

अंगपविट्ट सुत्ताणि

भाग १

प्रकाशकः श्रीमान् श्रीमान् श्रीमान्

अ. भा. सा. जैन सं. र. संघ साहित्य रत्नमाला का ६४ वाँ रत्न

अंगपविट्ट सुत्ताणि

एककारसंगसंजुओ

सम्पादक—

रतनलाल डोशी
पारसमल चण्डालिया

प्रकाशक—

आखिल भारतीय साधुमार्गी
जैन संस्कृति-रक्षक संघ
सैलाना [म. प्र.]

द्रव्य-सहायक

श्रीमान् जसवंतलाल भाई शाह बंबई

प्राप्ति स्थान -

अखिल भारतीय साधुमार्गी जैन संस्कृति-रक्षक संघ
सैलाना (म. प्र.)
शाखा-१ " एदुन बिर्लिङग धोबी तलाव लेन
बम्बई-४००००२
२ " " सराफा बाजार, जोधपुर (राज.)

मूल्य ६०-००

प्रथमावृत्ति
१०००

विक्रम संवत् २०३८
वीर संवत् २५०८
दिनांक ५-१-८२

मुद्रक-श्री जैन प्रिंटिंग प्रेस, सैलाना (म. प्र.)

निवेदन

‘अंगपक्विसुत्तणि’ धर्मप्रिय स्वाध्यायशील पाठकों के करकमलों में पहुँचाते हमें हर्ष हो रहा है। इसका प्रथम विभाग जुलाई १९७९ में प्रकाशित हुआ था, दूसरा अगस्त १९८० में और तीसरा दिसम्बर १९८१ में प्रकाशित हुआ। इन तीनों विभागों की हजार-हजार प्रतियाँ प्रकाशित हुईं और १००० प्रतियों का यह संयुक्त ग्रंथ प्रकाशित हो रहा है।

कार्य की रूप रेखा बनाते समय, समय का जो अनुमान लगाया गया था, वह हम साध नहीं सके। अनेक प्रकार की बाधाएँ आईं, साधन-सामग्री प्राप्त करना इस युग में कितना कठिन है? फिर प्रेस मशीनरी बिजली के आधीन होने से देश के सभी प्रेस कठिनाई में पड़ गए। काम करते-करते बिजली रूठ कर चली जाती है और यन्त्र स्थिर हो जाते हैं। किसी प्रकार जिनागमों के ११ सूत्रों का अंग विभाग पूरा कर के प्रकाशित किया जा रहा है।

अब जनवरी १९८२ में ही शेष सूत्रों का मुद्रण प्रारंभ किया जा रहा है। हमारा प्रयत्न तो सदैव की भाँति शीघ्र प्रकाशन का रहेगा।

एकादशांग के अपने अध्ययन पर से एक विस्तृत प्रस्तावना लिखने का विचार हुआ था, परंतु समय न मिलने और शारीरिक प्रतिकूलता के कारण

वैसा नहीं हो सका । यदि अनुकूलता रही, तो सम्यग्दर्शन में लेखमाला चालू करने की भावना रखता हूँ ।

मैं विद्वान नहीं हूँ । विद्वानों की अनुसंधान पूर्ण प्रस्तावना जैसी तो मैं नहीं लिख सकता, अन्य साहित्य के साथ तुलनात्मक अध्ययन पूर्वक प्रस्तुत नहीं कर सकता, परंतु अपने आगमों, उसके विधि-विधानों की विशेषता आदि तथा परिचयात्मक अध्ययन प्रस्तुत कर सकता हूँ ।

मुझ पर कार्य भार कुछ विशेष ही रहा और साहित्य सामग्री भी कम ही उपलब्ध हुई, अपनी अल्प पढ़ाई भी बाधक रही । इन कारणों से मैं उतना नहीं कर सकता, जितना करना चाहता हूँ । इस समय जो कुछ किया जा सका, वह प्रस्तुत है । इस प्रकार यह प्रकाशन सामान्य स्वाध्यायियों के लिये विशेष उपयोगी होगा ।

जिन धर्मोपासक संघ-संरक्षक दानवीर महानुभावों की उदारतापूर्ण सहायता-सहयोग से ही यह आगमसेवा बन सकी है । उन सभी महानुभावों का मैं हृदय से आभारी हूँ ।

दिनांक ५-१-१९८२
सैलाना

—रतनलाल डोशी



अस्वाध्याय

निम्नलिखित चौत्तीस कारण टाल कर स्वाध्याय करना चाहिये ।

आकाश सम्बन्धी १० अस्वाध्याय-कालमर्यादा

१ बड़ा तारा टूटे तो	एक प्रहर
२ दिशा-दाह+	जब तक रहे
३ अकाल में मेघगर्जना हो तो	दो प्रहर
४ " बिजली चमके तो	एक प्रहर
५ " बिजली कड़के तो	दो प्रहर
६ शुक्ल पक्ष की १-२-३ की रात	प्रहर रात्रि तक
७ आकाश में यक्ष का चिन्ह हो	जब तक दिखाई दे
८-९ काली और सफेद धूँअर	जब तक रहे
१० आकाश मण्डल धूलि से आच्छादित हो	"

+ आकाश में किसी दिशा में नगर जलने या अग्नि की लपटें उठने जैसा दिखाई दे, और प्रकाश हो तथा नीचे अन्धकार हो, वह दिशा-दाह है ।

औदारिक सम्बन्धी १० अस्वाध्याय

- ११-१३ हड्डी, रक्त और मांस, ये तिर्यच के ६० हाथ के भीतर हो । मनुष्य के हो तो १०० हाथ के भीतर हो । मनुष्य की हड्डी यदि जली या धुली न हो तो १२ वर्ष तक ।
- १४ अशुचि की दुर्गन्ध आवे या दिखाई दे तब तक
- १५ श्मशान भूमि- सौ हाथ से कम दूर हो तो ।
- १६ चन्द्रग्रहण-खंड ग्रहण में ८ प्रहर, पूर्ण हो तो १२ प्रहर ।
- १७ सूर्य ग्रहण " १२ " १६ "
- १८ राजा का अवसान होने पर, जब तक नया राजा घोषित न हो ।
- १९ युद्ध स्थान के निकट- जब तब युद्ध चले ।
- २० उपाश्रय में पंचेन्द्रिय का शव पड़ा हो, जब तक पड़ा रहे ।
- २१-२५ आषाढ़, भाद्रपद, आश्विन, कार्तिक और चैत्र की पूर्णिमा दिन रात ।
- २६-३० इन पूर्णिमा के बाद की प्रतिपदा "
- ३१-३४ प्रातः, मध्याह्न, संध्या और अर्द्ध रात्रि १-१ मुहुंत ।
- उपरोक्त अस्वाध्याय को टोल कर स्वाध्याय करना चाहिए । खुले मुंह नहीं बोलना तथा दीपक के उजाले में नहीं शंखना चाहिए ।

नोट—मेघ गर्जनादि में अकाल, अर्द्रा नक्षत्र से पूर्व और स्वाति के बाद का माना गया है ।

शुद्धि-पत्र

पृ.	पंक्ति	अशुद्ध	शुद्ध
२	३	विरुवरुवेहिं	विरुवरुहिं सत्येहिं
५	१८	चयावचइयं	चओवचइयं
११	१६	विइत्ता	संधिं विदित्ता
१२	३१	छणं	छणं छणं
१७	६	संवेहाए	संपेहाए
१९	२६	बेइया	बुइया
१९	२६	उण्णयमाणे	उण्णयमाणे
२०	५	आट्टीयं	आउट्टिकयं
२०	११	पव्वं	पुव्वं
२१	४	चेहपडिबुद्धजीवी	चेयपडिबुद्धजीवी
२१	२२	ण ल्खणे	०
२३	३	एवं	एवं से
२३	१९	सइं	सइं
२४	३	अणुद्दाणो	अणुद्दाणे
२४	१७	णायबाले	णाम बाले
२४	२१	वरस	पस्स
२५	१२	संगइं	संगं ति
३४	८	विहरित्थ	०
३८	११	पट्टणंसि	पट्टणंसि
३८	१६	दिज्जाणं	दिज्जमाणं
३९	१२	तत्थे० सामुदाणियं	तत्थे० कुलेहिं सामु०
३९	१३	पडिवायं	०
४१	१४	सक्कुलिं वा, पूयं वा	सक्कुलिं वा, फाणियं वा, पूयं वा
४२	५	अणंयर	अणंतर
४३	२	यं	य

पृ.	पं.	अशुद्ध	शुद्ध
४८	५	अफासु	अफासुयं
४८	७	पिल्लक्खुमंथुं	पिल्लंक्खुमंथुं
५२	३	तहप्पगारं	तहप्पगारं पडिमाहगं
५२	१३	वसमाणे	वसमाणे वा
५२	१८	तहेव तं	(तहेव तं)
५२	१८	जहेव तं	(जहेव तं)
५७	१६	जं पच्छाकम्मं तं	तं पच्छाकम्मं जं
५८	६	उवरए	उवचरण
६०	२२	परिभुत्तव्वा	परिभुत्तपुव्वा
६४	२४	अच्छे	उच्छे
६६	७	सिवा	सिया
६८	३	छायए	घायाए
७४	१६	तेमयावि	ते यावि
८२	८	महद्धणवंधण्णं	महद्धणवंधण्णं
८३	२१	अवहट्ठु	अवहट्ठु
८४	१६	अणुण्णविय	अणुण्णविय
८४	२०	वासामो	वसामो जाव
९१	१९	जुण्णरावणंसि	०
९६	२	गंडं वा	गंडं वा जाव
१०८	१७	रसमस्साउं	रसमणासाउं
१०८	२०-२१	णो रज्जेजा णो सज्जेजा	णो सज्जेजा णो रज्जेजा
११०	१८	करायं	कारयं
१३८	२३	पव्वईए	ते पव्वईए
१४०	२३	पुच्छए	तुच्छए
१४६	१३	णियहसत्तू	णिहयसत्तू
१५४	१०	वण्णेहिं	अण्णेहिं

पृ.	पं.	अशुद्ध	शुद्ध
१५५	अंतिम	विंयति	वेयंति
१५६	९	दण्डमादाणे अणष्टदंडवतिए	दण्डसमादाणे अणष्टादंड- वतिए
१५६	२०	मेत्ता	मेत्ता
१५९	८	अण्णे णिहरावेइ	अण्णेण णिहरावेइ
१६०	७	पढमसए	पढमसमए
२५३	२५	सुसमसुसमाए	सुसमसुसमाए
२५८	६	रयणाभाया	रयणाभया
२५८	१३	गोथूमा	गोथूमा
२८८	१३	खित्तइत्तं	खित्तइत्तं दित्तइत्तं
३०९	१९	चरित्तविणए	चरित्तविणए
३४५	३	ण	णं
३४७	अंतिम	णेइयाणं	०
३५८	२६	वलयमरणे	वलयमरणे
४३०	१	तिण्णि	पच्छिमा तिण्णि
४८६	७	संहेपेत्ता	संहेत्ता
४८८	२२	मुम्मुरब्भया	मुम्मुरूभूया
४८८	२३ब्भयंभूयं
४८८	२५ब्भयं	...भूयं
५३२	१६	गोयमा !	पुच्छा । गोयमा !
५३७	८	सवसा	तवसा
५३९	२०	जाव	जाव ओसप्पिणीइ वा
६५०	१६	हवा	अहवा
६५५	२३	एएणं	एएणं कमेणं
७१५	१०	महासुविणा....	महासुविणा नावत्तरि संब- सुविणा

पृ.	पं.	अशुद्ध	शुद्ध
७१५	११	वा	वा चक्वट्टि मायरो वा
७२६	१७	समवाणोसया	समणोवासया
७४२	४	वेमासाणियावासा	वेमाणियावासा
७७७	२२	अम्म.....	कम्म....
७९७	१६	तंदु.....	तंतु.....
८४८	१०	पाचलेइ०	पचालेइ०
८५०	२५	सलेसस्सस सरीरस्स	सलेसस्स ससरीरस्स
८५५	१७-१८	समंसरीरा	०
८५८	१०	असण्णी	णो असण्णी
८७९	२१	सेरीरं	सरीरं
११२०	१५	आयरियवउज्झा...	आयरियउवज्झा...
११२१	२	णट्टुल्लं	णट्टुल्लं
११२३	१६	परलो	परलोए
११२५	२३	च	च से
११३९	१२	वट्टाए	वट्टावए
११५३	२	विगयमुग्गभुमय	विगयमुग्गभग्गभुमय
११८१	२	णावसक्खयि	णावयक्खसि
११९३	१३	सोहेमाणो य	पेच्छमाणो य सोहेमाणो य
		सालोमाणी य	
११९५	२५	पुव्वजाइं	पुव्वजाइं
११९९	४	आग्गहोमं करेइ २ त्ता	अग्गिहोमं करेइ २ त्ता
			पाणिग्गहणं करेइ २ त्ता
१२१२	२७	गेहइ	गहेइ
१२१६	७भावा.....	...भावा जाव...
१२१८	४	मुहुत्तमित्त	मुहुत्तमित्तं
१२२८	४	ण्हाया	मज्जणघरं अणुपविसई २ त्ता ण्हाए

पृ.	पं.	अशुद्ध	शुद्ध
१२२८	२२	लावण	...गुणलावण...
१२३१	२७	एवं	एवं खलु
१२४१	१५	पंचवा	पंच पंडवा
१२४२	२८	अदिट्ठसेवगा	अदिट्ठसेवगा
१२४३	१६-१८	पव्वयाओ	पव्वयामो
१२६९	२१	पढमस्सघम्मकहाणं	धम्मकहाणं पढमस्स
१२६९	२४	अज्झयणा	अज्झयणा पणत्ता
१२७५	२१	मतेसु	मंतेसु य
१२९७	९	चुल्लसयगस्स	चुल्लसयगस्स समणोवासयस्स
१३०६	अंतिम	पण्णवाणहि	पण्णवणाहि
१३०७	२६	णीणेणा	णीणेत्ता
१३१९	१८	दोच्चं	दोच्चे
१३४२	२३	जत्थि	अत्थि
१३५०	१६	आइल्लानं	आइल्लानं
१३५२	१३	भगवं	समणं भगवं
१३६०	५	णंते !	णं भंते !
१३७२	५	...चंमुयंतघणडवेग....	मुयंतघणचंडवेग....
१३७५	१३	वज्जयाभीया	वज्जपाणभीया
१३८०	१४रुप्पुरचंच.....	रुप्पुरचंच....
१३९१	४	अयमिणं..	वयमिणं
१३९२	१३	पीलाकरं	पीलाकरं सावज्जं
१३९६	१२	सव्वं	भव्वं
१४२५	२५	..याइं...	याइं मयकिच्चाइं
१४५७	१	पुव्वपुच्छा	पुव्वभवपुच्छा

नोटः—पृ. ५४ पंक्ति १६ सूत्रांक ६५४ के बाद कुछ प्रतियों में निम्न पाठ भी मिलता है—“से भिक्खू वा० से जं पुण उ० बहवे समणवणीमाए पगाणिय २ समुद्दिस्स तं चेव भाणियव्वं ।.....”



अंग-पविट्ट सुत्ताणि

आयारो

पढमं अज्झयणं

सुयं मे आउसं ! तेणं भगवया एवमक्खायं ॥ १ ॥ इह-मेगेसिं णो सण्णा भवइ, तंजहा पुरत्थिमाओ वा दिसाओ आगओ अहमंसि ? दाहिणाओ वा दिसाओ आगओ अहमंसि, पच्चत्थिमाओ वा दिसाओ आगओ अहमंसि, उत्तराओ वा दिसाओ आगओ अहमंसि, उट्ठाओ वा दिसाओ आगओ अहमंसि ? अहो दिसाओ वा आगओ अहमंसि ? अण्णयरीओ वा दिसाओ अणुदिसाओ वा आगओ अहमंसि ? एवमेगेसिं णो णायं भवइ. अत्थि मे आया उववाइए, गत्थि मे आया उववाइए के अहं आसि ? के वा इओ खुओ इह पेच्चा भविस्सामि ॥ २ ॥ से जं पुण जाणेज्जा सहसंमइयाए परवागारेणं, अण्णेसिं वा अंतिए सोच्चा. तंजहा—पुरत्थिमाओ वा दिसाओ आगओ अहमंसि. जाव अण्णयरीओ वा दिसाओ अणुदिसाओ वा आगओ अहमंसि, एवमेगेसिं जं णायं भवइ. अत्थि मे आया उववाइए, जो इमाओ-दिसाओ अणुदिसाओ वा अणुसंचरइ, सव्वाओ दिसाओ सव्वाओ अणुदिसाओ जो आगओ अणुसंचरइ तोहं । से आयावाई, लैयावाई, कम्मावाई, किरियावाई ॥ ३ ॥ अकरिस्सं चइहं कारवेसुं चइहं करओ यावि सम्णुण्णे भविस्सामि; एयावंति सव्वावंति लोगंसि कम्मसमारंभा परिजाणियव्वा भवंति ॥ ४ ॥ अपरिण्णायकम्मे खलु अर्यं पुरिसे, जो इमाओ दिसाओ वा अणुदिसाओ वा अणुसंचरइ, सव्वाओ दिसाओ सव्वाओ अणुदिसाओ सहइ, अणेगरूवाओ जोणिओ संवेइ, विरूवरूवे फासे पडि-संवेदेइ ॥ ५ ॥ तत्थ खलु भगवया परिण्णा पवेइया ॥ ६ ॥ इमस्स चेव जीवियस्स परिवंदणमाण्णपूयणाए, जाईमरणमोयणाए, दुक्खपडिघायहेउं ॥ ७ ॥ एयावंति सव्वावंति लोगंसि कम्मसमारंभा परिजाणियव्वा भवंति ॥ ८ ॥ जस्सेते लोगंसि कम्मसमारंभा परिण्णायया भवंति से हु मुणी परिण्णायकम्मे-त्ति वेमि ॥ ९ ॥ पढमं अज्झयणं पढमो उहेसो ॥

अद्वे लोए परिजुण्णे दुस्संभोहे अविजाणए अरिंस लोए पव्वहिए तत्थ तत्थ पुढे पास, आतुरा परितावेत्ति ॥ १० ॥ संति पाणा पुढोसिया, लज्जमाणा पुढो पास ॥ ११ ॥ अणगारा मोत्ति एगे पवयमाणा; जमिणं विरूवरूवेहिं पुढविकम्म-समारंभेणं पुढविसत्थं समारंभमाणे अन्ने अणेगरूवे पाणे विहिंसइ ॥ १२ ॥ तत्थ खलु भगवया परिण्णा पवेइया । इमस्स चैव जीवियस्स, परिवंदण-माणण-पूयणाए, जाइमरणमोयणाए, दुक्खपडिघायहेउं, से सयमेव पुढविसत्थं समारंभइ, अण्णेहिं वा पुढविसत्थं समारंभावेइ । अण्णेवा पुढविसत्थं समारंभंते समणुजाणइ । तं से अहियाए, तं से अयोहिए ॥ १३ ॥, से तं संबुज्जमाणे आयाणीयं समुद्वाय सोच्चा खलु भगवओ, अणगाराणं वा अंतिए; इहमेगेसिं णायं भवइ-एस खलु गेथे, एस खलु मोहे, एस खलु मारे, एस खलु णए । इच्चत्थं गट्टिए लोए जमिणं विरूवरूवेहिं सत्थेहिं पुढविकम्मसमारंभेण पुढविसत्थं समारंभमाणे अण्णे अणेगरूवे पाणे विहिंसइ ॥ १४ ॥ से वेमि-अप्पेगे अंधमब्भे, अप्पेगे अंधमच्छे; अप्पेगे पायमब्भे, अप्पेगे पायमच्छे, अप्पेगे गुप्फमब्भे, अप्पेगे गुप्फमच्छे, अप्पेगे जंघमब्भे, अप्पेगे जंघमच्छे, अप्पेगे जाणुमब्भे, अप्पेगे जाणुमच्छे, अप्पेगे उरुमब्भे, अप्पेगे उरुमच्छे, अप्पेगे कडिमब्भे, अप्पेगे कडिमच्छे, अप्पेगे णामिमब्भे, अप्पेगे णामिमच्छे, अप्पेगे उयरमब्भे, अप्पेगे उयरमच्छे, अप्पेगे पासमब्भे, अप्पेगे पासमच्छे, अप्पेगे पिट्टमब्भे, अप्पेगे पिट्टमच्छे, अप्पेगे उरमब्भे, अप्पेगे उरमच्छे, अप्पेगे हिययमब्भे, अप्पेगे हिययमच्छे, अप्पेगे थणमब्भे, अप्पेगे थणमच्छे, अप्पेगे खंधमब्भे, अप्पेगे खंधमच्छे, अप्पेगे बाहुमब्भे, अप्पेगे बाहुमच्छे, अप्पेगे हत्थमब्भे, अप्पेगे हत्थमच्छे, अप्पेगे अंगुलिमब्भे, अप्पेगे अंगुलिमच्छे, अप्पेगे गहमब्भे, अप्पेगे गहमच्छे, अप्पेगे गीवमब्भे, अप्पेगे गीवमच्छे, अप्पेगे हणुमब्भे, अप्पेगे हणुमच्छे, अप्पेगे होट्टमब्भे, अप्पेगे होट्टमच्छे, अप्पेगे दंतमब्भे, अप्पेगे दंतमच्छे, अप्पेगे जिब्भमब्भे, अप्पेगे जिब्भमच्छे, अप्पेगे तालुमब्भे, अप्पेगे तालुमच्छे, अप्पेगे गलमब्भे, अप्पेगे गलमच्छे, अप्पेगे गंडमब्भे, अप्पेगे गंडमच्छे, अप्पेगे कण्णमब्भे, अप्पेगे कण्णमच्छे, अप्पेगे णासमब्भे, अप्पेगे णासमच्छे, अप्पेगे अच्चिमब्भे, अप्पेगे अच्चिमच्छे, अप्पेगे भमुहमब्भे, अप्पेगे भमुहमच्छे, अप्पेगे णिडालमब्भे, अप्पेगे णिडालमच्छे, अप्पेगे सीसमब्भे, अप्पेगे सीसमच्छे,

अप्पेगे संपमारए, अप्पेगे उद्वए ॥ १५ ॥ इत्थं सत्थं समारंभमाणस्स इच्चेए आरंभा अपरिण्णाया भवंति । एत्थं सत्थं असमारंभमाणस्स इच्चेए आरंभा परिण्णाया भवंति ॥ १६ ॥ तं परिण्णाय मेहावी गेव सयं पुढवि सत्थं समारंभेज्जा, गेवण्णेहिं पुढविसत्थं समारंभावेज्जा, गेवण्णे पुढविसत्थं समारंभंते समणुज्जाणेज्जा । अस्स एए पुढविकम्मसमारंभा परिण्णाया भवंति से हु मुणी परिण्णायकम्मे त्ति वेमि ॥ १७ ॥ **पढमं अज्जयणं बीयो उद्वेसो ।**

से वेमि, से जहावि अणगारे उज्जुकडे, गियायपडिवण्णे अमायं कुश्वमाणे वियाहिए, जाए सद्दाए णिकत्तंती, तमेवअणुपालिया वियहित्त्तु विसोत्तियं-॥१८॥ पणया वीरा महावीहिं, लोणं च आणाए अभिसमेच्चा अकुओभयं ॥ १९ ॥ से वेमि-गेव सयं लोणं अब्भाइक्खिज्जा, गेव अत्ताणं अब्भाइक्खिज्जा । जे लोयं अब्भाइक्खइ, से अत्ताणं अब्भाइक्खइ, जे अत्ताणं अब्भाइक्खइ, से लोयं अब्भाइक्खइ ॥२०॥ लज्जमाणा पुढो, पास अणगारा मो त्ति एगे पवयमाणा; जमिणं विरुवरूवेहिं सत्थेहिं उदयकम्मसमारंभेणं उदयसत्थं समारंभमाणे अण्णे अणेगरूवे पाणे विहिंसइ ॥२१॥ तत्थं खलु भगवया परिण्णा पवेइया, इमस्स चेव जीवियस्स परिवंदण-माणण-पूयणाए जाइमरणभोयणाए, दुक्खपडिघायहेउं, से सयमेव उदयसत्थं समारंभइ, अण्णेहिं वा उदयसत्थं समारंभावेइ, अन्ने उदयसत्थं समारंभंते समणुज्जाणइ तं से अहियाए तं से अबोहीए ॥२२॥ से तं संबुज्जमाणे आयाणीयं समुद्दया सोच्चा खलु भगवओ अणगाराणं वा अंतिए इहमेगेसिं णायं भवइ, एस खलु गंथे, एस खलु मोहे, एस खलु मारे, एस खलु णए । इच्चत्थं गट्टिए कोए जमिणं विरुवरूवेहिं सत्थेहिं उदयकम्मसमारंभेणं उदयसत्थं समारंभमाणे अण्णे अणेगरूवे पाणे विहिंसइ ॥२३॥ से वेमि-संति पाणा उदयनिस्सिया जीवा अण्णेगे, इह च खलु भो ! अणगाराणं उदयजीवा वियाहिया । सत्थं चेत्यं अणुवीइ पासा । पुढो सत्थं पवेइयं ॥२४॥ अनुवा अदिण्णादाणं ॥२५॥ कप्पइ जे कप्पइ णे पाउं, अदुवा विभूसाए, पुढो सत्थेहिं विउट्टंति एत्थं ऽवि तेसिं णो णिकरणाए ॥२६॥ एत्थं सत्थं समारंभमाणस्स इच्चेते आरंभा परिण्णाया भवंति । एत्थं सत्थं असमारंभमाणस्स इच्चेते आरंभा परिण्णाया भवंति । तं परिण्णाय मेहावी गेव सयं उदयसत्थं समारंभेज्जा, गेवण्णेहिं उदयसत्थं समारंभावेज्जा उदय-

सत्थं समारंभंतेऽवि अण्णे ण समणुजाणेज्जा, जस्सेते उदयसत्थसमारंभा परिण्णाया भवंति से हु मुणी परिण्णायकम्मं ति बेमि ॥२७॥ **पढमं अज्जययणं तइओहेसो ।**

से बेमि-णेव सयं लोयं अब्भाइक्खेज्जा, णेव अत्ताणं अब्भाइक्खेज्जा, जे लोम अब्भाइक्खइ, से अत्ताणं अब्भाइक्खइ, जे अत्ताणं अब्भाइक्खइ, से लोम अब्भाइक्खइ ॥२८॥ जे दीहलोगसत्थस्स खेयण्णे, से असत्थस्स खेयण्णे; जे असत्थस्स खेयण्णे, से दीहलोगसत्थस्स खेयण्णे ॥२९॥ वीरेहिं एयं अभिभूय दिट्ठं, संजएहिं सया जत्तेहिं सया अप्पमत्तेहिं ॥६०॥ जे पमत्ते गुणट्ठिए से हु दंडे ति पवुच्चइ । तं परिण्णाय मेहावी इयाणि णो जमहं पुव्वमकासी पमाएणं ॥३१॥ लज्जमाणा पुढो पास-अणगारा मोत्ति एगे पवयमाणा जमिणं विरूवरूवेहिं सत्थेहिं अगणिकम्मसमारंभेणं अगणिसत्थं समारंभमाणे, अण्णे अणेगरूवे पाणे विहिंसइ ॥३२॥ तत्थ खलु भगवया परिण्णा पवेइया, इमस्स चेव जीवियस्स परिवंदण-माण्णायणाए, जाइमरणमोयणाए, दुक्खपडिघायहेउं से सयमेव अगणिसत्थं समारंभइ, अण्णेहिं वा अगणिसत्थं समारंभावेइ अण्णेवा अगणिसत्थं समारंभमाणे समणुजाणइ । तं से अहियाए तं से अचोहिए ॥३३॥ से तं संबुज्जमाणे आयाणीयं समुट्ठाय सोच्चा, खलु भंगवओ अणगाराणं वा अंतिए इहमेगेसिं णायं भवइ-एस खलु गंये, एस खलु मोहे, एस खलु मारे, एस खलु णए । इच्चत्थं गट्ठिए लोए जमिणं विरूवरूवेहिं सत्थेहिं अगणिकम्मसमारंभेणं अगणिसत्थं समारंभमाणे अण्णे अणेगरूवे पाणे विहिंसइ ॥३४॥ से बेमि, संति पाणा, पुढविणिस्सिया, तण्णिरित्थया, पत्तणिस्सिया, कट्ठणिस्सिया, गोमयणिस्सिया; कथवरणिस्सिया; सन्ति संपाइमा पाणा, आहच्च संपयंति । अगणिं च खलु पुट्ठा, एगे संधायमावज्जंति, जे तत्थ संधायमावज्जंति ते तत्थ परियावज्जंति, जे तत्थ परियावज्जंति ते तत्थ उट्ठायंति ॥३५॥ एत्थ सत्थं समारंभमाणस्स इच्चेए आरंभा अपरिण्णाया भवंति एत्थ सत्थं असमारंभमाणस्स इच्चेए आरंभा परिण्णाया भवंति ॥३६॥ तं परिण्णाय मेहावी णेव सयं अगणिसत्थं समारंभेज्जा, णेवण्णेहिं अगणिसत्थं समारंभावेज्जा, अगणिसत्थं समारंभमाणे अण्णे न समणुजाणेज्जा । जस्सेते अगणिकम्मसमारंभा परिण्णाया भवंति, से हु मुणी परिण्णायकम्मं ति बेमि ॥३७॥ **चउत्थोहेसो ।**

तं णो करिस्सामि समुट्ठाए मत्ता मइमं, अभयं विइत्ता, तं-जे णो करए, एसो-

वरए, एत्थोवरए, एस अणगारे त्ति पबुच्चइ ॥३८॥ जे गुणे से आवट्टे जे आवट्टे से गुणे ॥ ३९ ॥ उट्ठं-अहं-तिरियं-पाईणं पासमाणे रूवाइं पासइ, सुणमाणे सदाइं-सुणइ, उट्ठं-अहं-तिरियं पाईणं मुच्छमाणे रूवेसु मुच्छति, सहेसु यावि एस लोणे वियाहिए । एत्थ अगुत्ते अणणाए पुणो पुणो गुणासाए वंकसमायारै पमत्तेऽभार-मावसे ॥ ४० ॥ लज्जमाणा पुट्ठो पास, अणगारा मोत्ति एणे पवयमाणा; जमिणं विरूवरूवेहिं सत्येहिं वणस्सइकम्मसमारंभेणं वणस्सइसत्थं समारभमाणे अण्णे अणेगरूवे पाणे विहिंसइ ॥ ४१ ॥ तत्थ खलु भगवया परिण्णा पवेइया । इमस्स चेव जीवियस्स परिवंण, माणण, पूयणाए, जाइमरण मोयणाए दुक्खपडिघायहेउं से सयमेव वणस्सइसत्थं समारंभइ, अण्णेहिं वा वणस्सइसत्थं समारंभावेइ, अण्णे वा वणस्सइसत्थं समारंभमाणे समणुजाणइ, तं से अहियाए, तं से अबोहिए ॥ ४२ ॥ से तं संबुज्जमाणे आयाणीयं समुट्ठाए सोच्चां भगवओ, अणगाराणं वा अंतिए इह मेगेसिं णायं भवइ-एस खलु गंथे, एस खलु मोहे, एस खलु मारे, एस खलु णए । इच्चत्थं गट्टिए लोए; जमिणं विरूवरूवेहिं सत्येहिं वणस्सइकम्मसमारंभेणं वणस्सइसत्थं समारंभमाणे अण्णे अणेगरूवे पाणे विहिंसइ ॥ ४३ ॥ से बेमि-इमंपि जाइधम्मयं, एयंपि जाइधम्मयं, इमंपि बुद्धिधम्मयं एयंपि बुद्धिधम्मयं; इमंपि चित्तमंतयं एयंपि चित्तमंतयं; इमंपि छिण्णं मिलाति, एयंपि छिण्णं मिलाति; इमंपि आहारगं, एयंपि आहारगं; इमंपि अणिच्चयं, एयंपि अणिच्चयं; इमंपि असासयं, एयंपि असासयं; इमंपि चयावचइयं, एयंपि चयावचइयं; इमंपि विपरिणामधम्मयं, एयंपि विपरिणामधम्मयं ॥४४॥ एत्थ सत्थं समारंभमाणस्स इच्चेए आरंभा अपरिण्णाया भवंति । एत्थ सत्थं असमारंभमाणस्स इच्चेए आरंभा परिण्णाया भवंति । तं परिण्णाय मेहावी णेव सयं वणस्सइसत्थं समारंभेजा, णेवण्णेहिं वणस्सइसत्थं समारंभावेजा, णेवण्णे वणस्सइसत्थं समारंभेते समणुजाणेजा, जस्सेते वणस्सइसत्थ-समारंभा परिण्णाया भवंति, से हु मुणी परिण्णायकम्मे त्ति बेमि ॥४५॥

पढमं अज्जयणं पंचमोहेत्ती ॥

से बेमि, संतिमे तसा पाण्ण, तंजहा-अंडया, पोयया, जरालया, रसया, संसेयया, संमुच्छिमा, उच्चिभयया, उववाइया, एस संसारेत्ति पबुच्चइ, मंदस्सावियाणओ ॥४६॥ णिज्जाइत्ता पडिलेहित्ता पत्तेयं परिणिच्चाणं, सव्वेसिं पाणाणं सव्वेसिं भूयाणं,

सञ्चेसि जीवाणं, सञ्चेसि सत्ताणं, असायं अपरिणिब्बाणं, महत्तमं दुक्खं त्ति वेमि ॥४७॥ तसंति पाणा पदिसोदिसासुय । तत्थ-तत्थ पुटो पास, आउरा परिसावेत्ति संति पाणा पुटोसिया ॥४८॥ लब्बमाणा पुटो पास अणगारा मोत्ति एगे पवयमाणा ज्जमिणं विरूवरूवेहिं सत्थेहिं तसकायसमारंभेणं तसकायसत्थं समारंभमाणे अण्णे अणेगरूवे पाणे विहिंसइ ॥४९॥ तत्थ खलु भगवया परिण्णा पवेइया । इमस्स चेष जीवियस्स परिवदण-माणण-पूयणाए, जाइमरणमोयणाए, दुक्खपडिघायहेउं, सं सयमेव तसकायसत्थं समारंभइ, अण्णेहिं वा तसकायसत्थं समारंभावेइ, अण्णे वा तसकायसत्थं समारंभमाणे समणुजाणइ; तं से अहियाए, तं से अबोहीए ॥५०॥ से तं संदुज्जामाणे आयाणीयं समुट्ठाय सोच्चा भगवओ, अणगाराणं वा अंतिए इहमेगेसि णायं भवइ-एस खलु गंथे, एस खलु मोहे; एस खलु मारे, एस खलु णए । इच्चत्थं गट्टिए लोए; जमिणं विरूवरूवेहिं सत्थेहिं तसकायसमारंभेणं तसकायसत्थं समारंभमाणे अण्णे अणेगरूवे पाणे विहिंसइ ॥५१॥ से वेमि-अप्पेगे अच्चाए वंहंति, अप्पेगे अज्जिणाए वंहंति अप्पेगे मंसाए वंहंति, अप्पेगे सोणियाए वंहंति, एवं हिययाए, पित्ताए वसाए-पिच्छाए-पुच्छाए-बालाए-सिंसाए-विसाणाए-दंताए-दाढाए-णहाए-ण्हारुणीए-अट्ठीए-अट्ठीमिंजाए-अट्ठाए-अणट्ठाए-अप्पेगे हिंसिसु मेत्ति वा वंहंति, अप्पेगे हिंसंति मेत्ति वा वंहंति, अप्पेगे हिंसिसंति मेत्ति वा वंहंति ॥५२॥ एत्थ सत्थं समारंभमाणस्स इच्चेइ आरंभा अपरिण्णाया भवंति एत्थ सत्थं असमारंभमाणस्स इच्चेइ आरंभा परिण्णाया भवंति ॥५३॥ तं परिण्णाय मेहावी णेवसत्थं तसकायसत्थं समारंभेज्जा, णेवण्णेहिं तसकायसत्थं समारंभावेज्जा, णेवण्णे तसकायसत्थं समारंभंते समणुजाणेज्जा, जस्सेए तसकायसत्थसमारंभा परिण्णाया भवंति, सेहु मुणी परिण्णायकम्मं त्ति वेमि ॥५४॥ इइ छठ्ठोहेसो ।

पहू एजस्स दुगंछणाए, आर्यकदंसी अहियंति णच्चा । जे अज्जत्थं जाणइ, से वहिया जाणइ, जे वहिया जाणइ, से अज्जत्थं जाणइ । एयं तुलमण्णेसिं । इह संतिगया दविया णावकंवेत्ति जीविउं ॥५५॥ लब्बमाणा पुटो पास, अणगारा मोत्ति एगे पवयमाणा; ज्जमिणं विरूवरूवेहिंसत्थेहिं, वाउकम्मसमारंभेणं वाउसत्थं समारंभमाणे अण्णे अणेगरूवे पाणे विहिंसइ ॥५६॥ तत्थ खलु भगवया परिण्णा पवेइया, इमस्स चेष जीवियस्स परिवदण-माणण-पूयणाए, जाइमरणमोयणाए दुक्खपडिघायहेउं, से

सयमेव वाउसत्थं समारंभइ, अण्णेहिं वा वाउसत्थं समारंभावेइ अण्णे वा वाउसत्थं
समारंभेते समणुज्जाणइ, तं से अहियाए तं से अबोहीए ॥ ५७ ॥ से तं संखुज्जमाणे
आयाणीयं समुट्ठाए सोच्चा भगवओ अणगाराणं वा अंतिए इहमेगेसिं णायं भवइ—
एस खलु गंथे, एस खलु मोहे, एस खलु मारे, एस खलु णरए । इच्चत्थं गट्टिए
लोए, जमिणं विरूवरूवेहिं सत्थेहिं वाउकम्मसमारंभेणं वाउसत्थं समारंभमाणे अण्णे
अणेगरूवे पाणे विहिंसइ ॥ ५८ ॥ से बेमि, सति संपाइमा पाणा, आहच्च संपयंति
य फरिसं च खलु पुट्ठा एगे संधायमावज्जंति । जे तत्थ संधायमावज्जंति, ते तत्थ
परियावज्जंति, जे तत्थ परियावज्जंति, ते तत्थ उदायंति ॥ ५९ ॥ एत्थ सत्थं समा-
रंभमाणस्स इच्चेए आरंभा अपरिण्णाया भवंति । एत्थ सत्थं असमारंभमाणस्स इच्चेए
आरंभा परिण्णाया भवंति ॥ ६० ॥ तं परिण्णाय मेहावी णेव सयं वाउसत्थं समा-
रंभेज्जा णेवण्णेहिं वाउसत्थं समारंभावेज्जा, णेवण्णे वाउसत्थं समारंभेते समणु-
ज्जाणेज्जा । जस्सेए वाउसत्थसमारंभा परिण्णाया भवंति से हु मुणी परिण्णायकम्मे
त्ति बेमि ॥ ६१ ॥ एत्थं पि जाण उवाईयमाणा जे आयारे ण रमंति, आरंभमाणा
विणयं वयंति, छंदोवणीया, अज्जोववणा, आरंभसत्ता पकरंति संगं ॥ ६२ ॥ से
वसुमं सत्त्वसमण्णागयपण्णाणेणं अप्पाणेणं अकरणिज्जं पावकम्मं णो अण्णेसिं ॥ ६३ ॥ तं
परिण्णाय मेहावी णेव सयं छज्जीवणिकायसत्थं समारंभेज्जा, णेवण्णेहिं छज्जीवणि-
कायसत्थं समारंभावेज्जा, णेवण्णे छज्जीवणिकायसत्थं समारंभेते समणुज्जाणेज्जा ।
जस्सेए छज्जीवणिकायसत्थसमारंभा परिण्णाया भवंति, से हु मुणी परिण्णायकम्मे
त्ति बेमि ॥ ६४ ॥ सत्तमोहेसो ॥ पढमं अज्जयणं समत्तं ॥

॥ लोगविजयो नामं वीयं अज्जयणं ॥

जे गुणे से मूलट्ठाणे, जे मूलट्ठाणे से गुणे, इइ से गुणट्ठी महया परियावेणं पुणो
पुणो वसे पमत्ते, तंजहा—माया मे, पिया मे, भाया मे, भइणी मे, भज्जा मे, पुत्ता
मे, धूया मे, सुण्हा मे, सहि-सयण-संगंथ-संथुया मे, विवित्तोवरण-परिवट्ठण-भोयण-
च्छायणं मे, इच्चत्थं गट्टिए लोए वसे पमत्ते ॥ ६५ ॥ अहो य राओ य परितप्पमाणे,
कालाकालसमुट्ठाई, संजोगट्ठी, अट्ठालोभी, आलुंप्पे, सहसाकारे, विणिविट्ठचित्ते एत्थ
सत्थे पुणो पुणो ॥ ६६ ॥ अप्पं च खलु आउर्यं इहमेगेसिं माणवणं; तंजहा—सो-
यपरिण्णाणेहिं परिहायमाणेहिं, चक्खुपरिण्णाणेहिं परिहायमाणेहिं, घाणपरिण्णाणेहिं

परिहायमाणेहिं, रसणापरिणाणेहिं परिहायमाणेहिं, फासपरिणाणेहिं परिहायमा-
णेहिं, अभिक्रंतं च खलु वयं संपेहाए तओ से एगया मूढभवं जणयइ ॥६७॥
जेहिं वा सद्धि संवसइ, तेविणं एगया गियगा पुंविं परिव्वयंति । सो वा ते गियगे
पच्छा परिव्वएजा, णालं ते तव ताणाए वा, सरणाए वा । तुमं पि तेसिं णालं
ताणाए वा, सरणाए वा । से ण हासाए, ण किड्ढाए, ण रइए, ण विभूसाए ॥६८॥
इच्चेवं समुट्टिए अहोविहाराए अंतरं च खलु इमं संपेहाए धीरो मुहुत्तमवि णो पमा-
यए । वओ अच्चेइ जोव्वणं व ॥६९॥ जीविए इह जे पमत्ता । से हंता, छेत्ता,
भेत्ता, लुंषित्ता, विलुंषित्ता, उद्वित्ता, उत्तासइत्ता, अकडं करिस्सामिति मण्ण-
माणे ॥७०॥ जेहिं वा सद्धि संवसइ ते वा णं एगया गियगा तं पुंविं पोसेंति,
सो वा ते गियगे पच्छा पोसिजा । णालं ते तव ताणाए वा, सरणाए वा । तुमं पि
तेसिं णालं ताणाए वा सरणाए वा ॥७१॥ उवाइयसेसेण वा संगिहिसंगिचओ कि-
ञ्चइ, इहमेगेसिं असंजयाणं भोयणए । तओ से एगया रोगसमुप्पया समुप्प-
जंति ॥७२॥ जेहिं वा सद्धि संवसइ ते वा णं एगया गियगा तं पुंविं परिहरंति,
सो वा ते गियगे पच्छा परिहरिजा । णालं ते तव ताणाए वा सरणाए वा तुमं पि
तेसिं णालं ताणाए वा सरणाए वा ॥७३॥ जाणित्तु दुक्खं पत्तेयं सायं, अणभि-
क्कंतं च खलु वयं संपेहाए खणं जाणाहि पंडिए ॥७४॥ जाव सोयपण्णाणा
अपरिहीणा, जेतपण्णाणा अपरिहीणा, घाणपण्णाणा अपरिहीणा, जीहपण्णाणा
अपरिहीणा, फरिसपण्णाणा अपरिहीणा, इच्चेएहिं विरूवरूवेहिं पण्णाणेहिं अपरि-
हायमाणेहिं आयट्ठं सम्मं समगुवासिज्जासि त्ति वेमि ॥७५॥ **पढमोद्धेसो समत्तो ॥**

अरइं आउट्टे से मेहावी; खणंसि मुक्के ॥ ७६ ॥ अणाणाए पुट्टा वि एगे गियट्ठंति
मंदा मोहेण पाउडा ॥ ७७ ॥ “अपरिग्गहा भविस्सामो” समुट्टाए लद्धे कामे
अभिगाहइ, अणाणाए मुण्णिणो, पडिलेहंति, एत्थं मोहे पुणो-पुणो सण्णा, णो हव्वाए
णो पाराए ॥ ७८ ॥ विमुत्ता हु ते जणा, जे जणा पारगामिणो लोभं अलोभेण
दुगंळमाणे लद्धे कामे णाभिगाहइ, विणावि लोभं णिक्खम्म एस अकम्मे जाणइ
पासइ । पडिलेहाए णावकंखइ, एस अणमारित्तिपबुच्चइ ॥ ७९ ॥ अहोयराओ
परितप्पमाणे कालाकालसमुट्टाई, संजोगट्ठी, अट्टालोमी, आलुंप्पे, सहसाकारे, विणि-
विट्ठचित्ते एत्थ, सत्थे पुणो-पुणो ॥ ८० ॥ से आयवले, से णाइवले, से सयणवले,

से मित्तबले, से पिबबले, से देवबले, से रायबले, से चोबले, से अतिहिवले, से
 किविणबले, से समणबले, इधेएहिं विरूवरूवेहिं कज्जेहिं दंडसमायाणं संपेहाए भया
 कज्जइ । पावमुक्कवुत्ति मण्णमाणे अट्टुवा आसंसाए ॥८१॥ तं परिण्णाय मेहावी,
 णेव सयं एएहिं कज्जेहिं दंडं समारंभिज्जा, णेवणं एएहिं कज्जेहिं दंडं समारंभा-
 विज्जा, एएहिं कज्जेहिं दंडं समारंभंतंवि अण्णं ण समणुजाणिज्जा ॥८२॥ एस मग्गे
 आयरिएहिं पवेइए, जहेत्थ कुसले णोवलिंप्पिज्जासि त्ति वेमि ॥८३॥ **बीअं**
अज्जयणं बीओहेसो समत्तो ॥

से असइ उच्चागोए, असइ णीयागोए । णो हीणे, णो अइरित्ते णोऽपीहए, इइ
 संखाए को गोयावाई ? को माणावाई ? कंसि वा एगे गिञ्जे ? ॥८४॥ तम्हा
 पंडिए णो हरिसे, णो कुप्पे, भूएहिं जाण पडिलेह सायं, समिए एयाणुपस्ती,
 तंजहा—अंधत्तं, बहिरत्तं, मूयत्तं, काणत्तं, कुंटत्तं, खुज्जत्तं, वडभत्तं, सामत्तं. सबलत्तं
 सहपमाएणं, अणेगरूवाओ जोगीओ, संधायइ, विरूवरूवे फासे पडिसंवेदेइ ॥८५॥
 से अट्टुज्जमाणे हओवईए जाइमरणमणुपरियट्टमाणे ॥८६॥ जीवियं पुढे पियं
 इहमेगेसिं माणवाणं खित्तवत्थुममायमाणं ॥८७॥ आरत्तं विरत्तं मणिकुंडलं, सह
 हिरण्णेण इत्थियाओ परिगिज्ज तत्थेव रत्ता ॥८८॥ “ण इत्थ तवो वा, दमो
 वा, गियमो वा, दिस्सइ,” संपुण्णं बाले जीविउकामे लालप्पमाणे मूढे विप्परियास-
 मुवेइ ॥८९॥ इणमेव णावकंखंति, जे जणा धुवचारिणो; जाइमरणं परिण्णाय,
 चरे संकमणे दढे ॥९०॥ णत्थि कालस्स णागमो ॥९१॥ सव्वे पाणा पियाउया,
 सुहसाया, दुक्खपडिकूला, अत्थियवंहा, पियजीविणो, जीविउकामा ॥९२॥
 सव्वेसिं जीवियं पियं ॥९३॥ तं परिगिज्ज दुपयं चउप्पयं अभिज्जुजिया णं, संसि-
 चियाणं, तिविहेण जा वि से तत्थ मत्ता भवइ—अप्पा वा बहुगा वा से तत्थ
 गट्टिए चिट्ठइ, भोयणाए ॥९४॥ तओ से एगया विविहं परिसिट्ठं संभूयं महोवगरणं
 भवइ । तंपि से एगया दायाया वा विभयंति, अदत्तहारो वा से अवहरइ, रायाणो
 वा से विलुंपंति, णस्सइ वा से, विणस्सइ वा से, अगारदाहेण वा से डज्जइ ॥९५॥
 इइ से पास्सअट्टाए कुराईं कम्माईं बाले पकुब्बमाणे तेण दुक्खेण संभूढे विप्परिया-
 समुवेइ ॥९६॥ सुणिणा हु एयं पवेइयं ॥९७॥ अणोहंतरा एए. णोय ओहं
 तारित्तए, अतीरंगमा एए, णोयतीरं गमित्तए । अपारंगमा एए णोय पारं गमित्तए

॥९८॥ आयाणिञ्च च आयाय, तंमि ठणे ण चिद्धइ । वितहं पप्पऽखेयण्णे
 तंमि ठणंमि चिद्धइ ॥९९॥ उद्देसो पासगस्स णत्थि ॥१००॥ बाले पुण णिहे
 कामसमणुण्णे असमियदुक्खे दुक्खी दुक्खाणमेव आवट्ठं अणुपरियट्ठइ तिं वेमि ।
 ॥१०१॥ बीअं अज्झयणं तइओद्देसो समत्तो ॥

तओ से एगया रोगसमुप्पाया समुप्पज्जति ॥१०२॥ जेहिं वा सद्धिं संवसइ,
 ते वा णं एगया णियया पुंविं परिवयंति । सो वा ते णियणे पच्छा परिवइज्जा,
 णालं ते तव ताणाए वा, सरणाए वा, तुमं पि तेसिं णालं ताणाए वा सरणाए
 वा ॥१०३॥ जाणित्तु दुक्खं पत्तेयं सयं ॥१०४॥ भोगा मे व अणुसोयेति
 इहमेगेसिं माणवाणं, तिंविहेण, जावि से तत्थ मत्ता भवइ—अप्पा वा, ब्रहुगा वा,
 से तत्थ गट्टिए चिद्धइ; भोयणाए ॥१०५॥ तओ से एगया विपरिसिट्ठं संभूयं
 महोवगरणं भवइ, तंमि से एगया दायाया विभयंति, अदत्तहारो वा से हरइ,
 रायाणो वा से विलुंपति, णस्सइ वा से, विणस्सइ वा से, अगारदाहेण वा से उज्जइ
 ॥१०६॥ इइ से बाले परस्स अट्ठाए कूराणि कम्मणि पकुक्खमाणे तेण दुक्खेण
 मूढे विप्परियासमुवेइ ॥१०७॥ आसं च छंदं च विमिच्च धीरे ॥१०८॥ तुमं
 चेव तं सल्लमाहट्टु ॥१०९॥ जेण सिया तेण गो सिया ॥११०॥ इणमेव णाव-
 बुज्जति, जे जणा मोहपाउडा ॥१११॥ थीमिलोएपव्वहिए ते भो वयंति—
 “एयाइं आययणाइं ॥११२॥ से दुक्खाए-मोहाए-माराए-णत्थाए-णरगतिरि-
 क्खाए ॥११३॥ सततं मूढे धम्मं णाभिजाणइ ॥११४॥ उदाहु वीरे, अप्प-
 माओ महामोहे ॥११५॥ अलं कुसलस्स पमाएणं, संति मरणं संपेहाए, भेउरधम्मं
 संपेहाए ॥११६॥ णालं पास अलं तव एएहिं, एयं पास सुणी ? महभयं ॥११७॥
 णाइवाइच्च कंचणं ॥११८॥ एस वीरे पसंसिए जे ण णिविज्जइ आयाणाए
 ॥११९॥ “ण मे देइ” ण कुप्पिज्जा थोवं लद्धं ण खिसए, पडिसेहिओ
 परिणमिज्जा ॥१२०॥ एयं भोणं समणुवासिज्जासिंत्ति वेमि ॥१२१॥
बीअं अज्झयणं चउत्थोद्देसो समत्तो ॥

जमिणं विरूवरूवेहिं सरयेहिं लोगस्स कम्मसमारंभा कज्जति, तंजहा—अप्पणो से
 पुत्तार्णं, धूयार्णं, सुप्पाणं णार्दणं, धार्दणं, राईणं, दासाणं, दासीणं, कम्मकराणं

कम्मकरीणं, अणसाए, पुदो पहेणाए, सामासाए, पायरासाए, सण्हि-सण्हिओ
 कज्जइ, इह मेगेसिं मणवाणं भोगयाए ॥१२२॥ समुट्टिए अणगारे आरिए आरि-
 यण्णे, आरियइंसी, अयंसंघित्ति, अदक्खु, से णाइए, णाइआवए, णाइयंते
 सम्भुजाणइ ॥१२३॥ स्वामगंवं परिण्णाय णिरामगंधो परिव्वए ॥१२४॥
 अदिस्समागे कयविकएस्सु; से ण किणे.ण किणावए, किणंतं ण समुजाणइ ॥१२५॥
 से भिक्खु कालण्णे-बलण्णे-मायण्णे-खेयण्णे-खणयण्णे-विणयण्णे-ससमयण्णे-परसम-
 यण्णे-भावण्णे-परिगहं अममायमाणे, कालाणुट्ठाई, अपडिण्णे दुहओ छेत्ता,
 णियाइ ॥१२६॥ वत्थं-पडिगहं-कंवलं-पायपुंछणं-उग्गहं च कडासणं, एएस्सु
 चेव जाणेज्जा ॥१२७॥ लद्धे आहारे, अणगारो मायं जाणेज्जा से जहेयं भगवया
 पवेइयं ॥१२८॥ लामुत्ति ण मज्जिजा, अलामुत्ति ण सोइज्जा, बहुंपि लद्धं ण
 णिहे, परिगहाओ अप्पाणं अयसंक्किज्जा, अण्णहा णं पासए परिहरिज्जा ॥१२९॥
 एस मग्गे आयरिएहिं पवेइए, जहित्थ कुसले णोवल्लिप्पिजासित्ति बेमि ॥१३०॥
 कामा दुरइक्कमा, जीविवं दुप्पडिवूहणं; कामकामी खलु अयं पुरिसे, से सोयइ,
 जूरइ, तिप्पइ, पिडुइ; परितप्पइ ॥१३१॥ आययचक्खू लोगविपस्सी लोगस्स
 अहो भागं जाणइ, उट्ठं भागं जाणइ, तिरियंभागं जाणइ ॥१३२॥ गडिए
 छोए अणुपरियट्ठमाणे, विइत्ता इह मच्चिएहिं, एस वीरे पसंसिए जे बद्धे
 पडिमोयए ॥१३३॥ ज्जहा अंतो तहा चाहिं जहा चाहिं तहा अंतो ॥१३४॥
 अंतो-अंतो पूइदेहंतराणि पासइ पुदोवि सवंधंताइं पंडिए पडिलेहाए ॥१३५॥ से
 मइमं परिण्णाय माय हु लालं पच्चासी, भा तेसु तिरिच्छमप्पाणमावायए ॥१३६॥
 कासंकासे खलु अयं पुरिसे, बहुमाई, कडेण मूढे, पुणो तं करेइ लोहं वेरं वट्ठेइ
 अप्पणो ॥१३७॥ जमिणं परिकहिज्जइ इमस्स चेव पडिवूहणयाए अमरायइ महा-
 सङ्घी अट्टमेयं तु पेहाए ॥१३८॥ अपरिण्णाए कंदइ से तं जाणइ जमहं बेमि
 ॥१३९॥ ते इच्छं पंडिए पययमाणे, से हंता, छित्ता, भित्ता, लुंपइत्ता, विलुंपइत्ता
 उद्वइत्ता, अकडं करिस्तामित्ति मण्णमाणे, जस्सवि य णं करेइ, अलं बालस्स
 संगेणं, जे वा से कारइ वाले, ण एवं अणगारस्स जायइत्ति बेमि ॥१४०॥

वीअं अज्झयणं पंचमोद्देशो समत्तो ॥

से तं संबुज्जमाणे आयाणीयं समुट्ठाए तम्हा पावकम्मं णेव कुज्जा, ण कार-

वेज्जा ॥१४१॥ सिया तत्थएगयरं विप्परामुसइ, छसु अण्णयरंसि, कप्पइ ॥१४२॥ सुहट्ठी लालप्पमाणे सएण दुक्खेण मूढे विप्परियासमुवेइ । सएण विप्पमाएण पुढो वयं पकुच्चइ, जं सि मे पाणा पच्चहिया, पडिलेहाए णो णिकरणयाए एस परिण्णा पवुच्चइ कम्मोवसंती ॥१४३॥ जे ममाइयमइं जहाइ से चयइ ममाइयं से हु दिट्ठपहे मुणी जस्स, गत्थि ममाइयं ॥१४४॥ तं परिण्णाय मेहावी विइत्ता लोमं वंता लोमसणं से मइमं परिकमिज्जासित्ति बेमि ॥१४५॥ णारइं सहते वीरे, वीरे णो सहते रइं जम्हा अविमणे वीरे, तम्हा वीरे ण रज्जइ ॥१४६॥ सद्दे फासे अहियासमाणे, णिच्चिद णंदिं इह, जीवियस्स ॥१४७॥ मुणी मोणं समायाय, धुणे कम्मसरीरगं, पंतं ल्हं सेवति, वीरा संमत्तदंसिणो ॥१४८॥ एस ओहंतरे मुणी, तिण्णे मुत्ते, विराए वियाहिएत्ति बेमि ॥१४९॥ दुच्चसुमुणी अणाणाए, तुच्छए गिलाइ वत्तए ॥१५०॥ एस वीरे पसंसिए, अच्चेइ लोयसंजोयं, ॥१५१॥ एस णाए पवुच्चइ, जं दुक्खं पवेइयं इह माणवाणं, तस्स दुक्खस्स कुसला परिण्ण-मुदाहरंति ॥१५२॥ इह कम्म परिण्णाय सच्चसो ॥१५३॥ जे अण्णदंसी से अण्णारामे, जे अण्णारामे से अण्णदंसी ॥१५४॥ जहा पुण्णस्स कत्थइ तहा तुच्छस्स कत्थइ जहा तुच्छस्स कत्थइ तहा पुण्णस्स कत्थइ ॥१५५॥ भविय हणे अणाइयमाणे । एत्थंपि जाण, सेयंति गत्थि ॥१५६॥ केयं पुरिसे कं च णए ! एस वीरे पसंसिए, जे बद्धे पडिमोयए, उट्ठं अहं तिरियं दिसासु ॥१५७॥ से सच्चओ सच्चपरिण्णाचारी ण लिप्पइ छणयएण, वीरे ॥१५८॥ से, मेहावी अणुग्घा-यणस्सत्थेयण्णे जे य बंधपमुक्खमण्णेसी ॥१५९॥ कुसले पुण णो बद्धे, णो मुक्के ॥ १६० ॥ से जं च आरभे जं च णारभे । अणारद्धं च ण आरभे ॥ १६१ ॥ छणं परिण्णाय लोमसणं च सच्चसो ॥ १६२ ॥ उदेसो पासगस्स गत्थि ॥ १६३ ॥ चाले पुण णिहे कामसमणुण्णे असमियदुक्खे दुक्खी दुक्खलाणमेव आवट्ठं अणु-परियट्ठइ त्ति बेमि ॥ १६४ ॥ छट्ठोद्देसो समत्तो ॥ लोगविजय णाम बीअमज्झयणं समत्तं ॥

—सीओसणिज्जं णाम तइयं अज्झयणं—

सुत्ता अमुणी सया मुणिणो सया जागरंति ॥१६५॥ लोयंसि जाण अहियाय

दुक्खं ॥ १६६ ॥ समयं लोगस्स जाणित्ता, इत्थ सत्थोवरए ॥ १६७ ॥ जस्सिमे
सहा य-रूवा य-गंवा य-रसा य-फासा य-अभिसमण्णागया भवति, से आयवं-णाणवं-
वेयवं-धम्मवं-वंभवं-पण्णागेहिं परियाणइ लोयं सुणीत्ति वच्चे धम्मविउत्ति अंजू आवट्ट-
सोए संगमभिजाणइ सीउसिणइई, से णिग्गंभे, अरइइसहे फरुसयं णो वेएइ जागर-
वेरोवरए-वीरे एवं दुक्खा पमुक्खसि ॥ १६८ ॥ जरामच्चुवसोवणीए णरे सययं
मूढे धम्मं णामिजाणइ ॥ १६९ ॥ पासिय आउरे पाणे अप्पमत्तो परिव्वए ॥ १७० ॥
मंता एयं; मइमं-पास ॥ १७१ ॥ आरंभजं दुक्खमिणंति ण्वा, माई पमाई पुण-एइ
गब्भं; उवेहमाणो सहरूवेसु अंजू, माराभिसंकी मरणा पमुच्चइ ॥ १७२ ॥ अप्पमत्तो
कामेहिं, उवरओ पावकम्महिं, वीरे आयगुत्ते जे खेयण्णे ॥ १७३ ॥ जे पज्जवजायस-
थस्स खेयण्णे, से असत्थस्स खेयण्णे; जे असत्थस्स खेयण्णे, से पज्जवजाय सत्थस्स
खेयण्णे ॥ १७४ ॥ अकम्मस्स वत्तहारो ण विज्जइ, कम्मुणा उवाही जायइ ॥ १७५ ॥
कम्मं च पडिलेहाए, कम्ममूलं च जं छणं ॥ १७६ ॥ पडिलेहिय, सव्वं समायाय
दोहिं अंतोहिं अदिस्समाणे ॥ १७७ ॥ तं परिणाय मेहावी विइत्ता लोगं, वंता
लोगसणं से मइमं परंक्कमिज्जासित्ति बेमि ॥ १७८ ॥ **पढमोद्देसो समत्तो ॥**
जाई च बुद्धिं च इहज्ज पासे, भूएहिं सायं पडिलेह जणे । तम्हाऽतिविज्जे
परमंति ण्वा, संमतदंसी ण करेइ पावं ॥ १७९ ॥ उम्मुच पासं इह मच्चिएहिं,
आरंभजीवी उभयाणुपरसी । कामेसु गिद्धा णिचयं करंति । संसिच्चमाणा पुणरिति
गब्भं ॥ १८० ॥ अवि से हासमासज्ज हंता णदीति मण्णइ । अलं बालस्स संगेणं
वेरं वड्ढेइ अप्पणो ॥ १८१ ॥ तम्हा-तिविज्जे परमंति ण्वा, आयंकदंसी ण करेइ पावं
॥ १८२ ॥ अग्गं च मूलं च विगिंच धीरे, पल्लिच्छदिया णं णिक्कम्मदंसी ॥ १८३ ॥
एस मरणा पमुच्चइ से हु दिट्ठभए सुणी, लोयंसी परमदंसी विवित्तजीवी उवसंते
समिए सहिए सयाजए कालकंखी परिव्वए ॥ १८४ ॥ ब्रह्मं च खलु पावकम्मं
पगडं, संबंमि विंई कुव्वहा, एत्थोवरए मेहावी सव्वं पावकम्मं झोसेइ ॥ १८५ ॥
अणेगचित्ते खलु अयं पुरिसे से केयणं अरिहए पुरइत्तए से अण्णवहाए, अण्ण-
परियावाए, अण्णपरिग्गहाए, जणवयवहाए, जणवयपरियावाए, जणवयपरि-
ग्गहाए ॥ १८६ ॥ आसेवित्ता एयमट्ठं इच्चेवेगे समुट्ठिया, तम्हा तं विइयं णो सेवे
णिस्तारं पासिय णाणी ॥ १८७ ॥ उववायं चवणं ण्वा, अण्णं चर माहणे ॥ १८८ ॥
से ण छणे ण छणामए, छणंतं णाणुजाणए ॥ १८९ ॥ णिव्विद णंदिं अरए पयासु

अणोमदंती णिसण्णे पावेहिं कम्महेहिं ॥१९०॥ कोहाइमाणं हणिया य वीरे लोभस्स
पासे गिरयं महंतं । तम्हा य वीरे विरए बहाओ, छिदिज्ज सोयं लहुभूय
गामी ॥१९१॥ अंथं परिणाय इहज्ज वीरे, सोयं परिणाय चरिज्ज दंते । उम्मज्ज
लहुं इह माणवेहिं, णो पाणिणं पाणे सुमारभिज्जासि—त्ति बेमि ॥ १९२॥
तइयं अज्झयणं बीओट्टेसो समत्तो ॥

संधिं लोगस्स जाणित्ता ॥ १९३ ॥ आयओ बहिया पास, तम्हा ण हंताण-
विधायए ॥१९४॥ जमिणं अण्णमण्णवितिगिच्छाए पडिलेहाए ण करेइ पावं कम्मं
किं तत्थ मुणी कारणं सिया ? समयं तत्थुवेहाए अप्पाणं विप्पसायए ॥१९५॥
अण्णपरमं णाणी णो पमाए कयाइवि । आयरुत्ते सया धीरे, जायामायाइ
जावए ॥१९६॥ विरागं रूवेहिं गच्छिज्जा महया खुंडुएहिं वा ॥१९७॥ आगइं
गइं परिणाय दोहिंवि अंतेहिं अदिस्समाणेहिंसे ण छिज्जइ, ण भिज्जइ, ण डज्जइ
ण हम्मइ कंचणं सव्वलोए ॥१९८॥ अवरेण पुव्वि ण संरंति एगे, किमस्सतीतं ?
किंवाऽऽगमिस्सं ? भासंति एगे इह माणशाओ, जमस्सतीतं तं आगमिस्सं ॥१९९॥
णाइंयमट्टं णय आगमिस्सं, अट्टं णिअच्छंति तहागया उ; विहूयकप्पे एयाणुपरसी;
णिज्जोसइत्ता रूवए महेसी ॥२००॥ का अरई ? के आणदे ? एत्थं पि
अगहे चरे । सव्वं हासं परिचज्ज, अलीणगुत्तो परिव्वए ॥२०१॥ पुरिसा !
तुममेव तुमं मित्ते, किं बहिया मित्तमिच्छसि ? ॥२०२॥ जं जाणिज्जा उच्चा-
लइयं तं जाणिज्जा दूरालइयं, जं जाणिज्जा दूरालइयं तं जाणेज्जा उच्चालइयं ॥२०३॥
पुरिसा ! अत्ताणमेथं अभिणिगिज्जइ एवं दुक्खा पमुच्चसि ॥ २०४ ॥ पुरिसा ! सच्च-
मेव समभिजाणाहि, सच्चस्ताणाए से उवट्टिए मेहावी मारं तरइ सहिओ धम्म-
मायाय सेयं समणुपस्सइ ॥ २०५ ॥ दुहओ, जीवियस्स परिवंदणमाणणपूयणाए,
कांसि एगे पमायंति ॥२०६॥ सहिओ दुक्खमत्ताए पुट्ठो णो संझाए; पासिमं दविए
लोए लोयालोयपवंचाओ मुच्चइ त्ति बेमि ॥ २०७ ॥ **तइओट्टेसो समत्तो ॥**

से वंता कोइं च, माणं च, मायं च, लोभं च, एयं पांसगस्स
दंसणं, उवरयसत्थस्स पलियंतकरस्स आयाणं सगडब्भि ॥ २०८ ॥ जे
एगं जाणह से सव्वं जाणइ, जे सव्वं जाणह से एगं जाणइ ॥२०९॥ सव्वओ पम-
त्तस्स भयं, सव्वओ अप्पमत्तस्स णत्थि भयं ॥२१०॥ जे एगं णामे से नहुं णामे,

जे बहु णामे से एगं णामे ॥२११॥ दुक्खं लोंगस्स जाणित्त, वंता लोंगस्स संजोगं,
 जंति वीरा महांजाणं, परेण परं जंति णायकंलंति जीवियं ॥२१२॥ एगं विगिंचमाणे
 पुढो विगिंचइ पुढोविगिंचमाणे एगं विगिंचइ ॥२१३॥ सद्धी आणाए मेहावी
 ॥२१४॥ लोणं च आणाए अभिसमेच्चाअकुओभयं ॥ २१५ ॥ अत्थि सत्थं परेण
 परं, णत्थि असत्थं परेण परं ॥ २१६ ॥ जे कोहदंसी सेमाणदंसी, जे माणदंसी से
 मायादंसी, जे मायादंसी से लोभदंसी, जे लोभदंसी से पिज्जदंसी, जे पिज्जदंसी से
 दोसदंसी, जे दोसदंसी से मोहदंसी, जे मोहदंसी से गब्भदंसी जे गब्भदंसी से
 जम्मदंसी, जे जम्मदंसी से मारदंसी, जे मारदंसी से णरयदंसी, जे णरयदंसी से
 तिरियदंसी, जे तिरियदंसी से दुक्खदंसी ॥२१७॥ से मेहावी अग्निवट्टिजा, कोहं
 च-माणं च-मायं च-लोहं च-पिज्जं च-दोसं च-मोहं च-गब्भं च-जम्मं च-मरणं च-
 णरयं च-तिरियं च-दुक्खं च-एयं पासगस्स दंसणं उवरयसत्थस्तपलियंतकरस्स
 ॥२१८॥ आयाणं णिसिद्धा सगडब्भि ॥२१९॥ किमत्थि ओवाही पारुगस्स ? ण
 विज्जइ ? णत्थि ति बेमि ॥२२०॥ चउत्थोद्देसो समत्तो ॥ सीओसणीयं
 णाम तइयज्झयणं समत्तं ॥

॥ सम्मत्तं णाम चउत्थं अज्झयणं ॥

से बेमि—जे य अईया, जे य पडुप्पणा, जेय आगमिस्सा अरहंता भगवंतो ते
 सव्वे, एवमाइक्खंति एवं भासंति एवं पण्णविति, एवं परुविति—सव्वे पाणा,
 सव्वे भूया, सव्वे जीवा, सव्वे सत्ता ण हंतत्वा, ण अज्जावेयत्वा, ण परिघेतत्वा ण
 परियावेयत्वा, ण उद्दवेयत्वा ॥२२१॥ एस धम्मं सुद्धे, णिइए-सासए-समिच्च लोयं
 खेयण्णेहि पवेइए, तंजहा—उट्टिएसु वा, अणुट्टिएसु वा, उवट्टिएसु वा अणुवट्टिएसु
 वा, उवरयदंडेसु वा, अणुवरयदंडेसु वा, सोवहिएसु वा, अणुवहिएसु वा, संजोग-
 रएसु वा, असंजोगरएसु वा ॥२२२॥ तच्चं चेयं तथा चेयं अस्सिं चेयं पक्खइ ॥२२३॥
 ते आइत्तु ण गिहे ण णिक्खिक्खे, जाणित्तु धम्मं जहा तथा ॥२२४॥ विट्ठेहिं णिव्वेयं
 गच्छिज्जा ॥२२५॥ णो लोगस्सेसणं चरे ॥२२६॥ जस्स णत्थि इमा णाई अण्णा
 तस्स कओ सिया ? ॥२२७॥ दिट्ठं सुयं मयं विण्णायं, जं एयं परिकहिज्जइ ॥२२८॥
 समेमाणा पलेमाणा पुणो पुणो जाई पकप्पंति ॥२२९॥ अहो य राओ य जयमाणे
 धीरे सया आगयण्णाणे, पमत्ते बहिया पास अप्पमत्ते सया परक्कमिज्जासि ति

बेमि ॥ २३० ॥ चउत्थं अज्झयणं पढमोद्देशो समत्तो ॥

जे आसवा ते परिस्सवा, जे परिस्सवा ते आसवा ॥ २३१ ॥ जे अणासवा ते अपरिस्सवा, जे अपरिस्सवा ते अणासवा ॥ २३२ ॥ एए पए संबुज्झमाणे लोयं च आणाए अभिसमिच्चा पुढो पवेइयं ॥ २३३ ॥ अथाइ णाणी इह माणवाणं संसारपडिवण्णाणं संबुज्झमाण्णाणं विण्णाणपताणं, अट्ठावि सत्ता अदुवा पमत्ता, अहा सच्चमिणंत्ति—बेमि ॥ २३४ ॥ णाणागमो मच्चुमुहस्स अत्थि । इच्छापणीया वंकाणिकेया कालग्गहीआ णिच्चयणिविट्ठा पुढो पुढो जाइं पक्कपयंति ॥ २३५ ॥ इहमेगेसिं तत्थ—तत्थ संथवो भवइ । अहोववाइए फासे पडिसवेदयंति ॥ २३६ ॥ चिट्ठकूरेहिं कम्महिं, चिट्ठं परिचिट्ठइ; अचिट्ठं कूरेहिं कम्महिं णो चिट्ठं परिचिट्ठइ ॥ २३७ ॥ एगे वयंति अदुवावि णाणी, णाणी वयंति अदुवावि एगे ॥ २३८ ॥ आवंती केया-व्रंती लोयंसि समणा य माहणा य पुढो विवायं वयंति, “से दिट्ठं च णे, सुयं च णे, मयं च णे, विण्णायं च णे, उट्ठं अहं तिरियं दिसासु सव्वओ सुपडिलेहियं च णे सव्वे पाणा, सव्वे जीवा, सव्वे भूया, सव्वे सत्ता इंतव्वा-अज्जावेयव्वा-परिघेतव्वा-परियावेयव्वा-उद्दवेयव्वा । एत्थं पि जाणइ, णत्थित्थं दोसो ।” अणारियवयणमेयं ॥ २३९ ॥ तत्थ जे ते आरिया, ते एवं वयासी—“से दुदिट्ठं च भे, दुस्सुयं च भे, दुम्मयं च भे, दुव्विण्णायं च भे, उट्ठं अहे तिरियं दिसासु सव्वओ दुप्पडिलेहियं च भे; जं णं तुब्भे एवमाइक्खइ, एवं भासइ, एवं पण्णवेइ एवं परूवेइ सव्वे पाणा सव्वे जीवा सव्वे भूया सव्वेसत्ता, इंतव्वा, अज्जावेयव्वा, परिघेतव्वा-परियावेयव्वा-उद्दवेयव्वा एत्थवि जाणइ णत्थित्थं दोसो ।” अणारियवयणमेयं ॥ २४० ॥ वयं पुण एवमाइक्खामो एवं भासामो, एवं पण्णवेमो, एवं परूवेमो, “सव्वे पाणा, सव्वे जीवा, सव्वे भूया, सव्वे सत्ता, ण इंतव्वा, ण अज्जावेयव्वा, ण परिघेतव्वा, ण परियावेयव्वा, ण उद्दवेयव्वा, एत्थवि जाणइ, णत्थित्थं दोसो ।” आरियवयणमेयं ॥ २४१ ॥ पुत्वं णिकायसमयं, पत्तेयं पत्तेयं पुच्छिससामो, हं भो पवाडुया ! किं मे सायं दुक्खं उदाहुअसार्थं ? समिया पडिवण्णे यावि एवं बूया—सव्वेसिं पाणाणं, सव्वेसिं भूयाणं, सव्वेसिं जीवाणं, सव्वेसिं सत्ताणं, असायं, अपरिणिव्वाणं मइब्भयं दुक्खं ति बेमि ॥ २४२ ॥ चउत्थं अज्झयणं बीओद्देशो समत्तो ॥

उवेहे णं बहिया य लोयं, से सव्वलोयमि जे केइ विण्णू ॥ २४३ ॥ अणुकीइ

पास, गिक्खित्तदंढा जे केइ सत्ता पलियं चयंति, णरे मुयच्चा धम्मविउत्ति अंजू ;
 आरंभजं दुक्खलमिणंति णच्चा, एवमाहु संमत्तदंसिणो ॥२४४॥ ते सव्वे पावाइया
 दुक्खस्स कुसला परिणमुदाहरंति, इति कम्मं परिणाय सव्वसो ॥२४५॥ इह
 आणाकंखी पंडिए अणिहे, एगमप्पाणं संपेहाए धुणे सरोरं ॥२४६॥ कसेहि
 अप्पाणं, जरेहि अप्पाणं ॥२४७॥ जहा जुण्णाइं कट्ठाइं हव्ववाहो पमत्थइ, एवं
 अत्तसमाहिए अणिहे ॥२४८॥ विगिं च कोहं अविकंपमाणे, इमं गिरुद्धाउयं संवेहाए
 ॥२४९॥ दुक्खं च जाण अदुवागमेस्सं, पुढो फासाइं च फासे, लोयं च पास, विष्फं-
 दमाणं ॥२५०॥ जे गिक्खुडा, पावेहिं कम्मोहिं अणियाणा ते वियाहिया ॥२५१॥
 तम्हाऽतिविज्जो णो पडिसंजलिज्जासि त्ति बेमि ॥२५२॥ **तइओद्देसो समत्तो ॥**

आवीलए फवीलए गिप्पीलए, जहिच्चा पुव्वसंजोगं हिच्चा उयसमं ॥२५३॥
 तम्हा अविमणे वीरे, सारए समिए सहिए सया जए ॥२५४॥ दुरणुचरो मग्गो
 वीराणं अणियद्दगामीणं ॥२५५॥ विगिं च मंसलोणियं, एस पुरिसे दवीए वीरे
 आयाणिजे वियाहिए, जे धुणाइ समुत्सयं वसित्ता बंभचेरंसि ॥२५६॥ गित्तेहिं
 पल्लिच्छिणेहिं आयाणसोयंगदिए बाले, अक्खोच्छिण्णवंधणे अणभिकंतसंजोए । तमंसि
 अवियाणओ आणाए लंभो णत्थिंत्ति बेमि ॥२५७॥ जस्स णत्थि पुरा पच्छा,
 मज्जे तस्स कुओ सिया ? ॥२५८॥ से हु पण्णाणमते बुद्धे आरंभोवरए, सम्ममेयंति
 पासह, जेण वंधं व्हं घोरं परितावं च दारुणं ॥२५९॥ पल्लिच्छिंदिय वाहिरगं च
 सोयं, गिक्कम्मदंसि इह भच्चिएहिं ॥२६०॥ कम्माणं सफलं दट्टूण तओ गिज्झाइ
 वेथवी ॥२६१॥ जे खलु भो ! वीरा ते समिया सहिया सयाजया संघडदंसिणो
 आओवरया अहातहं लोगमुवेहमाणा पाईणं पडीणं दाहीणं उईणं इइ सच्चंसि परि-
 च्चिद्धिसु ॥२६०॥ साहिस्सामो णाणं वीराणं समियाणं सहियाणं, सयाजयाणं
 संघडदंसिणं आओवरयाणं अहातहा लोगंसमुवेहमाणाणं किमत्थि उवाही ? पासगस्स
 ण विज्जइ णत्थि त्ति बेमि ॥२६३॥ **चउत्थं अज्झयणं चउत्थोद्देसो
 समत्तो ॥ सम्मत्तं णाम चउत्थमज्झयणं समत्तं ॥**

लोकसार णाम पंचमं अज्झयणं

आवती केयावेती लोयंसि विपरामुसंति अट्ठाए अणट्ठाए वा । एएसु चेव
 विपरामुसंति, गुरु से कामा, तओ से मारस्स अंतो जओ से मारस्स अंतो तओ

से दूरे, णेव से अंतो णेव से दूरे ॥२६४॥ से पासइ फुसियमिव कुसग्गे पणुणं
 णिवइयं वाएरियं, एवं बालस्स जीवियं मंदस्स अविंयाणओ ॥२६५॥ कुराई
 कम्माई बाले पकुब्बमाणे तेण दुक्खेण मूढे विपरियासमुवेइ; मोहेण गब्भं मरणाइ
 एइ एत्थ मोहे पुणो पुणो ॥२६६॥ संसयं परियाणओ संसारे परिणाए भवइ,
 संसयं अपरियाणओ संसारे अपरिणाए भवइ ॥२६७॥ जे छेए से सागरियं ण
 सेवए ॥२६८॥ कट्टु एवं अविंयाणओ बिइया मंदस्स बालया ॥२६९॥ लद्धा
 हुरत्था पडिलेहाए आगमित्ता आणविज्जा अणासेवणाए त्ति वेमि ॥२७०॥ पासह
 एगे रूवेसु गिद्धे परिणिज्जमाणे, एत्थ फांने पुणो पुणो, आवंती केयावंती लोयंसि
 आरंभजीवी ॥२७१॥ एएसु चेव आरंभजीवी, एत्थवि बाले परिपच्चमाणे रमइ
 पावेहिं कम्मेहिं असरणे सरणंति मण्णमाणे ॥२७२॥ इहमेगेसिं एगच्चरिया भवइ, से
 बहुकांहे-बहुमाणे-बहुमाए-बहुलोहे-बहुरए-बहुणडे-बहुसडे-बहुसंकप्पे, आसवसक्की
 पल्लिउच्छण्णे उट्टियवायं पवयमाणे “मा मे केइ अदक्खु” अण्णाणपमायदोसेणं,
 सययं मूढे धम्मं णामिजाणइ ॥२७३॥ अट्टा पया माणव ? कम्मकोविया जे
 अणुवरया अविज्जाए पल्लिसुक्कमाहु आवट्टमेव अणुपरियट्ठंति त्ति वेमि ॥२७४॥
पंचमं अज्झयणं पढमोद्देसो समत्तो ॥

आवंती केयावंती लोयंसी अणारंभजीविणो एएसु चेव अणारंभ जीविणो ॥२७५॥
 एत्थोवरए तं शोसमाणे “अयं संधीति” अदक्खु, जे इमस्स विग्गहस्स अयं
 खणेत्ति अण्णेसी ॥२७६॥ एस मग्गे आरिएहिं पवेइए, उट्टिए णो पमायए,
 ज्ञाणित्तु दुक्खं पत्तेयं सायं ॥२७७॥ पुट्ठो छंदा इह माणवा, पुट्ठो दुक्खं पवेइयं से
 अविहिंसमाणे अणवयमाणे, पुट्ठो फासे विप्पणोळए । एस समिया परियाए वियाहिए
 ॥२७८॥ जे असत्ता पावेहिं कम्मेहिं उदाहु ते आयंका फुसंति इइ उदाहु धीरे
 ते फासे पुट्ठो अहियासए ॥२७९॥ से पुत्वं पेयं, पच्छापेयं भेउरधम्मं विट्ठंस्सण-
 धम्मं अधुवं अणिइयं असासयं चयावचइयं विप्परिणाामधम्मं, पासह एयं रूव-
 संधि ॥२८०॥ समुप्पेहमाणस्स इक्कायणारयस्स इह विप्पमुक्कस्स गत्थि मग्गे
 विरयस्स त्ति वेमि ॥२८१॥ आवंती केयावंती लोयंसि परिग्गहावंती;—से अण्यं
 वा, बहुयं वा, अणुं वा, थूलं वा, चित्तमंतं वा, अचित्तमंतं वा, एएसु चेव परिग्गहा-
 वंती ॥२८२॥ एवमेवेगेसिं महब्भयं भवइ, लोगचित्तं च णं उवेहाए ॥२८३॥ एए

संगे अवियाणओ से सुपडिचदं सूवणीयंति णच्चा, पुरिसा ! परमच्चक्खुविप्परिक्कमा,
एएसु चेव बंमचेरं ति बेमि॥२८४॥से सुयं च मे, अज्झत्थयं च मे, बंधपमुक्खो
अज्झत्थेव ॥२८५॥ इत्थ विरए अणागारे दीहरायं तितिक्खए ॥२८६॥ पमत्ते
बहिया पास, अप्पमतो परिव्वए ॥२८७॥ एयं मोणं सम्मं अणुवासिज्जासित्ति
बेमि ॥ २८८ ॥ **पंचमं अज्झयणं बीयोहेसो समत्तो ॥**

आवंती केयावंती लोयंसि अपरिग्गहावंती एएसु चेव अपरिग्गहावंती सुच्चा वई
मेहावी, पंडियाण गिसामिया ॥२८९॥ समियाए धम्मे आरिएहिं पवेइए
बहित्थ मए संधी झोसिए एवमण्णत्थ संधी दुज्जोसए भवइ तग्हा बेमि णो
णिण्हवेज्ज वीरियं ॥२९०॥ जे पुव्वुट्ठाई णो पच्छाणिवाई, जे पुव्वुट्ठाई पच्छाणि-
वाई, जे णो पुव्वुट्ठाई णो पच्छाणिवाई, सेऽवि तारिसीए सिया, जे परिण्णाय लो-
गमण्णेसयंति, एयं गियाय मुणिणा पवेइयं ॥२९१॥ इह आणाकंखी पंडिए
अणिहे, पुवावरारयं जयमाणे सया सीलं सपेहाए ॥२९२॥ सुणिया भवे अकामे
भञ्जंझे ॥२९३॥ इमेणं खेव जुज्जाहि, किं ते जुज्जेण वज्जओ ? जुद्धारिहं खल
दुद्धइ ॥२९४॥ जहित्थ कुसलेहिं परिण्णाविवेगे भासिए, चुए हु बाले गब्भाइसु
रज्जइ ॥ २९५ ॥ अस्सि चेयं पच्चुच्चइ, रुवंसि वा छणंसि वा ॥ २९६ ॥ से हु
एगे संविद्धपहे मुणी अण्णहा लोगमुवेहमाणे ॥२९७॥ इति कम्मं परिण्णाय
सच्चसो से ण हिंसइ, संजमइ णो पगब्भइ, उवेहमाणो पत्तेयं सायं ॥ २९८ ॥
वण्णाएसी णारंभे कंचणं सच्चलोए, एगप्पमुहे विदिसप्पइण्णे णिव्विण्णचारी अरए
पयासु ॥२९९॥ से वसुमं सच्चसमण्णाजयपण्णाणेणं अप्पाणेणं अकरणिज्जं पावकम्मं
तं णो अण्णेसी ॥३००॥ जं सम्मं ति पासहा तं मोणं ति पासहा, जं मोणं ति
पासहा तं सम्मं ति पासहा, ॥३०१॥ ण इमं सक्कं सिटिलेहिं अदिज्जमाणेहिं
गुणासाएहिं वंकसमायारेहिं पमत्तेहिं गारमावसंतंहिं ॥३०२॥ मुणी मोणं समायाए,
धुणे कम्मसरीरगं, पंतं ल्हं सेवंति, वीरा संमत्तदंसिणे ॥ एस ओहंतरे मुणी,
तिण्णे मुत्ते विरए वियाहिएत्ति बेमि ॥३०३॥ **तइओहेसो समत्तो ॥**

गामाणुगामं दूइज्जमाणसस दुज्जायं दुप्परकंतं भवइ अवियत्तसस भिक्खुणो
॥३०४॥ वयसावि एगे बेइया कुप्पंति माणवा, उण्णयवाणे य णरे महया भोहेण
मुज्जइ संयाहा बहवे भुज्जो २ दुरइक्कमा अजाणओ, अपासओ, एयं ते मा होउ,

एयं कुसलस्स दंसणं ॥३०५॥ तदिट्ठीए तम्मुत्तीए तप्पुरक्कारे तस्सणी तण्णिवेसणे जयं विहारी चित्तणिवाई पंथणिज्जाई पलिन्नाहिरे, पासिय पाणे गच्छिज्जा। से अभिक्कममाणे पडिक्कममाणे संकुन्त्रमाणे पसारेमाणे विणिवट्टमाणे संपलिमज्जमाणे ॥३०६॥ एगया गुणसमियस्स रीयओ कायसंफासं समणुच्चिणा एगइया पाणा उदार्यति; इहलोगवेयणवेज्जावडियं जं आउट्टीयं कम्मं तं परिण्णाय विवेगमेइ; एयं से अप्पमाएणं विवेगं किट्टइ वेयवी ॥३०७॥ से पभूयदंसी पभूयपरिण्णणे उवसेते समिए सहिए सयाजण, दट्ठुं विप्पडिवेएइ अप्पाणं, “किमेस जणे करिस्सइ? एस से परमारामो जाओ लोमंमि इत्थीओ”, मुणिणा हु एयं पवेइयं ॥३०८॥ उब्बाहिज्जमाणे गामधम्ममेहिं अवि णिब्बलासए, अवि ओमोयरियं कुज्जा, अवि उट्ठं ठाणं ठाइज्जा, अवि गामणुगामं दूइज्जिज्जा, अवि आहारं बुच्छिदिज्जा, अवि नए इत्थीसु मणं ॥३०९॥ पव्वं दंडा पुच्छा फासा, पुव्वं फासा पच्छा दंडा, इच्चेए कलहासंगकरा भवंति। पडिलेहाए आगमिता आप्पविज्जा अणासेवणाए त्ति बेमि ॥३१०॥ से णो कहिए, णो पासणिए, णो संपसारए णो मामए णो कयकिरिए, थइगुत्ते; अज्झप्पसंबुडे, परिवज्जए सया पावं, एयं मोणं समणुवासिज्जासि—त्ति बेमि ॥३११॥ **पंचमं अज्झयणं चउत्थोद्वेसो समत्तो ॥**

से बेमि—तंजहा, अवि हरए पडिपुण्णे समंसि भोमे चिट्ठइ उवसेतरए सारक्खमाणे, से चिट्ठइ सोयमज्झगए, से पास, सव्वओ गुत्ते, पास लोए महेसिणो. जे य पण्णाणमेता पवुद्धा आरंभोवरया सम्ममेयंति पासह; कालस्स कंखाए परिव्वयंति त्ति बेमि ॥३१२॥ वितिगिच्छासमावण्णेणं अप्पाणेणं णो लभइ समाहिं ॥३१३॥ सिया वेगे अणुगच्छंति, असिया वेगे अणुगच्छंति, अणुगच्छमाणेहिं अणुगच्छमाणे कहं ण णिविज्जे, तमेव सच्चं णीसंकं जं जिणेहिं पवेइयं ॥३१४॥ सद्धिस्स णं समणुण्णस्स संपव्वयमाणस्स समियंति मण्णमाणस्स एगया समिया होइ समियंति मण्णमाणस्स एगया असमिया होइ असमयंति मण्णमाणस्स एगया समिया होइ असमियंति मण्णमाणस्स एगया असमिया होइ ॥३१५॥ समियंति मण्णमाणस्स समिया वा, असमिया वा, समिया होइ उवेहाए ॥३१६॥ असमियंति मण्णमाणस्स समिया वा, असमिया वा, असमिया होइ उवेहाए ॥३१७॥ उवेहमाणो अणुवेहमाणं बूया—“उवेहाहिं समियाए इच्चेवं तत्थ संधी शोसिओ भवइ” ॥३१८॥ से

उद्वियस्स ठियस्स गइं समणुपासह, इत्थवि बालभावे अप्पाणं णो उवदंसेज्जा
॥ ३१९ ॥ तुमंसि णाम सच्चेव, जं हंतव्वंति मण्णसि, तुमंसि णाम सच्चेव, जं अच्चा-
वेयव्वंति मण्णसि, तुमंसि णाम सच्चेव, जं परियावेयव्वंति मण्णसि, एवं जं परिचे-
त्तव्वंति मण्णसि, जं उद्दवेयव्वंति मण्णसि । अंजू चेहपडिबुद्धजीवी तम्हा ण हंता,
ण विघायए; अणुसंवेयणमप्पाणेणं जं हंतव्वं णामिपत्थाए ॥ ३२० ॥ जे आया से
विण्णाया, जे विण्णाया से आया, जेण वियाणइ से आया, तं पडुच्च पडिसंखाए,
एस आयावाइं समियाए परियाए वियाहिए त्ति बेमि ॥ ३२१ ॥ **पंचम अज्झ-
यणं पंचमोद्देशो समत्तो ॥**

अणाणाए एगे सोवट्ठणा आणाए एगे णिरुवट्ठणा एयं ते मा होउ, एयं कुस-
ल्लस्स दंसणं ॥ ३२२ ॥ तद्धिट्ठीए तम्मुत्तीए तप्पुरक्कारे तत्सण्णी तण्णिवेसणे,
अभिभूय अदक्खू, अणभिभूए पभू णिरालंबणयाए; जे महं अबहिंमणे ॥ ३२३ ॥
पवाएणं पवायं जाणिज्जा, सहसम्मइयाए, परवागरणेणं अणोसिं वा अंतिए सोच्चा
॥ ३२४ ॥ णिदेसं णाइवट्ठेज्जा मेहावी सुपडिलेहिय सव्वओ सव्वयाए सम्ममेव समभि-
जाणिया ॥ ३२५ ॥ इह आरामं परिण्णाय अट्ठीणगुत्तो परिच्चए, णिट्ठियट्ठी
वीरे आगमेण सया परकमेज्जासि त्ति बेमि ॥ ३२६ ॥ उड्डं सोया, अहे सोया, तिरियं
सोया वियाहिया; एए सोया वियक्खाया, जेहिं संगंति पासहा ॥ ३२७ ॥ आवट्टं तु
उवेहाए, एत्थ विरमिज्ज वेथवी ॥ ३२८ ॥ विणइत्तु सोयं णिक्खम्म एसमहं अकम्मा
जाणइ, पासइ, पडिलेहाए णावकंखइ, इह आगइं गइं परिण्णाय अब्बेइ जाइमरणस्स
वट्टमग्गं विक्खायए ॥ ३२९ ॥ सव्वे सरा णियट्ठंति, तक्का जत्थ ण विज्जइ, मई
तत्थ ण गाहिया, ओए अप्पइट्ठणस्स खेयण्णे ॥ ३३० ॥ से ण दीहे ण हस्से ण वट्ठे
ण तंसे ण चउरंसे ण परिमंडले, ण किण्हे, ण णीले, ण लोहिए, ण हाल्लेइ ण सुक्खिले
ण सुरहिगंवे ण दुरहिगंवे ण तित्ते ण कडुए, ण कसाए, ण अंबिले, ण महुरे, ण
लवणे, ण कक्खंडे ण मउए ण गुरुए ण लहुए ण सीए ण उण्णे ण णिद्धे ण लुक्खे ण
काऊ ण रुहे ण संगे ण इत्थी ण पुरिसे ण अण्णहा परिण्णे सण्णे ॥ ३३१ ॥ उवमा
ण विज्जए, अरूवी सत्ता, अपयस्स पर्यं णत्थि ॥ ३३२ ॥ से ण सहे ण रूवे ण गंवे
ण रसे ण फासे इच्चेयावंति त्ति बेमि ॥ ३३३ ॥ **छट्ठोद्देशो समत्तो ॥**

॥ लोगसार णाम पंचमज्झयणं समत्तं ॥

घृताकखं णाम छट्ठं अज्झयणं

ओबुज्जमाणे इह माणवेसु आत्ताइ से णरे, जस्सिमाओ जाइओ सव्वओ सुप-
 ङ्खिलेहियाओ भवंति, आत्ताइ से णाणमणेलिसं ॥ ३३४ ॥ से किट्टइ तेसिं समु-
 द्वियाणं णिक्खित्तदंडाणं समाहियाणं पण्णाणमंताणं इह सुत्तिमग्गं, एवं एगे महावीरा
 विप्परक्कमांते, पासह एगे अविसीयमाणे अणत्तपण्णे ॥ ३३५ ॥ से बेमि-से जहावि
 कुम्भे हरए विणिविद्वचित्ते पच्छण्णपलासे उम्मग्गं से णो ल्हइ ॥ ३३६ ॥ भंजगा
 इव सण्णिवेसं णो चयंति, एवं एगे अणेगरूवेहिं कुलेहिं जाया, रूवेहिं सत्ता, कलुणं
 थणंति. णियाणओ ते ण ल्हंति मुक्खं ॥ ३३७ ॥ अह पास तेहिं कुलेहिं आयत्ताए
 जाया ॥ ३३८ ॥ गंडी अहवा कोढी, रायंसी अवमारियं । काणियं झिमियं चेव,
 कुणियं खुजियं तथा ॥ उदरिं पास मूर्यं च, सूणियं च गिलासिणिं, वेवइं पीढमणियं
 च, सिलिचयं महुमेहणियं सोलस एए रोगा, अक्खाया अणुपुव्वसो, अह णं पुंसंति
 आयंका, फासा य असमंजसा ॥ मरणं तेसिं संपेहाए, उववायं चवणं च णत्ता;
 परियागं च संपेहाए, तं सुणेह जहा तथा ॥ ३३९ ॥ संति पाणा अंधा तमंसि विया-
 हिया; तामेव सइं असइं अइ अच्च उच्चावयफासे पडिसंवेइइ, बुद्धेहिं एवं पवेइयं
 ॥ ३४० ॥ संति पाणा वासगा, रसगा उदए उदएचरा आगासगमिणो पाणा पाणे
 किलेसंति ॥ ३४१ ॥ पास लोए मइब्भयं ॥ ३४२ ॥ बहुदुक्खाहु जंतवो ॥ ३४३ ॥
 सत्ता कामेसु माणत्ता, अवलेण वइं गच्छंति सरारेणं पभंगुरेण ॥ ३४४ ॥ अट्टे से
 बहुदुक्खे, इइ नाले पकुव्वइ; एए रोगा बहु णत्ता, आउरा परियावाए ॥ ३४५ ॥
 णालं पास, अलं तत्रेएहिं । एयं पास मुणी ! महब्भयं, णाइवाएज्ज कंचणं ॥ ३४६ ॥
 आयाण भो ! सुस्सू भो ! धूयवायं पवेदइस्सामि इह खलु अत्तत्ताए तेहिं-तेहिं
 कुलेहिं अभिसंणए, अभिसंभूया, अभिसंजाया, अभिणिव्वट्ठा, अभिसंभुद्धा, अभि-
 संबुद्धा अभिणिक्कंता अणुपुव्वेणं महामुणी ॥ ३४७ ॥ तं परक्कमंतं परिदेवमाणं
 माणेचयाहि इइ ते वयंति; “छंदोवण्णिया अज्जोवण्णा,” अक्कंदकारी जणगा
 रुयंति । अतारिसे मुणी णय ओहंतरए, जणगा जेण विप्पजट्ठा ॥ ३४८ ॥ सरणं
 तत्थ णो समेइ कहं णु णाम से तत्थ रमइ ? एयं णाणं सया समणुवासिज्जासि सि
 बेमि ॥ ३४९ ॥ छट्ठं अज्झयणं पढमोद्देसो समत्तो ॥

आउरं लेयमायाए चइत्ता पुव्वसंजोगं, हिंत्ता उवसमं, वसित्ता बंभचेरंमि,

यसु वा अणुवसु वा जाणित्तु धम्मं जहा तथा, अहेगे तमचाइ कुसीला, वत्थं पडिग्गहं
 क्वलं पायपुंळणं विउसिञ्जा, अणुपुव्वेण अणहियासेमाणा परीसहे दुरहियासए, कामे
 म्पमायमाणस्स, इयाणि वा मुहुत्तेण वा अपरिमाणाए भेओ एवं अंतराएहिं कामेहिं
 आकेवलिएहिं अवइण्णाचेए ॥३५०॥ अहेगे धम्ममायाय आयाणप्पभिइसु पणि-
 हिए चरे अप्पलीयमाणे दढे ॥३५१॥ सव्वं गिद्धि परिष्णाय एस पणए महामुणी
 ॥३५२॥ अइअच्च सव्वओ संगं “णमहं अत्थित्ति इइ एगोहमेसि” जयमाणे
 एत्थ विरए, अणगारे, सव्वओ मुंडे, रीयंते, जे अचले परिवुसिए संचिक्खइ
 ओमोयरियाए ॥३५३॥ से आकुट्ठे वा, हए वा, लुंविए वा, पलियं पकत्थ, अदुवा
 पकत्थ, अतहेहिं सइफासेहिं, इइ सत्ताए एगयरे अण्यरे अभिण्णाय तितिक्खमाणे
 परिव्वए, जे य हिरो जे य अहिरीमाणा, चिच्चा सव्वं विसोत्तियं संफासे फासे
 समियदंसगे ॥३५४॥ एते ओ णणिणा वुत्ता, जे लोयंसि अणागमणधम्मिणो,
 ॥३५५॥ “आणाए मामगं धम्मं” एस उत्तरवाए इह माणवाणं वियाहिए ॥३५६॥
 एत्थोवरए तं स्रोसमाणे, आयाणिञ्जं परिष्णाय परियाएणं विगिंचइ ॥३५७॥ इह
 मेगेसिं एगचरिया होइ, तत्थियरा इयरेहिं कुलेहिं सुद्धेसणाए सव्वेसणाए से मेहावी
 परिव्वए, सुन्नि अदुवा दुन्नि अदुवा तत्थ भेरवा पाणापाणे किलेसंति, ते फासे
 पुट्ठो धीरो अहियासेज्जासि त्ति बेमि ॥३५८॥ **बीओट्टेसो समत्तो ॥**

एयं खु मुणी आयाणं सया सुअक्खायधम्मे विघूयकप्पे णिज्झोसइत्ता ॥३५९॥
 जे अचले परिवुसिए तस्स णं भिक्खुस्स णो एवं भवइ परिजुण्णे मे वत्थं जाइ-
 स्सामि, सुत्तं जाइस्सामि, सइं जाइस्सामि, संघिस्सामि, सीविस्सामि, उक्कसिस्सामि
 वोक्कसिस्सामि, परिहिस्सामि पाउण्णिस्सामि ॥३६०॥ अदुवा तत्थ परक्कमंतं भुज्जे
 अचेलं तणफासा पुसंति, सीयफासा पुसंति, तेउफासा पुसंति, दंसमसगफासा पुसंति,
 एगयरे अण्यरे विरुवरूवे फासे अहियासेइ, अचेले, एगववं आगममाणे, तवेसे
 अभिसमण्णागए भवइ ॥३६१॥ जहेयं भगवया पघेइयं तमेव अभिसमेच्चा
 सव्वओ सव्वत्ताए सम्मत्तमेव समभिज्जाणिज्जा एवं तेसिं महावीराणं चिरराइं पुव्वाइं
 न्नासाणि रीयमाणानं दवियाणं पाम, अहियासियं ॥३६२॥ आगयपण्णाणानं किंसा
 बाहा भवंति, पयणुए य मंससोणिए, विस्तेणिं कट्टु परिण्णाए, एस तिण्णे मुत्ते
 विरए वियाहिएत्ति बेमि ॥३६३॥ विरयं भिक्खुं रीयंतं चिरराओसियं अरइं तत्थ

किं विधारए ॥३६४॥ संवेमाणे समुट्टिए, जहासे दीवे असंदीणे ॥३६५॥ एवं से धम्मे आयरियपदेसिए ॥३६६॥ ते अणवकंखमाण, पाणे अणइवाएमाणा दइया मेहाविणे पंडिया ॥३६७॥ एवं तेसिं भगवओ अणुट्टाणो जहा से दियापोए एवं ते सिस्सा दिया य राओ य अणुपुव्वेण वाइय त्ति बेमि ॥३६८॥ **छट्ठं अज्झयणं तइओद्देसो समत्तो ॥**

एवं ते सिस्सा दिया य राओ य अणुपुव्वेण वाइया तेहिं महावीरेहिं पण्णाण-
मंतेहिं तेसिमंतिए पण्णाणमुवल्लम्भ हिच्चा उवसमं फारुसियं समाइयंति ॥३६९॥
वसित्ता बंभचेरंसि आणं तं णो त्ति मण्णमाणा ॥३७०॥ आघायं तु सोच्चा णिसम्म
“समणुणा जीविस्सामो” एगे णिक्खमंते असंभवंता विडज्जमाणा कामेहिं गिद्धा
अज्झोववण्णा समाहिमाघायमजोसयंता सत्थारमेव फरुसं वयंति ॥ ३७१ ॥
सीलमंता उवसंता संखाए रीयमाणा “असीला” अणुवयमाणस्स बिइया मंदस्स
बालया ॥३७२॥ णियट्टमाणा वेगे आयारगोयरमाइक्खंति ॥३७३॥ णाणभट्टा
दंसणलूसिणे णममाणा एगे जीवियं विप्परिणामंति ॥ ३७४॥ पुट्टावेगे णियट्ठंति
जीवियस्सेव कारणा, णिक्खंतंपि तेसिं दुण्णिक्खंतं भवइ ॥३७५॥ बालवयणिज्जा
हु ते णरा पुणे पुणे जाइं पकप्पंति अहे संभवंता विदायमाणा अहमंसि त्ति
विउक्कसे उदासीणे फरुसं वयंति, पलियं पकत्थे अदुवा पकत्थे अतहेहिं तं मेहावी
जाणिज्जा धम्मं ॥३७६॥ अहम्मंडी तुमंसि गायचाले, आरंभट्टी अणुवयमाणे
“हणपाणे” घायमाणे, हणओयावि समणुजाणमाणे “घोरे धम्मे उदीरिए” उवेहइ
णं अणाणाए एस विसण्णे वियहे वियाहिए त्ति बेमि ॥ ३७७ ॥ किमणेणं मो ?
जणेण करिस्सामि त्ति मण्णमाणे एवं एगे वइत्ता, मायरं पियरं हिच्चा, गायओ य
परिग्गहं वीरायमाणा समुट्टाए अविहिंसो सुव्वया दंता, वरस दीणे उप्पइए पडिव-
यमाणे ॥३७८॥ वसट्टा कायरा जणा लूसगा भवंति ॥३७९॥ अहमेगेसिं सिलोए
पावए भवइ. से समणे भवित्ता समणे-विब्भंते २ ॥३८०॥ पासहेगे समण्णागाएहिं
सह असमण्णागाए, णममाणेहिं अणममाणे विरएहिं अविरए दविएहिं अदविए
॥३८१॥ अभिसमेच्चा पंडिए मेहावी णिट्ठियट्टे वीरे आगमेणं सया परक्कमेज्जासि
त्ति बेमि ॥३८२॥ **छट्ठं अज्झयणं चउत्थोद्देसो समत्तो ॥**

से गिहेसु वा, गिहंतरेसु वा, गामेसु वा, गामंतरेसु वा, णगरेसु वा णगरंतरेसु

वा, जणवयंतरे सु वा, जणवयंतरे सु वा, गामणयंतरे वा, गामजणवयंतरे वा, णगर-
जणवयंतरे वा, संतेगइया जणा लूसगा भवंति, अदुवा फासा फुसंति, ते फासे पुट्टो
धीरो अहियासए ओए समियदंसणे ॥३८३॥ दयं लोगस्स, जाणित्ता पाईणं पडीणं,
दाहिणं, उदीणं, आइक्खे; विभए, किट्टे वेयवी ॥३८४॥ से उट्टिए सु वा, अणुट्टिए सु
वा सुस्सूसमाणे सु पेवेयए, संति, विरई, उवसमं, णिव्वाणं, सोयं अज्जवियं महवियं टाघ-
वियं अणइवत्तियं ॥३८५॥ सव्वेसिं पाणाणं सव्वेसिं भूयाणं सव्वेसिं सत्ताणं अणुवीइ
भिकवू धम्ममाइक्खेजा ॥३८६॥ अणुवीइ भिकवू धम्ममाइक्खमाणे णो अत्ताणं
आसाइजा, णो परं आसाइजा, णो अण्णाइं पाणाइं भूयाइं जीवाइं सत्ताइं आसाएज्जा
॥३८७॥ से अणासायए अणासायमाणे वञ्जमाणाणं पाणाणं भूयाणं जीवाणं सत्ताणं,
जहा से दीवे असंदीणे एवं से भवइ सरणं महामुणी ॥३८८॥ एवं से उट्टिए टियप्पा
अणिहे अचले चले अबहिह्लेस्से परिव्वए ॥३८९॥ संखाय पेसलं धम्मं, दिट्ठिमं परि-
णिव्वुडे ॥३९०॥ तम्हा संगई पासह, गथेहिं गढिया णरा विसण्णा कामकंता, तम्हा
लूहाओ णो परिवत्तसेजा ॥३९१॥ जत्तिसमे आरंभा सव्वओ सव्वप्पयाए सुपरिण्णाया
भवन्ति जेसिमे लूसिणो णो परिवत्तसंति से वंता कोहं च माणं च मायं च लोभं च, एस
तुट्टे वियाहिए त्ति बेमि ॥३९२॥ कायस्स वियाघाए एस संगामसीसे वियाहिए, से
हु पारंगमे मुणी, अविहम्ममाणे फलगावयट्ठी कालोवणीए कंखेज्जकालं जाव सरीर
भेउत्ति बेमि ॥३९३॥ ॥ धूतावखं णाम छट्टमज्जयणं समत्तं ॥

॥ महापरिण्णा णाम सत्तमज्जयणं वोच्छिणं ॥

विमोक्ख णाम अट्टमं अज्जयणं

से बेमि समणुणस्स वा असमणुणस्स वा असणं वा, पाणं वा, खाइमं वा, साइमं वा;
वत्थं वा, पडिग्गहं वा, कंवलं वा, पायपुंछणं वा णो पाएजा, णो णिमंतिजा णो कुज्जा
वेयावडियं परं आढायमाणे त्ति बेमि ॥ ३९४ ॥ धुवं चयं जाणेजा असणं वा जाव
पायपुंछणं वा, लभिया णो लभिया, भुंजिया णो भुंजिया पयं विउत्ता विउकम्म विभत्तं
धम्मं जोसे माणे सभेमाणे चलेमाणे पाएजा वा णिमंतेजा वा कुज्जा वेयावडियं परं
अणाढायमाणे त्ति बेमि ॥३९५॥ इहमेगेसिं आयारगोयरे णो सुणिसंते भवइ, ते इह
आरंभट्ठी अणुवयमाणा "हण पाणा" घायमाणा हणओ यावि समणुजाणमाणा अदुवा
अट्टिणमाययंति, अदुवा वायाउ विउत्तंति; तंजहा--अत्थि लोए णत्थि लोए धुवे
लोए अधुवे लोए साइए लोए अणाइए लोए सपज्जवसिए लोए अपज्जवसिए लोए
मुक्कडेत्ति वा दुक्कडेत्ति वा कल्लगेत्ति वा पावेत्ति वा साहुत्ति वा असाहुत्ति वा, सिद्धीत्ति

वा, असिद्धीत्ति वा, गिरएत्ति वा अगिरएत्ति वा ॥ ३९६ ॥ जमिणं विष्णुडिवण्णा
 “मामगं धम्मं” पण्णवेमाणा, इत्थवि जाणह अकम्हा । एवं तेसिं णो सुअक्ख्वाए
 धम्मे णो सुपण्णत्ते धम्मे भवइ, से जहेयं भगवया पवेइयं आसुपण्णेण जाणया
 पासया, अदुवा गुत्ती वओगोयस्स त्ति बेमि ॥ ३९७ ॥ सवत्थ संमयं पावं, तमेव
 उवाइकम्म, एस महं विवेगे वियाहिए ॥ ३९८ ॥ गामे वा अदुवा रण्णे; णेव गामे
 णेव रण्णे, धम्ममायाणह पवेइयं माहणेण मईमया ॥ ३९९ ॥ जामा तिणिण उदाहिया,
 जेसु आयरिया संबुज्झमाणा समुट्ठिया ॥ ४०० ॥ जे णिव्हुयापावेहिं कम्मेहिं अणियाणा
 ते वियाहिया ॥ ४०१ ॥ उट्ठु अहं तिरियं दिसासु सव्वओ सव्वावंति च णं पाडियक्कं
 जीवेहिं कम्मसमरंभे णं ॥ ४०२ ॥ तं परिण्णाय मेहावी णेव सयं एएहिं काएहिं
 दंडं समारंभेज्जा, णेवण्णे एएहिं काएहिं दंडं समारंभावेज्जा, णेवण्णे एएहिं काएहिं
 दंडं समारंभेतेवि समणुजाणेज्जा ॥ ४०३ ॥ जेयण्णे एएहिं काएहिं दंडं समारंभंति
 तेसिंपि वयं लज्जामो ॥ ४०४ ॥ तं परिण्णाय मेहावी तं वा दंडं अण्णं वा दंडं णो
 दंडभी, दंडं समारंभेज्जासि त्ति बेमि ॥ ४०५ ॥ **पढमोद्देसो समत्तो ॥**

से भिक्खू परक्कमेज्ज वा, चिट्ठेज्ज वा, णिसीएज्ज वा, तुयट्ठेज्ज वा, सुसाणंसि वा
 सुण्णागारंसि वा, गिरिगुहंसि वा, रुक्खमूलंसि वा, कुंभारास्रयणंसि वा, हुरत्था वा क्हिं
 वि विहरमाणं तं भिक्खुं उवसंकमित्तु गाहावई बूया आउसंतो समणा ! अहं खलु तव
 अट्ठाए असणं वा, पाणं वा, खाइमं वा, साइमं वा, वत्थं वा, पडिग्गहं वा, कंबलं वा,
 पायपुंछणं वा, पाणाइं भूयाइं जीवाइं, सत्ताइं समारब्भ समुद्दिस्स कीयं, पामिच्चं
 अच्छिज्जं, अणिसिट्ठं, अभिहडं आहट्टु चेएमि, आवसहं वा समुस्सिणामि, से भुंजह,
 वसह ॥ ४०६ ॥ आउसंतो समणा ! भिक्खू तं गाहावई समणसं सवयसं पडियाइक्खे
 आउसंतो गाहावई ! णो खलु ते वयणं आढामि, णो खलु ते वयणं परिजाणामि, जो
 तुमं मम अट्ठाए असणं वा ४ वत्थं वा ४ पाणाइं वा, ४ जाव समारब्भ समुद्दिस्स कीयं
 पामिच्चं, अच्छिज्जं, अणिसिट्ठं, अभिहडं आहट्टु चेएसि, आवसहं वा समुस्सिणामि,
 से विरओ आउसो ! गाहावई ! एयस्स अकरणयाए ॥ ४०७ ॥ से भिक्खुं परिक्रमेज्ज
 वा जाव हुरत्था वा क्हिंचि विहरमाणं तं भिक्खुं उवसंकमित्तु गाहावई आयगयाए
 पेहाए असणं वा ४ वत्थं वा ४ पाणाइं ४ जाव आहट्टु चेएइ आवसहं वा समु-
 स्सिणाइ तं भिक्खुं परिघासिउं, तं च भिक्खू जाणेज्जा सह संमइयाए परवागरणं
 अण्णेसिं वा अंतिए सोव्हा 'अयं खलु गाहावई ! मम अट्ठाए अरणं वा ४ वत्थं वा
 ४ पाणाइं वा ४ समारब्भ जाव चेएइ आवसहं वा समुस्सिणाइ तं च भिक्खू संप-

डिलेहाए आगमेत्ता आणवेज्जा अणासेवणाए त्ति बेमि ॥४०८॥ भिक्खुं च खलु पुट्ठा वा अपुट्ठा वा जे इमे आह्वय गंधा वा फुसंति से हंता ॥ “ हणह खणह छिंदह दहह पयह आलुं पह विलुं पह सहसा कारेह विप्परामुसह ” ते फासे धीरो पुट्ठो अहियासए अदुवा आयारगोयरमाइक्खे तक्कियाणमणे लिंसं अदुवा वइगुत्तिए गोयरस्स अणु-पुत्वेण सम्मं पडिलेहाए आयगुत्ते बुद्धेहिं एवं पवेइयं ॥४०९॥ से समणुण्णे असम-णुण्णस्स असणं वा ४ वत्थं वा ४ णोपाएज्जा णोणिमंतेज्जा, णो कुज्जा वेयावडियं परं आदायमाणे त्ति बेमि ॥४१०॥ धम्ममायाणह पवेइयं माहणेण मइमया समणुण्णे समणुण्णस्स असणं वा ४ वत्थं वा ४ पाएज्जा णिमंतेज्जा कुज्जा वेयावडियं परं आदायमाणे त्ति बेमि ॥४११॥ **अट्ठं अज्झयणं बीओद्देसो समत्तो ॥**

मज्झिमेणं वयसावि एगे संबुज्झमाणा समुट्ठिया ॥४१२॥ सोच्चा मेहावी वयणं पडि-याणं णिसामित्ता ॥४१३॥ समियाए धम्मे आरिएहिं पवेइए ॥४१४॥ ते अणवकंख-माणा अणइवाए माणा अपरिग्गहेमाणा णो परिग्गहावंति सव्वावंति च णं लोगंसि । णिहाय दंडं पाणेहिं पावं कम्मं अकुट्ठमाणे एस महं अंग्थे वियाहिए, ओए जुइमस्स खेयण्णे उववायं चवणं च णच्चा ॥४१५॥ आहारोवचया देहा, परिसह पभंगुरा । पासहेगे सध्विंदिएहिं परिगिलायमाणेहिं ॥४१६॥ ओए दयं दयइ ॥ ४१७ ॥ जे संणिहाणसत्थस्स खेयण्णे से भिक्खू कालण्णे बलण्णे मायण्णे खणण्णे विणयण्णे समयण्णे परिग्गहं अममायमाणे कालेणुट्ठाइ अपडिण्णे दुहओ छेत्ता णियाइ ॥४१८॥ तं भिक्खुं सीयफासपरिवेवमाणगायं उवसंकमिच्चु गाहावई बूया, “ आउसंतो समणा ! णो खलु ते गामधम्मा उव्वाहंति ” आउसंतो गाहावई ! णो खलु मम गामधम्मा उव्वाहंति सीयफासं च णो खलु अहं संचाएमि अहियासित्तए । णो खलु मे कप्पइ अगणिकायं उज्जालेत्तए पज्जालेत्तए वा कायं आयावेत्तए पयावे-त्तए वा, अण्णेसि वा वयणाओ ॥४१९॥ सिया से एवं वयंतस्स परो अगणिकायं उज्जालेत्ता पज्जालेत्ता कायं आयावेज्जा वा पयावेज्जा वा, तं च भिक्खू पडिलेहाए आगमेत्ता आणविज्जा, अणासेवणाए त्ति बेमि । ४२०॥ **तइओद्देसो समत्तो ॥**

जे भिक्खू तिहिं वत्थेहिं परिवुसिए पायचउत्थेहिं तस्स णं णो एवं भवइ “ चउत्थं वत्थं जाइस्सामि ” से अहेसणिज्जाइं वत्थाइं जाएज्जा, अहापरिग्गहियाइं वत्थाइं धारेज्जा, णो धोएज्जा णो रएज्जा णो धोयरत्ताइं वत्थाइं धारेज्जा, अपलिउंचमाणे, गामंतरेसु, औमचेलिए, एयं खु वत्थधारिस्स सामग्गियं ॥ ४२१ ॥ अह पुण एवं जाणज्जा; उवाइकंते खलु हेमंते, गिम्हे पडिवण्णे अहापरिजुण्णाइं वत्थाइं

परिद्वेजा २ अदुवा संत्तरुत्तरे, अदुवा ओमचेले, अदुवा एगसाडे, अदुवा अचेले
लाघवियं आगममाणे, तत्रे से अभिसमण्णागए भवइ । जमेयं भगवया पवेइयं तमेव
अभिसमेच्चा, सव्वओ सव्वत्ताए सम्मत्तमेव समभिजाणिया । ४२२। जस्स णं भिक्खुस्स
एवं भवइ पुट्ठो खलु अहमंसि, णालमहमंसि सीय फासं अहियासित्ताए, से वसुमं सव्व-
समण्णागयपण्णाणेणं अप्पाणेणं केइ अकरणयाए आउट्टे, तवस्सिणो ह्हु तं सेयं जमेगे
विहमाइए तत्थावि तस्स कालपरियाए, से वि तत्थ विअंतिकारए इच्चेयं विमोहाय-
यणं हियंसुहंखमंणिस्सेसं आणुगामियं त्ति बेमि । ४२३। **चउत्थोद्देशो समत्तो ।**

से भिक्खू दोहिं वत्थेहिं परिचुसिए पायतइएहिं, तस्स णं णो एवं भवइ तइयं वत्थं
जाइस्सामि, से अहेसणिज्जाइं वत्थाइं ज्ञाएज्जा, जाव एवं खलु तस्स भिक्खुस्स साम-
ग्गियं ॥ ४२४॥ अह पुण एवं जाणेज्जा, उवाइकंते खलु हेमंते, गिम्हे पडिबण्णे,
अहा परिजुण्णाइं वत्थाइं परिद्वेजा २ अदुवा संत्तरुत्तरे, अदुवा ओमचेले अदुवा
एगसाडे, अदुवा अचेले, लाघवियं आगममाणे, तत्रे से अभिसमण्णागए भवइ,
जमेयं भगवया पवेइयं तमेव अभिसमेच्चा सव्वओ सव्वत्ताए सम्मत्तमेव समभिजा-
णिया ॥ ४२५॥ जस्सणं भिक्खुस्स एवं भवइ, पुट्ठो अचलो अहमंसि, णालमहमंसि
गिहंतरसंकमणं भिक्खायरियं गमणाए, से एवं वयंतस्स परो अभिहडं असणं वा ४
आहट्टु दलएज्जा से पुव्वामेव आलोएज्जा आउसंतो गाहावई ! णो खलु मे कप्पइ
अभिहडं असणं वा ४ भोत्तए वा, पायए वा, अण्णे वा एयप्पगारे ॥ ४२६ ॥
जस्सणं भिक्खुस्स अयं पगप्पे; अहं च खलु पडिण्णत्तो अपडिण्णत्तेहिं गिलाणो
अगिलाणेहिं अभिकंख साहम्मिएहिं कीरमाणं वेयावडियं साइज्जिस्सामि । अहं
वावि खलु अपडिण्णत्तो पडिण्णत्तस्स अगिलाणो गिलाणस्स, अभिकंख साहम्मि-
अस्स कुज्जा वेयावडिअं करणाए ॥ ४२७॥ आहट्टु परिणं अणुक्खिस्सामि, आहडं
च साइज्जिस्सामि १ आहट्टु परिणं आणक्खेस्सामि, आहडं च णो साइज्जिस्सामि २
आहट्टु परिणं, णो आणक्खेस्सामि, आहडं च साइज्जिस्सामि ३ आहट्टु परिणं णो
आणक्खेस्सामि, आहडं च णो साइज्जिस्सामि ४ एवं से अहाकिट्टियमेव, धम्मं सम-
हिजाणमाणे मंते विरए सुसमाहियलेसे तत्थावि तस्स कालपरियाए, से तत्थ
विअंतिकारए, इच्चेयं विमोहाययणं हियं सुहं खमं णिस्सेसं आणुगामियं त्ति बेमि
॥ ४२८॥ **अट्ठं अज्जयणं पंचमोद्देशो समत्तो ॥**

जे भिक्खू एगेण वत्थेण परिचुसिए पायविइएण, तस्सणं णो एवं भवइ, “ विइयं
वत्थं जाइस्सामि” से अहेसणिज्जां वत्थं जाएज्जा, अहापरिग्गहियं वा वत्थं धारेज्जा

जाव गिम्हे प्रडिवण्णे अहा परिजुण्णं वत्थं परिट्टवेज्जा २ ता अदुवा एग साडे अदुवा
अचेले लाघवियं आगममाणे, जाव सम्भत्तमेव समभिजाणिया, जस्त णं भिक्खुस्स
एवं भवइ एगे अहमंसि ण मे अत्थि कोइ ण याहमवि कस्स वि, एवं से एगागिणमेव
अप्याणं समभिजाणिज्जा लाघवियं आगममाणे तवे से अभिसमण्णागए भवइ जाव
समभिजाणिया ॥४२९॥से भिक्खू वा भिक्खुणी वा असणं वा ४ आहारेमाणे णो
वामाओ हणुयाओ दाहिणं हणुयं संचारेज्जा आसाएमाणे, दाहिणाओ वा हणुयाओ
वामं हणुयं णो संचारेज्जा आसाएमाणे से अणासायमाणे लाघवियं आगममाणे,
तवेसे अभिसमण्णागए भवइ । जमेयं भगवया पवेइयं तमेव अभिसमेच्चा सव्वओ
सव्वत्ताए सम्भत्तमेव समभिजाणिया ॥ ४३० ॥ जस्सणं भिक्खुस्स एवं भवइ,
से गिलामि च खल्ल अहं इमंमि समए णो संचाएमि इमं सरीरगं अणुपुव्वेण
परिवहित्तए,से अणुपुव्वेण आहारं संवट्टेज्जा अणुपुव्वेण आहारं संवट्टिता, कसाए
पयणुए किच्चा,समाहियच्चे फलगावयट्ठी उट्ठाया भिक्खू अभिण्वुड्ढे अणुपविसित्ता
गामं वा, णयरं वा, खेडं वा, कव्वडं वा, मंडवं वा, पट्टणं वा, दोणमुहं वा, आगरं वा,
आसमं वा, संणिवेसं वा, णिगमं वा, रायहारिणं वा, तणाइं जाएज्जा, तणाइं जाइत्ता से
तमायाए एगंतमवक्कमिज्जा, एगंतमवक्कमित्ता, अप्पंडे-अप्पमाणे-अप्पवीए-अप्प-
हरिए-अप्पोसे-अप्पोदए-अप्पुत्तिंग-पणग-दग मट्ठियमक्कडासंताणए पडिलेहिय २
पमजिय २ तणाइं संथरेज्जा तणाइं संथरेत्ता एत्थवि समए इत्तरियं कुज्जा ॥४३१॥ तं
सव्वं सव्ववाइं ओए तिण्णे, छिण्णकहं कहे, आईयट्ठे अणाइए चिच्चाण भिउरं कायं
संविहूय विरूवरूवे परिसहो वसग्गे अस्सि विसंभणयाए मेरवमणुच्चिण्णे, तत्थावि तस्स
कालपरियाए जाव अणुगामियं ति वेमि ॥४३२॥ **छट्ठोद्वेसो समत्तो ॥**

जे भिक्खू अचेले परिवुसिए तस्स णं भिक्खुस्स एवं भवइ चाएमि अहं तणफासं
अहियासित्तए, सीयफासं अहियासित्तए, तेउफासं अहियासित्तए, दंसमसगफासं
अहियासित्तए, एगयरे अण्ययरे विरूवरूवे फासे अहियासित्तए हिरिपडिच्छायणं
चइहं णो संचाएमि अहियासित्तए, एवं से कप्पइ कडिब्रंधणं धारित्तए ॥४३३॥
अदुवा तत्थ परक्कमंतं भुज्जो अचेले तणफासा फुसंति, सीयफासा फुसंति, तेउफासा
फुसंति, दंसमसगफासा फुसंति, एगयरे अण्ययरे विरूवरूवे फासे अहियासेइ अचेले
लाघवियं आगममाणे जाव समभिजाणिया ॥४३४॥ जस्सणं भिक्खुस्स एवं भवइ
अहं च खल्ल अण्णेसिं भिक्खूणं असणं वा ४ आहट्टु दलइस्सामि, आहडं च साइ-
ज्जिस्सामि १ जस्सणं भिक्खुस्स एवं भवइ अहं च खल्ल अण्णेसिं भिक्खूणं असणं वा ४

आहट्टु दलइस्सामि आहडं च णो साइज्जिस्सामि २ जस्सणं भिक्खुस्स एवं भवइ; अहं च खलु असणं वा ४ आहट्टु णो दलइस्सामि आहडं च साइज्जिस्सामि ३ जस्सणं भिक्खुस्स एवं भवइ अहं च खलु अण्णेसिं भिक्खूणं असणं वा ४ आहट्टु णो दलइस्सामि आहडं च णो साइज्जिस्सामि ॥४॥ अहं च खलु तेण अहाइरित्तेण अहेसणिज्जेण अहापरिग्गहिणं असणेणं वा ४ अभिकंख साइम्मियस्स कुब्बा वेयावडियं करणाए, अहं वावि तेण अहाइरित्तेण अहेसणिज्जेण अहापरिग्गहिणं असणेणं वा ४ अभिकंख साइम्मिएहिं कीरमाणं वेयावडियं साइज्जिस्सामि लाप्रवियं आगममाणे जाव सम्मत्तमेव समभिजाणिया ॥४३५॥ जस्सणं भिक्खुस्स एवं भवइ से गिलामि च खलु अहं इमम्मि समए इमं सरीरगं अणुपुव्वेणं परिवहित्ताए, से अणुपुव्वेणं आहारं संवट्टेज्जा, संवट्टइत्ता कसाए पयणूए किच्चा समाहिअवे फलगावयट्ठी उट्ठाव भिक्खू अभिणिव्वुद्धे, अणुपविसित्ता गामं वा णयरं वा जाव रायहणिं वा तणाइं जाएज्जा, से तमायाए एगंतमयक्कमेज्जा, एगंतमयक्कमेत्ता अप्पंडे जाव तणाइं संथरेज्जा, इत्थवि समए कार्यं च, जोगं च, इरियं च, पच्चक्खाएज्जा ॥४३६॥ तं सबं सच्चावाई भोए तिण्णे छिण्णकहं कहे आईयट्टे अणाइए चेच्चाण भिउरं कार्यं सविहूणिय विरूवरूवे परिअसोवसग्गे अरिंति विसंभणयाए भेरवमणुच्चिण्णे तत्थावि तस्सकालपरियाए से तत्थ विअंतिकारए इच्चेयं विमोहाययणं हियं, सुहं, खमं, जिस्सेसं आणुगामियं ति वेमि ॥४३७॥

अट्टमं अज्झयणं सत्तमोद्देशो समत्तो ॥

अणुपुव्वेण विमोहाइं, जाइं धीरा समासज्ज; वसुमंतो, मइमंतो ख्वं णच्चा अणेलिसं ॥४३८॥ दुविहंपि विइत्ताणं, बुद्धा धम्मस्स पारगा; अणुपुव्वीए संखाए, आरंभाओ तिउट्टइ ॥४३९॥ कसाए पयणूए किच्चा, अप्पाहारो तितिक्खए; अह भिक्खू गिलाएज्जा, आहारस्सेव अंतियं ॥४४०॥ जीवियं णाभिकंखेज्जा, मरणं णोवि पत्थए; दुहओवि ण सज्जेज्जा, जीविए मर णे तहा ॥ मज्झत्थो णिज्जरापेही, समाहिमणुपालए; अंतो बहिं विउत्तिसज्ज, अज्झत्थं सुद्धमे सए ॥४४१॥ जं किंचुवक्कमं जाणे, आउक्खेमस्स अप्पणो; तस्सेव अंतरद्धाए, खिण्पं सिक्खेज्ज पंडिए ॥४४२॥ गामे वा अट्टुवा रण्णे, थंडिलं पडिलेहिया; अप्पपाणं तु विण्णाय, तण्णइं संथरे मुणी ॥४४३॥ अणाहारो तुअट्टेज्जा, पुट्ठो तत्थइहियासए; णाइवेलं उवचरे, माणुस्सेहिं वि पुट्टुवा ॥४४४॥ ससप्पगा य जे पाणा, जे उ उट्टुमहेचरा; भुंजंति मंससोणियं, ण छणे ण पमज्जाए ॥४४५॥ पाणा देहं विहिंसति, ठाणाओ ण वि उब्भमे; आसवेहिं विवित्तेहिं, तिप्पमाणोइहियासए ॥४४६॥ गथेहिं विवित्तेहिं, आउकालस्स पारए; पग्गहियतरं चयेयं, दवियस्स विया-

णओ।४४७। अयं से अंवरे धम्मे, णायपुत्तेण साहिए; आयवज्जं पडीयारं, विज्जहिज्जा तिहा तिहा।४४८। हरिएसु ण णिवज्जेज्जा, थंडिलं मुणिआ सए; विउस्सिज्ज अणाहारो पुट्ठो तत्थऽहियासए।४४९। ईदिएहिं गिलायंतो, समियं आहारो मुणी; तहावि से अगारिहे, अचले जे समाहिए।४५०। अभिक्कमे पडिक्कमे, संकुचए पसारए; काय-साहारणट्ठाए, इत्थं वा वि अचेयणे।४५१। परिकमे परिकिल्लंते, अदुवा चिट्ठे अहा-यए; ठाणेण परिकिल्लंते, णिसिद्धिज्जाय अंतसो।४५२। आसीणेऽणेल्लिसं मरणं, ईदि-याणि समीरए; कोलावासं समासज्ज, वितहं पाउरेसए।४५३। जओ वज्जं समुप्पज्जे, ण तत्थ अवलंबए; तओ उक्कसे अप्पाणं, फासे तत्थ अहियासए।४५४। अयं चाय-यतरे सिया, जो एवं अणुपालए; सच्चगायणिरोहेवि, ठाणाओ ण विउब्भमे।४५५। अयं से उत्तमे धम्मे, पुच्चट्ठाणस पग्गहे; अचिरं पडिलेहित्ता, विहरे चिट्ठ माहणे।४५६। अचित्तं तु समासज्ज, ठावए तत्थ अप्पगं; वोसिरे सच्चसो कायं, ण मे देहे परीसहा।४५७। जावज्जीवं परीसहा, उवसग्गा इय संख्या; संबुडे देहभेयाए इय पण्णेऽहियासए ॥४५८॥ मेउरेसु ण रज्जेज्जा, कामेसु बहुयरेसु वि; इच्छा लोभं ण सेवेज्जा, धुवंवणं सपेहिया।४५९। सासएहिं णिमतेज्जा, दिध्वमायं ण सहहे; तं पडि-बुज्ज माहणे, सच्चं णुमं विहूणिया।४६०। सच्चट्ठेहिं अमुच्छिए, आउकालस्स पारए; तितिक्वं परमं णव्वा, विमोहणयरं हियं त्ति वेमि।४६१। अट्ठमोहेसो समसो ॥

॥ उवहाण-सुयं णाम नवमं अज्जयणं ॥

अहासुयं वइस्सामि, जहा से समणे भगवं उट्ठाए; संखाए तंसि हेमंते, अहुणा पव्व-इए रीइत्था।४६२। णो चेविमेण वत्थेण, पिहिस्सामि तंसि हेमंते; से पारए आव-कहाए, एवं खु अणुधम्मियं तस्स।४६३। चत्तारि साहिए मासे, बहवे पाणजाइया आगम्म; अभिरुज्झकार्यं विहरिसु, आरुसियाणं तत्थ हिंसिसु।४६४। संवच्छरं साहियं मासं, जं ण रिक्कासि वत्थगं भगवं; अचेलए तओ चाई, तं वोसिरिज्ज वत्थामणगारे।४६५। अदु पोरिसिं तिरियंभित्ति, चक्खुमासज्ज अंतसो ज्ञायइ; अह चक्खुभीया संहिया, ते हंता २ बहवे कंदिसु।४६६। सयणेहिं वित्तिमिस्सेहिं, इत्थीओ तत्थ से परिणाय; सागारियं ण सेवेइ य से सयं पवेसिया ज्ञाइ।४६७। जे के इमे अगारत्था, मीसीभावं पहाय से ज्ञाइ; पुट्ठो वि णाभिभासिसु, गच्छइ णाइवत्तइ अंजू ॥४६८॥ णो सुकरमेयमेगेसिं, णाभिभासे अभिवायमाणे हयपुच्चे तत्थ दंडेहिं, लूसियपुच्चे अप्पपुण्णेहिं ॥४६९॥ फरसाईं दुत्तितिक्खाईं, अइ अच्च मुणी परक्कममाणे; आवाय-णट्ठगीयाईं, दंडजुज्जाईं मुट्ठिजुज्जाईं।४७०। गदिए मिहो कहासु, समयंमि णायसुए

विसोए अदक्खू; एयाइं सो उरालाईं, गच्छइ णायपुत्ते असरणाए ॥४७१॥ अविसा-
 हिए दुवे वासे, सीओदं अमोच्चा णिक्खंते; एगत्तगए पिहियच्चे, से अहिण्णायदंसणे-
 संते ॥४७२॥ पुद्विं च आउक्कायं, तेउक्कायं च; बाउक्कायं च; पणगाइं बीयहरियाइं
 तसकायं च सब्वसो णच्चा, एयाइं संति पडिलेहे, चित्तमंताइं से अभिण्णाय; परिवज्जिय
 विहरित्था, इइ संखाय से महावीरे ॥४७३॥ अदु थावरा तसत्ताए, तसजीवा य
 थावरत्ताए; अदुवा सब्वजोणिया, सत्ता कम्मुणा कप्पिया पुटो बाला ॥४७४॥ भगवं
 च एवमणोसिं, सोवहिए हु लुप्पई बाले; कम्मं च सब्वसो णच्चा, तं पडियाइक्खे
 पावगं भगवं ॥४७५॥ दुविहं समिच्च मेहावी, किरियमक्खायमणेलिसं गाणी; आयाण-
 सोयमइवायसोयं जोगं च सब्वसोणच्चा ॥४७६॥ अइवत्तियं अण्णउट्ठिं, सयमणोसिं
 अकरणयाए; जस्सित्थिओ परिण्णया, सुव्वकम्मावहाओ से अदक्खू ॥४७७॥ अहा-
 कइं ण से सेवे, सव्वसो कम्मुणा य अदक्खू; जं किंवि पावगं भगवं; तं अकुव्वं वियडे
 भुजित्था ॥४७८॥ णो सेवइ य परवत्थं, परपाएवि से ण भुंजित्था; परिवज्जियाण
 ओमाणं गच्छइ संखडिं असरणयाए ॥४७९॥ मायण्णे असणपाणस्स, णाणुगिद्धे रसेसु
 अपडिण्णे; अच्छिपि णो पमज्जिजा णोवि य कंझयए मुणीं गायं ॥४८०॥ अप्यं तिरियं
 पेहाए, अप्यं पिट्ठओ व पेहाए; अप्यं बुइए ऽपडिभाणी, पंथपेही चरे जयमाणे
 ॥४८१॥ सिसिरंसि अद्दपडिबण्णे, तं वोसिज्ज वत्थमण्णारे; पसारित्तु ब्राह्मं परक्कमे, णो
 अवलंबिया ण खंधंसि ॥४८२॥ एस विही अणुक्कतो, माहणेण महमया; बहुसो अप्प-
 डिण्णेण, भगवया एवं रियंति त्ति वेमि ॥४८३॥ **पढमोद्देशो समत्तो ॥**

चरियासणाइं सेज्जाओ, एगइयाओ जाओ बुइयाओ; आइक्खताइं सयणासणाइं,
 ज्जाइं सेवित्था से महावीरो ॥४८४॥ आवेसणं समापवासु; पणियसालासु, एगया
 वासो; अदुवा पलियट्ठणेसु, पलालपुंजेसु एगया वासो ॥४८५॥ आगंतारे आरा-
 मागारे तह य णमरे वि एगया वासो; सुसाणे सुण्णगारे वा, रुक्खमूले वि एगया
 वासो ॥४८६॥ एएहिं मुणीं सयणेहिं, समणे आसी पतेरसवासे; राइं दियं पि
 जयमाणे, अप्पमत्ते समाहिए झाइ ॥४८७॥ णिहंपि णो पगाम्माए, सेवइ भगवं
 उट्ठाए; जग्गावई य अप्पाणं, ईसिं साइ य अपडिण्णे ॥४८८॥ संबुज्जमाणे
 पुणरवि, आसिसु भगवं उट्ठाए; णिक्खम्म एगया राओ, बहिं चंक्रमिया मुहुत्तागं
 ॥४८९॥ सयणेहिं तत्थुवसग्गा, भीमा आसी अणेगरूवाय; संस्पग्गाय जे पाणा,
 अदुवा जे पक्खिणो उवचरंति ॥४९०॥ अदु कुचरा उवचरंति गामरक्खाय
 सत्तिहत्थाय; अदुगामिया उवसग्गा इत्थी एगइया पुरिसो यं ॥४९१॥ इहलोइ-
 याइं परलोइयाइं भीमाइं अणेगरूवाइं; अवि सुन्निभदुब्भिभंगंधाईं सद्दाइं अणेगरूवाइं

अहियासए सया समिए, फासाइं विरूवरूवाइं अरइं रईं अभिभूय, रीयइ माहणे
 अब्रहुवाइं॥४९२॥स जणेहिं तत्थ पुच्छिसु, एगचरा वि एगया राओ; अवाहिए
 कसाइत्था, पेहमाणे समाहिं अपडिण्णे ॥ ४९३ ॥ अयमंतरंसि को एत्थ, अहमं-
 सित्ति भिक्खू आहट्टु; अयमुत्तमे से धम्मे तुसिणीए कसाइए झाइ ॥४९४॥
 जंसिप्पेगे पवेयंति, तिसिरे मारुए पवार्यते; तंसिप्पेगे अणगारा, हिमवाए
 णिवायमेसंति ॥४९५॥ संघाडिओ पवेसिस्सामो. एहा य समादहमाणा, पिहिया
 वा सन्नलामो, अइदुक्खे हिमगसफासा ॥४९६॥ तंसि भगवं अपडिण्णे, अहे वियडे
 अहियासए दविए, णिक्खम्म एगया राओ ठाइए भगवं समियाए ॥४९७॥ एस
 विही अणुक्कंतो माहणेण मईमया; बहुसो अपडिण्णेण, भगवया एवं रीयंति त्ति बेमि
 ॥ ४९८ ॥ **णवमं अज्झयणं बीओद्देसो समत्तो ॥**

तणफासे, सीयफासे, तेउफासे य, दंसमसगे य; अहियासए सया समिए, फासाइं
 विरूवरूवाइं ॥ ४९९ ॥ अह दुच्चरलाढमचारी, वज्जभूमिं च सुब्भभूमिं च; पंतं
 सेज्जे सेविसु, आसणगाणि चैव पंताणि ॥५००॥ लाढेहिं तस्सुवसग्गा, ब्रहवे जाणवया
 लूसिसु; अह लूसदेसिए भत्ते, कुक्कुरा तत्थ हिंसिसु णिवइंसु ॥ ५०१ ॥ अप्पे जणे
 णिवारेइ, लूसणए सुणए दसमाणे; सुसुकारंति आहंसु 'समणं कुक्कुरा दसंतु' त्ति
 ॥५०२॥ एल्लिक्खए जणे भुज्जो, ब्रहवे वज्जभूमिं फरुसासी; लट्ठिं गहाय णालियं,
 समणा तत्थ य विहरिसु ॥५०३॥ एवं पि तत्थ विहरंता, पुट्टपुव्वा अहेसि सुणएहिं;
 संलुंचमाणा सुणएहिं, दुच्चरगाणि तत्थ लाढेहिं ॥५०४॥ णिहाय दंडं पाणेहिं, तं
 कार्यं वोसिज्जमणभारे ॥ अह गामकंटए भगवं, ते अहियासए अभिसमेच्चा ॥५०५॥
 णाओ संगामसीसे वा, पारए तत्थ से महावीरे । एवं पि तत्थ लाढेहिं, अलद्धपुव्वो
 वि एगया गामो ॥५०६॥ उवसंकमंतमपडिण्णं, गामंतियंपि अप्पत्तं; पडिणिक्ख-
 मित्तु लूसिसु, एयाओ परं पलेहित्ति ॥ ५०७ ॥ हयपुव्वो तत्थ दंडेण, अदुवा
 मुट्ठिणा, अदु कुंताइफलेणं; अदु लेलुणा कवालें, हंता हंता ब्रहवे कंदिसु ॥५०८॥
 मंसाइ छिण्णपुव्वाइं, उट्ठंभिया एगया कार्यं; परीसहाइं लुंचिसु, अदुवा पंसुणा उवकरिसु
 ॥ ५०९ ॥ उवाल्लइय णिहणिसु, अदुवा आसणाओ खलइंसु; वोसट्टकाए पणयासी,
 दुक्खसहे भगवं अपडिण्णे ॥५१०॥ सूरुो संगामसीसे व, संवुडे तत्थ से महा-
 वीरे, पडिसेवमाणे फरुसाइं, अचेले भगवं रीइत्था ॥५११॥ एस विही अणुक्कंतो,
 माहणेण मईमया; बहुसो अपडिण्णेण भगवया एवं रीयंति, त्ति बेमि ॥५१२॥

णवमं अज्झयणं तद्दओद्देसो समत्तो ॥

ओमोयरियं चाण्ड, अपुट्टेवि भगवं रोमेहिं; पुट्टो वा से अपुट्टा वा, णो से साइ-
 ज्ज तेइच्छं ॥५१३॥ संसोहणं च वमणं च, गायढ्मणं च सिणाणं च; संवा-
 हणं ण से कप्पे, दंतपक्खालणं च परिण्णाए ॥५१४॥ विरए य गामवम्मेहिं
 रोयइ माहणो अवहुवाइं; सिसिरंमि एगया भगवं, छायाए झाइ आसी य ॥५१५॥
 आयावई य गिम्हाणं अच्छइ उक्कुडुए अभितावे । अदु जावइत्थ ल्हेणं,
 ओयणमंधुकुम्मासेणं ॥५१६॥ एयाणि तिण्णि पडिसेवे, अट्टमासे य; जावयं भगवं;
 अवि इत्थ एगया भगवं, अट्टमासं अदुवा मासंपि ॥५१७॥ अवि साहिए दुवे मासे,
 छप्पिमासे अदुवा अपिचित्ता । रायोवरायं विहरित्था अपडिण्णे अण्णगिलायमेगया
 भुंजे ॥५१८॥ छट्टेण एगया भुंजे, अदुवा अट्टमेणं दसमेणं; दुवालसमेण एगया भुंजे,
 पेहमाणे समाहिं अपडिण्णे ॥५१९॥ णच्चा णं से महावीरे, णोवि य पावगं सयमकासी ॥
 अण्णेहिं वा ण कारित्था, कीरंतंपि णाणुजाणित्था ॥५२०॥ गामं पविस्स णयरं
 वा, घासमेसे कडं परट्टाए; सुविसुद्धमेसिया भगवं, आययजोगयाए सेवित्था
 ॥५२१॥ अदु वायसा दिगिच्छित्ता, जे अण्णे रसेसिणो सत्ता; घासेसणाए चिट्ठंति,
 सययं णिवइए य पेहाए ॥५२२॥ अदु माहणं व समणं वा, गामपिंडोलगं च
 अइहिं वा; सोवागं मूसियारं वा, कुक्कुरं वा विट्ठियं पुरओ ॥५२३॥ वित्तिच्छेयं वन्तो,
 तेसिमपत्तियं परिहरंतो; मंदं परक्कमे भगवं, अहिंसमाणो घासमेसित्था ॥५२४॥
 अविस्इयं वा सुक्कं वा, सीयपिंडं पुराणकुम्मासं; अदु बुक्कसं पुलगं वा, लद्धे पिंडे
 अलद्धए दविए ॥५२५॥ अवि झाइ से महावीरे, आसणत्थे अकुक्कुए ज्ञाणं;
 उट्टमहेयं तिरियं च, पेहमाणे समाहिमपडिण्णे ॥५२६॥ अकसाई विगयगेही य,
 सदरूत्थेसु अमुच्छिण्णं झाइ; छउमत्थो वि परक्कममाणो ण पमायं सइंपि कुवित्था
 ॥५२७॥ सयमेव अमिसमागम्म, आययजोगमायसोहीए । अभिणिव्वुडे अमाइल्ले
 आवकहं भगवं समिआसी ॥ एस विही अणुक्कंतो माहणेण मईमया; बहुसो अपडि-
 ण्णेण भगवया एवं रोयति त्ति बेमि ॥५२८॥ **चउत्थोद्देशो समत्तो ॥**
उवहाणसुयं णवमज्झयणं समत्तं ॥

॥ बंभचेर णाम पढ्मो सुयक्खंधो समत्तो ॥

विद्ये सुयवस्वंधे

पिंडेसणा णाम पढमं अज्जयणं

से भिक्खू वा, भिक्खुणी वा, गाहावइकुलं पिंडवायपडियाए अणुपविट्ठे समाणे, से जं पुणजाणेज्जा असणं वा पाणं वा खाइमं वा साइमं वा पाणेहिं वा पणएहिं वा बीएहिं वा, हरिएहिं वा, संसत्तं, उग्गिस्सं, सीओदएण वा ओसित्तं, रयसा वा परिघासिर्यं, तहप्पगारं असणं वा पाणं वा खाइमं वा साइमं वा, परहत्थंसि वा परपायंसि वा, अफासुयं अणेसणिज्जंति मण्णमाणे लाभेवि संते णो पडिगाहेज्जा ॥५२९॥ से य आहच्च पडिग्गाहिए सिया से तं आयाय एगंतमवक्कमेज्जा, एगंतमवक्कमित्ता अहे आरामंसि वा अहे उवस्सयंसि वा, अप्पंडे-अप्पपाणे-अप्पवीए, अप्पहरिए, अप्पोसे अप्पोदए, अप्पुत्तिग-पणग-दग-मट्टियमक्कडासंताणए विगिंचिय विगिंचिय उम्मीसं विसोहिय वितोहिय तओ संजयामेव भुंजिज्ज वा, पीइज्ज वा, जं च णो संचाइज्जा भोत्तए वा पायए वा, से तमायाय एगंतमवक्कमिज्जा, एगंतमवक्कमित्ता, अहे ष्णामथंडिलंसि वा, अट्टिरासिंसि वा, किट्टिरासिंसि वा, तुसरासिंसि वा, गोमयरसिंसि वा अण्णयरंसि वा तहप्पगारंसि थंडिलंसि पडिलेहिय २ पमच्चिय २ तओ संजयामेव परिट्टविज्जा ॥५३०॥ से भिक्खू वा, भिक्खुणी वा गाहावइकुलं पिंडवायपडियाए अणुपविट्ठे समाणे, से जाओ पुण ओसहीओ जाणेज्जा कसिणाओ सासिआओ अविदलकडाओ अतिरिच्छच्छिण्णाओ, अब्बोच्छिण्णाओ तरुणियं वा छिवाडिं अणभिकंतभज्जियं पेहाए, अफासुयं अणेसणिज्जंति मण्णमाणे लाभे संते णो पडिगाहेज्जा ॥५३१॥ से भिक्खू वा, भिक्खुणी वा, जाव पविट्ठे समाणे से जाओ पुण ओसहीओ जाणेज्जा, अकसिणाओ असासियाओ, विदलकडाओ, तिरिच्छच्छिण्णाओ, वेच्छिण्णाओ, तरुणियं वा छिवाडिं अभिकंतं भज्जियं पेहाए फासुयं एसणिज्जंति मण्णमाणे लाभे संते पडिगाहेज्जा ॥५३२॥ से भिक्खू वा भिक्खुणी वा जाव पविट्ठे समाणे से जं पुण जाणेज्जा, पिहुयं वा बहुरयं वा, भुज्जियं वा, मंथुं वा, चाउलं वा, चाउलपलं वं वा, सइं संभज्जियं, अफासुयं अणेसणिज्जंति मण्णमाणे लाभे संते णो पडिगाहेज्जा ॥५३३॥ से भिक्खू वा, भिक्खुणी वा, जाव पविट्ठे समाणे से जं पुण जाणेज्जा, पिहुयं वा जाव चाउलपलं वं वा असइं भज्जियं दुक्खुत्तो वा भज्जियं तिक्खुत्तो वा भज्जियं फासुयं एसणिज्जं जाव लाभे संते पडिगाहेज्जा ॥५३४॥ से भिक्खू वा भिक्खुणी वा, गाहावइकुलं जाव पविसिउकामे णो अण्णउत्थिएण वा

गारत्थिएण वा परिहारिओ वा अपरिहारिएणं सद्धिं गाहावइकुलं पिंडवायपडियाए पविसिज्ज वा णिकखमेज्ज वा ॥५३५॥ से भिक्खू वा भिक्खुणी वा, बहिया विवारभूमिं वा, विहारभूमिं वा, णिकखममाणे वा पविसमाणे वा, णो अण्णउत्थिएण वा गारत्थिएण वा परिहारिओ वा अपरिहारिएण वा सद्धिं बहिया विवारभूमिं वा विहारभूमिं वा णिकखमिज्ज वा पविसिज्ज वा ॥५३६॥ से भिक्खू वा भिक्खुणी वा गामाणुगामं दूइज्जमाणे णो अण्णउत्थिएण वा गारत्थिएण वा, परिहारिओ अपरिहारिएण वा, सद्धिं गामाणुगामं दूइज्जिज्जा ॥५३७॥ से भिक्खू वा भिक्खुणी वा जाव पविट्ठे समाणे से णो अण्णउत्थियस्स वा गारत्थियस्स वा परिहारिओ वा अपरिहारिअस्स वा असणं पाणं खाइमं साइमं वा देज्जा अणुपदेज्जा वा ॥५३८॥ से भिक्खू वा भिक्खुणी वा जाव पविट्ठे समाणे से जं पुण जाणिज्जा, असणं वा ४ अस्संपडियाए एगं साहम्मियं समुद्दिस्स पाणाइं, भूयाइं, जीवाइं, सत्ताइं समारब्भ समुद्दिस्स कीयं पामिच्चं अन्धिज्जं अणिसट्ठं अभिहडं आहट्टु चेएइ तं तहप्पगारं असणं वा ४ पुरिसंतरकडं अपुरिसंतरकडं वा बहिया णीहडं वा अणीहडं वा अत्तट्ठियं वा अणत्तट्ठियं वा, परिभुत्तं वा अपरिभुत्तं वा आसेवियं वा अणासेवियं वा अफासुयं जाव णो पडिगाहिज्जा ॥५३९॥ एवं बहवे साहम्मिया, एगा साहम्मिणी, बहवे साहम्मिणीओ समुद्दिस्स चत्तारि आलावगा भाणियव्वा ॥५४०॥ से भिक्खू वा २ गाहावइकुलं जाव पविट्ठे समाणे से जं पुण जाणिज्जा, असणं वा ४ बहवे समणमाहणअतिहिकिवणवणीमए पगणिय पगणिय समुद्दिस्स पाणाइं वा ४ जाव समारब्भ आसेवियं वा अणासेवियं वा अफासुयं अणेसणिज्जंति मण्णमाणे लाभे संते जाव णो पडिगाहिज्जा ॥५४१॥ से भिक्खू वा २ गाहावइकुलं जाव पविट्ठे समाणे से जं पुण जाणेज्जा, असणं वा ४ बहवे समणमाहणअतिहिकिवणवणीमए समुद्दिस्स पाणाइं ४ जावआहट्टु चेएइ, तं तहप्पगारं असणं वा ४ अपुरिसंतरकडं अबहिया णीहडं अणत्तट्ठियं अपरिभुत्तं अणासेवियं अफासुयं अणेसणिज्जं जाव णो पडिगाहिज्जा ॥५४२॥ अह पुण एवं जाणिज्जा पुरिसंतरकडं बहिया णीहडं अत्तट्ठियं परिभुत्तं आसेवियं फासुयं एसणिज्जं जाव पडिगाहिज्जा ॥५४३॥ से भिक्खू वा २ गाहावइकुलं पिंडवायपडियाए पविसिउ कामे से जाइं पुण कुलाइं जाणिज्जा, इमेसु खल्लु कुलेसु णिइए पिंडे दिज्जइ, णिइए अग्गपिंडे दिज्जइ, णिइए भाए दिज्जइ, अवङ्गभाए दिज्जइ, तहप्पगाराइं कुलाइं णिइयाइं णिइउमाणेइं, णो

भक्ताए वा णो पाणाए वा पविस्सिज्ज वा णिकखमिज्ज वा ॥५४५॥ एयं खलु तस्स भिक्खुत्स वा भिक्खुणीए वा सामग्गियं जं सव्वट्ठेहिं समिए सहिए सयाजए त्ति बेस्सि ॥ ५४५ ॥ **पढमं अज्झयणं पढमोद्देशो समत्तो ॥**

से भिक्खू वा भिक्खुणी वा गाहावइकुलं पिंडवायपडियाए अणुपविट्ठे समाणे से जं पुण जाणेज्जा, असणं वा ४ अट्ठमिपोसहिएसु वा, अट्ठमासिएसु वा, मासिएसु वा, दोमासिएसु वा, तिमासिएसु वा; चाउमासिएसु वा पंचमासिएसु वा, छमासिएसु वा उऊसु वा, उऊसंघीसु वा, उउपरियट्ठेसु वा, बहवे समणमाहणअतिहिकियणवणीमगे एगाओ उक्खाओ परिएसिज्जमाणे पेहाए, दोहिं उक्खाहिं परिएसिज्जमाणे पेहाए, तिहिं उक्खाहिं परिएसिज्जमाणे पेहाए, चउहिं उक्खाहिं परिएसिज्जमाणे पेहाए, कुंभीसुहाओ वा कलोवाइओ वा, संणिहिसंणिचयाओ वा परिएसिज्जमाणे पेहाए तहप्पगारं असणं वा ४ अपुरिसंतरकडं जाव अणासेवियं अफासुयं अणेसणिज्जं णो पडिगाहिज्जा ॥५४६॥ अह पुण एवं जाणिज्जा पुरिसंतरकडं जाव आसेवियं फासुयं जाव पडिगाहिज्जा ॥५४७॥ से भिक्खू वा २ जाव पविट्ठे समाणे से जाई पुण कुलाइं जाणिज्जा; तंजहा—उग्गकुलाणि वा, भोगकुलाणि वा, राइण्णकुलाणि वा, खत्तियकुलाणि वा, इक्खागकुलाणि वा, हरिवंसकुलाणि वा, एसियकुलाणि वा, वेसियकुलाणि वा, गंडागकुलाणि वा, कोडागकुलाणि वा, गामरक्खकुलाणि वा, वोक्कसालियकुलाणि वा, अण्णयरेसु वा तहप्पगारेसु कुलेसु अदुगुंछिएसु अगरहिएसु वा, असणं वा ४ फासुयं एसणिज्जं जाव पडिगाहिज्जा ॥ ५४८ ॥ से भिक्खू वा २ गाहावइकुलं पिंडवायपडियाए अणुपविट्ठे समाणे से जं पुण जाणेज्जा असणं वा ४ समवाएसु वा, पिंडणियरेसु वा, इंदमहेसु वा, खंदमहेसु वा, रुद्धमहेसु वा, सुगुंदमहेसु वा, भूयमहेसु वा, जक्खमहेसु वा, णागमहेसु वा, थूममहेसु वा, चेइय महेसु वा, रुक्खमहेसु वा, गिरिमहेसु वा, दरिमहेसु वा, अगडमहेसु वा, तडागमहेसु वा, दहमहेसु वा, णईमहेसु वा, सरमहेसु वा, सागरमहेसु वा, आगरमहेसु वा, अण्णयरेसु वा, तहप्पगारेसु विरूवरूवेसु महामहेसु वट्ठमाणेसु, बहवे समणमाहणअतिहिकियणवणीमए एगाओ उक्खाओ परिएसिज्जमाणे पेहाए, दोहिं जाव संणिहिसंणिचयाओ वा परिएसिज्जमाणे पेहाए तहप्पगारं असणं वा ४ अपुरिसंतरकडं जाव णो पडिगाहिज्जा ॥५४९॥ अह पुण एवं जाणिज्जा, दिण्णं जं तेषिं

दायकं, अह तत्थ भुंजमाणे पेहाए गाहावइभारियं वा, गाहावइभगिणिं वा, गाहावइपुत्तं वा, गाहावइधूर्यं वा, सुण्हं वा, धाई वा, दासं वा, दासिं वा, कम्मकरं वा, कम्मकरिं वा, से पुष्वामेव आलोएज्जा, आउसि ति वा भगिणित्ति वा, दाहिसि मे इत्तो अण्णयरं भोगणजायं ? से सेवं वयंतस्स परो असणं वा ४ आहट्टु दलएज्जा तहप्पगारं असणं वा ४ सयं वा पुण जाएज्जा, परो वा से देज्जा, फासुयं जाव पडिगाहिज्जा ॥ ५५० ॥ से भिक्खू वा २ परं अद्धजोयणमेराए संखडिं ण्वा संखडिपडियाए णो अभिसंधारेज्जा गमणाए ॥५५१॥ से भिक्खू वा २ पाईणं संखडिं ण्वा पडीणं गच्छे अणाढायमाणे पडीणं संखडिं ण्वा प्राईणं गच्छे अणाढायमाणे दाहिणं संखडिं ण्वा उदीणं गच्छे अणाढायमाणे, उदीणं संखडिं ण्वा दाहिणं गच्छे अणाढायमाणे ॥५५२॥ जत्थंवा सा संखडी सिया, तंजहा गामंसि वा, णगरंसि वा, खेडंसि वा, क्वडंसि वा, मंडवंसि वा, पट्टगंसि वा, दोणमुहंसि वा, आगरंसि वा, णिगमंसि वा, आसमंसि वा, सणिवेसंसि वा, जाव रायहाणिसि वा, संखडिं संखडिपडियाए णो अभिसंधारेज्जा गमणाए, केवली बूया 'आयाणमेयं' ॥५५३॥ संखडिं संखडिपडियाए अभिसंधारेमाणे आहाकम्मियं वा उदेसियं, मीसजायं वा, कीयगडं वा, पामिच्चं वा, अच्छेज्जं वा, अणिसट्टं वा, अभिहडं वा, आहट्टु दिज्जाणं भुंजिज्जा, असंजए भिक्खूपडियाए, खुड्डियदुवारियाओ महल्लियदुवारियाओ कुज्जा, महल्लियदुवारियाओ खुड्डियदुवारियाओ कुज्जा, समाओ सिज्जाओ विसमाओ कुज्जा, विसमाओ सिज्जाओ समाओ कुज्जा, पवायाओ सिज्जाओ णिवायाओ कुज्जा, णिवायाओ सिज्जाओ पवायाओ कुज्जा, अंतो वा, बहिं वा उवस्सयस्स हरियाणिं छिंदिय २ दालिय २ संधारगं संधारिज्जा एस विहुंगथामो सिज्जाए अक्खाए तम्हासे संजए णियंठे अण्णयरं वा तहप्पगारं पुरे संखडिं वा पच्छासंखडिं वा संखडिं संखडिपडियाए णो अभिसंधारिज्ज गमणाए ॥ ५५४ ॥ एयं खलु तस्स भिक्खुस्स भिक्खुणीए वा सामगियं जं सव्वट्ठेहिं समिए सहिए सयाजए ति बेमि ॥ ५५५ ॥ **बीओद्देसो समत्तो ॥**

से एगइओ अण्णयरं संखडिं आसित्ता पिचित्ता लुट्ठेज्ज वा वमेज्ज वा, मुत्ते वा से णो सभंमं परिणमिज्जा अण्णयरं वा से दुक्खे रोयातंके समुपंजिज्जा, केवली बूया आयाणमेयं ॥५५६॥ इह खलु भिक्खू गाहावइहिं वा, गाहावइणीहिं वा, परिवा-

यएहिं वा, परिवाइयाहिं वा, एगज्जं सद्धिं सोंडं पाउं भो ! वइमिस्सं हुरत्या वा, उवस्सयं पडिल्लिहेमाणे णो लभिज्जा, तमेव उवस्सयं संमिस्सिभावमावज्जिज्जा अण्ण-
मण्णे वा से मते विप्परियासियभूए इत्थिविग्गहे वा किलीवे वा तं भिक्खुं उवसंक-
मिसु बूया 'आउसंतो समणा ! अहे आरामंसि वा, अहे उवस्सयंसि वा, राओ वा,
वियाले वा, गामधम्मणियंतियं कट्टु, रहस्सियंमेहुणधम्मपरियारणाए आउट्टामो' तं
चेवेगइओ साइज्जिज्जा, अकरणिज्जं चेर्यं संखाए। एए आययणाणि संति संचि-
ज्जमाणा पच्चवाया भवंति, तम्हा से संजए णियंठे तहप्पगारं पुरेसंखडिं वा
पच्छासंखडिं वा, संखडिं संखडिसंपडियाए णो अभिसंधारिज्जा गमणाए ॥५५७॥
से भिक्खू वा २ अण्णयरिं संखडिं वा सोच्चा णिसम्म संपरिहावइ उस्सुयभूयेणं
अप्पाणेणं 'धुवा संखडी' णो संचाएइ, तत्थ इथरेयेरेहिं कुलेहिं सामुदाणियं
एसियं वेसियं पिंडवायं पडिगाहित्ता आहारं. आहारेत्तए, माइट्ठाणं संपासे णो एवं
करिज्जा, से तत्थ कालेण अणुपविसित्ता तत्थेयेयेरेहिं सामुदाणियं एसियं वेसियं
पिंडवायं पडिवायं पडिगाहित्ता आहारं आहारिज्जा ॥५५८॥ से भिक्खू वा २ से जं
पुण जाणेज्जा गामं वा जाव रायहाणिं वा, इमंसि खल्ल गामंसि वा जाव रायहाणिंसि
वा संखडिं सिया तेषि य गामं वा जाव रायहाणिं वा संखडिं संखडिपडियाए
णो अभिसंधारेज्जा गमणाए, केवली बूया आयाणमेयं ॥५५९॥ आइण्णा अवमा
णं संखडिं अणुपविस्समाणस्स पाएण वा पाए अकंतपुव्वे भवइ, हत्थेण वा
हत्थे संचालियपुव्वे भवइ, पाएण वा पाए आवडियपुव्वे भवइ, सीसेण वा
सीसे संधट्टियपुव्वे भवइ, काएण वा काए संखोभियपुव्वे भवइ, दंडेण वा
अट्टीणा वा मुट्टिणा वा लेट्टणा वा क्वाल्लेण वा अभिहयपुव्वे भवइ, सीओदएण
वा उसित्तपुव्वे भवइ, रयसा वा परिघासियपुव्वे भवइ, अणेसणिज्जेण वा
परिमुत्तपुव्वे भवइ, अण्णेसिं वा दिज्जमाणे पडिगाहियपुव्वे भवइ, तम्हा से
संजए णिग्गंथे तहप्पगारं आइण्णाऽवमा णं संखडिं संखडिपडियाए णो अभिसं-
धारिज्जा गमणाए ॥५६०॥ से भिक्खू वा २ गाहावइकुलं पिंडवायपडियाए
पविट्ठे समाणे से जं पुण जाणेज्जा, असणं वा ४ एसणिज्जे सिया अणेसणिज्जे सिया
वित्तिगिच्छसमावण्णेणं अप्पाणेणं असमाहडाए लेस्साए तहप्पगारं असणं वा ४
लामे संते णो पडिगाहिज्जा ॥५६१॥ से भिक्खू वा २ गाहावइकुलं पविसिउ
कामे सव्वं भंडगमायाए गाहावइकुलं पिंडवायपडियाए पविसिज्ज वा णिक्खमिज्ज

वा ॥५६२॥ से भिक्खू वा २ बहिया विहारभूमिं वा वियारभूमिं वा णिक्ख-
ममाणे वा पविसमाणे वा सव्वं भंडगमायाए बहिया विहारभूमिं वा वियारभूमिं वा
णिक्खमिज्ज वा पविसिज्ज वा ॥५६३॥ से भिक्खू वा २ गामाणुगामं दूइज्जि-
माणे सव्वं भंडगमायाए गामाणुगामं दूइज्जिज्जा ॥५६४॥ से भिक्खू वा २
अह पुण एवं जाणिज्जा तिव्वदेसियं वा वासं वासेमाणं पेहाए, तिव्वदेसियं महियं
संणिचयमाणं पेहाए महावाएण वा रयं समुद्धयं पेहाए तिरिच्छसंपाइमा वा तसा
पाणा संथडा सण्णिचयमाणा पेहाए, से एवं णच्चा णो सव्वं भंडगमायाए गाहावइ-
कुलं पिंडवायपडियाए पविसिज्ज वा णिक्खमिज्ज वा बहिया विहारभूमिं वा वियार-
भूमिं वा पविसिज्ज वा णिक्खमिज्ज वा गामाणुगामं दूइज्जिज्जा ॥५६५॥ से भिक्खू
वा २ से जाई पुण कुलाई जाणिज्जा, तंजहा-खत्तियाण वा, राईण वा, कुराईण
वा, रायपेसियाण वा, रायवसट्टियाण वा अंतो वा बहिं वा गच्छंताण वा संणिविट्ठाण
वा णिमंतेमाणाण वा अणिमंतेमाणाण वा असणं वा ४ लाभे संते णो पडिगाहिज्जा
त्ति बेमि ॥५६६॥ **पढमं अज्झयणं तइओइेसो समत्तो ।**

से भिक्खू वा २ जाव पविट्ठे समाणे से जं पुण जाणिज्जा मंसाइयं वा मच्छाइयं
वा मंसखलं वा मच्छखलं वा आहेणं वा पहेणं वा, हिंगोलं वा, संमेलं वा हीरमाणं
संपेहाए अंतरा से मग्गा बहुपाणा, बहुबीया, बहुहरिया, बहुओसा, बहुउदया, बहु-
उत्तिगपणगदगमट्टियमक्कडासंताणगा, बहवे तत्थ समणमाहणअतिहिक्खिवणवणीमगा
उवागता उवागमिस्संति तथाइण्णावित्ती णो पण्णस्स णिक्खमणपवेसाए, णो पण्णस्स
वायणपुच्छणपरियट्टणाणुपेहधम्माणुओगचिंताए, सेवं णच्चा तहप्पगारं पुरेसंखडि
वा पच्छासंखडिं वा संखडिं संखडिपडियाए णो अभिसंधारेज्जा गमणाए ॥५६७॥
से भिक्खू वा २ गाहवइकुलं पिंडवायपडियाए पविट्ठे समाणे से जं पुण जाणेज्जा,
मंसाइयं वा जाव संमेलं वा हीरमाणं पेहाए, अंतरा से मग्गा अपंडा जाव
संताणगा णो जत्थ बहवे समणमाहण जाव उवागमिस्संति, अप्पाइण्णावित्ती
पण्णस्स णिक्खमणपवेसाए पण्णस्स वायणपुच्छणपरियट्टणाणुपेहधम्माणुओगचिंताए
सेवं णच्चा तहप्पगारं पुरेसंखडिं वा पच्छासंखडिं वा संखडिं संखडिपडियाए अभि-
संधारेज्ज गमणाए ॥५६८॥ से भिक्खू वा २ गाहावइकुलं जाव पविसिउकामे
से जं पुण जाणेज्जा, खीरिणियाओ गावीओ खीरिज्जमाणीओ पेहाए असणं वा ४

उवसंखंडिज्जमाणं पेहाए पुरा अप्पजूहिए सेवं णच्चा णो गाहावइकुलं पिंडवा-
यपडियाए णिक्खमिज्ज वा पविसिज्ज वा से तमायाए एगंतमवक्कमिज्जा, एगंतमव-
क्कमिक्का अणावायमसंलोए चिट्ठिज्जा, अह पुण एवं जाणेज्जा खीरिणीओ गावीओ
खीरियाओ पेहाए, असणं वा ४ उवक्खलियं पेहाए पुराए जूहिए से एवं णच्चा तओ
संजयामेव गाहावइकुलं पिंडवायपडियाए पावेसिज्ज वा णिक्खमिज्ज वा ॥५६९॥
भिक्खागाणामेगे एवमाहंसु समाणा वा वसमाणा वा; गामाणुगामं दूइज्जमाणे खुड्डाए
खलु अयं गामे संणिरुद्धाए णो महालए से हंता, भयंतारो बाहिरगाणि गामाणि
भिक्खायरियाए वयह ॥५७०॥ संति तत्थेगइयस्स भिक्खुस्स पुरे-संश्रुया वा
पच्छासंश्रुया वा परिवलंति, तंजहा—गाहावई वा, गाहावइणीओ वा गाहावइपुत्ता
वा, गाहावइधूयाओ वा, गाहावइसुण्हाओ वा, धाईओ वा, दासा वा, दासीओ वा,
क्कम्मकरा वा, क्कम्मकरीओ वा, तहप्पगाराई कुलाई पुरे संश्रुयाणि वा पच्छासंश्रु-
याणि वा, पुब्बामेव भिक्खायरियाए अणुपविसिस्सामि अवि य इत्थ लभिस्सामि,
पिंडं वा लोयं वा, खीरं वा, दधिं वा, णवणीयं वा घयं वा, गुलं वा, तेळं वा,
महुं वा मज्जं वा मंसं वा सक्कुलिं वा, पूयं वा, सिहरिणिं वा, तं पुब्बामेव भुच्चा
पिच्चा पडिग्गहं संल्लिहिय संमज्जिय तओ पच्छा भिक्खूहिं सद्धिं गाहावइकुलं
पिंडवायपडियाए पविसिस्सामि णिक्खमिस्सामि वा, माइट्ठाणं संफासे, तं णो एवं
करेज्जा, से तत्थ भिक्खूहिं सद्धिं कालेण अणुपविसित्ता, तत्थियरेयरेहिं कुलेहिं
सामुदाणियं एसियं वेसियं पिंडवायं पडिगाहित्ता आहारं अहारिज्जा ॥५७१॥
एयं खलु तस्स भिक्खुस्स वा भिक्खुणीए वा सामग्गियं ॥५७२॥ **पढमं अउज्ज-**
यणं चउत्थोद्देशो समत्तो ॥

से भिक्खू वा २ जाव पविट्ठे समाणे से जं पुण जाणिज्जा, अग्गपिंडं
उक्खिवप्पमाणं पेहाए, अग्गपिंडं णिक्खिवप्पमाणं पेहाए अग्गपिंडं हीरमाणं पेहाए,
अग्गपिंडं परिभाइज्जमाणं पेहाए, अग्गपिंडं परिभुजमाणं पेहाए, अग्गपिंडं परिट्ठ-
विज्जमाणं पेहाए, पुरा असिणाइ वा, अवहाराइ वा पुरा जत्थणगे समणमाहणअतिहि-
क्खिवणवगोमया खद्धं खद्धं उवसंक्कमंति, से हंता अहमवि खद्धं २ उवसंक्कमामि,
माइट्ठाणं संफासे णो एवं करिज्जा ॥५७३॥ से भिक्खू वा २ जाव पविट्ठे समाणे
अंतरा से वप्पाणि वा, फलिहाणि वा, पागाराणि वा, तोरणाणि वा, अग्गलाणि वा,

अग्गलपासगाणि वा सइ परक्कमे संजयामेव, परक्कमिज्जा णो उज्जुयं गच्छिज्जा, केवली बूया आयाणमेयं ॥५७४॥ से तत्थ परक्कममाणे पयलिज्ज वा, पक्खलेज्ज वा पवडिज्ज वा, से तत्थ पयलेमाणे वा पक्खलेज्जमाणे वा पवडमाणे वा, तत्थ से काए उच्चारेण वा पासवणेण वा खेलेण वा सिंघाणेण वा, वंतेण वा पित्तेण वा, पूर्णेण वा, सुक्केण वा, सोणिणेण वा, उवलित्ते सिया, तहप्पगारं कायं णो अणंयर-हियाए पुढवीए णो ससिणिद्धाए पुढवीए, णो ससरक्काए पुढवीए, णो चित्तमंताए सिलाए, णो चित्तमंताए लेखाए, कोलावासंसि वा दाए जीवपहट्टिए सअडे सपाणे जाव संताणए, णो आमज्जिज्ज वा पमज्जिज्ज वा, संलिहिज्ज वा, विलिहिज्ज वा, उच्च-लिज्ज वा, उवट्टिज्ज वा, आयाविज्ज वा, पयाविज्ज वा, से पुव्वामेव अप्पसरक्खं तणं वा, पत्तं वा, कट्टं वा, सक्करं वा, जाइज्जा, जाइत्ता से तमायाय एगंतमवक्कमिज्जा, २ अहे ज्ञामथंडिलंसि वा, जाव अण्णयरंसि वा, तहप्पगारंसि पडिलेहिय २ पमज्जिय २ तओ संजयामेव आमज्जिज्ज वा जाव पयाविज्ज वा ॥५७५॥ से भिक्खू वा २ जाव पविट्टे समाणे से जं पुण जाणेज्जा गोणं वियालं पडिपहे पेहाए, महिसं वियालं पडिपहे पेहाए एवं मणुस्सं आसं हत्थिं सीहं वग्गं विगं दीवियं अच्छं तरच्छं परिसरं सियालं विरालं सुणयं कोलसुणयं कोकंतियं चित्ताचेह्ण्डयं वियालं पडिपहे पेहाए सइपरक्कमे संजयामेव परक्कमेज्जा णो उज्जुयं गच्छेज्जा ॥५७६॥ से भिक्खू वा २ जाव समाणे अंतरा से ओवाओ वा, खाणू वा, कंटए वा, वसी वा, भिल्लगा वा विसमे वा विज्जले वा, परियावज्जिज्जा, सइ परक्कमे संजयामेव परक्कमेज्जा णो उज्जुयं गच्छिज्जा ॥५७७॥ से भिक्खू वा २ गाहावइकुलस्स दुवार-वाहं कंटक्कोदियाए परिपिहियं पेहाए तेसिं पुव्वामेव उग्गहं अण्णुण्णविय अपडि-लेहिय अपमज्जिय णो अवंगुणिज्ज वा, पविसिज्ज वा, णिक्खमिज्ज वा, तेसिं पुव्वामेव उग्गहं अण्णुण्णविय पडिलेहिय २ पमज्जिय २ तओ संजयामेव अवंगुणिज्ज वा पविसेज्ज वा णिक्खमेज्ज वा ॥५७८॥ से भिक्खू वा २ जाव समाणे से जं पुण जाणेज्जा, समणं वा, माहणं वा, गामपिंडोलगं वा, अतिहिं वा, पुव्वपविट्टं पेहाए णो तेसिं संलोए सपडिदुवारे चिट्ठेज्जा, केवली बूया आयाणमेयं ॥५७९॥ पुरा पेहाए तस्सट्ठाए परो असणं वा, ४ आहट्टु दलएज्जा, अह भिक्खूणं पुव्वोवट्टिआ एस पक्कम्, एस हेऊ, एस उवएसो, जं णो तेसिं संलोए सपडिदुवारे चिट्ठेज्जा से

तमायाए एगंतमवक्कमिज्जा २ अणावायमसंलोए चिट्ठेज्जा ॥५८०॥ से परो अणावाय-
मसंलोए चिट्ठेमाणस्स असणं वा ४ आहट्टु दलएज्जा से थं वएज्जा “आउसंतो
सुमणा ! इमे भे असणं वा ४ सव्वजणाए गिसिद्धे, तं भुंजह च णं परिभाएह
च णं” तं चेगइओ पडिगाहेत्ता तुसिणीओ उव्वेहेज्जा, अविवाइं एयं मममेव सिया
एवं माइट्ठणं संपासे, णो एवं करेज्जा, से तमायाए तत्थ गच्छेज्जा २ से
पुव्वामेव आलोएज्जा, “आउसंतो समणा ! इमे भे असणं वा ४ सव्व जणाए
गिसिद्धे तं भुंजह च णं परिभाएह च णं” सेवं वयंतं परो वएज्जा ‘आउसंतो
समणा ! तुमं चेव णं परिभाएहि, से तत्थ परिभाएमाणे णो अप्पणो खद्धं २ डायं
२ उसदं २ रसियं २ मणुण्णं २ गिद्धं २ लुक्खं २ से तत्थ अमुच्छिण्णं अग्निद्धे
अग्निद्धे अण्णोववण्णे, बहुसममेव, परिभाएज्जा ॥५८१॥ से णं परिभाएमाणं
परो वएज्जा ‘आउसंतो समणा ! मा णं तुमं परिभाएहि सव्वे वेगइया ठिया उ
भोक्खामो या पाहामो वा” से तत्थ भुंजमाणे णो अप्पणो खद्धं २ जाव लुक्खं
२ से तत्थ अमुच्छिण्णं ४ बहुसममेव भुंजिज्ज वा पीइज्ज वा ॥५८२॥ से
भिक्खू वा २ जाव समाणे से जं पुण जाणिज्जा, समणं वा, माहणं वा, गाम-
पिंडोलमं वा, अतिहिं वा, पुव्वपविट्ठं पेहाए णो ते उवाइक्कम्म पविसेज्ज वा ओभा-
सेज्ज वा से तमायाय एगंतमवक्कमेज्जा २ अणावायमसंलोए चिट्ठिज्जा, अह पुण एवं
जाणिज्जा, पडिसेहिण्णं वा दिण्णे वा तओ तंमि णियत्तिण्णं संजयामेव पविसिज्ज वा
ओभासिज्ज वा ॥५८३॥ एयं खलु तस्स भिक्खुस्स वा भिक्खुणीए वा सामग्गियं
॥५८४॥ **पढमं अज्झयणं पंजमोद्देसो समत्तो ॥**

से भिक्खू वा २ जाव समाणे से जं पुण जाणेज्जा, रसेसिणो बहवे पाणा
घासेसणाए संथडे संणिवइए पेहाए तंजहा—कुक्खुडजाइयं वा, सूयरजाइयं वा
अग्गपिंडेसि वा वायसा संथडा संणिवइया पेहाए सइ परक्कमे संजयामेव परक्कमेज्जा
णो उज्जुयं गच्छिज्जा ॥५८५॥ से भिक्खू वा २ जाव पविट्ठे समाणे णो गाहा-
वइकुलस्स दुवारसाहं अवलंबिय २ चिट्ठेज्जा, णो गाहावइकुलस्स दगच्छडुणमत्तए
चिट्ठिज्जा, णो गाहावइकुलस्स चंदणित्थयए चिट्ठेज्जा, णो गाहावइकुलस्स सिणा-
णस्स वा वच्चस्स वा संलोए सपडिदुवारे चिट्ठिज्जा णो गाहावइकुलस्स आलोयं वा
थिग्गलं वा संधि वा दग्गभवणं वा बाहाउ पग्गिज्जिय २ अंगुलियाए वा उद्दिसिय २

उष्णमिय २ अवनमिय २ रिण्डाइज्जा णो गाहावई अंगुलियाए उदिसिय २ जाइज्जा, णो गाहावई अंगुलियाए चालिय २ जाएज्जा, णो गाहावई अंगुलियाए तव्विय २ जाएज्जा, णो गाहावई अंगुलियाए उक्खुलंपिय २ जाएज्जा, णो गाहावई वंदिय २ जाएज्जा, णो वयणं फरुसं वइज्जा ॥५८६॥ अह तत्थ केचि भुंजमाणं पेहाए, तंजहा— गाहावई वा जाव कम्मकरिं वा से पुव्वामेव आलोइज्जा, “आउसो त्ति वा, भइणि त्ति वा दाहिसि मे एत्तो अण्णयरं भोयणजायं” से सेवं वयंतस्स परो हत्थं वा मत्तं वा दव्विं वा, भायणं वा सीओदगवियडेण वा, उसिणोदगवियडेण वा, उच्छोलेज्ज वा, पहोएज्ज वा, से पुव्वामेव आलोएज्जा “आउसो त्ति, वा भइणित्ति वा, मा एयं तुमं हत्थं वा, मत्तं वा, दव्विं वा, भायणं वा, सीओदगवियडेण वा उसिणोदगवियडेण वा, उच्छोलेहि वा, पहोवेहि वा, अभिकंवासि मे दाउं एमेव दलयाहि” से सेवं वयंतस्स परो हत्थं वा ४ सीओदगवियडेण वा २ उच्छोलेत्ता पहोइत्ता आहट्टु दलएज्जा तहप्पगारेण पुरे कम्मकरणं हत्थेण वा ४ असणं वा ४ अफामुयं अणेसणिज्जं जाव णो पडिगाहिज्जा, अह पुण एवं जाणेज्जा णो पुरेकम्मएणं उदउल्लेणं तहप्पगारेणं वा उदउल्लेणं (ससिणिद्वेण) वा हत्थेण वा ४ असणं वा ४ अफामुयं जाव णो पडिगाहिज्जा, अह पुण एवं जाणेज्जा णो उदउल्लेणं ससिणिद्वेणं सेसं तं चेव, एवं ससरक्खे उदउल्ले ससिणिद्वे मट्टिया, उसे हरियाले, हिंमुलए, मणोसिला, अंजणे, लोणे, मेरुय, वण्णिय, सेट्ठिय, सोरट्टिय पिट्ट कुक्कस उक्खुट्ट संसट्टेणं ॥५८७॥ अह पुण एवं जाणिज्जा, णो असंसट्टे, संसट्टे तहप्पगारेण संसट्टेण हत्थेण वा ४ असणं वा ४ फामुयं जाव पडिगाहिज्जा ॥५८८॥ से भिक्खू वा २ से जं पुण जाणेज्जा पिहुयं वा बहुरयं वा जाव चाउलपलंघं वा, असंजए भिक्खुपडियाए चित्तमंताए सिलाए जाव मक्कडासंताणाए कुट्टिसु वा, कुट्टिति वा, कुट्टिसंति वा, उप्फणिसु वा ३ तहप्पगारं पिहुयं वा, जाव चाउलपलंघं वा, अफामुयं जाव णो पडिगाहिज्जा ॥ ५८९ ॥ से भिक्खू वा २ जाव समाणे से जं पुण जाणेज्जा बिलं वा लोणं उन्निभयं वा लोणं, असंजए भिक्खुपडियाए चित्तमंताए सिलाए जाव संताणाए भिंदिसु वा, भिंदेति वा, भिंदिसंति वा, रुद्धिसु वा ३ बिलं वा लोणं उन्निभयं वा लोणं अफामुयं जाव णो पडिगाहिज्जा ॥५९०॥ से भिक्खू वा जाव समाणे से जं पुण जाणेज्जा असणं वा ४ अगण्णिणिकिरुत्तं तहप्पगारं

असणं वा ४ अफासुयं लामे संते णो पडिगाहिज्जा, केवली बूया, "आयाणमेयं" असंजए भिक्खुपडियाए उस्सिचमाणे वा, णिस्सिचमाणे वा, आमज्जमाणे वा, पमज्जमाणे वा, ओयारेमाणे वा, उव्वत्तमाणे वा, अगणिजीवे हिंसिज्जा, अह भिक्खूणं पुक्खोवदिट्ठा एस पइण्णा, एस हेऊ, एस कारणे, एसुवएसे, जं तहप्पगारं असणं वा, ४ अगणिणिक्खित्तं अफासुयं अणेसणिज्जं लामे संते णो पडिगाहिज्जा ॥५९१॥ एवं खलु तस्स भिक्खुस्स वा भिक्खुणीए वा सामग्गियं ॥५९२॥

पढमं अज्झयणं छट्ठोद्देशो समत्तो ॥

से भिक्खू वा २ जाव समाणे से जं पुण जाणेज्जा असणं वा ४ खंधंति वा थंभेसि वा, भंचंसि वा, मालंसि वा, पासायंसि वा, हग्गिमयतलंसि वा, अण्णयरंसि वा, तहप्पगारंसि अंतलिक्खजायंसि उव्वणिक्खित्ते सिया, तहप्पगारं मालोहडं असणं वा ४ अफासुयं जाव णो पडिगाहिज्जा, केवली बूया "आयाणमेयं" असंजए भिक्खुपडियाए पीढं वा फलमं वा णिस्सेणि वा, उदूहलं वा, आहट्टु उस्सविय दुरुहेज्जा, से तत्थ दुरुहमाणे, पयलेज्ज वा पवडेज्ज वा से तत्थ पयलेमाणे वा पवडेमाणे वा, हत्थं वा, पायं वा, बाहुं वा, उरं वा, उदरं वा, सीसं वा अण्णयरं वा कायंसि इंदियजायं लूसिज्ज वा, पाणाणि वा, भूयाणि वा, जीवाणि वा, सत्ताणि वा, अभिहणिज्ज वा, वित्तासिज्ज वा, लेसिज्ज वा, संघसिज्ज वा, संघट्टिज्ज वा, परियाविज्ज वा, किलामिज्ज वा, ठाणाओ ठाणं संकामिज्ज वा, तं तहप्पगारं मालोहडं असणं वा, ४ लामे संते णो पडिगाहिज्जा ॥५९३॥ से भिक्खू वा, २ जाव समाणे से जं पुण जाणेज्जा, असणं वा ४ कुट्टियाओ वा कोलेज्जाओ वा, असंजए भिक्खुपडियाए, उक्कज्जिय अवउज्जिय ओहरिय, आहट्टु, दलइज्जा, तहप्पगारं असणं वा, ४ मालोहडंति णच्चा लामे संते णो पडिगाहिज्जा ॥५९४॥ से भिक्खू वा २ जाव समाणे से जं पुण जाणेज्जा असणं वा ४ मट्ठिओलित्तं तहप्पगारं असणं वा ४ जाव लामे संते णो पडिगाहिज्जा । केवली बूया 'आयाणमेयं' असंजए भिक्खुपडियाए मट्ठिओलित्तं असणं वा ४ उब्भिदमाणे पुढ्ढीकार्यं समारंभिज्जा, तहा आउ-तेऊ-वाऊ-वणस्सइ-तसकायं समारंभिज्जा पुणरवि ओलिंमाणे पच्छाकम्मं करिज्जा । अह भिक्खूणं पुक्खोवदिट्ठा जाव जं तहप्पगारं मट्ठिओलित्तं असणं वा, ४ लामे संते णो पडिगाहिज्जा ॥५९५॥

से भिक्खू वा २ जाव पविट्ठे समाणे से जं पुण जाणेज्जा असणं वा ४ पुढ-
विकायपइट्ठियं तहप्पगारं असणं वा ४ अफासुयं जाव णो पडिगाहिज्जा ॥५९६॥
से भिक्खू वा भिक्खूणी वा से जं पुण जाणेज्जा, असणं वा ४ आउकायपइट्ठियं
तह चैव एवं अगणिकायपइट्ठियं लामे संते णो पडिगाहिज्जा, 'केवलीभूया'
'आयाणमेयं' असंजए भिक्खूपडियाए अगणिं उस्सकिय २ णिसकिय २
ओहरिय २ आहट्टु दलएज्जा, अह भिक्खूणं पुव्वोवदिट्ठा जाव णो पडिगा-
हिज्जा ॥५९७॥ से भिक्खू वा २ जाव पविट्ठे समाणे से जं पुण जाणेज्जा,
असणं वा ४ अञ्चुसिणं असंजए भिक्खुपडियाए, सुप्पेण वा, विहुण्णेण वा,
ताल्लियंटेण वा, पत्तेण वा, साहाए वा, साहाभंणेण वा, पिहुण्णेण वा, पिहुणहत्थेण
वा, चेलेण वा, चेलकण्णेण वा, हत्थेण वा, सुहेण वम, कुमिज्ज वा, वीएज्ज वा,
से पुव्वामेव आलोएज्जा "आउसो त्ति वा, भगिणि त्ति वा, मा एयं तुमं, असणं
वा, ४ अञ्चुसिणं सुप्पेण वा जाव कुमाहि वा, वीयाहि वा, अभिकंखसि मे दाउं
एमेव दलयहिं" से सेव वयंतस्स परो सुप्पेण वा जाव वीइत्ता आहट्टु दलएज्जा,
तहप्पगारं असणं वा ४ अफासुयं जाव णो पडिगाहिज्जा ॥५९८॥ से भिक्खू
वा २ जाव समाणे से जं पुण जाणेज्जा, असणं वा ४ वणस्सइकायपइट्ठियं
तहप्पगारं असणं वा ४ वणस्सइकायपइट्ठियं अफासुयं अणेसणिज्जं लामे संते
णो पडिगाहिज्जा, एवं तसंकाएवि ॥ ५९९ ॥ से भिक्खू वा २ जाव पविट्ठे
समाणे से जं पुण पाणगजायं जाणेज्जा, तंजहा उस्सेइमं वा, ससेइमं वा, चाउलोदगं
वा, अण्णयरं वा तहप्पगारं पाणगजायं, अहुणाधोयं, अणंबिलं, अबोक्कंतं, अपरिणयं
अविद्धत्थं, अफासुयं, अणेसणिज्जं जाव णो पडिगाहिज्जा ॥६००॥ अह पुण
एवं जाणेज्जा चिराधोयं, अबिलं, बुक्कंतं, परिणयं विद्धत्थं, फासुयं जाव पडिगा-
हिज्जा ॥६०१॥ से भिक्खू वा, २ जाव पविट्ठे समाणे से जं पुण पाणगजायं
जाणेज्जा, तंजहा-तिलोदगं वा, तुसोदगं वा, जवोदगं वा, आयामं वा; सोविं वा,
सुद्धवियडं वा, अण्णयरं वा तहप्पगारं पाणगजायं पुव्वामेव आलोएज्जा "आउसो
त्ति वा, भगिणित्ति वा, दाहिस्सि मे एत्तो अण्णयरं पाणगजायं ?" से सेव वयंतं परो
वएज्जा "आउसंतो समणा ! तुमं चेवेयं पाणगजायं पडिग्गहेण वा उरिसचियाणं
ओयत्तियाणं गिण्हाहि" तहप्पगारं पाणगजायं सयं वा गिण्हिब्बा, परो वा से दिज्जा,

फासुयं लाभे संते जाव पडिगाहिजा ॥६०२॥ से भिक्खू वा २ जाव समाणे से जं पुण पाणगं जाणेजा अणंतरहियाए पुढवीए जाव संताणए ओहदट्टु गिक्खित्ते सियम असंजए भिक्खुपडियाए, उदउल्लेण वा, ससिणिद्धेण वा, सकसाएण वा, मत्तेण वा सीओदएण वा, संभोएत्ता आहट्टु दलएज्जा तहप्पगारं पाणग-
जायं अफासुयं लाभे संते णो पडिगाहिजा ॥६०३॥ एयं खलु तस्स भिक्खुस्स वा भिक्खुणीए वा सामग्गियं ॥६०४॥ **सत्तमोहेसो समत्तो ॥**

से भिक्खू वा २ जाव पविट्ठे समाणे से जं पुण पाणगजायं जाणिजा, तंजहा-अंत्रपाणगं वा, अंत्राडगपाणगं वा, कविट्ठपाणगं वा, माउल्लिगपाणगं वा मुहियापाणगं वा, दाडिमपाणगं वा, खज्जूपाणगं वा, णालिएरपाणगं वा, करीर-
पाणगं वा, कोलपाणगं वा, आमलगपाणगं वा, चिंचापाणगं वा, अण्णयरं वा तहप्पगारं पाणगजायं सअट्ठियं सकणुयं सबीयगं असंजए भिक्खुपडियाए छब्बेण वा दूसेण वा, वालमेण वा, आवीलियाण वा, पवीलियाण परिसाइयाण आहट्टु दलएज्जा, तहप्पगारं पाणगजायं अफासुयं लाभे संते णो पडिगाहिजा ॥६०५॥ से भिक्खू वा २ जाव पविट्ठे समाणे, से आगंतारेसु वा, आरामागारेसु वा, गाहावइकुलेसु वा, परियावसहेसु वा, अण्णगंधाणि वा, पाणगंधाणि वा, सुरभिगंधाणि वा, अण्णय २ से तत्थ आसायपडियाए मुच्छिए, गिद्धे, गट्टिए, अज्झोववण्णे 'अहो गंधो २' णो गंधमाघाड्ढा ॥६०६॥ से भिक्खू वा २ जाव समाणे, से जं पुण जाणेजा, सालुयं वा, विरालियं वा, सासवणालियं वा, अण्णयरं वा तहप्पगारं आमगं असत्थपरिणयं अफासुयं जाव णो पडिगाहिजा ॥६०७॥ से भिक्खू वा २ जाव पविट्ठे समाणे से जं पुण जाणेजा, पिप्पल्लिं वा, पिप्पल्लिचुण्णं वा, मिरियं वा, मिरियचुण्णं वा, सिंगवेरं वा, सिंगवेरचुण्णं वा, अण्णयरं वा तहप्पगारं आमगं असत्थपरिणयं अफासुयं जाव णो पडिगाहिजा ॥६०८॥ से भिक्खू वा २ जाव पविट्ठे समाणे से जं पुण जाणेजा, पलंब्रजायं तंजहा अंत्रपलंब्रं वा, अंत्राडगपलंब्रं वा, ताल पलंब्रं वा, शिज्जिरपलंब्रं वा, सुरभिपलंब्रं वा, सल्लुपलंब्रं वा, अण्णयरं वा तहप्पगारं पलंब्रजायं आमगं असत्थपरिणयं अफासुयं अणेसणिब्बं जाव लाभे संते णो पडिगाहिजा ॥६०९॥ से भिक्खू वा २ जाव पविट्ठे समाणे से जं पुण पवालजायं जाणिजा, तंजहा-असोत्थपवालं वा णग्गोह-

पवालं वा, पित्तुखुपवालं वा, णीपूरपवालं वा, सहइपवालं वा, अण्णयरं तहप्पगारं पवालजायं आममं असत्थपरिणयं अफासुयं अणेसणिज्जं जाव णो पडिगाहिज्जा ॥ ६१० ॥ से भिक्खू वा २ जाव समाणे से जं पुण सरडुयजायं जाणिज्जा, तंजहा—अंचसरडुयं वा, कविट्ठसरडुयं वा, दाडिमसरडुयं वा, विट्ठसरडुयं वा, अण्णयरं वा तहप्पगारं सरडुयजायं आममं असत्थपरिणयं अफासु जाव णो पडिगाहिज्जा ॥ ६११ ॥ से भिक्खू वा २ जाव पविट्ठे समाणे, से जं पुण मंधुजायं जाणिज्जा, तंजहा—उंचरमंधुं वा, णग्गोहमंधुं वा, पिलक्खुमंधुं वा, आसोत्थमंधुं वा, अण्णयरं वा, तहप्पगारं मंधुजायं आममं दुरुक्कं साणुवीयं अफासुयं जाव णो पडिगाहिज्जा ॥ ६१२ ॥ से भिक्खू वा २ जाव समाणे से जं पुण जाणिज्जा, आमडामं वा, पूइपिण्णामं वा, महुं वा मज्जं वा सप्पिं वा, खोलं वा पुराणं एत्थ पाणा अणुप्पसूया, एत्थ पाणा जाया, एत्थ पाणा सवुट्ठा, एत्थ पाणा अबुक्कंता, एत्थ पाणा अपरिणया, एत्थ पाणा अविद्धत्था जाव णो पडिगाहिज्जा ॥ ६१३ ॥ से भिक्खू वा, २ जाव समाणे से जं पुण जाणिज्जा, उच्चुमेरगं वा अंकक्खेडुयं वा, कसेरगं वा, सिंघाडगं वा, पूइआलुगं वा, अण्णयरं वा तहप्पगारं आममं असत्थपरिणयं जाव णो पडिगाहिज्जा ॥ ६१४ ॥ से भिक्खू वा २ से जं पुण जाणिज्जा; उपलं वा, उपल णालं वा, भिसं वा, भिसमुणालं वा, पोक्खलं वा, पोक्खलविभंगं वा, अण्णयरं वा तहप्पगारं, जाव णो पडिगाहिज्जा ॥ ६१५ ॥ से भिक्खू वा, २ जाव समाणे, से जं पुण जाणिज्जा, अग्गवीयाणि वा, मूलवीयाणि वा, खंधवीयाणि वा, पोरवीयाणि वा, अग्गजायाणि वा, मूलजायाणि वा, खंधजायाणि वा, पोरजायाणि वा, अण्णत्थ तक्कलिमत्थएण वा, तक्कलिसीसेण वा, णालिएरमत्थएण वा, खज्जरमत्थएण वा, तालमत्थएण वा, अण्णयरं वा तहप्पगारं आमं असत्थपरिणयं जाव णो पडिगाहिज्जा ॥ ६१६ ॥ से भिक्खू वा २ जाव समाणे से जं पुण जाणिज्जा, उच्छुं वा, काणगं, अंगारियं संमित्तं, विगदूसियं वेत्तगं वा, कंदलीउसयं वा, अण्णयरं वा, तहप्पगारं आमं असत्थ परिणयं जाव णो पडिगाहिज्जा ॥ ६१७ ॥ से भिक्खू वा २ जाव समाणे से जं पुण जाणिज्जा, लसुणं वा, लसुणपत्तं वा, लसुणणालं वा, लसुणकंदं वा, लसुणचोयं वा, अण्णयरं वा तहप्पगारं आमं असत्थ परिणयं जाव णो पडिगाहिज्जा ॥ ६१८ ॥ से भिक्खू वा, २ जाव समाणे से जं पुण जाणिज्जा, अच्छिअं

वा, कुंभिककं, तिंदुगं वा, विलयं वा, पलगं वा, कासवणालियं वा, अण्णयरं वा तहप्पगारं आमं असत्थपरिणयं जाव णो पडिगाहिज्जा ॥६१९॥ से भिक्खू वा २ जाव्वा समाणे से जं पुण जाणिज्जा, कणं वा कणकुंड्यं वा, कणपूयलियं वा, चाउलं वा, चाउलपिट्ठं वा, तिलं वा, तिलपिट्ठं वा तिलपप्पडयं वा, अण्णयरं वा, तहप्पगारं आमं असत्थपरिणयं जाव लामे संते णो पडिगाहिज्जा ॥६२०॥ एस खलु तस्स भिक्खुस्स भिक्खुणीए वा सामग्गियं ॥६२१॥ **अट्ठमोद्देशो समत्तो ॥**

इह खलु पाईणं वा, पडीणं वा, दाहिणं वा, उदीणं वा, संतेगइया सट्ठा भवंति, गाहावइ वा जाव कम्मकरीओ वा; तेसिं च णं एवं वुत्तपुव्वं भवइ जे इमे भवंति समणा, भगवंतो, सीलमंता, वयमंता, गुणमंता, संजया, संबुडा, दंभचारी, उवरया मेट्ठुणाओ धम्मओ, णो खलु एएसिं कप्पइ आहाकम्मिए असणं वा ४ भोइत्तए वा पाइत्तए वा; से जं पुण इमं अहं अप्पणो अट्ठाए गिट्ठियं, तंजहा-असणं वा ४ सव्वमेयं समणाणं गिसिरामो, अवियाइं वय पच्छावि अप्पणो अट्ठाए असणं वा ४ चेइस्सामो एय्पगारं गिग्घोसं सोच्चा गिसम्म तहप्पगारं असणं वा ४ अफासुयं अणेसणिज्जं जाव लामे संते णो पडिगाहिज्जा ॥६२२॥ से भिक्खू वा २ समाणे वसमाणे वा गाम्माणुगामं वा दूइज्जमाणे से जं पुण जाणिज्जा, गामं वा जाव रायहाणि वा, इमंसि खलु गामंसि वा जाव रायहाणिंसि वा संतेगइयस्स भिक्खुस्स पुरे संथुया वा पच्छासंथुया वा परिवसंति, तंजहा-गाहावइ वा जाव कम्मकरीओ वा तहप्पगाराइं कुलाइं णो पुव्वामेव भत्ताए वा पाणाए वा गिक्खमेज्ज वा पविसेज्ज वा, केवली बूया, 'आयाणमेयं' । पुरा पेहाए तस्स परो अट्ठाए असणं वा ४ उवकरेज्ज वा, उवक्खडेज्ज वा, अह भिक्खूणं पुव्वोवदिट्ठा ४ जं णो तहप्पगाराइं कुलाइं पुव्वामेव भत्ताए वा पाणाए वा पविसेज्ज वा गिक्खमेज्ज वा । संतमायाय एगंतमवकमिज्जा २ अणावायमसंलोए चिट्ठेज्जा, से तत्थ कालेणं अणु-पविसेज्जा २ तत्थियरेयरेहिं कुलेहिं सामुदाणियं एसियं वेसियं पिंडवायं एसित्ता आहारं आहारिज्जा ॥६२३॥ सिया से परो कालेण अणुपविट्ठस्स आहाकम्मियं असणं वा ४ उवकरेज्ज वा उवक्खडेज्ज वा, तं चेगइओ तुसणीओ उवेहेज्जा, 'आइडमेव पचाइक्खिस्सामि' माइट्ठाणं संफासे, णो एवं करेज्जा, से पुव्वामेव आलोएज्जा 'आउसो ति वा भागिणि ति वा, णो खलु मे कप्पइ आहाकम्मियं असणं

वा ४ भोत्तए वा पाय २ वा, मा उवकरोहि, मा उवक्खडेहि, से सेवं वयंतस्स परो आहाकम्मियं असणं वा ४ उवक्खडावित्ता आहट्टु दलएज्जा, तहप्पगारं असणं वा ४ अफासुयं लाभे संते णो पडिगाहिज्जा ॥६२४॥ से भिक्खू वा २ जाव समाणे से जं पुण जाणिज्जा मंसं वा मच्छं वा भज्जिज्जमाणं पेहाए तेत्थपूर्यं (यं) वा आएसाए उवक्खडिज्जमाणं पेहाए णो खद्धं २ उवसंकमित्तु ओभासेज्जा गण्णत्थ गिलाणणीसाए ॥६२५॥ से भिक्खू वा जाव समाणे अण्णयरं भोयणजायं पडिगाहित्ता सुब्धि-सुब्धि भोच्चा दुब्धि-दुब्धि परिट्टवेइ, माइट्ठाणं संफासे, णो एवं करेज्जा, सुब्धि वा दुब्धि वा सव्वं भुंजिज्जा णो किंचिविपरिट्ठ-विज्जा ॥६२६॥ से भिक्खू वा २ जाव समाणे अण्णयरं वा पाणयजायं पडिगाहित्ता पुप्फं २ आवीइत्ता कसायं २ परिट्टवेइ, माइट्ठाणं संफासे णो एवं करिज्जा, पुप्फं पुप्फेइ वा कसायं कसाएत्ति वा सव्वमेयं भुंजिज्जा णो किंचिवि परिट्टवेज्जा ॥६२७॥ से भिक्खू वा २ बहुपरियावण्णं भोयणजायं पडिगाहित्ता बहवे साहम्मिया तत्थ वसंति संभोइया, समणुण्णा अपरिहारिया, अदूरगया तेसिं अणालोइया अणामंतिया परिट्टवेइ, माइट्ठाणं संफासे णो एवं करेज्जा से तमायाय तत्थ गच्छेज्जा २ से पुव्वामेव आलोएज्जा, “आउसंतो समणा! इमे मे असणं वा ४ बहुपरियावण्णे, तं भुजह च णं” से सेवं वयंतं परो वएज्जा “आउसंतो समणा! आहारमेयं असणं वा ४ जावइयं २ परिसडइ तावइयं २ भोक्खामो वा, पाहामो वा, सव्वमेयं परिसडइ, सव्वमेयं भोक्खामो वा पाहामो वा” ॥६२८॥ से भिक्खू वा २ से जं पुण जाणिज्जा, असणं वा, पाणं वा, खाइमं वा, साइमं वा, परं समुहिस्स बहिया णीहडं तं परेहिं असमणुण्णायं अणिसिट्ठं अफासुयं जाव णो पडिगाहिज्जा, तं परेहिं समणुण्णायं संणिसिट्ठं फासुयं लाभे संते जाव पडिगाहिज्जा ॥६२९॥ एस खल्ल तस्स भिक्खुस्स भिक्खुणीए वा सामगियं ॥६३०॥ **नद्धमोद्देशो समत्तो ॥**

से एगइओ साहारणं वा पिंडवार्यं पडिगाहित्ता, ते साहम्मिए अणापुच्छित्ता जस्स-जस्स इच्छइ तस्स-तस्स खद्धं-खद्धं दलयइ, माइट्ठाणं संफासे णो एवं करेज्जा से तमायाए तत्थ गच्छेज्जा २ पुव्वामेव आलोएज्जा “आउसंतो समणा! संति मम पुरे-संथुया वा पच्छासंथुया वा, तंजहा-आयरिए वा, उवज्जाए वा, पविस्ती वा, थेरे वा, गणी वा, गणहरे वा, गणावच्छेइए वा, अवियाइं एएसिं खद्धं-खद्धं

दाहामि" से सेवं वयंतं परो वएज्जा, कामं खलु आउसो ! अहापज्जत्तं गिसिराहि जावइयं २ परो वयइ तावइयं २ गिसिरेज्जा, सव्वमेयं परो वयइ सव्वमेयं गिसिरेज्जा ॥६३१॥ से एगइओ मणुणं भोयणजायं पडिगाहिच्चा पंतेण भोयणेण पलिच्चाएइ "मामेयं दाइयं संतं दट्टूणं सयमायए, आयरिए वा जाव गणावच्छेइए वा, णो खलु मे कस्सइ किञ्चिवि दायव्वं सिया" माइट्ठाणं संफासे णो एवं करेज्जा, से तमायाए तत्थ गच्छेज्जा, २ पुब्बामेव उत्ताणए हत्थे पडिग्गहं कट्टु "इमं खलु इमं खलु त्ति" आलोएज्जा, णो किञ्चिवि गिगूहेज्जा ॥६३२॥ से एगइओ अण्णयरं भोयणजायं पडिगाहिच्चा, भइयं भइयं भोच्चा, विवण्णं विरसमाहरइ, माइट्ठाणं संफासे, णो एवं करिज्जा ॥६३३॥ से भिक्खू वा २ से जं पुण जाणिज्जा, अंतरुच्छियं वा, उच्छुगंडियं वा, उच्छुचोयगं वा, उच्छुमेरगं वा, उच्छुसालगं वा, उच्छुडालगं वा, सिंवल्लि वा, सिंवल्लिथालगं वा, अस्सि खलु पडिग्गहियंसि अप्पे सिया भोयणजाए, बहुउज्झियधम्मिए तहप्पगारं अंतरुच्छुयं जाव सिंवली थालगं वा अफासुयं जाव णो पडिगाहिज्जा ॥६३४॥ से भिक्खु वा २ से जं पुण जाणिज्जा, बहु अट्ठियं वा मंसं वा मच्छं वा बहुकंटगं अस्सि खलु पडिग्गहियंसि अप्पेसिया भोयणजाए बहुउज्झियधम्मिए-तहप्पगारं बहु अट्ठियं वा मंसं वा, मच्छं वा बहुकंटगं लाभे संते जाव णो पडिगाहिज्जा ॥६३५॥ से भिक्खू वा २ जाव समाणे, सिया णं परो बहु अट्ठिएणं वा मंसेण वा मच्छेण वा उवणिमंतेज्जा "आउसंतो समणा अभिक्खसि ! बहुअट्ठियं मंसं पडिगाहित्तए ?" एयप्पगारं गिग्घेसं तोच्चा गिसम से पुब्बामेव आलोएज्जा, "आउसो त्ति वा भइणित्ति वा, णो खलु मे कप्पइ से बहुअट्ठियं मंसं पडिगाहित्तए, अभिक्खसि मे दाउं, जावइयं तावइयं पुग्गलं दलयाहिं, मा य अट्ठियाइं "से सेवं वयंतस्स परो अभिहट्टु अंतो पडिग्गहं गंसि बहुअट्ठियं मंसं परिभाएत्ता णिहट्टु दलएज्जा, तहप्पगारं पडिग्गहं परहत्थंसि वा परपायंसि वा अफासुयं अणेसणिज्जं लाभे संते णो पडिगाहिज्जा, से आहच्च पडिगाहिए सिया तं णोहि त्ति वएज्जा, णो अणहित्ति वएज्जा, से तमायाए एगंतमवक्कमेज्जा २ अहे आरामंसि वा, अहे उवस्सयंसि वा, अप्पंडए जाव अप्पंसंताणए, मंसं मच्छं भुच्चा अट्ठियाइं कंटए गहाय से तमायाए एगंतमवक्कमेज्जा २ अहे ज्जामथं डिलंसि वा, जाव पमज्जिय २ तओ संजयामेव

परिद्वविज्जा ॥६३६॥ से भिक्खू वा २ जाव समाणे सिया परो अभिहट्टु अंतो पडिग्गाहए बिलं वा लोणं, उब्भियं वा लोणं, परिभाएत्ता णीहट्टु दलएज्जा, तहप्पगारं परहत्थंसि वा, परपायंसि वा अफासुयं अणेसणिज्जं जाव गो पडिगाहिज्जा से आहच्च पडिग्गाहिए सिया तं च णाइदूरगए जाणिज्जा, से तमायाए तत्थ गच्छिज्जा २ पुव्वामेव आलोएज्जा “आउसो त्ति वा, भइणि त्ति वा, इमं ते किं जाणया दिण्णं उदाहु अजाणया ! सो य भणेज्जा, गो खलु मे जाणया दिण्णं, अजाणया दिण्णं, कामं खलु आउसो ! इदाणि णिसिरामि तं भुंजह च णं परिभाएह च णं, तं परेहिं समणुष्णायं समणुसिट्ठं तओ संजयामेव, भुंजेज्ज वा पीएज्ज वा, जं च गो संचाएइ भोत्तए वा पायए वा साहम्मिया तत्थ वसंति संभोइया समणुष्णा अपरिहारिया अदूरगया तेसिं अणुपयायव्वं, सिया णो जत्थ साहम्मिया सिया जहेव बहुपरियावण्णे कीरइ तहेव कायव्वं सिया ॥६३७॥ एस खलु तस्स भिक्खुस्स वा भिक्खुणीए वा सामगियं ॥६३८॥ **दसमोद्देशो सप्ततो ॥**

भिक्खाराणां णामेगे एवमाहंसु समाणे वा वसमाणे गामाणुगामं वा दूइज्जमाणे मणुष्णं भोयणजायं लभित्ता “से य भिक्खू गिलाइं से हंदह णं तस्साहरह से य भिक्खू गो भुंजिज्जा आहरिज्जा तुमं चेव णं भुंजिज्जासि” से एगइओ भोक्खामित्ति कट्टु पलित्तं चिय २ आलोएज्जा, तंजहा-इमे पिंडे इमे लोए इमे तित्तए इमे कडुए इमे कसाए इमे अंबिले इमे महुरे णो खलु एत्तो किंचि गिलाणस्स सयइत्ति माइट्ठणं संफासे, णो एवं करेज्जा तहाठियं तहेव तं आलोएज्जा जहाठियं जहेव तं गिलाणस्स सयइत्ति, तंजहा-तित्तयं तित्तएत्ति वा, कडुयं कडुएत्ति वा, कसायं कसाएत्ति वा, अंबिलं अंबिलेत्ति वा, महुरं महुरेत्ति वा ॥६३९॥ भिक्खाराणां णामेगे एवमाहंसु, समाणे वा वसमाणे वा, गामाणुगामं दूइज्जमाणे मणुष्णं भोयणजायं लभित्ता से भिक्खू गिलाइ से हंदह णं तस्साहरह से य भिक्खू गो भुंजिज्जा, आहरेज्जा, से ण गो खलु मे अंतराए आहग्गिस्सामि इच्चेयाइं आययणाइं उवाइक्कम्म ॥६४०॥ अह भिक्खू जाणिज्जा सत्त पिंडेसणाओ सत्त पाणेसणाओ तत्थ खलु इमा पदमा पिंडेसणा असंसट्ठे हत्थे असंसट्ठे मत्ते तहप्पगारेण असंसट्ठेण हत्थेण वा मत्तेण वा, असणं वा पाणं वा खाइमं वा साइमं वा सयं वा णं जाएज्जा, परो वा से दिज्जा, फासुयं जाव पडिगाहिज्जा, पदमा पिंडेसणा ॥६४१॥ अहावरा दोच्चा पिंडेसणा, संसट्ठे हत्थे

संसद्रे मत्तए तद्देव दोच्चा पिंडेसणा ॥ ६४२ ॥ अहावरा तच्चा पिंडेसणा, इह खलु पार्दणं वा ४ संतेगइया सद्धा भवंति गाहावइ वा जाव कम्मकरीओ वा, तेसिं च णं अण्णयरेसु विरूवरूवेसु भायणजाएसु उवणिन्निवत्तपुव्वे सिया तंजहा थालंसि वा, पिढरंसि वा सरगंसि वा, परगंसि वा, वरगंसि वा, अह पुण एवं जाणिज्जा, असंसद्रे हत्ये संसद्रे मत्ते, संसद्रे वा हत्ये असंसद्रे मत्ते से य पडिग्गहधारी सिया पाणिपडिग्गहिए वा, से पुब्बामेव आलोएज्जा “आउसोत्ति वा, भग्गिणि त्ति वा, एएणं तुमं असंसद्रेण हत्येण संसद्रेण मत्तेण संसद्रेण वा हत्येण असंसद्रेण मत्तेण अस्सिं पडिग्गहगंसि वा पाणिंसि वा गिहट्टु उचित्तु दलयाहि” तहप्पगारं भोयणजायं सयं वा णं जाएज्जा, परो वा से देज्जा, फासुयं एसणिज्जं जाव पडिगाहिज्जा । तच्चा पिंडेसणा ॥ ६४३ ॥ अहावरा चउत्था पिंडेसणा, से भिक्खू वा, २ से जं पुण जाणिज्जा, पिहुअं वा, जाव चाउलपलंबं वा, अस्सिं खलु पडिग्गहियंसि अप्पे पच्छाकम्मे अप्पे पब्बवजाए, तहप्पगारं पिहुयं वा जाव चाउलपलंबं वा सयं वा णं जाएज्जा परो वा से देज्जा जाव पडिमाहिज्जा । चउत्था पिंडेसणा ॥ ६४४ ॥ अहावरा पंचमा पिंडेसणा से भिक्खू वा भिक्खुणी वा, जाव समाणे, उग्गाहियमेव भोयणजायं जाणिज्जा, तंजहा—सरावंसि वा, डिंढिमंसि वा, कोसगंसि वा, अह पुण एवं जाणिज्जा बहुपरियावण्णे पाणीसु उदगलेवे तहप्पगारं असणं वा ४ सयं वा णं जाएज्जा, जाव पडिगाहिज्जा । पंचमा पिंडेसणा ॥ ६४५ ॥ अहावरा छट्ठा पिंडेसणा, से भिक्खू वा २ परगाहियमेव भोयणजायं जाणिज्जा, जं च सयट्ठाए परगाहियं जं च परट्ठाए परगाहियं तं पायपरियावण्णं तं पाणिपरियावण्णं फासुयं जाव पडिगाहिज्जा । छट्ठा पिंडेसणा ॥ ६४६ ॥ अहावरा सत्तमा पिंडेसणा, से भिक्खू वा २ जाव समाणे बहु उज्झियधम्मियं भोयणजायं जाणिज्जा, जं चउण्णे बहवे दुपय-चउपय-समण-माहण-अतिहि-क्किवण-वणीमगा णावकंखंति तहप्पगारं उज्झियधम्मियं भोयणजायं सयं वा णं जाएज्जा परो वा से दिज्जा जाव फासुयं पडिगाहिज्जा । सत्तमा पिंडेसणा ॥ इवेयाओ सत्त पिंडेसणाओ ॥ ६४७ ॥ अहावराओ सत्त पाणेसणाओ, तत्थ खलु इमा पढमा पाणेसणा, असंसद्रे हत्ये असंसद्रे मत्ते तं चेव भाणियत्वं, णवरं चउत्थाए णाणत्तं, से भिक्खू वा २ जाव समाणे से जं पुण पाणगजायं जाणिज्जा, तंजहा—तिलोदगं वा, तुसोदगं वा, जवोदगं वा,

आयामं वा, सोवीरं वा, सुद्धवियडं वा, अस्सि खलु पडिग्गहियंसि अप्पे पच्छा-
कम्मे, तहेव पडिग्गाहिज्जा ॥६४८॥ इत्थेयासि सत्तण्हं पिंडेरुणाणं सत्तण्हं पाणेष-
णाणं अण्णयरं पडिमं पडिवज्जमाणे णो एवं वएज्जा “मिच्छापडिवण्णा खलु
एए भयंतारो अहमेरो सम्मं पडिवण्णे, जे एए भयंतारो एयाओ पडिमाओ पडि-
वज्जिताणं विहरंति, जो य अहमंसि एय पडिमं पडिवज्जिताणं विहरामि सव्वेऽवि-
ते उं जिणाणाए उवट्ठिया अण्णोणसमाहीए एयं च णं विहरंति ॥६४९॥ एयं
खलु तस्स भिक्खुस्स वा भिक्खुणीए वा सामगियं ॥ ६५०॥ एगारसमो-
हेसो । बिइयसुयक्खंधस्स पिंडेसणा णामं पढमज्झयणं समत्तं ॥

॥ सेज्जा णाम बीयं अज्झयणं ॥

से भिक्खू वा २ अभिकंखेज्जा, उवस्सयं एसित्तए, से अणुपविसेत्ता गामं वा
जाव रायहाणिं वा ॥६५१॥ से जं पुण उवस्सयं जाणिज्जा, सअंडं जाव ससंताणयं
तहप्पगारे उवस्सए णो ठाणं वा सेज्जं वा णिसीहियं वा चेएज्जा ॥६५२॥ से भिक्खू
वा २ से जं पुण उवस्सयं जाणिज्जा, अप्पंडं अप्पपाणं जाव अप्पसंताणयं तहप्पगारे
उवस्सए पडिलेहित्ता पमज्जित्ता, तओ संजयामेव ठाणं वा सेज्जं वा णिसीहियं वा
चेएज्जा ॥६५३॥ से जं पुण उवस्सयं जाणिज्जा अस्सिपडियाए एगं साहम्मियं
समुद्दिस्स पाणाइं भूयाइं जीवाइं सत्ताइं समारब्भ समुद्दिस्स कीयं पामिच्चं अच्छिज्जं
अणिसट्ठं अमिहडं आहट्टु चेएइ तहप्पगारे उवस्सए पुरिसंतरगडे वा अपुरिसंत-
रगडे वा जाव अणासेविए वा णो ठाणं वा सेज्जं वा णिसीहियं वा चेएज्जा । एवं
बहवे साहम्मिया एगं साहम्मिणी बहवे साहम्मिणीओ ॥६५४॥ से भिक्खू वा २
से जं पुण उवस्सयं जाणिज्जा असंजए भिक्खुपडियाए बहवे समण-माहण-अतिहि-
क्खिण-वणोमए पगणिय २ समुद्दिस्स पाणाइं भूयाइं जीवाइं सत्ताइं जाव चेएइ
तहप्पगारे उवस्सए अपुरिसंतरगडे जाव अणासेविए णो ठाणं वा सेज्जं वा णिसी-
हियं वा चेएज्जा, अह पुण एवं जाणिज्जा पुरिसंतरगडे जाव आसेविए पडि-
लेहित्ता पमज्जित्ता तओ संजयामेव ठाणं वा सेज्जं वा णिसीहियं वा चेएज्जा
॥६५५॥ से भिक्खू वा २ से जं पुण उवस्सयं जाणिज्जा, असंजए भिक्खुपडियाए
कडिए वा, उक्कंनिए वा, छण्णे वा, लिच्चे वा, धट्ठे वा, मट्ठे वा, संमट्ठे वा, संप-

धूमिए वा, तहप्पगारे उवस्सए अपुरिसंतरगडे जाव अणासेविए, णो ठाणं वा, सेब्बं वा, णिसीहियं वा चेएज्जा, अह पुण एवं जाणिज्जा पुरिसंतरगडे जाव आसे-
 विए, पडिलेहिता पमज्जिता, तओ संजयामेव जाव चेएज्जा ॥६५६॥ से भिक्खु
 वा २ से जं पुण उवस्सयं जाणिज्जा, असंजए भिक्खुपडियाए खुड्डियाओ दुवारि-
 याओ महल्लियाओ कुज्जा, जहा पिंडेसणाए जाव संथारणं संथारिज्जा, ब्रहिया वा
 णिण्णक्खु तहप्पगारे उवस्सए अपुरिसंतरगडे जाव अणासेविए णो ठाणं वा, सेब्बं
 वा णिसीहियं वा चेएज्जा, अह पुण एवं जाणिज्जा पुरिसंतरगडे जाव आसेविए
 पडिलेहिता पमज्जिता तओ संजयामेव जाव चेएज्जा ॥६५७॥ से भिक्खु वा २
 से जं पुण उवस्सयं जाणिज्जा, असंजए भिक्खुपडियाए उदगप्पसूयाणि वा, कंदाणि
 वा, मूलाणि वा, पत्ताणि वा, पुप्फाणि वा, फलाणि वा, बीयाणि वा, हरियाणि वा,
 ठाणाओ ठाणं साहरइ, ब्रहिया वा णिण्णक्खु तहप्पगारे उवस्सए अपुरिसंतरगडे
 जाव णो ठाणं वा सेब्बं वा णिसीहियं वा चेएज्जा । अह पुण एवं जाणिज्जा,
 पुरिसंतरगडे जाव चेएज्जा ॥६५८॥ से भिक्खु वा, भिक्खुणी वा, से जं पुण
 उवस्सयं जाणिज्जा, असंजए भिक्खुपडियाए पीढं वा फल्यं वा णिस्सेणिं वा उदू-
 हलं वा ठाणाओ ठाणं साहरइ ब्रहिया वा णिण्णक्खु, तहप्पगारे उवस्सए अपु-
 रिसंतरगडे जाव णो ठाणं वा सेब्बं वा णिसीहियं वा चेएज्जा, अह पुण एवं
 जाणिज्जा पुरिसंतरगडे जाव चेएज्जा ॥६५९॥ से भिक्खु वा २ से जं पुण उवस्सयं
 जाणिज्जा, तेज्जा खंभंसि वा मंचंसि वा मालंसि वा पासायंसि वा हम्मियतलंसि वा
 अण्णयंसि वा तहप्पगारंसि, अंतुल्लिक्खजायंसि, णण्णत्थ आगाढागादेहिं कार-
 णेहिं, ठाणं वा सेज्जं वा णिसीहियं वा चेएज्जा ॥६६०॥ से आहच्च चेइए सिया
 णो तत्थ सीओदगवियडेण वा, उत्तिणोदगवियडेण वा, हत्थाणि वा, पायाणि
 वा, अन्ध्रीणि वा, दंताणि वा, मुहं वा, उच्चोलेज्ज वा पडोएज्ज वा, णो तत्थ ऊसदं
 पगारेज्जा, तेज्जा-उच्चारं वा पासवणं वा, खेलं वा, सिंघाणं वा, वंतं वा, पित्तं वा,
 पूयं वा, सोणियं वा, अण्णयरं वा सरीरावयथं केवली बूया “आयाणमेयं” से तत्थ
 ऊसदं पगारेमाणे पयलेज्ज वा, पवडेज्ज वा, से तत्थ पयलेमाणे पवडेमाणे वा हत्थं
 वा, जाव सीसं वा अण्णयरं वा कार्यंसि ईदियजायं लूसेज्ज वा पाणाणि वा ४ अभिह-
 णेज्ज वा जाव ववरोवेज्ज वा, अह भिक्खुणं पुब्बोवदिट्ठा एस पइण्णा जाव जं तह-

प्पगारे उवस्सए अंतलिक्खजाए णो ठाणं वा सेज्जं वा णिसीहियं वा चेएज्जा
 ॥६६१॥ से भिक्खू वा २ से जं पुण उवस्सयं जाणिज्जा सदित्थियं सखुद्धं
 सपसुमत्तपाणं तहपगारे सागारिए उवस्सए णो ठाणं वा सेज्जं वा णिसीहियं वा
 चेएज्जा, आयाणमेयं भिक्खुस्स गाहावइकुलेण सद्धिं संवसमाणस्स अलसए वा
 विसूइया वा छुड्डी वा उव्याहिज्जा अण्णयरे वा से दुक्खे रोगायंके समुप्पजेज्जा असं-
 जए कलुणवडियाए तं भिक्खुस्स गायं तेलेण वा, घएण वा, णवणीएण वा, वसाए
 वा उव्वट्टणेण वा अब्भंगेज्ज मक्खिज्ज वा, सिणाणेण वा, कक्केण वा, लोद्रेण वा,
 वण्णेण वा, चुण्णेण वा, पउमेण वा, अयंसेज्ज वा पधंसेज्ज वा, उव्वलेज्ज वा, उवट्टेज्ज
 वा, सीओदगवियडेण वा, उसिणोदगवियडेण वा, उच्छोलेज्ज वा, पच्छोलेज्ज वा,
 पहोएज्ज वा, सिणाविज्ज वा, सिंविज्ज वा, दारुणा वा, दारुपरिणामं कट्टु,
 अगणिकायं उज्जालेज्ज वा, पज्जालिज्ज वा, उज्जालित्ता २ कायं आयावेज्ज
 वा पयावेज्ज वा अहं भिक्खूणं पुव्वोवइट्ठा एस पइण्णा जाव जं तहप्पगारे
 सागारिए उवस्सए णो ठाणं वा सेज्जं वा णिसीहियं वा चेएज्जा ॥६६२॥ आयाण-
 मेयं भिक्खुस्स सागारिए उवस्सए वसमाणस्स इह खलु गाहावइ वा जाव कम्म-
 करीओ वा अण्णमण्णं अक्कोसंति वा पहेति वा कंमेति वा उद्विंति वा अहं
 भिक्खूणं उच्चावयं मणं णियंछेज्जा एए खलु अण्णमण्णं उक्कोसंतु वा मा वा उक्कोसंतु
 जाव मा वा उद्विंतु ! अहं भिक्खूणं पुव्वोवइट्ठा एस पइण्णा जाव जं तहप्पगारे
 सागारिए उवस्सए णो ठाणं वा सेज्जं वा णिसीहियं वा चेएज्जा ॥६६३॥ आयाण-
 मेयं भिक्खुस्स गाहावइहिं सद्धिं संवसमाणस्स इह खलु गाहावइ अण्णो
 सअट्ठाए अगणिकायं उज्जालेज्ज वा पज्जालेज्ज वा विज्जावेज्ज वा अहं
 भिक्खू उच्चावयं मणं णियंछेज्जा, एए खलु अगणिकायं उज्जालेत्तु वा
 जाव मा वा विज्जावेत्तु अहं भिक्खूणं पुव्वोवइट्ठा जाव जं तहप्पगारे
 उवस्सए णो ठाणं वा सेज्जं वा णिसीहियं वा चेएज्जा ॥ ६६४ ॥ आया-
 णमेयं भिक्खुस्स गाहावइहिं सद्धिं संवसमाणस्स इह खलु गाहावइस्स कुंडले वा,
 गुणे वा मणी वा, मोत्तिए वा, हिरण्णे वा, सुवण्णे वा, कडगाणि वा, तुडियाणि वा,
 तिसरगाणि वा, पालंवाणि वा, हारे वा, अद्धहारे वा, एगावली वा, मुत्तावली वा,
 कण्णावली वा, रयणावली वा, तरुणियं वा कुमारिं अलंक्खिविभूसियं पेहाए,

अह भिक्खू उच्चावयं मणं, गियंछेज्जा, “एरिसिया वा सा णो वा एरिसिया” इह वा णं बूया, इह वा णं मणं साएज्जा, अह भिक्खूणं पुब्बोवइट्ठा ४ जाव जं तहप्पगारे उवस्सए णो ठाणं वा जाव चेएज्जा ॥६६५॥ आयाणमेयं भिक्खुस्स गाहावइहि सद्धिं संवसमाणस्स इह खलु गाहावइणीओ वा, गाहावइधूयाओ वा, गाहावइसुण्हाओ वा, गाहावइधाईओ वा, गाहावइदासीओ वा, गाहावइकम्मकरीओ वा, तासिं च णं एवं बुत्तपुच्चं भवइ, “जे इमे भवंति सम्णा भगवंतो जाव उवरया मेहुणधम्मो णो खलु एएसिं कप्पइ मेहुणधम्मं परियारणाए आउट्टित्तए जा य खलु एएहिं सद्धिं मेहुणधम्मं परियारणाए आउट्टाविज्जा पुत्तं खलु सा लमेज्जा, ओयस्सिं तेयस्सिं वचस्सिं जसस्सिं संपराइयं आलोगणदरिसिणिज्जं,” एयप्पगारं गिण्घोसं सोच्चा णिसम्म तासिं च णं अण्ययो सद्धीं तं तवस्सिं भिक्खुं मेहुणधम्मपरियारणाए आउट्टावेज्जा, अह भिक्खूणं पुब्बोवइट्ठा जाव जं तहप्पगारे सागारिए उवस्सए णो ठाणं वा सेज्जं वा णिसीहियं वा चेएज्जा ॥६६६॥ एयं खलु तस्स भिक्खुस्स भिक्खुणीए वा सामगियं ॥६६७॥ **सेज्जाज्जयणस्स**

पढमोद्देशो समत्तो ॥

गाहावइ णामेगे सुइसमायारा भवंति से भिक्खू य असिणाणाए मोयसमायारे से तग्गधे दुग्गधे पडिक्कले पडिलोमे यावि भवइ, जं पुब्बकम्मं, जं पच्छाकम्मं तं पच्छाकम्मं तं पुब्बकम्मं तं भिक्खुपडियाए बट्टमाणे करेज्जा वा णो करेज्जा वा अह भिक्खूणं पुब्बोवइट्ठा जाव जं तहप्पगारे उवस्सए णो ठाणं वा जाव चेएज्जा ॥६६८॥ आयाणमेयं भिक्खुस्स गाहावइहिं सद्धिं संवसमाणस्स इह खलु गाहावइस्स अष्पणो सअट्ठाए विरूवरूवे भोयणजाए उवक्खडिए सिया अह पच्छा भिक्खुपडियाए असणं वा ४ उवक्खडेज्ज वा उवकरेज्ज वा तं च भिक्खू अभिक्खेज्जा भोत्तए वा पायए वा वियट्टित्तए वा अह भिक्खूणं पुब्बोवइट्ठा जाव जं तहप्पगारे उवस्सए णो ठाणं चेएज्जा ॥६६९॥ आयाणमेयं भिक्खुस्स गाहावइणा सद्धिं संवसमाणस्स इह खलु गाहावइस्स अष्पणो सयट्ठाए विरूवरूवाईं दारुयाईं भिण्णपुब्बाईं भवंति, अह पच्छा भिक्खुपडियाए विरूवरूवाईं दारुयाईं भिदेज्ज वा, किणेज्ज वा पामिचेज्ज वा, दारुणा वा दारुपरिणामं कट्टु अगणिकायं उज्जालेज्ज वा, पज्जालेज्ज वा, तत्थ भिक्खू अभिक्खेज्ज वा आयावेत्तए वा, पयावेत्तए वा, वियट्टित्तए वा,

अह भिक्खूणं पुब्बोवइट्ठा जाव जं तहप्पगारे उवस्सए णो ठाणं चेएज्जा ॥६७०॥
 से भिक्खू वा २ उच्चारपासवणेण उव्वाहिज्जमाणे राओ वां वियाले वा, गाहा-
 वइकुलस्स दुवारवाहं अबंणुणेज्जा तेणे य तस्संघिचारी अणुपविसेज्जा, तस्स
 भिक्खुस्स णो कप्पइ एवं वदित्तए “अयं तेणे पविसइ वा णो वा पविसइ,
 उवळियइ वा णो वा उवळियइ, आवयइ वा णो वा आवयइ, वयइ वा णो वा
 वयइ, तेण हडं अण्णेण हडं, तस्स हडं अण्णस्स हडं, अयं तेणे अयं उवरए,
 अयं हंता, अयं एत्थमकासी,” तं तवस्सिं भिक्खुं अतेणं तेणं ति संकड, अह
 भिक्खूणं पुब्बोवइट्ठा जाव चेएज्जा ॥६७१॥ से भिक्खू वा २ से जं पुण
 उवस्सयं जाणिज्जा तणपुंजेसु पल्लपुंजेसु वा, सअडे जाव ससंताणए तहप्पगारे
 उवस्सए णो ठाणं वा सेज्जं वा णिसीहियं वा चेएज्जा ॥६७२॥ से भिक्खू वा २
 से जं पुण उवस्सयं जाणिज्जा, तणपुंजेसु वा, पल्लपुंजेसु वा अप्पडे जाव
 चेएज्जा ॥६७३॥ से आगंतारेसु वा, आरामागारेसु वा, गाहावइकुलेसु वा
 परियावसहेसु वा अभिक्खणं अभिक्खणं साहम्मिएहि ओवयमाणेहि णो उवएज्जा
 ॥६७४॥ से आगंतारेसु वा जाव परियावसहेसु वा, जे भयंतारो उडुवदियं वासा-
 वासियं वा कप्पं उवाइणित्ता तत्थेव भुज्जो भुज्जो संवसंति, अयमाउसो ! कालाडकंत-
 किरिया वि भवइ ॥६७५॥ से आगंतारेसु वा जाव परियावसहेसु वा, जे भयंतारो
 उडुवदियं वा वासावासियं वा, कप्पं उवाइणावित्ता तं दुगुणा दु(त्ति)गुणेण वा
 अपरिहरित्ता तत्थेव भुज्जो भुज्जो संवसंति, अयमाउसो ! इत्तरा उवट्ठाणकिरिया यावि
 भवइ ॥६७६॥ इइ खलु पाईणं वा पडीणं वा दाहीणं वा उदीणं वा संतेगइया
 सद्धा भवंति तंजहा गाहावइ वा जाव कम्मकरीओ वा तेषिं च णं आयारगोयरे
 णो सुणिसंते भवइ तं सद्दहमाणेहिं, तं पत्तियमाणेहिं, तं रोयमाणेहिं बहवे समण-
 माहणअतिहिक्रिवणवणीमए समुद्दिस्स तत्थ तत्थ अगारीहिं अगाराइं चेइयाइं
 भवंति, तंजहा—आएसणाणि वा आययणाणि वा देवकुलाणि वा सहाओ वा पवाणि
 वा पणियनिहाणि वा पणियसालाओ वा जाणशिहाणि वा जाणसालाओ वा सुहा-
 कम्मंताणि वा दम्मकम्मंताणि वा च्छकम्मंताणि वा, वक्कयकम्मंताणि वा वणकम्मंताणि
 वा ईगालकम्मंताणि वा कट्टकम्मंताणि वा सुसाणकम्मंताणि वा संतिकम्मंताणि वा
 सुण्णागारकम्मंताणि वा गिरिकम्मंताणि वा कंदराकम्मंताणि वा सेलेवट्ठाणकम्मंताणि

वा भवणगिहाणि वा जे भयंतारो तहप्पगाराई आएसणाणि वा जाव भवणगिहाणि वा तेहिं ओवयंति ओवयंति, अयमाउसो ! अभिक्कंतकिरिया या वि भवइ ॥६७॥ इह खलु पाईणं वा पडीणं वा दाहिणं वा उदीणं वा संतेगइया सद्धा भवंति जाव तं रोयमाणेहिं बहवे समण जाव वणीमए समुद्दिस्स, तत्थ २ अगाराहिं अगाराईं चेइयाईं भवंति, तंजहा—आएसणाणि वा जाव भवणगिहाणि वा जे भयंतारो तहप्पगाराईं आएसणाणि वा जाव भवणगिहाणि वा तेहिं अणोवयमाणेहिं ओवयंति अयमाउसो ! अणभिक्कंतकिरिया या वि भवइ ॥ ६७८ ॥ इह खलु पाईणं वा पडीणं वा दाहिणं वा उदीणं वा संतेगइया सद्धा भवंति, तंजहा—गाहावई वा जाव कम्मकरीओ वा, तेसिं च णं एयं वुत्तपुव्वं भवइ, “जे इमे भवंति समणा भगवंतो सीलमंता जाव उवरया मेहुणवग्गमाओ, णो खलु एएसिं भयंताराणं कप्पइ आहाकम्मिए उवस्सए वत्थए, से जाणि इमाणि अम्हं अप्पणो सअट्टाए चेइयाईं भवंति, तंजहा आएसणाणि वा, जाव भवणगिहाणि वा, सच्चाणि ताणि समणाणं गिसिरामो अविद्याईं त्रयं पच्छा अप्पणो सअट्टाए चेइस्सामो तंजहा—आएसणाणि वा जाव भवणगिहाणि वा, एयप्पगारं गिग्घोसं सोच्चा णिसम्म जे भयंतारो तहप्पगाराईं आएसणाणि वा जाव भवणगिहाणि वा उवागच्छंति उवागच्छन्ता इयराइयरेहिं पाहुडेहिं वट्ठंति अयमाउसो ! वज्जकिरिया या वि भवइ ॥६७९॥ इह खलु पाईणं वा पडीणं वा दाहिणं वा उदीणं वा, संतेगइया सद्धा भवंति जाव तेसिं च णं आयारगोयरे णो सुणिसंते भवइ, जाव तं रोयमाणेहिं बहवे समण जाव वणीमए पगणिय २ समुद्दिस्स तत्थ २ अगाराहिं अगाराईं चेइयाईं भवंति तंजहा—आएसणाणि वा जाव भवणगिहाणि वा जे भयंतारो तहप्पगाराईं आएसणाणि वा जाव भवणगिहाणि वा उवागच्छंति २ इयराइयरेहिं पाहुडेहिं वट्ठंति अयमाउसो ! महावज्जकिरिया वि भवइ ॥६८०॥ इह खलु पाईणं वा पडीणं दाहिणं वा उदीणं वा संतेगइया सद्धा भवंति जाव तं रोयमाणेहिं बहवे समणजाए समुद्दिस्स तत्थ तत्थ अगाराहिं अगाराईं चेइयाईं भवंति—तंजहा आएसणाणि वा जाव भवणगिहाणि वा जे भयंतारो तहप्पगाराईं आएसणाणि वा जाव भवणगिहाणि वा उवागच्छंति २ ता इयराइयरेहिं पाहुडेहिं वट्ठंति, अयमाउसो ! सावज्जकिरिया या वि भवइ ॥६८१॥ इह खलु पाईणं वा जाव उदीणं वा संते-

गइया सद्दा भवेति तंजहा--गाहावई वा जाव कम्मकरोओ वा तेसिं च णं आयार-
 गोयरे णो सुणिंसेते भवइ जाव तं रोयमाणेहिं एक्क समणजायं समुद्दिस्स तत्थ तत्थ
 अगारीहिं अगाराइं चेइयाइं भवंति, तंजहा-आएसणाणि वा जाव भवणगिहाणि वा,
 महया पुढवीकायसमारंभेणं एवं महया आउ-तेउ-वाउ-वणस्सइ-तसकायसमारंभेणं
 महया संरंभेणं महया सभारंभेणं महया आरंभेणं महया विरूवरूवेहिं पावकम्महिं
 तंजहा छायणओ, लेवणओ, संथारदुवारपिहणाओ, सीतोदए वा परिट्टवियपुव्वे भवइ,
 अगणिकाए वा उज्जालियपुव्वे भवइ, जे भयंतारो तहप्पगाराइं आएसणाणि वा
 जाव भवणगिहाणि वा उव्वागच्छंति इण्णराइयरेहिं पाहुडेहिं वट्ठंति दुपक्खं ते कम्मं
 सेवंति अयमाउसो ! महासावज्जकिरिया या वि भवइ ॥६८२॥ इह खलु पाईणं
 वा जाव तं रोयमाणेहिं अप्पणो सअट्टाए तत्थ २ अगारीहिं जाव भवणगिहाणि
 वा, महया पुढविकायसमारंभेणं जाव अगणिकाए वा उज्जालियपुव्वे भवइ जे
 भयंतारो तहप्पगाराइं आएसणाणि वा जाव भवणगिहाणि वा उव्वागच्छंति
 इयराइयरेहिं पाहुडेहिं वट्ठंति एगपक्खं ते कम्मं सेवंति अयमाउसो ! अप्पसावज्जा
 किरिया या वि भवइ ॥ ६८३ ॥ एस खलु तस्स भिक्खुस्स भिक्खुणीए वा
 सामग्गियं ॥६८४॥ **सेज्जाउज्जयणरस्स बीओद्देसो समत्तो ॥**

“से य णो सुलभे फासुए उंछे अहेसणिजे णो य खलु सुद्धे इमेहिं, पाहुडेहिं,
 तंजहा--छायणओ, लेवणओ संथारदुवारपिहणओ पिंडवाएसणाओ से य भिक्खू
 चरियारए ठाणरए णिसीहियारए सेज्जासंथारपिंडवाएसणाए” संति भिक्खुणो
 एव मन्त्वाइणो उज्जुया णियासपडिवण्णा अमायं कुव्वमाणा वियाहिया ॥६८५॥
 संतेगइआ पाहुडिया उक्खित्तपुव्वा भवइ एवं णिक्खित्तपुव्वा भवइ परिभाइयपुव्वा
 भवइ परिभुत्तव्वा भवइ परिट्टवियपुव्वा भवइ एवं वियागरेमाणे समियाए
 वियागरेइ ? हंता भवइ ॥६८६॥ से भिक्खू वा २ से जं पुण उवस्सयं जाणिज्जा
 खुड्डियाओ खुड्डुदुवारियाओ णीयाओ संनिरुद्धाओ भवंति, तहप्पगारे उवस्सए
 राओ वा त्रिआले वा णिक्खममाणे वा पविसमाणे वा पुरा हत्थेण वा पच्छा
 पाएण वा तओ संजयामेव णिक्खमेज्ज वा पविसेज्ज वा, केवली बूया, ‘आयाणमेयं’
 जे तत्थ समणाण वा माहणाण वा छत्तए वा मत्तए वा दंडए वा लट्ठिया वा

भिसिया वा णालिया वा चेले वा विलिमिली वा चम्मए वा चम्मकोसए वा चम्म-
छेदणए वा दुब्बद्धे दुण्णिक्खित्ते अणिकंघे चलाचले भिक्खू य राओ वा वियाले
वा भिक्खवमाणे वा पविसमाणे वा पयलिज्ज वा पवडेज्ज वा, से तत्थ पयलेमाणे
वा पवडेमाणे वा, हत्थे वा पायं वा जाव इंदियजायं वा लूसेज्ज वा, पाणाणि जाव
सत्ताणि वा, अभिहणेज्ज वा जाव ववरोवेज्ज वा, अह भिक्खूणं पुब्बोवइट्ठा जाव
वं तहप्पगारे उवस्सए पुरा हत्थेणं पच्छा पाएणं तओ संजयामेव भिक्खमेज्ज
वा पविसेज्ज वा ॥ ६८७ ॥ से आगंतरेसु वा अणुवीइ उवस्सयं जाएज्जा, जे
तत्थ ईसरे जे तत्थ समहिट्ठाए, ते उवस्सयं अणुणवेज्जा, कामं खलु आउसो !
अहालंदं अहापरिणायं वसिस्सामो जाव आउसंतो जाव आउसंतस्स उवस्सए
जाव साहम्मियाए तओ उवस्सयं गिण्हिस्सामो तेण परं विहरिस्सामो ॥ ६८८ ॥
से भिक्खू वा २ जस्सुवस्सए संवसिज्जा तस्स पुव्वामेव णामगोयं जाणिज्जा तओ
पच्छा तस्स गिहे णिमंतेमाणस्स अणिमंतेमाणस्स वा असणं वा ४ अफासुयं जाव
णो पडिग्गाहिज्जा ॥ ६८९ ॥ से भिक्खू वा २ से जं पुण उवस्सयं जाणिज्जा ससा-
गारियं सागणियं सउदयं णो पण्हस्स भिक्खमणपवेसणाए, णो पण्हस्स वायण जाव
धम्मणुओग चिंताए, तहप्पगारे उवस्सए णो ठाणं वा सेज्जं वा णिसीहियं वा
चेएज्जा ॥ ६९० ॥ से भिक्खू वा २ से जं पुण उवस्सयं जाणिज्जा गाहावइकुलस्स
मज्झं मज्जेणं गंतुं पंथं पडिब्रदं णो पण्हस्स भिक्खमण जाव चिंताए तहप्पगारे
उवस्सए णो ठाणं वा सेज्जं वा णिसीहियं वा चेएज्जा ॥ ६९१ ॥ से भिक्खू वा २
से जं पुण उवस्सयं जाणिज्जा इह खलु ग्गहावई वा जाव कम्मकरीओ वा अण्ण-
मण्णमकोसंति वा जाव उह्वेति वा णो पण्हस्स जाव चिंताए सेवं णच्चा तहप्पगारे
उवस्सए णो ठाणं वा जाव चेएज्जा ॥ ६९२ ॥ से भिक्खू वा २ से जं पुण उवस्सयं
जाणिज्जा इह खलु गाहावई वा जाव कम्मकरीओ वा अण्णमण्णस्स गायं तेहेण वा
घएण वा णवणीएण वा, वसाए वा अब्भंगेति वा मक्खेति वा णो पण्हस्स जाव
चिंताए, तहप्पगारे उवस्सए णो ठाणं वा जाव चेएज्जा ॥ ६९३ ॥ से भिक्खू वा,
२ से जं पुण उवस्सयं जाणिज्जा, इह खलु गाहावई वा जाव कम्मकरीओ वा,
अण्णमण्णस्स गायं सिणाणेण वा कक्केण वा लंदेण वा वण्णेण वा लुण्णेण वा पउमेण
वा, आर्यंसंति वा पथंसंति वा उव्वलंति वा उव्वट्ठित्ति वा णो पण्हस्स भिक्खमण जाव

चिंताए तहप्पगारे उवस्सए णो ठाणं वा जाव चेएज्जा ॥६९४॥ से भिक्खू वा २ से जं पुण उवस्सयं जाणिज्जा इह खलु गाहावई वा जाव कम्मकरीओ वा अण्ण-मण्णस्स गायं सीओदगवियडेण वा उस्सिणोदगवियडेण वा, उच्छोलंति वा पओवेति वा सिंचंति वा सिणावेति वा णो पण्णस्स जाव णो ठाणं वा जाव चेएज्जा ॥६९५॥ से भिक्खू वा २ से जं पुण उवस्सयं जाणिज्जा, इह खलु गाहावई वा जाव कम्म-करीओ वा णिणिणा ठिआ, णिणिणा उल्लीणा मेहुणधम्मं विण्णवेति रहस्सियं वा मंतं मंतंति णो पण्णस्स जाव णो ठाणं वा जाव चेएज्जा ॥६९६॥ से भिक्खू वा २ से जं पुण उवस्सयं जाणिज्जा आइण्णसंलिकलं णो पण्णस्स जाव चिंताए जाव णो ठाणं वा सेज्जं वा णिसीहियं वा चेएज्जा ॥६९७॥ से भिक्खू वा २ अभिक्केवेज्जा संथारगं एसित्तए ॥ ६९८ ॥ से जं पुण संथारयं जाणिज्जा सअंडं जाव संताणगं तहप्पगारं संथारगं लाभे संते णो पडिगाहिज्जा ॥ ६९९ ॥ से भिक्खू वा २ से जं पुण संथारयं जाणिज्जा अप्पंडं जाव संताणगं मरुयं तहप्पगारं लाभे संते णो पडिगाहिज्जा ॥ ७०० ॥ से भिक्खू वा २ से जं पुण संथारगं जाणिज्जा, अप्पंडं जाव संताणगं लहुयं अपाडिहारियं तहप्पगारं सेज्जा संथारयं लाभे संते णो पडिगा-हिज्जा ॥ ७०१ ॥ से भिक्खू वा २ से जं पुण संथारगं जाणिज्जा, अप्पंडं जाव संताणगं लहुयं पाडिहारियं णो अहावद्धं तहप्पगारं लाभे संते णो पडिगाहिज्जा ॥ ७०२ ॥ से भिक्खू वा २ से जं पुण संथारयं जाणिज्जा अप्पंडं जाव संताणगं लहुयं पाडिहारियं अहावद्धं तहप्पगारं संथारयं जाव लाभे संते पडिगाहिज्जा ॥ ७०३ ॥ इधेयाई आययणाई उवाइकम्म अह भिक्खू जाणिज्जा इमाहिं चउहिं पडिमाहिं संथारगं एसित्तए तत्थ खलु इमा पढमा पडिमा;—से भिक्खू वा २ उदिसिय उदिसिय संथारगं जाएज्जा, तंजहा—इक्कडं वा कडिणं वा जंतुयं वा परगं वा मोरगं वा तणं वा सोरगं वा कुसं वा कुच्चगं वा पव्वगं वा पिप्पलगं वा पलालगं वा से पुव्वामेव आलोएज्जा आउसो ! त्ति वा भगिणी ! त्ति वा दाहिसि मे एत्ते अण्णयरं संथारगं ? तहप्पगारं सयं वा णं जाएज्जा परो वा से देज्जा फामुयं एसणिज्जं जाव लाभे संते पडिगाहिज्जा । पढमा पडिमा ॥७०४॥ अहावरा दोच्चा पडिमा, से भिक्खू वा २ पेहाए संथारगं जाएज्जा तंजहा—गाहावई वा जाव कम्मकरिं वा पुव्वामेव आलोएज्जा आउसो ! त्ति वा भगिणि ! त्ति वा

दाहिसि मे एत्तो अण्णयरं संथारगं ?” तहप्पगारं संथारगं सयं वा णं जाणञ्जा परो वा से देज्जा फासुयं एसणिज्जं जाव पडिगाहिज्जा । दोच्चा पडिमा ॥ ७०५ ॥ अहावरा तच्चा पडिमा, से भिक्खू वा २ जस्सुवस्सए संवसेज्जा जे तत्थ अहासमण्णा- गए तंजहा— इक्कडेइ वा जाव पलालेइया तस्स लामे संवसेज्जा तस्स अलामे उक्कुडुए वा णिसज्जिए वा विहरेज्जा । तच्चा पडिमा ॥ ७०६ ॥ अहावरा चउत्था पडिमा, से भिक्खू वा २ अहा संथडमेव संथारगं जाइज्जा तंजहा— पुढविसिलं कट्टसिलं वा, अहासंथडमेव तस्स लामे संते संवसेज्जा, अलामे उक्कुडुए वा णिसज्जिए वा विहरेज्जा । चउत्था पडिमा ॥ ७०७ ॥ इच्चेयाणं चउत्तं पडिमाणं अण्णयरं पडिमं पडिवज्जमाणे तं चैव जाव अण्णोणसमाहीए एवं च णं विहरंति ॥ ७०८ ॥ से भिक्खू वा २ अभिकंखेज्जा संथारं पच्चप्पिणित्तए से जं पुण संथारगं जाणिज्जा सअंडं जाव संताणगं तहप्पगारं संथारगं णो पच्चप्पिणित्तए ॥ ७०९ ॥ से भिक्खू वा २ अभिकंखेज्जा संथारं पच्चप्पिणित्तए, से जं पुण संथारगं जाणिज्जा अण्णं जाव संताणगं तहप्पगारं संथारगं पडिलेहिय २ पमज्जिय २ आयाविय २ विहुणिय २ तओ संजयामेव पच्चप्पिणेज्जा ॥ ७१० ॥ से भिक्खू वा २ समाणे वा वसमाणे वा गामाणुगामं दूइज्जमाणे पुव्वामेव णं पण्णस्स उच्चारपासवणभूमिं पडिलेहिज्जा केवली बूया ‘आयाणमेयं’ अपडिलेहियाए उच्चारपासवणभूमिए भिक्खू वा भिक्खुणी वा राओ वा वियाले वा उच्चारपासवणं परिट्टवेमाणे, पयलेज्जा वा पवडेज्जा वा से तत्थ पयलेमाणे पवडमाणे वा हत्थं वा पायं वा जाव लूसिज्जा पाणाणि वा ४ जाव ववरोवेज्जा, अह भिक्खूणं पुव्वोवइट्ठा जाव जं पुव्वामेव पण्णस्स उच्चारपासवणभूमिं पडिलेहेज्जा ॥ ७११ ॥ से भिक्खू वा २ अभिकंखेज्जा सेज्जासंथारगभूमिं पडिलेहित्तए गण्णत्थ आयरिएण वा उवज्जाएण वा जाव गणावच्छेएण वा बालेण वा बुद्धेण वा सेहेण वा गिलाणेण वा आएसेण वा अंतणे वा मज्जेण वा समेण वा विसमेण वा प्वाएण वा णिवाएण वा तओ संजयामेव पडिलेहिय २ पमज्जिय २ तओ संजयामेव बहुफासुयं सिज्जासंथारगं संथरिज्जा ॥ ७१२ ॥ से भिक्खू वा २ बहुफासुयं सेज्जासंथारगं संथरित्ता अभिकंखेज्जा, बहुफासुए सेज्जासंथारए दुरुहित्तए ॥ ७१३ ॥ से भिक्खू वा २ बहुफासुए सेज्जासंथारए दुरुहमाणे से पुव्वामेव ससीसोवरियं कायं पाए य पमज्जिय २

तत्रो संजयामेव बहुफासुए सिञ्जासंथारगे दुरुहिञ्जा दुरुहिन्ता तत्रो संज-
यामेव बहुफासुए सेजासंथारए सएञ्जा ॥७१४॥ से भिक्खू वा २ बहुफासुए
सेजा संथारए सयमाणे णो अण्णमण्णस्स हत्थेण हत्थं पाएण पायं काएण कार्यं
आसाएज्जा, से अणासायमाणे तत्रो संजयामेव बहुफासुए सेजासंथारए सएज्जा
॥७१५॥ से भिक्खू वा २ उस्सासमाणे वा णीसासमाणे वा कारुमाणे वा
ज्जीयमाणे वा जंभायमाणे वा उड्डुए वा वायणिसग्गे वा करेमाणे पुब्बामेव आसयं
वा पोसयं वा पाणिणा परिपिहिन्ता तत्रो संजयामेव उरसेज्जा वा जाव वायणिसग्गं
वा करेज्जा ॥७१६॥ से भिक्खू वा २ समावेगया सेजा भवेज्जा, विसमा वेगया
सेजा भवेज्जा, पवाया वेगया सेजा भवेज्जा, णिवाया वेगया सेज्जा भवेज्जा,
ससरक्खा वेगया सेज्जा भवेज्जा अप्पससरक्खा वेगया सेजा भवेज्जा, सद्दंसम-
सगा वेगया सेज्जा भवेज्जा, अप्पद्दंसमसगा वेगया सेजा भवेज्जा, सपरिसाडा वेगया
सेजा भवेज्जा, अपरिसाडा वेगया सेजा भवेज्जा, सउवसग्गा वेगया सेजा भवेज्जा,
णिरुवसग्गा वेगया सेजा भवेज्जा, तहप्पगारहिं सेजाहिं संविज्जमाणाहिं पग्गाहिय-
तरागं विहारं विहरेज्जा, णो किंचिवि गिलाएज्जा ॥ ७१७ ॥ एस खलु तस्स
भिक्खुस्स भिक्खुणीए वा सामग्गियं जं सच्चट्ठेहिं समिए सहिए सया जएज्जासि
त्ति वेमि ॥७१८ ॥ तइओद्देसो समत्तो ॥ सेज्जाणामब्बिइय-
मज्झयणं समत्तं ॥

॥ इरिया णाम तइयं अज्झयणं ॥

“अब्भुवगाए खलु वासावासे अभिपवुट्ठे बह्वे पाणा अभिसंभूया, बह्वे वीया-
अहुणुब्भिभण्णा, अंतरा से मग्गा, बहुपाणा बहुवीया, जाव संताणगा, अणभिकंता
पंथा णो विण्णाया मग्गा” सेवं णवा णो गामाणुगामं दूइजेज्जा, तत्रो संजयामेव
वासावासं उवल्लिएज्जा ॥७१९॥ से भिक्खू वा २ से जं पुण जाणिज्जा गामं
वा जाव रायहाणिं वा, इमंसि खलु गामंसि वा रायहाणिसि वा णो महईं विहारभूमि
णो महईं विथारभूमि, णो सुलभे पीढफलगसेजासंथारए णो सुलभे फासुए अच्छे
अहेसणिज्जे बह्वे जत्थ समणमाहणअतिहिक्खिवणवणीमगा उवागया उवागमिस्संति
य अच्चाइण्णा वित्ती णो पण्णस्स णिकखमणपवेसाए चाव घम्माणुओगचिन्ताए सेवं
णच्चा तहप्पगारं गामं वा णगरं वा जाव रायहाणिं वा णो वासावासं उवल्लिएज्जा

॥७२०॥ से भिक्खू वा २ से जं पुण जाणिज्जा गामं वा जाव रायहाणि वा, इमंसे खलु गामंसि वा रायहाणिसि वा महई विहारभूमी महई वियारभूमी सुलभे जत्थ पीढफलासेजासंथारए सुलभे फासुए उंच्छे अहेसणिज्जे णो जत्थ ब्रह्मे-समण जाव उवागया उवागमिस्संति य अप्पाइण्णा वित्ती जाव रायहाणि वा तओ संज-यामेव वासावासं उवस्सिएज्जा ॥७२१॥ अह पुण एयं जाणिज्जा चत्तारि मासा वासावासाण वीइकंता हेमंताण य पंचदसरायकप्पे परिवुसिए अंतरा से मग्गा बहुपाणा जाव संताणगा णो जत्थ ब्रह्मे समण जाव उवागया उवागमिस्संति य सेवं णच्चा णो गामाणुगामं दूइज्जेज्जा ॥७२२॥ अह पुण एयं जाणिज्जा चत्तारि मासा वासा वासाण वीइकंता हेमंताण य पंच-दस-रायकप्पे परिवुसिए, अंतरा से मग्गा अप्पंडा जाव असंताणगा ब्रह्मे जत्थ समण जाव उवागमिस्संति य सेवं णच्चा तओ संजयामेव गामाणुगामं दूइज्जेज्जा ॥ ७२३ ॥ से भिक्खू वा २ गामाणुगामं दूइज्जमाणे पुरओ गुगमायं पेहमाणे दट्ठण तसे पाणे उद्धट्टु पायं रीएज्जा साहट्टु पायं रीएज्जा उक्खिक्खपायं रीएज्जा तिरिच्छं वा कट्टु पायं रीएज्जा सइ परकमे संजयामेव परिकमेज्जा णो उज्जुयं गच्छेज्जा, तओ संजयामेव गामाणुगामं दूइज्जेज्जा ॥७२४॥ से भिक्खू वा २ गामाणुगामं दूइज्जमाणे अंतरा से पाणाणि वा वीथाणि वा हरियाणि वा उदए वा मट्टिया वा अविद्धत्थे सइ परकमे जाव णो उज्जुयं गच्छेज्जा, तओ संजयामेव गामाणुगामं दूइज्जेज्जा ॥ ७२५ ॥ से भिक्खू वा २ गामाणुगामं दूइज्जमाणे अंतरा से विरुवरूवाणि पंचतिगाणि दस्सुगायथणाणि मिल-क्खूणि अणायरियाणि दुस्सण्णपाणि दुप्पण्णयणिज्जाणि अकालपडिओहीणि अकाल-परिओईणि सइ लाढे विहाराए संथरमाणेहिं जणवएहिं णो विहारवत्तियाए पव-ज्जेज्जा गमणाए केवली बूया 'आयाणमेयं' ते णं बाला "अयं तेणे अयं उवचरए अयं तओ आगए" ति कट्टु तं भिक्खुं अक्कोसेज्ज वा जाव उद्वेज्ज वा वत्थं पडि-गाहं केवलं पायपुंज्जणं अच्चिदेज्ज वा भिदेज्ज वा अवहरिज्ज वा, परिट्टविज्ज वा, अह भिक्खूणं पुब्बोवइट्ठा पइण्णा जाव जं णो तहप्पगाराणि विरुवरूवाणि पंचति-याणि दस्सुगायथणाणि जाव विहारवत्तियाए णो पवज्जेज्जा गमणाए, तओ संजयामेव गामाणुगामं दूइज्जेज्जा ॥७२६॥ से भिक्खू वा २ गामाणुगामं दूइज्जमाणे अंतरा से अरायाणि वा, गणरायाणि वा, जुवरायाणि वा, दोरजाणि वा, वेरजाणि वा, विरुद्धरजाणि वा, सइ लाढे विहाराए संथरमाणेहिं जणवएहिं णो विहारवत्ति-

याए पवञ्जेज्जगमणाए, केवली बूया 'आयाणमेयं' ते णं बाला 'अयं तेणे' तं
 चेव जाव विहारवत्तिथाए पवञ्जेज्ज गमणाए तओ संजयामेव गामाणुगामं दूइज्जेज्जा
 ॥७२७॥ से भिक्खू वा २ गामाणुगामं दूइज्जमाणे अंतरा से विहं सिया से जं पुण
 विहं जाणिज्जा, एगाहेण वा, तुयाहेण वा, तियाहेण वा, चउयाहेण वा, पंचाहेण
 वा, पाउणिज्ज वा, णो पाउणिज्ज वा, तहप्पगारं विहं अणेगाहगमणिज्जं सइ लाडे जाव
 णो विहारवत्तिथाए पवञ्जेज्ज गमणाए, केवली बूया 'आयाणमेयं' अंतरा से वासे
 सिवा, पाणेषु वा, पणएसु वा, वीएसु वा, हरिएसु वा, उदएसु वा, मट्टियाएसु वा
 अविद्धत्थाए, अह भिक्खूणं पुव्वोवइट्ठा जाव जं तहप्पगारं अणेगाहगमणिज्जं
 जाव गमणाए, तओ संजयामेव गामाणुगामं दूइज्जेज्जा ॥ ७२८ ॥ से भिक्खू
 वा २ गामाणुगामं दूइज्जमाणे अंतरा से णावासंतारिमे उदए सिया, से जं
 पुण णावं जाणिज्जा, असंजए भिक्खुपट्टियाए किणेज्ज वा, पामिञ्जेज्ज वा, णावाए
 वा णावं परिणामं कट्टु थलाओ वा णावं जलंसि ओगाहेज्जा, जलाओ वा णावं
 थलंसि उक्कसेज्जा, पुण्णं वा णावं उस्सिचेज्जा, सण्णं वा णावं उप्पीलावेज्जा, तह-
 प्पगारं णावं उक्कगामिणिं वा, अहेगामिणिं वा, तिरियगामिणिं वा, परं जोयणमेराए
 अद्धजोयणमेराए अप्पतरो वा, भुज्जतरो वा, णो दुरुहेज्ज गमणाए ॥ ७२९ ॥ से
 भिक्खू वा २ पुव्वामेव तिरिच्छसंपातिमं णावं जाणिज्जा जाणित्ता से तमायाए
 एगंतमवक्कमिज्जा, २ त्ता भंडगं पडिलेहिज्जा, पडिलेहिच्चा एगओ भोयणभंडगं
 करेज्जा २ ससीसोवरियं कायं पाए य पमञ्जेज्जा पमज्जित्ता सागारंभत्तं पच्च-
 क्खाएज्जा पच्चक्खाइत्ता एगं पायं जले किच्चा एगं पायं थले किच्चा तओ संजया-
 मेव णावं दुरुहेज्जा ॥७३०॥ से भिक्खू वा २ णावं दुरुहमाणे णो णावाए पुरओ
 दुरुहेज्जा, णो णावाए अग्गओ दुरुहेज्जा, णो णावाए मज्जओ दुरुहेज्जा, णो
 बाहाओ पगिज्झिय पगिज्झिय अंगुलिए उवदंसिय २ ओणमिय २ उण्णमिय २
 णिज्झाएज्जा ॥७३१॥ से णं परो णावागओ णावागयं वएज्जा "आउसंतो समणा !
 एयं ता तुमं णावं उक्कसाहि वा वोक्कसाहि वा खिवाहि वा रज्जूए वा गहाय
 आकसाहि" णो से तं परिणं परिजागेज्जा तुसिणीओ उवेहेज्जा ॥७३२॥ से णं परो
 णावागओ णावागयं वएज्जा "आउसंतो समणा ! णो संचाएसि णावं उक्कसित्तए वा
 वोक्कसित्तए वा खिवित्तए वा रज्जुयाए वा गहाय आकसित्तए आहार एयं णावाए
 रज्जूयं सयं चेव णं वयं णावं उक्कसिस्सामो वा जाव रज्जूए वा गहाय आकसि-

स्सामो' णो से तं परिणं परिजाणेज्जा तुसिणीओ उव्वहेज्जा ॥७३३॥ से णं परो णावागओ णावागयं वएज्जा आउसंतो समणा ! एयं ता तुमं णावं आल्लित्तेण वा, पीढेण वा बंधेण वा बलएण वा अवलुएण वा वाहेहि णो से यं परिणं परिजाणिज्जा तुसिणीओ उव्वहेज्जा ॥७३४॥ से णं परो णावागओ णावागयं वएज्जा "आउसंतो समणा ! एयं ता तुमं णावाए उदयं हत्थेण वा पाएण वा मत्सेण वा पड्डिग्गहेण वा णावा उस्सिच्चणेण वा उस्सिच्चाहि ।" णो से तं परिणं परिजाणिज्जा तुसिणीओ उव्वहेज्जा ॥७३५॥ से णं परो णावागओ णावागयं वएज्जा, आउसंतो समणा ! एयं तो तुमं णावाए उत्तिं गेण वा पाएण वा बाहुणा वा उरुणा वा उदरेण वा सीसेण वा काएण वा णावा उस्सिच्चणेण वा चेलेण वा मट्टियाए वा कुसपत्तएण वा कुरुविंदेण वा पिहेहि ।" णो से तं परिणं परिजाणिज्जा तुसिणीओ उव्वहेज्जा ॥७३६॥ से भिक्खु वा २ णावाए उत्तिगेणं उदयं आसवमाणं पेहाए उव्वरुवरिं णावं कज्जलावेमाणिं पेहाए णो परं उव्वसकमित्तु एयं बूया, "आउसंतो गाहावइ ! एयं ते णावाए उदयं उत्तिगेणं आसवइ, उव्वरुवरिं वा णावा कज्जलावेइ" एयप्पगारं मणं वा वायं वा णो पुरओ कट्टु विहरेज्जा, अप्पुस्सुए अव्वहिद्धेस्से एगंतगएणं अप्पाणं विउसेज्ज समाहीए, तओ संजयामेव णावासंतारिमे उदए अहारियं रीएज्जा ॥७३७॥ एयं खलु तस्स भिक्खुस्स भिक्खुणीए वा सामग्गियं जं सब्बेद्वेहिं गहिए सया जएज्जासि ति वेमि ॥ ७३८ ॥ इरियाज्जयणे पढमोद्वेसो समत्तो ॥

से णं परो णावागओ णावागयं वएज्जा, "आउसंतो समणा ! एयं ता तुमं छत्तगं वा जाव चम्महेयणगं वा मिण्हाहि, एयाणि तुमं विरुव्वरुवाणि सत्थजायाणि धारेहि, एयं ता तुमं दारगं वा पज्जेहि ।" णो से तं परिणं परिजाणिज्जा, तुसिणीओ उव्वहेज्जा ॥७३९॥ से णं परो णावागए णावागयं वएज्जा एसणं समणे णावाए भंडमारिए भवइ से णं बाहाए गहाय णावाओ उदगंसि पक्खिववह, एयप्पगारं णिण्णोसं सोच्चा णिसम्म सं य चीवरधारी सिया खिप्पामेव चीवराणि उव्वेद्धिज्ज वा णिण्णेद्धिज्ज वा उप्पंसं वा करिज्जा ॥७४०॥ अह पुण एवं जाणिज्जा अभिक्कंत-कूरकम्मा खलु बालो बाहाहिं गहाय णावाओ उदगंसि पक्खिविज्जा से पुव्वामेव वएज्जा 'आउसंतो गाहावई ! मा मेत्तो बाहाए गहाय णावाओ उदगंसि पक्खिववह

सयं चैव णं अहं णावाओ उदगंसि ओगाहिस्सामि, ' से णेवं वयंतं परो सहसा बलसा
बाहाहिं गहाय णावाओ उदगंसि पक्खिविज्जा तं णो सुमणे सिया णो दुम्मणे सिया
णो उच्चावयं मणं णियंलिज्जा, णो तेसिं वाटाणं छायाए वहाए समुट्ठिजा, अप्पुस्सुए
जाव समाहिए तओ संजयामेव उदगंसि पविज्जिजा ॥७४१॥ से भिक्खू वा २ उद-
गंसि पवमाणे णो हत्थेण हत्थं पाएण पायं काएण कायं आसाएज्जा, से अणासाय-
णाए अणासायमाणे तओ संजयामेव उदगंसि पविज्जा ॥ ७४२ ॥ से भिक्खू वा
२ उदगंसि पवमाणे णो उम्मुग्गणिम्मुग्गियं करिज्जा, मामेयं उदगं कण्णेषु वा
अच्छीसु वा णकंसि वा मुहंसि वा परियावज्जिज्जा, तओ संजयामेव उदगंसि पविज्जा
॥७४३॥ से भिक्खू वा २ उदगंसि पवमाणे दोब्बलियं पाउणिज्जा त्तिप्पामेव
उवहिं विगिंचिज्जा वा विसोहिज्जा वा, णो चैव णं साइज्जिजा अहं पुण एवं जाणिज्जा
पारए सिया उदगाओ तीरं पाउणित्तए तओ संजयामेव उदउल्लेण वा ससिणिद्वेण
वा काएण उदगतीरे चिट्ठिज्जा ॥७४४॥ से भिक्खू वा २ उदउल्लं वा ससिणिद्वं
वा कायं णो आमज्जिज्ज वा पमज्जिज्ज वा संलिहिज्ज वा णिट्ठिहिज्ज वा उच्च-
लिज्ज वा उच्चट्ठिज्ज वा, आयाविज्ज वा पयाविज्ज वा, अहं पुं विगओदओ मे
काए छिण्णसिणेहे काए तहं कायं आमं जाव पयाविज्ज वां तओ संजयामेव
गामाणुगामं दूइज्जेजा ॥७४५॥ से भिक्खू वा २ गामाणुगामं दूइज्जमाणे णो परेहिं
सद्धिं परिजविय परिजविय गामाणुगामं दूइज्जिजां, तओ संजयामेव गामाणुगामं
दूइज्जिजा ॥७४६॥ से भिक्खू वा २ गामाणुगामं दूइज्जमाणे अंतरा से जंघासंता-
रिमे उदए सिया से पुव्वामेव ससीसोवरियं कायं पाए य पमज्जेज्जा पमज्जित्ता
जाव एगं पायं जले किच्चा एगं पायं थले किच्चा तओ संजयामेव जंघासंतारिमे
उदए अहारियं रीएजा ॥७४७॥ से भिक्खू वा २ जंघासंतारिमे उदए अहा-
रियं रीयमाणे णो हत्थेण वा हत्थं पाएण वा पायं काएण वा कायं आसाएज्जा, से
अणासायए अणासायमाणे तओ संजयामेव जंघासंतारिमे उदए अहारियं रीएजा
॥७४८॥ से भिक्खू वा २ जंघासंतारिमे उदए अहारियं रीयमाणे णो साया-
वडियाए णो परिदाहवडियाए महइमहालयंसि उदगंसि कायं विउसिजा, तओ
संजयामेव जंघासंतारिमे उदए अहारियं रीएजा, अहं पुण एवं जाणिज्जा पारए
सिया उदगाओ तीरं पाउणित्तए तओ संजयामेव उदउल्लेण वा ससिणिद्वेण वा
काएण उदगतीरे चिट्ठेजा ॥७४९॥ से भिक्खू वा २ उदउल्लं वा कायं ससि-

णिद्धं वा कार्यं णो आमज्जेज्ज वा पमज्जेज्ज वा, अह पुण एवं जाणिज्जा विगओदए मे
 काए छिण्णसिणेहे तहप्पगारं कार्यं आमज्जेज्ज वा जाव पयावेज्ज वा, तओ संजया-
 मेव गामाणुगामं दूइज्जेज्जा ॥७५०॥ से भिक्खू वा २ गामाणुगामं दूइज्जमाणे
 णो मट्टियामएहिं पाएहिं हरियाणि छिंदिय २ तिकुज्जिय २ विफालिय २ उम्मग्गेणं
 हरियवहाए गच्छेज्जा “जहेयं पाएहिं मट्टियं विप्पामेव हरियाणि अवहरंतु” माइ-
 द्ढाणं संफासे णो एवं करेज्जा से पुच्वामेव अप्पहरियं मग्गं पडिलेहेज्जा, तओ संजया-
 मेव गामाणुगामं दूइज्जेज्जा ॥७५१॥ से भिक्खू वा २ गामाणुगामं दूइज्जमाणे
 अंतरा से वप्पाणि वा, फलिहाणि वा, पागाराणि वा, तोरणाणि वा, अग्गलाणि वा,
 अग्गलपासणाणि वा, गड्डाओ वा, दरीओ वा, सइ परक्कमे संजयामेव परक्कमेज्जा,
 णो उज्जुयं गच्छेज्जा केवली बूया ‘आयाणमेयं’ से तत्थ परक्कममाणे पयलेज्ज वा
 पवडेज्ज वा ॥ ७५२ ॥ से तत्थ पयलमाणे वा, पवडेमाणे वा, रुक्खाणि वा,
 गुच्छाणि वा, गुम्माणि वा, लयाओ वा, वल्लीओ वा, तणाणि वा, गहणाणि वा,
 हरियाणि वा, अवलंबिय २ उत्तरेज्जा, जे तत्थ पाडिपहिया उवागच्छंति, ते पाणी
 जाएज्जा, तओ संजयामेव अवलंबिय २ उत्तरेज्जा, तओ संजयामेव गामाणुगामं
 दूइज्जेज्जा ॥ ७५३ ॥ से भिक्खू वा २ गामाणुगामं दूइज्जमाणे अंतरा से जवसाणि
 वा, सगडाणि वा, रहाणि वा, सचक्काणि वा, परचक्काणि वा, से णं वा विरुवरुवं
 संणिविट्ठं पेहाए सइ परक्कमे संजयामेव परक्कमेज्जा णो उज्जुयं गच्छेज्जा ॥७५४॥
 से णं परो सेणागओ वएज्जा, आउसंतो एसणं समणे सेणाए अभिणिवारियं करेइ,
 से णं बाहाए गहाय आगसह सेणं परो बाहाहिं गहाय आगसेज्जा, तं णो सुमणे
 सिया जाव समाहीए तओ संजयामेव गामाणुगामं दूइज्जेज्जा ॥७५५॥ से भिक्खू
 वा २ अंतरा से पाडिवहिया उवागच्छेज्जा तेणं पाडिवहिया एवं वएज्जा आउ-
 संतो ! समणा ! केवइए एस गामे वा जाव रायहाणी वा ? केवइया एत्थ आसा
 हत्थी गामपिंडोलमा मणुस्सा परिवसंति ? से बहुभत्ते बहुउदए बहुजणे बहुजवसे ?
 से अप्पुदए अप्पभत्ते अप्पजणे अप्पजवसे ? एयप्पगाराणि पसिणाणि पुट्ठो
 णो आइक्खेज्जा, एयप्पगाराणि पसिणाणि णो पुच्छेज्जा ॥७५६॥ एयं खलु
 तंस्स भिक्खुस्स भिक्खुणिए वा सामग्गियं ॥७५७॥ इरियाउज्जयणे बीओ-

द्वेसो समत्तो ॥

से भिक्खू वा २ गामाणुगामं दूइज्जमाणे अंतरा से वस्पाणि वा, फलिहाणि वा, पागाराणि वा, जाव दरीओ वा, कूडागाराणि वा, पासादाणि वा, फूमगिहाणि वा, रुक्खगिहाणि वा, पव्वयगिहाणि वा, रुक्खं वा चेइयकडं, थूमं वा चेइयकडं आएसणाणि वा, जाव भवणगिहाणि वा, णो ब्राहाओ पगिज्झिय २ अंगुलियाए उहिसिय २ ओ० २ उण्णमिय २ णिज्झाएज्जा, तओ संजयामेव गामाणुगामं दूइज्जेज्जा ॥७५८॥ से भिक्खू वा २ गामाणुगामं दूइज्जमाणे अंतरा से कच्छाणि वा, दवियाणि वा, णूमाणि वा, वलयाणि वा, गहणाणि वा, गहणविदुग्गाणि वा, वणाणि वा, वणविदुग्गाणि वा, पव्वयाणिवा पव्वयविदुग्गाणि वा, पव्वयगिहाणि वा, अगडाणि वा, तलागाणि वा, दहाणि वा, णईओ वा, वाकीओ वा, पुक्खरणीओ वा, दीहियाओ वा, गुंजालियाओ भा, सराणि वा, सरपंतियाणि वा, सरसरपंतियाणि वा, णो ब्राहाओ पगिज्झिय २ जाव णिज्झाएज्जा, केवली बूया 'आयाण-मेयं जे तत्थ मिगा वा, पसू वा, पक्खी वा, सिरीसिवा वा, सीहा वा, जलचरा वा, थलचरा वा, खहचरा वा सत्ता, ते उच्चसेज्ज वा, वित्तसेज्ज वा, वाडं वा सरणं वा करेज्जा, "चारित्ति मे अयं समणे" अह भिक्खूणं पुव्वोवइट्ठा एस पइण्णा जाव जे णो ब्राहाओ पगिज्झिय २ जाव णिज्झाएज्जा, तओ संजयामेव आयरिय उवज्झाएहिं सद्धिं गामाणुगामं दूइज्जेज्जा ॥७५९॥ से भिक्खू वा २ आयरिय उवज्झाएहिं सद्धिं गामाणुगामं दूइज्जमाणे, णो आयरिय उवज्झायस्स हत्थेण वा हत्थं जाव अणासायमाणे तओ संजयामेव आयरिय उवज्झाएहिं सद्धिं गामाणुगामं दूइज्जेज्जा ॥७६०॥ से भिक्खू वा २ आयरिय उवज्झाएहिं सद्धिं दूइज्जमाणे अंतरा से पाडिवहिया उवागच्छेज्जा, ते णं पाडिवहिया से एवं वएज्जा "आउसंतो ! समणा ! के तुब्भे ! कओ वा एह ! कहिं वा गच्छिहिह ! जे तत्थ आयरिए वा उवज्झाए वा से भासेज्ज वा, वियागरेज्ज वा, आयरियोवज्झायस्स भासमाणस्स वा वियागरेमाणस्स वा णो अंतराभासं करेज्जा, तओ संजयामेव अहाराइणिए दूइज्जेज्जा ॥७६१॥ से भिक्खू वा २ अहाराइणियं गामाणुगामं दूइज्जमाणे णो राइणियस्स हत्थेण हत्थं जाव अणासायमाणे तओ संजयामेव अहाराइणियं गामाणुगामं दूइज्जेज्जा ॥७६२॥ से भिक्खू वा २ अहाराइणियं दूइज्जमाणे अंतरा से पाडिवहिया उवागच्छेज्जा, ते णं पाडिवहिया एवं वएज्जा, आउसंतो ! समणा !

के तुभे ? कओ वा एह ? कहिं वा गच्छिहिह ? जे तत्थ सब्बराइणिए से भासेज्ज वा वागरेज्ज वा राइणियस्स भासमाणस्स वियागरेमाणस्स वा णो अंतराभासं भासेज्जा तओ संजयामेव अहाराइणियाए गामाणुगामं दूइज्जिज्जा ॥७६३॥ से भिक्खू वा २ गामाणुगामं दूइज्जमाणे अंतरा से पाडिवहिया आगच्छेज्जा, ते णं पाडिवहिया एवं वएज्जा “आउसंतो समणा ! अविद्याइं एत्तो पडिवहे पासह तंजहा— मणुस्सं वा गोणं वा महिसं वा पसुं वा पक्खिं वा, सिरीसिवं वा, जलयरं वा से आइक्खह दंसेह ” तं णो आइक्खेज्जा णो दंसेज्जा णो तेसिं तं परिणं परिजाणिज्जा, तुसिणीओ उवेहेज्जा, जाणं वा, णो जाणंति वएज्जा, तओ संजयामेव गामाणुगामं दूइजेज्जा ॥७६४॥ से भिक्खू वा २ गामाणुगामं दूइज्जमाणे अंतरा से पाडिवहिया आगच्छेज्जा ते णं पाडिवहिया एवं वएज्जा “आउसंतो समणा ! अविद्याइं एत्तो पडिपहे पासह उदगपसूथाणि कंदाणि वा मूलाणि वा तयाणि वा पत्ताणि वा पुप्फाणि वा फलाणि वा बीयाणि वा हरियाणि वा उदमं वा संणिहियं अगणिं वा संणिक्रियंतं, सेसं तं चैव से आइक्खह, जावं दूइजेज्जा ॥७६५॥ से भिक्खू वा २ गामाणुगामं दूइज्जमाणे अंतरा से पाडिवहिया उवागच्छेज्जा ते णं पाडिवहिया एवं वएज्जा, आउसंतो समणा ! अविद्याइं एत्तो पडिवहे पासह, जवसाणि वा, जाव से णं वा, विरुवरुवं संणिविद्धं, से आइक्खह जाव दूइज्जिज्जा ॥७६६॥ से भिक्खू वा २ गामाणुगामं दूइज्जमाणे अंतरा से पाडिवहिया जाव “आउसंतो समणा ! केवइए एत्तो गामे वा जाव रायहाणी वा से आइक्खह जाव दूइज्जिज्जा ॥७६७॥ से भिक्खू वा २ गामाणुगामं दूइज्जमाणे अंतरा से पाडिवहिया जाव “आउसंतो समणा ! केवइए एत्तो गामस्स णगरस्स वा जाव रायहाणीए वा मग्गे, से आइक्खह तहेव जाव दूइज्जिज्जा ॥७६८॥ से भिक्खू वा २ गामाणुगामं दूइज्जमाणे अंतरा से गोणं वियालं पडिपहे पेहाए जाव चित्तचिद्धं वियालं पडिवहे पेहाए णो तेसिं भीओ उम्मग्गेणं गच्छेज्जा, णो मग्गाओ उम्मग्गं संकमिज्जा, णो गहणं वा वणं वा दुग्गं वा अणुपविसेज्जा, णो रुक्खंसि दुरुहेज्जा, णो महइमहालयेसि उदर्यंसि कार्यं विउसेज्जा, णो वाडं वा सरणं वा सेणं वा सत्थं वा कंखेज्जा, अप्पुस्सुए जाव समाहिए तओ संजयामेव गामाणुगामं दूइज्जिज्जा ॥७६९॥ से भिक्खू वा २ गामाणुगामं दूइज्जमाणे अंतरा से विइं सिया से जं पुण

विहं जाणिज्जा, इमंसि खलु विहंसि वहवे आमोसगा उवगरणपडियाए संपिडिया गच्छेज्जा, णो तेसि भीओ उम्मग्गेण गच्छेज्जा, जाव समाहीए तओ संजयामेव गामाणुगामं दूइज्जिज्जा ॥७७०॥ से भिक्खू वा २ गामाणुगामं दूइज्जमाणे अंतरा से आमोसगा संपिडिया गच्छेज्जा ते णं आमोसगा एवं वएज्जा, आउसंतो समणा ! आहर एयं वत्थं वा पायं वा कंबलं वा पायपुंछणं देहि णिक्खिवाहि, तं णो देज्जा णो णिक्खिवाज्जा, णो वेदिय २ जाएज्जा, णो अंजलिं कट्टु जाएज्जा, णो कलुण-वडियाए जाएज्जा, धम्मियाए जायणाए जाएज्जा, तुसिणीयभावेण वा उवेहिज्जा ते णं आमोसगा 'सयं करणिज्जं' ति कट्टु, अक्कोसति वा जाव उवहयंति वा वत्थं वा पायं वा कंबलं वा पायपुंछणं अच्छिदेज्ज वा, जाव परिट्टवेज्ज वा, तं णं णो गामसंसारियं कुज्जा, णो रायसंसारियं कुज्जा, णो परं उवसंक्रमित्तु बूया, आउ-संतो गाहावई ! एए खलु मे आमोसगा उवगरणपडियाए सयं करणिज्जं ति कट्टु अक्कोसति वा जाव परिट्टवेति वा, एयप्पगारं मणं वा वयणं वा णो पुरओ कट्टु विहरेज्जा, अप्पुस्सुए जाव समाहीए तओ संजयामेव गामाणुगामं दूइज्जेज्जा ॥७७१॥ एयं खलु तस्स भिक्खुस्स भिक्खुणीए वा सामग्गियं जे सव्वट्ठेहिं समिए सहिए सया जएज्जासि ति वेमि ॥७७२॥ तइओट्टेसो समत्तो ॥ तइयं अज्झयणं समत्तं ॥

॥ भासज्जायं णाम चउत्थं अज्झयणं ॥

से भिक्खू वा २ इमाइं वयायाराइं सोच्चा णिसम्म इमाइं अणायाराइं अणा-यरियपुक्वाइं जाणिज्जा, जे कोहा वा वायं विउंजंति माणा वा वायं विउंजंति मायाए वा वायं विउंजंति लोहा वा वायं विउंजंति, जाणओ वा फरसं वयंति, अजाणओ वा फरसं वयंति, सव्वमेयं सावज्जं वज्जेज्जा, विवेगमायाए ॥७७३॥ धुवं चेयं जाणिज्जा, अधुवं चेयं जाणिज्जा, असणं वा ४ लभिय णो लभिय, भुंजिय णो भुंजिय, अदुवा आगए णा आगए, अदुवा एइ णो एइ, अदुवा एहिइ णो एहिइ, एत्थवि आगए णो आगए, एत्थवि एइ णो एइ, एत्थवि एहिइ णो एहिइ ॥७७४॥ अणुवीइ णिट्ठाभासी, सभियाए संजए भासं भासेज्जा, तंजहा—एगवयणं, दुवयणं, बहुवयणं, इत्थिवयणं, पुरिसवयणं, णपुंसगवयणं, अंजत्थवयणं, उयणीय-वयणं, अवणीयवयणं, उवणीयावणीयवयणं, अवणियोवणीयवयणं, तीयवयणं,

पडुप्पणवयणं, अणागयवयणं, पच्चक्खवयणं, परोक्खवयणं ॥७७५॥ से एगवयणं वइस्सामीइ एगवयणं वएज्जा, जाव परोक्खवयणं वइस्सामीइ परोक्खवयणं वएज्जा, इत्थी वेस पुरित्तो वेस, णपुंसं वेस, एयं वा चेयं, अण्णं वा चेयं, अणुवीइ णिट्ठाभासी, समियाए संजए भासं भासिज्जा, इच्चैयाइं आययणाइं उवाइकम्म ॥७७६॥ अह भिक्खू जाणिज्जा चत्तारि भासज्जायाइं, तंजहा—सच्चमेगे पढमं भासज्जायं, बीयं मोसं, तइयं सच्चामोसं, जं णेव सच्चं णेव मोसं णेव सच्चामोसं “असच्चामोसं” णाम तं चउत्थं भासज्जायं ॥७७७॥ से वेमि जे अईया जे य पडुप्पणा जे य अणागया अरइंता भगवंतो सव्वे ते एयाइं चैव चत्तारि भासाज्जायाइं भासिसु वा भासंति वा भासिस्संति वा, पण्णविसु वा, पण्णवैत्ति वा, पण्णविस्संति वा, सव्वाइं च णं एयाइं अचित्ताणि वण्णमंताणि गंधमंताणि रसमंताणि फासमंताणि चओवचइयाइं विपरिणामधम्माइं भवंतीति समक्खायाइं ॥७७८॥ से भिक्खू वा २ से जं पुं जाणिं पुट्ठिं भासा अभासा भासमाणा भासा भासा, भासासमयविइकंता च णं भासिया भासा अभासा ॥७७९॥ से भिक्खू वा २ से जं पुं जाणिं जां य भासा सच्चा, जा य भासा मोसा, जा य भासा सच्चामोसा, जा य भासा असच्चामोसा, तहप्पगारं भासं सावज्जं सकिरियं ककसं कडुयं गिट्ठुरं फरसं अण्हयकरिं छेयणभेयणकरिं परियावणकरिं उद्धवणकरिं भूओवघाइयं अभिक्ख भासं णो भासेज्जा ॥७८०॥ से भिक्खू वा २ से जं पुं जाणिं जा य भासा सच्चा सुहुमा जा य भासा असच्चामोसा तहप्पगारं भासं असावज्जं अकिरियं जाव अभूओवघाइयं अभिक्ख भासं भासेज्जा, से भिक्खू वा २ पुमं आमंतेमाणे आमंति ए वा अपडिसुणेमाणं णो एवं वएज्जा, होले त्ति वा गोले त्ति वा वसुले त्ति वा कुपक्खे त्ति वा घडदासे त्ति वा साणे त्ति वा तेणे त्ति वा चारिए त्ति वा माई त्ति वा मुसावाई त्ति वा एयाइं तुमं ते जणगा वा एयप्पगारं भासं सावज्जं सकिरियं जाव अभिक्ख णो भासेज्जा ॥७८१॥ से भिक्खू वा २ पुमं आमंतेमाणे आमंति ए वा अपडिसुणेमाणे एवं वएज्जा, अमुगे त्ति वा आउसोत्ति वा आउसंतारो त्ति वा सावगे त्ति वा उपासगेत्ति वा धम्मिएत्ति वा धम्मपियेत्ति वा एयप्पगारं भासं असावज्जं जाव अभूओवघाइयं अभिक्ख भासेज्जा ॥७८२॥ से भिक्खू वा २ इत्थि आमंतेमाणे आमंति ए य अपडिसुणेमाणीं णो एवं वएज्जा,

होली इ वा गोली इ वा इत्थीगमेण णेयव्वं ॥७८३॥ से भिक्खू वा २ इत्थियं आमंतेमाणे आमंतिए य अपडिसुणेमाणी एवं वएज्जा, आउमो ति वा भगिणि ति वा भगवइ ति वा साविगे ति वा उवासिए ति वा धम्मिए ति वा धम्मपियेत्ति वा एयप्पगारं भासं असावज्जं जाव अभिकंख भासेज्जा ॥७८४॥ से भिक्खू वा २ णो एवं वएज्जा, णमोदेवेत्ति वा गज्जदेवेत्ति वा विज्जुदेवे ति वा पवुट्टदेवेत्ति वा णिवुट्टदेवेत्ति वा पडउ वा वासं मा वा पडउ णिप्फज्जउ वा सस्सं मा या णिप्फज्जउ विभाउ वा रयणी मा वा विभाउ उदेउ वा सूरिए मा वा उदेउ, सो वा राया जयउ मा वा जयउ, णो एयप्पगारं भासं भासिज्जा पण्वं ॥७८५॥ से भिक्खू वा २ अंतलिक्वेत्ति वा गुज्झाणुचरिएत्ति वा संमुच्छिए वा णिवइए वा पओवएज्जा वा बुट्टवल्लाहगेत्ति वा ॥ ७८६ ॥ एयं खलु तस्स भिक्खुस्स भिक्खुणीए वा सामग्गियं जं सव्वेद्वेहिं समिए महिए सया जएज्जामि ति वेमि ॥७८७॥ **भासाज्झयणस्स पढमोद्देशो समत्तो ॥**

से भिक्खू वा २ जहा वेगइयाइं रूवाइं पासेज्जा तहावि ताइं णो एवं वएज्जा, तंजहा—गंडी गंडीइ वा, कुट्ठी कुट्ठीइ वा, जाव महुमेहुणीत्ति वा, हत्थच्छिण्णं हत्थच्छिणेत्ति वा, एवं पाद-णक्क-कण्ण-उट्टच्छिणेत्ति वा, जे यावण्णे तहप्पगारा एयप्पगाराहिं भासाहिं बुइया बुइया कुप्पंति माणवा, तेयावि तहप्पगाराहिं भासाहिं अभिकंख णो भासेज्जा ॥ ७८८ ॥ से भिक्खू वा २ जहा वेगइयाइं रूवाइं पासिज्जा तहावि ताइं एवं वएज्जा तंजहा—ओयंसी ओयंसीइ वा, तेयंसी तेयंसीइ वा, वधंसी वधंसीइ वा, जसंसी जसंसीइ वा, अभिरूवं अभिरूवेइ वा पडिरूवं पडिरूवेइ वा, पासाइयं पासाइएइ वा दरिसणिज्जं दरिसणीएइ वा, जे यावण्णे तहप्पगारा एयप्पगाराहिं भासाहिं बुइया बुइया णो कुप्पंति माणवा, तेयावि तहप्पगारा एयप्पगाराहिं भासाहिं अभिकंख भासिज्जा । तहप्पगारं भासं असावज्जं जाव भासेज्जा ॥ ७८९ ॥ से भिक्खू वा २ जहा वेगइयाइं रूवाइं पासेज्जा तंजहा—वप्पाणि वा जाव भवणगिहाणि वा, तहावि ताइं णो एवं वएज्जा, तंजहा—सुकडे इ वा सुट्टुकडे इ वा साहुकडे इ वा कल्लाणे इ वा करणिज्जे इ वा एयप्पगारं भासं सावज्जं जाव णो भासेज्जा ॥ ७९० ॥ से भिक्खू वा २ जहा वेगइयाइं रूवाइं पासेज्जा, तंजहा—वप्पाणि वा जाव भवणगिहाणि वा तहावि ताइं एवं

वएज्जा, तंजहा—आरंभकडेइ वा सावज्जकडे इ वा पयत्तकडे इ वा पासाइयं
पासाइएत्ति वा दरिसणीयं दरिसणीएत्ति वा अभिरुवं अभिरुवेत्ति वा पडिरुवं
पडिरुवेत्ति वा एयप्पगारं भासं असावज्जं जाव भासेज्जा ॥ ७९१ ॥ से भिक्खू
वा २ असणं वा ४ उवक्खडियं पेहाए तहाविहं तं णो एवं वएज्जा, तंजहा—
सुकडे इ वा सुट्टुकडे इ वा साहुकडे इ वा कल्लाणे इ वा करणिज्जे इ वा एयप्पगारं
भासं सावज्जं जाव णो भासेज्जा ॥ ७९२ ॥ से भिक्खू वा २ असणं वा ४ उवक्खडियं
पेहाए एवं वएज्जा, तंजहा—आरंभकडे त्ति वा सावज्जकडे त्ति वा पयत्तकडेत्ति वा
भदर्यं भदए त्ति वा ऊसढं ऊसढं त्ति वा रसियं रसिए त्ति वा मणुण्णं मणुण्णे त्ति
वा एयप्पगारं भासं असावज्जं जाव भासेज्जा ॥ ७९३ ॥ से भिक्खू वा २ मणुस्सं
वा गोणं वा महिसं वा मिगं वा पसुं वा पक्खि वा सरिसिवं वा जल्यरं वा से तं
परिवूढकायं पेहाए णो एवं वएज्जा थूले इ वा पमेइले इ वा वट्ठे इ वा वज्जे इ वा
पाइमं इ वा एयप्पगारं भासं सावज्जं जाव णो भासिज्जा ॥ ७९४ ॥ से भिक्खू
वा २ मणुस्सं जाव जल्यरं वा से तं परिवूढकायं पेहाए एवं वएज्जा, परिवूढ-
काएत्ति वा, उवच्चियकाए त्ति वा धिरसंघयणेत्ति वा उवच्चियमंससोणिएत्ति वा
बहुपडिपुण्णइदिएत्ति वा एयप्पगारं भासं असावज्जं जाव भासिज्जा ॥ ७९५ ॥ से
भिक्खू वा २ विरूवरूवाओ गाओ पेहाए णो एत्रं वएज्जा, तंजहा—गाओ
दोज्जाओ त्ति वा दम्मेत्ति वा गोरहत्ति वा वाहिमत्ति वा रहजोगत्ति वा एयप्प-
गारं भासं सावज्जं जाव अभिकंख णो भासिज्जा ॥ ७९६ ॥ से भिक्खू वा २
विरूवरूवाओ गाओ पेहाए एवं वएज्जा, तंजहा—जुवंगवेत्ति वा धेणु त्ति वा रस-
वइ त्ति वा हस्से इ वा महल्लए इ वा महव्वए इ वा संवहणि त्ति वा एयप्पगारं
भासं असावज्जं जाव अभिकंख भासिज्जा ॥ ७९७ ॥ से भिक्खू वा २ तहेव गंतु-
मुज्जाणाइं पव्वयाइं वणाणि वा रुक्खा महल्ला पेहाए णो एवं वएज्जा, तंजहा—
पासायजोग्गा इ वा तोरणजोग्गाइ वा गिहजोग्गा इ वा फल्लिइजोग्गाइ वा
अगगल-णावा-उदगदोणि-पीढ-चंगबेर-णंगल-कुलिय-जेतलट्ठी-णाभि-गंडी-आसण-
सयण-जाण-उवस्सय-जोग्गा इ वा, एयप्पगारं भासं सावज्जं जाव णो भासिज्जा
॥ ७९८ ॥ से भिक्खू वा २ तहेव गंतुमुज्जाणाइं पव्वयाणि वणाणि य रुक्खा
महल्ला पेहाए एवं वएज्जा, तंजहा—जाइमंता इ वा दीहवट्टा इ वा महालया

इ वा पयायसाला इ वा विडिमसाला इ वा पासाइया इ वा जाव पडिरूवा
 इ वा एयप्पगारं भासं असावज्जं जाव अभिक्खं भासिज्जा ॥ ७९९ ॥ से भिक्खू
 वा २ बहुसंभूया वणफला पेहाए तहावि ते णो एवं वएज्जा तंजहा—पक्का इ
 वा पायक्खज्जाइ वा वेलोइयाइ वा टालाइ वा वेहिया इ वा एयप्पगारं भासं
 सावज्जं जाव णो भासिज्जा ॥ ८०० ॥ से भिक्खू वा २ बहुसंभूयावणफला अंवा
 पेहाए एवं वएज्जा, तंजहा—असंथडा इ वा बहुणिवट्टिमफला इ वा बहुसंभूया
 इ वा भूयरूवित्ति वा एयप्पगारं भासं असावज्जं जाव भासेज्जा ॥ ८०१ ॥ से
 भिक्खू वा २ बहुसंभूयाओ ओसहीओ पेहाए तहावि ताओ णो एवं वएज्जा,
 तंजहा—पक्का इ वा णीलिया इ वा छ्वीइ वा लाइमा इ वा भज्जिमा इ वा बहु-
 खज्जा इ वा एयप्पगारं भासं सावज्जं जाव णो भासेज्जा ॥ ८०२ ॥ से भिक्खू वा
 २ बहुसंभूयाओ ओसहीओ पेहाए तहावि एवं वएज्जा, तंजहा—रूढा इ वा बहुसंभूया
 इ वा थिरा इ वा ऊसदा इ वा गग्भिया इ वा पसूया इ वा ससारा इ वा एयप्प-
 गारं भासं असावज्जं जाव भासेज्जा ॥ ८०३ ॥ से भिक्खू वा २ जहा वेगइयाइं सहाइं
 सुणेज्जा, तहावि एयाइं णो एवं वएज्जा, तंजहा—सुसदे इ वा दुसदे इ वा
 एयप्पगारं भासं सावज्जं जाव णो भासेज्जा, तहावि ताइं एवं वएज्जा, तंजहा—सुसदं
 सुसदे ति वा दुसदं दुसदे ति वा एयप्पगारं असावज्जं जाव भासेज्जा ॥ ८०४ ॥
 एवं रूवाइं कण्हे ति वा ५ गंधाइं सुभिगंधे ति वा २ रसाइं तित्ताणि वा ५
 फासाइं कक्खडाणि वा ८ ॥ ८०५ ॥ से भिक्खू वा २ वंता कोई च माणं च मायं
 च लोहं च अणुवीइ णिद्धाभासी णिसम्म भासी अतुरियभासी विवेगभासी समि-
 याए संजए भासं भासेज्जा ॥ ८०६ ॥ एयं खलु तस्स भिक्खुस्स वा भिक्खुणीए
 वा सामगियं ॥ ८०७ ॥ **बीओट्टेसो समत्तो । चउत्थं अज्झयणं
 समत्तं ॥**

॥ वत्थेसणा णाम पंचमं अज्झयणं ॥

से भिक्खू वा २ अभिक्खेज्जा वत्थं एसित्तए, से जं पुण वत्थं जाणिज्जा,
 तंजहा—जंमियं-भंगियं-साणयं-पोत्तयं-खोमियं वा तूलकडं वा तहप्पगारं वत्थं
 ॥ ८०८ ॥ जे णिग्गंथे तरुणे जुगवं बलवं अप्पायंके थिरसंघयणे से एगं वत्थं धारेज्जा

णो विइयं, जा णिगंथी सा चत्तारि संघाडीओ धारेज्जा, एगं दुहत्थवित्थारं, दो तिहत्थवित्थाराओ, एगं चउहत्थवित्थारं, एएहि वत्थेहि असंधिज्जमाणेहि अह पन्हा एगमेगं संसीविज्जा ॥८०९॥ से भिक्खू वा २ परं अद्धजोयणमेराए वत्थ-पडियाए णो अभिसंधारेज्जा गमणाए ॥८१०॥ से भिक्खू वा २ से जं पुण वत्थे जाणिज्जा अत्तिरडियाए एगं साहम्मियं समुद्दिस्स पाणाइं जहा पिडेसणाए ॥८११॥ एवं ब्रह्वे साहम्मिया, एगं साहम्मिणि, ब्रह्वे साहम्मिणीओ, ब्रह्वे समणमाहणा, तहेव पुरिसंतरकडं जहा पिडेसणाए ॥८१२॥ से भिक्खू वा २ से जं पुण वत्थे जाणिज्जा, असंजए भिक्खुपडियाए कीयं वा धोयं वा रत्तं वा धट्टं वा मट्टं वा संसट्टं वा संपधूमियं वा तहप्पगारं वत्थं अपुरिसंतरकडं जाव णो पडिगाहेज्जा, अह पुण एवं जाणिज्जा पुरिसंतरकडं जाव पडिगाहेज्जा ॥८१३॥ से भिक्खू वा २ से जाइं पुण वत्थाइं जाणिज्जा, विरूवरूवाइं महद्धणमोलाइं तंजहा—आइणगाणि वा, सहिणाणि वा, सहिणकल्लाणाणि वा, आयाणि वा, कायकाणि वा, खोमि-याणि वा, दुगुल्लाणि वा, पट्टाणि वा, मलयाणि वा, पत्तुण्णाणि वा, अंसुयाणि वा, चिणंसुयाणि वा, देसरगाणि वा, अमिलाणि वा, गज्जलाणि वा, फालियाणि वा, कयहाणि वा, कंचलगाणि वा, पावरणाणि वा, अण्णयराणि वा तहप्पगाराइं वत्थाइं महद्धणमोलाइं लाभे संते णो पडिगाहिज्जा ॥८१४॥ से भिक्खू वा २ से जाइं पुण आईणपाउरणाणि वत्थाणि जाणिज्जा, तंजहा—उट्टाणि वा पेसाणि वा, पेसलाणि वा किण्हमिगाईणगाणि वा णीलमिगाईणगाणि वा गोरमिगाईण-गाणि वा कणगाणि वा कणगकंताणि वा कणगपट्टाणि वा कणगखइयाणि वा कणग-फुसियाणि वा वग्घाणि वा विवग्घाणि वा आभरणाणि वा आभरणविच्चिताणि वा अण्णयराणि वा तहप्पगाराणि आईणपाउरणाणि वत्थाणि लाभे संते णो पडिगा-हिज्जा ॥८१५॥ इधेयाइं आययणाइं उवाइकम्म अह भिक्खू जाणिज्जा, चउहि पडिमाहि वत्थं एसत्तिए ॥८१६॥ तत्थ खल्लु इमा पदमा पडिमा—से भिक्खू वा २ उदिसिय २ वत्थं जाएज्जा, तंजहा—जंनियं वा भंनियं वा साणयं वा पोत्तयं वा खोमियं वा तूलकडं वा तहप्पगारं वत्थं सयं वा णं जाएज्जा परो वा णं देज्जा, फासुयं एसणीयं लाभे संते पडिगाहिज्जा, पदमा पडिमा ॥८१७॥ अहा-वरा दोचा पडिमा—से भिक्खू वा २ पेहाए २ वत्थं जाएज्जा, तंजहा—गाहावई

वा जाव कम्मकरी वा, से पुब्बामेव आलोएज्जा, आउसो इ वा भग्गिणि इ वा दाहिस्सि मे एत्तो अण्णयरं वत्थं ? तहप्पगारं वत्थं सयं वा णं जाएज्जा, परो वा से देज्जा, जाव फासुयं 'एसणीयं' लामे संते पडिगाहिज्जा । दोच्चा पडिमा ॥८१८॥ अहावरा तच्चा पडिमा—से भिक्खू वा २ से अं पुण वत्थं जाणिज्जा तंजहा!— अंतरिज्जगं वा उत्तरिज्जगं वा तहप्पगारं वत्थं सयं वा णं जाएज्जा जाव पडिगाहिज्जा । तच्चा पडिमा ॥ ८१९ ॥ अहावरा चउत्था पडिमा—से भिक्खू वा २ उज्झियधम्मियं वत्थं जाएज्जा, अं चउत्थे बहवे समणमाहणअतिहिक्खिणवणीमगाणावकंखंति, तहप्पगारं उज्झियधम्मियं वत्थं सयं वा णं जाएज्जा परो वा से देज्जा फासुयं जाव पडिगाहेज्जा । चउत्था पडिमा ॥ ८२० ॥ इच्चेयाणं चउत्थं पडिमाणं जहा पिंडेसणाए ॥८२१॥ सिया णं एयाए एसणाए एसमाणं परो वएज्जा आउसंतो समणा ! एज्जाहि तुमं मासेण वा दसराएण वा पंचराएण वा सुए वा सुयतरे वा तो ते वयं आउसो ! अण्णयरं वत्थं दाहामो ।" एयप्पगारं णिग्घोसं सोच्चा णिसम्म से पुब्बामेव आलोएज्जा आउसो इ वा भइणि इ वा णो खल्ल मे कप्पइ एयप्पगारे संगार-वयणे पडिसुणेत्तए अभिक्खसि मे दाउं ? इयाणिमेव दलयाहि, से णवं वयंतं परो वएज्जा आउसंतो समणा ! अणुगच्छहि तो ते वयं अण्णयरं वत्थं दाहामो से पुब्बामेव आलोएज्जा आउसो त्ति वा भइणि त्ति वा णो खल्ल मे कप्पइ एयप्पगारे संगारवयणे पडिसुणेत्तए, अभिक्खसि मे दाउं ? इयाणिमेव दलयाहि ।" से सेवं वयंतं परो णेया वएज्जा "आउसो त्ति वा भइणि त्ति वा आहरेयं वत्थं समणस्स दाहामो अवियाइं वयं पच्छावि अप्पणो सयट्ठाए पाणाइं भूयाइं जीवाइं सत्ताइं समारब्भ समुद्दिस्स जाव चेइस्सामो " एयप्पगारं णिग्घोसं सोच्चा णिसम्म तहप्पगारं वत्थं अफासुयं जाव णो पडिगाहेज्जा ॥८२२॥ सिया णं परो णेया वएज्जा "आउसो त्ति वा भइणि त्ति वा आहरेयं वत्थं सिणाणेण वा ४ जाव आधंसित्ता वा पधंसित्ता वा समणस्स णं दाहामो " एयप्पगारं णिग्घोसं सोच्चा णिसम्म से पुब्बामेव आलोएज्जा, आउसो त्ति वा भइणि त्ति वा मा एयं तुमं वत्थं सिणाणेण वा जाव पधंसाहि वा अभिक्खसि मे दाउं ? एमेव दलयाहि " से सेवं वयंतस्स परो सिणाणेण वा जाव पधंसित्ता वा दलएज्जा, तहप्पगारं वत्थं अफासुयं जाव णो पडिगाहेज्जा ॥८२३॥ से णं परो णेया वएज्जा, "आउसो त्ति

वा भङ्गि ति वा आहर एयं वत्यं सीओदगवियडेण वा उसिणोदगवियडेण वा उच्छोलेत्ता वा प्होलेत्ता वा समणस्स णं दाहामो एयप्पगारं णिग्घोसं सोच्चा णिसम्म से पुब्बामेव आलोएज्जा आउसो इ वा भङ्गि इ वा मा एयं तुमं वत्यं सीओदगवियडेण वा उसिणोदगवियडेण वा उच्छोलेहि वा प्होलेहि वा अभिकंखसि सेसं तद्देव जाव णो पडिग्गाहेज्जा ॥ ८२४ ॥ से णं परो णेया वएज्जा “आउसो इ वा भङ्गि इ वा आहरेयं वत्यं कंदाणि वा जाव हरियाणि वा विसोहित्ता समणस्स णं दाहामो” एयप्पगारं णिग्घोसं सोच्चा णिसम्म जाव “भङ्गि इ वा मा एयाणि तुमं कंदाणि वा जाव विसोहेहि णो खलु मे कप्पइ एयप्पगारे वत्ये पडिग्गाहित्ताए” से सेवं वयंतस्स परो कंदाणि वा जाव हरियाणि वा विसोहित्ता दलएज्जा तहप्पगारं वत्यं अफासुयं जाव णो पडिग्गाहेज्जा ॥ ८२५ ॥ सिया से परो णेया वत्यं णिसिरेज्जा से पुब्बामेव आलोएज्जा “आउसो इ वा भङ्गि इ वा तुमं चेव णं संतियं वत्यं अंतोअंतेणं पडिलेहिज्जिस्सामि” केवली बूया आयाणमेयं वत्यंतेण उच्चडे सिया कुडले वा गुणे वा हिरण्णे वा सुबण्णे वा मणी वा जाव रयणावली वा पाणे वा बीए वा हरिए वा अह भिक्खूणं पुब्बोवदिट्ठा जाव अं पुब्बामेव वत्यं अंतोअंतेणं पडिलेहिज्जा ॥ ८२६ ॥ से भिक्खू वा २ से जं पुण वत्यं जाणिज्जा सअण्डं जाव संताणगं तहप्पगारं वत्यं अफासुयं जाव णो पडिग्गाहेज्जा ॥ ८२७ ॥ से भिक्खू वा २ से जं पुण वत्यं जाणिज्जा अप्पंडं जाव अप्पसंताणगं अणलं अथिरं अधुवं अधारणिज्जं रोइज्जंतं ण रुच्चइ तहप्पगारं वत्यं अफासुयं जाव णो पडिग्गाहेज्जा ॥ ८२८ ॥ से भिक्खू वा २ से जं पुण वत्यं जाणिज्जा, अप्पंडं जाव संताणगं अलं थिरं धुवं धारणिज्जं रोइज्जंतं रुच्चइ तहप्पगारं वत्यं फासुयं जाव पडिग्गाहेज्जा । से भिक्खू वा २ णो णवए मे वत्ये ति कट्टु णो बहुदेसिएण सिणाणेण वा जाव पणसेज्जा ॥ ८२९ ॥ से भिक्खू वा २ णो णवए मे वत्ये ति कट्टु णो बहुदेसिएण सीओदगवियडेण वा जाव प्होएज्जा ॥ ८३० ॥ से भिक्खू वा २ दुब्धिभगंधे मे वत्ये ति कट्टु णो बहुदेसिएण सिणाणेण वा तद्देव सीओदगवियडेण वा उसिणोदगवियडेण वा आलावओ ॥ ८३१ ॥ से भिक्खू वा २ अभिकंखेज्जा वत्यं आयावेत्तए वा पयावेत्तए वा तहप्पगारं वत्यं णो अणंतरहियाए पुढवीए णो ससिणद्धाए पुढवीए जाव संताणए आयावेज्ज वा पयावेज्ज वा ॥ ८३२ ॥ से भिक्खू

वा २ अभिकंखेज्जा वत्थं आयावेत्तए वा पयावेत्तए वा तहप्पगारं वत्थं थूणंसि वा गिहेलुगंसि वा उसुयालंसि वा कामजलंसि वा अण्णयरे वा तहप्पगारे अंत-
लिकखजाए दुब्बद्वे दुण्णिक्खित्ते अणिकंपे चलाचले णो आयावेज्ज वा पयावेज्ज वा
॥ ८३३ ॥ से भिक्खू वा अभिकंखेज्जा वत्थं आयावेत्तए पयावेत्तए वा तहप्पगारं
वत्थं कुलियंसि वा भित्तिसि वा सिलंसि वा लेलंसि वा अण्णयरे वा तहप्पगारे अंत-
लिकखजाए जाव णो आयावेज्ज वा पयावेज्ज वा ॥ ८३४ ॥ से भिक्खू वा २
अभिकंखेज्जा वत्थं आयावेत्तए पयावेत्तए वा तहप्पगारे वत्थे खंधंसि वा मंचंसि-
मालंसि-पासायंसि-हम्मियतलंसि वा अण्णयरे वा तहप्पगारे अंतलिकखजाए जाव
णो आयावेज्ज वा पयावेज्ज वा ॥ ८३५ ॥ से तमायाय एगंतमवक्कमेज्जा २ अहे
ज्जा मथंडिलंसि वा जाव अण्णयरंसि वा तहप्पगारंसि थंडिलंसि पडिलेहिय २ पम-
ज्जिय २ तओ संजयामेव वत्थं आयावेज्ज वा पयावेज्ज वा ॥ ८३६ ॥ एयं खलु
तस्स भिक्खुस्स भिक्खुणीए वा सामग्गियं सया जइज्जासि त्ति वेमि ॥ ८३७ ॥
वत्थेसणाज्जयणे पढमोद्देशो समत्तो ॥

से भिक्खू वा भिक्खुणी वा, अहेसणिब्बाइं वत्थाइं जाएज्जा, अहापरिग्गहियाइं
वत्थाइं धारेज्जा, णो धोएज्जा, णो एएज्जा, णो धोयरत्ताइं वत्थाइं धारेज्जा अपलि-
उंचमाणे गामंतरेसु ओमचेलिए, एयं खलु वत्थधारिस्स सामग्गियं ॥ ८३८ ॥ से
भिक्खू वा २ गाहावइ कुलं पिंडवायपडियाए पविसिउकामे सव्वं चीवरमायाए
गाहावइकुलं पिंडवायपडियाए णिक्खमेज्ज वा पविसेज्ज वा, एवं बहिया वियारभूमि
विहारभूमि वा गामाणुगामं वा दूइजेज्जा । अइ पुण एवं जाणिज्जा तिव्वदेसियं वा
वासं वासमाणं पेहाए जहा पिंडेसणाए णवरं सव्वं चीवरमायाए ॥ ८३९ ॥ से
भिक्खू वा २ एगइओ मुहुत्तगं २ पाढिहारियं बीयं वत्थं जाएज्जा, जाव एमाहेण
वा दुयाहेण वा तिया-चउ-पंचाहेण वा विप्पवसिय २ उवागच्छेज्जा, तहप्पगारं
वत्थं णो अप्पणा गिण्हेज्जा, णो अण्णमण्णस्स देज्जा, णो पामिच्चं कुज्जा, णो वत्थेण
वत्थपरिणामं करेज्जा, णो परं उवसंकमिन्ता एवं वएज्जा “आउसंतो समणा !
अभिकंखसि वत्थं धारेत्तए परिहरित्तए वा” थिरं वा णं संतं णो पलिच्छिदिय २
परिट्टवेज्जा, तहप्पगारं ससंधियं वत्थं तस्स चेव णिसिरेज्जा, णो अत्ताणं साइजेज्जा
॥ ८४० ॥ से एगइओ तहप्पगारं णिग्गोसं सोब्बा णिसम्म जे भयंतारो तहप्पगाराणि

वत्थाणि संसंधियाणि मुहुत्तं २ जाइत्ता जाव एगाहेण वा जाव पंचाहेण वा विप्पवसिय विप्पवसिय उवागच्छंति, तहप्पगाराणि वत्थाणि णो अप्पणा गिण्हंति णो अण्णमण्णस्स दलर्यंति अणुवर्यंति, तं चैव जाव णो साइज्जंति बहुवयणेण भासियत्वं ॥८४१॥ से हंता “अहमवि मुहुत्तं पाडिहारियं वत्थं जाइत्ता जाव एगाहेण वा जाव पंचाहेण वा विप्पवसिय २ उवागच्छिसामि, अवियाइं एयं ममेव सिया” माइट्ठाणं संफासे णो एवं करिज्जा ॥८४२॥ से भिक्खू वा २ णो वण्णमंताइं वत्थाइं विवण्णाइं करेज्जा, णो विवण्णाइं वत्थाइं वण्णमंताइं करेज्जा, “अण्णं वा वत्थं लभिसामि ति” कट्टु णो अण्णमण्णस्स दिज्जा, णो पामिच्चं कुज्जा णो वत्थेण वत्थपरिणामं कुज्जा, णो परं उवसंकमिच्चु एवं वएज्जा, “आउसंतो समणा ! अभिकंखसि मे वत्थं धारित्तए वा परिहरित्तए वा” थिरं वा णं संतं णो पल्लिच्छिदिय २ परिट्ठविज्जा, जहा मेयं वत्थं पावगं परो मण्णइ, परं च णं अदत्तहारिं पडिपहे पेहाए तस्स वत्थस्स णिदाणाए णो तेसिं भीओ उम्मग्गेण गच्छेज्जा जाव अप्पुस्सुए तओ संजयमेव गामाणुगामं दूइज्जिज्जा ॥८४३॥ से भिक्खू वा २ गामाणुगामं दूइज्जमाणे अंतरा से विहं सिया से जं पुण विहं जाणिज्जा, इमंसि खलु विहंसि बहवे आमोसगा वत्थपडियाए संपिडिया गच्छेज्जा णो तेसिं भीओ उम्मग्गेण गच्छेज्जा, जाव गामाणुगामं दूइजेज्जा ॥८४४॥ से भिक्खू वा २ गामाणुगामं दूइज्जमाणे अंतरा से आमोसगा पडियागच्छेज्जा, ते णं आमोसगा एवं वएज्जा “आउसंतो समणा ! आहरेयं वत्थं देहि णिक्खिवाहि” जहा इरियाए णाणत्तं वत्थपडियाए ॥८४५॥ एयं खलु तस्स भिक्खुस्स भिक्खुणीए वा सामगियं जं सव्वेट्ठेहिं समिए सहिए सया जएज्जासित्ति बेमि ॥८४६॥

बीओहेसो समत्तो । पंचमं अज्झयणं समत्तं ॥

॥ पाएसणा णाम छट्ठं अज्झयणं ॥

से भिक्खू वा २ अभिकंखिज्जा पायं एसित्तए, से जं पुण पायं जाणिज्जा तंजहा अलाउयपायं वा दारुपायं मट्ठियापायं वा तहप्पगारं पायं जे णिग्गेये तरुणे जाव थिरसंघयणे से एगं पायं धारेज्जा णो बीयं ॥८४७॥ से भिक्खू वा २ परं अरुज्जोयमेराए पायपडियाए णो अभिसंधारेज्जा गमणाए ॥८४८॥ से भिक्खू वा २ से जं पुण पायं जाणिज्जा अस्सिपडियाए एगं साहम्मियं समुत्तिस्स पाणाइं ४ जहा पिडेसणाए चत्तारि आलावगा, पंचमे बहवे समणमाइणा पगणिय २ तहेव ॥८४९॥

से भिक्खू वा २ असंजए भिक्खुपडियाए बहवे समणमाहणा वत्थेसणाऽऽलावओ
 ॥८५०॥ से भिक्खू वा २ से जाइं पुण पायाइं जाणिज्जा विरुवरूवाइं महद्धण-
 मुल्लाइं तंजहा अयपायाणि वा तउ० तंचपायाणि वा सीसग-हिरण्ण-मुवण्ण-रीरिअ-
 हारपुड-पायाणि वा मणि-काय-कंस-संख-सिंग-दंत-चेल-सेल-पायाणि वा चम्म-
 पायाणि वा अण्णयराइं वा तहप्पगाराइं विरुवरूवाइं महद्धणमुल्लाइं पायाइं अफासुयाइं
 जाव णो पडिग्गाहेज्जा ॥८५१॥ से भिक्खू वा २ से जाइं पुण पायाइं जाणिज्जा,
 विरुवरूवाइं महद्धणवंधणाइं तं० अयबंधणाणि वा जाव चम्मबंधणाणि वा अण्ण-
 यराइं तहप्पगाराइं महद्धणबंधां अफासुयाइं जाव णो पडिग्गाहेज्जा, इच्चेइयाइं
 आययणाइं उवाइकम्म ॥८५२॥ अह भिक्खू जाणिज्जा चउहिं पडिमाहिं पायं
 एसित्तए, तत्थ खल्ल इमा पढमा पडिमा—से भिक्खू वा २ उहिसिय २ पायं
 जाएज्जा, तंजहा अलाउयपायं वा दारुपायं वा मट्टियापायं वा तहप्पगारं पायं सयं
 वा णं जाएज्जा, जाव पडिगाहिज्जा । पढमा पडिमा ॥८५३॥ अहावरा दोच्चा
 पडिमा—से भिक्खू वा २ पेहाए पायं जाएज्जा, तंजहा—गाहायइं वा जाव
 कम्मकरिं वा से पुव्वामेव आलोएज्जा, “आउसो त्ति वा भइणि त्ति वा दाहिसि
 भे एत्तो अण्णयरं पायं, तंजहा लाउयपायं वा ” जाव तहप्पगारं पायं सयं वा
 णं जाएज्जा, परो वा से देज्जा जाव पडिगाहेज्जा । दोच्चा पडिमा ॥८५४॥
 अहावरा तच्चा पडिमा—से भिक्खू वा २ से जं पुण वा जाणिज्जा, संगइयं वा
 वेजइयंतियं वा तहप्पगारं पायं सयं वा जाव पडिगाहिज्जा । तच्चा पडिमा ॥८५५॥
 अहावरा चउत्था पडिमा—से भिक्खू वा २ उज्झियधम्मियं पायं जाएज्जा,
 जं चउण्णे बहवे समणमाहणा जाव वणीमगा णायकंखंति, तहप्पगारं पायं सयं वा
 णं जाव पडिगाहिज्जा । चउत्था पडिमा ॥८५६॥ इच्चेयाणं चउण्हं पडिमाणं
 अण्णयरं पडिमं, जहा पिडिसणाए ॥ ८५७ ॥ से णं एयाए एसणाए एसमाणं
 पासित्ता परो वएज्जा, “आउसंतो समणा ! एज्जासि तुमं मासेण वा जाव ”
 जहा वत्थेसणाए ॥८५८॥ से णं परो जेया वएज्जा, आउसो त्ति वा भइणि त्ति
 वा आहरेयं पायं तेलेण वा घण्ण वा णवणीएण वा वसाए वा अब्भंगेत्ता वा
 तहेव सिणाणाइ तहेव सीओदगाइकंदाइं तहेव ॥८५९॥ से णं परो जेया वएज्जा
 “आउसंतो समणा ! मुहुत्तमं २ अच्छाहि जाव ताव अम्हे असणं वा ४ उवकरंसु

उवक्खडेसु वा, तो ते वयं आउसो ! सपाणं सभोयणं पडिग्गहं दाहामो, तुच्छए पडिग्गहए दिण्णे समणस्स गो सुट्ठु साहु भवइ ” से पुव्वामेव आलोएज्जा आउसो त्ति वा भइणि त्ति वा, णो खलु मे कप्पइ आहाकम्मिए असणे वा पाणे वा खाइमे वा साइमे वा भोत्तए वा पायए वा मा उवकरेहि मा उवक्खडेहि, अभिक्खसि मे दाउं एमेव दलयाहि से सेवं वयंतस्स परो असणं वा जाव उवकरित्ता उवक्खडित्ता, सपाणं सभोयणं पडिग्गहं दलएज्जा तहप्पगारं पडिग्गहं अफासुयं जाव णो पडिगाहेज्जा ॥८६०॥ सिया से परो उवणेत्ता पडिग्गहं गिसिरेज्जा से पुव्वामेव आलोएज्जा आउसो त्ति वा भइणि त्ति वा तुमं चेव णं संतिथं पडिग्गहं अंतो अंतेणं पडिलेहिस्सामि ॥८६१॥ केवली बूया ‘आयाणमेयं’ अंतो पडिग्गहंसि पाणाणि वा बीयाणि वा हरियाणि वा अह भिक्खूणं एस पइण्णा जाव जं पुव्वामेव पडिग्गहं अंतो अंतेणं पडिलेहिज्जा ॥८६२॥ सअंडाइ सव्वे अत्तावगा भाणियव्वा जहा वत्थेसणाए, णाणत्तं तेल्लेण वा घएण वा णवणीएण वा वसाए वा सिणाणाइ जाव अण्णयरंसि वा तहप्पगारंसि थंडिलंसि पडिलेहिय २ पमज्जिय २ तओ संजयामेव आमज्जिज्जा ॥८६३॥ अयं खलु तस्स भिक्खुस्स भिक्खुणीए वा सामग्गियं जं सव्वट्ठेहिं सहिएहिं सया जएज्जासि त्ति वेमि ॥८६४॥ पत्तेसणाज्जयणे

पढमोद्देशो समत्तो ॥

से भिक्खू वा २ गाहावइकुलं पिंडवायपडियाए पविट्ठे समाणे, पुव्वामेव पेहाए पडिग्गहं अवहट्ठु पाणे पमज्जिय रयं तओ संजयामेव गाहावइकुलं पिंडवाय पडियाए णिक्खमेज्ज वा पविसेज्ज वा ॥८६५॥ केवली बूया ‘आयाणमेयं’ अंतो पडिग्गहंसि पाणे वा बीए वा हरिए वा परिवावजेज्जा अह भिक्खूणं पुव्वोवइट्ठा एस पइण्णा जाव जं पुव्वामेव पेहाए पडिग्गहं अवहट्ठु पाणे पमज्जिय रयं तओ संजयामेव गाहावइकुलं पिंडवायपडियाए पविसेज्ज वा णिक्खमेज्ज वा ॥८६६॥ से भिक्खू वा २ गाहावइ० जाव० समाणे सिया से परो आहट्ठु अंतो पडिग्गहंसि सीओदगं परिभाएत्ता णीहट्ठु दलएज्जा तहप्पगारं पडिग्गहं परहत्थंसि वा परपायंसि वा अफासुयं जाव णो पडिग्गहज्जा ॥८६७॥ से य आहच्च पडिग्गहिए सिया से खिप्पामेव उदगंसि साहरिज्जा, से पडिग्गहमायाए पाणं परिट्ठवेज्जा, ससणिद्धाए च णं भूमिए णियमिज्जा ॥८६८॥ से भिक्खू वा २ उदउलं वा सणिद्धं वा

पडिग्गहं णो आमज्जिज्ज वा जाव पयाविज्ज वा ॥८६९॥ अह पुण एवं जागिज्जा विगओदए मे पडिग्गहए छिण्णसिणेहे तहप्पगारं पडिग्गहं तओ संजयामेव आम-
ज्जिज्ज वा जाव पयाविज्ज वा ॥ ८७० ॥ से भिक्खू वा २ गाहावडुकुलं जाव
पविसिउकामे से पडिग्गहमायाए गाहा० पिंडवायपडियाए पविसिज्ज वा गिक्ख-
मिज्ज वा एवं ब्रहिया वियारभूमिं वा विहारभूमिं वा गामाणुगामं दूइज्जिज्जा
॥८७१॥ तिक्खदेसियाए जहा विइयाए वत्थेसणाए णवरं एत्थ पडिग्गहे ॥८७२॥
एयं खलु तस्स भिक्खुस्स भिक्खुणीए वा सामग्गियं जं सव्वट्ठेहिं समिए सहिए
सया जएज्जासि त्ति वेमि ॥८७३॥ **बीओइसो समत्तो । छट्ठं अज्जयणं
समत्तं ॥**

॥ ओग्गह-पडिमा णाम सत्तमं अज्जयणं ॥

समणे भविस्सामि अणगारे अकिंचणे अपुत्ते अपसू परदत्तभोई पावं कम्मं
णो करिस्सामि त्ति समुट्ठाए सव्वं भंते ! अदिण्णादाणं पच्चक्खामि ॥८७४॥ से
अणुपविसित्ता गामं वा जाव० णेव सयं अदिण्णं गिण्हिज्जा, णेवण्णेणं अदिण्णं
गिण्हावेज्जा, णेवण्णेणं अदिण्णं गिण्हंतं समणुजाणेज्जा । जेहिंवि सद्धिं संपव्वइए
तेसिं पि जाइ छत्तंगं वा भत्तंगं वा दंडंगं वा जाव चम्मछेयणंगं वा तेमिं पुव्वामेव
उग्गहं अणुणविय अपडिलेहिय २ अपमज्जिय २ णो गिण्हेज्ज वा पणिण्हेज्ज
वा तेसिं पुव्वामेव उग्गहं जाइज्जा अणुणविय पडिलेहिय २ पमज्जिय २
तओ संजयामेव उगिण्हिज्ज वा पणिण्हिज्ज वा ॥ ८७५ ॥ से आगंतारेसु
वा ४ अणुवीइ उग्गहं जाएज्जा, जे तत्थ ईसरे जे तत्थ समहिट्ठाए ते उग्गहं
अणुणवेज्जा कामं खलु आउसो ! अहालंदं अहापरिण्णायं वासामो आउसो
जाव आउसंतस्स उग्गहे जाव साहम्मिया एइ ताव उग्गहं उगिण्हिस्सामो तेण परं
विहरिस्सामो ॥८७६॥ से किं पुण तत्थोग्गहंसि एवोग्गहियंसि ? जे तत्थ
साहम्मिया संभोइया समणुण्णा उवागच्छेज्जा, जे तेण सयमेसित्तए असणं वा ४
तेण ते साहम्मिया संभोइया समणुण्णा उवणिमंतेज्जा, णो चेव णं परवडियाए
उगिड्झिय २ उवणिमंतेज्जा ॥ ८७७ ॥ से आगंतारेसु वा ४-जाव से किं पुण
तत्थोग्गहंसि एवोग्गहियंसि जे तत्थ साहम्मिया अण्णसंभोइया समणुण्णा उवा-

गच्छेज्जा जे तेणं सयमेसित्तेण पीढे वा फलए वा सेज्जा वा संथारए वा, तेण ते साहम्मिणए अण्णसंभोइए समणुणे उवणिमंतेज्जा णो चेव णं परवडियाए उगिज्झिय २ उवणिमंतेज्जा ॥ ८७८ ॥ से आगंतारेसु वा ४ जाव से किं पुण तत्थोग्गहंसि एवोग्गहियंसि जे तत्थ गाहावईण वा गाहावइपुत्ताण वा सूई वा पिप्पलए वा कण्णसोहणए वा णहच्छेयणए वा तं अण्णो एगस्स अट्टाए पाडिहारियं जाइत्ता णो अण्णमण्णस्स देज्ज वा अणुपएज्ज वा सयं करणिज्जं त्ति कट्ठु से तमायाए तत्थ गच्छेज्जा गच्छित्ता पुव्वामेव उत्ताणए हत्थे कट्ठु भूमीए वा ठवेत्ता 'इमं खलु इमं खलु' त्ति आलोएज्जा, णो चेव णं सयं पाणिणा परपाणिंसि पच्चप्पिणेज्जा ॥ ८७९ ॥ से भिक्खू वा २ से जं पुण उग्गहं जाणिज्जा अणंतरहियाए पुढवीए ससणिद्धाए पुढवीए जाव संताणाए तहप्पगारं उग्गहं णो उगिणहेज्ज वा पणिणहेज्ज वा ॥ ८८० ॥ से भिक्खू वा २ से जं पुण उग्गहं जाणिज्जा थूणंसि वा ४ तहप्पगारे अंतलिकखजाए दुब्बद्धे जाव णो उग्गहं उगिणहेज्ज वा पणिणहेज्ज वा ॥ ८८१ ॥ से भिक्खू वा २ से जं पुण उग्गहं जाणिज्जा कुलियंसि वा जाव णो उगिणहेज्ज वा ॥ ८८२ ॥ से भिक्खू वा २ खंयंसि वा ४ अण्णयरे वा तहप्पगारे जाव णो उग्गहं उगिणहेज्ज वा ॥ ८८३ ॥ से भिक्खू वा २ से जं पुण उग्गहं जाणिज्जा ससागारियं सागणियं सउदयं सइत्थि सखुडुं सपसुं सभत्तपाणं णो पण्णस्स णिक्खमपणवेसे जाव धम्माणुओगचिंताए सेवं णच्चा तहप्पगारे उवस्सए ससागारिए जाव सखुडुपसु-भत्तपाणे णो उग्गहं उगिणहेज्ज वा २ ॥ ८८४ ॥ से भिक्खू वा २ से जं पुण उग्गहं जाणिज्जा गाहावइकुलस्स मज्झमज्झेणं गंतुं पंथे पडिबद्धं वा णो पण्णस्स जाव चिंताए से एवं णच्चा तहप्पगारे उवस्सए णो उग्गहं उगिणहेज्ज वा २ ॥ ८८५ ॥ से भिक्खू वा २ से जं पुण उग्गहं जाणिज्जा, इह खलु गाहावई वा जाव कम्मकरीओ वा अण्णमण्णं अक्कोसंति वा तद्देव तेल्ल-सिणाण-सोओदगविय-डादि णिणिणाइ य जहा सिज्जाए आलावगा णवरं उग्गहवत्तच्चया ॥ ८८६ ॥ से भिक्खू वा २ से जं पुण उग्गहं जाणिज्जा आइण्णसलिकखे णो पण्णस्स जाव चिंताए, तहप्पगारे उवस्सए णो उग्गहं उगिणहेज्ज वा २ ॥ ८८७ ॥ एयं खलु तस्स भिक्खुस्स २ वा सामग्गियं ॥ ८८८ ॥ उग्गहपडिमाज्झयणे पढमोद्देसो समत्तो ॥

से आगंतारेसु वा ४ अणुवीइ उग्गहं जाएज्जा, जे तत्थ ईसरे समहिद्धाए

ते उग्गहं अणुणविज्जा कामं खलु आउसो ! अहालंदं अहा परिण्णायं वसामो जाव
 आउसो ! आउसंतस्स उग्गहे जाव साहम्मियाए ताव उग्गहं उरिग्गहिस्सामो
 तेण परं विहरिस्सामो ॥ ८८९ ॥ से किं पुण तत्थ उग्गहंसि एवोग्गहियंसि जे
 तत्थ समणण वा माहणाण वा दंडए वा छत्तए वा जाव चम्मछेदणए वा तं णो अंतो-
 हितो ब्राहिं णीणेज्जा, बहियाओ वा णो अंतो पवेसेज्जा, णो सुत्तं वा णं पडिग्गहेज्जा,
 णो तेसिं किंचिवि अप्पत्तिं पडिणीयं करेज्जा ॥ ८९० ॥ से भिक्खू वा २
 अभिक्खेज्जा अंबवणं उवागच्छत्तए जे तत्थ ईसरे जे तत्थ समहिद्वाए से उग्गहं
 अणुजाणवेज्जा, कामं खलु जाव विहरिस्सामो ॥ ८९१ ॥ से किं पुण तत्थोग्ग-
 हंसि एवोग्गहियंसि अह भिक्खू इच्छेज्जा अंबं भोत्तए वा से जं पुण अंबं जाणिज्जा
 सअंडं जाव ससंताणं तहप्पगारं अंबं अफामुयं जाव णो पडिग्गहिज्जा ॥ ८९२ ॥
 से भिक्खू वा २ से जं पुण अंबं जाणिज्जा, अप्पंडं जाव अप्पसंताणं अति-
 रिच्छच्छिणं अवोच्छिणं अफामुयं जाव णो पडिग्गहिज्जा ॥ ८९३ ॥ से भिक्खू वा
 २ से जं पुण अंबं जाणिज्जा अप्पंडं जाव संताणं तिरिच्छच्छिणं वोच्छिणं
 फामुयं जाव पडिग्गहिज्जा ॥ ८९४ ॥ से भिक्खू वा २ अभिक्खेज्जा अंबभित्तं
 वा अंबपेसियं वा अंबचोयं वा अंबसालं वा अंबडालं वा भोत्तए वा पायए
 वा से जं पुण जाणिज्जा, अंबभित्तं वा जाव अंबडालं वा सअंडं जाव संताणं
 अफामुयं जाव णो पडिग्गहिज्जा ॥ ८९५ ॥ से भिक्खू वा २ से जं पुण जाणिज्जा,
 अंबभित्तं वा जाव, अप्पंडं जाव संताणं अतिरिच्छच्छिणं वा अवोच्छिणं वा
 अफामुयं जाव णो पडिग्गहिज्जा ॥ ८९६ ॥ से भिक्खू वा २ से जं पुण जाणिज्जा
 अंबभित्तं वा जाव, अप्पंडं जाव संताणं तिरिच्छच्छिणं वोच्छिणं फामुयं जाव
 पडिग्गहिज्जा ॥ ८९७ ॥ से भिक्खू वा २ अभिक्खेज्जा उच्छुवणं उवागच्छत्तए
 जे तत्थ ईसरे जाव एव उग्गहंसि ॥ ८९८ ॥ अह भिक्खू इच्छेज्जा उच्छुं भोत्तए
 वा पायए वा से जं उच्छुं जाणिज्जा, सअंडं जाव णो पडिग्गहिज्जा । अतिरिच्छ-
 च्छिणं तहेव, तिरिच्छच्छिणे वि तहेव ॥ ८९९ ॥ से भिक्खू वा २ से जं पुण
 अभिक्खेज्जा अंतदुयं उच्छुगंडियं वा उच्छुचोयं वा उच्छुसालं वा उच्छु-
 डालं वा भोत्तए वा पायए वा ॥ ९०० ॥ से जं पुण जाणिज्जा, अंतदुयं वा जाव
 डालं वा सअंडं जाव णो पडिग्गहिज्जा ॥ ९०१ ॥ से भिक्खू वा २ से जं पुण

आणिष्ठा अंतरुच्छ्रुयं वा जाव डालगं वा अप्पंडं जाव णो पडिग्गाहिज्जा, अति-
रिच्छच्छिण्णं तहेव ॥ ९०२ ॥ तिरिच्छच्छिण्णं तहेव पडिग्गाहिज्जा ॥ ९०३ ॥ से
भिक्खू वा २ अभिकंखेज्जा ल्हसुणवणं उवागच्छित्तए, तहेव तिण्णि वि आलावगा
णवरं ल्हसुण ॥ ९०४ ॥ से भिक्खू वा २ अभिकंखेज्जा ल्हसुणं वा, ल्हसुण-कंदं
वा, ल्हसुण-चोयगं वा, ल्हसुण-णालगं वा भोत्तए वा, पायए वा । सेज्जं पुण
जाणेज्जा—ल्हसुण वा जाव ल्हसुण वीयं वा सअंडं जाव णो पडिगाहेज्जा । एवं
अतिरिच्छच्छिण्णे वि तिरिच्छच्छिण्णे जाव पडिगाहेज्जा ॥ ९०५ ॥ से भिक्खू वा
२ आगतारेसु वा ४ जाव उग्गहियंसि जे तत्थ, गाहावईण वा गाहावइपुत्ताण वा
इधेयाइं आययणाइं उवाइकम्म ॥ ९०६ ॥ अह भिक्खू जाणिज्जा इमाहिं सत्तहिं
पडिमाहिं उग्गहं उगिण्हित्तए ॥ ९०७ ॥ तत्थ खलु इमा पढमा पडिमा— से
आगतारेसु वा ४ अणुवीइ उग्गहं जाएज्जा जाव० विहरिस्तामो । पढमा पडिमा
॥ ९०८ ॥ अहावरा दोच्चा पडिमा—जस्स णं भिक्खुस्स एवं भवइ “अहं च खलु
अण्णेसिं भिक्खूणं अट्टाए उग्गहं उगिण्हिस्सामि, अण्णेसिं भिक्खूणं उग्गहे उग्गहिए
उवल्लिस्सामि । दो० प० ॥ ९०९ ॥ अहा० तच्चा पडिमा—जस्सणं भिक्खुस्स एयं
भवइ “अहं च खलु अण्णेसिं भिक्खूणं अट्टाए उग्गहं उगिण्हिस्सामि, अण्णेसिं
च उग्गहे उग्गहिए णो उवल्लिस्सामि ।” त० प० ॥ ९१० ॥ अहा० चउत्था पडिमा—
जस्सणं भिक्खुस्स एवं भवइ “अहं च खलु अण्णेसिं भिक्खूणं अट्टाए उग्गहं णो
उगिण्हिस्सामि अण्णेसिं च उग्गहे उग्गहिए उवल्लिस्सामि ।” च० प० ॥ ९११ ॥
अहा० पंचमा पडिमा—जस्सणं भिक्खुस्स एवं भवइ, “अहं च खलु अप्पणो अट्टाए
उग्गहं उगिण्हिस्सामि, णो दोण्हं, णो तिण्हं, णो चउण्हं णो पंचण्हं ।” पं० प० ॥ ९१२ ॥
अहा० छट्ठा पडिमा—से भिक्खू वा २ जस्सेव उग्गहे उवल्लिएज्जा, जे तत्थ अहा
समण्णागए, तंजहा—इक्कडे वा जाव पलाले वा तस्स लाभे संवसेज्जा, तस्स अलाभे
उक्कुडुए वा णेसज्जिए वा विहरेज्जा । छ० प० ॥ ९१३ ॥ अहा० सत्तमा पडिमा—से
भिक्खू वा २ अहासंथडमेव उग्गहं जाएज्जा, तंजहा—पुढविसिलं वा, कट्टसिलं
वा अहासंथडमेव तस्स लाभे संवसेज्जा तस्स अलाभे उक्कुडुओ वा णेसज्जिओ
वा विहरेज्जा । सत्तमा प० ॥ ९१४ ॥ इधेयासिं सत्तण्हं पडिमाणं अण्णयरं, जहा
पिंडेसणाए ॥ ९१५ ॥ सुयं मे आउसं ! तेणं भगवया एवमक्खायं इह खलु थेरेहिं

भगवंतेहि पंचविहे उग्गहे पण्णत्ते, तंजहा—देविदोग्गहे, रायोग्गहे, गाहावइउग्गहे, सागारियउग्गहे, साहम्मियउग्गहे ॥ ९१६ ॥ एयं खलु तस्स भिक्खुस्स २ वा सामग्गियं ॥ ९१७ ॥ **बीओद्देसो समत्तो । सत्तमं अज्झयणं समत्तं ॥**

॥ ठाण-सत्तिक्कयं णाम अट्टमं अज्झयणं ॥

से भिक्खू वा २ अभिकंखेज्जा ठाणं ठाइत्तए से अणुपविसिज्जा, गामं वा णगरं वा, जाव सण्णिवेसं वा, से अणुपविसिज्जा, गामं वा जाव सण्णिविसं वा, से जं पुण ठाणं जाणिज्जा, सअंडं जाव मक्कडासंताणयं तं तहप्पगारं ठाणं अफासुयं अणे-सण्णिज्जं लामे संते णो पडिमाहिज्जा, एवं सेज्जागमेण णेयव्वं जाव उदयपसूयाइं ति ॥ ९१८ ॥ इच्चैयाइं आययणाइं उवाइकम्म अह भिक्खू इच्छेज्जा, चउहिं पडिमाहिं ठाणं ठाइत्तए ॥ ९१९ ॥ तत्थिमा पढमा पडिमा—अचित्तं खलु उवसज्जेज्जा अवलंवेज्जा काएण विपरिकम्माइ सवियारं ठाणं ठाइस्सामि ति । प० प० ॥ ९२० ॥ अहा० दोच्चा पडिमा—अचित्तं खलु उवसज्जेज्जा अवलंवेज्जा काएण विपरिकम्माइ णो सवियारं ठाणं ठाइस्सामि ति । दो० प० ॥ ९२१ ॥ अहा० तच्चा पडिमा—अचित्तं खलु उवसज्जेज्जा णो अवलंवेज्जा णो काएण, विपरिकम्माइं णो सवियारं ठाणं ठाइस्सामि ति । त० प० ॥ ९२२ ॥ अहा० चउत्था पडिमा—अचित्तं खलु उवस-ज्जेज्जा, णो अवलंवेज्जा णो काएण, णो विपरिकम्माइं णो सवियारं ठाणं ठाइस्सामि ति वोसट्टकाए वोसट्टकेसमंसुलोमणहे सणिरुद्धं वा ठाणं ठाइस्सामि ति । च० प० ॥ ९२३ ॥ इच्चैयासिं चउण्हं पडिमाणं जाव पग्गहियतरायं विहरेज्जा, णो तत्थ किंचिविं वएज्जा ॥ ९२४ ॥ एयं खलु तस्स भिक्खुस्स २ वा सामग्गियं वाव जएज्जासि ति बेमि ॥ ९२५ ॥ **अट्टमं अज्झयणं समत्तं ॥**

॥ णिसीहिया-सत्तिक्कयं णाम णवमं अज्झयणं ॥

से भिक्खू वा २ अभिकंखेज्जा णिसीहियं फासुयं गमणाए से जं पुण णिसीहियं जाणिज्जा, सअंडं सपाणं जाव मक्कडासंताणयं तहप्पगारं णिसीहियं अफासुयं अणेसण्णिज्जं लामे संते णो चेइस्सामि ॥ ९२६ ॥ से भिक्खू वा २ अभिकंखेज्जा णिसीहियं गमणाए से जं पुण णिसीहियं जाणिज्जा अप्पंडं अप्पपाणं जाव मक्कडासंता-णयं तहप्पगारं णिसीहियं फासुयं एसण्णिज्जं लामे संते चेइस्सामि एवं सेज्जागमेण

गेयञ्च जाव उदयप्पसूयाई ॥ ९२७ ॥ जे तत्थ दुवग्गा जाव पंचवग्गा वा अभिसंधारैति णिसीहियं गमणाए ते णो अण्णमण्णस्स कार्यं आलिगेज्ज वा विलिगेज्ज वा म्बुवेज्ज वा दंतेहिं णहेहिं वा अर्च्छिदेज्ज वा बुच्छिदेज्ज वा ॥९२८॥ एयं खलु तस्स भिक्खुस्स २ वा सामगियं जं सव्वद्वेहिं सहिए समिए सया जएज्जा सेयमिणं मणिज्जासि त्ति वेमि ॥९२९॥ **णवमं अज्झयणं समत्तं ॥**

॥ उच्चारपासवणं णाम दसमं अज्झयणं ॥

से भिक्खू वा २ उच्चारपासवणकिरियाए उब्बाहिज्जमाणे सयस्स पायपुच्छ-
णस्स असईए तओ पच्छा साहम्मियं जाएज्जा ॥ ९३० ॥ से भिक्खू वा २ से
जं पुण थंडिलं जाणिज्जा सअंडं सपाणं जाव मक्कडासंताणयं तहप्पगारंसि
थंडिलंसि णो उच्चारपासवणं वोसिरेज्जा ॥९३१॥ से भिक्खू वा २ से जं पुण
थंडिलं जाणिज्जा, अप्पपाणं अप्पवीयं जाव मक्कडासंताणयं तहप्पगारंसि थंडिलंसि
उच्चारपासवणं वोसिरेज्जा ॥९३२॥ से भिक्खू वा २ से जं पुण थंडिलं जाणिज्जा,
अस्सिपडियाए एगं साहम्मियं समुद्दिस्स अस्सिपडियाए बहवे साहम्मिया समुद्दिस्स
अस्सिपडियाए एगं साहम्मिणिं समुद्दिस्स अस्सि पडियाए बहवे साहम्मिणीओ
समुद्दिस्स अस्सिपडियाए बहवे समणमाहणवणीमया पगणिय पगणिय समुद्दिस्स
पाणाई ४ जाव उद्देसियं चेएइ, तहप्पगारं थंडिलं पुरिसंतरकडं जाव बहिया
णीहडं वा अणीहडं वा अण्णयरंसि वा तहप्पगारंसि थंडिलंसि णो उच्चार-
पासवणं वोसिरेज्जा ॥९३३॥ से भिक्खू वा २ से जं पुण थंडिलं जाणिज्जा, बहवे
समणमाहणकिवणवणीमगअतिही समुद्दिस्स पाणाई ४ जाव उद्देसियं चेएइ, तहप्प-
गारं थंडिलं अपुरिसंतरकडं जाव बहिया अणीहडं वा अण्णयरंसि वा तहप्पगारंसि
थंडिलंसि णो उच्चारपासवणं वोसिरेज्जा ॥ ९३४ ॥ अह पुण एवं जाणिज्जा, पुरि-
संतरकडं जाव बहिया णीहडं वा अण्णयरंसि तहप्पगारंसि थंडिलंसि उच्चारपासवणं
वोसिरेज्जा ॥ ९३५ ॥ से भिक्खू वा २ से जं पुण थंडिलं जाणिज्जा, अस्सि-
पडियाए कयं वा कारियं वा पाभिच्चियं वा छण्णं वा घट्टं वा मट्टं वा लित्तं
वा समट्टं वा संपभूमियं वा अण्णयरंसि वा तहप्पगारंसि थंडिलंसि णो उच्चारपासवणं
वोसिरेज्जा ॥ ९३६ ॥ से भिक्खू वा २ से जं पुण थंडिलं जाणिज्जा, इह खलु
गाहावई वा गाहावइपुत्ता वा कंदाणि वा मूलाणि वा जाव हरियाणि वा अंतराओ

वा बाहि णीहरंति बहियाओ वा अंतो साहरंति अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३७ ॥ से भिक्खू वा २ से जं पुण थंडिलं जाणिज्जा, खंथंसि वा पीदंसि वा मंचंसि वा मालंसि वा अट्टंसि वा पासायंसि वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३८ ॥ से भिक्खू वा २ से जं पुण थंडिलं जाणिज्जा, अणंतरहियाए पुढवीए ससिणिद्धाए पुढवीए ससरक्खाए पुढवीए मट्टियामक्कडाए चित्तमंताए सिलाए चित्तमंताए लेलुयाए कोलावासंसि वा दाहयंसि वा जीवपइट्टियंसि वा जाव मक्कडासंताणयंसि वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३९ ॥ से भिक्खू वा २ से जं पुण थंडिलं जाणिज्जा, इह खलु गाहावई वा गाहावइ पुत्ता वा कंदाणि वा जाव बीयाणि वा परिसाडंसु वा परिसाडिंति वा परिसाडिस्संति वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४० ॥ से भिक्खू वा २ से जं पुण थंडिलं जाणिज्जा, इह खलु गाहावई वा गाहावइपुत्ता वा सालीणि वा वीहीणि वा मुग्गाणि वा मासाणि वा तिलाणि वा कुत्तथाणि वा जवाणि वा जवज्जवाणि वा पइरिसु वा पइरिति वा पइरिस्संति वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४१ ॥ से भिक्खू वा २ से जं पुण थंडिलं जाणिज्जा, आमोयाणि वा घसाणि वा भिल्लयाणि वा विज्जलयाणि वा खाणुयाणि वा कडयाणि वा पगडाणि वा दरणि वा पदुग्गाणि वा समाणि वा विसमाणि वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४२ ॥ से भिक्खू वा २ से जं पुण थंडिलं जाणिज्जा, माणुसरंधणाणि वा, महिसकरणाणि वा, वसहकरणाणि वा, अस्सकरणाणि वा, कुक्कुडकरणाणि वा मक्कडकरणाणि वा लावयकरणाणि वा, वट्टयकरणाणि वा, त्तिस्तिरकरणाणि वा, कवोयकरणाणि वा, कविज्जलकरणाणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४३ ॥ से भिक्खू वा २ से जं पुण थंडिलं जाणिज्जा, वेहाणसट्ठाणेसु वा, शिद्धपिट्ठाणेसु वा, तरुपट्ठणट्ठाणेसु वा, मेरुपट्ठणट्ठाणेसु वा, विसभक्खणट्ठाणेसु वा, अगाणिपट्ठणट्ठाणेसु वा अण्णयरंसि वा तहप्पगारंसि णो उच्चारपासवणं वोसिरेज्जा ॥ ९४४ ॥ से भिक्खू वा २ से जं पुण थंडिलं जाणिज्जा, आरामाणि वा, उज्जाणाणि वा, वणाणि वा, वण-

संडाणि वा, देवकुलाणि वा, सभाणि वा, पवाणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४५ ॥ से भिक्खू वा २ से जं पुण थंडिलं जाणिज्जा, अट्टालयाणि वा, चरियाणि वा, दाराणि वा, गोपुराणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४६ ॥ से भिक्खू वा २ से जं पुण थंडिलं जाणिज्जा, तियाणि वा, चउक्काणि वा, चच्चराणि वा, चउमुहाणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४७ ॥ से भिक्खू वा २ से जं पुण थंडिलं जाणिज्जा, इंगालडाहेसु वा, खारडाहेसु वा, मडयडाहेसु वा, मडयथूमियासु वा, मडयचेइएसु वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४८ ॥ से भिक्खू वा २ से जं पुण थंडिलं जाणिज्जा णइयाययणेसु वा, पंकायथणेसु वा, भोघाययणेसु वा, सेयणवहंसि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४९ ॥ से भिक्खू वा २ से जं पुण थंडिलं जाणिज्जा, णवि-यासु वा, मट्टियत्थाणियासु णवियासु गोप्पलिहियासु वा, गवार्णासु वा, खाणीसु वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९५० ॥ से भिक्खू वा २ से जं पुण थंडिलं जाणिज्जा, डागवच्चंसि वा, सागवच्चंसि वा, मूलगवच्चंसि वा हत्थेकरवच्चंसि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९५१ ॥ से भिक्खू वा २ से जं पुण थंडिलं जाणिज्जा, असणवणंसि वा, सणवणंसि वा, धायइवणंसि वा, केयइवणंसि वा, अंबवणंसि वा, असोगवणंसि वा, णारावणंसि वा, पुण्णागवणंसि वा, चुण्णागवणंसि वा, अण्णयरेसु वा तहप्पगारेसु वा पत्तोवेएसु वा, पुप्फोवेएसु वा, फलोवेएसु वा, बीओवेएसु वा, हरिओवेएसु वा णो उच्चारपासवणं वोसिरेज्जा ॥ ९५२ ॥ से भिक्खू वा २ सयपाययं पा परपाययं वा गहाय से तमायाए एगंतमवक्कमेज्जा, अणावार्यंसि असंलोइयंसि अप्पाणंसि जाव मक्कडासंताणयंसि अहारामंसि वा उवस्सयंसि तओ संजयामेव उच्चारपासवणं वोसिरेज्जा, उच्चारपासवणं वोसिरित्ता से तमायाए एगंतमवक्कमे अणावार्यंसि जाव मक्कडासंताणयंसि अहारामंसि वा, ज्झामथंडिलंसि वा, अण्णयरंसि वा तहप्पगारंसि थंडिलंसि अच्चिंसि तओ संजयामेव उच्चारपासवणं परिट्ठवेज्जा ॥ ९५३ ॥ एयं खलु तस्स भिक्खुस्स २ वा सामग्गियं जाव जएज्जासि ति वेमि ॥ ९५४ ॥ **दसममज्झयणं समत्तं ॥**

॥ सह-सत्त्विककर्म णाम एगारसमं अज्झयणं ॥

से भिक्खू वा २ मुहंसदाणि वा, णंदीसदाणि वा, श्खलीसदाणि वा, अण्ण-
 यराणि वा तहप्पगाराईं विरूवरूवाईं वितताईं सदाईं कण्णसोयपडियाए णो
 अभिसंधारेज्जा गमणाए ॥ ९५५ ॥ से भिक्खू वा २ अहावेगइयाईं सदाईं सुणेइ
 तंजहा—वीणासदाणि वा, विपंचीसदाणि वा पिप्पीसगसदाणि वा, तूणयसदाणि वा,
 पण्यसदाणि वा तुंववीणियसदाणि वा, ढंकुणसदाणि वा अण्णयराईं वा तहप्पगाराईं
 विरूवरूवाईं सदाईं वितताईं कण्णसोयपडियाए णो अभिसंधारेज्जा गमणाए
 ॥ ९५६ ॥ से भिक्खू वा २ अहावेगइयाईं सदाईं सुणेइ तंजहा—तालसदाणि वा,
 कंसतालसदाणि वा, लत्तियसदाणि वा, गोहियसदाणि वा, किरिकिरियसदाणि वा
 अण्णयराणि वा तहप्पगाराईं विरूवरूवाईं तालसदाईं-कण्णसोयपडियाए णो अभि-
 संधारेज्जा गमणाए ॥ ९५७ ॥ से भिक्खू वा २ अहावेगइयाईं सदाईं सुणेइ
 तंजहा—संखसदाणि वा, वेणुसदाणि वा, वंससदाणि वा, खरमुहीसदाणि वा पिरि-
 पिरियसदाणि वा अण्णयराईं वा तहप्पगाराईं विरूवरूवाईं सदाईं हूसिराईं कण्ण-
 सोयपडियाए णो अभिसंधारेज्जा गमणाए ॥ ९५८ ॥ से भिक्खू वा २ अहावेगइयाईं
 सदाईं सुणेइ तंजहा—वष्पाणि वा, फलिहाणि वा, जाव सराणि वा, सागराणि वा
 सरपंतियाणि वा, सरसरपंतियाणि वा, अण्णयराईं वा तहप्पगाराईं विरूवरूवाईं
 सदाईं कण्णसोयपडियाए णो अभिसंधारेज्जा गमणाए ॥ ९५९ ॥ से भिक्खू वा २
 अहावेगइयाईं सदाईं सुणेइ तंजहा—कच्छाणि वा, णूमाणि वा, महणाणि
 वा, वणाणि वा, वणदुग्गाणि वा, पब्बयाणि वा, पब्बयदुग्गाणि वा, अण्णय-
 राईं वा तहप्पगाराईं विरूवरूवाईं सदाईं कण्णसोयपडियाए णो अभिसंधारेज्जा
 गमणाए ॥ ९६० ॥ से भिक्खू वा २ अहावेगइयाईं सदाईं सुणेइ तंजहा—
 गामाणि वा, णगराणि वा, णिगमाणि वा, रायहाणि आसमपट्टणसंणिवेसाणि
 वा, अण्णयराईं वा तहप्पगाराईं सदाईं णो अभिसंधारेज्जा गमणाए ॥ ९६१ ॥
 से भिक्खू वा २ अहावेगइयाईं सदाईं सुणेइ तंजहा—आरामाणि वा, उज्जाणाणि
 वा, वणाणि वा, वणसंडाणि वा, देवकुलाणि वा सभाणि वा, पवाणि वा, अण्णयराईं
 वा तहप्पगाराईं सदाईं णो अभिसंधारेज्जा गमणाए ॥ ९६२ ॥ से भिक्खू वा
 २ अहावेगइयाईं सदाईं सुणेइ तंजहा—अट्टाणि वा, अट्टालयाणि वा, चरियाणि

वा, दाराणि वा, गोपुराणि वा, अण्यराइं वा तहप्पगाराइं सदाइं णो अभि-
संधारेज्जा गमणाए ॥ ९६३ ॥ से भिक्खू वा २ अहवेगइयाइं सदाइं सुणेइ
तंजहा—तियाणि वा, चउक्काणि वा, चच्चराणि वा, चउम्मुहाणि वा, अण्यराइं
वा तहप्पगाराइं सदाइं णो अभिसंधारेज्जा गमणाए ॥ ९६४ ॥ से भिक्खू वा २
अहवेगइयाइं सदाइं सुणेइ तंजहा--महिसकरणट्ठाणाणि वा वसभकरणट्ठाणाणि वा,
अस्सकरणट्ठाणाणि वा, हत्थिकरणट्ठाणाणि वा जाव कविजलकरणट्ठाणाणि वा,
अण्यराइं वा तहप्पगाराइं सदाइं णो अभिसंधारेज्जा गमणाए ॥ ९६५ ॥ से भिक्खू
वा २ अहवेगइयाइं सदाइं सुणेइ तंजहा--महिसजुद्धाणि वा, वसभजुद्धाणि वा, अस्स-
जुद्धाणि वा, हत्थिजुद्धाणि वा जाव कविजलजुद्धाणि वा, अण्यराइं वा तहप्पगाराइं
णो अभिसंधारेज्जा गमणाए ॥ ९६६ ॥ से भिक्खू वा २ अहवेगइयाइं सदाइं सुणेइ
तंजहा--जुहियट्ठाणाणि वा, ह्यजुहियट्ठाणाणि गयजुहियट्ठाणाणि वा अण्यराइं
तहप्पगाराइं सदाइं णो अभिसंधारेज्जा गमणाए ॥ ९६७ ॥ से भिक्खू वा २ जाव सुणेइ
तंजहा--अक्खवाइयट्ठाणाणि वा, माणुम्माणियट्ठाणाणि वा, महयाऽऽहयणट्ठगीयवाइय-
तंतितलतालतुडियपडुप्पवाइयट्ठाणाणि वा अण्यराइं वा तहप्पगाराइं णो अभिसं-
धारेज्जा गमणाए ॥ ९६८ ॥ से भिक्खू वा २ जाव सुणेइ तंजहा--कलहाणि वा,
डिंवाणि वा, डमराणि वा, दोरक्काणि वा, वेररज्जाणि वा, विरुद्धरज्जाणि वा, अण्य-
राइं वा तहप्पगाराइं सदाइं णो अभिसंधारेज्जा गमणाए ॥ ९६९ ॥ से भिक्खू वा २ जाव
सदाइं सुणेइ तंजहा खुद्धियं दारियं परिभुत्तमंडियालं कियणिलुज्जमाणिं पेहाए एगं पुरिसं
वा वहाए णीणिज्जमाणं पेहाए अण्यराइं वा तहप्पगाराइं णो अभिसंधारेज्जा गम-
णाए ॥ ९७० ॥ से भिक्खू वा २ अण्यराइं विरुवरूवाइं महासवाइं एवं जाणिब्बा
तंजहा बहुसगडाणि वा, बहुरहाणि वा, बहुमिलक्खूणि वा, बहुपच्चंताणि वा, अण्य-
राइं वा तहप्पगाराइं विरुवरूवाइं महासवाइं कण्णसोयपडियाए णो अभिसंधारेज्जा
गमणाए ॥ ९७१ ॥ से भिक्खू वा २ विरुवरूवाइं महुस्सवाइं एवं जाणिज्जा
तंजहा—इत्थीणि वा, पुरिसाणि वा, थेराणि वा, डहराणि वा, मज्झिमाणि वा,
आभरणविभूसियाणि वा, गायंताणि वा, वायंताणि वा, णच्चंताणि वा, हसंताणि वा,
रमंताणि वा, मोहंताणि वा विउलं असणपाणखाइमसाइमं परिभुंजंताणि वा, परि-
भाइंताणि वा, विच्छडियमाणानि वा, विगोवयमाणानि वा, अण्यराइं वा तहप्प-

गाराइं विरुवरूवाइं महुस्सवाइं कण्णसोयपडियाए णो अभिसंधारेज्जा गमणाए
 ॥ ९७२ ॥ से भिक्खू वा २ णो इहलोइएहिं सदेहिं णो परलोइएहिं सदेहिं, णो
 सुएहिं सदेहिं, णो असुएहिं सदेहिं, णो दिट्ठेहिं सदेहिं णो अदिट्ठेहिं सदेहिं, णो
 कंतेहिं सदेहिं सज्जिजा, णो रजेज्जा, णो गिज्जेज्जा, णो मुज्जेज्जा, णो अज्जोववजेज्जा
 ॥ ९७३ ॥ एयं खलु तस्स भिक्खुस्स २ वा सामगियं जाव जएज्जासि ति वेमि
 ॥ ९७४ ॥ **एयारहममज्झयणं समत्तं ॥**

॥ रूव-सत्तिक्कयं णाम बारसमं अज्झयणं ॥

से भिक्खू वा २ अहावेगइयाइं रूवाइं षासइ तंजहा—गंधिमाणि वा, वेदिमाणि
 वा, पूरिमाणि वा, संवाइमाणि वा, कंठकम्माणि वा, पोत्थकम्माणि वा, चित्त-
 कम्माणि वा, मणिकम्माणि वा, दंतकम्माणि वा, पत्तच्छेज्जकम्माणि वा, विविहाणि
 वा वेदिमाइं जाव अण्णयराइं वा तहप्पगाराइं विरुवरूवाइं चक्खुदंसणपडियाए णो
 अभिसंधारेज्जा गमणाए ॥ ९७५ ॥ एयं णायव्वं जहा सहपडियाए स्ववा वाइत्तवज्जा
 रूवपडियाए वि ॥ ९७६ ॥ **दुवालसममज्झयणं समत्तं ॥**

परकिरिया-सत्तिक्कयं णाम तेरसमं अज्झयणं ॥

परकिरियं अज्झत्थियं संसेसियं णो तं सायए णो तं णियमे ॥ ९७७ ॥ सिया
 से परो पाए आमज्जिज्ज वा पमज्जिज्ज वा णो तं सायए णो तं णियमे सिया से परो
 पायाइं संवाहेज्ज वा पलिमदिज्ज वा णो तं सायए णो तं णियमे सिया से परो
 पायाइं फुसेज्ज वा रएज्ज वा णो तं सायए णो तं णियमे सिया से परो पायाइं तेहेण
 वा घएण वा णवणीएण वा वसाए वा मक्खेज्ज वा अर्द्धिमिज्ज वा णो तं सायए
 णो तं णियमे, सिया से परो पायाइं लोहेण वा कक्केण वा चुण्णेण वा वण्णेण वा
 उल्लोठिज्ज वा उब्बलिज्ज वा णो तं सायए णो तं णियमे, सिया से परो पायाइं
 सीओदगवियडेण वा उसिणोदगवियडेण वा उच्छोलेज्ज वा प्होलेज्ज वा णो तं सायए
 णो तं णियमे, सिया से परो पायाइं अण्णयरेण विलेवणजाएण आलिपेज्ज वा विलिपेज्ज
 वा णो तं सायए णो तं णियमे, सिया से परो पायाइं अण्णयरेण धूवणजाएण धूवेज्ज
 वा पधूवेज्ज वा णो तं सायए णो तं णियमे, सिया से परो पायाओ खाणुं वा
 कंटयं वा गिहरेज्ज वा विसोहेज्ज वा णो तं सायए णो तं णियमे । सिया से परो

पायाओ पूयं वा सोणियं वा णीहरेज्ज वा विसोहेज्ज वा णो तं सायए णो तं णियमे
 ॥१७८॥ सिया से परो कार्यं आमजेज्ज वा पमजेज्ज वा णो तं सायए णो तं णियमे,
 सिया से परो कार्यं लोहेण वा संवाहेज्ज वा पलिमहेज्ज वा णो तं सायए णो तं
 णियमे सिया से परो कार्यं तेलेण वा घएण वा णवणीएण वा वसाए वा मक्खेज्ज
 वा अब्भगेज्ज वा णो तं सायए णो तं णियमे, सिया से परो कार्यं लोहेण वा कक्केण
 वा चुण्णेण वा वण्णेण वा उल्लोदिज्ज वा उव्वलिज्ज वा णो तं सायए णो तं णियमे
 सिया से परो कार्यं सीओदगवियडेण वा उसिणोदगवियडेण वा उच्छोलेज्ज वा
 पओएज्ज वा णो तं सायए णो तं णियमे, सिया से परो कार्यं अण्णयरेणं विलेवण-
 जाएणं आलिपेज्ज वा, विलिपेज्ज वा, णो तं सायए, णो तं णियमे । सिया से
 परो कार्यं अण्णयरेण धूवणजाएण धूवेज्ज वा, पधूवेज्ज वा, णो तं सायए णो तं
 णियमे ॥ १७९ ॥ सिया से परो कार्यंसि वणं आमजेज्ज वा पमजेज्ज वा णो तं
 सायए णो तं णियमे, सिया से परो कार्यंसि वणं संवाहेज्ज वा पलिमहेज्ज वा णो तं
 सायए णो तं णियमे, सिया से परो कार्यंसि वणं तेलेण वा घएण वा णवणीएण
 वा वसाए वा मक्खेज्ज वा अब्भगिज्ज वा, णो तं सायए णो तं णियमे । सिया
 से परो कार्यंसि वणं लोहेण वा कक्केण वा चुण्णेण वा वण्णेण वा उल्लोदिज्ज वा
 उव्वहेज्ज वा णो तं सायए णो तं णियमे, सिया से परो कार्यंसि वणं सीओदग-
 वियडेण वा उसिणोदगवियडेण वा उच्छोलेज्ज वा पधोवेज्ज वा णो तं सायए णो
 तं णियमे ॥ १८० ॥ से सिया परो कार्यंसि वणं अण्णयरेणं विलेवणजाएणं आलि-
 पेज्ज वा विलिपेज्ज वा णो तं २ । सिया से परो कार्यंसि वणं अण्णयरेणं धूवण-
 जाएणं धूवेज्ज वा प० णो तं० २ । सिया से परो कार्यंसि वणं अण्णयरेणं सत्थ-
 जाएणं अञ्चिदिज्ज वा विञ्चिदिज्ज वा प० णो तं० २ । सिया से परो कार्यंसि
 वणं अण्ण० सत्थजाएणं अञ्चिदिज्ज वा विञ्चिदिज्ज वा पूयं वा सोणियं वा
 णीहरिज्ज वा वि० णो तं० २ । सिया से परो कार्यंसि गंडं वा, अरइयं वा, पुलइयं
 वा, भगंदलं वा, आमजेज्ज वा, पमजेज्ज वा, णो तं सायए णो तं णियमे । सिया से
 परो कार्यंसि गंडं वा, अरइयं वा, पुलइयं वा, भगंदलं वा, संवाहेज्ज वा पलिमहेज्ज
 वा, णो तं सायए णो तं णियमे, सिया से परो कार्यंसि गंडं वा जाव भगंदलं वा,
 तेलेण वा घएण वा णवणीएण वा वसाए वा मक्खेज्ज वा अब्भगेज्ज वा णो तं
 सायए णो तं णियमे । सिया से कार्यंसि गंडं वा जाव भगंदलं वा, लोहेण वा,

कक्केण वा चुण्णेण वा, वण्णेण वा उल्लोद्धिञ्ज वा, उल्लवेज्ज वा णो तं सायए णो तं
 णियमे । सिया से परो कायंसि गंडं वा भगंदलं वा, सीओदगवियडेण वा, उसि-
 णोदगवियडेण वा, उच्छोलेज्ज वा, पधोवेज्ज वा, णो तं सायए, णो तं णियमे । सिया से
 परोकायंसि गंडंवा जाव भगंदलं वा अण्णयरेणं सत्थजाएणं अच्छिदेज्ज वा विच्छिदेज्ज
 वा, सिया से परो अण्णयरेणं सत्थजाएणं अच्छिदित्ता वा २ पूयं वा सोणियं वा
 णीहरेज्ज वा णो तं सायए णो तं णियमे ॥९८१॥ सिया से परो कायाओ सेयं वा
 जलं वा णीहरेज्ज वा विसोहेज्ज वा णो तं सायए णो तं णियमे ॥९८२॥ सिया से
 परो अच्छिमलं, कण्णमलं वा, दंतमलं वा णहमलं वा, णीहरिज्ज वा विसोहिज्ज वा
 णो तं सायए णो तं णियमे ॥९८३॥ सिया से परो दीहाई वालाई दीहाई रोमाई दीहाई
 भमुहाई, दीहाई कक्खरोमाई दीहाई वत्थिरोमाई, कप्पेज्ज वा संठवेज्ज वा णो तं
 सायए णो तं णियमे ॥९८४॥ सिया से परो सीसाओ लिक्खं वा जूयं वा णीहरेज्ज वा
 विसोहेज्ज वा णो तं सायए णो तं णियमे ॥९८५॥ सिया से परो अंकंसि वा पलियंकंसि
 वा तुयट्ठावित्ता पायाई आमज्जिज्ज वा पमज्जिज्ज वा एवं हिट्ठिमो गमो पावाइ भाणि-
 यब्बो, सिया से परो अंकंसि वा पलियंकंसि वा तुयट्ठावित्ता, हारं वा अद्धहारं वा
 उरत्थं वा, गेवेयं वा, मउडं वा, पालंयं वा सुवण्णसुत्तं वा, अविहिज्ज वा,
 पिणहिज्ज वा णो तं सायए णो तं णियमे ॥९८६॥ सिया से परो आरामंसि वा,
 उज्जाणंसि वा, णीहरित्ता वा पविसित्ता वा पायाई आमजेज्ज वा पमजेज्ज वा णो
 तं सायए णो तं णियमे ॥९८७॥ एवं णेयव्वा अण्णमण्णकिरिया वि ॥ ९८८ ॥
 सिया से परो सुद्धेणं वइव्वलेणं तेइच्छं आउट्टे सिया से परो असुद्धेणं वइव्वलेणं
 तेइच्छं आउट्टे, सिया से परो गिलाणस्स सवित्ताणि कंदाणि वा मूलाणि वा तयाणि
 वा हरियाणि वा खणित्तु वा कट्ठित्तु वा कट्ठावित्तु वा तेइच्छं आउट्टाविज्जा णो
 तं सायए णो तं णियमे ॥९८९॥ कड्डुवेयणा पाणभूयजीवसत्ता वेयणं वेइति ॥९९०॥
 एयं खलु तस्स भिक्खुस्स २ वा सामगियं जं सव्वट्ठेहिं सहिए समिए सया जए
 सेयमिणं मण्णेज्जासि त्ति वेमि ॥९९१॥ तेरहममज्जयणं समत्तं ॥

॥ अण्णुण्णकिरिया-सत्तिवकयं णाम चउट्टसमं अज्जयणं ॥

से भिक्खू वा २ अण्णमण्णकिरियं अज्जतिययं संसेइयं णो तं सायए णो तं
 णियमे ॥९९२॥ सिया से अण्णमण्णं पाए आमजेज्ज वा पमजेज्ज वा णो तं

सायए णो तं णियमे ॥९९३॥ सेसं तं चैव ॥९९४॥ एयं खलु तस्स भिक्खुस्स २
वा सामंगियं ञ्जिज्जासि त्ति वेमि ॥९९५॥ चउद्दसममज्झयणं समत्तं ॥

॥ भावणा णाम पणरहमं अज्झयणं ॥

तेणं कालेणं तेणं समएणं समणे भगवं महावीरे पंचहत्थुत्तरे यावि होत्था,
तंजहा—हत्थुत्तराहिं चुए चइत्ता गब्भं वक्कंते, हत्थुत्तराहिं गब्भाओ गब्भं साहरिए
हत्थुत्तराहिं जाए, हत्थुत्तराहिं सव्वओ सव्वत्ताए मुंडे भवित्ता अगाराओ अणगारियं
पव्वइए, हत्थुत्तराहिं किसिणे पड्डिपुण्णे अच्चाए गिरावरणे अणंते अणुत्तरे केवल-
वरणाणंदसणे सनुप्पण्णे, साइणा भगवं परिणिव्वुए ॥९९६॥ समणे भगवं महावीरे,
इमाए ओसण्णिणीए सुसमसुसमाए समाए वीइक्कंताए सुसमाए समाए वीइक्कंताए,
सुसमदुसमाए समाए वीइक्कंताए दुसमसुसमाए समाए बहुवीइक्कंताए, पण्हत्तरीए
वासेहि मासेहिं य अद्धणवमेहिंसेसेहिं, जे से गिम्हाणं चउत्थे मासे अट्टमे पक्खे,
आसाढमुद्धे, तस्स णं आसाढमुद्धस्स छट्ठीपक्खेणं हत्थुत्तराहिं णक्खत्तेणं जोगमुवाग-
एणं, महाविजयसिद्धत्थुप्फुत्तरपवरपुंडरीयदिसासोवत्थियवद्धमाणाओ महाविमा-
णाओ वीसंसागरोवमाई आउथं पालइत्ता, आउक्खएणं, ठिइक्खएणं भवक्खएणं चुए
चइत्ता इह खलु जंबुद्वीवेणं दीवे, भारहे वासे, दाहिणद्धुभरहे दाहिणमाहणकुंडपुरसंणि-
वेसंमि उसभदत्तस्स माहणस्स कोडालसगोत्तस्स देवाणंदाए माहणीए जालंधरस्स
गुत्ताए सीहुब्भवभूएणं अप्पाणेणं कुच्चिसि गब्भं वक्कंते, समणे भगवं महावीरे
तिण्णाणोवगाए यावि होत्था, चइस्सामित्ति जाणइ चुएमित्ति जाणइ, चयमाणे ण
जाणेइ, सुहुमे णं से काले पण्णसे । तत्रो णं समणे भगवं महावीरे हियाणुकंपए णं
देवेणं जीयमेयं त्ति कट्टु जे से वासाणं तच्चे मासे पंचमे पक्खे आसोयबहुले तस्स णं
आसोयबहुलस्स तेरसीपक्खेणं हत्थुत्तराहिं णक्खत्तेणं जोगमुवागएणं वासीहिं राईदि-
एहिं वीइक्कंतेहिं तेसीइमस्स राईदियस्स परियाए वट्टमाणे दाहिणमाहणकुंडपुरसंणि-
वेसाओ उत्तरखत्तियकुंडपुरसंणिवेसंसि णायणं खत्तियाणं सिद्धत्थस्स खत्तियस्स
कासवगुत्तस्स तिसलाए खत्तियाणिए वासिद्धसगुत्ताए असुभाणं पुग्गलाणं अवहारं
करित्ता, सुभाणं पुग्गलाणं पक्खेवं करित्ता कुच्चिसि गब्भं साहरइ, जेवि य से
तिसलाए खत्तियाणीए कुच्चिसि गब्भे तंपि य दाहिणमाहणकुंडपुरसंणिवेसंसि
उसभ.....को.....देवा....जालंधरायणगुत्ताए कुच्चिसि गब्भं साहरइ ॥९९७॥ समणे

भगवं महावीरे तिष्णाणोवगए यावि होत्था, साहरिज्जिस्सामिच्छि जाणइ, साह-
रिएमिच्छि जाणइ साहरिज्जमाणे वि जाणइ सम्पणाउसो ! ॥ ९९८ ॥ तेणं कालेण
तेणं समएणं तिसल्लाए खत्तियाणीए अह अण्णया कयाइ णवण्हं मासाणं बहुपडि-
पुण्णाणं अद्धट्टमाणं राईदियाणं वीइक्कंताणं जे से गिम्हाणं पढमे मासे दोखे पक्खे
चित्तमुद्धे तस्सणं चित्तमुद्धस्स तेरसीपक्खेणं, हत्थुत्तराहि जोगमुवागएणं समणं
भगवं महावीरं आरोयारोयं पसूया ॥९९९॥ जं णं राई तिसल्ला खत्तियाणी समणं
भगवं महावीरं आरोयारोयं पसूया, तं णं राई भवणवइवाणमंतरजोइसियविमाण-
वासिदेवेहि य देवीहि य उवयंतेहि य उप्पयंतेहि य एगे महं दिव्वे देवुज्जोए देव-
सण्णिवाए देवकइक्कहे उप्पिजल्लभूए यावि होत्था ॥१०००॥ जं णं रयणिं तिसल्ला
खत्तियाणी समणं भगवं महावीरं आरोयारोयं पसूया तं णं रयणिं वहवे देवा य देवीओ
य एगं महं अमयवासं च, गंधवासं च, चुण्णवासं य, पुप्फवासं च, हिरण्णवासं
च, रयणवासं च वासिसु ॥ १००१ ॥ जं णं रयणिं तिसल्ला खत्तियाणी समणं भगवं
महावीरं आरोयारोयं पसूया, तं णं रयणिं भवणवइवाणमंतरजोइसियविमाणवासिणो
देवा य देवीओ य समणस्स भगवओ महावीरस्स सूइक्कम्माइं तित्थयराभिसेयं च
करिसु ॥ १००२ ॥ जओ णं पभिइ भगवं महावीरे तिसल्लाए खत्तियाणीए कुच्छिसि
गब्भं आगए तओ णं पभिइ तं कुलं विपुलेणं हिरण्णेणं सुवण्णेणं धणेणं धण्णेणं
माणिक्केणं मोत्तिएणं संखसिल्लप्पवाल्लेणं अईव २ परिवड्डइ, तओ णं समणस्स भग-
वओ महावीरस्स अम्मापियरो एयमहं जाणित्ता णिव्वत्तदसाहंसि वोक्कंतसि सूचि-
भूयंसि विपुलं असण्णणख्वाइमसाइमं उवक्खडावेति उवक्खडावेत्ता मित्तणाइसयण-
संबंधिवग्गं उवण्णिमंतेति उवण्णिमंतेत्ता बहवे समणमाहणक्किवणवणिमगाहिं भिच्छुं-
डगपंडरगाईणं विच्छुंहेति विग्गोवेति विस्साणंति दातारेसु णं दाणं पज्जभाइति विच्छ-
ड्ढित्ता विग्गोवित्ता विस्साणित्ता दायारेसु णं दाणं पज्जभाइत्ता मित्तणाइसयणसंबंधि-
वग्गं भुंजावेति भुंजावेत्ता मित्तणाइसयणसंबंधिवग्गेण इमेयारुर्वं णामधेज्जं कारवेति,
जओ णं पभिइ इमे कुमारे तिसल्लाए खत्तियाणीए कुच्छिसि गब्भे आहूए तओ णं
पभिइ इमे कुलं, विउलेणं हिरण्णेणं सुवण्णेणं धणेणं धण्णेणं माणिक्केणं मोत्तिएणं
संखसिल्लप्पवाल्लेणं अईव २ परिवड्डइ तं होउ णं कुमारे “ ब्रुद्धमाणे ” ॥ १००३ ॥
तओ णं समणे भगवं महावीरे पंचधाइपरिवुडे तंजहा—खीरधाईए-मज्जणधाईए-

मंडावणवाइए खेळावणवाइए-अंकवाइए अंकाओ अंकं साहरिज्जमाणे रम्मे मणि-
कोट्टिमंतले गिरिकंदरस्समल्लीणे विव चंपयपायवे अहाणुपुव्वीए संवहुइ ॥ १००४ ॥
तओ णं समणे भगवं महावीरे विण्णायपरिणये विणियत्तवालभावे अणुस्सुयाई उरा-
लाई माणुस्सगाई पंचलक्खणाई कामभोगाई सहफरिसरसख्वगंधाई परिवारेमाणे
एवं च णं विहरइ ॥ १००५ ॥ समणे भगवं महावीरे कासवगोत्ते तस्स णं इमे तिण्णि
णाम धेज्जा एवमाहिज्जंति, अम्मापिउसंतिए “वद्धमाणे,” सहसम्मुइए “समणे”
भीमभयभेरवं उरालं अचेलयं परिसहं सहइ त्ति कट्टु देवेहिं से णामं कयं “समणे
भगवं महावीरे” ॥ १००६ ॥ समणस्स णं भगवओ महावीरस्स पिया कासवगोत्तेणं
तस्स णं तिण्णि णामधेज्जा एवमाहिज्जंति, तंजहा—सिद्धत्थे इ वा, सेज्जंसेइ वा,
जसंसे इ वा ॥ १००७ ॥ समणस्स भगवओ महावीरस्स अम्मा वासिद्धसगोत्ता तीसेणं
तिण्णि णामधेज्जा, एवमाहिज्जंति तंजहा—तिसला इ वा, विदेहदिण्णा इ वा, पिय-
कारिणी इ वा ॥ १००८ ॥ समणस्स णं भगवओ महावीरस्स पित्तियए ‘सुपासे’
कासवगोत्तेणं, समणस्स णं भगवओ महावीरस्स जेट्ठे भाया णं दिवद्वणे कासवगोत्तेणं,
समणस्स णं भगवओ महावीरस्स जेट्ठा भइणी सुदंसणा कासवगोत्तेणं, समणस्स णं
भगवओ महावीरस्स भज्जा जसोया कोडिण्णा गोत्तेणं समणस्स भगवओ महावीरस्स
धूया कासवगोत्तेणं, तीसेणं दो णामधेज्जा, एवमाहिज्जंति, तंजहा—आणोज्जा इ
वा, पियदंसणा इ वा, समणस्स णं भगवओ महावीरस्स णत्तुई कोसियगोत्तेणं तीसेणं
दो णामधेज्जा, एवमाहिज्जंति, तंजहा—सेसवई इ वा, जसवई इ वा ॥ १००९ ॥
समणस्स णं भगवओ महावीरस्स अम्मापियरो पासावच्चिज्जा, समणोवासगा याधि
होत्था, ते णं बहूई वासाई समणोवासंगपरियागं पालइत्ता, उण्हं जीवणिकायाणं
संरक्खणणिमित्तं आलोइत्ता णिंदित्ता गरहित्ता पडिक्कमित्ता अहारिहं उत्तरगुण-
पायच्छित्तं पडिबज्जित्ता कुससंथारं दुरुहित्ता, भत्तं पचक्खाइंति, भत्तं पचक्खाइत्ता
अपच्छिमाए मारणतियाए संलेहणाए छुसियसरीरा कालमासे कालं किच्चा तं सरीरं
विपज्जहित्ता अच्चुए कप्पए देवत्ताए उववण्णा, तओणं आउक्खएणं भवक्खएणं
ठिइक्खएणं चुए चइत्ता महाविदेहवासे चरिमेणं उत्सासेणं सिज्झिस्संति, बुज्झि-
स्संति, मुच्चिस्संति परिणिव्वाइस्संति, सब्बदुक्खाणमंतं करिस्संति ॥ १०१० ॥ तेणं
कालेणं तेणं समएणं समणे भगवं महावीरे णाए णायपुत्ते णायकुलणिव्वत्ते विदेहे

विदेहदिण्णे विदेहज्जे विदेहसूमाले तीसं वासाइं विदेहंसि.त्ति कट्टु अगारमज्जे वसित्ता अम्मापिऊहिं कालगएहिं देवलोगमणुपत्तेहिं समत्तपइण्णे चिच्चा हिरण्णं, चिच्चा सुवण्णं, चिच्चा बलं, चिच्चा वाहणं, चिच्चा धणधणकणयरयणसंतसारसावइज्जं, विच्छड्ढेत्ता, विगोवित्ता, विस्साणित्ता, दायारेसु दाणं दाइत्ता परिभाइत्ता, संवच्छरं दाणं दलइत्ता, जे से हेमंताणं पढमे मासे पढमे पक्खे, मग्गसिरचहुले, तस्सणं मग्गसिरचहुलस्स दसमीपक्खेणं हत्थुत्तराहिं णक्खत्तेणं जोगमुवागएणं अभिणिक्खमणाभिप्पाए यावि होत्था ॥ १०११ ॥ संवच्छरेण होहिंति अभिणिक्खमणं तु जिणवरिंदस्स, तो अत्थि संपयाणं, पव्वत्तइं पुब्बसूराओ ॥ १०१२ ॥ एगा हिरण्ण-कोडी, अट्टेव अणूणया सयसहस्सा, सूरोदयमाइयं दिज्जइ जा पाथारासोत्ति ॥ १०१३ ॥ तिण्णेव य कोडिसया अट्टासीइं च हांति कोडीओ, असिइं च सयसहस्सा, एवं संवच्छरे दिण्णं ॥ १०१४ ॥ वेसमणकुंडलधरा, देवा लोगंतिथा महिद्धिया ॥ बोहिंति य तित्थयरं, पण्णरससु कम्मभूमिसु ॥ १०१५ ॥ वंभंमि य कप्पंमि य बोद्धव्वा कण्हराइणो मज्जे; लोगंतिथा विमाणा, अट्टसु वत्था असंखेज्जा ॥ १०१६ ॥ एए देवणिकाया, भगवं बोहिंति जिणवरं वीरं, सब्वजगजीवहियं, अरहं तित्थं पव्वत्तेहि ॥ १०१७ ॥ तओ णं समणस्स भगवओ महावीरस्स अभिणिक्खमणाभिप्पायं जाणेत्ता भवणवइ-वाणमंतरजोइसियविमाणवासिणो देवा य देवीओ य सएहिं सएहिं रुवेहिं, सएहिं सएहिं णेवत्थेहिं, सएहिं सएहिं चिंवेहिं, सत्विट्ठीए सव्वजुइए, सव्ववलसमुदएणं, सयाइं सयाइं जाणविमाणाइं दुरुहंति सयाइं २ जाणविमाणाइं दुरुहित्ता, अहा आथराइं पोग्गलाइं परिसाडेंति परिसाडित्ता, अहासुहुमाइं पोग्गलाइं परियाइंति परियाइत्ता, उट्ठं उप्पयंति उट्ठं उप्पइत्ता, ताए उक्किट्ठाए सिग्घाए चवलाए तुरियाए दिव्वाए देवगइए अहेणं उवयमाणा २ तिरिएणं असंखेज्जाइं दीवसमुद्दाइं वीइक्कममाणा २ जेणेव जंबुदीवे दीवे तेणेव उवागच्छंति उवा-गच्छित्ता, जेणेव उत्तरखत्तियकुंडपुरसंणिवेसे तेणेव उवागच्छंति उवागच्छित्ता, जेणेव उत्तरखत्तियकुंडपुर संणिवेस्स उत्तरपुरत्थिमे दिसिभाए तेणेव ज्ञात्तिवेगेण उवट्ठिइया ॥ १०१८ ॥ तओ णं सक्के देविंदे देवराया सणियं सणियं जाणविमाणं-पठवेइपठवेत्ता, सणियं २ जाणविमाणाओ पच्चोत्तरइ, पच्चोत्तरित्ता एगंतमवक्कमेइ एगंतमवक्कमेत्ता, महया वेउट्ठिवएणं समुग्घाएणं समोहणइ, महया वेउट्ठिवएणं

समुग्धाएणं समोहणित्ता, एगं महं णाणामणिकणयरयणभत्तिचित्तं सुभं चारुकंतलरुवं
 देवच्छंदयं विउव्वइ, तस्सणं देवच्छंदयस्सं ब्रह्मज्झदेसभाए एगं महं सपायपीढं
 सीहासणं णाणामणिकणयरयणभत्तिचित्तं सुभं चारुकंतलरुवं विउव्वइ विउव्वित्ता,
 जेणेव समणे भगवं महावीरे तेणेव उवागच्छइ उवागच्छित्ता समणं भगवं महावीरं
 तिक्खुत्तो आयाहिणं पयाहिणं करेइ, २ समणं भगवं महावीरं वंदइ णमंसइ, वेदिता
 णमंसित्ता समणं भगवं महावीरं गहाय जेणेव देवच्छंदए तेणेव उवागच्छइ उवा-
 गच्छित्ता, सणियं २ पुरत्थाभिमुहे सीहासणे णिसीयावेइ णिसीयावेत्ता सयपागसह-
 स्सपागेहिं तेलेहिं अब्भगेइ अब्भगेत्ता गंधकासाइएहिं उल्लोलेइ उल्लोलित्ता, सुद्धो-
 दएणं मज्जावेइ मज्जावित्ता, जस्स णं मुहं सयसहस्सेणं तिपडोलतित्तिएणं साहिएणं
 सीएणं गोसीसरत्तचंदणेणं अणुलिंपइ अणुलिंपित्ता ईसिणिस्सासवायवोज्झं वरणयर-
 पट्टणुग्गयं कुसलणरपसंसियं अस्सलालापेलवं छेयायरियकणगखचियंतकम्मं हंस-
 लक्खणं, पट्टजुयलं णियंसावेइ, णियंसावेत्ता हारं अद्धहारं उरत्थं णेवत्थं एगावलिं
 पालंबसुत्तं पट्टमउडरयणमालाओ आविधावेइ आविधावेत्ता गंधिमवेदिमपूरिमसंधा-
 इमेणं मलेणं कप्पकखमिव समलंकरेइ २ दोब्बंपि महया वेउव्वियसमुग्धाएणं
 समोहणइ, समोहणित्ता एगं महं चंदप्पहं सिवियं सहस्सवाहिणिं विउव्वइ तंजहा—
 ईहामियउसभतुरगणरमकरविहगवाणरकुंजररुसरभचमरसद्दुलसीहवणलयपउम-
 लयभत्तिचित्तलयविचित्तविज्जाहरमिहुणजुयलजंतजोगजुत्तं, अच्चीसहस्समालिणीयं
 सुणिरूवियं मिसिमिसिंतंरुवगसहस्सकलियं, ईसिभिसमाणं भिन्निभिसमाणं चक्खुल्लो-
 यणलेसं, सुत्ताहलमुत्तजालंतरोवियंतवणीयपवरलंबूसगपलंबेतमुत्तदामं, हारद्धहार-
 भूसणसमोणयं अहियपिच्छणिज्झं पउमलयभत्तिचित्तं, असोककुंदणाणालयभत्तिचित्तं
 विरइयं सुभं चारुकंतलरुवं णाणामणिपंचवण्णघंटापडायपरिमंडियग्गसिहरं पासाईयं
 दरिसणीयं सुरुवं ॥ १०१९ ॥ सीया उवणीया जिणवरस्स जरमरणविप्पमुक्कस्स;
 ओसत्तमल्लदामा, जलथलयदिब्बकुसुमेहिं ॥ १ ॥ सिवियाइ मज्झयारे, दिव्वं
 वररयणरुवचिंचइयं; सीहासणं महरिहं सपायपीढं जिणवरस्स ॥ २ ॥ आलइय-
 मालमउडो भासुरजोदी वराभरणधारी; खोमियवत्थणियत्थो, जस्स य मोहं
 सयंसहस्सं ॥ ३ ॥ छट्टेण उ भत्तेणं अज्झवसाणेण सोहणेण जिणे, लेसाहि
 विसुज्झंतो, आरुहइ उत्तमं सीयं ॥ ४ ॥ सीहासणे णिविद्धो सक्कीसाणा य दोहिं

पासेहिं, वीयंति चामराहिं मणिरयणविचित्तदंडाहिं ॥ ५ ॥ पुंनि उक्खिञ्चत्ता
 माणुसेहिं साहद्वरोमपुल्लएहिं, पच्छा वहंति देवा, सुरअसुरगरुल्लणासिंदा ॥ ६ ॥
 पुरओ सुरा वहंती असुरा पुण दाहिणंमि पासमि । अत्ररे वहंति गरुला, णागा
 पुण उत्तरे पासे ॥ ७ ॥ वणसंडं व कुसुमियं, पउमसरो वा जहा सरयकाले; सोहइ
 कुसुमभरेणं, इय गगणयलं सुरगणेहिं ॥ ८ ॥ सिद्धत्थवणं व जहा, कणियारवणं
 व चंपयवणं वा, सोहइ कुसुमभरेणं, इय गगणयलं सुरगणेहिं ॥ ९ ॥ वरपडह-
 भेरिञ्जल्लरिसंखसयसहस्सिएहिं तुरेहिं । गयणयले धरणियले तुरणिणाओ परम-
 रम्मो ॥ १० ॥ ततवितयं षण्णसिरं आउज्जं चउच्चिहं बहुविहीयं; वायंति तत्थ
 देवा, बहुहिं आणट्टगसाएहिं ॥ ११ ॥ १०२० ॥ तेणं कालेणं तेणं समएणं जे से
 हेमंतणं पढमे मासे पढमे पक्खे, मग्गसिरञ्जहुले, दस्सणं मग्गसिरञ्जहुलस्स दसमी-
 पक्खेणं, सुव्वएणं दिवसेणं, विजएणं मुहुत्तेणं हत्थुत्तराणकत्तेणं जोगोवगएणं
 पाईणगामिणीए छायाए बिइयाए पोरिसीए ल्हेणं भत्तेणं अपाणएणं, एगसाडगमा-
 याए, चंदप्पहाए सिवियाए सहस्सवाहिणीए सदेवमणुयासुराएपरिसाए समणिज्ज-
 माणे २ उत्तरखत्तियकुंडपुरसंणिवेसस्स मज्झमज्जेणं णिगच्छइ णिगच्छित्ता जेणेव
 णायसंडे उज्जाणे तेणेव उवागच्छइ, उवागच्छित्ता ईसिरयणिप्पमाणं अच्चोप्पेणं
 भूमिभागेणं सणियं २ चंदप्पहं सिवियं सहस्सवाहिणिं ठवेइ ठवेत्ता सणियं २ चंदप्प-
 हाओ सिवियाओ सहस्सवाहिणीओ पच्चोयरइ, पच्चोयरित्ता सणियं २ पुरत्थाभिमुहे
 सीहासणे णिसीयेइ, आभरणालंकारं ओमुयइ, तओ णं वेसमणे देवे जण्णुव्वायपडिए
 समणस्स भगवओ महावीरस्स हंसलक्खणेणं पडेणं आभरणालंकारं पडिच्छइ; तओ
 णं समणे भगवं महावीरे दाहिणेणं दाहिणं वामेणं वामं पंचमुट्ठियं लोयं करेइ, तओ
 णं सक्के देविंदे देवराया समणस्स भगवओ महावीरस्स जण्णुव्वायपडिए वयरामयेणं
 थालेणं केसाइं पडिच्छइ, पडिच्छित्ता “अणुजाणेसि भंते” त्ति कट्टट्टु खारोयसायं
 साहरइ, तओ णं समणे भगवं महावीरे दाहिणेणं दाहिणं वामेणं वामं पंचमुट्ठियं
 लोयं करेत्ता सिद्धाणं णमोक्कारं करेइ करेत्ता, “सव्वं मे अकरणिब्बं पावकम्मं”
 त्ति कट्टट्टु सामाइयं चरित्तं पडिवच्चइ, सामाइयं चरित्तं पडिवच्चित्ता देवपरिसं मणुय-
 परिसं च आलिक्व चित्तभूयमिव द्दवेइ ॥१०२१॥ दिव्वो मणुस्सघोसो, तुरियणि-
 णाओ य सक्कवयणेणं, खिप्पामेव णिलुक्को, जाहे पडिवच्चइ चरित्तं ॥१॥ पडिवच्चित्तु

चरितं अहोणिसीं सव्वपाणभूयहियं; साहददु लोमपुलया, सव्वे देवा णिसामिति
 ॥१०२२॥ तओ णं समणस्स भगवओ महावीरस्स सामाइयं खओवसमियं चरितं
 पडिविण्णस्स मणपज्जवणाणे णामं णाणे समुप्पण्णे, अट्ठाइज्जेहिं दीवेहिं दोहिं य समुद्देहिं
 सण्णीणं पंचंदियाणं पज्जत्ताणं वियत्तमणसाणं मणोगयाइं भावाइं जाणेइ ॥१०२३॥
 तओ णं समणे भगवं महावीरे पव्वइए समाणे मित्तणाइसयणसंवंधिवग्गं पडिविस-
 ष्सेइ, पडिविसज्जित्ता इमं एयाखुवं अभिग्गहं अभिगिण्हइ, “चारसवासाइं वोसट्टकाए
 चत्तदेहे जे केइ उवसग्गा समुप्पज्जंति, तंजहा—दिव्वा वा, माणुस्सा वा, तेरिच्छिया
 वा, ते सव्वे उवसग्गे समुप्पण्णे समाणे सम्मं सहिस्सामि, खमिस्सामि अहिया-
 सइस्सामि” ॥१०२४॥ तओ णं समणे भगवं महावीरे इमेयाखुवं अभिग्गहं अभि-
 गिण्हित्ता वोसट्टकाए चत्तदेहे दिवसे मुहुत्तसेसे कुम्मारगामं समणुपत्ते ॥ १०२५॥
 तओ णं समणे भगवं महावीरे वोसट्टचत्तदेहे अणुत्तरेणं आलएणं, अणुत्तरेणं विहा-
 रेणं, एवं संजमेणं, पग्गहेणं, संवरेणं तवेणं, बंभचेरवासेणं, खंतीए, मोत्तीए, समि-
 ईए, गुत्तीए, तुट्ठीए, ठाणेणं, कम्पेणं, सुचरियफलणिव्वाणमुत्तिमग्गेणं, अप्पाणं भावे-
 माणे विहरइ ॥१०२६॥ एवं वा विहरमाणस्स जे केइ उवसग्गा समुपक्कंति दिव्वा
 वा माणुस्सा वा तेरिच्छिया वा ते सव्वे उवसग्गे समुप्पण्णे समाणे अणाउले अव्व-
 हिए अदीणमाणसे तिविहमणवयणकायगुत्ते सम्मं सहइ खमइ तितिकखइ अहियासेइ
 ॥ १०२७॥ तओ णं समणस्स भगवओ महावीरस्स एएणं विहारेणं विहरमाणस्स
 चारसवासा वीइकंता, तेरसभस्स वासस्स परियाए वट्टमाणस्स जे से गिम्हाणं दोवे
 मासे चउत्थे पक्खे वइसाहसुद्धे, तस्सणं वइसाहसुद्धस्स दसमीपक्खेणं सुव्वएणं
 दिवसेणं विजएणं मुहुत्तेणं हत्थुत्तराहिं णक्खत्तेणं जोगोवगाएणं पाईणगामिणीए छायाए
 वियत्ताए पोरिसीए जंभियगामस्स णगरस्स बहिया णईए उज्जुवालियाए उत्तरे
 कुले, सामागस्स गाहावइस्स कट्टकरणंसि वेथावत्तस्स चेइयस्स उत्तरपुरत्थिमे
 दिसीभाए सालरुक्खस्स अदूरसामंते उक्कुडुयस्स गोदोहियाए आयावणाए आया-
 वेमाणस्स छट्ठेणं भत्तेणं अपाणएणं उड्डंजाणुअहोसिरस्स धम्मज्जाणकोट्टोवगयस्स
 सुक्कज्जाणंतरियाए वट्टमाणस्स णिव्वाणे, कसिणे, पडिपुण्णे, अव्वाहए, णिरावरणे,
 अणंते, अणुत्तरे, केवलवरणाणदंसणे समुप्पण्णे ॥ १०२८ ॥ से भयवं अरहा
 जिणे जाए, केवली सव्वण्णू सव्वभावदरिसी, सदेवमाणुयासुरस्स लोयस्स पज्जाए

क्षाणइ, तंजहा—आगइं गइं ठिइं चयणं, उववायं भुत्ते पीयं कडं पडित्तेवियं
 आकीकम्मं र्होकम्मं लवियं कहियं मग्गेमाणसियं सच्चलोए सच्चजीवाणं, सच्च-
 भावाइं जाणमाणे पासमाणे एवं च णं विहरइ ॥ १०२९ ॥ जणं दिवसं समणस्स
 भगवओ महावीरस्स गिव्वाणे कसिणे जाव समुप्पण्णे, तणं दिवसं भवणवइवाण-
 मंतरजोइसियविमाणवासिदेवेहिं य देवीहि य उव्वयंतेहिं य जाव उप्पिजलग्गभूए
 यावि होत्था ॥ १०३० ॥ तओ णं समणे भगवं महावीरे उप्पण्णवरणाणदंसणवरं
 अप्पाणं च लोगं च अभिसमिक्ख पुब्बं देवाणं धम्ममाइक्खइ तओ पच्छा मणु-
 स्साणं ॥ १०३१ ॥ तओ णं समणे भगवं महावीरे उप्पण्णणाणदंसणधरे गोयमाइणं
 समणाणं णियंगथाणं पंचमहव्वयाइं सभावणाइं छञ्जीवणिकायाइं आइक्खइ, भासइ,
 परूवेइ, तंजहा—पुढविकाए जाव तसकाए ॥ १०३२ ॥ पट्टमं भंते ! महव्वयं
 पच्चक्खामि, सच्चं पाणाइवायं से सुहुमं वा चायरं वा तसं वा थावरं वा णेव सयं
 पाणाइवायं करेज्जा ३ जावञ्जीवाए तिविइं तिविहेणं मणसा वयसा कायसा, तस्स
 भंते ! पडिक्कमामि णिंदामि गरिहामि अप्पाणं वोसिरामि ॥ १०३३ ॥ तस्सिमाओ
 पंच भावणाओ भवंति ॥ १०३४ ॥ तत्थिमा पट्टमा भावणा, इरियासमिए से
 णिग्गंथे, णो अणइरियासमिए त्ति, केवली बूयां अणइरियासमिए से णिग्गंथे,
 पाणाइं ४ अभिहणेज्ज वा, वत्तेज्ज वा, परियावेज्ज वा, लेसेज्ज वा, उद्वेज्ज वा,
 इरियासमिए से णिग्गंथे, णो इरियाअसमिए त्ति पट्टमा भावणा ॥ १०३५ ॥
 अहावरा दोच्चा भावणा, मणं परिजाणाइ से णिग्गंथे, जे य मणे पावए सावज्जे
 सकिरिए अण्हयकरे छेयकरे भेयकरे अहिकरणिए पाउसिए, परियाविए पाणाइ-
 वाइए, भूओववाइए तहप्पगारं मणं णो पधारेज्जा, मणं परिजाणाइ से णिग्गंथे जे
 य मणे अपावए त्ति दोच्चा भावणा ॥ १०३६ ॥ अहावरा तच्चा भावणा, वडं
 परिजाणाइ से णिग्गंथे जा य वई पाविया सावज्जा सकिरिया जाव भूओववाइया
 तहप्पगारं वडं णो उच्चारिज्जा, जे वई परिजाणाइ से णिग्गंथे जा य वई अपाविय
 त्ति तच्चा भावणा ॥ १०३७ ॥ अहावरा चउत्था भावणा, आयाणभंडमत्तणिकस्खेव-
 णासमिए से णिग्गंथे, णो अणायाणभंडमत्तणिकस्खेवणासमिए णिग्गंथे केवली बूया,
 आयाणभंडमत्तणिकस्खेवणाअसमिए से णिग्गंथे पाणाइंभूयाइंजीवइं सत्ताइं अभिह-
 णेज्ज वा जाव उद्वेज्ज वा, तम्हा आयाणभंडमत्तणिकस्खेवणासमिए से णिग्गंथे णो

आयाणभंडमत्तणिक्लेवणाअसमिए त्ति चउत्था भावणा ॥१०३८॥ अहावरा
 पंचमा भावणा, आलोइयपाणभोयणभोई से णिग्गंथे, णो अणालोइयपाणभोयणभोई,
 केवली बूया, अणालोइयपाणभोयणभोई से णिग्गंथे पाणाई वा ४ अभिहणेज्ज वा
 जाव उद्वेज्ज वा, तम्हा आलोइयपाणभोयणभोई से णिग्गंथे, णो अणालोइयपाण-
 भोयणभोई त्ति पंचमा भावणा ॥ १०३९ ॥ एयावता (पढमे) महव्वए सम्मं
 काएण फासिए पालिए तीरिए किट्टिए अक्खट्टिए आणाए आराहिए यावि भवइ
 ॥ १०४० ॥ पढमे भंते ! महव्वए पाणाइवायाओ वेरमणं ॥ १०४१ ॥ अहावरं
 दोच्चं महव्वयं पच्चक्खामि सव्वं मुसावायं वइहोसं से कोहा वा, लोहा वा, भया वा,
 हासा वा, णेव सयं मुसं भासेज्जा, णेवण्णेणं मुसं भासावेज्जा, अणं पि मुसं भासंतं
 ण समणुजाणेज्जा, तिविहं तिविहेणं मणसा वयसा कायसा तस्स भंते ! पडिक्खामि
 जाव वोत्तिरामि ॥ १०४२ ॥ तस्सिमाओ पंच भावणाओ भवंति ॥ १०४३ ॥
 तत्थिमा पढमा भावणा, अणुवीइभासी से णिग्गंथे णो अणुवीइभासी; केवली बूया
 अणुवीइभासी से णिग्गंथे समावज्जिंज्ज मोसं वयणाए, अणुवीइभासी से णिग्गंथे,
 णो अणुवीइभासि त्ति पढमा भावणा ॥ १०४४ ॥ अहावरा दोच्चा भावणा, कोहं
 परिजाणाइ से णिग्गंथे, णो कोहणे सिया, केवली बूया, कोहपत्ते कोहत्तं समा-
 वएज्जा मोसं वयणाए, कोहं परिजाणाइ से णिग्गंथे, णय कोहणे सियत्ति दोच्चा
 भावणा ॥ १०४५ ॥ अहावरा तच्चा भावणा, लोभं परिजाणाइ से णिग्गंथे, णो
 य लोभणए सिया, केवली बूया; लोभपत्ते लोभी समावएज्जा मोसं वयणाए,
 लोभं परिजाणइ से णिग्गंथे, णो य लोभणए सियत्ति तच्चा भावणा ॥ १०४६ ॥
 अहावरा चउत्था भावणा, भयं परिजाणाइ से णिग्गंथे णो भयभीरुए सिया; केवली
 बूया, भयपत्ते भीरू समावएज्जा मोसं वयणाए, भयं परिजाणइ से णिग्गंथे, णो
 भयभीरुए सिय त्ति चउत्था भावणा ॥ १०४७ ॥ अहावरा पंचमा भावणा, हासं
 परिजाणइ से णिग्गंथे, णो य हासणए सिया, केवली बूया, हासपत्ते हासी समा-
 वएज्जा मोसं वयणाए, हासं परिजाणइ से णिग्गंथे, णो य हासणए सिय त्ति
 पंचमा भावणा ॥ १०४८ ॥ एयावता दोच्चे महव्वए सम्मं काएण फासिए
 जाव आणाए आराहिए या वि भवइ ! दोच्चे भंते ! महव्वए ० ॥ १०४९ ॥ अहा-
 वरं तच्चं भंते ! महव्वयं पच्चक्खामि सव्वं अदिण्णादाणं; से गामे वा, नगरं वा,

अरण्णे वा, अप्पं वा, वहुं वा, अणुं वा, धूलं वा, चित्तमंतं वा, अचित्तमंतं वा, णेव सयं अदिण्णं गिण्हेज्जा, णेवण्णेहिं अदिण्णं णेण्हावेज्जा अण्णपि अदिण्णं गिण्हेतं ण समणुज्जाणिज्जा जावज्जीवाए जाव वोसिरामि ॥ १०५० ॥ तस्मिमाओ पंच भावणाओ भवंति तत्थिमा पढमा भावणा, अणुवीइ मिउग्गहं जाई से गिग्गंथे णो अणणुवीइमिउग्गहं जाई से गिग्गंथे केवली बूया अणणुवीइमिउग्गहं जाई से गिग्गंथे अदिण्णं गिण्हेज्जा अणुवीइमिउग्गहं जाई से गिग्गंथे णो अणणुवीइमिउग्गहं जाई ति पढमा भावणा ॥ १०५१ ॥ अहावरा दोच्चा भावणा, अणुणवियपाणभोयणभोई से गिग्गंथे णो अणणुणवियपाणभोयणभोई, केवली बूया, अणणुणवियपाणभोयणभोई से गिग्गंथे, अदिण्णं भुंजेज्जा, तम्हा अणुणवियपाणभोयणभोई से गिग्गंथे णो अणणुणवियपाणभोयणभोई ति दोच्चा भावणा ॥ १०५२ ॥ अहावरा तच्चा भावणा, गिग्गंथे णं उग्गहंसि उग्गहियंसि एतावताव उग्गहणसीलए सिया, केवली बूया, गिग्गंथे णं उग्गहंसि अणुग्गहियंसि एतावताव अणुग्गहणसीले अदिण्णं उगिण्हेज्जा गिग्गंथे णं उग्गहंसि उग्गहियंसि एतावताव उग्गहणसीलए सियति तच्चा भावणा ॥ १०५३ ॥ अहावरा चउत्था भावणा, गिग्गंथे णं उग्गहंसि उग्गहियंसि अभिक्खणं २ उग्गहणसीलए सिया, केवली बूया, गिग्गंथे णं उग्गहंसि उग्गहियंसि अभिक्खणं २ अणोग्गहणसीले अदिण्णं गिण्हेज्जा गिग्गंथे उग्गहंसि उग्गहियंसि अभिक्खणं २ उग्गहणसीलए सिय ति चउत्था भावणा ॥ १०५४ ॥ अहावरा पंचमा भावणा, अणुवीइमिउग्गहजाई से गिग्गंथे साहम्मिएसु णो अणणुवीइमिउग्गहजाई, केवली बूया, अणणुवीइमिउग्गहजाई से गिग्गंथे साहम्मिएसु अदिण्णं उगिण्हेज्जा, अणुवीइमिउग्गहजाई से गिग्गंथे साहम्मिएसु णो अणणुवीइमिउग्गहजाई इइ पंचमा भावणा ॥ १०५५ ॥ एतावताव त्थे महव्वए सम्मं जाव आणाए आराहिए थावि भवइ, तच्चं भंते ! महव्वयं ॥ १०५६ ॥ अहावरं चउत्थं महव्वयं पच्चक्खामि सव्वं मेहुणं, से दिव्वं वा, माणुसं वा, तिरिक्खजोणियं वा, णेव सयं मेहुणं गच्छेज्जा तं चेव अदिण्णादाणवत्तव्वया भाणियव्वा, जाव वोसिरामि ॥ १०५७ ॥ तस्मिमाओ पंचं भावणाओ भवंति ॥ १०५८ ॥ तत्थिमा पढमा भावणा, णो गिग्गंथे अभिक्खणं २ इत्थीणं कहं कहइत्तए सिया, केवली बूया, गिग्गंथे णं अभिक्खणं २ इत्थीणं कहं कहेमाणे

संतिभेया संतिविभंगा संतिकेवलीपणत्ताओ धम्माओ भंसेज्जा, णो गिग्गथेणं अभिक्खणं २ इत्थीणं क्हं क्हित्तए सिय त्ति पट्टमा भावणा ॥ १०५९ ॥ अहावरा दोच्चा भावणा, णो गिग्गथे इत्थीणं मणोहराईं २ इंदियाईं आलोएत्तए गिज्जाइत्तए सिया, केवली बूया, गिग्गथे णं इत्थीणं मणोहराईं २ इंदियाईं आलोएमाणे गिज्जाएमाणे संतिभेया संतिविभंगा जाव धम्माओ भंसेज्जा, णो गिग्गथे इत्थीणं मणोहराईं २ इंदियाईं आलोएत्तए गिज्जाइत्तए सिय त्ति दोच्चा भावणा ॥ १०६० ॥ अहावरा तच्चा भावणा, णो गिग्गथे इत्थीणं पुव्वरयाईं पुव्वकीलियाईं सुमरित्तए सिया, केवली बूया, गिग्गथे णं इत्थीणं पुव्वरयाईं पुव्वकीलियाईं सरमाणे संतिभेया जाव भंसेज्जा, णो गिग्गथे इत्थीणं पुव्वरयाईं पुव्वकीलियाईं सरित्तए सिय त्ति तच्चा भावणा ॥ १०६१ ॥ अहावरा चउत्था भावणा, णाइमत्तपाणभोयणभोईं से गिग्गथे णो पणीयरसभोयणभोईं, केवली बूया, अइमत्तपाणभोयणभोईं से गिग्गथे पणीयरसभोयणभोईं य संतिभेया जाव भंसेज्जा, णोऽतिमत्तपाणभोयणभोईं से गिग्गथे, णो पणीयरसभोयणभोईं त्ति चउत्था भावणा, ॥ १०६२ ॥ अहावरा पंचमा भावणा, णो गिग्गथे इत्थीपसुपंडगसंसत्ताईं सयणासणाईं सेवित्तए सिया, केवली बूया, गिग्गथेणं इत्थीपसुपंडगसंसत्ताईं सयणासणाईं सेवेमाणे संतिभेया जाव भंसेज्जा, णो गिग्गथे इत्थीपसुपंडगसंसत्ताईं सयणासणाईं सेवित्तए सियत्ति पंचमा भावणा ॥ १०६३ ॥ एतावताव चउत्थे महव्वए सम्मं काएण फासिए जाव आराहिए या वि भवइ, चउत्थं भंते ! महव्वयं ० ॥ १०६४ ॥ अहावरं पंचमं भंते ! महव्वयं सव्वं परिग्गहं पच्चक्खामि, से अप्पं वा, ब्रह्मं वा, अणुं वा, शूलं वा, चित्तमंतं वा, अचित्तमंतं वा, जेव सयं परिग्गहं गिण्हेज्जा, णेवण्णेहिं परिग्गहं गिण्हाविज्जा, अण्णापि परिग्गहं गिण्हेतं ण समणुज्जाणिज्जा, जाव वोसिरामि ॥ १०६५ ॥ तस्सिमाओ पंच भावणाओ भवंति । तत्थिमा पट्टमा भावणा, सोयओणं जीवे मणुण्णामणुण्णाईं सहाईं सुणेइ, मणुण्णामणुण्णेहिं सहेहिं णां सज्जेज्जा, णो रज्जेज्जा, णो गिज्जेज्जा, णो मुज्जेज्जा, णो अज्जेववज्जेज्जा, णो विणिग्ग्यायमावज्जेज्जा, केवली बूया, गिग्गथेणं मणुण्णामणुण्णेहिं सहेहिं सज्जमाणे जाव विणिग्ग्यायमावज्जमाणे संतिभेया संतिविभंगा संतिकेवल्लिपणत्ताओ धम्माओ भंसेज्जा ॥ १०६६ ॥ ण सक्का ण सोउं सहा, सोयविसयमागया; रागदोसा उ जे

तत्थ ते भिक्खू परिवज्जए ॥ १०६७ ॥ सोयओ जीवो मणुण्णामणुण्णाइं सहाइं सुणेइ त्ति प. भा. ॥ १०६८ ॥ अहावरा दोच्चा भावणा, चक्खूओ जीवो मणुण्णामणुण्णाइं रूवाइं पासइ, मणुण्णामणुण्णेहिं रूवेहिं षो सजेज्जा, णो रजेज्जा, जाव णो विणिग्घायमावजेज्जा, केवली बूया, मणुण्णामणुण्णेहिं रूवेहिं सज्जमाणे रज्जमाणे जाव विणिग्घायमावज्जमाणे संतिभेया संतिविभंगा जाव भंसेज्जा ॥ १०६९ ॥ णो सक्का रूवमदट्ठं चक्खुविसयमागयं, रागदोसा उ जे तत्थ, ते भिक्खू परिवज्जए ॥ १०७० ॥ चक्खूओ जीवो मणुण्णामणुण्णाइं रूवाइं पासइ त्ति दो. भा. ॥ १०७१ ॥ अहावरा तच्चा भावणा, घाणओ जीवो मणुण्णामणुण्णाइं गंधाइं अग्घायइ, मणुण्णामणुण्णेहिं गंधेहिं णो सजेज्जा णो रजेज्जा, जाव णो विणिग्घायमावजेज्जा, केवली बूया, मणुण्णामणुण्णेहिं गंधेहिं सज्जमाणे रज्जमाणे जाव विणिग्घायमावज्जमाणे संतिभेया संतिविभंगा जाव भंसेज्जा ॥ १०७२ ॥ णो सक्का गंधमग्घाउं णासाविसयमागयं, रागदोसा उ जे तत्थ ते भिक्खू परिवज्जए ॥ १०७३ ॥ घाणओ जीवो मणुण्णामणुण्णाइं गंधाइं अग्घायइ त्ति त. भा. ॥ १०७४ ॥ अहावरा चउत्था भावणा, जिब्भाओ जीवो मणुण्णामणुण्णाइं रसाइं अस्साएइ, मणुण्णामणुण्णेहिं रसेहिं षो सज्जेज्जा षो रजेज्जा, जाव णो विणिग्घायमावजेज्जा, केवली बूया, णिग्गोथे णं मणुण्णामणुण्णेहिं रसेहिं सज्जमाणे जाव विणिग्घायमावज्जमाणे संतिभेया जाव भंसेज्जा ॥ १०७५ ॥ णो सक्का रसमस्साउं जीहाविसयमागयं, रागदोसा उ जे तत्थ, ते भिक्खू परिवज्जए ॥ १०७६ ॥ जीहाओ जीवो मणुण्णामणुण्णाइं रसाइं अस्साएइ त्ति च. भा. ॥ १०७७ ॥ अहावरा पंचमा भावणा, फासओ जीवो मणुण्णामणुण्णाइं फासाइं पडिसंवेएइ, मणुण्णामणुण्णेहिं फासेहिं षो रजेज्जा, णो सजेज्जा, णो गिज्जेज्जा, णो मुज्जेज्जा, षो अज्झोववजेज्जा, णो विणिग्घायमावजेज्जा, केवली बूया, णिग्गोथे णं मणुण्णामणुण्णेहिं फासेहिं सज्जमाणे जाव विणिग्घायमावज्जमाणे, संतिभेया संतिविभंगा, संतिकेवल्लिपणत्ताओ धम्मओ भंसेज्जा ॥ १०७८ ॥ णो सक्का फासमवेएउं फासविसयमागयं, रागदोसा उ जे तत्थ, ते भिक्खू परिवज्जए ॥ १०७९ ॥ फासओ जीवो मणुण्णामणुण्णाइं फासाइं पडिसंवेएइ त्ति पं. भा. ॥ १०८० ॥ एतावताव पंचमे महव्वए सय्यं काएण फासिएपाल्लिएतीरिएकिट्टिए अहिट्टिए आणाए आराहिंए थावि भवइ, पंचमं

भंते ! महव्वयं ॥ १०८१ ॥ इच्चेहिं पंचमहव्वएहिं पणवीसाहिं य भावणाहिं
संपणे अणगारे अहासुवं अहाकर्णं अहामगं समं काएण फासित्ता, पालित्ता,
तीरित्ता, किट्टित्ता, आणाए आराहित्ता यावि भवइ ॥ १०८२ ॥ पणरहमं
अज्झयणं समत्तं ॥

॥ विमुत्ती णाम सोलसमं अज्झयणं ॥

अणिव्वमावासमुवेत्ति जंतुणो, पलोयए सुच्चमिदं अणुत्तरं; विऊसिरे विण्णु अगार-
बंधणं, अभीरु आरंभपरिग्गहं चए ॥ १०८३ ॥ तहागयं भिक्खुमणंतसंजयं, अणे-
लिसं विण्णु चरंतमेसणं; दुदंति वायाहिं अभिह्वं णरा, सरेहिं संगामगयं व कुंजरं
॥ १०८४ ॥ तहप्पगारेहिं जणेहिं हीलिए, ससहफासा फरुसा उईरिया; तितिव्वए
णाणि अदुट्ठचेयसा, गिरिव्व वाएण ण संपवेयए ॥ १०८५ ॥ उवेहमाणे कुसलेहिं
संबसे, अकंतदुक्खी तसथावरा दुही; अल्लसए सव्वसहे महामुणी, तहा हि से
सुस्तमणे समाहिए ॥ १०८६ ॥ विऊ णए धम्मपयं अणुत्तरं, विणीयतणहस्स
मुणिस ज्जायओ; समाहियस्सऽरिगसिहा व तेयसा, तवो य पण्णा य जसो य वट्ठइ
॥ १०८७ ॥ दिसोदिसिंऽणंतजिणेण ताइणा, महव्वया खेमपया पवेइया; महागुरु
णिससया उईरिया, तमेव तेऊत्तिदिसं पगासया ॥ १०८८ ॥ सिएहिं भिक्खु
असिए परिव्वए, असज्जमित्थीसु चएज्ज पूयणं; अणिसिओ लोगमिणं तहा परं,
णमिज्जइ कामगुणेहिं पंडिए ॥ १०८९ ॥ तहा विमुक्कस्स परिण्णचारिणो धिईमओ
दुक्खखमस्स भिक्खुणो; विसुज्जई जंसि मलं पुरेकडं, समीरियं रूपमलं व जोइणा
॥ १०९० ॥ से हु प्परिण्णा समयंमि वट्ठइ, णिराससे उवरय मेहुणा चरे; भुयंगमे
जुणतयं जहा जहे, विमुच्चइ से दुहसेज्ज माहणे ॥ १०९१ ॥ जमाहु ओहं सलिलं
अपारयं, महासमुदं व भुयाहिं दुत्तरं; अहे य णं परिजाणाहि पंडिए, से हु मुणी
अंतकडे त्ति वुच्चइ ॥ १०९२ ॥ जहा हि बद्धं इह माणवेहिं, जहा य तेसिं तु
विमोक्ख आहिओ; अहा तहा बंधविमोक्ख जे विऊ, से हु मुणी अंतकडे त्ति
वुच्चइ ॥ १०९३ ॥ इमंमि लोए परए य दोसुवि, ण विज्जइ बंधणं जस्स किंचिवि;
से हु णिरालंबणमप्पइट्टिए, कलंकली भावपहं विमुच्चइ त्ति वेमि ॥ १०९४ ॥
सोलसमं विमुत्तिज्झयणं समत्तं ॥ सदाचार णाम बीओ
सुयक्खंधो संपुण्णो ॥

✽ इइ आयारो ✽

सूयगडो

पढमो सूयकखंधो

समयज्जयणे पढमे

बुद्धिज्जत्ति तिउट्टिज्जा बन्धणं परिजाणिया । किमाह बंधणं वीरो किं वा जाणं
तिउट्टइ ? ॥१॥ चित्तमंतमच्चित्तं वा परिगिब्धं क्रिसामवि । अण्णं वा अणुजाणाइ
एवं दुक्खा ण मुच्चई ॥२॥ सयं तिवायए पाणे अदुवाऽण्णेहि धायए । हणंतं
वाऽणुजाणाइ वेरं वड्ढेइ अप्पणो ॥३॥ जस्सि कुले समुप्पण्णे जेहिं वा संवसे णरे ।
ममाइ लुप्पई बाले अण्णे अण्णेहिं मुच्छिए ॥४॥ वित्तं सोयरिया चेव, सव्वमेयं
ण ताणइ । संखाए जीवियं चेव, कम्मुणा उ तिउट्टइ ॥५॥ एए गंथे विउक्कम्म
एगे समणमाहणा । अयाणंता विउस्सित्ता सत्ता कामेहि माणवा ॥६॥ संति पंच
महब्भूया इहमेगेसिमाहिया । पुढवी आउ तेऊ वा वाउ आगासपंचमा ॥७॥ एए
पंच महब्भूया तेब्भो एगे ति आहिया । अह तेसिं, विणासेणं विणासो होइ देहिणो
॥ ८ ॥ जहा य पुढवीयूमे एगे जाणाहि दीसइ । एवं भो ! कसिणे लोए विण्णू
जाणाहि दीसइ ॥९॥ एवमेगे ति जम्पति मंदा आरम्भणिसिया । एगे किच्चा
सयं पावं तिच्चं दुक्खं णियच्छइ ॥ १० ॥ पत्तेयं कसिणे आया जे बाला जे य
पण्डिया । संति पिच्चा ण ते संति णत्थि सत्तोववाइया ॥११॥ णत्थि फुण्णे व पावे
वा णत्थि लोए इओवरे । सरोरस्स विणासेणं विणासो होइ देहिणो ॥१२॥ कुब्बं च
करायं चेव सव्वं कुब्बं ण विज्जई । एवं अकारओ अप्पा एवं ते उ पगग्धिमा
॥१३॥ जे ते उ वाइणो एवं लोए तेसिं कओ सिया । तमाओ ते तमं जंति मंदा
आरम्भणिसिया ॥१४॥ संति पंच महब्भूया इहमेगेसि आहिया । आयल्ल्हा पुणो
आहु आया लोगे य सासए ॥१५॥ दुहओ ण विणस्संति णो य उप्पज्जए असं ।
सव्वे वि सव्वहा भावा णियत्तीभावमागया ॥१६॥ पंच खंधे वयंतेगे बाला उ
खणजोइणो । अण्णो अणणो णेवाहु हेउयं च अहेउयं ॥१७॥ पुढवी आउ तेऊ
य तहा वाऊ य एगओ । चत्तारि धाउणो रूवं एंवमाहंसु आवरे ॥१८॥ अगार-
मावसंता वि अरणा वा वि पव्वया । इमं दरिसणमावणा सव्वदुक्खा

विमुञ्चई ॥१९॥ ते णावि संधिं णच्चा णं ण ते धम्मविऊ जणा । जे ते उ वाइणो एवं ण ते ओहंतैराऽऽहिया ॥२०॥ ते णावि संधिं णच्चा णं, ण ते धम्म विऊ जणा । जे ते उ वाइणो एवं ण ते संसारपारगा ॥२१॥ ते णावि संधिं णच्चा णं, ण ते धम्मविऊ जणा । जे ते उ वाइणो एवं ण ते गम्भस्स पारगा ॥२२॥ ते णावि संधिं णच्चा णं, ण ते धम्मविऊ जणा । जे ते उ वाइणो एवं ण ते जम्मस्स पारगा ॥२३॥ ते णावि संधिं णच्चा णं, ण ते धम्मविऊ जणा । जे ते उ वाइणो एवं ण ते दुक्खस्स पारगा ॥२४॥ ते णावि संधिं णच्चा णं, ण ते धम्मविऊ जणा । जे ते उ वाइणो एवं ण ते मारस्स पारगा ॥२५॥ णाणाविहाइं दुक्खाइं अणुहोति पुणो पुणो । संसारच्चक्रवालम्मि मच्चुवाहिजराकुले ॥ २६ ॥ उच्चावयाणि गच्छंता गम्भमेस्संति णंतसो । णायपुत्ते महावीरे एवमाह जिणुत्तमे ॥ २७ ॥ त्ति बेमि ।

॥ बीओ उद्देसो ॥

आघायं पुण एगेसिं उववण्णा पुढो जिया । वेदयंति सुहं दुक्खं अदु वा लुपंति ठाणओ ॥१॥ ण.तं सयं कडं दुक्खं कओ अण्णकडं च णं । सुहं वा जइ वा दुक्खं सेहियं वा असेहियं ॥२॥ सयं कडं ण अण्णेहिं वेदयंति पुढो जिया । संगइयं तं तथा तेसिं इहमेगेसिमाहियं ॥३॥ एवमेयाणि जम्पंता बाला पण्डियमाणिणो । णिययाणिययं संते अयाणंता अबुद्धिया ॥४॥ एवमेगे उ पासत्था ते भुज्जो विप्पग्रन्धिभया । एवं उवट्टिया संता ण ते दुक्खचिमोक्खया ॥ ५ ॥ जविणो मिगा जहा संता परियाणेण वज्जिया । असंकियाइं संकंति संकियाइं असंकियो ॥६॥ परियाणिथाणि संकंता पासियाणि असंकियो । अण्णाणभयसंविग्गा संपलिति तहिं तहिं ॥७॥ अह तं पवेज्ज वज्जं अहे वज्जस्स वा वए । मुच्चेज्ज पयपासाओ तं तु मंदे ण देहई ॥ ८ ॥ अहियप्पाऽहियपण्णाणे विसमंतेणुवागए । स बद्धे पयमासेणं तत्थ घायं णियच्छइ ॥९॥ एवं तु सभणा एगे मिच्छदिट्ठी अणारिया । असंकियाइं संकंति संकियाइं असंकियो ॥१०॥ धम्मपण्णवणा जा सा तं तु संकंति मूढगा । आरम्भाइं ण संकंति अवियत्ता अकोविया ॥११॥ सव्वप्पगं विउक्कस्सं सव्वं णूमं विहूणिया । अप्पत्तियं अकम्मसे एयमट्ठं मिगे जुए ॥१२॥ जे एयं णाभिजाणंति मिच्छदिट्ठी अणारिया । मिगा वा पासवद्धा ते घायमेस्संति णंतसो ॥१३॥ माहणा सभणा एगे सव्वे णाणं सयं वए । सव्वलोगे वि जे पाण, ण ते जाणंति किंचण ॥१४॥

मिलक्खू अमिलक्खुस्स जहा वुत्ताणुभासए ण हेउं से वियाणाइ भासिये तऽणुभासए
 ॥ १५ ॥ एवमण्णाणिया णाणं वयंता वि सयं सयं । णिच्छयत्यं ण जाणति मिलक्खु ध्व
 अबोहिया ॥ १६ ॥ अण्णाणियाणं वीमंसा अण्णाणे ण णियच्छइ । अप्पणो य परं
 णालं कुतो अण्णाणुसासिउं ॥ १७ ॥ वणे मूढे जहा जंतू मूढे णेयाणुगामिए । दो
 वि एए अकोविया तिव्वं सोयं णियच्छई ॥ १८ ॥ अंधो अंधं पहं णेतो दूरमद्दाणु-
 गच्छइ । आवउजे उप्पहं जंतू अदुवा पंथाणुगामिए ॥ १९ ॥ एवमेगे णियागट्ठी
 धम्ममारहगा वयं । अदुवा अहम्ममावजे ण ते सव्वज्जुयं वए ॥ २० ॥ एवमेगे
 वियक्काहिं णो अण्णं पज्जुवासिया । अप्पणो य वियक्काहिं अयमंजू हि दुम्मई ॥ २१ ॥
 एवं तक्काइ साहेता धम्माधम्मे अकोविया । दुक्खं ते णाइउट्ठेति सउणी पंजरं
 जहा ॥ २२ ॥ सयं सयं पसंसंता गरहंता परं वयं । जे उ तत्थ विउस्संति संसारं
 ते विउस्सिया ॥ २३ ॥ अहावरं पुरक्खायं किरियावाइदरिसणं । कम्मचिंतापण-
 द्दाणं संसारस्स पवड्ढणं ॥ २४ ॥ जाणं काएणऽणाउट्ठी अबुहो जं च हिंसइ । पुट्ठो
 संवेयइ परं अवियत्तं खु सावज्जं ॥ २५ ॥ संतिमे तउ आयाणा जेहिं कीरइ पावगं ।
 अभिकम्मा य पेसा य मणसा अणुजाणिया ॥ २६ ॥ एए उ तउ आयाणा जेहिं
 कीरइ पावगं । एवं भावविसोहीए णिव्वाणमभिगच्छई ॥ २७ ॥ पुत्तं पिया समा-
 रब्भ आहारेज्ज असंजए । भुज्जमाणो य मेहावी कम्मुणा णोवलिप्पइ ॥ २८ ॥
 मणसा जे पउस्संति चित्तं तेसिं ण विज्जइ । अणवज्जमतहं तेसिं ण ते संबुडचारिणो
 ॥ २९ ॥ इच्चेयाहि य दिट्ठीहिं सायागारवणिस्सिया । सरणं ति मण्णमाणा सेवंती
 पावगं जणा ॥ ३० ॥ जहा अस्साविणिं णावं जाइअंधो दुरूहिया । इच्छई पारमा-
 गंतुं अंतरा य विसीयई ॥ ३१ ॥ एवं तु समणा एगे मिच्छदिट्ठी अणारिया ।
 संसारपारकंखी ते, संसारं अणुपरियट्ठंति ॥ ३२ ॥ त्ति बेमि ॥

॥ तइओ उट्ठेसो ॥

जं किंचि उ पूइकडं सद्धीमांगतुमीहियं । सहस्संतरियं भुंजे दुपक्खं चेव सेवइ
 ॥ १ ॥ तमेव अवियाणंता विसमंसिअकोविया । मच्छा वेसालिया चेव उदगस्सऽ-
 भियागमे ॥ २ ॥ उदगस्स पहावेणं सुक्कंसिग्यं तमेति उ । ढंकेहि य कंकेहि य
 आमिसव्वेहिं ते दुही ॥ ३ ॥ एवं तु समणा एगे वट्टमाणसुहेसिणो । मच्छा वेसा-
 लिया चेव घायमेस्संति णंतसो ॥ ४ ॥ इणमण्णं तु अण्णाणं इहमेगेसिमाहियं ।

देवउत्ते अयं लोए बम्भउत्ते इ आवरे ॥ ५ ॥ ईसरेण कडे लोए पहाणाइ तहावरे ।
जीवाजीवसमाउत्ते सुहदुक्खसमणिए ॥ ६ ॥ सयंमुणा कडे लोए इइ वुत्तं महे-
सिणा । मारेण संधुया माया तेण लोए असासए ॥ ७ ॥ माहणा समणा एगे
आह अपडकडे जए । असो तत्तमकासी य अयाणंता मुसं वए ॥ ८ ॥ सएहिं
परियाएहिं लोगं बूया कडे त्ति य । तत्तं ते ण वियाणंति ण विणासी कयाइ वि
॥ ९ ॥ अमगुण्णसमुप्पायं दुक्खमेव वियाणिया । समुप्पायमयाणंता कइ णार्यंति
संवरं ? ॥ १० ॥ मुद्धे अपावए आया इहमेगेसिमाहियं । पुणो किड्डापदोसेणं सो
तत्थ अवरज्झई ॥ ११ ॥ इह संवुडे मुणी जाए पच्छा होइ अपावए । वियडम्बु
जहा भुज्जो णीरयं सरयं तथा ॥ १२ ॥ एयाणुवीइ मेहावी बम्भचेरेण ते वसे ।
पुढो पावाउया सव्वे अक्खायारो सयं सयं ॥ १३ ॥ सए सए उवट्टाणे सिद्धिमेव
ण अण्णाहा । अहो इहेव वसवत्ती सव्वकामसमणिए ॥ १४ ॥ सिद्धा य ते अरोगा
य इहमेगेसिमाहियं । सिद्धिमेव पुरो काउं सासए गहिया णरा ॥ १५ ॥ असंबुडा
अणाईयं भमिहिंति पुणो पुणो । कप्पकालमुवज्जंति ठाणा आसुरकिब्बिसिया ॥ १६ ॥
त्ति बेमि ॥

॥ पढमं अज्झयणं चउत्थो उद्देसो ॥

एए जिया भो ! ण सरणं बाला पण्डियमाणिणो । हिच्चा णं पुव्वसंजोयं सिया
किच्चोवएसगा ॥ १ ॥ तं त्र भिक्खू परिण्णाय वियं तेसु ण मुच्छए । अणुक्खस्से
अप्पलीणे मज्जेण मुणि जावए ॥ २ ॥ सपरिग्गहा य सारम्भा इहमेगेसिमाहियं
अपरिग्गहा अणारम्भा भिक्खू ताणं परिव्वए ॥ ३ ॥ कडेसु घासमेसेज्जा विऊ
दत्तेसणं चरे । अगिद्धो विष्पमुक्खे य ओमाणं परिव्वए ॥ ४ ॥ लोगवायं
णिसामेज्जा इहमेगेसिमाहियं । विवरीयपण्णसंभूयं अण्णउत्तं तयाणुवं ॥ ५ ॥ अण्णंते
णिइए लोए सासए ण विणस्सई । अंतवं णिइए लोए इइ धीरोऽतिपासई ॥ ६ ॥
अपरिमाणं वियाणाइ इहमेगेसिमाहियं । सव्वत्थ सपरिमाणं इइ धीरोऽतिपासई
॥ ७ ॥ जे केइ तसा पाणा चिट्ठंति अदु यावरा । परियाए अत्थि से अंजू जेण
ते तत्थावरा ॥ ८ ॥ उरालं जगओ जोगं विवज्जासं पलेंति य । सव्वे अकंत्तदुक्खा
य अओ सव्वे अहिसिया ॥ ९ ॥ एयं खु णाणिणो सारं जं ण हिंसइ किंचणं ।
अहिंसासमयं चेव एवावतं वियाणिया ॥ १० ॥ बुत्तिए य विगयगेही आयाणं

सम्म रक्खए । चरियासणवेज्जासु भत्तपाणे य अंतसो ॥ ११ ॥ एएहिं तिहिं
ठाणेहिं संजए सययं मुणी । उक्कसं जलणं गूमं मज्झत्थं च विणिच्चए ॥ १२ ॥
समिए उ सया साहू पंचसंवरसंबुडे । सिएहिं असिए भिक्खू आमोक्खाए परि-
व्वएज्जासि ॥ १३ ॥ ति वेमि ।

वेयालिए णाम बीअं अज्झयणं पढमो उद्देसो

संबुज्जह किं ण बुज्जह संबोही खलु पेच्च दुल्लहा । णो हूवणमंति राइयो णो
सुलभं पुणरावि जीवियं ॥ १ ॥ डहरा बुद्धा य पासह गम्भत्या वि चयंति माणवा ।
सेणे जह वट्ठयं हरे एवं आउखयम्मि तुट्ठई ॥ २ ॥ मायाहि पियाहि लुप्पई णो
सुलहा सुगई य पेच्चओ । एयाइ भयाइ पेहिया आरम्भा विरमेज्ज सुव्वए ॥ ३ ॥
जमिणं जगई पुटो जगा कम्मोहिं लुप्पंति पाणिणो । सयमेव कडेहि गाहई णो तस्स
सुवेज्जऽपुट्टयं ॥ ४ ॥ देवा गंधवरक्खसा असुरा भूमिचरा सरीसिवा । राया
णरसेट्ठिमाहणा ठाणा ते वि चयंति दुक्खिया ॥ ५ ॥ कामेहि य संथवेहि गिद्धा
कम्मसहा कालेण जंतवो । ताले जह बंधणच्चुए एवं आउखयम्मि तुट्ठई ॥ ६ ॥
जे यावि बहुस्सुए सिया धम्मिय माहण भिक्खुए सिया । अभिणूमकडेहि मुच्छिए
तिव्वं ते कम्मोहिं किच्चई ॥ ७ ॥ अह पास विवेगमुट्ठिए अविइण्णे इह भावई
धुवं । णाहिसि आरं कओ परं वेहासे कम्मोहिं किच्चई ॥ ८ ॥ जइ वि य णणिणे
क्किसे चरे जइ वि य मुंजिय मासमंतसो । जे इह मायाइ मिज्जई आगंता गम्भाय
णंतसो ॥ ९ ॥ पुरिसोरम पावकम्मुणा पलियंतं मणुयाण जीवियं । सण्णा इह काम-
मुच्छिया मोहं जंति णरा असंबुडा ॥ १० ॥ जययं विहराहि जोगवं अनुपाथा पंथा
दुरुत्तरा । अनुसासणमेव पक्कमे वीरेहिं सम्मं पवेइयं ॥ ११ ॥ विरया वीरा समु-
ट्ठिया कोहकायरियाइपिसणा । पाणे ण इणंति सव्वसो पावाओ विरयाऽभिणिव्खुडा
॥ १२ ॥ ण वि ता अहमेव लुप्पए लुप्पंती लोगंसि पाणिणो । एवं सहिएहिं पासए
अणिहे से पुट्ठेऽहियासए ॥ १३ ॥ धुणिया कुलियं व लेववं किसए देहमणासणा-
इहिं । अविहिसामेव पव्वए अणुधम्मो मुणिणा पवेइओ ॥ १४ ॥ सउणी जह पंसु-
गुण्डिया विहुणिय धंसयई सियं रयं । एवं दविओवहाणवं कम्मं खवइ तवस्सि
माहणे ॥ १५ ॥ उट्ठियमणगारमेसणं समणं ठाणटियं तवस्सिणं । डहरा बुद्धा य
पत्थए अवि सुस्से ण य तं लभेज्ज णो ॥ १६ ॥ जइ कालुणियाणि कासिया जइ

रोयति य पुत्तकारणा । दवियं भिक्खुं समुट्ठियं णो लब्भंति ण संठवित्तए ॥ १७ ॥
जइ वि य कामेहि ल्याविया जइ णेज्जाहि ण बेधित्तं घरं । जइ जीविय णावकंखए
णो लब्भंति ण संठवित्तए ॥ १८ ॥ सेहंति य णं ममाइणो माथ सिया य सुया य
भारिया । पोसाहि ण पासओ तुमं लोग परं पि जहासि पोसणो ॥ १९ ॥ अण्णे
अण्णेहि मुत्थिया मोहं जंति णरा असंबुडा । विसमं विसमेहि गाहिया ते पावेहिं
पुणो पगब्भिया ॥ २० ॥ तम्हा दवि इक्ख पंडिए पावाओ विरएऽभिणिव्खुडे ।
पणए वीरं महाविहिं सिद्धिपहं णेयाउयं धुवं ॥ २१ ॥ वेयालियमग्गमागओ मण-
वयसा काएण गिव्खुडो । चिच्चा वित्तं च णायओ आरम्मं च सुसंबुडे चरे ॥ २२ ॥
त्ति बेमि ।

॥ बीअं अज्झयणं बीओ उद्देशो ॥

तयस व जहाइ से रयं इइ संखाय मुणी ण मज्जई । गोयण्णतरेण माहणे अह-
सेयकरी अण्णेसि इस्खिणी ॥ १ ॥ जो परिभवई परं जणं संसारे परिवत्तई महं ।
अट्टु इस्खिणिया उ पाविया इइ संखाय मुणी ण मज्जई ॥ २ ॥ जे यावि अणायगे
सिया जे वि य पेसगपेसए सिया । जे मोणपयं उवट्टिए णो लजे समयं सया चरे
॥ ३ ॥ सम अण्णयरम्मि संजमे संसुद्धे समणे परिव्वए । जे आवकहा समाहिए
दविए कालमकासि पंडिए ॥ ४ ॥ दूरं अणुपस्सिया मुणी तीर्यं धम्ममणागयं तथा ।
पुट्टे फरुसेहिं माहणे अवि द्दण्णू समयम्मि रीयइ ॥ ५ ॥ पण्णसमत्ते सया जए
समताधम्ममुदाहरे मुणी । सुट्टुमे उ सया अल्लसए णो कुञ्जे णो माणि माहणे
॥ ६ ॥ वट्टुजणमणम्मि संबुडो सव्वट्टेहिं णरे अणिस्सिए । हरए व सया अणा-
विले धम्मं पादुरकासि कासवं ॥ ७ ॥ बहवे पाणा पुट्टो सिया पत्तेयं समयं समी-
हिया । जे मोणपयं उवट्टिए विरइं तत्थ अकासि पंडिए ॥ ८ ॥ धम्मस्स य पारए
मुणी आरंभस्स य अंतए टिए । सोयंति य णं ममाइणो णो लब्भंति णियं
परिग्गहं ॥ ९ ॥ इहलोगदुहावहं विऊ परलोगे य दुहं दुहावहं । विद्धंसणधम्ममेव
तं इइ विज्जं को गारमावसे ॥ १० ॥ महयं पल्लिगोव जाणिया जा वि य वंदण-
पूयणा इहं । सुट्टुमे सल्ले दुरुद्धरे विउमंतापयहिज्जं संथवं ॥ ११ ॥ एगे चर ठाण-
मासणे सयणे एग समाहिए सिया । भिक्खू उवहाणवीरिए वइगुत्ते अज्जत्त-
संबुडो ॥ १२ ॥ णो पीहे ण यावपंगुणे दारं सुण्णवरस्स संजए । पुट्टे ण उदाहरे

वयं ण समुच्छे णो संथरे तणं ॥ १३ ॥ जत्थत्थमिण् अणाउले समविसमाई
 मूणीऽहियासए । चरगा अदु वा वि भेरवा अदु वा तत्थ सरीसिवा सियां ॥ १४ ॥
 तिरिया मणुया य दिव्वगा उवसग्गा तिविहा हियासिया । लोमादीयं ण हारिसे
 मुण्णागारगओ महामूणी ॥ १५ ॥ णो अभिकंखेज्ज जीवियं णो वि य पूयणपत्थए
 सिया । अब्भत्थमुवेति भेरवा मुण्णागारगयस्स भिक्खुणो ॥ १६ ॥ उवणीयतरस्स
 ताइणो भयमाणस्स विविक्कमासणं । सामाइयमाहु तस्स जं जो अप्पाण भए ण दंसए
 ॥ १७ ॥ उस्सिणोदगतत्तभोइणो धम्मठियस्स मुणिस्स हीमतो । संसरिग असाहु राइहिं
 असमाही उ तहागयस्स वि ॥ १८ ॥ अहिगरणकडस्स भिक्खुणो वयमाणस्स पस-
 ज्ज दारुणं । अट्टे परिहायई बहू अहिगरणं ण करेज्ज पण्डिए ॥ १९ ॥ सीओदग
 पडि दुगुंठिणो अपडिण्णस्स लवावसप्पिणो । सामाइय माह तस्स जं जो गिहि-
 मत्तेऽसणं ण भुंजई ॥ २० ॥ णय संखय माहु जीवियं तह वि य बालजणो पगम्भई ।
 बाले पावेहि मिज्जई इइ संखाय मुणी ण मज्जई ॥ २१ ॥ छंदेण पले इमा पया
 बहुमाया मोहेण पाउडा । वियडेण पलेति माहणे सीउण्हं वयसा हियासए ॥ २२ ॥
 कुजए अपराजिए जहा अक्खेहिं कुसलेहिं दीवयं । कडभेव गहाय णो कलि णो
 तीयं णो चेव दावरं ॥ २३ ॥ एवं लोगम्मि ताइणा बुइए जे धम्मो अणुत्तरं ।
 तं गिण्हं हियं ति उत्तमं कडमिव सेसऽवहाय पण्डिए ॥ २४ ॥ उत्तर मणुयाण
 अहिया गामधम्म इइ मे अणुस्सुयं । जंसी विरया समुट्टिया कासवस्स अणु-
 धम्मचारिणो ॥ २५ ॥ जे एय चरंति आहिये णाएणं महया महेसिणा । ते
 उट्टिय ते समुट्टिया अण्णोणं सारंति धम्मओ ॥ २६ ॥ मा पेह पुरा पणामए
 अभिकंखे उवहिं धुणित्तए । जे दूमण एहि णो णया ते जाणंति समाहिमाहियं
 ॥ २७ ॥ णो काहिए होज्ज संजए पासणिए ण य संपसारए । णच्चा धम्मं अणुत्तरं
 कथकिरिए ण यावि मामए ॥ २८ ॥ छण्णं च पसंस णो करे ण य उक्कोस पगास
 माहणे । तेसिं सुविवेगमाहिए पणया जेहि सुजोसियं धुयं ॥ २९ ॥ अणिहे सहिए
 सुसंबुडे भम्मट्ठी उवहाणवोरिए । विहरेज्ज समाहिईदिए अयहियं खु दुहेण लब्भइ
 ॥ ३० ॥ ण हि णूण पुरा अणुस्सुयं अदु वा तं तह णो समुट्टियं । मुणिणा सामाइ
 आहियं णाएणं जगसव्वदंसिणा ॥ ३१ ॥ एवं मत्ता महंतरं धम्ममिणं सहिया बहू
 ज्जा । सुख्खो छंदाणुवत्तगा विरया तिण्ण महोव्रमाहियं ॥ ३२ ॥ त्ति वेमि ॥

॥ बीअं अज्झयणं तइओ उद्देसो ॥

संबुद्धकम्मस्स भिक्खुणो जं दुक्खं पुढं अबोहिए । तं संजमओऽवच्चिज्जई
 मरणं हेच्च वयेति पण्डिया ॥ १ ॥ जे विण्णवणाहिऽज्जोसिया संतिण्णेहि समं विथा-
 हिया । तम्हा उद्धं ति पासहा अदक्खु कामाई रोगवं ॥ २ ॥ अग्गं वणिएहि
 आहियं धारेन्ती राईणिया इहं । एवं परमा महव्वया अक्खवाया उ सराइभोयणा
 ॥ ३ ॥ जे इह सायाणुमा णरा अज्झोववणा कामेहि मुच्चिया । किवणेण समं पग-
 ब्भिया ण वि जाणंति समाहिमाहियं ॥ ४ ॥ वाहेण जहा व विच्छए अबले होइ
 गवं पचोइए । से अंतसो अप्पथामए णाइवहे अबले विसीयइ ॥ ५ ॥ एवं कामे-
 सणं विऊ अज्ज सुए पयहेज्ज संथवं । कामी कामे ण कामए लद्धे वा वि अलद्ध
 कण्हुई ॥ ६ ॥ मा पच्छ असाहुया भवे अच्चेही अणुसास अप्पगं । अहियं च
 असाहु सोयई से थणई परिदेवई बहं ॥ ७ ॥ इह जीवियमेव पासहा तरुणे वा
 समयस्स तुट्टई । इत्तरवासे य बुज्झह गिद्ध णरा कामेसु मुच्चिया ॥ ८ ॥ जे इह
 आरम्भणिसिया आयदण्ड एगंतल्लसगा । गंता ते पावलोगयं चिररायं आसुरियं
 दिसं ॥ ९ ॥ ण य संखयमाहु जीवियं तह वि य बालजणो पगभई ॥ पच्चुप्पण्णेण
 कारियं को दट्ठुं परलोगमाणए ॥ १० ॥ अदक्खुव दक्खुवाहियं (तं) सहसु
 अदक्खुदंसणा । हंदि ह्नु सुणिरुद्धदंसणे मोहणिएण कडेण कम्मणा ॥ ११ ॥ दुक्खी
 मोहे पुणो पुणो णिविद्वेज्ज सिलोगपूयणं । एवं सहिएऽहिपासए आयतुलं पाणेहि
 संजए ॥ १२ ॥ गारं पि य आवसे णरे अणुपुव्वं पाणेहि संजए । समया सव्वत्थ
 सुव्वए देवाणं गच्छे सलोगयं ॥ १३ ॥ सोच्चा भगवाणुसासणं सच्चे तत्थ करेज्जु-
 वक्कमं । सव्वत्थ विणीयमच्छरे उंछं भिक्खु विसुद्धमाहरे ॥ १४ ॥ सव्वं णच्चा
 अहिट्टए धम्मट्ठी उवहाणवीरिए । गुत्ते जुत्ते सया जए आयपरे परमावतट्टिए
 ॥ १५ ॥ वित्तं पसवो य णाइओ तं बाले सरणं ति मण्णई । एए मम तेसु वी अहं णो
 ताणं सरणं ण विज्जई ॥ १६ ॥ अब्भागमियम्मि वा दुहे अहवा उक्कमिए भवंतिए
 एगस्स गई य आगई विदुर्मता सरणं ण मण्णई ॥ १७ ॥ सव्वे सयकम्मकप्पिया
 अवियत्तेण दुहेण पाणिणो । हिण्डंति भयाउला सदा जाइजरा मरणेहिऽभिद्दुया
 ॥ १८ ॥ इणमेव खणं वियाणिया णो सुलभं बोहिं च आहियं । एवं सहिएऽहिपासए
 आह जिणे इणमेव सेसगा ॥ १९ ॥ अभविंसु पुरा वि भिक्खुवो आएसा वि

भवन्ति सुव्वया । एयाइं गुणाइं आहु ते कासवस्स अणुधम्मचारिणो ॥ २० ॥
 तिविहेण वि पाण मा हणे आयहिण्ण अणियाण संबुडे । एवं सिद्धा अणंतसो सपइ
 जे य अणागयावरे ॥ २१ ॥ एवं से उदाहु अणुत्तरणाणी अणुत्तरइंसी अणुत्तर-
 णाणइंसणधरे । अरहा णायपुत्ते भगवं वेसालिण्ण वियाहिण्ण ॥ २२ ॥ त्ति बेमि ॥

उवसग्गपरिष्णा णाम तइयं अज्झयणं पढमो उद्देसो

सूरं मण्णइ अप्पाणं जाव जेयं ण पत्सई । जुज्झंतं दढभग्गमाणं सिमुपालो
 व महारहं ॥ १ ॥ पयाया सूरं रणसीसे संगामम्मि उवट्टिण्ण । मावा पुनं
 ण जाणाइ जेएण परिविच्छण्ण ॥ २ ॥ एवं सेहे वि अप्पुट्टे भिक्खवायरियाअको-
 विण्ण । सूरं मण्णइ अप्पाणं जाव ल्हं ण सेवण्ण ॥ ३ ॥ जया हेमंतमासम्मि सीयं
 फुसइ सव्वगं । तत्थ मंदा विसीयंति रज्जहीणा व खत्तिया ॥ ४ ॥ पुट्टे भिम्हाहिता-
 वेणं विमणे सुपिवासिण्ण । तत्थ मंदा विसीयंति मच्छा अप्पोदण्ण जहा ॥ ५ ॥ सया
 दत्तेसणा दुक्खवा जायणा दुप्पणोल्लिया । कम्मत्ता दुब्भगा चेव इचाहंसु पुट्ठोज्जा
 ॥ ६ ॥ एए सदे अचायंता गामेसु णगरेसु वा । तत्थ मंदा विसीयंति संगामम्मि
 व भीरुया ॥ ७ ॥ अप्पेगे खुहियं भिक्खुं सुणी इंसइ लूसण्ण । तत्थ मंदा विसीयंति
 तेउपुट्टा व पाणिणो ॥ ८ ॥ अप्पेगे पडिभासंति पडिपंथियमागया । पडियारगया
 एए जे एए एवजीविणो ॥ ९ ॥ अप्पेगे वइ जुंजंति णगिणा पिण्डोलगाहमा ।
 मुण्डा कण्डूविणट्ठंगा उज्जहा असमाहिया ॥ १० ॥ एवं विप्पडिवण्णेगे अप्पणा
 उ अजाणया । तमाओ ते तमं जंति मंदा मोहेण पाउडा ॥ ११ ॥ पुट्टे य दंस-
 मसगेहिं तणफासमचाइया । ण मे दिट्ठे परे लोए जइ परं मरणं सिया ॥ १२ ॥
 संतत्ता केसलोएणं बग्गचेरपराइया । तत्थ मंदा विसीयंति मच्छा विट्ठा व केयणे
 ॥ १३ ॥ आवदण्डसमायारे मिच्छासंठियभावणा । हरिसप्पओसमावण्णा केई
 लूसंतिऽणारिया ॥ १४ ॥ अप्पेगे पल्लियंतेसिं चारो चोरो त्ति सुव्वथं । बंधंति
 भिक्खुर्यं चाला कसायवयणेहि य ॥ १५ ॥ तत्थ दण्णेण संवीए मुट्ठिणा अदु फलेण
 वा । णाईणं सरई चाले इत्थी वा कुद्धगामिणी ॥ १६ ॥ एए भो कसिणा फासा
 फरुसा दुरहियासया । हत्थी वा सरसंवित्ता कीवावस गया गिहं ॥ १७ ॥ त्ति बेमि ।

॥ तइयं अज्झयणं बीओ उद्देसो ॥ -

अहिमे सुट्टमा संगं भिक्खूणं जे दुरुत्तरा । जत्थ एगे विसीयंति ण चयंति

जवित्तए ॥ १ ॥ अप्पेगे णायओ दिस्स रोयंति परिवारिया । पोस णे ताय पुट्ठो
 ति कस्स ताय जहासि णे ॥ २ ॥ पिया ते थेरओ ताय ससा ते खुड्डिया इमा ।
 भयरो ते सगा ताय सोयरा किं जहासि णे ? ॥ ३ ॥ मायरं पियरं पोस एवं लोमो
 भविस्सइ । एवं खु लोइयं ताय जे पालेंति य मायरं ॥ ४ ॥ उत्तरा महुरुळावा
 पुत्ता ते ताय खुड्डिया । भारिया ते णवा ताय मा सा अण्णं जणं गमे ॥ ५ ॥
 एहि ताय घरं जामो मा य कम्म सहा वयं । विइयं पि ताय पासामो जामु ताव
 सयं गिहं ॥ ६ ॥ गंतुं ताय पुणो गच्छे ण तेणासमणो सिया । अकामगं परिकम्मं
 को ते वारिउमरिहइ ॥ ७ ॥ जं किंचि अणगं ताय तं पि सव्वं समीकयं । हिरण्णं
 ववहाराइ तं पि दाहामु ते वयं ॥ ८ ॥ इत्थेव णं सुमेहंति कालुणीयसमुट्टिया ।
 विन्नद्धो णाइसंगेहिं तओऽगारं पहावइ ॥ ९ ॥ जहा रुक्खं वणे जायं मालुया
 पडिबंघइ । एवं णं पडिबंघंति णायओ असमांहिणा ॥ १० ॥ विन्नद्धो णाइसंगेहिं
 हत्थी वा वि णवग्गहे । पिट्ठओ परिसप्यंति सुय गो व्व अदूरए ॥ ११ ॥ एए
 संग्गा मणूसानं पायाला व अतारिमा । क्रीवां जत्थ य किस्संति णाइसंगेहिं मुच्छिया
 ॥ १२ ॥ तं च भिक्खू परिणाय सव्वे संग्गा महासवा । जीवियं णावकंखिज्जा सोचा
 धम्ममणुत्तरं ॥ १३ ॥ अहिमे संति आवट्ठा कासवेणं पवेइया । बुद्धा जत्थावसप्यंति
 सीयंति अबुहा जहिं ॥ १४ ॥ रायणो रायऽमब्बा य माहणा अदुव खत्तिया ।
 णिमंतयंति भोगेहिं भिक्खुयं साहुजीविणं ॥ १५ ॥ हत्थस्सरहजाणेहिं विहारगमणेहि
 य । भुंज भोगे इमे संग्गे महरिसी पूजयामु तं ॥ १६ ॥ वत्थगंधमलंकारं इत्थीओ
 सयणाणि य । भुंजाहिमाइं भोगाइं आउसो ! पूजयामु तं ॥ १७ ॥ जो तुमे णियमो
 चिण्णो भिक्खु भावम्मि सुव्वया ! अगारमावसंतस्स सव्वो संविज्जए तहा ॥ १८ ॥
 विरं दूइज्जमाणस्स दोसो दाणिं कुओ तव ? इत्थेव णं णिमंतंति णीत्रारेण व सूयरं
 ॥ १९ ॥ चोइया भिक्खचरियाए अचयंता जवित्तए । तत्थ मंदा विसीयंति उज्जा-
 णंसि व दुव्वला ॥ २० ॥ अचयंता व लूहेणं उवहाणेण तज्जिया । तत्थ मंदा
 विसीयंति उज्जाणंसि जरग्गवा ॥ २१ ॥ एवं णिमंतणं लद्धुं मुच्छिया गिद्ध इत्थिसु ।
 अज्जोववण्णा कामेहिं चोइज्जंता गया गिहं ॥ २२ ॥ ति वेमि ॥

॥ तइयं अज्जयणं तइओ उद्देसो ॥

जहा संगामकालम्मि पिट्ठओ भीरु वेहइ । वलयं गहणं णूमं को जाणइ परा-

अर्थ ॥ १ ॥ मुहुत्ताणं मुहुत्तस्स मुहुत्तो होइ तारिस्सो पराजियाऽवसप्पामो इइ मीरु उवेहई ॥ २ ॥ एवं उ समणा एगे अवलं णच्चाण अप्पगं । अणागयं भयं दिस्स अवक्कपंतिमं सुयं ॥ ३ ॥ को जाणइ विऊत्तायं इत्थीओ उदगाउ वा । चोइज्जंता पवक्खामो ण णो अत्थि पक्खियं ॥ ४ ॥ इत्थेव पडिलेहंति वलया पडिलेहिणो । विति-
 गिच्छसमावण्णा पंथाण च अक्कोविया ॥ ५ ॥ जे उ संगामकालम्मि णायऽसूरपुरंगमा । णो ते पिट्टमुवेहिंति किं परं मरणं सिया ? ॥ ६ ॥ एवं समुट्टिए भिक्खू बोसिज्जा-
 गारव्रंणं । आरम्भं तिरियं कट्टु अत्तत्ताए परिव्वए ॥ ७ ॥ तमेगे परिभासंति भिक्खुयं साहुजीविणं । जे एवं परिभासंति अंतए ते समाहिए ॥ ८ ॥ संबद्धसम-
 कप्पा उ अण्णमण्णेषु मुच्छिया । पिण्डवायं गित्ताणस्स जं सारेह दलाह य ॥ ९ ॥ एवं तुब्भे सरागत्था अण्णमण्णमणुव्वसा । णट्टसप्पहसब्बावा संसारस्स अपारगा ॥ १० ॥ अह ते परिभासेज्जा भिक्खु मोक्खविसारए । एवं तुब्भे पभासंता दुपक्खं
 चेव सेवह ॥ ११ ॥ तुब्भे भुंजह पाएसु गिलाणो अभिह्वम्मि य । तं च बीओदगं भोच्चा त्तमुहिस्सादि जं कडं ॥ १२ ॥ लिच्चा तिक्खाभितावेणं उज्झिया असमाहिया ।
 णाइकण्डूइयं सेयं अरुयस्सावरज्जाई ॥ १३ ॥ तत्तेण अणुसिद्धा ते अपडिण्णेण जाणया । ण एस णियए मग्गे असमिक्खा वई किई ॥ १४ ॥ एरिसा जा वई एसा अग्ग-
 वेणु व्व करिसिया । गिहिणो अभिह्वडं सेयं भुंजिउं ण उ भिक्खुणं ॥ १५ ॥ धम्म-
 पण्णवणा जा सा सारम्भा ण विसोहिया । ण उ एयाहि दिट्ठीहिं पुव्वमासिं पगपियं ॥ १६ ॥ सव्वाहिं अणुजुत्तीहिं अचयंता जवित्तए । तओ वायं णिराक्खिच्चा ते भुज्जो
 वि पगग्गिभया ॥ १७ ॥ रागदेहाभिभूयप्पा मिच्छत्तेण अभिदुया । आउसे सरणं जंति टंक्का इव पव्वयं ॥ १८ ॥ बहुगुणप्पगप्पाई कुज्जा अत्तसमाहिए । जेणणे
 ण विरुज्जेज्जा तेण तं तं समायरे ॥ १९ ॥ इमं च धम्ममायाय कासवेण पवेइयं । कुज्जा भिक्खू गिलाणस्स अगिलाए समाहिए ॥ २० ॥ संखाय पेसलं धम्मं दिट्ठिमं परिणिव्वुडे । उवसग्गे णियामित्ता आमोक्खाए परिव्वएज्जासि ॥ २१ ॥ त्ति बेमि ॥

॥ तइयं अज्झयणं चउत्थो उहेसो ॥

आहंसु महापुरिसा पुत्वि तत्तवोधणा । उदएण सिद्धिमावण्णा तत्थ मंदो
 विसीयइ ॥ १ ॥ अमुंजिया णमी विदेही रामगुत्ते य भुंजिया । बाहुए उदगं भोच्चा

तहा णारायणे रिसी ॥ २ ॥ आसिले देविले चैव दीवायण महारिसी । पारासरे दगं भोच्चा बीयाणि हरियाणि य ॥ ३ ॥ एए पुध्वं महापुरिसा आहिया इह संमया । भोच्चा बीयोदगं सिद्धा इइ मेयमणुसुयं ॥ ४ ॥ तत्थ मंदा विसीयंति वीहच्छिण्णा व गद्भा । पिट्ठओ परिसपंति पिट्ठसप्पी य संभमे ॥ ५ ॥ इहमेगे उ भासंति सायं साएण विज्जई ! जे तत्थ आरियं मग्गं परमं च समाहियं ॥ ६ ॥ मा एयं अवमण्णता अप्पेणं लुम्पहा बहुं । एयस्स उ अमोक्खाए अयोहारि व्थ जूरह ॥ ७ ॥ पाणाइवाए वट्टंता मुसावाए असंजया । अदिण्णादाणे वट्टंता मेहुणे य परिग्गहे ॥ ८ ॥ एवमेगे उ पासत्था पण्णवंति अणारिया । इत्थीवसं गया बाला जिणमांसणपरंमुहा ॥ ९ ॥ जहा गण्डं पिलागं वा परिपीलेज्ज मुहुत्तगं । एवं विण्णवणित्थीसु दोसो तत्थ कओ सिया ? ॥ १० ॥ जहा मंधादणे णाम थिमियं भुंजई दगं । एवं विण्णवणित्थीसु दोसो तत्थ कओ सिया ? ॥ ११ ॥ जहा विहंगमा पिंगा थिमियं भुंजई दगं । एवं विण्णवणित्थीसु दोसो तत्थ कओ सिया ? ॥ १२ ॥ एवमेगे उ पासत्था मिच्छदिट्ठी अणारिया । अज्जोववण्णा कामेहिं पूयणा इव तरुणए ॥ १३ ॥ अणागयम रस्संता पच्चुप्पण्णगवेसगा । ते पच्छा परितपंति स्त्रीणे आउम्मि जोव्वणे ॥ १४ ॥ जेहिं काले परिकंतं ण पच्छा परितपगए । ते धीरा बंधणुम्मुक्का णावकंखंति जीवियं ॥ १५ ॥ जहा णई वेयरणी दुत्तरा इह संमया । एवं लोगंसि णारीओ दुत्तरा अमईमया ॥ १६ ॥ जेहिं णारीण संजोगा पूयणापिट्ठओ कया । सब्बमेयं णिराकिच्चा ते रटिया सुसमाहिए ॥ १७ ॥ एए ओयं तरिसंति समुहं ववहारिणो । जत्थ पाणा तिसण्णासि किच्चंती सयकम्मणा ॥ १८ ॥ तं च भिक्खु परिण्णाय सुव्वए समिए चरे । मुसावायं च वज्जिज्जा अदिण्णादाणं च वोसिरे ॥ १९ ॥ उट्ठमहे तिरियं वा जे केई तसथावरा । सब्बत्थ विरई कुज्जा संति णिव्वाणमाहियं ॥ २० ॥ इमं च धम्ममायाय कासवेण पवेइयं । कुज्जा भिक्खु गिलाणस्स अगिलाए समाहिए । २१ ॥ संखाथ पेसलं धम्मं दिट्ठिमं परिणिव्खुडे । उवसग्गे णियामित्ता आमोक्खाए परिव्वएज्जासि ॥ २२ ॥ त्ति वेमि ॥

॥ इत्थिपरिण्णा णाम चउत्थं अज्जयणं पढमो उट्ठेसो ॥

जे मायरं च पियरं च विप्पजहाय पुव्वसंजोगं । एगे सहिए चरिस्सामि आरयमेहुणो विवित्तेसु ॥ १ ॥ सुहुमेणं तं परिकम्म छण्णपएण इत्थिओ मंदा ।

उत्थायं पि ताउ जाणंसु जहा लिस्सति भिक्खुणो एगे ॥ २ ॥ पासे भिसं गिसी-
यंति अभिक्खणं पोसवत्थं परिहिति । कार्यं अहे वि दंसति बाहू उद्धट्टु कक्ख-
मणुव्वजे ॥ ३ ॥ सयणासणेहिं जोगेहिं इत्थिओ एगया गिमंतंति । एयाणि चेव
से जाणे पासाणि विरूवरूवाणि ॥ ४ ॥ णो तासु चक्खु सधेज्जा णो वि य साहसं
समभिजाणे । णो सहियं पि विहरेज्जा एवमप्पा सुरक्खिओ होइ ॥ ५ ॥ आमंतिय
उस्सविंया भिक्खुं आयसा गिमंतंति । एयाणि चेव से जाणे सदाणि विरूवरूवाणि
॥ ६ ॥ मणवंधणेहिं णेगेहिं कलुणविणीयमुवगमित्ताणं । अदु मंजुलाई भासंति
आणवयंति भिण्णकहाहिं ॥ ७ ॥ सीहं, जहा व कुण्णिमेणं णिब्भयमेगचरं - ति
पासेणं । एवित्थियाउ वंधंति संवुडं एगइयमणगरं ॥ ८ ॥ अह तत्थ पुणो
णमयंति रहकारो व णेमि आणुपुव्वीए । वद्धे मिएव पासेणं फंदंते वि ण
मुच्चए ताहे ॥ ९ ॥ अह सेऽणुत्तप्पई पच्छा भोच्चा पायसं व विसमिस्सं । एवं
विवेगमायाय संवासे ण वि कप्पए दविए ॥ १० ॥ तम्हा उ वज्जए इत्थी विसलित्तं व
कण्ठगं णच्चा । ओए कुलाणि वसवत्ती आप्राए ण से वि णिग्गंथे ॥ ११ ॥ जे एयं उंछे
अणुगिद्धा अण्णयरा होंति कुसीलाणं । सुतवस्सिए वि से भिक्खुणो विहरे सह णमि-
त्थीसु ॥ १२ ॥ अवि धूरयाहि सुण्हाहिं धाईहिं अदुव दासीहिं । महइहि वा कुमारीहिं
संथवं से ण कुब्जा अण्णारे ॥ १३ ॥ अदु णाइणं च सुहीणं वा अप्पियं दट्टु एगया होइ ।
गिद्धा सत्ता कामेहिं रक्खणपोसणे मणुस्सोऽसि ॥ १४ ॥ समणं पि दट्टुदासीणं तत्थ वि
ताव एगे कुप्पंति । अदु वा भोयणेहि णत्थेहिं इत्थीदीसं संकिणो होंति ॥ १५ ॥
कुव्वंति संथवं ताहिं पब्भट्ठा समाहिजोगेहिं । तम्हा समणा ण समंति आयहियाए
संणिसेज्जाओ ॥ १६ ॥ बहवे गिहाइं अवहट्टु मिस्सीभावं पत्थुया य एगे । धुवमग्ग-
मेव पवयंति वायावीरियं कुसीलाणं ॥ १७ ॥ सुद्धं रवइ परिसाए अह रहस्स-
म्मि दुक्कडं करेंति । जाणंति य णं तहाविऊ माइल्ले महासडेऽयं ति ॥ १८ ॥
सयं दुक्कडं च ण वयइ आइट्ठे वि पक्कथइ बाले । वेयणुवीइ मा कासी चोइ-
ज्जतो गिलाइ से भुज्जो ॥ १९ ॥ ओसिया वि इत्थिपोसेसु पुरिसा इत्थिवेयखेयणा ।
पण्णास मण्णिया वेगे णारीणं वसं उवक्कसंति ॥ २० ॥ अवि हत्थपायछेयाए अदु
वा वद्धमंसउक्कंते । अयि तेयसाभितावणाणि तच्छिय खारसिच्चणाइं य ॥ २१ ॥ अदु
कण्णवासच्छेयं कण्ठच्छेयणं तिइक्खंती । इइ एत्थ पावसंतत्ता ण वेंति पुणो ण

काहिंति ॥ २२ ॥ सुयमेयमेवमेगेसि इत्थीवेष त्ति हु सुयक्खायं । एयं पि ता
वइत्ताणं अदुं वा कम्मणा अवकरोति ॥ २३ ॥ अण्णं मणेण चित्तेति वाया अण्णं
च कम्मणा अण्णं । तम्हा ण सद्दे भिक्खू बहुमायाओ इत्थिओ णच्चा ॥ २४ ॥
जुवई समणं बूया विचित्तलंकारवत्थगाणि परिहित्ता । विरया चरिस्सहं रुक्खं
धम्ममाइक्ख णे भयंतारो ॥ २५ ॥ अदु सावियापवाएणं अहमंसि साहम्मिणी य
समणाणं । जउकुम्मे जहा उवज्जोई संवासे विऊ विसीएज्जा ॥ २६ ॥ जउकुम्मे
जोइउधगूढे आसुमित्ते णासमुवयाइ । एवित्थियाहिं अणगारा संवासेण णासमुव-
येति ॥ २७ ॥ कुब्बंति पावगं कम्मं पुट्ठा वेगेवमाहिंसु । णोऽहं करेमि पायं ति
अंकेसाइणी ममेस त्ति ॥ २८ ॥ बालस्स मंदयं वीयं जं च कडं अवजाणई
भुज्जो । दुग्गुणं करेइ से पावं पूयणकामो विसण्णेसी ॥ २९ ॥ संलोकणिज्जमणगारं
आयगयं णिमंतणेणाहंसु । वत्थं च ताइ पायं वा अण्णं पाणमं पडिग्गाहे ॥ ३० ॥
णीवारमेवं बुज्जेज्जा णो इच्छे अंगारमागंतुं । बद्धे विसययासेहिं मोहभावज्जइ पुणो
मंदे ॥ ३१ ॥ त्ति बेमि ॥

॥ चउत्थं अज्जयणं बीओ उद्देसो ॥

ओए सया ण रज्जेज्जा भोगकामी पुणो विरजेज्जा । भोगे समणाणं सुणेह जह
भुंजंति भिक्खुणो एरो ॥ १ ॥ अह तं तु भेयमावण्णं मुच्छियं भिक्खुं काममइवट्टं ।
पलिभिंदिया णं तो पच्छा पादुद्धट्टु मुद्धि पहणंति ॥ २ ॥ जइ केसिया णं मए
भिक्खू णो विहरे सह णमित्थीए । केसाणविहं लुंचिस्सं णणत्थ मए चरेज्जासि
॥ ३ ॥ अह णं से होइ उवज्जो तो पेस्सति तहाभूएहिं । अलाउच्छेयं पेहेहि वग्गु-
फलाइं आहराहि त्ति ॥ ४ ॥ दारुणि सागपागाए पज्जोओ वा भविस्सई राओ ।
पायाणि य मे रयावेहि एहि ता मे पिट्ठओमदे ॥ ५ ॥ वत्थाणि य मे पडिलेहेहि
अण्णं पाणं च आहराहि त्ति । गंधं च रओहरणं च कासवगं च मे समणुजाणाहि
॥ ६ ॥ अदु अंजणि अलंकारं कुक्कययं मे पयच्छाहि । लोद्धं च लोद्धकुसुमं च
वेणुपलासियं च गुल्लियं च ॥ ७ ॥ कुट्ठं तगरं च अगरं संपिट्ठं समं उसिरेणं ।
तेल्लं मुहभिंजाए वेणुफलाइं सण्णिहाणाए ॥ ८ ॥ णंदीचुण्णगाइं पाहराहि छत्तोवाणहं
च जाणाहि । संत्थं च सूवच्छेज्जाए आणीलं च वत्थयं रयावेहि ॥ ९ ॥ सुफणिं
च सागपागाए आमल्लाईं दगाहरणं च । तिलगकरणिमंजणसलागं धिसु मे विहु-

पयं विजाणेहि ॥ १० ॥ संडासगं च फणिहं च सीहलियासगं च आणाहि । आर्य-
सगं च पयच्छाहि देतपक्खालणं पवेसाहि ॥ ११ ॥ पूयफले तंभोळयं सूई सुत्तगं च
जाणाहि । कोसं च मोयमेहाए सुप्पुक्खलणं च खारगालणं च ॥ १२ ॥ चंदालगं
च करगं च वच्चरं च आउसो ! खणाहि । सरपाययं च जायाए गोरहगं च
सामणेराए ॥ १३ ॥ प्रडियं च सडिण्डिमयं च चेलगोलं कुमारभूयाए । वासं
समभ्रिआवण्णं आवसहं च जाण भत्तं च ॥ १४ ॥ आसंदियं च णवसुत्तं पाउल्लहं
संकमट्ठाए । अट्टु पुत्तदोहलट्ठाए आणप्पा हवंति दासा वा ॥ १५ ॥ जाए फले
समुप्पण्णे गेण्हसु वा णं अहवा जहाहि । अह पुत्तपोसिणो एगे भारवहा हवंति
उट्टा वा ॥ १६ ॥ राओ वि उट्टिया संता दारगं च संठवंति धाई वा । सुहिरामणा
वि ते संता वत्थभोवा हवंति हंसा वा ॥ १७ ॥ एवं वहुहिं कयपुवं भोगत्थाए
जेऽभियावण्णा । दासे मिए व पेसे वा पसुभूए व से ण वा केई ॥ १८ ॥ एवं
खु तासु विण्णप्यं संथवं संवासं च वज्जेज्जा । तज्जातिया इमे कामा वज्जकरा य
एवमक्खाए ॥ १९ ॥ एयं भयं ण सेयाए इइ से अप्पगं णिरुमिन्ता । णो इत्थि
णो पसुं भिक्खू णो सयं पाणिणा णिल्लिज्जेज्जा ॥ २० ॥ सुविसुद्धलेसे मेहावी पर-
किरियं च वज्जाए णाणी । मणसा वयसा काएणं सव्वपाससहे अणमारि ॥ २१ ॥
इचेवमाहु से वीरे धुरए धुयमोहे से भिक्खू । तम्हा अज्जत्थविसुद्धे सुविसुद्धे
आमोन्खाए परिव्वएज्जासि ॥ २२ ॥ त्ति वेमि ॥

॥ णरयविभत्ती णाम पंचमं अज्जयणं पढमो उट्ठेसो ॥

पुच्छिसहं केवलियं महेसिं कहं भितावा णरगा पुरत्था ? । अजाणओ मे मुणि
बूहि जाणं कहिं णु बाला णरयं उवेति ॥ १ ॥ एवं मए पुट्ठे महाणुभावे इणमोऽव्ववी
कासवे आसुपण्णे । पवेयइस्सं दुहमट्टुग्गं आईणियं दुक्कडिणं पुरत्था ॥ २ ॥ जे
केइ बाला इह जीवियट्ठी पावाइं कम्मइं करेति रुहा । ते घोररूवे तमिसंभयारे
तिव्वाभितावे णरए पडेति ॥ ३ ॥ तिव्वं तसे पाणिणो थावरे य जे हिंसई आयसुई
पडुच्चा । जे लूसए होइ अदत्तहारी ण सिक्खई सेयवियस्स किंचि ॥ ४ ॥ पागन्निभ
पाणे बह्णुणं तिवाइ अणिव्वुए घायमुवेइ बाले । गिहो णिसं गच्छइ अंतकाले अहो-
सिरं कट्टु उवेइ दुग्गं ॥ ५ ॥ हण छिदह भिंदह णं दहेइ सहे सुणेता परहम्मि-
याणं । ते णारगाओ भयभिण्णसण्णा कंखंति कं णाम दिसं वयामो ॥ ६ ॥ इंगाल-

रासिं जलियं सजोईं तत्त्वमे भूमिगणुक्कमेता । ते डङ्गमाणा कलुणं थणति अरह-
 ससरा तत्थ चिरंदिईया ॥ ७ ॥ जह ते सुया वेयरणी भिदुग्गा णिसिओ जहा खुर
 इव तिक्खसोया । तरंति ते वेयरणी भिदुग्गं उमुचोइया सत्तिमु हम्ममाणा ॥ ८ ॥
 कीलेहि विञ्जंति असाहुकम्मा णावं उवेते सइविप्पहूणा । अण्णे उ सूलहि तिसूलि-
 याहिं दीहाहि विदूण अहे करेति ॥ ९ ॥ केसिं च बंधित्तु गले सिलाओ उदगंसि
 बोलेति महालयंसि । कलंबुयावाबल्लयमुम्पुरे य लोलंति पच्चंति य तत्थ अण्णे ॥ १० ॥
 असूरियं णाम महाभितावं अंधंतमं दुप्पतरं महंतं । उद्धं अहे यं तिरियं दिसासु
 समाहिओ जत्थगणी सियाइ ॥ ११ ॥ जंसी गुहाए जलणेऽतिउट्टे अविजाणओ
 डङ्गइ लुत्तपण्णो । सया य कलुणं पुण घम्मठाणं गाढोवणीयं अइदुक्खधम्मं ॥ १२ ॥
 चत्तारि अगणीओ समारभेत्ता जहिं कूरकम्माऽभितवेति बालं । ते तत्थ चिट्ठंतऽ-
 भितप्पमाणा मच्छा व जीवंतु व जोइपत्ता ॥ १३ ॥ संतच्छणं णाम महाभितावं
 ते णारया जत्थ असाहुकम्मा । हत्थेहि पाएहि य बंधिऊणं फलगं व तच्छंति
 कुहाडहत्था ॥ १४ ॥ रुहारे पुणो वच्चसमुत्तियंणे भिण्णुत्तमंणे परिवत्तयंता । परंति
 णं णेरइए फुरंते सजीवमच्छे व अयोक्कच्छे ॥ १५ ॥ णो चेव ते तत्थ मसीभवन्ति
 ण भिञ्जई तिक्खभिवेयणाए । तमाणुभागं अणुवेययंता दुक्खंति दुक्खी इह दुक्क-
 डेणं ॥ १६ ॥ तहिं च ते लोलणसंपगाढे गाढं सुतत्तं अगणिं वयंति । ण तत्थ सायं
 लहईं भिदुग्गे अरहियाभितावा तह वी तवेति ॥ १७ ॥ से सुच्चई णगरवहे व सहे
 दुहोवणीयाणि पयाणि तत्थ । उदिण्णकम्माण उदिण्णकम्मा पुणो पुणो ते सरहं
 दुहेति ॥ १८ ॥ पाणेहि णं पाव वियोज्जयंति तं मे पवक्खामि जहातहेणं । दण्डेहि
 तत्था सरयंति बाला सव्वेहि दण्डेहि पुराकएहिं ॥ १९ ॥ ते हम्ममाणा णरगे
 पडंति पुण्णे दुरूवस्स महाभितावे । ते तत्थ चिट्ठंति दुरूवभक्खी तुट्ठंति कम्पो-
 वगया किमीहिं ॥ २० ॥ सया कसिणं पुण घम्मठाणं गाढोवणीयं अइदुक्खधम्मं ।
 अंदूसु पक्खिण्विहत्तु देहं वेहेण सीसं सेऽभितावयंति ॥ २१ ॥ छिंदंति बालस्स
 खुरेण णक्कं उट्टे वि छिंदंति दुवे वि कण्णे । जिब्भं विणिक्कस्स विहत्थिमेत्तं
 तिक्खाहि सूलहि भितावयंति ॥ २२ ॥ ते तिप्पमाणा तलसंपुडं व राइंदियं तत्थ
 थणंति बाला । गलंति ते सोणियपूयमंसं पज्जोइया खारपइद्धियंगा ॥ २३ ॥ जह ते
 सुया लोहियपूयपाई बालागणी तेअगुणा परेणं । कुम्भी महंताहियपोरुसीया समूसिया

लोहियपूयपुण्णा ॥ २४ ॥ पक्खिक्खप्प तासुं पययंति बाले अट्टस्सरे ते कलुणं रसंते ।
तण्हाइया ते तउतम्बतत्तं पक्खिज्जमाणट्टय्यं रसंति ॥ २५ ॥ अप्पेण अप्पंइह
वंचइत्ता भवाहमे पुव्वसए सहस्से । चिट्ठंति तत्था बहुकूरकम्मा जहा कइं कम्म
तहासि भारे ॥ २६ ॥ समज्जिणित्ता कलुसं अणज्जा इट्ठेहि कंतेहि य विप्पहूणा । ते
दुब्धिगंधे कसिणे य फासे कम्मोवगा कुणिमे आवसंति ॥ २७ ॥ सिं वेमि ॥

॥ पंचमं अज्झयणं बीओ उद्देसो ॥

अहावरं सासयदुक्खधम्मं तं भे पयक्खाभि जहातहेणं । बाला जहा दुक्कड-
कम्मकारी वेयंति कम्माइं पुरेकडाइं ॥ १ ॥ हत्थेहि पाएहि य वंधिऊणं उयरं
विकत्तंति खुरासिएहिं । गिण्हित्तु बालस्स विहत्तु देहं वद्धं थिरं पिट्टउ उद्धरंति
॥ २ ॥ बाहू पक्कत्तंति य मूलओ से थूलं वियासं मुहे आउइंति । रहंसि जुत्तं सर-
यंति बालं आरुस्स विज्जंति तुदेण पिट्ठे ॥ ३ ॥ अयं व तत्तं जलियं सजोइ तउउयं
भूमिमणुक्कमंता । ते डज्जमाण्णा कलुणं थणंति उसुच्चोइया तत्तजुगेसु जुत्ता ॥ ४ ॥
बाला बला भूमिमणुक्कमंता पविज्जलं लोहपहं च तत्तं । जंसीऽभिदुग्गंसि पवज्जमाणा
पेसे व दण्डेहि पुरा करंति ॥ ५ ॥ ते संपगाढंसि पवज्जमाणा सिलाहि हम्मंति
णिपातिणीहिं । संतावणी णाम चिरट्ठिइया संतप्पई जत्थ असाहुकम्मा ॥ ६ ॥
कंरूसु पक्खिक्खप्प पयंति बालं तओ वि दड्ढा पुण उप्पयंति । ते उड्ढकाएहिं पक्खज्ज-
माणा अवरेहिं खज्जंति सणप्फएहिं ॥ ७ ॥ समूसियं णाम विधूमठाणं जं सोयत्ता
कलुणं थणंति । अहोसिरं कट्टु विगत्तिऊणं अयं व सत्थेहि समोसवंति ॥ ८ ॥
समूसिया तत्थ विसूणियंगा पक्खीहि खज्जंति अओमुहेहिं । संजीवणी णाम चिरट्ठिइया
जंसी पया हम्मइ पावचेया ॥ ९ ॥ तिक्खाहि सूलाहि णिवाययंति वसोगयं सावययं
व लद्धं । ते सूलविद्धा कलुणं थणंति एगंतदुक्खं दुहओ गिलाणा ॥ १० ॥ सया
जलं णाम णिहं महंतं जंसी जलंतो अगणी अकट्ठो । चिट्ठंति बद्धा बहुकूरकम्मा
अरहस्सरा केइ चिरट्ठिइया ॥ ११ ॥ चिया महंतीउ समारभित्ता बुब्भंति ते तं
कलुणं रसंते । आवट्टई तत्थ असाहुकम्मा सप्पी जहा पडियं जोइमज्जे ॥ १२ ॥
सया कसिणं पुण्य घम्मठाणं मादोवणीयं अइदुक्खधम्मं । हत्थेहि पाएहि य वंधिऊणं
सत्तुव्वदण्डेहि समारभंति ॥ १३ ॥ भंजंति बालस्स वहेण पुट्ठी सीसं पि भिंदंति
अयोषणेहिं । ते भिण्णदेहा फलयं व तच्छा तत्ताहि आराहि णियोजयंति ॥ १४ ॥

अभिजुजिया रुद् असाहुकम्मा उमुचोइया हत्थिवहं वहंति । एगं दुरुहित्तु दुवे
 तओ वा आरुस्सं विज्झंति ककाणओ से ॥ १५ ॥ बाला बला भूमिमणुक्कमंता
 पविज्जलं कंटइलं महंतं । विवद्धतप्पेहि विवण्णचित्ते समीरिया कोट्टबलिं करंति
 ॥ १६ ॥ वेयालिए णाम महाभितावे एगायए पव्वयमंतलिकखे । हम्मंति तत्था
 बहुकूरकम्मा परं सहस्साण मुहुत्तगाणं ॥ १७ ॥ संबाहिया दुक्कडिणो थणंति अहो
 य राओ परितप्पमाणा । एगंतकूडे णरए महंते कूडेण तत्था विसमे हया उ
 ॥ १८ ॥ भंजंति णं पुव्वमरीसरोसं समुग्गरे ते मुसले गहेउं । ते भिण्णदेहा रुहिरं
 वमंता ओमुद्धगा धरणितले पडंति ॥ १९ ॥ अणासिया णाम महासियाला पाग-
 ङ्गिणो तत्थ सयावकोवा । खंजंति तत्था बहुकूरकम्मा अदूरगा संकलियाहि बद्धा
 ॥ २० ॥ सयाजला णाम णई भिदुग्गा पविज्जलं लोहविलीणतत्ता । जंसी भिदु-
 ग्गंसि पव्वज्जमाणा एगायताणुक्कमणं करंति ॥ २१ ॥ एयाई फासाईं पुसंति बालं
 णिरंतरं तत्थ चिरद्विइयं । ण हम्ममाणस्स उ होइ ताणं एगो सयं पच्चणुहोइ दुक्खं
 ॥ २२ ॥ जं जारिसं पुव्वमकासि कम्मं तमेव आगच्छइ संपराए । एगंतदुक्खं
 भवमज्जित्ता वेयंति दुक्खी तमणंतदुक्खं ॥ २३ ॥ एयाणि सोच्चा णरगाणि धीरे
 ण हिंसए किंचण सव्वलोए । एगंतदिट्ठी अपरिग्गहे उ बुज्झिज्ज लोगस्स वसं ण
 गच्छे ॥ २४ ॥ एवं तिरिकखेमणुयासु(म)रेसुं चउरंतणंतं तयणुध्विवागं । स सव्वमेयं
 इइ वेयइत्ता कंखेज्ज कालं धुयमायरेज्ज ॥ २५ ॥ त्ति वेमि ॥

॥ महावीरत्थुई णाम छट्ठं अज्झयणं ॥

पुच्छिस्सु णं सभणा माहणा य अमारिणो या परतित्थिया य । से केई णेगंत-
 हियं धम्ममाहु अणेलिसं साहुसमिक्खयाए ॥ १ ॥ कहं च णाणं कह दंसणं से
 सीलं कहं णायमुयस्स आसि । जाणासि णं भिक्खू जहातहेणं अहासुयं बूहि जहा
 णिसंतं ॥ २ ॥ खेयणए से कुसलामुपण्णे अणंतणाणी य अणंतदंसी । जंसंसिणो
 चक्खुपहे ठियस्स जाणाहि धम्मं च विइं च पेहि ॥ ३ ॥ उद्धं अहे यं तिरियं
 दिसासु तसा य जे थावर जे य पाणा । से णिच्चणिवेहि समिक्ख पण्णे दीवे व
 धम्मं समियं उदाहु ॥ ४ ॥ से सव्वदंसी अभिभूयणाणी णिरामगंधे विइमं ठियप्पा ।
 अणुत्तरे सव्वजगंसि विज्जं गंथा अईए अभए अणाऊ ॥५॥ से भूइपण्णे अणिए-
 अचारी ओहंतरे धीरे अणंतचक्खू । अणुत्तरं तप्पइ सूरिए वा वइरोयणिदे व

तमं पगासे ॥ ६ ॥ अणुत्तरं धम्ममिणं जिणाणं गेया मुणी कासव आसुपण्णे ।
 इंदे व देवाण महाणुभावे सहस्सगेया दिवि णं विस्सिट्ठे ॥ ७ ॥ से पण्णया
 अक्खयसागरे वा महोदही वा वि अणंत पारे । अणाइले वा अक्काइ
 मुक्के सक्के व देवाहिवई जुईमं ॥ ८ ॥ से वीरिएणं पडिपुण्णवीरिए सुदंसणे वा
 णगसव्वसेट्ठे । सुरालए वा सि मुदागरे से विरायए णेगगुणेववेए ॥ ९ ॥ सयं
 सहस्साण उ जोयणाणं तिक्कडगे पंडगवेजयते । से जोयणे णवणवते सहस्से
 उद्धुस्सियो हेट्ठ सहस्समेगं ॥ १० ॥ पुट्ठे णभे चिट्ठइ भूमिवट्ठिए जं सूरिया
 अणुपरिवट्ठयंति । से हेमवण्णे बहुणंदणे य जंसी रई वेययई महिदा ॥ ११ ॥
 से पव्वए सहमहप्पगासे विरायई कंचणमट्ठवण्णे । अणुत्तरे गिरिसु य पव्वहुग्गे
 गिरीवरे से जल्लिए व भोमे ॥ १२ ॥ महीइ मज्झमि टिए णगिदे पण्णावए
 सूरियसुद्धलेसे । एवं सिरीए उ स भूरियण्णे मणोरमे जोयइ अब्बिमाली ॥ १३ ॥
 सुदंसणस्सेव जसो गिरिस्स पवुच्चई महओ पव्वयस्स । एओवमे समणे णायपुत्ते
 जाईजसोदंसणगाणसीले ॥ १४ ॥ गिरीवरे वा णिसहाऽऽययाणं रुयए व सेट्ठे वल-
 याययाणं । तओवमे से जगभूइपण्णे मुणीण मज्जे तमुदाहु पण्णे ॥ १५ ॥ अणुत्तरं
 धम्ममुईरइत्ता अणुत्तरं ज्ञाणवरं झियाई । सुसुक्कसुक्कं अपगंडुसुक्कं सखिंदुएगंत-
 वदायसुक्कं ॥ १६ ॥ अणुत्तरग्गं परमं महेसी असेसकम्मं स विसोहइत्ता । सिद्धि
 गए साइमणंतपत्ते णाणेण सीलेण य दंसणेण ॥ १७ ॥ रुक्खेसु णाए जह सामली
 वा जस्सि रई वेययई सुवण्णा । वणेसु वा णंदणमाहु सेट्ठे णाणेण सीलेण य भूइ-
 पण्णे ॥ १८ ॥ थणियं व सदाण अणुत्तरे उ चंदो व ताराण महाणुभावे । गवेसु
 वा चंदणमाहु सेट्ठं एवं मुणीणं अपडिण्णमाहु ॥ १९ ॥ जहा सयंभू उदहीण सेट्ठे
 णागेसु वा धरणिंदमाहु सेट्ठे । खोओदए वा रस वेजयते तवोवहाणे मुणि वेज-
 यंते ॥ २० ॥ हर्थीसु एरावणमाहु णाए सीहो मियाणं सल्लियाण गंगा । पक्खीसु
 वा गरुले वेणुदेवो णिव्वाणवादीणिह णायपुत्ते ॥ २१ ॥ जोहेसु णाए जह वीससेणे
 पुप्फेसु वा जह अरविंदमाहु । खत्तीण सेट्ठे जह दंतवक्के इसीण सेट्ठे तह वद्धमाणे
 ॥ २२ ॥ दाणाण सेट्ठं अभयप्पयाणं सचेसु वा अणवज्जे वयंति । तवेसु वा उत्तमं
 बम्भचेरं लोगुत्तमे समणे णायपुत्ते ॥ २३ ॥ ठिईण सेट्ठा लवसत्तमा वा सभा
 सुहम्मा व सभाण सेट्ठा । णिव्वाणमेट्ठा जह सव्वधम्मा ण णायपुत्ता परमत्थि

पाणी ॥ २४ ॥ पुढोवमे धुणइ विगयगेही ण संगिहिं कुक्कइ आसुपण्णे । तरिउं समुद्दं व महाभवोयं अभयंकरे वीर अणंतच्चक्खू ॥ २५ ॥ कोहं च माणं च तहेव मायं.लोभं चउत्थं अञ्जत्तदोसा । एयाणि वंता अरहा महेसी ण कुक्कई पाव ण कारवेइ ॥ २६ ॥ किरियाकिरियं वेणइयाणुवायं अण्णाणियाणं पडियच्च ठाणं । से सव्ववार्यं इह वेयइत्ता उवट्टिए संजमदीहरायं ॥ २७ ॥ से वारिया इत्थि सराइभत्तं उवहाणवं दुक्खल्लयट्ठयाए । लोगं विदित्ता आरं परं च सव्वं पभू वारिय सव्व-वारं ॥ २८ ॥ सोच्चा य धम्मं अरहंतभासियं समाहियं अट्ठपदोवसुद्धं । तं सहहाणा य जणा अणाऊ इंदा व देवाहिव आगमिस्संति ॥ २९ ॥ ति बेमि ॥

॥ कुसीलपरिभासियं णाम सत्तमं अज्जयणं ॥

पुढवी य आऊ अगणी य वाऊ तण-रुक्ख. बीया य तसा य पाणा । जे अंडया जे य जराउ पाणा संसेयया जे रसयाभिहाणा ॥ १ ॥ एयाई कायाई पवेइयाई एएसु जाणे पडिलेह सायं । एएण काएण य आयदंडे एएसु या विप्परियासुवेति ॥ २ ॥ जाईपहं अणुपरिवट्टमाणे तसथावरेहिं विणिघायमेइ । से जाइ जाई बहुकूरकम्मे जं कुक्कई मिज्जइ तेण बाले ॥ ३ ॥ अस्सि च लोए अदु वा परत्था सयगसो वा तह अण्णहा वा । संसारमावण्ण परं परं ते बंधंति वेयंति य दुण्णियाणि ॥ ४ ॥ जे मायरं वा पियरं च हिच्चा समणव्वए अगणिं समारभिज्जा । अहाहु से लोए कुसीलधम्मे भूयाई जे हिंसइ आयसाए ॥ ५ ॥ उज्जालओ पाण णिवायएज्जा णिव्वावओ अगणिं णिवायएज्जा । तम्हा उ मेहावि समिक्ख धम्मं ण पंडिए अगणिं समारभिज्जा ॥ ६ ॥ पुढवीं वि जीवा आऊ वि जीवा पाणा य संगइम संपयंति । संसेयया कट्ठसमस्सिया य एए दहे अगणिं समारभंते ॥ ७ ॥ हरियाणि भूयाणि विलम्बगाणि आहार देहा य पुढो सियाइ । जे छिदई आयसुहं पडुच्च पांगब्भि पाणे बहुणं तिवाई ॥ ८ ॥ जाई च बुद्धिं च विणासयंते बीयाइ अस्संजय आयदंडे । अहाहु से लोए अणज्जधम्मे बीयाइ से हिंसइ आयसाए ॥ ९ ॥ गब्भाइ मिज्जंति बुयाबुयाणा णरा परे पंचसिहा कुमारा । जुवाणगा मज्झिम थेरगा य चयंति ते आउखए पत्तीणा ॥ १० ॥ संबुज्जहा जंतवो माणुसत्तं दट्ठुं भयं बालिसेणं अलम्भो । एणंतदुक्खे जरिए व लोए सकम्मुणा विप्परियासुवेइ ॥ ११ ॥ इहेग मूढा पयंति मोक्खं आहारसंपज्जणवज्जणेणं । एगे य सीओदग-

सेवणेणं हुएण एगे पवयति मोक्खं ॥ १२ ॥ पाओसिणाणाइसु णत्थि मोक्खो
 खारस्स लोणस्स अणासणेणं । ते मज्जमंसं लसुणं च भोच्चा अण्णत्थ वासं परि-
 कप्पयंति ॥ १३ ॥ उदगेण जे सिद्धिमुदाहरंति सायं च पायं उदगं फुसंता । उद-
 गस्स फासेण सिया य सिद्धी सिद्धिसु पाणा ब्रह्मे दर्गसि ॥ १४ ॥ मच्छा य कुम्मा
 य सिरोसिवा य मग्गू य उट्टा दगरक्खसा य । अट्टाणमेयं कुसला वयंति उदगेण
 जे सिद्धिमुदाहरंति ॥ १५ ॥ उदगं जई कम्ममलं हरेज्जा एवं सुहं इच्छामित्तमेव ।
 अंधं व पेयारमणुस्सरित्ता पाणाणि चेवं विणिहंति मंदा ॥ १६ ॥ पावाइं कम्माइं
 पकुञ्चओ हि सिओदगं ऊ जइ तं हरेज्जा । सिद्धिसु एगे दगसत्तघाईं मुसं वयंते
 जलसिद्धिमाहु ॥ १७ ॥ हुएण जे सिद्धिमुदाहरंति सायं च पायं अगणिं फुसंता । एवं
 सिया सिद्धि हवेज्ज तम्हा अगणिं फुसंताण कुकम्मिणं पि ॥ १८ ॥ अपरिक्ख दिट्ठं ण हु
 सिद्धीएहि ति ते घायमनुज्झमाणा । भूएहिं जाणं पडिलेह सायं विज्जं महायं तसथाव-
 रेहिं ॥ १९ ॥ थणंति लुप्पंति तसंति कम्मी पुट्ठो जगा परिसंखाय भिक्खू । तम्हा विऊ
 विरओ आयगुत्ते दट्टुं तसे या पडिसंहरेज्जा ॥ २० ॥ जे धम्मलद्धं विणिहाय भुंजे
 वियडेण साहट्टु य जे सिणाई । जे धोवई लूसयई व वत्थं अहाहु से णागणियस्स
 दूरे ॥ २१ ॥ कम्मं परिण्णाय दगंसि धीरे वियडेण जीवेज्ज य आदिमोक्खं । से
 वीयकंदाइ अभुंजमाणे विरए सिणाणाइसु इत्थियासु ॥ २२ ॥ जे मायरं च पियरं च
 हिच्चा गारं तथा पुत्तपसुं धणं च । कुलाईं जे धावइ साउगाईं अहाहु से सामणियस्स
 दूरे ॥ २३ ॥ कुलाईं जे धावइ साउगाईं आप्पाइ धम्मं उयराणुगिद्धे । अहाहु से
 आयरियाण सयंसे जे लावएज्जा असणस्स हेऊ ॥ २४ ॥ णिक्खम्म दीणे परभोयणम्मि
 सुहमंगलीए उयराणुगिद्धे । णीवारगिद्धे व महावराहे अदूरए एहिइ घायमेव
 ॥ २५ ॥ अण्णस्स पाणस्सिह लोइयस्स अणुप्पियं भासइ सेवमाणे । पासत्थयं
 चेव कुसीलयं च णिस्सारए होइ जहा पुलए ॥ २६ ॥ अण्णायपिण्णेणइहियास-
 एज्जा णो पूयणं तवसा आवहेज्जा । सहेहि रुवेहि असज्जमाणं सब्बेहि कामेहि
 विणीय गेहिं ॥ २७ ॥ सब्बाइं संग्गाईं अइच्च धीरे सब्बाइं दुक्खाइं तितिकम्ममाणे ।
 अखिले अगिद्धे अणिएयचारो अभयंकरे भिक्खू अणाविलप्पा ॥ २८ ॥ भारस्स
 जाआ मुणि भुंजएज्जा क्खेज्ज पावस्स विवेग भिक्खू । दुक्खेण पुट्ठे धुयमाइएज्जा
 संग्गामसीसे व परं दमेज्जा ॥ २९ ॥ अवि हम्ममाणे फलगावयट्ठी समागमं कंखइ

अंतगस्त । णिभूय कम्मं ण पवंचुवेइ अक्खक्खए वा सगडं त्ति वेमि ॥ ३० ॥

वीरियं णाम अट्टमं अज्जयणं

- दुहा वेयं सुयक्खायं वीरियं ति पवुच्चई । किं णु वीरस्स वीरत्तं कहं चेयं पवु-
च्चई ॥ १ ॥ कम्ममेगे पवेदेति अकम्मं वा वि सुव्वया । एएहिं दोहि ठाणेहिं
जेहिं दासंति मच्चिया ॥ २ ॥ पमायं कम्ममाहंसु अप्पमायं तहावरं । तब्भावा-
देसओ वा वि बालं पण्डियमेव वा ॥ ३ ॥ सत्थमेगे तु सिक्खंता अइयायाय
पाणिणं । एगे मंते अहिञ्जंति पाणभूयविहेडिणो ॥ ४ ॥ मायिणो कट्टु माया य
कामभोगे समारभे । हंता छेत्ता पगब्भित्ता आयासायाणुगामिणो ॥ ५ ॥ मणसा
वयसा चैव कायसा चैव अंतसो । आरओ परओ वा वि दुहा वि य असंजया
॥ ६ ॥ वेराई कुम्बइ वेरी तओ वेरेहि रज्जई । पावोवगा य आरम्भा दुक्ख-
फासा य अंतसो ॥ ७ ॥ संपरायं णियच्छंति अत्तदुक्कडकारिणो । रागदोसस्सिया
बाला पावं कुब्बंति ते ब्रह्मं ॥ ८ ॥ एयं सकम्मविरियं बालाणं तु पवेइयं । इत्तो
अकम्मविरियं पण्डियाणं सुणेह मे ॥ ९ ॥ दविए वंधणुम्मुक्के सव्वओ छिण्णबंधणे ।
पणोह्ण पावगं कम्मं सल्लं कंतइ अंतसो ॥ १० ॥ णेयाउयं सुयक्खायं उवायाय
समीहए । भुज्जो भुज्जो दुहावासं असुहत्तं तहा तहा ॥ ११ ॥ ठाणी विविहठाणाणि
त्रइस्संति ण संसओ । अणियए अयं वासे णायएहि सुहीहि य ॥ १२ ॥ एव-
मायाय मेहावी अप्पणी गिद्धिमुद्धरे । आरियं उवसंपजे सव्वधम्ममगोवियं ॥ १३ ॥
सहसंमइए षब्बा धम्मसारं सुणेत्तु वा । समुवट्ठिए उ अणगारे पच्चक्खायपावए
॥ १४ ॥ जं किंचुवक्कमं जाणे आउक्खेमस्स अप्पणो । तस्सेव अंतरा खिप्यं
सिक्खं सिक्खेज्ज पण्डिए ॥ १५ ॥ जहां कुम्भे सअंगाइं सए देहे समाहरे । एवं
पावाइं मेहावी अज्जप्पेण समाहरे ॥ १६ ॥ साहरे हत्थपाए य मणं पंचिदियाणि य ।
पावगं च परीणामं भासादोसं च तारिसं ॥ १७ ॥ अणु माणं च मायं च तं परिणाय
पण्डिए । सायासारवणिहुए उवसंते णिहे चरे ॥ १८ ॥ पाणे य णाइवाएज्जा
अदिण्णं पि य णायए । साइयं ण सुसं बूया एस धम्मे वुसीमओ ॥ १९ ॥
अइक्कम्मंति वायाए मणसा वि ण पत्थए । सव्वओ संवुडे दंते आयाणं सुसमा-
हरे ॥ २० ॥ कडं च कज्जमाणं च आगमिस्सं च पावगं । सव्वं तं णाणुजाणंति
आयंगुत्ता जिईदिया ॥ २१ ॥ जे याऽवुद्धा महाभागा वीरा असमत्तदंसिणो ।
असुद्धं तेसिं परकंतं सफलं होइ सव्वसो ॥ २२ ॥ जे य बुद्धा महाभागा वीरा

सम्मत्तदंसिणो । सुद्धं तेसिं परकंत्तं अफलं होह सव्वसो ॥ २३ ॥ तेसिं पि ण तवो सुद्धो णिक्खंता जे महाकुला । जं णेवण्णे वियाणंति ण सिल्लोगे पवेज्जए ॥ २४ ॥ अप्पपिण्डासि पाणासि अप्पं भासेज्ज सुव्वए । खंतेऽमिणिल्लुडे दंते वीयगिद्धी सया जए ॥ २५ ॥ ज्ञाणजोगं समाहट्टु कायं विउसेज्ज सव्वसो । तितिकखं परमं णच्चा आमोक्खाए परिव्वएज्जासि ॥ २६ ॥ त्ति वेमि ॥

॥ धम्मो णाम णवमं अज्झयणं ॥

कयरे धम्मे अक्खाए माहणेण मईमया । अंजु धम्मं जहातच्चं जिणाणं तं सुणेह मे ॥ १ ॥ माहणा खत्तिया वेस्सा, चण्डाला अट्टु बोक्कसा । एसिया वेसिया सुद्धा जे य आरम्मणिसिया ॥ २ ॥ परिग्गहणिविट्ठाणं पावं तेसिं पवहुई । आरम्मसंभिया कामा ण ते दुक्खविमोयगा ॥ ३ ॥ आवायक्किच्चमाहेउं णाहओ विसएसिणो । अण्णे हरंति तं वित्तं कम्मी कम्मेहि किच्चई ॥ ४ ॥ माया पिया ण्हुसा भाया भज्जा पुत्ता य ओरसा । णालं ते तव ताणाय लुपंतस्स सकम्भुणा ॥ ५ ॥ एयमट्ठं सपेहाए परमट्ठाणुगामियं । णिम्ममो णिरहंकारो चरे भिक्खू जिणाहियं ॥ ६ ॥ चिच्चा वित्तं च पुत्ते य णाहओ य परिग्गहं । चिच्चा णं अंतगं सोयं णिरवेक्खो परिव्वए ॥ ७ ॥ पुढवी उ अगणी वाऊ तणरुक्ख सबीयगा । अण्डया पोयजराऊ रससंसेयउच्चिभया ॥ ८ ॥ एएहिं छहिं काएहिं तं विज्जं परिजाणिया । मणसा कायवक्केणं णारम्भी ण परिग्गही ॥ ९ ॥ मुसावायं बहिद्धं च उग्गहं च अजाइया । सत्थादाणाइं लोगंसि तं विज्जं परिजाणिया ॥ १० ॥ पळिउंचणं च भयणं च यंढिल्लुस्सयणाणि य । धूणादाणाइं लोगंसि तं विज्जं परिजाणिया ॥ ११ ॥ धोयणं रयणं चैव वत्थीकम्मं विरेयणं । वमणंजणपलीमंथं तं विज्जं परिजाणिया ॥ १२ ॥ गंधमल्लसिणाणं च दंतपक्खालणं तहा । परिग्गहित्थिकम्मं च तं विज्जं परिजाणिया ॥ १३ ॥ उद्देसियं कीयगडं पामिच्चं चैव आहडं । पूयं अणेसणिज्जं च तं विज्जं परिजाणिया ॥ १४ ॥ आसूणिमक्खिरागं च गिद्धुवघायकम्मगं । उच्छोलणं च कक्कं च तं विज्जं परिजाणिया ॥ १५ ॥ संपसारी कयकिरिए पसिणाययणाणि य । सागारियं च पिण्डं च तं विज्जं परिजाणिया ॥ १६ ॥ अट्टावयं ण सिक्खिस्सच्चा वेहाइयं च णो वए । हत्थकम्मं विवायं च तं विज्जं परिजाणिया ॥ १७ ॥ पाणहाओ य छत्तं च णालीयं वालवीयणं । परकिरियं अण्णमणं च तं विज्जं परिजाणिया ॥ १८ ॥

उच्चारं पासवणं हरिएसु ण करे मुणी । वियडेण वा वि साहदुदु णावमज्जे कयाइ
 वि ॥ १९ ॥ परमत्ते अण्णपाणं ण भुंजेज्ज कयाइ वि । परवत्थं अचेलो वि तं विज्जं
 परिजाणिया ॥ २० ॥ आसंदी पलियंके य णिसिज्जं च गिहंतरे । संपुच्छणं सरणं
 वा तं विज्जं परिजाणिया ॥ २१ ॥ जसं कित्तिं सिलेयं च जा य वंदणपूयणा ।
 सब्वलोयंसि जे कामा तं विज्जं परिजाणिया ॥ २२ ॥ जेणेहं णिव्वहे भिक्खू अण्ण-
 पाणं तहाविहं । अणुप्पयाणमण्णेसिं तं विज्जं परिजाणिया ॥ २३ ॥ एवं उदाहु
 णिग्गंथे महावीरे महामुणी । अणंतणाणदंसी से धम्मं देसितवं सुयं ॥ २४ ॥ भास-
 माणो ण भासेज्जा णेव वम्फेज्ज मम्मयं । माइद्धाणं विवज्जेज्जा अणुचितिय वियागरे
 ॥ २५ ॥ तत्थिमा तइया भासा जं वइत्ताणुतप्पइ । जं छण्णं तं ण वत्तव्वं एसा
 आणा णियण्ठिया ॥ २६ ॥ होलावायं सहीवायं गोयावायं च णो वए । तुमं तुमं
 ति अमणुणं सब्वसो तं ण वत्तए ॥ २७ ॥ अक्कुसीले सया भिक्खू णेव संसग्गियं
 भए । सुहरूवा तत्थुवरसग्गा पडिबुज्जेज्ज ते विऊ ॥ २८ ॥ णणत्थ अंतराएणं
 परगेहे ण णिसीयए । गामकुमारियं किङ्कुं णाइवेलं हसे मुणी ॥ २९ ॥ अणुस्सुओ
 उरालेसु जयमाणो परिव्वए । चरियाए अण्णमत्तो पुट्ठो तत्थइहियासए ॥ ३० ॥
 हम्ममाणो ण कुप्पेज्ज बुच्चमाणो ण संजले । सुमणे अहियासेज्जा ण य कोलाहलं करे
 ॥ ३१ ॥ लद्धे कामे ण पत्थेज्जा विवेगे एवमाहिए । आयरियाइं सिक्खेज्जा बुद्धाणं
 अंतिए सया ॥ ३२ ॥ सुस्सूसमाणो उवासेज्जा सुप्पणं सुतवस्सियं । वीरा जे अत्त-
 पण्णेसी धिइमंता जिइंदिया ॥ ३३ ॥ गिहे दीवमपासंता पुरिसादाणिया णरा ।
 ते वीरा बंधणुम्मुक्का णावकंवेत्ति जीवियं ॥ ३४ ॥ अग्निद्धे सहफासेसु आरम्भेसु
 अणिस्सिए । सब्वं तं समयार्इयं जमेयं लवियं बहु ॥ ३५ ॥ अइमाणं च मायं च
 तं परिण्णाय पंडिए । गारवाणि य सब्वाणि णिव्वाणं संधए मुणि ॥ ३६ ॥ त्ति
 वेमि ॥

॥ समाही णाम दसमं अज्जयणं ॥

आधं मईमं अणुवीइ धम्मं अंजू समाहिं तमिमं सुणेह । अपडिण्णा भिक्खू उ
 समाहिपत्ते अणियाण भूएसु परिव्वएज्जा ॥ १ ॥ उड्ढं अहे यं तिरियं दिसासु
 तसां य जे थावर जे य पाणा । हत्थेहि पाएहि य संजमित्ता अदिण्णमण्णेसु य णो
 गहेज्जा ॥ २ ॥ सुयक्खायधम्मे वित्तिगिच्छतिण्णे लाढे चरे आयतुले पयासु । आर्यं ण

कुञ्जा इह जीवियद्धी चयं ण कुञ्जा सुतत्रसि भिक्खू ॥ ३ ॥ सत्विंदियाभिगिण्णुडे पयासु चरे मुणी सव्वउ विप्पमुक्के । पासाहि पाणे य पुढो वि सत्ते दुक्खेण अट्टे परितप्पमाणे ॥ ४ ॥ एएसु बाले य पक्कुवमाणे आवद्धई कम्मसु पावएसु । अइवायओ कीरइ पावकम्मं णिउंजमाणे उ करेइ कम्मं ॥ ५ ॥ आदीणवित्तीव करेइ पावं मंता उ एगंतसमाहिमाहु । बुद्धे समाहीय रए विवेगे पाणाइवाया विरए ठियप्पा ॥ ६ ॥ सव्वं जगं तू समयाणुपेही पियमप्पियं कस्सइ णो करेज्जा । उट्ठाय दीणो य पुणो विसण्णो संपूयणं चेव सिलोयकामी ॥ ७ ॥ आहाकडं चेव णिकाममीणे णियामचारी य विसण्णमेसी । इत्थीसु सत्ते य पुढो य बाले परिग्गहं चेव पक्कुवमाणे ॥ ८ ॥ वेराणुगिद्धे णिचयं करेइ इओ चुए से इहमद्धुग्गं । तम्हा उ मेहावि समिक्ख धम्मं चरे मुणी सव्वउ विप्पमुक्के ॥ ९ ॥ आयं ण कुञ्जा इह जीवियद्धी असज्जमाणो य परिव्वएज्जा । णिसम्मभासी य विणीयगिद्धिं हिंसणियं वा ण कहं करेज्जा ॥ १० ॥ आहाकडं वा ण णिकामएज्जा णिकामयंते य ण संथवेज्जा । धुणे उरालं अणुवेहमाणे चिच्चा ण सोयं अणवेक्खमाणो ॥ ११ ॥ एगत्तमेयं अभिपत्थएज्जा एवं पमुक्खो ण मुसं ति पासं । एसप्पमोक्खो अमुसे वरे वि अकोहणे सच्चरए तवस्सी ॥ १२ ॥ इत्थीसु या आरय मेहुणाओ परिग्गहं चेव अक्कुवमाणे । उच्चावएसु विसएसु ताई णिस्संसयं भिक्खू समाहिपत्ते ॥ १३ ॥ अरइं रईं च अभिभूय भिक्खू तणाइफासं तह सीयफासं । उण्हं च दंसं चऽहियासएज्जा सुब्धिं व दुब्धिं व तितिक्वएज्जा ॥ १४ ॥ गुत्तो वईए य समाहिपत्तो लेसं समाहट्टु परिव्वएज्जा गिहं ण छाए ण वि छायएज्जा संमिस्सभावं पयहे पयासु ॥ १५ ॥ जे केइ लोयग्ग्मि उ अकिरियआया अण्णे ण पुट्ठा धुयमादिसंति । आरम्भसत्ता गट्ठिया य लोए धम्मं ण जाणंति विमोक्खहेउं ॥ १६ ॥ पुढो य छंदा इह माणवा उ किरिया-किरीयं च पुढो य वायं । जायस्स बालस्स पक्कुव देहं पवद्धई वेरमसंजयस्स ॥ १७ ॥ आउक्खयं चेव अबुज्जमाणे ममाइ से साहसकारि मंदे अहो य राओ परितप्पमाणे अट्टेसु मूडे अजरामरेव्व ॥ १८ ॥ जहाहि वित्तं पसवो य सव्वं जे व्रंथवा जे य पिया य सित्ता । लालप्पई से वि य एइ मोहं अण्णे जणा तंस्सि हरंति वित्तं ॥ १९ ॥ सीहं जहा खुड्ढमिगा चरंता दूरे चरंति परिसंक्कमाणं । एवं तु मेहावि समिक्ख धम्मं दूरेण पावं परिव्वएज्जा ॥ २० ॥ संबुज्जमाणे उ णरे मईमं पावाउ

अप्पाण णिवट्टएज्जा । हिंसपसूयाई दुहाई मत्ता वेराणुबंधीणि महब्भयाणि ॥२१॥
 मुसं ण बूया मुणि अत्तगामी णिव्वाणमेयं कसिणं समाहिं । सयं ण कुज्जा ण य
 कारवेज्जा करंतमण्णं पि य णाणुजाणे ॥ २२ ॥ सुद्धे सिया जाए ण दूसएज्जा
 अमुच्छिए ण य अज्झोववण्णे । धिइमं विमुक्के ण य पूयणट्ठी ण सिलोयगामी
 य परिव्वएज्जा ॥ २३ ॥ णिक्खम्म गेहाउ णिरावकंखी कायं विउस्सेज्ज णियाण-
 छिण्णे । णो जीवियं णो मरणाभिकंखी चरेज्ज भिक्खू वलया विमुक्के ॥ २४ ॥
 ॥ त्ति वेमि ॥

मग्गे णाम एगारसमं अज्झयणं

कयरे मग्गे अक्खाए माहणेणं मईमया । जं मग्गं उज्जु पावित्ता ओहं तरइ
 दुत्तरं ? ॥१॥ तं मग्गं गुत्तरं सुद्धं सव्वदुक्खविमोक्खणं । जाणासि णं जहा भिक्खू
 तं णो बूहि महामुणी ॥ २ ॥ जइ णो केइ पुच्छिज्जा देवा अदुव माणुसा । तेसिं
 तु कयरं मग्गं आइक्खेज्ज कहाहि णो ॥ ३ ॥ जइ वो केइ पुच्छिज्जा देवा अदुव
 माणुसा । तेसिमं पडिसाहेज्जा मग्गसारं सुणेह मे ॥ ४ ॥ अणुपुव्वेण महावोरं
 कासवेण पवेइयं । जमाथाय इओ पुव्वं समुद्धं ववहारिणो ॥ ५ ॥ अतरिसु तरंतेगे
 तरिरसंति अणागया । तं सोच्चा पडिवक्खामि जंतवो तं सुणेह मे ॥ ६ ॥ पुढवी-
 जीवा पुढो सत्ता आउजीवा तहाऽगणी । वाउजीवा पुढो सत्ता तणरुक्खा सबीयगा
 ॥ ७ ॥ अहावरा तसा पाणा एवं छक्काय आहिया । एयावए जीवकाए णावरे
 कोइ विज्जई ॥ ८ ॥ सव्वाहिं अणुजुत्तीहिं मइमं पडिलेहिया । सव्वे अकंतदुक्खा
 य अओ सव्वे ण हिंसया ॥ ९ ॥ एयं खु णाणिणो सारं जं ण हिंसइ कंचण ।
 अहिंसा समयं चेव एयावंतं वियाणिया ॥ १० ॥ उहुं अहे य तिरियं जे केइ तस-
 थावरा । सव्वत्थ विरइं कुज्जा संति णिवाणमाहियं ॥ ११ ॥ पभू दोसे णिराकिच्चा
 ण विरुद्धेज्ज केणइ । मणसा वयसा चेव काथसा चेव अंतसो ॥ १२ ॥ संबुडे
 से महापण्णे धीरे दत्तेसणं चरे । एसणासमीए णिच्चं वज्जयंते अणेसणं ॥ १३ ॥
 भूयाई च समारम्भ तमुद्धिरसा य जं कडं । तारिसं तु ण णिण्हेज्जा अण्णपाणं
 सुसंजए ॥ १४ ॥ पूईकम्मं ण सेवेज्जा एस धम्मे बुसीमओ । जं किंचि अभिकंखेज्जा
 सव्वंसो तं ण कप्पए ॥ १५ ॥ हणंतं णाणुजाणेज्जा आथगुत्ते जिईदिए । ठाणाई
 संति सद्धीणं गामेसु नगरेसु वा ॥ १६ ॥ तहा गिरं समारम्भ अत्थि पुण्णं ति णो

वए । अहवा णत्थि पुण्णं ति एवमेयं महब्भयं ॥ १७ ॥ दाणट्टया य जे पाणा हम्मति तसथावरा । तेसिं सारक्खणट्टाए तम्हा अत्थि सि णो वए ॥ १८ ॥ जेसिं तं उवक्कंपति अण्णपाणं तहाविहं । तेसिं लाम्भंतरायं ति तम्हा णत्थि सि णो वए ॥ १९ ॥ जे य दाणं पसंसति वहमिच्छति पाणिणं । जे य णं पडिसेहंति वित्तिच्छेयं करंति ते ॥ २० ॥ बुहुओ वि ते ण भासति अत्थि वा णत्थि वा पुणो । आयं रयस्स हेच्चा णं णिव्वाणं पाउणंति ते ॥ २१ ॥ णिव्वाणं परमं बुद्धा णक्खत्ताण व चंदिमा । तम्हा सया जए दंते णिव्वाणं संघए मुणी ॥ २२ ॥ बुद्धमाणाण पाणाणं किच्छंताण सकम्मुणा । आघाइ साहु तं दीवं पइट्ठेसा एवुच्चई ॥ २३ ॥ आयगुत्ते सया दंते छिण्णसोए अणासवे । जे धम्मं सुद्धमकंत्ताइ पडिपुण्णमणेत्तिसं २४ ॥ तमेव अवि-
याणंता अबुद्धा बुद्धमाणिणो बुद्धा मो सि य मण्णंता अंत एए समाहिए ॥ २५ ॥ ते य वीओदगं चेव तमुद्दिस्सा य जं कडं । भोच्चा ज्ञाणं ज्ञियायंति अस्सेयण्णाऽसमाहिया ॥ २६ ॥ जहा टंका य कंका य कुल्लया मग्गुका सिही । मच्छेसणं ज्ञियायंति ज्ञाणं ते कल्लु साधमं ॥ २७ ॥ एवं तु समणा एगे मिच्छदिट्ठी अणारिया । विसएसणं ज्ञिया-
यंति कंका वा कल्लुसाहमा ॥ २८ ॥ सुद्धं मग्गं विराहिता इहमेगे उ दुम्मई । उम्मग्गगया दुक्खं घायमेसंति तं तहा ॥ २९ ॥ जहा आसाविणिं णावं जाइअंधो दुरूहिया । इच्छई पारमार्गतुं अंतरा य विसीयइ ॥ ३० ॥ एवं तु समणा एगे मिच्छदिट्ठी अणारिया । सोयं कसिणमावण्णा आगंतारो महब्भयं ॥ ३१ ॥ इमं च धम्ममायाय कासवेण पवेइयं । तरे सोयं महाघोरं अत्तत्ताए परिच्चए ॥ ३२ ॥ विरए गामधम्मेहिं जे केई जगई जगा । तेसिं अत्तुवमायाए धामं कुल्लं परिच्चए ॥ ३३ ॥ अइमाणं च मायं च तं परिणाय पण्डिए । सव्वमेयं णिराकिच्चा णिव्वाणं संघए मुणी ॥ ३४ ॥ संघए साहुधम्मं च पावधम्मं णिराकरे । उवहाणवीरिए भिक्खू कोहं माणं ण पत्थए ॥ ३५ ॥ जे य बुद्धा अइकंता जे य बुद्धा अणागया । संति तेसिं पइट्ठाणं भूयाणं जगई जहा ॥ ३६ ॥ अहं णं वयमावण्णं फासा उच्चावया फुत्से । ण तेसु विणिहण्णेज्जा वाएण व महागिरी ॥ ३७ ॥ संवुडे से महापण्णे धीरे दत्तेसणं चरे । णिव्बुडे कालमाकंखी एवं केवल्लिणो मयं ॥ ३८ ॥ ति बेमिं ॥

॥ समोसरणं णाम वारसमं अज्झयणं ॥

चत्तारि समोसरणाणिमाणि पावादुया जाइं पुढो वयंति । किरियं अकिरियं

विणर्थ ति तहयं अण्णाणमाहंसु चउत्थमेव ॥ १ ॥ अण्णाणिया ता कुसला वि संता
 असंथुया णो वितिभिच्छतिण्णा । अकोविया आहु अकोवियेहिं अणाणुवीइत्तु मुसं
 वयंति ॥ २ ॥ सच्चं असच्चं इति चित्तयंता असाहु साहु त्ति उदाहरंता । जेमे
 जणा वेणइया अणेगे पुट्ठा वि भावं विणइंसु णाम ॥ ३ ॥ अणोवसंखा इइ ते
 उदाहु अट्टे स ओभासइ अम्ह एवं । लवावसंकी य अणागएहिं णो किरियमाहंसु
 अकिरियवाई ॥ ४ ॥ संमिस्सभावं च गिरा गहीए से मुम्मुई होइ अणाणुवाई ।
 इमं दुपक्खं इममेगपक्खं आहंसु छलाययणं च कम्मं ॥ ५ ॥ ते एवमक्खंति
 अबुज्जमाणा विरूवरूवाणि अकिरियवाई । जे मायइत्ता बहवे मणूसा भमंति
 संसारमणोवदग्गं ॥ ६ ॥ णाइच्चो उएइ ण अत्थमेइ ण चंदिमा वड्डइ हायई वा ।
 सल्लिा ण संदंति ण वंति वाया वंझो गियओ कसिणे हु लोए ॥ ७ ॥ जहा हि
 अंधे सह जोइणा वि रूवाई णो पस्सइ हीणणेत्ते । संतं पि ते एवमकिरियवाई
 किरियं ण पस्संति णिरुद्धपण्णा ॥ ८ ॥ संबच्छरं सुविणं लक्खणं च णिमित्तदेहं च
 उप्पाइयं च । अट्ठंगमेयं बहवे अहित्ता लोगंसि जाणति अणागयाइं ॥ ९ ॥ केइ
 णिमित्ता तहिया भवंति केसिंत्ति तं विप्पडिएइ णाणं । ते विज्जभावं अणहिज्ज-
 माणा आहंसु विज्जा परिमोक्खमेव ॥ १० ॥ ते एवमक्खंति समिच्च लोगं तथा
 तथा समणा माहणा य । सयंकडं णण्णकडं च दुक्खं आहंसु विज्जाचरणं पमोक्खं
 ॥ ११ ॥ ते चक्खु लोगंसिह णायगा उ मग्गाणुसासंति हियं पयाणं । तथा तथा
 सासयमाहु लोए जंसी पया माणव ! संपगाढा ॥ १२ ॥ जे रक्खसा वा जमलोइया
 वा जे वा सुरा गंधवा य काया । आग्गासगामी य पुटोसिया जे पुणो पुणो
 विप्परियासुवेंति ॥ १३ ॥ जमाहु ओहं सल्लिलं अपारगं जाणाहि णं भवगहणं
 दुमोक्खं । जंसी विसण्णा विसयंगणाहिं दुहओऽवि लोयं अणुसंचरंति ॥ १४ ॥ ण
 कम्मुणा कम्म खवंति बाला अकम्मुणा कम्म खवंति धीरा । मेहाविणो लोभमया-
 वईया संतोसिणो णो पकरंति पावं ॥ १५ ॥ ते तीयउप्पणमणागयाइं लोगस्स जाणति
 तहागयाइं । गेयारो अण्णेसि अणण्णेया बुद्धा हु ते अंतकडा भवंति ॥ १६ ॥ ते
 णेव कुव्वंति ण कारवेंति भूयाहिसंकाइ दुगुंछमाणा । सया जया विप्पणमंति धीरा
 विण्णत्ति धीरा य हवंति एगे ॥ १७ ॥ डहरे य पाणे बुद्धे य पाणे ते अत्तओ पासइ
 सव्वलोए । उव्वेहईलोगमिणं भहंतं बुद्धेऽपमत्तेसु परिव्वएज्जा ॥ १८ ॥ जे आयओ

परओ वा वि ण्वा अलमप्पणो होति अलं परेसिं । तं जोइभूर्यं च सयावसेज्जा जे पाउकुज्जा अणुवीइधम्मं ॥१९॥ अत्ताण जो जाणइ जो य लोमं गइं च जो जाणइ प्रागइं च । जो सासयं जाण असासयं च जाइं च मरणं च जणोववायं ॥ २० ॥ अहो वि सत्ताण विउट्टणं च जो आसवं जाणइ संवरं च । दुक्खं च जो जाणइ णिज्जरं च सो भासिउमरिहइ किरियवायं ॥ २१ ॥ सहेसु रूवेसु असज्जमाणे गंधेसु रसेसु अदुस्समाणे । णो जोवियं णो मरणाहिकंखी आयाणगुत्ते वलया विमुक्के ॥२२॥ त्ति वेमि ॥

आहत्तहीयं णाम तेरसमं अज्झयणं

आहत्तहीयं तु पवेयइस्सं णाणप्पकारं पुरिसस्स जायं । सओ य धम्मं असओ असीलं संतिं असंतिं करिस्सामि पाउं ॥ १ ॥ अहो य राओ य समुट्ठिएहिं तहागएहिं पडिलब्भ धम्मं । समाहिमात्रायमजोसयंता सत्थारमेवं फरुसं वयंति ॥ २ ॥ विसोहियं ते अणुकाहयंते जे आयभावेण वियागरेज्जा । अट्टाणिए होइ ब्रह्मगुणाणं जे णाणसंकाइ मुसं वएज्जा ॥ ३ ॥ जे यावि पुट्टा पलिउंचयंति आयाणमट्ठं खल्लु वंचइत्ता । असाहुणो ते इह साहु माणी मायणिण एस्संति अणंतघायं ॥ ४ ॥ जे कोहणे होइ जयट्टभासी विओसियं जे उ उदीरएज्जा । अंधे व से दंडपहं गहाय अविओसिए धासइ पावकम्मी ॥ ५ ॥ जे विग्गहीए अण्णायभासी ण से समे होइ अइंझपत्ते । उवायकारी य हिरोमणे य एगंतदिट्ठी य अमाइरूवे ॥ ६ ॥ से पेसले सुहुमे पुरिसजाए ज्वण्णिणए चेव सुउज्जुयारे । बहं पि अणुसासिए जे तहच्चा समे हु से होइ अइंझपत्ते ॥ ७ ॥ जे यावि अप्पं सुमं ति मत्ता संखाय वायं अपरिकख कुज्जा । तवेण वाहं सहिउ त्ति मत्ता अण्णं जणं पस्सइ विम्बभूर्यं ॥ ८ ॥ एगंत-कूडेण उ से पलेइ ण विज्जई मोगपर्यसि गोत्ते । जे माण्णट्टेण विउकसेज्जा वसु-मण्णतरेण अबुज्जमाणे ॥ ९ ॥ जे माहणे खत्तियजायए वा तहुग्गपुत्ते तह लेच्छई वा । पव्वईए परदत्तभोई गोत्ते ण जे थब्भइ माणवद्धे ॥ १० ॥ ण तस्स जाई व कुलं व ताणं णणत्थ विज्जाचरणं सुच्चिण्णं । णिक्खम्म से सेवइऽगारिकम्मं ण से पारए होइ विमोयणाए ॥ ११ ॥ णिक्किंचणे भिक्खु सुल्लहजीवी जे गारवं होइ सिलोगकामी । आजीवमेयं तु अबुज्जमाणो पुणो पुणो विप्परियासुवेंति ॥ १२ ॥ जे भासवं भिक्खु सुसाहुवाइं पडिहाणवं होइ विसारए थ । आगादपणे सुविभावि-

यप्पा अण्णं जणं पण्णया परिह्वेज्जा ॥ १३ ॥ एवं ण से होइ समाहिपत्ते जे पण्णवं भिक्खू विउक्कसेज्जा । अहवा वि जे लाहमयावलिच्चे अण्णं जणं खिसइ बालपण्णे ॥ १४ ॥ पण्णामयं चव तवोमयं च णिण्णामए गोयमयं च भिक्खू । आजीवगं चव चउत्थमाहु से पंडिए उत्तमपोगगले से ॥ १५ ॥ एयाइं मयाइं विगिंच धीरा ण ताणि सेवंति सुधीरधम्मा । ते सव्वगोत्तावगया महेसी उच्चं अगोत्तं च गहं वयंति ॥ १६ ॥ भिक्खू मुयच्चे तह दिट्ठधम्मं गामं च णगरं च अणुप्प-विस्सा । से एसणं जाणमणेसणं च अण्णस्स पाणस्स अणाणुगिद्धे ॥ १७ ॥ अरइं रइं च अभिभूय भिक्खू बहूजणे वा तह एगच्चारी । एगंतमोणेण वियागरेज्जा एगस्स जंतो गइरागई य ॥ १८ ॥ सयं समेच्चा अदुवा वि सोच्चा भासेज्ज धम्मं हिययं पयाणं । जे गरहिया सणियाणप्पओगा ण ताणि सेवंति सुधीरधम्मा ॥ १९ ॥ केसिंचि तक्काइ अबुज्झ भावं खुइं पि गच्छेज्ज असदहाणे । आउस्स कालाइयारं वघाए लद्धाणुमाणे य परेसु अट्ठे ॥ २० ॥ कम्मं च छंदं च विगिंच धीरे विण-इज्ज ऊ सव्वउ आयभावं । रुवेहि लुप्पंति भयावहेहिं विज्जं गहाया तसथावरेहिं ॥ २१ ॥ ण पूयणं चव सिलोयकामी पियमपियं कस्सइ णो करेज्जा । सव्वे अण्णट्ठे परिवज्जयंते अणाउले या अकसाइं भिक्खू ॥ २२ ॥ आहत्तहीयं समुपेहमाणे सव्वेहिं पाणेहिं णिहाय दंडं । णो जीवियं णो भरणाहिकंखी परिव्वएज्जा वलया विमुक्के ॥ २३ ॥ त्ति वेमि ॥

॥ गंथो णाम चउद्दसमं अज्जयणं ॥

गंथं विहाय इह सिक्खमाणो उट्ठाअ सुवम्भचेरं वसेज्जा । ओवासकारी विणयं सुसिक्खे जे छेय से विप्पमायं ण कुज्जा ॥ १ ॥ जहा दियापोयमरत्तजायं सावासगा पविउं मण्णमाणं । तमचाइयं तरुणमपत्तजायं ढंकाइ अव्वत्तगमं हरेज्जा ॥ २ ॥ एवं तु सेहं पि अपुट्ठधम्मं णिस्सारियं बुसिमं मण्णमाणा । दियस्स छांयं व अपत्त-जायं हरिसु णं पावधम्मा अणेगे ॥ ३ ॥ ओसाणमिच्छे मणुए समाहिं अणोसिए णंतकरिं ति णच्चा । ओभासमाणे दवियस्स वित्तं ण णिकसे बहिया आसुपण्णे ॥ ४ ॥ जे ठाणओ य सयणासणे व परक्कमे यावि सुसाहुजुत्ते । समिईसु गुत्तीसु य आय-पण्णे वियागरिं ते य पुटो वएज्जा ॥ ५ ॥ सदाणि सोच्चा अदु भेरवाणि अणासवे तेसु परिव्वएज्जा । णिइं च भिक्खू ण पमाय कुज्जा कहं कहं वा वित्तिगिच्छत्तिण्णे

॥६॥ डहरेण बुद्धेणऽगुसासिए उ राहणिएणावि समव्वएणं । सम्मं तयं थिरओ
 णाभिगच्छे णिजंतए वावि अपारए से ॥ ७ ॥ विउट्टिएणं समयानुसिट्ठे डहरेण
 बुद्धेण उ चोइए य । अच्चुट्ठि याए घडदासिए वा अमारिणं वा समयानुसिट्ठे
 ॥ ८ ॥ ण तेसु कुञ्जे ण य पव्वहेज्जा ण यावि किंची फरुसं वएज्जा । तहा करिरसं
 ति पड्डिसुणेज्जा सेयं खु मेयं ण पमाय कुञ्जा ॥ ९ ॥ वर्णसि मूढस्स जहा अमूढा
 मग्गानुसासंति हिये पयाणं । तेणेव मज्झं इणमेव सेयं जं मे बुहा समणुमासयंति
 ॥ १० ॥ अह तेण मूढेण अमूढगस्स कायव्व पूया सविसेसजुत्ता । एओवमं तत्थ
 उदाहु वीरे अणुगम्म अत्थं उवणेइ सम्मं ॥ ११ ॥ णेया जहा अंधकारंसि राओ
 मग्गं ण जाणाइ अपस्समाणे । से सूरियस्स अब्भुग्गमेणं मग्गं वियाणाइ पगासियंसि
 ॥ १२ ॥ एवं तु सेहे वि अपुट्टधम्मे धम्मं ण जाणाइ अबुज्जमाणे । से कोविए जिण-
 वयणेण पच्छा सूरौदए पासइ चक्खुणेव ॥ १३ ॥ उहुं अहे यं तिरियं दिसासु तसा
 य जे थावर जे य पाणा । सया जए तेसु परिव्वएज्जा मणप्पओसं अविकम्पमाणे
 ॥ १४ ॥ कालेण पुच्छे समियं पयासु आइक्खमाणे दवियस्स वित्तं । तं सोयकारी
 य पुट्ठो पवेसे संखा इमं केवलियं समाहिं ॥ १५ ॥ अस्सि सुट्ठिआ तिविहेण तार्या
 एएसु या संति णिरोहमाहु । ते एवमक्खंति तिलोगदंसी ण भुज्जमेयंति पमाय-
 संगं ॥ १६ ॥ णिसम्म से भिक्खू समीहियदुं पडिभाणवं होइ विसारए य ।
 आयाणअट्ठी वोदाणमोणं उवेच्च सुद्धेण उवेइ मोक्खं ॥ १७ ॥ संखाइ धम्मं च
 वियागरंति बुद्धा हु ते अंतकरा भवंति । ते पारगा दोण्ह वि मोयणाए संसोधियं
 पण्हमुदाहरंति ॥ १८ ॥ णो छायए णो वि य लूसएज्जा माणं ण सेवेज्ज पगासणं
 च । ण यावि पण्णे परिहास कुञ्जा ण याऽऽसियावाय वियागरेज्जा ॥ १९ ॥ भूया-
 भिसंकाइ दुगुंछमाणे ण णिव्वहे मंतपएण गोयं । ण किंचिमिच्छे मणुए पयासुं
 असाहुधम्माणि ण संवएज्जा ॥ २० ॥ हासं पि णो संघइ पावधम्मं ओए तहीयं
 फरुसं वियाणे । णो पुच्छए णो य विकंथइज्जा अणाइले या अकसाइ भिक्खू ॥ २१ ॥
 संकेज्ज याऽसंक्रियभाव भिक्खू विभज्जवार्यं च वियागरेज्जा । भासाहुयं धम्मसमु-
 ट्ठिएहिं वियागरेज्जा समयानुपण्णे ॥ २२ ॥ अणुगच्छमाणे वितहं विजाणे तहा
 तहा साहु अककसेणं । ण कत्थइ भास विहिंसइज्जा णिरुद्धं वावि ण दीहइज्जा
 ॥ २३ ॥ समालवेज्जा पडिपुण्णभासी णिसामिया समियाअट्ठदंसी । आणाइ सुद्धं

वयणं भिउंजे अमिसंघए पावविवेग भिक्खू ॥ २४ ॥ अहाबुइयाई सुसिक्खएज्जा
जइज्जा णाइवेले वएज्जा । से दिट्ठिमं दिट्ठि ण लूसएज्जा से जाणइ भासिउं तं समाहिं
॥ २५ ॥ अलूसए णो पच्छणभासी णो सुत्तमत्थं च करेज्ज ताई । सत्थारभत्ती
अणुवीइवायं सुयं च सम्मं पडिवाययति ॥ २६ ॥ से सुद्धसुत्ते उवहाणवं च धम्मं
च जे विंदइ तत्थ तत्थ । आएज्जवक्के कुसले वियत्ते स अरिहइ भासिउं तं समाहिं
॥ २७ ॥ त्ति वेमि ॥

॥ जमईए णाम पणरसमं अज्जयणं ॥

जमईअं पडुप्पणं आगमिस्सं च णायओ । सव्वं मणइ तं ताई दंसणावरणं-
तए ॥ १ ॥ अंतए वितिगिच्छाए से जाणइ अणेसिं । अणेसिस्स अक्खाया
ण से होइ तहिं तहिं ॥ २ ॥ तहिं तहिं सुयक्खायं से य सव्वे सुआहिए । सया
सघेण संपण्णे मेत्ति भूएहिं कप्पए ॥ ३ ॥ भूएहिं ण विरुज्जेज्जा एस धम्मे वुसी-
मओ । वुसिमं जगं परिण्णाय अस्सि जीवियभावणा ॥ ४ ॥ भावणाजोगसुद्धप्पा
जले णावा ण आहिया । णावा व तीरसंपण्णा सव्वदुक्खा तिउट्टइ ॥ ५ ॥ तिउ-
ट्टई उ मेहावी जाणं लोगंसि पावगं । तुट्ठंति पावक्कमाणि णवं कम्ममकुव्वओ
॥ ६ ॥ अकुव्वओ णवं णत्थि कम्मं णाम विजाणइ । विण्णाय से महावीरे जेण
जाई ण मिज्जई ॥ ७ ॥ ण मिज्जई महावीरे जस्स णत्थि पुरेकडं । वाउ व्व
जालमवेइ पिया लोगंसि इत्थियो ॥ ८ ॥ इत्थियो जे ण सेवंति आइमोक्खा हु
ते जणा । ते जणा बंधणुम्मुक्का णावकंखंति जीवियं ॥ ९ ॥ जीवियं पिट्ठओ किच्चा
अंतं पावंति कम्मणं । कम्मणा संसुहीभूया जे मग्गमणुसासई ॥ १० ॥
अणुसासणं पुढो पाणी वसुमं पूयणासु ते । अणासए जए दंते दढे अरय-
मेहुणे ॥ ११ ॥ णीवारे व ण लीएज्जा छिण्णसोए अणाविले । अणाइले सया
दंते संधिं पत्ते अणेसिं ॥ १२ ॥ अणेसिस्स खेयण्णे ण विरुज्जेज्ज केणइ ।
मणसा वयसा चेव कायसा चेव चक्खुमं ॥ १३ ॥ से हु चक्खू मणुस्ताणं
जे कंखाए य अंतए । अंतएण खुरो वहई चक्कं अंतएण लोट्टई ॥ १४ ॥ अंताणि धीरा
सेवंति तेण अंतकरा इह । इह माणुस्सए ठाणे धम्ममाराहिउं णरा ॥ १५ ॥ णिट्ठि-
बद्धा व देवा वा उत्तरीए इयं सुयं । सुयं य मेयमेगेसिं अमणुस्सेसु णो तथा ॥ १६ ॥
अंतं करतिं दुक्खाणं इहमेगेसिमाहियं । आघायं पुण एगेसिं दुल्लभेइयं समुस्सए

॥१७॥इओ विद्धंसमाणस्स पुणो संबोहि दुल्लहा । दुल्लहाओ तहच्चाओ जे धम्मद्वं
 वियागरे ॥१८॥ जे धम्मं सुद्धमक्खंति पडिपुण्णमणेत्तिसं । अणेत्तिसस्स जं ठाणं
 तस्स जम्मकहा कओ ॥ १९ ॥ कओ कयाइ मेहावी उप्पज्जंति तहागया । तहागया
 अप्पडिण्णा चक्खू लोमस्सगुत्तरा ॥ २० ॥ अणुत्तरे य ठाणे से कासवेण पवेइए ।
 जं किच्चा णिव्बुडा एगे णिट्ठं पावंति पंडिया ॥ २१ ॥ पंडिए वीरियं लद्धं णिग्घा-
 याय पवत्तगं धुणे पुव्वकडं कम्मं णवं वा वि ण कुव्वई ॥२२॥ ण कुव्वई महावीरे
 अणुपुव्वकडं रयं । रयसा संमुहीभूया कम्मं हेच्चाण जं मयं ॥ २३ ॥ जं मयं सव्व-
 साहूणं तं मयं सल्लगत्तणं । साहइत्ताण तं तिण्णा देवा वा अभविसु ते ॥ २४ ॥
 अभविसु पुरा धीरा आगमिस्सा वि सुव्वया । दुण्णिन्नोहस्स मग्गस्स अंतं पाउकरा
 तिण्णे ॥ २५ ॥ त्ति वेमि ॥

॥ गाहा णाम सोलसमं अज्झयणं ॥

अहाह भगवं—एवं से दंते दविए वोसट्टकाए त्ति वच्चे माहणे त्ति वा १ समणे
 त्ति वा २ भिक्खु त्ति वा ३ णिग्गथे त्ति वा ४ । पडिआह—मंते ! कहं णु दंते
 दविए वोसट्टकाए त्ति वच्चे माहणे त्ति वा समणे त्ति वा भिक्खू त्ति वा णिग्गथे त्ति
 वा । तं णो बूहि महामुणी ॥ इइ विरए सव्वपावकम्मोहिं पिज्जदोसकलह० अब्भ-
 क्खाण० पेसुण्ण० परपरिवाय० अरइरइ० माथामोस० मिच्छादंसणसल्लविरए
 समिए सहिए सया जए णो कुज्जे णो माणी माहणे त्ति वच्चे ॥ १ ॥ एत्थ वि
 समणे अणिसिए अणियाणे आयाणं च अइवायं च मुसावायं च बहिद्धं च कोहं च
 माणं च मायं च लोहं च पिज्जं च दोसं च इच्चेव जओ जओ आयाणं अप्पणो
 पद्दोसहेऊ तओ तओ आयाणाओ पुव्वं पडिविरए पाणाइवाया सिआ दंते दविए
 वोसट्टकाए समणे त्ति वच्चे ॥ २ ॥ एत्थ वि भिक्खू अणुण्णए विणीए णामए
 दंते दविए वोसट्टकाए संविधुणीय विरूवरूवे परीसहोवसग्गे अज्झप्पजोगसुद्धादाणे
 उवट्टिए ठिअप्पा संखाए परदत्तमोई भिक्खू त्ति वच्चे ॥ ३ ॥ एत्थ वि णिग्गथे
 एगे एगविऊ बुद्धे संछिण्णसोए सुसंजए सुसमिए सुसामाइए आयवायपत्ते विऊ
 दुहओ वि सोयपलिच्छिण्णे णो पूयणसक्कारलाभट्ठी धम्मट्ठी धम्मविऊ णियागपडि-
 वण्णे समियं चरे दंते दविए वोसट्टकाए णिग्गथे त्ति वच्चे ॥ ४ ॥ से एवमेव
 जाणह जमहं भयंतारो ॥ त्ति वेमि ॥ **पढमे सुयक्खंधे समत्ते ॥**

सुयगढो—बीओ सुयक्खंधो

पोंडरीए णाम पढमं अज्जयणं

सुयं मे आउसं तेणं भगवया एवमक्खार्यं । इह खलु पोण्डरीए णामज्जयणे तस्स णं अयमद्वे पण्णत्ते । से जहाणामए पुक्खरिणीं सिया बहुउदगा बहुसेया बहु-पुक्खला लद्धा पुण्डरिक्किणीं पासाइया दरिसणिया अभिरूवा पडिरूवा । तीसे णं पुक्खरिणीए तत्थ तत्थ देसे देसे तहिं तहिं बहवे पउमवरपोण्डरीया बुइया, अणु-पुव्वुट्टिया ऊसिया रुइला वण्णमंता गंधमंता रसमंता फासमंता पासाइया दरि-सणिया अभिरूवा पडिरूवा । तीसे णं पुक्खरिणीए बहुमज्जदेसभाए एगे महं पउमवरपोण्डरीए बुइए, अणुपुव्वुट्टिए ऊसिए रुइले वण्णमंते गंधमंते रसमंते फासमंते पासादीए जाव पडिरूवे । सव्वावंति च णं तीसे पुक्खरिणीए तत्थ तत्थ देसे देसे तहिं तहिं बहवे पउमवरपोण्डरीया बुइया अणुपुव्वुट्टिया ऊसिया रुइला जाव पडिरूवा । सव्वावंति च णं तीसे णं पुक्खरिणीए बहुमज्जदेसभाए एगे महं पउमवरपोण्डरीए बुइए अणुपुव्वुट्टिए जाव पडिरूवे ॥१॥ अहं पुरिसे पुरित्थि-माओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुट्टियं ऊसियं जाव पडिरूवं । तए णं से पुरिसे एवं वयासी—अहंमंसि पुरिसे खेयण्णे कुसले पण्डिए वियत्ते मेहावी अवाले मग्गद्वे मग्गविरु मग्गस्स गइपरिक्कमण्णू । अहमेयं पउमवरपोण्डरीयं उण्णिक्खिस्सामि त्ति कट्टु इह बुया से पुरिसे अभिक्कमेइ तं पुक्खरिणिं । जावं जावं च णं अभिक्कमेइ तावं तावं च णं महंते उदए महंते सेए पहीणे तीरं अपत्ते पउमवरपोण्डरीयं णो हव्वाए णो पाराए अंतरा पुक्खरिणीए सेयंसि णिसण्णे पढमे पुरिसजाए ॥ २ ॥ अहावरे दोच्चे पुरिसजाए । अहं पुरिसे दक्खिणाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुट्टियं पासाइयं जाव पडिरूवं । तं च एत्थ एगं पुरिसजायं पासइ पहीण-तीरं अपत्तपउमवरपोण्डरीयं णो हव्वाए णो पाराए अंतरा पुक्खरिणीए सेयंसि णिसण्णं । तए णं से पुरिसे तं पुरिसं एवं वयासी—अहो णं इमे पुरिसे अखेयण्णे

अकुसले अपण्डिए अवियत्ते अमेहावी बाले णो मग्गट्ठे णो मग्गविऊ णो मग्गस्स गइपरिक्कमणू जं णं एस पुरिसे । अहमंसि खेयण्णे कुसले जाव पउमवरपोण्डरीयं उण्णिक्खिस्सामि । णो य खलु एयं पउमवरपोण्डरीयं एवं उण्णिक्खेयव्वं जहा णं एस पुरिसे मण्णे । अहमंसि पुरिसे खेयण्णे कुसले पण्डिए वियत्ते मेहावी अत्राले मग्गट्ठे मग्गविऊ मग्गस्स गइपरिक्कमणू, अहमेयं पउमवरपोण्डरीयं उण्णिक्खिस्सामि त्ति कट्टु इइ बुया से पुरिसे अभिक्कमे तं पुक्खरिणिं । जावं जावं च णं अभिक्कमेइ तावं तावं च णं महंते उदए महंते सेए पहीणे तीरं अपत्ते पउमवरपोण्डरीयं णो हव्वाए णो पाराए अंतरा पुक्खरिणीए, सेयंसि णिसण्णे दोच्चे पुरिसजाए ॥ ३ ॥ अहावरे तच्चे पुरिसजाए । अह पुरिसे पच्चत्थिमाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं एगं महं पउमवरपोण्डरीयं अणुपुव्वुद्धियं जाव पडिरूवं । ते तत्थ दोण्णि पुरिसजाए पासइ पहीणे तीरं अपत्ते पउमवरपोण्डरीयं णो हव्वाए णो पाराए जाव सेयंसि णिसण्णे । तए णं से पुरिसे एवं वयासी-अहो णं इमे पुरिसा अखेयण्णा अकुसला अपण्डिया अवियत्ता अमेहावी बाला णो मग्गट्ठा णो मग्गविऊ णो मग्गस्स गइपरिक्कमणू जं णं एए पुरिसा एवं मण्णे-अह्हे एयं पउमवरपोण्डरीयं उण्णिक्खिस्सामो णो य खलु एयं पउमवरपोण्डरीयं एवं उण्णिक्खेयव्वं जहा णं एए पुरिसा मण्णे । अहमंसि पुरिसे खेयण्णे कुसले पण्डिए वियत्ते मेहावी अत्राले मग्गट्ठे मग्गविऊ मग्गस्स गइपरिक्कमणू अहमेयं पउमवरपोण्डरीयं उण्णिक्खिस्सामि त्ति कट्टु इइ बुच्चा से पुरिसे अभिक्कमे तं पुक्खरिणिं । जावं जावं च णं अभिक्कमे तावं तावं च णं महंते उदए महंते सेए जाव अंतरा पुक्खरिणीए सेयंसि णिसण्णे तच्चे पुरिसजाए ॥ ४ ॥ अहावरे चउत्थे पुरिसजाए । अह पुरिसे उत्तराओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुद्धियं जाव पडिरूवं । ते तत्थ तिण्णि पुरिसजाए पासइ पहीणे तीरं अपत्ते जाव सेयंसि णिसण्णे । तए णं से पुरिसे एवं वयासी-अहो णं इमे पुरिसा अखेयण्णा जाव णो मग्गस्स गइपरिक्कमणू जं णं एए पुरिसा एवं मण्णे-अह्हे एयं पउमवरपोण्डरीयं उण्णिक्खिस्सामो णो य खलु एयं पउमवरपोण्डरीयं एवं उण्णिक्खेयव्वं जहा णं एए पुरिसा मण्णे । अहमंसि पुरिसे खेयण्णे जाव मग्गस्स गइपरिक्कमणू, अहमेयं पउमवरपोण्डरीयं एवं

उष्णिक्खिस्सामि त्ति कट्टु इइ बुच्चा से पुरिसे अभिक्कमे तं पुक्खरिणि । जावं जावं च णं अभिक्कमे तावं तावं च णं महंते उदए महंते सेए जाव णिसण्णे चउत्थे पुरिस ज्ञाए ॥ ५ ॥ अह भिक्खू लूहे तीरट्ठी खेयण्णे जाव गइपरिक्कमण्णू अण्णय-राओ दिसाओ वा अणुदिसाओ वा आगम्म तं पुक्खरिणि तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं जावं पडिख्वं । ते तत्थ चत्तारि पुरि-सजाए पासइ पहीणे तीरं अपत्ते जाव पउमवरपोण्डरीयं णो ह्ववाए णो पाराए अंतरा पुक्खरिणीए सेयंसि णिसण्णे । तए णं से भिक्खू एवं वयासी-अहो णं इमे पुरिसा अखेयणा जाव णो मग्गस्स गइपरिक्कमण्णू जं एए पुरिसा एवं मण्णे अह्हे एयं पउमवरपोण्डरीयं उष्णिक्खिस्सामो, णो य खलु एयं पउमवरपोण्डरीयं एवं उष्णिक्खेयव्वं जहा णं एए पुरिसा मण्णे । अहमंसि भिक्खू लूहे तीरट्ठी खेयण्णे जाव मग्गस्स गइपरिक्कमण्णू अहमेयं पउमवरपोण्डरीयं उष्णिक्खिस्सामि त्ति कट्टु इइ बुच्चा से भिक्खू णो अभिक्कमे तं पुक्खरिणि तीसे पुक्खरिणीए तीरे ठिच्चा सहं कुञ्जा-उप्पयाहि खलु भो पउमवरपोण्डरीया ! उप्पयाहि । अह से उप्पइए पउम-वरपोण्डरीए ॥ ६ ॥ किट्ठिए णाए समणाउसो ! अट्ठे पुण से जाणियव्वे भवइ । भंते ! त्ति समणं भगवं महावीरं णिग्गंथा य णिग्गंथीओ य वंदंति णमंसंति वंदित्ता णमंसित्ता एवं वयासी-किट्ठिए णाए समणाउसो ! अट्ठं पुण से ण जाणामो समणाउसो त्ति । समणे भगवं महावीरे ते य ब्रह्मे णिग्गंथे य णिग्गंथीओ य आमंतेत्ता एवं वयासी-हंस समणाउसो ! आइक्खामि विभावेमि किट्ठेमि पवेएमि सअट्ठं सहेउं सणि-मित्तं भुज्जो भुज्जो उवदंसेमि से बेमि ॥ ७ ॥ लोयं च खलु मए अप्पाहट्टु समणाउसो ! पुक्खरिणीं बुइया । कम्मं च खलु मए अप्पाहट्टु समणाउसो ! से उदए बुइए । कामभोगे य खलु मए अप्पाहट्टु समणाउसो ! से सेए बुइए । जणजाणवयं च खलु मए अप्पाहट्टु समणाउसो ! ते बह्वे पउमवरपोण्डरीए बुइए । रायाणं च खलु मए अप्पाहट्टु समणाउसो ! से एगे महं पउमवरपोण्डरीए बुइए । अण्ण-तिथिया य खलु मए अप्पाहट्टु समणाउसो ! ते चत्तारि पुरिसजाया बुइया । धम्मं च खलु मए अप्पाहट्टु समणाउसो ! से भिक्खू बुइए । धम्मतित्थं च खलु मए अप्पाहट्टु समणाउसो ! से तीरे बुइए । धम्मकहं च खलु मए अप्पाहट्टु सम-णाउसो ! से सहे बुइए । णिव्वाणं च खलु मए अप्पाहट्टु समणाउसो ! से उप्पाए

बुद्धए । एवमेयं च खलु मए अण्णाहट्टु समणाउसो ! से एवमेयं बुद्धयो ॥ ८ ॥ इह खलु
 पाईणं वा पडीणं वा उदीणं वा दाहिणं वा संतेगइया मणुस्सा भवंति अणुपुव्वेणं
 लोगं उववण्णा । तंजहा--आरिया वेगे अणारिया वेगे उच्चागोया वेगे पीयागोया
 वेगे कायमंता वेगे रहस्समंता वेगे सुवण्णा वेगे दुव्वण्णा वेगे सुरूवा वेगे दुरूवा
 वेगे । तेसिं च णं मणुयाणं एगे राया भवइ महथा हिमवंतमलयमंदरमहिंदसारे
 अचंतविसुद्धरायकुलवंसप्पसूए गिरंतररायलक्खणविराइयंगमगे बहुजणवहुमाण-
 पूइए सव्वगुणसमिद्धे खतिए मुदिए मुद्धाभिसित्ते माउपिउसुजाए दयणिए
 सीमंकरे सीमंधरे खेमंकरे खेमंधरे मणुस्सिंदे जणवयपिया जणवयपुरोहिए सेउ-
 करे केउकरे णरपवरे पुरिसपवरे पुरिससीहे पुरिसआसीविसे पुरिसवरपोण्हरीए
 पुरिसवरंगभ्रहत्थी अद्धे दित्ते वित्ते विच्छिण्णविउलभवणसयणासणजाणवाहाणइणो
 बहुधणवहुजायरूवरयए आओगपओगसंपउत्ते विच्छड्डियपठरभत्तपाणे ब्रहुदासीदास-
 गोमहिसगवेलगप्पभूए पडिपुण्णकोसकोट्टागाराउहागारे बलवं दुब्बलपच्चामित्ते
 ओहयकण्ठयं णिहयकण्ठयं मलियकण्ठयं उद्धियकण्ठयं अकण्ठयं ओहयसत्तू णियहसत्तू
 मलियसत्तू उद्धियसत्तू णिज्जियसत्तू पराइयसत्तू ववगबदुब्बिभक्खमारिभयविप्पमुक्कं
 (रायवण्णओ जहा उववाइए) जाव पसंतडिम्बडमरं रज्जं पसाहेमाणे विहरइ ।
 तस्स णं ण्णो परिसा भवइ उग्गा उग्गपुत्ता भोगा भोगपुत्ता इक्खागाइ इक्खागाइ-
 पुत्ता णाया णायपुत्ता कोरव्वा कोरव्वपुत्ता भट्टा भट्टपुत्ता माहणा माहणपुत्ता लेच्छइ
 लेच्छइपुत्ता पसत्थारो पसत्थपुत्ता सेणावई सेणावइपुत्ता । तेसिं च णं एगइए सद्धी
 भवइ कामं तं समणा वा माहणा वा संपहारिंसु गमणाए । तत्थ अण्णयरेणं धम्मेणं
 पण्णत्तारो वयं इमेणं धम्मेणं पण्णवइस्सामो से एवमायाणह भयंतारो जहा मए एस
 धम्मो सुयक्खाए सुपण्णत्ते भवइ । तं जहा—उड्ढं पायतला अहे केस्सगमत्थया तिरियं
 तयपरियंते जीवे एस आयापज्जवे कसिणे एस जीवे जीवइ, एस मए णो जीवण,
 सरीरे धरमाणे धरइ विणट्टमिम य णो धरइ । एयं तं जीवियं भवइ, आदहणाए परेहिं
 णिज्जइ, अगणिञ्जामिए सरीरे कवोययण्णाणि अट्ठीणि भवंति आसंठीपंचमा पुरिसा
 गामं पच्चागच्छंति, एवं असंते असंविज्जमाणे । जेसिं तं असंते असंविज्जमाणे तेसिं
 तं सुयक्खायं भवइ--अण्णो भवइ जीवो अण्णं सरीरं, तम्हा ते एव णो विपडिवे-
 देंति-अयमाउसो ! आया दीहे त्ति वा हस्से त्ति वा परिमण्डले त्ति वा वट्टे त्ति वा तंसे

त्ति वा चउरसे त्ति वा आयए त्ति वा छलंसिए त्ति वा अट्टसे त्ति वा किण्हे त्ति वा णीले त्ति वा लोहियहाल्लिंहे त्ति वा सुक्खिले त्ति वा सुब्भिग्घे त्ति वा दुब्भिग्घे त्ति वा तित्ते त्ति वा कड्डुए त्ति वा कसाए त्ति वा अम्भिले त्ति वा महुरे त्ति वा कक्खडे त्ति वा मउए त्ति वा गुरुए त्ति वा लहुए त्ति वा सीए त्ति वा उस्सिणे त्ति वा णिद्धे त्ति वा लुक्खे त्ति वा । एवं असंते असंविज्जमाणे । जेसिं तं सुयक्खायं भवइ-अण्णो जीवो अण्णं सरीरं, तम्हा ते णो एवं उवलब्भंति । से जहाणामए-केइ पुरिसे कोसीओ असिं अभिणिव्वट्टित्ता णं उवदंसेज्जा अयमाउसो ! असी अयं कोसी, एवमेव णत्थि केइ पुरिसे अभिणिव्वट्टित्ता णं उवदंसेत्तारो अयमाउसो ! आया इयं सरीरं । से जहाणामए केइ पुरिसे मुंजाओ इसियं अभिणिव्वट्टित्ता णं उवदंसेज्जा अयमाउसो ! मुंजे इयं इसियं, एवमेव णत्थि केइ पुरिसे उवदंसेत्तारो अयमाउसो आया इयं सरीरं । से जहाणामए-केइ पुरिसे मेसाओ अट्टिं अभिणिव्वट्टित्ता णं उवदंसेज्जा अयमाउसो ! मेसे अयं अट्टी, एवमेव णत्थि केइ पुरिसे उवदंसेत्तारो अयमाउसो ! आया इयं सरीरं । से जहाणामए-केइ पुरिसे करयलाओ आमलकं अभिणिव्वट्टित्ता णं उवदंसेज्जा अयमाउसो ! करयले अयं आमलए, एवमेव णत्थि केइ पुरिसे उवदंसेत्तारो अयमाउसो ! आया इयं सरीरं । से जहाणामए केइ पुरिसे दहीओ णवणीयं अभिणिव्वट्टित्ता णं उवदंसेज्जा अयमाउसो ! णवणीयं अयं तु दही, एवमेव णत्थि केइ पुरिसे जाव सरीरं । जे जहाणामए-केइ पुरिसे तिलेहिंतो तेळं अभिणिव्वट्टित्ता णं उवदंसेज्जा अयमाउसो तेळं अयं पिण्णाए, एवमेव जाव सरीरं । से जहाणामए-केइ पुरिसे इक्खूओ खोयरसं अभिणिव्वट्टित्ता णं उवदंसेज्जा अयमाउसो ! खोयरसे अयं छोए, एवमेव जाव सरीरं । से जहाणामए-केइ पुरिसे अरणीओ अरिगिं अभिणिव्वट्टित्ता णं उवदंसेज्जा अयमाउसो ! अरणी अयं अग्गी, एवमेव जाव सरीरं । एवं असंते असंविज्जमाणे । जेसिं तं सुयक्खायं भवइ तं जहा-अण्णो जीवो अण्णं सरीरं । तम्हा ते भिच्छा ॥ से हंता तं हणह लणह छणह डहह पयह आलुम्पह विलुम्पह सह-सक्कारेह विपरामुसंह, एयावया जीवे णत्थि परलोए । ते णो एवं विप्पडिवेदेंति, तं जहा-किरिया इ वा अकिरिया इ वा सुक्खडे इ वा दुक्खडे इ वा कल्लाणे इ वा पावए इ वा साहु इ वा असाहु इ वा सिद्धी इ वा असिद्धी इ वा णिए इ वा अणिए इ वा । एवं ते विरूवरूवेहिं कम्मसमारंमेहिं विरूवरूवाइं कामभोगाइं समारंभंति

भोयणाए ॥ एवं एगे पागब्भिया णिक्खम्म मामगं भम्मं पण्णवेति । तं सदहमाणा
 तं पत्तियमाणा तं रोएमाणा साहु सुयक्खाए समणे त्ति वा माहणे त्ति वा कामं खल
 आउसो ! तुमं पूययामि, तं जहा--असणेण वा पाणेण वा खाइमेण वा साइमेण वा
 वत्थेण वा पडिग्गहेण वा कम्बलेण वा पायपुंछणेण वा । तत्थेणे पूयणाए समा-
 उट्ठिसु तत्थेणे पूयणाए णिकाइंसु ॥ पुव्वमेव तेसि णायं भवइ--समणा भविस्सामो
 अणगारा अक्किचणा अपुत्ता अपसू परदत्तभोइणो भिक्खुणो पावं कम्मं णो करि-
 स्सामो समुट्ठाए । ते अप्पणा अप्पडिविरया भवन्ति, सयमाइयन्ति अण्णे वि आइयावेत्ति
 अण्णं वि आययत्तं समणुजाणंति एवमेव ते इत्थिकामभोगेहिं मुच्छिया गिडा गदिया
 अज्झोववण्णा लुद्धा रागदोसवसट्ठा । ते णो अप्पणं समुच्छेदेत्ति ते णो परं समुच्छे-
 देत्ति ते णो अण्णाइं पाणाइं भूयाइं जीवाइं सत्ताइं समुच्छेदेत्ति, पहीणा पुव्वसंजोगं
 आयरियं मग्गं असंपत्ता इइ ते णो हव्वाए णो पाराए अंतरा कामभोगेसु
 विसण्णा । इइ पढमे पुरिसजाए तज्जीवतच्छरीरए त्ति आहिए ॥ ९ ॥

अहावरे दोचे पुरिसजाए पंचमहब्भूइए त्ति आहिज्जइ । इह खलु पाईणं वा ६
 संतेगइया मणुस्सा भवन्ति अणुपुव्वेणं लोयं उववण्णा, तं जहा--आरिया वेगे अणा-
 रिया वेगे एवं जाव दुक्खा वेगे । तेसिं च णं महं एगे राया भवइ महया एवं
 चेव गिरवसेसं जाव सेणावइपुत्ता । तेसिं च णं एगइए सद्धी भवइ कामं तं समणा
 य माहणा य पहारिंसु गमणाए । तत्थ अण्णवरेणं धम्मेणं पण्णत्तारो वयं इमेणं
 धम्मेणं पण्णवइस्सामो से एवमायाणह भयंतारो ! जहा मए एस धम्मे सुअक्खाए
 सुपण्णंते भवइ । इह खलु पंचमहब्भूया जेहिं णो विज्जइ किरिया त्ति वा अकिरिया
 त्ति वा सुक्कडे त्ति वा दुक्कडे त्ति वा कल्लाणे त्ति वा पावए त्ति वा साहु त्ति वा
 असाहु त्ति वा सिद्धि त्ति वा असिद्धि त्ति वा गिरए त्ति वा अगिरए त्ति वा अवि
 अंतसो तणमायमधि । तं च पिहुदेसेणं पुढोभूयसमवायं जाणेजा । तं जहा पुढवी एगे
 महब्भूए, आऊ दुक्खे महब्भूए, तेऊ तच्चे महब्भूए, वाऊ चउत्थे महब्भूए, आगामे
 पंचमे महब्भूए । इच्चेए पंच महब्भूया अणिम्मिया अणिम्माविया अकडा णो
 कित्तिमा णो कडगा अणाइया अग्निहणा अवंक्षा अपुरोहिया सत्तंता सासया आया-
 छट्ठा । पुण एगे एवमाहु--सओ णत्थि विणालो असओ णत्थि संभवो । एयावया
 व जीवकाए एयावया व अत्थिकाए एयावया व सब्वलोए, एयं मुहं लोगस्स

करणयाए, अवि अंतसो तणमायमवि । से किणं किणावेमाणे हणं घायमाणे पयं पया-
चेमाणे अवि अंतसो पुरिसमवि कीणित्ता घायइत्ता एत्थं पि जाणाहि णत्थित्थ दोसो ।
ते णो एवं विप्पडिवेदंति । तं जहा-किरिया इ वा जाव अणिरए इ वा । एवं ते
विरुवरूवेहिं कम्मसमारंभेहिं विरुवरूवाइं कामभोगाइं समारंभंति भोयणाए । एव-
मेव ते अणारिया विप्पडिवण्णा तं सहहमाणा तं पत्तियमाणा जाव इइ ते णो
हव्वाए णो पाराए अंतरा कामभोगेसु विसण्णा । दोच्चे पुरिसजाए पंचमहब्भूइए
त्ति आहिण ॥१०॥ अहावरे तच्चे पुरिसजाए ईसरकारणिए त्ति आहिण्णइ । इहं
खलु पाईणं वा ६ संतेगइया मणुस्सा भवंति अणुपुव्वेणं लोयं उववण्णा । तं जहा-
आरिया वेसे जाव तेसिं च णं महंते एगे राया भवइ जाव सेणावइपुत्ता । तेसिं
च णं एगइए सद्धी भवइ, कामं तं समणा य माहणा य पहारिसु गमणाए जाव
जहा मए एस धम्मे सुयक्खाए सुपण्णत्ते भवइ । इह खलु धम्मा पुरिसाइया
पुरिसोत्तरिया पुरिसप्पणीया पुरिससंभूया पुरिसपज्जोइया पुरिसमभिसमण्णागया
पुरिसमेव अभिभूय चिट्ठंति । से जहाणामए-गण्डे सिया सरीरे जाए सरीरे संवुद्धे
सरीरे अभिसमण्णागए सरीरमेव अभिभूय चिट्ठइ, एवमेव धम्मा पुरिसाइया जाव
पुरिसमेव अभिभूय चिट्ठंति । से जहाणामए-अरई सिया सरीरे जाया सरीरे
संवुद्धा सरीरे अभिसमण्णागया सरीरमेव अभिभूय चिट्ठइ, एवमेव धम्मा वि पुरि-
साइया जाव पुरिसमेव अभिभूय चिट्ठंति से जहाणामए-वम्मिए सिया पुढविजाए
पुढविसंवुद्धे पुढविअभिसमण्णागए पुढविमेव अभिभूय चिट्ठइ, एवमेव धम्मा वि
पुरिसाइया जाव पुरिसमेव अभिभूय चिट्ठंति, से जहाणामए-रुक्खे सिया पुढवि-
जाए पुढविसंवुद्धे पुढविअभिसमण्णागए पुढविमेव अभिभूय चिट्ठइ, एवमेव धम्मा
वि पुरिसाइया जाव पुरिसमेव अभिभूय चिट्ठंति । से जहाणामए-पुक्खरिणी
सिया पुढविजाया जाम पुढविमेव अभिभूय चिट्ठइ, एवमेव धम्मा वि पुरिसाइया
जाव पुरिसमेव अभिभूय चिट्ठंति । से जहाणामए-उदगपुक्खले सिया उदगजाए
जाव उदगमेव अभिभूय चिट्ठइ, एवमेव धम्मा वि पुरिसाइया जाव पुरिसमेव अभि-
भूय चिट्ठंति । से जहाणामए-उदगबुब्बुए सिया उदगजाए जाव उदगमेव अभि-
भूय चिट्ठइ, एवमेव धम्मा वि पुरिसाइया जाव पुरिसमेव अभिभूय चिट्ठंति । जं
पि य इमं समणाणं गिग्गंथाणं उद्विट्ठं पणीयं विर्यंजियं दुवालसंयं गणिपिडगं, तं

जहा-आयारो सूयगडो जाव विट्ठिवाओ, सव्वमेवं मिच्छा, ण एयं तहियं ण एयं आहातहियं, इमं सच्चं इमं तहियं इमं आहातहियं । ते एवं सण्णं कुव्वंति, ते एवं सण्णं संठ्वेति, ते एवं सण्णं सोवट्ठवयंति । तमेवं ते तज्जाइयं दुक्खं णाइउट्ठंति सउणी पंजरं जहा । ते णो एवं विप्पडिवेदेति तं जहा-किरिया इ वा जाव अणिरए इ वा, एवामेव ते विरूवरूवेहिं कम्मसमारम्भेहिं विरूवरूवाइं कामभोगाईं समारम्भंति भोगणाए । एवामेव ते अणारिया विप्पडिवण्णा एवं सहहमाणा जाव इइ ते णो हव्वाए णो पाराए, अंतरा कामभोगेसु विसण्णे त्ति, तच्चे पुरिसजाए ईसरकारणिए त्ति आहिए ॥ ११ ॥ अहावरे चउत्थे पुरिसजाए णियइवाइए त्ति आहिज्जइ । इह खलु पाईणं वा ६ तद्देव जाव सेणावइपुत्ता वा । तेसिं च णं एगइए सङ्की भवइ, कामं तं समणा य माहणा य संपहारिसु गमणाए जात्र मए एस भम्मे सुअक्खाए सुपण्णे भवइ । इह खलु दुवे पुरिसा भवंति-एगे पुरिसे किरियमाइक्खइ एगे पुरिसे णोकिरियमाइक्खइ । जे य पुरिसे किरियमाइक्खइ जे य पुरिसे णोकिरियमाइक्खइ दो वि ते पुरिसा तुल्ला एगट्ठा कारणमावण्णा । बाले पुण एवं विप्पडिवेदेति कारण-मावण्णे-अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा अहमेयमकासि; परो वा जं दुक्खइ वा सोयइ वा जूइ वा तिप्पइ वा पीडइ वा परितप्पइ वा परो एवमकासि । एवं से बाले सकारणं वा परकारणं वा एवं विप्पडिवेदेति कारणमावण्णे । मेहावी पुण एवं विप्पडिवेदेति कारण-मावण्णे-अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा, णो अहं एवमकासि । परो वा जं दुक्खइ वा जाव परितप्पइ वा णो परो एवमकासि, एवं से मेहावी सकारणं वा परकारणं वा एवं विप्पडिवेदेति कारणमावण्णे । से बेमि पाईणं वा ६ जे तसथावरा पाणा ते एवं संथायमागच्छंति ते एवं विप्परियासमावब्भंति ते एवं विवेगमागच्छंति ते एवं विहाणमागच्छंति ते एवं संगइयंति उवेहाए । णो एवं विप्पडिवेदेति, तं जहा-किरिया इ वा जाव णिरए इ वा अणिरए इ वा । एवं ते विरूवरूवेहिं कम्मसमारम्भेहिं विरूवरूवाइं कामभोगाईं समारम्भंति भोगणाए । एवमेव ते अणारिया विप्पडिवण्णा तं सहह-माणा जाव इइ ते णो हव्वाए णो पाराए अंतरा कामभोगेसु विसण्णा । चउत्थं पुरिसजाए णियइवाइए त्ति आहिए ॥ इच्चेए चत्तारि पुरिसजाया णाणापण्णा पाणा-

छेदाणासील्ला णाणादिट्ठी णाणारुई णाणारम्भा णाणाअञ्जवसाणसंजुत्ता पहीण-
 पुञ्जसंजोगा आरियं भग्गं असंपत्ता इह ते णो हस्वाए णो पाराए अंतरा काम-
 भोगेसु विसण्णा ॥१२॥ से बेमि पाईणं वा ६ संतेगइया मणुस्सा भवंति । तं जहा-
 आरिया वेगे अणारिया वेगे उच्चागोया वेगे णीयागोया वेगे कायमंता वेगे
 हस्समंता वेगे सुवण्णा वेगे दुवण्णा वेगे सुरूवा वेगे दुरूवा वेगे । तेसिं च णं
 खेत्तवत्थूणि परिग्गहियाणि भवंति, तं जहा अप्पयरो वा भुज्जयरो वा । तेसिं
 च णं जणजाणवयाई परिग्गहियाई भवंति, तं जहा अप्पयरा वा भुज्जयरा वा; तह-
 प्पगारेहिं कुलेहिं आगम्म अभिभूय एगे भिक्खायरियाए समुट्ठिया । सओ वा वि
 एगे णायओ (अणायओ) य उवगरणं च विप्पजहाय भिक्खायरियाए समुट्ठिया ।
 असओ वा वि एगे णायओ (अणायओ) य उवगरणं च विप्पजहाय भिक्खाय-
 रियाए समुट्ठिया । [जे ते सओ वा असओ वा णायओ य अणायओ व उवगरणं
 च विप्पजहाय भिक्खायरियाए समुट्ठिया] पुञ्जमेवं तेहिं णायं भवइ । तं जहा-
 इह खलु पुरिसे अण्णामण्णे भग्गद्वाए एवं विप्पडिवेदंति । तं जहा-खेत्तं मे वत्थू मे
 हिरण्णं मे सुवण्णं मे धणं मे घण्णं मे कंसं मे दूसं मे विपुलवणकणपरयणमणि-
 मोत्तियसंवल्लिप्पवालरत्तरयणसंतसारसावएयं मे । सहा मे रुवा मे गंधा मे रसा मे
 फासा मे । एए खलु मे कामभोगा अहमवि एएसिं । से मेहावी पुव्वामेव अप्पणो
 एवं समभिजाणेज्जा । तं जहा—इह खलु मम अण्णयरे दुक्खे रोयायंके समुप्पजेज्जा
 अणिट्ठे अकंते अप्पिए असुमे अमण्णणे अमणामे दुक्खे णो सुहे । से हुंता भवंतारो !
 कामभोगाई मम अण्णयरं दुक्खं रोयायंके परियाइयह अणिट्ठं अकंते अप्पियं असुमं
 अमण्णणं अमणामं दुक्खं णो सुहं । ताऽहं दुक्खामि वा सौयामि वा जूरामि वा
 तिप्पामि वा पीडामि वा परितप्पामि वा इमाओ मे अण्णयराओ दुक्खाओ रोयायं-
 काओ पडिमोयह अणिट्ठाओ अकंताओ अप्पिवाओ असुभाओ अमण्णणाओ अमणा-
 माओ दुक्खाओ णो सुहाओ । एवमेव णो लद्धपुण्वं भवइ । इह खलु कामभोगा णो
 ताणाए वा णो सरणाए वा । पुरिसे वा एगया पुट्ठिं कामभोगे विप्पजहइ, कामभोगा
 वा एगया पुट्ठिं पुरिसं विप्पजहंति । अण्णे खलु कामभोगा अण्णे अहमंसि । से किमंग
 पुण वयं अण्णमण्णेहिं कामभोगेहिं मुच्छाम्हे ? इह संखाए णं वयं च कामभोगेहिं
 विप्पजहिस्सामो । से मेहावी जाणेज्जा बहिरंगमेयं इणमेव उवणीययराणं । तं जहा-

माया मे पिया मे भाया मे भणिणी मे भज्जा मे पुत्ता मे धूया मे पेसा मे णत्ता मे सुण्हा मे सुहा मे पिया मे सहा मे सयणसंगंथसंश्रुया मे । एए खलु मम णायओ अहमवि एएसिं । एवं से मेहावी पुक्वामेव अप्पणा एवं समभिजाणेज्जा । इह खलु मम अण्णयरे दुक्खे रोयायंके समुप्पजेज्जा अणिट्ठे जाव दुक्खे णो सहे । से हंता भयंतारो णायओ इमं मम अण्णयरं दुक्खं रोयायंके परियाइयह अणिट्ठं जाव णो सुहं । ताऽहं दुक्खामि वा सोयामि वा जाव परितप्पामि वा, इमाओ मे अण्णयराओ दुक्खाओ रोयायंकाओ परिमोएह अणिट्ठाओ जाव णो सुहाओ, एवमेव णो लद्धपुक्वं भवइ । तेसिं वा वि भयंताराणं मम णाययाणं अण्णयरे दुक्खे रोयायंके समुप्पजेज्जा अणिट्ठे जाव णो सुहे, से हंता अहमेएसिं भयंताराणं णाययाणं इमं अण्णयरं दुक्खं रोयायंके परियाइयामि अणिट्ठं जाव णो सुहं, मा मे दुक्खंतु वा जाव मा मे परितप्पंतु वा, इमाओ णं अण्णयराओ दुक्खाओ रोयायंकाओ परिमोएमि अणिट्ठाओ जाव णो सुहाओ, एवमेव णो लद्धपुक्वं भवइ । अण्णस्स दुक्खं अण्णो ष परियाइयइ अण्णेण कइ अण्णो णो पडिसंवेदेइ पत्तेयं जायइ पत्तेयं मएइ पत्तेयं चयइ पत्तेयं उववज्जइ पत्तेयं झंझा पत्तेयं सण्णा पत्तेयं मण्णा एवं विण्णु वैयाणा । इह खलु णाइसंजोगा णो ताणाए वा णो सरणाए वा । पुरिसे वा एगया पुट्ठिं णाइसंजोगे विप्पजहइ, णाइसंजोगा वा एगया पुट्ठिं पुरिसं विप्पजहंति, अण्णे खलु णाइसंजोगा अण्णो अहमंसि, से किमंग पुण वयं अण्णमण्णेहिं णाइसंजोगेहिं मुच्छामो ? इह संखाए णं वयं णाइसंजोगं विप्पजहिस्सामो । से मेहावी जाणेज्जा बहिरंगमेयं, इणमेव उवणीययरारं । तं जहा—हत्था मे पाया मे बाहा मे उरू मे उयरं मे सीसं मे सीलं मे आऊ मे बलं मे वण्णो मे तया मे छाया मे सोयं मे चक्खू मे धाणं मे जिम्मा मे फासा मे ममाइज्जइ, वयाउ पडिजूरइ । तं जहा—आउसो ! बलाओ वण्णाओ तयाओ छायाओ सोयाओ जाव फासाओ । सुसंधिओ संधी विसंधीभवइ, वलियतरंगे गाए भवइ, किण्हा केसा पलिया भवंति । तं जहा—जं पि य इमं सरीरं उरालं अहारोवइयं एयं पि य अणुपुक्वेणं विप्पजहियक्खं भविस्सइ । एयं संखाए से भिक्खू भिक्खायरियाए समुट्ठिए दुहओ लोगं जाणेज्जा, तं जहा—जीवा चेव अजीवा चेव, तसा चेव थावरा चेव ॥ १३ ॥ इह खलु गारत्था सारम्भा सपरिग्गहा, संतेग्गया समणा माहणा वि सारम्भा सपरिग्गहा, जे इमे तसा थावरा

पाणा ते सयं समारभंति अण्णेण वि समारम्भावेति अण्णं पि समारभंतं समणु-
जाणंति । इह खलु गारत्था सारम्भा सपरिग्गहा, संतेगइया, समणा माहणा वि
सारम्भा सपरिग्गहा, जे इमे कामभोगा सच्चित्ता वा अच्चित्ता वा ते सयं परि-
गिण्हंति अण्णेण वि परिगिण्हंति अण्णं पि परिगिण्हंतं समणुजाणंति । इह
खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा,
अहं खलु अणारम्भे अपरिग्गहे, जे खलु गारत्था सारम्भा सपरिग्गहा, संतेगइया
समणा माहणा वि सारम्भा सपरिग्गहा, एएसिं चेष णिस्साए बम्मचेरवासं वसि-
स्सामो । कस्स णं तं हेउं ? जहा पुवं तहा अवरं जहा अवरं तहा पुवं, अंजू
एए अणुवरया अणुवट्टिया पुणरवि तारिसगा चेष । जे खलु गारत्था सारम्भा
सपरिग्गहा, संतेगइया समणा माहणा वि सारम्भा सपरिग्गहा, दुहओ पावाहं
कुवंति इति संखाए दोहि वि अंतेहिं अदिस्समाणो इति भिक्खू रीएज्जा । से बेमि
पाईणं वा ६ जाव एवं से परिण्णायकम्मे, एवं से बवेयकम्मे, एवं से विअंतकारए
भवइ ति मक्खायं ॥ १४ ॥ तत्थ खलु भगवया छ्जीवणिकायहेऊ पणत्ता ।
तं जहा—पुट्ठीकाए जाव तसकाए । से जहाणामए—मम असायं दण्डेण वा
मुट्ठीण वा लेल्लण वा कवाल्लेण वा आउट्टिज्जमाणस्स वा हम्ममाणस्स वा तज्जिज्ज-
माणस्स वा ताडिज्जमाणस्स वा परियाविज्जमाणस्स वा किलामिज्जमाणस्स वा उद्द-
विज्जमाणस्स वा जाव लोमुक्खण्णमायमवि हिंसाकारगं दुक्खं भयं पडिसंवेदेमि,
इच्चेवं जाण सव्वे जीवां सव्वे भूया सव्वे पाणा सव्वे सत्ता दण्डेण वा जाव कवाल्लेण
वा आउट्टिज्जमाणा वा हम्ममाणा वा तज्जिज्जमाणा वा ताडिज्जमाणा वा परिया-
विज्जमाणा वा किलामिज्जमाणा वा उद्दविज्जमाणा वा जाव लोमुक्खण्णमायमवि
हिंसाकारगं दुक्खं भयं पडिसंवेदेति । एवं णच्चा सव्वे पाणा जाव सत्ता ण हंतव्वा
ण अज्जावेयव्वा ण परिचेयव्वा ण परितावेयव्वा ण उद्दवेयव्वा । से बेमि जे य
अईया जे य पडुप्पण्णा जे य आगमिस्सा अरिहंता भगवंता सव्वे ते एवमाइक्खंति
एवं भासंति एवं पण्णवेंति एवं परूवेंति सव्वे पाणा जाव सत्ता ण हंतव्वा ण परि-
चेयव्वा ण अज्जावेयव्वा ण परितावेयव्वा ण उद्दवेयव्वा । एस धम्मे धुवे णीइए
सासए समिच्च लोगं खेयण्णेहिं पवेइए । एवं से भिक्खू विरए पाणाईवायाओ
जाव विरए परिग्गहाओ णो दंतपक्खाल्लणेणं दंते पक्खाल्लेज्जा णो अंजणं णो वमणं

णो धूवणे णो तं परिआविण्णा ॥ से भिक्खू अकिरिए अलूसए अकोहे अमाणे
 अमाणे अलोहे उवसंते परिणिष्णुडे णो आसंसं पुरओ करेण्णा इमेण मे दिट्ठेण वा
 सुएण वा मएण वा विण्णाएण वा इमेण वा सुचरियतवणियमवम्भचेरवासेण
 इमेण वा जायामायावुत्तिएणं धम्मेणं इओ चुए पेचा देवे सिया कामभोगाण वस-
 वत्ती सिद्धे वा अदुक्खमसुभे एत्थ वि सिया एत्थ वि णो सिया । से भिक्खू सदेहिं
 अमुच्छिए रूवेहिं अमुच्छिए गंधेहिं अमुच्छिए रसेहिं अमुच्छिए फासेहिं अमुच्छिए
 विरए कोहाओ माणाओ मायाओ लोभाओ पेच्चाओ दोसाओ कलहाओ अब्भक्खा-
 णाओ पेसुण्णाओ परपरिवयाओ अरइरईओ मायामोसाओ मिच्छादंसणसहाओ इति
 से महओ आया णाओ उवसंते उवट्ठिए पडिविरए से भिक्खू । जे इमे तसथावरा
 पाणा भवति ते णो सयं समारम्भइ णो अण्णेहिं समारम्भावेइ अण्णे समारम्भंते
 वि ण समगुजाणइ इति से महओ आयाणाओ उवसंते उवट्ठिए पडिविरए से
 भिक्खू जे इमे कामभोगा सच्चित्ता वा अच्चित्ता वा ते णो सयं परिणिहंति णो
 अण्णेणं परिणिहंतेति अण्णं परिणिहंतेपि ण समगुजाणति इति से महओ आया-
 णाओ उवसंते उवट्ठिए पडिविरओ से भिक्खू । जे पि य इमं संपराइयं कम्मं
 किञ्चइ, णो तं सयं करेइ णो अण्णाणं कारवेइ अण्णं पि करेते ण समगुजाणइ, इति
 से महओ आयाणाओ उवसंते उवट्ठिए पडिविरए । से भिक्खू जाणेण्णा असणं
 वा ४ अस्सि पडियाए एणं साहम्मियं समुद्दिस्स पाणाई भूयाई जीवाई सत्ताई
 समारम्भ समुद्दिस्स कीयं पामिच्चं अच्छिज्जं अणिसट्ठं अमिहडं आहट्टुदेसियं तं
 चेइयं सिया तं णो सयं भुंजइ णो अण्णेणं भुंजावेइ अण्णं पि भुंजंतं ण समगुजाणइ,
 इति से महओ आयाणाओ उवसंते उवट्ठिए पडिविरए । से भिक्खू अह पुण एवं
 जाणेण्णा तं विञ्चइ तेसिं परकमे । (जस्सट्ठा ते वेइयं सिया तंजहा अप्पणो पुत्ताइ-
 णट्ठाए जाव आएसाए पुढो पहेणाए सामासाए पायरासाए संणिहिसंणिचओ
 किञ्चइ इह एएसिं माणवाणं भोयणाए) तत्थ भिक्खू परकडं परणिट्ठियमुग्गमुप्पाय-
 णेसणासुद्धं सत्थाइयं सत्थपरिणामियं अविहिसियं एसियं वेसियं सामुदाणियं
 पत्तमसणं कारणट्ठा पमाणुत्तं अक्खोवज्जणवणलेखणभूयं संजमजायाभायावत्तियं
 बिलमिव पण्णमभूएणं अप्पाणेणं आहारं आहारेण्णा अण्णं अण्णकाले पाणं पाणकाले
 वत्थं वत्थकाले लेणं लेणकाले सयणं सयणकाले । से भिक्खू मायण्णे अण्णयरं दिसं

अणुदिसं वा पडिवण्णे धम्मं आइक्खे विभए किट्ठे उवट्टिएसु वा अणुवट्टिएसु वा सुस्समाणेसुं पवेयए, संतिविरइं उवसमं णिव्वाणं सोयवियं अज्जवियं महविबं लाघवियं अणइवाइयं सव्वेसिं पाणाणं सव्वेसिं भूयाणं जाव सत्ताणं अणुवाइं किट्ठए धम्मं । से भिक्खू धम्मं किट्ठमाणे णो अण्णस्स हेउं धम्ममाइक्खेज्जा, णो पाणस्स हीउं धम्ममाइक्खेज्जा, णो वत्थस्स हेउं, धम्ममाइक्खेज्जा, णो लेणस्स हेउं धम्ममाइक्खेज्जा, णो सयणस्स हेउं धम्ममाइक्खेज्जा, णो अण्णेसिं विरूवरूवाणं कामभोगाणं हेउं धम्ममाइक्खेज्जा, अगिलाए धम्ममाइक्खेज्जा, णण्णत्थ कम्मणिज्जरट्ठाए धम्ममाइक्खेज्जा । इह खलु तस्स भिक्खुस्स अंतिए धम्मं सोच्चा णिसम्म उट्ठाणेणं उट्ठाय वीरा अस्सिं धम्मं समुट्ठिया । जे तस्स भिक्खुस्स अंतिए धम्मं सोच्चा णिसम्म सम्मं उट्ठाणेणं उट्ठाय वीरा अस्सिं धम्मं समुट्ठिया ते एवं सव्वोवगया ते एवं सव्वोवरया ते एवं सव्वोवसंता ते एवं सव्वत्ताए परिणिव्वुडे त्ति वेमि । एवं से भिक्खू धम्मट्ठी धम्मविऊ णियागपडिवण्णे से जहैयं बुइयं अदुवा पत्ते पउमवरपोण्ढरीयं, अदुवा अपत्ते पउमवरपोण्ढरीयं, एवं से भिक्खू परिणायकम्मे परिणायसंगे परिणायगेहवासे उवसंते समिए सहिए सथाजए । सेयं वयणिज्जे तं जहा—समणे त्ति वा माहणे त्ति वा खंते त्ति वा दंते त्ति वा गुत्ते त्ति वा मुत्ते त्ति वा इसि त्ति वा मुणि त्ति वा कइ त्ति वा विउ त्ति वा भिक्खू त्ति वा दूहे त्ति वा तीरट्ठित्ति वा चरणकरणपारविउ त्ति वेमि ॥ १५ ॥

॥ किरियाठाण णाम बीअं अज्जयणं ॥

सुयं मे आउसं ! तेणं भगवया एवमक्खायं । इह खलु किरियाठाणे णामज्जयणे पण्णत्ते, तस्स णं अयमट्ठे । इहं खलु संजुहेणं दुवे ठाणे एवमाहिज्जेति । तं जहा । धम्मं चेव अधम्मं चेव उवसंते चेव अणुवसंते चेव । तत्थ णं जे से पढमस्स ठाणस्स अहम्मपक्खस्स विमंगे तस्स णं अयमट्ठे पण्णत्ते । इहं खलु पार्इणं वा ६ संतेगइया मणुस्सा भवंति । तं जहा—आरिया वेगे आणारिया वेगे उच्चागोया वेगे णीयागोया वेगे कायमंता वेगे हस्समंता वेगे सुवण्णा वेगे दुवण्णा वेगे सुरूवा वेगे दुरूवा वेगे । तेसिं च णं इमं एयारूवं दण्डसमादानं संपेहाए । तं जहा—णेरइएसु वा तिरिक्खज्जोणिएसु वा मणुस्सेसु वा देवसेसु वा जे यावण्णे तहप्पगारा पाणा विण्णू वेचणं वियंति ॥ तेसिं पि य णं इमाइं तेरस्स किरियाठाणाइं भवंतीतिमक्खायं ।

तं जहा--अट्टादण्डे १, अणट्टादण्डे २, हिंसादण्डे ३, अकम्हादण्डे ४ दिट्ठिविपरिया-
 सियादण्डे ५, मोसवत्तिए ६, अदिण्णवत्तिए ७, अज्जत्थवत्तिए ८, माणावत्तिए
 ९, मिच्चदोसवत्तिए, १०, मायावत्तिए ११, लोभवत्तिए १२, इरियावत्तिए १३
 ॥ १ ॥ पढमे दण्डसमादाणे अट्टादण्डवत्तिए ति आहिज्जइ । से जहाणामए--केइ
 पुरिसे आयहेउं वा णाइहेउं वा अगारहेउं वा परिवारहेउं वा मिच्चहेउं वा गागहेउं
 वा भूयहेउं वा जक्कवहेउं वा तं दण्डं तसथावरेहिं पाणेहिं सयमेव णिसिरइ अण्णेण
 वि णीसिरावेइ अण्णं पि णिसिरंतं समणुयाणइ, एवं खलु तस्स तप्पत्तियं सावज्जं ति
 आहिज्जइ । पढमे दण्डसमादाणे अट्टादण्डवत्तिए ति आहिज्जइ ॥ २ ॥ अहावरे
 दोच्चे दण्डसमादाणे अणट्टदण्डवत्तिए ति आहिज्जइ । से जहाणामए--केइ पुरिसे
 जे इमे तसा पाणा भवंति ते णो अच्चाए णो अजिणाए णो मंसाए णो सोणियाए
 एवं हिययाए पित्ताए वसाए पिच्छाए पुच्छाए वालाए सिंगाए विसाणाए
 दंताए दाढाए णहाए ण्हारुणिए अट्ठीए अट्ठिमंजाए णो हिंसिसु मे ति णो हिंसति
 मे ति णो हिंसिस्संति मे ति णो पुत्तपोसणाए णो पसुपोसणाए णो अगारपरिवूहण-
 याए णो समणमाहणवत्तणाहेउं णो तस्स सरीरगस्स किंचि विपरियाइत्ता भवंति ।
 से हंता छेत्ता मेत्ता लुम्पइत्ता विलुम्पइत्ता उद्वइत्ता उज्झिउं वाले वेरस्स आभागी
 भवइ अणट्टादण्डे । से जहाणामए केइ पुरिसे जे इमे थावरा पाणा भवंति । तं
 जहा--इक्कडा इ वा कडिणा इ वा जंतुगा इ वा परगा इ वा मोक्खा इ वा तणा
 इ वा कुसा इ वा कुच्छगा इ वा पच्चगा इ वा पलला इ वा, ते णो पुत्तपोसणाए
 णो पसुपोसणाए णो अगारपरिवूहणयाए णो समणमाहणपोसणयाए णो तस्स सरीर-
 गस्स किंचि विपरियाइत्ता भवंति । से हंता छेत्ता मेत्ता लुम्पइत्ता विलुम्पइत्ता उद्वइत्ता
 उज्झिउं वाले वेरस्स आभागी भवइ अणट्टादण्डे ॥ से जहाणामए केइ पुरिसे
 कच्छंसि वा दहंसि वा उदगंसि वा दवियंसि वा वलयंसि णूमंसि वा गहणंसि
 वा गहणविदुग्गंसि वा वणंसि वा वणविदुग्गंसि वा पव्वयंसि वा पव्वय
 विदुग्गंसि वा तणाइं ऊसविय ऊसविय सयमेव अगणिकायं णिसिरइ अण्णेण वि
 अगणिकायं णिसिरावेइ अण्णं पि अगणिकायं णिसिरंतं समणुजाणइ अणट्टादण्डे ।
 एवं खलु तस्स तप्पत्तियं सावज्जं ति आहिज्जइ । दोच्चे दण्डसमादाणे अणट्टादण्ड-
 वत्तिए ति आहिज्जइ ॥ ३ ॥ अहावरे तच्चे दण्डसमादाणे हिंसादण्डवत्तिए ति

आहिञ्जइ । से जहाणामए—केइ पुरिसे ममं वा ममिं वा अण्णं वा अण्णिं वा हिंसिसु वा हिंसइ वा हिंसिस्सइ वा तं दण्डं तसथावरेहिं पाणेहिं सयमेव णिसिरइ अण्णेण वि णिसिरावेइ अण्णं पि णिसिरंतं समणुजाणइ हिंसादण्डे, एवं खलु तस्स तप्पत्तियं सावज्जं ति आहिञ्जइ । तच्चे दण्डसमादाणे हिंसादण्डवत्तिए ति आहिए ॥ ४ ॥ अहावरे चउत्थे दण्डसमादाणे अकम्हादण्डवत्तिए ति आहिञ्जइ । से जहाणामए—केइ पुरिसे कच्छंसि वा जान वणविदुग्गंसि वा मियवत्तिए मियसंकप्पे मियपणिहाणे मियवहाए गंता एए मिय ति काउं अण्णयरस्स मियस्स वहाए उंसुं आथा मेत्ता णं णिसिरेज्जा, स मियं वहिस्सामि ति कट्टु तिच्चिरं वा वट्टुं वा चडुं वा लावगं वा कथोयगं वा कविं वा क्विंजलं वा विधित्ता भवइ, इह खलु से अण्णस्स अट्ठाए अण्णं फुसइ अकम्हादण्डे । से जहाणामए केइ पुरिसे सालीणि वा वीहीणि वा कोदवाणि वा कंगूणि वा परगाणि वा रालाणि वा णिलिज्जमाणे अण्णयरस्स तणस्स वहाए सत्थं णिसिरेज्जा, से सामगं तणगं कुमुदुगं वीहीऊसियं कलेसुयं तणं छिंदिस्सामि ति कट्टु सालिं वा वीहिं वा कोदवं वा कंगुं वा परगं वा रालयं वा छिंदित्ता भवइ । इति खलु से अण्णस्स अट्ठाए अण्णं फुसइ अकम्हादण्डे । एवं खलु तस्स तप्पत्तियं सावज्जं आहिञ्जइ । चउत्थे दण्डसमादाणे अकम्हादण्डवत्तिए आहिए ॥५॥ अहावरे पंचमे दण्डसमादाणे दिट्ठिविपरियासियादण्डवत्तिए ति आहिञ्जइ । से जहाणामए—केइ पुरिसे माईहिं वा पिईहिं वा भाईहिं वा भगिणीहिं वा भज्जाहिं वा पुत्तेहिं वा धूयाहिं वा सुर्णहाहिं वा सद्धिं संवसमाणे मित्त अमित्तमेव मण्णमाणे भित्ते ह्यपुव्वे भवइ दिट्ठिविपरियासियादण्डे । से जहाणामए—केइ पुरिसे गामघायंसि वा णगरघायंसि वा खेडघायंसि कन्वडघायंसि मडंबघायंसि वा दोणमुहघायंसि वा पट्टणघायंसि वा आसमघायंसि वा सणिवेसघायंसि वा णिगमघायंसि वा रायहाणिघायंसि वा अतेणं तेणमित्ति मण्णमाणे अतेणे ह्यपुव्वे भवइ दिट्ठिविपरियासियादण्डे । एवं खलु तस्स तप्पत्तियं सावज्जं ति आहिञ्जइ । पंचमे दण्डसमादाणे दिट्ठिविपरियासियादण्डवत्तिए ति आहिए ॥ ६ ॥ अहावरे छट्ठे किरियट्ठाणे मोसावत्तिए ति आहिञ्जइ । से जहाणामए—केइ पुरिसे आयहेउं वा णाइहेउं वा अगारहेउं वा परिवारहेउं वा सयमेव मुसं वयइ अण्णेण वि मुसं वाएइ मुसं वयंतं पि अण्णं समणुजाणइ, एवं खलु तस्स तप्पत्तियं सावज्जं ति आहिञ्जइ । छट्ठे किरियट्ठाणे मोसावत्तिए

त्ति आहिए॥७॥ अहावरे सत्तमे किरियट्ठाणे अदिण्णादाणवत्तिए त्ति आहिज्जइ । से जहाणामए—केइ पुरिसे आयहेउं वा जाव परिवारहेउं वा सयमेव अदिण्णं आदियइ अण्णेणं वि अदिण्णं आदियावेइ अदिण्णं आदियंतं अण्णं समणुजाणइ, एवं खलु तस्स तप्पत्तियं सावज्जं ति आहिज्जइ । सत्तमे किरियट्ठाणे अदिण्णादाणवत्तिए त्ति आहिए ॥८॥ अहावरे अट्ठमे किरियट्ठाणे अज्झत्थवत्तिए त्ति आहिज्जइ । से जहाणामए—केइ पुरिसे णत्थि णं केइ किंचि विसंवादेइ सयमेव हीणे दीणे दुट्ठे दुम्मणे ओहय-मणसंक्खे चित्तासोगासागरसंपविट्ठे करयलपव्हत्थमुहे अट्ठज्जाणोवगए भूमिगय-दिट्ठिए झियाइ, तस्स णं अज्झत्थया आसंसइया चत्तारि ठाया एवमाहिज्जंति । तं जहा—कोहे माणे माया लोहे । अज्झत्थमेवं कोहमाणमायालोहे । एवं खलु तस्स तप्पत्तियं सावज्जं ति आहिज्जइ । अट्ठमे किरियट्ठाणे अज्झत्थवत्तिए त्ति आहिए ॥९॥ अहावरे णवमे किरियट्ठाणे माणवत्तिए त्ति आहिज्जइ । से जहाणामए—केइ पुरिसे जाइमएण वा कुलमएण वा बलमएण वा रूवमएण वा तवमएण वा सुयमएण वा लाभमएण वा इस्सरियमएण वा पण्णामएण वा अण्णयरेण वा मयट्ठाणेणं मत्ते समाणे परं हीलेइ णिदेइ खिसइ गरइइ परिभवइ अवमण्णेइ, इत्तरिए अयं, अहमंसि पुण विसिट्ठजाइकुलथलाइगुणोववेए । एवं अप्पाणं समुक्कस्से, देहच्चुए कम्मविइए अवसे पयाइ । तं जहा—गन्भाओ गन्भं ४ जम्माओ जम्मं माराओ मारं णरगाओ णरगं चण्डे थडे चवले माणी यावि भवइ । एवं खलु तस्स तप्पत्तियं सावज्जं ति आहिज्जइ । णवमे किरियट्ठाणे माणवत्तिए त्ति आहिए ॥१०॥ अहावरे दसमे किरियट्ठाणे मित्तदोसवत्तिए त्ति आहिज्जइ । से जहाणामए—केइ पुरिसे माईहिं वा पिईहिं वा भाईहिं वा भइणीहिं वा भज्जाहिं वा धूयाहिं वा पुत्तेहिं वा सुण्हाहिं वा सद्धिं संवसमाणे तेसिं अण्णयरंसि अहालहुंगंसि अवराहंसि सयमेव गरयं दण्डं णिवत्तेइ । तं जहा—सीओदगवियडंसि वा कायं उच्छोलेत्ता भवइ, उस्णिगोदगविय-डेण वा कायं ओसिंचित्ता भवइ, अगणिकायेणं कायं उवडहित्ता भवइ, जोत्तेण वा वेत्तेण वा णेत्तेण वा तथाइ वा [कण्णेण वा छियाए वा] लयाए वा (अण्ण-यरेण वा दवरएण) पासाई उहालित्ता भवइ, दण्डेण वा अट्ठीण वा मुट्ठीण वा लेट्ठण वा कथालेण वा कायं आउट्ठित्ता भवइ । तहप्पगारे .पुरिसजाए संव-समाणे दुम्मणा भवइ, पवसमाणे सुमणा भवइ, तहप्पगारे पुरिसजाए दण्डपासी

दण्डगुरुए दण्डपुरकडे अहिए इमंसि लोमंसि अहिए परंसि लोमंसि संजलणे कोइणे पिट्टिमंसी यावि भवइ । एवं खलु तस्स तप्पत्तियं सावज्जं ति आहिज्जइ । दसमे किरियट्ठाणे मित्तदोसवत्तिए त्ति आहिए ॥ ११ ॥ अहावरे एक्कारसमे किरियट्ठाणे मायावत्तिए त्ति आहिज्जइ । जे इमे भवंति—गूढायारा तमोकसिया उलुगपत्तलहुया पध्वयगुरुया ते आरिया वि संता अणारियाओ भासाओ वि पउज्जंति, अण्णहासंतं अप्पाणं अण्णहा मण्णंति, अण्णं पुट्ठा अण्णं वागरंति, अण्णं आइक्खियव्वं अण्णं आइक्खंति । से जहाणामए केइ पुरिसे अंतोसल्ले तं सहं णो सयं णिहरइ णो अण्णे णिहरावेइ णो पडिविद्धंसेइ, एवमेव णिण्वेइ, अविउट्टमाणे अंतोअंतो रियइ, एवमेव माई मायं कट्टु णो आलोएइ णो पडिक्कमेइ णो णिंदइ णो गरहइ णो विउट्टइ णो विसोहेइ णो अकरणाए अब्भुट्ठेइ णो अहारिहं तवोक्कमं पायच्छित्तं पडिवज्जइ, माई अस्सि लोए पच्चायाइ माई परंसि लोए पुणो पुणो पच्चायाइ णिंदइ गरहइ पसंसइ णिच्चरइ ण णियइइ णिसिरियं दण्डं छाएइ, माइ असमाहइसुलेस्से यावि भवइ ! एवं खलु तस्स तप्पत्तियं सावज्जं ति आहिज्जइ । एक्कारसमे किरियट्ठाणे मायावत्तिए त्ति आहिए ॥ १२ ॥ अहावरे बारसमे किरियट्ठाणे लोभवत्तिए त्ति आहिज्जइ । जे इमे भवंति, तं जहा—आरणिया आवासहिया गामंतिया कण्हुईरहस्सिया णो बहुसंजया णो बहुपडिविरया सव्वपाण-भूयजीवसत्तेहिं ते अप्पणो सच्चामोसाइ एवं विउज्जंति । अहं ण हंतव्वो, अण्णे हंतव्वा, अहं ण अज्जावेयव्वो, अण्णे अज्जावेयव्वा, अहं ण परिधेयव्वो, अण्णे परिधेयव्वा, अहं ण परितावेयव्वो, अण्णे परितावेयव्वा, अहं ण उह्वेयव्वो, अण्णे उह्वेयव्वा, एवमेव ते इत्थिकामेहिं मुच्छिया गिद्धा गदिया गरहिया अज्जोववण्णा जाव वासाइं चउपंचमाइं छहसमाइं अप्पयो वा भुज्जयो वा भुंजित्तु भोगभोगाइं कालमासे कालं किच्चा अण्णयरेसु आसुरिएसु किच्चिसिएसु ठाणेसु उव-वत्तारो भवंति । तओ विप्पमुच्चमाणे भुज्जो भुज्जो एलमूयत्ताए तमूयत्ताए जाइमूय-त्ताए पच्चायंति । एवं खलु तस्स तप्पत्तियं सावज्जं ति आहिज्जइ । दुवालसमे किरियट्ठाणे लोभवत्तिए त्ति आहिए । इच्चेयाइं दुवालस किरियट्ठाणाइं दविएणं समणेण वा माहणेण वा समं सुपरिजाणियव्वाइं भवंति ॥ १३ ॥ अहावरे तेरसमे किरियट्ठाणे इरियावहिए त्ति आहिज्जइ । इह खलु अत्तत्ताए संबुडस्स अणगारस्स

इरियासमियस्स भासासमियस्स एसणासमियस्स आयाणभण्डमत्तणिल्लेवणासमियस्स उच्चारपासवणखेलसिंघाणजल्लपारिद्धावणियासमियस्स मणसमियस्स वयसमियस्स कायसमियस्स मणगुत्तस्स वयगुत्तस्स कायगुत्तस्स गुत्तिदियस्स गुत्तवम्भयारिस्स आउत्तं गच्छमाणस्स आउत्तं चिद्धमाणस्स आउत्तं गिसीयमाणस्स अउत्तं तुयइ-माणस्स आउत्तं भुंजमाणस्स आउत्तं भासमाणस्स आउत्तं वत्थं पडिग्गहं कम्बलं पायपुंछणं गिण्हमाणस्स वा णिक्खिवमाणस्स वा जाव चक्खुपम्हणित्तायमवि अत्थि विमाया सुट्टुमा किरिया इरियावहिया णाम कञ्जइ । सा पढमसए बद्धा पुट्ठा विईयसमए वेइया तइयसमए णिज्जिण्णा सा बद्धा पुट्ठा उर्दारिया वेइया णिज्जिण्णा सेयकाले अकम्मे यावि भवइ । एवं खलु तस्स तप्पत्तिंयं सावज्जं ति आहिज्जइ, तेरसमे किरियट्ठाणे इरियावहिणं ति आहिज्जइ । से वेमि जे य अईया जे य पडुप्पण्णा जे य आगमिस्सा अरिहंता भगवता सर्व्वे ते एयाइं चेव तेरस किरिय-ट्ठाणइं भासिंसु वा भासेंति वा भासिस्संति वा पण्णविंसु वा पण्णवेति वा पण्ण-विस्संति वा, एवं चेव तेरसमं किरियट्ठाणं सेविंसु वा सेवेति वा सेविस्संति वा ॥१४॥ अटुत्तरं च णं पुरिसविजयं विभंगमाइक्खिस्सामि । इह खलु णाणापण्णाणं णाणा-छंदाणं णाणासीलाणं णाणादिट्ठीणं णाणारुईणं णाणारंम्भाणं णाणाज्जवसाणसंजुत्ताणं णाणाविहपावसुयज्जयणं एवं भवइ । तं जहा-भोमं उप्पायं सुविणं अंतलिकले अंगं सरं लक्खणं वंजणं इत्थिलक्खणं पुरिसलक्खणं हयलक्खणं गयलक्खणं गोणलक्खणं मेण्डलक्खणं कुक्कुडलक्खणं तित्तिरलक्खणं वट्टगलक्खणं लावयलक्खणं चक्क-लक्खणं छत्तलक्खणं चम्मलक्खणं दण्डलक्खणं असिलक्खणं मणिलक्खणं कागि-णिलक्खणं सुभगाकरं दुब्भगाकरं गम्भाकरं मोहणकरं आह्वयिणं पांगसासणिं दव्व-होमं खत्तियविच्चं चंदच्चरियं सूरच्चरियं सुक्कच्चरियं बहस्सइच्चरियं उक्कापात्रं दिसा-दाहं मियचक्रं वायसपरिमण्डलं पंसुषुट्ठिं केसवुट्ठिं मेसवुट्ठिं रहिरवुट्ठिं वेयालिं अद्ध-वेयालिं ओसोवणिं तालुग्घाडणिं सोवागिं सोवारिं दामलिं कालिं गोरिं गंधारिं ओवयणिं उप्पयणिं जम्भणिं थम्भणिं लेसणिं आमयकरणिं विसल्लकरणिं पक्कमणिं अंतद्धाणिं आयमिणिं, एवमाइयाओ विज्जाओ अण्णस्स हेउं पउंजंति पाणस्स हेउं पउंजंति वत्थस्स हेउं पउंजंति लेणस्स हेउं पउंजंति सयणस्स हेउं पउंजंति, अण्णेसिं वा विरूवरूवाणं कामभोगाणं हेउं पउंजंति । तिरिच्छं ते विज्जं सेवति, ते अणारिया

विष्पडिविष्णा कालमासे कालं किञ्चा अण्णयरार्इं आसुरियाइं किञ्चिसियाइं ठाणाइं उव्वत्तारो भवंति । तओ वि विष्पमुच्चमाणा भुज्जो एल्लमूययाए तमअंधयाए पच्चायंति ॥ १५ ॥ से एगइओ आयहेउं वा णायहेउं वा सयणहेउं वा अगारहेउं वा परिवारहेउं वा णायगं वा सहवासियं वा णिस्साए अदुवा अणुगामिए १ अदुवा उव्वचरणे २ अदुवा पडिपहिए ३ अदुवा संधिच्छेयए ४ अदुवा गण्ठिच्छेयए ५ अदुवा उरब्भिए ६ अदुवा सोवरिए ७ अदुवा वागुरिए ८ अदुवा साउणिए ९ अदुवा मच्छिए १० अदुवा गोघायए ११ अदुवा गोवालए १२ अदुवा सोवणिए १३ अदुवा सोवणियंतिए १४ । एगइओ आणुगामियभावं पडिसंधाय तमेव अणुगामियाणुगामियं हंता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारैइ, इइ से महया पावेहिं कम्मैहिं अत्ताणं उवक्खाइत्ता भवइ । से एगइओ उव्वचरयभावं पडिसंधाय तमेव उव्वचरियं हंता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारैइ । इइ से महया पावेहिं कम्मैहिं अत्ताणं उवक्खाइत्ता भवइ । से एगइओ पाडिपहियभावं पडिसंधाय तमेव पडिपहे ठिच्चा हंता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारैइ, इइ से महया पावेहिं कम्मैहिं अत्ताणं उवक्खाइत्ता भवइ । से एगइओ संधिच्छेदगभावं पडिसंधाय तमेव संधिं छेत्ता भेत्ता जाव इइ से महया पावेहिं कम्मैहिं अत्ताणं उवक्खाइत्ता भवइ । से एगइओ गण्ठिच्छेयगभावं पडिसंधाय तमेव गण्ठिं छेत्ता भेत्ता जाव इइ से महया पावेहिं कम्मैहिं अत्ताणं उवक्खाइत्ता भवइ । से एगइओ उरब्भियभावं पडिसंधाय उरब्भं वा अण्णयरं वा तसं पाणं हंता जाव उवक्खाइत्ता भवइ । (एसो अभिलावो सव्वत्थ) से एगइओ सोयरियभावं पडिसंधाय महिसं वा अण्णयरं वा तसं पाणं हंता जाव उवक्खाइत्ता भवइ । से एगइओ वागुरियभावं पडिसंधाय मियं वा अण्णयरं वा तसं पाणं हंता जाव उवक्खाइत्ता भवइ । से एगइओ सउणियभावं पडिसंधाय सउणिं वा अण्णयरं वा तसं पाणं हंता जाव उवक्खाइत्ता भवइ । से एगइओ मच्छियभावं पडिसंधाय मच्छं वा अण्णयरं वा तसं पाणं हंता जाव उवक्खाइत्ता भवइ । से एगइओ गोघायभावं पडिसंधाय तमेव गोणं वा अण्णयरं वा तसं पाणं हंता जाव उवक्खाइत्ता भवइ । से एगइओ गोवालभावं पडिसंधाय तमेव गोवालं वा परिजविय परिजविय हंता जाव उव-

कखाइत्ता भवइ । से एगइओ सोत्रणियभावं पडिसंधाय तमेव सुणगं वा अण्णयरं वा तसं पाणं हंता जाव उवक्खाइत्ता भवइ । से एगइओ सोत्रणियंतियभावं पडिसंधाय तमेव मणुस्सं वा अण्णयरं वा तसं पाणं हंता जाव आहारं आहारेइ इइ से महया पावेहिं कम्महिं अत्ताणं उवक्खाइत्ता भवइ ॥ १६ ॥ से एगइओ परिसामण्णाओ उट्टिता अहमेयं हणामि त्ति कट्टु तित्तिरं वा वट्टगं वा लावगं वा कवोयगं वा कविज्जलं वा अण्णयरं वा तसं पाणं हंता जाव उवक्खाइत्ता भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा सुराथालएणं गाहावईणं वा गाहावइपुत्ताण वा सयमेव अगणिकाएणं सस्साइं झामेइ अण्णेण वि अगणिकाएणं सस्साइं झमामेइ अगणिकाएणं सस्साइं झामंतं पि अण्णं समणुजाणइ, इइ से महया पावकम्महिं अत्ताणं उवक्खाइत्ता भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा सुराथालएणं गाहावईणं वा गाहावइपुत्ताण वा उट्टाण वा गोणाण वा घोडगाण वा गद्भाग वा सयमेव घूराओ कप्पेइ अण्णेण वि कप्पावेइ कप्पंतं पि अण्णं समणुजाणइ, इइ से महया जाव भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा सुराथालएणं गाहावईणं वा गाहावइपुत्ताण वा उट्टसाल्मओ वा गोणसालाओ वा घोडगसालाओ वा गद्भसालाओ वा कण्टकत्रोंदियाए पडिपेहित्ता सयमेव अगणिकाएणं झामेइ अण्णेण वि झामामेइ झामंतं पि अण्णं समणुजाणइ, इइ से महया जाव भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा सुराथालएणं गाहावईणं वा गाहावइपुत्ताण वा कुण्डलं वा मणिं वा मोत्तियं वा सयमेव अवहरइ अण्णेण वि अवहरावेइ अवहरंतं पि अण्णं समणुजाणइ इइ से महया जाव भवइ ॥ से एगइओ केणइ वि आयाणेणं विरुद्धे समाणे अदुवा खलदाणेणं अदुवा सुराथालएणं समाणा वा माहणाण वा छत्तगं वा दण्डगं वा भण्डगं वा मत्तगं वा लट्ठिं वा भिसिगं वा चेलगं वा चिलिभिलिगं वा चम्मयं वा छेयणगं वा चम्मकोसियं वा सयमेव अवहरइ जाव समणुजाणइ, इइ से महया जाव उवक्खाइत्ता भवइ ॥ से एगइओ णो विइगिळइ, तं जहा-गाहावईणं वा गाहावइपुत्ताण वा सयमेव अगणिकाएणं ओसहीओ झामेइ जाव अण्णं पि झामंतं समणुजाणइ, इति से महया जाव उवक्खाइत्ता भवइ । से एगइओ णो विइगिळइ, तं जहा-गाहावईणं वा गाहावइपुत्ताण वा उट्टाण वा गोणाण वा घोडगाणं वा गद्भाग वा सयमेव घूराओ कप्पेइ अण्णेण वि कप्पावेइ अण्णं पि कप्पंतं समणुजाणइ । से एगइओ

णो विइगिच्छ, तं जहा—गाहावर्द्धण वा गाहावइपुत्ताण वा उट्टसालाओ वा जाव गद्भसालाओ वा कण्ठकवोदियाहिं पडिपेहिन्ता सयमेव अमणिकाएणं ज्ञामेइ जाव समणुजाणइ। से एगइओ णो विइगिच्छ, तं जहा—गाहावर्द्धण वा गाहावइपुत्ताण वा जाव मोसियं वा सयमेव अवहरइ जाव समणुजाणइ। से एगइओ णो विइगिच्छ तं जहा—समणण वा माहणाण वा छत्तणं वा दण्डणं वा जाव चम्मल्लेयणं वा सयमेव अवहरइ जाव समणुजाणइ। इइ से महया जाव उवक्खाइत्ता भवइ। से एगइओ समणं वा माहणं वा दिस्सा णाणाविहेहिं पावकम्मोहिं अत्ताणं उवक्खाइत्ता भवइ, अदुवा णं अच्चराए आफालित्ता भवइ, अदुवा णं फसं वदित्ता भवइ, कालेण वि ते अणुपविट्ठस्स असणं वा पाणं वा जाव णो दवावेत्ता भवइ, जे इमे भवंति बोणमंता भारकंता अलसगा वसलगा किवणगा समणगा णिउक्कमा वणगा पव्वयंति ते इणमेव जीवियं धिञ्जीवियं संपडिबूहेति, णाइ ते परलोगस्स अट्ठाए किंचि वि सिलीसंति, ते दुक्खंति ते सोयंति ते जूरंति ते तिपंति ते पिट्ठंति ते परि-तपंति ते दुक्खणज्जूणसोयणतिप्पणपिट्ठणपरितिप्पणवहवंधणपरिक्लिसाओ अप्पडि-विरया भवंति। ते महया आरम्भेण ते महया समारम्भेण ते महया आरम्भसमा-रम्भेण विरुवल्हेहिं पावकम्मकिञ्चेहिं उरालाईं माणुस्सगाईं भोगभोगाईं भुञ्जित्तारो भवंति। तं जहा—अण्णं अण्णकाले पाणं पाणकाले वत्थं वत्थकाले लेणं लेणकाले सयणं सयणकाले सपुब्बावरं च णं ण्हाए कयञ्चलिकम्मे, कयकोउय-मंगल-पायच्छित्ते सिरसा ण्हाए कण्ठेमालाकडे आविद्धमणिसुवण्णे कप्पियमालामउली पडिबद्धसरीरे वग्घा-रियसोणिसुत्तगमल्लदामकलावे अह्यवत्थपरिहिए चंदणोक्खित्तगायसरीरे महइ-महालियाए कूडागारसालाए महइमहालयंसि सीहासणंसि इत्थीगुम्मसपरिवुडे सब्ब-राइएणं जोइणा श्लियायमाणेणं महाहाइयणट्ठगीयवाइयतंतीतल्लालुडियघणमुईग-पडुप्पवाहयरवेणं उरालाईं माणुस्सगाईं भोगभोगाईं भुञ्जमाणे विहरइ। तस्स णं एग-मवि आणवेमाणस्स जाव चत्तारि पंच जणा अबुत्ता चेव अब्बुट्ठंति। भणह देवा-णुप्पिया किं करेमो ? किं आहरेमो ? किं उवणेमो ? किं भाच्चिट्ठामो ? किं भे हियं इच्छियं ? किं भे आसमत्स सयइ ? तमेव पासित्ता अणारिया एवं वयंति—देवे खल्लु अयं पुरिसे, देवसिणाए खल्लु अयं पुरिसे, देवजीवणिजे खल्लु अयं पुरिसे, अण्णे वि य णं उवजीवंति। तमेव पासित्ता आरिया वयंति—अमिकंल-

कूरकम्मे खलु अयं पुरिसे अइधुए अइयायरक्खे दाहिणगामिए णेरइए कण्ह-
 पक्खिए आगमिस्सणं दुल्लह्वोहियाए यावि भविस्सइ । इच्चैयस्स ठाणस्स उट्टिया
 वेगे अभिगिज्झंति अणुट्टिया वेगे अभिगिज्झंति अभिंझाउरा वेगे अभि-
 गिज्झंति । एस ठाणे अणारिए अकेवले अप्पडिपुण्णे अणोयाउए असंसुद्धे असल्ल-
 गत्तणे असिद्धिमग्गे अमुत्तिमग्गे अणिव्वाणमग्गे अणिज्जाणमग्गे असव्वकदुखपहीण-
 मग्गे एगंतमिच्छे असाहू । एस खलु पटमस्स ठाणस्स अधम्मपक्खस्स विभंगे
 एवमाहिए ॥ १७ ॥ अहावरे दोच्चस्स ठाणस्स धम्मपक्खस्स विभंगे एवमाहिज्झइ ।
 इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति ।
 तं जहा--आरिया वेगे अणारिया वेगे उच्चागोया वेगे णीयागोया वेगे कायमंता
 वेगे हस्समंता वेगे सुवण्णा वेगे दुवण्णा वेगे सुरूवा वेगे दुरूवा वेगे । तेषिं च
 णं खेत्तवत्थूणि परिग्गहियाडं भवंति, एसो आलावरो जहा पोण्ढरीए तहा णेयब्बो,
 तेणेव अभिलावेण जाव सव्वोवसंता सव्वत्ताए परिणिव्वुडे त्ति बेमि ॥ एस ठाणे
 आरिए केवले जाव सव्वदुक्खपपहीणमग्गे एगंतसम्मो साहू । दोच्चस्स ठाणस्स
 धम्मपक्खस्स विभंगे एवमाहिए ॥ १८ ॥ अहावरे तच्चस्स ठाणस्स मिस्सगस्स विभंगे
 एवमाहिज्झइ । जे इमे भवंति आरणिथा आवसहिया गामणियंतिया कण्हुईरह-
 स्सिया जाव ते तओ विप्पमुच्चमाणा भुज्जो एलमूयत्ताए तमूयत्ताए पच्चायंति । एस
 ठाणे अणारिए अकेवले जाव असव्वदुक्खपपहीणमग्गे एगंतमिच्छे असाहू । एस
 खलु तच्चस्स ठाणस्स मिस्सगस्स विभंगे एवमाहिए ॥ १९ ॥ अहावरे पटमस्स
 ठाणस्स अधम्मपक्खस्स विभंगे एवमाहिज्झइ । इह खलु पाईणं वा ४ संतेगइया
 मणुस्सा भवंति--गिहत्था महिच्छा महारम्भा महापरिग्गहा अधम्मिया अधम्ममाणुया
 अपम्मिट्ठा अधम्मक्खाई अधम्मपायजीविणो अधम्मपलोई अधम्मपलज्जणा
 अधम्मसीलसमुदायारा अधम्मेणं चैव वित्तिं कप्पेमाणा विहरंति । हणं छिंदं भिदं
 विगत्तगा लोहियपाणी चण्डा रुद्धा खुद्धा साहस्सिया उक्कुंचणवंचणमायाणियडि-
 कूडकवडसाइसंपओगबहुला दुस्सीला दुच्चया दुप्पडियाणंदा असाहू सव्वाओ
 पाणाइवायाओ अप्पडिविरया जावब्बीवाए जाव सव्वाओ परिग्गहाओ अप्पडि-
 विरया जावब्बीवाए सव्वाओ कोहाओ जाव मिच्छादंसणसल्लओ अप्पडिविरया,
 सव्वाओ ण्हाणुम्मद्दणवण्णंगंधविलेवणसद्धारिसरसरूवगंधमल्लालंकाराओ अप्पडि-

डिविरया जावजीवाए सव्वाओ सगडरहजाणजुग्गगिछिथिछिसियासंदमाणिया-
सयणासणजाणवाहणभोगभोयणपविट्थरविहीओ अप्पडिविरया जावजीवाए सव्वाओ
कयविक्रयमासद्धमासरुवगसंभवहाराओ अप्पडिविरया, जावजीवाए सव्वाओ
हिरणसुवण्णधणधणमणिमोत्तियसंखसिलप्पवालाओ अप्पडिविरया जावजीवाए
सव्वाओ कूडतुलकूडमाणाओ अप्पडिविरया जावजीवाए सव्वाओ आरम्मसमा-
रम्माओ अप्पडिविरया जावजीवाए सव्वाओ करणकारावणाओ अप्पडिविरया
जावजीवाए सव्वाओ पयणपयावणाओ अप्पडिविरया जावजीवाए सव्वाओ कुट्टण-
पिट्टणतच्चणताडण्वहबंधपरिक्लेसाओ अप्पडिविरया जावजीवाए । जे यावण्णे
तहप्पगारा सावज्जा अन्नोहिया कम्मंता परपाणपरियावणकरा जे अणारिएहि कज्जति
तओ अप्पडिविरया जावजीवाए । से जहाणामए केइ पुरिसे कलममसूरतिल-
मुग्गमासणिप्फावकुलत्थआलिसंदगपलिसंथगमादिएहिं अयंते कूरे मिच्छादण्डं
पउंजंति, एवमेव तहप्पगारे पुरिसजाए तिसिरवट्टगलावगकवोयकविजलमियमहिस-
वराहगाहगोइकुम्मसिरिसिवमाइएहिं अयंते कूरे मिच्छादण्डं पउंजंति जा वि य
से जाहिरिया परिसा भवइ, तं जहा—दासे इ वा पेसे इ वा भयए इ वा भाइछे
इ वा कम्मकरए इ वा भोगपुरिसे इ वा तेसिं पि य णं अण्णयरंसि अहालहुगंसि
अवराहंसि सयमेव गरुयं दण्डं णिवत्तेइ । तं जहा—इमं दण्डेह इमं मुण्डेह इमं
तज्जेह इमं तालेह इमं अदुयबंधणं करेह इमं णियलबंधणं करेह इमं हड्डिबंधणं
करेह इमं चारगबंधणं करेह इमं णियलजुयलसंकोच्चियमोडियं करेह इमं हत्थच्छि-
ण्णयं करेह इमं पायच्छिण्णयं करेह, इमं कण्णच्छिण्णयं करेह इमं णक्कओट्टसीसमुह-
च्छिण्णयं करेह वेयगच्छहियं अंगच्छहियं पक्खाफोडियं करेह इमं णयणुप्पाडियं
करेह इमं दंसणुप्पाडियं वसणुप्पाडियं जिब्भुप्पाडियं ओलम्बियं करेह घसियं करेह
घोलियं करेह सूलाइयं करेह सूलामिण्णयं करेह खारवत्तियं करेह वज्जावत्तियं करेह
सीहपुच्छियं करेह वसभपुच्छियं करेह दवग्गिदङ्कयं कागणिसंखावियं भत्त-
पाणिरुद्धं इमं जावजीवं वहबंधणं करेह इमं अण्णयरेणं असुभेणं कुमारेणं मारेह ।
जा वि य से अब्भितरिया परिसा भवइ, तं जहा—माया इ वा पिया इ वा भाया इ
वा भणिणी इ वा भज्जा इ वा पुत्ता इ वा धूया इ वा सुण्हा इ वा, तेसिं पि य णं
अण्णयरंसि अहालहुगंसि अवराहंसि सयमेव गरुयं दण्डं णिवत्तेइ, सीओदगवियडंसि

उच्छोलित्ता भवइ जहा मित्तदोसवत्तिए जाव अहिए परसि लोंगंसि । ते दुक्खंति सोयंति जूरंति तिप्पंति पिट्ठंति परितर्पंति ते दुक्खंणसोयणजूरणतिप्पणपिट्ठण-परितप्पणवह्वंरणपरिकिलेसओ अप्पडिविरया भवंति । एवमेव ते इत्थिकामेहिं मुच्छिया गिद्धा गट्ठिया अज्झोववण्णा जाव वासाइं चउपंचमाइं छदसमाइं वा अप्प-यरो वा भुज्जयरो वा कालं भुंजित्तु भोगभोगाइं पविसुइत्ता वेराययणाइं सच्चिणित्ता बहूइं पावाइं कम्माइं उस्सण्णाइं संभारकडेण कम्मुणा से जहाणामए अयगोले इ वा सेलगोले इ वा उदंगंसि पक्खित्ते समाणे उदगयलमइवइत्ता अहे धरणियलपइट्ठाने भवइ, एवमेव तहप्पगारे पुरिसजाए वज्जवहुले धूयवहुले पंकवहुले वेरवहुले अप्प-त्तियवहुले दम्भवहुले णियडिबहुले साइवहुले अयसवहुले उस्सणतसपाणघाईं काल-मासे कालं किच्चा धरणियलमइवइत्ता अहे णरगयलपइट्ठाने भवइ ॥ २० ॥ ते णं णरगा अंतो वट्ठा वाहिं चउरंसा अहे खुरप्पसंठाणसंठिया णिच्चंधकारतमसा ववगय-गहचंदसूरणकलत्तजोइसप्पहा मेदवसामंसरुहिरपूयपडलंत्तिक्खललित्ताणुलेवणयला असुई वीसा परमदुब्बिभंगंधा कण्हा अगणिवण्णाभा कक्कलडफासा दुरहियासा असुभा णरगा असुभा णरएसु वेयणाओ ॥ णो चेव णरएसु णेरइया णिहायंति वा पयलायंति वा सुइं वा रइं वा धिइं वा मइं वा उवलभंते ते णं तरथ उज्जलं विउलं पगाटं कडुयं कक्कसं चण्डं दुक्खं दुग्गं तिव्वं दुरहियासं णेरइया वेयणं पच्चणुभवमाणा विहरंति ॥ २१ ॥ से जहाणामए रुक्खे सिया पल्लवग्गे जाए मूले छिण्णे अग्गे गरुए जओ णिण्णं जओ विसमं जओ दुग्गं तओ पवडइ, एवामेव तहप्पगारे पुरिसजाए गन्भाओ गन्भं जम्माओ जम्मं माराओ मारं णरगाओ णरगं दुक्खाओ दुक्खं दाहिणमामिए णेरइए कण्हपक्खिए आगमिस्साणं दुल्लहोहिए यावि भवइ । एस ठाणे अणारिए अकेवले जाव असव्वदुक्ख-पहीणमग्गे एगंतमिच्छे असाहू । पढमस्स ठाणस्स अधम्मपक्खस्स विभंगे एव-माहिए ॥ २२ ॥ अहावरे दोच्चस्स ठाणस्स धम्मपक्खस्स विभंगे एवमाहिज्जइ । इह खलु पाईणं वा ४ संतेगइया मणुस्सा भवंति । तं जहा—अणारम्भा अप-रिग्गहा धम्मिया धम्माणुया धम्मिद्धा जाव धम्मेणं चेव वित्तिं कप्पेमाणा विहरंति, सुसीला सुव्वया सुप्पडियाणंदा सुसाहू सत्त्वाओ पाणाइवायाओ पडि-विरया जावजीवाए जाव जे यावण्णे तहप्पगारा सावज्जा असोहिया कम्मंता

परपाणपरियावणकरा कञ्जति तओ वि पडिविरया जावञ्जीवाए ॥ से जहाणामए—
 अणगारा भगवंतो इरियासमिया भासासमिया एसणासमिया आयाणभण्डमत्तणिकत्वे-
 वणसमिया उच्चारपासवणखेलसिंघाणजल्लपरिट्ठावणियासमिया मणसमिया वयसमिया
 कायसमिया मणगुत्ता वयगुत्ता कायगुत्ता गुत्ता गुत्तिदिया गुत्तवम्भयारी अकोहा
 अमाणा अमाया अलोभा संता पसंता उवसंता परिणिव्खुडा अणासवा अग्गथा
 छिण्णसोया गिरुवलेवा कंसपाइ व्व मुक्कतोया संखो इव गिरंजणा जीव इव अपडि-
 हयगई गगणतलं पिव गिरालम्बणा वाउरिव अपडिवद्धा सारदसलिलं व सुद्धहियया
 पुक्खरपत्तं व गिरुवलेवा कुम्भो इव गुत्तिदिया विहग इव विप्पमुक्का खग्गिसाणं
 व एगजाया भारण्डपक्खी व अप्पमत्ता कुंजरो इव सोण्डीरा वसभो इव जायत्यामा
 सीहो इव दुद्धरिसा मंदरो इव अप्पकम्पा सागरो इव गम्भीरा चंदो इव सोमलेसा
 सूरु इव दित्ततेया जञ्जकंचणगं व जायरूवा वसुंधरा इव सव्वफासविसहा सुहुय-
 हुयासणो विय तेयसा जलंता । णत्थि णं तेसिं भगवंताणं कत्थ वि पडिबंधे
 भवइ । से पडिबंधे चउत्विहे पण्णते । तं जहा—अण्डए इ वा पोयए इ वा उग्गहे
 इ वा पग्गहे इ वा जं णं जं णं दिसं इच्छंति तं णं तं णं दिसं अपडिवद्धा सुहभूया
 ल्हुभूया अप्पग्गथा संकमेणं तं वत्ता अप्पाणं भावेमाणा विहरंति ॥ तेसिं णं भगवं-
 ताणं इमा एयरूवा जायामायावित्ती होत्या । तं जहा—चउत्थे भत्ते छट्ठे भत्ते
 अट्ठमे भत्ते दसमे भत्ते दुवाल्लसमे भत्ते चउदसमे भत्ते अद्धमासिए भत्ते मासिए
 भत्ते दोमासिए तिमासिए चउम्मासिए पंचमासिए छम्मासिए अदुत्तरं च णं
 उक्खित्तचरया णिक्खित्तचरया उक्खित्तंणिक्खित्तचरया अंतचरगा पंतचरगा
 ल्हूचरगा समुदाणचरगा संसट्ठचरगा असंसट्ठचरगा तज्जायसंसट्ठचरगा दिट्ठलाभिया
 अदिट्ठलाभिया पुट्ठलाभिया अपुट्ठलाभिया भिक्खलाभिया अभिक्खलाभिया
 अण्णायचरगा उवणिहिया संखादत्तिया परिमिबपिण्डवाइया सुद्धेसणिया अंता-
 हारा पंताहारा अरसाहारा विरसाहारा ल्हूहारा तुच्छाहारा अंतजीवी पंतजीवी
 आयम्भिलिया पुरिमद्धिया णिव्विगाइया अमज्जमंसासिणो णो णिया मरसभोई ठाणाइया
 पडिमाठाणाइया उक्कडुआसणिया णेसज्जिया वीरासणिया दण्डायइया लंगडसाइणो
 अप्पाउडा अगत्तया अकण्डुया अणिट्ठहा (एवं जहोववाइए) धुयकेसमंसुरोमणहा
 सव्वगायगडिकम्मविप्पमुक्का चिट्ठंति । ते णं एएणं विहारेणं विहरमाणा बहूइं

वासाई सामणपरियागं पाउणंति २ बहुबहु आवाहंसि उप्पणंसि वा अणुप्पणंसि वा बहूई भत्ताई पच्चक्खंति पच्चक्खाइत्ता बहूई भत्ताई अणसणाए छेदंति, अणसणाए छेदित्ता जस्सट्ठाए कीरइ णग्गभावे मुण्डभावे अण्हाणभावे अदंतवण्णे अउत्तए अणोवाहणए भूमिसेज्जा फलगसेज्जा कट्टसेज्जा केसलोए वम्भचेरवासे परावरपवेसे लद्धावलद्धे माणावमाणणाओ हीलणाओ णिंदणाओ खिसणाओ गरहणाओ तज्जणाओ तालणाओ उच्चावया गामकण्टगा वावीसं परीसहोवसग्गा अहियासिज्जंति तमट्ठं आराहंति तमट्ठं आराहिता चरमेहिं उस्सासणिस्सासेहिं अणंतं अणुत्तरं णिव्वाचार्यं णिरावरणं कसिणं पडिपुणं केवलवरणाणदंसणं समुप्पाडंति, समुप्पाडित्ता तओ पच्छा सिज्जंति बुज्जंति मुच्चंति परिणिव्वायंति सव्वदुकखाणं अंतं करंति । एगच्चाए पुण एणे भयंतारो भवंति, अवरे पुण पुच्चकम्मावसेसेणं कालमासे कालं किच्चा अण्णयरेसु देवलोएसु देवत्ताए उववत्तारो भवंति । तं जहा—महट्ठिएसु महज्जुइएसु महापरकमेसु महाजसेसु महाबलेसु महाणुंभावेसु महासुक्खेसु । ते णं तत्थ देवा भवंति महट्ठिया महज्जुइया जाव महासुक्खा हारविराइयवच्छा कडगतुडिययम्भियभुया अंगयकुण्डलमट्ठगण्डयलकण्णपीदधारी विच्चित्तहत्थाभरणा विच्चित्तमालामउल्लिमउड्डा कल्लाणगंधपवरवत्थपरिहिया कल्लाणगपवरमल्लाणुलेवणधरा भासुरचोदी पलम्भवणमालाधरा दिव्वेणं रूवेणं दिव्वेणं वण्णेणं दिव्वेणं गंधेणं दिव्वेणं फासेणं दिव्वेणं संघ्राएणं दिव्वेणं संठाणेणं दिव्वाए इट्ठीए दिव्वाए जुईए दिव्वाए पभाए दिव्वाए छायाए दिव्वाए अच्चाए दिव्वेणं तेएणं दिव्वाए लेसाए दस दिसाओ उज्जोवेमाणा पभासेमाणा गइकल्लाणा ठिइकल्लाणा आगमेसिभइया यावि भवंति । एस ठाणे आयरिए जाव सव्वदुक्खपहीणमग्गे एगंतसम्मं सुसाहू । दोच्चस्स ठाणत्स धम्मपक्खत्स विभंगे एवमाहिइ ॥ २३ ॥ अहावरे तच्चस्स ठाणत्स मीसगस्सविभंगे एवमाहिइइ । इह खलु पाईणं वा ४ संतेगइया मणुस्सा भवंति । तं जहा—अप्पिच्छा अप्पारम्भा अप्पपरिग्गहा धम्मिया धम्माणुया जाव धम्मेणं चेव विच्चिं कप्पेमाणा विहरंति सुसीला सुव्वया सुप्पडियाणंदंता साहू एगच्चाओ पाणाइवायाओ पडिविरया जावजीवाए एगच्चाओ अप्पडिविरया जाव जे यावणो तंहप्पगारा सावज्जा अबोहिया कम्मंता परपाणपरितावणकरा कज्जंति तओ वि एगच्चाओ अप्पडिविरया । से जहाणमए समणोवासगा भवंति अभिगयजीवाजीवा उवलद्ध-

पुण्णपावा आसवसंवरवेयणाणिज्जराकिरियाहिरणवंधमोक्खकुसला असहेज्जदेवा-
सुरणागसुवण्णजेक्खरक्खसकिण्णरकिंपुरिसगरुल्लगंधव्वमहोरगाइएहि देवगणेहिं
णिग्ंथाओ पावयणाओ अणइक्कमणिज्जा, इणमेव णिग्ंथे पावयणे णिस्संक्रिया
णिक्कंखिया णिच्चिइणिच्छा लद्धट्टा गहियट्टा पुच्छियट्टा विणिच्छियट्टा अभिगयट्टा
अट्टिमिज्जपेम्माणुरागरत्ता । अयमाउसो ! णिग्ंथे पावयणे अट्टे अयं परमट्टे सेसे
अणट्टे उसियफलिहा अवंगुयदुवाराअचियत्तंतेउरपरघरपवेसा चाउइसट्टमुद्धि-
पुण्णमासिणीसु पडिपुण्णं पोसहं सम्मं अणुपालेमाणा समणे णिग्ंथे फासुएसणि-
ज्जेणं असणुपाणखाइमसाइमेणं वत्थपडिग्ंगाहकम्बलपायपुंछणेणं ओसहभेसज्जेणं पीठ-
फलमसेज्जासंधारएणं पडिलाभेमाणा बहूहिं सीलव्वयगुणवेरमणपच्चक्खान्णपोसहोव-
वासहेहिं अहापरिग्गहिएहिं तवोकम्मेहिं अप्पाणं भावेमाणा विहरंति ॥ ते णं एया-
रूवेणं विहारंणं विहरमाणा बहूइं वासाइं समणोवासगपरियागं पाउणंति पाउणित्ता
आवाहंसि उप्पणंसि वा, अणुप्पणंसि वा बहूइं भत्ताइं अणसणाए पच्चक्खाएंति
बहूइं भत्ताइं अणसणाए पच्चक्खाएत्ता बहूइं भत्ताइं अणसणाए छेदंति बहूइं भत्ताइं
अणसणाए छेइत्ता आलोइयपडिक्कंता समाहिपत्ता कालमासे कालं किच्चा अणयरेसु
देवलोएसु देवत्ताए उववत्तारो भवंति, तं जहा-- महट्टिएसु महज्जुइएसु जाव
महासुक्खेसु सेसं तहेव जाव एसट्टाणे आयरिए जाव एगंतसम्मे साहू । तच्चस्स
ठाणस्स मीसगस्स विभंगे एवमाहिए ॥ २४ ॥ अविरइं पडुच्च बाले आहिज्जइ
विरइं पडुच्च पंडिए आहिज्जइ विरयाविरइं पडुच्च बालपंडिए आहिज्जइ तत्थणं
जा सा सव्वओ अविरइं एसट्टाणे आरंभट्टाणे अणारिए जाव असव्वदुक्खप्पहीण-
मग्गे एगंतमिच्छे असाहू, तत्थणं जा सा सव्वओ विरइं एसट्टाणे अणारंभट्टाणे
आरिए जाव सव्वदुक्खप्पहीणमग्गे एगंतसम्मे साहू, तत्थणं जा सा सव्वओ विरया-
विरइं एसट्टाणे आरंभणोआरंभट्टाणे एसट्टाणे आरिए जाव सव्वदुक्खप्पहीणमग्गे
एगंतसम्मे साहू ॥२५॥ एवमेव समणुगम्ममाणा इमेहिं चेव दोहिं ठाणेहिं समो-
अरंति, तं जहा--धम्मे चेव अधम्मे चेव, उवसंते चेव अणुवसंते चेव, तत्थणं जे से
पढमट्टाणस्स अधम्मपक्खस्स विभंगे एवमाहिए तस्सणं इमाइं तिण्णितेवट्टाइं पावा-
दुयसयाइं भवंतीति मक्खत्थाइं तं जहा--किरियावाइंणं अकिरियावाइंणं अण्णाणियवा-
इंणं वेणइयवाइंणं तेवि परिणिव्वाणमाहंसु तेवि परिमोक्खमाहंसु तेवि लवंति सावगा

तेषु लवंति सावइत्तरो ॥ २६ ॥ ते सव्वे पावाउया आइगरा धम्माणं णाणापण्णा
 णाणाळंदा णाणासीला णाणादिट्ठी णाणारुई णाणारंभा णाणाञ्जवसाणसंजुत्ता एगं
 महं मंडलिबंधं किञ्चा सव्वे एगओ चिद्धंति ॥ २७ ॥ पुरिसे य सागणियाणं इंगालाणं
 पाइं बहुपडिपुण्णं अउमएणं संडासएणं गहाय ते सव्वे पावाउए आइगरे धम्माणं
 णाणापण्णे जाव णाणाञ्जवसाणसंजुत्ते एवं वयासी-हंभो ! पावाउया आइगरा धम्माणं
 णाणापण्णा जाव णाणाञ्जवसाणसंजुत्ता ! इमं ताव तुब्भे सागणियाणं इंगालाणं पाइं
 बहुपडिपुण्णं गहाय सुहुत्तयं २ पाणिणा धरेह णो बहुसंडासगं संसारियं कुञ्जा, णो
 बहुअग्गिथंभणियं कुञ्जा णो बहु साहम्मियवेयावडियं कुञ्जा णो बहु परधम्मियवेया-
 वडियं कुञ्जा, उज्जुया णियामपडिन्नण्णा अमायं कुव्वमाणा पाणिं पसारिह इइ वुच्चा
 से पुरिसे तेषिं पावादुयाणं तं सागणियाणं इंगालाणं पाइं बहुपडिपुण्णं अउमएणं
 संडासएणं गहाय पाणिंसु गिमिरइ तएणं ते पावाउया आइगरा धम्माणं णाणा-
 पण्णा जाव णाणाञ्जवसाणसंजुत्ता पाणिं पडिसाहरंति-तएणं से पुरिसे ते सव्वे पावा-
 उए आइगरे धम्माणं जाव णाणाञ्जवसाणसंजुत्ते एवं वयासी हंभो ! पावाउया
 आइगरा धम्माणं णाणापण्णा जाव णाणाञ्जवसाणसंजुत्ता ! कम्हाणं तुब्भे पाणिं पडि-
 साहरह ? पाणिं णो डहिञ्जा, दहे किं भविस्सइ दुक्खं ? दुक्खं ति मण्णमाणा पडिसाह-
 रह एस तुला एसपमाणे एस समोसरणे पत्तेयं तुला पत्तेयं पमाणे पत्तेयं समो-
 सरणे तत्थणं जे ते समणा माहणा एवमाइक्खंति, जाव परूवेति सव्वे पाणा जाव
 सत्ता हंतव्वा अज्जावेयव्वा परिघेयव्वा परियावेयव्वा किलामेयव्वा उद्देयव्वा ते
 आगंतु छेयाए ते आगंतु भेयाए जाव ते आगंतु जाइजरामरणजोणिजम्मण-
 संसारपुण्णभवगम्भवासभवपवंचकलंकलीभागिणो भविस्संति । ते बहूणं दंडणाणं बहूणं
 मुंडणाणं तज्जणाणं तालणाणं अंदुब्रंधणाणं जाव घोळणाणं माइमरणाणं पिइमरणाणं
 भाइमरणाणं भणिणीमरणाणं भज्जापुत्तधूयसुण्हामरणाणं दारिहाणं दोहग्गाणं
 अप्पियसंवासाणं पियविप्पओगाणं बहूणं दुक्खदोम्मणस्साणं आभागिणो भविस्संति
 अणाइयं च णं अणवययं दीहमद्धं चाउरंतसंसारकंतारं भुज्जो भुज्जो अणुपरिय-
 ट्ठिस्संति ते णो सिद्धिस्संति णो बुद्धिस्संति जाव णो सव्वदुक्खान्णमंतं करिस्संति
 एस तुला एस पमाणे एस समोसरणे पत्तेयं तुला पत्तेयं पमाणे पत्तेयं समोसरणे ।
 तत्थ णं जे ते समणा माहणा एवमाइक्खंति जाव परूवेति । सव्वे पाणा सव्वे
 भूया सव्वे जीवा सव्वे सत्ता ण हंतव्वा ण अज्जावेयव्वा ण परिघेयव्वा ण उद्-

वेयव्वा ते णो आगतुञ्छेयाए ते णो आगतुभेयाए जाव जाइजराभरणजोणिजम्मण-
संसारपुणब्भवगब्भवासमथपवंचकलंकलीभागिणो भविस्संति, जाव अणाइयं च णं
अणवयगं दीहमदं चाउरंतसंसारकंतारं भुज्जो भुज्जो णो अणुपरियट्टिस्संति, ते
सिज्जिस्संति जाव सव्वदुक्खाणं अंतं करिस्संति ॥ २८ ॥ इत्थेएहिं वारसहिं किरिया-
ठाणेहिं वट्टमाणा जीवा णो सिज्जिस्सु णो बुज्जिस्सु णो मुच्चिस्सु णो परिणिव्वाइंसु जाव
णो सव्वदुक्खाणं अंतं करेसु वा णो करेति वा णो करिस्संति वा । एयंसि चैव
तेरसमे किरियाठाणे वट्टमाणा जीवा सिज्जिस्सु बुज्जिस्सु मुच्चिस्सु परिणिव्वाइंसु जाव
सव्वदुक्खाणं अंतं करेसु वा करेति वा करिस्संति वा । एवं से भिक्खू आयट्ठी
आयहिंए आयगुत्ते आयजोगे आयपरक्कमे आयरक्खिए आयाणुकम्पए आयणि-
प्फेडए आयाणमेव पडिसाहरेज्जासि ति वेमि ॥ २९ ॥

॥ आहारपरिण्णा णाम तद्दयं अज्झयणं ॥

सुयं मे आउसं ! तेणं भगवया एवमक्खवायं । इह खलु आहारपरिण्णा णामज्झयणे
तस्स णं अयमट्ठे । इह खलु पाईणं वा ४ सव्वओ सव्वावंति य णं लोगंसि चत्तारि-
बीयकाया एवमाहिज्जंति । ते जहा—अग्गबीया मूलबीया पोरबीया खंधबीया । तेसिं
च णं अहावीएणं अहावगासेणं इहेगइया सत्ता पुद्वीजोणिया पुद्वीसंभवा पुद्वी-
वुक्कमा तज्जोणिया तस्संभवा तदुवक्कमा कम्मोवगा कम्मणियाणेणं तत्थवुक्कमा णाणा-
विहजोणियासु पुद्वीसु रुक्खत्ताए विउट्ठंति ॥ ते जीवा तेसिं णाणाविहजोणियाणं
पुद्वीणं सिणेहमाहारेंति । ते जीवा आहारेंति पुद्वीसरीरं आउसरीरं तेउसरीरं
वाउसरीरं वणस्सइसरीरं । णाणाविहाणं तसथावराणं पाणाणं सरीरं अच्चित्तं कुव्वंति
परिचिद्धत्थं । तं सरीरं पुव्वाहारियं तथाहारियं विपरिणयं सारुवियकडं संतं । अवरे
वि थ णं तेसिं पुद्विजोणियाणं रुक्खाणं सरीरा णाणावण्णा णाणाग्धा णाणारसा
णाणाफासा णाणासंठाणसंठिया णाणाविहसरीरपुग्गलविउट्ठियया ते जीवा कम्मोवव-
ण्णमा भवेंतीति मक्खवायं ॥ १ ॥ अहावरं पुरक्खवायं इहेगइया सत्ता रुक्खजोणिया
रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मणियाणेणं
तत्थवुक्कमा पुद्वीजोणिएहिं रुक्खेहिं रुक्खत्ताए विउट्ठंति । ते जीवा तेसिं पुद्वी-
जोणियाणं रुक्खाणं सिणेहमाहारेंति, ते जीवा आहारेंति पुद्वीसरीरं आउतेउवाउ-
वणस्सइसरीरं णाणाविहाणं तसथावराणं पाणाणं सरीरं अच्चित्तं कुव्वंति परि-
चिद्धत्थं । सरीरं पुव्वाहारियं तथाहारियं विपरिणामियं सारुवियकडं संतं । अवरे

वि य णं तेसिं रुक्खजोणियाणं रुक्खवाणं सरीरा णाणावण्णा णाणागंधा णाणारसा णाणाफासा णाणासंटाणसंठिया णाणाविहसरीरपुग्गलविउव्विया ते जीवा कम्मोव वण्णगा भवन्तीति मक्खत्थं ॥२॥ अहावरं पुरक्खत्थं इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मणियाणेणं तत्थवुक्कमा रुक्खजोणिएसु रुक्खत्ताए विउट्ठंति, ते जीवा तेसिं रुक्खजोणियाणं रुक्खवाणं सिणेहमाहारंति ते जीवा आहारंति, पुट्ठीसरीरं आउतेउवाउवणस्सइ-सरीरं तसथावराणं पाणाणं सरीरं अचित्तं कुब्बंति परिविद्धत्थं तं सरीरं पुक्खाहारियं तयाहारियं विपरिणामियं सारुवियकडं संतं अवरे वि य णं तेसिं रुक्खजोणियाणं रुक्खवाणं सरीरा णाणावण्णा जाव ते जीवा कम्मोववण्णगा भवन्ति ति मक्खत्थं ॥३॥ अहावरं पुरक्खत्थं इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मणियाणेणं तत्थवुक्कमा रुक्खजोणिएसु रुक्खेसु मूलत्ताए कंदत्ताए खंधत्ताए तयत्ताए सालत्ताए पवाल्ताए पत्तत्ताए पुप्फत्ताए फलत्ताए बीयत्ताए विउट्ठंति ते जीवा तेसिं रुक्खजोणियाणं रुक्खवाणं सिणेहमाहारंति ते जीवा आहारंति पुट्ठीसरीरं आउतेउवाउवणस्सइ णाणाविहाणं तसथावराणं पाणाणं सरीरं अचित्तं कुब्बंति परिविद्धत्थं तं सरीरं जाव सारुवियकडं संतं अवरेवियणं तेसिं रुक्खजोणियाणं मूलाणं कंदाणं खंधाणं तयाणं सालाणं पवालाणं जाव बीयाणं सरीरा णाणावण्णा णाणागंधा जाव णाणाविहसरीरपुग्गलविउव्विया ते जीवा कम्मो-ववण्णगा भवन्ति ति मक्खत्थं ॥४॥ अहावरं पुरक्खत्थं इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोववण्णगा कम्मणिया-णेणं तत्थवुक्कमा रुक्खजोणिएहि रुक्खेहि अज्झारोहत्ताए विउट्ठंति ते जीवा तेसिं रुक्खजोणियाणं रुक्खवाणं सिणेहमाहारंति ते जीवा आहारंति पुट्ठीसरीरं जाव सारु-वियकडं संतं अवरेवि य णं तेसिं रुक्खजोणियाणं अज्झारोहणं सरीरा णाणावण्णा जाव मक्खत्थं ॥५॥ अहावरं पुरक्खत्थं इहेगइया सत्ता अज्झारोहजोणिया अज्झारोहसं-भवा जाव कम्मणियाणेणं तत्थवुक्कमा रुक्खजोणिएसु अज्झारोहेसु अज्झारोहत्ताए विउट्ठंति ते जीवा तेसिं रुक्खजोणियाणं अज्झारोहाणं सिणेहमाहारंति ते जीवा आहारंति पुट्ठीसरीरं जाव सारुवियकडं संतं अवरेवि य णं तेसिं अज्झारोहजो-याणं अज्झारोहाणं सरीरा णाणावण्णा जावमक्खत्थं ॥६॥ अहावरं पुरक्खत्थं इहेगइया

सत्ता अज्झारोहजोणिया अज्झारोहसंभवा जाव कम्मणियाणेणं तत्थवुक्कमा अज्झारोहजोणिएसु अज्झारोहत्ताए विउट्टंति ते जीवा तेसिं अज्झारोहजोणियाणं अज्झारोहाणं सिणेहमाहारेंति ते जीवा आहारेंति पुढविसरीरं आउसरीरं जाव सारुवियकडं संतं अवरेवि य णं तेसिं अज्झारोहजोणियाणं अज्झारोहाणं सरीरा णाणावण्णा जावमक्खायं ॥७॥ अहावरं पुरक्खायं इहेगइया सत्ता अज्झारोहजोणिया अज्झारोहसंभवा जाव कम्मणियाणेणं तत्थवुक्कमा अज्झारोहजोणिएसु अज्झारोहेसु मूलत्ताए जाव बीयत्ताए विउट्टंति ते जीवा तेसिं अज्झारोहजोणियाणं अज्झारोहाणं सिणेहमाहारेंति जाव अवरेवि य णं तेसिं अज्झारोहजोणियाणं मूलाणं जाव बीयाणं सरीरा णाणावण्णा जावमक्खायं ॥ ८ ॥ अहावरं पुरक्खायं इहेगइया सत्ता पुढविजोणिया पुढविसंभवा जाव णाणाविहजोणियासु पुढवीसु तणत्ताए विउट्टंति ते जीवा तेसिं णाणाविहजोणियाणं पुढवीणं सिणेहमाहारेंति जाव ते जीवा कम्मोववण्णा भवंति त्ति मक्खायं—एवं पुढविजोणिएसु तणेसु तणत्ताए विउट्टंति जाव मक्खायं—एवं तणजोणिएसु तणेसु तणत्ताए विउट्टंति तणजोणियं तणसरीरं च आहारेंति, जाव मक्खायं—एवं तणजोणिएसु तणेसु मूलत्ताए जाव बीयत्ताए विउट्टंति ते जीवा जाव एवमक्खायं—एवं ओसहीणं वि चत्तारि आलावगा—एवं हरियाणवि चत्तारि आलावगा ॥ ९—१० ॥ अहावरं पुरक्खायं इहेगइया सत्ता पुढवीजोणिया पुढविसंभवा जाव कम्मणियाणेणं तत्थवुक्कमा णाणाविहजोणियासु पुढवीसु आयत्ताए वायत्ताए कायत्ताए कूहणत्ताए कंदुकत्ताए उव्वेहणियत्ताए णिव्वेहणियत्ताए सच्चत्ताए छत्तगत्ताए वासाणियत्ताए कूरत्ताए विउट्टंति । ते जीवा तेसिं णाणाविहजोणियाणं पुढवीणं सिणेहमाहारेंति । ते वि जीवा आहारेंति पुढविसरीरं जाव संतं । अवरे वि य णं तेसिं पुढविजोणियाणं आयत्ताणं जाव कूराणं सरीरा णाणावण्णा जाव मक्खायं । एगो च्चैव आलावगो सेसा तिण्णि णत्थि । अहावरं पुरक्खायं इहेगइया सत्ता उदगजोणिया उदगसंभवा जाव कम्मणियाणेणं तत्थवुक्कमा णाणाविहजोणिएसु उदगसु रुक्खात्ताए विउट्टंति । ते जीवा तेसिं णाणाविहजोणियाणं उदगाणं सिणेहमाहारेंति । ते जीवा आहारेंति पुढविसरीरं जाव संतं । अवरे वि य णं तेसिं उदगजोणियाणं रुक्खाणं सरीरा णाणावण्णा जाव मक्खायं । जहा पुढविजोणियाणं रुक्खाणं चत्तारि गमा अज्झारुहाण वि तहेव, तणाणं ओसहीणं

हरियाणं चत्तारि आलावगा भाणियत्वा एक्केके, अहावरं पुरक्खायं इहेगइया सत्ता उदगजोणिया उदगसम्भवा जाव कम्मणियाणेणं तत्थबुक्कमा णाणाबिहजोणिएसु उदएसु उदगत्ताए अवगत्ताए पणगत्ताए सेवालत्ताए कलम्बुगत्ताए हडत्ताए कसेरुगत्ताए कच्छभाणियत्ताए उप्पलत्ताए पउमत्ताए कुमूयत्ताए णल्लिणत्ताए सुभगत्ताए सोगंधियत्ताए पोण्डरीयमहापोण्डरीयत्ताए सयपत्तत्ताए सहस्सपत्तत्ताए एवं कल्हारकोंकणयत्ताए अरविंदत्ताए तामरसत्ताए भिसभिसमुणालपुक्खलत्ताए पुक्खलच्छिभगत्ताए विउट्टंति । ते जीवा तेसिं णाणाबिहजोणियाणं उदगाणं सिणेहमाहारंति । ते जीवा आहारंति पुढवीसरीरं जाव संतं । अवरे वि य णं तेसिं उदगजोणियाणं उदगाणं जाव पुक्खलच्छिभगाणं सरीरा णाणावण्णा जाव मक्खायं एगो चेव आलावगो ॥ ११ ॥ अहावरं पुरक्खायं इहेगइया सत्ता तेसिं चेव पुढवी-जोणिएहिं रुक्खेहिं, रुक्खजोणिएहिं रुक्खेहिं, रुक्खजोणिएहिं मूलेहिं जाव बीएहिं, रुक्खजोणिएहिं अज्झारोहेहिं अज्झारोहजोणिएहिं अज्झारोहेहिं, अज्झारोहजोणिएहिं मूलेहिं जाव बीएहिं, पुढविजोणिएहिं तणेहिं, तणजोणिएहिं तणेहिं तणजोणिएहिं मूलेहिं जाव बीएहिं । एवं ओसहीहिं वि तिण्णि आलावगा एवं हरिएहिं वि तिण्णि आलावगा । पुढविजोणिएहिं वि आएहिं काएहिं जाव कूरेहिं उदगजोणिएहिं रुक्खेहिं, रुक्खजोणिएहिं रुक्खेहिं, रुक्खजोणिएहिं मूलेहिं जाव बीएहिं एवं अज्झारुहेहिं वि तिण्णि । तणेहिं वि तिण्णि आलावगा । ओसहीहिं वि तिण्णि, हरिएहिं वि तिण्णि, उदगजोणिएहिं उदएहिं अवएहिं जाव पुक्खलच्छिभएहिं तसपाणत्ताए विउट्टंति ॥ ते जीवा तेसिं पुढवीजोणियाणं उदगजोणियाणं रुक्ख-जोणियाणं अज्झारोहजोणियाणं तणजोणियाणं ओसहीजोणियाणं हरियजोणियाणं रुक्खाणं अज्झारुहाणं तणाणं ओसहीणं हरियाणं मूलाणं जाव बीयाणं आयाणं कायाणं जाव कुरवाणं [कुराणं] उदगाणं अवगाणं जाव पुक्खलच्छिभगाणं सिणेह-माहारंति । ते जीवा आहारंति पुढवीसरीरं जाव संतं । अवरे वि य णं तेसिं रुक्खजोणियाणं अज्झारोहजोणियाणं तणजोणियाणं ओसहीजोणियाणं हरियजोणियाणं मूलजोणियाणं कंदजोणियाणं जाव बीयजोणियाणं आयजोणियाणं कायजोणियाणं जाव कूरजोणियाणं उदगजोणियाणं अवगजोणियाणं जाव पुक्खलच्छिभगजोणियाणं तसपाणाणं सरीरा णाणावण्णा जाव मक्खायं ॥ १२ ॥ अहावरं पुरक्खायं णाणा-

विहाणं मणुस्साणं । तं जहा—कम्मभूमगाणं अकम्मभूमगाणं अंतरदीवगाणं आरियाणं मिलक्खुयाणं । तेसिं च णं अहावीएणं अहावगासेणं इत्थीए पुरिसस्स य कम्मकडाए जोणिए एत्थ णं मेहुणवत्तियाए (व) णामं संजोगे समुप्पज्जइ । ते दुहओ वि सिणेहं संचिणंति । तत्थणं जीवा इत्थित्ताए पुरिसत्ताए णपुंसगत्ताए विउट्टंति, ते जीवा माउउयं पिउमुक्कं तं तदुभयं संसट्टं कलुसं किच्चिसं तं पढमत्ताए आहारमाहारैति तओ पच्छ जं से माया णाणाविहाओ रसविहीओ आहारमाहारैति तओ एगदेसेणं ओयमाहारैति अणुपुव्वेणं बुद्धा पलिपागमणुपवण्णा तओ कायाओ अभिणिवट्टमाणा इत्थिं वेगया जणयंति पुरिसं वेगया जणयंति, णपुंसगं वेगया जणयंति ते जीवा डहरा समाणा माउकखीरं सपिं आहारैति अणुपुव्वेणं बुद्धा ओयणं कुम्मासं तसथावरे य पाणे ते जीवा आहारैति पुढविसरीरं जाव सारुवियकडं संतं अवरेवि य णं तेसिं णाणाविहाणं मणुस्सगाणं कम्मभूमगाणं अकम्मभूमगाणं अंतरदीवगाणं आरियाणं मिलक्खूणं सरीरा णाणावण्णा जाव भवंति त्ति मक्खायं ॥ अहावरं पुरक्खायं णाणाविहाणं जलचराणं पंचिदियतिरिक्खजोणियाणं, तं जहा—मच्छाणं जाव सुंसुमाराणं तेसिं च णं अहावीएणं अहावगासेणं इत्थीए पुरिसस्स य कम्म तहेव जाव तओ एगदेसेणं ओयमाहारैति अणुपुव्वेणं बुद्धा पलिपागमणुपवण्णा तओ कायाओ अभिणिवट्टमाणा अंडं वेगया जणयंति पोयं वेगया जणयंति, से अंडे उन्निज्जमाणे इत्थिं वेगया जणयंति, पुरिसं वेगया जणयंति, णपुंसगं वेगया जणयंति, ते जीवा डहरा समाणा आउसिणेहमाहारैति, अणुपुव्वेणं बुद्धा वणस्सइकायं तसथावरे य पाणे ते जीवा आहारैति पुढविसरीरं जाव संतं अवरेवि य णं तेसिं णाणाविहाणं जलचरपंचिदियतिरिक्खजोणियाणं मच्छाणं जाव सुंसुमाराणं सरीरा णाणावण्णा जावमक्खायं ॥ अहावरं पुरक्खायं णाणाविहाणं चउप्पयथलयरपंचिदियतिरिक्खजोणियाणं तं जहा—एगखुराणं दुखुराणं गंडीपयाणं सणप्फयाणं तेसिं च णं अहावीएणं अहावगासेणं इत्थिए पुरिसस्स य कम्म जाव मेहुणवत्तिए णामं संजोगे समुप्पज्जइ ते दुहओ वि सिणेहं संचिणंति तत्थणं जीवा इत्थित्ताए पुरिसत्ताए जाव विउट्टंति ते जीवा माउउयं पिउमुक्कं एवं जहा मणुस्साणं जाव इत्थिं वेगया जणयंति पुरिसंपि णपुंसगंपि ते जीवा डहरा समाणा माउकखीरं सपिं आहारैति अणुपुव्वेणं बुद्धा वणस्सइकायं तसथावरे य पाणे ते जीवा आहारैति पुढविसरीरं

जाव संतं अवरेवि य णं तेसिं णाणाविहाणं चउप्पयथलयरपंचिदियतिरिक्खजोगि-
याणं एगखुराणं जाव सणप्पयाणं सरीरा णाणावण्णा जावमक्खायं ॥ अहावरं
पुरक्खायं णाणाविहाणं उरपरिसप्पथलयरपंचिदियतिरिक्खजोगियाणं तंजहा—अहीणं
अयगराणं आसालियाणं महोरगाणं तेसिं च णं अहाबीएणं अहावगासेणं इत्थीए
पुरिसस्स जाव एत्थणं मेहुणे एवं तं चैव णाणत्तं अंडं वेगइया जणयंति पोयं वेग-
इया जणयंति से अंडे उच्चिज्जमाणे इत्थिं वेगइया जणयंति पुरिसंपि णपुंसगंपि, ते
जीवा डहरा समाणा वाउकायमाहारेंति अणुपुब्बेणं बुद्धा वणस्सइकायं तसथावरपाणे
ते जीवा आहारेंति पुढविसरीरं जाव संतं अवरेवि य णं तेसिं णाणाविहाणं उरपरि-
सप्पथलयरपंचिदियतिरिक्ख० अहीणं जाव महोरगाणं सरीरा णाणावण्णा णाणागंधा
जावमक्खायं ॥ अहावरं पुरक्खायं णाणाविहाणं भुयरिसप्पथलयरपंचिदियतिरि-
क्खजोगियाणं, तं जहा—गोहाणं णउलाणं सिहाणं सरडाणं सट्ठाणं सरवाणं खराणं
घरक्कोइलियाणं विस्संभराणं मुसगाणं मंगुसाणं पयलाइयाणं विरालियाणं जोहाणं
चउप्पाइयाणं तेसिं च णं अहाबीएणं अहावगासेणं इत्थिए पुरिसस्स य जहा
उरपरिसप्पाणं तहा भाणियक्खं जाव सारुवियकडं संतं अवरेवि य णं तेसिं णाणा-
विहाणं भुयपरिसप्पंचिदियथलयरतिरिक्खणं तं० गोहाणं जावमक्खायं ॥ अहावरं
पुरक्खायं णाणाविहाणं खहरपंचिदियतिरिक्खजोगियाणं, तंजहा—चम्मपक्खीणं
लोमपक्खीणं, समुग्गपक्खीणं विततपक्खीणं तेसिं च णं अहाबीएणं अहावगासेणं
इत्थीए जहा उरपरिसप्पाणं णाणत्तं ते जीवा डहरा समाणा माउगायसिणेहमाहा-
रेंति अणुपुब्बेणं बुद्धा वणस्सइकायं तसथावरे य पाणे ते जीवा आहारेंति पुढवि-
सरीरं जाव संतं अवरे वि य णं तेसिं णाणाविहाणं खहरपंचिदियतिरिक्खजोगियाणं
चम्मपक्खीणं जाव मक्खायं ॥१३॥ अहावरं पुरक्खायं इहेगइया सत्ता णाणाविह-
जोगिया णाणाविहसंभवा णाणाविहवुक्कमा तच्चोगिया तस्संभवा तदुवक्कमा कम्मोवगा
कम्मणियाणेणं तत्थुवुक्कमा णाणाविहाणं तसथावराणं पोगलाणं सरीरेसु सचित्तेसु वा
अचित्तेसु वा अणुसूयत्ताए विउट्टंति । ते जीवा तेसिं णाणाविहाणं तसथावराणं
पाणाणं सिणेहमाहारेंति । ते जीवा आहारेंति पुढविसरीरं जाव संतं । अवरे वि
य णं तेसिं तसथावरजोगियाणं अणुसूयगाणं सरीरा णाणावण्णा जाव मक्खायं ।
एवं दुरूवसंभवत्ताए । एवं खुरदुगत्ताए ॥ १४ ॥ अहावरं पुरक्खायं इहे-

गइया सत्ता णाणाविहजोणिया जाव कम्मणियाणेणं तत्थवुक्कमा णाणाविहाणं तसथा-
वराणं पाणाणं सरीरेसु सच्चित्तेसु वा अच्चित्तेसु वा तं सरीरगं वायसंसिद्धं वा वाय-
संगहियं वा वायपरिगहियं उड्डुवाएसु उड्डुभागी भवइ, अहेवाएसु अहेभागी भवइ,
तिरियवाएसु तिरियभागी भवइ । तं जहा—ओसा हिमए महिया करए हरतणुए
सुद्धोदए । ते जीवा तेसिं णाणाविहाणं तसथावराणं पाणाणं सिणेहमाहारेंति । ते
जीवा आहारेंति पुढविसरीरं जाव संतं । अवरें वि य णं तेसिं तसथावरजोणि-
याणं उस्साणं जाव सुद्धोदगाणं सरीरा णाणावण्णा जाव मक्खायं । अहावरं पुर-
क्खायं इहेगइया सत्ता उदगजोणिया उदगसंभवा जाव कम्मणियाणेणं तत्थवुक्कमा
तसथावरजोणिएसु उदएसु उदगत्ताए विउट्टंति । ते जीवा तेसिं तसथावरजोणियाणं
उदगाणं सिणेहमाहारेंति । ते जीवा आहारेंति पुढविसरीरं जाव संतं । अवरें वि य णं
तेसिं तसथावरजोणियाणं उदगाणं सरीरा णाणावण्णा जाव मक्खायं ।
अहावरं पुरक्खायं इहेगइया सत्ता उदगजोणियाणं जाव कम्मणियाणेणं तत्थवुक्कमा
उदगजोणिएसु उदएसु उदगत्ताए विउट्टंति ते जीवा तेसिं उदगजोणियाणं उदगाणं
सिणेहमाहारेंति । ते जीवा आहारेंति पुढविसरीरं जाव संतं । अवरें वि य णं
तेसिं उदगजोणियाणं उदगाणं सरीरा णाणावण्णा जाव मक्खायं । अहावरं पुर-
क्खायं इहेगइया सत्ता उदगजोणियाणं जाव कम्मणियाणेणं तत्थवुक्कमा उदग-
जोणिएसु उदएसु तसपाणत्ताए विउट्टंति । ते जीवा तेसिं उदगजोणियाणं उदगाणं
सिणेहमाहारेंति । ते जीवा आहारेंति पुढविसरीरं जाव संतं । अवरें वि य णं तेसिं
उदगजोणियाणं तसपाणाणं सरीरा णाणावण्णा जाव मक्खायं ॥ १५ ॥ अहावरं
पुरक्खायं इहेगइया सत्ता णाणाविहजोणिया जाव कम्मणियाणेणं तत्थवुक्कमा
णाणाविहाणं तसथावराणं पाणाणं सरीरेसु सच्चित्तेसु वा अच्चित्तेसु वा अगणिकाय-
त्ताए विउट्टंति ते जीवा तेसिं णाणाविहाणं तसथावराणं पाणाणं सिणेहमाहारेंति ।
ते जीवा आहारेंति पुढविसरीरं जाव संतं । अवरें वि य णं तेसिं तसथावरजोणि-
याणं अगणीणं सरीरा णाणावण्णा जाव मक्खायं । सेसा तिण्णि आलावगा जहा
उदगाणं । अहावरं पुरक्खायं इहेगइया सत्ता णाणाविहजोणियाणं जाव कम्मणिया-
णेणं तत्थवुक्कमा णाणाविहाणं तसथावराणं पाणाणं सरीरेसु सच्चित्तेसु वा अच्चित्तेसु
वा वाउक्कायत्ताए विउट्टंति । जहा अगणीणं तहा भाणिय्वा चत्तारि गमा ॥१६॥

अहावरं पुरक्खायं इहेगहया सत्ता णाणाविहजोगिया जाव कम्मणियाणेणं तत्थबुक्कमा णाणाविहाणं तसथावराणं पाणाणं सरीरेसु सच्चित्तसु वा अच्चित्तसु वा पुढवित्ताए सक्करत्ताए वालुयत्ताए । इमाओ गाहाओ अणुगंतव्वाओ—“पुढवी य सक्करा बालुया य उवले सिला य लोणूसे । अय तउ य तम्ब सीसग रूप सुवण्णे य वइरे य(१)हरियाले हिंगुलए, मणोसिला सासगंजणवाले, अब्भपडलब्भवालुय, वायरकाए मणिविहाणा(२)गोमेज्जए य रुयए, अंके फलिहे य लोहियक्खे य, मरगयमसारगळे भुयमोयगइंदणीले य (३) चंदणोरुयहंसगब्भ, पुलए सोगंधिए य चोद्वे, चंदप्पभवेरुलिए, जलकंते सूरकंते य (४)” एयाओ एएसु भाणियव्वाओ गाहाओ जाव सूरकंतत्ताए विउट्टंति, ते जीवा तेसिं णाणाविहाणं तसथावराणं पाणाणं सिणेहमाहारंति, ते जीवा आहारंति पुढविसरीरं जाव संतं अब्भरे वि य णं तेसिं तसथावरजोगियाणं पुढवीणं जाव सूरकंताणं सरीरा णाणावण्णा जाव मक्खायं, सेसा तिण्णि आलावगा जहा उंदगाणं ॥ १७ ॥ अहावरं पुरक्खायं सव्वे पाणा सव्वे भूया, सव्वे जीवा, सव्वे सत्ता, णाणाविहजोगिया, णाणाविहसंभवा, णाणाविहबुक्कमा, सरीरजोगिया, सरीरसंभवा, सरीरबुक्कमा, सरीराहारा, कम्मोवगा, कम्मणियाणा, कम्मगइया, कम्मठिइया, कम्मणा चेव विप्परियांसमुवेत्ति ॥१८॥ से एवमायाणह से एवमायाणित्ता आहारगुत्ते सहिए समिए सयाजए त्ति बेमि ॥ १९ ॥

पच्चक्खाणकिरिया णाम चउत्थं अज्झयणं

सुयं मे आउसं ! तेषं भगवया एवमक्खायं, इह खलु पच्चक्खाणकिरियाणाज्झयणे तस्सणं अयमट्ठे पण्णत्ते, आया अपच्चक्खाणीयावि भवइ, आया अकिरिया कुसलेयावि भवइ, आया मिच्छासंठिएयावि भवइ, आया एगंतदंडेयावि भवइ, आया एगंतत्रालेयावि भवइ, आया एगंतमुत्तेयावि भवइ, आया अवियारमणवयणकायवक्केयावि भवइ, आया अप्पडिहयअपच्चक्खायपावकम्मेयावि भवइ, एस खलु भगवया अक्खाए, असंजए, अविरए, अप्पडिहयपच्चक्खायपावकम्मे, सकिरिए, असंबुडे, एगंतदंडे, एगंतत्राले, एगंतमुत्ते से बाले, अवियारमणवयणकायवक्के, सुविणमवि ण पस्सइ पावे य से कम्मे कज्जइ ॥ १ ॥ तत्थ चोयए पण्णवगं एवं वयासी, असंतएणं मणेणं पावएणं असंतियाए वईए पावियाए, असंतएणं काएणं पावएणं अहणंतस्स अमणक्खस्स, अवियारमणवयणकायवक्कस्स सुविणविम

अपस्सओ पावे कम्मे णो कज्जइ कस्सणं तं हेउं ? चोयए एवं बवीइ अण्णयरेणं मणेणं पावएणं मणवत्तिए पावे कम्मे कज्जइ, अण्णयरीए वईए पावियाए वइवत्तिए पावे कम्मे कज्जइ, अण्णयरेणं काएणं पावएणं कायवत्तिए पावे कम्मे कज्जइ, हणंतस्स समणक्खस्स सवियारमणवयणकायवक्कस्स सुविणमवि पासओ, एवं गुणजाईयस्स पावे कम्मे कज्जइ, पुणरवि चोयए, एवं बवीइ तत्थणं जे ते एवमाहंसु असंतएणं मणेणं पावएणं असंतियाए वईए पावियाए, असंतएणं काएणं पावएणं अहणंतस्स अमणक्खस्स अवियारमणवयणकायवक्कस्स सुविणमवि अपस्सओ पावे कम्मे कज्जइ, तत्थ णं जे ते एवमाहंसु मिच्छा ते एवमाहंसु ॥ तत्थ पण्णवए चोयगं एवं वयासी—तं मम्मं जं मए पुब्बं वुत्तं असंतएणं मणेणं पावएणं, असंतियाए वईए पावियाए, असंतएणं काएणं पावएणं, अहणंतस्स अमणक्खस्स अवियारमणवयणकायवक्कस्स सुविणमवि अपस्सओ पावे कम्मे कज्जइ, तं मम्मं कस्स णं तं हेउं ? आयरिय आह—तत्थ खलु भगवया छुज्जीवणिकायहेऊ पण्णत्ता, तंजहा पुढविकाइया जाव तसकाइया इब्बेएहिं छहिं जीवणिकाएहिं आया अप्पडिहयपच्चन्नायपावकम्मे, णिच्चं पसदविउवायचित्तदण्ढे, तंजहा पाणाइवाए जाव परिग्गहे, कोहे जाव मिच्छादंसणसल्ले ॥ २ ॥ आयरिय आह—तत्थ खलु भगवया वहए दिट्ठंते पण्णत्ते । से जहाणामए—वहए सिया गाहावइस्स वा गाहावइपुत्तस्स वा रण्णो वा रायपुरिसस्स वा खणं णिदाय पविसिस्सामि खणं लद्धूणं वहिस्सामि संपहारेमाणे से किं णु हुं णाम से वहए तस्स गाहावइस्स वा गाहावइपुत्तस्स वा रण्णो वा रायपुरिसस्स वा खणं णिदाय पविसिस्सामि खणं लद्धूणं वहिस्सामि, पहारेमाणे दिया वा राओ वा सुत्ते वा जागरमाणे वा अमित्तभूए मिच्छासंठिए णिच्चं पसदविउवायचित्तदण्ढे भवइ ? एवं वियागरेमाणे समियाए वियागरे चोयए—हंता भवइ । आयरिय आह—जहा से वहए तस्स गाहावइस्स वा तस्स गाहावइपुत्तस्स वा रण्णो वा रायपुरिसस्स वा खणं णिदाय पविसिस्सामि खणं लद्धूणं वहिस्सामि त्ति पहारेमाणे दिया वा राओ वा सुत्ते वा जागरमाणे वा अमित्तभूए मिच्छासंठिए णिच्चं पसदविउवायचित्तदण्ढे, एवमेव झाले वि सव्वेसिं पाणाणं जावं सव्वेसिं सत्ताणं दिया वा राओ वा सुत्ते वा जागरमाणे वा अमित्तभूए मिच्छासंठिए णिच्चं पसदविउवायचित्तदण्ढे । तं जहा—पाणाइवाए जाव मिच्छादंसणसल्ले ।

एवं खलु भगवया अक्खाए असंजए अविरए अप्पडिहयपच्चक्खायपावकम्मे सक्कि-
रिए असंबुद्धे एगंतदण्डे एगंतबाले एगंतसुत्ते यावि भवंइ । से बाले अब्बियारमण-
वयणकायवक्के सुविणमवि ण पस्सइ पावे य से कम्मे कज्जइ । जहा से वहए तस्स
वा गाहावइस्स जाव तस्स वा रायपुरिस्स पत्तेयं पत्तेयं चित्तसमायाए दिया वा
राओ वा सुत्ते वा जागरमाणे वा अमित्तभूए मिच्छासंठिए णिच्चं पसदविउवाय-
चित्तदण्डे भवइ, एवमेव बाले सव्वेसिं पाणाणं जाव सव्वेसिं सत्ताणं पत्तेयं पत्तेयं
चित्तसमायाए दिया वा राओ वा सुत्ते वा जागरमाणे वा अमित्तभूए मिच्छासंठिए
णिच्चं पसदविउवायचित्तदण्डे भवइ ॥३॥ णो इणट्ठे समट्ठे [चोयए] । इह खलु वहवे
पाणा० जे इमेणं सरीरसमुस्सएणं णो दिट्ठा वा सुया वा णामिमया वा विण्णया
वा जेसिं णो पत्तेयं पत्तेयं चित्तसमायाए दिया वा राओ वा सुत्ते वा जागरमाणे
वा अमित्तभूए मिच्छासंठिए णिच्चं पसदविउवायचित्तदण्डे । तं जहा पाणाइवाए
जाव मिच्छादंसणसल्ले ॥४॥ आयरिय आह—तत्थ खलु भगवया दुवे दिट्ठंता पण्णत्ता ।
तं जहा—सण्णिदिट्ठंते य असण्णिदिट्ठंते य । से किं तं सण्णिदिट्ठंते ? जे इमे सण्णि-
पंचिंदिया पज्जत्ता एएसिं णं छज्जीवणिकाए पडुच्च, तं जहा—पुढवीकायं जाव
तसकायं । से एगइओ पुढवीकाएणं किच्चं करेइ वि कारवेइ वि । तस्स णं एवं
भवइ—एवं खलु अहं पुढवीकाएणं किच्चं करेमि वि कारवेमि वि, णो चेव णं से एवं
भवइ—इमेण वा इमेण वा से एएणं पुढवीकाएणं किच्चं करेइ वि कारवेइ वि ।
से णं तओ पुढवीकायाओ असंजयअविरयअप्पडिहयपच्चक्खायपावकम्मे यावि
भवइ । एवं जाव तसकाए स्ति भाणियव्वं । से एगइओ छज्जीवणिकाएहिं किच्चं
करेइ वि कारवेइ वि । तस्स णं एवं भवइ—एवं खलु छज्जीवणिकाएहिं किच्चं करेमि
वि कारवेमि वि । णो चेव णं से एवं भवइ—इमेहिं वा २, से य तेहिं छहिं जीवणिका-
एहिं जाव कारवेइ वि । से य तेहिं छहिं जीवणिकाएहिं असंजयअविरयअप्पडिहय-
पच्चक्खायपावकम्मे, तं जहा—पाणाइवाए जाव मिच्छादंसणसल्ले । एस खलु भगवया
अक्खाए असंजए अविरए अप्पडिहयपच्चक्खायपावकम्मे सुविणमवि अपस्सओ ।
पावे य से कम्मे कज्जइ । से तं सण्णिदिट्ठंते ॥ से किं तं असण्णिदिट्ठंते ? जे इमे
असण्णिणो पाणा, तं जहा—पुढवीकाइया जाव ऱणस्सइकाइया छट्ठा वेगइया तसा
पाणा, जेसिं णो तक्का इ वा सण्णा इ वा पण्णा इ वा मणा इ वा वई इ वा सयं वा

करणाए अण्णेहि वा कारवेत्तए करंतं वा समणुजाणित्तए, ते वि णं बाले सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्त-भूया मिच्छामंठिया णिच्चं पसद्विउवायचित्तदंडा तं० पाणाइवाए जाव मिच्छा-दंसणसल्ले । इधेव जाव णो चेव मणो णो चेव वई पाणाणं जाव सत्ताणं दुक्खण-याए सोयणयाए जूरणयाए तिप्पणयाए पिट्टणयाए परितप्पणयाए । ते दुक्खण-सोयण जाव परितप्पणवहंबंधणपरिकिलेसाओ अप्पडिविरया भवंति । इइ खलु से असण्णिणो वि सत्ता अहोणिसिं पाणाइवाए उवक्खाइज्जंति जाव अहोणिसिं परिग्गहे उवक्खाइज्जंति जाव मिच्छादंसणसल्ले उवक्खाइज्जंति [एवं भूयवाई] । सव्वजोणिया वि खलु सत्ता सण्णिणो हुच्चा असण्णिणो हांति असण्णिणो हुच्चा सण्णिणो हांति, होच्चा सण्णी अदुवा असण्णी, तत्थ से अविविचित्ता अविधूणित्ता असंमूच्छित्ता अणणुतावित्ता असण्णिकायाओ वा सण्णिकाए संकमंति सण्णिकायाओ वा असण्णिकायं संकमंति, सण्णिकायाओ वा सण्णिकायं संकमंति असण्णिकायाओ वा असण्णिकायं संकमंति । जे एए सण्णि वा असण्णि वा सव्वे ते मिच्छायारा णिच्चं पसद्विउ-वायचित्तदण्डा । तं जहा—पाणाइवाए जाव मिच्छादंसणसल्ले । एवं खलु भगवया अक्खाए असंजए अविरए अप्पडिहयपच्चक्खायपावकम्मे सकिरिए असंबुडे एगंत-दण्डे एगंतवाले एगंतसुत्ते से बाले अवियारभणवयणकायवक्के सुविणमवि ण पासइ पावे य से कम्मे कज्जइ ॥५॥ चोयए—से किं कुव्वं किं कारवं कहं संजयविरय-प्पडिहयपच्चक्खायपावकम्मे भवइ ? आयरिय आह—तत्थ खलु भगवया छ्खीव-णिकायहेऊ पण्णत्ता, तं जहा—पुढवीकाइया जाव तसकाइया । से जहाणामए मम अस्तापं दण्डेण वा अट्ठीण वा सुट्ठीण वा लेल्लण वा कवालेण वा आतोडिज्जमाणस्स वा जाव उवह्विज्जमाणस्स वा जाव लोमुक्खणणमायमवि हिंसकारं दुक्खं भयं पडिसंवेदेमि, इधेवं जाण सव्वे पाणा जाव सव्वे सत्ता दण्डेण वा जाव कवालेण वा आतोडिज्जमाणे वा हम्ममाणे वा तज्जिज्जमाणे वा तालिज्जमाणे वा जाव उवह्विज्जमाणे वा जाव लोमुक्खणणमायमवि हिंसकारं दुक्खं भयं पडिसंवेदेति । एवं णच्चा सव्वे पाणा जाव सव्वे सत्ता ण हंतव्वा जाव ण उह्वेयव्वा । एस धम्मे धुवे णिइए सासए समिच्च लोगं खेयण्णेहिं पवेइए । एवं से भिक्खू विरए पाणाइवायाओ जाव मिच्छा-दंसणसल्लोओ । से भिक्खू णो दंतपक्खालणेणं दंते पक्खालेज्जा, णो अंजणं णो वमणं

णो धूवणित्तिपि आइए । से भिक्खू अकिरिए अलूसए अकोहे जाव अलोमे उव-
संते परिणिवुडे । एस खलु भगवया अक्खाए संजयविरयपडिहयपच्चक्खायपाव-
कम्मे अकिरिए संबुडे एगंतपण्डिए भवइ त्ति वेमि ॥ ६ ॥

आधारसुयं णाम पंचमं अउञ्जयणं

आदाय बम्मचेरं च आसुपण्णे इमं वइं । अस्सि धम्मे अणायारं णायरेञ्ज
कयाइ वि ॥ १ ॥ अणाईयं परिणाय अणवदग्गे त्ति वा पुणो । सासयमसासए
वा इइ दिट्ठि ण धारए ॥ २ ॥ एएहिं दोहिं ठाणेहिं ववहारो ण विञ्जइं । एएहिं
दोहिं ठाणेहिं अणायारं तु जाणए ॥ ३ ॥ समुच्छिहिति सत्थारो सव्वे पाणा
अणेत्तिसा । गंठिया वा भविस्संतिं सासयं ति व णो वए ॥ ४ ॥ एएहिं दोहिं
ठाणेहिं ववहारो ण विञ्जइं । एएहिं दोहिं ठाणेहिं अणायारं तु जाणए ॥ ५ ॥ जे
केइ खुद्दगा पाणा अट्टुवा संति महालय । सरिसं तेहिं वेरं ति असरिसं ति य
णो वए ॥ ६ ॥ एएहिं दोहिं ठाणेहिं ववहारो ण विञ्जइं । एएहिं दोहिं ठाणेहिं
अणायारं तु जाणए ॥ ७ ॥ अहाकम्माणि भुंजंति, अण्णमण्णे सकम्मुणा । उवल्लित्ते
त्ति जाणिञ्जा अणुवल्लित्ते त्ति वा पुणो ॥ ८ ॥ एएहिं दोहिं ठाणेहिं ववहारो ण
विञ्जइं । एएहिं दोहिं ठाणेहिं अणायारं तु जाणए ॥ ९ ॥ जमिदं ओरालमाहारं
कम्मयं च तद्देव य । सव्वत्थ वीरियं अत्थि णत्थि सव्वत्थ वीरियं ॥ १० ॥ एएहिं
दोहिं ठाणेहिं ववहारो ण विञ्जइं । एएहिं दोहिं ठाणेहिं अणायारं तु जाणए
॥ ११ ॥ णत्थि लोए अलोए वा णेवं सण्णं णिवेसए । अत्थि लोए अलोए
वा एवं सण्णं णिवेसए ॥ १२ ॥ णत्थि जीवा अजीवा वा णेवं सण्णं णिवेसए ।
अत्थि जीवा अजीवा वा एवं सण्णं णिवेसए ॥ १३ ॥ णत्थि धम्मे अधम्मे वा णेवं
सण्णं णिवेसए । अत्थि धम्मे अधम्मे वा एवं सण्णं णिवेसए ॥ १४ ॥ णत्थि वंघे
व मोक्खे वा णेवं सण्णं णिवेसए । अत्थि वंघे व मोक्खे वा एवं सण्णं णिवेसए
॥ १५ ॥ णत्थि पुण्णे व पावे वा णेवं सण्णं णिवेसए । अत्थि पुण्णे व पावे वा
एवं सण्णं णिवेसए ॥ १६ ॥ णत्थि आसवे संवरे वा णेवं सण्णं णिवेसए । अत्थि
आसवे संवरे वा एवं सण्णं णिवेसए ॥ १७ ॥ णत्थि वेयणा णिञ्जर वा णेवं सण्णं
णिवेसए । अत्थि वेयणा णिञ्जर वा एवं सण्णं णिवेसए ॥ १८ ॥ णत्थि किरिया
अकिरिया वा णेवं सण्णं णिवेसए । अत्थि किरिया अकिरिया वा एवं सण्णं णिवे-
सए ॥ १९ ॥ णत्थि कोहे व माणे वा णेवं सण्णं णिवेसए । अत्थि कोहे व माणे वा एवं

सण्णं णिवेसए ॥ २० ॥ णत्थि माया व लोभे वा णेवं सण्णं णिवेसए । अत्थि माया व लोभे वा एवं सण्णं णिवेसए ॥ २१ ॥ णत्थि पेज्जे व दोसे वा णेवं सण्णं णिवेसए । अत्थि पेज्जे व दोसे वा एवं सण्णं णिवेसए ॥ २२ ॥ णत्थि चाउरंते संसारे णेवं सण्णं णिवेसए । अत्थि चाउरंते संसारे एवं सण्णं णिवेसए ॥ २३ ॥ णत्थि देवो व देवी वा णेवं सण्णं णिवेसए । अत्थि देवो व देवी वा एवं सण्णं णिवेसए ॥ २४ ॥ णत्थि सिद्धी असिद्धी वा णेवं सण्णं णिवेसए । अत्थि सिद्धी असिद्धी वा एवं सण्णं णिवेसए ॥ २५ ॥ णत्थि सिद्धी णियं ठाणं णेवं सण्णं णिवेसए । अत्थि सिद्धी णियं ठाणं एवं सण्णं णिवेसए ॥ २६ ॥ णत्थि साहू असाहू वा णेवं सण्णं णिवेसए । अत्थि साहू असाहू वा एवं सण्णं णिवेसए ॥ २७ ॥ णत्थि कल्लाण पावे वा णेवं सण्णं णिवेसए । अत्थि कल्लाण पावे वा एवं सण्णं णिवेसए ॥ २८ ॥ कल्लाणे पावए वा वि ववहारो ण विज्जइ । जं वेरं तं ण जाणंति समणा बालपण्डिया ॥ २९ ॥ असेसं अक्खयं वावि सव्वदुक्खे इ वा पुणो । वज्झा पाणा ण वज्झं त्ति इइ वायं ण णोसरे ॥ ३० ॥ दीसंति समियायारा भिक्खुणो साहुजीविणो । एए भिच्छोवजीवंति इइ दिट्ठिं ण धारए ॥ ३१ ॥ दक्खिणाए पड्डिलम्मो अत्थि वा णत्थि वा पुणो । ण वियागरेज्जं मेहावी संतिमग्गं च वूहए ॥ ३२ ॥ इच्चेएहिं ठाणेहिं जिणदिट्ठेहिं संजए । धारयंते उ अप्पाणं आमोक्खाए परिव्वएज्जासि ॥ ३३ ॥ त्ति वेमि ॥

अहंइज्जं णाम छट्ठं अज्झयणं

पुराकडं अहं ! इमं सुणेह मेरंत्तयारो समणे पुरासी । से भिक्खुणो उवणेत्ता अणेगे आइक्खएण्हिं पुटो वित्थरेणं ॥ १ ॥ साऽऽजीविया पट्टवियाऽधारेणं सभागओ गणओ भिक्खुमज्जे । आइक्खमाणो बहुज्जणमत्थं ण संघयाई अवरेण पुव्वं ॥ २ ॥ एरंतमेवं अदुवा वि एण्हिं दोऽवण्णमण्णं ण समेइ जम्हा । पुर्व्वं च एण्हिं च अणागयं वा एरंतमेवं पडिसंघयाइ ॥ ३ ॥ समिच्च लोमं तसथावराणं खेमंकरे समणे माहणे वा । आइक्खमाणो वि सहस्समज्जे एरंतयं सारयई तहच्चे ॥ ४ ॥ धम्मं कंहुतस्स उ णत्थि दोसो खंतस्स दंतस्स जिईदियस्स । भासाय दोसे यं विवज्जंगस्स गुणे यं भासाय णिसेवगस्स ॥ ५ ॥ महव्वए पंच अणुव्वए यं तहेव पंचासव संवरे यं । विरई इहं स्सामणियम्मि पण्णे लधावसक्की समणे त्ति

बेमि ॥ ६ ॥ सीओदगं सेवउ बीयकार्यं आहायकम्मं तह इत्थियाओ । एरंत-
 चारिस्सिह अम्ह धम्मे तवस्सिणो णाभिसमेइ पावं ॥७॥सीओदगं वा तह बीयकार्यं
 आहायकम्मं तह इत्थियाओ । एयाई जाणं पडिसेवमाणा अगारिणो अस्समणा
 भवंति ॥८॥ सिया य बीओदगइत्थियाओ पडिसेवमाणा समणा भवंतु । अगारिणो
 वि समणा भवंतु सेवंति ऊ ते वि तहप्पगारं ॥९॥ जे यावि बीओदगभोइ भिक्खू
 भिक्खं विहं जायइ जीवियद्धी । ते णाइसंजोगमविप्पहाय कायोवगा णंतकरा भवंति
 ॥ १० ॥ इमं वयं तु तुम पाउकुळ्वं पावाइणो गरिहसि सच्च एय । पावाइणो पुटो
 किइयंता सयं सयं दिट्ठि करंति पाउ ॥११॥ते अण्णमण्णस्स उ गरहमाणा अकमंति
 भो समणा माहणा य । सओ य अत्थी असओ य णत्थि गरहामु दिट्ठि ण गरहामु
 किंचि ॥ १२ ॥ ण किंचि रुवेणंऽभिधारयामो सदिट्ठिमग्गं तु करेसु पाउं । मग्गे
 इमे किट्ठिए आरिएहिं अणुत्तरे सप्पुरिसेहिं अंजू ॥ १३ ॥ उहं अहे यं तिरियं
 दिसामु तसा य जे थावर जे य पाणा । भूयाहिसंकाभिदुगुंळमाणा णो गरहई
 बुसिमं किंचि लोए ॥ १४ ॥ आगंतगारे आरामगारे समणे उ भीए ण उवेइ
 वासं । दक्खा हु संती बहवे मणुस्सा ऊणाइरित्ता य लवालवा य ॥ १५ ॥ मेहा-
 विणो सिक्खिय बुद्धिमंता सुत्तेहि अत्थेहि य णिच्छंयणा । पुच्छिसु मा णे अणगार
 अण्णे इइ संकमाणो ण उवेइ तत्थ ॥ १६ ॥ णो कामक्किच्चा ण य बालक्किच्चा रायाभि-
 ओगेण कुओ भएणं ? वियागरेज्ज पसिणं ण वा वि सकामक्किच्चेणिह आरियाणं ॥ १७ ॥
 गंता च तत्था अदुवा अगंता वियागरेज्जा समियासुपण्णे । अणारिया दंसणओ
 परित्ता इइ संकमाणो ण उवेइ तत्थ ॥ १८ ॥ पण्णं ज्जा वणिए उदयद्धी आयस्स
 हेउं पगरेइ संगं । तओवमे समणे णायपुत्ते इच्चेव मे होइ मई विवक्का ॥ १९ ॥
 णवं ण कुज्जा विहुणे पुराणे चिच्चाऽमई ताइ य साह एवं । एयावया चम्भवइ ति
 बुत्ता तत्सोदयद्धी समणे ति बेमि ॥ २० ॥ समारभंते वणिया भूयगामं परिग्गहं
 चेव ममायमाणा । ते णाइसंजोगमविप्पहाय आयस्स हेउं पगरंति संगं ॥ २१ ॥
 वित्तेसिणो मेहुणसंपगाढा ते भोयणद्धा वणिया वयंति । वयं तु कामेसु अज्जोववण्णा
 अणारिया पेमरसेसु गिद्धा ॥ २२ ॥ आरम्भगं चेव परिग्गहं च अविउत्तिसया
 णिस्सिय आयदण्डा । तेसिं च से उदए जं वयासी चउरंतणंताय दुहाय णेह ॥२३॥
 णेगंति णचंति य ओदए सो वयंति ते दो वि गुणोदयम्मि । से उदए साइमणंतपत्ते

तमुदयं साहयइ ताइ णाई ॥ २४ ॥ अहिंसयं सव्वपयाणुकम्पी धम्मं ठियं कम्म-
 विवेगहेउं । तमार्यदण्डेहिं समायरंता अबोहिए ते पडिरूवमेयं ॥२५॥ पिण्णाग-
 पिपट्ठीमवि विद्ध सूले केई पएज्जा पुरिसे इमे त्ति । अलाउयं वा वि कुमारए त्ति
 स लिप्पई पाणिवहेण अम्हं ॥ २६ ॥ अहवा वि विद्धूण मिलक्खु सूले पिण्णाग-
 बुद्धीइ णरं पएज्जा । कुमारगं वा वि अलाबुयं ति ण लिप्पई पाणिवहेण अम्हं ॥२७॥
 पुरिसं च विद्धूण कुमारगं वा सूलंमि केई पए जायतेए । पिण्णागपिण्डं सहमारु-
 हेत्ता बुद्धाण तं कप्पइ पारणाए ॥ २८ ॥ सिणायगाणं तु दुवे सहस्से जे भोयए
 गियए भिक्खुयाणं । ते पुण्णखंयं सुमहं जिगित्ता भवंति आरोप्प महंत सत्ता ॥२९॥
 अजोगरूवं इह संजयाणं पावं तु पाणाण पसञ्ज काउं । अबोहिए दोण्ह वि तं
 असाहु वयंति जे यावि पडिस्सुणंति ॥३०॥ उट्ठं अहे यं तिरियं दिसासु विण्णाय लिंमं
 तसधावराणं । भूयाभिसंकाइ दुगुंछमाणे वए करेज्जा व कुओ विहइत्थि ? ॥३१॥
 पुरिसे त्ति विण्णत्ति ण एवमत्थि अणारिए से पुरिसे तथा हु । को संभवो ? पिण्णग-
 पिण्डियाए वाया वि एसा बुइया असच्चा ॥ ३२ ॥ वायाभियोगेण जमावहेज्जा
 णो तारिसं वायमुदाहरेज्जा । अट्ठाणमेयं वयणं गुणाणं णो दिक्खिए बूय मुरालमेयं
 ॥ ३३ ॥ लद्धे अट्ठे अहो एव तुब्भे जीवाणुभागे सुविचिंतिए व । पुब्बं समुहं
 अवरं च पुट्ठे उलोहए पाणितले ठिए वा ॥३४॥ जीवाणुभागं सुविचिंतयंता आहा-
 रिया अण्णविहीए सोहिं । ण वियागरे छण्णपओपजीवी एसोऽणुधम्मो इह संजयाणं
 ॥३५॥ सिणायगाणं तु दुवे सहस्से जे भोयए गियए भिक्खुयाणं । असंजए लोहिय-
 पाणि से ऊ गियच्छई गरिहमिहेव लोए ॥३६॥ थूलं उरब्भं इह मारियाणं उद्विद्धभत्तं
 च पगप्पएत्ता । तं लोणतेल्लेण उवक्खंडेत्ता सपिप्पलीयं पगरंति मंसं ॥ ३७ ॥ तं
 भुंजमाणा पिसियं पभूयं णो उवल्लिप्पामु वयं रएणं । इच्चवमाहंसु अणजधम्मा
 अणारिया बाल रसेसु गिद्धा ॥३८॥ जे यावि भुंजति तहप्पगारं सेवति ते पावम-
 चाणमाणा । मणं ण एयं कुसला करंति वाया वि एसा बुइया उ मिच्छ ॥३९॥
 सव्वेसि जीवाण दयद्वयाए सावज्जदोसं परिवज्जयंता । तस्सकिणो इसिणो णायपुत्ता
 उद्विद्धभत्तं परिवज्जयंति ॥ ४० ॥ भूयाभिसंकाए दुगुंछमाणा सव्वेसि पाणाण गिहाय
 दण्डं । तम्हा ण भुंजति तहप्पगारं एसोऽणुधम्मो इह संजयाणं ॥ ४१ ॥ णिग्गंथ-
 धम्ममि इमं समाहिं अस्सि सुठिच्चा अणिहे चरेज्जा । बुद्धे मुणी सीलगुणोववेए

अच्छथयं पाउणई सिलोगं ॥ ४२ ॥ सिणायगाणं तु दुवे सहस्से जे भोयए गियए माहणाणं । ते पुण्णखंधे सुमहऽज्जजित्ता भवंति देवा इइ वेयवाओ ॥४३॥ सिणाय-
गाणं तु दुवे सहस्से जे भोयए गियए कुलालयाणं । से गच्छइ लोलुवसंपगाडे तिन्वाभितावी णरगाभिसेवी ॥ ४४ ॥ दयावरं धम्म दुरंगुल्लमाणा वहावहं धम्म पसं-
समाणा । एगं पि जे भोययई असीलं णिवो गिसं जाइ कुओऽसुरेहिं ॥ ४५ ॥
दुहओ वि धम्मम्मि समुट्ठियामो अस्सि सुट्ठिच्चा तह एसकालं । आथारसीले बुइएह
णाणी ण संपरायम्मि त्रिसेसमत्थि ॥ ४६ ॥ अक्खत्तरूवं पुरिसं महंतं सणातणं
अकखयमक्खयं च । सक्खेसु भूएसु वि सक्खंओसे चंदो व ताराहि समत्तरूवे ॥४७॥
एवं ण सिञ्जेति ण संसरंति ण माहणा खत्थिय वेस पेसा । क्रीडा य पक्खी य
सरोसिवा य णरा य सक्खे तहं देवलोगा ॥ ४८ ॥ लोये अयाणित्तिह केवल्लेण
कहंति जे धम्ममजाणमाणा । णःसंति अप्पाण परं च णट्ठा संसार घोरम्मि अणो-
रपारे ॥ ४९ ॥ लोगं विजाणंतिह केवल्लेण पुण्णेण णाणेण समाहिजुत्ता । धम्मं च
समत्तं च कहंति जे उ तारंति अप्पाण परं च तिण्णा ॥ ५० ॥ जे गरहियं ठाण-
मिहावसंति जे यावि लोए चरणोववेया । उदाहडं तं तु समं मईए अहाउसो
विप्परियासमेव ॥ ५१ ॥ संवच्छरेणावि य एगमेगं बाणेण मारेउ महागयं तु ।
सेसाण जीवाण दयद्वयाए वासं वयं वित्ति पकप्पयामो ॥ ५२ ॥ संवच्छरेणावि य
एगमेगं पाणं हणंता अप्पियत्तदोसा । सेसाण जीवाण वहेण लग्गा सिया य थोवं
गिहिणो वि तम्हा ॥ ५३ ॥ संवच्छरेणावि य एगमेगं पाणं हणंता समणक्खएसु ।
आथाहिए से पुरिसे अण्णे ण तारिसे केवल्लिणो भवंति ॥ ५४ ॥ बुद्धस्स आणाए
इमं समाहिं अस्सि सुट्ठिच्चा ति विहेण ताई । तरिउं समुद्धं च महंभवोयं आयाणयं
धम्ममुदाहरेज्जा ॥ ५५ ॥ त्ति वेमि ॥

पालंदइज्जं णाम सत्तमं अज्जयणं

तेणं कालेणं तेणं समएणं रायगिहे णामं णयरे होत्था रिद्धित्थिमियसमिद्धे
(वण्णओ) जाव पडिरूवे । तस्स णं रायगिहस्स णयरस्स बहिया उत्तरपुरत्थिमे
दिसीभाए एत्थ णं णालंदा णामं बाहिरिया होत्था अणेगभवणसयसंणिविट्ठा जाव
पडिरूवा । तत्थ णं णालंदाए बाहिरियाए लेवे णामं गाह्मवई होत्था अद्धे दित्ते
वित्ते वित्थिण्णविपुलभवणसयणासणजाणवाहाणाइण्णे बहुधणबहुजायस्वरजए आओ-

गपओगसंपउत्ते विच्छड्डियपउरभत्तपाणे बहुदासीदासगोमहिसगवेलगप्पभूए बहु-
 जणस्स अपरिभूए यावि होत्था ॥ १ ॥ से णं लेवे णामं गाहावई समणोवासए
 यावि होत्था अभिगयजीवाजीवे जाव विहरइ णिग्गंथे पावयणे णिस्संक्खिए णिक्कं-
 खिए णिव्विइगिच्छे लद्धे गहियट्ठे पुच्छियट्ठे विणिच्छियट्ठे अभिगहियट्ठे अट्ठिमिंजा
 पेमाणुरागरत्ते । अयमाउसो ! णिग्गंथे पावयणे अयं अट्ठे, अयं परमट्ठे, सेसे अणट्ठे,
 उस्सियफलिहे अप्पावयदुवारे चियत्तंतेउरप्पवेसे चाउद्दसट्ठमुद्दिट्ठपुण्णमासिणीसु
 पडिपुण्णं पोसहं सम्मं अणुपालेमाणे समणे णिग्गंथे तहाविहेणं एसणिल्लेणं असण-
 पाणत्ताइमसाइमेणं पडिलामेमाणे बहूहिं सीलच्चयगुणविरमणपच्चक्खणपोसहोववा-
 सेहिं अप्पाणं भावेमाणे एवं च णं विहरइ ॥ २ ॥ तस्स णं लेवस्स गाहावइस्स
 णालंदाए बाहिरियाए उत्तरपुरत्थिमे दिसिभाए एत्थ णं सेसदविया णामं उदग-
 साला होत्था अणेगत्तम्भसयसंणिविट्ठा पासादीयां जाव पडिरूवा । तीसे णं सेसद-
 वियाए उदगसालाए उत्तरपुरत्थिमे दिसिभाए एत्थ णं इत्थिजामे णामं वणसण्ठे
 होत्था क्खिहे (वण्णओ वणसण्ठस्स) ॥ ३ ॥ तस्सि च णं गिहपदेसम्मि भगवं गोयमे
 विहरइ, भगवं च णं अहे आरामंसि । अहे णं उदए पेढालपुत्ते भगवं पासावच्चिल्ले
 णियंठे मेयञ्जे गोत्तेणं जेणेव भगवं गोयमे तेणेव उवागच्छइ, उवागच्छित्ता
 भगवं गोयमं एवं वयासी-आउसंतो गोयमा ! अत्थि खलु मे केइ पदेसे पुच्छियव्वे
 तं च आउसो ! अहासुर्यं अहादरिसियं मे वियागरेहि सवायं ? भगवं गोयमे उदयं
 पेढालपुत्तं एवं वयासी-अवियाइ आउसो ! सोच्चा णिसम्म जाणिस्सामो सवायं ।
 उदए पेढालपुत्ते भगवं गोयमं एवं वयप्पी ॥४॥ आउसो गोयमा ! अत्थि खलु कुमार-
 पुत्तिया णाम समणा णिग्गंथा तुम्हाणं पवयणं पवयमाणा गाहावई समणोवासगं उव-
 संपण्णं एवं पच्चक्खान्वेति-णण्णत्थ अभिओएणं गाहावइचोरग्गहणविमोक्खणयाए
 तसेहिं पाणेहिं णिहाय दण्डं । एवं ण्हं पच्चक्खंताणं दुप्पच्चक्खायं भवइ, एवं ण्हं
 पच्चक्खावेमाण्णं दुपच्चक्खावियव्वं भवइ, एवं ते परं पच्चक्खावेमाणा अइयरंति
 सयं पइण्णं । कस्स णं तं हेउं ? संसारिया खलु पाणा, थावरा वि पाणा तसत्ताए
 पच्चार्यंति, तसा वि पाणा थावरत्ताए पच्चार्यंति, थावरकायाओ विप्पमुच्चमाणा तस-
 कायंसि उववञ्जंति, तसकायाओ विप्पमुच्चमाणा थावरकायंसि उववञ्जंति । तेसिं च णं
 थावरकायंसि उववण्णाणं ठाण्णमेयं घत्तं ॥५॥ एवं ण्हं पच्चक्खंताणं सुपच्चक्खायं भवइ ।

एवं णं पच्चक्खावेमाणं सुपच्चक्खावियं भवइ । एवं ते परं पच्चक्खावेमाणा णाइय-
रंति सयं पइण्णं णणत्थ अभिओएणं गाहावइचोरग्गहणविमोक्खणयाए तसभूएहिं
पाणेहिं णिहाय दण्डं । एवमेव सइ भासाए परक्कमे विज्जमाणे जे ते कोहा वा
लोहा वा परं पच्चक्खावेति अयं पि णो उवएसे णो जेयाउए भवइ । अवियाइ
आउसो गोयमा ! तुब्भं पि एवं रोयइ ? सवायं भगवं गोयमे उदयं पेढालपुत्तं एवं
वयासी—आउसंतो उदगा ! णो खलु अम्हे एवं रोयइ । जे ते समणा वा माहणा वा
एवमाइक्खंति जाव परूवेति णो खलु ते समणा वा णिग्गथा वा भासं भासंति,
अणुत्तावियं खलु ते भासं भासंति, अब्भाइक्खंति खलु ते समणे समणोवासाए
वा जेहिं वि अण्णेहिं जीवेहिं पाणेहिं भूएहिं सत्तेहिं संजमयंति ताण वि ते
अब्भाइक्खंति । कस्स णं तं हेउं ? संसारिया खलु पाणा, तसावि पाणा थावर-
त्ताए पच्चायंति थावरा वि पाणा तसत्ताए पच्चायंति तसकायाओ विप्प-
मुच्चमाणा थावरकायंसि उववज्जंति, थावरकायाओ विप्पमुच्चमाणा तसकायंसि
उववज्जंति, तेसिं च णं तसकायंसि उववण्णाणं ठाणमेयं अघत्तं ॥ ७ ॥ सवायं
उदए पेढालपुत्ते भगवं गोयमं एवं वयासी—कयरे खलु ते आउसंतो गोयमा !
तुब्भे वयह तसा पाणा तसा आउ अण्णहा ? सवायं भगवं गोयमे उदयं पेढालपुत्तं
एवं वयासी—आउसंतो उदगा ! जे तुब्भे वयह तसभूया पाणा तसा ते वयं वयामो
तसा पाणा, जे वयं वयामो तसा पाणा ते तुब्भे वयह तसभूया पाणा । एए संति
दुवे ठाणा तुल्ला एगट्ठा । किमाउसो ! इमे भे सुप्पणीयतराए भवइ तसभूया पाणा
तसा, इमे भे दुप्पणीयतराए भवइ—तसा पाणा तसा । तओ एगमाउसो ! पडि-
क्कोसह एकं अभिणंदह । अयं पि भेदो से णो जेयाउए भवइ । भगवं च णं उदाहु-
संतगेइया मणुस्सा भवंति, तेसिं च णं एवं वुत्तपुत्वं भवइ—णो खलु वयं संचाएमो
मुण्डा भवित्ता अगाराओ अणगारियं पव्वइत्ताए । सावयं णं अणुपुत्वेणं गुत्तस्स
ल्लिस्सिस्सामो । ते एवं संखवेति ते एवं संखं ठवयंति ते एवं संखं ठवयंति
णणत्थ अभिओएणं गाहावइचोरग्गहणविमोक्खणयाए तसेहिं पाणेहिं णिहाय दण्डं ।
तं पि तेसिं कुसलमेव भवइ ॥ ८ ॥ तसा वि वुच्चेति तसा तससंभारकडेणं कम्मणा
णामं च णं अब्भुवगयं भवइ, तसाउयं च णं पल्लिक्खीणं भवइ, तसकायट्ठिइया ते
तओ आउयं विप्पजहंति । ते तओ आउयं विप्पजहित्ता थावरत्ताए पच्चायंति ।

थावरा वि बुद्धंति । थावरा थावरसंभारकडेणं कम्मणा णामं च णं अब्भुवगयं भवइ
थावराउत्थं च णं पलिकक्खीणं भवइ । थावरकायट्टिइया ते तओ आउत्थं विप्पजहंति
तओ आउत्थं विप्पजहिता भुञ्जो परलोइयत्ताए पच्चायंति । ते पाणावि बुद्धंति, ते तसा
वि बुद्धंति, ते महाकाया ते चिरट्टिइया ॥९॥ सवायं उदए पेढालपुत्ते भयवं गोयमं
एवं वयासी—आउसंतो गोयमा ! णत्थि णं से केइ परियाए जं णं समणोवासगस्स
एगपाणाइवायविरए वि दण्डे णिक्खित्ते । कस्स णं तं हेउं ? संसारिया खलु पाणा,
थावरा वि पाणा तसत्ताए पच्चायंति, तसा वि पाणा थावरत्ताए पच्चायंति, थावर-
कायाओ विप्पमुच्चमाणा सव्वे तसकायंसि उववज्जंति, तसकायाओ विप्पमुच्चमाणा सव्वे
थावरकायंसि उववज्जंति, तेसिं च णं थावरकायंसि उववण्णाणं ठाणमेयं घत्तं ।
सवायं भगवं गोयमे उदयं पेढालपुत्तं एवं वयासी—णो खलु आउसो ! अम्हाकं वत्त-
व्वएणं तुब्भं चैव अणुप्पवाएणं अत्थि णं से परियाए जे णं समणोवासगस्स सव्व-
पाणेहिं सव्वभूएहिं सव्वजीवेहिं सव्वसत्तेहिं दण्डे णिक्खित्ते भवइ । कस्स णं तं
हेउं ? संसारिया खलु पाणा, तसा वि पाणा थावरत्ताए पच्चायंति, थावरा वि पाणा
तसत्ताए पच्चायंति, तसकायाओ विप्पमुच्चमाणा सव्वे थावरकायंसि उववज्जंति,
थावरकायाओ विप्पमुच्चमाणा सव्वे तसकायंसि उववज्जंति तेसिं च णं तसकायंसि
उववण्णाणं ठाणमेयं अधत्तं । ते पाणा वि बुद्धंति, ते तसा वि बुद्धंति, ते महाकायां
ते चिरट्टिइया । ते बहुयरगा पाणा जेहिं समणोवासगस्स सुपच्चवस्वायं भवइ । ते
अप्पयरगा पाणा जेहिं समणोवासगस्स अपच्चक्खायं भवइ । से महया तसकायाओ
उवसंतस्स उवट्टियस्स पडिविरयस्स जं णं तुब्भे वा अण्णो वा एवं वयह—णत्थि णं
से केइ परियाए जंस्सि समणोवासगस्स एगपाणाए वि दण्डे णिक्खित्ते । अयं पि
भेदे से णो णेयाउए भवइ ॥ १० ॥ भगवं च णं उदाहु णियण्ठा खलु पुच्छि-
यव्वा । आउसंतो ! णियण्ठा इह खलु संतेगइया मणुस्सा भवंति । तेसिं च एवं
वुत्तपुव्वं भवइ—जे इमे मुण्डे भवित्ता अगाराओ अण्णारियं पव्वइए एसिं च
णं आमरणंताए दण्डे णिक्खित्ते । जे इमे अगारमावसंति एएसिं णं आमरणंताए
दण्डे णो णिक्खित्ते । केई च णं समणा जाव वासाइं चउपच्चमाइं छट्ठदसमाइं
अप्पयरो वा भुज्जयरो वा देसं दूइज्जित्ता अगारमावसेज्जा ? हंता वसेज्जा । तस्स णं
तं गारत्थं वहमाणस्स से पच्चक्खाणे भंगे भवइ ? णो इण्ठे समट्ठे । एवमेव समणो-

वासगस्स वि तसेहिं पाणेहिं दण्डे णिक्खित्ते, थावरेहिं पाणेहिं दण्डे णो णिक्खित्ते । तस्स णं तं थावरकायं वहमाणस्स से पच्चक्खाणे णो भंगे भवइ । से एवमायाणह गियण्ठा ! से एवमायाणियुव्वं ॥ भगवं च णं उदाहु गियण्ठा खलु पुच्छियव्वा-आउसंतो ! गियण्ठा इह खलु गाहावई वा गाहावइपुत्तो वा तहप्पगारेहिं कुलेहिं आगम्म धम्मं सवणवत्तियं उवसंकमेज्जा ? हंता उवसंकमेज्जा । तेसिं च णं तहप्पगाराणं धम्मं आइक्खियव्वे ? हंता आइक्खियव्वे । किं ते तहप्पगारं धम्मं सोच्चा णिसम्म एवं वएज्जा इणमेव णिग्गंयं पावयणं सच्चं अणुत्तरं केवलियं पडिपुण्णं संसुद्धं णेयाउयं सल्लकत्तणं सिद्धिमग्गं मुत्तिमग्गं णिज्जाणमग्गं णिव्वाणमग्गं अवि-तहमसंदिद्धं सव्वदुक्खव्वपहीणमग्गं । 'एत्थ ठिया जीवा सिज्झंति वुज्झंति मुच्चंति परिणिव्वायंति सव्वदुक्खानमंतं करेति । तमाणाए तहा गच्छामो तहा चिट्ठामो तहा णिसीयामो तहा तुयट्टामो तहा भुंजामो तहा भासामो तहा अब्भुट्टामो तहा उट्टाए उट्टेमो त्ति पाणाणं भूयाणं जीवाणं सत्ताणं संजमेणं संजमामो त्ति वएज्जा ? हंता वएज्जा । किं ते तहप्पगारा कप्पंति पव्वावित्तए ? हंता कप्पंति किं ते तहप्पगारा कप्पंति मुण्डावित्तए ? हंता कप्पंति । किं ते तहप्पगारा कप्पंति सिक्खावित्तए ? हंता कप्पंति । किं ते तहप्पगारा कप्पंति उवट्टावित्तए ? हंता कप्पंति । तेसिं च णं तहप्पगाराणं सव्वपाणेहिं जाव सव्वसत्तेहिं दण्डे णिक्खित्ते ? हंता णिक्खित्ते । से णं एयारूवेणं विहारेणं विहरमाणा जाव वासाइं चउपंचमाइं छट्ठहसमाइं वा अप्पयरो वा भुज्जयरो वा देसं दूइज्जेत्ता अगारं वएज्जा ? हंता वएज्जा । तस्स णं सव्वपाणेहिं जाव सव्वसत्तेहिं दण्डे णिक्खित्ते ? णो इणट्ठे समट्ठे । से जे से जीवे जस्स परेणं सव्वपाणेहिं जाव सव्वसत्तेहिं दण्डे णो णिक्खित्ते । से जे से जीवे जस्स आरेणं सव्वपाणेहिं जाव सत्तेहिं दण्डे णिक्खित्ते । से जे से जीवे जस्स इयाणि सव्वपाणेहिं जाव सत्तेहिं दण्डे णो णिक्खित्ते भवइ, परेणं असंजए आरेणं संजए, इयाणि असंजए, असंजयस्स णं सव्वपाणेहिं जाव सत्तेहिं दण्डे णो णिक्खित्ते भवइ । से एवमायाणह गियण्ठा ? से एवमायाणियुव्वं ॥ भगवं च णं उदाहु गियण्ठा खलु पुच्छियव्वा-आउसंतो ! गियण्ठा इह खलु परि-व्वाइया वा परिव्वाइयाओ वा अण्णयरेहिंती तित्थाययणेहिंती । आगम्म धम्मं सवणवत्तियं उवसंकमेज्जा ? हंता उवसंकमेज्जा । किं तेसिं तहप्पगारेणं धम्मं आइ-

विखयव्वे ? हंता आइक्खियव्वे । तं चेव उवट्ठावित्तए जाव कप्पंति ? हंता कप्पंति । किं ते तहप्पगारा कप्पंति संभुंजित्तए ? हंता कप्पंति । ते णं एयारूवेणं विहारेणं विहरमाणा तं चेव जाव अगारं वएज्जा ? हंता वएज्जा । ते णं तहप्पगारा कप्पंति संभुंजित्तए ? णो इण्ठे समट्ठे । से जे से जीवे जे परेणं णो कप्पंति संभुंजित्तए । से जे से जीवे आरेणं कप्पंति संभुंजित्तए । से जे से जीवे जे इयाणि णो कप्पंति संभुंजित्तए । परेणं अस्समणे आरेणं समणे, इयाणि अस्समणे, अस्समणेणं सद्धिं णो कप्पंति समणाणं णिग्गंथाणं संभुंजित्तए । से एवमायाणह ? णियण्ठा से एवमायाणियव्वं ॥ ११ ॥ भगवं च णं उदाहु संतेगइया समणोवासगा भवंति । तेसिं च णं एवं वुत्तपुव्वं भवइ--णो खलु वयं संचाएमो मुण्डा भवित्ता अगाराओ अणगारियं पव्वइत्तए । वयं णं चाउहसट्ठमुद्धिपुण्णिमासिणीसु पडिपुण्णं पोसहं सम्मं अणुपालेमाणा विहरिस्सामो । थूलगं पाणाइवायं पच्चक्खाइस्सामो, एवं थूलगं मुसावायं थूलगं अदिण्णादाणं थूलगं मेहुणं थूलगं परिग्गहं पच्चक्खाइस्सामो । इच्छापरिमाणं करिस्सामो, दुविहं तिविहेणं । मा खलु ममट्ठाए किंचि करेह वा करावेह वा तत्थं वि पच्चक्खाइस्सामो । ते णं अभोच्चा अपिच्चा असिणाइत्ता आसंदीपेडि-याओ पच्चोरहित्ता, ते तहा कालगया किं वत्तव्वं सिया--सम्मं कालगयं त्ति ? वत्तव्वं सिया । ते पाणा वि बुच्चंति ते तसा वि बुच्चंति ते महाकाया ते च्चिरट्ठिइया । ते ब्रह्मुरगा पाणा जेहिं समणोवासगस्स सुपच्चक्खायं भवइ । ते अप्पयरगा पाणा जेहिं समणोवासगस्स अपच्चक्खायं भवइ । इइ से महयाओ जं णं तुब्भे वयह तं चेव जाव अयं पि भेदे से णो णेयाउए भवइ ॥ भगवं च णं उदाहु संतेगइया समणोवासगा भवंति । तेसिं च णं एवं वुत्तपुव्वं भवइ--णो खलु वयं संचाएमो मुण्डा भवित्ता अगाराओ जाव पव्वइत्तए । णो खलु वयं संचाएमो चाउहसट्ठमुद्धिपुण्णिमासिणीसु जाव अणुपालेमाणे विहरित्तए । वयं णं अपच्छिममारणंतियं संलेहणाजूसणाजूसिया भत्तपाणं पडियाइक्खिया जाव कालं अणवकंखमाणा विहरिस्सामो । सव्वं पाणाइवायं पच्चक्खाइस्सामो जाव सव्वं परिग्गहं पच्चक्खाइस्सामो तिबिहं तिबिहेणं मा खलु ममट्ठाए किंचि वि जाव आसंदीपेडियाओ पच्चोरहित्ता एए तहा कालगया, किं वत्तव्वं सिया सम्मं कालगयं त्ति ? वत्तव्वं सिया । ते पाणा वि बुच्चंति जाव अयं पि भेदे से णो णेयाउए भवइ ॥ भगवं च णं उदाहु संते-

गइया मणुस्सा भवंति । तं जहा—महइच्छा महारम्भा महापरिग्गहा अहम्मिय जाव दुप्पडियाणंदा जाव सव्वाओ परिग्गहाओ अप्पडिविरया जावज्जीवाए जेहिं समणोवासगस्स आयाणसो आमरणंताए दंढे णिक्खित्ते ते तओ आउगं विप्पजहंति तओ भुज्जो सगमायाए दुग्गइगामिणो भवंति, ते पाणावि बुच्चंति ते तसावि बुच्चंति ते महाकाया ते चिरट्टिइया ते ब्रह्मुरगा आयाणसो इइ से महयाओ णं जण्णं तुब्भे वयइ तं चेव अयंपि भेदे से णो णेयाउए भवइ—भगवं च णं उदाहु संतेगइया मणुस्सा भवंति । तं जहा—अणारम्भा अपरिग्गहा धम्मिया धम्माणुया जाव सव्वाओ परिग्गहाओ पडिविरया जावज्जीवाए, जेहिं समणोवासगस्स आयाणसो आमरणंताए दण्डे णिक्खित्ते, ते तओ आउगं विप्पजहंति, ते तओ भुज्जो सगमायाए सोग्गइगामिणो भवंति । ते पाणा वि बुच्चंति जाव णो णेयाउए भवइ । भगवं च णं उदाहु संतेगइया मणुस्सा भवंति तं जहा—अप्पिच्छा अप्पारम्भा अप्पपरिग्गहा धम्मिया धम्माणुया जाव एग्गच्चाओ परिग्गहाओ अप्पडिविरया, जेहिं समणोवासगस्स आयाणसो आमरणंताए दण्डे णिक्खित्ते । ते तओ आउगं विप्पजहंति, तओ भुज्जो सगमायाए सोग्गइगामिणो भवंति । ते पाणा वि बुच्चंति जाव णो णेयाउए भवइ । भगवं च णं उदाहु संतेगइया मणुस्सा भवंति । तं जहा—आरण्णिया आवसहिा गामणियंतिा, कण्हुइरहस्सिया, जेहिं समणोवासगस्स आयाणसो आमरणंताए दण्डे णिक्खित्ते भवइ । णो ब्रह्मसंजया णो बहुपडिविरया पाणभूयजीवसत्तेहिं अप्पणा सच्चापोसाइं एवं विप्पडिवेदेति—अहं ण हतंत्वो अण्णे हंतव्वा जाव कालमासे कालं किच्चा अण्णयराइं आसुरियाइं किच्चिसियाइं जाव उववत्तारो भवंति, तओ विप्पमुच्चमाणा भुज्जो एल्लमुयत्ताए तमोरूवत्ताए पच्चार्यंति । ते पाणा वि बुच्चंति जाव णो णेयाउए भवइ । भगवं च णं उदाहु संतेगइया पाणा दीहाउया जेहिं समणोवासगस्स आयाणसो आमरणंताए जाव दण्डे णिक्खित्ते भवइ । ते पुव्वामेव कालं करेति करेत्ता पारलोइवत्ताए पच्चार्यंति । ते पाणा वि बुच्चंति, ते तसा वि बुच्चंति । ते महाकाया ते चिरट्टिइया ते दीहाउया ते ब्रह्मुरगा, पाणा जेहिं समणोवासगस्स सुपच्चक्खायं भवइ, जाव णो णेयाउए भवइ । भगवं च णं उदाहु संतेगइया पाणा समाउया, जेहिं समणोवासगस्स आयाणसो आमरणंताए जाव दण्डे णिक्खित्ते भवइ । ते सयमेव कालं करेति,

करित्ता पारलोइयत्ताए पच्चायंति । ते पाणा वि बुच्चंति, ते तसा वि बुच्चंति, ते महाकाया ते समाउया ते बहुयरगा जेहिं समणोवासगस्स सुपच्चक्खायं भवइ जात्र णो जेयाउए भवइ । भगवं च णं उदाहु संतेगइया पाणा अप्पाउया, जेहिं समणोवासगस्स आयाणसो आमरणंताए जाव दण्डे णिक्खित्ते भवइ । ते पुध्वामेव कालं करंति, करेत्ता पारलोइयत्ताए पच्चायंति । ते पाणा वि बुच्चंति, ते तसा वि बुच्चंति, ते महाकाया ते अप्पाउया ते बहुयरगा पाणा जेहिं समणोवासगस्स सुपच्चक्खायं भवइ, जाव णो जेयाउए भवइ । भगवं च णं उदाहु संतेगइया समणोवासगा भवंति । त्तेसिं च णं एवं वुत्तपुत्वं भवइ—णो खलु वयं संचाएमो मुण्डा भवित्ता जाव पव्वइत्तए । णो खलु वयं संचाएमो चाउहसद्धमुद्धिद्धपुण्णमासिणीसु पडिपुण्णं पोसहं अणुपालित्तए । णो खलु वयं संचाएमो अपच्छिमं जाव विहरित्तए वयं च णं सामाइयं देसावगासियं पुरत्था पाईणं वा पडीणं वा दाहिणं वा उदीणं वा एयावया जाव सव्वपाणेहिं जाव सव्वसत्तेहिं दण्डे णिक्खित्ते सव्वपाणभूयजीवसत्तेहिं खेमंकरे अहमंसि । तत्थ आरेणं जे तसा पाणा जेहिं समणोवासगस्स आयाणसो आमरणंताए दण्डे णिक्खित्ते । तओ आउं विप्पजहंति, विप्पजहित्ता तत्थ आरेणं चेव जे तसा पाणा जेहिं समणोवासगस्स आयाणसो जाव तेसु पच्चायंति, जेहिं समणोवासगस्स सुपच्चक्खायं भवइ । ते पाणा वि जाव अयं पि भेदे जाव जेयाउए भवइ ॥ १२ ॥ तत्थ आरेणं जे तसा पाणा जेहिं समणोवासगस्स आयाणसो आमरणंताए दण्डे णिक्खित्ते ते तओ आउं विप्पजहंति विप्पजहित्ता तत्थ आरेणं चेव जाव थावरा पाणा जेहिं समणोवासगस्स अट्टाए दण्डे अणिक्खित्ते अणट्टाए दण्डे णिक्खित्ते तेसु पच्चायंति । तेहिं समणोवासगस्स अट्टाए दण्डे अणिक्खित्ते अणट्टाए दण्डे णिक्खित्ते, ते पाणा वि बुच्चंति, ते तसा ते चिरट्टिइया जाव अयं पि भेदे से... । तत्थ जे आरेणं तसा पाणा जेहिं समणोवासगस्स आयाणसो आमरणंताए... तओ आउं विप्पजहंति विप्पजहित्ता तत्थ परेणं जे तसा थावरा पाणा जेहिं समणोवासगस्स आयाणसो आमरणंताए... तेसु पच्चायंति, तेहिं समणोवासगस्स सुपच्चक्खायं भवइ, ते पाणा वि जाव अयं पि भेदे से... । तत्थ जे आरेणं थावरा पाणा जेहिं समणोवासगस्स अट्टाए दण्डे अणिक्खित्ते अणट्टाए णिक्खित्ते ते तओ आउं विप्पजहंति, विप्पजहित्ता तत्थ आरेणं चेव जे तसा पाणा जेहिं

समणोवासगस्स आयाणसो आमरणंताए... तेसु पच्चायंति, तेसु समणोवासगस्स सुप-
 च्चक्खायं भवइ, ते पाणा वि जाव अयं पि भेदे से... । तत्थं जे ते आरेणं जे थावरा
 पाणा जेहिं समणोवासगस्स अट्टाए दण्डे अणिक्खित्ते, अणट्टाए णिक्खित्ते ते तओ
 आउं विप्पजहंति विप्पजहित्ता ते तत्थ आरेणं चेव जे थावरा पाणा जेहिं समणो-
 वासगस्स अट्टाए दण्डे अणिक्खित्ते अणट्टाए णिक्खित्ते तेसु पच्चायंति । तेहिं समणो-
 वासगस्स अट्टाए अणट्टाए ते पाणा वि जाव अयं पि भेदे से णो... । तत्थ जे ते
 आरेणं थावरा पाणा जेहिं समणोवासगस्स अट्टाए दण्डे अणिक्खित्ते, अणट्टाए
 णिक्खित्ते तओ आउं विप्पजहंति, विप्पजहित्ता तत्थ परेणं जे तसथावरा पाणा
 जेहिं समणोवासगस्स आयाणसो आमरणंताए० तेसु पच्चायंति । तेहिं समणोवासगस्स
 सुपच्चक्खायं भवइ । ते पाणा वि जाव अयं पि भेदे से णो णेयाउए भवइ । तत्थ जे
 ते परेणं तसथावरा पाणा जेहिं समणोवासगस्स आयाणसो आमरणंताए० ते तओ
 आउं विप्पजहंति, विप्पजहित्ता तत्थ आरेणं जे तसां पाणा जेहिं समणोवासगस्स
 आयाणसो आमरणंताए..... तेसु पच्चायंति । तेहिं समणोवासगस्स सुपच्चक्खायं
 भवइ । ते पाणा वि जाव अयं पि भेदे से णो णेयाउए भवइ । तत्थ जे ते परेणं
 तसथावरा पाणा जेहिं समणोवासगस्स आयाणसो आमरणंताए.... ते तओ आउं
 विप्पजहंति विप्पजहित्ता तत्थ आरेणं जे थावरा पाणा जेहिं समणोवासगस्स
 अट्टाए दण्डे अणिक्खित्ते अणट्टाए णिक्खित्ते तेसु पच्चायंति, जेहिं समणोवासगस्स
 अट्टाए अणिक्खित्ते अणट्टाए णिक्खित्ते जाव ते पाणा वि जाव अयं पि भेदे से णो.... ।
 तत्थ जे ते परेणं तसथावरा पाणा जेहिं समणोवासगस्स आयाणसो आमरणंताए...
 ते तओ आउं विप्पजहंति, विप्पजहित्ता ते तत्थ परेणं चेव जे तसथावरा पाणा
 जेहिं समणोवासगस्स आयाणसो आमरणंताए० तेसु पच्चायंति, जेहिं समणोवास-
 गस्स सुपच्चक्खायं भवइ । ते पाणा वि जाव अयं पि भेदे से णो... । भगवं च णं
 उदाहु ण एयं भूयं ण एयं भव्वं ण एयं भविस्सइ जं णं तसा पाणा वोच्छिज्जिहंति
 थावरा पाणा भविस्संति, थावरा पाणा वि वोच्छिज्जिहंति तसा पाणा भविस्संति ।
 अवोच्छिण्णेहिं तसथावरेहिं पाणेहिं जं णं तुब्भे वा अण्णो वा एवं वयह—णत्थि
 णं से केइ परियाए जाव णो णेयाउए भवइ ॥ १३ ॥ भगवं च णं उदाहु आउ-
 संतो उदमा ! जे खलु समणं वा माहणं वा परिभासेइ भित्ति मण्णंति आगमित्ता
 णाणं आगमित्ता दंसणं आगमित्ता चरित्तं पावाणं कम्माणं अकरणयाए से खलु पर-

लोगपलिमंथत्ताए चिद्धइ, जे खलु समणं वा माहणं वा णो परिभासइ मिति मण्णति आगमित्ता णाणं आगमित्ता दंसणं आगमित्ता चरित्तं पावाणं कम्ममाणं अकरणयाए से खलु परलोगविसुद्धीए चिद्धइ । तए णं से उदए पेढालपुत्ते भगवं गोयमं अणाढायमाणे जामेव दिसिं पाउब्भूए तामेव दिसिं पहारेत्थ गमणाए । भगवं च णं उदाहु आउसंतो उदगा ! जे खलु तहाभूयस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा णिसम्म अप्पणो चेव सुहुमाए पडिलेहाए अणुत्तरं जोगखेमययं लभिमए समाणे सो वि ताव तं आढाइ परिजाणेइ वंदइ णमंसइ सक्कारेइ सम्माणेइ जाव कळाणं मंगलं देवयं चेइयं पज्जुवासइ । तए णं से उदए पेढालपुत्ते भगवं गोयमं एवं वयासी-एएसिं णं भंते ! पदाणं पुट्ठि अण्णाणयाए असवणयाए अवोहिए अणभिममेणं अदिट्ठाणं असुयाणं अमुयाणं अविण्णायाणं अब्बोगटाणं अविग्गूढाणं अविच्छिण्णाणं अणिसिट्ठाणं अणिवुटाणं अणुवहारियाणं एयमट्ठं णो सहइयं णो पत्तियं णो रोइयं । एएसिं णं भंते ! पदाणं एहिं जाणयाए सवणयाए बोहिए जाव उवहारणयाए एयमट्ठं सहहामि पत्तियामि रोएमि एवमेव से जहेयं तुब्भे वयह । तए णं भगवं गोयमे उदयं पेढालपुत्तं एवं वयासी सहहाहि णं अब्बो ! पत्तियाहि णं अब्बो ! रोएहि णं अब्बो ! एवमेयं जहा णं अम्हे वयामो । तए णं से उदए पेढालपुत्ते भगवं गोयमं एवं वयासी-इच्छामि णं भंते ! तुब्भं अंतिए चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ता णं विहरित्तए ॥ तए णं से भगवं गोयमे उदयं पेढालपुत्तं गहाय जेणेव समणे भगवं महावीरे तेणेव उवागच्छइ, उवागच्छित्ता तए णं से उदए पेढालपुत्ते समणं भगवं महावीरं तिक्खुत्तो आयाहिणं पयाहिणं करेइ, तिक्खुत्तो आयाहिणं पयाहिणं करित्ता वंदइ णमंसइ वंदित्ता णमंसित्ता एवं वयासी-इच्छामि णं भंते तुब्भं अंतिए चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ता णं विहरित्तए । तए णं समणे भगवं महावीरे उदयं एवं वयासी-अहासुहं देवाणुप्पिया ! मा पडिवंधं करेहि । तए णं से उदए पेढालपुत्ते समणस्स भगवओ महावीरस्स अंतिए चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ता णं विहरइ ति वेमि ॥ १४ ॥

॥ सूयगडं समत्तं ॥

ठाणं

पढमं ठाणं

सुयं मे आउसं ! तेणं भगवया एव मक्खार्यं—एगे आया ॥१॥ एगे दंडे
॥ २ ॥ एगा किरिया ॥ ३ ॥ एगे लोए ॥ ४ ॥ एगे अलोए ॥ ५ ॥ एगे धम्मे
॥ ६ ॥ एगे अहम्मे ॥ ७ ॥ एगे बंधे ॥ ८ ॥ एगे मोक्खे ॥ ९ ॥ एगे पुण्णे
॥ १० ॥ एगे पावे ॥ ११ ॥ एगे आसवे ॥ १२ ॥ एगे संवरे ॥ १३ ॥ एगा
वेयणा ॥ १४ ॥ एगा गिज्जरा ॥ १५ ॥ एगे जीवे प्राडिक्कएणं सरीरएणं ॥ १६ ॥
एगा जीवाणं अपरियाइत्ता विगुव्वणा ॥ १७ ॥ एगे मणे ॥ १८ ॥ एगा वई
॥ १९ ॥ एगे कायवायामे ॥ २० ॥ एगा उप्पा ॥ २१ ॥ एगा वियई ॥ २२ ॥
एगा वियच्चा ॥ २३ ॥ एगा गई ॥ २४ ॥ एगा आगई ॥ २५ ॥ एगे चयणे
॥ २६ ॥ एगे उववाए ॥ २७ ॥ एगा तक्का ॥ २८ ॥ एगा सण्णा ॥ २९ ॥ एगा
मण्णा ॥ ३० ॥ एगा विण्णू ॥ ३१ ॥ एगा वेयणा ॥ ३२ ॥ एगा छेयणा ॥ ३३ ॥
एगा भेयणा ॥ ३४ ॥ एगे मरणे अंतिमसारीरियाणं ॥ ३५ ॥ एगे संसुद्धे अहाभूए
पत्ते ॥ ३६ ॥ एगे दुक्खे जीवाणं ॥ ३७ ॥ एगे भूए ॥ ३८ ॥ एगा अहम्मपडिमा
जं से आया पडिक्किलेसइ ॥ ३९ ॥ एगा धम्मपडिमा जं से आया पज्जवजाए
॥ ४० ॥ एगे मणे देवासुरमणुयाणं तंसि तंसि समयंसि, एगा वई देवासुरमणुयाणं
तंसि तंसि समयंसि, एगे कायवायामे देवासुरमणुयाणं तंसि तंसि समयंसि, एगे
उट्टाणकम्मवल्लवीरियपुरिसक्कारपरक्कमे देवासुरमणुयाणं तंसि तंसि समयंसि ॥ ४१ ॥
एगे णाणे ॥ ४२ ॥ एगे दंसणे ॥ ४३ ॥ एगे चरित्ते ॥ ४४ ॥ एगे समए
॥ ४५ ॥ एगे पएसे ॥ ४६ ॥ एगे परमाणू ॥ ४७ ॥ एगा सिद्धी ॥ ४८ ॥ एगे
सिद्धे ॥ ४९ ॥ एगे परिणिव्वाणे ॥ ५० ॥ एगे परिणिव्वुए ॥ ५१ ॥ एगे सहे
॥ ५२ ॥ एगे रूवे ॥ ५३ ॥ एगे गंधे ॥ ५४ ॥ एगे रसे ॥ ५५ ॥ एगे फासे
॥ ५६ ॥ एगे सुब्भिसहे, एगे दुब्भिसहे ॥ ५७ ॥ एगे सुरूवे एगे दुरूवे ॥ ५८ ॥
एगे दीहे एगे हस्से ॥ ५९ ॥ एगे वट्टे, एगे तंसे, एगे चउरंसे, एगे पिहुले, एगे

परिमंडले ॥६०॥ एगे क्रिण्हे, एगे णीले, एगे लोहिए, एगे हालिहे, एगे सुक्किले
 ॥ ६१ ॥ एगे सुब्भिग्घे, एगे दुब्भिग्घे ॥६२॥ एगे तित्ते एगे कडुए एगे कसाए
 एगे अंबिले-एगे महुरे ॥ ६३ ॥ एगे कक्खडे-जाव एगे लुक्खे ॥६४॥ एगे पाणा-
 इवाए जाव एगे परिग्गहे ॥ एगे कोहे जाव एगे लोहे, एगे पेत्ते एगे दोसे, जाव
 एगे परपरिवाए, एगा अरइ-रइ, एगे मायामोसे एगे मिच्छादंसणस्से ॥६५॥ एगे
 पाणाइवायवेरमणे जाव परिग्गहवेरमणे, एगे कोहविवेगे, जाव मिच्छादंसणसल्लविवेगे
 ॥६६॥ एगा ओसप्पिणी एगा सुसमसुसमा जाव एगा दुसमदुसमा, एगा उस्त-
 प्पिणी, एगा दुसमदुसमा जाव एगा सुसमसुसमा ॥६७॥ एगा णेरइयाणं वग्गणा,
 एगा असुरकुमारानं वग्गणा, चउवीसदंडओ जाव एगा वेमाणियाणं वग्गणा
 ॥६८॥ एगा भवसिद्धियाणं वग्गणा, एगा अभवसिद्धियाणं वग्गणा, एगा भव-
 सिद्धियाणं णेरइयाणं वग्गणा, एगा अभवसिद्धियाणं णेरइयाणं वग्गणा, एवं जाव
 एगा भवसिद्धियाणं वेमाणियाणं वग्गणा एगा अभवसिद्धियाणं वेमाणियाणं वग्गणा
 ॥ ६९ ॥ एगा सम्मदिद्धियाणं वग्गणा, एगा मिच्छदिद्धियाणं वग्गणा, एगा सम्म-
 मिच्छदिद्धियाणं वग्गणा, एगा सम्मदिद्धियाणं णेरइयाणं वग्गणा, एगा मिच्छदिद्धि-
 याणं णेरइयाणं वग्गणा, एगा सम्ममिच्छदिद्धियाणं णेरइयाणं वग्गणा, एवं जाव
 थणियकुमारानं, एगा मिच्छदिद्धियाणं पुढवीकाइयाणं वग्गणा, एवं जाव वणस्सइ-
 काइयाणं, एगामम्मदिद्धियाणं बेइंदियाणं वग्गणा, एगा मिच्छदिद्धियाणं बेइंदियाणं
 वग्गणा, एवं तेइंदियाणं चउरिंदियाणं वि सेसा जहा णेरइया, जाव एगा सम्म-
 मिच्छदिद्धियाणं वेमाणियाणं वग्गणा ॥७०॥ एगा कण्हपक्खियाणं वग्गणा, एगा
 सुक्कपक्खियाणं वग्गणा, एगा कण्हपक्खियाणं णेरइयाणं वग्गणा, एगा सुक्कपक्खि-
 याणं णेरइयाणं वग्गणा, एवं चउवीसदंडओवि भाणियव्वो ॥ ७१ ॥ एगा कण्ह-
 लेस्साणं वग्गणा, एगा णील्लेस्साणं वग्गणा, एवं जाव सुक्कलेस्साणं वग्गणा, एगा
 कण्हलेस्साणं णेरइयाणं वग्गणा, जाव काउलेस्साणं णेरइयाणं वग्गणा, एवं जस्स
 जइ लेस्साओ, भवणवइवाणमंतरपुढविआउवणस्सइकाइयाणं च चत्तारि लेस्साओ
 तेऊवाउबेइंदियतेइंदियचउरिंदियाणं तिण्णलेस्साओ पंचिदियतिरिक्खजोणियाणं
 मणुस्साणं छलेस्साओ, जोइसियाणं एगा तेउलेस्सा, वेमाणियाणं तिण्णउवरिम-
 लेस्साओ एगा कण्हलेस्साणं भवसिद्धियाणं वग्गणा, एगा कण्हलेस्साणं अभवसिद्धि-

याणं वग्गणा, एवं छसु वि लेस्सासु दो पथाणि भाणियव्वाणि, एगा कण्हलेस्साणं भवसिद्धियाणं णेरइयाणं वग्गणा, एगा कण्हलेस्साणं अभवसिद्धियाणं णेरइयाणं वग्गणा, एवं जस्स जइ लेस्साओ तस्स तइयाओ भाणियव्वाओ, जाव वेमाणियाणं । एगा कण्हलेस्साणं समद्विद्वियाणं वग्गणा एगा कण्हलेस्साणं मिच्छद्विद्वियाणं वग्गणा एगा कण्हलेस्साणं सम्ममिच्छद्विद्वियाणं वग्गणा, एवं छसु वि लेस्सासु जाव वेमाणियाणं जेसिं जइ दिट्ठीओ । एगा कण्हलेस्साणं कण्हपक्खियाणं वग्गणा, एगा कण्हलेस्साणं सुक्कपक्खियाणं वग्गणा, जाव वेमाणियाणं, जस्स जइ लेस्साओ, एए अट्ट चउवीसदंडया ॥ ७२ ॥ एगा तित्थसिद्धाणं वग्गणा, एगा अतित्थसिद्धाणं वग्गणा, एवं जाव एगा एकसिद्धाणं वग्गणा, एगा अणिकसिद्धाणं वग्गणा, एगा पढमसमयसिद्धाणं वग्गणा, एवं जाव अणंतसमयसिद्धाणं वग्गणा ॥ ७३ ॥ एगा परमाणुपोग्गलाणं वग्गणा, एवं जाव एगा अणंतपएसियाणं खंधाणं पोग्गलाणं वग्गणा, एगा एगपएसोमादाणं पोग्गलाणं वग्गणा, जाव एगा असखेज्जपएसोमादाणं पोग्गलाणं वग्गणा, एगा एगसमयट्ठिइयाणं पोग्गलाणं वग्गणा, जाव एगा असखेज्जसमयट्ठिइयाणं पोग्गलाणं वग्गणा, एगा एगरुणकालयाणं पोग्गलाणं वग्गणा, जाव एगा असखेज्जरुणकालयाणं पोग्गलाणं वग्गणा । एगा अणंतरुणकालयाणं पोग्गलाणं वग्गणा, एवं वण्णगंधरसफासा भाणियव्वा जाव एगा अणंतरुणलुक्खाणं पोग्गलाणं वग्गणा, एगा जहण्णपएसियाणं खंधाणं वग्गणा, एगा उक्कोसपएसियाणं खंधाणं वग्गणा, एगा अजहण्णुक्कोसपएसियाणं खंधाणं वग्गणा, एवं जहण्णोगाहणगाणं, उक्कोसोगाहणगाणं, अजहण्णुक्कोसोगाहणगाणं, जहण्णट्ठिइयाणं, उक्कोसट्ठिइयाणं, अजहण्णुक्कोसट्ठिइयाणं, जहण्णरुणकालगाणं, उक्कोसरुणकालगाणं, अजहण्णुक्कोसरुणकालगाणं, एवं वण्णगंधरसफासाणं वग्गणा भाणियव्वा, जाव एगा अजहण्णुक्कोसरुणलुक्खाणं पोग्गलाणं वग्गणा ॥ ७४ ॥ एगे जंबुद्वीवे २ सव्वदीवसमुदाणं जाव अड्ढंगुलगं च किंचि वितेसाहिए परिकखेवेणं ॥ ७५ ॥ एगे समणे भगवं महावीरे इमीसे ओसण्णिणीए चउवीसाए तित्थयराणं चरमतित्थयरे सिद्धे बुद्धे मुत्ते जाव सव्वदुककल्पहीणे ॥ ७६ ॥ अणुत्तरोववाइयाणं देवाणं एगा रयणी उड्ढं उच्चत्तेणं पणत्ता ॥ ७७ ॥ अहाणकवत्ते एगतारे पणत्ते, चित्ताणकवत्ते एगतारे पणत्ते, साइणकवत्ते एगतारे पणत्ते ॥ ७८ ॥ एगपएसोमादा पोग्गला

अर्णता पण्णत्ता, एवमेगसमयट्ठिया, एग्गुणकालगा पोग्गला अर्णता पण्णत्ता, जाव
एग्गुणलुक्खा पोग्गला अर्णता पण्णत्ता ॥ ७९ ॥

बीअं ठाणं पढमो उद्देसो

जयत्थि णं लोए तं सव्वं दुपडोयारं, तं जहा—जीवा चेव अजीवा चेव, तसे चेव
यावरे चेव, सजोणिया चेव अजोणिया चेव, साउया चेव अणाउया चेव, सइंदिया
चेव अण्णिंदिया चेव, सवेयगा चेव अवेयगा चेव, सरूवि चेव अरूवि चेव, सपो-
ग्गला चेव अपोग्गला चेव, संसारसमावण्णगा चेव असंसारसमावण्णगा चेव,
सासया चेव असासया चेव, आगासे चेव णो आगासे चेव, धम्मे चेव अधम्मे
चेव, बंधे चेव मोक्खे चेव, पुण्णे चेव पावे चेव, आसवे चेव संवरे चेव, वेयणा
चेव, जिज्जरा चेव ॥ १ ॥ दो किरियाओ प० तं जहा—जीवकिरिया चेव अजीव-
किरिया चेव । जीवकिरिया दुविहा पण्णत्ता, तं जहा—सम्मत्तकिरिया चेव मिच्छत्त-
किरिया चेव । अजीवकिरिया दुविहा पण्णत्ता, तं जहा—इरिथावहिया चेव संपराइया
चेव ॥ २ ॥ दोकिरियाओ प० तं जहा—काइया चेव अहिगरणिया चेव । काइया
किरिया दुविहा पण्णत्ता, तं जहा—अणुवरयकायकिरिया चेव, दुप्पउत्तकायकिरिया
चेव । अहिगरणियाकिरिया दुविहा पण्णत्ता, तं जहा—संजोयणाहिगरणिया चेव
णिवत्तणाहिगरणिया चेव ॥ ३ ॥ दो किरियाओ प० तं जहा—पाउसिया चेव पारि-
यावणिया चेव । पाउमिया किरिया दुविहा पण्णत्ता, तं जहा—जीवपाउसिया चेव
अजीवपाउसिया चेव, पारियावणियाकिरिया दुविहा पण्णत्ता, तं जहा—सहत्थपारिया-
वणिया चेव परहत्थपारियावणिया चेव ॥ ४ ॥ दो किरियाओ प० तं जहा—
पाणाइवायकिरिया चेव, अपच्चक्खाणकिरिया चेव । पाणाइवायकिरिया दुविहा
पण्णत्ता, तं जहा—सहत्थपाणाइवायकिरिया चेव, परहत्थपाणाइवायकिरिया चेव ।
अपच्चक्खाणकिरिया दुविहा पण्णत्ता, तं जहा—जीवअपच्चक्खाणकिरिया चेव, अजीव-
अपच्चक्खाणकिरिया चेव ॥ ५ ॥ दो किरियाओ प० तं जहा—आरंभिया चेव
परिग्गहिया चेव । आरंभिया किरिया दुविहा पण्णत्ता, तं जहा—जीवआरंभिया चेव
अजीवआरंभिया चेव, एवं परिग्गहियावि ॥ ६ ॥ दो किरियाओ प० तं जहा—
मायावत्तिया चेव, मिच्छादंसणवत्तिया चेव । मायावत्तियाकिरिया दुविहा पण्णत्ता,
तं जहा—आयभाववंकणया चेव परभाववंकणया चेव । मिच्छादंसणवत्तियाकिरिया

दुविहा पण्णत्ता, तंजहा—ऊणाइरित्तमिच्छादंसणवत्तिआ चैव तव्वइरित्तमिच्छा-
 दंसण वत्तिआ चैव ॥७॥ दो किरियाओ प० तंजहा—दिट्ठिया चैव पुट्ठिया चैव ।
 दिट्ठियाकिरिया दुविहा प० तंजहा—जीवदिट्ठिया चैव अजीवदिट्ठिया चैव, एवं
 पुट्ठियावि ॥ ८ ॥ दो किरियाओ प० तंजहा—पाडुच्चिया चैव सामंतोवणिवाइया
 चैव । पाडुच्चियाकिरिया दुविहा पण्णत्ता, तंजहा—जीवपाडुच्चिया चैव अजीवपाडु-
 च्चिया चैव, एवं सामंतोवणिवाइयावि ॥९॥ दो किरियाओ प० तंजहा—साहत्थिया
 चैव, गेसत्थिया चैव । साहत्थियाकिरिया दुविहा पण्णत्ता, तंजहा—जीवसाहत्थिया
 चैव, अजीवसाहत्थिया चैव, एवं गेसत्थियावि ॥ १० ॥ दो किरियाओ प०
 तंजहा—आणवणिया चैव वेयारणिया चैव, जहेव गेसत्थिया ॥ ११ ॥ दो किरि-
 याओ प० तंजहा—अणाभोगवत्तिया चैव । अणवकंखवत्तिया चैव । अणभोगवत्तिया-
 किरिया दुविहा पण्णत्ता, तंजहा—अणाउत्तआइयणया चैव, अणाउत्तपमज्जणया
 चैव । अणवकंखवत्तिया किरिया दुविहा पण्णत्ता, तंजहा—आयसरीरअणवकंखवत्तिया
 चैव, परसरीरअणवकंखवत्तिया चैव ॥ १२ ॥ दो किरियाओ प० तंजहा—पेज्ज-
 वत्तिया चैव, दोसवत्तिया चैव । पेज्जवत्तियाकिरिया दुविहा पण्णत्ता, तंजहा—माया-
 वत्तिया चैव, लोहवत्तिया चैव । दोसवत्तिया किरिया दुविहा पण्णत्ता, तं जहा—कोहे
 चैव माणे चैव ॥ १३ ॥ दुविहा गरिहा पण्णत्ता, तं जहा—मणसावेगे गरिहइ वयसा-
 वेगे गरिहइ, अहवा गरिहा दुविहा प० दीहं एगे अद्धं गरिहइ, रहस्सं एगे अद्धं
 गरिहइ ॥ १४ ॥ दुविहे पच्चक्खाणे, मणसावेगे पच्चक्खाइ, वयसावेगे पच्चक्खाइ,
 अहवा पच्चक्खाणे दुविहे, दीहं एगे अद्धं पच्चक्खाइ, रहस्सं एगे अद्धं पच्चक्खाइ
 ॥ १५ ॥ दोहिं ठाणेहिं अणगारे संपण्णे अणाइयं अणवयगं दीहमद्धं चाउरंत-
 संसारकंतारं वीइवएजा, तं जहा—विज्जाए चैव, चरणेण चैव ॥ १६ ॥ दो ठाणां
 अपरियाइत्ता आया णो केवलपण्णत्तं धम्मं लभेज्जा सवणयाए, तं जहा—आरंभे
 चैव परिग्गहे चैव । दो ठाणां अपरियाइत्ता आया णो केवलं वोहिं बुज्जेज्जा तं
 आरंभे चैव परिग्गहे चैव । दो ठाणां अपरियाइत्ता आया णो केवलं मुंडे भवित्ता
 आगाराओ अणगारियं पव्वइज्जा, तं जहा—आरंभे चैव परिग्गहे चैव, एवं णो केवलं
 वंभचेरवासमावसेज्जा णो केवलेणं संजमेणं संजमेज्जा, णो केवलेणं संवरेणं संवरेज्जा,
 णो केवलं आभिणित्रोहियणाणं उप्पाडेज्जा, एवं सुयणाणं, ओहिणाणं, मणपज्जवणाणं,

केवलणाणं ॥ १७ ॥ दो ठाणाई परियाइत्ता आया केवलीपणत्तं धम्मं लभेज्ज सवणयाए, तं जहा—आरंभे चैव परिग्गहे चैव, एवं जाव केवलणाणमुप्पाडेज्जा ॥ १८ ॥ दोहिं ठाणेहिं आया केवलिपणत्तं धम्मं लभेज्ज सवणयाए तं जहा— सोखा चैव, अभिसमेच्चा चैव, जाव केवलणाणं उप्पाडेज्जा ॥ १९ ॥ दो समाओ पणत्ताओ, तं जहा—उस्सप्पिणिसमा चैव, ओसप्पिणिसमा चैव ॥ २० ॥ दुविहे उम्माए पणत्ते, तं जहा—जक्खाएसे चैव मोहणिज्जस्स चैव कम्मस्स उदएणं, तत्थणं जे से जक्खाएसे से णं सुहवेयतराए चैव सुहविमोयतराए चैव, तत्थणं जे से मोहणिज्जस्स कम्मस्स उदएणं, से णं दुहवेयतराए चैव दुहविमोयतराए चैव ॥ २१ ॥ दो दंडा पणत्ता, तं जहा—अट्टादंडे चैव, अणट्टादंडे चैव, णेरइयाणं दो दंडा पणत्ता तं जहा—अट्टादंडे चैव अणट्टादंडे य एवं चउवीसदंडओ जाव वेमाणियाणं ॥ २२ ॥ दुविहे दंसणे० सम्मदंसणे चैव, मिच्छाईसणे चैव । सम्मदंसणे दुविहे० णिसग्गसम्मदंसणे चैव, अभिगमसम्मदंसणे चैव । णिसग्गसम्मदंसणे दुविहे०, पडि- वाई चैव अपडिवाई चैव । अभिगमसम्मदंसणे दुविहे०, पडिवाई चैव, अपडिवाई चैव । मिच्छादंसणे दुविहे० तं जहा—अभिग्गहियमिच्छादंसणे चैव, अणभिग्गहिय- मिच्छादंसणे चैव । अभिग्गहियमिच्छादंसणे दुविहे० सपज्जवसिए चैव, अपज्जवसिए चैव, एवमणभिग्गहियमिच्छादंसणेवि ॥ २३ ॥ दुविहे णाणे० पच्चक्खे चैव, परोक्खे चैव । पच्चक्खणाणे दुविहे० केवलणाणे चैव, णो केवलणाणे चैव । केवलणाणे दुविहे० भवत्थकेवलणाणे चैव सिद्धकेवलणाणे चैव । भवत्थकेवलणाणे दुविहे० सजोगि- भवत्थकेवलणाणे चैव अजोगिभवत्थकेवलणाणे चैव । सजोगिभवत्थकेवलणाणे दुविहे० पढमसमयसजोगिभवत्थकेवलणाणे चैव, अपढमसमयसजोगिभवत्थकेवल- णाणे चैव, अहवा चरिमसमयसजोगिभवत्थकेवलणाणे चैव, अचरिमसमयसजोगि- भवत्थकेवलणाणे चैव । एवं अजोगिभवत्थकेवलणाणे वि । सिद्धकेवलणाणे दुविहे०, अणंतरसिद्धकेवलणाणे चैव, परंपरसिद्धकेवलणाणे चैव । अणंतरसिद्धकेवलणाणे दुविहे० एक्काणंतरसिद्धकेवलणाणे चैव, अणेक्काणंतरसिद्धकेवलणाणे चैव । परंपर- सिद्धकेवलणाणे दुविहे० एक्कपरंपरसिद्धकेवलणाणे चैव, अणेक्कपरंपरसिद्धकेवलणाणे चैव । णो केवलणाणे दुविहे० ओहिणाणे चैव, मणपज्जवणाणे चैव । ओहिणाणे दुविहे० भवपच्चइए चैव, खओवसमिए चैव । दोण्हं भवपच्चइए० देवाणं चैव, णेरइयाणं

चेव । दोण्हं खओवसमिए० मणुस्साणं चेव, पंचिन्द्रियतिरिक्खजोणियाणं चेव । मण-
 पञ्चवणाणे दुविहे० उज्जुमई चेव, विउलमई चेव । परोक्खवणाणे दुविहे० आभि-
 णिबोहियणाणे चेव, सुयणाणे चेव । आभिणिबोहियणाणे दुविहे० सुयणिसिए चेव
 असुयणिसिए चेव । सुयणिसिए दुविहे० अत्थोग्गहे चेव, वंजणोग्गहे चेव । असुय-
 णिसिए वि एवमेव । सुयणाणे दुविहे० अंगपविट्टे चेव, अंगवाहिरे चेव । अंगवाहिरे
 दुविहे० आवस्सए चेव आवस्सयवइरित्ते चेव । आवस्सयवइरित्ते दुविहे० कालिए
 चेव, उक्कालिए चेव ॥ २४ ॥ दुविहे धम्मे० सुयधम्मे चेव, चरित्तधम्मे चेव ।
 सुयधम्मे दुविहे० सुत्तसुयधम्मे चेव, अत्थसुयधम्मे चेव । चरित्तधम्मे दुविहे०
 अगारचरित्तधम्मे चेव, अणगारचरित्तधम्मे चेव । संजमे दुविहे० सरागसंजमे चेव,
 वीयरागसंजमे चेव । सरागसंजमे दुविहे० सुहुमसंपरायसरागसंजमे चेव वादरसंप-
 रायसरागसंजमे चेव । सुहुमसंपरायसरागसंजमे दुविहे० पढमसमयसुहुमसंपराय-
 सरागसंजमे चेव, अपढमसमयसुहुमसंपरायसरागसंजमे चेव । अहवा चरिमसमय-
 सुहुमसंपरायसरागसंजमे चेव, अचरिमसमयसुहुमसंपरायसरागसंजमे चेव ।
 अहवा सुहुमसंपरायसरागसंजमे दुविहे० संकिल्लेसमाणए चेव, विसुज्जमाणए
 चेव । वादरसंपरायसरागसंजमे दुविहे० पढमसमयवादरसंपरायसरागसंजमे अपढम-
 समयवादरसंपरायसरागसंजमे, अहवा चरिमसमयवादरसंपरायसरागसंजमे, अच-
 रिमसमयवादरसंपरायसरागसंजमे, अहवा वादरसंपरायसरागसंजमे दुविहे०
 पडिवाइए चेव, अपडिवाइए चेव । वीयरागसंजमे दुविहे० उवसंतकसायवीयराग-
 संजमे चेव, खीणकसायवीयरागसंजमे चेव । उवसंतकसायवीयरागसंजमे दुविहे०
 पढमसमयउवसंतकसायवीयरागसंजमे चेव, अपढमसमयउवसंतकसायवीयराग-
 संजमे चेव, अहवा चरिमसमयउवसंतकसायवीयरागसंजमे चेव, अचरिमसमय-
 उवसंतकसायवीयरागसंजमे चेव । खीणकसायवीयरागसंजमे दुविहे० छउमत्थखीण-
 कसायवीयरागसंजमे चेव, केवल्लिखीणकसायवीयरागसंजमे चेव । छउमत्थखीण-
 कसायवीयरागसंजमे दुविहे० सयंबुद्धछउमत्थखीणकसायवीयरागसंजमे, बुद्धोहिय-
 छउमत्थखीणकसायवीयरागसंजमे । सयंबुद्धछउमत्थखीणकसायवीयरागसंजमे दुविहे०
 पढमसमयसयंबुद्धछउमत्थखीणकसायवीयरागसंजमे, अपढमसमयसयंबुद्धछउमत्थ-
 खीणकसायवीयरागसंजमे, अहवा चरिमसमयसयंबुद्धछउमत्थखीणकसायवीयराग-

संजमे, अचरिमसमयसंबुद्धछउमत्थखीणकसायवीयरागसंजमे । बुद्धबोहियछउमत्थ-
 खीणकसायवीयरागसंजमे दुविहे० पढमसमयबुद्धबोहियछउमत्थखीणकसायवीयराग-
 संजमे, अपढमसमयबुद्धबोहियछउमत्थखीणकसायवीयरागसंजमे, अहवा चरिमसम-
 यबुद्धबोहियछउमत्थखीणकसायवीयरागसंजमे अचरिमसमयबुद्धबोहियछउमत्थखीण-
 कसायवीयरागसंजमे । केवल्लिखीणकसायवीयरागसंजमे दुविहे० सजोगिकेवल्लिखीणक-
 सायवीयरागसंजमे, अजोगिकेवल्लिखीणकसायवीयरागसंजमे । सजोगिकेवल्लिखीण-
 कसायवीयरागसंजमे दुविहे० पढमसमयसजोगिकेवल्लिखीणकसायवीयरागसंजमे अपढ-
 मसमयसजोगिकेवल्लिखीणकसायवीयरागसंजमे, अहवा चरिमसमयसजोगिकेवल्लिखी-
 णकसायवीयरागसंजमे, अचरिमसमयसजोगिकेवल्लिखीणकसायवीयरागसंजमे । अजो-
 गिकेवल्लिखीणकसायवीयरागसंजमे दुविहे० पढमसमयअजोगिकेवल्लिखीणकसायवी-
 यरागसंजमे, अपढमसमयअजोगिकेवल्लिखीणकसायवीयरागसंजमे, अहवा चरिम-
 समयअजोगिकेवल्लिखीणकसायवीयरागसंजमे, अचरिमसमयअजोगिकेवल्लिखीणकसाय-
 वीयरागसंजमे ॥ २५ ॥ दुविहा पुढविकाइया पणत्ता, तंजहा—सुहुमा चेव, बायरा
 चेव, एवं जाव दुविहा वणस्सइकाइया पणत्ता तंजहा—सुहुमा चेव, बायरा चेव ।
 दुविहा पुढविकाइया पणत्ता—पज्जत्तगा चेव, अपज्जत्तगा चेव, एवं जाव
 वणस्सइकाइया । दुविहा पुढविकाइया पणत्ता, तंजहा—परिणया चेव अपरिणया
 चेव, एवं जाव वणस्सइकाइया । दुविहा दब्वा० परिणया चेव अपरिणया चेव । दुविहा
 पुढविकाइया पणत्ता तंजहा—गइसमावण्णगा चेव अगइसमावण्णगा चेव, एवं जाव
 वणस्सइकाइया । दुविहा दब्वा पणत्ता तंजहा—गइसमावण्णगा चेव अगइसमाव-
 ण्णगा चेव । दुविहा पुढविकाइया० अणंतरोगाढगा चेव परंपरोगाढगा चेव, जाव
 दब्वा ॥ २६ ॥ दुविहे काले० ओसप्पिणीकाले चेव, उस्सप्पिणीकाले० चेव ॥ २७ ॥
 दुविहे आगासे० लोगागासे चेव, अलोगागासे चेव ॥ २८ ॥ णेरइयाणं दो
 सरीरगा० अब्भंतरगे चेव, बाहिरगे चेव । अब्भंतरए कम्मए, बाहिरए वेडब्धिए,
 एवं देवाणं भाणियव्वं । पुढविकाइयाणं दो सरीरगा० अब्भंतरगे चेव, बाहिरगे
 चेव । अब्भंतरए कम्मए, बाहिरगे उरालिए, जाव वणस्सइकाइयाणं । बेईदियाणं
 दोसरीरगा० अब्भंतरए चेव बाहिरए चेव । अब्भंतरए कम्मए अट्ठिमंससोणिय-
 वद्धे बाहिरए उरालिए, जाव चउरिंदियाणं । पंचेदियतिरिक्खजोणियाणं दो सरी-

रगा० अब्भतरगे चैव, बाहिरगे चैव, अब्भतरगे कम्मए, अट्टिमंसोणियण्हा-
रुच्छिराक्खे, बाहिरए उरालिए, मणुस्सार्णवि एवं चैव विग्गहगइसमावण्णगाणं
णेरइयाणं दो सरीरगा० तेयए चैव कम्मए चैव, गिरंतरं जाव वेमाणियाणं । णेरइ-
याणं दोहिं ठाणेहिं सरीरुप्पत्ती सिया, तं० रागेणं चैव, दोसेणं चैव, जाव वेमाणि-
याणं । णेरइयाणं दुट्ठाणणिव्वत्तिए सरीरगे० रागणिव्वत्तिए चैव, दोसणिव्वत्तिए
चैव, जाव वेमाणियाणं ॥ २९ ॥ दो काया० तसकाए चैव, थावरकाए चैव ।
तसकाए दुविहे पण्णत्ते० भवसिद्धिए चैव, अभवसिद्धिए चैव, एवं थावरकाए वि
॥ ३० ॥ दो दिसाओ अभिगिञ्ज कप्पइ गिग्गंथाणं वा, गिग्गंथीणं वा, पव्वा-
वित्तए, पाईणं चैव, उदीणं चैव, एवं मुंडावित्तए, सिक्खावित्तए, उवट्ठावित्तए,
संभुजित्तए, संवसित्तए, सञ्झायं उद्विसित्तए, सञ्झायं समुद्विसित्तए, सञ्झायमणु-
जाणित्तए, आलोइत्तए, पडिक्कमित्तए, णिदित्तए, गरहित्तए, विउट्टित्तए,
विसोहित्तए, अकरणयाए अब्भुट्टित्तए, अहारिहं पायच्छित्तं तवोक्कम्मं पडिवज्जित्तए,
दो दिसाओ अभिगिञ्ज कप्पइ गिग्गंथाणं वा गिग्गंथीणं वा, अपच्छिममारणंतिए-
सलेहणाञ्जुसणा झूसियाणं भत्तपाणपडियाइक्खियाणं पाओवगयाणं कालं अणवकंख-
माणं विहरित्तए, तं जहा-पाईणं चैव उदीणं चैव ॥ ३१ ॥

बीयं ठाणं बीयो उद्देसो

जे देवा उद्धोववण्णगा कप्पोववण्णगा, विमाणोववण्णगा, चारोववण्णगा, चार-
ट्टिइया, गइरइया, गइसमावण्णगा, तेषिं देवाणं सयासमियं जे पावे कम्मे कज्जइ
तत्थगयावि एगइया वेयणं वेयंति अण्णत्थगयावि एगइया वेयणं वेयंति, णेरइयाणं
सयासमियं जे पावे कम्मे कज्जइ तत्थगयावि एगइया वेयणं वेयंति अण्णत्थ-
गयावि एगइया वेयणं वेयंति, जाव पंचिन्द्रियतिरिक्खजोणियाणं । मणुस्सार्णं सया-
समियं जे पावे कम्मे कज्जइ, इहगयावि एगइया वेयणं वेयंति अण्णत्थगयावि
एगइया वेयणं वेयंति, मणुस्सवज्जा सेसा एक्कगमा ॥ ३२ ॥ णेरइया दुगइया
दुयागइया प० तं० णेरइए णेरइएसु उववज्जमाणे मणुस्सेहिंतो वा पंचिन्द्रिय-
तिरिक्खजोणिएहिंतो वा उववज्जेजा, से चैव णं से णेरइए णेरइयत्तं विप्पजहमाणे
मणुस्सत्ताए वा पंचिन्द्रियतिरिक्खजोणियत्ताए वा गच्छेज्जा, एवं असुरकुमारावि,
णवरं से चैवणं से असुरकुमारत्तं विप्पजहमाणे मणुस्सत्ताए वा तिरिक्खजोणियत्ताए

वा गच्छेज्जा, एवं सव्वदेवा, पुढविकाइया दुगइया दुयागइया प० तं०—पुढविकाइए
 पुढविकाइएसु उव्वेज्जमाणे पुढविकाइएहिंते वा णो पुढविकाइएहिंते वा उवव-
 ज्जेजा। से चेवणं से पुढविकाइयत्तं विप्पज्जहमाणे पुढविकाइयत्ताए वा णो पुढविकाइ-
 यत्ताए वा गच्छेज्जा, एवं जाव मणुस्ता ॥ ३३ ॥ दुविहा णेरइया प० तं० भवसिद्धिया
 चेव, अभवसिद्धिया चेव, जाव वेमाणिया। दुविहा णेरइया प० तं० अणंतरोववण्णगा
 चेव परंपरोववण्णगा चेव, जाव वेमाणिया। दुविहा णेरइया प० तं० गइसमावण्णगा
 चेव, अगइसमावण्णगा चेव, जाव वेमाणिया। दुविहा णेरइया प० तं० पढम-
 समयउववण्णगा चेव, अपढमसमयउववण्णगा चेव, जाव वेमाणिया। दुविहा णेरइया
 प० तं० आहारगा चेव, अणाहारगा चेव, एवं जाव वेमाणिया। दुविहा णेरइया
 पणत्ता तं०, उस्सासगा चेव णोउस्सासगा चेव, जाव वेमाणिया। दुविहा णेरइया
 प० तं० सइंदिया चेव, अण्णदिया चेव, जाव वेमाणिया। दुविहा णेरइया प० तं०
 पज्जत्तगा चेव, अपज्जत्तगा चेव, जाव वेमाणिया। दुविहा णेरइया प० तं० सण्णी
 चेव, असण्णी चेव, एवं जाव पंच्चिदिया सव्वे विगल्लिंदियवज्जा, जाव वाणमंतरा।
 दुविहा णेरइया प० तं० भासगा चेव अभासगा चेव, एवमेगेदियवज्जा सव्वे।
 दुविहा णेरइया प० तं० समहिद्विया चेव मिच्छद्विया चेव, एगिंदियवज्जा सव्वे।
 दुविहा णेरइया प० तं० परित्तसंसारिया चेव, अणंतसंसारिया चेव जाव वेमाणिया।
 दुविहा णेरइया प० तं० संखेज्जकालसमयद्विइया चेव असंखेज्जकालसमयद्विइया चेव,
 एवं पंच्चिदिया, एगिंदिया विगल्लिंदियवज्जा जाव वाणमंतरा। दुविहा णेरइया प०
 तं० सुलभजोहिया य दुल्लभजोहिया य जाव वेमाणिया। दुविहा णेरइया प० तं०
 कण्हपक्खिया चेव सुक्कपक्खिया चेव, जाव वेमाणिया। दुविहा णेरइया प० तं०
 चरिमा चेव अचरिमा चेव, जाव वेमाणिया ॥ ३४ ॥ दोहिं ठाणेहिं आया अहे
 लोगं जाणइ पासइ, तं० समोहएणं चेव अप्पाणेणं आया अहे लोगं जाणइ पासइ,
 असमोहएणं चेव अप्पाणेणं आया अहे लोगं जाणइ पासइ, आहोहि समोहया
 समोहएणं चेव अप्पाणेणं आया अहे लोगं जाणइ पासइ, एवं तिरियलोगं उड्ड-
 लोगं केवलकप्पं लोगं। दोहिं ठाणेहिं आया अहे लोगं जाणइ पासइ, तं जहा-
 विउव्विएणं चेव अप्पाणेणं आया अहेलोगं जाणइ पासइ, अविउव्विएणं चेव
 अप्पाणेणं आया अहेलोगं जाणइ पासइ, आहोहि विउव्वियाविउव्विएणं चेव

अप्पाणेणं आया अहेल्लोगं जाणइ पासइ, एवं तिरियल्लोगं उड्डल्लोगं केवलकप्पं लोणं ॥ ३५ ॥ दोहिं ठाणेहिं आया सद्दाइं सुणेइ, तं जहा—देसेणवि आया सद्दाइं सुणेइ, सव्वेणवि आया सद्दाइं सुणेइ, एवं रुवाईं पासइ, गंधाईं आधायइ, रसाईं आसाएइ, फासाईं पडिसंवेएइ, दोहिं ठाणेहिं आया ओभासइ, तंजहा—देसेणवि आया ओभासइ, सव्वेण वि आया ओभासइ । एवं पभासइ, विउम्बइ, परियारेइ, भासं भासइ, आहारेइ, परिणामेइ, वेएइ, णिज्जरेइ, दोहिं ठाणेहिं देवे सद्दाइं सुणेइ, तंजहा— देसेणवि देवे सद्दाइं सुणेइ, सव्वेण वि देवे सद्दाइं सुणेइ, जाव णिज्जरेइ ॥ ३६ ॥ मरुया देवा दुविहा प० तं० एगसररी चेव, विसररी चेव । एवं किण्णरा, किंपुरिसा, गंधव्वा, णागकुमारा, सुवण्णकुमारा, अग्गिकुमारा, वाउकुमारा । देवा दुविहा प० तं० एगसररी चेव विसररी चेव ॥ ३७ ॥

बीयं ठाणं तइओ उट्ठेसो

दुविहे सद्दे प० तं० भासासद्दे चेव णोभासासद्दे चेव । भासासद्दे दुविहे प० तं० अक्खरसंघे चेव, णोअक्खरसंघे चेव । णोभासासद्दे दुविहे प० तं० आउज्जसद्दे चेव, णोआउज्जसद्दे चेव । आउज्जसद्दे दुविहे प० तं० तते चेव, वितते चेव । तते दुविहे प० तं० घणे चेव, झुसिरे चेव, एवं विततेवि । णोआउज्जसद्दे दुविहे प० तं० भूसणसद्दे चेव, णोभूसणसद्दे चेव । णोभूसणसद्दे दुविहे प० तं० तालसद्दे चेव लत्तियासद्दे चेव । दोहिं ठाणेहिं सद्दुप्पाए सिया तंजहा—साहण्णताणं चेव, पुग्गलाणं सद्दुप्पाए सिया भिज्जताणं चेव पोग्गलाणं सद्दुप्पाए सिया ॥ ३८ ॥ दोहिं ठाणेहिं पोग्गला साहण्णति, तंजहा—सयं वा पोग्गला साहण्णति परेण वा पोग्गला साहण्णति । दोहिं ठाणेहिं पोग्गला भिज्जति, तंजहा—सयं वा पोग्गला भिज्जति, परेण वा पोग्गला भिज्जति । दोहिं ठाणेहिं पोग्गला परिसडंति, सयं वा पोग्गला परिसडंति, परेण वा पोग्गला परिसडंति, एवं परिपडंति, विद्धंसंति ॥ ३९ ॥ दुविहा पोग्गला प० तं० भिण्णा चेव अभिण्णा चेव । दुविहा पोग्गला प० तं० मिउरधम्मा चेव णोमिउरधम्मा चेव । दुविहा पोग्गला प० तं० परमाणुपोग्गला चेव णोपरमाणुपोग्गला चेव । दुविहा पोग्गला प० तं० सुहुमा चेव, वायरा चेव । दुविहा पोग्गला प० तं० बद्धपासपुट्टा चेव णोबद्धपासपुट्टा चेव । दुविहा पोग्गला प० तं० परियाइयच्चेव, अपरियाइयच्चेव । दुविहा पोग्गला प० तं० अत्ताचेव अणत्ताचेव । दुविहा पोग्गला प० तं०

इष्टा चैव, अणिष्टा चैव, एवं कंता, पिया, मणुष्णा, मणामा । दुविहा सहा प० तं०
अत्ता चैव, अणत्ता चैव एवं इष्टा जाव मणामा । दुविहा रूवा प० तं० अत्ता चैव
अग्रात्ता चैव, जाव मणामा, एवं गंधा, रसा, फासा, एवमिक्किक्के छआलावगा
भाणियक्वा ॥ ४० ॥ दुविहे आयारे प० तं० णाणायारे चैव णो णाणायारे
चैव । णोणाणायारे दुविहे प० तं० दंसणायारे चैव, णोदंसणायारे चैव । णोदंसणा-
यारे दुविहे पण्णत्ते तं०, चरित्तायारे चैव, णो चरित्तायारे चैव । णो चरित्तायारे
दुविहे प० तं० तवायारे चैव, वीरियायारे चैव ॥ ४१ ॥ दो पडिमाओ प० तं०
समाहिपडिमा चैव, उवहाणपडिमा चैव । दो पडिमाओ प० तं० विवेगपडिमा
चैव, विउसग्गपडिमा चैव । दोपडिमाओ प० तं० भहा चैव, सुभहा चैव । दो पडि-
माओ प० तं० महाभहा चैव सव्वतोभहा चैव । दो पडिमाओ प० तं० खुड्डिया
चैव मोयपडिमा, महल्लिया चैव मोयपडिमाओ । दोपडिमाओ प० तं० जवमज्जे
चैव चंदपडिमा, वहरमज्जे चैव चंदपडिमा ॥ ४२ ॥ दुविहे सामाइए प० तं०
अगारसामाइए चैव, अणगारसामाइए चैव ॥ ४३ ॥ दोण्हं उववाए प० तं०
देवाणं चैव, णेरइयाणं चैव । दोण्हं उव्वट्टणा प० तं० णेरइयाणं चैव, भवणक्वासीणं
चैव । दोण्हं चयणे प० तं० जोइसियाणं चैव, वेमाणियाणं चैव । दोण्हं गब्भक्कंती
प० तं० मणुस्साणं चैव, पंचिदियतिरिक्खजोणियाणं चैव । दोण्हं गब्भत्थाणं
आहारे प० तं० मणुस्साणं चैव पंचिदियतिरिक्खजोणियाणं चैव । दोण्हं गब्भत्थाणं
बुद्धी प० तं० मणुस्साणं चैव पंचिदियतिरिक्खजोणियाणं चैव । एवं णिव्वुद्धी
विगुव्वणा गइपरियाए समुग्घाए कालसंजोगे आयाइ मरणे । दोण्हं छविपव्वा प०
तं० मणुस्साणं चैव पंचिदियतिरिक्खजोणियाणं चैव । दो सुक्कसोणिअसंभवा, प०
तं० मणुस्सा चैव पंचिदियतिरिक्खजोणिया चैव, दुविहा ठिई, कायठिई चैव,
भवट्ठिई चैव, दोण्हं कायट्ठिई, मणुस्साणं चैव पंचिदियतिरिक्खजोणियाणं चैव ।
दोण्हं भवट्ठिई, देवाणं चैव णेरइयाणं चैव । दुविहे आउए, अद्धाउए चैव, भवा-
उए चैव । दोण्हं अद्धाउए, मणुस्साणं चैव पंचिदियतिरिक्खजोणियाणं चैव ।
दोण्हं भवाउए देवाणं चैव णेरइयाणं चैव । दुविहे कम्मे, पएसकम्मे चैव, अणु-
भावकम्मं चैव । दो अहाउयं पालेति, देवच्चेव णेरइयच्चेव । दोण्हं आउयसंवट्टए
प० तं० मणुस्साणं चैव, पंचिदियतिरिक्खजोणियाणं चैव ॥ ४४ ॥ जंबुद्दीवे दीवे

मंदरस्त पव्वयस्स उत्तरदाहिणेणं दोवासा बहुसमउल्ला अविसेसमणाणत्ता अण्णमण्णं
 णाइवट्ठंति, आयामविकखंभसंठाणपरिणाहेणं, तं जहा—भरहे चेव, एरवए चेव ।
 एवमेएणं अहिलावेणं णेयव्वं, हेमवए चेव हेरण्णवए चेव, हरिवरिसे चेव,
 रम्मववरिसे चेव ॥ ४५ ॥ जंबूद्वीवे दीवे मंदरस्त पव्वयस्स पुरच्छिमपच्चत्थियेणं
 दो खित्ता, बहुसमउल्ला अविसेस जाव पुव्वविदेहे चेव अवरविदेहे चेव ॥ ४६ ॥
 जंबूमंदरस्त पव्वयस्स उत्तरदाहिणेणं दोकुराओ, बहुसमउल्लाओ अविसेसा जाव
 देवकुरा चेव उत्तरकुरा चेव । तत्थ णं दो महइ महालया महादुमा, बहुसमउल्ला,
 अविसेसमणाणत्ता अण्णमण्णं णाइवट्ठंति आयामविकखंभुच्चतोव्वेहंसंठाणपरिणाहेणं
 तं जहा—कूडसामली चेव, जंबू चेव सुंदंसणा । तत्थणं दो देवा महिद्धिया जाव
 महासोकत्ता, पलिओवमट्ठिइया परिवसति, तं जहा—गरले चेव वेणुदेवे अणाटिए
 चेव जंबूद्वीवाहिवई ॥ ४७ ॥ जंबूमंदरस्त पव्वयस्स उत्तरदाहिणेणं दोवासहरपव्वया
 बहुसमउल्ला, अविसेसमणाणत्ता, अण्णमण्णं णाइवट्ठंति, आयामविकखंभुच्चतोव्वेह-
 संठाणपरिणाहेणं, तं जहा—सुल्लहिमवंतेचेव सिहरा चेव । एवं महाहिमवंते चेव,
 रुप्पी चेव, एवं णिसडे चेव, णीलवंते चेव ॥ ४८ ॥ जंबूमंदरस्तपव्वयस्स उत्तर-
 दाहिणेणं हेमवएरण्णवएसु वासेसु दोवट्ठवेयड्ढपव्वया, बहुसमउल्ला, अविसेसमणा-
 णत्ता जाव सहावाई चेव वियडावाई चेव, तत्थणं दो देवा महिद्धिया जाव
 पलिओवमट्ठिइया परिवसति, तं जहा—साई चेव पभासे चेव ॥ ४९ ॥ जंबूमंदरस्त
 उत्तरदाहिणेणं हरिवासरम्मएसु वासेसु दोवट्ठवेयड्ढपव्वया, बहुसमउल्ला, जाव गंधा-
 वाई चेव, मालवंतपरियाए चेव, तत्थणं दोदेवा महिद्धिया, जाव पलिओवम-
 ट्ठिइया परिवसति, तं जहा—अरुणे चेव, पउमे चेव ॥ ५० ॥ जंबूमंदरस्त पव्वयस्स
 दाहिणेणं देवकुराए पुव्वावरे पासे, एत्थणं आसक्खंधगसरिसा, अद्धचंदसंठाण-
 संठिया दोवक्खारपव्वया, बहुसमउल्ला जाव, सोमणसे चेव विज्जुप्पमे चेव । जंबू-
 मंदरस्त उत्तरेणं उत्तरकुराए पुव्वावरे पासे एत्थणं आसक्खंधगसरिसा अद्धचंद-
 संठाणसंठिया दो वक्खारपव्वया प० तं० बहु० जाव, गंधमायणे चेव, मालवंते
 चेव ॥ जंबूमंदरस्त पव्वयस्स उत्तरदाहिणेणं दोदीहवेयड्ढपव्वया, बहुसमउल्ला जाव
 भारहे चेव दीहवेयड्ढे एरावए चेव दीहवेयड्ढे । भारहेणं दीहवेयड्ढे दोगुहाओ बहु-
 समउल्लाओ अविसेसमणाणत्ताओ अण्णमण्णं णाइवट्ठंति आयामविकखंभुच्चत्तसंठाण-

परिणाहेणं, तं जहा—तिमिसगुहा चैव, खंडगप्पवायगुहा चैव । तत्थणं दो देवा महि-
 ष्टिया, जाव पलिओवमट्टिइया परिवसंति, तं जहा—कयमालए चैव, णट्टमालए
 चैव । एरावए णं दीहवेयद्धे दोगुहा, जाव कयमालए चैव णट्टमालए चैव ॥५१॥
 जंबूमंदरस्स पव्वयस्स दाहिणेणं चुल्लहिमवंते वासहरपव्वए दोकूडा, बहुसमउल्ला,
 जाव विक्खंमुच्चत्तसठाणपरिणाहेणं, तं जहा—चुल्लहिमवंतकूडे चैव वेसमणकूडे
 चैव । जंबूमंदरस्स दाहिणेणं महाहिमवंते वासहरपव्वए दोकूडा, बहुसमउल्ला
 जाव महाहिमवंतकूडे चैव, वेरुलियकूडे चैव । एवं णिसडे वासहरपव्वए दोकूडा,
 बहुसमउल्ला जाव० णिसदकूडे चैव, स्यगधमे चैव । जंबूमंदरस्स उत्तरेणं णील-
 वंते वासहरपव्वए दोकूडा, बहुसमउल्ला जाव० णीलधंतकूडे चैव, उवदंसणकूडे
 चैव । एवं रुप्पिमि वासहरपव्वए दोकूडा, बहुसमउल्ला जाव० तंजहा रुप्पिकूडे
 चैव, मणिकंचणकूडे चैव । एवं सिहरिमि वि वासहरपव्वए दोकूडा, बहुसमउल्ला
 तंजहा—सिहरिकूडे चैव, तिगिच्छिकूडे चैव ॥ ५२ ॥ जंबूमंदरस्स उत्तरदाहि-
 णेणं चुल्लहिमवंतसिहरीसु वासहरपव्वएसु दो महद्दहा, बहुसमउल्ला, अविसेसमणा-
 णत्ता अण्णं मण्णं णाइवट्टंति, आयामविक्खंमउव्वेहसठाणपरिणाहेणं, तंजहा—पउ-
 मद्दहे चैव, पुंडरीयद्दहे चैव । तत्थणं दो देवयाओ महिष्ठियाओ जाव पलिओवम-
 ट्टिइयाओ परिवसंति, तं० सिरी चैव लच्छी चैव । एवं महाहिमवंतरुप्पीसु
 वासहरपव्वएसु दो महद्दहा प० बहुसमउल्ला जाव महापउमद्दहे चैव, महा-
 पोंडरीयद्दहे चैव । देवयाओ हिरिचैव बुद्धिचैव । एवं णिसहणीलवंतेसु तिगि-
 च्छिद्दहे चैव, केसरिद्दहे चैव, देवयाओ धिई चैव कित्तिचैव ॥ ५३ ॥ जंबूमंदर-
 दाहिणेणं महाहिमवंताओ वासहरपव्वयाओ महापउमद्दहाओ दो महाणईओ
 पवहंति तंजहा रोहियचैव हरिकंतचैव । एवं णिसहाओ वासहरपव्वयाओ तिगिच्छि-
 द्दहाओ दोमहाणईओ पवहंति तं० हरिचैव, सीतोअचैव । जंबूमंदरस्स उत्तरेणं
 णीलवंताओ वासहरपव्वयाओ केसरिद्दहाओ दो महाणईओ पवहंति तं० सीता चैव,
 णारिकंता चैव । एवं रुप्पिवासहरपव्वयाओ महापोंडरीयद्दहाओ दोमहाणईओ पव-
 हंति, तंजहा णरकंता चैव रुप्पकूला चैव । जंबूमंदरदाहिणेणं भरहेवासे दोपवाय-
 द्दहा प० तं० बहुसमउल्ला जाव गंगप्पवायद्दहे चैव, सिंधुप्पवायद्दहे चैव । एवं
 हेमवएवासे दोपवायद्दहा प० बहुसमउल्ला तं० रोहियप्पवायद्दहे चैव, रोहियंसप्प-

वायद्दे चेव । जंबूमंदरदाहिणे णं हरिवासे वासे दोपवायद्देहा प० बहुसमउल्ला तं०
हरिप्पवायद्दे चेव हरिकंतप्पवायद्दे चेव । जंबूमंदरउत्तरदाहिणेणं महाविदेहे वासे
दोपवायद्देहा प० तं० बहुसमउल्ला जाव० सीयप्पवायद्दे चेव, सीओयप्पवायद्दे
चेव । जंबूमंदरउत्तरेणं रम्मएवासे दोपवायद्देहा प० बहुसमउल्ला जाव णरकंतप्प-
वायद्दे चेव णारिकंतप्पवायद्दे चेव । एवं हेरण्णवएवासे दोपवायद्देहा प० बहु-
समउल्ला जाव० सुवण्णकूलप्पवायद्दे चेव, रूप्पकूलप्पवायद्दे चेव । जंबूमंदर-
उत्तरेणं एरवएवासे दोपवायद्देहा, प० बहुसमउल्ला जाव० रत्तप्पवायद्दे चेव
रत्तावईप्पवायद्दे चेव । जंबूमंदरदाहिणेणं भरहेवासे दोमहाणईओ प० बहुसमउल्ला
गंगा चेव, सिंधू चेव । एवं जहा प्पवायद्देहा एवं णईओ भाणियव्वाओ । जाव
एरवए वासे दोमहाणईओ प० बहुसमउल्लाओ जाव रत्ता चेव रत्तवई चेव ॥ ५४ ॥
जंबुद्दीवे दीवे भरहेरवएसु वासेसुऽतीयाए उस्सप्पिणीए सुसमदुसमाए समाए
दो सागरोवमकोडाकोडीओ काले होत्था । एवमिमीसे ओसप्पिणीए जाव प० एवं
आगमिस्साए उस्सप्पिणीए जाव भविस्सइ । जंबुद्दीवे दीवे भरहेरवएसु वासेसु
तीयाए उस्सप्पिणीए सुसमाए समाए मणुया दोगाउयाई उड्ढं उच्चत्तेणं होत्था,
दोण्णिपपलिओवमाई परमाउं पालइत्था । एवमिमीसे ओसप्पिणीए जाव पालइत्था ।
एवमागमिस्साए उस्सप्पिणीए जाव पालइस्संति ॥ ५५ ॥ जंबुद्दीवे दीवे भरहेर-
वएसु वासेसु एगसमए एगजुगे दो अरहंतवंसा उप्पज्जिसु वा उप्पज्जंति वा उप्पज्जि-
स्संति वा । एवं चक्कवट्ठिवंसा, दसारवंसा । जंबुभरहेरवएसु एगसमए दोअरिहंता
उप्पज्जिसु वा उप्पज्जंति वा उप्पज्जिस्संति वा, एवं चक्कवट्ठि एवं तलदेवा एवं वासुदेवा,
जाव उप्पज्जिस्संति वा ॥ ५६ ॥ जंबू० दोसु कुरासु मणुया सया सुसमसुसमुत्तममिद्धिं
पत्ता पच्चणुभवमाणा विहरंति, तं जहा—देवकुराए चेव, उत्तरकुराए चेव ।
जंबुद्दीवे दीवे दोसु वासेसु मणुया सया सुसमसुत्तममिद्धिं पत्ता पच्चणुभवमाणा विहरंति
तंजहा—हरिवासे चेव रम्मगवासे चेव । जंबू० दोसु वासेसु मणुया सया सुसमदुस-
मुत्तममिद्धिं पत्ता पच्चणुभवमाणा विहरंति, तं जहा—हेमवए चेव एरण्णवए चेव ।
जंबुद्दीवे दीवे दोसु खित्तसु मणुया सया दुसमसुसमुत्तममिद्धिं पत्ता पच्चणुभवमाणा
विहरंति, तं जहा—पुव्वविदेहे चेव अवरविदेहे चेव । जंबुद्दीवे दीवे दोसु वासेसु
मणुया छव्विहंपिकालं पच्चणुभवमाणा विहरंति, तं जहा—भरहे चेव, एरवए चेव

॥५७॥ जंबुद्दीवे २ दोचंदा पभासिसु वा, पभासंति वा, पभासिस्संति वा, दोसूरिआ तवइंसु वा, तवंति वा, तविस्संति वा । दो कत्तिथाओ, दो रोहिणीओ दो मिय-सिराओ, दो अद्दाओ एवं भाणियब्बं ॥ कत्तियरोहिणिमियसिर अद्दा य पुण्णवसू य पुस्सो य । तत्तोवि अस्सलेसा, महा य दो फग्गुणीओ य । १ । हत्थो चित्ता साई, विसाहा तह य होति अणुराहा, जेढ्ढा मूलो पुब्बा य, आसाढा उत्तरा चैव । २ । अमिई सवण धणिद्धा सयमिसया दो य होति भहवया । रेवइ अस्सिणि भरणी, णेयध्वा अणुपुब्बीए । ३ । एवं गाहाणुसारेण णायब्बं जाव दो भरणीओ । दो अग्गी दो पया-वई दोसोमा दोरुहा दोअइई दोत्रहस्सई दोसप्पी दोपिई दोभगा दोअब्जमा दोसबिया दोतट्ठा दोवाऊ दोइंदग्गी दोमिच्चा दोईदा दोणिरई दोआऊ दोविस्सा दोवम्हा दोविण्हू दोवसू दोवरुणा दोअथा दोविबिद्धी दोपुस्सा दोअस्सा दोयमा । दोइंगालगा दोविया-लगा दोलोहियक्खत्ता दोसणिच्चरा दोआहुणिया दोपाहुणिया दोकणा दोकणगा दोकण-क्कणा दोकणगवियाणगा दोकणगसंताणगा दोसोमा दोसहिया दोआसासणा दोकज्जो-वगा दोकब्बडगा दोअयकरगा दोदुंदुभगा दोसंखा दोसंखवण्णा दोसंखवण्णाभा दोकंसा दोकंसवण्णा दोकंसवण्णाभा दोरुप्पी दोरुप्पाभासा दोणीला दोणीलोभासा दोभासा दोभासरासी दोतिला दोतिलपुप्फवण्णा दोदगा दोदगपंचवण्णा दोकाका दोकक्कंधा दोइंदग्गी दोधूमकेऊ दोहरी दोपिंगला दोबुहा दोसुक्का दोत्रहस्सई दोराहू दोभगत्थी दोमाणवग्गा दोकासा दोफासा दोधुरा दोपमुहा दोवियडा दोविसंधी दोणियल्ला दोपइल्ला दोजडियाइलगा दोअरुणा दोअग्गिल्ला दोकाला दोमहाकालगा दोसोत्थिया दोसोवत्थिया दोवद्धमाणगा दोपूसमाणगा दोअंकुसा दोपलंबा दोणिच्च-लोगा दोणिच्चुज्जोया दोसयंपभा दोओभासा दोसेयंकरा दोखेमंकरा दोआभंकरा दोपभंकरा दोअपराजिया दोअरया दोअसोगा दोविगयसोगा दोविमला दोवि-तत्ता दोवितत्ता दोविसाला दोसाला दोसुध्वया दोअणियट्ठी दोएगज्जडी दोदुज्जडी दोकरकरिगा दोरायग्गला दोपुप्फकेऊ दोभावकेऊ ॥ ५८ ॥ जंबुद्दीवस्स णं दीवस्स वेइआ दोगाउआई उड्डं उच्चत्तेणं प०, लवणेणं समुद्दे दोजोयणसयसहस्साइं चक्कवाल-विकखंभेण प० लवणस्सणं समुद्दस्स वेइया दोगाउआई उड्डं उच्चत्तेणं प० ॥५९॥ धायईखंडेणं दीवे पुरत्थिमद्धेणं मंदरस्स पव्वयस्स उत्तरदाहिणेणं दोवासा, बहुसम-उल्ला जाव भरहे चैव, एरवए चैव । एवं जहा जंबुद्दीवे तथा एत्थ वि भाणियब्बं,

जाव दोसु वासेसु मणुया छद्विहंपि कालं पच्चणुभवमाणा विहरंति, तंजहा—भरहे चेव एरवए चेव, णवरं कूडसामली भेव, धायईरुक्खे चेव, देवां गरुले चैव वेणुदेवे सुदंसणे चेव । धायईखंडदीवपच्चत्थिमद्वेणं मंदरस्स पव्वयस्स उत्तरदाहिणेणं दोवासा प० ब्रहुसमउल्ला जाव भरहे चेव एरवए चेव, जाव छद्विहंपि कालं पच्चणुभवमाणा विहरंति । णवरं कूडसामली चेव महाधायईरुक्खे चेव, देवा गरुले चेव वेणुदेवे पियंदंसणे चेव । धायईखंडेणं दीवे दोभरहाई दोएरवयाई दोहिमवयाई दो हेरणवयाई दोहरिवासाई दोरम्मगवासाई, दोपुव्वविदेहाई दोअवरविदेहाई दोदेवकुराओ दोदेवकुरुमहादुमा, दोदेवकुरुमहादुमावासी देवा दोउत्तरकुराओ दोउत्तरकुरुमहादुमा दोउत्तरकुरुमहादुमावासी देवा । दोचुल्लहिमवंता दोमहाहिमवंता दोणिसहा दोणीलवंता दोरुप्पी दोसिहरी । दोसहावाई दोसहावाईवासी साई देवा, दोवियडावाई दोवियडावाईवासी पभासा देवा दोगंधावाई दोगंधावाईवासी अरुणादेवा दोमालवंतपरियागा दोमालवंतपरियागावासी पउमादेवा । दोमालवंता दोचित्तकूडा दोपम्हकूडा दोणल्लिणकूडा दोएगसेला दोतिकूडा दोवेसमणकूडा दोअंजणा दोमातंजणा दोसोमणसा दोविज्जुप्पभा दोअंकावई दोपम्हावई दोआसी-विस्ता दोसुहावहा दोचंदपव्वया दोसूरपव्वया दोणागपव्वया दोदेवपव्वया दोगंध-मायणा दोउसुगारपव्वया दोचुल्लहिमवंतकूडा दोवेसमणकूडा दोगहाहिमवंतकूडा दोवेरुल्लियकूडा दोणिसहकूडा दोरुयगकूडा दोणीलवंतकूडा दोउवदंमणकूडा दोरुप्पि-कूडा दोमणिकंचणकूडा दोसिहरिकूडा दोतिगिच्छिक्कूडा दोपउमदहहा, दोपउमदह-वासिणीओ सिरीदेवीओ दोमहापउमदहहा दोमहापउमदहहवासिणीओ हिरीओ एवं जाव दोपुंडरीयहहा दोपुंडरीयहहवासिणीओ लच्छीओ देवीओ । दोगंगप्पवायदहा जाव दोरत्तवईप्पवायदहा दोरोहियाओ जाव दोरुप्पकूलाओ दोगाहावईओ दोदह-वईओ दोपकवईओ दोत्तजलाओ दोमत्तजलाओ दोउम्मत्तजलाओ दोखीरोयाओ दोसीहसोयाओ दोअंतोवाहिणीओ दोउम्मिमालिणीओ दोफेणमालिणीओ दोगंभीर-मालिणीओ । दोकच्छा दोसुकच्छा दोमहाकच्छा दोकच्छगावई दोआवत्ता दोमंगला-वत्ता दोपुक्खला दोपुक्खलावई, दोवच्छा दोसुवच्छा दोमहावच्छा दोवच्छगावई दोरम्मा दोरम्मगा दोरमणिजा दोमंगलावई, दोपम्हा दोसुपम्हा दोमहापम्हा दोपम्हगावई दोसंखा दोणल्लिणा दोकुमुया दोसल्लिावई, दोणल्लिणावई दोवप्पा

दोसुवप्पा दोमहावप्पा दोवप्पगावई दोवग्गू दोसुवग्गू दोगंधिला दोगंधिलावई । दोखेमाओ दोखेमपुरीओ दोरिद्धाओ दोरिद्धपुरीओ दोखग्गीओ दोमंजूसाओ दो-
 ओसहीओ दोपुण्डरीगिणीओ दोसुसीमाओ दोकुंडलाओ दोअपराइआओ दोप्प-
 भंकराओ दोअंकावईओ दोपम्हावईओ दोसुभाओ दोरयणसंचयाओ, दोआसपुराओ
 दोसीहपुराओ दोमहापुराओ दोविजयपुराओ दोअवराजियाओ दोअवराओ दो-
 असोयाओ दोविगयसोयाओ, दोविजयाओ दोवेजयंतीओ दोजयंतीओ दोअपरा-
 जियाओ दोचक्रपुराओ दोखग्गपुराओ दोअवज्झाओ दोअउज्झाओ । दोभह-
 सालवणा दोणंदणवणा दोसोमणसवणा दोपंडगवणा दोपंडुकंबलसिलाओ दोअति-
 पंडुकंबलसिलाओ दोरत्तकंबलसिलाओ दोअइरत्तकंबलसिलाओ दोमंदरा दोमंदर-
 चूलियाओ, धायइखंडस्सणं दीवस्स वेइया दोगाउयाई उहुं उच्चत्तेणं पणत्ता,
 कालोदस्सणं समुहस्स वेइया दोगाउयाई उहुं उच्चत्तेणं पणत्ता । पुक्खरवरदीवद्ध-
 पुरत्थिमद्धेणं मंदरस्स पव्वयस्स उत्तरदाहिणेणं दोवासा प० बहुसमउल्ला जाव
 भरहे चैव एरवए चैव जाव दोकुराओ पणत्ताओ देवकुरा चैव उत्तरकुरा
 चैव । तत्थणं दोमहइमहालया महद्दुमा प० तं० कूडसामली चैव, पउमरुक्खे
 चैव, देवा गरुले चैव वेणुदेवे पउमे चैव, जाव छविहंपि कालं पच्चणुअभवमाणा
 विहरंति । पुक्खरवरदीवद्धपच्चत्थिमद्धेणं मंदरपव्वयस्स उत्तरदाहिणेणं दोवासा प०
 तं० तद्देव णाणत्तं कूडसामली चैव, महापउमरुक्खे चैव, देवा गरुले चैव, वेणुदेवे
 पुंडरीए चैव । पुक्खरवरदीवद्धेणं दीवे दोभरहाई दोएरवयाई जाव दोमंदरा दोमंद-
 रचूलाओ, पुक्खरवरस्स णं दीवस्स वेइया दोगाउयाई उहुं उच्चत्तेणं प० सक्खेसिं पि
 णं दीवसमुद्दाणं वेइयाओ दोगाउयाई उहुं उच्चत्तेणं पणत्ताओ ॥ ६० ॥ दोअसुर-
 कुमारिंदा प० तं० चमरे चैव, बली चैव । दोणागकुमारिंदा प० तं० धरणे चैव,
 भूयाणंदे चैव । दोसुवण्णकुमारिंदा प० तं० वेणुदेवे चैव, वेणुदाली चैव । दोविज्जु-
 कुमारिंदा प० तं० हरी चैव हरिस्सहे चैव । दोअग्गिकुमारिंदा प० तं० अग्गिसिहे
 चैव अग्गिमाणवे चैव । दोदीवकुमारिंदा प० तं० पुण्णे चैव, विसिट्ठे चैव । दोउदहि-
 कुमारिंदा प० तं० जलकंते चैव जलप्पमे चैव । दोदिसाकुमारिंदा प० तं० अमियगई
 चैव, अमियवाइणे चैव । दोवाउकुमारिंदा प० तं० वेल्बे चैव पभंजणे चैव । दोथणिय-
 कुमारिंदा प० तं० घोसे चैव महाघोसे चैव । दोपिसायइंदा प० तं० काले चैव महा-

काले चैव । दोभूयइंदा प० तं० मुरूवे चैव पडिरूवे चैव । दोबकिंखदा प० तं० पुण्ण-
 भदे चैव माणिभदे चैव । दोरक्खसिंदा प० तं० भीमे चैव महाभीमे चैव । दोकि-
 ण्णरिंदा प० तं० किण्णरे चैव किंपुरिसे चैव । दोकिंपुरिसिंदा प० तं० सप्पुरिसे चैव
 महापुरिसे चैव । दोमहोरगिंदा प० तं० अइकाए चैव महाकाए चैव । दोगंधविंदा
 प० तं० गीयरई चैव गीयज्जे चैव । दोअणपण्णिंदा प० तं० सण्हिए चैव, सामण्णे
 चैव । दोपणपण्णिंदा प० तं० धाए चैव विहाए चैव । दोइसिवाइंदा प० तं० इसि
 खेव इसिवालए चैव । दोभूयवाइंदा प० तं० इस्सरे चैव महिस्सरे चैव । दोकंदिंदा
 प० तं० सुवच्छे चैव विसाले चैव । दोमह्यकंदिंदा प० तं० हस्से चैव हस्सरई चैव ।
 दोकुमंडिंदा प० तं० सेए चैव महासेए चैव । दोपयइंदा प० तं० पयए चैव
 पयगवई चैव । जोइसियाणं देवाणं दोइंदा प० तं० चंदे चैव सूरे चैव । सोहम्मी-
 साणेसु णं कप्पेसु दोइंदा प० तं० सक्के चैव ईसाणे चैव । एवं सणकुमारमाहिंसेसु
 कप्पेसु दोइंदा प० तं० सणकुमारे चैव माहिंसे चैव । बंभलोयलंतएसु णं दोइंदा
 प० तं० बंभे चैव लंतए चैव । महासुकसहस्सारेसु णं कप्पेसु दोइंदा पण्णत्ता
 तंजहा--महासुकके चैव सहस्सारे चैव । आणयपाणयारणच्चुएसु णं कप्पेसु दोइंदा
 प० तं० पाणए चैव, अच्चुए चैव ॥६१॥ महासुकसहस्सारेसु णं कप्पेसु विमाणा
 दुवण्णा प० तं० हालिहा चैव सुकिल्ला चैव, गेविज्जगाणं देवाणं दो रयणीओ उइं
 उच्चत्तेणं पण्णत्ता ॥ ६२ ॥

बीयं ठाणं चउत्थो उद्देसो

समयाइ वा आवलियाइ वा, जीवाइ वा अजीवाइ वा पवुच्चइ । आणापाणूइ
 वा, थोवाइ वा जीवाइ वा अजीवाइ वा पवुच्चइ । खणाइ वा लवाइ वा जीवाइ वा
 अजीवाइ वा पवुच्चइ । एवं मुहुत्ताइ वा, अहोरत्ताइ वा, पक्खाइ वा, मासाइ वा,
 उऊइ वा, अयणाइ वा, संवच्छराइ वा, जुगाइ वा, वाससायाइ वा, वाससहस्साइ
 वा, वाससयसहस्साइ वा, वासकोडीइ वा, पुक्खंगाइ वा, पुक्खाइ वा, तुडियंगाइ
 वा तुडियाइ वा अडडंगाइ वा अडडाइ वा, अववंगाइ वा, अववाइ वा हूहूअंगाइ
 वा, हूहूयाइ वा, उप्पलंगाइ वा, उप्पलाइ वा, पउमंगाइ वा, पउमाइ वा, णलिणं-
 गाइ वा, णलिणाइ वा, अच्छणिउरंगाइ वा, अच्छणिउराइ वा, अउअंगाइ वा
 अउआइ वा, णउअंगाइ वा, णउआइ वा, पउअंगाइ वा, पउयाइ वा, चूलिअंगाइ

वा चूलियाइ वा, सीसप्पहेलिअंगाइ वा, सीसप्पहेलियाइ वा, पलिओवमाइ वा, सागरोवमाइ वा उस्सप्पिणीइ वा, ओसप्पिणीइ वा, जीवाइ वा अजीवाइ वा पवुच्चइ ॥ ६३ ॥ गामाइ वा, णगराइ वा, णिगमाइ वा, रायहाणीइ वा, खेडाइ वा, कब्बडाइ वा, मडंवाइ वा, दोणमुहाइ वा, पट्टणाइ वा, आगराइ वा, आस-
माइ वा, संवाहाइ वा, संणिवेसाइ वा, घोसाइ वा, आरामाइ वा, उज्जाणाइ वा, वणाइ वा, वणखंडाइ वा, वावीइ वा, पुक्खरणीइ वा, सराइ वा, सरपंतीइ वा, अगडाइ वा, तडागाइ वा, दहाइ वा, णदीइ वा, पुढवीइ वा, उदहीइ वा, वात-
खंधाइ वा, उवासंतराइ वा, वलयाइ वा, विग्गहाइ वा, दीवाइ वा, समुहाइ वा, वेलाइ वा, वेइयाइ वा, दाराइ वा, तोरणाइ वा, णेरइयाइ वा, णेरइयावासाइ वा, जाव वेमाणियावासाइ वा, कप्पाइ वा, कप्पविमाणवासाइ वा, वासाइ वा, वास-
हरपव्वयाइ वा, कूडाइ वा, कूडागराइ वा, विजयाइ वा, रायहाणीइ वा जीवाइ वा अजीवाइ वा पवुच्चइ ॥ ६४ ॥ छायाइ वा, आतवाइ वा, जोसिणाइ वा, अंध-
गाराइ वा, ओमाणाइ वा, पमाणाइ वा, उम्माणाइ वा, अइयाणगिहाइ वा, उज्जाणगिहाइ वा, अवलिम्बाइ वा, सणिप्पवायाइ वा जीवाइ वा अजीवाइ वा पवुच्चइ ॥ ६५ ॥ दो रासी प० तं० जीवरासी चैव, अजीवरासी चैव । दुविहे बंधे प० तं० पेज्जबंधे चैव, दोसबंधे चैव । जीवाणं दोहिं ठाणेहिं पावकम्मं बंधंति तं० रागेण चैव, दोसेण चैव । जीवाणं दोहिं ठाणेहिं पावकम्मं उदीरंति तं० अब्भो-
वगमियाए चैव वेयणाए उवकमियाए चैव वेयणाए एवं । वेदंति एवं णिज्जरेति अब्भो-
वगमियाए चैव वेयणाए उवकमियाए चैव वेयणाए । दोहिं ठाणेहिं आया सरीरं फुसित्ताणं णिज्जाइ तं० देसेणवि आया सरीरं फुसित्ताणं णिज्जाइ सव्वेणवि आया सरीरं फुसित्ताणं णिज्जाइ, एवं फुरित्ताणं एवं फुडित्ताणं एवं संवट्टित्ताणं णिव्वट्टि-
त्ताणं । दोहिं ठाणेहिं आया केवलपण्णत्तं धम्मं लभेज्जा सवणयाए तंजहा—खएण चैव उवसमेण चैव । एवं जाव मणपज्जवणाणं उप्पाडेज्जा तं० खएण चैव उवसमेण चैव ॥ ६६ ॥ दुविहे अद्धोवमिए प० तं० पलिओवमे चैव सागरोवमे चैव । से किं तं पलिओवमे ? पलिओवमे—जं जोयणविच्छिण्णं पल्लं एगाहियप्परूढाणं होज्ज णिरंतरणचियं भरियं बालग्गकोडीणं । १। वाससए वाससए एकक्के, अवहडंमि जो कालो; सो कालो बोद्धव्वो, उवमा एगस्स पल्लस्स । २। एएसिं पल्लानं कोडाकोडी

हवेञ्ज दसगुणिया; तं सागरोक्षमस्स उ एगस्स भवे परीमाणं ॥ ३ ॥ ६७ ॥ दुविहे कोहे प० तं० आयपइट्टिए चेव, परपइट्टिए चेव । एवं गेरइयाणं जाव वेमाणियाणं, एवं जाव मिञ्छादंसणसल्ले ॥ ६८ ॥ दुविहा संसारसमावण्णगा जीवा प० तं० तसा चेव, थावरा चेव । दुविहा सव्वजीवा प० तं० सिद्धा चेव असिद्धा चेव । दुविहा सव्वजीवा प० तं० सइंदिया चेव, अणिंदिया चेव । एवं एसा गाहा फासे-यव्वा जाव ससरीरी चेव असरीरी चेव । सिद्धसइंदियाकाए, जोगे वेए कसायलेसा य, णाणुवओगाहारे भासगच्चरिमे य ससरीरी (१) ॥ ६९ ॥ दोमरणाई समणेणं भगवया महावीरेणं समणाणं णिग्गंथाणं णो णिच्चं वण्णियाइं कित्तियाइं णो णिच्चं बुइयाइं णो णिच्चं पसत्थाइं णो णिच्चं अब्भणुण्णायाइं भवंति तं० वलयमरणे चेव, वसट्टमरणे चेव, एवं गियाणमरणे चेव, तम्भवमरणे चेव, गिरिपडणे चेव, तरुपडणे चेव, जलप्पवेसे चेव, जलणप्पवेसे चेव, विसभक्खणे चेव, सत्थोवाडणे चेव । दोमरणाई जाव णो णिच्चं अब्भणुण्णायाइं भवंति, कारणेणं पुण अप्पड्डिकुट्टाई तंजहा-वेहाणसे चेव गिद्धपिट्ठे चेव ॥ ७० ॥ दोमरणाई समणेणं भगवया महावीरेणं समणाणं णिग्गंथाणं णिच्चं वण्णियाइं जाव अब्भणुण्णायाइं भवंति तं० पाओवगमणे चेव भत्तपच्चक्खणे चेव । पाओवगमणे दुविहे प० तं० णीहारिमे चेव अणीहारिमे चेव, णियमं अप्पड्डिकमे । भत्तपच्चक्खणे दुविहे प० तं० णीहारिमे चेव, अणीहा-रिमे चेव, णियमं सप्पड्डिकमे ॥ ७१ ॥ के अयं लोए ? जीवच्चेव अजीवच्चेव, के अणंतालोए ? जीवच्चेव अजीवच्चेव । के सासया लोए ? जीवच्चेव अजीवच्चेव ॥ ७२ ॥ दुविहा बोही, णाणबोही चेव, दंसणबोही चेव । दुविहा बुद्धा णाणबुद्धा चेव दंसण-बुद्धा चेव, एवं मोहे मूढा ॥ ७३ ॥ णाणावरणिज्जे कम्मे दुविहे पण्णत्ते तं० देस-णाणावरणिज्जे चेव, सव्वणाणावरणिज्जे चेव । दंसणावरणिज्जे कम्मे एवं चेव वेय-णिज्जे कम्मे दुविहे प० तं० सायावेयणिज्जे चेव असायावेयणिज्जे चेव । मोहणिज्जे कम्मे दुविहे प० तं० दंसणमोहणिज्जे चेव चरित्तमोहणिज्जे चेव । आउकम्मे दुविहे प० तं० अद्धाउए चेव, भवाउए चेव । णामकम्मे दुविहे प० तं० सुभणामे चेव असुभणामे चेव । गोत्तकम्मे दुविहे प० तं० उच्चागोए चेव णीयागोए चेव । अंत-राइएकम्मे दुविहे प० तं० पट्टुप्पण्णविणासिए चेव पिहियआगामिपहं ॥ ७४ ॥ दुविहा मुच्छा प० तं० पेञ्जवत्तिया चेव, दोसवत्तिया चेवं । पेजवत्तियामुच्छा

दुविहा प० तं० माए चैव लोहे चैव । दोसवत्तियामुच्छा दुविहा प० तं० कोहे चैव माणे चैव ॥ ७५ ॥ दुविहा आराहणा प० तं० धम्मियाराहणा चैव केवलि-
 आराहणा चैव । धम्मियाराहणा दुविहा प० तं० सुयधम्माराहणा चैव चरित्त-
 धम्माराहणा चैव । केवलिआराहणा दुविहा प० तं० अंतकिरिया चैव कप्पवि-
 माणोवत्तिया चैव ॥ ७६ ॥ दोतित्थयरा णीलुप्पलसमावण्णेणं प० तं० मुणिसुव्वए
 चैव, अरिट्ठणेमी चैव । दोतित्थयरा पियंगुसमावण्णेणं प० तं० मल्ली चैव पासे
 चैव । दोतित्थयरा पउमगोरा वण्णेणं, प० तं पउमप्पहे चैव वासुपुञ्जे चैव । दो-
 तित्थयरा चंदगोरा वण्णेणं प० तं० चंदप्पभे चैव पुप्फदंते चैव ॥ ७७ ॥ सच्चप्पवाय
 पुव्वस्सणं दुवे वत्थू पण्णत्ता । पुव्वभह्वयाणक्खत्ते दुतारे प० उत्तरभह्वयाणक्खत्ते
 दुतारे प०-एवं पुव्वफग्गुणी, उत्तरफग्गुणी ॥ ७८ ॥ अंतोणं मणुस्सखेत्तस्स दो
 समुद्दा, प० तं० लव्वणे चैव कालोदे चैव । दोच्चक्खवट्ठी अपरिचत्तकामभोगा काल-
 मासे कालं किच्चा अहे सत्तमाए पुढवीए अप्पइट्ठाणणए णेरइयत्ताए उववण्णा तं०
 सुभूमे चैव बंधत्ते चैव ॥ ७९ ॥ असुरिंदवज्जियाणं भवणवासीणं देवाणं देसू-
 णाई दोपलिओवमाईं ठिई प०, सोहम्मे कप्पे देवाणं उक्कोसेणं दोसागरोवमाईं ठिई
 प०, ईसाणे कप्पे देवाणं उक्कोसेणं साइरेगाईं दोसागरोवमाईं ठिई प०, सणंकुमारे
 कप्पे देवाणं जहण्णेणं दोसागरोवमाईं ठिई प०, माहिंदे कप्पे देवाणं जहण्णेणं
 साइरेगाईं दोसागरोवमाईं ठिई पण्णत्ता ॥ ८० ॥ दोसु कप्पेसु कप्पत्थियाओ
 पण्णत्ताओ तं० सोहम्मे चैव ईसाणे चैव । दोसु कप्पेसु देवा तेउलेस्सा प० तं०
 सोहम्मे चैव ईसाणे चैव । दोसु कप्पेसु देवा कायपरियारगा प० तं० सोहम्मे चैव
 ईसाणे चैव । दोसु कप्पेसु देवा फासपरियारगा प० तं० सणंकुमारे चैव, माहिंदे
 चैव । दोसु कप्पेसु देवा रूवपरियारगा प० तं० बंधलोए चैव, लंतए चैव । दोसु
 कप्पेसु देवा सहपरियारगा प० तं० महासुक्के चैव, सहस्सारे चैव । दोईदा मण-
 परियारगा, प० तं० पाणए चैव, अरुचुए चैव ॥ ८१ ॥ जीवाणं दुट्ठाणणिव्वत्तिए
 पोग्गले पावक्कम्मत्ताए च्चिणिसु वा च्चिणंति वा च्चिणिसंति वा तं जहा-त्तसकाय-
 णिव्वत्तिए चैव, थावरकायणिव्वत्तिए चैव । एवं उवच्चिणिसु वा, उवच्चिणंति वा,
 उवच्चिणिसंति वा, बंधिसु वा, बंधंति वा, बंधिस्संति वा, उदीरिसु वा, उदीरंति वा,
 उदीरिस्संति वा, वेदिसु वा, वेदिंति वा, वेदिस्संति वा, णिज्जरिसु वा, णिज्जरेंति

वा, णिञ्जरिस्संति वा ॥ ८२ ॥ दुष्पएस्सिया खंवा अणंता प० दुष्पएसोमाढा पोग्गला अणंता प० एवं जाव दुग्गुणलुक्कवा पोग्गला अणंता पण्णत्ता ॥ ८३ ॥

तइयं ठाणं पढमो उद्देसो

तओ इंदा प० तं० णामिदे-ठवणिदे-दध्विदे । तओ इंदा प० तं० णाणिदे-दंसणिदे-चरिस्सिदे, तओ इंदा प० तं० देविदे-असुरिदे-मणुस्सिदे ॥ १ ॥ तिविहा विउव्वणा प० तं० बाहिरए पोग्गलए परियाइत्ता एगा विउव्वणा, बाहिरए पोग्गले अपरियाइत्ता एगाविउव्वणा, बाहिरए पोग्गले परियाइत्ता वि अपरियाइत्ता वि एगा विउव्वणा, तिविहा विउव्वणा प० तं० अब्भंतरए पोग्गले परियाइत्ता एगा विउव्वणा अब्भंतरए पोग्गले अपरियाइत्ता एगाविउव्वणा अब्भंतरए पोग्गले परियाइत्ता वि अपरियाइत्तावि एगा विउव्वणा । तिविहा विउव्वणा प० तं० बाहिर-ब्भंतरए पोग्गले परियाइत्ता एगा विउव्वणा बाहिरब्भंतरए पोग्गले अपरियाइत्ता एगा विउव्वणा बाहिरब्भंतरए पोग्गले परियाइत्तावि अपरियाइत्तावि एगा विउव्वणा ॥ २ ॥ तिविहा णेरइया प० तं० कतिसंचिया, अकतिसंचिया अवत्तव्वगसंचिया एवमेगिदियव्वजा जाव वेमाणिया ॥ ३ ॥ तिविहा परियारणा प० तं० एगे देवे अण्णे देवे अण्णेसि देवाणं देवीओ य अभिजुंजिय २ परियारेइ, अप्पणिज्जिआओ देवीओ अभिजुंजिय २ परियारेइ अप्पाणमेव अप्पणा विउव्विय २ परियारेइ, एगे देवे णो अण्णेदेवे णो अण्णेसि देवाणं देवीओ अभिजुंजिय २ परियारेइ अप्पणिज्जि-आओ देवीओ अभिजुंजिय २ परियारेइ अप्पाणमेव अप्पणा विउव्विय २ परिया-रेइ । एगे देवे णो अण्णेदेवे णो अण्णेसि देवाणं देवीओ अभिजुंजिय २ परियारेइ, णो अप्पणिज्जिआओ देवीओ अभिजुंजिय २ परियारेइ अप्पाणमेव अप्पाणं विउ-व्विय २ परियारेइ ॥ ४ ॥ तिविहे मेहुणे प० तं० दिव्वे माणुस्सए तिरिक्क-जोणिए । तओ मेहुणं गच्छंति तं० देवा मणुस्सा तिरिक्कजोणिया । तओ मेहुणं सेवेति तं० इत्थी पुरिसा णपुंसगा ॥ ५ ॥ तिविहे जोगे प० तं० मणजोगे वयजोगे काय-जोगे, एवं णेरइयाणं विगल्लिदियव्वजाणं जाव वेमाणियाणं । तिविहे पओगे प० तं० मणपओगे, वयपओगे, कायपओगे; जहा जोगो विगल्लिदियव्वजाणं जाव वेमाणि-याणं, तथा पओगेवि । तिविहे करणे प० तं० मणकरणे, वयकरणे, कायकरणे, एवं णेरइयाणं विगल्लिदियव्वजाणं जाव वेमाणियाणं । तिविहे करणे पण्णत्ते तं० आरंभ-

करणे, संरंभकरणे, समारंभकरणे, गिरंतरं जाव वेमाणियाणं ॥ ६ ॥ तिहिं ठाणेहिं जीवा अप्पाउयत्ताए कम्मं पगरेंति तं० पाणे अइवाइत्ता भवइ, मुसंवइत्ता भवइ, तहारूवं समणं वा, माहणं वा, अफामुएणं अणेसणिज्जेणं असणपाणखाइमसाइमेणं पडिलाभित्ता भवइ । इच्चएहिं तिहिं ठाणेहिं जीवा अप्पाउयत्ताए कम्मं पगरेंति । तिहिं ठाणेहिं जीवा दीहाउयत्ताए कम्मं पगरेंति तंजहा—णो पाणे अइवाइत्ता भवइ, णो मुसं वइत्ता भवइ, तहारूवं समणं वा माहणं वा फामुएसणिज्जेणं असणपाणखाइमसाइमेणं पडिलाभेत्ता भवइ । इच्चएहिं तिहिं ठाणेहिं जीवा दीहाउयत्ताए कम्मं पगरेंति ॥ ७ ॥ तिहिं ठाणेहिं जीवा असुभदीहाउयत्ताए कम्मंपगरेंति तं० पाणे अइवाइत्ता भवइ, मुसं वइत्ता भवइ, तहारूवं समणं वा माहणं वा हीलेत्ता णिंदेत्ता विंसेत्ता गरिहित्ता अवमाणित्ता अण्णथरेणं अमणुणेणं अपीइकारएणं असणपाणखाइमसाइमेणं पडिलाभेत्ता भवइ, इच्चएहिं तिहिं ठाणेहिं जीवा असुभदीहाउयत्ताए कम्मं पगरेंति, तिहिं ठाणेहिं जीवा सुभदीहाउयत्ताए कम्मं पगरेंति, तंजहा—णो पाणे अइवाइत्ता भवइ, णो मुसं वइत्ता भवइ, तहारूवं समणं वा माहणं वा वंदेत्ता णमंसित्ता सकारेत्ता सम्माणेत्ता कल्लाणं मंगलं देवयं चेइयं पज्जुवासेत्ता मणुणेणं पीइकारएणं असणपाणखाइमसाइमेणं पडिलाभेत्ता भवइ, इच्चएहिं तिहिं ठाणेहिं जीवा सुहदीहाउयत्ताए कम्मं पगरेंति ॥ ८ ॥ तओ गुत्तीओ पणत्ताओ तं० मणगुत्ती, वयगुत्ती कायगुत्ती । संजयमणुस्साणं तओ गुत्तीओ प० तं० मण, वय, काय० । तओ अगुत्तीओ प० तं० मणअगुत्ती, वयअगुत्ती, कायअगुत्ती, एवं णेरइयार्णं जाव० थणियकुमारार्णं पंचिंदियतिरिक्खजोगियाणं असंजयमणुस्साणं वाणमंतरार्णं जोइसियाणं वेमाणियाणं । तओ दंडा प० तं० मणदंडे, वयदंडे, कायदंडे णेरइयार्णं तओ दंडा प० तं० मणदंडे, जाव कायदंडे, विगळिंदियवळं जाव वेमाणियाणं ॥ ९ ॥ तिविहा गरहा प० तं० मणसावेगे गरहइ, वयसावेगे गरहइ, कायसावेगे गरहइ, पावाणं कम्मार्णं अकरणयाए । अहवा गरहा तिविहा प० तं० दीहंवेगे अद्धं गरहइ, रहसं वेगे अद्धं गरहइ, कायंवेगे पडिसाहरइ पावाणं कम्मार्णं अकरणयाए । तिविहे पच्चक्खाणे प० तं० मणसावेगे पच्चक्खाइ, वयसावेगे पच्चक्खाइ, कायसावेगे पच्चक्खाइ, एवं जहा गरहा तहा पच्चक्खाणेवि दो आलावगा भाणियव्या ॥ १० ॥ तओ रुक्खा, प० तं० पत्तोवए, पुप्फोवए, फलोवए, एवामेव तओ पुरिसजाया

प० तं० पत्तो वा रुक्खसमाणे, पुप्फो वा रुक्खसमाणे फलो वा रुक्खसमाणे । तओ पुरिसजाया प० तं० णामपुरिसे, ठवणापुरिसे दव्वपुरिसे । तओ पुरिसजाया प० तं० णाणपुरिसे, दंसणपुरिसे, चरित्तपुरिसे, तओ पुरिसजाया प० तं० वेदपुरिसे, चिंधपुरिसे, अभिलावपुरिसे ॥ ११ ॥ तिविहा पुरिसा प० तं० उत्तमपुरिसा, मज्झिमपुरिसा जहणपुरिसा । उत्तमपुरिसा तिविहा प० तं० धम्मपुरिसा, भोग-पुरिसा, कम्मपुरिसा । धम्मपुरिसा अरिहंता, भोगपुरिसा चक्कवट्ठी, कम्मपुरिसा वासुदेवा । मज्झिमपुरिसा तिविहा—उग्गा भोगा राइण्णा । जहणपुरिसा तिविहा, प० तं० दासा, भयगा, भाइल्लगा ॥ १२ ॥ तिविहा मच्छा प० तं० अंडया, पोयया, संमुच्छिमा । अंडया मच्छा तिविहा प० तं० इत्थी, पुरिसा, णपुंसगा । पोयया मच्छा तिविहा प० तं० इत्थी, पुरिसा, णपुंसगा ॥ १३ ॥ तिविहा पक्खी प० तं० अंडया, पोयया, संमुच्छिमा । अंडया पक्खी तिविहा प० तं० इत्थी, पुरिसा, णपुंसगा । पोयया पक्खी तिविहा प० तं० इत्थी, पुरिसा, णपुंसगा, एव-मेएणं अभिल्लवेणं उरपरिसप्पावि भाणियत्वा, भुजपरिसप्पा वि भाणियत्वा, एवं च्चव ॥ १४ ॥ तिविहाओ इत्थीओ पणत्ताओ तं० तिरिक्खजोणित्थीओ, मणुस्सित्थीओ देवित्थीओ । तिरिक्खजोणित्थीओ तिविहाओ प० तं० जलचरीओ, थलचरीओ, खहचरीओ । मणुस्सित्थीओ तिविहाओ पणत्ताओ, तं० कम्मभूमियाओ, अकम्म-भूमियाओ, अंतरदीवियाओ ॥ १५ ॥ तिविहा पुरिसा प० तं० तिरिक्खजोणियपुरिसा, मणुस्सपुरिसा, देवपुरिसा । तिरिक्खजोणियपुरिसा तिविहा प० तं० जलयरा, थलयरा, खलयरा । मणुस्सपुरिसा तिविहा प० तं० कम्मभूमिया, अकम्मभूमिया अंतरदीवया ॥ १६ ॥ तिविहा णपुंसगा, प० तं० णेरइयणपुंसगा, तिरिक्खजोणियणपुंसगा मणुस्सणपुंसगा । तिरिक्खजोणियणपुंसगा तिविहा—जलयरा थलयरा खलयरा ॥ १७ ॥ मणुस्सणपुंसगा तिविहा प० तं० कम्मभूमिया अकम्मभूमिया अंतरदीवया । तिविहा तिरिक्खजोणिया, इत्थी पुरिसा णपुंसगा ॥ १८ ॥ णेरइयाणं तओ लेस्साओ प० तं० कण्हलेस्सा णीललेस्सा काउलेस्सा । असुरकुमारारणं तओ लेस्साओ संकिल्लिद्धाओ प० तं० कण्हलेस्सा णीललेस्सा काउलेस्सा एवं जाव थणियकुमारारणं । एवं पुढवि-काइयाणं आउवणस्सइकाइयाणं वि तेउवाउवेइंदियतेइंदियचउरिंदियाणं वि तओ लेस्सा जहा णेरइयाणं, पंचिंदियतिरिक्खजोणियाणं तओ लेस्साओ संकिल्लिद्धाओ प०

तं० कण्ठलीलकाउलेस्सा, पंचिदियतिरिक्खजोणियाणं तओ लेस्साओ असंकलिट्ठाओ
 प० तं० तेउपम्हसुकलेस्सा, एवं मणुस्साणवि । वाणमंतराणं जहा असुरकुमाराणं,
 वेमणियाणं तओ लेस्साओ प० तं० तेउपम्हसुकलेस्सा ॥ १९ ॥ तिहिं ठाणेहिं
 ताराख्वे चलेज्जा तं० विउव्वमाणे वा परियारेमाणे वा, ठाणाओ वा ठाणं संकम-
 माणे ताराख्वे चलेज्जा । तिहिं ठाणेहिं देवे विज्जुयारं करेज्जा तं० विउव्वमाणे वा
 परियारेमाणे वा तहाराख्वस्स समणस्स वा माहणस्स वा इह्विं जुइं जसं बलं वीरियं
 पुरिसक्कारपरक्कमं उवदंसेमाणे देवे विज्जुयारं करेज्जा । तिहिं ठाणेहिं देवे थणियसहं
 करेज्जा तं० विउव्वमाणे वा एवं जहा विज्जुयारं तहेव थणियसहंपि ॥ २० ॥ तिहिं
 ठाणेहिं लोगंधयारे सिया तंजहा-अरिहंतेहिं वोच्छिज्जमाणेहिं अरिहंतपण्णत्ते धम्मे
 वोच्छिज्जमाणे पुव्वगए वोच्छिज्जमाणे । तिहिं ठाणेहिं लोगुज्जोए सिया तं० अरिहं-
 तेहिं जायमाणेहिं अरिहंतेहिं पव्वयमाणेहिं, अरिहंताणं णाणुप्पायमहिमासु । तिहिं
 ठाणेहिं देवंधयारे सिया तं० अरिहंतेहिं वोच्छिज्जमाणेहिं अरिहंतपण्णत्ते धम्मे
 वोच्छिज्जमाणे पुव्वगए वोच्छिज्जमाणे । तिहिं ठाणेहिं देवुज्जोए सिया तं० अरिहंतेहिं
 जायमाणेहिं, अरिहंतेहिं पव्वयमाणेहिं, अरिहंताणं णाणुप्पायमहिमासु । तिहिं ठाणेहिं
 देवसण्णियाए सिया तं० अरिहंतेहिं जायमाणेहिं अरिहंतेहिं पव्वयमाणेहिं अरिहंताणं
 णाणुप्पायमहिमासु । एवं देवुकलिया, देवकहकहए । तिहिं ठाणेहिं देविंदा माणुसं
 लोगं हव्वमागच्छंति तं० अरिहंतेहिं जायमाणेहिं अरिहंतेहिं पव्वयमाणेहिं अरिहं-
 ताणं णाणुप्पायमहिमासु, एवं सामाणिया, तायत्तीसगा लोगपाला देवा अग्गमहि-
 सीओ देवीओ परिसोववण्णगा देवा, अणियाहिवई देवा, आयरक्खा देवा माणुसं
 लोगं हव्वमागच्छंति । तिहिं ठाणेहिं देवा अब्भुट्टेज्जा तं० अरिहंतेहिं जायमाणेहिं
 जाव तं चेव, एवमासणाइं चलेज्जा, सीहणायं करेज्जा, चेळुक्खेवं करेज्जा । तिहिं
 ठाणेहिं देवाणं चेइय रुक्खा चलेज्जा तं० अरिहंतेहिं जायमाणेहिं, जाव तं चेव ।
 तिहिं ठाणेहिं लोगंतिया देवा माणुसं लोगं हव्वमागच्छेज्जा तं० अरिहंतेहिं जायमाणेहिं,
 अरिहंतेहिं पव्वयमाणेहिं, अरिहंताणं णाणुप्पायमहिमासु ॥ २१ ॥ तिण्हं दुप्पडियारं
 समणाउसो ! तंजहा-अम्मापिउणो भट्टिस्स धम्मायरियस्स, संपाओवि य णं केइ
 पुरिसं अम्मापियरं सयपागसहस्सपागेहिं तिह्णेहिं अब्भंतेत्ता, सुरमिणा गंधट्टएणं
 उव्वट्टित्ता, तिहिं उदगेहिं मज्जावेत्ता, सव्वालंकारविभूसिय करेत्ता, मणुण्णं थालीपा-

गसुद्धं अट्टारसवञ्जणाउलं भोयणं भोयावेत्ता जावज्जीवं पिट्ठिवडिसियाए परिव-
हेजा, तेणावि तस्स अम्मापिउस्स दुप्पडियारं भवइ । अहेणं से तं अम्मापियरं
केवल्लिपण्णत्ते धम्मं आघवइत्ता पण्णवइत्ता परुवइत्ता ठावइत्ता भवइ, तेणामेव तस्स
अम्मापिउस्स सुप्पडियारं भवइ समणाउसो ! केइ महच्चे दरिइं समुक्कसेज्जा तएणं
से दरिइं समुक्किट्ठे समणे पच्छा पुरं च णं विउलभोगसमिइसमण्णागए या त्ति
विहरेज्जा, तएणं से महच्चे अण्णया कयाइं दरिही हूए समणे तस्स दरिइस्स अंतिए
हव्वमागच्छेज्जा, तएणं से दरिइं तस्स भट्टिस्स सव्वस्समवि दलयमाणे तेणावि तस्स
दुप्पडियारं भवइ, अहेणं से तं भट्टिं केवल्लिपण्णत्ते धम्मं आघवइत्ता पण्णवइत्ता
परुवइत्ता ठावइत्ता भवइ, तेणामेव तस्स भट्टिस्स सुप्पडियारं भवइ । केइ तहारावस्स
समणस्स वा माहणस्स वा अंतियमंगमवि आरियं जिणभासियं धम्मं सुवयणं सोच्चा
णिसम्म कालमासे काले किच्चा अण्णयरेसु देवलोएसु देवत्ताए उववण्णे, तएणं से देवे
तं धम्मायरियं दुट्ठिभक्खाओ वा देसाओ सुमिक्खे देसं साहरेज्जा, कंताराओ वा
णिकंतारं करेज्जा, दीहकालिएणं वा रोगावक्रेणं अभिभूयं समणं विमोइज्जा, तेणावि
तस्स धम्मायरियस्स दुप्पडियारं भवइ, अहेणं से तं धम्मायरियं केवल्लिपण्णत्ताओ
धम्माओ भट्टं समणं भुज्जोवि केवल्लिपण्णत्ते धम्मं आघवइत्ता जाव ठावइत्ता भवइ
तेणामेव तस्स धम्मायरियस्स सुप्पडियारं भवइ ॥ २२ ॥ तिहिं ठाणेहिं संपण्णे
अणगारे अणाइयं अणवदम्मं दीहमद्धं चाउरंतसंसारकंतारं वीइवएज्जा, तंजहा-
अणियाणयाए, दिट्ठिसंपण्णयाए, जोगवाहियाए ॥ २३ ॥ तिविहा ओसप्पिणी प०
तं० उक्कोसा मज्झिमा जहण्णा, एवं छप्पिसमाओ भाणियव्वाओ जाव दुसमदुसमा,
तिविहा उस्सप्पिणी प० तं० उक्कोसा मज्झिमा जहण्णा एवं छप्पिसमाओ भाणिय-
व्वाओ, जाव सुसमसुसमा ॥ २४ ॥ तिहिं ठाणेहिं अच्चिण्णे पोग्गले चलेज्जा तं०
आहारिज्जमाणे वा पोग्गले चलेज्जा, विउव्वमाणे वा पोग्गले चलेज्जा, ठाणाओ ठाणं
संक्रामेज्जमाणे वा पोग्गले चलेज्जा ॥ २५ ॥ तिविहा उवही प० तं० कम्मोवही
सरीरोवही बाहिरभंडमत्तोवही, एवं असुरकुमाराणं भाणियव्वं, एवं एगिदियणेरइय-
वज्जं जाव वेमाणियाणं । अहवा तिविहा उवही प० तं० सच्चित्ता अचित्ता मीसिया ।
एवं णेरइयाणं णिरंतरं जाव वेमाणियाणं, तिविहे परिग्गहे प० तं० कम्मपरिग्गहे
सरीरपरिग्गहे बाहिरभंडमत्तपरिग्गहे, एवं असुरकुमाराणं, एवं एगिदियणेरइयवज्जं

जाव वेमाणियाणं, अहवा तिविहे परिग्गहे प० तं० सच्चित्ते अचित्ते मीसए एवं
 णेरइयाणं गिरंतरं जाव वेमाणियाणं ॥ २६ ॥ तिविहे पणिहाणे प० तं० मणपणि-
 हाणे वयपणिहाणे कायपणिहाणे एवं पंचिदियाणं जाव वेमाणियाणं । तिविहे सुप्प-
 णिहाणे प० तं० मणसुप्पणिहाणे वयसुप्पणिहाणे कायसुप्पणिहाणे, संजयमणुस्साणं
 तिविहे सुप्पणिहाणे प० तं० मणसुप्पणिहाणे वयसुप्पणिहाणे कायसुप्पणिहाणे, तिविहे
 दुप्पणिहाणे प० तं० मणदुप्पणिहाणे वयदुप्पणिहाणे कायदुप्पणिहाणे, एवं पंचिदि-
 याणं जाव वेमाणियाणं ॥ २७ ॥ तिविहा जोणी पणत्ता तं जहा-सीया उसिणा
 सीओसिणा । एवमेगिंदियाणं विगळिंदियाणं तेउकाइयवच्चाणं संमुच्छिमपंचिदिय-
 तिरिक्खजोणियाणं संमुच्छिममणुस्साण य । तिविहा जोणी प० तं० सच्चित्ता अचित्ता
 मीसिया एवमेगिंदियाणं विगळिंदियाणं संमुच्छिमपंचिदियतिरिक्खजोणियाणं संमु-
 च्छिममणुस्साण य । तिविहा जोणी प० तं० संबुडा, वियडा, संबुडवियडा । तिविहा
 जोणी प० तं० कुम्मुण्णया संखावत्ता वंसीपत्तिया, कुम्मुण्णयाणं जोणी उत्तमपुरिस-
 माऊणं, कुम्मुण्णयाएणं जोणीए तिविहा उत्तमपुरिसा गभं वक्कमंति तं० अरिहंता
 चक्कवट्ठी चल्देववासुदेवा । संखावत्ताणं जोणी इत्थीरयणस्स संखावत्ताएणं जोणीए
 बहवे जीवा य पोग्गला य वक्कमंति विउक्कमंति चयंति उयवज्जंति, णो चेव णं णिप्पज्जंति ।
 वंसीपत्तियाणं जोणी पिहळणस्स वंसीपत्तियाएणं जोणीए बहवे पिहळणे गभं वक्क-
 मंति ॥ २८ ॥ तिविहा न्नणवणस्सइकाइया प० तं० संखेज्जजीविया असंखेज्ज-
 जीविया अणंतजीविया ॥ २९ ॥ जंबुद्दीवे दीवे भरहेवासे तओ तित्था प० तं०
 मागहे वरदामे पभासे, एवं एरवएवि । जंबुद्दीवे दीवे महाविदेहवासे एगमेगे चक्क-
 वट्टिविजए तओ तित्था प० तं० मागहे वरदामे पभासे, एवं धायइखंडे दीवे
 पुरत्थिमद्धेवि पच्चत्थिमद्धेवि पुक्खरवदीवद्धूपुरत्थिमद्धेवि पच्चत्थिमद्धेवि ॥ ३० ॥
 जंबुद्दीवे दीवे भरहेरवएसु वासेसु तीयाए उस्सप्पिणीए सुसमाए समाए तिण्णि-
 सागरोवमकोडाकोडीओ कालो होत्था । एवं ओसप्पिणीए णवरं प० आगमेस्साए
 उस्सप्पिणीए भविस्सइ । एवं धायइखंडे पुरत्थिमद्धेवि पच्चत्थिमद्धेवि । एवं पुक्ख-
 रवदीवद्धूपुरत्थिमद्धे पच्चत्थिमद्धेवि कालो भाणियव्वो ॥ ३१ ॥ जंबुद्दीवे दीवे भर-
 हेरवएसु वासेसु तीयाए उस्सप्पिणीए सुसमसुसमाए समाए मणुया तिण्णि गाउ-
 आई उट्ठं उच्चत्तेणं तिण्णिपलिओवमाई परमाउं पालइत्था । एवं इमीसे ओसप्पिणीए

आगमेत्साए उस्सप्पिणीए । जंबुद्वीवे दीवे देवकुरुउत्तरकुरासु मणुया तिण्णि गाउ-
 आई उड्डु उच्चतेणं प० तिण्णिपल्लिओवमाई परमाउं पालयंति । एवं जाव पुक्खर-
 वरदीवड्डुपच्चत्थिमद्वे ॥ ३२ ॥ जंबुद्वीवे दीवे भरहेरवएसु वासेसु एगमेगाए ओस-
 प्पिणीउस्सप्पिणीए तओ वंसा उप्पज्जिसु वा उप्पज्जति वा उप्पज्जिस्संति वा तं०
 अरिहंतवंसे चक्कवट्ठिंसे दसारवंसे । एवं जाव पुक्खरवरदीवड्डुपच्चत्थिमद्वे । जंबु-
 द्वीवे दीवे भरहेरवएसु वासेसु एगमेगाए ओसप्पिणीउस्सप्पिणीए तओ उच्चमपुरिसा
 उप्पज्जिसु वा उप्पज्जति वा उप्पज्जिस्संति वा तं० अरिहंता वा चक्कवट्ठी वा बल-
 देववासुदेवा, एवं जाव पुक्खरवरदीवड्डुपच्चत्थिमद्वे । तओ अहाउयं पालेंति तं०
 अरिहंता चक्कवट्ठी बलदेववासुदेवा । तओ मज्झिममाउयं पालयंति तं० अरिहंता
 चक्कवट्ठी बलदेववासुदेवा ॥ ३३ ॥ वायरतेउक्काइयाणं उक्कोसेणं तिण्णि राईदियाई
 ठिई प० । वायरवाउक्काइयाणं उक्कोसेणं तिण्णिवाससहस्साईं ठिई पण्णत्ता ॥ ३४ ॥ अह-
 भंते । सालीणं वीहीणं गोधूमाणं जवाणं जवज्जवाणं एएसिणं घण्णाणं कोट्टाउत्ताणं
 पल्लाउत्ताणं मंचाउत्ताणं मालाउत्ताणं ओलित्ताणं लित्ताणं लंछियाणं मुहियाणं
 पिहियाणं केवइयं कालं जोणी संचिट्ठइ ? गोयमा । जहण्णेणं अंतोमुहुत्तं उक्कोसेणं
 तिण्णिसंवच्छराईं तेण परं जोणी पमिलायइ पविद्धंसइ विद्धंसइ तेण परं वीए अवीए
 भवइ तेण परं जोणी वोच्छेए प० ॥ ३५ ॥ दोच्चाएणं सक्करप्पभाए पुढवीए णेरइयाणं
 उक्कोसेणं तिण्णिसागरोवमाईं ठिई प० । तच्चाएणं वालुयप्पभाए पुढवीए जहण्णेणं
 णेरइयाणं तिण्णिसागरोवमाईं ठिई प० । पंचमाए णं धूमप्पभाए पुढवीए तिण्णि-
 णिरयावाससयसहस्सा प० । तिसु णं पुढवीसु णेरइया उसिणं वेयणं पच्चणुभवमाणा
 विहरंति तं० पढमाए दोच्चाए तच्चाए ॥ ३६ ॥ तओ लोगे समा सपक्खि सपड्ढिदिंसि प०
 तं० अप्पइट्ठणे णरए जंबुद्वीवे दीवे सव्वट्ठसिद्धे महाविमाणे । तओ लोगे समा सपक्खि
 सपड्ढिदिंसि प० तं० सीमंतएणं णरए समयक्खेत्ते ईसिपक्कभरापुढवी ॥ ३७ ॥ तओ
 समुद्दा पगईए उदगरसेणं प० तं० कालोदे, पुक्खरोदे, सयंभुरमणे, तओ समुद्दा
 बहुमच्छकच्छभाइणा प० तं० लवणे कालोदे सयंभुरमणे ॥ ३८ ॥ तओ लोए णिस्सीला
 णिव्वया णिग्गुणा णिममेरा णिपच्चक्खलाणपोसहोववासा कालमासे कालं किच्चा अहे
 सत्तमाए पुढवीए अप्पइट्ठणे णरए णेरइयत्ताए उववज्जति तं० रायाणो मंडलिया
 जे य महारंभा कोडुंवी । तओ लोए सुसीला सुव्वया सग्गुणा सग्गमेरा सपच्चक्खलाण-

पोसहोववासा कालमासे कालं किञ्चा सव्यद्वसिद्धे महाविमाणे देवत्ताए उववत्तारो भवति तं० रायाणीं परिचत्तकामभोगा सेणावई पसत्थारो ॥३९॥ वंभलोगलंतएसु णं कप्पेसु विमाणा तिवण्णा पण्णत्ता तं० किण्हा णीला लोहिया । आणयपाणयारणच्चुएसु णं कप्पेसु देवाणं भवधारणिञ्जसरीरगा उक्कोसेणं तिण्णि रयणीओ उद्धं उच्चत्तेणं प० ॥४०॥ तओ पण्णत्तीओ कालेणं अहिञ्जति तं० चंदपण्णत्ती सूरपण्णत्ती दीवसागर-पण्णत्ती ॥ ४१ ॥

तइयं ठाणं बीओ उट्टेसो

तिविहे लोमे पण्णत्ते तं० णामलोमे ठवणलोमे दव्वलोमे । तिविहे लोमे प० तं० णाणलोमे दंसणलोमे चरित्तलोमे । तिविहे लोमे प० तं० उद्धलोमे अहोलोमे तिरिय-लोमे ॥ ४२ ॥ चमरस्स णं असुरिंदस्स असुरकुमाररणो तओ परिसाओ पण्णत्ताओ तं० समिया चंडा जाया, अब्भितरिया समिया मज्झमिया चंडा बाहिरिया जाया । चमरस्स णं असुरिंदस्स असुरकुमाररणो सामाणियाणं देवाणं तओ परिसाओ पण्णत्ताओ तं० समिया जहेव चमरस्स, एवं तायत्तीसगाणवि, लोगपालाणं तुंथा तुडिया पव्वा एवं अग्गमहिशीण वि । नल्लिस्स वि एवं चेव जाव अग्गमहिशीणं । धरणस्स य सामाणियतायत्तीसगाणं च समिया चंडा जाया, लोगपालाणं अग्ग-महिशीणं ईसा तुडिया ददरहा, जहा धरणस्स तहा सेसाणं भवणवासीणं, काल-स्स णं पिसाईदस्स पिसायरणो तओ परिसाओ पण्णत्ताओ, तं० ईसा तुडिया ददरहा, एवं सामाणियअग्गमहिशीणं वि एवं जाव गीयरइ गीयजसाणं चंदस्स णं जोइसिंदस्स जोइसरणो तओ परिसाओ, तुंथा तुडिया पव्वा, एवं सामाणियअग्गमहिशीणं, एवं सूरस्स वि, सक्कस्स णं देविंदस्स देवरणो तओ परिसाओ पण्णत्ताओ तं० समिया चंडा जाया, एवं जहा चमरस्स जाव अग्गमहिशीणं, एवं जाव अच्चुयस्स लोगपालाणं ॥ ४५ ॥ तओ जामा प० तं० पढमे जामे मज्झिमे जामे पच्छिमे जामे, तिहि जामेहि आया केवल्लिपण्णत्तं धम्मं लभेज्ज सवणयाए तं० पढमे जामे मज्झिमे जामे पच्छिमे जामे, एवं जाव केवल्लणाणं उप्पाडेज्जा तं० पढमे जामे मज्झिमे जामे पच्छिमे जामे । तओ वया प० तं० पढमे वए मज्झिमे वए पच्छिमे वए । तिहि वएहि आया केवल्लिपण्णत्तं धम्मं लभेज्ज सवणयाए तं० पढमे वए मज्झिमे वए पच्छिमे वए, एतो चेव गमो णेयव्वो, जाव केवल्लणाणंति ॥ ४४ ॥ तिविहा बोही

प० तं० णाणबोही दंसणबोही चरित्तबोही । तिविहा बुद्धा प० तं० णाणबुद्धा
 दंसणबुद्धा चरित्तबुद्धा, एवं भोहे मूढा ॥ ४५ ॥ तिविहा पव्वज्जा प० तं० इह-
 लोपपडिन्नद्धा, परलोपपडिन्नद्धा, दुहओ पडिन्नद्धा । तिविहा पव्वज्जा प० तं० पुरओ-
 पडिन्नद्धा, मग्गओपडिन्नद्धा, उभओपडिन्नद्धा । तिविहा पव्वज्जा प० तं० तुयावइत्ता
 पुयावइत्ता, दुयावइत्ता । तिविहा पव्वज्जा पणत्ता तं० उवायपव्वज्जा अक्कवाय-
 पव्वज्जा संगारपव्वज्जा ॥ ४६ ॥ तओ गियंठा गोसण्णोवउत्ता प० तं० पुल्लए
 गियंठे सिणाए । तओ गियंठा सण्णोसण्णोवउत्ता प० तं० बउसे पडिसेवणाकुसीले
 कसायकुसीले ॥ ४७ ॥ तओ सेहभूमीओ पं० तं० उक्कोसा मज्झिमा जहण्णा,
 उक्कोसा छम्मासा, मज्झिमा चउमासा, जहण्णा सत्तराईदिया ॥ ४८ ॥ तओ
 थेरभूमीओ पणत्ताओ तं० जाइथेरे सुयथेरे परियायथेरे । सट्ठिवासजाए समणे
 गिग्गंथे जाइथेरे, ठाणसमवायथेरे णं समणे गिग्गंथे सुयथेरे, वीसवासपरियाए णं
 समणे गिग्गंथे परियायथेरे ॥ ४९ ॥ तओ पुरिसजाया प० सुमणे दुम्मणे गो-
 सुमणेणोदुम्मणे । तओ पुरिसजाया प० तं० गंताणामेगे सुमणे भवइ गंताणामेगे
 दुम्मणे भवइ गंताणामेगे गोसुमणेणोदुम्मणे भवइ । तओ पुरिसजाया प० तं०
 जामि एगे सुमणे भवइ, जामि एगे दुम्मणे भवइ, जामि एगे गोसुमणेणोदुम्मणे
 भवइ, एवं जाइस्सामि एगे सुमणे भवइ (३) तओ पुरिसजाया पणत्ता तं०
 अगंताणामेगे सुमणे भवइ (३) तओ पुरिसजाया प० तं० ण जामि एगे सुमणे
 भवइ (३) तओ पुरिसजाया प० तं० ण जाइस्सामि एगे सुमणे भवइ (३) एवं
 आगंताणामेगे सुमणे भवइ (३) एमि एगे सुमणे भवइ, एस्सामि एगे सुमणे भवइ (३)
 एवं एएणं अभिल्लात्रेणं, गंता य अगंता य आगंता खलु तहा अणागंता । चिट्ठित्तम-
 चिट्ठित्ता, गिसिइत्ता चेव णो चेव ॥१॥ हंता य अहंताय छिंदित्ता खलु तहा अछिंदित्ता
 बूइत्ता अबूइत्ता, भासित्ता चेव णो चेव ॥२॥ दच्चा य अदच्चा य, भुंजित्ता खलु
 तहा अभुंजित्ता, लंभित्ता अलंभित्ता, पिइत्ता चेव णो चेव ॥३॥ सुइत्ता असुइत्ता,
 जुज्झित्ता खलु तहा अजुज्झित्ता; जइत्ता अजइत्ता य, पराजिणित्ता चेव णो
 चेव ॥४॥ सहा रूवा गंधा, रसा य फासा तहेव ठाणा य; गिरसीलस्स गरहिया,
 पस्त्था पुण सीलवंतस्स ॥५॥ एवमेक्केके तिण्णित्तिण्णित्तिण्णित्ति आलाबणा भाणियत्वा । सहं
 सुणेत्ताणामेगे सुमणे भवइ (३) एवं सुणेमित्ति (३) सुणेस्सामित्ति ३ एवं असुणे-

त्ताणामेगे सुमणे भवइ (३) ण सुणेमि त्ति ३ ण सुणेस्तामित्ति ३ एवं रुवाई गंधाई
रसाई फासाई इक्केके छ-छ आलावगा भाणियव्वा, एवं १२७ आलावगा भवंति
॥ ५० ॥ तओ ठाणा णिस्सीलस्स णिव्वयस्स णिग्गुणस्स णिम्मेरस्स णिप्पच्चक्खाण-
पोसहोववासस्स गरहिया भवंति तं० अस्सिं लोगे गरहिए भवइ उववाए गरहिए
भवइ आयाई गरहिया भवइ । तओ ठाणा सुसीलस्स सुव्वयस्स सग्गुणस्स समेरस्स
सपच्चक्खाणपोसहोववासस्स पसत्था भवंति तं० अस्सिं लोगे पसत्थे भवइ उववाए
पसत्थे भवइ आयाई पसत्था भवइ ॥ ५१ ॥ तिविहा संसारसमावण्णगा जीवा
प० तं० इत्थी पुरिसा णपुंसगा । तिविहा सव्वजीवा प० तं० सम्मदिट्ठी
मिच्छदिट्ठी सम्ममिच्छदिट्ठी य । अहवा तिविहा सव्वजीवा प० तं० पञ्जत्तगा
अपञ्जत्तगा णोपञ्जत्तगाणोअपञ्जत्तगा । एवं सम्मदिट्ठिपरित्तापञ्जत्तगसुहुमसण्णि-
भविया य ॥ ५२ ॥ तिविहा लोगत्ठिई प० तं० आगासपइट्ठिए वाए वायपइट्ठिए
उदही उदहीपइट्ठिया पुढवी । तओ दिसाओ प० तं० उड्ढा अहा तिरिया । तिहिं
दिसाहिं जीवाणं गइ पवत्तई तं० उड्ढाए अहाए तिरियाए, एवं आगई वक्कंती
आहारे वुड्ढी णिवुड्ढी गइपरियाए समुग्घाए कालसंजोगे दंसणाभिगमे णाणाभिगमे
जीवाभिगमे । तिहिं दिसाहिं जीवाणं अजीवाभिगमे प० तं० उड्ढाए अहाए तिरि-
याए, एवं पंचिंदियतिरिक्खजोणियाणं । एवं मणुस्साण्वि ॥ ५३ ॥ तिविहा तसा प०
तं० तेउकाइया, वाउकाइया, उराला तसा पाणा । तिविहा थावरा प० तं० पुढविका-
इया आउकाइया वणस्सइकाइया ॥ ५४ ॥ तओ अच्चेज्जा प० तं० समए पएसे
परमाणू; एवमभेज्जा अडज्जा अगिज्जा अणड्ढा अमज्जा अपएसा । तओ अवि-
भाइमा प० तं० समए पएसे परमाणू ॥ ५८ ॥ अज्जोत्ति ! समणे भगवं महावीरे
गोयमाई समणे णिग्गंथे आमंत्तित्ता एवं वयासी-किं भया पाणा समणाउसे ?
गोयमाई समणा णिग्गंथा समणं भगवं महावीरं उवसंकमंति, उवसंकमित्ता वंदंति
णमंसंति वंदित्ता णमंसित्ता एवं वयासी णो खलु वयं देवाणुप्पिया ! एयमट्ठं जाणामो
वा पासामो वा तं जइणं देवाणुप्पिया ! एयमट्ठं णो गिलायंति परिकहेत्तए तमि-
च्छामो णं देवाणुप्पियाणं अंतिए एयमट्ठं जाणित्तए । अज्जोत्ति ! समणे भगवं महावीरे
गोयमाई समणे णिग्गंथे आमंत्तित्ता एवं वयासी, दुक्ख भया पाणा समणाउसे ।
से णं भंते ! दुक्खे केण कडे ? जीवेण कडे पमाएणं, से णं भंते ! दुक्खे कई वेइज्जति ?

अप्पमाएणं ॥५६॥ अण्णउत्थिया णं भंते ! एवमाइक्खंति, एवं भासेति एवं पण्णवेति एवं परुवेति कहण्णं समणाणं णिग्गंधाणं किरिया कज्जइ ? तत्थ जासा कडा कज्जइ णो तं पुच्छंति, तत्थ जासा कडा णो कज्जइ णो तं पुच्छंति, तत्थ जासा अकडा णो कज्जइ णो तं पुच्छंति, तत्थ जासा अकडा कज्जइ णो तं पुच्छंति, से एवं वत्तव्वं सिया ? अकिच्चं दुक्खं अफुसं दुक्खं अकज्जमाणकडं दुक्खं अकट्टु अकट्टु पाणा भूया जीवा सत्ता वेयणं वेयंति त्ति वत्तव्वं, जे ते एवमाहंसु मिच्छा, ते एवमाहंसु । अहं पुण एवमाइक्खामि एवं भासामि, एवं पण्णवेमि, एवं परुवेमि, किच्चं दुक्खं फुसं दुक्खं कज्जमाणं कडं दुक्खं कट्टु २ पाणा भूया जीवा सत्ता वेयणं वेयंति त्ति वत्तव्वं सिया ॥ ५७ ॥

तइयं ठाणं तइओ उट्ठेसो

तिहिं ठाणेहिं मायी मायं कट्टु णो आलोएज्जा णो पडिक्कमेज्जा णो णिंदिज्जा णो गरहेज्जा णो विउट्ठेज्जा णो विसोहेज्जा णो अकरणयाए अब्भुट्ठेज्जा णो अहारिहं पायच्छिस्तं तवोकम्मं पडिवज्जिजा तं० अकरिंसु वाहं करेमि वाहं करिस्सामि वाहं ॥ ५८ ॥ तिहिं ठाणेहिं मायी मायं कट्टु णो आलोएज्जा णो पडिक्कमेज्जा जाव णो पडिवज्जेज्जा तं० अकित्ती वा मे सिया अवण्णे वा मे सिया अविणए वा मे सिया । तिहिं ठाणेहिं मायी मायं कट्टु णो आलोएज्जा जाव णो पडिवज्जेज्जा तं० कित्ती वा मे परिहाइस्सइ जसो वा मे परिहाइस्सइ पूयासक्कारे वा मे परिहाइस्सइ । तिहिं ठाणेहिं मायी मायं कट्टु आलोएज्जा पडिक्कमेज्जा णिंदेज्जा जाव पडिवज्जेज्जा तं० जहा माइस्स णं अस्सि लोए गरहिए भवइ उववाए गरहिए भवइ आयाइ गरहिया भवइ । तिहिं ठाणेहिं मायी मायं कट्टु आलोएज्जा जाव पडिवज्जेज्जा तं० अमाइस्स णं अस्सि लोए पसत्थे भवइ, उववाए पसत्थे भवइ आयाइ पसत्था भवइ । तिहिं ठाणेहिं मायी मायं कट्टु आलोएज्जा जाव पडिवज्जेज्जा तं० णाणट्टयाए दंसणट्टयाए चरित्तट्टयाए ॥ ५९ ॥ तओ पुरिसजाया प० तं० सुत्तधरे अत्थधरे तट्ठुभयधरे ॥ ६० ॥ कप्पइ णिग्गंधाणं वा णिग्गंधीणं वा तओ वत्थाइं धारित्तए वा परिहरित्तए वा तं० जंमिए भंमिए खोमिए । कप्पइ णिग्गंधाणं वा णिग्गंधीणं वा तओ पायाइं धारित्तए वा परिहरित्तए वा तं० लाउयपाए वा दाहयाए वा मट्टियापाए वा । तिहिं ठाणेहिं वत्थं धरेज्जा तं० हिरिवत्तियं दुगुंछावत्तियं परीसहवत्तियं ॥ ६१ ॥ तओ आयरक्खा प० तं० धम्मियाए

पडिचोयणाए पडिचोएत्ता भवइ तुसिणीए वा सिया उट्टिका वा आयाए एगंतमंतम-
वक्कमेजा ॥ ६२ ॥ णिग्गंथस्स णं गिलायमाणस्स कर्पंति तओ वियडदत्तीओ
पडिगाहित्तए तं० उक्कोसा मज्झिमा जहण्णा ॥६३॥ तिहिं ठाणेहिं समणे णिग्गंथे
साहम्मियं संभोइयं विसंभोइयं करेमाणे णाडक्कमइ, तं० सयं वा दट्ठुं सड्ढुस्स वा
णिसम्म तवं मोसं आउट्टइ चउत्थं णो आउट्टइ ॥६४॥ तिविहा अणुण्णा प० तं०
आयरियत्ताए उवज्झायत्ताए गणित्ताए । तिविहा समणुण्णा प० तं० आयरियत्ताए
उवज्झायत्ताए गणित्ताए, एवं उवसंपया एवं विजहण्णा ॥६५॥ तिविहे वयणे प० तं०
तत्त्वयणे तदण्णवयणे णो अवयणे । तिविहे अवयणे प० तं० णो तत्त्वयणे णो तदण्ण-
वयणे अवयणे । तिविहे मणे प० तं० तम्मणे तयण्णमणे णो अमणे । तिविहे अमणे
णो तंमणे णो तयण्णमणे अमणे ॥ ६६ ॥ तिहिं ठाणेहिं अप्पवुट्टिकाए सिया तं०
तंसि च णं देसंसि वा पएसंसि वा णो बह्वे उदगजोणिया जीवा य पोग्गला य
उदगत्ताए वक्कमंति विउक्कमंति चयंति उववज्जंति, देवाणागा जक्खा भूया णो सम्म-
माराहिता भवंति तत्थ समुट्ठियं उदगपोग्गलं परिणयं वासिउकामं अण्णं देसं साहरंति
अब्भवहूलगं च णं समुट्ठियं परिणयं वासिउकामं वाउकाए विहुणेइ, इच्चएहिं तिहिं
ठाणेहिं अप्पवुट्टिकाए सिया । तिहिं ठाणेहिं महावुट्टिकाए सिया तं० तंसि च णं
देसंसि वा पएसंसि वा बह्वे उदगजोणिया जीवा य पोग्गला य उदगत्ताए वक्क-
मंति विउक्कमंति, चयंति उववज्जंति, देवा णागा जक्खा भूया सम्ममाराहिता भवंति
अण्णत्थ समुट्ठियं उदगपोग्गलं परिणयं वासिउकामं तं देसं साहरंति अब्भवहूलगं च
णं समुट्ठियं परिणयं वासिउकामं णो वाउकाओ विहुणेइ, इच्चएहिं तिहिं ठाणेहिं
महावुट्टिकाए सिया ॥६७॥ तिहिं ठाणेहिं अहुणोववण्णे देवे देवलोएसु इच्छेज्जा
माणुसं लोगं हव्वमागच्छित्तए, णो च्चेव णं संचाएइ हव्वमागच्छित्तए तं० अहुणो-
ववण्णे देवे देवलोएसु दिव्वेसु कामभोगेसु मुच्छिए गिद्धे गटिए अज्जोववण्णे से
णं माणुस्सए कामभोगे णो आटाइ णो परियाणाइ णो अट्ठं बंधइ णो णियाणं पगरैइ,
णो ट्ठिप्पकप्पं पगरैइ, अहुणोववण्णे देवे देवलोएसु दिव्वेसु कामभोगेसु मुच्छिए
गिद्धे गटिए अज्जोववण्णे तस्स णं माणुस्सए पेम्मे वोच्छिण्णे दिव्वे संकंते भवइ,
अहुणोववण्णे देवे देवलोएसु दिव्वेसु कामभोगेसु मुच्छिए जाव अज्जोववण्णे तस्स
णमेवं भवइ इयंण्हिं ण गच्छं मुहुत्तं गच्छं तेणं कालेणमप्पाउया मणुस्सा कालधम्पुणा

संजुत्ता भवंति इच्छेएहिं तिहिं ठाणेहिं अहुणोववण्णे देवे देवलोएसु इच्छेज्जा माणुस्सं
 लोगं हव्वमागच्छित्तए णो चैव णं संचाएइ हव्वमागच्छित्तए । तिहिं ठाणेहिं
 अहुणोववण्णे देवे देवलोएसु इच्छेज्जा माणुस्सलोगं हव्वमागच्छित्तए संचाएइ
 हव्वमागच्छित्तए तं० अहुणोववण्णे देवे देवलोएसु दिव्वेसु कामभोगेसु अमुच्छिए
 अगिद्धे अगट्टिए अणज्जोववण्णे तस्स णं एवं भवइ अत्थि णं मम माणुस्सए भवे
 आयरिएइ वा, उयज्झाएइ वा पवत्तेइ वा थेरेइ वा गणीइ वा गणहरेइ वा
 गणावच्छेएइ वा जेसिं पभावेणं मए इमा एया रूवा दिव्वा देविद्धी दिव्वा देवजुई
 दिव्वे देवाणुभावे लद्धे पत्ते अभिसमण्णागए तं गच्छामि णं ते भगवंते वंदामि
 णमंसामि सक्कारेमि सम्माणेमि कल्लाणं मंगलं देवयं चैइयं पज्जुवासामि । अहुणोववण्णे
 देवे देवलोएसु दिव्वेसु कामभोगेसु अमुच्छिए जाव अणज्जोववण्णे तस्स णं एवं
 भवइ, एस णं माणुस्सए भवे णाणीइ वा, तवस्सीइ वा, अइदुक्कर-दुक्करकारणे तं
 गच्छामि णं भगवंतं वंदामि णमंसामि जाव पज्जुवासामि अहुणोववण्णे देवे देव-
 लोएसु जाव अणज्जोववण्णे तस्स णं एवं भवइ अत्थि णं मम माणुस्सए भवे
 मायाइ वा जाव सुण्हाइ वा तं गच्छामि णं तेसिमंतियं पाउब्भवामि, पासंतु ता
 मे इमं एयारूवं दिव्वं देविद्धिं, दिव्वं देवजुई दिव्वं देवाणुभावं लद्धं पत्तं अभि-
 समण्णागयं, इच्छेएहिं तिहिं ठाणेहिं अहुणोववण्णे देवे देवलोएसु इच्छेज्जा माणुस्सं
 लोगं हव्वमागच्छित्तए संचाएइ हव्वमागच्छित्तए ॥ ६८ ॥ तओ ठाणाइं देवे
 पीहेज्जा तं० माणुस्सगं भवं, आरिए खेत्ते जम्मं, सुकुलपच्चायाइं ॥ ६९ ॥ तिहिं
 ठाणेहिं देवे परितप्पेज्जा तं० अहो णं मए संते बले संते वीरिए संते पुरिसक्कार-
 परक्कमे खेमंसि सुमिक्खंसि आयरियउवज्झाएहिं विज्जमाणेहिं कल्लसरिरेणो बहुए
 सुए अहीए अहो णं मए इहलोगपड्डिबद्धेणं परलोगपरमुहेणं विसयतिसिएणं णो
 दीहे सामण्णपरियाए अणुपालिए । अहो णं मए इद्धिरससायगरुएणं भोगामिस-
 गिद्धेणं णो विसुद्धे चरित्ते फासिए इच्छेएहिं० ॥ ७० ॥ तिहिं ठाणेहिं देवे चइस्सामीत्ति
 जाणइ, तं० विमाणाभरणाइं णिप्पभाइं पासित्ता, कप्परुक्खगं मिलायमाणं पासित्ता
 अप्पणो तेयलेस्सं परिहायमाणं जाणित्ता इच्छेएहिं० । तिहिं ठाणेहिं देवे उव्वेगमाग-
 च्छेज्जा तं०—अहो णं मए इमाओ एयारूवाओ दिव्वाओ देविद्धिओ दिव्वाओ देव-
 जुईओ, दिव्वाओ देवाणुभावाओ लद्धाओ पत्ताओ अभिसमण्णागयाओ चइयव्वं

भविस्सइ । अहो णं मए माउओयं पिउसुक्कं तं तदुभयसंसिद्धं तप्पडमयाए आहारो
 आहारेयव्वो भविस्सइ । अहो णं मए कलमलजंजालाए असुइए उव्वेयणियाए
 भीमाए गम्भवसहीए वसियव्वं भविस्सइ । इच्चेएहिं तिहिं ठाणेहिं ॥ ७१ ॥
 तिसंठिया विमाणा प० तं० वट्टा तंसा चउरंसा । तत्थ णं जे ते वट्टविमाणा ते णं
 पुक्कवरकणिया संठाणसंठिया सव्वओ समंता पागारपरिक्खित्ता एगदुवारा प० ।
 तत्थ णं जे ते तंसविमाणा ते सिंघाडगसंठाणसंठिया दुहओ पागारपरिक्खित्ता
 एगओ वेइया परिक्खित्ता त्तिदुवारा प० । तत्थ णं जे ते चउरंसविमाणा ते णं
 अक्खाडगसंठाणसंठिया सव्वओ समंता वेइया परिक्खित्ता चउदुवारा प० ।
 तिपइट्टिया विमाणा प० तं० घणोदहिपइट्टिया, घणवायपइट्टिया, उवासंतरपइट्टिया ।
 तिविहा विमाणा प० तं० अवट्टिया वेउव्विया परिजाणिया ॥ ७२ ॥ तिविहा
 णेरइया प० तं० सम्मादिट्ठी भिच्छादिट्ठी सम्मामिच्छादिट्ठी, एवं विगल्लिदियवज्जं
 जाव वेमाणियाणं । तओ दुग्गईओ पणत्ताओ तं० णेरइयदुग्गई, तिरिक्खजोगिय-
 दुग्गई मणुयदुग्गई । तओ सुग्गईओ प० तं० सिद्धिसोग्गई देवसोग्गई मणुस्स-
 सोग्गई । तओ दुग्गया प० तं० णेरइयदुग्गया तिरिक्खजोगियदुग्गया, मणुस्स-
 दुग्गया । तओ सुग्गया प० तं० सिद्धसुग्गया देवसुग्गया मणुस्ससुग्गया ॥ ७३ ॥
 चउत्थभत्तियस्स णं भिक्खुस्स कप्पंति तओ पाणगाई पडिगाहित्तए तं० उस्सेइमे
 संसेइमे चाउलधोवणे । छट्ठभत्तियस्स णं भिक्खुस्स कप्पंति तओ पाणगाई पडि-
 गाहित्तए, तंजहा—तिलोदए तुसोदए जवोदए । अट्टमभत्तियस्स णं भिक्खुस्स कप्पंति
 तओ पाणगाई पडिगाहित्तए तंजहा—आयामए सोवीरए सुद्धवियडे ॥ ७४ ॥
 तिविहे उवहडे प० तं० फलीओवहडे सुद्धोवहडे संसट्ठोवहडे । तिविहे ओग्गहिए प०
 तं० जं च ओगिण्हइ जं च साहरइ जं च आसगंसि पक्खिवइ ॥ ७५ ॥
 तिविहा ओमोयरिया प० तं० उवगरणोमोयरिया, भत्तपाणोमोयरिबा, भावोमोय-
 रिया । उवगरणोमोयरिया तिविहा प० तं० एगे वत्थे, एगे पाए चियतोवहि-
 साइज्जणया ॥ ७६ ॥ तओ ठाणा गिग्गंथाणं वा गिग्गंथीणं वा अहियाए असुहाए
 अक्कमाए अणित्तेयसाए अणाणुगामियत्ताए भवंति तं० कूअणया, कक्कणया
 अवज्झाणया । तओ ठाणा गिग्गंथाणं वा गिग्गंथीणं वा हियाए सुहाए खमाए
 णित्तेयसाए आणुगामियत्ताए भवंति, तं० अकूअणया अक्कणया अणवज्झाणया

॥ ७७ ॥ तओ सळा प० तं० मायासळे णियाणसळे मिच्छादंसणसळे ॥ ७८ ॥
 तिहिं ठाणेहिं समणे णिग्गथे संखित्तविउल्लतेउलेस्से भवइ तं० आयावणयाए
 खंतिखमाए अपाणणेणं तवोकम्मणं ॥ ७९ ॥ तिमासियं णं भिक्खुपडिमं पडि-
 वणणस्स अणगारस्स कप्पति तओ दत्तीओ भोअणस्स पडिगाहित्तए तओ पाणगस्स ।
 एगराइयं भिक्खुपडिमं सम्ममणुपालेमाणस्स अणगारस्स इमे तओ ठाणा अहि-
 याए असुभाए अखमाए अणिस्सेयसाए अणाणुगामियत्ताए भवति तं० उम्मायं वा
 लभेज्जा, दीहकालियं वा रोयायंकं पाउणेज्जा, केवल्लिपणत्ताओ धम्माओ भंसेज्जा ।
 एगराइयं भिक्खुपडिमं सम्ममणुपालेमाणस्स अणगारस्स तओ ठाणा हियाए
 सुभाए खमाए णिस्सेसाए आणुगामियत्ताए भवति तं० ओहिणाणे वा से समुप्प-
 ज्जेज्जा मणपज्जवणाणे वा से समुप्पज्जेज्जा, केवल्लणाणे वा से समुप्पज्जेज्जा ॥ ८० ॥
 जंबुहीवे दीवे तओ कम्मभूमीओ प० तं० भरहे, एरवए, महाविदेहे । एवं धायइ-
 खंडे दीवे पुरत्थिमद्धे जाव पुक्खर-वर-दीवद्ध-पच्चत्थिमद्धे ॥ ८१ ॥ तिविहे दंसणे
 प० तं० सम्मदंसणे, मिच्छदंसणे, सम्ममिच्छदंसणे । तिविहा रुई प० तं० सम्मरुई,
 मिच्छरुई, सम्ममिच्छरुई । तिविहे पओगे प० तं० सम्मप्पओगे, मिच्छप्पओगे,
 सम्ममिच्छप्पओगे ॥ ८२ ॥ तिविहे ववसाए, प० तं० धम्मिए ववसाए अहम्मिए
 ववसाए, धम्मियाधम्मिए ववसाए । अहवा तिविहे ववसाए, प० तं० पच्चक्खे,
 पच्चइए, आणुगामिए । अहवा तिविहे ववसाए प० तं० इहलोइए, परलोइए, इह-
 लोइयपरलोइए । इहलोइए ववसाए तिविहे प० तं० लोइए वेइए सामइए । लोइए
 ववसाए तिविहे प० तं० अत्थे धम्मे कामे । वेइए ववसाए तिविहे प० तं० रिउव्वेए
 जउव्वेए सामवेए । सामइए ववसाए तिविहे प० तं० णाणे दंसणे चरित्ते ॥ ८३ ॥
 तिविहा अत्थजोणी प० तं० सामे दंडे भेए ॥ ८४ ॥ तिविहा पोगगला प० तं०
 पओगपरिणया, मीसापरिणया, वीससापरिणया ॥ ८५ ॥ तिपइट्ठिया णरगा प०
 तं० पुढवीपइट्ठिया आगासपइट्ठिया आयपइट्ठिया । णेगमसंगहववहारणं पुढवी-
 पइट्ठिया, उज्जसुयस्स आगासपइट्ठिया तिण्हं सद्दणयाणं आयपइट्ठिया ॥ ८६ ॥
 तिविहे मिच्छत्ते प० तं० अकिरिया अविणए अण्णाणे । अकिरिया तिविहा प०
 तं० पओगकिरिया, समुदाणकिरिया अण्णाणकिरिया, पओगकिरिया तिविहा प०
 तं० मणपओगकिरिया वइपओगकिरिया कायपओगकिरिया । समुदाणकिरिया तिविहा

प० तं० अणंतरसमुदाणकिरिया, परंपरसमुदाणकिरिया तदुभयसमुदाणकिरिया । अण्णाणकिरिया तिविहा प० तं० मइअण्णाणकिरिया, सुयअण्णाणकिरिया, विभंग-
अण्णाणकिरिया । अविणए तिविहे प० तं० देसच्चाई, गिरालंबणया, णाणापेज्जदोसे ।
अण्णाणे तिविहे प० तं० देसअण्णाणे, सव्वअण्णाणे, भावअण्णाणे ॥ ८७ ॥
तिविहे धम्मे प० तं० सुयधम्मे, चरित्तधम्मे, अत्थिकायधम्मे । तिविहे उवक्कमे
प० तं० धम्मिए उवक्कमे, अहम्मिए उवक्कमे, धम्मियाधम्मिए उवक्कमे । अहवा
तिविहे उवक्कमे प० तं० आओवक्कमे, परोवक्कमे, तदुभयोवक्कमे, एवं वेयाबच्चे,
अणुग्गहे, अणुसिट्ठि, उवालंभे, एवमिक्केके तिणिण २ आलावगा जहेव उवक्कमे
॥ ८८ ॥ तिविहा कहा प० तं० अत्थकहा, धम्मकहा, कामकहा । तिविहे विणिच्छए प०
तं० अत्थविणिच्छए धम्मविणिच्छए कामविणिच्छए ॥ ८९ ॥ तहारूवं णं भंते !
समणं वा माहणं वा पज्जुवासमाणस्स किं फला पज्जुवासणया ? सवणफला, से णं
भंते ! सवणे किं फले ? णाणफले, से णं भंते ! णाणे किं फले ? विण्णाण फले,
एवमेएणं अभित्तावेणं इमा गाहा अणुगंतच्चा—“सवणे णाणे य विण्णाणे, पच्चक्खाणे
य संजमे । अण्हए तवे चेव, वोदाणे अकिरिय णिव्वाणे (१) जाय से णं भंते !
अकिरिया किं फला ? णिव्वाणफला, से णं भंते ! गिक्खाणे किं फले ? सिद्धिगह-
गमणपच्चवसाणफले पण्णत्ते समणाउसो ! ॥ ९० ॥

तइयं ठाणं चउत्थो उद्देसो

पडिमापडिबण्णस्स णं अणगारस्स कप्पंति तओ उवस्सया पडिलेहित्तए तं०—
अहे आगमणगिहंसि वा, अहे वियडगिहंसि वा, अहे रुक्खमूलगिहंसि वा, एव-
मणुण्वेत्तए, उवाइणित्तए । पडिमापडिबण्णस्स णं अणगारस्स कप्पंति तओ संथारगा
पडिलेहित्तए तं० पुढवीसिला, कट्टसिला, अहासंथडमेव, एवमणुण्वित्तए उवाइणि-
त्तए ॥ ९१ ॥ तिविहे काले प० तं० तीए पडुप्पण्णे अणागए । तिविहे समए प०
तं० तीए, पडुप्पण्णे, अणागए, एवं आवलिया, आणापाणू, थोवे लवे मुहुत्ते अहो-
रत्ते, जाव वाससयसहरसे पुक्वंगे, पुक्वे, जाव ओसप्पिणी । तिविहे पोग्गलपरियट्टे
प० तं० तीए पडुप्पण्णे अणागए ॥ ९२ ॥ तिविहे वयणे प० तं०—एगवयणे,
दुवयणे, बहुवयणे । अहवा तिविहे वयणे प० तं० इत्थिवयणे, पुंवयणे, णुंसग-
वयणे । अहवा तिविहे वयणे प० तं० तीयवयणे, पडुप्पण्वयणे, अणागवयणे

॥ ९३॥ तिविहा पणवणा प० तं० णाणपणवणा, दंसणपणवणा, चरित्तपणवणा । तिविहे सम्मे प० तं० णाणसम्मे, दंसणसम्मे, चरित्तसम्मे ॥ ९४॥ तिविहे उवघाए प० तं० उग्गमोवघाए, उप्पायणोवघाए, एसणोवघाए, एवं विसोही ॥ ९५ ॥ तिविहा आराहणा प० तं० णाणाराहणा, दंसणाराहणा, चरित्ताराहणा । णाणाराहणा तिविहा प० तं० उक्कोसा, मज्झिमा, जहण्णा, एवं दंसणाराहणावि, चरित्ताराहणावि । तिविहे संकिलेसे प० तं० णाणसंकिलेसे, दंसणसंकिलेसे, चरित्तसंकिलेसे, एवं असंकिलेसे वि एवं अइकमे वि, वइकमे वि, अइयारे वि, अणायारे वि । तिण्हमइकमाणं आलोएजा, पडिक्कमेजा णिदेजा, गरहिजा, जाव पडिवज्जिजा, तं० णाणइक्कमस्स दंसणइक्कमस्स, चरित्तइक्कमस्स, एवं वइक्कमाणं, अइयाराणं, अणायाराणं ॥ ९६ ॥ तिविहे पायच्छित्ते प० तं० आलोयणारिहे, पडिक्कमणारिहे, तदुभयरिहे ॥ ९७ ॥ जंबुद्वीवे दीवे मंदरस्स पव्वयस्स दाहिणेणं तओ अकम्मभूसीओ प० तं० हेमवए हरिवासे देवकुरा । जंबुद्वीवे दीवे मंदरस्स पव्वयस्स उत्तरेणं तओ अकम्मभूसीओ प० तं० उत्तरकुरा, रम्मगवासे, एरणवए । जंबुद्वीवे दीवे मंदरपव्वयस्स दाहिणेणं तओ वासा प० तं० भरहे, हेमवए, हरिवासे । जंबूमंदरस्स उत्तरेणं तओ वासा प० तं० रम्मगवासे, हेरणवए, एरवए । जंबूमंदरस्स दाहिणेणं तओ वासहरपव्वया प० तं० चुल्लहिमवंते, महाहिमवंते, णिसडे । जंबूमंदरस्स उत्तरेणं तओ वासहरपव्वया प० तं० णीलवंते, रुप्पी, सिहरी । जंबूमंदरस्स दाहिणेणं तओ महादहा प० तं० पउमद्दे, महापउमद्दे, तिगिच्छिद्दे, तत्थ णं तओ देवयाओ महिद्धियाओ जाव पल्लिओवमद्धिइयाओ परिवसति तं० सिरि, हिरी, धिई । एवं उत्तरेण वि, णवरं केसरिद्दे, महापोंडरीयद्दे, पोंडरीयद्दे, देवयाओ किंती, बुद्धी, लच्छी । जंबूमंदरस्स दाहिणेणं चुल्लहिमवंताओ वासहरपव्वयाओ पउमदहाओ महादहाओ तओ महाणईओ पव्हंति तं० गंगा सिंधू रोहिंयसा । जंबूमंदरस्स उत्तरेणं सिहरीओ वासहरपव्वयाओ पोंडरीयद्दाओ महाद्दाओ तओ महाणईओ पव्हंति तं० सुवण्णकूला रत्ता रत्तवई । जंबूमंदरस्स पुरत्थिमेणं सीयाए महाणईए उत्तरेणं तओ अंतरणईओ प० तं० गाहावई, दहवई, पंकवई । जंबूमंदरस्स पुरत्थिमेणं सीयाए महाणईए दाहिणेणं तओ अंतरणईओ प० तं० तत्तजला, मत्तजला, उम्मत्तजला । जंबूमंदरस्स पच्चत्थिमेणं

सीओदाए महाणईए दाहिणेणं तओ अंतरणईओ प० तं० खीरोदा, सीहसोया, अंतोवाहिणी । जंभूमंदरस्स पच्चत्थिमेणं सीओदाए महाणईए उत्तरेणं तओ अंतरण-
ईओ प० तं० उम्मिमालिणी, फेणमालिणी, गंभीरमालिणी । एवं धायइखंडे दीवे
पुरत्थिमद्धेवि अकम्मभूमीओ आढवेत्ता जाव अंतरणईओत्ति, गिरवसेसं भाणि-
यत्वं जाव पुक्खरवरदीवडूपच्चत्थिमद्धे तहेव गिरवसेसं भाणियत्वं ॥ ९८ ॥
तिहिं ठाणेहिं देसे पुढवीए चलेज्जा तंजहा—अहेणमिमीसे रयणप्पभाए पुढवीए
उराला पोग्गला णिवत्तेज्जा, तएणं ते उराला पोग्गला णिवयमाणा देसं पुढवीए
चलेज्जा, महोरए वा महिद्धिए जाव महेसक्खे इमीसे रयणप्पभाए पुढवीए अहे
उम्मज्जणिमज्जियं करेमाणे देसं पुढवीए चलेज्जा, णागसुवण्णाण वा संगामंसि
वट्टमाणंसि देसं पुढवीए चलेज्जा, इवेएहिं० । तिहिं ठाणेहिं केवलकप्पा पुढवी चलेज्जा
तं० अहेणं इमीसे रयणप्पभाए पुढवीए घणवाए गुप्पेज्जा, तएणं से घणवाए
गुविए समाणे घणोदहिमेएज्जा, तएणं से घणोदही एइए समाणे केवलकप्पं पुढविं
चालेज्जा, देवे वा महिद्धिए जाव महेसक्खे तहारूवस्स समणस्स माणस्स वा
इद्धिं जुइं जसं बलं वीरियं पुरिसक्कारपरक्कमं उवदंसेमाणे केवलकप्पं पुढविं चालेज्जा,
देवासुरसंगामंसि वा वट्टमाणंसि केवलकप्पा पुढवी चलेज्जा, इवेएहिं तिहिं०
॥ ९९ ॥ तिविहा देवा किब्बिसिया प० तं० तिपलिओवमट्ठिईया, तिसागरोव-
मट्ठिईया, तेरससागरोवमट्ठिईया । कहि णं भंते ! तिपलिओवमट्ठिईया देवा किब्बि-
सिया परिवसंति ? उप्पिं जोइसियाणं हिट्ठिं सोहम्मीसाणेसु कप्पेसु एत्थणं तिपलि-
ओवमट्ठिईया देवा किब्बिसिया परिवसंति । कहि णं भंते ! तिसागरोवमट्ठिईया देवा
किब्बिसिया परिवसंति ? उप्पिं सोहम्मीसाणाणं कप्पाणं, हेट्ठिं सणं कुमारमाहिं देसु
कप्पेसु एत्थ णं तिसागरोवमट्ठिईया देवा किब्बिसिया परिवसंति । कहि णं भंते !
तेरससागरोवमट्ठिईया देवा किब्बिसिया परिवसंति ? उप्पिं बंभलोयस्स कप्पस्स
हिट्ठिं लंतगे कप्पे एत्थ णं तेरससागरोवमट्ठिईया देवा किब्बिसिया परिवसंति
॥ १०० ॥ सक्कस्स णं देविंदस्स देवरणो बाहिरपरिसाए देवाणं तिण्णिपलिओव-
माइं टिईं प०—सक्कस्स णं देविंदस्स देवरणो अड्ढिभतरपरिसाए देवीणं तिण्णि-
पलिओवमाइं टिईं प० । ईसाणस्सणं देविंदस्स देवरणो बाहिरपरिसाए देवीणं
तिण्णिपलिओवमाइं टिईं प० ॥ १०१ ॥ तिविहे पायच्छिस्से प० तं० णाणपाय-

च्छित्ते, दंसणपायच्छित्ते, चरित्तपायच्छित्ते । तओ अणुग्घाइमा प० तं० हत्थ कम्मं करेमाणे, मेट्ठणं सेवेमाणे, राइभोयणं भुंजमाणे । तओ पारंघिया प० तं० दुट्ठे पारंघिए, पमत्ते पारंघिए, अण्णमण्णं करेमाणे पारंघिए । तओ अणवट्ठप्पा प० तं० साहम्मियाणं तेणं करेमाणे, अण्णयम्मियाणं तेणं करेमाणे, हत्थतालं दलयमाणे । तओ णो कप्पंति पव्वावेत्तए तं० पंडए, वाइए, कीवे, एवं मुंडावेत्तए, सिक्खावेत्तए, उवट्ठावेत्तए, संभुजित्तए, संवासित्तए ॥ १०२ ॥ तओ अवायणिज्जा प० तं० अविणीए, विगइपडिबद्धे, अविओसियपाहुडे । तओ कप्पंति वाइत्तए तं० विणीए अविगइपडिबद्धे विउसियपाहुडे ॥ १०३ ॥ तओ दुसण्णप्पा प० तं० दुट्ठे मूढे बुग्गाहिए । तओ सुसण्णप्पा प० तं० अदुट्ठे अमूढे अबुग्गाहिए ॥ १०४ ॥ तओ मंडलिया पव्वया प० तं० माणुसुत्तरे कुंडलवरे रुयगन्नरे । तओ महइमहालया प० तं० जंबुहीवे दीवे मंदरे मंदरेसु, सयंमुरमणसमुदे समुदेसु, बंभलोए कप्पे कप्पेसु ॥ १०५ ॥ तिविहा कप्पटिई प० तं० सामाइयकप्पटिई छेदोवट्ठवणियकप्पटिई णिव्विसमाणकप्पटिई । अहवा तिविहा कप्पटिई प० तं० णिव्विट्ठकप्पटिई, जिण-कप्पटिई, धेरकप्पटिई ॥ १०६ ॥ णेरइयाणं तओ सरीरगा प० तं० वेउत्तिए, तेयए, कम्मए । असुरकुमाराणं तओ सरीरगा प० एवं चैव एवं सक्खेसि देवाणं । पुट्ठीकाइयाणं तओ सरीरगा प० तं० ओरालिए, तेयए, कम्मए । एवं वाउकाइयवज्जाणं जाव चउरिंदियाणं ॥ १०७ ॥ गुरुं पडुच्च तओ पडिणीया प० तं० आयरियपडिणीए, उचक्खायपडिणीए, थेरपडिणीए । गइं पडुच्च तओ पडिणीया प० तं० इहलोयपडिणीए, परलोयपडिणीए, दुहओलोयपडिणीए । समूहं पडुच्च तओ पडिणीया प० तं० कुलपडिणीए, गणपडिणीए, संवपडिणीए । अणुकंपं पडुच्च तओ पडिणीया प० तं० तवस्सिपडिणीए, गिलाणपडिणीए, सेहपडिणीए । भावं पडुच्च तओ पडिणीया प० तं० णाणपडिणीए, दंसणपडिणीए, चरित्तपडिणीए । सुयं पडुच्च तओ पडिणीया प० तं० सुत्तपडिणीए, अत्थपडिणीए, तदुभयपडिणीए ॥ १०८ ॥ तओ पितियंगा प० तं० अट्ठी, अट्ठिमिज्जा, केसमंमुरोमणहे । तओ माउयंगा प० तं० मंसे, सोणिए, मत्थुल्लिणे ॥ १०९ ॥ तिहिं ठाणेहिं समणे णिग्गथे मंहाणिज्जरे महापञ्चवसाणे भयइ तं० कया णं अहं अप्पं वा ब्रह्मं वा सुयं अह्निस्सामि ? कयाणं अहं एकल्लविहारपडिं उवसंपज्जिताणं विहरिस्सामि ? कयाणं अहं अपक्खिम-

मारणंतियसंलेहणाञ्जसणाञ्जसिए भत्तपाणपडियाइक्खिए पाओवगए कालमणवकंख-
 माणे विहरिस्सामि । एवं समणसा सवयसा सकायसा पागडेमाणे समणे णिग्गंथे
 महाणिज्जरे महापज्जवसाणे भवइ ॥ ११० ॥ तिहिं ठाणेहिं समणोवासए महाणिज्जरे
 महापज्जवसाणे भवइ तं० कयाणं अहं अप्पं वा बहुयं वा परिग्गहं परिचइस्सामि ?
 कयाणं अहं मुंडे भवित्ता अगाराओ अणगारिये पव्वइस्सामि ? कयाणं अहं अपच्छिम-
 मारणंतियसंलेहणाञ्जसणाञ्जसिए भत्तपाणपडियाइक्खिए पाओवगए कालं अणवकंख-
 माणे विहरिस्सामि ? एवं समणसा सवयसा सकायसा पागडेमाणे समणोवासए
 महाणिज्जरे महापज्जवसाणे भवइ ॥ १११ ॥ तिविहे पोग्गलपडिघाए प० तं० परमाणु-
 पोग्गले परमाणुपोग्गलं पप्प पडिहण्णिज्जा, लुक्खत्ताए वा पडिहण्णिज्जा, लोगतं वा
 पडिहण्णिज्जा ॥ ११२ ॥ तिविहे चक्खू प० तं० एगचक्खू, विचक्खू, तिचक्खू ।
 छउमत्थेणं मणुस्से एगचक्खू, देवे विचक्खू, तहारूवे समणे वा माहणे वा
 उप्पण्णणदंसणधरे से णं तिचक्खुत्ति वत्तव्वं सिया ॥ ११३ ॥ तिविहे अमि-
 समागमे प० तं० उद्धं अहं तिरियं । जया णं तहारूवस्स समणस्स वा माहणस्स
 वा अइसेसे णाणदंसणे समुप्पज्जइ सेणं तप्पदमयाए उद्धमभिसमेइ, तओ तिरियं
 तओ पच्छा अहे, अहोलोणेणं दुरमिगमे प० समणाउसे ॥ ११४ ॥ तिविहा इट्ठी
 प० तं० देविट्ठी-राइट्ठी-गणिट्ठी । देविट्ठी तिविहा प० तं० विमाणिट्ठी, विगुक्खिणिट्ठी,
 परियारणिट्ठी । अहवा देविट्ठी तिविहा प० तं० सच्चित्ता, अच्चित्ता मीसिया । राइट्ठी
 तिविहा प० तं० रण्णो अइयाणिट्ठी, रण्णो णिज्जाणिट्ठी, रण्णो बलवाहणकोस-
 कोट्टागारिण्ठी । अहवा राइट्ठी तिविहा प० तं० सच्चित्ता, अच्चित्ता, मीसिया । गणिट्ठी
 तिविहा प० तं० णाणिट्ठी, दंसणिट्ठी, चरित्तिट्ठी । अहवा गणिट्ठी तिविहा प० तं०
 सच्चित्ता अच्चित्ता मीसिया ॥ ११५ ॥ तओ गारवा प० तं० इट्ठीगारवे, रसगारवे,
 सायागारवे । तिविहे करणे प० तं० धम्मिए करणे, अधम्मिए करणे, धम्मिया-
 धम्मिए करणे ॥ ११६ ॥ तिविहे भगवया धम्मे प० तं० सुअहिज्जिए, सुज्जाइए,
 सुतवस्सिए । जया सुअहिज्जियं भवइ, तया सुज्जाइयं भवइ, जया सुज्जाइयं भवइ
 तया सुतवस्सियं भवइ । से सुअहिज्जिए, सुज्जाइए, सुतवस्सिए सुयक्खाएणं भग-
 वया धम्मे पण्णत्ते ॥ ११७ ॥ तिविहा वावत्ती प० तं० जाणू, अजाणू, विति-
 णिच्छा, एवमंज्जोववज्जणा परियावज्जणा ॥ ११८ ॥ तिविहे अंते प० तं०

लोमंते, वेयंते, समयंते ॥ ११९ ॥ तओ जिणा प० तं० ओहिणाणजिणे मण-
 पज्जवणाणजिणे, केवलणाणजिणे । तओ केवली प० तं० ओहिणाणकेवली, मण-
 पज्जवणाणकेवली, केवलणाणकेवली । तओ अरहा प० तं० ओहिणाणअरहा, मण-
 पज्जवणाणअरहा, केवलणाणअरहा ॥ १२० ॥ तओ लेस्साओ दुट्ठिभगंधाओ प० तं०
 कण्हलेस्सा, णीललेस्सा, काउलेस्सा । तओ लेस्साओ सुट्ठिभगंधाओ प० तं०
 तेऊ-पम्ह-सुक्कलेस्सा । एयं दुग्गइगामिणीओ, सुग्गइगामिणीओ संकिल्लिद्धाओ,
 असंकिल्लिद्धाओ, अमणुष्णाओ, मणुष्णाओ, अविमुद्धाओ, विमुद्धाओ, अप्प-
 सत्थाओ, पसत्थाओ, सीअलुक्खाओ, णिद्धुण्हाओ ॥ १२१ ॥ तिविहे मरणे प०
 तं० बालमरणे, पंडियमरणे, बालपंडियमरणे । बालमरणे तिविहे प० तं० ठिअलेस्से,
 संकिल्लिद्धलेस्से, पज्जवजायलेस्से । पंडियमरणे तिविहे प० तं० ठिअलेस्से,
 असंकिल्लिद्धलेस्से, पज्जवजायलेस्से । बालपंडियमरणे तिविहे प० तं० ठिअलेस्से
 असंकिल्लिद्धलेस्से अपज्जवजायलेस्से ॥ १२२ ॥ तओ टाणा अव्ववसियस्स
 अहियाए, असुभाए, अखमाए, अणिस्सेसाए, अणाणुगामियत्ताए भवंति तं० से णं
 मुंडे भवित्ता अगाराओ अणगारियं पव्वइए णिग्गथे पावयणे संकिए कंखिए विति-
 णिच्छिए भेदसमावण्णे कल्लससमावण्णे णिग्गंथं पावयणं णो सहइइ, णो पत्तियइ, णो
 रोएइ, तं परीसहा अभिजुंजिय अभिजुंजिय अभिभवन्ति, णो से परीसहे अभि-
 जुंजिय अभिजुंजिय अभिभवइ; से णं मुंडे भवित्ता अगाराओ अणगारियं पव्वइए
 पंचहिं महव्वएहिं संकिए जाव कल्लससमावण्णे, पंचमहव्वयाइं णो सहइइ जाव णो
 से परीसहे अभिजुंजिय २ अभिभवइ, से णं मुंडे भवित्ता अगाराओ अणगारियं
 पव्वइए छहिं जीवणिकाएहिं जाव अभिभवइ । तओ टाणा बवसियस्स हियाए जाव
 आणुगामियत्ताए भवंति तं० से णं मुंडे भवित्ता अगाराओ अणगारियं पव्वइए
 णिग्गथे पावयणे णिस्संकिए णिक्कंखिए जाव णो कल्लससमावण्णे णिग्गंथं पावयणं
 सहइइ पत्तियइ रोएइ से परीसहे अभिजुंजिय २ अभिभवइ, णो तं परीसहा
 अभिजुंजिय २ अभिभवन्ति, से णं मुंडे भवित्ता अगाराओ अणगारियं पव्वइए
 समाणे पंचहिं महव्वएहिं णिस्संकिए-णिक्कंखिए जाव, परीसहे अभिजुंजिय २
 अभिभवइ, णो तं परीसहा अभिजुंजिय २ अभिभवन्ति, से णं जाव छहिं जीव-
 णिकाएहिं णिस्संकिए जाव परीसहे अभिजुंजिय २ अभिभवइ, णो तं परीसहा

अभिञ्जित्य २ अभिभवंति ॥ १२३ ॥ एगमेगाणं पुढवी तिहिं वलएहिं सव्वओ समंता संपरिक्खित्ता तंजहा—घणोदहिवलएणं, घणवायवलएणं, तणुवायवलएणं ॥ १२४ ॥ णेरइयाणं उक्कोसेणं तिसमइएणं विग्गहेणं उववज्जंति एगिदियवज्जं जाव वेमाणियाणं ॥ १२५ ॥ खीणमोहस्सणं अरहओ तओ कम्मसा जुगवं खिज्जंति तं० णाणावरणिज्जं, दंसणावरणिज्जं, अंतराइयं ॥ १२६ ॥ अभिईणकखत्ते तित्तारे प० एवं सवणे अस्सिणी भरणी मगसिरे पूसे जेट्ठा ॥ १२७ ॥ धम्माओ णं अरहाओ संती अरहा तिहिं सागरोवमेहिं तिचउन्भाणं पलिओवमऊणएहिं वीइक्कंतेहिं समुप्पणे । समणस्स णं भगवओ महावीरस्स जाव तच्चाओ पुरिसजुगाओ जुगंतकरभूमी । मल्लीणं अरहा तिहिं पुरिससएहिं सद्धि मुंडे भवेत्ता जाव पव्वइए, एवं पासेवि । समणस्स णं भगवओ महावीरस्स तिण्णि सया चउहसपुव्वीणं अजिणाणं जिणसंकासाणं सव्वक्खर-सणिणवाइंणं जिण इव अविताहवागरमाणाणं उक्कोसिया चउहसपुव्विसंपया हुत्था । तओ तित्थयरा चक्कवट्ठी होत्था तं० संती कुंथू अरो ॥ १२८ ॥ तओ गेविज्ज-विमाणपत्थडा प० तं० हिट्ठिमगेविज्जविमाणपत्थडे; मज्झिमगेविज्जविमाणपत्थडे, उवरिमगेविज्जविमाणपत्थडे । हिट्ठिमगेविज्जविमाण पत्थडे तिविहे प० तं० हिट्ठिम-हिट्ठिमगेविज्जविमाणपत्थडे हिट्ठिममज्झिमगेविज्जविमाणपत्थडे हिट्ठिमउवरिम-गेविज्जविमाणपत्थडे । मज्झिमगेविज्जविमाणपत्थडे तिविहे प० तं० मज्झिमहिट्ठिम-गेविज्जविमाणपत्थडे, मज्झिममज्झिमगेविज्जविमाणपत्थडे, मज्झिमउवरिमगेविज्ज-विमाणपत्थडे । उवरिमगेविज्जविमाणपत्थडे, तिविहे प० तं० उवरिमहिट्ठिमगेविज्ज-विमाणपत्थडे उवरिममज्झिमगेविज्जविमाणपत्थडे । उवरिमउवरिमगेविज्जविमाण-पत्थडे ॥ १२९ ॥ जीवाणं तिठाणणिव्वत्तिए पोग्गले पावकम्मत्ताए चिणिसु वा चिणंति वा चिणिसंति वा तंजहा—इत्थिणिव्वत्तिए, पुरिसणिव्वत्तिए णंपुंसग-णिव्वत्तिए, एवं चिणउवचिणबंधउदीरवेय तह णिज्जरा चेंव ॥ १३० ॥ तिपए-सिया खंधा अणंता पण्णत्ता । एवं जाव तिगुणलुक्खा पोग्गला अणंता पण्णत्ता ॥ १३१ ॥ तिट्ठाणं समत्तं ॥

चउत्थं ठाणं पढमो उट्ठेसो

चत्तारि अंतकिरियाओ प० तं० तत्थ खलु इमा पढमा अंतकिरिया, अप्पकम्मपच्चायाए यावि भवइ, से णं मुंडे भवित्ता अगाराओ अणगारिअं पव्व-

इए, संजमबहुले संवरबहुले समाहिबहुले लूहे तीरड्डी उवहाणवं दुक्खक्खवे तवस्सी तस्स णो तहप्पगारे तवे भवइ, णो तहप्पगारा वेयणा भवइ, तहप्पगारे पुरिसजाए दीहेणं परियाएणं सिञ्जइ, बुज्जइ मुच्चइ परिणिव्याइ सव्वदुक्खाणमंतं करेइ, जहा से भरहे राया चाउरंतचक्कवट्ठी पदमा अंतकिरिया। अहावरा दोच्चा अंतकिरिया, महाकम्मपच्चायाए यावि भवइ से णं मुंडे भवित्ता अगाराओ अणगारियं पव्वइए, संजमबहुले संवरबहुले' ' ' ' जाव उवहाणवं दुक्खक्खवे तवस्सी तस्स णं तहप्पगारे तवे भवइ, तहप्पगारा वेयणा भवइ, तहप्पगारे पुरिसजाए णिरुद्धेणं परियाएणं सिञ्जइ० जाव अंतं करेइ जहा से गयस्सूमाले अणगारे, दोच्चा अंतकिरिया। अहावरा तच्चा अंतकिरिया, महाकम्मपच्चायाएयावि भवइ, से णं मुंडे भवित्ता अगाराओ अणगारियं पव्वइए जहा दोच्चा, णवरं दीहेणं परियाएणं सिञ्जइ जाव सव्वदुक्खाणमंतं करेइ, जहा से सणंकुमारे राया चाउरंतचक्कवट्ठी तच्चा अंतकिरिया। अहावरा चउत्था अंतकिरिया, अप्पकम्मपच्चायाएयावि भवइ, से णं मुंडे भवित्ता जाव पव्वइए संजमबहुले जाव तस्स णं णो तहप्पगारे तवे भवइ णो तहप्पगारा वेयणा भवइ तहप्पगारे पुरिसजाए णिरुद्धेणं परियाएणं सिञ्जइ जाव सव्वदुक्खाणमंतं करेइ, जहा सा मरुदेवा भगवई, चउत्था अंतकिरिया ॥१॥ चत्तारि रुक्खा प० तं० उण्णए णाममेगे उण्णए, उण्णए णाममेगे पणए, पणए णाममेगे उण्णए, पणए णाममेगे पणए, एवामेव चत्तारि पुरिसजाया प० तं० उण्णए णाममेगे उण्णए, तहेव जाव पणए णाममेगे पणए। चत्तारि रुक्खा प० तं० उण्णए णाममेगे उण्णयपरिणए, उण्णए णाममेगे पणयपरिणए, पणए णाममेगे उण्णयपरिणए, पणए णाममेगे पणयपरिणए। एवामेव चत्तारि पुरिसजाया प० तं० उण्णए णाममेगे उण्णयपरिणए, चउभंगो। चत्तारि रुक्खा प० तं० उण्णए णाममेगे उण्णय रूवे, तहेव चउभंगो, एवामेव चत्तारि पुरिसजाया प० तं० उण्णए णामं ४। चत्तारि पुरिसजाया प० तं० उण्णए णाममेगे उण्णय मणे, उण्ण० एवं संक्खेपेण्णे-दिट्ठी-सीलाचारे-ववहारे-परक्कमे-एगे पुरिसजाए पडिबक्खो गत्थि ॥२॥ चत्तारि रुक्खा प० तं० उज्जूणाममेगे उज्जू, उज्जूणाममेगे वंके, चउभंगो। एवामेव चत्तारि पुरिसजाया, प० तं० उज्जूणाममेगे उज्जू ४ एवं जहा उण्णयपणएहिं गमो तहा उज्जुवंकेहिं वि भाणियव्वो, जाव परक्कमे ॥ ३ ॥ पडिमापडिबण्णस्सणं अण-

गारस्स कण्पति चत्तारि भासाओ भासित्तए तं० जायणी पुच्छणी अणुणवणी पुट्टस्स
 थागरणी । चत्तारिभासजाया प० तं० सच्चमेगं भासजायं वीयं मोसं तइयं सच्चमोसं
 चउत्थं असच्चमोसं ॥ ४ ॥ चत्तारि वत्था प० तं० सुद्धे णाममेगे सुद्धे, सुद्धे
 णाममेगे असुद्धे, असुद्धे णाममेगे सुद्धे, असुद्धे णाममेगे असुद्धे, एवामेव चत्तारि
 पुरिसजाया प० तं० सुद्धे णाममेगे सुद्धे चउभंगो । एवं परिणयरूवे वत्था सपडिवक्खा
 ॥ ५ ॥ चत्तारि पुरिसजाया प० तं० सुद्धे णाममेगे सुद्धमणे चउभंगो, एवं संकप्पे
 जाव परक्कमे ॥ ६ ॥ चत्तारि सुया प० तं० अइजाए, अणुजाए, अबजाए, कुलिगाले
 ॥ ७ ॥ चत्तारि पुरिसजाया प० तं० सच्चे णाममेगे सच्चे, सच्चे णाममेगे असच्चे (४)
 एवं परिणए जाव परक्कमे ॥ ८ ॥ चत्तारि वत्था प० तं० सुई णाममेगे सुई, सुई
 णाममेगे असुई, चउभंगो, एवामेव चत्तारि पुरिसजाया प० तं० सुई णाममेगे सुई
 चउभंगो, एवं जहेव सुद्धेणं वत्थेणं भणियं, सहेव सुइणावि जाव परक्कमे ॥ ९ ॥
 चत्तारि कोरवा प० तं० अंबपलंबकोरवे, तालपलंबकोरवे, वल्लिपलंबकोरवे, मिंद-
 विसाणकोरवे, एवामेव चत्तारि पुरिस जाया प० तं० अंबपलंबकोरवसमाणे, ताल-
 पलंबकोरवसमाणे, वल्लिपलंबकोरवसमाणे, मिंदविसाणकोरवसमाणे ॥ १० ॥ चत्तारि
 युणा प० तं० तयक्खाए, छल्लिक्खाए, कट्टक्खाए, सारक्खाए, एवामेव चत्तारि
 भिक्खायरा प० तं० तयक्खायसमाणे, जाव सारक्खायसमाणे, तयक्खायसमाणस्स
 णं भिक्खागस्स सारक्खायसमाणे तवे प० सारक्खायसमाणस्सणं भिक्खागस्स
 तयक्खायसमाणे तवे पण्णत्ते, छल्लिक्खायसमाणस्स णं भिक्खागस्स कट्टक्खायसमाणे
 तवे प० कट्टक्खायसमाणस्स णं भिक्खागस्स छल्लिक्खायसमाणे तवे प० ॥ ११ ॥
 चउत्विहा तणवणस्सइकाइया प० तं० अग्गबीया मूलबीया पोरबीया खंधबीया
 ॥ १२ ॥ चउत्तिं ठाणेहिं अहुणोववण्णे णेरइए णिरयलोगंसि इच्छेज्जा माणुसं लोगं
 हव्वमागच्छित्तए णो चेवणं संचाएइ हव्वमागच्छित्तए । अहुणोववण्णे णेरइए
 णिरयलोगंसि समुब्भूयं वेयणं वेयमाणे इच्छेज्जा माणुसं लोगं हव्वमागच्छित्तए
 णो चेव णं संचाएइ हव्वमागच्छित्तए । अहुणोववण्णे णेरइए णिरयलोगंसि णिरय-
 पालेहिं भुब्बो भुब्बो अहिट्टिज्जमाणे इच्छेज्जा माणुसं लोगं हव्वमागच्छित्तए, णो
 चेव णं संचाएइ हव्वमागच्छित्तए । अहुणोववण्णे णेरइए णिरयवेयणिब्बंसि कम्मंसि
 अक्खीणंसि अवेइयंसि अणिज्जिणंसि इच्छेज्जा ० णो चेव णं संचाएइ, हव्वमागच्छि-

त्ताए, एवं गिरयाउयंसि कम्मंसि अक्खीणंसि जाव णो चेव णं संचाएइ हव्वमा-
 गच्छित्तए इच्चेएहिं चउहिं ठाणेहिं अहुणोववण्णे णेरइए जाव णो चेव णं संचा-
 एइ हव्वमागच्छित्तए ॥१३॥ कप्पति णिग्गंथीणं चत्तारि संवाडीओ धारित्तए वा
 परिहरित्तए वा तं० एगं दुइत्थवित्थारं, दोत्तिहत्थवित्थारं, एगं चउहत्थवित्थारं
 ॥ १४ ॥ चत्तारि ज्ञाणा प० तं० अट्टे ज्ञाणे, रोहे ज्ञाणे, धम्मे ज्ञाणे, सुक्के ज्ञाणे ।
 अट्टे ज्ञाणे चउत्विहे प० तं० अमणुणसंपओगसंपउत्ते तस्स विप्पओगसइसमण्णा-
 गए यावि भवइ, मणुणसंपओगसंपउत्ते तस्स अविप्पओगसइसमण्णागए यावि
 भवइ, आर्यकसंपओगसंपउत्ते तस्स विप्पओगसइसमण्णागए यावि भवइ, परि-
 जुसियकामभोगसंपओगसंपउत्ते तस्स अविप्पओगसइसमण्णागए यावि भवइ ।
 अट्टस्सणं ज्ञाणस्स चत्तारि लक्खणा प० तं० कंदणया, सोयणया, तिप्पणया परि-
 देवणया । रोहे ज्ञाणे चउत्विहे प० तं० हिंसाणुबंधि, मोसाणुबंधि तेणाणुबंधि सारक्ख-
 णाणुबंधि । रुहस्स णं ज्ञाणस्स चत्तारि लक्खणा प० तं० ओसण्णदोसे, बहुलदोसे,
 अण्णाणदोसे आमरणंतदोसे । धम्मे ज्ञाणे चउत्विहे चउप्पडोयारे प० तं० आणा-
 विजए, अवायविजए, विवागविजए, संठाणविजए । धम्मस्स णं ज्ञाणस्स चत्तारि
 लक्खणा प० तं० आणारुई, णिसग्गरुई, सुत्तरुई, ओगाट्ठरुई । धम्मस्स णं ज्ञाणस्स
 चत्तारि आलंबणा प० तं० वायणा, पडिपुच्छणा, परियट्टणा, अणुप्पेहा । धम्मस्स
 णं ज्ञाणस्स चत्तारि अणुप्पेहाओ प० तं० एगाणुप्पेहा, अणिच्चाणुप्पेहा, असर-
 णाणुप्पेहा, संसाराणुप्पेहा । सुक्केज्ञाणे चउत्विहे चउप्पडोयारे प० तं० पुहुत्तवियक्के-
 सवियारी, एगत्तवियक्के अवियारी, सुहुमक्किरिए अणियट्टी, समुच्छिण्णक्किरिए
 अपडिवाइं । सुक्कस्स णं ज्ञाणस्स चत्तारि लक्खणा प० तं० अव्वहे असम्मोहे
 विवेगे विउस्सग्गे । सुक्कस्स णं ज्ञाणस्स चत्तारि आलंबणा प० तं० खंती मुत्ती महवे
 अज्जवे । सुक्कस्स णं ज्ञाणस्स चत्तारि अणुप्पेहाओ प० तं० अणंतवत्तियाणुप्पेहा,
 विपरिणामाणुप्पेहा, असुभाणुप्पेहा, अवायाणुप्पेहा ॥१५॥ चउत्विहा देवाणं ठिई प०
 तं० देवेणाममेगे, देवस्सिणाए णाममेगे, देवपुरोहिणं णाममेगे, देवपज्जलणे णाममेगे
 ॥१६॥ चउत्विहे संवासे प० तं० देवणाममेगे देवीए सद्धिं संवासं गच्छेज्जा, देव-
 णाममेगे छवीए सद्धिं संवासं गच्छेज्जा, छवीणाममेगे देवीए सद्धिं संवासं गच्छेज्जा,
 छवीणाममेगे छवीए सद्धिं संवासं गच्छेज्जा ॥१७॥ चत्तारि कसाया प० तं० कोह-
 कसाए माणकसाए मायाकसाए लोभकसाए, एवं णेरइयाणं जाव वेमाणियाणं ।

चउपइट्टिए कोहे प० तं० आयपइट्टिए, परपइट्टिए, तटुभयपइट्टिए, अपइट्टिए, एवं गेरइयाणं जाव वेमाणियाणं, एवं जाव लोभे वेमाणियाणं । चउहिं ठाणेहिं कोधु-
 प्पत्ती सिया तं० खेत्तं पडुच्च, वत्थुं पडुच्च, सरीरं पडुच्च, उवहिं पडुच्च, एवं गेरइयाणं
 जाव वेमाणियाणं, एवं जाव लोहे वेमाणियाणं । चउव्विहे कोहे प० तं० अणंताणु-
 बंधिकोहे, अपच्चक्खाणक्कोहे, पच्चक्खाणावरणे कोहे, संजलणे कोहे, एवं गेरइयाणं
 जाव वेमाणियाणं । एवं जाव लोहे वेमाणियाणं । चउव्विहे कोहे पणत्ते, आभोग-
 गिन्वत्तिए, अणाभोगिन्वत्तिए, उवसंते, अणुवसंते, एवं गेरइयाणं, जाव वेमाणि-
 याणं । एवं जाव लोभे, वेमाणियाणं ॥ १८ ॥ जीवा णं चउहिं ठाणेहिं अट्टकम्म-
 पगडीओ चिणिसु तं० कोहेणं भाणेणं मायाए लोभेणं, एवं जाव वेमाणियाणं । एवं
 चिणंति एस दंडओ, एवं चिणिस्संति एस दंडओ, एवमेएणं तिण्णि दंडगा । एवं
 उवचिणिसु, उवचिणंति, उवचिणिस्संति, बंधिसु ३, उदीरंसु ३ वेदंसु ३, गिज्जरंसु
 गिज्जरंति गिज्जरिस्संति, जाव वेमाणियाणं एवमेक्किक्के पदे तिण्णि २ दंडगा भाणियव्वा,
 जाव गिज्जरिस्संति ॥१९॥ चत्तारि पडिमाओ प० तं० समाहिपडिमा, उवहाण-
 पडिमा, विवेगपडिमा, विउस्सग्गपडिमा । चत्तारि पडिमाओ प० तं० भदा, सुभदा,
 महाभदा, सव्वओभदा । चत्तारि पडिमाओ प० तं० खुड्डियामोयपडिमा, महत्थिया-
 मोयपडिमा, जवमज्झा, वहरमज्झा ॥ २० ॥ चत्तारि अत्थिकाया अजीवकाया
 प० तं० धम्मत्थिकाए, अधम्मत्थिकाए, आगासत्थिकाए, पोग्गलत्थिकाए । चत्तारि
 अत्थिकाया अरुविकार्या प० तं० धम्मत्थिकाए, अधम्मत्थिकाए, आगासत्थिकाए,
 जीवत्थिकाए ॥२१॥ चत्तारि फला प० तं० आमैणाममेगे आममहुरे, आमैणाम-
 मेगे पक्कमहुरे, पक्केणाममेगे आममहुरे, पक्केणाममेगे पक्कमहुरे, एवामेव चत्तारि
 पुरिसजाया प० तं० आमैणाममेगे आममहुरफलसम्माणे, (४) ॥ २२ ॥ चउव्विहे
 सच्चे प० तं० काउज्जुयया, भासुज्जुयया, भावुज्जुयया, अक्सिंवायणाजोगे । चउ-
 व्विहे मोसे प० तं०—कायअणुज्जुयया, भासअणुज्जुयया, भावअणुज्जुयया, विसं-
 वादणाजोगे ॥ २३ ॥ चउव्विहे पणिहाणे प० तं० मणपणिहाणे, वइपणिहाणे,
 कायपणिहाणे, उवगरणपणिहाणे । एवं गेरइयाणं पंचिंदियाणं जाव वेमाणियाणं ।
 चउव्विहे सुप्पणिहाणे प० तं० मणसुप्पणिहाणे जाव उवगरणसुप्पणिहाणे, एवं
 संजयमणुस्ताणवि । चउव्विहे दुप्पणिहाणे प० तं० मणदुप्पणिहाणे जाव उवगरण

दु०, एवं पंचिदियाणं जाव वेमाणियाणं ॥ २४ ॥ चत्तारि पुरिसजाया प० तं०
 आवायभद्दए णाममेगे णो संवासभद्दए, संवासभद्दए णाममेगे णो आवायभद्दए,
 एगे आवायभद्दएवि संवासभद्दएवि, एगे णो आवायभद्दए णो संवासभद्दए ।
 चत्तारि पुरिसजाया प० तं० अप्पणो णाममेगे वज्जं पासइ णो परस्स, परस्स णाम-
 मेगे वज्जं पासइ ४ । चत्तारि पुरिसजाया प० तं० अप्पणो णाममेगे वज्जं उदीरेइ
 णो परस्स ४ । चत्तारि पुरिसजाया प० तं० अप्पणो णाममेगे वज्जं उवसामेइ णो
 परस्स ४ । चत्तारि पुरिसजाया प० तं० अब्भुट्ठेइ णाममेगे णो अब्भुट्ठावेइ
 ४ एवं वेदइ णाममेगे णो वेदावेइ ४ एवं सक्कारेइ, सम्माणेइ ४ पूएइ वाएइ
 पडिपुच्छइ पुच्छइ वागरेइ ४ । चत्तारि पुरिसजाया प० तं० सुत्तधरे णाममेगे णो
 अत्थधरे, अत्थधरे णाममेगे णो सुत्तधरे, एगे सुत्तधरेवि अत्थधरेवि, एगे णो
 सुत्तधरे णो अत्थधरे ॥ २५ ॥ चमरस्स णं असुरिंदस्स असुरकुमाररण्णो चत्तारि
 लोगपाला प० तं० सोमे जमे वरुणे वेसमणे; एवं बल्लिस्सवि सोमे जमे वेसमणे
 वरुणे, धरणस्स कालवाले कोलवाले सेलवाले संखवाले, एवं भूयाणंदस्स कालवाले
 कोलवाले संखवाले सेलवाले, वेणुदेवस्स चित्ते विचित्ते चित्तपक्खे विचित्तपक्खे,
 वेणुदालिस्स चित्ते विचित्ते विचित्तपक्खे चित्तपक्खे । हरिकंतस्स पभे सुप्पभे पभ-
 कंते सुप्पभकंते; हरिस्सहस्स पभे सुप्पभे सुप्पभकंते पभकंते; अग्गिसिहस्स तेऊ
 तेउसिहे तेउकंते तेउप्पभे, अग्गिमाणवस्स तेऊ तेउसिहे तेउप्पभे तेउकंते, पुण्णस्स
 रूप रूपेसे रूपकंते रूपप्पभे, विसिट्ठस्स रूप रूपेसे रूपप्पभे रूपकंते । जलकंतस्स
 जले जलए जलकंते जलप्पभे । जलप्पहस्स जले जलए जलप्पहे जलकंते । अमिय-
 गइस्स तुरियगई खिप्पगई सीहगई सीहविककमगई । अमियवाहणस्स तुरियगई
 खिप्पगई सीहविककमगई सीहगई; वेलंबस्स काले महाकाले अंजणे रिट्ठे । पभेजणस्स
 काले महाकाले रिट्ठे अंजणे । घोसस्स आवत्ते वियावत्ते णदियावत्ते महाणदियावत्ते ।
 महात्रोसस्स आवत्ते वियावत्ते महाणदियावत्ते णदियावत्ते । सक्कस्स सोमे जमे वरुणे
 वेसमणे । ईसाणस्स सोमे जमे वेसमणे वरुणे, एवं एगंतरिया जाव अच्छुयस्स ॥ २६ ॥
 चउत्तिवहा वाउकुमारा प० तं० काले महाकाले वेलंबे पभेजणे । चउत्तिवहा देवा
 प० तं० भन्नवासी वाणमंतरा जोइसिया विमाणवासी ॥ २७ ॥ चउत्तिवहे पमाणे
 प० तं० दक्खप्पमाणे खेत्तप्पमाणे कालप्पमाणे भावप्पमाणे ॥ २८ ॥ चत्तारि
 दिसाकुमारिमहत्तरियाओ प० तं० रुया रूपसा सुरूवा रुयावई । चत्तारि

विञ्जुकुमारिमहत्तरियाओ प० तं० चित्ता चित्तकणगा सतेरा सोयामणी ॥२९॥
सकसस णं देविंदस्स देवरण्णो मज्झिमपरिसाए देवाणं चत्तारि पलिओवमाईं ठिई
प० । ईसाणस्स णं देविंदस्स देवरण्णो मज्झिमपरिसाए देवीणं चत्तारि पलिओव-
माईं ठिई प० ॥ ३० ॥ चउव्विहे संसारे दव्वसंसारे खेत्तसंसारे कालसंसारे भाव-
संसारे ॥ ३१ ॥ चउव्विहे दिट्ठिवाए प० तं० परिकम्मं सुत्ताईं पुव्वगए अणुजोगे
॥ ३२ ॥ चउव्विहे पायच्छित्ते, गाणपायच्छित्ते दंसणपायच्छित्ते चरित्तपायच्छित्ते ।
वियत्तकिच्चपायच्छित्ते चउव्विहे पायच्छित्ते, पड्डिसेवणापायच्छित्ते संजोयणापायच्छित्ते,
आरोवणापायच्छित्ते, पलिउंचणापायच्छित्ते ॥ ३३ ॥ चउव्विहे काले प० तं० पमाण-
काले अहाउयणिव्वत्तिकाले मरणकाले अद्धाकाले ॥ ३४ ॥ चउव्विहे पोग्गलपरि-
णामे, प० तं० वण्णपरिणामे गंधपरिणामे रसपरिणामे फासपरिणामे ॥ ३५ ॥ भरहेरवए सु
णं वासेसु पुरिमपच्छिमवज्जा मज्झिमगा बावीसं अरहंता भगवंतो चाउज्जामं धम्मं
पण्णवेंति तं० सव्वाओ पाणाइवायाओ वेरमणं, एवं मुसावायाओ, अदिण्णादाणाओ,
सव्वाओ बहिद्धादाणाओ वेरमणं । सव्वेसु णं महाविदेहेसु अरहंता भगवंतो चाउ-
ज्जामं धम्मं पण्णवयंति तं० सव्वाओ पाणाइवायाओ वेरमणं जाव सव्वाओ बहिद्धा-
दाणाओ वेरमणं ॥ ३६ ॥ चत्तारि दुग्गईओ प० तं० णेरइयदुग्गई, तिरिक्ख-
ज्जोणियदुग्गई, मणुस्सदुग्गई देवदुग्गई । चत्तारि सोग्गईओ प० तं० सिद्धसोग्गई, देव-
सोग्गई, मणुयसोग्गई, सुकुलपच्चायाई । चत्तारि दुग्गया प० तं० णेरइयदु० जाव
देवदुग्गया । चत्तारि सुमया प० तं० सिद्धसुग्गया जाव सुकुलपच्चायाया ॥ ३७ ॥ पढम-
समयजिणस्स णं चत्तारि कम्मंसा खीणा भवेंति तं० णाणावरणिज्जं, दंसणावरणिज्जं,
मोहणिज्जं, अंतराइयं । उप्पण्णणाणदंसणंधरेणं अरहा जिणे केवली चत्तारि कम्मंसे
वेदेति तं० वेयणिज्जं आउयं णामं गोयं । पढमसमयसिद्धस्स णं चत्तारि कम्मंसा
जुगवं खिज्जंति तं० वेयणिज्जं आउयं णामं गोयं ॥ ३८ ॥ चउहिं ठाणेहिं हासु-
प्पत्ती सिया तं० पासेत्ता भासेत्ता सुणेत्ता संभरेत्ता ॥ ३९ ॥ चउव्विहे अंतरे
प० तं० कट्ठंतरे पम्हंतरे लोहंतरे पत्थरंतरे, एवामेव इत्थीए वा पुरिसस्स वा,
चउव्विहे अंतरे प० तं० कट्ठतरसमाणे, पम्हंतरसमाणे, लोहंतरसमाणे, पत्थरं-
तरसमाणे ॥ ४० ॥ चत्तारि भयया प० तं० दिवसभयए जत्ताभयए उच्चत्तभयए
कब्बालभयए ॥ ४१ ॥ चत्तारि पुरिसजाया प० तं० संपागडपडिसेवी णाममेगे

णो पच्छण्णपडिसेवी, पच्छण्णपडिसेवी, णाममेगे णो संपागडपडिसेवी, एगे संपागड-
 पडिसेवीवि पच्छण्णपडिसेवीवि, एगे णो संपागडपडिसेवी णो पच्छण्णपडिसेवी
 ॥ ४२ ॥ चमरस्स णं असुरिंदस्स असुरकुमाररण्णो सोमस्स महारण्णो चत्तारि
 अग्गमहिंसीओ प० तं० कणगा कणगलया चित्तगुत्ता वसंधरा, एवं जमस्स वरु-
 णस्स वेसमणस्स । बलिस्स णं वइरोयणिंदस्स वइरोयणरण्णो, सोमस्स महारण्णो
 चत्तारि अग्गमहिंसीओ प० तं० भित्तगा सुभहा विज्जुया असणी, एवं जमस्स वेस-
 मणस्स वरुणस्स । धरणस्स णं णागकुमारिंदस्स णागकुमाररण्णो कालवालस्स महा-
 रण्णोचत्तारि अग्गमहिंसीओ प० तं० असोगा विमला सुप्पभा सुदंसणा, एवं जाव
 संखवालस्स । भूयाणंदस्स णं णागकुमारिंदस्स णागकुमाररण्णो कालवालस्स महारण्णो
 चत्तारि अग्गमहिंसीओ प० तं० सुणंदा सुभहा सुजाया सुमणा, एवं जाव सेल-
 वालस्स, जहा धरणस्स एवं सध्वेसिं दाहिणिंदलोगपालाणं जाव घोसस्स जहा
 भूयाणंदस्स एवं जाव महाघोसस्स लोगपालाणं । कालस्स णं पिसाईंदस्स पिसाय-
 रण्णो चत्तारि अग्गमहिंसीओ प० तं० कमला कमलप्पभा उप्पला सुदंसणा, एवं
 महाकालस्स वि । सुरुवस्स णं भूइंदस्स भूयरण्णो चत्तारि अग्गमहिंसीओ प० तं०
 रुववई बहुरुवा सुरुवा सुभगा, एवं पडिरुवस्स वि, पुण्णभदस्स णं जक्खिंदस्स
 जक्खरण्णो चत्तारि अग्गमहिंसीओ प० तं० पुण्णा बहुपुत्तिया उत्तमा तारगा, एवं
 माणिभदस्स वि । भीमस्स णं रक्खसिंदस्स रक्खसरण्णो चत्तारि अग्गमहिंसीओ
 प० तं० पउमा वसुमई कणगा रयणप्पभा । एवं महाभीमस्स वि किण्णरस्स णं
 किण्णरिंदस्स चत्तारि अग्गमहिंसीओ प० तं० वडिसा केउमई रइसेणा रइप्पभा,
 एवं किंपुरिसस्स वि सुपुरिसस्स णं किंपुरिसिंदस्स चत्तारि अग्गमहिंसीओ प० तं०
 रोहिणी णवमिया हिरि पुक्कवई, एवं महापुरिसस्स वि, अइकायस्स णं महोरगिंदस्स
 चत्तारि अग्गमहिंसीओ प० तं० भुयगा भुयगवई महाकच्छा फुडा, एवं महाकायस्स
 वि, गीयरइस्स णं गंधर्विंदस्स चत्तारि अग्गमहिंसीओ प० तं० सुघोसा विमला
 सुस्सरा सरस्सई, एवं गीयजसस्स वि, चंदस्स णं जोइसिंदस्स जोइसरण्णो चत्तारि
 अग्गमहिंसीओ प० तं० चंदप्पभा दोसिणाभा अच्चिमाली पभंकरा, एवं सूरस्स
 वि, णवरं सूरप्पभा दोसिणाभा अच्चिमाली पभंकरा । इंयालस्स णं महग्गहस्स
 चत्तारि अग्गमहिंसीओ प० तं० विजया वेजयंती जयंती अपराजिया । एवं

सन्वेसि महग्गहाणं जाव भावकेउरस्स । सक्कस्स णं देविंदस्स देवरण्णो सोमस्स महारण्णो चत्तारि अग्गमहिंसीओ प० तं० रोहिणी मयणा चित्ता सोमा, एवं जाव वेसमणस्स । ईसाणस्स णं देविंदस्स देवरण्णो सोमस्स महारण्णो चत्तारि अग्गमहिंसीओ प० तं० पुढवी राई रयणी विज्जू एवं जाव वरुणस्स ॥४३॥ चत्तारिगोरसविगईओ प० तं० खीरं दहिं सधिं णवणीयं, चत्तारि सिणेहविगईओ प० तं० तेल्लं घयं वसा णवणीयं, चत्तारि महाविगईओ प० तं० महुं मंसं मल्लं णवणीयं ॥ ४४ ॥ चत्तारि कूडागारा प० तं० गुत्तेणाममेगे गुत्ते, गुत्तेणाममेगे अगुत्ते, अगुत्ते णाममेगे गुत्ते, अगुत्ते णाममेगे अगुत्ते, एवामेव चत्तारि पुरिसजाया प० तं० गुत्तेणाममेगे गुत्ते ४ । चत्तारि कूडागारसालाओ प० तं० गुत्ता णाममेगा गुत्तदुवारा, गुत्ताणाममेगा अगुत्तदुवारा, अगुत्ता णाममेगा गुत्तदुवारा, अगुत्ता णाममेगा अगुत्तदुवारा, एवामेव चत्तारितीओ प० तं० गुत्ता णाममेगा गुत्तिंदिया, गुत्ता णाममेगा अगुत्तिंदिया ४ ॥ ४५ ॥ चउच्चिहा ओगाहणा प० तं० दब्बोगाहणा खेतोगाहणा कालो-गाहणा भावोगाहणा ॥ ४६ ॥ चत्तारि पण्णत्तीओ अंगबाहिरियाओ प० तं० चंद-पण्णत्ती सूरपण्णत्ती जंबुद्धीवपण्णत्ती, दीवसागरपण्णत्ती ॥ ४७ ॥

चउत्थं ठाणं बीओ उट्ठेसो

चत्तारि पडिसंलीणा प० तं० कोहपडिसंलीणे माणपडिसंलीणे मायापडिसंलीणे लोभपडिसंलीणे । चत्तारि अपडिसंलीणा प० तं० कोहअपडिसंलीणे जाव लोभ-अपडिसंलीणे । चत्तारि पडिसंलीणा प० तं० मणपडिसंलीणे, वहपडिसंलीणे, काय-पडिसंलीणे, इंदियपडिसंलीणे । चत्तारि अपडिसंलीणा प० तं० मणअपडिसंलीणे जाव इंदियं ॥ ४८ ॥ चत्तारि पुरिसजाया प० तं० दीणे णाममेगे दीणे, दीणे णाममेगे अदीणे, अदीणे णाममेगे दीणे, अदीणे णाममेगे अदीणे । चत्तारि पुरिस-जाया प० तं० दीणे णाममेगे दीणपरिणए, दीणे णाममेगे अदीणपरिणए, अदीणे णाममेगे दीणपरिणए, अदीणे णाममेगे अदीणपरिणए । चत्तारि पुरिसजाया प० तं० दीणे णाममेगे दीणरूवे ४, एवं दीणमणे दीणसंकप्पे दीणपण्णे दीणदिट्ठी दीणसीला-यारे दीणववहारे ४, चत्तारि पुरिसजाया प० तं० दीणे णाममेगे दीणपरक्कमे, दीणे णाममेगे अदीणपरक्कमे ४, एवं सन्वेसिं चउभंगो भाणियच्चो । चत्तारि पुरिसजाया प० तं० दीणे णाममेगे दीणवित्ती ४, एवं दीणजाई दीणभासी, दीणोभासी । चत्तारि

पुरिसजाया पण्णात्ता तं० दीणे णाममेगे दीणसेवी ४ । एवं दीणे णाममेगे दीणपरियाए ४ एवं दीणे णाममेगे दीणपरियाले ४ । सव्वत्थ चउभंगो ॥ ४९ ॥ चत्तारि पुरिसजाया प० तं० अञ्जे णाममेगे अञ्जे ४ । चत्तारि पुरिसजाया प० तं० अञ्जे णाममेगे अञ्जपरिणए ४ एवं अञ्जरूवे ४ अञ्जमणे ४ अञ्जसंकप्पे ४ अञ्जपण्णे ४ अञ्जदिट्ठी ४ अञ्जसीलायारे ४ अञ्जववहारे ४ अञ्जपरक्कमे ४ अञ्जविच्ची ४ अञ्जजाई ४ अञ्जभासी ४ अञ्ज ओभासी ४ अञ्जसेवी ४ एवं अञ्जपरियाए ४ अञ्जपरियाले ४ एवं सत्तरस भालावगा, जहा दीणे णं भणिया तथा अञ्जेणवि भाणियत्वा । चत्तारि पुरिसजाया प० तं० अञ्जे णाममेगे अञ्जभावे, अञ्जे णाममेगे अणञ्जभावे, अणञ्जे णाममेगे अञ्जभावे, अणञ्जे णाममेगे अणञ्जभावे ॥ ५० ॥ चत्तारि उसभा प० तं० जाइसंपण्णे कुलसंपण्णे बलसंपण्णे रूवसंपण्णे, एवामेव चत्तारि पुरिसजाया प० तं० जाइसंपण्णे कुलसंपण्णे बलसंपण्णे रूवसंपण्णे । चत्तारि उसभा प० तं० जाइसंपण्णे णाममेगे णो कुलसंपण्णे, कुलसंपण्णे णाममेगे णो जाइसंपण्णे, एगे जाइसंपण्णेवि, कुलसंपण्णेवि एगे णो जाइसंपण्णे णो कुलसंपण्णे । एवामेव चत्तारि पुरिसजाया प० तं० जाइसंपण्णे णाममेगे णो कुलसंपण्णे ४ । चत्तारि उसभा प० तं० जाइसंपण्णे णाममेगे णो बलसंपण्णे ४ एवामेव चत्तारि पुरिसजाया प० तं० जाइसंपण्णे णाममेगे णो बलसंपण्णे ४ । चत्तारि उसभा प० तं० जाइसंपण्णे णाममेगे णो रूवसंपण्णे ४ एवामेव चत्तारि पुरिसजाया प० तं० जाइसंपण्णे णाममेगे णो रूवसंपण्णे ४ । चत्तारि उसभा प० तं० कुलसंपण्णे णाममेगे णो बलसंपण्णे ४ । एवामेव चत्तारि पुरिसजाया प० तं० कुलसंपण्णे णाममेगे णो बलसंपण्णे ४ चत्तारि उसभा प० तं० कुलसंपण्णे णाममेगे णो रूवसंपण्णे ४ एवामेव चत्तारि पुरिसजाया प० तं० कुलसंपण्णे णाममेगे णो रूवसंपण्णे ४ । चत्तारि उसभा प० तं० बलसंपण्णे णाममेगे णो रूवसंपण्णे ४ एवामेव चत्तारि पुरिसजाया प० तं० बलसंपण्णे णाममेगे णो रूवसंपण्णे ४ ॥ ५१ ॥ चत्तारि हत्थी प० तं० भद्दे मंदे मिए संकिण्णे, एवामेव चत्तारि पुरिसजाया प० तं० भद्दे मंदे मिए संकिण्णे । चत्तारि हत्थी प० तं० भद्दे णाममेगे भद्दमणे, भद्दे णाममेगे मंदमणे, भद्दे णाममेगे मियमणे, भद्दे णाममेगे संकिण्णमणे, एवामेव चत्तारि पुरिसजाया प० तं० भद्दे णाममेगे भद्दमणे, भद्दे णाममेगे मंदमणे, भद्दे णाममेगे

मियमणे, भदे णाममेगे संकिण्णमणे । चत्तारि हत्थी प० तं० मंदे णाममेगे भद्दमणे, मंदे णाममेगे मंदमणे, मंदे णाममेगे मियमणे, मंदे णाममेगे संकिण्णमणे, एवामेव चत्तारि पुरिसज्जाया प० तं० मंदे णाममेगे भद्दमणे, तं चेंव । चत्तारि हत्थी प० तं० मिए णाममेगे भद्दमणे, मिए णाममेगे मंदमणे, मिए णाममेगे मियमणे, मिए णाममेगे संकिण्णमणे, एवामेव चत्तारि पुरिसज्जाया प० तं० मिए णाममेगे भद्दमणे, तं चेंव । चत्तारि हत्थी प० तं० संकिण्णे णाममेगे भद्दमणे, संकिण्णे णाममेगे मंदमणे, संकिण्णे णाममेगे मियमणे, संकिण्णे णाममेगे संकिण्णमणे । एवामेव चत्तारि पुरिसज्जाया प० तं० संकिण्णे णाममेगे भद्दमणे, तं चेंव जाव संकिण्णे णाममेगे संकिण्णमणे । गाथा=मधुगुलियपिंगलक्खो, अणुपुव्वसुजायदीहणंगूलो; पुरओ उदग्गधीरो, सव्वंगसमाहिओ भद्दो ॥ ५२ ॥ (१) चलवहलविसमचम्मो थूलसिरो थूलएण पेएण; थूलणहदंतवालो, हरिपिंगल्लोयणो मंदो ॥ ५३ ॥ (२) तणुओ तणुयग्गीवो, तणयतओ तणुयदंतणहवालो; मीरू तत्थुट्ठिवग्गो; तासी य भवे मिए णामं ॥ ५४ ॥ (३) एएसिं हत्थीणं, थोवं थोवं तु जो अणुहरइ हत्थी; रूवेण व सीलेण व, सो संकिण्णो त्ति णायव्वो ॥ ५५ ॥ (४) भद्दो मज्जइ सरए, मंदो उण मज्जए वसंतम्मि; मिउ मज्जइ हेमंते, संकिण्णो सव्वकालम्मि (५) ॥ ५६ ॥ चत्तारि विकहाओ प० तं० इत्थिकहा भत्तकहा देसकहा रायकहा । इत्थिकहा चउव्विहा प० तं० इत्थीणं जाइकहा, इत्थीणं कुलकहा, इत्थीणं रूवकहा, इत्थीणं णेवत्थकहा । भत्तकहा चउव्विहा प० तं० भत्तस्स आवावकहा, भत्तस्स णिव्वावकहा, भत्तस्स आरंभकहा, भत्तस्स णिट्ठाणकहा । देसकहा चउव्विहा प० तं० देसविहिकहा, देसविकप्पकहा, देसच्छंदकहा, देसणेवत्थकहा । रायकहा चउव्विहा प० तं० रण्णो अइयाणकहा रण्णो णिज्जाणकहा, रण्णो बलवाहणकहा, रण्णो कोसकोट्टागारकहा ॥ ५७ ॥ चउव्विहा धम्मकहा प० तं० अक्खेवणी विक्खेवणी संवेयणी णिव्वेयणी । अक्खेवणी कहा चउव्विहा प० तं० आयारउक्खेवणी ववहारउक्खेवणी पण्णत्तिउक्खेवणी दिट्ठिवायअक्खेवणी । विक्खेवणी कहा चउव्विहा प० तं० ससमयं कहेइ, ससमयं कहेत्ता परसमयं कहेइ, परसमयं कहेत्ता ससमयं ठावइत्ता भवइ, सम्मावायं कहेइ, सम्मावायं कहेत्ता मिच्छावायं कहेइ, मिच्छावायं कहेत्ता सम्मावायं ठावइत्ता भवइ । संवेयणी कहा चउव्विहा प० तं०

इहलोगसंवेयणी परलोगसंवेयणी आयसरोरसंवेयणी परसरीरसंवेयणी । णिव्वेयणी क्हा चउत्तिहा प० तं० इहलोगे दुच्चिण्णा कम्मा इहलोगे दुहफलविवागसंजुत्ता भवंति, इहलोगे दुच्चिण्णा कम्मा परलोगे दुहफलविवागसंजुत्ता भवंति, परलोगे दुच्चिण्णा कम्मा इहलोगे दुहफलविवागसंजुत्ता भवंति, परलोगे दुच्चिण्णा कम्मा परलोगे दुहफलविवागसंजुत्ता भवंति । इहलोगे सुच्चिण्णाकम्मा इहलोगे सुहफलविवागसंजुत्ता भवंति, इहलोगे सुच्चिण्णा कम्मा परलोगे सुहफलविवागसंजुत्ता भवंति, एवं चउमंगे तद्देव ॥ ५८ ॥ चत्तारि पुरिसजाया प० तं० किसे णाममेगे किसे, किसे णाममेगे दढे, दढे णाममेगे किसे, दढे णाममेगे दढे । चत्तारि पुरिसजाया प० तं० किसे णाममेगे किससरीरे, किसे णाममेगे दढसरीरे, दढे णाममेगे किससरीरे, दढे णाममेगे दढसरीरे । चत्तारि पुरिसजाया प० तं० किससरीरस्स णाममंगस्स णाणदंसणे समुप्पज्जइ णो दढसरीरस्स, दढसरीरस्स णाममंगस्स णाणदंसणे समुप्पज्जइ णो किससरीरस्स, एगस्स किससरीरस्स वि णाणदंसणे समुप्पज्जइ दढसरीरस्स वि, एगस्स णो किससरीरस्स णाणदंसणे समुप्पज्जइ णो दढसरीरस्स ॥ ५९ ॥ चउहिं ठाणेहिं णिग्गंथाण वा, णिग्गंथीण वा अस्सिं समयंसि अइसेसे णाणदंसणे समुपज्जिउकामेवि णो समुप्पज्जेज्जा तं० अभिक्खणं अभिक्खणं इत्थिक्कहं भत्तक्कहं देसक्कहं रायक्कहं क्हेत्ता भवइ, विवेगेण विउसग्गेणं णो सम्ममप्पाणं भावेत्ता भवइ, पुव्वरत्तावरत्तकालसमयंसि णो धम्मजागरियं जागरित्ता भवइ, फासुयस्स एसणिज्जस्स उच्छस्स सामुदाणियस्स णो सम्मं गवेसइत्ता भवइ, इच्चेएहिं चउहिं ठाणेहिं णिग्गंथाण वा णिग्गंथीण वा जाव णो समुप्पज्जेज्जा । चउहिं ठाणेहिं णिग्गंथाण वा णिग्गंथीण वा अइसेसे णाणदंसणे समुपज्जिउकामे समुप्पज्जेज्जा तं० इत्थिक्कहं भत्तक्कहं देसक्कहं रायक्कहं णो क्हेत्ता भवइ, विवेगेण विउसग्गेणं सम्ममप्पाणं भावेत्ता भवइ, पुव्वरत्तावरत्तकालसमयंसि धम्मजागरियं जागरित्ता भवइ, फासुयस्स एसणिज्जस्स उच्छस्स सामुदाणियस्स सम्मं गवेसइत्ता भवइ, इच्चेएहिं चउहिं ठाणेहिं णिग्गंथाण वा णिग्गंथीण वा जाव समुप्पज्जेज्जा ॥ ६० ॥ णो कप्पइ णिग्गंथाण वा णिग्गंथीण वा चउहिं महापाडिवएहिं सज्झायं करेत्तए तं० आसाढपाडिवए इंदमहापाडिवए कस्सियपाडिवए सुमिम्हपाडिवए । णो कप्पइ णिग्गंथाण वा णिग्गंथीण वा चउहिं संझाहिं सज्झायं करेत्तए तं० पढमाए पच्छिमाए मज्झण्हे अद्धरत्ते । कप्पइ णिग्गंथाण वा णिग्गं-

धीण वा चाउक्कालं सञ्जायं करेत्तए तं० पुव्वण्हे अवरण्हे पओसे पव्वचूसे ॥६१॥
चउव्विहा लोगट्टिहं प० तं० आगासपइट्टिए वाए, वायपइट्टिए उदही, उदहिपइट्टिया
पुढ्नी, पुढ्विपइट्टिया तसा थावरा पाणा ॥ ६२ ॥ चत्तारि पुरिसजाया प० तं०
तहे णाममेगे गोतहे णाममेगे सोवत्थी णाममेगे पहाणे णाममेगे ॥ ६३ ॥ चत्तारि
पुरिसजाया प० तं० आयंतकरे णाममेगे णो परंतकरे, परंतकरे णाममेगे णो
आयंतकरे, एगे आयंतकरेवि परंतकरेवि, एगे णो आयंतकरे णो परंतकरे । चत्तारि
पुरिसजाया प० तं० आयंतमे णाममेगे णो परंतमे परंतमे णाममेगे णो आयंतमे
४ । चत्तारि पुरिसजाया प० तं० आयंदमे णाममेगे णो परंदमे, परंदमे णाममेगे
णो आयंदमे, एगे आयंदमेवि परंदमेवि, एगे णो आयंदमे णो परंदमे ॥ ६४ ॥
चउव्विहा गरहा प० तं० उवसंपब्बामित्ति एगा गरहा, वित्तिगिच्छामित्ति एगा
गरहा, जं किंत्तिमिच्छामित्ति एगा गरहा, एवंपि पण्णत्ते एगा गरहा ॥ ६५ ॥
चत्तारि पुरिसजाया प० तं० अप्पणो णाममेगे अलमंथू भवइ णो परस्स, परस्स णाम-
मेगे अलमंथू भवइ णो अप्पणो, एगे अप्पणोवि अलमंथू भवइ परस्सवि, एगे णो
अप्पणो अलमंथू भवइ णो परस्स ॥ ६६ ॥ चत्तारि मग्गा प० तं० उज्जू णाममेगे
उज्जू, उज्जू णाममेगे वंके, वंके णाममेगे उज्जू, वंके णाममेगे वंके । एवामेव
चत्तारि पुरिसजाया प० तं० उज्जू णाममेगे उज्जू ४ । चत्तारि मग्गा प० तं० खेमे
णाममेगे खेमे, खेमे णाममेगे अखेमे ४ । एवामेव चत्तारि पुरिसजाया प० तं० खेमे
णाममेगे खेमे ४ । चत्तपरि मग्गा प० तं० खेमे णाममेगे खेमरूवे, खेमे णाममेगे
अखेमरूवे ४ । एवामेव चत्तारि पुरिसजाया प० तं० खेमे णाममेगे खेमरूवे ४
॥६७॥ चत्तारि संवुक्का प० तं० वामे णाममेगे वामावत्ते, वामे णाममेगे दाहिणावत्ते,
दाहिणे णाममेगे वामावत्ते, दाहिणे णाममेगे दाहिणावत्ते, एवामेव चत्तारि पुरि-
सजाया प० तं० वामे णाममेगे वामावत्ते ४ । चत्तारि धूमसिहाओ प० तं० वामा
णाममेगा वामावत्ता ४ । एवामेव चत्तारित्थिओ प० तं० वामा णाममेगा
वामावत्ता ४ । चत्तारि अग्गिसिहाओ प० तं० वामा णाममेगा वामावत्ता ४ ।
एवामेव चत्तारित्थिओ प० तं० वामा णाममेगा वामावत्ता ४ । चत्तारि वाय-
मंडलिया, प० तं० वामा णाममेगा वामावत्ता ४ । एवामेव चत्तारित्थिओ प० तं०
वामा णाममेगा वामावत्ता ४ । चत्तारि वणखंडा प० तं० वामे णाममेगे वामावत्ते

४ । एवामेव चत्तारि पुरिसजाया प० तं० वामे णाममेगे वामावत्ते ४ ॥ ६८ ॥
 चउहिं ठाणेहिं णिग्गंथे णिग्गंथि आलवमाणे वा संलवमाणे वा णाइक्कमइ, तं० पंथं
 पुच्छमाणे वा पंथं देसमाणे वा असणं वा पाणं वा खाइमं वा साइमं वा दलयमाणे
 वा, दलावेमाणे वा ॥ ६९ ॥ तमुक्कायस्स णं चत्तारि णामधेज्जा प० तं० तमेइ वा,
 तमुक्काएइ वा, अंधयारेइ वा, महंधयारेइ वा । तमुक्कायस्स णं चत्तारि णामधेज्जा
 प० तं० लोग्गंधयारेइ वा, लोगतमसेइ वा, देवंधयारेइ वा, देवतमसेइ वा । तमु-
 क्कायस्स णं चत्तारि णामधेज्जा प० तं० वायफलिहेइ वा, वायफलिहखोभेइ वा, देव-
 रण्णेइ वा, देववूहेइ वा । तमुक्काए णं चत्तारि कप्पे आयरित्ता चिट्ठइ तं० सोहम्मी-
 साणं सणंकुमारमारहिंदं ॥ ७० ॥ चत्तारि पुरिसजाया प० तं० संपागडपडिसेवी
 णाममेगे, पच्छण्णपडिसेवी णाममेगे, पडुप्पण्णंदी णाममेगे, गिस्सरण्णंदी णाममेगे
 ॥ ७१ ॥ चत्तारि सेणाओ प० तं० जइत्ता णाममेगा णो पराजिणित्ता, पराजिणित्ता
 णाममेगा णो जइत्ता, एसा जइत्तां वि पराजिणित्तावि, एसा णो जइत्ता णो परा-
 जिणित्ता । एवामेव चत्तारि पुरिसजाया प० तं० जइत्ता णाममेगे णो पराजिणित्ता
 ४ । चत्तारि सेणाओ प० तं० जइत्ता णाममेगा जयइ, जइत्ता णाममेगा पराजिणइ
 पराजिणित्ता णाममेगा जयइ, पराजिणित्ता णाममेगा पराजिणइ, एवामेव चत्तारि
 पुरिसजाया प० तं० जइत्ता णाममेगे जयइ ॥ ७२ ॥ चत्तारि केयणा प० तं०
 वंसीमूलकेयणाए, मंदविसाणकेयणाए, गोमुत्तिकेयणाए, अवलेहणियकेयणाए ।
 एवामेव चउव्विहा माया प० तं० वंसीमूलकेयणासमाणा जाव अवलेहणिया-
 केयणासमाणा, वंसीमूलकेयणासमाणं मायं अणुप्पविट्ठे जीवे कालं करेइ णेरइएसु
 उववज्जइ, मंदविसाणकेयणासमाणं मायमणुप्पविट्ठे जीवे कालं करेइ तिरिक्ख-
 जोणिएसु उववज्जइ गोमुतिअं जाव कालं करेइ मणुस्सेसु उववज्जइ, अवलेहणिया
 जाव देवेसु उववज्जइ ॥ ७३ ॥ चत्तारि थंभा प० तं० सेलथंभे अट्ठिथंभे दारु-
 थंभे, तिणिसलयाथंभे, एवामेव चउव्विहे माणे प० तं० सेलथंभसमाणे जाव तिणि-
 सलयाथंभसमाणे । सेलथंभसमाणं माणं अणुप्पविट्ठे जीवे कालं करेइ णेरइएसु
 उववज्जइ, एवं जाव तिणिसलयाथंभसमाणं माणं अणुप्पविट्ठे जीवे कालं करेइ
 देवेसु उववज्जइ ॥ ७४ ॥ चत्तारि वत्था प० तं० किमिरागरत्ते कदमरागरत्ते
 खंजणरागरत्ते हलिहरागरत्ते, एवामेव चउव्विहे लोभे प० तं० किमिरागरत्तवत्थ-

समाणे कद्मरागरत्तवत्थसमाणे खंजणरागरत्तवत्थसमाणे हलिहरागरत्तवत्थसमाणे,
 किमिरागरत्तवत्थसमाणं लोभमणुप्पविट्ठे जीवे कालं करेइ णेरइएसु उववज्जइ, तहेव
 जाव हलिहरागरत्तवत्थसमाणं लोभमणुप्पविट्ठे जीवे कालं करेइ देवेसु उववज्जइ
 ।। ७५ ।। चउव्विहे संसारे प० तं० णेरइयसंसारे जाव देवसंसारे । चउव्विहे
 आउए प० तं० णेरइयआउए जाव देवाउए । चउव्विहे भवे प० तं० णेरइयभवे
 जाव देवभवे ॥ ७६ ॥ चउव्विहे आहारे प० तं० असणे पाणे खाइमे साइमे ।
 चउव्विहे आहारे प० तं० उवक्खरसंपण्णे, उवक्खडसंपण्णे, सभावसंपण्णे, परि-
 जुसियसंपण्णे ॥ ७७ ॥ चउव्विहे बंधे प० तं० पगइबंधे ठिइबंधे अणुभावबंधे
 पएसबंधे । चउव्विहे उवक्कमे प० तं० बंधणोवक्कमे उदीरणोवक्कमे उवसमणोवक्कमे
 विप्परिणामणोवक्कमे । बंधणोवक्कमे चउव्विहे प० तं० पगइबंधणोवक्कमे ठिइबंधणो-
 वक्कमे अणुभावबंधणोवक्कमे पएसबंधणोवक्कमे । उदीरणोवक्कमे चउव्विहे प० तं०
 पगइउदीरणोवक्कमे ठिइउदीरणोवक्कमे अणुभावउदीरणोवक्कमे पएसउदीरणोवक्कमे ।
 उवसामणोवक्कमे चउव्विहे प० तं० पगइउवसामणोवक्कमे ठिइअणुभावपएसउव-
 सामणोवक्कमे । विप्परिणामणोवक्कमे चउव्विहे प० तं० पगइठिइअणुभावपएस-
 विप्परिणामणोवक्कमे । चउव्विहे अप्पाबहुए प० तं० पगइअप्पाबहुए ठिइअणु-
 भावपएसअप्पाबहुए । चउव्विहे संकमे, पगइसंकमे ठिइअणुभावपएससंकमे ।
 चउव्विहे णिधत्ते प० तं० पगइणिधत्ते, ठिइअणुभावपएसणिधत्ते । चउव्विहे णिगा-
 इए प० तं० पगइणिगाइए, ठिइणिगाइए, अणुभावणिगाइए, पएसणिगाइए
 ॥ ७८ ॥ चत्तारि एकका प० तं० दव्विए एककए माउयएक्कए पज्जयएक्कए
 संगहएक्कए । चत्तारि कई प० तं० दव्वियकई माउयकई पज्जवकई संगहकई । चत्तारि
 सव्वा प० तं० णामसव्वए उवणसव्वए आएससव्वए णिरवसेसव्वए ॥ ७९ ॥ माणु-
 सुत्तरस्स णं पव्वयस्स चउद्विसिं चत्तारि कूडा प० तं० रयणे रयणुच्चए सव्वरयणे
 रयणसंचए ॥ ८० ॥ जंबुदीवे २ भरहेरवएसु वासेसु तीयाए उस्तप्पिणीए सुसमसु-
 समाए समाए चत्तारि सागरोवमकोडाकोडीओ कालो हुत्था । जंबुदीवे २ भरहेरवए
 इमीसे ओसप्पिणीए दुसमसुसमाए समाए जहण्णपए णं चत्तारि सागरोवमकोडा-
 कोडीओ कालो हुत्था । जंबुदीवे दीवे जाव आगमिस्ताए उस्तप्पिणीए सुसम-
 सुसमाए समाए चत्तारि सागरोवमकोडाकोडीओ कालो भविस्सइ । जंबुदीवे दीवे

देवकुरुउत्तरकुरुवज्जाओ चत्तारि अकम्मभूमीओ प० तं० हेमवए एरण्णवए हरि-
 वासे रम्मगवासे, चत्तारि वट्टवेयट्टपव्वया प० तं० सहावई वियडावई गंधावई
 मालवंतपरियाए । तत्थ णं चत्तारि देवा महिद्धिया जाव पलिओवमठिईया परि-
 वसंति तं० साई पभासे अरुणे पउमे । जंबुद्वीवे दीवे महाविदेहेवासे चउव्विहे प०
 तं० पुव्वविदेहे, अवरविदेहे, देवकुरा, उत्तरकुरा । सव्वेवि णं णिसढणीलवंतवास-
 हरपव्वया चत्तारि जोयणसयाई उट्टु उच्चत्तेणं, चत्तारि गाउयसयाई उव्वेहेणं प० ।
 जंबुद्वीवे दीवे मंदरस्स पव्वयस्स पुरत्थिमेणं सीयाए महाणईए उत्तरकूले चत्तारि
 वक्खारपव्वया प० तं० चित्तकूडे पम्हकूडे णल्लिणकूडे एगसेले । जंबूमंदरपुरत्थिमेणं
 सीयाए महाणईए दाहिणकूले चत्तारि षक्खारपव्वया प० तं० तिकूडे वेसमणकूडे
 अंजणे मायंजणे । जंबूमंदरस्स पच्चत्थिमेणं सीओयाए महाणईए दाहिणकूले चत्तारि
 वक्खारपव्वया प० तं० अंकावई पम्हावई आसीविसे सुहावहे । जंबूमंदरस्स
 पच्चत्थिमेणं सीओयाए महाणईए उत्तरकूले चत्तारि वक्खारपव्वया प० तं० चंद-
 पव्वए सूरपव्वए देवपव्वए णागपव्वए । जंबुद्वीवे दीवे मंदरस्स पव्वयस्स चउसु
 विदिसासु चत्तारि वक्खारपव्वया प० तं० सोमणसे विज्जुप्पभे गंधमायणे माल-
 वंते । जंबुद्वीवे दीवे महाविदेहे वासे जहण्णपए चत्तारि अरिहंता, चत्तारि चक्खवट्ठी,
 चत्तारि बलदेवा, चत्तारि वामुदेवा, उप्पज्जिसु वा उप्पज्जंति वा उप्पज्जिस्संति
 वा । जंबुद्वीवे दीवे मंदरे पव्वए चत्तारि वणा प० तं० भद्रसालवणे, णंदणवणे,
 सोमणसवणे, पंडगवणे । जंबूमंदरपव्वथपंडगवणे चत्तारि अभिसेगसिलाओ प० तं०
 पंडुकंबलसिला, अइपंडुकंबलसिला, रत्तकंबलसिला, अइरत्तकंबलसिला । मंदरचूलि-
 या णं उवरिं चत्तारि जोयणाई विक्खंभेणं पण्णत्ता । एवं धायइस्खंडीवपुरत्थिमड्ढेवि
 कालं आई करित्ता जाव मंदरचूलियत्ति । एवं जाव पुक्खारवरदीवपच्चत्थिमड्ढे जाव
 मंदरचूलियत्ति, जंबुद्वीवगआवस्सणं तु कालाओ चूलिया जाव धायइस्खंडे पुक्खर-
 वरे य पुव्वावरे पासे । जंबुद्वीवस्स णं दीवस्स चत्तारि दारा प० तं० विजए वेजयंते
 जयंते अपराजिए, ते णं दारा चत्तारि जोयणाई विक्खंभेणं तावइयं चेव पवेसेण
 प०, तत्थ णं चत्तारि देवा महिद्धिया जाव पलिओवमठिईया परिवसंति तं० विजए
 वेजयंते जयंते अपराजिए ॥ ८१ ॥ जंबुद्वीवे दीवे मंदरस्स पव्वयस्स दाहिणेणं
 चुल्लहिमवंतस्स वासहरपव्वयस्स चउसु विदिसासु लवणसमुई तिण्णि तिण्णि जोयण-

सयाई ओगाहेत्ता एत्थणं चत्तारि अंतरदीवा प० तं० एगरूयदीवे आभासियदीवे
वेसाणियदीवे णंगोलियदीवे, तेसु णं दीवेसु चउव्विहा मणुस्सा परिवसंति, एगरूया
आभासिया वेसाणिया णंगोलिया । तेसि णं दीवाणं चउसु विदिसासु लवणसमुद्दं
चत्तारि चत्तारि जोयणसयाई ओगाहेत्ता एत्थ णं चत्तारि अंतरदीवा प० तं० ह्य-
कण्णदीवे, गयकण्णदीवे गोकण्णदीवे सक्कुलिकण्णदीवे । तेसु णं दीवेसु चउव्विहा
मणुस्सा परिवसंति तं० ह्यकण्णा गयकण्णा गोकण्णा सक्कुलिकण्णा । तेसि णं दीवाणं
चउसु विदिसासु लवणसमुद्दं पंच पंच जोयणसयाई ओगाहेत्ता एत्थ णं चत्तारि
अंतरदीवा प० तं० आर्यसमुहदीवे मंदमुहदीवे अओमुहदीवे गोमुहदीवे । तेसु णं
दीवेसु चउव्विहा मणुस्सा भाणियव्वा तेसि णं दीवाणं चउसु विदिसासु लवणसमुद्दं
छ छ जोयणसयाई ओगाहेत्ता एत्थ णं चत्तारि अंतरदीवा प० तं० आसमुहदीवे
हत्थिमुहदीवे सीहमुहदीवे वग्घमुहदीवे, तेसु णं दीवेसु मणुस्सा भाणियव्वा । तेसि णं
दीवाणं चउसु विदिसासु लवणसमुद्दं सत्त सत्त जोयणसयाई ओगाहेत्ता एत्थ णं चत्तारि
अंतरदीवा प० तं० आसकण्णदीवे हत्थिकण्णदीवे अकण्णदीवे कण्णपाउरणदीवे,
तेसु णं दीवेसु मणुस्सा भाणियव्वा । तेसि णं दीवाणं चउसु विदिसासु लवणसमुद्दं
अद्दुद्ध जोयणसयाई ओगाहेत्ता एत्थ णं चत्तारि अंतरदीवा प० तं० उक्कामुहदीवे
मेहमुहदीवे विज्जुमुहदीवे विज्जुदंतदीवे, तेसु णं दीवेसु मणुस्सा भाणियव्वा । तेसि णं
दीवाणं चउसु विदिसासु लवणसमुद्दं णव णव जोयणसयाई ओगाहेत्ता एत्थणं चत्तारि
अंतरदीवा प० तं० घणदंतदीवे लद्धदंतदीवे गूढदंतदीवे सुद्धदंतदीवे, तेसु णं दीवेसु
चउव्विहा मणुस्सा परिवसंति तं० घणदंता लद्धदंता गूढदंता सुद्धदंता । जंबुदीवे
दीवे मंदरस्स पव्वयस्स उत्तरेणं सिहरिस्स वासहरपव्वयस्स चउसु विदिसासु लवण-
समुद्दं तिण्णि तिण्णि जोयणसयाई ओगाहेत्ता एत्थणं चत्तारि अंतरदीवा प० तं०
एगरूयदीवे सेसं तहेव गिरवसेसं भाणियव्वं जाव सुद्धदंता ॥ ८२ ॥ जंबुदीवस्स
णं दीवस्स बाहिरिल्लाओ वेइयंताओ चउदिसिं लवणसमुद्दं पंचाणउज्जोयणसहस्साई
ओगाहेत्ता एत्थणं महइमहालया महाल्लिजरसंठाणसंठिया चत्तारि महापायाला प०
वलयामुहे केउए जूए ईसरे, तत्थणं चत्तारि देवा महिद्धिया जाव तं० पलिओवम-
ळिईया परिवसंति तं० काले महाकाले वेळंवे पभंजणे ॥ ८३ ॥ जंबुदीवस्स णं दीवस्स
बाहिरिल्लाओ वेइयंताओ चउदिसिं लवणसमुद्दं बायालीसं २ जोयणसहस्साई आगा-

हिता एत्थणं चउण्हं वेलंधरणागराईणं चत्तारि आवासपव्वया प० तं० गोथूमे उदय-
भासे संखे दगसीमे, तत्थ णं चत्तारि देवा महिद्धिया जाव पलिओवमठिईयां परिव-
संति तं० गोथूमे सिवए संखे मणोसिलए । जंबुदीवस्स णं दीवस्स बाहिरिद्धाओ वेइय-
ताओ चउसु विदिसासु लवणसमुद्दं बायालीसं २ जोयणसहस्साइं ओगाहेत्ता एत्थणं
चउण्हं अणुवेलंधरणागराईणं चत्तारि आवासपव्वया प० तं० कक्कोडए विज्जुप्पमे
केलासे अरुणप्पमे । तत्थ णं चत्तारि महिद्धिया जाव पलिओवमठिईयां परिव-
संति तं० कक्कोडए क्हमए केलासे अरुणप्पमे ॥८४॥ लवणे णं समुद्दे चत्तारि चंदा
पभासिंमु वा पभासंति वा पभासिस्संति वा, चत्तारि सूरिया तविंसु वा तवंति वा तवि-
स्संति वा, चत्तारि कत्तियाओ जाव चत्तारि भरणीओ, चत्तारि भग्गी जाव चत्तारि
ज्जमा, चत्तारि अंगारया जाव चत्तारि भावकेऊ ॥ ८५ ॥ लवणस्स णं समुद्दस्स
चत्तारि दारा प० तं० विजए वेजयंते जयंते अपराजिए । ते णं दारा णं चत्तारि
जोयणाइं विक्खंभेणं तावइयं चैव पवेसेणं पण्णत्ता, तत्थ णं चत्तारि देवा महिद्धिया
जाव पलिओवमठिईयां परिवसंति विजए जाव अपराजिए ॥८६॥ धायइल्लंहे णं
दीवे चत्तारि जोयणसयसहस्साइं चक्कवालविक्खंभेणं, प० ॥८७॥ जंबुदीवस्स णं
दीवस्स बहिया चत्तारि भरहाइं चत्तारि एरवयाइं, एवं जहा सद्दुद्देसए तहेव गिरव-
सेसं भाणियव्वं, जाव चत्तारि मंदरा चत्तारि मंदरचूलियाओ ॥ ८८ ॥ णंदीस-
रवरस्स णं दीवस्स चक्कवालविक्खंभस्स बहुमज्झदेसभाए चउद्धिसिं चत्तारि
अंजणगपव्वया प० तं० पुरत्थिमिल्ले अंजणगपव्वए दाहिणिल्ले अंजणगपव्वए,
पच्चत्थिमिल्ले अंजणगपव्वए उत्तरिल्ले अंजणगपव्वए, ते णं अंजणगपव्वया
चउरासीइजोयणसहस्साइं उद्धं उच्चत्तेणं एगं जोयणसहस्सं उव्वेहेणं मूले दसजोयण-
सहस्साइं विक्खंभेणं तदणंतरं च णं मायाए मायाए परिहाएमाणा परिहाएमाणा
उवरिमेणं जोयणसहस्सं विक्खंभेणं प०, मूले इक्कतीसं जोयणसहस्साइं उच्चतेवीसे
जोयणसए परिकखेवेणं उवरिं तिण्णि २ जोयणसहस्साइं एगं च छावट्ठं जोयणसयं
परिकखेवेणं मूले विन्डिण्णा मज्जे संखित्ता उप्पि तणुया गोपुच्छसंठाणसंठिया
सव्वअंजणमया अच्छा जाव पडिरूवा । तेसि णं अंजणगपव्वयाणं उवरिं बहु-
समरमणिज्जभूमिभागा प० तेसि णं बहुसमरमणिज्जभूमिभागाणं बहुमज्झदेसभागे
चत्तारि सिद्धाययणा पण्णत्ता, ते णं सिद्धाययणा एगं जोयणसयं आयामेणं

पण्णत्ता पण्णासं जोयणाइं विकखंभेणं वावत्तारि जोयणाइं उद्धं उच्चत्तेणं, तेसिं सिद्धायय-
णाणं चउदिसिं चत्तारि दारा प० तं०-देवदारे असुरदारे णागदारे सुवण्णदारे,
तेसुणं दारेसु चउव्विहा देवा परिवसंति तं० देवा असुरा णागा सुवण्णा, तेसिणं
दाराणं पुरओ चत्तारि मुहमंडवा पं०, तेसिणं मुहमंडवाणं पुरओ चत्तारि पेच्छा-
वरमंडवा प०, तेसिणं पेच्छावरमंडवाणं बहुमज्झदेसभागे चत्तारि वइरामया
अक्खाडगा प०, तेसि णं वइरामयाणं अक्खाडगाणं बहुमज्झदेसभागे चत्तारि मणि-
पेढियाओ प०, तासि णं मणिपेढियाणं उवरिं चत्तारि सीहासणा पण्णत्ता, तेसि
णं सीहासणाणं उवरिं चत्तारि विजयदूसा पण्णत्ता, तेसि णं विजयदूसाराणं बहु-
मज्झदेसभागे चत्तारि वइरामया अंकुसा प० तेसु णं वइरामएसु अंकुसेसु चत्तारि
कुंमिका मुत्तादामा प० ते णं कुंमिका मुत्तादामा पत्तेयं २ अण्णेहिं तदद्धउच्चत्त-
पमाणमित्तेहिं चउहिं अद्धकुंमिकेहिं मुत्तादामेहिं, सब्बओ समंता संपरिक्खित्ता, तेसि
णं पेच्छावरमंडवाणं पुरओ चत्तारि मणिपेढियाओ पण्णत्ताओ, तासि णं मणि-
पेढियाणं उवरिं चत्तारि २ चेइयथूभा पण्णत्ता, तासि णं चेइयथूभाणं पत्तेयं २
चउदिसिं चत्तारि मणिपेढियाओ प० तासि णं मणिपेढियाणं उवरिं चत्तारि जिण-
पडिमाओ सब्बरयणामईओ संपल्लियं कणिसण्णाओ थूभाभिमुहाओ चिद्धंति तं०
रिसभा वद्धमाणा चंदाणणा वारिसेणा, तेसि णं चेइयथूभा णं पुरओ चत्तारि मणि-
पेढियाओ प० तासि णं मणिपेढियाणं उवरिं चत्तारि चेइयरुक्खा प०, तेसि णं
चेइयरुक्खा णं पुरओ चत्तारि मणिपेढियाओ प०, तासि णं मणिपेढियाणं उवरिं
चत्तारि महिंदज्झया प०, तेसि णं महिंदज्झयाणं पुरओ चत्तारि २ णंदाओ पुक्खर-
णीओ प० तासिणं पुक्खरणीणं पत्तेयं पत्तेयं चउदिसिं चत्तारि वणखंडा प० तं०
पुरत्थिमेणं दाहिणेणं पच्चत्थिमेणं उत्तरेणं, पुव्वेणं असोगवणं दाहिणओ होइ
सत्तवण्णवणं, अवरेणं चंपगवणं, चूयवणं उत्तरे पासे (१) तत्थ णं जे से पुरत्थि-
मिल्ले अंजणगपक्वए तस्स णं चउदिसिं चत्तारि णंदाओ पुक्खरणीओ पण्णत्ताओ तं०
णंदुत्तरा णंदा आणंदा णंदिवद्धणा, ताओ णंदाओ पुक्खरणीओ एणं जोयणसय-
सहस्सं आयामेणं पण्णासं जोयणसहस्साइं विकखंभेणं दस जोयणसयाइं उव्वेहेणं,
तासिणं पुक्खरणीणं पत्तेयं पत्तेयं चउदिसिं चत्तारि तिसोवाणपडिरूवगा प० तेसिणं
तिसोवाणपडिरूवगाणं पुरओ चत्तारि तोरणा प० तं० पुरत्थिमेणं दाहिणेणं पच्चत्थिमेणं

उत्तरेण, तासिणं पुक्खरणीणं पत्तेयं पत्तेयं चउद्विंसि चत्तारि वणखंडा ५० तं० पुरओ दाहिणेणं पच्चत्थिमेषं उत्तरेण, पुव्वेणं असोगवणं जाव च्यूवणं उत्तरे पासे । तासिणं पुक्खरणीणं बहुमज्झदेसभाए चत्तारि दहिमुहगपव्वया ५०, ते णं दहिमुहगपव्वया चउसट्ठिं जोयणसहस्साइं उट्ठं उच्चत्तेणं एगं जोयणसहस्समुव्वेहेणं, सव्वत्थसमा पल्लसंठाणसंठिया दसजोयणसहस्साइं विक्खंभेणं एकतीसं जोयणसहस्साइं छच्चतेवीसेजोयणसए परिकखेवेणं सव्वरयणामया अच्छा जाव पडिस्वा । तेसि णं दहिमुहगपव्वयाणं उवरिं बहुसमरमणिजा भूमिभागा पणत्ता, सेसं जहेव अंजणगपव्वयाणं तहेव णिरवसेसं भाणियव्वं जाव च्यूवणं उत्तरेपासे । तत्थ णं जे से दाहिणिल्ले अंजणगपव्वए तस्सणं चउद्विंसि चत्तारि णंदाओ पुक्खरणीओ ५० तं० भदा विसाला कुमुया पांडरीणिणी । ताओ णंदाओ पुक्खरणीओ एगं जोयणसयसहस्सं सेसं तं चव जाव दहिमुहगपव्वया जाव वणखंडा । तत्थणं जे से पच्चत्थिमिल्ले अंजणगपव्वए तस्स णं चउद्विंसि चत्तारि णंदाओ पुक्खरणीओ पणत्ताओ तं० णदिसेणा अमोहा गोथूमा सुदंसणा, सेसं तं चव, तहेव दहिमुहगपव्वया तहेव सिद्धाययणा जाव वणखंडा । तत्थणं जे से उत्तरिल्ले अंजणगपव्वए तस्स णं चउद्विंसि चत्तारि णंदाओ पुक्खरणीओ ५० तं० विजया वेजयंती जयंती अपराजिया, ताओ णं पुक्खरणीओ एगं जोयण सयसहस्सं तं चव पमाणं तहेव दहिमुहगपव्वया, तहेव सिद्धाययणा जाव वणखंडा । णंदीसरवरस्स णं दीवस्स चक्खवाल्लविकव्वेभस्स बहुमज्झदेसभाए चउसु विदिससु चत्तारि रइकरगपव्वया ५० तं० उत्तरपुरत्थिमिल्ले रइकरगपव्वए दाहिणपुरत्थिमिल्ले रइकरगपव्वए दाहिणपच्चत्थिमिल्ले रइकरगपव्वए उत्तरपच्चत्थिमिल्ले रइकरगपव्वए, ते णं रइकरगपव्वया दसजोयणसयाइं उट्ठं उच्चत्तेणं दसगाउयमयाइं उव्वेहेणं, सव्वत्थसमा झल्लरिसंठाणसंठिया, दसजोयणसहस्साइं विक्खंभेणं, एकतीसं जोयणसहस्साइं छच्चतेवीसे जोयणसए परिकखेवेणं, सव्वरयणामया अच्छा जाव पडिस्वा । तत्थ णं जे से उत्तरपुरत्थिमिल्ले रइकरगपव्वए तस्सणं चउद्विंसिमीसाणस्स देविदस्स देवरणो चउण्हमग्गमहिसीणं जेवुदीवप्पमाणमेत्ताओ चत्तारि रायहाणीओ पणत्ताओ तं० णंदुत्तरा णंदा उत्तरकुरा देवकुरा । कण्हाए कण्हराडं रामाए रामरक्खियाए । तत्थ णं जे से दाहिणपुरत्थिमिल्ले रइकरगपव्वए तस्सणं चउद्विंसि सक्खस्स देविदस्स देवरणो चउण्हमग्गमहिसीणं जेवुदीवप्पमाणमेत्ताओ चत्तारि राय-

हाणीओ प० तं० समणा सोमणसा अच्चिमाली मणोरमा, पडमाए सिवाए सईए अंजूए । तत्थणं जे से दाहिणपच्चत्थिमिल्ले रइकरगपव्वए तस्सणं चउदिसिं सक्क-
स्स-देविंदस्स देवरणो चउण्हमग्गमहिसीणं जंबुद्दीवप्पमाणमेत्ताओ चत्तारि राय-
हाणीओ प० तं० भूया भूयवडिंसा गोथूभा मुदंसणा, अमलाए अच्छराए णवमियाए
रोहिणीए । तत्थ णं जे से उत्तरपच्चत्थिमिल्ले रइकरगपव्वए तस्सणं चउदिसि-
मीसाणस्स देविंदस्स देवरणो चउण्हमग्गमहिसीणं जंबुद्दीवप्पमाणमेत्ताओ चत्तारि
रायहाणीओ प० तं० रयणा रयणुच्चया सव्वरयणा रयणसंचया । वसूए वसुगुत्ताए
वसुमित्ताए वसुंधराए ॥ ८९ ॥ चउव्विहे सच्चे प० तं० णामसच्चे ठवणसच्चे दव्वसच्चे
भावसच्चे ॥ ९० ॥ आजीवियाणं चउव्विहे तवे प० तं० उग्गतवे धोरतवे रसणिज्जह-
णया जिब्भिमियपडिसंलीणया ॥ ९१ ॥ चउव्विहे संजमे प० तं० मणसंजमे
वइसंजमे कायसंजमे उवगरणसंजमे । चउव्विहे चियाए प० तं० मणचियाए वइ-
चियाए कायचियाए उवगरणचियाए । चउव्विहा अकिंचणया प० तं० मण-
अकिंचणया वइअकिंचणया कायअकिंचणया उवगरणअकिंचणया ॥ ९२ ॥

चउत्थं ठाणं तइओ उद्देसो

चत्तारि राईओ प० तं० पव्वयराई पुढविराई वालुयराई उदगराई । एवामेव
चउव्विहे कोहे प० तं० पव्वयराइसमाणे पुढविराइसमाणे वालुयराइसमाणे उदग-
राइसमाणे । पव्वयराइसमाणं कोहमणुपविट्ठे जीवे कालं करेइ णेरइएसु उववज्जइ,
पुढविराइसमाणं कोहमणुपविट्ठे जीवे कालं करेइ तिरिक्खजोणिएसु उववज्जइ, वालु-
यराइसमाणं कोहमणुपविट्ठे जीवे कालं करेइ मणुस्सेसु उववज्जइ, उदगराइसमाणं
कोहमणुपविट्ठे जीवे कालं करेइ देवेसु उववज्जइ । चत्तारि उदगा प० तं० क्हमोदए
खंजणोदए वालुओदए सेलोदए, एवामेव चउव्विहे भावे प० तं० क्हमोदगसमाणे
खंजणोदगसमाणे वालुओदगसमाणे सेलोदगसमाणे । क्हमोदगसमाणं भावमणु-
पविट्ठे जीवे कालं करेइ णेरइएसु उववज्जइ एवं जाव सेलोदगसमाणं भावमणुपविट्ठे
जीवे कालं करेइ देवेसु उववज्जइ ॥ ९३ ॥ चत्तारि पक्खी प० तं० रुयसंपण्णे णाममेगे
णो रुवसंपण्णे, रुवसंपण्णे णाममेगे णो रुयसंपण्णे, एगे रुयसंपण्णे वि रुवसंपण्णे
वि, एगे णो रुयसंपण्णे णो रुवसंपण्णे, एवामेव चत्तारि पुरिसजाया प० तं० रुय-
संपण्णे णाममेगे णो रुवसंपण्णे ४ ॥ ९४ ॥ चत्तारि पुरिसजाया प० तं० पत्तियं करे-
मिति एगे पत्तियं करेइ, पत्तियं करेमिति एगे अप्पत्तियं करेइ, अप्पत्तियं करेमिति
एगे पत्तियं करेइ, अप्पत्तियं करेमिति एगे अप्पत्तियं करेइ । चत्तारि पुरिसजाया प०

तं० अप्पणो णाममेगे पत्तियं करेइ णो परस्स, परस्स णाममेगे पत्तियं करेइ णो अप्पणो ४ । चत्तारि पुरिसजाया प० तं० पत्तियं पवेसामिति एगे पत्तियं पवेसेइ, पत्तियं पवेसामिति एगे अप्पत्तियं पवेसेइ, अप्पत्तियं पवेसामिति एगे पत्तियं पवेसेइ, अप्पत्तियं पवेसामिति एगे अप्पत्तियं पवेसेइ । चत्तारि पुरिसजाया प० तं० अप्पणो णाममेगे पत्तियं पवेसेइ णो परस्स ४ ॥ ९५ ॥ चत्तारि रुक्खा प० तं० पत्तोवए पुप्फोवए फलोवए छायोवए, एवामेव चत्तारि पुरिसजाया प० तं० पत्तो वा रुक्ख-समाणे पुप्फो वा रुक्खसमाणे फलो वा रुक्खसमाणे छायो वा रुक्खसमाणे ॥९६॥ भारं णं वहमाणस्स चत्तारि आसासा प० तं० जत्थ णं अंसाओ अंसं साहरइ तत्थ वि य से एगे आसासे पणत्ते, जत्थ वि य णं उच्चारं वा पासवणं वा परिठावेइ तत्थ वि य से एगे आसासे प०, जत्थ वि य णं णागकुमारावासंसि वा सुवण्णकुमारावासंसि वा वासं उवेइ तत्थ वि य से एगे आसासे प०, जत्थ वि य णं आवकहाए चिट्ठइ जाव आसासे प० । एवामेव समणोवासगस्स चत्तारि आसासा प० तं० जत्थ वि य णं सीलब्धयगुणव्यवेरणपच्चक्खणाणोसहोववा-साईं पड्विज्जइ तत्थ वि य से एगे आसासे प०, जत्थ वि य णं सामाइयं देसा-वगासियं सम्मणुपालेइ तत्थ वि य से एगे आसासे प०, जत्थ वि य णं चाउहस-ट्टमुद्धिट्टपुण्णमासिणीसु पड्विपुण्णं पोसहं सम्मं अणुपालेइ तत्थ वि य से एगे आसासे प०, जत्थ वि य णं अपच्छिममारणतियसंलेहणाजूसणाजूसिए भत्तपाणवडिया-इत्थिए पाओवगए कालमणवकंखमाणे बिहरइ तत्थ वि य से एगे आसासे प० ॥ ९७ ॥ चत्तारि पुरिसजाया प० तं० उदिओदिए णाममेगे, उदियत्थमिए णाममेगे, अत्थमिओदिए णाममेगे, अत्थमियत्थमिए णाममेगे । भरहे राया चाउरंतचक्कवट्ठी णं उदिओदिए, वंभदत्ते णं राया चाउरंतचक्कवट्ठी उदियत्थमिए, हरिएसवलेणमणगारे अत्थमिओदिए, काले णं सोयरिए अत्थमियत्थमिए ॥९८॥ चत्तारि जुंमा प० तं० कडजुंमे तेयोए दावरजुंमे कलिओए । णेरइयाणं चत्तारि जुंमा प० तं० कडजुंमे जाव कलिओए, एवमसुरकुमारणं जाव थणियकुमारणं, एवं पुढविकाइयाणं आउतेउवाउवणस्सइ वेंदियाणं तेंदियाणं चउरिदियाणं पंचि-दियतिरिक्खजोणियाणं मगुस्साणं वाणमंतरजोइसियाणं वेमाणियाणं सव्वसिं जहा णेरइयाणं ॥ ९९ ॥ चत्तारि सूरा प० तं० खंतिसूरे तवसूरे दाणसूरे जुडसूरे,

खेतिसूरा अरिहंता तवसूरा अणगारा; दाणसूरे वेसमणे जुद्धसूरे वासुदेवे ॥१००॥
 चत्तारि पुरिसजाया प० तं० उच्चे णाममेगे उच्चच्छंदे उच्चे णाममेगे णीयच्छंदे णीए
 णाममेगे उच्चच्छंदे णीए णाममेगे णीयच्छंदे ॥ १०१ ॥ असुरकुमाराणं चत्तारि
 लेस्सा प० तं० कणहलेस्सा णीललेस्सा काउलेस्सा तेउलेस्सा, एवं जाव थणिय-
 कुमाराणं एवं पुढविकाइयाणं आउवणस्सइकाइयाणं वाणमंतराणं सव्वेसिं जहा
 असुरकुमाराणं ॥ १०२ ॥ चत्तारि जाणा प० तं० जुत्ते णाममेगे जुत्ते जुत्ते णाममेगे
 अजुत्ते अजुत्ते णाममेगे जुत्ते अजुत्ते णाममेगे अजुत्ते, एवामेव चत्तारि पुरिसजाया
 प० तं० जुत्ते णाममेगे जुत्ते ४ । चत्तारि जाणा प० तं० जुत्ते णाममेगे जुत्तपरिणए,
 जुत्ते णाममेगे अजुत्तपरिणए ४, एवामेव चत्तारि पुरिसजाया प० तं० जुत्ते णाम-
 मेगे जुत्तपरिणए ४ । चत्तारि जाणा प० तं० जुत्ते णाममेगे जुत्तरूवे जुत्ते णाममेगे
 अजुत्तरूवे ४, एवामेव चत्तारि पुरिसजाया प० तं० जुत्ते णाममेगे जुत्तरूवे ४ ।
 चत्तारि जाणा प० तं० जुत्ते णाममेगे जुत्तसोभे ४ । एवामेव चत्तारि पुरिसजाया
 प० तं० जुत्ते णाममेगे जुत्तसोभे ४ । चत्तारि जुग्गा प० तं० जुत्ते णाममेगे जुत्ते
 ४ । एवामेव चत्तारि पुरिसजाया प० तं० जुत्ते णाममेगे जुत्ते ४, एवं जहा
 जाणेण चत्तारि भालावगा तथा जुग्गेणवि पड्डिवक्खो तहेव पुरिसजाया जाव
 सोभेत्ति । चत्तारि सारही प० तं० जोयावइत्ता णाममेगे णो विजोयावइत्ता,
 विजोयावइत्ता णाममेगे णो जोयावइत्ता, एगे जोयावइत्तावि विजोयावइत्तावि,
 एगे णो जोयावइत्ता. णो विजोयावइत्ता, एवामेव चत्तारि पुरिसजाया ४ । चत्तारि
 हया प० तं० जुत्ते णाममेगे जुत्ते ४ । एवामेव चत्तारि पुरिसजाया प० तं० जुत्ते
 णाममेगे जुत्ते ४ । एवं जुत्तपरिणए जुत्तरूवे जुत्तसोभे सव्वेसिं पड्डिवक्खो पुरिस-
 जाया । चत्तारि गया प० तं० जुत्ते णाममेगे जुत्ते ४ । एवामेव चत्तारि पुरिसजाया
 प० तं० जुत्ते णाममेगे जुत्ते ४, एवं जहा हयाणं तथा गयाणवि भाणियव्वं
 पड्डिवक्खो तहेव पुरिसजाया । चत्तारि जुग्गारिया प० तं० पंथजाई णाममेगे णो
 उप्पहजाई उप्पहजाई णाममेगे णो पंथजाई एगे पंथजाई वि उप्पहजाई वि एगे
 णो पंथजाई णो उप्पहजाई । एवामेव चत्तारि पुरिसजाया ४ ॥ १०३ ॥ चत्तारि
 पुप्फा प० तं० रूवसंपण्णे णाममेगे णो गंधसंपण्णे गंधसंपण्णे णाममेगे णो रूवसंपण्णे
 एगे रूवसंपण्णेवि गंधसंपण्णेवि एगे णो रूवसंपण्णे णो गंधसंपण्णे । एवामेव

चत्तारि पुरिसजाया प० तं० रुवसंपण्णे णाममेगे णो सीलसंपण्णे ४ ॥१०४॥ चत्तारि
 पुरिसजाया प० तं० जाइसंपण्णे णाममेगे णो कुलसंपण्णे, कुलसंपण्णे णाममेगे णो
 जाइसंपण्णे ४ । चत्तारि पुरिसजाया प० तं० जाइसंपण्णे णाममेगे णो बलसंपण्णे
 बलसंपण्णे णाममेगे णो जाइसंपण्णे ४, एवं जाइए रुवेण य चत्तारि आलावगा,
 एवं जाइए सुएण य ४, एवं जाइए सीलेण ४ एवं जाइए चरित्तेण ४ । एवं
 कुलेण बलेण ४, कुलेण रुवेण ४, कुलेण सुएण ४, कुलेण सीलेण ४, कुलेण
 चरित्तेण ४ । चत्तारि पुरिसजाया प० तं० बलसंपण्णे णाममेगे णो रुवसंपण्णे ४,
 एवं बलेण सुएण ४, एवं बलेण सीलेण ४, एवं बलेण चरित्तेण ४ । चत्तारि
 पुरिसजाया प० तं० रुवसंपण्णे णाममेगे णो सुयसंपण्णे ४, एवं रुवेण सीलेण ४,
 रुवेण चरित्तेण ४ । चत्तारि पुरिसजाया प० तं० सुयसंपण्णे णाममेगे णो सील-
 संपण्णे ४, एवं सुएण चरित्तेण य ४ । चत्तारि पुरिसजाया प० तं० सीलसंपण्णे
 णाममेगे णो चरित्तसंपण्णे ४ । एए इक्कवीस भंगा भाणियक्वा ॥१०५॥ चत्तारि
 फला प० तं० आमलगमहुरे मुदियामहुरे खीरमहुरे खंडमहुरे, एवामेव चत्तारि
 आयरिया प० तं० आमलगमहुरफलसमाणे जाव खंडमहुरफलसमाणे ॥ १०६ ॥
 चत्तारि पुरिसजाया प० तं० आयवेयावच्चकरे णाममेगे णो परवेयावच्चकरे ४ ।
 चत्तारि पुरिसजाया प० तं० करेइ णाममेगे वेयावच्चं णो पडिच्छइ, पडिच्छइ णाम-
 मेगे वेयावच्चं णो करेइ ४ ॥१०७॥ चत्तारि पुरिसजाया प० तं० अट्टकरे णाममेगे
 णो माणकरे, माणकरे णाममेगे णो अट्टकरं, एगे अट्टकरंवि माणकरेवि, एगे णो
 अट्टकरे णो माणकरे । चत्तारि पुरिसजाया प० तं० गणट्टकरे णाममेगे णो माणकरे ४ ।
 च० पु० जा० प० तं० गणसंगहकरे णाममेगे णो माणकरे ४ । चत्तारि पुरिसजाया
 प० तं० गणसोभकरे णाममेगे णो माणकरे ४ । चत्तारि पुरिसजाया प० तं० गण-
 सोहिकरे णाममेगे णो माणकरे ४ ॥१०८॥ चत्तारि पुरिसजाया प० तं० रुवं णाम-
 मेगे जहइ णो धम्मं धम्मं णाममेगे जहइ णो रुवं एगे रुवंपि जहइ धम्मंपि जहइ,
 एगे णो रुवं जहइ णो धम्मं । चत्तारि पुरिसजाया प० तं० धम्मं णाममेगे जहइ
 णो गणसंठिइ ४ । चत्तारि पुरिसजाया प० तं० पियधम्मं णाममेगे णो दढधम्मं,
 दढधम्मं णाममेगे णो पियधम्मं, एगे पियधम्मंवि दढधम्मंवि एगे णो पियधम्मं
 णो दढधम्मं ॥ १०९ ॥ चत्तारि आयरिया प० तं० पव्वावणायरिह णाममेगे णो

उवट्टावणायरिए, उवट्टावणायरिए णाममेगे णो पव्वावणायरिए, एगे पव्वावणाय-
रिएवि उवट्टावणायरिएवि, एगे णो पव्वावणायरिए णो उवट्टावणायरिए, धम्माय-
रिए । चत्तारि आयरिया प० तं० उद्देसणायरिए णाममेगे णो वायणायरिए ४
धम्मायरिए ॥ ११० ॥ चत्तारि अंतेवासी प० तं० पव्वावणंतेवासी णाममेगे
णो उवट्टावणंतेवासी ४ धम्मंतेवासी । चत्तारि अंतेवासी प० तं० उद्देसणं-
तेवासी णाममेगे णो वायणंतेवासी ४ धम्मंतेवासी ॥ १११ ॥ चत्तारि णिग्गंथा
प० तं० रायणिए समणे णिग्गंथे महाकम्मे महाकिरिए अणायावी असमिए धम्मस्स
अणाराहए भवइ, राइणिए समणे णिग्गंथे अप्पकम्मे अप्पकिरिए आयावी समिए
धम्मस्स आराहए भवइ, ओमराइणिए समणे णिग्गंथे महाकम्मे महाकिरिए अणा-
यावी असमिए धम्मस्स अणाराहए भवइ, ओमराइणिए समणे णिग्गंथे अप्पकम्मे
अप्पकिरिए आयावी समिए धम्मस्स आराहए भवइ । चत्तारि णिग्गंथीओ प० तं०
राइणिया समणी णिग्गंथी ४ एवं चेंव । चत्तारि समणोवासगा प० तं० रायणिए
समणोवासए महाकम्मे ४ तहेव । चत्तारि समणोवासियाओ प० तं० रायणिया सम-
णोवासिया महाकम्मा तहेव चत्तारि गमा ॥ ११२ ॥ चत्तारि समणोवासगा प०
तं० अम्मापिइसमाणे भाइसमाणे मित्तसमाणे सवत्तिसमाणे । चत्तारि समणोवा-
सगा प० तं० अद्दागसमाणे पडागसमाणे खाणुसमाणे खरकंटयसमाणे ॥ ११३ ॥
समणस्स णं भग्गओ महावीरस्स समणोवासगाणं सोहम्मे कप्पे अरुणाभे विमाणे
चत्तारि पल्लिओवमाइं ठिई प० ॥ ११४ ॥ चउहिं ठाणेहिं अहुणोववण्णे देवे देवलोएसु
इच्छेज्जा माणुसं लोगं हव्वमागच्छित्तए णो चेंव णं संचाएइ हव्वमागच्छित्तए तं०
अहुणोववण्णे देवे देवलोएसु दिव्वेसु कामभोगेसु मुच्छिए गिद्धे गटिए अज्जोववण्णे
सें णं माणुस्सए कामभोगे णो आढाइ णो परियाणाइ णो अट्टं बंधइ णो णियाणं
पगरेइ, णो ठिइपगर्णं पगरेइ, अहुणोववण्णे देवे देवलोएसु दिव्वेसु कामभोगेसु
मुच्छिए ४ तस्स णं माणुस्सए पेमे वोच्छिण्णे दिव्वे संकंते भवइ, अहुणोववण्णे
देवे देवलोएसु दिव्वेसु कामभोगेसु मुच्छिए ४ तस्स णं एवं भवइ, इयर्णिहं गच्छं
मुहुत्तेणं गच्छं तेणं कालेणमप्पाउया मणुस्सा कालधम्मणा संजुत्ता भवंति, अहुणोव-
वण्णे देवे देवलोएसु दिव्वेसु कामभोगेसु मुच्छिए ४ तस्स णं माणुस्सए गंधे पडि-
कूले पडिलोमे यावि भवइ, उट्टंपि य णं माणुस्सए गंधे जाव चत्तारिपंचजोयण-
सयाइं हव्वमागच्छइ ४ इचेएहिं चउहिं ठाणेहिं अहुणोववण्णे देवे देवलोएसु इच्छेज्जा

माणुसं लोगं हव्वमागच्छित्तए णो चेव णं संचाएइ हव्वमागच्छित्तए ॥११५॥ चउहिं
 ठाणेहिं अहुणोववण्णे देवे देवलोएसु इच्छेज्जा माणुसं लोगं हव्वमागच्छित्तए संचा-
 एइ हव्वमागच्छित्तए तं० अहुणोववण्णे देवे देवलोएसु दिव्वेसु कामभोगेसु अमु-
 च्छिए जाव अणज्झोववण्णे तस्स णं एवं भवइ अत्थि खलु मम माणुस्सए भवे
 आयरिएइ वा उव्वज्जाएइ वा पवत्तीइ वा धेरेइ वा गणीइ वा गणहरेइ वा गणा-
 वच्छेएइ वा जेसिं पभावेणं मए इमा एयासुवा दिव्वा देविद्धी दिव्वा देवजुई लद्धा
 पत्ता अभिसमण्णायाया तं० गच्छामि णं ते भगवन्ते वंदामि जाव पज्जुवासामि, अहु-
 णोववण्णे देवे देवलोएसु जाव अणज्झोववण्णे तस्स णं एवं भवइ एस णं माणुस्सए
 भवे णाणीइ वा तवस्सीइ वा अइदुक्करदुक्करकारए तं गच्छामि णं ते भगवन्तं वंदामि
 जाव पज्जुवासामि, अहुणोववण्णे देवे जाव अणज्झोववण्णे तस्स णं एवं भवइ
 अत्थि णं मम माणुस्सए भवे मायाइ वा जाव सुण्हाइ वा तं गच्छामि णं तेसि-
 मंतियं पाउब्भवामि पासंतु ता मे इममेयारूवं दिव्वं देविद्धिं दिव्वं देवजुई लद्धं पत्तं
 अभिसमण्णागयं, अहुणोववण्णे देवे देवलोएसु जाव अणज्झोववण्णे तस्स णं एवं
 भवइ अत्थि णं मम माणुस्सए भवे मित्तेइ वा सहीइ वा सुहीइ वा सहाएइ वा
 संगइए वा तेसिं च णं अग्हे अण्णमण्णस्स संगारे पंडिसुए भवइ, जो मे पुत्ति
 चयइ से संवोहियव्वे इत्थेएहिं जाव संचाएइ हव्वमागच्छित्तए ॥११६॥ चउहिं
 ठाणेहिं लोगंधगारे सिया तं० अरिहंतेहिं वोच्छिज्जमाणेहिं, अरिहंतपण्णत्ते भग्गे
 वोच्छिज्जमाणे पुव्वगए वोच्छिज्जमाणे जायतेए वोच्छिज्जमाणे । चउहिं ठाणेहिं लोगु-
 ज्जोए सिया तं० अरिहंतेहिं जायमाणेहिं, अरिहंतेहिं पव्वयमाणेहिं, अरिहंताणं
 णाणुप्पायमहिमासु, अरिहंताणं परिणिव्वाणमहिमासु, एवं देवंधगारे देवुज्जोए
 देवसण्णिवाए देवुकलियाए देवकहकहए । चउहिं ठाणेहिं देविंदा माणुसं लोगं
 हव्वमागच्छंति, एवं जहा तिठाणे जाव लोगंतिया देवा माणुसं लोगं हव्वमा-
 गच्छेज्जा तं० अरिहंतेहिं जायमाणेहिं जाव अरिहंताणं परिणिव्वाणमहिमासु
 ॥११७॥ चत्तारिं दुहसेज्जाओ प० तं० तत्थ खलु इमा पदमा दुहसेज्जा से णं मुंढे
 भवित्ता अगाराओ अणगारियं पव्वइए णिग्गंथे पावयणे संक्खिए कंक्खिए त्रित्ति-
 गिच्छिए भेयसमावण्णे कल्लससमावण्णे णिग्गंथं पावयणं णो सहइइ णो पत्तियइ
 णो रोएइ, णिग्गंथं पावयणं असहइमाणे अपत्तियमाणे अरोएमाणे मणं उचावयं

णियच्छइ विणिघायमावज्जइ पदमा दुहसेज्जा । अहावरा दोच्चा दुहसेज्जा से णं मुंडे भवित्ता अगाराओ अणगारियं पव्वइए सएणं लामेणं णो तुस्सइ परस्स लाममासाएइ पीहेइ पत्थेइ अभिलसइ परस्स लाममासाएमाणे जाव अभिलस-
माणे मणं उच्चावयं णियच्छइ विणिघायमावज्जइ दोच्चा दुहसेज्जा । अहावरा तच्चा दुहसेज्जा, से णं मुंडे भवित्ता अगाराओ अणगारियं पव्वइए दिव्वे माणु-
स्सए कामभोगे आसाएइ जाव अभिलसइ दिव्वे माणुस्सए कामभोए आसा-
एमाणे जाव अभिलसमाणे मणं उच्चावयं णियच्छइ, विणिघायमावज्जइ तच्चा दुह-
सेज्जा । अहावरा चउत्था दुहसेज्जा से णं मुंडे भवित्ता जाव पव्वइए तस्स णमेवं
भवइ जयां णं अहमगारवासमावसामि तथा णमहं संवाहणपरिमहणगायब्भंग-
गाउच्छोलणाइं लभामि जप्पभिइं च णं अहं मुंडे भवित्ता जाव पव्वइए तप्पभिइं
च णं अहं संवाहण जाव गाउच्छोलणाइं णो लभामि से णं संवाहण जाव गाउच्छो-
लणाइं आसाएइ जाव अभिलसइ से णं संवाहण जाव गाउच्छोलणाइं आसाए-
माणे जाव मणं उच्चावयं णियच्छइ विणिघायमावज्जइ चउत्था दुहसेज्जा ॥ ११८ ॥
चत्तारि सुहसेज्जाओ प७ तं० तत्थ खलु इमा पदमा सुहसेज्जा से णं मुंडे भवित्ता
अगाराओ अणगारियं पव्वइए णिग्गंथे पावयणे णिस्संकिए णिक्कंखिए णिव्वित्ति-
णिच्छिए, णो भेदसमावण्णे णो कलुससमावण्णे णिग्गंथं पावयणं सहहइ पत्तियइ
रोएइ णिग्गंथं पावयणं सहहमाणे पत्तियमाणे रोएमाणे णो मणं उच्चावयं णियच्छइ,
णो विणिघायमावज्जइ पदमा सुहसेज्जा । अहावरा दोच्चा सुहसेज्जा से णं मुंडे भवित्ता
जाव पव्वइए सएणं लामेणं तुस्सइ, परस्स लामं णो आसाएइ, णो पीहेइ, णो पत्थेइ,
णो अभिलसइ, परस्स लाममणासाएमाणे जाव अणभिलसमाणे णो मणं उच्चावयं
णियच्छइ णो विणिघायमावज्जइ, दोच्चा सुहसेज्जा । अहावरा तच्चा सुहसेज्जा, से णं मुंडे
भवित्ता जाव पव्वइए दिव्वमाणुस्सए कामभोगे णो आसाएइ जाव णो अभिलसइ,
दिव्वमाणुस्सए कामभोगे अणासाएमाणे जाव अणभिलसमाणे णो मणं उच्चावयं
णियच्छइ णो विणिघायमावज्जइ, तच्चा सुहसेज्जा । अहावरा चउत्था सुहसेज्जा,
से णं मुंडे भवित्ता जाव पव्वइए तस्स णमेवं भवइ जइ ताव अरिहंता भगवंता
हट्ठा आरोग्गा बलिया कल्लसरीरा अण्णयराइं ओरालाइं कल्लाणाइं विउल्लाइं
पयत्ताइं पग्गहियाइं महाणुभागाइं कम्मक्खयकारणाइं तवोकम्माइं पडिवज्जति

किमंग पुण अहं अब्भोवगमिओवक्कमियं वेयणं णो सम्मं सहामि खमामि तिति-
 व्खेमि अहियासेमि, ममं च णं अब्भोवगमिओवक्कमियं वेयणं सम्ममसहमाणस्स
 अक्खममाणस्स अतितिक्खमाणस्स अणहियासेमाणस्स किं मण्णे कज्जइ ? एगंतसो
 मे पावे कम्मं कज्जइ, ममं च णं अब्भोवगमिओ जाव सम्मं सहमाणस्स जाव
 अहियासेमाणस्स किं मण्णे कज्जइ ? एगंतसो मे णिज्जरा कज्जइ, चउरथा सुह-
 सेज्जा ॥ ११९ ॥ चत्तारि अवायणिज्जा प० तं० अविणीए, विगइपडिबडे,
 अविओसवियपाहुडे, माई । चत्तारि वायणिज्जा प० तं० विणीए, अविगइपडिबडे
 विओसवियपाहुडे, अमाई ॥ १२० ॥ चत्तारि पुरिसजाया प० तं० आयंभरे
 णाममेगे णो परंभरे, परंभरे णाममेगे णो आयंभरे, एगे आयंभरेवि परंभरेवि,
 एगे णो आयंभरे णो परंभरे ॥ १२१ ॥ चत्तारि पुरिसजाया प० तं० दुग्गए णाम-
 मेगे दुग्गए, दुग्गए णाममेगे सुग्गए, सुग्गए णाममेगे दुग्गए, मुग्गए णाममेगे
 सुग्गए । चत्तारि पुरिसजाया प० तं० दुग्गए णाममेगे दुव्वए, दुग्गए णाममेगे
 सुव्वए, सुग्गए णाममेगे दुव्वए, सुग्गए णाममेगे सुव्वए । चत्तारि पुरिसजाया प०
 तं० दुग्गए णाममेगे दुप्पडियाणंदे, दुग्गए णाममेगे सुप्पडियाणंदे ४ । चत्तारि
 पुरिसजाया प० तं० दुग्गए णाममेगे दुग्गइगामी, दुग्गए णाममेगे सुग्गइगामी ४ ।
 चत्तारि पुरिसजाया प० तं० दुग्गए णाममेगे दुग्गइं गए, दुग्गए णाममेगे सुग्गइं
 गए ॥ १२२ ॥ चत्तारि पुरिसजाया प० तं० तमे णाममेगे तमे, तमे णाममेगे जोई,
 जोई णाममेगे तमे, जोई णाममेगे जोई । चत्तारि पुरिसजाया प० तं० तमे णाममेगे
 तमबले, तमे णाममेगे जोईबले, जोई णाममेगे तमबले, जोई णाममेगे जोईबले ।
 चत्तारि पुरिसजाया प० तं० तमे णाममेगे तमबलपलज्जणे, तमे णाममेगे जोईबलपल-
 ज्जणे ४ ॥ १२३ ॥ चत्तारि पुरिसजाया प० तं० परिण्णायकम्मं णाममेगे णो परि-
 ण्णायसण्णे, परिण्णायसण्णे णाममेगे णो परिण्णायकम्मं, एगे परिण्णायकम्मंवि परि-
 ण्णायसण्णेवि, एगे णो परिण्णायकम्मं णो परिण्णायसण्णे । चत्तारि पुरिसजाया प०
 तं० परिण्णायकम्मं णाममेगे णो परिण्णायग्निहावासे, परिण्णायग्निहावासे णाममेगे
 णो परिण्णायकम्मं ४ । चत्तारि पुरिसजाया प० तं० परिण्णायसण्णे णाममेगे णो
 परिण्णायग्निहावासे, परिण्णायग्निहावासे णाममेगे णो परिण्णायसण्णे ४ ॥ १२४ ॥
 चत्तारि पुरिसजाया प० तं० इहत्थं णाममेगे णो परत्थं, परत्थं णाममेगे णो इहत्थं ४ ।

चत्तारि पुरिसजाया प० तं० एगेणं णाममेगे वड्डइ एगेणं हायइ, एगेणं णाममेगे वड्डइ दोहिं हायइ, दोहिं णाममेगे वड्डइ एगेणं हायइ, दोहिं णाममेगे वड्डइ दोहिं हायइ ॥१२५॥ चत्तारि कंधगा प० तं० आइण्णे णाममेगे आइण्णे, आइण्णे णाममेगे खलुंके, खलुंके णाममेगे आइण्णे, खलुंके णाममेगे खलुंके । एवामेव चत्तारि पुरिसजाया प० तं० आइण्णे णाममेगे आइण्णे, चउभंगो । चत्तारि कंधगा प० तं० आइण्णे णाममेगे आइण्णत्ताए विहरइ, आइण्णे णाममेगे खलुंकत्ताए विहरइ ४ । एवामेव चत्तारि पुरिसजाया प० तं० आइण्णे णाममेगे आइण्णत्ताए विहरइ, चउभंगो । चत्तारि पकंधगा प० तं० जाइसंपण्णे णाममेगे णो कुलसंपण्णे ४ । एवामेव चत्तारि पुरिसजाया प० तं० जाइसंपण्णे णाममेगे चउभंगो । चत्तारि कंधगा प० तं० जाइसंपण्णे णाममेगे णो बलसंपण्णे ४ । एवामेव चत्तारि पुरिसजाया प० तं० जाइसंपण्णे णाममेगे णो बलसंपण्णे ४ । चत्तारि कंधगा प० तं० जाइसंपण्णे णाममेगे णो रुवसंपण्णे ४ । एवामेव चत्तारि पुरिसजाया प० तं० जाइसंपण्णे णाममेगे णो रुवसंपण्णे ४ । चत्तारि कंधगा प० तं० जाइसंपण्णे णाममेगे णो जयसंपण्णे ४ । एवामेव चत्तारि पुरिसजाया प० तं० जाइसंपण्णे ४ । एवं कुलसंपण्णेण य बलसंपण्णे य ४ । कुलसंपण्णेण य रुवसंपण्णेण य ४ । कुलसंपण्णेण य जयसंपण्णेण य ४ । एवं बलसंपण्णेण य रुवसंपण्णेण य ४ । बलसंपण्णेण य जयसंपण्णेण य ४ । सब्वत्थ पुरिसजाया पडिवक्खो, चत्तारि कंधगा प० तं० रुवसंपण्णे णाममेगे णो जयसंपण्णे ४ । एवामेव चत्तारि पुरिस० ॥१२६॥ चत्तारि पुरिसजाया प० तं० सीहत्ताए णाममेगे णिकखंते सीहत्ताए विहरइ, सीहत्ताए णाममेगे णिकखंते सीयालत्ताए विहरइ, सीयालत्ताए णाममेगे णिकखंते सीहत्ताए विहरइ, सीयालत्ताए णाममेगे णिकखंते सीयालत्ताए विहरइ ॥१२७॥ चत्तारि लोगे समा प० तं० अपइट्ठाणे णए, जंबुहीवे दीवे, पालए जाणविमाणे, सब्वट्ठसिद्धे महाविमाणे । चत्तारि लोगे समा सपक्खि सपडिदिसिं प० तं० सीमंतए णए समयक्खेत्ते उड्डुविमाणे ईसीपन्भारा पुढवी ॥१२८॥ उड्डुलोए णं चत्तारि विमरीरा प० तं० पुढविकाइया आउवणत्सइका० उराला तसा पाणा । अहे लोए णं चत्तारि विमरीरा प० तं० एवं चेव एवं तिरियलोएवि ४ ॥ १२९ ॥ चत्तारि पुरिसजाया प० तं० हिरिसत्ते हिरिमणसत्ते चलसत्ते थिरसत्ते ॥१३०॥ चत्तारि सेज्जपडिमाओ

प०, चत्तारि वत्थपडिमाओ प०, चत्तारि पायपडिमाओ प०, चत्तारि ठाणपडि-
 माओ प० ॥ १३१ ॥ चत्तारि सरौरगा जीवफुडा प० तं० वेउव्विए आहारए
 तेयए कम्मए; चत्तारि सरौरगा कम्मुम्मीसगा प० तं० ओरालिए वेउव्विए
 आहारए तेयए ॥ १३२ ॥ चउहिं अत्थिकाएहिं लोगे फुडे प० तं० धम्म-
 तिथिकाएणं अधम्मत्थिकाएणं जीवत्थिकाएणं पुग्गलत्थिकाएणं । चउहिं बायर-
 काएहिं उववज्जमाणेहिं लोगे फुडे प० तं० पुढविकाइएहिं आउकाइएहिं वाउवण-
 स्सइकाइएहिं । चत्तारि पएसग्गेणं तुद्धा प० तं० धम्मत्थिकाए अधम्मत्थिकाए
 लोगागामे एगजीवे । चउण्हमेगसरिरं णो सुपस्सं भवइ तं० पुढविआउतेउवणस्सइ-
 काइयाणं ॥ १३३ ॥ चत्तारि इंदियत्था पुद्धा वेदेति तं० सोइंदियत्थे घाणिंदियत्थे
 त्तिभिंदियत्थे फासिंदियत्थे ॥ १३४ ॥ चउहिं ठाणेहिं जीवा य पोग्गला य णो
 संचाएंति बहिया लोगतं गमणयाए तं० गइअभावेणं णिरुवग्गहयाए लुक्खत्ताए
 लोगाणुभावेणं ॥ १३५ ॥ चउव्विहे णाए प० तं० आहरणे आहरणतद्देसे आहर-
 णतद्देसे उववणासोवणए । आहरणे चउव्विहे प० तं० अवाए उवाए ठवणाकम्मे
 पडुप्पणविणासी । आहरणतद्देसे चउव्विहे प० तं० अणुसिद्धी उवालंभे पुच्छा
 णिस्सावयणे । आहारणतद्देसे चउव्विहे प० तं० अधम्मजुत्ते पडिलोमे अंतोवणीए
 दुरुवणीए । उववणासोवणए चउव्विहे प० तं० तव्वत्थुए तदण्वत्थुए पडिणिमे
 हेऊ ॥ १३६ ॥ चउव्विहे हेऊ प० तं० जावए थावए वंसए लूसए । अहवा हेऊ
 चउव्विहे प० तं० पच्चक्खे अणुमाणे ओवम्मे आगमे । अहवा हेऊ चउव्विहे प०
 तं० अत्थित्तं अत्थि सो हेऊ अत्थित्तं णत्थि सो हेऊ णत्थित्तं अत्थि सो हेऊ णत्थित्तं
 णत्थि सो हेऊ ॥ १३७ ॥ चउव्विहे संखाणे प० तं० परिकम्मं ववहारे रज्जू रासी
 ॥ १३८ ॥ अहोलोए णं चत्तारि अंधयारं करेति तं० णरगा णेरइया पावाइं कम्माइं
 असुभा पोग्गला । तिरियलोए णं चत्तारि उज्जोयं करेति तं० चंदा सूरं मणी जोई ।
 उद्धलोए णं चत्तारि उज्जोयं करेति तं० देवा देवीओ विमाणा आभरणा ॥ १३९ ॥

चउत्थं ठाणं चउत्थो उद्देसो

चत्तारि पसप्पगा प० तं० अणुप्पण्णाणं भोगाणं उप्पाएत्ता एगे पसप्पए,
 पुव्वुप्पण्णाणं भोगाणं अविप्पओगेणं एगे पसप्पए, अणुप्पण्णाणं सोक्खाणं उप्पाइत्ता
 एगे पसप्पए पुव्वुप्पण्णाणं सोक्खाणं अविप्पओगेणं एगे पसप्पए ॥ १४० ॥ णेरइ-

याणं चउव्विहे आहारे प० तं० इंगालोवमे मुम्मुरोवमे सीयले हिमसीयले ।
तिरिक्खजोणिंयाणं चउव्विहे आहारे प० तं० कंकोवमे विलोवमे पाणमंसेवमे पुत्त-
मंसोवमे । मणुस्साणं चउव्विहे आहारे प० तं० असणे पाणे खाइमे साइमे । देवाणं
चउव्विहे आहारे प० तं० वणमंते गंधमंते रसमंते फासमंते ॥ १४१ ॥ चत्तारि
जाइआसीविसा प० तं० विच्छुयजाइआसीविसे मंडुक्कजाइआसीविसे उरगजाइ-
आसीविसे मणुस्सजाइआसीविसे । विच्छुयजाइआसीविसस्स णं भंते ! केवइए विसए
प० ? पभूणं विच्छुयजाइआसीविसे अद्धभरहप्पमाणमेत्तं बोदिं विसेणं विसपरिणयं
विसट्टमाणिं करेत्तए, विसए से विसट्टयाए णो चैव णं संपत्तीए करिंसु वा करेति
वा करिस्संति वा । मंडुक्कजाइआसीविसस्स पुच्छा, पभूणं मंडुक्कजाइआसीविसे भर-
हप्पमाणमेत्तं बोदिं विसेणं विसपरिणयं विसट्टमाणिं सेसं तं चैव जाव करिस्संति वा ।
उरगजाइआसीविसस्स पुच्छा, पभूणं उरगजाइआसीविसे जंझुहीवप्पमाणमेत्तं बोदिं
विमेणं सेसं तं चैव जाव करिस्संति वा । मणुस्सजाइआसीविसपुच्छा, पभूणं मणुस्स-
जाइआसीविसे समयक्खेत्तपमाणमेत्तं बोदिं विसेणं विसपरिणयं विसट्टमाणिं करेत्तए
विसए से विसट्टयाए णो चैव णं जाव करिस्संति वा ॥ १४२ ॥ चउव्विहे बाही
प० तं० वाइए पित्तिए सिंभिए सण्णिवाइए । चउव्विहा तिगिच्छा प० तं० विब्बो
ओसहाईं आउरे परियारए । चत्तारि तिगिच्छा प० तं० आयतिगिच्छए णाममेगे
णो परतिगिच्छए, परतिगिच्छए णाममेगे णो आयतिगिच्छए जाव चउभंगो
॥ १४३ ॥ चत्तारि पुस्सिजाया प० तं० वणकरे णाममेगे णो वणपरिमासी, वणपरि-
मासी णाममेगे णो वणकरे, एगे वणकरेवि वणपरिमासीवि, एगे णो वणकरे णो
वणपरिमासी । चत्तारि पुरिसजाया प० तं० वणकरे णाममेगे णो वणसारक्खी ४ ।
चत्तारि पुरिसजाया प० तं० वणकरे णाममेगे णो वणसंरोही ४ ॥ १४४ ॥ चत्तारि
वणा प० तं० अंतोसल्ले णाममेगे णो बाहिसल्ले ४ । एवामेव चत्तारि पुरिसजाया
प० तं० अंतोसल्ले णाममेगे णो बाहिसल्ले ४ । चत्तारि वणा प० तं० अंतोदुट्ठे
णाममेगे णो बाहिंदुट्ठे, बाहिंदुट्ठे णाममेगे णो अंतोदुट्ठे ४ । एवामेव चत्तारि
पुरिसजाया प० तं० अंतोदुट्ठे णाममेगे णो बाहिंदुट्ठे ४ ॥ १४५ ॥ चत्तारि पुरिस-
जाया प० तं० सेयंसे णाममेगे सेयंसे, सेयंसे णाममेगे पावंसे, पावंसे णाममेगे सेयंसे,
पावंसे णाममेगे पावंसे । चत्तारि पुरिसजाया प० तं० सेयंसे णाममेगे सेयंसेत्ति
सालिसए सेयंसे णाममेगे पावंसेत्ति सालिसए ४ । चत्तारि पुरिसजाया प० तं०

सेयंसेत्ति णाममेगे सेयंसेत्ति मण्णइ, सेयंसेत्ति णाममेगे पावंसेत्ति मण्णइ ४ । चत्तारि
 पुरिसजाया प० तं० सेयंसे णाममेगे सेयंसेत्ति साल्लिए मण्णइ सेयंसे णाममेगे पावं-
 सेत्ति साल्लिए मण्णइ ४ ॥ १४६ ॥ चत्तारि पु० प० तं० आघवइत्ता णाममेगे
 णो परिभावइत्ता, परिभावइत्ता णाममेगे णो आघवइत्ता ४ । चत्तारि पु० प० तं०
 आघवइत्ता णाममेगे णो उंछजीविसंपण्णे, उंछजीविसंपण्णे णाममेगे णो आघ-
 वइत्ता ४ ॥ १४७ ॥ चउव्विहा रुक्खविगुब्बणा प० तं० पवालत्ताए पत्तत्ताए
 पुप्फत्ताए फलत्ताए ॥ १४८ ॥ चत्तारि वाइसमोसरणा प० तं० किरियावाई
 अकिरियावाई अण्णाणियावाई वेणइयावाई । णेरइयाणं चत्तारि वाइसमोसरणा प०
 तं० किरियावाई, जाव वेणइयावाई । एवमसुरकुमारणवि जाव यणियकुमारणं,
 एवं विगल्लिदियवज्जं जाव वेमाणियाणं ॥ १४९ ॥ चत्तारि मेहा प० तं० गज्जिता
 णाममेगे णो वासित्ता, वासित्ता णाममेगे णो गज्जिता, एगे गज्जितावि वासित्तावि,
 एगे णो गज्जिता णो वासित्ता । एवामेव चत्तारि पु० प० तं० गज्जिता णाममेगे णो
 वासित्ता ४ । चत्तारि मेहा प० तं० गज्जिता णाममेगे णो विज्जुयाइत्ता, विज्जुयाइत्ता
 णाममेगे णो गज्जिता ४ । एवामेव चत्तारि पु० प० तं० गज्जिता णाममेगे
 णो विज्जुयाइत्ता ४ । चत्तारि मेहा प० तं० वासित्ता णाममेगे णो विज्जुयाइत्ता ४ ।
 एवामेव चत्तारि पु० प० तं० वासित्ता णाममेगे णो विज्जुयाइत्ता ४ । चत्तारि मेहा
 प० तं० कालवासी णाममेगे णो अकालवासी, अकालवासी णाममेगे णो कालवासी ४ ।
 एवामेव चत्तारि पुरिसजाया प० तं० कालवासी णाममेगे णो अकालवासी ४ । चत्तारि
 मेहा प० तं० खेत्तवासी णाममेगे णो अखेत्तवासी ४ । एवामेव चत्तारि पु० प० तं०
 खेत्तवासी णाममेगे णो अखेत्तवासी ४ । चत्तारि मेहा प० तं० जणइत्ता णाममेगे णो
 णिम्मवइत्ता, णिम्मवइत्ता णाममेगे णो जणइत्ता ४ । एवामेव चत्तारि अम्मापिसरो
 प० तं० जणइत्ता णाममेगे णो णिम्मवइत्ता ४ । चत्तारि मेहा प० तं० देसवासी
 णाममेगे णो सव्ववासी ४ । एवामेव चत्तारि रायाणो प० तं० देसाहिवई णाममेगे
 णो सव्वहिवई ४ । चत्तारि मेहा प० तं० पुक्खलसंवट्टए पज्जुण्णे जीमूए जिम्हे ।
 पुक्खलसंवट्टए णं महामेहे एगेणं वासेणं दसवाससहस्साइं भावेइ, पज्जुण्णे णं महा-
 मेहे एगेणं वासेणं दसवाससयाइं भावेइ, जीमूए णं महामेहे एगेणं वासेणं दस-
 वासाइं भावेइ, जिम्हे णं महामेहे बहूहिं वासेहिं एगं वासं भावेइ वा ण भावेइ वा
 ॥१५०॥ चत्तारि करंडगा प० तं० सोवागकरंडए वेसियाकरंडए गाहावइकरंडए

रायकरंडए । एवामेव चत्तारि आयरिया प० तं० सोवामकरंडगसमाणे, वेसिया-
करंडगसमाणे, गाहावइकरंडगसमाणे, रायकरंडगसमाणे ॥ १५१ ॥ चत्तारि रुक्खा
प० तं० साले णाममेगे सालपरियाए साले णाममेगे एरंडपरियाए ४ । एवामेव
चत्तारि आयरिया प० तं० साले णाममेगे सालपरियाए साले णाममेगे एरंडपरियाए
एरंडे णाममेगे ४ । चत्तारि रुक्खा प० तं० साले णाममेगे सालपरिवारे ४ ।
एवामेव चत्तारि आयरिया प० तं० साले णाममेगे सालपरिवारे ४ । गाहा—साल-
दुममज्झयारे जह साले णाम होइ दुमराया, इय सुंदरआथरिए सुंदरसीसे मुणे-
यव्वे (१) एरंडमज्झयारे जह साले णाम होइ दुमराया, इय सुंदरआथरिए
मंगुलसीसे मुणेयव्वे (२) सालदुममज्झयारे एरंडे णाम होइ दुमराया, इय मंगुल-
आथरिए सुंदरसीसे मुणेयव्वे (३) एरंडमज्झयारे, एरंडे णाम होइ दुमराया, इय
मंगुलआथरिए मंगुलसीसे मुणेयव्वे (४) ॥ १५२ ॥ चत्तारि मच्छा प० तं०
अणुसोयचारी पडिसोयचारी अंतचारी मज्झचारी । एवामेव चत्तारि भिक्खागा
प० तं० अणुसोयचारी पडिसोयचारी अंतचारी मज्झचारी ॥ १५३ ॥ चत्तारि गोला
प० तं० मधुसिथगोले अउगोले दारुगोले मट्टियागोले । एवामेव चत्तारि पुरिसजाया
प० तं० मधुसिथगोलसमाणे ४ । चत्तारि गोला प० तं० अयगोले तउगोले तंब-
गोले सीसगोले । एवामेव चत्तारि पु० प० तं० अयगोलसमाणे जाव सीसगोल-
समाणे ४ । चत्तारि गोला प० तं० हिरण्णगोले सुवण्णगोले रयणगोले वयरगोले,
एवामेव चत्तारि पुरिसजाया प० तं० हिरण्णगोलसमाणे जाव वयरगोलसमाणे
॥ १५४ ॥ चत्तारि पत्ता प० तं० अंसिपत्ते करपत्ते खुरपत्ते कलंबचीरियापत्ते,
एवामेव चत्तारि पु० प० तं० असिपत्तसमाणे जाव कलंबचीरियापत्तसमाणे
॥ १५५ ॥ चत्तारि कडा प० तं० सुंबकडे विदलकडे चम्मकडे कंबलकडे । एवा-
मेव चत्तारि पु० प० तं० सुंबकडसमाणे जाव कंबलकडसमाणे ॥ १५६ ॥ चउ-
क्विहा चउप्पया प० तं० एगखुरा दुखुरा गंडीपदा सणप्पदा । चउक्विहा पक्खी
प० तं० चम्मपक्खी लोमपक्खी समुग्गपक्खी विषयपक्खी । चउक्विहा खुडुपाणा
प० तं० बेईदिया तेईदिया चउरिंदिया संमुच्छिमपंचिंदियतिरिक्खजोणिया
॥ १५७ ॥ चत्तारि पक्खी प० तं० णिवइत्ता णाममेगे णो परिवइत्ता परिवइत्ता
णाममेगे णो णिवइत्ता एगे णिवइत्तावि परिवइत्तावि एगे णो णिवइत्ता णो परिवइत्ता,

एवामेव चत्तारि भिक्खागा प० तं० णिवइत्ता णाममेगे णो परिवइत्ता ४ ॥१५८॥
 चत्तारि पुरिसजाया प० तं० णिकट्टे णाममेगे णिकट्टे, णिकट्टे णाममेगे, अणिकट्टे
 ४ । चत्तारि पुरिसजाया प० तं० णिकट्टे णाममेगे णिट्टकप्पा णिकट्टे णाममेगे
 अणिकट्टप्पा ४ । चत्तारि पु० प० तं० बुहे णाममेगे बुहे, बुहे णाममेगे अबुहे
 ४ । चत्तारि पुरिसजाया प० तं० बुहे णाममेगे बुहहियाए ४ । चत्तारि पुरि-
 सजाया प० तं० आयाणुकंपए णाममेगे णो पराणुकंपए ४ ॥ १५९ ॥ चउव्विहे
 संवासे प० तं० दिव्वे आसुरे रक्खसे माणुसे । चउव्विहे संवासे प० तं० देवे
 णाममेगे देवीए सद्धिं संवासं गच्छइ, देवे णाममेगे असुरीए सद्धिं संवासं गच्छइ
 असुरे णाममेगे देवीए सद्धिं संवासं गच्छइ असुरे णाममेगे असुरीए सद्धिं
 संवासं गच्छइ । चउव्विहे संवासे प० तं० देवे णाममेगे देवीए सद्धिं संवासं
 गच्छइ, देवे णाममेगे रक्खसीए सद्धिं संवासं गच्छइ, रक्खसे णाममेगे ४ ।
 चउव्विहे संवासे प० तं० देवे णाममेगे देवीए सद्धिं संवासं गच्छइ, देवे णाममेगे
 मणुसीए सद्धिं संवासं गच्छइ ४ । चउव्विहे संवासे प० तं० असुरे णाममेगे
 असुरीए सद्धिं संवासं गच्छइ, असुरे णाममेगे रक्खसीए सद्धिं संवासं गच्छइ ४ ।
 चउव्विहे संवासे प० तं० असुरे णाममेगे असुरीए सद्धिं संवासं गच्छइ, असुरे
 णाममेगे मणुसीए सद्धिं संवासं गच्छइ ४ । चउव्विहे संवासे प० तं० रक्खसे
 णाममेगे रक्खसीए सद्धिं संवासं गच्छइ, रक्खसे णाममेगे मणुसीए सद्धिं संवासं
 गच्छइ ४ ॥ १६० ॥ चउव्विहे अवद्धंसे प० तं० आसुरे आभिओगे संमोहे देव-
 किब्बिसे । चउहिं ठाणेहिं जीवा आसुरत्ताए कम्मं पकरंति तं० कोवसीलयाए
 पाहुडसीलयाए संसत्ततथोकम्मणेणं णिमित्ताजीवयाए । चउहिं ठाणेहिं जीवा आभि-
 ओगत्ताए कम्मं पगरंति तं० अत्तुक्कोसेणं परपरिवाएणं भूइकम्मणेणं कोउयकरणेणं ।
 चउहिं ठाणेहिं जीवा सम्मोहत्ताए कम्मं पगरंति तं० उम्मग्गदेसणाए मग्गतराएणं
 कामासंसपओगेणं भिज्जाणिद्याणकरणेणं । चउहिं ठाणेहिं जीवा देवकिब्बिसियाए
 कम्मं पगरंति तं० अरिहंताणं अवण्णं वयमाणे अरिहंतपण्णत्तस्स धम्मस्स अवण्णं
 वयमाणे, आथरियउव्वञ्जायाणमवण्णं वयमाणे चाउवण्णस्स संघस्स अवण्णं वय-
 माणे ॥ १६१ ॥ चउव्विहा पव्वज्जा प० तं० इह्लोगपडिचद्धा परलोगपडिचद्धा
 दुहुओलोगपडिचद्धा अप्पडिचद्धा । चउव्विहा पव्वज्जा प० तं० पुरओपडिचद्धा

मग्गओपडिबद्धा दुहओपडिबद्धा अप्पडिबद्धा । चउव्विहा पव्वज्जा प० तं० ओवाय-
 पव्वज्जा अकत्तीबपव्वज्जा संगारपव्वज्जा विहग्गइपव्वज्जा । चउव्विहा पव्वज्जा
 प० तं० तुयावइत्ता पुयावइत्ता मोयावइत्ता परिपूयावइत्ता । चउव्विहा पव्वज्जा
 प० तं० णडखइया भडखइया सीहखइया सीयालक्खइया । चउव्विहा किसी प०
 तं० वाविया परिव्वाविया णिंदिया परिणिंदिया । एवामेव चउव्विहा पव्वज्जा प० तं०
 वाविया परिव्वाविया णिंदिया परिणिंदिया । चउव्विहा पव्वज्जा प० तं० धण्ण-
 पुंजियसमाणा धण्णविरुद्धियसमाणा धण्णविक्खित्तसमाणा धण्णसंकट्टियसमाणा
 ॥ १६२ ॥ चत्तारि सण्णाओ पण्णत्ताओ तं० आहारसण्णा भयसण्णा मेहुणसण्णा
 परिग्गहसण्णा । चउहिं ठाणेहिं आहारसण्णा समुप्पज्जइ तं० ओमकोट्टयाए बुहावेय-
 णिज्जस्स कम्मस्स उदएणं मईए तदट्ठोवओगेणं । चउहिं ठाणेहिं भयसण्णा समुप्पज्जइ
 तं० हीणसत्तयाए भयवेयणिज्जस्स कम्मस्स उदएणं मईए तदट्ठोवओगेणं । चउहिं
 ठाणेहिं मेहुणसण्णा समुप्पज्जइ तं० चियमंससोणिययाए मोहणिज्जस्स कम्मस्स
 उदएणं मईए तदट्ठोवओगेणं । चउहिं ठाणेहिं परिग्गहसण्णा समुप्पज्जइ तं० अवि-
 मुत्तयाए लोभवेयणिज्जस्स कम्मस्स उदएणं मईए तदट्ठोवओगेणं ॥ १६३ ॥ चउ-
 व्विहा कामा प० तं० सिंगारा कल्लणा बीभच्छा रोह्वा । सिंगारा कामा देवाणं कल्लणा
 कामा मणुयाणं बीभच्छा कामा तिरिक्खज्जोणियाणं रोह्वा कामा णेरइयाणं ॥ १६४ ॥
 चत्तारि उदगा प० तं० उत्ताणे णाममेगे उत्ताणोदए उत्ताणे णाममेगे गंभीरोदए
 गंभीरे णाममेगे उत्ताणोदए गंभीरे णाममेगे गंभीरोदए, एवामेव चत्तारि पुरिस-
 जाया प० तं० उत्ताणे णाममेगे उत्ताणहियए उत्ताणे णाममेगे गंभीरहियए ४ ।
 चत्तारि उदगा प० तं० उत्ताणे णाममेगे उत्ताणोभासी उत्ताणे णाममेगे गंभीरो-
 भासी ४ । एवामेव चत्तारि पुरिसजाया प० तं० उत्ताणे णाममेगे उत्ताणोभासी,
 उत्ताणे णाममेगे गंभीरोभासी ४ । चत्तारि उदही प० तं० उत्ताणे णाममेगे उत्ता-
 णोदही, उत्ताणे णाममेगे गंभीरोदही ४ । एवामेव चत्तारि पुरिसजाया प० तं०
 उत्ताणे णाममेगे उत्ताणहियए ४ । चत्तारि उदही प० तं० उत्ताणे णाममेगे
 उत्ताणोभासी उत्ताणे णाममेगे गंभीरोभासी ४ । एवामेव चत्तारि पुरिसजाया
 प० तं० उत्ताणे णाममेगे उत्ताणोभासी ४ ॥ १६५ ॥ चत्तारि तरगा प० तं० समुद्दं
 तरामित्ति एगे समुद्दं तरइ, समुद्दं तरामित्ति एगे गोप्पयं तरइ, गोप्पयं तरामित्ति

एगे ४ । चत्तारि तरगा प० तं० समुहं तरित्ता णाममेगे समुहे विसीयइ, समुहं तरित्ता णाममेगे गोपए विसीयइ ४ ॥१६६॥ चत्तारि कुंभा प० तं० पुण्णे णाममेगे पुण्णे पुण्णे णाममेगे तुच्छे तुच्छे णाममेगे पुण्णे तुच्छे णाममेगे तुच्छे, एवामेव चत्तारि पुरिसजाया प० तं० पुण्णे णाममेगे पुण्णे ४ । चत्तारि कुंभा प० तं० पुण्णे णाममेगे पुण्णेभासी, पुण्णे णाममेगे तुच्छेभासी ४; एवामेव चत्तारि पुरिसजाया प० तं० पुण्णे णाममेगे पुण्णेभासी ४ । चत्तारि कुंभा प० तं० पुण्णे णाममेगे पुण्णरूवे, पुण्णे णाममेगे तुच्छरूवे ४ । एवामेव चत्तारि पुरिसजाया प० तं० पुण्णे णाममेगे पुण्णरूवे ४ । चत्तारि कुंभा प० तं० पुण्णेवि एगे पियट्ठे, पुण्णेवि एगे अवदले, तुच्छेवि एगे पियट्ठे, तुच्छेवि एगे अवदले । एवामेव चत्तारि पुरिसजाया प० तं० पुण्णेवि एगे पियट्ठे ४ तहेव । चत्तारि कुंभा प० तं० पुण्णेवि एगे विस्संदइ, पुण्णेवि एगे णो विस्संदइ, तुच्छेवि एगे विस्संदइ, तुच्छेवि एगे णो विस्संदइ । एवामेव चत्तारि पुरिसजाया प० तं० पुण्णेवि एगे विस्संदइ ४ तहेव । चत्तारि कुंभा प० तं० भिण्णे जज्जरिए परिस्साई अपरिस्साई । एवामेव चउच्चिहे चरित्ते प० तं० भिण्णे जाव अपरिस्साई । चत्तारि कुंभा प० तं० महुकुंभे णाममेगे महुप्पिहाणे महुकुंभे णाममेगे विसपिहाणे विसकुंभे णाममेगे महुप्पिहाणे विसकुंभे णाममेगे विसपिहाणे । एवामेव चत्तारि पुरिसजाया ४ हिययमपावमकलुसं जीहाऽवि य महुरभासिणी णिच्चं, जंमि पुरिसंमि विज्जइ से महुकुंभे महुपिहाणे (१) हिय-यमपावमकलुसं, जीहाऽवि य कडुयभासिणी णिच्चं, जंमि पुरिसंमि विज्जइ, से महुकुंभे विसपिहाणे (२) जं हिययं कलुसमयं जीहाऽवि य महुरभासिणी णिच्चं, जंमि पुरिसंमि विज्जइ, से विसकुंभे महुपिहाणे (३) जं हिययं कलुसमयं; जीहाऽवि य कडुयभासिणी णिच्चं, जंमि पुरिसंमि विज्जइ, से विसकुंभे विसपिहाणे (४) ॥१६७॥ चउच्चिहा उवसग्गा प० तं० दिव्वा माणुसा तिरिक्खजोणिया आयसंचेयणिज्जा । दिव्वा उवसग्गा चउच्चिहा प० तं० हासा पाओभा वीमसा पुटोवेमाया । माणुसा उवसग्गा चउच्चिहा प० तं० हासा पाओसा वीमसा कुसीलपडिसेवणया । तिरि-क्खजोणिया उवसग्गा चउच्चिहा प० तं० भया पदोसा आहारहेउं अबच्चलेणसार-क्खणया । आयसंचेयणिज्जा उवसग्गा चउच्चिहा प० तं० षड्ढणया पवडणया थंभ-णया लेसणया ॥१६८॥ चउच्चिहे कम्मे प० तं० सुभे णामं एगे सुभे, सुभे णाममेगे

असुभे, असुभे० ४। चउव्विहे कम्मं प० तं० सुभे णाममेगे सुभविवागे, सुभे णाममेगे असुभविवागे, असुभे णाममेगे सुभविवागे असुभे णाममेगे असुभविवागे। चउव्विहे कम्मं प० तं० पगडीकम्मं, ठिइकम्मं, अणुभावकम्मं, पदेसकम्मं। १६९। चउव्विहे संघे प० तं० समणा समणीओ सावगा सावियाओ। १७०। चउव्विहा बुद्धी प० तं० उप्पत्तिया वेणइया कम्मिया पारिणामिया। चउव्विहा मई प० तं० उग्गहमई ईहामई अवाय-मई धारणामई। अहवा चउव्विहा मई प० तं० अरंजरोदगसमाणा, वियरोदगसमाणा सरोदगसमाणा सागरोदगसमाणा ॥ १७१ ॥ चउव्विहा संसारसमावण्णगा जीवा प० तं० णेरइया तिरिक्खजोणिया मणुस्सा देवा। चउव्विहा सव्वजीवा प० तं० मणजोगी वइजोगी कायजोगी भजोगी। अहवा चउव्विहा सव्वजीवा प० तं० इत्थिवेयगा पुरिसवेयगा णुंसगवेयगा अवेयगा। अहवा चउव्विहा सव्वजीवा प० तं० चक्खुदंसणी अक्खुदंसणी ओहिदंसणी, केवलदंसणी। अहवा चउव्विहा सव्वजीवा प० तं० संजया असंजया संजयासंजया षोसंजया णोअसंजया ॥ १७२ ॥ चत्तारि पुरिसजाया प० तं० मित्ते णाममेगे मित्ते, मित्ते णाममेगे अमित्ते, अमित्ते णाममेगे मित्ते, अमित्ते णाममेगे अमित्ते। चत्तारि पुरिसजाया प० तं० मित्ते णाममेगे मित्तरूवे चउभंणे ॥ १७३ ॥ चत्तारि पुरिसजाया प० तं० मुत्ते णाममेगे मुत्ते, मुत्ते णाममेगे अमुत्ते ४। चत्तारि पुरिसजाया प० तं० मुत्ते णाममेगे मुत्तरूवे ४ ॥ १७४ ॥ पंचिदियतिरिक्खजोणिया चउगइया चउआगइया प० तं० पंचिदिय-तिरिक्खजोणिया पंचिदियतिरिक्खजोणिएसु उववज्जमाणा णेरइएहितो वा, तिरिक्खजोणिएहितो वा, मणुस्सेहितो वा, देवेहितो वा उववज्जेजा। से चव णं से पंचिदियतिरिक्खजोणिए पंचिदियतिरिक्खजोणियत्तं विप्पजहमाणे णेरइयत्ताए वा जाव देवत्ताए वा उवागच्छेजा। मणुस्सा चउगइया चउआगइया एवं चव मणुस्सावि ॥ १७५ ॥ वेइंदिया णं जीवा असमारभमाणस्स चउव्विहे असंजमे कज्जइ तं० जिन्नामयाओ सोक्खाओ अववरोवेत्ता भवइ, जिन्नामएणं दुक्खेणं असंजोगेत्ता भवइ, फासामयाओ सोक्खाओ अववरोवेत्ता भवइ, फासामएणं दुक्खेणं असंजोगेत्ता भवइ। वेइंदिया णं जीवा समारभमाणस्स चउव्विहे असंजमे कज्जइ तं० जिन्नामयाओ सोक्खाओ ववरोवेत्ता भवइ जिन्नामएणं दुक्खेणं संजोगेत्ता भवइ फासामयाओ सोक्खाओ ववरोवेत्ता भवइ फासामएणं दुक्खेणं संजोगेत्ता भवइ ॥ १७६ ॥ समहिद्वियाणं णेरइयाणं चत्तारि किरियाओ पण्णत्ताओ तं० आरंभिया, परिग्गहिया

मायावत्तिया, अपञ्चकव्याणक्रिया । सम्महिद्वियाणमसुरकुमाराणं चत्तारि क्रियाओ
 प० तं० एवं चेव । एवं विगळिदियवञ्जं जाव वेमाणियाणं ॥१७७॥ चउहिं ठाणेहिं संते
 गुणे गासेजा तं० कोहेणं पडिणिवेसेणं, अकयण्णुयाए, मिच्छत्ताहिणिवेसेणं । चउहिं
 ठाणेहिं संते गुणे दीवेजा तं० अन्मासवत्तियं परच्छंदाणुवत्तियं, कञ्जहेउं, कयपडिकइ-
 एइ वा । गेरइयाणं चउहिं ठाणेहिं सरोम्पत्ती सिया तं० कोहेणं माणेणं मायाए
 लोभेणं, एवं जाव वेमाणियाणं । गेरइयाणं चउठाणणिवत्तिए, सरीरे प० तं० कोहणिव-
 त्तिए जाव लोभणिवत्तिए, एवं जाव वेमाणियाणं । चत्तारि धम्मदारा प० तं०
 खंती मुत्ती अञ्जे महवे ॥१७८॥ चउहिं ठाणेहिं जीवा गेरइयाए कम्मं पगरेति
 तं० महारंभयाए, महापरिगहयाए पंचिदियवहेणं कुणिमाहारेणं । चउहिं ठाणेहिं
 जीवा तिरिक्खजोणियत्ताए कम्मं पगरेति तं० माइल्लयाए, गियडिल्लयाए अलियवय-
 णेणं कूउतुल्लकूउपणेणं । चउहिं ठाणेहिं जीवा मणुस्सत्ताए कम्मं पगरेति तं० पगइ-
 भइयाए पगइविणीययाए साणुकोसयाए अमच्छरियाए । चउहिं ठाणेहिं जीवा
 देवाउयत्ताए कम्मं पगरेति तं० सरागसंजणेणं संजमासंजमेणं बालतवोकमेणं
 अकामणिज्जाराए ॥१७९॥ चउच्चिहे वजे प० तं० तते वितते घणे झुसिरे । चउच्चिहे
 णट्टे प० तं० अंचिए रिमिए आरभडे भिसोले । चउच्चिहे गेए प० तं० उक्खित्तए
 पत्तए मंदए रोविंदए । चउच्चिहे मल्ले प० तं० गंधिमे वेढिमे पुरिमे संधाइमे ।
 चउच्चिहे अलंकारे प० तं० केसालंकारे वत्थालंकारे मल्लालंकारे आभरणालंकारे ।
 चउच्चिहे अभिणए प० तं० दिट्ठतिए पाडेसुए सामंतोवायणिए लोमज्जावसिए
 ॥१८०॥ सर्णकुमारमाहिंदेसु णं कप्पेसु विमाणा चउवण्णा प० तं० णीत्वा लोहिया
 हालिद्दा सुक्किटा । महासुकमहस्सारेसु णं कप्पेसु देवाणं भवधारणिज्जा सरीरगा
 उक्कोसेणं चत्तारि रयणीओ उड्डं उच्चत्तेणं पण्णत्ता ॥१८१॥ चत्तारि उदगगम्भा प०
 तं० उत्सा महिया सीया उसिणा, चत्तारि उदगगम्भा प० तं० हेमगा अब्भसंधडा
 सीओसिणा पंचरुविया । माहे उ हेमगा गम्भा फग्गुणे अब्भसंधडा, सीओसिणा उ
 चित्ते, वइसाहे पंचरुविया (१) चत्तारि मणुस्सीगम्भा प० तं० इत्थित्ताए पुरिम-
 ताए णपुंसगत्ताए विवत्ताए । अप्पं सुक्कं वहुं ओयं इत्थी तत्थ पजायइ, अप्पं ओयं
 वहुं सुक्कं पुरिसो तत्थ पजायइ (१) दोण्हं पि रत्तसुक्काणं, तुल्लभावे णपुंसओ,
 इत्थीओयसमाओगे, विवं तत्थ पजायइ (२) ॥ १८२ ॥ उप्पायपुव्वस्स णं

चत्तारि चूलियावत्थु प०, चउव्विहे कव्वे प० गजे पजे कत्थे मेए ॥१८३॥ गेरइ-
याणं चत्तारि ममुग्घाया प० तं० वेयणासमुग्घाए कसायसमुग्घाए मारणतियसमु-
ग्घाए वेउव्वियममुग्घाए एवं वाउक्काइयाणवि ॥१८४॥ अरहओ णं अरिट्ठणेमिस्स
चत्तारि सया चोइसपुव्वीणं अजिणाणं जिणसंकासाणं सव्वक्खरसंणिवाईणं जिणो इव
अवितह वागमारणाणं उक्कोसिया चउइसपुव्विसंपया हुत्था । समणस्स णं भगवओ
महावीरस्स चत्तारि सया वाईणं सदेवमगुयासुराए परिसाए अपराजियाणं उक्को-
सिया वाइसंपया हुत्था ॥१८५॥ हेट्ठिल्ला चत्तारि कप्पा अइचंदसंठाणसंठिया प०
तं० सोहम्मो ईसाणे सणकुमारे माहिंदे । मड्डिल्ला चत्तारि कप्पा पड्डिपुण्णचंद-
संठाणसंठिया प० तं० बंभलोए लंतए महासुक्के सहस्सारे । उवरिल्ला चत्तारि कप्पा
अइचंदसंठाणसंठिया प० तं० आणए पाणए आरणे अच्चुए ॥१८६॥ चत्तारि समुद्दा
पत्तेयरसा प० तं० लवणोदए वरुणोदए खीरोदए घओदए । चत्तारि आवत्ता प०
तं० खरायत्ते उण्णयावत्ते गूढावत्ते अभिसावत्ते । एवामेव चत्तारि कसाया प० तं०
खरावत्तसमाणे कोहे उण्णयावत्तसमाणे माणे, गूढावत्तसमाणा माया, अभिसावत्त-
समाणे लोभे । खरावत्तसमाणं कोहमणुपविट्ठे जीवे कालं करेइ गेरइएसु उववब्बइ,
उण्णयावत्तसमाणं माणं एवं चेव गूढावत्तसमाणं मायमेवं चेव अभिसावत्तसमाणं
लोभे अणुपविट्ठे जीवे कालं करेइ गेरइएसु उववब्बइ ॥ १८७ ॥ अणुराहा णक्खत्ते
चउत्तारे प०, पुव्वासाढे एवं चेव । उत्तारासाढे एवं चेव ॥ १८८ ॥ जीवा णं
चउट्ठणणिव्वत्तिए पोग्गले पावकम्मत्ताए चिणिसु वा चिणंति वा चिणिसंति
वा तं० गेरइयणिव्वत्तिए तिरिक्खजोणियणिव्वत्तिए मणुस्सणिव्वत्तिए देवणिव्व-
त्तिए । एवं उवचिणिसु वा उवचिणंति वा उवचिणिसंति वा एवं चिणउवचिण-
बंधोदीरवेय तह णिज्जरा चेव ॥१८९॥ चउप्पएसिया खंधा अणंता प०, चउप्प-
एसोगाढा पोग्गला अणंता प०, चउसमथठिईया पोग्गला अणंता प०, चउमुण-
कालगा पोग्गला अणंता जाव चउरुणुल्लक्खा पोग्गला अणंता प० ॥ १९० ॥

पंचमं ठाणं पढमो उद्देशो

पंचमहव्वया प० तं० सव्वाओ पाणाइवायाओ वेरमणं, सव्वाओ मुसावा-
याओ वेरमणं, सव्वाओ अदिण्णादाणाओ वेरमणं, सव्वाओ मेहुणाओ वेरमणं,
सव्वाओ परिग्गहाओ वेरमणं, पंचाणुव्वया प० तं० थूलाओ पाणाइवायाओ

वेरमणं, थूलाओ मुसावायाओ वेरमणं, थूलाओ अदिण्णादाणाओ वेरमणं, थूलाओ
 मेहुणाओ वेरमणं (सदारसंतोसे) इच्छापरिमाणे ॥ १ ॥ पंच वण्णा प० तं० किण्हा
 णीला लोहिया हालिहा सुक्किला । पंच रसा प० तं० तित्ता कडुथा कपाया अंबिला
 महरा । पंचक्कामगुणा प० तं० सदा रूवा गंधा रसा फासा । पंचहिं ठाणेहिं जीवा
 सज्जंति तं० सदेहिं जाव फासेहिं, एवं रज्जंति मुच्छंति गिज्जंति अब्बोववज्जंति ।
 पंचहिं ठाणेहिं जीवा विणिघायमावज्जंति तं० सदेहिं जाव फासेहिं । पंच ठाणा
 अपरिण्णाया जीवाणं अहियाए असुभाए अखमाए अणिरसेस्साए अणाणुगामि-
 यत्ताए भवंति तं० सदा जाव फासा, पंचठाणा सुपरिण्णाया जीवाणं हियाए
 सुभाए जाव आणुगामियत्ताए भवंति तं० सदा जाव फासा । पंच ठाणा अपरि-
 ण्णाया जीवाणं दुग्गइगमणाए भवंति तं० सदा जाव फासा । पंचठाणा परिण्णाया
 जीवाणं सुग्गइगमणाए भवंति तं० सदा जाव फासा ॥ २ ॥ पंचहिं ठाणेहिं जीवा
 दुग्गइं गच्छंति तं० पाणाइवाएणं जाव परिग्गहेणं । पंचहिं ठाणेहिं जीवा सोगइं
 गच्छंति तं० पाणाइवायवेरमणेणं जाव परिग्गहवेरमणेणं ॥ ३ ॥ पंच पडिमाओ
 प० तं० भदा सुभदा महाभदा सव्वओभदा भद्दुत्तरपडिमा ॥४॥ पंच थावरकाया
 प० तं० इंदे थावरकाए, बंभे थावरकाए सिप्पे थावरकाए संमई थावरकाए
 पायावच्चे थावरकाए । पंच थावरकायाहिवई प० तं० इंदे थावरकायाहिवई, जाव
 पायावच्चे थावरकायाहिवई ॥ ५ ॥ पंचहिं ठाणेहिं ओहिंदंसणे समुप्पज्जिउकामेवि
 तप्पढमयाए खंभाएज्जा तं० अप्पभूयं वा पुढविं पासित्ता तप्पढमयाए खंभाएज्जा,
 कुंथुरासिभूयं वा पुढविं पासित्ता तप्पढमयाए खंभाएज्जा, महइमहालयं वा महो-
 रगसरीरं पासित्ता तप्पढमयाए खंभाएज्जा, देवं वा महिइड्डियं जाव महेसक्खं
 पासित्ता तप्पढमयाए खंभाएज्जा, पुरेसु वा पोराणाइं महइमहालयाइं महाणिहाणाइं
 पहीणसामियाइं पहीणसेउयाइं पहीणगुत्तागाराइं उच्छिण्णसामियाइं उच्छिण्णसेउयाइं
 उच्छिण्णगुत्तागाराइं जाइं इमाइं गामागरणगरखेडकब्बडमंडवदोणमुहपट्टणा-
 समसंवाहसणिवेसेसु सिंघाडगतिगचउक्कच्चरचउम्मुहमहापहपहेसु णगरणिज्ज-
 मणेसु सुसाणसुणागारगिरिकंदरसंतिसेलोवट्टावणभवणगिहेसु संणिकियत्ताइं चिट्ठंति
 ताइं वा पासित्ता तप्पढमयाए खंभाएज्जा, इच्चेएहिं पंचहिं ठाणेहिं ओहिं-
 दंसणे समुप्पज्जिउकामे तप्पढमयाए खंभाएज्जा ॥ ६ ॥ पंचहिं ठाणेहिं केवल-
 वरणाणदंसणे समुप्पज्जिउकामे तप्पढमयाए णो खंभाएज्जा तं० अप्पभूयं वा

पुढर्वि पासित्ता तप्पढमयाए णो खंभाएज्जा सेसं तहेव जाव भवणगिहेसु
संणिखित्ताइं चिद्धंति ताइं वा पासित्ता तप्पढमयाए णो खंभाएज्जा, सेसं
तहेव, इच्चएहिं पंचहिं ठाणेहिं जाव णो खंभाएज्जा ॥ ७ ॥ णेरइयाणं
सरीरगा पंचवण्णा पंचरसा प० तं० किण्हा जाव सुक्किळा तित्ता जाव महुरा,
एवं णिरंतरं जाव वेमाणियाणं ॥ ८ ॥ पंच सरीरगा प० तं० ओरालिए वेउच्चिए
आहारए तेयए कम्मए । ओरालियसरीरे पंचवण्णे पंचरसे प० तं० किण्णे जाव
सुक्किळे, तित्ते जाव महुरे । एवं जाव कम्मगसरीरे, सव्वे वि णं बादरवोदिधरा कळे-
वरा पंचवण्णा पंचरसा दुग्ंधा अट्टफासा ॥ ९ ॥ पंचहिं ठाणेहिं पुरिमपच्छिमगाणं
जिणाणं दुग्ंधमं भवइ तं० दुआइक्खं दुविभज्जं दुपरसं दुतित्तिक्खं दुरणुचरं । पंचहिं
ठाणेहिं मच्चिमगाणं जिणाणं सुग्ंधमं भवइ तं० सुआइक्खं सुविभज्जं सुपरसं सुतित्तिक्खं
सुरणुचरं ॥१०॥ पंचठाणाइं समणेणं भगवया महावीरेणं समणाणं णिग्ंधथाणं णिच्चं
वण्णियाइं णिच्चं कित्तियाइं णिच्चं बुइयाइं णिच्चं पसत्थाइं णिच्चमन्भणुण्णयाइं भवंति
तं० खेती मुत्ती अज्जवे मद्दवे लायवे । पंचठाणाइं समणेणं जाव अन्भणुण्णयाइं
भवति तं० सब्बे संजमे तवे चियाए बंभचेरवासे ॥ ११ ॥ पंचठाणाइं समणाणं जाव
अन्भणुण्णयाइं भवंति तं० उक्खित्तं चरए णिक्खित्तं चरए अंतं चरए पंतं चरए ल्ह-
चरए । पंचठाणाइं जाव अन्भणुण्णयाइं भवंति तं० अण्णाय चरए अण्णवेत्तं चरए
मोणं चरए संसट्टकप्पिए तज्जाय संसट्टकप्पिए । पंचठाणाइं जाव अन्भणुण्णयाइं भवंति
तं उवण्हिए मुद्धे मणिए सैखादत्तिए दिट्ठलाभिए पुट्टलाभिए । पंचठाणाइं जाव
अन्भणुण्णयाइं भवंति तं० आयं विलिए णिक्खियं ए पुरिमच्चिए परिमियं पिंडवाइए
भिण्णपिंडवाइए । पंचठाणाइं जाव अन्भणुण्णयाइं भवंति तं० अरसाहारे विरसाहारे
अंताहारे पंताहारे ल्हहाहारे । पंचठाणाइं जाव भवंति तं० अरसजीवी विरसजीवी
अंतजीवी पंतजीवी ल्हजीवी । पंचठाणाइं जाव भवंति तं जहा—ठाणाइए उक्कुट्टु-
आसणिए पडिमट्टाई वीरासणिए णेसज्जिए । पंचठाणाइं जाव भवंति तं० दंडायइए
लमंडसाई आयावए अवाउडए अकंडूयए ॥ १२ ॥ पंचहिं ठाणेहिं समणे णिग्ंधं
महाणिच्चरे महापज्जवसाणे भवइ तं० अगिलाए आयरियवेयावच्चं करेमाणे एवं
उवज्जायवेयावच्चं थेरवेयावच्चं तवस्सियेयावच्चं गिलाणवेयावच्चं करेमाणे । पंचहिं
ठाणेहिं समणे णिग्ंधं महाणिच्चरे महापज्जवसाणे भवइ तं० अगिलाए सेहवेयावच्चं

करेमाणे, अगिलाए कुलवेयावच्चं करेमाणे, ३ गिलाए गणवेयावच्चं करेमाणे, अगिलाए संघवेयावच्चं करेमाणे, अगिलाए साहम्मियवेयावच्चं करेमाणे ॥ १३ ॥
 पंचहिं ठाणेहिं समणे गिग्गंथे साहम्मियं संभोइयं विसंभोइयं करेमाणे णाइक्कमइ तं० सक्किरियट्ठाणं पडिसेवित्ता भवइ पडिसेवित्ता णो आलोएइ आलोइत्ता णो षट्ठवेइ पट्टवेत्ता णो गिव्विसइ जाइं इमाइं थेराणं टिइपक्कपाइं भवति ताइं अइ-
 यंचिय २ पडिसेवेइ से इंदहं पडिसेवामि किं मे थेरा करिस्सति । पंचहिं ठाणेहिं समणे गिग्गंथे साहम्मियं पारंचियं करेमाणे णाइक्कमइ तं० सकुले वसइ कुलस्स भेयाए अब्भुट्ठेत्ता भवइ, गणे वसइ गणस्स भेयाए अब्भुट्ठेत्ता भवइ हिंसपंही छिहंपेही अमिक्खणं अमिक्खणं पसिणायतणाइं पउंजित्ता भवइ । आयरियउव-
 ज्जायस्स णं गणंसि पंचवुग्गहट्ठाणा प० तं० आयरियउवज्जाए णं गणंसि आणं वा धारणं वा णो सम्मं पउंजित्ता भवइ, आयरियउवज्जाए णं गणंसि आहारा-
 इणियाए किइक्कम्मं णो सम्मं पउंजित्ता भवइ, आयरियउवज्जाए णं गणंसि जे सुयपज्जवाए धारंति ते काले २ णो सम्ममणुपवाएत्ता भवइ, आयरियउवज्जाए-
 णं गणंसि गिलाणसेहवेयावच्चं णो सम्ममब्भुट्ठेत्ता भवइ, आयरियउवज्जाए णं गणंसि अणापुच्छियचारी यावि हवइ, णो आपुच्छियचारी । आयरियउवज्जायस्स णं गणंसि पंच अवुग्गहट्ठाणा प० तं० आयरियउवज्जाए णं गणंसि आणं वा धारणं वा सम्मं पउंजित्ता भवइ एवमाहाराइणियाए सम्मं किइक्कम्मं पउंजित्ता भवइ, आयरियउवज्जाए णं गणंसि जे सुयपज्जवाए धारंति ते काले २ सम्म-
 मणुपवाइत्ता एवं गिलाणसेहवेयावच्चं सम्मं अब्भुट्ठित्ता भवइ, आयरियउवज्जाए णं गणंसि आपुच्छियचारी यावि भवइ, णो अणापुच्छियचारी ॥ १४ ॥ पंच गिसि-
 ज्जाओ प० तं० उक्कुडुया गोदोहिया समपायपुया पलियंका अद्धपलियंका ॥ १५ ॥
 पंच अब्भट्ठाणा प० तं० साहुअज्जवं साहुमद्वं साहुलाववं साहुस्सेती साहुमुत्ती ॥ १६ ॥ पंच विहा जोइसिया प० तं० चंदा सूरा गहा णक्कत्ता ताराओ ॥ १७ ॥
 पंच विहा देवा प० तं० भवियदध्वदेवा णरदेवा धम्मदेशा देवाहिदेवा भावदेशा ॥ १८ ॥ पंचविहा परियारणा प० तं० कायपरियारणा फामपरियारणा खंवरिया-
 रणा सद्दपरियारणा मणपरियारणा ॥ १९ ॥ चमरस्स णं असुरिंदस्स असुरबुमाररण्णो पंच अग्गमहिसीओ प० तं० काली राई रयणी विज्जू मेहा, वल्लिस्स णं यइरोय-

गिंदस्स वइरोयणरण्णो पंच अग्गमहिंसीओ प० तं० सुभा गिसुभा रंभा गिरंभा मयणा ॥ २० ॥ चमरस्स णं असुरिंदस्स असुरकुमाररण्णो पंच संगामिया अणिया पंच संगामिया अणियाहिवई प० तं० पायत्ताणिए पीढाणिए कुंजराणिए महिसाणिए रहाणिए । दुमे पायत्ताणियाहिवई सोदामे आसराया पीढाणियाहिवई कुंथु हत्थिराया कुंजराणियाहिवई लोहियक्खे महिसाणियाहिवई किण्णरे रहाणियाहिवई । वल्लिस्स णं वइरोयणिंदस्स वइरोयणरण्णो पंच संगामिया अणिया पंच संगामिया अणियाहिवई प० तं० पायत्ताणिए जाव रहाणिए । महद्दुमे पायत्ताणियाहिवई महासोदामे आसराया पीढाणियाहिवई मालंकारे हत्थिराया कुंजराणियाहिवई महालोहिअक्खे महिसाणियाहिवई किंपुरिसे रहाणियाहिवई । धरणस्स णं णागकुमारिंदस्स णागकुमाररण्णो पंच संगामिया अणिया पंच संगामिया अणियाहिवई प० तं० पायत्ताणिए जाव रहाणिए । भद्दसेणे पायत्ताणियाहिवई जसोधरे आसराया पीढाणियाहिवई सुदंसणे हत्थिराया कुंजराणियाहिवई णीलकंठे महिसाणियाहिवई आणंदे रहाणियाहिवई । भूयाणंदस्स णागकुमारिंदस्स णागकुमाररण्णो पंच संगामिया अणिया पंच संगामिया अणियाहिवई प० तं० पायत्ताणिए जाव रहाणिए । दक्खे पायत्ताणियाहिवई सुग्गीवे आसराया पीढाणियाहिवई सुविक्रमे हत्थिराया कुंजराणियाहिवई सेयकंठे महिसाणियाहिवई णंदुत्तरे रहाणियाहिवई । वेणुदेवस्स णं सुवणिणंदस्स सुवण्णकुमाररण्णो पंच संगामिया अणिया पंच संगामिया अणियाहिवई प० तं० पायत्ताणिए एवं जहा धरणस्स तथा वेणुदेवस्स वि । वेणुदात्तियस्स य जहा भूयाणंदस्स । जहा धरणस्स तथा सव्वेसिं दाहिणिल्लाणं जाव घोसस्स । जहा भूयाणंदस्स तथा सव्वेसिं उत्तरिल्लाणं जाव महाघोमस्स । सक्कस्स णं देविंदस्स देवरण्णो पंच संगामिया अणिया पंच संगामिया अणियाहिवई प० तं० पायत्ताणिए जाव उमभाणिए रहाणिए । हरिणेगमेसी पायत्ताणियाहिवई वाऊं आसराया पीढाणियाहिवई एरावणे हत्थिराया कुंजराणियाहिवई दामद्धी उसभाणियाहिवई मादरे रहाणियाहिवई । ईसाणस्स णं देविंदस्स देवरण्णो पंच संगामिया अणिया जाव पायत्ताणिए पीढाणिए कुंजराणिए उसभाणिए रहाणिए । लहुपरक्कमे पायत्ताणियाहिवई महावाऊ आसराया पीढाणियाहिवई पुप्फंदंते हत्थिराया कुंजराणियाहिवई महादामद्धी उसभाणियाहिवई महामादरे रहाणियाहिवई । जहा सक्कस्स

तहा सब्वेसिं दाहिणिल्लाणं जाव आरणस्स । जहा ईसाणस्स तथा सब्वेसिं उत्तरिल्लाणं
जाव अब्बुयस्स । सकस्स णं देविंदस्स देवरणो अब्भंतरपरिसाए देवाणं पंच
पलिओवमाईं ठिईं प० । ईसाणस्स णं देविंदस्स देवरणो अब्भंतरपरिसाए देवीणं
पंच पलिओवमाईं ठिईं प० ॥ २१ ॥ पंच विहा पडिहा प० तं० गइपडिहा ठिइ-
पडिहा बंधणपडिहा भोगपडिहा बलकीरियपुरिसयारपरकमपडिहा ॥ २२ ॥ पंचविहे
आजीवे प० तं० जाइआजीवे कुलाजीवे कम्माजीवे सिप्पाजीवे लिंगाजीवे ॥२३॥
पंच रायककुहा प० तं० खग्गं छत्तं उप्फेसं उयाणहाओ वालवीअणी ॥ २४ ॥
पंचहिं ठाणेहिं छउमत्थे णं उदिण्णे परिसहोवसग्गे सम्मं सहेज्जा खमेज्जा तितिकखेज्जा
अहियासेज्जा तं० उदिण्णकम्मे खलु अयं पुरिसे उम्मत्तगभूए तेण मे एस पुरिसे
अक्कोसइ वा अवहरइ वा गिच्छेहेइ वा गिब्भेहेइ वा बंधइ वा रंभइ वा
छविच्छेयं करेइ वा पमारं वा गेइ उद्दवेइ वा वत्थं वा पडिग्गहं वा कंवलं वा
पायपुच्छणमच्छिदइ वा विच्छिदइ वा भिंदइ वा अवहरइ वा जकत्वाइट्टे खलु
अयं पुरिसे तेण मे एस पुरिसे अक्कोसइ वा तहेव जाव अवहरइ वा ममं च णं
तब्भववेयणिजे कम्मे उदिण्णे भवइ तेण मे एस पुरिसे अक्कोसइ वा जाव अवहरइ
वा ममं च णं सम्मं असहमाणस्स अखममाणस्स अतितिकखमाणस्स अणहियासे-
माणस्स किं मण्णे कज्जइ ? एगंतसो मे पावे कम्मे कज्जइ ममं च णं सम्मं सहमाणस्स
जाव अहियासेमाणस्स किं मण्णे कज्जइ ? एगंतसो मे गिज्जरा कज्जइ इच्चेएहिं
पंचहिं ठाणेहिं छउमत्थे उदिण्णे परिसहोवसग्गे सम्मं सहेज्जा जाव अहियासेज्जा
॥ २५ ॥ पंचहिं ठाणेहिं केवली उदिण्णे परिसहोवसग्गे सम्मं सहेज्जा जाव अहिया-
सेज्जा तं० खित्तचित्ते खलु अयं पुरिसे तेण मे एस पुरिसे अक्कोसइ वा तहेव
जाव अवहरइ वा दित्तचित्ते खलु अयं पुरिसे तेण मे एस पुरिसे जाव अवहरइ
वा जकत्वाइट्टे खलु अयं पुरिसे तेण मे एस पुरिसे जाव अवहरइ वा ममं च णं
तब्भववेयणिजे कम्मे उदिण्णे भवइ तेण मे एस पुरिसे जाव अवहरइ वा ममं च
णं सम्मं सहमाणं खममाणं तितिकखमाणं अहियासेमाणं पासित्ता वहुवे अण्णे छउ-
मत्था समगा गिग्गथा उदिण्णे २ परिसहोवसग्गे एवं सम्मं सहिस्संति जावं अहिया-
सिस्संति इच्चेएहिं पंचहिं ठाणेहिं केवली उदिण्णे परिसहोवसग्गे सम्मं सहेज्जा
जाव अहियासेज्जा ॥ २६ ॥ पंच हेऊ प० तं० हेउं ण जाणइ हेउं ण पासइ हेउं

ण बुद्धइ हेउं णाभिगच्छइ हेउमण्णाणमरणं मरइ । पंच हेऊ प० तं० हेउणा ण जाणइ जाव हेउणा अण्णाणमरणं मरइ । पंच हेऊ प० तं० हेउं जाणइ जाव हेउं छउमत्थमरणं मरइ । पंच हेऊ प० तं० हेउणा जाणइ जाव हेउणा छउमत्थमरणं मरइ । पंच अहेऊ प० तं० अहेउं ण जाणइ जाव अहेउं छउमत्थमरणं मरइ । पंच अहेऊ प० तं० अहेउणा ण जाणइ जाव अहेउणा छउमत्थमरणं मरइ । पंच अहेऊ प० तं० अहेउं जाणइ जाव अहेउं केवलमरणं मरइ । पंच अहेऊ प० तं० अहेउणा ण जाणइ जाव अहेउणा केवलमरणं मरइ ॥ २७ ॥ केवलस्स णं पंच अणुत्तरा प० तं० अणुत्तरे णाणे अणुत्तरे दंसणे अणुत्तरे चरित्ते अणुत्तरे तवे अणुत्तरे वीरिए ॥ २८ ॥ पउमप्पहे णं अरहा पंच चित्ते हृतथा तं० चित्ताहिं चुए चइत्ता गब्भं वक्कंते चित्ताहिं जाए चित्ताहिं मुंडे भवित्ता अगाराओ अणगारियं पव्वइए चित्ताहिं अणंते अणुत्तरे णिवाघाए गिरावरणे कसिणे पडिपुण्णे केवलवरणाणदंसणे समुप्पण्णे चित्ताहिं परिणिव्वुए । पुप्फदंतं णं अरहा पंच मूले हृतथा तं० मूलेणं चुए चइत्ता गब्भं वक्कंते एवं चेव एवमेएणं अभिलावेणं इमाओ गाहाओ अणुगंतंवाओ—पउमप्पभस्स चित्ता मूले पुण होइ पुप्फदंतस्स; पुव्वाइं आसाढा सीयलस्सुत्तर विमलस्स भद्दवया (१) रेवइया अणंतजिणे पूसो धम्मस्स संतिणो भरणी, कुंथुस्स कत्तियाओ अरस्स तह रेवईओ य (२) मुणिसुव्वयस्स सवणो आसिणिं णमिणो थ जेमिगो चित्ता, पासस्स विसाहाओ पंच य हत्थुत्तरे वीरो (३) समणे भगवं महावीरे पंचहत्थुत्तरे होत्था तं०—हत्थुत्तराहिं चुए चइत्ता गब्भं वक्कंते, हत्थुत्तराहिं गब्भाओ गब्भं साहरिष, हत्थुत्तराहिं जाए, हत्थुत्तराहिं मुंडे भवित्ता जाव पव्वइए, हत्थुत्तराहिं अणंते अणुत्तरे जाव केवलवरणाणदंसणे समुप्पण्णे ॥२९॥

पंचमं ठाणं बीओ उद्देसो

णो कप्पइ गिग्गंथाणं वा गिग्गंथीणं वा इमाओ उद्दिट्ठाओ गणियाओ विर्यंजियाओ पंच महण्णावाओ महाणईओ अंतो मासस्स दुक्खुत्तो वा, तिक्खुत्तो वा, उत्तरित्तए वा संतरित्तए वा तं० गंगा जउणा सरऊ एरावइ मही । पंचहिं ठाणेहिं कप्पइ तं० भयंसि वा, दुब्भिकखंसि वा, पव्वहेज्ज व णं कोई उदओधंसि वा एज्जमाणसि, महया वा अणारिएसु । णो कप्पइ गिग्गंथाणं वा गिग्गंथीणं वा पट्टमपाउसंसि,

गामाणुगामं दूइजित्तए, पंचहिं ठाणेहिं कप्पइ तं० भयेसि वा दुब्भिकखंसि वा
 जाव महया वा अणारिएहि । वासावासं पजोसवियाणं णो कप्पइ णिग्गंथाणं वा
 णिग्गंथीणं वा गामाणुगामं दूइजित्तए, पंचहिं ठाणेहिं कप्पइ तं० णाणट्टयाए दंस-
 णट्टयाए चरित्तट्टयाए आयरियउवज्झाया वा से वीसुंभेजा आयरियउवज्झायाणं
 वा बहिया वेयावच्चं करणयाए ॥ ३० ॥ पंच अणुग्घाइया प० तं० हत्थकम्मं
 करेमाणे मेहूणं पड्डिसेवमाणे राइभोयणं भुंजमाणे सागारियपिंडं भुंजमाणे रायपिंडं
 भुंजमाणे । पंचहिं ठाणेहिं समणे णिग्गंथं रायंतेउरमणुपविसमाणे णाइककमइ तं०
 णगरं सिया सव्वओ समंता गुत्ते गुत्तदुवारे बहवे समणमाहणा णो संचाएंति
 भत्ताए वा पाणाए वा णिकवमिच्चए वा पविसित्तए वा तेसिं विण्णवणट्टयाए
 रायंतेउरमणुपविसेज्जा पाडिहारिये वा पीढफळगमेज्जासंथारगं पच्चपिणमाणे रायं-
 तेउरमणुपविसेज्जा हयस्स वा गयस्स वा दुट्ठस्स आगच्छमाणस्स भीए रायंतेउर-
 मणुपविसेज्जा परो वा णं सहसा वा ब्रलसा वा ब्राहाए गहाय रायंतेउरमणुपविसेज्जा
 बहिया व णं आरामगयं वा उज्जाणगयं वा रायंतेउरज्जो सव्वओ समंता संपरि-
 क्खित्तवित्ता णं णिविसेज्जा इच्चेएहिं पंचहिं ठाणेहिं समणे णिग्गंथं जाव णाइककमइ
 ॥ ३१ ॥ पंचहिं ठाणेहिं इत्थी पुरिसेण सद्धिं असंबसमाणी वि गब्भं धरेज्जा तं०
 इत्थी दुब्बियडा दुणिसण्णा सुक्कपोग्गले अहिट्टेज्जा, सुक्कपोग्गलसंसिट्ठे व से वत्थे
 अंतो जोणीए अणुपविसेज्जा सयं वा सा सुक्कपोग्गले अणुपविसेज्जा परो व से
 सुक्कपोग्गले अणुपविसेज्जा सीओदगवियडेण वा से आयममाणीए सुक्कपोग्गले
 अणुपविसेज्जा, इच्चेएहिं पंचहिं ठाणेहिं जाव धरेज्जा । पंचहिं ठाणेहिं इत्थी पुरिसेण
 सद्धिं संवसमाणी वि गब्भं णो धरेज्जा तं० अप्पत्तजोवणा अइककंतजोवणा जाइवंशा
 गेलण्णपुट्टा दोमणंसिया इच्चेएहिं पंचहिं ठाणेहिं इत्थी पुरिसेण सद्धिं संवसमाणी
 वि गब्भं णो धरेज्जा । पंचहिं ठाणेहिं इत्थी पुरिसेण सद्धिं संवसमाणी वि गब्भं णो
 धरेज्जा तं० णिच्चोउया अगोउया वावण्णसोया वाविद्धसोया अणंगपड्डिसेविणी इच्चे-
 एहिं पंचहिं ठाणेहिं इत्थी पुरिसेण सद्धिं संवसमाणी वि गब्भं णो धरेज्जा । पंचहिं
 ठाणेहिं इत्थी पुरिसेण सद्धिं संवसमाणी वि गब्भं णो धरेज्जा तं० उउंमि णो णिगाम-
 पड्डिसेविणी यमवि भवइ, समागया वा से सुक्कपोग्गला पड्डिविद्धंसंति उद्विण्णे वा
 सेपित्तमोणिए पुरा वा देवकम्मणा पुत्तफले वा णो णिट्ठे भवइ इच्चेएहिं जाव
 णो धरेज्जा ॥ ३२ ॥ पंचहिं ठाणेहिं णिग्गंथा णिग्गंथीओ य एगयओ ठाणं

वा मेज्जं वा णिसीहियं वा चेएमाणा णाइक्कमंति तं० अत्थेगइया णिग्गंथा णिग्गंथीओ
य एगं महं अग्गामियं छिण्णावायं दीहमद्धं भड्ढविमणुपविट्ठा तत्थेगयओ ठाणं वा
सेज्जं वा णिसीहियं वा चेएमाणा णाइक्कमंति अत्थेगइया णिग्गंथा २ गामंसि वा
णगंसि वा जाव रायहाणिसि वा वासं उवागया एगइया जत्थ उवस्सयं लभंति
एगइया णो लभंति तत्थेगयओ ठाणं वा जाव णाइक्कमंति अत्थेगइया णिग्गंथा
णिग्गंथीओ य णागकुमारावासंसि वा सुवण्णकुमारावासंसि वा वासं उवागया तत्थे-
गयओ ठाणं वा जाव णाइक्कमंति, आमोसगा दीसंति ते इच्छंति णिग्गंथीओ चीवर-
पडियाए पडिगाहेत्तए तत्थेगयओ ठाणं वा जाव णाइक्कमंति, जुवाणा दीसंति
ते इच्छंति णिग्गंथीओ मेहुणपाडियाए पडिगाहेत्तए तत्थेगयओ ठाणं वा जाव
णाइक्कमंति, ड्ढेएहिं पंचहिं ठाणेहिं जाव णाइक्कमंति । पंचहिं ठाणेहिं समणे णिग्गंथे
अचेलए सचेलियाहिं णिग्गंथीहिं सद्धिं संवसमाणे णाइक्कमइ तं० खित्तचित्ते समणे
णिग्गंथे णिग्गंथेहिं अविज्जमाणेहिं अचेलए सचेलियाहिं णिग्गंथीहिं सद्धिं संवसमाणे
णाइक्कमइ एवमेएणं गमएणं दित्तचित्ते जक्खाइट्ठे उम्मायपत्ते णिग्गंथीपच्चाइथए
समणे णिग्गंथेहिं अविज्जमाणेहिं अचेलए सचेलियाहिं णिग्गंथीहिं सद्धिं संवसमाणे
णाइक्कमइ ॥ ३३ ॥ पंच आसवदारा प० तं० मिच्छंत्तं अबिरई पमाओ कसाया
जोगा । पंच संवरदारा प० तं० सम्मत्तं विरई अपमाओ अकसाइत्तं अजोगित्तं ।
पंच दंडा प० तं० अट्ठादंडे अणट्ठादंडे हिंसादंडे अकम्हादंडे दिट्ठिपपरियासियादंडे ।
पंच किरियाओ प० तं० आरंभिया परिग्गहिया मायावत्तिया अपच्चक्खाणकिरिया
मिच्छादंसणवत्तिया । मिच्छहिट्ठिणेइयाणं पंच किरियाओ प० तं० आरंभिया
जाव मिच्छादंसणवत्तिया एवं सच्चसिं णिरंतरं जाव मिच्छादिट्ठियाणं वेमाणियाणं,
णवरं विगलेदिया मिच्छादिट्ठीण भण्णंति, सेसं तद्देव । पंच किरियाओ प० तं०
काइया अहिगरणिया पाओसियां पारियावणिया पाणाइवायकिरिया । णेरइयाणं पंच
एवं चेव णिरंतरं जाव वेमाणियाणं । पंच किरियाओ प० तं० आरंभिया जाव
मिच्छादंसणवत्तिया णेरइयाणं पंच किरिया णिरंतरं जाव वेमाणियाणं । पंच किरि-
याओ प० तं० दिट्ठिया पुट्ठिया पाडुच्चिया सामंतोवणिवाइया साहत्थिया, एवं
णेरइयाणं जाव वेमाणियाणं । पंच किरियाओ प० तं० णेसत्थिया आणवणिया
वेयारणिया अणाभोगवत्तिया अणवक्कलवत्तिया, एवं जाव वेमाणियाणं । पंचकिरि-
याओ प० तं० पेज्जवत्तिया दोसवत्तिया पओगकिरिया समुदाणकिरिया ईरियाव-

हिया, एवं मणुस्साण वि, सेसाणं णत्थि ॥ ३४ ॥ पंच विहा परिण्णा प० तं० उवहिपरिण्णा उवस्सयपरिण्णा कसायपरिण्णा जोगपरिण्णा भत्तपाणपरिण्णा ॥ ३५ ॥ पंच विहे ववहारे प० तं० आगमे सुए आणा धारणा जीए, जहा से तत्थ आगमे सिया आगमेणं ववहारं पट्टवेज्जा, णो से तत्थ आगमे सिया, जहा से तत्थ सुए सिया सुएणं ववहारं पट्टवेज्जा णो से तत्थ सुए सिया, एवं जाव जहा से तत्थ जीए सिया जीएणं ववहारं पट्टवेज्जा । इच्चेएहि पंचहि ववहारं पट्टवेज्जा, आगमेणं जाव जीएणं जहा २ से तत्थ आगमे जाव जीए तहा २ ववहारं पट्टवेज्जा से किमाहु भंते ! आगमचलिया समणा णिग्गंथा ! इच्चेयं पंच विहं ववहारं जया जया जहिं जहिं तया तया तहिं तहिं अणिसि-ओवस्सियं सम्मं ववहरमाणे समणे णिग्गंथं आणाए आराहए भवइ ॥ ३६ ॥ संजयमणुस्साणं सुत्ताणं पंच जागरा प० तं० सदा जाव फासा । संजयमणुस्साणं जागराणं पंच सुत्ता प० तं० सदा जाव फासा । असंजयमणुस्साणं सुत्ताणं वा जागराणं वा पंच जागरा प० तं० सदा जाव फासा ॥ ३७ ॥ पंचहिं ठाणेहिं जीवा रयं आइज्जति तं० पाणाइवाएणं जाव परिग्गहेणं । पंचहिं ठाणेहिं जीवा रयं वमेति तं० पाणाइवायवेरमणेणं जाव परिग्गहवेरमणेणं । पंचमांसियं णं भिक्खुपडिमं पडि-वण्णस्स अणगारस्स कम्पति पंचदत्तीओ भोयणस्स पडिगाहेत्तए पंचपाणगसस ॥ ३८ ॥ पंच विहे उवघाए प० तं० उग्गमोवघाए उप्पायणोवघाए एसणोवघाए परि-कम्मोवघाए परिहरणोवघाए । पंचविहा विसोही प० तं० उग्गमविसोही उप्पायण-विसोही एसणाविसोही परिकम्मविसोही परिहरणविसोही । पंचहिं ठाणेहिं जीवा दुल्लभओहियत्ताए कम्मं पगरेति तं० अरिहंताणमवण्णं वयमाणे अरिहंताणत्तस्स धम्मस्स अवण्णं वयमाणे आयरियउवज्झायाणमवण्णं वयमाणे चाउवण्णस्स संघ-स्स अवण्णं वयमाणे विविक्कतवचंभचेराणं देवाणं अवण्णं वयमाणे । पंचहिं ठाणेहिं जीवा सुल्लभओहियत्ताए कम्मं पगरेति, तं० अरिहंताणं वण्णं वयमाणे, जाव विविक्क-तवचंभचेराणं देवाणं वण्णं वयमाणे ॥ ३९ ॥ पंच पडिसंलीणा प० तं० सोईदिय-पडिसंलीणे जाव फासिंदियपडिसंलीणे । पंच अपडिसंलीणा प० तं० सोईदियअपडि-संलीणे जाव फासिंदियअपडिसंलीणे । पंच विहे संवरे प० तं० सोईदियसंवरे जाव फासिंदियसंवरे । पंचविहे असंवरे प० तं० सोईदियअसंवरे जाव फासिंदियअसंवरे ॥ ४० ॥ पंचविहे संजमे प० तं० सामाइयसंजमे छेदोवट्ठावणियसंजमे परिहार-

त्रिसुद्धियसंजमे सुदुमसंपरायसंजमे अहकलायचरित्तसंजमे । एगिंदिया णं जीवा
 असमारभमाणस्स पंचविहे संजमे कज्जइ तं० पुढविकाइयसंजमे जाव वणस्सइकाइय-
 संजमे । एगिंदिया णं जीवा समारभमाणस्स पंचविहे असंजमे कज्जइ तं० पुढवि-
 काइयअसंजमे जाव वणस्सइकाइयअसंजमे । पंचिंदिया णं जीवा असमारभमाणस्स
 पंचविहे संजमे कज्जइ तं० सोइंदियसंजमे जाव फासिंदियसंजमे । पंचिंदिया णं जीवा
 समारभमाणस्स पंचविहे असंजमे कज्जइ तं० सोइंदियअसंजमे जाव फासिंदिय-
 असंजमे । सव्वपाणभूयजीवसत्ता णं असमारभमाणस्स पंचविहे संजमे कज्जइ तं०
 एगिंदियसंजमे जाव पंचिंदियसंजमे । सव्वपाणभूयजीवसत्ता णं समारभमाणस्स
 पंचविहे असंजमे कज्जइ तं० एगिंदियअसंजमे जाव पंचिंदियअसंजमे ॥ ४१ ॥ पंच-
 विहा तणवणस्सइकाइया प० तं० अग्गवीया मूलवीया पोरवीया खंधवीया बीयरुहा
 ॥ ४२ ॥ पंचविहे आयारे प० तं० णाणायारे दंसणायारे चरित्तायारे तवायारे
 वीरियायारे । पंचविहे आयारपक्खे प० तं० मासिए उग्घाइए मासिए अणुग्घा-
 इए चउमासिए उग्घाइए चउमासिए अणुग्घाइए आरोवणा । आरोवणा पंचविहा
 प० तं० पट्टविया ठविया कसिणा अकसिणा हाडहडा ॥ ४३ ॥ जंबुद्दीवे दीवे मंद-
 रस्स पव्वयस्स पुरत्थिमे णं सीयाए महाणईए उत्तरेणं पंचवक्खारपव्वया प० तं०
 मालवंते चित्तकूडे पम्हकूडे णल्लिणकूडे एगसेले । जंबूमंदरस्स पुरओ सीयाए महा-
 णईए दाहिणेणं पंचवक्खारपव्वया प० तं० तिकूडे वेसमणकूडे अंजणे मायंजणे
 सोमणसे । जंबूमंदरस्स पच्चत्थिमेणं सीओयाए महाणईए दाहिणेणं पंचवक्खार-
 पव्वया प० तं० विज्जुप्पमे अंकावई पम्हावई आसीविसे सुहावहे । जंबूमंदरस्स
 पच्चत्थिमेणं सीओयाए महाणईए उत्तरेणं भंच वक्खारपव्वया प० तं० चंदपव्वए
 सूरपव्वए णागपव्वए देवपव्वए गंधमायणे । जंबूमंदरस्स दाहिणेणं देवकुराए
 कुराए पंचमहहहा प० तं० णिसहदहे देवकुरुदहे सूरदहे सुलसदहे विज्जुप्पहदहे ।
 जंबूमंदरउत्तरेणं उत्तरकुराए कुराए पंचमहहहा प० तं० णीलवंतदहे उत्तर
 कुरुदहे चंददहे एरावणदहे मालवंतदहे । सव्वेवि णं वक्खारपव्वया सीयासीओ-
 याओ महाणईओ मंदरं वा पव्वयंतेणं पंचजोयणसयाई उट्ठं उच्चत्तेणं पंचगाउय-
 सयाई उव्वेहेणं । धायइसंडे दीवे पुरत्थिमद्धेणं मंदरस्स पव्वयस्स पुरत्थिमेणं
 सीयाए महाणईए उत्तरेणं पंचवक्खारपव्वया प० तं० मालवंते एवं जहा
 जंबुद्दीवे तहा जाव पुक्खारवरदीवड्ढुपच्चत्थिमद्धे वक्खारा दहा य उच्चत्तं

भाणियत्वं । समयकवेत्ते णं पंच भरहाडं पंच एरवयाइं एवं जहा चउट्टाणे विडय उद्देमे तहा एत्थवि भाणियत्वं जाव पंच मंदरा पंचमंदरचूलियाओ णवरं उमुयारा णत्थि ॥ ४४ ॥ उसभे णं अरहा कोसलिए पंचधणुमंयाइं उड्डं उच्चत्तेणं होत्था भरहे णं राया चाउरंतचक्कवट्टी पंचधणुसयाइं उड्डं उच्चत्तेणं होत्था बाहुवली णं अणगारे एवं चेव । बंभी णं अज्जा एवं चेव सुंदरावि । पंचहिं ठाणेहिं मुत्ते वि बुज्जेज्जा तं० सद्देणं फासेणं भोयणवरिणामेणं णिदकखरणं सुविणदंमणेणं । पंचहिं ठाणेहिं समणे णिग्गंथे णिग्गंथिं णिण्हमाणे वा अवलंबमाणे वा णाइक्कमइ तं० णिग्गंथिं च णं अणयरे पमुजाइए वा पक्खीजाइए वा ओहाएज्जा तत्थ णिग्गंथिं णिग्गंथिं णिण्हमाणे वा अवलंबमाणे वा णाइक्कमइ णिग्गंथे णिग्गंथिं तुग्गंसि वा विसमंसि वा पक्खलमाणिं वा पवडमाणिं वा गेण्हमाणे वा अवलंबमाणे वा णाइक्कमइ णिग्गंथे णिग्गंथिं सेयंसि वा पंकंसि वा पणगंसि वा उदगंसि वा उक्कस्समाणिं वा उवुज्जमाणिं वा णिण्हमाणे वा अवलंबमाणे वा णाइक्कमइ । णिग्गंथे णिग्गंथिं णावं आरुहमाणे वा ओरुहमाणे वा णाइक्कमइ म्वित्तइत्तं जक्कवाइट्टं उम्मायपत्तं उवसग्गपत्तं साहिगरणं सपायच्छित्तं जाव भत्तपाणपडियाइत्थिस्सवं अट्टजायं वा णिग्गंथे णिग्गंथिं णिण्हमाणे वा अवलंबमाणे वा णाइक्कमइ ॥ ४५ ॥ आयरियउवज्जायस्स णं गणंसि पंच अइसेसा प० तं० आयरियउवज्जाए अंतो-उवस्सयस्स पाए णिग्गिज्जियं २ पप्फोडेमाणे वा पमज्जेमाणे वा णाइक्कमइ आयरियउवज्जाए अंतो उवस्सयस्स उचारपासवणं विग्गिचमाणे वा विमोहेमाणे वा णाइक्कमइ आयरियउवज्जाए पभू इच्छा वेयावडियं करेज्जा इच्छा णो करेज्जा आयरियउवज्जाए अंतो उवस्सयस्स एगराईं वा दुराईं वा एगामी वसमाणे णाइक्कमइ । आयरियउवज्जाए चाहिं उवस्सयस्स एगराईं वा दुराईं वा वसमाणे णाइक्कमइ । पंचहिं ठाणेहिं आयरियउवज्जायस्स गणावक्कमणे प० तं० आयरियउवज्जाए गणंसि आणे वा धारणं वा णो सम्मं पउंजित्ता भवइ । आयरियउवज्जाए गणंसि अहारायणियाए किइक्कमं वेणइयं णो सम्मं पउंजित्ता भवइ । आयरियउवज्जाए गणंसि जे सुयपज्जवजाए धारित्तिं ते काले णो सम्ममणुपवाएत्ता भवइ, आयरियउवज्जाए गणंसि सगणियाए वा परगणियाए वा णिग्गंथीए वहिल्लेमे भवइ, मित्ते णाइग्गणे वा से गणाओ अवक्कमेज्जा तेसिं संगहोवग्गहट्टयाए गणावक्कमणे

पणसे । पंच विहा इद्धिमंता मणुस्सा प० तं० अरहंता चक्कवट्ठी बलदेवा वासु-
देवा भावियण्णाणो अणगारा ॥ ४६ ॥

पंचमं ठाणं तइओ उद्देसो

पंच अत्थिकाया प० तं० धम्मत्थिकाए अधम्मत्थिकाए आगासत्थिकाए
जीवत्थिकाए पोग्गलत्थिकाए । धम्मत्थिकाए अवण्णे अगंधे अरसे अफासे अरूवी
अजीवे सासए अवट्ठिए लोगद्वे से समासओ पंचविहे प० तं० दव्वओ खेत्तओ
कालओ भावओ गुणओ । दव्वओ णं धम्मत्थिकाए एगं दव्वं खेत्तओ लोगपमाणमेत्ते
कालओ ण कयाइ णासी ण कयाइ ण भवइ ण कयाइ ण भविस्सइत्ति भुविं भवइ
य भविस्सइ य धुवे णिए सासए अक्खए अक्खए अवट्ठिए णिवे, भावओ अवण्णे
अगंधे अरसे अफासे, गुणओ गमणगुणे य (१) अधम्मत्थिकाए अवण्णे एवं चेव
णवरं गुणओ ठाणगुणे (२) आगासत्थिकाए अवण्णे एवं चेव णवरं खेत्तओ लोगा-
ल्लोग्गमाणमेत्ते गुणओ अधगाहणारुणे सेसं तं चेव (३) जीवत्थिकाए णं अवण्णे
एवं चेव णवरं दव्वओ णं जीवत्थिकाए अणंताइं दव्वाइं, अरूवी जीवे सासए,
गुणओ उवओगुणे, सेसं तं चेव (४) पोग्गलत्थिकाए पंचवण्णे पंचरसे दुग्ंधे
अट्ठफासे रूवी अजीवे सासए अवट्ठिए जाव दव्वओ णं पोग्गलत्थिकाए अणंताइं
दव्वाइं, खेत्तओ लोगपमाणमेत्ते, कालओ ण कयाइ णासी जाव णिवे भावओ वण-
मंते गंधमंते रसमंते फासमंते, गुणओ गहणगुणे ॥ ४७ ॥ पंच गइओ प० तं०
गिरयगई तिरियगई मणुयगई देवगई सिद्धिगई । पंच इंदियत्था प० तं० सोइं-
दियत्थे जाव फासिंदियत्थे । पंच मुंडा प० तं०—सोइंदियमुंडे जाव फासिंदियमुंडे,
अहवा पंच मुंडा प० तं० कोहमुंडे, माणमुंडे, मायामुंडे, लोभमुंडे, सिरमुंडे
॥ ४८ ॥ अहे लोए णं पंच बायरा प० तं० पुढविकाइया आउ० वाउ० वणस्सइ-
काइया उराला तसा पाणा । उड्डलोए णं पंच बायरा, एवं चेव, तिरियलोए णं
पंच बायरा प० तं० एगिंदिया जाव पंचिंदिया । पंच विहा बायरतेउकाइया प० तं०
इंगाले जाले मुम्मुरे अच्ची अल्लए । पंचविहा बादरवाउकाइया प० तं० पाइण-
वाए पडीणवाए दाहिणवाए उदीणवाए विदिसिवाए । पंचविहा अचित्ता वाउ-
काइया प० तं० अकंते धंते पीलिए सरीराणुगाए संमुच्छिमे ॥ ४९ ॥ पंच णियंठा
प० तं० पुलाए वउसे कुसीले णियंठे सिणाए । पुलाए पंच विहे प० तं०

णाणपुलाए दंसणपुलाए चरित्तपुलाए लिंगपुलाए अहासुहुमपुलाए णामं पंचमे ।
 वउमे पंचविहे ५० तं० आभोगवउसे अणाभोगवउसे संवुडवउसे असंवुडवउसे
 अहासुहुमवउसे णामं पंचमे । कुसीले पंचविहे ५० तं० णाणकुसीले दंसणकुसीले
 चरित्तकुसीले लिंगकुसीले अहासुहुमकुसीले णामं पंचमे । गियंठे पंचविहे ५० तं०
 पढमसमयणियंठे अपढमसमयणियंठे चरिमसमयणियंठे अचरिमसमयणियंठे
 अहासुहुमणियंठे णामं पंचमे । सिणाए पंच विहे ५० तं० अच्छवी असत्रले अक-
 म्मंसे संसुद्धणाणदंसणधरे अरहा जिणे केवली अपरिस्माई ॥ ५० ॥ कप्पइ
 णिग्गंथाणं वा णिग्गंधीणं वा पंचवत्थाईं धारेत्तए वा परिहरित्तए वा तं० जंगिए
 भंगिए साणए पोत्तिए त्तिरोडपट्टए णामं पंचमए । कप्पइ णिग्गंथाण वा णिग्गं-
 थीण वा पंच रयहरणाईं धारित्तए वा परिहरित्तए वा, तंजहा उणिए उट्टिए
 साणए पच्चापिच्चियए मुंजापिच्चिए णामं पंचमे ॥ ५१ ॥ धम्मं चरमाणस्स पंच
 णिस्साठाणा ५० तं० छक्काए गणे राया गिहवईं सरारं । पंच णिही ५० तं०
 पुत्तणिही मित्तणिही सिप्पणिही धणणिही धण्णणिही । पंचविहे सोए ५० तं० पुद-
 विसोए आउसोए तेउसोए मंतसोए वंभसोए । पंचठाणाईं छउमत्थे सव्वभावेणं ण
 जाणइ ण पासइ तं० धम्मत्थिकायं अधम्मत्थिकायं आगासत्थिकायं जीवं असरोर-
 पडिबद्धं परमाणुपोग्गलं, एयाणि चैव उप्पण्णणाणदंसणधरे अरहा जिणे केवली
 सव्वभावेणं जाणइ पासइ धम्मत्थिकायं जाव परमाणुपोग्गलं । अहे लोए णं पंच
 अणुत्तरा महइमहालयया महाणिरया ५० तं० काले महाकाले रोरुए महारोरुए
 अप्पइट्ठाणे । उड्डुलोए णं पंच अणुत्तरा महइमहालयया महाविमाणा ५० तं० विजये
 वेजयंते जयंते अपराजिए सव्वट्ठसिद्धे ॥ ५२ ॥ पंच पुरिसजाया ५० तं०
 हिरिसत्ते हिरिमणसत्ते च्लसत्ते थिरसत्ते उदयणसत्ते । पंच मच्छा ५० तं०
 अणुसोयचारी पडिसोयचारी अंतचारी मज्झचारी सव्वचारी । एवामेव पंच
 भिक्खागा ५० तं० अणुसोयचारी जाव सव्वचारी । पंच वणामगा ५० तं० अतिहि-
 वणीमए किणवणीमए माहणवणीमए साणवणीमए समणवणीमए । पंचहिं
 ठाणंहिं अत्तेलए पसत्थे भवइ तं० अप्पा पडिलेहा लाघविए पसत्थे रुवेवेसा-
 सिए तत्रे अणुण्णाए विउले इंदियणिग्गहे । पंच उक्कला ५० तं० दंडुककले
 रड्डुककले तेणुककले देसुककले सव्वुककले । पंच समिईअं ५० तं० इरियासमिई
 भासा जाव पारिठावणियासमिई ॥ ५३ ॥ पंचविहा संसारसमावण्णया जीवा ५० तं०

एगिदिया जाव पंचिदिया । एगिदिया पंचगइया पंचागइया प० तं० एगिदिए
 एगिदिएसु उववज्जमाणे एगिदिएहितो वा जाव पंचिदिएहितो वा उववज्जेजा से
 चैव णं से एगिदिए एगिदियत्तं विप्पजहमाणे एगिदियत्ताए वा जाव पंचिदिय-
 ताए वा गच्छेज्जा । बेइदिया पंचगइया पंचागइया एवं चैव । एवं जाव पंचिदिया
 पंचगइया पंचागइया प० तं० पंचिदिया जाव गच्छेज्जा ॥ ५४ ॥ पंचविहा सव्व-
 जीवा प० तं० कोहकसाई जाव लोभकसाई अकसाई । अहवा पंचविहा सव्वजीवा
 प० तं० गेरइया जाव देवा सिद्धा । अह भंते ! कलमसूरतिलमुग्गमासणिप्फावकुल-
 र्थआलिसंदगसईणपल्लिमथगाणं एएसि णं धण्णाणं कुट्टाउत्ताणं जहा सालीणं
 जाव केवइयं कालं जोणी संचिद्धइ ? गोयमा ! जहण्णेणं अंतं मुहुत्तं उक्कोसेणं पंच
 संवच्छराइं, तेण परं जोणी पमिलायइ जाव तेण परं जोणीवोच्छेदे पण्णत्ते ॥५५॥
 पंच संवच्छरा प० तं० णक्खत्तसंवच्छरे जुगसंवच्छरे पमाणसंवच्छरे लक्खणसंव-
 च्छरे सणिचरसंवच्छरे । जुगसंवच्छरे पंचविहे प० तं० चंदे चंदे अभिवद्धिए
 चंदे अभिवद्धिए चैव । पमाणसंवच्छरे पंचविहे प० तं० णक्खत्ते चंदे उऊ आइच्चे
 अभिवद्धिए । लक्खणसंवच्छरे पंचविहे प० तं० समगं णक्खत्ता जोगं जोयति समगं
 उऊ परिणमंति; णच्चुण्हं णाइसीओ बहूदओ होइ णक्खत्ते (१) ससिसगलपुण्ण-
 मासी जोएइ विसमन्चारिणक्खत्ते कडुओ बहूदओ या तमाहु संवच्छरं चंदं(२)विसमं
 पवाल्लिणे परिणमंति; अणुदूसु देति पुप्फफले; वासं ण सम्म वासइ तमाहु
 संवच्छरं कम्मं (३) पुढव्विदगाणं तु रसं पुप्फफलाणं तु देइ आदिच्चो; अप्पेण
 वि वासेणं सम्मं णिप्फज्जेए सस्सं (४) आइच्चतेयतविया खणल्लवदिवसा उऊ
 परिणमंति; पूरिंति रेणुथलयाइं, तमाहु अभिवद्धियं जाण (५) ॥ ५६ ॥ पंचविहे
 जीवस्स णिज्जाणमग्गे प० तं० पाएहिं ऊरुहिं उरेणं सिर्रेणं सव्वंगेहिं । पाएहिं
 णिज्जाणमाणे गिरयंगामी भवइ ऊरुहिं णिज्जाणमाणे तिरियगामी भवइ उरेणं
 णिज्जाणमाणे मणुयगामी भवइ सिर्रेणं णिज्जाणमाणे देवगामी भवइ सव्वं-
 गेहिं णिज्जाणमाणे सिद्धिगइपज्जवसाणे पण्णत्ते । पंचविहे छेयणे प० तं० उप्पाय-
 च्छेयणे वियच्छेयणे बंधच्छेयणे पएसच्छेयणे दोधारच्छेयणे । पंचविहे आणंतरिए
 प० तं० उप्पायणंतरिए वियणंतरिए पएसाणंतरिए समयणंतरिए सामण्णाणंतरिए ।
 पंचविहे अणंतए प० तं० णामणंतए ठवणाणंतए दव्वाणंतए गणणाणंतए पए-
 साणंतए । अहवा पंचविहे अणंतए प० तं० एगओऽणंतए दुहओणंतए देस-

वित्थाराणतए सव्ववित्थाराणतए सासयाणतए ॥ ५७ ॥ पंचविहे णाणे प० तं०
 आभिणित्रोहियणाणे सुयणाणे ओहिणाणे मणवज्जवणाणे केवलणाणे । पंचविहे णाणा-
 वरणिजे कम्मे प० तं० आभिणित्रोहियणाणावरणिजे जाव केवलणाणावरणिजे ।
 पंचविहे सज्जाए प० तं० वायणा पुच्छणा परियट्ठणा अनुप्पेहा धम्मकहा । पंच-
 विहे पच्चक्खाणे प० तं० सहहणमुद्धे विणयमुद्धे अनुभासणासुद्धे अनुपालणासुद्धे
 भावमुद्धे । पंचविहे पडिक्कमणे प० तं० आसवदारपडिक्कमणे मिच्छत्तपडिक्कमणे
 कसायपडिक्कमणे जोगपडिक्कमणे भावपडिक्कमणे । पंचहिं ठाणेहिं सुत्तं वाएजा
 तं० संगहट्ठयाए उवग्गहणट्ठयाए णिज्जरणट्ठयाए सुत्ते वा मे पच्चवयाए भविस्सइ
 मुत्तस्स वा अबोच्छित्तिणयट्ठयाए । पंचहिं ठाणेहिं सुत्तं सिक्खिब्बजा तं० णाणट्ठयाए
 दंसणट्ठयाए चरित्तट्ठयाए बुग्गहविमोयणट्ठयाए अहत्थे वा भावे जाणिससामीति
 कट्ठ । सोहम्मीसाणेसु णं कप्पेसु विमाणा पंचवण्णा प० तं० किण्हा जाव सुक्किल्ला
 (१) सोहम्मीसाणेसु णं कप्पेसु विमाणा पंचजोयणसयाई उड्डं उच्चत्तेणं प०
 (२) धंमलोगलंतएसु णं कप्पेसु देवाणं भवधारणिज्जसरीरगा उक्कोसेणं पंचरयणी
 उड्डं उच्चत्तेणं प० (३) णेरइया णं पंचवण्णे पंचरसे षोग्गले वेधंसु वा बंधंति वा
 बंधिस्संति वा तं० किण्हे जाव सुक्किल्ले, तिस्से जाव महुरे, एवं जाव वेमाणिया
 ॥ ५८ ॥ जंडुहीवे दीवे मंदरस्स पव्वयस्स दाहिणेणं गंगामहाणइं पंचमहाणइंओ
 समप्पेति तं० जउणा सरऊ आदी कोसी मही (१) जंबूमंदरस्स दाहिणेणं सिंधु-
 महाणइं पंचमहाणइंओ समप्पेति तं० सयद्दू विभासा वितत्था एरावई चंदभारा
 (२) जंबूमंदरस्स उत्तरेणं रत्तामहाणइं पंचमहाणइंओ समप्पेति तं० किण्हा महा-
 किण्हा णीला महाणीला महातीरा (३) जंबूमंदरस्स उत्तरेणं रत्तावई महाणइं
 पंचमहाणइंओ समप्पेति तं० इंदा इंदसेणा सुसेणा वारिसेणा महाभोया (४) ॥ ५९ ॥
 पंच तिथ्यरा कुमारवासमज्जे वसित्ता मुंडा जाव पव्वइया तं० वासुपुज्जे मल्ली
 अरिट्ठणेमी पासे वीरे । चमरचंचाए रायहाणीए पंच सभा प० तं० सभासुहम्मा
 उववायसभा अभिमेयसभा अलंकारियसभा ववसायसभा । एग्गमेगे णं इंदट्ठाने
 णं पंच सभाओ प० तं० सभासुहम्मा जाव ववसायसभा । पंच णक्खत्ता पंच तारा
 प० तं० धणिट्ठा रोहिणी पुणव्वसू हत्थो विसाहा । जीवा णं पंचट्ठानिण्वत्तिए
 षोग्गले पावक्कम्मत्ताए चिणिसु वा चिणंति वा चिणिसंति वा तं० एभिंदियणिव्व-

तिण् जाव पंचिन्द्रियणिव्वत्तिण् एवं चिण उवच्चिण बंध-उदीर-वेद-तह णिज्जरा
चेव । पंचपणसिया खंधा अणंता प० । पंचपणसोगाढा षोग्गला अणंता प० जाव
पंच गुणलुक्खा षोग्गला अणंता पण्णत्ता ॥ ६० ॥

छट्ठं ठाणं

छहिं ठाणेहिं संपण्णे अणगारे अरिहइ गणं धारित्तए तं० सद्धी पुरिसजाए,
सधे पुरिसजाए, मेहावी पुरिसजाए, बहुस्सुए पुरिसजाए, सत्तिमं, अप्पाहिगरणे ।
छहिं ठाणेहिं णिग्गथे णिग्गथिं णिण्हमाणे वा अवलंबमाणे वा णाइक्कमइ, तं०
खित्तचित्तं, दित्तचित्तं, जक्खाइट्ठं, उम्मायपत्तं, उवसग्गपत्तं, साहिगरणं ॥ १ ॥ छहिं
ठाणेहिं णिग्गथा णिग्गंथीओ य साहम्मियं कालगयं समायरमाणा णाइक्कमंति तं०
अंतोहितो वा बाहिं णीणेमाणा, बाहीहितो वा णिब्बाहिं णीणेमाणा, उवेहमाणा वा,
उवासमाणा वा, अणुण्णवेमाणा वा, तुसिणीए वा संपव्वयमाणा ॥ २ ॥ छ
ठाणाइं छउमत्थे सव्वभावेणं ण जाणइ ण पासइ तं० धम्मत्थिकायमधम्मत्थि-
कायमायासं जीवमसरीरपडिबद्धं परमाणुषोग्गलं सद्दं, एयाणि चेव उप्पण्णणाणदंस-
णधरे अरहा जिणे जाव सव्वभावेणं जाणइ पासइ धम्मत्थिकायं जाव सद्दं ॥ ३ ॥
छहिं ठाणेहिं सव्वजीवाणं णत्थि इद्धीति वा जुत्तीति वा जसेइ वा बलेइ वा वीरिएइ
वा पुरिसक्कार जाव परक्कमेइ वा तं० जीवं वा अजीवं करणयाए, अजीवं वा
जीवं करणयाए, एगसमएणं वा दो भासाओ भासित्तए, सयं कडं वा कम्मं वेएमि
वा मा वा वेएमि, परमाणुषोग्गलं वा छिंदित्तए वा, भिंदित्तए वा, अगणिकाएण
वा समोदहित्तए, बहिया वा लोगंता गमणयाए ॥ ४ ॥ छजीवणिकाया प० तं०
पुढविकाइया जाव तसकाइया ॥ ५ ॥ छ तारग्गहा प० तं० सुक्के, बुधे, बहस्सई,
अंगारए, सणिच्चरे, केऊ ॥ ६ ॥ छव्विहा संसारसमावण्णगा जीवा प० तं० पुढवि-
काइया जाव तसकाइया ॥ ७ ॥ पुढविकाइया छगइया छआगइया प० तं० पुढवि-
काइए पुढविकाइएसु उववज्जमाणे पुढविकाइएहितो वा जाव तसकाइएहितो वा
उववज्जेजा, सो चेव णं से पुढविकाइए पुढविकाइयत्तं विप्पजहमाणे पुढविकाइय-
त्ताए वा जाव तसकाइयत्ताए वा गच्छेजा । आउकाइयावि छगइया छआगइया,
एवं चेव जाव तसकाइया ॥ ८ ॥ छव्विहा सव्वजीवा प० तं० आग्निबोहियणाणी
जाव केवलणाणी, अण्णाणी ॥ ९ ॥ अहवा छव्विहा सव्वजीवा प० तं० एग्गिदिया
जाव पंचिन्द्रिया, अणिदिया ॥ १० ॥ अहवा छव्विहा सव्वजीवा प० तं० ओरा-

लियसरीरी, वेउल्वियसरीरी, आहारगसरीरी, तेअगसरीरी, कम्मगसरीरी, असरोरी
 ॥ ११ ॥ छविहा तणवणस्सइकाइया प० तं० अगनीया मूलनीया पोरनीया खंध-
 नीया वीयरुहा संमुच्छिमा ॥ १२ ॥ छट्ठाणाइं सव्वजीवाणं णो सुत्तमाइं भवेति,
 तं० माणुस्सए भवे, आयरिए खित्ते जम्मं, सुकुले पच्चायाई, केवल्लिपणत्तस्स
 धम्मस्स सवणया, सुयस्स वा सद्दहणया, सद्दहियस्स वा पत्तियस्स वा रोइयस्स वा
 सम्मं काएणं फासणया ॥ १३ ॥ छ ईदियत्था प० तं० सोईदियत्थे जाव फासि-
 दियत्थे णोईदियत्थे ॥ १४ ॥ छविहे संवरे प० तं० सोईदियसंवरे जाव फासि-
 दियसंवरे णोईदियसंवरे ॥ १५ ॥ छविहे असंवरे प० तं० सोईदियअसंवरे, जाव
 फासिदियअसंवरे, णोईदियअसंवरे ॥ १६ ॥ छविहे माए प० तं० सोईदियसाए
 जाव णोईदियसाए ॥ १७ ॥ छविहे असाए प० तं० सोईदियअसाए, जाव णोई-
 दियअसाए ॥ १८ ॥ छविहे पायच्छित्ते प० तं० आलोयगारिहे पडिक्कमगारिहे,
 तदुभयारिहे, विवेगारिहे, विउस्सगारिहे, तवारिहे ॥ १९ ॥ छविहा मणुस्सा प०
 तं० जंबूदीवगा, धायइखंडदीवपुरत्थिमद्दगा, धायइखंडदीवपच्चत्थिमद्दगा,
 पुक्खरवरदीवड्डुपुरत्थिमद्दगा, पुक्खरवरदीवड्डुपच्चत्थिमद्दगा, अंतरदीवगा । अहवा
 छविहा मणुस्सा प० तं० संमुच्छिमणुस्सा, कम्मभूमगा अकम्मभूमगा अंतर-
 दीवगा; गम्भवकंतिमणुस्सा कम्मभूमिगा अकम्मभूमिगा अंतरदीवगा ॥ २० ॥
 छविहा इद्धिमंता मणुस्सा प० तं० अरहंता, चक्खवट्ठी, बलदेवा, वासुदेवा, चारणा,
 विजाहरा ॥ २१ ॥ छविहा अणिद्धिमंता मणुस्सा प० तं० हेमवंतगा हेरण्वंतगा
 हरिवंसगा रम्मगवंसगा कुरुवासिणो अंतरदीवगा ॥ २२ ॥ छविहा ओमप्पिणी
 प० तं० सुसमसुसमा जाव दुसमदुसमा । छविहा उस्सप्पिणी प० तं० दुसमदुसमा
 जाव सुसमसुसमा ॥ २३ ॥ जंबुदीवे दीवे भरहेरवएसु वासेसु तीताए उस्सप्पिणी
 सुसमसुसमाए समाए मणुया छच्च धणुसहस्साइं उड्डुमुच्चत्तेणं हुत्था, छच्च अद्धपलि-
 ओवमाइं परमाउं पालथित्था ॥ २४ ॥ जंबुदीवे दीवे भरहेरवएसु वासेसु इमंमिं
 ओसप्पिणीए सुसमसुसमाए समाए एवं च्चेव ॥ २५ ॥ जंबू० भरहेरवए आग-
 भित्साए उस्सप्पिणीए सुसमसुसमाए समाए एवं च्चेव, जाव छच्च अद्धपलिओ-
 वमाइं परमाउं पालइस्संति ॥ २६ ॥ जंबुदीवे दीवे देवकुरुउत्तरकुरामु मणुया
 छच्चणुस्सहस्साइं उड्डु उच्चत्तेणं प० छच्च अद्धपलिओवमाइं परमाउं पालंति ॥ २७ ॥

एवं धायइसंडशीवपुरतिथमद्धे चत्तारि आलावगा जाव पुक्खरवरदीवद्वयचत्तिथमद्धे
चत्तारि आलावगा ॥ २८ ॥ छविहे संघयणे प० तं० बइरोसभणारायसंघयणे,
उसभणारायसंघयणे, णारायसंघयणे, अद्धणारायसंघयणे, खीलियासंघयणे, छेवद्व-
संघयणे ॥ २९ ॥ छविहे संठाणे प० तं० समचउरंसे, णग्गोहपरिमंडले, साई,
खुजे, वामणे, हुंडे ॥ ३० ॥ छट्ठाणा अणत्तवओ अहियाए असुभाए जाव अणाणु-
गामियत्ताए भवंति, तं० परियाए परियाले सुए तवे लाभे पूयासक्कारे ॥ ३१ ॥ छट्ठाणा
अत्तवत्तो हियाए जाव आणुगामियत्ताए भवंति तं० परियाए जाव पूया-
सक्कारे ॥ ३२ ॥ छविहा जाइआरिया मणुस्सा प० तं० अंबट्ठा य कलंदा य वेदेहा
वेदिगाइया; हरिया चुंचुणा चेव छप्पेया इभजाइओ ॥ ३३ ॥ छविहा कुलारिया
मणुस्सा प० तं० उग्गा भोगा राइण्णा इक्खागा णाया कोरवा ॥ ३४ ॥ छविहा
लोगट्टिई प० तं० अगासपइट्टिए वाए वायपइट्टिए उदही उदहिपइट्टिया पुढवी पुढ-
विपइट्टिया तसा थावरा पाणा अजीवा जीवपइट्टिया जीवा कम्मपइट्टिया ॥ ३५ ॥
छदिसाओ प० तं० पाईणा पडीणा दाहिणा उईणा उट्टा अहा ॥ ३६ ॥ छहिं
दिसाहिं जीवाणं गई पवत्तइ तं० पाईणाए जाव अहाए एवमागई वक्कंती आहारे
उट्टी णिवुट्टी विगुब्बणा गइपरियाए समुग्घाए कालसंजोगे दंसणाभिगमे णाणाभि-
गमे जीवाभिगमे अजीवाभिगमे एवं पंचिदियतिरिक्खजोणियाणवि मणुस्साणवि
॥ ३७ ॥ छहिं ठाणेहिं समणे णिग्गंथे आहारमाहारेमाणे णाइक्कमइ तं० वेयण-
वेयावच्चे ईरियट्टाए य संजमट्टाए, तह पाणवत्तियाए छट्ठं पुण धम्मचित्ताए ॥ छहिं
ठाणेहिं समणे णिग्गंथे आहारं वोच्छिदमाणे णाइक्कमइ तं० आर्यके उवसग्गे तिति-
क्खणे बंभचेरगुत्तीए पाणिदया तवहेउं सरीरवुच्छेयणट्टाए ॥ ३८ ॥ छहिं
ठाणेहिं आया उम्मायं पाउणेजा तं० अरहंताणमवण्णं वयमाणे, अरहंतपणत्तस्स
धम्मस्स अवण्णं वयमाणे, आयरियउवज्जायाणमवण्णं वयमाणे, चाउव्वण्णस्स
संघस्स अवण्णं वयमाणे, जक्खावेसेण चेव मोहणिज्जस्स चेव कम्मस्स उदएणं
॥ ३९ ॥ छविहे पमाए प० तं० मज्जपमाए गिहपमाए, विसयमाए, कसाय-
पमाए, अथपमाए, पडिलेहणापमाए ॥ ४० ॥ छविहा पमायपडिलेहणा प० तं०
आरभडा संमहा, वज्जेयव्वा य मोसली तइया, पप्फोडणा चउत्थी विक्खित्ता
वेइया छट्ठी (१) छविहा अप्पमायपडिलेहणा प० तं० अणच्चावियं अवलियं,

अणाणुबंधिं अमोसलिं चैव छप्पुरिमा णव खोडा पाणी पाणविमोहणी (२)
 ॥ ४१ ॥ छ लेसाओ प० तं० कण्हलेसा जाव सुक्कलेसा । पंचिदियतिरिक्कजो-
 णियाणं छ लेसाओ प० तं० कण्हलेसा जाव सुक्कलेसा । एवं मणुस्सेदशाण वि
 ॥ ४२ ॥ सक्कस्स णं देविंदस्स देवरणो सोमस्स महारणो छ अग्गमहिंसीओ प०
 ॥ ४३ ॥ सक्कस्स णं देविंदस्स देवरणो जमस्स महारणो छ अग्गमहिंसीओ प०
 ॥ ४४ ॥ ईसाणस्स णं देविंदस्स मज्झिमपरिसाए देवाणं छ पलिओवमाइं ठिइं
 प० ॥ ४५ ॥ छ दिसिक्कुमारिमहत्तरियाओ प० तं० रुवा रुवेसा सुरूवा रुववेइं
 रुवकंता रुयप्पभा । छ विज्जुकुमारिमहत्तरियाओ प० तं० आला सक्का सतेरा
 सोयामणी इंदा षणविज्जुया ॥ ४६ ॥ धरणस्स णं णागकुमारिंदस्स णागकुमारणो
 छ अग्गमहिंसीओ प० तं० आला सक्का सतेरा सोयामणी इंदा षणविज्जुया ।
 भूयाणंदस्स णं णागकुमारिंदस्स णागकुमारणो छ अग्गमहिंसीओ प० तं० रुवा
 रुवेसा सुरूवा रुववेइं रुवकंता रुयप्पभा । जहा धरणस्स तहा सध्वेमिं दाहिणि-
 ल्लाणं जाव घोसस्स । जहा भूयाणंदस्स तहा सध्वेसिं उत्तरिल्लाणं जाव महाघोसस्स
 ॥ ४७ ॥ धरणस्स णं णागकुमारिंदस्स णागकुमारणो छस्सामाणियसाहस्सीओ
 पणत्ताओ । एवं भूयाणंदस्स वि जाव महाघोसस्स ॥ ४८ ॥ छव्विहा उग्गहमईं
 प० तं० खिप्पमोगिण्हइं बहुमोगिण्हइं बहुविधमोगिण्हइं ध्रुवमोगिण्हइं अणिसि-
 यमोगिण्हइं असंदिद्धमोगिण्हइं ॥ ४९ ॥ छव्विहा ईंहामईं प० तं० खिप्पमी-
 हइं, बहुमीहइं जाव असंदिद्धमीहइं ॥ ५० ॥ छव्विहा अवायमईं प० तं० खिप्प-
 मवेइं जाव असंदिद्धमवेइं । छव्विहा धारणा प० तं० बहुं धारेइं बहुविहं धारेइं
 पोरणं धारेइं दुद्धरं धारेइं अणिसिथं धारेइं असंदिद्धं धारेइं ॥ ५१ ॥ छव्विहे
 बाहिरए तवे प० तं० अणसणं ओमोयरिया भिक्खायरिया रसपरिच्चाए कायकिलेसो
 पडिंसलीणया ॥ ५२ ॥ छव्विहे अब्भंतरिए तवे प० तं० पायच्छित्तं विणओ
 वेयावच्चं तहेव सज्जाओ ज्ञाणं विउस्सग्गो ॥ ५३ ॥ छव्विहे विवाए प० तं०
 ओसक्कइत्ता उस्सक्कइत्ता अणुलोमइत्ता पडिलोमइत्ता भइत्ता मेलइत्ता ॥ ५४ ॥
 छव्विहा खुब्बा पाणा प० तं० वेइंदिया तेइंदिया चउरिंदिया संमुच्छिमपंचिदियतिरि-
 क्खजोणिया तेउकाइया वाउकाइया ॥ ५५ ॥ छव्विहा गोयरचरिया प० तं० पेडा
 अद्धपेडा गोमुत्तिया पतंगवीहिया संबुक्कवट्टा गंतुपच्चागया ॥ ५६ ॥ जंतुद्विजे तीवे

मंदरस्स पव्वयंस्स दाहिणेणमिमीसे रयणप्पभाए पुढवीए छ अवक्कंतमहाणिरया
 प० तं० लोले लोलुए उदद्धे णिदद्धे जरए पजरए ॥५७॥ चउत्थीए णं पंक्कप्पभाए
 पुढवीए छ अवक्कंता महाणिरया प० तं० अरिे वारे मारे रोरे रोरुए खाडखडे
 ॥ ५८ ॥ बंमलोए णं कप्पे छ विमाणपत्थटा प० तं० अरए विरए णीरए णिम्मले
 वितिमिरे विसुद्धे ॥ ५९ ॥ चंदस्स णं जोइसिंदस्स जोइसरणो छ णक्खत्ता पुव्वं-
 भागा समखेत्ता तीसइमुहुत्ता प० तं० पुव्वाभद्दवया कत्तिया महा पुव्वाफग्गुणी
 मूलो पुव्वासाटा ॥ ६० ॥ चंदस्स णं जोइसिंदस्स जोइसरणो छ णक्खत्ता णत्तंभागा
 अवद्धक्खेत्ता पण्णरसमुहुत्ता प० तं० सयमिसया भरणी अद्दा अस्सेसा साई जेद्दा
 ॥ ६१ ॥ चंदस्स णं जोइसिंदस्स जोइसरणो छ णक्खत्ता उभयंभागा दिवद्धक्खेत्ता
 पणयालीसमुहुत्ता प० तं० रोहिणी पुणव्वसू उत्तराफग्गुणी विसाहा उत्तरासाटा
 उत्तराभद्दवया ॥ ६२ ॥ अभिचंदे णं कुलकरे छ धणुसयाई उद्धं उच्चत्तेणं हुत्था
 ॥ ६३ ॥ भरहे णं राया चाउरंतचक्कवट्ठी छ पुव्वसयसहस्साई महाराया हुत्था
 ॥ ६४ ॥ पासस्स णं अरहओ पुरिसादाणियस्स छसया वार्हेणं सदेवमणुयासुराए
 परिसाए अपराजियाणं सर्पया हुत्था ॥ ६५ ॥ वासुपुज्जे णं अरहा छहिं पुरिस-
 सएहिं सद्धिं मुंडे जाव पव्वइए ॥ ६६ ॥ चंदप्पमे णं अरहा छम्मासे छउमत्थे हुत्था
 ॥ ६७ ॥ तेइंदियाणं जीवाणं असमारभमाणस्स छव्विहे संजमे कज्जइ तं० घाणामाओ
 सोक्खाओ अववरोवेत्ता भवइ घाणामएणं दुक्खेणं असंजोएत्ता भवइ जिब्भामाओ
 सोक्खाओ अववरोवेत्ता भवइ एवं चेव फासामाओ वि ॥ ६८ ॥ तेइंदियाणं
 जीवाणं समारभमाणस्स छव्विहे असंजमे कज्जइ तं० घाणामाओ सोक्खाओ ववरो-
 वेत्ता भवइ घाणामएणं दुक्खेणं संजोगेत्ता भवइ जाव फासमएणं दुक्खेणं संजोगेत्ता
 भवइ ॥ ६९ ॥ जंबुहीवे दीवे छ अकम्मभूमीओ प० तं० हेमवए हेरणवए हरि-
 वासे रम्मगवासे देवकुरा उत्तरकुरा ॥ ७० ॥ जंबुहीवे दीवे छव्वासा प० तं० भरहे
 एरवए हेमवए हेरणवए हरिवासे रम्मगवासे ॥ ७१ ॥ जंबुहीवे दीवे छव्वासहर-
 पव्वया प० तं० चुल्लहिमवंते महाहिमवंते णिसडे णीलवंते रूप्पी सिंहरी ॥ ७२ ॥
 जंबूमंदरदाहिणे णं छ कूडा प० तं० चुल्लहिमवंतकूडे वेसमणकूडे महाहिमवंतकूडे
 वेरुत्थियकूडे णिसढकूडे रुयगकूडे ॥ ७३ ॥ जंबूमंदरउत्तरेणं छ कूडा प० तं०
 णीलवंतकूडे उवदंसणकूडे रुप्पिकूडे मणिकंचणकूडे सिहरिकूडे तिगिच्छकूडे ॥ ७४ ॥

जंबुद्वीवे दीवे छ महद्दहा प० तं० पउमद्दहे महापउमद्दहे तिगिच्छद्दहे केसरिद्दहे
 महापोडरीयद्दहे पुंडरीयद्दहे ॥ ७५ ॥ तत्थ णं छ देवयाओ महद्द्वियाओ जाव
 पलिओवमठिईयाओ परिवसति तं० भिरा हिरा धिई किन्ती बुद्धी लच्छी ॥ ७६ ॥
 जंबूमंदरदाहिणेणं छ महाणईओ प० तं० गंगा सिंधू रोहिया रोहियंसा हरी हरिकंता
 ॥ ७७ ॥ जंबूमंदरउत्तरे णं छ महाणईओ प० तं० णरकंता णारिकंता सुवण्णकूला
 रूपकूला रत्ता रत्तवई ॥ ७८ ॥ जंबूमंदरपुरत्थिमे णं सीयाए महाणईए उभय-
 कूले छ अंतरणईओ प० तं० गाहावई दहावई पंकवई तत्तजला मत्तजला उम्मत्त-
 जला ॥ ७९ ॥ जंबूमंदरपच्चत्थिमे णं सीओयाए महाणईए उभयकूले छ अंत-
 णईओ प० तं० खीरोदा सीहसोया अंतोवाहिणी उम्मिमालिणी फेणमालिणी गंभीर-
 मालिणी ॥ ८० ॥ धायइसंडदीवपुरत्थिमद्धेणं छ अकम्मभूमीओ प० तं० हेमवण
 एवं जहा जंबुद्वीवे २ तहा णई जाव अंतरणईओ जाव पुक्कवरत्तरीवद्धुपच्चत्थि-
 मद्धे भाणियत्तं ॥ ८१ ॥ छ उऊ प० तं० पाउसे वरिसारंत्ते मरए हेमंते वसंते गिम्हे
 ॥ ८२ ॥ छ ओमरत्ता प० तं० तइए पव्वे सत्तमे पव्वे एक्कारसमे पव्वे पण्णरसमे
 पव्वे एग्गुवीसइमे पव्वे तेवीसइमे पव्वे ॥ ८३ ॥ छ अइरत्ता प० तं० चउत्थे
 पव्वे अट्टमे पव्वे दुयालसमे पव्वे सोलसमे पव्वे वीसइमे पव्वे चउवीमइमे पव्वे
 ॥ ८४ ॥ आभिणिबोहियणाणस्स णं छविहहे अत्थोग्गहे प० तं० सोईदियत्थोग्गहे
 जाव णोईदियत्थोग्गहे ॥ ८५ ॥ छविहहे ओहिणाणे प० तं० आणुगामिए
 अणाणुगामिए वड्डमाणए हीयमाणए पडिवाई अपडिवाई ॥ ८६ ॥ णो कप्पइ
 णिग्गंथाण वा णिग्गंथीण वा इमाई छअयणआई वइत्तए तं० अलियवयणे हीलि-
 यवयणे खिसियवयणे फरुसवयणे गारत्थियवयणे विउसविंयं वां पुणो उदीरित्तए
 ॥ ८७ ॥ छ कप्पस्स पत्थारा प० तं० पाणाइवायस्स वायं वयमाणे सुसावायस्स
 वायं वयमाणे अदिण्णादाणस्स वायं वयमाणे अविरइवायं वयमाणे अपुरिसवायं
 वयमाणे दासवायं वयमाणे इच्चेए छ कप्पस्स पत्थारे पत्थरेत्ता सम्ममपरिपूरेमाणे
 तट्ठाणपत्ते ॥ ८८ ॥ छ कप्पस्स पलिमंथू प० तं० कोकुइए संजमस्स पलिमंथू
 मोहरिए सच्चवयणस्स पलिमंथू चक्खुलोलुए ईरियावहियाए पलिमंथू तितिणिए
 एसणागोयरस्स पलिमंथू इच्छालोभिए मुत्तिमग्गस्स पलिमंथू भिज्जाणिदाणकरणे
 मोक्खमग्गस्स पलिमंथू सच्चत्थ भगवया अणिदाणता पत्तथा ॥ ८९ ॥ छविहहा

कपटिई प० तं० सामाइयकपटिई छेओवद्वावणियकपटिई गिद्विसमाणकपटिई
 गिद्विद्वकपटिई जिणकपटिई धेरकपटिई ॥ ९० ॥ समणे भगवं महा-
 वीरे छट्टेणं भत्तेणं अपाणएणं मुंडे जाव पव्वइए ॥ ९१ ॥ समणस्स णं
 भगवओ महावीरस्स छट्टेणं भत्तेणं अपाणएणं अणंते अणुत्तरे जाव समुप्पणे
 ॥ ९२ ॥ समणे भगवं महावीरे छट्टेणं भत्तेणं अपाणएणं सिद्धे जाव सव्वदुक्ख-
 प्पहीणे ॥ ९३ ॥ सणंकुमारमाहिंदेसु णं कप्पेसु विमाणा छ ज्ञोयणसयाई उड्डं उच्च-
 त्तेणं प० ॥ ९४ ॥ सणंकुमारमाहिंदेसु णं कप्पेसु देवाणं भवधारणिज्जगा सरीरगा
 उक्कोसेणं छ रयणीओ उड्डं उच्चत्तेणं पणत्ता ॥ ९५ ॥ छद्विहे भोयणपरिणामे
 प० तं० मणुणे रसिए पीणणिजे विहणिजे दावणिजे [मयणणिजे] दप्पणिजे
 ॥ ९६ ॥ छद्विहे विसपरिणामे प० तं० डक्के भुत्ते णिवइए मंसणुसारी सोणि-
 याणुसारी अट्टिमिजाणुसारी ॥ ९७ ॥ छद्विहे पट्टे प० तं० संसयपट्टे बुग्गहपट्टे अणु-
 जोमी अणुलोमे तहणाणे अतहणाणे ॥ ९८ ॥ चमरचंचा णं रायहाणी उक्कोसेणं
 छम्मासा विरहिया उववाएणं ॥ ९९ ॥ एगमेने णं इंदट्टाणे उक्कोसेणं छम्मासा
 विरहिए उववाएणं ॥ १०० ॥ अहेसत्तमा णं पुढवी उक्कोसेणं छम्मासा विरहिया
 उववाएणं ॥ १०१ ॥ सिद्धिगई णं उक्कोसेणं छम्मासा विरहिया उववाएणं ॥ १०२ ॥
 छद्विहे आउयबंधे प० तं० जाइणामणिधत्ताउए गइणामणिधत्ताउए टिइणामणिध-
 त्ताउए ओमाहणाणामणिधत्ताउए पएसणामणिधत्ताउए अणुभावणामणिधत्ताउए
 ॥ १०३ ॥ णेरइयाणं छद्विहे आउयबंधे प० तं० जाइणामणिधत्ताउए जाव अणु-
 भावणामणिधत्ताउए एवं जाव वेमाणियाणं ॥ १०४ ॥ णेरइया णियमा छम्मा-
 सावसेसाउया परभवियाउयं पगरंति, एवमिेव असुरकुमारावि जाव थणियकुमारा,
 असंखेज्जवासाउया सण्णियं चिदियतिरिक्खजोणिया णियमं छम्मासावसेसाउया पर-
 भवियाउयं पगरंति । असंखेज्जवासाउया सण्णिमणुस्सा णियमं जाव पगरंति, वाण-
 मंतरा जोइसवासिया वेमाणिया जहा णेरइया ॥ १०५ ॥ छद्विहे भावे प० तं०
 ओदइए उवममिए खइए खंयोवसमिए पारिणामिए संगिवाइए ॥ १०६ ॥ छद्विहे
 पडिक्कमणे प० तं० उच्चारपडिक्कमणे पासवणपडिक्कमणे इत्तरिए आवकहिए जं-
 किंत्तिमिच्छा सोमणंतिए ॥ १०७ ॥ कत्तियाणक्खत्ते छतारे प० ॥ १०८ ॥ असिलेसा-
 णक्खत्ते छतारे प० ॥ १०९ ॥ जीवा णं छट्टाणणिव्वत्तिए योग्गले पावकम्मत्ताए

चिणिसु वा चिणंति वा चिणिस्संति वा तं० पुढविकाइयणिव्वत्तिए जाव तसकाय-
णिव्वत्तिए एवं चिण-उवचिण-बंध-उदीर-नेय तह-णिज्जरा चैव ॥ ११० ॥ छप्पए-
सिया णं खंधा अणंता प० ॥ १११ ॥ छप्पएसोगाढा पोगगला अणंता प० ॥ ११२ ॥
छसमयठिईया पोगगला अणंता प० ॥ ११३ ॥ छगुणकालमा पोगगला जाव छगुण-
लुक्खा पोगगला अणंता पणत्ता ॥ ११४ ॥

सत्तमं ठाणं

सत्तविहे गणावक्कमणे प० तं० सव्वधम्मा रोएमि एगइया रोएमि एगइया णो
रोएमि सव्वधम्मा वितिगिच्छामि एगइया वितिगिच्छामि एगइया णो वितिगिच्छामि
सव्वधम्मा जुहुणामि एगइया जुहुणामि एगइया णो जुहुणामि इच्छामि णं भंते !
एगळविहारपडिमं उवसंपज्जिता णं विहरित्तए ॥ १ ॥ सत्तविहे विभंगणाणे प०
तं० एगदिसिलोगाभिगमे, पंचदिसिलोगाभिगमे, किरियावरणे जीवे, मुट्ठगे जीवे,
अमुट्ठगे जीवे, रूवी जीवे, सव्वमिणं जीवा, तत्थ खलु इमे पढमे विभंगणाणे जया
णं तहारूवस्स समणस्स वा माहणस्स वा विभंगणाणे समुप्पज्जइ से णं तेषां विभंग-
णाणेणं समुप्पणेणं पासइ पाईणं वा पडिणं वा दाहिणं वा उदीणं वा उट्ठं वा जाव
सोहम्मे कप्पे तस्स णमेवं भवइ अत्थि णं मम अइसेसे णाणंदंसणे समुप्पणे एग-
दिसि लोगाभिगमे संतेगइया समणा वा माहणा वा एवमाहंसु पंचदिसिं लोगा-
भिगमे जे ते एवमाहंसु मिच्छं ते एवमाहंसु पढमे विभंगणाणे । अहावरे दोच्चे
विभंगणाणे जया णं तहारूवस्स समणस्स वा माहणस्स वा विभंगणाणे समुप्पज्जइ से
णं तेषां विभंगणाणेणं समुप्पणेणं पासइ पाईणं वा पडीणं वा दाहिणं वा उदीणं वा
उट्ठं जाव सोहम्मे कप्पे तस्स णं एवं भवइ अत्थि णं मम अइसेसे णाणंदंसणे समु-
प्पणे पंचदिसिं लोगाभिगमे संतेगइया समणा वा माहणा वा एवमाहंसु एगदिसिं
लोगाभिगमे जे ते एवमाहंसु मिच्छं ते एवमाहंसु दोच्चे विभंगणाणे । अहावरे
तच्चे विभंगणाणे जया णं तहारूवस्स समणस्स वा माहणस्स वा विभंगणाणे समुप्प-
ज्जइ, से णं तेषां विभंगणाणेणं समुप्पणेणं पासइ पाणे अइवाएमाणा, मुसं चएमाणे
अदिण्णमादियमाणे मेहुणं पडिसेवमाणे परिग्गहं परिणिपहमाणे, राइभोषणं भुंज-
माणे वा पावं च णं कम्मं कीरमाणं णो पासइ तस्स णमेवं भवइ अत्थि णं मम
अइसेसे णाणंदंसणे समुप्पणे किरियावरणे जीवे संतेगइया समणा वा माहणा वा
एवमाहंसु णो किरियावरणे जीवे जे ते एवमाहंसु मिच्छं ते एवमाहंसु तच्चे

विभंगणाणे । अहावरे चउत्थे विभंगणाणे जया णं तहारूवस्स समणस्स वा माह-
णस्स वा जाव समुप्पज्जइ से णं तेषं विभंगणाणेणं समुप्पणेणं देवामेव पासइ
बाहिरब्भंतरए पोग्गले परियाइत्ता पुढेगत्तं णाणत्तं फुसिया फुरित्ता फुट्टित्ता
विकुव्वित्ता णं विकुव्वित्ता णं चिट्ठित्तए तस्स णमेवं भवइ अत्थि णं मम अइसेसे
णाणदंसणसमुप्पणे मुदग्गे जीवे संतेगइया समणा वा माहणा वा एवमाहंसु अमु-
दग्गे जीवे, जे ते एवमाहंसु मिच्छं ते एवमाहंसु चउत्थे विभंगणाणे । अहावरे
पंचमे विभंगणाणे जया णं तहारूवस्स समणस्स जाव समुप्पज्जइ, से णं तेषं
विभंगणाणेणं समुप्पणेणं देवामेव पासइ बाहिरब्भंतरए पोग्गले अपरियाइत्ता
पुढेगत्तं णाणत्तं जाव विउत्थित्ता णं चिट्ठित्तए तस्स णमेवं भवइ अत्थि जाव समु-
प्पणे अमुदग्गे जीवे, संतेगइया समणा वा माहणा वा एवमाहंसु मुदग्गे जीवे,
जे ते एवमाहंसु मिच्छं ते एवमाहंसु, पंचमे विभंगणाणे । अहावरे छट्ठे विभंग-
णाणे, जया णं तहारूवस्स समणस्स वा माहणस्स वा जाव समुप्पज्जइ, से णं
तेषं विभंगणाणेणं समुप्पणेणं देवामेव पासइ बाहिरब्भंतरए पोग्गले परियाइत्ता
वा अपरियाइत्ता वा पुढेगत्तं णाणत्तं फुसेत्ता जाव विकुव्वित्ताणं चिट्ठित्तए तस्स
णमेवं भवइ, अत्थि णं मम अइसेसे णाणदंसणे समुप्पणे रूवी जीवे संतेगइया समणा
वा माहणा वा एवमाहंसु अरूवी जीवे जे ते एवमाहंसु मिच्छं ते एवमाहंसु छट्ठे
विभंगणाणे । अहावरे सत्तमे विभंगणाणे जया णं तहारूवस्स समणस्स वा माह-
णस्स वा विभंगणाणे समुप्पज्जइ, से णं तेषं विभंगणाणेणं समुप्पणेणं पासइ सुहु-
मेणं वाउकाएणं फुडं पोग्गलकायं एयंतं, वेयंतं चलंतं खुभंतं फंदंतं घट्टंतं उदी-
रंतं तं तं भावं परिणमंतं तस्स णमेवं भवइ अत्थि णं मम अइसेसे णाणदंसणे समु-
प्पणे, सव्वसिणं जीवा संतेगइया समणा वा माहणा वा एवमाहंसु जीवा चेव
अजीवा चेव जे ते एवमाहंसु मिच्छं ते एवमाहंसु तस्स णमिमे चत्तारि जीव-
णिकाया णो सम्मनुवगया भवंति तंजहा-पुढविकाइया आऊ तेऊ वाउकाइया,
इधेएहिं चउहिं जीवणिकाएहिं मिच्छादंडं पवत्तेइ, सत्तमे विभंगणाणे ॥२॥ सत्तविहे
ओणिसंगहे प० तं० अंडया पोयया जराउया रसया संसेयया संमुच्छिमा उब्भिया ।
अंडया सत्तगइयां सत्तागइया प० तं० अंडगे अंडगेसु उववज्जमाणे अंडएहितो वा
पोयएहितो वा जाव उब्भिएहितो वा उववज्जेज्जा से चेव णं से अंडए अंडगत्तं

विष्वज्जहमाणे अंडयत्ताए वा पोययत्ताए जाव उब्भियत्ताए वा गच्छंज्जा । पोयया
सत्तगइया सत्तागइया, एवं चैव, सत्तण्हवि गइरागई भाणियत्वा जाव उब्भियत्ति
॥३॥ आयरियउवज्झायस्स णं गणंसि सत्त संगहठाणा प० तं० आयरियउवज्झाए
गणंसि आणं वा धारणं वा सम्मं पउंजित्ता भवइ, एवं जहा पंचट्ठाणं जाव
आयरियउवज्झाए गणंसि आपुब्बियचारी यावि भवइ, णो अणापुब्बियचारी
यावि भवइ आयरियउवज्झाए गणंसि अणुप्पण्णाई उवगरणाई सम्मं उप्पाइत्ता
भवइ, आयरियउवज्झाए गणंसि पुब्बुप्पण्णाई उवकरणाई सम्मं सारक्खेत्ता संगो-
वित्ता भवइ णो असम्मं सारक्खेत्ता संगोवित्ता भवइ ॥४॥ आयरियउवज्झायस्स
णं गणंसि सत्त असंगहठाणा प० तं० आयरियउवज्झाए गणंसि आणं वा धारणं वा
णो सम्मं पउंजित्ता भवइ, एवं जाव उवगरणाणं णो सम्मं सारक्खेत्ता संगोवेत्ता
भवइ ॥ ५ ॥ सत्त पिडेसणाओ प० ॥ ६ ॥ सत्तपाणेसणाओ प० ॥ ७ ॥ सत्त
उग्गहपडिमाओ प० ॥ ८ ॥ सत्त सत्तिकया प० ॥ ९ ॥ सत्त महज्झयथा प०
॥ १० ॥ सत्तसत्तमिया णं भिक्खुपडिमा एग्गुपण्णयाए राइंदिएहिं एगेण य
छण्णउएणं भिक्खासएणं अहामुत्ते (अहा अर्थ) जाव आराहिया यावि भवइ
॥११॥ अहे लोए णं सत्त पुढवीओ प०, सत्त घणोदहीओ प०, सत्त घणवाया प०,
सत्त तणुवाया प०, सत्त उवासंतरा प०, एएसु णं सत्तसु उवासंतरेसु सत्ततणुवाया
पइट्ठिया एएसु णं सत्तसु तणुवाएसु सत्त घणवाया पइट्ठिया एएसु णं सत्तसु
घणवाएसु सत्त घणोदही पइट्ठिया । एएसु णं सत्तसु घणोदहीसु पिंडलगपिहुण-
संठाणसंठिआओ सत्त पुढवीओ प० तं० पढमा जाव सत्तमा । एयासि णं सत्तण्हं
पुढवीणं सत्त णामवेज्जा प० तं० घम्मा वंसा सेला अंजणा रिद्धा मया मायवई ।
एयासि णं सत्तण्हं पुढवीणं सत्त गोत्ता प० तं० रयणप्पभा मक्करप्पभा वाल्लअप्पभा
पंक्कप्पभा धूमप्पभा तमा तमतमा ॥ १२ ॥ सत्तविहा वायवाउकाइया प० तं०
पाईणवाए पडीणवाए दाहिणवाए उदीणवाए उट्टुवाए अहोवाए विदिसिवाए
॥ १३ ॥ सत्त संठाणा प० तं० दीहे रहस्से वट्टे तंसे चउरंसे पिहुले परिमंडले
॥ १४ ॥ सत्त भयट्ठाणा प० तं० इहल्लोगभए परल्लोगभए आदाणभए अक्कमाभए
वेयणभए मरणभए असिल्लोगभए ॥ १५ ॥ सत्तहिं ठाणेहिं छउमत्थं जाणेज्जा तं०
पाणे अइवाएत्ता भवइ मुसं वइत्ता भवइ अदिण्णमाइत्ता भवइ सदफरिसरसत्तव-

गंधे आसाएत्ता भवइ पूयासकारमणुवृहेत्ता भवइ इमं सावज्जंति पण्णवेत्ता पडि-
सेवेत्ता भवइ णो जहीवाई तहाकारी यावि भवइ ॥ १६ ॥ सत्तहिं ठाणेहिं केवली
जाणेजा तं० णो पाणे अइवाएत्ता भवइ जाव जहावाई तहाकारी यावि भवइ
॥ १७ ॥ सत्त मूलगोत्ता प० तं० कासवा गोयमा वच्छा कोच्छा कोसिया मंडवा
वासिद्धा । जे कासवा ते सत्तविहा प० तं० ते कासवा ते संडेछा ते गोछा ते वाला
ते मुंजइणो ते पध्यपेच्छइणो ते वरिसकण्हा । जे गोयमा ते सत्त विहा प० तं० ते
गोयमा ते गग्गा ते भारद्वा ते अंगिरसा ते सक्कराभा ते भक्खराभा ते उदगत्ताभा ।
जे वच्छा ते सत्त विहा प० तं० ते वच्छा ते अग्गोया ते मित्थिया ते सामिलिणो
ते सेलयया ते अट्ठिसेणा ते वीयकम्हा, जे कोच्छा ते सत्तविहा प० तं० ते कोच्छा
ते मोग्गलायणा ते पिंगलायणा ते कोडीणा ते मंडलिणो ते हारिता ते सोमया । जे
कोसिया ते सत्त विहा प० तं० ते कोसिया ते कचायणा ते सालंकायणा ते गोलि-
कायणा ते पक्खिकायणा ते अग्गिवात्ता ते लोहिया । जे मंडवा ते सत्तविहा प० तं०
ते मंडवा ते अरिद्धा ते समुया ते तेला ते एलावच्चा ते कंडिळा ते खारायणा । जे
वासिद्धा ते सत्तविहा प० तं० ते वासिद्धा ते उंजायणा ते जारेकण्हा ते वग्घावच्चा ते
कोडिण्णा ते सण्णी ते पारासरा ॥१८॥ सत्त मूलणया प० तं० णेगमे संगहे ववहारे
उज्जुसुए सद्दे समभिरूढे एवंबूए ॥ १९ ॥ सत्त सरा प० तं० सज्जे रिसभे गंधारे
मज्झिमे पंचमे सरे, धेवते चैव गिसादे सरा सत्त वियाहिया (१) एएसि णं सत्तण्हं
सराणं सत्त सरट्ठाणा प० तं० सज्जं तु अग्गजिन्भाए उरेण रिसभं सरं, कण्ठुग्गएण
गंधारं मज्झजिन्भाए मज्झिमं (२) णासाए पंचमं बूया दंतोद्वेण य धेवयं,
मुद्धाणेण य णेसायं सरट्ठाणा वियाहिया (३) सत्त सरा जीवणिसिसया प० तं०
सज्जं रवइ मयूरो कुक्कुडो रिसहं सरं, हंसो णदइ गंधारं मज्झिमं तु गवेलगा (४)
अह कुसुमसंभवे काले कोइला पंचमं सरं, छट्ठं च सारसा कौंचा गिसायं सत्तमं
गया (५) सत्तसरा अजीवणिसिसया प० तं० सज्जं रवइ मुइंगो गोमुही रिसभं
सरं, संखो णदइ गंधारं मज्झिमं पुण झल्लरी (६) चउचलणपइट्ठाणा गोहिया
पंचमं सरं, आइंवेरो रेवइयं महाभेरी य सत्तमं (७) एएसि णं सत्त सराणं सत्त
सरलक्खणा प० तं० सज्जेण लभइ वित्तिं कयं च ण विणस्सइ, गावो मित्ता य पुत्ता
य पारोणं चैव वल्लभो (८) रिसभेण उ एसज्जं, सेणावच्चं धणाणि य; वत्थगंधम-
लंकारं इत्थीओ सयणाणि य (९) गंधारे गीयजुत्तिण्णा वज्जवित्ती कलाहिया,

भवंति कश्चो पण्णा जे अण्णे सत्थवारमा (१०) मज्झिमसरसंपण्णा भवंति सुह-
 नीविणो, खायई पीयई देई, मज्झिमं सरमस्सिओ (११) पंचमसरसंपण्णा. भवंति
 पुढवीपई, सूरा संगहकत्तारो अणेगमणायमा (१२) घेवयसरसंपण्णा भवंति
 कलहप्पिया; साउणिया वग्गुरिया सोयरिया मच्छवंधा य (१३) चंडाव्या सुट्टिया
 सेया, जे अण्णे पावकम्मिगो; गोवातगा य जे चोरा, गिसायं सरमस्सिता (१४)
 एएसि णं सत्तहं सराणं तओ गामा प० तं० सज्जगामे मज्झिमगामे गंधारगामे ।
 सज्जगामस्स णं सत्त मुच्छणाओ प० तं० मंगी कोरक्कीया हरीय रयणी य सार-
 कंता य, छट्ठी य सारसी णाम सुद्धसज्जा य सत्तमा (१५) मज्झिमगामस्स णं सत्त-
 मुच्छणाओ प० तं० उत्तरमंदा रयणी उत्तरा उत्तरासमा; आसोकंता य सोवीरा,
 अभिरू हवइ सत्तमा (१६) गंधारगामस्स णं सत्त मुच्छणाओ प० तं० पंदी य
 खुदिमा पूरिमा य चउत्थी य सुद्धगंधारा, उत्तरगंधारा वि य पंचमिया हवइ मुच्छा
 उ (१७) सुट्टुत्तरमायामा सा छट्ठी णियमसो उ णायत्वा अह उत्तरायया कोडी-
 मायसा सत्तमी मुच्छा (१८) सत्त सराओ कओ संभवंति गेयस्स का भवइ जोगी ?
 कइ समया उस्सासा कइ वा गेयस्स आगारा ? (१९) सत्त सरा णाप्पीओ भवंति,
 गीयं च रुयजोगीयं; पायसमा उस्सासा तिण्णि य गेयस्स आगारा (२०) आइमिउ
 आरभंता समुव्वहंता य मज्झगारंमि; अवसाणे तज्जविंते तिण्णि य गेयस्स आगारा
 (२१) छट्ठोसे अट्टगुणे तिण्णि य वित्ताइं दो य भणिईओ जाणाहिइ सो गाहिइ
 सुसिक्खिओ रंगमज्झमि (२२) भीतं दुतं रहस्सं गायंते मा य गाहि उत्तालं,
 काकस्सरमण्णासं च हंति गेयस्स छट्ठोसा (२३) पुण्णं रत्तं च अलंकियं च वत्तं
 तहा अविजुडं; महुरं सभ सुकुमारं अट्ट गुणा हंति गेयस्स (२४) उरकंठसिरपत्तयं
 च गेज्जेते मउरिभिअपदबद्धं; समतालपडुक्खेवं सत्तसरसीहरं गीयं (२५) णिट्ठोसं
 सारवंतं च हेउजुत्तमलंकियं, उवणीयं सोवयारं च मियं महुरमेव य (२६) सभ-
 मद्धसमं चेव सव्वत्थ विसमं च जं, तिण्णि वित्तप्पयाराइं चउत्थं णोवल्लभइ (२७)
 सक्कया पागया चेव दुहा भणिईओ आहिया; सरमंडलमि गिज्जेते पत्तथा इस्सि-
 भासिया (२८) केसी गायइ महुरं केसी गायइ खरं च रुक्खं च, केसी गायइ
 चउरं केसि विलंबं दुतं केसी ? (२९) विस्सरं पुण केरिसी ? मामा गायइ महुरं
 काली गायइ खरं च रुक्खं च गोरी गायइ चउरं, काण किलंबं दुयं अंधा (३०)
 विस्सरं पुण पिंगला । तंतिसमं तालसमं पादसमं लयसमं गहसमं च, णीससिउमसि-

वसमं संचारसमा सरा सत्त (३१) सत्त सरा य तओ गामा मुच्छणा एगवीसई
ताणा एगूणपण्णासा समत्तं सरमंडलं (३२) ॥ २० ॥

सत्तुविहे कायकिलेसे प० तं० ठाणाइए उक्कुडुयासणिए पडिमडाई वीरासणिए
णेसळिए दंडाइए लगंडसाई ॥ २१ ॥ जंबुहीवे दीवे सत्तवासा प० तं० भरहे
एरवए हेमवए हेरणवए हरिवासे रम्मगवासे महाविदेहे ॥ २२ ॥ जंबुहीवे २ सत्त
वासहरपव्वया प० तं० चुळहिमवंते महाहिमवंते णिसहे णीलवंते रुप्पी सिहरी
मंदरे ॥ २३ ॥ जंबुहीवे २ सत्त महाणईओ पुरत्थाभिमुहीओ लवणसमुद्दं समप्पेंति
तं० गंगा रोहिया हिरी सीया णरकंता मुवण्णकूला रत्ता ॥ २४ ॥ जंबुहीवे २ सत्त
महाणईओ पच्चत्थाभिमुहीओ लवणसमुद्दं समप्पेंति तं० सिंधू रोहियंसा हरिकंता
सीतोदा णारिकंता रुप्पकूला रत्तवई ॥ २५ ॥ धायइसंडदीवपुरत्थिमद्धे णं सत्त
वासा प० तं० भरहे जाव महाविदेहे । धायइसंडदीवपुरत्थिमे णं सत्त वासहर-
पव्वया प० तं० चुळहिमवंते जाव मंदरे । धायइसंडदीवपुरत्थिमद्धे णं सत्त महाणईओ
पुरत्थाभिमुहीओ कालोयसमुद्दं समप्पेंति तं० गंगा जाव रत्ता । धायइसंडदीवपुरत्थि-
मद्धे णं सत्त महाणईओ पच्चत्थाभिमुहीओ लवणसमुद्दं समप्पेंति तं० सिंधू जाव
रत्तवई । धायइसंडदीवे पच्चत्थिमद्धे णं सत्त वासा एवं चैव णवरं पुरत्थाभिमुहीओ
लवणसमुद्दं समप्पेंति पच्चत्थाभिमुहीओ कालोदं, सेसं तं चैव ॥ २६ ॥ पुक्खरवर-
दीवडुपुरत्थिमद्धे णं सत्त वासा तहेव णवरं पुरत्थाभिमुहीओ पुक्खरोदं समुद्दं
समप्पेंति पच्चत्थाभिमुहीओ कालोदं समुद्दं समप्पेंति सेसं तं चैव । एवं पच्चत्थिमद्धे वि
णवरं पुरत्थाभिमुहीओ कालोदं समुद्दं समप्पेंति, पच्चत्थाभिमुहीओ पुक्खरोदं
समप्पेंति, सव्वत्थ वासा वासहरपव्वया णईओ य भाणियव्वाणि ॥ २७ ॥ जंबुहीवे २
भारहे वासे तीयाए उस्सप्पिणीए सत्त कुलगरा हुत्था, तंजहा मित्तदामे सुदामे य
सुपासे य सयंपभे; विमलघोसे सुघोसे य महाघोसे य सत्तमे ॥ २८ ॥ जंबुहीवे २
भारहे वासे इमीसे ओसप्पिणीए सत्त कुलगरा हुत्था तं० पढमित्थ विमलवाहण
चक्खुम जसमं चउत्थमभिचंदे; तत्तो य पसेणइ पुण मरुदेवे चैव णाभी य (१)
एएसि णं सत्तण्हं कुलगराणं सत्त भारियाओ हुत्था, तं० चंदजसा चंदकंता सुरूव
पडिरूव चक्खुवुकंता य; सिरिकंता मरुदेवी, कुलकरइत्थीण णामाई (२) ॥ २९ ॥
जंबुहीवे २ भारहे वासे आगमिस्साए उस्सप्पिणीए सत्त कुलगरा भविरसति तं०

मित्तवाहण सुभोमे य सुष्पभे सयंपभे; दत्ते सहमे [सुहे सुरूवे] सुब्रंधू य आगमे-
 स्सिण होक्खइ ॥ ३० ॥ विमलवाहणे णं कुल्लगरे सत्तविहा रुक्खा उक्खभोगत्ताए
 हव्वमागच्छिसु तं० मत्तंगया य भिंगा चित्तंगा चैव होति चित्तरसा; मणियंगया य
 अणियणा सत्तमगा कप्परुक्खा य (१) ॥ ३१ ॥ सत्तविहा दंडणीई प० तं०
 हक्कारे मक्कारे धिक्कारे परिभासे मंडल्लव्हे चारए छत्तिच्छेदे ॥ ३२ ॥ एगमेगस्स
 णं रण्णे चाउरंतच्चक्कवट्टिस्स सत्त एगिंदियरयणा प० तं० चक्करयणे छत्तरयणे
 चम्मरयणे दंडरयणे असिरयणे मणिरयणे काकणिरयणे ॥ ३३ ॥ एगमेगस्स णं
 रण्णे चाउरंतच्चक्कवट्टिस्स सत्त पंचिंदियरयणा प० तं० सेणावइरयणे गाहावइरयणे
 वड्डइरयणे पुरोदियरयणे इत्थिरयणे, आसरयणे हत्थिरयणे ॥ ३४ ॥ सत्तहिं
 ठाणेहिं ओगाढं दुस्समं जाणेज्जा, तं० अकाले वरिसइ काले ण वरिसइ असाधू
 पुज्जति साधू ण पुज्जति गुरुहिं जगो मिच्छं पडिवण्णे मणोदुहया वइदुहया ॥ ३५ ॥
 सत्तहिं ठाणेहिं ओगाढं सुसमं जाणेज्जा तं० अकाले ण वरिसइ काले वरिसइ असाधू
 ण पुज्जति साधू पुज्जति गुरुहिं जगो सम्मं पडिवण्णे मणोसुहया वइसुहया ॥ ३६ ॥
 सत्तविहा संसारसमावण्णागा जीवा प० तं० णेरइया, तिरिक्खजोगिया, तिरिक्खजो-
 गिणिओ, मणुस्सा, मणुस्सीओ, देवा देवीओ ॥ ३७ ॥ सत्तविहे आउभेदे प०
 तं० अज्जवसाणगिमित्ते, आहारे, वेयणा, पराधाए, फासे, आणापाणू, सत्तविहं
 भिज्जए आउं ॥ ३८ ॥ सत्तविहा सव्वजीवा प० तं० पुट्टिकाइया आउतेउ-
 वाउ वणस्सइ० तसकाइया अकाइया । अहवा सत्तविहा सव्वजीवा प० तं० कण्ह-
 लेसा जाव सुक्कलेसा अलेसा ॥ ३९ ॥ वंभदत्ते णं राया चाउरंतच्चक्कवट्टी सत्त
 धणूइं उट्टं उच्चत्तेणं सत्त य वाससयाई परमाउं पालइत्ता कालमासे कालं किच्चा अहे
 सत्तमाए पुट्टवीए अप्पइइण्णे णरए णेरइयत्ताए उववण्णे ॥ ४० ॥ मल्ली णं अरहा
 अप्पसत्तमे मुंडे भवित्ता अगाराओ अणगारियं पव्वइए तं० मल्ली विदेहरायवरक-
 ण्णया, पडिबुद्धी इक्खागराया, चंदच्छाए अंगराया, रूप्पी कुणालाहिवई, संखे
 कासीराया, अदीणसत्त कुरुराया, जियसत्त पंचालराया ॥ ४१ ॥ सत्तविहे दंसणे
 प० तं० सम्मदंसणे मिच्छदंसणे सम्मामिच्छदंसणे चक्खुदंसणे अचक्खुदंसणे
 ओहिदंसणे केवल्लदंसणे ॥ ४२ ॥ छउमत्थवीयरगे णं मोहणित्तज्जवज्जाओ सत्त
 कम्मपवडीओ वेएइ, तं० णाणावरणिज्जं, दंसणावरणिज्जं, वेयणियं, आउयं, णम्मं,
 गोयमंतराइयं ॥ ४३ ॥ सत्त ठाणाईं छउमत्थे सव्वभावेणं ण याणइ ण पासइ,

तं० धम्मत्थिकायं, अधम्मत्थिकायं, आगासत्थिकायं, जीवं असरीरपडिबद्धं, पर-
 माणुपोग्गलं, सहं, गंधं ॥ ४४ ॥ एयाणि चैव उप्पण्णणणे जाव जाणइ पासइ,
 तं० धम्मत्थिकायं जाव गंधं ॥ ४५ ॥ समणे भगवं महावीरे वयरोसभणाराय-
 संघयणे समच्चउरंससंठाणसठिए सत्त रयणीओ उद्धं उच्चत्तेणं हुत्था ॥ ४६ ॥
 सत्तविकहाओ प० तं० इत्थिकहा, भत्तकहा, देसकहा, रायकहा, मिउकालणिया,
 दंसणभेयणी, न्तरित्तभेयणी ॥ ४७ ॥ आयरियउवज्झायस्स णं गणंसि सत्त अइसेसा
 प० तं० आयरियउवज्झाए अंतो उवस्सयस्स पाए णिणिज्झिय २ पप्फोडेमाणे वा
 पमञ्जेमाणे वा णाइक्कमइ एवं जहा पंचट्टाणे जाव बाहिं उवस्सयस्स एगरायं वा
 दुरायं वा वसमाणे णाइक्कमइ उवगरणाइसेसे भत्तपाणाइसेसे ॥ ४८ ॥ सत्तविहे
 संजमे प० तं० पुढविकाइयसंजमे जाव तसकाइयसंजमे अजीवकायसंजमे ॥ ४९ ॥
 सत्त विहे असंजमे प० तं० पुढविकाइयअसंजमे जाव तसकाइयअसंजमे, अजीव-
 कायअसंजमे ॥ ५० ॥ सत्तविहे आरंभे प० तं० पुढविकाइयआरंभे जाव अजीव-
 कायआरंभे एवमणारंभेवि एवं सारंभे वि एवमसारंभे वि एवं समारंभेवि एवं अस-
 मारंभेवि जाव अजीवकायअसमारंभे ॥ ५१ ॥ अह भंते ! अयसिक्कुसुंभकोद्वकंगुरा-
 लग(वराकोदूत्तगा)सणसरिसवमूलगवीयाणं एएसि णं धण्णाणं कोट्टाउत्ताणं पल्ला-
 उत्ताणं जाव पिहियाणं केवइयं कालं जोणी संचिट्ठइ ? गोयमा ! जहण्णेणं अंतोमुहुत्तं
 उक्कोसेणं सत्त संवच्छराइं, तेण परं जोणी पमिलायइ जाव जोणीवोच्छेदे प० ॥ ५२ ॥
 चायरआउकाइयाणं उक्कोसेणं सत्त वाससहस्साइं ठिई प० ॥ ५३ ॥ तच्चाए णं
 वालुयप्पभाए पुढवीए उक्कोसेणं णेरइयाणं सत्त सागरोवमाइं ठिई प० ॥ ५४ ॥
 चउत्थीए णं पक्कप्पभाए पुढवीए जहण्णेणं णेरइयाणं सत्तसागरोवमाइं ठिई प०
 ॥ ५५ ॥ सक्कस्स णं देविंदस्स देवरण्णो वरुणस्स महारण्णो सत्त अग्गमहिंसीओ
 प० ॥ ५६ ॥ ईसाणस्स णं देविंदस्स देवरण्णो सोमस्स महारण्णो सत्त अग्ग-
 महिंसीओ प० ॥ ५७ ॥ ईसाणस्स णं देविंदस्स देवरण्णो जमस्स महारण्णो सत्त
 अग्गमहिंसीओ प० ॥ ५८ ॥ ईसाणस्स णं देविंदस्स देवरण्णो अग्गिभतरपरिसाए
 देवाणं सत्त पलिओवमाइं ठिई प० ॥ ५९ ॥ सक्कस्स णं देविंदस्स देवरण्णो अग्गिभ-
 तरपरिसाए देवाणं सत्त पलिओवमाइं ठिई प० ॥ ६० ॥ सक्कस्स णं देविंदस्स
 देवरण्णो अग्गमहिंसीणं देवीणं सत्त पलिओवमाइं ठिई प० ॥ ६१ ॥ सोहम्मे कप्पे

परिग्गहियाणं देवीणं उक्कोसेणं सत्त पल्लिओवमाईं ठिईं प० ॥ ६२ ॥ साग्गस्सयमाइ-
 च्चारणं सत्त देवा सत्त देवसया प० ॥ ६३ ॥ गहत्तोयतुसियाणं देवाणं सत्त देवा सत्त
 देवसहस्सा प० ॥ ६४ ॥ सणंकुमारे कप्पे उक्कोसेणं देवाणं सत्त साग्गरोवमाईं ठिईं
 प० ॥ ६५ ॥ माहिंदे कप्पे उक्कोसेणं देवाणं साइरेमाईं सत्त साग्गरोवमाईं ठिईं प०
 ॥ ६६ ॥ बंभलोए कप्पे जहण्णेणं देवाणं सत्त साग्गरोवमाईं ठिईं प० ॥ ६७ ॥
 बंभलोयलंतएसु णं कप्पेसु त्रिमाणा सत्त जोयणसयाइं उड्डं उच्चत्तेणं प० ॥ ६८ ॥
 भवणत्रासीणं देवाणं भवधारणिज्जा सरौरगा उक्कोसेणं सत्त रयणीओ उड्डं
 उच्चत्तेणं प० । एवं वाणमंतराणं एवं जोइसियाणं । सोहम्मसाणेसु णं कप्पेसु देवाणं
 भवधारणिज्जगा सरौरा सत्त रयणीओ उड्डं उच्चत्तेणं प० ॥ ६९ ॥ णंदीसरवरस्स
 णं दीवस्स अंतो सत्त दीवा प० तं० । जंतुहीवे २ धायइसडे दीवे पोक्खरवरे वरुणवरे
 खीरवरे वयवरे खोयवरे ॥७०॥ णंदीसरवरस्स णं दीवस्स अंतो सत्त समुहा प० तं०
 लवणे कालोए पुक्खरोदे वरुणेए खीरोदे घओदे खोओए ॥७१॥ सत्त सेदीओ
 प० तं० उज्जुआयया एगओवंका दुहओवंका एगओखुहा दुहओखुहा च्चक्कवाला
 अट्ठच्चक्कवाला ॥७२॥ चमरस्स णं असुरिंदस्स असुरकुमाररण्णो सत्त अणिया सत्त
 अणियाहिवईं प० तं० पायत्ताणिए पीढाणिए कुंजराणिए महिसाणिए रहाणिए-
 णट्टाणिए गंधव्वाणिए दुमे पायत्ताणियाहिवईं एवं जहा पंचट्टाणे जाव किण्णरे
 रहाणियाहिवईं रिट्ठे णट्टाणियाहिवईं गीयरईं गंधव्वाणियाहिवईं । तल्लिस्स णं वइ-
 रोयणिंदस्स वइरोयणरण्णो सत्त अणिया सत्त अणियाहिवईं प० तं० पायत्ताणिए
 जाव गंधव्वाणिए महदुदुमे पायत्ताणियाहिवईं जाव किंपुरिसे रहाणियाहिवईं
 महारिट्ठे णट्टाणियाहिवईं गीयजसे गंधव्वाणियाहिवईं । धरणस्स णं णागकुमारिंदस्स
 णागकुमाररण्णो सत्त अणिया सत्त अणियाहिवईं प० तं० पायत्ताणिए जाव गंध-
 व्वाणिए रुहसेणे पायत्ताणियाहिवईं जाव आणंदे रहाणियाहिवईं णंदणे णट्टाणिया-
 हिवईं ततली गंधव्वाणियाहिवईं । भूयाणंदस्स सत्त अणिया सत्त अणियाहिवईं
 प० तं० पायत्ताणिए जाव गंधव्वाणिए दक्खे पायत्ताणियाहिवईं जाव णंतुत्तरे
 रहाणियाहिवईं रईं णट्टाणियाहिवईं माणसे गंधव्वाणियाहिवईं एवं जाव श्लेसमहा-
 श्लेसाणं णेयवं । सक्कस्स णं देविंदस्स देवरण्णो सत्त अणिया सत्त अणियाहिवईं
 प० तं० पायत्ताणिए जाव गंधव्वाणिए हरिणेगमेसी पायत्ताणियाहिवईं जाव
 माट्टरे रहाणियाहिवईं सेए णट्टाणियाहिवईं तुंवुरू गंधव्वा णियाहिवईं । ईसाणस्स

णं देविदस्स देवरण्णो सत्त अणिया सत्त अणियाहिवईणो प० तं० पायत्ताणिए जाव गंधव्वाणिए ल्हुपरक्कमे पायत्ताणियाहिवई जाव महासेए णट्टाणियाहिवई रए गंधव्वाणियाहिवई सेसं जहा पंचट्टाणे एवं जाव अच्चुयस्स वि णेयळ्ळं ॥७३-७४॥ चमरस्स णं असुरिंदस्स असुरकुमाररण्णो दुमस्स पायत्ताणियाहिवइस्स सत्त कच्छाओ प० तं० पढमा कच्छा जाव सत्तमा कच्छा । चमरस्स णं असुरिंदस्स असुरकुमाररण्णो दुमस्स पायत्ताणियाहिवइस्स पढमाए कच्छाए चउसट्ठि देवसहस्सा प० जावइया पढमा कच्छा तब्बिगुणा दोच्चा कच्छा तब्बिगुणा तच्चा कच्छा एवं जाव जावइया छट्ठा कच्छा तब्बिगुणा सत्तमा कच्छा । एवं ब्रल्लिस्स वि णवरं महद्दुमे सट्ठिदेवसाहस्सिओ सेसं तं चेव । धरणस्स एवं चेव णवरं अट्टावीसं देवसहस्सा सेसं तं चेव जहा धरणस्स एवं जाव महाघोसस्स णवरं पायत्ताणियाहिवई अण्णे ते पुव्वभणिया ॥ ७५ ॥ सक्कस्स णं देविदस्स देवरण्णो हरिणेगमेसिस्स सत्त कच्छाओ प० तं० पढमा कच्छा एवं जहा चमरस्स तहा जाव अच्चुयस्स, णाणत्तं पायत्ताणियाहिवईणं ते पुव्वभणिया देवपरिमाणमिमं सक्कस्स चउरासीइं देवसहस्सा ईसाणस्स असीइं देवसहस्साईं देवा इमाए गाहाए अणुगंतव्वा, 'चउरासीइ असीइ जावत्तारि सत्तरी य सट्ठीया; पण्णा चत्तालीसा तीसा वीसा दससहस्सा' (१) जाव अच्चुयस्स ल्हुपरक्कमस्स दसदेवसहस्सा जाव जावइया छट्ठा कच्छा तब्बिगुणा सत्तमा कच्छा ॥ ७६ ॥ सत्तविहे वयणविकण्णे प० तं० आलावे, अणालावे, उल्लावे, अणुल्लावे, संलावे, -पलावे विप्पलावे ॥ ७७ ॥ सत्तविहे विणए प० तं० णाणविणए, ईसणविणए, चरित्तविणए, मणविणए, वइविणए, कायविणए, लोगोव-यारविणए ॥ ७८ ॥ पसत्थमणविणए सत्तविहे प० तं० अपावए असावज्जे अकिरिए णिवक्केसे अण्हकरे अच्छविकरे अभूयाभिसंकमणे ॥ ७९ ॥ अपसत्थमणविणए सत्तविहे प० तं० पावए सावज्जे सकिरिए सउवक्केसे अण्हकरे छविकरे भूयाभिसंकमणे ॥ ८० ॥ पसत्थवइविणए सत्तविहे प० तं० अपावए असावज्जे जाव अभूयाभिसंकमणे ॥ ८१ ॥ अपसत्थवइविणए सत्तविहे प० तं० पावए, जाव भूयाभिसंकमणे ॥ ८२ ॥ पसत्थकायविणए सत्तविहे प० तं० आउत्तं गमणं आउत्तं ठाणं आउत्तं णिसीयणं आउत्तं तुअट्टणं आउत्तं उल्लंघणं आउत्तं पल्लंघणं आउत्तं सव्विदियजोगजुंजगया ॥ ८३ ॥ अपसत्थकायविणए सत्तविहे प० तं० अणाउत्तं गमणं जाव अणाउत्तं सव्विदियजोगजुंजगया ॥ ८४ ॥ लोगोवयार-

विणए सत्तविहे ५० तं० अब्भासवत्तिथं परच्छंदाणुवत्तिथं कञ्जहेउं कयपडिक्खिया
 अत्तगवेसणया देसकालणुया सव्वत्थेसु या पडिलोमया ॥ ८५ ॥ सत्त समुग्घाया
 ५० तं० वेयणासमुग्घाए कसायसमुग्घाए मारणंतिथसमुग्घाए वेउडिवियसमुग्घाए
 तेजससमुग्घाए आहारससमुग्घाए केवलिसमुग्घाए । मणुस्साणं सत्त समुग्घाया ५०
 एवं चेव ॥ ८६ ॥ समणस्स णं भगवओ महावीरस्स तित्थंसि सत्त पवयण-
 णिण्हगा ५० तं० बहुरया जीवपएसिया अवत्तिया सामुच्छेइया दोकिरिया तेरासिया
 अब्बद्धिया । एएसि णं सत्तहं पवयणणिण्हगाणं सत्त धम्मयायरिया हुत्था तं० जमाली
 तीसगुत्ते आसाढे आसमित्ते गगे छलुए गोट्टामाहिले । एएसि णं सत्तहं पवयण-
 णिण्हगाणं सत्त उप्पत्तिगगरा हुत्था तं० सावत्थी उसभपुरं सेयविया मिहिलउत्तु-
 गातीरं पुरिमंतरंजि दमपुरं णिण्हगउप्पत्तिगगराईं ॥ ८७ ॥ सायावेयणिण्हस
 कम्मस्स सत्तविहे अणुभावे ५० तं० मणुण्णा सदा मणुण्णा रुवा जाव मणुण्णा फामा
 मणोसुहया वइसुहया ॥ ८८ ॥ असायावेयणिण्हस णं कम्मस्स सत्तविहे अणु-
 भावे ५० तं० अमणुण्णा सदा जाव वइदुहया ॥ ८९ ॥ महागक्खत्ते सत्ततारं ५०
 ॥ ९० ॥ अभिईयाइया णं सत्तणक्खत्ता पुव्वदारिया ५० तं० अभिईं सवगो धणिट्ठा
 सयभिसया पुव्वाभद्वयया उत्तराभद्वयया रेवईं । अस्सिणियाइया णं सत्त णक्खत्ता
 दाहिणदारिया ५० तं० अस्सिणी भरिणी कित्तिया रोहिणी मिगसिरे अदा पुण्णवम् ।
 पुस्साइया णं सत्त णक्खत्ता अवरदारिया ५० तं० पुस्सो अस्सिलेसा मया पुव्वा-
 फग्गुणी उत्तराफग्गुणी हत्थो चित्ता । साइयाइया णं सत्त णक्खत्ता उत्तरदारिया ५०
 तं० साईं विसाहा अणुराहा जेट्ठा मूलो पुव्वासाढा उत्तरामाढा ॥ ९१ ॥ जंबुदीवे
 दीवे सोमणसे वक्खारपव्वए सत्त कूडा ५० तं० सिद्धे सोमणसे तह बोवव्वे
 मंगलावईकूडे, देवकुरु विमल कंचण, विसिद्धकूडे य बोद्धव्वे ॥ ९२ ॥ जंबुदीवे
 दीवे गंधमायणे वक्खारपव्वए सत्त कूडा ५० तं० सिद्धे य गंधमायण बोद्धव्वे
 गंधिलावईकूडे उत्तरकुरुफलिहे लोहियक्ख आणंदणे चेव ॥ ९३ ॥ विइंदियाणं सत्त
 जाइकुलक्खेडिजोणीपमुहसयसहस्सा ५० ॥ ९४ ॥ जीवा णं सत्तट्ठाणिव्वत्तिए पोग्गले
 पावकम्मत्ताए विग्गिसु वा चिणंति वा च्चिणिसंति वा तं० णेरइयणिव्वत्तिए जाव
 देवणिव्वत्तिए एवं च्चिण जाव णिञ्जरा चेव ॥ ९५ ॥ सत्तपएसिया खंधा अणता ५०
 ॥ ९६ ॥ सत्त पएसोगाढा पोग्गला जाव सत्तगुणलुक्खा पोग्गला अणता ५० ॥ ९७ ॥

अट्टमं ठाणं

अट्टहिं ठाणेहिं संयण्णे अणगारे अरिहइ एगल्लविहारपडिमं उवसंपज्जित्ताणं विहरित्तए तं० सद्धी पुरिसजाए सच्चे पुरिसजाए मेहावी पुरिसजाए बहुस्सुए पुरिसजाए सत्तिमं अप्पाहिगरणे धिइमं वीरियसंपण्णे ॥१॥ अट्टविहे जोणिसंगहे प० तं० अंडया पोयया जाव उब्भिया उववाइया । अंडया अट्टगइया अट्टागइया प० तं० अंडए अंडएसु उववज्जमाणे अंडएहिंतो वा जाव उववाइएहिंतो वा उववज्जेजा, से चेव णं से अंडए अंडगतं विप्पज्जमाणे अंडगत्ताए वा पोयगत्ताए वा जाव उववाइयत्ताए वा गच्छेजा । एवं पोययावि जराउयावि सेसाणं गइरागई णत्थि ॥ २ ॥ जीवा णं अट्ट कम्मपयडीओ च्चिणिसु वा च्चिणंति वा च्चिणिसंति वा तं० णाणावरणिज्जं दरिसणावरणिज्जं वेयणिज्जं मोहणिज्जं आउयं गामं गोत्तं अंतरा-इयं । गेरइया णं अट्ट कम्मपयडीओ च्चिणिसु वा ३ एवं च्चैव, एवं णिरंतरं जाव वेमाणियाणं २४ । जीवाणमट्टकम्मपयडीओ उवच्चिणिसु वा ३ एवं चेव एवं च्चिण-उवच्चिण-व्रथ-उदार-वेय-तह-णिज्जरा च्चैव, एए छ चउवीसा दंडगा भाणियच्चा ॥ ३ ॥ अट्टहिं ठाणेहिं माई मायं कट्टु णो आलोएज्जा णो पडिक्कमेज्जा जाव णो पडिवज्जेजा, तं० करिसु वाऽहं करेमि वाऽहं करिस्सामि वाऽहं अकित्ती वा मे सिया अवण्णे वा मे सिया अविणए वा मे सिया कित्ती वा मे परिहाइस्सइ जसे वा मे परिहाइस्सइ, अट्टहिं ठाणेहिं माई मायं कट्टु आलोएज्जा जाव पडिवज्जेजा तं० माइस्स णं अस्सि लोए गरहिए भवइ उयवाए गरहिए भवइ आयाई गरहिया भवइ एगमवि माई मायं कट्टु णो आलोएज्जा जाव णो पडिवज्जेजा णत्थि तस्स आराहणा एगमवि माई मायं कट्टु आलोएज्जा जाव पडिवज्जेजा अत्थि तस्स आराहणा बहुओवि माई मायं कट्टु णो आलोएज्जा जाव णो पडिवज्जेजा णत्थि तस्स आराहणा बहुओवि माई मायं कट्टु आलोएज्जा जाव अत्थि तस्स आराहणा आयरियउवज्जायस्स वा मे अइसेसे णाणदंसणे समुपज्जेजा, से तं मममालोएज्जा माई णं एसे माई णं मायं कट्टु से जहा णामए अयागरेइ वा तंवागरेइ वा तउ-आगरेइ वा सीसागरेइ वां रुप्पागरेइ वा सुवण्णागरेइ वा तिलगणीइ वा तुसागणीइ वा बुसागणीइ वा णलागणीइ वा दलागणीइ वा सोडियालिच्छाणि वा भंडियालि-च्छाणि वा गोलियालिच्छाणि वा कुंभारावाएइ वा कवेत्तुआवाएइ वा इट्टावाएइ

वा जंतवाड्जुल्लीइ वा लोहारंजरिसाणि वा तत्ताणि समजोइभूयाणि किंनुककुल्ल-
समाणाणि उक्कासहस्साई विणिम्पुयमाणाई २ जालासहस्साई पमुंचमाणाई इंगाल-
सहस्साई परिकिरमाणाई अंतो २ झियार्यति एवामेव माई मायं कट्टु अंतो २ झिया-
यइ जइवि य णं अण्णे केइ वयंति तं पि य णं माई जाणइ अहमेसे अभिसंकिज्जाभि २।
माई णं मायं कट्टु अणालोइयपडिकंते कालमासे कालं किच्चा अण्णयरेसु देवल्लोएसु
देवत्ताए उववत्तारो भवंति तंजहा णो महिद्धिएसु जाव णो दूरंगइएसु णो चिरट्टिई-
एसु से णं तत्थ देवे भवइ णो महिद्धिए जाव णो चिरट्टिईए जावि य से तत्थ
वाहिरव्भंतरीया परिसा भवइ साविय णं णो आढाइ णो परिजाणाइ णो महारिहे-
णमासणेणं उवणिमंतेइ भासं पि य से भासमाणस्स जाव चत्तारि पंच देवा अबुत्ता
चेव अब्भुट्ठंति मा बहुं देवे ! भासउ । से णं तओ देवल्लोगाओ आउक्खएणं भव-
क्खएणं टिइक्खएणं अणंतरं चयं चइत्ता इहेव माणुस्सए भवे जाई इमाई कुलाई
भवंति तं० अंतकुलाणि वा पंतकुलाणि वा तुच्छकुलाणि वा दरिदकुलाणि वा
भिक्षवागकुलाणि वा कियणकुलाणि वा तहप्पगारेसु कुलेसु पुमत्ताए पच्चायाइ से
णं तत्थ पुमे भवइ दुरुवे दुवण्णे दुग्गंधे दुरसे दुफासे अणिट्ठे अकंतं अण्णिए अम-
णुण्णे अमणामे हीणस्सरे दीणस्सरे अणिट्ठसरे अकंतसरे अपियस्सरे अमणुण-
स्सरे अमणामस्सरे अणाएज्जवयणपच्चायाए जाविय से तत्थ वाहिरव्भंतरीया
परिसा भवइ सावि य णं णो आढाइ णो परिजाणाइ णो महारिहेणं आसणेणं उव-
णिमंतेइ भासं पि य से भासमाणस्स जाव चत्तारि पंच जणा अबुत्ता चेव अब्भु-
ट्ठंति मा बहुं अज्जउत्तो ! भासउ । माई णं मायं कट्टु आलोइयपडिकंते कालमासे
कालं किच्चा अण्णयरेसु देवल्लोएसु देवत्ताए उववत्तारो भवंति तं० महिद्धिएसु जाव
चिरट्टिईएसु से णं तत्थ देवे भवइ महिद्धिए जाव चिरट्टिईए हारविराइयवच्छे
कडगत्तुडियथंभियसुए अंगयकुंडलमउडगंडतलक्कणपीदधारी विचित्तहत्याभरणं
विचित्तवत्थाभरणे विचित्तमालामउली कल्लाणगपवरवत्थपरिहिए कल्लाणगपवर-
गंधमल्लाणुलेवणधरे भामुरधोदी पल्लवणमालधरे दिव्वेणं वण्णेणं दिव्वेणं गंयं
दिव्वेणं रसेणं दिव्वेणं फासेणं दिव्वेणं संघणं दिव्वेणं संठाणेणं दिव्वाए इड्डीए
दिव्वाए जुईए दिव्वाए पभाए दिव्वाए छायाए दिव्वाए अच्चीए दिव्वेणं तेएणं
दिव्वाए लेस्साए दसदिसाओ उज्जोएमाणे पभासेमाणे महयाऽहयणइमीयवाइयतंती-

तलतालतुडियघणमुईगपडुप्पचाइयरवेणं दिव्वाइं भोगभोगाईं भुंजमाणे विहरइ ।
जावि य से तत्थं बाहिरभंंतरिया परिसा भवइ, सावि य णं आढाइ परिजाणाइ
महारिहेणं आसणेणं उवणिमंतेइ भासंपि य से भासमाणस्स जाव चत्तारि पंच देवा
अवुत्ता चेव अबुद्धेति बहुं देवे ! भासउ । से णं तओ देवलोगाओ आउक्खएणं
३ जाव चइत्ता इहेव माणुस्सए भवे जाई इमाई कुलाई भवंति, अड्ढाई जाव बहु-
जणस्स अपरिभूयाईं तहप्पगारेसु कुलेसु पुमत्ताए पच्चायाइ, से णं तत्थ पुमे भवइ
सुरूवे सुवण्णे सुगंधे सुरसे सुफासे इट्ठे कंते जाव मणामे अहीणस्सरे जाव मणाम-
स्सरे आदेब्बवयणे पच्चायाए जाऽविय से तत्थ बाहिरभंंतरिया परिसा भवइ
सावि य णं आढाइ जाव बहुमज्जउत्ते ! भासउ ॥ ४ ॥ अट्ठविहे संवरे प० तं०
सोईदियसंवरे जाव फासिंदियसंवरे मणसंवरे वइसंवरे कायसंवरे । अट्ठविहे
असंवरे प० तं० सोईदियअसंवरे जाव कायअसंवरे ॥ ५ ॥ अट्ठ फासा प० तं०
कक्कडे मउए गरुए लहुए सीए उसिणे णिद्धे लुक्खे ॥ ६ ॥ अट्ठविहा लोगठिई
प० तं० आगासपइट्ठिए वाए वायपइट्ठिए उदही एवं जहा छट्ठाणे जाव जीवा
कम्मपइट्ठिया अजीवा जीवसंगहीया जीवा कम्मसंगहीया ॥ ७ ॥ अट्ठविहा गणि-
संपया प० तं० आयासंपया सुयसंपया सरीरसंपया वयणसंपया वायणासंपया
मइसंपया पओगसंपया संगहपरिण्णाणम अट्ठमा ॥ ८ ॥ एगमेगे णं महाणिही
अट्ठचक्कवालपइट्ठणे अट्ठट्ठजोयणाईं उट्ठं उच्चत्तेणं प० ॥ ९ ॥ अट्ठसमिईओ
प० तं० इरियासमिई भासासमिई एसणासमिई आयाणभंडमत्तणिक्खेवणासमिई
उच्चारपासवणखेलजल्लसिंघाणपरिट्ठावणियासमिई मणसमिई वइसमिई कायसमिई
॥ १० ॥ अट्ठहिं ठाणेहिं संपण्णे अणगारे अरिहइ आलोयणा पडिच्छित्तए तं०
आयारवं आहारवं ववहारवं ओवीलए पकुव्वए अपरिस्साई णिज्जावए अवायदंसी
॥ ११ ॥ अट्ठहिं ठाणेहिं संपण्णे अणगारे अरिहइ अत्तदोसमालोइत्तए तं० जाइ-
संपण्णे कुलसंपण्णे विणयसंपण्णे णाणसंपण्णे दंसणसंपण्णे चरित्तसंपण्णे खंते दंते
॥ १२ ॥ अट्ठविहे पायच्छित्ते प० तं० आलोयणारिहे पडिक्कमणारिहे तदुभयारिहे
विवेगारिहे विउस्सग्गारिहे तवारिहे छेयारिहे मूलारिहे ॥ १३ ॥ अट्ठ मयट्ठणा प०
तं० जाइमए कुलमए बलमए रूवमए तवमए सुयमए लाममए इस्सरियमए ॥ १४ ॥
अट्ठ अकिरियावाई प० तं० एगावाई अणेगावाई मितवाई णिम्मितवाई सायवाई

समुच्छेयवाई गियावाई ण सति परलोगवाई ॥ १५ ॥ अट्टविहे महाणिमित्ते
 प० तं० भोमे उप्पाए सुविणे अंतलिक्खे अंगे सरे लक्खणे वंजणे ॥ १६ ॥
 अट्टविहा वयणविभत्ती प० तं० णिहेसे पढमा होइ विइया उवएणं; तइयां करणमि
 कया चउत्थी संपयावणे (१) पंचमी य अवायाणे छट्ठी सस्तामिवायणे; सत्तमी
 सण्णहाणत्थे अट्टमी आमंतणी भवे (२) तत्थ पढमा विभत्ती णिहेसे सो इमो
 अहं वत्ति १-विइया उण उवएसे भण कुण व इमं व तं वत्ति (३) तइया कर-
 णमि कया णीयं च कयं च तेण व मए वा; इंदि णमो साहाए हवइ चउत्थी
 पयाणमि (४) अवणे णिण्हसु तत्तो इत्तोत्ति व पंचमी अवादाने; छट्ठी तस्स
 इमस्स व गयस्स वा सामिसंबंधे (५) हवइ पुण सत्तमीयं इमंमि आहारकाल-
 भावे य; आमंतणी भवे अट्टमी उजह हे जुवाणत्ति (६) ॥ १७ ॥ अट्ट ठाणाई
 छउमत्थे णं सव्वभावेणं ण याणइ ण पासइ तं० धम्मतिथिकायं जाव गथं वायं,
 एयाणि चैव उप्पण्णणणदंसणधरे अरहा जिणे केवली जाणइ पासइ जाव गथं
 वायं ॥ १८ ॥ अट्टविहे आउवेए प० तं० कुमारभिच्चे, कायतिगिच्छा, सालाई,
 सल्लहत्ता, जंगोली, भूयवेज्जा, स्वारतंते, रसायणे ॥ १९ ॥ सक्कस्स णं देविंदस्स देव-
 रण्णो अट्टग्गमहिंसीओ प० तं० पउमा सिवा सई अंजू अमला अच्छरा णवमिया
 रोहिणी ॥ २० ॥ ईसाणस्स णं देविंदस्स देवरण्णो अट्टग्गमहिंसीओ प० तं०
 कण्हा कण्हराई रामा रामरक्खिया वसू वसुगुत्ता वसुमित्ता वसुंधरा ॥ २१ ॥ सक्कस्स
 णं देविंदस्स देवरण्णो सोमस्स महारण्णो अट्टग्गमहिंसीओ प० ॥ २२ ॥ ईसाणस्स
 णं देविंदस्स देवरण्णो वेसमणस्स महारण्णो अट्टग्गमहिंसीओ प० ॥ २३ ॥ अट्ट-
 महग्गहा प० तं० चंदे सूरु मुक्के बुहे बहस्सई अंगारए सणिचरे केऊ ॥ २४ ॥
 अट्टविहा तणवणस्सइकाइया प० तं० मूले कंदे खंधे तथा साले पवाल्ले पत्ते पुप्फे
 ॥ २५ ॥ चउरिंदिया णं जीवा असमारभमाणस्स अट्टविहे संजमे कज्जइ तं०
 चककुमाओ सोक्खाओ अववरोवेत्ता भवइ चककुमएणं दुक्खेणं असजोएत्ता भवइ
 एवं जाव फासामाओ सोक्खाओ अववरोवेत्ता भवइ फासामएणं दुक्खेणं असजो-
 एत्ता भवइ ॥ २६ ॥ चउरिंदिया णं जीवा समारभमाणस्स अट्टविहे असंजमे
 कज्जइ तं० चककुमाओ सोक्खाओ ववरोवेत्ता भवइ चककुमएणं दुक्खेणं सजोएत्ता
 भवइ एवं जाव फासामाओ सोक्खाओ ॥ २७ ॥ अट्टसुहुमा प० तं० पाणसुहुमे

पणगसुहुमे बीयसुहुमे हरियसुहुमे पुप्फसुहुमे अंडसुहुमे लेणसुहुमे सिणेहसुहुमे
 ॥ २८ ॥ भरहस्स णं रण्णे चाउरंतचक्कवट्टिस्स अट्टपुरिसजुगाई अणुबद्धं सिद्धाई
 नाव सव्वदुक्खलप्पहीणाई तं० आइच्चजसे महाजसे अइबले महाबले तेथवीरिए
 कित्तवीरिए दंडवीरिए जलवीरिए ॥ २९ ॥ पासस्स णं अरहओ पुरिसादाणियस्स
 अट्ट गणा अट्ट गणहरा होत्था तं० सुभे अज्जघोसे वसिट्ठे बंभयारी सोमे सिरिधरे
 वीरिए भहजसे ॥ ३० ॥ अट्टविहे दंसणे प० तं० सम्महंसणे मिच्छईसणे सम्मा-
 मिच्छंदंसणे चक्खुदंसणे जाव केवलदंसणे सुविणदंसणे ॥ ३१ ॥ अट्टविहे अट्टो-
 वमिए प० तं० पल्लिओवमे सागरोवमे उस्सप्पिणी ओसप्पिणी पोग्गलपरियट्ठे
 तीतद्धा अणागयद्धा सव्वद्धा ॥ ३२ ॥ अरहओ णं अरिट्ठणेमिस्स जाव अट्टमाओ
 पुरिसजुगाओ जुगतंकरभूमी तुवासपरियाए अंतमकासी ॥ ३३ ॥ समणेणं भग-
 वथा महावीरेणं अट्ट रायाणो मुंडे भवेत्ता अगाराओ अण्णारिथं पव्वाविया तं०
 वीरंगय वीरजसे संजय एणिज्जए य रायरिसी, सेय सिवे उदायणे (तह संखे
 कासिवद्धणे) ॥ ३४ ॥ अट्टविहे आहारे प० तं० मणुण्णे असणे पाणे खाइमे
 साइमे अमणुण्णे जाव साइमे ॥ ३५ ॥ उप्पि सणंकुमारमहिंदाणं कप्पाणं हेट्ठिं
 बंभलोए कप्पे रिद्धविमाणपत्थडे एत्थ णमक्खवाडगसमचउरंससंठाणसंठियाओ
 अट्ट कण्हराईओ प० तं० पुरत्थिमेणं दो कण्हराईओ दाहिणेणं दो कण्हराईओ
 पच्चत्थिमेणं दो कण्हराईओ उत्तरेणं दो कण्हराईओ । पुरत्थिमा अब्भंतरा कण्हराई
 दाहिणं बाहिरं कण्हराईं पुट्ठा, दाहिणा अब्भंतरा कण्हराईं पच्चत्थिमगं बाहिरं
 कण्हराईं पुट्ठा, पच्चत्थिमा अब्भंतरा कण्हराईं उत्तरं बाहिरं कण्हराईं पुट्ठा, उत्तरा
 अब्भंतरा कण्हराईं पुरत्थिमं बाहिरं कण्हराईं पुट्ठा, पुरत्थिमपच्चत्थिमिल्लाओ
 बाहिराओ दो कण्हराईओ छल्लासाओ उत्तरदाहिणाओ बाहिराओ दो कण्हराईओ
 तंसाओ सव्वाओ वि णं अब्भंतरकण्हराईओ चउरंसाओ । एयासि णं अट्टण्हं कण्ह-
 राईणं अट्ट णामधेज्जा प० तं० कण्हराईइ वा मेहराईइ वा मथाइ वा माघवईइ
 वा वायफलिहेइ वा वायपल्लिक्खोभेइ वा देवपलिहे वा देवपल्लिक्खोभेइ वा ।
 एयासि णं अट्टण्हं कण्हराईणं अट्टसु उवासंतरेसु अट्टलोगंतियविमाणा प० तं०
 अची अचिमाली वइरोअणे पभंकरे चंदाभे सूरामे सुपइट्ठामे अग्गिच्चाभे । एएसु
 णं अट्टसु लोगतियविमाणेसु अट्टविहा लोगतिया देवा प० तं० सारस्सयमाइच्चा

वण्ही वण्णा य महतोया य, तुसिया अवावाहा अगिग्घा चैव त्रोधवा (१)
 एएस्सि णं अट्ठहं लोगतियदेवाणं अजहणमणुक्कोसेणं अट्ठ सागरोवमाईं ठिईं प०
 ॥ ३६ ॥ अट्ठ धम्मत्थिकायमज्झपएसा प० अट्ठ अहम्मत्थिकायमज्झपएसा
 एवं चैव अट्ठ आगामत्थिकायमज्झपएसा प० एवं चैव अट्ठ जीवमज्झपएसा प०
 ॥ ३७ ॥ अरहंता णं महापउमे अट्ठ रायाणो मुंडा भवित्ता अगाराओ अणगारियं
 पव्वावेस्सइ तं० पउमं पउमगुम्मं गल्लिणं गल्लिणगुम्मं पउमद्वयं धणुद्वयं कणगरहं
 भरहं ॥ ३८ ॥ कण्हस्स णं वामुदेवस्स अट्ठ अग्गमाहिसीओ अरहओ णं अरिट्ठ-
 णेमिस्स अंतिए मुंडा भवेत्ता अगाराओ अणगारियं पव्वइया सिद्धाओ जाव
 सम्बदुक्कवप्पहीणाओ तं० पउमावईं य गौरी गंधारी लक्खणा सुसीमा य जंचवईं
 सच्चामा रुप्पिणी कण्हअग्गमाहिसीओ ॥ ३९ ॥ वीरियपुव्वस्स णं अट्ठ वत्थु
 अट्ठ चूलियावत्थु प० ॥ ४० ॥ अट्ठ गईओ प० तं० गिरियगईं तिरियगईं जाव
 सिद्धिगईं गुरुगईं पणोत्तगगईं पव्वारगईं ॥ ४१ ॥ गंगासिंधुरत्तारत्तवइदेवीणं
 दीवा अट्ठ २ जोयणाईं आयामविकखंभेणं प० ॥ ४२ ॥ उक्कामुहमेहमुहविज्जु-
 मुहविज्जुदंतदीवाणं दीवा अट्ठ २ जोयणसथाईं आयामविकखंभेणं प० ॥ ४३ ॥
 कालोदे णं समुद्दे अट्ठ जोयणसयसहस्साईं चक्कवालविकखंभेणं प० ॥ ४४ ॥
 अब्भंतरपुक्कवरद्धे णं अट्ठ जोयणसयसहस्साईं चक्कवालविकखंभेणं प० एवं चाहिर-
 पुक्कवरद्धेवि ॥ ४५ ॥ एगमेगस्स णं रण्णो चाउरंतचक्कवट्ठिस्स अट्ठ सोवणिए
 काकिणिरयणे छत्तले दुवालसंसिए अट्ठकणिए अधिकरणिंसठिए प० ॥ ४६ ॥
 मागधस्स णं जोयणस्स अट्ठ धणुसहस्साईं गिधत्ते प० ॥ ४७ ॥ जंबू णं सुदंसणा
 अट्ठ जोयणाईं उट्ठं उच्चत्तेणं बट्टमज्झदेसभाए अट्ठ जोयणाईं विकखंभेणं साइरेगाईं
 अट्ठ जोयणाईं सव्वग्गेणं प० ॥ ४८ ॥ कूडसामली णं अट्ठ जोयणाईं एवं चैव ॥ ४९ ॥
 तिमिसगुहा णमट्ठ जोयणाईं उट्ठं उच्चत्तेणं ॥ ५० ॥ खंडप्पवायगुहा णं अट्ठ जोय-
 णाईं उट्ठं उच्चत्तेणं एवं चैव ॥ ५१ ॥ जंबूमंदरस्स पव्वयस्स पुरत्थिमेणं सीयाए
 महाणईंए उभओ कूले अट्ठ वक्खारपव्वया प० तं० चित्तकूडे पम्हकूडे गल्लिण-
 कूडे एगसेले तिकूडे वेसमणकूडे अंजणे मायंजणे ॥ ५२ ॥ जंबूमंदरपच्चत्थिमेणं
 सीओयाए महाणईंए उभओकूले अट्ठ वक्खारपव्वया प० तं० अंकावईं पम्हावईं
 आसीविसे सुहावहे चंदपव्वए सूरपव्वए णागपव्वए देवपव्वए ॥ ५३ ॥

जंबूमंदरपुरतिथिमेणं सीयाए महाणईए उत्तरेणं अट्ट चक्कवट्टिविजया प० तं०
 कच्छे सुकच्छे महाकच्छे कच्छगावई आवत्ते जाव पुक्खलावई ॥ ५४ ॥ जंबू-
 मंदरपुरतिथिमेणं सीयाए महाणईए दाहिणेणमट्ट चक्कवट्टिविजया प० तं० वच्छे
 सुवच्छे जाव मंगलावई ॥ ५५ ॥ जंबूमंदरपच्चतिथिमेणं सीओयाए महाणईए दाहि-
 णेणं अट्ट चक्कवट्टिविजया प० तं० पम्हे जाव सलिलावई ॥ ५६ ॥ जंबूमंदर-
 पच्चतिथिमेणं सीओयाए महाणईए उत्तरेणं अट्ट चक्कवट्टिविजया प० तं० कप्पे
 सुवप्पे जाव गंधिलावई ॥ ५७ ॥ जंबूमंदरपुरतिथिमेणं सीयाए महाणईए उत्तरेण-
 मट्ट रायहाणीओ प० तं० खेमा खेमपुरी च्चैव जाव पुंडरीगिणी ॥ ५८ ॥
 जंबूमंदरपुरतिथिमेणं सीयाए महाणईए दाहिणेणमट्ट रायहाणीओ प० तं० सुसीमा
 कुंडला च्चैव जाव रयणसंचया ॥ ५९ ॥ जंबूमंदरपच्चतिथिमेणं सीओयाए महा-
 णईए दाहिणेणं अट्ट रायहाणीओ प० तं० आसपुरा जाव वीयसोगा ॥ ६० ॥
 जंबूमंदरपच्चतिथिमेणं सीओयाए महाणईए उत्तरेणं अट्ट रायहाणीओ प० तं०
 विजया वेजयंती जाव अउज्झा ॥ ६१ ॥ जंबूमंदरपुरतिथिमेणं सीयाए
 महाणईए उत्तरेणं उक्कोसपए अट्ट अरिहंता अट्ट चक्कवट्टी अट्ट बलदेवा अट्ट
 वासुदेवा उप्पज्जिसु वा उप्पज्जिति वा उप्पज्जिस्संति वा ॥ ६२ ॥ जंबूमंदरपुरतिथि-
 मेणं सीयाए महाणईए दाहिणेणं उक्कोसपए एवं च्चैव ॥ ६३ ॥ जंबूमंदरपच्चतिथिमेणं
 सीओयाए महाणईए दाहिणेणं उक्कोसपए एवं च्चैव ॥ ६४ ॥ एवं उत्तरेणवि ।
 जंबूमंदरपुरतिथिमेणं सीयाए महाणईए उत्तरेणं अट्ट दीहवेयड्ढा अट्ट तिमिसगुहाओ
 अट्ट खंडगप्पवायगुहाओ अट्ट कयमालगा देवा अट्ट णट्टमालगा देवा अट्ट गंगा-
 कुंडा अट्ट सिंधुकुंडा अट्ट गंगाओ अट्ट सिंधूओ अट्ट उसभकूडपव्वया अट्ट उस-
 भकूडा देवा प० । जंबूमंदरपुरतिथिमेणं सीयाए महाणईए दाहिणेणं अट्ट दीहवेयड्ढा
 एवं च्चैव जाव अट्ट उसभकूडा देवा प० णवरमेत्थ रत्तारत्तावईओ तासिं च्चैव कुंडा
 ॥ ६५ ॥ जंबूमंदरपच्चतिथिमेणं सीओयाए महाणईए दाहिणेणं अट्ट दीहवेयड्ढा जाव
 अट्ट गंगाकुंडा अट्ट सिंधुकुंडा अट्ट गंगाओ अट्ट सिंधूओ जाव अट्ट उसभकूडा देवा
 प० । जंबूमंदरपच्चतिथिमेणं सीओयाए महाणईए उत्तरेणं अट्ट दीहवेयड्ढा जाव अट्ट णट्ट-
 मालगा देवा प० अट्ट रत्तकुंडा अट्ट रत्तावइकुंडा अट्ट रत्ताओ जाव अट्ट उसभकूडा
 देवा प० ॥ ६६ ॥ मंदरचूलिया णं बहुमत्तदेसभाए अट्ट जोयणाइं विक्खंमेणं प०

॥ ६७ ॥ धायइसंडदीवे पुरत्थिमद्वेणं धायइरुक्खे अट्ट जोयणाई उट्ठं उच्चत्तेणं
 ५० बह्मुमञ्जदेसभाए अट्ट जोयणाई विक्खंभेणं साइरेगाई अट्ट जोयणाई सव्वरगेणं
 ५० एवं धायइरुक्ख्वाओ आट्टवेत्ता सञ्जेव जंबूदीववत्तव्वया भाणियव्वा जाव मंदर-
 चूलियत्ति एवं पच्चत्थिमद्वेवि महाधायइरुक्ख्वाओ आट्टवेत्ता जाव मंदरचूलियत्ति
 ॥ ६८ ॥ एवं पुक्खरवरदीवह्मपुरत्थिमद्वेवि पउमरुक्ख्वाओ आट्टवेत्ता जाव मंदर-
 चूलियत्ति एवं पुक्खरवरदीवह्मपच्चत्थिमद्वेवि महापउमरुक्ख्वाओ जाव मंदरचूलि-
 यत्ति ॥ ६९ ॥ जंबुदीवे दीवे मंदरे पव्वए भद्दसालवणे अट्ट दिसाहत्थिकूडा प० तं०—
 ५उमुत्तर णीलवंते सुहत्थी अंजणागिरी, कुमुए यं पलासए वडिंये अट्टमए, रोयणा-
 गिरी ७० ॥ ॥ जंबुदीवस्स णं दीवस्स जंगई अट्ट जोयणाई उट्ठं उच्चत्तेणं बह्मु-
 मञ्जदेसभाए अट्ट जोयणाई विक्खंभेणं प० ॥ ७१ ॥ जंबुदीवे दीवे मंदरपव्वयस्स
 दाहिणेणं महाहिमवंते वासहरपव्वए अट्ट कूडा प० तं० सिद्धे महाहिमवंते हिमवंतं
 रोहिया हरीकूडे, हरिकंता हरिवासं वेरुल्लिए चेव कूडा उ ॥ ७२ ॥ जंबूमंदरउत्त-
 रेणं रुप्पिमि वासहरपव्वए अट्ट कूडा प० तं० सिद्धे यं रुप्पि रम्मग णरकंता बुद्धि
 रुप्पकूडे यं, हिरण्यवए मणिकंचणे यं रुप्पिमि कूडा उ ॥ ७३ ॥ जंबूमंदरपुर-
 त्थिमेणं रुयगवरे पव्वए अट्ट कूडा प० तं०—रिट्ठे तवणिज्ज कंचणे रययं दिसासोत्थिए
 ५लंबे यं; अंजणे अंजणपुलए रुयगस्स पुरत्थिमे कूडा (१) तत्थ णं अट्ट दिसा-
 कुमारिमहत्तरियाओ महिद्धियाओ जाव पलिओवमट्ठिईयाओ परिवसंति तं०णंदुनरा
 व णंदा आणंदा णंदिवद्धणा, विजया यं वेजयंती जयंती अपराजिया ॥ ७४ ॥
 जंबूमंदरदाहिणेणं रुयगवरे पव्वए अट्ट कूडा प० तं०—कणए कंचणे पउमे णल्लिणे ससि
 दिवायरे चेव, वेसमणे वेरुल्लिए रुयगस्स उ दाहिणे कूडा (१) तत्थ णं अट्ट दिसा-
 कुमारिमहत्तरियाओ महिद्धियाओ जाव पलिओवमट्ठिईयाओ परिवसंति तं० समाहारा
 सुप्पइण्णा सुप्पबुद्धा जसोहरा; लच्छिवई सेसवई चित्तगुत्ता वसंधरा ॥ ७५ ॥
 जंबूमंदरपच्चत्थिमेणं रुयगवरे पव्वए अट्ट कूडा प० तं० सोत्थिए यं अगोहे यं
 हिमवं मंदरे तहा, रुअंसे रुयगुत्तमे चंदे अट्टमे यं सुदंसणे (१) तत्थ णं अट्ट
 दिसाकुमारिमहत्तरियाओ महिद्धियाओ जाव पलिओवमट्ठिईयाओ परिवसंति तं०—
 इलादेवी सुरादेवी पुढवी पउमावई, एणाणासा णवमिया सीया भदा यं अट्टमा
 ॥ ७६ ॥ जंबूमंदरउत्तररुअगवरे पव्वए अट्टकूडा प० तं० रयणे रयणुच्चए या
 सव्वरयण रयणसंचए चेव, विजये यं वेजयंते जयंते अपराजिए (१) तत्थ णं

अद्द दिसाकुमारिमहत्तरियाओ महद्वियाओ जाव पलिओवमद्विईयाओ परिवसंति
 तं०—अलंबुसा मिक्केसी पोंडरिगी य वारुणी, आसा य सव्वगा चैव सिरी हिरी चैव
 उत्तराओ ॥ ७७ ॥ अद्द अहेलोगवत्थव्वाओ दिसाकुमारिमहत्तरियाओ प० तं०
 भोगंकरा भोगवई सुभोगा भोगमालिणी; सुवच्छा वच्छमिच्चा य, वारिसेणा बला-
 हगा (१) अद्द उबूलोगवत्थव्वाओ दिसाकुमारिमहत्तरियाओ प० तं०—मेघंकरा
 मेघवई सुमेघा मेघमालिणी, तोयधारा विचित्ता य पुप्फमाला अण्णित्ता (२)
 ॥७८॥ अद्द कप्पा तिरियमिस्सोववण्णगा प० तं० सोहम्मे जाव सहस्सारे ॥७९॥
 एएसु णं अद्दसु कप्पेसु अद्द ईंदा प० तं० सक्के जाव सहस्सारे ॥ ८० ॥ एएसि
 णं अद्दण्हं ईंदाणं अद्द परियाणिया विमाणा प० तं० पालए पुप्फए सोमण्णसे
 सिरिवच्छे णंदावत्ते कामकमे पीइमणे विमले ॥८१॥ अद्दट्टमिया णं भिक्खुपडिमा
 णं चउसट्ठीए राईदिएहिं दोहि य अट्ठासीएहिं भिक्खासएहिं अहासुत्तं जाव
 अणुपालियावि भवइ ॥ ८२ ॥ अद्दविहा संसारसमावण्णगा जीवा प० तं० पढम-
 समयणेरइया अपढमसमयणेरइया एवं जाव अपढमसमयदेवा ॥ ८३ ॥ अद्दविहा
 सव्वजीवा प० तं० णेरइया तिरिक्खजोणिया तिरिक्खजोणिणीओ मणुस्सा मणु-
 स्सीओ देवा देवीओ सिद्धा ॥ ८४ ॥ अहवा अद्दविहा सव्वजीवा प० तं० आभि-
 णिन्नोहियणाणी जाव केवलणाणी मइअण्णाणी सुयअण्णाणी विभंगणाणी ॥ ८५ ॥
 अद्दविहे संजमे प० तं० पढमसमयसुद्धमसंपरायसरागसंजमे, अपढमसमयसुद्धमसंप-
 रायसरागसंजमे, पढमसमयचादरसंपरायसंजमे, अपढमसमयचादरसंपरायसंजमे,
 पढमसमयउवसंतकसायवीयरायसंजमे, अपढमसमयउवसंतकसायवीयरायसंजमे,
 पढमसमयखीणकसायवीयरायसंजमे, अपढमसमयखीणकसायवीयरायसंजमे ॥८६॥
 अद्दपुदवीओ प० तं० रयणप्पभा जाव अहे सत्तमा ईसिपम्भारा ॥८७॥ ईसिपम्भा-
 राए णं पुदवीए बहुमज्झदेसभाए अद्दजोयणिए खेत्ते अद्द जोयणाई वाहल्लेणं
 प० ॥ ८८ ॥ ईसिपम्भाराए णं पुदवीए अद्द णामधेज्जा प० तं० ईसीइ वा,
 ईसिपम्भाराइ वा, तणूइ वा, तणुतणूइ वा, सिद्धीइ वा, सिद्धालएइ वा, मुत्तीइ
 वा, मुत्तालएइ वा ॥ ८९ ॥ अद्दहिं ठाणेहिं सम्मं संघडियव्वं जइयव्वं परक्कमि-
 यव्वं अस्सि च णं अद्दे णो पमाएयव्वं भवइ, असुयाणं धम्माणं सम्मं सुणण्याए
 अब्भुट्ठेयव्वं भवइ, सुयाणं धम्माणं ओगिण्हण्याए उवधारण्याए अब्भुट्ठेयव्वं

भवइ, पावाणं कम्माणं संजमेणमकरणयाए अब्भुट्टेयव्वं भवइ, पोराणाणं कम्माणं तवसा विमिच्चणयाए विमोहणयाए अब्भुट्टेयव्वं भवइ, अमंगिहीयपरियणस्स संगि-
 ण्हणयाए अब्भुट्टेयव्वं भवइ, सेहं आयाारगोयरगहणयाए अब्भुट्टेयव्वं भवइ, गिला-
 णस्स अगिलाए वेयावच्चकरणयाए अब्भुट्टेयव्वं भवइ, साहम्मियाणमधिकरणमि
 उप्पण्णंति तत्थ अणिरिसओवस्सिओ अपक्खग्गाही मज्झत्थभावभूए कह णु साह-
 म्मिया अप्पसद्दा अप्पसंझा अप्पतुमंतुमा उवसामणयाए अब्भुट्टेयव्वं भवइ ॥९०॥
 महासुक्कसहस्सारेसु णं कप्पेसु विमाणा अट्ट जोयणसयाई उट्ठं उच्चत्तेणं प०
 ॥ ९१ ॥ अरहओ णं अरिट्ठणेमिस्स अट्टसया वाईणं सदेवमणुयासुराए परिंसाए
 वाए अपराजियाणं उक्कोसिया वाइसंपया हुत्था ॥ ९२ ॥ अट्टसमइए क्वाळ-
 समुग्घाए प० तं० पट्टमे समए दंडं करेइ बीए समए क्वाळं करेइ तइए समए
 मंथाणं करेइ चउत्थं समए लोगं पूरेइ पंचमे समए लोगं पडिसाहरइ छट्ठे
 समए मंथं पडिसाहरइ सत्तमे समए क्वाळं पडिसाहरइ अट्टमे समए दंडं पडि-
 साहरइ ॥ ९३ ॥ समणस्स णं भगवओ महावीरस्स अट्ट सया अणुत्तरोववाइयाणं
 गइकल्लाणाणं जाय आगमेसिभद्दाणं उक्कोसिया अणुत्तरोववाइयसंपया हुत्था
 ॥ ९४ ॥ अट्टविहा वाणमंतरा देवा प० तं०-पिसाया भूया जक्खला रक्खसा
 किण्णरा किंपुरिसा महोरगा गंधव्वा ॥ ९५ ॥ एएति णं अट्टहं वाणमंतरदेवाणं
 अट्टचेइयरुक्खा प० तं०-कलंबो य पिसायाणं वडो जक्खलाण चइयं तुलसी भूयाणं
 भवे रक्खसाणं च कंडओ (१) असोओ किण्णराणं च किंपुरिसाण य चंपओ;
 णागरुक्खो भुयंगाणं गंधव्वाण य तंतुओ (२) ॥ ९६ ॥ इमीस्से रयणप्पभाए
 पुट्टवीए बहुसमरमणिज्जाओ भूमिभागाओ अट्टजोयणसए उट्टुवाहाए सूरविमाणं
 चारं चरइ ॥ ९७ ॥ अट्ट णक्खत्ता चंदेणं सद्धिं पमहं जोगं जोएति तं० कत्तिया
 रोहिणी पुणव्वसू महा चित्ता विसाहा अणुराहा जेट्ठा ॥ ९८ ॥ जंतुदीवस्स णं
 दीवस्स दारा अट्टजोयणाई उट्ठं उच्चत्तेणं प०-सव्वेसिपि दीवसमुद्दाणं दारा अट्ट-
 जोयणाई उट्ठं उच्चत्तेणं प० ॥ ९९ ॥ पुरिसवेयणिज्जस्स णं कम्मस्स जहण्णेणं अट्ट-
 संवच्छराई वंधट्ठिई प० ॥ १०० ॥ जसोकित्तीणामएणं कम्मस्स जहण्णेणं अट्ट
 मुट्टुत्ताई वंधट्ठिई प० ॥ १०१ ॥ उच्चगोयस्स णं कम्मस्स एवं चैव ॥ १०२ ॥
 तेईदियाणमट्ट जाइकुल्लकोडीजोणीपमुहसयसहस्सा प० ॥ १०३ ॥ जीवा णं अट्ट-
 ठाण्णिव्वत्तिए पोगाले पावकम्मत्ताए चिणिसु वा चिणंति वा चिणिसिस्सति वा तं०-

पढमसमयणेरइयणिव्वत्तिए जाव अपढमसमयदेवणिव्वत्तिए एवं चिण-उवच्चिण जाव णिज्जरा चेव ॥ १०४ ॥ अट्टपएसिया खंधा अणता प० ॥ १०५ ॥ अट्ट पएसोगाढा पोग्गला अणता प० ॥ १०६ ॥ जाव अट्टगुणलुक्खा पोग्गला अणता प० ॥ १०७ ॥

णवमं ठाणं

णवहिं ठाणेहिं समणे णिरग्गये संभोइयं विसंभोइयं करेमाणे णाइक्कमइ तं०—
 आयरियपडिणीयं उवच्चज्ञायपडिणीयं थेरपडिणीयं कुल० गण० संघ० णाण०
 देसण० चरित्तपडिणीयं ॥ १ ॥ णव वंभचेरा प० तं० सत्थपरिण्णा लोगविज्जओ
 जाव उवहाणसुयं महापरिण्णा ॥ २ ॥ णव वंभचेरगुत्तीओ प० तं० विवित्ताइं
 सयणासणाइं सेवित्ता भवइ णो इत्थिसंसत्ताइं णो पसुसंसत्ताइं णो पंडगसंसत्ताइं १
 णो इत्थीणं कइं कहेत्ता २ णो इत्थिठाणाइं सेवित्ता भवइ ३ णो इत्थीणमिंदियाइं
 मणोहराइं मणोरमाइं आलोइत्ता णिज्जइत्ता भवइ ४ णो पणीयरसभोई ५ णो
 पाणभोयणस्स अइमत्तं आहारए सया भवइ ६ णो पुव्वरयं पुव्वकीलियं समरेत्ता
 भवइ ७ णो सद्दाणुवाइं णो रुवाणुवाइं णो सिलोगाणुवाइं ८ णो सायसोक्खपडिबद्धे
 यावि भवइ ९ ॥ ३ ॥ णव वंभचेरअगुत्तीओ प० तं० णो विवित्ताइं सयणासणाइं
 सेवित्ता भवइ इत्थीसंसत्ताइं पसुसंसत्ताइं पंडगसंसत्ताइं इत्थीणं कइं कहेत्ता भवइ
 इत्थीणं ठाणाइं सेवित्ता भवइ इत्थीणं इंदियाइं जाव णिज्जइत्ता भवइ पणीय-
 रसभोई पाणभोयणस्स अइमायमाहारए सया भवइ पुव्वरयं पुव्वकीलियं सरित्ता
 भवइ सद्दाणुवाइं रुवाणुवाइं सिलोगाणुवाइं जाव सायसुक्खपडिबद्धे यावि भवइ
 ॥ ४ ॥ अभिणंदणाओ णं अरहओ सुमई अरहा णवहिं सागरोवमकोडीसयसह-
 स्सेहिं विइकंतेहिं समुप्पण्णे ॥ ५ ॥ णव सम्भावपयत्था प० तं० जीवा अजीवा
 पुण्णं पावो आसवो संवरो णिज्जरा वंभो मोक्खो ॥ ६ ॥ णवविहा संसारसमावण्णमा
 जीवा प० तं० पुढविकाइया जाव वणस्सइकाइया बेइंदिया जाव पंचिदियत्ति
 ॥ ७ ॥ पुढविकाइया णवगइया णव आगइया प० तं० पुढविकाइए पुढविकाइएसु
 उववज्जमाणे पुढविकाइएहिंतो वा जाव पंचिदिएहिंतो वा उववज्जेजा, से चेव
 णं से पुढविकाइए पुढविकायत्तं विप्पज्जमाणे पुढविकाइयत्ताए जाव पंचिदिय-
 त्ताए वा गच्छेजा । एवं आउकाइयावि पंचिदियत्ति ॥ ८ ॥ णवविहा स्ववजीवा

प० तं० एगिंदिया वेइंदिया तेइंदिया चउरिंदिया णेरइया पंचिंदियतिरिक्ख-
जोगिया मणुस्सा देवा सिद्धा ॥ ९ ॥ अहवा णवविहा सव्वजीवा प० तं० पढम-
समयणेरइया अपढमसमयणेरइया जाव अपढमसमयदेवा सिद्धा ॥ १० ॥ णवविहा
सव्वजीवोगाहणा प० तं० पुढविकाइओगाहणा आउ० जाव वणस्सइकाइओगाहणा
वेइंदियोगाहणा तेइंदियोगाहणा चउरिंदियोगाहणा पंचिंदियोगाहणा ॥ ११ ॥
जीवा णं णवहिं ठाणेहिं संसारं वत्तिमु वा वत्तंति वा वत्तिस्मंति वा तं० पुढवि-
काइयत्ताए जाव पंचिंदियत्ताए ॥ १२ ॥ णवहिं ठाणेहिं रोगुप्पत्ती सिया तं०
अच्चासणाए अहियासणाए अइगिहाए अइजागरिएणं उच्चारणिरोगेणं पासवणफिरो-
हेणं अद्दाणमणेणं भोयणवडिक्कल्याए इंदियत्थविकोवणयाए ॥ १३ ॥ णवविहे
दरिसणावरणे कम्मे प० तं०-णिहं गिहागिहा पयला पयलापयला थीणगिद्धी
चक्खुदरिसणावरणे अचक्खुदरिसणावरणे ओहिदरिसणावरणे केवलदरिसणावरणे
॥ १४ ॥ अभिई णं णववत्ते साइरेणे णवमुहुत्ते चंदेणं सद्धि जोगं जोगइ ॥ १५ ॥
अभिईआइआ णं णवणक्खत्ता णं चंदस्स उत्तरेणं जोगं जोएति तं०, अभिई सवणो
धगिट्ठा जाव भरणी ॥ १६ ॥ इमीसे णं रयणप्पंभाए पुढवीए ब्रहुसमरमणिच्चाओ
भूमिभागाओ णवजोयणसयाई उहं अवाहाए उवरिल्ले तारारुवे चारं चरइ
॥ १७ ॥ जंबुद्वीवे णं दीवे णवजोयणिया मच्छा पविसिंनु वा पविसंति वा पवि-
सिस्संति वा ॥ १८ ॥ जंबुद्वीवे दीवे भारहे वासे इमीसे ओसप्पिणीए णव वलदेव-
वामुदेवपियरो हुत्था तं० पयावई य वंमे य रोदे सोमे सिवेइया, महामीहे अगि-
सीहे दसरह णवमे य वसुदेवे (१) इत्तो आट्ठत्तं जहा समवाये णिरवसेसं जाव
एगा से गम्भवसही सिद्धिस्सइ आगमिस्सेणं ॥ १९ ॥ जंबुद्वीवे दीवे भारहे
वासे आगमेस्साए उस्सप्पिणीए णववलदेववामुदेवपियरो भविसंति णव वलदेव-
वामुदेवमायरो भविसंति, एवं जहा समवाए णिरवत्तेसं जाव महाभीमणेणे
सुग्गीवे य अपच्छिमे; एए खल्ल पडिसत्तु किन्तीपुरिसाण वामुदेवार्णं सव्वेवि
चक्खोही हम्मंहेंती सचकेहिं ॥ २० ॥ एगमेणे णं महाणिही णवणव जोयणइं
विक्रंभेणं प० । एगमेगस्स णं रण्णो चाउरंतचक्खवडिस्स णव महाणिहीओ प० तं०
“ णेसप्पे पंडुयए पिंगलए सव्वरयण महापउमे, काले य महाकाले माणवग महा-
णिही संखे (१) णेसप्पंमि णिवेसा गामागरणगरपट्टणार्णं च, दोगमूद्दमंडंवाणं
खंधारारणं गिहाणं च (२) गणियस्स य वीयाणं माणुम्माणस्स जं पमाणं च,

धण्णस्स य नीयाणं उप्पत्ती पंडुए भणिया (३) सत्त्वा आभरणविही पुरिसाणं
जा य होइ महिलारणं, आसाण य हत्थीण य विंगलमणिहिम्मि सा भणिया (४)
रयण्णं सव्वरयणे चोदस पवराइं चक्कवट्टिस्स, उप्पज्जंति एगिदियाइं पंचिदि-
याइं च (५) वत्थाण य उप्पत्ती णिप्पत्ती चैव सव्वभत्तीणं, रंगाण य धोयाण य
सव्वा एसा महापउमे (६) काले कालण्णाणं भव्वपुराणं च तीसु वासेसु; सिप्पसयं
कम्मणि य, तिण्णिण पथाए हियकराइं (७) लोहस्स य उप्पत्ती होइ महाकाले
आगराणं च, रूप्पस्स सुवण्णस्स य मणिमोत्तिसिलप्पवालाणं (८) जोधाण य
उप्पत्ती आवरणं च, पहरणं च, सव्वा य जुद्धणीई, माणवए दंडणीई य
(९) णट्टिविही णाडगविही, कव्वस्स चउट्ठिवहस्स उप्पत्ती, संखे महाणिहिम्मी,
तुड्डियेगाणं च सव्वेसिं (१०) चक्कट्टपइट्टाणा अट्टुस्सेहा य णव य त्रिकव्वंभे,
बारसदीहा मंजूससठिया, जंहवीइ मुहे (११) वेरलियमणिकवाडा कणमया
विविहरयणपडिपुण्णा, ससिसूरचक्कलक्खण अणुसमजुगवाहुवयणा य (१२) पलि-
भोवमट्टिईया णिहिसरिणांमा य तेसु खलु देवा; जेसिं ते आवासा अक्किञ्जा आहि-
वच्चा वा, (१३) एए ते णवणिहओ पभूयधरणयणसंचयसमिद्धा जे वसमुवगच्छंती
सव्वेसिं चक्कवट्टीणं" (१४) ॥ २१ ॥ णव विगईओ प० तं० खीरं दहिं णवणीयं
सप्पि तेलं गुल्लो महुं मज्जं मंसं ॥ २२ ॥ णवसोयपरिस्सावा वोंदी प० तं० दो
सोत्ता दो णेत्ता दो व्वाणा मुहं पोसे पाऊ ॥ २३ ॥ णवविहे पुण्णे प० तं० अण्णपुण्णे
पाणपुण्णे वत्थपुण्णे लेणपुण्णे सयणपुण्णे मणपुण्णे वइपुण्णे कायपुण्णे णमोक्कारपुण्णे
॥ २४ ॥ णव पावस्सारयंतणा प० तं० पाणाइवाए मुसावाए जाव परिग्गहे कोहे माणे
माया लोहे ॥ २५ ॥ णवविहे पावस्सुयपसंगे प० तं० उप्पाए णिमित्ते मंते आइक्खिवाए
तिग्गिच्छए, कला आवरणे अण्णाणे मिच्छापावयणेति य ॥ २६ ॥ णव णेउणिया
वत्थू प० तं० संखाणे णिमित्ते काइए पोराने पारिहत्थियए परंपंडिए वाइए
भूइकम्मे तिग्गिच्छए ॥ २७ ॥ समणस्स णं भगवओ महावीरस्स णव गणा हुत्था
तं० गोदासगणे उत्तरबल्लिस्सहगणे उद्देहगणे चारणगणे उद्दवाइयगणे विस्सवा-
इयगणे कामद्धियगणे माणवगणे कोडियगणे ॥ २८ ॥ समणेणं भगवया महा-
वीरेणं समणाणं णिरगंथाणं णवकोडिपरिसुद्धे भिक्खे प० तं० ण हणइ ण हणावइ
हणंतं णाणुजाणइ ण पयइ ण पयावेइ पर्यंतं णाणुजाणइ ण क्रिणइ ण क्रिणावेइ किणंतं
णाणुजाणइ ॥ २९ ॥ ईसाणस्स णं देविंदस्स देवरणो वरुणस्स महारणो णव
भग्गमहिसीओ प० ॥ ३० ॥ ईसाणस्स णं देविंदस्स देवरणो अग्गमहिसीणं णवपलि-

ओषमाईं ठिईं प० ॥ ३१ ॥ ईसाणे कप्पे उक्कोमेणं देवीणं णव पलिओषमाईं ठिईं
 प० ॥ ३२ ॥ णव देवणिक्काया प० तं० “ सारस्सयमाइच्चा वण्ही वरुणा य-गह-
 तोया य तुसिया अच्चावाह अग्गिच्चा चेव रिट्ठा य ” ॥ ३३ ॥ अच्चावाहाणं देवाणं
 णव देवा णव देवसया प० ॥ ३४ ॥ एवं अग्गिच्चावि एवं रिट्ठावि ॥ ३५ ॥ णव
 गेवेज्जविमाणपत्थडे प० तं० हेट्ठिमहेट्ठिमगेविज्जविमाणपत्थडे हेट्ठिममज्झिम-
 गेविज्जविमाणपत्थडे हेट्ठिमउवरिमगेविज्जविमाणपत्थडे मज्झिमहेट्ठिमगेविज्ज-
 विमाणपत्थडे मज्झिममज्झिमगेविज्जविमाणपत्थडे मज्झिमउवरिमगेविज्जविमाण-
 पत्थडे उवरिमहेट्ठिमगेविज्जविमाणपत्थडे उवरिममज्झिमगेविज्जविमाणपत्थडे
 उवरिमउवरिमगेविज्जविमाणपत्थडे ॥ ३६ ॥ एएसि णं णवण्हं वेणिच्चविमाणपत्थ-
 डाणं णव णामधिज्जा प० तं० भहे सुभहे सुजाए सोमणसे पियदरिसणे, सुदंसणे
 अमोहे य सुप्पयुद्धे जसोधरे ॥ ३७ ॥ णवविहे आउपरिणाने प० तं० गइपरि-
 णामे गइबंधणपरिणामे टिइपरिणामे टिइबंधणपरिणामे उट्ठंगारवपरिणामे अहे-
 गारवपरिणामे तिरियंगारवपरिणामे दीहंगारवपरिणामे रहस्संगारवपरिणामे ॥ ३८ ॥
 णवणवमिया णं भिक्खुपडिमा एमासीए राईंदिएहि चउडि य पंचुत्तरेहिं
 भिक्खवासएहिं अहासुत्तं जाव आराहिया यावि भवइ ॥ ३९ ॥ णवविहे पायच्छत्ते
 प० तं० आलोयणारिहे जाव मूलारिहे अणवट्ठप्पारिहे ॥ ४० ॥ जंबूमंदरदाहि-
 णेणं भरहे दीहवेयड्ढे णव कूडा प० तं० सिद्धे भरहे खंडग माणी वेयड्ढु पुण्ण
 तिमिसगुहा, भरहे वेसमणे या भरहे कूडाण णामाईं ॥ ४१ ॥ जंबूमंदरदाहिणेणं
 णिमहे व.सहरपव्वए णवकूडा प० तं० सिद्धे णिसहे हरिवास विदेह हरि
 धिइ असीओया, अवरविदेहे रुयणे णिसहे कूडाण णामाणि ॥ ४२ ॥ जंबूमंदर-
 पव्वए णंदणवणे णव कूडा प० तं० णंदणे मंदरे चेव णिसहे हेमवणं रयय रुयए
 य, सागरचित्ते वइरे बल्लूडे चेव बोद्धव्वे ॥ ४३ ॥ जंबूमालवंतवक्खारपव्वए णव
 कूडा प० तं० सिद्धे य मालवंते, उत्तरकुरु कच्छ सामरे रयए, सीया तइ पुण्ण-
 णामे हरिस्सहकूडे य बोद्धव्वे ॥ ४४ ॥ जंबू० कच्छे दीहवेयड्ढे णव कूडा प० तं०
 सिद्धे कच्छे खंडग माणी वेयड्ढु पुण्ण तिमिसगुहा, कच्छे वेसमणे या कच्छे कूडाण
 णामाईं ॥ ४५ ॥ जंबू० सुकच्छे दीहवेयड्ढे णव कूडा प० तं० सिद्धे सुकच्छे खंडग
 माणी वेयड्ढु पुण्ण तिमिसगुहा; सुकच्छे वेसमणे या सुकच्छे कूडाण णामाईं
 ॥ ४६ ॥ एवं आच पोक्खलावईमि दीहवेयड्ढे, एवं वच्छे दीहवेयड्ढे, एवं जाव

मंगलावईमि दीहवेयहे ॥ ४७ ॥ जंबू० विज्जुप्पमे वक्खारपव्वए णव कूडा प०
 तं०—सिद्धे अ विज्जुणांमे देवकुरा पम्ह कणग सोवत्थी, सीओयाए सजले हरिकूडे
 चेव बोद्धव्वे ॥ ४८ ॥ जंबू० पम्हे दीहवेयहे णव कूडा प० तं०—सिद्धे पम्हे
 खंडग माणी वेयङ्ग एवं चेव जाव सल्लिलावईमि दीहवेयहे एवं वप्पे दीहवेयहे एवं
 जाव गंधिलावईमि दीहवेयहे णव कूडा प० तं० सिद्धे गंधिल खंडग माणी वेयङ्ग
 पुण्ण तिमिसगुहा; गंधिलावइ वेसमण कूडाणं होंति णामाई (१) एवं सव्वेसु दीह-
 वेयहेसु दो कूडा सरिसणामगा सेसा ते चेव ॥ ४९ ॥ जंबूमंदरउत्तरेणं णीलवंते
 वासहरपव्वए णव कूडा प० तं० सिद्धे णीलवंत विदेहे सीया किन्ती य णारिकंता
 य, अवरविदेहे रम्मगकूडे उवदंसणे चेव ॥ ५० ॥ जंबूमंदरउत्तरेणं एरवए दीह-
 वेयहे णव कूडा प० तं० सिद्धे रयणे खंडग माणी वेयङ्ग पुण्ण तिमिसगुहा, एरवए
 वेसमणे एरवए कूडणामाई ॥ ५१ ॥ पासे णं अरहा पुरिसादाणिए वज्जिसहणा-
 रायसंघयणे समचउरससंठाणसंठिए णव रयणीओ उह्वं उच्चत्तेणं हुत्था ॥ ५२ ॥
 समणस्स णं भगवओ महावीरस्स तित्थंसि णवहिं जीवेहिं तित्थयरणामगोत्ते कम्मे
 गिव्वत्तिए तं० सेणिएणं सुंपासेणं उदाइणा पोट्टिलेणं अणगारेणं दढाउणा संखेणं
 सयएणं सुलसाए सावियाए रेवईए ॥ ५३ ॥ एस णं अज्जो ! कण्हे वासुदेवे, रामे
 बलदेवे, उदाए पेढालपुत्ते, पुट्टिले, सयए गाहावई, दारुए णियंठे, सच्चई णियंठी-
 पुत्ते, मावियव्वडे अंबडे परिव्यायए, अज्जाविणं सुपासा पासावच्चिजा, आगमेस्साए
 उस्सप्पिणीए चाउज्जामं भ्रम्मं पण्णवइत्ता सिज्जिहिंति जाव अंतं काहिंति ॥ ५४ ॥
 एस णं अज्जो ! सेणिए राया भिंसिारे कालमासे कालं किच्चा इमीसे रयणप्पभाए
 पुट्टवीए सीमंतए णए चउरासीइवाससंहस्सट्ठिईयंसि णियंसि णेरइयत्ताए उव-
 वज्जिहिइ से णं तत्थ णेरइए भविस्सइ काले कालोभासे जाव परमकिण्हे वण्णेणं
 से णं तत्थ वेयणं वेदिहिई उज्जले जाव दुरहियासं से णं तओ णरयाओ उव्वट्टेत्ता
 आगमेस्साए उस्सप्पिणीए इहेव जंबुदीवे दीवे भारहे वासे वेयङ्गगिरियायमूले
 पुंडेसु जणवएसु सयदुवारे णयरे संमुइस्स कुलकरस्स भद्दाए भारियाए कुच्चिसि
 पुमत्ताए पच्चायाहिइ तए णं सा भद्दा भारिया णवण्हं मासाणं बहुपडिपुण्णाणं
 अड्डट्टमाण य राइंदियाणं वीडकंताणं सुकुमालपागिपायं अहीणपडिपुण्णपंचिदिय
 सरारं लक्खणवज्जणं जाव सुरुवं दारगं पयाहिई जे रयणिं च णं से दारए पया-

हिई तं रयणि च णं सयदुवारे णयरे सन्निभतरवाहिरए भारगसो य कुंभगसो य पउमवासे य रयणवासे य वासे वासिहिइ तए णं तस्स दारयस्स अम्मापियरो एक्कारसमे दिवसे वीइक्कंते जाव वारसाहे दिवसे अयमेयास्सुं गोण्णं गुणणिप्फण्णं णामधिज्जे काहिंति जम्हा णं अम्हं इमंसि दारगंसि जावंसि समाणंसि सयदुवारे णयरे सन्निभतरवाहिरए भारगसो य कुंभगसो य पउमवासे य रयणवासे य वासे बुट्ठे तं होउ णं अम्हं इमस्स दारगस्स णामधिज्जे महापउमे तए णं तस्स दारगस्स अम्मापियरो णामधिज्जे काहिंति महापउमेत्ति । तए णं महापउमं दारगं अम्मापियरो साइरेंयं अट्टवासजायगं जाणित्ता महया रायाभिसेएणं अभिसिच्चिहिंति से णं तत्थ राया भविससइ महया हिम्वंतमहंतमलयमंदररायवण्णओ जाव रज्जे पसाहेमाणे विहरिससइ तए णं तस्स महापउमस्सरणो अण्णया कयाइ दो देवा महिच्चिया जाव महेसकला सेणाकम्मं काहिंति तं० पुण्णभइए माणिभइए तए णं सयदुवारं णयरे बहवे राईसरतलवरमांडवियकोडुं वियइब्भसेट्टिसेणावइसत्थवाहएप्पभइयो अण्णमण्णं सदावेहिंति एवं वइस्संति जम्हा णं देवाणुप्पिया ! अम्हं महापउमस्सरणो दो देवा महिच्चिया जाव महेसकला सेणाकम्मं करेंति तं० पुण्णभइे य माणिभइे य तं होउ णं अम्हं देवाणुप्पिया ! महापउमस्सरणो दोवेवि णामधेज्जे देवसेणे, तए णं तस्स महापउमस्सरणो दोवेवि णामधेज्जे भविससइ देवसेणेइ २ । तए णं तस्स देवसेणस्सरणो अण्णया कयाइ सेयसंखतलविमलसण्णिकासे चउदंतं हत्थिरयणे समुप्पञ्चिहिइ तए णं से देवसेणे राया तं सेयसंखतलविमलसण्णिकासं चउदंतं हत्थिरयणं दुरुठे समाणे सयदुवारं णयरं मज्झमज्जेणं अभिक्खणं २ अइज्जाहि य णिज्जाहि य, तए णं सयदुवारे णयरे बहवे राईसरतलवर जाव अण्णमण्णं सदावेहिंति २ एवं वइस्संति जम्हा णं देवाणुप्पिया ! अम्हं देवसेणस्सरणो सेयसंखतलविमलसण्णिकासे चउदंतं हत्थिरयणे समुप्पण्णे तं होउ णं अम्हं देवाणुप्पिया ! देवसेणस्सरणो तच्चेवि णामधेज्जे विमलवाहणे, तए णं तस्स देवसेणस्सरणो तच्चेवि णामधेज्जे भविससइ विमलवाहणे २ । तए णं से विमलवाहणे गया तीसं वासाइं अगारवासमज्जे वसित्ता अम्मापिईहिं देवत्तगएहिं गुरुमहत्तरएहिं अन्नमण्णुणाए समाणे उट्टुमि सरए संबुद्धे अणुत्तरे मोक्खमग्गे पुणरवि लोभंतिएहिं जीयकपिएहिं देवेहिं तर्हिं इट्ठाहिं कंताहिं पियाहिं मणुण्णहिं म्णामाहिं उरालाहिं कल्लाणाहिं धण्णाहिं सिवाहिं मंगल्लाहिं सस्सिरीअहिं वग्गुहिं अभिणंदिक्कमाणे

अभिश्रुवमाणे यं वहिया सुभूमिभागे उज्जाणे एगं देवदूसमादाय मुंडे भवित्ता
 भगाराओ अणगारिणं पव्वयाहिइ तस्स णं भगवंतस्स साइरेगाई दुवालस वासाई
 णिघं थोसट्टकाए चियत्तदेहे जे केई उवसग्गा उप्पज्जंति तं० दिव्वा वा माणुसा
 वा तिरिक्कंजोणिया वा ते उप्पण्णे सम्मं सहिस्सइ खमिस्सइ तितिक्खिस्सइ अहि-
 यासिस्सइ तए णं से भगवं इरियासमिए भासासमिए जाव गुत्तवंभयारी अममे
 भकिंचणे छिण्णगंथे गिरुवल्लेवे कंसपाईव सुक्कतोए जहा भावणाए जाव सुहुयहुया-
 सणेइव तेयसा जलंते, कंसे संखे जीवे गगणे वाए य सारए सलिले, पुक्खरपत्ते
 कुम्भे विहसे खग्गे य भारंडे (१) कुंजर वसहे सीहे णगराया चेव सागरमक्खलोमे
 चंदे सूरे कण्णे वसुंधरा चेव सुहुयहुए (२) णत्थि णं तस्स भगवंतस्स कत्थइ
 पडिबंवे भवइ, से य पडिबंवे चउच्चिहे प० तं०—अंडए वा पोयएइ वा उग्गहेइ
 वा पग्गहिएइ वा जं णं जं णं दिसं इच्छइ तं णं तं० णं दिसं अपडिबंवे सुइभूए
 लहुभूए अणप्पगंथे संजमेणं अप्पाणं भावेमाणे विहरिस्सइ, तस्स णं भगवंतस्स
 अणुत्तरेणं णाणेणं अणुत्तरेणं देसणेणं अणुत्तरेणं चरित्तेणं एवं आलएणं विहारेणं
 अज्जेवे महवे लाववे खंती सुत्ती गुत्ती सच्च संजम तवगुणसुच्चरियसोवच्चियफलपरि-
 णिव्वाणग्गणेणं अप्पाणं भावेमाणस्स ज्ञाणंतरियाए वट्टमाणस्स अणते अणुत्तरे
 णिव्वाणाए जाव केवल्लवराणाणंदेसणे समुप्पज्जिहिइ । तए णं से भगवं अरहा जिणे
 भविस्सइ केवली सव्वण्णू सव्वदरिसी सदेवमणुयासुरस्स लोगस्स परियागं जाणइ
 पासइ सव्वलोए सव्वजीवाणं आगइ गइं ठिईं चयणं उववायं तक्कं मणोमाणसियं
 भुत्तं कइं परिसेवियं आवीकम्मं रहोकम्मं अरहा अरहस्स भागी तं तं कालं मणस-
 चयसकाइए जोगे वट्टमाणं सव्वलोए सव्वजीवाणं सव्वभावे जाणमाणे पासमाणे
 विहरइ । तए णं से भगवं तेणं अणुत्तरेणं केवल्लवराणाणंदेसणेणं सदेवमणुयासुरलोगं
 अभिसमिच्चा समणाणं णिग्गंथाणं पंच महव्वयाईं सभावणाईं छच्च जीवणिकायधम्मं
 देसेमाणे विहरिस्सइ से जहाणामए अज्जो ! मए समणाणं णिग्गंथाणं एरो आरंभ-
 ठाणे पण्णत्ते एवामेव महापउमेवि अरहा समणाणं णिग्गंथाणं एगं आरंभट्ठणं पण्ण-
 वेहिइ, से जहाणामए अज्जो ! मए समणाणं णिग्गंथाणं दुविहे बंधणे प० तं०
 पंचबंधणे, दोसबंधणे, एवामेव महापउमेवि अरहा समणाणं णिग्गंथाणं दुविहं
 वंधणं पण्णवेहिइ तं० पेज्जबंधणं च दोसबंधणं च । से जहाणामए अज्जो ! मए

समणाणं गिग्गंथाणं तओ दंडा प० तं० मणदंडे ३ एवामेव महापउमेवि समणाणं गिग्गंथाणं तओ दंडे पण्णवेहिइ तं० मणोदंडं ३ से जहाणामए एएणं अभिखावेणं चत्तारि कसाया प० तं० कोहकसाए ४ पंच कामगुणे प० तं० सदे ५, छब्बीवणिकाया प० तं० पुढविक्काइया जाव तसकाइया एवामेव जाव तसकाइया से जहाणामए एएणं अभिखावेणं सत्त भयट्टाणा प० तं० एवामेव महापउमेवि अरहा समणाणं गिग्गंथाणं सत्त भयट्टाणा पण्णवेहिइ, एवमट्ट मयट्टाणे, णव वंभचेरगुत्तीओ दस-विहे समणधम्मो एवं जाव तेत्तीसमासायणाउत्ति । से जहाणामए अज्जो ! मए समणाणं गिग्गंथाणं णग्गभावे मुंडभावे अण्हाणए अदेतवणे अच्छत्तए अणुवाहणए भूमिसेजा फलगसेजा कट्टुमेउजा केसलोए वंभचेरवासो परवरपवेसे जाव लद्धावलद्धवित्तीओ प० एवामेव महापउमेवि अरहा समणाणं गिग्गंथाणं णग्गभावं जाव लद्धावलद्धवित्ती पण्णवेहिइ । से जहाणामए अज्जो ! मए समणाणं गिग्गंथाणं आहाकम्मिणइ वा उद्वेसिणइ वा मीसज्जाणइ वा अज्जोयरणइ वा पुइए कीण पाणिंवे अच्छेजे अणिसट्ठे अभिहडेइ वा कंतारभत्तेइ वा दुट्ठिभक्खभत्तेइ वा गिल्लणभत्ते वहल्लियाभत्तेइ वा पाटुणभत्तेइ वा मूलभोयणेइ वा कंद० फल० बीय० हरियभोयणेइ वा पडिसिद्धे एवामेव महापउमे वि अरहा समणाणं० आहाकम्मियं वा जाव हरियभोयणं वा पडिसिद्धिस्सइ । से जहाणामए अज्जो ! मए समणाणं गिग्गंथाणं पंचमहव्वइए सपडिकमणे अचेलए धम्मो प० एवामेव महापउमेवि अरहा समणाणं गिग्गंथाणं पंचमहव्वइयं जाव अचेलं धम्मं पण्णवेहिइ । से जहाणामए अज्जो ! मए पंचाणुव्वइए सत्तसिक्खावइए दुवालसविहे सावगधम्मो प० एवामेव महापउमेवि अरहा पंचाणुव्वइयं जाव सावगधम्मं पण्णवेस्सइ । से जहाणामए अज्जो ! मए समणाणं गिग्गंथाणं सेज्जायरपिंडेइ वा रायपिंडेइ वा पडिसिद्धे एवामेव महापउमेवि अरहा समणाणं गिग्गंथाणं सेज्जायरपिंडेइ वा जाव पडिसिद्धिस्सइ । से जहाणामए अज्जो ! मए णव गणा इगारस गणहरा, एवामेव महापउमस्स वि अरहओ णव गणा इगारस गणहरा भविस्संति । से जहाणामए अज्जो ! अहं तीसं वासाइं अगारवासमज्जे वसित्ता मुंडे भवित्ता जाव पव्वइए दुवालस संवच्छराइं तेरस पक्खा छउमत्थपरियागं पाउणित्ता तेरसहिं पक्खेहिं उण्णागइं तीसं वासाइं केवल्लिपरियागं पाउणित्ता वायालीसं वासाइं सामण्यपरियागं पाउणित्ता

बावत्तरि वासाई सव्वाउयं पालइत्ता सिद्धिस्सं जाव सव्वदुक्खाणमंतं करेस्सं, एवा-
मेव महापउमेवि अरहा तीसं वासाई अगारवासमज्जे वसित्ता जाव पव्विहिइ दुवा-
लस संवच्छराई जाव बावत्तरिवासाई सव्वाउयं पालइत्ता सिद्धिहिई जाव सव्वदु-
क्खाणमंतं काहिई, “जंसीलसमायारो अरहा तित्थं करो महावीरो, तस्सीलसमा-
यारो होइ उ अरहा महापउमे ॥ ५५ ॥

णव णक्खत्ता च्चदस्स पच्छंभागा प० तं० अभिई सवणो धणिट्ठा रेवइ अस्सिणि
मग्गसिर पूसो, हृतथो चित्ता य तथा पच्छंभागा णव हवंति ॥५६॥ आणयपाणय-
आरणच्चुएसु कपेसु विमाणा णव जोयणसयाई उहुं उच्चत्तेणं प० ॥ ५७ ॥
विमलवाहणे णं कुलकरे णव धणुसयाई उहुं उच्चत्तेणं हृतथा ॥ ५८ ॥ उसभे णं
अरहा कोसलिए णं इमीसे ओसप्पिणीए णवहिं सागरोवमकोडाकोडीहिं विईकंताहिं
तित्थे पवत्तिए ॥ ५९ ॥ घणदंतलट्ठदंतगूढदंतसुद्धदंतदीवा णं दीवा णवणवजोय-
णसयाई आयामविकल्पेणं प० ॥ ६० ॥ सुक्कस्स णं महागहस्स णव वीहीओ
प० तं०—हयवीही गयवीही णागवीही वसहवीही गोवीही उरगवीही अयवीही
मियवीही वेसाणरवीही ॥६१॥ णवविहे णोक्कसायवेयणिजे कम्मे प० तं०—
इत्थिवेए पुरिसवेए णपुंसगवेए हासे रई अरई भये सोगे दुग्गुछे ॥ ६२ ॥ चउरिं-
दियाणं णव जाइकुलकोडीजोणिपमुहसयसहस्सा प० ॥ ६३ ॥ भुयगपरिसप्पथल-
यरपंचिदियतिरिक्खजोणियाणं णवजाइकुलकोडीजोणिपमुहसयसहस्सा प० ॥ ६४ ॥
जीवा णं णवट्ठाणणिवत्तिए पोग्गले पावकम्मत्ताए च्चिणिसु वा ३ ॥ ६५ ॥ पुढवि-
काइयणिवत्तिए जाव पंचिदियणिवत्तिए एवं चिण-उवचिण जाव णिज्जरा चेव
॥ ६६ ॥ णव पएसिया खंधा अणंता प० ॥ ६७ ॥ णव पएसोगाढा पोग्गला
अणंता प० ॥ ६८ ॥ जाव णव गुणलुक्खा पोग्गला अणंता प० ॥ ६९ ॥

दसमं ठाणं

दसविहा लोगट्ठिई प० तं० जणं जीवा उहाइत्ता २ तत्थेव २ भुज्जो २ पच्चयंति,
एवं एगा लोगट्ठिई प० १ जणं जीवाणं सया समियं पावे कम्मे कज्जइ एवं एगा
लोगट्ठिई प० २ जणं जीवा सया समियं मोहणिजे पावे कम्मे कज्जइ एवं एगा लोग-
ट्ठिई प० ३ ण एवं भूयं वा भव्वं वा भविस्सइ वा जं जीवा अजीवा भविस्संति
अजीवा वा जीवा भविस्संति एवं एगा लोगट्ठिई प० १ एवं भूयं ३ जं तसा

पाणा वोच्छिञ्जिस्संति थावरा पाणा वोच्छिञ्जिस्संति तथा पाणा भविस्संति वा एवं पि
एगा लोमट्ठिई ५० ५ ण एवं भूयं वा ३ जं लोए अलोए भविस्सइ अलोए वा लोए
भविस्सइ एवं एगा लोमट्ठिई ५० ६ ण एवं भूयं वा ३ जं लोए अलोए पविस्सइ
अलोए वा लोए पविस्सइ एवं एगा लोमट्ठिई ५० ७ जाव ताव लोए ताव ताव
जीवा जाव ताव जीवा ताव ताव लोए एवं एगा लोमट्ठिई ५० ८ जाव ताव जीवाण
य पोग्गलाण य गइपरियाए ताव ताव लोए जाव ताव लोए ताव ताव जीवाण य
पोग्गलाण य गइपरियाए एवं एगा लोमट्ठिई ५० ९ सव्वेसु वि णं लोमतेसु अवद्ध-
पासपुट्ठा पोग्गला लुक्खत्ताए कम्मंति जेणं जीवा य पोग्गला य णो संचायंति वद्विया
लोमता गमणयाए एवं एगा लोमट्ठिई पण्णत्ता ॥ १ ॥ दसविहे सदे ५० तं०
णीहारि पिडिमे लुक्खे भिण्णे जजरिए इय; दीहे रहस्से पुहत्ते य, काकणा म्विक्खि-
णिसरे ॥ २ ॥ दस इंदियत्थातीता ५० तं० देसेण वि एगे सदाइं सुणिसु सव्वेण
वि एगे सदाइं सुणिसु देसेण वि एगे रुवाइं प मिसु सव्वेण वि एगे रुवाइं पामिसु
एवं गंवाइं रसाइं फासाइं जाव सव्वेण वि एगे फामाइं पडिमवेदंसु ॥ ३ ॥ दस
इंदियत्था पडुप्पणा ५० तं०—देसेण वि एगे सदाइं सुणेंति, सव्वेण वि एगे सदाइं
सुणेंति, एवं जाव फासाइं । दस इंदियत्था अणागया ५० तं०—देसेण वि एगे सदाइं
सुणिसंति सव्वेण वि एगे सदाइं सुणिसंति एवं जाव सव्वेण वि एगे फामाइं
पडिमवेदंसंति ॥ ४ ॥ दसहिं ठाणेहिं अच्चिण्णे पोग्गले चलेज्जा तं०—आहारिज्ज-
माणे वा चलेज्जा, परिणामेज्जमाणे वा चलेज्जा, उरमसिज्जमाणे वा चलेज्जा,
णिससिज्जमाणे वा चलेज्जा, वेदेज्जमाणे वा चलेज्जा, णिज्जरिज्जमाणे वा
चलेज्जा, विउव्विज्जमाणे वा चलेज्जा, परियारिज्जमाणे वा चलेज्जा, जक्खवाइट्ठे वा
चलेज्जा, वायपरिग्गहे वा चलेज्जा ॥ ५ ॥ दसहिं ठाणेहिं कोंहुप्पत्ती मिया तं०
मणुण्णाइं मे सहफरिसरसरूवगंधाइमवहरिसु अमणुण्णाइं मे सहफरिसरसरूवगंधाइं
उवहरिसु, मणुण्णाइं मे सहफरिसरसरूवगंधाइं अवहरइ, अमणुण्णाइं मे सहफरि-
सजावगंधाइं उवहरइ, मणुण्णाइं मे सह जाव अवहरिस्सइ, अमणुण्णाइं मे सह
जाव उवहरिस्सइ, मणुण्णाइं मे सह जाव गंधाइं अवहरिसु वा अवहरइ अवहरिस्सइ
अमणुण्णाइं मे सह जाव उवहरिसु वा उवहरइ उवहरिस्सइ, मणुण्णामणुण्णाइं सह
जाव अवहरिसु अवहरइ अवहरिस्सइ, उवहरिसु उवहरइ उवहरिस्सइ अहं च णं

आयरियउवज्जायाणं सम्मं वट्टामि ममं च णं आयरियउवज्जाया मिच्छं पडिवण्णा
 ॥ ६ ॥ दसविहे संजमे प० तं० पुढविकाइयसंजमं जाव वणस्सइकाइयसंजमे बेई-
 दियसंजमे तेईदियसंजमे चउरिंदियसंजमं पंचिंदियसंजमे अजीवकायसंजमे ॥ ७ ॥
 दसविहे असंजमं प० तं० पुढविकाइयअसंजमे, आउ० तेउ० वाउ० वणस्सइ० जाव
 अजीवकायअसंजमे ॥ ८ ॥ दसविहे संवरं प० तं०—सोईदियसंवरं जाव फासिंदिय-
 संवरं मण० वय० काय० उवकरण० सूचीकुसग्गसंवरं ॥ ९ ॥ दसविहे असंवरं
 प० तं०—सोईदियअसंवरं जाव सूचीकुसग्गअसंवरं ॥ १० ॥ दसहिं ठाणेहिं अहमं-
 तीइ थंभिच्चा तं०—जाइमएण वा कुलमएण वा जाव इस्सरियमएण वा णाग-
 सुवण्णा वा मे अंतियं हव्वमागच्छंति, पुरिसधम्माओ वा मे उत्तरिए अहोहिए
 णाणंसणे समुप्पण्णे ॥ ११ ॥ दसविहा समाही प० तं०—पाणाइवायवेरमणे,
 मुसा० अदिण्णा० मेहुण० परिग्गह० इरियासमिई भासा० एसणा० आयाण०
 उच्चारपासवणखेलजट्टसिंघाणारिद्धावणियासमिई ॥ १२ ॥ दसविहा असमाही प०
 तं० पाणाइवाए जाव परिग्गहे, इरियाऽसमिई जाव उच्चार० ॥ १३ ॥ दसविहा
 पव्वच्चा प० तं०—छंदा रोसा परिजुण्णा सुविणा पडिस्सुया चेव सारणिया रोणिणिया
 भणाट्टिया देवसण्णत्ती वच्छाणुबंधिया ॥ १४ ॥ दसविहे समणधम्मे प० तं०
 खंती मुत्ती अज्जवे मद्वे लाध्वे सध्वे संजमे तवे चियाए बंधचेरवासे ॥ १५ ॥
 दसविहे वेयावच्चे प० तं० आयरियवेयावच्चे उवज्जायवेयावच्चे थेरवेयावच्चे तवस्मि०
 गिलाण० मह० कुल० गण० संववेयावच्चे साहम्मियवेयावच्चे ॥ १६ ॥ दसविहे
 जीवपरिणामं प० तं० गइपरिणामं ईदियपरिणामं कमायपरिणामं लेस्सा० जोग०
 उवओग० णाण० दंसण० चरित्त० वेयपरिणामे ॥ १७ ॥ दसविहे अजीवपरिणामे
 प० तं० वेत्रणपरिणामे गइ० संठाण० भेद० वण्ण० रस० गंध० फास० अगुरु-
 लहु० सदपरिणामे ॥ १८ ॥ दसविहे अंतलिक्खवए असज्जाइए प० तं०—
 उक्कावाए दिसिदहे गज्जिए विज्जुए गिग्घाए जुयए जक्क्यालित्ते धूमिया महिया
 रयउग्घाए ॥ १९ ॥ दसविहे ओरालिए असज्जाइए प० तं०—अट्ठि मंसं सोणिए
 असुइसामंते सुसाणसामंते चंदोवराए सूरोवराए पडणे रायवुग्गहे उवस्सयस्स
 अंतो ओरालिए सरोरगे ॥ २० ॥ पंचिंदियाणं जीयाणं असमारभमाणस्स दस-
 विहे संजमं कज्जइ तं०—सोयामयाओ सुवखाओ अववरोवेत्ता भवइ, सोयामएणं
 दुक्खेणं असंजोगेत्ता भवइ, एवं जाव फासामएणं दुक्खेणं असंजोएत्ता भवइ,

एवं अमंजमोवि भाणियव्वो ॥ २१ ॥ दससुहुमा प० तं-वाणसुहुमे, पणगसुहुमे
जाव सिणेहसुहुमे, गणियसुहुमे, भंगसुहुमे ॥ २२ ॥ जंबूमंदरदाहिणेणं गंगसिंनु-
महाणईओ दसमहाणईओ समण्येति तं० जउणा, सरऊ, आवी, कोसी, मंही, सिधू,
विवच्छा, विभासा, एरावई, चंदभागा ॥ २३ ॥ जंबूमंदरउत्तरेणं रत्तारत्तवईओ
महाणईओ दस महाणईओ समण्येति तं०-किण्हा, महाकिण्हा, णीला, महाणीला,
तीरा, महातीरा, इंदा जाव महाभोगा ॥ २४ ॥ जंबुद्वीवे दीवे भरहे वसे दस
रायहाणीओ प० तं० चंपा, महुरा, वाणारसी य, सावत्थी, तह य साएयं, हत्थि-
णउर, कंफिल्ले, मिहिला, कोसंबि, रायगिहं ॥ २५ ॥ एयासु णं दस रावहाणीसु
दस रायणो मुंडा भवेत्ता जाव पव्वइया, तं०-भरहे, सगरो, मणवं, सणंकुमारो,
संती, कुंयू, अरे, महापउमे, हरिसेणो, जयणामे ॥ २६ ॥ जंबूमंदरपव्वए दस
जोयणसयाई उव्वेहेणं धरणितले दस जोयणसहस्साईं विकखंभेणं उवरिं दसजोय-
णसयाईं विकखंभेणं दसदसाईं जोयणसहस्साईं सव्वग्गेणं प० ॥ २७ ॥ जंबुद्वीवे
दीवे मंदरस्स पव्वयस्स बहुमज्झदेसभाए इमीसे रयणणभाए पुट्ठीए उवरिमहे-
ट्टिल्लेसु खुड्डुगपयरेसु एत्थ णं अट्ट पएसिए रुयगे प० जओ णं इमाओ दस दिसाओ
पव्वंति तं० पुरत्थिमा, पुरत्थिमदाहिणा, दाहिणा, दाहिणपच्चत्थिमा, पच्चत्थिमा,
पच्चत्थिमुत्तरा, उत्तरा, उत्तरपुत्थिमा, उट्ठा, अहो ॥ २८ ॥ एएसि णं दसण्हं दिसाणं
दस णामधिज्जा, प० तं०-इंदा अग्गीइ जमा णेरई वारुणी य वायव्वा, सोमा ईसा-
णावि य विमला य तमा यं चोद्धव्वा ॥ २९ ॥ लवणस्स णं समुद्दस्स दस जोयण-
सहस्साईं गोतित्थविरहिए ख्वेत्ते प० ॥ ३० ॥ लवणस्स णं समुद्दस्स दस जोयण-
सहस्साईं उदगमाले पण्णत्ते ॥ ३१ ॥ सव्वेवि णं महापायाला दसदमाईं जोयण-
सहस्साईं उव्वेहेणं प० मूले दस जोयणसहस्साईं विकखंभेणं प० बहुमज्झदेसभाए
एगपएसियाए सेदीए दसदसाईं जोयणसहस्साईं विकखंभेणं प० उवरिं मुहमूले दस
जोयणसहस्साईं विकखंभेणं प० तेषि णं महापायालाणं कुड्डु सव्ववइरामया सव्व-
त्थसमा दस जोयणसयाईं ऩाइल्लेणं प० सव्वेवि णं खुट्ठा पायाला दस जोयणसयाईं
उव्वेहेणं प० मूले दसदसाईं जोयणाईं विकखंभेणं बहुमज्झदेसभाए एगपएसियाए
सेदीए दस जोयणसयाईं विकखंभेणं प० उवरिं मुहमूले दसदसाईं जोयणाईं विकखं-
भेणं प० तेषि णं खुट्ठापायालाणं कुड्डु सव्ववइरामया सव्वत्थ समा दस जोयणाईं
वाइल्लेणं प० ॥ ३२ ॥ धायइसडगा णं मंदरा दस जोयणसयाईं उव्वेहेणं धर-

णितले देसूणाई दस जोयणसहस्ताई विकल्पेणं उवरिं दस जोयणसयाई विकल्पे-
 भेणं प० ॥ ३३ ॥ पुक्खवरदीवद्धगा णं मंदरा दस जोयण एवं चेव ॥ ३४ ॥
 सव्वेवि णं वद्धवेयद्धपव्वया दसजोयणसयाई उद्धं उच्चत्तेणं दस गाउयसयाई उव्वेहेणं
 सव्वत्थसमा पल्लगसंठाणसंठिया दसजोयणसयाई विकल्पेणं प० ॥ ३५ ॥ जंबुदीवे
 दीवे दस खेत्ता प० तं० भरहे एरवए हेमवए हेरणवए हरिक्खसे रम्मगवस्से
 पुव्वविदेहे अवरविदेहे देवकुरा उत्तरकुरा ॥ ३६ ॥ माणुसुत्तरे णं पव्वए मूले दस
 बावीसे जोयणसए विकल्पेणं प० ॥ ३७ ॥ सव्वेवि णं अंजणगपव्वया दस जोयण-
 सयाई उव्वेहेणं मूले दस जोयणसहस्ताई विकल्पेणं उवरिं दस जोयणसयाई विकल्पे-
 भेणं प० ॥ ३८ ॥ सव्वेवि णं दहिमुहपव्वया दस जोयणसयाई उव्वेहेणं सव्वत्थसमा
 पल्लगसंठाणसंठिया दस जोयणसहस्ताई विकल्पेणं प० ॥ ३९ ॥ सव्वेवि णं रइकरय-
 पव्वया दस जोयणसयाई उद्धं उच्चत्तेणं दस गाउयसयाई उव्वेहेणं सव्वत्थसमा झल्लरि-
 संठाणसंठिया दस जोयणसहस्ताई विकल्पेणं प० ॥ ४० ॥ रुयगवरे णं पव्वए दस
 जोयणसयाई उव्वेहेणं, मूले दस जोयणसहस्ताई विकल्पेणं उवरिं दस जोयण-
 सयाई विकल्पेणं प०, एवं कुंडलवरेवि ॥ ४१ ॥ दसविहे दवियाणुओगे प० तं०
 दवियाणुओगे माउयाणुओगे एगट्टियाणुओगे करणाणुओगे अप्पियणप्पिए भाविया-
 भाविए वाहिरावाहारे सासयासासए तहणाणे अतहणाणे ॥ ४२ ॥ चमरस्स णं
 असुरिंदस्स असुरकुमाररणो तिगिच्छिद्धे उप्पायपव्वए मूले दसबावीसे जोयणसए
 विकल्पेणं प० ॥ ४३ ॥ चमरस्स णं असुरिंदस्स असुरकुमाररणो सोमस्स महा-
 रणो सोमप्पमे उप्पायपव्वए दस जोयणसयाई उद्धं उच्चत्तेणं दस गाउयसयाई
 उव्वेहेणं मूले दस जोयणसयाई विकल्पेणं प० ॥ ४४ ॥ चमरस्स णं असुरिंदस्स
 असुरकुमाररणो जमस्स महारणो जमप्पमे उप्पायपव्वए एवं चेव, एवं वरुणस्सवि,
 एवं वेसमणस्स वि ॥ ४५ ॥ बलिस्स णं वइरोयणिंदस्स वइरोयणरणो रुयगिंदे
 उप्पायपव्वए मूले दसबावीसे जोयणसए विकल्पेणं प० ॥ ४६ ॥ बलिस्स णं
 वइरोयणिंदस्स सोमस्स एवं चेव । जहा चमरस्स लोगपालाणं तं चेव बलिस्स वि,
 ॥ ४७ ॥ धरणस्स णं णागकुमारिंदस्स णागकुमाररणो धरणप्पमे उप्पायपव्वए
 दस जोयणसयाई उद्धं उच्चत्तेणं दस गाउयसयाई उव्वेहेणं मूले दस जोयणसयाई
 विकल्पेणं ॥ ४८ ॥ धरणस्स णं णागकुमारिंदस्स णागकुमाररणो कालवालस्स
 महारणो महाकालप्पमे उप्पायपव्वए दस जोयणसयाई उद्धं उच्चत्तेणं एवं चेव, एवं

जाव सखवाल्स, एवं भूयाणंदस वि, एवं लोमपालाणं वि मे जहा धरणस,
 एवं जाव थणियकुमारणं सलोगरालाणं भाणियव्वं, सव्वेसिं उप्पायव्वया भाणि-
 यव्वा सारमणामगा ॥ ४९ ॥ सक्कस णं देविंदस देवरणो सक्कपभे उप्पायव्वए
 दस जोयणसहस्साइं उद्धं उच्चत्तेण दसगाउयसहस्साइं उध्वेहेणं मूत्ते दस जोयण-
 सहस्साइं विकखमेणं ५० ॥ ५० ॥ सक्कस णं देविंदस देवरणो सोमस महारणो
 जहा सक्कस तथा सव्वेसिं लोमपालाणं सव्वेसिं च इदाणं जाव अच्युयत्ति
 सव्वेसिं पमाणमेणं ॥ ५१ ॥ आयमणससइकाडयाणं उक्कोसणं दस जोयणसयाइं
 सरीरोगाहणा ५० ॥ ५२ ॥ जलचरपंचिदियंतंरिक्खजोणियाणं उक्कोसणं दस
 जोयणसयाइं सरीरोगाहणा ५० ॥ उरपरिमपथलचरपंचिदियतिरिक्खजोणियाणं
 उक्कोसणं च च ॥ ५३ ॥ सभवाओ णं अरहाओ अभिणदणे अरहा दसहिं
 सागरोयमकोडिसयसहस्सहिं वइकंतेहिं सपण्णे ॥ ५४ ॥ दसविहे अणंतए ५०
 तं० णामाणतए ठवणांतए दवणांतए गणणांतए पण्णमांतए एगओणंतए
 दुहओणंतए देसविथराणंतए सव्वविथराणंतए सासयाणंतए ॥ ५५ ॥ उप्पाय-
 पुव्वस णं दस वत्थू ५० ॥ ५६ ॥ अत्थिणत्थिपवायपुव्वस णं दस चूलवत्थू ५०
 ॥ ५७ ॥ दसविहा पडिमेवणा ५० तं०-दप्प पमाय णोभोगे आउरे आवइसु य,
 संकिए सहसक्कारे भयप्पओसा य वीममा ॥ ५८ ॥ दस आलोयणा दोसा ५० तं०
 आकंसइत्ता अणुमाणइत्ता जंदिद्धं चायरं च सुद्धुं वा, लणं सहाउलगं बहुजण
 अव्वत्त तस्सेवी ॥ ५९ ॥ दसहिं ठाणेहिं सपण्णे अणगारे अरिहइ अत्तदोममालोए-
 साए तं०-जाइसपण्णे कुलमपण्णे एवं जहा अद्धुणाणे जाव खंते दंते अमाइं
 अपच्छाणुयावी ॥ ६० ॥ दसहिं ठाणेहिं सपण्णे अणगारे अरिहइ आलोयणं पडिच्छ-
 साए तं०-आयारवं अवहारवं जाव अवायदंसी पियवम्मं ददवम्मं ॥ ६१ ॥ दसविहे
 पायच्छत्ते ५० तं०-आलोयणारिहे जाव अणवट्टप्पारिहे पांचियारिहे । ६२ ॥
 दसविहे मिच्छत्ते ५० तं०-अधम्मं धम्ममण्णा धम्मं अधम्मसण्णा उम्मग्गे मग्ग-
 सण्णा मग्गे उम्मग्गसण्णा अजीवेसु जीवसण्णा जीवेसु अजीवसण्णा असाहुम साहु-
 सण्णा माहुमु असाहुमण्णा अमुत्तेसु सुत्तसण्णा मुत्तेसु अमुत्तसण्णा ॥ ६३ ॥
 चेदप्पमे णं अरहा दस पुव्वसयसहस्साइं सव्वाउयं पालइत्ता सिद्धे जावपहीणे
 ॥ ६४ ॥ धम्मं णं अरहा दस वाससयसहस्साइं सव्वाउयं पालइत्ता सिद्धे जाव-

प्पहीणे ॥ ६५ ॥ णमी णं अरहा दस वाससहस्साईं सव्वाउयं पालइत्ता सिद्धे जाव
 प्पहीणे ॥ ६६ ॥ पुरिससीहे णं वामुदेवे दसवाससयसहस्साईं सव्वाउयं पालइत्ता
 छट्ठीए तमाए पुढवीए णेरइयत्ताए उववण्णे ॥ ६७ ॥ णमी णं अरहा दस धणूईं
 उहुं उच्चत्तेणं दस य वाससयाईं सव्वाउयं पालइत्ता सिद्धे जावप्पहीणे ॥ ६८ ॥
 कण्हे णं वामुदेवे दस धणूईं उहुं उच्चत्तेणं दस य वाससयाईं सव्वाउयं पालइत्ता तच्चाए
 बालुयप्पभाए पुढवीए णेरइयत्ताए उववण्णे ॥ ६९ ॥ दसविहा भवणवासी देवा
 प० तं०—असुरकुमारा जाव थणियकुमारा ॥ ७० ॥ एएसि णं दसविहाणं भवण-
 वासीणं देवाणं दस चेइय रुक्खा प० तं०—असत्थ सत्तिवण्णे सामलि उंवर सिरीस
 दहियण्णे, वंजुल पलास वप्पे तए य कणियारुक्खे ॥ ७१ ॥ दसविहे सोक्खे प०
 तं०—आगोग्ग दीहमाउं अब्बुल्लं काम भोग संतोमं; अत्थि सुहभोग णिकम्ममेव
 तओ अणावाहे ॥ ७२ ॥ दसविहे उवघाए प० तं०—उग्गमोवघाए उप्पायणो-
 वघाए जह पंचठाणे जाव परिहरणोवघाए णाणोवघाए दंसणोवघाए चरित्तो-
 वघाए अन्नियत्तोवघाए सारक्खणोवघाए ॥ ७३ ॥ दसविहा विसोही प० तं०—
 उग्गमविमोही उप्पायणविमोही जाव सारक्खणविसोही ॥ ७४ ॥ दसविहे संकिल्लेसे
 प० तं०—उवहिंसंकिल्लेसे उवस्सयसंकिल्लेसे कसायसंकिल्लेसे भत्तपाणसंकिल्लेसे मण-
 संकिल्लेसे वडसंकिल्लेसे कायसंकिल्लेसे णाणसंकिल्लेसे दंसणसंकिल्लेसे चरित्तसंकिल्लेसे
 ॥ ७५ ॥ दसविहे अमंसंकिल्लेसे प० तं० उवहिअमंसंकिल्लेसे जाव चरित्तअसंकिल्लेसे
 ॥ ७६ ॥ दसविहे वले प० तं०—सोईदियवले जाव पासिंदियवले णाणवले
 दंसणवले चरित्तवले तववले वीरियवले ॥ ७७ ॥ दसविहे सधे प० तं०—जणवय
 सम्मय ठवणा णामे रुवे पडुच्चसधे य, ववहार भाव जोगे दसमे ओवम्मसधे
 य ॥ ७८ ॥ दसविहे मोसे प० तं०—कोहे माणे माया लोभे पिञ्जे तहेव दोसे य
 हास भए अक्खवाइय उवघायणिस्सिए दसमे ॥ ७९ ॥ दसविहे सच्चामोसे प०
 तं० उप्पणीमीसए विगयमीसए उप्पणविगयमीसए जीवमीसए अजीवमीसए
 जीवाजीवमीसए अणंतमीसए परित्तमीसए अद्धामीसए अद्धदामीसए ॥ ८० ॥
 दिट्ठिवायस्म णं दस णामधेवा प० तं० दिट्ठिवाएइ वा हेउवाएइ वा भूयावाएइ
 वा तच्चवाएइ वा सम्मावाएइ वा धम्मावाएइ वा भासाविज्जएइ वा पुव्वगएइ
 वा अणुजोमगएइ वा सव्वपाणपूयजीवमत्तमुहावहेइ वा ॥ ८१ ॥ दसविहे सत्थे
 प० तं०—सत्थमग्गी विमं लोणं सिणेहो खार मंवलं, दुप्पउत्तो मणो वाया काया

भावो य अविरई ॥ ८२ ॥ दसविहे दोसे प० तं०—तज्जायदोसे महभंगदोसे पसत्थारदोसे परिहरणदोसे, सलकव्यण कारण हेउदोसे संकामणं गिग्गह वत्थुदोसे ॥ ८३ ॥ दस विहे विसेसे प० तं—वत्थु तज्जायदोसे य दोसे एग्द्विण्डि य, कारणे य पडुप्पणे दोसे गिच्चे हि अट्टमे; अत्तणा उवणीए य विसेसेइ य ते दस. . . ॥ ८४ ॥ दसविहे सुद्धावायाणुओगे प० तं०—चंकारे मंकारे पिंकारे सेयंकारे सायंकारे एणत्ते पुहुत्ते संज्जेहे संकामिए मिण्णे ॥ ८५ ॥ दसविहे दाणे प० तं० अणुक्का संगहे चेव भये कालुणिएइ य; लज्जाए गारवेणं च, अहंमे पुण सत्तमे । धम्मं य अट्टमे वुत्ते काहीइ य कयंति य ॥ ८६ ॥ दसविहा गई प० तं०—गिरयगई, गिरयविग्गहगई, तिरियगई, तिरियविग्गहगई, एवं जाव सिद्धिगई, सिद्धिविग्गहगई ॥ ८७ ॥ दसमुंडा प० तं०—सोईदियमुंडे ज्ञव फासिंदियमुंडे, कोहमुंडे जाव लोभमुंडे दसमे सिरमुंडे ॥ ८८ ॥ दसविहे संखाणे प० तं०—परिकम्मं ववहारो रज्जु रासी कलासवण्णे य, जावंतावइ वग्गो घणो य तह वग्गवग्गो वि, कणो य ॥ ८९ ॥ दसविहे पच्चक्खाणे प० तं०—अणामयमइकंतं कोडीसहियं गियंटियं चेव, सागारमणागारं, परिमाणकंडं, गिरवसेसं, संकेयं चेव अद्धाए, पच्चक्खाणं दसविहं तु ॥ ९० ॥ दसविहा सामायारी प० तं०—इच्छा मिच्छा तहकारो आवत्तिसया णिसीहिया, आपुच्छणा य पडिपुच्छा ढंढणा य णिमंतणा, उवसंपया य काले सामायारी भवे दसविहा उ ॥ ९१ ॥ समणे भगवं महावीरे छउमत्थकालियाए अंतिमराइयंसि इमे दस महासुमिणे पासित्ता णं पडिबुद्धे तं०—एगं च णं महाघोररुवदित्तधरं तालपिसायं सुमिणे पराजियं पासित्ता णं पडिबुद्धे १ एगं च णं महं सुक्किलपक्खगं पुंसकोइलगं सुमिणे पासित्ता णं पडिबुद्धे २ एगं च णं महं चित्तविचित्तपक्खगं पुंसकोइलगं सुमिणे पासित्ता णं पडिबुद्धे ३ एगं च णं महं दामदुगं सव्वरयणामयं सुमिणे पासित्ता णं पडिबुद्धे ४ एगं च णं महं सेयं गोवग्गं सुमिणे पासित्ता णं पडिबुद्धे ५ एगं च णं महं पउमसरं सव्वओ समंता कुसुमियं सुमिणे पासित्ता णं पडिबुद्धे ६ एगं च णं महासागरं उम्भी-वीचासहसकलियं भुयाहिं तिण्णं सुमिणे पासित्ता णं पडिबुद्धे ७ एगं च णं महं दिणयरं तेयसा जलंतं सुमिणे पासित्ता णं पडिबुद्धे ८ एगं च णं महं हरिवेरु-लियवण्णाभेणं णियएणमतेणं माणुसुत्तरं पव्वयं सव्वओ समंता भावेदियं परि-

वेदियं सुमिणे पासित्ता णं पडिबुद्धे ९ एगं च णं महं मंदरे पव्वए मंदरचूलियाओ उवरिं सीहासणवरंगयमत्ताणं सुमिणे पासित्ता णं पडिबुद्धे १० । जण्णं समणे भगवं महावीरे एगं महं घोररूवदित्तधरं तालपिसायं सुमिणे पराजियं पासित्ता णं पडिबुद्धे तण्णं समणेणं भगवया महावीरेणं मोहणिज्जे कम्मं मूलाओ उग्घाइए १ जण्णं समणे भगवं महावीरे एगं महं सुक्किलपक्खगं जाव पडिबुद्धे तं णं समणे भगवं महावीरे सुक्कज्झाणोवगए विहरइ २ जण्णं समणे भगवं महावीरे एगं महं चित्त-
वित्तपक्खगं जाव पडिबुद्धे तं णं समणे भगवं महावीरे ससमयपरसमइयं चित्त-
वित्तं दुवालसंगं गणिपिडगं आघवेइ पण्णवेइ परूवेइ दंसेइ गिंदसेइ उवदंसेइ
तं० आयारं जाव दिट्ठिवायं ३ जण्णं समणे भगवं महावीरे एगं महं दामदुगं
सव्वरयणा जाव पडिबुद्धे तं णं समणे भगवं महावीरे दुविहं धम्मं पण्णवेइ, तं—
अगारधम्मं च अणगारधम्मं च ४ जं णं समणे भगवं महावीरे एगं महं सेयं
गोवग्गं सुमिणे जाव पडिबुद्धे तं णं समणस्स भगवओ महावीरस्स चाउव्वणाइण्णे
संचे तं०—समणा समणीओ सावगा सावियाओ ५ जण्णं समणे भगवं महावीरे
एगं महं पउमसरं जाव पडिबुद्धे तं णं समणे भगवं महावीरे चउत्विहे देवे पण्ण-
वेइ, तं०—भवणवासी वाणमंतंरा जोइसवासी वेमाणवासी ६ जण्णं समणे भगवं
महावीरे एगं महं उग्गीवीची जाव पडिबुद्धे तं णं समणेणं भगवया महावीरेणं
अणाईए अणवदग्गे दीहमद्धे चाउरंतसंसारकंतारे तिण्णे ७ जण्णं समणे भगवं
महावीरे एगं महं दिण्यंरं जाव पडिबुद्धे तं णं समणस्स भगवओ महावीरस्स
अणंते अणुत्तरे जाव समुप्पण्णे ८ जण्णं समणे भगवं महावीरे एगं महं हरिवे-
रुलियं जाव पडिबुद्धे तं णं समणस्स भगवओ महावीरस्स सदेवमणुयासुरे लोगे
उराला कित्तिवण्णसहसिलोगा परिगुव्वंति इइ खलु समणे भगवं महावीरे इइ० ९
जण्णं समणे भगवं महावीरे मंदरे पव्वए मंदरचूलियाए उवरिं जाव पडिबुद्धे तं
णं समणे भगवं महावीरे सदेवमणुयासुराए परिसाए मज्झगए केवल्लिपण्णत्तं धम्मं
आघवेइ पण्णवेइ जाव उवदंसेइ १० ॥ ९२ ॥ दसविहे सरागसम्महंसणे प० तं०—
णिसग्गुवएसरुई आणरुई सुत्तबीयरुइमेव, अभिगम वित्थाररुई किरिया संखेव
धम्मरुई ॥ ९३ ॥ दससण्णाओ प० तं०—आहारसण्णा भयसण्णा मेहुणसण्णा
परिग्गहसण्णा कौहसण्णा माणसण्णा मायासण्णा लोहरुण्णा लोगसण्णा ओहसण्णा

णेरइयायं दस सण्णाओ एवं चेव । एवं णिरंतरं जाव वेमाणियाणं २४ ॥ ९४ ॥
 णेरइया णं दसविहं त्रेयणं पवणुभवमाणा विहरंति तं० सीयं उमिणं खुहं पिवासं कंडुं
 परब्बं भयं सोयं जरं वाहिं ॥ ९५ ॥ दस ठाणाइं छउमत्थे णं सव्वभावेणं ण जाणइ
 ण पासइ तं—भम्मत्थिकायं जाव वायं अयं जिणे भविस्सइ वा ण वा भविस्सइ
 अयं सव्वदुक्खाणमंतं करेस्सइ वा ण वा करेस्सइ एयाणि चेव उप्पण्णणानंदसण-
 धरे अरहा जाणइ पासइ जाव अयं सव्वदुक्खाणमं० करेस्सइ वा ण वा करेस्सइ
 ॥ ९६ ॥ दस दसाओ प० तं०—कम्मविवागदसाओ, उवासगदसाओ, अंतगाड-
 साओ, अणुत्तरोववाइयदसाओ, आयद्दसाओ, पण्हावागरणदसाओ, बंधदसाओ,
 दोगिद्धिदसाओ, शीहदसाओ, संखेवियदसाओ ॥ ९७ ॥ कम्मविवागदसाणं दस
 अज्झयणा प० तं०—मियापुत्ते य गोत्तासे अंडे सगवेइ यावरे, माहणे णंदिसेणे य
 मोरियत्ति उटुंबरे १ सहसुहाहे आमलए कुमार लेच्छइ इइ २ ॥ ९८ ॥ उवासग-
 दसाणं दस अज्झयणा प० तं०—आणंदे कामदेवे अ माहावइ चूलणीपिया, सुरादेवे
 चुल्लसयए गाहावइ कुंडकोलिए (१) सहालपुत्ते महासयए णंदिणीपिया सालइया-
 पिया ॥ ९९ ॥ अंतगाडदसाणं दस अज्झयणा प० तं०—णमि मायंणे सोमिले रामगुत्ते
 सुदंसणे चेव, जमाली य भगाली य किंकमे पल्लएइ य (१) फाले अंबडपुत्ते य
 एमेए दस आहिआ ॥ १०० ॥ अणुत्तरोववाइयदसाणं दस अज्झयणा प० तं०—
 इसिदासे य धण्णे य मुणक्वत्ते य काइए इय, सट्ठाणे सालिभदे य आणंदे तेयली इय
 (१) दसण्णभदे अइमुत्ते एमेए दस आहिआ ॥ १०१ ॥ आचारदसाणं दस अज्झ-
 यणा प० तं० वीसं असमाहिट्ठाणा एगवीसं सबला तेत्तीसं आसायणाओ अट्टविहा
 गणिसंपया दस चित्तसमाहिट्ठाणा एगारसउवासगपडिमाओ वारस भिक्खुपडिमाओ
 पञ्जोसवणाकप्पो तीसं मोहणिज्झट्ठाणा आज्ञाट्ठाणं ॥ १०२ ॥ पण्हावागरणदसाणं
 दस अज्झयणा प० तं० उवमा संग्वा इसिभासियाइं आयरियभासियाइं महावीर-
 भासियाइं खोमगरसिणाइं कोमलपसिणाइं अहागपसिणाइं अंगुट्टपसिणाइं ब्राह्मपसि-
 णाइं ॥ १०३ ॥ ब्रंश्रदसाणं दस अज्झयणा प० तं०—बंधे य मोक्खे य देवद्धि
 दसारमंडलेत्ति य, आयरियविप्पडिवत्ती उवज्झायविप्पडिवत्ती भावणां विमुत्ती
 साओ कम्मे ॥ १०४ ॥ दोगेद्धिदसाणं दस अज्झयणा प० तं० वाए विवाए उव-
 वाए सुक्खित्ते कसिणे बायालीसं सुमिणे तीसं महासुमिणा बावत्तरिं सव्वसुमिणा
 हारे रामे सुत्ते एमेए दस आहिआ ॥ १०५ ॥ शीहदसाणं दस अज्झयणा प०

तं० चंदे सूरए सुके य सिरिदेवी पभावई दीवसमुद्दोववची बहूपुत्ती मंदरेइ य
 येरे संभूयविजए थेरे पम्ह उसासणीसासे ॥१०६॥ संखेवियदसाणं दस अज्जयणा
 प० तं० खुड्डियाविमाणपविभत्ती महल्लियाविमाणपविभत्ती अंगचूलिया वग्गचूलिया
 विवाहचूलिया अरुणोववाए वरुणोववाए गरुलोववाए वेल्धरोववाए वेसम-
 णोववाए ॥ १०७ ॥ दस सागरोवमकोडाकोडीओ कालो उस्सप्पिणीए दस सागरो-
 वमकोडाकोडीओ कालो ओसप्पिणीए ॥ १०८ ॥ दसविहा णेरइया प० तं०—
 अणंतरोववण्णा परंपरोववण्णा अणंतरायगाढा परंपरावगाढा अणंतराहारगा परं-
 पराहारगा अणंतरपज्जत्ता परंपरपज्जत्ता चरिमा अचरिमा एवं णिरंतरं जाव
 वेमाणियां ॥ १०९ ॥ चउत्थीए णं पंकप्पभाए पुढवीए दस णिरयावाससय-
 सहस्सा प० ॥ ११० ॥ रयणप्पभाए पुढवीए जहण्णेणं णेरइयाणं दसवाससहस्साई
 ठिई प० ॥ १११ ॥ चउत्थीए णं पंकप्पभाए पुढवीए उक्कोसेणं णेरइयाणं दस
 सागरोवमाईं ठिई प० ॥ ११२ ॥ पंचमाए णं धूमप्पभाए पुढवीए जहण्णेणं णेर-
 इयाणं दस सागरोवमाईं ठिई प० ॥ ११३ ॥ असुरकुमारणं जहण्णेणं दसवास-
 सहस्साईं ठिई प० ॥ ११४ ॥ एवं जाव थणियकुमारणं ॥ नायरवणस्सइकाइयाणं
 उक्कोसेणं दसवाससहस्साईं ठिई प० ॥ ११५ ॥ वाणमंतराणं देवाणं जहण्णेणं दस-
 वाससहस्साईं ठिई प० ॥ ११६ ॥ बंभलोए कप्पे देवाणं उक्कोसेणं दस सागरो-
 वमाईं ठिई प० ॥ ११७ ॥ लंतए कप्पे देवाणं जहण्णेणं दस सागरोवमाईं ठिई
 प० ॥ ११८ ॥ दसहिं ठाणेहिं जीवा आगमेसिभइत्ताए कम्मं पगरंति तं०—
 अणिदाणयाए, दिट्ठिसंपणयाए, जोगवाहियत्ताए, खंतिखमणयाए, जिईदिययाए,
 अमाइल्लयाए, अपासत्थयाए, सुसामणयाए, पवयणवच्छल्लयाए, पवयणउब्भाव-
 णयाए ॥ ११९ ॥ दसविहे आसंसप्पओगे प० तं०—इहलोगासंसप्पओगे, परलोगा-
 संसप्पओगे, दुहओलोगासंसप्पओगे, जीवियासंसप्पओगे, मरणासंसप्पओगे, कामा-
 संसप्पओगे, भोगासंसप्पओगे, लाभासंसप्पओगे, पूयासंसप्पओगे, सक्कारासंसप्पओगे
 ॥ १२० ॥ दसविहे धम्मं प० तं०—गामधम्मं, णगरधम्मं, रट्ठधम्मं, पासंडधम्मं
 कुलधम्मं, गणधम्मं, संवधम्मं, सुयधम्मं, चरित्तधम्मं, अत्थिकायधम्मं ॥ १२१ ॥
 दसथेरा प० तं० गामथेरा, णगरथेरा, रट्ठथेरा, पसत्थारथेरा, कुलथेरा, गणथेरा,
 संवथेरा, जाइथेरा, सुअथेरा, परिथायथेरा ॥ १२२ ॥ दसपुत्ता प० तं०—अत्तए

खेत्तए दिण्णए विण्णए उरसे मोहरे सोडोरे संबुद्धे उवयाइए धम्मतेवासी ॥१२३॥
 केवल्लिस्स णं दस अणुत्तरा प० तं० अणुत्तरे णाणे अणुत्तरे दंसणे अणुत्तरे चरिस्से
 अणुत्तरे तत्रे अणुत्तरे वीरिए अणुत्तरा खंती अणुत्तरा मुत्ती अणुत्तरे अज्जे
 अणुत्तरे महवे अणुत्तरे लाघवे ॥ १२४ ॥ समयखेत्ते णं दस कुराओ प० तं०—
 पंच देवकुराओ पंच उत्तरकुराओ तत्थ णं दस महइमहालया महाट्टुमा प० तं०—
 जंबू सुदंसणे धायइरुक्खे महाधायइरुक्खे पउमरुक्खे महापउमरुक्खे, पंच कूड-
 सामलीओ तत्थ णं दस देवा महिद्धिया जाव परिवसंति तं० अणाडिए जंबुद्दी-
 वाहिवई सुदंसणे पियदंसणे पोंडरीए महापोंडरीए पंच गरुला वेणुदेवा ॥ १२५ ॥
 दसहिं ठाणेहिं ओगाढं दुस्समं जाणेज्जा'तं०—अकाले वरिसइ काले ण वरिसइ
 असाहू पृइज्जंति साहू ण पृइज्जंति गुरुसु जणो मिच्छं पडिवण्णो अमणुण्णा सदा जाव
 फासा ॥ १२६ ॥ दसहिं ठाणेहिं ओगाढं सुसमं जाणेज्जा तं०—अकाले ण वरिसइ
 तं चेव विवरीयं जाव मणुण्णा फासा ॥ १२७ ॥ सुसमसुसमाए णं समाए दस-
 विहा रुक्खा उवभोगत्ताए हव्वमागच्छंति तं० मत्तंगया य भिंगा तुडियंगा दीव
 जोइ चित्तंगा; चित्तरसा मणियंगा गेहागारा अणियणा य ॥ १२८ ॥ जंबुद्दीवे २
 भारहे वासे तीयाए उस्सण्णिणीए दस कुलगरा हुत्थो तं०—सयज्जले सयाऊ य
 अणंतसेणे य अमियसेणे य तकसेणे भीमसेणे महाभीमसेणे य सत्तमे (१) ददरहे
 दसरहे सयरहे ॥ १२९ ॥ जंबुद्दीवे २ भारहे वासे आगमीसाए उस्सण्णिणीए
 दस कुलगरा भविस्संति तं०—सीमंकरे सीमंधरे खेमंकरे खेमंधरे विमल-
 वाहणे संमुई पडिसुए ददधणू दसधणू सयधणू ॥ १३० ॥ जंबुद्दीवे दीवे मंदरस्स
 पव्वयस्स पुरत्थिमेणं सीयाए महाणईए उभओ कूले दस वक्खारपव्वया प० तं०—
 मालवंते चित्तकूडे विचित्तकूडे बंभकूडे जाव सोमणसे ॥ १३१ ॥ जंबूमंदरपच्च-
 तिमे णं सीओयाए महाणईए उभओ कूले दस वक्खारपव्वया प० तं०—विज्जु-
 प्पभे जाव गंधमायणे । एवं धायइसंडपुरत्थिमद्वेवि वक्खारा भाणियव्वा जाव
 पुक्खरवरदीवद्वपच्चत्थिमद्वे ॥ १३२ ॥ दसकप्पा इंदाहिद्धिया प० तं० सोहम्मे
 जाव सहस्सारे पाणए अच्चुए । एएसु णं दससु कप्पेसु दस इंदा प० तं०—सक्के
 ईसाणे जाव अच्चुए । एएसु णं दसण्हं इंदाणं दस परिजाणियविमाणा प० तं०—
 पालए पुष्पाए जाव विमलवरे सव्वओभदे ॥ १३३ ॥ दस दसमिया णं भिक्खुपडिमा
 णं एमेण राइंदियसएणं अद्धच्छेद्धिं य भिक्खासएहिं अहासुत्तं जाव आराहियावि

भवइ ॥ १३४ ॥ दसविहा संसारसमावण्णगा जीवा प० तं०—पढमसमयएगिंदिया
अपढमसमयएगिंदिया एवं जाव अपढमसमयपंचिंदिया ॥ १३५ ॥ दसविहा
सव्वजीवा प० तं०—पुढविकाइया जाव वणस्सइकाइया बैदिया जाव पंचिंदिया
अर्णिंदिया ॥ १३६ ॥ अहवा दसविहा सव्वजीवा प० तं० पढमसमयणेइया
अपढमसमयणेइया जाव अपढमसमयदेवा पढमसमयसिद्धा अपढमसमयसिद्धा
॥ १३७ ॥ वाससयाउयस्स णं पुरिस्स दस दसाओ प० तं०—वाला किड्डा य
मंदा य ब्रला पण्णा य हायणी, पवंचा पवभारा य मुंमुही सावणी तथा ॥ १३८ ॥
दसविहा तणवणस्सइकाइया प० तं०—मूले कंदे जाव पुप्फे फले बीए ॥ १३९ ॥
सव्वओवि णं विड्जाहरसेदीओ दसदसजोयणाइं विक्खंभेणं प० ॥ १४० ॥ सव्व-
ओवि णं आभिओगसेदीओ दस दस जोयणाइं विक्खंभेणं प० ॥ १४१ ॥ गेविज्जाग-
विमाण्णं दस जोयणसयाइं उड्ढं उच्चत्तेणं प० ॥ १४२ ॥ दसहिं ठाणेहिं सह
तेयसा भासं कुज्जा, तं० केइ तहारूवं समणं वा माहणं वा अच्चासाएज्जा, से
य अच्चासाइए समाणे परिकुविए तस्स तेयं गिसिरेज्जा से तं परियावेइ, से तं
परियावित्ता तामेव सह तेयसा भासं कुज्जा, केइ तहारूवं समणं वा माहणं वा अच्चा-
साएज्जा से य अच्चासाइए समाणे देवे, परिकुविए तस्स तेयं गिसिरेज्जा से तं परि-
यावेइ से तं २ तमेव सह तेयसा भासं कुज्जा, केइ तहारूवं समणं वा माहणं वा
अच्चासाएज्जा, से य अच्चासाइए समाणे परिकुविए देवे य परिकुविए दुहओ पडिण्णा
तस्स तेयं गिसिरेज्जा ते तं परियावित्ति ते तं परियावेत्ता तमेव सह तेयसा भासं
कुज्जा, केइ तहारूवं समणं वा माहणं वा अच्चासाएज्जा से य अच्चासाइए परिकुविए
तस्स तेयं गिसिरेज्जा तत्थ फोडा संमुच्छंति ते फोडा भिज्जंति ते फोडा भिण्णा समाणा
तमेव सह तेयसा भासं कुज्जा, केइ तहारूवं समणं वा माहणं वा अच्चासाएज्जा से य
अच्चासाइए देवे परिकुविए तस्स तेयं गिसिरेज्जा, तत्थ फोडा संमुच्छंति ते फोडा
भिज्जंति, ते फोडा भिण्णा समाणा तमेव सह तेयसा भासं कुज्जा, केइ तहारूवं
समणं वा माहणं वा अच्चासाएज्जा से य अच्चासाइए परिकुविए देवेवि य परि-
कुविए ते दुहओ पडिण्णा ते तस्स तेयं गिसिरेज्जा, तत्थ फोडा संमुच्छंति, सेसं
तहेव जाव भासं कुज्जा, केइ तहारूवं समणं वा माहणं वा अच्चासाएज्जा, से य
अच्चासाइए परिकुविए तस्स तेयं गिसिरेज्जा, तत्थ फोडा संमुच्छंति ते फोडा
भिज्जंति तत्थ पुला संमुच्छंति ते पुला भिज्जंति, ते पुला भिण्णा समाणा तामेव

सह तेयसा भासं कुञ्जा, एए तिण्णि आलावमा भाणियव्वा केइ तहारुवं ममणं वा
 माहणं वा अचासाएमाणे तेयं गिसिरेज्जा से य तत्थ णो कम्मइ णो पकम्मइ अन्वियं
 अंचियं करेइ करेत्ता आयाहिणपयाहिणं करेइ २ ता उट्ठं वेहामं उप्पयइ २ से णं
 तओ पडिहए पडिणियत्तइ २ ता तमेव सरीरगमगुदहमाणे २ सह तेवसा भासं
 कुञ्जा जहा वा गोसालस्स मंखलिपुत्तस्स तवेतेए ॥ १४३ ॥ दस अच्चेरगा प०
 तं०—उवसग्ग रावभरणं इत्थंतित्थं अभाविआ परिमा, कण्हस्स अवराक्का
 उत्तरणं चंदसूराणं (१) हरिवंसकुलुप्पत्ती चमरुप्पाओ य अट्टसयसिद्धा, असंजएसु
 पूआ दसवि अण्णतेण २ कालेण ॥ १४४ ॥ इमीसे णं रयणप्पभाए पुट्ठीए रयणे
 कंडे दसजोयणसयाइं वाह्हेणं प० ॥ १४५ ॥ इमीसे णं रयणप्पभाए पुट्ठीए वयरे
 कंडे दस जोयणसयाइं वाह्हेणं प० ॥ एवं वेरुलिए लोहितवखे मसारत्ते हंसगव्वे
 पुल्लए सोगधिए जोइरसे अंजणे अंजणपुल्लए रयए जायरुवे अंके फलिहे रिट्ठे
 जहा रयणे तहा सोलसविहा भाणियव्वा ॥ १४६ ॥ सव्वेवि णं दावममुहा दस-
 जोयणसयाइं उव्वेहेणं प० ॥ १४७ ॥ सव्वेवि णं महादहा दस जोयणाइं उव्वेहेणं
 प० ॥ १४८ ॥ सव्वेवि णं सल्लिकुंडा दसजोयणाइं उव्वेहेणं प० ॥ १४९ ॥
 सीयासीओया णं महाणईओ मुहमूले दस दस जोयणाइं उव्वेहेणं प० ॥ १५० ॥
 कत्तियाणक्खत्ते सव्ववाहिराओ मंडलाओ दसमे मंडले चारं चरइ ॥ १५१ ॥
 अणुराहा णक्खत्ते सव्ववभंतराओ मंडलाओ दसमे मंडले चारं चरइ ॥ १५२ ॥
 दस णक्खत्ता णाणस्स विद्धिकरा प० तं० मिगसिरमहा पुस्सो तिण्णिय पुत्थाइं
 मूलमस्सेसा, हत्थो चित्ता य तहा दस विद्धिकराइं णाणस्स ॥ १५३ ॥ चउप्पय-
 थलयरपंचिदियतिरिक्खजोणियाणं दस जाइकुलकौडिजोणियमुहसयसहस्सा प०
 उरपरिसप्पथलयरपंचिदियतिरिक्खजोणियाणं दस जाइकुलकौडिजोणियमुहसयसहस्सा
 प० ॥ १५४ ॥ जीवा णं दसठाणणिव्वत्तिया पोग्गले पावकम्मत्ताए च्चिणिमु वा ३
 तंजहा—पढमसमयएगिंदियणिव्वत्तिए जाव फासिंदियणिव्वत्तिए, एवं च्चिण-उव-
 च्चिण-बंध-उदीर-वेय-तह णिच्चरा चेव ॥ १५५ ॥ दसपएसिया खंधा अणंता प०
 ॥ १५६ ॥ दस पएसोगादा पोग्गला अणंता प० ॥ १५७ ॥ दससमयट्ठीया पोग्गला
 अणंता प० ॥ दसगुणकालपा पोग्गला अणंता प० ॥ १५८ ॥ एवं वण्णेहिं गंवेहिं
 रसेहिं फासेहिं दसगुणलुक्खा पोग्गला अणंता प० ॥ १५९ ॥

॥ ठाणं समत्तं ॥

समवाओ

सुयं मे आउमं ! तेणं भगवया एवमकखायं ॥ १ ॥ [इह खलु समणेणं भग-
 वया महावीरेणं आइगरेणं तित्थयरेणं सयंसंबुद्धेणं पुरिसुत्तमेणं पुरिससीहेणं पुरिस-
 वरपुंडरीएणं पुरिसवरगंधहत्थिणा लोगुत्तमेणं लोगणाहेणं लोगहिएणं लोगपईवेणं
 लोगपज्जोअगरेणं अभयदएणं चक्खुदएणं मग्गदएणं सरणदएणं जीवदएणं धम्म-
 दएणं धम्मदेसएणं धम्मणाथगेणं धम्मसारहिणा धम्मवरचाउरंतच्चक्खवट्ठिणा अप्प-
 डिहयवरणाणंसणधरेणं वियट्ठच्छउमेणं जिणेणं जावएणं तिणेणं तारएणं बुद्धेणं बोह-
 एणं मुत्तेणं मोयगेणं सव्वण्णुणा सव्वदरिसिणा सिवमयलमरुयमणंतमक्खयमव्वावाह-
 मपुणरावित्तिसिद्धिगइणामधेयं ठाणं संपाविउकामेणं इमे दुवालसंगे गणिपिडगे पण्णत्ते,
 तं जहा—आयारे १ स्यूगडे २ ठाणे ३ समवाए ४ विवाहपण्णत्ती ५ णायाधम्म-
 क्हाओ ६ उवासागदसाओ ७ अंतगडदसाओ ८ अणुत्तरोववाइयदसाओ ९ पण्हा-
 नागरणं १० विवागसुए ११ दिट्ठिवाए १२ ॥ २ ॥ तत्थ णं जे से चउत्थे अंगे
 समवाए त्ति आहिए तस्स णं अयमट्ठे पण्णत्ते—तं जहा] एगे आया, एगे अणाया,
 एगे दंडे, एगे अदंडे, एगा किरिआ, एगा अकिरिआ, एगे लोए, एगे अलोए,
 एगे धम्मे, एगे अधम्मे, एगे पुण्णे, एगे पावे, एगे बंधे, एगे मोक्खे, एगे आस्से
 एगे संवरे, एगा वेयणा, एगा णिज्जरा ॥ ३ ॥ जंतुदीवे दीवे एगं जोयणसयसहस्सं
 आयामविकखंमेणं पण्णत्ते । अप्पइट्ठाणे णरए एगं जोयणसयसहस्सं आयामविकखं-
 मेणं पण्णत्ते । पालए जाणविमाणे एगं जोयणसयसहस्सं आयामविकखंमेणं पण्णत्ते ।
 सव्वट्ठसिद्धे महाविमाणे एगं जोयणसयसहस्सं आयामविकखंमेणं पण्णत्ते । अहा-
 णक्खत्ते एगतारे पण्णत्ते । चित्ताणक्खत्ते एगतारे पण्णत्ते । सात्तिणक्खत्ते एगतारे
 पण्णत्ते ॥ ४ ॥ इमीसे णं रयणप्पभाए पुढवीए अत्थेगइयाणं णेरइयाणं एगं पलि-
 ओवमं ठिई पण्णत्ता । इमीसे णं रयणप्पभाए पुढवीए णेरइयाणं उक्कोसेणं एगं
 सागरोवमं ठिई पण्णत्ता । दोचाए पुढवीए णेरइयाणं जहण्णेणं एगं सागरोवमं ठिई
 पण्णत्ता । असुरकुमारणं देवाणं अत्थेगइयाणं एगं पलिओवमं ठिई पण्णत्ता ।
 असुरकुमारणं देवाणं उक्कोसेणं एगं साहियं सागरोवमं ठिई पण्णत्ता । असुरकुमा-
 रिदवज्जियाणं भोमिजाणं देवाणं अत्थेगइयाणं एगं पलिओवमं ठिई पण्णत्ता ।

असंखिज्जवासाउयसण्णिपंचिदियतिरिक्खजोगियाणं अत्थेगइयाणं एगं पलिओवमं
 ठिई पण्णत्ता । असंखिज्जवासाउयगम्भवकंति यसण्णिमणुयाणं अत्थेगइयाणं एगं
 पलिओवमं ठिई पण्णत्ता । वाणमत्तराणं देवाणं उक्कोसेणं एगं पलिओवमं ठिई पण्णत्ता ।
 जोइसियाणं देवाणं उक्कोसेणं एगं पलिओवमं वाससयसहस्समम्भहिये ठिई पण्णत्ता ।
 सोहम्मे कप्पे देवाणं जहण्णेणं एगं पलिओवमं ठिई पण्णत्ता । सोहम्मे कप्पे देवाणं
 अत्थेगइयाणं एगं सागरोवमं ठिई पण्णत्ता । ईसाणे कप्पे देवाणं जहण्णेणं साइरेणं
 एगं पलिओवमं ठिई पण्णत्ता । ईसाणे कप्पे देवाणं अत्थेगइयाणं एगं सागरोवमं ठिई
 पण्णत्ता । जे देवा सागरं सुसागरं सागरकंतं भवं मणुं माणुसोत्तरं ल्लोगहिये विमाणं
 देवत्ताए उववण्णा तेसि णं देवाणं उक्कोसेणं एगं सागरोवमं ठिई पण्णत्ता । ते णं देवा
 एगस्स अद्दमासस्स आणमंति वा पाणमंति वा उस्समंति वा णीससंति वा । तेसि णं
 देवाणं एगस्स वाससहस्सस्स आहारत्ते समुप्पज्जइ । संतेगइया भवसिद्धिया जे जीवा
 ते एगेणं भवग्गहणेणं सिद्धिस्सति बुद्धिस्सति मुच्चिस्सति परिणिव्वाइस्सति सव्व-
 दुक्खाणं मंतं करिस्संति ॥५॥ ६॥ दो दंडा पण्णत्ता, तं जहा-अट्ठादंडे चंच, अणट्ठा-
 दंडे चंच । दुवे रासी पण्णत्ता, तं जहा-जीवरासी चंच, अजीवरासी चंच । दुविहे बंधणे
 पण्णत्ते, तं जहा-रागबंधणे चंच, दोसबंधणे चंच । पुव्वाफग्गुणी णक्खत्ते दुतारे पण्णत्ते ।
 उत्तराफग्गुणी णक्खत्ते दुतारे पण्णत्ते । पुव्वाभद्वया णक्खत्ते दुतारे पण्णत्ते । उत्तरा-
 भद्वया णक्खत्ते दुतारे पण्णत्ते इमीसे णं रयणप्पभाए पुढवीए अत्थेगइ-
 याणं णेरइयाणं दो पलिओवमाइं ठिई पण्णत्ता । दुच्चाए पुढवीए अत्थेगइयाणं णेरइ-
 याणं दो सागरोवमाइं ठिई पण्णत्ता । असुरकुमारारणं देवाणं अत्थेगइयाणं दोपलिओ-
 वमाइं ठिई पण्णत्ता । असुरकुमारिदवज्जियाणं भोमिज्जाणं देवाणं उक्कोसेणं देसूणाइं
 दो पलिओवमाइं ठिई पण्णत्ता । असंखिज्जवासाउयसण्णिपंचेदियतिरिक्खजोगिआणं
 अत्थेगइयाणं दोपलिओवमाइं ठिई पण्णत्ता । असंखिज्जवासाउयगम्भवकंति यसण्णि-
 पंचिदियमाणुसाणं अत्थेगइयाणं दोपलिओवमाइं ठिई पण्णत्ता । सोहम्मे कप्पे अत्थे-
 गइयाणं देवाणं दो पलिओवमाइं ठिई पण्णत्ता । ईसाणे कप्पे अत्थेगइयाणं देवाणं दो
 पलिओवमाइं ठिई पण्णत्ता । सोहम्मे कप्पे अत्थेगइयाणं देवाणं उक्कोसेणं दो साग-
 रोवमाइं ठिई पण्णत्ता । ईसाणे कप्पे देवाणं उक्कोसेणं साह्वियाइं दो सागरोवमाइं
 ठिई पण्णत्ता । सणंकुमारे कप्पे देवाणं जहण्णेणं दो सागरोवमाइं ठिई पण्णत्ता ।

माहिंदे कपे देवाणं जहण्णेणं साहियाइं दो सागरोवमाइं ठिईं पणत्ता। जे देवा सुभं सुभकंतं सुभवणं सुभगंधं सुभलेसं सुभफासं सोहम्मवडिसगं विमाणं देवत्ताए उववण्णा तेसि णं देवाणं उक्कोसेणं दो सागरोवमाइं ठिईं पणत्ता। ते ण देवा दोण्हं अद्धमासाणं आणमंति वा पाणमंति वा ऊससति वा णीससंति वा। तेसि णं देवाणं दोहिं वाससहस्सेहिं आहारट्टे समुप्पज्जइ। अत्थेगइया भवसिद्धिया जीवा जे दोहिं भवग्गहणेहिं सिञ्जिस्संति बुञ्जिस्संति मुच्चिस्संति परिणिव्वाइस्संति सब्बदुक्खाणमंतं करिस्संति ॥ २ ॥ तओ दंडा पणत्ता, तं जहा—मणदंडे, वइदंडे, कायदंडे। तओ गुत्तीओ पणत्ताओ, तं जहा—मणगुत्ती, वयगुत्ती, कायगुत्ती। तओ सहा पणत्ता, तं जहा—मायासल्ले णं, णियाणसल्ले णं, मिच्छादंसणसल्ले णं। तओ गारवा पणत्ता, तं जहा—इड्डीगारवेणं, रसगारवे णं, सायागारवे णं। तओ विराहणा पणत्ता, तं जहा—णाणविराहणा, दंसणविराहणा, चरित्तविराहणा। मिगसिरणकखत्ते तितारे पणत्ते। पुस्सणकखत्ते तितारे पणत्ते। जेट्टाणकखत्ते तितारे पणत्ते। भभीइणकखत्ते तितारे पणत्ते। सवण्णकखत्ते तितारे पणत्ते। अस्सिणिकखत्ते तितारे पणत्ते। भरणीणकखत्ते तितारे पणत्ते। इमीसे णं रयण्णभाए पुढवीए अत्थेगइयाणं णेरइयाणं तिण्णि पलिओवमाइं ठिईं पणत्ता। दोच्चाए णं पुढवीए णेरइयाणं उक्कोसेणं तिण्णि सागरोवमाइं ठिईं पणत्ता। तच्चाए णं पुढवीए णेरइयाणं जहण्णेणं तिण्णि सागरोवमाइं ठिईं प०। असुरकुमारणं देवाणं अत्थेगइयाणं तिण्णि पलिओवमाइं ठिईं प०। असंखिज्जवासाउयसण्णिपंचिंदियतिरिक्खजोणियाणं उक्कोसेणं तिण्णि पलिओवमाइं ठिईं प०। असंखिज्जवासाउयसण्णिगम्भवकंसियमणुस्साणं उक्कोसेणं तिण्णि पलिओवमाइं ठिईं प०। सोहम्मीसाणेसु कप्पेसु अत्थेगइयाणं देवाणं तिण्णि पलिओवमाइं ठिईं प०। सणकुमारमाहिंदेसु कप्पेसु अत्थेगइयाणं देवाणं तिण्णि सागरोवमाइं ठिईं प०। जे देवा आभंकरं पभंकरं आभंकरं पभंकरं चंद्रं चंदावत्तं चंदप्पभं चंदकंतं चंदवण्णं चंदलेसं चंदज्जयं चंदसिगं चंदसिद्धं चंदकूडं चंदुत्तरवडिसगं विमाणं देवत्ताए उववण्णा तेसि णं देवाणं उक्कोसेणं तिण्णि सागरोवमाइं ठिईं प०। ते णं देवा तिण्हं अद्धमासाणं आणमंति वा पाणमंति वा ऊससति वा णीससंति वा। तेसि णं देवाणं तिहिं वाससहस्सेहिं आहारट्टे समुप्पज्जइ। संतेगइया भवसिद्धिया जीवा जे तिहिं भवग्गहणेहिं सिञ्जिस्संति बुञ्जिस्संति मुच्चिस्संति परिणिव्वाइस्संति सब्बदुक्खाणमंतं करिस्संति ॥ ३ ॥ चत्तारि

कसाया प०, तं—कोइकसाए माणकसाए मायाकसाए लोभकसाए । चत्तारि शाणा प०, तं०—अट्टज्जाणे रुद्धज्जाणे धम्मज्जाणे सुक्कज्जाणे । चत्तारि त्रिकहाओ प०, तं०—इत्थिकहा भत्तकहा रायकहा देसकहा । चत्तारि सण्णा प०, तं०—आहारसण्णा भयसण्णा मेहुणसण्णा परिग्गहसण्णा । चउद्विवे वेवे पण्णत्ते, तं०—पगइवंवे ठिइवंवे अणुभाववंवे पएसवंवे । चउगाउए जोयणे पण्णत्ते । अणुराहाणकखत्ते चउतारे पण्णत्ते । पुव्वासाढाणकखत्ते चउतारे पण्णत्ते । उत्तरासाढाणकखत्ते चउतारे पण्णत्ते । इगीस णं रयणपरभाए पुढवीए अत्येगइयाणं णेरइयाणं चत्तारि पल्लिओवमाईं ठिईं पण्णत्ता । तच्चाए णं पुढवीए अत्येगइयाणं णेरइयाणं चत्तारि सागरोवमाईं ठिईं पण्णत्ता । अमुरकुमारणं देवाणं अत्येगइयाणं चत्तारि पल्लिओवमाईं ठिईं पण्णत्ता । सोइग्गीसाणेसु कप्पेसु अत्येगइयाणं देवाणं चत्तारि पल्लिओवमाईं ठिईं पण्णत्ता । सणंकुमारमाहिं देसु कप्पेसु अत्येगइयाणं देवाणं चत्तारि सागरोवमाईं ठिइं पण्णत्ता । जे देवा किट्ठिं मुक्किट्ठिं किट्ठियावत्तं किट्ठिपभं किट्ठिजुत्तं किट्ठिवण्णं किट्ठिलेसं किट्ठिज्जयं किट्ठिसिंमं किट्ठिसिट्ठं किट्ठिइंइं किट्ठुत्तएवडिंसं विमाणं देवत्ताए उववण्णा तेषिं णं देवाणं उक्कोमेणं चत्तारि सागरोवमाईं ठिईं पण्णत्ता । ते णं देवा चउण्हउडमासाणं आयमंति वा पाणमंति वा ऊमसंति वा णीससंति वा । तेषिं देवाणं चउहिं वासमहस्सेहिं आहारट्ठे समुप्पज्जइ । अत्येगइयां भवमिद्धिया जीवा जे चउहिं भवरगहणेहिं सिञ्जिसंति जाव सव्वट्टुकम्भाणं अंतं करिस्संति ॥ ४ ॥ पंच किरिया पण्णत्ता, तं०—काइया अहिगरणिया पाउसिया पारियावणिया पाणाइवायकिरिया । पंच महस्वया प० तं०—सव्वाओ पाणाइवायाओ वेरमणं, सव्वाओ सुमावायाओ वेरमणं, सव्वाओ अदिण्णादाणाओ वेरमणं, सव्वाओ मेहुणाओ वेरमणं, सव्वाओ परिग्गहाओ वेरमणं । पंच कामगुणा प०, तं०—सद्दा रूवा रसा गंधा फासा । पंच आसव्वदारा प० तं०—मिच्छत्तं अविर्इं पमाया कमाया जोगा । पंच संवरदारा प० तं०—सम्मत्तं विर्इं अप्पमत्तया अकमाया अजोगया । पंच णिज्जरट्ठाणा प० तं०—पाणाइवायाओ वेरमणं, सुमावायाओ वेरमणं, अदिण्णादाणाओ वेरमणं, मेहुणाओ वेरमणं, परिग्गहाओ वेरमणं । पंच समिईओ पण्णत्ताओ, तं०—इरियासमिई भासासमिई एमणासमिई आयाणभेडमत्तणिकखेवणासमिई उच्चारसव्वणखेलसिंवा-

णजलपरिद्धावणियासमिई । पंच अत्थिकाया प० तं०—धम्मत्थिकाए अधम्मत्थि-
 काए आगासत्थिकाए जीवत्थिकाए पोग्गलत्थिकाए । रोहिणी णक्खत्ते पंचतारे प० ।
 पुणव्वसुणक्खत्ते पंचतारे प० । हत्थणक्खत्ते पंचतारे प० । विसाहाणक्खत्ते पंच-
 तारे प० । धणिट्ठाणक्खत्ते पंचतारे प० । इमीसे णं रयणप्पभाए पुढवीए अत्थेगइयाणं
 णेरइयाणं पंच पलिओवमाईं ठिईं प० । तच्चाए णं पुढवीए अत्थेगइयाणं णेरइयाणं
 पंचसागरोवमाईं ठिईं प० । असुरकुमारारणं देवाणं अत्थेगइयाणं पंचपलिओवमाईं
 ठिईं प० । सोहम्मीसाणेसु कप्पेसु अत्थेगइयाणं देवाणं पंचपलिओवमाईं ठिईं प० ।
 सणंकुमारमाहिंदेसु कप्पेसु अत्थेगइयाणं देवाणं पंच सागरोवमाईं ठिईं प० । जे देवा
 वायं सुवायं वायावत्तं वायप्पभं वायकंतं वायवणं वायलेसं वायज्जयं वायसिं गं वाय-
 सिट्ठं वायकूडं वाउत्तरवडिसं गं सूरं सुसूरं सूरावत्तं सूरप्पभं सूरकंतं सूरवणं सूरलेसं
 सूरज्जयं सूरसिं गं सूरसिट्ठं सूरकूडं सूरुत्तरवडिसं गं विमाणं देवत्ताए उववण्णा तेसि
 णं देवाणं उक्कोत्तेणं पंच सागरोवमाईं ठिईं प० । ते णं देवा पंचहं अद्धमासाणं आण-
 मंति वा पाणमंति वा ऊससंति वा णीससंति वा । तेसिं णं देवाणं पंचहिं वाससहस्सेहिं
 आहारट्टे समुप्पज्जइ । संतिगइया भवसिद्धिया जीवा जे पंचहिं भवग्गहणेहिं सिज्झि-
 स्संति जाव अंतं करिस्संति ॥ ५ ॥ छ लेसाओ प०, तं०—कण्हलेसा णील्लेसा
 काउलेसा तेउलेसा पम्हलेसा सुक्कलेसा । छ जीवणिकाया प०, तं०—पुढविकाए
 आउकाए तेउकाए वाउकाए वणस्सइकाए तसकाए । छट्ठिवहे बाहिरे तवोकम्मे
 प०, तं०—अणसणे ऊणोयरिया विसीसखेवो रसपरिच्चाओ कायकिल्लेसो संलीणया ।
 छट्ठिवहे अन्भितरे तवोकम्मे प०, तं०—पायच्छित्तं विणओ वेयावच्चं सज्जाओ
 णाणं उस्सग्गो । छ छाउमत्थिया समुग्घाया प० तं०—वेयणासमुग्घाए कसाय-
 समुग्घाए मारणंति यसमुग्घाए वेउव्वियसमुग्घाए तेयसमुग्घाए आहारसमुग्घाए ।
 छट्ठिवहे अत्थुग्गहे पण्णत्ते, तं०—सोइंदियअत्थुग्गहे चक्खुइंदिय अत्थुग्गहे घाणि-
 दियअत्थुग्गहे जिन्भिदियअत्थुग्गहे फासिंदियअत्थुग्गहे णोइंदियअत्थुग्गहे । कत्ति-
 याणक्खत्ते वृत्तारे प० । असिल्लेसाणक्खत्ते वृत्तारे प० । इमीसे णं रयणप्पभाए
 पुढवीए अत्थेगइयाणं णेरइयाणं छ पलिओवमाईं ठिईं प० । तच्चाए णं पुढवीए
 अत्थेगइयाणं णेरइयाणं छ सागरोवमाईं ठिईं प० । असुरकुमारारणं देवाणं अत्थे-
 गइयाणं णेरइयाणं छ पलिओवमाईं ठिईं प० । सोहम्मीसाणेसु कप्पेसु अत्थेगइयाणं

देवाणं छ पलिओवमाई ठिई प० । सणकुमारमाहिंदेसु कप्पेसु अत्थेगइयाणं देवाणं छ
 सागरोवमाई ठिई प० । जे देवा सयंभुं सयंभूरमणं घोसं सुघोसं महाघोसं
 किट्ठिघोसं वीरं सुवीरं वीरगतं वीरसेणियं वीरावत्तं वीरप्पभं वीरकंतं वीरवण्णं वीरलेसं
 वीरञ्जयं वीरसिंगं वीरसिट्ठं वीरकूडं वीरुत्तरवडिसगं त्रिमाणं देवत्ताए उववण्णा
 तेसि णं देवाणं उक्कोसेणं छ सागरोवमाई ठिई प० । ते णं देवा छण्हं अट्टमासाणं
 आणमंति वा पाणमंति वा ऊत्तसति वा पीससति वा । तेसि णं देवाणं एहिं वास-
 सहस्सेहिं आहारट्टे समुप्पज्जइ । संतेगइया भवसिद्धिया जीवा जे एहिं भवग्गहणेहिं
 सिज्झिस्संति जाव सव्वदुक्खाणमंतं करिस्संति ॥६॥ सत्त भयट्ठणाया प० तं० इह्लोग-
 भए परलोगभए आदाणभए अकम्हाभए आजीवभए मरणभए असिलोगभए ।
 सत्त समुग्घाया प० तं०—वेयणासमुग्घाए कसायसमुग्घाए मारणंतियसमुग्घाए
 वेउत्तियसमुग्घाए तेयसमुग्घाए आहारसमुग्घाए केवलिसमुग्घाए । समणे
 भगवं मद्दावीरे सत्त रयणीओ उट्ठं उच्चत्तेणं होत्था । इहेव जंबुदीवे दीवे सत्त
 वासहरव्वयया प० तं०—चुल्लहिमवंते महाहिमवंते गिसडे णीलवेंते रूप्पी सिहरी
 मंदरे । इहेव जंबुदीवे दीवे सत्त वासा प०, तं०—भरहे हेमवए हरिवासे
 महाविदेहे रम्मए एरणवए एरवए । खीणमंहेणं भगवया मोहणिञ्चव्जाओ
 सत्त कम्मपयडीओ वेएई । महाणक्खत्ते सत्ततारे प० । कत्तिआइया सत्त
 णक्खत्ता पुव्वदारिआ प० (अभियाइया सत्त णक्खत्ता) । महाइया सत्त
 णक्खत्ता दाहिणदारिआ प० । अणुराहाइया सत्त णक्खत्ता अवरदारिआ प० ।
 यणिट्ठाइया सत्त णक्खत्ता उत्तरदारिआ प० । इमीसे णं रयणप्पभाए पुट्ठवीए
 अत्थेगइयाणं णेरइयाणं सत्त पलिओवमाई ठिई प० । तच्चाए णं पुट्ठवीए णेर-
 इयाणं उक्कोसेणं सत्त सागरोवमाई ठिई प० । चउत्थीए णं पुट्ठवीए णेरइयाणं
 जहण्णेणं सत्त सागरोवमाई ठिई प० । असुरकुमाराणं देवाणं अत्थेगइयाणं सत्त
 पलिओवमाई ठिई प० । साहम्मिसाणेसु कप्पेसु अत्थेगइयाणं देवाणं सत्त
 पलिओवमाई ठिई प० । सणकुमारे कप्पे अत्थेगइयाणं देवाणं उक्कोसेणं सत्त-सागरो-
 वमाई ठिई प० । माहिंदे कप्पे देवाणं उक्कोसेणं साइरेगाई सत्त सागरोवमाई ठिई
 प० । वंभलोए कप्पे अत्थेगइयाणं देवाणं सत्त साहिया सागरोवमाई ठिई प० । जे
 देवा समं समप्पभं महावभं पभासं भासुरं विमलं कंचणकूडं सणकुमारवडिसगं

विमाणं देवताए उववण्णा तेसि णं देवाणं उक्कोसेणं सत्त सागरोवमाइं ठिईं प० ।
 ते णं देवा सत्तण्हं अद्धमासाणं आणमंति वा पाणमंति वा ऊससंति वा णीससंति
 वा । तेसि णं देवाणं सत्तहिं वाससहस्सेहिं आहारट्टे समुप्पज्जइ । संतेगइया भव-
 सिद्धिया जीवा जे णं सत्तहिं भवग्गाहणेहिं सिद्धिस्संति जाव सव्वदुक्खाणमंतं
 करिस्संति ॥ ७ ॥ अट्ट मयट्ठणा प० तं०—जाइमए कुलमए बलमए रूवमए
 तवमए सुयमए लाभमए इस्सरियमए । अट्ट पवयणमायाओ प० तं०—इरिया-
 समिई भासासमिई एसणासमिई आयाणभेमत्तणिकखेवणासमिई उच्चारपासवण-
 खेहसिघाणजल्लपारिट्ठावणियासमिई मणगुत्ती वइगुत्ती कायगुत्ती । वाणमंतराणं
 देवाणं चेइय रुक्खा अट्ट जोयणाइं उद्धं उच्चत्तेणं पण्णत्ता । जंबू णं सुदंसणा अट्ट
 जोयणाइं उद्धं उच्चत्तेणं प० । कूडसामली णं गरुलावासे अट्ट जोयणाइं उद्धं उच्चत्तेणं
 प० । जंबु दीवस्स णं जगई अट्ट जोयणाइं उद्धं उच्चत्तेणं प० । अट्टसामइए
 केवलिसमुग्घाए प० तं०—पढमे समए दंडं करेइ, बीए समए कवाडं करेइ,
 तइए समए मंथं करेइ, चउत्थे समए मंथंतराईं पूरेइ, पंचमे समए मंथंतराईं
 पडिसाहरइ, छट्ठे समए मंथं पडिसाहरइ, सत्तमे समए कवाडं पडिसाहरइ,
 अट्टमे समए दंडं पडिसाहरइ, तओ पच्छा सरीरत्थे भवइ । पासस्स णं अरहओ
 पुरिसादाणियस्स अट्ट गणा अट्ट गणहरा हुत्था, तं०—सुभे य सुभोसे य,
 वसिट्ठे वंभयारि य । सोमे सिरिधरे चेव, वीरभदे जसे इय (१) अट्ट णक्खत्ता
 चंदेणं सद्धिं पमहं जोगं जोएंति, तं०—कत्तिया, रोहिणी, पुणव्वसू, महा, चित्ता,
 विमाहा, अणुराहा, जेट्ठा । इमीसे णं, रयंणप्पभाए पुढवीए अत्थेगइयाणं णेर-
 इयाणं अट्ट पलिओवमाइं ठिईं प० । चउत्थीए पुढवीए अत्थेगइयाणं णेरइयाणं
 अट्ट सागरोवमाइं ठिईं प० । असुरकुमाराणं देवाणं अत्थेगइयाणं अट्ट पलि-
 ओवमाइं ठिईं प० । सोहम्मीसाणेसु कप्पेसु अत्थेगइयाणं देवाणं अट्ट पलिओ-
 वमाइं ठिईं प० । वंभलोए कप्पे अत्थेगइयाणं देवाणं अट्ट सागरोवमाइं ठिईं
 प० । जे देवा अच्चिं अच्चिमालिं वइरोयणं पभेकरं चंदाभं सूराभं सुपइट्ठाभं
 अंग्गच्चामं रिट्ठाभं अरुणाभं अरुणुत्तरवडिसगं विमाणं देवताए उववण्णा तेसि
 णं देवाणं उक्कोसेणं अट्ट सागरोवमाइं ठिईं प० । ते णं देवा अट्टण्हं अद्ध-
 मासाणं आगमंति वा पाणमंति वा ऊससंति वा णीससंति वा । तेसि णं देवाणं
 अट्टहिं वाससहस्सेहिं आहारट्टे समुप्पज्जइ । संतेगइया भवसिद्धिया जीवा जे अट्टहिं

भवग्गहणेहिं सिद्धिस्संति दुद्धिस्संति जाव अंतं करिस्सति ॥८॥ णव बंधचेर-
गुत्तीओ पणत्ताओ तं०—णो इत्थीपमुपंडगसंसत्ताणि सिच्चासणाणि सेवित्ता भवइ,
णो इत्थीणं कइं कहित्ता भवइ, णो इत्थीणं गणाइं सेवित्ता भवइ, णो इत्थीणं
ईदियाणि मणोहराइं मणोरमाइं आलोइत्ता णिज्जाइत्ता भवइ, णो पणायरमभोई,
णो पाणभोयणस्स अइमायाए आहारइत्ता, णो इत्थीणं पुव्वरयाइं पुव्वकालिआइं
समइत्ता भवइ, णो सद्धानुवाइं णो रूवाणुवाइं णो गंदाणुवाइं णो रसाणुवाइं णो
फासाणुवाइं णो सिलोगाणुवाइं, णो सायासोकवपडिबडे यावि भवइ । णव बंधचेर-
अगुत्तीओ पणत्ताओ तं०—इत्थीपमुपंडगसंसत्ताणं सिच्चासणाणं सेवणया जाव
सायासोकवपडिबडे यावि भवइ । णव बंधचेरा प०, तं०—सत्थपरिण्णा लोम-
विजओ सीओसणिज्ज सम्पत्तं । आवंति दुय विमोहा [यण] उवहाणसुयं मपरिण्णा ।
पासे णं अरहा पुरिसादाणीए णव रयणीओ उद्धं उच्चत्तेणं हृत्या । अभीजि णकलत्ते
साइरेगे णव सुहुत्ते चंदेणं सद्धि जोगं जोएइ । अभीजियाइया णव णकलत्ता चंदस्स
उत्तरेणं जोगं जाएति, तं०—अभीजि सवणो जाव भरणी । इमीसे णं रयणपभाए
पुढवीए बहुसमरमणिज्जाओ भूमिभागाओ णव जोयणसए उद्धं अचाहाए उवरिल्ले
ताराख्वे चारं चरइ । जंबुहीवे णं दीवे णवजोयणिया मच्छा पविसिंसु वा ३ ।
विजयस्स णं दारस्स एगमेगाए चाहाए णव णव भोना प० । वाणमंतराणं देवाणं
सभाओ सुहम्माओ णव जोयणाइं उद्धं उच्चत्तेणं प० । दंसणावरणिज्जसस णं कम्मस्स
णव उत्तरपगडीओ प०, तं०—णिदा पयला गिहाणिदा पयलापयला थीणडी चकम्बु-
दंसणावरणे अचकम्बुदंसणावरणे ओहिदंसणावरणे केवलदंसणावरणे । इमीसे णं
रयणपभाए पुढवीए अत्थेगइयाणं णेरइयाणं णव पलिओवमाइं ठिई प० ।
चउत्थीए पुढवीए अत्थेगइयाणं णेरइयाणं णव सागरोवमाइं ठिई प० । असुर-
कुमारणं देवाणं अत्थेगइयाणं णव पलिओवमाइं ठिई प० । सोहम्मीमाणेसु कप्पेसु
अत्थेगइयाणं देवाणं णव पलिओवमाइं ठिई प० । बंधलोए कप्पे अत्थेगइयाणं
देवाणं णव सागरोवमाइं ठिई प० । जे देवा पम्हं सुपम्हं पम्हावत्तं पम्हपम्हं पम्ह-
कंतं पम्हवण्णं पम्हलेसं पम्हज्जयं पम्हसिंणं पम्हसिद्धं पम्हकूडं पम्हुत्तरवडिसंणं सुल्ले
सुमुल्ले सुज्जवित्तं सुज्जपभं सुज्जकंतं सुज्जवण्णं सुज्जलेसं सुज्जज्जयं सुज्जसिंणं सुज्ज-
सिद्धं सुज्जकूडं सुज्जुत्तरवडिसंणं रुइल्लं रुइल्लावत्तं रुइल्लपभं रुइल्लकंतं रुइल्लवण्णं
रुइल्लेसं रुइल्लज्जयं रुइल्लसिंणं रुइल्लसिद्धं रुइल्लकूडं रुइल्लुत्तरवडिसंणं विमाणं

देवताए उववण्णा तेसि णं देवाणं णव सागरोवमाइं ठिईं प० । ते णं देवा णवण्हं
 अद्धमासाणं आणमंति वा पाणमंति वा ऊससंति वा णीससंति वा । तेसि णं देवाणं
 णवहिं वाससहस्तेहिं आहारट्टे समुप्पज्जइ । संतेगइया भवसिद्धिआ जीवा जे णवहिं
 भवग्गेहणेहिं सिद्धिअसंति जाव सव्वदुक्खणमंतं करिस्सति ॥ ९ ॥ दसविहे समण-
 धम्मं प०, तं०—लंती मुत्ती अज्जथे महवे लायवे सच्चे संजमे तवे चियाए बंभ-
 चेरवासे । दस चित्तसमाहिट्ठाणा प०, तं०—धम्मचिंता वा से असमुप्पण्णपुव्वे
 समुप्पज्जिआ सव्वं धम्मं जाणित्तए, सुमिणदंसणे वा से असमुप्पण्णपुव्वे समुप्पज्जिआ
 अहातच्चं सुमिणं पासित्तए, सण्णणाणे वा से असमुप्पण्णपुव्वे समुप्पज्जिआ पुव्व-
 भवे सुमरित्तए, देवदंसणे वा से असमुप्पण्णपुव्वे समुप्पज्जिआ दिव्वं देविद्धिं
 दिव्वं देवजुइं दिव्वं देवाणुभावं पासित्तए, ओहिणाणे वा से असमुप्पण्णपुव्वे
 समुप्पज्जिआ ओहिणा लोगं जाणित्तए, ओहिदंसणे वा से असमुप्पण्णपुव्वे समु-
 प्पज्जिआ ओहिणा लोगं पासित्तए, मणपञ्चणाणे वा से असमुप्पण्णपुव्वे समुप्प-
 ज्जिआ जाव मणोगए भावे जाणित्तए, केवलणाणे वा से असमुप्पण्णपुव्वे समुप्प-
 ज्जिआ केवलं लोगं जाणित्तए, केवलदंसणे वा से असमुप्पण्णपुव्वे समुप्पज्जिआ
 केवलं लोगं पासित्तए, केवलमरणं वा मरिज्जा सव्वदुक्खण्यहीणाए । मंदरे णं
 पव्वए मूले दस जोयणसहस्साइं विक्खंभेणं प० । अरहा णं अरिद्धगेमी दस धणूइं
 उद्धं उच्चत्तेणं होत्था । कण्हे णं वासुदेवे दस धणूइं उद्धं उच्चत्तेणं होत्था । रामे णं
 बलदेवे दस धणूइं उद्धं उच्चत्तेणं होत्था । दस णक्खत्ता णाणवुद्धिकरा प० तं०—
 “मिगमिर अद्दा पुस्सो तिण्णि अ पुव्वा य मूलमस्सेसा । इत्थो चित्तो य तहा,
 दस बुद्धिकराइं णाणस्स ।” अकम्मभूमियणं मणुआणं दसविहा रुक्खा उवभोगत्ताए
 उवत्थिया प० तं०—“मत्तंगया य भिंगा, तुडिअंगा दीव जोइ चित्तंगा । चित्तरसा
 मणिअंगा, गेहागारा अण्णिगिणा य ॥ १ ॥” इमीसे णं रयणपरभाए पुढवीए
 अत्थेगइयाणं णेरइयाणं जहण्णेणं दस वाससहस्साइं ठिईं प० । इमीसे णं रयणप्प-
 भाए पुढवीए अत्थेगइयाणं णेरइयाणं दस पलिओवमाइं ठिईं प० । चउत्थीए
 पुढवीए दस गिरवात्ताससयसहस्साइं प० । चउत्थीए पुढवीए णेरइयाणं अत्थे-
 गइयाणं उक्कोसेणं दस सागरोवमाइं ठिईं प० । पंचमीए पुढवीए अत्थेगइयाणं
 णेरइयाणं जहण्णेणं दस सागरोवमाइं ठिईं प० । असुरकुमाराणं देवाणं अत्थे-
 गइयाणं जहण्णेणं दस वाससहस्साइं ठिईं प० । असुरिंदवज्जाणं भोमिज्जाणं देवाणं

अत्येगइयाणं जहण्णेणं दस वामसहस्साइं ठिईं प० । असुरकुमारणं देवाणं अत्ये-
 गइयाणं दस पलिओवमाइं ठिईं प० । चायरवणस्सइकाइयाणं उक्कोसेणं दस वास-
 सहस्साइं ठिईं प० । वाणमंतराणं देवाणं अत्येगइयाणं जहण्णेणं दस वामसहस्साइं
 ठिईं प० । सोहम्मीसाणेसु कप्पेसु अत्येगइयाणं देवाणं दस पलिओवमाइं ठिईं प० ।
 बंभलोए कप्पे देवाणं उक्कोसेणं दस सागरोवमाइं ठिईं प० । लंतए कप्पे देवाणं
 अत्येगइयाणं जहण्णेणं दस सागरोवमाइं ठिईं प० । जे देवा घोसं सुघोसं महाघोसं
 णंदिघोसं सुसरं मणोरमं रम्मं रम्मगं रमणिजं मंगलावत्तं बंभलोववडिंसगं विमाणं
 देवत्ताए उववण्णा तेषि णं देवाणं उक्कोसेणं दस सागरोवमाइं ठिईं प० । तं णं देवा
 दसहं अद्धमासाणं आणमंति वा पाणमंति वा ऊसमंति वा णीसमंति वा । तेषि णं
 देवाणं दसहिं वाससहस्सेहिं आहारुद्धे समुप्पज्जइ । संतेगइआ भवसिद्धिआ जीवा जे
 दसहिं भन्नगहणेहिं विज्जिस्समंति बुज्जिस्संति मुच्चिस्संति परिणिव्वाइस्संति सव्व-
 दुक्कत्ताणमंतं करिस्संति ॥ १० ॥ एककारस उववसगपडिमाओ प० तं०—
 दंसणसावए, कयव्वयकम्मे, सामाइयकडे, पोसहोववासणिरए, दिया वंभयारा
 रत्ति परिमाणकडे, दिआ वि राओ वि वंभयारो असिणाईं वियडभोईं मोलिकडे,
 सच्चित्तपरिणाए, आरंभपरिणाए, पेसपरिणाए, उडिद्धभत्तपरिणाए, समण-
 भूए यावि भवइ समणाउसो ! लोगतोओ एककारसएहिं एकारेहिं जोयण-
 सएहिं अवाहाए जोइसंते पण्णत्ते । जंबूहीने दीवे मंदरस्स पव्वयस्स एवकारसहिं
 एककवीसेहिं जोयणसएहिं अवाहाए जोइसे चारं चरइ । समणस्स णं भग-
 वओ महावीरस्स एकारस गणहरा हुत्था, तं०—ईदभूईं अग्गिभूईं वायुभूईं विअत्ते
 सुहम्मं मंडिए मोरियपुत्ते अकंपिए अयलभाए मेअजे पभासे । मूले णक्खत्ते एकार-
 सतारे प० । हेट्टिमोविज्जायाणं देवाणं एकारसमुत्तरं नेविज्जविमाणमंतं भवइ त्ति
 मक्खायं । मंदरे णं पव्वए धरणितलाओ सिहरतले एकारसभागपरिहीणे उवत्तेणं
 प० । इमीसे णं रयणप्पभाए पुढवीए अत्येगइयाणं णेरइयाणं एकारस पलिओ-
 वमाइं ठिईं प० । पंचमीए पुढवीए अत्येगइयाणं णेरइयाणं एकारस सागरोवमाइं
 ठिईं प० । असुरकुमारणं देवाणं अत्येगइयाणं एकारस पलिओवमाइं ठिईं प० ।
 सोहम्मीसाणेसु कप्पेसु अत्येगइयाणं देवाणं एकारस पलिओवमाइं ठिईं प० ।
 लंतए कप्पे अत्येगइयाणं देवाणं एकारस सागरोवमाइं ठिईं प० । जे देवा वंभं
 सुवंभं बंभावत्तं वंभप्पं वंभकंतं वंभवणं वंभलेसं वंभज्जायं वंभसिं वंभसिं वंभं

कूडं वंभुत्तरवडिसगं विमाणं देवताए उत्रवणा तेसि णं देवाणं (उक्कोमणं) एक्कारस मागरोवमाइं ठिईं प० । ते णं देवा एक्कारसण्हं अद्रमासाणं आणमति वा पाणमति वा ऊससंति वा णीससंति वा । तेसि णं देवाणं एक्कारसण्हं वाससहस्साणं आहाट्टे समुप्पज्जइ । संतेगइया भवसिद्धिया जीया जे एक्कारसहिं भवग्गहणेहिं सिद्धिस्संति बुद्धिस्संति मुद्धिस्संति परिणिव्वाइस्संति सव्वदुकखाणमंतं करिस्संति ॥ ११ ॥ चारस भिक्खुपडिमाओ पणत्ताओ, तं जहा—मासिया भिक्खुपडिमा, दोमासिया भिक्खुपडिमा, तिमासिया भिक्खुपडिमा, चउमासिया भिक्खुपडिमा, पंचमासि ॥ भिक्खुपडिमा, छमासिया भिक्खुपडिमा, सत्तमासिया भिक्खुपडिमा, पदमा सत्तराईदिया भिक्खुपडिमा, दोच्चा सत्तराईदिया भिक्खुपडिमा, तच्चा सत्तराईदिया भिक्खुपडिमा, अहोराइया भिक्खुपडिमा, एगराइया भिक्खुपडिमा । दुवालसविहे संभोगे प० तं०—“उवहीसुयभत्तवाणे, अंजलीपग्गहे ति य । दायणे य णिकाए अ अंभुट्ठाणेइ आंधरे । कितिकम्मस्स य करणे, वेयावच्चकरणे इय । समोसरणं संणिस्सिजा य, कहाए य पवंधणे ” । दुवालसावत्ते कितिकम्मे प०, तं०—“दुओणयं जहाजार्य, कितिकम्मं चारसावयं । चउसिरं तिगुत्तं च, दुपवेसं एगणिकवमणे ” । विजया णं रायहाणी दुवालस जोयणसयसहस्साइं आयामविकखंभेणं प० । रामे णं बलदेवे दुवालस वाससयाइं सव्वाउयं पालित्ता देवत्तं गए । मंदरस्स णं पव्वयस्स चूलिआ मूले दुवालस जोयणाइं विकखंभेणं प० । जंबूदीवस्स णं दीवस्स वेइया मूले दुवालस जोयणाइं विकखंभेणं प० । सव्वजहणिया राईं दुवालसमुहुत्तिया प० । एवं दिवसोऽवि णायव्वो । सव्वट्टमिद्धस्स णं महाविमाणस्स उवरिच्छाओ थुभियग्गाओ दुवालस जोयणाइं उद्धं उप्पइआ ईसिपन्भारणामपुढवी प० । ईसिपन्भारणं णं पुढवीए दुवालस णामधेजा प०, तं०—ईसिति वा ईसिपन्भाराइ वा तणूइ वा तणूयतरि ति वा सिद्धिति वा सिद्धालए ति वा मुत्तीति वा मुत्तालए ति वा वंभे ति वा वंभवडिसए ति वा लोकपरिपूरणे ति वा लोग्गगचूलिआइ वा । इमीमे णं रयणपरभाए पुढवीए अत्थेगइयाणं णेरइयाणं चारस पलिओवमाइं ठिईं प० । पंचमीए पुढवीए अत्थेगइयाणं णेरइयाणं चारस सागरोवमाइं ठिईं प० । असुरकुमारणं देवाणं अत्थेगइयाणं चारस पलिओवमाइं ठिईं प० । सोहम्मीमाणेमु कप्पेसु अत्थेगइयाणं देवाणं चारस पलिओवमाइं ठिईं प० । लंतए

कप्ये अत्येगइयाणं देवाणं चारस सागरोवमाईं ठिईं प० । जे देवा महिंदं महिंद-
 ज्ञयं कंचुं कंबुग्गीवं पुंखं सुपुंखं महापुंखं पुंडं सुपुंडं महापुंडं णरिंदं णरिंदकंतं
 णरिंदुत्तरवड्डिगं विमाणं देवत्ताए उववण्णा तेषि णं देवाणं उक्कोसणं चारस
 सागरोवमाईं ठिईं प० । ते णं देवा चारसपहं अद्धमासाणं आणमंति वा पाणमंति
 उस्ससंति वा णीससंति वा । तेषि णं देवाणं चारसहिं वाससहस्मेहिं आहारुत्ते
 समुप्पज्जइ । संतेगइया भवसिद्धिया जीवा जे चारसहिं भवग्गहणेहिं सिग्गिस्संति
 बुद्धिस्संति मुच्चिस्संति परिणिव्वाइस्संति सव्वदुक्खाणमंतं करिस्संति ॥ १२ ॥
 तेरस किरियाठाणा प० तं०—अट्टादंडे अणट्टादंडे हिंसादंडे अकम्हादंडे दिट्ठि-
 विपरियासियादंडे मुसावायवत्तिए अदिण्णादाणवत्तिए अज्झत्थिए माणवत्तिए
 भित्तदोसवत्तिए मायावत्तिए लोभवत्तिए इरियावहिए णामं तेरसमे । सोहम्मी-
 साणेमु कप्पेसु तेरस विमाणपत्थडा प० । सोहम्मवड्डिसगे णं विमाणे णं अद्ध-
 तेरसजोयणसयसहस्साईं आयामविक्खंभेणं प० । एवं ईसाणवड्डिसगे वि । जल-
 थरपंचिंदियतिरिक्खजोणियाणं अद्धतेरसजाइकुलकोडीजोणीपमुहसयसहस्साईं प० ।
 पाणाउस्स णं पुव्वस्स तेरस वत्थू प० । गम्भवक्कंति यपंचेदियतिरिक्खजोणियाणं
 तेरसविहे पओगे प० तं०—सच्चमणपओगे मोसमणपओगे सच्चाभोसमणपओगे
 असच्चाभोसमणपओगे सच्चवइपओगे मोसवइपओगे सच्चाभोसवइपओगे असच्चाभोस-
 वइपओगे ओरालियसरीरकायपओगे ओरालियमीससरीरकायपओगे वेउच्चिय-
 सरीरकायपओगे वेउच्चियमीससरीरकायपओगे कम्मसरीरकायपओगे । सू-
 र्मंडल जोयणेणं तेरमे (स)हिं एगसट्ठिभाग (गे) हिं जोयणस्स ऊणं प० । इमीमे णं
 रयणप्पभाए पुट्टवीए अत्येगइयाणं णेरइयाणं तेरस पलिओवमाईं ठिईं प० । पंचमीए
 पुट्टवीए अत्येगइयाणं णेरइयाणं तेरस सागरोवमाईं ठिईं प० । अमुरकुमारानं
 देवाणं अत्येगइयाणं तेरस पलिओवमाईं ठिईं प० । सोहम्मीसाणेसु कप्पेसु अत्ये-
 गइयाणं देवाणं तेरस पलिओवमाईं ठिईं प० । लंतए कप्पे अत्येगइयाणं देवाणं
 तेरस सागरोवमाईं ठिईं प० । जे देवा वज्जं सुयज्जं वज्जावत्तं वज्जपभं वज्जकंतं
 वज्जवण्णं वज्जलेमं वज्जरूवं वज्जसिं गं वज्जसिट्ठं वज्जकूडं वज्जुत्तरवड्डिसगं वड्डरं वड्डा-
 वत्तं वड्डरप्पभं वड्डरकंतं वड्डरवण्णं वड्डरलेसं वड्डररूवं वड्डरसिं गं वड्डरसिट्ठं वड्डरकूडं
 वड्डरुत्तरवड्डिसगं लोमं लोमावत्तं लोमपभं लोमकंतं लोमवण्णं लोमलेसं लोमरूवं

लोगसिं गं लोगसिं डं लोगकूडं लोगुत्तरवडिसं गं विमाणं देवत्ताए उववण्णा तेसि णं देवाणं उक्कोसेणं तेरस सागरोवमाई ठिई प० । ते णं देवा तेरसहिं अद्धमासेहिं आणमंति वा पाणमंति वा उस्ससंति वा णीससंति वा । तेसि णं देवाणं तेरसहिं वाससहस्सेहिं आहारट्टे समुप्पज्झइ । संतेगइया भवसिद्धिया जीवा जे तेरसहिं भवग्गहणेहिं सिज्झिस्संति बुद्धिस्संति मुच्चिस्संति परिणिव्वाइस्संति सब्बदुक्खाणमंतं करिस्संति ॥ १३ ॥ चउद्दस भूअग्गामा प०, तं०—सुहुमा अपज्जत्तया सुहुमा पज्जत्तया बादरा अपज्जत्तया बादरा पज्जत्तया वेईदिया अपज्जत्तया वेईदिया पज्जत्तया तेंदिया अपज्जत्तया तेंदिया पज्जत्तया चउरिंदिया अपज्जत्तया चउरिंदिया पज्जत्तया पंचिंदिया असणिअपज्जत्तया पंचिंदिया असणिपज्जत्तया पंचिंदिया सणिअपज्जत्तया पंचिंदिया सणिपज्जत्तया । चउदस पुव्वा प० तं०—उप्पायपुव्वमग्गेणियं च तइयं च वीरियं पुव्वं । अत्थीणत्थि पवायं तत्तो णाणप्पवायं च ॥१॥ सच्चप्पवायपुव्वं तत्तो आयप्पवायपुव्वं च । कम्मप्पवायपुव्वं पच्चक्खत्तां भवे णव्वमं ॥२॥ विक्खाअणुप्पवायं अवंझ पाणाउ वारसं पुव्वं । तत्तो किरियविसालं पुव्वं तह त्रिंदुसारं च ॥३॥ अग्गेणीअस्स णं पुव्वस्स चउद्दस वत्थू प० । समणस्स णं भगवओ महावीरस्स चउद्दस समणसाहस्सीओ उक्कोसिया समणसंपया होत्था । कम्मविसोहिमग्गणं पडुच्च चउद्दस जीवट्ठाणा प०, तं०—मिच्छदिट्ठी सासायणसम्मदिट्ठी सम्मा-मिच्छदिट्ठी अकियसम्मदिट्ठी विरयाविरए पमत्तसंजए अप्पमत्तसंजए णियट्ठि-बायरे अणियट्ठिबायरे सुहुमसंपराए उवसामए वा खवए वा उवसंतमोहे खीण-मोहे सजोगीकेवली अजोगीकेवली । भरहेरवयाओ णं जीवाओ चउद्दस-चउद्दस जौयणमहस्साई चत्तारि य एग्गुत्तरे जौयणसए छच्च एग्गूणवीसे भागे जौयणस्स आयामंणं प० । एग्गमेग्गस्स णं रण्णो चउरंतचक्कवट्ठिस्स चउद्दस रयणा प०, तं०—इत्थीरयणे सेणावइरयणे गाहावइरयणे पुरोहियरयणे वड्डइरयणे आसरयणे हत्थि-रयणे अस्सिरयणे दंडरयणे चक्करयणे छत्तरयणे चम्मरयणे मणिरयणे काणिणिरयणे । जंघुदीवे णं दीवे चउद्दस महाणईओ पुव्वावरेणं लवणसमुद्दं समप्पेति, तं०—गंगा सिंधू रोहिया रोहिअंसः हरी हरिकंता सीया सीओया णरकंता णारिकंता सुवण्ण-कूला रूप्पकूला रत्ता रत्तवई । इमीसे णं रयणप्पभाए पुढवीए अत्थेगइयाणं णेरइयाणं चउद्दस पंलिओवमाई ठिई प० । पंचमीए णं पुढवीए अत्थेगइयाणं णेरइयाणं चउद्दस सागरोवमाई ठिई प० । असुरकुमाराणं देवाणं अत्थेगइयाणं

चउद्दस पलिओवमाई ठिई प० । सोहम्मीमाणेसु कप्पेसु अत्थेगइयाणं देवाणं
 चउद्दस पलिओवमाई ठिई प० । लंतए कप्पे देवाणं उक्कोमेणं चउद्दस सागरो-
 वमाई ठिई प० । महासुक्के कप्पे देवाणं जइण्णेणं चउद्दस सागरोवमाई ठिई प० ।
 जे देवा सिरिकंतं सिरिमहियं सिरिसोमणमं लंतयं काविट्ठं महिदं महिदकंतं महिदु-
 चरवडिंसणं विमाणं देवत्ताए उववण्णा तेसि णं देवाणं उक्कोमेणं चउद्दस सागरो-
 वमाई ठिई प० । ते णं देवा चउद्दसहिं अट्टमामेहिं आणमंति वा पाणमंति वा
 उस्समंति वा णीससंति वा । तेसि णं देवाणं चउद्दसहिं वामसहस्सेहिं आहारद्धे
 समुप्पज्जइ । संतेगइया भवसिद्धिया जीवा जे चउद्दसहिं भवगहणेहिं मिडिसंमंति
 बुद्धिसंमंति मुद्धिसंमंति परिणिव्वाइस्संति सव्वदुक्कवाणमंतं करिस्संति ॥ १४ ॥
 पण्णरस परमाहम्मिया प०, तं०—अंबे अंबरिसी चेवु, सामे सव्वले त्ति यावरे ।
 रुद्धोवसुद्धकाले य, महाकाले त्ति यावरे ॥ १ ॥ असिपत्ते धणु कुंभे, वा ७७ वेय-
 णीति य । खरस्सरे महाघोसे, एए पण्णरसाहिआ ॥ २ ॥ णमी णं अरहा पण्णर-
 धणुं उट्ठं उच्चत्तेणं होत्था । धुवराहू णं बहुलपक्कवस्स पडिवाए पण्णरसभागं पण्ण-
 रसभागेणं चंदस्स लेसं आवरेत्ताणं चिट्ठइ, तं०—पट्टमाए पट्टमं भागं बीआए
 दुभागं तइआए तिभागं चउत्थीए चउभागं पंचमीए पंचभागं छट्ठीए छभागं सत्त-
 मीए सत्तभागं अट्टमीए अट्टभागं णवमीए णवभागं दसमीए दसभागं एक्कारसीए
 एक्कारसभागं बारसीए बारसभागं तेरसीए तेरसभागं चउद्दसीए चउद्दसभागं पण्ण-
 रसेसु पण्णरसभागं । तं चेव सुक्कपक्कस्स य उवदंसेमाणे २ चिट्ठइ, तं०—पट्टमाए
 पट्टमं भागं जाव पण्णरसेसु पण्णरसभागं । छ णक्कत्ता पण्णरसमुद्दुत्तसंजुत्ता प०,
 तं०—सतभिसय भरणि अदा असलेसा साई तहा जेट्ठा । एए छण्णक्कत्ता पण्ण-
 रसमुद्दुत्तसंजुत्ता ॥१॥ चेत्तासोएसु णं मामेसु पण्णरसमुद्दुत्तो दिवसो भवइ, एवं
 चेत्तासोएसु णं मामेसु पण्णरसमुद्दुत्ता राई भवइ । विज्जाअणुप्पवायस्स णं पृथ्वस्स
 पण्णरस वत्थू पण्णत्ता । मण्णमाणं पण्णरसविहे पओगे प० तं जहा—सच्चमणपओगे
 मोसमणपओगे सच्चमोसमणपओगे असच्चामोसमणपओगे सच्चवइपओगे मोसवइप-
 ओगे सच्चमोसवइपओगे असच्चामोसवइपओगे ओरालियसरीरकायपओगे ओग-
 लियमीससरीरकायपओगे वेउद्वयपरीरकायपओगे वेउद्वियमीससरीरकायपओगे
 आहारयसरीरकायपओगे आहारयमीससरीरकायपओगे कम्मयसरीरकायपओगे ।

इमीसे णं रयणप्पभाए पुढवीए अत्थेगइयाणं णेरइयाणं पण्णरस पलिओवमाइं ठिईं प० । पंचमीए पुढवीए अत्थेगइयाणं णेरइयाणं पण्णरस सागरोवमाइं ठिईं प० । अमुरकुमारानं देवानं अत्थेगइयाणं पण्णरस पलिओवमाइं ठिईं प० । सोहम्मिसाणेसु कप्पेसु अत्थेगइयाणं देवानं पण्णरस पलिओवमाइं ठिईं प० । महासुक्के कप्पे अत्थेगइयाणं देवानं पण्णरस सागरोवमाइं ठिईं प० । जे देवा णंदं म्णंदं णंदावत्तं णंदप्पभं णंदकंतं णंदवण्णं णंदत्थेसं णंदज्जयं णंदसिगं णंदसिद्धं णंदकूडं णंदुत्तरवड्ढिसगं विमाणं देवत्ताए उववण्णा तेसि णं देवानं उक्कोमणं पण्णरस सागरोवमाइं ठिईं प० । ते णं देवा पण्णरसण्हं अद्ध-
मासाणे आणमति वा पाणमति वा उस्समति वा णीससंति वा । तेसि णं देवानं पण्णरसहिं वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे पण्णरसहिं भवगहणेहिं सिद्धिस्संति बुद्धिस्संति मुच्चिस्संति परिणिव्वाइस्संति सव्वदृक्कवाणमंतं करिस्संति ॥ १५ ॥ सोलसय गाहा सोलसगा प०, तं०—समए वेयालिए उवगगपरिण्णा इत्थीपरिण्णा णिरयविभत्ती महावीरथुईं कुसीलपरिभासिए वीरिए धम्मे समाही मग्गे सभोसरणे अहातहिए गथे जमईए गाहासोलसमे सोलसगे । सोलस कमाया प०, तं०—अणंताणुवंधी कोहे, अणंताणुवंधी माणे, अणंताणुवंधी माया, अणंताणुवंधी लोभे, अपच्चक्खाणकसाए कोहे, अपच्चक्खाण-
कसाए माणे, अपच्चक्खाणकसाए माया, अपच्चक्खाणकसाए लोभे, पच्चक्खाणा-
वरणे कोहे, पच्चक्खाणावरणे माणे, पच्चक्खाणावरणा माया, पच्चक्खाणावरणे लोभे, संजलणे कोहे, संजलणे माणे, संजलणे माया, संजलणे लोभे । मंदरस्स णं पच्चयस्स सोलस णामवेया पण्णत्ता, तं जहा—मंदर मेरु मणोरम, सुदंसण सयंपमे य निरिराया । रयणुच्चय पियदंसण, मज्जे लोगस्स णाभी य ॥१॥ अत्थे अ सूरियावत्ते, सूरियावरणे त्ति य । उत्तरे य दिसाईं य, वड्ढिंमे इय सोलसगे ॥२॥ पावस्स णं अरहओ पुरिसादाणीयस्स सोलस समणसाहस्सीओ उक्कोसिया समण-
संपदा होत्था । आयप्पवायस्स णं पुवंस्स णं सोलय वत्थू पण्णत्ता । चमरवत्तीणं ऊवारियाल्लेणे सोलस-जोयणसट्ठस्साइं आयामविकल्पेणं प० । लवणे णं समुद्दे सोलस जोयणसट्ठस्साइं उस्सेहपरिवुद्धीए पण्णत्ते । इमीसे णं रयणप्पभाए पुढवीए अत्थेगइयाणं णेरइयाण सोलस पलिओवमाइं ठिईं प० । पंचमीए पुढवीए

अत्येगइयाणं णेरइयाणं सोलस सागरोवमाइं टिईं प० । असुरकुमाराणं देवाणं
 अत्येगइयाणं सोलस पलिओवमाइं टिईं प० । सोहम्मीसाणेसु कप्पेसु अत्येगइ-
 याणं देवाणं सोलस पलिओवमाइं टिईं प० । महासुक्के कप्पे देवाणं अत्येगइयाणं
 सोलस सागरोवमाइं टिईं प० । जे देवा आवत्तं वियावत्तं णंदियावत्तं महान्दि-
 यावत्तं अंकुसं अंकुसपल्लवं भदं सुभदं महाभदं सव्वओभदं भद्दुत्तरवडिंसं विमाणं
 देवत्ताए उववण्णा तेसि णं देवाणं उक्कोसेणं सोलस सागरोवमाइं टिईं प० ।
 ते णं देवा सोलसहिं अद्दमायाणं आणमंति वा पाणमंति वा उस्ससंति वा णीम-
 संति वा । तेसि णं देवाणं सोलसवाप्तसहसंहिं आहारट्ठे समुप्पज्जइ । संतेगइया
 भवसिद्धिया जीवा जे सोलसहिं भवग्गहणेहिं मिज्झिस्सति वुज्झिस्सति मुच्चि-
 स्सति पारणिच्चाइस्सति सव्वदुक्खाणमंतं करिस्सति ॥ १६ ॥ सत्तरसविहे अमंजमे
 प० तं०—पुढवीकायअमंजमे आउकायअसंजमे तेउकायअसंजमे वाउकायअमंजमे
 वणस्सइकायअमंजमे वेइंदियअसंजमे तेइंदियअसंजमे चउरिंदियअसंजमे
 पंचिंदियअसंजमे अजीवकायअसंजमे पेहाअसंजमे उवेहाअसंजमे अवहट्टुअमंजमे
 अप्पमज्जणाअसंजमे मणअसंजमे वइअसंजमे कायअसंजमे । सत्तरसविहे संजमे
 पण्णत्ते, तं०—पुढवीकायअमंजमे आउकायअसंजमे तेउकायअसंजमे वाउकायअमंजमे
 वणस्सइकायअसंजमे वेइंदियअसंजमे तेइंदियअसंजमे चउरिंदियअसंजमे पंचिंदियअसंजमे
 अजीवकायअसंजमे पेहाअसंजमे उवेहाअसंजमे अवहट्टुअसंजमे पमज्जणाअसंजमे मणमज्जे
 वइअसंजमे कायअसंजमे । माणुसत्तरे णं पव्वए सत्तरस एकवीसे जोयणसयइ उइं
 उच्चत्तेणं प० । सव्वेसिं पि णं वेल्लधरअणुवेल्लधरणागारइणं आवासपव्वया सत्तरस
 एकवीसाइं जोयणसयाइं उइं उच्चत्तेणं प० । लवणे णं समुद्रे सत्तरस जोयणसहस्साइं
 सव्वग्गेणं प० । इमीसे णं रयणपभाए पुढवीए बहुसमरमणिज्जाओ भूमिभागाओ
 साइरेगाइं सत्तरस जोयणसस्साइं उइं उप्पत्तिता तओ पच्छा चारणाणं तिरिया
 गाइं पवत्तइ । चमरस्स णं असुरिंदस्स असुररण्णे तिगिळिकूडे उप्पायपव्वए सत्त-
 रस एकवीसाइं जोयणसयाइं उइं उच्चत्तेणं प० । बलिस्स णं असुरिंदस्स क्यगिंदे
 उप्पायपव्वए सत्तरस एकवीसाइं जोयणसयाइं उइं उच्चत्तेणं प० । सत्तरसविहे
 मरणे प०, तं०—आवीइंमरणे ओहिमरणे आर्यतियमरणे बलायमरणे वसट्टमरणे
 अंतोसल्लमरणे तन्भवमरणे बालमरणे पंडितमरणे बालपंडितमरणे छउमत्थमरणे

केवलमरणे वेहासमरणे मिद्धपिट्टमरणे भक्तपञ्चकवाणमरणे इंगिणिमरणे पाओवग-
मणमरणे । सुहुमसंपराण णं भगवं सुहुमसंपरायभावे वट्टमाणे सत्तरस कम्मपगडीओ
णिवंधइ, तं०—आभिणिबोहियणाणावरणे सुयणाणावरणे ओहिणणावरणे मणपञ्च
णाणावरणे केवलणाणावरणे चक्खुदंसणावरणे अचक्खुदंसणावरणे ओहिदंसणा-
वरणे केवलदंसणावरणे सायावेयणिञ्जं जसोक्तिणामं उचागोयं दाणंतरायं लाभंतरायं
भोगंतरायं उवभोगंतरायं वीरियअंतरायं । इमीसे णं रयणप्पभाए पुढवीए अत्थे-
गइयाणं णेरइयाणं सत्तरस पलिओवमाइं ठिई प० । पंचमीए पुढवीए अत्थेगइयाणं
णेरइयाणं उक्कोसेणं सत्तरस सागरोवमाइं ठिई प० । छट्ठीए पुढवीए अत्थेगइयाणं
णेरइयाणं जहणणेणं सत्तरस सागरोवमाइं ठिई प० । असुरकुमारारणं देवाणं अत्थे-
गइयाणं सत्तरस पलिओवमाइं ठिई प० । सोहम्मीसाणेसु कप्पेसु अत्थेगइयाणं
देवाणं सत्तरस पलिओवमाइं ठिई प० । महासुक्के कप्पे देवाणं उक्कोसेणं सत्तरस
सागरोवमाइं ठिई प० । सहसारे कप्पे देवाणं जहणणेणं सत्तरस सागरोवमाइं
ठिई प० । जे देवा सामाणं सुसामाणं महासामाणं पउमं महापउमं कुमुदं महाकुमुदं
णल्लिणं महाणल्लिणं पौडरीअं महापौडरीअं सुक्कं महासुक्कं सीहं सीहकंतं सीहवीअं
भाविअं विमाणं देवत्ताए उववण्णा तेसि णं देवाणं उक्कोसेणं सत्तरस सागरोवमाइं
ठिई प० । ते णं देवा सत्तरसहिं अद्धमासेहिं आणमंति वा पाणमंति वा उस्ससंति
वा णिसमंति वा । तेसि णं देवाणं सत्तरसहिं वाससहस्सेहिं आहारट्ठे समुप्पज्जइ ।
संतेगइया भवमिद्धिया जीवा जे सत्तरसहिं भवग्गहणेहिं सिज्झिस्संति बुज्झिस्संति
मुच्चिस्संति परिणिव्वाइस्संति संव्वदुक्खाणमंतं करिस्संति ॥ १७ ॥ अट्टारसविहे बंभे
प०, तं०—ओरालिए कामभोगे णेव सयं म्मणेणं सेवइ, णो वि अण्णं म्मणेणं सेवा-
वेइ, म्मणेणं सेवंतं पि अण्णं ण समणुजाणाइ ओरालिए कामभोगे णेव सयं वायाए
सेवइ, णो वि अण्णं वायाए सेवावेइ, वायाए सेवंतं पि अण्णं ण समणुजाणाइ,
ओरालिए कामभोगे णेव सयं काएणं सेवइ, णो वि यऽण्णं काएणं सेवावेइ, काएणं
सेवंतं पि अण्णं ण समणुजाणाइ, दिव्वे कामभोगे णेव सयं म्मणेणं सेवइ, णो वि
अण्णं म्मणेणं सेवावेइ, म्मणेणं सेवंतं पि अण्णं ण समणुजाणाइ, दिव्वे कामभोगे णेव
सयं वायाए सेवइ, णो वि अण्णं वायाए सेवावेइ, वायाए सेवंतं पि अण्णं ण
समणुजाणाइ, दिव्वे कामभोगे णेव सयं काएणं सेवइ, णो वि अण्णं काएणं
सेवावेइ, काएणं सेवंतं पि अण्णं ण समणुजाणाइ । अरहओ णं अरिद्धमेमिस्स

अट्टारस समणसाहस्सीओ उक्कोसिया समणमंपया होत्था । समणेण भगवया महा-
वीरण समणाग णिग्गधागे सखुडुय वयत्ताण अट्टारस टाणा प०, तं०—वयच्छकं
कायच्छकं, अकप्पो मिह्मिभायणं, पल्लयक णिसिद्धा य, सिणाणे सोभवच्चणं । १ ॥
आयारस्म णं भगवओ सचूलियागस्स अट्टारस पयसहस्साइं पयग्गेणं पण्णत्ताइं ।
वंभीए णं लिक्कीए अट्टारसावहे लेखविहाणं प०, तं०—वंभी जवणी लियाओसा
ऊरया खरोट्टिया खरसाविया पहाणइया उच्चत्तरिया अक्खरपुट्टि (स्थि) या
भोगवयया वेणइया णिण्हइया अंकलिवि गणियलिवि गंधवलिक्की [भुवालिक्की]
भाइंसलिक्की माहेमरीलिक्की दामिलिक्की वोल्लिदिलिक्की । अत्थणत्थिपव्वायस्म णं
पुव्वस्स णं अट्टारस वत्थू प० । धूमप्पभाए णं पुट्टवीए अट्टारसुत्तरं जोयणमयसइरसं
बाह्हेणं प० । पासासाडेणं मांसु सइ उक्कोमणं अट्टारस मुहुत्ते दिवसे भवइ
सइ उक्कोमणं अट्टारस मुहुत्ता राइं भवइ । इमीम णं रयणप्पनाए पुट्टवीए अत्यं-
गइयाणं णरइयाणं अट्टारस पल्लिओवमाइं ठिइं प० । छट्ठीए पुट्टवीए अत्यंग-
याणं णरइयाणं अट्टारस सागरोवमाइं ठिइं प० । असुरकुमारणं देवाणं अत्यंग-
याणं अट्टारस पल्लिओवमाइं ठिइं प० । सोहम्मीणाणेसु कप्पेसु अत्यंगइयाणं देवाणे
अट्टारस पल्लिओवमाइं ठिइं प० । सहस्सारे कप्पे देवाणं उक्कोमणं अट्टारस सागरो-
वमाइं ठिइं प० । आणर कप्पे देवाणं अत्यंगइयाणं जहण्णं अट्टारस सागरोवमाइं
ठिइं प० । जे देवा कालं सुकालं महाकालं अंजणं रिट्ठं सालं समाणं दुग्गं मा दुग्गं
विसालं सुसालं पउमं पउमग्गुमं कुमुदं कुमुदग्गुमं णल्लिणं णल्लिणग्गुमं पुंउरंअं
पुंउरायग्गुमं सहस्सारवडिसग विमाणं देवत्ताए उववण्णारं तेसि णं देवाणं (उक्कोमणं)
अट्टारस सागरोवमाइं ठिइं प० । ते णं देवा णं अट्टारसेहिं अद्धमासेहिं अणमंति
वा पाणमंति वा ऊमसंति वा णीससंति वा । तेसि णं देवाणं अट्टारसवामनस्वहिं
आहारट्ठे समुप्पजइ । मतेगइया भवसिद्धिया (जीया) जे अट्टारसेहिं भवग्गल्लेहिं
सिद्धिस्संति बुद्धिस्संति सुद्धिस्संति परिणिव्वाइस्सति सव्वदुकव्वाणमंतं कांस्सति
॥ १८ ॥ एग्गुणीसं णायञ्जयणा प० तं०—उक्खित्तणाए, संघाटे, अट्ठे, कुम्मं,
य सेत्थए । तुंवे य रोहणी, मल्ली, मागरी, चंदिमाइ य ॥ १ ॥ दावद्दवे, उंउग्गणाए,
मंडुक्के, तेत्तली इय । णंदिफ्फे, अवरकंका, आडण्णे, सुंममाइ य ॥ २ ॥ अवरं य
पोडरीए, णाए एग्गुणीसमे । जंतुदीवे णं दीवे सूरिआ उक्कोमणं एग्गुणीसं

जोयणसयाई उड्डमहो तवयंति । सुक्के णं महग्गहे अवरे णं उदिए समाणे एग्गूण-
वीसं णक्खत्ताईं समं चारं चरित्ता अवरेणं अत्थमणं उवागच्छइ । जंबुदीवस्स णं
दीवस्स कलाओ एग्गूणवीसं छेयणाओ प० । एग्गूणवीसं तित्थयरा अगारवासमज्जे
वसित्ता मुंडे भवित्ता णं अगाराओ अणगारियं पट्ठइआ । इमीसे णं रयणप्पभाए
पुढवीए अत्थेगइयाणं णेरइयाणं एग्गूणवीसं पलिओवमाईं ठिईं प० । छट्ठीए पुढवीए
अत्थेगइयाणं णेरइयाणं एग्गूणवीसं सागरोवमाईं ठिईं प० । असुरकुमाराणं देवाणं
अत्थेगइयाणं एग्गूणवीसं पलिओवमाईं ठिईं प० । सोहम्मीसाणेसु कप्पेसु अत्थेगइ-
याणं देवाणं एग्गूणवीसं पलिओवमाईं ठिईं प० । आणयक्कप्पे [अत्थेगइयाणं]
देवाणं उक्कोसेणं एग्गूणवीसं सागरोवमाईं ठिईं प० । पाणए कप्पे [अत्थेगइयाणं]
देवाणं जहण्णेणं एग्गूणवीसं सागरोवमाईं ठिईं प० । जे देवा आणतं पाणतं णतं
विणतं घणं सुसिरं इंदं इंदोक्तं इंदुत्तरवड्डिसगं विमाणं देवत्ताए उववण्णा तेसि णं
देवाणं उक्कोसेणं एग्गूणवीसं सागरोवमाईं ठिईं प० । ते णं देवा एग्गूणवीसाए
अद्धमासाणं आणमंति वा पाणमंति वा उस्ससंति वा णीससंति वा । तेसि णं
देवाणं एग्गूणवीसाए वीससहस्सेहिं आहारट्ठे समुप्पज्जइ । संतेगइया भवसिद्धिया
जीवा जे एग्गूणवीसाए भवग्गहणेहिं सिज्झिस्संति बुज्झिस्संति मुच्चिस्संति परिणिव्वा-
इस्संति सव्वदुक्खाणं अंतं करिस्संति ॥ १९ ॥ वीसं असमाहिठाणा प० तं०—
दवदवचारि यावि भवइ, अपमज्जियचारि यावि भवइ, दुप्पमज्जियचारि यावि
भवइ, अइरित्तसेज्जासणिए, राइणियपरिभासी, थेरोवघाइए, भूओवघाइए, संज-
लणे कोहणे, पिट्ठिमंसिए, अभिक्खणं अभिक्खणं ओहारइत्ता भवइ, णवाणं
अधिकरणाणं अणुप्पण्णाणं उप्पाएत्ता भवइ, पोरानाणं अधिकरणाणं खामियवि-
उसवियाणं पुणोदीरेत्ता भवइ, ससरक्खपाणिपाए, अकालसज्जायकारए यावि
भवइ, कलहकरे, सहकरे, झंझकरे, सूरप्पमाणभोईं, एसणाऽसमिए यावि भवइ ।
मुणिसुव्वए णं अरहा वीसं घणूइं उड्डं उच्चत्तेणं होत्था । सव्वेऽविअ णं षणोदही
वीसं जोयणसहस्साईं ब्राह्मेणं पणत्ताओ । पाणयस्स णं देविंदस्स देवरण्णे वीसं
सामाणियसाहस्सीओ पणत्ताओ । णपुंसयवेयणिज्जस्स णं कम्मस्स वीसं सागरो-
वमकोडाकोडीओ बंधओ बंधठिईं प० । पच्चक्खाणस्स णं पुव्वस्स वीसं वत्थू प० ।
उत्सप्पिणोसोसप्पिणिमंडले वीसं सागरोवमकोडाकोडीओ काले पणत्तो । इमीसे
णं रयणप्पभाए पुढवीए अत्थेगइयाणं णेरइयाणं वीसं पलिओवमाईं ठिईं प० ।

छट्ठीए पुढवीए अत्येगइयाणं णेरइयाणं वीसं सागरोवमाइं ठिईं प० । असुर-
कुमारणं देवाणं अत्येगइयाणं वीसं पलिओवमाइं ठिईं प० । सोहम्मीसणेषु
कप्पेषु अत्येगइयाणं देवाणं वीसं पलिओवमाइं ठिईं प० । पाणते कप्पे देवाणं
उक्कोसेणं वीसं सागरोवमाइं ठिईं प० । आरणे कप्पे देवाणं जहण्णेणं वीसं सागरो-
वमाइं ठिईं प० । जे देवा सायं विसायं सुविसायं सिद्धत्थं उप्पलं भित्तिलं तिणिच्छं
दिसासोवत्थियं पल्लं रुइलं पुप्फं सुपुप्फं पुप्फावत्तं पुप्फपभं पुप्फकतं पुप्फवणं
पुप्फलेसं पुप्फज्जयं पुप्फसिगं पुप्फसिद्धं पुप्फुत्तरवडिसगं विमाणं देवत्ताए उववणा
तेसि णं देवाणं उक्कोसेणं वीसं सागरोवमाइं ठिईं प० । ते णं देवा वीसाए अद्द-
मासाणं आणमंति वा पाणमंति वा उस्संसंति वा णीसंसंति वा । तेसि णं देवाणं
वीसाए वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे
वीसाए भवग्गहणेहिं सिद्धिस्संसंति बुद्धिस्संसंति मुच्चिस्संसंति परिणिव्वाइस्संसंति सव्व-
दुक्खाणमंतं करिस्संसंति ॥ २० ॥ एकवीसं सब्बे प० तं—हत्थकम्मं करेमाणे
सब्वे, मेहुणं पडिसेवमाणे सब्वे, राइभोयणं भुंजमाणे सब्वे, आहाकम्मं भुंजमाणे
सब्वे, सागारियं पिंडं भुंजमाणे सब्वे, उदेसियं कीयं वा पामिच्चं वा अच्छिज्जं वा
अणिसिद्धं वा आहट्टु दिज्जमाणं भुंजमाणे सब्वे, अभिक्खणं अभिक्खणं पडिया-
इक्खेत्ता णं भुंजमाणे सब्वे, अंतो छण्हं मासाणं गणाओ गणं संकममाणे सब्वे,
अंतो मासस्स तओ दगलेवे करेमाणे सब्वे, अंतो मासस्स तओ माइंठाणे सेवमाणे
सब्वे, रायपिंडं भुंजमाणे सब्वे, आउट्टियाए पाणाइवायं करेमाणे सब्वे, आउ-
ट्टियाए मुसावायं वयमाणे सब्वे, आउट्टियाए अदिण्णादाणं शिण्हमाणे सब्वे,
आउट्टियाए अणंतरहियाए पुढवीए ठाणं वा णिसीहियं वा चेएमाणे सब्वे,
आउट्टियाए ससणिद्धाए पुढवीए ससरक्खाए पुढवीए ठाणं वा णिसीहियं वा
चेएमाणे सब्वे, आउट्टियाए चित्तमंताए पुढवीए चित्तमंताए सिद्धाए चित-
मंताए लेट्टए कोलावाससि वा दाए जीवपइट्टिए सअंडे सपाणे सब्वे, सहरिए
सउत्तिंसे पणगदग्गमट्टीमक्कडासंताणए तहप्पगारे ठाणं वा सिज्जं वा णिसीहियं वा
चेएमाणे सब्वे, आउट्टियाए मूलभोयणं वा कंदभोयणं वा खंधभोयणं वा तथा-
भोयणं वा पवालभोयणं वा पत्तभोयणं वा पुप्फभोयणं वा फलभोयणं वा
वीयभोयणं वा हरियभोयणं वा भुंजमाणे सब्वे, अंतो संवच्छरस्स दस दगलेवे
करेमाणे सब्वे, अंतो संवच्छरस्स दस माइंठाणाइं सेवमाणे सब्वे, आउट्टियाए

सीओदयत्रियडवग्वारियहृत्येण वा ४ असणं वा पाणं वा खाइमं वा साइमं वा पडि-
गाहित्ता भुंजमाणे संबले । णियट्टिवायरस्स णं खवियसत्तयस्स मोहणिज्जस्स कम्मस्स
एक्कवीस कम्मंसा संतकम्मा प० तं जहा—अपच्चक्खाणकसाए कोहे, अपच्चक्खा-
णकसाए माणे, अपच्चक्खाणकसाए माया, अपच्चक्खाणकसाए लोभे, पच्चक्खा-
णावरणकसाए कोहे, पच्चक्खाणावरणकसाए भाणे, पच्चक्खाणावरणकसाए माया,
पच्चक्खाणावरणकसाए लोभे, संजलणकसाए कोहे, संजलणकसाए माणे, संज-
लणकसाए माया, संजलणकसाए लोभे, इत्थिवेए, पुंवेए, णपुंवेए, हासे, अरइ,
रइ, भय, सोग, दुगुंछा । एकमेक्काए णं ओसप्पिणीए पंचमडट्टाओ समाओ एक्क-
वीसं एत्तं कवीसं वाससहस्साइं कालेणं प० तं०—दूसमा दूसमदूसमा । एगमे-
गाए णं उस्तप्पिणीए पढमच्चिइयाओ समाओ एक्कवीसं एक्कवीसं वाससहस्साइं
कालेणं प० तं०—दूसमदूसमाए दूसमाए य । इमीसे णं रयणप्पभाए पुढवीए
अत्येगइयाणं णेरइयाणं एक्कवीसपलिओवमाइं ठिईं प० । छट्ठीए पुढवीए
अत्येगइयाणं णेरइयाणं एक्कवीससागरोवमाइं ठिईं प० । असुरकुमारणं देवाणं
अत्येगइयाणं एगवीसपलिओवमाइं ठिईं प० । सोहम्मीसाणेसु कप्पेसु अत्येगइ-
याणं देवाणं एक्कवीसं पलिओवमाइं ठिईं प० । भारणे कप्पे देवाणं उक्कोसेणं
एक्कवीसं सागरोवमाइं ठिईं प० । अच्चुए कप्पे देवाणं जहण्णेणं एक्कवीसं
सागरोवमाइं ठिईं प० । जे देवा सिरिवच्छं सिरिदामकंडं मल्लं किट्ठं चावोण्यं
अरण्यवडिसगं विमाणं देवत्ताए उववण्णा तेसि णं देवाणं उक्कोसेणं एक्कवीसं
सागरोवमाइं ठिईं प० । ते णं देवा एक्कवीसाए अद्धमासाणं आणमंति वा
पाणमंति वा उस्ससंति वा णीससंति वा । तेसि णं देवाणं एक्कवीसाए वाससहस्सेहिं
आहारट्टे समुप्पज्जइ । संतेगइया भवसिद्धिया जीवा जे एक्कवीसाए भवग्गहणेहिं
सिज्जिस्संसंति बुज्जिस्संसंति मुच्चिस्संसंति परिणिव्वाइस्संसंति सव्वदुक्खाणमंतं करिस्संसंति
॥ २१ ॥ बावीसं परोसहा प० तं जहा—दिगिंछापरोसहे, पिवासापरोसहे, सीय-
परोसहे, उस्सिणपरोसहे, दंसमसगपरोसहे, अचेलपरोसहे, अरइपरोसहे, इत्थी-
परोसहे, चरियापरोसहे, णिसीहियापरोसहे, सिज्जापरोसहे अक्कोसपरोसहे, वहपरी-
सहे, जायणापरोसहे, अलाभपरोसहे, रोगपरोसहे, तणफासपरोसहे, जल्लपरोसहे,
सक्कारपुरक्कारपरोसहे, पण्णापरोसहे, अण्णाणपरोसहे, दंसणपरोसहे । दिट्ठिवायस्स
णं बावीसं सुत्ताइं छिण्णछेयणइयाइं ससमयसुत्तपरिवाडीए बावीसं सुत्ताइं अछि-

ण्णत्थेयणइयाइं आजीवियमुत्तपरिवाडीए । बावीसं सुत्ताइं तिकणइयाइं तेरासिअ-
सुत्तपरिवाडीए । बावीसं सुत्ताइं चउक्कणइयाइं ससमयमुत्तपरिवाडीए । बावीसविहे
पोग्गलपरिणामे प० तं०—कालवण्णपरिणामे, णीलवण्णपरिणामे, लोहियवण्णपरिणामे,
हालिद्ववण्णपरिणामे, सुक्खिद्ववण्णपरिणामे, सुब्भिमंगंधपरिणामे, दुब्भिमंगंधपरिणामे,
तित्तरसपरिणामे, कड्डुयरसपरिणामे, कसायरसपरिणामे, अंबिलरसपरिणामे, महुर-
रसपरिणामे, कम्बडफासपरिणामे, मउयफासपरिणामे, गुरुफासपरिणामे, लहुफास-
परिणामे, सीयफासपरिणामे, उसिणफासपरिणामे, णिडफासपरिणामे, लुक्खफासपरि-
णामे, अगुरुलहुफासपरिणामे, गुरुलहुफासपरिणामे । इमीसे णं रयणप्पभाए पुट्ट-
वीए अत्थेगइयाणं णेरइयाणं बावीसं पल्लिओवमाइं ठिईं प० । छट्ठीए पुट्टवीए
(णेरइयाणं) उक्कोसेणं बावीसं सागरोवमाइं ठिईं प० । अहेसत्तमाए पुट्टवीए
[अत्थेगइयाणं] णेरइयाणं जहण्णेणं बावीसं सागरोवमाइं ठिईं प० । असुरकुमाराणं
देवाणं अत्थेगइयाणं बावीसं पल्लिओवमाइं ठिईं प० । सोहम्मीसाणेसु कप्पेसु अत्थे-
गइयाणं देवाणं बावीसं पल्लिओवमाइं ठिईं प० । अच्चुए कप्पे देवाणं (उक्कोसेणं)
बावीसं सागरोवमाइं ठिईं प० । हेट्टिमहेट्टिमगेवेज्जयाणं देवाणं जहण्णेणं बावीसं
सागरोवमाइं ठिईं प० । जे देवा महियं त्रिसूहियं विमलं पभासं वणमालं अच्चुय-
वड्डिसगं विमाणं देवत्ताए उववण्णा तेषि णं देवाणं उक्कोसेणं बावीसं सागरोवमाइं
ठिईं प० । ते णं देवा बावीसाए अट्टमासाणं आणमंति वा पाणमंति वा उस्स-
संति वा णीससंति वा । तेषि णं देवाणं बावीसवाससहस्सेहिं आहारट्टे समुप्पज्जइ ।
संतेगइया भवसिद्धिया जीवा जे बावीसं भवरगहणेहिं सिञ्चिस्संति सुञ्चिस्संति
मुच्चिस्संति परिणिव्वाइस्संति सव्वदुक्खणमंतं करिस्संति ॥ २२ ॥ तेवीसं सुयगड-
ज्जयणा प० तं०—समए, वेयाल्लिए, उवसरगपरिण्णा, थीपरिण्णा, णरयविभत्ती,
महावीरथुई, कुसीलपरिभासिए, वीरिए, धम्मे, समाही, मग्गे, समोसरणे, आह-
त्तहिए, गंधे, जमईए, गाथा, पुंडरीए, किरियाठाणा, आहारपरिण्णा, [अ]
प्पच्चक्खणकिरिया, अणमारसुयं, अहइज्जं, णालंदइज्जं । जंबुद्वीवे णं दीवे भारहे
वासे इमीसे णं ओसण्णिणीए तेवीसाए जिणाणं सूरग्गमणमुहुत्तंसि केवलवरणाण-
दंसणे समुप्पपण्णे । जंबुद्वीवे णं दीवे इमीसे णं ओसण्णिणीए-तेवीसं तित्थयरा
पुव्वभवे एक्कारसंगिणो होत्था, तं जहा— अजित संभव अभिणंदण सुमई जाव

पासो वद्धमाणो य, उसमे णं अरहा कोसलिए चोइसपुव्वी होत्था । जंबुदीवे णं दीवे इमीसे ओसप्पिणीए तेवीसं तित्थयरा पुव्वभवे मंडलियरायाणो होत्था, तं जहा—अजित संभव अभिणंदण जाव पासो वद्धमाणो य, उसमे णं अरहा कोस-
 लिए पुव्वभवे चक्रवर्ती होत्था । इमीसे णं रयणप्पभाए पुढवीए अत्थेगइयाणं
 णेरइयाणं तेवीसं पलिओवमाइं ठिईं प० । अहेसत्तमाए णं पुढवीए अत्थे-
 गइयाणं णेरइयाणं तेवीसं सागरोवमाइं ठिईं प० । असुरकुमाराणं देवाणं अत्थे-
 गइयाणं तेवीसं पलिओवमाइं ठिईं प० । सोहम्मीसाणाणं देवाणं अत्थेगइयाणं
 तेवीसं पलिओवमाइं ठिईं प० । हेट्टिममज्झिमगेविज्जाणं देवाणं जहण्णेणं तेवीसं
 सागरोवमाइं ठिईं प० । जे देवा हेट्टिमहेट्टिमगेवेज्जयविमाणेसु देवत्ताए उववण्णा
 तेषि णं देवाणं उक्कोसेणं तेवीसं सागरोवमाइं ठिईं प० । ते णं देवा तेवीसाए
 अद्धमासाणं (मासेहिं) आणमंति वा पाणमंति वा ऊससंति वा णीससंति
 वा । तेषि णं देवाणं तेवीसाए वाससहस्तेहिं आहारट्ठे समुप्पज्जइ । संतेगइया
 भवसिद्धिया जीवा जे तेवीसाए भवग्गहणेहिं सिज्झिस्संति बुज्झिस्संति मुच्चिस्संति
 परिणिव्वाइस्संति सव्वंदुक्खाणमंतं करिस्संति ॥२३॥ चउव्वीसं देवाहिदेवा प० तं
 जहा—उसभअजितसंभवअभिणंदणसुमइपउमप्पहसुपासचंदप्पहसुविधिसीयलसिक्कं-
 वासुपुज्जविमलअणंतधम्मसंतिकुंधुअरमल्लीमुणिसुव्वयणमिणेमीपासवद्धमाणा । चुल-
 हिमवंतसिहरीणं वासहरपव्वयाणं जीवाओ चउव्वीसं चउव्वीसं जोयणसहस्साइं
 णववत्तीसे जोयणसए एगं अट्टत्तीसइभागं जोयणस्स किंचि विसेसाहियाओ आया-
 मेणं प० । चउव्वीसं देवठाणा सइंदया प० सेसा अहमिंदा अणिंदा अपुरोहिया ।
 उत्तरायणगए णं सूरिए चउव्वीसंगुलियं पोरिसिच्छायं णिव्वत्तइत्ता णं णिअट्टइ ।
 गंगासिंधूओ णं महाणईओ पवाहे साइरेगेणं चउव्वीसं कोसे वित्थारेणं प० ।
 रत्तारत्तवईओ णं महाणईओ पवाहे साइरेगे चउव्वीसं कोसे वित्थारेणं प० ।
 इमीसे णं रयणप्पभाए पुढवीए अत्थेगइयाणं णेरइयाणं चउव्वीसं पलिओवमाइं ठिईं
 प० । अहेसत्तमाए पुढवीए अत्थेगइयाणं णेरइयाणं चउव्वीसं सागरोवमाइं ठिईं
 प० । असुरकुमाराणं देवाणं अत्थेगइयाणं चउव्वीसं पलिओवमाइं ठिईं प० ।
 सोहम्मीसाणेसु कप्पेसु अत्थेगइयाणं देवाणं चउव्वीसं पलिओवमाइं ठिईं प० ।
 हेट्टिमउवरिमगेविज्जाणं देवाणं जहण्णेणं चउव्वीसं सागरोवमाइं ठिईं प० । जे देवा

हेट्टिममञ्जिमगेवेज्जयविमाणेसु देवत्ताए उववण्णा तेसि णं देवाणं उक्कोसेण चउवीसं सागरोवमाईं ठिईं प० । ते णं देवा चउवीसाए अडमासाणं आणमंति वा पाणमंति वा ऊससंति वा णीससंति वा । तेसि णं देवाणं चउवीसाए वाससहस्सेहिं आहारट्ठे समुपपज्जइ । संतेगइया भवसिद्धिया जीवा जे चउवीसाए भवग्गहणेहिं सिञ्जिस्संति युञ्जिस्संति मुच्चिस्संति परिणिव्वाइस्संति सब्बदुक्खाणमंतं करिस्संति ॥ २४ ॥ पुरिमपच्छिमगाणं तित्थगराणं पंचजामस्स पणवीसं भावणाओ प० तं०—इरियासमिई, मणगुत्ती, वयगुत्ती, आलोयभायणभोयणं, आदानभंडमत्तणिकखेवणासमिई, अणुवीइभासणया, कोहेविवेगे, लोभविवेगे, भयविवेगे, हासविवेगे, उग्गहअणुणवणया, उग्गहसीमजाणया, सयमेव उग्गहं अणुणिणया, साहम्मियउग्गहं अणुणविय परिभुजणया, साहारणभत्तपाणं अणुणविय पडिभुजणया, इत्थीपसुपंडगसंसत्तगसयणासगवज्जणया, इत्थीकहवियज्जणया, इत्थीणं इंदियाणमालोयणवज्जणया, पुत्तवयपुब्बकालियाणं अणुसरणया, पणीताहारवियज्जणया, सोईंदियरागोवरईं, चर्किंखदियरागोवरईं, घाणिंदियरागोवरईं, जिडिभदियरागोवरईं, फासिंदियरागोवरईं । मल्ली णं भरहा पणवीसं घणुइं उड्डं उच्चत्तेणं होत्थ । सब्बेवि दीहवेयहूपन्नया पणवीसं जोयणाणि उड्डं उच्चत्तेणं पण्णत्ता पणवीसं पणवीसं गाउयाणि उव्विद्धेणं प० । दोच्चाए णं पुट्टवीए पणवीसं णिरयावाससयसहस्सा पण्णत्ता । आयासस्स णं भगवओ सच्चूलिआयस्स पणवीसं अज्झयणा पण्णत्ता, तं०—सत्थपरिण्णा लोगविजओ सीओसणीअ सम्मत्तं । आवंति धुय विमोह उवहाणसुयं महपरिण्णा । पिंडेसण सिञ्जिरिआ भासज्झयणा य वत्थ पाएसा । उग्गहपडिमा सत्तिकसत्तया भावण विमुत्ती । णिसीहज्झयणं पणवीसइमं । मिच्छादिट्ठि विगलिंदिए णं अपज्जत्तए णं संकिलिद्धपरिणामे णामस्स कम्मस्स पणवीसं उत्तरपयडीओ णिंधंइ तिरियगइणामं विगलिंदियजाइणामं ओरालियसरीरणामं तेअगसरीरणामं कम्मणसरीरणामं हुंडगसंठाणणामं ओरालियसरीरणोवंगणामं छेवट्टसंधयणणामं वण्णणामं गंधणामं रसणामं फासणामं तिरियाणुपुविणामं अगुरुलहुणामं उवघायणामं तसणामं चादरणामं अपज्जत्तयणामं पत्तेयसरीरणामं अथिरणामं असुभणामं दुअगणामं अणादेज्जणामं अजसोक्कित्तिणामं णिम्माणणामं । गंगासिंधूओ णं महाणईओ पणवीसं गाउयाणि पुहुत्तेणं दुहओ घडमुहपवित्तिएणं मुत्तावल्लिहारसंठिएणं

पवाएण पडंति । रत्तारत्तवईओ णं महाणईओ पणवीसं गाउयाणि पुहुत्तेणं मकर
 (धड) मुहपवित्तिंएणं मुत्तावलिहारसंठिएणं पवाएण पडंति । लोगच्चिदुसारस्स णं
 पुव्वस्स पणवीसं वत्थू प० । इमीसे णं रयणप्पभाए पुढवीए अत्थेगइयाणं णेरइयाणं
 पणवीसं पलिओवमाइं ठिई प० । अहे सत्तमाए पुढवीए अत्थेगइयाणं णेरइयाणं
 पणवीसं सागरोवमाइं ठिई प० । असुरकुमारारणं देवाणं अत्थेगइयाणं पणवीसं
 पलिओवमाइं ठिई प० । सोहम्मीसाणे णं देवाणं अत्थेगइयाणं पणवीसं पलिओ-
 वमाइं ठिई प० । मज्झिमहेट्ठिमगेवेज्जाणं देवाणं जहण्णेणं पणवीसं सागरोवमाइं
 ठिई प० । जे देवा हेट्ठिमउवरिमगेवेज्जगविमाणेसु देवत्ताए उववण्णा तेसि णं
 देवाणं उक्कोसेणं पणवीसं सागरोवमाइं ठिई प० । ते णं देवा पणवीसाए अद्ध-
 मासेहिं आणमंति वा पाणमंति वा उस्ससंति वा णीससंति वा । तेसि णं देवाणं
 पणवीसं वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे पण-
 वीसाए भवग्गणेहिं सिज्झिस्संति बुज्झिस्संति मुच्चिस्संति परिणिव्वाइस्संति सव्व-
 दुक्ख्वाणमंतं करिस्संति ॥ २५ ॥ छव्वीसं दसकप्पववहारारणं उहेसणकाला प०, तं०-
 दस दसाणं छ कप्पस्स दस ववहारस्स । अभवसिद्धियाणं जीवाणं मोहणिज्जस्स
 कम्मस्स छव्वीसं कम्मंसा संतकम्मा प०, तं०—मिच्छत्तमोहणिज्जं सोलस कसाया
 इत्थीवेए पुरिसवेए णंपुंसकवेए हासं अरइ रइ भयं सोगं दुगुञ्जा । इमीसे णं
 रयणप्पभाए पुढवीए अत्थेगइयाणं णेरइयाणं छव्वीसं पलिओवमाइं ठिई प० ।
 अहे सत्तमाए पुढवीए अत्थेगइयाणं णेरइयाणं छव्वीसं सागरोवमाइं ठिई प० ।
 असुरकुमारारणं देवाणं अत्थेगइयाणं छव्वीसं पलिओवमाइं ठिई प० । सोहम्मीसाणे
 णं देवाणं अत्थेगइयाणं छव्वीसं पलिओवमाइं ठिई पण्णत्ता । मज्झिममज्झिमगेवेज्ज-
 याणं देवाणं जहण्णेणं छव्वीसं सागरोवमाइं ठिई प० । जे देवा मज्झिमहेट्ठिमगेवेज्ज-
 विमाणेसु देवत्ताए उववण्णा तेसि णं देवाणं उक्कोसेणं छव्वीसं सागरोवमाइं ठिइ
 प० । ते णं देवा छव्वीसाए अद्धमासेहिं आणमंति वा पाणमंति वा उस्ससंति वा
 णीससंति वा । तेसि णं देवाणं छव्वीसं वाससहस्सेहिं आहारट्ठे समुप्पज्जइ । संतेगइया
 भवसिद्धिया जीवा जे छव्वीसेहिं भवग्गहणेहिं सिज्झिस्संति बुज्झिस्संति मुच्चिस्संति
 परिणिव्वाइस्संति सव्वदुक्ख्वाणमंतं करिस्संति ॥ २६ ॥ सत्तावीसं अणमरगुणा प० तं०-
 पाणाइवायाओ वेरमणं, मुसावायाओ वेरमणं, अदिण्णदाणाओ वेरमणं, मेहुणाओ

वेरमणं, परिग्गहाओ वेरमणं, सोइदियणिग्गहे, चक्खिन्दियणिग्गहे, धामिन्दिय-
 णिग्गहे, जिम्भिन्दियणिग्गहे, फासिन्दियणिग्गहे, कोहविवेगे, माणविवेगे, माया-
 विवेगे, लोभविवेगे, भावसञ्चे, करणसञ्चे, जोगसञ्चे, खमा, विरागया, मणसमाहरणया,
 वयसमाहरणया, कायसमाहरणया, णाणसंपण्णया, दंसणसंपण्णया, चरित्तसंपण्णया,
 वेयणअहियासणया, मारणंतियअहियासणया । जंबुद्वीवे दीवे अभिइवज्जेहिं सत्तावी-
 साए णक्खत्तेहिं संबवहारे वट्टइ । एगमेगे णं णक्खत्तमासे सत्तावीसाहिं राइंदि-
 याहिं राइंदियग्गेणं प० । सोहम्मीसाणेसु कप्पेसु विमाणपुट्टवी सत्तावीसं जोयणमयाइं
 ब्राह्मणेणं पण्णत्ता । वेयगसम्मत्तबोधोवरयस्स णं मोहणिज्जस्स कम्मस्स सत्तावीसं
 उत्तरपयडीओ संतकम्मंसा प० । सावणसुद्धसत्तमीसु णं सूरिए सत्तावीसंमुत्ताये
 पोरिसिच्छायं गिच्चत्तइत्ता णं दिवसत्तेत्तं गियट्टेमाणे रयणित्तेत्तं अभिणिवट्टमाणे
 चारं चरइ । इमीसे णं रयणप्पमाए पुट्टवीए अत्थेगइयाणं णेरइयाणं सत्तावीसं
 पल्लिओवमाइं ठिई प० । अहे सत्तमाए पुट्टवीए अत्थेगइयाणं णेरइयाणं सत्तावीसं
 सागरोवमाइं ठिई प० । असुरकुमाराणं देवाणं अत्थेगइयाणं सत्तावीसं पल्लि-
 ओवमाइं ठिई प० । सोहम्मीसाणेसु कप्पेसु अत्थेगइयाणं देवाणं सत्तावीसं
 पल्लिओवमाइं ठिई प० । मज्झिमउवरिमगेवेज्जयाणं देवाणं जहण्णेणं सत्तावीसं
 सागरोवमाइं ठिई प० । जे देवा मज्झिममज्झिमगेवेज्जयविमाणेसु देवत्ताए
 उववण्णा तेसि णं देवाणं उक्कोसेणं सत्तावीसं सागरोवमाइं ठिई प० । तं णं देवा
 सत्तावीसाए अद्धमासेहिं आणमंति वा पाणमंति वा उस्ससंति वा णीससंति वा ।
 तेसि णं देवाणं सत्तावीसवाससहस्सेहिं आहारट्टे समुप्पज्जइ । संतेगइया भवसिद्धिया
 जीवा जे सत्तावीसाए भवग्गहणेहिं सिज्झिस्संति बुज्झिस्संति मुच्चिस्संति परिणिव्वाइ-
 स्संति सव्वदुक्खाणमंतं करिस्संति । २७अट्ठावीसविहे आयारपकप्पे प०, तं०—मासिया
 आरोवणा, संपंचराईमासिया आरोवणा, सदसराइमासिया आरोवणा, (सपण्णरम-
 राइमासिया आरोवणा, सबीसइगइमासिया आरोवणा, संपंचवीसराइमासिया आरो-
 वणा) एवं चैव दामासिया आरोवणा, संपंचराईदोमासिया आरोवणा, एवं तिम-
 सिया आरोवणा, चउमासिया आरोवणा, उववाइया आरोवणा, अणुवघाइया
 आरोवणा, कसिणा आरोवणा, अकसिणा आरोवणा, एतावताक्कआयारपकप्पे एताव-
 ताव आयारियव्वे । भवसिद्धियाणं जीवाणं अत्थेगइयाणं मोहणिज्जस्स कम्मस्स अट्ठा-

वीसं कम्मंसा संतकम्मा प० तं०—सम्मत्तवेयणिज्जं मिच्छत्तवेयणिज्जं सम्ममिच्छ-
 त्तवेयणिज्जं सोरुस कसाथा णव गोकसाया । आभिणित्रोहियणाणे अट्टावीसइविहे
 प० तं० सोईदियअत्थावग्गहे, चक्खिदियअत्थावग्गहे, घाणिंदियअत्थावग्गहे,
 जिंभिंदियअत्थावग्गहे, फासिंदियअत्थावग्गहे, णोईदियअत्थावग्गहे, सोईदिय-
 वंजणोग्गहे, घाणिंदियवंजणोग्गहे, जिंभिंदियवंजणोग्गहे, फासिंदियवंजणोग्गहे,
 सोईदियईहा, चक्खिंदियईहा, घाणिंदियईहा, जिंभिंदियईहा, फासिंदियईहा,
 णोईदियईहा, सोईदियावाए, चक्खिंदियावाए, घाणिंदियावाए, जिंभिंदियावाए,
 फासिंदियावाए, णोईदियावाए, सोईदियधारणा, चक्खिंदियधारणा, घाणिंदिय-
 धारणा, जिंभिंदियधारणा, फासिंदियधारणा, णोईदियधारणा । ईसाणे णं कप्पे अट्टा-
 वीसं विमाणानाससयसहस्सा प० । जीवे णं देवगई बंधमाणे णामस्स कम्मस्स अट्टा-
 वीसं उत्तरपयडीओ णिबंधइ, तं०—देवगइणामं, पंचिंदियजाइणामं, वेउव्वियसरी-
 रणामं, तेययसरीरणामं, कम्मणसरीरणामं, समचउरंसंठाणणामं, वेउव्वियसरीरंगोवं-
 गणामं, वण्णणामं, गंधणामं, रसणामं, फासणामं, देवानुपुड्विणामं, अगुरुल-
 हुणामं, उवघायणामं, पराघायणामं, उस्सासणामं पसत्थविहायोगइणामं, तसणामं,
 बायरणामं, पब्बत्तणामं, पत्तेयसरीरणामं, थिराथिराणं सुभासुभणं (सुभगणामं,
 सुस्सरणामं), आएज्जाणएज्जाणं दोण्हं अण्णयरं एगं णामं णिबंधइ, जसोक्कित्तिणामं,
 णिम्माणणामं । एवं चेव णेरइया वि, णाणत्तं अप्पसत्थविहायोगइणामं हुंडगसंठाण-
 णामं, अथिरणामं, दुब्भगणामं, असुभणामं दुस्सरणामं, अणादिज्जणामं, अजसो-
 क्कित्तीणामं, णिम्माणणामं । इमीत्ते णं रयणप्पभाए पुढवीए अत्थेगइयाणं णेरइयाणं
 अट्टावीसं पलिओवमाई ठिई प० । अहे सत्तमाए पुढवीए अत्थेगइयाणं णेरइयाणं
 अट्टावीसं सागरोवमाई ठिई प० । असुरकुमारणं देवाणं अत्थेगइयाणं अट्टावीसं
 पलिओवमाई ठिई प० । सोहम्मीसाणेसु कप्पेसु देवाणं अत्थेगइयाणं अट्टावीसं
 पलिओवमाई ठिई प० । उवरिमहेट्टिमगेवेज्जएणं देवाणं जहण्णेणं अट्टावीसं सागरो-
 वमाई ठिई प० जे देवा ढज्झिमउवरिमगेवेज्जएणं विमाणेसु देवत्ताए उववण्णा
 तेसि णं देवाणं उक्कोसेणं अट्टावीसं सागरोवमाई ठिई प० । ते णं देवा अट्टावी-
 साए अट्टमासेहिं आणमंति वा पाणमंति वा ऊससंति वा णीससंति वा । तेसि णं
 देवाणं अट्टावीसाए वाससहस्सेहिं आहारट्टे समुप्पज्जइ । संतेगइया भवसिद्धिया

जीवा जे अट्टावीसाए भवग्गहणेहिं सिद्धिस्संति बुद्धिस्संति मुच्चिस्संति परिणिब्बा-
इस्संति सव्वदुक्खाणमंतं करिस्संति ॥ २८ ॥ एगूणतीसइविहे पावसुयपसंणे
णं प० तं० भोमे, उप्पाए, सुमिणे, अंतरिकखे, अंगे, सरे, वंजणे, लवखणे, भोमे
तिविहे प० तं०-सुत्ते वित्ती वत्तिण, एवं एक्केकं तिविहं, विकहाणुजोगे, विजाणु-
जोगे, मंताणुजोगे, जोगाणुजोगे, अण्णतित्थियपवत्ताणुजोगे । आसाडे णं मासे
एगूणतीसराइंदियाइं राइंदियग्गेणं पण्णत्ते । (एवं चेव) भद्दए णं मासे ।
कत्तिण णं मासे । पोसे णं मासे । फग्गणे णं मासे । वइसाहे णं मासे । चंददिणे
णं एगूणतीसं मुहुत्ते साइरेगे मुहुत्तग्गेणं प० । जीवे णं पसत्थऽज्जवसाणजुत्ते
भविण सम्मदिट्ठी तिथकरणमसहियाओ णामस्स णियमा एगूणतीसं उत्तरपय-
डीओ गिवंघित्ता वेमाणिएसु देवेषु देवत्ताए उववञ्जइ । इमीसे णं रयणप्पभाए
पुढवीए अत्थेगइयाणं णेरइयाणं एगूणतीसं पलिओवमाइं ठिई प० । अहे सत्तमाए
पुढवीए अत्थेगइयाणं णेरइयाणं एगूणतीसं सागरोवमाइं ठिई प० । असुरकुमारणं
देवाणं अत्थेगइयाणं एगूणतीसं पलिओवमाइं ठिई प० । सोहम्मीसाणेसु कपेसु
देवाणं अत्थेगइयाणं एगूणतीसं पलिओवमाइं ठिई प० । उवरिममज्जिमगेवेज्जयाणं
देवाणं जहण्णेणं एगूणतीसं सागरोवमाइं ठिई प० । जे देवा उवरिमहेट्टिमगेवेज्जय-
विमाणेसु देवत्ताए उववण्णा तेसि णं देवाणं उक्कोसेणं एगूणतीसं सागरोवमाइं
ठिई प० । ते णं देवा एगूणतीसाए अद्धमासेहिं आणमंति वा पाणमंति वा ऊस-
संति वा णीससंति वा । तेसि णं देवाणं एगूणतीसं वाससहस्सेहिं आहारट्ठे समुत्थ-
णइ । संतेगइया भवसिद्धिया जीवा जे एगूणतीसभवग्गहणेहिं सिद्धिस्संति
बुद्धिस्संति मुच्चिस्संति परिणिब्बाइस्संति सव्वदुक्खाणमंतं करिस्संति ॥ २९ ॥ तीसं
मोहणीयठाना प० तं० जे यावि तसे पाणे, वारिमज्जे विगाहिया । उदएणा कम्मा
मारैई, महामोहं पकुच्चइ ॥ १ ॥ सीसावेढेण जे केई आवेढेइ अभिक्खणं । तिग्घा-
मुभसमायारे, महामोहं पकुच्चइ ॥ २ ॥ पाणिणा संपिहित्ता णं, सोयमाचरिय
पाणिणं । अंतोणदंतं मारेई, महामोहं पकुच्चइ ॥ ३ ॥ जायतेयं समारोभं, बहुं
ओहंभिया जणं । अंतोधूमेणं मारेई (जा), महामोहं पकुच्चइ ॥ ४ ॥- सिस्सम्मि
जे पहणइ, उत्तमंगम्मि चेतसा । विभज्जमत्थयं फाले, महामोहं पकुच्चइ ॥ ५ ॥ पुणो
पुणो पणिहिए, हणित्ता उवहसे जणं । फलेणं अदुवा दंडेणं, महामोहं पकुच्चइ
॥ ६ ॥ गूढायारो णिगूहिज्जा, मायं मायाए छयए । असच्चवाई णिण्हाई, महामोहं

पकुव्वइ ॥ ७ ॥ धंसेइ जो अभूएणं, अकम्मं अत्तकम्मुणा । अदुवा तुम कासित्ति,
महामोहं पकुव्वइ ॥ ८ ॥ जाणमाणो परिसओ, सच्चामोसाणि भासइ । अब्बखीण-
हंसे पुरिसे, महामोहं पकुव्वइ ॥ ९ ॥ अणायगस्स णयवं, दारे तस्सेव धंसिया ।
विउलं विक्खोभइत्ता णं, किच्चा णं पडिवाहिरं ॥ १० ॥ उवगसंतं पि झंपित्ता,
पडिलोमाहिं वग्गुहिं । भोगभोगे विचारैइं, महामोहं पकुव्वइ ॥ ११ ॥ अकुमारभूए
जे केई, कुमारभूए त्ति हं वए । इत्थीहिं गिद्धे वसए, महामोहं पकुव्वइ ॥ १२ ॥
अवंभयारी जे केई, वंभयारी त्ति हं वए । गहहेव्व गवां मज्जे, विस्सरं णयई
णदं ॥ १३ ॥ अप्पणो अहिए बाले, मायामोसं बहुं भसे । इत्थीविसयगेहीए,
महामोहं पकुव्वइ ॥ १४ ॥ जं गिस्सिए उव्वहइ, जससाहिग्गमेण वा । तस्स लुब्भइ
वित्तम्मि, महामोहं पकुव्वइ ॥ १५ ॥ ईसरेण अदुवा गामेणं, अणिसरे ईसरीकए ।
तस्स संपयहीणस्स, सिरी अतुलमागया ॥ १६ ॥ ईसादोसेण आइट्ठे, कलुसाविल-
चेयसे । जे अंतरायं चेएइ, महामोहं पकुव्वइ ॥ १७ ॥ सप्पी जहा अंडउडं,
भत्तारं जो विहिसइ । सेणावइं पसत्थारं, महामोहं पकुव्वइ ॥ १८ ॥ जे णायगं
च रट्ठस्स, णेयारं णिगमस्स वा । सेट्ठिं बहुरवं हंता, महामोहं पकुव्वइ ॥ १९ ॥
बहुजणस्स णेयारं, दीवं ताणं चं पाणिणं । एयारिसं णरं हंता, महामोहं पकुव्वइ
॥ २० ॥ उवट्ठियं, पडिविरयं, संजयं सुतवत्तियं । बुक्कम्म धग्माओ भंसेइ, महा-
मोहं पकुव्वइ ॥ २१ ॥ तहेवाणंतणाणीणं, जिणाणं वरदंसिणं । तेसिं अवण्णवं बाले,
महामोहं पकुव्वइ ॥ २२ ॥ णेयाइअस्स मग्गस्स, दुट्ठे अवयरईं बहुं । तं तिप्प-
यंतो भावेइ, महामोहं पकुव्वइ ॥ २३ ॥ आयरियउवज्जाएहिं, सुयं विणयं च
गाहिए । ते चेव विसईं बाले, महामोहं पकुव्वइ ॥ २४ ॥ आयरियउवज्जायाणं,
सम्मं णो पडित्तएइ । अप्पडिपूयए थद्धे, महामोहं पकुव्वइ ॥ २५ ॥ अब्बहुस्सुए
य जे केई, सुएणं पविकत्थई । सज्जायवायं वयइ, महामोहं पकुव्वइ ॥ २६ ॥
अतवस्सीए य जे केई, तवेण पविकत्थइ । सव्वलोयपरे तेणे, महामोहं पकुव्वइ
॥ २७ ॥ साहारणट्ठा जे केई, गिलाणम्मि उवट्ठिए । पभू ण कुणईं किंबं, मज्जे
पि से ण कुव्वइ ॥ २८ ॥ सट्ठे णियडीपणाणे, कलुसाउलचेयसे । अप्पणो य अ-
बोहीय, महामोहं पकुव्वइ ॥ २९ ॥ जे कहाहिगरणाईं, संपउंजे पुणो पुणो । सव्व-
तित्थाण भेयाणं, महामोहं पकुव्वइ ॥ ३० ॥ जे य आहम्मिए जोए, संपउंजे पुणो

पुणो । सहाहेउं सहीहेउं, महामोहं पकुव्वइ ॥ ३१ ॥ जे य माणुस्सए भोए,
अदुवा पारलोइए । तेऽतिप्पयंतो आसयइ, महामोहं पकुव्वइ ॥ ३२ ॥ इद्धीं जुई
जसो वण्णो, देवानं वलवीरियं । तेसिं अवण्णवं बाले, महामोहं पकुव्वइ ॥ ३३ ॥
अपस्समाणो पस्सामि, देवं जक्खे य गुज्झमे । अण्णाणीं जिणपूयट्ठी, महामोहं
पकुव्वइ ॥ ३४ ॥ थेरे णं मंडियपुत्ते तीसं वासाइं सामण्णपरियायं पाउणित्ता
सिद्धे बुद्धे जाव सव्वदुक्खप्पहीणे । एगमेणे णं अहोरत्ते तीसमुट्ठत्ते मुट्ठत्तग्गेणं प० ।
एएसिं णं तीसाए मुट्ठत्ताणं तीसं णामधेज्जा प०, तं०—रोद्धे, सत्ते, मित्ते, वाऊ,
सुपीए, अभिचंन्दे, माहिंदे, पलंबे, बंभे, सच्चे, आणंदे, विजए, विस्समेणं, वाया-
वच्चे, उवसमे, ईसाणे, तट्टे, भावियप्पा, वेसमणे, वरुणे, सत्तरिसभे, गंधव्वे, अग्गि-
वेसायणे, आतवे, आवत्ते, तट्टवे, भूमहे, रिसभे, सव्वट्टसिद्धे, रक्खसे । अरे
णं अरहा तीसं धणु (णू) इं उट्ठं उच्चत्तेणं होत्था । सहस्सारस्स णं देविंदस्स
देवरण्णो तीसं सामाणियसाहस्सीओ प० । पासे णं अरहा तीसं वासाइं अगारवास-
मज्जे वसित्ता अगाराओ अणगारियं पव्वइए । समणे भगवं महावीरे तीसं
वासाइं अगारवासमज्जे वसित्ता अगाराओ अणगारियं पव्वइए । रयणप्पभाए
णं पुट्ठीए तीसं गिरयावाससयसहरसा प० । इमीसे णं रयणप्पभाए पुट्ठीए
अत्थेगइयाणं णेरइयाणं तीसं पलिओवमाइं ठिई प० । अहे सत्तमाए पुट्ठीए
अत्थेगइयाणं णेरइयाणं तीसं सागरोवमाइं ठिई प० । असुरकुमाराणं देवाणं
अत्थेगइयाणं तीसं पलिओवमाइं ठिई प० । सोहम्मीसाणेसु कप्पेसु देवाणं अत्थे-
गइयाणं तीसं पलिओवमाइं ठिई प० । उवरिमउवरिमगेवेज्जायाणं देवाणं जहण्णेणं
तीसं सागरोवमाइं ठिई प० । जे देवा उवरिममज्झिमगेवेज्जाएसु त्रिमाणंसु देवत्ताए
उववण्णा तेसिं णं देवाणं उक्कोसेणं तीसं सागरोवमाइं ठिई प० । ते णं देवा तीसाए
अद्धमामेहिं आणमंति वा पाणमंति वा उस्ससंति वा णीससंति वा । तेसिं णं देवाणं
तीसाए वाससहस्सेहिं आहारट्टे समुप्पज्जइ । संतेगइया भवसिद्धिया जीवा जे
तीसाए भवग्गहणेहिं सिज्झिस्संति बुज्झिस्संति मुच्चिस्संति परिणिव्वाइस्संति मव्व-
दुक्खवाणमंतं करिस्संति ॥ ३० ॥ एकतीसं सिद्धाइगुणा पण्णत्ता, तं जहा—खीणे
आभिणिन्नोहियणाणवरणे, खीणे सुयणाणवरणे, खीणे ओहिणाणवरणे, खीणे
मणपच्चवण्णावरणे, खीणे केवलणाणवरणे, खीणे चक्खुदंसणावरणे, खीणे

अत्रभ्रुदंसणावरणे, स्त्रीणे ओहिदंसणावरणे, स्त्रीणे केवलदंसणावरणे, स्त्रीणे गिहा,
स्त्रीणे गिहार्णिहा, स्त्रीणे पयला, स्त्रीणे पयलापयला, स्त्रीणे धीणद्धी, स्त्रीणे साया-
द्वेयणिजे, स्त्रीणे असायावेयणिजे, स्त्रीणे दंसणमोहणिजे स्त्रीणे चरित्तमोहणिजे, स्त्रीणे
णेरइयाउए, स्त्रीणे तिरियाउए, स्त्रीणे मणुस्साउए, स्त्रीणे देवाउए, स्त्रीणे उच्चा-
गोए, स्त्रीणे गियागोए, स्त्रीणे सुभणामे, स्त्रीणे असुभणामे, स्त्रीणे दाणंतराए, स्त्रीणे
लाभंतराए, स्त्रीणे भोगंतराए, स्त्रीणे उत्रभोगंतराए, स्त्रीणे वीरियंतराए । मंदरे
णं पव्वए धरणितले एकतीसं जोयणसहस्साइं छवेव तेवीसे जोयणसए किंचिदेसूणे
परिवखेत्तेणं प० । जया णं सूरिए सव्ववाहिरियं मंडलं उवसंक्कमित्ता चारं चरइ
तया णं इहगयस्स मणुस्सस्स एकतीसाए जोयणसहस्सेहिं अट्ठहि य एकतीसेहिं
जोयणसएहिं तीसाए सट्ठिभागे जोयणस्स सूरिए चक्खुप्फासं हव्वमागच्छइ ।
अभिवद्धिए णं मासे एकतीसं साइरेगाइं राइंदियाइं राइंदियग्गेणं पण्णसे । आइवे
णं मासे एकतीसं राइंदियाइं किंचि विसेसूणाइं राइंदियग्गेणं पण्णसे । इमीसे णं
रयणप्पभाए पुढवीए अत्येगइयाणं णेरइयाणं एकतीसं पलिओवमाइं ठिईं प० ।
अहे सत्तमाए पुढवीए अत्येगइयाणं णेरइयाणं एकतीसं सागरोवमाइं ठिईं प० ।
असुरकुमाराणं देवाणं अत्येगइयाणं एकतीसं पलिओवमाइं ठिईं प० । सोहम्मी-
साणेसु कप्पेसु अत्येगइयाणं देवाणं एकतीसं पलिओवमाइं ठिईं प० । विजय-
वेजयंतजयंतअपराजियाणं देवाणं जहण्णेणं एकतीसं सागरोवमाइं ठिईं प० । जे
देवा उवरिमउवरिमगेवेज्जयविमाणेसु देवत्ताए उववण्णा तेसि णं देवाणं उक्कोसेणं
एकतीसं सागरोवमाइं ठिईं प० । ते णं देवा एकतीसाए अद्धमासेहिं आणमंति
वा पाणमंति वा उस्ससंति वा णीससंति वा । तेसि णं देवाणं एकतीसं (स) वास-
सहस्सेहिं अहारद्वे समुप्पज्जइ । संतेगइया भवसिद्धिया जीवा जे एकतीसेहिं
भवग्गहणेहिं सिञ्जिस्संति बुञ्जिस्संति मुच्चिस्संति परिणिव्वाइस्संति सव्वदुक्खाणमंतं
करिस्संति ॥ ३१ ॥ वत्तीसं जोगसंगहा प०, तं०—आलोयण, गिरवलावे, आवईसु
दढभ्रमया । अणिसिओवहाणे य, सिक्खा णिप्पडिक्कमया ॥ १ ॥ अण्णायया,
अलोभे य, तितिकन्ना अज्जवे सुई । सम्मदिट्ठी समाही य, आथारे विणओवए
॥ २ ॥ थिईमई य संवेगे, पणिही सुविहि संधरे । अत्तदोसोषसंहारे, सव्वकाम-
विरत्तया ॥ ३ ॥ पक्कवाणे त्रिउस्सग्गे, अप्पमाए लवालवे । ज्ञाणसंवरजोगे य,
उदए मारणतिए ॥ ४ ॥ संगणं च परिणयाया, पायच्छित्तकरणे वि य । आराहणा

य मरणंते, बत्तीसं जोगसंगहा ॥ ५ ॥ बत्तीसं देविंदा प०, तं०—चमरे बली धरणे भूयागंदे जाव घोसे महाघोसे चंदे सूरे सके ईसाणे सणकुमारे जाव पाणए अचनुए । कुंधुसस णं अरहओ बत्तीसहिया बत्तीसं जिणसया होत्था । सोहम्मे कप्पे बत्तीसं विमाणावाससयसहस्सा प० । रेवइणकल्ले बत्तीसइतारे पण्यत्ते । बत्तीस-
 तिविहे णट्टे पण्यत्ते । इमीसे णं रयणप्पभाए पुढवीए अत्थेगइयाणं णेरइयाणं बत्तीसं पलिओवमाइं ठिई प० । अहे सत्तमाए पुढवीए अत्थेगइयाणं णेरइयाणं बत्तीसं सागरोवमाइं ठिई प० । असुरकुमारारणं देवाणं अत्थेगइयाणं बत्तीसं पलिओवमाइं ठिई प० । सोहम्मीसाणेसु कप्पेसु देवाणं अत्थेगइयाणं बत्तीसं पलिओवमाइं ठिई प० । जे देवा विजयवेजयंतजयंतअपरारिजियविमाणेसु देवत्ताए उववण्णा तेसि णं देवाणं अत्थेगइयाणं बत्तीसं सागरोवमाइं ठिई प० । ते णं देवा बत्तीसाए अद्ध-
 मासेहिं आणमंति वा पाणमंति वा उस्ससंति वा णीससति वा । तेसि णं देवाणं बत्तीसवाससहस्सेहिं आहारट्टे समुप्पज्जइ । संतेगइया भवसिद्धिया जीवा जे बत्ती-
 साए भवग्गहणेहिं सिद्धिस्संति बुद्धिस्संति मुच्चिस्संति परिणिव्वाइस्संति सव्व-
 दुक्खाणमंतं करिस्संति ॥ ३२ ॥ तेत्तीसं आसायणाओ पण्यत्ताओ, तं०—सेहे राइणियस्स आसण्णं गंता भवइ आसायणा सेहस्स, सेहे राइणियस्स पुरओ गंता भवइ आसायणा सेहस्स, सेहे राइणियस्स सपक्खं गंता भवइ आसायणा सेहस्स, सेहे राइणियस्स आसण्णं ठिच्चा भवइ आसायणा सेहस्स, जाव सेहे राइणियस्स आलवमाणस्स तत्थगए च्वेव पडिसुणित्ता भवइ आसायणा सेहस्स । चमरस्स णं असुरिंदस्स असुररण्णे चमरचंचाए रायहाणीए एक्कमेक्कवाराए तेत्तीसं तेत्तीसं भोमा प० । महाविदेहे णं वासे तेत्तीसं जोगणसहस्साइं साइरेगाइं विक्खंभेणं प० ।
 जया णं सूरेए ब्राहिराणंतरं तच्चं मंडलं उवसंक्कमित्ता णं चारं चरइ तथा णं इह गयस्स पुरिसस्स तेत्तीसाए जोगणसहस्सेहिं किंचिविसेसूणेहिं चक्खुष्कासं हव्वमाग-
 च्छइ । इमीसे णं रयणप्पभाए पुढवीए अत्थेगइयाणं णेरइयाणं तेत्तीसं पलिओ-
 वमाइं ठिई प० । अहे सत्तमाए पुढवीए कालमहाकालरोस्यमहारोरुएसु णेरइ-
 याणं उक्कोसेणं तेत्तीसं सागरोवमाइं ठिई प० । अप्पइट्ठाणणरए णेरइयाणं अज-
 ह्णमणुक्कोसेणं तेत्तीसं सागरोवमाइं ठिई प० । असुरकुमारारणं अत्थेगइयाणं देवाणं तेत्तीसं पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं तेत्तीसं पलिओवमाइं ठिई प० । विजयवेजयंतजयंतअपरारिजेसु विमाणेसु उक्कोसेणं

तेत्तीसं सागरोवमाई ठिई प० । जे देवा स्ववट्टसिद्धे महाविमाणे देवत्ताए उव-
वणा तेसि णं देवाणं अजहण्णमणुक्कोसेणं तेत्तीसं सागरोवमाई ठिई प० । ते णं
देवा तेत्तीसाए अद्धमासेहिं आणमंति वा पाणमंति वा उस्ससंति वा णिस्ससंति वा ।
तेसि णं देवाणं तेत्तीसाए वाससहस्सेहिं आहारद्वे समुप्पज्जइ । संतेगइया भवसिद्धिया
जीवा जे तेत्तीसं भवग्गहणेहिं सिञ्जिस्संति बुञ्जिस्संति मुच्चिस्संति परिणिव्वाइस्संति
सव्वदुक्खाणमंतं करिस्संति ॥ ३३ ॥ चोत्तीसं बुद्धाइसेसा प० तं०—अवट्टिए केस-
मंसुरांमणहे, णिरामया णिरुवलेवा गायलट्टी, गोक्खीरपंडुरे मंससोणिए, पउमुप्पल-
गंधिए उस्सासणिस्सासे, पच्छण्णे आहारणीहारे अदिस्से मंसचक्खुणा, आगासगयं
चक्कं, आगासगयं छत्तं, आगासगयाओ सेयवरचामराओ, आगासफालियामयं
सपायपीढं सीहासणं, आगासगओ कुडभीसहस्सपरिमंडियामिरामो इंदज्जओ
पुरओ गच्छइ, जत्थ जत्थ विय णं अरहंता भगवंतो चिट्ठंति वा णिसीयंति वा तत्थ
तत्थ वि य णं तक्खणादेव संलण्णत्तपुप्फपल्लवसमाउलो सच्छत्तो सज्जओ सघंटो
सपडागो असोगवरपायवो अभिसंजायइ, ईसिं पिट्ठओ मउडडाणंमि तेयमंडलं
अभिसंजायइ अंधकारे वि य णं दस दिसाओ पभासेइ, ब्रहुसमरमणिज्जे भूमिभागे,
अहोसिरा कंटया जायंति उऊ विवरोया सुहफासा भवंति, सीयलेणं सुहफासेणं सुर-
भिणा मारुएणं जोयणपरिमंडलं सव्वओ समंता संपमज्जिज्जइ, जुत्तफुसिएणं मेहेण
य णिहयरयरेणूयं किंजइ, जलथलयभासुरपभूएणं चिट्ठट्टाइणा दसद्धवण्णेणं कुसुमेणं
जाणुस्सेहप्पमाणमित्ते (अचित्ते) पुप्फोवयारे कज्जइ, अमणुष्णाणं सहफरिसरस-
रुवगंधाणं अवकरिसो भवइ, मणुष्णाणं सहफरिसरसरुवगंधाणं पाउब्भाओ भवइ,
पचाहरओ वि य णं हिययगमणीओ जोयणणीहारी सरो, भगवं च णं अद्धमागहीए
भासाए धम्ममाइक्खइ, सा वि य णं अद्धमागही भासा भासिज्जमाणी तेसिं
सव्वेसिं आरियमणारियाणं दुप्पयच्चउप्पयमित्यपसुपक्खिसरोसिवाणं अप्पणो हिय-
सिन्नुहयभासत्ताए परिणमइ, पुब्बवद्धवेरा वि य णं देवासुरणागसुवण्णजक्खरक्खस-
क्किंणरकिंपुरिसगरुल्लगंधव्वमहोरगा अरहओ पायमूले पसंतचित्तमाणसा धम्मं
णिसामंति, अण्णउत्थियपावयणिया वि य णमागया वंदंति, आगया समाणा अरहओ
पायमूले णिप्पडिवयणा हवंति, जओ जओ वि य णं अरहंतो भगवंतो विहरंति
तओ तओ वि य णं जोयणणकीसाए णं ईई ण भवइ, मारी ण भवइ, सचक्कं ण

भवइ, परचक्रं ण भवइ, अइबुट्ठी ण भवइ, अणावुट्ठी ण भवइ, दुब्भिकखं ण भवइ, पुब्बुप्पणा वि य णं उप्पाइया वाही खिप्पमिव उवसमंति । जंबुहीवे णं दीवे चउत्तीसं चक्रवट्टिविजया प० तं०—वत्तीसं महाविदेहे दो भरहे एरवए । जंबुहीवे णं दीवे चोत्तीसं दीहवेयङ्का प० । जंबुहीवे णं दीवे उक्कोसपए चोत्तीसं तित्थंकरा समुप्पज्जति । चमरस्स णं असुरिंदस्स असुररण्णो चोत्तीसं भवणावाससयसहस्सा प० । पढमपंचमछट्ठीसत्तमासु चउसु पुढवीसु चोत्तीसं गिरयावाससयसहस्सा प० ॥३४॥ पणतीसं सच्चवयणाइसेसा प० । कुंभू णं अरहा पणतीसं धणूइं उड्डं उच्चत्तेणं होत्था । दत्ते णं वासुदेवे पणतीसं धणूइं उड्डं उच्चत्तेणं होत्था । णंदणे णं बलदेवे पणतीसं धणूइं उड्डं उच्चत्तेणं होत्था । सोहम्मे कप्पे सुहम्माए सभाए माणवए चेइयक्खंभे हेट्ठा उवरिं च अद्धतेरस २ जोयणाणि वज्जेत्ता मज्जे पणतीस जोयणेसु वइरामएसु गोलवट्टसमुग्गएसु जिण सकहाओ प० । विइयचउत्थीसु दोसु पुढवीसु पणतीसं गिरयावाससयसहस्सा प० ॥ ३५ ॥ छत्तीसं उत्तरज्झयणा प० तं०—विणयसुयं, परीसहो, चाउरंगिज्जं, असंखयं, अकाममरणिज्जं पुरिसविज्जा, उरब्भिज्जं, काविलियं, णमिपव्वज्जा, दुमपत्तयं, बहुसुयपूया, हरिएसिज्जं, चित्तसंभूयं, उसूयारिज्जं, सभिकखुगं, समाहिठाणाइं, पावसमणिज्जं, संजइज्जं, मियचारिया, अणाहपव्वज्जा, समुद्दपालिज्जं, रहणेमिज्जं, गोयमकेसिज्जं, समिईओ, जण्णइज्जं, सामायारी, खलुंकिज्जं, मोक्खमग्गगई, अप्पमाओ, तवोमग्गो, चरणविही, पमायठाणाइं कम्मपयडी, लेसज्झयणं, अणगारमग्गे, जीवाजीवविभत्ती य । चमरस्स णं असुरिंदस्स असुररण्णो सभा सुहम्मा छत्तीसं जोयणाइं उड्डं उच्चत्तेणं होत्था । समणस्स णं भगवओ महावीरस्स छत्तीसं अज्जाणं साहस्सीओ होत्था । चेत्तासोएसु णं मासेसु सह छत्तीसंगुलियं सूरिए पोरिसिछायं णिव्वत्तइ ॥ ३६ ॥ कुंथुस्स णं अरहओ सत्ततीसं गणा सत्ततीसं गणहरा होत्था । हेमवयहेरण्णवयाओ णं जीवाओ सत्ततीसं जोयणसहस्साइं छच्च चउसत्तरे जोयणसए सोलस य एग्गणवीसइभाए जोयणस्स किंविसेसूणाओ आयामेणं पण्णाओ । सव्वासु णं विजयवेज्जयंतजयंतअपराजियासु रायहाणीसु पागारा सत्ततीसं सत्ततीसं जोयणाइं उड्डं उच्चत्तेणं प० । खुंढियाए णं विमाणपविभत्तीए पढमे वग्गे सत्ततीसं उदेसणकाला प० । कत्तियवहुलसत्तमीए णं सूरिए सत्ततीसंगुलियं पोरिसिछायं णिव्वत्तइत्ता णं चारं चरइ ॥ ३७ ॥ पासस्स

णं अरहओ पुरिसादाणीयस्स अट्ठतीसं अज्जियासाहस्सीओ उक्कोसिया अज्जियासंपया होत्था । हेमत्रयएरण्णवईयाणं जीवाणं धणूपिट्ठे अट्ठतीसं जोयणसहस्साई सत्त य चत्ताले जोयणसए दस एगूणवीसइभागे जोयणस्स किंचिविसेसूणा परिवखेवेणं पण्णत्ते । अत्थस्स णं पव्वयरण्णे विइए कंडे अट्ठतीसं जोयणसहस्साई उट्ठं उच्चत्तेणं होत्था । खुट्ठियाए णं विमाणपविभत्तीए विइए बग्गे अट्ठतीसं उद्देसणकाला प० ॥ ३८ ॥ णमिस्स णं अरहओ एगूणचत्तालीसं आहोहियसया होत्था । समयखेत्ते एगूणचत्तालीसं कुलपव्वया प०, तं०—तीसं वासहरा, पंच मंदरा, चत्तारि उमुकारा । दोच्चउत्थपंचमच्छत्तमासु णं पंचसु पुढवीसु एगूणचत्तालीसं गिरयावाससयसहस्सा प० । णाणावरणिज्जस्स मोहणिज्जस्स गोत्तस्स आउयस्स हियासि णं चउण्हं कम्मपयडीणं एगूणचत्तालीसं उत्तरपयडीओ पण्णत्ताओ ॥ ३९ ॥ अरहओ णं अरिद्वणेमिस्स चत्तालीसं अज्जियासाहस्सीओ होत्था । मंदरचूलियाणं चत्तालीसं जोयणाइं उट्ठं उच्चत्तेणं पण्णत्ता । संती अरंहा चत्तालीसं धणूइं उट्ठं उच्चत्तेणं होत्था । भूयाणंदस्स णं णागकुमारस्स णागरण्णे चत्तालीसं भवणावाससयसहस्सा प० । खुट्ठियाए णं विमाणपविभत्तीए तइए बग्गे चत्तालीसं उद्देसणकाला प० । फग्गुणपुण्णमासिण्णेए णं सूरिए चत्तालीसंगुलियं पोरिसीछायं णिव्वट्ठइत्ता णं चारं चरइ । एवं कत्तियाए विं पुण्णिमाए । महासुक्के कप्पे चत्तालीसं विमाणावाससहस्सा प० ॥४०॥ णमिस्स णं अरहओ एकचत्तालीसं अज्जियासाहस्सीओ होत्था । चउसु पुढवीसु एकचत्तालीसं गिरयावाससयसहस्सा प०, तं०—रण्णपभाए पंकप्पभाए तमाए तमतमाए । महालियाए णं विमाणपविभत्तीए पढमे बग्गे एकचत्तालीसं उद्देसणकाला प० ॥ ४१ ॥ समणे भगवं महावीरे बायालीसं वासाइं साहित्याइं सामणपरियाणं पाउणित्ता सिद्धे जाव सव्वदुक्खप्पहीणे । जंबुदीवस्स णं दीवस्स पुरत्थिमिल्लाओ चरमंताओ गोथूभस्स णं आवासपव्वयस्स पच्चत्थिमिल्ले चरमंते एस णं बायालीसं जोयणसहस्साइं अब्बाहाए अंतरे पण्णत्ते । एवं चउदिसिं पि दओभामे संखोदयसीमे य । कालोए णं समुद्दे बायालीसं चंदा जोइंसु वा जोइंति वा जोइस्संति वा बायालीसं सूरिया पभासिसु वा पभासिंति वा पभासिस्संति वा । संमुच्चिन्धमभुयपरिसप्पाणं उक्कोसणं बायालीसं वाससहस्साइं टिई प० । णामकम्मे बायालीसविहे पण्णत्ते, तं जहा—गइणामे, जाइणामे, सरीरणामे, सरीरंगोवंणामे, सरीरत्रंघणामे, सरीरसंवायणामे, संघयणामे, संठाणामे, वण्णामे, रंघणामे,

रसणामे, फासणामे, अगुहलहुयणामे, उवघायणामे, पराघायणामे, आणुपुष्पीणामे, उस्तासणामे, आयवणामे, उज्जोयणामे, विहगगणामे, तसणामे, थावरणामे, सुहुमणामे, नायरणामे, पञ्जत्तणामे, अपञ्जत्तणामे, साहारणसरीरणामे, पत्तेयसरीरणामे, थिरणामे, अधिरणामे, सुभणामे, असुभणामे, सुभगणामे, दुब्भगणामे, सुस्सरणामे, दुस्सरणामे, आएज्जणामे, अणएज्जणामे, असोक्कित्तिणामे, अजसोक्कित्तिणामे, गिम्माणामे, तित्थकरणामे । लवणे णं समुद्धे नायालीसं णागसाहस्सीओ अट्ठिभतरियं वेले धारंति । महालियाए णं विमाणपविभत्तीए विइए वग्गे नायालीसं उद्देसणकाला प० । एगमेगाए ओसप्पिणीए पंचमउट्ठीओ समाओ नायालीसं वाससहस्साइं कालेणं पणत्ता । एगमेगाए उस्सप्पिणीए पढमवीयाओ समाओ नायालीसं वाससहस्साइं कालेणं पणत्ता ॥ ४२ ॥ तेनालीसं कम्मविवागज्जयणा प० । पढमचउत्थपंचमामु पुढवीमु तेनालीसं णिरवावाससयसहस्सा प० । जंतुदीवस्स णं दीवस्स पुरत्थिमिद्धाओ चरंमताओ गोथूभस्स णं आवासपव्वयस्स पुरत्थिमिद्धे चरंमते एस णं तेनालीसं जोयणसहस्साइं अचाहाए अंतरे प० । एवं चउद्दिंसि पि दगभामे सखे दयसीमे । महालियाए णं विमाणपविभत्तीए तइए वग्गे तेनालीसं उद्देसणकाला प० ॥ ४३ ॥ चोनालीसं अज्जयणा इसिभासिया दिवल्लोणनुयाभासिया प० । विमलस्स अरहओ णं चउनालीसं पुरिसजुगाइं अणुपिट्ठि सिद्धाइं जाव प्पहीणाइं । धरणस्स णं णामिंदस्स णागरणो चोनालीसं भवणावाससयसहस्सा प० । महालियाए णं विमाणपविभत्तीए चउत्थे वग्गे चोनालीसं उद्देसणकाला प० ॥ ४४ ॥ समयखेत्ते णं पणयालीसं जोयणसयसहस्साइं आयामविकखेभेणं प० । सीमंतए णं णए पणयालीसं जोयणसयसहस्साइं आयामविकखेभेणं प० । एवं उट्टुविमाणे वि । ईसिपब्भारा णं पुढवी एवं चेव । धम्मे णं अरहा पणयालीसं धणूइं उट्ठं उचत्तेणं हात्था । मंदरस्स णं पव्वयस्स चउद्दिंसि पि पणयालीसं-पणयालीसं जोयणसहस्साइं अचाहाए अंतरे प० । सव्वे वि णं दिवद्धुखेत्तिया णक्खत्ता पणयालीसं मुहुत्ते चंद्रेण सद्धिं जोगं जोइंसु वा जोइंति वा जोइंस्संति वा-तिणोव उत्तराइं, पुणव्वसु रोहिणी विसाहा व । एए छ णक्खत्ता, पणयालमुहुत्तसंजोगा । महालियाए णं विमाणपविभत्तीए पंचमे वग्गे पणयालीसं उद्देसणकाला प० ॥ ४५ ॥ दिट्ठिवायस्स णं छायालीसं माउवापया प० । वंभीए णं लिवीए छायालीसं माउयक्खरा प० । पभंजणस्स णं वाउकुमारिंदस्स छायालीसं भवणावाससयसहस्सा प० ॥ ४६ ॥

जया णं सूरिए सव्वभिंतरमंडलं उवसंकमिन्ता णं चारं चरइ तथा णं इहगयस्स
मणूसस्स सत्तञ्जतालीसं जोजणसहस्सेहिं दोहि य तेवड्ढेहिं जोजणसएहिं एकवीसाए
य सट्ठिभागेहिं जोजणस्स सूरिए चक्खुफासं हव्वमागच्छइ । धेरे णं अग्गिभूई सत्त-
चत्तालीसं वासाइं अगारमज्जे वसित्ता मुंडे भवित्ता अगाराओ अणगारियं पव्वइए
॥ ४७ ॥ एगमेगस्स णं रण्णो चाउरंतचक्खवट्ठिस्स अडयालीसं पट्टणसहस्सा प० ।
धम्मस्स णं अरहओ अडयालीसं गणा अडयालीसं गणहरा होत्था । सूर्मंडले णं
अडयालीसं एकसट्ठिभागे जोजणस्स विक्खंभेणं प० ॥ ४८ ॥ सत्तसत्तमियाए णं
भिक्खुपडिमाए एगूणपण्णाए राइंदिएहिं छण्णउइभिक्खासएणं अहासुत्तं जाव
आराहिया भवइ । देवकुरुउत्तरकुरुएसु णं मणुया एगूणपण्णा राइंदिएहिं संपण्ण-
जोव्वणा भवंति । तेइंदियाणं उक्कोसेणं एगूणपण्णा राइंदिया ठिई प० ॥ ४९ ॥ मुण्णि-
सुव्वयस्स णं अरहओ पंचासं अज्जियासाहस्सीओ होत्था । अणंते णं अरहा पण्णासं
धणूई उट्ठं उच्चत्तेणं होत्था । पुरिसुत्तमे णं वासुदेवे पण्णासं धणूई उट्ठं उच्चत्तेणं
होत्था । सव्वे वि णं दीहवेयङ्का मूले पण्णासं-पण्णासं जोजणाणि विक्खंभेणं प० ।
लंतए कप्पे पण्णासं विमाणावाससहस्सा प० । सव्वाओ णं तिमिस्सगुह्वावंडगप्पवा-
यगुहाओ पण्णासं-पण्णासं जोजणाई आयामेणं प० । सव्वे वि णं कंचगपव्वया
सिहरतले पण्णासं-पण्णासं जोजणाई विक्खंभेणं प० ॥ ५० ॥ णवण्हं बंधचेराणं
एकावण्णं उहेसणकाला प० । चमरस्स णं असुरिंदस्स असुररण्णो सभा सुहम्मा
एकावण्णखंभसयसंणिविट्ठा प० । एवं चैव वलिस्स वि । सुप्पमे णं बलदेवे एकावण्णं
वाससयसहस्साइं परमाउं पालइत्ता सिदे बुदे जाव सव्वदुक्खप्पहीणे । दंसणावरण-
गामाणं दोण्हं कम्ममाणं एकावण्णं उत्तरकम्मपयडीओ पण्णत्ताओ ॥ ५१ ॥ मोह-
णिज्जस्स णं कम्मस्स बावण्णं णामधेज्जा प०, तं०—कोहे, कोवे, रोसे, दोसे, अलमा,
संजलणे, कलहे, चंडिके, भंडणे, विवाए, माणे, मदे, दप्पे, थंभे, अत्तुकोसे, गव्वे,
परपरिवाए, अक्कोसे, अवक्कोसे (परिभवे), उण्णए, उण्णामे, माया, उवही, णियडी,
बलए, गहणे, णूमे, कक्के, कुरुए, दंभे, कूडे, जिम्हे, किन्निसे, अणायरणया, गूह-
णया, वंचणया, पल्लिकुंचणया, साइजोगे, लोभे, इच्छा, मुच्छा, कंखा, मेही,
तिण्हा, भिज्जा, अभिज्जा, कामासा, भोगासा, जीवियासा, मरणासा, णंदी, रागे ।
गोथूभस्स णं आवासपव्वयस्स पुरत्थिमिल्लाओ चरमंताओ वलयामुहस्स महापा-
यालस्स पच्चत्थिमिल्ले चरमंते ए स णं बावण्णं जोजणसहस्साइं अवाहाए अंतरे प० ।

एवं दगभासस्स णं केउगस्स संवस्स जूयगस्स दयसीमस्स ईसरस्स । णाणावर-
 णिज्जस्स णामस्स अंतरायस्स एएसि णं तिण्हं कम्मपयडीणं वावणं उत्तरपयडीओ
 पण्णत्ताओ । सोहम्मसणं कुमारमाहिं देसु तिसु कप्पेसु वावणं विमणावाससयमहस्सा
 प० ॥ ५२ ॥ देवकुरुउत्तरकुरुयाओ णं जीवाओ तेवणं तेवणं जोयणसहस्साई साइरे-
 गाई आयामेणं पण्णत्ताओ । महाहिमवंतरुप्पीणं वासहरपव्वयाणं जीवाओ तेवणं
 तेवणं जोयणसहस्साई णव य एगतीसे जोयणसए छच्च एगूणवीसइभाए जोयणस्स
 आयामेणं पण्णत्ताओ । समणस्स णं भगवओ महावीरस्स तेवणं अणगारा संवच्छर-
 परिआया पंचसु अणुत्तरेसु महइमहालएसु महाविमाणेसु देवत्ताए उववणा ।
 संमुच्चिमउरपरिसव्वाणं उक्कोवेणं तेवणं वाससहस्सा ठिई प० ॥ ५३ ॥ भरहेरवएसु
 णं वासेसु एगगेगाए उस्सस्विगी र ओसस्विगीए चउवणं चउवणं उत्तमपुरिसा
 उप्पज्जिसु वा उप्पज्जंति वा उप्परज्जिस्संति वा, तं०—चउवीसं तित्थकरा वारस चक्क-
 वट्ठी णव बलदेवा णव वासुदेवा । अरहा णं अरिद्रुणेमी चउवणं राईदियाइं छउ-
 मत्थपरियायं पाउणिता जिणे जाए केवली सव्वणू सव्वभावदरिसी । समणे भगवं
 महावीरे एगदिवसेणं एगणिसिज्जाए चउप्पणाई वागरणाई वागरित्था । अणंतस्स णं
 अरहओ चउप्पणं गणहरा होत्था ॥ ५४ ॥ मज्झिस्स णं अरहओ [मल्ली णं अरहा]
 पणपणं वाससहस्साई परमाउं पालइत्ता सिद्धे बुद्धे जाव प्पहीणे । मंदस्स णं
 पव्वयस्स पच्चत्थिमिच्छाओ चरमंताओ विजयदारस्स पच्चत्थिमिद्धे चरमंते एस णं
 पणपणं जोयणसहस्साई अवाहाए अंतरे प० । एवं चउद्विसिं पि विजयवेजयंतजयंत-
 अपराजियं ति । समणे भगवं महावीरे अंतिमराइयंसि पणपणं अज्झयणाई कड्ढाण-
 फलविवागाई पणपणं अज्झयणाई पावफलविवागाई वागरित्ता सिद्धे बुद्धे जाव
 प्पहीणे । पढमविइयासु दोसु पुढवीसु पणपणं गिरयावाससयमहस्सा प० । देवणा-
 वरणिज्जणामाउयाणं तिण्हं कम्मपयडीणं पणपणं उत्तरपयडीओ प० ॥ ५५ ॥
 जंबुद्वीवे णं दीवे छप्पणं णक्खन्त्ता चंदेण सद्धिं जोगं जोइंसु वा जोइंति वा जंइस्संति
 वा । विमलस्स णं अरहओ छप्पणं गणा छप्पणं गणहरा होत्था ॥ ५६ ॥ तिण्हं
 गणपिडगाणं आयारचूलियावजाणं सत्तावणं अज्झयणा प० तं०—आयारे सूयगडे
 ठागे । गोथूमस्स णं आवासपव्वयस्स पुरत्थिमिच्छाओ चरमंताओ वलयामुहस्स
 महापायालस्स बहुमज्झदेसभाए एस णं सत्तावणं जोयणसहस्साई अवाहाए

अंतरे प० । एवं दगभासस्त केउयस्त य संखस्त य जूयस्त य दयसीमस्त ईस-
रस्त य । महिस्त णं अरहओ सत्तावणं मणपञ्चणागिसया होत्था । महाहिमवंत-
रुपीणं वासहरपव्वयाणं जीवाणं धणुपिट्ठं सत्तावणं सत्तावणं जोयणसहस्साइं
दोणिणं य तेणउए जोयणसए दस य एगूणवीसइभाए जोयणस्त परिकखेवेणं प०
॥ ५७ ॥ पढमदोअपंचमासु तिसु पुढवीसु अट्टावणं गिरयावाससयसहस्सा प० ।
णाणावरणिज्जस्त वेयणियआउयणामअंतराइयस्त एएसि णं पंचहं कम्मपयडीणं
अट्टावणं उत्तरपयडीओ पणत्ताओ । गोथूभस्त णं आवासपव्वयस्त पच्चत्थिमिह्हाओ
चरमंताओ वलयामुहस्त महापायालस्त बहुमज्झदेसभाए एस णं अट्टावणं जोयण-
सहस्साइं अवाहाए अंतरे प० । एवं चउदिसिं पि णेयव्वं ॥ ५८ ॥ चंदस्त णं
संवच्छरस्त एगमेगे उऊ एगूणसट्ठिं राइंदियाइं राइंदियग्गेणं प० । संभवे णं अरहा
एगूणसट्ठिं पुव्वसयसहस्साइं अगारमज्जे वसित्ता मुंडे जाव पव्वइए । महिस्त णं
अरहओ एगूणसट्ठिं ओहिणागिसया होत्था ॥ ५९ ॥ एगमेगे णं मंडले सूरिए सट्ठिए
सट्ठिए सुहुत्तेहिं संघाइए । लवणस्त णं समुहस्त सट्ठिं णागसाहस्सीओ अग्गोदयं
धारंति । विमले णं अरहासट्ठिं धणूइं उहुं उच्चत्तेणं होत्था । बलिस्त णं वइरोयणिंदस्त
सट्ठिं सामाणियसाहस्सीओ पणत्ताओ । बंभस्त णं देविंदस्त देवरणो सट्ठिं सामाणिय-
सहस्सीओ पणत्ताओ । सोहम्मीसागेमु दोसु कप्पेसु सट्ठिं विमाणावाससयसहस्सा
प० ॥ ६० ॥ पंचसंवच्छरियस्त णं जुगस्त रिउमासेणं मिज्जमाणस्त इगसट्ठिं उऊ-
मासा प० । मंदरस्त णं पव्वयस्त पढमे कंडे इगसट्ठिजोयणसहस्साइं उहुं उच्चत्तेणं
प० । चंदमंडले णं एगसट्ठिविभागविभाइए समंसे प० । एवं सूरस्त वि ॥ ६१ ॥
पंचसंवच्छरिए णं जुगे वासट्ठिं पुण्णिमाओ चावट्ठिं अमावसाओ पणत्ताओ । वासु-
पुव्वस्त णं अरहओ च सट्ठिं गणा वासट्ठिं गणहरा होत्था । सुक्कपक्खस्म णं चंदे
वासट्ठिं भागे दिवसे-दिवसे परिवड्ढइ, ते चेष बहुलपक्खे दिवसे-दिवसे परिहायइ ।
सोहम्मीसागेमु कप्पेसु पढमे पत्थडे पढमावलियाए एगमेगाए दिसाए वासट्ठिं
वासट्ठिं विमाणा प० । सव्वे वेमाणियाणं वासट्ठिं विमाणपत्थडा पत्थडग्गेणं प०
॥ ६२ ॥ उसभे णं अरहा कौसलिए तेसट्ठिं पुव्वसयसहस्साइं महारायमज्जे वसित्ता
मुंडे भवेत्ता अगाराओ अगारियं पव्वइए । हरिवासरम्मयवासेसु मणुस्ता तेसट्ठिए
राइंदिएहिं संपत्तजोव्वणा भवंति । गिसडे णं पव्वए तेसट्ठिं सूरुदया प० । एवं

णीलवते वि ॥ ६३ ॥ अट्टुडुमिया णं भिकखुपडिमा चउसट्ठीए राइदिएहि दोहि य
अट्टासीएहिं भिकखासएहिं अहासुत्तं जाव भवइ । चउसट्ठिं असुरकुमारात्वासय-
सहस्ता प० । चमरस्स णं रण्णो चउसट्ठिं सामाणियसाहस्सीओ पण्णत्ताओ । सव्वे
वि दहिमुहाणं पव्वया पट्टासंठाणसंठिया सव्वत्थ समा विकलंभुस्सेहेणं चउसट्ठिं
जोयणसहस्ताइं प० । सोहम्मीसाणेसु वंभलोए य तिसु कप्पेसु चउसट्ठिं विमाणा-
वाससयसहस्ता प० । रुव्वस्स वि य णं रण्णो चाउरंतच्चक्कवट्ठिस्स चउसट्ठिवट्ठीए
महग्गे सुत्तामणि(मए)हारे प० ॥ ६४ ॥ जंतुदीवे णं दीवे पणसट्ठिं सूरमंडला प० ।
थरे णं मोरियपुत्ते पणसट्ठिवासाइं अगारमज्जे वसित्ता मुंडे भवित्ता अगाराओ
अणमारिये पव्वइए । सोहम्मवडिस्सयस्स णं विमाणस्स एगमंगाए वाहाए
पणसट्ठिं पणसट्ठिं भोमा प० ॥ ६५ ॥ दाहिणड्डुमाणुस्सखेत्ता णं छावट्ठिं चंदा पभा-
सिसु वा पभासति वा पभासिस्संति वा । छावट्ठिं सूरिया तविंसु वा तवंति वा
तविस्संति वा । उत्तरड्डुमाणुस्सखेत्ता णं छावट्ठिं चंदा पभासिसु वा पभासति वा
पभासिस्संति वा । छावट्ठिं सूरिया तविंसु वा तवंति वा तविस्संति वा । सेज्जसस्स
णं अरहओ छावट्ठिं गणा छावट्ठिं गणहरा होत्था । आभिणिचोहियणाणस्स णं उक्को-
सेणं छावट्ठिं सागरोवमाइं ठिई प० ॥ ६६ ॥ पंचसंवेच्छरियस्स णं जुमस्स णकवत्त-
मासेणं मिज्जमाणस्स सत्तसट्ठिं णकवत्तमासा प० । हेमवयएरणवयाओ णं वाहाओ
सत्तसट्ठिं सत्तसट्ठिं जोयणसयाइं पणपण्णाइं तिण्णि य भागा जोयणस्स आयामेणं प० ।
मंदरस्स णं पव्वयस्स पुरत्थिमिल्लाओ चरमंताओ गोयमदीवस्स पुरत्थिमिल्ले चरमंते
एस्स णं सत्तसट्ठिं जोयणसहस्ताइं अवाहाए अंतरे प० । सव्वेसिं पि णं णकवत्ताणं
सीमाविकलंभे णं सत्तसट्ठिं भागं भइए समसे प० ॥ ६७ ॥ धायइसंडे णं दीवे अडसट्ठिं
चक्कवट्ठिविजया अडसट्ठिं रायहाणीओ प० । उक्कोसए अडसट्ठिं अरहंता समुप्पज्जिसु
वा समुप्पज्जंति वा समुप्पज्जिस्संति वा । एवं चक्कवट्ठी बलदेवा वासुदेवा । पुक्ख-
वरदीवहे णं अडसट्ठिं विजया एवं चेव जाव वासुदेवा । विमलस्स णं अरहओ
अडसट्ठिं समणसाहस्सीओ उक्कोसिया समणसंपया होत्था ॥ ६८ ॥ समयत्थित्ते णं
मंदरवज्जा एग्गूणसत्तरिं वासा वासहरपव्वया प० तं जहा—पणतीसं वासा तीसं
वासहरा चत्तारि उसुयारा । मंदरस्स पव्वयस्स पच्चत्थिमिल्लाओ चरमंताओ गोय-
मदीवस्स पच्चत्थिमिल्ले चरमंते एस्स णं एग्गूणसत्तरिं जोयणसहस्ताइं अवाहाए अंतरे
प० । मोहणिज्जवज्जाणं सत्तणं कम्मपयडीणं एग्गूणसत्तरिं उत्तरपयडीओ पण्ण-

साओ ॥ ६९ ॥ समणे भगवं महावीरे वासाणं सवीसइराए मासे वइकंते सत्तरि-
एहिं राइंदिएहिं सेसेहिं वासावासं पञ्जोसवेइ । पासे णं अरहा पुरिसादाणीए
सत्तरिं वासाइं बहुपडिपुण्णाइं सामण्णपरियागं पाउणित्ता सिद्धे बुद्धे जाव प्पहीणे ।
वासुपुज्जे णं अरहा सत्तरिं धणूइं उड्ढं उच्चत्तेणं होत्था । मोहणिञ्जस्सणं कम्मस्स
सत्तरिं सागरोवमकोडाकोडीओ अत्राहूणिया कम्मट्ठिई कम्मणिसेगे प० । माहिंदस्स
णं देविंदस्स देवरण्णो सत्तरिं सामाणियसाहस्सीओ पण्णत्ताओ ॥ ७० ॥ चउत्थस्स
णं चंदसंयच्छरस्स हेमंताणं एकनत्तरीए राइंदिएहिं वीइकंतेहिं सव्वनाहिराओ
मंडलाओ सूरीए आउट्ठिं करेइ । वीरियप्पवायस्स णं पुव्वस्स एककसत्तरिं
पाहुडा प० । अजिते णं अरहा एककसत्तरिं पुव्वसयसहस्साइं अगारमज्जे वसित्ता
मुंडे भवित्ता जाव पव्वइए । एवं सगरो वि राया चाउरंतचक्कवट्ठीं एककसत्तरिं
पुव्व जाव पव्वइए ति ॥ ७१ ॥ वावत्तरिं सुवण्णकुमारावाससयसहस्सा प० । लवणस्स
समुद्दस्स वावत्तरिं णागसाहस्सीओ बाहिरियं वेळं धारंति । समणे भगवं महावीरे
वावत्तरिं वासाइं सव्वाउयं पालइत्ता सिद्धे बुद्धे जाव प्पहीणे । थेरे णं अयलभाया
वावत्तरिं वासाइं सव्वाउयं पालइत्ता सिद्धे जाव प्पहीणे । अग्गिभतरपुक्खरद्धे णं
वावत्तरिं चंदा पभांसिमु वा पभांसंति वा पभासिस्संति वा, वावत्तरिं सूरीया तथिसु
वा तवंति वा तविसंति वा । एगमेगस्स णं रण्णो चाउरंतचक्कवट्ठिस्स वावत्तरिपुर-
वरसाहस्सीओ पण्णत्ताओ । वावत्तरि कलाओ प० तं०—लेहं, गणियं, खवं, णट्ठं,
गीयं, वाइयं, सरगयं, पुक्खरगयं, समतालं, जूर्यं, जणवायं, पोरेवच्चं, अट्ठावयं,
दगमट्ठियं, अण्णविहीं, पाणविहीं, वत्थविहीं, सयणविहीं, अज्जं, पहेलियं, मागहियं,
गाहं, सिल्लेगं, गंधजुत्तिं, मधुसित्थं, आभरणविहीं, तरुणीपडिकम्मं, इत्थीलक्खणं
पुरिसलक्खणं, हयलक्खणं, गयलक्खणं, गोणलक्खणं, कुक्कुडलक्खणं, मिंदय-
लक्खणं, चकलक्खणं, छत्तलक्खणं, दंडलक्खणं, असिलक्खणं, मणिलक्खणं,
कांगणिलक्खणं, चम्मलक्खणं, चंदलक्खणं, सूरचरियं, राहुचरियं, गहचरियं,
सोभागकरं, दोभागकरं, विजागयं, मंतगयं, रहस्सगयं, सभासं, चारं, पडिचारं,
वूहं, पडिवूहं, खंधावारमाणं, णगरमाणं, वत्थुमाणं, खंधावारणिवेसं, वत्थुणिवेसं,
णगरणिवेसं, ईसत्थं, छरुप्पवायं, आससिक्खं, हत्थिसिक्खं, धणुव्वेयं, हिरण्णपागं
सुवण्णपागं मणिपागं धातुपागं, वाहुजुद्धं दंडजुद्धं मुट्ठिजुद्धं अट्ठिजुद्धं जुद्धं णिजुद्धं
जुद्धां जुद्धं, सुत्तखेडं णालियाखेडं, वट्ठखेडं, धम्मखेडं, चम्मखेडं, पत्तच्छेज्जं, कडग-

ऋष्टेज्जं, सजीवं गिञ्जीवं, सउणरुयं । संमुच्छिमन्वह्यरपंचिदियतिरिक्खजोगियाणं
 उक्कोत्तेणं वावत्तरिं वाससहस्साइं ठिईं प० ॥ ७२ ॥ हरिवासरम्मयवासयाओ णं
 जीवाओ तेवत्तरिं तेवत्तरिं जोयणसहस्साइं णव य एगुत्तरे जोयणसए सत्तरस य
 एगूणवीसइभागे जोयणस अद्धभागं च आयामेणं प० । विजए णं वल्लदेवे तेव-
 त्तरिं वाससयसहस्साइं सव्वाउयं पालइत्ता सिद्धे जाव प्पहीणे ॥ ७३ ॥ धेरे णं
 अग्गिभूई गणहरे चोवत्तरिं वासाइं सव्वाउयं पालइत्ता सिद्धे जाव प्पहीणे । गिस-
 हाओ णं वासहरपव्वयाओ तिगिच्छिओ णं दहाओ सीओयामहाणईओ चोवत्तरिं
 जोयणसयाइं साहियाइं उत्तराहिमुही पवहित्ता वइरामयाए जिदिभयाए चउजोयणा-
 यामाए पण्णासजोयणविकखंभाए वइरतले कुंडे महया घडमुहपवत्तिएणं मुत्तावल्लि-
 हारसंठाणसंठिएणं पवाएणं मइया सहेणं पवइइ । एवं सीया वि दक्खिणाहिमुही
 भाणियव्वा । चउत्थवज्जासु लमु पुढवीसु चोवत्तरिं णरयावान्णयसहस्सा प०
 ॥ ७४ ॥ सुविहिस्स णं पुप्फदेतस्स अरहओ पणत्तरिं जिणसया होत्था । सीयले
 णं अरहा पणत्तरिं पुव्वासहस्साइं अगारवासमज्जे वसित्ता मुंडे भवित्ता जाव पव्व-
 इए । संती णं अरहा पणत्तरिं वाससहस्साइं अगारवासमज्जे वसित्ता मुंडे भवित्ता
 अमाराओ अणगारियं पव्वइए ॥ ७५ ॥ छावत्तरिं विज्जुकुमारावाससयसहस्सा
 प० । एवं दीवदिसाउदहीणं, विज्जुकुमारिंदथणियमग्गीणं । लण्हं पि जुगलयाणं,
 छावत्तरि सयसहस्साइं ॥ ७६ ॥ भरहे राया चाउरंतचक्कवट्ठी सत्तहत्तरिं पुव्वसय-
 सहस्साइं कुमारवासमज्जे वसित्ता महारायाभिसेयं संपत्ते । अंगवंसाओ णं सत्तहत्तरिं
 रायाणो मुंडे जाव पव्वइया । गदतोयतुसियाणं देवाणं सत्तहत्तरिं देवसहस्मपरिवारा
 प० । एरामेगे णं मुहुत्ते सत्तहत्तरिं लवे लवग्गेणं प० ॥ ७७ ॥ सक्कस्स णं देविंदस्स
 देवरणो वेसमणे महाराया अद्धहत्तरीए सुवण्णकुमारदीवकुमारावासमयसहस्साणं
 आहेवच्चं पोरेवच्चं सामित्तं भट्टित्तं महारायत्तं आणाईसरसेणावच्चं कारेमाणे पालेमाणे
 विहरइ । धेरे णं अक्कपिए अद्धहत्तरिं वासाइं सव्वाउयं पालइत्ता सिद्धे जाव प्पहीणे ।
 उत्तरायणणियट्ठे णं रूरिए पढमःओ मंडलाओ एगूणचत्तालीसइमं मंडले अट्टइत्तरिं
 एगसट्टिभाए दिवसखेत्तस्स गिज्जुत्ता रयणियखेत्तस्स अभिणिवुट्ठेत्ता णं चारं चरइ,
 एवं दक्खिणाणणियट्ठे वि ॥ ७८ ॥ वल्लयामुहस्स णं पायालस्स हिट्ठिआओ चर-
 मंताओ इमीसे णं रवणप्पभाए पुढवीए हेट्ठिल्ले चरमंते एस णं एगूणासिं जोयणस-

हस्ताई अबाहाए अंतरे प० । एवं केउस्त वि जूयस्त वि ईसरस्त वि । छट्टीए पुढवीए बहुमञ्जदेसभायाओ छट्टस्त घणोदहिस्त हेट्टिले चरमंते एस णं एगूणासीई जोयणसहस्ताई अबाहाए अंतरे प० । जंबुद्दीवस्त णं दीवस्त बारस्त य बारस्त य एस णं एगूणासीई जोयणसहस्ताई साइरेगाई अबाहाए अंतरे प० ॥ ७९ ॥ सेज्जेसे णं अरहा असीई धणूई उड्डं उच्चत्तेणं होत्था । तिविट्ठे णं वासुदेवे असीई धणूई उड्डं उच्चत्तेणं होत्था । अयले णं बलदेवे असीई धणूई उड्डं उच्चत्तेणं होत्था । तिविट्ठे णं वासुदेवे असीइवाससयसहस्ताई महाराया होत्था । आउबहुले णं कंडे असीइ जोयणसहस्ताई बाहलेणं प० । ईसाणस्त देविंदस्त देवरणो असीइ सामाणियसाहस्तीओ पणत्ताओ । जंबुद्दीवे णं दीवे असीउत्तरं जोयणसयं ओगाहेत्ता सूरिए उत्तरकट्टोवगए पढमं उदयं करेइ ॥ ८० ॥ णवणवमिया णं भिक्खुपडिमा एक्कासीइ राईदिएहिं चउहि य पंचुत्तरेहिं (भिक्खासएहिं) अहामुत्तं जाव आराहिया । कुंथुस्त णं अरहओ एक्कासीई मणपञ्जवणाणिसया होत्था । विवाहपण्णत्तीए एक्कासीई महाजुम्मसया प० ॥ ८१ ॥ जंबुद्दीवे दीवे वासीयं मंडलसयं जं सूरिए दुक्खुत्तो संक्कमित्ता णं चारं चरइ, तं जहा—णिकलममाणे य पविसमाणे य । समणे भगवं महावीरे वासीए राईदिएहिं वीइक्कंतेहिं गम्भाओ गम्भं साहरिए । महाहिमवंतस्त णं वासहरपव्वयस्त उवरिल्लाओ चरमंताओ सोगंधियस्त कंडस्त हेट्टिले चरमंते एस णं वासीई जोयणसयाई अबाहाए अंतरे प० । एवं रणिसिस्त वि ॥ ८२ ॥ समणे भगवं महावीरे वासीइ राईदिएहिं वीइक्कंतेहिं तेयासीइमे राईदिए चट्टमाणे गम्भाओ गम्भं साहरिए । सीयलस्त णं अरहओ तेसीई गणा तेसीई गणहरा होत्था । थेरे णं मंडियपुत्ते तेसीई वासाई सव्वाउयं पालइत्ता सिद्धे जाव प्पहीणे । उसमे णं अरहा कोसलिए तेसीई पुव्वसयसहस्ताई अगारमञ्जे वसित्ता मुंडे भवित्ता णं जाव पव्वइए । भरहे णं राया चाउरंतचक्कवट्टी तेसीई पुव्वसयसहस्ताई अगारमञ्जे वसित्ता जिणे जाए केवली सव्वण्णू सव्वभावदरिसी ॥ ८३ ॥ चउरासीइ गिरयावाससयसहस्ता प० । उसमे णं अरहा कोसलिए चउरासीई पुव्वसयसहस्ताई सव्वाउयं पालइत्ता सिद्धे बुद्धे जाव प्पहीणे । एवं भरहो बाहुवली वंभी सुंदरी । सिज्जेसे णं अरहा चउरासीई वाससयसहस्ताई सव्वाउयं पालइत्ता सिद्धे जाव प्पहीणे । तिविट्ठे णं वासुदेवे चउरासीई वाससयसहस्ताई सव्वाउयं पालइत्ता अप्पइट्ठणे णरए णेरइयत्ताए उववणो । सक्कस्त णं देविंदस्त देवरणो

चउरासीइ सामाणियसाहस्सीओ पण्णत्ताओ । सव्वे वि णं बाहिरया मंदरा चउरा-
सीइं चउरासीइं जोगणसहस्साइं उड्ढं उच्चत्तेणं प० । सव्वे वि णं अंजणगपव्वया
चउरासीइं-चउरासीइं जोगणसहस्साइं उड्ढं उच्चत्तेणं प० । हरिवासरम्मयवासियाणं
जीवाणं धणुपिड्ढा चउरासीइं जोगणसहस्साइं सोलस जोगणाइं चत्तारि य भागा
जोगणस्स परिकखेवेणं प० । पंकवहुलस्स णं कंडस्स उवरिल्लाओ चरमंताओ हेट्ठिल्ले
चरमंते एस णं चोरासीइं जोगणसयसहस्साइं अब्बाहाए अंतरे प० । विवाहपण्णत्तीए
णं भगवईए चउरासीइं पयसहस्सा पदग्गेणं प० । चोरासीइं णागकुमारावाससय-
सहस्सा प० । चोरासीइं पइण्णगसहस्साइं पण्णत्ताइं । चोरासीइं जोगिण्णमुहसय-
सहस्सा प० । पुव्वाइयाणं सीसपहेलियएज्जवसाणाणं सट्ठणट्ठणंतराणं चोरासीए
गुणकारे प० । उसभस्स णं अरहओ कोसलियस्स चउरासीइ गणा चउरासीइ
गहणरा होत्था । उसभस्स णं अरहओ कोसलियस्स उसभेत्तेणपामोकखाओ चउरा-
सीइ समणसाहस्सीओ होत्था । सव्वे वि चउरासीइ विमाणावाससयसहस्सा सत्ताण-
उइं च सहस्सा तेवीसं च विमाणा भवंतीति मक्खायं ॥ ८४ ॥ आचारस्स णं
भगवओ सचूलियागस्स पंचासीइ उद्देसणकाला प० । धायइंसडस्स णं मंदरा पंचा-
सीइ जोगणसहस्साइं सव्वग्गेणं प० । रुयए णं मंडलियपव्वए पंचासीइ जोगण-
सहस्साइं सव्वग्गेणं प० । गंदणवणस्स णं हेट्ठिल्लाओ चरमंताओ सोगंधियस्स कंडस्स
हेट्ठिल्ले चरमंते एस णं पंचासीइ जोगणसयाइं अब्बाहाए अंतरे प० ॥ ८५ ॥
सुविहिस्स णं पुप्फदंतस्स अरहओ छलसीइ गणा छलसीइ गणहरा होत्था । सुपा-
सस्स णं अरहओ छलसीइ वाइसया होत्था । दोच्चाए णं पुट्ठीए बहुमज्झदेस-
भायाओ दोच्चस्स घणोदहिस्स हेट्ठिल्ले चरमंते एस णं छलसीइ जोगणसहस्साइं
अब्बाहाए अंतरे प० ॥ ८६ ॥ मंदरस्स णं पव्वयस्स पुरत्थिमिल्लाओ चरमंताओ
गोयूभस्स आवासपव्वयस्स पच्चत्थिमिल्ले चरमंते एस णं सत्तासीइं जोगणसहस्साइं
अब्बाहाए अंतरे प० । मंदरस्स णं पव्वयस्स दक्खिणिल्लाओ चरमंताओ दग्गभासस्स
आवासपव्वयस्स उत्तरिल्ले चरमंते एस णं सत्तासीइं जोगणसहस्साइं अब्बाहाए
अंतरे प० । एवं मंदरस्स पच्चत्थिमिल्लाओ चरमंताओ संखस्स आवासपव्वयस्स
पुरत्थिमिल्ले चरमंते एस णं सत्तासीइं जोगणसहस्साइं अब्बाहाए अंतरे प० ।
एवं चैव मंदरस्स उत्तरिल्लाओ चरमंताओ दग्गसीमस्स आवासपव्वयस्स दाहिणिल्ले

चरमंते एस णं सूत्तासीई ज्योणसहस्साई अवाहाए अंतरे प० । छण्हं कम्मपयडीणं
 आइमउवरिल्लवज्जाणं सत्तासीई उत्तरपयडीओ प० । महाहिमवंतकूडस्स णं उवरि-
 ल्लाओ चरमंताओ सोगंधियस्स कंडस्स हेट्टिल्ले चरमंते एस णं सत्तासीई ज्योणसयाई
 अवाहाए अंतरे प० । एवं रुप्पिकूडस्स वि ॥ ८७ ॥ एगमेगस्स णं चंदिमसूरियस्स
 अट्टासीई अट्टासीई महग्गहा परिवारे प० । दिट्ठिवायस्स णं अट्टासीई सुत्ताई
 पण्णत्ताई, तं जहा—उज्जुसुयं परिणयापरिणयं एवं अट्टासीई सुत्ताणि भाणियव्वाणि
 जहा णंदीए । मंदरस्स णं पव्वयस्स पुरत्थिमिल्लाओ चरमंताओ गोथूभस्स आवास-
 पव्वयस्स पुरत्थिमिल्ले चरमंते एस णं अट्टासीई ज्योणसहस्साई अवाहाए अंतरे
 प० । एवं चउसु वि दिसासु णेयव्वं । बाहिराओ उत्तराओ णं कट्टाओ सूरिए
 पदमं छम्मासं अयमाणे चोयालीसइमे मंडलगाए अट्टासीई एगसट्ठिभागे मुहुत्तस्स
 दिवसखेत्तस्स णिवुड्ढेत्ता रयणिखेत्तस्स अभिणिवुड्ढेत्ता सूरिए चारं चरइ । दक्खिण-
 कट्टाओ णं सूरिए दोब्बं छम्मासं अयमाणे चोयालीसइमे मंडलगाए अट्टासीई एग-
 सट्ठिभागे मुहुत्तस्स रयणिखेत्तस्स णिवुड्ढेत्ता दिवसखेत्तस्स अभिणिवुड्ढेत्ता णं सूरिए
 चारं चरइ ॥ ८८ ॥ उसभे णं अरहा कोसलिए इमीसे ओसप्पिणीए तइयाए सुसम-
 दूसमाए समाए पच्छिमे भागे एगूणणउइए अद्धमासेहिं सेसेहिं कालगाए जाव सव्व-
 दुक्खव्वपहीणे । समणे भगवं महावीरे इमीसे ओसप्पिणीए चउत्थाए दूसमसुसमाए
 समाए पच्छिमे भागे एगूणणउइए अद्धमासेहिं सेसेहिं कालगाए जाव सव्वदुक्खव्व-
 हीणे । हरिसेणे णं राया चाउरंतचक्कवट्ठी एगूणणउई वाससयाई महाराया होत्था
 संतिस्स णं अरहओ एगूणणउई अज्जास्सहस्सीओ उक्कोसिया अज्जासंपया होत्था
 ॥ ८९ ॥ सीयले णं अरहा णउई धणूहं उड्ढं उच्चत्तेणं होत्था । अजियस्स णं अ-
 हओ णउई गणा णउई गणहरा होत्था । एवं संतिस्स वि । सयंभुस्स णं वासुदेवस्स
 णउइ वासाई विजए होत्था । सव्वेसि णं वट्टवेयड्ढुपव्वयाणं उवरिल्लाओ सिहरतलाओ
 सोगंधियकंडस्स हेट्टिल्ले चरमंते एस णं णउइ ज्योणसयाई अवाहाए अंतरे प०
 ॥ ९० ॥ एकाणउई परवेयावच्चकम्मपडिमाओ पण्णत्ताओ । कालोए णं समुद्दे
 एकाणउई ज्योणसयसहस्साई साहियाई परिकखेवेणं प० । कुंथुस्स णं अरहओ
 एकाणउई आहोहियसया होत्था । आउयगोयवज्जाणं छण्हं कम्मपयडीणं एकाणउई
 उत्तरपयडीओ पण्णत्ताओ ॥ ९१ ॥ बाणाउई पडिमाओ पण्णत्ताओ । धेरे णं इंदभूई

वाणउइ वासाई सव्वाउयं पालइत्ता सिद्धे बुद्धे । मंदरस्स णं पव्वयस्स बहुमज्झ-
 देसभायाओ गोथूमस्स आवासपव्वयस्स पच्चत्थिमिल्ले चरमंते एस णं वाणउई
 जोयणसहस्साई अचाहाए अंतरे प० । एवं चउण्हं वि आवासपव्वयाणं ॥ ९२ ॥
 च्चदप्पहस्स णं अरहओ तेणउई गणा तेणउई गणहरा होत्था । संतिस्स णं अरहओ
 तेणउई चउह्दसपुव्विसया होत्था । तेणउइ मंडलगए णं सूरिए अइवट्टमाणे वा
 णिवट्टमाणे वा समं अहोरत्तं विसमं करेइ ॥ ९३ ॥ णिसहणीलवंतियाओ णं जीवाओ चउ-
 णउइ जोयणसहस्साई एकं छप्पणं जोयणसयं दोणिण य एगूणक्कीसइभागे जोयणस्स
 आयामेणं प० । अजियस्स णं अरहओ चउणउइ ओहिणाणिसया होत्था ॥ ९४ ॥
 सुपासस्स णं अरहओ पंचाणउइ गणा पंचाणउइ गणहरा होत्था । जंबुद्वीवस्स णं शीव-
 स्स चरमंताओ चउदिसिं लवणसमुदं पंचाणउई पंचाणउई जोयणसहस्साई ओगाहित्ता
 चत्तारि महापायालकलसा प० तं०-वल्लयामुहे केऊए जूयए ईसरे । लवणसमुदस्स
 उभओ पासं पि पंचाणउयं पंचाणउयं पदेसाओ उव्वेहुस्सेहपरिहाणीए प० । कुंथू णं
 अरहा पंचाणउइ वाससहस्साई परमाउयं पालइत्ता सिद्धे बुद्धे जाव प्पहीणे । धेरे णं
 मोरियपुत्ते पंचाणउइ वासाई सव्वाउयं पालइत्ता सिद्धे बुद्धे जाव प्पहीणे ॥ ९५ ॥
 एगमेस्स णं रण्णे चाउरंतचक्कवट्टिस्स छण्णउई छण्णउई गामकोडीओ होत्था ।
 वाउकुमारणं छण्णउइ भवणावाससयसहस्सा प० । ववहारिए णं देडे छण्णउइ
 अंगुलाई अंगुलमाणेणं । एवं धणू णालिया जुगे अक्खे सुसले वि हु । अडिंभतरओ
 आइसुहुत्ते छण्णउइअंगुलछाए प० ॥ ९६ ॥ मंदरस्स णं पव्वयस्स पच्चत्थिमि-
 ल्लाओ चरमंताओ गोथूमस्स णं आवासपव्वयस्स पच्चत्थिमिल्ले चरमंते एस णं सत्ता-
 णउइ जोयणसहस्साई अचाहाए अंतरे पण्णत्ते । एवं चउदिसिं पि । अट्टण्हं कम्म-
 पयडीणं सत्ताणउइ उत्तरपयडीओ पण्णत्ताओ । हरिसेणे णं राया चाउरंतचक्कवट्टी
 देसूणाई सत्ताणउइ वाससयाई अगारमज्जे वत्तिता मुंडे भवित्ता णं जाव पव्वइए
 ॥ ९७ ॥ णंदणवणस्स णं उन्नरिल्लाओ चरमंताओ पंडुयवणस्स हेट्टिल्ले चरमंते एस
 णं अट्टाणउइ जोयणसहस्साई अचाहाए अंतरे पण्णत्ते । मंदरस्स णं पव्वयस्स पच्च-
 त्थिमिल्लाओ चरमंताओ गोथूमस्स आवासपव्वयस्स पुरत्थिमिल्ले चरमंते एस णं
 अट्टाणउइ जोयणसहस्साई अचाहाए अंतरे प० । एवं चउदिसिं पि । दाहिणभरह-
 व्हुस्स णं धणुण्णित्ठे अट्टाणउइ जोयणसयाई किंचूणाई आयामेणं पण्णत्ते । उत्तराओ

णं कट्टाओ सूरिए पढमं छम्मासं अयमाणे एग्गुणपण्णासइमे मंडलगए अट्टाणउइ एकसट्ठिभागे मुहुत्तस्स दिवसखेत्तस्स णिवुद्धेत्ता रयणिखेत्तस्स अभिणिवुद्धित्ता णं सूरिए चारं चरइ । दक्खिगाओ णं कट्टाओ सूरिए दोच्चं छम्मासं अयमाणे एग्गुण-पण्णासइमे मंडलगए अट्टाणउइ एकसट्ठिभाए मुहुत्तस्स रयणिखेत्तस्स णिवुद्धेत्ता दिवसखेत्तस्स अभिणिवुद्धित्ता णं सूरिए चारं चरइ । रेवईपढमजेट्टापज्जवसाणाणं एग्गुणवीसाए णक्खत्ताणं अट्टाणउइ ताराओ तारग्गेणं पण्णत्ताओ ॥ ९८ ॥ मंदरे णं पव्वए णवणउइ जोयणसहस्साइं उट्ठं उच्चत्तेणं पण्णत्ते । णंदणवणस्स णं पुरत्थि-मिल्लाओ चरमंताओ पच्चत्थिमिल्ले चरमंते एस णं णवणउइ जोयणसयाइं अत्ताहाए अंतरे पण्णत्ते । एवं दक्खिणिल्लाओ चरमंताओ उत्तरिल्ले चरमंते एस णं णवणउइ जोयणसयाइं अत्ताहाए अंतरे पण्णत्ते । उत्तरे पढमे सूरियमंडले णवणउइ जोयण-सहस्साइं साइरेगाइं आयामविकखंभेणं पण्णत्ते । दोच्चे सूरियमंडले णवणउइ जोयण-सहस्साइं साहियाइं आयामविकखंभेणं पण्णत्ते । तइए सूरियमंडले णवणउइ जोयण-सहस्साइं साहियाइं आयामविकखंभेणं पण्णत्ते । इमीसे णं रयणप्पभाए पुढवीए अज्जणस्स कंडस्स हेट्ठिल्लाओ चरमंताओ वाणमंतरभोमेज्जविहारारणं उवरिमंते एस णं णवणउइ जोयणसयाइं अत्ताहाए अंतरे पण्णत्ते ॥ ९९ ॥ दसदसमिया णं भिक्खु-पड्डिमा एणेणं राइंदियसएणं अट्ठच्छेहिं भिक्खासएहिं अहासुत्तं जाव आराहिया वि भवइ । सयमिसया णक्खत्ते एकसयतारे पण्णत्ते । सुविही पुप्फदंते णं अरहा एगं धणुसयं उट्ठं उच्चत्तेणं होत्था । पासे णं अरहा पुरिसादाणीए एक्कं वास-सयं सव्वाउयं पालइत्ता सिद्धे जाव प्पहीणे । एवं थेरे वि अज्जसुहम्मे । सव्वे वि णं दीहवेयड्ढपव्वया एगमेगं गाउयसयं उट्ठं उच्चत्तेणं प० । सव्वे वि णं चुल्लहिम-वंतसिहीरीवासहरपव्वया एगमेगं जोयणसयं उट्ठं उच्चत्तेणं प० एगमेगं गाउयसयं उव्वेहेणं प० । सव्वे वि णं कंचणगपव्वया एगमेगं जोयणसयं उट्ठं उच्चत्तेणं प० एगमेगं गाउयसयं उव्वेहेणं प० एगमेगं जोयणसयं मूले विकखंभेणं प० ॥ १०० ॥ चंदप्पमे णं अरहा दिवड्ढं धणुसयं उट्ठं उच्चत्तेणं होत्था । आरणे कप्पे दिवड्ढं विमाणावाससयं प० । एवं अच्चुए वि ॥ १०१ ॥ सुपासे णं अरहा दो धणुसयाइं उट्ठं उच्चत्तेणं होत्था । सव्वे वि णं महाहिमवंतवप्पीवासहरपव्वया दो-दो जोयण-सयाइं उट्ठं उच्चत्तेणं प० दो-दो गाउयसयाइं उव्वेहेणं प० । जंबुदीवे णं दीवे दो

कंचणपव्वसया प० ॥ १०२ ॥ पउमप्वमे णं अरहा अट्ठाइजाई धणुसयाई उट्ठं उच्चत्तेणं होत्था । असुरकुमाराणं देवाणं पासायवडिंसगा अट्ठाइजाई जोगणसयाई उट्ठं उच्चत्तेणं प० ॥ १०३ ॥ सुमई णं अरहा तिण्णि धणुसयाई उट्ठं उच्चत्तेणं होत्था । अरिट्ठणेमी णं अरहा तिण्णि वाससयाई कुमारवासमज्जे वसित्ता मुंडे भवित्ता जाय पव्वइए । वेमाणियाणं देवाणं विमाणपागारा तिण्णि तिण्णि जोगणसयाई उट्ठं उच्चत्तेणं प० । समणस्स भगवओ महावीरस्स तिण्णि सयाणि चोदसपुव्वीणं होत्था । पंचधणुसइयस्स णं अंतिमसारीरियस्स सिद्धिगयस्स साइरेगाणि तिण्णि धणुसयाणि जीवप्वदेसोगाहणा प० ॥ १०४ ॥ पासस्स णं अरहओ पुरिसादाणीयस्स अट्ठुट्ठसयाई चोदसपुव्वीणं संपया होत्था । अभिणंदणे णं अरहा अट्ठुट्ठाई धणुसयाई उट्ठं उच्चत्तेणं होत्था ॥ १०५ ॥ संभवे णं अरहा चत्तारि धणुसयाई उट्ठं उच्चत्तेणं होत्था । सव्वे वि णं णिसदणीलवंता वासहरपव्वया चत्तारि-चत्तारि जोगणसयाई उट्ठं उच्चत्तेणं चत्तारि-चत्तारि गाउयसयाई उव्वेहेणं प० । सव्वे वि णं वक्खारपव्वया णिसदणीलवंतासहरपव्वयए णं चत्तारि चत्तारि जोगणसयाई उट्ठं उच्चत्तेणं चत्तारि-चत्तारि गाउयसयाई उव्वेहेणं पण्णत्ते । आणयपाणएसु दोसु कप्पेसु चत्तारि विमाणसया प० । समणस्स णं भगवओ महावीरस्स चत्तारि सया वाईणे सदेवमणुयासुरंमि लोगंमि वाए अपराजियाणं उक्कोसिया वाइसंपया होत्था ॥ १०६ ॥ अजिए णं अरहा अट्ठपंचमाई धणुसयाई उट्ठं उच्चत्तेणं होत्था । सगरे णं राया चाउरंतचक्कवट्ठी अट्ठपंचमाई धणुसयाई उट्ठं उच्चत्तेणं होत्था ॥ १०७ ॥ सव्वे वि णं वक्खारपव्वया सीयासीओयाओ महाणईओ मंदरपव्वयंतणेणं पंच-पंच जोगणसयाई उट्ठं उच्चत्तेणं पंच-पंच गाउयसयाई उव्वेहेणं प० । सव्वे वि णं वासहरकूडा पंच-पंच जोगणसयाई उट्ठं उच्चत्तेणं होत्था, मूले पंच-पंच जोगणसयाई विक्खंभेणं प० । उसभे णं अरहा कोसलिए पंच धणुसयाई उट्ठं उच्चत्तेणं होत्था । भरहे णं राया चाउरंतचक्कवट्ठी पंच धणुसयाई उट्ठं उच्चत्तेणं होत्था । सोमणसगंभ्रमादण-विज्जुप्वभमालवंताणं वक्खारपव्वयाणं मंदरपव्वयंतणेणं पंच-पंच जोगणसयाई उट्ठं उच्चत्तेणं पंच-पंच गाउयसयाई उव्वेहेणं प० । सव्वे वि णं वक्खारपव्वयकूडा हरिहरिस्सहकूडवजा पंच-पंच जोगणसयाई उट्ठं उच्चत्तेणं मूले पंच-पंच जोगणसयाई आयामविक्खंभेणं प० । सव्वे वि णं णंदणकूडा बलकूडवजा पंच-पंच जोगण-

सयाई उड्डं उच्चतेणं मूले पंच-पंच जोयणसयाई आथामविक्रंभेणं प० । सोहम्मी-
साणेसु कपेसु विमाणा पंच-पंच जोयणसयाई उड्डं उच्चतेणं प० ॥ १०८ ॥ सण-
कुमारमाहि देसु कपेसु विमाणा छ जोयणसयाई उड्डं उच्चतेणं प० । जुल्लहिमवंत-
कूडस्स-णं उवरिल्लाओ चरमंताओ जुल्लहिमवंतस्स वासहरपव्वयस्स समधरणितले
एस णं छ जोयणसयाई अन्नाहाए अंतरे पण्णत्ते । एवं सिहरीकूडस्स वि । पासस्स णं
अरहओ छ सया वाईणं सदेवमणुयासुरे लोए वाए अपराजियाणं उक्कोसिया वाई-
संपया होत्था । अभिचंदे णं कूलगरे छ धणुसयाई उड्डं उच्चतेणं होत्था । वासुपुज्जे णं
अरहा छहिं पुरिससएहिं सिद्धिं मुंडे भवित्ता अगाराओ अणगारियं पव्वइए ॥ १०९ ॥
वंभलंतएसु कपेसु विमाणा सत्त-सत्त जोयणसयाई उड्डं उच्चतेणं प० । समणस्स णं
भगवओ महावीरस्स सत्त जिणसया होत्था । समणस्स भगवओ महावीरस्स सत्त
वेउव्वियसया होत्था । अरिट्टणेमी णं अरहा सत्त वाससयाई देसूणाई केवलपरियागं
पाउणित्ता सिद्धे बुद्धे जाव प्पहीणे । महाहिमवंतकूडस्स णं उवरिल्लाओ चरमंताओ
महाहिमवंतस्स वासहरपव्वयस्स समधरणितले एस णं सत्त जोयणसयाई अन्नाहाए
अंतरे पण्णत्ते । एवं रुप्पिकूडस्स वि ॥ ११० ॥ महासुक्कसहस्सारेसु दोसु कपेसु
विमाणा अट्ट जोयणसयाई उड्डं उच्चतेणं प० । इमीसे णं रयणप्पभाए पुढवीए पढमे
कंडे अट्टसु जोयणसएसु वाणमंतरभोमेज्जविहारा प० । समणस्स णं भगवओ महा-
वीरस्स अट्टसया अणुत्तरोववाइयाणं देवाणं गइकल्लाणाणं ठिइकल्लाणाणं आगमेसि-
भदाणं उक्कोसिया अणुत्तरोववाइयसंपया होत्था । इमीसे णं रयणप्पभाए पुढवीए
बहुसमरमणिज्जाओ भूमिभागाओ अट्टहिं जोयणसएहिं सूरिए चारं चरइ । अरहओ
णं अरिट्टणेमिस्स अट्ट सयाई वाईणं सदेवमणुयासुरंमि लोगमि वाए अपराजियाणं
उक्कोसिया वाईसंपया होत्था ॥ १११ ॥ आणयपाणयआरणअच्चुएसु कपेसु विमाणा
णव-णव जोयणसयाई उड्डं उच्चतेणं प० । णिसदकूडस्स णं उवरिल्लाओ सिहरतलाओ
णिसदस्स वासहरपव्वयस्स समे धरणितले एस णं णव जोयणसयाई अन्नाहाए अंतरे
पण्णत्ते । एवं णीलवंतकूडस्स वि । विमलवाहणे णं कुलगरे णं णव धणुसयाई उड्डं
उच्चतेणं होत्था । इमीसे णं रयणप्पभाए बहुसमरमणिज्जाओ भूमिभागाओ णवहिं
जोयणसएहिं सववुरिमे ताराव्वे चारं चरइ । णिसदस्स णं वासहरपव्वयस्स उव-
रिल्लाओ सिहरतलाओ इमीसे णं रयणप्पभाए पुढवीए पढमस्स कंडस्स बहुमज्जदे-

सभाए एस णं णव जोयणसयाई अत्राहाए अंतरे पण्णत्ते । एवं णीलवंतस्स वि
 ॥ ११२ ॥ सव्वे वि णं गेवेज्जविमाणे दस-दस जोयणसयाई उड्डं उच्चत्तेणं पण्णत्ते ।
 सव्वे वि णं जमगपव्वया दस-दस जोयणसयाई उड्डं उच्चत्तेणं प०, दस-दस गाउय-
 सयाई उव्वेहेणं प०, मूले दस-दस जोयणसयाई आयामविकलंभेणं प० । एवं
 चित्तविचित्तकूडा वि भाणियव्वा । सव्वे वि णं वट्टवेयह्वपव्वया दस-दस जोयण-
 सयाई उड्डं उच्चत्तेणं प०, दस-दस गाउयसयाई उव्वेहेणं प० मूले दस-दस जोयण-
 सयाई विकलंभेणं प०, सव्वत्थ समा पल्लगसंठाणसठिया प० । सव्वे वि णं हरि-
 हरिस्सहकूडा वक्खारकूडवज्जा दस-दस जोयणसयाई उड्डं उच्चत्तेणं प०, मूले दस-दस
 जोयणसयाई विकलंभेणं प० । एवं बलकूडा वि णंदणकूडवज्जा । अरहा वि अरिट्ट-
 गेमी दस वाससयाई सव्वाउयं पालइत्ता सिद्धे बुद्धे जाव् सव्वदुक्खप्पहीणे । पासस्स-
 णं अरहओ दस सयाई जिणाणं होत्था । पासस्स णं अरहओ दस अंतेवासीसयाइं
 कालगयाई जाव् सव्वदुक्खप्पहीणाइं । पउमदहपुंडरीयदहां य दस-दस जोयणस-
 याई आयामेणं प० ॥ ११३ ॥ अणुत्तरोववाइयाणं देवाणं विमाणा एक्कारस जोयण-
 सयाई उड्डं उच्चत्तेणं प० । पासस्स णं अरहओ इक्कारस सयाई वेउच्चियाणं होत्था
 ॥ ११४ ॥ महापउममहापुंडरीयदहाणं दो दो जोयणसहस्साइं आयामेणं प० ॥ ११५ ॥
 इमीसे णं रयणप्पभाए पुढवीए वहरकंडस्स उवरिळाओ चरमंताओ लोहियक्ख-
 कंडस्स हेट्ठिल्ले चरमंते एस णं तिण्णि जोयणसहस्साइं अत्राहाए अंतरे प० ॥ ११६ ॥
 तिगिच्छिकेसरिदहाणं चत्तारि-चत्तारि जोयणसहस्साइं आयामेणं पण्णत्ता ॥ ११७ ॥
 धरणितले मंदरस्स णं पव्वयस्स बहुमज्झदेसभाए रुयगणाभीओ चउदिसिं पंच पंच
 जोयणसहस्साइं अत्राहाए अंतरे मंदरपव्वए पण्णत्ते ॥ ११८ ॥ सहस्सारे णं कप्पे
 छ विमाणावाससहस्सा प० ॥ ११९ ॥ इमीसे णं रयणप्पभाए पुढवीए रयणस्स
 कंडस्स उवरिळाओ चरमंताओ पुलगस्स कंडस्स हेट्ठिल्ले चरमंते एस णं सत्त जोयण-
 सहस्साइं अत्राहाए अंतरे पण्णत्ते ॥ १२० ॥ हरिवासरम्मयाणं वासा अट्ट जोयण-
 सहस्साइं साइरेगाइं वित्थरेणं प० ॥ १२१ ॥ दाहिणद्धुभरहस्स णं जीवा पाईण-
 पडीणायया दुहओ समुदं पुट्टा णव जोयणसहस्साइं आयामेणं प० ॥ १२२ ॥ अजियस्स
 णं अरहओ साइरेगाइं णव ओहिणाणसहस्साइं होत्था, मंदरे णं पव्वए धरणि-
 तले दस जोयणसहस्साइं विकलंभेणं पण्णत्ते ॥ १२३ ॥ जंबूदीवे णं दीवे एयं जोयण-

सयसहस्सं आयामविकखंभेणं प० ॥१२४॥ लवणे णं समुदे दो ज्योणसयसहस्साई चक्कवालविकखंभेणं प० ॥१२५॥ पासस्स णं अरहओ तिणिण सयसाहस्सीओ सत्तावीसं च सहस्साई उक्कोसिया सावियासंपया होत्था ॥१२६॥ धायइखंडे णं दीवे चत्तारि ज्योणसयसहस्साई चक्कवालविकखंभेणं पण्णत्ते ॥१२७॥ लवणस्स णं समुहस्स पुरत्थिमिल्लाओ चरमंताओ पच्चत्थिमिल्ले चरमंते एस णं पंच ज्योणसयसहस्साई अवाहाए अंतरे पण्णत्ते ॥१२८॥ भरहे णं राया चाउरंतचक्कवट्टी छ पुव्वसयसहस्साई रायमज्जे वसित्ता मुंडे भवित्ता अगाराओ अणमारियं पव्वइए ॥१२९॥ जंबूदीवस्स णं दीवस्स पुरत्थिमिल्लाओ वेइयंताओ धायइखंडचक्कवालस्स पच्चत्थिमिल्ले चरमंते एस णं सत्त ज्योणसयसहस्साई अवाहाए अंतरे पण्णत्ते ॥१३०॥ माहिं देणं कप्पे अट्ट विमाणावाससयसहस्साई पण्णत्ताई ॥१३१॥ अजियस्स णं अरहओ साइरेगाई णव ओहिणाणिसहस्साई होत्था ॥१३२॥ पुरिससीहे णं वासुदेवे दस वाससयसहस्साई सव्वाउर्यं पालइत्ता पंचमाए पुढवीए णेरइए सु णेरइयत्ताए उववण्णे ॥१३३॥ समणे भगवं महावीरे तित्थगरभवग्गहणाओ छट्ठे पोट्टिलभवग्गहणे पूगं वासकोडिं सामण्णपरियागं पाउणित्ता सहस्सारे कप्पे सव्वट्टविमाणे देवत्ताए उववण्णे ॥१३४॥ उसभसिरिरस्स भगवओ चरिमस्स य महावीरवद्धमाणस्स एगा सागरौवमकोडाकोडी अवाहाए अंतरे पण्णत्ते ॥१३५॥

गणिपिडग

दुवालसंगे गणिपिडगे पण्णत्ते, तं जहा—आयारे, सूयगडे, ठाणे, समवाए, विवाहपण्णत्ती, णायाधम्मकहाओ, उवासगदसाओ, अंतगडदसाओ, अणुत्तरोववाइयदसाओ, पण्हावागरणाई, विवाग्गसुए, दिट्ठिवाए । से किं तं आयारे ? आयारे णं समणाणं गिग्गंथाणं आयारगोयरविणयवेणइयट्ठाणगमणचकमणपमाणजोगजुजणभासासमिइगुत्तीसेज्जोवहिभत्तपाणउग्गमउप्पायणए सणाविसोहिंसुद्धासुद्ध - गहणवयणियमतवोवहाणसुप्पसत्थमाहिज्जइ । से समासओ पंचविहे पण्णत्ते, तं जहा—णाणायारे, दंसणायारे चरित्तायारे, तवायारे, विरियायारे । आयारस्स णं परित्ता वायणा, संखेज्जा अणुओगदारा, संखेज्जाओ पडिबत्तीओ, संखेज्जा वेढा, संखेज्जा सिलोगा, संखेज्जाओ णिज्जुत्तीओ । से णं अंगट्टयाए पट्टमे अंगे दो सुयक्खंधा, पण्णत्तीसं अज्जयणा, पंचासीई उद्देसणकाला, पंचासीई समुद्देसणकाला, अट्टारस पयसहस्साई पयग्गेणं, संखेज्जा अक्खरा, अणंता गमा, अणंता पज्जवा,

परित्ता तसा, अणंता थायरा, सासया कडा णिवद्धा णिकाइया जिणपण्णत्ता भावा आघविज्जंति पण्णविज्जंति परुविज्जंति दंसिज्जंति णिंदंसिज्जंति उवदंसिज्जंति । से एवं आया एवं णाया एवं विण्णाया । एवं चरणकरणरूवणया आघविज्जंति पण्णविज्जंति परुविज्जंति दंसिज्जंति णिंदंसिज्जंति उवदंसिज्जंति । से च आयारे ॥१३६॥ से किं तं सूयगडे ? सूयगडे णं ससमया सूइज्जंति, परसमया सूइज्जंति, ससमयपरसमया सूइज्जंति, जीवा सूइज्जंति, अजीवा सूइज्जंति, जीवाजीवा सूइज्जंति, लोगो सूइज्जंति, अलोगो सूइज्जंति, लोगालोगो सूइज्जंति । सूयगडे णं जीवाजीवपुण्णपायासवसंवरणिच्चरण-बंधमोक्खावसाणा पयत्था सूइज्जंति । समणाणं अचिरकालपव्वइयाणं कुसमयमोह-मोहमइमोहिथाणं संदेहजायसहजबुद्धिपरिणामसंमइयाणं पावकरमल्लिणमइगुणविषोह-णत्थं असीयस्स किरियावाइयसवस्स चउरासीए अकिरियवाईणं सत्तट्ठीए अण्णा-णियवाईणं वत्तीसाए वेणइयवाईणं तिण्हं तेवट्ठीणं अण्णदिट्ठियसयाणं वूहं किच्चा ससमए ठाविज्जइ णाणादिट्ठंतवयणणिस्सारं सुट्टु दरिसयंता विविहवित्थराणुगम-परमसवभावगुणविसिट्ठा मोक्खपहोयारगा उदारा अण्णाणतबंधकारट्टुगोसु दीवभूया सोवाणा चव सिद्धिसुगइगिट्ठत्तमस्स णिक्खोभणिप्पकंपा सुत्तथा । सुयगडस्स णं परित्ता वायणा संखेज्जा अणुओगदारा संखेज्जाओ पडिं वत्तीओ संखेज्जा वेदा संखेज्जा सिलोगा संखेज्जाओ णिज्जुत्तीओ । से णं अंगट्टयाए दोबे अंगे दो मुयक्खंधा तंवीसं अउज्जयणा तेत्तीसं उदेसणकाला तेत्तीसं समुदेसणकाला छत्तीसं पयसहस्साइं पय-ग्गेणं पण्णत्ताइं, संखेज्जा अक्खरा अणंता गमा अणंता पज्जा परित्ता तसा अणंता थायरा सासया कडा णिवद्धा णिकाइया जिणपण्णत्ता भावा आघविज्जंति पण्णविज्जंति परुविज्जंति दंसिज्जंति णिंदंसिज्जंति उवदंसिज्जंति । से एवं आया एवं णाया एवं विण्णाया एवं चरणकरणरूवणया आघविज्जंति पण्णविज्जंति परुविज्जंति दंसिज्जंति णिंदंसिज्जंति उवदंसिज्जंति । से च सूयगडे ॥ १३७ ॥ से किं तं ठाणे ? ठाणे णं ससमया ठाविज्जंति, परसमया ठाविज्जंति, ससमयपरसमया ठाविज्जंति, जीवा ठावि-ज्जंति, अजीवा ठाविज्जंति, जीवाजीवा ठाविज्जंति, लोगा ठाविज्जंति अलोगा ठाविज्जंति, लोगालोगा ठाविज्जंति, ठाणेणं दव्वगुणखेत्तकालपव्वज्जवपयत्थाणं—सेला सट्ठिला य समुद्दा, सूभवणविमाणआगरणइंओ । णिहिओ पुरिसज्जाया, सरा य गोत्ता य जोइसंचाला ॥ १ ॥ एकविहवत्तव्वयं टुविह जाव दसविहवत्तव्वयं जीवाण

समवाओ-गणिपिडग-समवाए, वियाहे ३९५

पोगलाण य लोमट्टाई च णं परूवणया आघविज्जंति । ठाणस्त णं परित्ता वायणा, संखेज्जा अणुओमदारा, संखेज्जाओ पड्विवत्तीओ, संखेज्जा वेदा, संखेज्जा सिलोमा, संखेज्जाओ संगहणीओ । से णं अंगट्टयाए तइए अंगे, एगे सुयक्खंधे, दस अज्झयणा, एक्कवीसं उद्देसणकाला, एक्कवीसं समुद्देसणकाला, बावत्तरिं पयसहस्साई पयग्गेणं पण्णत्ताई । संखेज्जा अक्खरा, अणंता गमा, अणंता पज्जवा, परित्ता तसा, अणंता थावरा, सासया कडा णिवद्धा णिकाइया जिणपण्णत्ता भावा आघविज्जंति पण्णविज्जंति परूविज्जंति दंसिज्जंति णिदंसिज्जंति उवदंसिज्जंति । से एवं आया एवं णाया एवं विण्णयाया एवं चरणकरणपरूवणया आघविज्जंति । से त्तं ठाणे ॥ १३८ ॥ से किं तं समवाए ? समवाए णं ससमया सूइज्जंति, परसमया सूइज्जंति, ससमयपरसमया सूइज्जंति, जाव लोमालोमा सूइज्जंति । समवाए णं एकाइयाणं एगट्टाणं एगुत्तरियपरिवुद्धीय, दुवालसंगस्स य गणिपिडगस्स पल्लवग्गे समणुगाइज्जइ ठाणगसयस्स, बारसविहवित्थरस्स सुयणागस्स जगजीवहियस्स भगवओ समासेणं समायारे आहिज्जइ । तत्थ य णाणाविहप्पगारा जीवाजीवा य वण्णिया वित्थरेण, अचरे वि य बहुविहा विसेसा णरगतिरियमणुयसुरगणाणं आहारुत्तासलेसाआवाससंखआययप्पमाणउववायच्चवणओगाह्णोवहिवेयणविहाणउवओगजोगइदियकसाय, त्रिविहा य जीवजोणी, विक्खंभुस्सेहपरिरयप्पमाणं विहिविसेमा य मंदराईणं महीधराणं, कुलगरतित्थगरगणहराणं समत्तभरहाहिवाण चक्कीणं चेव चक्कहरहलहराण य, वासाण य णिगमा य समाए । एए अण्णे य एवमाइ एत्थ वित्थरेणं अत्था समाहिज्जंति । समवायस्स णं परित्ता वायणा जाव से णं अंगट्टयाए चउत्थे अंगे एगे अज्झयणे एगे सुयक्खंधे एगे उद्देसणकाले एगे समुद्देसणकाले एगे चउयाले पयसयसहस्से पयग्गेणं पण्णत्ते । संखेज्जाणि अक्खराणि जाव चरणकरणपरूवणया आघविज्जंति । से त्तं समवाए ॥ १३९ ॥ से किं तं वियाहे ? वियाहेणं ससमया वियाहिज्जंति परसमया वियाहिज्जंति ससमयपरसमया वियाहिज्जंति, जीवा वियाहिज्जंति अजीवा वियाहिज्जंति जीवाजीवा वियाहिज्जंति, लोमे वियाहिज्जइ अलोमे वियाहिज्जइ लोमालोमे वियाहिज्जइ । वियाहेणं णाणाविहसुरणरिंदरायसिस्सिविहसंसइयपुच्छियाणं जिणेणं वित्थरेणं भासियाणं दव्वगुणखेत्तकालपञ्चपदेसपरिणामजंहत्थिभावअणुगमणिकखेवणयप्पमाणसुणिउणोवक्कमविविहप्प-

गारपयवृषयासियाणं लोपालोपयासियाणं संसारसमुद्हरुंदउत्तरणसमत्थाणं सुरवइ-
 संपूजियाणं भवियजणपयहिययाभिणंदियाणं तमरयविद्धंसणाणं सुदिट्टदीवभूयईहा-
 मइबुद्धिवद्धणाणं छत्तीससहस्समग्गयाणं वागरणाणं दंसणाओ सुयत्थवहुविहप्पगारा
 सीसहियत्था य गुणहत्था । वियाहस्स णं परित्ता वायणा संखेज्जा अणुओगदारा
 संखेज्जाओ पड्डिवत्तीओ संखेज्जा वेढा संखेज्जा सिलोगा संखेज्जाओ गिज्जुत्तीओ । से णं
 अंगट्टयाए पंचमे अंगे एगे सुयक्खंवे एगे साइरेगे अज्झयणसए दस उहेसगसह-
 स्साइं दस समुद्रेसगसहस्साइं छत्तीसं वागरणसहस्साइं चउरासीई पयसहस्साइं पय-
 ग्गेणं प० । संखेज्जाइं अक्खराइं अणंता गमा अणंता पज्जवा परित्ता तसा अणंता थावरा
 सासया कडा णिवद्धा णिकाइया जिणपण्णत्ता भावा आघविज्जंति पण्णविज्जंति परु विज्जंति
 दंसिज्जंति णिंदंसिज्जंति उवदंसिज्जंति । से एवं आया से एवं णाया से एवं विण्णाया एवं
 चरणकरणपरुवणया आघविज्जंति । से तं वियाहे । १४० । से किं तं णायाधम्मकहाओ ?
 णायाधम्मकहासु णं णायाणं णगराइं उज्जाणाइं चेइयाइं वणंसंडा रायाणो अम्मापियरो
 समोसरणाइं धम्मथरिया धम्मकहाओ इहलोइयपरलोइयइह्वीविसेसा भोगपरिचाया
 पव्वज्जाओ सुयपरिग्गहा तवोवहणाइं परियाया संलेहणाओ भत्तपच्चक्खाणाइं पाओ-
 वगमणाइं देवलोगमणाइं सुकुलपच्चायायाइं पुणभोहिल्लाभा अंतकिरियाओ य आघ-
 विज्जंति जाव णायाधम्मकहासु णं पव्वइयाणं विणयकरणजिणसामिसासणवरे संज-
 मपइण्णपालणधिइमइवयसायदुब्बलाणं तवणियमतवोवहाणरणदुद्धरभरभग्गयणिस-
 हयणिसिद्धाणं ओरपरीसहपराजियाणं सहपारद्वरुद्धसिद्धालयमग्गणिग्गयाणं विसयसुह-
 तुच्छआसावसदोमसुच्छियाणं विराहियचरित्तणाणदंसणजइगुणवित्रिहप्पवारणिसार-
 मुण्णयाणं संसारअपारदुकखदुग्गइभन्नविहपरंपरापवंचा । धीराण य जियपरिसह-
 कसायसेणधिइयणियसंजमउच्छाहणिच्छियाणं आराहियणाणदंसणचरित्तजोगणिससल-
 सुद्धसिद्धालयमग्गममिसुहाणं सुरभवणविमाणसुक्खाइं अणोवमाइं भुत्तूण चिरं च
 भोगभोगाणि ताणि दिव्वाणि महरिहाणि तओ य कालक्कमत्तुयाणं जह य पुणो लद्ध-
 सिद्धिमग्ग्याणं अंतकिरिया । चलियाण य सदेवमाणुस्सधीरकरणकारणाणि बोधण-
 अणुसासणाणि गुणदोसदरिसणाणि दिट्ठंते पच्चए य सोऊण लोममुण्णिणो जहट्टिय-
 सासणम्मि जरमरणगासणकरे आराहियसंजमा य सुरलोपपड्डिणियत्ता ओवेंति जइ
 सासयं सिवं सव्वदुकव्वमोक्खं । एए अण्णे य एवमाइअत्था वित्थरेण य । णाया-

धम्मकहासु णं परित्ता वायणा संखेज्जा अणुओगदारा जाव संखेज्जाओ संगहणीओ ।
 से णं अंगट्टयाए छट्ठे अंगे दो सुयक्खंधा एगूणवीसं अञ्जयणा, ते समासओ
 द्रुविहा पण्णत्ता, तं जहा—चरिता य कप्पिया य, दस धम्मकहाणं वग्गा, तत्थ णं
 एगमेगाए धम्मकहाए पंच पंच अक्खाइयासयाई एगमेगाए अक्खाइयाए पंच-
 पंच उवक्खाइयासयाई, एगमेगाए उवक्खाइयाए पंच-पंच अक्खाइयउवक्खा-
 इयासयाई, एवमेव सपुट्वावरेणं अद्दुट्ठाओ अक्खाइयकोडीओ भवंतीति मक्खा-
 याओ, एगूणतीसं उद्देसणकाला एगूणतीसं समुद्देसणकाला संखेज्जाइं पयसहस्साई
 पयग्गेणं पण्णत्ता, संखेज्जा अक्खरा जाव चरणकरणपरूवणया आघविज्जंति ।
 से त्तं णायाधम्मकहाओ ॥ १४१ ॥ से किं तं उवासगदसाओ ? उवासगदसासु णं
 उवासयाणं णगराई उज्जाणाई चेइयाई वणसंडा रायाणो अम्मापियरो समोसरणाई
 धम्मायरिया धम्मकहाओ इहलोइयपरलोइयइद्धिविसेसा उवासयाणं सीलव्वयवेर-
 मणगुणपच्चक्खाणपोसहोववासापडिविज्जणयाओ सुयपरिग्गहा तवोवहाणा पडिमाओ
 उवसग्गा संलेह्णाओ भत्तपच्चक्खाणाई पाओवगमणाई देवलोगमणाई सुकुलपच्चा-
 याया पुणो बोहिलाभा अंतकिरियाओ य आघविज्जंति । उवासगदसासु णं उवा-
 सयाणं रिद्धिविसेसा परिसा वित्थरधम्मसवणाणि बोहिलाभअभिगमसम्मत्तविसुद्धया
 थिरत्तं मूलगुणउत्तरगुणाइयारा ठिईविसेसा य बहुविसेसा पडिमाभिग्गहग्गहणपालणा
 उवसग्गाहियासणा णिह्वसग्गा य तवा य विचित्ता सीलव्वयगुणवेरमणपच्चक्खाण-
 पोसहोववासा अपच्छिम्ममारणतिया य संलेह्णाओसणाहिं अप्पाणं जह य भावइत्ता
 बहूणि भत्ताणि अणसणाए य छेयइत्ता उववण्णा कप्पवरविमाणुत्तमेसु जह अणु-
 भवंति सुरवरविमाणवरपोंडरीएसु सोक्खाई अणोवमाई कमेण सुत्तूण उत्तमाई तओ
 आउक्खएणं चुया समाणा जह जिणमयंमि बोहिं लद्धूण य संजमुत्तमं तमरयोघ-
 विप्पमुक्का उव्वेति जह अक्खयं सव्वदुक्खमोक्खं । एए अण्णे य एवमाइअत्था
 वित्थरेण य । उवासयदसासु णं परित्ता वायणा संखेज्जा अणुओगदारा जाव संखे-
 ज्जाओ संगहणीओ । से णं अंगट्टयाए सत्तमे अंगे एगे सुयक्खंधे दस अञ्जयणा
 दस उद्देसणकाला दससमुद्देसणकाला संखेज्जाइं पयसयसहस्साई पयग्गेणं पण्णत्ता ।
 संखेज्जाइं अक्खराई जाव एवं चरणकरणपरूवणया आघविज्जंति । से त्तं उवासग-
 दसाओ ॥१४२॥ से किं तं अंतगडदसाओ ? अंतगडदसासु णं अंतगडाणं णगराई

उज्जाणाईं चेइयाईं वणसंडा रायाणो अम्मापियरो समोसरणाईं धम्मायरिया धम्मकहा इहलोइयपरलोइयइड्ढिविसेसा भोगपरिचाया पव्वज्जाओ सुयपरिग्गहा तवोवहाणाईं पडिमाओ बहुविहाओ खमा अज्जवं मद्दवं च सोअं च सच्चसहियं सत्तरसविहो य संजमो उत्तमं च वंभं आकिंचणया तवो चियाओ समिइगुत्तीओ चैव तह अप्पमायजोमो सज्जायज्जाणाण य उत्तमाणं दोण्हं पि लक्खणाईं पत्ताण य संजमुत्तमं जियपरीमहाणं चउत्विहकम्मक्खयम्मि जह केवलस्स लंभो परियाओ जत्तिओ य जह पालिओ मुणिहिं पायोवगओ य जो जहिं जत्तियाणि भत्ताणि छेयइत्ता अंतगडो मुणिवरो तमरयोवविष्णुको मोक्खसुहमणुत्तरं च पत्ता। एए अण्णे य एवमाइअत्था वित्था-रेणं परूवेईं । अंतगडदसामु णं परित्ता धायणा संत्वेज्जा अणुओगदारा जाव संत्वेज्जाओ संगहणीओ, से णं अंगट्टयाए अट्टमे अंगे एगे सुयक्खेधे दस अज्जायणा अट्ट वग्गा दस उदेसणकाला दस समुदेसणकाला संत्वेज्जाईं पयमयसहस्साईं पयग्गेणं प० संत्वेज्जा अक्खरा जाव एवं चरणकरणपरूवणयां आवविज्जंति । से सं अंतगडदसाओ ॥१४३॥ से किं तं अणुत्तरोववाइयदसाओ ? अणुत्तरोववाइयदसामु णं अणुत्तरोववाइयाणं नगराईं उज्जाणाईं चेइयाईं वणसंडा रायाणो अम्मापियरो समोसरणाईं धम्मायरिया धम्मकहाओ इहलोगपरलोइयइड्ढिविसेसा भोगपरिचाया पव्वज्जाओ सुयपरिग्गहा तवोवहाणाईं परियाया पडिमाओ संलेहणाओ भत्तपाणपच्चक्खाणाईं पाओवगमणाईं अणुत्तरोववाओ सुकुलपच्चायाया पुणो चोहिलाभो अंतकिरियाओ य आवविज्जंति । अणुत्तरोववाइयदसामु णं तित्थकरसमोसरणाईं परमंगल्लजगहियाणि जिणाइसेसा य बहुविसेसा जिणसीसाणं चैव समगणणपवरगंधइत्थीणं थिरजसाणं परिसहसेण्णरिउवल्लपमद्दणाणं तवदित्तचरोत्तणाणसम्मत्तसारविहिप्पगारवित्थरपसत्थगुणसंजुयाणं अणगारमहरिसीणं अणगारगुणाण वण्णओ उत्तमवरतवविस्मिद्दणाण-बोगजुत्ताणं जह य जगहियं भगवओ जारिसा इड्ढिविसेसा देवासुरमाणुसाणं परि-साणं पाउब्भावा य जिणसमीवं जह य उवासंति जिणवरं जह य परिकहंति धम्मं लोगगुरू अमरणसुरगणाणं सोऊण य तस्स भासियं अवसेसकम्मविसयविरत्ता णरा जहा अब्भुवेति धम्ममुरालं संजमं तवं चावि बहुविहप्पगारं जह बहूणि वासाणि अणुचरित्ता आराहियणाणदंसणचरित्तजोमा जिणवयणमणुगयमहियभासिया जिणव-रण हियएणमणुणेत्ता जे य जहिं जत्तियाणि भत्ताणि छेयइत्ता लद्धूण य समाहि-

समवाओ-गणिपिडग-पण्हा० विवागसुयं ३९९

मुत्तमज्झाणजोगजुत्ता उव्वण्णा सुणिवरोत्तमा जह अणुत्तरेसु पावंति जह अणुत्तरं
 तत्थ विसयसोक्खं तंओ य चुया कमेण काहिंति संजया जहा य अंतकिरिये एए
 अण्णे य एवमाइअत्था वित्थरेण । अणुत्तरोववाइयदसासु णं परित्ता वायणा संखेज्जा
 अणुओगदारा संखेज्जाओ संगहणीओ । से णं अंगट्टयाए णवमे अंगे एगे सुयक्खंवे
 दस अउज्जयणा तिण्णि वग्गा दस उद्देसणकाला दस समुद्देसणकाला संखेज्जाइं पय-
 सयसहस्साइं पयग्गेणं प० । संखेज्जाणि अक्खराणि जाव एवं चरणकरणपरूवणया
 आघविज्जंति । से त्तं अणुत्तरोववाइयदसाओ ॥ १४४ ॥ से किं तं पण्हावागरणाणि ?
 पण्हावागरणेसु णं अट्टुत्तरं पसिणसयं अट्टुत्तरं अपसिणसयं अट्टुत्तरं पसिणापसिण-
 सयं विज्जाइसया णागसुवण्णेहिं सद्धिं दिव्वा संवाया आघविज्जंति । पण्हावागरणदसासु
 णं समयपरसमयपण्णवयपत्तेयबुद्धविहित्थभासाभासियाणं अइसयगुणउयसमणाण-
 प्पमारआयरियभासियाणं वित्थरेणं वीरमद्देसीहिं विविहवित्थरभासियाणं च जगहि-
 याणं अहागंगुट्टवाहुअसिमणिखोमआइच्चमाइयाणं विविहमहापसिणविज्जामणपसिण-
 विज्जादेवयपयोगपहाणगुणप्पगासियाणं सब्भूयदुगुणप्पभावणरणमइविम्हयकराणं
 अइसयमईयकालसमयदमसंमतित्थकरुत्तमस्स ठिइकरणकारणाणं दुराहिगमदुरवगा-
 हस्स सव्वसव्वण्णुसम्मयस्स अबुहज्जणविज्जेहणकरस्स पच्चक्खयपच्चयकराणं पण्हाणं
 विविहगुणमहत्था जिणवरप्पणीया आघविज्जंति । पण्हावागरणेसु णं परित्ता वायणा
 संखेज्जा अणुओगदारा जाव संखेज्जाओ संगहणीओ । से णं अंगट्टयाए दसमे अंगे
 एगे सुयक्खंवे पणयालीसं उद्देसणकाला पणयालीसं समुद्देसणकाला संखेज्जाणि पय-
 सयसहस्साणि पयग्गेणं प० । संखेज्जा अक्खरा अणंता गमा जाव चरणकरण-
 परूवणया आघविज्जंति । से त्तं पण्हावागरणाइं ॥ १४५ ॥ से किं तं विवागसुयं ?
 विवागसुए णं सुक्कडदुकुडाणं कम्माणं फलविवागे आघविज्जंति से समासओ दुविहे
 प०, तं०-दुहविवागे चेव सुहविवागे चेव । तत्थ णं दस दुहविवागाणि दस सुहविवा-
 गाणि । से किं तं दुहविवागाणि ? दुहविवागेसु णं दुहविवागाणं णगराइं उज्जाणाइं
 चेइयाइं वणसंडा रायाणो अम्मापियरो समोसरणाइं धम्मायरिया धम्मकहाओ णगर-
 गमणाइं संसारपत्रंवे दुहपरंपराओ य आघविज्जंति । से त्तं दुहविवागाणि । से
 किं तं सुहविवागाणि ? सुहविवागेसु सुहविवागाणं णगराइं उज्जाणाइं चेइयाइं वणसंडा
 रायाणो अम्मापियरो समोसरणाइं धम्मायरिया धम्मकहाओ इहलोइयपरलोइय-

इद्धिविसेसा भोगपरिच्चाया पव्वजाओ सुयवरिग्गहा तवोवहाणाई परियाया पडिमाओ संलेहणाओ भत्तपच्चक्खाणाई पाओवगमणाई देवलोग्गमणाई सुकुलपच्चायाया पुण बोहिलाहा अंतकिरियाओ य आघविज्जंति । दुहविवागेसु णं पाणाइवायअल्लियवयणचोरिकेकरणपरदारमेहुणससंगयाए महत्तिल्लकसायईदियप्पमायपावप्पओयअसुहउत्तवमाणसंचियाणं कम्मणं पावयाणं पावअणुभागफलविवागा गिरयगइतिरिक्खजोणिवहुविहनसणसयपरंपरापव्वदाणं मणुयत्ते वि आगयाणं जहा पावकम्मसेसेण पावगा हांति फलविवागा वहयसणविणासणासाकण्णुत्तुंगुत्तकरचरणहच्छेयणजिम्भच्छेयणअज्जणकइरिगिदाहणाय च्चलणमलणफालणउत्तं वणसूललयालउत्तलट्टिभंजणतउसीसगतत्तनेल्लकलकउअहिसिं वणकुंभिपागकंपणथिरवंधणवेहवत्तककतणपइभयकरकपल्लीवणादिदारणाणि दुक्खाणि अणोवमाणि । बहुविहपरंपराणुचद्धा ण मुच्चंति पावकम्मवल्लीए, अवेयइत्ता हु णत्थि मोक्खो तवेण थिइधणियवद्धकच्छेण सोहणं तस्स वावि हुज्जा । एत्तो य सुहविवागेसु णं सीलसजमणियमगुणतवोवहाणेसु साहुसु सुविहिएसु अणुकंपासयप्पओगत्तिकालमइविनुद्धभत्तपाणाई पययमणसा हियसुहणीसेसत्तित्वपरिणामणिच्छियमई पयच्छिउणं पयोगसुद्धां जह य णिवत्तंति उ बोहिलाभं जह य परित्तीकरेंति णरणरयतिरियसुरगमणित्थलपरियट्टअरइभयविसायसोगमिच्छत्तसेलसंकडे अण्णाययमंधकारं च्चिक्खल्लसुत्तारं जरमरणजोणिसंखुभियचक्कवालं सोलसकसायसावयपयडचंटे अणाइयं अणवयगं संसारसागरमिणं । जह य णिवंधंति आउगं सुरगणेसु जह य अणुभवंति सुरगणविमाणसोकलाणि अणोवमाणि तओ य कालंतरे चुयणं इहेव णरल्लोगमागयाणं आउवपु वण्णरुव जाइकुलजम्मआरोग्गवुद्धिमेहाविसेसा मित्तजणसयणधणधण्णविभवसमिद्धसारससुदयविसेसा बहुविहकामभोगुच्चववाणसोकववाण सुहविवागोत्तमेसु अणुवरयपरंपराणुचद्धा असुभाणं सुभाणं चेव कम्मणं भासिआ बहुविहाविवागा विवागसुयमि भगवया जिणवरेण संवेगकारणत्था अण्णे वि य एवमाइया बहुविहा वित्थरेणं अत्थपरुत्तणया आघविज्जंति । विवागसुअस्स णं परित्ता वायणा संखेज्जा अणुओग्गदारा जाव संखेज्जाओ संगहणीओ । से णं अंगट्टयाए एककारसमे अंगे वीसं अज्जयणा वीसं उद्देसणकाला वीसं समुद्देसणकाला संखेज्जाई पयसयसहसाई पयग्गेणं पण्णत्ता । संखेज्जाणि अक्खराणि अणंता गमा

समवाओ-गणपिडग—दिट्टिवाए ४०१

अणंता पज्जवा जाव एवं चरणकरणपरूवणया आघविज्जंति । से तं विवागसुए
 ॥ १५६ ॥ से किं तं दिट्टिवाए ? दिट्टिवाए णं सव्वभावपरूवणया आघविज्जंति ।
 से समासओ पंचविहे पण्णत्ते, तं जहा-परिकम्मं, सुत्ताइं, पुव्वगयं, अणुओगो,
 चूलिया । से किं तं परिकम्मं ? परिकम्मं सत्तविहे पण्णत्ते, तं जहा-सिद्धसेणिया-
 परिकम्मं, मणुस्ससेणियापरिकम्मं, पुट्टसेणियापरिकम्मं, ओगाहणसेणियापरिकम्मं,
 उवसंपज्जसेणियापरिकम्मं, विप्वजहसेणियापरिकम्मं, चुयाचुयसेणियापरिकम्मं । से
 किं तं सिद्धसेणियापरिकम्मं ? सिद्धसेणियापरिकम्मं चोइसविहे प०, तं०-माउया-
 पयाणि, एगट्टियपयाणि, पाओट्टपयाणि, आगासपयाणि, केउभूयं, रासिबद्धं, एगगुणं,
 दुगुणं, तिगुणं, केउभूयं, पड्डिग्गहो, संसारपड्डिग्गहो, णंदावत्तं, सिद्धवद्धं, से तं
 सिद्धसेणियापरिकम्मं । से किं तं मणुस्ससेणियापरिकम्मं ? मणुस्ससेणियापरिकम्मं
 चोइसविहे प०, तं०-ताइं चैव माउयापयाणि जाव णंदावत्तं मणुस्सवद्धं, से
 तं मणुस्ससेणियापरिकम्मं । अवसेसाइं परिकम्मं पुट्टाइयाइं एक्कारसविहाइं पण्ण-
 त्ताइं । इच्चैयाइं सत्त परिकम्मं, छ ससमइयाइं सत्त आजीवियाइं, छ चउक्कण-
 इयाइं सत्त तेरासियाइं, एवामेव सपुव्वावरेणं सत्त परिकम्मं तेसीति
 भवंतीति मक्खायाइं, से तं परिकम्मं । से किं तं सुत्ताइं ? सुत्ताइं अट्टासीति
 भवंतीति मक्खायाइं, तं०-उज्जुगं परिणयापरिणयं बहुभंगियं विप्वच्चइयं [विण
 (ज) यचरियं] अणंतं परंपरं समाणं संजूहं [मासाणं] संमिण्णं अहाच्चयं [अह-
 व्वायं-णंदीए] सोवत्थियं (वत्तं यं) णंदावत्तं बहुलं पुट्टापुट्टं वियावत्तं एवंभूयं दुआवत्तं
 वत्तमाणप्पयं सममिरुद्धं सव्वओभंइं णाणं [पत्सासं—णंदीए] दुपड्डिग्गहं । इच्चैयाइं
 बावीसं सुत्ताइं छिण्णछेयणइयाइं ससमयसुत्तपरिवाडीए इच्चैयाइं बावीसं सुत्ताइं
 अछिण्णछेयणइयाइं आजीवियसुत्तपरिवाडीए, इच्चैयाइं बावीसं सुत्ताइं तिकणइयाइं
 तेरासियसुत्तपरिवाडीए, इच्चैयाइं बावीसं सुत्ताइं चउक्कणइयाइं ससमयसुत्तपरि-
 वाडीए, एवामेव सपुव्वावरेणं अट्टासीति सुत्ताइं भवंतीति मक्खायाइं, से तं सुत्ताइं ।
 से किं तं पुव्वगयं ? पुव्वगयं चउइसविहं पण्णत्तं, तं जहा-उप्पायपुव्वं, अग्गेणीयं,
 वीरियं, अत्थिणत्थिप्पवायं, णाणप्पवायं, सच्चप्पवायं, आयप्पवायं, कम्मप्पवायं,
 पच्चक्खाणप्पवायं, विज्जाणप्पवायं अवंइं, पाणाऊ, किरियाविसालं, लोगविंदुसारं ।
 उप्पायपुव्वस्स णं दसवत्थू पण्णत्ता, चत्तारि चूलियावत्थू पण्णत्ता । अग्गेणियस्स

णं पुव्वस्स चोद्दसवत्थू प०, चारस चूलियावत्थू प० । वीरियप्पवायस्स णं पुव्वस्स अट्ठ वत्थू प०, अट्ठ चूलियावत्थू प० । अत्थियणत्थियप्पवायस्स णं पुव्वस्स अट्ठारस वत्थू प०, दस चूलियावत्थू प० । णाणप्पवायस्स णं पुव्वस्स चारस वत्थू प० । सच्चप्पवायस्स णं पुव्वस्स दो वत्थू प० । आयप्पवायस्स णं पुव्वस्स सोलस वत्थू प० । कम्मप्पवायप्पुव्वस्स णं तीसं वत्थू प० । पच्चकग्गाणस्स णं पुव्वस्स वीसं वत्थू प० । विज्जाणुप्पवायस्स णं पुव्वस्स पणरस वत्थू प० । अवंडस्स णं पुव्वस्स चारस वत्थू प० । पाणाउस्स णं पुव्वस्स तेरस वत्थू प० । किरियाविमालसस णं पुव्वस्स तीसं वत्थू प० । लोयविंदुमारस्स णं पुव्वस्स पणवीसं वत्थू प० । “ दस चोद्दस अट्ठद्वारसे व चारस दुवे य वत्थूणि । सोलस तीसा वीसा पणरस अणुप्पवायस्सिंम ॥ चारस एकारसमे, चारसमे तेरसेव वत्थूणि । तीसा पुण तेरससं चउदसं पणवीसाओ । चत्तारि दुवालस अट्ठ चेव दस चेव चूलवत्थूणि । आइल्लण चउण्हं, सेसाणं चूलिया णत्थि ” से चं पुव्वगयं । से किं तं अणुओगे ? अणुओगे तुविहे प०, तं० मूलपट्टमाणुओगे य गंडियाणुओगे य । से किं तं मूलपट्टमाणुओगे ? एत्थ णं अरहंताणं भगवंताणं पुव्वभवा देवलोगगमणाणि आउं चयणाणि जम्मणाणि य अभिसेया रायवरसिरीओ सीयाओ पव्वज्जाओ तवा य भत्ता केवलणाणुप्पाया य तित्थपवत्तणाणि य संघयणं संठाणं उच्चत्तं आउं वण्णविभागो सीसा गणा गगहरा य अन्ना पवत्तणीओ संघस्स चउड्विहस्स जे वावि परिमाणं जिणमणपच्चओहिणाणसम्मत्तसुयणाणिणो य वाई अणुत्तरगई य जत्तिया सिद्धा पाओवगथा य जे जहि जत्तियाई भत्ताई छेयइत्ता अंतगडा मुणिवरुत्तमा तमरओघविप्पमुक्का सिद्धिपहमणुत्तरं च पत्ता, एए अण्णे य एवमाइया भावा मूलपट्टमाणुओगे कहिया आघविज्जंति पण्णविज्जंति परुविज्जंति, से चं मूलपट्टमाणुओगे । से किं तं गंडियाणुओगे ? गंडियाणुओगे अणेगविहे प०, तं०—कुल्लगरगंडियाओ तित्थगरगंडियाओ गणहरगंडियाओ चक्करगंडियाओ दसारगंडियाओ बलदेवगंडियाओ वासुदेवगंडियाओ हरिवंसगंडियाओ भद्दचाहुगंडियाओ तवोकम्मगंडियाओ चिन्तंरगंडियाओ उस्सप्पिणीगंडियाओ ओसप्पिणीगंडियाओ अमरणरतिरियणिरयगइगमणविविहपरियट्ठणाणुओगे, एवमाइयाओ गंडियाओ आप्रविज्जंति पण्णविज्जंति परुविज्जंति, से चं गंडियाणुओगे । से किं तं चूलियाओ ? जण्णे आइल्लणं चउण्हं पुव्व्वाणं चूलियाओ सेसाई पुव्वाइं अचूलियाई, से चं चूलियाओ । दिट्ठिवायस्स

णं परित्ता वायणा, संखेज्जा अणुओगदारा संखेज्जाओ पडिवत्तीओ संखेज्जाओ
 णिज्जुत्तीओ संखेज्जा सिलोगा संखेज्जाओ संगहणीओ। से णं अंगद्वयाए वारसमे
 अंगे एगे सुयकखंवे चउहस पुव्वाइं संखेज्जा वत्थू संखेज्जा चूलवत्थू संखेज्जा
 पाहुडा संखेज्जा पाहुडपाहुडा संखेज्जाओ पाहुडियाओ संखेज्जाओ पाहुडपाहुडि-
 याओ संखेज्जाणि पयसयसहस्ताणि पयग्गेणं पण्णत्ता, संखेज्जा अक्खरा अणंता
 गमा अणंता पज्जवा परित्ता तसा अणंता थावरा सासया कडा णिवद्धा णिकाइया
 जिणपण्णत्ता भावा आपविवज्जंति पण्णविवज्जंति परूविवज्जंति दंसिज्जंति णिदंसिज्जंति
 उवदंसिज्जंति, एवं णाया एवं विण्णाया एवं चरणकरणपरुवणया आपविवज्जंति,
 से तं दद्विवाए, से तं दुवालसंगे गणिपिडगे । १४७। इच्चेइयं दुवालसंगं गणिपिडगं
 अतीतकाले अणंता जीवा आणाए विराहिता चाउरंतसंसारकंतारं अणुपरियट्ठिसु,
 इच्चेइयं दुवालसंगं गणिपिडगं पडुप्पणे काले परित्ता जीवा आणाए विराहिता
 चाउरंतसंसारकंतारं अणुपरियट्ठंति, इच्चेइयं दुवालसंगं गणिपिडगं अणागए काले
 अणंता जीवा आणाए विराहिता चाउरंतसंसारकंतारं अणुपरियट्ठिसंति, इच्चेइयं
 दुवालसंगं गणिपिडगं अतीतकाले अणंता जीवा आणाए आराहिता चाउरंतसंसार-
 कंतारं वीईवइंसु, एवं पडुप्पणेऽवि, एवं अणागएऽवि । दुवालसंगे णं गणिपिडगे
 ण कयाइ णासी, ण कयाइ णत्थि, ण कयाइ ण भविस्सइ, भुविं च भवइ य भविस्सइ य
 (अयले) धुवे णिइए सासए अक्खए अक्खए अवट्ठिए णिच्चे । से जहा णामए पंच
 अत्थिकाया ण कयाइ ण आसि, ण कयाइ णत्थि, ण कयाइ ण भविस्सइ, भुविं च
 भवइ य भविस्सइ य, (अयला) धुवा णिइया सासया अक्खया अक्खया अवट्ठिया
 णिच्चा, एवामेव दुवालसंगे गणिपिडगे ण कयाइ ण आसि, ण कयाइ णत्थि, ण
 कयाइ ण भविस्सइ, भुविं च भवइ य भविस्सइ य (अयले) धुवे जाव अवट्ठिए
 णिच्चे । एत्थं णं दुवालसंगे गणिपिडगे अणंता भावा अणंता अभावा अणंता हेऊ
 अणंता अहेऊ अणंता कारणा अणंता अकारणा अणंता जीवा अणंता अजीवा
 अणंता भवसिद्धिया अणंता अभवसिद्धिया अणंता सिद्धा अणंता असिद्धा आघ-
 विज्जंति पण्णविवज्जंति परूविवज्जंति दंसिज्जंति णिदंसिज्जंति उवदंसिज्जंति । एवं
 दुवालसंगं गणिपिडगं इति ॥१४८॥

जीवरासी अजीवरासी

दुवे रासी पण्णत्ता, तं जहा—जीवरासी अजीवरासी य । अजीवरासी दुविहा

पण्णत्ता, तं जहा—रूवी अजीवरासी अरूवी अजीवरासी य। से किं तं अरूवी अजीवरासी ? अरूवी अजीवरासी दसविहा पण्णत्ता तं जहा—धम्मत्थि-काए जाव अद्दासमए। रूवी अजीवरासी अणेगविहा प० जाव। से किं तं अणुत्तरोववाइआ ? अणुत्तरोववाइआ पंचविहा प० तं जहा—विजयवेजयंतजयंत-अपराजियसव्वद्वसिद्धिया, से तं अणुत्तरोववाइआ, से तं पंचिदियसंसारसमावण-जीवरासी। दुविहा णेरइया प० तं० पज्जत्ता य अपज्जत्ता य, एवं दंडओ भाणियव्वो जाव वेमाणिय ति। इमीसे णं रयणप्पभाए पुढवीए केवइयं खेत्तं ओगाहेत्ता केवइया णिरयावासा प० ? गोयमा ! इमीसे णं रयणप्पभाए पुढवीए असीउत्तर-जोयणसयसहस्सत्राहल्लाए उवरिं एगं जोयणसहस्सं ओगाहेत्ता हेट्ठा चेगं जोयण-सहस्सं वज्जेत्ता मज्जे अट्टमत्तरि जोयणसयसहस्से एत्थ णं रयणप्पभाए पुढवीए णेरइयाणं तीसं णिरयावाससयसहस्सा भवतीति मक्खत्ताया। ते णं णिरयावासा अंतो वट्ठा वाहिं चउरंसा जाव अमुभा णिरया अमुभाओ णिरएसु वेयगाओ, एवं सत्त वि भाणियव्वाओ जं जासु जुज्जइ—आसीयं वत्तीसं अट्ठावीसं तहेव कीसं च। अट्ठा-रस सोलसगं अट्टुत्तरमेव बाहल्लं ॥ १ ॥ तीसा य पण्णवीसा पण्णरस दमेव सय-सहस्साइं। तिण्णेगं पंचूणं पंचेव अणुत्तरा णरगा ॥ २ ॥ चउसट्ठी अमुराणं चउ-रासीइं च होइ णागाणं। वावत्तरिं सुवण्णाणं वाउकुमारण छण्णउई ॥ ३ ॥ दीव-दिसाउदहीणं विज्जुकुमारिंदधणियमग्गीणं। छण्हं पि जुवलयणं वावत्तरिमो य सयसहसा (स्ता) ॥ ४ ॥ वत्तीमट्ठावीसा वारस अड चउरो य सयसहस्सा। पण्णा चत्तालीसा छब्ब सहस्सा सहस्सारे ॥ ५ ॥ आणयपा गयकप्पे चत्तारि सयाऽऽरणचुए तिण्णि। सत्त विमाणसयाइं चउसु वि एएसु कप्पेसु ॥ ६ ॥ एक्कारसुत्तरं हेट्ठिंसु सत्तुत्तरं च मज्झिमए। सयमेगं उवरिमए पंचेव अणुत्तरविमाण ॥ ७ ॥ दोच्चाए णं पुढवीए तच्चाए णं पुढवीए चउत्थीए पुढवीए पंचमीए पुढवीए छट्ठीए पुढ-वीए सत्तमाए पुढवीए गाहाहिं भाणियव्वा। सत्तमाए पुढवीए पुच्छा, गोयमा ! सत्तमाए पुढवीए अट्टुत्तरजोयणसयसहस्साइं ब्राहल्लाए उवरि अद्धतेवण्णं जोयण-सहस्साइं ओगाहेत्ता हेट्ठा वि अद्धतेवण्णं जोयणसहस्साइं वज्जित्ता मज्जे तिसु जोयणसहस्सेसु एत्थ णं सत्तमाए पुढवीए णेरइयाणं पंच अणुत्तरा महडमक्खल्लया महाणिरया प० तं जहा—काले महाकाले रोरुए महारोरुए अप्पइट्ठाणे णामं पंचमे। ते णं णिरया वट्ठे य तंसा य अहे खुरप्पसंठाणसंठिया जाव अमुभा णरगा अमु-

भाओ णरएसु वेयणाओ ॥ १४९ ॥ केवइया णं भंते ! असुरकुमारावासा प० ?
 गोयमा ! इमीसे णं रयणप्पभाए पुढवीए असीउत्तरजोयणसयसहस्सनाहल्लाए उवरिं
 एगं जोयणसहस्सं ओगाहेत्ता हेट्ठा चेगं जोयणसहस्सं वज्जित्ता मज्जे अट्टहत्तरि
 जोयणसयसहस्से एत्थ णं रयणप्पभाए पुढवीए चउसट्ठिं असुरकुमारावाससयसहस्सा
 प० । ते णं भवणा बाहिं वट्ठा अंतो चउरंसा अहे पोक्खरकयाणियासंठाणसंठिया
 उक्किण्णंतरविउलगं भीरखायफलिहा अट्टालयचरियदारगोउरकवाडतोरणपडिदुवार-
 देसभागा जंतमुसलपुसंदिशथग्घिपरिवारिया अउज्झा अडयालकोट्टयइया अडयाल-
 कयवणमाला लाउल्लोइयमहिया गोसीससरसरत्तचंदणदहरदिण्णपंचंगुलित्तला काला-
 गुरुपवरकुंतुरुक्कतुरुक्कडज्जंतधूवमममपंतगंधुद्धुयाभिरामा सुगंधवरगंधिया गंधवट्ठि-
 भूया अच्छा सण्हा लण्हा घट्ठा मट्ठा णीरया णिम्मला वितिमिरा विसुद्धा सप्पभा समि-
 रीया सउज्जोया पासाईया दरिसणिज्जा अभिरूवा पडिरूवा । एवं जं जस्स कमई
 तं तस्स जं जं गाहाहिं भणियं तह चेव वण्णओ ॥ १५० ॥ केवइया णं भंते !
 पुढविकाइयावासा प० गोयमा ! असंखेज्जा पुढवीकाइयावासा प० एवं जाव मणुस्स
 त्ति । केवइया णं भंते ! वाणमंतरावासा प० गोयमा ! इमीसे णं रयणप्पभाए पुढ-
 वीए रयणामयस्स कंडस्स जोयणसहस्सनाहल्लस्स उवरिं एगं जोयणसयं ओगा-
 हेत्ता हेट्ठा चेगं जोयणसयं वज्जेत्ता मज्जे अट्टसु जोयणसएसु एत्थ णं वाणमंतराणं
 देवाणं तिरियमसंखेज्जा भोमेज्जा णगरावाससयसहस्सा प०, ते णं भोमेज्जा णगरा
 बाहिं वट्ठा अंतो चउरंसा, एवं जहा भवणवासीणं तहेव णेयव्वा, णवरं पडागमाला-
 उला सुरम्मा पासाईया दरिसणिज्जा अभिरूवा पडिरूवा ॥ १५१ ॥ केवइया णं भंते !
 जोइसियाणं विमाणावासा पण्णत्ता ! गोयमा ! इमीसे णं रयणप्पभाए पुढवीए बहु-
 समरमणिज्जाओ भूमिभागाओ सत्तणउयाई जोयणसयाई उट्ठं उप्पइत्ता एत्थ णं
 दसुत्तरजोयणसयनाहल्ले तिरियं जोइसविसए जोइसियाणं देवाणं असंखेज्जा जोइ-
 सियविमाणावासा प०, ते णं जोइसियविमाणावासा अन्भुग्गयमूसियपहसिया विविह-
 रमणिरयणभत्तिचित्ता वाउद्धुयविज्जयवेजयेतीपडागलत्ताइछत्तकलिया तुंगा गगण-
 तलमणुल्लिहंतसिहरा जालंतररयणपंचरुम्मिलियव्व मणिकणगशूभियाया वियसिय-
 सयपत्तपुंडरीयतिलयरयणद्धचंदत्तिता अंतो बाहिं च सण्हा तवणिज्जवाल्लुयापत्थडा
 मुहफासा सस्सिरोयरूवा पासाईया दरिसणिज्जा अभि० ॥ १५२ ॥ केवइया णं भंते !

वेमाणियावासा प० ? गोयमा ! इमीसे णं रयणप्पभाए पुढवीए बहुसमरमणिजाओ भूमिभागाओ उहुं चंदिममूरियगहणणवस्वत्ताराख्वाणं वीइवइत्ता बहूणि जोयणाणि बहूणि जोयणसयाणि बहूणि जोयणसहस्साणि बहूणि जोयणसयसहस्साणि बहुइओ जोयणकोडीओ बहुइओ जोयणकोडाकोडीओ असंखेजाओ जोयणकोडाकोडीओ उहुं दूरं वीइवइत्ता एत्थ णं विमाणियाणं देवाणं सोहम्मिंसाणमणं कुमारमाहिंद-
 वेभलंतगसुकसहस्सारआणयपाणयआरणअच्चुएसु गोवेज्जमणुत्तरेसु य चउरासईं विमाणावाससयसहस्सा सत्ताणउइं च सहस्सा तेवसं च विमाणा भवतीति मग्ग्याय, ने णं विमाणा अच्चिमालिप्पभा भासरासिवण्णाभा अरया णीरया णिममला वित्तिगिरा विसुद्धा सव्वरयणामया अच्छा सण्हा वट्ठ मट्ठा णिप्पेका णिक्कंठच्छाया म्पभा समरीया सउज्जोया पासईया दरिसणिजा अभिरूवा पडिरूवा । सोहम्मं णं भंते ! कप्पे केवइया विमाणावासा प० ? गोयमा ! वत्तीसं विमाणावाससयसहस्सा प०, एवं ईसाणाइसु अट्ठावीसं बारस अट्ठ चत्तारि एयाइं सयसहस्साइं पण्णासं चत्ता-
 लीसं छ एयाइं सहस्साइं आणए पाणए चत्तारि आरणच्चुए तिण्णि एयाणि सयाणि, एवं गाहाहिं भाणियब्बं ॥ १५३ ॥ णेरइयाणं भंते ! केवइयं कालं ठिइं प० ? गोयमा ! जहण्णेणं दस वाससहस्साइं उक्कोसेणं तेत्तीसं सागरोवमाइं ठिइं प० । अपज्जत्तगाणं णेरइयाणं भंते ! केवइयं कालं ठिइं प० ? गोयमा ! जहण्णेणं अंतोमुहुत्तं उक्कोसेण वि अंतोमुहुत्तं । पज्जत्तगाणं जहण्णेणं दस वाससहस्साइं अंतो-
 मुहुत्तूणाइं । उक्कोसेणं तेत्तीसं सागरोवमाइं अंतोमुहुत्तूणाइं । इमीसे णं रयणप्पभाए पुढवीए एवं जाव विजयवेजयंतजयंतअपराजियाणं देवाणं केवइयं कालं ठिइं प० ? गोयमा ! जहण्णेणं एकत्तीसं सागरोवमाइं उक्कोसेणं तेत्तीसं सागरोवमाइं । सव्वट्ठे अजहण्णमणुक्कोसेणं तेत्तीसं सागरोवमाइं ठिइं प० ॥ १५४ ॥ कइ णं भंते सररीरा प० ? गोयमा ! पंच सररीरा प०, तं—ओरालिए वेउव्विए आहारए नेयए कम्मए । ओरालियसररीरे णं भंते ! कइविहे प० ! गोयमा पंचविहे प०, तं—
 एगिंदियओरालियसररीरे जाव गंभवक्कंति यमणुस्सपेच्चिंदियओरालियसररीरे य ! ओरालियसररीरस्स णं भंते ! के महालिया सररीरोगाइया प० ? गोयमा ! जहण्णेणं अंगुलअसंखेज्जभागं उक्कोसेणं साइरेणं जोयणसहस्सं, एवं जहा ओगाहणसंटाणं ओरालियपमाणं तहा णिरवसेसं, एवं जाव मणुस्से त्ति उक्कोसेणं तिण्णि गाउयाइं ।

समवाओ—जीवरासी अजीवरासी ४०७

कइविहे णं भंते ! वेउव्वियसरीरे पणत्ते ? गोयमा ! दुविहे पणत्ते—एग्गिदिय-
वेउव्वियसरीरे य पंचिदियवेउव्वियसरीरे य, एवं जाव सणकुमारे आदत्तं जाव
अणुत्तराणं भवधारणिजा जाव तेसिं रयणी-रयणी परिहायइ । आहारयसरीरे णं
भंते ! कइविहे प० ? गोयमा ! एगाकारे प० । जइ एगाकारे प० किं मणुस्स-
आहारयसरीरे अमणुस्सआहारयसरीरे ? गोयमा ! मणुस्सआहारयसरीरे णो अमणु-
स्सआहारयसरीरे, एवं जइ मणुस्सआहारयसरीरे किं गन्भवकंति यमणुस्सआहारय-
सरीरे संमुच्छिममणुस्सआहारयसरीरे ? गोयमा ! गन्भवकंति यमणुस्सआहारय-
सरीरे णो संमुच्छिममणुस्सआहारयसरीरे । जइ गन्भवकंति यमणुस्सआहारयसरीरे
किं कम्मभूमिगा० अकम्मभूमिगा० ? गोयमा ! कम्मभूमिगा० णो अकम्मभूमिगा० ।
जइ कम्मभूमिगा० किं संखेज्जवासाउय० असंखेज्जवासाउय० ? गोयमा ? संखे-
ज्जवासाउय० णो असंखेज्जवासाउय० । जइ संखेज्जवासाउय० किं पज्जत्तय०
अपज्जत्तय० ? गोयमा ! पज्जत्तय० णो अपज्जत्तय० । जइ पज्जत्तय० किं
सम्मदिट्ठी० मिच्छदिट्ठी० सम्मामिच्छदिट्ठी० ? गोयमा ! सम्मदिट्ठी० णो मिच्छ-
दिट्ठी० णो सम्मामिच्छदिट्ठी० । जइ सम्मदिट्ठी० किं संजय० असंजय० संजया-
संजय० ? गोयमा ! संजय० णो असंजय० णो संजयासंजय० । जइ संजय० किं
पमत्तसंजय० अपमत्तसंजय० ? गोयमा ! पमत्तसंजय० णो अपमत्तसंजय० । जइ
पमत्तसंजय० किं इद्धिपत्त० अणिद्धिपत्त० ? गोयमा ! इद्धिपत्त० णो अणिद्धिपत्त०
वयणा विभाणियत्वा आहारयसरीरे समचउरंसंठाणसंठिए । आहारयसरीरेस्स
कं महालिया सरीरोगाहणा प० ? गोयमा ! जहण्णेणं देसूणा रयणी उक्कोसेणं पडि-
पुण्णा रयणी । तेयासरीरे णं भंते ! कइविहे प० ! गोयमा ! पंचविहे प०—
एग्गिदियतेयासरीरे बित्तिचउपंच० एवं जाव गेवेज्जस्स णं भंते ! देवस्स णं मार-
णतियसमुग्घाएणं समोहयस्स समाणस्स के महालिया सरीरोगाहणा प० ? गोयमा !
सरीरप्पमाणमेत्ता विक्खंभवाह्छेणं आयामेणं जहण्णेणं अहे जाव विज्जाहरसेहीओ
उक्कोसेणं जाव अहोलेइयग्गामाओ, उह्हुं जाव सयाइं विमाणाइं, तिरियं जाव
मणुस्सखेत्तं, एवं जाव अणुत्तरोववाइया । एवं कम्मयसरीरे भाणियत्वं ॥१५५॥
भेय विसयसंठाणे, अग्गिभर बाहिरे य देसोही । ओहिस्स बुद्धिहाणी, पडिवाइं
चेव अपडिवाइं ॥ १ ॥ १५६ ॥ कइविहे णं भंते ! ओही प० ? गोयमा ! दुविहा

५०—भनपच्चइए य खओवसमिए य, एवं सव्वं ओहिपयं भाणियव्वं ॥ १५७ ॥
 सीया य दव्व सारीर साया तह वेयणा भवे दुक्कम्या । अच्चुव्वगमुवक्कमिया णिशाए
 च्चेव अणियाए ॥ १ ॥ णेरइया णं भंते ! किं सीयं वेयणं वेयंति उसिणं वेयणं
 वेयंति सीओसिणं वेयणं वेयंति ? गोयमा ! णेरइया० एवं च्चेव वेयणापरं भाणियव्वं
 ॥ १५८ ॥ कइ णं भंते ! लेसाओ पणत्ताओ ? गोयमा ! छ लेसाओ पणत्ताओ,
 तं जहा—किण्हा पीला काऊ तेऊ पम्हा सुक्का, एवं लेसापरं भाणियव्वं ॥ १५९ ॥
 अणंतरा य आहारे, आहाराभोयणा इ य । पोग्गला णेव जाणति, अच्चइवसाणे य
 सम्मत्ते ॥ १ ॥ णेरइया णं भंते ! अणंतराहारा तओ णिव्वत्तणया तओ परियाइय-
 णया तओ परिणामणया तओ परियारणया तओ पच्छा विवुव्वणया ? हंता
 गोयमा ! एवं आहारपरं भाणियव्वं ॥ १६० ॥ कइविहे णं भंते ! आउगबंधे
 ५० ? गोयमा ! छव्विहे आउगबंधे ५०, तं जहा—जाइणामणिहत्ताउए गइणाम-
 णिहत्ताउए ठिइणामणिहत्ताउए पएसणामणिहत्ताउए अणुभागणामणिहत्ताउए
 ओगाहणामणिहत्ताउए । णेरइयाणं भंते ! कइविहे आउगबंधे ५० ? गोयमा !
 छव्विहे ५०, तं जहा—जाइणामणिहत्ताउए गइणामणिहत्ताउए ठिइणामणिहत्ताउए
 पएसणामणिहत्ताउए अणुभागणामणिहत्ताउए ओगाहणामणिहत्ताउए । एवं जाव
 वेमाणियाणं ॥ १६१ ॥ णिरयगई णं भंते ! केवइयं कालं विरहिया उववाएणं ५० ?
 गोयमा ! जहण्णेणं एकं समयं उक्कोसेणं वारस मुहुत्ते, एवं तिरियगई मणुस्सगई
 देवगई । सिद्धिगई णं भंते ! केवइयं कालं विरहिया सिद्धणयाए ५० ? गोयमा !
 जहण्णेणं एकं समयं उक्कोसेणं छम्मासे, एवं सिद्धिज्जा उव्वट्टणा । इमीसे णं भंते !
 रयणप्पभाए पुटवीए णेरइया केवइयं कालं विरहिया उववाएणं ? एवं उववाय-
 दंडओ भाणियव्वो उव्वट्टणादंडओ य । णेरइया णं भंते । जाइणामणिहत्ताउयं कइ
 आगारिसेहिं पगरंति ? गोयमा ! सिय १ सिय २ सिय ३ सिय ४ सिय ५ सिय ६
 सिय ७ सिय ८ अट्टहिं णो च्चेव णं णवहिं । एवं सेसाण वि आउगाणि जाव वेमाणिय
 त्ति ॥ १६२ ॥ कइविहे णं भंते ! संघयणे पणत्ते ? गोयमा ! छव्विहे संघयणे
 पणत्ते, तं जहा—वइरोसभणारायसंघयणे रिसभणारायसंघयणे णारायसंघयणे अड-
 णारायसंघयणे कीलियासंघयणे छेवट्टसंघयणे । णेरइया णं भंते ! किंसंघयणी ?
 गोयमा ! छण्हं संघयणाणं असंघयणी णेव अट्टि णेव छिरा णेव ण्हारू जे पोग्गला

समवाओ—कुलगर-तित्थयराइ ४०९

अणिद्धा अकंता अपिया अणाएजा असुमा अमणुणा अमणामा अमणाभिरामा ते तेसि असंघयणत्ताए परिणमंति । असुरकुमाराणं भंते ! किंसंघयणी प० ? गोयमा ! छण्हं संघयणाणं असंघयणी णेवट्ठी णेव छिरा णेव ण्हारू जे पोग्गला इट्ठा कंता पिया मणुणा मणामा मणाभिरामा ते तेसि असंघयणत्ताए परिणमंति, एवं जाव थणियकुमाराणं । पुढवीकाइया णं भंते ! किंसंघयणी प० ? गोयमा ! छेवट्ठसंघयणी प०, एवं जाव संमुच्छिमपंचिंदियतिरिक्खजोणिय त्ति । गम्भवकंतिया छव्विहसंघयणी, संमुच्छिममणुस्सा छेवट्ठसंघयणी, गम्भवकंतियमणुस्सा छव्विहे संघयणे प० । जहा असुरकुमारा तथा वाणमंतरजोइसियवेमाणिया य ॥ १६३ ॥ कइविहे णं भंते ! संठाणे पण्णत्ते ? गोयमा छव्विहे संठाणे पण्णत्ते, तं जहा—समचउरसे १ णिग्गोहपरिमंडले २ साइए ३ वामणे ४ खुब्जे ५ हुंडे ६ । णेरइया णं भंते ! किंसंठाणी प० ? गोयमा ! हुंडसंठाणी प० । असुरकुमारा णं भंते ! किंसंठाणी प० ? गोयमा ! समचउरससंठाणसंठिया प०, एवं जाव थणियकुमारा । पुढवी मसूरसंठाणा प०, आऊ थिबुयसंठाणा प०, तेऊ सूइकलावसंठाणा प०, वाऊ पडागासंठाणा प०, वणस्सई णाणासंठाणसंठिया प०, बेईदियतेईदियचउरिंदिय-संमुच्छिमपंचिंदियतिरिक्खा हुंडसंठाणा प०, गम्भवकंतिया छव्विहसंठाणा प०, संमुच्छिममणुस्सा हुंडसंठाणसंठिया प०, गम्भवकंतियाणं मणुस्साणं छव्विहा संठाणा प० । जहा असुरकुमारा तथा वाणमंतरजोइसियवेमाणिया वि ॥ १६४ ॥ कइविहे णं भंते ! वेए पण्णत्ते ? गोयमा ! तिविहे वेए प०, तं जहा—इत्थीवेए पुरिसवेए णपुंसगवेए । णेरइया णं भंते ! किं इत्थीवेया पुरिसवेया णपुंसगवेया प० ? गोयमा ! णो इत्थीवेया णो पुरिसवेया णपुंसगवेया प० । असुरकुमारा णं भंते ! किं इत्थीवेया पुरिसवेया णपुंसगवेया ? गोयमा ! इत्थीवेया पुरिसवेया णो णपुंसगवेया, जाव थणियकुमारा, पुढवी-आऊ-तेऊ-वाऊ-वणस्सई वित्तिचउरिंदियसंमुच्छिमपंचिंदिय-तिरिक्खसंमुच्छिममणुस्सा णपुंसगवेया, गम्भवकंतियमणुस्सा पंचिंदियतिरिया य तिवेया, जहा असुरकुमारा तथा वाणमंतरा जोइसियवेमाणिया वि ॥ १६५ ॥

कुलगर-तित्थयराइ

ते णं काले णं ते णं समए णं कप्पस्स समोसरणं णेयब्बं, जाव गणहरा सावच्चा णिरंवच्चा वोच्छिणा ॥ १६६ ॥ जंबुहीवे णं दीवे भारहे वासे तीयाए उस्सण्णिणीए सत्त कुलगरा होत्था, तं—मित्तदामे सुपासे य सयंपभे । विमल्लघोसे सुजोसे

य, महायोसे य सत्तमे ॥ १ ॥ जंबुद्वीवे णं दीवे भारहे वासे तीयाए ओसप्पिणीए दस कुलगरा होत्था, तं०—सयंजले सयाऊ य, अजियसेणे अणंतसेणे य । कज्ज-सेणे भीमसेणे, महाभीमसेणे य सत्तमे ॥ २ ॥ ददरहे दसरहे सयरहे ॥ जंबुद्वीवे णं दीवे भारहे वासे इमीसे ओसप्पिणीए समाए सत्त कुलगरा होत्था, तं०—पढमेत्थ विमलवाहण [चक्खुम जसमं चउत्थमभिचंदे । तत्तो य पसेणइए मरुदेवे चेव णामी य ॥ ३ ॥] एएसि णं सत्तण्हं कुलगराणं सत्त भारिया होत्था, तं०—चंदजसा चंदकंता [सुरुच्च पडिरुव चक्खुकंता य । सिरिकंता मरुदेकी कुलगरपत्तीण णामइं ॥ ४ ॥] १६७ ॥ जंबुद्वीवे णं दीवे भारहे वासे इमीसे णं ओसप्पिणीए चउवीसं तित्थयराणं पियरो होत्था, तं०—णामी य जियसत्तु य [जियारी संवरे इय । मेहे धरे पइठ्ठे य महसेणे य खत्तिए ॥५॥ सुग्गीवे ददरहे विण्हू वसुपुञ्ज य खत्तिए । कयवम्मा सीहसेणे भाणू विस्ससेणे इय ॥६॥ सुरे सुदंसणे कुंभे, सुमित्तविजए समुहविजए य । राया य आससेणे य सिद्धत्थेस्त्रिय खत्तिए ॥ ७ ॥] उदितोदियकुलवंसा विसुद्धवंसा गुणेहि उववेथा । तित्थप्पवत्तयाणं एए पियरो जिणवरणं ॥ ८ ॥ जंबुद्वीवे णं दीवे भारहे वासे इमीसे ओसप्पिणीए चउ-वीसं तित्थयराणं मायरो होत्था, तं०—मरुदेवी विजया सेणा [सिद्धत्था मंगला सुसीमा य । पुहवी लक्खणा रामा णंदा विण्हू जया सामा ॥ ९ ॥ सुजसा सुव्वय अइरा सिरिया देवी पभावइं पउमा । बप्पा सिवा य वामा तिसला देवी य जिण-माया ॥ १० ॥] १६८ ॥ जंबुद्वीवे णं दीवे भारहे वासे इमीसे ओसप्पिणीए चउ-वीसं तित्थयरा होत्था, तं०—उसभ अजिय संभव अभिणंदण सुमइ पउमप्पह सुपास चंदप्पह सुविहि=पुप्फदंत सीयल सिज्जंस वासुपुञ्ज विमल अणंत धम्म संति कुंथु अर मल्लि मुणिसुव्वय णमि गेमि पास वड्डमाणो य ॥ १६९ ॥ एएसिं चउवी-साए तित्थयराणं चउव्वीसं पुव्वभवया णामधेया होत्था, तं०—पढमेत्थ वइर-णाभे विमले तह विमलवाहणे चेव । तत्तो य धम्मसीहे सुमित्त तह धम्ममित्ते य ॥ ११ ॥ सुंदरबाहु तह दीहबाहु जुगबाहु य लद्धबाहु य । दिण्णे य इंददत्ते सुंदर माहिंदरे चेव ॥ १२ ॥ सीहरहे मेहरहे रूपी य सुदंसणे य बोद्धव्वे । तत्तो य णंदणे खलु सीहगिरी चेव वीसइमे ॥ १३ ॥ अदीणसत्तु संखे सुदंसणे णंदणे य बोद्धव्वे । ओसप्पिणीए एए तित्थयराणं तु पुव्वभवा ॥ १४ ॥ १७० ॥ एएसिं णं चउव्वीसाए तित्थयराणं चउव्वीसं सीयाओ होत्था, तं जहा—सीया सुदंसणा सुधमा य सिद्धत्थ सुप्पसिद्धा य । विजया य वेजयंती अयंती अपराजिया चेव ॥ १५ ॥

अरुणस्पभं चंदस्पभं सूरस्पभं अग्नि सुस्पभं चैव । विमला यं पंचवर्णा सागरदत्ता
यं नागदत्ता यं ॥ १६ ॥ अभयकरं गिन्नुइकरा मणोरमा तह मणोहरा चैव । देव-
कुरुत्तरकुरा विसालं चंदस्पभं सीया ॥ १७ ॥ एयाओ सीयाओ सव्वेसिं चैव
जिणवरिंदाणं । सव्वजगवच्छलाणं सव्वोउयसुभाए छायाए ॥ १८ ॥ पुत्वि उक्खित्ता
माणुसेहिं साहट्टु (ड) रोमकूवेहिं । पच्छा वंति सीयं असुरिंदसुरिंदणागिंदा
॥ १९ ॥ चलचवलकुंडलधरा सच्छंदविउच्चियाभरणधारी । सुरअसुरवंदियाणं
वंति सीयं जिणंदाणं ॥ २० ॥ पुरओ वंति देवा नागा पुण दाहिणम्मि पासम्मि ।
पच्चत्थिमेण असुरा गरुला पुण उत्तरे पासे ॥ २१ ॥ उसभो यं विणीयाए वार-
वईए अरिद्वरणेमी । अवसेसा तित्थयरा गिक्खंता जम्मभूमीसु ॥ २२ ॥ सव्वे
वि एगदूसेण [णिग्गया जिणवरा चउव्वीसं । ण यं णाम अष्णलिंगे ण यं गिहि-
लिंगे कुलिंगे यं ॥ २३ ॥] एक्को भगवं वीरो [पासो मल्ली यं तिहि-तिहि सएहिं ।
भगवं पि वासुपुज्जो छहिं पुरिससएहिं गिक्खंतो ॥ २४ ॥] उग्गाणं भोगाणं
राइणाणं [च खत्तियाणं च । चउहिं सहस्सेहिं उसभो सेसा उ सहस्सपरिवारा
॥ २५ ॥] सुमइत्थं गिक्खभत्तेण [णिग्गओ वासुपुज्जं चोत्थेणं । पासो मल्ली यं अट्ट-
मेण सेसा उ छट्ठेणं ॥ २६ ॥] एएसिं णं चउव्वीसाए तित्थयराणं चउव्वीसं
पढमभिक्खलादायारो होत्था, तं०—सिक्खं स वंभदत्ते सुरिंददत्ते यं इंददत्ते यं । पउमे
यं सोमदेवे माहिंदे तह सोमदत्ते यं । पुरसे पुणव्वसू पुण्णणंद सुणंदे जये यं विजये
यं । तत्तो यं धम्मसीहे सुमित्तं तह वग्गसीहे यं ॥ २७ ॥ अपराजियं विस्सेणे
वीसइमे होइ उसभसेणे यं । दिण्णे वरदत्ते धणे बहुले यं आणुपुव्वीए ॥ २८ ॥
एए विमुद्धलेसा जिणवरभत्तीइ वंजलिउडा उ । तं कालं तं समयं पडि-
लाभेई जिणवरिंदे ॥ २९ ॥ संबच्छरेण भिक्खला लद्धा उसभेण लोयणाहेण । सेसेहिं
वीयदिवसे लद्धाओ पढमभिक्खलाओ ॥ ३० ॥ उसभस्स पढमभिक्खला खोयरसो आसि
लोयणाहस्स । सेसाणं परमणं अमियरसरसोवमं आसि ॥ ३१ ॥ सव्वेसिं पि
जिणाणं जहियं लद्धाउ पढमभिक्खलाउ । तहियं वसुधाराओ सरीरमेत्तीओ बुद्धाओ
॥ ३२ ॥ १७१ ॥ एएसिं चउव्वीसाए तित्थयराणं चउवीसं चेइयरुक्खा होत्था,
तं०—णग्गोहं सत्तिवण्णे साले पियए पियंगु छत्ताहे । सिरिसे यं णागरुक्खे माली
यं पिलंक्खुरुक्खे यं ॥ ३३ ॥ तिंदुग पाडलं जंबू आसत्थे खलु तहेव दहिवण्णे ।
णंदीरुक्खे तिलए अंबयरुक्खे असोणे यं ॥ ३४ ॥ चंपयं बउले यं तहा वेडसरुक्खे

धायईरुक्खे । साले य वड्डमाणस्स चेइयरुक्खा जिणवराणं ॥ ३५ ॥ वतीसं धणु-
 याइं चेइयरुक्खो य वड्डमाणस्स । णिच्चोउमो असोगो ओच्छणो सालरुक्खेण
 ॥ ३६ ॥ तिण्णे व गाउआइं चेइयरुक्खो जिणस्स उअभस्स । सेसाणं पुण रुक्खा
 सरोरओ वारसगुणा उ ॥ ३७ ॥ सञ्छत्ता सपडागा सवेइया तोरणेहिं उववेया ।
 सुरअसुरगरुलमहिया चेइयरुक्खा जिणवराणं ॥ ३८ ॥ १७२ ॥ एएसिं चउवीसाए
 तित्थयराणं चउवीसं पढमसीसा होत्था, तं जहा—पढमेत्थ उअभसेणे बीइए पुण
 होइ सीहसेणे य । चारू य वज्जणाभे चमरे तह सुव्वय विदग्गे ॥ ३९ ॥ दिण्णे
 य वराहे पुण आणंदे गोथुभे सुहम्मे य । मंदर जसे अरिट्ठे चक्काह सयंसु कुंभे य
 ॥ ४० ॥ इंदे कुंभे य सुभे वरदत्ते दिण्ण इंदभूई य । उदितोदितकुलवंसा विसुद्ध-
 वंसा गुणेहि उववेया । तित्थप्पवत्तयाणं पढमा सिस्सा जिणवराणं ॥ ४१ ॥ १७३ ॥
 एएसि णं चउवीसाए तित्थयराणं चउवीसं पढमसिस्सिणी होत्था, तं जहा—वंभी
 य फग्गु सामा अजिया कासवी रई सोमा । सुमणा वारुणि सुल्ला धारणि धरणि य
 धरणिधरा ॥ ४२ ॥ पउमा सिवा सुयी तह अंजुया भावियप्पा य रक्खी य । बंधु-
 वई पुप्फवई अन्ना अमिला य अहिया य ॥ ४३ ॥ जक्खिणी पुप्फचूला य
 चंदणऽब्बा य आहियाउ । उदितोदितकुलवंसा विसुद्धवंसा गुणेहि उववेया ।
 तित्थप्पवत्तयाणं पढमा सिस्सी जिणवराणं ॥ ४४ ॥ १७४ ॥ जंबुहीवे णं दीवे
 भारहे वासे इमीसे ओसप्पिणीए वारह चक्कवट्ठियरो होत्था, तं जहा—उअभे
 सुमित्ते विजए समुहविजए य आससेणे य । विस्ससेणे य सूरे सुदंसणे कत्तवीरिए
 चैव ॥ ४५ ॥ पउमुत्तरे महाहरी विजए राया तहेव य । बंभे वारसमे उत्ते पिउ-
 णामा चक्कवट्ठीणं ॥ ४६ ॥ १७५ ॥ जंबुहीवे णं दीवे भारहे वासे इमीसे ओस-
 प्पिणीए वारस चक्कवट्ठियायो होत्था, तं जहा—सुमंगला जसवई भद्दा सहदेवी
 अइरा सिरिदेवी । तारा जाला (जाला तारा) मेरा वप्पा चुल्लणि अपच्छिमा
 ॥ १७६ ॥ जंबुहीवे णं दीवे भारहे वासे इमीसे ओसप्पिणीए वारस चक्कवट्ठी
 होत्था, तं जहा—भरहो सगरो मघवं [सणकुमारो य रायसद्दूळो । संती कुंथू य
 अरो हवइ सुभूमो य कोरव्वो ॥ ४७ ॥ णवमो य महापउमो हरिसेणो चैव राय-
 सद्दूळो । जयणामो य णरवई, वारसमो बंभदत्तो य ॥ ४८ ॥] एएसिं वारसणं
 चक्कवट्ठीणं वारस इत्थिरयणा होत्था, तं जहा—पढमा होइ सुभद्दा भद्द सुणंदा
 जथा य विजया य । किण्हसिरी सूरसिरी पउमसिरी वसुंधरा देवी ॥ ४९ ॥ लच्छि-
 मई कुरुमई इत्थिरयणाण णाभाइं ॥ १७७ ॥ जंबुहीवे णं दीवे भारहे वासे इमीसे

ओसपिणीए णवबलदेवणववासुदेवपियरो होत्था, तं जहा—पयावई य बंभो [सोमो रुहो सिवो महसिवो य । अग्गिसिहो य दसरहो णवमो भणिओ य वसुदेवो ॥५०॥] जंबुद्दीवे णं दीवे भारहे वासे इमीसे ओसपिणीए णव वासुदेवमायरो होत्था, तं जहा—मियावई उमा चेव पुहवी सीथा य अम्मया । लच्छिमई सेसमई केकई देवई तथा ॥ ५१ ॥ जंबुद्दीवे णं दीवे भारहे वासे इमीसे ओसपिणीए णवबलदेव-मायरो होत्था, तं जहा—भद्दा तह सुभद्दा य सुप्पभा य सुदंसणा । विजया वेज-यंती य जयंती अपराजिया ॥ ५२ ॥ णवमीया रोहिणी य बलदेवाण मायरो ॥ १७८ ॥ जंबुद्दीवे णं दीवे भारहे वासे इमीसे ओसपिणीए णव दसारमंडला होत्था, तं जहा—उत्तमपुरिसा मज्झिमपुरिसा पहाणपुरिसा ओयंसी तेयंसी वचंसी जसंसी छायंसी कंता सोमा सुभगा पियदंसणा सुरूवा सुहसीलसुहाभिगमसव्व-जणयणकंता ओहवला अइवला महावला अणिहया अपराइया सत्तमद्दणा रिपु-सहस्समाणमहणा साणुक्कोसा अमच्छरा अचवला अचंडा मियमंजुलपलावहसिय-गंभीरमधुरपडिपुण्णसच्चवयणा अब्भुवगयवच्छला सरणा लक्खणवंजणगुणोववेथा माणुग्माणपमाणपडिपुण्णसुजायसव्वंगसुंदरंगा ससिसोमागारकंतपियदंसणा अमरि-सणा पयंडदंडप्पयारा(र)गंभीरदर(रि)सणिज्जा तालद्धओव्विद्धगरुलकेऊ महाधणु-विकट्टया महासत्तसाथरा दुद्धरा धणुद्धरा धीरपुरिसा जुद्धकित्तिपुरिसा विउलकुल समुंभवः महारयणविहाडगा अद्धभरहसामी सोमा रायकुलवंसतिलया अजिया अजियरहा हलमुसलकणगपाणी संखचक्कगयसत्तिणंदगधरा पवदञ्जलसुकंतविमल-गोत्थुमतिरीडधारी कुंडलउज्जोइयाणणा पुंडरीयणयणा एकावलिकंठलइयवच्छा सिरि-वच्छसुल्लेखणा वरजसा सव्वोडयसुरभिकुसुमरचितपलंबसोभंतकंतविकसंतवित्तवर-मालरइयवच्छा अट्टसयविभत्तलक्खणपसत्थसुंदरविरइयंगमंगा मत्तगयवरिंदललिय-विक्रमविलसियगई सारयणवथणियमहुरंगंभीरकुंचणिग्घोसदुंदुभिसरा कडिसुत्तग-णीलपीयकोसेज्जवाससा पवरदित्ततेया णरसीहा णरवई णरिंदा णरवसहा मरुयवसभ-कप्पा अब्भहियरायतेयलच्छीए दिप्पमाणा णीलगपीयगवसणा दुवे-दुवे रामकेसवा भायरो होत्था, तं जहा—तिविट्टू जाव कण्हे अयले जाव रामे यावि अपच्छिमे ॥५३॥१७९॥ एए सि णं णवण्हं बलदेववासुदेवाणं पुव्वभविया णव णामधेज्जा होत्था, तं० विसभूई पव्वयए धणदत्त समुद्दत्त इसिवाले । पियमित्त ललियमित्ते पुणव्वसू गंगदत्ते य ॥ ५४ ॥ एयाइं णामाइं पुव्वभवे आसि वासुदेवाणं । एत्तो बलदेवाणं

अहकर्मं कित्तइस्सामि ॥ ५५ ॥ विसणंदी य सुक्कंधू सागरदत्ते असोमञ्जलि ए य ।
 वाराह धम्मसेणे अपराइय राथललिए य ॥ ५६ ॥ १८० ॥ एएसि णवण्हं ऋत्तदेव-
 वासुदेवाणं पुव्वभविया णव धम्मायरिया होत्था, तं—संभूय सुभइ सुदंसणे य
 सेयसे कण्ह गंगदत्ते य । सागरसमुद्दणामे दुमसेणे य णवमए ॥ ५७ ॥ एए धम्मा-
 यरिया किच्चीपुरिसाण वासुदेवाणं । पुव्वभवे एयासि जत्थ णियाणाइं कासी य
 ॥ ५८ ॥ १८१ ॥ एएसिं णवण्हं वासुदेवाणं पुव्वभवे णव णियाणभूमिओ होत्था,
 तं—महुरा यं हत्थिणापुरं च ॥ ५९ ॥ १८२ ॥ एएसि णं णवण्हं वासुदेवाणं
 णव णियाणकारणा होत्था, तं—गावी जुवे जाव माउया इय ॥ ६० ॥ १८३ ॥
 एएसिं णवण्हं वासुदेवाणं णव पडिसल्लू होत्था, तं—अस्सग्गीवे जाव जरासंघे
 ॥ ६१ ॥ एए खल्ल पडिसत्तु जाव सच्चक्रेहि ॥ ६२ ॥ एको य सत्तमीए पंच य
 छट्ठीए पंचमी एको । एको य चउत्थीए कण्हो पुण तच्चपुट्ठीए ॥ ६३ ॥ अणिया-
 णकडा रामा [सव्वे वि य केसवा णियाणकडा । उड्डंगामी रामा केसव सव्वे अहो-
 गामी ॥ ६४ ॥] अड्डंतकडा रामा एगो पुण बंभल्लोयकप्पम्मि । एक्का से गळ-
 वसही सिज्झिस्सइ आगमिस्सेणं ॥ ६५ ॥ १८४ ॥ जंबुद्वीवे णं दीवे एरवए वासे
 इमीसे ओसप्पिणीए चउत्तीसं तित्थयरा होत्था, तं—चंदाणणं सुचंदं अग्गीसेणं च
 णंदिसेणं च । इसिदिणं वय हारिं वंदिमो सोमचंदं च ॥ ६६ ॥ वंदामि जुत्तिसेणं
 अजियसेणं तद्देव सिवसेणं । बुद्धं च देवसम्मं सयंयं णिक्खित्तसत्थं च ॥ ६७ ॥
 असंजलं जिणवसहं वंदे य अणंतयं अमियणणिं । उवसंतं च धुयरयं वंदे खल्ल
 गुत्तिसेणं च ॥ ६८ ॥ अइपासं च सुपासं देवेसरवंद्रियं च मरुदेवं । णिव्वाणगयं
 च ध(व)रं खीणदुहं सामकोट्टं च ॥ ६९ ॥ जियरागमग्गिसेणं वंदे खीणरायमग्गिउत्तं
 च । वोक्कसियपिज्जदोसं वारिसेणं गयं सिद्धिं ॥ ७० ॥ १८५ ॥ जंबुद्वीवे णं दीवे
 आगमिस्साए उस्सप्पिणीए भारहे वासे सत्त कुलगरा भविस्संति, तं—मियवाहणं
 सुभूमे य सुपपमे य सयंपपमे । दत्ते सुहुमे सुक्कंधू य आगमिस्साण होक्खइ ॥ ७१ ॥
 ॥ १८६ ॥ जंबुद्वीवे णं दीवे आगमिस्साए उस्सप्पिणीए एरवए वासे दस कुल-
 गरा भविस्संति, तं—विमलवाहणे सीमंकरे सीमंधरे खेमंधरे ददधणु
 दसधणू सयधणू पडिसुइं सुमइ त्ति ॥ १८७ ॥ जंबुद्वीवे णं दीवे भारहे वामे
 आगमिस्साए उस्सप्पिणीए चउत्तीसं तित्थयरा भविस्संति, तं—महापउमे सूरदेवे,
 सुपासे य सयंपपमे । सव्वाणुभूइं अरहा, देवस्सुए य होक्खइ ॥ ७२ ॥ उदए

पेढालपुत्ते य, पोड्डिले सत (त्त) कित्ति य । मुणिसुध्वए य अरहा, सव्वभावविऊ
जिणे ॥ ७३ ॥ अममे णिक्कसाए य, णिप्पुलाए य णिम्ममे । चित्तउत्ते समाही य,
आगमिस्सेण होक्खइ ॥ ७४ ॥ संवरे (जसोहरे) अणियट्ठी य, विजए विमले इय ।
देवोक्खाए अरहा, अणंतविजए इय ॥ ७५ ॥ एए वुत्ता चउव्वीसं, भरहे वासम्मि
केवली । आगमिस्सेण होक्खंति, धम्मतिथ्यस्स देसगा ॥ ७६ ॥ १८८ ॥ एएसि
णं चउव्वीसाए तिथ्यराणं पुव्वभविया चउव्वीसं णामधेज्जा भविस्संति, तं०—
सेणिय सुपास उदए पोड्डिल अणगार तह दढाऊ य । कत्तिय संखे य तथा णंद
सुणंदे य सयए य ॥ ७७ ॥ बोद्धव्वा देवई य सच्चइ तह वासुदेव बलदेवे ।
रोहिणि सुलसा चेव तत्तो खलु रेवई चेव ॥ ७८ ॥ तत्तो हवइ सवाली बोद्धव्वे
खलु तहा भयाली य । दीवायणे य कण्हे तत्तो खलु णारए चेव ॥ ७९ ॥ अंणड
दारुमडे य साई बुद्धे य होइ बोद्धव्वे । भावीतिथ्यराणं णामाई पुव्वभवियाइं
॥ ८० ॥ १८९ ॥ एएसि णं चउव्वीसाए तिथ्यराणं चउव्वीसं पियरो भवि-
स्संति, चउव्वीसं मायरो भविस्संति, चउव्वीसं पढमसीसा भविस्संति, चउव्वीसं
पढमसिस्सणीओ भविस्संति, चउव्वीसं पढमभिक्खादायगा भविस्संति, चउव्वीसं
चेइयरुक्खा भविस्संति ॥ १९० ॥ जंबुद्दीवे णं दीवे भारहे वासे आगमिस्साए
उत्सपिणीए बारस चक्कवट्ठिणो भविस्संति, तं०—भरहे य दीहदंते गूढदंते य
सुद्धदंते य । सिरिउत्ते सिरिभूई सिरितोमे य सत्तमे ॥ ८१ ॥ पउमे य महापउमे
विमलवाहणे विपुलवाहणे चेव । वरिद्धे बारसमे वुत्ते आगमिसा भरहाहिवा ॥ ८२ ॥
एएसि णं बारसण्हं चक्कवट्ठीणं बारस पियरो भविस्संति, बारस मायरो भविस्संति
बारस इत्थीरयणा भविस्संति ॥ १९१ ॥ जंबुद्दीवे णं दीवे भारहे वासे आगमि-
स्साए उत्सपिणीए णव बलदेववासुदेवपियरो भविस्संति, णव वासुदेवमायरो
भविस्संति, णव बलदेवमायरो भविस्संति, णव दसारमंडला भविस्संति, तं०—
उत्तमपुरिसा मज्झिमपुरिसा पहाणपुरिसा ओयंसी तेयंसी एवं सो चेव वण्णओ
भाणियव्वो जाव णीलगापीतगवसणा दुवे-दुवे राम-केसवा भायरो भविस्संति, तं
जहा-णंदे य णंदमित्ते दीहबाहू तहा महाबाहू । अइबले महाबले बलभदे य सत्तमे
॥ ८३ ॥ दुविट्ठू यं तिविट्ठू य आगमिस्साण वणिहणो । जयंते विजए भदे सुप्पमे
य सुंदसणे । आणंदे णंदणे पउमे संकरिसणे य अपच्छिमे ॥ ८४ ॥ १९२ ॥ एएसि
णं णवण्हं बलदेववासुदेवाणं पुव्वभविया णव णामधेज्जा भविस्संति, णव धम्माय-

रिया भविस्संति, णव गियाणभूमीओ भविस्संति, णव गियाणकारणा भविस्संति, णव पडिसत्तू भविस्संति, तं जहा—तिलाए य लोहजंवे वइरजंवे य केसरो पहराए । अपराइए य भीमे महाभीमे य सुग्गीवे ॥ ८५ ॥ एए ग्वलु पडिसत्तू क्कित्तीपुरिमाण वामुदेवाणं । सव्वे वि चक्कजोही हम्मिहिति सच्चकेहिं ॥ ८६ ॥ १९३ ॥ जंबुदीपे णं दीवे एरवए वासे आगमिस्साए उस्सप्पिणीए चउव्वीसं तित्थयरा भविस्संति, तं जहा—सुमंगले य सिद्धत्थे, णिव्वाणे य महाजसे । धम्मज्झए य अरहा, आगमिस्साण होक्खइ ॥ ८७ ॥ सिरिचंदे पुप्फकेऊ, महान्दं दे य केवली । सुयसायरे य अरहा, आगमिस्साण होक्खइ ॥ ८८ ॥ सिद्धत्थे पुण्णोसे य, महाघोसे य केवली । सच्चसेणे य अरहा, आगमिस्साण होक्खइ ॥ ८९ ॥ मूरसेणे य अरहा, महासेणे य केवली । सव्वाणंदे य अरहा, देवउत्ते य होक्खइ ॥ ९० ॥ सुपामे सुव्वए अरहा, अरहे य सुकोसले । अरहा अणंतविजए, आगमिस्साण होक्खइ ॥ ९१ ॥ विमले उत्तरे अरहा, अरहा य महावले । देवाणंदे य अरहा, आगमिस्साण होक्खइ ॥ ९२ ॥ एए वुत्ता चउव्वीसं, एरवयंमि केवली । आगमिस्साण होक्खंति, धम्मतित्थस्स देसगा ॥ ९३ ॥ १९४ ॥ वारस चक्कवट्ठिणो भविस्संति, वारस चक्कवट्ठिपियरो भविस्संति, वारस चक्कवट्ठिमायरो भविस्संति, वारस इत्थीरयणा भविस्संति । णव बलदेववामुदेवपियरो भविस्संति, णव वामुदेवमायरो भविस्संति, णव बलदेवमायरो भविस्संति, णव दसारमंडला भविस्संति, तं जहा—उत्तमपुरिसा मज्झिमपुरिसा पहाणपुरिसा जाव दुवे-दुवे रामकेसवा भायरो भविस्संति, णव पडिसत्तू भविस्संति, णव पुव्वभवणामधेज्जा, णव धम्मायरिया, णव गियाणभूमीओ, णव गियाणकारणा, आयाए एरवए आगमिस्साए भाणियव्वा । एवं दोसु वि आगमिस्साए भाणियव्वा ॥ १९५ ॥ इथेयं एवमाहिज्जंति, तं जहा—कुलगरवंसेइ य एवं तित्थयरवंसेइ य चक्कवट्ठिवंसेइ य दसारवंसेइ य गणधरवंसेइ य इसिवंसेइ य जइवंसेइ य मुणिवंसेइ य । सुएइ वा सुअंगेइ वा सुयसमासेइ वा सुयखेइ वा समवाएइ वा संखेइ वा सम्मत्तमंगमक्खायं अज्झयणं ति वेमि ॥ १९६ ॥

॥ समवायं चउत्थमंगं समत्तं ॥



भगवई—विवाहपणति

णमो अरिहंताणं णमो सिद्धाणं णमो आथरियाणं णमो उवज्जायाणं णमो
 लोए सव्वसाहणं ॥१॥ णमो बंधीए लिवीए ॥२॥ णमो सुयस्स ॥३॥ रायगिह
 चलण दुक्खे कंखपओसे य पगइ पुढवीओ । जावंते णेरइए बाले गुरुए य चल-
 णाओ ॥१॥ ते णं कालेणं तेणं समए णं रायगिहे णामं णयरे होत्था, वण्णओ ।
 तस्स णं रायगिहस्स णगरस्स बहिया उत्तरपुरत्थिमे दिसीभाए गुणसिलए णामं
 चेइए होत्था, सेणिए राया, चिल्लणा देवी ॥ ४ ॥ ते णं काले णं ते णं समए
 णं समणे भगवं महावीरे आइगरे तित्थयरे सहसंबुद्धे पुरिसुत्तमे पुरिससीहे
 पुरिसवरपुंडरीए पुरिसवरगंधहत्थीए लोमुत्तमे लोगणाहे लोगप्पइवे लोग-
 पज्जोयगरे अभयदए चक्खुदए मग्गदए सरणदए धम्मदए धम्मदेसए धम्म-
 सारही धम्मवरचाउरंतचक्कवट्टी अप्पडिहयवरणाणदंसणधरे वियट्टुछउमे
 जिणे जाणए बुद्धे बोहए मुत्ते मोयए सव्वणू सव्वदरिसी सिवमयलमरुय-
 मणंतमक्खयमव्वाबाहमपुणरावत्तयं सिद्धिगइणामधेयं ठाणं संयाविउकामे जाव
 समोसरणं ॥ ५ ॥ परिसा णिग्गया, धम्मो कहिओ, परिसा पडिगया ॥ ६ ॥
 तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंद-
 भूई णामं अणगारे गोर्धमसगोत्तेणं सत्तुस्तेहे समचउरंससंठाणसंठिए वज्जरि-
 सहणारायसंधयणे कणगपुलगणिघसपग्गहोरे उगगतवे दित्ततवे तत्ततवे महातवे
 ओराले घोरे घोरगुणे घोरतवस्सी घोरबंधेवरवासी उच्छूढसरीरे संखित्त-
 बिउलतेयलेसे चोइसपुब्बी चउणाणोवगए सव्वक्खरसण्णिवाई समणस्स भग-
 वओ महावीरस्स अदूरसामंते उड्ढंजाणू अहोसिरे ण्णानकोट्ठीवगए संजमेणं
 तवसा अप्पाणं भावेमाणे विहरइ ॥ ७ ॥ तए णं से भगवं गोयमे जायसड्ढे
 जायसंसए जायकोउहल्ले उप्पणसड्ढे उप्पणसंसए उप्पणकोउहल्ले संजायसड्ढे
 संजायसंसए संजायकोउहल्ले समुप्पणसड्ढे समुप्पणसंसए समुप्पणकोउ-
 हल्ले उट्ठाए उट्ठेइ उट्ठाए उट्ठंत्ता जेणेव समणे भगवं महावीरे तेणेव
 उवागच्छइ उवागच्छित्ता समणं भगवं महावीरं तिकखुत्तो आयाहिणपयाहिणं
 करेइ २ ता वंदइ णमंसइ २ ता णच्चासण्णे णाइदूरे सुत्तसमाप्पे णमंसमाणे

अभिमुहे विणएणं पंजलिउडे पज्जुवासमाणे एवं वयासी—ते नूणं भंते !
 चलमाणे चलिए १, उदीरिज्जमाणे उदीरिए २, वेइज्जमाणे वेइए ३,
 पहिज्जमाणे पहीणे ४, छिज्जमाणे छिण्णे ५, भिज्जमाणे सिण्णे ६,
 दड्ड (डड्ड) माणे दड्डे ७, मिज्जमाणे मए ८, णिज्जरिज्जमाणे
 णिज्जिण्णे ९ ? हंता, गोयमा ! चलमाणे चलिए जाव णिज्जरिज्जमाणे
 णिज्जिण्णे । एए णं भंते ! णव पया कि एगट्टा णाणाघोसा णाणावंजणा
 उदाट्टा णाणट्टा णाणाघोसा णाणावंजणा ? गोयमा ! चलमाणे चलिए १
 उदीरिज्जमाणे उदीरिए २ वेइज्जमाणे वेइए ३ पहिज्जमाणे पहीणे ४
 ते एए णं चत्तारि पया एगट्टा णाणाघोसा णाणावंजणा उप्पणपक्खस्स,
 छिज्जमाणे छिण्णे मिज्जमाणे भिण्णे दड्ड (डड्ड) माणे दड्डे मिज्जमाणे
 मडे णिज्जरिज्जमाणे णिज्जिण्णे, एए णं पंच पया णाणट्टा णाणाघोसा
 णाणावंजणा विगयपक्खस्स ॥ ८ ॥ णेरइयाणं भंते ! केवइकालं ठिई
 पणत्ता ? गोयमा ! जहण्णेणं दत्त वाससहस्साइं उक्कोसेणं तेत्तीखं सागरो-
 वमाइं ठिई प० १ । णेरइयाणं भंते ! केवइकालस्स आणमंति वा पाणमंति
 वा ऊससंति वा णीससंति वा ? जहा ऊसासपए २ । णेरइयाणं भंते !
 आहारट्टी ? जहा पणवणाए पढमए आहारुहेसए तथा भाणियव्वं ३ ।
 ठिई उस्सासाहारे कि, वाऽऽहारेंति सब्बओ वावि ? कइभागं
 सब्बाणि व ? कीस व भुज्जो परिणमंति ? ॥ १ ॥ ९ ॥ णेरइयाणं भंते !
 पुब्बाहारिया पोग्गला परिणया १ ? आहारिया आहारिज्जमाणा पोग्गला
 परिणया २ ? अणाहारिया आहारिज्जिस्समाणा पोग्गला परिणया ३ ? अणा-
 हारिया अणाहारिज्जिस्समाणा पोग्गला परिणया ४ ? गोयमा ! णेरइयाणं
 पुब्बाहारिया पोग्गला परिणया १, आहारिया आहारिज्जमाणा पोग्गला परि-
 णया परिणमंति य २, अणाहारिया आहारिज्जिस्समाणा पोग्गला णो परिणया
 परिणमिस्संति ३, अणाहारिया अणाहारिज्जिस्समाणा पोग्गला णो परिणया णो
 परिणमिस्संति ४ ॥ १० ॥ णेरइयाणं भंते ! पुब्बाहारिया पोग्गला चिया पुच्छा,
 जहा परिणया तथा चियावि । एवं चिया उवचिया उदीरिया वेइया णिज्जिण्णा,
 गहा—परिणय चिया उवचिया उदीरिया वेइया य णिज्जिण्णा । एककेवकमि
 पदंमि (भौ) चउच्चिवा पोग्गला हंति ॥ ११ ॥ ११ ॥ णेरइयाणं भंते ! कइविहा

पोग्ला भिज्जंति ? गोयमा ! कम्मदब्बवग्गणमहिक्कच्च दुविहा पोग्ला भिज्जंति, तंजहा—अणू चेव बायरा चेव १। णेरइयाणं भंते ? कइविहा पोग्ला चिज्जंति ? गोयमा ! आहारदब्बवग्गणमहिक्कच्च दुविहा पोग्ला चिज्जंति, तंजहा—अणू चेव बायरा चेव २। एवं उवचिज्जंति ३। णेर० क० पो० उदीरेंति ? गोयमा ! कम्मदब्बवग्गणमहिक्कच्च दुविहे पोग्गणे उदीरेंति, तंजहा—अणू चेव बायरा चेव। सेसावि एवं चेव भाणियब्बा, एवं वेदेंति ५ णिज्जरेंति ६ उयट्टिसु ७ उव्वट्टेंति ८ उव्वट्टिस्संति ९ संकामिसु १० संकामेति ११ संकामिस्संति १२ णिहत्तिसु १३ णिहत्तेति १४ णिहत्तिस्संति १५ णिकायंसु १६ णिकायंति १७ णिकाइस्संति १८, सब्बेसु वि कम्मदब्बवग्गणमहिक्कच्च। गाहा—भेइयच्चिया उवचिया उदीरिया वेइया य णिज्जिण्णा। उयट्टणसंकाभणिहत्तण णिकायणे तिविह कालो ॥१॥१२॥ णेरइयाणं भंते ! जे पोग्गले तेयाकम्मत्ताए गेष्हंति ते किं तीयकालसमए गेष्हंति ? पडुप्पण्णकालसमए गेष्हंति ? अणा० का० समए गेष्हंति ? गोयमा ! णो तीयकालसमए गेष्हंति पडुप्पण्णकालसमए गेष्हंति णो अणा० समए गिष्हंति १। णेरइयाणं भंते ! जे पोग्गला तेयाकम्मत्ताए गहिहए उदीरेंति ते किं तीयकालसमयगहिहए पोग्गले उदीरेंति पडुप्पण्णकालसमए घेप्पमाणे पोग्गले उदीरेंति गहणसमयपुरक्खडे पोग्गले उदीरेंति ? गोयमा ! अतीयकालसमयगहिहए पोग्गले उदीरेंति णो पडुप्पण्णकालसमए घेप्पमाणे पोग्गले उदीरेंति णो गहणसमयपुरक्खडे पोग्गले उदीरेंति २, एवं वेदेंति ३ णिज्जरेंति ॥३॥ णेरइयाणं भंते ! जीवाओ किं चलियं कम्मं बंधंति अचलियं कम्मं बंधंति ? गोयमा ! णो चलियं कम्मं बंधंति अचलियं कम्मं बंधंति १। णेरइयाणं भंते ! जीवाओ किं चलियं कम्मं उदीरेंति अचलियं कम्मं उदीरेंति ? गोयमा ! णो चलियं कम्मं उदीरेंति अचलियं कम्मं उदीरेंति २। एवं वेदेंति ३ उयट्टेंति ४ संकामेति ५ णिहत्तेति ६ णिकायंति ७, सब्बेसु अचलियं णो चलियं। णेरइयाणं भंते ! जीवाओ किं चलियं कम्मं णिज्जरेंति अचलियं कम्मं णिज्जरेंति ? गोयमा ! चलियं कम्मं णिज्जरेंति णो अचलियं कम्मं णिज्जरेंति ८। गाहा—बंधोदयवेदोयट्टसंकमे तह णिहत्तण्णिकाये। अचलियं कम्मं तु भवे चलियं जीवाउ णिज्जरए ॥१॥१४॥ एवं ठिई आहारो य भाणियब्बो, ठिई—जहा ठिइए तहा भाणियब्बा, सब्बजीवाणं

आहारोऽपि जहा पणवणाए पढमे आहारद्वेसए तथा भाणियच्चो, एत्तो आढत्तो-
 णेरइयाणं भंते ! आहारदट्ठी ? जाव दुवलत्ताए भुज्जो-भुज्जो परिणमंति,
 गोयमा ! ० । असुरकुमारारणं भंते ! केवइयं कालं ठिई प० ? गोयमा ! जहण्णेणं
 दस वाससहस्साइं उक्कोसेणं साइरेगं सागरोवमं । असुरकुमारारणं भंते ! केव-
 इयं कालस्स आणमंति वा पाणमंति वा ? गोयमा ! जहण्णेणं सत्तप्हं थोवाणं
 उक्कोसेणं साइरेगस्स पक्खस्स आणमंति वा पाणमंति वा । असुरकुमारारणं भंते !
 आहारदट्ठी ? हंता आहारदट्ठी । असुरकुमारारणं भंते ! केवइकालस्स आहारदट्ठे
 समुप्पज्जइ ? गोयमा ! असुरकुमारारणं दुविहे आहारे पणत्ते, तंजहा-आभोग-
 णिव्वत्तिए य अणाभोगणिव्वत्तिए य । तत्थ णं जे से अणाभोगणिव्वत्तिए से
 अणुसमयं अविरहिए आहारदट्ठे समुप्पज्जइ । तत्थ णं जे से आभोगणिव्वत्तिए, से
 जहण्णेणं चउत्थभत्तस्स उक्कोसेणं साइरेगस्स वाससहस्सस्स आहारदट्ठे समुप्प-
 ज्जइ । असुरकुमारारणं भंते ! किमाहारमाहारंति ? गोयमा ! दव्वओ अणंतपए-
 सियाइं दव्वाइं खित्तकालभावपणवणागमेणं सेसं जहा णेरइयाणं जाव तेणं तंति
 पोगला कीसत्ताए भुज्जो-भुज्जो परिणमंति ? गोयमा ! सोईदियताए मुरूवत्ताए
 सुवण्णत्ताए ४ इट्टत्ताए इच्छियत्ताए भिज्जियत्ताए उड्डत्ताए णो अहत्ताए मुहत्ताए
 णो दुहत्ताए भुज्जो-भुज्जो परिणमंति । असुरकुमारारणं पुव्वाहारिया पुग्गला
 परिणया ? असुरकुमारारिभलावेणं जहा णेरइयाणं जाव णो अचलियं कम्मं णिज्ज-
 रंति । णागकुमारारणं भंते ! केवइयं कालं ठिई प० ? गोयमा ! जहण्णेणं दस
 वाससहस्साइं उक्कोणं देसूणाइं दो पलिओवमाइं । णागकुमारारणं भंते ! केवइ-
 कालस्स आणमंति वा पा० ? गोयमा ! जहण्णेणं सत्तप्हं थोवाणं उक्कोसेणं
 मुहुत्तपुहुत्तस्स आणमंति वा पा० । णागकुमारारणं भंते ! आहारदट्ठी ? हंता आहा-
 रदट्ठी । णागकुमारारणं भंते ! केवइकालस्स आहारदट्ठे समुप्पज्जइ ? गोयमा !
 णागकुमारारणं दुविहे आहारे पणत्ते, तंजहा-आभोगणिव्वत्तिए य अणाभोग-
 णिव्वत्तिए य । तत्थ णं जे से अणाभोगणिव्वत्तिए से अणुसमयमविरहिए आहा-
 रदट्ठे समुप्पज्जइ तत्थ णं जे से आभोगणिव्वत्तिए से जहण्णेणं चउत्थभत्तस्स
 उक्कोसेणं दिवसपुहुत्तस्स आहारदट्ठे समुप्पज्जइ । सेसं जहा असुरकुमारारणं जाव
 णो अचलियं कम्मं णिज्जरंति । एवं सुवण्णकुमारारि जाव थणियकुमारारणं ति ।
 पुढविककाइयाणं भंते ! केवइयं कालं ठिई प० ? गोयमा ! जहण्णेणं अंतो-

मुहुत्तं उक्कोसेणं बावीसं वाससहस्साइं । पुढविक्काइया केवइकालस्स आणमंति वा पा० ? गो० वेमाय० आणमंति वा पा०, पुढविक्काइयाणं आहारट्ठी ? हंतो आहारट्ठी । पुढविक्काइयाणं केवइकालस्स आहारट्ठे समुप्पज्जइ ? गोयमा ! अणुसमयं अविरहिए आहारट्ठे समुप्पज्जइ, पुढविक्काइया किमाहारमाहारेंति ? गोयमा ! दब्बओ जहा णेरइयाणं जाव णिव्वाघाएणं छर्दिसिं वाघायं पडुच्च सिय तिर्दिसिं सिय चउर्दिसिं सिय पंचर्दिसिं, वण्णओ कालणीलपीतलोहियहालिइमुक्किल्लाणि, गंधओ सुरभिगंध २ रसओ तित्त ५ फासओ कक्खड ८ सेसं तहेव । णाणत्तं कइभागं आहारेंति ? कइभागं फासाइंति ? गोयमा ! असंखिज्जइभागं आहारेंति अणंतभागं फासाइंति जाव तेसिं पोग्गला कीसत्ताए भुज्जो-भुज्जो परिणमंति ? गोयमा ! फासिंदियवेमायत्ताए भुज्जो-भुज्जो परिणमंति, सेसं जहा णेरयाणं जाव णो अचलियं कम्मं णिज्जरंति । एवं जाव वणस्सइकाइयाणं, णवरं ठिई वण्णेयव्वा जाव (इया) जस्स, उस्सासो वेमायाए । बेइंदियाणं ठिई भाणियव्वा उसासो वेमायाए । बेइंदियाणं आहारे पुच्छा, गोयमा ! आभोगणिव्वत्तिए य अणाभोगणिव्वत्तिए य तहेव । तत्थ णं जे से आभोगणिव्वत्तिए से णं असंखेज्जसमाए अंतोमुहुत्तिए वेमायाए आहारट्ठे समुप्पज्जइ, सेसं तहेव जाव अणंतभागं आसार्यंति । बेइंदियाणं भंते ! जे पोग्गले आहारत्ताए गेण्हंति ते किं सब्बे आहारेंति णो सब्बे आहारेंति ? गोयमा ! बेइंदियाणं दुविहे आहारे पण्णत्ते, तंजहा-लोमाहारे पक्खेवाहारे य । जे पोग्गले लोमाहारत्ताए गिण्हंति ते सब्बे अपरिसेसिए आहारेंति, जे पोग्गले पक्खेवाहारत्ताए गिण्हंति तेसिणं पोग्गलाणं असंखिज्जइभागं आहारेंति अणेगाइं च णं भागसहस्साइं अणासाइज्जमाणाइं अफासिज्जमाणाइं विद्धंसमागच्छंति । एएसिं णं भंते ! पोग्गलाणं अणासाइज्जमाणां अफासाइज्जमाणाण य कयरे-कयरे अप्पा वा बहुया वा तुल्ला वा विसेसाहिया वा ? गोयमा ! सब्बत्थोवा पुग्गला अणासाइज्जमाणा अफासाइज्जमाणा अणंतगुणा । बेइंदियाणं भंते ! जे पोग्गला आहारत्ताए गिण्हंति ते णं तेसिं पुग्गला कीसत्ताए भुज्जो-२ परिणमंति ? गोयमा ! जिंभदियफासिंदियवेमायत्ताए भुज्जो-भुज्जो परिणमंति । बेइंदियाणं भंते ! पुक्खाहारिया पुग्गला परिणया तहेव जाव चलियं कम्मं णिज्जरंति । तेइंदियचउर्दिरदियाणं णाणत्तं ठिइए जाव णेगाइं च णं भागसहस्साइं अणाघाइज्जमाणाइं

अणासाइज्जमाणाइं अफासाइज्जमाणाइं विद्धंसमागच्छंति । एएसिणं भन्ते ! योग-
 लाणं अणाघाइज्जमाणाइं ३ पुच्छा । गोयमा ! सव्वरथोवा पोग्गला अणाघा-
 इज्जमाणा अणासाइज्जमाणा अणंतगुणा अफासाइज्जमाणा अणंतगुणा । तेइंदि-
 दयाणं घाणिदियजिंभदियफांसिदियवेमायाए भुज्जो २ परिणमंति । चउरंदि-
 दयाणं चक्खिदियघाणिदियजिंभदियफांसिदियत्ताए भुज्जो-भुज्जो परिणमंति ।
 पंचिदियतिरिक्खजोणियाणं ठिई भणिऊणं ऊसासो वेमायाए, आहारो अणा-
 भोगणिच्चत्तिए अणुसमयं अविरहो, आभोगणिच्चत्तओ जहण्णेणं अंतोमुहु-
 त्तस्स उक्कोसेणं छट्टभत्तस्स, सेसं जहा चउरंदियाणं जाव चलयं कम्मं णिज्ज-
 रेंति । एवं मणुस्साणवि, णवरं आभोगणिच्चत्तिए जहण्णेणं अंतोमुहुत्तं उक्को-
 सेणं अट्टभत्तस्स सोइदियवेमायत्ताए भुज्जो-भुज्जो परिणमंति, सेसं जहा
 चउरंदियाणं, तहेव जाव णिज्जरेति । वाणमंतराणं ठिईए णाणत्तं, परिणमंति
 भवसेसं जहा णागकुमारणं, एवं जोइसियाणवि, णवरं उस्सासोजहण्णेणं मुहु-
 त्तपुहुत्तस्स उक्कोसेणवि मुहुत्तपुहुत्तस्स, आहारो जहण्णेणं दिवसपुहुत्तस्स उक्को-
 सेणवि दिवसपुहुत्तस्स, सेसं तहेव । वेमाणियाणं ठिई भाणियव्वा ओहिया,
 ऊसासो जहण्णेणं मुहुत्तपुहुत्तस्स उक्कोसेणं तेत्तीसाए पक्खाणं, आहारो आभोग-
 णिव्वत्तिओ जहण्णेणं दिवसपुहुत्तस्स उक्कोसेणं तेत्तीसाए वाससहस्साणं, सेसं
 चलियाइयं तहेव जाव णिज्जरेति ॥१५॥ जीवा णं भन्ते ! किं आयारंभा
 परारंभा तदुभयारंभा अणारंभा ? गोयमा ! अत्थेगइया जीवा आयारंभावि
 परारंभावि तदुभयारंभावि णो अणारंभा । अत्थेगइया जीवा णो आयारंभा
 णो परारंभा णो तदुभयारंभा अणारंभा । से केणदुठ्ठेणं भन्ते ! एवं वुच्चइ-अत्थे-
 गइया जीवा आयारंभावि ? एवं पडिउच्चारेयव्वं । गोयमा ! जीवा दुविहा पण्णत्ता
 तंजहा—संसारसभावण्णगा य असंसारसभावण्णगा य, तत्थ णं जे ते असंसार-
 सभावण्णगा ते णं सिद्धा । सिद्धा णं णो आयारंभा जाव अणारंभा । तत्थ णं
 जे ते संसारसभावण्णगा ते दुविहा पण्णत्ता, तंजहा—संजया य असंजया य । तत्थ
 णं जे ते संजया ते दुविहा पण्णत्ता, तंजहा—पमत्तसंजया य अप्पमत्तसंजया य ।
 तत्थ णं जे ते अप्पमत्तसंजया ते णं णो आयारंभा णो परारंभा जाव अणारंभा ।
 तत्थ णं जे ते पमत्तसंजया ते सुहं जोगं पडुच्च णो आयारंभा णो परारंभा जाव
 अणारंभा, असुभं जोगं पडुच्च आयारंभावि जाव णो अणारंभा । तत्थ णं जे ते

असंजया ते अविरइं पडुच्च आयारंभावि जाव णो अणारंभा । से तेणट्ठेणं
 गोयमा ! एवं वुच्चइ-अत्थेगइया जीवा जाव अणारंभा । णेरइयाणं भंते !
 किं आयारंभा परारंभा तवुभयारंभा अणारंभा ? गोयमा ! णेरइया आया-
 रंभावि जाव णो अणारंभा । से केणट्ठेणं भंते एवं वुच्चइ ? गोयमा ! अवि-
 रइं पडुच्च, से तेणट्ठेणं जाव णो अणारंभा । एवं जाव असुरकुमाराणवि जाथ
 पंचिदियतिरिक्खजोणिया, मणुस्सा जहा जीवा, णवरं सिद्धविरहिया भाणियव्वा ।
 वाणमंतरा जाव वेमाणिया जहा णेरइया । सलेस्सा जहा ओहिया, कण्हलेसस्स
 णीललेसस्स काउलेसस्स जहा ओहिया जीवा, णवरं पमत्तअप्यभत्ता ण भाणियव्वा,
 तेउलेसस्स पम्हलेसस्स सुक्कलेसस्स जहा ओहिया जीवा, णवरं सिद्धा ण
 भाणियव्वा ॥ १६ ॥ इहभविए भंते ! णाणे परभविए णाणे तदुभयभविए
 णाणे ? गोयमा ! इहभविएवि णाणे परभविएवि णाणे तदुभयभविएवि
 णाणे । दंसणपि एवमेव । इहभविए भंते ! चरित्ते परभविए चरित्ते
 तदुभयभविए चरित्ते ? गोयमा ! इहभविए चरित्ते णो परभविए चरित्ते णो
 तदुभयभविए चरित्ते । एवं तवे संजमे ॥ १७ ॥ असंबुडे णं भंते ! अणगारे किं
 सिज्झइ बुज्झइ मुच्चइ परिणिव्वाइ सव्वदुक्खाणमंतं करेइ ? गोयमा ! णो इणट्ठे
 समट्ठे । से केणट्ठेणं जाव णो अंतं करेइ ? गोयमा ! असंबुडे अणगारे
 आउयवज्जाओ सत्तं कम्मपयडीओ सिद्धिलबंधणबद्धाओ धणियबंधणबद्धाओ
 पकरेइ हस्सकालठिइयाओ दीहकालट्ठिइयाओ पकरेइ मंदाणुभावाओ तिग्वाणु-
 भावाओ पकरेइ अप्पएसग्गाओ बहुप्पएसग्गाओ पकरेइ आउयं च णं कम्मं
 सिय बंधइ सिय णो बंधइ अस्सायावेयणिज्जं च णं कम्मं भुज्जो-भुज्जो उवच्चि-
 णाइ अणाइयं च णं अणवदगं दीहमद्धं चाउरंतसंसारकंतारं अणुपरियट्ठइ, से
 एएणट्ठेणं गोयमा ! असंबुडे अणगारे णो सिज्झइ ५ । संबुडे णं भंते ! अण-
 गारे सिज्झइ ५ ? हंता सिज्झइ जाव अंतं करेइ । से केणट्ठेणं ? गोयमा !
 संबुडे अणगारे आउयवज्जाओ सत्तं कम्मपयडीओ धणियबंधणबद्धाओ सिद्धिल-
 बंधणबद्धाओ पकरेइ दीहकालठिइयाओ हस्सकालट्ठिइयाओ पकरेइ तिग्वाणु-
 भावाओ मंदाणुभावाओ पकरेइ बहुप्पएसग्गाओ अप्पएसग्गाओ पकरेइ, आउयं
 च णं कम्मं ण बंधइ, अस्सायावेयणिज्जं च णं कम्मं णो भुज्जो-भुज्जो
 उवच्चिणाइ, अणाइयं च णं अणवदगं दीहमद्धं चाउरंतसंसारकंतारं वीइ-

वयइ, से एणट्ठेणं गोयमा ! एवं वुच्चइ-संबुडे अणगारे सिञ्जइ जाव अंतं करेइ ॥ १८ ॥ जीवे णं भंते ! अस्संजए अविरए अप्पडिहयपच्चक्खायंपाव-कम्मे इओ च्चुए पेच्चा देवे सिया ? गोयमा ! अत्थेगइए देवे सिया अत्थे-गइए णो देवे सिया । से केणट्ठेणं जाव इओ च्चुए पेच्चा अत्थेगइए देवे सिया अत्थेगइए णो देवे सिया ? गोयमा ! जे इमे जीवा गामागरणगरणिगमराय-हाणिखेडकब्बडमडंबदोणमुहपट्टणासमसण्णिवेसेमु अकामत्तहाए अकामच्छुहाए अकामबंभचेरवासेणं अकामसीतातवदंसभसगअण्हाणगमेयजल्लमलपंकपरिदाहेणं अप्पतरं वा भुज्जतरं वा कालं अप्पाणं परिकिलेसंति अप्पाणं परिकिलेसित्ता कालमासे कालं किच्चा अण्णयरेसु वाणमंतरेसु देवलोगेसु देवत्ताए उववत्तारो भवति । केरिसाणं भंते ! तेसिं वाणमंतराणं देवाणं देवलोगा पण्णत्ता ? गोयमा ! से जहाणामए-इहं मणुस्सलोगंमि असोगवणे इ वा सत्तवण्णवणे इ वा चंपयवणे इ वा चूपवणे इ वा तिलगवणे इ वा लाउयवणे इ वा णिगोहवणे इ वा छतोहवणे इ वा असणवणे इ वा सणवणे इ वा अयसिवणे इ वा कुसुंभवणे इ वा सिद्धत्थवणे इ वा बंधुजीवगवणे इ वा, णिच्चं कुसुमिय-माइय-लवइयथवइयगुलइय-गुच्छियजमलिय-जुवलयविणमियपणमियमुविभत्त-पिडिमंजरिवडेंसगधरे सिरीए अईव-अईव उवसोभेमाणे-उवसोभेमाणे चिड्ढइ, एवामेव तेसिं वाणमंतराणं देवाणं देवलोगा जहण्णेणं दसवासहस्ससट्ठिईएहि उवकोसेणं पल्लिओवमट्ठिईएहि बह्महि वाणमंतरेहि देवेहि तद्देवीहि य आइण्णा वित्तिकिण्णा उवत्थडा संथडा फुडा अवगाढगाढसिरीए अईव-अईव उव-सोभेमाणा-उवसोभेमाणा च्चिट्ठंति, एरिसगाणं गोयमा ! तेसिं वाणमंतरा-णं देवाणं देवलोगा प०, से तेणट्ठेणं गोयमा ! एवं वुच्चइ-जीवे णं असंजए जाव देवे सिया । सेवं भंते ! सेवं भंते ! त्ति भगवं गोयमे समणं भगवं महा-वीरं वंदइ णमंसइ वंदइत्ता णमंसइत्ता संजमेणं तवसा अप्पाणं भावेमाणे विहरइ ॥ १९ ॥ पढमे सए पढमो उद्देसो समत्तो ॥

रायगिहे णगरे समोसरणं, परिसा णिगथा जाव एवं वयासी-जीवे णं भंते ! सयंकडं दुक्खं वेएइ ? गोयमा ! अत्थेगइयं वेएइ अत्थेगइयं णो वेएइ । से केणट्ठेणं भंते ! एवं वुच्चइ-अत्थेगइयं वेएइ अत्थेगइयं णो वेएइ ? गोयमा ! अदिण्णं वेएइ अणुदिण्णं णो वेएइ, से तेणट्ठे एवं वुच्चइ-अत्थेगइयं वेएइ

अत्थेगइयं णो वेएइ, एवं चउब्बीसदंडएणं जाव वेमाणिए । जीवा णं भंते !
सयंकडं दुक्खं वेएन्ति ? गोयमा ! अत्थेगइयं वेएन्ति अत्थेगइयं णो वेएन्ति ।
से केणट्ठेणं ? गोयमा ! उडिण्णं वेएन्ति णो अणुविण्णं वेएन्ति, से तेणट्ठेणं,
एवं जाव वेमाणिया । जीवे णं भंते ! सयंकडं आउयं वेएइ ? गोयमा !
अत्थेगइयं वेएइ अत्थेगइयं णो वेएइ जहा दुक्खेणं दो दंडगा तथा आउएणवि
दो दंडगा एगत्तपुहुत्तिया, एगत्तेणं जाव वेमाणिथा पुहुत्तेगवि तहेव ॥ २० ॥
णेरइया णं भंते ! सव्वे समाहारा सव्वे समसरीरा सव्वे समुस्साणीससासा ?
गोयमा ! णो इणट्ठे समट्ठे । से केणट्ठेणं भंते ! एवं बुच्चइ णेरइया णो सव्वे
समाहारा णो सव्वे समसरीरा णो सव्वे समुस्सासणिस्सासा ? गोयमा ! णेर-
इया दुविहा प०, तंजहा—महासरीरा य अप्पसरीरा य, तत्थ णं जे ते महासरीरा
ते बहुतराए पोग्गले आहारेंति बहुतराए पोग्गले परिणामेंति बहुतराए पोग्गले
उस्ससंति बहुतराए पोग्गले णीससंति अभिक्खणं आहारेंति अभिक्खणं परिणा-
मेंति अभिक्खणं ऊससंति अभिक्खणं णी०, तत्थ णं जे ते अप्पसरीरा ते णं
अप्पतराए पुग्गले आहारेंति अप्पतराए पुग्गले परिणामेंति अप्पतराए पोग्गले
उस्ससंति अप्पतराए पोग्गले णीससंति आहच्च आहारेंति आहच्च परिणामेंति
आहच्च उस्ससंति आहच्च णीससंति, से तेणट्ठेणं गोयमा ! एवं बुच्चइ—णेर-
इया णो सव्वे समाहारा जाव णो सव्वे समुस्सासणिस्सासा । णेरइया णं
भंते ! सव्वे समकम्मा ? गोयमा ! णो इणट्ठे समट्ठे, से केणट्ठेणं ? गोयमा !
णेरइया दुविहा पणत्ता, तंजहा—पुब्बोववण्णगा य पच्छोववण्णगा य । तत्थ णं
जे ते पुब्बोववण्णगा ते णं अप्पकम्मतरागा । तत्थ णं जे ते पच्छोववण्णगा ते णं
महाकम्मतरागा, से तेणट्ठेणं गोयमा ! ० । णेरइया णं भंते ! सव्वे समवण्णा ?
गोयमा ! णो इणट्ठे समट्ठे, से केणट्ठेणं तहेव ? गोयमा ! जे ते पुब्बोव-
वण्णगा ते णं विसुद्धवण्णतरागा, तत्थ णं जे ते पच्छोववण्णगा ते णं अविमुद्ध-
वण्णतरागा तहेव से तेणट्ठेणं एवं ० । णेरइया णं भंते ! सव्वे समलेस्सा ?
गोयमा ! णो इणट्ठे समट्ठे, से केणट्ठेणं, जाव णो सव्वे समलेस्सा ? गोयमा !
णेरइया दुविहा प०, तंजहा—पुब्बोववण्णगा य पच्छोववण्णगा य । तत्थ णं जे
पुब्बोववण्णगा ते णं विसुद्धलेस्सतरागा, तत्थ णं जे ते पच्छोववण्णगा ते णं
अविमुद्धलेस्सतरागा, से तेणट्ठेणं । णेरइया ० णं भंते ! सव्वे समवेयणा ? गोयमा !

णो इणट्ठे समट्ठे । से केणट्ठेणं ? गोयमा ! णेरइया दुविहा पण्णत्ता, तंजहा-सण्णिभूया य असण्णिभूया य । तत्थ णं जे ते सण्णिभूया ते णं महावेयया, तत्थ णं जे ते असण्णिभूया ते णं अप्पवेयणतरागा, से तेणट्ठेणं गोयमा ! ० । णेरइया णं भंते ! सव्वे समकिरिया ? गोयमा ! णो इणट्ठे समट्ठे । से केणट्ठेणं ? गोयमा ! णेरइया तिविहा प०, तंजहा-सम्मदिट्ठी मिच्छादिट्ठी सम्मामिच्छादिट्ठी । तत्थ णं जे ते सम्मदिट्ठी तेसि णं चत्तारि किरियाओ पण्णत्ताओ, तंजहा-आरंभिया १ परि० २ माया० ३ अप्पच्च० ४, तत्थ णं जे ते मिच्छादिट्ठी तेसि णं पंच किरियाओ कज्जंति तं०-आरंभिया जाव मिच्छादंसणवत्तिया, एवं सम्मामिच्छादिट्ठीणपि, से तेणट्ठेणं गोयमा ! ० । णेरइया णं भंते ! सव्वे समाउया सव्वे समोववण्णगा ? गोयमा ! णो इणट्ठे समट्ठे । से केणट्ठेणं ? गोयमा ! णेरइया चउच्चिहा प०, तंजहा-अत्थेगइया समाउया समोववण्णगा १ अत्थेगइया समाउया विसमोववण्णगा २ अत्थेगइया विसमाउया समोववण्णगा ३ अत्थेगइया विसमाउया विसमोववण्णगा ४ से तेणट्ठेणं गोयमा ! ० । असुरकुमारा णं भंते ! सव्वे समाहारा सव्वे समसरीरा ? जहा णेरइया तहा भाणियच्चा, णवरं कम्मवण्णलेस्साओ परिवण्णेयच्चाओ, पुव्वोववण्णगा महाकम्मतरागा अविमुद्धवण्णतरागा अविमुद्धलेसतरागा, पच्छोववण्णगा पसत्था, सेसं तहेव, एवं जाव थणियकुमाराणं । पुढविककाइयाणं आहारकम्मवण्णलेस्सा जहा णेरइयाणं । पुढविककाइया णं भंते ! सव्वे समवेयणा ? हुंता समवेयणा, से केणट्ठेणं भंते ! समवेयणा ? गोयमा ! पुढवोकाइया सव्वे असण्णी असण्णिभूया अणिदाए वेयणं वेदंति से तेणट्ठेणं । पुढविककाइया णं भंते ! सव्वे समकिरिया ? हुंता समकिरिया । से केणट्ठेणं ? गोयमा ! पुढविककाइया सव्वे माई-मिच्छादिट्ठी ताणं णियइयाओ पंच किरियाओ कज्जंति, तंजहा-आरंभिया जाव मिच्छादंसणवत्तिया, से तेणट्ठेणं समाउया समोववण्णगा, जहा णेरइया तहा भाणियच्चा, जहा पुढविककाइया तहा जाव चउररिदिया । पंचिदियतिरिक्खजोणिया जहा णेरइया णाणत्तं किरियासु, पंचिदियतिरिक्खजोणिया णं भंते ! सव्वे समकिरिया ? गो०, णो ति० । से केणट्ठेणं ? गो० पंचिदियतिरिक्खजोणिया तिविहा प०, तंजहा-सम्मदिट्ठी मिच्छादिट्ठी सम्मामिच्छादिट्ठी । तत्थ णं जे ते सम्मदिट्ठी ते दुविहा प०, तंजहा-अस्संजया य संजया-

संजया य, तत्थ णं जे ते संजयासंजया तेसिणं तिण्णि किरियाओ कज्जंति, तंजहा—आरंभिया परिग्गहिया मायावत्तिया, असंजयाणं चत्तारि, मिच्छादिट्ठीणं पंच, सम्मामिच्छादिट्ठीणं पंच । मणुस्सा जहा णेरइया णाणत्तं जे महासरीरा ते बहुतराए पोग्गले आहारेंति आहुच्च आहारेंति । जे अप्पसरीरा ते अप्पतराए पोग्गले आहारेंति अभिक्खणं आहारेंति सेसं जहा णेरइयाणं जाव वेयणा । मणुस्सा णं भंते ! सव्वे समकिरिया ? गोयसा ! णो इणट्ठे समट्ठे । से केणट्ठेणं ? गोयसा ! मणुस्सा ति विहा प० तंजहा—सम्मदिट्ठी मिच्छादिट्ठी सम्मामिच्छादिट्ठी । तत्थ णं जे ते सम्मदिट्ठी ते ति विहा प०, तंजहा—संजया अस्संजया संजयासंजया य । तत्थ णं जे ते संजया ते दुविहा प०, तंजहा—सरागसंजया य वीयरगसंजया य । तत्थ णं जे ते वीयरगसंजया ते णं अकिरिया । तत्थ णं जे ते सरागसंजया ते दुविहा पणत्ता तंजहा—पमत्तसंजया य अपमत्तसंजया य । तत्थ णं जे ते अप्पमत्तसंजया तेसिणं एग मायावत्तिया किरिया कज्जइ, तत्थ णं जे ते पमत्तसंजया तेसिणं दो किरियाओ कज्जंति, तं०—आरंभिया य मायावत्तिया य । तत्थ णं जे ते संजयासंजया तेसि णं आइल्लाओ तिण्णि किरियाओ कज्जंति, तंजहा—आरंभिया १ परिग्गहिया २ मायावत्तिया ३ । अस्संजयाणं चत्तारि किरियाओ कज्जंति—आरं० १ परि० २ मायावत्तिया ३ अप्पच्च० ४ । मिच्छादिट्ठी णं पंच—आरंभि० १ परि० २ माया० ३ अप्पच्च० ४ मिच्छादंसण० ५ । सम्मामिच्छादिट्ठीणं पंच ५ । वाणमंतरजोइसवेमाणिया जहा असुरकुमारा णवरं वेयणाए णाणत्तं—मायिमिच्छादिट्ठीउववण्णगा य अप्पवेयणतरा अमायिसम्मदिट्ठीउववण्णगा य महावेयणतरागा भाणियव्वा, जोइसवेमाणिया । सलेस्सा णं भंते ! णेरइया सव्वे सभाहारगा ? ओहिया णं सलेस्साणं सुक्कलेस्साणं, एएसि णं तिण्हं एक्को गमो, कण्हलेस्साणं णीललेस्साणंपि एक्को गमो णवरं वेयणाए मायिमिच्छादिट्ठीउववण्णगा य अमायिसम्मदिट्ठीउवव० भाणियव्वा । मणुस्सा किरियासु सरागवीयरगपमत्तापमत्ता ण भाणियव्वा । काउलेसाएवि एसेव गमो, णवरं णेरइए जहा ओहिए दंडए तथा भाणियव्वा, तेउलेस्सा पम्हलेस्सा जत्स अत्थि महा ओहिओ दंडओ तथा भाणियव्वा णवरं मणुस्सा सरागा वीयरगा य ण भाणियव्वा । गाहा—दुक्खाउए उदिण्णे आहारे कम्मवण्णलेस्सा य । समवेयण-

समकिरिया समाउए चेव बोद्धव्वा ॥ १ ॥ २१ ॥ कह णं भंते ! लेस्साओ पण्णत्ताओ ? गोयमा ! छल्लेसाओ पण्णत्ता, तंजहा—लेसाणं बीयओ उद्देसओ भाणियव्वो जाव इड्ढी ॥ २२ ॥ जीवस्स णं भंते ! तीतद्धाए आदिट्टस्स कइविहे संसारसंचिट्ठणकाले प० ? गोयमा ! चउड्विहे संसारसंचिट्ठणकाले प० तंजहा—णेरइयसंसारसंचिट्ठणकाले तिरिक्ख० मणुस्स० देवसंसारसंचिट्ठणकाले य पण्णत्ते । णेरइयसंचिट्ठणकाले णं भंते ! कइविहे पण्णत्ते ? गोयमा ! तिविहे पण्णत्ते, तंजहा—सुण्णकाले असुण्णकाले मिस्सकाले । तिरिक्खजोणियसंसार पुच्छा ? गोयमा ! दुविहे पण्णत्ते, तंजहा—असुण्णकाले य मिस्सकाले य । मणुस्साण य देवाण य जहा णेरइया णं । एयस्स णं भंते ! णेरइयसंसारसंचिट्ठणकालस्स सुण्णकालस्स असुण्णकालस्स मोसकालस्स य कयरे-कयरेहितो अप्पा वा बहुए वा तुल्ले वा विसेसाहिए वा ? गोयमा ! सब्ब० असुण्णकाले मिस्सकाले अणंतगुणे सुण्णकाले अणंतगुणे । तिरि० जो० भंते ! सब्ब० असुण्णकाले मिस्सकाले अणंतगुणे । मणुस्सदेवाण य जहा णेरइयाणं । एयस्स णं भंते ! णेरइयस्स संसारसंचिट्ठणकालस्स जाव देवसंसारसंचिट्ठण जाव विसेसाहिए वा ? गोयमा ! सब्बत्थोवे मणुस्ससंसारसंचिट्ठणकाले, णेरइयसंसारसंचिट्ठणकाले असंखेज्जगुणे, देयसंसारसंचिट्ठणकाले असंखेज्जगुणे, तिरिक्खजोणिए अणंतगुणे ॥ २३ ॥ जीवे णं भंते ! अंतकिरियं करेज्जा ? गोयमा ! अत्थेगइया करेज्जा अत्थेगइया णो करेज्जा, अंतकिरियापयं णेयव्वं ॥ २४ ॥ अहं भंते ! असंजय-भवियदव्वदेवाणं १ अविराहियसंजमाणं २ विराहियसं० ३ अविराहियसंजमासंज० ४ विराहियसंजमासं० ५ असण्णीणं ६ तावसाणं ७ कंदपियमाणं ८ चरगपरिक्खायमाणं ९ किब्बिसियाणं १० तेरिच्छियाणं ११ आजीवियाणं १२ आभिओगियाणं १३ सल्लिगीणं दंसणवावण्णगाणं १४ एएसि णं देवलोगेषु उववज्जमाणानं कस्स काहं उववाए पण्णत्ते ? गोयमा ! अस्संजयभवियदव्वदेवाणं जहण्णेणं भवणवासीसु उक्कोसेणं उवरिमगेविज्जएसु १, अविराहियसंजमाणं जहण्णेणं सोहम्मे कप्पे उक्कोसेणं सव्वट्ठसिद्धे विमाणे २, विराहियसंजमाणं जहण्णेणं भवणवासीसु उक्कोसेणं सोहम्मे कप्पे ३, अविराहियसंजमासंजमाणं जह० सोहम्मे कप्पे उक्कोसेणं अच्चुए कप्पे ४, विराहियसंजमासं० जहण्णेणं भवणवासीसु उक्कोसेणं जोइसिएसु ५, असण्णीणं जहण्णेणं भवणवासीसु उक्को-

सेणं वाणमंतरसु ६, अबसेसा सव्वे जहं भवणवा० उक्कोसगं वोच्छामि-
 तावसाणं जौडिसिएसु, कंदप्पियाणं सोहम्मै कप्पे, चरगपरिव्वायगाणं बंभलोए
 कप्पे, किब्बिसियाणं लंतगे कप्पे, तेरिच्छायाणं सहस्सारे कप्पे, आजौवियाणं
 अच्चुए कप्पे, आभिओगियाणं अच्चुए कप्पे, सल्लिगीणं दंसणवावण्णगाणं उवरिम-
 गेवेज्जएसु १४ ॥ २५ ॥ कइविहे णं भंते ! असण्णिआउए पण्णत्ते ? गोयमा !
 चउव्विहे असण्णिआउए पण्णत्ते, तंजहा—णेरइयअसण्णिआउए तिरिक्ख०
 मणुस्स० देव० । असण्णी णं भंते ! जीवे किं णेरइयाउयं पकरेइ तिरि० मणु०
 देवाउयं पकरेइ ? हंता गोयमा ! णेरइयाउयं पकरेइ तिरि० मणु० देवा-
 उयं पकरेइ । णेरइयाउयं पकरेमाणे जहण्णेणं दसवाससहस्साइं उक्कोसेणं
 पलिओवमस्स असंखेज्जइभागं पकरेइ, तिरिक्खजोणियाउयं पकरेमाणे जहण्णेणं
 अंतोमहुत्तं उक्कोसेणं पलिओवमस्स असंखेज्जइभागं पकरेइ, मणुस्साउएवि एवं
 चेव, देवाउयं जहा णेरइया । एयस्स णं भंते ! णेरइयअसण्णिआउयस्स तिरि०
 मणु० देवअसण्णिआउयस्स कयरे कयरे जाव विसेसाहिए वा ? गोयमा !
 सव्वथोवे देवअसण्णिआउए, मणुस्स० असंखेज्जगुणे, तिरिय० असंखेज्जगुणे,
 णेरइय० असंखेज्जगुणे । सेवं भंते ! सेवं भंते ! त्ति ॥ २६ ॥

पढमं सयं तइओ उद्देसो

जीवाणं भंते ! कंखामोहणिज्जे कम्मं कडे ? हंता कडे । से भंते ! किं
 देसेणं देसे कडे ? १ देसेणं सव्वे कडे ? २ सव्वेणं देसे कडे ? ३ सव्वेणं सव्वे
 कडे ? ४ गोयमा ! णो देसेणं देसे कडे १ णो देसेणं सव्वे कडे २ णो सव्वेणं देसे
 कडे ३ सव्वेणं सव्वे कडे ४ । णेरइया णं भंते ! कंखामोहणिज्जे कम्मं कडे ?
 हंता कडे जाव सव्वेणं सव्वे कडे ४ । एवं जाव वेमाणियाणं दंडओ भाणि-
 यव्वो ॥ २७ ॥ जीवा णं भंते ! कंखामोहणिज्जं कम्मं करिंसु ? हंता करिंसु ।
 तं भंते ! किं देसेणं देसं करिंसु ? एएणं अभिलावेणं दंडओ भाणियव्वो जाव
 वेमाणियाणं । एवं करेति, एत्थवि दंडओ जाव वेमाणियाणं, एवं करेस्संति,
 एत्थवि दंडओ जाव वेमाणियाणं । एवं चिए चिणंसु चिणंति चिणिस्संति,
 उवचिए उवचिणंसु उवचिणंति उवचिणिस्संति, उदीरेंसु उदीरेंति उदीरिस्संति,
 वेदिंसु वेदेंति वेदिस्संति, णिज्जरेंसु णिज्जरेंति णिज्जरिस्संति । गाहा—कउचिया
 उवचिया उदीरिय. वेदिया य णिज्जिण्णा । आदिइए चउभेदा तियभेदा

तिणि ॥ १ ॥ २८ ॥ जीवा णं भंते ! कंखामोहणिज्जं कम्मं वेदंति ? हंता वेदंति । कहणं भंते ! जीवा कंखामोहणिज्जं कम्मं वेदंति ? गोयमा ! तेहिं सेहिं कारणेहिं संकिया कंखिया वित्तिगिच्छिया भेदसभावण्णा कलुससमावण्णा, एवं खलु जीवा कंखामोहणिज्जं कम्मं वेदंति ॥ २९ ॥ से णूणं भंते ! तमेव सच्चं णीसकं जं जिणेहिं पवेइयं ? हंता गोयमा ! तमेव सच्चं णीसकं जं जिणेहिं पवेइयं ॥ ३० ॥ से णूणं भंते ! एवं मणं धारेमाणे एवं पकरमाणे एवं चिट्ठेमाणे एवं संवरमाणे आणाए आराहए भवइ ? हंता गोयमा ! एवं मणं धारेमाणे जाव भवइ ॥ ३१ ॥ से णूणं भंते ! अत्थित्तं अत्थित्ते परिणमइ णत्थित्तं णत्थित्ते परिणमइ ? हंता गोयमा ! जाव परिणमइ । जण्णं भंते ! अत्थित्तं अत्थित्ते परिणमइ णत्थित्तं णत्थित्ते परिणमइ, तं किं पयो-गसा बीससा ? गोयमा ! पयोगसावि तं बीससावि तं । जहा ते भंते ! अत्थित्तं अत्थित्ते परिणमइ तथा ते णत्थित्तं णत्थित्ते परिणमइ ? जहा ते णत्थित्तं णत्थित्ते परिणमइ तथा ते अत्थित्तं अत्थित्ते परिणमइ ? हंता गोयमा ! जहा मे अत्थित्तं अत्थित्ते परिणमइ तथा मे णत्थित्तं णत्थित्ते परिणमइ, जहा मे णत्थित्तं णत्थित्ते परिणमइ तथा मे अत्थित्तं अत्थित्ते परिणमइ । से णूणं भंते ! अत्थित्तं अत्थित्ते गमणिज्जं ? जहा परिणमइ दो आलावगा तथा ते इह गमणिज्जेणवि दो आलावगा भाणियव्वा जाव जहा मे अत्थित्तं अत्थित्ते गमणिज्जं ॥ ३२ ॥ जहा ते भंते ! एत्थं गमणिज्जं तथा ते इहं गमणिज्जं जहा ते इहं गमणिज्जं तथा ते एत्थं गमणिज्जं ? हंता ! गोयमा ! जहा मे एत्थं गमणिज्जं जाव तथा मे एत्थं (इहं) गमणिज्जं ॥ ३३ ॥ जीवाणं भंते ! कंखामोहणिज्जं कम्मं बंधंति ? हंता ! बंधंति । कहं णं भंते ! जीवा कंखामोहणिज्जं कम्मं बंधंति ? गोयमा ! पमादपच्चया जोगणित्तं च । से णं भंते ! पमाए किपवहे ? गोयमा ! जोगप्पवहे । से णं भंते ! जोए किपवहे ? गोयमा ! वीरियप्पवहे । से णं भंते वीरिए किपवहे ? गोयमा ! सरीरप्पवहे । से णं भंते ! सरीरे किपवहे ? गोयमा ! जीवप्पवहे । एवं सति अत्थि उट्ठाणे इ वा कम्मे इ वा बले इ वा वीरिए इ वा पुरिसक्कारपरक्कमे इ वा ॥ ३४ ॥ से णूणं भंते ! अप्पणा चेव उदीरेइ अप्पणा चेव गरहइ अप्पणां चेव संवरइ ? हंता ! गोयमा ! अप्पणा चेव तं चेव उच्चारयेव्वं ३ । जं तं भंते ! अप्पणा

चेव उदीरेइ अप्पणा चेव गरहइ अप्पणा चेव संवरइ तं कि उदिण्णं उदीरेइ १
 अणुदिण्णं उदीरेइ २ अणुदिण्णं उदीरणाभवियं कम्मं उदीरेइ ३ उदयाणंतर-
 पच्छाकडं कम्मं उदीरेइ ४ ? गोयमा ! णो उदिण्णं उदीरेइ १ णो अणुदिण्णं
 उदीरेइ २ अणुदिण्णं उदीरणाभवियं कम्मं उदीरेइ ३ णो उदयाणंतरपच्छाकडं
 कम्मं उदीरेइ ४ । जं तं भंते ! अणुदिण्णं उदीरणाभवियं कम्मं उदीरेइ तं
 कि उट्टाणेणं कम्मेणं बलेणं वीरिएणं पुरिसक्कारपरक्कमेणं अणुदिण्णं उदीरणा-
 भवियं क० उदी० ? उवाहु तं अणुट्टाणेणं अकम्मेणं अबलेणं अवीरिएणं
 अपुरिसक्कारपरक्कमेणं अणुदिण्णं उदीरणाभवियं कम्मं उदी० ? गोयमा !
 तं० उट्टाणेणवि कम्मे० बले० वीरिए० पुरिसक्कारपरक्कमेणवि अणुदिण्णं
 उदीरणाभवियं कम्मं उदीरेइ, णो तं अणुट्टाणेणं अकम्मेणं अबलेणं अवीरिएणं
 अपुरिसक्कार० अणुदिण्णं उदी० भ० क० उदी० । एवं सति अत्थि उट्टाणे इ
 वा कम्मे इ वा बले इ वा वीरिए इ वा पुरिसक्कारपरक्कमे इ वा । से णूणं
 भंते ! अप्पणा चेव उवसामेइ अप्पणा चेव गरहइ अप्पणा चेव संवरइ ? हंता
 गोयमा ! एत्थ वि तहेव भाणियच्चं, णवरं अणुदिण्णं उवसामेइ सेसा पडि-
 सेहेयच्चा तिण्णि । जं तं भंते ! अणुदिण्णं उवसामेइ तं कि उट्टाणेणं जाव पुरि-
 सक्कारपरक्कमेइ वा, से णूणं भंते ! अप्पणा चेव वेएइ अप्पणा चेव गरहइ ?
 एत्थवि सच्चेव परिवाडी, णवरं उदिण्णं वेएइ णो अणुदिण्णं वेएइ, एवं जाव
 पुरिसक्कारपरक्कमे इ वा । से णूणं भंते ! अप्पणा चेव णिज्जरेइ अप्पणा
 चेव गरहइ, एत्थवि सच्चेव परिवाडी णवरं उदयाणंतरपच्छाकडं कम्मं णिज्ज-
 रेइ एवं जाव परक्कमेइ वा ॥ ३५ ॥ णेरइयाणं भंते ! कंखामोहणिज्जं
 कम्मं वेएंति ? जहा ओहिया जीवा तहा णेरइया, जाव थणियकुमारा । पुढ-
 विक्काइयाणं भंते ! कंखामोहणिज्जं कम्मं वेइंति ? हंता वेइंति । कहण्णं भंते !
 पुढविक्का० कंखामोहणिज्जं कम्मं वेइंति ? गोयमा ! तेसिणं जीवाणं णो एवं
 तक्का इ वा सण्णा इ वा पण्णा इ वा मणे इ वा वई ति वा—अम्हे णं कंखा-
 मोहणिज्जं कम्मं वेएमो, वेएंति पुण ते । से णूणं भंते ! तमेव सच्चं णीसंकं
 जं जिणेहिं पवेइयं ? सेसं तं चेव, जाव पुरिसक्कारपरक्कमेइ वा । एवं जाव
 चउरिवियाणं पंचिदियतिरिक्खजोणिया जाव वेमाणिया जहा ओहिया जीवा
 ॥ ३६ ॥ अत्थि णं भंते ! समणावि णिग्गंथा कंखामोहणिज्जं कम्मं वेएंति ?

हंता अत्थि । कहण्णं भंते ! समणा-णिग्गंथा कंखामोहणिज्जं कम्मं वेएति ? गोयमा ! तेहिंशणाणंतरेहिं बंसणंतरेहिं चरित्तंतरेहिं लिंगंतरेहिं पवयणंतरेहिं पावयणंतरेहिं कपंतरेहिं मग्गंतरेहिं मयंतरेहिं भंगंतरेहिं णयंतरेहिं णियमंतरेहिं पमाणंतरेहिं संकिया कंखिया वित्तिगिच्छिया भेयसमावण्णा कलुससमावण्णा, एवं खलु समणा-णिग्गंथा कंखामोहणिज्जं कम्मं वेइति । से णूणं भंते ! तमेव सच्चं णीसकं जं जिणेहिं पवेइयं ? हंता गोयमा ! तमेव सच्चं णीसकं, एवं जाव पुरिसवकारपरवकमेइ वा सेवं भंते ! सेवं भंते ! ॥३७॥

पढमं सयं चउत्थो उट्ठेसो

कइ णं भंते ! कम्मप्पयडीओ पणत्ताओ ? गोयमा ! अट्ट कम्मप्पयडीओ पणत्ताओ, कम्मपयडीए पढमो उट्ठेसो णेयव्वो जाव अणुभागो सम्मत्तो । गाहा-कइ पयडी कह बंधइ कइहिं व ठाणेहिं बंधइ पयडी ? कइ वेएइ य पयडी अणुभागो कइविहो कस्स ? ॥१॥३८॥ जीवे णं भंते ! मोहणिज्जेणं कडेणं कम्मेणं उदिण्णेणं उवट्टाएज्जा ? हंता उवट्टाएज्जा । से भंते ! किं वीरियत्ताए उवट्टाएज्जा अवीरियत्ताए उवट्टाएज्जा ? गोयमा ! वीरियत्ताए उवट्टाएज्जा णो अवीरियत्ताए उवट्टाएज्जा । जइ वीरियत्ताए उवट्टाएज्जा किं बालवीरियत्ताए उवट्टाएज्जा पंडियवीरियत्ताए उवट्टाएज्जा बालपंडियवीरियत्ताए उवट्टाएज्जा ? गोयमा ! बालवीरियत्ताए उवट्टाएज्जा णो पंडियवीरियत्ताए उवट्टाएज्जा णो बालपंडियवीरियत्ताए उवट्टाएज्जा । जीवे णं भंते ! मोहणिज्जेणं कडेणं कम्मेणं उदिण्णेणं अवक्कमेज्जा ? हंता अवक्कमेज्जा, से भंते ! जाव बालपंडियवीरियत्ताए अवक्कमेज्जा ? गोयमा ! बालवीरियत्ताए अवक्कमेज्जा णो पंडियवीरियत्ताए अवक्कमेज्जा सिय बालपंडियवीरियत्ताए अवक्कमेज्जा । जहा उदिण्णेणं दो आलावगा तथा उवसंतेणवि दो आलावगा भाणियव्वा, णवरं उवट्टाएज्जा पंडियवीरियत्ताए अवक्कमेज्जा बालपंडियवीरियत्ताए । से भंते ! किं आयाए अवक्कमइ ? अणायाए अवक्कमइ ? गोयमा ! आयाए अवक्कमइ णो अणायाए अवक्कमइ, मोहणिज्जं कम्मं वेएमाणे । से कहमेयं भंते ! एवं ? गोयमा ! पुंवि से एयं एवं रोयइ इयाणि से एयं एवं णो रोयइ एयं एवं खलु एवं ॥३९॥ से णूणं भंते ! जेरइयस्स वा तिरिक्खजोणियस्स वा मणूसस्स वा देवस्स वा जे कडे पावे कम्मे णत्थि

तस्स अवेइत्ता मोक्खो ? हुंता गोयमा ! गेरइयस्स वा त्तिरिक्ख० मणु० देव-
 स्स वा जे कडे पावे कम्मे णत्थि तस्स अवेइत्ता मोक्खो । से केणट्ठेण भंते !
 एवं वुच्चइ-गेरइयस्स वा जाव मोक्खो ? एवं खलु मए गोयमा ! बुविहे कम्मे
 पण्णत्ते, तंजहा-पएसकम्मे थ अणुभागकम्मे थ । तत्थ णं जं तं पएसकम्मं तं
 णियमा वेएइ । तत्थ णं जं तं अणुभागकम्मं तं अत्थेगइयं वेएइ अत्थेगइयं णो
 वेएइ । णायमेयं अरहया सुयमेयं अरहया विण्णायमेयं अरहया इमं कम्मं अयं
 जीवे अब्भोवगमियाए वेयणाए वेदिस्सइ इमं कम्मं अयं जीवे उवक्कमियाए
 वेयणाए वेदिस्सइ, अहाकम्मं अहाणिकरणं जहा जहा तं भगवया विट्ठं तथा
 तथा तं विप्परिणमिस्सतीति । से तेणट्ठेणं गोयमा ! गेरइयस्स वा ४ जाव
 मोक्खो ॥ ४० ॥ एस णं भंते ! पोग्गले अतीतमणंतं सासयं समयं भुवीति
 वत्तब्बं सिया ? हुंता गोयमा ! एस णं पोग्गले अतीतमणंतं सासयं समयं
 भुवीति वत्तब्बं सिया । एस णं भंते ! पोग्गले पडुप्पण्णसासयं समयं भवतीति
 वत्तब्बं सिया ? हुंता गोयमा ! तं चेव उच्चारयेयब्बं । एस णं भंते ! पोग्गले
 अणागयमणंतं सासयं समयं भविस्सई वत्तब्बं सिया ? हुंता गोयमा ! तं
 चेव उच्चारयेयब्बं । एवं खंघेणवि तिण्णि आलावगा, एवं जीवेणवि तिण्णि
 आलावगा भाणियब्बा ॥ ४१ ॥ छउमत्थे णं भंते ! मणुसे अतीतमणंतं सासयं
 समयं भुवीति केवलेणं संजमेणं केवलेणं संवरेणं केवलेणं बंभचेरयासेणं केव-
 ताहिं पवयणमाईहिं सिज्झसु बुज्झसु जाव सब्बदुक्खाणमंतं करिंसे ? गोयमा !
 णो इणट्ठे समट्ठे । से केणट्ठेणं भंते ! एवं वुच्चइ तं चेव जाव अंतं करिंसे ?
 गोयमा ! जे केइ अंतकरा वा अंतिमसरीरिया वा सब्बदुक्खाणमंतं करिंसे वा
 करिंति वा करिस्संति वा सब्बे ते उप्पण्णणाणवंसणधरा अरहा जिणे केवली
 भवित्ता तओ पच्छा सिज्झंति बुज्झंति मुच्चंति परिणिव्वायंति सब्बदुक्खाण-
 मंतं करिंसे वा करिंति वा करिस्संति वा, से तेणट्ठेणं गोयमा ! जाव सब्ब-
 दुक्खाणमंतं करिंसे, पडुप्पण्णेऽवि एवं चेव णवरं सिज्झंति भाणियब्बं । अणा-
 गाएवि एवं चेव, णवरं सिज्झस्संति भाणियब्बं । जहा छउमत्थो तथा आहो-
 हिओवि तथा परमाहोहिओऽवि तिण्णि तिण्णि आलावगा भाणियब्बा । केवली
 णं भंते ! मणुसे अतीतमणंतं सासयं समयं जाव अंतं करिंसे ? हुंता सिज्झसु
 जाव अंतं करिंसे । एए तिण्णि आलावगा भाणियब्बा छउमत्थस्स जहा णवरं
 सिज्झसु सिज्झंति सिज्झस्संति । से णूणं भंते ! अतीतमणंतं सासयं समयं

पडुधण्णं वा सासयं समयं अणागयमणंतं वा सातयं समयं जे केइ अंतकरा वा अंतिससरीरिया वा सव्वदुबखाणमंतं करेनु वा करेलि वा करिस्संति वा सव्वे ते उप्पण्णणाणदंसणधरे अरहा जिणा केवली भविता ततो पच्छा सिज्जंति जाव अंतं करेस्संति वा ? हंता गोयमा ! अतीतमणंतं सासयं सपयं जाव अंतं करेस्संति वा । ते पूर्णं भंते ! उप्पण्णणाणदंसणधरे अरहा जिणे केवली अलमत्थुत्ति वत्तव्वं सिया ? हंता गोयमा ! उप्पण्णणाणदंसणधरे अरहा जिणे केवली अलमत्थुत्ति वत्तव्वं सिया । सेवं भंते ! सेवं भंते ! ति ॥४२॥

पढमं सयं पंचमो उद्देशो

कइ णं भंते ! पुडवीओ पण्णत्ताओ ? गोयमा ! सत्त पुडवीओ पण्णत्ताओ, तंजहा—रयणप्पभा जाव तमतया । इमीसे णं भंते ! रयणप्पभाए पुढवीए कइ णिरयावाससयसहस्सा प० ? गोयमा ! तीतं णिरयावाससयसहस्सा प० । गाहा—तीसा य पण्णवीसा पण्णरस दसेव या सयसहस्सा । तिण्णेणं पंचूणं पंचेव अणुत्तरा णिरया ॥१॥ केवइया णं भंते ? असुरकुमारावाससयसहस्सा प० ? एवं—चउसट्ठी असुराणं चउरारीई य होइ णागाणं । धावत्तरि भुवण्णाणं वाउकुमाराण छज्जउई ॥१॥ दीवदिसाउद्धीणं विज्जुकुमारिंदयणिवमगीणं । छव्हंपि जुयलयाणं छवत्तरिओ सयसहस्सा ॥२॥ केवइया णं भंते ! पुढविककाइयावाससयसहस्सा प० ? गोयमा ! असंखेज्जा पुढविककाइयावाससयसहस्सा प०, जाव असंखेज्जा जोइसियविमणाणावाससयसहस्सा प० । सोहम्भे णं भंते ! कप्पे केवइया विमणाणावाससयसहस्सा प० ? गोयमा ! बत्तोसं विमणाणावाससयसहस्सा प०, एवं—बत्तोसट्ठावीसा बारस अट्टु चउरो सयसहस्सा । एण्णा चत्तालीसा छच्च सहस्सा सहस्सारे ॥१॥ आणयपाण्यकप्पे चत्तरि सयाऽऽरणध्वुए तिण्णि । सत्त विमाणसयाइं चउसुवि एएसु कप्पेसु ॥२॥ एवकारसुत्तरं हेट्ठिमेसु सत्तुत्तरं सयं च मज्जिमए । सयमेणं उवरिमए पंचेव अणुत्तरविमणा ॥३॥ ४३ ॥ पुढवी ट्ठिइ ओगाहणसरीरसंययणमेव संठाणे । केस्ता दिट्ठी णाणे जोमुक्कओमे य दस ठाणा ॥१॥ इमीसे णं भंते ! रयणप्पभाए पुढवीए तीसाए णिरयावाससयसहस्सेसु एगमेणंति णिरयावाससंति णेरइयाणं केवइया ठिइठाणा प० ? गोयमा ! असंखेज्जा ठिइठाणा

प०, तंजहा—जहणिया ठिई समयाहिया जहणिया ठिई दुसमयाहिया जाव असंखेज्जसमयाहिया जहणिया ठिई तप्पाउग्गुक्कोसिया ठिई । इमीसे णं भंते ! रयणप्पभाए पुढवीए तीसाए णिरयावाससयसहस्सेसु एगमेगंसि णिरयावासंसि जहणियाए ठिईए वट्टमाणा णेरइया कि कोहोवउत्ता माणोवउत्ता मायोवउत्ता लोभोवउत्ता ? गोयमा ! सव्वेवि ताव होज्जा कोहोवउत्ता १, अहवा कोहोवउत्ता य माणोवउत्ते य २, अहवा कोहोवउत्ता य माणोवउत्ता य ३, अहवा कोहोवउत्ता य मायोवउत्ते य ४, अहवा कोहोवउत्ता य मायोवउत्ता य ५, अहवा कोहोवउत्ता य लोभोवउत्ते य ६, अहवा कोहोवउत्ता य लोभोवउत्ता य ७ । अहवा कोहोवउत्ता य माणोवउत्ते य मायोवउत्ते य १ कोहोवउत्ता य माणोवउत्ते य मायोवउत्ता य २, कोहोवउत्ता य माणोवउत्ता य मायोवउत्ते य ३, कोहोवउत्ता य माणोवउत्ता य मायोवउत्ता य ४ एवं कोहमाणलोभेणवि चउ ४, एवं कोहमायालोभेणवि चउ ४ एवं १२, पच्छा माणेण मायाए लोभेण कोहो भइयव्वो, ते कोहं अमुंचता ८, एवं सत्तावीसं भंगा णेयव्वा । इमीसे णं भंते ! रयणप्पभाए पुढवीए तीसाए णिरयावाससयसहस्सेसु एगमेगंसि णिरयावासंसि समयाहियाए जहण्णद्विईए वट्टमाणा णेरइया कि कोहोवउत्ता माणोवउत्ता मायोवउत्ता लोभोवउत्ता ? गोयमा ! कोहोवउत्ते य माणोवउत्ते य मायोवउत्ते य लोभोवउत्ते य, कोहोवउत्ता य माणोवउत्ता य मायोवउत्ता य लोभोवउत्ता य, अहवा कोहोवउत्ते य माणोवउत्ते य अहवा कोहोवउत्ते य माणोवउत्ता य एवं असीइ भंगा णेयव्वा, एवं जाव संखिज्जसमयाहिया ठिई असंखेज्जसमयाहियाए ठिईए तप्पाउग्गुक्कोसियाए ठिईए सत्तावीसं भंगा भाणियव्वा ॥४४॥ इमीसे णं भंते ! रयणप्पभाए पुढवीए तीसाए णिरयावाससयसहस्सेसु एगमेगंसि णिरयावासंसि णेरइयाणं केवइया ओगाहणाठाणा पणत्ता ? गोयमा ! असंखेज्जा ओगाहणाठाणा पणत्ता, तंजहा—जहणिया ओगाहणा, पएसाहिया जहणिया ओगाहणा, दुप्पएसाहिया जहणिया ओगाहणा जाव असंखिज्जपएसाहिया जहणिया ओगाहणा, तप्पाउग्गुक्कोसिया ओगाहणा । इमीसे णं भंते ! रयणप्पभाए पुढवीए तीसाए णिरयावाससयसहस्सेसु एगमेगंसि णिरयावासंसि जहणियाए ओगाहणाए वट्टमाणा णेरइया कि कोहोवउत्ता ? असीइभंगा भाणियव्वा जाव संखिज्जपएसाहिया जहणिया

ओगाहणा, असंख्जेजपएसाहियाए जहणियाए ओगाहणाए वट्टमाणाणं तप्पाउग्गु-
 क्कोसियाए ओगाहणाए वट्टमाणाणं णेरइयाणं दोसुवि सत्तावीसं भंगा । इमीसे
 णं भंते ! रयण० जाव एगमेगंसि णिरयावासंसि णेरइयाणं कइ सरीरया पणत्ता ?
 गोयमा ! तिण्णि सरीरया पणत्ता, तंजहा—वेउव्विए तेयए कम्मए । इमीसे
 णं भंते ! जाव वेउव्वियसरीरे वट्टमाणा णेरइया कि कोहोवउत्ता ? सत्तावीसं
 भंगा भाणियव्वा, एएणं गमएणं तिण्णि सरीर भ्राणियव्वा । इमीसे णं भंते !
 रयणप्पभाए पुढवीए जाव णेरइयाणं सरीरया किं संघयणी पणत्ता ? गोयमा !
 छण्हं संघयणाणं अस्संघयणी, णेवट्ठी णेव छिरा णेव ण्हारुणि जे पोगला
 अणिट्ठा अकंता अपिया असुहा अमणुणां अमणामा, एएसि सरीरसंघायत्ताए
 परिणमंति । इमीसे णं भंते ! जाव छण्हं संघयणाणं असंघयणे वट्टमाणाणं
 णेरइया कि कोहोवउत्ता ? सत्तावीसं भंगा । इमीसे णं भंते ! रयणप्पभा जाव
 सरीरिया किसंठिया पणत्ता ? गोयमा ! दुविहा पणत्ता, तंजहा—भवधार-
 णिज्जा य उत्तरविउव्विया य, तत्थ णं जे ते भवधारणिज्जा ते हुंडसंठिया
 पणत्ता, तत्थ णं जे ते उत्तरवेउव्विया तेवि हुंडसंठिया पणत्ता । इमीसे णं
 जाव हुंडसंठाणे वट्टमाणा णेरइया कि कोहोवउत्ता ? सत्तावीसं भंगा । इमीसे णं
 भंते ! रयणप्पभाए पुढवीए णेरइयाणं कइ लेस्साओ पणत्ता ? गोयमा !
 एगा काउलेस्सा पणत्ता । इमीसे णं भंते ! रयणप्पभाए जाव काउलेस्साए
 वट्टमाणा सत्तावीसं भंगा ॥ ४५ ॥ इमीसे णं जाव कि सम्मदिट्ठी मिच्छा-
 दिट्ठी सम्मामिच्छादिट्ठी ? तिण्णिवि । इमीसे णं जाव सम्महंसणे वट्टमाणा
 णेरइया सत्तावीसं भंगा, एवं मिच्छावंसणेवि । सम्मामिच्छावंसणे असीइ भंगा ।
 इमीसे णं भंते ! जाव कि णाणी अण्णाणी ? गोयमा ! णाणीवि अण्णाणीवि
 तिण्णि णाणाइं णियमा, तिण्णि अण्णाणाइं भयणाए । इमीसे णं भंते ! जाव
 आभिण्णिवोहियणाणे वट्टमाणा सत्तावीसं भंगा, एवं तिण्णि णाणाइं तिण्णि
 अण्णाणाइं भाणियव्वाइं । इमीसे णं जाव कि मणजोगो वड्जोगी कायजोगी ?
 तिण्णिवि । इमीसे णं जाव मणजोए वट्टमाणा कोहोवउत्ता ? सत्तावीसं भंगा । एवं
 वड्जोए एवं कायजोए । इमीसे णं जाव णेरइया कि सागारोवउत्ता अणागारो-
 वउत्ता ? गोयमा ! सागारोवउत्तावि अणागारोवउत्तावि । इमीसे णं जाव
 सागारोवओतो वट्टमाणा कि कोहोवउत्ता ? सत्तावीसं भंगा । एवं अणागारोवउ-

तावि सत्तावीसं भंगा । एवं सत्तवि पुढवीओ णेयव्वाओ, णाणत्तं लेसासु । माहा-
काऊ य दोसु तंइयाए मीसिया णीलिया चउत्थीए । पंचमियाए मीसा कण्हा
तसो परमकण्हा ॥ १ ॥ ४६ ॥ चउसट्ठीए णं भंते ! असुरकुमारावाससय-
सहस्सेसु एगमेगंसि असुरकुमारावासंसि असुरकुमाराणं केवइया ठिइठाणा प० ?
गोयमा ! असंखेज्जा ठिइठाणा प० जहणिया ठिई जहा णेरइया तथा,
णवरं पडिलोमा भंगा भाणियव्वा—सव्वेवि ताव होज्ज लोभोवउत्ता, अहवा
लोभोवउत्ता य मायोवउत्ते य, अहवा लोभोवउत्ता य मायावउत्ता य, एएणं
गमेणं णेयव्वं जाव थणियकुमाराणं, णवरं णाणत्तं जाणियव्वं ॥ ४७ ॥ असं-
खेज्जेसु णं भंते ! पुढविकाइयावाससयसहस्सेसु एगमेगंसि पुढविकाइयावासंसि
पुढविकाइयाणं केवइया ठिइठाणा प० ? गोयमा ! असंखेज्जा ठिइठाणा
प०, तंजहा—जहणिया ठिई जाव तप्पाउमगुक्कोसिया ठिई । असंखेज्जेसु णं
भंते ! पुढविकाइयावाससयसहस्सेसु एगमेगंसि पुढविकाइयावासंसि जहणिया-
याए ठिइए वट्टमाण्णा पुढविकाइया किं कोहोवउत्ता माणोवउत्ता मायोवउत्ता
लोभोवउत्ता ? गोयमा ! कोहोवउत्तावि माणोवउत्तावि मायोवउत्तावि लोभो-
वउत्तावि, एवं पुढविकाइयाणं सव्वेसुवि ठाणेसु अभंगयं, णवरं तेउलेस्साए
असीइ भंगा । एवं आउक्काइयावि । तेउक्काइयाउक्काइयाणं सव्वेसुवि ठाणेसु
अभंगयं । वणस्सइकाइया जहा पुढविकाइया ॥ ४८ ॥ बेइंदिय-तेइंदियचउ-
रिवियाणं जेहिं ठाणेहिं णेरइयाणं असीइभंगा तेहिं ठाणेहिं असीइं चेव, णवरं
अन्महिया सम्मत्ते आभिणिबोहियणाणे सुयणाणे य, एएहिं असीइभंगा, जेहिं
ठाणेहिं णेरइयाणं सत्तावीसं भंगा तेसु ठाणेसु सव्वेसु अभंगयं । पंचदियतिरि-
क्खजोणिया जहा णेरइया तथा भाणियव्वा, णवरं जेहिं सत्तावीसं भंगा तेहिं
अभंगयं कायव्वं जत्थ असीइ तत्थ असीइं चेव । मणुस्साणवि जेहिं ठाणेहिं
णेरइयाणं असीइभंगा तेहिं ठाणेहिं मणुस्साणवि असीइभंगा भाणियव्वा । जेसु
ठाणेसु सत्तावीसा तेसु अभंगयं, णवरं मणुस्साणं अन्महियं जहणिया ठिई आहा-
रएय असीइ भंगा । बाणमंतरजोइसवेमाणिया जहा भवणवासी, णवरं णाणत्तं
जाणियव्वं जं जस्सं, जाव अणुत्तरा । सेवं भंते ! सेवं भंते ! त्ति जाव विहरइ ॥४९॥

पढमं सयं छट्ठी उद्देसो

जावइयाओ य णं भंते ! उवासंतराओ उदयंते सुरिए चक्खुप्फासं हव्व-

सागच्छइ अत्थमंतेविद्य णं सूरिए तावइयाओ चैव उवासंतराओ चक्खुपासं हव्वमागच्छइ ? हुंता ! गोयमा ! जावइयाओ णं उवासंतराओ उदयंते सूरिए चक्खुपासं हव्वमागच्छइ अत्थमंतेवि सूरिए जाव हव्वमागच्छइ । जावइयणं भंते ! खिसं उदयंते सूरिए आयवेणं सव्वओ समंता ओभासेइ उज्जोएइ तवेइ पभासेइ, अत्थमंतेविद्य णं सूरिए तावइयं चैव खिसं आयवेणं सव्वओ समंता ओभासेइ उज्जोएइ तवेइ पभासेइ ? हुंता गोयमा ! जावइयणं खेतं जाव पभासेइ । तं भंते ! किं पुट्ठं ओभासेइ अपुट्ठं ओभासेइ ? जाव छट्ठिसि ओभासेइ, एवं उज्जोवेइ तवेइ पभासेइ, जाव गियमा छट्ठिसि । से णूणं भंते ! सव्वंति सव्ववर्तं फुसभाणकालसमयंसि जावइयं खेतं फुसइ तावइयं फुसमाणे पुट्ठेत्ति वत्तव्वं सिया ? हुंता ! गोयमा ! सव्वंति जाव वत्तव्वं सिया । तं भंते ! किं पुट्ठं फुसइ अपुट्ठं फुसइ ? जाव गियमा छट्ठिसि ॥ ५० ॥ लोयंते भंते ! अलोयंते फुसइ अलोयंतेवि लोयंते फुसइ ? हुंता गोयमा ! लोयंते अलोयंते फुसइ अलोयंतेवि लोयंते फुसइ ३ । तं भंते ! किं पुट्ठं फुसइ अपुट्ठं फुसइ ? जाव गियमा छट्ठिसि फुसइ । दीवंते भंते ! सागरंते फुसइ सागरंतेवि दीवंते फुसइ ? हुंता जाव गियमा छट्ठिसि फुसइ । एवं एएणं अभिलावेणं उदयंते पोयंते फुसइ छिट्ठे दूसंते छायंते आयवंते जाव गियमा छट्ठिसि फुसइ ॥ ५१ ॥ अत्थि णं भंते ! जीवाणं पाणाइवाएणं किरिया कज्जइ ? हुंता अत्थि । सा भंते ! किं पुट्ठा कज्जइ अपुट्ठा कज्जइ ? जाव निव्वाघाएणं छट्ठिसि वाघायं पहुच्च सिय तिर्विसि सिय चच्चदिसि सिय पंचदिसि । सा भंते ! किं कडा कज्जइ अकडा कज्जइ ? गोयमा ! कडा कज्जइ णो अकडा कज्जइ । सा भंते ! किं अत्तकडा कज्जइ परकडा कज्जइ तदुभयकडा कज्जइ ? गोयमा ! अत्तकडा कज्जइ णो परकडा कज्जइ णो तदुभयकडा कज्जइ । सा भंते ! किं आणुपुर्व्व कडा कज्जइ अणाणुपुर्व्व कडा कज्जइ ? गोयमा ! आणुपुर्व्व कडा कज्जइ णो अणाणुपुर्व्व कडा कज्जइ, जाय कडा कज्जइ जा य कज्जिस्सइ सव्वा सा आणुपुर्व्व कडा णो अणाणुपुर्व्व कडत्ति वत्तव्वं सिया । अत्थि णं भंते ! णेरइयाणं पाणाइवार्याकिरिया कज्जइ ? हुंता अत्थि । सा भंते ! किं पुट्ठा कज्जइ अपुट्ठा कज्जइ जाव गियमा छट्ठिसि कज्जइ । सा भंते ! किं कडा कज्जइ अकडा कज्जइ ? तं चैव जाव णो अणाणुपुर्व्व कडत्ति वत्तव्वं सिया । जहा णेरइया तथा

एगिदियवडंजा भाणियव्वा जाव वेमाणिया । एगिदिया जहा जीवा तथा भाणियव्वा । जहा पाणाइवाए तथा मुलावाए तथा अदिण्णादाणे मेहुणे परिग्गहे कोहे जाव मिच्छादंसणसल्ले । एवं एए अट्टारस, चउवीसं दंडगा भाणियव्वा, सेवं भंते ! सेवं भंते ! त्ति भगवं गोयमे समणं भगवं जाव विहरइ ॥ ५२ ॥ तेणं कालेणं तेणं समएणं समणस्स भगवओ महावीरस्स अतेवासी रोहे णामं अणगारे पगइभइए पगइमउए पगइविणीए पगइउवसंते पगइपयणुकोहमाणमाया-लोभे मिउमह्वसंपणे अल्लोणे भइए विणीए समणस्स भगवओ महावीरस्स भदूरसामंते उड्डंजाणू अहोसिरे ज्ञाणकोट्ठोवगए संजमेणं तवसा अप्पाणं भावे-माणे विहरइ । तए णं से रोहे णामं अणगारे जायसइठे जाव पज्जुवासमाणे एवं बयासी-पुंठ्वं भंते ! लोए पच्छा अलोए पुंठ्वं अलोए पच्छा लोए ? रोहा ! लोए य अलोए य पुंठ्वं पेते पच्छ, पेते दोवि एए सासया भावा, अणाणुपुव्वी एसा रोहा ! पुंठ्वं भंते ! जीवा पच्छा अजीवा पुंठ्वं अजीवा पच्छा जीवा ? जहेव लोए य अलोए य तहेव जीवा य अजीवा य, एवं भवसिद्धिया य अभवसिद्धिया य सिद्धी असिद्धी सिद्धा असिद्धा । पुंठ्वं भंते ! अंडए पच्छा कुवकुडी पुंठ्वं कुवकुडी पच्छा अंडए ? रोहा ! से णं अंडए कओ ? भयवं ! कुवकुडीओ ! सा णं कुवकुडी कओ ? भंते ! अंडयाओ । एवामेव रोहा ! से य अंडए सा य कुवकुडी, पुंठ्वं पेते पच्छापेते दुवे ते सासया भावा, अणाणुपुव्वी एसा रोहा ! पुंठ्वं भंते ! लोयंते पच्छा अलोयंते पुंठ्वं अलोयंते पच्छा लोयंते ? रोहा ! लोयंते य अलोयंते य जाव अणाणुपुव्वी एसा रोहा ! पुंठ्वं भंते ! लोयंते पच्छा सत्तमे उवासंतरे पच्छा । रोहा ! लोयंते य सत्तमे उवासंतरे पुंठ्वं पि दोवि एए जाव अणाणुपुव्वी एसा रोहा ! एवं लोयंते य सत्तमे य तणुवाए, एवं घणवाए घणोदही सत्तमा पुढवी, एवं लोयंते एक्केक्केणं संजोएयध्वे इमेहिं ठाणेहि-तंजहा-उवासवायघणउदहि पुढवी दीवा य सागरा वासा । णेरइयाई अत्थिय समया कम्मइं लेस्साओ ॥ १ ॥ दिट्ठी दंसण णाणा सण्ण सरोरा य जोय उवओगे । दव्वपएसा पज्जव अट्ठा किं पुंठ्वं लोयंते ? ॥ २ ॥ पुंठ्वं भंते ! लोयंते पच्छा सध्वद्धा ? जहा लोयंतेणं संजोइया सध्वे ठाणा एए एवं अलोयंते-णवि संजोएयध्वे सध्वे । पुंठ्वं भंते ! सत्तमे उवासंतरे पच्छा सत्तमे तणुवाए ? एवं सत्तमं उवासंतरे सध्वेहिं समं संजोएयध्वं जाव सध्वद्धाए । पुंठ्वं भंते !

सत्तमे तणुवाए पच्छा सत्तमे घणवाए ? एयंपि तहेव जेयव्वं जाव सव्वद्धा, एवं उवरिल्लं एक्केक्कं संजोयंतेणं जो जो हिट्ठिल्लो तं तं छडुतेणं जेयव्वं जाव अईयअणागयद्धा पच्छा सव्वद्धा जाव अणाणुपुव्वी एसा रोहा ! सेवं भंते ! सेवं भंते ! त्ति जाव विहरइ ॥ ५३ ॥ भंते त्ति ! भगवं गोयमे समणं जाव एवं वयासी—कइविहा णं भंते ! लोयट्ठिई प० ? गोयमा ! अट्टविहा लोयट्ठिई प०, तंजहा—आगासपइट्ठिए बाए १ वायपइट्ठिए उवही २ उवहीपइट्ठिया पुढवी ३ पुढविपइट्ठिया तसा थावरा पाणा ४ अजीवा जीवपइट्ठिया ५ जीवा कम्म-पइट्ठिया ६ अजीवा जीवसंगहिंया ७ जीवा कम्मसंगहिंया ८ । से केणट्ठेणं भंते ! एवं वुच्चइ ?—अट्टविहा जाव जीवा कम्मसंगहिंया ? गोयमा ! से जहाणामए—केइ पुरिसे वत्थिमाडोवेइ वत्थिमाडोवित्ता उंप्पि सित्तं बंधइ २ मज्जेणं गंठि बंधइ २ उवरिल्लं गंठि मुयइ २ उवरिल्लं देसं वामेइ २ उवरिल्लं देसं वामेत्ता उवरिल्लं देसं आउयायस्स पूरेइ २ उंप्पि सित्तं बंधइ २ मज्जिल्लं गंठि मुयइ । से णूणं गोयमा ! से आउयाए तस्स वाउयायस्स उंप्पि उवरिमतले चिट्ठइ ? हंता चिट्ठइ, से तेणट्ठेणं जाव जीवा कम्मसंगहिंया, से जहा वा केइ पुरिसे वत्थिमाडोवेइ २ कडीए बंधइ २ अत्याहमतारमपोर-सियंसि उदगंसि ओगाहेज्जा, से णूणं गोयमा ! से पुरिसे तस्स आउयायस्स उवरिमतले चिट्ठइ ? हंता चिट्ठइ, एवं वा अट्टविहा लोयट्ठिई पण्णत्ता जाव जीवा कम्मसंगहिंया ॥ ५४ ॥ अत्थि णं भंते ! जीवा य पोगला य अण्ण-मण्णबद्धा अण्णमण्णपुट्ठा अण्णमण्णमोगाढा अण्णमण्णसिणेहपडिबद्धा अण्णमण्ण-घडत्ताए चिट्ठंति ? हंता ! अत्थि । से केणट्ठेणं भंते ! जाव चिट्ठंति ? गोयमा ! से जहाणामए—हरदे सिया पुण्णे पुण्णप्पमाणे वोलट्टमाणे वोसट्टमाणे समभरघडत्ताए चिट्ठइ, अहे णं केइ पुरिसे तंसि हरदंसि एगं भहं णावं सयासवं सयच्छिड्डं ओगाहेज्जा, से णूणं गोयमा ! सा णावा तेहिं आसवदारेहिं आपूर-माणी २ पुण्णा पुण्णप्पमाणा वोलट्टमाणा वोसट्टमाणा समभरघडत्ताए चिट्ठइ ? हंता चिट्ठइ । से तेणट्ठेणं गोयमा ! अत्थि णं जीवा य जाव चिट्ठंति ॥ ५५ ॥ अत्थि णं भंते ! सया समियं सुहमे सिणेहकाए पवडइ ? हंता अत्थि । से भंते ! किं उड्ढे पवडइ अहे पवडइ तिरिए पवडइ ? गोयमा ! उड्ढेवि पवडइ अहेवि पवडइ तिरिएवि पवडइ । जहा से बायरे आउयाए अण्णमण्णसमाउत्ते

चिरं पि दीहकालं चिद्वृद्धं तद्वा णं सेवि ! णो इणदुठे, समदुठे, से णं खिप्पामेव विद्वंसमागच्छइ । सेवं भंते ! सेवं भंते ! त्ति ॥१॥५६॥

पढमं सयं सत्तमो उद्देसो

णेरइए णं भंते ! णेरइएमु उववज्जमाणे किं देसेणं देसं उववज्जइ, देसेणं सव्वं उववज्जइ, सव्वेणं देसं उववज्जइ, सव्वेणं सव्वं उववज्जइ ? गोयमा ! णो देसेणं देसं उववज्जइ णो देसेणं सव्वं उववज्जइ णो सव्वेणं देसं उववज्जइ सव्वेणं सव्वं उववज्जइ । जहा णेरइए एवं जाव वेमाणिए ॥१॥५७॥ णेरइए णं भंते ! णेरइएमु उववज्जमाणे किं देसेणं देसं आहारेइ १ देसेणं सव्वं आहारेइ २ सव्वेणं देसं आहारेइ ३ सव्वेणं सव्वं आहारेइ ? ४, गोयमा ! णो देसेणं देसं आहारेइ णो देसेणं सव्वं आहारेइ सव्वेण वा देसं आहारेइ सव्वेण वा सव्वं आहारेइ । एवं जाव वेमाणिए २ । णेरइए णं भंते ! णेरइएहिंतो उववट्टमाणे किं देसेणं देसं उववट्टइ ? जहा उववज्जमाणे तहेव उववट्टमाणेऽपि दंडगो भाणियव्वो ३ । णेरइए णं भंते ! णेरइएहिंतो उववट्टमाणे किं देसेणं देसं आहारेइ तहेव जाव सव्वेण वा देसं आहारेइ ? सव्वेण वा सव्वं आ० १, एवं जाव वेमाणिए ४ । णेरइ० भंते ! णेर० उववण्णे किं देसेणं देसं उववण्णे ? एसोऽपि तहेव जाव सव्वेणं सव्वं उववण्णे ? जहा उववज्जमाणे उववट्टमाणे य चत्तारि दंडगा तथा उववण्णेणं उववट्टेणवि चत्तारि दंडगा भाणियव्वा, सव्वेणं सव्वं उववण्णे सव्वेण वा देसं आहारेइ सव्वेण वा सव्वं आहारेइ, एएणं अभिलावेणं उववण्णेवि उववट्टेणवि णेयव्वं ८ । णेरइए णं भंते ! णेरइएमु उववज्जमाणे किं अट्टेणं अट्टं उववज्जइ ? १ अट्टेणं सव्वं उववज्जइ ? २ सव्वेणं अट्टं उववज्जइ ? ३ सव्वेणं सव्वं उववज्जइ ० ? ४, जहा पढमिल्लेणं अट्टं दंडगा तथा अट्टेणवि अट्टं दंडगा भाणियव्वा, णवरं जहिं देसेणं देसं उववज्जइ तहिं अट्टेणं अट्टं उववज्जइ इइ भाणियव्वं, एवं णाणत्तं, एए सव्वेवि सोलस-दंडगा भाणियव्वा ॥५६॥ जीवे णं भंते ! किं विग्गहगइसमावण्णए अविग्गहगइसमावण्णए ? गोयमा ! सिय विग्गहगइसमावण्णए सिय अविग्गहगइसमावण्णए, एवं जाव वेमाणिए । जीवा णं भंते ! किं विग्गहगइसमावण्णया अविग्गहगइसमावण्णया ? गोयमा ! विग्गहगइसमावण्णयावि अविग्गहगइसमाव-

ष्णगावि । णेरडया णं भंते ! किं विग्गहगइसमावष्णया अविग्गहगइसमा-
वष्णया ? गोयमा ! सव्वेवि ताव होज्ज अविग्गहगइसमावष्णया ? । अहवा
अविग्गहगइसमावष्णया य विग्गहगइसमावष्णये य २ अहवा अविग्गहगइ-
समावष्णया य विग्गहगइसमावष्णया य ३ । एवं जीवेणंदिद्यवज्जो तियभंगो
॥ ५६ ॥ देवे णं भंते ! महिड्डिए महज्जुईए महव्वले महाप्रसे महासुव्वे
महाणुभावे अविउक्कंतिथं चयमाणे किञ्चिकालं हिरिवत्तियं दुग्ंठावत्तियं
परिसहवत्तियं आहारं णो आहारेइ, अहे णं आहारेइ, आहारिज्जमाणे आहा-
रिए परिणामिज्जमाणे परिणामिए पहीणे य आउए भवइ जत्थ उववज्जइ
तमाउयं पडिसवेएइ, तंजहा—तिरिक्खुजोणियाउयं वा मणुस्साउयं वा ? हुंता
गोयमा ! देवे णं महिड्डिए जाव मणुस्साउयं वा ॥ ६० ॥ जीवे णं भंते !
गढं वक्कममाणे किं सइदिए वक्कमइ अण्णिए वक्कमइ ? गोयमा ! सिय
सइदिए वक्कमइ सिय अण्णिए वक्कमइ । से केणट्ठेणं ? गोयमा ! दंथ्व-
दियाइं पडुच्च अण्णिए वक्कमइ भाविदियाइं पडुच्च सइदिए वक्कमइ, से
तेणट्ठेणं । जीवे णं भंते ! गढं वक्कममाणे किं ससरीरी वक्कमइ असरीरी
वक्कमइ ? गोयमा ! सिय ससरीरी व० सिय असरीरी वक्कमइ, से केणट्ठेणं ?
गोयमा ! ओरालियवेउच्चियआहारयाइं पडुच्च असरीरी व० तेयाकम्मा० प०
सस० वक्क० से तेणट्ठेणं गोयमा ! ० । जीवे णं भंते ! गढं वक्कममाणे
त्पपढमयाए किमाहारमाहारेइ ? गोयमा ! माउओथं पिउसुक्कं तं तदुभय-
संसिद्धं कलुसं किच्चिसं तपपढमयाए आहारमाहारेइ । जीवे णं भंते ! गढं गए
समाणे किमाहारमाहारेइ ? गोयमा ! जं से माया णाणाविहाओ रसविगईओ आहा-
रमाहारेइ तदेवकदैसेणं ओयमाहारेइ । जीवस्स णं भंते ! गढं गयस्स समाणस्स
अत्थि उच्चारेइ वा पासवणेइ वा खेलेइ वा सिघाणेइ वा वंतेइ वा पित्तेइ वा ?
णो इणट्ठे समट्ठे, से केणट्ठेणं ? गोयमा ! जीवे णं गढं गए समाणे जमा-
हारेइ तं चिणाइ तं सोइदियत्ताए जाव फासिदियत्ताए अट्ठिअट्ठिमिज्जकेसमंशुरो-
मणहत्ताए, से तेणट्ठेणं । जीवे णं भंते ! गढं गए समाणे पभू मूहेणं काव-
त्तियं आहारं आहारित्तए ? गोयमा ! णो इणट्ठे समट्ठे, से केणट्ठेणं ?
गोयमा ! जीवे णं गढं गए समाणे सव्वओ आहारेइ- सव्वओ परिणामेइ
सव्वओ उस्ससइ सव्वओ णिस्ससइ अभिक्खणं आहारेइ अभिक्खणं परिणामेइ

अभिवक्षणं उस्ससइ अभिवक्षणं णिस्ससइ आहच्च आहारेइ आहच्च परिणामेइ
 आहच्च उस्ससइ आहच्च णीससइ । माउजीवरसहरणी पुत्तजीवरसहरणी
 माउजीवपडिबद्धा पुत्तजीवं फुडा तम्हा आहारेइ तम्हा परिणामेइ, अवरावि य
 णं पुत्तजीवपडिबद्धा माउजीवफुडा तम्हा चिणाइ तम्हा उवचिणाइ से तेणट्ठेणं०
 जाव णो पभू मुहेणं कावलयं आहारं आहारित्तए । कइ णं भंते ! माइयंगा
 प० ? गोयमा ! तओ माइयंगा प०, तंजहा—मंसे सोणिए मत्थुलुंगे । कइ णं
 भंते ! पिइयंगा प० ? गोयमा ! तओ पिइयंगा प०, तंजहा—अट्ठि अट्ठिमिजा
 केसमंसुरोमणहे । अम्मापिइए णं भंते ! सरीरए केवइयं कालं संचिट्ठइ ?
 गोयमा ! जावइयं से कालं भवधारणिज्जे सरीरए अब्बावणे भवइ एवतियं
 कालं संचिट्ठइ, अहे णं समए-समए वोक्कसिज्जमाणे २ चरमकालसमयंसि
 वोच्छिण्णे भवइ ॥ ६१ ॥ जीवे णं भंते ! गढभगए समाणे णेरइएसु उव-
 वज्जेज्जा ? गोयमा ! अत्थेगइए उववज्जेज्जा अत्थेगइए णो उववज्जेज्जा । से
 केणट्ठेणं ? गोयमा ! से णं सण्णी पंचिदिए सव्वाहि पज्जत्तीहि पज्जत्तए
 वीरियलद्धीए वेडिक्खियलद्धीए पराणीएणं आगयं सोच्चा णिस्सम्म पएसे
 णिच्छुभइ णि० २ वेडिक्खियसमुग्घाएणं समोहणइ समो० २ चाउरंगिणिं सेणं
 विउच्चइ चाउरंगिणीसेणं विउच्चैत्ता चाउरंगिणीए सेणाए पराणीएणं सद्धि
 संगामं संगामेइ, से णं जीवे अत्थकामए रज्जकामए भोगकामए कामकामए
 अत्थकंखिए रज्जकंखिए भोगकंखिए कामकंखिए अत्थपिवासिए रज्जपिवासिए
 भोगपिवासिए कामपिवासिए तच्चित्ते तम्मणे तल्लेसे तदञ्जवसिए तत्तिक्व-
 ज्जवसाणे तदट्ठोवउत्ते तदप्पियकैरणे तवभावणाभाविए, एयंसि णं अंतरंसि
 कालं करेज्ज णेरइएसु उववज्जइ, से तेणट्ठेणं गोयमा ! जाव अत्थेगइए
 उववज्जेज्जा अत्थेगइए णो उववज्जेज्जा । जीवे णं भंते ! गढभगए समाणे
 देवतोगेसु उववज्जेज्जा ? गोयमा ! अत्थेगइए उववज्जेज्जा अत्थेगइए णो
 उववज्जेज्जा । से केणट्ठेणं ? गोयमा ! से णं सण्णी पंचिदिए सव्वाहि पज्ज-
 त्तीहि पज्जत्तए त्हाक्खस्स समणस्स वा माहणस्स वा अत्तिए एगमवि आरियं
 धम्मियं सुवयणं सोच्चा णिस्सम्म तओ भवइ संवेगजायसइहे तिक्वधम्माणुरारागत्ते,
 से णं जीवे धम्मकामए पुण्णकामए सग्गकामए मोक्खकामए धम्मकंखिए पुण्ण-
 कंखिए सग्गमोक्खकं० धम्मपिवासिए पुण्णसग्गमोक्खपिवासिए तच्चित्ते तम्मणे

तल्लेसे तद्वज्जवसिए तत्तिव्वज्जवसण्णे तद्वट्ठोवउत्ते तदपियकरणे तन्भावणा-
 भाविए एयसि णं अंतरसि कालं करे० देवलो० उव०, से तेणट्ठेणं गोयमा ! ०।
 जीवे णं भंते ! गम्भगए समाणे उत्ताणए वा पाविल्लए वा अंबलुज्जए वा
 अच्छेज्ज वा चिट्ठेज्ज वा णिसीएज्ज वा तुयट्ठेज्ज वा माऊए सुयमाणीए
 सुवइ जागरमाणीए जागरइ सुहियाए सुहिए भवइ दुहियाए दुहिए भवइ ?
 हुंता गोयमा ! जीवे णं गम्भगए समाणे जाव दुहियाए दुहिए भवइ । अहे णं
 पसवणकालसमयंसि सोसेण वा पाएहि वा आगच्छइ सममागच्छइ तिरियमा-
 गच्छइ विणिहायमावज्जइ । वणवज्जाणि य से कम्माइं बढ्ढाइं पुट्टाइं णिहत्ताइं
 कडाइं पट्टवियाइं अभिणिविट्ठाइं अभिसमण्णागयाइं उदिण्णाइं णो उवसंताइं
 भवन्ति तओ भवइ दुरूवे दुक्खणे दुग्गंधे दुरसे दुक्फाने अणिट्ठे अकंते अप्पिए
 असुभे अमणुणे अमण्णाने हीणस्सरे दीणस्सरे अणिव्वस्सरे अकंतस्सरे अप्पियसरे
 असुभस्सरे अमणुणस्सरे अमणामस्सरे अणाएज्जवयणे पच्चायाए यावि भवइ
 वणवज्जाणि य से कम्माइं णो बढ्ढाइं पसत्थं णेयव्वं जाव आदेज्जवयणे पच्चा-
 याए यावि भवइ । सेवं भंते ! सेवं भंते ! त्ति ॥ ६२ ॥

पढमं सयं अट्टमो उट्ठसो

रायणिहे समोसरणं जाव एवं वयासी-एगंतवाले णं भंते ! मणुसे किं णेरइया-
 उयं पकरेइ तिरिव्वल्ल० मणु० देवा० पक० ? णेरइयाउयं किच्चा णेरइएसु उव०
 तिरियाउयं कि० तिरिएसु उवव० मणुस्साउयं किच्चा मणुस्से० उव० देवाउ० कि०
 देवलोएसु उववज्जइ ? गोयमा ! एगंतवाले णं मणुस्से णेरइयाउयं पकरेइ तिरि०
 मणु० देवाउयं पकरेइ णेरइयाउयं किच्चा णेरइएसु उव० तिरि० मणु०
 देवाउयं किच्चा तिरि० मणु० देवलोएसु उववज्जइ ॥ ६३ ॥ एगंतपंडिए
 णं भंते ! मणुस्से किं णेर० पकरेइ जाव देवाउयं किच्चा देवलोएसु उवव० ?
 गोयमा ! एगंतपंडिए णं मणुस्से आउयं सिय पकरेइ सिय णो पकरेइ, जइ पकरेइ णो
 णेरइया० पकरेइ णो तिरि० णो मणु०, देवाउयं पकरेइ । णो णेरइयाउयं किच्चा
 णेर० उव० णो तिरि० णो मणुस्स०, देवाउयं किच्चा देवेषु उव० । से केणट्ठेणं
 जाव देवा० किच्चा देवेषु उववज्जइ ? गोयमा ! एगंतपंडियस्स णं मणुस्सस
 केवल्लमेव दो गईओ पण्णायंति, तंजहा-अंतकिरिया चेव कप्पोववत्तिया चेव,

से तेणट्ठेणं गोयमा ! जाव देवाउयं किच्चा देवेसु उववज्जइ । बालपंडिए णं भंते ! मणुस्से कि णेरइयाउयं पकरेइ जाव देवाउयं किच्चा देवेसु उववज्जइ ? गोयमा ! णो णेरइयाउयं पकरेइ जाव देवाउयं किच्चा देवेसु उववज्जइ । से केणट्ठेणं जाव देवाउयं किच्चा देवेसु उववज्जइ ? गोयमा ! बालपंडिए णं मणुस्से तहारुवस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा णिसम्म देसं उवरमइ देसं णो उवरमइ देसं पच्चक्खाइ देसं णो पच्चक्खाइ, से तेणट्ठेणं देसोवरमदेसपच्चक्खाणेणं णो णेरइयाउयं पकरेइ जाव देवाउयं किच्चा देवेसु उववज्जइ, से तेणट्ठेणं जाव देवेसु उववज्जइ ॥६४॥

पुरिसे णं भंते ! कच्छंसि वा १ दहंसि वा २ उदगंसि वा ३ दवियंसि वा ४ बलयंसि वा ५ जूमंसि वा ६ गहणंसि वा ७ गहणविदुग्गंसि वा ८ पव्वयंसि वा ९ पव्वयविदुग्गंसि वा १० वणंसि वा ११ वणविदुग्गंसि वा १२ मियवित्तीए मियसंकप्पे मियपणिहाए मियवहाए गंता एए मिएत्तिकाउं अण्णयरस्स मियस्स बहाए कूडपासं उट्ठाइ, तजो णं भंते ! से पुरिसे कइकिरिए पण्णत्ते ? गोयमा ! जावं च णं से पुरिसे कच्छंसि वा १० (१२) जाव कूडपासं उट्ठाइ तावं च णं से पुरिसे सिय तिकि० सिय चउ० सिय पंच० । से केणट्ठेणं सिय ति० सिय च० सिय पं० ? गोयमा ! जे भविए उट्ठवणयाए णो बंधणयाए णो मारणयाए तावं च णं से पुरिसे काइयाए अहिगरणियाए पाउसियाए तिहि किरियाहि पुट्ठे, जे भविए उट्ठवणयाएवि बंधणयाएवि णो मारणयाए तावं च णं से पुरिसे काइयाए अहिगरणियाए पाउसियाए पारियावणियाए चउहि किरियाहि पुट्ठे, जे भविए उट्ठवणयाएवि बंधणयाएवि मारणयाएवि तावं च णं से पुरिसे काइयाए अहिगरणियाए पाउसियाए जाव पंचहि किरियाहि पुट्ठे, से तेणट्ठेणं जाव पंचकिरिए ॥६५॥ पुरिसे णं भंते ! कच्छंसि वा जाव वणविदुग्गंसि वा तणाहं असाविय २ अगणिकायं णिस्सरइ तावं च णं से भंते ! से पुरिसे कइकिरिए ? गोयमा ! सिय तिकिरिए सिय चउकि० सिय पंच० । से केणट्ठेणं ? गोयमा ! जे भविए उस्सवणयाए तिहि, उस्सवणयाएवि णिस्सरणयाएवि णो बहणयाए चउहि, जे भविए उस्सवणयाएवि णिस्सरणयाएवि बहणयाएवि तावं च णं से पुरिसे काइयाए जाव पंचहि किरियाहि पुट्ठे, से तेण० गोयमा ! ॥६६॥ पुरिसे णं भंते ! कच्छंसि वा जाव वणविदुग्गंसि वा मियवित्तीए

मियसंकम्पे मियपणिहाणे मियवहाए गंता एए मिएत्तिकाउं अण्णयरस्स मियस्स
 वहाए उसुं णिसिरइ तए णं भंते ! से पुरिसे कइकिरिए ? गोयमा ! सिय
 तिकिरिए सिय चउकिरिए सिय पंचकिरिए । से केणट्ठेणं ? गोयमा ! जे
 भविए णिसिरणयाए णो विद्धंसणयाएवि णो मारणयाए तिहिं, जे भविए
 णिसिरणयाएवि विद्धंसणयाएवि णो मारणयाए चउहिं, जे भविए णिसिरण-
 याएवि वि० मा० तावं च णं से पुरिसे जाव पंचहिं किरियाहिं पुट्ठे, से तेण-
 ट्ठेणं गोयमा ! सिय तिकिरिए सिय चउकिरिए सिय पंचकिरिए ॥ ६७ ॥
 पुरिसे णं भंते ! कच्छंसि वा जाव अण्णयरस्स मियस्स वहाए आययकण्णाययं
 उसुं आयाभेत्ता चिद्धिज्जा, अण्णयरे पुरिसे मग्गओ आगम्म सयपाणिणा असिणा
 सीसं छिदेज्जा से य उसुं ताए चेव पुंवायामणयाए तं मियं विधेज्जा से णं भंते !
 पुरिसे कि मियवेरेणं पुट्ठे पुरिसवेरेणं पुट्ठे ? गोयमा ! जे मियं मारेइ से
 मियवेरेणं पुट्ठे, जे पुरिसं मारेइ से पुरिसवेरेणं पुट्ठे । से केणट्ठेणं भंते ! एवं
 वुच्चइ जाव से पुरिसवेरेणं पुट्ठे ? से णूणं गोयमा ! कज्जमाणे कडे संधिज्ज-
 माणे संधिए णिव्वत्तिज्जमाणे णिव्वत्तिए णिसिरिज्जमाणे णिसिट्ठेत्ति वत्तव्वं
 सिया ? हुंता भगवं ! कज्जमाणे कडे जाव णिसिट्ठेत्ति वत्तव्वं सिया, से
 तेणट्ठेणं गोयमा ! जे मियं मारेइ से मियवेरेणं पुट्ठे, जे पुरिसं मारेइ से
 पुरिसवेरेणं पुट्ठे । अंतो छण्हं मासाणं मरइ काइयाए जाव पंचहिं किरियाहिं
 पुट्ठे, बाहिं छण्हं मासाणं मरइ काइयाए जाव पारियावणियाए चउहिं किरि-
 याहिं पुट्ठे ॥ ६८ ॥ पुरिसे णं भंते ! पुरिसं सत्तीए समभिधंसेज्जा सय-
 पाणिणा वा से असिणा सीसं छिदेज्जा तओ णं भंते ! से पुरिसे कइकिरिए ?
 गोयमा ! जावं च णं से पुरिसे तं पुरिसं सत्तीए अभिसंधेइ सयपाणिणा वा से
 असिणा सीसं छिदइ तावं च णं से पुरिसे काइयाए अहिगरणि० जाव पाणाइ-
 वायकिरियाए पंचहिं किरियाहिं पुट्ठे, आसण्णवहएण थ अणवकंखवत्तिएणं
 पुरिसवेरेणं पुट्ठे ॥ ६९ ॥ दो भंते ! पुरिसा सरिसया सरित्तया सरिव्वया
 सरिसभंडमत्तोवगरणा अण्णमण्णेणं सद्धि संगामं संगामेति, तत्थ णं एगे पुरिसे
 पराइणइ एगे पुरिसे पराइज्जइ, से कहमेयं भंते ! एवं ? गोयमा ! सवीरिए
 पराइणइ अवीरिए पराइज्जइ । से केणट्ठेणं जाव पराइज्जइ ? गोयमा !
 जस्स णं वीरियवज्जाइं कम्भाइं णो बद्धाइं णो पुट्ठाइं जाव णो अभिसमण्णागयाइं

णो उद्विष्णाई उवसंताई भवंति से णं पराइणइ । जस्स णं वीरियवज्जाई कम्माई
 बद्धाई जाव-उद्विष्णाई णो उवसंताई भवंति से णं पुरिसे पराइज्जइ, से तेण-
 ट्ठेणं गोयमा ! एवं वुच्चइ-सवीरिए पराइणइ अवीरिए पराइज्जइ ॥ ७० ॥
 जीवा णं भंते ! किं सवीरिया अवीरिया ? गोयमा ! सवीरियावि अवी-
 रियावि । से केणट्ठेणं ? गोयमा ! जीवा दुविहा पण्णत्ता, तंजहा-संसारसमा-
 वण्णगा य असंसारसमावण्णगा य । तत्थ णं जे ते असंसारसमावण्णगा ते णं
 सिद्धा, सिद्धा णं अवीरिया । तत्थ णं जे ते संसारसमावण्णगा ते दुविहा पण्णत्ता,
 तंजहा-सेलेसिपडिवण्णगा य असेलेसिपडिवण्णगा य । तत्थ णं जे ते सेलेसि-
 पडिवण्णगा ते णं लद्धिवीरिएणं सवीरिया करणवीरिएणं अवीरिया । तत्थ णं
 जे ते असेलेसिपडिवण्णगा ते णं लद्धिवीरिएणं सवीरिया करणवीरिएणं सवीरि-
 यावि अवीरियावि, से तेणट्ठेणं गोयमा ! एवं वुच्चइ-जीवा दुविहा पण्णत्ता,
 तंजहा-सवीरियावि अवीरियावि । णेरइया णं भंते ! किं सवीरिया अवीरिया ?
 गोयमा ! णेरइया लद्धिवीरिएणं सवीरिया करणवीरिएणं सवीरियावि अवीरि-
 यावि । से केणट्ठेणं ? गोयमा ! जेसि णं णेरइयाणं अत्थि उट्टाणे कम्मे बले
 वीरिए पुरिसक्कारपरक्कमे ते णं णेरइया लद्धिवीरिएणवि सवीरिया करण-
 वीरिएणवि सवीरिया, जेसि णं णेरइयाणं णत्थि उट्टाणे जाव परक्कमे ते णं
 णेरइया लद्धिवीरिएणं सवीरिया करणवीरिएणं अवीरिया, से तेणट्ठेणं । जहा
 णेरइया एवं जाव पच्चिदियतिरिक्खजोणिया । मणुस्सा जहा ओहिया जीवा,
 णवरं सिद्धवज्जा भाणियव्वा । वाणमंतरजोइसवेमाणिया जहा णेरइया । सेवं
 भंते ! सेवं भंते ! त्ति जाव विहरइ ॥ ७१ ॥

पढमं सयं णवमो उद्देसो

कहणं भंते ! जीवा गस्यत्तं हव्वमागच्छंति ? गोयमा ! पाणाइवाएणं
 मुसावाएणं अविष्णा० मेहुण० परि० कोह० भाण० माया० लोभ० पे० दोस०
 कलह० अन्नभक्खाण० पेसुण्ण० रइअरइ० परपरिवाय० मायामोसमिच्छा-
 वंसणसल्लेणं, एवं खलु गोयमा ! जीवा गस्यत्तं हव्वमागच्छंति । कहणं भंते !
 जीवा लहुयत्तं हव्वमागच्छंति ? गोयमा ! पाणाइवायवेरमणेणं जाव मिच्छा-
 वंसणसल्लवेरमणेणं एवं खलु गोयमा ! जीवा लहुयत्तं हव्वमागच्छन्ति । एवं
 संसारं आउली करेति, एवं परित्तीकरेति दोहीकरेति हस्तीकरेति एवं

अणुपरिवृत्ति एवं वीड्वयति-पसत्था चत्तारि अप्पसत्था चत्तारि ॥७२॥ सत्तमे णं भंते ! ओवासंतरे किं गुरुए ल्हए गुरुयलहुए अगुरुयलहुए ? गोयमा ! णो गुरुए णो ल्हए णो गुरुयलहुए अगुरुयलहुए । सत्तमे णं भंते ! तणुवाए किं गुरुए ल्हए गुरुयलहुए अगुरुयलहुए ? गोयमा ! णो गुरुए णो ल्हए गुरुयलहुए णो अगुरुयलहुए । एवं सत्तमे घणवाए सत्तमे घणोदही सत्तमा पुढवी । उवासंतराइं सव्वाइं जहा सत्तमे ओवासंतरे, (सेसा) जहा तणुवाए, एवं-ओवासवायघणउदहि पुढवी दीवा य सागरा वात्ता । णेरइया णं भंते ! किं गुरुया जाव अगुरुयलहुया ? गोयमा ! णो गुरुया णो लहुया गुरुयलहुयावि अगुरुयलहुयावि । से केणट्ठेणं ? गोयमा ! वेउव्वियतेयाइं पडुच्च णो गुरुया णो लहुया गुरुयलहुया णो अगुरुयलहुया, जीवं च कम्मणं च पडुच्च णो गुरुया णो लहुया णो गुरुयलहुया अगुरुयलहुया, से तेणट्ठेणं एवं जाव वेमागिया, णवरं णाणत्तं जाणियव्वं सरीरोहि । धम्मत्थिकाए जाव जीवत्थिकाए चउत्थपएणं । पोग्गलत्थिकाए णं भंते ! किं गुरुए ल्हए गुरुयलहुए अगुरुयलहुए ? गोयमा ! णो गुरुए णो ल्हए गुरुयलहुएवि अगुरुयलहुएवि । से केणट्ठेणं ? गोयमा ! गुरुयलहुयदव्वाइं पडुच्च णो गुरुए णो ल्हए गुरुयलहुए णो अगुरुयलहुए, अगुरुयलहुयदव्वाइं पडुच्च णो गुरुए णो ल्हए णो गुरुयलहुए अगुरुयलहुए । समय कम्माणि य चउत्थपएणं । कण्हलेसा णं भंते ! किं गुरुया जाव अगुरुयलहुया ? गोयमा ! णो गुरुया णो लहुया गुरुयलहुयावि अगुरुयलहुयावि । से केणट्ठेणं ? गोयमा ! दव्वलेसं पडुच्च तइयपएणं भावलेसं पडुच्च चउत्थपएणं । एवं जाव सुक्कलेसा । दिट्ठीदंसणणानअण्णाणसण्णा चउत्थपएणं णेयव्वाओ । हेट्ठिल्ला चत्तारि सरीरा णायव्वा तइयपएणं, कम्म य चउत्थपएणं, मणजोगो वडजोगो चउत्थपएणं पएणं, कायजोगो तइएणं पएणं सागारोवओमो अणागारोवओमो चउत्थपएणं पएणं सव्वदव्वा सव्वपएसा सव्वपज्जवा जहा पोग्गलत्थिकाओ, तीयद्धा अणागयद्धा सव्वद्धा चउत्थपएणं पएणं ॥७३॥ से णूणं भंते ! लाघवियं अप्पिच्छा अनुच्छा अगोही अपडिबद्धया समणाणं णिग्गंथाणं पसत्थं ? हंता गोयमा ! लाघवियं जाव पसत्थं । से णूणं भंते ! अकोहत्तं अमाणत्तं अमायत्तं अलोभत्तं समणाणं णिग्गंथाणं पसत्थं ? हंता गोयमा ! अकोहत्तं अमाणत्तं जाव पसत्थं । से णूणं भंते ! कंखापदोसे खीणे सभणे णिग्गंथे अंतकरे भवइ अतिमसरीरिए वा ? बहुमोहेवि

य णं पुंन्वि विहरित्ता अह पच्छा संवुडे कालं करेइ तओ पच्छा सिज्जाइ ३ जाव अंतं करेइ ? हुंता गोयमा ! कंखापदोसे खीणे जाव अंतं करेइ ॥७४॥
 अण्णउत्थिया णं भंते ! एवमाइक्खंति एवं भासेंति एवं पण्णवेति एवं परू-
 वेति—एवं खलु एगे जीवे एगेणं समएणं दो आउयाइं पकरेइ तंजहा—इह-
 भवियाउयं च परभवियाउयं च, जं समयं इहभवियाउयं पकरेइ तं समयं
 परभवियाउयं पकरेइ, जं समयं परभवियाउयं पकरेइ तं समयं इहभवि-
 याउयं पकरेइ, इहभवियाउयस्स पकरणयाए परभवियाउयं पकरेइ पर-
 भवियाउयस्स पकरणयाए इहभवियाउयं पकरेइ, एवं खलु एगे जीवे एगेणं
 समएणं दो आउयाइं पकरेइ, तं०—इहभवियाउयं च परभवियाउयं च, से
 कहमेयं भंते ! एवं ? खलु गोयमा ! जण्णं ते अण्णउत्थिया एवमाइक्खंति
 जाव परभवियाउयं च, जे ते एवमाहंसु मिच्छं ते एवमाहंसु, अहं पुण गोयमा !
 एवमाइक्खामि जाव परूवेमि—एवं खलु एगे जीवे एगेणं समएणं एगं आउयं
 पकरेइ, तं०—इहभवियाउयं वा परभवियाउयं वा, जं समयं इहभवियाउयं
 पकरेइ णो तं समयं परभवियाउयं पकरेइ, जं समयं परभवियाउयं पकरेइ
 णो तं समयं इहभवियाउयं पकरेइ, इहभवियाउयस्स पकरणयाए णो पर-
 भवियाउयं पकरेइ पभवियाउयस्स पकरणयाए णो इहभवियाउयं पकरेइ,
 एवं खलु एगे जीवे एगेणं समएणं एगं आउयं पकरेइ, तं०—इहभवियाउयं वा,
 परभवियाउयं वा । सेवं भंते ! सेवं भंते ! त्ति भगवं गोयमे जाव विहरइ, ॥७५॥
 तेणं कालेणं तेणं समएणं पासावच्चिज्जे कालासवेसियपुत्ते णामं अणगारे जेणेव
 थेरा भगवंतो तेणेव उवागच्छइ २ ता थेरे भगवंते एवं वयासी—थेरा सामाइयं
 ण याणंति थेरा सामाइयस्स अट्ठं ण याणंति थेरा पच्चक्खणं ण याणंति
 थेरा पच्चक्खणस्स अट्ठं ण याणंति थेरा संजमं ण याणंति थेरा संजमस्स
 अट्ठं ण याणंति थेरा संवरं ण याणंति थेरा संवरस्स अट्ठं ण याणंति थेरा
 विवेगं ण याणंति थेरा विवेगस्स अट्ठं ण याणंति थेरा विउस्सगं ण याणंति
 थेरा विउस्सगस्स अट्ठं ण याणंति ६ । तए णं ते थेरा भगवंतो कालासवेसिय-
 पुत्तं अणगारं एवं वयासी—जाणामो णं अज्जो ! सामाइयं जाणामो णं अज्जो !
 सामाइयस्स अट्ठं जाव जाणामो णं अज्जो ! विउस्सगस्स अट्ठं । तए णं
 से कालासवेसियपुत्ते अणगारे ते थेरे भगवंते एवं वयासी—जइ णं अज्जो ! तुभे
 जाणह सामाइयं जाणह सामाइयस्स अट्ठं जाव जाणह विउस्सगस्स अट्ठं

किं भे अज्जो ! सामाइए किं भे अज्जो ! सामाइयस्स अट्ठे ? जाव किं भे विउस्सग्गस्स अट्ठे ? तए णं ते थेरा भगवंतो कालासवेसियपुत्तं अणगारं एवं वयासी—आया णे अज्जो ? सामाइए आया णे अज्जो ! सामाइयस्स अट्ठे जाव विउस्सग्गस्स अट्ठे । तए णं ते कालासवेसियपुत्ते अणगारे थेरे भगवते एवं वयासी—‘जइ भे अज्जो ! आया सामाइए आया सामाइयस्स अट्ठे एवं जाव आया विउस्सग्गस्स अट्ठे अवहट्ठु कोहमाणमायालोभे किमट्ठं अज्जो ! गरहह ? कालास० संजमट्ठयाए, से भंते ! किं गरहा संजमे अणगहा संजमे ? कालास० गरहा संजमे णो अणगहासंजमे, गरहात्रिय षं सव्वं दोसं पविणेइ सव्वं वासियं परिष्णाए एवं खु णे आया संजमे उवहिए भवइ, एवं खु णे आया संजमे उवचिए भवइ, एवं खु णे आया संजमे उवट्ठिए भवइ एत्थ णं से कालासवेसियपुत्ते अणगारे संबुद्धे थेरे भगवंते वंदइ णमंसइ २ एवं वयासी—एएसि णं भंते ! पयाणं पुँव्व अण्णाणयाए असवणयाए अबोहियाए अणगमेणं अविट्ठाणं असुयाणं असुयाणं अविष्णायाणं अब्बोवडाणं अब्बोच्छिष्णाणं अण्णज्जहाणं अणुवधरियाणं एयमट्ठं णो सइहिए णो पत्तिइए णो रोइए इयाणिं भंते ! एएसि पयाणं जाणयाए सवणयाए बोहीए अभिगमेणं विट्ठाणं सुयाणं मयाणं विष्णायाणं योगडाणं वोच्छिष्णाणं णिज्जहाणं उवधरियाणं एयमट्ठं सइहामि पत्तियामि रोएमि एवमेयं से जहेयं तुब्भे वदह । तए णं ते थेरा भगवंतो कालासवेसियपुत्तं अणगारं एवं वयासी—सइहाहि अज्जो ! पत्तियाहि अज्जो ! रोएहि अज्जो ! से जहेयं अम्हे वदामो । तए णं से कालासवेसियपुत्ते अणगारे थेरे भगवंतो वंदइ णमंसइ २ एवं वयासी—इच्छामि णं भंते ! तुब्भं अँतिए चाउज्जामो धम्मो पंचमहद्वइयं सपडिक्कमणं धम्मं उवसंपडिज्जता णं विहरित्तए । अहामुहं देवाणुपियया ! मा पडिबधं । तए णं से कालासवेसियपुत्ते अणगारे थेरे भगवंते वंदइ णमंसइ वंदिता णमंसित्ता चाउज्जामाओ धम्मो पंचमहद्वइयं सपडिक्कमणं धम्मं उवसंपज्जित्ता णं विहरइ । तए णं से कालासवेसियपुत्तं अणगारे बहूणि वासाणि सामणपरियाणं पाउणइ जस्सट्ठाए कीरइ णग्गभावे मुंडभावे अण्हाणयं—अदंत-धुवणयं अदच्छत्तयं अणोवाहणयं भूमिसेज्जा फलहसेज्जा कट्ठसेज्जा केसलोओ बभंचेरवासो परधरपवेसो लद्धावलद्धी उच्चावया गामकंटगां वासीसं परिसहो-वसग्गा अहियासिज्जति तमट्ठं आराहेइ २ चरिमेहिं उरसासणीसासेहिं सिद्धे

बुद्धे मुक्के परिणिव्वुडे सव्वदुकलप्पहीणे ॥७६॥ भंते ! त्ति भगवं गोयमे समणं
 भगवं महावीरं वंदइ णमंसइ २ एवं वयासी-से णूणं भंते ! सेट्ठियस्स य तणु-
 यस्स य किवणस्स य खत्तियस्स य समं चेव अपच्चक्खवाणकिरिया कज्जइ ?
 हेता गोयमा ! सेट्ठियस्स य जाव अपच्चक्खवाणकिरिया कज्जइ । से केणट्ठेणं
 भंते ! गोयमा ! अविरइं पडुच्च से तेण० गोयमा ! एवं वुच्चइ-सेट्ठियस्स
 य तणु० जाव कज्जइ ॥७७॥ आहाकम्मं णं भुंजमाणे समणे णिगंथे कि बंधइ
 कि पकरेइ कि चिणाइ कि उवचिणाइ ? गोयमा ! आहाकम्मं णं भुंजमाणे
 आउयवज्जाओ सत्त कम्मपयडीओ सिद्धिलबंधणबद्धाओ धणियबंधणबद्धाओ
 पकरेइ जाव अणुपरियट्ठइ । से केणट्ठेणं जाव अणुपरियट्ठइ ? गोयमा ! आहा-
 कम्मं णं भुंजमाणे आयाए धम्मं अइक्कमइ आयाए धम्मं अइक्कममाणे पुढ-
 विक्कायं णावकंखइ जाव तसकायं णावकंखइ, जेसिपि य णं जीवाणं सरीराइं
 आहारमाहारेइ तेवि जीवे णावकंखइ, से तेणट्ठेणं गोयमा ! एवं वुच्चइ-
 आहाकम्मं णं भुंजमाणे आउयवज्जाओ सत्त कम्मपयडीओ जाव अणुपरि-
 यट्ठइ । फामुएसणिज्जं भंते ! भुंजमाणे कि बंधइ जाव उवचिणाइ ? गोयमा !
 फामुएसणिज्जं णं भुंजमाणे आउयवज्जाओ सत्त कम्मपयडीओ धणियबंधण-
 बद्धाओ सिद्धिलबंधणबद्धाओ पकरेइ जहा संबुडे णं णवरं आउयं च णं कम्मं
 सिय बंधइ सिय णो बंधइ सेसं तहेव जाव वोईवयइ । से केणट्ठेणं जाव
 वोईवयइ ? गोयमा ! फामुएसणिज्जं भुंजमाणे समणे णिगंथे आयाए धम्मं
 णो अइक्कमइ, आयाए धम्मं अणइक्कममाणे पुढविक्काइयं अवकंखइ जाव
 तसकायं अवकंखइ, जेसिपि य णं जीवाणं सरीराइं आहारेइ तेवि जीवे
 अवकंखइ से तेणट्ठेणं जाव वोईवयइ ॥७८॥ से णूणं भंते ! अथिरे पलोट्टइ
 णो थिरे पलोट्टइ अथिरे भज्जइ णो थिरे भज्जइ सासए बालाए बालियत्तं
 असासयं सासए पंडिए पंडियत्तं असासयं ? हेता गोयमा ! अथिरे पलोट्टइ
 जाव पंडियत्तं असासयं । सेवं भंते ! सेवं भंते ! त्ति जाव विहरइ ॥७९॥

पढमं सयं दसमो उट्ठेसो

अणउत्थिया णं भंते ! एवमाइक्खंति जाव एवं परूवेति-एवं खलु चल-
 माणे अचलिए जाव णिज्जरिज्जमाणे अणिज्जिण्णे, दो परमाणुपोग्गला एग-
 यओ ण साहंति, कम्हा दो परमाणुपोग्गला एगयओ ण साहंति ? दोण्हं
 परमाणुपोग्गलाणं णत्थि सिणेहकाए, तम्हा दो परमाणुपोग्गला एगयओ ण

साहर्णति, तिष्णि परमाणुपोगला एगयओ साहर्णति, कम्हा तिष्णि परमाणु-
 पोगला एगयओ साहर्णति ? तिष्णं परमाणुपोगलाणं अत्थि सिणेहकाए, तम्हा
 तिष्णि परमाणुपोगला एगयओ सा०, ते भिज्जमाणा दुहावि तिहावि कज्जति,
 दुहा कज्जमाणा एगयओ दिवड्ढे परमाणुपोगले भवइ एगयओवि दिवड्ढे
 पर० पो० भवइ। तिहा कज्जमाणा तिष्णि परमाणुपोगला भवन्ति, एवं जाव
 चत्तारि पंचपरमाणु पो० एगयओ साहर्णति एगयओ साहर्णिता दुक्खत्ताए
 कज्जति, दुक्खेवि य णं से सासए सया समियं उवचिज्जइ य अवचिज्जइ
 य। पुंवि भासा-भासा भासिज्जमाणी भासा अभासा भासासमयवीड-
 ककंतं च णं भासिया भासा। जा सा पुंवि भासा-भासा भासिज्जमाणी
 भासा अभासा भासासमयवीडककंतं च णं भासिया भासा सा कि भासओ
 भासा अभासओ भासा ? अभासओ णं सा भासा णो खलु सा भासओ भासा।
 पुंवि किरिया दुक्खा कज्जमाणी किरिया अदुक्खा किरियासमयवीडककंतं
 च णं कडा किरिया दुक्खा, जा सा पुंवि किरिया दुक्खा कज्जमाणी किरिया
 अदुक्खा किरियासमयवीडककंतं च णं कडा किरिया दुक्खा सा कि करणओ
 दुक्खा अकरणओ दुक्खा ? अकरणओ णं सा दुक्खा णो खलु सा करणओ
 दुक्खा। सेवं वत्तव्वं सिया-अकिच्चं दुक्खं अफुसं दुक्खं अकज्जमाणकडं दुक्खं
 अकट्टु अकट्टु पाणभूयजीवसत्ता वेयणं वेदंतीति वत्तव्वं सिया। से कहमेयं
 भंते ! एवं ? गोयमा ! जणं ते अण्णउत्थिया एवमाइक्खंति जाव वेदणं
 वेदंति, वत्तव्वं सिया, जे ते एवमाहंसु मिच्छा ते एवमाहंसु। अहं पुण गोयमा !
 एवमाइक्खामि, एवं खलु चलमाणे चलिए जाव णिज्जरिज्जमाणे णिज्जिण्णे।
 दो परमाणुपोगला एगयओ साहर्णति कम्हा ? दो परमाणुपोगला एगयओ
 साहर्णति ? दोष्णं परमाणुपोगलाणं अत्थि सिणेहकाए, तम्हा दो परमाणु-
 पोगला एगयओ सा०, ते भिज्जमाणा दुहा कज्जति, दुहा कज्जमाणा एगयओ
 पर० पोगले एगयओ प० पोगले भवन्ति। तिष्णि परमा० एगयओ साह०,
 कम्हा ? तिष्णि परमाणुपोगले एग० सा० ? तिष्णं परमाणुपोगलाणं अत्थि
 सिणेहकाए, तम्हा तिष्णि परमाणुपोगला एगयओ साहर्णति, ते भिज्जमाणा
 दुहावि तिहावि कज्जति, दुहा कज्जमाणा एगयओ परमाणुपोगले एगयओ
 दुपएसिए खंधे भवइ, तिहा कज्जमाणा तिष्णि परमाणुपोगला भवन्ति, एवं जाव

चत्तारिपंचपरमाणुपो० एग्यओ साहर्णति २ खंधत्ताए कज्जन्ति, खंधेवि य णं
 से असासए सया समियं उवच्चिज्जइ य अवच्चिज्जइ य । पुंन्व भासा अभासा
 भासिज्जभाणी भासा २ भासासमयवीइक्कंतं च णं भासिया भासा अभासा ।
 जा सा पुंन्व भासा अभासा भासिज्जमाणी भासा २ भासासमयवीइक्कंतं च
 णं भासिया भासा अभासा सा किं भासओ भासा अभासओ भासा ? भासओ
 णं भासा णो खलु सा अभासओ भासा । पुंन्व किरिया अदुक्खा जहा भासा
 तहा भाणियव्वा । किरियावि जाव करणओ णं सा दुक्खा णो खलु सा अकरणओ
 दुक्खा, सेवं वत्तव्वं सिया—किच्चं फुसं दुक्खं कज्जमाणकडं दुक्खं कट्टु २ पाण-
 भूयजीवसत्ता वेदेणं वेदंतीति वत्तव्वं सिया ॥ ८० ॥ अण्णउत्थिया णं भंते !
 एवमाइक्खंति जाव—एवं खलु एगे जीवे एगेणं समएणं दो किरियाओ पकरेइ,
 तंजहा—इरियावहियं च संपराइयं च, [जं समयं इरियावहियं पकरेइ तं समयं
 संपराइयं पकरेइ, जं समयं संपराइयं पकरेइ तं समयं इरियावहियं पकरेइ,
 इरियावहियाए पकरणताए संपराइयं पकरेइ संपराइपकरणयाए इरियावहियं
 पकरेइ, एवं खलु एगे जीवे एगेणं समएणं दो किरियाओ पकरेइ, तंजहा—
 इरियावहियं च संपराइयं च । से कहमेयं भंते ! एवं ? गोयमा ! जं णं ते
 अण्णउत्थिया एवमाइक्खंति तं चेव जाव जे ते एवमाहंसु, मिच्छा से एवमा-
 हंसु अहं पुण गोयमा ! एवमाइक्खामि ४—एवं खलु एगे जीवे एगसमए एककं
 किरियं पकरेइ] परउत्थियवत्तव्वं भेयव्वं । ससमयवत्तव्वयाए भेयव्वं जाव
 इरियावहियं संपराइयं वा ॥ ८१ ॥ गिरयगई णं भंते ! केवइयं कालं विरहिया
 उववाएणं प० ? गोयमा ! जहण्णेणं एककं समयं उक्कोसेणं बारस मुहुत्ता ।
 एवं वक्कंतीपयं भाणियव्वं गिरवसेसं । सेवं भंते ! सेवं भंते ! त्ति जाव
 विहरइ ॥ ८२ ॥

पढमं सयं समत्तं

॥ बीयं सयं पढमो उद्देशो ॥

गाहा—ऊसासखंए वि य १ समुघाय २ पुढवि ३ दिय ४ अण्ण-
 उत्थिभासा ५ य । देवा य ६ चमरचंवा ७ समय ८ खित्त ९ त्थिकाय १०
 बीयसए ॥ १ ॥ ८३ ॥ तेणं कालेणं तेणं समएणं रायगिहे णामं णयरे होत्था,

वण्णओ, सामी समोसढे परिसा णिग्गया धम्मो कह्तिओ पडिग्गया परिसा ।
तेणं कालेणं २ जेट्ठे अंतेवासी जाव पज्जुवासमाणे एवं वयासी-जे इमे भंते !
वेइंदिया तेइंदिया चउरंदिया पंचेंदिया जीवा एएसि णं आणामं वा पाणामं
वा उस्सासं वा णोसासं वा जाणामो पासामो, जे इमे पुट्टविककाइया जाव
वणस्सइकाइया एगिंदिया जीवा एएसि णं आणामं वा पाणामं वा उस्सासं वा
णिस्सासं वा ण याणामो ण पासामो, एएसि णं भंते ! जीवा आणमंति वा
पाणमंति वा उस्ससंति वा णोससंति वा ? हुंता गोयमा ! एएवि य णं जीवा
आणमंति वा पाणमंति वा उस्ससंति वा णोससंति वा ॥ ८४ ॥ किण्णं भंते !
जीवा आण० पा० उ० णी० ? गोयमा ! दब्बओ णं अणंतपएसियाइं दब्बाइं
खेत्तओ णं असंखपएसोगाढाइं कालओ अण्णयरट्ठितीयाइं भावओ वण्णमंताइं
गंधमंताइं रसमंताइं फासमंताइं आणमंति वा पाणमंति वा उस्ससंति वा णोससंति
वा, जाइं भावओ वण्णमंताइं आण० पाण० उस्स० णीस० ताइं कि एगव-
ण्णाइं आणमंति पाणमंति उस्स० णीस० ? आहारगमो णेयध्वो जाव तिचउ-
पंचदिसि । किण्णं भंते ! षेरइया आ० पा० उ० णी० तं चेव जाव णियमा
छदिसि आ० पा० उ० णी० जीवा एगिंदिया वाघाया य णिव्वाघाया य
भाणियव्वा, सेसा णियमा छदिसि । वाउयाए णं भंते ! वाउयाए चेव आणमंति वा
पाणमंति वा उस्ससंति वा णोससंति वा ? हुंता गोयमा ! वाउयाए णं जाव णोस-
संति वा ॥ ८५ ॥ वाउयाए णं भंते ! वाउयाए चेव अणेगसयसहस्सखत्तो उट्टाडत्ता २
तत्थेव भुज्जो भुज्जो पच्चायाइ ? हुंता गोयमा ! जाव पच्चायाइ । से भंते कि
पुट्ठे उट्टाइ अपुट्ठे उट्टाइ ? गोयमा ! पुट्ठे उट्टाइ णो अपुट्ठे उट्टाइ । से
भंते ! कि ससररीरी णिक्खमइ असरीरी णिक्खमइ ? गोयमा ! सिय ससररीरी
णिक्खमइ सिय असरीरी णिक्खमइ । से केणट्ठेणं भंते ! एवं बुच्चइ सिय
ससररीरी णिक्खमइ सिय असरीरी णिक्खमइ ? गोयमा ! वाउकायस्स णं
सत्तारि सरीरया पण्णत्ता, तंजहा-ओरालिए वेउद्विए तेयए कम्मए । ओरा-
लियवेउद्वियाइं विण्णजहाय तेयकम्मएहि णिक्खमइ, से तेणट्ठेणं गोयमा !
एवं बुच्चइ-सिय ससररीरी सिय असरीरी णिक्खमइ ॥ ८६ ॥ भडाइं णं भंते !
णियंठे णो णिरुद्धभवे णो णिरुद्धभवदब्बे णो पहीणसंसारे णो पहीणसंसार-
वेयणिज्जे णो वोच्छिण्णसंसारे णो वोच्छिण्णसंसारवेयणिज्जे णो णिट्ठियट्ठे

णो णिट्ठियदुकरणिज्जे पुणरवि इत्थत्तं हव्वमागच्छइ ? हंता गोयमा !
 मडाई ! णिणंठे जाव पुणरवि इत्थत्तं हव्वमागच्छइ ॥८७॥ से णं भंते ! कि
 वत्तव्वं सिया ? गोयमा ! पाणेइ वत्तव्वं सिया भूतेति वत्तव्वं सिया जीवेति
 वत्तव्वं० सत्तेति वत्तव्वं० विण्णुति वत्तव्वं० वेएति वत्तव्वं सिया पाणे भूए जीवे
 सत्ते विण्णू वेएति वत्तव्वं सिया । से केणट्ठेणं भंते ! पाणेति वत्तव्वं सिया जाव
 वेएति वत्तव्वं सिया ? गोयमा ! जम्हा आ० पा० उ० णी० तम्हा पाणेति वत्तव्वं
 सिया, जम्हा भूए भवइ भविस्सइ य तम्हा भूएति वत्तव्वं सिया, जम्हा जीवे
 जीवइ जीवत्तं आउयं च कम्मं उवजीवइ तम्हा जीवेति वत्तव्वं सिया, जम्हा
 सत्ते सुहासुहेहि कम्मोहि तम्हा सत्तेति वत्तव्वं सिया, जम्हा तित्तकडुयकसाय-
 अंबिलमहुरे रसे जाणइ तम्हा विण्णुति वत्तव्वं सिया, वेदेइ य सुहदुक्खं तम्हा
 वेएति वत्तव्वं सिया । से तेणट्ठेणं जाव पाणेति वत्तव्वं सिया जाव वेएति
 वत्तव्वं सिया ॥ ८८ ॥ मडाई णं भंते ! णियंठे णिरुद्धभवे णिरुद्धभवपवंचे
 जाव णिट्ठियदुकरणिज्जे णो पुणरवि इत्थत्तं हव्वमागच्छइ ? हंता गोयमा !
 मडाई णं णियंठे जाव णो पुणरवि इत्थत्तं हव्वमागच्छइ से णं भंते ! किति
 वत्तव्वं सिया ? गोयमा ! सिद्धेति वत्तव्वं सिया बुद्धेति वत्तव्वं सिया मुत्तेति
 वत्तव्वं० पारगएत्ति व० परंपरगएत्ति व० सिद्धे बुद्धे मुत्ते परिणिव्वुडे अंतकडे
 सव्वदुक्खप्पहीणेति वत्तव्वं सिया, सेवं भंते ! सेवं भंते ! त्ति भगवं गोयमे
 समणं भगवं महावीरं बंदइ णमंसइ २ संजमेणं तवसा अप्पाणं भावेमाणे विह-
 रइ ॥ ८९ ॥ तेणं कालेणं तेणं समएणं समणे भगवं महावीरे रायगिहाओ
 णगराओ गृणसिलाओ चेइयाओ पंडिणिकलमइ पंडिणिकलमिता बहिया
 जणवयविहारं विहरइ । तेणं कालेणं तेणं समएणं कयंगलाणामं णगरी
 होत्था वण्णओ । तीसे णं कयंगलाए णगरीए बहिया उत्तरपुरच्छिमे दिसीभाए
 छत्तपलासए णामं चेइए होत्था वण्णओ, तए णं समणे भगवं महावीरे उप्पण्ण-
 णाणदंसणधरे जाव समोसरणं परिसा णिग्गच्छइ । तीसे णं कयंगलाए णगरीए
 अदूरसामंते सावथी णामं णयरी होत्था वण्णओ । तत्थ णं सावथीए णयरीए
 गद्दभालिस्स अंतेवासी खंदए णामं कच्चायणस्सगोत्ते परिव्वायगे परिवसइ
 रिउव्वेदजजुव्वेदसामवेदअहव्वणवेदइतिहासपंचमाणं णिग्घंटुछट्टाणं चउण्हं
 वेदाणं संगोवंगणं सरहस्साणं सारए वारए धारए पारए सडंगवी सद्वित्त-

विसारए संखाणे सिक्खाकप्पे वागरणे छंदे णिरुत्ते जोइसामयणे अण्णेषु य बहुसु बंभण्णएसु परिव्वायएसु य णयेसु सुपरिणिट्टिए यावि होत्था । तत्थ णं सावत्थीए णयरीए पिगलए णामं णियंठे वेसालियसावए परिवसइ । तए णं से पिगलए णामं णियंठे वेसालियसावए अण्णया कयाइं जेणेव खंदए कच्चायणस्स-गोत्ते तेणेव उवागच्छइ २ खंदगं कच्चायणस्सगोत्तं इणमक्खेवं पुच्छे—मागहा ! किं सअंते लोए अणंते लोए १ सअंते जीवे अणंते जीवे २ सअंता सिद्धी अणंता सिद्धी ३ सअंते सिद्धे अणंते सिद्धे ४ केण वा मरणेणं मरमाणे जीवे वड्डइ वा हायइ वा ५ ? एतावं ताव आयक्खाहि वुच्चमाणे एवं । तए णं से खंदए कच्चा० गोत्ते पिगलएणं णियंठेणं वेसालीसावएणं इणमक्खेवं पुच्छिए समाणे संकिए कंखिए विइगिच्छिए भेदसमावण्णे कलुससमावण्णे णो संचाएइ पिगलयस्स णियंठस्स वेसालियसावयस्स किंचिवि पमोक्खमक्खाइउं, तुसिणीए संचिट्टइ, तए णं से पिगले णियंठे वेसालीसावए खंदयं कच्चायणस्स-गोत्तं दोचर्चपि तच्चर्चपि इणमक्खेवं पुच्छे—मागहा ! किं सअंते लोए जाव केण वा मरणेणं मरमाणे जीवे वड्डइ वा हायइ वा ? एतावं ताव आइक्खाहि वुच्चमाणे एवं, तए णं से खंदए कच्चा० गोत्ते पिगलएणं णियंठेणं वेसाली-सावएणं दोचर्चपि तच्चर्चपि इणमक्खेवं पुच्छिए समाणे संकिए कंखिए विइ-गिच्छिए भेदसमावण्णे कलुसमावण्णे णो संचाएइ पिगलयस्स णियंठस्स वेसालि-सावयस्स किंचिवि पमोक्खमक्खाइउं तुसिणीए संचिट्टइ । तए णं सावत्थीए णयरीए सिघाडग जाव महापहेसु महया जणसंमद्देइ वा जणवूहे इ वा परिसा णिगच्छइ । तए णं तस्स खंदयस्स कच्चायणस्सगोत्तस्स बहुजणस्स अंतिए एयमट्ठं सोच्चा णिसम्म इमेयारूखे अब्भत्थिए चितिए पत्थिए मणोगए संकप्पे समुप्पज्जित्था—एवं खलु समणे भगवं महावीरे कयंगलाए णयरीए बहियाल्लत्तपलासए चेइए संजमेणं तवसा अप्पाणं भावेमाणे विहरइ, तं गच्छामि णं समणं भगवं महावीरं वंदामि णमंतामि । सेयं खलु मे समणं भगवं महावीरं वंदित्ता णमंसित्ता सक्कारेत्ता सम्माणित्ता कल्लाणं मंगलं देवयं चेइयं पज्जुवासित्ता इमाइं च णं एयारूवाइं अट्टाइं हेऊइं पसिणाइं कारणाइं पुच्छित्तएत्ति कट्टु एवं संपेहेइ २ जेणेव परिव्वायावसहे तेणेव

उवागच्छइ २ ता तिवंदं च कुंडियं च कंचणियं च करोडियं च भिसियं च
 केसरियं च छण्णालयं च अकुसयं च पवित्तयं च गणेत्तियं च छत्तयं च वाहणाओ
 य पाउयाओ य धाउरत्ताओ य गेण्हइ गेण्हइत्ता परिब्वायावसहाओ पडिणि-
 वल्लमइ पडिणिवल्लमइत्ता तिवंदं कुंडियं कंचणियं करोडियं भिसियं केसरियं छण्णालय-
 अकुसयं पवित्तयं गणेत्तियं हत्थगए छत्तोवाहणसंजुत्ते धाउरत्तवत्थपरिहिए सावत्थीए
 णयरीए मज्झंमज्झेणं णिग्गच्छइ णिग्गच्छइत्ता जेणेव कयंगला णयरी जेणेव
 छत्तपलासए चेइए जेणेव समणे भगवं महावीरे तेणेव पहारेत्थ गमणाए । गोय-
 माइ ! समणे भगवं महावीरे भगवं गोयमं एवं वयासी—दच्छिसि णं गोयमा !
 पुव्वसंगइयं । कहं भंते ! खंदयं णाम, से काहं वा किहं वा केवच्चिरेण वा ?
 एवं खलु गोयमा ! तेणं कालेणं २ सावत्थीणामं णयरी होत्था वण्णओ, तत्थ
 णं सावत्थीए णयरीए गइभात्तिस्स अंतेवासी खंदए णामं कच्चायणस्सगोत्ते
 परिब्वायए परिवसइ तं चेव जाव जेणेव ममं अंतिए तेणेव पहारेत्थ गमणाए,
 से तं अदूरागए बहुसंपत्ते अट्ठाणपडिवण्णे अंतरापहे वट्टइ । अज्जेव णं
 दच्छिसि गोयमा ! भंतेत्ति ! भगवं गोयमे समणं भगवं महावीरं वंदइ णमंसइ २
 एवं वयासी—पहं णं भंते ! खंदए कच्चायणस्सगोत्ते देवानुप्पियाणं अंतिए
 मुंडे भवित्ता अगाराओ अणगारियं पव्वइत्तए ? हंता पभू । जावं च णं
 समणे भगवं महावीरे भगवओ गोयमस्स एयमट्ठं परिक्कहेइ तावं च णं से
 खंदए कच्चायणस्सगोत्ते तं देसं हव्वमागए । तए णं भगवं गोयमे खंदयं कच्चाय-
 णस्सगोत्तं अदूरआगयं जाणित्ता खिप्पामेव अब्भुट्ठेइ २ खिप्पामेव पच्चु-
 वगच्छइ २ जेणेव खंदए कच्चायणस्सगोत्ते तेणेव उवागच्छइ २ ता खंदयं
 कच्चायणस्सगोत्तं एवं वयासी—हे खंदया ! सागयं खंदया ! सुसागयं खंदया !
 अणुरागयं खंदया ! सागयमणुरागयं खंदया ! से णूणं तुमं खंदया ! सावत्थीए
 णयरीए पिगलएणं णियंठेणं वेसालियसावएणं इणमक्खेवं पुच्छिए—मागहा !
 किं सअंते लोए अणंते लोए ? एवं तं चेव जाव जेणेव इहं तेणेव हव्वमागए । से
 णूणं खंदया ! अट्ठे समट्ठे ? हंता अत्थि । तए णं से खंदए कच्चा-
 भगवं गोयमं एवं वयासी—से केस णं गोयमा ! तहारूवे णाणी वा तवस्सी
 वा जेणं तव एस अट्ठे मम ताव रहस्सकडे हव्वमवक्खाए ? जओ णं तुमं
 जाणसि ? तए णं से भगवं गोयमे खंदयं कच्चायणस्सगोत्तं एवं वयासी—एवं खलु

खंदया ! मम धम्मायरिए धम्मोवएसए समणे भगवं महावीरे उप्पण्णणाण-
 दंसणधरे अरहा जिणे केवली तीयपच्चुप्पणमणागयविद्याणए सच्चवणू सच्च-
 दरिसी जेणं ममं एस अट्ठे तव ताव रहस्सकडे हव्वमक्खाए जओ णं अहं
 जाणामि खंदया ! तए णं से खंदए कच्चायणस्सगोत्ते भगवं गोयमं एवं
 वयासी-गच्छामो णं गोयमा ! तव धम्मायरियं धम्मोवएसयं समणं भगवं
 महावीरं वंदामो णमंसामो जाव पज्जुवासामो । अहासुहं देवाणुप्पिया ! मा
 पडिबंधं । तए णं से भगवं गोयमे खंदएणं कच्चायणस्सगोत्तेणं सत्थि जेणेव
 समणे भगवं महावीरे तेणेव पहारेस्स गमणाए । तेणं कालेणं २ समणे भगवं
 महावीरे विद्यट्ठभोई यावि होत्था । तए णं समणस्स भगवओ महावीरस्स
 विद्यट्ठभोइस्स सरीरयं ओरालं सिगारं कत्ताणं सिवं धण्णं मंगल्लं सत्सिरीयं
 अणलं कियविभूसियं लवखणवंजणगुणोववेयं सिरीए अईव २ उवसोभेमाणे
 चिट्ठइ । तए णं से खंदए कच्चायणस्सगोत्ते समणस्स भगवओ महावीरस्स
 विद्यट्ठभोइस्स सरीरयं ओरालं जाव अईव २ उवसोभेमाणं पासइ २ ता हट्ठ-
 तुट्ठचित्तभाणंदिए पीइमणे परमसोमणस्सिए हरिसवसविसप्पमाणहियए जेणेव
 समणे भगवं महावीरे तेणेव उवागच्छइ २ ता समणं भगवं महावीरं तिक्खुत्तो
 आयाह्णिणप्पयाह्णिणं करेइ जाव पज्जुवासइ । खंदयाइ ! समणे भगवं महावीरे
 खंदयं कच्चाय० एवं वयासी-से णूणं तुमं खंदया ! सावस्थीए णयरीए पिगल-
 एणं णियंठेणं वेसालियसावएणं इणमवखेवं पुच्छिए मागहा ! किं सअंते लोए
 अणंते लोए एवं तं चेव जाव जेणेव मम अंतिए तेणेव हव्वमागए, से णूणं
 खंदया ! अयमट्ठे समट्ठे ? हुंता अत्थि, जेविय ते खंदया ! अयमेयाह्वे अञ्ज-
 त्थिए चित्तिए पत्थिए मणोगए संकप्पे समुप्पज्जित्था-किं सअंते लोए अणंते
 लोए ? तस्सवि य णं अयमट्ठे-एवं खलु मए खंदया ! चउट्ठिवहे लोए पण्णते,
 तंजहा-दव्वओ खेत्तओ कालओ भावओ । दव्वओ णं एगे लोए सअंते १, खेत्तओ
 णं लोए असंखेज्जाओ जोयणकोडाकोडीओ आयामच्चिक्खंभेणं असंखेज्जाओ
 जोयणकोडाकोडीओ परिवक्खेवें ५० अत्थि पुण सअंते २, कालओ णं लोए ण
 कयाइ ण आसी ण कयाइ ण भवइ ण कयाइ ण भविससइ भविमुय भवइ
 य भविससइ य धुवे णिइए सासए अबक्खए अद्वए अवट्ठिए णिच्छे, णत्थि पुण से
 अंते ३, भावओ णं लोए अणंता वण्णपज्जवा गंध० रस० फासपज्जवा अणंता

संठाणपज्जवा अणंता गरुयलहुयपज्जवा अणंता अगरुयलहुयपज्जवा, णत्थि पुण से अंते ४ । सेत्तं खंदया ! दच्चओ लोए सअंते खेत्तओ लोए सअंते कालओ लोए अणंते भावओ लोए अणंते । जेवि य ते खंदया ! जाव सअंते जीवे अणंते जीवे, तस्सवि य णं अयमट्ठे—एवं खलु जाव दच्चओ णं एगे जीवे सअंते, खेत्तओ णं जीवे असंखेज्जपएसिए असंखेज्जपएसोगाढे अत्थि पुण से अंते, कालओ णं जीवे ण कयाइ ण आसी जाव णिञ्चे णत्थि पुण से अंते, भावओ णं जीवे अणंता णाणपज्जवा अणंता दंसणप० अणंता चारित्तप० अणंता गरुयलहुयपज्जवा अणंता अगुरुलहुयप० णत्थि पुण से अंते, सेत्तं दच्चओ जीवे सअंते खेत्तओ जीवे सअंते कालओ जीवे अणंते भावओ जीवे अणंते । जेवि य ते खंदया पुच्छा [इमेयारूवे चित्तिए जाव सअंता सिद्धी अणंता सिद्धी, तस्सवि य णं अयमट्ठे खंदया !—मए एवं खलु चउड्विहा सिद्धी प०, तं०—दच्चओ ४ । दच्चओ णं एगा सिद्धी] सअंता खेत्तओ णं सिद्धी पणयालीसं जोयणसयसहस्साइं आयामविक्खंभेणं एगा जोयणकोडी बायालीसं च जोयणसयसहस्साइं तीसं च जोयणसहस्साइं दोण्णि य अउणापण्णजोयणसाए किञ्चि विसेसाहिए परिवखेवेणं अत्थि पुण से अंते, कालओ णं सिद्धी ण कयाइ ण आसी० भावओ य जहा लोयस्स तहा भाणियट्ठ्वा, तत्थि दच्चओ सिद्धी सअंता खे० सिद्धी सअंता का० सिद्धी अणंता भावओ सिद्धी अणंता । जेवि य ते खंदया ! जाव कि अणंते सिद्धे तं चेव जाव दच्चओ णं एगे सिद्धे सअंते, खे० सिद्धे असंखेज्जपएसिए असंखेज्जपएसोगाढे, अत्थि पुण से अंते, कालओ णं सिद्धे साइए अपज्जवसिए णत्थि पुण से अंते, भा० सिद्धे अणंता णाणपज्जवा अणंता दंसणपज्जवा जाव अणंता अगुरुलहुयप० णत्थि पुण से अंते, सेत्तं दच्चओ सिद्धे सअंते खेत्तओ सिद्धे सअंते का० सिद्धे अणंते भा० सिद्धे अणंते । जेवि य ते खंदया ! इमेयारूवे अज्झत्थिए चित्तिए जाव समुप्पज्जित्था—केण वा मरणेणं मरमाणे जीवे वडुइ वा हायइ वा ? तस्सवि य णं अयमट्ठे एवं खलु खंदया ! मए दुविहे मरणे पण्णत्ते, तंजहा—बालमरणे य पंडियमरणे य । से किं तं बालमरणे ? बालमरणे दुवालसविहे प०, तं० बल्यमरणे वसट्टमरणे अंतोसल्लमरणे तठभवमरणे गिरिपडणे तट्टपडणे जलप्पवेसे जलणप्प० विसभवक्खणे सत्थोवाडणे वेहाणसे गिद्धपट्ठे । इच्चेतेणं खंदया ! दुवालसविहेणं बालमरणेणं मरमाणे जीवे

अणंतेहि णेरइयभवग्गहणेहि अप्पाणं संजोएइ तिरियमणुदेव० अणाइयं च णं
अणवयग्गं दीहमद्धं चाउरंतसंसारकंतारं अणुपरियट्टइ, सेत्तं मरमाणे वडुइ २,
सेत्तं बालमरणे । से किं तं पंडियमरणे ? २ दुविहे प०, तं० पाओवगमणे य
भत्तपच्चवखाणे य । से किं तं पाओवगमणे ? २ दुविहे प०, तं०-णीहारिमे
य अणीहारिमे य णियमा अप्पडिवकमे, सेत्तं पाओवगमणे । से किं तं भत्त-
पच्चवखाणे ? २ दुविहे प०, तं०-णीहारिमे य अणीहारिमे य णियमा सपडि-
वकमे, सेत्तं भत्तपच्चवखाणे । इच्चेएणं खंदया ! दुविहेणं पंडियमरणेणं मरमाणे
जीवे अणंतेहि णेरइयभवग्गहणेहि अप्पाणं विसंजोएइ जाव वीईवयइ, सेत्तं
मरमाणे हायइ, सेत्तं पंडियमरणे । इच्चेएणं खंदया ! दुविहेणं मरणेणं मरमाणे
जीवे वडुइ वा हायइ वा ॥ ६० ॥ एत्थं णं से खंदए कच्चायणस्सगोत्ते संबुद्धे
समणं भगवं महावीरं बंदइ णमंसइ २ एवं वयासी-इच्छामि णं भंते ! तुब्भं
अंतिए केवलपणत्तं धम्मं णिसामेत्तए । अहामुहं देवाणुप्पिया ! मा पडिबंधं ।
तए णं समणे भगवं महावीरे खंदयस्स कच्चायणस्सगोत्तस्स तीसे य महइमहा-
लियाए परिसाए धम्मं परिकहेइ, धम्मकहा भाणियव्वा । तए णं से खंदए
कच्चायणस्सगोत्ते समणस्स भगवओ महावीरस्स अंतिए धम्मं सोच्चा णिसम्म
हट्टुट्टे जाव हियए उट्टाए उट्टेइ २ समणं भगवं महावीरं तिक्खुत्तो आया-
हिणं पयाहिणं करेइ २ एवं वयासी-सइहामि णं भंते ! णिग्गंथं पावयणं, पत्ति-
यामि णं भंते ! णिग्गंथं पावयणं, रोएमि णं भंते ! णिग्गंथं पावयणं, अम्भुट्ठेमि
णं भंते ! णिग्गंथं पा०, एवमेयं भंते ! तहमेयं भंते ! अविहमेयं भंते !
असंदिद्धमेयं भंते ! इच्छियमेयं भंते ! पडिच्छियमेयं भंते ! इच्छियपडिच्छिय-
मेयं भंते ! से जहेयं तुब्भे वदहत्ति कट्टु समणं भगवं महावीरं बंदइ णमंसइ २
उत्तरपुरत्थिमं दिसीभायं अवकमइ २ तिवंडं च कुंडियं च जाव धाउरत्ताओ
य एगंते एडेइ २ जेणेव समणे भगवं महावीरे तेणेव उवागच्छइ २ समणं
भगवं महावीरं तिक्खुत्तो आयाहिणं पयाहिणं करेइ करेइत्ता जाव णमंसित्ता
एवं वयासी-आत्ति णं भंते ! लोए पत्ति णं भंते ! लोए आ० प० भं०
लो० जराकरणेण य, से जहाणामए-केइ गाहावई आगारंसि झिययमाणंसि
जे से तत्थ भंडे भवइ अप्पभारे मोल्लगरुए तं गहाय आयाए एगंतमंतं अवक-
मइ, एस मे णित्थारिए समाणे पच्छा पुरा हियाए सुहाए खमाए णित्थेयसाए
आणुगामियत्ताए भविस्सइ, एवामेव देवाणुप्पिया ! मज्झवि आया एगे भंडे

इदं कते पिए मणुणे मणामे थेज्जे वेस्सासिए संमए बहुमए अणुमए भंड-
करंडगसमाणे मा णं सीयं माणं उण्हं मा णं खुहा मा णं पिवासा मा णं चोरा
मा णं वाला मा णं दंसा मा णं भसगा मा णं वाइयपित्तिथसेंभियसंणिवाइय-
विबिहा रोगायंका परीसहोवसग्गा फुसंतु त्ति कट्ठु एस मे णित्थारिए समाणे
परलोयस्स हियाए सुहाए खमाए णीसेसाए आणुंगामियत्ताए भविस्सइ, तं
इच्छामि णं देवाणुप्पिया ! सयमेव पव्वाविद्यं सयमेव मुंडाविद्यं सयमेव सेहा-
विद्यं सयमेव सिवखाविद्यं सयमेव आयारगोयरं विणयवेणइयचरणकरणजाया-
मायावत्तिंयं धम्ममाइक्खयं । तए णं समणे भगवं महावीरे खंदयं कच्च-
यणरसगोत्तं सयमेव पव्वावेइ जाव धम्ममाइक्खइ, एवं देवाणुप्पिया ! गंतव्वं
एवं चिद्वियव्वं एवं णिसीइयव्वं एवं तुयद्वियव्वं एवं भुंजियव्वं एवं भासियव्वं
एवं उट्टाए २ पाणेहिं भूएहिं जीवेहिं सत्तोहिं संजमेणं संजमियव्वं, अस्सि च णं
अट्ठे णो किंचिवि पमाइयव्वं । तए णं से खंदए कच्चायणस्सगोत्ते समणस्स
भगवओ महावीरस्स इमं एयारूवं धम्मियं उवएसं सम्मं संपडिवज्जइ तमाणाए
तह गच्छइ तह चिद्वइ तह णिसीयइ तह तुयद्वइ तह भुंजइ तह भासइ
तह उट्टाए २ पाणेहिं भूएहिं जीवेहिं सत्तोहिं संजमेणं संजमेइ, अस्सि च
णं अट्ठे णो पमायइ । तए णं से खंदए कच्चाय० अणगारे जाए इरियासमिए
भासासमिए एसणासमिए आयाणभंडमत्तणिक्खेवणासमिए उच्चारपासवण-
खेलसिधाणजल्लपरिट्ठावणियासमिए मणसमिए वयसमिए कायसमिए मणगुत्ते
वइगुत्ते कायगुत्ते गुत्ते भुत्तिविए गुत्तबंभयारी चाई लज्ज धण्णे खंतिखमे जिइं-
विए सोहिए अणियाणे अप्पुस्सुए अबहिल्लेस्से सुसामण्णरए दंते इणमेव णिगांथं
पावयणं पुरओ काउं विहरइ ॥ ६१ ॥ तए णं समणे भगवं महावीरे कयंग-
लाओ णयरीओ छत्तपलासयाओ चेइयाओ पडिणिक्वमइ २ बहिया जणवय-
विहारं विहरइ । तए णं से खंदए अणगारे समणस्स भगवओ महावीरस्स तहा-
रूवाणं येराणं अंतिए सामाइयमाइयाइं एक्कारस्स अंगाइं अहिज्जइ २ जेणेव समणे
भगवं महावीरे तेणेव उवागच्छइ २ समणं भगवं महावीरं वंदइ णमंसइ २
एवं वयासी-इच्छामि णं भते ! तुब्भेहिं अब्भणुण्णाए समाणे मासियं भिक्खु-
पडिमं उवसंपज्जित्ता णं विहरित्तए । अहामुहं देवाणुप्पिया ! मा पडिबंधं ।
तए णं से खंदए अणगारे समणेणं भगवया महावीरेणं अब्भणुण्णाए समाणे
हट्ठे जाव णमंसित्ता मासियं भिक्खुपडिमं उवसंपज्जित्ता णं विहरइ । तए णं

से खंदए अणगारे मासियं भिक्खुपडिमं अहामुत्तं अहाकप्पं अहामग्गं अहातच्चं
 अहासम्मं काएण फासेइ पालेइ सोभेइ तीरेइ पूरेइ किट्टेइ अणुपालेइ आणाए
 आराहेइ संमं काएण फासित्ता जाव आराहेत्ता जेणेव समणे भगवं महावीरे
 तेणेव उवागच्छइ २ समणं भगवं जाव णमंसित्ता एवं वयासी-इच्छामि णं
 भंते ! तुव्भेहिं अढभणुणाए समाणे दोमासियं भिक्खुपडिमं उवसंपज्जित्ता णं
 विहरित्तए, अहामुहं देवाणुप्पिया ! मा पडिबंधं, तं चेव । एवं तेमासियं चाउ-
 म्मासियं पंचछसत्तमा०, पढमं सत्तराईदियं दोच्चं सत्तराईदियं तच्चं सत्तरा-
 इदियं अहोराईदियं एगरा० । तए णं से खंदए अणगारे एगराईदियं भिक्खु-
 पडिमं अहामुत्तं जाव आराहेत्ता जेणेव समणे० तेणेव उवागच्छइ २ समणं
 भगवं म० जाव णमंसित्ता एवं वयासी-इच्छामि णं भंते ! तुव्भेहिं अढभणुणाए
 समाणे गुणरयणसंवच्छरं तवोकम्मं उवसंपज्जित्तं णं विहरित्तए । अहामुहं
 देवाणुप्पिया ! मा पडिबंधं । तए णं से खंदए अणगारे समणेणं भगवया महा-
 वीरेणं अढभणुणाए समाणे जाव णमंसित्ता गुणरयणसंवच्छरं तवोकम्मं उव-
 संपज्जित्ता णं विहरइ, तं०-पढमं मासं चउत्थंचउत्थेणं अणिक्लित्तेणं तवो-
 कम्मेणं दिया ठाणुककुडुए सूराभिमुहे आयावणभूमीए आयावेमाणे रत्ति वीरा-
 सणेणं अवाउडेण य । एवं दोच्चं मासं छट्ठंछट्ठेणं अणिक्लित्तेणं तवोकम्मेणं
 दिया ठाणुककुडुए सूराभिमुहे आयावणभूमीए आयावेमाणे रत्ति वीरासणेणं
 अवाउडेण य, एवं तच्चं मासं अट्ठमंअट्ठमेणं चउत्थं मासं दसमंदसमेणं पंचमं मासं
 बारसमंबारसमेणं छट्ठं मासं चउत्थमंचउत्थमेणं सत्तमं मासं सोलसमं २ अट्ठमं
 मासं अट्ठारसमं २ णवमं मासं वीसइमं २ दसमं मासं बावीसं २ एवकारसमं
 मासं चउत्थवीसइमं २ बारसमं मासंछवीसइमं २ तेरसमं मासं अट्ठावीसइमं २
 चउत्थसमं मासं तीसइमं २ पण्णरसमं मासं बत्तीसइमं २ सोलसमं मासं चोत्ती-
 सइमं २ अणिक्लित्तेणं तवोकम्मेणं दिया ठाणुककुडुए सूराभिमुहे आयावण-
 भूमीए आयावेमाणे रत्ति वीरासणेणं अवाउडेणं । तए णं से खंदए अणगारे
 गुणरयणसंवच्छरं तवोकम्मं अहामुत्तं अहाकप्पं जाव आराहेत्ता जेणेव समणे
 भगवं महावीरे तेणेव उवागच्छइ २ समणं भगवं महावीरं वंदइ णमंसइ २
 बर्हीहं चउत्थछट्ठमदसमदुवालसेहिं मासद्धमासखमणेहिं विचित्तीहिं तवोकम्मेहिं
 अप्पाणं भावेमाणे विहरेइ । तए णं से खंदए अणगारे तेणं ओरालेणं विउलेणं

पयत्तेणं पगाहिएणं कत्ताजेणं सिवेणं घण्णेणं मंगल्लेणं सस्सिरीएणं उदग्गेणं उदत्तेणं उत्तमेणं उदारेणं महाणुभागेणं तवोकम्मेणं सुक्के लुक्खे णिम्मंसे अट्ठि-
 वम्मावणद्धे किडिकिडियाभूए किसे धमणिसंतए जाए यावि होत्था, जीव-
 ञ्जीवेण गच्छइ जीवञ्जीवेण चिट्ठइ भासं भामित्तावि गिलाइ भासं भासभाणे
 गिलाइ भासं भासिरसामीइ गिलायइ, से जहा णामए—कट्टसगडिया इ वा पत्त-
 सगडिया इ वा पत्ततिलभङ्गसगडिया इ वा एरंडकट्टसगडिया इ वा इंगाल-
 सगडिया इ वा उण्हे दिण्णा सुक्का समाणी ससद्दं गच्छइ ससद्दं चिट्ठइ एवामेव
 खंदएवि अणगारे ससद्दं गच्छइ ससद्दं चिट्ठइ उवच्चिए तवेणं अवच्चिए मंस-
 सीणिएणं ह्यासणेविव भासरासिपडिच्छण्णे तवेणं तेएणं तवतेयसिरीए अईव २
 उवसोभेमाणे २ चिट्ठइ ॥ ६२ ॥ तेणं कालेणं २ रायगिहे णयरे जाव समो-
 सरणं जाव परिसा पडिगया । तए णं तस्स खंदयस्स अण० अण्णया कथाइ
 पुट्टवरत्तावरत्तकालसमयंसि धम्मजागरियं जागरमाणस्स इमेयारूवे अज्झत्थिए
 चित्तिए जाव समुप्पडिजत्था—एवं खलु अहं इमेणं एयारूवेणं ओरालेणं जाव
 किसे धमणिसंतए जाए जीवञ्जीवेणं गच्छामि जीवञ्जीवेणं चिट्ठामि जाव गिलामि
 जाव एवामेव अहंपि ससद्दं गच्छामि ससद्दं चिट्ठामि तं अत्थि ता मे उट्टाणे
 कम्मे बले वीरिए पुरिसक्कारपरक्कमे तं जाव ता मे अत्थि उट्टाणे कम्मे बले
 वीरिए पुरिसक्कारपरक्कमे जाव य मे धम्मायरिए धम्मोवएसए समणे भगवं
 महावीरे जिणे सुहृत्थो विहरइ ताव ता मे सेयं कल्लं पाउप्पभायाए रयणीए
 फुल्लुप्पलकमलकोमलुम्मिल्लियंमि अहापंडुरे पभाए रत्तासोयप्पकासकिंसुय-
 सुयमहुंज्जद्वारागसरिसे कमलागरसंडबोहए उट्ठियंमि सूरे सहस्सरस्सिमि दिण-
 यरे तेयसा जलंते समणं भगवं महावीरं वंदित्ता जाव पज्जुवासित्ता समणेणं
 भगवया महावीरेणं अब्भणुणाए समाणे सयमेव पंच महद्वयाणि आरोवेत्ता
 समणा य समणीओ य लामेत्ता तहारूवेहिं थेरेहिं कडाईहिं सद्धिं चिपुलं पव्वयं
 सणियं २ दुरूहिता मेहघणसण्णिगासं देवसण्णिवायं पुढवीसिलावट्टयं पडिलेहिंत्ता
 दब्भसंथारयं संथरित्ता दब्भसंथारोवगयस्स संलेहणाञ्जसणाञ्जसियस्स भत्तपाण-
 पडियाइक्खियस्स पाओवगयस्स कालं अणवकंलमाणस्स विहरित्तए त्ति कट्टु
 एवं संपेहेइ २ ता कल्लं पाउप्पभायाए रयणीए जाव जलंते जेणेव समणे भग०
 जाव पज्जुवासइ । खंदयाइ ! समणे भगवं महावीरे खंदयं अणगारं एवं वयासी—

से पूर्णं तव खंदया ! पुव्वरत्तावरत्तकालस० जाव जागरमाणस्स इमेयारूवे
 अज्झत्थिए जाव समुप्पज्जित्था—एवं खलु अहं इमेणं एयारूवेणं तवेणं ओरा-
 लेणं विउलेणं तं जेव जाव कालं अणवकंखमाणस्स विहरित्तए त्ति कट्टु एवं
 संपेहेइ २ कत्तं पाउप्पभायाए जाव जलंते जेणेव मम अंतिए तेणेव हव्वमागए,
 से पूर्णं खंदया ! अट्ठे समट्ठे ? हंता अत्थि । अहामुहं देवाणुप्पिया ! मा
 पडिबंधं ॥ ६३ ॥ तए णं से खंदए अणगारे समणेणं भगवया महावीरेणं
 अबभणुष्णाए समाणे हट्टतुट्टु जाव हयहियए उट्टाए उट्ठेइ २ समणं भगवं महा०
 तिवक्खुत्तो आयाहिणं पयाहिणं करेइ २ जाव णमंसित्ता सयमेव पंच महव्वयाइं
 आरूहेइ २ ता समणाय समणीओ यी खामेइ २ ता तहारूवेहिं थेरैहिं कडाईंहिं
 सद्धिं विपुलं पव्वयं सणियं २ दुरूहेइ मेहघणसण्णिगासं देवसण्णिवायं पुढविस्सिला-
 वट्टयं पडिलेहेइ २ उच्चारपासवणभूमि पडिलेहेइ २ दब्भसंथारयं संथरइ २ ता
 पुरत्थाभिमुहे संपलियंकणिसण्णे करयलपरिग्गहियं दसणहं सिरसावत्तं मत्थए
 अंजलिं कट्टु एवं वयासी—णमोऽत्थु णं अरहंताणं भगवंताणं जाव संपत्ताणं,
 णमोऽत्थु णं समणस्स भगवओ म० जाव संपाविउकामस्स, वंदामि णं
 भगवंतं तत्थ गयं इहगए, पासउ मे भयवं तत्थगए इहगयं त्ति कट्टु वंदइ णमं-
 सइ २ एवं वयासी—पुंन्विपि मए समणस्स भगवओ महावीरस्स अंतिए सव्वे
 पाणाइवाए पच्चक्खाए जावज्जीवाए जाव मिच्छादंसणसल्ले पच्चक्खाए
 जावज्जीवाए इयारिणपि य णं समणस्स भ० म० अंतिए सव्वं पाणाइवायं
 पच्चक्खामि जावज्जीवाए जाव मिच्छादंसणसल्लं पच्चक्खामि, एवं सव्वं
 असणं पाणं खा० सा० चउट्ठिव्हंपि आहारं पच्चक्खामि जावज्जीवाए, जंयि
 य इमं सरीरं इट्ठं कंतं पियं जाव फुसंतु त्ति कट्टु एयंपि णं चरिमेहिं
 उस्सासणीसासेहिं वोसिरामि त्ति कट्टु संलेहणाइसणाइसिए भत्तपाणपडि-
 याइक्खिए पाओवगए कालं अणवकंखमाणे विहरइ । तए णं से खंदए अण०
 समणस्स भ० म० तहारूवाणं थैराणं अंतिए सामाइयमाइयाइं एक्कारस अंगाइं
 अहिज्जित्ता बहुपडिपुष्णाइं दुवालसवासाइं सामण्णपरियागं पाउणित्त मासि-
 याए संलेहणाए अत्ताणं झूसित्ता सद्धिं भत्ताइं अणसणाए छेदेत्ता आलोइय-
 पडिबकंते समाहिपत्ते आणुपुक्खीए कालगए ॥ ६४ ॥ तए णं ते थैरा भगवंतो
 खंदयं अण० कालगयं जाणित्ता परिणिव्वाणवत्तियं काउस्सागं करंति २

पत्तचोवराणि गिण्हंति २ विपुलाओ पव्वयाओ सणियं २ पच्चोसहंति २ जेणेव समणे भगवं म० तेजेव उवा० समणं भगवं म० वंदंति णमंसंति २ एवं वयासी-एवं खलु देवाणुप्पियाणं अंतेवासी खंदए णामं अणगारे पगइभदए पगइ-विणीए पगइउवसते पगइउयमुहोहमागमायाजोमे मिउमद्वसंपण्णे अल्लीणे भदए विणीए, से णं देवाणुप्पिएहिं अब्भणुण्णाए समाणे सयमेव पंच महव्वयाणि आरोविस्ता समणा य समणोओ य खामेता अरुहेहिं सिद्धि विपुलं पव्वयं तं चेव णिरवसेलं जाव आणुपुव्वीए काल्गाए इमे य से आयासंइए । भंते ! त्ति भगवं गोयमे समणं भगवं म० वंदइ णमंसइ २ एवं वयासी-एवं खलु देवाणुप्पियाणं अंतेवासी खंदए णामं अण० कालमासे कालं किच्चा कीहं गए ? कीहं उववण्णे ? गोयमाइ ! समणे भगवं महा० भगवं गोयमं एवं वयासी-एवं खलु गोयमा ! मम अंतेवासी खंदए णामं अणगारे पगइभ० जाव से णं भए अब्भणुण्णाए समाणे सयमेव पंच महव्वयाइं आरुहेत्ता तं चेव सव्वं अविसेसियं पेयव्वं जाव आलोइयपडिक्कते समाहिपत्ते कालमासे कालं किच्चा अञ्चुए कप्पे देवत्ताए उववण्णे । तत्थ णं अत्थेगइयाणं देवाणं बावीसं सागरोवमाइं ठिई प०, तस्स णं खंदयस्सवि देवस्स बावीसं सागरोवमाइं ठिई प० । से णं भंते ! खंदए, देवे ताओ देवलोयाओ आउक्खएणं भक्खएणं ठिइक्खएणं अणंतरं चयं चइत्ता कीहं गच्छिहिइ ? कीहं उववज्जिहिइ ? गोयमा ! महाविदेहे वासे सिज्जिहिइ बुज्जिहिइ मुच्चिहिइ परिणिव्वाहिइ सव्वदुक्खाणमंतं करेहिइ ॥६५॥ खंदओ समत्तो ॥

बीयं सयं बीओ उद्देसो

कइ णं भंते ! समुग्घाया पण्णत्ता ? गोयमा ! सत्त समुग्घाया पण्णत्ता, संजहा-वेयणासमुग्घाए एवं समुग्घायपयं छाउमत्तियसमुग्घायवज्जं भाणियव्वं, जाव वेमाणियाणं कसयसमुग्घाया अप्पावहुयं । अणगारस्स णं भंते ! भाविप्यणो केवत्तिसमुग्घाए जाव सासयमणागयदं चिट्ठंति ? समुग्घायपयं पेयव्वं ॥६६॥

बीयं सयं तइओ उद्देसो

कइ णं भंते ! पुढवीओ पण्णत्ताओ ? जीवाभिगमे णेरइयाणं जो बिइओ

उद्देसो सो णेयव्वो, पुढवि ओगाहिता णिरया संठाणमेव बाहल्लं । [जिवल्लंमपरि-
दखेवो वण्णो गंधो य फासो य ॥ १ ॥] जाव किं सव्वपाणा उववण्णपुव्वा ?
हंता गोयमा ! असइं अदुवा अणंतखुत्तो ॥६७॥ पुढवी उद्देसो ॥

बीयं सयं चउत्थो उद्देसो

कइ णं भंते ! इंदिया पण्णत्ता ? गोयमा ! पंचिदिया पण्णत्ता, तंजहा-
पढमिल्लो इंदियउद्देसो णेयव्वो, संठाणं बाहल्लं पोहत्तं जाव अलोगो ॥६८॥
इंदियउद्देसो ॥

बीयं सयं पंचमो उद्देसो

अण्णउत्थिया णं भंते ! एवमाइक्खति भासंति पण्णवेति परूवेति, तंजहा-
एवं खलु णियंठे कालगए समाणे देवम्भूएणं अप्पाजेणं से णं तत्थ णो अण्णे
देवे णो अण्णेसिं देवाणं देवीओ अहिजुंजिय २ परियारेइ १ णो अप्पणिच्चि-
याओ देवीओ अभिजुंजिय २ परियारेइ २ अप्पणामेव अप्पाणं चित्थिविय २
परियारेइ ३ एगेविय णं जीवे एगेणं समएणं दो वेवे, वेएइ, तंजहा-इत्थिवेयं
च पुरिसवेयं च, एवं परउत्थियक्खव्वया णेयव्वा जाव इत्थिवेयं च पुरिसवेयं
च । से कहमेयं भंते ! एवं ? गोयमा ! जण्णं ते अण्णउत्थिया एवमाइक्खति
जाव इत्थिवेयं च पुरिसवेयं च, जे ते एवमाहंसु मिरुच्छं ते एवमाहंसु । अहं पुण
गोयमा ! एवमाइक्खामि भा० प० परू०-एवं खलु णियंठे कालगए समाणे
अण्णयरेसु देवलोएसु देवत्ताए उववत्तारो भवन्ति महिड्डिएसु जाव महाणु-
भागेसु दूरगईसु चिरद्विईएसु । से णं तत्थ देवे भवइ महिड्डिए जाव दस
दिसाओ उज्जोवेमाणे पभासेमाणे जाव पडिरूवे । से णं तत्थ अण्णे देवे
अण्णेसिं देवाणं देवीओ अभिजुंजिय २ परियारेइ १ अप्पणिच्चिद्याओ देवीओ
अभिजुंजिय २ परियारेइ २ णो अप्पणामेव अप्पाणं चित्थिविय २ परि-
यारेइ ३, एगेविय णं जीवे एगेणं समएणं एगं वेयं वेएइ, तंजहा-इत्थि-
वेयं वा पुरिसवेयं वा, जं समयं इत्थिवेयं वेएइ णो तं समयं पुरिसवेयं वेएइ
जं समयं पुरिसवेयं वेएइ णो तं समयं इत्थिवेयं वेएइ, इत्थिवेयस्स उदएणं
णो पुरिसवेयं वेएइ, पुरिसवेयस्स उदएणं णो इत्थिवेयं वेएइ, एवं खलु
एगे जीवे एगेणं समएणं एगं वेयं वेएइ, तंजहा-इत्थीवेयं वा पुरिसवेयं वा,

इत्थी इत्थिवेएणं उदिण्णेणं पुरिसं पत्थेइ, पुरिसो पुरिसवेएणं उदिण्णेणं इत्थि
 पत्थेइ, दोवि ते अण्णमण्णं पत्थेति, तंजहा—इत्थी वा पुरिसं पुरिसे वा इत्थि
 ॥ ६६ ॥ उदगगम्भे णं भंते ! उदगगम्भेत्ति कालओ केवच्चिरं होइ ?
 गोयमा ! जहण्णेणं एक्कं समयं उक्कोसेणं छम्मासा । तिरिक्खजोणियगम्भे
 णं भंते ! तिरिक्खजोणियगम्भेत्ति कालओ केवच्चिरं होइ ? गोयमा ! जहण्णेणं
 अंतोमुहुत्तं उक्कोसेणं अट्ट संवच्छराइं । मणुस्सीगम्भे णं भंते ! मणुस्सीगम्भेत्ति
 कालओ केवच्चिरं होइ ? गोयमा ! जहण्णेणं अंतोमुहुत्तं उक्कोसेणं बारस
 संवच्छराइं ॥ १०० ॥ कायभवत्थे णं भंते ! कायभवत्थेत्ति कालओ केवच्चिरं
 होइ ? गोयमा ! जहण्णेणं अंतोमुहुत्तं उक्कोसेणं चउव्वीसं संवच्छराइं ॥ १०१ ॥
 मणुस्सपच्चैदियतिरिक्खजोणियव्वीए णं भंते ! जोणियव्वभूए केवइयं कालं
 सच्चिट्ठइ ? गोयमा ! जहण्णेणं अंतोमुहुत्तं उक्कोसेणं बारस मुहुत्ता ॥ १०२ ॥
 एगजीवे णं भंते ! एगभवग्गहणेणं केवइयाणं पुत्तत्ताए हव्वमागच्छइ ?
 गोयमा ! जहण्णेणं इक्कस्स वा दोण्हं वा तिण्हं वा, उक्कोसेणं सयपुहुत्तस्स
 जीवाणं पुत्तत्ताए हव्वमागच्छइ ॥ १०३ ॥ एगजीवस्स णं भंते ! एगभवग्गह-
 णेणं केवइया जीवा पुत्तत्ताए हव्वमागच्छति ? गोयमा ! जहण्णेणं एक्को वा
 दो वा तिण्णि वा, उक्कोसेणं सयसहस्सपुहुत्तं जीवा णं पुत्तत्ताए हव्वमागच्छति ।
 से केणट्ठेणं भंते ! एवं वुच्चइ—जाव हव्वमागच्छति ? गोयमा ! इत्थीए य
 पुरिसस्स य कम्मकडाए जोणीए मेहुणवत्तिए णामं संजोए समुप्पज्जइ, ते दुहओ
 सिण्हेहं सच्चिणंति २ तत्थ णं जहण्णेणं एक्को वा दो वा तिण्णि वा उक्कोसेणं
 सयसहस्सपुहुत्तं जीवाणं पुत्तत्ताए हव्वमागच्छति, से तेणट्ठेणं जाव हव्वमा-
 गच्छति ॥ १०४ ॥ मेहुणे णं भंते ! सेवमाणस्स केरिसिए असंजमे कज्जइ ?
 गोयमा ! से जहाणामए केइ पुरिसे रूयणालियं वा बूरणालियं वा तत्तेणं
 कणएणं समभिधंतेज्जा एरिसए णं गोयमा ! मेहुणं सेवमाणस्स असंजमे कज्जइ ।
 सेवं भंते ! सेवं भंते ! जाव विहरइ ॥ १०५ ॥ तए णं समणे भगवं महावीरे
 रायगिहाओ णयराओ गुणसिलाओ चेइयाओ पडिणिवत्तमइ २ बहिया जण-
 वयविहारं विहरइ । तेणं कालेणं २ तुंगिया णामं णयरी होत्था वण्णओ, तीसे
 णं तुंगियाए णयरीए बहिया उत्तरपुरत्थियमे दिसीमाए पुण्फवइए णामं चेइए
 होत्था, वण्णओ । तत्थ णं तुंगियाए णयरीए बहवे समणोवासया परिवसंति अट्टा

विंता विद्विथ्णविपुलभवणसथणासणजाणवाहणाइण्णा बहुधणबहुजायरुवरयया
 आयोगपयोगसंवउत्ता दिच्छट्टियविपुलभत्तपाणा बहुदासीदासगोमहिंसगवेत्तयप्प-
 भूया बहुजणस्स अपरिभूया अभिगयजीवाजीवा उवत्तद्वपुण्णपावा आसवत्तंवर-
 णिज्जरक्किरियाहिवरणबंधमोक्खकुसला असहेज्जदेवासुरणागमुवण्णजवत्तरक्ख-
 सकिणरत्किपुरिसगरुलगंधव्वमहोरगाइएहि देवगणेहि णिगंथाओ पावयणाओ
 अणत्तिवकमणिज्जा णिगंथे पावयणे णिरसंकिया णिवक्कत्तिया णिव्वित्तिगिज्जा
 लद्धट्टा गहियट्टा पुच्छियट्टा अभिगयट्टा विणिच्छियट्टा अट्ठिंमिजपेम्माणुरागरत्ता
 अयमाउत्तो ! णिगंथे पावयणे अट्ठे अयं परंमट्ठे सेसे अणट्ठे ऊत्तियफलिहा
 अवंग्युदुवारा चियत्ततेउरघरप्पवेसा' बहूहि सीलव्वयगुणवेरमणदञ्चक्खण-
 पोसहोववासेहि, चाउइसट्टमुद्दिट्टपुण्णमासिणीसु पडिपुण्णं दोसहं सम्मं अणु-
 पालेमाणा समणे णिगंथे फासुएसणिज्जेणं असणयाणखाइमसाइमेणं वत्थपडि-
 गहकंबलपायपुंछणेणं पीढफलगसेज्जासंधारएणं ओसहभेसज्जेण य पडिलाभे-
 माणा अहापडिगहिएहि तवोकम्मैहि अप्पाणं भावेमाणा विहरंति ॥ १०६ ॥
 तेणं कालेणं २ पासवच्चिज्जा थेरा भगवंतो जाइसंपण्णा कुलसंपण्णा बल-
 संपण्णा रुवसंपण्णा विणयसंपण्णा णाणसंपण्णा दंसणसंपण्णा चरित्तसंपण्णा
 लज्जासंपण्णा लाघवसंपण्णा ओयंसी तेयंसी वचवंसी जसंसी जियकोहा जिय-
 माणा जियलोहा जियणिट्टा जिइदिया जियररीसहा जीवियासमरणभयविप्प-
 मुक्का जाव कुत्तियावणभूया बहुस्सुया बहुपरिवारा पंचहि अणगारसएहि सद्धि
 संपरिवुडा अहाणुपुट्ठिं चरमाणा गामाणुगामं दूइज्जमाणा सुहंसुहेणं विहरमाणा
 जेणेव तुंगिया णयरी जेणेव पुप्फवईए चेइए तेणेव उवागच्छंति २ अहापडिह्वं
 उगहं उगिण्हित्ता णं संजमेणं तवसा अप्पाणं भावेमाणा विहरंति ॥ १०७ ॥
 तए णं तुंगियाए णयरौए सिंघाडगतिगचउक्कचच्चरमहापहपहेसु जाव एगदिसा-
 भिसुहा णिज्जार्यंति । तए णं ते समणोवासया इमीसे कहाए लद्धट्टा समाणा
 हट्टुट्टा जाव सद्धवेत्ति २ एवं तयासी-एवं खलु देवाणुपिया ! पासावच्चेज्जा
 थेरा भगवंतो जाइसंपण्णा जाव अहापडिह्वं उगहं उगिण्हित्ता णं संजमेणं
 तवसा अप्पाणं भावेमाणा विहरंति, तं महाफलं खलु देवाणुपिया ! तहारुवाणं
 थेराणं भगवंताणं णामगोयस्सवि सवणयाए किमंग पुण अभिगमणवंदणणभं-
 सणपडिपुच्छणपज्जुवासणयाए ? जाव गहणयाए ? तं गच्छामो णं देवा-

णुशिया ! थेरे भगवते वंदामो णमंसामो जाव पञ्जुवासामो, एयं णं इह भवे वा परभवे वा जाव आणुगामियत्ताए भविस्सईतिकट्टु अणमणस्स अंतिए एयमठं पडिमुणेति २ जेणेव सयाइं २ गिहाइं तेणेव उवागच्छति २ र्हाया कयबालकम्मा कयकोउय मंगल-पायच्छिता सुद्धप्पावेसाइं मंगलाइं वत्थाइं पवराइं परिहिया अप्पमहग्घाभरणालकियसरोरा सएहि २ गेहेहिं तो पडिणिवत्त-मंति २ ता एग्घओ मेलायंति २ पायविहारचारेणं तुंगियाए णयरोए मज्झं-मज्जेणं णिगच्छति २ जेणेव पुप्फवइए चेइए तेणेव उवागच्छति २ थेरे भगवते पंचविहेणं अभिगमेणं अभिगच्छति, तंजहा—सच्चित्तानं दब्बाणं विउसरणयाए १ अचित्तानं दब्बाणं अविउसरणयाए २ एगसाडिएणं उत्तरासंगकरणेणं ३ चक्खु-प्फासे अंजलिप्पग्गहेणं ४ मणसो एगत्तीकरणेणं ५ जेणेव थेरा भगवंतो तेणेव उवागच्छति २ तिव्वुत्तो आयाहिणं पयाहिणं करेति २ जाव तिविहाए पञ्जु-वासणाए पञ्जुवासंति ॥ १०८ ॥ तए णं ते थेरा भगवंतो तेसि समणोवासयाणं तीसे य महइमहालियाए चाउज्जामं धम्मं परिकहेति जहा केसिसाभिस्स जाव समणोवासियत्ताए आणाए आराहए भवंति जाव धम्मो कहिओ । तए णं ते समणोवासया थेराणं भगवन्ताणं अंतिए धम्मं सोच्चा णिसम्म हट्टु तुट्टु जाव ह्यहियया तिव्वुत्तो आयाहिणप्पयाहिणं करेति २ जाव तिविहाए पञ्जुवास-णाए पञ्जुवासंति २ एवं वयासी—संजमे णं भंते ! किफले ? तवे णं भंते ! किफले ? तए णं ते थेरा भगवंतो ते समणोवासए एवं वयासी—संजमे णं अज्जो ! अण्हयफले तवे वोदाणफले । तए णं ते समणोवासया थेरे भगवते एवं वयासी—जइ णं भंते ! संजमे अण्हयफले तवे वोदाणफले किपत्तियं णं भंते ! देवा देवलोएसु उववज्जंति ? तत्थ णं कालियपुत्ते णामं थेरे ते समणोवासए एवं वयासी—पुव्वतवेणं अज्जो ! देवा देवलोएसु उववज्जंति, तत्थ णं मेहिले णामं थेरे ते समणोवासए एवं वयासी—पुव्वसंजमेणं अज्जो ! देवा देवलोएसु उव-वज्जंति । तत्थ णं आणंदरक्खिए णामं थेरे ते समणोवासए एवं वयासी—कम्मि-याए अज्जो ! देवा देवलोएसु उववज्जंति । तत्थ णं कासवे णामं थेरे ते सम-णोवासए एवं वयासी—संगियाए अज्जो ! देवा देवलोएसु उववज्जंति । पुव्व-तवेणं पुव्वसंजमेणं कम्मियाए संगियाए अज्जो ! देवा देवलोएसु उव-वज्जंति । सच्चे णं एस अट्ठे णो चेव णं आयभाववत्तव्वयाए । तए णं ते सम-

गोवासया थेरेहि भगवतेहि इमाइं एयारूवाइं वागरणाइं वागरिया समाणा
 हट्टुट्टा थेरे भगवते वंदति णमंसति २ पसिणाइं पुच्छति २ अट्टाइं उवादिपति
 २ उट्टाइं उट्ठेति २ थेरे भगवते तिक्खुत्तो वंदति णमंसति २ थेराणं भगवं
 अंतियाओ पुप्फवइयाओ चेइयाओ पडिणिक्खमंति २ जामेव दिंसि पाउ-
 ष्ठया तामेव दिंसि पडिगया । तए णं ते थेरा अण्णया कयाइं तुंगियाओ
 पुप्फवइचेइयाओ पडिणिग्गच्छति २ बहिया जणव्यविहारं विहरंति ॥ १०६ ॥
 तेणं कालेणं २ राथगिहे णामं णयरे जाव परिसा पडिगया । तेणं कालेणं २ सम-
 णस्स भगवओ महावीरस्स जेट्ठे अंतेवासी इंदभूर्इणांमं अणगारे जाव संखित्त-
 विउलतेयलेस्से छट्ठंछट्ठेणं अणिक्खित्तेणं तवोकम्मेणं संजमेणं तवसा अप्पणं
 भावेभाणे जाव विहरइ । तए णं ते भगवं गोयमे छट्ठवखमणपारणगंसि पढमाए
 पोरिसीए सज्जायं करेइ बीयाए पोरिसीए ज्ञाणं शिष्यायइ तइयाए पोरिसीए
 अतुरियमचवलमसंभंते मुहपोसियं पडिलेहेइ २ भायणाइं वत्थाइं पडिलेहेइ २
 भायणाइं पमज्जइ २ भायणाइं उग्गाहेइ २ जेणेव समणे भगवं महावीरे तेणेव
 उवागच्छइ २ समणं भगवं महावीरं वंदइ णमंसइ २ एवं वयासी-इच्छामि णं
 भंते ! तुवभेहिं अब्भणुष्णाए छट्ठक्खमणपारणगंसि रायगिहे णयरे उच्चणीय-
 मज्झिमाइं कुलाइं घरसमुदाणस्स भिक्खायरियाए अडित्तए । अहासुहं देवाणु-
 ण्पिया ! मा पडिबंध्यं । तए णं भगवं गोयमे समणेणं भगवया महावीरेणं अब्भ-
 णुष्णाए समणे समणस्स भगवओ महावीरस्स अंतियाओ गुणसिलाओ चेइ-
 याओ पडिणिक्खमइ २ अतुरियमचवलमसंभंते जुगंतरपलोयणाए दिट्ठीए
 पुरओ रिपं सोहेभाणे २ जेणेव रायगिहे णयरे तेणेव उवागच्छइ २ रायगिहे
 णयरे उच्चणीयमज्झिमाइं कुलाइं घरसमुदाणस्स भिक्खायरियं अडइ । तए णं
 ते भगवं गोयमे रायगिहे णं जाव अडमाणे बहुजणसहं णिसामेइ-एवं खत्तु
 देवाणुण्पिया ! तुंगियाए णयरीए बहिया पुप्फवईए चेइए पासावच्चिज्जा थेरा
 भगवंतो समणोवासएहि इमाइं एयारूवाइं वागरणाइं पुच्छिया-संजमे णं भंते !
 किफले ? तवे णं भंते ! किफले ? तए णं ते थेरा भगवतो ते समणोवासए
 एवं वयासी-संजमे णं अज्जो ! अणह्यफले तवे वीदाणफले तं चेव जाव
 पुव्वतवेणं पुव्वसंजमेणं कम्मियाए संगियाए अज्जो ! देवा देवलोएमु उव-
 वज्जंति, सच्चे णं एसमट्ठे णो चेव णं आयभाववत्तव्वयाए । से कहमेयं मण्णे
 एवं ? तए णं समणे० गोयमे इमीसे कहाए लद्धट्ठे समाणे जायसट्ठे जाव

समुष्णकोउहृत्ले अहापउज्जत्तं समुदाणं गेण्हइ २ रायगिहाओ णयराओ पडि-
 णिक्खमइ २ अंतुरियं जाव सोहेमाणे जेणेव गुणसिए चेइए जेणेव समणे
 भग्गं महावीरे तेणेव उवा० सम० भ० महावीरस्स अडूरसामंते गमणागमणाए
 पडिक्कमइ एसणमणेसणं आलोएइ २ भत्तपाणं पडिदंसेइ २ समणं भ० महा-
 वीरं जाव एवं वयासी-एवं खलु भंते ! अहं तुळ्भोहिं अरुभणुण्णाए समाणे
 रायगिहे णयरे उच्चत्तीयमज्झिमाइं कुलाइं घरसमुदाणस्स भिक्खायरियाए
 अइमाणे बहुजणसहं णिसामेभि एवं खलु देवा० तुंगियाए णयरीए बहिया
 पुफ्फवईए चेइए पासावच्चिज्जा थेरा भगवंतो समणोवासएहिं इमाइं एया-
 रूवाइं वागरणाइं पुच्छिया-संजमे णं भंते ! किफले ? तवे किफले ? तं चेव
 जाव सच्चे णं एसमट्ठे णो चेव णं आयभाववत्तव्वयाए । तं पभू णं भंते !
 ते थेरा भगवंतो तेसिं समणोवासयाभं इमाइं एयारूवाइं वागरणाइं वागरित्तए
 उदाहु अप्पभू ? समिया णं भंते ! ते थेरा भगवंतो तेसिं समणोवासयाणं इमाइं
 एयारूवाइं वागरणाइं वागरित्तए उदाहु असमिया ? आउज्जिया णं भंते ! ते
 थेरा भगवंतो तेसिं समणोवासयाणं इमाइं एयारूवाइं वागरणाइं वागरित्तए ?
 उदाहु अणाउज्जिया ? पलिउज्जिया णं भंते ! ते थेरा भगवंतो तेसिं समणो-
 वासयाणं इमाइं एयारूवाइं वागरणाइं वागरित्तए उदाहु अपलिउज्जिया ?
 पुव्वतवेणं अज्जो ! देवा देवलोएसु उववज्जंति पुव्वसंजमेणं कम्मियाए संगियाए
 अज्जो ! देवा देवलोएसु उववज्जंति, सच्चे णं एसमट्ठे णो चेव णं आयभाव-
 वत्तव्वयाए ? पभू णं गोयमा ! ते थेरा भगवंतो तेसिं समणोवासयाणं इमाइं
 एयारूवाइं वागरणाइं वागरेत्तए, णो चेव णं अप्पभू, तहं चेव णेयव्वं अव-
 सेसियं जाव पभू, समियं आउज्जिया पलिउज्जिया जाव सच्चे णं एसमट्ठे
 णो चेव णं आयभाववत्तव्वयाए, अहंपि णं गोयमा ! एवमाइक्खामि भासेमि
 पण्णवेमि परूवेमि पुव्वतवेणं देवा देवलोएसु उववज्जंति पुव्वसंजमेणं देवा
 देवलोएसु उववज्जंति, कम्मियाए देवा देवलोएसु उववज्जंति, संगियाए देवा
 देवलोएसु उववज्जंति, पुव्वतवेणं पुव्वसंजमेणं कम्मियाए संगियाए अज्जो !
 देवा देवलोएसु उववज्जंति, सच्चे णं एसमट्ठे णो चेव णं आयभाववत्तव्वयाए
 ॥११०॥ तहारूवं णं भंते ! समणं वा माहणं वा पज्जुवासमाणस्स किफला
 पज्जुवासणा ? गोयमा ! सवणफला । से णं भंते ! सवणे किफले ? णाणफले
 से णं भंते ! णाणे किफले ? विण्णाणफले । से णं भंते ! विण्णाणे किफले ?

पचचक्खाणफले । से णं भंते ! पचचक्खाणे किफले ? संजमफले । से णं भंते ! संजमे किफले ? अणण्हयफले, एवं अणण्हए तवफले, तवे बोदाणफले, बोदाणे अकिरियाफले । से णं भंते ! अकिरिया कि फला ? सिद्धिपज्जवसाणफला पण्णत्ता गोयमा ! गाहा-सवणे णाणे य विण्णाणे पचचक्खाणे य संजमे । अणण्हए तवे चेव बोदाणे अकिरिया सिद्धी ॥ १ ॥ १११ ॥ अण्णउत्थिया णं भंते ! एवमाइक्खंति भासंति पण्णवेति परूवेति-एवं खलु रायगिहस्स णयरस्स बहिया वेभारस्स पव्वयस्स अहे एत्थ णं महं एगे हरए अघेपण्णत्ते अणेगाइं जोयणाइं आयामविक्खंभेणं णाणादुमसंडमंडिउट्ठेसे सस्सिरीए जाव पडिह्वे, तत्थ णं बह्वे ओराला बलाहया संसेयंति सम्मुच्छंति वासति तव्वइरित्ते य णं सया समियं उंसिणे २ आउकाए अभिणिरसवइ । से कहमेयं भंते ! एवं ? गोयमा ! जण्णं ते अण्णउत्थिया एवमाइक्खंति जाव जे ते एवं परूवेति मिच्छंते एवमाइक्खंति जाव सव्वं णेयव्वं जाव, अहं पुण गोयमा ! एवमाइक्खामि मा० प० प० एवं खलु रायगिहस्स णयरस्स बहिया वेभारपव्वयस्स अदूरसा-भंते, एत्थ णं महातवोवतीरप्पभवे णामं पासवणे पण्णत्ते पंचधनुसयाइं आयामविक्खंभेणं णाणादुमसंडमंडिउट्ठेसे सस्सिरीए पासाइए दरिसण्णजे अभिरूवे पडिह्वे तत्थ णं बह्वे उंसिणजोगिया जीवा य पोम्मला य उव-गत्ताए वक्कमंति विउवक्कमंति चयंति उववज्जंति तव्वइरित्तेवि य णं सया समियं उंसिणे २ आउयाए अभिणिरसवइ, एस णं गोयमा ! महातवोवतीर-प्पभवे पासवणे एस णं गोयमा ! महातवोवतीरप्पभवस्स पासवणस्स अट्ठे पण्णत्ते । सेवं भंते २ त्ति भगवं गोयमे समणं भगवं महावीरं वंदइ णमंसइ ॥ ११२ ॥

बीयं सयं छट्ठो उट्ठेसो

से णूणं भंते ! मग्गामी ति ओहारिणी भासा ? एवं भासापयं भाणियव्वं ॥ ११३ ॥

बीयं सयं सत्तमो उट्ठेसो

कइविहा णं भंते ! देवा प० ? गोयमा ! चउत्थिहा देवा प०, तंजहा-भवणवइयाणमंतरजोइसवेमाणिया । कहि णं भंते ! भवणवासीणं देवाणं ठाणा प० ? गोयमा ! इमीसे रयणप्पभाए पुढवीए जहा ठाणपदे देवाणं वत्त-

ध्वया सा भाणियव्वा, णवरं भवणा ५०, उववाएणं लोयस्स असंखेज्जइभागे,
एवं सव्वं भाणियव्वं जाव सिद्धगंडिया समत्ता-कप्पाण पइट्ठाणं बाहुल्लुच्चत्त-
मेव संठाणं । जीवाभिगमे जाव वेमाणिउहेसो भाणियव्वो सव्वो ॥ ११४ ॥

वीर्यं सयं अट्टमो उट्टेसो

कहि णं भंते ! चमरस्स असुरिदस्स असुरकुमाररण्णो सभा सुहम्माम्
५० ? गोयमा ! जंबुद्वीवे दीवे मंदरस्स पव्वयस्स दाहिणेणं तिरियमसंखेज्जे
दीवसमुद्दे बीड्वइत्ता अरुणवरस्स दीवस्स बाहिणिल्लाओ वेइयंताओ अरुणोदयं
समुद्दं बायालीसं जोयणसहस्साइं ओगाहिता एत्थ णं चमरस्स असुरिदस्स
असुरकुमाररण्णो तिगिच्छिकूड्ढे णामं उप्पायपव्वए पण्णत्ते, सत्तरसएक्कवीसे
जोयणसए उड्ढं उच्चत्तेणं चत्तारि तीसे जोयणसए कोसं च उव्वेहेणं गोथू-
भस्स आवासपव्वयस्स पमारेणं णेयव्वं णवरं उवरिल्लं पमाणं मज्जे भाणि
पव्वं [मूले दसबावीसे जोयणसए विक्खंभेणं मज्जे चत्तारि चउवीसे जोयणसए
विक्खंभेणं उव्वारि सत्तेदीसे जोयणसए विक्खंभेणं मूले तिण्णि जोयणसहस्साइं
दोण्णि य बत्तोमुत्तरे जोयणसए किंचिविसेसूणे परिकखेवेणं मज्जे एगं जोयण-
सहस्सं तिण्णि य इगयाले जोयणसए किंचिविसेसूणे परिकखेवेणं उव्वारि दोण्णि
य जोयणसहस्साइं दोण्णि य छलसीए जोयणसए किंचिविसेसाहिए परिकखेवेणं]
जाव मूले वित्थडे मज्जे संखित्ते उप्पि विसाले मज्जे वरवइरविग्गहिए महा-
मउवंसंठाणसंठिए सव्वरयणामए अच्छे जाव पडिरूवे । से णं एगाए पउमवर-
वेइयाए एगेणं वणसंडेणं य सव्वओ समंता संपरिविखत्ते पउमवरवेइयाए वण-
संडस्स य वण्णओ । तस्स णं तिगिच्छिकूड्ढस्स उप्पायपव्वयस्स उप्पि बहुसमर-
मणिज्जे भूमिभागे पण्णत्ते वण्णओ । तस्स णं बहुसमरमणिज्जस्स भूमिभागस्स
बहुमज्जदेसभागे एत्थ णं महं एगे पासायवडिसए पण्णत्ते, अट्टाज्ज्जाइं जोयण-
सयाइं उड्ढं उच्चत्तेणं पणवीसं जोयणसयाइं विक्खंभेणं, पासायवण्णओ उल्लोय-
भूमिवण्णओ अट्ट जोयणाइं मणिपेड्डिया चमरस्स सोहासणं सपरिवारं भाणि-
यव्वं । तस्स णं तिगिच्छिकूड्ढस्स दाहिणेणं छक्कोडिसए पणवण्णं च कोडोओ
पणतीसं च सयसहस्साइं पण्णासं च सहस्साइं अरुणोदए समुद्दे तिरियं वीड-
वइत्ता अहे रयणापभाए पुट्ठवीए चत्तालीसं जोयणसहस्साइं ओगाहिता एत्थ
णं चमरस्स असुरिदस्स असुरकुमाररण्णो चमरचंचा णामं रायहाणी ५० एगं

जोयणसयसहस्सं आयामविकलंभेणं जंबुद्वीवप्पमाणं, पागारो विवड्ढं जोयणसयं उड्ढं उच्चत्तेणं मूले पण्णासं जोयणाइं विकलंभेणं उव्वारं अद्धतेरसजोयणा क्विसीसगा अद्धजोयणआयामं कोसं विकलंभेणं वेसूणं अद्धजोयणं उड्ढं उच्चत्तेणं एग्गेगाए बाहाए पंच २ दारसया अड्डाइज्जाइं जोयणसयाइं २५० उड्ढं उच्चत्तेणं १२५ अद्धं विकलंभेणं उवरियलेणं सीलसजोयणसहस्साइं आयामविकलंभेणं पण्णासं जोयणसहस्साइं पंच य सत्ताणउयजोयणसाए किच्चिविसेसूणे परिवस्सेवेणं सव्वप्पमाणं वेमाणियप्पमाणस्स अद्धं णेयव्वं, सभा सुहम्मा, उत्तरपुरतियमेणं जिणघरं तओ उव्वथायससा हरओ अभिसेयं० अलंकारो जहा विजयस्स । उव्वत्ताओ संकप्पो अभिसेयविभूसणा य, वधसाओ । अच्चणिय सिद्धायण गमो त्रि प चमरपरिवार इड्डसं ॥ ११५ ॥

बीयं सयं णवमो उट्ठेसो

किमिदं भंते ! समयखेत्तेति पवुच्चइ ? गोयमा ! अड्डाइज्जा दीवा दो य समुत्ता एस णं एवइए समयखेत्तेति पवुच्चइ । तत्थ णं अयं जंबुद्वीवे २ सव्व-दीवसमुत्ताणं सव्वभंतरे एवं जीवाभिगमवत्तव्वया णेयव्वया जाव अतिभतरं पुक्खरद्धं जोइसविहूणं ॥ ११६ ॥

बीयं सयं दसमो उट्ठेसो

कइ णं भंते ! अत्थिकाया प० ? गोयमा ! पंच अत्थिकाया प०, तंजहा—धम्मत्थिकाए अधम्मत्थिकाए आगासत्थिकाए जीवत्थिकाए पोमल-त्थिकाए । धम्मत्थिकाए णं भंते ! कइवण्णे कइग्घे कइरसे कइफासे ? गोयमा ! अवण्णे अग्घे अरसे अफासे अरूवी अजीवे सासाए अवट्टिए लो-ग-दव्वे । से समासओ पंचविहे पण्णत्ते, तंजहा—दव्वओ खेत्तओ कालओ भावओ गुणओ । दव्वओ णं धम्मत्थिकाए एगे दव्वे, खेत्तओ णं लो-ग-प-माणमेत्ते, कालओ ण कयाइ ण आसि ण कयाइ णत्थि जाव णिच्छे, भावओ अवण्णे अग्घे अरसे अफासे, गुणओ गमणगुणे । अहम्मत्थिकाएवि एवं चेव, णवरं गुणओ णगुणे । आगासत्थिकाएवि एवं चेव, णवरं खेत्तओ णं आगासत्थिकाए लो-या-लो-य-प-माणमेत्ते अणंते चेव जाव गुणओ अवगाहणागुणे । जीवत्थिकाए णं भंते ! कइवण्णे कइग्घे कइरसे कइफासे ? गोयमा ! अवण्णे जाव अरूवी

जीवे सासए अवट्टिए लोगदब्बे, से समासओ पंचविहे पण्णत्ते, तंजहा—दब्बओ जाव गुणओ, दब्बओ णं जीवत्थिकाए अणंताइं जीवदब्बाइं, खेत्तओ लोगप्प-माणमेत्ते कालओ ण कयाइ ण आसि जाव णिच्चे, भावओ पुण अवण्णे अगंधे अरसे अफासे, गुणओ उवओगगुणे । पोगलत्थिकाए णं भंते ! कइवण्णे कइ-गंधे० रसे० फासे ? गोयमा ! पंचवण्णे पंचरसे दुगंधे अट्टफासे रूबी अजीवे सासए अवट्टिए लोगदब्बे, से समासओ पंचविहे पण्णत्ते, तंजहा—दब्बओ खेत्तओ कालओ भावओ गुणओ, दब्बओ णं पोगलत्थिकाए अणंताइं दब्बाइं, खेत्तओ लोघप्पमाणमेत्ते, कालओ ण कयाइ ण आसि जाव णिच्चे, भावओ वण्णयंते गंध० रस० फासयंते, गुणओ गहणगुणे ॥ ११७ ॥ एगे भंते ! धम्मत्थिकाय-पएसे धम्मत्थि हाएत्ति वत्तव्वं सिया ? गोयमा ! णो इणट्ठे समट्ठे । एवं बोण्णिवि तिग्गिवि चत्तारि वि पंच छ सत्त अट्ट णव दस संखेज्जा । असंखेज्जा भंते ! धम्मत्थिकायपएसा धम्मत्थिकाएत्ति वत्तव्वं सिया ? गोयमा ! णो इणट्ठे समट्ठे, एगपएसूणवि य णं भंते ! धम्मत्थिकाए २ त्ति वत्तव्वं सिया ? णो इणट्ठे समट्ठे । से केणट्ठेणं भंते ! एवं बुच्चइ ? एगे धम्मत्थिकायपएसे णो धम्मत्थिकाएत्ति वत्तव्वं सिया जाव एगपएसूणेवि य णं धम्मत्थिकाए णो धम्मत्थिकाएत्ति वत्तव्वं सिया ? से णूणं गोयमा ! खंडे चक्के सगले चक्के ? सगवं ! णो खंडे चक्के सगले चक्के, एवं छत्ते चम्मे दंडे दूसे आजहे मोयए, से तेणट्ठेणं गोयमा ! एवं बुच्चइ—एगे धम्मत्थिकायपएसे णो धम्मत्थिकाएत्ति वत्तव्वं सिया जाव एगपएसूणेवि य णं धम्मत्थिकाए णो धम्मत्थिकाएत्ति वत्तव्वं सिया । से किलाइए णं भंते ! धम्मत्थिकाए त्ति वत्तव्वं सिया ? गोयमा ! असंखेज्जा धम्मत्थिकायपएसा ते सब्बे कसिणा पडिपुण्णा गिरव-सेसा एगगहणगहिया एस णं गोयमा ! धम्मत्थिकाएत्ति वत्तव्वं सिया । एवं अहम्मत्थिकाएवि, आगतत्थिकाएवि, जीवत्थिकायपोगलत्थिकायावि एवं चेव, णवरं तिग्गुपि पंसा अणंता भाणियब्बा, सेसं तं चेव ॥ ११८ ॥ जीवे णं भंते ! उट्टाणे सक्कमे सबले सवीरिए सपुरिसत्तकारपरक्कमे आयभावेणं जीवभावं उवदंसेतीति वत्तव्वं सिया ? हुंता गोयमा ! जीवे णं सउट्टाणे जाव उवदंसेतीति वत्तव्वं सिया । से केणट्ठेणं जाव वत्तव्वं सिया ? गोयमा ! जीवे णं अणंताणं आभिणवोहियणाणपज्जवाणं एवं सुयणाणपज्जवाणं ओहि-

गाणपञ्जवाणं मणपञ्जवणाणप० केवलणाणप० महअण्णाणप० सुयअण्णाणप०
 विभंगणाणपञ्जवाणं चक्खुदंसणप० अचक्खुदंसणप० ओहिदंसणप० केवल-
 दंसणप० उवओगं गच्छइ, उवओगलक्खणे णं जीवे । से एएणट्ठेणं एवं
 वृच्चइ-गोयमा ! जीवे णं सउट्ठाणे जाव वत्तत्तं मिया ॥ ११६ ॥ कइविहे
 णं भंते ! आगासे पणत्ते ? गोयमा ! दुविहे आगासे प०, तंजहा-लोयागासे
 य अलोयागासे य । लोयागासे णं भंते ! किं जीवा जीवदेसा जीवप्पएसा
 अजीवा अजीवदेसा अजीवप्पएसा ? गोयमा ! जीवावि जीवदेसावि जीवप्प-
 एसावि अजीवावि अजीवदेसावि अजीवप्पएसावि, जे जीवा ते णियमा एगि-
 दिया बेंदिया तेइदिया चउरिंदिया पंचेंदिया अण्णदिया, जे जीवदेसा ते णियमा
 एगिदियदेसा जाव अण्णदियदेसा, जे जीवप्पएसा ते णियमा एगिदियपएसा
 जाव अण्णदियपएसा । जे अजीवा ते दुविहा पणत्ता, तंजहा-रूवी य अरूवी
 य, जे रूवी ते चउद्विहा पणत्ता, तंजहा-खंधा खंधेसा खंधपएसा परमाणु-
 योगला । जे अरूवी ते पंचविहा पणत्ता-धम्मत्थिकाए णो धम्मत्थिकायस्स
 देसे धम्मत्थिकायस्स पएसा अधम्मत्थिकाए णो अधम्मत्थिकायस्स देसे अध-
 म्मत्थिकायस्स पएसा, अट्ठासमए ॥ १२० ॥ अलोयागासे णं भंते ! किं जीवा ?
 पुच्छा तह चेव, गोयमा ! णो जीवा जाव णो अजीवप्पएसा एगे अजीवदव्व-
 देसे अगुरुयलहए अणत्तेहि अगुरुयलहयगुणेहि संजुत्ते सव्वागासे अणत्ताभागेणे
 ॥ १२१ ॥ धम्मत्थिकाए णं भंते ! केमहालए पणत्ते ? गोयमा !
 लोए लोयमेत्ते लोयप्पमाणे लोयफुडे लोयं चेव फुसित्ता णं तिट्ठइ । एवं अह-
 म्मत्थिकाए लोयागासे जीवत्थिकाए पोम्मलत्थिकाए पंचवि एवकाभित्तावा
 ॥ १२२ ॥ अहोलोए णं भंते ! धम्मत्थिकायस्स केवइयं फुसइ ? गोयमा !
 साइरेणं अट्ठं फुसइ । तिरियलोए णं भंते ! पुच्छा, गोयमा ! असंखेज्जइ-
 भागं फुसइ । उट्टुलोए णं भंते ! पुच्छा, गोयमा ! देसूणं अट्ठं फुसइ ॥ १२३ ॥ इमा
 णं भंते ! रयणप्पभापुट्ठवी धम्मत्थिकायस्स किं संखेज्जइभागं फुसइ ? असंखेज्जइ-
 भागं फुसइ ? सखिज्जे भागे फुसइ ? असंखेज्जे भागे फुसइ ? सव्वं फुसइ ?
 गोयमा ! णो संखेज्जइभागं फुसइ असंखेज्जइभागं फुसइ णो संखेज्जे णो अ-
 संखेज्जे णो सव्वं फुसइ । इमीसे णं भंते ! रयणप्पभाए पुट्ठवीए धणोइही धम्मत्थि-
 कायस्स पुच्छा, किं संखेज्जइभागं फुसइ ? जहा रयणप्पभा तहा प्रणोइहिधण-

घायतणुवायावि। इमीसे णं भंते ! रयणप्पभाए पुढवीए उवासंतरे धम्मत्थिकाय-
स्स किं संखेज्जइभागं फुसइ असंखेज्जइभागं फुसइ जाव सव्वं फुसइ ? गोयमा !
संखेज्जइभागं फुसइ णो असंखेज्जइभागं फुसइ णो संखेज्जे० णो असंखेज्जे०
णो सव्वं फुसइ, उवासंतराईं सव्वाइं । जहा रयणप्पभाए पुढवीए वत्तव्वया
भणिया, एव जाव अहेसत्तमाए, जंबुद्दीवाइया दीवा लवणसमुद्दाइया समुद्दा,
एवं सोहम्ममे कप्पे जाव ईसोपव्वभारापुढवीए, एए सव्वेऽवि असंखेज्जइभागं
फुसइ, सेसा पडिसेहियव्वा । एवं अधम्मत्थिकाए, लोयागासेवि । गाहा—पुढ-
बोदवीघणतणूकप्पा गेवेज्जणुत्तरा सिद्धी । संखेज्जइभागं अंतरेसु सेसा असं-
खेज्जा ॥ १ ॥ १२४ ॥

द्वीयं सयं समत्तं

॥ तद्वयं सयं पढमो उद्देसो ॥

गाहा—केरिसविज्जव्वणा चमर किरिय जाणित्थि णगर पात्ता य ।
अहिंइइ इदियपरिसा तद्वयम्मि सए वसुद्देसा ॥ १ ॥ तेणं कालेणं तेणं सम-
एणं मोया णामं णयरी होत्था, वण्णओ । तीसे णं मोयाए णयरीए बहिया
उत्तरपुरत्थिमे विसीभागे णं णंदणे णामं चेइए होत्था, वण्णओ । तेणं कालेणं
२ सामी समोसडे, परिसा णिग्गच्छइ पडिगया परिसा । तेणं कालेणं तेणं
समएणं समणस्स भगवओ महावीरस्स शोच्चे अंतेवासी अग्गिभूईं णामं अण-
गारे गोयमगोत्तेणं सत्तस्सेहे जाव पज्जुवासंभाणे एवं वयासी—चमरे णं भंते !
असुरिंदे असुरराया केमहिंइइए ? केमहज्जुईए ? केमहाबले ? केमहायसे ?
केमहासोक्खे ? केमहाणुभागे ? केवइयं च णं पभू विउव्वित्तए ? गोयमा !
चमरे णं असुरिंदे असुरराया महिंइइए जाव महाणुभागे से णं तत्थ चोत्तीसाए
भवणावाससयसहस्साणं चउसट्ठीए सामाणियसाहस्सीणं तायत्तीसाए तायत्ती-
सगाणं जाव विहरइ, एवं महिंइइए जाव महाणुभागे, एवइयं च णं पभू विउ-
व्वित्तए से जहाणाभाए—जुवइं जुवाणे हत्थेणं हत्थे गेण्हेज्जा चक्कस्स वा णाम्मी
अरगाउत्ता सिया, एवामेव गोयमा ! चमरे असुरिंदे असुरराया वेउव्विय-
समुग्घाएणं समोहण्णइ २ संखेज्जाइं जोयणाइं उड्ढं वंडं णिसिरइ, तंजहा—रय-
णाणं जाव रिट्ठाणं अहावायरे पोमले परिसाडेइ २ अहासुद्धमे पोमले परि-

याएइ २ दोच्चंपि वेउव्वियसमग्घाएणं समोहण्णइ २, पभूणं गोयमा ! चमरे असुरिंदे असुरराया केवलकप्पं जंबुद्वीवं २ बहूहि असुरकुमारेहि देवेहि देवीहि य आइण्णं विइकिण्णं उवत्थडं संथडं फुडं अवगाढावगाढं करेतए । अदुत्तरं च णं गोयमा ! पभू चमरे असुरिंदे असुरराया तिरियमसंखेज्जे दीवसमुद्दे बहूहि असुरकुमारेहि देवेहि देवीहि य आइण्णे विइकिण्णे उवत्थडे संथडे फुडे अवगाढावगाढे करेतए । एस णं गोयमा ! चमरस्स असुरिंदस्स असुररण्णो अयमेयारूढे विसए विसयमेत्ते बुइए, णो चैव णं संपत्तीए विकुव्विसु वा विकुव्वइ वा विकुव्विस्सइ वा ॥ १२५ ॥ जइ णं भंते ! चमरे असुरिंदे असुरराया एमहिड्डिए जाव एवइयं च णं पभू विंकुव्वित्तए, चमरस्स णं भंते ! असुरिंदस्स असुररण्णो सामाणिया देवा केमहिड्डिया जाव केवइयं च णं पभू विकुव्वित्तए ? गोयमा ! चमरस्स असुरिंदस्स असुररण्णो सामाणिया देवा महिड्डिया जाव महाणुभागा, ते णं तत्थ साणं २ भवणाणं साणं २ सामाणियाणं साणं २ अगमहितीणं जाव दिव्वाइं भोगभोगाइं भुंजमाणा विहरंति, एवं महिड्डिया जाव एवइयं च णं पभू विकुव्वित्तए । से जहाणामए-ज्जुवइं ज्जुवाणे हत्थेणं हत्थे गेण्हेज्जा चक्कस्स वा णाभी अरयाउत्ता सिया एवामेव गोयमा ! चमरस्स असुरिंदस्स असुररण्णो एगमेगे सामाणियदेवे वेउव्वियसमग्घाएणं समोहण्णइ २ जाव दोच्चंपि वेउव्वियसमग्घाएणं समोहण्णइ २ पभू णं गोयमा ! चमरस्स असुरिंदस्स असुररण्णो एगमेगे सामाणियदेवे केवलकप्पं जंबुद्वीवं २ बहूहि असुरकुमारेहि देवेहि देवीहि य आइण्णं विइकिण्णं उवत्थडं संथडं फुडं अवगाढावगाढं करेतए, अदुत्तरं च णं गोयमा ! पभू चमरस्स असुरिंदस्स असुररण्णो एगमेगे सामाणियदेवे तिरियमसंखेज्जे दीवसमुद्दे बहूहि असुरकुमारेहि देवेहि देवीहि य आइण्णे विइकिण्णे उवत्थडे संथडे फुडे अवगाढावगाढे करेतए । एस णं गोयमा ! चमरस्स असुरिंदस्स असुररण्णो एगमेगस्स सामाणियदेवस्स अयमेयारूढे विसए विसयमेत्ते बुइए णो चैव णं संपत्तीए विकुव्विसु वा विकुव्वइ वा विकुव्विस्सइ वा । जइ णं भंते ! चमरस्स असुरिंदस्स असुररण्णो सामाणिया देवा एवं महिड्डिया जाव एवइयं च णं पभू विकुव्वित्तए चमरस्स णं भंते ! असुरिंदस्स असुररण्णो तापत्तीतया देवा केमहिड्डिया ? तापत्तीसया देवा जहा सामाणिया तहा णेयव्वा, लोयपाला

तहेव, णवरं संखेज्जा दीवसमुदा भाणियव्वा, बहुरिह असुरकुमारेहि २ आइण्णे
 जाव विउत्तिवरसेंति वा । जइ णं भंते ! चमरस्स असुरिदस्स असुररण्णे
 लोणपाला देवा एवमहिड्डिया जाव एवइयं च णं पभू विउत्तिवत्तए चमरस्स
 णं भंते ! असुरिदस्स अनुररण्णे अग्गमहिसीओ देवीओ केमहिड्डियाओ जाव
 केवइयं च णं पभू विकुत्तिवत्तए ? गोयमा ! चमरस्स णं असुरिदस्स असुर-
 रण्णे अग्गमहिसीओ महिड्डियाओ जाव महाणुभागाओ, ताओ णं तत्थ साणं २
 भवणाणं साणं २ सामाणियसाहस्सीणं साणं २ महत्तरियाणं साणं २ परिसाणं
 जाव एमहिड्डियाओ अण्णं जहा लोणपालाणं अपरिसेसं ॥१२६॥ सेवं भंते !
 २ ति भगवं दोच्चे गोयमे समणं भगवं महावीरं वंदइ णमंसइ २ जेणेव
 तच्चे गोयमे वायुभूइअणगारे तेणेव उवागच्छइ २ तच्चं गोयमं वायुभूइं
 अणगारं एवं वयासी-एवं खलु गोयमा ! चमरे असुरिदे असुरराया एवं महि-
 ड्डिए तं चेव एवं सव्वं अपुट्टवागरणं गेयव्वं अपरिसेसियं जाव अग्गमहिसीणं
 वत्तव्वया समत्ता । तए णं से तच्चे गोयमे वायुभूइं अणगारे दोच्चस्स गोय-
 मस्स अग्गिभूइस्स अणगारस्स एवमाइक्खमाणस्स भा० प० परू० एयमट्ठं णो
 सइहइ णो पत्तियइ णो रोएइ एयमट्ठं असइहमाणे अपत्तियमाणे अरोएमाणे
 उट्टाए उट्ठेइ २ जेणेव समणे भगवं महावीरे तेणेव उवागच्छइ जाव पज्जु-
 बासमाणे एवं वयासी-एवं खलु भंते ! दोच्चे गोयमे अग्गिभूइअणगारे ममं
 एवमाइक्खइ भासइ पण्णवेइ परूवेइ-एवं खलु गोयमा ! चमरे असुरिदे
 असुरराया महिड्डिए जाव महाणुभागे से णं तत्थ चोत्तीसाए भवणावाससय-
 साहस्साणं एवं तं चेव सव्वं अपरिसेसं भाणियव्वं जाव अग्गमहिसीणं वत्तव्वया
 समत्ता । से कहमेयं भंते ! एवं ? गोयमाइ ! समणे भगवं महावीरे तच्चं गोयमं
 खाउभूइं अणगारं एवं वयासी-जण्णं गोयमा ! दोच्चे गो० अग्गिभूइअणगारे
 तव एवमाइक्खइ ४-एवं खलु गोयमा ! चमरे ३ महिड्डिए एवं तं चेव
 सव्वं जाव अग्गमहिसीणं वत्तव्वया समत्ता, सच्चे णं एसमट्ठे, अहं पि णं
 गोयमा ! एवमाइक्खामि भा० प० परू०, एवं खलु गोयमा ! चमरे ३
 जाव महिड्डिए सो त्रेव बिइओ गमो भाणियव्वो जाव अग्गमहिसीओ, सच्चे
 णं एसमट्ठे । सेवं भंते २ ति तच्चे गोयमे ! वायुभूइं अणगारे समणं भगवं
 महावीरं वंदइ णमंसइ २ जेणेव दोच्चे गोयमे अग्गिभूइं अणगारे तेणेव उवा-
 गच्छइ २ दोच्चं गो० अग्गिभूइं अणगारं वंदइ णमंसइ २ एयमट्ठं सम्भं

विणएणं भुज्जो २ खामेइ ॥ १२७ ॥ तए णं से तच्चे गोयमे वाउभूई
अणगारे दोच्छेणं गोयमेणं अग्गिभूइणामेणं अणगारेणं सद्धि जेणेव समणे
भगवं महावीरे जाव पज्जुवासमाणे एवं वयासी-जइ णं भंते ! चमरे असुरिंदे
असुरराया एवं महिड्डिए जाव एवइयं च णं पभू विकुच्चित्तए बली णं भंते !
वइरोयणिंदे वइरोयणराया केमहिड्डिए जाव केवइयं च णं पभू विकुच्चित्तए ?
गोयमा ! दली णं वइरोयणिंदे वइरोयणराया महिड्डिए जाव महानुभागे,
से णं तत्थ तीसाए भवणावाससयसहस्साणं सट्ठीए सामाणियसाहस्सीणं सेसं
जहा चमरस्स तथा बलियस्सवि णेयव्वं, णवरं साइरेणं केवलकपं जंबूदीवंति
भाणियव्वं, सेसं तं चेव णिरवसेसं णेयव्वं, णवरं णाणत्तं जाणियव्वं भवणेहिं
सामाणिएहिं, सेवं भंते ! २ त्तिं तच्चे गोयमे वायुभूई जाव विहरइ । भंते ! त्ति
भगवं दोच्छे गोयमे अग्गिभूई अणगारे समणं भगवं महावीरं वंदइ २ एवं
वयासी-जइ णं भंते ! बली वइरोयणिंदे वइरोयणराया एमहिड्डिए जाव
एवइयं च णं पभू विकुच्चित्तए, धरणे णं भंते ! णागकुमारिंदे णागकुमारराया
केमहिड्डिए जाव केवइयं च णं पभू विकुच्चित्तए ? गोयमा ! धरणे णं
णागकुमारिंदे णागकुमारराया एमहिड्डिए जाव से णं तत्थ चोयालीसाए
भवणावाससयसहस्साणं छण्हं सामाणियसाहस्सीणं तायत्तीसाए तायत्तीसगाणं
चउण्हं लोणरात्ताणं छण्हं अग्गमहिस्सीणं सपरिवाराणं तिण्हं परिसाणं सत्तण्हं
अणियाणं सत्तण्हं अणियाहिं वईणं चउव्वीसाए आयरइत्तदेवसाहस्सीणं अण्णेसि
च जाव विहरइ, एवइयं च णं पभू विउच्चित्तए से जहाणामए-जुवइं
जुवाणे जाव पभू केवलकपं जंबूदीवं २ जाव तिरियं संखेज्जे दीवसमुहे
बहूहिं णागकुमारिंहं जाव विउच्चित्तए वा, सामाणिया तायत्तीसलोग-
पालगा अग्गमहिस्सीओ य त्थेव, जहा चमरस्स एवं धरणे णं णागकुमारराया
महिड्डिए जाव एवइयं जहा चमरे तथा धरणेऽवि, णवरं संखेज्जे दीवसमुहे
भाणियव्वं, एवं जाव यणिकुमारा वाणमंतरा जोइसियावि, णवरं दाहि-
णिल्ले सव्वे अग्गिभूई पुच्छइ, उत्तरिल्ले सव्वे वाउभूई पुच्छइ ! भंतेति !
भगवं दोच्छे गोयमे अग्गिभूई अणगारे समणं भगवं म० वंदइ णमंसइ २
एवं वयासी-जइ णं भंते ! जोइसिंदे जोइसराया एवं महिड्डिए जाव एवइयं
च णं पभू विकुच्चित्तए सव्वे णं भंते ! देविंदे देवराया केमहिड्डिए जाव केव-

इयं च णं पभू विउव्वित्तए ? गोयमा ! सक्के णं देविदे देवराया महिड्डिए जाव महाणूभागे, से णं तत्थ बत्तीसाए विमाणावाससयसहस्साणं चउरासीए सामाणियसाहस्सीणं जाव चउण्हं चउरासीणं आयरक्ख (देव) साहस्सीणं अण्णोसि च जाव बिहरइ, एवंमहिड्डिए जाव एवइयं च णं पभू विकुव्वित्तए, एवं जहेव चमरस्स तहेव भाणियव्वं, जवरं दो केवलकप्पे जंबुद्दीये २ अबसेसं तं चेव, एस णं गोयमा ! सक्कस्स देविदस्स देवरण्णो इमेयारूवे विसए विस-यमेतं णं बुइए णो चेव णं संपतीए विउव्विसु वा विउव्वइ वा विउव्विस्सइ वा ॥१२८॥ जइ णं भंते ! सक्के देविदे देवराया एमहिड्डिए जाव एवइयं च णं पभू विकुव्वित्तए ॥ एवं खलु देवाणुप्पियाणं अंतेवासी तीसए णामं अण्णारे पगइभइए जाव विणीए छट्ठंछट्ठेणं अणिकिखत्तेणं तत्रोकम्मेणं अण्णणं भावेमाणे बहुपडिपुण्णाइं अट्ठ संवच्छराइं सामण्णपरियागं पाउ-णित्ता मासियाए संलेहणाए अत्ताणं झूसेत्ता सट्ठिभत्ताइं अणसणाए छेदेत्ता आलोइयपडिक्कते समाहिपत्ते कालमासे कालं किञ्चा सोहम्मे कप्पे सयसि बिभाणंसि उववायसभाए देवसयणिज्जंसि देवदूसंतरिए अंगुलस्स असंखेज्जइ-भाणमेत्ताए ओगाहणाए सक्कस्स देविदस्स देवरण्णो सामाणियदेवत्ताए उववण्णे, सए णं तीसए देवे अट्ठणोववण्णमेत्ते समाणे पंचविहाए पज्जतीए पज्जत्तिभावं, गच्छइ तंजहा-आहारपज्जतीए सरीरं इंदियं आणपाणुपज्जतीए आसामण-पज्जतीए, तए णं तं तीसयं देवं पंचविहाए पज्जतीए पज्जत्तिभावं गयं समाणं सामाणियपरिसोववण्णया देवा करयलपरिगगहियं दसण्हं सिरसावत्तं मत्थए अंजालि कट्टु जएणं विजएणं बद्धाविति २ एवं वयासी-अहो णं देवाणुप्पिए ! दिव्वा देविड्डी दिव्वा देवज्जुई दिव्वे देवाणुभावे लद्धे पत्ते अभिसमण्णागए, तारिसिया णं देवाणुप्पिएहि दिव्वा देविड्डी दिव्वा देवज्जुई दिव्वे देवाणुभावे लद्धे पत्ते अभिसमण्णागए तारिसिया णं सक्केणं देविदेणं देवरण्णा दिव्वा देविड्डी जाव अभिसमण्णागया, तारिसिया णं (सक्केणं देविदेणं देवरण्णा दिव्वा देविड्डी जाव अभिसमण्णागया तारिसिया णं) देवाणुप्पिएहि दिव्वा देविड्डी जाव अभिसमण्णागया । से णं भंते ! तीसए देवे केमहिड्डिए जाव केवइयं च णं पभू विउव्वित्तए ? गोयमा ! महिड्डिए जाव महाणूभागे, से णं तत्थ सयस्स विमाणस्स चउण्हं सामाणियसाहस्सीणं चउण्हं अगमहिस्तीणं

सपरिवाराणं तिष्ठं परिसाणं सत्तं अणियाणं सत्तं अणियाहिवर्द्धं सीत्तसहं
 आयरक्खदेवसाहस्सीणं अण्णेसि च बहूणं वेमाणियाणं देवाण य देवीण य जाव
 विहरइ, एवमहिड्डिए जाव एवइयं च णं पभू विउच्चित्तए, से जहाणामए
 जुवइं जुवाणे हत्थेणं हत्थे गेण्हेज्जा जहेव सक्करस तहेव जाव एस णं गोयमा ।
 तीसयस्स देवस्स अयमेयारूढे विसए विसयमेत्ते बुइए णो चेव णं संगत्तीए
 विउच्चिसु वा ३ । जइ णं भंते ! तीसए देवे महिड्डिए जाव एवइयं च णं
 पभू विउच्चित्तए सक्करस णं भंते ! देविदस्स देवरण्णी अवसेसा सामाणिया
 देवा केमहिड्डिया ? तहेव सक्कं जाव एस णं गोयमा ! सक्करस देविदस्स देवर-
 ण्णी एगमेगस्स सामाणियस्स देवस्स इमेयारूढे विसए विसयमेत्ते बुइए णो चेव
 णं संपत्तीए विउच्चिसु वा विउच्चंति वा विउच्चिस्संति वा ताथसीसा य
 लोगपालअग्गमहिस्सीणं जहेव चमररस णवरं दो केवलकप्पे जंबूद्वीवे २ अण्णं
 तं चेव । सेवं भंते ! २ ति दोच्छे गोयमे जाव विहरइ ॥ १२६ ॥ भंतेति ! भगवं
 सच्चे गोयमे वाउभूई अणगारे समणं भगवं जाव एवं वयासी-जइ णं भंते !
 सक्के देविदे देवराया एमहिड्डिए जाव एवइयं च णं पभू विउच्चित्तए ईसाणे
 णं भंते ! देविदे देवराया केमहिड्डिए ? एवं तहेव, णवरं साहिए दो केवल-
 कप्पे जंबूद्वीवे २ अवसेसं तहेव ॥ १३० ॥ जइ णं भंते ! ईसाणे देविदे देव-
 राया एमहिड्डिए जाव एवइयं च णं पभू विउच्चित्तए । एवं तनु देवाण-
 प्पियाणं अतेवासी कुशदत्तपुत्ते णामं पगइभद्दए जाव विणीए अट्टसंअट्टमेणं
 अणिक्लित्तेणं पारणए अयंबिल्लपरिगहिएणं तवोकम्मेणं उड्डं आहाओ पयि-
 ज्जिय २ सूराम्भुहे आयाक्कणभूमीए आयावेमाणे बहूपडिपुण्णे छम्मासे साम-
 णपरियाणं पाउणित्ता अद्धमासियाए सत्तेहणाए अत्ताणं झूसित्ता तीत्तं भत्ताइं
 अणसणाए छेवित्ता आलोइयपडिक्कंते समाहिपत्ते कालमासे कालं किच्च
 ईसाणे कप्पे सयंसि विमार्णांसि जा तीसए वत्तव्वया सा सत्तेव अपरिसेसा
 कुशदत्तपुत्तेव, णवरं साइरेगे दो केवलकप्पे जंबूद्वीवे २, अवसेसं तं चेव, एवं
 सामाणियताथसीसलोगपालअग्गमहिस्सीणं जाव एस णं गोयमा ! ईसाणस्स
 देविदस्स देवरण्णी एवं एगमेगाए जग्गमहिसीए देवीए अयमेयारूढे विसए
 विसयमेत्ते बुइए णो चेव णं संपत्तीए विउच्चिसु वा ३-॥ १३१ ॥ एवं सण-
 कुमारेवि, णवरं चत्तारि केवलकप्पे जंबूद्वीवे २ अट्टत्तरं च णं तिरियमसंखेज्जे,

एवं सामान्यतायत्तीसलोगपालअग्गमहिंसीणं असंखेज्जे दीवसमुद्दे सव्वे विउ-
 ष्वत्ति, सणकुमाराओ आरद्धा उवरिल्ला लोगपाला सव्वेवि असंखेज्जे दीव-
 समुद्दे विउव्वत्ति । एवं माहिदेवि, णवरं साइरेगे चत्तारि केवलकप्पे जंबुद्वीवे २,
 एवं बंभलोएवि, णवरं अट्ट केवलकप्पे, एवं लंतएवि, णवरं साइरेगे अट्ट केवल-
 कप्पे, महामुवके सोलस केवलकप्पे, सहस्सारे साइरेगे सोलस, एवं पाणएवि,
 णवरं बत्तीसं केवल०, एवं अच्चुएवि णवरं साइरेगे बत्तीसं केवलकप्पे जंबुद्वीवे
 २ अण्णं तं चेव । सेव् भंते ! २ त्ति तच्चे गोयमे वायुभूई अणगारे समणं भगवं
 महावीरं वंदइ णमंसइ जाव विहरइ । तए णं समणे भगवं महावीरे अण्णया
 कयाइ मोयाओ णयरीओ णंयणाओ चेइयाओ पडिणिक्वमइ २ बहिया
 णणवयविहारं विहरइ ॥ १३२ ॥ तेणं कालेणं तेणं० रायणिहे णामं णयरे होत्था,
 षण्णओ, जाव परिसा पज्जुवासइ । तेणं कालेणं २ ईसाणे देविदे देवराया
 सुलपाणी वसह्वाहणे उत्तरङ्गुलोगाहिंवेई अट्ठावीसविमाणवावाससयसहस्साहिंवेई
 अरयंवरवत्यधरे आलइयमालमउडे णवहेभचारचित्तचंचलकुंडलविलिहिज्ज-
 षाणणंडे जाव दस दिसाओ उज्जोवेमाणे पभासेमाणे ईसाणे कप्पे ईसाणवांडसए
 विमाणे जहेव रायप्पसेगइज्जे जाव दिव्वं देविंइ जाव जामेव दिंति पाउज्जमूए
 तामेव दिंति पडिगए । भंतेत्ति ! भगवं गोयमे समणं भगवं महावीरं वंदइ
 णमंसइ २ एवं वयासी-अहो णं भंते ! ईसाणे देविदे देवराया महिड्डिए
 ईसाणस्स णं भंते ! सा दिव्वा देविड्ढी कीहं गया कीहं अणुपविट्ठा ? गोयमा !
 सररीरं गया २ । से केणट्ठेणं भंते ! एवं वुच्चइ सररीरं गया ? २, गोयमा !
 से जहाणामए-कूडागारसाला सिया दुहुंओ लिता गुत्ता गुत्तदुवारा णिवाया
 णिवायगंभीरा तीसे णं कूडागारसालाए जाव कूडागारसालादिट्ठंतो भाणियव्वो ।
 ईसाणेणं भंते ! देविदेणं देवरणा सा दिव्वा देविड्ढी दिव्वा देवज्जुई दिव्वे
 देवाणभग्गे किण्णा लद्धे किण्णा पत्ते किण्णा अभिसमण्णागए ? के वा एस आसि
 पुव्वभवे किणामए वा किंगोत्ते वा कयरंसि वा गामंसि वा णयरंसि वा जाव
 संणिवेसंसि वा कि वा सुच्चा कि वा दच्चा कि वा भोच्चा कि वा किच्चा
 कि वा समायरित्ता कस्स वा तहारूवस्स समणस्स वा माहणस्स वा अंतिए
 एगमवि आयरियं धम्मियं सुवयणं सोच्चा णिसम्म ? जण्णं ईसाणेणं देविदेणं
 देवरणा सा दिव्वा देविड्ढी जाव अभिसमण्णागया ? एवं खलु गोयमा !

तेणं कालेणं २ इहेव जंबुद्वीवे २ भारहे वासे तामलित्ती णामं णयरी होत्था,
 वण्णओ । तत्थ णं तामलित्तीए णयरीए तामली णामं मोरियपुत्ते गाहावई
 होत्था, अइहे दित्ते जाव बहुज्जणस्स अपरिभूए यावि होत्था । तए णं तस्स
 मोरियपुत्तस्स तामलित्तस्स गाहावइस्स अण्णया कयाइ पुव्वरत्तावरत्त-
 कालसमयंसि कुटुंबजागरियं जागरमाणस्स इमेयारूवे अज्झत्थिए जाव सम-
 प्पज्जित्था-अत्थि ता मे पुरा पोराणाणं सुच्चिण्णाणं सुपत्तिकंताणं मुभाणं
 कल्लाणाणं कडाणं कम्माणं कल्लाणफलवित्तिविसेसो जेणाहं हिरण्णेणं वड्डामि
 मुषण्णेणं वड्डामि धण्णेणं वड्डामि धण्णेणं वड्डामि पुत्तेहिं वड्डामि पसूहिं वड्डामि
 विउल्लधणकणग-रयण-मणिमोत्तिय-संवल्लिप्पवालरत्तरयणरांतसारमावएज्जेणं
 अईव २ अभिवड्डामि, तं किण्णं अहं पुरा पोराणाणं सुच्चिण्णाणं जाव कडाणं
 कम्माणं एगंतसोक्खयं उवेहेमाणे विहरामि ? तं जाव ताव अहं हिरण्णेणं वड्डामि
 जाव अईव २ अभिवड्डामि जावं च णं मे मित्तणाइणियगसंबंधिपरियणो आढाइ
 परियाणाइ सक्कारेइ सम्माणेइ कल्लाणं मंगलं देवयं छेइयं विणएणं पज्जु-
 दासइ तावता मे सेयं कल्लं पाउप्पभायाए रयणीए जाव जलंते सयमेव दारु-
 मयं पडिग्गहयं करेत्ता विउल्लं असणं पाणं खाइमं साइमं उववखडावेत्ता
 मित्तणाइणियगसयणसंबंधिपरियणं आमतेत्ता तं मित्तणाइणियगसंबंधिपरियणं
 विउल्लेणं असणपाणाखाइमसाइमेणं वत्थमंधमल्लालंकारेण य सक्कारेत्ता सम्मा-
 णेत्ता तस्सेव मित्तणाइणियगसंबंधिपरियणस्स पुरओ जेट्टुपुत्तं कुटुंबे ठावेत्ता तं
 मित्तणाइणियगसंबंधिपरियणं जेट्टुपुत्तं च आपुच्छित्ता सयमेव दारुमयं पडिग्गहं
 गहाय मुंडे भवित्ता पाणामाए पव्वज्जाए पव्वइत्तए, पव्वइएऽवि य णं समाणे
 इमं एयारूवं अभिग्गहं अभिगिण्हिस्सामि-कप्पइ मे जावज्जीवाए छट्ठं-
 छट्ठेणं अणिविखल्लेणं तवोक्खमेणं उड्ढं बाहाओ पगिण्डिय २ सूरामिमूहस्स
 आयावणभूमोए आयावेमाणस्स विहरित्तए, छट्ठस्सवि य णं पारणयंसि आया-
 वणभूमोओ पच्चोरुभित्ता सयमेव दारुमयं पडिग्गहयं गहाय तामलित्तीए णय-
 रीए उच्चणीयमज्जिमाइं कुलाइं घरसमुदानस्स भिक्खायरियाए अडित्ता
 सुद्धोयणं पडिग्गाहेत्ता तं तिसत्तवखुत्तो उदएणं पक्खालेत्ता तओ पच्छा
 आहारं आहारित्तएत्तिकट्टु एवं संपेहेइ २ कल्लं पाउप्पभायाए जाव जलंते
 सयमेव दारुमयं पडिग्गहयं करेइ २ विउल्लं असणं पाणं खाइमं साइमं उववख-

ढावेइ २ तओ पच्छा ण्हाए कयबलिकम्मे कयकोउय-मंगल-पायच्छित्ते सुद्धप्पा-
वेसाइं मंगल्लाईं वत्थाइं पवरपरिहिए अप्पमहग्घाभरणालंकियसरीरे भोयण-
वेत्ताए भोयणमंडवंसि सुहासणवरमए तए णं मित्तणाइणियगसयणसंबंधिपरि-
ज्जेणं सदिं तं विउलं असणं पाणं खाइमं साइमं आसाएमाणे वीसाएमाणे परि-
माएमाणे परिभुंजेमाणे विहरइ । जिमियभुत्तुत्तरागएऽवि य णं समाणे आयते
चोक्खे परमसुद्धंभूए तं मित्तं जाव परिणं विउलेणं असणपाण ४-पुप्फवत्थयंगंध-
मल्लालंकारेण य सक्कारेइ २ तस्सेव मित्तणाइ जाव परिणसस पुरओ जेट्ठं
पुत्तं कुट्टुं ठावेइ २ ता तं मित्त-णाइ-णियग-सयण-संबंधि-परियणं जेट्टुत्तं
च आपुच्छइ २ मुंढे भवित्ता पाणामाए पव्वज्जाए पव्वइए, पव्वइएवि य णं
समाणे इमं एयारूवं अभिग्गहं अभिगिण्हइ-कप्पइ मे जावज्जीवाए छट्ठंछट्ठेणं
जाव आहारित्तएत्तिकट्टु इमं एयारूवं अभिग्गहं अभिगिण्हइ २ ता जावज्जी-
वाए छट्ठंछट्ठेणं अणिक्लित्तेणं तवोकम्मेणं उड्डं ब्राहाओ पगिज्जिय २
सूराभिमुहे आयावणभूमीए आयावेमाणे विहरइ, छट्टस्सवि य णं पारणयंसि
आयावणभूमोओ पच्चोरुहइ २ सयमेव दासमयं पडिग्गहं गहाय तामलितीए
णयरीए उच्चणीयमज्जिमाइं कुलाइं घरसमुदाणस्स भिक्खायरियाए अडइ २
सुद्धोयणं पडिग्गाहेइ २ तिसत्तवकुत्तो उदएणं पक्खालेइ, तओ पच्छा आहारं
आहारेइ । से केणट्ठेणं भंते ! एवं वुच्चइ-पाणामा पव्वज्जा ? गोयमा !
पाणामाए णं पव्वज्जाए पव्वइए समाणे जं जत्थ पासइ इदं वा खंदं वा रुहं
वा सिवं वा वेसमणं वा अज्जं वा कोट्टिकिरियं वा रायं वा जाव सत्थवाहं वा
काकं वा साणं वा पाणं वा उच्चं पासइ उच्चं पणामं करेइ णीयं पासइ णीयं
पणामं करेइ, जं जहा पासइ तस्स तहा पणामं करेइ, से तेणट्ठेणं गोयमा !
एवं वुच्चइ-पाणामा पव्वज्जा ॥ १३३ ॥ तए णं से तामली मोरियपुत्ते
तेणं ओरालेणं विउलेणं पयत्तेणं पग्गहिएणं बालतवोकम्मेणं सुक्के भुक्खे जाव
धमणिसंतए जाए यावि होत्था, तए णं तस्स तामलिस्स बालतवस्सिस्स
अण्णया कयाइ पुव्वरत्तावरत्तकालसमयंसि अणिच्चजागरिय जागरमाणस्स
इमेयारूवे अज्जत्थिए चित्तिए जाव समुप्पज्जित्था-एवं खतु अहं इमेणं ओरा-
लेणं विउलेणं जाव उदग्गेणं उदत्तेणं उत्तमेणं महाणुमागेणं तवोकम्मेणं सुक्के
भुक्खे जाव धमणिसंतए जाए, तं अत्थि जा मे उट्टाणे कम्मे बले वीरिए पुरिस-

षकारपरवकमे तावता मे सेयं कल्लं जाव जलंते तामलिस्तीए णयरीए विट्ठु-
 मट्ठे य पासंडत्थे य गिहत्थे य पुव्वसंगतिए य पच्छासंगतिए य परियायसंगतिए
 य आपुच्छित्ता तामलिस्तीए णयरीए मज्झमज्झेणं णिग्गच्छित्ता पाउगं कुंडिय-
 माइयं उवगरणं दासुमयं च पडिग्गहयं एगंते एडेइ एडित्ता तामलिस्तीए
 णयरीए उत्तरपुरत्थिमे दिसीभाए णियत्तणियमंडलं आलिहइ आलिहिता
 संलेहणाञ्जूसणाञ्जूसियस्स भत्तपाणपडियाइविक्खयस्स पाओवगयस्स कालं अणव-
 कंखमाणस्स विहरित्तएत्तिकट्टु एवं सपेहेइ एवं सहेपेत्ता कल्लं जाव जलंते
 जाव आपुच्छइ २ तामलिस्तीए एगंते एडेइ जाव जलंते जाव भत्तपाणपडि-
 याइविक्खए पाओवगमणं णिवण्णे । तेणं कालेणं २ बलिबंचारायहाणी अंगिदा
 अपुरोहिद्या यावि होत्था । तए णं ते बलिबंचारायहाणिवत्थव्वया बह्वे असुर-
 कुमारा देवा य देवीओ य तामलि बालतवस्सि ओहिणा आहोसंति २ अण-
 मण्णं सट्ठावेति २ एवं वयासी—एवं खलु देवाणुप्पिया ! बलिबंचा रायहाणी
 अंगिदा अपुरोहिद्या अम्हे य णं देवाणुप्पिया ! इंदाहीणा इंदाहिट्ठिया इंदाहीण-
 कज्जा अयं च णं देवाणुप्पिया ! तामली बालतवस्सि तामलिस्तीए णयरीए
 बहिया उत्तरपुरत्थिमे दिसीभाए णियत्तणियमंडलं आलिहिता संलेहणाञ्जूसणा-
 ञ्जूसिए भत्तपाणपडियाइविक्खए पाओवगमणं णिवण्णे, तं सेयं खलु देवाणुप्पिया !
 अम्हं तामलि बालतवस्सि बलिबंचाए रायहाणीए ठिइपकप्पं पकरावेत्तएत्ति-
 कट्टु अणमण्णस्स अंतिए एयमट्ठं पडिसुणोति २ बलिबंचाए रायहाणीए
 मज्झमज्झेणं णिग्गच्छति २ जेणेव रुयंगिदे उप्पायपव्वए तेणेव उवागच्छति २
 वेज्जव्वियसमुग्घाएणं समोहणंति जाव उत्तरवेउव्वियाइं रुवाइं विकुव्वंति, ताए
 उक्किट्ठाए तुरियाए चवलाए चंडाए जइणाए छेयाए सीहाए सिग्घाए दिव्वाए
 उद्धुयाए देवगइए तिरियमसंखेज्जाणं दीवसमुट्ठाणं मज्झमज्झेणं जेणेव
 जंनुट्ठीवे २ जेणेव भारहे वासे जेणेव तामलिस्ती णयरी जेणेव तामली
 मोरियपुत्ते तेणेव उवागच्छति २ ता तामलिस्स बालतवस्सिस्स उप्पि सर्पाक्ख
 सपडिदिंसि ठिष्चा दिव्वं देविंइ दिव्वं देवज्जुइं दिव्वं देवाणुभागं दिव्वं बत्तीस-
 विहं णट्ठविहि उवदंसंति २ तामलि बालतवस्सि तिव्वुत्तो आयाहिणं पयाहिणं
 करेति वदंति णमंसंति २ एवं वयासी—एवं खलु देवाणुप्पिया ! अम्हे बलि-
 बंचारायहाणिवत्थव्वया बह्वे असुरकुमारादेवा य देवीओ य देवाणुप्पियं वंदाओ

णमंसामो जाव पज्जुवासामो, अम्हाणं देवाणुप्पिया ! बलिचंचा रायहाणी
 अणिदा अपुरोहि्या अम्हेऽवि य णं देवाणुप्पिया ! इंदाहीणा इंदाहिट्टिया इंदा-
 हीणकज्जा तं तुब्भे णं देवाणुप्पिया ! बलिचंचारायहाणि आढाह परिमाणह
 सुमरह अट्ठं बंधह णियाणं पकरेह ठिइपकप्पं पकरेह, तए णं तुब्भे कालमासे
 कालं किच्चा बलिचंचारायहाणीए उववज्जिस्सह, तए णं तुब्भे अम्हं इंदा
 भविस्सह, तए णं तुब्भे अम्हेहिं सद्धि दिव्वाइं भोगभोगाइं भुंजमाणा विहरि-
 स्सह । तए णं से तामली बालतवस्सी तेहिं बलिचंचारायहाणिवत्थव्वेहिं बहूहि
 असुरकुमारेहिं देवेहिं देवीहि य एवं वृत्ते समाणे एयमट्ठं णो आढाइ णो परिया-
 णेइ तुसिणीए संचिट्ठइ । तए णं ते बलिचंचारायहाणिवत्थव्वया बह्वे असुर-
 कुमारा देवा य देवीओ य तामलि मोरियपुत्तं दोच्चंपि तच्चंपि तिक्खत्तो
 आयाहिणप्पयाहिणं करेति २ जाव अम्हं च णं देवाणुप्पिया ! बलिचंचाराय-
 हाणी अणिदा जाव ठिइपकप्पं पकरेह जाव दोच्चंपि तच्चंपि, एवं वृत्ते
 समाणे जाव तुसिणीए संचिट्ठइ । तए णं ते बलिचंचारायहाणिवत्थव्वया बह्वे
 असुरकुमारा देवा य देवीओ य तामलिणा बालतवस्सिणा अणाढाइज्जमाणा
 अपरियाणिज्जमाणा जामेव दिंसि पाउब्भया तामेव दिंसि पडिगया ॥ १३४ ॥
 तेणं कालेणं २ ईसाणे कप्पे अणिदे अपुरोहिए यावि होत्या । तए णं से तामली
 बालतवस्सी बहुपडिपुण्णाइं सद्धि वाससहस्साइं परिमाणं पाउणित्ता दोमासियाए
 संलेहणाए अत्ताणं झूसिता सबीसं भत्तसयं अणसणाए छेदित्ता कालमासे कालं
 किच्चा ईसाणे कप्पे ईसाणवडिसए विमाणे उववायसभाए देवसयणिज्जंसि
 देवदूसंतरिए अंगुलस्स असंखेज्जभगमेत्तीए ओगाहणाए ईसाणदेवदविरह-
 कालसमयंसि ईसाणदेवदत्ताए उववण्णे । तए णं से ईसाणे देवदे देवराया
 अहुणोववण्णे पंचविहाए पज्जत्तीए पज्जत्तिभावं गच्छइ, तंजहा—आहारप०
 जाव भासामणपज्जत्तीए । तए णं ते बलिचंचारायहाणिवत्थव्वया बह्वे असुर-
 कुमारा देवा य देवीओ य तामलि बालतवस्सि कालगयं जाणित्ता ईसाणे
 य कप्पे देवदत्ताए उववण्णं पासित्ता आसुरत्ता कुविया चंडिकिया मिसि-
 मिसेमाणा बलिचंचाराय० मज्झमज्जेणं णिग्गच्छति २ ताए उक्किट्ठाए
 जाव जेणेव भारहे वासे जेणेव तामलित्ती णयरी जेणेव तामलिस्स
 बालतवस्सिस्स सरीरए तेणेव उवागच्छति वामे पाए सुंबेणं बंधति २

तिषल्लुत्तो मूहे उट्ठहति २ तामलित्तीए णयरोए सिंघाडगतिगचउक्कचच्चर-
 चउम्महमहापहपहेसु आकडुविकडिं करेमाणा महया २ सद्देणं उग्घोसेमाणा २
 एवं वयासी-केस णं भो ! से तामली बालतव० सयंगहियांलिगे पाणामाए पव्व-
 ज्जाए पव्वइए ? केस णं भो ! से ईसाणे कप्पे ईसाणे देविंदे देवराया ? तिकट्टु
 तामलिस्स बालतव० सरोरयं हीलंति णिदंति खिसंति गरिंहति अवमण्णंति
 तज्जंति तालेंति परिवहेति पव्वहेति आकडुविकडिं करेति होलेत्ता जाव आकडु-
 विकडिं करेत्ता एगंते एडेंति २ जामेव दिंसि पाउब्भूया तामेव दिंसि पडिगया
 ॥१३५॥ तए णं ते ईसाणकप्पवासी बह्वे वेमाणिया देवा य देवीओ य बलिचंचा-
 रायहाणिवत्थव्वयाहं बह्वे असुरकुमारेहं देवेहि य देवीहि य तामलिस्स
 बालतवस्सिस्स सरोरयं हीलिज्जमाणं णिदिज्जमाणं जाव आकडुविकडिं कीर-
 माणं पासंति २ आसुहत्ता जाव मिसिमिसेमाणा जेणेव ईसाणे देविंदे देवराया
 तेणेव उवागच्छंति २ करयलपरिग्गहियं दसणहं सिरसायत्तं मत्थए अंजलि
 कट्टु जएणं विजएणं वट्ठावेति २ एवं वयासी-एवंखलु देवाणुप्पिया ! बलि-
 चंचारायहाणिवत्थव्वया बह्वे असुरकुमारा देवा य देवीओ य देवाणुप्पिए काल-
 गए जाणित्ता ईसाणे कप्पे इंदत्ताए उववण्णे पासेत्ता आसुहत्ता जाव एगंते
 एडेंति २ जामेव दिंसि पाउब्भूया तामेव दिंसि पडिगया । तए णं से ईसाणे
 देविंदे देवराया तेसि ईसाणकप्पवासीणं बह्वे वेमाणियाणं देवाण य देवीण य
 अंतिए एयमट्ठं सोच्चा णिसम्म आसुहत्ते जाव मिसिमिसेमाणे तत्थेव सय-
 णिज्जवरगए तिवलियं भिउडि णिडाले साहट्टु बलिचंचारायहाणि अहे सप-
 विख सपडिदिंसि समभिलोएइ । तए णं सा बलिचंचारायहाणी ईसाणेणं देवि-
 देणं देवरणा अहे सपविख सपडिदिंसि समभिलोइया समाणी तेणं दिव्वपमा-
 वेणं इंगालब्भूया मुम्मुरब्भया छारियब्भूया तत्तकवेल्लकब्भूया तत्ता समजोइ-
 ष्भया जाया यावि होत्था । तए णं ते बलिचंचारायहाणिवत्थव्वया बह्वे असुर-
 कुमारा देवा य देवीओ य तं बलिचंचं रायहाणिं इंगालब्भूयं जाव समजोइ-
 ष्भयं पासंति २ भीया तत्था तसिया उव्विग्गा संजायभया सव्वओ समंता
 आघावेति परिघावेति २ अण्णमण्णस्स कायं समतुरंगेमाणा २ चिट्ठंति । तए
 णं ते बलिचंचारायहाणिवत्थव्वया बह्वे असुरकुमारा देवा य देवीओ य ईसा-
 णं देविंदं देवरायं परिकुवियं जाणित्ता ईसाणस्स देविंदस्स देवरणां तं दिव्वं

देविङ्गु दिव्वं देवज्जुइं दिव्वं देवाणुभागं दिव्वं तेयलेस्सं असहभाणा सच्चे सप-
 विख सपडिदिंसिं ठिच्चो करयत्तपरिग्गहिंयं दसणहं सिरसावत्तं भत्थए अंजलि
 कट्टु जएणं विजएणं वद्धाविति २ एवं वयासी--अहो णं देवाणुप्पिएहं दिव्वा
 देविङ्गुदी जाव अभिसमण्णागया तं दिव्वा णं देवाणुप्पियाणं दिव्वा देविङ्गुदी
 जाव लद्धा पत्ता अभिसमण्णागया तं खामेमो णं देवाणुप्पिया ! खमंतु णं
 देवाणुप्पिया ! खमंतु मरिहंतु णं देवाणुप्पिया ! णाइ भुज्जो २ एवंकरणयाए-
 त्तिकट्टु एयमट्ठं सम्मं विणएणं भुज्जो २ खामेति । तएणं से ईसाणे देविदे
 देवराया तेहि बलिचंचारायहाणिदत्थव्वेहिं वहरिं असुरकुमारेहिं देवेहिं देवीहि
 य एयमट्ठं सम्मं विणएणं भुज्जो २ खामिए समाणे तं दिव्वं देविङ्गु जाव
 तेयलेस्सं पडिसाहरइ । तप्पभिइं च णं गोयमा ! ते बलिचंचारायहाणिवत्थ-
 ण्णया बहवे असुरकुमारा देवा य देवीओ य ईसाणं देविदं देवरायं आडंति जाव
 पज्जुवासंति, ईसाणस्स देविदस्स देवरणो आणाउववायवयणणिदेसे चिट्ठंति ।
 एवं खलु गोयमा ! ईसाणेणं देविदेणं देवरण्णा सा दिव्वा देविङ्गुदी जाव
 अभिसमण्णागया । ईसाणस्स णं भंते ! देविदस्स देवरणो केवइयं कालं
 ठिई पणत्ता ? गोयमा ! साइरेगाइं दो सागरोवमाइं ठिई पणत्ता । ईसाणे
 णं भंते ! देविदे देवराया ताओ देवलोगाओ आउक्खएणं जाव कहिं गच्छि-
 हिइ ? कहिं उववज्जिहिइ ? गो० ! महाविदेहे वासे सिज्जिहिइ जाव
 अंतं काहिइ ॥ १३६ ॥ सक्कस्स णं भंते ! देविदस्स देवरणो विमाणेहिंतो
 ईसाणस्स देविदस्स देवरणो विमाणा ईसि उच्चयरा चेव ईसि उण्णयतरा
 चेव ईसाणस्स वा देविदस्स देवरणो विमाणेहिंतो सक्कस्स देविदस्स देवरणो
 विमाणा णोययरा चेव ईसि णिण्णयरा चेव ? हुंता ! गोयमा ! सक्कस्स
 तं चेव सव्वं णोयव्वं । से केणट्ठेणं ? गोयमा ! से जहाणामए--करयले
 सिद्या देसे उच्चे देसे उण्णए देसे णीए देसे णिणो, से तेणट्ठेणं गोयमा !
 सक्कस्स देविदस्स देवरणो जाव ईसि णिण्णयरा चेव ॥ १३७ ॥ पभू
 णं भंते ! सक्के देविदे देवराया ईसाणस्स देविदस्स देवरणो अंतियं
 पाउव्वसिच्चए ? हुंता पभू । से णं भंते ! किं आढायमाणे पभू अणाढायमाणे
 पभू ? गोयमा ! आढायमाणे पभू णो अणाढायमाणे पभू । पभू णं भंते !
 ईसाणे देविदे देवराया सक्कस्स देविदस्स देवरणो अंतियं पाउव्वसिच्चए ?

हंता पभू । से भंते ! कि आढायमाणे पभू अणाढायमाणे पभू ? गोयमा !
 आढायमाणेवि पभू अणाढायमाणेवि पभू । पभू णं भंते ! सक्के देविदे देवराया
 ईसाणं देविदं देवरायं सपक्खि सपडिदिंसि समभिलोइत्तए ? जहा पाउब्भवणा
 तथा दोवि आलावणा णेयव्वा । पभू णं भंते ! सक्के देविदे देवराया ईसाणं
 देविदेणं देवरणा सद्धि आलावं वा संलावं वा करेत्तए ? हंता ! पभू जहा
 पाउब्भवा । अत्थि णं भंते ! तेसि सक्कीसाणाणं देविदाणं देवराईणं किच्चाइं
 करणिज्जाइं समुप्पज्जंति ? हंता ! अत्थि । रो कहमियारिणं पकरेंति ? गोयमा !
 ताहे चेव णं से सक्के देविदे देवराया ईसाणस्स देविदस्स देवरणो अंतियं
 पाउब्भवइ, ईसाणे वा देविदे देवराया सक्कस्स देविदस्स देवरणो अंतियं
 पाउब्भवइ, इति भो ! सक्का देविदा देवराया दाहिणडुलोगाहिवई ! इति भो !
 ईसाणा देविदा देवराया उत्तरडुलोगाहिवई ! इति भो ! २ त्ति ते अण्णमण्णस्स
 किच्चाइं करणिज्जाइं पच्चणुब्भवमाणा विहरंति ॥ १३८ ॥ अत्थि णं भंते !
 तेसि सक्कीसाणाणं देविदाणं देवराईणं विवादा समुप्पज्जंति ? हंता ! अत्थि ।
 से कहमियारिणं पकरेंति ? गोयमा ! ताहे चेव णं ते सक्कीसाणा देविदा दे-
 वरायाणो सणकुमारं देविदं देवरायं मणसीकरेंति, तए णं से सणकुमारे देविदे
 देवराया तेहि सक्कीसाणांहे देविदेहे देवराईहे मणसीकए समारणे खिप्पामेव
 सक्कीसाणाणं देविदाणं देवराईणं अंतियं पाउब्भवइ, जं से वयइ तस्स आणा-
 उववायवयणिहेसे चिट्ठंति ॥ १३९ ॥ सणकुमारे णं भंते ! देविदे देवराया
 किं भवसिद्धिए अभवसिद्धिए सम्मद्दिट्ठी मिच्छविट्ठी परित्तसंसारए अणंत-
 संसारए सुलभबोहिए दुल्लभबोहिए आराहए विराहए चरिमे अचरिमे ?
 गोयमा ! सणकुमारे णं देविदे देवराया भवसिद्धिए णो अभवसिद्धिए, एवं
 सम्मद्दिट्ठी परित्तसंसारए सुलभबोहिए आराहए चरिमे पसत्थं णेयव्वं । से
 केणट्ठेणं भंते ! ? गोयमा ! सणकुमारे देविदे देवराया बहूणं समणाणं
 बहूणं समणीणं बहूणं सावयाणं बहूणं सावियाणं हियकामए सुहकामए पय-
 कामए आणुकंपिए जिस्सेयसिए हियसुहणस्सेसकामए, से तेणट्ठेणं गोयमा !
 सणकुमारे णं भवसिद्धिए जाव णो अचरिमे । सणकुमारस्स णं भंते ! देवि-
 दस्स देवरणो केवइयं कालं ठिई पण्णत्ता ? गोयमा ! सत्त सागरोवमाणि
 ठिई पण्णत्ता । से णं भंते ! ताओ देवलोगाओ आउवत्तएणं जाव काहं उव-

बज्जिहिइ ? गोयमा ! महाविदेहे वासे सिज्जिहिइ जाव अंतं करेहिइ । सेवं भंते ! सेवं भंते ! । गाहाओ-छट्टुट्टमनासो, अट्टमासो वासाइं अट्ट छम्मासा । तीसगकुखदत्ताणं तवभत्तपरिण्यपरियाओ ॥ १ ॥ उच्चत्तविमाणं पाउभव पेच्छणा य संलावे । किञ्चि विवाडुप्पत्ती सणकुमारे य भवियव्वं (त्तं) ॥ २ ॥ भोया समत्ता ॥

तइयं सयं बीओ उट्टेसो

तेणं कालेणं तेणं समएणं रायगिहे णामं णयरे होत्था जाव परिसा पज्जु-वासइ । तेणं कालेणं तेणं समएणं चमरे अमुरिदे अमुररावा चमरचंचाए राय-हाणीए सभाए सुहम्माए चमरंसि सोहासणंसि चउसट्ठीए सामाजियत्ताहस्तीहि जाव णट्टविहिं उवदंसेत्ता जामेव दिंसि पाउव्वभूए तामेव दिंसि पडिगए । अंतेत्ति ! भगवं गोयमे समणं भगवं महावीरं वंदइ णमंसइ २ एवं वयःसो-अत्थि णं भंते ! इमीसे रयणप्पभाए पुढवीए अहे असुरकुमारा देवा परिवसंति ? गोयमा ! णो इणट्ठे समट्ठे, एवं जाव अहेसत्तमाए पुढवीए, सोहम्मस्स कप्पस्स अहे जाव अत्थि णं भंते ! ईसिपम्भाराए पुढवीए अहे असुरकुमारा देवा परि-वसंति ? णो इणट्ठे समट्ठे । से कंहि खाइ णं भंते ! असुरकुमारा देवा परिवसंति ? गोयमा ! इमीसे रयणप्पभाए पुढवीए असीउत्तरजोयणसयसहस्स-बाहल्लाए, एवं असुरकुमारदेववत्तव्वया जाव दिव्वाइं भोगभोगाइं भुंजमाणा विहरंति । अत्थि णं भंते ! असुरकुमाराणं देवाणं अहे गइविसए ? हंता अत्थि । केवइयं च णं पभू ! ते असुरकुमाराणं देवाणं अहे गइविसए पणत्ते ? गोयमा ! जाव अहेसत्तमाए पुढवीए तच्चं पुण पुढविं गया य गमिस्संति य । किं पत्तियणं भंते ! असुरकुमारा देवा तच्चं पुढविं गया य गमिस्संति य ? गोयमा ! पुव्ववेरियस्स वा वेदणउदीरणयाए पुव्वसंगइयस्स वा वेदणउवसा-मणयाए, एवं खलु असुरकुमारा देवा तच्चं पुढविं गया य गमिस्संति य । अत्थि णं भंते ! असुरकुमाराणं देवाणं तिरियं गइविसए पणत्ते ? हंता अत्थि । केवइयं च णं भंते ! असुरकुमाराणं देवाणं तिरियं गइविसए पणत्ते ? गोयमा ! जाव असंबेज्जा दीवसमुद्दा णंदिस्सरवरं पुण दीवं गया य गमिस्संति य । किं पत्तियणं भंते ! असुरकुमारा देवा णंदिस्सरवरदीवं गया य गमिस्संति य ? गोयमा । जे इमे अरिहंता भगवंता एएसि णं जम्मणमहेसु वा णिवक्खमण-महेसु वा णाणुप्पयमहिंमासु वा परिणिव्वाणमहिंमासु वा, एवं खलु असुर-

कुमारा देवा गंदिस्सरवरदीवं गया य गमिस्संति य । अत्थि णं भंते ! असुर-
 कुमाराणं देवाणं उड्ढं गइविसए ? हंता ! अत्थि । केवइयं च णं भंते !
 असुरकुमाराणं देवाणं उड्ढं गइविसए ? गोयमा ! जावऽच्चुए कप्पे
 सोहम्मं पुण कप्पं गया य गमिस्संति य । किं पत्तियण्णं भंते ! असुर-
 कुमारा देवा सोहम्मं कप्पं गया य गमिस्संति य ? गोयमा ! तेसि णं देवाणं
 भवपच्चइयवेराणुबंधे, ते णं देवा विकुब्बेमाणा परिघारेमाणा वा आयरवत्ते
 देवे वित्तासेंति अहालहुस्सगाइं रयणाइं गहाय आयाए एगंतमंतं अवक्कमंति ।
 अत्थि णं भंते ! तेसि देवाणं अहालहुस्सगाइं रयणाइं ? हंता अत्थि । से
 कहमियाणिं पकरेंति ? तओ से पृच्छा कायं पव्वहति । पभू णं भंते !
 असुरकुमारा देवा तत्थ गया चेव समाणा ताहिं अच्छराहिं सदिं दिव्वाइं भोग-
 भोगाइं भुंजमाणा विहरित्तए ? णो इणट्ठे समट्ठे, ते णं तओ पडिगियतंति
 २ ता इहमागच्छति २ जइ णं ताओ अच्छराओ आढायंति परियाणंति पभू
 णं ते असुरकुमारा देवा ताहिं अच्छराहिं सदिं दिव्वाइं भोगभोगाइं भुंजमाणा
 विहरित्तए अहण्णं ताओ अच्छराओ णो आढायंति णो परियाणंति णो णं पभू
 ते असुरकुमारा देवा ताहिं अच्छराहिं सदिं दिव्वाइं भोगभोगाइं भुंजमाणा वि-
 हरित्तए । एवं खलु गोयमा ! असुरकुमारा देवा सोहम्मं कप्पं गया य गमिस्संति
 य ॥ १४१ ॥ केवइकालस्स णं भंते ! असुरकुमारा देवा उड्ढं उप्पयंति जाव
 सोहम्मं कप्पं गया य गमिस्संति य ? गोयमा ! अणंतारिंहं उस्सप्पिणीहिं
 अणंतारिंहं अवसप्पिणीहिं समइक्कंतारिंहं, अत्थि णं एस भावे लोयच्छेरयमूए
 समुप्पज्जइ जण्णं असुरकुमारा देवा उड्ढं उप्पयंति जाव सोहम्मो कप्पो । किं
 णिस्साए णं भंते ! असुरकुमारा देवा उड्ढं उप्पयंति जाव सोहम्मो कप्पो ?
 गोयमा ! से जहाणामए—इह सबरा इ वा बब्वरा इ वा टंकगा इ वा भुत्त्या इ
 वा पल्हया इ वा पुल्लिदा इ वा एगं महं रण्णं वा गडुं वा खडुं वा दुग्गं वा वरिं वा
 विसमं वा पव्वयं वा णीसाए सुमहल्लमवि आसबलं वा हत्थिवलं वा जोहबलं
 वा धणुवलं वा आगल्लेति, एवामेव असुरकुमारावि देवा, णणत्थ अरिहंते वा
 अरिहंतं चेइयाणि वा अणगारे वा भावियप्पणो णिस्साए उड्ढं उप्पयंति जाव
 सोहम्मो कप्पो । सब्बेवि णं भंते ! असुरकुमारा देवा उड्ढं उप्पयंति जाव
 सोहम्मो कप्पो ? गोयमा ! णो इणट्ठे समट्ठे, महिड्डिया णं असुरकुमारा

बैवा उड्डं उप्पयंति जाव सोहम्मो कप्पो । एसवि णं भंते ! चमरे असुरिदे
 असुरकुमारराया उड्डं उप्पइययुंवि जाव सोहम्मो कप्पो ? हंता गोयमा !
 २ । अहो णं भंते ! चमरे असुरिदे असुरकुमारराया महिड्ढिए महज्जुईए जाव
 कहि पयिड्ढा ? कूडगारसालादिट्ठंतो भाणियव्वो ॥ १४२ ॥ चमरेणं भंते !
 असुरिदेणं असुररणा सा दिव्वा देविड्ढी तं चेव जाव किष्णा लद्धा पत्ता
 अभिसमण्णागया ? एवं खलु गोयमा ! तेणं कालेणं तेणं समएणं इहेव
 जंबूद्वीवे २ भारहे वासे विंशगिरिपायमूले बेभेले णामं सणिवेसे होत्था,
 धणओ । तत्थ णं बेभेले सणिवेसे पूरणे णामं गाहावई परिवसइ अड्ढे
 दित्ते जहां तामलित्तस वत्तव्वया तहा णेयव्वा, णवरं चउप्पुडयं दारुमयं पडि-
 ग्गहयं करेता जाव विउलं असणं पाणं खाइमं साइमं जाव सयमेव चउप्पुडयं
 दारुमयं पडिग्गहयं गहाय मुंडे भबित्ता दाणामाए पव्वज्जाए पव्वइत्तए
 पव्वइएऽवि य णं समाणे तं चेव, जाव आयावणमूमीओ पच्चोएहइ २ तां
 सयमेव चउप्पुडयं दारुमयं पडिग्गहयं गहाय बेभेले सणिवेसे उच्चणीयमज्झि-
 भाइं कुलाइं घरसमुवाणस्स भिक्खायरियाए अडेत्ता जं मे पडमे पुडए पडइ
 कप्पइ मे तं पंथे पहियाणं दलइत्तए जं मे दोष्चे पुडए पडइ कप्पइ मे तं
 कागमुणयाणं दलइत्तए जं मे तच्चे पुडए पडइ कप्पइ मे तं मच्छरुच्छमाणं
 दलइत्तए जं मे चउत्थे पुडए पडइ कप्पइ मे तं अप्पणा आहारित्तएत्तिकट्ठ
 एवं संपेहेइ २ कल्लं पाउप्पभायाए रयणीए तं चेव णिरवसेसं जाव जं मे (से)
 चउत्थे पुडए पडइ तं अप्पणा आहारं आहारेइ । तए णं से पूरणे बालतवस्सी
 तेणं ओरालेणं विउलेणं पयत्तेणं पग्गहिएणं बालतवोकम्मेणं तं चेव जाव बेभे-
 लस्स सणिवेसस्स मज्झमज्जेणं णिग्गच्छइ २ पाउयं कुंडियमाईयं उवगरणं
 चउप्पुडयं च दारुमयं पडिग्गहयं एगंतमंते एडेइ २ बेभेलस्स सणिवेसस्स दाहिण
 पुरत्थिने दिमीभागे अट्ठणियत्तणियमंडलं आलिहिता संलेहणाज्जसणाज्जसिए
 भत्तराणपडिगाइविखए पाओवगमणं णिधण्णे । तेणं कालेणं तेणं समएणं अहं
 गोयमा ! छउमत्थकालियाए एवकारसवासपरियाए छट्ठंछट्ठेणं अणिविलत्तेणं
 तवोकम्मेणं संजमेणं लज्जा अप्पाणं भावेमाणे पुठ्ठानुपुंवि चरमाणे गामाणु-
 णामं वूइज्जमाणे जेणेव सुसुभारपुरे णयरे जेणेव असोयवणसंडे उज्जाणे जेणेव
 असोयवरपायवे जेणेव पुठ्ठवित्तिवावट्टए तेणेव उवागच्छामि २ असोयवरपाय-

वस्त हेट्टा पुढविसिलावट्टयंसि अट्टमभत्तं परिगिण्हामि, दोवि पाए साहट्ट
 वग्घारियपाणी एगपोग्गलणिविट्ठदिट्ठी अणिभिसज्जयणं ईतिपभारगएणं काएणं
 अहापणिहिण्हिं गत्तेहिं सत्विदिण्हिं गुत्तेहिं एगरादयं महापडिन्नं उवसंपज्जिता
 णं विहरामि । तेणं कालेणं तेणं समएणं चमरचंचारायहाणी अणिदा अपुरोहिया
 यावि होत्था । तए णं से पूरणं बालतवरसी बहुपडिपुण्णाइं दुवालसवाताइं परि-
 यागं पाडणित्ता मासियाए संलेहणाए अत्ताणं झूत्ता सट्ठिं भत्ताइं अणसणाए
 छेदेत्ता कालमासे कालं किञ्चा चमरचंचाए रायहाणीए उववायसभाए जाव
 इंदत्ताए उववण्णे । तए णं से चमरे असुरिदे असुरराया अहुणोववण्णे पंचविहाए
 पज्जत्तीए पज्जत्तिभावं गच्छइ तंजहा—आहारपज्जत्तीए जाव भास-मणपज्जत्तीए
 तए णं से चमरे असुरिदे असुरराया पंचविहाए पज्जत्तीए पज्जत्तिभावं गए
 समाणे उड्डं वीससाए ओहिणा आभोएइ जाव सोहम्मो कप्पो, पासाइ य तत्थ
 सक्कं देविदं देवरायं मघवं पाकसासणं सयक्कतुं सहस्सखं वज्जपाणि पुरंदरं
 जाव दस दिसाओ उज्जोवेमाणं पभासेमाणं सोहम्भे कप्पे सोहम्मवडेरए विमाणे
 सक्कंसि सीहासणंसि जाव दिव्वाइं भोगभोगाइं भुंजमाणं पासाइ २ इमेयाख्खे
 अज्झत्थिए चित्तिए पत्थिए मणोगए संकप्पे समुप्पज्जित्था—एस णं एस अपत्थिय
 पत्थए दुत्तंपंतलवखणे हिरिसिरिपरिवज्जिए हीणपुण्णजाडत्ते जण्णं ममं
 इमाए एयाख्खाए दिव्वाए देविड्ढीए जाव दिव्वे देवाणुभावे लद्धे पत्ते अभि-
 समण्णागए उप्पि अप्पुस्सुए दिव्वाइं भोगभोगाइं भुंजमाणे विहरइ, एवं सपेहेइ
 २ सामाणियपरिसोववण्णए देवे सद्दावेइ २ एवं वयासी—केत णं एस देवाणु-
 प्पिया अपत्थियपत्थए जाव भुंजमाणे विहरइ ? तए णं ते सामाणियपरिसोव-
 वण्णगा देवा चमरेणं असुरिदेणं असुररणा एवं वृत्ता समाणा हट्टुट्ठा जाव
 हयहियया करयलपरिग्गहियं दसअहं सिरसावत्तं मत्थए अज्जलि कट्टु जएणं
 विजएणं वद्धावेति २ एवं वयासी—एस णं देवाणुपिया ! सक्के देविदे
 देवराया जाव विहरइ । तए णं से चमरे असुरिदे असुरराया तेषिं सामा-
 णियपरिसोववण्णमाणं देवाणं अंतिए एयमट्ठं सोच्चा णिसम्म आमुस्सत्ते
 रुट्ठे कुविए चंडिकिए मित्तिमित्तेमाणे ते सामाणियपरिसोववण्णए देवे
 एवं वयासी—अण्णे खलु भो ! से सक्के देविदे देवराया अण्णे खलु भो ! से
 चमरे असुरिदे असुरराया, महिड्ढिए खलु भो ! से सक्के देविदे देवराया,

अपिड्डीए खलु भो ! ते चमरे असुरिदे असुरराया, तं इच्छामि णं देवान्-
 पिप्या ! रावकं देविदं देवरायं सयमेव अच्छासाइत्तएत्तिकट्टु उसिणे उसिण-
 ध्मूए जाए याचि होत्था । तए णं से चमरे असुरिदे असुरराया ओहिं पउंजइ २
 ममं ओहिणा आभोएइ २ इमेयारूवे अज्झरिथाए जाव समुप्पज्जित्या—एवं खलु
 समणे भगवं महावीरे जंबुद्वीवे २ भारहेवासे सुंसुमारपुरे णयरे असोगवणसंडे
 उज्जाणे असोगवरपायवरस अहे पुढविस्तिलावट्टयंसि अट्टमभत्तं पडिगिण्हत्ता
 एगराइयं महापडिमं उवसंपज्जित्ता णं विहरइ । तं सेयं खलु मे समणं भगवं
 महावीरं णीसाए सवकं देविदं देवरायं सयमेव अच्छासाइत्तएत्तिकट्टु एवं संपे-
 हेइ २ सयणिज्जाओ अन्भुट्टेइ २ ता देवदूसं परिहेइ २ उववायसभाए पुरत्थि-
 मित्तेणं दारेणं णिगगच्छइ, जेणेव सभा सुहम्ममा जेणेव चोप्पाले पहरणकोसे
 तेणेव उवागच्छइ २ ता फलिहरयणं परामुसइ २ एगे अबीए फलिहरयणमायाए
 महया अमरिसं वहुमाणे चमरचंचाए रायहाणीए मज्झमज्जेणं णिगगच्छइ २
 जेणेव तिगिच्छिक्खंडे उप्पायपक्खए तेणेव उवागच्छइ २ ता वेउव्वियसमुग्घा-
 एणं समोहण्णइ २ तां संखेज्जाइं जोयणाइं जाव उत्तरवेउव्वियरूवं विउव्वइ २
 ता ताए उक्किट्टाए जाव जेणेव पुढविस्तिलावट्टए जेणेव मम अंत्तिए तेणेव
 उवागच्छइ २ ममं तिकखुत्तो आयाहिणं पयाहिणं करेइ जाव णमंसित्ता एवं
 वयासी—इच्छामि णं भंते ! तुभं णीसाए सवकं देविदं देवरायं सयमेव अच्छा-
 साइत्तएत्तिकट्टु उत्तरपुरत्थिमं दिसीभागं अवक्कमइ २ वेउव्वियसमुग्घाएणं
 समोहण्णइ २ जाव दोच्चंपि वेउव्वियसमुग्घाएणं समोहण्णइ २ एगं महं धोरं
 घोरागारं भीमं भीमागारं भासुरं भयाणीयं गंभीरं उत्तासणयं कालडुरत्तमास-
 रासिसंकासं जोयणसयसाहस्सीयं महाबोविं विउव्वइ २ अफोडेइ २ वग्गइ २
 गज्जइ २ ह्यहेसियं करेइ २ हत्थिगुलगुलाइयं करेइ २ रहघणघणाइयं करेइ २
 पायदहरणं करेइ २ भूमिचवेडयं दलयइ २ सीहणादं णवइ २ उच्छोलेइ २
 पच्छोलेइ २ तिवइं छिदइ २ घामं भुयं ऊसवेइ २ दाहिणहत्थपदेसिणीए य
 अंगुट्टुणहेण य वित्तिरिच्छमुहं विडंबेइ २ महया २ सट्ठेणं कलकलरवं करेइ,
 एगो अबीए फलिहरयणमायाए उड्डं वेहासं उप्पइए, खोभंते चेव अहेलीयं
 कपेमाणे च मेयणितलं आकट्टं (साकड्डं) तेव तिरियलीयं फोडेमाणे व
 अंदरतलं कत्थइ गज्जंते कत्थइ विज्जयायंते कत्थइ वासं वासमाणे गाओ

कथय उरुघायं पकरेमाणे कथय तमुक्कायं पकरेमाणे वाणमंतरदेवे वित्ता-
 सेमाणे जोइसिए देवे डुहा विभयमाणे २ आयरवले देवे विपलायमाणे २ फलि-
 हरयणं अंवरतलसि विअट्टमाणे २ विउम्भाएमाणे २ ताए उक्किट्टाए जाव
 तिरियमसद्धेज्जाणं दीवसमुद्दाणं मज्झमज्जेणं वीईवयमाणे २ जेणेव सोहम्मे
 कप्पे जेणेव सोहम्मवडेंसए विमाणे जेणेव सत्ता सुहम्मा तेणेव उवागच्छइ २
 एगं पायं पडमवरवेइयाए करेइ एग पायं सभाए सुहम्माए करेइ फलिहरयणं
 महया २ सद्देषं तिव कुत्तो इंध्यालं आउडेइ २ एवं वयासी—कहि णं भो ! सक्के
 देविदे देवराया ? कहि णं ताओ चउरासीइ सामाणियसाहसीओ ? जाव कहि
 णं ताओ चत्तारि चउरासीईओ आयरवलेदेवसाहसीओ ? कहि णं ताओ अणे-
 गाओ अछराकोडोओ ? अज्जं हणामि अज्जं महंमि अज्जं वहंमि अज्जं ममं
 अवसाओ अध्छराओ वसमुवणमंमुत्तिकट्टु तं अणिट्ठं अकतं अण्णिवं अमुमं
 अमण्णुणं अमणामं फहतं गिरं णिसिरइ । तए णं से सक्के देविदे देवराया तं
 अणिट्ठं जाव अमणामं अस्सुयपुक्वं फरसं गिरं सोच्छा णिसम्म आयुहते जाव
 भिसिमिसेमाणे तिवलियं भिउडि णिडाले साहट्टु चमरं असुरिदं अमुररायं एवं
 वयासी—हं भो ! चमरा ! असुरिदा ! अमुरराया ! अपत्थियपत्थया ! जाव
 हीणपुण्णवाउइसा ! अज्जं ण अवसि णाहि ते सुहमत्थीतिकट्टु तत्थेव सीहा-
 सणवरगए वज्जं परामुसइ २ तं जलंतं फुडंतं तडतडंतं उक्कासहत्साइं विणि-
 म्मुयमाणं जालासहत्साइं पमंजमाणं इंगालसहत्साइं पविक्खरमाणं २ फुलिग-
 जालामालासहत्साइं चक्खुविकखेवदिट्ठिपडिघायं पि पकरेमाणं द्धुववहइरेगतेय-
 यिण्णंतं जइणवेगं फुल्लंकिमुयसमाणं महम्मयं भयंकरं चमरस्स असुरिदस्स
 असुररण्णे वहाए वज्जं णिसिरइ । तए णं से चमरे असुरिदे असुरराया तं
 जलंतं जाव भयंकरं वज्जमभिमुहं आवयमाणं पासइ पासइत्ता जियाइ पिहाइ
 जियाइत्ता पिहाइत्ता तहेव संभगमउडविडए सालंबहत्थाभरणे उड्डपाए अहो-
 त्तिरे कक्खागपसेयपि व विणिम्मयमाणं २ ताए उक्किट्टाए जाव तिरियम-
 संखेज्जाणं दीवसमुद्दाणं मज्झमज्जेणं वीईवयमाणे २ जेणेव जबुद्धे २ जाव
 जेणेव असोअवरपायवे जेणेव मम अंसिए तेणेव उवागच्छइ २ सा भीए भय-
 मगरसरे भगवं सरणंभित्ति वुवमाणे ममं दोण्हि पायार्ण अंतरंति जलिवेण
 समोदडिए ॥ १४३ ॥ तए णं तस्स सक्कस्स देविदस्स देवरण्णे इमेयाकडे

अञ्जत्थिए जाव समुप्पज्जित्था—णो खलु पभू चमरे असुरिदे असुरराया णो खलु समत्थे चमरे असुरिदे असुरराया णो खलु विसए चमरस्स असुरिदस्स असुररण्णो अप्पणो णिरत्ताए उड्ढं उप्पइत्ता जाव सोहम्मो कप्पो, णणत्थ अरिहंते वा अरहंत चेइयाणि वा अणगारे वा भाविअप्पणो णीसाए उड्ढं उप्पयइ जाव सोहम्मो कप्पो । तं महादुक्खं खलु तहारूवाणं अरहंतानं भगवंतानं अणगाराण य अच्चासायणाएत्तिकट्टु ओहि पउंजइ २ मम ओहिणा आभोएइ २ हा हा अहो हतोऽहंपसित्तिकट्टु ताए उक्किट्ठाए जाव दिक्खाए देवगईए वज्जस्स जीहि अणुगच्छमाणे २ तिरियमसंखेज्जाणं दीवसमुदाणं मज्झिमज्जेणं जाव जेणेव असोगवरथायवे जेणेव मम अतिए तेणेव उवागच्छइ २ ममं चउरंगुलमसंपत्तं वज्जं पडिसाहरइ, अविद्याइं मे गोयमा ! मूट्टिवाएणं केसग्गे सोइत्था ॥ १४४ ॥ तए णं से सक्के देविदे देवराया वज्जं पडिसाहरित्ता ममं तिक्खुत्तो आयाहिणं पयाहिणं करेइ २ वंदइ णमंसइ २ एवं वयासी—एवं खलु भंते ! अहं तुभं णीसाए चमरेणं असुरिदेणं असुररण्णा सयमेव अन्धासाइए, तए णं मए परिकुविएणं समाणेणं चमरस्स असुरिदस्स असुररण्णो वहाए वज्जे णिसिट्ठे, तए णं ममं इमेयारूवे अञ्जत्थिए जाव सनुप्पज्जित्था—णो खलु पभू चमरे असुरिदे असुरराया तहेव जाव ओहि पउंजामि देवाणुप्पिए ओहिणा आभोएमि हा हा अहो हभोनीतिकट्टु ताए उक्किट्ठाए जाव जेणेव देवाणुप्पिए तेणेव उवागच्छामि देवाणुप्पियाणं चउरंगुलमसंपत्तं वज्जं पडिसाहरामि वज्जपडिसाहरणट्टयाए णं इहमागए इह समोसठे इह संपत्ते इहेव अज्ज उवसंपज्जित्ता णं विहरामि । तं खामेमि णं देवाणुप्पिया ! खमंतु णं देवाणुप्पिया ! खमंतु मरहंतु णं देवाणुप्पिया ! णाइभुज्जो एवं पकरणयाएत्तिकट्टु ममं वंदइ णमंसइ २ उत्तरपुरत्थिमं दिसीभागं अवक्कमइ २ वामेणं पादेणं तिक्खुत्तो भूमिं वलेइ २ चमरं असुरिदं असुररायं एवं वयासी—नुक्कोऽसि णं भो चमरा ! असुरिदा ! असुरराया ! समणस्स भगवओ महावीरस्स पभावेणं णाहि ते दाणिं ममाओ भयमत्थीतिकट्टु जामेव दिंसि पाउंभूए तामेव दिंसि पडिगए ॥ १४५ ॥ भंतेत्ति ! भगवं गोयमे समणं भगवं महावीरं वंदइ २ एवं वयासी—देवे णं भंते ! महिड्डिए महज्जुइए जाव महाणुभागे पुव्वामेव पोग्गलं खिवित्ता पभू तमेव अणुपरियट्टित्ता णं गिण्हत्तए ? हंता पभू । से केणट्ठेणं

भंते ! जात्र गिह्त्तए ? गोयमा ! पोग्गले णं लिक्खे समणे पुक्वामेव
सिग्घमई भवित्ता तओ पच्छा मंदगई भयइ । देवे णं महिद्धिए पुंत्विपिय
पच्छावि सीहे सीहगई चेव तुरिए तुरियगई चेव, से तेणद्वेणं जाव पभू
गेह्त्तए । जइ णं भंते ! देवे महिद्धिए जाव अणुपरियट्टिता णं गेह्त्तए
कम्हा णं भंते ! सक्केणं देविदेणं देवरण्णा (राया) चमरे असुरिदे असुरराया
णो संचाएइ साहत्थि गेह्त्तए ? गोयमा ! असुरकुमारारणं देवाणं अहे गइ-
विसए सीहे २ चेव तुरिए २ चेव उड्ढं गइविसए अप्पे २ चेव मंदे-मंदे
चेव वेमा णियाणं देवाणं उड्ढं गइविसए सीहे-सीहे चेव तुरिए-तुरिए चेव
अहे गइविसए अप्पे-अप्पे चेव मंदे-मंदे चेव, जात्रइयं खेत्तं सक्के देविदे
देवराया उड्ढं उप्पयइ एक्केणं समएणं तं वज्जे दोहि, जं वज्जे दोहि तं
चमरे तिहि, सव्वत्थोवे सक्कस्स देविदस्स देवरण्णो उड्डुलीयकंडए अहेलोय-
कंडए संखेज्जगुणे, जावइयं खेत्तं चमरे असुरिदे असुरराया अहे उवयइ
एक्केणं समएणं तं सक्के दोहि जं सक्के दोहि तं वज्जे तिहि, सव्वत्थोवे चम-
रस्स असुरिदस्स असुररण्णो अहेलोयकंडए उड्डुलीयकंडए संखेज्जगुणे । एवं
खलु गोयमा ! सक्केणं देविदेणं देवरण्णा चमरे असुरिदे असुरराया णो संचा-
एइ साहत्थि गेह्त्तए । सक्कस्स णं भंते ! देविदस्स देवरण्णो उड्ढं अहे
तिरियं च गइविसयस्स कयरे २ हितो अप्पे वा बहूए वा तुल्ले वा विसेसा-
हिए वा ? गोयमा ! सव्वत्थोवं खेत्तं सक्के देविदे देवराया अहे उवयइ
एक्केणं समएणं तिरियं संखेज्जे भागे गच्छइ उड्ढं संखेज्जे भागे गच्छइ ।
चमरस्स णं भंते ! असुरिदस्स असुररण्णो उड्ढं अहे तिरियं च गइविसय-
स्स कयरे २ हितो-अप्पे वा बहूए वा तुल्ले वा विसेसाहिए वा ? गोयमा !
सव्वत्थोवं खेत्तं चमरे असुरिदे असुरराया उड्ढं उप्पयइ एक्केणं समएणं तिरियं
संखेज्जे भागे गच्छइ अहे संखेज्जे भागे गच्छइ । वज्जं जहा सक्कस्स देविदस्स
तहेव णवरं विसेसाहियं कायव्वं । सक्कस्स णं भंते ! देविदस्स देवरण्णो
उवयणकालस्स य उप्पयणकालस्स य कयरे २ हितो अप्पे वा बहूए वा तुल्ले
वा विसेसाहिए वा ? गोयमा ! सव्वत्थोवे सक्कस्स देविदस्स देवरण्णो उड्ढं
उप्पयणकाले उवयणकाले संखेज्जगुणे । चमररसवि जहा सक्कस्स णवरं

सम्बन्धोदे उवयगकाले उप्पयणकाले संखेज्जगुणे । वज्जस्स पुच्छा, गोयमा !
सम्बन्धोवे उप्पयणकाले उवयणकाले विसेसाहिए । एयस्स णं भंते । वज्जस्स
वज्जाहिवइस्स चमरस्स य असुरिदस्स असुररण्णा उवयणकालस्स य उप्पयण-
कालस्स य कयरे २ हितो अप्पे वा ४ ? गोयमा ! सक्कस्स य उप्पयणकाले
चमरस्स य उवयणकाले एए णं दोण्णिवि तुल्ला सञ्चत्थोवा, सक्कस्स य उव-
यणकाले वज्जस्स य उप्पयणकाले एस णं दोण्णिवि तुल्ले संखेज्जगुणे चमरस्स य
उप्पयणकाले वज्जस्स य उवयणकाले एस णं दोण्णिवि तुल्ले विसेसाहिए
॥ १४६ ॥ तए णं से चमरे असुरिदे असुरराया वज्जभयविप्पमुक्के सक्केणं
देविदेणं देवरण्या महया अवमाणेणं अवमाणिए समाणे चमरचंचाए रायहाणीए
समाए सुहमाए चमरंसि सीहासणंसि ओहयमणसंकप्पे चित्तासोयसागरसंपविट्ठे
करयलपत्तहत्थमुहे अट्टज्जाणोवणए मूमिगयविट्ठोए ज्ञियाइ । तए णं तं चमरं
असुरिदं असुररायं सामाणियपरिसोववणण्या देवा ओहयमणसंकप्पं जाव ज्ञिया-
यमाणं पासंसि २ करयल जाव एवं वयासी—किण्णं देवाणुप्पिया ! ओहयमण-
संकप्पा जाव ज्ञियायह ? तए णं से चमरे असुरिदे असुर० ते सामाणियपरि-
सोववण्णए देवे एवं वयासी—एवं खलु देवाणुप्पिया ! मए समणं भगवं महा-
वीरं णीसाए सक्के देविदे देवराया सयमेव अच्छासाइए, तए णं तेणं परि-
कुविएणं समाणेणं ममं बहाए वज्जे णिसिट्ठे तं भट्ठणं भवतु देवाणुप्पिया !
समणस्स भगवओ महावीरस्स जस्स म्हि पभावेणं अक्किट्ठे अव्वहिए
अपरिताविए इहमागए इह समोसडे इह संपत्ते इहेव अज्जं उवसंपाज्जिता णं
विहरामि । तं गच्छामो णं देवाणुप्पिया ! समणं भगवं महावीरं वंदामो णमं-
सामो जाव पज्जुवासामोत्तिकट्ठु चउसट्ठोए सामाणियसाहस्सीहिं जाव सच्चि-
इडोए जाव जेणेव असोगवरपायवे जेणेव मम अंतिए तेणेव उवागच्छइ २ ममं
तिवत्तुत्तो आयाहिणं पयाहिणं जाव णमंसित्ता एवं वयासी—एवं खलु भंते !
मए तुभं णीसाए सक्के देविदे देवराया सयमेव अच्छासाइए जाव तं भवं
णं भवतु देवाणुप्पियाणं जस्स म्हि पभावेणं अक्किट्ठे जाव विहरामि तं खामेमि
णं देवाणुप्पिया ! जाव उत्तरपुरत्थिसं दिसीभागं अवक्कमइ २ त्ता जाव बत्ती-
सइबद्धं णट्टविहिं उवदंसेइ २ जामेव दिंसि पाउठ्ठूए तामेव दिंसि पडिगए ।
एवं खलु गोयमा ! चमरेणं असुरिदेणं असुररण्णा सा दिव्वा देविड्ढी लद्धा

पत्ता जाव अभिसमण्णागया, ठिई सागरोवमं, महाविदेहे वाते सिञ्जिहिइ जाव अंतं काहिइ ॥ १४७ ॥ किं पत्तियं णं भंते ! असुरकुमारा देवा उड्ढं उप्पयंति जाव सोहम्मो कप्पो ? गोयमा ! तेसि णं देवाणं अट्टणोववण्णाण वा अरिमभयत्थाण वा इमेयाहवे अज्जाथिए जाव तम्पणजइ—अणो णं अट्टेहि दिव्वा देविड्ढी लद्धा पत्ता जाव अभिसमण्णागया जारिसिया णं अट्टेहि दिव्वा देविड्ढी जाव अभिसमण्णागया तारिसिया णं सबकेणं देविदेणं देवरण्णा दिव्वा देविड्ढी जाव अभिसमण्णागया जारिसिया णं सबकेणं देविदेणं देवरण्णा जाव अभिसमण्णागया तारिसिया णं अट्टेहिवि जाव अभिसमण्णागया, तं गच्छामो णं सबकस्स देविदस्स देवरण्णो अंतियं पाउडमवामो पातामो ताव सबकस्स देविदस्स देवरण्णो दिव्वं देविड्ढि जाव अभिसमण्णागया पासउ ताव अट्टेहि सबके देविदे देवराया दिव्वं देविड्ढि जाव अभिसमण्णागया, तं जाणामो ताव सबकस्स देविदस्स देवरण्णो दिव्वं देविड्ढि जाव अभिसमण्णागया जाणउ ताव अट्टेहि सबके देविदे देवराया दिव्वं देविड्ढि जाव अभिसमण्णागया । एवं खलु गोयमा ! असुरकुमारा देवा उड्ढं उप्पयंति जाव सोहम्मो कप्पो । सेवं भंते ! सेवं भंते ! त्ति ॥ १४८ ॥ चमरो समत्तो ॥

तइयं सयं तइओ उट्टेसो

तेणं कालेणं तेणं समएणं रायगिहे णामं णयरे होत्था जाव परिसा पडिगया । तेणं कालेणं तेणं समएणं जाव अंतेवासी मंडियपुत्ते णामं अणगारे पगइभट्टए जाव पज्जुवासमाणे एवं वयासी—कइ णं भंते ! किरियाओ पणत्ताओ ? मंडियपुत्ता ! पंच किरियाओ पणत्ताओ, तंजहा—काइया अहिरणिया पाओसिया पारियावणिया पाणाइवायकिरिया । काइया णं भंते ! किरिया कइविहा पणत्ता ? मंडियपुत्ता ! दुविहा पणत्ता, तंजहा—अणवरयकायकिरिया य दुष्पउत्तकायकिरिया य । अहिरणिया णं भंते ! किरिया कइविहा पणत्ता ? मंडियपुत्ता ! दुविहा पणत्ता, तंजहा—संजोयणाहिरणिकिरिया य णिवत्तणाहिरणिकिरिया य । पाओसिया णं भंते ! किरिया कइविहा पणत्ता ? मंडियपुत्ता ! दुविहा पणत्ता, तंजहा—जीवपाओसिया य अजीव पाओसिया य । पारियावणिया णं भंते ! किरिया कइविहा प० ? मंडियपुत्ता ! दुविहा प०, तंजहा—सहत्थपारियावणिया य परहत्थपारियावणिया य । पाणाइवाय-

किरिया णं भंते ! पाणाइवायकिरिया कइविहा प० ? मंडियपुत्ता !
 दुविहा पण्णत्ता, तंजहा-सहत्थपा० परहत्थपा० किरिया य ॥१४६॥ पुंवि
 भंते ! किरिया पच्छा वेयणा पुंवि वेयणा पच्छा किरिया ? मंडियपुत्ता !
 पुंवि किरिया पच्छा वेयणा, णो पुंवि वेयणा पच्छा किरिया ॥१५०॥
 अत्थि णं भंते ! समणाणं णिग्गंथाणं किरिया कज्जइ ? हंता ! अत्थि ।
 कहुं णं भंते ! समणाणं णिग्गंथाणं किरिया कज्जइ ? मंडियपुत्ता ! पमाय-
 पच्चया जोगणिमित्तं च, एवं खलु समणाणं णिग्गंथाणं किरिया कज्जइ
 ॥१५१॥ जीवे णं भंते ! सया समियं एयइ वेयइ चत्तइ फंदइ घट्टइ
 खुब्भइ उडीरइ तं तं भावं परिणमइ ? हंता ! मंडियपुत्ता ! जीवे णं सया
 समियं एयइ जावं तं तं भावं परिणमइ । जावं च णं भंते ! से जीवे सया
 समियं जावं परिणमइ तावं च णं तस्स जीवस्स अंते अंतकिरिया भवइ ?
 णो इणट्ठे समट्ठे । से केणट्ठेणं भंते ! एवं वुच्चइ-जावं च णं से जीवे
 सया समियं जावं अंते अंतकिरिया ण भवइ ? मंडियपुत्ता ! जावं च णं से
 जीवे सया समियं जावं परिणमइ तावं च णं से जीवे आरंभइ सारंभइ समा-
 रंभइ आरंभे वट्टइ सारंभे वट्टइ समारंभे वट्टइ आरंभमाणे सारंभमाणे समा-
 रंभमाणे आरंभं वट्टमाणे सारंभे वट्टमाणे समारंभे वट्टमाणे बहूणं पाणाणं
 भूयाणं जीवाणं सत्ताणं दुक्खावणयाए सोयावणयाए जूरावणयाए तिप्पावण-
 याए विट्ठावणयाए परियावणयाए वट्टइ । से तेणट्ठेणं मंडियपुत्ता ! एवं वुच्चइ-
 जावं च णं से जीवे सया समियं एयइ जावं परिणमइ तावं च णं तस्स
 जीवस्स अंते अंतकिरिया ण भवइ । जीवे णं भंते ! सया समियं णो एयइ
 जावं णो तं तं भावं परिणमइ ? हंता मंडियपुत्ता ! जीवे णं सया समियं जावं
 णो परिणमइ । जावं च णं भंते ! से जीवे णो एयइ जावं णो तं तं भावं परि-
 णमइ तावं च णं तस्स जीवस्स अंते अंतकिरिया भवइ ? हंता ! जावं भवइ ।
 से केणट्ठेणं भंते ! जावं भवइ ? मंडियपुत्ता ! जावं च णं से जीवे सया
 समियं णो एयइ जावं णो परिणमइ तावं च णं से जीवे णो आरंभइ णो
 सारंभइ णो समारंभइ णो आरंभे वट्टइ णो सारंभे वट्टइ णो समारंभे वट्टइ
 अणारंभमाणे असारंभमाणे असमारंभमाणे आरंभे अवट्टमाणे सारंभे अवट्टमाणे
 समारंभे अवट्टमाणे बहूणं पाणाणं ४ अदुक्खावणयाए जावं अपरियावणयाए

वट्टइ । से जहाणामए केइ पुरिसे सुक्कं तणहत्थयं जायतेर्यासि पक्खिवेज्जा, से णूणं मंडियपुत्ता ! से सुक्के तणहत्थए जायतेर्यासि पक्खित्ते समाणे खिप्पामेव मसमसाधिज्जइ ? हंता ! मसमसाधिज्जइ ? से जहाणामए—केइ पुरिसे तत्तंसि अयकवल्लंसि उदयबिंदुं पक्खिवेज्जा, से णूणं मंडियपुत्ता ! से उदयबिंदू तत्तंसि अयकवल्लंसि पक्खित्ते समाणे खिप्पामेव त्रिद्वंसमागच्छइ ? हंता ! त्रिद्वंसमागच्छइ । से जहाणामए हए सिया पुण्णे पुण्णप्पमाणे बोलट्टमाणे दोसट्टमाणे समभरघडताए चिट्ठइ ? हंता चिट्ठइ, अहे णं केइ पुरिसे तंसि हरयंसि एगं महं णावं सयासवं सयच्छिट्ठं ओगाहेज्जा से णूणं मंडियपुत्ता ! सा णावा तेहिं, आसवदारेहिं आपूरेमाणी २ पुण्णा पुण्णप्पमाणा बोलट्टमाणा दोसट्टमाणा समभरपडत्ताए चिट्ठइ ? हंता ! चिट्ठइ, अहे णं केइ पुरिसे तीत्ते णावाए सव्वओ समंता आसवदाराइं पिहेइ २ णावा उस्सिच्चणएणं उदयं उस्सिच्चिज्जा से णूणं मंडियपुत्ता ! सा णावा तंसि उदयंसि उस्सिच्चिज्जंसि समाणांसि खिप्पामेव उड्ढं उदाइ ? हंता ! उदाइ, एवामेव मंडियपुत्ता ! अत्तात्तासंबुडस्स अणगारस्स इरियासभिण्यस्स जाव गुत्तबंभारिस्स आउत्तं गच्छमाणस्स चिट्टमाणस्स णिसीयमाणस्स तुयट्टमाणस्स आउत्तं वत्थपडिगाहकंबलपायपुंछणं गेहमाणस्स णिक्खिवमाणस्स जाव चक्खुपम्हणियायमवि वेमाया सुट्टमा इरियावहिया किरिया कज्जइ, सा पडमसमयवद्धपुट्टा विइयसमयवेइया तइयसमयणिज्जरिया सा वट्टा पुट्टा उदीरिया वेइया णिज्जिण्णा सेयकाले अकम्मं वावि भवइ, से तेगट्ठेणं मंडियपुत्ता ! एवं बुच्चइ—जावं च णं से जीवे सया समियं णो एयइ जाव अंते अंतकिरिया भवइ ॥ १५२ ॥ पमत्तसंजयस्स णं भंते ! पमत्तसंजमे वट्टमाणस्स सव्वावि य णं पमत्तद्धा कालओ केवच्चिरं होइ ? मंडियपुत्ता ! एगजीवं पडुच्च जहण्णेणं एक्कं समयं उक्कोसेणं देसूणा पुट्टवकोडी, णाणाजीवे पडुच्च सव्वट्टा । अप्पमत्तसंजयस्स णं भंते ! अप्पमत्तसंजमे वट्टमाणस्स सव्वावि य णं अप्पमत्तद्धा कालओ केवच्चिरं होइ ? मंडियपुत्ता ! एगजीवं पडुच्च जहण्णेणं अंतोमूहुत्तं उक्को० पुट्टवकोडी देसूणा, णाणाजीवे पडुच्च सव्वट्टा । सेवं भंते ! २ त्ति भगवं मंडियपुत्ते अणगारे समणं भगवं महावीरं वंदइ णमंसइ २ संजमेणं तवसा अप्पाणं भावेमाणे विहरइ ॥ १५३ ॥ भंते ! त्ति भगवं

गोयमे समणं भगवं महावीरं वंदइ णमंसइ २ ता एवं वयासी-कम्हा णं भंते !
 लवणसमुद्दे चाउद्दसट्टमुद्दिट्टपुणमासिणीसु अइरेयं वड्ढइ वा हायइ वा ? जहा
 बीवाभिगमे लवणसमुद्दवत्तव्वया णेयव्वा जाव लोयट्ठिई, लोयाणुभावे । सेवं
 भंते ! २ त्ति जाव विहरइ । किरिया समत्ता ॥ १५४ ॥

तइयं सयं चउत्थो उद्देसो

अणगारे णं भंते ! भावियप्पा देवं वेउव्वियसमुग्घाएणं समोहयं जाण-
 रुवेणं जायमाणं जाणइ पासइ ? गोयमा ! अत्थेगइए देवं पासइ णो जाणं
 पासइ १ अत्थेगइए जाणं पासइ णो देवं पासइ २ अत्थेगइए देवंपि पासइ
 जाणपि पासइ ३ अत्थेगइए णो देवं पासइ णो जाणं पासइ ४ । अणगारे
 णं भंते ! भावियप्पा देवि वेउव्वियसमुग्घाएणं समोहयं जाणरुवेणं जायमाणं
 जाणइ पासइ ? गोयमा ! एवं चेव । अणगारे णं भंते ! भावियप्पा देवं
 सदेवीयं वेउव्वियसमुग्घाएणं समोहयं जाणरुवेणं जायमाणं जाणइ पासइ ?
 गोयमा ! अत्थेगइए देवं सदेवीयं पासइ णो जाणं पासइ, एएणं अभिलवेणं
 चत्तारि मंगा । अणगारे णं भंते ! भावियप्पा रुक्खस्स किं अंतो पासइ बार्हि
 पासइ ? चउमंगो । एवं किं मूलं पासइ कवं पा० ? चउमंगो । मूलं पा० खंधं
 पा० ? चउमंगो । एधं मूलेणं बीजं संजोएयव्वं । एवं कंदेणवि समं संजोए-
 यध्वं जाव बीयं, एवं जाव पुप्फेण समं बीयं संजोएयव्वं । अणगारे णं भंते !
 भावियप्पा रुक्खस्स किं फलं पा० बीयं पा० ? चउमंगो ॥ १५५ ॥ पमू णं
 भंते ! वाउकाए एगं महं इत्थिरुवं वा पुंसिरुवं वा हत्थिरुवं वा जाणरुवं वा
 एवं जुग्गमित्थिल्लिथिल्लिसीयसंदमाणियरुवं वा विउव्वित्तए ? गोयमा ! णो
 इणट्ठे समट्ठे, वाउकाए णं विकुट्ठमाणे एगं महं पडागासंठियं रुवं विकुट्ठइ ।
 पभू णं भंते ! वाउकाए एगं महं पडागासंठियं रुवं विउव्वित्ता अणेगाइं जोय-
 गाइं गमित्तए ? हुंता ! पभू । से भंते ! किं आयड्ढीए गच्छइ परिड्ढीए
 गच्छइ ? गोयमा ! आयड्ढीए ग० णो परिड्ढीए ग० । जहा आयड्ढीए एवं
 आयकम्मणावि आयप्पओगेणवि भाणियव्वं । से भंते ! किं ऊसिओदयं गच्छइ
 पयोदयं ग० ? गोयमा ! ऊसिओदयंपि ग० पयोदयंपि ग० । से भंते ! किं
 एगओपडागं गच्छइ दुहओपडागं गच्छइ ? गोयमा ! एगओपडागं गच्छइ णो
 दुहओपडागं गच्छइ । से णं भंते ! किं वाउकाए पडागा ? गोयमा ! वाउकाए

णं से णो खलु सा पडागा ॥ १५६ ॥ पभू णं भंते ! बलाहए एगं महं इत्थिरूवं
 वा जाव संदमाणियरूवं वा परिणामेत्तए ? हंता ! पभू । पभू णं भंते ! बलाहए
 एगं महं इत्थिरूवं परिणामेत्ता अणेगाइं जोयणाइं गमित्तए ? हंता ! पभू । से
 भंते ! किं आयड्ढीए गच्छइ परिड्ढीए गच्छइ ? गोयमा ! णो आयड्ढीए
 गच्छइ, परिड्ढीए ग० । एवं णो आयकम्मणा परकम्मणा णो आयपओगेणं
 परपओगेणं ऊसिओदयं वा गच्छइ पयोदयं वा गच्छइ । से भंते ! किं बलाहए
 इत्थी ? गोयमा ! बलाहए णं से णो खलु सा इत्थी । एवं पुरिसे आसे इत्थी ।
 पभू णं भंते ! बलाहए एगं महं जाणरूवं परिणामेत्ता अणेगाइं जोयणाइं गमि-
 त्तए ? जहा इत्थिरूवं तहा भाणियदवं । णवरं एगओचक्कवालपि दुहओचक्क-
 वालं पि गच्छइ भाणियदवं, जुगगिल्लिथिल्लिसीयासंदमाणियाणं तहेव ॥ १५७ ॥
 जीवे णं भंते ! जे भविए णेरइएमु उववज्जित्तए, से णं भंते ! किलेसेमु उव-
 वज्जइ ? गोयमा ! जल्लेसाइं दव्वाइं परियाइत्ता कालं करेइ तल्लेसेमु उव-
 वज्जइ, तं०—कथल्लेसेमु वा णील्लेसेमु वा काउल्लेसेमु वा, एवं जस्स जा लेस्सा
 सा तस्स भाणियदवा जाव जीवे णं भंते ! जे भविए जोइसिएमु उववज्जित्तए ?
 पुच्छा, गोयमा ! जल्लेसाइं दव्वाइं परियाइत्ता कालं करेइ तल्लेसेमु उववज्जइ,
 तं०—तेउल्लेसेमु । जीवे णं भंते ! जे भविए वेमाणिएमु उववज्जित्तए से णं
 भंते ! किलेसेमु उववज्जइ ? गोयमा ! जल्लेसाइं दव्वाइं परियाइत्ता कालं
 करेइ तल्लेसेमु उववज्जइ, तं० तेउल्लेसेमु वा पम्हल्लेसेमु वा मुक्कलेसेमु वा
 ॥ १५८ ॥ अणगारे णं भंते ! भावियप्पा बाहिरए पोगले अपरियाइत्ता पभू
 वेभारं पव्वयं उल्लंघेत्तए वा परलंघेत्तए ? गोयमा ! णो इणट्ठे समट्ठे । अण-
 गारे णं भंते ! भावियप्पा बाहिरए पोगले परियाइत्ता पभू वेभारं पव्वयं
 उल्लंघेत्तए वा परलंघेत्तए वा ? हंता ! पभू । अणगारे णं भंते ! भावियप्पा
 बाहिरए पोगले अपरियाइत्ता जावइयाइं रायगिहे णयरे रूवाइं एवइयाइं
 विकुच्चत्ता वेभारं पव्वयं अंतो अणुप्पविसित्ता पभू समं वा विसमं करेत्तए
 विसमं वा समं करेत्तए ? गोयमा ! णो इणट्ठे समट्ठे । एवं चेव विइओज्जि
 आलावगो णवरं परियाइत्ता पभू । से भंते ! किं माईं विकुच्चइ अमाईं
 विकुच्चइ ? गोयमा ! माईं विकुच्चइ णो अमाईं विकुच्चइ । से केणट्ठेणं भंते !
 एवं वुच्चइ जाव णो अमाईं विकुच्चइ ? गोयमा ! माईं णं पणीयं पाणभोयणं

भोच्चा २ वामेइ तस्स णं तेणं पणीएणं पाणभोयणेणं अट्ठि-अट्ठिमिजा बहली-
भवति पयणए मंससोणिए भवइ, जेविय से अहाबायरा पोगला तेविय से
परिणमति, तं जहा-सोइवियत्ताए जाव फांसिवियत्ताए अट्ठिअट्ठिमिजकेसमसुरोम-
णहत्ताए सुक्कत्ताए सोणियत्ताए, अमाई णं लूहं पाणभोयणं भोच्चा २ णो
वामेइ, तस्स णं तेणं लूहं पाणभोयणेणं अट्ठि-अट्ठिमिजा० पयणु भवति बहले
मंससोणिए, जेविय से अहाबायरा पोगला तेविय से परिणमति, तंजहा-उच्चा-
एताए पासवणत्ताए जाव सोणियत्ताए, से तेणट्ठेणं जाव णो अमाई विकुब्बइ ।
माई णं तस्स ठाणस्स अणालोइयपडिक्कंते कालं करेइ णत्थि तस्स आराहणा ।
अमाई णं तस्स ठाणस्स आलोइयपडिक्कंते कालं करेइ अत्थि तस्स आराहणा ।
सेव भंते ! सेवं भते ! त्ति ॥ १५६ ॥

तइयं सयं पंचमो उट्ठेसो

अणगारे णं भंते ! भावियप्पा बाहिरए पोगले अपरियाइत्ता पभू एगं महं
इत्थीरूवं वा जाव संदमाणियरूवं वा विउब्बित्तए ? णो इ० । अणगारे णं
भंते ! भावियप्पा बाहिरए पोगले परियाइत्ता पभू एगं महं इत्थीरूवं वा जाव
संदमाणियरूवं वा विउब्बित्तए ? हुंता ! पभू । अणगारे णं भंते ! भावि०
केवइयाइं पभू इत्थिरूवाइं विकुब्बित्तए ? गोयमा ! से जहाणामए जुवइं
जुवाणे हत्थेणं हत्थे गेण्हेज्जा चक्कस्स वा णाभी अरगाउत्ता सिधा एवामेव
अणगारेवि भावियप्पा वेउट्ठिवयसमुग्धाएणं समोहण्णइ जाव पभू णं गोयमा ।
अणगारे णं भावियप्पा केवलकप्पं जंबुहीवं बहूहि इत्थिरूवेहि आइणं विति-
किणं जाव एस णं गोयमा ! अणगारस्स भावि० अयमेयारूवे विसए विसय-
मेत्ते बुइए णो चेव णं संपत्तीए विकुब्बिसु वा ३, एवं परिव्वाडीए णेयव्वं जाव
संदमाणिया । से जहाणामए केइ पुरिसे असिचम्मपायं गहाय गच्छेज्जा एवा-
मेव अणगारेवि भावियप्पा असिचम्मपायहत्थकिच्चगएणं अप्पाणेणं उइदं वेहासं
उप्पइज्जा ? हुंता ! उप्पइज्जा । अणगारे णं भंते ! भावियप्पा केवइयाइं पभू
असिचम्मपायहत्थकिच्चगयाइं रूवाइं विउब्बित्तए ? गोयमा ! से जहाणामए-
जुवइं जुवाणे हत्थेणं हत्थे गेण्हेज्जा तं चेव जाव विउब्बिसु वा ३ । से जहा-
णामए केइ पुरिसे एगओपडागं फाउं गच्छेज्जा, एवामेव अणगारेवि भावि-
यप्पा एगओपडागाहत्थकिच्चगएणं अप्पाणेणं उइदं वेहासं उप्पएज्जा ? हुंता

गोयमा ! उप्पएज्जा । अणगारे णं भंते ? भावियप्पा केवइयाइं पभू एगओ-
 पडागाहत्थकिच्चगयाइं रुवाइं विउव्वित्तए ? एवं चेव जाव विकुंभ्वसु वा ३ ।
 एवं दुहओपडार्गपि । से जहाणामए—केइ पुरिसे एगओजण्णोवइयं काउं गच्छेज्जा,
 एवामेव अण० भा० एगओजण्णोवइयकिच्चगएणं अप्पण्णेणं उददं वेहासं उप्प-
 एज्जा ? हुंता ! उप्पएज्जा । अणगारे णं भंते ! भावियप्पा केवइयाइं पभू एग-
 ओजण्णोवइयकिच्चगयाइं रुवाइं विकुंभ्वित्तए ? तं चेव जाव विकुंभ्वसु वा ३,
 एवं दुहओजण्णोवइयंपि । से जहाणामए—केइ पुरिसे एगओपल्हत्थियं काउं
 चिट्ठेज्जा, एवामेव अणगारेवि भावियप्पा० एवं चेव जाव विकुंभ्वसु वा ३
 एवं दुहओ पल्हत्थियं पि । से जहाणामए केइ पुरिसे एगओपलियंका काउं
 चिट्ठेज्जा० ? तं चेव जाव विकुंभ्वसु वा ३ एवं दुहओपलियंका पि । अणगारे
 णं भंते ! भावियप्पा बाहिरए योग्गले अपरियाइत्ता पभू एगं महं आसरूवं वा
 हत्थिरूवं वा सीहरूवं वा वग्घवग्घोवियअच्छतरच्छपरासरूवं वा अभिजुंजि-
 त्तए ? णो इणट्ठे समट्ठे । अणगारे णं एवं बाहिरए योग्गले परियाइत्ता पभू ।
 अणगारे णं भंते ! भा० एगं महं आसरूवं वा अभिजुंजित्ता अणेगाइं जोयणाइं
 गमित्तए ? हुंता ! पभू । से भंते ! किं आयड्ढीए गच्छइ परिड्ढीए गच्छइ ?
 गोयमा ! आयड्ढीए गच्छइ णो परिड्ढीए । एवं आयकम्मुणा णो परकम्मुणा
 आयप्पओगेणं णो परप्पओगेणं उस्सिओदयं वा गच्छइ पयोदयं वा गच्छइ । से
 णं भंते ! किं अणगारे आसे ? गोयमा ! अणगारे णं से णो खलु से आसे ।
 एवं जाव परासरूवं वा । से भंते ! किं माईं विकुंभ्वइ अमाईं विकुंभ्वइ ?
 गोयमा ! माईं विकुंभ्वइ णो अमाईं विकुंभ्वइ । माईं णं भंते ! तस्स ठाणस्स
 अणालोइयपडिक्कंते कालं करेइ किं उववज्जइ ? गोयमा ! अणायरेसु आभि-
 योगेसु देवलोगेसु देवत्ताए उववज्जइ । अमाईं णं भंते ! तस्स ठाणस्स आलोइय-
 पडिक्कंते कालं करेइ किं उववज्जइ ? गोयमा ! अणायरेसु अणाभिओगेसु देव-
 लोएसु देवत्ताए उववज्जइ । सेवं भंते ! २ त्ति, गाहा—इत्थीअसीपडागा जण्णोवइए
 य होइ बोद्धव्वे । पल्हत्थियपलियंका अभिओगविकुंभ्वणा माईं ॥ १ ॥ १६० ॥

तइयं सयं छट्ठो उद्देशो

अणगारे णं भंते ! भावियप्पा माईं मिच्छद्दिट्ठी वीरियंलद्धीए वेउव्विय-
 लद्धीए विभंगणालद्धीए वाणारत्ति णयारिं समोहए समोहणित्ता रायगिहे णयरे

रूवाइं जाणइ पासइ ? हुंता ! जाणइ पासइ । से भंते ! किं तहाभावं जाणइ पासइ अण्णहाभावं जा० पा० ? गोयमा ! णो तहाभावं जाणइ पा० अण्णहाभावं जा० पा० । से केणट्ठेणं भंते ! एवं बुच्चइ णो तहाभावं जा० पा० अण्णहाभावं जाणइ पा० ? गोयमा ! तस्स णं एवं भवइ—एवं खलु अहं रायगिहे णयरे समोहए समोहणित्ता वाणारसीए णयरीए रूवाइं जाणामि पासामि, से से दंसणे विवच्चासे भवइ, से तेणट्ठेणं जाव पासइ । अणगारे णं भंते ! भावियप्पा माई मिच्छदिट्ठी जाव रायगिहे णयरे समोहए समोहणित्ता वाणारसीए णयरीए रूवाइं जाणइ पासइ ? हुंता ! जाणइ पासइ । तं चेव जावं तस्स णं एवं भवइ—एवं खलु अहं वाणारसीए णयरीए समोहए २ रायगिहे णयरे रूवाइं जाणामि पासामि, से से दंसणे विवच्चासे भवइ, से तेणट्ठेणं जाव अण्णहाभावं जाणइ पासइ । अणगारे णं भंते ! भावियप्पा माई मिच्छदिट्ठी वीरियलद्धीए वेउव्वियलद्धीए विभंगणाणलद्धीए वाणारसि णयरी रायगिहं च णयरं अंतरा एगं महं जणवयवग्गं समोहए २ वाणारसि णयरी रायगिहं च णयरं अंतरा एगं महं जणवयवग्गं जाणइ पासइ ? हुंता ! जाणइ पासइ । से भंते ! किं तहाभावं जाणइ पासइ अण्णहाभावं जाणइ पा० ? गोयमा ! णो तहाभावं जाणइ पासइ अण्णहाभावं जाणइ पासइ । से केणट्ठेणं जाव पासइ ? गोयमा ! तस्स खलु एवं भवइ एस खलु वाणारसी णयरी एस खलु रायगिहे णयरे एस खलु अंतरा एगे महं जणवयवग्गे णो खलु एस महं वीरियलद्धी वेउव्वियलद्धी विभंगणाणलद्धी इड्ढी जुई जसे बले वीरिए पुरिसवकारपरक्कमे लद्धे पत्ते अभिसमर्णागए, से से दंसणे विवच्चासे भवइ, से तेणट्ठेणं जाव पासइ । अणगारे णं भंते ! भावियप्पा अमाई सम्मदिट्ठी वीरियलद्धीए वेउव्वियलद्धीए ओहिणाणलद्धीए रायगिहं णयरं समोहए २ वाणारसीए णयरीए रूवाइं जाणइ पासइ ? हुंता ! जा० पा० । से भंते ! किं तहाभावं जाणइ पासइ अण्णहाभावं जाणइ पासइ ? गोयमा ! तहाभावं जाणइ पासइ णो अण्णहाभावं जाणइ पासइ । से केणट्ठेणं भंते ! एवं बुच्चइ ? गोयमा ! तस्स णं एवं भवइ—एवं खलु अहं रायगिहे णयरे समोहए समोहणित्ता वाणारसीए णयरीए रूवाइं जाणामि पासामि, से से दंसणे विवच्चासे भवइ, से तेणट्ठेणं गोयमा ! एवं बुच्चइ, बीओ आलावगो एवं चेव णवरं वाणारसीए णयरीए

समोहणा णेयव्वा रायगिहे णयरे रुवाइं जाणइ पासइ । अणगारे णं भंते । भावियप्पा अमाई सम्मदिट्ठी वीरियलद्धीए वेउद्वियलद्धीए ओहिणाणलद्धीए रायगिहं णयरं वाणारसिं णयरिं च अंतरा एगं महं जणवयवग्गं समोहए २ रायगिहं णयरं वाणारसिं च णयरिं तं च अंतरा एगं महं जणवयवग्गं जाणइ पासइ ? हुंता ! जा० पा० । से भंते ! किं तहाभावं जाणइ पासइ अणहाभावं जाणइ पासइ ? गोयमा ! तहाभावं जाणइ पा०, णो अणहाभावं जा० पा० । से केणट्ठेणं ? गोयमा ! तस्स णं एवं भवइ—णो खलु एस रायगिहे णयरे णो खलु एस वाणारसी णयरी णो खलु एस अंतरा एगे जणवयवग्गे एस खलु ममं वीरियलद्धी वेउद्वियलद्धी ओहिणाणलद्धी इड्ढी जुई जसे बले वीरिए पुरि-सवकारपरवकमे लद्धे पत्ते अभिसमण्णाए से से दंसणे अविचच्चासे भवइ से तेणट्ठेणं गोयमा ! एवं वृच्चइ तहाभावं जाणइ पासइ णो अणहाभावं जाणइ पासइ । अणगारे णं भंते ! भावियप्पा बाहिरए पोगगले अपरियाइत्ता पभू एगं महं गामरूवं वा णयररूवं वा जाव सण्णिवेसरूवं वा विकुव्वित्तए ? णो इणट्ठे समट्ठे, एवं बिइओवि आलावगो, णवरं बाहिरए पोगगले परि-याइत्ता पभू । अणगारे णं भंते ! भावियप्पा केवइयाइं पभू गामरूवाइं विकु-व्वित्तए ? गोयमा ! से जहाणामए जुवइं जुवाणे हत्थेणं हत्थे गेभेज्जा तं चेव जाव विकुव्विसु वा ३ एवं जाव सण्णिवेसरूवं वा ॥१६१॥ चमरस्स णं भंते ! असुरिदस्स असुररण्णो कइ आयरवखदेवसाहस्सीओ पणत्ताओ ? गोयमा ! चत्तारि चउसट्ठीओ आयरवखदेवसाहस्सीओ पणत्ताओ, ते णं आयरवखा वण्णओ जहा रायप्पेणइज्जे, एवं सव्वेसिं ईदाणं जस्स जत्तिया आयरवखा भाणियव्वा । सेवं भंते ! २ त्ति ॥ १६२॥

तइयं सयं सत्तमो उट्ठेसो

रायगिहे णयरे जाव पज्जुवासमाणे एवं दयासी—सवकस्स णं भंते ! देवि-दस्स देवरण्णो कइ लोगपाला पणत्ता ? गोयमा ! चत्तारि लोगपाला-प०, तंजहा—सोमे जमे वरणे वेसमणे । एएसि णं भंते ! चउण्हं लोगपालाणं कइ विभाणा पणत्ता ? गोयमा ! चत्तारि विभाणा प०, तंजहाँ—संज्ञापभे वर-सिट्ठे सयज्जले वग्गू । कहि णं भंते ! सवकस्स देविदस्स देवरण्णो सोमस्स

महारणो संज्ञप्पमे णामं महाविमाणे पणत्ते ? गोयमा ! जंबुद्वीवे २ मंदरस्स पध्वयस्स दाहिणेणं इमीसे रयणप्पभाए पुढवीए बहुसमरमणिज्जाओ भूमिनागाओ उड्डुं चंदिमसूरियगहगणवत्ततारारूवाणं बहूइं जोयणाइं जाव पंच वडंसया पणत्ता, तंजहा—असोयवडेंसए सत्तवण्णवडेंसए चंपयवडेंसए चूयवडेंसए मज्जे सोहम्मवडेंसए । तस्स णं सोहम्म वडेंसयस्स महाविमाणस्स पुरत्थिमेणं सोहम्मे कप्पे असखेज्जाइं जोयणाइं वीड्वइत्ता एत्थ णं सक्कस्स देविदस्स देवरणो सोमस्स महारणो संज्ञप्पमे णामं महाविमाणे पणत्ते अट्ठेरेस जोयणसयसहस्साइं आयामविक्खंभेणं उयालीसं जोयणसयसहस्साइं बावण्णं च सहस्साइं अट्ठ प उडयाले जोयणसए किच्चिविसेसाहिए परिकखेवेणं प० जा सूरियाभविमाणस्स वत्तव्वया सा अपरिसेसा भाणियव्वा जाव अभिसेओ णवरं सोमो देवो । संज्ञप्पभस्स णं महाविमाणस्स अहे सपक्खं सपडिदिंस असंखेज्जाइं जोयणसहस्साइं ओगाहिता एत्थ णं सक्कस्स देविदस्स देवरणो सोमस्स महारणो सोमा णामं रायहाणी पणत्ता एणं जोयणसयसहस्सं आयामविक्खंभेणं जंबुद्वीवपमाणा, वेमाणियाणं पमाणस्स अट्ठं णेयव्वं जाव उवरियलेणं सोसस जोयणसहस्साइं आयामविक्खंभेणं पण्णासं जोयणसहस्साइं पंच थ सत्ताणउए जोयणसए किच्चिविसेसू णे परिकखेवेणं पणत्ते, पासायाणं चत्तारि परिवाडीओ णेयव्वाओ सेसा णत्थि । सक्कस्स णं देविदस्स देवरणो सोमस्स महारणो इमे देवा आणाउववायवयणणिहेसे चिट्ठंति, तंजहा—सोमकाइयाइ वा सोमदेवयकाइयाइ वा विज्जुकुमारा विज्जुकुमारीओ अग्गिकुमारा अग्गिकुमारीओ वाउकुमारा वाउकुमारीओ चंदा सूरा गहा णवत्तंता तारारूवा जे यावण्णे तहप्पगारा सव्वे ते तब्भत्तिया तप्पक्खिया तब्भारिया सक्कस्स देविदस्स देवरणो सोमस्स महारणो आणाउववायवयणणिहेसे चिट्ठंति । जंबुद्वीवे २ मंदरस्स पध्वयस्स दाहिणेणं जाइं इमाइं समुप्पज्जंति, तं जहा—गहदंडाइ वा गहमुसलाइ वा गहगज्जियाइ वा, एवं गहजुद्धाइ वा गहसिघाडगाइ वा गहावसव्वाइ वा अग्भाइ वा अग्भरुक्खाइ वा संज्ञाइ वा गंधव्वणयराइ वा उक्कापायाइ वा दिसीदाहाइ वा गज्जियाइ वा विज्जुयाइ वा पंसुवुट्ठीइ वा जूवेइ वा जवखालित्तएत्ति वा धूमियाइ वा भहियाइ वा रउग्घाएइ वा चंदोवरागाइ वा सूरिवरागाइ वा चंदपरिवेसाइ वा सूरपरिवेसाइ वा पडिचंदाइ वा पडिसूराइ वा इंबघणू-

इ वा उदगमच्छर्कपिहृसियमोहपाईणवायाइ वा पडोणवायाइ वा जात्र
 संवट्टयवायाइ वा गामदाहाइ वा जात्र सण्णिवेसदाहाइ वा पाणवत्तया जण-
 वत्तया धणवत्तया कुलवत्तया वसणम्भूया अणारिया जं यावण्णे तहप्पगारा ण
 ते सक्कस्स देविदस्स देवरण्णो सोमस्स महारण्णो अण्णाया अदिट्ठा असुया
 धमुया अविण्णाया तेसि वा सोमकाइयाणं देवाणं । सक्कस्स णं देविदस्स देव-
 रण्णो सोमस्स महारण्णो इप्पे देवा अहावच्च्चा अभिण्णाया होत्था, तं जहा-
 इंगालए वियालए तोहियवत्ते सण्णिचचरे चंदे मूरे सुवके बुहे बहस्सई राहू ।
 सक्कस्स णं देविदस्स देवरण्णो सोमस्स महारण्णो सत्तिभागं पत्तिओवमं ठिई
 पण्णत्ता, अहावच्च्चाभिण्णायाणं देवाणं एमं पत्तिओवमं ठिई पण्णत्ता, एवमहि-
 ड्डिए जाव महाणुभागे सोमे महारीया ॥ १६३ ॥ कहि णं भंते ! सक्कस्स
 देविदस्स देवरण्णो जमस्स महारण्णो वरसिट्ठे णामं महाविमाणे पण्णत्ते ?
 गोयमा ! सोहम्मवर्वाडिसयस्स महाविमाणस्स दाहिणेणं सोहम्मे कप्पे अमंखे-
 व्जाइं जोयणसहस्साइं वीइवइत्ता एत्थ णं सक्कस्स देविदस्स देवरण्णो जमस्स
 महारण्णो वरसिट्ठे णामं महाविमाणे पण्णत्ते अद्धतेरस जोयणसयसहस्साइं
 जहा सोमस्स विमाणं तहा जाव अभिसेओ रायहाणी तहेव जाव पासायणं-
 तीओ । सक्कस्स णं देविदस्स देवरण्णो जमस्स महारण्णो इमे देवा आणां
 जाव चिट्ठंति, तं जहा-जमकाइयाइ वा जमदेवकाइयाइ वा पेयकाइयाइ वा
 पेयदेवयकाइयाइ वा असुरकुमारा असुरकुमारीओ कंदप्पा गिरयवाला आभिओगा
 जे यावण्णे तहप्पगारा सव्वे ते तम्मत्तिया तप्पक्खिया तम्मारिया सक्कस्स देवि-
 दस्स देवरण्णो जमस्स महारण्णो आणाए जाव चिट्ठंति । जंबुद्वीवे २ मंदरस्स
 पव्वयस्स दाहिणेणं जाइं इमाइं समुप्पज्जति, तंजहा-ईंढवाइ वा उमराइ वा कल-
 हाइ वा बोलाइ वा खाराइ वा महाजुद्धाइ वा महासंगामाइ वा महासत्थणिव-
 ड्ढणाइ वा एवं महापुरिसणिवड्ढणाइ वा महान्हिरणिवड्ढणाइ वा दुम्भूयाइ वा
 कुलरोगाइ वा गामरोगाइ वा मंडलरोगाइ वा णयरोगाइ वा सीसवेयणाइ वा
 अचिच्छवेयणाइ वा कण्णणहदंतवेयणाइ वा इंदग्गहाइ वा खंदग्गहाइ वा कुमार-
 ग्गहा जक्खग्गहा० भूयग्गहा० एगाहियाइ वा बंयाहियाइ वा तेयाहियाइ वा
 चाउत्थहियाइ वा उव्वेयगाइ वा कासा० सासाइ वा सोमेइ वा जराइ वा
 दाहा० कच्छकोहाइ वा अजीरया पंडुरोगा हरिसाइ वा भंगंवराइ वा हियय-

सूलाइ वा मन्थयसू० जोणिसू० पाससू० कुच्छिसू० गाममारीइ वा जयर०
 खेड० कड्वड० दोगमुह० मडंब० पट्टण० आसम० संवाह० संजिबेसमारीइ वा
 पाणक्खया जणक्खया धणक्खया कुलक्खया वसणभूयमणारिया जे यावण्णे
 तहप्पगारा ण ते सक्कस्स देविदस्स देवरण्णो जमस्स महारण्णो अण्णाया० ५
 तेसि वा जमकाइयाणं देवाणं ॥ १६४ ॥ सक्कस्स णं देविदस्स देवरण्णो जमस्स
 महारण्णो इमे देवा अहावच्चा अभिण्णाया होत्था, तंजहा—अंबे १ अंबरिसे चैव
 २, सामे ३ सबलेत्ति यावरे ४। रुट्टो ५—वरुट्टे ६ काले ७ य, महाकालेत्ति
 यावरे ८ ॥ १॥ असिपत्ते ९ धणू १० कुंभे ११ (असी य असिपत्ते कुंभे)वालू
 १२ बेयरणीइ य १३। खरस्सरे १४ महाघोरो १५, एए पण्णरसाहिया ॥ २ ॥
 सक्कस्स णं देविदस्स देवरण्णो जमस्स महारण्णो सत्तिभागं पलिओवमं ठिई
 प०, अहावच्चाभिण्णायाणं देवाणं एगं पलिओवमं ठिई पण्णत्ता, एवमहिड्डिए
 जाव जमे महाराया ॥ १६५ ॥ कहि णं भंते ! सक्कस्स देविदस्स देवरण्णो
 वरुणस्स महारण्णो सयंजले णामं महाविमाणे पण्णत्ते ? गोयमा ! तस्स णं
 सोहम्मवडिसयस्स महाविमाणस्स पच्चत्थिमेणं सोहम्मे कप्पे असंखेज्जाइं जहा
 सोमस्स तहा विमाणरायहाणीओ भाणियक्खा जाव पासायवीडिसया णवरं णाम-
 णाणत्तं । सक्कस्स णं वरुणस्स महारण्णो इमे देवा आणा० जाव चिट्ठंति,
 तं०—वरुणकाइयाइ वा वरुणदेवयकाइयाइ वा णागकुमारा णागकुमारीओ उदहि-
 कुमारा उदहिकुमारीओ धणियकुमारा यणियकुमारीओ जे यावण्णे तहप्पगारा
 सव्वे ते तव्वत्तिया जाव चिट्ठंति । जंबूदीवे २ मंदरस्स पव्वयस्स दाहिणेणं
 जाइं इमाइं समुपज्जंति, तंजहा—अडवासाइ वा मंदवासाइ वा सुवुट्ठीइ वा
 दुव्वुट्ठीइ वा उदवभेयाइ वा उदवपीलाइ वा उदवाहाइ वा पव्वाहाइ वा गाम-
 वाहाइ वा जाव सण्णिवेसवाहाइ वा पाणक्खया जाव तेसि वा वरुणकाइयाणं
 देवाणं । सक्कस्स णं देविदस्स देवरण्णो वरुणस्स महारण्णो जाव अहावच्चा-
 भिण्णाया होत्था, तंजहा—कक्कोडए कट्टमए अंजणे संखवाले पुंडे, पलासे
 मोए जए दहिभुहे अयंपुल्ले कायरिए । सक्कस्स णं देविदस्स देवरण्णो वरुणस्स
 महारण्णो देसूणाइं दो पलिओवमाइं ठिई पण्णत्ता, अहावच्चाभिण्णायाणं देवाणं
 एगं पलिओवमं ठिई पण्णत्ता, एवमहिड्डिए जाव वरुणे महाराया ॥ १६६ ॥
 कहि णं भंते ! सक्कस्स देविदस्स देवरण्णो वेसमणस्स महारण्णो वग्गू णामं
 महाविमाणे पण्णत्ते ? गोयमा ! तस्स णं सोहम्मवडिसयस्स महाविमाणस्स

उत्तरेणं जहा सोमस्स विमानरायहाणिवत्तव्वया तथा जेयव्वा जाव पासायव-
 ङ्गसथा । सक्कस्स णं देविदस्स देवरण्णो वेसमणस्स महारण्णो इमे देवा आणा-
 उववायधयणणिद्देसे चिट्ठति, तंजहा—वेसमणकाइयाइ वा वेसमणदेवयकाइयाइ
 वा सुवणकुमारा सुवणकुमारीओ दीवकुमारा दीवकुमारीओ विसाकुमारा विसा-
 कुमारीओ वाणमंतरा वाणमंतरीओ जे यावण्णे तहपगारा सव्वे ते तंभत्तिया
 जाव चिट्ठति । जव्वुद्दीवे २ मंदरस्स पव्वयस्स दाहिणेणं जाइ इमाइं समुप्प-
 क्कंति, तंजहा—अयागराइ वा तजयागराइ वा तंभागराइ वा एवं सीसागराइ
 वा हिरण्ण० सुवण्ण० रथण० वयरागराइ वा वसुहाराइ वा हिरण्णवासाइ वा
 सुवण्णवासाइ वा रयण० वडर० आमरण० पत्त० पुप्फ० फल० बीय० मल्ल०
 वण्ण० चुण्ण० गंध० वत्थवासाइ वा हिरण्णवुट्ठीइ वा सु० र० व० आ०
 प० पु० फ० बी० म० व० चुण्ण० गंधवुट्ठी० वत्थवुट्ठीइ वा भायणवुट्ठीइ वा
 क्षीरवुट्ठीइ वा मुयालाइ वा दुक्कालाइ वा अप्पघाइ वा मह्गघाइ वा सुभि-
 क्खाइ वा दुभिक्खाइ वा कयविककयाइ वा सण्हियाइ वा सण्णियाइ वा
 णिहीइ वा णिहाणाइ वा चिरपोराणाइं पहीणसामियाइ वा पहीणसेउयाइ वा
 [पहीणमगाणि वा] पहीणगोत्तागाराइ वा उच्छिण्णसामियाइ वा उच्छिण्ण-
 सेउयाइ वा उच्छिण्णगोत्तागाराइ वा सिघाडग-तिग-चउक्क-चच्चर-चउग्गुह
 महापह-पहेसु नगरणिद्धमणेसु वा सुसाण-गिरि-कंदर-सत्ति सेलो वट्ठाण-
 भवणगिहेसु सण्णिक्लत्ताइं चिट्ठति, ण ताइं सक्कस्स देविदस्स देवरण्णो
 वेसमणस्स महारण्णो ण अण्णायाइं अदिट्ठाइं असुयाइं अमुयाइं अविण्णायाइं तेसिं
 वा वेसमणकाइयाणं देवाणं । सक्कस्स णं देविदस्स देवरण्णो वेसमणस्स महा-
 रण्णो इमे देवा अहावक्काभिण्णाया होत्था, तंजहा—पुण्णभद्दे माणिभद्दे सालि-
 भद्दे सुभणभद्दे चक्के रक्खे पुण्णरक्खे सव्वाणे [पव्वाणे] सव्वजसे सव्वकामे
 सपिद्धे अमोहे असंगे । सक्कस्स णं देविदस्स देवरण्णो वेसमणस्स महारण्णो दो
 पत्तिओवमाइं ठिई पण्णत्ता, अहावक्काभिण्णायाणं देवाणं एणं पत्तिओवमं ठिई
 पण्णत्ता, एमहिड्डिए जाव वेसमणे महाराया । सेवं भत्ते ! २ त्ति ॥ १६७ ॥

तइयं सयं अट्ठमो उट्ठेसो .

रायगिहे णयरे जाव पज्जुवासमाणे एवं ययासी—असुरकुमारानं भत्ते !

देवाणं कइ देवा आहेवच्चं जाव विहरंति ? गोयमा ! दस देवा आहेवच्चं जाव विहरंति, तंजहा-चमरे असुरिदे असुरराया सोमे जमे वरुणे वेसमणे बली वइरोयणिदे वइरोयणराया सोमे जमे वरुणे वेसमणे । णागकुमाराणं भंते ! पुच्छा ? गोयमा ! दस देवा आहेवच्चं जाव विहरंति, तंजहा-धरणेणं णागकुमारिदे णागकुमारराया कालवाले कोलवाले सेलवाले संखवाले भूयाणंदे णागकुमारिदे णागकुमारराया कालवाले कोलवाले संखवाले सेलवाले । जहा णागकुमारिदाणं एयाए वत्तव्वयाए णेयव्वं एवं इमाणं णेयव्वं, सुवण्णकुमाराणं वेणुदेवे वेणुदाली चित्ते विचित्ते चित्तपक्खे विचित्तपक्खे, विज्जुकुमाराणं हक्किरुते हरिरसहे पमे १ सुप्पभे २ पभकंते ३ सुप्पभकंते ४, अग्गिफुमाराणं अग्गिसीहे अग्गिमाणवे तेऊ तेउसीहे तेउकंते तेउप्पभे, दीवकुमाराणं पुण्णविसिट्ठरूयरूयंसरूयकंत रूयप्पभा, उदहिकुमाराणं जलकंतजलप्पभ-जलजलरूयजलकंतजलप्पभा, दिसाकुमाराणं अमियगई अमियवाहणे तुरियगई खिप्पगई सीहगई सीहविककमगई, वाउकुमाराणं वेत्तंबपभंजणकाल-महाकालअंजणरिट्ठा, थणियकुमाराणं घोसमहाघोसभावत्तवियवात्तणं दियावत्त-महणं दियावत्ता, एवं भाणियव्वं जहा असुरकुमाराणं । सो० १ का० २ चि० ३ प्प० ४ ते० ५ रु० ६ ज० ७ तु० ८ का० ९ आ० १० सोमे य महाकाले, चित्तप्पभ तेउ तह रूए चेव । जल तह तुरियगई य काले आउत्त पढमा उ । पिसायकुमाराणं पुच्छा ? गोयमा ! दो देवा आहेवच्चं जाव विहरंति, तंजहा-काले य महाकाले सुरूवपडिखुव पुण्णभइे य । अमरवई माग्गिभइे भीमे य तहा महाभीमे ॥ १ ॥ किणरकिपुरिसे खलु सप्पुरिसे खलु तहा महापुरिसे । अइकाय महाकाए गीयरई चेव गीयजसे ॥ २ ॥ एए वाणसंतराणं देवाणं । जोइसियाणं देवाणं दो देवा आहेवच्चं जाव विहरंति, तंजहा-चंदे य सूरे य । सोहम्मोसाणेसु णं भंते ! कप्पेसु कइ देवा आहेवच्चं जाव विहरंति ? गोयमा ! दस देवा जाव विहरंति, तंजहा-सक्के देविदे देवराया सोमे जमे वरुणे वेसमणे, ईसाणे देविदे देवराया सोमे जमे वरुणे वेसमणे, एसा वत्तव्वया सव्वेसुवि कप्पेसु, एए चेव भाणियव्वा, जे य इंदा ते य भाणियव्वा । सेवं भंते ! २ त्ति ॥ १६८ ॥

तइयं सयं णवमो उट्ठेसो

रायग्गिहे जाव एए वयासी-कइविहे णं भंते ! इंदियविसए पणत्ते ?

गोयमा ! पंचविहे इंदियविसए पणत्ते, तं०-त्तोइंदियविसए० जीवाभिगमे
भोइसियउद्देसो णेयच्चो अपरिसेयो । से० २ त्ति ॥१६६॥

तइयं सयं दसमो उद्देसो

रायगिहे जाव एवं वयाभी-चमरस्स णं भंते ! असुरिदस्स असुररण्णो
कइ परिसाओ पणत्ताओ ? गोयमा ! तओ परिसाओ पणत्ताओ, तंजहा-
समिया चंडा जाया, एवं जहाणुग्घीए जावऽच्चुओ कप्पो । सेवं भंते ! २
त्ति ॥१७०॥

तइयं सयं समत्तं

॥ चउत्थं सयं पढमो बीओ तइओ चउत्थो उद्देसो ॥

चत्तारि विमाणोहि चत्तारि य होंति रायहाणीहि । णेरइए लेस्साहिय
दस उद्देसा चउत्थसए ॥ १ ॥ रायगिहे णयरे जाव एवं वयासी-ईसाणस्स णं
भंते ! देविदस्स देवरण्णो कइ लोगपाला प० ? गोयमा ! चत्तारि लोगपाला
प०, तंजहा-सोमे जमे वेसमणे वरुणे । एएसि णं भंते ! लोगपालाणं कइ
विमाणा प० ? गोयमा ! चत्तारि विमाणा प०, तंजहा-सुमणे सच्चओभद्दे
वग्गु सुवग्गु । कहि णं भंते ! ईसाणस्स देविदस्स देवरण्णो सोमस्स महारण्णो
सुमणे णामं महाविमाणे पणत्ते ? गोयमा ! जंबूद्वीवे २ मंदरस्स पच्चयस्स
उत्तरेणं इमीसे रयणप्पभाए पुढव्वीए जाव ईसाणे णामं कप्पे पणत्ते, तत्थ
णं जाव पंचवड्डेसया प०, तंजहा-अकवड्डेसए फलिह्वड्डेसए रयणवड्डेसए जाय-
रुववड्डेसए भज्जे ईसाणवड्डेसए । तस्स णं ईसाणवड्डेसयस्स महाविमाण-
स्स पुरत्थियेणं तिरियमसंलेज्जाइं जीघणसहस्साइं वीईवड्डत्ता एत्थ णं ईसाण-
स्स ३ सोमस्स २ सुमणे णामं महाविमाणे पणत्ते अद्धतेरसजोयण० जहा सबक-
स्स वत्तव्वया तइयसए तहा ईसाणस्सवि जाव अच्चणिया समत्ता । चउण्हवि
लोगपालाणं विमाणे २ उद्देसओ, चउसुवि विमाणेसु चत्तारि उद्देसा अपरिसेसा,
णवरं ठिईए णाणत्तं-आदिदुय तिभागूणा पलिया धणयस्स होंति दो सेव ।
दो सतिभागा वरुणेपलियमहावच्चदेवाणं ॥१॥ १७१ ॥

चउत्थं सयं पंचमो छट्ठो सत्तमो अट्ठमो उट्ठेसो

रायहाणीमुवि चत्तारि उट्ठेसा भाणियव्वा जाव एवमहिड्ढिए जाव वरुणे
महाराया ॥ १७२ ॥

चउत्थं सयं णवमो उट्ठेसो

णेरइए णं भंते ! णेरइएमु उववज्जइ अणेरइए णेरइएमु उववज्जइ ?
पण्णवणाए लेस्सापए तइओ उट्ठेसओ भाणियव्वो जाव णाणाइं ॥ १७३ ॥

चउत्थं सयं दसमो उट्ठेसो

से णूणं भंते ! कण्हलेस्सा णीललेस्सं पप्प तारूवत्ताए तावण्णत्ताए एव
चउत्थो उट्ठेसओ पण्णवणाए चेव लेस्सापए णेयव्वो जाव-परिणामवण्णरस-
गंधमुद्धपसत्थसंकिण्टिट्ठुण्हा । गइपरिणामपएसोगाह्णवग्गणाठाणमप्पवहुं ॥ १ ॥
सेवं भंते ! २ त्ति ॥ १७४ ॥

चउत्थं सयं समत्तं

॥ पंचमं सयं पढमो उट्ठेसो ॥

चंप(चंपाए)रवि १ अणिल २ गंठिय ३ सहे ४ छउमाउ ५-६ एयण ७
णियठे ८ । रायगिहं ९ चंपाचंदिमा १० य दस पंचमंमि सए ॥ १ ॥ तेणं
कालेणं तेणं समएणं चंपा णामं णयरी होत्था, वण्णओ । तीसे णं चंपाए णय-
रीए पुण्ण भइ णामं चेइए होत्था, वण्णओ । सामो समोसढे जाव परिसा
पडिगया । तेणं कालेणं तेणं समएणं समणत्स भगवओ महावीरस्स जेट्ठे
अंतेवासी इंदभई णामं अणगारे गोयमगोत्तेणं जाव एवं वयासी—जंबूदीवे
णं भंते ! दीवे सूरिया उदीणपाईणमुग्गच्छ पाईणदाहिणमागच्छंति, पाईण-
दाहिणमुग्गच्छ दाहिणपडीणमागच्छंति, दाहिणपडीणमुग्गच्छ पडीणउदीणमा-
गच्छंति, पडीणउदीणं उग्गच्छ उदीचिपाईणमागच्छंति ? हुंता ! गोयमा !
जंबूदीवे णं दीवे सूरिया उदीचिपाईणमुग्गच्छ जाव उदीचिपाईणमागच्छंति
॥ १७५ ॥ जया णं भंते ! जंबूदीवे २ दाहिणइढे दिवसे भवइ तथा णं उत्त-
रइढेवि दिवसे भवइ, जया णं उत्तरइढेवि दिवसे भवइ तथा णं जंबूदीवे २ मंदर-
स्स पव्वयस्स पुरत्थिमपच्चत्थियेणं राई भवइ ? हुंता गोयमा ! जया णं

जंबूद्वीवे २ दाहिणड्डेवि दिवसे जाव राई भवइ । जया णं भंते ! जंबू० मंदरस्स पच्चयस्स पुरत्थिमेणं दिवसे भवइ तथा णं पच्चत्थिमेणवि दिवसे भवइ जया णं पच्चत्थिमेणं दिवसे भवइ तथा णं जंबूद्वीवे २ मंदरस्स पच्चयस्स उत्तरदाहिणेणं राई भवइ ? हुंता गोयमा ! जया णं जंबू० मंदरपुरत्थिमेणं दिवसे जाव राई भवइ । जया णं भंते ! जंबूद्वीवे २ दाहिणड्डे उक्कोसए अट्टारसमुहुत्ते दिवसे भवइ तथा णं उत्तरड्डेवि उक्कोसए अट्टारसमुहुत्ते दिवसे भवइ जया णं उत्तरड्डे उक्कोसए अट्टारसमुहुत्ते दिवसे भवइ तथा णं जंबूद्वीवे २ मंदरस्स पुरत्थिमपच्चत्थिमेणं जहण्णिमा दुवालसमुहुत्ता राई भवइ ? हुंता गोयमा ! जया णं जंबू० जाव दुवालसमुहुत्ता राई भवइ । जया णं जंबू० मंदरस्स पुरत्थिमेणं उक्कोसए अट्टारस जाव तथा णं जंबूद्वीवे २ पच्चत्थिमेणवि उक्को० अट्टारसमुहुत्ते दिवसे भवइ जया णं पच्चत्थिमेणं उक्कोसए अट्टारसमुहुत्ते दिवसे भवइ तथा णं भंते ! जंबूद्वीवे २ उत्तरं दुवालसमुहुत्ता जाव राई भवइ ? हुंता गोयमा ! जाव भवइ । जया णं भंते ! जंबू० दाहिणड्डे अट्टारसमुहुत्ताणंतरे दिवसे भवइ तथा णं उत्तरे अट्टारसमुहुत्ताणंतरे दिवसे भवइ जया णं उत्तरे अट्टारसमुहुत्ताणंतरे दिवसे भवइ तथा णं जंबू० मंदरस्स पच्चयस्स पुरत्थिमपच्चत्थिमेणं साइरेया दुवालसमुहुत्ता राई भवइ ? हुंता गोयमा ! जया णं जंबू० जाव राई भवइ । जया णं भंते ! जंबूद्वीवे २ पुरत्थिमेणं अट्टारसमुहुत्ताणंतरे दिवसे भवइ तथा णं पच्चत्थिमेणं अट्टारसमुहुत्ताणंतरे दिवसे भवइ जया णं पच्चत्थिमेणं अट्टारसमुहुत्ताणंतरे दिवसे भवइ तथा णं जंबू० २ मंदरस्स पच्चयस्स उत्तर-दाहिणेणं साइरेया दुवालसमुहुत्ता राई भवइ ? हुंता गोयमा ! जाव भवइ । एवं एएणं कमेणं ओसारे-यच्चं सत्तरसमुहुत्ते दिवसे तेरसमुहुत्ता राई भवइ सत्तरसमुहुत्ताणंतरे दिवसे साइरेया तेरसमुहुत्ता राई सोलसमुहुत्ते दिवसे चोद्दसमुहुत्ता राई सोलसमुहुत्ताणंतरे दिवसे साइरेयच्चउद्दसमुहुत्ता राई पण्णरसमुहुत्ते दिवसे पण्णरसमुहुत्ता राई पण्णरसमुहुत्ताणंतरे दिवसे साइरेया पण्णरसमुहुत्ता राई चोद्दसमुहुत्ते दिवसे सोलसमुहुत्ता राई चोद्दसमुहुत्ताणंतरे दिवसे साइरेया सोलसमुहुत्ता राई तेरसमुहुत्ते दिवसे सत्तरसमुहुत्ता राई तेरसमुहुत्ताणंतरे दिवसे साइरेया सत्तरसमुहुत्ता राई । जया णं जंबू० दाहिणड्डे जहण्णए दुवालस-

मुहुत्ते दिवसे भवइ तथा णं उत्तरइडेवि, जया णं उत्तरइडे तथा णं जंबूदीवे
 २ मंदरस्स पव्वयस्स पुरत्थिमपच्चत्थिमेणं उक्कोसिया अट्टारसमुहुत्ता राई
 भवइ ? हुंता गोयमा ! एवं चैव उच्चारेयव्वं जाव राई भवइ । जया णं
 भंते ! जंबू० मंदरस्स पव्वयस्स पुरत्थिमेणं जहण्णए दुवालसमुहुत्ते दिवसे भवइ
 तथा णं पच्चत्थिमेणवि० तथा णं जंबू० मंदरस्स उत्तरदाहिणेणं उक्कोसिया
 अट्टारसमुहुत्ता राई भवइ ? हुंता गोयमा ! जाव राई भवइ ॥१६७॥
 जया णं भंते ! जंबू० दाहिणइडे वासाणं पढमे समए पडिवज्जइ तथा णं उत्तर-
 इडेवि वासाणं पढमे समए पडिवज्जइ जया णं उत्तरइडेवि वासाणं पढमे
 समए पडिवज्जइ तथा णं जंबूदीवे २ मंदरस्स पव्वयस्स पुरत्थिमपच्चत्थिमेणं
 अणंतरपुरव्वडसमयंसि वासाणं प० स० प० ? हुंता गोयमा ! जया णं जंबू०
 २ दाहिणइडे वासाणं प० स० पडिवज्जइ तह चैव जाव पडिवज्जइ । जया णं
 भंते ! जंबू० मंदरस्स० पुरत्थिमेणं वासाणं पढमे स० पडिवज्जइ तथा णं
 पच्चत्थिमेणवि वासाणं पढमे समए पडिवज्जइ, जया णं पच्चत्थिमेणवि वासाणं
 पढमे समए पडिवज्जइ तथा णं जाव मंदरस्स पव्वयस्स उत्तरदाहिणेणं अणंतर-
 पच्छाकडसमयंसि वासाणं प० स० पडिवण्णे भवइ ? हुंता गोयमा ! जया णं
 जंबू० मंदरस्स पव्वयस्स पुरत्थिमेणं, एवं चैव उच्चारेयव्वं जाव पडिवण्णे
 भवइ । एवं जहा समएणं अभिलावो भणियो वासाणं तहा आवलियाएवि २
 भाणियव्वो, आणापाणुणवि ३ थोवेणवि ४ लवेणवि ५ मुहुत्तेणवि ६ अहोरत्ते-
 णवि ७ पव्वेणवि ८ मासेणवि ९ उउणावि १०, एएसि सव्वेसि जहा समयस्स
 अभिलावो तहा भाणियव्वो । जया णं भंते ! जंबू० दाहिणइडे हेमताणं पढमे
 समए पडिवज्जइ जहेव वासाणं अभिलावो तहेव हेमंताणवि २० गिम्हाणवि
 ३० भाणियव्वो जाव उऊए, एवं तिण्णिवि, एएसि तीसं आलावगा भाणि-
 यव्वो । जया णं भंते ! जंबू० मंदरस्स पव्वयस्स दाहिणइडे पढमे अयणे पडि-
 वज्जइ तथा णं उत्तरइडेवि पढमे अयणे पडिवज्जइ, जहा समएणं अभिलावो
 तहेव अयणेणवि भाणियव्वो जाव अणंतरपच्छाकडसमयंसि पढमे अयणे पडि-
 वण्णे भवइ । जहा अयणेणं अभिलावो तहा संवच्छरेणवि भाणियव्वो जुएणवि
 वाससएणवि वाससहस्सेणवि वाससयसहस्सेणवि पुव्वंगेणवि पुव्वेणवि तुडियं-
 गेणवि तुडिएणवि, एवं पुव्वे २ तुडिए २ अडडे २ अववे २ हूए २ उप्पले
 पउमे २ णल्लिणे २ अच्छ(अत्थि)णउरे २ अउए २ णउए २ पउए २ चूलिया

२ सीसपहेलिया २ पलिओवमेणवि सागरोवमेणवि भाणियव्वो । जया ण भंते ! जंबूदीवे २ दाहिणड्ढे पढमा ओसप्पिणी पडिवज्जइ तथा णं उत्तरड्ढेवि पढमा ओसप्पिणी पडिवज्जइ, जया णं उत्तरड्ढेवि पडिवज्जइ तथा णं जंबूदीवे २ मंदरस्स पव्वयस्स पुरत्थिमपच्चत्थिमेणवि णेवत्थि ओसप्पिणी णेवत्थि उस्सप्पिणी अवट्ठिणं तत्थ काले पण्णत्ते ? समणाउसो ! हंता गोयमा ! तं चेव उच्चारेयव्वं जाव समणाउसो ! जहा ओसप्पिणीए आलावओ भणिओ एवं उस्सप्पिणीएवि भाणियव्वो ॥ १७७ ॥ लवणे णं भंते ! समुद्वे सुरिया उदीचिपाईणमुग्गच्छ० जच्चेव जंबूदीवस्स वत्तव्वया भणिया सच्चेव सव्वा अपरिसेसिया लवणसमुद्दस्सवि भाणियव्वा, णवरं अभिलावो इमो णेयव्वो—जया ण भंते ! लवणे समुद्वे दाहिणड्ढे दिवसे भवइ तं चेव जाव तथा णं लवणे समुद्वे पुरत्थिमपच्चत्थिमेणं राई भवइ । एएणं अभिलावेणं णेयव्वं । जया णं भंते ! लवणसमुद्वे दाहिणड्ढे पढमा ओसप्पिणी पडिवज्जइ तथा णं उत्तरड्ढेवि पढमा ओसप्पिणी पडिवज्जइ, जया णं उत्तरड्ढे पढमा ओसप्पिणी पडिवज्जइ तथा णं लवणसमुद्वे पुरत्थिमपच्चत्थिमेणं णेवत्थि ओसप्पिणी जाव समणाउसो ! ? हंता गोयमा ! जाव समणाउसो ! । धायइसंडे णं भंते ! दीवे सुरिया उदीचिपाईणमुग्गच्छ० जहेव जंबूदीवस्स वत्तव्वया भणिया सच्चेव धायइसंडस्सवि भाणियव्वा, णवरं इमेणं अभिलावेणं सव्वे आलावगा भाणियव्वा । जया णं भंते ! धायइसंडे दीवे दाहिणड्ढे दिवसे भवइ तथा णं उत्तरड्ढेवि जया णं उत्तरड्ढेवि तथा णं धायइसंडे दीवे मंदराणं पव्वयाणं पुरत्थिमपच्चत्थिमेणं राई भवइ ? हंता गोयमा ! एवं चेव जाव राई भवइ । जया णं भंते ! धायइसंडे दीवे मंदराणं पव्वयाणं पुरत्थिमेणं दिवसे भवइ तथा णं पच्चत्थिमेणवि, जया णं पच्चत्थिमेणवि तथा णं धायइसंडे दीवे मंदराणं पव्वयाणं उत्तरेणं दाहिणेणं राई भवइ ? हंता गोयमा ! जाव भवइ । एवं एएणं अभिलावेणं णेयव्वं जाव जया णं भंते ! दाहिणड्ढे पढमा ओस० तथा णं उत्तरड्ढे जया णं उत्तरड्ढे तथा णं धायइसंडे दीवे मंदराणं पव्वयाणं पुरत्थिमपच्चत्थिमेणं णत्थि ओस० जाव समणाउसो ! ? हंता गोयमा ! जाव समणाउसो ! जहा लवणसमुद्दस्स वत्तव्वया तथा कालोदस्सवि भाणियव्वा, णवरं कालोदस्स णासं भाणियव्वं । अत्तितरपुक्खरद्धे णं भंते ! सुरिया उदीचिपाईणमुग्गच्छ०

जहेव घायइसंडस्स वत्तव्वया तहेव अन्भितरपुक्खरद्धस्सवि भाणियन्वा णवरं
अभिलावो जाव जाणेयव्वो जाव तथा णं अन्भितरपुक्खरद्धे मंदराणं पुरत्थिमेण-
पच्चत्थिमेणं जेवत्थि ओसं जेवत्थि उत्सम्पिणी अवट्टिए णं तत्थ काले पण्णत्ते
समणाउसो ! सेवं भंते ! २ त्ति ॥ १७८ ॥

पंचमं सयं दीओ उद्देशो

रायगिहे णयरे जाव एवं वयासो-अत्थि णं भंते ! ईसिं पुरेवाया पत्था-
वाया मंदावाया महावाया वार्यति ? हुंता ! अत्थि । अत्थि णं भंते !
पुरत्थिमेणं ईसिं पुरेवाया पत्थावाया मंदावाया महावाया वार्यति ? हुंता !
अत्थि । एवं पच्चत्थिमेणं दाहिणेणं उत्तरेणं उत्तरपुरत्थिमेणं दाहिणपुरत्थिमे
णं, दाहिणपच्चत्थिमे णं उत्तरपच्चत्थिमे णं । जया णं भंते ! पुरत्थिमेणं ईसिं
पुरेवाया पत्थावाया मंदावाया महावाया वार्यति तथा णं पच्चत्थिमेणवि ईसिं
पुरेवाया जया णं पच्चत्थिमेणं ईसिं पुरेवाया तथा णं पुरत्थिमेणवि ? हुंता
गोयमा ! जया णं पुरत्थिमेणं तथा णं पच्चत्थिमेणवि ईसिं जया णं पच्चत्थि-
मेणवि ईसिं तथा णं पुरत्थिमेणवि ईसिं, एवं विसामु विदिसामु ! अत्थि णं
भंते ! दीविच्चया ईसिं ? हुंता ! अत्थि । अत्थि णं भंते ! सामुद्दया ईसिं ?
हुंता ! अत्थि । जया णं भंते ! दीविच्चया ईसिं तथा णं सामुद्दयावि ईसिं जया
णं सामुद्दया ईसिं तथा णं दीविच्चयावि ईसिं ? णो इणट्ठे समट्ठे । से केण-
ट्ठेणं भंते ! एवं बुच्चइ जया णं दीविच्चया ईसिं णो णं तथा सामुद्दया ईसिं
जया णं सामुद्दया ईसिं णो णं तथा दीविच्चया ईसिं ? गोयमा ! तिसिं णं
धयाणं अण्णमण्णस्स विवञ्चासेणं लवणे समुद्दे वेलं णाइक्कमइ से तेणट्ठेणं
जाव वाया वार्यति । अत्थि णं भंते ! ईसिं पुरेवाया पत्थावाया मंदावाया महा-
वाया वार्यति ? हुंता ! अत्थि । कया णं भंते ! ईसिं जाव वार्यति ? गोयमा !
जया णं वाउयाए अहारियं रियंति तथा णं ईसिं जाव वार्यति । अत्थि णं भंते !
ईसिं ? हुंता ! अत्थि । कया णं भंते ! ईसिं पुरेवाया पत्था० ? गोयमा !
जया णं वाउयाए उत्तरकरियं रियइ तथा णं ईसिं जाव वार्यति । अत्थि णं
भंते ! ईसिं ? हुंता ! अत्थि । कया णं भंते ! ईसिं पुरेवाया पत्था० ?
गोयमा ! जया णं वाउकुमारा वाउकुमारीओ वा अप्पणो वा परस्स वा

तदुभयस्स वा अट्टाए वाउकायं उदीरेंति तथा णं ईसिं पुरेवाया जाव वायंति ।
 वाउयाए णं भंते ! वाउयायं चैव आणमंति पाण० ? जहा खंदए तथा चत्तारि
 आलावगा णेयव्वा अणेगसयसहस्स० पुट्ठे उहाइ ससरीरी गिबल्लमइ ॥१७६॥
 अह भंते ! ओदणे कुम्मासे सुराए एए णं किसरीराइ वत्तव्वं सिया ? गोयमा !
 ओदणे कुम्मासे सुराए य जे घणे दव्वे एए णं पुव्वभावपण्णवणं पडुच्च वणस्सइ-
 जीवसरीरा तओ पच्छा सत्थाईया सत्थपरिणामिया अगणिज्झामिया अगणि-
 ष्णूसिया अगणितेविया अगणिपरिणामिया अगणिजीवसरीराति वत्तव्वं सिया,
 सुराए य जे दवे दव्वे एए णं पुव्वभावपण्णवणं पडुच्च आउजीवसरीरा तओ
 पच्छा सत्थाईया जाव अगणिकायसरीरा इ वत्तव्वं सिया । अहण्णं भंते ! अए
 तंवे तउए सीसए उवले कसट्ठिया एए णं किसरीरा इ वत्तव्वं सिया ? गोयमा ।
 अए तंवे तउए सीसए उवले कसट्ठिया, एए णं पुव्वभावपण्णवणं पडुच्च पुट्ठवी-
 जीवसरीरा तओ पच्छा सत्थाईया जाव अगणिजीवसरीरा इ वत्तव्वं सिया ।
 अहण्णं भंते ! अट्ठी अट्ठिज्झामे चम्मे चम्मज्झामे रोमे २ सिगे २ खुरे २ णहे
 २ एए णं किसरीरा इ वत्तव्वं सिया ? गोयमा ! अट्ठी चम्मे रोमे सिगे खुरे
 णहे एए णं तसपाणजीवसरीरा अट्ठिज्झामे चम्मज्झामे रोमज्झामे सिगे ० खुरे ०
 णहज्झामे एए णं पुव्वभावपण्णवणं पडुच्च तसपाणजीवसरीरा तओ पच्छा
 सत्थाईया जाव अगणिजीव० सि वत्तव्वं सिया । अह भंते ! इंगाले छारिए
 भुसे गोमए—एए णं किसरीराइ वत्तव्वं सिया ? गोयमा ! इंगाले छारिए
 भुसे गोमए—एए णं पुव्वभावपण्णवणं पडुच्च एगिवियजीवसरीरप्पओगपरि-
 णामियावि जाव पंचिदियजीवसरीरप्पओगपरिणामियावि तओ पच्छा सत्था-
 ईया जाव अगणिजीवसरीरा इ वत्तव्वं सिया ॥१८०॥ लवणे णं भंते ! समुद्धे
 केवइयं चक्कवालविक्खंमेणं पण्णत्ते ? एवं णेयव्वं जाव लोगट्ठिई लोगणुभावे,
 सेवं भंते ! २ त्ति भगवं जाव विहरइ ॥ १८१ ॥

पंचमं सयं तइओ उट्टेसो

अण्णउत्थिया णं भंते ! एवमाइक्खंति भा० प० एवं प० से जहाणामए
 जालगंठिया सिया आणुपुंज्वगट्ठिया अणंतरगट्ठिया परंपरगट्ठिया अणमण्ण-
 गट्ठिया अणमण्णगइयत्ताए अणमण्णभारियत्ताए अणमण्णगइयसंभारियत्ताए

अणमणघडत्ताए जाव चिट्ठइ । एवामेव बहूणं जीवाणं बहूषु आजाइस-
हस्सेसु बहूइं आउयसहस्साइं आणुपुंविगडियाइं जाव चिट्ठंति, एगेऽविय
णं जीवे एगेणं समएणं दो आउयाइं पडिसंवेदेइ, तंजहा-इहभविआउयं च
परभविआउयं च । जं समयं इहभविआउयं पडिसंवेदेइ तं समयं परभविआउयं
पडिसंवेदेइ जाव से कहमेयं भंते ! एवं ? गोयमा ! जण्णं ते अणउत्थियथा तं
चेव जाव परभविआउयं च, जे ते एवमाहंसु तं मिच्छा, अहं पुण गोयमा !
एवमाइक्खामि जाव परूवेमि से जहाणामए जालगंठिया सिया जाव अणमण-
घडत्ताए चिट्ठंति, एवामेव एगमेगस्स जीवस्स बहूँह आजाइसहस्सेहिं बहूँइं
आउयसहस्साइं आणुपुंविगडियाइं जाव चिट्ठंति, एगेऽविय णं जीवे एगेणं
समएणं एगं आउयं पडिसंवेदेइ, तंजहा-इहभविआउयं वा परभविआउयं वा, जं
समयं इहभविआउयं पडिसंवेदेइ णो तं समयं पर० पडिसंवेदेइ जं समयं प०
णो तं समयं इहभविआउयं प०, इहभविआउयस्स पडिसंवेयणाए णो परभविआ-
उयं पडिसंवेदेइ परभविआउयस्स पडिसंवेयणाए णो इहभविआउयं पडिसंवेदेइ,
एवं खलु एगे जीवे एगेणं समएणं एगं आउयं प० तंजहा-इहभ० वा परभ०
वा ॥१८२॥ जीवे णं भंते ! जे भविए णेरइएसु उववज्जित्तए से णं भंते !
कि साउए संकमइ णिराउए संकमइ ? गोयमा ! साउए संकमइ णो णिरा-
उए संकमइ । से णं भंते ! आउए कहिं कडे कहिं समाइण्णे ? गोयमा !
पुरिसे भवे कडे पुरिसे भवे समाइण्णे । एवं जाव वेमाणियाणं दंडओ । से णूणं
भंते ! जे जं भविए जोणि उववज्जित्तए से तमाउयं पकरेइ, तंजहा-णेरइया-
उयं वा जाव देवाउयं वा ? हुंता गोप्रमा ! जे जं भविए जोणि उववज्जित्तए
से तमाउयं पकरेइ, तंजहा-णेरइयाउयं वा तिरि० मणू० देवाउयं वा, णेरइया-
उयं पकरेमाणे सत्तविहं पकरेइ, तंजहा-रणणप्पभा पुढविणेरइयाउयं वा जाव
अहेसत्तमापुढविणेरइयाउयं वा, तिरिक्खजोणियाउयं पकरेमाणे पंचविहं पकरेइ,
तंजहा-एगिदियतिरिक्खजोणियाउयं वा, भेदो सब्बो भाणियब्बो, मणुस्साउयं
दुविहं, देवाउयं चउद्विहं । सेवं भंते ! सेवं भंते ! त्ति ॥ १८३ ॥

पंचमं सयं चउत्थो उट्ठेसो

छउमत्थे णं भंते ! मणुस्से आउडिज्जमाणाइं सहाइं सुणेइ, तंजहा-संख-
सहाणि वा सिगस० संखियस० खरमूहीस० पोयास० परिपिरियास० पणवस०

पडहस० संभस० होरंभस० भेरिसद्दाणि वा जल्लरीस० दंडुहिस० तयाणि वा वित्तयाणि वा घणाणि वा झुसिराणि वा ? हंता गोयमा ! छउमत्थे णं मणूसे भाउडिडज्जमाणाइं सद्दाइं सुणेइ, तंजहा—मंल्लसद्दाणि वा जाव झुसिराणि वा । ताइं भंते ! किं पुट्टाइं सुणेइ अपुट्टाइं सुणेइ ? गोयमा ! पुट्टाइं सुणेइ णो अपुट्टाइं सुणेइ, जाव णियमा छडिंसि सुणेइ । छउमत्थे णं भंते ! मणूस्से किं आरगयाइं सद्दाइं सुणेइ पारगयाइं सद्दाइं सुणेइ ? गोयमा ! आरगयाइं सद्दाइं सुणेइ णो पारगयाइं सद्दाइं सुणेइ । जहा णं भंते ! छउमत्थे मणूस्से आरगयाइं सद्दाइं सुणेइ णो पारगयाइं सद्दाइं सुणेइ तथा णं भंते ! केवली मणूस्से किं आरगयाइं सद्दाइं सुणेइ पारगयाइं सद्दाइं सुणेइ ? गोयमा ! केवली णं आरगयं वा पारगयं वा सव्वदूरमूलमणंतिर्यं सद्दं जाणेइ पासइ । से केणट्ठेणं तं जेव केवली णं आरगयं वा पारगयं वा जाव पासइ ? गोयमा ! केवली णं पुरत्थिमेणं मियंपि जाणइ अमियंपि जा० एवं दाहिणेणं पच्चत्थिमेणं उत्तरेणं उड्डं अहे मियंपि जा० अमियं पि जा० सव्वं जाणइ केवली सव्वं पासइ केवली सव्वओ जाणइ पासइ सव्वकालं जा० पा० सव्वभावे जाणइ केवली सव्वभावे पासइ केवली । अणंते णाणे केवलिस्स अणंते दंसणे केवलिस्स णिव्वुडे णाणे केवलिस्स णिव्वुडे दंसणे केवलिस्स से तेणट्ठेणं जाव पासइ ॥१८४॥

छउमत्थे णं भंते ! मणूस्से ह्सेज्ज वा उस्सुयाएज्ज वा ? हंता ! ह्सेज्ज वा उस्सुयाएज्ज वा । जहा णं भंते ! छउमत्थे मणूस्से ह्सेज्ज जाव उस्सु० तथा णं केवलीवि ह्सेज्ज वा उस्सुयाएज्ज वा ? गोयमा ! णो इणट्ठे समट्ठे । से केणट्ठेणं भंते ! जाव णो णं तथा केवली ह्सेज्ज वा जाव उस्सुयाएज्ज वा ? गोयमा ! जणं जीवा चरित्तमोहिणिज्जस्स कम्मस्स उवएणं हंसति वा उस्सुयायंति वा से णं केवलिस्स णत्थि, से तेणट्ठेणं जाव णो णं तथा केवली ह्सेज्ज वा उस्सुयाएज्ज वा । जीवे णं भंते ! ह्समाणे वा उस्सुयमाणे वा कइ कम्मपयडीओ बंधइ ? गोयमा ! सत्तविहंबंधए वा अट्टविहंबंधए वा । णेरइएणं भंते ! ह्समाणे वा उस्सुयमाणे वा कइ कम्मपयडीओ बंधइ ? गोयमा ! सत्तविहंबंधए वा अट्टविहंबंधए वा, जीवा णं भंते ! ह्समाणा वा उस्सुयायमाणा वा कइ कम्मपयडीओ बंधति ? गोयमा ! सत्तविहंबंधगा वा अट्टविहंबंधगा वा, णेरइयाणं पुच्छा, गोयमा ! सव्वे वि ताव होज्जा सत्तविहंबंधगा अहवा सत्तविहंबंधगावि अट्टविहंबंधगावि,

अदुवा सत्तविहबंधगा य अदुविहबंधगा य । एवं जाव वेमाणिए, पोहत्तिएहिं
जीवेगिदियवज्जो तियभंगो । छउमत्थे णं भंते । मणूसे णिद्दाएज्ज वा पयला-
एज्ज वा ? हुंता ! णिद्दाएज्ज वा पयलाएज्ज वा । जहा हुसेज्ज वा तथा णवरं
हरिसणावरणिज्जस्स कम्मस्स उदएणं णिद्दायंति वा पयलायंति वा, से णं केव-
लिस्स णत्थि, अण्णं तं चेव । जीवे णं भंते ! णिद्दायमाणे वा पयलायमाणे वा
कइ कम्मपयडोओ बंधइ ? गोयमा ! सत्तविहबंधए वा अदुविहबंधए वा, एवं
जाव वेमाणिए, पोहत्तिएसु जीवेगिदियवज्जो तियभंगो ॥ १८५ ॥ हरी णं
भंते ! हरिणेगमेसी सक्कदूए इत्थीगब्भं संहरमाणे किं गब्भाओ गब्भं साहरइ ?
गब्भाओ जोणिं साहरइ २ जोणीओ गब्भं साहरइ २ जोणीओ जोणिं साहरइ
४ ? गोयमा ! णो गब्भाओ गब्भं साहरइ णो गब्भाओ जोणिं साहरइ णो
जोणीओ जोणिं साहरइ परामुसिय २ अब्बाबाहेणं अब्बाबाहं जोणीओ गब्भं
साहरइ । पभू णं भंते ! हरिणेगमेसी सक्कस्स णं दूए इत्थीगब्भं णहरिसं-
सि वा रोमकूर्बंसि वा साहरित्तए वा णीहरित्तए वा ? हुंता ! पभू, णो चेव णं
तस्स गब्भस्स किञ्चिञ्चि आबाहं वा विबाहं वा उप्पाएज्जा छविच्छेदं पुण
करेज्जा, एसुहुंभं च णं साहुरज्ज वा णीहरिज्ज वा ॥ १८६ ॥ तेणं कालेणं
तेणं समएणं समणस्स भगवओ महावीरस्स अंतेवासी अइमुत्ते णामं कुमारसमणे
पगइभट्टए जाव विणीए । तए णं से अइमुत्ते कुमारसमणे अण्णया कयाइ महा-
वुट्टिकायसि णिवयमाणंसि कक्खलपडिगगहरयहरणमायाए बहिया संपट्टिए विहा-
राए । तए णं से अइमुत्ते कुमारसमणे वाहयं घहमाणं पासइ २ मट्टियाए पालि
बंधइ २ णाविद्या मे २ णाविओविन्न णावमयं पडिगगहयं उदगंसि कट्टु पव्वाह-
माणे २ अमिरमइ, तं च थंरा अट्ठक्ख, जेणेव समणे भगवं ० तेणेव उवागच्छंति
२ एवं वयासी—एवं खलु देवाणुप्पिधाणं अंतेवासी अइमुत्ते णामं कुमारसमणे से
णं भंते ! अइमुत्ते कुमारसमणे कइहिं भवग्गहणेहिं सिज्जिह्हि जाव अंतं करे-
हिइ ? अजोत्ति ! समणे भगवं महावीरे ते थरे एवं वयासी—एवं खलु अज्जो ।
१. म अंतेवासी अइमुत्ते णामं कुमारसमणे पगइभट्टए जाव विणीए से णं अइमुत्ते
कुमारसमणे इमेणं चेव भवग्गहणेणं सिज्जिह्हि जाव अंतं करेहिइ, तं मा णं
अज्जो ! तुब्भे अइमुत्तं कुमारसमणं हीलेह णिबह खिसह गरहह अवमण्णह,
तुब्भे णं देवाणुप्पिधा ! अइमुत्तं कुमारसमणं अगिलाए संगिण्हह अगिलाए

उवगिण्हह अगिलाए भत्तेण पाणेण विणएण वेयावडियं करेह, अइमुत्ते णं कुमारसमणे अंतकरे चेव अंतिमसरीरिए चेव । तए णं ते थेरा भगवंतो समणेणं भगवया म० एवं वुत्ता समाणा समणं भगवं महावीरं वंदंति णमंसंति अइमुत्तं कुमारसमणं अगिलाए संगिण्हंति जाव वेयावडियं करेति ॥१८७॥

तेणं कालेणं २ महासुक्काओ कप्पाओ महासग्गाओ महाविमाणाओ दो देवा महिद्धिया जाव महाणुभागा समणस्स भगवओ महावीरस्स अंतियं पाउब्भूया, तए णं ते देवा समणं भगवं महावीरं मणसा चेव वंदंति णमंसंति मणसा चेव इमं एयारूवं वागरणं पुच्छंति—इइ णं भंते ! देवानुप्पियाणं अंतेवासीसयाइं सिज्झिंहंति जाव अंतं करेंहंति ? तए णं समणे भगवं महावीरे तेहिं देवेहिं मणसा पुट्ठे तेसिं देवाणं मणसा चेव इमं एयारूवं वागरणं वागरेइ—एवं खलु देवानुप्पिया ! ममं सत्त अंतेवासीसयाइं सिज्झिंहंति जाव अंतं करेंहंति । तए णं ते देवा समणेणं भगवया महावीरेणं मणसा पुट्ठेणं मणसा चेव इमं एयारूवं वागरणं वागरिया समाणा हट्टुट्टा जाव ह्यहियया समणं भगवं महावीरं वंदंति णमंसंति २ ता मणसा चेव सुस्सुसमाणा णमंसमाणा अभिमुहा जाव पज्जुवासंति । तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूई णामं अणगारे जाव अदूरसामंते उड्ढंजाणु जाव विहरइ । तए णं तस्स भगवओ गोयमस्स ज्ञाणंतरियाए वट्टमाणस्स इमेयारूवे अज्झत्थिए जाव समुप्पज्जितथा, एवं खलु दो देवा महिद्धिया जाव महाणुभागा समणस्स भगवओ महावीरस्स अंतियं पाउब्भूया तं णो खलु अहं ते देवे जाणामि कयराओ कप्पाओ वा सग्गाओ वा विमाणाओ वा कस्स वा अत्थस्स अट्टाए इहं हव्वमागया ? तं गच्छामि णं भगवं महावीरं वंदामि णमंसामि जाव पज्जुवासामि इमाइं च णं एयारूवाइं वागरणाइं पुच्छिस्सामिति कट्टु एवं संयेहेइ २ उट्टाए उट्ठेइ २ जेणेव समणे भगवं महा० जाव पज्जुवासइ । गोयमाई ! समणे भगवं महावीरे भगवं गोयमं एवं वयासी—से णूणं तव गोयमा ! ज्ञाणंतरियाए वट्टमाणस्स इमेयारूवे अज्झत्थिए जाव जेणेव ममं अंतिए तेणेव हव्वमागए से णूणं गोयमा ! अत्थे समत्थे ? हंता ! अत्थि, तं गच्छाहिं णं गोयमा ! एए चेव देवा इमाइं एयारूवाइं वागरणाइं वागरेंहंति । तए णं भगवं गोयमे समणेणं भगवया महावीरेणं अब्भणुणाए

समाणे समणं भगवं महावीरं वंदइ णमंसइ २ जेणेव ते देवा तेणेव पहारेत्थ
गमणाए । तए णं ते देवा भगवं गोयमं एज्जमाणं पासंति २ हट्ठा जाव ह्य-
हियया खिप्पामेव अब्भुट्ठेति २ खिप्पामेव पच्चुवागच्छंति २ जेणेव भगवं
गोयमे तेणेव उवागच्छंति २ ता जाव णमंसित्ता एवं वयासी—एवं खलु भंते !
अम्हे महासुक्काओ कप्पाओ महासग्गाओ महाविमाणाओ दो देवा महिद्धिया
जाव पाउब्भूया तए णं अम्हे समणं भगवं महावीरं वंदामो णमंसामो २ मणसा
चेव इमाइं एयारूवाइं वागरणाइं पुच्छामो—कइ णं भंते ! देवाणुप्पियाणं
अंतेवासीसयाइं सिज्झिहिति जाव अंतं करेहिति ? तए णं समणे भगवं महा-
वीरे अम्हेहि मणसा पुट्ठे अम्हं मणसा चेव इमं एयारूवं वागरणं वागरेइ—एवं
खलु देवाणु० मम सत्त अंतेवासीसयाइं जाव अंतं करेहिति, तए णं अम्हे सम-
णेणं भगवया महावीरेणं मणसा चेव पुट्ठेणं मणसा चेव इमं एयारूवं वागरणं
वागरिया समाणा समणं भगवं महावीरं वंदामो णमंसामो २ जाव पज्जुवासा-
मोत्तिकट्टु भगवं गोयमं वंदंति णमंसंति २ जामेव दिंसि पाउ० तामेव दिंसि
प० ॥ १८८ ॥ भंतेति ! भगवं गोयमे समणं जाव एवं वयासी—देवा णं भंते !
संजयाइ वत्तव्वं सिया ? गोयमा ! णो इणट्ठे समट्ठे अब्भक्खानणमेयं । देवा
णं भंते ! असंजया इ वत्तव्वं सिया ? गोयमा ! णो इणट्ठे० णिट्ठुरवयणमेयं ।
देवा णं भंते ! संजयासंजया इ वत्तव्वं सिया ? गोयमा ! णो इणट्ठे समट्ठे,
असब्भयमेयं देवाणं । से किं खाईं णं भंते ! देवा इ वत्तव्वं सिया ? गोयमा !
देवा णं णोसंजयाइ वत्तव्वं सिया ॥ १८९ ॥ देवा णं भंते ! कयराए भासाए
भासंति ? कयरा वा भासा भासिज्जमाणो विसिस्सइ ? गोयमा ! देवा णं
अद्धमागहाए भासाए भासंति, सावि य णं अद्धमागहा भासा भासिज्जमाणो
विसिस्सइ ॥ १९० ॥ केवली णं भंते ! अंतकरं वा अंतिमसरीरियं वा जाणइ
पासइ ? हुंता ! गोयमा ! जाणइ पासइ । जहा णं भंते ! केवली अंतकरं वा
अंतिमसरीरियं वा जाणइ पासइ तथा णं छउमत्थेवि अंतकरं वा अंतिमसरीरियं
वा जाणइ पासइ ? गोयमा ! णो इणट्ठे समट्ठे, सोच्चा जाणइ, पासइ, पमा-
णओ वा । से किं तं सोच्चा ? सोच्चा णं केवलिस्स वा केवलिवावयस्स वा
केवलिसावियाए वा केवलिउवासियाए वा केवलि उवासगस्स वा तप्पविल्लयस्स वा
तप्पविल्लयसावगस्स वा तप्पविल्लयसावियाए वा तप्पविल्लयउवासगस्स वा तप्प-

क्खियउवात्तियः वा मे तं सोच्चा ॥ १६१ ॥ से किं तं पमाणे ? पमाणे चउच्चिहे पा० तंजहा—पच्चवखे अणुमाणे ओवप्पे आगमे, जहा अणु-
 भोगदारे तहा णेयव्वं पमाणं जाव तेण परं णो अत्तागमे णो अणंतरागमे
 परंपरागमे ॥ १६२ ॥ केवली णं भंते ! चरिमकम्मं वा चरिसण्णज्जरं वा जाणइ
 पासइ ? हुंता गोयमा ! जाणइ पासइ । जहा णं भंते ! केवली चरिमकम्मं
 वा जहा णं अतकरेणं आलावगो तहा चरिमकम्मेणवि अपरिसेसिओ णेयव्वो
 ॥ १६३ ॥ केवली णं भंते ! पणीयं मणं वा वइं वा धारेज्जा ? हुंता ! धारेज्जा ।
 जहा णं भंते ! केवली पणीयं मणं वा वइं वा धारेज्जा ते ण वेमाणिया देवा
 जाणति पासति ? गोयमा ! अत्थेगइया जाणति पा० अत्थेगइया ण जाणति
 ण पा० । से केणट्ठेणं जाव ण जाणति ण पासति ? गोयमा ! वेमाणिया देवा
 दुविहा पणत्ता, तंजहा—माइमिच्छादिट्ठिउववण्णगा य अमाइसम्मदिट्ठिउव-
 वण्णगा य, तत्थ णं जे ते माइमिच्छादिट्ठिउववण्णगा ते ण जाणति ण पासति,
 तत्थ णं जे ते अमाइसम्मदिट्ठिउववण्णगा ते णं जाणति पासति । से केणट्ठेणं
 एवं वु० अमाई सम्मदिट्ठी जाव पा० ? गोयमा ! अमाई सम्मदिट्ठी दुविहा
 पणत्ता—अणंतरोववण्णगा य परंपरोववण्णगा य, तत्थ अणंतरोववण्णगा ण
 जा० परंपरोववण्णगा जाणति, से केणट्ठेणं भंते ! एवं० परंपरोववण्णगा जाव
 जाणति ? गोयमा ! परंपरोववण्णगा दुविहा पणत्ता—पज्जत्ता य अपज्जत्ता
 य, पज्जत्ता जा० अपज्जत्ता ण जा०, एवं० अणंतरपरंपरपज्जत्तापज्जत्ता य
 उवउत्ता अणुवउत्ता, तत्थ णं जे ते उवउत्ता ते जा० पा० से तेणट्ठेणं त चेव
 ॥ १६४ ॥ पभू णं भंते ! अणुत्तरोववाइया देवा तत्थगया चेव समाणा इह-
 गएणं केवलिणा सद्धि आलावं वा सलावं वा करेत्तए ? हुंता ! पभू । से केण-
 ट्ठेणं जाव पभू णं अणुत्तरोववाइया देवा जाव करेत्तए ? गोयमा ! जणं
 अणुत्तरोववाइया देवा तत्थगया चेव समाणा अट्ठं वा हेउं वा पसिणं वा कारणं
 वा वागरणं वा पुच्छति तणं इहगए केवली अट्ठं वा जाव वागरणं वा
 वागरेइ से तेणट्ठेणं । जणं भंते ! इहगए चेव केवली अट्ठं वा जाव
 वागरेइ तणं अणुत्तरोववाइया देवा तत्थगया चेव समाणा जा० पा० ? हुंता !
 जाणति पासति । से केणट्ठेणं जाव पासति ? गोयमा ! तेसिणं देवाणं अण-
 ताओ मणोदव्ववग्गणाओ लद्धाओ पत्ताओ अभिसमण्णागयाओ भवति से तेण-

दृठेण जण्णं इहगए केवली जाव पा० ॥ १६५ ॥ अणुत्तरोववाइया णं भंते ! देवा कि उदिण्णमोहा उवसंतमोहा खीणमोहा ? गोयमा ! णो उदिण्णमोहा उवसंतमोहा णो खीणमोहा ॥ १६६ ॥ केवली णं भंते ! आयाणेहि जा० पा० ? गोयमा ! णो इणट्ठे स० । से केणट्ठेणं जाव केवली णं आयाणेहि ण जाणइ ण पासइ ? गोयमा ! केवली णं पुरत्थिमेणं मियंपि जाणइ अमियंपि जा० जाव णिण्णुणे दंसणे केवलिस्स से तेण० ॥ १६७ ॥ केवली णं भंते ! अस्सि समयंसि जेसु आगासपएसेसु हत्थं वा पायं वा जाहुं वा ऊरं वा ओगाहिता णं चिट्ठइ पभू णं भंते ! केवली सेयकालंसिवि तेसु चेव आगासपएसेसु हत्थं वा जाव ओगाहिता णं चिट्ठित्तए ? गोयमा ! णो इ० । से केणट्ठेणं भंते ! जाव केवली णं अस्सि समयंसि जेसु आगासपएसेसु हत्थं वा जाव चिट्ठइ णो णं पभू केवली सेयकालंसिवि तेसु चेव आगासपएसेसु हत्थं वा जाव चिट्ठित्तए ? गो० ! केवलिस्स णं वीरियसओगसट्ठव्वयाए चलाइं उवकरणाइं भवति, चलोवभरणट्टयाए य णं केवली अस्सि समयंसि जेसु आगासपएसेसु हत्थं वा जाव चिट्ठइ णो णं पभू केवली सेयकालंसिवि तेसु चेव जाव चिट्ठित्तए, से तेणट्ठेणं जाव वृच्चइ—केवली णं अस्सि समयंसि जाव चिट्ठित्तए ॥ १६८ ॥ पभू णं भंते ! चीट्ठसपुब्बी घडाओ घडसहस्सं पडाओ पडसहस्सं कडाओ २ रहाओ २ छताओ छतसहस्सं बंडाओ बंडसहस्सं अभिणिव्वट्टेत्ता उवदंसेत्तए ? हुंता ! पभू ! से केणट्ठेणं पभू चउट्ठसपुब्बी जाव उवदंसेत्तए ? गोयमा ! चउट्ठसपुब्बिस्स णं अणंताइं दब्वाइं उक्करियाभेएणं मिज्जमाणाइं लद्धाइं पत्ताइं अभिसमण्णाययाइं भवति, से तेणट्ठेणं जाव उवदंसेत्तए । सेवं भंते ! सेवं भंते ! ति ॥ १६९ ॥

पंचमं सयं पंचमो उद्देशो

छउमत्ये णं भंते ! मणूसे तीयमणंतं सासयं समयं केवलेणं संजमेणं० जहा पद्धमसए चउत्थुद्देशे आलावगा तहा णेयव्वा जाव अलभत्थुत्ति वत्तव्वं सिया ॥ २०० ॥ अण्णउत्थिया णं भंते ! एवमाइक्खंति जाव परूवेति सब्बे पाणा सब्बे भूया सब्बे जीवा सब्बे सत्ता एब्भूयं वेद्यणं वेदंति । से कहमेयं भंते ! एवं ? गोयमा ! जण्णं ते अण्णउत्थिया एवमाइक्खंति जाव वेदंति जे ते एव-

माहंसु मिच्छा ते एवमाहंसु, अहं पुण गोयमा ! एवमाइक्खामि जाव पव्वेमि अत्थेगइया पाणा भूया जीवा सत्ता एवंभूयं वेयणं वेदेंति अत्थेगइया पाणा भूया जीया सत्ता अणेवंभूयं वेयणं वेदेंति । से केणट्ठेणं अत्थेगइया ? तं चेव उच्चारेयव्वं, गोयमा ! जे णं पाणा भूया जीवा सत्ता जहा कडा कम्मा तथा वेयणं वेदेंति ते णं पाणा भूया जीवा सत्ता एवंभूयं वेयणं वेदेंति, जे णं पाणा भूया जीवा सत्ता जहा कडा कम्मा णो तथा वेयणं वेदेंति ते णं पाणा भूया जीवा सत्ता अणेवंभूयं वेयणं वेदेंति, से तेणट्ठेणं तहेव । णेरइया णं भंते ! किं एवंभूयं वेयणं वेदेंति अणेवंभूयं वेयणं वेदेंति ? गोयमा ! णेरइया णं एवंभूयंपि वेयणं वेदेंति अणेवंभूयंपि वेयणं वेदेंति । से केणट्ठेणं तं चेव ? गोयमा ! जे णं णेरइया जहा कडा कम्मा तथा वेयणं वेदेंति ते णं णेरइया एवंभूयं वेयणं वेदेंति जे णं णेरइया जहा कडा कम्मा णो तथा वेयणं वेदेंति ते णं णेरइया अणेवंभूयं वेयणं वेदेंति, से तेणट्ठेणं, एवं जाव वेमाणिया । संसारमंडलं णेयव्वं ॥ २०१ ॥ जंबुद्वीवे णं भंते ! इह भारहे वासे इमीसे ओसं कइ कुलगरा होत्थ्या ? गोयमा ! सत्त एवं तित्थयरा तित्थयरमायरो पियरो पडमा तिसिणीओ चक्कवट्टीमायरो पियरो इत्थियरणं बलदेवा वामुदेवा वामुदेवमायरो पियरो, एएंसि पडिसत्तू जहा समवाए णामपरिवाडीए तथा णेयव्वा । सेवं भंते ! २ ति जाव विहरइ ॥ २०२ ॥

पंचमं सयं छट्ठो उद्देशो

कहणं भंते ! जीवा अप्पाउयत्ताए कम्मं पकरेंति ? गोयमा ! तिहि ठाणेहि, तंजहा—पाणे अइवाएत्ता मुसं वइत्ता तहारूवं समणं वा माहणं वा अफामुएणं अणेसणिज्जेणं असणपाणक्खाइमसाइमेणं पडिलाभेत्ता, एवं खलु जीवा अप्पाउयत्ताए कम्मं पकरेंति । कहणं भंते ! जीवा दीहाउयत्ताए कम्मं पकरेंति ? गोयमा ! तिहि ठाणेहि—णो पाणे अइवाइत्ता णो मुसं वइत्ता तहारूवं समणं वा माहणं वा फामुएसणिज्जेणं असणपाणक्खाइमसाइमेणं पडिलाभेत्ता एवं खलु जीवा दीहाउयत्ताए कम्मं पकरेंति । कहणं भंते ! जीवा असुभदीहाउयत्ताए कम्मं पकरेंति ? गोयमा ! पाणे अइवाइत्ता मुसं वइत्ता

तहारूवं समणं वा माहणं वा हीलित्ता णिदिता खिसित्ता गरहित्ता अबम-
 णित्ता अण्णघरेणं अमणुणेणं अपीइकारएणं असणपाणखाइमसाइमेणं पडि-
 लाभेत्ता एवं खलु जीवा अमुमदीहाउयत्ताए कम्मं पकरेंति । कहण्णं भंते ।
 जीवा सुमदीहाउयत्ताए कम्मं पकरेंति ? गोयमा ! णो पाणे अइवाइत्ता णो
 मुसं वइत्ता तहारूवं समणं वा माहणं वा वंदित्ता णमसित्ता जाव पज्जुवासित्ता
 अण्णघरेणं मणुणेणं पीइकारएणं असणपाणखाइमसाइमेणं पडिलाभेत्ता एवं
 खलु जीवा सुमदीहाउयत्ताए कम्मं पकरेंति ॥ २०३ ॥ गाहावइस्स णं भंते ।
 भंडं विक्किणमाणस्स केइ भंडं अवहरेज्जा तस्स णं भंते ! तं भंडं अणुववेस-
 माणस्स किं आरंभिया किरिया कज्जइ परिगहिया० माया० अप० मिच्छा० ?
 गोयमा ! आरंभिया किरिया कज्जइ परि० माया० अपच्च० मिच्छादंसणकिरिया
 सिय कज्जइ सिय णो कज्जइ । अह से भंडे अमिसमण्णःगए भवइ, ताओ से
 पच्छा सव्वाओ ताओ पयणुईभवति । गाहावइस्स णं भंते ! तं भंडं विक्किणमा-
 णस्स कइए भंडं साइज्जेज्जा भंडे य से अणुवणीए सिया । गाहावइस्स णं भंते !
 ताओ भंडाओ किं आरंभिया किरिया कज्जइ जाव मिच्छादंसणकिरिया कज्जइ
 कइयस्स वा ताओ भंडाओ किं आरंभिया किरिया कज्जइ जाव मिच्छादंसण-
 किरिया कज्जइ गोयमा ! गाहावइस्स ताओ भंडाओ आरंभिया किरिया
 कज्जइ जाव अपच्चक्खाणिया मिच्छादंसणवत्तिया किरिया सिय कज्जइ सिय
 णो कज्जइ, कइयस्स णं ताओ सव्वाओ पयणुईभवति । गाहावइस्स णं भंते !
 भंडं विक्किणमाणस्स जाव भंडे से उवणीए सिया कइयस्स णं भंते ! ताओ
 भंडाओ किं आरंभिया किरिया कज्जइ ? गाहावइस्स वा ताओ भंडाओ किं
 आरंभिया किरिया कज्जइ ? गोयमा ! कइयस्स ताओ भंडाओ हेट्टुल्लाओ
 चत्तारि किरियाओ कज्जंति मिच्छादंसणकिरिया भयणाए, गाहावइस्स णं ताओ
 सव्वाओ पयणुईभवति । गाहावइस्स णं भंते ! भंडं जाव धणे य से अणुवणीए
 सिया एवंपि जहा भंडे उवणीएत्ता णेयव्वं चउत्थो आलावगो, धणे से उवणीए
 सिया जहा पढमो आलावगो भंडे य से अणुवणीए सिया तहा णेयव्वो
 पढमचउत्थाणं एक्को गमो बिइयतइयाणं एक्को गमो । अगणिकाए णं भंते !
 अहणोज्जलिए समणे महाकम्मतराए चेव महाकिरियतराए चेव महासव-
 तराए चेव महावेयणतराए चेव भवइ, अहे णं सभए २ वोक्कसिज्जमाणे २

चरिमकालसमयसि इंगालब्भूए मुम्मुरब्भूए छारियब्भूए तओ पच्छा अप्प-
 कम्मतराए चेव अप्पकिरियतराए चेव अप्पासवतराए चेव अप्पवेयणतराए
 चेव भवइ ? हुंता गोयमा ! अगणिकाए णं अहुणोज्जलिए समाणे तं चेव
 ॥२०४॥ पुरिसे णं भंते ! धणुं परामुसइ परामुसित्ता उसुं परामुसइ २
 ठाणं ठाइ ठाणं ठिच्चा आययकणाययं उसुं करेइ आययकणाययं उसुं करेत्ता
 उड्डं वेहासं उसुं उड्विहइ २ तओ णं से उसुं उड्डं वेहासं उड्विहिए समाणे
 जाइं तत्थ पाणाइं भूयाइं जोवाइं सत्ताइं अभिहणइ वत्तेइ लेस्सेइ संघाएइ
 संघट्टेइ परिघावेइ कित्तामेइ ठाणाओ ठाणं संकामेइ जीवियाओ ववरोवेइ
 तए णं भंते ! से पुरिसे कइकिरिए ? गोयमा ! जावं च णं से पुरिसे धणुं
 परामुसइ २ जाव उड्विहइ तावं च णं से पुरिसे काइयाए जाव पाणाइवाय-
 किरियाए पंचाहिं किरियाहिं पुट्ठे, जेसिपि य णं जीवाणं सरीरेहिं धणू णिध्व-
 त्तिए तेऽवि य णं जीवा काइयाए जाव पंचाहिं किरियाहिं पुट्ठे (ट्टा) एवं धणु-
 पुट्ठे पंचाहिं, किरियाहिं, जीवा पंचाहिं, ण्हारू पंचाहिं, उसुं पंचाहिं, सरे पत्तणे फले
 ण्हारू पंचाहिं ॥२०५॥ अहे णं से उसुं अप्पणो गुरुयत्ताए भारियत्ताए गुरुय-
 संभारियत्ताए अहे वीससाए पच्चोवयमाणे जाइं तत्थ पाणाइं जाव जीवियाओ
 ववरोवेइ तावं च णं से पुरिसे कइकिरिए ? गोयमा ! जावं च णं से उसुं
 अप्पणो गुरुयत्ताए जाव ववरोवेइ तावं च णं से पुरिसे काइयाए जाव चउहिं
 किरियाहिं पुट्ठे, जेसिपि य णं जीवाणं सरीरेहिं धणू णिध्वत्तिए तेवि जीवा
 चउहिं किरियाहिं, धणुपुट्ठे चउहिं, जीवा चउहिं, ण्हारू चउहिं, उसुं पंचाहिं,
 सरे पत्तणे फले ण्हारू पंचाहिं, जेवि य से जीवा अहे पच्चोवयमाणस्स उवग्गहे
 वट्ठंति तेवि य णं जीवा काइयाए जाव पंचाहिं किरियाहिं पुट्ठा ॥ २०६ ॥
 अण्णउत्तियया णं भंते ! एवमाइक्खंति जाव परूवेति से जहाणामए जुवइं
 जुवणे हत्थेणं हत्थे गेहेज्जा चक्कस्स वा णाभो अरगाउत्ता सिया एवामेव
 जाव चत्तारि पंच जोयणसयाइं बहुसमाइण्णे मणुयलोए मणुस्सेहिं । से कहमेयं
 भंते ! एवं ? गोयमा ! जण्णं ते अण्णउत्तियया जाव मणुस्सेहिं जे ते एवमाहुंसु
 मिच्छा०, अहं पुण गोयमा ! एवमाइक्खामि जाव एवामेव चत्तारि पंच
 जोयणसयाइं बहुसमाइण्णे णिरयलोए णेरइएहिं ॥ २०७ ॥ णेरइया णं भंते !
 किं एगत्तं पभू विउड्वित्तए पुहुत्तं पभू विउड्वित्तए ? जहा जीवाभिगमे आत्ता-

वगो तहा जेयब्बो जाव दुरहियासे ॥ २०८ ॥ आहाकम्मं अणवज्जेत्ति मणं
 पहारेत्ता भवइ, से णं तस्स ठाणस्स अणालोइयपडिक्कंते कालं करेइ णत्थि
 तस्स आराहणा, से णं तस्स ठाणस्स आलोइयपडिक्कंते कालं करेइ-अत्थि तस्स
 आराहणा । एएणं गमेणं जेयब्बं-कीयगडं ठवियं रइयं कंतारभत्तं दुब्बिबल्लभत्तं
 वहूलियाभत्तं गिलाणभत्तं सेज्जायरपिडं रायपिडं । आहाकम्मं अणवज्जेत्ति
 बहुजणस्स मज्झे भासित्ता सयमेव परिभुजित्ता भवइ से णं तस्स ठाणस्स जाव
 अत्थि तस्स आराहणा । एयंपि तह चेव जाव रायपिडं । आहाकम्मं अणवज्जेत्ति
 अणमणस्स अणुप्पदावइत्ता भवइ, से णं तस्स एयं तह चेव जाव रायपिडं ।
 आहाकम्मं णं अणवज्जेत्ति बहुजणमज्झे पणवइत्ता भवइ से णं तस्स जाव-
 अत्थि आराहणा जाव रायपिडं ॥२०९॥ आयरियउवज्जाए णं भंते ! सवि-
 सयंसि गणं अगिलाए संगिण्हमाणे अगिलाए उवगिण्हमाणे कइहि भवग्गाहणेहिं
 सिज्झइ जाव अंतं करेइ ? गोयमा ! अत्थेगइए तेणेव भवग्गाहणेणं सिज्झइ अत्थे-
 गइए बोच्चेणं भवग्गाहणेणं सिज्झइ तच्चं पुण भवग्गाहणं णाइक्कमइ ॥२१०॥
 जे णं भंते ! परं अलिएणं असन्नूएणं अब्भक्खाणेणं अब्भक्खाइ तस्स णं कहप्प-
 गारा कम्मा कज्जंति ? गोयमा ! जे णं परं अलिएणं असंतवयणेणं अब्भक्खा-
 णेणं अब्भक्खाइ तस्स णं तहप्पगारा चेव कम्मा कज्जंति, जत्थेव णं अभिसमा-
 गच्छइ तत्थेव णं पडिसंवेदेइ तओ से पच्छा वेदेइ । सेवं भंते ! २ त्ति ॥२११॥

पंचमं सयं सत्तमो उद्देशो

परमाणुपोगले णं भंते ! एयइ वेयइ जाव तं तं भावं परिणमइ ?
 गोयमा ! सिय एयइ वेयइ जाव परिणमइ सिय णो एयइ जाव णो परिणमइ ।
 दुप्पएसिए णं भंते ! खंधे एयइ जाव परिणमइ ? गोयमा ! सिय एयइ जाव
 परिणमइ सिय णो एयइ जाव णो परिणमइ, सिय देसे एयइ देसे णो एयइ ।
 तिप्पएसिए णं भंते ! खंधे एयइ ? गोयमा ! सिय एयइ सिय णो एयइ,
 सिय देसे एयइ णो देसे एयइ सिय देसे एयइ णो देसा एयंसि सिय देसा
 एयंसि णो देसे एयइ । चउप्पएसिए णं भंते ! खंधे एयइ ? गोयमा ! सिय
 एयइ सिय णो एयइ सिय देसे एयइ णो देसे एयइ सिय देसे एयइ णो देसा
 एयंसि सिय देसा एयंसि णो देसे एयइ सिय देसा एयंसि णो देसा एयंसि जहा
 चउप्पएसिओ तहा पंचपएसिओ तहा जाव अणंतपएसिओ ॥२१२॥ परमाणु-
 पोगले णं भंते ! असिधारं वा खुरधारं वा ओगाहेज्जा ? हुंता ! ओगा-

हेज्जा ! से णं भंते ! तत्थ छिज्जेज्ज वा भिज्जेज्ज वा ? गोयमा ! णो इणट्ठे समट्ठे, णो खलु तत्थ सत्थं कमइ । एवं जाव असंखेज्जपएसिओ । अत्तंपएसिए णं भंते ! खंधे असिधारं वा खुरधारं वा ओगाहेज्जा ? हंता ! ओगाहेज्जा । से णं भंते ! तत्थ छिज्जेज्ज वा भिज्जेज्ज वा ? गोयमा ! अत्थेगइए छिज्जेज्ज वा भिज्जेज्ज वा अत्थेगइए णो छिज्जेज्ज वा णो भिज्जेज्ज वा । एवं अग्गिणकायस्स मज्झंमज्झेणं तंहि णवरं सियाएज्जा भाणियच्चं, एवं पुव्वत्तसंबट्टगस्स महामेहस्स मज्झंमज्झेणं तंहि उल्ले सिया, एवं गंगाए महाणईए पडिमोयं हव्वमागच्छेज्जा तंहि विणिहायमावज्जेज्जा, उदगावत्तं वा उदगावद्दं वा वा ओगाहेज्जा से णं तत्थ परियावज्जेज्जा ॥२१३॥ परमाणुपोगले णं भंते ! कि सअड्ढे समज्जे सपएसे ? उदाहु अणड्ढे अमज्जे अपएसे ? गोयमा ! अणड्ढे अमज्जे अपएसे णो सअड्ढे णो समज्जे णो सपएसे । दुप्पएसिए णं भंते ! खंधे कि सअड्ढे समज्जे सपएसे उदाहु अणड्ढे अमज्जे अपएसे ? गोयमा ! सअड्ढे अमज्जे सपएसे णो अणड्ढे णो समज्जे णो अपएसे । तिप्पएसिए णं भंते ! खंधे पुच्छा ? गोयमा ! अणड्ढे समज्जे सपएसे णो सअड्ढे णो अमज्जे णो अपएसे । जहा दुप्पएसिओ तथा जे समा ते भाणियच्चा, जे विसमा ते जहा तिप्पएसिओ तथा भाणियच्चा । संखेज्जपएसिए णं भंते ! खंधे कि सअड्ढे ६ ? गोयमा ! सिय सअड्ढे अमज्जे सपएसे सिय अणड्ढे समज्जे सपएसे जहा संखेज्जपएसिओऽपि तथा असंखेज्जपएसिओपि, अणंतपएसिओ वि ॥२१४॥ परमाणुपोगले णं भंते ! परमाणुपोगलं फुसमाणे कि देसेणं देसं फुसइ १ देसेणं देसे फुसइ २ देसेणं सव्वं फुसइ ३ देसेहि देसं फुसइ ४ देसेहि देसे फुसइ ५ देसेहि सव्वं फुसइ ६ सव्वेणं देसं फुसइ ७ सव्वेणं देसे फुसइ ८ सव्वेणं सव्वं फुसइ ९ ? गोयमा ! णो देसेणं देसं फुसइ णो देसेणं देसे फुसइ णो देसेणं सव्वं फुसइ णो देसेहि देसं फुसइ णो देसेहि देसे फुसइ णो देसेहि सव्वं फुसइ णो सव्वेणं देसं फुसइ णो सव्वेणं देसे फुसइ सव्वेणं सव्वं फुसइ । एवं परमाणुपोगले दुप्पएसियं फुसमाणे सत्तमणवमेहि फुसइ, परमाणुपोगले तिप्पएसियं फुसमाणे निप्पच्छिमएहि तिहि फु०, जहा परमाणुपोगले तिप्पएसियं फुसाविओ एवं फुसावेयव्वो जाव अणंतपएसिओ । दुप्पएसिए णं भंते ! खंधे परमाणुपोगलं फुसमाणे पुच्छा ? तइयणवमेहि फुसइ, दुप्पएसिओ दुप्पएसियं

फुसमाणो पढमतइयसत्तमणवमेहिं फुसइ, दुप्पएसिओ तिप्पएसियं फुसमाणो
 आइल्लएहि य पच्छिल्लएहि य तिहिं फुसइ, मज्झिमएहिं तिहिं विपडिसेहेयव्वं,
 दुप्पएसिओ जहा तिप्पएसियं फुसाविओ एवं फुसावेयव्वो जाव अणंतपएसियं ।
 तिपएसिए णं भंते ! खंधे परमाणुपोग्गलं फुसमाणे पुच्छा, तइयच्छट्टसत्तमणव-
 मेहिं फुसइ, तिपएसिओ दुपएसियं फुसमाणो पढमएणं तइएणं चउत्थच्छट्टसत्तमणव-
 मेहिं फुसइ, तिपएसिओ तिपएसियं फुसमाणो सव्वेसुवि ठाणेसु फुसइ, जहा
 तिपएसिओ तिपएसियं फुसाविओ एवं तिप्पएसिओ जाव अणंतपएसिएणं संजो-
 एयव्वो, जहा तिपएसिओ एवं जाव अणंतपएसिओ भाणियव्वो ॥ २१५ ॥
 परमाणुपोग्गले णं भंते ! कालओ केवच्चिरं होइ ? गोयमा ! जहण्णेणं एणं
 समयं उक्कोसेणं असंखेज्जं कालं, एवं जाव अणंतपएसिओ । एगपएसोगाडे णं
 भंते ! पोग्गले सेए तम्मि वा ठाणे अण्णमि वा ठाणे कालओ केवच्चिरं होइ ?
 गोयमा ! जह० एणं समयं उक्को० आवलियाए असंखेज्जइभागं, एवं जाव
 असंखेज्जपएसोगाडे । एगपएसोगाडे णं भंते ! पोग्गले णिरेए कालओ केव-
 च्चिरं होइ ? गोयमा ! जहण्णेणं एणं समयं उक्कोसेणं असंखेज्जं कालं, एवं
 जाव असंखेज्जपएसोगाडे । एगगुणकालए णं भंते ! पोग्गले कालओ केवच्चिरं
 होइ ? गोयमा ! जह० एणं समयं उ० असंखेज्जं कालं एवं जाव अणंतगुण-
 कालए, एवं वण्णगंधरसफास० जाव अणंतगुणलुक्खे, एवं सुहुमपरिणए पोग्गले
 एवं वायरपरिणए पोग्गले । सहपरिणए णं भंते ! पोग्गले कालओ केवच्चिरं
 होइ ? गोयमा ! ज० एणं समयं उ० आवलियाए असंखेज्जइभागं । असहपरि-
 णए जहा एगगुणकालए । परमाणुपोग्गलस्स णं भंते ! अंतरं कालओ केवच्चिरं
 होइ ? गोयमा ! जहण्णेणं एणं समयं उक्कोसेणं असंखेज्जं कालं । दुरएसियस्स
 णं भंते ! खंधस्स अंतरं कालओ केवच्चिरं होइ ? गोयमा ! जहण्णेणं एणं
 समयं उक्कोसेणं अणंतं कालं, एवं जाव अणंतपएसिओ । एगपएसोगाडस्स णं
 भंते ! पोग्गलस्स सेयस्स अंतरं कालओ केवच्चिरं होइ ? गोयमा ! जहण्णेणं
 एणं समयं उक्कोसेणं असंखेज्जं कालं, एवं जाव असंखेज्जपएसोगाडे । एगपए-
 सोगाडस्स णं भंते ! पोग्गलस्स णिरेयस्स अंतरं कालओ केवच्चिरं होइ ?
 गोयमा ! जहण्णेणं एणं समयं उक्कोसेणं आवलियाए असंखेज्जइभागं, एवं
 जाव असंखेज्जपएसोगाडे । वण्णगंधरसफाससुहुमपरिणयवायरपरिणयाणं एएसि

अं चेव संचिट्ठणा तं चेव अंतरं पि भाणियब्बं । सद्दपरिणयस्स णं भंते ! पोगलस्स अंतरं कालओ केवच्चिरं होइ ? गोयमा ! जहण्णेणं एगं समयं उक्कोसेणं असंखेज्जं कालं । असद्दपरिणयस्स णं भंते ! पोगलस्स अंतरं कालओ केवच्चिरं होइ ? गोयमा ! जहण्णेणं एगं समयं उक्कोसेणं आवलियाए असंखेज्जइभागं ॥ २१६ ॥ एयस्स णं भंते ! दव्वट्ठणाउयस्स खेत्तट्ठणाउयस्स ओगाहणट्ठणाउयस्स भावट्ठणाउयस्स कयरे २ जाव विसेसाहिया वा ? गोयमा ! सव्वत्थोवे खेत्तट्ठणाउए ओगाहणट्ठणाउए असंखेज्जगुणे दव्वट्ठणाउए असंखेज्जगुणे भावट्ठणाउए असंखेज्जगुणे—खेत्तोगाहणदव्वे भावट्ठणाउयं च अप्पबहुं । खेत्ते सव्वत्थोवे सेसा ठाणा असंखेज्जगुणा ॥ १ ॥ २१७ ॥ णेरइया णं भंते ! किं सारंभा सपरिग्गहा उदाहु अणारंभा अवरिग्गहा ? गोयमा ! णेरइया सारंभा सपरिग्गहा णो अणारंभा णो अपरिग्गहा । से केणट्ठेणं जाव अपरिग्गहा ? गोयमा ! णेरइया णं पुढविकायं समारंभंति जाव तसकायं समारंभंति सरीरा परिग्गहिया भवंति कम्मा परिग्गहिया भवंति सच्चित्ताचित्तमोसयाइं दव्वाइं परि० भ०, से तेणट्ठेणं तं चेव । असुरकुमारा णं भंते ! किं सारंभा ४ ? पुच्छा, गोयमा ! असुरकुमारा सारंभा सपरिग्गहा णो अणारंभा अप० । से केणट्ठेणं ? गोयमा ! असुरकुमारा णं पुढविकायं समारंभंति जाव तसकायं समारंभंति सरीरा परिग्गहिया भवंति कम्मा परिग्गहिया भवंति भवणा परि० भवंति देवा देवीओ मणुस्सा मणुस्सीओ तिरिक्खजोणिया तिरिक्खजोणियाओ परिग्गहिया भवंति आसणसयणभंडमत्तोवगरणा परिग्गहिया भवंति सच्चित्ताचित्तमोसयाइं दव्वाइं परिग्गहियाइं भवंति से तेणट्ठेणं तद्देव एवं जाव थणियकुमारा । एगिदिया जहा णेरइया । वेइंदिया णं भंते ! किं सारंभा सपरिग्गहा ? तं चेव जाव सरीरा परिग्गहिया भवति बाहिरिया भंडमत्तोवगरणा परि० भवंति सच्चित्ताचित्त० जाव भवंति एवं जाव चउरदिया । पंचेदियतिरिक्खजोणिया णं भंते ! ० तं चेव जाव कम्मा परि० भवंति टंका कूडा सेला सिंहरो पढभारा परिग्गहिया भवंति जलथलबिल्लिगुहलेणा परिग्गहिया भवंति उज्जरणिज्जरच्चिल्ललपल्ललवप्पिणा परिग्गहिया भवंति अगडतडागदहणईओ वाविपुक्खरिणीदीहिया गुंजालिया सरा सरपंतियाओ सरसरपंतियाओ बिलपंतियाओ परिग्गहियाओ भवंति आराभुज्जाणा काणणा

वणा वणसंडा वणराईओ परिग्गहियाओ भवंति देवउल-सम-पव-थूम-खाइय-परिखाओ परिग्गहियाओ भवंति पागारअट्टालगचरियदारगोपुरा परिग्गहिया भवंति पासायघरसरणलेणआवणा परिग्गहिया भवंति सिंघाडगतिगचउक्क-चचवरचउम्मुहमहापहा परिग्गहिया भवंति सगडरहजाणजुग्गगिल्लियिल्लि-सीयसंदमाणियाओ परिग्गहियाओ भवंति लोहीलोहकडाहकडुच्छया परिग्गहिया भवंति भवणा परिग्गहिया भवंति देवा देवीओ मणुस्ता मणुस्तीओ तिरिक्खजो-णिआ तिरिक्खजोणिणीओ आसणसयणखंडभडसचित्ताचित्तमीसयाइं दग्वाइं परि-ग्गहियाइं भवंति से तेणदुठेण० । जहा तिरिक्खजोणिया तथा मणुस्तावि भाणियग्वा, वाणमंतरजोइसवेमाणिया जहा भवणवासी तथा पेयग्वा ॥२१८॥ पंच हेऊ पणत्ता, तंजहा-हेउं जाणइ हेउं पासइ हेउं बुज्जइ हेउं अभिसमा-गच्छइ हेउं छउमत्थमरणं मरइ । पंच हेऊ प०, तंजहा-हेउणा जाणइ जाव हेउणा छउमत्थमरणं मरइ । पंच हेऊ पणत्ता, तंजहा-हेउं ण जाणइ जाव हेउं अण्णाणमरणं मरइ । पंच हेऊ पणत्ता, तंजहा-हेउणा ण जाणइ जाव हेउणा अण्णाणमरणं मरइ । पंच अहेऊ पणत्ता, तंजहा-अहेउं जाणइ जाव अहेउं केवलमरणं मरइ । पंच अहेऊ पणत्ता, तंजहा-अहेउणा जाणइ जाव अहेउणा केवलमरणं मरइ । पंच अहेऊ पणत्ता, तंजहा-अहेउं ण जाणइ जाव अहेउं छउमत्थमरणं मरइ । पंच अहेऊ पणत्ता, तंजहा-अहेउणा ण जाणइ जाव अहेउणा छउमत्थमरणं मरइ । सेवं भंते । २ त्ति ॥ २१९॥

पंचमं सयं अट्टमो उद्देशो

तेणं कालेणं २ जाव परिसा पडिगया । तेणं कालेणं २ समणस्स ३ जाव अंतेवासी णारयपुत्ते णामं अणगारे पगइमहए जाव विहरइ । तेणं कालेणं २ समणस्स ३ जाव अंतेवासी णियंठिपुत्ते णामं अण० पगइमहए जाव विहरइ, तए णं से णियंठिपुत्ते अण० जेणामेव णारयपुत्ते अणगारे तेणेव उवागच्छइ २ णारयपुत्तं अण० एवं वयासी-सग्वा पोग्गला ते अज्जो ! कि सअड्ढा समज्झा सपएसा उदाहु अणड्ढा अमज्झा अपएसा ? अज्जो ! त्ति णारयपुत्ते अणगारे णियंठि-पुत्तं अणगारं एवं वयासी-सग्वपोग्गला मे अज्जो ! सअड्ढा समज्झा सपएसा णो अणड्ढा अमज्झा अपएसा । तए णं से णियंठिपुत्ते अणगारे णारयपुत्तं अ० एवं वयासी-जइ णं ते अज्जो ! सग्वपोग्गला सअड्ढा समज्झा सपएसा णो

अण्डा अमज्झा अपएसा कि दव्वादेसेण अज्जो ! सव्वपोगला सअड्डा समज्झा सपएसा गो अण्डा अमज्झा अपएसा ? खेत्तादेसेण अज्जो ! सव्वपोगला सअड्डा समज्झा सपएसा तह चेव, कालादेसेण तं चेव, भावादेसेण तं चेव ? तए णं से णारयपुत्ते अणगारे णियंठिपुत्तं अणगारं एवं वयासी-दव्वादेसेणवि मे अज्जो ! सव्वपोगला सअड्डा समज्झा सपएसा गो अण्डा अमज्झा अपएसा खेत्तादेसेणवि सव्वे पोगला सअड्डा तह चेव कालादेसेणवि, तं चेव भावादेसेण वि । तए णं से णियंठिपुत्ते अण० णारयपुत्तं अणगारं एवं वयासी-जइ णं अज्जो ! दव्वादेसेणं सव्वपोगला सअड्डा समज्झा सपएसा गो अण्डा अमज्झा अपएसा, एवं ते परमाणुपोगलेवि सअड्डे समज्झे सपएसे गो अण्डे अमज्झे अपएसे, जइ णं अज्जो ! खेत्तादेसेणवि सव्वपोगला सअड्डा ३ जाव एवं ते एगपएसोगाहेवि पोगले सअड्डे समज्झे सपएसे, जइ णं अज्जो ! कालादेसेणं सव्वपोगला सअड्डा समज्झा सपएसा, एवं ते एगसमयठिईएवि पोगले सअड्डे ३ तं चेव, जइ णं अज्जो ! भावादेसेणं सव्वपोगला सअड्डा समज्झा सपएसा, एवं ते एगगुणकालएवि पोगले सअ० ३ तं चेव, अह ते एवं ण भवइ तो जं वयसि दव्वादेसेणवि सव्वपोगला सअ० ३ गो अण्डा अमज्झा अपएसा एवं खेत्तादेसेणवि काला० भावादेसेणवि तण्णं मिच्छा । तए णं से णारयपुत्ते अणगारे णियंठिपुत्तं अ० एवं वयासी-णो खलु एवं देवा० एयमट्ठं जाणामो पासामो, जइ णं देवा० गो गिलायंति परिकहित्तए तं इच्छामि णं देवा० अंतिए एयमट्ठं सोच्चा णिसम्म जाणित्तए । तए णं से णियंठिपुत्ते अणगारे णारयपुत्तं अणगारं एवं वयासी-दव्वादेसेणवि मे अज्जो ! सव्वे पोगला सपएसावि अपएसावि अणत्ता खेत्तादेसेणवि एवं चेव कालादेसेणवि भावादेसेणवि एवं चेव । जे दव्वओ अपएसे से खेत्तओ णियमा अपएसे कालओ सिय सपएसे सिय अपएसे भावओ सिय सपएसे सिय अपएसे । जे खेत्तओ अपएसे से दव्वओ सिय सपएसे सिय अपएसे कालओ भयणाए भावओ भयणाए । जहा खेत्तओ एवं कालओ भावओ । जे दव्वओ सपएसे से खेत्तओ सिय सपएसे सिय अपएसे, एवं कालओ भावओवि । जे खेत्तओ सपएसे से दव्वओ णियम्य सपएसे कालओ भयणाए भावओ भयणाए जहा दव्वओ तहा कालओ भावओवि । एएसि णं

भंते ! पोग्गलाणं व्ववादेसेणं खेत्तादेसेणं कालादेसेणं भावादेसेणं सपएसाण य
 मपएसाण य कथरे २ जाव विसेसाहिया वा ? णारयपुत्ता ! सम्बत्थोवा
 पोग्गला भावादेसेणं अपएसा कालादेसेणं अपएसा असंखेज्जगुणा व्ववादेसेणं
 अपएसा असंखेज्जगुणा खेत्तादेसेणं अपएसा असंखेज्जगुणा खेत्तादेसेणं चैव
 सपएसा असंखेज्जगुणा व्ववादेसेणं सपएसा विसेसाहिया कालादेसेणं सपएसा
 विसेसाहिया भावादेसेणं सपएसा विसेसाहिया । तए णं से णारयपुत्ते अणगारे
 णियंठिपुसं अणगारं वंदइ णमंसइ णियंठिपुत्तं अणगारं वंदित्ता णमंसित्ता
 एयमट्ठं सम्मं विणएणं भुज्जो २ खामेइ २ त्ता संजमेणं सवसा अप्पाणं
 भावेमाणे विहरइ ॥ २२० ॥ भंते ! त्ति भगवं गोयमे जाव एवं वयासी-जीवा
 णं भंते ! किं वड्ढंति हायंति अवट्ठिया ? गोयमा ! जीवा णो वड्ढंति णो
 हायंति अवट्ठिया । णेरइया णं भंते ! किं वड्ढंति हायंति अवट्ठिया ? गोयमा !
 णेरइया वड्ढंतिवि हायंतिवि अवट्ठियावि । जहा णेरइया एवं जाव वेमाणिया ।
 सिद्धा णं भंते ! पुच्छा, गोयमा ! सिद्धा वड्ढंति णो हायंति अवट्ठियावि ।
 जीवा णं भंते ! केवइयं कालं अवट्ठिया ? गोयमा ! सम्बद्धं । णेरइया णं भंते !
 केवइयं कालं वड्ढंति ? गोयमा ! ज० एणं समयं उक्को० आवलियाए असं-
 खेज्जइभागं, एवं हायंति वा । णेरइया णं भंते ! केवइयं कालं अवट्ठिया ? गोयमा !
 जहण्णेणं एणं समयं उक्को० चउव्वीसं मुहुत्ता, एवं सत्तमुवि पुठवीसु वड्ढंति
 हायंति भाणियव्वं णवरं अवट्ठिएसु इमं णाणत्तं, तंजहा-रयणप्पभाए पुठवीए
 अडयालीसं मुहुत्ता सक्कर० चोइस राइंदियाइं वालु० मासं पंक० दो मासा
 धूम० चत्तारि मासा तमाए अट्ठ मासा तमतमाए बारस मासा । असुरकुभारावि
 वड्ढंति हायंति जहा णेरइया, अवट्ठिया जह० एक्कं समयं उक्को० अट्ठचत्ता-
 लीसं मुहुत्ता । एवं दसविहावि, एगिदिया वड्ढंतिवि हायंतिवि अवट्ठियावि,
 एएहि तिहिवि जहण्णेणं एक्कं समयं उक्को० आवलियाए असंखेज्जइभागं ।
 बेइंदिया वड्ढंति हायंति तहेव, अवट्ठिया ज० एक्कं समयं उक्को० दो अंतो-
 मुहुत्ता । एवं जाव चउरंरदिया, अवसेसा सब्बे वड्ढंति हायंति तहेव, अवट्ठियाणं
 णाणत्तं इमं, तं०-संमुच्छिमपॉचदियतिरिक्खजोणियाणं दो अंतोमुहुत्ता, गब्भ-
 वक्कंतियाणं चउव्वीसं मुहुत्ता, संमुच्छिममणुस्साणं अट्ठचत्तालीसं मुहुत्ता, गब्भ-
 वक्कंतियमणुस्साणं चउव्वीसं मुहुत्ता, वाणमंतरजोइससोह्मीसाणेसु अट्ठचत्तालीसं

मुहुता, सणकुमारे अट्टारस राईदियाइं चत्तालीस य मुहुता, माहिदे चउवीसं राईदियाइं वीस य मु०, बंभलोए पंचचत्तालीसं राईदियाइं, लंतए णउइ. राइ-
दियाइं, महासुक्के सट्टि राईदियसयं, सहस्सारे दो राईदियसयाइं, आणयपाण-
याणं संखेज्जा मासा, आरणच्छयाणं संखेज्जाइं वासाइं, एवं गेवेज्जेदेवाणं
विजयवेजयंतजयंतअपराजियाणं असंखेज्जाइं वाससहस्साइं, सब्बट्टसिद्धे य
पलिओवमस्स संखेज्जइभागो, एवं भाणियव्वं, वड्ढंति हायंति जह० एकं
समयं उ० आवलियाए असंखेज्जइभागं, अवट्टियाणं जं भाणियं । सिद्धा णं
भंते ! केवइयं कालं वड्ढंति ? गोयमा ! जह० एकं समयं उक्को० अट्ट
समया । केवइयं कालं अवट्टिया ? गोयमा ! जह० एकसमयं उक्को० छम्मासा ।
जीवा णं भंते ! किं सोवचया सावचया सोवचयसावचया णिरुवचयणिरवचया ?
गोयमा ! जीवा णो सोवचया णो सावचया णो सोवचयसावचया णिरुवचय-
णिरवचया । एगिदिया तइयपए, सेसा जीवा चउहिं पएहिं भाणियव्वा ।
सिद्धा णं भंते ! पुच्छा, गोयमा ! सिद्धा सोवचया णो सावचया णो सोवचय-
सावचया णिरुवचयणिरवचया । जीवा णं भंते ! केवइयं कालं णिरुवचयणिर-
वचया ? गोयमा ! सब्बद्धं । णेरइया णं भंते ! केवइयं कालं सोवचया ?
गोयमा ! जह० एकं समयं उ० आवलियाए असंखेज्जइभागं । केवइयं कालं
सावचया ? एवं चेव । केवइयं कालं सोवचयसावचया ? एवं चेव । केवइयं
कालं णिरुवचयणिरवचया ? गोयमा ! ज० एकं समयं उक्को० द्वारसमु०
एगिदिया सब्बे सोवचयसावचया सब्बद्धं सेसा सब्बे सोवचयावि सावचयावि
सोवचयसावचयावि णिरुवचयणिरवचयावि जहण्णेणं एकं समयं उक्कोसेणं
आवलियाए असंखेज्जइभागं अवट्टिएहिं वक्कतिकालो भाणियव्वो । सिद्धा णं
भंते ! केवइयं कालं सोवचया ? गोयमा ! जह० एकं समयं उक्को० अट्ट
समया । केवइयं कालं णिरुवचयणिरवचया ? जह० एकं समयं उ० छम्मासा ।
सेवं भंते ! २ ति ॥२२१॥

पंचमं सयं णवमो उट्टेसो

तेणं कालेणं तेणं समएणं जाव एवं वयासी-किमियं भंते ! णयरं राय-
गिहंति पवुच्चइ ? किं पुढवी णयरं रायगिहंति पवुच्चइ, आऊ णयरं राय-
गिहंति पवुच्चइ ? जाव वणस्सई ? जहा एयणुहेसए पंचिदियतिरिवलज्जोणि-

याणं वत्तव्वया तहा भाणियव्वा जाव सच्चित्ताच्चित्तमीसयाइं दव्वाइं णयरं राय-
 गिहंति पवुच्चइ ? गोयमा ! पुढवीवि णयरं रायगिहंति पवुच्चइ जाव सच्चित्ता-
 चित्तमीसयाइं दव्वाइं णयरं रायगिहंति पवुच्चइ । से केणट्ठेणं ? गोयमा !
 पुढवी जीवाइय अजीवाइय णयरं रायगिहंति पवुच्चइ जाव सच्चित्ताच्चित्त-
 मीसयाइं दव्वाइं जीवाइय अजीवाइय णयरं रायगिहंति पवुच्चइ से तेणट्ठेणं
 तं चेव ॥ २२२ ॥ से णूणं भंते ! दिया उज्जोए राइं अंधयारे ? हुंता गोयमा !
 जाव अंधयारे । से केणट्ठेणं ? गोयमा ! दिया सुभा पोगला सुभे पोगल-
 परिणामे राइं असुभा पोगला असुभे पोगलपरिणामे, से तेणट्ठेणं । णेर-
 इयाणं भंते ! कि उज्जोए अंधयारे ? गोयमा ! णेरइयाणं णो उज्जोए
 अंधयारे । से केणट्ठेणं ? गोयमा ! णेरइयाणं असुभा पोगला असुभे पोगल-
 परिणामे, से तेणट्ठेणं । असुरकुमाराणं भंते ! कि उज्जोए अंधयारे ?
 गोयमा ! असुरकुमाराणं उज्जोए णो अंधयारे । से केणट्ठेणं ? गोयमा !
 असुरकुमाराणं सुभा पोगला सुभे पोगलपरिणामे, से तेणट्ठेणं जाव एवं वुच्चइ,
 जाव यणियकुमाराणं । पुढविव्काइया जाव तेइंदिया जहा णेरइया । चउररिदि-
 याणं भंते ! कि उज्जोए अंधयारे ? गोयमा ! उज्जोएवि अंधयारेवि । से
 केणट्ठेणं ? गोयमा ! चउररिदियाणं सुभासुभा य पोगला सुभासुभे य पोगल-
 परिणामे, से तेणट्ठेणं एवं जाव मणुस्साणं । वाणमंतरजोइसवेमाणिया जहा
 असुरकुमारा ॥ २२३ ॥ अत्थि णं भंते ! णेरइयाणं तत्थगयाणं एवं पण्णायए
 तं०-समयाइ वा आवलियाइ वा जाव ओसप्पिणीइ वा उस्सप्पिणीइ वा ? णो
 इणट्ठे समट्ठे । से केणट्ठेणं जाव समयाइ वा आवलियाइ वा जाव उस्सप्पि-
 णीइ वा ? गोयमा ! इहं तेसि माणं इहं तेसि पमाणं इहं तेसि पण्णायए,
 तंजहा-समयाइ वा जाव उस्सप्पिणीइ वा, से तेणट्ठेणं जाव णो एवं पण्णाय-
 ए, तंजहा-समयाइ वा जाव उस्सप्पिणीइ वा । एवं जाव पंचेविद्यतिरिबल-
 जोणियाणं । अत्थि णं भंते ! मणुस्साणं इहगयाणं एवं पण्णायइ, तंजहा-
 समयाइ वा जाव उस्सप्पिणीइ वा ? हुंता ! अत्थि । से केणट्ठेणं ? गोयमा !
 इहं तेसि माणं इहं तेसि पमाणं, इहं चेव तेसि एवं पण्णायए, तंजहा-समयाइ
 वा जाव उस्सप्पिणीइ वा से तेण० । वाणमंतरजोइसवेमाणिया णं जहा
 णेरइयाणं ॥ २२४ ॥ तेणं कालेणं २ पासावच्चिज्जा थेरा भगवंतो जेणेव

समणे भगवं महावीरे तेणेव उवागच्छति २ समणस्स भगवओ महावीरस्स अदूरसामते ठिच्चा एवं वयासी-से णूं भंते ! असंखेज्जे लोए अणंता राइ-दिया उप्पज्जिज्जमु वा उप्पज्जंति वा उप्पज्जिज्जसंति वा विगच्छिमु वा विगच्छति वा विगच्छिस्संति वा परिता राइदिया उप्पज्जिज्जमु वा ३ विगच्छिमु वा ३ ? हुंता अज्जो ! असंखेज्जे लोए अणंता राइदिया तं चेव । से केणट्ठेणं जाव विगच्छिस्संति वा ? से णूं भे अज्जो ! पामेणं अरहया पुरिसादाणिएणं सासए लोए दुइए अणाइए अणवदग्गे परित्ते परिवुडे हेट्ठा विच्छिण्णे मज्जे संखिसे उप्पि विसाले अहे पलियंकसंठिए मज्जे वरवइरविग्गहिए उप्पि उद्ध-मुइंगाकारसंठिए तेसि च णं सासयंसि लोगंसि अणादियंसि अणवदग्गंसि परि-त्तंसि परिवुडंसि हेट्ठा विच्छिण्णंसि मज्जे संखिसंसि उप्पि विसालंसि अहे पलियंकसंठियंसि मज्जे वरवइरविग्गहियंसि उप्पि उद्धमुइंगाकारसंठियंसि अणंता जीवघणा उप्पज्जिज्जा २ णिलीयंसि परित्ता जीवघणा उप्पज्जिज्जा २ णिलीयंसि से णूं भूए उप्पण्णे विगए परिणए अजीवेहिं लोककइ पलोककइ, जे लोककइ से लोए ? हुंता भगवं ! से तेणट्ठेणं अज्जो ! एवं दुच्चइ असंखेज्जे तं चेव । तप्पभिइं च णं ते पासावच्चेज्जा थेरा भगवंतो समणं भगवं महावीरं पच्चभिजाणंति सव्वण्णु सव्वदरिसं । तए णं ते थेरा भगवंतो समणं भगवं महावीरं वंदंति णमंसंति २ एवं वयासी-इच्छामि णं भंते ! तुभं अंतिए चाउज्जामाओ धम्माओ पंचमहव्वइयं सप्पडिक्कमणं धम्मं उवसंप-ज्जिज्जा णं विहरित्तए, अहामुहं देवाणुप्पिया ! मा पडिबंधं । तए णं ते पासावच्चिज्जा थेरा भगवंतो जाव चरिमेहिं उस्सासणिस्सासेहिं सिद्धा जाव सव्वदुक्खप्पहीणा अत्थेगइया देवा देवलोएसु उववण्णा ॥२२५॥ कइविहा णं भंते ! देवलोगा पण्णत्ता ? गोयमा ! चउच्चिहा देवलोगा पण्णत्ता, तंजहा-भवणवासीवाणमंतरजोइसियवेमाणियभेएणं, भवणवासी दसविहा वाणमंतरा अट्टविहा जोइसिया पंचविहा वेमाणिया दुविहा । गाहा-किमियं राधगिहंति य उज्जोए अंधयार समए य । पासंतिवासि पुच्छा राइदिय देवलोगा.य ॥१॥ सेवं भंते ! २ त्ति ॥ २२६ ॥

पंचमं सयं दसमो उद्देशो

तेषां कालेणं तेषां समएणं चंपा णामं णयरी जहा पढमित्तो उद्देशओ

तहा जेयम्बो एसोवि, णवरं-चंदिमा भाणियम्बा ॥ २२७ ॥

पंचमं सयं समत्तं

॥ छट्ठं सयं पढमो उद्देशो ॥

गाहा—वेयण १ आहार २ महस्सवे य ३ सपएस ४ तम्भुयाए ५ भविए ।
 ६ साली ७ पुढवी ८ कम्म ९ अण्णउत्थि १० दस छट्ठगमि सए ॥ १॥ से
 णुणं भंते ! जे महावेयणे से महाणिज्जरे जे महाणिज्जरे से महावेयणे ? महा-
 वेयणस्स य अप्पवेयणस्स य से सेए जे पसत्थणिज्जराए ? हंता गोयमा ! जे
 महावेयणे एवं चेव । छट्ठसत्तमासु णं भंते ! पुढवीसु णेरइया महावेयणा ?
 हंता ! महावेयणा । ते णं भंते ! समणेहिंतो णिगगंधेहिंतो महाणिज्जरतरा ?
 गोयमा ! णो इणट्ठे समट्ठे । से केणट्ठेणं भंते ! एवं बुच्चइ जे महावेयणे
 जाव पसत्थणिज्जराए ? गोयमा ! से जहाणामए बुवे वत्था सिया, एगे वत्थे
 कद्दमरागरत्ते एगे वत्थे खंजणरागरत्ते एएसि णं गोयमा ! दोण्हं वत्थणं कयरे
 वत्थे दुब्बोयतराए चेव दुवामतराए चेव दुपरिकम्मतराए चेव कयरे वा वत्थे
 सुब्बोयतराए चेव सुवामतराए चेव सुपरिकम्मतराए चेव, ने वा से वत्थे कद्द-
 मरागरत्ते जे वा से वत्थे खंजणरागरत्ते ? भगवं ! तत्थ णं जे से वत्थे कद्द-
 मरागरत्तेसे णं वत्थे दुब्बोयतराए चेव दुवामतराए चेव दुपरिकम्मतराए चेव,
 एवामेव गोयमा ! णेरइयाणं पावाइं कम्माइं गाढीकयाइं चिक्कणीकयाइं सिलि-
 ट्ठीकयाइं खिलीभूयाइं भवन्ति संपगाढपि य णं ते वेयणं वेएमाणा णो महा-
 णिज्जरा णो महापज्जवसाणा भवन्ति । से जहा वा केइ पुरिसे अहिगराणि आउ-
 डेभाणे मह्या २ सद्देणं मह्या २ घोसेणं मह्या २ परंपराघराणं णो संचाएइ
 तीसे अहिगरणीए केई अहावायरे पोगले परिसाडित्तए एवामेव गोयमा ! णेरइ-
 याणं पावाइं कम्माइं गाढीकयाइं जाव णो महापज्जवसाणा भवन्ति । भगवं !
 तत्थ जे से वत्थे खंजणरागरत्ते से णं वत्थे सुब्बोयतराए चेव सुवामतराए चेव
 सुपरिकम्मतराए चेव, एवामेव गोयमा ! समणाणं णिगगंधाणं अहावायराइं
 कम्माइं सिडिलीकयाइं णिट्ठियाइं कडाइं विप्परिणामियाइं खिप्पामेव
 विद्धत्थाइं भवन्ति, जावइयं तावइयपि णं ते वेयणं वेएमाणा महाणिज्जरा महा-
 पज्जवसाणा भवन्ति, से जहाणामए—केइ पुरिसे सुक्कं तणहत्थयं जायतेयंसि

पक्खिवेज्जा से णूणं गोयमा ! से सुक्के तणहत्थए जायतेयंसि पक्खिते समाणे खिप्पामेव मसमसाविज्जइ ? हंता मसमसाविज्जइ, एवामेव गोयमा ! सम-
 णाणं णिमंगथाणं अहावायराइं कम्माइं जाव महापज्जवसाणा भवति, से जहा-
 णामए केइ पुरिसे तत्तंसि अयवकवल्लंसि उदग्गिबिदु जाव हंता ! विद्धंसमागच्छइ,
 एवामेव गोयमा ! समणाणं णिमंगथाणं जाव महापज्जवसाणा भवति, से तेण-
 ट्ठेणं जे महावेयणे से महाणिज्जरे जाव णिज्जराए ॥२२८॥ कइविहे णं भंते !
 करणे पणत्ते ? गोयमा ! चउव्विहे करणे पणत्ते, तंजहा—मणकरणे वइकरणे
 कायकरणे कम्मकरणे । णेरइयाणं भंते ! कइविहे करणे पणत्ते ? गोयमा !
 चउव्विहे पणत्ते, तंजहा—मणकरणे' वइकरणे कायकरणे कम्मकरणे ४
 एवं पंचिदियाणं सव्वेसि चउव्विहे करणे पणत्ते ; एगिदियाणं द्विविहे—काय-
 करणे य कम्मकरणे य, विगल्लेदियाणं तिविहे-वइकरणे कायकरणे कम्मकरणे ।
 णेरइयाणं भंते ! किं करणओ असायं वेयणं वेयंति अकरणओ असायं वेयणं
 वेयंति ? गोयमा ! णेरइयाणं करणओ असायं वेयणं वेयंति णो अकरणओ
 असायं वेयणं वेयंति । से केणट्ठेणं ? गोयमा ! णेरइयाणं चउव्विहे करणे
 पणत्ते, तंजहा—मणकरणे वइकरणे कायकरणे कम्मकरणे, इच्चेएणं चउव्विहेणं
 असुभेणं करणेणं णेरइया करणओ असायं वेयणं वेयंति णो अकरणओ, से
 तेणट्ठेणं । असुरकुमाराणं किं करणओ अकरणओ ? गोयमा ! करणओ
 णो अकरणओ से केणट्ठेणं ? गोयमा ! असुरकुमाराणं चउव्विहे करणे
 पणत्ते, तंजहा—मणकरणे वइकरणे कायकरणे कम्मकरणे इच्चेएणं सुभेणं
 करणेणं असुरकुमाराणं करणओ सायं वेयणं वेयंति णो अकरणओ, एवं जाव
 थणियकुमाराणं । पुढवीकाइयाणं एवामेव पुच्छा, णवरं—इच्चेएणं सुमामुभेणं
 करणेणं पुढविवकाइया करणओ वेमायाए वेयणं वेयंति णो अकरणओ । ओरा-
 लियसरीरा सव्वे सुभामुभेणं वेमायाए । देवा सुभेणं सायं वेयणं वेयंति ॥२२९॥
 जीवा णं भंते ! किं महावेयणा महाणिज्जरा १ महावेयणा अप्पणिज्जरा २
 अप्पवेयणा महाणिज्जरा १ अप्पवेयणा अप्पणिज्जरा ४ ? गोयमा ! अत्थे-
 गइया जीवा महावेयणा महाणिज्जरा १ अत्थेगइया जीवा महावेयणा अप्प-
 णिज्जरा २ अत्थेगइया जीवा अप्पवेयणा महाणिज्जरा ३ अत्थेगइया जीवा
 अप्पवेयणा अप्पणिज्जरा ४ । से केणट्ठेणं ? गोयमा ! पडिमापडिक्खणाए

अणगारे महावेद्यणे महाणिज्जरे छट्टसत्तमासु पुढवीसु णेरइया महावेद्यणा अप्प-
णिज्जरा सेलेसि-पडिवण्णए अणगारे अप्पवेद्यणे महाणिज्जरे अणुत्तरोववाइया
देवा अप्पवेद्यणा अप्पणिज्जरा । सेवं भंते ! २ त्ति ॥ महावेद्यणे य वरथे कद्दम-
खंजणकए य अहिगरणी । तणहत्थे य कवल्ले करण-महावेद्यणा जीवा ॥१॥
॥२३०॥ सेवं भंते ! सेवं भंते ! त्ति ।

छट्ठं सयं बीओ उद्देसो

रायगिहं णयरं जाव एवं वयासी-आहारुद्देसो जो पण्णवणाए सो सव्वो
णिखसेसो णेयव्वो । सेवं भंते ! सेवं भंते ! त्ति ॥२३१॥

छट्ठं सयं तइओ उद्देसो

बहुकम्मवत्थपोग्गलपयोगसावीससा य साईए । कम्मट्ठिईत्थिसंजय सम्भ-
ट्ठिठी य सण्णी य ॥१॥ भविए दंसण पज्जत्ते भासयपरित्ते णाणजोगे य ।
उवओगाहारगसुहुमच्चरिभबंधे य अप्पबहुं ॥२॥ से णूणं भंते ! महाकम्मस्स
महाकिरियस्स महासव्वस्स महावेद्यणस्स सव्वओ पोग्गला बज्झंति सव्वओ पोग्गला
चिज्जंति सव्वओ पोग्गला उवचिज्जंति सया समियं पोग्गला बज्झंति सया
समियं पोग्गला चिज्जंति सया समियं पोग्गला उवचिज्जंति सया समियं च णं
तस्स आया दुखत्ताए दुवण्णत्ताए दुग्धत्ताए दुरसत्ताए दुफासत्ताए अणिट्ठत्ताए
अकंतं० अप्पियं० असुभं० अमणुण्णं० अमणामत्ताए अणिच्छियत्ताए अभिज्झिय-
त्ताए अहत्ताए णो उडुत्ताए दुक्खत्ताए णो सुहत्ताए भुज्जो २ परिणमंति ?
हंता गोयमा ! महाकम्मस्स तं चेव । से केणट्ठेणं ? गोयमा ! से जहाणामए-
वत्थस्स अहयस्स वा धोयस्स वा तंतुग्गयस्स वा आणुपुढ्वीए परिभुज्जमाणस्स
सव्वओ पोग्गला बज्झंति सव्वओ पोग्गला चिज्जंति जाव परिणमंति से तेण-
ट्ठेणं । से णूणं भंते ! अप्पकम्मस्स अप्पकिरियस्स अप्पासव्वस्स अप्पवेद्यण-
स्स सव्वओ पोग्गला भिज्जंति सव्वओ पोग्गला छिज्जंति सव्वओ पोग्गला
विद्धंसंति सव्वओ पोग्गला परिविद्धंसंति सया समियं पोग्गला भिज्जंति सव्वओ
पोग्गला छिज्जंति विद्धंसंति परिविद्धंसंति सया समियं च णं तस्स आया सुख-
वत्ताए पसत्थं णेयव्वं जाव सुहत्ताए णो दुक्खत्ताए भुज्जो २ परिणमंति ?
हंता गोयमा ! जाव परिणमंति । से केणट्ठेणं ? गोयमा ! से जहाणामए

वत्थस्स जल्लियस्स वा पंक्रियस्स वा मइल्लियस्स वा रइल्लियस्स वा आणु-
 पुच्चोए परिक्कम्भज्जमाणस्स सुद्धेण वारिणा धोवेमाणस्स सव्वओ पोगला
 भिज्जति जाव परिणमति से तेणट्ठेणं ॥ २३२ ॥ वत्थस्स णं भंते ! पोगलोवचए
 किं पओगसा वीससा ? गोयमा ! पओगसावि वीससावि । जहा णं भंते !
 वत्थस्स णं पोगलोवचए पओगसावि वीससावि तथा णं जीवाणं कम्मोवचए
 किं पओगसा वीससा ? गोयमा ! पओगसा णो वीससा । से केणट्ठेणं ?
 गोयमा ! जीवाणं तिविहे पओगे पणत्ते, तंजहा—मणएपओगे वइ० का०, इच्छे-
 एणं तिविहेणं पओगेणं जीवाणं कम्मोवचए पओगसा णो वीससा, एवं सव्वेसि
 पंचेदियाणं तिविहे पओगे भाणियच्चै । पुढवीकाइयाणं एगविहेणं पओगेणं एवं
 जाव वणस्सइकाइयाणं, विगल्लिदियाणं दुविहे पओगे पणत्ते, तंजहा—वइपओगे
 कायपओगे य, इच्छेएणं दुविहेणं पओगेणं कम्मोवचए पओगसा णो वीससा,
 से तेणट्ठेणं जाव णो वीससा एवं जस्स जो पओगे जाव वेमाणियाणं
 ॥ २३३ ॥ वत्थस्स णं भंते ! पोगलोवचए किं साइए सपज्जवसिए १ साइए
 अपज्जवसिए २ अणाइए सपज्ज० ३ अणा० अप० ४ ? गोयमा ! वत्थस्स
 णं पोगलोवचए साइए सपज्जवसिए णो साइए अप० णो अणा० स० णो
 अणा० अप० । जहा णं भंते ! वत्थस्स पोगलोवचए साइए सपज्ज० णो
 साइए अप० णो अणा० सप० णो अणा० अप० तथा णं जीवाणं कम्मोवचए
 पुच्छा, गोयमा ! अत्थेगइयाणं जीवाणं कम्मोवचए साइए सपज्जवसिए अत्थे०
 अणाइए सपज्जवसिए अत्थे० अणाइए अपज्जवसिए णो चेव णं जीवाणं
 कम्मोवचए साइए अप० । से केण० ? गोयमा ! इरियावहियाबंधयस्स कम्मो-
 वचए साइए सप० भवसिद्धियस्स कम्मोवचए अणाइए सपज्जवसिए अभव-
 सिद्धियस्स कम्मोवचए अणाइए अपज्जवसिए, से तेणट्ठेणं गोयमा ! एवं
 सुच्चइ अत्थे० जीवाणं कम्मोवचए साइए णो चेव णं जीवाणं कम्मोवचए
 साइए अपज्जवसिए । वत्थे णं भंते ! किं साइए सपज्जवसिए चउभंगो ?
 गोयमा ! वत्थे साइए सपज्जवसिए अवसेसा तिण्णिक्कि पडिसेहेयववा । जहा
 णं भंते ! वत्थे साइए सपज्जवसिए णो साइए अपज्ज० णो अणाइए सप०
 णो अणाइए अपज्जवसिए तथा णं जीवाणं किं साइया सपज्जवसिया ? चउ-
 भंगो पुच्छा, गोयमा ! अत्थेगइया साइया सपज्जवसिया चत्तारिवि भाणि-

यव्वा । से-केणट्ठेणं ? गोयमा ! णेरइया तिरिक्खज्जोणिया मणुस्सा देवा गइरागइं पडुच्च साइया सपज्जवसिया सिद्धा गइं पडुच्च साइया अपज्जवसिया, भवसिद्धिया लद्धिं पडुच्च अणाइया सपज्जवसिया अभवसिद्धिया संसारं पडुच्च अणाइया अपज्जवसिया, से तेणट्ठेणं ॥ २३४ ॥ कइ णं भंते ! कम्मप्पयडोओ पणत्ताओ ? गोयमा ! अट्ट कम्मप्पयडोओ प०, तंजहा-णाणावरणिज्जं दरिसणावरणिज्जं जाव अंतराइयं । णाणावरणिज्जस्स णं भंते ! कम्मस्स केवइयं कालं बंधठिई प० ? गोयमा ! जह० अंतोमुहुत्तं उक्को० तीसं सागरोवमकोडाकोडीओ तिण्णि य वाससहस्साइं अबाहा अबाहूणिया कम्मट्ठिई-कम्मणिसेओ, एवं दरिसणावरणिज्जं, वेयणिज्जं जह० दो समया उक्को० जहा णाणावरणिज्जं, मोहणिज्जं जह० अंतोमुहुत्तं उक्को० सत्तिरि-सागरोवमकोडाकोडीओ, सत्त य वाससहस्साणि अबाहा, अबाहूणिया कम्मठिई-कम्मणिसेओ, आउयं जहण्णेणं अंतोमुहुत्तं उक्कोसेणं तेत्तीसं सागरोवमाणि पुव्वकोडित्तिभागमव्वहियाणि, कम्मट्ठिई-कम्मणिसेओ, णामगोयाणं जहण्णेणं अट्ट मुहुत्ता उक्कोसेणं व्हीसं सागरोवमकोडाकोडीओ दोण्णि य वाससहस्साणि अबाहा, अबाहूणिया कम्मट्ठिई-कम्मणिसेओ, अंतराइयं जहा णाणावरणिज्जं ॥ २३५ ॥ णाणावरणिज्जं णं भंते ! कम्मं कि इत्थो बंधइ पुरिसो बंधइ णपुंसओ बंधइ ? जोइत्थो णोपुरिसो णोणपुंसओ बंधइ ? गोयमा ! इत्थोवि बंधइ पुरिसोवि बंधइ णपुंसओवि बंधइ जोइत्थो णोपुरिसो णोणपुंसओ सिय बंधइ सिय णो बंधइ एवं आउयवज्जाओ सत्त कम्मप्पयडोओ । आउयं णं भंते ! कम्मं कि इत्थो बंधइ पुरिसो बंधइ णपुंसओ बंधइ ? पुच्छा, गोयमा ! इत्थो सिय बंधइ सिय णो बंधइ, एवं तिण्णिवि भाणियव्वा, जोइत्थो णोपुरिसो णोणपुंसओ ण बंधइ । णाणावरणिज्जं णं भंते ! कम्मं कि संजए बंधइ अस्संजए बंधइ संजयासंजए बंधइ णोसंजएणोअसंजएणोसंजयासंजए बंधइ ? गोयमा ! संजए सिय बंधइ सिय णो बंधइ अस्संजए बंधइ संजयासंजएवि बंधइ णोसंजएणोअसंजएणोसंजयासंजए ण बंधइ, एवं आउयवज्जाओ सत्तवि । आउए हेट्ठिल्ला तिण्णि भयणाए उवरिल्ले ण बंधइ । णाणावरणिज्जं णं भंते ! कम्मं कि सम्मदिट्ठी बंधइ मिच्छादिट्ठी बंधइ सम्मामिच्छदिट्ठी बंधइ ? गोयमा ! सम्मदिट्ठी सिय बंधइ सिय णो बंधइ मिच्छदिट्ठी बंधइ सम्मामिच्छदिट्ठी बंधइ, एवं आउ-

यवज्जाओ सत्तवि, आउए हेट्टिल्ला दो भयणाए सम्मामिच्छदिट्ठी ण बंधइ ।
 णाणावरणिज्जं कि सण्णी बंधइ असण्णी बंधइ णोसण्णीणोअसण्णी बंधइ ?
 गोयमा ! सण्णी सिय बंधइ सिय णो बंधइ असण्णी बंधइ णोसण्णीणोअसण्णी
 ण बंधइ, एवं वेयणिज्जाउयवज्जाओ छ कम्मपयडीओ, वेयणिज्जं हेट्टिल्ला
 दो बंधंति, उवरिल्ले भयणाए, आउयं हेट्टिल्ला दो भयणाए, उवरिल्ले ण
 बंधइ । णाणावरणिज्जं कम्मं कि भवसिद्धिए बंधइ अभवसिद्धिए बंधइ णोभव-
 सिद्धिएणोअभवसिद्धिए बंधइ ? गोयमा ! भवसिद्धिए भयणाए अभवसिद्धिए
 बंधइ णोभवसिद्धिएणोअभवसिद्धिए ण बंधइ; एवं आउयवज्जाओ सत्तवि,
 आउयं हेट्टिल्ला दो भयणाए उवरिल्ले ण बंधइ । णाणावरणिज्जं कि भवकु-
 वंसणी बंधइ अचवखुदंसं ओहिदंसं केवलदंसं ? गोयमा ! हेट्टिल्ला तिण्णि
 भयणाए उवरिल्ले ण बंधइ, एवं वेयणिज्जवज्जाओ सत्तवि, वेयणिज्जं हेट्टिल्ला
 तिण्णि बंधंति केवलदंसणी भयणाए । णाणावरणिज्जं कम्मं कि पज्जत्तओ
 बंधइ अपज्जत्तओ बंधइ णोपज्जत्तएणोअपज्जत्तए बंधइ ? गोयमा ! पज्जत्तए
 भयणाए, अपज्जत्तए बंधइ, णोपज्जत्तएणोअपज्जत्तए ण बंधइ, एवं आउय-
 वज्जाओ, आउयं हेट्टिल्ला दो भयणाए उवरिल्ले ण बंधइ । णाणावरणिज्जं
 कि भासए बंधइ अभासए ? गोयमा ! बोवि भयणाए, एवं वेयणिज्ज-
 वज्जाओ सत्तवि, वेयणिज्जं भासए बंधइ अभासए भयणाए । णाणावरणिज्जं
 कि परित्ते बंधइ अपरित्ते बंधइ णोपरित्तेणोअपरित्ते बंधइ ? गोयमा ! परित्ते
 भयणाए अपरित्ते बंधइ णोपरित्तेणोअपरित्ते ण बंधइ, एवं आउयवज्जाओ
 सत्त कम्मपयडीओ, आउयं परित्तोवि अपरित्तोवि भयणाए, णोपरित्तोणोअ-
 परित्तो ण बंधइ । णाणावरणिज्जं कम्मं कि आभिणिबोहियणाणी बंधइ सुय-
 णाणी ओहिणाणी मणपज्जवणाणी केवलणाणी वं ? गोयमा ! हेट्टिल्ला
 चत्तारि भयणाए केवलणाणी ण बंधइ, एवं वेयणिज्जवज्जाओ सत्तवि, वेय-
 णिज्जं हेट्टिल्ला चत्तारि बंधंति केवलणाणी भयणाए । णाणावरणिज्जं कि
 मइअण्णाणी बंधइ सुयं विभंगं ? गोयमा ! आउयवज्जाओ सत्तवि
 बंधंति, आउयं भयणाए । णाणावरणिज्जं कि मणजोगी बंधइ वयं कायं
 अयोगी बंधइ ? गोयमा ! हेट्टिल्ला तिण्णि भयणाए अज्जेगी ण बंधइ, एवं
 वेयणिज्जवज्जाओ, वेयणिज्जं हेट्टिल्ला बंधंति अजोगी ण बंधइ । णाणा-

वरणिज्जं किं सागारोवउत्ते बंधइ अणागारोवउत्ते बंधइ ? गोयमा ! अट्टमुक्कि भयणाए । पाणावरणिज्जं किं आहारए बंधइ अणाहारए बंधइ ? गोयमा ! दोवि भयणाए, एवं वेयणिज्जाउयवज्जाणं छण्हं, वेयणिज्जं आहारए बंधइ अणाहारए भयणाए, आउए आहारए भयणाए, अणाहारए ण बंधइ । पाणा-वरणिज्जं किं सुहमे बंधइ बायरे बंधइ णोसुहमेणोबायरे बंधइ ? गोयमा ! सुहमे बंधइ बायरे भयणाए णोसुहमेणोबायरे ण बंधइ, एवं आउयवज्जाओ सत्तवि, आउए सुहमे बायरे भयणाए णोसुहमेणोबायरे ण बंधइ । पाणावर-णिज्जं किं चरिमे अचरिमे बं० ? गोयमा ! अट्टुक्कि भयणाए ॥ २३६ ॥ एएसि णं भंते ! जीवाणं इत्थिवेयमाणं पुरिसवेयमाणं णपुंसगवेयमाणं अवेयमाणं य कयरे कयरे अप्पा वा ४ ? गोयमा ! सव्वत्थोवा जीवा पुरिसवेयमा इत्थि-वेयमा संखेज्जगुणा अवेयमा अणंतगुणा णपुंसगवेयमा अणंतगुणा । एएसि सध्वेसि पयाणं अप्पबहुगाइं उच्चारेयव्वाइं जाव सव्वत्थोवा जीव अचरिमा चरिमा अणंतगुणा । सेवं भंते ! सेवं भंते ! ति ॥ २३७ ॥

छट्ठं सयं चउत्थो उट्ठेसो

जीवे णं भंते ! कालादेसेणं किं सपएसे अपएसे ? गोयमा ! णियमा सपएसे । णेरइए णं भंते ! कालादेसेणं किं सपएसे अपएसे ? गोयमा ! सिय सपएसे सिय अपएसे, एवं जाव सिद्धे । जीवा णं भंते ! कालादेसेणं किं सप-एसा अपएसा ? गोयमा ! णियमा सपएसा । णेरइया णं भंते ! कालादेसेणं किं सपएसा अपएसा ? गोयमा !, सख्वेवि ताव होज्जा सपएसा १ अहवा सपएसा य अपएसे य २ अहवा सपएसा य अपएसा य ३ एवं जाव थणिय-कुमारा । पुढविकाइया णं भंते ! किं सपएसा अपएसा ? गोयमा ! सपएसावि अपएसावि एवं जाव वणस्सइकाइया, सेसा जहा णेरइया तहा जाव सिद्धा । आहारमाणं जीवेगेदियवज्जो तियभंगो, अणाहारमाणं जीवेगेदियवज्जा छभंगो एवं भाणियव्वा-सपएसा वा १ अपएसा वा १ अपएसा वा २ अहवा सपएसे य अपएसे य ३ अहवा सपएसे य अपएसा य ४ अहवा सपएसा य अपएसे य ५ अहवा सपएसा य अपएसा य ६, सिद्धेहिं तियभंगो, भवसिद्धिया अभव-सिद्धिया जहा ओहिया, णोभवसिद्धियणोअभवसिद्धिया जीवसिद्धेहिं तियभंगो, सण्णीहिं जीवाइओ तियभंगो, असण्णीहिं एंगिदियवज्जो तियभंगो, णेरइय-

देवमणुएहिं छब्भंगो, णोसण्णोअसण्णजीवमणुयसिद्धेहिं तियभंगो सलेसा जहा ओहिया। कण्हलेस्सा णोल्लेस्सा काउलेस्सा जहा आहारओ णवरं जस्स अत्थि एयाओ, तेउलेस्साए जीवाइओ तियभंगो, णवरं पुढविदकाइएसु आउवणस्सईसु छब्भंगा, पम्ह्हेस्समुदकलेस्साए जीवाइओ तियभंगो, अलेभेहिं जीवसिद्धेहिं तियभंगो मणुएसु छब्भंगा, सम्मद्धिट्ठीहिं जीवाइओ तियभंगो, विगलिदिएसु छब्भंगा, मिच्छदिट्ठीहिं एग्गिदिदवज्जो तियभंगो, सम्मा-मिच्छविट्ठीहिं छब्भंगा, संजएहिं जीवाइओ तियभंगो, असंजएहिं एग्गिदियवज्जो तियभंगो, संजयासंजएहिं तियभंगो जीवाइओ, णोसंजयणोअसंजयणो-संजयासंजयजीवसिद्धेहिं तियभंगो, सकसाईहिं जीवाइओ तियभंगो, एग्गिदिएसु अभंगयं, कोहकसाईहिं जीवएग्गिदियवज्जो तियभंगो, देवेहिं छब्भंगा, माण-कसाई मायाकसाई जीवेग्गिदियवज्जो तियभंगो, णेरइयवेवेहिं छब्भंगा, लोभ-कसाईहिं जीवेग्गिदियवज्जो तियभंगो, णेरइएसु छब्भंगा, अकसाईजीवमणुएहिं सिद्धेहिं तियभंगो, ओहियणाणे आभिणिवोहियणाणे सुयणाणे जीवाइओ तियभंगो, विगलिदिएहिं छब्भंगा, ओहियणाणे मण० केवलणाणे जीवाइओ तियभंगो, ओहिए अणाणे मइअणाणे सुयअणाणे एग्गिदियवज्जो तियभंगो, विभंग-णाणे जीवाइओ तियभंगो, सजोगी जहा ओहिओ, मणजोगी वयजोगी काय-ओओ जीवाइओ तियभंगो णवरं कायजोगी एग्गिदिया तेसु अभंगयं, अजोगी जहा अलेस्सा, सागारोवउत्त-अणागारोवउत्तेहिं जीवएग्गिदियवज्जो तियभंगो, सवेयमा य जहा सकसाई, इत्थिवेयगपुरिसवेयगणुंसगवेयमेसु जीवाइओ तियभंगो, णवरं णुंसगवेदे एग्गिदिएसु अभंगयं, अवेयमा जहा अकसाई, सत-रीरी जहा ओहिओ, ओरालिवेउदिवयसरीराणं जीवएग्गिदियवज्जो तियभंगो, आहारगसरीरे जीवमणुएसु छब्भंगा, तेयगकम्मगाणं जहा ओहिया, असरीरेहिं जीवसिद्धेहिं तियभंगो, आहारपज्जतीए सरीरपज्जतीए इंदियपज्जतीए आगा-पाणपज्जतीए जीवएग्गिदियवज्जो तियभंगो, भासामणपज्जतीए जहा सण्णी, आहारअपज्जतीए जहा अगाहारमा, सरीरअपज्जतीए इंदियअपज्जतीए आना-पाणअपज्जतीए जीवेग्गिदियवज्जो तियभंगो, णेरइयदेवमणुएहिं छब्भंगा, पासा-मणअपज्जतीए जीवाइओ तियभंगो, णेरइयदेवमणुएहिं छब्भंगा। गाहा-सपएसा आहारगभवियसण्णिलेस्सा विट्ठी संजयकसाए। णाणे जोगुवओणे वेदे

य सरोरपज्जती ॥ १ ॥ २३८ ॥ जीवा णं भंते ! किं पच्चक्खलाणी अपच्चक्खलाणी पच्चक्खलाणापच्चक्खलाणी ? गोयमा ! जीवा पच्चक्खलाणीवि अपच्चक्खलाणीवि पच्चक्खलाणापच्चक्खलाणीवि । सव्वजीवाणं एवं पुच्छा, गोयमा ! णेरइया अपच्चक्खलाणी जाव चउरिदिया, सेसा दो पडिसेहेयव्वा, पंचेदियतिरिक्खजोणिया णो पच्चक्खलाणी अपच्चक्खलाणीवि पच्चक्खलाणापच्चक्खलाणीवि, मणुस्सा तिण्णिवि, सेसा जहा णेरइया । जीवा णं भंते ! किं पच्चक्खलाणं जाणंति अपच्चक्खलाणं जाणंति पच्चक्खलाणापच्चक्खलाणं जाणंति ? गोयमा ! जे पंचेदिया ते तिण्णिवि जाणंति अवसेसा पच्चक्खलाणं ण जाणंति ३ । जीवा णं भंते ! किं पच्चक्खलाणं कुव्वंति अपच्चक्खलाणं कुव्वंति पच्चक्खलाणापच्चक्खलाणं कुव्वंति ? जहा ओहिओ तथा कुव्वणा । जीवा णं भंते ! किं पच्चक्खलाणिव्वत्तियाउया अपच्चक्खलाणणि० पच्चक्खलाणापच्चक्खलाणणि० ? गोयमा ! जीवा य वेमाणिया य पच्चक्खलाणिव्वत्तियाउया तिण्णिवि अवसेसा अपच्चक्खलाणिव्वत्तियाउया । पच्चक्खलाणं १ जाणइ २ कुव्वइ ३ तिण्णेव आउणिव्वत्ती ४ । सएमुद्देसंमि य एमेए दंडया चउरो ॥ १ ॥ २३९ ॥ सेवं भंते ! सेवं भंते ! त्ति ।

छट्ठं सयं पंचमो उद्देशो

किमियं भंते ! तमुक्काएत्ति पव्वुच्चइ किं पुढवी तमुक्काएत्ति पव्वुच्चइ आऊ तमुक्काएत्ति पव्वुच्चइ ? गोयमा ! णो पुढवी तमुक्काएत्ति पव्वुच्चइ आऊ तमुक्काएत्ति पव्वुच्चइ । से केणट्ठेणं ? गोयमा ! पुढविकाए णं अत्थेगइए सुभे देसं पकासेइ अत्थेगइए देसं णो पकासेइ, से तेणट्ठेणं । तमुक्काए णं भंते ! काहिं समुट्ठिए काहिं संणिट्ठिए ? गोयमा ! जंबुद्दीवस्स २ बहिया तिरियमसंखेज्जे दीवसमुद्दे वीईवइत्ता अरुणवरस्स दीवस्स बाहिरिल्लाओ वेइयंताओ अरुणोदयं समुद्दं बायालीसं जोयणसहस्साणि ओगाहिता उवरिल्लाओ जलंताओ एगपएसियाए सेढीए एत्थ णं तमुक्काए समुट्ठिए, सत्तरसएवकवीसे जांयणसए उड्ढं उप्पइत्ता तओ पच्छा तिरियं पवित्थरमाणे २ सोहम्मीसाणसणं कुमारमाहिंदे चत्तारिवि कप्पे आवरित्ता णं उड्ढंपि य णं जाव बंभलोए कप्पे रिट्ठविमाणपत्थंडं संपत्ते एत्थ णं तमुक्काए णं संणिट्ठिए । तमुक्काए णं भंते ! किसिंठिए पणत्ते ? गोयमा ! अहे मल्लगमूलसंठिए उंप्पि कुक्कडग-

पंजरगसंठीए पणत्ते । तमुक्काए णं भंते ! केवइयं विक्खंभेण केवइयं परिवले-
 वेणं पणत्ते ? गोयमा ! दुविहे पणत्ते, तंजहा—संखेज्जवित्थडे य असंखेज्ज-
 वित्थडे य, तत्थ णं जे से संखेज्जवित्थडे से णं संखेज्जाइं जोयणसहस्साइं
 विक्खंभेणं असंखेज्जाइं जोयणसहस्साइं परिवलेवेणं प० तत्थ णं जे से असं-
 खेज्जवित्थडे से णं असंखेज्जाइं जोयणसहस्साइं विक्खंभेणं असंखेज्जाइं जोयण-
 सहस्साइं परिवलेवेणं प० । तमुक्काए णं भंते ! केमहाए प० ? गोयमा !
 अयं णं जंहुदीवे २ सव्वदीवसमुद्धानं सव्ववभंतराए जाव परिवलेवेणं पणत्ते ।
 देवे णं महिड्डिए जाव महानुभावे इणामेव २ त्तिकट्टु केवलकापं जंबुदीवं २
 तिहिं अछराराणिवाएहिं तिसत्तक्खुत्तो अणुपरियट्ठिता णं हव्वमामाच्छिज्जा से णं
 देवे ताए उक्किट्ठाए तुरियाए जाव देवगईए वीईवयमाणे २ जाव एमाहं वा
 दुयाहं वा तियाहं वा उक्कोसेणं छम्मासे वीईवएज्जा अत्थेगइयं तमुक्कायं वीई-
 वएज्जा अत्थेगइयं णो तमुक्कायं वीईवएज्जा, एमहाए णं गोयमा ! तमुक्काए
 पणत्ते । अत्थि णं भंते ! तमुक्काए गेहाइ वा गेहावणाइ वा ? णो इणट्ठे
 समट्ठे । अत्थि णं भंते ! तमुक्काए गामाइ वा जाव संणिवेसाइ वा ? णो
 इणट्ठे समट्ठे । अत्थि णं भंते ! तमुक्काए उराला बलाहया संसेयति संनु-
 च्छंति वासं वासंति ? हुंता ! अत्थि । तं भंते ! किं देवो पकरेइ असुरो
 पकरेइ णागो पकरेइ ? गोयमा ! देवोविं पकरेइ असुरोविं पकरेइ णागोविं
 पकरेइ । अत्थि णं भंते ! तमुक्काए बायरे थणियसहे बायरे विज्जुए ? हुंता !
 अत्थि । तं भंते ! किं देवो पकरेइ ३ ? तिण्णिवि पकरेति । अत्थि णं भंते !
 तमुक्काए बायरे पुढविकाए बायरे अगणिकाए ? णो इणट्ठे समट्ठे णणत्थ
 विग्गहगइसमावण्णएणं । अत्थि णं भंते ! तमुक्काए चंदिमसूरियगहगणवत्त-
 त्तारारूवा ? णो इणट्ठे समट्ठे, पलियस्सओ पुण अत्थि । अत्थि णं भंते !
 तमुक्काए चंदाभाइ वा सूराभाइ वा ? णो इणट्ठे समट्ठे, कादूसणिया पुण
 सा । तमुक्काए णं भंते ! केरिसए वण्णएणं पणत्ते ? गोयमा ! काले काला-
 वभासे गंभीरलोमहरिसज्जणे भीमे उत्तासणए परमकिण्हे वण्णेणं पणत्ते, देवेवि
 णं अत्थेगइए जे णं तप्पट्ठमयाए पासित्ता णं खुभाएज्जा अहे णं अनिसमा-
 गच्छेज्जा तओ पच्छा सीहं २ तुरियं २ खिप्पामेव वीईवएज्जा । तमुक्कायस्स
 णं भंते ! कइ णामधेज्जा पणत्ता ? गोयमा ! तेरस णामधेज्जा पणत्ता,

तंजहा--तमेइ वा तमुक्काएइ वा अंधकारेइ वा महंधकारेइ वा लोमंधकारेइ वा लोगतमिसेइ वा देवधकारेइ वा देवतमिसेइ वा देवरणेइ वा देववूहेइ वा देवकलिहेइ वा देवपडिक्खोभेइ वा अरुणोदएइ वा समुहे । तमुक्काए णं भंते ! किं पुढविपरिणामे आउपरिणामे जीवपरिणामे पोमगलपरिणामे ? गोयमा ! णो पुढविपरिणामे आउपरिणामेवि जीवपरिणामेवि पोमगलपरिणामेवि । तमुक्काए णं भंते ! सव्वे पाणा भूया जीवा सत्ता पुढविकाइयत्ताए जाव तसकाइयत्ताए उववण्णपुव्वा ? हंता गोयमा ! असइं अदुवा अणंतक्खुत्तो णो जेव णं बायरपुढविकाइयत्ताए बायरअगणिकाइयत्ताए वा ॥ २४० ॥ कइ णं भंते ! कण्हराईओ पण्णत्ताओ ? गोयमा अट्ट कण्हराईओ पण्णत्ताओ । कहि णं भंते ! एयाओ अट्ट कण्हराईओ पण्णत्ताओ ? गोयमा ! उंप्पि सणंकुमारमाहिंदाणं कप्पाणं हिंदिं बंभलोए कप्पे रिट्ठे विमाणे पत्थइं, एत्थ णं अवक्खाडगसमच्चउरंसंठाणसंठियाओ अट्ट कण्हराईओ पण्णत्ताओ, तंजहा-पुरत्थियेणं दो पच्चत्थियेणं दो दाहिणेणं दो उत्तरेणं दो, पुरत्थिमभंतरा कण्हराई दाहिणं बाहिरं कण्हराइं पुट्ठा दाहिणभंतरा कण्हराई पच्चत्थियमबाहिरं कण्हराइं पुट्ठा पच्चत्थिमभंतरा कण्हराई उत्तरबाहिरं कण्हराइं पुट्ठा उत्तरमभंतरा कण्हराई पुरत्थिमबाहिरं कण्हराइं पुट्ठा, दो पुरत्थिमपच्चत्थियमाओ बाहिराओ कण्हराईओ छलंसाओ दो उत्तरदाहिणबाहिराओ कण्हराईओ तंसाओ दो पुरत्थिमपच्चत्थियमाओ अंभंतराओ कण्हराईओ चउरंसाओ दो उत्तरदाहिणओ अंभंतराओ कण्हराईओ चउरंसाओ 'पुव्वावरा छलंसा तंसा पुण दाहिणुत्तरा वज्जा । अंभंतर चउरंसा सव्वावि य कण्हराईओ ॥ १ ॥' कण्हराईओ णं भंते ! केवइयं आयामेणं केवइयं विक्खंभेणं केवइयं परिकखेवेणं पण्णत्ताओ ? गोयमा ! असंखेज्जाइं जोयणसहस्साइं आयामेणं संखेज्जाइं जोयणसहस्साइं विक्खंभेणं असंखेज्जाइं जोयणसहस्साइं परिकखेवेणं पण्णत्ताओ । कण्हराईओ णं भंते ! केमहाल्लियाओ पण्णत्ताओ ? गोयमा ! अयण्णं जंबुद्दीवे २ जाव अद्धमासं वीईवएज्जा अत्थेगइयं कण्हराइं वीईवएज्जा अत्थेगइयं कण्हराइं णो वीईवएज्जा एमहाल्लियाओ णं गोयमा ! कण्हराईओ पण्णत्ताओ । अत्थि णं भंते ! कण्हराईसु गेहाइ वा गेहावणाइ वा ? णो इणट्ठे समट्ठे । अत्थि णं भंते ! कण्हराईसु गामाइ वा० ? णो इणट्ठे समट्ठे । अत्थि णं भंते ! कण्ह० उराला बलाहया संसेयति ३ ? हंता अत्थि । तं भंते ! किं देवो प० ३ ? गो० देवो

पकरेइ णो असुरो णो णागो प० । अत्थि णं भंते ! कण्हराईसु बायरे अगणिसद्वे०
जहा उराला तथा । अत्थि णं भंते ! कण्हराईसु बायरे आउकाए बायरे अगणि-
काए बायरे वणप्फइकाए ? णो इणट्ठे समट्ठे, णणत्थ विग्गहगइत्तमावण्णएणं ।
अत्थि णं कण्ह० चंदिमसूरिय ४ ? णो इण० । अत्थि णं कण्ह० चंदाभाइ
वा २ ? णो इणट्ठे समट्ठे । कण्हराईओ णं भंते ! केरिसियाओ वण्णेणं
पण्णत्ताओ ? गोयमा ! कालाओ जाव खिप्पामेव वीईवएज्जा । कण्हराईओ
णं भंते ! कइ णामधेज्जा पण्णत्ता ? गोयमा ! अट्ट णामधेज्जा पण्णत्ता,
तंजहा—कण्हराईइ वा मेहराईइ वा मघाइ वा माघवईइ वा वायफलिहाइ वा
वायपलिवलोभाइ वा देवफलिहाइ वा देवपलिवलोभाइ वा । कण्हराईओ णं
भंते ! किं पुह्विपरिणामाओ आउपरिणामाओ जीवपरिणामाओ पोमग्लपरि-
णामाओ ? गोयमा ! पुह्विपरिणामाओ णो अउपरिणामाओ जीवपरिणा-
माओवि पोमग्लपरिणामाओवि । कण्हराईसु णं भंते ! सव्वे पाणा भूया जीवा
सत्ता० उववण्णपुव्वा ? हंता गोयमा ! असइं अट्टुवा अणंतवखुत्तो णो चेव णं
बायरआउकाइयत्ताए बायरअगणिकाइयत्ताए वा बायरवणप्फइकाइयत्ताए वा
॥ २४१ ॥ एएसि णं अट्टुहं कण्हराईं अट्टुसु उवासंतरेसु अट्टु लोगतियविमाणो
पण्णत्ता, तंजहा—१ अच्ची २ अच्चिमाली ३ वइरोयणे ४ पभंकरे ५ चंदाभे
६ सूराभे ७ सुवकाभे ८ सुपइट्ठाभे ९ मज्जे रिट्ठाभे । कहि णं भंते ! अच्चि-
विमाणे प० ? गोयमा ! उत्तर-पुत्थिमेणं । कहि णं भंते ! अच्चिमाली विमाणे
पण्णत्ते ? गोयमा ! पुरत्थिमेणं, एवं परिवाडीए णेयव्वं जाव कहि णं भंते !
रिट्ठे विमाणे पण्णत्ते ? गोयमा ! बहुमज्जदेसभाए । एएसु णं अट्टुसु लोगतिय-
विमाणेसु अट्टुविहा लोगंतियदेवा परिवसंति, तंजहा—सारस्सयमाइच्चा वण्ही
वरुणा य गहतोया य । तुसिया अच्चाबाहा अग्गिच्चा चेव रिट्ठा य ॥१॥ कहि णं
भंते ! सारस्सया देवा परिवसंति ? गोयमा ! अच्चिम्मि विमाणे परिवसंति ।
कहि णं भंते ! आइच्चा देवा परिवसंति ? गोयमा ! अच्चिमालिम्मि विमाणे,
एवं णेयव्वं जहाणुपुच्चीए जाव कहि णं भंते ! रिट्ठा देवा परिवसंति ? गोयमा !
रिट्ठिम्मि विमाणे । सारस्सयमाइच्चाणं भंते ! देवाणं कइ देवा कइ देवसया
पण्णत्ता ? गोयमा ! सत्त देवा सत्त देवसया परिवारो पण्णत्तो, वण्हीवरुणाणं
देवाणं चउट्ठस देवा चउट्ठस देवसहस्सा परिवारो पण्णत्तो, गहतोय-तुसियाणं
देवाणं सत्त देवा सत्त देवसहस्सा परिवारो पण्णत्तो, अवसेसाणं णव देवा णव

वेवसया परिवारो पण्णत्तो—'पढमजुगलम्मि सत्तओ सयाणि बीयंमि चउइस-
सहस्सा । तइए सत्तसहस्सा णव चेव सयाणि सेसेसु ॥ १ ॥' लोगतियविभाणा
णं भंते ! किंपइट्टिया पण्णत्ता ? गोयमा ! वाउपइट्टिया प०, एवं णेयव्वं—
'विमाणानं पइट्टाणं बाहुत्तुच्चसमेव संठाणं ।' बंभलोयवत्तव्वया णेयव्वा जहा
जीवामिगमे वेवुहेसए जाव हुंता गोयमा ! असइ अदुवा अणंतबल्लुतो । णो चेव
णं देवित्ताए लोगतियविभाणेसु । लोगतियविमाणेसु णं भंते ! केवइयं कालं ठिई
पण्णत्ता ? गोयमा ! अट्ट सागरोवभाइं ठिई पण्णत्ता । लोगतियविमाणोहितो
णं भंते ! केवइयं अबाहाए लोगंते पण्णत्ते ? गोयमा ! असंखेज्जाइं ज्ञेयण-
सहस्साइं अबाहाए लोगंते पण्णत्ते । सेवं भंते ! सेवं भंते ! त्ति ॥ २४२ ॥

छट्ठं सयं छट्ठी उद्देसो

कइ णं भंते ! पुढवीओ पण्णत्ताओ ? गोयमा ! सत्त पुढवीओ पण्णत्ताओ,
तंजहा—रयणप्पभा जाव तमतमा । रयणप्पभाईणं आवासा भाणियव्वा जाव
अहेसत्तमाए, एवं जे जत्तिया आवासा ते भाणियव्वा जाव कइ णं भंते ! अणु-
त्तरविभाणा पण्णत्ता ? गोयमा ! पंच अणुत्तरविभाणा पण्णत्ता, तंजहा—विजए
जाव सव्वट्टसिद्धे ॥ २४३ ॥ जीवे णं भंते ! मारणंतियसमुग्घाएणं समोहए
समोहणित्ता जे भविए इमीसे रयणप्पभाए पुढवीए तीसाए गिरयावाससय-
सहस्सेसु अण्णयरंसि गिरयावासंसि णेरइयत्ताए उववज्जित्तए से णं भंते !
तत्थेगए चेव आहारेज्ज वा परिणामेज्ज वा सरीरं वा बंधेज्जा ? गोयमा !
अत्थेगइए तत्थेगए चेव आहारेज्ज वा परिणामेज्ज वा सरीरं वा बंधेज्जा
अत्थेगइए तओ पडिणियत्तइ, तओ पडिणियत्तित्ता इहमागच्छइ २ दोच्चंपि
मारणंतियसमुग्घाएणं समोहणइ २ इमीसे रयणप्पभाए पुढवीए तीसाए गिरया-
वाससयसहस्सेसु अण्णयरंसि गिरयावासंसि णेरइयत्ताए उववज्जित्तए तओ
पच्छा आहारेज्ज वा परिणामेज्ज वा सरीरं वा बंधेज्जा एवं जाव अहेसत्तमा
पुढवी । जीवे णं भंते ! मारणंतियसमुग्घाएणं समोहए २ जे भविए चउ-
सट्ठीए असुरकुमारावाससयसहस्सेसु अण्णयरंसि असुरकुमारावासंसि असुर-
कुमारत्ताए उववज्जित्तए जहा णेरइया तथा भाणियव्वा जाव थणियकुमारा ।
जीवे णं भंते ! मारणंतियसमुग्घाएणं समोहए २ जे भविए असंखेज्जेसु पुढवि-

काइयावाससयसहस्सेसु अण्णयरंसि पुढविकाइयावासंसि पुढविकाइयत्ताए उव-
वज्जित्तए से णं भंते ! मंदरस्स पव्वयस्स पुरत्थिमेणं केवइयं गच्छेज्जा केव-
इयं पाउणेज्जा ? गोयमा ! लोयंतं गच्छेज्जा लोयंतं पाउणिज्जा । से णं भंते !
तत्थगए चेव आहारेज्ज वा परिणामेज्ज वा सरीरं वा बंधेज्जा ? गोयमा ! अत्थे-
गइए तत्थगए चेव आहारेज्ज वा परिणामेज्ज वा सरीरं वा बंधेज्जा अत्थेगइए
तओ पडिणियत्तइ २ ता इह हव्वमागच्छइ २ ता दोच्चंपि मारणंतियसमुग्घा-
एणं समोहण्णइ २ ता मंदरस्स पव्वयस्स पुरत्थिमेणं अंगुलस्स असंखेज्जभागमेत्तं
वा संखेज्जइभागमेत्तं वा वालगं वा वालगएहुत्तं वा एवं लिक्खं जूयं जवं
अंगुलं जाव जोयणकोडिं वा जोयणकोडाकोडिं वा संखेज्जेसु वा असंखेज्जेसु वा
जोयणसहस्सेसु लोगते वा एगपएसियं सेढिं मोत्तूण असंखेज्जेसु पुढविकाइया-
वाससयसहस्सेसु अण्णयरंसि पुढविकाइयावासंसि पुढविकाइयत्ताए उववज्जेत्ता
तओ पच्छा आहारेज्ज वा परिणामेज्ज वा सरीरं वा बंधेज्जा, जहा पुरत्थिमेणं
मंदरस्स पव्वयस्स आलावओ भणिओ एवं दाहिणेणं पच्चत्थिमेणं उत्तरेण उड्ढे
अहे, जहा पुढविकाइया तहा एगिदियाणं सव्वेत्ति, एक्केक्कस्स छ आलावमा
भाणियस्वा । जीवे णं भंते ! मारणंतियसमुग्घाएणं समोहण्णइ २ ता जे भविए
असंखेज्जेसु बेइंदियावाससयसहस्सेसु अण्णयरंसि बेइंदियावासंसि बेइंदियत्ताए
उववज्जित्तए से णं भंते ! तत्थगए चेव ? जहा णेरइया, एवं जाव अणुत्तरोव-
वाइया । जीवे णं भंते ! मारणंतियसमुग्घाएणं समोहए २ जे भविए
पंचसु अणुत्तरेसु महइमहालएसु महाविमाणेसु अण्णयरंसि अणुत्तरविमाणंसि
अणुत्तरोववाइयदेवत्ताए उववज्जित्तए, से णं भंते ! तत्थगए चेव ? तं चेव जाव
आहारेज्ज वा परिणामेज्ज वा सरीरं वा बंधेज्जा । सेवं भंते ! २ त्ति ॥ २४४ ॥

छट्ठं सयं सत्तमो उद्देसो

अह भंते ! सालीणं वीहीणं गोधूमाणं जवाणं जवजवाणं एएसिं णं धण्णाणं
कोट्टाउत्ताणं पल्लाउत्ताणं मंचाउत्ताणं भालाउत्ताणं उल्लित्ताणं लित्ताणं पिहियाणं
मुहियाणं लंछियाणं केवइयं कालं जोणी संचिट्ठइ ? गोयमा ! जहण्णेणं अंतो-
मुहत्तं उक्कोसेणं तिण्णि संवच्छराइं तेण परं जोणी पमिलायइ तेण परं जोणी
पविद्धंसइ तेण परं बीए अबीए भवइ तेण परं जोणीवोच्छेए पण्णत्ते समणा-
उसो ! । अह भंते ! कलायमसूरतिलमुग्गभासणिक्कावकुलत्थआलिसंदगसईण-

पलिमंयगमाईणं एएसि णं घण्णाणं जहा सालीणं तहा एयाणिवि, णवरं पंच
 संवच्छराई, सेसं तं चेव । अह भंते ! अयसि कुलुंमगकोट्टकं णवरगरालगको-
 दूसगसणसरिसवमूलगबीयमाईणं एएसि णं घण्णाणं, एयाणिवि तहेव, णवरं
 सस संवच्छराई, सेसं तं चेव ॥ २४५ ॥ एगमेगस्स णं भंसे ! मुहुत्तस्स केवइया
 ऊसासद्धा वियाहिया ? गोयमा ! असंखेज्जाणं समयाणं समुदयसमिद्धसमागमेणं
 सा एगा आवलियत्ति एवुच्चइ, संखेज्जा आवलिया ऊसासो संखेज्जा आवलिया
 णिस्तासो-हट्टस्स अणवगत्तस्स, णिरुवकिट्टस्स जंतुणो । एगे ऊसासणीसासे,
 एस पाणुत्ति वुच्चइ ॥ १ ॥ सत्त पाणूणि से थोवे, सत्त थोवाइं से लवे । लवाणं
 ससहत्तरिए, एस मुहुत्ते वियाहिए ॥ २ ॥ तिण्णि सहस्सा सत्त य सयाइं तेव-
 त्तरि च ऊसासा । एस मुहुत्तो विट्ठो सब्बेहि अणंतणाणीहि ॥ ३ ॥ एएणं
 मुहुत्तपमाणेणं तीसमुहुत्तो अहोरत्तो, पण्णरस अहोरत्ता पक्खो, दो पक्खा मासे,
 दो मासा उऊ, तिण्णि उउए अयणे, दो अयणे संवच्छरे, पंचसंवच्छरिए जुगे,
 बीसं जुगाइं वाससयं, वस वाससयाइं वाससहस्सं, सयं वासहस्साणं वाससय-
 सहस्सं, चउरासीइं वाससयसहस्साणि से एगे पुब्बंगे, चउरासीइं पुब्बंगसय-
 सहस्साइं से एगे पुब्बे, एवं २ तुडिए २ अडडे २ अबवे २ हूहए २ उप्पले २ पउमे
 २ णलिणे २ अत्थणित्तरे २ अउए २ पउए य २ णउए य २ चूलिया २ सीस-
 पहेलिया २ एताव ताव गणिए एताव ताव गणियस्स विसए, तेण परं ? उव-
 मिए । से किं तं उं वमिए ? २ दुविहे पण्णत्ते तंजहा-पलिओवमे य सागरो-
 वमे य, से किं तं पलिओवमे ? से किं तं सागरोवमे ? । सत्थेण सुत्तिक्वेणवि
 छेतुं भेतुं च अं किर ण सक्का । तं परमाणुं सिद्धा वयंति आईं पमाणानं ॥ १ ॥
 अणंतारं परमाणुपोगलानं समुदयसमिद्धसमागमेणं सा एगा उस्सण्हसण्हियाइ
 वा सण्हसण्हियाइ वा उड्डरेणूइ वा तसरेणूइ वा रहरेणूइ वा वालगगेइ वा
 लिक्खाइ वा जूयाइ वा जवमज्जेइ वा अंगुलेइ वा, अट्ट उस्सण्हसण्हियाओ सा
 एगा सण्हसण्हिया, अट्ट सण्हसण्हियाओ सा एगा उड्डरेणू, अट्ट उड्डरेणूओ सा
 एगा तसरेणू, अट्ट तसरेणूओ सा एगा रहरेणू, अट्ट रहरेणूओ से एगे देवकुह-
 उत्तरकुहगणं मणूसाणं वालगगे, एवं हरिवासरम्मगहेमवयएरणवयाणं पुब्ब-
 विदेहाणं मणूसाणं अट्ट वालगगा सा एगा लिक्खा, अट्ट लिक्खाओ सा एगा जूया,
 अट्ट जूयाओ से एगे जवमज्जे, अट्ट जवमज्जाओ से एगे अंगुले, एएणं अंगुल-

पमाणेण छ अंगुलाणि पाओ, बारस अंगुलाइं विहत्थी, चउव्वीसं अंगुलाइं रयणी
 अडयालीसं अंगुलाइं कुच्छी, छण्णउइ अंगुलाणि से एगे बडेइ वा धणुइ वा
 जूएइ वा णालियाइ वा अक्खेइ वा मुसलेइ वा, एएणं धणुप्पमाणेण दो धणु-
 सहस्साइं गाउयं, चत्तारि गाउयाइं जोयणं, एएणं जोयणप्पमाणेणं जे पल्ले
 जोयणं आयाम-विक्खं भेणं जोयणं उइइ उच्चत्तेणं तं तिउणं सविसेसं परिरएणं
 से णं एगाहियवेयाहियतेयाहिय उवकोसं सत्तरत्तप्परुढाणं संमट्ठे संणिच्चिए
 भरिए वालगगकोडीणं ते णं वालगगे णो अग्गी दहेज्जा णो वाऊ हरेज्जा
 णो कुत्थेज्जा णो परिविद्धसेज्जा णो वूइत्ताए हव्वमागच्छेज्जा, तथो णं वास-
 सए २ एगमेगं वालगगं अवहाय जावइएणं कालेणं से पल्ले खीणे णोरए णिम्मले
 णिट्टिए णिल्लेवे अवहडे विसुद्धे भवइ, से पलिओवमे । गगहा—एएसि पल्लाणं
 कोडाकोडी हवेज्ज दसगुणिया । तं सागरोवमस्स उं एकक्खस्स भवे परिमाणं
 ॥ १ ॥ एएणं सागरोवमपमाणेणं चत्तारि सागरोवमकोडाकोडीओ कालो सुसम-
 सुसमा १ तिण्णिसागरोवमकोडाकोडीओ कालो सुसमा २ दो सागरोवमकोडा-
 कोडीओ कालो सुसमदुसमा ३ एगा सागरोवमकोडाकोडी बायालीसाए वास-
 सहस्सेहं ऊणिया कालो दुसमसुसमा ४ एकक्खीसं वाससहस्साइं कालो दुसमा ५
 एकक्खीसं वाससहस्साइं कालो दुसमदुसमा ६ । पुणरवि उस्सप्पिणीए एकक्-
 खीसं वाससहस्साइं कालो दुसमदुसमा १ एकक्खीसं वाससहस्साइं ञाव चत्तारि
 सागरोवमकोडाकोडीओ कालो सुसमसुसमा, दस सागरोवमकोडाकोडीओ कालो
 ओसप्पिणी दस सागरोवमकोडाकोडीओ कालो उस्सप्पिणी वीसं सागरोवम-
 कोडाकोडीओ कालो ओसप्पिणी उस्सप्पिणी य ॥ २४६ ॥ जंबुदीवे णं भंते !
 दीवे इमीसे ओसप्पिणीए सुसमसुसमाए समाए उत्तमट्टपत्ताए भरहस्स वासस्स
 केरिसए अयाारभावपडोयारे होत्था ? गोथमा ! बहुसमरमणिज्जे भूमिमागे
 होत्था, से जहाणामए—आत्तिगपुक्खरेइ वा एवं उत्तरकुच्चत्तव्वया णेयव्वा जाव
 आसयंति सर्वंति तीसे णं समाए भारहे वासे तत्थ २ देसे २ तंहि २ बह्वे
 उराला कुदाला जाव कुसविकुसविसुद्धरुक्खमूला जाव छव्विहा मणुस्सा अणु-
 सज्जित्था ९०, तं०—पम्हगंधा १ मियगंधा २ अममा ३ तेयली ४ सहा ५
 सणिचारो ६ । सेवं भंते ! सेवं भंते ! त्ति ॥ २४७ ॥

छट्ठं सयं अट्टमो उट्ठेसो

कड णं भंते ! पुढवीओ पणत्ताओ ? गोयमा ! अट्ट पुढवीओ पणत्ताओ, तंजहा-रयणप्पभा जाव ईसिप्पव्वारा । अत्थि णं भंते ! इमीसे रयणप्पभाए पुढवीए अहे गेहाइ वा गेहावणाइ वा? गोयमा ! णो इणट्ठे समट्ठे । अत्थि णं भंते ! इमीसे रयणप्पभाए अहे गामाइ वा जाव संणिवेसाइ वा ? णो इणट्ठे समट्ठे । अत्थि णं भंते ! इमीसे रयणप्पभाए पुढवीए अहे उराला बलाहया संसेयंति संमूच्छंति वासं वासंति ? हुंता ! अत्थि, तिण्णिवि पकरेंति देवोवि पकरेइ असुरोवि प० णागोवि प० । अत्थि णं भंते ! इमीसे रयण० बायरे थणियसट्ठे ? हुंता ! अत्थि, तिण्णिवि पकरेंति । अत्थि णं भंते ! इमीसे रयण० अहे बायरे अगणिकाए ? गोयमा ! णो इणट्ठे समट्ठे, णणत्थ विग्गह-गइसमावण्णएणं । अत्थि णं भंते ! इमीसे रयण० अहे चंदिम जाव ताराकवा ? णो इणट्ठे समट्ठे । अत्थि णं भंते ! इमीसे रयणप्पभाए पुढवीए चंदाभाइ वा २ ? णो इणट्ठे समट्ठे, एवं दोच्चाएवि पुढवीए भाणियव्वं, एवं तच्चा-एवि भाणियव्वं, णवरं देवोवि पकरेइ असुरोवि पकरेइ णो णागो पकरेइ, एवं चउत्थाएवि एवं णवरं देवो एक्को पकरेइ णो असुरो० णो णागो पकरेइ, एवं हेट्ठिलासु सव्वासु देवो एक्को पकरेइ । अत्थि णं भंते ! सोहम्मोसाणाणं कप्पाणं अहे गेहाइ वा २ ? णो इणट्ठे समट्ठे । अत्थि णं भंते ! उराला बलाहया ? हुंता-! अत्थि, देवो पकरेइ असुरोवि पकरेइ णो णाओ पकरेइ, एवं थणियसट्ठे वि ; अत्थि णं भंते ! बायरे पुढविकाए बायरे अगणिकाए ? णो इणट्ठे समट्ठे, णणत्थ विग्गहगइसमावण्णएणं । अत्थि णं भंते ! चंदिम० ? णो इणट्ठे समट्ठे । अत्थि णं भंते ! गामाइ वा० ? णो इणट्ठे स० । अत्थि णं भंते ! चंदाभाइ वा २ ? गोयमा ! णो इणट्ठे समट्ठे । एवं सणकुमार-माहिदेसु णवरं देवो एगो पकरेइ । एवं बंभजोएवि । एवं बंभलोगस्स उव्वरि सव्वंहि देवो पकरेइ, पुच्छियव्वो य, बायरे आउकाए बायरे अगणिकाए बायरे वणस्सइकाए अण्णं तं वेव । गाहा-तमुकाए कप्पपणए अगणी पुढवी य अगणि पुढवीसु । आऊनेउवणस्सइ कप्पुवरिमकण्हाराईसु ॥ १ ॥ २४८ ॥ कइविहे णं भंते ! आउयबंधए पणत्ते ? गोयमा ! छव्विहा आउयबंधा पणत्ता, तंजहा-जाइणामणिहत्ताउए १ गइणामणिहत्ताउए २ ठिइणामणिहत्ताउए ३ ओगा-

ह्णानामणिहत्ताउए ४ पएसणामणिहत्ताउए ५ अणुभागणामणिहत्ताउए ६ दंडओ जाव वेमाणियाणं । जीवा णं भंते ! किं जाइणामणिहत्ता जाव अणुभागणामणिहत्ता ? गोयमा ! जाइणामणिहत्तावि जाव अणुभागणामणिहत्तावि दंडओ जाव वेमाणियाणं । जीवा णं भंते ! किं जाइणामणिहत्ताउया जाव अणुभागणामणिहत्ताउया ? गोयमा ! जाइणामणिहत्ताउयावि जाव अणुभागणामणिहत्ताउयावि, दंडओ जाव वेमाणियाणं । एवं एए दुवालस दंडगा भाणियव्वा । जीवा णं भंते ! किं जाइणामणिहत्ता १ जाइणामणिहत्ताउया २ ? जीवा णं भंते ! किं जाइणामणिउत्ता ३ जाइणामणिउत्ताउया ४ जाइगोयणिहत्ता ५ जाइगोयणिहत्ताउया ६ जाइगोयणिउत्ता ७ जाइगोयणिउत्ताउया ८ जाइणामगोयणिहत्ता ९ जाइणामगोयणिहत्ताउया १० जाइणामगोयणिउत्ता ११ ? जीवा णं भंते ! किं जाइणामगोयणिउत्ताउया १२ जाव अणुभागणामगोयणिउत्ताउया ? गोयमा ! जाइणामगोयणिउत्ताउयावि जाव अणुभागणामगोयणिउत्ताउयावि दंडओ जाव वेमाणियाणं ॥ २४६ ॥ लवणे णं भंते ! समुद्दे किं उस्सिओदए पत्थडोदए खुभियजले अखुभियजले ? गोयमा ! लवणे णं समुद्दे ऊस्सिओदए णो पत्थडोदए खुभियजले' णो अखुभियजले एत्तो आढत्तं जहा जीवाभिगमे जाव से तेण० गोयमा ! बाहिरया णं दीवसमुद्दा पुण्णा पुण्णप्पमाणा वोसट्टमाणा वोसट्टमाणा समभरधडत्ताए चिट्ठंति संठाणओ एगविहिंविहाणा चित्थारओ अणेगविहिंविहाणा दुग्गुणा दुग्गुणप्पमाणाओ जाव अस्सि तिरियलोए असंखेज्जा दीवसमुद्दा सयंभूरमणपज्जवसाणा पणत्ता समणाउसो ! । दीवसमुद्दा णं भंते ! केवइया णामधेज्जेहिं पणत्ता ? गोयमा ! जावइया लोए सुभा णामा सुभा रूवा सुभा गंधा सुभा रसा सुभा फासा एवइया णं दीवसमुद्दा णामधेज्जेहिं पणत्ता, एवं णेयव्वा सुभा णामा उट्टारो परिणामो सव्वजीवाणं । सेवं भंते ! सेवं भंते ! त्ति ॥ २५० ॥

छट्ठं सयं णवमो उट्टेसो

जीवे णं भंते ! णाणावरणिज्जं कम्मं बंधमाणे कइ कम्मप्पयडोओ बंधंइ ? गोयमा ! सत्तविहबंधए वा अट्टविहबंधए वा छत्विहबंधए वा, बंधुट्टेसो पण्णवणाए णेयव्वो ॥ २५१ ॥ देवे णं भंते ! महिड्डिए जाव महाणुभागो बाहिरए योग्गले अपरियाइत्ता पभू एगवणं एगरूवं विउच्चित्तए ? गोयमा ! णो

इणट्ठे० । देवे णं भंते ! बाहिरए पोग्गले परियाइत्ता पभू ? हंता ! पभू ।
 से णं भंते ! किं इहगए पोग्गले परियाइत्ता विउब्बइ तत्थगए पोग्गले परिया-
 इत्ता विउब्बइ अण्णत्थगए पोग्गले परियाइत्ता विउब्बइ ? गोयमा ! णो इह-
 गए पोग्गले परियाइत्ता विउब्बइ, तत्थगए पोग्गले परियाइत्ता विउब्बइ, णो
 अण्णत्थगए पोग्गले परियाइत्ता विउब्बइ, एवं एएणं गमेणं जाव एगववणं एग-
 रूवं १ एगववणं अणेगरूवं २ अणेगववणं एगरूवं ३ अणेगववणं अणेगरूवं ४
 चउभंगो । देवे णं भंते ! महिड्डिए जाव महानुभागे बाहिरए पोग्गले अपरिया-
 इत्ता पभू कालयं पोग्गलं नीलगपोग्गलत्ताए परिणामेत्तए नीलगं पोग्गलं वा
 कालगपोग्गलत्ताए परिणामेत्तए ? गोयमा ! णो इणट्ठे समट्ठे, परियाइत्ता
 पभू । से णं भंते ! किं इहगए पोग्गले० तं चेव णवरं परिणामेइत्ति भाणियव्वं,
 एवं कालगपोग्गलं लोहियपोग्गलत्ताए, एवं कालएणं जाव सुक्किलं, एवं नील-
 एणं जाव सुक्किलं, एवं लोहियपोग्गलं जाव सुक्किलत्ताए, एवं हालिइएणं
 जाव सुक्किलं, तं—एवं एयाए परिवाडीए गंधरसफास० कवखडफासपोग्गलं
 मउयफासपोग्गलत्ताए २ एवं दो दो गरुयलहुय २ सीयउसिण २ णिद्धलुवख २,
 वण्णई सव्वत्थ परिणामेइ, आलावया दो दो पोग्गले अपरियाइत्ता परिया-
 इत्ता ॥२५२॥ अविमुद्धलेसे णं भंते ! देवे असमोहएणं अप्पाणेणं अविमुद्ध-
 लेसं देवं देवं अण्णयरं जाणइ पासइ ? णो इणट्ठे०, एवं अविमुद्धलेसे देवे
 असमोहएणं अप्पाणेणं विमुद्धलेसं देवं ३, २ । अविमुद्धलेसे समोहएणं अप्पा-
 णेणं अविमुद्धलेसं देवं ३, ३ । अविमुद्धलेसे देवे समोहएणं अप्पाणेणं विमुद्धलेसं
 देवं ३, ४ । अविमुद्धलेसे समोहयासमोहएणं अप्पाणेणं अविमुद्धलेसं देवं ३,
 ५ । अविमुद्धलेसे समोहया० विमुद्धलेसं देवं ३, ६ ॥ विमुद्धलेसे असमो०
 अविमुद्धलेसं देवं ३ १ । विमुद्धलेसे असमोहएणं विमुद्धलेसं देवं ३, २ । विमुद्ध-
 लेसे णं भंते ! देवे समोहएणं अविमुद्धलेसं देवं ३ जाणइ० ?, हंता ! जाणइ० ।
 एवं विमुद्ध० समो० विमुद्धलेसं देवं ३ जाणइ ? हंता ! जाणइ ४ । विमुद्ध-
 लेसे समोहयासमोहएणं अविमुद्धलेसं देवं ३, ५ । विमुद्धलेसे समोहयासमोहएणं
 अविमुद्धलेसं देवं ३, ६ । एवं हेट्टिलएहि अट्टहि ण जाणइ ण पासइ उवरिल्ल-
 एहि चउर्जहि जाणइ पासइ । सेवं भंते ! सेवं भंते ! त्ति ॥ २५३ ॥

छट्ठं सयं दसमो उट्टेसो.

अण्णउत्थिया णं भंते ! एवमाइक्खंति जाव परूवेति जावइया रायगिहे णयरे जीवा एवइयाणं जीवाणं णो चक्किया केइ सुहं वा दुहं वा जाव कोलट्टिगमाय-
मवि णिप्फावमायमवि कलमायमवि मासमायमवि म्भुगमायमवि जूयामाय-
मवि लिक्खामायमवि अभिणिवट्टेत्ता उवदंसित्तए । से कहमेयं भंते ! एवं ?
गोयमा ! जण्णं ते अण्णउत्थिया एवमाइक्खंति जाव मिच्छंते एवमाहंसु, अहं पुण
गोयमा । एवमाइक्खामि जाव परूवेमि सव्वलोएवि य णं सव्वजीवाणं णो
चक्किया केइ सुहं वा तं चेव जाव, उवदंसित्तए । से केणट्ठेणं ? गोयमा !
अयण्णं जंबुट्ठीवे २ जाव विसेसाहिए परिवक्खेवेणं पण्णत्ते, देवे णं महिड्डिए जाव
महाणुभागे एगं महं सविलेवणं गंधसमुग्गं गहाय तं अवहालेइ तं अवहालेत्ता
जाव इणामेव कट्टु केवलकणं जंबुट्ठीवं २ तीहि अछ्छराणिवाएहि तिसत्तत्ततो
अणुपरियट्टित्ता णं हव्वमागच्छेज्जा, से ण्णं गोयमा ! से केवलकण्णे जंबुट्ठीवे
२ तेहि घाणपोगालेहि फुडे ?, हुता ! फुडे, चक्किया णं गोयमा ! केइ तेसि
घाणपोगालाणं कोलट्टियामायमवि जाव उवदंसित्तए ? णो इणट्ठे समट्ठे । से
तेणट्ठेणं जाव उवदसेत्तए ॥२५४॥ जीवे णं भंते ! जीवे २ जीवे ? गोयमा !
जीवे ताव णियमा जीवे जीवेवि णियमा जीवे । जीवे णं भंते ! णेरइए
णेरइए जीवे ? गोयमा ! णेरइए ताव णियमा जीवे जीवे पुण सिय णेरइए
सिय अणेरइए । जीवे णं भंते ! असुरकुमारे असुरकुमारे जीवे ? गोयमा !
असुरकुमारे ताव णियमा जीवे जीवे पुण सिय असुरकुमारे सिय णो असुरकुमारे ।
एवं दंडओ भ्राणियव्वो जाव वेमाणियाणं । जीवइ भंते ! जीवे जीवे जीवइ ?
गोयमा ! जीवइ ताव णियमा जीवे जीवे पुण सिय जीवइ सिय णो जीवइ ।
जीवइ भंते ! णेरइए २ जीवइ ? गोयमा ! णेरइए ताव णियमा जीवइ २ पुण
सिय णेरइए सिय अणेरइए, एवं दंडओ णेयव्वो जाव वेमाणियाणं । भवसिट्ठिए
णं भंते ! णेरइए २ भवसिट्ठिए ? गोयमा ! भवसिट्ठिए सिय णेरइए सिय अणे-
रइए णेरइएऽविय सिय भवसिट्ठिए सिय भवसिट्ठिए, एवं दंडओ जाव वेमा-
णियाणं ॥२५५॥ अण्णउत्थिया णं भंते ! एवमाइक्खंति जाव परूवेति एवं खलु
सव्वे पाणा भूया जीवा सत्ता एगंतदुक्खं वेयणं वेयंति । से कहमेयं भंते ! एवं ?

गोयमा ! जण्णं ते अण्णउत्थिया जाव मिच्छं ते एवमाहंसु, अहं पुण गोयमा !
 एवमाइक्खामि जाव परूवेमि अत्थेगइया पाणा भूया जीवा सत्ता एगंतदुक्खं
 वेयणं वेयंति आहच्च सायं, अत्थेगइया पाणा भूया जीवा सत्ता एगंतसायं
 वेयणं वेयंति आहच्च असायं, अत्थेगइया पाणा भूया जीवा सत्ता वेमायाए
 वेयणं वेयंति आहच्च सायमसायं । से केणट्ठेणं ? गोयमा ! णेरइया एगंत-
 दुक्खं वेयणं वेयंति आहच्च सायं, भवणवइवाणमंतरजोइसवेमाणिया एगंतसायं
 वेयणं वेयंति आहच्च असायं, पुढविवकाइया जाव मणुस्सा वेमायाए वेयणं
 वेयंति आहच्च सायमसायं, से तेणट्ठेणं० ॥ २५६ ॥ णेरइया णं भंते ! जे
 पोग्गले अत्तमायाए आहारेंति ते किं आयसरीरखेतोगाढे पोग्गले अत्तमायाए
 आहारेंति अणंतरखेतोगाढे पोग्गले अत्तमायाए आहारेंति परंपरखेतोगाढे
 पोग्गले अत्तमायाए आहारेंति ? गोयमा ! आग्रसरीरखेतोगाढे पोग्गले अत्त-
 मायाए आहारेंति णो अणंतरखेतोगाढे पोग्गले अत्तमायाए आहारेंति णो परं-
 परखेतोगाढे, जहा णेरइया तहा जाव वेमाणियाणं दंडओ ॥ २५७ ॥ केवली
 णं भंते ! आयाणेहिं जाणइ पासइ ? गोयमा ! णो इणट्ठे० । से केणट्ठेणं ?
 गोयमा ! केवली णं पुरत्थियेणं मियंपि जाणइ अभियंपि जाणइ जाव णिव्वुडे
 दंसणे केवलिससे से तेणट्ठेणं० । गाहा-जीवाण य सुहं दुक्खं जीवे जीवइ तहेव
 भविद्या य । एगंतदुक्खं वेयण अत्तमाया य केवली ॥ १ ॥ सेवं भंते ! सेवं भंते !
 ति ॥ २५८ ॥

॥ छट्ठं सयं समत्तं ॥

॥ सत्तमं सयं पढमो उद्देसो ॥

गाहा—आहार १ विरइ २ थावर ३ जीवा ४ पक्खी य ५ आउ ६
 अणगारे ७ । छउमत्थ ८ असंबुड ९ अण्णउत्थि १० दस सत्तमंमि सए ॥ १ ॥
 तेषं कालेणं तेषं समएणं जाव एवं ब्रयासी-जीवे णं भंते ! कं समयमणाहारए
 भवइ ? गोयमा ! पढमे समए सिय आहारए सिय अणाहारए बिइए समए
 सिय आहारए सिय अणाहारए तइए समए सिय आहारए सिय अणाहारए
 चउत्थे समए णियमा आहारए, एवं दंडओ, जीवा य एगंदिया य चउत्थे
 समए सेसा तइए समए । जीवे णं भंते ! कं समयं सब्बपाहारए भवइ ?

गोयमा ! पद्धमसमयोववणए वा चरमसमए भवत्ये वा, एत्थ णं जीवे णं
 सख्वप्पाहारए भवइ, इंडओ भाणियव्वो जाव वेमाणियाणं ॥ २५६ ॥ किं
 संठिए णं भंते ! लोए पणत्ते ? गोयमा ! सुपइट्टगसंठिएलोए पणत्ते, हेट्टा
 विच्छिण्णे जाव उप्पि उड्डमुइंगागारसंठिए, तंति च णं सासयंसि लोगंसि हेट्टा
 विच्छिण्णंसि जाव उप्पि उड्डमुइंगागारसंठियंसि उप्पण्णणाणदंसणधरे अरहा
 जिणे केवली जीवेवि जाणइ पासइ अजीवेवि जाणइ पासइ तओ पच्छा सिज्झइ
 जाव अंतं करेइ ॥ २६० ॥ समणोवासयस्स णं भंते ! सामाइयकडस्स समणो-
 वासए अच्छमाणस्स तस्स णं भंते ! किं इरियावहिया किरिया कज्जइ संप-
 राइया किरिया कज्जइ ? गोयमा ! णो इरियावहिया किरिया कज्जइ, संप-
 राइया किरिया कज्जइ । से केणट्ठेणं जाव संपराइया ? गोयमा ! समणोवास-
 यस्स णं सामाइयकडस्स समणोवासए अच्छमाणस्स अया अहिगरणी भवइ आया-
 हिगरणवत्तियं च णं तस्स णो इरियावहिया किरिया कज्जइ संपराइया किरिया
 कज्जइ, से तेणट्ठेणं जाव संपराइया ॥ २६१ ॥ समणोवासयस्स णं भंते !
 पुव्वामेव तसपाणसमारंभे पच्चक्खाए भवइ पुट्ठविसमारंभे अपच्चक्खाए भवइ
 से य पुट्ठवि खणमाणेअणयरं तसं पाणं विहिंसेज्जा से णं भंते ! तं वयं अइ-
 चरइ ? णो इणट्ठे समट्ठे, णो खलु से तस्स अइवायाए आउट्टइ । समणोवास-
 यस्स णं भंते ! पुव्वामेव वणस्सइसमारंभे पच्चक्खाए से य पुट्ठवि खणमाणे
 अणयरस्स हक्खस्स मूलं छिदेज्जा से णं भंते ! तं वयं अइचरइ ? णो इणट्ठे
 समट्ठे, णो खलु तस्स अइवायाए आउट्टइ ॥ २६२ ॥ समणोवासए णं भंते !
 त्हारूवं समणं वा माहणं वा फासुएसणिज्जेणं असणपाणखाइमसाइमेणं पडिलाभे-
 माणे किं लडभइ ? गोयमा ! समणोवासए णं त्हारूवं समणं वा जाव पडि-
 लाभेमाणे त्हारूवस्स समणस्स वा माहणस्स वा समाहि उप्पाएइ, समाहिकार-
 एणं तमेव समाहि पडिलभइ । समणोवासए णं भंते ! त्हारूवं समणं वा जाव
 पडिलाभेमाणे किं चयइ ? गोयमा ! जीवियं चयइ दुच्चयं चयइ दुक्करं करेइ
 दुल्लहं लहइ बोहि बुज्झइ तओ पच्छा सिज्झइ जाव अंतं करेइ ॥ २६३ ॥ अत्थि
 णं भंते ! अकम्मस्स गई पण्णायइ ? हुंता ! अत्थि । कहणं भंते ! अकम्मस्स गई
 पण्णायइ ? गोयमा ! निस्संगयाए गिरंगणयाए गइपरिणामेणं बंधणछेयणयाए
 गिरंधणयाए पुट्ठवप्पओगेणं अकम्मस्स गई प० । कहणं भंते ! निस्संगयाए
 गिरंगणयाए गइपरिणामेणं बंधणछेयणयाए गिरंधणयाए पुट्ठवप्पओगेणं अक-

म्मस्स गई पण्णायइ ? से जहाणामए—केइ पुरिसे सुक्कं तुवं णिच्छिहं णिरु-
वहयं आणुपुव्वीए परिकम्ममाणे २ दब्भेहि य कुसेहि य वेढेइ २ अट्ठीहि
मट्ठियालेवेहिं लिपइ २ उण्हे दलयइ भूइ २ सुक्कं समाणं अथाहमतारमपोर-
सियसि उदगंसि पक्खिषेज्जा, से नूणं गोयमा ! से तुंबे तेसिं अट्ठुहं मट्ठिया-
लेवाणं गुरुयत्ताए भारियत्ताए गुरुसंभारियत्ताए सलिलतलमइवइत्ता अहे धरणि-
तलपइट्ठुणे भवइ ? हंता ! भवइ, अहे णं से तुंबे तेसिं अट्ठुहं मट्ठियालेवाणं
परिक्खएणं धरणितलमइवइत्ता उण्णि सलिलतलपइट्ठुणे भवइ ? हंता ! भवइ,
एवं खलु गोयमा ! णिस्संगयाए णिरंगणयाए गइपरिणामेणं अकम्मस्स गई
पण्णायइ । कहण्णं भंते ! बंधणछेयणयाए अकम्मस्स गई प० ? गोयमा ! से
जहाणामए—कर्त्तिसंबलियाइ वा भुगसिंबलियाइ वा माससिंबलियाइ वा सिंब-
लिसिंबलियाइ वा एरंडसिंबलियाइ वा उण्हे दिण्णा सुक्का समाणी फुडित्ता णं
एगंतमंतं गच्छइ, एवं खलु गोयमा ! ० । कहण्णं भंते ! णिरंधणयाए अक-
म्मस्स गई प० ? गोयमा ? से जहाणामए—धूमस्स इंधणविष्पमुक्कस्स उड्ढं
वीससाए णिष्वाघाएणं गई पवत्तइ, एवं खलु गोयमा ! ० । कहण्णं भंते !
पुव्वपओगेणं अकम्मस्स गई प० ? गोयमा ! से जहाणामए कंडस्स कोदंड-
विष्पमुक्कस्स लक्खाभिमुही णिष्वाघाएणं गई पवत्तइ, एवं खलु गोयमा !
पुव्वपओगेणं अकम्मस्स गई प०, एवं खलु गोयमा ! णोसंगयाए णिरंगणयाए
जाव पुव्वपओगेणं अकम्मस्स गई प० ॥ २६४ ॥ दुक्खी भंते ! दुक्खेणं फुडे,
अदुक्खी दुक्खेणं फुडे ? गोयमा ! दुक्खी दुक्खेणं फुडे णो अदुक्खी दुक्खेणं
फुडे । दुक्खी णं भंते ! णेरइए दुक्खेणं फुडे अदुक्खी णेरइए दुक्खेणं फुडे ?
गोयमा ! दुक्खी णेरइए दुक्खेणं फुडे णो अदुक्खी णेरइए दुक्खेणं फुडे, एवं
दंडओ जाव वेमाणियाणं । एवं पंच दंडगा णेयव्वा—दुक्खी दुक्खेणं फुडे १ दुक्खी
दुक्खं परियायइ २ दुक्खी दुक्खं उदीरेइ ३ दुक्खी दुक्खं वेएइ ४ दुक्खी दुक्खं
णिज्जरेइ ५ ॥ २६५ ॥ अणगारस्स णं भंते ! अणाउत्तं गच्छमाणस्स वा चिट्ठ-
माणस्स वा णिसीयमाणस्स वा तुयट्ठमाणस्स वा अणाउत्तं वत्थं पडिगहं कंबलं
पायपुंछणं गेण्हमाणस्स वा णिक्खिणमाणस्स वा तस्स णं भंते ? कि इरिया-
वहिया किरिया कज्जइ ? संपराइया किरिया कज्जइ ? गो० ! णो इरियावहिया
किरिया कज्जइ संपराइया किरिया कज्जइ । से केणट्ठेणं ? गोयमा ! जस्स

णं कोहमाणमायालोभा बोच्छिण्णा भवन्ति तस्स णं इरियावहिया किरिया
 कज्जइ णो संपराइया किरिया कज्जइ, जस्स णं कोहमाणमायालोभा अवो-
 च्छिण्णा भवन्ति तस्स णं संपराइया किरिया कज्जइ णो इरियावहिया०, अहा-
 सुत्तं रीयमाणस्स इरियावहिया किरिया कज्जइ उस्सुत्तं रीयमाणस्स संपराइया
 किरिया कज्जइ, से णं उस्सुत्तमेव रियइ, से तेणट्ठेण० ॥ २६६ ॥ अह भंते !
 सइंगालस्स सधूमस्स संजोयणादोसदुट्ठस्स पाणभोयणस्स के अट्ठे पणत्ते ?
 गोयमा ! जे णं णिग्गंथे वा णिग्गंथी वा फासुएसणिज्जं असणपाण ४ पडि-
 ग्गाहिता मुच्छिण्णं गिद्धे गदिण्णं अज्जोववण्णे आहारं आहारेइ एस णं गोयमा !
 सइंगाले पाणभोयणे, जे णं णिग्गंथे वा णिग्गंथी वा फासुएसणिज्जं असणपाण ४
 पडिग्गाहिता महया २ अप्पत्तियकोहकिलामं करेमाणे आहारमाहारेइ एस णं
 गोयमा ! सधूमे पाणभोयणे, जे णं णिग्गंथे वा २ जाव पडिग्गाहेत्ता गुणुपायण-
 हेळं अण्णदव्वेण सद्धिं संजोएत्ता आहारमाहारेइ, एस णं गोयमा ! संजोयणा-
 दोसदुट्ठे पाणभोयणे, एस णं गोयमा ! सइंगालस्स सधूमस्स संजोयणादोस-
 दुट्ठस्स पाणभोयणस्स अट्ठे पणत्ते ! अह भंते ! वीतिगालस्स वीयधूमस्स
 संजोयणादोसविप्पमुक्कस्स पाणभोयणस्स के अट्ठे पणत्ते ? गोयमा ! जे णं
 णिग्गंथे वा जाव पडिग्गाहेत्ता अमुच्छिण्णं जाव आहारेइ एस णं गोयमा ! वीति-
 गाले पाणभोयणे, जे णं णिग्गंथे वा णिग्गंथी वा जाव पडिग्गाहेत्ता णो महया
 अप्पत्तियं जाव आहारेइ, एस णं गोयमा ! वीयधूमे पाणभोयणे, जे णं णिग्गंथे
 वा णिग्गंथी वा जाव पडिग्गाहेत्ता जहालद्धं तथा आहारमाहारेइ एस णं
 गोयमा ! संजोयणादोसविप्पमुक्के पाणभोयणे, एस णं गोयमा ! वीतिगालस्स
 वीयधूमस्स संजोयणादोसविप्पमुक्कस्स पाणभोयणस्स अट्ठे पणत्ते ॥ २६७ ॥
 अह भंते ! खेत्ताइक्कंतस्स कालाइक्कंतस्स भग्गाइक्कंतस्स पमाणाइक्कंतस्स
 पाणभोयणस्स के अट्ठे पणत्ते ? गो० ! जे णं णिग्गंथे वा णिग्गंथी वा फासु-
 एसणिज्जं असणं ४ अणुग्गए मूरिण्णं पडिग्गाहिता उग्गए मूरिण्णं आहारमाहा-
 रेइ एस णं गोयमा ! खेत्ताइक्कंते पाणभोयणे, जे णं णिग्गंथो वा २ जाव
 साइमं पडमाए पोरिसीए पडिग्गाहेत्ता पच्छिमं पोरिसि उवायणावेत्ता आहारं
 आहारेइ एस णं गोयमा ! कालाइक्कंते पाणभोयणे, जे णं णिग्गंथो वा २
 जाव साइमं पडिग्गाहिता परं अद्धजोयणमेराए वीइक्कमावइत्ता आहारमाहा-

रेइ एस णं गोयमा ! मग्गाइक्कते पाणभोयणे, जे णं णिग्गंथो वा णिग्गंथी वा फासुएसण्ज्जं जाव साइमं पडिग्गाहिता परं बत्तीसाए कुक्कुडिअंडगपमाण-
 मेत्ताणं कवलाणं आहारमाहारेइ एस णं गोयमा ! पमाणाइक्कते पाणभोयणे,
 अट्टकुक्कुडिअंडगपमाणमेत्ते कवले आहारमाहारेमाणे अप्पाहारे दुवालसकुक्कुडि-
 अंडगपमाणमेत्ते कवले आहारमाहारेमाणे अवड्ढोभोयरिया सोलस कुक्कुडि-
 अंडगपमाणमेत्ते कवले आहारमाहारेमाणे दुभागप्पत्ते चउव्वीसं कुक्कुडिअंडग-
 पमाणमेत्ते कवले आहारमाहारेमाणे ओमोयरिए बत्तीसं कुक्कुडिअंडगपमाण-
 मेत्ते कवले आहारमाहारेमाणे पमाणपत्ते, एत्तो एककेणवि घासेणं ऊणमं आहार-
 माहारेमाणे समणे णिग्गंथे णो पकामरसभोईति बत्तव्वं सिया, एस णं गोयमा !
 खेत्ताइक्कंतस्स कालाइक्कंतस्स मग्गाइक्कंतस्स पमाणाइक्कंतस्स पाणभोयणस्स
 अट्ठे पण्णत्ते ॥ २७८ ॥ अह भंते ! सत्थाईयस्स सत्थपरिणामियस्स एसियस्स
 वेसियस्स सामुवाणियस्स पाणभोयणस्स के अट्ठे पण्णत्ते ? गोयमा ! जे णं
 णिग्गंथे वा णिग्गंथी वा णिक्खित्तसत्थमुसले ववगयमालावण्णगविलेवणे वव-
 गयच्युचइयचत्तवेहं जीवविप्पज्जं अकयमकारियमसंकप्पियमणाहयमकीयकड-
 मणुद्धिट्ठं णवकोडीपरिसुद्धं बसवोसविप्पमुक्कं उग्गम्पायणेसणासुपरिसुद्धं
 बीतिगालं बीयधूमं संजोयणादोसविप्पमुक्कं असुरसुरं अचवचवं अदुयमबिलं-
 बियं अपरिसाडि अक्खोबंजणवणाणलेवणभूयं संजमज्जायामायावत्तियं संजम-
 भारवहणट्ठयाए बिल्लिमिव पण्णगभूएणं अप्पाणेणं आहारमाहारेइ एस णं
 गोयमा ! सत्थाईयस्स सत्थपरिणामियस्स जाव पाणभोयणस्स अथमट्ठे पण्णत्ते ।
 सेवं भंते ! सेवं भंते ! ति ॥ २६६ ॥

सत्तमं सयं बीओ उद्देसो

से णूणं भंते ! सव्वपाणेहिं सव्वभूएहिं सव्वजीवेहिं सव्वसत्तेहिं पच्चक्खाय-
 मिति वयमाणस्स सुपच्चक्खायं भवइ दुपच्चक्खायं भवइ ? गोयमा ! सव्व-
 पाणेहिं जाव सव्वसत्तेहिं पच्चक्खायमिति वयमाणस्स सिय सुपच्चक्खायं भवइ
 सिय दुपच्चक्खायं भवइ । से केणट्ठेणं भंते ! एवं वुच्चइ सव्वपाणेहिं जाव
 सिय दुपच्चक्खायं भवइ ? गोयमा ! नस्स णं सव्वपाणेहिं जाव सव्वसत्तेहिं
 पच्चक्खायमिति वयमाणस्स णो एवं अभिसमण्णागयं भवइ इमे जीवा इमे
 अजीवा इमे तसा इमे घावरा तस्स णं सव्वपाणेहिं जाव सव्वसत्तेहिं पच्च-

क्लायमिति वयमाणस्स णो सुपच्चक्खायं भवइ दुपच्चक्खायं भवइ, एवं खलु
 से दुपच्चक्खाई सव्वपाणेहिं जाव सव्वसत्तेहिं पच्चक्खायमिति वयमाणे णो
 सच्चं भासं भासइ मोसं भासं भासइ, एवं खलु से मुत्तावाई सव्वपाणेहिं जाव
 सव्वसत्तेहिं तिविहं तिविहेणं असंजयविरयपडिहयपच्चक्खायपावकम्मे सकिरिए
 असंबुडे एगंतदंडे एगंतबाले यावि भवइ । जस्स णं सव्वपाणेहिं जाव सव्वसत्तेहिं
 पच्चक्खायमिति वयमाणस्स एवं अभिसमण्णागयं भवइ-इमे जीवा इमे अजीवा
 इमे तसा इमे थावरा, तस्स णं सव्वपाणेहिं जाव सव्वसत्तेहिं पच्चक्खायमिति
 वयमाणस्स सुपच्चक्खायं भवइ णो दुपच्चक्खायं भवइ । एवं खलु से सुपच्च-
 क्खाई सव्वपाणेहिं जाव सव्वसत्तेहिं पच्चक्खायमिति वयमाणे सच्चं भासं
 भासइ णो मोसं भासं भासइ, एवं खलु से सच्चवाई, सव्वपाणेहिं जाव सव्व-
 सत्तेहिं तिविहं तिविहेणं संजयविरयपडिहयपच्चक्खायपावकम्मे अकिरिए संबुडे
 एगंतपडिए यावि भवइ । से तेणट्ठेणं गोयमा ! एवं वुच्चइ जाव सिय दुपच्च-
 क्लायं भवइ ॥ २७० ॥ कइविहे णं भंते ! पच्चक्खाणे पण्णत्ते ? गोयमा !
 दुविहे पच्चक्खाणे पण्णत्ते, तंजहा-मूलगुणपच्चक्खाणे य उत्तरगुणपच्चक्खाणे
 य । मूलगुणपच्चक्खाणे णं भंते ! कइविहे पण्णत्ते ? गोयमा ! दुविहे
 पण्णत्ते, तंजहा-सव्वमूलगुणपच्चक्खाणे य देसमूलगुणपच्चक्खाणे य । सव्वमूल-
 गुणपच्चक्खाणे णं भंते ! कइविहे पण्णत्ते ? गोयमा ! पंचविहे पण्णत्ते,
 तंजहा-सव्वाओ पाणाइवायाओ वेरमणं जाव सव्वाओ परिग्गहाओ वेरमणं ।
 देसमूलगुणपच्चक्खाणे णं भंते ! कइविहे पण्णत्ते ? गोयमा ! पंचविहे पण्णत्ते,
 तंजहा-थूलाओ पाणाइवायाओ वेरमणं जाव थूलाओ परिग्गहाओ वेरमणं ।
 उत्तरगुणपच्चक्खाणे णं भंते ! कइविहे पण्णत्ते ? गोयमा ! दुविहे पण्णत्ते,
 तंजहा-सव्वुत्तरगुणपच्चक्खाणे य देसुत्तरगुणपच्चक्खाणे य । सव्वुत्तरगुणपच्च-
 क्लाये णं भंते ! कइविहे पण्णत्ते ? गोयमा ! दसविहे पण्णत्ते, तंजहा-अणा-
 गय १ मइक्कंतं २ कोडीसहियं ३ णियंटियं ४ चेव । सागार ५ मणागारं ६ परि-
 माणकडं ७ णिरवसेसं ८ ॥ १ ॥ सा केयं ९ चेव अद्धाए १० पच्चक्खाणं भवे
 दसहा । देसुत्तरगुणपच्चक्खाणे णं भंते ! कइविहे पण्णत्ते ? गोयमा ! सत्त-
 विहे पण्णत्ते, तंजहा-दिसिच्चयं १ उवभोगपरिभोगपरिमार्णं २ अणत्तयदंडवेर-
 मणं ३ सामाइयं ४ देसावगासियं ५ पोसहोववासो ६ अतिहिसंविभागो ७

अपच्छिममारणंतियसंलेहणाद्भूसणाराहणया ॥ २७१ ॥ जीवा णं भंते ! किं मूलगुणपच्चक्खाणी उत्तरगुणपच्चक्खाणी अपच्चक्खाणी ? गोयमा ! जीवा मूलगुणपच्चक्खाणीवि उत्तरगुणपच्चक्खाणीवि अपच्चक्खाणीवि । णेरइया णं भंते ! किं मूलगुणपच्चक्खाणी० पुच्छा, गोयमा ! णेरइया णो मूलगुणपच्चक्खाणी णो उत्तरगुणपच्चक्खाणी अपच्चक्खाणी, एवं जाव चउरिदिया । पंचिदियतिरिक्खजोणिया मणुस्सा य जहा जीवा, वाणमंतरजोइसियवेमाणिया जहा णेरइया । एएसि णं भंते ! जीवाणं मूलगुणपच्चक्खाणीणं उत्तरगुणपच्चक्खाणीणं अपच्चक्खाणीणं य कयरे २ हितो जाव विसेसाहिया वा ? गोयमा ! सव्वत्थोवा जीवा मूलगुणपच्चक्खाणी उत्तरगुणपच्चक्खाणी असंखेज्जगुणा अपच्चक्खाणी अणंतगुणा । एएसि णं भंते ! पंचिदियतिरिक्खजोणियाणं पुच्छा, गोयमा ! सव्वत्थोवा जीवा पंचेदियतिरिक्खजोणिया मूलगुणपच्चक्खाणी उत्तरगुणपच्चक्खाणी असंखेज्जगुणा अपच्चक्खाणी असंखेज्जगुणा । एएसि णं भंते ! मणुस्साणं मूलगुणपच्चक्खाणीणं० पुच्छा, गोयमा ! सव्वत्थोवा मणुस्सा मूलगुणपच्चक्खाणी उत्तरगुणपच्चक्खाणी संखेज्जगुणा, अपच्चक्खाणी असंखेज्जगुणा । जीवा णं भंते ! किं सव्वमूलगुणपच्चक्खाणी देसमूलगुणपच्चक्खाणी अपच्चक्खाणी ? गोयमा ! जीवा सव्वमूलगुणपच्चक्खाणीवि देसमूलगुणपच्चक्खाणीवि अपच्चक्खाणीवि । णेरइयाणं पुच्छा, गोयमा ! णेरइया णो सव्वमूलगुणपच्चक्खाणी णो देसमूलगुणपच्चक्खाणी अपच्चक्खाणी, एवं जाव चउरिदिया । पंचेदियतिरिक्ख० पुच्छा, गोयमा ! पंचेदियतिरिक्ख० णो सव्वमूलगुणपच्चक्खाणी देसमूलगुणपच्चक्खाणीवि अपच्चक्खाणीवि, मणुस्सा जहा जीवा, वाणमंतरजोइसियवेमाणिया जहा णेरइया । एएसि णं भंते ! जीवाणं सव्वमूलगुणपच्चक्खाणीणं देसमूलगुणपच्चक्खाणीणं अपच्चक्खाणीणं य कयरे २ हितो जाव विसेसाहिया वा ? गोयमा ! सव्वत्थोवा जीवा सव्वमूलगुणपच्चक्खाणी देसमूलगुणपच्चक्खाणी असंखेज्जगुणा अपच्चक्खाणी अणंतगुणा । एवं अप्पावहमाणि तिण्णिवि जहा पढमिल्लए वंडए, णवरं सव्वत्थोवा पंचिदियतिरिक्खजोणिया देसमूलगुणपच्चक्खाणी अपच्चक्खाणी असंखेज्जगुणा । जीवा णं भंते ! किं सव्वत्तरगुणपच्चक्खाणी देसुत्तरगुणपच्चक्खाणी अपच्चक्खाणी ? गोयमा ! जीवा सव्वत्तरगुणपच्चक्खाणीवि तिण्णिवि, पंचिदियतिरिक्खजोणिया

मणुस्सा य एवं चेव, सेसा अपच्चक्खणी जाव वेमाणिया । एएसि णं भंते ! जीवाणं सव्वत्तरगुणपच्चक्खणीणं० अप्पाबहुगाणि, तिण्णिवि जहा पदमे दंडए जाव मणुसाणं । जीवा णं भंते ! किं संजया असंजया संजयासंजया ? गोयमा ! जीवा संजयावि असंजयावि संजयासंजयावि, एवं जहेव पण्णवणाए तहेव भाणियव्वं जाव वेमाणिया, अप्पाबहुगं तहेव तिण्हवि भाणियव्वं । जीवा णं भंते ! किं पच्चक्खणी अपच्चक्खणी पच्चक्खणी पच्चक्खणी ? गोयमा ! जीवा पच्चक्खणीवि एवं तिण्णिवि, एवं मणुस्सावि तिण्णिवि, पंचिदियतिरिवल्लजोणिया आइल्लविरहिया सेसा सव्वे अपच्चक्खणी जाव वेमाणिया । एएसि णं भंते ! जीवाणं पच्चक्खणीणं जाव विसेसाहिया वा ? गोयमा ! सव्वत्थोवा जीवा पच्चक्खणी पच्चक्खणी पच्चक्खणी असंखेज्जगुणा अपच्चक्खणी अणंतगुणा, पंचेदियतिरिवल्लजोणिया सव्वत्थोवा पच्चक्खणी पच्चक्खणी अपच्चक्खणी असंखेज्जगुणा, मणुस्सा सव्वत्थोवा पच्चक्खणी पच्चक्खणी पच्चक्खणी संखेज्जगुणा अपच्चक्खणी असंखेज्जगुणा ॥ २७२ ॥ जीवा णं भंते ! किं सासया असासया ? गोयमा ! जीवा सिय सासया सिय असासया । से केणट्ठेणं भंते ! एवं बुच्चइ—जीवा सिय सासया सिय असासया । गोयमा ! दव्वट्टयाए सासया भावट्टयाए असासया, से तेणट्ठेणं गोयमा ! एवं बुच्चइ—जाव सिय असासया । णेरइया णं भंते ! किं सासया असासया ? एवं जहा जीवा तहा णेरइयावि, एवं जाव वेमाणिया जाव सिय सासया सिय असासया । सेवं भंते ! सेवं भंते ! त्ति ॥ २७३ ॥

सत्तमं सयं तइओ उट्टेसो

वणस्सइकाइया णं भंते ! किं कालं सव्वप्पाहारगा वा सव्वमहाहारगा वा भवंति ? गोयमा ! पाउसवरिसारत्तेसु णं एस्थ णं वणस्सइकाइया सव्वमहाहारगा भवंति तयाणंतरं च णं सरए, तयाणंतरं च णं हेमते, तयाणंतरं च णं वसंते, तयाणंतरं च णं गिम्ह, गिम्हासु णं वणस्सइकाइया सव्वप्पाहारगा भवंति । जइ णं भंते ! गिम्हासु वणस्सइकाइया सव्वप्पाहारगा भवंति; कम्हा णं भंते ! गिम्हासु बहवे वणस्सइकाइया पत्तिया पुप्फिया फलिया हरियगरेरिज्जमाणा सिरीए अईव-अईव उवसोभेमाणा-उवसोभेमाणा च्चिट्ठति ? गोयमा ! गिम्हासु णं बहवे उसिणजोणिया जीवा य पोगला य वणस्सइकाइया-

साए वक्कमंति विउक्कमंति चर्यंति उववज्जंति, एवं खलु गोयमा ! गिम्हासु
 बह्वे वणस्सइकाइया पत्तिया पुप्फिया जाव चिट्ठंति ॥ २७४ ॥ से णूणं भंते !
 मूला मूलजीवफुडा कंदा कंदजीवफुडा जाव बीया बीयजीवफुडा ? हंता
 गोयमा ! मूला मूलजीवफुडा जाव बीया बीयजीवफुडा । जइ णं भंते ! मूला
 मूलजीवफुडा जाव बीया बीयजीवफुडा कम्हा णं भंते ! वणस्सइकाइया आहा-
 रेंति कम्हा परिणामेंति ? गोयमा ! मूला मूलजीवफुडा पुढवीजीवपडिबद्धा
 तम्हा आहारेंति तम्हा परिणामेंति, कंदा कंदजीवफुडा मूलजीवपडिबद्धा तम्हा
 आहारेंति तम्हा परिणामेंति, एवं जाव बीया बीयजीवफुडा फलजीवपडिबद्धा
 तम्हा आहारेंति तम्हा परिणामेंति ॥ २७५ ॥ अहं भंते ! आलुए मूलए सिग-
 बेरे हिरिली सिरिली सिस्सिरिली किट्टिया छिरिया छीरिविरालिया कण्हकंदे
 वज्जकंदे मूरणकंदे खेलूइ अहए भद्दमुत्था पिडहलिदा लोही णोहू थोहू थिरूणा
 मुग्गपणी अस्सकणी सीहकणी सीहंडी मुसुंडी जे यावणे तहप्पगारा सव्वे ते
 अणंतजीवा विविहसत्ता ? हंता गोयमा ! आलुए मूलए जाव अणंतजीवा विविह-
 सत्ता ॥ २७६ ॥ सिय भंते ! कण्हलेसे णेरइए अप्पकम्मतराए णीललेसे णेरइए
 महाकम्मतराए ? हंता ! सिया । से केणट्ठेणं भंते ! एवं वुच्चइ--कण्हलेसे
 णेरइए अप्पकम्मतराए णीललेसे णेरइए महाकम्मतराए ? गोयमा ! ठिइं
 पडुच्च, से तेणट्ठेणं गोयमा ! जाव महाकम्मतराए । सिय भंते ! णीललेसे
 णेरइए अप्पकम्मतराए काउलेसे णेरइए महाकम्मतराए ? हंता ! सिया । से
 केणट्ठेणं भंते ! एवं वुच्चइ--णीललेसे णेरइए अप्पकम्मतराए काउलेसे णेरइए
 महाकम्मतराए ? गोयमा ! ठिइं पडुच्च, से तेणट्ठेणं गोयमा ! जाव महा-
 कम्मतराए । एवं असुरकुमारैवि, णवरं तेउलेसा अब्भहिया एवं जाव वेमाणिया,
 जस्स जइ लेस्साओ तस्स तत्तिया भाणियव्वाओ, जोइसियस्स ण भण्णइ, जाव
 सिय भंते ! पण्हलेसे वेमाणिए अप्पकम्मतराए सुवकलेसे वेमाणिए महाकम्म-
 तराए ? हंता ! सिया । से केणट्ठेणं ? सेसं जहा णेरइयस्स जाव महाकम्म-
 तराए ॥ २७७ ॥ से णूणं भंते ! जा वेयणा सा णिज्जरा जा णिज्जरा सा
 वेयणा ? गोयमा ! णो इणट्ठे समट्ठे । से केणट्ठेणं भंते ! एवं वुच्चइ जा
 वेयणा ण सा णिज्जरा जा णिज्जरा ण सा वेयणा ? गोयमा ! कम्म वेयणा
 णोक्कम णिज्जरा, से तेणट्ठेणं गोयमा ! जाव ण सा वेयणा । णेरइयाणं
 भंते ! जा वेयणा सा णिज्जरा जा णिज्जरा सा वेयणा ? गोयमा ! णो

इणट्ठे समट्ठे । से केणट्ठेण भंते ! एवं वुच्चइ णेरइयाणं जा वेयणा ण सा णिज्जरा जा णिज्जरा ण सा वेयणा ? गोयमा ! णेरइयाणं कम्म वेयणा णोकम्म णिज्जरा, से तेणट्ठेणं गोयमा ! जाव ण सा वेयणा, एवं जाव वेमा-
 णियाणं । से णूणं भंते ! जं वेदेंसु तं णिज्जरिंसु जं णिज्जरिंसु तं वेदेंसु ? णो
 इणट्ठे समट्ठे । से केणट्ठेणं भंते ! एवं वुच्चइ जं वेदेंसु णो तं णिज्जरेंसु जं
 णिज्जरेंसु णो तं वेदेंसु ? गोयमा ! कम्मं वेदेंसु णोकम्मं णिज्जरिंसु, से
 तेणट्ठेणं गोयमा ! जाव णो तं वेदेंसु । णेरइया णं भंते ! जं वेदेंसु तं णिज्ज-
 रिंसु ? एवं णेरइयावि एवं जाव वेमाणिया । से णूणं भंते ! जं वेदेंति तं
 णिज्जरेंति जं णिज्जरेंति तं वेदेंति ? गोयमा ! णो इणट्ठे समट्ठे । से केण-
 ट्ठेणं भंते ! एवं वुच्चइ जाव णो तं वेदेंति ? गोयमा ! कम्मं वेदेंति णोकम्मं
 णिज्जरेंति, से तेणट्ठेणं गोयमा ! जाव णो तं वेदेंति, एवं णेरइयावि जाव
 वेमाणिया । से णूणं भंते ! जं वेदिस्संति तं णिज्जरिस्संति जं णिज्जरिस्संति
 तं वेदिस्संति ? गोयमा ! णो इणट्ठे समट्ठे । से केणट्ठेणं जाव णो तं वेदि-
 स्संति ? गोयमा ! कम्मं वेदिस्संति णोकम्मं णिज्जरिस्संति, से तेणट्ठेणं जाव
 णो तं णिज्जरिस्संति, एवं णेरइयावि जाव वेमाणिया । से णूणं भंते ! जं
 वेयणासमए से णिज्जरासमए जे णिज्जरासमए से वेयणासमए ? णो इणट्ठे
 समट्ठे । से केणट्ठेणं भंते ! एवं वुच्चइ जे वेयणासमए ण से णिज्जरासमए
 जे णिज्जरासमए ण से वेयणासमए ? गोयमा ! जं समयं वेदेंति णो तं समयं
 णिज्जरेंति जं समयं णिज्जरेंति णो तं समयं वेदेंति, अण्णम्मि समए वेदेंति
 अण्णम्मि समए णिज्जरेंति अण्णे से वेयणासमए अण्णे से णिज्जरासमए, से
 तेणट्ठेणं जाव ण से वेयणासमए ण से णिज्जरासमए । णेरइयाणं भंते ! जं
 वेयणासमए से णिज्जरासमए जे णिज्जरासमए से वेयणासमए ? गोयमा !
 णो इणट्ठे समट्ठे । से केणट्ठेणं भंते ! एवं वुच्चइ णेरइयाणं जे वेयणासमए
 ण से णिज्जरासमए जे णिज्जरासमए ण से वेयणासमए ? गोयमा ! णेरइया
 णं जं समयं वेदेंति णो तं समयं णिज्जरेंति जं समयं णिज्जरेंति णो तं समयं
 वेदेंति अण्णम्मि समए वेदेंति अण्णम्मि समए णिज्जरेंति अण्णे से वेयणासमए
 अण्णे से णिज्जरासमए, से तेणट्ठेणं जाव ण से वेयणासमए एवं जाव वेमा-
 णिया ॥२७६॥ णेरइया णं भंते ! किं सासया असासया ? गोयमा ! सिध

सासया सिय असासया । से केणट्ठेणं भंते ! एवं वुच्चइ णेरइया सिय सासया सिय असासया ? गोयमा ! अब्बोच्छत्तिणयट्ठयाए सासया वोच्छत्तिणयट्ठयाए असासया । से तेणट्ठेणं जाव सिय सासया सिय असासया, एवं जाव वेमाणिया जाव सिय असासया । सेवं भंते ! सेवं भंते ! त्ति ॥२७६॥

सत्तमं सयं चउत्थो उद्देसो

रायगिहे णयरे जाव एवं वयासी—कइविहा णं भंते ! संसारसमावण्णगा जीवा पण्णत्ता ? गोयमा ! छव्विहा संसारसमावण्णगा जीवा पण्णत्ता, तंजहा—पुढविकाइया एवं जहा जीवाभिगमे जाव सम्मत्तकिरियं वा मिच्छत्तकिरियं वा । जीवा छव्विह पुढवो जीवाण ठिई भवट्ठिई काए । णिल्लेवण अणगारे किरिया सम्मत्तमिच्छत्ता ॥ १ ॥ सेवं भंते ! सेवं भंते ! त्ति ॥२८०॥

सत्तमं सयं पंचमो उद्देसो

रायगिहे जाव एवं वयासी—खहयरपविदियतिरिक्खजोणियाणं भंते ! कइविहे जोणीसंगहे पण्णत्ते ? गोयमा ! तिविहे जोणीसंगहे पण्णत्ते, तंजहा—अंडया पोयथा संमुच्छिमा, एवं जहा जीवाभिगमे जाव णो चेव णं ते विमाणे बीईवएज्जा । एवंमहालयानं गोयमा ! ते विमाणा पण्णत्ता । ‘जोणीसंगह लेसा दिट्ठी णाणे य जोग उवओगे । उववायठिइसमुघायचवणजाईकुलविहीओ’ ॥ १ ॥ सेवं भंते ! सेवं भंते ! त्ति ॥ २८१ ॥

सत्तमं सयं छट्ठो उद्देसो

रायगिहे जाव एवं वयासी—जीवे णं भंते ! जे भविए णेरइएसु उववज्जित्तए से णं भंते ! कि इहगए णेरइयाउयं पकरेइ उववज्जमाणे णेरइयाउयं पकरेइ उववण्णे णेरइयाउयं पकरेइ ? गोयमा ! इहगए णेरइयाउयं पकरेइ णो उववज्जमाणे णेरइयाउयं पकरेइ णो उववण्णे णेरइयाउयं पकरेइ, एवं असुरकुमारेसुवि एवं जाव वेमाणिएसु । जीवे णं भंते ! जे भविए णेरइएसु उववज्जित्तए से णं भंते ! कि इहगए णेरइयाउयं पडिसंवेदेइ उववज्जमाणे णेरइयाउयं पडिसंवेदेइ उववण्णे णेरइयाउयं पडिसंवेदेइ ? गोयमा ! णो इहगए णेरइयाउयं पडिसंवेदेइ उववज्जमाणे णेरइयाउयं पडिसंवेदेइ उववण्णेवि

णेरइयाउयं पडिसंवेदेइ, एवं जाव वेमाणिएसु । जीवे णं भंते ! जे भविए णेरइएसु
 उववज्जित्तए से णं भंते ! कि इहगए महावेयणे उववज्जमाणे महावेयणे उव-
 ववणे महावेयणे? गोयमा ! इहगए सिय महावेयणे सिय अप्पवेयणे उववज्जमाणे
 सिय महावेयणे सिय अप्पवेयणे अहे णं उवववणे भवइ तओ पच्छा एगंतदुक्खं
 वेयणं वेयइ आहच्च सायं । जीवे णं भंते ! जे भविए असुरकुमारेसु उववज्जित्तए
 पुच्छा, गोयमा ! इहगए सिय महावेयणे सिय अप्पवेयणे उववज्जमाणे सिय
 महावेयणे सिय अप्पवेयणे अहे णं उवववणे भवइ तओ पच्छा एगंतसायं वेयणं
 वेएइ आहच्च असायं, एवं जाव थणियकुमारेसु । जीवे णं भंते ! जे भविए
 पुट्टविककाइएसु उववज्जित्तए पुच्छा, गोयमा ! इहगए सिय महावेयणे सिय
 अप्पवेयणे, एवं उववज्जमाणेवि, अहे णं उवववणे भवइ तओ पच्छा वेमायाए
 वेयणं वेएइ, एवं जाव मणुस्सेसु, वाणमंतरजोइसियवेमाणिएसु जहा असुर-
 कुमारेसु ॥ २८२ ॥ जीवा णं भंते ! कि आभोगणिव्वत्तियाउया अणाभोग-
 णिव्वत्तियाउया? गोयमा ! णो आभोगणिव्वत्तियाउया अणाभोगणिव्वत्तियाउया
 एवं णेरइयावि, एवं जाव वेमाणिया ॥ २८३ ॥ अत्थि णं भंते ! जीवाणं
 कक्कसवेयणज्जा कम्मा कज्जंति ? [गोयमा !] हंता ! अत्थि । कहणं भंते !
 जीवाणं कक्कसवेयणज्जा कम्मा कज्जंति ? गोयमा ! पाणाइवाएणं जाव
 मिच्छादंसणसत्तेणं, एवं खलु गोयमा ! जीवाणं कक्कसवेयणज्जा कम्मा
 कज्जंति । अत्थि णं भंते ! णेरइयाणं कक्कसवेयणज्जा कम्मा कज्जंति ? एवं
 चेव, एवं जाव वेमाणियाणं । अत्थि णं भंते ! जीवाणं अक्कसवेयणज्जा
 कम्मा कज्जंति ? हंता ! अत्थि । कहणं भंते ! जीवाणं अक्कसवेयणज्जा
 कम्मा कज्जंति ? गोयमा ! पाणाइवायवेरमणं जाव परिरगहवेरमणं कोह-
 विवेगेणं जाव मिच्छादंसणसत्तलिविवेगेणं, एवं खलु गोयमा ! जीवाणं अक्कस-
 वेयणज्जा कम्मा कज्जंति । अत्थि णं भंते ! णेरइयाणं अक्कसवेयणज्जा
 कम्मा कज्जंति ? गोयमा ! णो इणट्ठे समट्ठे, एवं जाव वेमाणिया, णवरं
 मणुस्साणं जहा जीवाणं ॥ २८४ ॥ अत्थि णं भंते ! जीवाणं सायावेयणज्जा
 कम्मा कज्जंति ? हंता ! अत्थि । कहणं भंते ! जीवाणं सायावेयणज्जा कम्मा
 कज्जंति ? गोयमा ! पाणाणुकंपयाए भूयाणुकंपयाए जीवाणुकंपयाए सत्ताणु-
 कंपयाए बहूणं पाणाणं जाव सत्ताणं अदुक्खणयाए असोयणयाए अजरणयाए

अतिष्पणयाए अपिटृणयाए अपरियावणयाए एवं खलु गोयमा ! जीवाणं सायावेय-
 णिज्जा कम्मा कज्जंति । एवं णेरइयाण वि, एवं जाव वेमाणियाणं । अत्थि णं
 भंते ! जीवाणं असायावेयणिज्जा कम्मा कज्जंति ? हुंता अत्थि । कहण्णं भंते ! जीवा
 णं असायावेयणिज्जा कम्मा कज्जंति ? गोयमा ! परदुक्खणयाए परसोयणयाए
 परजूरणयाए परतिष्पणयाए परपिटृणयाए परपरियावणयाए बहूणं पाणाणं जाव
 सत्ताणं दुक्खणयाए सोयणयाए जाव परियावणयाए एवं खलु गोयमा ! जीवाणं
 असायावेयणिज्जा कम्मा कज्जंति, एवं णेरइयाणवि, एवं जाव वेमाणियाणं
 ॥ २८५ ॥ जंबुदीवे णं भंते ! दीवे भारहे वासे इमीसे ओसप्पिणीए दुसमदुस-
 माए समाए उत्तमकट्टपत्ताए भरहस्स वासस्स केरिसए आयारभावपडोयारे
 भविस्सइ ? गोयमा ! कालो भविस्सइ हाहाभूए भंभाभूए कोलाहलभूए समया-
 णुभावेण य णं खरफरुसधूलिमइला दुक्खिसहा वाउला भयंकरा वाया संवट्टगा य
 वाहिंति, इह अभिक्खं २ धूमाहिंति य दिसा समंता रउस्सला रेणु-
 कलुसत्तमपडलणिरालोगा समयलुक्खयाए य णं अहियं चंदा सीयं मोच्छंति
 अहियं सूरिया तवइस्संति अदुत्तरं च णं अभिक्खणं बहवे अरसमेहा विरसमेहा
 खारमेहा लट्टमेहा अग्निमेहा विज्जुमेहा विसमेहा असणिमेहा अपिवणिज्जोदगा
 (अजवणिज्जोदया) वाहिरोगवेयणोदीरणापरिणामसलिला अमणुष्णपाणियगा
 चंडाणिलपहयतिक्खधारणिवायपउरवासं वासिंति । जे णं भारहे वासे मामा-
 गरणगरखेडकब्बडमडंबवोणमुहपट्टणासमगयं जणवयं चउप्पयगवेलए खह्यरे
 य पक्खिसंघे गामारण्णपयारणिरए तसे य पाणे बहुप्पगारे रुक्खगुच्छगुम्मलय-
 वल्लितणपव्वगहरियोसहिपवालंकुरमाइए य तणवणस्सइकाइए विद्धंसेहिंति,
 पव्वयगिरिडोंगरउत्थलभट्टिमाइए य वेयडुगिरिवज्जे विरावेहिंति सल्लि-
 बिलगडुदुग्गविसमं णिष्णुणयाइं च गंगासिधुवज्जाइं समीकरेहिंति । तीसे णं
 भंते ! समाए भरहवासस्स भूमीए केरिसए आयारभावपडोयारे भविस्सइ ?
 गोयमा ! भूमी भविस्सइ इंगलठभूया मुम्मुरठभूया छारियमूया तत्तकवेल्लयभूया
 तत्तसमजोइभूया धूलिबहुला रेणुबहुला पंकबहुला पणगबहुला चलणिवहुला बहूणं
 धरणिगोयराणं सत्ताणं दुण्णिक्कमा यावि भविस्सइ ॥ २८६ ॥ तीसे णं भंते !
 समाए भारहे वासे मणुयाणं केरिसए आयारभावपडोयारे भविस्सइ ? गोयमा !
 मणुया भविस्संति डुरूचा डुवण्णा दुगंधा डुरसा डुफासा अणिट्टा अकंता जाव अम-

णामा हीणस्सरा दीणस्सरा अणिट्टस्सरा जाव अमणामस्सरा अणादेज्जवयणपच्चा-
याया णिल्लज्जा कूडकवडकलहवहबंधवेरिणरया मज्जयाइवकमप्पहाणा अकज्ज-
णिच्चुज्जया गुरुणिधोयविणयरहिया य विकलरूवा परूढणहकेसमसुरोमा काला
खरफरुसक्षामवण्णा फुट्टिसरा कविलपलियकेसा बहुह्णहार [णि] संपिणद्धुदंसणि-
ज्जरूवा संकुडियवलीतरंगपरिवेडियंगमंगा जरापरिणयव्व थेरगणरा पविरल-
परिसडियवंतसेडो उब्भडघडमुहा विसमणयणा वंकणासा वंगवलीविगयमेसण-
मुहा कच्छुकसराभिभूया खरतिवखणहकंडुइयविवल्लयतण ददुकिडिभंसिज-
फुडियफरुसच्छवी चित्तलंगा टोलागइविसमसंधिबंधणउवकुडुअट्टिगविभत्तदुब्ब-
लकुसंघयणकुप्पमाणकुसंठिया कुरूवा कुट्टाणासणकुसेज्जकुभोइणो असुइणो अणेग-
वाह्निपरिपोलियंगमंगा खलंतविब्भलगई णिरुच्छाहा सत्परिवज्जिया विगय-
च्चिट्टुणट्टेया अभिवलणं सोयउह्णखरफरुसवायविज्जंडिया मलिणपंसुरयमुंडि-
यंगमंगा बहुकोहमाणमाया बहुलोभा असुहुदुक्खभागे उस्सणं धम्मसणसम्म-
त्तपरिडभट्टा उवकोसेणं रयणिप्पमाणमेत्ता सोलसवीसइवासपरमाउसो पुत्तणत्त-
परियालपणयबहुला गंगांसिधूओ महाणईओ वेयड्ढं च पव्वयं णिस्साए वावतीरि
णिओया बीयं बीयामेत्ता विलवासिणो भविस्संति । ते णं भंते ! मणुया कमाहार-
माहारेहिंति ? गोयमा ! ते णं कालेणं तेणं समए णं गंगांसिधूओ महाणईओ
रहपहविस्थराओ अवलसोयपप्पमाणमेत्तं जलं वोज्जिंहिति सेवि य णं जले बहु-
मच्छकच्छभाइण्णे णो सेव णं आउवहुले भविस्सइ । तए णं ते मणुया सूहग्गमणमहु-
त्तंसि य सूरत्थमणमहुत्तंसि य विलेहितो णिद्धांहिति णिद्धाइत्ता मच्छकच्छभे
थलाइं गाहेहिंति गाहेत्ता सीयायवतत्तएहिं मच्छकच्छएहिं एक्कवीसं वाससहस्साइं
विंत्त कप्पेमाण विहरिस्संति । ते णं भंते ! मणुया णिस्सीला णिग्गुणा णिग्मेरा
णिप्पच्चक्खमाण-पोसहोववासा उस्सणं मंसाहारा, मच्छाहारा खोइाहारा कुणि-
माहारा कालमासे कालं किच्चा कहिं गच्छिंहिति कहिं उववज्जिंहिति ? गोयमा!
उस्सणं णरगतिरिक्खजोणिएसु उववज्जिंहिति । ते णं भंते ! सीहा वग्घा वगा
दीविया अच्छा तरच्छा परच्छा परस्सरा णिस्सीला तहेव जाव कहिं उववज्जि-
ंहिति ? गोयमा ! उस्सणं णरगतिरिक्खजोणिएसु उववज्जिंहिति । ते णं भंते !
ढंका कंका विलका मदुगा सिहो णिस्सीला तहेव जाव उस्सणं णरगतिरिक्ख
जोणिएसु उववज्जिंहिति । सेवं भंते ! सेवं भंते ! ति ॥ २८७ ॥

सत्तमं सयं सत्तमो उद्देसो

संबुडस्स णं भंते ! अणगारस्स आउत्तं गच्छमाणस्स जाव आउत्तं तुप्र-
 ट्टमाणस्स आउत्तं वत्थं पडिग्गहं कंबलं पायपुंछणं गेष्हमाणस्स वा णिक्खिव-
 माणस्स वा तस्स णं भंते ! किं इरियावहिया किरिया कज्जइ संपराइया
 किरिया कज्जइ ? गोयमा ! संबुडस्स णं अणगारस्स जाव तस्स णं इरियाव-
 हिया किरिया कज्जइ णो संपराइया किरिया कज्जइ । से केणट्ठेणं भंते !
 एवं वुच्चइ-संबुडस्स णं जाव संपराइया किरिया कज्जइ ? गोयमा ! जस्स
 णं कोहमाणमायालोभा बोच्छिण्णा भवन्ति तस्स णं इरियावहिया किरिया
 कज्जइ, तहेव जाव उस्सुत्तं रीयमाणस्स संपराइया किरिया कज्जइ, से णं
 अहामुत्तमेव रीयइ, से तेणट्ठेणं गोयमा ! जाव णो संपराइया किरिया
 कज्जइ ॥ २८८ ॥ रूवी भंते ! कामा अरूवी कामा ? गोयमा ! रूवी कामा
 णो अरूवी कामा । सच्चित्ता भंते ! कामा अच्चित्ता कामा ? गोयमा !
 सच्चित्तावि कामा अच्चित्तावि कामा । जीवा भंते ! कामा अजीवा कामा ?
 गोयमा ! जीवावि कामा अजीवावि कामा । जीवाणं भंते ! कामा
 अजीवाणं कामा ? गोयमा ! जीवाणं कामा णो अजीवाणं कामा । कइविहा
 णं भंते ! कामा पण्णत्ता ? गोयमा ! दुविहा कामा पण्णत्ता, तंजहा-सद्दा य
 रूवा य । रूवी भंते ! भोगा अरूवी भोगा ? गोयमा ! रूवी भोगा णो अरूवी
 भोगा । सच्चित्ता भंते ! भोगा अच्चित्ता भोगा ? गोयमा ! सच्चित्तावि भोगा
 अच्चित्तावि भोगा । जीवा भंते ! भोगा अजीवा भोगा ? गोयमा ! जीवावि
 भोगा अजीवावि भोगा । जीवाणं भंते ! भोगा अजीवाणं भोगा ? गोयमा !
 जीवाणं भोगा णो अजीवाणं भोगा । कइविहा णं भंते ! भोगा पण्णत्ता ?
 गोयमा ! त्रिविहा भोगा पण्णत्ता, तंजहा-गंधा रसा फासा । कइविहा णं
 भंते ! कामभोगा पण्णत्ता ? गोयमा ! पंचविहा कामभोगा पण्णत्ता, तंजहा-
 सद्दा रूवा गंधा रसा फासा । जीवा णं भंते ! किं कामी भोगी ? गोयमा !
 जीवा कामीवि भोगीवि । से केणट्ठेणं भंते ! एवं वुच्चइ जीवा कामीवि
 भोगीवि ? गोयमा ! सोइंदियच्चविल्लदियाइं पडुच्च कामी घाणिंदियजिब्धिं-
 दियफासिंदियाइं पडुच्च भोगी, से तेणट्ठेणं गोयमा ! जाव भोगीवि ।

णेरइया णं भंते ! किं कामी भोगी ? एवं चेव एवं जाव अणियकुमारा !
 पुढविकाइयाणं पुच्छा, गोयमा ! पुढविकाइया णो कामी भोगी । से केणट्ठेणं
 जाव भोगी ? गोयमा ! फासिदियं पडुच्च से तेणट्ठेणं जाव भोगी, एवं जाव
 वणस्सइकाइया, बेइंदिया एवं चेव णवरं जिंभिदियफासिदियाइं पडुच्च भोगी,
 तेइंदियावि एवं चेव णवरं घाणिदियजिंभिदियफासिदियाइं पडुच्च भोगी । चउ-
 रिदियाणं पुच्छा, गोयमा ! चउरिविया कामीवि भोगीवि । से केणट्ठेणं जाव
 भोगीवि ? गोयमा ! चिखिदियं पडुच्च कामी घाणिदियजिंभिदियफासिदि-
 याइं पडुच्च भोगी, से तेणट्ठेणं जाव भोगीवि, अवसेसा जहा जीवा जाव
 वेमाणिया । एएसि णं भंते ! जीवाणं कामभोगीणं णोकामीणं णोभोगीणं
 भोगीणं य कयरे कयरेहितो जाव विसेसाहिया वा ? गोयमा ! सव्वत्थोवा
 जीवा कामभोगी णोकामी णोभोगी अणंतगुणा भोगी अणंतगुणा ॥२८६॥ छउ-
 मत्थे णं भंते ! मणुस्से जे भविए अण्यरेसु देवलोएसु देवत्ताए उववज्जित्तए,
 से णूणं भंते ! से खीणभोगी णो पभू उट्टाणेणं कम्मणेणं बलेणं वीरिएणं
 पुरिसक्कारपरक्कमेणं विउलाइं भोगभोगाइं भुंजमाणे विहरित्तए ? से
 णूणं भंते ! एयमट्ठं एवं बयह ? गोयमा ! णो इणट्ठे समट्ठे,
 पभू णं से उट्टाणेणवि कम्मणेणवि बलेणवि वीरिएणवि पुरिसक्कार-
 परक्कमेणवि अण्यराराइं विपुलाइं भोगभोगाइं भुंजमाणे विहरित्तए,
 तम्हा भोगी भोगे परिच्चयमाणे महाणज्जरे महापज्जवसाणे भवइ । आहो-
 हिए णं भंते ! मणुस्से जे भविए अण्यरेसु देवलोएसु एवं चेव जहा छउमत्थे
 जाव महापज्जवसाणे भवइ । परमाहोहिए णं भंते ! मणुस्से जे भविए तेणेव
 भवग्गहणेणं सिज्जित्तए जाव अंतं करेत्तए । से णूणं भंते ! से खीणभोगी सेसं
 जहा छउमत्थस्स । केवली णं भंते ! मणुस्से जे भविए तेणेव भवग्गहणेणं
 एवं जहा परमाहोहिए जाव महापज्जवसाणे भवइ ॥ २६० ॥ जे इमे भंते !
 असण्णिणो पाणा, तंजहा—पुढविकाइया जाव वणस्सइकाइया छट्टा य एगइया
 तसा, एए णं अंधा मूढा तमंपविट्टा तमपढलमोहजालपडिच्छण्णा अकामणिकरणं
 वेयणं वेदंतीति वत्तव्वं सिया ? हंता गोयमा ! जे इमे असण्णिणो पाणा पुढ-
 विकाइया जाव वणस्सइकाइया छट्टा य जाव वेयणं वेदंतीति वत्तव्वं
 सिया । अत्थि णं भंते ! पभूवि अकामणिकरणं वेयणं वेदंति ? हंता गोयमा !

अत्थि । कहण्णं भंते ! पभूवि अकामणिकरणं वेयणं वेदेंति ? गोयमा ! जे णं णो पभू विणा पइवेणं अंधकारंसि रुवाइं पासित्तए जे णं णो पभू पुरओ रुवाइं अणिज्जाइत्ता णं पासित्तए जे णं णो पभू मग्गओ रुवाइं अणवयक्खित्ता णं पासित्तए जे णं णो पभू पासओ रुवाइं अणवलोइत्ता णं पासित्तए जे णं णो पभू उड्डं रुवाइं अणालोएत्ता णं पासित्तए जे णं णो पभू अहे रुवाइं अणालोएत्ता णं पासित्तए एस णं गोयमा ! पभूवि अकामणिकरणं वेयणं वेदेंति । अत्थि णं भंते ! पभूवि पकामणिकरणं वेयणं वेदेंति ? हुंता । अत्थि । कहण्णं भंते ! पभूवि पकामणिकरणं वेयणं वेदेंति ? गोयमा ! जे णं णो पभू समुद्दस्स पारं गमित्तए जे णं णो पभू समुद्दस्स पारगयाइं रुवाइं पासित्तए जे णं णो पभू देवलोणं गमित्तए जे णं णो पभू देवलोणगयाइं रुवाइं पासित्तए एस णं गोयमा ! पभूवि पकामणिकरणं वेयणं वेदेंति । सेवं भंते ! सेवं भंते ! त्ति ॥ २६१ ॥

सत्तमं सयं अट्टमो उट्ठेसो

छउमत्थे णं भंते ! मणूसे तीयमणंतं सासयं समयं केवलेणं संजमेणं एवं जहा पढमसए चउत्थे उट्ठेसए तहा भाणियव्वं जाव अलमत्थु० ॥ २६२ ॥ से णूणं भंते ! हत्थिस्स य कुंथुस्स य समे चेव जीवे ? हुंता गोयमा ! हत्थिस्स य कुंथुस्स य एवं जहा रायप्पसेणइज्जे जाव खुड्डियं वा महालियं वा से तेणदट्ठेणं गोयमा ! जाव समे चेव जीवे ॥ २६३ ॥ णेरइयाणं भंते ! पावे कम्मं जे य कडे जे य कज्जइ जे य कज्जिस्सइ सव्वे से दुवल्ले जे णिज्जिण्णे से सुहे ? हुंता गोयमा ! णेरइयाणं पावे कम्मं जाव सुहे, एवं जाव वेमाणियाणं ॥ २६४ ॥ कइ णं भंते ! सण्णाओ पणत्ताओ ? गोयमा ! दस सण्णाओ, पणत्ताओ, तंजहा-आहारसण्णा १ भयसण्णा २ भेहुणसण्णा ३ परिग्गहसण्णा ४ कोहसण्णा ५ माणसण्णा ६ मायासण्णा ७ लोभसण्णा ८ लोगसण्णा ९ ओहसण्णा १०, एवं जाव वेमाणियाणं । णेरइया दसविहं वेयणं पच्चणुभवमाणा विहरंति, तंजहा-सीयं उसिणं खुहं पिवासं कडं परज्जं जरं दाहं भयं सोगं ॥ २६५ ॥ से णूणं भंते ! हत्थिस्स य कुंथुस्स य समा चेव अपच्चवक्खाणकिरिया कज्जइ ? हुंता गोयमा ! हत्थिस्स य कुंथुस्स य जाव कज्जइ । से केणदट्ठेणं भंते ! एवं वुच्चइ जाव कज्जइ ? गोयमा ! अविरइं पडुच्च, से तेणदट्ठेणं

जाव कज्जइ ॥ २६६ ॥ आहाकम्मणं भंते ! भुंजमाणे किं बंधइ ? किं पक्क-
रेइ ? किं चिणाइ ? किं उवचिणाइ ? एवं जहा पढमे सए णवमे उद्देसए
तहा भाणियच्चं जाव सासए पडिए पडियत्तं असासयं । सेवं भंते ! सेवं भंते !
त्ति ॥ २६७ ॥

सत्तमं सयं णवमो उद्देसो

असंबुडे णं भंते ! अणगारे बाहिरए पोगगले अपरियाइत्ता पभू एगवणं
एगरूवं विउच्चित्तए ? णो इणट्ठे समट्ठे । असंबुडे णं भंते ! अणगारे
बाहिरए पोगगले परियाइत्ता पभू एगवणं एगरूवं जाव हुंता । पभू । से
भंते ! किं इहगए पोगगले परियाइत्ता विउच्चइ तत्थगए पोगगले परियाइत्ता
विउच्चइ अणत्थगए पोगगले परियाइत्ता विउच्चइ ? गोयमा ! इहगए पोगगले
परियाइत्ता विउच्चइ णो तत्थगए पोगगले परियाइत्ता विउच्चइ णो अणत्थ-
गए पोगगले जाव विउच्चइ, एवं एगवणं अणेरूवं चउभंगो जहा छट्टसए
णवमे उद्देसए तहा इहा वि भाणियच्चं, णवरं अणगारे इहगयं इहगए चेव पोगगले
परियाइत्ता विउच्चइ, सेसं तं चेव जाव लुक्खपोगगलं णिद्धपोगगलत्ताए परि-
णामेत्तए ? हुंता ! पभू, से भंते ! किं इहगए पोगगले परियाइत्ता जाव णो
अणत्थगए पोगगले परियाइत्ता विउच्चइ ॥ २६८ ॥ णायमेयं अरहया सुयमेयं
अरहया विण्णायमेयं अरहया महासिलाकंटए संगामे । महासिलाकंटए णं भंते !
संगामे वट्टमाणे के जइत्था के पराजइत्था ? गोयमा ! वज्जी विदेहपुत्तं जइत्था,
णवमत्तलई णवलेच्छई कासीकोसलगा अट्टारसवि गणरायाणो पराजइत्था ।
तए णं ते कोणिए राया महासिलाकंटं संगामं उवट्ठियं जाणित्ता कोडुंबिय-
पुरिसे सट्ठावेइ २ एवं वयासी-खिप्पामेव भो देवाणुप्पिया ! उदाइं हत्थिरायं
पडिकप्पेह ह्यगयरहजोहकलियं चाउरं गिणि सेणं सण्णाहेह २ ता मम एयमा-
णत्तियं खिप्पामेव पच्चप्पिणह । तए णं ते कोडुंबियपुरिसा कोणिएणं रण्णा
एवं दुत्ता समाणा हट्टतुट्टं जाव अज्जलि कट्टु एवं सामी ! तहत्ति आणाए
विणएणं वयणं पडिसुणंति २ खिप्पामेव छेयापरियोवएसमइकप्पणाविकप्पेहि
सुणिउणेहि एवं जहा उववाइए जाव भीमं संगामियं अउज्जं उदाइं हत्थिरायं
पडिकप्पेति ह्यगय जाव सण्णाहेति २ जणेव कूणिए रावा तेणेव उवागच्छति
तेणेव उवागच्छित्ता करयल० कूणियस्स रणो तमाणत्तियं पच्चप्पिणंति । तए

णं से कूणिए राया जेगेव मज्जणघरं तेगेव उवागच्छइ तेगेव उवागच्छिता
मज्जणघरं अणुप्पविसइ मज्जणघरं अणुप्पविसिता ण्हाए कयबलिकम्मे कय-
कोउय-मंगल-पायच्छित्ते सव्वात्कारविभूसिए सण्णद्धबद्धवम्मियकवए उप्पोलिय-
सरासणपट्टिए पिणद्धगेवेज्ज विमलवरबद्धच्चिधपट्टे गहियाउह पहरणे सकोरिइ-
मल्लदामेणं छत्तेणं धरिज्जमाणेणं चउचामरबालवीइयंगे मंगलजयसहकयालोए
एवं जहा उववाइए जाव उवागच्छिता उदाइं हत्थिरायं दुहुडे । तए णं से
कूणिए राया हारोत्थयसुकयरइयवच्छे जहा उववाइए जाव सेधवरचामराहि
उद्धुव्वमाणींह-उद्धुव्वमाणींह ह्यपयरहपवरजोहकलियाए चाउरंगिणीए
सेणाए सद्धिं संपरिवुडे महया भडचडगरविंदपरिविखत्ते जेगेव महासिलाकंटए
संगामे तेगेव उवागच्छइ तेगेव उवागच्छिता महासिलाकंटयं संगामं ओयाए ।
पुरओ य से सक्के देविंदे देवराया एगं महं अभेज्जकवयं वडरपडिरुवगं विउ-
ठ्वित्ता णं चिट्ठइ । एवं खलु दो इंदा संगामं संगामेत्ति, तंजहा-देविंदे य मणुइंदे
य, एगहत्थिणा वि णं पभू कूणिए राया पराजिणित्तए । तए णं से कूणिए राया
महासिलाकंटयं संगामं संगामेमाणे णव मल्लई णव लेच्छई कासीकोसलगा
अट्टारसवि गगरायाणो ह्यमहियपवरवीरघाइयविधडियच्चिधद्वयपडागे किच्छ-
पाणगए दिसो दिसिं पडिसेहित्था । से केणट्ठेणं भंते ! एवं वुच्चइ महासिला-
कंटए संगामे ? गोयमा ! महासिलाकंटए णं संगामे वट्टमाणे जे तत्थ आसे
वा हत्थो वा जोहे वा सारही वा तणेण वा पत्तेण वा कट्ठेण वा सक्कराए
वा अभिहम्मइ सव्वे से जानइ महासिलाए अहं अभिहए म० २, से तेणट्ठेणं
गोयमा ! महासिलाकंटए संगामे । महासिलाकंटए णं भंते ! संगामे वट्टमाणे
कइ जणसयसाहस्सीओ वहियाओ ? गोयमा ! चउरासीइं जणसयसाहस्सीओ
वहियाओ । ते णं भंते ! मणुया णिस्सीला जाव णिप्पचचक्खाणपोसहोववासा
रुट्ठा परिकुविया समरवहिया अणुवसंता कालमासे कालं किच्चा कहि गया
कहि उववण्णा ? गोयमा ! उस्सण्णं णरगतिरिक्खजोणिएसु उववण्णा ॥२६६॥
णायमेयं अरहया सुयमेयं अरहया विण्णायमेयं अरहया रहमुसले संगामे,
रहमुसले णं भंते ! संगामे वट्टमाणे के जइत्था ? के पराजइत्था ? गोयमा !
वज्जी विदेहपुत्ते चमरे असुरिंदे असुरकुमारराया जइत्था णव मल्लई णव
लेच्छई पराजइत्था । तए णं से कूणिए राया रहमुसलं संगामं उवट्टियं

तेसं जहा महासिलाकंटे ए णवरं भूयाणंदे हत्थिराया जाव रहमुसलं संगामं
 ओयाए, पुरओ ष से सक्के देविदे देवराया, एवं तहेव जाव चिट्ठंति, मग्गओ
 य से चमरे असुरिदे असुरकुमारराया एगं महं आयसं किट्ठिणपडिरूवगं विउ-
 व्वित्ता णं चिट्ठइ । एवं खलु तओ इंदा संगामं संगामेति, तंजहा—देविदे य मणुइंदे
 ष असुरिदे य, एगहत्थियणावि णं पभू कूणिए राया जइत्तए तहेव जाव विसो-
 दिंसि पडिसेहित्था । से केणट्ठेणं भंते ! एवं बुच्चइ रहमुसले संगामे ?
 गोयमा ! रहमुसले णं संगामे वट्टमाणे एगे रहे अणासए असारहिए अणा-
 रोहए समुसले महया जणवत्थयं जणवहं जणप्पमदं जणसंवट्टकपं रुहिरकट्टमं
 करेमाणे सव्वओ समंता परिधावित्था से तेणट्ठेणं जाव रहमुसले संगामे ।
 रहमुसले णं भंते ! संगामे वट्टमाणे कइ जणसयसाहस्सीओ वहियाओ ?
 गोयमा ! छण्णउइं जणसयसाहस्सीओ वहियाओ । ते णं भंते ! मणुया
 णिस्सीला जाव उववण्णा ? गोयमा ! तत्थ णं दस साहस्सीओ एगाए मच्छीए
 कुच्चिसि उववण्णाओ, एगे देवलोगेसु उववण्णे, एगे सुकुले पच्चायाए, अबसेसा
 उस्सणं णरगतिरिक्खजोणिएसु उववण्णा ॥ ३०० ॥ कम्हा णं भंते ! सक्के
 देविदे देवराया चमरे य असुरिदे असुरकुमारराया कूणियस्स रण्णो साहेज्जं दल-
 इत्था ? गोयमा ! सक्के देविदे देवराया पुव्वसंगइए चमरे असुरिदे असुर-
 कुमारराया परियायसंगइए, एवं खलु गोयमा ! सक्के देविदे देवराया चमरे
 ष असुरिदे असुरकुमारराया कूणियस्स रण्णो साहिज्जं दलइत्था ॥ ३०१ ॥
 बहुजणे णं भंते ! अण्णमण्णस्स एवमाइक्खइ जाव परूवेइ एवं खलु बहुवे
 मणुस्ता अण्णयरेसु उच्चावएसु संगामेसु अभिमुहा चेव पहया समाणा काल-
 मासे कालं किच्चा अण्णयरेसु देवलोएसु देवत्ताए उववत्तारो भवंति । से कह-
 मेयं भंते ! एवं ? गोयमा ! जणं से बहुजणो अण्णमण्णस्स एवं आइक्खइ
 जाव उववत्तारो भवंति जे ते एवमाहंसु मिच्छं ते एवमाहंसु, अहं पुण गोयमा !
 एवमाइक्खामि जाव परूवेमि—एवं खलु गोयमा ! तेणं कालेणं तेणं समएणं
 वेसाली णामं णयरी होत्था, वण्णओ, तत्थ णं वेसालीए णयरीए वरुणे णामं
 णागणत्तुए परिवसइ अइडे जाव अपरिभूए समणोवासए अभिगयजीवाजीवे जाव
 पडिलाभेमाणे छट्ठंछट्ठेणं अण्णक्खत्तेणं तवोक्कमेणं अप्पाणं भांवेमाणे विहरइ ।
 तए णं से वरुणे णागणत्तुए अण्णया कयाइ रायाभिओगेणं गणाभिओगेणं बलाभि-

आगेणं रहमुसले संगामे आणत्ते समाणे छट्टुभत्तिए अट्टुमभत्तं अणुवट्टेइ
 अट्टुमभत्तं अणुवट्टेत्ता कोडुंबियपुरिसे सहावेइ २ एवं वयासी-खिप्पामेव भो
 देवाणुप्पिया ! चाउघटं आसरहं जूत्तामेव उवट्टावेह ह्यगयरहपवर० जाव
 सण्णाहेत्ता मम एयमाणत्तियं पच्चप्पिणह । तए णं ते कोडुंबियपुरिसा जाव पडि-
 सुजेत्ता खिप्पामेव सच्छत्तं सज्जयं जाव उवट्टावेत्ति ह्यगयरह जाव सण्णाहेत्ति २
 जेणेव वरुणे णागणत्तुए जाव पच्चप्पिणत्ति । तए णं से वरुणे णागणत्तुए जेणेव
 भज्जणघरे तेणेव उवागच्छइ जहा कूणिओ जाव पायच्छित्ते सव्वालंकारविभूसिए
 सण्णद्धवद्धे सकोरेंटमल्लदामेणं जाव धरिज्जमाणेणं अणेगगणनाथग जाव दूयसंधि-
 चालसाद्धि संपरिवुडे मज्जणघराओ पडिणिक्वमइ पडिणिक्वमिन्ता जेणेव बाहि-
 रिया उवट्टाणसाला जेणेव चाउघटं आसरहे तेणेव उवागच्छइ उवागच्छित्ता
 चाउघटं आसरहं दुरूहइ २ ह्यगयरह जाव संपरिवुडे महया भडचडगर०
 जाव परिक्खित्ते जेणेव रहमुसले संगामे तेणेव उवागच्छइ २ त्ता रहमुसलं
 संगामं ओयाए । तए णं से वरुणे णागणत्तुए रहमुसलं संगामं ओयाए समाणे
 अयमेयाखुवं अभिग्गहं अभिगिण्हइ-कप्पइ मे रहमुसलं संगामं संगामेमाणस्स
 जे पुंविं पहणइ से पडिहणित्तए अबसेसे णो कप्पइ त्ति, अयमेयाखुवं अभिग्गहं
 अभिगेण्हइ अभिगेण्हित्ता रहमुसलं संगामं संगामेइ । तए णं तस्स वरुणस्स णाग-
 णत्तुयस्स रहमुसलं संगामं संगामेमाणस्स एगे पुरिसे सरिसए सरिसत्तए सरि-
 सव्वए सरिसभंडमत्तोवगरणे रहेणं पडिरहं हव्वमागए । तए णं से पुरिसे वरुणं
 णागणत्तुयं एवं वयासी-पहण भो वरुणा ! णागणत्तुया ! प० २ । तए णं से
 वरुणे णागणत्तुए तं पुरिसं एवं वयासी-णी खलु मे कप्पइ देवाणुप्पिया । पुंविं
 अहयस्स पहणित्तए, तुमं चेव णं पुंविं पहणाहि । तए णं से पुरिसे वरुणेणं णाग-
 णत्तुएणं एवं वृत्ते समाणे आमुहत्ते जाव मिसिमिसेमाणे धणुं परामुसइ २
 उसुं परामुसइ उसुं परामुसित्ता ठाणं ठाइ ठाणं ठिच्चा आययकण्णाययं उसुं
 करेइ आययकण्णाययं उसुं करेत्ता वरुणं णागणत्तुयं गाढप्पहारी करेइ । तए णं
 से वरुणे णागणत्तुए तेणं पुरिसेणं गाढप्पहारीकए समाणे आमुहत्ते जाव मिसि-
 मिसेमाणे धणुं परामुसइ धणुं परामुसित्ता उसुं परामुसइ उसुं परामुसित्ता
 आययकण्णाययं उसुं करेइ आययकण्णाययं० २ तं पुरिसं एगाहच्चं कुडाहच्चं
 जीवियाओ ववरोवेइ । तए णं से वरुणे णागणत्तुए तेणं पुरिसेणं गाढप्पहारीकए

समाणे अत्थामे अबले अवीरिए अपुरिसक्कारपरवकमे अधारणिज्जमिति कट्टु
 तुरए णिगिण्हइ तुरए णिगिण्हिता रहं परावत्तेइ रहं परावत्तिता रहमुत्तथा
 संगामाओ पडिण्णिकखमइ २ एगंतमंतं अवक्कमइ एगंतमंतं अवक्कमिता तुरए
 णिगिण्हइ २ रहं ठवेइ २ ता रहाओ पच्चोसुहइ रहाओ पच्चोसुहिता तुरए मोएइ
 तुरए मोएत्ता तुरए विसज्जेइ २ ता दव्वसंथारगं संथरइ २ ता पुरत्थामि-
 मुहे दुरुहइ दव्वसंसं २] पुरत्थामिमुहे संपलियं कणिसण्णे करयत्त जाव कट्टु
 एवं जयासी-णमोत्थु णं अरिहंताणं जाव संपत्ताणं णमोत्थु णं समणस्स भग-
 वओ महावीरस्स आइगरस्स जाव संपाविडकामस्स मम धम्मपारियस्स धम्मो-
 वएसगस्स वंदामि णं भगवंतं तत्तमयं इहगए पासड मे णे भगवं तत्तमए जाव
 वंदइ णमंसइ २ एवं जयासी-पुंविपि णं मए समणस्स भगवओ महावीरस्स
 अंतिए थूलए पाणाइवाए पच्चक्खाए जावज्जीवाए एवं जाव थूलए परिगहे
 पच्चक्खाए जावज्जीवाए, इयाणि पि णं अहं तस्सेव भगवओ महावीरस्स
 अंतियं सव्वं पाणाइवायं पच्चक्खाणि जावज्जीवाए एवं जहा खंदओ
 जाव एयंपि णं चरमेहिं ऊससणीसासेहिं वोसिरामिं त्ति कट्टु सण्णाहपट्टं मुयइ
 सण्णाहपट्टं मुइत्ता सल्लुद्धरणं करेइ सल्लुद्धरणं करेत्ता आत्तोइपरडिक्कंते
 समाहिपत्ते आणुपुव्वीए कालगए । तए णं तस्स वरुणस्स णागणत्तुयस्स एये
 पियवालवयंसए रहमुत्तलं संगामं संगामेमाणे एयेणं पुरिसेणं गाढप्पहारीकए
 समाणे अत्थामे अबले जाव अधारणिज्जमिति कट्टु वरुणं णागणत्तुयं रहमुत्त-
 लाओ संगामाओ पडिण्णिकखममाणं पासइ पासित्ता तुरए णिगिण्हइ तुरए णिगे-
 ण्हिता जहा वरुणे जाव तुरए विसज्जेइ पडसंथारगं दुरुहइ पडसंथारगं दुरुहिता
 पुरत्थामिमुहे जाव अज्जित कट्टु एवं जयासी-जाइं णं भंते ! मम पियवाल-
 वयंसस्स वरुणस्स णागणत्तुयस्स सीलाइं जयाइं गुणाइं वेरमणाइं पच्चक्खाण-
 पोसहोववासाइं ताइं णं ममं पि भवंतुत्तिकट्टु सण्णाहपट्टं मुयइ २ सल्लुद्धरणं
 करेइ सल्लुद्धरणं करेत्ता आणुपुव्वीए कालगए । तए णं तं वरुणं णागणत्तुयं
 कालगयं जाणित्ता अहासणिहिं हि वाणसंतरेहिं देवेहिं दिव्वे तुरभिग्घोदग-
 धासे वुट्ठे वसद्धवण्णे कुमुभे णिवाडिए दिव्वे य गीयगंधव्वणिणाए कए यात्रि
 होत्था । तए णं तस्स वरुणस्स णागणत्तुयस्स तं दिव्वं देविं विद्वं देवज्जुं
 दिव्वं देवाणुभागं सुणित्ता य पासित्ता य बहूजणो अणमणस्स एवमाइवत्तइ

जाव परुवेइ-एवं खलु देवाणुप्पिया ! बहवे मणुस्सा जाव उववत्तारो भवन्ति ॥ ३०२ ॥ वरुणे णं भंते ! णागणत्तुए कालमासे कालं किञ्चा कहिं गए कहिं उववण्णे ? गोयमा ! सोहम्मे कप्पे अरुणाभे विमाणे देवत्ताए उववण्णे, तत्थ णं अत्थेगइयाणं देवाणं चत्तारि पलिओवमाइं ठिई पण्णत्ता, तत्थ णं वरुणस्स त्ति देवस्स चत्तारि पलिओवमाइं ठिई पण्णत्ता । से णं भंते ! वरुणे देवे ताओ देवत्तोगाओ आउक्खएणं भवक्खएणं ठिइक्खएणं जाव महाविदेहे वासे सिज्जिहइ जाव अंतं करेहिइ । वरुणस्स णं भंते ! णागणत्तुयस्स पियबालवयंसए कालमासे कालं किञ्चा कहिं गए कहिं उववण्णे ? गोयमा ! सुकुले पच्चायाए । से णं भंते ! तओहितो अणंतरं उववट्ठित्ता कहिं गच्छिहिइ कहिं उववज्जिहिइ ? गोयमा ! महाविदेहे वासे सिज्जिहिइ जाव अंतं काहिइ । सेवं भंते ! सेवं भंते ! त्ति ॥ ३०३ ॥

सत्तमं सयं दसमो उद्देशो

तेणं कालेणं तेणं समएणं रायगिहे णामं णयरे होत्था वण्णओ, गुणसिलए चेइए वण्णओ, जाव पुढविंसिलापट्टओ वण्णओ । तस्स णं गुणसिलयस्स चेइयस्स अदूरसामंते बहवे अण्णउत्थिया परिवसन्ति, तंजहा-कालोयाई सेलोयाई सेबालोयाई उइए णामुदए णम्मुदए अण्णवालए सेलवालए संखवालए सुहत्थी गाहावई । तए णं तेसि अण्णउत्थियाणं अण्णया कयाइं एगयओ समु-वागयाणं सण्णिविट्ठाणं सण्णिसण्णाणं अयमेयारूवे मिहो कहासमुल्लावे समु-प्पज्जित्था-एवं खलु समणे णायपुत्ते पंचं अत्थिकाए पण्णवेइ, तंजहा-धम्म-त्थिकायं जाव आगासत्थिकायं, तत्थ णं समणे णायपुत्ते चत्तारि अत्थिकाए अजीवकाए पण्णवेइ, तंजहा-धम्मत्थिकायं अधम्मत्थिकायं आगासत्थिकायं, पोगलत्थिकायं, एगं च णं समणे णायपुत्ते जीवत्थिकायं अरुविकायं जीवकायं पण्णवेइ, तत्थ णं समणे णायपुत्ते चत्तारि अत्थिकाए अरुविकाए पण्णवेइ, तंजहा-धम्मत्थिकायं अधम्मत्थिकायं आगासत्थिकायं जीवत्थिकायं, एगं च णं समणे णायपुत्ते पोगलत्थिकायं रूविकायं अजीवकायं पण्णवेइ, से कहमेयं मण्णे एव ? तेणं कालेणं तेणं समएणं समणे भगवं महावीरे जाव गुणसिलए चेइए समोसडे जाव परिसा पडिगया । तेणं कालेणं तेणं समएणं समणस्स

भगवओ महावीरस्स जेट्ठे अतिवासी इंदभूई णामं अणगारे गोयमगोत्तेणं एवं जहा बिइयसए णियंठुहेसए जाव भिक्खायरियाए अडमाणे अहापज्जत्तं भत्तपाणं पडिग्गाहिता रायगिहाओ जाव अतुरियमच्चवलमसंमंतं जाव रियं सोहेमाणे-सोहेमाणे तेसि अण्णउत्थियाणं अदूरसामंतेणं वीइवयइ । तए णं ते अण्णउत्थिया भगवं गोयमं अदूरसामंतेणं वीइवयमाणं पातति पासेत्ता अण्णमण्णं सदावेति अण्णमण्णं सदावेत्ता एवं वयासी-एवं खलु देवानुप्पिया ! अम्हं इमा कहा अविप्पकडा अयं च णं गोयमे अम्हं अदूरसामंतेणं वीइवयइ तं सेयं खलु देवानुप्पिया ! अम्हं गोयमं एयमट्ठं पुच्छित्तए त्तिकट्टु अण्णमण्णस्स अंतिए एयमट्ठं पडिसुणेति २ ता जेणेव भगवं गोयमे तेणेव उवागच्छति तेणेव उवागच्छत्ता ते भगवं गोयमं एवं वयासी-एवं खलु गोयमा ! तत्र धम्मोवएसए समणे णायपुत्ते पंच अत्थिकाए पण्णवेइ, तंजहा-धम्मत्थिकायं जाव अगासत्थिकायं, तं चेव जाव रुविकायं अजीवकायं पण्णवेइ से कहमेयं भंते ! गोयमा ! एवं ? तए णं से भगवं गोयमे ते अण्णउत्थिए एवं वयासी-णो खलु वयं देवानुप्पिया ! अत्थिभावं णत्थि त्ति वयामो णत्थिभावं अत्थित्ति वयामो, अम्हे णं देवानुप्पिया ! सव्वं अत्थिभावं अत्थित्ति वयामो सव्वं णत्थिभावं णत्थित्ति वयामो, तं चेयसा खलु तुब्भे देवानुप्पिया ! एयमट्ठं सयमेव पच्चुवेक्खह त्तिकट्टु ते अण्णउत्थिए एवं वयासी-एवं २, जेणेव गुणसिलए चेइए जेणेव समणे भगवं महावीरे एवं जहा णियंठुहेसए जाव भत्तपाणं पडिदंसेइ भत्तपाणं पडिदंसेत्ता समणं भगवं महावीरं वंदइ णमंसइ २ णच्चवासणे जाव पच्चुवासइ । तेणं कालेणं तेणं समएणं समणे भगवं महावीरे महाकहापडिवणे यावि होत्था, कालोदाई य तं देसं हव्वमागए, कालोदाईति समणे भगवं महावीरे कालोदाई एवं वयासी-से णूणं कालोदाई ! अण्णया कयाइ एगयओ सहियाणं समुवागयाणं सण्णिविट्ठाणं तहेव जाव से कहमेयं मणे एवं ? से णूणं कालोदाई ! अट्ठे समट्ठे ? हुंता ! अत्थि । तं सच्चे णं एसमट्ठे कालोदाई ! अहं पंचत्थिकायं पण्णवेमि, तंजहा-धम्मत्थिकायं जाव पोग्गलत्थिकायं, तत्थ णं अहं चत्तारि अत्थिकाए अजीवत्थिकाए अजीवत्ताए पण्णवेमि तहेव जाव एगं च णं अहं पोग्गलत्थिकायं रुविकायं पण्णवेमि । तए णं से कालोदाई समणं भगवं महावीरं एवं वयासी-एयंसि णं भंते ! धम्म-

स्थिकायंसि अधम्मस्थिकायंसि आगासस्थिकायंसि अरुविकायंसि अजीवकायंसि च्चविकया केइ आसइत्तए वा १ सइत्तए वा २ चिट्ठइत्तए वा ३ णिसीइत्तए वा ४ तुयट्ठित्तए वा ५ ? णो इणट्ठे० कालोदाई ! एयंसि णं पोग्गलस्थिकायंसि रूविकायंसि अजीवकायंसि च्चविकया केइ आसइत्तए वा सइत्तए वा जाव तुयट्ठित्तए वा । एयंसि णं भंते ! पोग्गलस्थिकायंसि रूविकायंसि अजीवकायंसि जीवाणं पावा कम्मा पावकम्मफलविवागसंजुत्ता कज्जति ? णो इणट्ठे समट्ठे । कालोदाई ! एयंसि णं जीवस्थिकायंसि अरुविकायंसि जीवाणं पावा कम्मा पावफलविवागसंजुत्ता कज्जति ? हुंता ! कज्जति । एत्थ णं से कालोदाई संबुद्धे समणं भगवं महावीरं वंदइ णमंसइ वंदित्ता णमंसित्ता एवं वयासी-इच्छामि णं भंते ! तुब्भं अंतियं धम्मं णिसामेत्तए एवं जहा खंदए तहेव पव्वइए तहेव एक्कारस अंगाइ जाव विहरइ ॥ ३०४ ॥ तए णं समणे भगवं महावीरे अण्णया कयाइ रायगिहाओ णयरओ गुणसिलाओ चेइयाओ पडिणिवल्लमइ २ बहिंया जणवयविहारं विहरइ । तेणं कालेणं तेणं समएणं रायगिहे णामं णयेरे गुणसिलए णामं चेइए होत्था । तए णं समणे भगवं महावीरे अण्णया कयाइ जाव समोसडे० परिसा पडिगया, तए णं से कालोदाई अणगारे अण्णया कयाइ जेणेव समणे भगवं महावीरे तेणेव उवागच्छइ २ समणं भगवं महावीरं वंदइ णमंसइ वंदित्ता णमंसित्ता एवं वयासी-अत्थि णं भंते ! जीवाणं पावा कम्मा पावफलविवागसंजुत्ता कज्जति ? हुंता ! अत्थि । कहण्णं भंते ! जीवाणं पावा कम्मा पावफलविवागसंजुत्ता कज्जति ? कालोदाई ! से जहाणामए केइ पुरिसे मणुण्णं थालीपागमुद्धं अट्टारसवंजणाउलं विससंमिस्सं भोयणं भुज्जेज्जा, तस्स णं भोयणस्स आवाए भइए भवइ, तओ पच्छा परिणममाणे परि०दुरुवत्ताए दुग्ंधत्ताए जहा महासवए जाव भुज्जो २ परिणमइ, एवामेव कालोदाई ! जीवाणं पाणाइवाए जाव मिच्छादंसणसल्ले तस्स णं आवाए भइए भवइ तओ पच्छा वि परिणममाणे २ दुरुवत्ताए जाव भुज्जो २ परिणमइ, एवं खलु कालोदाई ! जीवाणं पावा कम्मा पावफलविवागसंजुत्ता कज्जति ? अत्थि णं भंते ! जीवाणं कल्लाणा कम्मा कल्लाणफलविवागसंजुत्ता कज्जति ? हुंता ! अत्थि । कहण्णं भंते ! जीवाणं कल्लाणा कम्मा जाव कज्जति ? कालोदाई ! से जहाणामए केइ पुरिसे मणुण्णं थालीपा-

गसुद्धं अट्टारसत्तंजणाउलं ओसहमिस्सं भोयणं भुञ्जेज्जा तस्स णं भोयणस्स आवाए णो भद्दए भवइ, तओ पच्छा परिणममाणे २ सुरूवत्ताए सुवण्णत्ताए जाव सुहत्ताए णो दुक्खत्ताए भुञ्जो २ परिणमइ, एवामेव कालोदाई ! जीवाणं पाणाइवाप्रवेरमणे जाव परिगहवेरमणे कोहविवेगे जाव मिच्छादंस-णसल्लविवेगे तस्स णं आवाए णो भद्दए भवइ तओ पच्छा परिणममाणे २ सुरूवत्ताए जाव णो दुक्खत्ताए भुञ्जो २ परिणमइ । एवं खलु कालोदाई ! जीवाणं कल्लाणा कम्मा जाव कज्जति ॥३०५॥ दो भंते ! पुरिसा सरिसया जाव सरिसभंडमतोवगरणा अण्णमण्णेणं सद्धि अगणिकायं समारंभंति तत्थ णं एमे पुरिसे अगणिकायं उज्जालेइ एगे पुरिसे अगणिकायं णिग्वावेइ, एएसि णं भंते ! दोहं पुरिसाणं कयरे पुरिसे महाकम्मतराए चेव महाकिरि-तराए चेव महासवतराए चेव महावेयणतराए चेव कयरे वा पुरिसे अप्पकम्म-तराए चेव जाव अप्पवेयणतराए चेव ? जे वा से पुरिसे अगणिकायं उज्जालेइ जे वा से पुरिसे अगणिकायं णिग्वावेइ ? कालोदाई ! तत्थ णं जे से पुरिसे अगणिकायं उज्जालेइ से णं पुरिसे महाकम्मतराए चेव जाव महावेयणतराए चेव, तत्थ णं जे से पुरिसे अगणिकायं णिग्वावेइ से णं पुरिसे अप्पकम्मतराए चेव जाव अप्पवेयणतराए चेव । से केणट्ठेणं भंते ! एवं वुच्चइ-तत्थ णं जे से पुरिसे जाव अप्पवेयणतराए चेव ? कालोदाई ! तत्थ णं जे से पुरिसे अगणि-कायं उज्जालेइ से णं पुरिसे बहुतरायं पुढविक्कायं समारंभइ बहुतरायं आउ-क्कायं समारंभइ अप्पतरायं तेउकायं समारंभइ बहुतरायं वाउकायं समारंभइ बहुतरायं वणस्सइकायं समारंभइ बहुतरायं तसकायं समारंभइ । तत्थ णं जे से पुरिसे अगणिकायं णिग्वावेइ से णं पुरिसे अप्पतरायं पुढविक्कायं समारंभइ अप्पतरायं आउक्कायं समारंभइ बहुतरायं तेउक्कायं समारंभइ अप्पतरायं वाउ-क्कायं समारंभइ अप्पतरायं वणस्सइकायं समारंभइ अप्पतरायं तसकायं समारं-भइ, से तेणट्ठेणं कालोदाई ! जाव अप्पवेयणतराए चेव ॥ ३०६ ॥ अत्थि णं भंते ! अचित्तावि पोग्गला ओभासंति उज्जोवेति तवेति पभासेति ? हुंता ! अत्थि । कयरे णं भंते ! अचित्तावि पोग्गला ओभासंति जाव पभासेति ? कालो-दाई ! कुद्धास अणगारस्स तेयलेस्सा णिसट्ठा समाणो दूरं गया दूरं णिवयइ देसं गया देसं णिवयइ जिहं-जिहं च णं सा णिवयइ तीहं-तीहं च णं ते अचि-त्तावि पोग्गला ओभासंति जाव पभासंति, एएणं कालोदाई ! ते अचित्तावि

भोगला ओभासंति जाव पभासंति । तए णं से कालोदाई अणगारे समणं भगवं
महावीरं वंदइ णंमंसइ २ बर्हीहि चउत्थछट्टट्टम जाव अप्पाणं भावेमाणे जहा
पढमसए कालासवेसियपुत्ते जाव सव्वदुक्खप्पहीणे । सेवं भंते ! २ त्ति ॥३०७॥

सत्तमं सयं समत्तं

॥ अट्टमं सयं पढमो उद्देशो ॥

गाहा—पोग्गल १ आसीविस २ रुक्ख ३ किरिय ४ आजीव ५
कासुय ६ मदत्ते ७ । पडिणीय ८ बंध ९ आराहणा य १० दस अट्टमंमि सए
॥ १ ॥ रायगिहे जाव एवं वयासी—कइविहा णं भंते ! पोग्गला पण्णत्ता ?
गोयमा ! तिविहा पोग्गला पण्णत्ता, तंजहा—पओगपरिणया मीससापरिणया
बीससापरिणया ॥३०८॥ पओगपरिणया णं भंते ! पोग्गला कइविहा पण्णत्ता ?
गोयमा ! पंचविहा पण्णत्ता, तंजहा—एंगिदियपओगपरिणया बेइदियपओग-
परिणया जाव पंचिदियपओगपरिणया । एंगिदियपओगपरिणया णं भंते !
पोग्गला कइविहा पण्णत्ता ? गोयमा पंचविहा पण्णत्ता, तंजहा—पुढविककाइय-
एंगिदियपओगपरिणया जाव वणस्सइकाइयएंगिदियपओगपरिणया । पुढवि-
क्काइयएंगिदियपओगपरिणया णं भंते ! पोग्गला कइविहा पण्णत्ता ? गोयमा !
दुविहा पण्णत्ता, तंजहा—सुहुमपुढविककाइयएंगिदियपओगपरिणया बाधरपुढवि-
क्काइयएंगिदियपओगपरिणया य, आउक्काइयएंगिदियपओगपरिणया एवं चेव,
एवं बुयओ भेओ जाव वणस्सइकाइयएंगिदियपओगपरिणया य । बेइदियपओग-
परिणयाणं पुच्छा, गोयमा ! अणेगविहा पण्णत्ता, एवं तेइदियचउरिदियपओगपरि-
णयावि । पंचिदियपओगपरिणयाणं पुच्छा, गोयमा ! चउत्थिविहा पण्णत्ता, तंजहा—
णेरइयपंचिदियपओगपरिणया तिरिक्ख० एवं भणुस्स० देवपंचिदिय० । णेरइय
पंचिदियपओगपरिणयाणं पुच्छा, गोयमा ! सत्तविहा पण्णत्ता, तंजहा—रयणप्प-
भापुढविणेरइयपंचिदियपओगपरिणया वि जाव अहेसत्तमपुढविणेरइयपंचिदिय-
पओगपरिणया वि । तिरिक्खजोणियपंचिदियपओगपरिणयाणं पुच्छा, गोयमा !
तिविहा पण्णत्ता, तंजहा—जलयरतिरिक्खजोणियपंचिदिय० थलयरतिरिक्ख-
जोणियपंचिदिय० खहयरतिरिक्खजोणियपंचिदिय० । जलयरतिरिक्खजोणिय-
पंचिदियपओगपरिणयाणं पुच्छा, गोयमा ! दुविहा प०, तंजहा—संमुच्छिमजल-

थर०, गम्भवक्कंतियजलथर० । थलथरतिरिक्ख० पुच्छा, गोयमा ! दुविहा प०, तंजहा—चउप्यथलथर० परिसप्पथलथर० । चउप्यथलथर० पुच्छा, गोयसा ! दुविहा प०, तंजहा—संमुच्छिमचउप्यथलथर० गम्भवक्कंतियचउप्यथलथर० । एवं एएणं अभिलावेणं परिसप्पा दुविहा प०, तंजहा—उरपरिसप्पा य भुय-परिसप्पा य, उरपरिसप्पा दुविहा प०, तंजहा—संमुच्छिमा य गम्भवक्कंतिया य, एवं भुयपरिसप्पा वि, एवं ख्हयरा वि । मणुस्सपंचिदियपओग० पुच्छा, गोयमा ! दुविहा प०, तंजहा—संमुच्छिममणुस्स० गम्भवक्कंतियमणुस्स० । देवपंचिदियपओग० पुच्छा, गोयमा ! चउव्विहा पणत्ता, तंजहा—भवणवासि-देवपंचिदियपओग० एवं जाव वेमाणिम्या । भवणवासिदेवपंचिदिय० पुच्छा, गोयमा ! दसविहा प०, तंजहा—अंसुरकुमार० जाव थणियकुमार० । एवं एएणं अभिलावेणं अट्टविहा वाणमंतरा पिसाया जाव गंधंवा, जोइसिया पंचविहा प०, तंजहा—चंदविमाणजोइसिया जाव ताराविमाणजोइसियदेवा०, वेमाणिया दुविहा पणत्ता, तंजहा—कप्पोववण्णग० कप्पाईयवेमाणिधा, कप्पोवगा बुवात्तसविहा पणत्ता, तंजहा—सोहम्मकप्पोवग० जाव अच्चुथकप्पोवण-वेमाणिधा । कप्पाईयग० दुविहा पणत्ता, तंजहा—गेवेज्जकप्पाईयवे० अणु-त्तरोववाइयकप्पाईयवे०, गेवेज्जकप्पाईयग० णवविहा पणत्ता, तंजहा—हेट्ठिम २ गेवेज्जकप्पाईयग० जाव उवरिम २ गेविज्जगकप्पाईय० । अणुत्तरोववाइ-यकप्पाईयवेमाणियदेवपंचिदियपओगपरिणया णं भंते ! पोमाला कइविहा प० ? गोयमा ! पंचविहा पणत्ता, तंजहा—विजयअणुत्तरोववाइय० जाव परि-णया जाव सव्वदुसिद्धअणुत्तरोववाइयदेवपंचिदिय जाव परिणया । सुहुमपुढ-विकाइयएंगिदियपओगपरिणया णं भंते ! पोमाला कइविहा पणत्ता ? गोयमा ! दुविहा पणत्ता, तंजहा— [केइ अपज्जत्तमं पढमं भणति पच्छा पज्जत्तगं] पज्जत्तगसुहुमपुढविकाइय जाव परिणया य अपज्जत्तगसुहुमपुढविकाइय जाव परिणया य, बायरपुढविकाइयएंगिदिय० एवं चेव, एवं जाव वणस्सइकाइया, एक्केक्का दुविहा पोमाला—सुहुमा य बायरा य, पज्जत्तगा अपज्जत्तगा य भाणियत्त्वा । बेइंदियपओगपरिणयाणं पुच्छा, गोयमा ! दुविहा पणत्ता, तंजहा—पज्जत्तगबेइंदियपओगपरिणया य अपज्जत्तग जाव परिणया य, एवं तेइंदिया वि एवं चउरंदिया वि । रयणप्पभापुढविणेरइय० पुच्छा, गोयमा ! दुविहा प०, तंजहा—पज्जत्तगरयणप्पभापुढवि जाव परिणया य अपज्जत्तग जाव

परिणया य, एवं जाव अहेसत्तमा । संमुच्छिमजलयरतिरिवख० पुच्छा, गोयमा !
 दुविहा प०, तंजहा—पज्जत्तग० अपज्जत्तग०, एवं गढभवक्कंतिया वि, संमुच्छिम-
 चउप्पययलयर० वि एवं चेव, एवं गढभवक्कंतिया वि, एवं जाव संमुच्छिम-
 खह्यर० गढभवक्कंतिया य, एक्केक्के पज्जत्तगा य अपज्जत्तगा य भाणियव्वा ।
 संमुच्छिममणुस्सपंचदिय० पुच्छा, गोयमा ! एभविहा प०, अपज्जत्तगा चेव ।
 गढभवक्कंतियमणुस्सपंचदिय० पुच्छा, गोयमा ! दुविहा प० तंजहा—पज्जत्तग-
 गढभवक्कंतियावि अपज्जत्तगगढभवक्कंतियावि । असुरकुमारभवणवासिदेवाणं
 पुच्छा, गोयमा ! दुविहा प०, तंजहा—पज्जत्तगअसुरकुमार० अपज्जत्तगअसुर०,
 एवं जाव थणियकुमारा पज्जत्तगा अपज्जत्तगा य । एवं एएणं अभिलावेणं
 दुयएणं भेएणं पिसाया जाव गंधव्वा, चंदा जाव ताराविमाणा सोहम्म-
 कप्पोवगा जाव अच्चुओ, हिट्ठिमहिट्ठिमगेविज्जकप्पाईय० जाव उवरिम-
 उवरिमगेविज्ज०, एवं विजयअणुसरो० जाव अपराजिय०, सब्बट्टसिद्धकप्पाईय०
 पुच्छा, गोयमा ! दुविहा प० तंजहा—पज्जत्तगसब्बट्टसिद्धअणुत्तरो० अपज्जत्तग-
 सब्बट्ट० जाव परिणया वि, १ दंडगा । जे अपज्जत्ता सुहमपुढविकाइयएंगिदिय-
 पओगपरिणया ते ओरालियतेयाकम्मासरीरप्पओगपरिणया जे पज्जत्ता सुहम०
 जाव परिणया ते ओरालियतेयाकम्मासरीरप्पओगपरिणया एवं जाव चउरि-
 दिया पज्जत्ता, णवरं जे पज्जत्ताबायरवाउकाइयएंगिदियपओगपरिणया ते
 ओरालियवेउद्वियतेयाकम्मासरीरपओगपरिणया, सेसं तं चेव । जे अपज्जत्त-
 रयणप्पभापुढविणेरइयपंचदियपओगपरिणया ते वेउद्वियतेयाकम्मासरीरप्पओ-
 गपरिणया, एवं पज्जत्तगा वि, एवं जाव अहेसत्तमा । जे अपज्जत्तगसंमु-
 च्छिमजलयर जाव परिणया ते ओरालियतेयाकम्मासरीरप्पओगपरिणया एवं
 पज्जत्तगा वि, गढभवक्कंतिय अपज्जत्तगा एवं चेव, पज्जत्तगा णं एवं चेव,
 णवरं सरीरगाणि चत्तारि जहा बायरवाउक्काइयाणं पज्जत्तगाणं, एवं
 जहा जलयरेसु चत्तारि आलावगा भणिया एवं चउप्पयउरपरिसप्पभय-
 परिसप्पखह्यरेसुवि चत्तारि आलावगा भाणियव्वा । जे संमुच्छिममणुस्स-
 पंचदियपओगपरिणया ते ओरालियतेयाकम्मासरीरप्पओगपरिणया, एवं
 गढभवक्कंतियावि अपज्जत्तगा, पज्जत्तगावि एवं चेव, णवरं सरीरगाणि
 पंच भाणियव्वाणि । जे अपज्जत्ता असुरकुमारभवणवासि जहा णेरइया तहेव,

एवं पज्जत्तगावि, एवं दुयएणं भेएणं जाव थणियकुमारा, एवं पिसाया जाव गंधव्वा, चंदा जाव ताराविमाणा, एवं सोहम्मकप्पो जाव अच्चुओ हेट्टिम २ गेवेज्जग जाव उवरिम २ गेवज्जग, विजयअणुत्तरोववाइय० जाव सब्बट्टुसिद्धअणु० एक्केक्केणं दुयओ भेओ भाणियव्वो जाव जे पज्जत्तसव्वट्टुसिद्धअणुत्तरोववाइय जाव परिणया ते वेउच्चियतेयाकम्मासरीरपओगपरिणया, वंडगा ३ । जे अपज्जत्ता सुहुमपुढविकाइयएंगिदिय पओगपरिणया ते फांसिदियपओगपरिणया जे पज्जत्ता सुहुमपुढविकाइया एवं चेव, जे अपज्जत्ता बायरपुढविकाइया एवं चेव, एवं पज्जत्तगावि, एवं चउक्कएणं भेएणं जाव वणस्सइकाइया । जे अपज्जत्ता वेइंदियपओगपरिणया ते जिंभिदियफांसिदियपओगपरिणया जे पज्जत्ता वेइंदिया एवं चेव, एवं जाव चउररिदिया णवरं एक्केक्कं इंदियं वड्ढेयव्वं । जे अपज्जत्ता रयणप्पभापुढविणेरइयर्पिच्चिदियपओगपरिणया ते सोइंदियर्चिक्खिदियघाणिदियजिंभिदियफांसिदियपओगपरिणया, एवं पज्जत्तगावि, एवं सब्बे भाणियव्वा, तिरिक्खजोणियमणुस्स देवा जाव जे पज्जत्ता सब्बट्टुसिद्धअणुत्तरोववाइय जाव परिणया ते सोइंदियर्चिक्खिदिय जाव परिणया ४ । जे अपज्जत्ता सुहुमपुढविकाइयएंगिदियओरालियतेयाकम्मासरीरपओगपरिणया ते फांसिदियपओगपरिणया जे पज्जत्ता सुहुम० एवं चेव, बायरअपज्जत्ता एवं चेव, एवं पज्जत्तगावि, एवं एएणं अभिलावेणं जस्स जइ इंदियाणि सरीराणि य ताणि भाणियव्वाणि जाव जे पज्जत्ता सब्बट्टुसिद्धअणुत्तरोववाइय जाव देवर्पिच्चिदियवेउच्चियतेयाकम्मासरीरपओगपरिणया ते सोइंदियर्चिक्खिदिय जाव फांसिदियपओगपरिणया ५ । जे अपज्जत्ता सुहुमपुढविकाइयएंगिदियपओगपरिणया ते वण्णओ कालवण्णपरिणयावि णील० लोहिय० हासिह० सुक्किल्ल०, गंधओ सुब्भिगंधपरिणयावि दुब्भिगंधपरिणयावि, रसओ तित्तरसपरिणयावि कडुयरसपरिणयावि कसायरसप० अंबिलरसप० महुररसप०, फासओ कक्खडफासपरि० जाव लुक्खफासपरि०, संठाणओ परिमंडलसंठाणपरिणयावि वट्टुत्तंसचउरंसआययसंठाणपरिणयावि, जे पज्जत्ता सुहुमपुढविं० एवं चेव, एवं जहाणुपुव्वीए णेयव्वं जाव जे पज्जत्ता सब्बट्टुसिद्धअणुत्तरोववाइय जाव परिणया ते वण्णओ कालवण्णपरिणयावि जाव आययसंठाणपरिणयावि ६ । जे अपज्जत्ता सुहुमपुढवि० एंगिदियओरालियतेयाकम्मासरीरपओगपरिणया ते

वण्णओ कालवण्णपरि० जाव आययसंठाणपरि०, जे पज्जत्ता सुहुमपुढवि० एवं चेव, एवं जहाणुपुब्बीए णेयव्वं जस्स जइ सरीराणि जाव जे पज्जत्ता सव्वट्टुसिद्धअणुत्तरोववाइय० देवपंचदियवेउव्वियतेयाकम्मासरीरपओगपरिणया ते वण्णओ कालवण्णपरिणयावि जाव आययसंठाणपरिणयावि ७ । जे अपज्जत्ता सुहुमपुढविकाइयएंगिदियफांसिदियपओगपरिणया ते वण्णओ कालवण्णपरिणयावि जाव आययसंठाणपरिणयावि, जे पज्जत्ता सुहुमपुढवि० एवं चेव, एवं जहाणुपुब्बीए जस्स जइ इंदियाणि तस्स तइ भाणियव्वाणि जाव जे पज्जत्ता सव्वट्टुसिद्धअणुत्तरो० देवपंचदियसोइंदिय जाव फांसिदियपओगपरिणया ते वण्णओ कालवण्णपरिणयावि जाव आययसंठाणपरिणयावि ८ । जे अपज्जत्ता सुहुमपुढविककाइयएंगिदियओरालियतेयाकम्माफांसिदियपओगपरिणया ते वण्णओ कालवण्णपरिणयावि जाव आयसंठाणप०, जे पज्जत्ता सुहुमपुढवि० एवं चेव, एवं जहाणुपुब्बीए जस्स जइ सरीराणि इंदियाणि य तस्स तइ भाणियव्वाणि जाव जे पज्जत्ता सव्वट्टुसिद्धअणुत्तरोववाइय जाव देवपंचदियवेउव्वियतेयाकम्मासोइंदिय जाव फांसिदियपओगपरिणया ते वण्णओ कालवण्णपरि० जाव आययसंठाणपरिणयावि, एवं एए णव वंडगा ६॥३०६॥ मीसापरिणया णं भंते ! पोग्गला कइविहा पण्णत्ता ? गोयमा ! पंचविहा पण्णत्ता, तंजहा—एंगिदियमीसापरिणया जाव पंचदियमीसापरिणया । एंगिदियमीसापरिणया णं भंते ! पोग्गला कइविहा पण्णत्ता ? एवं जहा पओगपरिणएहि णव वंडगा भणिया एवं मीसापरिणएहि वि णव वंडगा भाणियव्वा, तहेव सव्वं णिरवसेसं, णवरं अभिलावो मीसापरिणया भाणियव्वं, सेसं तं चेव, जाव जे पज्जत्ता सव्वट्टुसिद्धअणुत्तरो० जाव आययसंठाणपरिणयावि ॥ ३१० ॥ बीससापरिणया णं भंते ! पोग्गला कइविहा पण्णत्ता ? गोयमा ! पंचविहा पण्णत्ता, तंजहा—वण्णपरिणया गंधपरिणया रसपरिणया फासपरिणया संठाणपरिणया । जे वण्णपरिणया ते पंचविहा पण्णत्ता, तंजहा—कालवण्णपरिणया जाव सुक्किल्लवण्णपरिणया, जे गंधपरिणया ते दुविहा पण्णत्ता, तंजहा—सुब्भिमंधपरिणयावि दुब्भिमंधपरिणयावि, एवं जहा पण्णवणाए तहेव णिरवसेसं जाव जे संठाणओ आययसंठाणपरिणया ते वण्णओ कालवण्णपरिणयावि जाव लुक्कफासपरिणयावि ॥ ३११ ॥ एगे भंते ! दव्वे कि पओगपरिणए मीसा-

परिणए वीससापरिणए ? गोयमा ! पओगपरिणए वा मीसापरिणए वा वीससापरिणए वा । जइ पओगपरिणए किं मणप्पओगपरिणए वड्ढपओगपरिणए कायप्पओगपरिणए ? गोयमा ! मणप्पओगपरिणए वा वड्ढपओगपरिणए वा कायप्पओगपरिणए वा । जइ मणप्पओगपरिणए किं सच्चमणप्पओगपरिणए मोसमणप्पओग० सच्चामोसमणप्पओ० असच्चामोसमणप्पओ० ? गोयमा ! सच्चमणप्पओगपरिणए वा मोसमणप्पओग० सच्चामोसमणप्पओ० असच्चामोसमणप्पओ० वा । जइ सच्चमणप्पओगपरिणए किं आरंभसच्चमणप्पओ० अणारंभसच्चमणप्पओगपरि० सारंभसच्चमणप्पओग० असारंभसच्चमणप्पओ० समारंभसच्चमणप्पओगपरि० असमारंभसच्चमणप्पओगपरिणए ? गोयमा ! आरंभसच्चमणप्पओगपरिणए वा जाव असमारंभसच्चमणप्पओगपरिणए वा । जइ मोसमणप्पओगपरिणए किं आरंभमोसमणप्पओगपरिणए वा ? एवं जहा सच्चेणं तथा मोसेण वि, एवं सच्चामोसमणप्पओगेणवि, एवं असच्चामोसमणप्पओगेणवि । जइ वड्ढपओगपरिणए किं सच्चवड्ढपओगपरिणए मोसवड्ढपओगपरिणए ? एवं जहा मणप्पओगपरिणए तथा वड्ढपओगपरिणएवि जाव असमारंभवड्ढपओगपरिणए वा । जइ कायप्पओगपरिणए किं ओरालियसरीरकायप्पओगपरिणए ओरालियमोसासरीरकायप्पओ० वेडवियसरीरकायप्पओ० वेडवियमोसासरीरकायप्पओगपरिणए आहारगसरीरकायप्पओगपरिणए आहारगमोसासरीरकायप्पओगपरिणए कम्मसरीरकायप्पओगपरिणए ? गोयमा ! ओरालियसरीरकायप्पओगपरिणए वा जाव कम्मसरीरकायप्पओगपरिणए वा । जइ ओरालियसरीरकायप्पओगपरिणए किं एंगिदियओरालियसरीरकायप्पओगपरिणए एवं जाव पंचिदियओरालिय जाव परि० ? गोयमा ! एंगिदियओरालियसरीरकायप्पओगपरिणए वा बेड्ढिदिय जाव परिणए वा जाव पंचिदिय जाव परिणए वा । जइ एंगिदियओरालियसरीरकायप्पओगपरिणए किं पुढविवकाइयएंगिदिय जाव परिणए ? जाव वणस्सइकाइयएंगिदियओरालियसरीरकायप्पओगपरिणए ? गोयमा ! पुढविवकाइयएंगिदिय जाव परिणए वा जाव वणस्सइकाइयएंगिदिय जाव परिणए वा । जइ पुढविवकाइयएंगिदियओरालियसरीर जाव परिणए किं सुहुमपुढविवकाइय जाव परिणए नायरपुढविवकाइयएंगिदिय जाव परिणए ? गोयमा ! सुहुमपुढविवकाइयएंगिदिय जाव

परिणए वा बायरपुढविककाइय जाव परिणए वा, जइ सुहुमपुढविककाइय जाव परिणए किं पञ्जत्तसुहुमपुढवि जाव परिणए अपञ्जत्तसुहुमपुढवि जाव परिणए ? गोयमा ! पञ्जत्तसुहुमपुढविककाइय जाव परिणए वा अपञ्जत्तसुहुमपुढविककाइय जाव परिणए वा, एवं बायरावि, एवं जाव वणस्सइकाइयाणं चउक्कओ भेओ, बेइंदियतेइंदियचउरिदियाणं द्रुयओ भेओ पञ्जत्तगा य अपञ्जत्तगा य । जइ पंचिदियओरालियसरीरकायप्पओगपरिणए किं तिरिक्खजोणियपंचिदियओरालियसरीरकायप्पओगपरिणए मणुस्सपंचिदिय जाव परिणए ? गोयमा ! तिरिक्खजोणिय जाव परिणए वा मणुस्सपंचिदिय जाव परिणए वा । जइ तिरिक्खजोणिय जाव परिणए किं जलयरतिरिक्खजोणिय जाव परिणए थलयरखहयर० एवं चउक्कओ भेओ जाव खहराणं । जइ मणुस्सपंचिदिय जाव परिणए किं संमुच्छिममणुस्सपंचिदिय जाव परिणए गम्भवक्कंतियमणुस्स जाव परिणए ? गोयमा ! दोमुवि । जइ गम्भवक्कंतियमणुस्स जाव परिणए किं पञ्जत्तगम्भवक्कंतिय जाव परिणए अपञ्जत्तगम्भवक्कंतियमणुस्सपंचिदियओरालियसरीरकायप्पओगपरिणए ? गोयमा ! पञ्जत्तगम्भवक्कंतिय जाव परिणए वा अपञ्जत्तगम्भवक्कंतिय जाव परिणए वा ? । जइ ओरालियमीसासरीरकायप्पओगपरिणए किं एंगिदियओरालियमीसासरीरकायप्पओगपरिणए बेइंदिय जाव परिणए जाव पंचिदियओरालिय जाव परिणए ? गोयमा ! एंगिदियओरालिय एवं जहा ओरालियसरीरकायप्पओगपरिणएणं आलावगो भणिओ तथा ओरालियमीसासरीरकायप्पओगपरिणएणवि आलावगो भाणियव्वो, णवरं बायरवाउक्काइयगम्भवक्कंतियपंचिदियतिरिक्खजोणियगम्भवक्कंतियमणुस्साणं एएसि णं पञ्जत्तापञ्जत्तगाणं सेसाणं अपञ्जत्तगाणं २ । जइ वेउव्वियसरीरकायप्पओगपरिणए किं एंगिदियवेउव्वियसरीरकायप्पओगपरिणए जाव पंचिदियवेउव्वियसरीर जाव परिणए ? गोयमा ! एंगिदिय जाव परिणए वा पंचिदिय जाव परिणए वा, जइ एंगिदिय जाव परिणए किं वाउक्काइयएंगिदिय जाव परिणए अवाउक्काइयएंगिदिय जाव परिणए ? गोयमा ! वाउक्काइयएंगिदिय जाव परिणए णो अवाउक्काइय जाव परिणए, एवं एएणं अमिलावेणं जहा ओगाहणसंठाणे वेउव्वियसरीरं भणियं तथा इहवि भाणियव्वं जाव पञ्जत्तसव्वट्टुसिद्धअणुत्तरोववाइयकप्पाईयवेमाणियदेवपंचिदियवेउव्वियसरीरकायप्प-

ओगपरिणए वा अपज्जत्तसव्वट्टसिद्धं कायप्पओगपरिणए वा ३ । जइ वेउ-
 विवयमीसासरीरकायप्पओगपरिणए कि एगिदियमीसासरीरकायप्पओगपरिणए
 जाव पंचिदियमीसासरीरकायप्पओगपरिणए ? एवं जहा वेउविवयं तथा वेउ-
 विवयमीसंगपि णवरं देवणेरइयाणं अपज्जत्तगाणं सेसाणं पज्जत्तगाणं तहेव
 जाव णो पज्जत्तसव्वट्टसिद्धअणुत्तरो० जाव पओग० अपज्जत्तसव्वट्टसिद्धअणु-
 त्तरोववाइयदेवपंचिदियवेउविवयमीसासरीरकायप्पओगपरिणए ४ । जइ आहा-
 रगसरीरकायप्पओगपरिणए कि मणुस्साहारगतरीरकायप्पओगपरिणए अमणु-
 स्साहारग जाव प० ? एवं जहा ओगाहणसंठाणे जाव इंड्रिपत्तपमत्तसंजय-
 सम्भट्टिट्ठिपज्जत्तसंखेज्जवासाउय जाव परिणए णो अणिड्डिपत्तपमत्तसंजय-
 सम्भट्टिट्ठिपज्जत्तसंखेज्जवासाउय जाव प० ५ । जइ आहारगमीसासरीरकाय-
 प्पओगप० कि मणुस्साहारगमीसासरीर० ? एवं जहा आहारगं तहेव मीस-
 गपि णिरवसेसं भाणियव्वं ६ । जइ कम्मासरीरकायप्पओगप० कि एगिदिय-
 कम्मासरीरकायप्पओगप० जाव पंचिदियकम्मासरीर जाव प० ? गोयमा !
 एगिदियकम्मासरीरकायप्पओ० एवं जहा ओगाहणसंठाणे कम्मगतस भेओ
 तहेव इहावि जाव पज्जत्तसव्वट्टसिद्धअणुत्तरोववाइय जाव वेवपंचिदियकम्मा-
 सरीरकायप्पओगपरिणए वा अपज्जत्तसव्वट्टसिद्धअणु० जाव परिणए वा ७ ।
 जइ मीसापरिणए कि मणमीसापरिणए वइमीसापरिणए कायमीसापरिणए ?
 गोयमा ! मणमीसापरिणए वा वइमीसा० वा कायमीसापरिणए वा । जइ मण-
 मीसापरिणए कि सच्चमणमीसापरिणए भोसमणमीसापरिणए ? जहा पओग-
 परिणए तथा मीसापरिणएवि भाणियव्वं णिरवसेसं जाव पज्जत्तसव्वट्टसिद्ध-
 अणुत्तरोववाइय जाव देवपंचिदियकम्मासरीरमीसापरिणए वा अपज्जत्तसव्वट्ट-
 सिद्धअणु० जाव कम्मासरीरमीसापरिणए वा । जइ वीससापरिणए कि वण्ण-
 परिणए गंधपरिणए रसपरिणए फासपरिणए संठाणपरिणए ? गोयमा ! वण्ण-
 परिणए वा गंधपरिणए वा रसपरिणए वा फासपरिणए वा संठाणपरिणए वा,
 जइ वण्णपरिणए कि कालवण्णपरिणए णील जाव सुक्किल्लवण्णपरिणए ?
 गोयमा ! कालवण्णपरिणए वा जाव सुक्किल्लवण्णपरिणए वा । जइ ग्रंथपरि-
 णए कि सुब्भिमगंधपरिणए दुब्भिमगंधपरिणए ? गोयमा ! सुब्भिमगंधपरिणए वा
 दुब्भिमगंधपरिणए वा । जइ रसपरिणए कि तित्तरसपरिणए ५, पुच्छा, गोयमा !

तितरसपरिणए वा जाव महुररसपरिणए वा, जइ फासपरिणए कि कक्खडफास-
परिणए जाव लुक्खफासपरिणए ? गोयमा । कक्खडफासपरिणए वा जाव
लुक्खफासपरिणए वा, जइ संठाणपरिणए पुच्छा, गोयमा ! परिमंडलसंठाणपरि-
णए वा जाव आययसंठाणपरिणए वा ॥ ३ १ २ ॥ दो भंते ! द्वा कि पओगपरिणया
मीसापरिणया वीससापरिणया ? गोयमा ! पओगपरिणया वा १ मीसापरिणया
वा २ वीससापरिणया वा ३ अहवा एगे पओगपरिणए एगे मीसापरिणए ४
अहवेगे पओगप० एगे वीससापरि० ५ अहवा एगे मीसापरिणए एगे वीससापरि-
णए एवं ६ । जइ पओगपरिणया कि मणप्पओगपरिणया वइप्पओग० कायप्प-
ओगपरिणया ? गोयमा ! मणप्पओ० वइप्पओगप० कायप्पओगपरिणया वा अहवेगे
मणप्पओगप० एगे वइप्पओगप० अहवेगे मणप्पओगपरिणए एगे कायप०, अहवेगे
वइप्पओगप० एगे कायप्पओगपरि०, जइ मणप्पओगप० कि सच्चमणप्पओगप०
४ ? गोयमा ! सच्चमणप्पओगपरिणया वा जाव असच्चाओसमणप्पओगप०
वा १ अहवा एगे सच्चमणप्पओगपरिणए एगे ओसमणप्पओगपरिणए १ अहवा
एगे सच्चमणप्पओगप० एगे सच्चाओसमणप्पओगपरिणए २ अहवा एगे
सच्चमणप्पओगपरिणए एगे असच्चाओसमणप्पओगपरिणए ३ अहवा एगे
ओसमणप्पओगप० एगे सच्चाओसमणप्पओगप० ४ अहवा एगे ओसमणप्प-
ओगप० एगे असच्चाओसमणप्पओगप० ५ अहवा एगे सच्चाओसमणप्पओगप०
एगे असच्चाओसमणप्पओगप० ६ । जइ सच्चमणप्पओगप० कि आरंभसच्च-
मणप्पओगपरिणया जाव असमारंभसच्चमणप्पओगप० ? गोयमा ! आरंभ-
सच्चमणप्पओगपरिणया वा जाव असमारंभसच्चमणप्पओगपरिणया वा, अहवा
एगे आरंभसच्चमणप्पओगप० एगे अणारंभसच्चमणप्पओगप० एवं एएणं गम-
एणं दुयसंजोएणं णेयव्वं, सव्वे संजोगा जत्थ जत्तिया उट्ठेति ते भाणियव्वा
जाव सव्वट्ठसिद्धगइ । जइ मीसाप० कि मणमीसाप० ? एवं मीसापरि० वि ।
जइ वीससापरिणया कि वण्णपरिणया गंधप० ? एवं वीससापरिणयावि जाव
अहवा एगे चउरंसंठाणपरि० एगे आययसंठाणपरिणए वा । तिग्गि भंते !
द्वा कि पओगपरिणया मीसाप० वीससाप० ? गोयमा ! पओगपरिणया
वा मीसापरिणया वा वीससापरिणया वा । अहवा एगे पओगपरिणए दो मीसा-
प० १ अहवेगे पओगपरिणए दो वीससाप० २ अहवा दो पओगपरिणया एगे

मीससापरिणए ३ अहवा दो पओगप० एगे वीससाप० ४ अहवा एगे मीसापरि-
णए दो वीससाप० ५ अहवा दो मीससाप० एगे वीससाप० ६ अहवा एगे पओ-
गप० एगे मीसापरि० एगे वीससाप० ७ । जइ पओगप० कि मणप्पओग-
परिणया वडप्पओगप० कायप्पओगप० ? गोयमा ! मणप्पओगपरिणया वा
एवं एक्कगसंजोगो दुयासंजोगो तियासंजोगो भाणियव्वो । जइ मणप्पओग-
परि० कि सच्चमणप्पओगपरिणया ४ ? गोयमा ! सच्चमणप्पओगपरिणया
वा जाव असच्चामोसमणप्पओगपरिणया वा ४, अहवा एगे सच्चमणप्पओगपरि-
णए दो मोसमणप्पओगपरिणयावा, एवं दुयासंजोगो तियासंजोगो भाणियव्वो,
एत्थवि तहेव जाव अहवा एगे तंससंठाणपरिणए वा एगे चउरंसंठाणपरिणए
वा एगे आययसंठाणपरिणए वा । चत्तारि भंते ! दब्बा कि पओगपरिणया
३ ? गोयमा ! पओगपरिणया वा मीसापरिणया वा वीससापरिणया वा,
अहवा एगे पओगपरिणए तिण्णि मीसापरिणया १ अहवा एगे पओगपरिणए
तिण्णि वीससापरिणया २ अहवा दो पओगपरिणया दो मीसापरिणया ३
अहवा दो पओगपरिणया दो वीससापरिणया ४ अहवा तिण्णि पओगपरिणया
एगे मीसापरिणए ५ अहवा तिण्णि पओगपरिणया एगे वीससापरिणए ६
अहवा एगे मीसापरिणए तिण्णि वीससापरिणया ७ अहवा दो मीसापरिणया
दो वीससापरिणया ८ अहवा तिण्णि मीसापरिणया एगे वीससापरिणए ९
अहवा एगे पओगपरिणए एगे मीसा परिणए दो वीससा परिणया १ अहवा
एगे पओगपरिणए दो मीसापरिणया एगे वीससापरिणए २ अहवा दो पओगपरि-
णया एगे मीसापरिणए एगे वीससापरिणए ३ । जइ पओगपरिणया कि मणप्प-
ओगपरिणया ३ ? एवं एएणं कमेणं पंच छ सत्त जाव दस संखेज्जा असंखेज्जा
अणंता य दब्बा भाणियव्वो दुयासंजोएणं तियासंजोएणं जाव दससंजोएणं बारस-
संजोएणं उवजुंजिऊणं जत्थ जत्तिया संजोगा उट्ठेति ते सब्बे भाणियव्वो,
एए पुण जहा णवमसए पवेसणए भणिहामो तहा उवजुंजिऊण भाणियव्वो
जाव असंखेज्जा अणंता एवं च्चेव, णवरं एक्कं पयं अब्बहिंयं, जाव अहवा अणंता
परिमंडलसंठाणपरिणया जाव अणंता आययसंठाणपरिणया ॥ ३१३ ॥ एएसि
णं भंते ! पोग्गलाणं पओगपरिणयाणं मीसापरिणयाणं वीससापरिणयाणं य

कयरे २ हितो जाव विसेसाहिया वा ? गोयमा ! सव्वत्थोवा पोगला पओग-
परिणया मीसापरिणया अणंतगुणा वीससापरिणया अणंतगुणा । सेवं भंते !
सेवं भंते ! ति ॥ ३१४ ॥

अट्टमं सयं बीओ उद्देसो

कइविहा णं भंते ! आसीविसा पणत्ता ? गोयमा ! दुविहा आसीविसा
पणत्ता, तंजहा—जाइआसीविसा य कम्मआसीविसा य । जाइआसीविसा णं
भंते ! कइविहा प० ? गोयमा ! चउव्विहा प०, तंजहा—विच्छुयजाइआसी-
विसे मंडुक्कजाइआसीविसे उरगजाइआसीविसे मणुस्सजाइआसीविसे । विच्छुय-
जाइआसीविसस्स णं भंते ! केवइए विसए पणत्तं ? गोयमा ! पभू णं विच्छुय-
जाइआसीविसे अट्टभरहूपमाणमेत्तं बोदि विसेणं विसपरिगयं विसट्टमाणं पकरे-
त्तए, विसए से विसट्टयाए णो चेव णं संपत्तीए करेंसु वा करेंति वा करिस्संति
वा १ । मंडुक्कजाइआसीविसपुच्छा, गोयमा ! पभू णं मंडुक्कजाइआसीविसे
भरहूपमाणमेत्तं बोदि विसेणं विसपरिगयं सेसं तं चेव जाव करेस्संति वा २ ।
एवं उरगजाइआसीविसस्सवि णवरं जंबुद्दीवप्पमाणमेत्तं बोदि विसेणं विसपरि-
गयं सेसं तं चेव जाव करेस्संति वा ३, मणुस्सजाइआसीविसस्सवि एवं चेव णवरं
समयखेत्तप्पमाणमेत्तं बोदि विसेणं विसपरिगयं सेसं तं चेव जाव करेस्संति वा
४ । जइ कम्मआसीविसे कि णेरइयकम्मआसीविसे तिरिक्खजोणियकम्मआसी-
विसे मणुस्सकम्मआसीविसे देवकम्मआसीविसे ? गोयमा ! णो णेरइयकम्मासी-
विसे तिरिक्खजोणियकम्मासीविसेवि मणुस्सकम्मा० देवकम्मासी०, जइ
तिरिक्खजोणियकम्मासीविसे कि एगिदियतिरिक्खजोणियकम्मासीविसे जाव
पंचिदियतिरिक्खजोणियकम्मासीविसे ? गोयमा ! णो एगिदियतिरिक्ख-
जोणियकम्मासीविसे जाव णो चउरिदियतिरिक्खजोणियकम्मासीविसे, पंचि-
दियतिरिक्खजोणियकम्मासीविसे । जइ पंचिदियतिरिक्खजोणियकम्मासीविसे
कि संमुच्छिमपंचिदियतिरिक्खजोणियकम्मासीविसे गढभवक्कंतियपंचिदियतिरि-
क्खजोणियकम्मासीविसे ? एवं जहा वेउव्वियसरोरस्स भेओ जाव पज्जत्ता-
संखेज्जवासाउयगढभवक्कंतियपंचिदियतिरिक्खजोणियकम्मासीविसे णो अपज्ज-
त्तासंखेज्जवासाउय जाव कम्मासीविसे । जइ मणुस्सकम्मासीविसे कि संमुच्छिम-
मणुस्सकम्मासीविसे गढभवक्कंतियमणुस्सकम्मासीविसे ? गोयमा ! णो संमु-

किञ्चिममणुस्सकम्मासीविसे गढभवक्कतियमणुस्सकम्मासीविसे एवं जहा वेउ-
 व्वियसरीरं जाव पज्जत्तसंखेज्जवासाउयकम्मभूमिगगढभवक्कतियमणुस्सकम्मा-
 सीविसे णो अपज्जत्ता जाव कम्मासीविसे । जइ देवकम्मासीविसे कि भवण-
 वासिदेवकम्मासीविसे जाव वेमाणियदेवकम्मासीविसे ? गोयमा । भवणवासि-
 देवकम्मासीविसे वाणमंतरं जोइसियं वेमाणियदेवकम्मासीविसेवि, जइ
 भवणवासिदेवकम्मासीविसे कि असुरकुमारभवणवासिदेवकम्मासीविसे जाव
 थणियकुमार जाव कम्मासीविसे ? गोयमा ! असुरकुमारभवणवासिदेवकम्मा-
 सीविसेवि जाव थणियकुमारं आसीविसेवि, जइ असुरकुमार जाव कम्मा-
 सीविसे कि पज्जत्तअसुरकुमार जाव कम्मासीविसे अपज्जत्तअसुरकुमारभवण-
 वासिदेवकम्मासीविसे ? गोयमा ! णो पज्जत्तअसुरकुमार जाव कम्मासीविसे
 अपज्जत्तअसुरकुमारभवणवासिदेवकम्मासीविसे, एवं थणियकुमाराणं । जइ वाण-
 मंतरदेवकम्मासीविसे कि पिसायवाणमंतरं एवं सव्वेसिपि अपज्जत्तगाणं, जोइ-
 सियाणं सव्वेसि अपज्जत्तगाणं । जइ वेमाणियदेवकम्मासीविसे कि कप्पोवग-
 वेमाणियदेवकम्मासीविसे कप्पाईयवेमाणियदेवकम्मासीविसे ? गोयमा ! कप्पो-
 वगवेमाणियदेवकम्मासीविसे णो कप्पाईयवेमाणियदेवकम्मासीविसे, जइ
 कप्पोवगवेमाणियदेवकम्मासीविसे कि सोहम्मकप्पोवं जाव कम्मासीविसे
 जाव अच्चुयकप्पोवग जाव कम्मासीविसे ? गोयमा ! सोहम्मकप्पोवग-
 वेमाणियदेवकम्मासीविसेवि जाव सहस्सारकप्पोवगवेमाणियदेवकम्मासी-
 विसेवि, णो आणयकप्पोवगं जाव णो अच्चुयकप्पोवगवेमाणियदेवकं,
 जइ सोहम्मकप्पोवग जाव कम्मासीविसे कि पज्जत्तसोहम्मकप्पोवग
 वेमाणियं अपज्जत्तसोहम्मकं ? गोयमा ! णो पज्जत्तसोहम्मकप्पोवग-
 वेमाणियं अपज्जत्तसोहम्मकप्पोवगवेमाणियदेवकम्मासीविसे, एवं जाव
 णो पज्जत्तसहस्सारकप्पोवगवेमाणियदेवकम्मासीविसे, अपज्जत्तसहस्सार-
 कप्पोवग जाव कम्मासीविसे ॥ ३१५ ॥ इत्थं णाणं छउमत्थे सव्वभावेणं
 ण जाणइ ण यासइ, तंजहा—धम्मत्थिकायं १ अधम्मत्थिकायं २ आगासुत्थि-
 कायं ३ जीवं असरीरपडिबद्धं ४ परमाणुपोगलं ५ सहं ६ गंधं ७ वायं ८
 अयं जिणे भविस्सइ ण वा भविस्सइ ९ अयं सव्वदुक्खाणं अंतं करिस्सइ ण
 वा करिस्सइ १० । एयाणि चैव उप्पण्णणागदंसणधरे अरहा जिणे केवली

सर्वभावेणं जाणइ पासइ, तंजहा—धम्मत्थिकायं जाव करेस्सइ ण वा करे-
 स्सइ ॥ ३१६ ॥ कइविहे णं भंते ! णाणे पण्णत्ते ? गोयमा ! पंचविहे
 णाणे पण्णत्ते, तंजहा—आभिणिबोहियणाणे सुयणाणे ओहिणाणे मणपज्जवणाणे
 केवलणाणे । से किं तं आभिणिबोहियणाणे ? आभिणिबोहियणाणे चउत्विहे
 पण्णत्ते, तंजहा—उग्गहो ईहा अवाओ धारणा, एवं जहा रायप्पसेणइज्जे णाणाणं
 भंओ तहेव इह भाणियव्वो जाव सेत्तं केवलणाणे । अण्णाणे णं भंते ! कइ-
 विहे पण्णत्ते ? गोयमा ! तिविहे पण्णत्ते, तंजहा—मइअण्णाणे सुयअण्णाणे
 विभंगणाणे । से किं तं मइअण्णाणे ? २ चउत्विहे पण्णत्ते, तंजहा—उग्गहो
 जाव धारणा । से किं तं उग्गहे ? २ दुविहे पण्णत्ते, तंजहा—अत्थेग्गहे य
 बंजणोगग्गहे य, एवं जहेव आभिणिबोहियणाणं तहेव, णवरं एगट्ठियवज्जं जाव
 णोइदियधारणा, सेत्तं धारणा सेत्तं मइअण्णाणे । से किं तं सुयअण्णाणे ? २ जं
 इमं अण्णाणिएहिं मिच्छाद्दिट्ठिएहिं जहा णंदीए जाव चत्तारि वेया संगोवंगा,
 सेत्तं सुयअण्णाणे ! से किं तं विभंगणाणे ? २ अणेगविहे पण्णत्ते, तंजहा—
 गामसंठिए णयरसंठिए जाव संणिवेससंठिए दीवसंठिए समुद्दसंठिए वाससंठिए
 वासहरसंठिए पव्वयसंठिए रुक्खसंठिए थुभसंठिए ह्यसंठिए गवसंठिए णरसंठिए
 किणरसंठिए किपुरिससंठिए महोरगसंठिए गंधव्वसंठिए उसभसंठिए पसुपसय-
 विहमवाणरणाणासंठाणसंठिए पण्णत्ते । जीवा णं भंते ! किं णाणी अण्णाणी ?
 गोयमा ! जीवा णाणीवि अण्णाणीवि, जे णाणी ते अत्थेगइया दुण्णाणी अत्थेगइया
 तिण्णाणी अत्थेगइया चउणाणी अत्थेगइया एगणाणी । जे दुण्णाणी ते आभिणि-
 बोहियणाणी य सुयणाणी य, जे तिण्णाणी ते अभिणिबोहियणाणी सुयणाणी
 ओहिणाणी अहवा आभिणिबोहियणाणी सुयणाणी मणपज्जवणाणी, जे चउ-
 णाणी ते आभिणिबोहियणाणी सुयणाणी ओहिणाणी मणपज्जवणाणी, जे एग-
 णाणी ते णियमा केवलणाणी । जे अण्णाणी ते अत्थेगइया दुअण्णाणी अत्थे-
 गइया तिअण्णाणी, जे दुअण्णाणी ते मइअण्णाणी य सुयअण्णाणी य, जे ति-
 अण्णाणी ते मइअण्णाणी सुयअण्णाणी विभंगणाणी । णेरइया णं भंते ! किं
 णाणी अण्णाणी ? गोयमा ! णाणीवि अण्णाणीवि । जे णाणी ते णियमा
 तिण्णाणी, तंजहा—आभिणिबोहिं० सुयणाणी ओहिणाणी, जे अण्णाणी ते
 अत्थेगइया दुअण्णाणी अत्थेगइया तिअण्णाणी, एवं तिण्णि अण्णाणि भयणाए ।
 अमुरकुमारा णं भंते ! किं णाणी अण्णाणी ? जहेव णेरइया तहेव तिण्णि

णाणाणि नियमा, तिष्णि अण्णाणाणि भयणाए, एवं जाव थणियकुमारा ।
 पुढविकाइया णं भंते किं ! णाणी अण्णाणी ? गोयमा ! णो णाणी
 अण्णाणी, जे अण्णाणी ते णियमा दुअण्णाणी—मइअण्णाणी य सुयअण्णाणी य,
 एवं जाव वणस्सइकाइया । बेइंदियाणं पुच्छा, गोयमा ! णाणीवि अण्णाणीवि,
 जे णाणी ते णियमा दुण्णाणी, तंजहा—आभिणिबोहियणाणी य सुयणाणी
 य, जे अण्णाणी ते णियमा दुअण्णाणी तं०—मइ अण्णाणी सुयअण्णाणी,
 एवं तेइंदियच्चउरिंदियावि । पंचिंदियतिरिक्खजो० पुच्छा, गोयमा ! णाणीवि
 अण्णाणीवि, जे णाणी ते अत्ये० दुण्णाणी अत्ये० तिष्णाणी एवं तिष्णि णाणा-
 णि तिष्णि अण्णाणाणि य भयणाए । मणुस्सा जहा जीवा तहेव पंच णाणाणि
 तिष्णि अण्णाणि भयणाए । वाणमंतरा जहा णे० जोइसियवेमाणियाणं तिष्णि
 णाणाणि तिष्णि अण्णाणाणि नियमा । सिद्धा णं भंते ! पुच्छा, गोयमा ! णाणी
 णो अण्णाणी, नियमा एगणाणी केवलणाणी ॥३१७॥ गिरधमइया णं भंते !
 जीवा किं णाणी अण्णाणी ? गोयमा ! णाणीवि अण्णाणीवि, तिष्णि णाणाइं
 नियमा तिष्णि अण्णाणाइं भयणाए । तिरिधगइया णं भंते ! जीवा किं णाणी
 अण्णाणी ? गोयमा ! दो णाणा दो अण्णाणा नियमा । मणुस्सगइया णं भंते !
 जीवा किं णाणी अण्णाणी ? गोयमा ! तिष्णि णाणाइं भयणाए दो अण्णाणाइं
 नियमा, देवगइया जहा गिरयगइया । सिद्धगइया णं भंते ! जीवा किं णाणी ?
 जहा सिद्धा । सइंदिया णं भंते ! जीवा किं णाणी अण्णाणी ? गोयमा ! चत्तारि
 णाणाइं तिष्णि अण्णाणाइं भयणाए । एगिंदिया णं भंते ! जीवा किं णाणी० ?
 जहा पुढविकाइया, बेइंदियतेइंदियच्चउरिंदियाणं दो णाणा दो अण्णाणा नियमा ।
 पंचिंदिया जहा सइंदिया । अणिंदिया णं भंते ! जीवा किं णाणी० ! जहा
 सिद्धा । सकाइया णं भंते ! जीवा किं णाणी अण्णाणी ? गोयमा ! पंच णाणाइं
 तिष्णि अण्णाणाइं भयणाए । पुढविकाइया जाव वणस्सइकाइया णो णाणी
 अण्णाणी नियमा दुअण्णाणी, तंजहा—मइअण्णाणी य सुयअण्णाणी य, तस-
 काइया जहा सकाइया । अकाइया णं भंते ! जीवा किं णाणी० ? जहा सिद्धा
 ३ । सुहुमा णं भंते ! जीवा किं णाणी० ? जहा पुढविकाइया । बायरा णं
 भंते ! जीवा किं णाणी० ? जहा सकाइया । णोसुहुमाणोवायरा णं भंते !
 जीवा० जहा सिद्धा ४ । पज्जता णं भंते ! जीवा किं णाणी० ? जहा सका-

इया । पञ्जत्ता णं भंते ! णेरइया कि णाणी० ? तिण्णि णाणा तिण्णि
अण्णाणा णियमा जहा णेरइया एवं जाव थणियकुमारा । पुढविकाइया जहा
एभिदिया, एवं जाव चउररदिया । पञ्जत्ता णं भंते ! पंचिदियतिरिक्खजोणिया
कि णाणी अण्णाणी ? तिण्णि णाणा तिण्णि अण्णाणा भयणाए । मणुस्सा
जहा सकाइया । वाणमंतरा जोइसिया वेमाणिया जहा णेरइया । अपञ्जत्ता
णं भंते ! जीवा कि णाणी० ? तिण्णि णाणा तिण्णि अण्णाणा भयणाए ।
अपञ्जत्ता णं भंते ! णेरइया कि णाणी अण्णाणी ? तिण्णि णाणा णियमा
तिण्णि अण्णाणा भयणाए, एवं जाव थणियकुमारा । पुढविकाइया जाव वण-
स्सइकाइया जहा एभिदिया । बेइदियाणं पुच्छा, दो णाणा दो अण्णाणा णियमा,
एवं जाव पंचिदियतिरिक्खजोणियाणं । अपञ्जत्तगा णं भंते ! मणुस्सा कि
णाणी अण्णाणी ? तिण्णि णाणाइं भयणाए दो अण्णाणाइं णियमा । वाणमंतरा
जहा णेरइया, अपञ्जत्तगाणं जोइसियवेमाणियाणं तिण्णि णाणा तिण्णि अण्णाणा
णियमा । णोपञ्जत्तगाणोअपञ्जत्तगा णं भंते ! जीवा कि णाणी० ? जहा
सिद्धा ५ । णिरयभवत्था णं भंते ! जीवा कि णाणी अण्णाणी ? जहा णिरय-
वइया । तिरियभवत्था णं भंते ! जीवा कि णाणी अण्णाणी ? तिण्णि णाणा
तिण्णि अण्णाणा भयणाए । मणुस्सभवत्था णं० जहा सकाइया । देवभवत्था
णं भंते ! जहा णिरयभवत्था । अभवत्था जहा सिद्धा ६ । भवसिद्धिया णं
भंते ! जीवा कि णाणी० ? जहा सकाइया । अभवसिद्धियाणं पुच्छा, गोयमा !
णो णाणी अण्णाणी तिण्णि अण्णाणाइं भयणाए । णो भवसिद्धिया णो अभव-
सिद्धिया णं भंते ! जीवा० जहा सिद्धा ७ । सण्णीणं पुच्छा, जहा सइदिया,
असण्णी जहा बेइदिया, णोसण्णीणोअसण्णी जहा सिद्धा ८ ॥३१८॥ कइविहा
णं भंते ! लद्धी पणत्ता ? गोयमा ! दसविहा लद्धी प०, तंजहा—णाणलद्धी
१ दंसणलद्धी २ चरित्तलद्धी ३ चरित्ताचरित्तलद्धी ४ दाणलद्धी ५ लाभलद्धी
६ भोगलद्धी ७ उवभोगलद्धी ८ वीरियलद्धी ९ इंदियलद्धी १० । णाणलद्धी
णं भंते ! कइविहा प० ? गोयमा ! पंचविहा प०, तंजहा—आभिणिबोहिय-
णाणलद्धी जाव केवलणाणलद्धी । अण्णाणलद्धी णं भंते ! कइविहा प० ?
गोयमा ! तिविहा प०, तंजहा—मइअण्णाणलद्धी सुयअण्णाणलद्धी विभंगणाण-
लद्धी । दंसणलद्धी णं भंते ! कइविहा प० ? गोयमा ! तिविहा प०, तंजहा—

सम्महंसणलद्धी मिच्छादंसणलद्धी सम्मामिच्छादंसणलद्धी । चरित्तलद्धी णं भंते ! कइविहा प० ? गोयमा ! पंचविहा प० तंजहा—सामाइयचरित्तलद्धी छेदोवट्ठावणियचरित्तलद्धी परिहारविमुद्धचरित्तलद्धी सुहुमसंपरायचरित्तलद्धी अहक्खायचरित्तलद्धी । चरित्ताचरित्तलद्धी णं भंते ! कइविहा प० ? गोयमा ! एगागारा प०, एवं जाव उवभोगलद्धी एगागारा प० । वीरियलद्धी णं भंते ! कइविहा प० ? गोयमा ! तिविहा प०, तंजहा—बालवीरियलद्धी पंडियवीरियलद्धी बालपंडियवीरियलद्धी । इंदियलद्धी णं भंते ! कइविहा प० ? गोयमा ! पंचविहा प०, तंजहा—सोइंदियलद्धी जाव फांसिदियलद्धी । णाणलद्धिया णं भंते ! जीवा किं णाणी अण्णाणी ? गोयमा ! णाणी णो अण्णाणी, अत्थेगइया दुण्णाणी, एवं पंच णाणाइं भयणाए । तस्स अलद्धिया णं भंते ! जीवा किं णाणी अण्णाणी ? गोयमा ! णो णाणी अण्णाणी अत्थेगइया दुअण्णाणी अण्णाणाइं भयणाए । आभिणिबोहियणाणलद्धिया णं भंते ! जीवा किं णाणी अण्णाणी ? गोयमा ! णाणी णो अण्णाणी, अत्थेगइया दुण्णाणी चत्तारि णाणाइं भयणाए । तस्स अलद्धिया णं भंते ! जीवा किं णाणी अण्णाणी ? गोयमा ! णाणीवि अण्णाणीवि, जे णाणी ते णियमा एगणाणी केवलणाणी, जे अण्णाणी ते अत्थेगइया दुअण्णाणी तिण्णि अण्णाणाइं भयणाए । एवं सुयणाणलद्धियावि, तस्स अलद्धियावि जहा आभिणिबोहियणाणस्स लद्धिया । ओहिणाणलद्धियाणं पुच्छा ? गोयमा ! णाणी णो अण्णाणी, अत्थेगइया तिण्णाणी अत्थेगइया चउणाणी, जे तिण्णाणी ते आभिणिबोहियणाणी सुयणाणी ओहिणाणी, जे चउणाणी ते आभिणिबोहियणाणी सुय० ओहि० मणपज्जवणाणी । तस्स अलद्धिया णं भंते ! जीवा किं णाणी० ? गोयमा ! णाणीवि अण्णाणीवि । एवं ओहिणाणवज्जाइं चत्तारि णाणाइं तिण्णि अण्णाणाइं भयणाए । मणपज्जवणाणलद्धियाणं पुच्छा, गोयमा ! णाणी णो अण्णाणी, अत्थेगइया तिण्णाणी अत्थेगइया चउणाणी, जे तिण्णाणी ते आभिणिबोहियणाणी सुयणाणी मणपज्जवणाणी, जे चउणाणी ते आभिणिबोहियणाणी सुयणाणी ओहिणाणी मणपज्जवणाणी, तस्स अलद्धियाणं पुच्छा, गोयमा ! णाणीवि अण्णाणीवि, मणपज्जवणाणवज्जाइं चत्तारि णाणाइं, तिण्णि अण्णाणाइं भयणाए । केवलणाणलद्धिया णं भंते ! जीवा किं णाणी अण्णाणी ?

गोयमा ! णाणी णो अण्णाणी, णियमा एगणाणी केवलणाणी । तस्स अलद्धियाणं पुच्छा, गोयमा ! णाणीवि अण्णाणीवि, केवलणाणवज्जाइं चत्तारि णाणाइं तिण्णि अण्णाणाइं भयणाए । अण्णाणलद्धियाणं पुच्छा, गोयमा ! णो णाणी अण्णाणी, तिण्णि अण्णाणाइं भयणाए, तस्स अलद्धियाणं पुच्छा गोयमा ! णाणी णो अण्णाणी, पंच णाणाइं भयणाए जहा अण्णाणस्स लद्धिया अलद्धिया य भणिया एवं मइअण्णाणस्स सुयअण्णाणस्स य लद्धिया अलद्धिया य भाणियव्वा । चिन्नंगणाणलद्धियाणं तिण्णि अण्णाणाइं णियमा, तस्स अलद्धियाणं पंच णाणाइं भयणाए दो अण्णाणाइं णियमा । दंसणलद्धिया णं भंते ! जीवा किं णाणी अण्णाणी ? गोयमा ! णाणीवि अण्णाणीवि, पंच णाणाइं तिण्णि अण्णाणाइं भयणाए । तस्स अलद्धिया णं भंते ! जीवा किं णाणी अण्णाणी ? गोयमा ! तस्स अलद्धिया णत्थि । सम्मदंसणलद्धियाणं पंच णाणाइं भयणाए, तस्स अलद्धियाणं तिण्णि अण्णाणाइं भयणाए । मिच्छादंसणलद्धिया णं भंते ! पुच्छा, णो णाणी अण्णाणी, तिण्णि अण्णाणाइं भयणाए, तस्स अलद्धियाणं पंच णाणाइं तिण्णि य अण्णाणाइं भयणाए, सम्माभिच्छादंसणलद्धिया अलद्धिया य जहा मिच्छादंसणलद्धिया अलद्धिया त्हेव भाणियव्वा । चरित्तलद्धिया णं भंते ! जीवा किं णाणी अण्णाणी ? गोयमा ! पंच णाणाइं भयणाए, तस्स अलद्धियाणं मणपज्जवणाणवज्जाइं चत्तारि णाणाइं तिण्णि य अण्णाणाइं भयणाए । सामाइयचरित्तलद्धिया णं भंते ! जीवा किं णाणी अण्णाणी ? गोयमा ! णाणी० केवलवज्जाइं चत्तारि णाणाइं भयणाए, तस्स अलद्धियाणं पंच णाणाइं तिण्णि य अण्णाणाइं भयणाए, एवं जहा सामाइयचरित्तलद्धिया अलद्धिया य भणिया एवं जीव अहक्खायचरित्तलद्धिया अलद्धिया य भाणियव्वा, णवरं अहक्खायचरित्तलद्धियाणं पंच णाणाइं भ० । चरित्ताचरित्तलद्धिया णं भंते ! जीवा किं णाणी अण्णाणी ? गोयमा ! णाणी णो अण्णाणी, अत्थेगइया दुण्णाणी अत्थेगइया तिण्णाणी, जे दुण्णाणी ते आभिण्णोहिण्णायो य सुयणाणी य, जे तिण्णाणी ते आभि० सुयणाणी ओहिणाणी, तस्स अलद्धियाणं पंच णाणाइं तिण्णि अण्णाणाइं भयणाए ४ । दाणलद्धियाणं पंच णाणाइं तिण्णि अण्णाणाइं भयणाए, तस्स अ० पुच्छा, गोयमा ! णाणी णो अण्णाणी, णियमा एगणाणी केवलणाणी । एवं जाव वीरियस्स लद्धि अलद्धि य भाणियव्वा । डालवीरियलद्धियाणं तिण्णि णाणाइं तिण्णि अण्णाणाइं भयणाए, तस्स

अलद्धियाणं पंच णाणाइं भयणाए । पंडियवीरियलद्धियाणं पंच णाणाइं भय-
 णाए, तस्स अलद्धियाणं मणपज्जवणाणवज्जाइं णाणाइं अण्णाणाणि तिण्णि य
 भयणाए । बालपंडियवीरियलद्धिया णं भंते ! जीवा० तिण्णि णाणाइं भय-
 णाए, तस्स अलद्धियाणं पंच णाणाइं तिण्णि अण्णाणाइं भयणाए । इंदिय-
 लद्धिया णं भंते ! जीवा किं णाणी अण्णाणी ? गोयमा ! चत्तारि णाणाइं
 तिण्णि य अण्णाणाइं भयणाए । तस्स अलद्धियाणं पुच्छा, गोयमा ! णाणी णो
 अण्णाणी णियमा एगणाणी केवलणाणी । सोइंदियलद्धियाणं जहा इंदियलद्धिया ।
 तस्स अलद्धियाणं पुच्छा, गोयमा ! णाणीवि अण्णाणीवि, जे णाणी ते अत्थे-
 गइया दुण्णाणी अत्थेगइया एगणाणी जे दुण्णाणी ते आभिणिबोहियणाणी सुय-
 णाणी, जे एगणाणी ते केवलणाणी; जे अण्णाणी ते णियमा दुअण्णाणी, तंजहा-
 मइअण्णाणी य सुयअण्णाणी य । चक्खिदियघाणिदियलद्धियाणं अलद्धियाण य
 जहेव सोइंदियलद्धिया अलद्धिया य । जिंभिदियलद्धियाणं चत्तारि णाणाइं
 तिण्णि य अण्णाणाणि भयणाए, तस्स अलद्धियाणं पुच्छा, गोयमा ! णाणीवि
 अण्णाणीवि, जे णाणी ते णियमा एगणाणी केवलणाणी, जे अण्णाणी ते णियमा
 दुअण्णाणी, तंजहा-मइअण्णाणी य सुयअण्णाणी य । फांसिदियलद्धियाणं अल-
 द्धियाणं जहा इंदियलद्धिया य अलद्धिया य ॥३१९॥ सागारोवउत्ता णं भंते !
 जीवा किं णाणी अण्णाणी ? पंच णाणाइं तिण्णि अण्णाणाइं भयणाए ।
 आभिणिबोहियणाणसागारोवउत्ता णं भंते ! चत्तारि णाणाइं भयणाए । एवं
 सुयणाणसागारोवउत्तावि । ओहिणाणसागारोवउत्ता जहा ओहिणाणलद्धिया,
 मणपज्जवणाणसागारोवउत्ता जहा मणपज्जवणाणलद्धिया, केवलणाणसागारो-
 वउत्ता जहा केवलणाणलद्धिया, मइअण्णाणसागारोवउत्ताणं तिण्णि अण्णाणाइं
 भयणाए, एवं सुयअण्णाणसागारोवउत्तावि, विभंगणाणसागारोवउत्ताणं तिण्णि
 अण्णाणाइं णियमा । अणागारोवउत्ता णं भंते ! जीवा किं णाणी अण्णाणी ?
 पंच णाणाइं तिण्णि अण्णाणाइं भयणाए । एवं चक्खुदंसणअचक्खुदंसणअणा-
 गारोवउत्तावि, णवरं चत्तारि णाणाइं तिण्णि अण्णाणाइं भयणाए । ओहिदंसण-
 अणागारोवउत्ताणं पुच्छा, गोयमा ! णाणीवि अण्णाणीवि, जे णाणी ते
 अत्थेगइया तिण्णाणी अत्थेगइया चउणाणी, जे तिण्णाणी ते आभिणिबोहिय-
 णाणी सुयणाणी ओहिणाणी, जे चउणाणी ते आभिणिबोहियणाणी जाव मण-
 पज्जवणाणी, जे अण्णाणी ते णियमा तिअण्णाणी, तंजहा-मइअण्णाणी सुय-

अण्णाणी विभंगणाणी, केवलदंसणअणागारोवउत्ता जहा केवलणाणलद्धिया । सजोगी णं भंते ! जीवा कि णाणी० ? जहा सकाइया, एवं मणजोगी वइजोगी कायजोगीवि, अजोगी जहा सिद्धा । सलेस्सा णं भंते ! जीवा कि णाणी० ? जहा-सकाइया । कण्हलेस्सा णं भंते ! ०जहा सइंदिया, एवं जाव पण्हलेसा, सुवक-लेस्सा जहा सलेस्सा, अलेस्सा जहा सिद्धा । सकसाई णं भंते ! जहा सइंदिया, एवं जाव लोहकसाई । अकसाई णं भंते ! ० ? पंच णाणाइं भयणाए । सवेयगा णं भंते ! जहा सइंदिया, एवं इत्थिवेयगावि, एवं पुरिसवेयगावि, एवं णपुंसग-वे०, अवेयगा जहा अकसाई । आहारगा णं भंते ! जीवा० ? जहा सकसाई णवरं केवलणाणपि, अणाहारगा णं भंते ! जीवा कि णाणी अण्णाणी ? मण-पज्जवणाणवज्जाइं णाणाइं अण्णाणाणि य त्तिण्णि भयणाए ॥ ३२० ॥ आभि-णिबोहियणाणस्स णं भंते ! केवइए विसए पण्णत्ते ? गोयमा ! से समासओ चउव्विहे प०, तंजहा-दव्वओ खेत्तओ कालओ भावओ । दव्वओ णं आभि-णिबोहियणाणी आएसेणं सव्वदव्वाइं जाणइ पासइ, खेत्तओ णं आभिणिबोहिय-णाणी आएसेणं सव्वखेत्तं जाणइ पासइ, एवं कालओवि, एवं भावओवि । सुयणाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं सुयणाणी उवउत्ते सव्वदव्वाइं जाणइ पासइ, एवं खेत्तओवि कालओवि, भावओ णं सुयणाणी उवउत्ते सव्वभावे जाणइ पासइ । ओहिणाणस्स णं भंते ! केवइए विसए पण्णत्ते ? गोयमा ! से समा-सओ चउव्विहे पण्णत्ते, तंजहा-दव्वओ ४, दव्वओ णं ओहिणाणी रुवि-दव्वाइं जाणइ पासइ जहा णंदीए जाव भावओ । मणपज्जवणाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं उज्जुमई अण्णत्ते अणंतपएसिए जहा णंदीए जाव भावओ । केवलणाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ खेत्तओ कालओ भावओ, दव्वओ णं केवल-णाणी सव्वदव्वाइं जाणइ पासइ एवं जाव भावओ । मइअण्णाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ खेत्तओ कालओ भावओ । दव्वओ णं मइअण्णाणी मइअण्णाणपरिगयाइं दव्वाइं जाणइ पासइ, एवं जाव भावओ मइअण्णाणी मइअण्णाणपरिगए भावे

ज्ञाणइ पासइ । सुयअण्णाणस्स णं भंते ! केवइए विसए पणत्ते ? गोयमा !
 से समासओ चउच्चिहं पणत्ते, तंजहा--दव्वओ ४, दव्वओ णं सुयअण्णाणी सुय-
 अण्णाणपरिगयाइं दव्वाइं आघवेइ पणवेइ परूवेइ, एवं खेतओ कालओ,
 भावओ णं सुयअण्णाणी सुयअण्णाणपरिगए भावे आघवेइ तं चेव । विभंग-
 णाणस्स णं भंते ! केवइए विसए पणत्ते ? गोयमा ! से समासओ चउच्चिहं
 पणत्ते, तंजहा--दव्वओ ४, दव्वओ णं विभंगणाणी विभंगणाणपरिगयाइं
 दव्वाइं ज्ञाणइ पासइ, एवं जाव भावओ णं विभंगणाणी विभंगणाणपरिगए
 भावे ज्ञाणइ पासइ ॥ ३२१ ॥ णाणी णं भंते ! णाणीति कालओ केवच्चिरं
 होइ ? गोयमा ! णाणी दुविहे पणत्ते, तंजहा--साइए वा अपज्जवसिए साइए वा
 सपज्जवसिए, तत्थ णं जे से साइए सपज्जवसिए से जहणेण अंतोमहुत्तं उक्को-
 सेण छावट्ठि सागरोवमाइं साइरेगाइं । आभिणिबोहियणाणी णं भंते ! आभिणि-
 बोहिय० एवं णाणी आभिणिबोहियणाणी जाव केवलणाणी । अण्णाणी मइ-
 अण्णाणी सुयअण्णाणी विभंगणाणी, एएसि दसह्वि सच्चिट्ठणा जहा कार्थिईए ।
 अंतरं सव्वं जहा जीवाभिगमे । अप्पाबहुगाणि तिण्णि जहा बहुवत्त्वयाए ।
 केवइया णं भंते ! आभिणिबोहियणाणपज्जवा पणत्ता ? गोयमा ! अणंता
 आभिणिबोहियणाणपज्जवा पणत्ता । केवइया णं भंते ! सुयणाणपज्जवा प० ?
 एवं चेव एवं जाव केवलणाणस्स । एवं मइअण्णाणस्स सुयअण्णाणस्स, केवइया
 णं भंते ! विभंगणाणपज्जवा प० ? गोयमा ! अणंता विभंगणाणपज्जवा प० ।
 एएसि णं भंते ! आभिणिबोहियणाणपज्जवाणं सुयणाण० ओहिणाण० मण-
 पज्जवणाण० केवलणाणपज्जवाण य कयरे २ जाव विसेसाहिया वा ? गोयमा !
 सव्वत्थोवा मणपज्जवणाणपज्जवा ओहिणाणपज्जवा अणंतगुणा सुयणाणपज्जवा
 अणंतगुणा आभिणिबोहियणाणपज्जवा अणंतगुणा केवलणाणपज्जवा अणंतगुणा ।
 एएसि णं भंते ! मइअण्णाणपज्जवाणं सुयअण्णाण० विभंगणाणपज्जवाण य
 कयरे २ जाव विसेसाहिया वा ? गोयमा ! सव्वत्थोवा विभंगणाणपज्जवा
 सुयअण्णाणपज्जवा अणंतगुणा मइअण्णाणपज्जवा अणंतगुणा । एएसि णं भंते !
 आभिणिबोहियणाणपज्जवाणं जाव केवलणाणप० मइअण्णाणप० सुयअण्णाणप०
 विभंगणाणप० कयरे २ जाव विसेसाहिया वा ? गोयमा ! सव्वत्थोवा मण-
 पज्जवणाणपज्जवा विभंगणाणपज्जवा अणंतगुणा ओहिणाणपज्जवा अणंतगुणा

सुयअण्णाणपज्जवा अणंतगुणा सुयणाणपज्जवा विसेसाहिया मइअण्णाणपज्जवा
अणंतगुणा आभिणिबोहियणाणपज्जवा विसेसाहिया केवलणाणपज्जवा अणंत-
गुणा । सेवं भंते ! सेवं भंते ! त्ति ॥ ३२२ ॥

अट्टमं सयं तइओ उट्टेसो

कइविहा णं भंते ! रुक्खा पण्णत्ता ? गोयमा ! त्तिविहा रुक्खा प०,
तंजहा—संखेज्जजीविया असंखेज्जजीविया अणंतजीविया । से किं तं संखेज्ज-
जीविया ? संखेज्ज० अणेणविहा प०, तंजहा—ताले तमाले तक्कलि तेयलि
जहा पण्णवणाए जाव णालिएरी, जे यावण्णे तहप्पगारा, सेत्तं संखेज्जजीविया ।
से किं तं असंखेज्जजीविया ? असंखेज्जजीविया दुविहा प०, तंजहा—एगट्टिया
य बहुबीयगा य । से किं तं एगट्टिया ? २ अणेणविहा प०, तंजहा—णिबंबजंबू०
एवं जहा पण्णवणाए जाव फला बहुबीयगा, सेत्तं बहुबीयगा, सेत्तं असंखेज्ज-
जीविया । से किं तं अणंतजीविया ? अणंतजीविया अणेणविहा प०, तं०—आलुए
मूलए सिग्गबेरे, एवं जहा सत्तमसए जाव सीउण्हे सिउंडी मुसुंडी, जे यावण्णे त०,
सेत्तं अणंतजीविया ॥ ३२३ ॥ अहं भंते ! कुम्मे कुम्मावलिया गोहे गोहावलिया
गोणा गोणावलिया मणुस्से मणुस्सावलिया महिसे महिसावलिया एएसि णं बुहा
वा तिहा वा संखेज्जहा वा छिण्णाणं जे अंतरा तेवि णं तेहिं जीवएसेहिं
फुडा ? हंता ! फुडा ! पुरिसे णं भंते ! अंतरे हत्थेण वा पाएण वा अंगुलि-
याए वा सलागाए वा कट्ठेण वा कलिचेण वा आमसमाणे वा संमुसमाणे वा
आलिहमाणे विलिहमाणे वा अण्णयरेंणं वा तिक्खेणं सत्थजाएणं आच्छिदमाणे
वा विच्छिदमाणे वा अगणिकाएणं वा समोडहमाणे तेसिं जीवएसाणं किंचि
आबाहं वा विबाहं वा उप्पायइ छविच्छेवं वा करेइ ? णो इणट्ठे समट्ठे, णो
खलु तत्थ सत्थं संकमइ ॥ ३२४ ॥ कइ णं भंते ! पुढवीओ पण्णत्ताओ ?
गोयमा ! अट्ट पुढवीओ पण्णत्ताओ, तंजहा—रयणप्पभा जाव अहे सत्तमा पुढवि-
ईसिपम्भारा । इमा णं भंते ! रयणप्पभापुढवी किं चरिमा अचरिमा ?
चरिमपयं निरवसेसं भाणियव्वं जाव वेमाणिया णं भंते ! फासचरिमेणं किं
चरिमा अचरिमा ? गोयमा ! चरिमावि अचरिमावि । सेवं भंते ! सेवं भंते !
त्ति भगवं गो० ॥ ३२५ ॥

अट्टमं सयं चउत्थो उद्देसो

रायगिहे जाव एवं वयासी-कइ णं भंते ! किरियाओ पण्णत्ताओ ? गोयमा ! पंच किरियाओ पण्णत्ताओ, तंजहा-काइया अहिगरणिया, एवं किरियापर्यं णिरवसेत्तं भाणियच्चं जाव मायावत्तियाओ किरियाओ विसेसा-हियाओ । सेवं भंते ! सेवं भंते ! त्ति भगवं गोयमे० ॥ ३२६ ॥

अट्टमं सयं पंचमो उद्देसो

रायगिहे जाव एवं वयासी-अजीविया णं भंते ! थेरे भगवंते एवं वयासी-समणोवासयस्स णं भंते ! सामाइयकडस्स समणोवस्सए अच्छमाणस्स केइ भंडं अवहरेज्जा से णं भंते ! तं भंडं अणुगवेसमाणे किं सयं भंडं अणुगवेसइ परायणं भंडं अणुगवेसइ ? गोयमा ! सयं भंडं अणुगवेसइ णो परायणं भंडं अणुगवेसइ । तस्स णं भंते ! तेहिं सीलच्चयगुणवेरमणपच्चक्खाणपोसहोववासेहिं से भंडे अभंडे भवइ ? हुंता ! भवइ । से केणं खाइ णं अट्ठेणं भंते ! एवं वुच्चइ सयं भंडं अणुगवेसइ णो परायणं भंडं अणुगवेसइ ? गोयमा ! तस्स णं एवं भवइ-णो मे हिरणे णो मे सुवण्णे णो मे कंसे णो मे दूसे णो मे विउलधण-कणगरयणमणिमोत्तियसंखंसिलप्पवालरत्तरयणभाईए संतसारसावएज्जे, ममत-भावे पुण से अपरिण्णाए भवइ, से तेणट्ठेणं गोयमा ! एवं वुच्चइ-सयं भंडं अणुगवेसइ णो परायणं भंडं अणुगवेसइ । समणोवासयस्स णं भंते ! सामाइय-कडस्स समणोवस्सए अच्छमाणस्स केइ जायं चरेज्जा से णं भंते ! किं जायं चरइ अजायं चरइ ? गोयमा ! जायं चरइ णो अजायं चरइ । तस्स णं भंते ! तेहिं सीलच्चयगुणवेरमणपच्चक्खाणपोसहोववासेहिं सा जाया अजाया भवइ ? हुंता ! भवइ । से केणं खाइ णं अट्ठेणं भंते ! एवं वुच्चइ-जायं चरइ णो अजायं चरइ ? गोयमा ! तस्स णं एवं भवइ-णो मे माया णो मे पिया णो मे भाया णो मे भगिणी णो मे भज्जा णो मे पुत्ता णो मे धूया णो मे सुण्हा, पेज्जवंधणे पुण से अवोच्छिण्णे भवइ, से तेणट्ठेणं गोयमा ! जाव णो अजायं चरइ ॥ ३२७ ॥ समणोवासयस्स णं भंते ! पुद्दवामेव थूलए पाणाइवाए अपच्चक्खाए भवइ से णं भंते ! पच्छा पच्चाइक्खमाणे किं करेइ ? गोयमा ! तीयं पडिक्क-मइ पडुप्पणं संवरेइ अणागयं पच्चक्खाइ । तीयं पडिक्कममाणे किं तिविहं

तिविहेण पडिक्कमइ १ तिविहं दुविहेण पडिक्कमइ २ तिविहं एगविहेण पडि-
क्कमइ ३ दुविहं तिविहेण पडिक्कमइ ४ दुविहं दुविहेण पडिक्कमइ ५ दुविहं
एगविहेण पडिक्कमइ ६ एगविहं तिविहेण पडिक्कमइ ७ एगविहं दुविहेण
पडिक्कमइ ८ एगविहं एगविहेण पडिक्कमइ ९ ? गोयमा ! तिविहं तिवि-
हेण पडिक्कमइ तिविहं दुविहेण वा पडिक्कमइ तं चेव जाव एगविहं वा
एगविहेण पडिक्कमइ । तिविहं तिविहेण पडिक्कममाणे ण करेइ ण कारवेइ
करेतं णाणुजाणइ मणसा वयसा कायसा १, तिविहं दुविहेण पडि० ण क०
ण का० करेतं णाणुजाणइ मणसा वयसा २, अहवा ण करेइ ण का० करेतं
णाणुजाणइ मणसा कायसा ३, अहवा ण करेइ ३ वयसा कायसा ४, तिविहं
एगविहेण पडि० ण करेइ ३ मणसा ५, अहवा ण करेइ ३ वयसा ६, अहवा
ण करेइ ३ कायसा ७, दुविहं ति० प० ण करेइ ण का० मणसा वयसा कायसा
८, अहवा ण करेइ करेतं णाणुजाणइ मणसा वयसा कायसा ९ अहवा ण
कारवेइ करेतं णाणुजाणइ मणसा वयसा कायसा १०, दु० दु० प० ण क० ण
का० म० व० ११, अहवा ण क० ण का० म० कायसा १२, अहवा ण क० ण
का० वयसा कायसा १५, अहवा ण करेइ करेतं णाणुजाणइ मणसा वयसा १४,
अहवा ण करेइ करेतं णाणुजाणइ मणसा कायसा १५, अहवा ण करेइ करेतं
णाणुजाणइ वयसा कायसा १६, अहवा ण कारवेइ करेतं णाणुजाणइ मणसा
वयसा १७, अहवा ण कारवेइ करेतं णाणुजाणइ मणसा कायसा १८, अहवा
ण कारवेइ करेतं णाणुजाणइ वयसा कायसा १९, दुविहं एक्कविहेण पडि-
क्कममाणे ण करेइ ण कारवेइ मणसा २० अहवा ण करेइ ण कारवेइ वयसा
२१, अहवा ण करेइ ण कारवेइ कायसा २२, अहवा ण करेइ करेतं णाणु-
जाणइ मणसा २३, अहवा ण करेइ करेतं णाणुजाणइ वयसा २४, अहवा ण
करेइ करेतं णाणुजाणइ कायसा २५, अहवा ण कारवेइ करेतं णाणुजाणइ
मणसा २६, अहवा ण कारवेइ करेतं णाणुजाणइ वयसा २७, अहवा ण कार-
वेइ करेतं णाणुजाणइ कायसा २८, एगविहं तिविहेण पडि० ण करेइ मणसा
वयसा कायसा २९, अहवा ण कारवेइ मणसा वयसा कायसा ३०, अहवा
करेतं णाणुजाणइ मणसा ३. ३१, एक्कविहं दुविहेण पडिक्कममाणे ण करेइ
मणसा वयसा ३२, अहवा ण करेइ मणसा कायसा ३३, अहवा ण करेइ वयसा

कायसा ३४, अहवा ण कारवेइ मणसा वयसा ३५, अहवा ण कारवेइ मणसा कायसा ३६, अहवा ण कारवेइ वयसा कायसा ३७, अहवा करेतं णाणुजाणइ मणसा वयसा ३८, अहवा करेतं णाणुजाणइ मणसा कायसा ३९, अहवा करेतं णाणुजाणइ वयसा कायसा ४० एककविहं एगविहेणं पडिक्कममाणे ण करेइ मणसा ४१, अहवा ण करेइ वयसा ४२, अहवा ण करेइ कायसा ४३, अहवा ण कारवेइ मणसा ४४, अहवा ण कारवेइ वयसा ४५, अहवा ण कारवेइ कायसा ४६, अहवा करेतं णाणुजाणइ मणसा ४७ अहवा करेतं णाणुजाणइ वयसा ४८, अहवा करेतं णाणुजाणइ कायसा ४९ । पडुप्पणं संवरेमाणे किं तिविहं तिविहेणं संवरेइ ? एवं जहा पडिक्कममाणेणं एगुणपणं भंगा भणिया एवं संवरमाणेणवि एगुणपणं भंगा भाणियव्वा । अणागयं पच्चक्खमाणे किं तिविहं तिविहेणं पच्चक्खाइ ? एवं ते चेव भंगा एगुणपणं भाणियव्वा जाव अहवा करेतं णाणुजाणइ कायसा । समणोवासयस्स णं भंते ! पुट्ठामेव थूलए मुसावाए अपच्चक्खाए भवइ से णं भंते ! पच्छा पच्चाइवक्खमाणे० एवं जहा पाणाइवायस्स सीयालं भंगसयं भणियं तथा मुसावायस्सवि भाणियव्वं । एवं अदिण्णादानस्सवि, एवं थूलगस्सं मेहुणस्सवि थूलगस्स परिग्गहस्सवि जाव अहवा करेतं णाणुजाणइ कायसा । एए खलु परिसगा समणोवासगा भवन्ति, णो खलु एरिसगा आजीवियोवासगा भवन्ति ॥ ३२८ ॥ आजीवियसमयस्स णं अयमट्ठे पणत्ते अक्खीणपडिभोइणो सव्वे सत्ता से हंता छेत्ता भेत्ता लंपित्ता विलुंपित्ता उद्वइत्ता आहारमाहारैति तत्थ खलु इमे दुवालस आजीवियोवासगा भवन्ति, तंजहा—ताले, १ तालपलंबे, २ उव्विहे, ३ संविहे, ४ अवविहे, ५ उदए, ६ णामुदए, ७ णम्मुदए, ८ अणुवालए, ९ संखवालए, १० अयंपुले, ११ कायरिए, १२, इच्चेएदुवालस आजीवियोवासगा अरिहंतदेवयागा अम्मापिउमुस्सुसगा पंचफलपडिक्कंता तंजहा उंबरेहिं, वडोहिं, बोरोहिं, सतरैहिं, पिल्लूहिं, पलंडुल्लुमुणकंदमूलविवज्जगा अणिल्लंछिएहिं अणक्कभिण्णेहिं गोणेहिं तसपाणविवज्जिएहिं चिं (चिं) सेहिं वित्ति कप्पेमाणा विहरन्ति एएवि ताव एवं इच्छन्ति, किमंग ! पुण जे इमे समणोवासगा भवन्ति जेसं णो कप्पन्ति इमाइं पणरस कम्मादाणाइं सयं करेत्तए वा कारवेत्तए वा करेतं वा अण्णं समणुजाणेत्तए तंजहा—इंगालकम्मे, वणकम्मे, साडोकम्मे,

भाडीकम्मे, फोडीकम्मे, दंतवाणिज्जे, लक्खवाणिज्जे, केसवाणिज्जे, रसवाणिज्जे, विसवाणिज्जे, जंतपीलणकम्मे, णिल्लंछणकम्मे, दवग्गिदावणया, सरदहतलाय-परिसोसणया, असईपोसणया, इच्छेए समणोवासगा सुक्का सुक्काभिजाइया भवित्ता कालमासे कालं किच्चा अण्णयरेसु देवलोएसु देवत्ताए उववत्तारो भवति ॥ ३२६ ॥ कइविहा णं भंते ! देवलोगा पण्णत्ता ? गोयमा ! चउ-व्विहा देवलोगा प०, तंजहा—भवणवासिवाणमंतरजोइसवेमाणिया । सेवं भंते !
२ ति ॥ ३३० ॥

अट्टमं सयं छट्ठो उट्ठेसो

समणोवासयस्स णं भंते ! तहारूवं समणं वा माहणं वा फासुएसणिज्जेण असणपाणखाइमसाइमेणं पडिलाभेमाणस्स किं कज्जइ ? गोयमा ! एगंतसो से णिज्जरा कज्जइ णत्थि य से पावे कम्मे कज्जइ । समणोवासयस्स णं भंते ! तहारूवं समणं वा माहणं वा अफासुएणं अणसणिज्जेणं असणपाण जाव पडि-लाभेमाणस्स किं कज्जइ ? गोयमा ! बहुतरिया से णिज्जरा कज्जइ अप्प-तराए से पावे कम्मे कज्जइ । समणोवासयस्स णं भंते ! तहारूवं असंजय-अविरयअपडिहयपच्चक्खायपावकम्मं फासुएण वा अफासुएण वा एसणिज्जेण वा अणसणिज्जेण वा असणपाण जाव किं कज्जइ ? गोयमा ! एगंतसो से पावे कम्मे कज्जइ णत्थि से काइ णिज्जरा कज्जइ ॥ ३३१ ॥ णिग्गंथं च णं गाहावइकुलं पिडवायपडियाए अणुप्पविट्ठं केइ दोहिं पिडेहिं उवणिमंतेज्जा-एगं आउसो ! अप्पणा भुंजाहि एगं थेराणं दलयाहि, से य तं पडिग्गाहेज्जा, थेरा य से अणुगवेसियव्वा सिया जत्थेव अणुगवेसमाणे थेरे पासिज्जा तत्थेव अणुप्पदायव्वे सिया णो चेव णं अणुगवेसमाणे थेरे पासिज्जा तं णो अप्पणा भुंजेज्जा णो अणोसि दावए एगंते अणावाए अच्चित्ते बहुफासुए थंडिल्ले पडि-लेहेत्ता पमज्जित्ता परिट्ठावेयव्वे सिया । णिग्गंथं च णं गाहावइकुलं पिडवाय-पडियाए अणुप्पविट्ठं केइ तिहिं पिडेहिं उवणिमंतेज्जा—एगं आउसो ! अप्पणा भुंजाहि दो थेराणं दलयाहि, से य ते पडिग्गाहेज्जा, थेरा य से अणुगवेसेयव्वा सेसं तं चेव जाव परिट्ठावेयव्वे सिया, एवं जाव दसहिं पिडेहिं उवणिमंतेज्जा णवरं एगं आउसो ! अप्पणा भुंजाहि णव थेराणं दलयाहि सेसं तं चेव जाव

परिट्ठावेयव्वे सिया । णिग्गंथं च णं गाहावडकुलं जाव केइ दोहिं पडिग्गहेहिं उवणिमंतेज्जा एगं आउसो ! अप्पणा पडिभुंजाहिं एगं थेराणं इलयाहिं । से य तं पडिग्गाहेज्जा, तहेव जाव तं णो अप्पणा पडिभुंजेज्जा णो अण्णेसि दावए सेसं तं चेव जाव परिट्ठावेयव्वे सिया, एवं जाव दसहिं पडिग्गहेहिं, एवं जहा पडिग्गहवत्तव्वया भणिया एवं गोच्छगरयहरणचोलपट्टगकंबललट्टिसंथारगवत्तव्वया य भाणियव्वा जाव दसहिं संथारएहिं उवणिमंतेज्जा जाव परिट्ठावेयव्वे सिया ॥ ३३२ ॥ णिग्गंथेण य गाहावडकुलं पिडवायपडियाए पविट्ठेण अण्णयरे अकिच्चट्टाणे पडिसेविए, तस्स णं एवं भवइ-इहेव ताव अहं एयस्स ठाणस्स आलोएमि पडिक्कमामि णिंदामि गरिहामि विउट्टामि विसोहेमि अकरणयाए अब्भुट्ठेमि अहारिहं पायच्छिस्सं तवोक्कम्मं पडिवज्जामि, तओ पच्छा थेराणं अतिथं आलोएसामि जाव तवोक्कम्मं पडिवज्जिस्सामि, से य संपट्टिए असंपत्ते थेरा य पुव्वामेव अमुहा सिया से णं भंते ! किं आराहए विराहए ? गोयमा ! आराहए णो विराहए १ । से य संपट्टिए असंपत्ते अप्पणा य पुव्वामेव अमुहे सिया से णं भंते ! किं आराहए विराहए ? गोयमा ! आराहए णो विराहए २, से य संपट्टिए असंपत्ते थेरा य कालं करेज्जा से णं भंते ! किं आराहए विराहए ? गोयमा ! आराहए णो विराहए ३, से य संपट्टिए असंपत्ते अप्पणा य पुव्वामेव कालं करेज्जा से णं भंते ! किं आराहए विराहए ? गोयमा ! आराहए णो विराहए ४, से य संपट्टिए संपत्ते थेरा य अमुहा सिया से णं भंते ! किं आराहए विराहए ? गोयमा ! आराहए णो विराहए, से य संपट्टिए संपत्ते अप्पणा य० एवं संपत्तेणवि चत्तारि आलावगा भाणियव्वा जहेव असंपत्तेणं । णिग्गंथेण य बहिया वियारभूमि वा विहारभूमि वा णिवत्तंतेणं अण्णयरे अकिच्चट्टाणे पडिसेविए तस्स णं एवं भवइ-इहेव ताव अहं० एवं एत्थवि ते चेव अट्ट आलावगा भाणियव्वा जाव णो विराहए । णिग्गंथेण य गामाणुगामं दूइज्जमाणेणं अण्णयरे अकिच्चट्टाणे पडिसेविए तस्स णं एवं भवइ इहेव ताव अहं० एत्थवि ते चेव अट्ट आलावगा भाणियव्वा जाव णो विराहए । णिग्गंथीए य गाहावडकुलं पिडवायपडियाए अणुपविट्टाए अण्णयरे अकिच्चट्टाणे पडिसेविए तीसे णं एवं भवइ इहेव ताव अहं एयस्स ठाणस्स आलोएमि जाव तवोक्कम्मं पडिवज्जामि तओ पच्छा पव-

त्तिणीए अतिथं आलोएस्सामि जाव पडिवज्जिस्सामि, सा य संपट्टिया असंपत्ता पवत्तिणी य अर्मुहा सिया सा णं भंते ! कि आराहिया विराहिया ? गोयमा ! आराहिया णो विराहिया, सा य संपट्टिया जहा णिगंथस्स तिण्णि गमा भणिया एवं णिगंथोएवि तिण्णि आलावगा भाणियव्वा जाव आराहिया णो विराहिया । से केणट्ठेणं भंते ! एवं वुच्चइ-आराहए णो विराहए ? गोयमा ! से जहा णामए-केइ पुरिसे एणं महं उण्णालोमं वा गयलोमं वा सणलोमं वा कप्पासलोमं वा तणसूयं वा दुहा वा तिहा वा संखेज्जहा वा छिवित्ता अगणिकायंसि पक्खिवेज्जा से णूणं गोयमा ! छिज्जमाणे छिण्णे पक्खिप्पमाणे पक्खित्ते उज्जमाणे दड्ढेत्ति वत्तव्वं सिया ? हुंता भगवं ! छिज्जमाणे छिण्णे जाव दड्ढेत्ति वत्तव्वं सिया । से जहा वा केइ पुरिसे वत्थं अहयं वा धोयं वा तंतु-गयं वा मंजिट्ठादोणीए पक्खिवेज्जा से णूणं गोयमा ! उक्खिप्पमाणे उक्खित्ते पक्खिप्पमाणे पक्खित्ते रज्जमाणे रत्तेत्ति वत्तव्वं सिया ? हुंता भगवं ! उक्खि-प्पमाणे उक्खित्ते जाव रत्तेत्ति वत्तव्वं सिया, से तेणट्ठेणं गोयमा ! एवं वुच्चइ-आराहए णो विराहए ॥ ३३३ ॥ पईवस्स णं भंते ! झियायमाणस्स कि पईवे झियाइ लट्ठी झियाइ वत्ती झियाइ तेल्ले झियाइ पईवचंपए झियाइ जोई झियाइ ? गोयमा ! णो पईवे झियाइ जाव णो पईवचंपए झियाइ, जोई झियाइ । अगारस्स णं भंते ! झियायमाणस्स कि अगारे झियाइ कुड्डा झियाइ कडणा झि० धारणा झि० बलहरणे झि० वंसा० झि० मल्ला झि० वग्गा झियाइ छित्तरा झियाइ छाणे झियाइ जोई झियाइ ? गोयमा ! णो अगारे झियाइ णो कुड्डा झियाइ जाव णो छाणे झियाइ, जोई झियाइ ॥ ३३४ ॥ जीवे णं भंते ! ओरालियसरीराओ कइकिरिए ? गोयमा ! सिय तिकिरिए सिय चउकिरिए सिय पंचकिरिए सिय अकिरिए । णेरइए णं भंते ! ओरालिय-सरीराओ कइकिरिए ? गोयमा ! सिय तिकिरिए सिय चउकिरिए सिय पंच-किरिए । असुरकुमारे णं भंते ! ओरालियसरीराओ कइकिरिए ? एवं चेव, एवं जाव वेमाणिए, णवरं मणुस्से जहा जीवे । जीवे णं भंते ! ओरालियसरीरेहितो कइकिरिए ? गोयमा ! सिय तिकिरिए जाव सिय अकिरिए । णेरइए णं भंते ! ओरालियसरीरेहितो कइकिरिए ? एवं एसो जहा पढमो दंडओ तथा इमोवि अपरिसेसो भाणियव्वो जाव वेमाणिए, णवरं मणुस्से जहा जीवे । जीवा णं

भन्ते ! ओरालियसरीराओ कइकिरिया ? गोयमा ! सिय तिकिरिया जाव सिय अकिरिया । नेरइया णं भन्ते ! ओरालियसरीराओ कइकिरिया ? एवं एसोवि जहा पढमो दंडओ तथा भाणियव्वो, जाव वेमाणिया, णवरं मणुस्सा जहा जीवा । जीवा णं भन्ते ! ओरालियसरीरेहिंतो कइकिरिया ? गोयमा ! तिकिरियावि चउकिरियावि पंचकिरियावि अकिरियावि । नेरइया णं भन्ते ! ओरालियसरीरेहिंतो कइकिरिया ? गोयमा ! तिकिरियावि चउकिरियावि पंचकिरियावि एवं जाव वेमाणिया, णवरं मणुस्सा जहा जीवा । जीवे णं भन्ते ! वेउव्वियसरीराओ कइकिरिए ? गोयमा ! सिय तिकिरिए सिय चउकिरिए सिय अकिरिए । नेरइए णं भन्ते ! वेउव्वियसरीराओ कइकिरिए ? गोयमा ! सिय तिकिरिए सिय चउकिरिए एवं जाव वेमाणिए, णवरं मणुस्से जहा जीवे, एवं जहा ओरालियसरीरेणं चत्तारि दंडगा भणिया तथा वेउव्वियसरीरेणवि चत्तारि दंडगा भाणियव्वा, णवरं पंचमकिरिया ण मणुइ, सेसं तं चैव, एवं जहा वेउव्वियं तथा आहारगंवि तेयगंवि कम्मगंवि भाणियव्वं, एक्केक्के चत्तारि दंडगा भाणियव्वा जाव वेमाणिया णं भन्ते ! कम्मगसरीरेहिंतो कइकिरिया ? गोयमा ! तिकिरियावि चउकिरियावि । सेवं भन्ते ! सेवं भन्ते ! त्ति ॥३३५॥

अट्ठमं सयं सत्तमो उद्देसो

तेणं कालेणं २ रायगिहे णयरे वण्णओ, गुणसिलए चेइए वण्णओ, जाव पुढविसिलावट्टओ, तस्स णं गुणसिलयस्स चेइयस्स अदूरसामते बह्वे अण्णउत्थिया परिवसंति । तेणं कालेणं २ समणे भगवं महावीरे आइगरे जाव समोसहे जाव परिसा पडिगया । तेणं कालेणं २ समणस्स भगवओ महावीरस्स बह्वे अंतेवासी थेरा भगवंतो जाइसंपण्णा कुलसंपण्णा जहा विइयसए जाव जीवियासमरणभयविप्पमुक्का समणस्स भगवओ महावीरस्स अदूरसामते उड्डंजाणू अहोसिरा ज्ञाणकोट्ठीवगया संजमेणं तवसा अप्पाणं भावेमाणा विहरंति । तए णं ते अण्णउत्थिया जेणेव थेरा भगवंतो तेणेव उवागच्छंति २ त्ता ते थेरे भगवंते एवं वयासी-तुम्भे णं अज्जो ! तिविहं तिविहेणं असंजय-अवरियअप्पडिह्य जहा सत्तमसए विइए उद्देसए जाव एगंतबाला यावि भवह । तए णं ते थेरा भगवंतो ते अण्णउत्थिए एवं वयासी-केण कारणेणं अज्जो !

अम्हे तिविहं तिविहेणं असंजयअविरय जाव एगंतबाला यावि भवामो ? तए णं ते अण्णउत्थिया ते थेरे भगवंते एवं वयासी-तुम्हे णं अज्जो ! अदिण्णं गेण्हह अदिण्णं भुंजह अदिण्णं साइज्जह, तए णं ते तुम्हे अदिण्णं गेण्हमाणा अदिण्णं भुंजमाणा अदिण्णं साइज्जमाणा तिविहं तिविहेणं असंजय-अविरय जाव एगंत बाला यावि भवह । तए णं ते थेरा भगवंतो ते अण्ण-उत्थिए एवं वयासी-केण कारणेणं अज्जो ? अम्हे अदिण्णं गेण्हामो अदिण्णं भुंजामो अदिण्णं साइज्जामो, जएणं अम्हे अदिण्णं गेण्हमाणा जाव अदिण्णं साइज्जमाणा तिविहं तिविहेणं असंजय जाव एगंतबाला यावि भवामो ? तए णं ते अण्णउत्थिया ते थेरे भगवंते एवं वयासी-तुम्हा णं अज्जो ! दिज्जमाणे अदिण्णे पडिग्गाहेज्जमाणे अपडिग्गहिए णिस्सिरिज्जमाणे अणिसिट्ठे, तुम्हे णं अज्जो ! दिज्जमाणं पडिग्गहणं असंपत्तं एत्थ णं अंतरा केइ अवहरिज्जा, गाहावइस्स णं तं णो खलु तं तुम्हं तए णं तुम्हे अदिण्णं गेण्हह जाव अदिण्णं साइज्जह, तए णं तुम्हे अदिण्णं गेण्हमाणा जाव एगंतबाला यावि भवह । तए णं ते थेरा भगवंतो ते अण्णउत्थिए एवं वयासी-णो खलु अज्जो ! अम्हे अदिण्णं गेण्हामो अदिण्णं भुंजामो अदिण्णं साइज्जामो अम्हे णं अज्जो ! दिण्णं गेण्हामो दिण्णं भुंजामो दिण्णं साइज्जामो, तएणं अम्हे दिण्णं गेण्हमाणा दिण्णं भुंजमाणा दिण्णं साइज्जमाणा तिविहं तिविहेणं संजयविरयपडिहय जहा सत्तमसए जाव एगंतपंडिया यावि भवामो । तएणं ते अण्णउत्थिया ते थेरे भगवंते एवं वयासी-केण कारणेणं अज्जो ! तुम्हे दिण्णं गेण्हह जाव दिण्णं साइज्जह, जएणं तुम्हे दिण्णं गेण्हमाणा जाव एगंतपंडिया यावि भवह ? तएणं ते थेरा भगवंतो ते अण्णउत्थिए एवं वयासी-अम्हे णं अज्जो ! दिज्ज-माणे दिण्णे पडिग्गाहेज्जमाणे पडिग्गहिए णिस्सिरिज्जमाणे णिसिट्ठे । अम्हे णं अज्जो ! दिज्जमाणं पडिग्गहणं असंपत्तं एत्थ णं अंतरा केइ अवहरेज्जा अम्हाणं तं णो खलु तं गाहावइस्स, तएणं अम्हे दिण्णं गेण्हामो दिण्णं भुंजामो दिण्णं साइज्जामो तएणं अम्हे दिण्णं गेण्हमाणा जाव दिण्णं साइज्जमाणा तिविहं तिविहेणं संजय जाव एगंतपंडिया यावि भवामो । तुम्हे णं अज्जो ! अण्णया चेव तिविहं तिविहेणं असंजय जाव एगंतबाला यावि भवह । तए णं ते अण्णउत्थिया ते थेरे भगवंते एवं वयासी-केण कारणेणं अज्जो ! अम्हे

तिविहं जाव एगंतबाला यावि भवामो ? तए णं ते थेरा भगवंतो ते अण्ण-उत्थिए एवं वयासी-तुढ्मे णं अज्जो ! अदिण्णं गेण्हह ३, तए णं-तुढ्मे अदिण्णं गे० जाव एगंत० । तए णं ते अण्णउत्थिया ते थेरे भगवंते एवं वयासी-केण कारणेणं अज्जो ! अम्हे अदिण्णं गेण्हामो जाव एगंतबा० ? तए णं ते थेरा भगवंतो ते अण्णउत्थिए एवं वयासी-तुढ्मे णं अज्जो ! दिग्गमाने अदिण्णे तं चैव जाव गाहावइस्स णं तं णो खलु तं तुढ्मं, तए णं तुज्जे अदिण्णं गेण्हह, तं चैव जाव एगंतबाला यावि भवह । तए णं ते अण्णउत्थिया ते थेरे भ० एवं व०-तुढ्मे णं अज्जो ! तिविहं तिविहेणं असंजय जाव एगंतबा० भवह । तए णं ते थेरा भ० ते अण्णउत्थिए एवं वयासी-केण कारणेणं अज्जो ! अम्हे तिविहं तिविहेणं जाव एगंतबाला यावि भवामो ? तए णं ते अण्णउत्थिया ते थेरे भगवंते एवं वयासी-तुढ्मे णं अज्जो ! रीयं रीय-माणा पुढावि पेच्चेह अभिहणह वत्तेह लेसेह संघाएह संघट्टेह परिधावेह किला-मेह उद्दवेह तएणं तुढ्मे पुढावि पेच्चेमाणा जाव उद्दवेमाणा तिविहं तिविहेणं असंजयअविरय जाव एगंतबाला यावि भवह । तए णं ते थेरा भगवंतो ते अण्ण-उत्थिए एवं वयासी-णो खलु अज्जो ! अम्हे रीयं रीयमाणा पुढावि पेच्चामो अभिहणामो जाव उवद्दवेमो अम्हे णं अज्जो ! रीयं रीयमाणा कायं वा जायं वा रीयं वा पडुच्च देसं देसेणं वयामो पएसं पएसेणं वयामो तेणं अम्हे देसं देसेणं वयमाणा पएसं पएसेणं वयमाणा णो पुढावि पेच्चेमो अभिहणामो जाव उवद्दवेमो, तएणं अम्हे पुढावि अपेच्चेमाणा अणमिहणेमाणा जाव अणुवद्दवेमाणा तिविहं तिविहेणं संजय जाव एगंतपंडिया यावि भवामो । तुढ्मे णं अज्जो ! अप्पणा चैव तिविहं तिविहेणं असंजय जाव एगंत बाला यावि भवह । तए णं ते अण्णउत्थिया थेरे भगवंते एवं वयासी-केण कारणेणं अज्जो ! अम्हे तिविहं तिविहेणं जाव एगंतबाला यावि भवामो ? तए णं ते थेरा भगवंतो ते अण्ण-उत्थिए एवं वयासी-तुढ्मे णं अज्जो ! रीयं रीयमाणा पुढावि पेच्चेह जाव उवद्दवेह, तए णं तुढ्मे पुढावि पेच्चेमाणा जाव उवद्दवेमाणा तिविहं तिविहेणं जाव एगंतबाला यावि भवह । तए णं ते अण्णउत्थिया ते थेरे भगवंते एवं वयासी-तुढ्मे णं अज्जो ! गम्ममाणे अगए वीइक्कमिपेजमाणे अबीइक्कंते रायगिहं णयरं संपाविउकामे असंपत्ते । तए णं ते थेरा भगवंतो ते अण्णउत्थिए

एवं वयासी—णो खलु अज्जो ! अम्हे गम्भमाणे अगए वीड्ककमिज्जमाणे अबी-
इक्कते रायगिहं णयरं जाव असंपत्ते, अम्हे णं अज्जो ! गम्भमाणे गए वीड-
क्कमिज्जमाणे वीड्ककते रायगिहं णयरं संपाविउकामे संपत्ते तुब्भे णं अप्पणा
चेव गम्भमाणे अगए वीड्ककमिज्जमाणे अबीइक्कते रायगिहं णयरं जाव असंपत्ते ।
तए णं ते थेरा भगवंतो अण्णउत्थिए एवं पडिहणति पडिहणित्ता गइप्पवाय-
णामं अज्जयणं पण्णवइंसु ॥ ३३६ ॥ कइविहे णं भंते ! गइप्पवाए पण्णत्ते ?
गोयमा ! पंचविहे गइप्पवाए पण्णत्ते, तंजहा—पयोगगई, ततगई, बंधणछेयणगई,
उववायगई, विहायगई । एत्तो आरब्भ पयोगपयं णिरवसेसं भाणियच्चं, जाव सेत्तं
विहायगई । सेवं भंते ! सेवं भंते ! त्ति ॥ ३३७ ॥

अट्टमं सयं अट्टमो उद्देशो

रायगिहे णयरे जाव एवं वयासी—गुरूणं भंते ! पडुच्च कइ पडिणीया
पण्णत्ता ? गोयमा ! तओ पडिणीया पण्णत्ता, तंजहा—आयरियपडिणीए,
उवज्जायपडिणीए, चेरपडिणीए । गइं णं भंते ! पडुच्च कइ पडिणीया
पण्णत्ता ? गोयमा ! तओ पडिणीया पण्णत्ता, तंजहा—इहलोगपडिणीए,
परलोगपडिणीए, दुहओलोगपडिणीए । समूहणं भंते ! पडुच्च कइ पडि-
णीया पण्णत्ता ? गोयमा ! तओ पडिणीया पण्णत्ता, तंजहा—कुलपडिणीए,
गणपडिणीए, संघपडिणीए । अणुकपं भंते ! पडुच्च पुच्छा ? गोयमा ! तओ
पडिणीया पण्णत्ता, तंजहा—तवस्सिपडिणीए, गिलाणपडिणीए, सेहपडिणीए ।
सुयणं भंते ! पडुच्च पुच्छा ? गोयमा ! तओ पडिणीया पण्णत्ता, तंजहा—
सुत्तपडिणीए, अत्थपडिणीए, तदुभयपडिणीए । भावं णं भंते ! पडुच्च पुच्छा ?
गोयमा ! तओ पडिणीया पण्णत्ता, तंजहा—णाणपडिणीए, बंसणपडिणीए,
चरित्तपडिणीए ॥ ३३८ ॥ कइविहे णं भंते ! ववहारे पण्णत्ते ? गोयमा ! पंच-
विहे ववहारे पण्णत्ते, तंजहा—आगमे, सुयं, आणा, धारणा, जीए । जहा से तत्थ
आगमे सिया आगमेणं ववहारं पट्टवेज्जा, णो य से तत्थ आगमे सिया जहा से
तत्थ सुए सिया सुएणं ववहारं पट्टवेज्जा, णो य से तत्थ सुए सिया जहा
से तत्थ आणा सिया आणाए ववहारं पट्टवेज्जा, णो य से तत्थ आणा सिया
जहा से तत्थ धारणा सिया धारणाए ववहारं पट्टवेज्जा, णो य से तत्थ

धारणा सिया जहा से तत्थ जीए सिया जीएणं ववहारं पट्टवेज्जा । इच्छेएहि पंचहि ववहारं पट्टवेज्जा, तंजहा—आगमेणं, सुएणं, आणाए, धारणाए, नीएणं, जहा २ से आगमे सुए आणा धारणा जीए तहा २ ववहारं पट्टवेज्जा । से किमाहु भंते ! आगमबलिया सवणा निगमंथा इच्छेयं पंचविहं ववहारं जया २ जहि २ तहा २ तंहि २ अणिसिओवसियं सम्मं ववहरमाणे समणे निगमंथे आणाए आराहए भवइ ॥३३६॥ कइविहे णं भंते ! बंधे पण्णत्ते ? गोयमा ! दुविहे बंधे पण्णत्ते, तंजहा—इरियावहियबंधे य संपराइयबंधे य । इरियावहियण्णं भंते ! कम्मं कि णेरइओ बंधइ तिरिक्खजोणिओ बंधइ तिरिक्खजोणिणी बंधइ मणुस्सो बंधइ मणुस्सी बंधइ देवो बंधइ देवी बंधइ ? गोयमा ! णो णेरइओ बंधइ णो तिरिक्खजोणिओ बंधइ णो तिरिक्खजोणिणी बंधइ णो देवो बंधइ णो देवी बंधइ, पुण्वपडिवण्णए पडुच्च मणुस्सा य मणुस्सोओ य बंधंति, पडिवज्जमाणए पडुच्च मणुस्सो वा बंधइ १ मणुस्सो वा बंधइ २ मणुस्सा वा बंधंति ३ मणुस्सोओ वा बंधंति ४ अहवा मणुस्सो य मणुस्सी य बंधइ ५ अहवा मणुस्सो य मणुस्सोओ य बंधंति ६ अहवा मणुस्सा य मणुस्सो य बंधइ ७ अहवा मणुस्सो य मणुस्सोओ य बंधंति । तं भंते ! कि इत्थो बंधइ पुरिसो बंधइ णपंसगो बंधइ, इत्थोओ बंधंति पुरिसा बंधंति णपंसगा बंधंति, णो-इत्थिणोपुरिसोणोणपंसओ बंधइ ? गोयमा ! णो इत्थो बंधइ णो पुरिसो बंधइ जाव णो णपंसगा बंधइ, पुण्वपडिवण्णए पडुच्च अवगयवेया बंधंति, पडिवज्जमाणए पडुच्च अवगयवेओ वा बंधइ अवगयवेया वा बंधंति । जइ भंते ! अवगयवेओ वा बंधइ अवगयवेया वा बंधंति तं भंते ! कि इत्थोपच्छाकडो बंधइ १ पुरिसपच्छाकडो बंधइ २ णपंसगपच्छाकडो बंधइ ३ इत्थोपच्छाकडा वंधंति ४ पुरिसपच्छाकडा बंधंति ५ णपंसगपच्छाकडा बंधंति ६ उदाहु इत्थिपच्छाकडो य पुरिसपच्छाकडो य बंधइ, उदाहु इत्थिपच्छाकडो य पुरिसपच्छाकडा य बंधंति, उदाहु इत्थिपच्छाकडो य पुरिसपच्छाकडो य बंधइ, उदाहु इत्थिपच्छाकडा य पुरिसपच्छाकडो य बंधंति, उदाहु इत्थोपच्छाकडो य णपंसगपच्छाकडो य बंधइ ४ उदाहु पुरिसपच्छाकडो य णपंसगपच्छाकडो य बंधइ ४ उदाहु इत्थिपच्छाकडो य पुरिसपच्छाकडो य णपंसगपच्छाकडो य बंधइ ८, एवं एए छवीसं भंगा २६ जाव उदाहु इत्थोपच्छाकडा य पुरिसप० णपंसगप० बंधंति ?

गोयमा ! इत्थिपच्छाकडोवि बंधइ १ पुरिसपच्छाकडोवि बंधइ २ णुंसग-
 पच्छाकडोवि बंधइ ३ इत्थिपच्छाकडावि बंधति ४ पुरिसपच्छाकडावि बंधति
 ५ णुंसगपच्छाकडावि बंधति ६ अहवा इत्थिपच्छाकडो य पुरिसपच्छाकडो य
 बंधइ ७ एवं एए चेव छब्बीसं भंगा भाणियव्वा, जाव अहवा इत्थिपच्छाकडा
 य पुरिसपच्छाकडा य णुंसगपच्छाकडा य बंधति । तं भंते ! किं बंधी बंधइ
 बंधिस्सइ १ बंधी बंधइ ण बंधिस्सइ २ बंधी ण बंधइ बंधिस्सइ ३ बंधी ण बंधइ
 ण बंधिस्सइ ४ ण बंधी बंधइ बंधिस्सइ ५ ण बंधी बंधइ ण बंधिस्सइ ६ ण
 बंधी ण बंधइ बंधिस्सइ ७ ण बंधी ण बंधइ ण बंधिस्सइ ८ ? गोयमा ! भवा-
 गरिसं पडुच्च अत्थेगइए बंधी बंधइ बंधिस्सइ अत्थेगइए बंधी बंधइ ण बंधि-
 स्सइ, एवं तं चेव सत्वं जाव अत्थेगइए ण बंधी ण बंधइ ण बंधिस्सइ, गहणा-
 गरिसं पडुच्च अत्थेगइए बंधी बंधइ बंधिस्सइ, एवं जाव अत्थेगइए ण बंधी बंधइ
 बंधिस्सइ, णो चेव णं ण बंधी बंधइ ण बंधिस्सइ, अत्थेगइए ण बंधी ण बंधइ
 बंधिस्सइ अत्थेगइए ण बंधी ण बंधइ ण बंधिस्सइ । तं भंते ! किं साइयं सपज्ज-
 वसियं बंधइ साइयं अपज्जवसियं बंधइ अणाइयं सपज्जवसियं बंधइ अणाइयं
 अपज्जवसियं बंधइ ? गोयमा ! साइयं सपज्जवसियं बंधइ णो साइयं अपज्ज-
 वसियं बंधइ णो अणाइयं सपज्जवसियं बंधइ णो अणाइयं अपज्जवसियं बंधइ ।
 तं भंते ! किं देसेणं देसं बंधइ देसेणं सत्वं बंधइ सत्वेणं देसं बंधइ सत्वेणं सत्वं
 बंधइ ? गोयमा ! णो देसेणं देसं बंधइ णो देसेणं सत्वं बंधइ णो सत्वेणं देसं
 बंधइ सत्वेणं सत्वं बंधइ ॥ ३४० ॥ संपराइयणं भंते ! कम्मं किं णेरइओ
 बंधइ तिरिक्खजोणिओ बंधइ जाव, देवीं बंधइ ? गोयमा ! णेरइओवि बंधइ
 तिरिक्खजोणिओवि बंधइ तिरिक्खजोणिणीवि बंधइ मणुस्सोवि बंधइ मणुस्सोवि
 बंधइ देवीवि बंधइ देवीवि बंधइ । तं भंते ! किं इत्थो बंधइ पुरिसो बंधइ
 तहेव जाव णोइत्थोणोपुरिसोणोणुंसओ बंधइ ? गोयमा ! इत्थोवि बंधइ
 पुरिसोवि बंधइ जाव णुंसगावि बंधति अहवेए य अवगयवेओ य बंधइ अहवेए
 य अवगयवेया य बंधति । जइ भंते ! अवगयवेओ य बंधइ अवगयवेया य
 बंधति तं भंते ! किं इत्थोपच्छाकडो बंधइ पुरिसपच्छाकडो बंधइ ? एवं जहेव
 इरियावहियाबंधगस्स तहेव णिरवसेसं जाव अहवा इत्थोपच्छाकडा य पुरिस-
 पच्छाकडा य णुंसगपच्छाकडा य बंधति । तं भंते ! किं बंधी बंधइ बंधिस्सइ १

बंधी बंधइ ण बंधिस्सइ २ बंधी ण बंधइ बंधिस्सइ ३ बंधी ण बंधइ ण
 बंधिस्सइ ४ ? गोयमा ! अत्थेगइए बंधी बंधइ बंधिस्सइ १ अत्थेगइए बंधी
 बंधइ ण बंधिस्सइ २ अत्थेगइए बंधी ण बंधइ बंधिस्सइ ३ अत्थेगइए बंधी
 ण बंधइ ण बंधिस्सइ । तं भंते ! किं साइयं सपज्जवसियं बंधइ ? पुच्छा तहेव,
 गोयमा ! साइयं वा सपज्जवसियं बंधइ अणाइयं वा सपज्जवसियं बंधइ अणा-
 इयं वा अपज्जवसियं बंधइ णो चेव णं साइयं अपज्जवसियं बंधइ । तं भंते !
 किं देसेणं देसं बंधइ० एवं जहेव इरियावहियाबंधगस्स जाव सव्वेणं सव्वं
 बंधइ ॥ ३४१ ॥ कइ णं भंते ! कम्मपयडीओ पणत्ताओ ? गोयमा ! अट्ट
 कम्मपयडीओ पणत्ताओ ? तंजहा—णाणावरणिज्जं जाव अंतराइयं । कइ णं
 भंते ! परीसहा पणत्ताओ ? गोयमा ! बावीसं परीसहा ५०, तंजहा—दिग्गिछा-
 परीसहे, विवासापरीसहे, जाव दंसणपरीसहे । एए णं भंते ! बावीसं परीसहा
 कइसु कम्मपयडीसु समोयरंति ? गोयमा ! चउसु कम्मपयडीसु समोयरंति,
 तंजहा—णाणावरणिज्जे, वेयणिज्जे, मोहणिज्जे, अंतराइए । णाणावरणिज्जे
 णं भंते ! कम्मे कइ परीसहा समोयरंति ? गोयमा ! दो परीसहा समोयरंति,
 तं०—पण्णापरीसहे णाणपरीसहे य । वेयणिज्जे णं भंते ! कम्मे कइ परीसहा
 समोयरंति ? गोयमा ! एक्कारस परीसहा समोयरंति, तंजहा—पंचेव आणु-
 पुट्ठो चरिया सेज्जा वहे य रोगे य । तणफास जत्तमेव य एक्कारस वेय-
 णिज्जंमि ॥ १ ॥ वंसणमोहणिज्जे णं भंते ! कम्मे कइ परीसहा समोयरंति ?
 गोयमा ! एगे वंसणपरीसहे समोयरइ । चरित्तमोहणिज्जे णं भंते ! कम्मे कइ
 परीसहा समोयरंति ? गोयमा ! सत्त परीसहा समोयरंति, तंजहा—अरई अचेत्त
 इत्थी णिसीहिया जायणा य अबकोसे । सबकारपुरक्कारे चरित्तमोहंमि सत्तेए
 ॥ १ ॥ अंतराइए णं भंते ! कम्मे कइ परीसहा समोयरंति ? गोयमा ! एगे
 अत्ताभपरीसहे समोयरइ । सत्तविहबंधगस्स णं भंते ! कइ परीसहा पणत्ता ?
 गोयमा ! बावीसं परीसहा पणत्ता, बीसं पुण वेएइ, जं समयं सीयपरीसहं
 वेएइ णो तं समयं उंसिणपरीसहं वेएइ जं समयं उंसिणपरीसहं वेएइ णो तं
 समयं सीयपरीसहं वेएइ, जं समयं चरियापरीसहं वेएइ णो तं समयं णिसी-
 हियापरीसहं वेएइ जं समयं णिसीहियापरीसहं वेएइ णो तं समयं
 चरियापरीसहं वेएइ । एवं अट्टविहबंधगस्सवि । छव्विहबंधगस्स णं भंते !

सरागछउमत्थस्स कइ परीसहा पणत्ता ? गोयमा ! चोइस परीसहा पणत्ता
 बारस पुण वेएइ, जं समयं सीयपरीसहं वेएइ णो तं समयं उंसिणपरीसहं वेएइ
 जं समयं उंसिणपरीसहं वेएइ णो तं समयं सीयपरीसहं वेएइ, जं समयं चरिया-
 परीसहं वेएइ णो तं समयं सेज्जापरीसहं वेएइ जं समयं सेज्जापरीसहं वेएइ
 णो तं समयं चरियापरीसहं वेएइ । एक्कविहबंधगस्स णं भंते ! वीयरगछउ-
 मत्थस्स कइ परीसहा पणत्ता ? गोयमा ! एवं च्चैव जहेव छव्विहबंधगस्स ।
 एगविहबंधगस्स णं भंते ! सजोगिभवत्थकेवलस्स कइ परीसहा पणत्ता ?
 गोयमा ! एक्कारस परीसहा पणत्ता, णव पुण वेएइ, सेसं जहा छव्विहबंध-
 गस्स । अबंधगस्स णं भंते ! अजोगिभवत्थकेवलस्स कइ परीसहा पणत्ता ?
 गोयमा ! एक्कारस परीसहा पणत्ता, णव पुण वेएइ, जं समयं सीयपरीसहं
 वेएइ णो तं समयं उंसिणपरीसहं वेएइ जं समयं उंसिणपरीसहं वेएइ णो तं
 समयं सीयपरीसहं वेएइ, जं समयं चरियापरीसहं वेएइ णो तं समयं सेज्जा-
 परीसहं वेएइ जं समयं सेज्जापरीसहं वेएइ णो तं समयं चरियापरीसहं वेएइ
 ॥ ३४२ ॥ जंबूहीवे णं भंते ! दीवे सूरिया उग्गमणमुहुत्तंसि दूरे य मूले य
 दीसंति मज्झंतियमुहुत्तंसि मूले य दूरे य दीसंति अत्थमणमुहुत्तंसि दूरे य मूले
 य दीसंति ? हंता गोयमा ! जंबूहीवे णं दीवे सूरिया उग्गमणमुहुत्तंसि दूरे
 य तं च्चैव जाव अत्थमणमुहुत्तंसि दूरे य मूले य दीसंति । जंबूहीवे णं भंते !
 दीवे सूरिया उग्गमणमुहुत्तंसि मज्झंतियमुहुत्तंसि य अत्थमणमुहुत्तंसि य सब्बत्थ
 समा उच्चत्तेणं ? हंता गोयमा ! जंबूहीवे णं दीवे सूरिया उग्गमण जाव
 उच्चत्तेणं । जइ णं भंते ! जंबूहीवे २ सूरिया उग्गमणमुहुत्तंसि य मज्झंतिय०
 अत्थमणमुहुत्तंसि जाव उच्चत्तेणं से केणं खाइ अदुठेणं भंते ! एवं वुच्चइ
 जंबूहीवे णं दीवे सूरिया उग्गमणमुहुत्तंसि दूरे य मूले य दीसंति जाव अत्थ-
 मणमुहुत्तंसि दूरे य मूले य दीसंति ? गोयमा ! लेसापडिघाएणं उग्गमण-
 मुहुत्तंसि दूरे य मूले य दीसंति लेसाभितावेणं मज्झंतियमुहुत्तंसि मूले य दूरे
 य दीसंति लेसापडिघाएणं अत्थमणमुहुत्तंसि दूरे य मूले य दीसंति, से तेण-
 दुठेणं गोयमा ! एवं वुच्चइ—जंबूहीवे णं दीवे सूरिया उग्गमणमुहुत्तंसि दूरे य
 मूले य दीसंति जाव अत्थमण जाव दीसंति । जंबूहीवे णं भंते ! दीवे सूरिया
 कि तीयं खेत्तं गच्छंति पडुप्पणं खेत्तं गच्छंति अणागयं खेत्तं गच्छंति ?

गोयमा ! णो तीयं खेत्तं गच्छति पडुप्पणं खेत्तं गच्छति णो अणागयं खेत्तं गच्छति । जंबूदीवे णं भंते ! दीवे सूरिया किं तीयं खेत्तं ओभासति पडुप्पणं खेत्तं ओभासति अणागयं खेत्तं ओभासति ? गोयमा ! णो तीयं खेत्तं ओभासति पडुप्पणं खेत्तं ओभासति णो अणागयं खेत्तं ओभासति । तं भंते ! किं पुट्ठं ओभासति अपुट्ठं ओभासति ? गोयमा ! पुट्ठं ओभासति णो अपुट्ठं ओभासति जाव णियमा छद्दिसि । जंबूदीवे णं भंते ! दीवे सूरिया किं तीयं खेत्तं उज्जोवेत्ति ? एवं चेव जाव णियमा छद्दिसि, एवं तवेत्ति एवं भासति जाव णियमा छद्दिसि । जंबूदीवे णं भंते ! दीवे सूरियाणं किं तीए खेत्ते किरिया कज्जइ पडुप्पणे खेत्ते किरिया कज्जइ अणागए खेत्ते किरिया कज्जइ ? गोयमा ! णो तीए खेत्ते किरिया कज्जइ पडुप्पणे खेत्ते किरिया कज्जइ णो अणागए खेत्ते किरिया कज्जइ । सा भंते ! किं पुट्ठा कज्जइ अपुट्ठा कज्जइ ? गोयमा ! पुट्ठा कज्जइ णो अपुट्ठा कज्जइ जाव णियमा छद्दिसि । जंबूदीवे णं भंते ! दीवे सूरिया केवइयं खेत्तं उड्ढं तवन्ति केवइयं खेत्तं अहो तवन्ति केवइयं खेत्तं तिरियं तवन्ति ? गोयमा ! एगं जोयणसयं उड्ढं तवन्ति अट्टारस जोयणसयाइं अहे तवन्ति सीयालीसं जोयणसहस्साइं बोणिणं य तेवट्ठे जोयणसए एक्कवीसं च सट्ठिभाए जोयणस्स तिरियं तवन्ति । अंतो णं भंते ! माणुसुत्तरस्स पव्वयस्स जे चंदिमसूरियगहगणणवत्तताराहवा ते णं भंते ! देवा किं उड्ढो-बवण्णगा ? जहा जीवाभिगमे तहेव णिरवसेसं जाव उवकोसेणं छम्मासा । बहिया णं भंते ! माणुसुत्तरस्स जहा जीवाभिगमे जाव इंदट्टाणे णं भंते ! केवइयं कालं उववाएणं विरहिए पणत्ते ? गोयमा ! जहण्णेणं एक्कं समयं उवकोसेणं छम्मासा । सेवं भंते ! सेवं भंते ! त्ति ॥ ३४३ ॥

अट्टमं सयं णवमो उट्ठेसो

कइविहे णं भंते ! बंधे पणत्ते ? गोयमा ! दुविहे बंधे पणत्ते, तंजहा-पओगबंधे य बीससाबंधे य ॥ ३४४ ॥ बीससाबंधे णं भंते ! कइविहे पणत्ते ? गोयमा ! दुविहे पणत्ते, तंजहा-साईयबीससाबंधे य अणाईयबीससाबंधे य । अणाईयबीससाबंधे णं भंते ! कइविहे पणत्ते ? गोयमा ! तिबिहे पणत्ते, तंजहा-धम्मत्थिकायअणमण्णअणाईयबीससाबंधे, अधम्मत्थिकायअणमण्ण-

अणार्ईयवीससाबंधे, आगासत्थिकायअणमणअणार्ईयवीससाबंधे । धम्मत्थि-
 कायअणमणअणार्ईयवीससाबंधे णं भंते ! किं देसबंधे सच्चबंधे ? गोयमा !
 देसबंधे णो सच्चबंधे, एवं अधम्मत्थिकायअणमणअणार्ईयवीससाबंधेवि, एव-
 मागासत्थिकायअणमणअणार्ईयवीससाबंधेवि । धम्मत्थिकायअणमणअणार्ईय-
 वीससाबंधे णं भंते ! कालओ केवच्चिरं होइ ? गोयमा ! सच्चबंधे, एवं अध-
 म्मत्थिकाए, एवं आगासत्थिकाए वि । सार्ईयवीससाबंधे णं भंते ! कइविहे
 पणत्ते ? गोयमा ! तिविहे पणत्ते, तंजहा—बंधणपच्चइए, भायणपच्चइए
 परिणामपच्चइए । से किं तं बंधणपच्चइए ? २ जणं परमाणुपोगला
 बुप्पएसिया तिप्पएसिया जाव दसपएसिया संखेज्जा पएसिया असंखेज्ज-
 पएसिया, अणंतपएसियाणां खंधाणं वेमायणिट्ठयाए वेमायलुबलयाए वेमायणिट्ठ-
 लुबलयाए बंधणपच्चइए णं बंधे समुप्पज्जइ जहण्णेणं एक्कं समयं उक्को-
 सेणं असंखेज्जं कालं, सेत्तं बंधणपच्चइए । से किं तं भायणपच्चइए ?
 भायणपच्चइए जणं जुणसुराजुणगुलजुणतंदुलाणं भायणपच्चइएणं बंधे
 समुप्पज्जइ जहण्णेणं अंतोमुहुत्तं उक्कोसेणं संखेज्जं कालं, सेत्तं भायण-
 पच्चइए । से किं तं परिणामपच्चइए ? परिणामपच्चइए जणं अब्भानं
 अब्भक्खलाणं जहा तइयसए जाव अमोहाणं परिणामपच्चइए णं बंधे समुप्प-
 ज्जइ जहण्णेणं एक्कं समयं उक्कोसेणं छम्भासा, सेत्तं परिणामपच्चइए, सेत्तं
 सार्ईयवीससाबंधे, सेत्तं वीससाबंधे ॥ ३४५ ॥ से किं तं पओगबंधे ? पओग-
 बंधे तिविहे पणत्ते, तंजहा—अणार्ईए वा अपज्जवसिए, सार्ईए वा अपज्जवसिए,
 सार्ईए वा सपज्जवसिए । तत्थ णं जे से अणार्ईए अपज्जवसिए से णं अट्ठुहं
 जीवमज्झपएसाणं । तत्थवि णं तिहं २ अणार्ईए अपज्जवसिए सेसाणं सार्ईए,
 तत्थ णं जे से सार्ईए अपज्जवसिए से णं सिट्ठानं, तत्थ णं जे से सार्ईए
 सपज्जवसिए से णं चउच्चिवहे पणत्ते, तंजहा—आलावणबंधे, अल्लियावणबंधे,
 सरीरबंधे, सरीरप्पओगबंधे । से किं तं आलावणबंधे ? आलावणबंधे जणं
 तणभाराण वा कट्ठभाराण वा पत्तभाराण वा पलालभाराण वा वेत्तभाराण
 वा वेत्तलयावागवरत्तरज्जुवल्लिकुसदब्भमार्ईएहिं आलावणबंधे समुप्पज्जइ
 जहण्णेणं अंतोमुहुत्तं उक्कोसेणं संखेज्जं कालं, सेत्तं आलावणबंधे । से किं तं
 अल्लियावणबंधे ? अल्लियावणबंधे चउच्चिवहे पणत्ते, तंजहा—लेसणाबंधे,
 उच्चयबंधे, समुच्चयबंधे, साहणणाबंधे । से किं तं लेसणाबंधे ? लेसणाबंधे

जण्णं कुट्टा णं कोट्टिमाणं खंभाणं पासायाणं कट्टाणं चम्पाणं घडाणं पडाणं कडाणं छुहाच्चिक्खिल्लसिलेस्सलक्खमहुसिथमाइएहि लेसणएहि बंधे समुप्पज्जइ जहण्णेणं अंतोमुहुत्तं, उक्कोसेणं संखेज्जं कालं, सेत्तं लेसणाबंधे । से किं तं उच्चयबंधे ? उच्चयबंधे जण्णं तणरासीण वा, कट्टरासीण वा, पतरासीण वा, तुसरसीण वा भुसरसीण वा गोमयरासीण वा अवगरसीण वा उच्चत्तेणं बंधे समुप्पज्जइ जहण्णेणं अंतोमुहुत्तं उक्कोसेणं संखेज्जं कालं, सेत्तं उच्चयबंधे । से किं तं समुच्चयबंधे ? समुच्चयबंधे जण्णं अगडतडागणईवहवाबी-पुक्खरिणीदीहिहियाणं गुंजालियाणं सराणं सरपतियाणं सरसरपतियाणं त्रिलपतियाणं देवकुलसभप्पवथूभस्साइयाणं फरिहाणं पागारट्टालमच्चरियदारगोपुरतोराणाणं पासायघरसरणलेणआवणाणं सिंघाडगतियच्चउक्कचच्चरचउम्मुहमहापहमाईणं छुहाच्चिक्खिल्लसिलेससमुच्चएणं बंधे समुप्पज्जइ जहण्णेणं अंतोमुहुत्तं उक्कोसेणं संखेज्जं कालं, सेत्तं समुच्चयबंधे । से किं तं साहणणाबंधे ? साहणणाबंधे दुविहे पणत्ते, तंजहा-देससाहणणाबंधे य सव्वसाहणणाबंधे य । से किं तं देससाहणणाबंधे ? देससाहणणाबंधे जण्णं सगडरहजाणज्जग्गित्थिल्लिथिल्लिसीयसंदमाणियलोहीलोहकडाहकडुच्छुयआसणसघणखंभमंडमत्तोवगरणमाईणं देससाहणणाबंधे समुप्पज्जइ जहण्णेणं अंतोमुहुत्तं उक्कोसेणं संखेज्जं कालं, सेत्तं देससाहणणाबंधे । से किं तं सव्वसाहणणाबंधे ? सव्वसाहणणाबंधे से णं खीरोदगमाईणं, सेत्तं सव्वसाहणणाबंधे, सेत्तं साहणणाबंधे, सेत्तं अल्लियावणबंधे ॥ ३४६ ॥ से किं तं सरीरबंधे ? सरीरबंधे दुविहे पणत्ते, तंजहा-पुव्वप्पओगपच्चइए य पडुप्पण्णपओगपच्चइए य । से किं तं पुव्वप्पओगपच्चइए पुव्वपओगपच्चइए जण्णं णेरइयाणं संसारत्थाणं सव्वजीवाणं तत्थ २ तेसु २ कारणेसु समोहणमाणाणं जीवप्पएसाणं बंधे समुप्पज्जइ सेत्तं पुव्वप्पओगपच्चइए । से किं तं पडुप्पण्णपओगपच्चइए ? २ जण्णं केवलणाणिस्स अणगारस्स केवलिसमुग्घाएणं समोहयस्स ताओ समुग्घायाओ पडिणियत्तमाणस्स अंतरा मंथे बट्टमाणस्स तेयाकम्माणं बंधे समुप्पज्जइ किं कारणं ? ताहे से पएसा एगत्तीगया भवति, सेत्तं पडुप्पण्णपओगपच्चइए, सेत्तं सरीरबंधे । से किं तं सरीरप्पओगबंधे ? सरीरप्पओगबंधे पंचविहे पणत्ते, तंजहा-ओरालियसरीर-

प्यओगबंधे, वेउच्चियसरीरप्यओगबंधे, आहारगसरीरप्यओगबंधे, तेयासरीरप्य-
ओगबंधे, कम्मासरीरप्यओगबंधे । ओरालियसरीरप्यओगबंधे णं भंते ! कइ-
विहे पणत्ते ? गोयमा ! पंचविहे पणत्ते, तंजहा—एंगिदियओरालियसरीरप्य-
ओगबंधे बेइदियओ० जाव पंचदियओरालियसरीरप्यओगबंधे । एंगिदियओरा-
लियसरीरप्यओगबंधे णं भंते ! कइविहे पणत्ते ? गोयमा ! पंचविहे पणत्ते,
तंजहा—पुढविककाइयएंगिदिय० एवं एएणं अभिलावेणं भेओ जहा ओगाहणसंठाणे
ओरालियसरीरस्स तहा भाणियच्चो जाव पज्जत्तगम्भवक्कंतियमणुस्सपंचदिय-
ओरालियसरीरप्यओगबंधे य अपज्जत्तगम्भवक्कंतियमणुस्स जाव बंधे य । ओरा-
लियसरीरप्यओगबंधे णं भंते ! कस्स कम्मस्स उदएणं ? गोयमा ! वीरिय-
सजोगसहृच्चयाए पमायपच्चया कम्मं च जोगं च भवं च आउयं च पडुच्च ओरा-
लियसरीरप्यओगणामकम्मस्स उदएणं ओरालियसरीरप्यओगबंधे । एंगिदिय-
ओरालियसरीरप्यओगबंधे णं भंते ! कस्स कम्मस्स उदएणं ? एवं चेव, पुढवि-
क्काइयएंगिदियओरालियसरीरप्यओगबंधे एवं चेव, एवं जाव वणस्सइकाइया,
एवं बेइदिया, एवं तेइदिया, एवं चउरिदिया । तिरिक्खजोणियपंचदियओरा-
लियसरीरप्यओगबंधे णं भंते ! कस्स कम्मस्स उदएणं ? एवं चेव, मणुस्स-
पंचदियओरालियसरीरप्यओगबंधे णं भंते ! कस्स कम्मस्स उदएणं ? गोयमा !
वीरियसजोगसहृच्चयाए पमायपच्चया जाव आउयं च पडुच्च मणुस्सपंचदिय-
ओरालियसरीरप्यओगणमकम्मस्स उदएणं । ओरालियसरीरप्यओगबंधे णं
भंते ! किं देसबंधे सव्वबंधे ? गोयमा ! देसबंधेवि सव्वबंधेवि । एंगिदिय-
ओरालियसरीरप्यओगबंधे णं भंते ! किं देसबंधे सव्वबंधे ? एवं चेव, एवं
पुढविककाइया, एवं जाव मणुस्सपंचदियओरालियसरीरप्यओगबंधे णं भंते !
किं देसबंधे सव्वबंधे ? गोयमा ! देसबंधेवि सव्वबंधेवि । ओरालियसरीरप्य-
ओगबंधे णं भंते ! कालओ केवच्चिरं होइ ? गोयमा ! सव्वबंधे एक्कं समयं,
देसबंधे जहण्णेणं एक्कं समयं, उक्कोसेणं तिण्णि पतिओवमाइं समयऊणाइं ।
एंगिदियओरालियसरीरप्यओगबंधे णं भंते ! कालओ केवच्चिरं होइ ? गोयमा !
सव्वबंधे एक्कं समयं, देसबंधे जहण्णेणं एक्कं समयं, उक्कोसेणं बावीसं वास-
सहस्साइं समयऊणाइं पुढविककाइयएंगिदियपुच्छा, गोयमा । सव्वबंधे एक्कं
समयं, देसबंधे जहण्णेणं खुडुगाभवग्गहणं तिसमयऊणं, उक्कोसेणं बावीसं वास-

सहस्साइं समयऊणाइं, एवं सव्वेसि सव्वबंधो एक्कं समयं, देसबंधो जेसि णत्थि वेउत्थियसरीरं तेसि जहणेणं खुड्डागं भवग्गहणं तिसमयऊणं, उक्कोसेणं जा जस्स ठिई सा समयऊणा कायव्वा, जेसि पुण अत्थि वेउत्थियसरीरं तेसि देसबंधो जहणेणं एक्कं समयं, उक्कोसेणं जा जस्स ठिई सा समयऊणा कायव्वा जाव मणुस्साणं देसबंधे जहणेणं एक्कं समयं, उक्कोसेणं तिण्णि पलि-ओवमाइं समयऊणाइं । ओरालियसरीरप्पओगबंधंतरं णं भंते ! कालओ केव-च्चिरं होइ ? गोयमा ! सव्वबंधंतरं जहणेणं खुड्डागं भवग्गहणं तिसमयऊणं, उक्कोसेणं तेत्तीसं सागरोवमाइं पुव्वक्कोडिसमयाहियाइं, देसबंधंतरं जहणेणं एक्कं समयं, उक्कोसेणं तेत्तीसं सागरोवमाइं तिसमयाहियाइं । एगिंदियओरालियपुच्छा, गोयमा ! सव्वबंधंतरं जहणेणं खुड्डागं भवग्गहणं तिसमयऊणं, उक्कोसेणं बावीसं वाससहस्साइं समयाहियाइं, देसबंधंतरं जहणेणं एक्कं समयं, उक्कोसेणं अंतोमुहुत्तं । पुढविककाइयएगिंदियपुच्छा गोयमा ! सव्वबंधंतरं जहेव एगिंदियस्स तहेव भाणियव्वं, देसबंधंतरं जहणेणं एक्कं समयं, उक्कोसेणं तिण्णि समया, जहा पुढविककाइयाणं एव जाव चउररिदियाणं वाउ-क्काइयवज्जाणं, णवरं सव्वबंधंतरं उक्कोसेणं जा जस्स ठिई सा समयाहिया कायव्वा, वाउक्काइयाणं सव्वबंधंतरं जहणेणं खुड्डागभवग्गहणं तिसमयऊणं, उक्कोसेणं तिण्णि वाससहस्साइं समयाहियाइं, देसबंधंतरं जहणेणं एक्कं समयं, उक्कोसेणं अंतोमुहुत्तं । पंचिदियतिरिक्खजोणियओरालियपुच्छा, गोयमा ! सव्वबंधंतरं जहणेणं खुड्डागभवग्गहणं तिसमयऊणं, उक्कोसेणं पुव्वकोडी समयाहिया, देसबंधंतरं जहा एगिंदियाणं तथा पंचिदियतिरिक्खजोणियाणं, एवं मणुस्साणवि णिरवसेसं भाणियव्वं जाव उक्कोसेणं अंतोमुहुत्तं । जीवस्स णं भंते ! एगिंदियत्ते णोएगिंदियत्ते पुणरवि एगिंदियत्ते एगिंदियओरालियसरी-रप्पओगबंधंतरं कालओ केवच्चिरं होइ ? गोयमा ! सव्वबंधंतरं जहणेणं दो खुड्डाइं भवग्गहणाइं तिसमयऊणाइं, उक्कोसेणं दो सागरोवमसहस्साइं सखेज्जवासमव्वहियाइं, देसबंधंतरं जहणेणं खुड्डागं भवग्गहणं समयाहियं, उक्कोसेणं दो सागरोवमसहस्साइं सखेज्जवासमव्वहियाइं । जीवस्स णं भंते ! पुढविककाइयत्ते णोपुढविककाइयत्ते पुणरवि पुढविककाइयत्ते पुढविककाइयएगिंदिय ओरालियसरीरप्पओगबंधंतरं कालओ केवच्चिरं होइ ? गोयमा ! सव्वबंधंतरं

जहणेणं दो खुड्डाई भवग्गहणाई तिसमयऊणाई, उक्कोसेणं अणंतं कालं अणंताओ उस्सप्पिणिओसप्पिणीओ कालओ, खेत्तओ अणंता लोगा असंखेज्जा पोग्गलपरियट्टा ते णं पोग्गलपरियट्टा आवलियाए असंखेज्जइभागो, देसबंधंतरं जहणेणं खुड्डागभवग्गहणं समयाहियं, उक्कोसेणं अणंतं कालं जाव आवलियाए असंखेज्जइभागो, जहा पुढविक्काइयाणं एवं वणस्सइकाइयवज्जाणं जाव मणुस्साणं, वणस्सइकाइयाणं दोण्णि खुड्डाई, एवं चेव उक्कोसेणं असंखेज्जं कालं असंखेज्जाओ उस्सप्पिणिओसप्पिणीओ कालओ, खेत्तओ असंखेज्जा लोगा, एवं देसबंधंतरंपि उक्कोसेणं पुढविकालो । एएसि णं भंते ! जीवाणं ओरालियसरीरस्स देसबंधगाणं सब्वबंधगाणं अबंधगाण य कयरे २ जाव विसेसाहिया वा ? गोयमा ! सब्वत्थोवा जीवा ओरालियसरीरस्स सब्वबंधगा, अबंधगा विसेसाहिया, देसबंधगा असंखेज्जगुणा ॥ ३४७ ॥ वेउव्वियसरीरप्पओगबंधे णं भंते ! कइविहे पणत्ते ? गोयमा ! दुविहे पणत्ते, तंजहा—एंगिदियवेउव्वियसरीरप्पओगबंधे य पंचिदियवेउव्वियसरीरप्पओगबंधे य । जइ एंगिदियवेउव्वियसरीरप्पओगबंधे कि वाउक्काइयएंगिदियसरीरप्पओगबंधे य अवाउक्काइयएंगिदिय० एवं एएणं अभिलावेणं जहा ओगाहणसंठाणे वेउव्वियसरीरमेओ तहा भाणियव्वो जाव पज्जत्तासव्वट्टसिद्धअणुत्तरोववाइयकप्पाईयवेमाणियदेवपंचिदियवेउव्वियसरीरप्पओगबंधे य अपज्जत्तासव्वट्टसिद्धअणुत्तरोववाइय जाव पओगबंधे य । वेउव्वियसरीरप्पओगबंधे णं भंते ! कस्स कम्मस्स उदएणं ? गोयमा ! वीरियसजोगसहव्वयाए जाव आउयं वा लद्धि वा पडुच्च वेउव्वियसरीरप्पओगणामाए कम्मस्स उदएणं वेउव्वियसरीरप्पओगबंधे । वाउक्काइयएंगिदियवेउव्वियसरीरप्पओग० पुच्छा गोयमा ! वीरियसजोगसहव्वयाए एवं चेव जाव लद्धि पडुच्च वाउक्काइयएंगिदियवेउव्विय जाव बंधे । रयणप्पभापुढविणेरइयपंचिदियवेउव्वियसरीरप्पओगबंधे णं भंते ! कस्स कम्मस्स उदएणं ? गोयमा ! वीरियसजोगसहव्वयाए जाव आउयं वा पडुच्च रयणप्पभापुढवि जाव बंधे, एवं जाव अहेसत्तमाए । तिरिक्खजोणियपंचिदियवेउव्वियसरीरपुच्छा, गोयमा ! वीरिय० जाव जहा वाउक्काइयाणं, मणुस्सपंचिदियवेउव्वियसरीरप्पओग० पुच्छा, एवं चेव, असुरकुमारभवणवासिदेवपंचिदियवेउव्विय जाव बंधे, जहा रयणप्पभापुढविणेरइयाणं एवं जाव थणिय-

कुमारा, एवं वाणमंतरा, एवं जोइसिया, एवं सोहम्मकप्पोवया वेमाणिया एवं जाव अच्चुयगेवेज्जकप्पाईयवेमाणिया अणुत्तरोववाइयकप्पाईय-वेमाणिया एवं चेव । वेउच्चियसरीरप्पओगबंधे णं भंते ! किं देसबंधे सव्वबंधे ? गोयमा ! देसबंधेवि सव्वबंधेवि, वाउक्काइयएंगिदिय० एवं चेव, रयणप्पभापुट्टविणेइयया एवं देव एवं जाव अणुत्तरोववाइया । वेउच्चियसरीर-प्पओगबंधे णं भंते ! कालओ केवच्चिरं होइ ? गोयमा ! सव्वबंधे जहण्णेणं एक्कं समयं, उक्कोसेणं दो समयया, देसबंधे जहण्णेणं एक्कं समयं, उक्कोसेणं तेत्तीसं सागरोवमाइं समयऊणाइं । वाउक्काइयएंगिदियवेउच्चिय पुच्छा ? गोयमा ! सव्वबंधे एक्कं समयं, देसबंधे जहण्णेणं एक्कं समयं, उक्कोसेणं अंतोमुहुत्तं । रयणप्पभा पुट्टविणेइयपुच्छा, गोयमा ! सव्वबंधे एक्कं समयं, देसबंधे जहण्णेणं दसवाससहस्साइं तिसमयऊणाइं, उक्कोसेणं सागरोवमं समयऊणं, एवं जाव अहे सत्तमा णवरं देसबंधे जस्स जा जहण्णिया ठिई सा तिसमयऊणा कायच्चा जाव उक्कोसा सा समयऊणा । पंचिदियतिरिक्खजोगियाणं मणुस्साण य जहा वाउक्काइयाणं । असुरकुमारणागकुमार जाव अणुत्तरोववाइयाणं जहा णेरइयाणं णवरं जस्स जा ठिई सा भाणियच्चा जाव अणुत्तरोववाइयाणं सव्वबंधे एक्कं समयं देसबंधे जहण्णेणं एक्कतीसं सागरोवमाइं तिसमय-ऊणाइं, उक्कोसेणं तेत्तीसं सागरोवमाइं समयऊणाइं । वेउच्चियसरीरप्प-ओगबंधंतरं णं भंते ? कालओ केवच्चिरं होइ ? गोयमा ! सव्वबंधंतरं जहण्णेणं एक्कं समयं, उक्कोसेणं अणंतं कालं अणंताओ जाव आवलियाए असंखेज्जइभागो, एवं देसबंधंतरंपि । वाउक्काइयवेउच्चियसरीरपुच्छा ? गोयमा ! सव्वबंधंतरं जहण्णेणं अंतोमुहुत्तं, उक्कोसेणं पल्लिओवमस्स असं-खेज्जइभागं, एवं देसबंधंतरंपि । तिरिक्खजोगियपंचिदियवेउच्चियसरीर-प्पओगबंधंतरं पुच्छा, गोयमा ! सव्वबंधंतरं जहण्णेणं अंतोमुहुत्तं, उक्कोसेणं पुव्वकोडिपुहुत्तं, एवं देसबंधंतरंपि, एवं मणुस्सस्सवि । जीवस्स णं भंते ! वाउक्काइयत्ते णोवाउक्काइयत्ते पुणरवि वाउक्काइयत्ते वाउक्काइयएंगिदियवेउच्चिय-पुच्छा ? गोयमा ! सव्वबंधंतरं जहण्णेणं अंतोमुहुत्तं, उक्कोसेणं अणंतं कालं वणस्सइकालो, एवं देसबंधंतरंपि । जीवस्स णं भंते ! रयणप्पभापुट्टविणेइयत्ते णोरयणप्पभापुट्टवि० पुच्छा ? गोयमा ! सव्वबंधंतरं जहण्णेणं दसवाससहस्साइं

अंतोमुहुत्तमव्भहियाई, उक्कोसेणं वणस्सइकालो, देसबंधंतरं जहण्णेणं, अंतोमुहुत्तं-
उक्कोसेणं अणंतं कालं वणस्सइकालो, एवं जाव अहेसत्तमाए, णवरं जा जस्स
ठिई जहण्णिया सा सव्वबंधंतरं जहण्णेणं अंतोमुहुत्तमव्भहिया कायव्वा, सेसं तं
चेव । पींचदियतिरिक्खजोणियमणुस्साण य जहा वाउक्काइयाणं । असुरकुमार-
णागकुमार जाव सहस्सारदेवाणं एएसि जहा रयणप्पभापुढविणेरइयाणं णवरं
सव्वबंधंतरं जस्स जा ठिई जहण्णिया सा अंतोमुहुत्तमव्भहिया कायव्वा, सेसं
तं चेव । जीवस्स णं भंते ! आणयदेवत्ते णोआणयदेवत्ते ०पुच्छा ? गोयमा ! सव्व-
बंधंतरं जहण्णेणं अट्टारस सागरोवमाई वासपुहुत्तमव्भहियाई, उक्कोसेणं अणंतं
कालं वणस्सइकालो, देसबंधंतरं जहण्णेणं वासपुहुत्तं उक्कोसेणं अणंतं कालं
वणस्सइकालो, एवं जाव अच्चुए णवरं जस्स जा ठिई सा सव्वबंधंतरं जहण्णेणं
वासपुहुत्तमव्भहिया कायव्वा सेसं तं चेव । गेवेज्जकप्पाईयापुच्छा ? गोयमा !
सव्वबंधंतरं जहण्णेणं बाधीसं सागरोवमाई वासपुहुत्तमव्भहियाई, उक्कोसेणं
अणंतं कालं वणस्सइकालो, देसबंधंतरं जहण्णेणं वासपुहुत्तं उक्कोसेणं वणस्स-
इकालो । जीवस्स णं भंते ! अणुत्तरोववाइयपुच्छा ? गोयमा ! सव्वबंधंतरं
जहण्णेणं एक्कतीसं सागरोवमाई वासपुहुत्तमव्भहियाई, उक्कोसेणं संखेज्जाई
सागरोवमाई, देसबंधंतरं जहण्णेणं वासपुहुत्तं, उक्कोसेणं संखेज्जाई सागरो-
वमाई । एएसि णं भंते ! जीवाणं वेउव्वियसरीरस्स देसबंधगाणं सव्वबंधगाणं
अबधगाणं य कयरे २ हितो, जाव विसेसाहिया वा ? गोयमा ! सव्वत्थोवा जीवा
वेउव्वियसरीरस्स सव्वबंधगा, देसबंधगा असंखेज्जगुणा, अबंधगा अणंतगुणा ।
आहारगसरीरप्पओगबंधे णं भंते ! कइविहे पणत्ते ? गोयमा ! एगागारे
पणत्ते । जइ एगागारे पणत्ते किं मणुस्साहारगसरीरप्पओगबंधे अमणुस्साहा-
रगसरीरप्पओगबंधे ? गोयमा ! मणुस्साहारगसरीरप्पओगबंधे णो अमणुस्सा-
हारगसरीरप्पओगबंधे, एवं एएणं अभिलावेणं जहा ओगाहणसंठाणे जाव इड्ढि-
पत्तपमत्तसंजयसम्मद्विड्ढिपज्जत्तसंखेज्जवासाउयकम्मभूमियगवभवकत्तियमणु-
स्साहारगसरीरप्पओगबंधे, णो अणिड्ढिपत्तपमत्त जाव आहारगसरीरप्पओगबंधे ।
आहारगसरीरप्पओगबंधे णं भंते ! कस्स कम्मस्स उदएणं ? गोयमा ! नीरिय-
सज्जोवसद्वव्याए जाव लोद्धि वा पडुच्च आहारगसरीरप्पओगणामाए कम्मस्स
उदएण आहारगसरीरप्पओगबंधे । आहारगसरीरप्पओगबंधे णं भंते ! किं

देसबंधे सव्वबंधे ? गोयमा ! देसबंधेवि सव्वबंधेवि । आहारगसरीरप्पओग-
 बंधे णं भंते ! कालओ केवच्चिरं होइ ? गोयमा ! सव्वबंधे एक्कं समयं,
 देसबंधे जहण्णेणं अंतोमुहुत्त उवकोसेणवि अंतोमुहुत्तं । आहारगसरीरप्पओग-
 बंधंतरं णं भंते ! कालओ केवच्चिरं होइ ? गोयमा ! सव्वबंधंतरं जहण्णेणं
 अंतोमुहुत्तं उवकोसेणं अणंतं कालं अणंताओ ओसप्पिणउस्सप्पिणीओ कालओ,
 खेतओ अणंता लोया अवड्ढं पोग्गलपरियट्ठं देसुणं, एवं देसबंधंतरं पि । एएसि
 णं भंते ! जीवाणं आहारगसरीरस्स देसबंधगाणं सव्वबंधगाणं अबंधगाण य
 कयरे २ हितो जाव विसेसाहिया वा ? गोयमा ! सव्वत्थोवा जीवा आहारग-
 सरीरस्स सव्वबंधगा, देसबंधगा संखेज्जगुणा, अबंधगा अणंतगुणा ३ ॥ ३४८ ॥
 तेयासरीरप्पओगबंधे णं भंते ! कइविहे पणत्ते ? गोयमा ! पंचविहे पणत्ते,
 तंजहा—एगिदियतेयासरीरप्पओगबंधे य अइदिय० तेइदिय० जाव पंचिदियतेया-
 सरीरप्पओगबंधे य । एगिदियतेयासरीरप्पओगबंधे णं भंते ! कइविहे
 पणत्ते ? एवं एएणं अभिलविणं भेओ जहा ओगाहणसंठाणे जाव पज्जत्तासव्व-
 ट्ठसिद्धअणुत्तरोववाइयकप्पाईयवेमाणियदेवपंचिदियतेयासरीरप्पओगबंधे य
 अपज्जत्तासव्वट्ठसिद्धअणुत्तरोववाइय जाव बंधे य । तेयासरीरप्पओगबंधे णं भंते !
 कस्स कम्मस्स उदएणं ? गोयमा ! वीरियसजोगसद्व्वयाए जाव आउयं च
 पडुच्च तेयासरीरप्पओगणामाए कम्मस्स उदएणं तेयासरीरप्पओगबंधे । तेया-
 सरीरप्पओगबंधे णं भंते ! किं देसबंधे सव्वबंधे ? गोयमा ! देसबंधे णो
 सव्वबंधे । तेयासरीरप्पओगबंधे णं भंते ! कालओ केवच्चिरं होइ ? गोयमा !
 दुविहे पणत्ते, तंजहा—अणाइए वा अपज्जवसिए अणाइए वा सपज्जवसिए ।
 तेयासरीरप्पओगबंधंतरं णं भंते ! कालओ केवच्चिरं होइ ? गोयमा ! अणा-
 इयस्स अपज्जवसियस्स णत्थि अंतरं, अणाइयस्स सपज्जवसियस्स णत्थि
 अंतरं । एएसि णं भंते ! जीवाणं तेयासरीरस्स देसबंधगाणं अबंधगाण य
 कयरे २ हितो जाव विसेसाहिया वा ? गोयमा ! सव्वत्थोवा जीवा तेयासरीर-
 स्स अबंधगा, देसबंधगा अणंतगुणा ४ ॥ ३४९ ॥ कम्मासरीरप्पओगबंधे णं
 भंते ! कइविहे पणत्ते ? गोयमा ! अट्ठविहे पणत्ते, तंजहा—णाणावरणिज्ज-
 कम्मासरीरप्पओगबंधे जाव अंतराइयकम्मासरीरप्पओगबंधे । णाणावरणिज्ज-

कम्मासरीरप्पओगबंधे णं भंते कस्स ! कम्मस्स उदएणं ? गोयमा ! णाणपडि-
 पीययाए णाणणिह्वणयाए, णाणंतराएणं, णाणप्पओसेणं, णाणच्चासायणयाए,
 णाणविसंवायणाजोगेणं णाणावरणिज्जकम्मासरीरप्पओगणामाए कम्मस्स उद-
 एणं णाणावरणिज्जकम्मासरीरप्पओगबंधे ! दरिसणावरणिज्जकम्मासरीरप्प-
 ओगबंधे णं भंते ! कस्स कम्मस्स उदएणं ? गोयमा ! दंसणपडिणीययाए
 एवं जहा णाणावरणिज्जं णवरं दंसणणाम घेत्त्वं जाव दंसणविसंवायणाजोगेणं
 दरिसणावरणिज्जकम्मासरीरप्पओगणामाए कम्मस्स उदएणं जाव पओगबंधे ।
 सायावेयणिज्जकम्मासरीरप्पओगबंधे णं भंते ! कस्स कम्मस्स उदएणं ?
 गोयमा ! पाणाणुकंपयाए भूयाणुकंपयाए एवं जहा सत्तमसए दसमोद्देसए जाव
 अपरियावणयाए सायावेयणिज्जकम्मासरीरप्पओगणामाए कम्मस्स उदएणं
 सायावेयणिज्जकम्मा जाव बंधे ! असायावेयणिज्जपुच्छा ? गोयमा ! परदुक्खण-
 याए परसोयणयाए जहा सत्तमसए दसमोद्देसए जाव परियावणयाए असायावेय-
 णिज्जकम्मा जाव पओगबंधे । मोहणिज्जकम्मासरीरप्पओगपुच्छा ? गोयमा !
 तिक्वकोहयाए, तिक्वमाणयाए, तिक्वमाययाए, तिक्वल्लोहयाए, तिक्वदंसणमोह-
 णिज्जयाए, तिक्वचरित्तमोहणिज्जयाए, मोहणिज्जकम्मासरीरप्पओग जाव
 पओगबंधे । णेरइयाउयकम्मासरीरप्पओगबंधे णं भंते ! पुच्छा ? गोयमा !
 महारंभयाए, महापरिग्गहयाए, कुणिमाहारेणं, पंचिदियवहेणं, णेरइयाउयकम्मा-
 सरीरप्पओगणामाए कम्मस्स उदएणं णेरइयाउयकम्मासरीर जाव पओगबंधे ।
 तिरिक्खजोणियाउयकम्मासरीरप्पओगपुच्छा ? गोयमा ! माइल्लयाए, णियडिल्ल-
 याए, अलियवयणेणं, कूडतुलकूडमाणेणं, तिरिक्खजोणियाउयकम्मासरीर जाव
 पओगबंधे । मणुस्सआउयकम्मासरीरपुच्छा ? गोयमा ! पगइभइयाए, पगइवि-
 णीययाए, साणुककोसयाए, अमच्छरियाए, मणुस्साउयकम्मा जाव पओगबंधे ।
 देवाउयकम्मासरीरपुच्छा ? गोयमा ! सरागसंजमेणं संजमासंजमेणं, बालतवी-
 कम्मेणं, अकामणिज्जराए, देवाउयकम्मासरीर जाव पओगबंधे । सुभणाम-
 कम्मासरीरपुच्छा ? गोयमा ! काउज्जुययाए, भावुज्जुययाए, भासुज्जुययाए,
 अविंसंवायणाजोगेणं, सुभणामकम्मासरीर जाव पओगबंधे । असुभणामकम्मासरी-
 रपुच्छा ? गोयमा ! कायअणुज्जुययाए, भावअणुज्जुययाए, भासअणुज्जुययाए,

विसंवायणाजोगेण असुभयामकम्मा जाव पओगबंधे । उच्चागोयकम्मासरीर-
 पुच्छा ? गोयमा ! जाइअमएणं, कुलअमएणं, बलअमएणं, रूवअमएणं, तवअम-
 एणं सुयअमएणं, लामअमएणं, इस्सरियअमएणं, उच्चागोयकम्मासरीर जाव
 पओगबंधे । नीयागोयकम्मासरीरपुच्छा ? गोयमा ! जाइमएणं, कुलमएणं, बल-
 मएणं, जाव इस्सरियमएणं, नीयागोयकम्मासरीर जाव पओगबंधे । अंतराइय-
 कम्मासरीरपुच्छा ? गोयमा ! दाणंतराएणं, लाभंतराएणं, भोगंतराएणं, उवभोगं-
 तराएणं, वीरियंतराएणं, अंतराइयकम्मासरीरपपओगणामाए कम्मस्स उदएणं,
 अंतराइयकम्मासरीरपपओगबंधे । णाणावरणिज्जकम्मासरीरपपओगबंधे णं भंते !
 किं देसबंधे सव्वबंधे ? गोयमा ! देसबंधे णो सव्वबंधे, एवं जाव अंतराइय-
 कम्मा० । णाणावरणिज्जकम्मासरीरपपओगबंधे णं भंते ! कालओ केवच्चिरं
 होइ ? गोयमा ! णाणा० दुविहे पणत्ते, तंजहा—अणाइए सवज्जवसिए अणा-
 इए अपज्जवसिए, एवं जहा तेयगस्स संचिट्ठणा तहेव एवं जाव अंतराइयकम्म-
 स्स । णाणावरणिज्जकम्मासरीरपपओगबंधंतरे णं भंते ! कालओ केवच्चिरं
 होइ ? गोयमा ! अणाइयस्स एवं जहा तेयगसरीरस्स अंतरं तहेव एवं जाव
 अंतराइयस्स । एएसि णं भंते ! जीवाणं णाणावरणिज्जस्स कम्मस्स देसबंध-
 गाणं अबंधगाणं थ कयरे २ जाव अप्पाबहुगं जहा तेयगस्स, एवं आउयवज्जं
 जाव अंतराइयस्स । आउयस्स पुच्छा ? गोयमा ! सव्वत्थोवा जीवा आउयस्स
 कम्मस्स देसबंधगा, अबंधगा संखेज्जगुणा ५ ॥ ३५० ॥ जस्स णं भंते !
 ओरालियसरीरस्स सव्वबंधे से णं भंते ! वेउव्वियसरीरस्स किं बंधए अबंधए ?
 गोयमा ! णो बंधए अबंधए, आहारगसरीरस्स किं बंधए अबंधए ? गोयमा !
 णो बंधए अबंधए, तेयासरीरस्स किं बंधए अबंधए ? गोयमा ! बंधए णो
 अबंधए, जइ बंधए किं देसबंधए सव्वबंधए ? गोयमा ! देसबंधए णो सव्व-
 बंधए, कम्मासरीरस्स किं बंधए अबंधए ? जहेव तेयगस्स जाव देसबंधए णो
 सव्वबंधए । जस्स णं भंते ! ओरालियसरीरस्स देसबंधे से णं भंते ! वेउ-
 व्वियसरीरस्स किं बंधए अबंधए ? गोयमा ! णो बंधए अबंधए, एवं जहेव
 सव्वबंधेणं भणियं तहेव देसबंधेणवि भाणियव्वं जाव कम्मगस्स । जस्स
 णं भंते ? वेउव्वियसरीरस्स सव्वबंधे से णं भंते ! ओरालियसरीरस्स किं
 बंधए अबंधए ? गोयमा ! णो बंधए अबंधए, आहारगसरीरस्स एवं चेव

तेयगस्स कम्मगस्स य जहेव ओरालिएणं समं भणियं तहेव भाणियव्वं जाव देसबंधए णो सव्वबंधए । जस्स णं भंते ! वेउव्वियसरीरस्स देसबंधे से णं भंते ! ओरालियसरीरस्स कि बंधए अबंधए ? गोयमा ! णो बंधए, अबंधए एवं जहेव सव्वबंधेणं भणियं तहेव देसबंधेणवि भाणियव्वं जाव कम्मगस्स । जस्स णं भंते ! आहारगसरीरस्स सव्वबंधे से णं भंते ! ओरालियसरीरस्स कि बंधए अबंधए ? गोयमा ! णो बंधए अबंधए, एवं वेउव्वियससवि, तेयाकम्माणं जहेव ओरालिएणं समं भणियं तहेव भाणियव्वं । जस्स णं भंते ! आहारगसरीरस्स देसबंधे से णं भंते ! ओरालियसरीरस्स० एवं जहा आहारगसरीरस्स सव्वबंधेणं भणियं तहा देसबंधेणवि भाणियव्वं जाव कम्मगस्स । जस्स णं भंते ! तेयासरीरस्स देसबंधे से णं भंते ! ओरालियसरीरस्स कि बंधए अबंधए ? गोयमा ! बंधए वा अबंधए वा, जइ बंधए कि देसबंधए सव्वबंधए ? गोयमा ! देसबंधए वा सव्वबंधए वा, वेउव्वियसरीरस्स कि बंधए अबंधए ? एवं चेव, एवं आहारगसरीरस्सवि, कम्मगसरीरस्स कि बंधए अबंधए ? गोयमा ! बंधए णो अबंधए, जइ बंधए कि देसबंधए सव्वबंधए ? गोयमा ! देसबंधए णो सव्वबंधए । जस्स णं भंते ! कम्मगसरीरस्स देसबंधे से णं भंते ! ओरालियसरीरस्स० जहा तेयगस्स वत्तव्वया भणिया तहा कम्मगस्सवि भाणियव्वा जाव तेयासरीरस्स जाव देसबंधए णो सव्वबंधए ॥ ३५१ ॥ एएसि णं भंते ! सव्वजीवाणं ओरालियवेउव्वियआहारगतेयाकम्मासरीरगाणं देसबंधगाणं सव्वबंधगाणं अबंधगाणं य कयरे २ जाव विसेसाहिया वा ? गोयमा ! सव्वत्थोवा जीवा आहारगसरीरस्स सव्वबंधगा १ तस्स चेव देसबंधगा संखेज्जगुणा २ वेउव्वियसरीरस्स सव्वबंधगा असंखेज्जगुणा ३ तस्स चेव देसबंधगा असंखेज्जगुणा ४ तेयाकम्मगाणं दुष्हवि तुल्ला अबंधगा अणंतगुणा ५ ओरालियसरीरस्स सव्वबंधगा अणंतगुणा ३ तस्स चेव अबंधगा विसेसाहिया ७ तस्स चेव देसबंधगा असंखेज्जगुणा ८ तेयाकम्मगाणं देसबंधगा विसेसाहिया ९ वेउव्वियसरीरस्स अबंधगा विसेसाहिया १० आहारगसरीरस्स अबंधगा विसेसाहिया ११ । सेवं भंते ! २ त्ति ॥ ३५२ ॥

अट्टमं सयं दसमो उद्देशो

रार्यागिहे णयरे जाव एवं वयासी-अण्णउत्थिया णं भंते ! एवमाइव्वंति

जाव एवं परूवेति—एवं खलु सीलं सेयं, सुयं सेयं, सुप्रं सेयं सीलं सेयं । से कह-
मेयं भंते ! एवं ? गोयमा ! जणं ते अण्णउत्थिया एवमाइक्खंति जात्र जे ते
एवमाहंसु मिच्छा ते एवमाहंसु, अहं पुण गोयमा ! एवमाइक्खामि जाव परूवेमि,
एवं खलु मए चत्तारि पुरिसजाया पण्णत्ता तज्जहा—सीलसंपण्णे णामं एगे
णो सुयसंपण्णे १ सुयसंपण्णे णामं एगे णो सीलसंपण्णे २ एगे सीलसंपण्णेवि
सुयसंपण्णेवि ३ एगे णो सीलसंपण्णे णो सुयसंपण्णे ४ । तत्थ णं जे से पहमे
पुरिसजाए से णं पुरिसे सीलवं असुयवं, उवरए अविण्णायधम्मे, एस णं गोयमा !
मए पुरिसे देसाराहए पण्णत्ते, तत्थ णं जे से दोच्चे पुरिसजाए से णं पुरिसे
असीलवं सुयवं, अणुवरए विण्णायधम्मे, एस णं गोयमा ! मए पुरिसे देस-
विराहए पण्णत्ते, तत्थ णं जे से तच्चे पुरिसजाए से णं पुरिसे सीलवं सुयवं,
उवरए विण्णायधम्मे, एस णं गोयमा ! मए पुरिसे सब्वाराहए पण्णत्ते, तत्थ
णं जे से चउत्थे पुरिसजाए से णं पुरिसे असीलवं असुयवं, अणुवरए अवि-
ण्णायधम्मे, एस णं गोयमा ! मए पुरिसे सब्वविराहए पण्णत्ते ॥३५३॥ कइ-
विहा णं भंते ! आराहणा पण्णत्ता ? गोयमा ! तिविहा आराहणा पण्णत्ता,
तज्जहा—णाणाराहणा दंसणाराहणा चरित्ताराहणा । णाणाराहणा णं भंते !
कइविहा पण्णत्ता ? गोयमा ! तिविहा पण्णत्ता—उक्कोसिया मज्झिमा जहण्णा ।
दंसणाराहणा णं भंते ! कइविहा प० ? एवं चेव तिविहावि । एवं चरित्ताराह-
णावि । जस्स णं भंते ! उक्कोसिया णाणाराहणा तस्स उक्कोसिया दंसणाराहणा
जस्स उक्कोसिया दंसणाराहणा तस्स उक्कोसिया णाणाराहणा ? गोयमा !
जस्स उक्कोसिया णाणाराहणा तस्स दंसणाराहणा उक्कोसिया वा अजहण्ण-
उक्कोसिया वा, जस्स पुण उक्कोसिया दंसणाराहणा तस्स णाणाराहणा उक्कोसा
वा जहण्णा वा अजहण्णमणुक्कोसा वा । जस्स णं भंते ! उक्कोसिया णाण-
ाराहणा तस्स उक्कोसिया चरित्ताराहणा जस्सुक्कोसिया चरित्ताराहणा तस्सु-
क्कोसिया णाणाराहणा ? जहा उक्कोसिया णाणाराहणा य दंसणाराहणा य
भणिया तहा उक्कोसिया णाणाराहणा य चरित्ताराहणा य भाणियव्वा । जस्स
णं भंते ! उक्कोसिया दंसणाराहणा तस्सुक्कोसिया चरित्ताराहणा जस्सुक्को-
सिया चरित्ताराहणा तस्सुक्कोसिया दंसणाराहणा ? गोयमा ! जस्स उक्को-
सिया दंसणाराहणा तस्स चरित्ताराहणा उक्कोसा वा जहण्णा वा अजहण्ण-

मनुकोसां वा जस्स पुण उक्कोसिया चरित्ताराहणा तस्स दंसणाराहणा
 णियमा उक्कोसा । उक्कोसियं णं भंते ! णाणाराहणं आराहेत्ता कइहि
 भवग्गहणेहि सिज्झइ जाव अंतं करेइ ? गोयमा ! अत्थेगइए तेणेव भव-
 ग्गहणेणं सिज्झइ जाव अंतं करेइ अत्थेगइए दोच्चेणं भवग्गहणेणं सिज्झइ
 जाव अंतं करेइ, अत्थेगइए कप्पोवएसु वा कप्पाईएसु वा उववज्जइ ।
 उक्कोसियं णं भंते ! दंसणाराहणं आराहेत्ता कइहि भवग्गहणेहि सिज्झइ
 जाव अंतं करेइ ? एवं चेव । उक्कोसियं णं भंते ! चरित्ताराहणं आरा-
 हेत्ता ० ? एवं चेव णवरं अत्थेगइए कप्पाईएसु उववज्जइ । मज्झिमियं
 णं भंते ! णाणाराहणं आराहेत्ता कइहि भवग्गहणेहि सिज्झइ जाव अंतं
 करेइ ? गोयमा ! अत्थेगइए दोच्चेणं भवग्गहणेणं सिज्झइ जाव अंतं करेइ
 तच्चं पुण भवग्गहणं णाइक्कमइ । मज्झिमियं णं भंते ! दंसणाराहणं आरा-
 हेत्ता ० एवं चेव, एवं मज्झिमियं चरित्ताराहणंपि । जहण्णियण्णं भंते !
 णाणाराहणं आराहेत्ता कइहि भवग्गहणेहि सिज्झइ जाव अंतं करेइ ?
 गोयमा ! अत्थेगइए तच्चेणं भवग्गहणेणं सिज्झइ जाव अंतं करेइ
 सत्तभवग्गहणाइं पुण णाइक्कमइ, एवं दंसणाराहणंपि, एवं चरित्ताराह-
 णंपि ॥ ३५४ ॥ कइविहे णं भंते ! पोगलपरिणामे पण्णत्ते ? गोयमा !
 पंचविहे पोगलपरिणामे पण्णत्ते, तंजहा-वण्णपरिणामे १ गंधप० २ रसप० ३
 फासप० ४ संठाणप० ५ । वण्णपरिणामे णं भंते ! कइविहे पण्णत्ते ? गोयमा !
 पंचविहे पण्णत्ते, तंजहा-कालवण्णपरिणामे जाव सुविकल्लवण्णपरिणामे, एवं
 एएणं अभिल्लावेणं गंधपरिणामे दुविहे, रसपरिणामे पंचविहे, फासपरिणामे
 अट्टविहे । संठाणपरिणामे णं भंते ! कइविहे पण्णत्ते ? गोयमा ! पंचविहे
 पण्णत्ते, तंजहा-परिमंडलसंठाणपरिणामे जाव आययसंठाणपरिणामे ॥ ३५५ ॥
 एगे भंते ! पोगलत्थिकायपएसे किं दव्वं १ दव्वदेसे २ दव्वाइं ३ दव्वदेसा
 ४ उदाहु दव्वं च दव्वदेसे य ५ उदाहु दव्वं च दव्वदेसा य ६ उदाहु दव्वाइं
 च दव्वदेसे य ७ उदाहु दव्वाइं च दव्वदेसा य ८ ? गोयमा ! सिय दव्वं सिय
 दव्वदेसे णो दव्वाइं णो दव्वदेसा णो दव्वं च दव्वदेसे य जाव णो दव्वाइं च
 दव्वदेसा य । दो भंते ! पोगलत्थिकायपएसा किं दव्वं दव्वदेसे ? पुच्छा तहेव,
 गोयमा ! सिय दव्वं १ सिय दव्वदेसे २ सिय दव्वाइं ३ सिय दव्वदेसा ४ सिय

द्वं च दव्वदेसे य ५ णो दव्वं च दव्वदेसा य ६ सेसा पडिसेहेयव्वा । तिण्णि भंते ! पोग्गलत्थिकायपएसा कि दव्वं दव्वदेसे० ? पुच्छा, गोयमा ! सिय दव्वं १ सिय दव्वदेसे २ एवं सत्त भंगा भाणियव्वा जाव सिय दव्वाइं च दव्वदेसे य णो दव्वाइं च दव्वदेसा य । चत्तारि भंते ! पोग्गलत्थिकायपएसा कि दव्वं० ? पुच्छा, गोयमा ! सिय दव्वं १ सिय दव्वदेसे २ अट्ठवि मंगा भाणियव्वा जाव सिय दव्वाइं च दव्वदेसा य ८ । जहा चत्तारि भणिया एवं पंच छ सत्त जाव संखेज्जा असंखेज्जा । अणंता भंते ! पोग्गलत्थिकायपएसा कि दव्वं० ? एवं सेव जाव सिय दव्वाइं च दव्वदेसा य ॥ ३५६ ॥ केवइया णं भंते ! लोयागासपएसा प० ? गोयमा ! असंखेज्जा लोयागासपएसा प० । एगमेगस्स णं भंते ! जीवस्स केवइया जीवपएसा प० ? गोयमा ! जावइया 'लोयागास-पएसा एगमेगस्स णं जीवस्स एवइया जीवपएसा पण्णत्ता ॥ ३५७ ॥ कइ णं भंते ! कम्मपयडोओ पण्णत्ताओ ? गोयमा ! अट्ठ कम्मपयडोओ पण्णत्ताओ, तंजहा-णाणावरणिज्जं जाव अंतराइयं । गेरइयाणं भंते ! कइ कम्मपयडोओ पण्णत्ताओ ? गोयमा ! अट्ठ, एवं सब्वजीवाणं अट्ठ कम्मपयडोओ ठावेयव्वाओ जाव वेमाणियाणं । णाणावरणिज्जस्स णं भंते ! कम्मस्स केवइया अविभाग-पलिच्छेया प० ? गोयमा ! अणंता अविभागपलिच्छेया प० । गेरइयाणं भंते ! णाणावरणिज्जस्स कम्मस्स केवइया अविभागपलिच्छेया प० ? गोयमा ! अणंता अविभागपलिच्छेया प० । एवं सब्वजीवाणं जाव वेमाणियाणं पुच्छा ? गोयमा ! अणंता अविभागपलिच्छेया प० एवं जहा णाणावरणिज्जस्स अविभागपलिच्छेया भणिया तथा अट्ठण्हवि कम्मपयडोणं भाणियव्वा जाव वेमाणियाणं अंतराइयस्स । एगमेगस्स णं भंते ! जीवस्स एगमेगे जीवपएसे णाणावरणिज्जस्स कम्मस्स केवइएहि अविभागपलिच्छेएहि आवेदिय परिवेदिए ? गोयमा ! सिय आवेदिय-परिवेदिए सिय णो आवेदियपरिवेदिए, जइ आवेदियपरिवेदिए णियमा अण-तेहि । एगमेगस्स णं भंते ! गेरइयस्स एगमेगे जीवपएसे णाणावरणिज्जस्स कम्मस्स केवइएहि अविभागपलिच्छेएहि आवेदिय परिवेदिए ? गोयमा ! णियमं अणतेहि, जहा गेरइयस्स एवं जाव वेमाणियस्स, णवरं मणूस्स जहा जीवस्स । एगस्स णं भंते ! जीवस्स एगमेगे जीवपएसे दरिसणावरणि-ज्जस्स कम्मस्स केवइएहि० एवं जहेव णाणावरणिज्जस्स तहेव दंडगो भाणि-

यवो जाव वेमाणियस्स, एवं जाव अंतराइयस्स भाणियव्वं, णवरं वेयणिज्जस्स
 आउयस्स णामस्स गोयस्स एएसि चउण्हवि कम्माणं मणूसस्स जहा णेरइयस्स
 तथा भाणियव्वं सेसं तं वेव ॥ ३५८ ॥ जस्स णं भंते ! णाणावरणिज्जं तस्स
 दरिसणावरणिज्जं जस्स दंसणावरणिज्जं तस्स णाणावरणिज्जं ? गोयमा ! जस्सणं
 णाणावरणिज्जं तस्स दंसणावरणिज्जं णियमा अत्थि, जस्सणं दरिसणावर-
 णिज्जं तस्सवि णाणावरणिज्जं णियमा अत्थि । जस्स णं भंते ! णाणावरणिज्जं
 तस्स वेयणिज्जं जस्स वेयणिज्जं तस्स णाणावरणिज्जं ? गोयमा ! जस्स
 णाणावरणिज्जं तस्स वेयणिज्जं णियमा अत्थि, जस्स पुण वेयणिज्जं तस्स
 णाणावरणिज्जं सिय अत्थि सिय णत्थि । जस्स णं भंते ! णाणावरणिज्जं तस्स
 मोहणिज्जं जस्स मोहणिज्जं तस्स णाणावरणिज्जं ? गोयमा ! जस्स णाणा-
 वरणिज्जं तस्स मोहणिज्जं सिय अत्थि सिय णत्थि, जस्स पुण मोहणिज्जं तस्स
 णाणावरणिज्जं णियमा अत्थि । जस्स णं भंते ! णाणावरणिज्जं तस्स आउयं ?
 एवं जहा वेयणिज्जेण समं भणियं तथा आउएणवि समं भाणियव्वं, एवं णामे-
 णवि एवं गोएणवि समं, अंतराइएण समं जहा दरिसणावरणिज्जेण समं तहेव
 णियमा परोप्परं भाणियव्वाणि १ । जस्स णं भंते ! दरिसणावरणिज्जं तस्स
 वेयणिज्जं जस्स वेयणिज्जं तस्स दरिसणावरणिज्जं ? जहा णाणावरणिज्जं
 उवरिमेहिं सत्तहिं कम्मोहिं समं भणियं तथा दरिसणावरणिज्जंपि उवरिमेहिं
 छाहिं कम्मोहिं समं भाणियव्वं जाव अंतराइएणं २ । जस्स णं भंते ! वेयणिज्जं
 तस्स मोहणिज्जं जस्स मोहणिज्जं तस्स वेयणिज्जं ? गोयमा ! जस्स वेयणिज्जं
 तस्स मोहणिज्जं सिय अत्थि सिय णत्थि, जस्स पुण मोहणिज्जं तस्स वेयणिज्जं
 णियमा अत्थि । जस्स णं भंते ! वेयणिज्जं तस्स आउयं ? एवं एयाणि
 परोप्परं णियमा, जहा आउएण समं एवं णामेणवि गोएणवि समं भाणियव्वं ।
 जस्स णं भंते ! वेयणिज्जं तस्स अंतराइयं ? पुच्छा, गोयमा ! जस्स वेय-
 णिज्जं तस्स अंतराइयं सिय अत्थि सिय णत्थि, जस्स पुण अंतराइयं तस्स
 वेयणिज्जं णियमा अत्थि ३ । जस्स णं भंते ! मोहणिज्जं तस्स आउयं जस्स
 आउयं तस्स मोहणिज्जं ? गोयमा ! जस्स मोहणिज्जं तस्स आउयं णियमा
 अत्थि, जस्स पुण आउयं तस्स मोहणिज्जं सिय अत्थि सिय णत्थि, एवं णामं

गोयं अंतराइयं च भाणियव्वं ४ । जस्स णं भंते ! आउयं तस्स णामं ० ? पुच्छा,
 गोयमा ! दोवि परोप्परं णियमं, एवं गोत्तेणवि सभं भाणियव्वं । जस्स णं
 भंते ! आउयं तस्स अंतराइयं ० ? पुच्छा, गोयमा ! जस्स आउयं तस्स
 अंतराइयं सिय अत्थि सिय णत्थि, जस्स पुण अंतराइयं तस्स आउयं
 णियमा अत्थि ५ । जस्स णं भंते ! णामं तस्स गोयं जस्स गोयं तस्स
 णामं ? गोयमा ! जस्स णामं तस्स णियमा गोयं, जस्स गोयं तस्स णियमा
 णामं, गोयमा ! दोवि एए परोप्परं णियमा अत्थि । जस्स णं भंते ! णामं तस्स
 अंतराइयं ० ? पुच्छा, गोयमा ! जस्स णामं तस्स अंतराइयं सिय अत्थि सिय
 णत्थि, जस्स पुण अंतराइयं तस्स णामं णियमा अत्थि ६ । जस्स णं भंते !
 गोयं तस्स अंतराइयं ० ? पुच्छा, गोयमा ! जस्स गोयं तस्स अंतराइयं सिय
 अत्थि सिय णत्थि, जस्स पुण अंतराइयं तस्स गोयं णियमा अत्थि ७ ॥ ३५६ ॥
 जीवे णं भंते ! किं पोग्गली पोग्गले ? गोयमा ! जीवे पोग्गलीवि पोग्गलेवि ।
 से केणट्ठेणं भंते ! एवं बुच्चइ जीवे पोग्गलीवि पोग्गलेवि ? गोयमा ! से
 जहाणामए छत्तेणं छत्ती, बडेणं दंडी, घडेणं घडी, पडेणं पडी, करेणं करी,
 एवामेव गोयमा ? जीवेवि सोहदियच्चिक्खदियपधोर्णिदियजिअिअदियफांसिदि-
 थाइं पडुच्च पोग्गली, जीवं पडुच्च पोग्गले, से तेणट्ठेणं गोयमा ! एवं बुच्चइ
 जीवे पोग्गलीवि पोग्गले वि । णेरइए णं भंते ? किं पोग्गली ० ? एवं चेव, एवं
 जाव वेमाणिए णवरं जस्स जइ इदियाइं तस्स तइ भाणियव्वाइं । सिद्धे णं भंते !
 किं पोग्गली पोग्गले ? गोयमा ! णो पोग्गली पोग्गले । से केणट्ठेणं भंते !
 एवं बुच्चइ जाव पोग्गले ? गोयमा ! जीवं पडुच्च, से तेणट्ठेणं गोयमा !
 एवं बुच्चइ सिद्धे णो पोग्गली पोग्गले । सेवं भंते ! सेवं भंते ! स्ति ॥ ३६० ॥

अट्टमं सयं समत्तं

॥ णवमं सयं पढमो उट्ठेसो ॥

जंबुद्दीवे १ जोइस २ अंतरदीवा ३० असोच्च ३१ गंगेय ३२ । कुंडगामे ३३
 पुरिसे ३४ णवममि सए चउत्तीसा ॥ १ ॥ तेणं कालेणं तेणं समएणं मिहिला
 णामं णयरी होत्था वण्णओ, माणिभद्दे चेइए वण्णओ, सामी समोसढे परिसा
 णिग्गया जाव भगवं गोयमे पज्जुवासमाणे एवं वयासी-कहि णं भंते ! जंबुद्दीवे

दीवे ? किसंठिए णं भंते ! जंबुद्दीवे दीवे ? एवं जंबुद्दीवपण्णत्ती भाणियब्बा जाव एवामेव संपुब्बावरेणं जंबुद्दीवे २ चोद्दस सल्लिा सयसहस्सा छप्पण्णं च सहस्सा भवन्तीतिमक्खाया । सेवं भंते ! सेवं भंते ! त्ति ॥ ३६१ ॥

णवमं सयं बीओ उद्देसो

रायगिहे जाव एवं वयासी-जंबुद्दीवे णं भंते ! दीवे केवइया चंदा पभासिसु वा पभासेति वा पभासिस्सति वा ? एवं जहा जीवाभिगमे जाव-‘एणं च सयसहस्सं तेत्तीतं खलु भवे सहस्साइं । णव य सया पण्णासा तारागणकोडिकोडोणं ॥१॥’सोभं सोभिंसु सोभिंति सोभिस्सति । लवणे णं भंते ! समुद्दे केवइया चंदा पभासिसु वा पभासिति वा पभासिस्सति वा ? एवं जहा जीवाभिगमे जाव ताराओ । धायइसंडे कालोदे पुक्खरवरे अंबितरपुक्खरद्धे मणुस्सखत्ते, एएसु सव्वेसु जहा जीवाभिगमे जाव-‘एगससीपरिवारो तारागणकोडिकोडोणं । पुक्खरद्धे णं भंते ! समुद्दे केवइया चंदा पभासिसु वा ३ ? एवं सव्वेसु दीवसमुद्देसु जोइसियाणं भाणियब्बं जाण सयंभूरमणे जाव सोभं सोभिंसु वा सोभिंति वा सोभिस्सति वा । सेवं भंते ! सेवं भंते ! त्ति ॥ ३६२ ॥

णवमं सयं ३-३० उद्देसो

रायगिहे जावं एवं वयासी-कहि णं भंते ! दाहिणिल्लानं एगोरुयमणुस्सानं एगोरुयदीवे णामं दीवे पण्णत्ते ? गोयमा ! जंबुद्दीवे दीवे मंदरस्स पव्वयस्स दाहिणेणं चुल्लहिमधंतस्स वासहरपव्वयस्स पुरत्थिमिल्लाओ चरिमंताओ लवणसमुद्दं उत्तरपुरत्थिमे णं तिण्णि जोयणसयाइं ओगाहिता एत्थ णं दाहिणिल्लानं एगोरुयमणुस्सानं एगोरुयदीवे णामं दीवे पण्णत्ते, तं गोयमा ! तिण्णि जोयणसयाइं आयामविषक्खंभेणं णवएमूणवण्णे जोयणसए किच्चिद्विसेसूणे परिक्खत्तेणं पण्णत्ते, से णं एगाए पउमवरवेइयाए एगेण थ वणसंडेणं सव्वओ समंता संपरिक्खत्ते दोण्हवि पमाणं वण्णओ य, एवं एएणं कमेणं एवं जहा जीवाभिगमे जाव सुद्धदंतदीवे जाव देवलोगपरिग्गहा णं ते मणुथा पण्णत्ता समणाउसो ! एवं अट्टावीसंपि अंतरदीवा सएणं २ आयामविक्खंभेणं भाणियब्बा, णवरं दीवे २ उद्देसओ, एवं सव्वेवि अट्टावीसं उद्देसगा भाणियब्बा । सेवं भंते ! सेवं भंते ! त्ति ॥ ३६३ ॥

णवमं सयं एगतीसइमो उद्देसो

रायगिहे जाव एवं वयासी-असोच्चा णं भंते ! केवलित्स वा केवलिमाव-
गस्स वा केवलिसावियाए वा केवलिउवासगस्स वा केवलिउवासियाए वा
तप्पक्खियस्स वा तप्पक्खियसावगस्स वा तप्पक्खियसावियाए वा तप्पक्खिय-
उवासगस्स वा तप्पक्खियउवासियाए वा केवलिपण्णत्तं धम्मं लभेज्ज सवणयाए ?
गोयमा ! असोच्चा णं केवलित्स वा जाव तप्पक्खियउवासियाए वा अत्थेगइए
केवलिपण्णत्तं धम्मं लभेज्ज सवणयाए, अत्थेगइए केवलिपण्णत्तं धम्मं णो
लभेज्ज सवणयाए । से केणट्ठेणं भंते ! एवं वुच्चइ-असोच्चा णं जाव णो
लभेज्ज सवणयाए ? गोयमा ! जस्स णं णाणावरणिज्जाणं कम्माणं खओवसमे
कडे भवइ से णं असोच्चा केवलित्स वा जाव तप्पक्खियउवासियाए वा केवलि-
पण्णत्तं धम्मं लभेज्ज सवणयाए, जस्स णं णाणावरणिज्जाणं कम्माणं खओ-
वसमे णो कडे भवइ से णं असोच्चा णं केवलित्स वा जाव तप्पक्खियउवा-
सियाए वा केवलिपण्णत्तं धम्मं णो लभेज्ज सवणयाए, से तेणट्ठेणं गोयमा !
एवं वुच्चइ-तं चेव जाव णो लभेज्ज सवणयाए । असोच्चा णं भंते ! केवलित्स
वा जाव तप्पक्खियउवासियाए वा केवलं बोहिं बुज्जेज्जा ? गोयमा ! असोच्चा
णं केवलित्स वा जाव अत्थेगइए केवलं बोहिं बुज्जेज्जा, अत्थेगइए
केवलं बोहिं णो बुज्जेज्जा । से केणट्ठेणं भंते ! जाव णो बुज्जेज्जा ? गोयमा !
जस्स णं दरिसणावरणिज्जाणं कम्माणं खओवसमे कडे भवइ से णं असोच्चा
केवलित्स वा जाव केवलं बोहिं बुज्जेज्जा, जस्स णं दरिसणावरणिज्जाणं
कम्माणं खओवसमे णो कडे भवइ से णं असोच्चा केवलित्स वा जाव केवलं
बोहिं णो बुज्जेज्जा, से तेणट्ठेणं जाव णो बुज्जेज्जा । असोच्चा णं भंते !
केवलित्स वा जाव तप्पक्खियउवासियाए वा केवलं मुंडे भवित्ता अगाराओ
अणगारियं पव्वएज्जा ? गोयमा ! असोच्चा णं केवलित्स वा जाव उवासियाए
वा अत्थेगइए केवलं मुंडे भवित्ता अगाराओ अणगारियं पव्वएज्जा, अत्थेगइए
केवलं मुंडे भवित्ता अगाराओ अणगारियं णो पव्वएज्जा । से केणट्ठेणं जाव णो
पव्वएज्जा ? गोयमा ! जस्स णं धम्मंतराइयाणं कम्माणं खओवसमे कडे
भवइ से णं असोच्चा केवलित्स वा जाव केवलं मुंडे भवित्ता अगाराओ अण-
गारियं पव्वएज्जा, जस्स णं धम्मंतराइयाणं कम्माणं खओवसमे णो कडे भवइ

से णं असोच्चा केवलस्स वा जाव मुंडे भवित्ता जाव णो पध्वएज्जा, से तेण-
 ट्ठेणं गोयमा ! जाव णो पध्वएज्जा । असोच्चा णं भंते ! केवलस्स वा जाव
 उवासियाए वा केवलं बंभचेरवासं आवसेज्जा ? गोयमा ! असोच्चा णं केव-
 लिस्स वा जाव उवासियाए वा अत्थेगइए केवलं बंभचेरवासं आवसेज्जा, अत्थे-
 गइए केवलं बंभचेरवासं णो आवसेज्जा । से केणट्ठेणं भंते ! एवं वुच्चइ जाव
 णो आवसेज्जा ? गोयमा ! जस्स णं चरित्तावरणिज्जाणं कम्माणं खओवसमे
 कडे भवइ से णं असोच्चा केवलस्स वा जाव केवलं बंभचेरवासं आवसेज्जा,
 जस्स णं चरित्तावरणिज्जाणं कम्माणं खओवसमे णो कडे भवइ से णं असोच्चा
 केवलस्स वा जाव णो आवसेज्जा, से तेणट्ठेणं जाव णो आवसेज्जा । असोच्चा
 णं भंते ! केवलस्स वा जाव केवलेणं संजमेणं संजमेज्जा ? गोयमा ! असोच्चा
 णं केवलस्स वा जाव उवासियाए वा जाव अत्थेगइए केवलेणं संजमेणं संज-
 मेज्जा, अत्थेगइए केवलेणं संजमेणं णो संजमेज्जा । से केणट्ठेणं जाव णो संज-
 मेज्जा ? गोयमा ! जस्स णं जयणावरणिज्जाणं कम्माणं खओवसमे कडे
 भवइ से णं असोच्चा णं केवलस्स वा जाव केवलेणं संजमेणं संजमेज्जा, जस्स
 णं जयणावरणिज्जाणं कम्माणं खओवसमे णो कडे भवइ से णं असोच्चा केव-
 लिस्स वा जाव णो संजमेज्जा, से तेणट्ठेणं गोयमा ! जाव अत्थेगइए णो
 संजमेज्जा । असोच्चा णं भंते ! केवलस्स वा जाव उवासियाए वा केवलेणं
 संवरेणं संवरेज्जा ? गोयमा ! असोच्चा णं केवलस्स वा जाव अत्थेगइए
 केवलेणं संवरेज्जा, अत्थेगइए केवलेणं जाव णो संवरेज्जा । से केणट्ठेणं जाव
 णो संवरेज्जा ? गोयमा ! जस्स णं अज्जवसाणावरणिज्जाणं कम्माणं खओ-
 वसमे कडे भवइ से णं असोच्चा केवलस्स वा जाव केवलेणं संवरेणं संवरेज्जा,
 जस्स णं अज्जवसाणावरणिज्जाणं कम्माणं खओवसमे णो कडे भवइ से णं
 असोच्चा केवलस्स वा जाव णो संवरेज्जा, से तेणट्ठेणं जाव णो संवरेज्जा ।
 असोच्चा णं भंते ! केवलस्स वा जाव केवलं आभिणिबोहियणाणं उप्पाडेज्जा ?
 गोयमा ! असोच्चा णं केवलस्स वा जाव उवासियाए वा अत्थेगइए केवलं
 आभिणिबोहियणाणं उप्पाडेज्जा, अत्थेगइए केवलं आभिणिबोहियणाणं णो
 उप्पाडेज्जा । से केणट्ठेणं जाव णो उप्पाडेज्जा ? गोयमा ! जस्स णं आभिणि-
 बोहियणाणावरणिज्जाणं कम्माणं खओवसमे कडे भवइ से णं असोच्चा
 केवलस्स वा जाव केवलं आभिणिबोहियणाणं उप्पाडेज्जा, जस्स णं आभि-

णिबोहियणाणावरणिज्जाणं कम्माणं खओवसमे णो कडे भवइ से णं असोच्चा केवलस्स वा जाव केवलं आभिणिबोहियणाणं णो उप्पाडेज्जा, से तेणट्ठेणं जाव णो उप्पाडेज्जा । असोच्चा णं भंते ! केवलस्स वा जाव केवलं सुयणाणं उप्पाडेज्जा ? एवं जहा आभिणिबोहियणाणस्स वत्त्वया भणिया तथा सुयणाणस्सवि भाणियव्वा, णवरं सुयणाणावरणिज्जाणं कम्माणं खओवसमे भाणियव्वे । एवं चेव केवलं ओहिणाणं भाणियव्वं, णवरं ओहिणाणावरणिज्जाणं कम्माणं खओवसमे भाणियव्वे, एवं केवलं मणपज्जवणाणं उप्पाडेज्जा, णवरं मणपज्जवणाणावरणिज्जाणं कम्माणं खओवसमे भाणियव्वे । असोच्चा णं भंते ! केवलस्स वा जाव तप्पविल्लयउवासियाए वा केवलणाणं उप्पाडेज्जा ? एवं चेव णवरं केवलणाणावरणिज्जाणं कम्माणं खए भाणियव्वे, सेसं तं चेव, से तेणट्ठेणं गोयमा ! एवं वुच्चइ जाव केवलणाणं णो उप्पाडेज्जा । असोच्चा णं भंते ! केवलस्स वा जाव तप्पविल्लयउवासियाए वा केवलपण्णत्तं धम्मं लभेज्ज सवणयाए केवलं बोहिं वुज्जेज्जा केवलं मुंडे भवित्ता अगाराओ अणगारियं पव्वएज्जा केवलं बंभचेरवासं आवसेज्जा केवलेणं संजमेणं संजमेज्जा केवलेणं संवरेणं संवरेज्जा केवलं आभिणिबोहियणाणं उप्पाडेज्जा जाव केवलं मणपज्जवणाणं उप्पाडेज्जा केवलणाणं उप्पाडेज्जा ? गोयमा ! असोच्चा णं केवलस्स वा जाव उवासियाए वा अत्थेगइए केवलपण्णत्तं धम्मं लभेज्ज सवणयाए, अत्थेगइए केवलपण्णत्तं धम्मं णो लभेज्ज सवणयाए, अत्थेगइए केवलं बोहिं वुज्जेज्जा, अत्थेगइए केवलं बोहिं णो वुज्जेज्जा, अत्थेगइए केवलं मुंडे भवित्ता अगाराओ अणगारियं पव्वएज्जा, अत्थेगइए जाव णो पव्वएज्जा, अत्थेगइए केवलं बंभचेरवासं आवसेज्जा, अत्थेगइए केवलं बंभचेरवासं णो आवसेज्जा, अत्थेगइए केवलेणं संजमेणं संजमेज्जा, अत्थेगइए केवलेणं संजमेणं णो संजमेज्जा, एवं संवरेणवि, अत्थेगइए केवलं आभिणिबोहियणाणं उप्पाडेज्जा, अत्थेगइए जाव णो उप्पाडेज्जा, एवं जाव मणपज्जवणाणं, अत्थेगइए केवलणाणं उप्पाडेज्जा, अत्थेगइए केवलणाणं णो उप्पाडेज्जा । से केणट्ठेणं भंते ! एवं वुच्चइ असोच्चा णं तं चेव जाव अत्थेगइए केवलणाणं णो उप्पाडेज्जा ? गोयमा ! जस्स णं णाणावरणिज्जाणं कम्माणं खओवसमे णो कडे भवइ १ जस्स णं दरिसणावरणिज्जाणं कम्माणं खओवसमे णो कडे भवइ २ जस्स णं

धम्मंतराइयाणं कम्माणं खओवसमे णो कडे भवइ ३ एवं चरित्तावरणिज्जाणं
 ४ जयणावरणिज्जाणं ५ अज्जवसाणावरणिज्जाणं ६ आभिणिबोहियणाणावर-
 णिज्जाणं ७ जाव मणपज्जवणाणावरणिज्जाणं कम्माणं खओवसमे णो कडे
 भवइ १० जस्स णं केवलणाणावरणिज्जाणं जाव खए णो कडे भवइ ११ से
 णं असोच्चा केवलस्स वा जाव केवलिपण्णत्तं धम्मं णो लभेज्ज सवणयाए केवलं
 बोहिं णो बुज्जेज्जा जाव केवलणाणं णो उप्पाडेज्जा, जस्स णं णाणावरणिज्जाणं
 कम्माणं खओवसमे कडे भवइ जस्स णं दरिसणावरणिज्जाणं कम्माणं खओवसमे
 कडे भवइ जस्स णं धम्मंतराइयाणं एवं जाव जस्स णं केवलणाणावरणिज्जाणं
 कम्माणं खए कडे भवइ से णं असोच्चा केवलस्स वा जाव केवलिपण्णत्तं धम्मं
 लभेज्ज सवणयाए केवलं बोहिं बुज्जेज्जा जाव केवलणाणं उप्पाडेज्जा ॥ ३६४ ॥
 तस्स णं भंते ! छट्ठंछट्ठेणं अणिविखत्तेणं तवोक्कम्भेणं उड्ढं बाहाओ पगि-
 ज्जिय पगिज्जिय सूरामिमुहस्स आयावणभूमोए आयावेमाणस्स पगइभद्दयाए
 पगइउवसंतयाए पगइपघणुकोहमाणमायालोभयाए मिउमद्दवसंपणयाए अत्ली-
 णयाए भद्दयाए विणीययाए अणया कयाइ सुभेणं अज्जवसाणेणं सुभेणं
 परिणामेणं लेस्साहिं विसुज्जमाणोहिं २ तथावरणिज्जाणं कम्माणं खओवसमेणं
 ईहापोहमगणवसेणं करमाणस्स विड्ढंभे णामं अण्णाणे समुप्पज्जइ, से णं तेणं
 विड्ढंभेणं समुप्पणेणं जहण्णेणं अंगुत्तस्स असंखेज्जइभागं उवकोसेणं असं-
 खेज्जाइं जौयणसहस्साइं जाणइ पासइ, से णं तेणं विड्ढंभेणं समुप्पणेणं
 जीवेवि जाणइ अजीवेवि जाणइ पासइत्थे सारंभे सपरिग्गहे संकिलस्समाणेवि
 जाणइ विसुज्जमाणेवि जाणइ से णं पुब्बामेव सम्मत्तं पडिवज्जइ सम्मत्तं पडि-
 वज्जिता समणधम्मं रोएइ समणधम्मं रोएत्ता चरित्तं पडिवज्जइ चरित्तं पडि-
 वज्जिता लिगं पडिवज्जइ, तस्स णं तेहिं मिच्छतपज्जवेहिं परिहायमाणोहिं २
 सम्मत्तं सणपज्जवेहिं परिवड्ढमाणोहिं २ से विड्ढंभे अण्णाणे सम्मत्तपरिग्गहिं
 खिप्पामेव ओही परावत्तइ ॥ ३६५ ॥ से णं भंते ! कइसु लेस्सामु होज्जा ?
 गोयमा ! तिसु विसुद्धलेस्सामु होज्जा, तंजहा-तेउलेस्साए पम्हलेस्साए सुवक-
 लेस्साए । से णं भंते ! कइसु णाणेसु होज्जा ? गोयमा ! तिसु आभिणिबो-
 हियणाणमुयणाणओहिणाणेसु होज्जा । से णं भंते ! किं सजोगी होज्जा अजोगी
 होज्जा ? गोयमा ! सजोगी होज्जा णो अजोगी होज्जा, जइ सजोगी होज्जा किं मण-

जोगी होज्जा बड़जोगी होज्जा कायजोगी होज्जा ? गोयमा ! मणजोगी वा होज्जा बड़जोगी वा होज्जा कायजोगी वा होज्जा । से णं भंते ! किं सगारो-
वउत्ते होज्जा अणागारोवउत्ते होज्जा ? गोयमा ! सागारोवउत्ते वा होज्जा
अणागारोवउत्ते वा होज्जा । से णं भंते ! कयरंमि संघयणे होज्जा ? गोयमा !
बड़रोसहणारायसंघयणे होज्जा । से णं भंते कयरंमि संठाणे होज्जा ? गोयमा !
छ०हं संठाणाणं अणयरे संठाणे होज्जा । से णं भंते ! कयरंमि उच्चत्ते होज्जा ?
गोयमा ! जहणेणं सत्त रयणीए उक्कोसेणं पंचधणुसाइए होज्जा । से णं भंते ! कय-
रंमि आउए होज्जा ? गोयमा ! जहणेणं साइरेगट्टासाउए उक्कोसेणं पुक्ककोडि-
आउए होज्जा । से णं भंते ! किं सवेयए होज्जा अवेयए होज्जा ? गोयमा !
सवेयए होज्जा णो अवेयए होज्जा, जइ सवेयए होज्जा किं इत्थिवेयए होज्जा
पुरिसवेयए होज्जा णपुंसगवेयए होज्जा पुरिसणपुंसगवेयए होज्जा ? गोयमा !
णो इत्थिवेयए होज्जा पुरिसवेयए वा होज्जा णो णपुंसगवेयए होज्जा पुरिस-
णपुंसगवेयए वा होज्जा । से णं भंते ! किं सकसाई होज्जा अकसाई होज्जा ?
गोयमा ! सकसाई होज्जा णो अकसाई होज्जा, जइ सकसाई होज्जा से णं
भंते ! कइसु कसाएसु होज्जा ? गोयमा ! चउसु संजलणकोहमाणमायालोभेसु
होज्जा । तस्स णं भंते ! केवइया अज्जावसाणा प० ? गोयमा ! असंखेज्जा अज्जा-
वसाणा प० । ते णं भंते ! किं पसत्था अप्पसत्था ? गोयमा ! पसत्था णो अप्प-
सत्था । से णं भंते ! तेहिं पसत्थेहिं अज्जावसाणेहिं वड्डुमाणेहिं अणंतेहिं णेरइयभव-
ग्गहणेहितो अप्पाणं विसंजोएइ अणंतेहिं तिरिक्खज्जोणिय जाव विसंजोएइ
अणंतेहिं भणुस्स भवाग्गहणेहितो अप्पाणं विसंजोएइ अणंतेहिं देवभवग्गहणेहितो
अप्पाणं विसंजोएइ, जाओवि य से इमाओ णेरइयतिरिक्खज्जोणियमणुस्सदेव-
गइणामाओ चत्तारि उत्तरपयडीओ तांसि च णं उवग्गहिंए अणंताणुबंधी कोह-
माणमायालोभे खवेइ अणं० २ ता अपक्कक्खाणकसाए कोहमाणमायालोभे खवेइ
अप० २ ता पक्कक्खाणावरणकोहमाणमायालोभे खवेइ पक्क० २ ता संज-
लणकोहमाणमायालोभे खवेइ संज० २ ता पंचविहं णाणावरणज्जं णवविहं
दरिसणावरणज्जं पंचविहंमंतराइयं तालमत्थकडं च णं मोहणज्जं कट्टु कम्म-
रयविकिरणकरं अपुक्ककरणं अणुपविट्टस्स अणंते अणुत्तरे णिंवाघाए णिरावरणे
कसिणे पडिपुणे केवसवरणाणदंसणे समुप्पज्जइ ॥ ३६६ ॥ से णं भंते !

केवलपण्णत्तं धम्मं आघवेज्ज वा पण्णवेज्ज वा परूवेज्ज वा ? णो इण्ठे समट्ठे, ण्णत्थ एगणाएण वा एगवागरणेण वा । से णं भंते ! पक्वावेज्ज वा मुंडावेज्ज वा ? णो इण्ठे समट्ठे, उवएसं पुण करेज्जा, से णं भंते ! सिज्जइ जाव अंतं करेइ ? हंता सिज्जइ जाव अंतं करेइ ॥ ३६७ ॥ से णं भंते ! कि उड्ढं होज्जा अहो होज्जा तिरियं होज्जा ? गोयमा ! उड्ढं वा होज्जा अहे वा होज्जा तिरियं वा होज्जा, उड्ढं होज्जमाणे सद्दावइवियडावइगंधावइमाल-वंतपरियाएमु वट्टवेयड्डुपव्वएसु होज्जा, साहरणं पडुच्च सोमणसवणे वा पंडग-वणे वा होज्जा. अहे होज्जमाणे गड्डाए वा दरीए वा होज्जा, साहरणं पडुच्च पायाले वा भयणे वा होज्जा, तिरियं होज्जमाणे पण्णरससु कम्मभूमीसु होज्जा, साहरणं पडुच्च अट्टाइज्ज दीवसमुद्द तदेक्कदेसभाए होज्जा । ते णं भंते ! एग-समए णं केवइया होज्जा ? गोयमा ! जहण्णेणं एक्को वा दो वा तिण्णि वा उक्कोसेणं दस, से तेण्णट्ठेणं गोयमा ! एवं वुच्चइ असोच्चा णं केवलिसस वा जाव अत्थेगइए केवलपण्णत्तं धम्मं लभेज्ज सवणयाए, अत्थेगइए असोच्चा णं केवलिसस वा जाव णो लभेज्ज सवणयाए जाव अत्थेगइए केवलणाणं उप्पाडेज्जा, अत्थेगइए केवलणाणं णो उप्पाडेज्जा ॥ ३६८ ॥ सोच्चा णं भंते ! केवलिसस वा जाव तप्पक्खियउवासियाए वा केवलपण्णत्तं धम्मं लभेज्ज सवणयाए ? गोयमा ! सोच्चा णं केवलिसस वा जाव अत्थेगइए केवलपण्णत्तं धम्मं एवं जा चेव असोच्चाए वत्तव्वया सा चेव सोच्चाएवि भाणियव्वा, णवरं अभिलावो सोच्चेत्ति, सेसं तं चेव णिरवसेसं जाव जस्स णं मणपज्जवणाणावरणिज्जाणं कम्माणं खओवसमे कडे भवइ जस्स णं केवलणाणावरणिज्जाणं कम्माणं खए कडे भवइ से णं सोच्चा केवलिसस वा जाव उवासियाए वा केवलपण्णत्तं धम्मं लभेज्ज सवणयाए केवलं बोहिं वुज्जेज्जा जाव केवलणाणं उप्पाडेज्जा । तस्स णं अट्ठमंअट्ठमेणं अणिकित्तत्तेणं तवोक्कमेणं अप्पाणं भावेमाणस्स पगइभइयाए तहेव जाव गवेसणं करेमाणस्स ओहिणाणे समुप्पज्जइ, से णं तेणं ओहिणाणेणं समु-प्पणेणं जहण्णेणं अंगुलस्स असंखेज्जइभागं उक्कोसेणं असंखेज्जाइं अलोए लोयप्पमाणमेत्ताइं खण्डाइं जाणइ पासइ । से णं भंते ! कइसु लेस्सामु होज्जा ? गोयमा ! छसु लेस्सामु होज्जा, तंजहा-कण्हलेसाए जाव सुक्कलेसाए । से णं भंते ! कइसु णाणेसु होज्जा ? गोयमा ! तिसु वा चउसु वा होज्जा, तिसु

होज्जमाणे तिसु आभिणिबोहियणाणसुयणाणओहिणाणेषु होज्जा, चउसु होज्ज-
माणे आभि० सुय० ओहि० सणपज्जवणाणेषु होज्जा । से णं भंते ! किं
सजोगी होज्जा असोगी होज्जा ? एवं जोगी उवओगी संघयणं संठाणं उच्चतं
आउयं च, एयाणि सव्वाणि जहा असोच्चाए तहेव भाणिघव्वाणि । से णं भंते !
किं सवेयए०? पुच्छा, गोयमा ! सवेयए वा होज्जा अवेषए वा होज्जा । जइ
अवेषए होज्जा किं उवसंतवेयए होज्जा खीणवेयए होज्जा ? गोयमा ! णो
उवसंतवेयए होज्जा खीणवेयए होज्जा । जइ सवेयए होज्जा किं इत्थिवेयए
होज्जा पुरिसवेयए होज्जा णपुंसगवेयए होज्जा पुरिसणपुंसगवेयए होज्जा ?
पुच्छा, गोयमा ! इत्थिवेयए वा होज्जा पुरिसवेयए वा होज्जा पुरिसणपुंसग-
वेयए वा होज्जा । से णं भंते ! किं सकसाई होज्जा अकसाई होज्जा ? गोयमा !
सकसाई वा होज्जा अकसाई वा होज्जा । जइ अकसाई होज्जा किं उवसंत-
कसाई होज्जा खीणकसाई होज्जा ? गोयमा ! णो उवसंतकसाई होज्जा खीण-
कसाई होज्जा । जइ सकसाई होज्जा से णं भंते ! कइसु कसाएसु होज्जा ?
गोयमा ! चउसु वा तिसु वा दोसु वा एवकमि वा होज्जा, चउसु होज्जमाणे
चउसु संजलणकोहमाणमायालोभेषु होज्जा, तिसु होज्जमाणे तिसु संजलण-
माणमायालोभेषु होज्जा, दोसु होज्जमाणे दोसु संजलणमायालोभेषु होज्जा,
एगमि होज्जमाणे एगमि संजलणे लोभे होज्जा । तस्स णं भंते ! केवइया
अज्झवसाणा पणत्ता ? गोयमा ! असंखेज्जा, एवं जहा असोच्चाए तहेव जाव
केवलवरणाणदंसणे समुप्पज्जइ । से णं भंते ! केवलपणत्तं धम्मं आघवेज्ज वा
पणवेज्ज वा परूवेज्ज वा ? हुंता गोयमा ! आघवेज्ज वा पणवेज्ज वा परू-
वेज्ज वा । से णं भंते ! पव्वावेज्ज वा मुंडावेज्ज वा ? हुंता गोयमा ! पव्वा-
वेज्ज वा मुंडावेज्ज वा । तस्स णं भंते ! सिस्सावि पव्वावेज्ज वा मुंडावेज्ज
वा ? हुंता पव्वावेज्ज वा मुंडावेज्ज वा, तस्स णं भंते ! पसिस्सावि पव्वा-
वेज्ज वा मुंडावेज्ज वा ? हुंता पव्वावेज्ज वा मुंडावेज्ज वा । से णं भंते !
सिज्झइ बुज्झइ जाव अंतं करेइ ? हुंता सिज्झइ जाव अंतं करेइ । तस्स णं
भंते ! सिस्सावि सिज्झंति जाव अंतं करेति ? हुंता सिज्झंति जाव अंतं करेति ।
तस्स णं भंते ! पसिस्सावि सिज्झंति जाव अंतं करेति ? एवं चेव जाव अंतं
करेति । से णं भंते ! किं उड्ढं होज्जा ? जहेव असोच्चाए जाव तदेवकदेसभाए
होज्जा । ते णं भंते ! एगसमाए णं केवइया होज्जा ? गोयमा ! जहणणे

एवको वा दो वा तिण्णि वा उवकोसेणं अट्टसयं १०८। से तेणट्ठेणं गोयमा ! एवं बुच्चइ-सौच्चा णं केवलस्स वा जाव केवलउवासियाए वा जाव अत्थे-गइए केवलणाणं उप्पाडेज्जा, अत्थेगइए केवलणाणं णो उप्पाडेज्जा । सेवं भंते ! सेवं भंते ! त्ति ॥३६६॥

णवमं सयं बत्तीसइमो उद्देशो

तेणं कालेणं तेणं समएणं वाणिघग्गामे णयरे होत्था वण्णओ, दूइपत्तासे चेइए सामी समोसद्धे, परिसा णिग्गया, धम्मो कह्हिओ, परिसा पडिग्गया । तेणं कालेणं तेणं समएणं पासावच्चिज्जे णंगेए णामं अणयारे जेणेव समणे भगवं महावीरे तेणेव उवागच्छइ तेणेव उवागच्छइत्ता समणस्स भगवओ महा-वीरस्स अदूरसामंते ठिच्चा समणं भगवं महावीरं एवं वयासी-संतरं भंते ! णेरइया उववज्जंति णिरंतरं णेरइया उववज्जंति ? गंगेया ! संतरं पि णेरइया उववज्जंति णिरंतरं पि णेरइया उववज्जंति । संतरं भंते ! असुरकुमारा उव-वज्जंति णिरंतरं असुरकुमारा उववज्जंति ? गंगेया ! संतरं पि असुरकुमारा उववज्जंति णिरंतरं पि असुरकुमारा उववज्जंति, एवं जाव थणियकुमारा । संतरं भंते ! पुढविक्काइया उववज्जंति णिरंतरं पुढविक्काइया उववज्जंति ? गंगेया ! णो संतरं पुढविक्काइया उववज्जंति णिरंतरं पुढविक्काइया उववज्जंति, एवं जाव वणस्सइकाइया, बेइदिया जाव वेमाणिया एए जहा णेरइया ॥ ३७० ॥ संतरं भंते ! णेरइया उव्वट्ठंति णिरंतरं णेरइया उव्वट्ठंति ? गंगेया ! संतरं पि णेरइया उव्वट्ठंति णिरंतरं पि णेरइया उव्वट्ठंति, एवं जाव थणियकुमारा । संतरं भंते ! पुढविक्काइया उव्वट्ठंति ? पुच्छा, गंगेया ! णो संतरं पुढविक्काइया उव्वट्ठंति णिरंतरं पुढविक्काइया उव्वट्ठंति, एवं जाव वणस्सइकाइया णो संतरं णिरंतरं उव्वट्ठंति । संतरं भंते ! बेइदिया उव्वट्ठंति णिरंतरं बेइदिया उव्वट्ठंति ? गंगेया ! संतरं पि बेइदिया उव्वट्ठंति णिरंतरं पि बेइदिया उव्वट्ठंति, एवं जाव वाणमंतरा, संतरं भंते ! जोइसिया चयंति ? पुच्छा, गंगेया ! संतरं पि जोइ-सिया चयंति णिरंतरं पि जोइसिया चयंति, एवं जाव वेमाणिया वि ॥ ३७१ ॥ कइविहे णं भंते ! पवेसणए प० ? गंगेया ! चउद्विहे पवेसणए पण्णत्ते तंजहा-णेरइयपवेसणए, त्तिरिक्खजोणियपवेसणए, मणुस्सपवेसणए, देवपवेसणए । णेर-इयपवेसणए णं भंते ! कइविहे पण्णत्ते ? गंगेया ! सत्तविहे पण्णत्ते, तंजहा-

रयणप्पभाए पुढविणे रइयपवेसणए जाव अहेसत्तमाए पुढविणे रइयपवेसणए । एगे ञं भंते ! णेरइए णेरइयपवेसणएणं पविसमाणे किं रयणप्पभाए होज्जा, सक्करप्पभाए होज्जा जाव अहेसत्तमाए होज्जा ? गंगेया ! रयणप्पभाए वा होज्जा जाव अहेसत्तमाए वा होज्जा । दो भंते ! णेरइया णेरइयपवेसणएणं पविसमाणा किं रयणप्पभाए होज्जा जाव अहेसत्तमाए होज्जा ? गंगेया ! रयणप्पभाए वा होज्जा जाव अहेसत्तमाए वा होज्जा, अहवा एगे रयणप्पभाए एगे सक्करप्पभाए होज्जा अहवा एगे रयणप्पभाए एगे वालुयप्पभाए होज्जा जाव एगे रयणप्पभाए एगे अहेसत्तमाए होज्जा, अहवा एगे सक्करप्पभाए एगे वालुयप्पभाए होज्जा जाव अहवा एगे सक्करप्पभाए एगे अहेसत्तमाए होज्जा, अहवा एगे वालुयप्पभाए एगे पंकप्पभाए होज्जा एवं जाव अहवा एगे वालुयप्पभाए एगे अहेसत्तमाए होज्जा, एवं एककेक्का पुढवी छड्डेयव्वा जाव अहवा एगे तमाए एगे अहेसत्तमाए होज्जा । तिण्णि भंते ! णेरइया णेरइयपवेसणएणं पविसमाणा किं रयणप्पभाए होज्जा जाव अहेसत्तमाए होज्जा ? गंगेया ! रयणप्पभाए वा होज्जा जाव अहेसत्तमाए वा होज्जा, अहवा एगे रयणप्पभाए दो सक्करप्पभाए होज्जा जाव अहवा एगे रयणप्पभाए दो अहेसत्तमाए होज्जा ६ अहवा दो रयणप्पभाए एगे सक्करप्पभाए होज्जा जाव अहवा दो रयणप्पभाए एगे अहेसत्तमाए होज्जा १२ अहवा एगे सक्करप्पभाए दो वालुयप्पभाए होज्जा जाव अहवा एगे सक्करप्पभाए दो अहेसत्तमाए होज्जा १७ अहवा दो सक्करप्पभाए एगे वालुयप्पभाए होज्जा जाव अहवा दो सक्करप्पभाए एगे अहेसत्तमाए होज्जा २२ एवं जहा सक्करप्पभाए बत्तव्वया भणिया तहा सक्क-पुढवीणं भाणियव्वा जाव अहवा दो तमाए एगे अहेसत्तमाए होज्जा, ४-४-३-३-२-२-१-१ (४२) अहवा एगे रयणप्पभाए एगे सक्करप्पभाए एगे वालुयप्पभाए होज्जा १ अहवा एगे रयणप्पभाए एगे सक्करप्पभाए एगे पंकप्पभाए होज्जा २ जाव अहवा एगे रयणप्पभाए एगे सक्करप्पभाए एगे अहेसत्तमाए होज्जा ५ अहवा एगे रयणप्पभाए एगे वालुयप्पभाए एगे पंकप्पभाए होज्जा ६ अहवा एगे रयणप्पभाए एगे वालुयप्पभाए एगे धूमप्पभाए होज्जा ७ एवं जाव अहवा एगे रयणप्पभाए एगे वालुयप्पभाए एगे अहेसत्तमाए होज्जा ८ अहवा एगे रयणप्पभाए एगे पंकप्पभाए एगे धूमप्पभाए होज्जा १० जाव

अहवा एगे रयणप्पभाए एगे पंकप्पभाए एगे अहेसत्तमाए होज्जा १२ अहवा एगे रयणप्पभाए एगे धूमप्पभाए एगे तमाए होज्जा १३ अहवा एगे रयणप्पभाए एगे धूमप्पभाए एगे अहेसत्तमाए होज्जा १४ अहवा एगे रयणप्पभाए एगे तमाए एगे अहेसत्तमाए होज्जा १५ अहवा एगे सक्करप्पभाए एगे बालुयप्पभाए एगे पंकप्पभाए होज्जा १६ अहवा एगे सक्करप्पभाए एगे बालुयप्पभाए एगे धूमप्पभाए होज्जा १७ जाव अहवा एगे सक्करप्पभाए एगे बालुयप्पभाए एगे अहेसत्तमाए होज्जा १९ अहवा एगे सक्करप्पभाए एगे पंकप्पभाए एगे धूमप्पभाए होज्जा २० जाव अहवा एगे सक्कर० एगे पंक० एगे अहेसत्तमाए होज्जा २२ अहवा एगे सक्करप्पभाए एगे धूमप्पभाए एगे तमाए होज्जा २३ अहवा एगे सक्करप्पभाए एगे धूमप्प० एगे अहेसत्तमाए होज्जा २४ अहवा एगे सक्करप्पभाए एगे तमाए एगे अहेसत्तमाए होज्जा २५ अहवा एगे बालुयप्पभाए एगे पंकप्पभाए एगे धूमप्पभाए होज्जा २६ अहवा एगे बालुयप्पभाए एगे पंकप्पभाए एगे तमाए होज्जा २७ अहवा एगे बालुयप्पभाए एगे पंकप्पभाए एगे अहेसत्तमाए होज्जा २८ अहवा एगे बालुयप्पभाए एगे धूमप्पभाए एगे तमाए होज्जा २९ अहवा एगे बालुयप्पभाए एगे धूमप्पभाए एगे अहेसत्तमाए होज्जा ३० अहवा एगे बालुयप्पभाए एगे तमाए एगे अहेसत्तमाए होज्जा ३१ अहवा एगे पंकप्पभाए एगे धूमप्पभाए एगे तमाए होज्जा ३२ अहवा एगे पंकप्पभाए एगे धूमप्पभाए एगे अहेसत्तमाए होज्जा ३३ अहवा एगे पंकप्पभाए एगे तमाए एगे अहेसत्तमाए होज्जा ३४ अहवा एगे धूमप्पभाए एगे तमाए एगे अहेसत्तमाए होज्जा ३५ । चत्तारि भंते !

जेरइया जेरइयप्पवेसणएणं पविसमाणा किं रयणप्पभाए होज्जा ० ? पुच्छा, मंगेया ! रयणप्पभाए वा होज्जा जाव अहेसत्तमाए वा होज्जा ७, अहवा एगे रयणप्पभाए तिण्णि सक्करप्पभाए होज्जा अहवा एगे रयणप्पभाए तिण्णि बालुयप्पभाए होज्जा एवं जाव अहवा एगे रयणप्पभाए तिण्णि अहेसत्तमाए होज्जा ६ अहवा दो रयणप्पभाए दो सक्करप्पभाए होज्जा एवं जाव अहवा दो रयणप्पभाए दो अहेसत्तमाए होज्जा १२ अहवा तिण्णि रयणप्पभाए एगे सक्करप्पभाए होज्जा, एवं जाव अहवा तिण्णि रयणप्पभाए एगे अहेसत्तमाए होज्जा १८, अहवा एगे सक्करप्पभाए तिण्णि बालुयप्पभाए होज्जा, एवं जहेव

रयणप्पभाए उवरिर्माहिं समं चारियं तथा सक्करप्पभाए वि उवरिर्माहिं समं-
 चारेयव्वं ५, एवं एक्केक्काए समं चारियव्वं जाव अहवा तिण्णि तमाए एगे
 अहेसत्तमाए होज्जा १२-६-६-३ (६३) अहवा एगे रयणप्पभाए एगे सक्कर-
 प्पभाए दो वालुयप्पभाए होज्जा अहवा एगे रयणप्पभाए एगे सक्कर० दो
 पंक० होज्जा एवं जाव अहवा एगे रयणप्पभाए एगे सक्कर० दो अहेसत्तमाए
 होज्जा ५ अहवा एगे रयण० दो सक्कर० एगे वालुयप्पभाए होज्जा एवं जाव
 अहवा एगे रयण० दो सक्कर० एगे अहेसत्तमाए होज्जा १० अहवा दो रयण०
 एगे सक्कर० एगे वालुय० होज्जा, एवं जाव अहवा दो रयण० एगे सक्कर०
 एगे अहेसत्तमाए होज्जा १५ अहवा एगे रयण० एगे वालुय० दो पंक० होज्जा
 एवं जाव अहवा एगे रयणप्पभाए एगे वालुय० दो अहेसत्तमाए होज्जा ४ एवं
 एएणं गमएणं जहा तिहं तियसंजोमे तथा भाणियव्वो जाव अहवा दो धूमप्प-
 भाए एगे तमाए एगे अहेसत्तमाए होज्जा १०५ अहवा एगे रयण० एगे सक्कर०
 एगे वालुयप्पभाए एगे पंकप्पभाए होज्जा १ अहवा एगे रयणप्पभाए एगे
 सक्कर० एगे वालुय० एगे धूमप्पभाए होज्जा २ अहवा एगे रयण० एगे
 सक्कर० एगे वालुय० एगे तमाए होज्जा ३ अहवा एगे रयणप्पभाए एगे
 सक्करप्पभाए एगे वालुयप्पभाए एगे अहेसत्तमाए होज्जा ४ अहवा एगे रयण०
 एगे सक्कर० एगे पंक० एगे धूमप्पभाए होज्जा ५ अहवा एगे रयण० एगे
 सक्कर० एगे पंकप्पभाए एगे तमाए होज्जा ६ अहवा एगे रयण० एगे सक्कर०
 एगे पंक० एगे अहेसत्तमाए होज्जा ७ अहवा एगे रयणप्पभाए एगे सक्कर०
 एगे धूम० एगे तमाए होज्जा ८ अहवा एगे रयण० एगे सक्कर० एगे धूम०
 एगे अहेसत्तमाए होज्जा ९ अहवा एगे रयण० एगे सक्करप्पभाए एगे तमाए
 एगे अहेसत्तमाए होज्जा १० अहवा एगे रयण० एगे वालुय० एगे पंक० एगे
 धूमप्पभाए होज्जा ११ अहवा एगे रयण० एगे वालुय० एगे पंक० एगे तमाए
 होज्जा १२ अहवा एगे रयण० एगे वालुय० एगे पंक० एगे अहेसत्तमाए होज्जा
 १३ अहवा एगे रयण० एगे वालुय० एगे धूम० एगे तमाए होज्जा १४ अहवा
 एगे रयण० एगे वालुय० एगे धूम० एगे अहेसत्तमाए होज्जा १५ अहवा एगे
 रयण० एगे वालुय० एगे तमाए एगे अहेसत्तमाए होज्जा १६ अहवा एगे रयण०
 एगे पंक० एगे धूम० एगे तमाए होज्जा १७ अहवा एगे रयण० एगे पंक० एगे
 धूम० एगे अहेसत्तमाए होज्जा १८ अहवा एगे रयण० एगे पंक० एगे तमाए एगे

अहेसत्तमाए होज्जा १६ अहवा एगे रयण० एगे धूम० एगे तमाए एगे अहे-
सत्तमाए होज्जा २० अहवा एगे सक्कर० एगे वालुय० एगे पंक० एगे धूमप्प-
भाए होज्जा २१ एवं जहा रयणप्पभाए उवरिमाओ पुढवीओ चारियाओ
तहा सक्करप्पभाए उवरिमाओ चारियव्वाओ जाव अहवा एगे सक्कर०
एगे धूम० एगे तमाए एगे अहेसत्तमाए होज्जा ३० अहवा एगे वालुय० एगे
पंक० एगे धूम० एगे तमाए होज्जा ३१ अहवा एगे वालुय० एगे पंक० एगे
धूमप्पभाए एगे अहेसत्तमाए होज्जा ३२ अहवा एगे वालुय० एगे पंक० एगे
तमाए एगे अहेसत्तमाए होज्जा ३३ अहवा एगे वालुय० एगे धूम० एगे तमाए
एगे अहेसत्तमाए होज्जा ३४ अहवा एगे पंक० एगे धूम० एगे तमाए एगे अहे-
सत्तमाए होज्जा ३५। पंच भंते ! नेरइया नेरइयप्पवेसणएणं पविसमाणा किं
रयणप्पमाए होज्जा० ? पुच्छा, गंगेया ! रयणप्पभाए वा होज्जा जाव अहे-
सत्तमाए वा होज्जा अहवा एगे रयण० चत्तारि सक्करप्पभाए होज्जा जाव
अहवा एगे रयण० चत्तारि अहेसत्तमाए होज्जा अहवा दो रयण० तिण्णि
सक्करप्पभाए होज्जा एवं जाव अहवा दो रयणप्पभाए तिण्णि अहेसत्तमाए
होज्जा अहवा तिण्णि रयण० दो सक्करप्पभाए होज्जा एवं जाव अहेसत्तमाए
होज्जा अहवा चत्तारि रयण० एगे सक्कर० होज्जा एवं जाव अहवा चत्तारि
रयण० एगे अहेसत्तमाए होज्जा अहवा एगे सक्कर० चत्तारि वालुय० होज्जा
एवं जहा रयण० समं- उवरिमपुढवीओ चारियाओ तथा सक्कर० वि समं
चारेयव्वाओ जाव अहवा चत्तारि सक्करप्पभाए एगे अहेसत्तमाए होज्जा एवं
एक्केक्काए समं चारेयव्वाओ जाव अहवा चत्तारि तमाए एगे अहेसत्तमाए
होज्जा अहवा एगे रयण० एगे सक्कर० तिण्णि वालुयप्पभाए होज्जा एवं जाव
अहवा एगे रयण० एगे सक्कर० तिण्णि अहेसत्तमाए होज्जा अहवा एगे रयण०
दो सक्कर० दो वालुयप्पभाए होज्जा एवं जाव अहवा एगे रयण० दो सक्कर०
दो अहेसत्तमाए होज्जा अहवा दो रयणप्पभाए एगे सक्करप्पभाए दो वालुय-
प्पभाए होज्जा एवं जाव अहवा दो रयणप्पभाए एगे सक्करप्पभाए दो अहे-
सत्तमाए होज्जा अहवा एगे रयण० तिण्णि सक्कर० एगे वालुयप्पभाए होज्जा
एवं जाव अहवा एगे रयण० तिण्णि सक्कर० एगे अहेसत्तमाए होज्जा अहवा
दो रयण० दो सक्कर० एगे वालुयप्पभाए होज्जा एवं जाव दो रयण० दो

सक्कर० एगे अहेसत्तमाए होज्जा अहवा तिण्णि रयण० एगे सक्कर० एगे
 वालुयप्पभाए होज्जा एवं जाव अहवा तिण्णि रयण० एगे सक्कर० एगे अहे-
 सत्तमाए होज्जा अहवा एगे रयण० एगे वालुय० तिण्णि पंकप्पभाए होज्जा,
 एवं एएणं कमेणं जहा चउण्हं तियासंजोगो भणिओ तथा पंचण्हवि तिया-
 संजोगो भाणियच्चो णवरं तत्थ एगो संचारिज्जइ इह दोण्णि सेसं तं चेव
 जाव अहवा तिण्णि धूमप्पभाए एगे तमाए एगे अहेसत्तमाए होज्जा अहवा एगे
 रयण० एगे सक्कर० एगे वालुय० दो पंकप्पभाए होज्जा एवं जाव अहवा एगे
 रयण० एगे सक्कर० एगे वालुय० दो अहेसत्तमाए होज्जा ४ अहवा एगे रयण०
 एगे सक्कर० दो वालुय० एगे पंकप्पभाए होज्जा एवं जाव अहवा एगे रयण०
 एगे सक्कर० दो वालुय० एगे अहेसत्तमाए होज्जा, ८, अहवा एगे रयण० दो
 सक्करप्पभाए एगे वालुय० एगे पंकप्पभाए होज्जा एवं जाव अहवा एगे रयण०
 दो सक्कर० एगे वालुय० एगे अहेसत्तमाए होज्जा १२ अहवा दो रयण० एगे
 सक्कर० एगे वालुय० एगे पंकप्पभाए होज्जा एवं जाव अहवा दो रयण० एगे
 सक्कर० एगे वालुय० एगे अहेसत्तमाए होज्जा १६ अहवा एगे रयण० एगे
 सक्कर० एगे पंक० दो धूमप्पभाए होज्जा एवं जहा चउण्हं चउक्कसंजोगो भणिओ
 तथा पंचण्हवि चउक्कसंजोगो भाणियच्चो, णवरं अब्भहियं एगो संचारेपच्चो, एवं
 जाव अहवा दो पंक० एगे धूम० एगे तमाए एगे अहेसत्तमाए होज्जा अहवा
 एगे रयण० एगे सक्कर० एगे वालुय० एगे पंक० एगे धूमप्पभाए होज्जा १
 अहवा एगे रयण० एगे सक्कर० एगे वालुय० एगे पंक० एगे तमाए होज्जा २
 अहवा एगे रयण० जाव एगे पंक० एगे अहेसत्तमाए होज्जा ३ अहवा एगे
 रयण० एगे सक्कर० एगे वालुयप्पभाए एगे धूमप्पभाए एगे तमाए होज्जा ४
 अहवा एगे रयण० एगे सक्कर० एगे वालुय० एगे धूम० एगे अहेसत्तमाए
 होज्जा ५ अहवा एगे रयण० एगे सक्कर० एगे वालुय० एगे तमाए एगे अहे-
 सत्तमाए होज्जा ६ अहवा एगे रयण० एगे सक्कर० एगे पंक० एगे धूम० एगे
 तमाए होज्जा ७ अहवा एगे रयण० एगे सक्कर० एगे पंक० एगे धूम० एगे
 अहेसत्तमाए होज्जा ८ अहवा एगे रयण० एगे सक्कर० एगे पंक० एगे तमाए एगे
 अहेसत्तमाए होज्जा ९ अहवा एगे रयण० एगे सक्कर० एगे धूम० एगे तमाए

एगे अहेसत्तमाए होज्जा १० अहवा एगे रयण० एगे वालुय० एगे पंक० एगे धूम० एगे तमाए होज्जा ११ अहवा एगे रयण० एगे वालुय० एगे पंक० एगे धूम० एगे अहेसत्तमाए होज्जा १२ अहवा एगे रयण० एगे वालुय० एगे पंक० एगे तमाए एगे अहेसत्तमाए होज्जा १३ अहवा एगे रयण० एगे वालुय० एगे धूम० एगे तमाए एगे अहेसत्तमाए होज्जा १४ अहवा एगे रयण० एगे पंक० जाव एगे अहेसत्तमाए होज्जा १५ अहवा एगे सक्कर० एगे वालुय० जाव एगे तमाए होज्जा १६ अहवा एगे सक्कर० जाव एगे पंक० एगे धूम० एगे अहेसत्तमाए होज्जा १७ अहवा एगे सक्कर० जाव एगे पंक० एगे तमाए एगे अहेसत्तमाए होज्जा १८ अहवा एगे सक्कर० एगे वालुय० एगे धूम० एगे तमाए एगे अहेसत्तमाए होज्जा १९ अहवा एगे सक्कर० एगे पंक० जाव एगे अहेसत्तमाए होज्जा २० अहवा एगे वालुय० जाव एगे अहेसत्तमाए होज्जा २१।
छःभंते ! णेरइया णेरइयप्पवेसणएणं पविसमाणा कि रयणप्पभाए होज्जा० ? पुच्छा, गंगेया ! रयणप्पभाए वा होज्जा जाव अहेसत्तमाए वा होज्जा ७ अहवा एगे रयण० पंच सक्करप्पभाए होज्जा अहवा एगे रयण० पंच वालुयप्पभाए होज्जा जाव अहवा एगे रयण० पंच अहेसत्तमाए होज्जा अहवा दो रयण० चत्तारि सक्करप्पभाए होज्जा जाव अहवा दो रयण० चत्तारि अहेसत्तमाए होज्जा अहवा तिण्णि रयण० तिण्णि सक्करप्पभाए होज्जा, एवं एएणं कमेणं जहा पंचण्हं वुयासंजोगो तथा छण्हवि भाणियव्वो णवरं एक्को अब्भहिओ संचारेयव्वो जाव अहवा पंच तमाए एगे अहेसत्तमाए होज्जा, अहवा एगे रयण० एगे सक्कर० चत्तारि वालुय० होज्जा अहवा एगे रयण० एगे सक्कर० चत्तारि पंकप्पभाए होज्जा एवं जाव अहवा एगे रयण० एगे सक्कर० चत्तारि अहेसत्तमाए होज्जा अहवा एगे रयण० दो सक्कर० तिण्णि वालुय० होज्जा, एवं एएणं कमेणं जहा पंचण्हं तियासंजोगो भणिओ तथा छण्हवि भाणियव्वो णवरं एक्को अहिओ उच्चारेयव्वो, सेसं तं चैव ३४, चउक्कसंजोगोवि तहेव, पंचगसंजोगोवि तहेव, णवरं एक्को अब्भहिओ संचारेयव्वो जाव पच्छिमो भंगो अहवा दो वालुय० एगे पंक० एगे धूम० एगे तमाए एगे अहेसत्तमाए होज्जा अहवा एगे रयण० एगे सक्कर० जाव एगे तमाए होज्जा १ अहवा एगे रयण० जाव एगे धूम० एगे अहेसत्तमाए होज्जा २ अहवा एगे रयण० जाव एगे पंक०

एगे तमाए एगे अहेसत्तमाए होज्जा ३ अहवा एगे रयण० जाव एगे वालुय० एगे धूम० जाव एगे अहेसत्तमाए होज्जा ४ अहवा एगे रयण० एगे सक्कर० एगे पंक० जाव एगे अहेसत्तमाए होज्जा ५ अहवा एगे रयण० एगे वालुय० जाव एगे अहेसत्तमाए होज्जा ६ अहवा एगे सक्कर० एगे वालुय० जाव एगे अहेसत्तमाए होज्जा ७ । सत्त भंते ! णेरइया णेरइयपवेसणएणं पविसमाणा० पुच्छा, गंगेया ! रयण० वा होज्जा जाव अहेसत्तमाए वा होज्जा ७, अहवा एगे रयण० छ सक्कर० होज्जा एवं एएणं कमेणं जहा छण्हं दुयासंजोगो तथा सत्तण्हवि भाणियव्वं णवरं एगो अब्भहिओ संचारिज्जइ, सेसं तं चेव, तियासंजोगो चउक्कसंजोगो पंचसंजोगो छक्कसंजोगो य छण्हं जहा तथा सत्तण्हवि भाणियव्वं, णवरं एक्केक्को अब्भहिओ संचारेयव्वो जाव छक्कगसंजोगो अहवा दो सक्कर० एगे वालुय० जाव एगे अहेसत्तमाए होज्जा अहवा एगे रयण० एगे सक्कर० जाव एगे अहेसत्तमाए होज्जा । अट्ट भंते ! णेरइया णेरइयपवेसणएणं पविसमाणा० पुच्छा, गंगेया ! रयण० वा होज्जा जाव अहेसत्तमाए वा होज्जा अहवा एगे रयण० सत्त सक्कर० होज्जा एवं दुयासंजोगो जाव छक्कसंजोगो य जहा सत्तण्हं भणिओ तथा अट्टण्हवि भाणियव्वो णवरं एक्केक्को अब्भहिओ संचारेयव्वो सेसं तं चेव जाव छक्कसंजोगस्स अहवा तिण्णि सक्कर० एगे वालुय० जाव एगे अहेसत्तमाए होज्जा अहवा एगे रयण० जाव एगे तमाए दो अहेसत्तमाए होज्जा अहवा एगे रयण० जाव दो तमाए एगे अहेसत्तमाए होज्जा एवं संचारेयव्वं जाव अहवा दो रयण० एगे सक्कर० जाव एगे अहेसत्तमाए होज्जा । णव भंते ! णेरइया णेरइयपवेसणएणं पविसमाणा कि रयण० होज्जा० ? पुच्छा, गंगेया ! रयण० वा होज्जा जाव अहेसत्तमाए वा होज्जा अहवा एगे रयण० अट्ट सक्करप्पमाए होज्जा एवं दुयासंजोगो जाव सत्तगसंजोगो य जहा अट्टण्हं भणियं तथा णवण्हं पि भाणियव्वं णवरं एक्केक्को अब्भहिओ संचारेयव्वो, सेसं तं चेव पच्छिमो आलावगो अहवा तिण्णि रयण० एगे सक्कर० एगे वालुय० जाव एगे अहेसत्तमाए होज्जा । दस भंते ! णेरइया णेरइयपवेसणएणं पविसमाणा० पुच्छा, गंगेया ! रयण० वा होज्जा जाव अहेसत्तमाए वा होज्जा ७ अहवा एगे रयण० णव सक्कर० होज्जा एवं दुयासंजोगो जाव सत्तसंजोगो य जहा णवण्हं णवरं एक्केक्को अब्भहिओ संचारेयव्वो सेसं तं चेव पच्छिमो आलावगो अहवा चत्तारि रयण० एगे सक्कर० जाव एगे अहेसत्त-

माए होज्जा । संखेज्जा भंते ! जेरइया जेरइयप्पवेसणएणं पविसमाणां पुच्छा,
गंगेया ! रयण० वा होज्जा जाव अहेसत्तमाए वा होज्जा ७ अहवा एगे रयण०
संखेज्जा सक्कर० होज्जा एवं जाव अहवा एगे रयण० संखेज्जा अहेसत्तमाए होज्जा
अहवा दो रयण० संखेज्जा सक्कर० होज्जा एवं जाव अहवा दो रयण० संखेज्जा
अहेसत्तमाए होज्जा अहवा तिण्णि रयण० संखेज्जा सक्कर० होज्जा एवं एएणं
कमेणं एक्केवको संचारेयव्वो जाव अहवा दस रयण० संखेज्जा सक्कर० होज्जा
एवं जाव अहवा दस रयण० संखेज्जा अहेसत्तमाए होज्जा अहवा संखेज्जा
रयण० संखेज्जा सक्कर० होज्जा जाव अहवा संखेज्जा रयण० संखेज्जा अहे-
सत्तमाए होज्जा अहवा एगे सक्कर० संखेज्जा बालुय० होज्जा एवं जहा
रयणप्पभा उवरिमपुढवीहि समं चारिया एवं सक्करप्पभावि उवरिमपुढवीहि
समं चारेयव्वा, एवं एक्केवका पुढवी उवरिमपुढवीहि समं चारेयव्वा जाव
अहवा संखेज्जा तमाए संखेज्जा अहेसत्तमाए होज्जा अहवा एगे रयण० एगे
सक्कर० संखेज्जा बालुय० होज्जा अहवा एगे रयण० एगे सक्कर० संखेज्जा
पंकप्पभाए होज्जा जाव अहवा एगे रयण० एगे सक्करप्पभाए संखेज्जा अहे-
सत्तमाए होज्जा अहवा एगे रयण० दो सक्कर० संखेज्जा बालुयप्पभाए होज्जा
जाव अहवा एगे रयण० दो सक्कर० संखेज्जा अहेसत्तमाए होज्जा अहवा एगे
रयण० तिण्णि सक्कर० संखेज्जा बालुयप्पभाए होज्जा, एवं एएणं कमेणं
एक्केवको संचारेयव्वो जाव अहवा एगे रयण० संखेज्जा सक्कर० संखेज्जा
बालुयप्पभाए होज्जा जाव अहवा एगे रयण० संखेज्जा बालुय० संखेज्जा
अहेसत्तमाए होज्जा अहवा दो रयण० संखेज्जा सक्कर० संखेज्जा बालुयप्पभाए
होज्जा जाव अहवा दो रयण० संखेज्जा सक्कर० संखेज्जा अहेसत्तमाए होज्जा
अहवा तिण्णि रयण० संखेज्जा सक्कर० संखेज्जा बालुयप्पभाए होज्जा, एवं
एएणं एक्केवको रयणप्पभाए संचारियव्वो जाव अहवा संखेज्जा रयण० संखेज्जा
सक्कर० संखेज्जा बालुयप्पभाए होज्जा जाव अहवा संखेज्जा रयण० संखेज्जा
सक्कर० संखेज्जा अहेसत्तमाए होज्जा अहवा एगे रयण० एगे बालुय० संखेज्जा
पंकप्पभाए होज्जा जाव अहवा एगे रयण० एगे बालुय० संखेज्जा अहेसत्तमाए
होज्जा अहवा एगे रयण० दो बालुय० संखेज्जा पंकप्पभाए होज्जा, एवं एएणं
कमेणं तियासंजोगो चउक्कसंजोगो जाव सत्तगसंजोगो य जहा दसण्हं तहेव
भाणियव्वो पच्छिमो आलावगो सत्तसंजोगत्स अहवा संखेज्जा रयण० संखेज्जा

सक्कर० जाव संखेज्जा अहेसत्तमाए होज्जा। असंखेज्जा भंते ! णेरइया णेरइय-
 प्पवेसणएणं पविसमाणा० पुच्छा ? गंगेया ! रयणप्पभाए वा होज्जा जाव अहे-
 सत्तमाए वा होज्जा, अहवा एगे रयण० असंखेज्जा सक्करप्पभाए होज्जा, एवं
 दुयासंजोगो जाव सत्तगसंजोगो य जहा संखेज्जाणं भणिओ तथा असंखेज्जाणवि
 भाणियव्वो, णवरं असंखेज्जाओ अब्भहिओ भाणियव्वो, सेसं तं चेव जाव सत्तग-
 संजोगस्स पच्छिमो आलावगो अहवा असंखेज्जा रयण० असंखेज्जा सक्कर०
 जाव असंखेज्जा अहेसत्तमाए होज्जा। उक्कोसेणं भंते ! णेरइया णेरइयप्पवेस-
 णएणं० पुच्छा, गंगेया ! सव्वेवि ताव रयणप्पभाए होज्जा अहवा रयणप्पभाए
 य सक्करप्पभाए य होज्जा अहवा रयणप्पभाए य वालुयप्पभाए य होज्जा
 जाव अहवा रयणप्पभाए य अहेसत्तमाए य होज्जा अहवा रयणप्पभाए य
 सक्करप्पभाए य वालुयप्पभाए य होज्जा एवं जाव अहवा रयण० य सक्कर-
 प्पभाए य अहेसत्तमाए य होज्जा ५ अहवा रयण० वालुय० पंकप्पभाए य
 होज्जा जाव अहवा रयण० वालुय० अहेसत्तमाए य होज्जा ४ अहवा रयण०
 पंकप्पभाए धूमाए होज्जा एवं रयणप्पभं अमुयंतेसु जहा तिण्हं तियासंजोगो
 भणिओ तथा भाणियव्वं जाव अहवा रयण० तमाए य अहेसत्तमाए य होज्जा
 १५ अहवा रयणप्पभाए य सक्करप्पभाए वालुय० पंकप्पभाए य होज्जा अहवा
 रयणप्पभाए सक्करप्पभाए वालुय० धूमप्पभाए य होज्जा जाव अहवा रयणप्प-
 भाए सक्करप्पभाए वालुय० य अहेसत्तमाए य होज्जा ४ अहवा रयण०
 सक्कर० पंक० धूमप्पभाए य होज्जा एवं रयणप्पभं अमुयंतेसु जहा चउण्हं
 चउक्कसंजोगो भणिओ तथा भाणियव्वं जाव अहवा रयण० धूम० तमाए
 अहेसत्तमाए य होज्जा अहवा रयण० सक्कर० वालुय० पंक० धूमप्पभाए य
 होज्जा १ अहवा रयणप्पभाए जाव पंक० तमाए य होज्जा २ अहवा रयण०
 जाव पंकप्पभाए अहेसत्तमाए य होज्जा ३ अहवा रयण० सक्कर० वालुय०
 धूम० तमाए य होज्जा ४ एवं रयणप्पभं अमुयंतेसु जहा पंचण्हं पंचगसंजोगो
 तथा भाणियव्वं जाव अहवा रयण० पंकप्पभाए य जाव अहेसत्तमाए य होज्जा
 अहवा रयण० सक्कर० जाव धूमप्पभाए तमाए य होज्जा १ अहवा रयण०
 जाव धूम० अहेसत्तमाए य होज्जा २ अहवा रयण० सक्कर० जाव पंक०
 तमाए य अहेसत्तमाए य होज्जा ३ अहवा रयण० सक्कर० वालुय० धूमप्पभाए

तमाए अहेसत्तमाए य होज्जा ४ अहवा रयण० सक्कर० पंक० जाव अहेसत्त-
 माए य होज्जा ५ अहवा रयण० चालुय० जाव अहेसत्तमाए य होज्जा ६
 अहवा रयणप्पभा० य सक्कर० य जाव अहेसत्तमाए य होज्जा ७ । एयस्स
 णं भंते ! रयणप्पभापुढविणे रइयपवेसणगस्स सक्करप्पभापुढवि० जाव अहे-
 सत्तमापुढविणे रइयपवेसणगस्स कयरे २ जाव विसेसाहिया वा ? गंगेया !
 सव्वत्थोवे अहेसत्तमापुढविणे रइयपवेसणए, तमापुढविणे रइयपवेसणए असंखेज्ज-
 गुणे, एवं पडिसीमगं जाव रयणप्पभापुढविणे रइयपवेसणए असंखेज्जगुणे । ३७२ ।
 तिरिक्खजोणियपवेसणए णं भंते ! कइविहे पणत्ते ? गंगेया ! पंचविहे
 पणत्ते, तंजहा—एंगिदियतिरिक्खजोणियपवेसणए जाव पंचिदियतिरिक्खजोणिय-
 पवेसणए । एगे भंते ! तिरिक्खजोणिए तिरिक्खजोणियपवेसणएणं पविसमाणे
 कि एंगिदिएसु होज्जा जाव पंचिदिएसु होज्जा ? गंगेया ! एंगिदिएसु वा
 होज्जा जाव पंचिदिएसु वा होज्जा । दो भंते ! तिरिक्खजोणिया० पुच्छा,
 गंगेया ! एंगिदिएसु वा होज्जा जाव पंचिदिएसु वा होज्जा, अहवा एगे एंगि-
 दिएसु होज्जा एगे बेइंदिएसु होज्जा एवं जहा णेरइयपवेसणए तथा तिरिक्ख-
 जोणियपवेसणएवि भाणियव्वे जाव असंखेज्जा । उक्कोसा भंते ! तिरिक्ख-
 जोणिया० पुच्छा, गंगेया ! सव्वेवि ताव एंगिदिएसु होज्जा अहवा एंगिदिएसु
 य बेइंदिएसु य होज्जा, एवं जहा णेरइया चारिया तथा तिरिक्खजोणियावि
 चारेयव्वा, एंगिदिया अमुयंतेसु दुयासंजोगो तियासंजोगो च उक्कसंजोगो पंच-
 संजोगो उवउंजिऊण भाणियव्वो जाव अहवा एंगिदिएसु य बेइंदिएसु य जाव
 पंचिदिएसु य होज्जा । एयस्स णं भंते ! एंगिदियतिरिक्खजोणियपवेसणगस्स
 जाव पंचिदियतिरिक्खजोणियपवेसणगस्स य कयरे २ जाव विसेसाहिया वा ?
 गंगेया ! सव्वत्थोवे पंचिदियतिरिक्खजोणियपवेसणए, चउरिदियतिरिक्ख-
 जोणिय० विसेसाहिए, तेइंदिय० विसेसाहिए, बेइंदिय० विसेसाहिए, एंगिदिय-
 तिरिक्ख० विसेसाहिए ॥ ३७३ ॥ मणुस्सपवेसणए णं भंते ! कइविहे पणत्ते ?
 गंगेया ! दुविहे पणत्ते, तंजहा—संमुच्छिममणुस्सपवेसणए य गब्भवक्कंतिय-
 मणुस्सपवेसणए य । एगे भंते ! मणुस्से मणुस्सपवेसणएणं पविसमाणे किं
 संमुच्छिममणुस्सेसु होज्जा गब्भवक्कंतियमणुस्सेसु होज्जा ? गंगेया ! संमुच्छिम-
 मणुस्सेसु वा होज्जा गब्भवक्कंतियमणुस्सेसु वा होज्जा । दो भंते ! मणुस्सा०
 पुच्छा, गंगेया ! संमुच्छिममणुस्सेसु वा होज्जा गब्भवक्कंतियमणुस्सेसु वा

होज्जा अहवा एगे संमुच्छिममणुस्सेसु होज्जा एगे गम्भवक्कंतिमणुस्सेसु होज्जा, एवं एएणं कमेणं जहा णेरइयपवेसणए तथा मणुस्सपवेसणएवि भाणि-यत्थे जाव दस । संखेज्जा भंते ! मणुस्सा० पुच्छा, गंगेया ! संमुच्छिम-मणुस्सेसु वा होज्जा गम्भवक्कंतिमणुस्सेसु वा होज्जा अहवा एगे संमुच्छिम-मणुस्सेसु होज्जा संखेज्जा गम्भवक्कंतिमणुस्सेसु होज्जा अहवा दो संमुच्छिम-मणुस्सेसु होज्जा संखेज्जा गम्भवक्कंतिमणुस्सेसु होज्जा एवं एक्केक्कं उस्सा-रित्तिसु जाव अहवा संखेज्जा संमुच्छिममणुस्सेसु होज्जा संखेज्जा गम्भवक्कं-तिमणुस्सेसु होज्जा । असंखेज्जा भंते ! मणुस्सा० पुच्छा, गंगेया ! सब्बेवि ताव संमुच्छिममणुस्सेसु होज्जा, अहवा असंखेज्जा संमुच्छिममणुस्सेसु एगे गम्-वक्कंतिमणुस्सेसु होज्जा अहवा असंखेज्जा संमुच्छिममणुस्सेसु दो गम्भवक्कंति-मणुस्सेसु होज्जा एवं जाव असंखेज्जा संमुच्छिममणुस्सेसु होज्जा संखेज्जा गम्भवक्कंतिमणुस्सेसु होज्जा । उक्कोसा भंते ! मणुस्सा० पुच्छा, गंगेया ! सब्बेवि ताव संमुच्छिममणुस्सेसु होज्जा अहवा संमुच्छिममणुस्सेसु य गम्भवक्कं-तिमणुस्सेसु य होज्जा । एयस्स णं भंते ! संमुच्छिममणुस्सपवेसणगस्स गम्-वक्कंतिमणुस्सपवेसणगस्स य कयरे २ जाव विसेसाहिया वा ? गंगेया ! सब्बत्थेवे गम्भवक्कंतिमणुस्सपवेसणए, संमुच्छिममणुस्सपवेसणए असंखेज्जणुणे ॥ ३७४ ॥ देवपवेसणए णं भंते ! कइविहे पणत्ते ? गंगेया ! चउरिविहे पणत्ते, तंजहा-भवणवासिदेवपवेसणए जाव वेमाणियदेवपवेसणए । एगे भंते ! देवे देवपवेसणएणं पविसमाणे किं भवणवासीसु होज्जा वाणमंतरजोइसियवेमा-णिएसु होज्जा ? गंगेया ! भवणवासीसु वा होज्जा वाणमंतरजोइसियवेमाणिएसु वा होज्जा । दो भंते ! देवा देवपवेसणएणं० पुच्छा, गंगेया ! भवणवासीसु वा होज्जा वाणमंतरजोइसियवेमाणिएसु वा होज्जा अहवा एगे भवणवासीसु एगे वाणमंतरेसु होज्जा एवं जहा तिरिक्खजोणियपवेसणए तथा देवपवेसणएवि भाणियत्थे जाव असंखेज्ज त्ति । उक्कोसा भंते !० पुच्छा, गंगेया ! सब्बेवि ताव जोइसिएसु होज्जा अहवा जोइसियभवणवासीसु य होज्जा अहवा जोइ-सियवाणमंतरेसु य होज्जा अहवा जोइसियवेमाणिएसु य होज्जा अहवा जोइ-सिएसु य भवणवासीसु य वाणमंतरेसु य होज्जा अहवा जोइसिएसु य भवण-वासीसु य वेमाणिएसु य होज्जा अहवा जोइसिएसु य वाणमंतरेसु य वेमा-

णिएसु य होज्जा अहवा जोइसिएसु य भवणवासीसु य वाणमंतरेसु य वेमाणिएसु य होज्जा । एयस्स णं भंते ! भवणवासिदेवपवेसणगस्स वाणमंतरदेवपवेसणगस्स जोइसियदेवपवेसणगस्स वेमाणियदेवपवेसणगस्स य कयरे २ जाव विसेसाहिया वा ? गंगेया ! सव्वत्थोवे वेमाणियदेवपवेसणए, भवणवासिदेवपवेसणए असंखेज्जगुणे, वाणमंतरदेवपवेसणए असंखेज्जगुणे, जोइसियदेवपवेसणए संखेज्जगुणे ॥ ३७५ ॥ एयस्स णं भंते ! णेरइय पवेसणगस्स तिरिक्ख० मणुस्स० देवपवेसणगस्स कयरे कयरे जाव विसेसाहिया वा ? गंगेया ! सव्वत्थोवे मणुस्सपवेसणए, णेरइयपवेसणए असंखेज्जगुणे, देवपवेसणए असंखेज्जगुणे, तिरिक्खजोणियपवेसणए असंखेज्जगुणे ॥ ३७६ ॥ संतरं भंते ! णेरइया उववज्जंति णिरंतरं णेरइया उववज्जंति संतरं असुरकुमारा उववज्जंति णिरंतरं असुरकुमारा उववज्जंति जाव संतरं वेमाणिया उववज्जंति णिरंतरं वेमाणिया उववज्जंति संतरं णेरइया उव्वट्ठंति णिरंतरं णेरइया उव्वट्ठंति जाव संतरं वाणमंतरा उव्वट्ठंति णिरंतरं वाणमंतरा उव्वट्ठंति संतरं जोइसिया चयंति णिरंतरं जोइसिया चयंति संतरं वेमाणिया चयंति णिरंतरं वेमाणिया चयंति ? गंगेया ! संतरंपि णेरइया उववज्जंति णिरंतरंपि णेरइया उववज्जंति जाव संतरंपि थणियकुमारा उववज्जंति णिरंतरंपि थणियकुमारा उववज्जंति णो संतरं पुढविक्काइया उववज्जंति णिरंतरं पुढविक्काइया उववज्जंति एवं जाव वणस्सइक्काइया सेसा जहा णेरइया जाव संतरंपि वेमाणिया उववज्जंति णिरंतरंपि वेमाणिया उववज्जंति, संतरंपि णेरइया उव्वट्ठंति णिरंतरंपि णेरइया उव्वट्ठंति. एवं जाव थणियकुमारा णो संतरं पुढविक्काइया उव्वट्ठंति णिरंतरं पुढविक्काइया उव्वट्ठंति एवं जाव वणस्सइक्काइया सेसा जहा णेरइया, णवरं जोइसियवेमाणिया चयंति अभिलावो, जाव संतरंपि वेमाणिया चयंति णिरंतरंपि वेमाणिया चयंति । सओ भंते ! णेरइया उववज्जंति असओ भंते ! णेरइया उववज्जंति ? गंगेया ! सओ णेरइया उववज्जंति णो असओ णेरइया उववज्जंति, एवं जाव वेमाणिया । सओ भंते ! णेरइया उव्वट्ठंति असओ णेरइया उव्वट्ठंति ? गंगेया ! सओ णेरइया उव्वट्ठंति णो असओ णेरइया उव्वट्ठंति, एवं जाव वेमाणिया णवरं जोइसियवेमाणिएसु चयंति भाणियव्वं । सओ भंते ! णेरइया उववज्जंति असओ भंते ! णेर-

इया उव्वज्जंति सओ असुरकुमारा उव्वज्जंति जाव सओ वेमाणिया उव्वज्जंति असओ वेमाणिया उव्वज्जंति सओ णेरइया उव्वट्ठंति असओ णेरइया उव्वट्ठंति सओ असुरकुमारा उव्वट्ठंति जाव सओ वेमाणिया चयंति असओ वेमाणिया चयंति ? गंगेया ! सओ णेरइया उव्वज्जंति णो असओ णेरइया उव्वज्जंति सओ असुरकुमारा उव्वज्जंति णो असओ असुरकुमारा उव्वज्जंति जाव सओ वेमाणिया उव्वज्जंति णो असओ वेमाणिया उव्वज्जंति, सओ णेरइया उव्वट्ठंति णो असओ णेरइया उव्वट्ठंति जाव सओ वेमाणिया चयंति णो असओ वेमाणिया चयंति । से केणट्ठेणं भंते ! एवं वुच्चइ सओ णेरइया उव्वज्जंति णो असओ णेरइया उव्वज्जंति जाव सओ वेमाणिया चयंति णो असओ वेमाणिया चयंति ? से णूणं भो ! गंगेया ! पासेणं अरहया पुरिसादाणीएणं सासए लोए बुइए अणाईए अणवयग्गे जहा पंचमसए जाव जे लोक्कइ से लोए, से तेणट्ठेणं गंगेया ! एवं वुच्चइ जाव सओ वेमाणिया चयंति णो असओ वेमाणिया चयंति । सयं भंते ! एए एवं जाणह उदाहु असयं, असोच्चा एए एवं जाणह उदाहु सोच्चा, सओ णेरइया उव्वज्जंति णो असओ णेरइया उव्वज्जंति जाव सओ वेमाणिया चयंति णो असओ वेमाणिया चयंति ? गंगेया ! सयं एए एवं जाणामि णो असयं, असोच्चा एए एवं जाणामि णो सोच्चा सओ णेरइया उव्वज्जंति णो असओ णेरइया उव्वज्जंति जाव सओ वेमाणिया चयंति णो असओ वेमाणिया चयंति । से केणट्ठेणं भंते ! एवं वुच्चइ तं चेव जाव णो असओ वेमाणिया चयंति ? गंगेया ! केवलो णं पुरत्थिमेणं मियंपि जाणइ अमियंपि जाणइ दाहिणेणं एवं जहा सद्दुट्ठेसए जाव णिव्वुडे णाणे केवलिस्स, से तेणट्ठेणं गंगेया ! एवं वुच्चइ तं चेव जाव णो असओ वेमाणिया चयंति । सयं भंते ! णेरइया णेरइएसु उव्वज्जंति असयं णेरइया णेरइएसु उव्वज्जंति ? गंगेया ! सयं णेरइया णेरइएसु उव्वज्जंति णो असयं णेरइया णेरइएसु उव्वज्जंति । से केणट्ठेणं भंते ! एवं वुच्चइ जाव उव्वज्जंति ? गंगेया ! कम्मोदएणं कम्मगुहयत्ताए कम्मभारियत्ताए कम्मगुरुसंभारियत्ताए असुभाणं कम्मणं उदएणं असुभाणं कम्मणं विवागेणं असुभाणं कम्मणं फलविन्नागेणं सयं णेरइया णेरइएसु उव्वज्जंति णो असयं णेरइया णेरइएसु उव्वज्जंति, से तेणट्ठेणं गंगेया ! जाव उव्वज्जंति । सयं भंते ! असुरकुमारा० पुच्छा ? गंगेया ! सयं

असुरकुमारा जाव उववज्जंति णो असयं असुरकुमारा जाव उववज्जंति । से केणट्ठेणं तं चेव जाव उववज्जंति ? गंगेया ! कम्मोदएणं कम्मोवसमेणं कम्मवियईए कम्मविसोहीए कम्मविसुद्धीए सुभाणं कम्ममाणं उदएणं सुभाणं कम्ममाणं विवागेणं सुभाणं कम्ममाणं फलविवागेणं सयं असुरकुमारा असुरकुमार-त्ताए जाव उववज्जंति णो असयं असुरकुमारा असुरकुमारत्ताए जाव उव-वज्जंति, से तेणट्ठेणं जाव उववज्जंति, एवं जाव यणियकुमारा । सयं भंते ! पुढविवकाइया० पुच्छा ? गंगेया ! सयं पुढविवकाइया जाव उववज्जंति णो असयं जाव उववज्जंति । से केणट्ठेणं भंते ! एवं वुच्चइ जाव उववज्जंति ? गंगेया ! कम्मोदएणं कम्मगुह्यत्ताए कम्मभारियत्ताए कम्मगुहसंभारियत्ताए सुभासुमाणं कम्ममाणं उदएणं सुभासुमाणं कम्ममाणं विवागेणं सुभासुमाणं कम्ममाणं फलविवागेणं सयं पुढविवकाइया जाव उववज्जंति णो असयं पुढविवकाइया जाव उववज्जंति, से तेणट्ठेणं जाव उववज्जंति, एवं जाव मणुस्सा । वाणमंतर-जोइसियवेमाणिया जहा असुरकुमारा, से तेणट्ठेणं गंगेया ! एवं वुच्चइ सयं वेमाणिया जाव उववज्जंति णो असयं वेमाणिया जाव उववज्जंति ॥ ३७७ ॥ तप्पभिइं च णं से गंगेए अणगारे समणं भगवं महावीरं पच्चभिजाणइ सव्वण्णु सव्वदरिसी, तए णं से गंगेए अणगारे समणं भगवं महावीरं तिवल्लुत्तो आया-ह्णिणं पयाह्णिणं करेइ करेत्ता खंदइ णमंसइ वंदिसा णमंसित्ता एवं वयासी-इच्छामि णं भंते ! तुभं अंतियं चाउज्जामाओ धम्माओ पंचमहव्वइयं एवं जहा कालासवेसियपुत्ते अणगारे तहेव भाणियव्वं जाव सव्वदुक्खप्पहीणे । सेवं भंते ! सेवं भंते ! त्ति ॥ ३७८ ॥

णवमं सयं तेत्तीसइमो उद्देशो

तेणं कालेणं तेणं समएणं माहणकुंडग्गामे णामं णयरे होत्था वण्णओ, बहु-सालए चेइए वण्णओ, तत्थ णं माहणकुंडग्गामे णयरे उसभदत्ते णामं माहणे परिवसइ अड्ढे दित्ते वित्ते जाव अपरिभूए रिउव्वेयज्जुव्वेयसामवेयअथव्वणवेय जहा खंदओ जाव अण्णेसु य बहुसु बंभण्णएसु णएसु सुपरिणिट्ठिए समणोवासए अभिगयजीवाजीवे उवल्लद्वपुण्णपावे जाव अप्पाणं भावेमाणे विहरइ, तस्स णं उसभदत्तस्स माहणस्स देवाणंदा णामं माहणी होत्था, सुकुमालपाणिपाया जाव पियदंसणा सुह्वा समणोवासिया अभिगयजीवाजीवा उवल्लद्वपुण्णपावा

जाव विहरइ । तेणं कालेणं तेणं समएणं सामो समोसदे, परिसा जाव पज्जु-
वासइ । तए णं से उसभदत्ते माहणे इमीसे कहाए लद्धट्ठे समाणे हट्ट जाव
हियए जेणेव देवाणंदा माहणी तेणेव उवागच्छइ २ ता देवाणंदां माहणीं एवं
वयासी-एवं खलु देवाणुप्पिए ! समणे भगवं महावीरे आइगरे जाव सव्वणू
सव्वदरिसी आगासगएणं चक्केणं जाव सुहंसुहेणं विहरमाणे बहुसालए चेइए
अहापडिइव्वं उग्गहं जाव विहरइ, तं महाफलं खलु देवाणुप्पिए ! जाव तहा-
रुवाणं अरिहंताणं भगवंताणं णामगोयस्सवि सवणयाए किमंग पुण अभिगमण-
वंदणणमंसणपडिपुच्छणपज्जुवासणयाए, एगस्सवि आरियस्स धम्मियस्स सुव-
यणस्स सवणयाए किमंग पुण विउलस्स अट्टस्स गहणयाए, तं गच्छामी णं
देवाणुप्पिए ! समणं भगवं महावीरं वंदामो णमंसामो जाव पज्जुवासामो,
एयणं इहभवे य परभवे य हियाए सुहाए खमाए णिस्सेसाए आणुगामियत्ताए
भविस्सइ । तए णं सा देवाणंदा माहणी उसभदत्तेणं माहणेणं एवं वुत्ता समाणी
हट्ट जाव हियया करयल जाव कट्टु उसभदत्तस्स माहणस्त एयमट्ठं विणएणं
पडिसुणेइ । तए णं से उसभदत्ते माहणे कोडुंबियपुरिसे सट्टवेइ कोडुंबियपुरिसे
सट्टवेत्ता एवं वयासी-खिप्पामेव भो देवाणुप्पिया ! लहुकरणजुत्तजोइयसमसुर-
धातिहाणसमलहियंसिगेहिं जंबूप्पयामयकलावजुत्तपरिविसिट्ठेहिं रययाभय-
यंटसुत्तरज्जुयपवरकंचणत्थपमाहोंगंहयएहिं णीलुप्पलकयामेलएहिं पवरगोण-
ज्जुवाभएहिं णाणाभणिरयणघंठियाजात्तपरिगयं सुजायजुगजोत्तरउज्जुय-
जुगपसत्थमुविरइयणिम्मियं पवरत्तवल्लणोववेयं धम्मियं जाणप्पवरं जुत्तामेव-
उवट्टवेह २ ता मम एयमाणत्तियं पच्चप्पिणह । तए णं ते कोडुंबियपुरिसा
उसभदत्तेणं माहणेणं एवं वुत्ता समाणा हट्ट जाव हियया करयल जाव एवं
सामी ! तहत्ति आणाए विणएणं वयणं जाव पडिसुणेत्ता खिप्पामेव लहुकरण-
जुत्त जाव धम्मियं जाणप्पवरं जुत्तामेव उवट्टवेत्ता जाव तमाणत्तियं पच्चप्पि-
णंति । तए णं से उसभदत्ते माहणे ष्हाए जाव अप्पमहग्घाभरणालकियसरीरे
साओ गिहाओ पडिणिक्खमइ साओ गिहाओ पडिणिक्खमित्ता जेणेव बाहिरिया
उवट्टाणसाला जेणेव धम्मिए जाणप्पवरे तेणेव उवागच्छइ तेणेव उवागच्छिता
धम्मियं जाणप्पवरं दुरुडे । तए णं सा देवाणंदा माहणी अंतो अंतोउरंसि ष्हाया
कयबलिकम्मा कयकोउय-मंगल-पायच्छित्ता किंच वरपायवत्तणेउरमणिमेहला-

हारबिरइयउच्चियकडगखुडुयाएकावलीकंठसुत्तरत्यगेवेज्जसोणिसुत्तगणाणाम-
मभिरयणमूसणविराइयंगी चोणंसुयवस्थपवरपरिहिया दुगुत्तसुकुमालउत्तरिज्जा
सन्धोउयसुरभिकुसुमवरियसिरया वरचंदणबंदिया वराभरणभूसियंगी काला-
गुरुधूवधूविया सिरिसमाणवेसा जाव अप्पमहग्घाभरणालकियसरीरा बह्णीह
खुज्जाह चित्ताइयाह वामणियाह वडहियाह बच्चरियाह पओसियाह ईसि-
गणियाह जोण्हियाह चारुगणियाह पल्हवियाह ल्हासियाह लउसियाह
आरवीह दमिलीह सिघलीह पुल्लदीह पुक्कलीह बहूलीह मुसंडीह सब-
रीह पारसीह णाणावेसीह विदेसपरिपंडियाह इंगियाच्चितियपत्थिवियाणि-
याह सदेसणेवत्यगहियवेसाह कुसलाह विणीयाह य चेडियाचक्कवालवरि-
सधरथेरकवुड्ज्जमहत्तरगवंदपरिक्खिता अंतेउराओ णिग्गच्छइ अंतेउराओ
णिग्गच्छिता जेणेव बाहिरिया उवट्टाणत्ताला जेणेव धम्मिए जाणप्पवरे तेणेव
उवागच्छइ तेणेव उवागच्छिता जाव धम्मियं जाणप्पवरं दुरुढा । तए णं से
उसमदत्ते माहणे देवाणंदाए माहणीए सद्धि धम्मियं जाणप्पवरं दुरुढे समणे
णियगपरियात्तसपरिदुडे माहणकुंडम्मामं णयरं मज्झमज्जेणं णिग्गच्छइ णिग्ग-
च्छिता जेणेव बहूसालए चेइए तेणेव उवागच्छइ तेणेव उवागच्छिता छत्ताईए
तित्थयराइसए पासइ छ० २ ता धम्मियं जाणप्पवरं ठवेइ २ ता धम्मियाओ
जाणप्पवराओ पच्चोरुहइ ध० २ ता समणं भगवं महावीरं पंचविहेणं अभि-
गमेणं अभिगच्छइ; तंजहा—सच्चित्तानं दग्घाणं विउसरणयाए एवं जहा बिइयसए
जाव तिविहाए पज्जुवासणयाए पज्जुवासइ । तए णं सा देवाणंदा माहणी
धम्मियाओ जाणप्पवराओ पच्चोरुहइ धम्मियाओ जाणप्पवराओ पच्चोरुहिता
बह्णीह खुज्जाह जाव महत्तरगवंदपरिक्खिता समणं भगवं महावीरं पंचविहेणं
अभिगमेणं अभिगच्छइ, तंजहा—सच्चित्तानं दग्घाणं विउसरणयाए, अच्चित्तानं
दग्घाणं अविमोयणयाए, विणयोणयाए गायलट्ठीए, चक्खुप्फासे अंजलि-
पग्गहेणं, मणस्स एंगत्तीमावकरणेणं जेणेव समणे भगवं महावीरे तेणेव उवा-
गच्छइ तेणेव उवागच्छिता समणं भगवं महावीरं तिवल्लो आयाहिणं
पयाहिणं करेइ २ ता वंदइ णमंसइ वंदित्ता णमंसित्ता उसभदत्तं माहणं
पुरओ कट्ठु ठिया चेव सपरिवारा सुस्सुसमाणी णमंसमाणी अभिसुहा विणएणं
पंजलिउडा जाव पज्जुवासइ ॥ ३७६ ॥ तए णं सा देवाणंदा माहणी आगय-

पण्हया पण्फुयलोयणा संवरियवलयबाहा कंचुयपरिक्खित्तिया धाराहयकलं-
 बगंपिवसमूसवियरोमकूवा समणं भगवं महावीरं अणिमिसाए दिट्ठीए
 देहमाणी २ चिट्ठइ । भंते ! त्ति भगवं गोयमे समणं भगवं महावीरं वंदइ णमं-
 सइ वंदित्ता णमसित्ता एवं वयासी-किण्णं भंते ! एसा देवाणंदा माहणी
 आगयपण्हया तं चेव जाव रोमकूवा देवाणुप्पियं अणिमिसाए दिट्ठीए देहमाणी
 २ चिट्ठइ ? गोयमाइ ! समणे भगवं महावीरे भगवं गोयमं एवं वयासी-एवं खलु
 गोयसा ! देवाणंदा माहणी ममं अम्मगा, अहण्णं देवाणंदाए माहणीए अत्तए, तए
 णं सा देवाणंदा माहणी तेणं पुव्वपुत्तसिणेहाणुराएणं आगयपण्हया जाव समू-
 वियरोमकूवा ममं अणिमिसाए दिट्ठीए देहमाणी २ चिट्ठइ ॥ ३८० ॥ तए
 णं समणे भगवं महावीरे उसभदत्तस्स माहणस्स देवाणंदाए माहणीए तीसे य
 महइमहालियाए इत्तिपरिसाए जाव परिसा पडिगय्म । तए णं से उसभदत्ते
 माहणे समणस्स भगवओ महावीरस्स अंतियं धम्मं सोच्चा णिसम्म हट्ठुट्ठे
 उट्ठाए उट्ठेइ उट्ठाए उट्ठेत्ता समणं भगवं महावीरं तिक्खत्तो जाव णमसित्ता
 एवं वयासी-एवमेयं भंते ! तहमेयं भंते ! जहा खंदओ जाव से जहेयं तुट्ठे
 वयहत्ति कट्ठु उत्तरपुरत्थिमं विसीभागं अवक्कमइ उत्तरपु० २ ता सयमेव
 आभरणमल्लालंकारं ओमुयइ सयमे० २ ता सयमेव पंचमुट्ठियं लोयं करेइ
 सयमे० २ ता जेणेव समणे भगवं महावीरे तेणेव उवागच्छइ २ ता समणं भगवं
 महावीरं तिक्खत्तो आयाहिणं पयाहिणं जाव णमसित्ता एवं वयासी-आलित्ते
 णं भंते ! लोए, पलित्ते णं भंते ! लोए, आलित्तपलित्ते णं भंते ! लोए जराए
 मरणेण य, एवं एएणं कमेणं जहा खंदओ तहेव पव्वइओ जाव सामाइयमाइ-
 याइं एक्कारस्स अंगाइं अहिज्जइ जाव बहूहिं चउत्थछट्ठमइसम जाव विचित्तींहि
 तवोक्कमेहिं अप्पाणं भावेमाणे बहूइं वासाइं सामणपरियागं पाउणइ २ ता
 मासियाए संलेहणाए अत्ताणं मूसेइ मासि० २ ता सट्ठिं भत्ताइं अणसणाए
 छेदेइ सट्ठिं २ ता जस्सट्ठाए कीरइ णमभावे जाव तमट्ठं आराहेइ तमट्ठं
 आराहेत्ता जाव सव्वदुक्खप्पहीणे । तए णं सा देवाणंदा माहणी समणस्स
 भगवओ महावीरस्स अंतियं धम्मं सोच्चा णिसम्म हट्ठुट्ठुट्ठा समणं भगवं महावीरं
 तिक्खत्तो आयाहिणं पयाहिणं जाव णमसित्ता एवं वयासी-एवमेयं भंते !
 तहमेयं भंते ! एवं जहा उसभदत्तो तहेव जाव धम्ममाइक्खियं । तए णं समणे

भगवं महावीरे देवाणवं माहर्णि सयमेयं पञ्चावेइ सय० २ ता सयमेव अज्ज-
चंदणाए अज्जाए सीसिणिताए वलयइ । तए णं सा अज्जचंदणा अज्जा देवा-
णवं माहर्णि सयमेव मुंडावेइ सयमेव सेहावेइ एवं जहेव उसभवत्तो तहेव अज्ज-
चंदणाए अज्जाए इमं एयारूवं धम्मियं उवएसं सम्मं संपडिवज्जइ तमाणाए
तह गच्छइ जाव संजमेणं संजमेइ । तए णं सा देवाणंदा अज्जा अज्जचंदणाए
अज्जाए अंतियं सामाइयमाइयाइं एक्कारस अंगाइं अहिज्जइ सेसं तं चेव जाव
संभवदुक्खप्पहीणा ॥ ३८१ ॥ तस्स णं माहणकुंडग्गामस्स णयरस्स पच्चत्थियेणं
एत्थ णं खत्तियकुंडग्गामे णामं णयरे होत्था वण्णओ, तत्थ णं खत्तियकुंडग्गामे
णयरे जमाली णामं खत्तियकुमारि परिवसइ अड्ढे दित्ते जाव अपरिभूए उप्पि
पासायवरगए फुट्टुभाणेहिं मुइंगमत्थएहिं बत्तीसइबद्धेहिं णाडएहिं णाणाविहवर-
तदणीसंपउत्तेहिं उवणच्चिज्जमाणे-उवणच्चिज्जमाणे उवगिज्जमाणे २ उव-
लात्तिज्जमाणे २ पाउसवासारत्तसरयहेमंतवसंतगिम्हपुज्जंते छप्पिउऊ जहा
विभवेणं माणमाणे २ कालं गालेमाणे इट्ठे सहफरिसरसरूवगंधे पंचविहे
माणुस्सए कामभोगे पच्चणुम्भमाणे विहरइ । तए णं खत्तियकुंडग्गामे णयरे
सिघाडगतियचउक्कचचर जाव बहुजणसहेइ वा जहा उववाइए जाव एवं पण्ण-
वेइ एवं परूवेइ-एवं खलु देवाणुप्पिया ! समणे भगवं महावीरे आइगरे जाव
संभवणू संभवदरिसी माहणकुंडग्गामस्स णयरस्स बहिया बहुसालए चेइए अहा-
पडिक्खं जाव विहरइ, तं महप्फलं खलु देवाणुप्पिया ! तहारूवाणं अरहंताणं
भगवंताणं जहा उववाइए जाव एगाभिभूहे खत्तियकुंडग्गामं णयरं मज्झंमज्जेणं
णिग्गच्छइ णिग्गच्छिता जेणेव माहणकुंडग्गामे णयरे जेणेव बहुसालए चेइए
एवं जहा उववाइए जाव तिविहाए पज्जुवासणाए पज्जुवासइ । तए णं तस्स
जमालिस्स खत्तियकुमारस्स तं महया जणसइं वा जाव जणसणिवायं वा
सुणमाणस्स वा पासमाणस्स वा अयमेयारूवे अज्जत्थिए जाव समुप्पज्जित्था-
किण्णं अज्ज खत्तियकुंडग्गामे णयरे इंदमहेइ वा खंवमहेइ वा मुगंदमहेइ वा
णागमहेइ वा जक्खमहेइ वा भूयमहेइ वा कूवमहेइ वा तडागमहेइ वा णई-
महेइ वा दहमहेइ वा पव्वयमहेइ वा रुक्खमहेइ वा चेइयमहेइ वा थूममहेइ
वा जण्णं एए बह्वं उग्गा भोगा राइण्णा इक्खाणा णाया कोरब्बा खत्तिया
खत्तियपुत्ता भडा भडपुत्ता जहा उववाइए जाव सत्थवाहप्पमिइओ

ण्हाया कयबलिकम्मा जहा उववाइए जाव णिग्गच्छंति ? एवं संपेहेइ एवं संपेहिता कंचुइज्जपुरिसं सदावेइ कंचु० २ ता एवं वयासी-किण्णं देवाणु-
 प्पिया ! अज्ज खत्तियकुंडग्गामे णयरे इंदमहेइ वा जाव णिग्गच्छंति ? तए णं
 से कंचुइज्जपुरिसे जमालिणा खत्तियकुमारेणं एवं वुत्ते समणे हट्टुट्ठे
 समणस्स भगवओ महावीरस्स आगयणगहियविणिच्छए करयल० जमालि
 खत्तियकुमारं जएणं विजएणं वद्धावेइ वद्धावेत्ता एवं वयासी-णो खलु देवा-
 णुप्पिया ! अज्ज खत्तियकुंडग्गामे णयरे इंदमहेइ वा जाव णिग्गच्छति, एवं
 खलु देवाणुप्पिया ! अज्ज समणे भगवं महावीरे जाव सव्वण्णं सव्वदरिमी
 माहणकुंडग्गामस्स णयरस्स बहिया बहूसालए चेइए अहापडिरुवं उगहं जाव
 विहरइ, तए णं एए बहवे उग्गा भोगा जाव अप्पेगइया वंदणवत्तियं जाव
 णिग्गच्छंति । तए णं से जमाली खत्तियकुमारे कंचुइज्जपुरिसस्स अंतिए एय-
 मट्ठं सोच्चा णिसम्म हट्टुट्ठे० कोडुंबियपुरिसे सदावेइ कोडुंबियपुरिसे सदा-
 वइत्ता एवं वयासी-खिण्णामेव भो देवाणुप्पिया ! चाउग्घंटे आसरहं जुत्तामेव
 उवट्टवेह उवट्टवेत्ता मम एयमाणत्तियं पच्चप्पिणह । तए णं ते कोडुंबियपुरिसा
 जमालिणा खत्तियकुमारेणं एवं वुत्ता समाणा जाव पच्चप्पिणंति । तए णं से
 जमाली खत्तियकुमारे जेणेव मज्जणघरे तेणेव उवागच्छइ तेणेव उवागच्छिता
 ण्हाए कयबलिकम्मे जाव उववाइए परिसावण्णओ तथा भाणियद्वं जाव चंद-
 णोकिण्णभायसरीरे सव्वात्तंकारविभूसिए मज्जणघराओ पडिणिक्खमइ मज्जण-
 घराओ पडिणिक्खमित्ता जेणेव बाहिरिया उवट्टाणसाला जेणेव चाउग्घंटे आस-
 रहे तेणेव उवागच्छइ तेणेव उवागच्छिता चाउग्घंटे आसरहं दुरुहेइ चाउ० २
 ता सकोरंटेमल्लदाभेणं छत्तेणं धरिज्जमाणेणं महया भडचडकरपहकरवंवपरि-
 क्खित्ते खत्तियकुंडग्गामं णयरं मज्जंमज्जेणं णिग्गच्छइ णिग्गच्छिता जेणेव
 माहणकुंडग्गामे णयरे जेणेव बहूसालए चेइए तेणेव उवागच्छइ तेणेव उवा-
 गच्छिता नुरए णिग्गहेइ २ ता रहं ठवेइ रहं ठवेत्ता रहाओ पच्चोत्तहइ रहा०
 ता पुफत्तंबोलाउहमाइयं वाहणाओ य विसज्जेइ २ ता एगसाडियं उत्तरासंणं
 करेइ उत्तरासंणं करेत्ता आयंते चोक्खे परमसुइड्ढूए अंजलिमतलियहरंथे जेणेव
 समणे भगवं महावीरे तेणेव उवागच्छइ तेणेव उवागच्छिता समणं भगवं महा-
 वीरं तिक्खत्तो आयाहिणं पयाहिणं करेइ २ ता जाव तिविहाए पज्जुवासणाए
 पज्जुवासइ । तए णं समणे भगवं महावीरे जमालिस्स खत्तियकुमारस्स तीसे

य महइमहालियाए इसि० जाव धम्मकहा जाव परिसा पडिगया । तए णं से जमाली खत्तियकुमारे समणस्स भगवओ महावीरस्स अंतिए धम्मं सोच्चा णिसम्म हट्ट जाव हियए उट्टाए उट्ठेइ उट्टाए उट्ठेत्ता समणं भगवं महावीरं तिवखुत्तो जाव णमंसित्ता एवं वयासी-सइहामि णं भंते ! णिग्गंथं पावयणं, पतियामि णं भंते ! णिग्गंथं पावयणं, रोएमि णं भंते ! णिग्गंथं पावयणं, अहमुट्ठेमि णं भंते ! णिग्गंथं पावयणं, एवमेयं भंते ! तहमेयं भंते ! अवि-तहरेयं भंते ! असंदिद्धमेयं भंते ! जाव से जहेयं तुब्भे वयह, जं णवरं देवाणु-प्पिया ! अम्मापियरो आपुच्छामि । तए णं अहं देवाणुप्पियाणं अतियं मुंडे भवित्ता अगाराओ अणगारियं पञ्चयामि, अहामुहं देवाणुप्पिया ! मा पडिबंधं ॥३८२॥ तए णं से जमाली खत्तियकुमारे समणेणं भगवया महावीरेणं एवं वुत्ते समाणे हट्टुट्ठे समणं भगवं महावीरं तिवखुत्तो जाव णमंसित्ता तमेव चाउगघटं आसरहं दुरूहेइ दुरूहित्ता समणस्स भगवओ महावीरस्स अंतियाओ बहुसालाओ चेइयाओ पडिणिक्खमइ पडिणिक्खमित्ता सकोरंट० जाव धरिज्जमाणेणं महया भइच्चइगर जाव परिक्खित्ते जेणेव खत्तियकुंडग्गामे णयरे तेणेव उवागच्छइ तेणेव उवागच्छित्ता खत्तियकुंडग्गामं णयरं भज्जंमज्जेणं जेणेव सए गिहे जेणेव बाहिरिया उवट्टाणसाला तेणेव उवागच्छइ तेणेव उवागच्छित्ता तुरए णिगिण्हइ तुरए णिगिण्हित्ता रहं ठवेइ रहं ठवेत्ता रहाओ पच्चोरुहइ रहाओ पच्चोरुहित्ता जेणेव अंभतरिया उवट्टाणसाला जेणेव अम्मापियरो तेणेव उवागच्छइ तेणेव उवागच्छित्ता अम्मापियरो जएणं विजएणं वद्धावेइ वद्धावेत्ता एवं वयासी-एवं खलु अम्मयाओ ! मए समणस्स भगवओ महावीरस्स अंतियं धम्मे णिसंते, सेवि य मे धम्मे इच्छिए पडिच्छिए अभिरुइए । तए णं तं जमालि खत्तियकुमारं अम्मापियरो एवं वयासी-धण्णेसि णं तुमं जाया ! कयत्थेसि णं तुमं जाया ! कयपुण्णेसि णं तुमं जाया ! कयलवल्लणेसि णं तुमं जाया ! जणं तुमे समणस्स भगवओ महावीरस्स अंतियं धम्मे णिसंते से वि य धम्मे इच्छिए पडिच्छिए अभिरुइए । तए णं से जमाली खत्तियकुमारे अम्मापियरो दोच्चंपि एवं वयासी-एवं खलु मए अम्मयाओ ! समणस्स भगवओ महावीरस्स अंतिए धम्मे णिसंते जाव अभिरुइए, तए णं अहं अम्मयाओ ! संसारभयउच्चिरणे भीए जम्मजरारमणेणं तं इच्छामि णं अम्मयाओ ! तुब्भेहि अब्भणुणाए

समाणे समणस्स भगवओ महावीरस्स अंतियं मुंडे भवित्ता अगाराओ अण-
गारियं पव्वइत्तए । तए णं सा जमालिस्स खत्तियकुमारस्स माया तं अणिट्ठं
अकंतं अर्पियं अमणुणं अमणामं असुयपुब्बं गिरं सोच्चा णिस्सम्म सेयांगंयरोम-
कूवपगतंतविलीणगत्ता सोगभरपवेवियंगमंगी णित्तेया वीणविमणवयणा करयल-
मलियव्वकमलमाला तक्खणओलुग्गदुव्वससरीरलावणसुण्णणिच्छाया गय-
सिरीया पसिहिलभूसणपडंतखुण्णियसंचुण्णियधवलवलयपढमट्टउत्तरिज्जा मुच्छा-
वसणट्टुचेयगुरुई सुकुमालविकिण्णकेसहत्था परमुणियत्तव्व चंपगलया णिव्वत्त-
महे व्व इंदलट्ठी विमुवकसंधिबंधणा कोट्टिमत्तंसि धसत्ति सव्वंगेहिं संणि-
वडिया । तए णं सा जमालिस्स खत्तियकुमारस्स माया ससंभमोवत्तियाए तुरियं
कच्चणभिगार-मूह्विणिग्गय-सोयल-विमलजलधारपरिसिचमाणिच्चावियगाय-
लट्ठी उक्खेवयतालियंतवीयणगज्जणियवाएणं सफुत्तिएणं अतेउरपरिजणेणं आसा-
सिया सभाणी रोयमाणो कंदमाणी सोयमाणी विलवमाणी जमालि खत्तियकुमारं
एवं वयासी-तुमंसि णं जाया ! अम्हं एगे पुत्ते इट्ठे कंते पिए मणुणे मणामे
येज्जे वेसासिए संमए बहुमए अणुमए भंडकरंडगसमाणे रयणे रयणम्भूए जीवि-
ऊसविए हिययणंदिजणणे उंबरपुष्फमिव दुल्लहे सव्वणयाए किमंग ! पुण पासण-
याए, तं णो खलु जाया ! अम्हे इच्छामो तुव्वं खणमवि विप्पओयं, तं अच्छाहि
ताव जाया ! जाव ताव अम्हे जीवामी, तओ पच्छा अम्हेहिं कालगएहिं समा-
णेहिं परिणयवए वडियकुलवंसतंतुकज्जंमि णिरवयक्खे समणस्स भगवओ महा-
वीरस्स अंतियं मुंडे भवित्ता अगाराओ अणगारियं पव्वइत्तए । तए णं से
जमालो खत्तियकुमारे अम्मपियरो एवं वयासी-तहावि णं तं अम्मयाओ !
जणं तुव्वे मम एवं वयह तुमंसि णं जाया ! अम्हं एगे पुत्ते इट्ठे कंते तं चेव
जाव पव्वइत्तए । एवं खलु अम्मयाओ ! माणुस्सए भवे अणेगजाइजरा-
मरणरोगसारीरमाणसपकामदुक्खवेयणवसणसओवह्वाभिभूए अधुवे अणिइए
असासए संझंमरगसरिसे जलबुब्बयसमाणे कुसग्गजत्तिंबिदुसण्णिभे सुविणय-
दंसणोवमे विउजुल्लयाचंचले अणिच्चे सडणपडणविट्ठंसणधम्ममे पुब्बि वा पच्छा
वा अवस्सविप्पजहियव्वे भविस्सइ, से केस णं जाणइ अम्मयाओ ! के
पुब्बि गमणयाए के पच्छा गमणयाए ? तं इच्छामि णं अम्मयाओ ! तुव्वेहिं
अदभणुणाए समाणे समणस्स भगवओ महावीरस्स जाव पव्वइत्तए । तए णं

तं जमालि खत्तियकुमारं अम्मापियरो एवं वयासी-इमं च ते जाया !
सरीरगं पविसिद्धरूवलक्ष्णबंजणगुणोववेयं उत्तमबलवीरियसत्तजुत्तं विष्णाण-
विधवखणं ससोहग्गुणसमुस्सियं अभिजायमहक्खमं विविहवाहिरोगरहियं णिरु-
वह्यउदत्तलट्ठंपंचिवियपडुपडमजोव्वणत्थं अणेगउत्तमगुणेहि संजुत्तं तं अणुहोहि
ताव जाया ! णियगसरीररूवसोहग्गजोव्वणगुणे, तओ पच्छा अणुभूय-
णियगसरीररूवसोहग्गजोव्वणगुणे अम्हेहि कालगएहि समाणेहि परिणयवए
वड्डियकुल्लवंसतंतुकज्जमि णिरवयवखे समणस्स भगवओ महावीरस्स अंतियं
मुंडे भवित्ता अगाराओ अणगारियं पव्वइहिंसि । तए णं से जमाली खत्तिय-
कुमारे अम्मापियरो एवं वयासी-तहावि णं तं अम्मयाओ ! जणं तुब्भे मम एवं
वयह-इमं च णं ते जाया ! सरीरगं तं चेव जाव पव्वइहिंसि, एवं खलु अम्म-
याओ ! माणुस्सगं सरीरं दुक्खापयणं विविहवाहिसयसणिकेयं अट्टियकट्ठुट्टियं
छिराणाहृजालओणद्धसंपिणद्धं मट्टियभंडं व तुब्बलं असुइसकिलिट्ठं अणिट्टिविय-
सव्वकालसंठप्पयं जहाकुणिमज्जजरघरं व सडणपडणविद्धंसणधम्मं पुंविं व
पच्छा वा अवस्सं विप्पजहियव्वं भविस्सइ, से केस णं जाणइ, अम्मयाओ !
के पुंविं तं चेव जाव पव्वइत्तए । तए णं तं जमालि खत्तियकुमारं अम्मा-
पियरो एवं वयासी-इमाओ य ते जाया ! विउलकुलबालियाओ सरिसियाओ
सरित्तयाओ सरिस्वयाओ सरिसलावणरूवजोव्वणगुणोववेयाओ सरिसएहितो
कुलेहितो आणिएल्लियाओ कलाकुसलसव्वकाललालियसुहोचियाओ महवगुण-
जुत्तणित्तणविणओवयारपंडियवियक्खणाओ मंजुलमियमहुरभणियविहसियविय्ये-
विल्लधगइविलासच्चिट्ठियविसारयाओ, अचिकलकुलसीलसालिणीओ विसुद्धकुल-
वंसंताणतंतुवद्धणप्पगम्भुम्भवपभाविणीओ मणाणुकूलहियइच्छियाओ अट्ट
तुज्ज गणवत्तहाओ उत्तमाओ णिच्चं भावानुरत्तसव्वंगसुंदरीओ भारियाओ,
सं भंजाहि ताव जाया ! एयाहिं सिद्धिं बिउले माणुस्सए कामभोगे, तओ
पच्छा भुत्तभोगी विसयविगयवोच्छिण्णकोउहल्ले अम्हेहि कालगएहि जाव
पव्वइहिंसि । तए णं से जमाली खत्तियकुमारे अम्मापियरो एवं वयासी-
तहावि णं तं अम्मयाओ ! जणं तुब्भे मम एयं वयह इमाओ ते जाया !
विउलकुल जाव पव्वइहिंसि, एवं खलु अम्मयाओ ! माणुस्सया काम-
भोगा असुई असासया वंतासवा पित्तासवा खेलासवा सुक्कासवा सोणियासवा

उच्चारपासवणखेलीसिघाणगवंतपित्तपूयसुकसोणियसमुम्भवा अमणुण्णदुरूव-
मुत्तपूइयपूरीसपूणा मयगंधुस्सासअसुभणित्तासउव्वेयणया बीमच्छा अम्प-
कालिया लहूसगा कलमलाहियासदुक्खबहुजणसाहारणा परिकिलेसकिच्छुक्ख-
सज्जा अबुहजणणित्तेविया सया साहगरहणिज्जा अणंतसमारवद्धणा कडुयफल-
विवागा च्छुडलिलव्व अमुच्चमाणदुक्खानुबंघिणो सिद्धिगमणविग्घा, से केस णं
जाणइ अम्मयाओ ! के पुंन्व गमणयाए के पच्छा गमणयाए ? तं इच्छामि णं
अम्मयाओ ! जाव पव्वइत्तए । तए णं तं जमालि खत्तियकुमारं अम्मापियरो
एवं वयासी-इमे य ते जाया ! अज्जयपज्जयपिउपज्जयागए सुबहु हिरणे य
सुवण्णे य कसे य दूसे य विउल्लघणकणय जाव संतमारसावएज्जे अलाहि जाव
आसत्तमाओ कुलवंसाओ पकामं दाउं पकामं भोतुं पकामं परिभाएउं तं
अणुहोहि ताव जाया ! विउले मणुस्सए इड्डिसक्कारसमुदए, तओ पच्छा
अणुहूयकल्लणे वड्डियकुलवंसंतनु जाव पव्वइहिसि । तए णं से जमाली खत्तिय-
कुमारे अम्मापियरो एवं वयासी-तहाहि णं तं अम्मयाओ ! जण्णं तुज्जे
ममं एवं वयह-इमं च ते जाया ! अज्जयपज्जय जाव पव्वइहिसि, एवं खलु
अम्मयाओ ! हिरणे य सुवण्णे य जाव सावएज्जे अग्गिसाहिए चोरसाहिए
रायसाहिए मच्चुसाहिए वाइयसाहिए अग्गिसामण्णे अधुवे अण्डिए असासए
पुंन्व वा पच्छा वा अवस्सविणपजहियव्वे भविस्सइ, से केस णं जाणइ तं चेव
जाव पव्वइत्तए । तए णं तं जमालि खत्तियकुमारं अम्मयाओ जाहे णो संचाएति
विसयाणुलोमाहि बहूहि आघवणाहि य पण्णवणाहि य सण्णवणाहि य विण्णव-
णाहि य आघवेत्तए वा पण्णवेत्तए वा सण्णवेत्तए वा विण्णवेत्तए वा लोहे विहाय-
पडिकूलाहि संजमभयउव्वेयणकराहि पण्णवणाहि पण्णवेमाणा एवं वयासी-एवं
खलु जाया ! णिगंथे पावयणे सच्चे अणुत्तरे केवले जहा आवस्सए जाव
सव्वदुक्खानमंतं करेति अहीव एगंतविट्ठीए खूरो इव एगंतघाराए लोहमया जवा
चावेयव्वा वालुयाकवले इव णिस्साए गंगा वा महाणई पडिसीयगमणयाए
महासमुदो वा भुयाहि दुत्तरो तिक्खं कमियव्वं मरयं लंबेयव्वं असिधाराणं
वयं चरियव्वं, णो खलु कप्पइ जाया ! समणणं णिगंथाणं अह्हाकम्मि-
एइ वा उहेसिएइ वा मिस्सजाएइ वा अज्जोयरएइ वा पूइएइ वा कीएइ
वा पामिच्चेइ वा अच्छेज्जेइ वा अणिसट्ठेइ वा अभिहूडेइ वा कंतारभत्तेइ

वा दुष्मिबखमत्तेइ वा गिलाणमत्तेइ वा वद्लियाभत्तेइ वा पाहुणगमत्तेइ वा
 सेज्जायरपिडेइ वा रायपिडेइ वा मूलभोयणेइ वा कंदभोयणेइ वा कलभोयणेइ
 वा बौयभोयणेइ वा हरियभोयणेइ वा भुत्तए वा पायए वा, तुमंसि च णं जाया !
 सुहसमुच्चिए णो चेव णं दुहसमुच्चिए णालं सीयं णालं उण्हं णालं खुहा णालं
 पिवासा णालं चोरा णालं बाला णालं दंसा णालं मसगा णालं वाइपपित्ति-
 सेंभियसण्णिवाइए विविहे रोगायंके परीस्सहोवसग्गे उद्विण्णे अहियासेत्तए, तं
 णो खलु जाया ! अम्हे इच्छामो तुब्भं खणमवि विप्पओगं तं अच्छाहि ताव
 जाया ! जाव ताव अम्हे जीवामो, तओ पच्छा अम्हेहि कालगएहि जाव पव्व-
 इहिसि । तए णं से जमाली खत्तियकुमारे अम्मापियरो एवं वयासो—तहावि
 णं तं अम्मयाओ ! जणं तुब्भे मसं एवं वयह—एवं खलु जाया ! णिग्गंथे
 पावयणे सत्त्वे अणुत्तरे केवले तं चेव जाव पव्वइहिसि, एवं खलु अम्म-
 याओ ! णिग्गंथे पावयणे कीवाणं कायराणं कापुरिसाणं इहलोगपडि-
 बद्धाणं परलोगपरंमुहाणं विसयत्तिसियाणं दुरणुचरे पागपजणस्स, धीरस्स
 णिच्छिप्पस्स ववसियस्स णो खलु एत्थं किञ्चि वुक्करं करणयाए, तं इच्छामि
 णं अम्मयाओ ! तुब्भेहि अंभणुष्णाए सभाणे समणस्स भगवओ महा-
 धीरस्स जाव पव्वइत्तए । तए णं तं जमालि खत्तियकुमारं अम्मापियरो जाहे
 णो सत्ताएति विसयाणुलोमाहि य विसयपडिकूलाहि य बहूहि आघवणाहि
 य पण्णवणाहि य ४ आघवेत्तए वा जाव विण्णवेत्तए वा ताहे अकाभाइं
 चेव जमालिस्स खत्तियकुमारस्स णिक्खंमणं अणुमणित्था ॥ ३८३ ॥ तए णं
 तस्स जमालिस्स खत्तियकुमारस्स पिया कोडुंबियपुरिसे सद्दावेइ सद्दावेत्ता एवं
 वयासो—खिप्पामेव भो देवाणुप्पिया ! खत्तियकुंडगामं णयरं सींभतरबाहिरियं
 आसियसंमज्जिओवलितं जहा उववाइए जाव पच्चप्पिणंति । तए णं से जमा-
 लिस्स खत्तियकुमारस्स पिया दोच्चंपि कोडुंबियपुरिसे सद्दावेइ सद्दावइत्ता एवं
 वयासो—खिप्पामेव भो देवाणुप्पिया ! जमालिस्स खत्तियकुमारस्स महत्थं
 महग्घं महरिहं विपुलं णिक्खमणाभिसेयं उवट्टवेह, तए णं ते कोडुंबियपुरिसा
 त्तेव जाव पच्चप्पिणंति । तए णं तं जमालि खत्तियकुमारं अम्मापियरो सीहा-
 सणवरंसि पुरस्त्थाभिमुहं णिसीयावेति णिसीयावेत्ता अट्टसएणं सोवणिगयाणं
 कलसाणं एवं जहा रायप्पसेणइज्जे जाव अट्टसएणं भोमेज्जाणं कलसाणं सन्वि-

इदोए जाव रवेणं महया-महया णिक्खमणाभिसेएणं अभिसिचंति णिक्खमणा-
 भिसेएणं अभिसिचिन्ता करयल जाव जएणं विजएणं वद्धावेत्ति जएणं विजएण
 वद्धावेत्ता एवं वयासी-भण जाया ! किं देमो किं पयच्छामो किणा वा ते
 अट्ठो ? तए णं से जमाली खत्तियकुमारे अम्मापियरो एवं वयासी-इच्छामि
 णं अम्मयाओ ! कुत्तियावणाओ रयहरणं च पडिगहं च आणित्तं कासवगं च
 सदाविजं । तए णं से जमालिस्स खत्तियकुमारस्स पिया कोडुंबियपुरिसे सदावेड
 सदावेत्ता एवं वयासी-खिप्पामेव भो देवाणुप्पिया ! सिरिधराओ तिण्णि
 सयसहस्साइं गहाय दोहि सयसहस्सेहि कुत्तियावणाओ रयहरणं च पडिगहं च
 आणेह सयसहस्सेणं कासवगं सदावेह । तए णं ते कोडुंबियपुरिसा जमालिस्स
 खत्तियकुमारस्स पिउणा एवं वुत्ता समाणा हट्टुट्टा करयल जाव पडिसुणेत्ता
 खिप्पामेव सिरिधराओ तिण्णि सयसहस्साइं तहेव जाव कासवगं सदावेत्ति ।
 तए णं से कासवए जमालिस्स खत्तियकुमारस्स पिउणा कोडुंबियपुरिसेहि सदा-
 विए समाणे हट्ठे तुट्ठे ण्हाए कथञ्चलिकम्मे जाव सरीरे जेणेव जमालिस्स
 खत्तियकुमारस्स पिया तेणेव उवागच्छइ तेणेव उवागच्छिन्ता करयल० जमा-
 लिस्स खत्तियकुमारस्स पियरं जएणं विजएणं वद्धावेड जएणं विजएणं वद्धा-
 वित्ता एवं वयासी-संसित्तु णं देवाणुप्पिया ! जं मए करणिज्जं ? तए णं से
 जमालिस्स खत्तियकुमारस्स पिया तं कासवगं एवं वयासी-तुभं देवाणुप्पिया !
 जमालिस्स खत्तियकुमारस्स परेणं जत्तेणं चउरंगुलवज्जे णिक्खमणपओगे अग्ग-
 केसे पडिकप्पेहि । तए णं से कासवए जमालिस्स खत्तियकुमारस्स पिउणा एवं
 वुत्ते समाणे हट्टुट्टे करयल जाव एवं सामी ! तहत्ताणाए विणएणं वयणं
 पडिसुणेइ २ ता मुरमिणा गंधोदएणं हत्थपाए पक्खालेइ मुरमिणा० २ ता मुद्धाए
 अट्टुपडलाए पोत्तीए मुहं बंधइ मुहं बंधित्ता जमालिस्स खत्तियकुमारस्स परेणं
 जत्तेणं चउरंगुलवज्जे णिक्खमणपओगे अग्गकेसे कप्पेइ । तए णं सा जमालिस्स
 खत्तियकुमारस्स भाया हंसलक्खणेणं पडसाडएणं अग्गकेसे पडिच्छइ अग्गकेसे
 पडिच्छित्ता मुरमिणा गंधोदएणं पक्खालेइ मुरमिणा गंधोदएणं पक्खालेत्ता
 अग्गेहि वरेहि गंधेहि मत्तेहि अच्चेइ २ ता मुद्धवत्थेणं बंधेइ मुद्धवत्थेणं बंधित्ता
 रयणकरंडगंसि पक्खवइ २ ता हारवारिधारसिदुवारिछणभुत्तावलिण्णगासाइं
 सुयविओगदूसहाइं अंसूइं विणिम्मयमाणो २ एवं वयासी-एस णं अहं जमा-

लिस्स खत्तियकुमारस्स बहूसु तिहीसु य पव्वणीसु य उस्सवेसु य जण्णेसु य छणेसु य अप्पच्छिमे दरिसणे भविस्सई तिकट्टु ऊसीसगमूले ठवेइ । तए णं तस्स जमालिस्स खत्तियकुमारस्स अम्भापियरो दोच्चंपि उत्तरावककमणं सीहा-
सणं रयावेत्ति २ ता जमालिस्स खत्तियकुमारस्स सीयापीयएहि कलसेहि
ण्हावेत्ति सीयापीयएहि कलसेहि ण्हावेत्तः पम्हलसुकुमालाए सुरभीए गंध-
कासाईए गाथाइं लूहेत्ति सुरभीए गंधकासाईए गाथाइं लूहेत्ता सरसेणं
गोसीसचंदणेणं गाथाइं अणुलिपंति गाथाइं अणुलिपित्ता णासाणिस्सासवाय-
वोञ्जं चक्खुहरं वण्णफरिसजुत्तं हयलालापेलवाइरेणं धवलं कणगत्तच्चियंतकम्मं
महरिहं हंसलक्खणपडसाडगं परिहंति २ ता हारं पिणद्धेत्ति २ ता अद्धहारं
पिणद्धेत्ति २ ता० एवं जहा सूरियाभस्स अलंकारो तहेव जाव चित्तं रयण-
संकडुक्कडं मउडं पिणद्धेत्ति, किं बहुणा गंधिमवेदिमपूरिमसंधाइमेणं चउत्विहेणं
मल्लेणं कप्परुखणं पिवअलंकियविभूसियं करेत्ति । तए णं से जमालिस्स खत्तिय-
कुमारस्स पिया कोडुंबियपुरिसे सदावेइ सदावेत्ता एवं वयासी-खिप्पामेव भो
देवाणुप्पिया ! अणेमल्लंसयसण्णिविट्ठं लीलट्टियसालभंजियायं जहा राय-
प्पसेणइज्जे विमाणवण्णओ जाव मणिरयणघट्टियाजालपरिक्खित्तं पुरिससहस्स-
वाहिणं सीयं उवट्टवेह उवट्टवेत्ता मम एयमाणत्तियं पच्चप्पिणह, तए णं ते
कोडुंबियपुरिसा जाव पच्चप्पिणंति । तए णं से जमाली खत्तियकुमारे केसालं-
कारेणं वत्थालंकारेणं मल्लालंकारेणं आभरणालंकारेणं चउत्विहेणं अलं-
कारेणं अलंकारिए समाणे पडिपुण्णालंकारे सीहासणाओ अब्भुट्ठेइ सीहासणाओ
अब्भुट्ठेत्ता सीयं अणुप्पयाहिणीकरेमाणे सीयं दुरूहइ २ ता सीहासणवरंति पुरस्था-
भिमुहे सण्णिसण्णे । तए णं तस्स जमालिस्स खत्तियकुमारस्स माया ण्हाया कय-
बलिं जाव सरीरा हंसलक्खणं पडसाडगं गहाय सीयं अणुप्पयाहिणीकरेमाणो सीयं
दुरूहइ सीयं दुरूहिता जमालिस्स खत्तियकुमारस्स दाहिणे पासे भदासणवरंति
सण्णिसण्णा, तए णं तस्स जमालिस्स खत्तियकुमारस्स अम्मघाई ण्हाया जाव
सरीरा रयहरणं पडिग्गहं च गहाय सीयं अणुप्पयाहिणी करेमाणो सीयं
दुरूहइ सीयं दुरूहिता जमालिस्स खत्तियकुमारस्स वामे पासे भदासणवरंति
सण्णिसण्णा । तए णं तस्स जमालिस्स खत्तियकुमारस्स पिट्ठओ एगा धरतरुणी
सिगारामारच्चाख्वेसा संगयगय जाव रुवजोव्वणविलासकलिया सुंदरथण० हिम-

रययकुमुद्यकुंदेदुप्पागासं सकोरेंटमल्लदामं धवलं आयवसं गहाय सलीलं उवरि
 धारेभाणी २ चिट्ठइ । तए णं तस्स जमालिस्स उभओपासिं दुवे वरतरुणीओ सिगार-
 रागारचार जाव कलियाओ णाणामणिकणगरयणविमलमहरिहतवणिज्जुज्जल-
 चित्तदंडाओ चिल्लियाओ संखंककुंददगरयअमयमहियफेणपुंसंणिकासाओ
 धवलाओ चामराओ गहाय सलीलं वीयमाणीओ-वीयमाणीओ चिट्ठति । तए णं
 तस्स जमालिस्स खत्तियकुमारस्स उत्तरपुरत्थिमेणं एगा वरतरुणी सिगारागार
 जाव कलियाः सेयरययामयं विमलसलिलपुष्णं मत्तगयमहामुहाकिइत्तमाणं सिगारं
 गहाय चिट्ठइ । तए णं तस्स जमालिस्स खत्तियकुमारस्स दाहियपुरत्थिमेणं एगा
 वरतरुणी सिगारागार जाव कलिया चित्तकणमदंडं तालदेंटं गहाय चिट्ठइ । तए
 णं तस्स जमालिस्स खत्तियकुमारस्स पिया कोडुंबियपुरिसे सद्दावेइ को० २ ता
 एवं वयासी—खिप्पाभेव भो देवाणुप्पिया । सरिसयं सरित्तयं सरिव्वयं सरिस-
 लावण्णरुवओव्वगणुणोव्वेयं एगाभरणवसणगहियणिज्जोयं कोडुंबियवरतरुण-
 सहस्सं सद्दावेह । तए णं ते कोडुंबियपुरिसा जाव पडिसुणेत्ता खिप्पाभेव सरिसयं
 सरित्तयं जाव सद्दावेत्ति । तए णं ते कोडुंबियपुरिसा जमालिस्स खत्तियकुमारस्स
 पिउणा कोडुंबियपुरिसेहि सद्दाविया समाणा हट्टुट्टु० ष्हाया कयबलिकम्मा
 कयकोउय-मंगल-पायच्छिता एगाभरणवसणगहियणिज्जोया जेणेव जमालिस्स
 खत्तियकुमारस्स पिया तेणेव उवागच्छति ते० २ ता करयल जाव वद्धावेत्ता
 एवं वयासी—संदिसंतु णं देवाणुप्पिया ! जं अम्हेहि करणिज्जं । तए णं से जमा-
 लिस्स खत्तियकुमारस्स पिया तं कोडुंबियवरतरुणसहस्सपि एवं वयासी—तुव्वभे
 णं देवाणुप्पिया ! ष्हाया कयबलिकम्मा जाव गहियणिज्जोया जमालिस्स खत्तिय-
 कुमारस्स सीयं परिवहह । तए णं ते कोडुंबियपुरिसा जमालिस्स खत्तियकुमा-
 रस्स जाव पडिसुणेत्ता ष्हाया जाव गहियणिज्जोया जमालिस्स खत्तियकुमारस्स
 सीयं परिवहंति । तए णं तस्स जमालिस्स खत्तियकुमारस्स पुरिससहस्सवाहिंण
 सीयं दुरुढस्स समाणस्स तप्पटमयाए इमे अट्टुट्टुमंगलगा पुरओ अहाणुपुव्वीए
 संपट्टिया, तं०—सोत्थिय सरिव्वच्छ जाव दप्पणा, तयाणंतं च णं पुण्यकलत्तं-
 सिगारं जहा उववाइए जाव गणत्तलमणुत्तिहंती पुरओ अहाणुपुव्वीए संपट्टिया,
 एवं जहा उववाइए तहेव भाणियव्वं जाव आलीयं च करेभाणा जय २ सद्दं च
 पउजमाणा पुरओ अहाणुपुव्वीए संपट्टिया । तयाणंतं च णं बह्वे उग्गा भोगा

जहा उववाइए जाव महापुरिसवमुरापरिखित्ता जमालिस्स खत्तियकुमारस्स पुरओ य मग्गओ य पासओ य अहाणुपुब्बीए संपट्टिया । तए णं से जमालिस्स खत्तियकुमारस्स पिया ण्हाए कयवलिकम्मे जाव विभूसिए हत्थिखंधवरगए सकीरेटमल्लदामेणं छत्तेणं धरिज्जमाणेणं सेयवरचामराहि उड्डुक्वमाणे २ ह्य-गयरहपवरजोहकलियाए चाउरंगिणीए सेणःए सद्धि संपरिवुडे मह्या भद्धचड-गर जाव परिखित्ते जमालिस्स खत्तियकुमारस्स पिट्टओ अणुगच्छइ । तए णं तस्स जमालिस्स खत्तियकुमारस्स पुरओ महं आसा आसवरा उभओ पांसि णामा णागवरा पिट्टओ रहा रहसंगेल्ली । तए णं से जमाली खत्तियकुमारे अहमग्गार्याभिगारे परिग्गहिधत्तालियंटे ऊसवियसेयछत्ते पवीइयसेयचामरवाल-वीयणीए सव्विड्ढीए जाव णाइयरवेणं । तयाणंतरं च णं बहुवे लट्ठीग्गाहा कुंतग्गाहा जाव पुत्थयग्गाहा जाव वीणग्गाहा । तयाणंतरं च णं अट्टसयं गयाणं अट्टसयं नुरयाणं अट्टसयं रहाणं । तयाणंतरं च णं लउडअसिकोत्तहत्थाणं बहूणं पायत्ताणीणं पुरओ संपट्टियं । तयाणंतरं च णं बहुवे राईसरतलवर जाव सत्थवाहप्पमिइओ पुरओ संपट्टिया जाव णाइयरवेणं खत्तियकुंडग्गामं णयरं मज्झमज्जेणं जेणेव माहणकुंडग्गामे णयरं जेणेव बहुसालए चेइए जेणेव समणे भगवं महावीरे तेणेव पहारेत्थ गमणाए । तए णं तस्स जमालिस्स खत्तिय-कुमारस्स खत्तियकुंडग्गामं णयरं मज्झमज्जेणं णिग्गच्छमाणस्स सिघाडगतिय-घउक्क जाव पहेसु बहुवे अत्यत्थिया जहा उववाइए जाव अभिणंदता य अभि-त्युणंता य एवं वयासी—जय-जय णंदा ! धम्मेणं, जय-जय णंदा ! तवेणं, जय-जय णंदा ! भट्टं ते अभग्गेहि णाणदंसणचरित्तमुत्तमेहि अजियाइं जिणाहि इंदियाइं जिमं च पालेहि समणधम्मं जिघविंग्घोऽवि य चसाहि तं देव ! सिद्धिमज्जे णिहणाहि य रागदोसमल्ले तवेणं धिइघणियबद्धकच्छे मद्दाहि य अट्टकम्मसत्तु ज्ञाणेणं उत्तमेणं सुक्केणं अप्पमत्तो हराहि आराहणपडागं च धीर ! तेलो-क्करंगमज्जे पावय वित्तिमिरमणुत्तरं केवलं च णाणं गच्छ य मोक्खं परं पयं जिणवरोचइट्ठेणं सिद्धिभग्गेणं अकुडिलेणं हंता परीसहकम्मं अभिभविय गाम-कंटकोवसग्गाणं धम्मं ते किं बहुला अविग्घमत्थुत्तिकट्टु अभिणंदति य अभि-थुणंति य । तए णं से जमाली खत्तियकुमारे णयणमालासहस्सेहि पिच्छिज्ज-माणे २ एवं जहा उववाइए कूणिओ जाव णिग्गच्छइ णिग्गच्छिता जेणेव माहणकुंडग्गामे णयरं जेणेव बहुसालए चेइए तेणेव उवागच्छइ तेणेव उवाग-

च्छिता छताईए तित्थगराइसए पासइ पासित्ता पुरिससहस्सवाहिणिं सीयं
ठवेइ २ ता पुरिससहस्सवाहिणीओ सीयाओ पच्चोक्कइ । तए णं तं जमालि
खत्तियकुमारं अम्मापियरो पुरओ काउं जेणेव समणे भगवं महावीरे तेणेव
उवागच्छति तेणेव उवागच्छिता समणं भगवं महावीरं तिवखुत्तो जाव णमं-
सित्ता एवं वयासी-एवं खलु भंते ! जमाली खत्तियकुमारे अम्हं एगे पुत्ते
इट्ठे कंते जाव किमंग ! पुण पासणयाए ? से जहाणामए-उप्पलेइ वा पउमेइ वा
जाव सहस्सपत्तेइ वा पंके जाए जले संवुड्ढे णोवल्लिप्पइ पंकरएणं णोवल्लिप्पइ
जलरएणं एवामेव जमालीवि खत्तियकुमारे कामेहिं जाए भोगेहिं संवुड्ढे णोवल्लि-
प्पइ कामरएणं णोवल्लिप्पइ भोगरएणं णोवल्लिप्पइ मित्तगाइणियगसयणसंबधि-
परिजणेणं, एस णं देवाणुप्पिया ! संसारभयउच्चिग्गे भीए जम्मणमरणेणं इच्छइ
देवाणुप्पियाणं अंतिए मुंडे भवित्ता अगाराओ अणगारियं पव्वइत्तए, तं एय्थणं
देवाणुप्पियाणं अम्हे सीसभिवल्लं दलयामो, पडिच्छंतु णं देवाणुप्पिया ! सीस-
भिवल्लं । तए णं समणे० ३ जमालि खत्तियकुमारं एवं वयासी-अहामुहं
देवाणुप्पिया ! मा पडिबंध्यं । तए णं से जमाली खत्तियकुमारे समणेणं भग-
वया महावीरेणं एवं वुत्ते समणे हट्टुत्तुट्ठे समणं भगवं महावीरं तिवखुत्तो
जाव णमंसित्ता उत्तरपुरत्थियं दिसीभागं अवक्कमइ २ ता सयमेव आभरण-
मल्लालंकारं ओमुयइ । तए णं सा जमालिस्स खत्तियकुमारस्स माया हंसल-
वल्लणेणं पडसाडएणं आभरणमल्लालंकारं पडिच्छइ पडिच्छिता हारवारि जाव
विणिम्मयमाणी २ जमालि खत्तियकुमारं एवं वयासी-घडियव्वं जाया ! जइ-
यव्वं जाया ! परक्कमियव्वं जाया ! अस्सिं च णं अट्ठे णो पमाएयव्वंति कट्ठु
जमालिस्स खत्तियकुमारस्स अम्मापियरो समणं भगवं महावीरं बंदंति णमंसंति
बंदित्ता णमंसित्ता जामेव दिंसि पाउव्वभूया तामेव दिंसि पडिगया । तए णं से जमाली
खत्तियकुमारे सयमेव पंचमुट्ठियं लोयं करेइ २ ता जेणेव समणे भगवं महावीरे
तेणेव उवागच्छइ तेणेव उवागच्छिता एवं जहा उत्तमदत्तो तहेव पव्वइओ णवरं
पंचहिं पुरिससएहिं सद्धिं तहेव जाव सव्वं सामाइयमाइयाइं एक्कारसं अंगाइं
अहिज्जइ अहिज्जेता बहूहिं चउत्थल्लुट्टुम जाव मासद्धमासखमणेहिं विचित्तेहिं
तवोक्कमेहिं अण्णाणं भावेमाणे विहरइ ॥ ३८४ ॥ तए णं से जमाली अण-
गारे अण्णया कयाइ जेणेव समणे भगवं महावीरे तेणेव उवागच्छइ तेणेव

उवागच्छइता समणं भगवं महावीरं वंदइ णमंसइ वंदित्ता णमंसित्ता एवं वयासी-इच्छामि णं भंते ! तुब्भेहि अब्भणुष्णाए समणे पंचाहि अणगारसएहि सद्धि बहिधा जणवयविहारं विहरित्ते । तए णं समणे भगवं महावीरे जमालिस्स अणगारस्स एयमट्ठं णो आढाइ णो परिजाणइ तुसिणीए संचिट्ठइ । तए णं से जमाली अणगारे समणं भगवं महावीरं दोच्चंपि तच्चंपि एवं वयासी-इच्छामि णं भंते ! तुब्भेहि अब्भणुष्णाए समणे पंचाहि अणगारसएहि सद्धि जाव विहरित्ते । तए णं समणे भगवं महावीरे जमालिस्स अणगारस्स दोच्चंपि तच्चंपि एयमट्ठं णो आढाइ जाव तुसिणीए संचिट्ठइ । तए णं से जमाली अणगारे समणं भगवं महावीरं वंदइ णमंसइ वंदित्ता णमंसित्ता समणस्स भगवओ महावीरस्स अंतियाओ बहुसालाओ चेइयाओ पडिणिक्खमइ पडिणिक्खमित्ता पंचाहि अणगारसएहि सद्धि बहिधा जणवयविहारं विहरइ । तेणं कालेणं तेणं समएणं सावत्थी णामं णयरी होत्था वण्णओ, कोट्टए चेइए वण्णओ जाव वण-संडस्स, तेणं कालेणं तेणं समएणं चंपा णामं णयरी होत्था वण्णओ, पुष्णभट्टे चेइए वण्णओ जाव पुढविंसित्तापट्टओ । तए णं से जमाली अणगारे अण्णया कयाइ पंचाहि अणगारसएहि सद्धि संपरिवुडे पुब्बाणुपुब्बि चरमाणे गामाणुगामं दूइज्जमाणे जेणेव सावत्थी णयरी जेणेव कोट्टए चेइए तेणेव उवागच्छइ तेणेव उवागच्छित्ता अहापडिरूवं उगहं उगिण्हइ अहापडिरूवं उगहं उगिण्हित्ता संजमेणं तवसा अप्पाणं भावेमाणे विहरइ । तए णं समणे भगवं महावीरे अण्णया कयाइ पुब्बाणुपुब्बि चरमाणे जाव सुहंसुहेणं विहरमाणे जेणेव चंपा णयरी जेणेव पुष्णभट्टे चेइए तेणेव उवागच्छइ उवागच्छित्ता अहापडिरूवं उगहं उगिण्हइ अहा० २ संजमेणं तवसा अप्पाणं भावेमाणे विहरइ । तए णं तस्स जमालिस्स अणगारस्स तेहिं अरसेहि य विरसेहि य अंतेहि य पंतेहि य लूहेहि य तुच्छेहि य कालाइक्कतेहि य पमाणाइक्कतेहि य सीयएहि य पाणभोयणेहिं अण्णया कयाइ सरीरगंति विउले रोगायंके पाउबभूए उज्जले विउले पगाढे कक्कसे कडुए चंडे दुक्खे दुग्गे तिब्बे दुरहिंयासे पित्तज्जरपरिगयसरीरे दाहवक्कत्तिए यावि विहरइ । तए णं से जमाली अणगारे वेधणाए अभिभूए समणे समणे णिग्गंथे सद्दावेइ सद्दावेत्ता एवं वयासी-तुब्भे णं देवाणुप्पिया ! मम सेज्जसंधारणं संधरेह । तए णं ते समणा णिग्गंथा जमालिस्स अणगारस्स एयमट्ठं विणएणं पडिसुणंति पडिसुणेत्ता जमालिस्स अणगारस्स सेज्जासंधारणं संधरंति । तए

णं से जमाली अणगारे बलियतरं वेयणाए अभिमूए समाणे दोच्चपि समणे णिग्गंथे सद्दवेइ २ ता दोच्चपि एवं वयासी-ममण्णं देवाणुप्पिया ! सेज्जा-संथारए किं कडे कज्जइ ? (एवं वृत्ते समाणे समणा णिग्गंथा बिति-सो सामी! कीरइ) तए णं ते समणा णिग्गंथा जमालि अणगारं एवं वयासी-णो खलु देवाणुप्पियाणं सेज्जासंथारए कडे कज्जइ । तए णं तस्स जमालिस्स अणगारस्स अयमेयारूवे अज्जत्थिए जाव समुप्पज्जिस्था-ज्जणं समणे भगवं महावीरे एवं आइक्खइ जाव एवं परूवेइ-एवं खलु चलमाणे चलिए उदीरिज्जमाणे उदीरिए जाव णिज्जरिज्जमाणे णिज्जिण्णे तं णं मिच्छा इमं च णं पच्चवल्लमेव दीसइ सेज्जासंथारए कज्जमाणे अकडे संथरिज्जमाणे असंथरिए जम्हा णं सेज्जा-संथारए कज्जमाणे अकडे संथरिज्जमाणे असंथरिए तम्हा चलमाणेवि अचलिए जाव णिज्जरिज्जमाणेवि अणिज्जिण्णे, एवं संपेहेइ एवं संपेहेत्ता समणे णिग्गंथे सद्दवेइ समणे णिग्गंथे सद्दवेत्ता एवं वयासी-ज्जणं देवाणुप्पिया ! समणे भगवं महावीरे एवं आइक्खइ जाव परूवेइ-एवं खलु चलमाणे चलिए तं चेव सव्वं जाव णिज्जरिज्जमाणे अणिज्जिण्णे । तए णं तस्स जमालिस्स अणगारस्स एवं आइक्खमाणस्स जाव परूवेमाणस्स अत्थेगइया समणा णिग्गंथा एयमट्ठं सद्दहंति पत्तियति रोयंति, अत्थेगइया समणा णिग्गंथा एयमट्ठं णो सद्दहंति ३, तत्थ णं जे ते समणा णिग्गंथा जमालिस्स अणगारस्स एयमट्ठं सद्दहंति ३ ते णं जमालि चेव अणगारं उवसंपज्जित्ता णं विहरंति, तत्थ णं जे ते समणा णिग्गंथा जमालिस्स अणगारस्स एयमट्ठं णो सद्दहंति णो पत्तियति णो रोयंति ते णं जमालिस्स अणगारस्स अंतियाओ कोट्टयाओ चेइयाओ पडिणिकल्लमंति २ ता पुट्ठाणुपुंठ्व चरमाणा गामाणुगामं दूइज्जमाणा जेणेव चंपाणयरी जेणेव पुण्ण-भद्दे चेइए जेणेव समणे भगवं महावीरे तेणेव उवागच्छति २ ता समणं भगवं महावीरं तिकखुत्ते आयाहिणं पयाहिणं करंति २ ता वंदंति णमंसंति २ ता समणं भगवं महावीरं उवसंपज्जित्ता णं विहरंति ॥ ३८५ ॥ तए णं से जमाली अणगारे अण्यया कयाइ ताओ रोगायंकाओ विष्पमुक्के हट्ठे तुट्ठे जाए. अरोए बलियसररीरे सावत्थीओ णयरीओ कोट्टयाओ चेइयाओ पडिणिकल्लमइ २ ता पुट्ठाणुपुंठ्व चरमाणे गामाणुगामं दूइज्जमाणे जेणेव चंपाणयरी जेणेव पुण्ण-भद्दे चेइए जेणेव समणे भगवं महावीरे तेणेव उवागच्छइ २ ता समणस्स भगवओ

महावीरस्स अदूरेसामंते ठिच्चा समणं भगवं महावीरं एवं वयासी—जहा णं देवाणु-
 प्पियाणं बह्वे अंतेवासी समणा णिग्गंथा छउमत्था भवेत्ता छउमत्थावक्कमणेणं
 अवक्कंता णो खलु अहं तथा चेव छउमत्थे भवित्ता छउमत्थावक्कमणेणं अव-
 वक्कंते अहण्णं उप्पण्णणाणदंसणधरे अरहा जिणे केवली भवित्ता केवल्लिअवक्क-
 मणेणं अवक्कंते । तए णं भगवं गोयमे जमालि अणगारं एवं वयासी—णो
 खलु जमाली ! केवल्लिस्स णाणे वा दंसणे वा सेल्लसि वा यंभंसि वा थूभंसि वा
 आवरिज्जइ वा णिवारिज्जइ वा, जइ णं तुमं जमाली ! उप्पण्णणाणदंसणधरे
 अरहा जिणे केवली भवित्ता केवल्लिअवक्कमणेणं अवक्कंते तो णं इमाइं दो
 वागरणइं वागरेहि—सासए लोए जमाली ! असासए लोए जमाली ! सासए
 जीवे जमाली ! असासए जीवे जमाली ! तए णं से जमाली अणगारे भगवया
 गोयमेणं एवं वुत्ते समाणे सक्खिए जाव कलुससमावण्णे जाए यावि होत्था,
 णो संचाएइ भगवओ गोयमस्स किञ्चि वि पमोकखमाइक्खित्तए तुसिणीए संचिट्ठइ ।
 जमालीइ ! समणे भगवं महावीरे जमालि अणगारं एवं वयासी—अत्थि णं
 जमाली ! ममं बह्वे अंतेवासी समणा णिग्गंथा छउमत्था जे णं पभू एयं वाग-
 रणं वागरित्तए जहा णं अहं, णो चेव णं एधप्पगारं भासं भासित्तए जहा णं
 तुमं, सासए लोए जमाली ! जण्ण कयाइ णासि ण कयाइ ण भवइ ण
 कयाइ ण भविस्सइ भुवि च भवइ य भविस्सइ य धुवे णिइए सासए अक्खए
 अश्वए अवट्टिए णिच्चे, असासए लोए जमाली ! जं ओसप्पिणी भवित्ता
 उस्सप्पिणी भवइ उस्सप्पिणी भवित्ता ओसप्पिणी भवइ, सासए जीवे जमाली !
 जं ण कयाइ णासी जाव णिच्चे, असासए जीवे जमाली ! जण्णं णेरइए भवित्ता
 तिरिक्खजोणिए भवइ तिरिक्खजोणिए भवित्ता मणुस्से भवइ मणुस्से भवित्ता
 देवे भवइ । तए णं से जमाली अणगारे समणस्स भगवओ महावीरस्स एव-
 माइक्खमाणस्स जाव एवं परूवेमाणस्स एयमट्ठं णो सइहइ णो पत्तियइ णो
 रोएइ एयमट्ठं असइहमाणे अपत्तियमाणे अरोएमाणे दोक्कंपि समणस्स भग-
 वओ महावीरस्स अंतियाओ आयाए अवक्कमइ दोक्कंपि आयाए अवक्कमित्ता
 बहूहि असंभावुभावणाहिं मिच्छत्तामिणिवेसेहि य अप्पाणं च परं च तदुभयं
 च दुग्गाहेमाणे वुप्पाएमाणे बहूइं वासाइं सामण्णपरियाणं पाउणइ २ त्ता अद्ध-
 मासियाए संलेहणाए अत्ताणं झूसेइ अ० २ त्ता तीसं भत्ताइं अणसणाए छेदेइ २

त्ता तस्स ठाणस्स अणालोइयपडिक्कंते कालमासे कालं किच्चा लंतए कप्पे तेरससागरोवमठिईएसु देवकिव्विसिएसु देवेषु देवकिव्विसियत्ताए उवववणे ॥३८६॥ तए णं भगवं गोयमे जमालि अणगारं कालगयं जाणित्ता जेणव समणे भगवं महावीरे तेषेव उघायच्छइ ते० २ त्ता समणं भगवं महावीरं वंदइ णमंसइ २ त्ता एवं वयासी—एवं खलु देवाणुप्पियाणं अंतेवासी कुत्तिस्से जमाली णामं अणगारे से णं भंते ! जमाली अणगारे कालमासे कालं किच्चा कहिं गए कहिं उवववणे ? गोयमाइ ! समणे भगवं महावीरे भगवं गोयमं एवं वयासी एवं खलु गोयमा ! ममं अंतेवासी कुत्तिस्से जमाली णामं अणगारे से णं तथा मम एवं आइक्खमाणस्स ४ एयमट्ठं णो सइहइ ३ एयमट्ठं असइहमाणे ३ दोच्छंणि ममं अंतियाओ आयाए अवक्कमइ २ त्ता ब्रह्महि असब्भावुब्भावणाहि तं चेव जाव देवकिव्विसियत्ताए उवववणे ॥ ३८७ ॥ कइविहा णं भंते ! देवकिव्विसिया प० ? गोयमा ! तिविहा देवकिव्विसिया प०, तंजहा—तिपलिओवमट्टिइया तिसागरोवमट्टिइया तेरससागरोवमट्टिइया । कहिं णं भंते ! तिपलिओवमट्टिइया देवकिव्विसिया परिवसंति ? गोयमा ! उप्पि जोइसियाणं हिंट्टि सोहम्मोसाणेसु कप्पेसु एत्थ णं तिपलिओवमट्टिइया देवकिव्विसिया परिवसंति । कहिं णं भंते ! तिसागरोवमट्टिइया देवकिव्विसिया परिवसंति ? गोयमा ! उप्पि सोहम्मोसाणाणं कप्पाणं हिंट्टि सणकुमारमाहिंसेसु कप्पेसु एत्थ णं तिसागरोवमट्टिइया देवकिव्विसिया परिवसंति । कहिं णं भंते ! तेरससागरोवमट्टिइया देवकिव्विसिया देवा परिवसंति ? गोयमा ! उप्पि वंभलोगस्स कप्पस्स हिंट्टि लंतए कप्पे एत्थ णं तेरससागरोवमट्टिइया देवकिव्विसिया देवा परिवसंति ! देवकिव्विसिया णं भंते ! केसु कम्मादानेसु देवकिव्विसियत्ताए उववत्तारो भवंति ? गोयमा ! जे इमे जीवा आयरियपडिणीया उवज्झायपडिणीया कुलपडिणीया गणपडिणीया संघपडिणीया आयरियउवज्झायाणं अयसकरा अवणकरा अकित्तिकरा ब्रह्महि असब्भावुब्भावणाहि मिच्छत्ताभिणिवेसेहि थ अण्णाणं च ३ वुग्गाहेमाणा वुप्पाएमाणा ब्रह्मइं वासाइं सामण्यपरियायं पाउणंति २ त्ता तस्स ठाणस्स अणालोइयपडिक्कंता कालमासे कालं किच्चा अण्णयरेसु देवकिव्विसिएसु देवकिव्विसियत्ताए उववत्तारो भवंति, तंजहा—तिपलिओवमट्टिइएसु वा तिसागरोवमट्टिइएसु वा तेरससागरोवमट्टिइएसु वा । देवकिव्विसिया

णं भंते ! ताओ देवलोगाओ आउक्खएणं भवक्खएणं ठिइक्खएणं अणंतरं चयं
 चइत्ता कांहि म्छंति कांहि उववज्जंति ? गोयमा ! जाव चत्तारि पंच णेरइय-
 त्तिरिक्खजोगियमणुस्सदेवभवग्गहणाइं संसारं अणुपरियट्टित्ता तओ पच्छा
 सिज्जंति बुज्जंति जाव अंतं करंति, अत्येगइया अणाईयं अणवयगं वीहमद्धं
 चाउरंतसंसारकंतारं अणुपरियट्टंति । जमाली णं भंते ! अणगारे अरसाहारे
 विरसाहारे अंताहारे पंताहारे लूहाहारे तुच्छाहारे अरसजीवी विरसजीवी जाव
 तुच्छजीवी उवसंतजीवी पसंतजीवी विवित्तजीवी ? हंता गोयमा ! जमाली
 णं अणगारे अरसाहारे विरसाहारे जाव विवित्तजीवी । जइ णं भंते ! जमाली
 अणगारे अरसाहारे विरसाहारे जाव विवित्तजीवी कम्हा णं भंते ! जमाली
 अणगारे कालमासे कालं किच्चा लंतए कप्पे तेरससागरोवमट्टिइएसु देवकिच्चि-
 सिएसु देवेसु देवकिच्चिसियत्ताए उववण्णे ? गोयमा ! जमाली णं अणगारे
 आयरियपडिणीए उवज्जायपडिणीए आयरियउवज्जायाणं अयसकारए जाव
 वुप्पाएमाणे बहूइं वासाइं सामण्णपरियागं पाउणित्ता अद्धमासियाए संलेहणाए
 तीसं भत्ताइं अणसणाए छेदेइ तीसं ० २ ता तस्स ठाणस्स अणालोइयपडिक्कते
 कालमासे कालं किच्चा लंतए कप्पे जाव उववण्णे ॥ ३८८ ॥ जमाली णं भंते !
 देवे ताओ देवलोयाओ आउक्खएणं जाव कांहि उववज्जिहिइ ? गोयमा !
 चत्तारि पंच त्तिरिक्खजोगियमणुस्सदेवभवग्गहणाइं संसारं अणुपरियट्टित्ता तओ
 पच्छा सिज्जिहिइ जाव अंतं काहिइ । सेवं भंते ! सेवं भंते ! त्ति ॥ ३८९ ॥

णवमं सयं चोत्तीसइमो उद्देसो

तेणं कालेणं तेणं समएणं रायगिहे जाव एधं वयासी-पुरिसे णं भंते !
 पुरिसं हणमाणे किं पुरिसं हणइ णोपुरिसं हणइ ? गोयमा ! पुरिसंपि हणइ
 णोपुरिसंपि हणइ । से केणट्ठेणं भंते ! एधं वुच्चइ पुरिसंपि हणइ णोपुरिसंपि
 हणइ ? गोयमा ! तस्स णं एधं भवइ एवं खलु अहं एगं पुरिसं हणामि से णं
 एगं पुरिसं हणमाणे अणेगजीवा हणइ, से तेणट्ठेणं गोयमा ! एवं वुच्चइ
 पुरिसंपि हणइ णोपुरिसंपि हणइ । पुरिसे णं भंते ! आसं हणमाणे किं आसं
 हणइ णोआसे हणइ ? गोयमा ! आसंपि हणइ णोआसेवि हणइ । से केणट्ठेणं ?
 अट्ठो तहेव, एवं हात्थि सीहं वग्घं जाव चिल्ललगं । पुरिसे णं भंते ! अण्णयरं

तसपाणं हणमाणे किं अण्णयरं तसपाणं हणइ णोअण्णयरे तसपाणे हणइ ? गोयमा । अण्णयरंपि तसपाणं हणइ णोअण्णयरेवि तसे पाणे हणइ । से केण-
दुठेणं भंते ! एवं वुच्चइ अण्णयरंपि तसं पाणं हणइ णोअण्णयरेवि तसे पाणे
हणइ ? गोयमा ! तस्स णं एवं भवइ एवं खलु अहं एगं अण्णयरं तसं पाणं
हणामि से णं एगं अण्णयरं तसं पाणं हणमाणे अणोमे जीवे हणइ, से तेणदुठेणं
गोयमा ! तं चेव, एए सव्वेवि एवकगमा । पुरिसे णं भंते ! इसि हणमाणे किं
इसि हणइ णोइसि हणइ ? गोयमा ! इसिपि हणइ णोइसिपि हणइ । से केण-
दुठेणं भंते ! एवं वुच्चइ जाव णोइसिपि हणइ ? गोयमा ! तस्स णं एवं
भवइ एवं खलु अहं एगं इसि हणामि, से णं एगं इसि हणमाणे अणते जीवे
हणइ, से तेणदुठेणं णिक्खेवओ । पुरिसे णं भंते ! पुरिसं हणमाणे किं पुरिस-
वेरेणं पुट्ठे णोपुरिसवेरेणं पुट्ठे ? गोयमा ! णियमं ताव पुरिसवेरेणं पुट्ठे,
अहवा पुरिसवेरेण य णोपुरिसवेरेण य पुट्ठे अहवा पुरिसवेरेण य णोपुरिसवेरेहि
य पुट्ठे, एवं आसं एवं जाव चिल्ललगं जाव अहवा चिल्ललगवेरेण य णो-
चिल्ललगवेरेहि य पुट्ठे । पुरिसे णं भंते ! इसि हणमाणे किं इसिवेरेणं पुट्ठे
णोइसिवेरेणं पुट्ठे ? गोयमा ! णियमा इसिवेरेण य णोइसिवेरेहि य पुट्ठे
॥३६०॥ पुढविक्काइया णं भंते ! पुढविक्काइयं चेव आणमंति वा पाणमंति वा
ऊससंति वा णीससंति वा ? हुंता गोयमा । पुढविक्काइए पुढविक्काइयं चेव
आणमंति वा जाव णीससंति वा । पुढविक्काइए णं भंते ! आउक्काइयं आणमंति
वा जाव णीससंति वा ? हुंता गोयमा ! पुढविक्काइए आउक्काइयं आणमंति वा
जाव णीससंति वा, एवं तेउक्काइयं वाउक्काइयं एवं वणस्सइकाइयं । आउक्काइए
णं भंते ! पुढविक्काइयं आणमंति वा पाणमंति वा० ? एवं चेव, आउक्काइए
णं भंते ! आउक्काइयं चेव आणमंति वा० ? एवं चेव, एवं तेउवाउवणस्सइ-
काइयं । तेउक्काइए णं भंते ! पुढविक्काइयं आणमंति वा० ? एवं जाव
वणस्सइकाइए णं भंते ! वणस्सइकाइयं चेव आणमंति वा० ? तहेव । पुढवि-
क्काइए णं भंते ! पुढविक्काइयं चेव आणममाणे वा पाणममाणे वा ऊससमाणे
वा णीससमाणे वा कइकिरिए ? गोयमा ! सिय तिकिरिए सिय चउकिरिए
सिय पंचकिरिए । पुढविक्काइए णं भंते ! आउक्काइयं आणममाणे वा० ?
एवं चेव, एवं जाव वणस्सइकाइयं, एवं आउक्काइएणवि सव्वेविभाणियत्वा, एवं

तेउक्काइएणवि, एवं वाउक्काइएणवि, जाव वणस्सइकाइए णं भंते ! वणस्सइ-
काइयं चेव आणममाणे वा० ? पुच्छा, गोयमा ! सिय त्तिकरिए सिय चउ-
किरिए सिय पंचकिरिए ॥३६१॥ वाउक्काइए णं भंते ! रुक्खस्स मूलं पचाले-
माणे वा पवाडेमाणे वा कइकिरिए ? गोयमा ! सिय त्तिकरिए सिय चउकिरिए
सिय पंचकिरिए । एवं कवं एवं जाव मूलं, बीयं पचालेमाणे वा० पुच्छा ?
गोयमा ! सिय त्तिकरिए सिय चउकिरिए सिय पंचकिरिए । सेवं भंते !
सेवं भंते ! त्ति ॥३६२॥

णवमं सयं समत्तं

॥ दसमं सयं पढमो उट्टेसो ॥

गाहा—दिसि १ संबुडअणगारे २ आइड्ढी ३ सामहत्थि ४ देवि ५ सभा
६ । उत्तरअंतरदीवा २८ दससमि सयमि चउत्तीसा ॥ ३४ ॥ रायगिहे जाव
एवं बयासी—किमियं भंते ! पाईणत्ति पबुच्चइ ? गोयमा ! जीवा चेव अजीवा
चेव । किमियं भंते ! पडीणत्ति पबुच्चइ ? गोयमा ! एवं चेव, एवं दाहिणा,
एवं उबीणा, एवं उड्डा, एवं अहोवि । कइ णं भंते ! दिसाओ पण्णत्ताओ ?
गोयमा ! दस दिसाओ पण्णत्ताओ, तंजहा—पुरत्थिमा १ पुरत्थिमदाहिणा
२ दाहिणा ३ दाहिणपच्चत्थिमा ४ पच्चत्थिमा ५ पच्चत्थिमुत्तरा ६ उत्तरा ७
उत्तरपुरत्थिमा ८ उड्डा ९ अहो १० । एघासि णं भंते ! दसण्हं दिसाणं कइ
णामधेज्जा पण्णत्ता ? गोयमा ! दस णामधेज्जा पण्णत्ता, तंजहा—इंदा १
अग्गेई २ जमा य ३ णेरई ४ वाइणी य ५ वायव्वा ६, सोमा ७ ईसाणी
य ८ विमला य ९ तमा य १० बोद्धव्वा । इंदा णं भंते ! दिसा कि जीवा
जीवदेसा जीवपएसा अजीवा अजीवदेसा अजीवपएसा ? गोयमा ! जीवावि
३ तं चेव जाव अजीवपएसावि, जे जीवा ते णियमा एंगिदिया बेइंदिया जाव
पंचिदिया अंगिदिया, जे जीवदेसा ते णियमा एंगिदियदेसा जाव अंगिदियदेसा,
जे जीवपएसा ते णियमा एंगिदियपएसा बेइंदियपएसा जाव अंगिदियपएसा,
जे अजीवा ते दुविहा पण्णत्ता, तंजहा—रूवी अजीवा य अरूवी अजीवा य, जे
रूवी अजीवा ते चउत्तिहा पण्णत्ता, तंजहा—खंधा १ खंधदेसा २ खंधपएसा ३
परमाणुपोगला ४, जे अरूवी अजीवा ते सत्तविहा पण्णत्ता, तंजहा—णोधम्म-

त्थिकाए धम्मत्थिकायस्स देसे, धम्मत्थिकायस्स पएसा, णोअधम्मत्थिकाए अधम्मत्थिकायस्स देसे अधम्मत्थिकायस्स पएसा, णोआगासत्थिकाए आगासत्थिकायस्स देसे, आगासत्थिकायस्स पएसा, अद्धासमए । अग्गेई णं भंते ! दिसा किं जीवा जीवदेसा जीवपएसा० ? पुच्छा, गोयमा ! णो जीवा जीवदेसावि १ जीवपएसावि २ अजीवावि १ अजीवदेसावि २ अजीवपएसावि ३, जे जीवदेसा ते णियमा एगिदियदेसा अहवा एगिदियदेसा य बेइंदियस्स देसे १ अहवा एगिदियदेसा य बेइंदियस्स देसा २ अहवा एगिदियदेसा य बेइंदियाण य देसा ३ अहवा एगिदियदेसा य तेइंदियस्स य देसे एधं चेष तियभंगो भाणियब्धो एवं जाव अणियदियाणं तियभंगो, जे जीवपएसा ते णियमा एगिदियपएसा अहवा एगिदियपएसा य बेइंदियस्स पएसा अहवा एगिदियपएसा य बेइंदियाण य पएसा एवं आइत्त्वविरहिओ जाव अणियदियाणं, जे अजीवा ते दुविहा पण्णत्ता, तंजहा-रूवी अजीवा य अरूवी अजीवा य, जे रूवी अजीवा ते चउव्विहा पण्णत्ता, तंजहा-खंधा जाव परमाणुपोगला ४, जे अरूवी अजीवा ते सत्तविहा पण्णत्ता, तंजहा-णोधम्मत्थिकाए धम्मत्थिकायस्स देसे धम्मत्थिकायस्स पएसा एवं अधम्मत्थिकायस्सवि जाव आगासत्थिकायस्स पएसा अद्धासमए । विदिसाणु णत्थि जीवा देसे भंगो य होइ सव्वत्थ । जमा णं भंते ! दिसा किं जीवा० ? जहा इंदा तहेव णिरवसेसा, णेरई य जहा अग्गेई, वारुणी जहा इंदा, वायग्घा जहा अग्गेई, सोमा जहा इंदा, ईसाणी जहा अग्गेई, विमलाए जीवा जहा अग्गेई, अजीवा जहा इंदा, एवं तमाएवि, णवरं अरूवी छव्विहा अद्धासमओ ण षण्णइ ॥ ३६३ ॥ कइ णं भंते ! सरीरा पण्णत्ता ? गोयमा पंच सरीरा पण्णत्ता, तंजहा-ओरालिए जाव कम्मए । ओरालियसरीरे णं भंते ! कइविहे पण्णत्ते ? एवं ओगाहणसंठाणं णिरवसेसं भाणियब्धं जाव अप्पाबहुगंति । सेवं भंते ! सेवं भंते ! त्ति ॥ ३६४ ॥

दसमं सयं बीओ उद्देसो

रायगिहे जाव एवं वयासी-संबुडस्स णं भंते ! अणगारस्स बीईपंधे ठिच्चा पुरओ रूवाइं णिज्जायमाणस्स मग्गओ रूवाइं अवधकखमाणस्स पासओ रूवाइं अवलोएमाणस्स उड्ढं रूवाइं ओलोएमाणस्स अहे रूवाइं ओलोएमाणस्स तस्स णं भंते ! किं इरियावहिया किरिया कज्जइ संपराइया किरिया कज्जइ ?

गोयमा ! संबुडस्स णं अणगारस्स वीईपंथे ठिच्चा जाव तस्स णं णो इरिया-
वहिया किरिया कज्जइ संपराइया किरिया कज्जइ । से केणट्ठेणं भंते ! एवं
वुच्चइ संबुडस्स० जाव संपराइया किरिया कज्जइ ? गोयमा ! जस्स णं कोह-
माणमायालोभा एवं जहा सत्तमसए पढमोहेसए जाव से णं उस्समुत्तमेव रीयइ,
से तेणेट्ठेणं जाव संपराइया किरिया कज्जइ । संबुडस्स णं भंते ! अणगारस्स
अवीईपंथे ठिच्चा पुरओ रुवाइं णिज्जायमाणस्स जाव तस्स णं भंते ! किं
इरियावहिया किरिया कज्जइ ? पुच्छा, गोयमा ! संबुड० जाव तस्स णं
इरियावहिया किरिया कज्जइ णो संपराइया किरिया कज्जइ । से केणट्ठेणं
भंते ! एवं वुच्चइ जहा सत्तमे सए पढमोहेसए जाव से णं अहामुत्तमेव रीयइ
से तेणट्ठेणं जाव णो संपराइया किरिया कज्जइ ॥३६५॥ कइविहा णं भंते !
जोणी प० ? गोयमा ! तिविहा जोणी प०, तंजहा—सीया उसिणा सीओसिणा,
एवं जोणीपयं णिरवसेसं भाणियब्बं ॥३६६॥ कइविहा णं भंते ! वेयणा
प० ? गोयमा ! तिविहा वेयणा प०, तंजहा—सीया उसिणा सीओसिणा, एवं
वेयणापयं णिरवसेसं भाणियब्बं जाव णेरइया णं भंते ! किं दुक्खं वेयणं वेयंति
सुहं वेयणं वेयंति अबुक्खमसुहं वेयणं वेयंति ? गोयमा ! दुक्खंपि वेयणं वेयंति
सुहंपि वेयणं वेयंति अबुक्खमसुहंपि वेयणं वेयंति ॥ ३६७ ॥ मासियण्णं भंते !
भिक्खुपडिमं पडिच्चणस्स अणगारस्स णिच्चं बोसट्टुकाए चियत्तवेहे, एवं मासिया
भिक्खुपडिमा णिरवसेसा भाणियग्वा जहा दसाहिं जाव आराहिया भवइ
॥३६८॥ भिक्खू य अण्णयरं अकिच्चट्टाणं पडिसेवित्ता से णं तस्स ठाणस्स
अणालोइयपडिक्कंते कालं करेइ णरिथ तस्स आराहणा, से णं तस्स ठाणस्स
आलोइयपडिक्कंते कालं करेइ अरिथ तस्स आराहणा । भिक्खू य अण्णयरं अकि-
च्चट्टाणं पडिसेवित्ता तस्स णं एवं भवइ पच्छावि णं अहं चरिमकालसमयंसि
एयंस्स ठाणस्स आलोएस्सामि जाव पडिच्चिज्जस्सामि, से णं तस्स ठाणस्स
अणालोइयपडिक्कंते जाव णरिथ तस्स आराहणा, से णं तस्स ठाणस्स आलोइय-
पडिक्कंते कालं करेइ अरिथ तस्स आराहणा । भिक्खू य अण्णयरं अकिच्चट्टाणं
पडिसेवित्ता तस्स णं एवं भवइ—जइ ताव समणोवासगावि कालमासे कालं
किच्चा अण्णयरेसु देवलोएसु देवत्ताए उववत्तारो भवंति किमंग ! पुण अहं
अणपणियदेवत्तणंपि णो लभिस्सामिति कट्टु से णं तस्स ठाणस्स अणालोइय-

पडिवकंते कालं करेइ णत्थि तस्स आराहणा, से णं तस्स ठाणस्स आलोइय-
पडिवकंते करेइ अत्थि तस्स आराहणा । सेवं भंते ! सेवं भंते ! त्ति ॥३६६॥

दसमं सयं तइयो उद्देशो

रायगिहे जाव एवं वयासी-आइइढीए णं भंते ! देवे जाव चत्तारि पंच
देवावासंतराइं वीइवकंते तेण परं परिइढीए ? हंता गोयमा ! आइइढीए णं
तं चेव, एवं असुरकुमारेवि, णवरं असुरकुमारावासंतराइं सेसं तं चेव, एवं एएणं
फनेणं जाव थणियकुमारे, एवं वाणमंतरजोइसियवेमाणिए जाव तेण परं परि-
इढीए । अप्पिड्डिए णं भंते ! देवे से महिड्डियस्स देवस्स मज्झंमज्जेणं वीइ-
वएज्जा ? गोयमा ! णो इणट्ठे समट्ठे । समिड्डिए णं भंते ! देवे समिड्डियस्स
देवस्स मज्झंमज्जेणं वीइवएज्जा ? णो इणट्ठे समट्ठे, पमत्तं पुण वीइवएज्जा ।
से णं भंते ! कि विमोहेत्ता पभू अविमोहेत्ता पभू ? गोयमा ! विमोहेत्ता
पभू णो अविमोहेत्ता पभू । से भंते ! कि पुंवि विमोहेत्ता पच्छा वीइवएज्जा
पुंवि वीइवएत्ता पच्छा विमोहेज्जा ? गोयमा ! पुंवि विमोहेत्ता पच्छा वीइ-
वएज्जा णो पुंवि वीइवइत्ता पच्छा विमोहेज्जा । महिड्डिए णं भंते ! देवे
अप्पिड्डियस्स देवस्स मज्झंमज्जेणं वीइवएज्जा ? हंता वीइवएज्जा । से णं भंते !
कि विमोहेत्ता पभू अविमोहेत्ता पभू ? गोयमा ! विमोहेत्तावि पभू अविमोहे-
त्तावि पभू । से भंते ! कि पुंवि विमोहेत्ता पच्छा वीइवएज्जा पुंवि वीइवइत्ता
पच्छा विमोहेज्जा ? गोयमा ! पुंवि वा विमोहेत्ता पच्छा वीइवएज्जा पुंवि
वा वीइवइत्ता पच्छा विमोहेज्जा । अप्पिड्डिए णं भंते ! असुरकुमारे महिड्डि-
यस्स असुरकुमारस्स मज्झंमज्जेणं वीइवएज्जा ? णो इणट्ठं समट्ठे, एवं
असुरकुमारेणवि तिण्णि आलावगा भाणियव्वा जहा ओहिणं देवेणं भणिया,
एवं जाव थणियकुमारेणं, वाणमंतरजोइसियवेमाणिएणं एवं चेव । अप्पिड्डिए णं
भंते ! देवे महिड्डियाए देवीए मज्झंमज्जेणं वीइवएज्जा ? णो इणट्ठं समट्ठे ।
समिड्डिए णं भंते ! देवे समिड्डियाए देवीए मज्झंमज्जेणं०? एवं तहेव देवेण य
देवीए य वंडओ भाणियव्वो जाव वेमाणियाए । अप्पिड्डिया णं भंते ! देवी महि-
ड्डियस्स देवस्स मज्झंमज्जेणं एवं एसोवि तइओ वंडओ भाणियव्वो जाव महि-
ड्डिया वेमाणिणी अप्पिड्डियस्स वेमाणियस्स मज्झंमज्जेणं वीइवएज्जा ? हंता
वीइवएज्जा । अप्पिड्डिया णं भंते ! देवी महिड्डियाए देवीए मज्झंमज्जेणं वीइ-

वएज्जा ? णो इणट्ठे समट्ठे, एवं समिद्धिया देवी समिद्धियाए देवीए तहेव, महिद्धियावि देवी अप्पिद्धियाए देवीए तहेव, एवं एक्केक्के तिण्णि २ आलावगा भाणियव्वा जाव महिद्धिया णं भंते ! वेमाणिणी अप्पिद्धियाए वेमाणिणीए मज्झंमज्जेणं वोइवएज्जा ? हंता वोइवएज्जा । सा भंते ! किं विमोहिस्ता पभू ? तहेव भाव पुंस्व वा वोइवइत्ता पच्छा विमोहेज्जा एए चत्तारि दंडगा ॥ ४०० ॥ आसस्स णं भंते ! धावमाणस्स किं खुलुत्ति करेइ ? गोयमा ! आसस्स णं धावमाणस्स हिययस्स य जगयस्स य अंतरा एत्थ णं कब्बडए णामं वाए संमुच्छइ जे णं आसस्स धावमाणस्स खुलुत्ति करेइ ॥ ४०१ ॥ अहं भंते ! आसइस्सामो सइस्सामो चिट्ठिस्साओ णिसीइस्सामो तुयट्ठिस्सामो, आमंतणी आणवणी जायणी तह पुच्छणी य पण्णवणी । पच्चवखाणी भासा भासा इच्छा-णलोभा य ॥ १ ॥ अणभिग्गहिया भासा भासा य अभिग्गहंमि बोद्धवा । संसयकरणी भासा वोयडमवोयडा चेव ॥ २ ॥ पण्णवणी णं एसा भासा ण एसा भासा मोसा ? हंता गोयमा ! आसइस्सामो तं चेव जाव ण एसा भासा मोसा । सेवं भंते ! सेवं भंते ! त्ति ॥ ४०२ ॥

दसमं सयं चउत्थो उट्ठेसो

तेणं कालेणं तेणं समएणं वाणियग्गामे णामं णयरे होत्था वण्णओ, दूइपला-सए चेइए, सामो समोसडे जाव परिसा पडिगया । तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदमूई णामं अणगारे जाव उड्डं-जाणू जाव विहरइ । तेणं कालेणं तेणं समएणं समणस्स भगवओ महावीरस्स अंतेवासी सामहत्थी णामं अणगारे पगइमइए जहा रोहे जाव उड्डंजाणू जाव विहरइ । तए णं से सामहत्थी अणगारे जायसड्ठे जाव उट्टाए उट्ठेइ उट्ठेत्ता जेणेव भगवं गोयमे तेणेव उवागच्छइ तेणेव उवागच्छित्ता भगवं गोयमं तिकलुत्तो जाव पज्जुवासनाणे एवं घयासी-अत्थि णं भंते ! चमरस्स अमुरिदस्स अमुर-कुमाररणो तायत्तीसगा देवा ? हंता अत्थि । से केणट्ठेणं भंते ! एवं वुच्चइ चमरस्स अमुरिदस्स अमुरकुमाररणो तायत्तीसगा देवा २ ? एवं खलु साम-हत्थी ! तेणं कालेणं तेणं समएणं इहेव जंबुद्वीवे २ भारहे वासे कायंदी णामं णयरी होत्था वण्णओ, तत्थ णं कायंदीए णयरीए तायत्तीसं सहाया गाहावई समणोवासया परिवसंति अड्डा जाव अपरिभूया अभिगयजीवाजीवा उवल्ल-

पुण्णपावा जाव विहरंति । तए णं ते तायत्तीसं सहाया गाहावई समणोवासया पुच्चि उग्गा उग्गविहारी संविग्गा संविग्गविहारी भवित्ता तओ पच्छा पास-
 तथा पासत्थविहारी ओसण्णा ओसण्णविहारी कुसीला कुसीलविहारी अहाच्छंदा
 अहाच्छंदविहारी बहूइं वासाइं समणोवासगपरियागं पाउणंति २ ता अद्धमासि-
 याए संलेहणाए अत्ताणं झुसेंति अत्ताणं झुसेत्ता तीसं भत्ताइं अणसणाए छेदंति
 २ ता तस्स ठाणस्स अणालोइयपडिक्कंता कालमासे कालं किच्च चमरस्स
 असुरिदस्स असुरकुमाररण्णो तायत्तीसगदेवत्ताए उववण्णा । जप्पभिइं च णं
 भंते ! कायंदग्गा तायत्तीसं सहाया गाहावई समणोवासया चमरस्स असुरिदस्स
 असुरकुमाररण्णो तायत्तीसगदेवत्ताए उववण्णा तप्पभिइं च णं भंते ! एवं
 वुच्चइ चमरस्स असुरिदस्स असुरकुमाररण्णो तायत्तीसगा देवा २ ? तए
 णं भगवं गोयमे सामहत्थिणा अणगारेणं एवं वुत्ते समाणे संकिए कंखिए
 चित्तिगच्छिए उट्टाए उट्ठेइ उट्टाए उट्ठेत्ता सामहत्थिणा अणगारेणं सद्धि
 जेणेव समणे भगवं महावीरे तेणेव उवागच्छइ तेणेव उवागच्छित्ता समणं
 भगवं महावीरं वंदइ णमंसइ वंदित्ता णमंसित्ता एवं वयासी-अत्थि णं भंते !
 चमरस्स असुरिदस्स असुररण्णो तायत्तीसगा देवा २ ? हंता अत्थि । से केण-
 ट्ठेणं भंते ! एवं वुच्चइ ? एवं तं चेव सव्वं भाणियव्वं जाव तप्पभिइं च णं
 एवं वुच्चइ चमरस्स असुरिदस्स असुरकुमाररण्णो तायत्तीसगा देवा २ ? णो
 इणट्ठे समट्ठे, एवं खलु गोयमा ! चमरस्स णं असुरिदस्स असुरकुमाररण्णो
 तायत्तीसगाणं देवाणं सासए णामधेज्जे पण्णत्ते, जं ण कयाइ णासी ण
 कयाइ ण भवइ ण कयाइ ण भविस्सइ जाव णिच्चे अक्कोच्छित्तिणयट्टयाए
 अण्णे चर्यंति अण्णे उववज्जंति । अत्थि णं भंते ! बलिस्स वइरोयणंदस्स
 वइरोयणरण्णो तायत्तीसगा देवा २ ? हंता अत्थि । से केणट्ठेणं भंते ! एवं
 वुच्चइ बलिस्स वइरोयणंदस्स जाव तायत्तीसगा देवा २ ? एवं खलु गोयमा !
 तेणं कालेणं तेणं समएणं इहेव जंबुद्धीवे २ भारहे वासे विभेले णामं संणिवेसे
 होत्था वण्णओ, तत्थ णं विभेले संणिवेसे जहा चमरस्स जाव उववण्णा । जप्प-
 भिइं च णं भंते ! ते विभेलगा तायत्तीसं सहाया गाहावई समणोवासया बलि-
 स्स वइरोयणंदस्स सेसं तं चेव जाव णिच्चे अक्कोच्छित्तिणयट्टयाए अण्णे
 चर्यंति अण्णे उववज्जंति । अत्थि णं भंते ! धरणस्स णागकुमारिदस्स णाग-

कुमाररण्णो तायत्तीसगा देवा २ ? हंता अत्थि । से केणट्ठेणं जाव तायत्तीसगा देवा २ ? गोयमा ! धरणस्स णागकुमारिदस्स णागकुमाररण्णो तायत्तीसगाणं देवाणं सासए णामधेज्जे पण्णत्ते जं ण कयाइ णासी जाव अण्णे चयति अण्णे उववज्जति, एवं भूयाणंदस्सवि, एवं जाव महाघोसस्स । अत्थि णं भंते ! सबकस्स देविदस्स देवरण्णो० पुच्छा ? हंता अत्थि । से केणट्ठेणं भंते ! जाव तायत्तीसगा देवा २ ? एवं खलु गोयमा ! तेणं कालेणं तेणं समएणं इहेव जंबुद्दीवे बीवे भारहे चासे पालासए णामं सण्णिवेसे होत्था वण्णओ, तत्थ णं पालासए सण्णिवेसे तायत्तीसं सहाया गाहावई समणोवासया जहा चमरस्स जाव विहरंति । तए णं ते तायत्तीसं सहाया गाहावई समणोवासया पुंविपि पच्छावि उग्गा उग्गविहारी संबिग्गा संबिग्गविहारी बहूइं वासाइं समणोवासग-परिधानं पाउणंति पाउणित्ता मासियाए संलेहणाए अत्ताणं झूसैति झूसित्ता सट्ठि भत्ताइं अणसणाए छेदंति २ ता आलोइयपडिक्कंता समाहिपत्ता कालमासे कालं किच्चा जाव उववण्णा, जप्पभिइं च णं भंते ! पालासिगा तायत्तीसं सहाया गाहावई समणोवासया सेसं जहा चमरस्स जाव अण्णे उववज्जति । अत्थि णं भंते ! ईसाणस्स० ? एवं जहा सबकस्स णवरं चंपाए णयरीए जाव उववण्णा, जप्पभिइं च णं भंते ! चंपिज्जा तायत्तीसं सहाया सेसं तं चेव जाव अण्णे उववज्जति । अत्थि णं भंते ! सणकुमारस्स देविदस्स देवरण्णो० पुच्छा ? हंता अत्थि । से केणट्ठेणं ? जहा धरणस्स तहेव एवं जाव पाणयस्स एवं अच्चयस्स जाव अण्णे उववज्जति । सेवं भंते ! सेवं भंते ! त्ति ॥ ४०३ ॥

दसमं सयं पंचमो उद्देशो

तेणं कालेणं तेणं समएणं रायगिहे णामं णयरे गुणसिलए चेइए जाव परिसा पडिगया । तेणं कालेणं तेणं समएणं समणस्स भगवओ महावीरस्स बहवे अंतेवासी घेरा भगवंतो जाइसंपण्णा जहा अट्टमे सए सत्तमुद्देसए जाव विहरंति । तए णं ते घेरा भगवंतो जायसद्धा जायसंसया जहा गोयमसामो जाव पज्जुवासमाणा एवं वयासी—चमरस्स णं भंते ! अत्तुरिदस्स असुरकुमार-रण्णो कइ अगमहिंसीओ पण्णत्ताओ ? अज्जो ! पंच अगमहिंसीओ पण्णत्ताओ, तंजहा—काली राई रयणी विज्जू मेहा, तत्थ णं एगमेगाए देवोए अट्टट्ठ देवि-सहस्सा परिवारो पण्णत्तो । पभू णं भंते ! ताओ एगमेगा देवो अण्णाइं अट्टट्ठ-

देवीसहस्राङ्गं परिवारं विउच्चित्तए ? एवामेव सपुष्पावरेणं चत्तालीसं देवीसहस्रा, सेत्तं तुडिए । पभू णं भंते ! चमरे असुरिंदे असुरकुमारराया चमरचंचाए रायहाणीए सभाए सुहम्माए चमरंसि सीहासणंसि तुडिएणं सत्तिं दिक्खाइं भोगभोगाइं भुंजमाणे विहरित्तए ? णो इणट्ठे समट्ठे । से केणट्ठेणं भंते ! एवं वुच्चइ—णो पभू चमरे असुरिंदे चमरचंचाए रायहाणीए जाव विहरित्तए ? अज्जो ! चमरस्स णं असुरिंदस्स असुरकुमाररण्णो चमरचंचाए रायहाणीए सभाए सुहम्माए माणवए चेइयत्थंमे वड्डरामएसु गोलवट्टसमुग्गएसु बहूओ जिणसकहाओ संणि-विलत्ताओ चिट्ठंति, जाओ णं चमरस्स ३ अण्णेसि च बहूणं असुरकुमाराणं देवाण य देवीण य अच्चणिज्जाओ ३, पूर्यणिज्जाओ ३ कल्लाणं ४ पज्जवा-सणिज्जाओ भवंति तेसि पणिहाए णो पभू, से तेणट्ठेणं अज्जो ! एवं वुच्चइ—णो पभू चमरे असुरिंदे जाव राया चमरचंचाए जाव विहरित्तए । पभू णं अज्जो ! चमरे असुरिंदे असुरकुमारराया चमरचंचाए रायहाणीए सभाए सुहम्माए चमरंसि सीहासणंसि चउसट्ठीए सामाणियसाहस्सीहं तायत्तीसाए जाव अण्णेहि य बहूहि असुरकुमारेहि देवेहि य देवीहि य सत्तिं संपरिवुडे महयाहय जाव भुंजमाणे विहरित्तए ? केवलं परिवारिइंटीए णो चेव णं मेहुण-वत्तियं ॥ ४०४ ॥ चमरस्स णं भंते ! असुरिंदस्स असुरकुमाररण्णो सोमस्स महारण्णो कइ अग्गमहिंसीओ पण्णत्ताओ ? अज्जो ! चत्तारि अग्गमहिंसीओ पण्णत्ताओ, तंजहा—कणगा कणगलया चित्तगुत्ता वसुंधरा, तत्थ णं एगमेगाए देवीए एगमेगं देविसहस्सं परिवारे पण्णत्ते, पभू णं ताओ एगमेगाए देवीए अण्णं एगमेगं देविसहस्सं परिवारं विउच्चित्तए ? एवामेव सपुष्पावरेणं चत्तारि देवि-सहस्रा, सेत्तं तुडिए । पभू णं भंते ! चमरस्स असुरिंदस्स असुरकुमाररण्णो सोमे महाराया सोमाए रायहाणीए सभाए सुहम्माए सोमंसि सीहासणंसि तुडिएणं अव-सेसं जहा चमरस्स, णवरं परिवारो जहा सूरियाभस्स, सेसं तं चेव, जाव णो चेव णं मेहुणवत्तियं । चमरस्स णं भंते ! जाव रण्णो जमस्स महारण्णो कइ अग्ग-महिंसीओ ? एवं चेव णवरं जमाए रायहाणीए सेसं जहा सोमस्स, एवं वरुण-स्सवि, णवरं वरुणाए रायहाणीए, एवं वेसमणस्सवि णवरं वेसमणाए राय-हाणीए सेसं तं चेव जाव मेहुणवत्तियं । बलिस्स णं भंते ! 'वड्डरोर्यणिदस्स पुच्छा ? अज्जो ! पंच अग्गमहिंसीओ पण्णत्ताओ, तंजहा—सुत्ता णिसुंभा रंभा

गिरंभा मध्या, तत्थ णं एगमेगाए देवीए अट्टुठुं सेसं जहा चमरस्स, णवरं बलि-
चंचाए रायहाणीए परिवारो जहा मोउद्देसए, सेसं तं चेव जाव मेहुणवत्तिपं ।
बलिस्स णं भंते ! वड्ढरोयणिदस्स वड्ढरोयणरण्णो सोमस्स महारण्णो कइ
अग्गमहिंसीओ पण्णत्ताओ ? अज्जो ! चत्तारि अग्गमहिंसीओ पण्णत्ताओ,
तंजहा-मीणगा सुभद्दा विजया असणी, तत्थ णं एगमेगाए देवीए० सेसं जहा
चमरस्स, एवं जाव बेसमणस्स । धरणस्स णं भंते ! णागकुमारिदस्स णागकुमार-
रण्णो कइ अग्गमहिंसीओ पण्णत्ताओ ? अज्जो ! छ अग्गमहिंसीओ पण्णत्ताओ,
तंजहा-इला सुवक्का सतारा सोयामिणी इंदा घणविज्जुया, तत्थ णं एगमेगाए
देवीए छ छ देविसहस्सा परिवारो पण्णत्ता । पमू णं भंते ! ताओ एगमेगा
देवो अण्णाइं छ छ देविसहस्साइं परिवारं विउव्वित्तए ? एवामेव सपुव्वावरेणं
छत्तीसाइं देविसहस्साइं, सेसं तुडिए । पमू णं भंते ! धरणे ? सेसं तं चेव, णवरं
धरणाए रायहाणीए धरणंसि सीहासणंसि सओ परिवारो सेसं तं चेव । धर-
णस्स णं भंते ! णागकुमारिदस्स कालवालस्स लोणपालस्स महारण्णो कइ
अग्गमहिंसीओ पण्णत्ताओ ? अज्जो ! चत्तारि अग्गमहिंसीओ पण्णत्ताओ,
तंजहा-भसोगा निमला सुप्पभा सुवंसणा, तत्थ णं एगमेगाए देवीए अवसेसं
जहा चमरस्स लोणपालाणं, एवं सेसाणं तिण्हवि । भूयाणंदस्स णं भंते ! पुच्छा?
अज्जो ! छ अग्गमहिंसीओ पण्णत्ताओ, तंजहा-रूया रूयंसा सुरूया रूयगावई
रूयकंता रूयप्पभा, तत्थ णं एगमेगाए देवीए० अवसेसं जहा धरणस्स । भूयाणं-
दस्स णं भंते ! णागवित्तस्स पुच्छा ? अज्जो ! चत्तारि अग्गमहिंसीओ पण्णत्ताओ,
तंजहा-सुणंदा सुभद्दा सुजाया सुमणा, तत्थ णं एगमेगाए देवीए अवसेसं जहा
चमरलोणपालाणं एवं सेसाणं तिण्हवि लोणपालाणं, जे दाहिणिल्लाणिंदा तेसिं
जहा धरणिदस्स, लोणपालाणवि तेसिं जहा धरणस्स लोणपालाणं, उत्तरिल्लाणं
इंदाणं जहा भूयाणंदस्स, लोणपालाणवि तेसिं जहा भूयाणंदस्स लोणपालाणं,
णवरं इंदाणं सव्वेसिं रायहाणीओ सीहासणाणि य सरिसणामगाणि, परिवारो
जहा तइयसए पढ्ढे उद्देसए, लोणपालाणं सव्वेसिं रायहाणीओ सीहासणाणि य
सरिसणामगाणि, परिवारो जहा चमरस्स लोणपालाणं । कालस्स णं भंते !
पिसायिदस्स पिसायरण्णो कइ अग्गमहिंसीओ पण्णत्ताओ ? अज्जो ! चत्तारि
अग्गमहिंसीओ पण्णत्ताओ, तंजहा-कमल कमलप्पभा उप्पला सुवंसणा, तत्थ णं

एगमेगाए देवीए एगमेगं देविसहस्सं सेसं जहा चमरलोगपालाणं, परिवारो तहेव, णवरं कालाए रायहाणीए कालसि सीहासणांसि, सेसं तं चेव, एवं महाकालस्सवि । सुरुवस्स णं भंते ! भूइंदस्स भूयरणो पुच्छा ? अज्जो ! चत्तारि अगमहिंसीओ पण्णत्ताओ, तंजहा—रूववई बहुरूवा सुरुवा सुभगा, तत्थ णं एगमेगा सेसं जहा कालस्स, एवं पडिरूवस्सवि । पुण्णभट्टस्स णं भंते ! जविंखदस्स पुच्छा, अज्जो ! चत्तारि अगमहिंसीओ पण्णत्ताओ, तंजहा—पुण्णा बहुपुत्तिया उत्तमा तारया, तत्थ णं एगमेगाए सेसं जहा कालस्स, एवं माणिभट्टस्सवि । भीमस्स णं भंते ! रक्खंसिदस्स पुच्छा ? अज्जो ! चत्तारि अगमहिंसीओ पण्णत्ताओ, तंजहा—पउमा पउमावई कणगा रयणप्पभा, तत्थ णं एगमेगा देवी सेसं जहा कालस्स । एवं महाभीमस्सवि । किण्णरस्स णं भंते ! पुच्छा, अज्जो ! चत्तारि अगमहिंसीओ पण्णत्ताओ, तंजहा—वडेंसा केउमई रइसेणा रइप्पिया, तत्थ णं सेसं तं चेव, एवं किपुरिसस्सवि । सप्पुरिसस्स णं पुच्छा, अज्जो ! चत्तारि अगमहिंसीओ पण्णत्ताओ, तंजहा—रोहिणी णवमिया हिरो पुप्फवई, तत्थ णं एगमेगा देवी सेसं तं चेव, एवं महापुरिसस्सवि । अइकायस्स णं पुच्छा, अज्जो ! चत्तारि अगमहिंसीओ प०, तंजहा—भुयंगा भुयंगवई महाकच्छा फुडा, तत्थ णं०, सेसं तं चेव, एवं महाकायस्सवि । गीयरइस्स णं भंते ! पुच्छा, अज्जो ! चत्तारि अगमहिंसीओ प०, तंजहा—सुधोसा विमला सुस्सरा सरस्सई, तत्थ णं०, सेसं तं चेव, एवं गीयजसस्सवि, सव्वेसि एएसि जहा कालस्स, णवरं सरिसणामियाओ रायहाणीओ सीहासणाणि य, सेसं तं चेव । चंदस्स णं भंते ! जोइसिदस्स जोइसरणो पुच्छा, अज्जो ! चत्तारि अगमहिंसीओ पण्णत्ताओ, तंजहा—चंदप्पभा दोसिणाभा अच्चिमाली पभंकरा, एवं जहा जीवाभिगमे जोइसियउहेसए तहेव, सूरस्सवि सूरप्पभा आयवाभा अच्चिमाली पभंकरा, सेसं तं चेव, जाव णो चेव णं मेहुणवत्तियं । इंगालस्स णं भंते ! भग्गहस्स कइ अगमहिंसीओ पुच्छा, अज्जो ! चत्तारि अगमहिंसीओ पण्णत्ताओ, तंजहा—विजया वैजयंती जयंती अपराजिया, तत्थ णं एगमेगाए देवीए सेसं तं चेव जहा चंदस्स, णवरं इंगालवडेंसए विमाणे इंगालगंसि सीहासणांसि सेसं तं चेव, एवं विपालगस्सवि, एवं अट्टासोईएवि महंगंहाणं भाणियद्वं जाव भावकेउस्स, णवरं वडेंसगा सीहासणाणि य, सरिसणामाणाणि, सेसं तं चेव । सवकस्स णं भंते ! देविंदस्स देवरणो पुच्छा ? अज्जो ! अट्ट अग-

महिंसीओ पण्णत्ताओ, तंजहा—पउमा सिवा सेया अंजू अमला अच्छरा
णवमिया रोहिणी, तत्थ णं एगमेगाए देवीए सोलस-सोलस देविसहस्सा परि-
धारो पण्णत्तो । पभू णं ताओ एगमेगा देवी अण्णाइं सोलस २ देविसहस्सपरि-
धारं विउच्चित्तए ? एवामेव सपुब्बावरेणं अट्ठावीसुत्तरं देविसयसहस्सं परियारं
विउच्चित्तए, सेत्तं तुडिए । पभू णं भंते ! सक्के देविंदे देवराया सोहम्मे कप्पे
सोहम्मवडेंसए विमाणे सभाए सुहम्माए सक्कंसि सीहासणंसि तुडिएणं सद्धि
सेसं जहा चमरस्स णवरं परिवारो जहा मोउद्देसए । सक्कस्स णं भंते ! देवि-
दस्स देवरण्णो सोमस्स महारण्णो कइ अग्गमहिंसीओ पुच्छा ? अज्जो ! चत्तारि
अग्गमहिंसीओ पण्णत्ताओ, तंजहा—रोहिणी मयणा चित्ता सोमा तत्थ णं एग-
मेगा० सेसं जहा चमरलोगपालाणं, णवरं सयंपभे विमाणे सभाए सुहम्माए
सोमंसि सीहासणंसि, सेसं तं चेव, एवं जाव वेसमणस्स, णवरं विमाणाइं जहा
तइयसए । ईसाणस्स णं भंते ! पुच्छा, अज्जो ! अट्ठ अग्गमहिंसीओ प०,
तंजहा—कण्हा कण्हराई रामा रामरविक्खधा वसू वसुगुत्ता वसुमिन्ता वसुंधरा,
तत्थ णं एगमेगाए० सेसं जहा सक्कस्स । ईसाणस्स णं भंते ! देविदस्स देव-
रण्णो सोमस्स महारण्णो कइ अग्गमहिंसीओ पुच्छा, अज्जो ! चत्तारि अग्ग-
महिंसीओ प०, तंजहा—पुढ्ढीं राई रयणी विज्जू, तत्थ णं० सेसं जहा सक्कस्स
लोगपालाणं, एवं जाव वरुणस्स, णवरं विमाणा जहा चउत्थसए, सेसं तं चेव,
जाव णो चेव णं मेहुणवत्तियं । सेवं भंते ! सेवं भंते ! ति जाव विहरइ ॥४०५॥

दसमं सयं छट्ठो उद्देशो

कहि णं भंते ! सक्कस्स देविदस्स देवरण्णे सभा सुहम्मा पण्णत्ता ?
गोयमा ! जंबुद्वीवे २ मंदरस्स पग्गयस्स दाहिणेणं इमीसे रयणप्पभाए पुढ्ढीए
एवं जहा रायप्पसेणइज्जे जाव पंच वडेंसगा पण्णत्ता, तंजहा—असोगवडेंसए
जाव मज्जे सोहम्मवडेंसए, से णं सोहम्मवडेंसए महाविमाणे अट्ठतेरसं जोयण-
सयसहस्साइं आयामविक्खंभेणं—एवं जह सूरियाभे तहेव माणं तहेव उववाओ ।
सक्कस्स य अभिसेओ तहेव जह सूरियाभस्स ॥ १ ॥ अलंकार अच्चणिया
तहेव जाव आयरक्खत्ति, दो सागरोवमाइं ठिई । सक्के णं भंते ! देविंदे देव-
राया केमहिइडिइए जाव के महासोक्खे ? गोयमा ! महिइडिइए जाव महा-
सोक्खे, से णं तत्थ बत्तीसाए विमाणावाससयसहस्साणं जाव विहरइ, एवं-

महिद्धिए जाव महासोक्खे सक्के देविडे देवराया । सेवं भंते ! २ त्ति ॥४०६॥

दसमं सयं ७-३४ उद्देसा

कहिण्णं भंते ! उत्तरिल्लानं एगोरुयमणुस्सानं एगोरुयदीवे णामं दीवे षण्णत्ते ? एवं जहा जीवाभिगमे तहेव णिरवसेसं जाव सुद्धंतदीवोत्ति, एए अट्टावीसं उद्देसगा भाणियक्खा । सेवं भंते ! २ त्ति जाव बिहरइ ॥ ४०७ ॥

दसमं सयं समत्तं

॥ एक्कारसं सयं पढमो उद्देसो ॥

उप्पल १ साल २ पलासे ३ कुंभी ४ णाली य ५ पजम ६ कण्णी ७ य । णलिण ८ सिव ९ लोग १० काला ११ लभिय १२ वस वो य एक्कारे ॥१॥ उववाओ १ परिमाणं २ अवहाक ३ च्चत्त ४ बंध ५ वेए ६ य । उदए ७ उदी- रणाए ८ लेसा ९ विट्ठी १० य णाणे ११ य ॥१॥ जोगु १२ वओगे १३ वण्ण १४ रसमाई १५ ऊसासगे १६ य आहारे १७ । विरई १८ किरिया १९ बंधे २० सण्ण २१ कसापि २२ त्थि २३ बंधे २४ य ॥ २ ॥ सण्णि २५ द्विय २६ अणुबंधे २७ संबेहा २८ हार २९ ठिइ ३० समुघाए ३१ । चयणं ३२ मूलाईसु य उववाओ ३३ सब्बजीवाणं ॥ ३ ॥ तेणं कालेणं तेणं समएणं राय- गिहे जाव पज्जुधासमाणे एवं वप्रासी-उप्पले णं भंते ! एगपत्तए कि एगजीवे अणेगजीवे ? गोयमा ! एगजीवे णो अणेगजीवे, तेण परं जे अण्णे जीवा उववज्जंति ते णं णो एगजीवा अणेगजीवा । ते णं भंते ! जीवा कओहितो उववज्जंति कि णेरइएहितो उववज्जंति तिरिक्खमणुस्सदेवेहितो उववज्जंति ? गोयमा ! णो णेरइएहितो उववज्जंति तिरिक्खजोणिएहितोवि उववज्जंति मणुस्सेहितो• देवेहितोवि उववज्जंति, एणं उववाओ भाणियक्खो जहा वक्कंतीए वणस्सइकाइयाइयाणं जाव ईसाणेत्ति १ । ते णं भंते ! जीवा एगसमएणं केव- इया उववज्जंति ? गोयमा । जहण्णेणं एक्को वा दो वा तिण्णि वा उक्कोसेणं संखेज्जा वा असंखेज्जा वा उववज्जंति २ । ते णं भंते । जीवा समए २ अव- हीरमाणा २ केवइयकालेणं अवहीरंति ? गोयमा ! ते णं असंखेज्जा समए २ अवहीरमाणा २ असंखेज्जाहि उस्सप्पिणिओसप्पिणि अवहीरंति णो चेव णं अवहिया सिया ३ । तेसि णं भंते ! जीवाणं केमहालिया सरीरोगाहणा पणत्ता ?

गोयमा ! जहण्णेण अंगुत्तस्स असंखेज्जइमागं उक्कोसेणं साइरेगं जोयणत्तहस्सं
 ४ । ते णं भंते ! जीवा णाणावरणिज्जस्स कम्मस्स किं बंधगा अबंधगा ? गोयमा !
 णो अबंधगा बंधए वा बंधगा वा । एवं जाव अंतराइयस्स, णवरं आउयस्स
 पुच्छा, गोयमा ! बंधए वा अबंधए वा बंधगा वा अबंधगा वा अहवा बंधए य
 अबंधए य अहवा बंधए य अबंधगा य अहवा बंधगा य अबंधए य अहवा बंधगा
 य अबंधगा य ८ एए अट्ट भंगा ५ । ते णं भंते ! जीवा णाणावरणिज्जस्स कम्मस्स
 किं वेयगा अवेयगा ? गोयमा ! णो अवेयगा वेयए वा वेयगा वा एवं जाव
 अंतराइयस्स । ते णं भंते ! जीवा किं सायावेयगा असायावेयगा ? गोयमा !
 सायावेयए वा असायावेयए वा अट्ट भंगा ६ । ते णं भंते ! जीवा णाणावर-
 णिज्जस्स कम्मस्स किं उदई अणुदई ? गोयमा ! अणुदई उदई वा उदइणो वा,
 एवं जाव अंतराइयस्स ७ । ते णं भंते ! जीवा णाणावरणिज्जस्स कम्मस्स किं
 उदीरगा० ? गोयमा ! णो अणुदीरगा उदीरए वा उदीरगा वा, एवं जाव
 अंतराइयस्स, णवरं वेयणिज्जाउएसु अट्ट भंगा ८ । ते णं भंते ! जीवा किं
 कण्हलेसा णीललेसा काउलेसा तेउलेसा ? गोयमा ! कण्हलेसे वा जाव तेउलेसे वा
 कण्हलेस्सा वा णीललेस्सा वा काउलेसा वा तेउलेस्सा वा अहवा कण्हलेसे य णील-
 लेस्से य एवं एए दुयासंजोगतियासंजोगचउक्कसंजोगेणं असीई भंगा भवंति ९ ।
 ते णं भंते ! जीवा किं सम्मदिट्ठी मिच्छादिट्ठी सम्मामिच्छादिट्ठी ? गोयमा !
 णो सम्मदिट्ठी णो सम्मामिच्छादिट्ठी मिच्छादिट्ठी वा मिच्छादिविणो वा
 १० । ते णं भंते ! जीवा किं णाणी अण्णाणी ? गोयमा ! णो णाणी अण्णाणी
 वा अण्णाणिणी वा ११ । ते णं भंते ! जीवा किं मणजोगी वइजोगी
 कायजोगी ? गोयमा ! णो मणजोगी णो वइजोगी कायजोगी वा कायजोगिणी
 वा १२ । ते णं भंते ! जीवा किं सागारोवउत्ता अणागारोवउत्ता ? गोयमा !
 सागारोवउत्ते वा अणागारोवउत्ते वा अट्ट भंगा १३ । तेसि णं भंते ! जीवाणं
 सरीरगा कइवण्णा कइगंधा कइरसा कइकासा ५० ? गोयमा ! पंच-
 वण्णा पंचरसा दुगंधा अट्टकासा ५०, ते पुण अप्वणा अवण्णा अगंधा अरसा
 अफासा ५० १४-१५ ॥ ते णं भंते ! जीवा किं उस्सासा णिस्सासा णो
 उस्सासणिस्सासा ? गोयमा ! उस्सासए वा १ णिस्सासए वा २ णो उस्सासए
 णिस्सासए वा ३ उस्सासगा वा ४ णिस्सासगा वा ५ णो उस्सासणीसासगा वा ६

अह्वा उस्सासए य णिस्सासए य ४ अह्वा उस्सासए य णो उस्सासणिस्सासए
य ४ अह्वा णिस्सासए य णो उस्सासणिस्सासए य ४ अह्वा ऊसासए य
णीसासए य णो उस्सासणिस्सासए य अट्ट भंगा, एए छब्बीसं भंगा भवति
१६ । ते णं भंते ! जीवा किं आहारगा अणाहारगा ? गोयमा ! णो अणा-
हारगा आहारए वा अणाहारए वा एवं अट्ट भंगा १७ । ते णं भंते ! जीवा
किं विरया अविरया विरयाविरया ? गोयमा ! णो विरया णो विरयाविरया
अविरए वा अविरया वा १८ । ते णं भंते ! जीवा किं सकिरिया अकिरिया ?
गोयमा ! णो अकिरिया सकिरिए वा स्सकिरिया वा १९ । ते णं भंते ! जीवा
किं सत्तविहबंधगा अट्टविहबंधगा ? गोयमा ! सत्तविहबंधए वा अट्टविहबंधए
वा अट्ट भंगा २० । ते णं भंते ! जीवा किं आहारसण्णोवउत्ता भयसण्णोवउत्ता
मेहुणसण्णोवउत्ता परिग्गहसण्णोवउत्ता ? गोयमा ! आहारसण्णोवउत्ता वा
असीई भंगा २१ । ते णं भंते ! जीवा किं कोहकसाई माणकसाई भायाकसाई
लोभकसाई ? गोयमा ! कोहकसाई वा असीई भंगा २२ । ते णं भंते ! जीवा किं
इत्थिवेयगा पुरिसवेयगा णपुंसगवेयगा ? गोयमा ! णो इत्थिवेयगा णो पुरिसवेयगा
णपुंसगवेयए वा णपुंसगवेयगा वा २३ । ते णं भंते ! जीवा किं इत्थिवेयबंधगा
पुरिसवेयबंधगा णपुंसगवेयबंधगा ? गोयमा ! इत्थिवेयबंधए वा पुरिसवेयबंधए
वा णपुंसगवेयबंधए वा, छब्बीसं भंगा २४ । ते णं भंते ! जीवा किं सण्णी
असण्णी ? गोयमा ! णो सण्णी असण्णी वा असण्णिणो वा २५ । ते णं भंते !
जीवा किं सइदिया अणिदिया ? गोयमा ! णो अणिदिया सइदिए वा सइ-
दिया वा २६ । ते णं भंते ! उप्पलजीवेत्ति कालओ केवच्चिरं होइ ? गोयमा !
जह्ण्णेणं अंतोमुहुत्तं उक्कोसेणं असंखेज्जं कालं २७ । ते णं भंते ! उप्पल-
जीवे पुढविजीवे पुणरवि उप्पलजीवेत्ति केवइयं कालं सेवेज्जा केवइयं कालं
गइरागइं करेज्जा ? गोयमा ! भवादेसेणं जह्ण्णेणं दो भवग्गहणाइं उक्कोसेणं
असंखेज्जाइं भवग्गहणाइं, कालादेसेणं जह्ण्णेणं दो अंतोमुहुत्ता उक्कोसेणं असं-
खेज्जं कालं, एवइयं कालं सेवेज्जा एवइयं कालं गइरागइं करेज्जा । ते णं भंते !
उप्पलजीवे आउजीवे० एवं चेव एवं जहा पुढविजीवे भणिए तथा जाव वाउ-
जीवे भाणियत्त्वे । ते णं भंते ! उप्पलजीवे से वणस्सइजीवे से पुणरवि उप्पल-
जीवेत्ति केवइयं कालं सेवेज्जा केवइयं कालं गइरागइं करेज्जा ? गोयमा !
भवादेसेणं जह्ण्णेणं दो भवग्गहणाइं उक्कोसेणं अणंताइं भवग्गहणाइं, काला-

सेसेणं जहण्णेणं दो अंतोमुहुत्ता उक्कोसेणं अणंतं कालं तरुकालं एवइयं कालं सेवेज्जा एवइयं कालं गइरागइं करेज्जा । से णं भंते ! उप्पलजीवे वेइदियजीवे पुणरवि उप्पलजीवेत्ति केवइयं कालं सेवेज्जा केवइयं कासं गइरागइं करेज्जा ? गोयमा ! भवादेसेणं जहण्णेणं दो भवग्गहणाइं उक्कोसेणं संखेज्जाइं भवग्गहणाइं, कालादेसेणं जहण्णेणं दो अंतोमुहुत्ता उक्कोसेणं संखेज्जं कालं एवइयं कालं सेवेज्जा एवइयं कालं गइरागइं करेज्जा, एवं तेइदियजीवि, एवं चर्त्तरियजीवेत्ति । से णं भंते ! उप्पलजीवे पंचेदियतिरिक्खओणियजीवे पुणरवि उप्पलजीवेत्ति पुच्छा ? गोयमा ! भवादेसेणं जहण्णेणं दो भवग्गहणाइं उक्कोसेणं अट्ट भवग्गहणाइं कालादेसेणं जहण्णेणं दो अंतोमुहुत्ताइं उक्कोसेणं पुव्वकोट्टिपुहुत्ताइं एवइयं कालं सेवेज्जा एवइयं कालं गइरागइं करेज्जा, एवं मणुस्सेणवि सभं जाव एवइयं कालं गइरागइं करेज्जा २८ । ते णं भंते ! जीवा किमाहारमाहारंति ? गोयमा ! दब्बओ अणंतपएसियाइं दब्बाइं एवं जहा आहारहूसए वणस्सइकाइयाणं आहारो तहेव जाव सब्बप्पणयाए आहारमाहारंति णवरंणियमा छट्ठिसि सेसं तं जेव २९ । तेसि णं भंते ! जीवाणं केवइयं कालं ठिई ५० ? गोयमा ! जहण्णेणं अंतोमुहुत्तं उक्कोसेणं दस वाससहससाइं ३० । तेसि णं भंते ! जीवाणं कइ समुग्घाया ५० ? गोयमा ! तओ समुग्घाया ५०, तंजहा—वेयणासमुग्घाए कसायसमुग्घाए, मारणंतियसमुग्घाए ३१ । ते णं भंते ! जीवा भारणंतियसमुग्घाएणं किं समोहया मरंति असमोहया मरंति ? गोयमा ! समोहयावि मरंति असमोहयावि मरंति ३२ । ते णं भंते ! जीवा अणंतं उव्वट्टित्ता किं गच्छंति किं उव्वज्जंति किं णेरइएसु उव्वज्जंति तिरिक्खओणिएसु उव्वज्जंति ? एवं जहा वक्कंतीए उव्वट्टणाए वणस्सइकाइयाणं तथा भाणियव्वं । अहं भंते ! सब्बपाणा सब्बभूया सब्बजीवा सब्बसत्ता उप्पलमूलत्ताए उप्पलकंदत्ताए उप्पलपालत्ताए उप्पलपत्तत्ताए उप्पलकेसरत्ताए उप्पलकण्णियत्ताए उप्पलविभुग्गत्ताए उव्वण्णपुव्वा ? हुंता गोयमा ! असइं अडुवा अणंतखुत्तो । सेवं भंते ! सेवं भंते ! त्ति ३३ ॥ ४०८ ॥

एककारसं सयं २-८ उद्देसा

सालुए णं भंते ! एगपत्तए किं एगजीवे अणेगजीवे ? गोयमा ! एगजीवे, एवं उप्पलुद्देसगवत्तव्वया अपरिसेसा भाणियव्वा जाव अणंतखुत्तो, णवरं

सरीरोगाहणा जहण्णेणं अंगुलस्स असंखेज्जइभागं, उक्कोसेणं धणुपुहुत्तं, सेसं तं चेव । सेवं भंते ! सेवं भंते ! त्ति ॥ ४०६ ॥ ११-२ ॥ पलासे णं भंते ! एगपत्तए किं एगजीवे अणेगजीवे ? एवं उप्पलुद्देसगवत्तव्वया अपरिसेसा भाणियव्वा, णवरं सरीरोगाहणा जहण्णेणं अंगुलस्स असंखेज्जइभागं उक्कोसेणं गाउयपुहुत्ता, देवा एएसु ण उवक्कजंति । लेसामु ते णं भंते ! जीवा किं कण्हलेसा णीललेसा काउलेसा० ? गोयमा ! कण्हलेस्से वा णीललेस्से वा काउलेस्से वा छव्वीसं भंगा, सेसं तं चेव । सेवं भंते ! २ त्ति ॥ ४१० ॥ ११-३ ॥ कुंभिए णं भंते ! एगपत्तए किं एगजीवे अणेगजीवे ? एवं जहा पलासुद्देसए तथा भाणियव्वे, णवरं ठिई जहण्णेणं अतोमुहुत्तं उक्कोसेणं वासपुहुत्तं, सेसं तं चेव । सेवं भंते ! सेवं भंते ! त्ति ॥ ४११ ॥ ११-४ ॥ णालिए णं भंते ! एगपत्तए किं एगजीवे अणेगजीवे ? एवं कुंभिउद्देसगवत्तव्वया णिरवसेसं भाणियव्वा । सेवं भंते ! सेवं भंते ! त्ति ॥ ४१२ ॥ ११-५ ॥ पउमे णं भंते ! एगपत्तए किं एगजीवे अणेगजीवे ? एवं उप्पलुद्देसगवत्तव्वया णिरवसेसा भाणियव्वा । सेवं भंते ! सेवं भंते ! त्ति ॥ ४१३ ॥ ११-६ ॥ कण्णिए णं भंते ! एगपत्तए किं एगजीवे० ? एवं चेव णिरवसेसं भाणियव्वं । सेवं भंते ! सेवं भंते ! त्ति ॥ ४१४ ॥ ११-७ ॥ णालिणे णं भंते ! एगपत्तए किं एगजीवे अणेगजीवे ? एवं चेव णिरवसेसं जाव अणंतखुत्तो । सेवं भंते ! सेवं भंते ! त्ति ॥ ४१५ ॥

एक्कारसं सयं णवमो उद्देसो

तेणं कालेणं तेणं समएणं हत्थिणापुरे णामं णयरे होत्था वण्णओ, तस्स णं हत्थिणापुरस्स णयरस्स बहिया उत्तरपुरत्थिमे त्रिसोभागे एत्थ णं सहसंबवणे णामं उज्जाणे होत्था सव्वोउयपुप्फकलसमिद्धे रम्मे णंदणवणसंणिगाप्ते सुहसीयलच्छाए मणोरमे साउप्फले अकंटेए पासाईए जाव पडिरूवे । तत्थ णं हत्थिणापुरे णयरे सिवे णामं राया होत्था महयाहिमवंतं० वण्णओ । त्त्स णं सिवस्स रण्णो धारिणी णामं देवी होत्था सुकुमालपाणिपाया वण्णओ । तस्स णं सिवस्स रण्णो पुत्ते धारिणीए अत्तए सिवभद्दए णामं कुमारे होत्था सुकुमालं जहा सूरियकंते जाव पच्चुवेक्खमाणे पच्चुवेक्खमाणे विहरइ । तए णं तस्स

सिवस्स रंणो अण्णया कयाइ पुअवरत्तावरत्तकालसमयसि रज्जधुरं चितेमाणस्स अयमेयारुवे अज्झत्थिए जाव समुप्पज्जित्था—अत्थि ता मे पुरा पोराणाणं जहा तामलिस्स जाव पुत्तेहि वड्ढामि पसूहि वड्ढामि रज्जेणं वड्ढामि एवं रट्ठेणं बलेणं धोहणेणं कोसेणं कोट्टुगारेणं पुरेणं अतेउरेणं वड्ढामि विपुलधणकणगरयणं जाव संतसारसावएज्जेणं अईव २ अभिवड्ढामि, तं किण्णं अहं पुरा पोराणाणं जाव एगंतसोवलयं उव्वेहमाणे विहरामि ? तं जाव ताव अहं हिरण्णेणं वड्ढामि तं चेव जाव अभिवड्ढामि जाव मे सामंतरायाणोवि वसे वट्ठंति ताव ता मे सेयं कल्लं पाउप्पभायाए जाव जलंते सुबहुं लोहीलोहकडाहकडुच्छुयं तंबियं तावस-संडंणं घडावेत्ता सिवभदं कुमारं रज्जे ठावेत्ता तं सुबहुं लोहीलोहकडाहकडुच्छुयं तंबियं तावससंडंणं गहाय जे इमे गंगाकूले वाणपत्था तावसा भवन्ति, तं०—होत्तिया पोत्तिया कोत्तिया जण्णई सड्ढई थालई हुंबउट्टा वंतुक्खलिया उम्मज्जगा संम-ज्जगा णिम्मज्जगा संपक्खाला उट्ठकडूयगा अहोकडूयगा दाहिणकूलगा उत्तर-कूलगा संखधमगा कूलधमगा मियलुद्धया हत्थितावसा जलाभिसेयकडिणगाया अंबुधासिणो वाउवासिणो जलवासिणो जेलवासिणो अंबुभक्खिणो वाउभक्खिणो सेवालभक्खिणो मूलाहारा कंढाहारा पत्ताहारा तयाहारा पुप्फाहारा फलाहारा बीयाहारा परित्तडियकंदमूलतयपंडुपत्तपुप्फफलाहारा उट्ठंणगा रुक्खमूलिया बिलवासिणो वक्क (ल) वासिणो दिसापोक्खिणो आयावणाहिं पंचगिगतावेहिं इंगालसोल्लियपिय कंबुसोल्लियपिय कट्टसोल्लियपिय जाव अप्पाणं करेमाणा विहरन्ति । तत्थ णं जे ते दिसापोक्खियतावसा तेसि अंतियं मुंडे भवित्ता दिसा-पोक्खियतावसत्ताए पव्वइत्तए, पव्वइएवि य णं समाणे अयमेयारुवं अभिग्गहं अभिगिण्हस्सामि—कप्पइ मे जावज्जीवाए छट्ठंछट्ठेणं अणिक्खित्तेणं दिसा-चक्कवालेणं तवोकम्मेणं उड्ढं बाहाओ पगिज्जिय २ जाव विहरित्तएत्तिकट्टु, एवं संपेहेइ संपेहेत्ता कल्लं जाव जलंते सुबहुं लोहीलोह जाव घडावेत्ता कोडुंबिय-पुरिसे सट्ठावेइ सट्ठावेत्ता एवं वयासी—खिप्पामेव भो देवाणुप्पिया ! हत्थिणा-पुरं णयरं सत्तिभतरबाहिरियं आसिय जाव तमाणत्तियं पच्चप्पिणंति । तए णं से सिवे राया दोच्चपि कोडुंबियपुरिसे सट्ठावेइ २ ता एवं वयासी—खिप्पामेव भो देवाणुप्पिया ! सिवभदस्स कुमारस्स महत्थं ३ विउलं रायाभिसेयं उवट्ठेवह, तए णं ते कोडुंबियपुरिसा तहेव जाव उवट्ठेवन्ति । तए णं से सिवे राया अणेगगण-

णायगदंडणायग जाव संधिपाल सद्धि संपरिवुडे सिवभदं कुमारं सीहासणवरंसि
 पुररथामिमुहं णिसीयावेइ २ ता अट्टसएणं सोवणियाणं कलसाणं जाव अट्टसएणं
 भोमेज्जाणं कलसाणं सत्विड्ढीए जाव रवेणं महया २ रायाभिसेएणं अभिसिचइ
 २ ता पम्हलसुज्जुमालाए सुरभीए गंधकासाईए गायाइं लूहेइ पम्ह० २ ता
 सरसेणं गोसीसेणं एवं जहेव जमालिस्स असंकारो तहेव जाव कप्परुक्खर्गपिव
 अलंकियविभूसियं करेइ २ ता करयल जाव कट्टु सिवभदं कुमारं जएणं विज-
 एणं वद्धावेति जएणं विजएणं वद्धावेत्ता ताहि इट्ठाहि कंताहि पियाहि एवं जाव
 उववाइए कणियस्स जाव परमाउं पालयाहि इट्ठजणसंपरिवुडे हत्थियाणापुरस्स णय-
 रस्स अण्णेसि च बहूणं गामागरणयर जाव बिहराहित्तिकट्टु जयजयसदं पजंजति ।
 तए णं से सिवभदे कुमारे राया जाए महया हिमवंत० वण्णओ जाव बिहरइ ।
 तए णं से सिवे राया अण्णया कयाइं सोहूणंसि तिहिकरणदिवसमुहत्तणक्खत्तंसि
 विपुलं असणं पाणं खाइमं साइमं उवक्खडावेइ उवक्खडावेत्ता मित्तणाइणियग
 जाव परिजणं रायाणो य खत्तिए य आमतेइ आमंतेत्ता तओ पच्छा ण्हाए जाव
 सरीरे भोयणवेलाए भोयणमंडवंसि सुहासणवरगए तेषं मित्तणाइणियगसयण
 जाव परिजणेणं राएहि य खत्तिएहि य सद्धि विपुलं असणं पाणं खाइमं साइमं
 एवं जहा तामली जाव सक्कारेइ सम्माणेइ सक्कारेत्ता सम्माणेत्ता तं मित्त-
 णाइणियग जाव परिजणं रायाणो य खत्तिए य सिवभदं च रायाणं आपुच्छइ
 आपुच्छित्ता सुबहुं लोहीलोहकडाहकडुच्छुयं जाव भंडगं गहाय जे इमे गंगा-
 कलगा वाणपत्था तावसा भवंति तं चेव जाव तेसि अंतियं मुंडे भवित्ता
 दिसापोकिल्लयतावसत्ताए पव्वइए, पव्वइएऽविय णं समाणे अयमेयाख्वं
 अभिगगहं अभिगिण्हइ कप्पइ मे जावज्जीवाए छट्ठं तं चेव जाव अभि-
 गगहं अभिगिण्हइ २ ता पढमं छट्ठक्खमणं उवसंपज्जित्ता णं विहरइ । तए णं
 से सिवे रायरिसी पढमछट्ठक्खमणपारणगंसि आयावणभूमीए पच्चोरुहइ आया-
 वणभूमीए पच्चोरुहित्ता वागलवत्थणियत्थे जेणेव सए उडए तेणेव उवागच्छइ
 तेणेव उवागच्छित्ता किट्ठिणसंकाइयगं गिण्हइ गिण्हित्ता पुरत्थिमं दिंसि पोक्खेइ
 पुरत्थिमाए दिसाए सोमे महाराथा पत्थाणे पत्थियं अभिरक्खउ सिवं राय-
 रिसिं अभि० २, जाणि य तत्थ कंदाणि य मूलाणि य तयाणि य पत्ताणि य
 पुप्फाणि य फलाणि य बीयाणि य हरियाणि य ताणि अणुजाणउत्ति कट्टु

पुरत्थिमं दिसं पसरइ पुर० २ ता जाणि य तत्थ कंवाणि य जाव हरियाणि य ताइं गेण्हइ २ तां किट्ठिणसंकाइयं भरेइ किट्ठि० २ ता दब्बे य कुसे य समिहाओ य पत्तामोडं च गेण्हइ २ ता जेणेव सए उडए तेणेव उवागच्छइ २ ता किट्ठिणसंकाइयणं ठवेइ किट्ठि० २ ता वेइं वड्ढेइ २ ता उवलेवण संमज्जणं करेइ उ० २ ता दम्भसगग्गमकलसाहत्थगए जेणेव गंगा महाणई तेणेव उवागच्छइ गंगामहाणइं ओगाहेइ २ ता जलमज्जणं करेइ २ ता जलकीडं करेइ २ ता जलाभित्थेयं करेइ २ ता आयंते चोक्खे परममुद्दभूए देवयपिइकयकज्जे दम्भसगग्गमकलसाहत्थगए गंगाओ महाणईओ पच्चुत्तरइ २ ता जेणेव सए उडए तेणेव उवागच्छइ तेणेव उवागच्छित्ता दब्बेहि य कुसेहि य वालुयाएहि य वेइं रएइ वेइं रएत्ता सरएणं अर्राणं महेइ सर० २ ता अग्गि पाडेइ २ ता अग्गि संधुक्केइ २ ता समिहाकट्ठाइं पक्खिइइ समिहाकट्ठाइं पक्खिवित्ता अग्गि उज्जालेइ अग्गि उज्जालेत्ता—'अग्गिस्स दाहिणे पासे, सत्तंगाइं सभादहे।' तं०—सकहं बक्कलं ठाणं, सिज्जा भंडं कमंडलुं ॥ १ ॥ वंडदारं तहप्पाणं अहे ताइं समावहे । महुणा य धएण य तंडुलेहि य अग्गि हुणइ, अग्गि हुणित्ता चरं साहेइ, चरं साहेत्ता बलि बइस्सदेव करेइ बलि बइस्सदेव करेत्ता अतिहिपूयं करेइ अतिहिपूयं करेत्ता तओ पच्छा अप्पणा आहारमाहारेइ । तए णं से सिवे रायरिसी दोक्खं छट्ठक्खमणं उवसंपज्जित्ताणं विहरइ । तए णं से सिवे रायरिसी दोक्खे छट्ठक्खमणपारणगंसि आयावणभूमोओ पच्चोरुहइ आयावण० २ ता एवं जहा पढमपारणगं णवरं दाहिणगं दिसं पोक्खेइ २ ता दाहिणाए दिसाए जमे महाराया पत्थाणे पत्थियं सेसं तं चैव जाव आहारमाहारेइ । तए णं से सिवे रायरिसी तक्कं छट्ठक्खमणं उवसंपज्जित्ता णं विहरइ, तए णं से सिवे रायरिसी सेसं तं चैव णवरं पच्चत्थिमं दिसं पोक्खेइ पच्चत्थिमाए दिसाए वरुणे महाराया पत्थाणे पत्थियं सेसं तं चैव जाव आहारमाहारेइ । तए णं से सिवे रायरिसी चउत्थं छट्ठक्खमणं उवसंपज्जित्ता णं विहरइ । तए णं से सिवे रायरिसी चउत्थं छट्ठक्खमण एवं तं चैव णवरं उत्तरं दिसं पोक्खेइ उत्तराए दिसाए वेसमणे महाराया पत्थाणे पत्थियं अभिरक्खउ सिव० सेसं तं चैव जाव तओ पच्छा अप्पणा आहारमाहारेइ ॥ ४१६ ॥ तए णं तस्स सिवस्स रायरिसिस्स छट्ठंछट्ठेणं अणिक्खित्तेणं दिसाचक्कवालेणं जाव आयावेमाणस्स

पद्मभद्रयाए जाव विणीययाए अण्णया कयाइ तयावरणिज्जाणं कम्ममाणं खओ वसमेणं ईहापोहमगणगवेसणं करेमाणस्स विभंगे णामं अण्णाणे समुप्पण्णे, से णं तेणं विभंगणाणेणं समुप्पण्णेणं पासइ अस्सि लोए सत्त दीवे सत्त समुद्दे तेण परं ण जाणइ, ण पासइ, तए णं तस्स सिवस्स रायरिसिस्स अयमेयारूवे अइसेसे जाव समुप्पज्जित्था—अत्थि णं ममं अइसेसे णाणदंसणे समुप्पण्णे एवं खलु अस्सि लोए सत्त दीवा सत्त समुद्दा तेण परं वोच्छिण्णा दीवा य समुद्दा य, एवं संपेहेइ २ ता आयावणभूसीओ परुचोरुहइ आ० २ ता वागलवत्थणियत्थे जेणेव सए उडए तेणेव उवागच्छइ २ ता सुवहुं लोहीलोहकडाहकडुच्छुयं जाव भंडमं किट्ठिणसंकाइयं च गेण्हइ २ ता जेणेव हत्थिणापुरे णयरे जेणेव तावसावसहे तेणेव उवागच्छइ २ ता भंडणिकखेवं करेइ २ ता हत्थिणापुरे णयरे सिघाडगतिग जाव पहेसुं बहुजणस्स एवमाइक्खइ जाव एवं परुवेई—अत्थि णं देवाणुप्पिया ! ममं अइसेसे णाणदंसणे समुप्पण्णे, एवं खलु अस्सि लोए जाव दीवा य समुद्दा य, तए णं तस्स सिवस्स रायरिसिस्स अंतियं एयमट्ठं सोच्चा णिसम्म हत्थिणापुरे णयरे सिघाडगतिग जाव पहेसुं बहुजणो अणमणस्स एवमाइक्खइ जाव परुवेइ—एवं खलु देवाणुप्पिया ! सिवे रायरिसी एवं आइक्खइ जाव परुवेइ—अत्थि णं देवाणुप्पिया ! ममं अइसेसे णाणदंसणे समुप्पण्णे जाव तेण परं वोच्छिण्णा दीवा य समुद्दा य से कहमेयं मण्णे एवं ? । तेणं कालेणं तेणं समएणं सामी समोसडे परिसा जाव पडिगया । तेणं कालेणं तेणं समएणं समणस्स भगवओ महावीरस्स जेट्ठे अते-वासी जहा बिद्दयसए णियंठुट्ठेसए जाव अडमाणे बहुजणसद्दं णिसामेइ बहुजणो अणमणस्स एवं आइक्खइ जाव एवं परुवेइ—एवं खलु देवाणुप्पिया ! सिवे रायरिसी एवं आइक्खइ जाव परुवेइ—अत्थि णं देवाणुप्पिया ! तं चेव जाव वोच्छिण्णा दीवा य समुद्दा य, से कहमेयं मण्णे एवं ? तए णं भगवं गोयमे बहुजणस्स अंतियं एयमट्ठं सोच्चा णिसम्म जायसड्ढे जहा णियंठुट्ठेसए जाव तेण परं वोच्छिण्णा दीवा य समुद्दा य, से कहमेयं भंते ! एवं ? गोयमादि समणे भगवं महावीरे भगवं गोयमं एवं वयासी—जण्णं गोयमा ! से बहुजणे अणमणस्स एवमाइक्खइ तं चेव सत्वं भाणियत्वं जाव भंडणिकखेवं करेइ हत्थिणापुरे णयरे सिघाडग० तं चेव जाव वोच्छिण्णा दीवा य समुद्दा य, तए णं तस्स सिवस्स रायरिसिस्स अंतिए एयमट्ठं सोच्चा णिसम्म तं चेव सत्वं

भाणियत्वं जाव तेण परं धोच्छिण्णा दीवा य समुद्दा य तण्णं मिच्छा । अहं पुण
 गोयमा ! एवमाइक्खामि जाव परूवेमि—एवं खलु जंबुद्दीवाईया दीवा लव-
 णाईया समुद्दा संठाणओ एगविहिविहाणा वित्थारओ अणेगविहिविहाणा एवं
 जहा जीवाभिगमे जाव सयंभूरमणसमुद्दपज्जवसाणा अस्सि तिरियलोए असं-
 खेज्जा दीवसमुद्दा पण्णत्ता समणाउसो ! अत्थि णं भंते ! जंबुद्दीवे दीवे
 दब्बाइं सवण्णाइंपि अवण्णाइंपि सगंधाइंपि अगंधाइंपि सरसाइंपि अरसाइंपि
 सफासाइंपि अफासाइंपि अण्णमण्णबद्धाइं अण्णमण्णपुट्ठाइं जाव घडत्ताए
 चिट्ठंति ? हुंता अत्थि । अत्थि णं भंते ! लवणसमुद्दे दब्बाइं सवण्णाइंपि
 अवण्णाइंपि सगंधाइंपि अगंधाइंपि सरसाइंपि अरसाइंपि सफासाइंपि अफासाइंपि
 अण्णमण्णबद्धाइं अण्णमण्णपुट्ठाइं जाव घडत्ताए चिट्ठंति ? हुंता अत्थि । अत्थि
 णं भंते ! धायइंसंडे दीवे दब्बाइं सवण्णाइंपि० एवं चेव, एवं जाव सयंभूर-
 मणसमुद्दे जाव हुंता अत्थि । तए णं सा महइमहालिया महच्चपरिसा समणस्स
 भगवओ महावीरस्स अंतियं एयमट्ठं सोच्चा णिसम्म हट्ठुट्ठा समणं भगवं
 महावीरं वंदइ णमंसइ वंविता णमंसिता जामेव विसि पाउब्भूया तामेव विसि
 पडिगया, तए णं हत्थिणापुरे णयरे सिघाडग जाव पहेसु बहुजणो अण्णमण्णस्स
 एवमाइक्खइ जाव परूवेइ—अण्णं देवाणुप्पिया ! सिवे रायरिसी एवमाइक्खइ
 जाव परूवेइ—अत्थि णं देवाणुप्पिया ! ममं अइसेसे णाणदंसणे समुद्दा य,
 तं णो इणट्ठे समट्ठे, समणे भगवं महावीरे एवमाइक्खइ जाव परूवेइ—एवं
 खलु एयस्स सिवस्स रायरिसिस्स छट्ठंछट्ठेणं तं चेव जाव भंडणिकखेवं करेइ
 भंडणिकखेवं करेत्ता हत्थिणापुरे णयरे सिघाडग जाव समुद्दा य, तए णं
 तस्स सिवस्स रायरिसिस्स अंतियं एयमट्ठं सोच्चा णिसम्म जाव समुद्दा य,
 तण्णं मिच्छा, समणे भगवं महावीरे एवमाइक्खइ०—एवं खलु जंबुद्दीवाईया
 दीवा लवणाईया समुद्दा तं चेव जाव असंखेज्जा दीवसमुद्दा पण्णत्ता समणा-
 उसो ! तए णं से सिवे रायरिसी बहुजणस्स अंतियं एयमट्ठं सोच्चा णिसम्म
 संकिए कंखिए वित्थियिच्छिए भेइसमावण्णे कलुससमावण्णे जाए यावि होत्था,
 तए णं तस्स सिवस्स रायरिसिस्स संकियस्स कंखियस्स जाव कलुससमावण्णस्स
 से विमंगे अण्णाणे खिप्पामेव परिबडिए । तए णं तस्स सिवस्स रायरिसिस्स अय-
 भेयारूवे अब्भत्थिए जाव समुप्पज्जित्था—एवं खलु समणे भगवं महावीरे आइ-
 गरे तित्थगरे जाव सवण्णू सव्वदरिसी आगासगएणं चक्केणं जाव सहसंबवणे

उज्जाणे अहापडिरुवं जाव विहरइ, तं महाफलं खलु तहारूवाणं अरहंताणं भगवंताणं णामगोयस्स जहा उववाइए जाव गहणयाए, तं गच्छामि णं समणं भगवं महावीरं बंदामि जाव पज्जुवासामि, एयं णे इहमवे य परमवे य जाव भविस्सइत्तिकट्टइ एवं संपेहेइ एवं संपेहिस्सा जेणेव तावसावसहे तेणेव उवागच्छइ तेणेव उवागच्छित्ता तावसावसहं अणुप्पविसइ २ ता सुबहुं लोहीलोहकडाह जाव किट्ठिणसंकाइयं च गेहइ गेण्हित्ता तावसावसहाओ पडिणिकलमइ ताव० २ ता परिवडियविबभंगे हरियणापुरं णयरं मज्झमज्जेणं णिगच्छइ णिगच्छित्ता जेणेव सहसंबवणे उज्जाणे जेणेव समणे भगवं महावीरे तेणेव उवागच्छइ तेणेव उवागच्छित्ता समणं भगवं महावीरं तिकवृत्तो आयाहिणं पयाहिणं करेइ बंदइ णमंसइ वंदित्ता णमंसित्ता णव्वासण्णे णाइदूरे जाव पंजलिउडे पज्जुवासइ । तए णं समणे भगवं महावीरे सिवस्स रायरिसिस्स तीसे य महइमहालियाए जाव आणाए आराहए भवइ । तए णं से सिवे रायरिसी समणस्स भगवओ महावीरस्स अंतियं धम्मं सोक्खा णिसम्म जहा खंदओ जाव उत्तरपुरत्थिमं विसीभागं अबक्कमइ २ ता सुबहुं लोहीलोहकडाह जाव किट्ठिणसंकाइयं च एगते एडेइ एडित्ता सयमेव पंचमट्ठियं लोयं करेइ सयमे० २ ता समणं भगवं महावीरं एवं जहेव उसमवत्तो तहेव पवइओ तहेव एक्कारस अंगाइं अहिज्जइ तहेव सव्वं जाव सव्वकुक्खप्पहीणे ॥ ४१७ ॥ भंते ! ति भगवं गोयमे समणं भगवं महावीरं बंदइ णमंसइ वंदित्ता णमंसित्ता एवं वयासीजीवा णं भंते ! सिज्जमाणा कयरम्मि संघयणे सिज्जंति ? गोयमा वइरोसभणारायसंघयणे सिज्जंति, एवं जहेव उववाइए तहेव संघयणं संठाणं उच्चत्तं आउयं च परिवसणा, एवं सिट्ठिगंडिया णिरवसेसा भाणियव्वा जाव अब्वावाहं सोक्खं अणुहोति सासयं सिट्ठा । सेवं भंते ! २ ति ॥४१८॥

एककारसं सयं वसमो उट्ठेसो

रायगिहे जाव एवं वयासी—कइविहे णं भंते ! लोए पणत्ते ? गोयमा ! चउत्तिवहे लोए पणत्ते, तंजहा—दव्वलोए, खेतलोए, काललोए, भाक्त्तोए । खेतलोए णं भंते ! कइविहे पणत्ते ? गोयमा ! तिविहे पणत्ते, तंजहा—अहोलोयखेतलोए १ तिरियलोयखेतलोए २ उड्डुलोयखेतलोए ३ । अहोलोयखेतलोए णं भंते ! कइविहे पणत्ते ? गोयमा ! सत्तविहे पणत्ते, तंजहा—

रयणप्पभापुढविअहेल्लोयखेत्तलोए जाव अहेसत्तमापुढविअहेल्लोयखेत्तलोए ।
 तिरियल्लोयखेत्तलोए णं भंते ! कइविहे पणत्ते ? गोयमा ! असंखेज्जविहे
 पणत्ते, तंजहा—जंबुद्वीवे २ तिरियल्लोयखेत्तलोए जाव सयंभूरभणसमुद्दे तिरिय-
 ल्लोयखेत्तलोए । उड्डल्लोयखेत्तलोए णं भंते ! कइविहे पणत्ते ? गोयमा !
 पण्णरसविहे पणत्ते, तंजहा— सोहम्मकप्पउड्डल्लोयखेत्तलोए जाव अञ्चुयकप्प-
 उड्डल्लोयखेत्तलोए गेबेज्जविमाणउड्डल्लोयखेत्तलोए अणुत्तरविमाणउड्डल्लोयखेत्त-
 लोए ईसिपम्भारपुढविअउड्डल्लोयखेत्तलोए । अहेल्लोयखेत्तलोए णं भंते ! कि
 संठिए पणत्ते ? गोयमा ! तप्पागारसंठिए पणत्ते । तिरियल्लोयखेत्तलोए णं
 भंते ! किसंठिए पणत्ते ? गोयमा ! झल्लरिसंठिए पणत्ते । उड्डल्लोयखेत्तलोय०
 पुच्छा, गोयमा ! उड्डमुड्ङ्गाकारसंठिए पणत्ते । लोए णं भंते ! किसंठिए
 पणत्ते ? गोयमा ! सुपड्ढुगसंठिए लोए पणत्ते, तंजहा—हेट्ठा विच्छिण्णे मज्झे
 संखित्ते जहा सत्तमसए पढमुद्देसए जाव अंतं करेइ । अलोए णं भंते ! कि
 संठिए पणत्ते ? गोयमा ! झुसिरगोलसंठिए पणत्ते । अहेल्लोयखेत्तलोए णं
 भंते ! कि जीवा जीवदेसा जीवपएसा० ? एवं जहा इंवा दिसा तहेव णिर-
 वसेसं भाणियध्वं जाव अद्दासमए । तिरियल्लोयखेत्तलोए णं भंते ! कि
 जीवा० ? एवं चेव उड्डल्लोयखेत्तलोएवि, णवरं अरूवी छव्विहा अद्दासमओ
 णत्थि । लोए णं भंते ! कि जीवा० ? जहा बिइयसए अत्थियउद्देसए लोया-
 गासे, णवरं अरूवी सत्तविहा जाव अहम्मत्थिकायस्स पएसा णो आगासत्थिकाए
 आगासत्थिकायस्स देसे आगासत्थिकायस्स पएसा अद्दासमए, सेसं तं चेव ।
 अलोए णं भंते ! कि जीवा० ? एअं जहा अत्थिकायउद्देसए अलोयागासे
 तहेव णिरवसेसं जाव अणंतभागूणे । अहेल्लोयखेत्तलोयस्स णं भंते ! एणंमि
 आगासपएसे कि जीवा जीवदेसा जीवप्पएसा अजीवा अजीवदेसा अजीवपएसा ?
 गोयमा ! णो जीवा जीवदेसावि जीवपएसावि अजीवावि अजीवदेसावि अजीव-
 पएसावि । जे जीवदेसा ते णियमा एण्णिदिय देसा १ अहवा एण्णिदियदेसा य बेइं-
 दियस्स देसे २ अहवा एण्णिदियदेसा य बेइंदियाण य देसा ३ एवं मज्झल्ल-
 विरहिओ जाव अण्णिदिएसु जाव अहवा एण्णिदियदेसा य अण्णिदियाण य देसा, जे
 जीवपएसा ते णियमा एण्णिदियपएसा १ अहवा एण्णिदियपएसा य बेइंदियस्स
 पएसा २ अहवा एण्णिदियपएसा य बेइंदियाण य पएसा ३ एवं आइल्लविरहिओ

जाव पंचिदिएमु अणिदिएमु तियमंगो, जे अजीवा ते डुविहा पणत्ता, तंजहा-
रूवी अजीवा य अरूवी अजीवा य, रूवी तहेव, जे अरूवी अजीवा ते पंचविहा
पणत्ता, तंजहा-णो धम्मत्थिकाए धम्मत्थिकायस्स देसे १ धम्मत्थिकायस्स
पएसे २ एवं अहम्मत्थिकायस्सवि ४ अट्ठासमए ५ । तिरियल्लोयखेत्तलोयस्स
णं भंते ! एगमि आगासपएसे किं जीवा० ? एवं जहा अहेल्लोयखेत्तलोयस्स
तहेव, एवं उड्डल्लोयखेत्तलोयस्सवि, णवरं अट्ठासमओ णत्थि, अरूवी चउच्चिहा
ल्लोयस्स जहा अहेल्लोयखेत्तलोयस्स एगमि आगासपएसे । अलोयस्स णं भंते !
एगमि आगासपएसे० पुच्छा, गोयमा ! णो जीवा णो जीवदेसा तं चेव जाव
अणंतोह् अगुरुयल्लहुयगुणेहि संजुत्ते . सव्वागासस्स अणंतभागूणे । दव्वओ णं
अहेल्लोयखेत्तलोए अणंताइं जीवदव्वाइं अणंताइं अजीवदव्वाइं अणंता जीवा-
जीवदव्वा एवं तिरियल्लोयखेत्तलोएवि, एवं उड्डल्लोयखेत्तलोएवि, दव्वओ णं
अलोए णेवत्थि जीवदव्वा णेवत्थि अजीवदव्वा णेवत्थि जीवाजीवदव्वा एगे
अजीवदव्वदेसे जाव सव्वागासस्स अणंतभागूणे । कालओ णं अहेल्लोयखेत्तलोए
ण कयाइ णासि जाव णिच्चे एवं जाव अलोए । भावओ णं अहेल्लोयखेत्तलोए
अणंता वणपज्जवा जहा खंवए जाव अणंता अगुरुयल्लहुयपज्जवा एवं जाव
लोए, भावओ णं अलोए णेवत्थि वणपज्जवा जाव णेवत्थि अगुरुयल्लहुयपज्जवा
एगे अजीवदव्वदेसे जाव अणंतभागूणे ॥ ४१६ ॥ लोए णं भंते ! केमहात्तए
पणत्ते ? गोयमा ! अयणं जंबुद्दीवे २ सव्वदीव० जाव परिवखेदेणं, तेणं
कालेणं तेणं समएणं छ देवा मह्हिद्धिया जाव महेसक्खा जंबुद्दीवे २ मंदरे पव्वए
मंदरचूलियं सव्वओ समंता संपरिक्खत्ताणं चिट्ठेज्जा, अहे णं चत्तारि दिसा-
कुमारीओ महत्तरियाओ चत्तारि बलिंपिडे गहाय जंबुद्दीवस्स २ चउमुदि
दिसासु बह्घियासिमुद्दीओ ठिच्चा ते चत्तारि बलिंपिडे जमगसमगं बह्घियाभि-
मुहे पक्खिक्खेज्जा, पभू णं गोयमा ! तओ एगमेगे देवे ते चत्तारि बलिंपिडे
धरणितलमसंपत्ते खिप्पामेव पडिसाहरित्तए, ते णं गोयमा ! देवा ताए उक्कि-
ट्टाए जाव देवगईए एगे देवे पुरच्छाभिमुहे पयाए एवं दाह्णिणाभिमुहे एदं
पच्चत्थाभिमुहे एवं उत्तराभिमुहे एवं उड्डाभिमुहे एगे देवे अहोभिमुहे पयाए,
तेणं कालेणं तेणं समएणं वाससहस्साउए दारए पयाए, तए णं तस्स दारगस्स
अम्मपियरो पहीणा भवन्ति णो चेव णं ते देवा लोगंतं संपाउणंति, तए णं

तस्स दारगस्स आउए पहीणे भवइ णो चेव णं जाव संपाउणंति, तए णं तस्स दारगस्स अट्ठिमिजा पहीणा भवंति णो चेव णं ते देवा लोगंतं संपाउणंति, तए णं तस्स दारगस्स आसत्तमेवि कुलवंसे पहीणे भवइ णो चेव णं ते देवा लोगंतं संपाउणंति, तए णं तस्स दारगस्स णामगोएवि पहीणे भवइ णो चेव णं ते देवा लोगंतं संपाउणंति, तेसि णं भंते ! देवाणं किं गए बहुए अगए बहुए गोयमा ! गए बहुए णो अगए बहुए, गयाउ से अगए असंखेज्जइभागे अगयाउ से गए असंखेज्जगुणे, लोए णं गोयमा ! एमहालए पणत्ते । अलोए णं भंते ! केमहालए पणत्ते ? गोयमा ! अयथं समयखेत्ते पणयालीसं जोयण-सयसहस्साइं आयामविकलंभेणं जहा खंदए जाव परिवखेवेणं, तेणं कालेणं तेणं समएणं दस देवा महिद्धिया तहेव जाव संपरिक्खित्ताणं संचिट्ठेज्जा, अहे णं अट्ठ विसाकुभारीओ महत्तरियाओ अट्ठ बलिपिडे गहाय माणुमुत्तरस्स पव्वयस्स चउसुवि विसासु चउसुवि विदिसासु बहियाभिमूहीओ ठिच्चा ते अट्ठ बलिपिडे जमगसमणं बहियाभिमूहीओ पक्खिजेज्जा, पभू णं गोयमा ! तओ एगमेगे देवे ते अट्ठ बलिपिडे धरणित्तलमसंपत्ते खिप्पामेव पडित्ताहरित्तए, ते णं गोयमा ! देवा ताए उक्किट्ठाए जाव देवगईए लोगंते ठिच्चा असब्भावपट्टवणाए एगे देवे पुरत्थाभिमूहे पयाए एगे देवे दाहिणपुरत्थाभिमूहे पयाए एवं जाव उत्तर-पुरत्थाभिमूहे पयाए एगे देवे उड्ढाभिमूहे एगे देवे अहोमिमूहे पयाए, तेणं कालेणं तेणं समएणं वाससयसहस्साउए दारए पयाए, तए णं तस्स दारगस्स अम्मापियरो पहीणा भवंति णो चेव णं ते देवा आलोगंतं संपाउणंति, तं चेव जाव तेसि णं भंते ! देवाणं किं गए बहुए अगए बहुए ? गोयमा ! णो गए बहुए अगए बहुए, गयाउ से अगए अणंतगुणे अगयाउ से गए अणंतभागे, अलोए णं गोयमा ! एमहालए पणत्ते ॥ ४२० ॥ लोयस्स णं भंते ! एगंमि आगास-पएसे जे एगिदियपएसा जाव पंचिदियपएसा अणिदियपएसा अण्णमण्णबद्धा अण्णमण्णपट्टु जाव अण्णमण्णसमभरघडत्ताए चिट्ठंति? अत्थि णं भंते ! अण्ण-मण्णस्स किंचि आबाहं वा वाबाहं वा उप्पायंति छविच्छेदं वा करंति ? णो इणट्ठे समट्ठे । से केणट्ठेणं भंते ! एवं बुच्चइ लोयस्स णं एगंमि आगासपएसे जे एगिदियपएसा जाव चिट्ठंति अत्थि णं भंते ! अण्णमण्णस्स किंचि आबाहं वा जाव करंति ? गोयमा ! से जहाणामए णट्ठिया सिधा सिगारागारचाह्वेसा

जाव कलिया रंगट्टाणंसि जणसयाउलंसि जणसयसहस्साउलंसि बत्तीसइविहस्स
 णट्टस्स अण्णयरं णट्टविहिं उवहंसैज्जा । से णूणं गोयमा ! ते पेच्छगा तं णट्टियं
 अणिमिसाए दिट्ठीए सब्बओ समंता समभिलोएति ? हंता समभिलोएति,
 ताओ णं गोयमा ! दिट्ठीओ तंसि णट्टियंसि सब्बओ समंता सण्णि-
 पडियाओ ? हंता सण्णिपडियाओ, अत्थि णं गोयमा ! ताओ दिट्ठीओ
 तीसे णट्टियाए किंचिआबाहं वा वाबाहं वा उप्पाएति छविच्छेदं वा करंति ?
 णो इणट्ठे समट्ठे, अहवा सा णट्टिया तासि दिट्ठीणं किंचि आबाहं वा वाबाहं
 वा उप्पाएति छविच्छेदं वा करेइ ? णो इणट्ठे समट्ठे, ताओ वा दिट्ठीओ
 अण्णमण्णाए दिट्ठीए किंचि आबाहं वा वाबाहं वा उप्पाएति छविच्छेदं वा
 करंति ? णो इणट्ठे समट्ठे, से तेणट्ठेणं गोयमा ! एवं वुच्चइ तं चेव जाव
 छविच्छेदं वा करंति ॥ ४२१ ॥ लोयस्स णं भंते ! एगमि आगासपएसे जहण्ण-
 पए जीवपएसाणं उक्कोसपए जीवपएसाणं सब्बजीवाण य कयरे २ जाव विसे-
 साहिया वा ? गोयमा ! सब्बथोवा लोयस्स एगमि आगासपएसे जहण्णपए
 जीवपएसा, सब्बजीवा असंखेज्जगुणा, उक्कोसपए जीवपएसा विसेसाहिया ।
 सेवं भंते ! सेवं भंते ! त्ति ॥ ४२२ ॥

एक्कारसं सयं एक्कारसमो उट्ठेसो

तेणं कालेणं तेणं समएणं वाणियग्गामे णामं णयरे होत्था वण्णओ, दूइ-
 पलासे चेइए वण्णओ जाव पुढविंसिलापट्टओ, तत्थ णं वाणियग्गामे णयरे
 सुदंसणे णामं सेट्ठी परिवसइ अड्ढे जाव अपरिभूए समणोवासए अभिगय-
 जीवाजीवे जाव विहरइ । सामी समोसढे जाव परिसा पज्जुवासइ । तए णं से
 सुदंसणे सेट्ठी इमीसे कहाए लद्धट्ठे समाणे हट्टुत्तुट्ठे णहाए कय जाव पायच्छित्ते
 सब्बालंकारविभूसिए साओ गिहाओ पडिणिकखमइ साओ गिहाओ पडिणिकख-
 मित्ता सकोरेंटमहलदामेणं छत्तेणं धरिज्जमाणेणं पायविहारचारेणं महया पुरिस-
 वग्गुरापरिक्खित्ते वाणियग्गामं णयरं मज्झमज्जेणं णिगच्छइ णिगच्छित्ता जेणेव
 दूइपलासे चेइए जेणेव सपणे भगवं महावीरे तेणेव उवागच्छइ तेणेव उवागच्छित्ता
 समणं भगवं महावीरं पंचविहेणं अभिगमेणं अभिगच्छइ, तं०—सञ्चित्ताणं
 दब्बाणं जहा उसभदत्तो जाव तिविहाए पज्जुवासणाए पज्जुवासइ । तए णं
 समणे भगवं महावीरे सुदंसणस्स सेट्ठिस्स तीसे य महइमहालियाए जाव आरा-
 हए भवइ । तए णं से सुदंसणे सेट्ठी समणस्स भगवओ महावीरस्स अतियं

घम्मं सोच्चा णिसम्म हट्टुत्तुडे उट्टाए उट्ठेइ २ समणं भगवं महावीरं तिव्खुत्तो जाव पमंसित्ता एवं वयासी-कइविहे णं भंते ! काले पण्णत्ते ? सुदंसणा ! चउत्तविहे काले पण्णत्ते, तंजहा-पमाणकाले १ अहाउणिव्वत्तिकाले २ मरणकाले ३ अट्ठाकाले ४ । से किं तं पमाणकाले ? २ दुविहे पण्णत्ते, तंजहा-दिवसपमाणकाले १ राइप्पमाणकाले य २, चउपोरिसिए दिवसे चउपोरिसिया राई भवइ ॥४२३॥ उक्कोसिया अट्ठपंचममुहुत्ता दिवसस्स वा राईए वा पोरिसी भवइ, जहणिया तिमुहुत्ता दिवसस्स वा राईए वा पोरिसी भवइ । ज्या णं भंते ! उक्कोसिया अट्ठपंचममुहुत्ता दिवसस्स वा राईए वा पोरिसी भवइ तथा णं कइभागमुहुत्तभागेणं परिहायमाणी-परिहायमाणी जहणिया तिमुहुत्ता दिवसस्स वा राईए वा पोरिसी भवइ ? ज्या णं जहणिया तिमुहुत्ता दिवसस्स वा राईए वा पोरिसी भवइ, तथा णं कइभागमुहुत्तभागेणं परिवड्ढमाणी २ उक्कोसिया अट्ठपंचममुहुत्ता दिवसस्स वा राईए वा पोरिसी भवइ ? सुदंसणा ! ज्या णं उक्कोसिया अट्ठपंचममुहुत्ता दिवसस्स वा राईए वा पोरिसी भवइ तथा णं बावीससयभागमुहुत्तभागेणं परिहायमाणी २ जहणिया तिमुहुत्ता दिवसस्स वा राईए वा पोरिसी भवइ, ज्या णं जहणिया तिमुहुत्ता दिवसस्स वा राईए वा पोरिसी भवइ तथा णं बावीससयभागमुहुत्तभागेणं परिवड्ढमाणी-परिवड्ढमाणी उक्कोसिया अट्ठपंचममुहुत्ता दिवसस्स वा राईए वा पोरिसी भवइ । कया णं भंते ! उक्कोसिया अट्ठपंचममुहुत्ता दिवसस्स वा राईए वा पोरिसी भवइ कया वा जहणिया तिमुहुत्ता दिवसस्स वा राईए वा पोरिसी भवइ ? सुदंसणा ! ज्या णं उक्कोसिए अट्ठारसमुहुत्ते दिवसे भवइ जहणिया दुवालसमुहुत्ता राई भवइ तथा णं उक्कोसिया अट्ठपंचममुहुत्ता दिवसस्स पोरिसी भवइ जहणिया तिमुहुत्ता राईए पोरिसी भवइ, ज्या णं उक्कोसिया अट्ठारसमुहुत्तिया राई भवइ जहणिए दुवालसमुहुत्ते दिवसे भवइ तथा णं उक्कोसिया अट्ठपंचममुहुत्ता राईए पोरिसी भवइ जहणिया तिमुहुत्ता दिवसस्स पोरिसी भवइ । कया णं भंते ! उक्कोसिए अट्ठारसमुहुत्ते दिवसे भवइ जहणिया दुवालसमुहुत्ता राई भवइ कया वा उक्कोसिया अट्ठारसमुहुत्ता राई भवइ जहणिए दुवालसमुहुत्ते दिवसे भवइ ? सुदंसणा ! आसाहपुण्णिमाए उक्कोसिए अट्ठारसमुहुत्ते दिवसे भवइ, जहणिया दुवालसमुहुत्ता राई भवइ, पोसस्स पुण्णिमाए णं उक्कोसिया अट्ठा-

रसमुहुता राई भवइ जहणए दुवालसमुहुते दिवसे भवइ । अत्थि णं भंते ! दिवसा य राईओ य समा चैव भवति ? हुंता ! अत्थि । कया णं भंते ! दिवसा य राईओ य समा चैव भवति ? सुदंसणा ! चित्तासोयपुण्णिमासु णं एत्थ णं दिवसा य राईओ य समा चैव भवति, पण्णरसमुहुते दिवसे पण्णरसमुहुता राई भवइ चउभागमुहुत्तभागूणा चउमुहुत्ता दिवसस्म वा राईए वा पोरिसी भवइ, सेत्तं पमाणकाले ॥४२४॥ से किं तं अहाउणिव्वत्तिकाले ? अहाउणिव्वत्तिकाले जण्णं जेणं णेरइएण वा तिरिक्खजोणिएण वा मणुस्सेण वा देवेण वा अहाउयं णिव्वत्तियं सेत्तं पालेमाणे अहाउणिव्वत्तिकाले । से किं तं मरणकाले ? २ जीवो वा सरीराओ सरीरं वा जीवाओ, सेत्तं मरणकाले । से किं तं अद्धाकाले ? अद्धाकाले अणेगविहे पण्णत्ते, से णं समयट्टयाए आवलियट्टयाए जाव उस्सप्पिणीट्टयाए । एस्स णं सुदंसणा ! अद्धा दोहारुच्छेएणं छिज्जमाणी जाहे विभागं णो हव्वमागच्छइ सेत्तं समए, समयट्टयाए असंखेज्जाणं समयाणं समुदयसमिइसमागमेणं सा एगा आवलियात्त पवुच्चइ, संखेज्जाओ आवलियाओ जहा सालिउद्देसए जाव सागरोवमस्स उ एगस्स भवे परिमाणं । एएहि णं भंते ! पलिओवमसागरोवमेहि किं पओयणं ? सुदंसणा ! एएहि पलिओवमसागरोवमेहि णेरइयतिरिक्खजोणियमणुस्स देवाणं आउयाइं मविज्जति ॥ ४२५ ॥ णेरइयाणं भंते ! केवइयं कालं ठिई पण्णत्ता ? एवं ठिइपयं णिरवसेसं भाणियव्वं जाव अजहण्णमणुक्कोसेणं तेत्तीसं सागरोवमाइं ठिई प० ॥ ४२६ ॥ अत्थि णं भंते ! एएसिं पलिओवमसागरोवमाणं खएइ वा अवचएइ वा ? हुंता अत्थि । से केणट्ठेणं भंते ! एवं वुच्चइ अत्थि णं एएसिं णं पलिओवमसागरोवमाणं जाव अवचएइ वा ? एवं खलु सुदंसणा ! तेणं कालेणं तेणं समएणं हत्थिणापुरे णामं णयरे होत्था वण्णओ, सहसंबवणे उज्जाणे वण्णओ, तत्थ णं हत्थिणापुरे णयरे बले णामं राया होत्था वण्णओ, तस्स णं बलस्स रण्णे पभावईं णामं देवी होत्था सुक्कुमाल० वण्णओ जाव विहरइ । तए णं सा पभावईं देवी अण्णया कयाइ तंसि तारिसगंसि वासघरंसि अंभतरओ सच्चित्तकम्मे बाहिरओ इमियघट्टमट्ठे विचित्तउल्लोयच्चिल्लियतले मणिरयणपणासियंघयारे बहुसमसुविभत्तदेसभाए पंचवण्णसरससुरभिमुवकपुष्पपुंजोवयारकलिए कालागुरुपरकुंडुककतुरुक्कधूवमघमघंतगंधुद्धुयाभिरामे सुगंधि-

वरगंधिए गंधवट्टिभूए तंसि तारिसगंसि सयणिज्जंसि सालिंगणवट्टिए उभओ
विब्बोयणे दुहओ उण्णए भज्जेणयगंभीरे गंगापुल्लिणवालयउहालसालिसए उव-
चियसोमियद्दुगुल्लपट्टपडिच्छायणे सुविरइययत्ताणे रत्तंसुयसंबूए सुरम्मे आइ-
णगरुयव्वरणवणीयतूलफासे सुगंधवरकुसुमचुण्णसयणोवयारकलिए अद्धरत्तकाल-
समयंसि सुत्तजागरा ओहीरमाणी २ अयमेयारुवं ओरालं कल्लाणं सिबं धण्णं
मंगल्लं सस्सिरीयं महासुविणं पासित्ता णं पडिबुद्धा हाररययखीरसागर-
ससंकरिणदगरयरययमहासेलपंडुरतरोरुरमणिज्जपेच्छणिज्जं थिरलट्टपउट्टवट्ट-
पोवरसुसिलिट्टविसिट्टतिकखदाढाविडं बियमुहं परिकम्मियजच्चकमलकोमलमाइ-
यसोहंतलट्टउट्ठं रत्तुप्पलपत्तमउयसुकुंमालतालुजीहं मूसागयपवरकणगताविय-
आवत्तायंतवट्टतडिच्चिमलसरिसणयणं विसालपीवरोरुपडिपुण्णविउलखंधं मिउ-
विसयसुहुमलवखणपसत्थविच्छिण्णकेसरसडोवसोहियं ऊसियसुणिम्मियसुजाय-
अप्फोडियलंगूलं सोमं सोमाकारं लीलायंतं जंभायंतं णहयलाओ ओवयमाणं
णिययवयणमइवयंतं सीहं सुविणे पासित्ता णं पडिबुद्धा । तए णं सा पभावई
देवी अयमेयारुवं ओरालं जाव सस्सिरीयं महासुविणं पासित्ता णं पडिबुद्धा
समाणी हट्टुट्टु जाव हियया धाराहयकलंबपुष्फगंविव समूससियरोमकूवा
तं सुविणं ओगिण्हइ भोगिण्हिता सयणिज्जाओ अब्भुट्ठेइ सयणिज्जाओ अब्भु-
ट्ठेत्ता अतुरियमच्चलमसंभंताए अचिलंबियाए रायहंससरिसीए गईए जेणेव
बलस्स रण्णो सयणिज्जे तेणेव उवागच्छइ तेणेव उवागच्छित्ता बलं रायं ताहिं
इट्ठाहिं कंताहिं पियाहिं मणुण्णाहिं मणामाहिं ओरालाहिं कल्लाणाहिं सिवाहिं
धण्णाहिं मंगल्लाहिं सस्सिरीयाहिं मियमहुरमंजुलाहिं गिराहिं संलवमाणी-संलव-
माणी पडिबोहेइ पडिबोहेत्ता बलेणं रण्णा अब्भणुण्णाया समाणी णाणाभणि-
रयणभत्तिच्चित्तंसि भट्टासणंसि णिसीयइ णिसीइत्ता आसत्था वीसत्था सुहासण-
बरगया बलं रायं ताहिं इट्ठाहिं कंताहिं जाव संलवमाणी २ एवं वयासी-एवं
खल्लु अहं देवाणुप्पिया ! अज्ज तंसि तारिसगंसि सयणिज्जंसि सालिंगण० तं
चेव जाव णियगवयणमइवयंतं सीहं सुविणे पासित्ता णं पडिबुद्धा, तण्णं देवाणु-
प्पिया ! एयस्स ओरालस्स जाव महासुविणस्स के मण्णे कल्लाणे फलवित्ति-
विसेसे भविस्सइ ? तए णं से बले राया पभावईए देवीए अंतियं एयमट्ठं
सोच्चा णिसम्म हट्टुट्टु जाव हयहियए धाराहयणीवसुरभिक्कुमुमचंचुमालइय-

तण्यु असक्विरोमकूवे तं सुविणं ओगिण्हइ ओगिण्हिता ईहं पविसइ ईहं पवि-
 सिता अप्पणो साभाविएणं महपुण्वएणं बुद्धिविण्णाणेणं तस्स सुविणस्स अत्यो-
 ग्गहणं करेइ तस्स० २ ता पभावइं देविं ताहिं इट्ठाहिं कंताहिं जाव मंगल्लाहिं
 मियमहुरसस्सिरियाहिं संलवमाणे २ एवं वयासी-ओराले णं तुमे देवी ! सुविणे
 दिट्ठे, कल्लाणे णं तुमे देवी ! सुविणे दिट्ठे जाव सस्सिरिए णं तुमे देवी !
 सुविणे दिट्ठे, आरोग्गतुट्ठिदीहाउकल्लाणमंगल्लकारे णं तुमे देवी ! सुविणे
 दिट्ठे, अस्थलाभो देवाणुप्पिए ! भोगलाभो देवाणुप्पिए ! पुत्तलाभो देवाणु-
 प्पिए ! रज्जलाभो देवाणुप्पिए ! एवं खलु तुमं देवाणुप्पिए ! णवण्हं मासाणं
 बह्वपडिपुण्णाणं अट्ठट्ठमाणराइदियाणं वीइवकंताणं अहं कुलकेउं कुलदीवं कुल-
 पव्वयं कुलवडंसयं कुलतिलगं कुलकित्तिकरं कुलर्णदिकरं कुलजसकरं कुलाधारं
 कुलपायवं कुलबिबद्धणकरं सुकुमात्तपाणिपायं अहीणपडिपुण्णपंचिदियसरीरं
 जाव ससिसोमाकारं कंतं पियदंसणं सुरूवं देवकुमारत्तमप्पभं दारणं पयाहिंसी ।
 सेऽवि य णं दारे उम्भक्कवालभावे विण्णायपरिणयमित्ते जोव्वणगमणुप्पत्ते
 सूरे वीरे विवकंते विविण्णविउल्लवलवाहणे रज्जवई राया भविसइ, तं उराले
 णं तुमे देवी ! सुमिणे दिट्ठे जाव आरोग्गतुट्ठि जाव मंगल्लकारे णं तुमे देवी !
 सुविणे दिट्ठेत्तिकट्ठ पभावइं देविं ताहिं इट्ठाहिं जाव वग्गहिं बोक्खं पि तक्खं पि
 अणुबूहइ । तए णं सा पभावइं देवी बलस्स रण्णो अतियं एयमट्ठं सोच्चा
 णिसम्म हट्ठुट्ठु० करयल जाव एवं वयासी-एवमेयं देवाणुप्पिया ! तहमेयं
 देवाणुप्पिया ! अवित्तहमेयं देवाणुप्पिया ! असंदिट्ठमेयं देवाणुप्पिया !
 इच्छियमेयं देवाणुप्पिया ! पडिच्छियमेयं देवाणुप्पिया ! इच्छियपडिच्छियमेयं
 देवाणुप्पिया ! से जहेयं तुज्जे वयहत्तिकट्ठ तं सुविणं तम्मं पडिच्छइ पडि-
 च्छित्ता बलेणं रण्णा अब्भण्णयाया समाणी णाणामणिरयणभत्तिच्चित्ताओ
 भट्टासणाओ अब्भट्ठेइ अब्भट्ठेत्ता अतुरियमच्चवल जाव गईए जेजेव सए
 सयणिज्जे तेजेव उवागच्छइ तेजेव उवागच्छित्ता सयणिज्जंति णिसीयइ
 णिसीइत्ता एवं वयासी-मा मे से उत्तमे पहाणे मंगल्ले सुविणे अण्णेहि पाव-
 सुमिणेहि पडिहम्मिस्सइत्तिकट्ठ देवगुण्णसंबद्धाहिं पसत्थाहिं मंगल्लाहिं
 धम्मियाहिं कहाहिं सुविणजागरियं पडिजागरमाणी २ विहरइ । तए णं से
 बले राया कोडुंबियपुरिसे सहावेइ सहावेत्ता एवं वयासी-खिप्पामेव भो

देवाणुप्पियां ! अज्ज सविसेसं बाहिरियं उवट्टाणसालं गंधोदयसित्त-सुइय-
संमज्जिओवत्तिसं सुगंधवरपंचवण्णपुप्फोवयारकलियं कालागरुपवरकुंडुश्वक
जाव गंधवट्टिभूयं करेह य करावेह य करेत्ता करावेत्ता सीहासणं रयावेह सीहा-
सणं रयावेत्ता ममेयं जाव पच्चप्पिणह । तए णं ते कोडुंबियपुरिसा जाव
पडिसुणेत्ता खिप्पामेव सविसेसं बाहिरियं उवट्टाणसालं जाव पच्चप्पिणंति ।
तए णं से बले राया पच्चसकालसमयसि सयणिज्जाओ अब्भुट्ठेइ सयणिज्जाओ
अब्भुट्ठेत्ता पायपीढाओ पच्चोसुहइ पायपीढाओ पच्चोसुहिता जेणेव अट्टणसाला
तेणेव उवागच्छइ २ ता अट्टणसालं अणुपविसइ जहा उववाइए तहेव अट्टण-
साला तहेव मज्जणघरे जाव ससिध्व पियदंसणे णरवई मज्जणघराओ पडि-
णिवल्लमइ पडिणिवल्लमित्ता जेणेव बाहिरिया उवट्टाणसाला तेणेव उवागच्छइ
तेणेव उवागच्छित्ता सीहासणवरंसि पुरत्थाभिमुहे णिसीयइ णिसीइत्ता अप्पणो
उत्तरपुरत्थिमे दिसीभाए अट्ट भट्टासणाइं सेयवत्थपच्चुत्थुयाइं सिद्धत्थगकयमंग-
लोवयाराइं रयावेइ रयावेत्ता अप्पणो अदूरसामंते णाणामणिरयणमंडियं अहिय-
पेच्छणिज्जं महघ वरपट्टणुगयं सण्हपट्टबहुभत्तिभयच्चित्तताणं ईहामियउत्तम
जाव भत्तिचित्तं अंभित्तरियं जवणियं अंछावेइ अंछावेत्ता णाणामणिरयणभत्ति-
चित्तं अत्थरयमउयमसूरगोत्थयं सेयवत्थपच्चुत्थुयं अंगसुहफासयं सुमउयं पभा-
वईए देवीए भट्टासणं रयावेइ रयावेत्ता कोडुंबियपुरिसे सदावेइ सदावेत्ता एवं
वयासी-खिप्पामेव भो देवाणुप्पिया ! अट्ठंगमहाणिमित्तभुत्तत्थधारए विविह-
सत्थकुसले सुविणलक्खणपाढए सदावेह । तए णं ते कोडुंबियपुरिसा जाव पडि-
सुणेत्ता बलस्स रण्णो अंतियाओ पडिणिवल्लभंति पडिणिवल्लमित्ता सिग्घं तुरियं
चवलं चंड वेइयं हत्थिणापुरं णयरं मज्झंमज्जेणं णिग्गच्छंति २ ता जेणेव तेसिं
सुविणलक्खणपाढमाणं गिहाइं तेणेव उवागच्छंति तेणेव उवागच्छित्ता ते
सुविणलक्खणपाढए सदावेत्ति । तए णं ते सुविणलक्खणपाढगा बलस्स रण्णो
कोडुंबियपुरिसेहिं सदाविया सभाणा हट्टुत्तुट्ठा ण्हाया कय जाव सरीरा सिद्धत्थग-
हरियातियाकयमंगलमुद्धाणां सएहिं-सएहिं गिहेत्तितो णिग्गच्छंति स० २ ता
हत्थिणापुरं णयरं मज्झंमज्जेणं जेणेव बलस्स रण्णो भवणवरवडंसए तेणेव
उवागच्छंति तेणेव उवागच्छित्ता भवणवरवडंसगपडिदुवारंसि एगओ मिलंति
एगओ मिलित्ता जेणेव बाहिरिया उवट्टाणसाला जेणेव बले राया तेणेव उवा-
गच्छंति २ ता करयल० बलं रायं जएणं विजएणं वट्टावेत्ति । तए णं ते सुविण-

लक्ष्मणपादगा बलेणं रण्णा वंदिय-पूइय-सवकारिय-सम्मानिया समाणा पत्तेयं पत्तेयं पुचवणत्थेसु भद्दासणेसु णिसीयंति । तए णं से बलें राया पभावई देवं जवणियंतरियं ठावेइ ठावेत्ता पुफ्फकल पडिपुण्हत्थे परेणं विणएणं ते सुविण-लक्ष्मणपादए एवं वयासी-एवं खलु देवाणुप्पिया ! पभावई देवी अज्ज तंसि तारिसगंसि वासघरंसि जाव सीहं सुविणे पासित्ता णं पडिबुद्धा, तण्णं देवाणु-प्पिया ! एयस्स ओरालस्स जाव के मण्णे कल्लाणे फलवित्तिविसेसे भविस्सइ ? तए णं ते सुविणलक्ष्मणपादगा बलस्स रण्णो अंतियं एयमट्ठं सोच्चा णिसम्म हट्टुत्तुं तं सुविणं ओगिण्हंति ओगिण्हंता ईहं अणुप्पविसंति अणुप्पविसित्ता तस्स सुविणस्स अत्थोगहणं करेंति तस्स० २ त्ता अण्णमण्णेणं सद्धिं संचालेंति २ त्ता तस्स सुविणस्स लद्धट्ठा गहियट्ठा पुच्छियट्ठा विणिच्छियट्ठा अभिगयट्ठा बलस्स रण्णो पुरओ सुविणसत्थाइ उच्चारेमाणा २ एवं वयासी-एवं खलु देवाणुप्पिया ! अहं सुविणसत्थंसि ब्रायालीसं सुविणा तीसं महामुविणा जावत्तारं सब्वसुविणा विट्ठा, तत्थ णं देवाणुप्पिया ! तित्थयरमायरो वा चक्कवट्ठिमायरो वा तित्थयरंसि वा चक्कवट्ठिसि वा गढं वक्कममाणंसि एएंसि तीसाए महामुविणाणं इमे चोद्दस महामुविणे पासित्ता णं पडिबुज्झंति, तंजहा-गयवसहसोहअभिसेयदामससि-दिणयरं झयं कुंभं । पउमसरसागरविमाणभवणरयणुच्चयसिहिं च १४ ॥ १ ॥ वासुदेवमायरो वा वासुदेवंसि गढं वक्कममाणंसि एएंसि चोद्दसहं महामुवि-णाणं अण्णयरे सत्त महामुविणे पासित्ता णं पडिबुज्झंति, बलदेवमायरो वा बलदेवंसि गढं वक्कममाणंसि एएंसि चोद्दसहं महामुविणाणं अण्णयरे चत्तारि महामुविणे पासित्ता णं पडिबुज्झंति, मंडलियमायरो वा मंडलियंसि गढं वक्कममाणंसि एएंसि णं चउदसहं महामुविणाणं अण्णयरं एणं महामुविणं पासित्ता णं पडिबुज्झंति । इमे य णं देवाणुप्पिया ! पभावईए देवीए एणं महा-सुविणे दिट्ठे, तं ओराले णं देवाणुप्पिया ! पभावईए देवीए सुविणे दिट्ठे जाव आरोगगुट्ठि जाव मंगलकारए णं देवाणुप्पिया ! पभावईए देवीए सुविणे दिट्ठे, अत्थलाभो देवाणुप्पिया ! भोग० पुत्त० रज्जलामो देवाणुप्पिया ! एवं खलु देवाणुप्पिया ! पभावई देवी णवण्हं मासाणं ब्रह्मपडिपुण्णाणं जाव वीइक्कंताणं तुम्हं कुलकेउं जाव वारणं पर्याहइ, सेऽविय-णं दारए उम्मुक्क-बालभावे जाव रज्जवई राया भविस्सइ अणगारे वा भावियप्पा, तं ओराले

णं देवाणुप्पिया ! पभावईए देवीए सुविणे दिट्ठे जाव आरोग्गट्टिदीहाउय-
 कल्लाण जाव दिट्ठे । तए णं से बले राया सुविणलक्खपाढमाणं अतिए एय-
 मट्ठं सोच्चा णिसम्म हट्टुत्तु करयल जाव कट्टु ते सुविणलक्खणपाढगे एवं
 वयासी-एवमेयं देवाणुप्पिया ! जाव से जहेयं तुम्भे वयहत्तिकट्टु तं सुविणं
 सम्मं पडिच्छइ तं० २ ता सुविणलक्खणपाढए विउलेणं असणपाणखाइमसाइम-
 पुष्फवत्थगंधमल्लालंकारेणं सक्कारेइ सम्माणेइ सक्कारेत्ता सम्माणेत्ता विउलं
 जीवियारिहं पीइदानं दलयइ २ ता पडिविसज्जेइ पडिविसज्जेत्ता सीहासणाओ
 अब्भुट्ठेइ अब्भुट्ठेत्ता जेणेव पभावई देवी तेणेव उवागच्छइ तेणेव उवागच्छिता
 पभावइं देवि ताहिं इट्ठाहिं कंताहिं जाव संलवमाणे-संलवमाणे एवं वयासी-
 एवं खलु देवाणुप्पिए ! सुविणसत्थंसि बायालीसं सुविणा तीसं महासुविणा
 विट्ठा, तत्थ णं देवाणुप्पिए ! तित्थयरमायरो वा तं चेव जाव अणण्यरं एणं
 महासुविणं पासित्ता णं पडिबुज्जंति, इमे य णं तुमे देवाणुप्पिए ! एगे महा-
 सुविणे दिट्ठे, तं ओराले णं तुमे देवी ! सुविणे दिट्ठे जाव रज्जवई राया
 मविस्सइ अणणारे वा भावियण्णा, तं ओराले णं तुमे देवी ! सुविणे दिट्ठे
 जाव दिट्ठेत्तिकट्टु पभावइं देवि ताहिं इट्ठाहिं कंताहिं जाव दोच्चंपि तच्चंपि
 अणुवूहइ । तए णं सा पभावई देवी बलस्स रण्णे अंतियं एयमट्ठं सोच्चा
 णिसम्म हट्टुत्तु करयल जाव एवं वयासी-एयमेयं देवाणुप्पिया ! जाव तं
 सुविणं सम्मं पडिच्छइ तं सुविणं सम्मं पडिच्छित्ता बलेणं रण्णा अब्भणुण्णाया
 समाणी णाणामणिरयणभत्तिच्चित्त जाव अब्भुट्ठेइ अतुरियमच्चवल जाव गईए जेणेव
 सए भवणे तेणेव उवागच्छइ तेणेव उवागच्छित्ता सयं भवणमणुपविट्ठा । तए णं
 सा पभावई देवी ष्हाया कयबलिकम्मा जाव सव्वालंकारविभूसिया तं गढं णाइ-
 सीएहिं णाइउण्हेहिं णाइतिलोहिं णाइकडुएहिं णाइकसाएहिं णाइअंबिलोहिं णाइ-
 महुरेहिं उउभयमाणसुहेहिं भायणच्छायणगंधमल्लोहिं जं तस्स गढमस्स हियं मिथं
 पत्थं गढभपोसणं तं देसे य काले य आहारमाहारेमाणी विवित्तमउएहिं सयणासणोहं
 पडिरिक्कसुहाए मणाणुकूलाए विहारभूमीए पसत्थदोहला संपुण्णदोहला सम्मा-
 णियदोहला अब्भिमाणियदोहला वोच्छिण्णदोहला विणीयदोहला ववगयरोगसोग-
 भोहभयपरित्तासा तं गढं सुहंसुहेणं परिवहइ । तए णं सा पभावई देवी णवण्हं
 मासाणं बहुपडिपुण्णाणं अट्टुमाणराइंदियाणं वीइक्कंताणं सुकुमालपाणिपायं

अहीणपडिपुण्णपंचदियसररीरं लव्वणइंजणणोववेयं जाव सरिसोमाकारं कंतं
 पियदंसणं सुरुवं दारयं पयाया । तए णं तीसे पभावईए देवोए अंगपडियारि-
 याओ पभावईं देव पसुयं जाणेत्ता जेणेव बले राया तेणेव उवागच्छति तेणेव
 उवागच्छित्ता करयल जाव बलं रायं जएणं विजएणं वद्धावेति जएणं विजएणं
 वद्धावेत्ता एवं वयासी—एवं खलु देवाणुप्पिया ! पभावईं देवो णव्वहं मासाणं
 बहुपडिपुण्णाणं जाव दारयं पयाया तं एयणं देवाणुप्पियाणं पियट्टयायं पियं
 णिवेदेसो पियं भे भवउ । तए णं से बले राया अंगपडियारियाणं अतियं एय-
 मट्ठं सोच्चा णिसम्म हट्टुट्टु जाव धाराहयणीव जाव रोमकूवे तासि अंग-
 पडियारियाणं मउडवज्जं जहामालियं ओमोयं दलयइ २ ता सेयं रययामयं
 विमलसल्लित्तपुण्णं भिगारं च गिण्हइ गिण्हित्ता मत्थए धोवइ धोविता विउलं
 जीवियारिहं पीइदाणं दलयइ पीइदाणं दलइत्ता सक्कारेइ सम्माणेइ स० २ ता
 पडिविसज्जेइ ॥ ४२७ ॥ तए णं से बले राया कोडुंविद्यपुरिसे सद्दावेइ सद्दावेत्ता
 एवं वयासी—त्तिप्पामेव भो देवाणुप्पिया ! हत्थिणापुरे णधरे चारगसोहणं
 करेह चारग० २ ता माणुम्माणवड्डणं करेह मा० २ ता हत्थिणापुरं
 णधरं सट्ठित्तरदाहिरियं आसियसंमज्जिओवलित्तं जाव करेह य कारवेह
 य करेत्ता य कारवेत्ता य जूयसहस्सं वा चक्कसहस्सं वा पूयामहामहिंसक्कारं
 वा उस्सवेह २ ता ममेयमाणत्तियं पच्चप्पिणह । तए णं ते कोडुंविद्यपुरिसा
 बलेणं रणा एवं वुत्ता समाणा जाव पच्चप्पिणंति । तए णं से बले राया जेणेव
 अट्टणसाला तेणेव उवागच्छइ तेणेव उवागच्छित्ता तं सेव जाव मउज्जणधराओ
 पडिणिवत्तमइ पडिणिवत्तमित्ता उस्सुक्कं उक्करं उक्किट्ठं अदिज्जं अमिज्जं
 अभड्डपवेसे अदंडकोदंडिमं अधरिमं गणिघावरणाडइज्जकलियं अणेगत्तालाचरा-
 णुचरियं अणुट्टुयमुड्डं अमिलायमहलदामं पमुड्डयपक्कीत्तियं सपुरजणजाणवयं
 दसदिवसे ठिडवडियं करेइ । तए णं से बले राया दसाहियाए ठिडवडियाए
 वट्टमाणेए सइए य साहस्सिए य सयसाहस्सिए य जाए य दाए य भाए य
 दलमाणे य दवावेमाणे य सइए य साहस्सिए य सयसाहस्सिए य लुंणे पडि-
 च्छमाणे य पडिच्छावेमाणे य एवं विहरइ । तए णं तस्स दारगस्स अम्माधियरो
 पढमे दिवसे ठिडवडियं करेइ, तइए दिवसे चंदसूरदंसणियं करेइ, छट्ठे
 दिवसे जागरियं करेइ, एककारसमे दिवसे वीइवकते णिव्वत्ते अमुड्डजायकम्म-

करणे संपत्ते बारसाहदिवसे विउलं असणं पाणं खाइमं खाइमं उवक्खडावेति
 २ ता जहा सिवो जाव खत्तिए य आमंतेंति २ ता तओ पच्छा ष्हाया तं चेव
 जाव सक्कारेंति सम्माणेति स० २ तस्सेव मित्तणाइ जाव राईण य खत्तियाण
 य पुरओ अज्जयपज्जयपिउपज्जयागयं बहुपुरिसपरंपरप्परूढं कुलाणुरूवं कुल-
 सरिसं कुलसंताणतंतुवद्धणकरं अयमेयारूवं गोणं गुणणिप्फणं णामधेज्जं
 करेंति—जम्हा णं अम्हं इमे दारए बलस्स रण्णो पुत्ते पभावईए देवीए अत्तए
 तं होउ णं अम्हं एयस्स दारगस्स णामधेज्जं महब्बले, तए णं तस्स दारगस्स
 अम्मापियरो णामधेज्जं करेंति महब्बलेति । तए णं से महब्बले दारए पंच-
 धाईपरिग्गहिए, तंजहा—खीरघाईए एवं जहा दढपइण्णे जाव णिठ्वायणिठ्वा-
 घायंसि मुहमुहेणं परिवड्ढइ । तए णं तस्स महब्बलस्स दारगस्स अम्मापियरो
 अणुपुब्बेणं ठिइवड्ढियं वा चंदसूरदंसावणियं वा जागरियं वा णामकरणं वा
 परंभाभणं वा पयचंक्रमणं वा जेभावणं वा पिडवद्धणं वा पजंपावणं वा कण्ण-
 वेहणं वा संवच्छरपडिलेहणं वा चोलोयणगं च उवणयणं च अण्णाणि य बहूणि
 गम्भाहाणजम्मणमाइयाइं कोउयाइं करेंति । तए णं तं महब्बलं कुमारं अम्मा-
 पियरो साइरेगट्टवासणं जाणित्ता सोभणंसि तिहिकरणणक्खत्तमुहुत्तंसि० एवं
 जहा दढप्पइण्णे जाव अलंभोगसमत्थे जाए यावि होत्था । तए णं तं महब्बलं
 कुमारं उम्मुक्कवालभावं जाव अलं भोगसमत्थं विजाणित्ता अम्मापियरो अट्ट
 पासायवड्डेसए करेंति अब्भुगयमूसियपहसिए इव वण्णओ जहा रायप्पसेणइज्जे
 जाव पडिरूवे, तेसि णं पासायवड्डेसगाणं बहुमज्झदेसभाए एत्थ णं महेगं भवणं
 कारेंति अणेगखंभसयसंणिचिट्ठं वण्णओ जहा रायप्पसेणइज्जे पेच्छाघरमंडवंसि
 जाव पडिरूवे ॥ ४२८ ॥ तए णं तं महब्बलं कुमारं अम्मापियरो अण्णया
 कयाइ सोभणंसि तिहिकरणदिवसणक्खत्तमुहुत्तंसि ष्हायं कयबलिकम्मं कयकोउ-
 यमंगलपायच्छित्तं सव्वालंकारविभूसियं पमक्खणगण्हाणगीयवाइयपसाहणट्ठं-
 गतिलग कंकणअविहववहुउवणीयं मंगलमुजंपिएहि य वरकोउयमंगलोवयारकय-
 संतिकम्मं सरिसियाणं सरित्तयाणं सरिव्वयाणं सरिसलावण्णरूवजोव्वणगुणोव-
 वेयाणं विणोयाणं कयकोउयमंगलपायच्छित्तानं सरिसएहि रायकुलेहितो आणि-
 ल्लियाणं अट्टण्हं रायवरकण्णाणं एगदिवसेणं पाणिं गिण्हारिवसु । तए णं तस्स
 महाबलस्स कुमारस्स अम्मापियरो अयमेयारूवं पीइदाणं दलयति तं०—अट्ट

हिरण्यकोडीओ अट्ट सुवण्णकोडीओ अट्ट मउडे मउडप्पवरे अट्ट कुंडलजुए कुंडलजु-
यप्पवरे अट्ट हारे हारप्पवरे अट्ट अद्धहारे अद्धहारप्पवरे अट्ट एगावलीओ एगावलि-
प्पवराओ एवं मुत्तावलीओ एवंकणगावलीओ एवं रयणावलीओ अट्ट कडगजोए
कडगजोयप्पवरे एवं तुड्डियजोए अट्ट खोमजुयलाइं खोमजुयलप्पवराइं एवं बड-
गजुयलाइं एवं पट्टजुयलाइं एवं वुगुल्लजुयलाइं अट्ट सिरीओ अट्ट हिरीओ
एवं धिईओ किन्तीओ वुद्धीओ लच्छीओ अट्ट णंदाइं अट्ट भद्दाइं अट्ट तले तल-
प्पवरे सव्वरयणामए णियगवरभवणकेऊ अट्ट झए झयप्पवरे अट्ट वए वयप्पवरे
दसगोसाहस्सिएणं वएणं अट्ट णाडगाइं णाडगप्पवराइं बत्तीसबद्धेणं णाडएणं अट्ट आसे
आसप्पवरे सव्वरयणामए सिरिघरपडिक्खए अट्ट हथी हत्थिप्पवरे सव्वरयणामए
सिरिघरपडिक्खए अट्ट जाणाइं जाणप्पवराइं अट्ट जुगाइं जुगप्पवराइं एवं सिबि-
याओ एवं संदमाणीओ एवं गिल्लीओ थिल्लीओ अट्ट वियडजाणाइं वियडजाणप्प-
वराइं अट्ट रहे पारिजाणिए अट्ट रहे संगामिए अट्ट आसे आसप्पवरे अट्ट हथी
हत्थिप्पवरे अट्ट गामे गामप्पवरे दसकुलसाहस्सिएणं गामेणं अट्ट दासे दासप्प-
वरे एवं चेव दासीओ एवं किकरे एवं कंचुइउज्जे एवं वरिसधरे एवं महत्तरए अट्ट
सोवणिए ओलंबणदीवे अट्ट रूपामए ओलंबणदीवे अट्ट सुवण्णरूपामए ओलंबण-
दीवे अट्ट सोवणिए उक्कंचणदीवे एवं चेव तिण्णिवि, अट्ट सोवणिए पंजर-
दीवे एवं चेव तिण्णिवि, अट्ट सोवणिए थाले अट्ट रूपामए थाले अट्ट सुवण्ण-
रूपामए थाले अट्ट सोवणियाओ पत्तीओ ३ अट्ट सोवणियाइं थासयाइं ३ अट्ट
सोवणियाइं मल्लगाइं ३ अट्ट सोवणियाओ तलियाओ ३ अट्ट सोवणियाओ
कविच्चियाओ ३ अट्ट सोवणिए अवएडए ३ अट्ट सोवणियाओ अवयवकाओ
३ अट्ट सोवणिए पायपीडए ३ अट्ट सोवणियाओ मिसियाओ ३ अट्ट
सोवणियाओ करोडियाओ ३ अट्ट सोवणिए पल्लंके ३ अट्ट सोवणियाओ
पडिसेज्जाओ ३ अट्ट हंसासणाइं अट्ट कौंसासणाइं एवं गरुलासणाइं उण्णया-
सणाइं पणयासणाइं दोहासणाइं भद्दासणाइं पक्खासणाइं मगरासणाइं अट्ट
पउमासणाइं अट्ट दिसासोवत्थियासणाइं अट्ट तेत्तसमुग्गे जहा रायप्पसेणइउज्जे
जाव अट्ट सरिसवसमुग्गे अट्ट खुज्जाओ जहा उक्कवाइए जाव अट्ट पारिसीओ
अट्ट छत्ते अट्ट छत्तधारीओ चेडीओ अट्ट चामराओ अट्ट चामरधारीओ चेडीओ
अट्ट तालियंटे अट्ट तालियंटेधारीओ चेडीओ अट्ट करोडियाधारीओ चेडीओ

अट्ट खीरघाईओ जाव अट्ट अंकघाईओ अट्ट अंगमद्वियाओ अट्ट उम्मद्वियाओ
 अट्ट ण्हविष्णओ अट्ट पसाहियाओ अट्ट वण्णगपेसीओ अट्ट च्चुण्णगपेसीओ
 अट्ट कोट्टागारीओ अट्ट दवकारीओ अट्ट उवत्थाणियाओ अट्ट णाडइज्जाओ अट्ट
 कीडिबिणीओ अट्ट महाणसिणीओ अट्ट भंडागारिणीओ अट्ट अ(ब्भा)ज्जाधारि-
 णीओ अट्ट पुष्फधारिणीओ अट्ट पाणिधारिणीओ अट्ट बलिकारीओ अट्ट सेज्जा-
 कारीओ अट्ट अंब्भतरियाओ पडिहारीओ अट्ट बाहिरियाओ पडिहारीओ अट्ट
 मालाकारीओ अट्ट पेसणकारीओ अण्णं वा सुवहुं हिरण्णं वा सुवण्णं वा कंसं
 वा दूंसं वा विउल्लघणकणम जाव संतसारसावएज्जं अलाहि जाव आसत्तमाओ
 कुलवंसाओ पकामं दाउं पकामं भोत्तुं पकामं परिभाएउं । तए णं से महब्बले
 कुमारे एगमेगाए भज्जाए एगमेगं हिरण्णकोडि दलयइ एगमेगं सुवण्णकोडि
 दलयइ एगमेगं मउडं मउडप्पवरं दलयइ एवं तं चेव सव्वं जाव एगमेगं पेसण-
 कारिं दलयइ अण्णं वा सुवहुं हिरण्णं वा सुवण्णं वा जाव परिभाएउं । तए णं
 से महब्बले कुमारे उप्पि पासायवरगए जहा जमाली जाव विहरइ ॥ ४२६ ॥
 तेणं कालेणं तेणं समएणं विमलस्स अरहओ पओप्पए धम्मघोसे णामं अणगारे
 जाइसंपण्णे वण्णओ जहा केसिसामिस्स जाव पंचहि अणगारसएहि सिद्धि संपरि-
 वुडे पुक्काणुपुक्किं खरमाणे गामाणुगामं दूइज्जमाणे जेणेव हत्थिणापुरे णयरे
 जेणेव सहसंबवणे उज्जाणे तेणेव उवागच्छइ २ ता अहापडिक्खं उगहं
 ओगिण्हइ २ ता संजमेणं तवसा अप्पाणं भावेमाणे विहरइ । तए णं हत्थिणा-
 पुरे णयरे सिंघाडगतिय जाव परिसा पज्जवासइ । तए णं तस्स महब्बलस्स
 कुमारस्स तं महया जणसहं वा जण्णबूहं वा एवं जहा जमाली तहेव चिंता तहेव
 कंचुइज्जपुरिसं सहावेइ, कंचुइज्जपुरिसोवि तहेव अवखाइ, णवरं धम्मघोसस्स
 अणगारस्स आगमणगहियविण्णुच्छए करयल जाव णिग्गच्छइ, एवं खलु वेवाणु-
 प्पिया ! विमलस्स अरहओ पउप्पए धम्मघोसे णामं अणगारे सेसं तं चेव जाव
 सोवि तहेव रहवरेणं णिग्गच्छइ, धम्मकहा जहा केसिसामिस्स, सोवि तहेव अम्मा-
 पियरो आपुच्छइ, णवरं धम्मघोसस्स अणगारस्स अंतिए मुंडे भवित्ता अगाराओ
 अणगारियं पव्वइत्तए तहेव वुत्तपडिवुत्तया णवरं इमाओ य ते जाया विउल्ल-
 रायकुलबालियाओ कला० सेसं तं चेव जाव ताहे अकामाडं चेव महब्बलकुमारं
 एवं वयासी-तं इच्छामो ते जाया ! एगदिवसमवि रज्जसिंरिं पासित्तए, तए

णं से महब्बले कुमारो अम्मापियरायण वयणमणुयत्तमाणे तुसिणीए सच्चिदुइ ।
 तए णं से बले राया कोडुंबियपुरिसे सदावेइ एवं जहा सिवभट्टस्स तहेव राया-
 भिसेओ भाणियव्वो जाव अभिसिचइ २ ता करयलपरिग्गहियं महब्बलं कुमारं
 ३.एणं विजएणं वद्धावेत्ति जएणं विजएणं वद्धावित्ता एवं वयासी-भण जाया !
 किं देसो किं पयच्छामो ? सेसं जहा जगालिस्स तहेव जाव तए णं से महब्बले
 अणगारे धम्मघोसस्स अणगारस्स अंतियं सामादयमाइयाइं चोदस्स पुव्वाइं
 अहिज्जइ २ ता ब्रह्मिहं चउत्थ जाव विचित्तीहं तवोक्कम्मैहि अप्पाणं भावेमाणे
 द्दुपडिपुण्णाइं दुवालसवासाइं सामण्णपरियागं पाउणइ २ ता मासियाए
 स्सलेह्णाए सद्धं भत्ताइं अणसणाए छेदेइ २ ता अलोइयपडिक्कंते समा-
 हिपत्ते कालमासे कालं किच्चा उड्ढं अदिमसूरिय जहा अम्मडो जाव बंभलोए
 कप्पे देवत्ताए उववण्णे, तत्थ णं अत्थेगइयाणं देवणं दस सागरोवमाइं ठिई
 पण्णत्ता, तत्थ णं महब्बलस्सवि देवस्स दस सागरोवमाइं ठिई पण्णत्ता, से णं तुमं
 सुदंसणा ! बंभलोए कप्पे दस सागरोवमाइं दिव्वाइं भोगभोगाइं भुंजमाने बिह-
 रित्ता ताओ चेव देवलोगाओ आउवखएणं ३.अणतरं चयं चइत्ता इहेव वाणिय-
 गगामे णयरे सेट्टिकुलंसि पुत्तत्ताए पच्चायाए १.४३.०॥ तए णं तुमे सुदंसणा !
 उम्मवकवालभावेणं विण्णायपरिणयमेत्तेणं जोव्वणगमणुप्पत्तेणं तहारूवाणं
 थेराणं अंतियं केवलपण्णत्ते धम्मं णिसंते, सेऽविय धम्मं इच्छिए पडिच्छिए
 अभिरुइए तं सुदुत्थु णं तुमं सुदंसणा ! इयाणिं पकरेस्सि । से तेणट्ठेणं सुदंसणा !
 एवं वुच्चइ-अत्थि णं एएसिं पलिओवमसागरोवमाणं खएइ वा अवचएइ वा ।
 तए णं तस्स सुदंसणस्स सेट्टिस्स समणस्स भगवओ महावीरस्स अंतियं एयमट्ठं
 सोच्चा णिसम्म सुभेणं अञ्जवसाणेणं सुभेणं परिणामेणं लेसाहिं विमुञ्जयाणीहिं
 तयावरणिज्जाणं कम्ममाणं खओवसमेणं ईहापोहमगणगवेसणं करेमाणस्स सण्णी-
 पुव्वजाईसरणे समुप्पण्णे एयमट्ठं सम्मं अभिसमेइ । तए णं से सुदंसणे सेट्ठी
 समणेणं भगवया महावीरेणं संभारियपुव्वभवे दुग्गुणाणीयसड्डुसंवेगे आणंदमुप्पण-
 णदणे समणं भगवं महावीरं तिवल्लुत्तो आ० २ वंदइ णमंसइ वं० २ एवं
 वयासी-एवमेयं भंते ! जाव से जहेयं तुज्जे वयहत्तिकदट्ठ उत्तरपुरत्थिमं दिसी-
 भागं अववकमइ सेसं जहा उसभदत्तस्स जाव सव्वदुक्खपह्णीणे, णवरं चोदस्स
 पुव्वाइं अहिज्जइ, ब्रहुपडिपुण्णाइं दुवालसवासाइं सामण्णपरियागं पाउणइ,
 तेस तं चेव । सेवं भंते ! सेवं भंते ! त्ति ॥ ४३१ ॥

एककारसं सयं बारसमो उद्देसो

तेणं कालेणं तेणं समएणं आलभिया णामं णयरी होत्था वण्णओ, संखवणे
 चेईए वण्णओ, तत्थ णं आलभियाए णयरीए बह्वे इसिभद्दुत्तपामोवखा
 समणोवासया परिवसंति, अज्जा जाव अपरिभूया अभिगयजीवाजीवा जाव विह-
 रंति । तए णं तेसिं समणोवासघाणं अण्णया कयाइ एगयओ सहियाणं समु-
 वागघाणं संणि (समु) विट्ठाणं सण्णिसण्णाणं अयमेयारूवे मिहो क्हासमुल्लावे
 समुप्पज्जित्था—देवलोएसु णं अज्जो ! देवाणं केवइयं कालं ठिई पण्णत्ता ?
 तए णं से इसिभद्दुत्ते समणोवासए देवद्विइगहियट्ठे ते समणोवासए एवं वयासी-
 देवलोएसु णं अज्जो ! देवाणं जहण्णेणं दसवाससहस्साइं ठिई पण्णत्ता, तेण
 परं समयाहिया दुसमयाहिया जाव दससमयाहिया संखेज्जसमयाहिया असंखेज्ज-
 समयाहिया उवकोसेणं तेत्तोसं सागरोवमाइं ठिई पण्णत्ता, तेण परं वोच्छिण्णा
 देवा य देवलोगा य । तए णं ते समणोवासया इसिभद्दुत्तस्स समणोवासगस्स
 एवमाइक्खमाणस्स जाव-एवं पख्खमाणस्स एयभट्ठं णो सदहंति णो पत्तिर्यति
 णो रोयंति एयमट्ठं असदहमाणा अपत्तिर्यमाणा अरोयमाणा जामेव दिंसिं पाउ-
 न्भूया तामेव दिंसिं पडिगया ॥ ४३२ ॥ तेणं कालेणं तेणं समएणं समणे भगवं
 महावीरे जाव समोसद्धे जाव परिसा पज्जुवासइ । तए णं ते समणोवासया
 इमीसे क्हाए लद्धुत्ता समाणा हट्टुत्ता एवं जहा तुंगिउद्देसए जाव पज्जुवासंति ।
 तए णं समणे भगवं महावीरे तेसिं समणोवासघाणं तीसे य महइ० धम्मक्हा
 जाव आणाए आराहए भवइ । तए णं ते समणोवासया समणस्स भगवओ
 महावीरस्स अंतियं धम्मं सोच्छा णिसम्म हट्टुत्ता उट्टाए उट्ठंति उ० २ ता
 समणं भगवं महावीरं वंदंति णमंसति वं० २ ता एवं वयासी—एवं खलु भंते !
 इसिभद्दुत्ते समणोवासए अमहं एवं आइक्खइ जाव पख्खेइ—देवलोएसु णं
 अज्जो ! देवाणं जहण्णेणं दस वाससहस्साइं ठिई पण्णत्ता तेण परं समयाहिया
 जाव तेण परं वोच्छिण्णा देवा य देवलोगा य, से कहमेयं भंते ! एवं ?
 अज्जोत्ति ! समणे भगवं महावीरे ते समणोवासए एवं वयासी—जण्णं अज्जो !
 इसिभद्दुत्ते समणोवासए तुब्भं एवं आइक्खइ जाव पख्खेइ—देवलोएसु णं
 अज्जो ! देवाणं जहण्णेणं दस वाससहस्साइं ठिई पण्णत्ता तेण परं समयाहिया

जाव तेण परं वोच्छिण्णा देवा य देवलोगा य, सच्चे णं एसमट्ठे, अहं पुण अज्जो ! एवमाइवत्तासि जाव परुवेमि-देवलोएमु णं अज्जो ! देवाणं जहण्णेणं इत्त वाससहस्साइं तं चेव जाव तेण परं वोच्छिण्णा देवा य देवलोगा य सच्चे णं एसमट्ठे । तए णं ते समणोवासया समणस्स भगवओ महावीरस्स अंतियं एयमट्ठं सोच्चा णिसम्म समणं भगवं महावीरं वंदति णमंसति वं० २ ता जेणेव इसिभट्टपुत्ते समणोवासए तेणेव उवागच्छति २ ता इसिभट्टपुत्ते समणोवासणं वंदति णमंसति थं० २ ता एयमट्ठं सम्मं विणएणं भुज्जो २ खामेति । तए णं ते समणोवासया पसिणाइं पुज्जंति २ ता अट्ठाइं परियाइयति अ० २ ता समणं भगवं महावीरं वंदति णमंसति थं० २ ता जामेव दिसि पाउद्वयया तामेव दिसं पडिगया ॥४३३॥ भंतेत्ति ! भगवं गोयमे समणं भगवं महावीरं वंदइ णमंसइ वं० २ ता एयं वयासी-पभू णं भंते ! इसिभट्टपुत्ते समणोवासए देवाणप्पियाणं अंतियं भुंजे भवित्ता अगाराओ अणसारियं पक्वइत्तए ? गोयमा ! णो इणट्ठे समट्ठे, गोयमा ! इसिभट्टपुत्ते णं समणोवासए ब्रह्मिह सोलव्वपभुणव्वयवेरमणपक्ववत्ताणथोसहोववासेहि अहापरिग्गहिएहि तवोरुम्महि अष्वाणं भावेमाणे बहूइं वासाइं समणोवासणपरियाणं पाउणिहिइ वं० २ ता मासियाए सलेहणाए अत्ताणं असेहिइ मा० २ ता सत्ति भत्ताइं अणशणाए छेदेहिइ २ ता आलोइयपडिक्कंते समाहिपत्ते कालमासे कालं किच्चा सोहम्मे कप्पे अहणासे विमाणे देवत्ताए उववज्जिहिइ, तत्थ णं अत्थेगइयाणं देयाणं चत्तारि पलिओवमाइं ठिई प०, तत्थ णं इसिभट्टपुत्तस्सवि देवस्स चत्तारि पलिओवमाइं ठिई भवित्त्सइ । से णं भंते ! इसिभट्टपुत्ते देवे ताओ देवलोगाओ आउवत्तएणं भववत्तएणं ठिइवत्तएणं जाव कहि उववज्जिहिइ ? गोयमा ! महाविदेहे वासे सिज्जिहिइ जाव अंतं काहिइ । सेवं भंते ! सेवं भंते ! ति भगवं गोयमे जाव अष्वाणं भावेमाणे विहरइ ॥४३४॥ तए णं समणे भगवं महावीरे अणया कयाइ आलभियाओ णयरीओ संखवणाओ चेइयाओ पडिणिवत्तमइ पडिणिवत्तमित्ता ब्रह्मिया जणवयविहारं विहरइ । तेणं कालेणं तेणं समएणं आलभिया णामं णयरी होत्था वण्णओ, तत्थ णं संखवणे णामं चेइए होत्था वण्णओ, तस्स णं संखवणस्स चेइयस्स अट्टरसाभंते योगले णामं परिव्वायाए परिवसइ रिउद्वेयजजुद्वेय जाव णएमु सुपरिणिट्टिए छट्ठंछट्ठेणं अणिवत्तएणं तवोरुम्मेणं उड्ढं बाहाओ जाव आयावेमाणे विहरइ । एए णं तस्स योगलस्स छट्ठंछट्ठेणं

जाव आयावेमाणस्स पगइ भइयाए जहा सिवस्स जाव विवभंगे णामं अण्णाणे समुप्पणे । से णं तेणं विवभंगेणं अण्णाणेणं समुप्पणेणं बंभलोए कप्पे देवाणं ठिई जाणइ पासइ । तए णं तस्स पोगलस्स परिड्वायगस्स अयमेयारूवे अज्झ-
त्थिए जाव समुप्पज्जित्था-अत्थि णं ममं अइसेसे णाणदंसणे समुप्पणे, देव-
लोएसु णं देवाणं जहण्णेणं दसवाससहस्साइं ठिई प०, तेण परं समयाहिया
दुसमयाहिया जाव असंखेज्जसमयाहिया उक्कोसेणं दससागरोवमाइं ठिई प०,
तेण परं वोच्छिण्णा देवा य देवलोगा य, एवं संपेहेइ २ ता आयावणभूमिओ
पच्चोरुहइ आ० २ ता तिवंडकुंडिया जाव धाउरत्ताओ य गेणहइ २ ता जेणेव
आलभिया णयरो जेणेव परिड्वायगावसहे तेणेव उवागच्छइ २ ता भंडणि-
क्खेवं भं० २ ता आलभियाए णयरोए सिंघाडग जाव पहेसु अणमण्णस्स एव-
माइक्खइ जाव परूवेइ-अत्थि णं देवाणुप्पिया ! ममं अइसेसे णाणदंसणे समु-
प्पणे, देवलोएसु णं देवाणं जहण्णेणं दसवाससहस्साइं तहेव जाव वोच्छिण्णा
देवा य देवलोगा य । तए णं आलभियाए णयरोए एएणं अभिलावेणं जहा
सिवस्स तं चेव जाव से कहमेयं मणे एवं ? सामी समोसढे जाव परिसा पडिगया,
भगवं गोयमे तहेव भिक्खायारियाए तहेव बहुजणसइं णिसामेइ तहेव बहुजणसइं
णिसामेत्ता तहेव सव्वं भाणियव्वं जाव अहं पुण गोयमा ! एवं आइक्खामि एवं
भासाभि जाव परूवेमि-देवलोएसु णं देवाणं जहण्णेणं दस वाससहस्साइं ठिई
पणत्ता, तेण परं समयाहिया दुसमयाहिया जाव उक्कोसेणं तेत्तीसं सागरोव-
माइं ठिई पणत्ता, तेण परं वोच्छिण्णा देवा य देवलोगा य । अत्थि णं
भंते ! सोहम्मे कप्पे दग्वाइं सवण्णाइंपि अवण्णाइंपि तहेव जाव हुंता अत्थि,
एवं ईसाणेवि, एवं जाव अच्चुए, एवं गेवेज्जविमाणेसु अणुत्तरविमाणेसु
वि ईसिपवभाराएवि जाव हुंता अत्थि । तए णं सा महइमहालिया जाव पडि-
गया । तए णं आलभियाए णयरोए सिंघाडगतिय० अवसेसं जहा सिवस्स जाव
सव्वदुक्खप्पहोणे णवरं तिवंडकुंडियं जाव धाउरत्तवत्थपरिहिए परिवडिय-
विभंगे आलभियं णयरं मज्झमज्जेणं णिग्गच्छइ जाव उत्तरपुरत्थिमं विसीभागं
अवक्कमइ २ ता तिवंडं कुंडियं च जहा खंओ जाव पव्वइओ सेसं जहा सिवस्स
जाव अग्वाबाहं सोक्खं अणुभवन्ति सासयं सिद्धा । सेवं भंते ! २ त्ति ॥४३५॥

एक्कारसं सयं समत्तं

बारसमं सयं पढमो उट्टेसो

संखे १ जयति २ पुढवी ३ पोगल ४ अइवाय ५ राहु ३ लोगे य ७ ।
 पागे य ८ देव ९ आया १० बारसमसए दसुट्टेसा ॥१॥ तेणं कालेणं तेणं समएणं
 सावत्थी णयरी होत्था वण्णओ, कोट्टए चेइए वण्णओ, तत्थ णं सावत्थीए
 णयरीए बह्वे संखप्पामोवखा समणोवासया परिवसंति, अट्टा जाव अपरिभूया
 अभिगयजीवाजीवा जाव विहरंति । तस्स णं संखस्स समणोवासगस्स उप्पला णामं
 भारिया होत्था, सुकुमाल जाव मुरुवा समणोवासिया अभिगयजीवाजीवा जाव
 विहरइ । तत्थ णं सावत्थीए णयरीए पोवल्ली णामं समणोवासए परिवसइ
 अट्टे अभिगय जाव विहरइ । तेणं कालेणं तेणं समएणं सामी ससोसठे परिसा
 णिग्गया जाव पज्जुवासइ । तए णं ते समणोवासया इमीसे कहाए जहा
 आलभियाए जाव पज्जुवासंति, तए णं समणे भगवं महावीरे तैसि समणोवास-
 गाणं तीसे य महइ० धम्मकहा जाव परिसा पडिगया । तए णं ते समणोवासया
 समणस्स भगवओ महावीरस्स अंतियं धम्मं सोच्चा णिसम्म हट्टुट्टा समणं
 भगवं महावीरं वंदंति णमंसंति वं० २ ता पसिणाइं पुच्छंति २ ता अट्टाईं
 परियाइयंति अ० २ ता उट्टाए उट्टेति उ० २ ता समणस्स भगवओ महा-
 वीरस्स अंतियाओ कोट्टयाओ चेइयाओ पडिणिक्खमंति २ ता जेणेव सावत्थी
 णयरी तेणेव पहारेत्थ गमणाए ॥४३६॥ तए णं से संखे समणोवासए ते समणो-
 वासए एवं वयासी-तुंभे णं देवाणुप्पिया ! विउलं असणं पाणं खाइमं साइमं
 उवक्खडावेह, तए णं अम्हे तं विउलं असणं पाणं खाइमं साइमं आसाएमाणा
 विस्साएमाणा परिभुंजेमाणा परिभाएमाणा पक्खियं पोसहं पडिजागरमाणा
 विहरिस्सामो । तएणं ते समणोवासया संखस्स समणोवासगस्स एयमट्ठं विण-
 एणं पडिसुणेंति । तए णं तस्स संखस्स समणोवासगस्स अयमेयाह्वे अज्झत्थिए
 जाव समुप्पज्जत्था--णो खलु मे सेयं तं विउलं असणं जाव साइमं आसाएमाणस्स
 ४ पक्खियं पोसहं पडिजागरमाणस्स विहरित्तए, सेयं खलु मे पोसहूसात्ताए
 पोसहियस्स बंभयारिस्स उम्मुक्कणिसुवण्णस्स ववगयमात्तावण्णगविलेवणस्स
 णिक्खित्तसत्थमसलस्स एगस्स अबिइयस्स दब्भसंथारोवगयस्स पक्खियं पोसहं
 पडिजागरमाणस्स विहरित्तएत्तिकट्टु एवं सपेहेइ २ ता जेणेव सावत्थी णयरी

जेणेव सए गिहे जेणेव उप्पला समणोवासिया तेणेव उवागच्छइ २ ता उप्पलं
समणोवासियं आपुच्छइ २ ता जेणेव पोसहसाला तेणेव उवागच्छइ २ ता पोस-
हसालं अणुपविसइ २ ता पोसहसालं पमज्जइ पो० २ उच्चारपासवणभूमिं पडि-
लेहेइ उ० २ ता दब्भसंथारगं संथरइ दब्भ० ता दब्भसंथारगं दुरुहइ २ ता पोस-
हसालाए पोसहिए बंभयारी जाव पक्खियं पोसहं पडिजागरमाणे विहरइ । तए
णं ते समणोवासिया जेणेव सावत्थी णयरी जेणेव साइं २ गिहाइं तेणेव उवा-
गच्छंति २ ता विउलं असणं पाणं खाइमं साइमं उवक्खडावेति २ ता अणमण्णं
सद्दावेति अ० २ एवं वयासी—एवं खलु देवाणुप्पिया ! अम्हेहिं से विउले
असणपाणखाइमसाइमे उवक्खडाविए, संखे य णं समणोवासए णो हव्वमागच्छइ,
तं सेयं खलु देवाणुप्पिया ! अम्हं संखं समणोवासयं सद्दावेत्तए । तए णं से
पोक्खली समणोवासए ते समणोवासए एवं वयासी—अच्छह णं तुब्भे देवाणु-
प्पिया ! सुणिव्वया वीसत्था अहण्णं संखं समणोवासयं सद्दावेमिच्चिकट्टु तेसि
समणोवासमाणं अंतियाओ पडिणिक्खमइ २ ता सावत्थीए णयरीए मज्झंमज्झेणं
जेणेव संखस्स समणोवासिगस्स गिहे तेणेव उवागच्छइ २ ता संखस्स समणो-
वासिगस्स गिहं अणुपविट्ठे । तए णं सा उप्पला समणोवासिया पोक्खलि
समणोवासयं एज्जमाणं पासइ २ ता हट्टुट्टु आसणाओ अम्भुट्ठेइ २ ता
सत्तट्टुपयाइं अणुगच्छइ २ ता पोक्खलि समणोवासयं वंदइ णमंसइ वं० २ ता
आसणेणं उवणिमंतेइ आ० २ ता एवं वयासी—संविंसंतु णं देवाणुप्पिया !
किमागमणप्पओयणं ? तए णं से पोक्खली समणोवासए उप्पलं समणोवासियं
एवं वयासी—कहिण्णं देवाणुप्पिए ! संखे समणोवासए ? तए णं सा उप्पला
समणोवासिया पोक्खलि समणोवासयं एवं वयासी—एवं खलु देवाणुप्पिया !
संखे समणोवासए पोसहसालाए पोसहिए बंभयारी जाव विहरइ । तए णं से
पोक्खली समणोवासए जेणेव पोसहसाला जेणेव संखे समणोवासए तेणेव उवा-
गच्छइ २ ता गमणागमणाए पडिक्कमइ ग० ता संखं समणोवासयं वंदइ
णमंसइ वं० २ ता एवं वयासी—एवं खलु देवाणुप्पिया ! अम्हेहिं से विउले
असण जाव साइमे उवक्खडाविए तं गच्छामो णं देवाणुप्पिया ! तं विउलं
अंसणं जाव साइमं आसाएमाणा जाव पडिजागरमाणा विहरामो । तए णं से संखे
समणोवासए पोक्खलि समणोवासयं एवं वयासी—णो खलु कप्पइ देवाणु-

प्यिया ! तं विउलं असणं पाणं खाइमं साइमं आसाएमाणस्स जाव पडिजागरमा-
णस्स विहरित्तए, कप्पइ मे पोसहसालाए पोसहियस्स जाव विहरित्तए, तं
छुदेणं देवाणुप्पिया ! तुव्भे तं विउलं असणं पाणं खाइमं साइमं आसाएमाणा
जाव विहरह । तए णं से पोवखली समणोवासए सखस्स समणोवासगस्स अंति-
याओ पोसहसालाओ पडिणिकखमइ २ ता सावत्थि णयरिं मज्झंमज्जेणं जेणेव
ते समणोवासया तेणेव उवागच्छइ २ ता ते समणोवासए एवं वयासी—एवं
खलु देवाणुप्पिया ! संखे समणोवासए पोसहसालाए पोसहिए जाव विहरइ,
तं छुदेणं देवाणुप्पिया ! तुव्भे विउलं असणपाणखाइमसाइमं जाव विहरह,
संखे णं समणोवासए णो हव्वमागच्छइ । तए णं ते समणोवासया तं विउलं
असणं ४ आसाएमाणा जाव विहरति । तए णं तस्स संखस्स समणोवासगस्स
पुव्वरत्तावरत्तकालसमयंसि धम्मजागरियं जागरमाणस्स अयमेयाह्वे जाव
समुप्पज्जित्था—सेयं खलु मे कल्लं जाव जलंते समणं भगवं महावीरं वंदित्ता
णमंसित्ता जाव पज्जुवासित्ता तओ पडिणियत्तस्स पक्खयं पोसहं पारित्तए
त्तिकट्टु एवं संपेहेइ २ ता कल्लं जाव जलंते पोसहसालाओ पडिणिकखमइ २
त्ता सुद्धप्पावेसाइं मंगल्लाइं वरथाइं पवरपरिहिए सयाओ गिहाओ पडिणिकख-
मइ सयाओ गिहाओ पडिणिकखमित्ता पायविहारचारेणं तावत्थि णयरिं मज्झं-
मज्जेणं जाव पज्जुवासइ । अभिगमो णत्थि । तए णं ते समणोवासया कल्लं
पाउप्पभायाए जाव जलंते ण्हाया कयबलिकम्मा जाव सरीरा सएहिं-सएहिं गेहे-
हित्तो पडिणिकखमंति २ ता स० एगयओ मित्तायंति २ ता सेसं जहा पढमं जाव
पज्जुवासंति । तए णं समणे भगवं महावीरे तेसिं समणोवासगणं तीसे य धम्म-
कहा जाव आणाए आराहए भवइ । तए णं ते समणोवासया समणत्स भग-
वओ महावीरस्स अंतियं धम्मं सोच्चा णिसम्म हट्टुट्टा उट्टाए उट्ठंति २ ता
समणं भगवं महावीरं वंदंति णमंसंति वं० २ ता जेणेव संखे समणोवासए
तेणेव उवागच्छंति २ ता संखं समणोवासयं एवं वयासी—तुमं देवाणुप्पिया !
हिज्जो अम्हे अप्पणा चेव एवं वयासी—तुम्हे णं देवाणुप्पिया ! विउलं असणं जाव
विहरिस्सामो, तए णं तुमं पोसहसालाए जाव विहरिए तं सुट्ठुणं तुमं देवाणु-
प्पिया ! अम्हं हीलसि । अज्जोत्ति ! समणे भगवं महावीरे ते समणोवासए एवं
वयासी—मा णं अज्जो ! तुव्भे संखं समणोवासयं हीलह णिदह खिसह गरहह

अवभण्णह, संखे णं समणोवासए पियधम्मे चेव दधधम्मे चेव सुदक्खुजागरियं जागरिए ॥ ४३७ ॥ भंतेति ! भगवं गोयमे समणं भगवं महावीरं वंदइ णमंसइ वं० २ ता एवं वयासी-कइविहा णं भंते ! जागरिया प० ? गोयमा ! तिविहा जागरिया प०, तंजहा-बुद्धजागरिया, अबुद्धजागरिया, सुदक्खुजागरिया । से केणट्ठेणं भंते ! एवं वुच्चइ तिविहा जागरिया प०, तंजहा-बुद्धजागरिया १ अबुद्धजागरिया २ सुदक्खुजागरिया ३ ? गोयमा ! जे इमे अरिहंता भगवंतो उप्पण्णणाणदंसणधरा जहा खंदए जाव सव्वण्णू सव्वदरिसी एए णं बुद्धा बुद्ध-जागरियं जागरंति, जे इमे अणगारा भगवंतो इरियासमिया भासासमिया जाव गुत्तवंभयारी एए णं अबुद्धा अबुद्धजागरियं जागरंति, जे इमे समणोवासया अभिगयजीवाजीवा जाव विहरंति एए णं सुदक्खुजागरियं जागरंति, से तेणट्ठेणं गोयमा ! एवं वुच्चइ तिविहा जागरिया जाव सुदक्खुजागरिया ॥ ४३८ ॥ तए णं से संखे समणोवासए समणं भगवं महावीरं वंदइ णमंसइ वदिता णमं-एवं वयासी-कोहवसट्ठे णं भंते ! जीवे किं बंधइ किं पकरेइ किं चिणाइ किं उवचिणाइ ? संखा ! कोहवसट्ठे णं जीवे आउयवज्जाओ सत्त कम्मपय-डीओ सिद्धित्त्वबंधणबद्धाओ एवं जहा पढमसए असंबुडस्स अणगारस्स जाव अणु-परियट्ठइ । माणवसट्ठे णं भंते ! जीवे एवं चेव । एवं मायावसट्ठेवि, एवं लोभ-वसट्ठेवि जाव अणुपरियट्ठइ । तए णं ते समणोवासया समणस्स भगवओ महा-वीरस्स अंतियं एयमट्ठं सोच्चा णिसम्म मीया तत्था तसिया संसारभउव्विग्गा समणं भगवं महावीरं वंदंति णमंसंति वं० २ ता जेणेव संखे समणोवासए तेणेव उवागच्छंति २ ता संखं समणोवासयं वंदंति णमंसंति वं० २ ता एय-मट्ठं सम्मं विणएणं भुज्जो २ खामेंति । तए णं ते समणोवासया सेसं जहा आलभिधाए जाव पडिगया । भंते ! त्ति भगवं गोयमे समणं भगवं महावीरं वंदइ णमंसइ वं० २ ता एवं वयासी-पभू णं भंते ! संखे समणोवासए देवाणु-प्पियाणं अंतियं सेसं जहा इसिभइपुत्तस्स जाव अंतं काहिइ । सेवं भंते ! सेवं भंते ! त्ति जाव विहरइ ॥ ४३९ ॥

बारसमं सयं बीओ उट्ठेसो

तेणं कालेणं तेणं समएणं कोसंबी णामं णयरी होत्था वण्णओ, चंदोवतरणे चेइए वण्णओ, तत्थ णं कोसंबीए णयरीए सहस्साणीयस्स

रण्णो पोत्ते सयाणीयस्स रण्णो पुत्ते चेडगस्स रण्णो णत्तए मियावईए देवीए अत्तए जयंतीए समणोवासियाए भत्तिज्जए उदायणे णामं राया हीत्था वण्णओ, तत्थ णं कोसंबीए णयरीए सहस्सानीयस्स रण्णो सुण्हा सयाणीयस्स रण्णो भज्जा चेडगस्स रण्णो धूया उदायणस्स रण्णो माया जयंतीए समणोवासियाए भाउज्जा मियावई णामं देवी हीत्था वण्णओ सुकुमाल जाव मुरूवा समणो-वासिया जाव विहरइ । तत्थ णं कोसंबीए णयरीए सहस्सानीयस्स रण्णो धूया सयाणीयस्स रण्णो भगिणी उदायणस्स रण्णो पिउच्छा मियावईए देवीए णगंदा वेयालीसावयाणं अरहंताणं पुब्बसिज्जायरी जयंती णामं समणोवासिया हीत्था सुकुमाल जाव मुरूवा अभिगय जाव विहरइ ॥ ४४० ॥ तेणं कालेणं तेणं जम-एणं सामी समोसडे जाव परिसा पज्जुवासइ । तए णं से उदायणे राया इमीसे कहाए लद्धट्ठे समणे हट्टुत्तुट्ठे कोडुंबियपुरिसे सट्ठावेइ २ ता एवं वयासी-खिप्पामेव भो देवाणुप्पिया ! कोसंबि णयरिं सत्तिभतरवाहिरियं० एवं जहा कूणओ तहेव सव्वं जाव पज्जुवासइ । तए णं सा जयंती समणोवासिया इमीसे कहाए लद्धट्ठा समाणी हट्टुत्तुट्ठा जेणेव मियावई देवी तेणेव उवागच्छइ २ ता मियावई देवि एवं वयासी-एवं जहा णवमसए उसभदत्तो जाव भवि-स्सइ । तए णं सा मियावई देवी जयंतीए समणोवासियाए जहा देवाणंदा जाव पडिसुणेइ । तए णं सा मियावई देवी कोडुंबियपुरिसे सट्ठावेइ २ ता एवं वयासी-खिप्पामेव भो देवाणुप्पिया ! लहुकरणजुसजोइय जाव धम्मियं जाणप्प-वरं जुत्तामेव उवट्टवेह जाव उवट्टवेति जाव पच्चप्पिणंति । तए णं सा मिया-वई देवी जयंतीए समणोवासियाए सत्ति ण्हाया कयबलिकम्मा जाव सरीरा बह्हाहि खुज्जाहि जाव अंतेउराओ णिग्गच्छइ २ ता जेणेव बाहिरिया उवट्टाण-साला जेणेव धम्मिए जाणप्पवरे तेणेव उवागच्छइ २ ता जाव दुरूढा । तए णं सा मियावई देवी जयंतीए समणोवासियाए सत्ति धम्मियं जाणप्पवरं दुरूढा समाणी णियगपरियाल० जहा उसभदत्तो जाव धम्मियाओ जाणप्पवराओ पच्चोच्छइ । तए णं सा मियावई देवी जयंतीए समणोवासियाए सत्ति बह्हाहि खुज्जाहि जहा देवाणंदा जाव वंदइ णमंसइ उदायणं रायं पुरओ कटट्टु ठिइया चेव जाव पज्जुवासइ । तए णं समणे भगवं महावीरे उदायणस्स रण्णो मिया-वईए देवीए जयंतीए समणोवासियाए तीसे य महइ० जाव धम्मं परिकहेइ जाव परिसा पडिगया उदायणे पडिगए मियावई देवीवि पडिगया ॥ ४४१ ॥

तए णं सा जयंती समणोवासिया समणस्स भगवओ महावीरस्स अंतियं धम्मं सोच्चा णिसम्म हट्ठुट्ठा समणं भगवं महावीरं बंदइ णमंसइ वं० २ ता एवं वप्रासी—कहणं भंते ! जीवा गरुयत्तं हव्वमागच्छंति ? जयंती ! पाणाइ-वाएणं जाव मिच्छादंसणसल्लेणं, एवं खलु जीवा गरुयत्तं हव्वमागच्छंति एवं जहा पढमसए जाव बीईवयंति । भवसिद्धियत्तणं भंते ! जीवाणं किं सभावओ परिणामओ ? जयंती ! सभावओ णो परिणामओ । सव्वेवि णं भंते ! भव-सिद्धिया जीवा सिञ्जिस्संति ? हंता जयंती ! सव्वेवि णं भवसिद्धिया जीवा सिञ्जिस्संति । जइ णं भंते ! सव्वेवि भवसिद्धिया जीवा सिञ्जिस्संति तम्हा णं भवसिद्धियविरहिए लोए भवस्सइ ? णो इणट्ठे समट्ठे । से केणं खाइएणं अट्ठे णं भंते ! एवं वुच्चइ सव्वेवि णं भवसिद्धिया जीवा सिञ्जिस्संति णो चेव णं भवसिद्धियविरहिए लोए भवस्सइ ? जयंती ! से जहाणामए सव्वागास-सेढो सिया अणाइया अणवदग्गा परित्ता परिवुडा सा णं परमाणुयोगलमेत्तेहिं खंडेहिं समए २ अवहीरमाणो २ अणंताहिं उस्सप्पिणीओसप्पिणीहिं अवहीरति णो चेव णं अवहिया सिया, से तेणट्ठेणं जयंती ! एवं वुच्चइ—सव्वेवि णं भव-सिद्धिया जीवा सिञ्जिस्संति णो चेव णं भवसिद्धियविरहिए लोए भवस्सइ । सुत्तं भंते ! साहू जागरियत्तं साहू ? जयंती ! अत्थेगइयाणं जीवाणं सुत्तं साहू अत्थेगइयाणं जीवाणं जागरियत्तं साहू । से केणट्ठेणं भंते ! एवं वुच्चइ अत्थेगइयाणं जाव साहू ? जयंती ! जे इमे जीवा अहम्मिया अहम्माणुया अहम्मिद्वा अहम्मक्खाई अहम्मपलोई अहम्मपलज्जमाणा अहम्मसमुदायारा अहम्मेणं चेव वित्ति कप्पेमाणा विहरंति एएसि णं जीवाणं सुत्तं साहू, एए णं जीवा सुत्ता समाणा णो बहूणं पाणभूयजीवसत्ताणं दुक्खणयाए सोयणयाए जाव परियावणयाए वट्ठंति, एए णं जीवा सुत्ता समाणा अप्पाणं वा परं वा तदुभयं वा णो बहूहिं अहम्मियाहिं संजोयणाहिं संजोएत्तारो भवंति, एएसि जीवाणं सुत्तं साहू । जयंती ! जे इमे जीवा धम्मिया धम्माणुया जाव धम्मेणं चेव वित्ति कप्पेमाणा विहरंति एएसि णं जीवाणं जागरियत्तं साहू, एए णं जीवा जागरा समाणा बहूणं पाणाणं जाव सत्ताणं अदुक्खणयाए जाव अपरियावणयाए वट्ठंति, ते णं जीवा जागरमाणा अप्पाणं वा परं वा तदुभयं वा बहूहिं धम्मियाहिं संजोयणाहिं संजोएत्तारो भवंति, एए णं जीवा जागरमाणा

धम्मजागरियाए अप्पाणं जागरइत्तारो भवति, एएसि णं जीवाणं जागरियत्तं साहू, से तेणट्ठेणं जयंती ! एवं वुच्चइ अत्थेगइयाणं जीवाणं सुत्तत्तं साहू अत्थेगइयाणं जीवाणं जागरियत्तं साहू । बलियत्तं भंते ! साहू, दुब्बलियत्तं साहू ? जयंती ! अत्थेगइयाणं जीवाणं बलियत्तं साहू अत्थेगइयाणं जीवाणं दुब्बलियत्तं साहू । से केणट्ठेणं भंते ! एवं वुच्चइ जाव साहू ? जयंती ! जे इमे जीवा अहम्मिया जाव विहरंति एएसि णं जीवाणं दुब्बलियत्तं साहू, एए णं जीवा एवं जहा सुत्तस्स तहा दुब्बलियस्स वत्तव्वया भाणियव्वा, बलियस्स जहा जागरस्स तहा भाणियव्वं जाव संजोएत्तारो भवति, एएसि णं जीवाणं बलियत्तं साहू, से तेणट्ठेणं जयंती ! एवं वुच्चइ तं चेव जाव साहू । दक्खत्तं भंते ! साहू आलसियत्तं साहू ? जयंती ! अत्थेगइयाणं जीवाणं दक्खत्तं साहू अत्थेगइयाणं जीवाणं आलसियत्तं साहू । से केणट्ठेणं भंते ! एवं वुच्चइ तं चेव जाव साहू ? जयंती ! जे इमे जीवा अहम्मिया जाव विहरंति एएसि णं जीवाणं आलसियत्तं साहू, एए णं जीवा आलसा समाणा णो बहूणं जहा सुत्ता तहा आलसा भाणियव्वा, जहा जागरा तहा दक्खा भाणियव्वा जाव संजोएत्तारो भवति, एए णं जीवा दक्खा समाणा बहूहि आपरियवेयावच्चेहि उवञ्जाय० थेर० तवस्सि० गिलाणवेयावच्चेहि सेहवेयावच्चेहि कुलवेयावच्चेहि गणवेयावच्चेहि संघवेयावच्चेहि साहम्मियवेयावच्चेहि अत्ताणं संजोएत्तारो भवति, एएसि णं जीवाणं दक्खं साहू, से तेणट्ठेणं तं चेव जाव साहू । सोइंदियवसट्ठे णं भंते ! जीवे किं बंधइ ? एवं जहा कोहवसट्ठे तहेव जाव अणुपरियट्ठइ । एवं चिख्खदियवसट्ठेवि, एवं जाव फांसिदियवसट्ठेवि जाव अणुपरियट्ठइ । तए णं सा जयंती समणोवासिया समणस्स भगवओ महावीरस्स अंतियं एयमट्ठं सोच्चा गिसम्म हट्टुत्तुत्ता सेसं जहा देवाणंदाए तहेव पम्बइया जाव सव्वदुक्ख-प्पहीणा । सेवं भंते ! २ त्ति ॥ ४४२ ॥

बारसमं सयं तइओ उट्ठेसो

रायगिहे जाव एवं वयासी-कइ णं भंते ! पुढवीओ पण्णत्ताओ ? गोयमा ! सत्त पुढवीओ पण्णत्ताओ, तंजहा-पढमा दोच्चा जाव सत्तमा । पढमा णं भंते ! पुढवी किणामा किणोत्ता पण्णत्ता ? गोयमा ! धम्मा णामेणं रयणप्यभा गोत्तेणं, एवं जहा जीवाभिगभे पढमो णेरइयउट्ठेसओ सो चेव णिरवसेसो भाणियव्वो जाव अप्पाबहुगंति । सेवं भंते ! सेवं भंते ! त्ति ॥ ४४३ ॥

बारसमं सयं चउत्थो उद्देसो

रायगिहे जाव एवं वयासी-दो भंते ! परमाणुपोगला एगयओ साहण्णंति एगयओ साहण्णत्ता कि भवइ ? गोयमा ! दुप्पएसिए खंधे भवइ, से भिज्जमाणे दुहा कज्जइ एगयओ परमाणुपोगले एगयओ परमाणुपोगले भवइ । तिण्णि भंते ! परमाणुपोगला एगयओ साहण्णंति ? ता कि भवइ ? गोयमा ! तिपएसिए खंधे भवइ, से भिज्जमाणे दुहावि तिहावि कज्जइ, दुहा कज्जमाणे एगयओ परमाणुपोगले एगयओ दुपएसिए खंधे भवइ, तिहा कज्जमाणे तिण्णि परमाणुपोगला भवति । चत्तारि भंते ! परमाणुपोगला एगयओ साहण्णंति० पुच्छा, गोयमा ! चउपएसिए खंधे भवइ, से भिज्जमाणे दुहावि तिहावि चउहावि कज्जइ, दुहा कज्जमाणे एगयओ परमाणुपोगले एगयओ तिपएसिए खंधे भवइ, अहवा दो दुपएसिया खंधा भवति, तिहा कज्जमाणे एगयओ दो परमाणुपोगला एगयओ दुप्पएसिए खंधे भवइ, चउहा कज्जमाणे चत्तारि परमाणुपोगला भवति । पंच भंते ! परमाणुपोगला० पुच्छा, गोयमा ! पंचपएसिए खंधे भवइ, से भिज्जमाणे दुहावि तिहावि चउहावि पंचहावि कज्जइ, दुहा कज्जमाणे एगयओ परमाणुपोगले एगयओ चउपएसिए खंधे भवइ अहवा एगयओ दुपएसिए खंधे भवइ एगयओ तिपएसिए खंधे भवइ, तिहा कज्जमाणे एगयओ दो परमाणुपोगला एगयओ तिपएसिए खंधे भवइ अहवा एगयओ परमाणुपोगले एगयओ दो दुपएसिया खंधा भवति, चउहा कज्जमाणे एगयओ तिण्णिपरमाणुपोगला एगयओ दुप्पएसिए खंधे भवइ, पंचहा कज्जमाणे पंच परमाणुपोगला भवति । छठभंते ! परमाणुपोगला० पुच्छा, गोयमा ! छप्पएसिए खंधे भवइ, से भिज्जमाणे दुहावि तिहावि जाव छठ्विहावि कज्जइ, दुहा कज्जमाणे एगयओ परमाणुपोगले एगयओ पंचपएसिए खंधे भवइ अहवा एगयओ दुप्पएसिए खंधे एगयओ चउपएसिए खंधे भवइ अहवा दो तिपएसिया खंधा भवति, तिहा कज्जमाणे एगयओ दो परमाणुपोगला एगयओ चउपएसिए खंधे भवइ अहवा एगयओ परमाणुपोगले एगयओ दुपएसिए खंधे एगयओ तिपएसिए खंधे भवइ अहवा तिण्णि दुपएसिया खंधा भवति, चउहा कज्जमाणे एगयओ तिण्णि परमाणुपोगला एगयओ तिपएसिए खंधे भवइ अहवा एगयओ दो परमाणुपोगला भवति एगयओ दो दुप्पएसिया खंधा भवति,

पंचहा कज्जमाणे एगयओ चत्तारि परमाणुपोगला एगयओ दुपएसिए खंधे भवइ, छहा कज्जमाणे छ परमाणुपोगला भवन्ति । सत्त भन्ते ! परमाणु-पोगला० पुच्छा, गोयमा ! सत्तपएसिए खंधे भवइ, से भिज्जमाणे दुहावि जाव सत्तहावि कज्जइ, दुहा कज्जमाणे एगयओ परमाणुपोगले एगयओ छप्पएसिए खंधे भवइ, अहवा एगयओ दुप्पएसिए खंधे भवइ एगयओ पंचपएसिए खंधे भवइ अहवा एगयओ तिप्पएसिए खंधे एगयओ चउपएसिए खंधे भवइ, तिहा कज्जमाणे एगयओ दो परमाणुपोगला एगयओ पंचपएसिए खंधे भवइ अहवा एगयओ परमाणुपोगले एगयओ दुपएसिए खंधे एगयओ चउपएसिए खंधे भवइ अहवा एगयओ परमाणुपोगले, एगयओ दो तिपएसिया खंधा भवन्ति अहवा एगयओ दो दुपएसिया खंधा भवन्ति एगयओ तिपएसिए खंधे भवइ, चउहा कज्जमाणे एगयओ तिण्णि परमाणुपोगला एगयओ चउप्पएसिए खंधे भवइ अहवा एगयओ दो परमाणुपोगला एगयओ दुपएसिए खंधे एगयओ तिपएसिए खंधे भवइ अहवा एगयओ परमाणुपोगले एगयओ तिण्णि दुपएसिया खंधा भवन्ति, पंचहा कज्जमाणे एगयओ चत्तारि परमाणुपोगला एगयओ तिपएसिए खंधे भवइ अहवा एगयओ तिण्णि परमाणुपोगला एगयओ दो दुपएसिया खंधा भवन्ति, छहा कज्जमाणे एगयओ पंच परमाणु-पोगला एगयओ दुपएसिए खंधे भवइ, सत्तहा कज्जमाणे सत्त परमाणुपोगला भवन्ति । अट्ट भन्ते ! परमाणुपोगला० पुच्छा, गोयमा ! अट्टपएसिए खंधे भवइ जाव दुहा कज्जमाणे एगयओ परमाणुपोगले एगयओ सत्तपएसिए खंधे भवइ अहवा एगयओ दुपएसिए खंधे एगयओ छप्पएसिए खंधे भवइ अहवा एगयओ तिपएसिए खंधे एगयओ पंचपएसिए खंधे भवइ अहवा दो चउप्प-एसिया खंधा भवन्ति, तिहा कज्जमाणे एगयओ दो परमाणुपोगला भवन्ति एग-यओ छप्पएसिए खंधे भवइ अहवा एगयओ परमाणुपोगले एगयओ दुप्पएसिए खंधे एगयओ पंचपएसिए खंधे भवइ अहवा एगयओ परमाणुपोगले एगयओ तिपएसिए खंधे एगयओ चउपएसिए खंधे भवइ अहवा एगयओ दो दुपएसिया खंधा एगयओ चउप्पएसिए खंधे भवइ अहवा एगयओ दुपएसिए खंधे एगयओ दो तिपएसिया खंधा भवन्ति, चउहा कज्जमाणे एगयओ तिण्णि-परमाणुपोगला एगयओ पंचपएसिए खंधे भवइ अहवा एगयओ दोण्णि परमाणुपोगला एगयओ

दुपएसिए खंधे एगयओ चउप्पएसिए खंधे भवइ अहवा एगयओ दो परमाणु-
 पोगला एगयओ दो तिपएसिया खंधा भवन्ति अहवा एगयओ परमाणुपोगले
 एगयओ दो दुपएसिया खंधा एगयओ तिपएसिए खंधे भवइ अहवा चत्तारि
 दुपएसिया खंधा भवन्ति, पंचहा कज्जमाणे एगयओ चत्तारि परमाणुपोगला
 एगयओ चउप्पएसिए खंधे भवइ अहवा एगयओ तिण्णि परमाणुपोगला
 एगयओ दुपएसिए खंधे एगयओ तिपएसिए खंधे भवइ अहवा एगयओ दो पर-
 माणुपोगला एगयओ तिण्णि दुपएसिया खंधा भवन्ति, छहा कज्जमाणे एगयओ
 पंच परमाणुपोगला एगयओ तिपएसिए खंधे भवइ अहवा एगयओ चत्तारि
 परमाणुपोगला एगयओ दो दुपएसिया खंधा भवन्ति सत्तहा कज्जमाणे एगयओ
 छ परमाणुपोगला एगयओ दुपएसिए खंधे भवइ अट्टहा कज्जमाणे अट्ट पर-
 माणुपोगला भवन्ति । णव भन्ते ! परमाणुपोगला० पुच्छा, गोयमा ! जाव
 णवविहा कज्जन्ति, दुहा कज्जमाणे एगयओ परमाणुपोगले एगयओ अट्टपएसिए
 खंधे भवइ, एवं एक्केक्कं संचारैतेहि जाव अहवा एगयओ चउप्पएसिए
 खंधे एगयओ पंचपएसिए खंधे भवइ, तिहा कज्जमाणे एगयओ दो पर-
 माणुपोगला एगयओ सत्तपएसिए खंधे भवइ अहवा एगयओ परमाणुपोगले
 एगयओ दुपएसिए खंधे एगयओ छप्पएसिए खंधे भवइ अहवा एगयओ पर-
 माणुपोगले एगयओ तिपएसिए खंधे एगयओ पंचपएसिए खंधे भवइ अहवा
 एगयओ परमाणुपोगले एगयओ दो चउप्पएसिया खंधा भवन्ति अहवा एग-
 यओ दुपएसिए खंधे एगयओ तिपएसिए खंधे एगयओ चउप्पएसिए खंधे भवइ
 अहवा तिण्णि तिपएसिया खंधा भवन्ति, चउहा कज्जमाणे एगयओ तिण्णि
 परमाणुपोगला एगयओ छप्पएसिए खंधे भवइ अहवा एगयओ दो परमाणु-
 पोगला एगयओ दुपएसिए खंधे एगयओ पंचपएसिए खंधे भवइ अहवा एग-
 यओ दो परमाणुपोगला एगयओ तिपएसिए खंधे एगयओ चउप्पएसिए खंधे
 भवइ अहवा एगयओ परमाणुपोगले एगयओ दो दुपएसिया खंधा एगयओ
 चउप्पएसिए खंधे भवइ अहवा एगयओ परमाणुपोगले एगयओ दुपएसिए खंधे
 एगयओ दो तिपएसिया खंधा भवन्ति अहवा एगयओ तिण्णि दुप्पएसिया खंधा
 एगयओ तिपएसिए खंधे भवइ, पंचहा कज्जमाणे एगयओ चत्तारि परमाणु-
 पोगला एगयओ पंचपएसिए खंधे भवइ अहवा एगयओ तिण्णि परमाणु-
 पोगला एगयओ दुपएसिए खंधे एगयओ चउप्पएसिए खंधे भवइ अहवा एग-

यओ तिण्णि परमाणुपोग्गला एगयओ दो तिपएसिया खंधा भवंति अहवा एग-
यओ दो परमाणुपोग्गला एगयओ दो दुपएसिया खंधा एगयओ तिपएसिए खंधे
भवइ अहवा एगयओ परमाणुपोग्गले एगयओ चत्तारि दुपएसिया खंधा भवंति,
छहा कज्जमाणे एगयओ पंच परमाणुपोग्गला एगयओ चउप्पएसिए खंधे
भवइ अहवा एगयओ चत्तारि परमाणुपोग्गला एगयओ दुप्पएसिए खंधे एग-
यओ तिपएसिए खंधे भवइ अहवा एगयओ तिण्णि परमाणुपोग्गला एगयओ
तिण्णि दुप्पएसिया खंधा भवंति, सत्तहा कज्जमाणे एगयओ छ परमाणुपोग्गला
एगयओ तिप्पएसिए खंधे भवइ अहवा एगयओ पंच परमाणुपोग्गला एगयओ
दो दुपएसिया खंधा भवंति, अट्टहा कज्जमाणे एगयओ सत्त परमाणुपोग्गला
एगयओ दुपएसिए खंधे भवइ, णवहा कज्जमाणे णव परमाणुपोग्गला भवंति ।
दस भंते ! परमाणुपोग्गला० पुच्छा, गोयमा ! जाव दुहा कज्जमाणे एगयओ
परमाणुपोग्गले एगयओ णवपएसिए खंधे भवइ अहवा एगयओ दुपएसिए खंधे
एगयओ अट्टपएसिए खंधे भवइ एवं एक्केक्कं संचारेयव्वंति जाव अहवा दो
पंचपएसिया खंधा भवंति, तिहा कज्जमाणे एगयओ दो परमाणुपोग्गला एग-
यओ अट्टपएसिए खंधे भवइ अहवा एगयओ परमाणुपोग्गले एगयओ दुपएसिए
खंधे एगयओ सत्तपएसिए खंधे भवइ अहवा एगयओ परमाणुपोग्गले एगयओ
तिपएसिए खंधे भवइ एगयओ छप्पएसिए खंधे भवइ अहवा एगयओ परमाणु-
पोग्गले एगयओ चउप्पएसिए० एगयओ पंचपएसिए खंधे भवइ अहवा एगयओ
दुपएसिए खंधे एगयओ दो चउप्पएसिया खंधा भवंति अहवा एगयओ
दो तिपएसिया खंधा० एगयओ चउप्पएसिए खंधे भवइ, चउहा कज्जमाणे
एगयओ तिण्णि परमाणुपोग्गला एगयओ सत्तपएसिए खंधे भवइ अहवा एग-
यओ दो परमाणुपोग्गला एगयओ दुपएसिए० एगयओ छप्पएसिए खंधे भवइ
अहवा एगयओ दो परमाणुपोग्गला एगयओ तिप्पएसिए खंधे एगयओ पंचप-
सिए खंधे भवइ अहवा एगयओ दो परमाणुपोग्गला एगयओ दो चउप्पएसिया
खंधा भवंति अहवा एगयओ परमाणुपोग्गले एगयओ दुपएसिए० एगयओ
तिपएसिए० एगयओ चउप्पएसिए खंधे भवइ अहवा एगयओ परमाणुपोग्गले
एगयओ तिण्णि तिपएसिया खंधा भवंति अहवा एगयओ तिण्णि दुपएसिया
खंधा० एगयओ चउप्पएसिए खंधे भवइ अहवा एगयओ दो दुपएसिया खंधा

एगयओ दो तिपएसिया खंधा भवंति, पंचहा कज्जमाणे एगयओ चत्तारि पर-
 माणुपोगला एगयओ छप्पएसिए खंधे भवइ अहवा एगयओ तिण्णि परमाणु-
 पोगला एगयओ दुपएसिए खंधे एगयओ पंचपएसिए खंधे भवइ अहवा एग-
 यओ तिण्णि परमाणुपोगला एगयओ तिपएसिए खंधे एगयओ चउपएसिए
 खंधे भवइ अहवा एगयओ दो परमाणु० एग० दो दुपएसिया खंधा एग०
 चउप्पएसिए खंधे भवइ अहवा एगयओ दो परमाणुपोगला एगयओ दुपएसिए
 खंधे० एगयओ दो तिपएसिया खंधा भवंति अहवा एगयओ परमाणुपोगले
 एगयओ तिण्णि दुपएसिया० एगयओ तिपएसिए खंधे भवइ अहवा पंच दुपए-
 सिया खंधा भवंति, छहा कज्जमाणे एगयओ पंच परमाणुपोगला एगयओ
 पंचपएसिए खंधे भवइ अहवा एगयओ चत्तारि परमाणुपोगला एगयओ दुपए-
 सिए० एगयओ चउपएसिए खंधे भवइ अहवा एगयओ चत्तारि परमाणुपोगला
 एगयओ दो तिपएसिया खंधा भवंति अहवा एगयओ तिण्णि परमाणुपोगला
 एगयओ दो दुपएसिया खंधा० एगयओ तिपएसिए खंधे भवइ अहवा एगयओ
 दो परमाणुपोगला एगयओ चत्तारि दुपएसिया खंधा भवंति, सत्तहा कज्जमाणे
 एगयओ छ परमाणुपोगला एगयओ चउप्पएसिए खंधे भवइ अहवा एगयओ
 पंच परमाणुपोगला एगयओ दुपएसिए० एगयओ तिपएसिए खंधे भवइ अहवा
 एगयओ चत्तारि परमाणुपोगला एगयओ तिण्णि दुपएसिया खंधा भवंति, अट्टहा
 कज्जमाणे एगयओ सत्त परमाणुपोगला एगयओ तिपएसिए खंधे भवइ अहवा
 एगयओ छ परमाणुपोगला एगयओ दो दुपएसिया खंधा भवंति, णवहा कज्ज-
 माणे एगयओ अट्ट परमाणुपोगला एगयओ दुपएसिए खंधे भवइ, दसहा कज्ज-
 माणे दस परमाणुपोगला भवंति । संखेज्जा णं भंति ! परमाणुपोगला एग-
 यओ साहण्णांति एगयओ साहण्णित्ता किं भवइ ? गोयमा ! संखेज्जपएसिए
 खंधे भवइ से भिज्जमाणे बुहावि जाव दसहावि संखेज्जहावि कज्जइ, बुहा
 कज्जमाणे एगयओ परमाणुपोगले एगयओ संखेज्जपएसिए खंधे भवइ अहवा
 एगयओ दुपएसिए खंधे एगयओ संखेज्जपएसिए खंधे भवइ अहवा एगयओ
 तिपएसिए खंधे एगयओ संखेज्जपएसिए खंधे भवइ एवं जाव अहवा एगयओ
 दसपएसिए खंधे एगयओ संखेज्जपएसिए खंधे भवइ अहवा दो संखेज्जपएसिया
 खंधा भवंति, तिहा कज्जमाणे एगयओ दो परमाणुपोगला एगयओ संखेज्ज-

एएसिए खंधे भवइ अहवा एगयओ परमाणुपोग्गले एगयओ दुपएसिए खंधे एगयओ संखेज्जपएसिए खंधे भवइ अहवा एगयओ परमाणुपोग्गले एगयओ तिपएसिए खंधे एगयओ संखेज्जपएसिए खंधे भवइ एवं जाव अहवा एगयओ परमाणुपोग्गले एगयओ दसपएसिए खंधे एगयओ संखेज्जपएसिए खंधे भवइ अहवा एगयओ परमाणुपोग्गले एगयओ दो संखेज्जपएसिया खंधा भवति अहवा एगयओ दुपएसिए खंधे एगयओ दो संखेज्जपएसिया खंधा भवति, एवं जाव अहवा एगयओ दसपएसिए खंधे एगयओ दो संखेज्जपएसिया खंधा भवति अहवा तिण्णि संखेज्जपएसिया खंधा भवति, चउहा कज्जमाणे एगयओ तिण्णि परमाणुपोग्गला एगयओ संखेज्जपएसिए खंधे भवइ अहवा एगयओ दो परमाणुपोग्गला एगयओ दुपएसिए खंधे एगयओ संखेज्जपएसिए खंधे भवइ अहवा एगयओ दो परमाणुपोग्गला एगयओ तिप्पएसिए० एगयओ संखेज्जपएसिए खंधे भवइ एवं जाव अहवा एगयओ दो परमाणुपोग्गला एगयओ दसपएसिए० एगयओ संखेज्जपएसिए खंधे भवइ अहवा एगयओ दो परमाणुपोग्गला एगयओ दो संखेज्जपएसिया खंधा भवति अहवा एगयओ परमाणुपोग्गले एगयओ दुपएसिए खंधे एगयओ दो संखेज्जपएसिया खंधा भवति जाव अहवा एगयओ परमाणुपोग्गले एगयओ दसपएसिए खंधे एगयओ दो संखेज्जपएसिया खंधा भवति अहवा एगयओ परमाणुपोग्गले एगयओ तिण्णि संखेज्जपएसिया खंधा भवति अहवा एगयओ दुपएसिए खंधे एगयओ तिण्णि संखेज्जपएसिया खंधा भवति जाव अहवा एगयओ दसपएसिए खंधे एगयओ तिण्णि संखेज्जपएसिया खंधा भवति अहवा चत्तारि संखेज्जपएसिया खंधा भवति, एवं एएणं कमेणं पंचगसंजोगोवि भाणियव्वो जाव णवगसंजोगो, दसहा कज्जमाणे एगयओ णव परमाणुपोग्गला एगयओ संखेज्जपएसिए खंधे भवइ अहवा एगयओ अट्ठ परमाणुपोग्गला एगयओ दुपएसिए० एगयओ संखेज्जपएसिए खंधे भवइ, एवं एएणं कमेणं एकेवको पूरेयव्वो जाव अहवा एगयओ दसपएसिए खंधे एगयओ णव संखेज्जपएसिया खंधा भवति अहवा दस संखेज्जपएसिया खंधा भवति, संखेज्जहा कज्जमाणे संखेज्जा परमाणुपोग्गला भवति । असंखेज्जा णं भंते ! परमाणुपोग्गला एगयओ साहण्णंति २ ता किं भवइ ? गोयमा ! असंखेज्जपएसिए खंधे भवइ, से भिज्जमाणे दुहावि जाव दसहावि संखेज्जहावि असंखेज्जहावि कज्जइ,

दुहा कज्जमाणे एगयओ परमाणुपोगले एगयओ असंखेज्जपएसिए खंधे भवइ जाव अहवा एगयओ दसपएसिए० एगयओ असंखेज्जपएसिए खंधे भवइ अहवा एगयओ संखेज्जपएसिए खंधे एगयओ असंखेज्जपएसिए खंधे भवइ अहवा दो असंखेज्जपएसिया खंधा भवति, तिहा कज्जमाणे एगयओ दो परमाणुपोगला एगयओ असंखेज्जपएसिए खंधे भवइ अहवा एगयओ परमाणुपोगले एगयओ दुपएसिए० एगयओ असंखेज्जपएसिए खंधे भवइ जाव अहवा एगयओ परमाणुपोगले एगयओ दसपएसिए० एगयओ असंखेज्जपएसिए खंधे भवइ अहवा एगयओ परमाणुपोगले एगयओ संखेज्जपएसिए० एगयओ असंखेज्जपएसिए खंधे भवइ अहवा एगयओ परमाणुपोगले एगयओ दो असंखेज्जपएसिया खंधा भवति अहवा एगयओ दुपएसिए० एगयओ दो असंखेज्जपएसिया खंधा भवति एवं जाव अहवा एगयओ संखेज्जपएसिए खंधे भवइ एगयओ दो असंखेज्जपएसिया खंधा भवति अहवा तिणिण असंखेज्जपएसिया खंधा भवति, चउहा कज्जमाणे एगयओ तिणिण परमाणुपोगला एगयओ असंखेज्जपएसिए खंधे भवइ एवं चउवकगसंजोगो जाव दसगसंजोगो एए जहेव संखेज्जपएसियस्स णवर असंखेज्जय एगं अहिणं भाणियक्वं जाव अहवा दस असंखेज्जपएसिया खंधा भवति, संखेज्जहा कज्जमाणे एगयओ संखेज्जा परमाणुपोगला एगयओ असंखेज्जपएसिए खंधे भवइ अहवा एगयओ संखेज्जा दुपएसिया खंधा एगयओ असंखेज्जपएसिए खंधे भवइ एवं जाव अहवा एगयओ संखेज्जा दसपएसिया खंधा एगयओ असंखेज्जपएसिए खंधे भवइ अहवा एगयओ संखेज्जा संखेज्जपएसिया खंधा एगयओ असंखेज्जपएसिए खंधे भवइ अहवा संखेज्जा असंखेज्जपएसिया खंधा भवति, असंखेज्जहा कज्जमाणे असंखेज्जा परमाणुपोगला भवति । अणंता णं भंते ! परमाणुपोगला जाव कि भवइ ? गोयमा ! अणंतपएसिए खंधे भवइ, से भिज्जमाणे दुहावि तिहावि जाव दसहावि संखेज्जहा असंखेज्जहा अणंतहावि कज्जइ, दुहा कज्जमाणे एगयओ परमाणुपोगले एगयओ अणंतपएसिए खंधे भवइ जाव अहवा दो अणंतपएसिया खंधा भवति, तिहा कज्जमाणे एगयओ दो परमाणुपोगला एगयओ अणंतपएसिए खंधे भवइ अहवा एगयओ परमाणुपोगले एगयओ दुपएसिए० एगयओ अणंतपएसिए खंधे भवइ जाव अहवा एगयओ परमाणुपोगले एगयओ असंखेज्जपएसिए०

एगयओ अणंतपएसिए खंधे भवइ अहवा एगयओ परमाणुपोगले एगयओ दो अणंतपएसिया खंधा भवति अहवा एगयओ दुपएसिए० एगयओ दो अणंतपएसिया खंधा भवति एवं जाव अहवा एगयओ दसपएसिए० एगयओ दो अणंतपएसिया खंधा भवति अहवा एगयओ संखेज्जपएसिए० एगयओ दो अणंतपएसिया खंधा भवति अहवा एगयओ असंखेज्जपएसिए खंधे एगयओ दो अणंतपएसिया खंधा भवति अहवा तिण्णि अणंतपएसिया खंधा भवति, चउहा कज्जमाणे एगयओ तिण्णि परमाणुपोगला एगयओ अणंतपएसिए खंधे भवइ एवं चउ-क्कसंजोगो जाव असंखेज्जगसंजोगो, एए सध्वे जहेव असंखेज्जाणं भणिया तहेव अणंताणवि भाणियध्वा णवरं एकं अणंतं अभमहिंयं भाणियध्वं जाव अहवा एगयओ संखेज्जा संखेज्जपएसिया खंधा एगयओ अणंतपएसिए खंधे भवइ अहवा एगयओ संखेज्जा असंखेज्जपएसिया खंधा एगयओ अणंतपएसिए खंधे भवइ अहवा संखेज्जा अणंतपएसिया खंधा भवति, असंखेज्जहा कज्जमाणे एगयओ असंखेज्जा परमाणुपोगला एगयओ अणंतपएसिए खंधे भवइ अहवा एगयओ असंखेज्जा दुपएसिया खंधा एगयओ अणंतपएसिए खंधे भवइ जाव अहवा एगयओ असंखेज्जा संखेज्जपएसिया खंधा एगयओ अणंतपएसिए खंधे भवइ अहवा एगयओ असंखेज्जा असंखेज्जपएसिया खंधा एगयओ अणंतपएसिए खंधे भवइ अहवा असंखेज्जा अणंतपएसिया खंधा भवति, अणंतहा कज्जमाणे अणंता परमाणुपोगला भवति ॥४४४॥ एसि णं भंते ! परमाणुपोगलाणं साहणणाभेयाणुयाएणं अणंतानंता पोगलपरियट्टा समणंतंठ्वा भवंतीति मक्खाया ? हुंता गोयमा ! एसि णं परमाणुपोगलाणं साहणणाभेयाणु जाव मक्खाया । कइविहे णं भंते ! पोगलपरियट्टे पण्णत्ते ? गोयमा ! सत्तविहे पोगलपरियट्टे पण्णत्ते, तंजहा—ओरालियपोगलपरियट्टे वेउड्विय० तेयापोगलपरियट्टे कम्मापोगलपरियट्टे मणपोगलपरियट्टे वइपोगलपरियट्टे आणापाणुपोगलपरियट्टे । णेरइयाणं भंते ! कइविहे पोगलपरियट्टे पण्णत्ते ? गोयमा ! सत्तविहे पोगलपरियट्टे पण्णत्ते, तंजहा—ओरालियपोगलपरियट्टे वेउड्वियपोगलपरियट्टे जाव आणापाणुपोगलपरियट्टे, एवं जाव वेमाणियाणं । एगमेस्स णं भंते ! णेरइयस्स केवइया ओरालियपोगलपरियट्टा अतीया ? अणंता, केवइया पुरवखडा ? कस्सइ अत्थि कस्सइ गत्थि जस्सइत्थि जहण्णेणं एवको वा दो वा

तिष्णि वा उक्कोसेणं संखेज्जा वा असंखेज्जा वा अणंता वा । एगमेगस्स णं भंते । असुरकुमारस्स केवइया ओरालियपोग्गलपरियट्टा० ? एवं चेव, एवं जाव वेमाणियस्स । एगमेगस्स णं भंते ! णेरइयस्स केवइया वेउव्वियपोग्गलपरियट्टा अतीया ? गोयमा ! अणंता, एवं जहेव ओरालियपोग्गलपरियट्टा तहेव वेउव्वियपोग्गलपरियट्टावि भाणियव्वा, एवं जाव वेमाणियस्स एवं जाव आणापाणुपोग्गलपरियट्टा, एए एगत्तिया सत्त दंडगा भवंति । णेरइयाणं भंते । केवइया ओरालियपोग्गलपरियट्टा अतीया ? गोयमा ! अणंता, केवइया पुरक्खडा ? अणंता, एवं जाव वेमाणियाणं, एवं वेउव्वियपोग्गलपरियट्टावि एवं जाव आणापाणुपोग्गलपरियट्टा वेमाणियाणं, एवं एए पोहत्तिया सत्त-चउव्वीसइ दंडगा । एगमेगस्स णं भंते ! णेरइयस्स णेरइयस्से केवइया ओरालियपोग्गलपरियट्टा अतीया ? गोयमा ! णत्थि एक्कोवि, केवइया पुरक्खडा ? णत्थि एक्कोवि, एगमेगस्स णं भंते ! णेरइयस्स असुरकुमारस्से केवइया ओरालियपोग्गलपरियट्टा० ? एवं चेव, एवं जाव थणियकुमारस्से जहा असुरकुमारस्से । एगमेगस्स णं भंते ! णेरइयस्स पुढविकाइयस्से केवइया ओरालियपोग्गलपरियट्टा अतीया ? अणंता, केवइया पुरक्खडा ? कस्सइ अत्थि कस्सइ णत्थि जत्थस्सि तस्स जहण्णेणं एक्को वा दो वा तिष्णि वा उक्कोसेणं संखेज्जा वा असंखेज्जा वा अणंता वा एवं जाव मणुस्सत्ते, वाणमंतरजोइसियवेमाणियस्से जहा असुरकुमारस्से । एगमेगस्स णं भंते ! असुरकुमारस्स णेरइयस्से केवइया अतीया ओरालियपोग्गलपरियट्टा ? एवं जहा णेरइयस्स वत्तव्वया भाणिया तथा असुरकुमारस्सवि भाणियव्वा जाव वेमाणियस्से, एवं जाव थणियकुमारस्स, एवं पुढविकाइयस्सवि, एवं जाव वेमाणियस्स, सव्वेसि एक्को गमो । एगमेगस्स णं भंते ! णेरइयस्स णेरइयस्से केवइया वेउव्वियपोग्गलपरियट्टा अतीया ? अणंता, केवइया पुरक्खडा ? एगुत्तरिया जाव अणंता, एवं जाव थणियकुमारस्से । पुढविकाइयस्से पुच्छा, णत्थि एक्कोवि, केवइया पुरक्खडा ? णत्थि एक्कोवि, एवं जत्थ वेउव्वियसरीरं अत्थि तत्थ एगुत्तरिओ जत्थ णत्थि तत्थ जहा पुढविकाइयस्से तथा भाणियव्वं जाव वेमाणियस्स वेमाणियस्से । तेयापोग्गलपरियट्टा कम्मापोग्गलपरियट्टा य सव्वत्थ एगुत्तरिया भाणियव्वा, मणपोग्गलपरियट्टा सव्वेसु पांचिदिएसु एगुत्तरिया, विगालिदिएसु णत्थि, वइपोग्गलपरि-

यद्वा एवं चेव, णवरं एगिदिएसु णत्थि भाणियव्वा । आणापाणुपोग्गलपरियट्टा
 सव्वत्थ एगुत्तरिया जाव वेमाणियस्स वेमाणियत्ते । णेरइयाणं भंते !
 णेरइयत्ते केवइया ओरालियपोग्गलपरियट्टा अतीया ? णत्थि एककोवि, केव-
 इया पुरक्खडा ? णत्थि एककोवि, एवं जाव थणियकुमारस्से । पुढविकाइयत्ते
 पुच्छा, गोयमा ! अणंता, केवइया पुरक्खडा ? अणंता, एवं जाव मणुस्सत्ते
 वाणमंतरजोइसियवेमाणियत्ते जहा णेरइयत्ते एवं जाव वेमाणियस्स वेमाणियत्ते,
 एवं सत्तवि पोग्गलपरियट्टा भाणियव्वा, जत्थ अत्थि तत्थ अतीयावि पुरक्खडा-
 वि अणंता भाणियव्वा, जत्थ णत्थि तत्थ दोवि णत्थि भाणियव्वा जाव
 वेमाणियाणं वेमाणियत्ते केवइया आणापाणुपोग्गलपरियट्टा अतीया ? अणंता,
 केवइया पुरक्खडा ? अणंता ॥ ४४५ ॥ से केणट्ठेणं भंते ! एवं वुच्चइ—ओरा-
 लियपोग्गलपरियट्टे २ ? गोयमा ! जणं जीवेणं ओरालियसरिरे वट्टमाणेणं
 ओरालियसरोरपाउग्गाइं दव्वाइं ओरालियसरिरत्ताए गहियाइं बद्धाइं पुट्टाइं
 कडाइं पट्टवियाइं णिविट्टाइं अभिणिविट्टाइं अभिसमण्णागयाइं परियाइयाइं
 परिणामियाइं णिज्जिण्णाइं णिसिरियाइं णिसिट्टाइं भवंति, से तेणट्ठेणं गोयमा !
 एवं वुच्चइ ओरालियपोग्गलपरियट्टे २, एवं वेउद्वियपोग्गलपरियट्टेवि णवरं
 वेउद्वियसरिरे वट्टमाणेणं वेउद्वियसरोरपाउग्गाइं सेसं तं चेव सव्वं एवं जाव
 आणापाणुपोग्गलपरियट्टे, णवरं आणापाणुपाउग्गाइं सव्वदव्वाइं आणापाणु-
 त्ताए सेसं तं चेव । ओरालियपोग्गलपरियट्टे णं भंते ! केवइकालस्स णिव्व-
 त्तिज्जइ ? गोयमा ! अणंताहि उरस्सप्पिणिओसप्पिणीहि एवइकालस्स णिव्व-
 त्तिज्जइ, एवं वेउद्वियपोग्गलपरियट्टेवि, एवं जाव आणापाणुपोग्गलपरियट्टेवि ।
 एयस्स णं भंते ! ओरालियपोग्गलपरियट्टेणिव्वत्तणाकालस्स वेउद्वियपोग्गल-
 जाव आणापाणुपोग्गलपरियट्टेणिव्वत्तणाकालस्स कयरे कयरेहिंतो जाव वित्ते-
 साहिया वा ? गोयमा ! सव्वत्थोवे कम्मगपोग्गलपरियट्टेणिव्वत्तणाकाले, तेया-
 पोग्गलपरियट्टेणिव्वत्तणाकाले अणंतगुणे, ओरालियपोग्गलपरियट्टे ० अणंतगुणे,
 आणापाणुपोग्गल ० अणंतगुणे, मणपोग्गल ० अणंतगुणे, वइपोग्गल ० अणंतगुणे,
 वेउद्वियपोग्गलपरियट्टेणिव्वत्तणाकाले अणंतगुणे ॥ ४४६ ॥ एएसि णं भंते !
 ओरालियपोग्गलपरियट्टाणं जाव आणापाणुपोग्गलपरियट्टाणं य कयरे २ हिंतो
 जाव वित्तेसाहिया वा ? गोयमा ! सव्वत्थोवा वेउद्वियपोग्गलपरियट्टा, वइ-

पोगलपरियट्टा अणंतगुणा, मणपोगलपरियट्टा अणंतगुणा, आणापाणुपोगल०
अणंतगुणा, औरालियपोगल० अणंतगुणा, तेयापोगल० अणंतगुणा, कम्मग-
पोगल० अणंतगुणा । सेवं भंते ! सेवं भंते ! त्ति भगवं जाव विहरइ ॥४४७॥

बारसमं सयं पंचमो उद्देशो

रायगिहे जाव एवं वयासी--अहं भंते ! पाणाइवाए सुसावाए अदिष्णादाणे
मेहुणे परिगहे, एस णं कइवण्णे कइगंधे कइरसे कइफासे पण्णत्ते ? गोयमा !
पंचवण्णे दुग्ंधे पंचरसे चउफासे पण्णत्ते । अहं भंते ! कोहे १ कोवे २ रोसे
३ दोसे ४ अखमा ५ संजलणे ६ कलहे ७ चंडिके ८ भंडणे ९ विवाए
१०, एस णं कइवण्णे जाव कइफासे पण्णत्ते ? गोयमा ! पंचवण्णे पंचरसे
दुग्ंधे चउफासे पण्णत्ते । अहं भंते ! माणे मए दप्ये थंभे गवे अत्तुक्कोसे
परपरिवाए उक्कासे अवक्कासे उण्णए उण्णामे दुण्णामे १२, एस णं कइवण्णे
४ प० ? गोयमा ! पंचवण्णे जहा कोहे तहेव । अहं भंते ! माया उवही
णियडो वलए गहणे णूमे कक्के कुरूए जिम्हे किक्विसे १० आयरण्या
गूहणया वंचणया पलिउंचणया साइजोगे य १५, एस णं कइवण्णे ४ प० ?
गोयमा ! पंचवण्णे जहेव कोहे । अहं भंते ! लोभे इच्छा मुच्छा कंला गेही
तण्हा भिज्जा अभिज्जा आसासणया पत्थणया १० लालप्पणया कामासा
भोगासा जीवियासा मरणासा गविरामे १६, एस णं कइवण्णे ४ प० ?
गोयमा ! जहेव कोहे । अहं भंते ! पेज्जे दोसे कलहे जाव मिच्छादंसणसल्ले
एस णं कइवण्णे ४ प० ? जहेव कोहे तहेव जाव चउफासे ॥४४८॥ अहं
भंते ! पाणाइवायवेरमणे जाव परिगहवेरमणे, कोहविवेगे जाव मिच्छादंसण-
सल्लविवेगे एस णं कइवण्णे जाव कइफासे पण्णत्ते ? गोयमा ! अवण्णे अग्ंधे
अरसे अफासे पण्णत्ते । अहं भंते ! उप्पत्तिया वेणइया कम्मिया परिणामिया
एस णं कइवण्णा ४ प० ? तं चेव जाव अफासा पण्णत्ता । अहं भंते ! उग्गहे
ईहा अवाए धारणा एस णं कइवण्णा ४ प० ? एवं चेव जाव अफासा पण्णत्ता ।
अहं भंते ! उट्ठाणे कम्मे बले बीरिए पुरिसक्कारपरक्कमे एस णं कइवण्णे ४
प० ? तं चेव जाव अफासे पण्णत्ते । सत्तमे णं भंते ! उवासंतरे कइवण्णे ४
प० ? एवं चेव जाव अफासे पण्णत्ते । सत्तमे णं भंते ! तणुवाए कइवण्णे ४
प० ? जहा पाणाइवाए, णवरं अट्ठाफासे पण्णत्ते, एवं जहा सत्तमे तणुवाए तहा

सत्तमे घणवाए घणोदही पुढवी, छट्ठे उवासंतरे अवण्णे, तणुवाए जाव छट्ठी पुढवी एयाइं अट्ट फासाइं, एवं जहा सत्तमाए पुढवीए वत्तव्वया मणिया तहा जाव पढमाए पुढवीए भाणियव्वं, जंबुद्वीवे २ जाव सयंभुरमणे समुद्दे, सोहम्ममे कप्पे जाव ईसिपम्भारा पुढवी, णेरइयवासा जाव वेमामाणियावासा एयाणि सव्वानि अट्टफासाणि । णेरइया णं भंते ! कइवण्णा जाव कइफासा पणत्ता ? गोयमा ! वेउव्वियतेयाइं पडुच्च पंचवण्णा पंचरसा दुग्ंधा अट्टफासा पणत्ता, कम्मगं पडुच्च पंचवण्णा पंचरसा दुग्ंधा चउफासा पणत्ता, जीवं पडुच्च अवण्णा जाव अफासा पणत्ता, एवं जाव यणियकुमारा । पुढविव्काइयाणं पुच्छा, गोयमा ! ओरालियतेयगाइं पडुच्च पंचवण्णा जाव अट्टफासा पणत्ता, कम्मगं पडुच्च जहा णेरइयाणं, जीवं पडुच्च तहेव, एवं जाव चउररिदिया, णवरं वाउक्काइया ओरालियवेउव्वियतेयगाइं पडुच्च पंचवण्णा जाव अट्टफासा पणत्ता, सेसं जहा णेरइयाणं, पंचिदियतिरिक्खजोणिया जहा वाउक्काइया । मणुस्साणं पुच्छा, ओरालियवेउव्वियभाहारगतेयगाइं पडुच्च पंचवण्णा जाव अट्टफासा पणत्ता, कम्मगं जीवं च पडुच्च जहा णेरइयाणं, घाणमंतरजोइसियवेमाणिया जहा णेरइया, धम्मत्थिकाए जाव पोगलत्थिकाए एए सव्वे अवण्णा णवरं पोगलत्थिकाए पंचवण्णे पंचरसे दुग्ंधे अट्टफासे पणत्ते, णाणावरणिज्जे जाव अंतराइए एयाणि चउफासाणि । कण्हलेस्सा णं भंते ! कइवण्णा० पुच्छा ? गोयमा ! दव्वलेसं पडुच्च पंचवण्णा जाव अट्टफासा पणत्ता, भावलेसं पडुच्च अवण्णा ४, एवं जाव सुक्कलेस्सा, सम्भट्ठी ३ चक्खुदंसणे ४ आभिणिबोहियणाणे ५ जाव विडमंगणाणे आहारसण्णा जाव परिगहसण्णा एयाणि अवण्णाणि ४, ओरालियसरीरे जाव तेयगसरीरे एयाणि अट्टफासाणि, कम्मगसरीरे चउफासे, मणजोगे वइजोगे य चउफासे, कायजोगे अट्टफासे, सागारोवओगे य अणागारोवओगे य अवण्णा । सव्वदव्वा णं भंते ? कइवण्णा० पुच्छा, गोयमा ! अत्थेगइया सव्वदव्वा पंचवण्णा जाव अट्टफासा पणत्ता, अत्थेगइया सव्वदव्वा पंचवण्णा जाव चउफासा पणत्ता अत्थेगइया सव्वदव्वा एगवण्णा एगगंधा एगरसा दुफासा पणत्ता, अत्थेगइया सव्वदव्वा अवण्णा जाव अफासा पणत्ता, एवं सव्वपएसोधि सव्वपज्जवावि, तीयद्धा अवण्णा जाव अफासा पणत्ता, एवं अणागयद्धावि, एवं सव्वद्धावि ॥ ४४६ ॥ जीवे णं भंते ! गग्भं वक्कममाणे कइवण्णं कइगंधं कइरसं कइफासं परिणामं परिण-

मइ ? गोयमा ! पंचवज्जं पंचरसं दुग्धं अट्टफासं परिणामं परिणमइ ॥४५०॥
कम्मओ णं भंते । जीवे णो अकम्मओ विभत्तिभावं परिणमइ कम्मओ णं जए
णो अकम्मओ विभत्तिभावं परिणमइ ? हुंता गोयमा ! कम्मओ णं तं चैव
जाव परिणमइ णोअकम्मओ विभत्तिभावं परिणमइ । सेवं भंते । रत्ति ॥४५१॥

बारसमं सयं छट्ठी उद्देशो

रायगिहे जाव एवं वयासी-बहुजणे णं भंते ! अणमण्यस्स एवमाइक्खइ
जाव एवं परूवेइ-एवं खलु राहू चवं गेण्हइ एवं० २ । से कहमेयं भंते ! एवं ?
गोयमा ! जणं से बहुजणे णं अणमण्यस्स जाव भिच्छं ते एवमाहंसु । अहं
पुण गोयमा ! एवमाइक्खामि जाव एवं परूवेमि-एवं खलु राहू देवे महिद्धिए
जाव महेसक्खे वरवत्थधरे वरमल्लधरे वरगंधधरे वराभरणधारी, राहुस्स
णं देवस्स णव णामधेज्जा पणत्ता, तंजहा-सिघाडए १ जडिलए २ खंभाए
[खत्तए] ३ खरए ४ इदुदरे ५ भगरे ६ मच्छे ७ कच्छमे ८ कण्हसप्ये ९,
राहुस्स णं देवस्स विमाणा पंचवज्जणा पणत्ता, तंजहा-किण्हा णीला लोहिया
हालिहा सुविकल्ला अत्थि कालए राहुविमाणे खंजणवण्णाभे पणत्ते, अत्थि
णीलए राहुविमाणे लाउयवण्णाभे प० अत्थि लोहिए राहुविमाणे मंजिट्ट-
वण्णाभे प० अत्थि पीयए राहुविमाणे हालिइवण्णाभे पणत्ते, अत्थि
सुविकल्लए राहुविमाणे भासरसिक्खणाभे पणत्ते । जया णं राहू आगच्छ-
माणे वा गच्छमाणे वा विउक्खमाणे वा परियारेमाणे वा चंदलेस्सं पुरत्थिमेणं
आवरेत्ता णं पच्चत्थिमेणं धीईवयइ, तथा णं पुरत्थिमेणं चंदे उवदंसेइ पच्च-
त्थिमेणं राहू, जया णं राहू आगच्छमाणे वा गच्छमाणे वा विउक्खमाणे वा
परियारेमाणे वा चंदलेस्सं पच्चत्थिमेणं आवरेत्ताणं पुरत्थिमेणं धीईवयइ,
तथा णं पच्चत्थिमेणं चंदे उवदंसेइ पुरत्थिमेणं राहू, एवं जहा पुरत्थिमेणं
पच्चत्थिमेणं य दो आलावगा भणिया तथा दाहिणेणं उत्तरेण य दो आला-
वगा भाणियध्वा, एवं उत्तरपुरत्थिमेणं दाहिणपच्चत्थिमेणं य दो आलावगा
भाणियध्वा, एवं दाहिणपुरत्थिमेणं उत्तरपच्चत्थिमेणं य दो आलावगा भाणि-
यध्वा एवं चैव जाव तथा णं उत्तरपच्चत्थिमेणं चंदे उवदंसेइ दाहिणपुरत्थिमेणं
राहू, जया णं राहू आगच्छमाणे वा गच्छमाणे वा विउक्खमाणे वा परियारेमाणे
वा चंदलेस्सं आवरेमाणे २ चिट्ठइ, तथा णं मणुस्सलोए मणुस्सा वयति-एवं

खलु राहू चंद्रं गेहृद् एवं०, जया णं राहू आगच्छमाणे वा ४ चंद्रस्स लेस्सं आवरेत्ताणं पासेणं बीईवयइ तथा णं मणुस्सलोए मणुस्सा वयंति-एवं खलु चंदेणं राहूस्स कुच्छी भिण्णा एवं०, जया णं राहू आगच्छमाणे वा ४ चंद्रस्स लेस्सं आवरेत्ताणं पच्चोसक्कइ तथा णं मणुस्सलोए मणुस्सा वयंति-एवं खलु राहूणा चंदे वंते एवं०, जया णं राहू आगच्छमाणे वा जाव परियारेमाणे वा चंदलेस्सं अहे सपक्खि सपडिदिंसि आवरेत्ताणं चिट्ठइ, तथा णं मणुस्सलोए मणुस्सा वयंति-एवं खलु राहूणा चंदे घत्थे एवं० । कइविहे णं भंते ! राहू पण्णत्ते ? गोयमा ! दुविहे राहू पण्णत्ते, तंजहा-धुवराहू य पव्वराहू य, तत्थ णं जे से धुवराहू से णं ब्रहूलपक्खस्स पाडिवए पण्णरसइभागेणं पण्णरसइभागं चंद्रस्स लेस्सं आवरेमाणे २ चिट्ठइ, तंजहा-पढमाए-पढमं भागं बिइयए बिइयं भागं जाव पण्णरसेमु पण्णरसमं भागं, चरिमसमए चंदे रत्ते भवइ अवसेसे समए चंदे रत्ते वा विरत्ते वा भवइ, तमेव सुक्कपक्खस्स उवदंसेमाणे २ चिट्ठइ पढमाए पढमं भागं जाव पण्णरसेमु पण्णरसमं भागं, चरिमसमए चंदे विरत्ते भवइ अवसेसे समए चंदे रत्ते वा विरत्ते वा भवइ, तत्थ णं जे से पव्वराहू से जह्णणेणं छहं मासाणं उक्कोसेणं बायालीसाए मासाणं चंद्रस्स, अडयालीसाए संवच्छरणं सूरस्स ॥ ४५२ ॥ से केणट्ठेणं भंते ! एवं बुच्चइ-चंदे ससी २ ? गोयमा ! चंद्रस्स णं जोईसिदस्स जोइसरण्णे मियंके विमाणे कंता देवा कंताओ देवीओ कंताइ आसणसपणखंभंभंडमत्तोवगरणाइ अप्पणावि य णं चंदे जोईसिदे जोइसराया सोमे कंते सुभए पियदंसणे सुखे से तेणट्ठेणं जाव ससी ॥ ४५३ ॥ से केणट्ठेणं भंते ! एवं बुच्चइ-सूरे आइत्ते सूरे० ? गोयमा ! सूराइया णं समयाइ वा आवलियाइ वा जाव उस्सप्पिणीइ वा अवसप्पिणीइ वा से तेणट्ठेणं गोयमा ! जाव आइत्ते० २ ॥ ४५४ ॥ चंद्रस्स णं भंते ! जोईसिदस्स जोइसरण्णे कइ अग्गमहिंसीओ पण्णत्ताओ ? जहा वसमसए जाव णो च्चेव णं नेहुणवत्तिंयं । सूरस्सवि तहेव । चंदिमसूरिया णं भंते ! जोईसिदा जोइसदायाओ केरिसए कामभोगे पच्चणुवभवमाणा विहरंति ? गोयमा !-से जहाणामए केइ पुरिसे पढमजोव्वणुट्ठाणबलत्थे पढमजोव्वणुट्ठाणबलत्थाए भारियाए सद्धि अचिरवत्तविवाहकज्जे अत्थगवेसणयाए सोलसवंसविप्पवासिए से णं तओ लद्धट्ठे कयकज्जे अणहसमग्गे पुणरवि णियगगिहं ह्ववमागए ष्हाए

कयबलिकम्मे कयकोउय-मंगल-पायच्छित्ते सव्वालंकारविभूसिए मणुण्णं थाली-
पागमुद्धं अट्टारसंबंजणाउलं भोयणं भुत्ते समणे तंसि तारिसगंसि वासघरंसि
वण्णओ महब्बले कुमारे जाव सयणोवयारकलिए ताए तारिसियाए भारियाए
सिगारागारचाह्वेसाए जाव कलियाए अणुरत्ताए अविरत्ताए मणाणुकूलाए
सद्धि इदुठे सद्दे फरिसे जाव पंचविहे माणुस्सए कामभोगे पच्चणुब्भवमाणे विह-
रेज्जा, से णं गोयमा ! पुरिसे विउसमणकालसमयंसि केरिसयं सायासोक्खं
पच्चणुब्भवमाणे विहरइ ? ओरालं समणाओ ! तस्स णं गोयमा ! पुरिसस्स
कामभोगेहितो वाणमंतराणं देवाणं एत्तो अणंतगुणविसिट्टतरा चेव कामभोगा,
वाणमंतराणं देवाणं कामभोगेहितो असुरिदवज्जियणं भवणवासीणं देवाणं
एत्तो अणंतगुणविसिट्टतरा चेव कामभोगा, असुरिदवज्जियणं भवणवासियाणं
देवाणं कामभोगेहितो असुरकुमाराणं देवाणं एत्तो अणंतगुणविसिट्टतरा चेव
कामभोगा, असुरकुमाराणं देवाणं कामभोगेहितो गहगणणक्खत्ताराकूवार्णं
जोइसियाणं देवाणं एत्तो अणंतगुणविसिट्टतरा चेव कामभोगा, गहगणणक्खत्त
जाव कामभोगेहितो चंदिमसूरियाणं जोइसियाणं जोइसराईणं एत्तो अणंतगुण-
विसिट्टतरा चेव कामभोगा, चंदिमसूरिया णं गोयमा ! जोइसिदा जोइसरायाणो
एरिसे कामभोगे पच्चणुब्भवमाणा विहरंति । सेवं भंते ! सेवं भंते ! त्ति
भगवं गोयमे समणं भगवं महावीरं जाव विहरइ ॥ ४५५ ॥

वारसमं सयं सत्तमो उद्देसो

तेणं कालेणं तेणं समएणं जाव एवं वयासी-केमहालए णं भंते ! लोए
पण्णत्ते ? गोयमा ! महइमहालए लोए पण्णत्ते, पुरत्थिमेणं असंखेज्जाओ
जोयणकोडाकोडीओ दाहिण्णं असंखेज्जाओ एवं चेव, एवं पच्चत्थिमेणवि,
एवं उत्तरेणवि, एवं उद्धंपि, अहे असंखेज्जाओ जोयणकोडाकोडीओ आयाम-
विकखंमेणं । एयंसि णं भंते ! एमहालयंसि लोगंसि अत्थि केइ परमाणुपोगल-
मेत्तेवि पएसे जत्थ णं अयं जीवे ण जाए वा ण मए वावि ? गोयमा ! णो
इणदुठे समदुठे । से केणदुठेणं भंते ! एवं बुच्चइ एयंसि णं एमहालयंसि
लोगंसि णत्थि केइ परमाणुपोगलमेत्तेवि पएसे जत्थ णं अयं जीवे ण जाए
वा ण मए वावि ? गोयमा ! से जहाणामए-केइ पुरिसे अयासयस्स एगं महं
अयावयं करेज्जा, से णं तत्थ जहण्णेणं एवकं वा दो वा तिण्णि वा उक्कोसेणं

अयासहस्सं पक्खिवेज्जा, ताओ णं तत्थ पउरगोपराओ पउरवाणियाओ जह-
 ण्णेणं एमाहं वा दुयाहं वा तियाहं वा उक्कोसेणं छम्मासे परिवसेज्जा,
 अस्थि णं गोयमा ! तस्स अयावयस्स केई परमाणुपोग्गलमेत्तेवि पएसे जे णं
 तासि अयाणं उच्चारेण वा पासवणेण वा खेलेण वा सिघाणएण वा वंतेण
 वा पित्तेण वा पूएण वा सुक्केण वा सोणिएण वा चम्मोहि वा रोमोहं वा
 सिगोहं वा खुरेहि वा णहेहि वा अणवकंतपुव्वे भवइ ? भगवं ! णो इणट्ठे
 समट्ठे । होज्जावि णं गोयमा ! तस्स अयावयस्स केई परमाणुपोग्गलमेत्तेवि
 पएसे जे णं तासि अयाणं उच्चारेण वा जाव णहेहि वा अणवकंतपुव्वे णो चेव
 णं एयंसि एमहालयंसि लोगंसि लोसस्सं य सासयं भावं संसारस्स य अणाइभावं
 जीवस्स य णिच्चभावं कम्मबहुतं जम्मणमरणबाहुल्लं च पडुच्च णस्थि केइ
 परमाणुपोग्गलमेत्तेवि पएसे जत्थ णं अयं जीवे ण जाए वा ण मए वावि, से
 तेणट्ठेणं तं चेव जाव ण मए वावि ॥ ४५६ ॥ कइ णं भंते ! पुढवीओ पण्ण-
 ताओ ? गोयमा ! सत्त पुढवीओ पण्णत्ताओ जहा पढमसाए पंचमउद्देसए
 तहेव आवासा ठावेयव्वा जाव अणुत्तरविमाणेत्ति जाव अपराजिए सव्वदु-
 सिद्धे । अयण्णं भंते ! जीवे इमीसे रयणप्पभाए पुढवीए तीसाए णिरयावास-
 सयसहस्सेसु एगमेगंसि णिरयावासंसि पुढविकाइयत्ताए जाव वणस्सइकाइयत्ताए
 णरगत्ताए णेरइयत्ताए उववण्णपुव्वे ? हंता गोयमा ! असइं अदुवा अणंत-
 खुत्तो । सव्वजीवा वि णं भंते ! इमीसे रयणप्पभाए पुढवीए तीसाए णिरया-
 वाससयसहस्सेसु तं चेव जाव अणंतखुत्तो । अयण्णं भंते ! जीवे सक्करप्पभाए
 पुढवीए पण्णवीसाए एवं जहा रयणप्पभाए तहेव दो आलावगा भाणियव्वा,
 एवं जाव धूमप्पभाए । अयण्णं भंते ! जीवे तमाए पुढवीए पंचूणे णिरयावास-
 सयसहस्से एगमेगंसि सेसं तं चेव, अयण्णं भंते ! जीव अहेसत्तभाए पुढवीए
 पंचसु अणुत्तरेसु महइमहालएसु महाणिरएसु एगमेगंसि णिरयावासंसि सेसं
 जहा रयणप्पभाए । अयण्णं भंते ! जीवे चउसट्ठीए असुरकुमारावाससय-
 सहस्सेसु एगमेगंसि असुरकुमारावासंसि पुढविककाइयत्ताए जाव वणस्सइ-
 काइयत्ताए देवत्ताए देवित्ताए आसणसयणभंडमत्तोवमरणत्ताए उववण्ण-
 पुव्वे ? हंता गोयमा ! जाव अणंतखुत्तो, सव्वजीवावि णं भंते ! एवं चेव, एवं
 जाव थणियकुमारसु, णाणत्तं आवासेसु, आवासा पुव्वभणिया । अयण्णं भंते !

जीवे असंखेज्जेसु पुढविक्काइयावाससयसहस्सेसु एगमेगंसि पुढविक्काइया-
वासंसि पुढविक्काइयत्ताए जाव वणस्सइकाइयत्ताए उववण्णपुब्बे ? हंता गोयमा !
जाव अणंतखुत्तो, एवं सब्बजीवावि, एवं जाव वणस्सइकाइएसु । अयण्णं भंते !
जीवे असंखेज्जेसु बेंदियावाससयसहस्सेसु एगमेगंसि बेंदियावासंसि पुढविक्काइय-
त्ताए जाव वणस्सइकाइयत्ताए बेंदियत्ताए उववण्णपुब्बे ? हंता गोयमा !
जाव अणंतखुत्तो, सब्बजीवावि णं एवं चेव, एवं जाव मणुस्सेसु, णवरं तेइंदिएसु
जाव वणस्सइकाइयत्ताए तेइंदियत्ताए चउरिंदिएसु चउरिंदियत्ताए पंचिंदिय-
तिरिक्खजोणिएसु पंचिंदियतिरिक्खजोणियत्ताए मणुस्सेसु मणुस्सत्ताए सेसं
जहा बेंदियाण, वाणमंतरजोइसियसोहम्मीसाणेसु य जहा असुरकुमारारणं ।
अयण्णं भंते ! जीवे सणकुमारे कप्पे बारससु विमाणावाससयसहस्सेसु एगमे-
गंसि वेमाणियावासंसि पुढविक्काइयत्ताए सेसं जहा असुरकुमारारणं जाव अणंत-
खुत्तो, णो चेव णं देवीत्ताए, एवं सब्बजीवावि, एवं जाव आणयपाणएसु, एवं
भारणच्चएसुवि । अयण्णं भंते ! जीवे तिसुवि अट्टारसुत्तरेसु गेविज्जविमाणा-
वाससएसु एवं चेव । अयण्णं भंते ! जीवे पंचसु अणुत्तरविमाणेसु एगमेगंसि
अणुत्तरविमाणंसि पुढवि० तहेव जाव अणंतखुत्तो, णो चेव णं देवत्ताए वा देवि-
त्ताए वा एवं सब्बजीवावि । अयण्णं भंते ! जीवे सब्बजीवाणं माइत्ताए पिइ-
त्ताए माइत्ताए भगिणित्ताए भज्जत्ताए पुसत्ताए धूयत्ताए सुण्हत्ताए उववण्ण-
पुब्बे ? हंता गोयमा ! असइं अट्टुवा अणंतखुत्तो । सब्बजीवावि णं भंते !
इमस्स जीवस्स माइत्ताए जाव उववण्णपुब्बे ? हंता गोयमा ! जाव अणंत-
खुत्तो । अयण्णं भंते ! जीवे सब्बजीवाणं अरित्ताए वेरियत्ताए घायगत्ताए वह-
गत्ताए पडिणीयत्ताए पच्चामित्तत्ताए उववण्णपुब्बे ? हंता गोयमा ! जाव
अणंतखुत्तो । सब्बजीवावि णं भंते ! एवं चेव, अयण्णं भंते ! जीवे सब्बजीवाणं
रायत्ताए जुवरायत्ताए जाव सत्थवाहत्ताए उववण्णपुब्बे ? हंता गोयमा ! असइं
जाव अणंतखुत्तो, सब्बजीवाणं एवं चेव । अयण्णं भंते ! जीवे सब्बजीवाणं
दासत्ताए पेसत्ताए भयगत्ताए भाइल्लगत्ताए भोगपुरिसत्ताए सीसत्ताए वेसत्ताए
उववण्णपुब्बे ? हंता गोयमा ! जाव अणंतखुत्तो, एवं सब्बजीवावि जाव अणंत-
खुत्तो । सेवं भंते ! सेवं भंते ! त्ति जाव विहरइ ॥ ४५७ ॥

बारसमं सयं अट्टमो उट्टेसो

तेणं कालेणं तेणं समएणं जाव एवं वयासी-देवे णं भंते ! महिड्डिए जाव भहेसक्खे अणंतरं चयं चइत्ता बिसरीरेसु णागेसु उववज्जेज्जा ? हंता गोयमा ! उववज्जेज्जा, से णं तत्थ अच्चियवंदियपूहयसवकारियसम्माणिए दिज्जे सच्चे सरुचोवाए संणिहियपाडिहेरे यावि भवेज्जा ? हंता भवेज्जा । से णं भंते ! तओहिती अणंतरं उववट्टित्ता सिज्जेज्जा बुज्जेज्जा जाव अंतं करेज्जा ? हंता सिज्जेज्जा जाव अंतं करेज्जा । देवे णं भंते ! महिड्डिए एवं चेव जाव बिसरीरेसु मणीसु उववज्जेज्जा, एवं चेव जहा णागाणं । देवे णं भंते ! महिड्डिए जाव बिसरीरेसु रुक्खेसु उववज्जेज्जा ? हंता उववज्जेज्जा, एवं चेव, णवरं इमं णाणत्तं जाव सण्णिहियपाडिहेरे लाज्जलोइयमहिए यावि भवेज्जा ? हंता भवेज्जा, सेसं तं चेव जाव अंतं करेज्जा ॥ ४५८ ॥ अह भंते ! गोलंगूलवसभे कुवकुडवसभे मंडुक्कवसभे एए णं णिस्सीला णिव्वया णिग्गुणा णिम्भेरा णिप्पच्चक्खणाणपोसहोववासा कालमासे कालं किच्चा इमीसे रयणप्पमाए पुढवीए उक्कोसेणं सागरोवमट्टिईयंसि णरयंसि णेरइयत्ताए उववज्जेज्जा ? समणे भगवं महावीरे वागरेइ-उववज्जमाणे उववण्णेत्ति वत्तव्वं सिया । अह भंते ! सीहे चाधे जहा उरसप्पिणी उट्टेसए जाव परस्सरे एए णं णिस्सीला एवं चेव जाव वत्तव्वं सिया । अह भंते ! ढंके कंके विलए मग्गुए सिखीए, एए णं णिस्सीला० सेसं तं चेव जाव वत्तव्वं सिया । सेवं भंते ! सेवं भंते ! ति जाव विहरइ ॥ ४५९ ॥

बारसमं सयं णवमो उट्टेसो

कइविहा णं भंते ! देवा पण्णत्ता ? गोयमा ! पंचविहा देवा पण्णत्ता, तंजहा-भविद्यदव्वदेवा १ णरदेवा २ धम्मदेवा ३ देवाहिदेवा ४ भावदेवा ५ । से केणट्ठेणं भंते ! एवं वुच्चइ-भविद्यदव्वदेवा-भविद्यदव्वदेवा ? गोयमा ! जे भविए पंचिदियतिरिक्खजोणिए वा मणुस्से वा देवेसु उववज्जित्तए से तेणट्ठेणं गोयमा ! एवं वुच्चइ भविद्यदव्वदेवा २ । से केणट्ठेणं भंते ! एवं वुच्चइ णरदेवा-णरदेवा ? गोयमा ! जे इमे रायाणो चाउरंतचक्कवट्टी उप्पणसमत-चक्करयणप्पहाणा णवण्हिपइणो समिद्धकोसा बत्तीसं रायवरसहस्साणुयाय-मग्गा सागरवरमेहलाहिवइणो मणुस्सिदा से तेणट्ठेणं जाव णरदेवा २ । से

केणट्ठेणं भंते ! एवं बुच्चइ—धम्मदेवा-धम्मदेवा ? गोयमा ! जे इमे अण-
गारा भगवंतो इरियासमिया जाव गुत्तबंभयारी से तेणट्ठेणं जाव धम्मदेवा
२ । से केणट्ठेणं भंते ! एवं बुच्चइ—देवाहिदेवा-देवाहिदेवा ? गोयमा ! जे
इमे अरिहंता भगवंतो उप्पण्णणणदंसणधरा जाव सव्वदरिसी से तेणट्ठेणं
जाव देवाहिदेवा २ । से केणट्ठेणं भंते ! एवं बुच्चइ—भावदेवा-भावदेवा ?
गोयमा ! जे इमे भवणवइवाणमंतरजोइसियवेमाणिया देवा देवगइणामगोयाइं
कम्माइं वेदंति से तेणट्ठेणं जाव भावदेवा २॥४६०॥ भवियदव्वदेवा णं भंते !
कओहिंते उववज्जंति कि णेरइएहिंते उववज्जंति तिरिक्ख० मणुस्स० देवेहिंते
उववज्जंति ? गोयमा ! णेरइएहिंते उववज्जंति तिरि० मणु० देवेहिंतेवि उव-
वज्जंति, भेओ जहा वक्कंतीए सव्वेसु उववाएयव्वा जाव अणुत्तरोववाइयत्ति,
णवरं असंखेज्जवासाउयअकम्मभूमियअंतरदीवगसव्वट्टुसिद्धवज्जं जाव अपरा-
जियदेवेहिंतेवि उववज्जंति, णो सव्वट्टुसिद्धदेवेहिंते उववज्जंति । णरदेवा णं
भंते ! कओहिंते उववज्जंति, कि णेरइए० पुच्छा, गोयमा ! णेरइएहिंते उव-
वज्जंति णो तिरि० णो मणु० देवेहिंतेवि उववज्जंति । जइ णेरइएहिंते उव-
वज्जंति कि रयणप्पभापुढविणेरइएहिंते उववज्जंति जाव अहेसत्तमापुढविणेर-
इएहिंते उववज्जंति ? गोयमा ! रयणप्पभापुढविणेरइएहिंते उववज्जंति णो
सक्कर० जाव णो अहेसत्तमापुढविणेरइएहिंते उववज्जंति । जइ देवेहिंते
उववज्जंति कि भवणवासिदेवेहिंते उववज्जंति वाणमंतर० जोइसिय०
वेमाणियदेवेहिंते उववज्जंति ? गोयमा ! भवणवासिदेवेहिंतेवि उववज्जंति
वाणमंतर० एवं सव्वेदेवेसु उववाएयव्वा वक्कंतीभेएणं जाव सव्वट्टुसिद्धत्ति ।
धम्मदेवा णं भंते ! कओहिंते उववज्जंति कि णेरइएहिंते० ? एवं
वक्कंतीभेएणं सव्वेसु उववाएयव्वा जाव सव्वट्टुसिद्धत्ति, णवरं तमा अहे-
सत्तमाए तेउवाउअसंखेज्जवासाउयअकम्मभूमियअंतरदीवगवज्जेसु । देवाहिदेवा
णं भंते ! कओहिंते उववज्जंति कि णेरइएहिंते उववज्जंति पुच्छा, गोयमा !
णेरइएहिंते उववज्जंति णो तिरि० णो मणु० देवेहिंतेवि उववज्जंति ।
जइ णेरइएहिंते ? एवं तिसु पुढवीसु उववज्जंति सेसाओ खोडेयव्वाओ ।
जइ देवेहिंते० वेमाणिएसु सव्वेसु उववज्जंति जाव सव्वट्टुसिद्धत्ति, सेसा
खोडेयव्वा । भावदेवा णं भंते ! कओहिंते उववज्जंति ? एवं जहा वक्कं-
तीए भवणवासीणं उववाओ तहा भाणियव्वो ॥४६१॥ भवियदव्वदेवाणं

भंते ! केवइयं कालं ठिई प० ? गोयमा जहण्णेणं अंतोमुहुत्तं उक्कोसेणं तिण्णि पत्तिओवमाइं । णरदेवाणं पुच्छा, गोयमा ! जहण्णेणं सत्त वाससयाइं उक्कोसेणं चउरासीई पुक्वसयसहस्साइं । धम्मदेवाणं भंते ! पुच्छा, गोयमा ! जहण्णेणं अंतोमुहुत्तं उक्कोसेणं देसुणा पुक्वकोडी । देवाहिदेवाणं पुच्छा, गोयमा ! जहण्णेणं भावत्तिरि वासाइं उक्कोसेणं चउरासीई पुक्वसयसहस्साइं । भावदेवाणं पुच्छा, गोयमा ! जहण्णेणं दस वाससहस्साइं उक्कोसेणं तेत्तीसं सागरोवमाइं ॥ ४३२ ॥ भवियदक्वदेवा णं भंते ! कि एगत्तं पभू विउव्वित्तए पुहुत्तं पभू विउव्वित्तए ? गोयमा ! एगत्तंपि पभू विउव्वित्तए पुहुत्तंपि पभू विउव्वित्तए, एगत्तं विउव्वमाणे एगिदियरूवं वा जाव पंचिदियरूवं वा पुहुत्तं विउव्वमाणे एगिदियरूवाणि वा जाव पंचिदियरूवाणि वा ताइं संखेज्जाणि वा असंखेज्जाणि वा संबद्धाणि वा असंबद्धाणि वा सरिसाणि वा असरिसाणि वा विउव्वन्ति विउव्वित्ता तओ पच्छा अप्पणो जहिच्छिथाइं कज्जाइं करेति, एवं णरदेवावि, एवं धम्मदेवावि । देवाहिदेवाणं पुच्छा, गोयमा ! एगत्तंपि पभू विउव्वित्तए पुहुत्तंपि पभू विउव्वित्तए णो चेव णं संपत्तीए विउव्विसु वा विउव्वित्ति वा विउव्विस्संति वा । भावदेवाणं पुच्छा, जहा भवियदक्वदेवा ॥ ४६३ ॥ भवियदक्वदेवाणं भंते ! अणंतं उव्वट्ठित्ता कहि गच्छंति कहि उव्वज्जंति कि णेरइएसु उव्वज्जंति जाव देवेसु उव्वज्जंति ? गोयमा ! णो णेरइएसु उव्वज्जंति णो तिरि० णो मणु० देवेसु उव्वज्जंति, जइ देवेसु उव्वज्जंति सव्वदेवेसु उव्वज्जंति जाव सव्वट्ठिसिद्धति । णरदेवा णं भंते ! अणंतं उव्वट्ठित्ता पुच्छा, गोयमा ! णेरइएसु उव्वज्जंति णो तिरि० णो मणु० णो देवेसु उव्वज्जंति, जइ णेरइएसु उव्वज्जंति० सत्तयुवि पुहवीसु उव्वज्जंति । धम्मदेवा णं भंते ! अणंतं उव्वट्ठित्ता पुच्छा, गोयमा ! णो णेरइएसु उव्वज्जंति णो तिरि० णो मणु० देवेसु उव्वज्जंति । जइ देवेसु उव्वज्जंति कि भवणवासि० पुच्छा, गोयमा ! णो भवणवासिदेवेसु उव्वज्जंति णो वाणमंतर० णो जोइसिय० वेमाणियदेवेसु उव्वज्जंति, सव्वेसु वेमाणिएसु उव्वज्जंति जाव सव्वट्ठिसिद्धअणुत्तरोववाइय जाव उव्वज्जंति, अरथेगइया सिज्जंति जाव अंतं करेति । देवाहिदेवा णं भंते ! अणंतं उव्वट्ठित्ता कहि गच्छंति कहि उव्वज्जंति ? गोयमा ! सिज्जंति जाव अंतं करेति । भावदेवा णं भंते ! अणंतं उव्वट्ठित्ता पुच्छा, जहा वक्कंतीए

असुरकुमाराणं उव्वट्टणा तथा भाणियव्वा । भवियदव्वदेवे णं भंते ! भविय-
दव्वदेवेत्ति कालो केवच्चिरं होइ ? गोयमा ! जहण्णेणं अंतोमुहुत्तं उव्वको-
सेणं तिण्णि पलिओवमाइं, एवं जहेव ठिई सच्चेव सच्चिट्टणावि जाव परवदेवस्स,
णवरं धम्मदेवस्स जहण्णेणं एक्कं समयं उव्वकोसेणं देसूणा पुव्वकोडी । भविय-
दव्वदेवस्स णं भंते ! केवह्वयं कालं अंतरं होइ ? गोयमा ! जहण्णेणं दसवास-
सहस्साइं अंतोमुहुत्तमव्वहियाइं उव्वकोसेणं अणंतं कालं वणस्सइकालो । णर-
देवाणं पुच्छा, गोयमा ! जहण्णेणं साइरेणं सामरोवमं उव्वकोसेणं अणंतं कालं
अवड्डं पोगलपरियट्टं देसूणं । धम्मदेवस्स णं पुच्छा, गोयमा ! जहण्णेणं
पलिओवमपुहुत्तं उव्वकोसेणं अणंतं कालं जाव अवड्डं पोगलपरियट्टं देसूणं ।
देवाहिदेवाणं पुच्छा, गोयमा ! णत्थि अंतरं । भावदेवस्स णं पुच्छा, गोयमा !
जहण्णेणं अंतोमुहुत्तं उव्वकोसेणं अणंतं कालं वणस्सइकालो । एएसि णं भंते !
भवियदव्वदेवाणं णरदेवाणं जाव भावदेवाणं य कयरे २ जाव विसेसाहिया
वा ? गोयमा ! सव्वत्थोवा णरदेवा, देवाहिदेवा संखेज्जगुणा, धम्मदेवा संखेज्ज-
गुणा, भवियदव्वदेवा असंखेज्जगुणा, भावदेवा असंखेज्जगुणा ॥ ४६४ ॥ एएसि
णं भंते ! भावदेवाणं भवणवासीणं षाणसंतराणं जोइसियाणं वेमाणियाणं
सोहम्मगाणं जाव अच्चुयगाणं गेवेज्जगाणं अण्त्तरोववाइयाणं य कयरे २ जाव
विसेसाहिया वा ? गोयमा ! सव्वत्थोवा अण्त्तरोववाइया भावदेवा, उयरिम-
गेवेज्जा भावदेवा संखेज्जगुणा, मज्झिमगेवेज्जा संखेज्जगुणा, हेट्ठिमगेवेज्जा
संखेज्जगुणा, अच्चुए कप्पे देवा संखेज्जगुणा जाव आणयकप्पे भावदेवा संखेज्ज-
गुणा एवं जहा जीवाभिगमे तिविहे देवपुरिसे अप्पावहुयं जाव जोइसिया भाव-
देवा असंखेज्जगुणा । सेवं भंते ! सेवं भंते ! त्ति ॥ ४६५ ॥

बारसमं सयं दसमो उट्ठेसो

कइविहा णं भंते ! आया पणत्ता ? गोयमा ! अट्ठविहा आया पणत्ता,
तंजहा—दवियाया कसायाया जोगाया उवओगाया णाणाया दंसणाया चरित्ताया
वीरियाया । जस्स णं भंते ! दवियाया तस्स कसायाया जस्स कसायाया तस्स
दवियाया ? गोयमा ! जस्स दवियाया तस्स कसायाया सिय अत्थि सिय
णत्थि, जस्स पुण कसायाया तस्स दवियाया णियमं अत्थि । जस्स णं भंते !
दवियाया तस्स जोगाया ? एवं जहा दवियाया कसायाया भणिया तथा दवि-

याया जोगाया भाणियव्वा । जस्स णं भंते ! दवियाया तस्स उवओगाया एवं सव्वत्थ पुच्छा भाणियव्वा, गोयमा ! जस्स दवियाया तस्स उवओगाया णियमं अत्थि, जस्सवि उवओगाया तस्सवि दवियाया णियमं अत्थि, जस्स दवियाया तस्स णाणाया भयणाए, जस्स पुण णाणाया तस्स दवियाया णियमं अत्थि, जस्स दवियाया तस्स दंसणाया णियमं अत्थि, जस्सवि दंसणाया तस्स दवियाया णियमं अत्थि, जस्स दवियाया तस्स चरित्ताया भयणाए, जस्स पुण चरित्ताया तस्स दवियाया णियमं अत्थि, एवं वीरियायाएवि समं । जस्स णं भंते ! कसायाया तस्स जोगाया पुच्छा, गोयमा ! जस्स कसायाया तस्स जोगाया णियमं अत्थि, जस्स पुण जोगाया तस्स कसायाया सिय अत्थि सिय णत्थि, एवं उवओगायाएवि समं कसायाया णेयव्वा, कसायाया य णाणाया य परोप्परं दोवि भइयव्वाओ, जहा कसायाया य उवओगाया य तथा कसायाया य दंसणाया य कसायाया य चरित्ताया य दोवि परोप्परं भइयव्वाओ, जहा कसायाया य जोगाया य तथा कसायाया य वीरियाया य भाणियव्वाओ, एवं जहा कसायायाए वत्तव्वया भणिया तथा जोगायाएवि उवरिमाहिं समं भाणियव्वाओ । जहा दवियायाए वत्तव्वया भणिया तथा उवओगायाएवि उवरिल्लाहिं समं भाणियव्वा । जस्स णाणाया तस्स दंसणाया णियमं अत्थि, जस्स पुण दंसणाया तस्स णाणाया भयणाए, जस्स णाणाया तस्स चरित्ताया सिय अत्थि सिय णत्थि, जस्स पुण चरित्ताया तस्स णाणाया णियमं अत्थि, णाणाया वीरियाया दोवि परोप्परं भयणाए । जस्स दंसणाया तस्स उवरिमाओ दोवि भयणाए, जस्स पुण ताओ तस्स दंसणाया णियमं अत्थि । जस्स चरित्ताया तस्स वीरियाया णियमं अत्थि, जस्स पुण वीरियाया तस्स चरित्ताया सिय अत्थि सिय णत्थि । एयासि णं भंते ! दवियायाणं कसायायाणं जाव वीरियायाण य कयरे २ जाव विसेसाहिंया वा ? गोयमा ! सव्वत्थोवाओ चरित्तायाओ, णाणायाओ अणंतगुणाओ, कसायायाओ अणंतगुणाओ, जोगायाओ विसेसाहिंयाओ, वीरियायाओ विसेसाहिंयाओ; उवओगदवियदंसणायाओ तिण्णिवि तुल्लाओ विसेसाहिंयाओ ॥ ४६६ ॥ आया भंते ! णाणे अण्णाणे ? गोयमा ! आया सिय णाणे सिय अण्णाणे, णाणे पुण णियमं आया । आया भंते ! णेरइयाणं णाणे अण्णे णेरइयाणं णाणे ? गोयमा ! आया णेरइयाणं सिय णाणे सिय अण्णाणे, णाणे पुण

से नियमं आया, एवं जाव थणियकुमाराणं । आया भंते ! पुढविकाइयाणं
अण्णाणे अण्णे पुढविकाइयाणं अण्णाणे ? गोयमा ! आया पुढविकाइयाणं
णियमं अण्णाणे अण्णाणेवि णियमं आया, एवं जाव वणस्सइकाइयाणं,
वेइदियतेइदिय जाव वेमाणियाणं जहा णेरइयाणं । आया भंते ! दंसणे अण्णे
दंसणे ? गोयमा ! आया णियमं दंसणे दंसणेवि णियमं आया । आया भंते !
णेरइयाणं दंसणे अण्णे णेरइयाणं दंसणे ? गोयमा ! आया णेरइयाणं णियमं
दंसणे दंसणेवि से णियमं आया, एवं जाव वेमाणियाणं णिरंतरं दंडओ ॥४६७॥
आया भंते ! रयणप्पभापुढवी अण्णा रयणप्पभापुढवी ? गोयमा ! रयणप्पभा-
पुढवी सिय आया सिय णो आया सिय अवत्तव्वं आयाइ य णो आयाइ य । से
केणट्ठेणं भंते ! एवं बुच्चइ-रयणप्पभापुढवी सिय आया सिय णो आया सिय
अवत्तव्वं आयाइ य णो आयाइ य ? गोयमा ! अप्पणो आइट्ठे आया, परस्स
आइट्ठे णो आया, तदुभयस्स आइट्ठे अवत्तव्वं रयणप्पभापुढवी आयाइ य
णो आयाइ य, से तेणट्ठेणं तं चेव जाव णो आयाइ य । आया भंते ! सक्कर-
प्पभापुढवी जहा रयणप्पभापुढवी तहा सक्करप्पभावि एवं जाव अहे सत्तमा ।
आया भंते ! सोहम्मकप्पे पुच्छा, गोयमा ! सोहम्मे कप्पे सिय आया सिय
णो आया जाव णो आयाइ य । से केणट्ठेणं भंते ! जाव णो आयाइ य ?
गोयमा ! अप्पणो आइट्ठे आया, परस्स आइट्ठे णो आया, तदुभयस्स
आइट्ठे अवत्तव्वं आयाइ य णो आयाइ य, से तेणट्ठेणं तं चेव जाव णो
आयाइ य, एवं जाव अच्चुए कप्पे । आया भंते ! गेविज्जविमाणे अण्णे
गेविज्जविमाणे ? एवं जहा रयणप्पभापुढवी तहेव, एवं अणुत्तरविमाणवि,
एवं ईसिपइभारावि । आया भंते ! परमाणुपोग्गले अण्णे परमाणुपोग्गले ?
एवं जहा सोहम्मे कप्पे तहा परमाणुपोग्गलेवि णाणियव्वे । आया भंते !
दुपएसिए खंधे अण्णे दुपएसिए खंधे ? गोयमा ! दुपएसिए खंधे सिय आया
१ सिय णो आया २ सिय अवत्तव्वं आयाइ य णो आयाइ य ३ सिय आया
य णो आया य ४ सिय आया य अवत्तव्वं आयाइ य णो आयाइ य ५ सिय
णो आया य अवत्तव्वं आयाइ य णो आयाइ य ६ । से केणट्ठेणं भंते ! एवं
तं चेव जाव णो आया य अवत्तव्वं आयाइ य णो आयाइ य ? गोयमा !
अप्पणो आइट्ठे आया १ परस्स आइट्ठे णो आया २ तदुभयस्स आइट्ठे

अवत्तत्त्वं दुपएसिए खंधे आयाइ य णो आयाइ य ३ वेसे आइट्ठे सन्भाव-
 पज्जवे देसे आइट्ठे असन्भावपज्जवे दुप्पएसिए खंधे आया य णो आया य ४
 देसे आइट्ठे सन्भावपज्जवे देसे आइट्ठे तद्दुभयपज्जवे दुपएसिए खंधे आया
 य अवत्तत्त्वं आयाइ य णो आयाइ य ५ देसे आइट्ठे असन्भावपज्जवे देसे
 आइट्ठे तद्दुभयपज्जवे दुपएसिए खंधे णो आया य अवत्तत्त्वं आयाइ य णो
 आयाइ य ६, से तेणट्ठेणं तं चेव जाव णो आयाइ य । आया भंते ! तिप-
 एसिए खंधे अण्णे तिपएसिए खंधे ? गोयमा ! तिपएसिए खंधे सिय आया १
 सिय णो आया २ सिय अवत्तत्त्वं आयाइ य णो आयाइ य ३ सिय आया य
 णो आया य ४ सिय आया य णो आयाओ य ५ सिय आयाओ य णो आया
 य ६ सिय आया य अवत्तत्त्वं आयाइ य णो आयाइ य ७ सिय आया य अव-
 त्तत्त्वाइं आयाओ य णो आयाओ य ८ सिय आयाओ य अवत्तत्त्वं आयाइ य
 णो आयाइ य ९ सिय णो आया य अवत्तत्त्वं आयाइ य णो आयाइ य १०
 सिय णो आया य अवत्तत्त्वाइं आयाओ य णो आयाओ य ११ सिय णो आयाओ
 य अवत्तत्त्वं आयाइ य णो आयाइ य १२ सिय आया य णो आया य अवत्तत्त्वं
 आयाइ य णो आयाइ य १३ । से केणट्ठेणं भंते ! एवं बुच्चइ-तिपएसिए
 खंधे सिय आया एवं चेव उच्चारेयत्त्वं जाव सिय आया य णो आया य अव-
 त्तत्त्वं आयाइ य णो आयाइ य ? गोयमा ! अण्णो आइट्ठे आया १ परस्स
 आइट्ठे णो आया २ तद्दुभयस्स आइट्ठे अवत्तत्त्वं आयाइ य णो आयाइ य ३
 देसे आइट्ठे सन्भावपज्जवे देसे आइट्ठे असन्भावपज्जवे तिपएसिए खंधे आया
 य णो आया य ४ देसे आइट्ठे सन्भावपज्जवे देसे आइट्ठे असन्भावपज्जवा
 तिपएसिए खंधे आया य णो आयाओ य ५ वेसा आइट्ठे सन्भावपज्जवा देसे
 आइट्ठे असन्भावपज्जवे तिपएसिए खंधे आयाओ य णो आया य ६ देसे
 आइट्ठे सन्भावपज्जवे देसे आइट्ठे तद्दुभयपज्जवे तिपएसिए खंधे आया य
 अवत्तत्त्वं आयाइ य णो आयाइ य ७ देसे आइट्ठे सन्भावपज्जवे वेसा आइट्ठे
 तद्दुभयपज्जवा तिपएसिए खंधे आया य अवत्तत्त्वाइं आयाओ य णो आयाओ
 य ८ वेसा आइट्ठे सन्भावपज्जवा देसे आइट्ठे तद्दुभयपज्जवे तिपएसिए खंधे
 आयाओ य अवत्तत्त्वं आयाइ य णो आयाइ य ९, एए तिण्णि मंगा, देसे
 आइट्ठे असन्भावपज्जवे देसे आइट्ठे तद्दुभयपज्जवे तिपएसिए खंधे णो आया

य अवत्तव्वं आयाइ य णो आयाइ य १० देसे आइट्ठे असम्भावपज्जवे देसा
 आइट्ठा तदुभयपज्जवा त्तिपएसिए खंधे णो आया य अवत्तव्वाइं आयाओ य
 णो आयाओ य ११ देसा आइट्ठा असम्भावपज्जवा देसे आइट्ठे तदुभयपज्जवे
 त्तिपएसिए खंधे णो आयाओ य अवत्तव्वं आयाइ य णो आयाइ य १२ देसे
 आइट्ठे सम्भावपज्जवे देसे आइट्ठे असम्भावपज्जवे देसे आइट्ठे तदुभयपज्जवे
 त्तिपएसिए खंधे आया य णो आया य अवत्तव्वं आयाइ य णो आयाइ य १३,
 से तेणट्ठेणं गोयमा ! एवं वुच्चइ-त्तिपएसिए खंधे सिय आया तं चैव जाव
 णो आयाइ य । आया भंते ! चउप्पएसिए खंधे अण्णे० पुच्छा, गोयमा !
 चउप्पएसिए खंधे सिय आया १ सिय णो आया २ सिय अवत्तव्वं आयाइ
 य णो आयाइ य ३ सिय आया य णो आया य ४, ४-७ सिय आया य
 अवत्तव्वं ४, ८-१२ सिय णो आया य अवत्तव्वं ४, १२-१५ सिय आया
 य णो आया य अवत्तव्वं आयाइ य णो आयाइ य १६ सिय आया य णो
 आया य अवत्तव्वाइं आयाओ य णो आयाओ य १७ सिय आया य णो
 आयाओ य अवत्तव्वं आयाइ य णो आयाइ य १८ सिय आयाओ य णो आया
 य अवत्तव्वं आयाइ य णो आयाइ य १९ । से केणट्ठेणं भंते ! एवं वुच्चइ
 चउप्पएसिए खंधे सिय आया य णो आया य अवत्तव्वं तं चैव अट्ठे पडि-
 उच्चारेयव्वं ? गोयमा ! अप्पणो आइट्ठे आया १ परस्स आइट्ठे णो आया
 २ तदुभयस्स आइट्ठे अवत्तव्वं आयाइ य णो आयाइ य ३ देसे आइट्ठे
 सम्भावपज्जवे देसे आइट्ठे असम्भावपज्जवे चउभंगो, सम्भावपज्जवेणं तदु-
 भएण य चउभंगो असम्भावेणं तदुभएण य चउभंगो, देसे आइट्ठे सम्भाव-
 पज्जवे देसे आइट्ठे असम्भावपज्जवे देसे आइट्ठे तदुभयपज्जवे चउप्पए-
 सिए खंधे आया य णो आया य अवत्तव्वं आयाइ य णो आयाइ य, देसे
 आइट्ठे सम्भावपज्जवे देसे आइट्ठे असम्भावपज्जवे देसा आइट्ठा तदुभयपज्जवा
 चउप्पएसिए खंधे आया य णो आया य अवत्तव्वाइं आयाओ य णो आयाओ
 य १७ देसे आइट्ठे सम्भावपज्जवे देसा आइट्ठा असम्भावपज्जवा देसे आइट्ठे
 तदुभयपज्जवे चउप्पएसिए खंधे आया य णो आयाओ य अवत्तव्वं आयाइ य
 णो आयाइ य १८ देसा आइट्ठा सम्भावपज्जवा देसे आइट्ठे असम्भावपज्जवे
 देसे आइट्ठे तदुभयपज्जवे चउप्पएसिए खंधे आयाओ य णो आया य अवत्तव्वं

आयाइ य णो आयाइ य १६, से तेणट्ठेणं गोयमा ! एवं वुच्चइ-चउप्पएसिए खंधे सिय आया सिय णो आया सिय अवत्तव्वं णिवत्थेवे ते चेव भंगा उच्चारे-यव्वा जाव णो आयाइ य । आया भंते ! पंचपएसिए खंधे अण्णे पंचपएसिए खंधे ? गोयमा ! पंचपएसिए खंधे सिय आया १ सिय णो आया २ सिय अवत्तव्वं आयाइ य णो आयाइ य ३ सिय आया य णो आया य ४ सिय आयाय अवत्तव्वं ४ णो आयाय अवत्तव्वेण य तियगसंजोगे एवकी ण पडइ । से केणट्ठेणं भंते ! तं चेव पड्डिउच्चारेयव्वं ? गोयमा ! अप्पणो आइट्ठे आया १ परस्स आइट्ठे णो आया २ तदुभयस्स आइट्ठे अवत्तव्वं ३ देसे आइट्ठे सव्भावपज्जवे देसे आइट्ठे असव्भावपज्जवे एवं दुर्धगसंजोगे सव्वे पडंति तियगसंजोगे एवकी ण पडइ । छप्पएसियस्स सव्वे पडंति जहा छप्पएसिए एवं जाव अणंतपएसिए । सेवं भंते ! सेवं भंते ! त्ति जाव विहरइ ॥ ४६८ ॥

बारसमं सयं समत्तं

तेरसमं सयं पढमो उद्देसो

पुढवी १ देव २ मणंतर ३ पुढवी ४ आहारमेव ५ उववाए ६ । भासा ७ कम्म ८ अणगारे केयाघडिया ९ समुग्घाए १० । रायगिहे जाव एवं वयासी-कइ णं भंते ! पुढवीओ पणत्ताओ ? गोयमा ! सत्त पुढवीओ पणत्ताओ, तंजहा-रयणप्पभा जाव अहेसत्तमा । इमीसे णं भंते ! रयणप्पभाए पुढवीए केवइया णिरयावाससयसहस्सा पणत्ता ? गोयमा ! तीसं णिरयावाससय-सहस्सा पणत्ता । ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडावि असंखेज्जवित्थडावि । इमीसे णं भंते ! रयणप्पभाए तीसाए णिरयावाससयसहस्सेसु संखेज्जवित्थडेसु णेरएसु एगसमएणं केवइया णेरइया उववज्जंति १ ? केवइया काउलेस्सा उववज्जंति २ ? केवइया कण्हपविखया उववज्जंति ३ ? केवइया सुक्कपविखया उववज्जंति ४ ? केवइया सण्णी उववज्जंति ५ ? केवइया असण्णी उववज्जंति ६ ? केवइया भवसिद्धिया जीवा उववज्जंति ७ ? केवइया अभवसिद्धिया जीवा उववज्जंति ८ ? केव-इया आभिणिबोहियणाणी उववज्जंति ९ ? केवइया सुयणाणी उववज्जंति १० ? केवइया ओहिणाणी उववज्जंति ११ ? केवइया मइअण्णाणी उव-

वज्जति १२ ? केवइया सुयअण्णाणी उववज्जति १३ ? केवइया विभंगणाणी उववज्जति १४ ? केवइया चक्खुदंसणी उववज्जति १५ ? केवइया अचक्खुदंसणी उववज्जति १६ ? केवइया ओहिदंसणी उववज्जति १७ ? केवइया आहारसण्णोवउत्ता उववज्जति १८ ? केवइया भयसण्णोवउत्ता उववज्जति १९ ? केवइया मेहुणसण्णोवउत्ता उववज्जति २० ? केवइया परिग्गहसण्णोवउत्ता उववज्जति २१ ? केवइया इत्थिवेयगा उववज्जति २२ ? केवइया पुरिसवेयगा उववज्जति २३ ? केवइया णपुंसगवेयगा उववज्जति २४ ? केवइया कोहकसाई उववज्जति २५ जाव केवइया लोभकसाई उववज्जति २६ ? केवइया सोइंदियउवउत्ता उववज्जति २७ जाव केवइया फांसिदियोवउत्ता उववज्जति २८ ? केवइया णोइंदियोवउत्ता उववज्जति २९ ? केवइया मणजोगी उववज्जति ३० ? केवइया वइजोगी उववज्जति ३१ ? केवइया कायजोगी उववज्जति ३२ ? केवइया सागारोवउत्ता उववज्जति ३३ ? केवइया अणागारोवउत्ता उववज्जति ३४ ? गोयमा ! इमीसे णं रयणप्पभाए पुढवीए तीसाए णिरयावाससयसहस्सेसु संखेज्जवित्थडेसु णरएसु जहण्णेणं एक्को वा दो वा तिण्णि वा उक्कोसेणं संखेज्जा णेरइया उववज्जति, जहण्णेणं एक्को वा दो वा तिण्णि वा उक्कोसेणं संखेज्जा काउलेस्सा उववज्जति, जहण्णेणं एक्को वा दो वा तिण्णि वा, उक्कोसेणं संखेज्जा कण्हपक्खिया उववज्जति, एवं सुक्कपक्खियावि, एवं सण्णीवि, एवं असण्णीवि, एवं भवसिद्धिया एवं अभवसिद्धिया, आभिणिबोहिंयणाणी सुयणाणी ओहिंणाणी मइअण्णाणी सुयअण्णाणी विभंगणाणी एवं च्चैव, चक्खुदंसणी, ण उववज्जति, जहण्णेणं एक्को वा दो वा तिण्णि वा उक्कोसेणं संखेज्जा अचक्खुदंसणी उववज्जति, एवं ओहिदंसणीवि, एवं आहारसण्णोवउत्तावि जाव परिग्गहसण्णोवउत्तावि, इत्थिवेयगा ण उववज्जति पुरिसवेयगावि ण उववज्जति, जहण्णेणं एक्को वा दो वा तिण्णि वा उक्कोसेणं संखेज्जा णपुंसगवेयगा उववज्जति, एवं कोहकसाई जाव लोभकसाई, सोइंदियउवउत्ता ण उववज्जति एवं जाव फांसिदोवउत्ता ण उववज्जति, जहण्णेणं एक्को वा दो वा तिण्णि वा उक्कोसेणं संखेज्जा णोइंदोवउत्ता उववज्जति, मणजोगी ण उववज्जति, एवं वइजोगीवि, जहण्णेणं एक्को वा दो वा तिण्णि वा उक्कोसेणं संखेज्जा कायजोगी उववज्जति, एवं सागारोवउत्तावि

एवं अणागारोवउत्तावि । इमीसे णं भंते ! रयणप्पभाए पुढवीए तीसाए गिरयादाससयसहस्सेसु संखेज्जवित्थडेसु णरएसु एगसमएणं केवइया णेरइया उववट्टंति, केवइया काउलेस्सा उववट्टंति जाव केवइया अणागारोवउत्ता उववट्टंति ? गोयमा ! इमीसे णं रयणप्पभाए पुढवीए तीसाए गिरयादाससयसहस्सेसु संखेज्जवित्थडेसु णरएसु एगसमएणं जहण्णेणं एक्को वा दो वा तिण्णि वा उक्कोसेणं संखेज्जा णेरइया उववट्टंति, जहण्णेणं एक्को वा दो वा तिण्णि वा, उक्कोसेणं संखेज्जा काउलेस्सा उववट्टंति, एवं जाव सण्णी, असण्णी ण उववट्टंति, जहण्णेणं एक्को वा दो वा तिण्णि वा उक्कोसेणं संखेज्जा भवसिद्धिया उववट्टंति एवं जाव सुयअण्णाणी विभंगण्णाणी ण उववट्टंति, चक्खुदंसणी ण उववट्टंति, जहण्णेणं एक्को वा दो वा तिण्णि वा उक्कोसेणं संखेज्जा अचक्खुदंसणी उववट्टंति, एवं जाव लोभकसाई, सोईदियउवउत्ता ण उववट्टंति एवं जाव फांसिदियोवउत्ता ण उववट्टंति, जहण्णेणं एक्को वा दो वा तिण्णि वा उक्कोसेणं संखेज्जा णोईदियोवउत्ता उववट्टंति, मणजोगी ण उववट्टंति एवं वइजोगीवि, जहण्णेणं एक्को वा दो वा तिण्णि वा उक्कोसेणं संखेज्जा कायजोगी उववट्टंति, एवं सागारोवउत्तावि अणागारोवउत्तावि । इमीसे णं भंते ! रयणप्पभाए पुढवीए तीसाए गिरयादाससयसहस्सेसु संखेज्जवित्थडेसु णरएसु केवइया णेरइया पणत्ता ? केवइया काउलेस्सा प० जाव केवइया अणागारोवउत्ता पणत्ता ? केवइया अणंतरोववण्णा पणत्ता १ ? केवइया परंपरोववण्णा पणत्ता २ ? केवइया अणंतरोवगाढा पणत्ता ३ ? केवइया परंपरोवगाढा प० ४ ? केवइया अणंतराहारा प० ५ ? केवइया परंपराहारा प० ६ ? केवइया अणंतरपज्जत्ता प० ७ ? केवइया परंपरपज्जत्ता पणत्ता ८ ? केवइया चरिमा प० ९ ? केवइया अचरिमा प० १० ? गोयमा ! इमीसे रयणप्पभाए पुढवीए तीसाए गिरयादाससयसहस्सेसु संखेज्जवित्थडेसु णरएसु संखेज्जा णेरइया प०, संखेज्जा काउलेस्सा प०, एवं जाव संखेज्जा सण्णी प०, असण्णी सिय अत्थि सिय णत्थि जइ अत्थि जहण्णेणं एक्को वा दो वा तिण्णि वा उक्कोसेणं संखेज्जा प०, संखेज्जा भवसिद्धिया प०, एवं जाव संखेज्जा परिग्गहसणोवउत्ता प०, इत्थि-वेयगा णत्थि पुरिसवेयगा णत्थि, संखेज्जा णपुंसगवेयगा प०, एवं कोहकसाईवि, माणकसाई जहा असण्णी, एवं जाव लोभकसाई, संखेज्जा सोईदियोवउत्ता प०, एवं जाव फांसिदियोवउत्ता, णोईदियोवउत्ता जहा असण्णी, संखेज्जा

मणजोगी प०। एवं जाव अणागारोवउत्ता, अर्णतरोववण्णगा सिय अत्थि सिय
 णत्थि जइ अत्थि जहा असण्णी, संखेज्जा परंपरोववण्णगा प०, एवं जहा अर्ण-
 तरोववण्णगा तथा अर्णतरोवगाढगा अर्णतराहारगा अर्णतरपज्जत्तमा चरिमा,
 परंपरोवगाढगा जाव अचरिमा जहा परंपरोववण्णगा । इमीसे णं भंते ! रयण-
 प्पभाए पुढवीए तीसाए गिरयावाससयसहस्सेसु असंखेज्जवित्थडेसु णरएसु
 एगसमएणं केवइया णेरइया उववज्जंति जाव केवइया अणागारोवउत्ता उव-
 वज्जंति ? गोयमा ! इमीसे णं रयणप्पभाए पुढवीए तीसाए गिरयावाससय-
 सहस्सेसु असंखेज्जवित्थडेसु णरएसु एगसमएणं जहणेणं एक्को वा बो वा तिण्णि
 वा, उक्कोसेणं असंखेज्जा णेरइया उववज्जंति, एवं जहेव संखेज्जवित्थडेसु
 तिण्णि गमगा, तथा असंखेज्जवित्थडेसु वि तिण्णि गमगा भाणियव्वा णवरं
 असंखेज्जा भाणियव्वा सेसं तं चेव जाव असंखेज्जा अचरिमा प०, णवरं
 संखेज्जवित्थडेसुवि असंखेज्जवित्थडेसुवि ओहिणाणी ओहिंसणी य संखेज्जा
 उववट्ठावेयव्वा, सेसं तं चेव । सक्करप्पभाए णं भंते ! पुढवीए केवइया
 गिरयावास० पुच्छा, गोयमा ! पणवीसं गिरयावाससयसहस्सा पण्णत्ता, ते
 णं भंते ! किं संखेज्जवित्थडा ? असंखेज्जवित्थडा ? एवं जहा रयणप्पभाए
 तथा सक्करप्पभाएवि णवरं असण्णी तिसुवि गमएसु ण भण्णइ, सेसं तं
 चेव । बालुयप्पभाए णं पुच्छा, गोयमा ! पण्णरस गिरयावाससयसहस्सा
 प०, सेसं जहा सक्करप्पभाए णाणत्तं लेसामु लेसाओ जहा पढमसए । पंकप्पभाए
 णं पुच्छा, गोयमा ! वस गिरयावाससयसहस्सा प०, एवं जहा सक्करप्पभाए
 णवरं ओहिणाणी ओहिंसणी य ण उव्वट्ठंति, सेसं तं चेव । धूमप्पभाए णं
 पुच्छा, गोयमा ! तिण्णि गिरयावाससयसहस्सा एवं जहा पंकप्पभाए । तमाए
 णं भंते ! पुढवीए केवइया गिरयावास० पुच्छा, गोयमा ! एगे पंचूणे गिर-
 यावाससयसहस्से पण्णत्ते, सेसं जहा पंकप्पभाए । अहेसत्तमाए णं भंते ! पुढ-
 वीए कइ अणुत्तरा महइमहालयया महागिरया पण्णत्ता ? गोयमा ! पंच अणु-
 तरा जाव अपइट्ठाणे, ते णं भंते ! किं संखेज्जवित्थडा असंखेज्जवित्थडा ?
 गोयमा ! संखेज्जवित्थडे य असंखेज्जवित्थडा य, अहेसत्तमाए णं भंते ! पुढवीए
 पंचसु अणुत्तरेसु महइमहालयया जाव महागिरएसु संखेज्जवित्थडे णरए एगसम-
 एणं केवइया णेरइया उववज्जंति ? एवं जहा पंकप्पभाए णवरं तिसु णाणेसु
 ण उववज्जंति ण उव्वट्ठंति, पण्णत्तएसु तहेव अत्थि, एवं असंखेज्जवित्थडेसुवि

णवरं असंखेज्जा भाणियव्वा ॥४६६॥ इमीसे णं भंते ! रयणप्पभाए पुढवीए तीसाए णिरयावाससयसहस्सेसु संखेज्जवित्थडेसु णरएसु किं सम्महिट्ठी णेरइया उववज्जति मिच्छदिट्ठी णेरइया उववज्जति सम्मामिच्छदिट्ठी णेरइया उववज्जति ? गोयमा ! सम्महिट्ठीवि णेरइया उववज्जति, मिच्छदिट्ठीवि णेरइया उववज्जति, णो सम्मामिच्छदिट्ठी णेरइया उववज्जति । इमीसे णं भंते ! रयणप्पभाए पुढवीए तीसाए णिरयावाससयसहस्सेसु संखेज्जवित्थडेसु णरएसु किं सम्महिट्ठी णेरइया उववज्जति ? एवं चेव । इमीसे णं भंते ! रयणप्पभाए पुढवीए तीसाए णिरयावाससयसहस्सेसु संखेज्जवित्थडे णरणा किं सम्महिट्ठीहि णेरइएहि अविरहिया मिच्छादिट्ठीहि णेरइएहि अविरहिया सम्मामिच्छदिट्ठीहि णेरइएहि अविरहिया वा ? गोयमा ! सम्महिट्ठीहि वि णेरइएहि अविरहिया मिच्छादिट्ठीहि वि णेरइएहि अविरहिया, सम्मामिच्छादिट्ठीहि णेरइएहि अविरहिया विरहिया वा, एवं असंखेज्जवित्थडेसु वि तिण्णि गमगा भाणियव्वा एवं सक्करप्पभाए वि, एवं जाव तमाए वि । अहेसत्तमाए णं भंते ! पुढवीए पंचसु अणुत्तरेसु जाव संखेज्जवित्थडेसु णरए किं सम्महिट्ठी णेरइया पुच्छा, गोयमा ! सम्महिट्ठी णेरइया ण उववज्जति, मिच्छादिट्ठी णेरइया उववज्जति, सम्मामिच्छदिट्ठी णेरइया ण उववज्जति, एवं उव्वट्ठतिवि, अविरहिए जहेव रयणप्पभाए, एवं असंखेज्जवित्थडेसु वि तिण्णि गमगा ॥ ४७० ॥ से णूणं भंते ! कण्हलेस्से णीललेस्से जाव मुक्कलेस्से भवित्ता कण्हलेस्सेसु णेरइएसु उववज्जति, हुंता, गोयमा ! कण्हलेस्से जाव उववज्जति । से केणट्ठेणं भंते ! एवं बुच्चइ कण्हलेस्से जाव उववज्जति ? गोयमा ! लेस्सट्ठाणेसु संकिलिस्समाणेसु २ कण्हलेस्सं परिणमइ २ ता कण्हलेस्सेसु णेरइएसु उववज्जति, से तेणट्ठेणं जाव उववज्जति । से णूणं भंते ! कण्हलेस्से जाव मुक्कलेस्से भवित्ता णीललेस्सेसु णेरइएसु उववज्जति ? हुंता गोयमा ! जाव उववज्जति, से केणट्ठेणं जाव उववज्जति ? गोयमा ! लेस्सट्ठाणेसु संकिलिस्समाणेसु वा विसुज्जमाणेसु णीललेस्सं परिणमइ २ ता णीललेस्सेसु णेरइएसु उववज्जति, से तेणट्ठेणं गोयमा ! जाव उववज्जति । से णूणं भंते ! कण्हलेस्से णीललेस्से जाव भवित्ता काउलेस्सेसु णेरइएसु उववज्जति ? एवं जहा णीललेस्साए तहा काउलेस्साए वि भाणियव्वा जावि से तेणट्ठेणं जाव उववज्जति । सेवं भंते ! सेवं भंते ! ति ॥ ४७१ ॥

तेरसमं सयं बीओ उद्देसो

कइविहा णं भंते ! देवा पण्णत्ता ? गोयमा ! चउअविहा देवा पण्णत्ता, तंजहा--भवणवासी वाणमंतरा जोइसिया वेमाणिया । भवणवासी णं भंते ! देवा कइविहा पण्णत्ता ? गोयमा ! दसविहा पण्णत्ता, तंजहा--असुरकुमारा एवं भेओ जहा बिइयसए देखुद्देसए जाव अपराजिया सव्वट्टिसिद्धगा । केवइया णं भंते ! असुरकुमारावाससयसहस्सा पण्णत्ता ? गोयमा ! चोसट्ठी असुरकुमारा-वाससयसहस्सा पण्णत्ता, ते णं भंते ! किं संखेज्जवित्थडा ? असंखेज्जवित्थडा ? गोयमा ! संखेज्जवित्थडावि असंखेज्जवित्थडावि । चोसट्ठीए णं भंते ! असुर-कुमारावाससयसहस्सेसु संखेज्जवित्थडेसु असुरकुमारावासेसु एगसमएणं केवइया असुरकुमारा उववज्जंति जाव केवइया तेउलेस्सा उववज्जंति केवइया कण्ह पक्खिया उववज्जंति एवं जहा रयणप्पभाए तहेव पुच्छा, तहेव वागरणं, णवरं वोहि वेदेहि उववज्जंति, णपुंसगवेयगा ण उववज्जंति, सेसं तं चेव, उव्वट्टंतगावि तहेव णवरं असण्णी उव्वट्टंति, ओहिणाणी ओहिदंसणी य ण उव्वट्टंति, सेसं तं चेव पण्णत्तएसु तहेव णवरं संखेज्जगा इत्थियेयगा पण्णत्ता, एवं पुरिसवेयगा वि, णपुंसगवेयगा णत्थि, कोहकसाई सिय अत्थि सिय णत्थि जइ अत्थि जह-ण्णेणं एक्को वा दो वा तिण्णि वा उक्कोसेणं संखेज्जा पण्णत्ता, एवं माण माया संखेज्जा लोभकसाई पण्णत्ता, सेसं तं चेव तिसुवि गमएसु संखेज्जवित्थडेसु चत्तारि लेस्साओ भाणियव्वाओ, एवं असंखेज्जवित्थडेसुवि णवरं तिसुवि गम-एसु असंखेज्जा भाणियव्वा जाव असंखेज्जा अचरिमा पण्णत्ता । केवइया णं भंते ! णागकुमारावास० एवं जाव थणियकुमारावास णवरं जत्थ जत्तिया भवणा । केवइया णं भंते ! वाणमंतरावाससयसहस्सा पण्णत्ता ? गोयमा ! असंखेज्जा वाणमंतरावाससयसहस्सा पण्णत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडा णो असंखेज्जवित्थडा । संखेज्जेसु णं भंते ! वाणमंतरावाससयसहस्सेसु एगसमएणं केवइया वाणमंतरा उव-वज्जंति ? एवं जहा असुरकुमाराणं संखेज्जवित्थडेसु तिण्णि गमगा तहेव भाणियव्वा वाणमंतराणवि तिण्णि गमगा । केवइया णं भंते ! जोइसियविमाणा-वाससयसहस्सा पण्णत्ता ? गोयमा ! असंखेज्जा जोइसियविमाणावाससयसह-स्सा पण्णत्ता, ते णं भंते ! किं संखेज्जवित्थडा० ? एवं जहा वाणमंतराणं

तहा जोइसियाणंवि तिण्णि गमगा भाणियव्वा णवरं एगा तेउलेस्सा, उववज्जं-
 तेसु पण्णत्तेसु य असण्णी णत्थि, सेसं तं चेव । सोहम्मे णं भंते ! कप्पे केवइया
 विमाणावाससयसहस्सा पण्णत्ता ? गोयमा ! बत्तीसं विमाणावाससयसहस्सा
 पण्णत्ता । ते णं भंते ! किं संखेज्जवित्थडा असंखेज्जवित्थडा ? गोयमा ! संखे-
 ज्जवित्थडावि असंखेज्जवित्थडावि, सोहम्मे णं भंते । कप्पे बत्तीसाए विमाणा-
 वाससयसहस्सेसु संखेज्जवित्थडेसु विमाणेसु एगसमएणं केवइया सोहम्मगा देवा
 उववज्जंति केवइया तेउलेस्सा उववज्जंति ? एवं जहा जोइसियाणं तिण्णि
 गमगा तहेव तिण्णि गमगा भाणियव्वा, णवरं तिसुवि संखेज्जा भाणियव्वा,
 ओहिणाणी ओहिंदंसणी य चयावेयव्वा, सेसं तं चेव । असंखेज्जवित्थडेसु एवं
 चेव तिण्णि गमगा णवरं तिसुवि गमएसु असंखेज्जा भाणियव्वा, ओहिणाणी य
 ओहिंदंसणी य संखेज्जा चयंति, सेसं तं चेव, एवं जहा सोहम्मे वत्तव्वया
 भणिया तहा ईसाणेवि छ गमगा भाणियव्वा, सणंकुमारोवि एवं चेव णवरं
 इत्थीवेयगा ण उववज्जंति पण्णत्तेसु य ण मण्णंति, असण्णी तिसुवि गमएसु ण
 भण्णंति, सेसं तं चेव, एवं जाव सहस्सारे, णाणत्तं विमाणेसु लेस्सासु य सेसं
 तं चेव । आणयपाणएसु णं भंते ! कप्पेसु केवइया विमाणावाससया पण्णत्ता ?
 गोयमा ! चत्तारि विमाणावाससया पण्णत्ता, ते णं भंते ! किं संखेज्जवित्थडा
 असंखेज्जवित्थडा ? गोयमा ! संखेज्जवित्थडावि असंखेज्जवित्थडावि, एवं
 संखेज्जवित्थडेसु तिण्णि गमगा जहा सहस्सारे असंखेज्जवित्थडेसु उववज्जंतेसु
 य चयंतेसु य एवं चेव संखेज्जा भाणियव्वा पण्णत्तेसु असंखेज्जा णवरं
 णोइंदियोवउत्ता अणंतरोववण्णगा अणंतरोगाढगा अणंतराहारगा अणंतरपज्ज-
 त्ता य एएंसि जहण्णेणं एक्को वा दो वा तिण्णि वा उक्कोसेणं संखेज्जा ५०,
 सेसा असंखेज्जा भाणियव्वा । आरणच्चुएसु एवं चेव जहा आणयपाणएसु
 णाणत्तं विमाणेसु, एवं गेवेज्जगावि । कइ णं भंते ! अणुत्तरविमाणा पण्णत्ता ?
 गोयमा ! पंच अणुत्तरविमाणा पण्णत्ता, ते णं भंते ! किं संखेज्जवित्थडा
 असंखेज्जवित्थडा ? गोयमा ! संखेज्जवित्थडे य असंखेज्जवित्थडा य, पंचसु
 णं भंते ! अणुत्तरविमाणेसु संखेज्जवित्थडे विमाणे एगसमएणं केवइया अणु-
 त्तरोववाइया देवा उववज्जंति केवइया मुक्कलेस्सा उववज्जंति पुच्छा तहेव,
 गोयमा ! पंचसु णं अणुत्तरविमाणेसु संखेज्जवित्थडे अणुत्तरविमाणे एगसमएणं

अहणेणं एक्को वा दो वा तिण्णि वा उक्कोसेणं संखेज्जा अणुत्तरोववाइया देवा उववज्जंति, एवं जहा गेवेज्जविमाणेसु संखेज्जवित्थडेसु णवरं किण्हपक्खिया अभवसिद्धिया तिसु अण्णाणेषु एए ण उववज्जंति ण चरयंति णवि पण्णत्तएसु भाणियव्वा अचरिमावि खोडिज्जंति जाव संखेज्जा चरिमा प०, सेसं तं चेव, असंखेज्जवित्थडेसुवि एए ण भण्णंति णवरं अचरिमा अत्थि, सेसं जहा गेवेज्जएसु असंखेज्जवित्थडेसु जाव असंखेज्जा अचरिमा प० । चोसट्ठीए णं भंते ! असुरकुमारावाससयसहस्सेसु संखेज्जवित्थडेसु असुरकुमारावासेसु किं सम्मद्दिट्ठी असुरकुमारा उववज्जंति मिच्छादिट्ठी एवं जहा रयणप्पभाए तिण्णि आलावया भणिया तथा भाणियव्वा, एवं असंखेज्जवित्थडेसुवि तिण्णि एमगा, एवं जाव गेवेज्जविमाणेषु अणुत्तरविमाणेषु एवं चेव, णवरं तिसुवि आलावएसु मिच्छादिट्ठी सम्मामिच्छादिट्ठी य ण भण्णंति, सेसं तं चेव । से णूणं भंते ! कण्हलेस्से णील जाव सुक्कलेस्से भवित्ता कण्हलेस्सेसु देवेषु उववज्जंति ? हंता गोयमा ! एवं जहेव णेरइएसु पढमे उद्देसए तहेव भाणियव्वं, णीललेसाएवि जहेव णेरइयाणं, जहा णीललेसाए एवं जाव पण्हलेस्सेसु सुक्कलेस्सेसु एवं चेव, णवरं लेस्सट्ठाणेषु विसुज्जमाणेषु २ सुक्कलेस्सं परिणमइ २ त्ता सुक्कलेस्सेसु देवेषु उववज्जंति, से तेणट्ठेणं जाव उववज्जंति । सेवं भंते ! सेवं भंते ! त्ति ॥ ४७२ ॥

तेरसमं सयं तइओ उद्देसो

णेरइया णं भंते ! अणंतराहारा त्ताओ णिव्वत्तणया एवं परियारणापयं णिरवसेसं भाणियव्वं । सेवं भंते ! सेवं भंते ! त्ति ॥ ४७३ ॥

तेरसमं सयं चउत्थो उद्देसो

कइ णं भंते ! पुढवीओ पण्णत्ताओ ? गोयमा ! सत्त पुढवीओ पण्णत्ताओ, तंजहा-रयणप्पभा जाव अहेसत्तमा । अहेसत्तमाए णं भंते ! पुढवीए पंच अणुत्तरा महइमहालया जाव अपइट्ठाणे, ते णं णरगा छट्ठीए तमाए पुढवीए णरएहितो महंततरा चेव १ महाविच्छिण्णतरा चेव २ महावासतरा चेव ३ महापइरिवकतरा चेव ४ णो तथा महापवेसणतरा चेव १ णो आइण्णतरा चेव २ णो आउलतरा चेव ३ णो अणो (मा) यणतरा चेव ४, तेषु णं णरएसु णेर-

इया छट्ठीए तमाए पुढवीए णेरइएहितो महाकम्मतरा चेव १ महाकिरियतरा चेव २ महासवतरा चेव ३ महावेयणतरा चेव ४ णो तथा अप्पकम्मतरा चेव १ णो अप्पकिरियतरा चेव, २ णो अप्पासवतरा चेव ३ णो अप्पवेयणतरा चेव ४ अप्पि-
 ङ्गिततरा चेव १ अप्पजुइयतरा चेव २ णो तथा महिङ्गियतरा चेव १ णो महाजुइ-
 यतरा चेव २ । छट्ठीए णं तमाए पुढवीए एगे पंचूणे णिरयावाससयसहस्से पणत्ते,
 ते णं णरगा अहेसत्तमाए पुढवीए णरइएहितो णो तथा महत्तरा चेव महाविच्छि-
 ण्णतरा चेव ४, महप्पवेसणतरा चेव आइण्णतरा चेव ४, तेसु णं णरएसु णेरइया
 अहेसत्तमाए पुढवीए णेरइएहितो अप्पकम्मतरा चेव अप्पकिरियतरा चेव ४
 णो तथा महाकम्मतरा चेव महाकिरियतरा चेव ४ महिङ्गियतरा चेव महा-
 जुइयतरा चेव, णो तथा अप्पिङ्गियतरा चेव अप्पजुइयतरा चेव । छट्ठीए णं
 तमाए पुढवीए णरगा पंचमाए धूमप्पमाए पुढवीए णरइएहितो महत्तरा चेव
 ४ णो तथा महप्पवेसणतरा चेव ४, तेसु णं णरएसु णेरइया पंचमाए धूमप्प-
 माए पुढवीए णेरइएहितो महाकम्मतरा चेव ४ णो तथा अप्पकम्मतरा चेव
 ४ अप्पिङ्गियतरा चेव २ णो तथा महिङ्गियतरा चेव २, पंचमाए णं धूमप्पमाए
 पुढवीए तिण्णि णिरयावाससयसहस्सा पणत्ता, एवं जहा छट्ठीए णणिया
 एवं सत्तवि पुढवीओ परोप्परं णणंति जाव रयणप्पभंति जाव णो तथा
 महिङ्गियतरा चेव अप्पजुइयतरा चेव ॥ ४७४ ॥ रयणप्पमापुढविणेरइया णं
 भंते ! केरिसयं पुढविकासं पच्चणुबभवमाणा विहरंति ? गोयमा ! अणिट्ठं
 जाव अमणामं, एवं जाव अहेसत्तमापुढविणेरइया, एवं आउफासं एवं जाव
 वणस्सइफासं ॥ ४७५ ॥ इमा णं भंते ! रयणप्पमापुढवी दोत्तं सक्कर-
 प्पमं पुढविं पणिहाय सव्वमहंतिया बाहल्लेणं सव्वखुड्डिया सव्वंतेसु० एवं
 जहा जीवाजीवाभिगमे विइए णेरइयउद्देसए ॥ ४७६ ॥ इमीसे णं भंते !
 रयणप्पमाए पुढवीए णिरयपरिसामंतेसु जे पुढविककाइया० एवं जहा णेरइय-
 उद्देसए जाव अहेसत्तमाए ॥ ४७७ ॥ कहि णं भंते ! लोगस्स आयाममज्जे
 पणत्ते ! गोयमा ! इमीसे णं रयणप्पमाए पुढवीए उवासंतरस्स असंखेज्जइभागं
 ओगाहेत्ता एत्थ णं लोगस्स आयाममज्जे पणत्ते । कहि णं भंते ! अहेलोगस्स
 आयाममज्जे पणत्ते ? गोयमा ! चउत्थीए पंकप्पमाए पुढवीए उवासंतरस्स
 साइरेणं अद्धं ओगाहिता एत्थ णं अहेलोगस्स आयाममज्जे पणत्ते । कहि णं

भंते ! उड्डलोगस्स आध्याममज्झे पण्णत्ते ? गोयमा ! उण्वि सणं कुमारमाहिं-
 दाणं कप्पाणं हेहिं बंभलोए कप्पे रिट्ठविमाणे पत्थडे एत्थ णं उड्डलोगस्स
 आध्याममज्झे पण्णत्ते । कहि णं भंते ! तिरियलोगस्स आध्याममज्झे पण्णत्ते ?
 गोयमा ! जंबुहीवे २ मंदरस्स पठवयस्स बहुमज्झवेसभाए इमीसे रयणप्पमाए
 पुढवीए उवरिमहेट्ठिल्लेसु खुड्डुगपयरेसु एत्थ णं तिरियलोगस्स मज्झे अट्टपए-
 सिए रुयए पण्णत्ते, जओ णं इमाओ दस दिसाओ पवहंति, तंजहा-पुरत्थिमा
 पुरत्थिमदाहिणा एवं जहा दसमसए णामधेज्जंति ॥ ४७८ ॥ इंदा णं भंते !
 दिसा किमाइया किपवहा कइपएसाइया कइपएसुत्तरा कइपएसिया किपज्ज-
 वसिया किंसंठिया पण्णत्ता ? गोयमा ! इंदा णं दिसा रुयगाइया रुयगप्पवहा
 दुपएसाइया दुपएसुत्तरा लोणं पडुच्च असंखेज्जपएसिया, अलोणं पडुच्च अणंत-
 पएसिया, लोणं पडुच्च साइया सपज्जवसिया, अलोणं पडुच्च साइया अपज्ज-
 वसिया, लोणं पडुच्च मूरजसंठिया, अलोणं पडुच्च सगडुद्धिसंठिया पण्णत्ता ।
 अग्गेई णं भंते ! दिसा किमाइया किपवहा कइपएसाइया कइपएसविच्छिण्णा
 कइपएसिया किपज्जवसिया किंसंठिया पण्णत्ता ? गोयमा ! अग्गेई णं दिसा
 रुयगाइया रुयगप्पवहा एगपएसाइया एगपएसविच्छिण्णा अणुत्तरा लोणं पडुच्च
 असंखेज्जपएसिया अलोणं पडुच्च अणंतपएसिया, लोणं पडुच्च साइया सपज्ज-
 वसिया अलोणं पडुच्च साइया अपज्जवसिया, छिण्णमुत्तावत्तियसंठिया पण्णत्ता ।
 जमा जहा इंदा, णेरई जहा अग्गेई, एवं जहा इंदा तथा दिसाओ चत्तारि, जहा
 अग्गेई तथा चत्तारिवि विविसाओ । विमला णं भंते ! दिसा किमाइया० पुच्छा
 जहा अग्गेईए, गोयमा ! विमला णं दिसा रुयगाइया रुयगप्पवहा चउपए-
 साइया दुपएसविच्छिण्णा अणुत्तरा लोणं पडुच्च सेसं जहा अग्गेईए णवरं रुयग-
 संठिया पण्णत्ता, एवं तमावि ॥ ४७९ ॥ किमियं भंते ! लोएत्ति पवुच्चइ ?
 गोयमा ! पंचत्थिकाया, एस णं एवइए लोएत्ति पवुच्चइ, तंजहा-धम्मत्थिकाए
 अहम्मत्थिकाए जाव पोगलत्थिकाए । धम्मत्थिकाएणं भंते ! जीवाणं कि पव-
 त्तइ ? गोयमा ! धम्मत्थिकाएणं जीवाणं आगमणममणभासुम्मेसमणजोगा
 वइजोगा कायजोगा जे यावण्णे तहप्पगारा चला भावा सव्वे ते धम्मत्थिकाए
 पवत्तंति, गइलक्खणं णं धम्मत्थिकाए । अहम्मत्थिकाएणं भंते ! जीवाणं कि
 पवत्तइ ? गोयमा ! अहम्मत्थिकाएणं जीवाणं ठाण्णिसीयणतुयट्ठण मणस्स

य एगत्तीभावकरणया जे यावण्णे तहप्पगारा थिरा भावा सच्चे ते अहम्मत्थि-
काए पवत्तंति, ठाणलक्खणे णं अहम्मत्थिकाए । आगासत्थिकाएणं भंते !
जीवाणं अजीवाण य किं पवत्तइ ? गोयमा ! आगासत्थिकाएणं जीवदव्वाण
य अजीवदव्वाण य भायणभूए-एगेणवि से पुण्णे दोहिवि पुण्णे सयंपि माएज्जा ।
कोडिसएणवि पुण्णे कोडिसहस्संपि माएज्जा ॥ १ ॥ अवगाहणालक्खणे णं
आगासत्थिकाए । जीवत्थिकाएणं भंते ! जीवाणं किं पवत्तइ ? गोयमा !
जीवत्थिकाएणं जीवे अणंताणं आभिणिबोहियणाणपज्जवाणं अणंताणं सुवणाण-
पज्जवाणं एवं जहा विइयसए अत्थिकायउद्देसए जाव उवओगं गच्छइ, उव-
ओगलक्खणे णं जीवे । पोग्गलत्थिकाए, णं पुच्छा, गोयमा ! पोग्गलत्थिकाएणं
जीवाणं ओरालियवेउब्बिद्यआहारगतेयाकम्मए सोइदियच्चत्तियदियघाणिय-
जिंभदियफांसियमणजोगवइजोगकायजोगआणायाणूणं च गहणं पवत्तइ, गहण-
लक्खणे णं पोग्गलत्थिकाए ॥ ४८० ॥ एगे भंते ! धम्मत्थिकायपएसे केवइएहि
धम्मत्थिकायपएसेहि पुट्ठे ? गोयमा ! जहण्णपए तिहि उक्कोसपए छहि ।
केवइएहि अहम्मत्थिकायपएसेहि पुट्ठे ? गोयमा ! जहण्णपए चउहि उवकोस-
पए सत्तिहि । केवइएहि आगासत्थिकायपएसेहि पुट्ठे ? गोयमा ! सत्तिहि ।
केवइएहि जीवत्थिकायपएसेहि पुट्ठे ? गोयमा ! अणंतेहि । केवइएहि पोग्गल-
त्थिकायपएसेहि पुट्ठे ? गोयमा ! अणंतेहि । केवइएहि अद्धासमएहि पुट्ठे ?
सिय पुट्ठे सिय णो पुट्ठे जइ पुट्ठे णियमं अणंतेहि । एगे भंते ! अहम्मत्थि-
कायपएसे केवइएहि धम्मत्थिकायपएसेहि पुट्ठे ? गोयमा ! जहण्णपए चउहि
उवकोसपए सत्तिहि । केवइएहि अहम्मत्थिकायपएसेहि पुट्ठे ? गोयमा ! जहण्णपए
तिहि उवकोसपए छहि, सेसं जहा धम्मत्थिकायस्स । एगे भंते ! आगास-
त्थिकायपएसे केवइएहि धम्मत्थिकायपएसेहि पुट्ठे ? गोयमा ! सिय पुट्ठे
सिय णो पुट्ठे, जइ पुट्ठे जहण्णपए एककेण वा दोहि वा तिहि वा चउहि वा
उवकोसपए सत्तिहि, एवं अहम्मत्थिकायपएसेहिवि । केवइएहि आगासत्थि-
काय० ? गोयमा ! छहि, केवइएहि जीवत्थिकायपएसेहि पुट्ठे ? सिय पुट्ठे
सिय णो पुट्ठे, जइ पुट्ठे णियमं अणंतेहि । एवं पोग्गलत्थिकायपएसेहिवि
अद्धासमएहिवि ॥ ४८१ ॥ एगे भंते ! जीवत्थिकायपएसे केवइएहि धम्मत्थि-
काय० पुच्छा, जहण्णपए चउहि उवकोसपए सत्तिहि, एवं अहम्मत्थिकायपए-

सेहिवि । केवइएहि आगासत्थिकाय० ? सत्ताहि । केवइएहि जीवत्थि० ? सेसं जहा धम्मत्थिकायस्स । एगे भंते ! पोग्गलत्थिकायपएसे केवइएहि धम्मत्थिकायपएसेहि० ? एवं जहेव जीवत्थिकायस्स । दो भंते ! पोग्गलत्थिकायपएसा केवइएहि धम्मत्थिकायपएसेहि पुट्टा ? जहण्णपए छहि उक्कोसपए बारसहि, एवं अहम्मत्थिकायपएसेहिवि । केवइएहि आगासत्थिकाय० ? बारसहि, सेसं जहा धम्मत्थिकायस्स । तिण्णि भंते ! पोग्गलत्थिकायपएसा केवइएहि धम्मत्थिकाय० ? जहण्णपए अट्ठीहि उक्कोसपए सत्तरसहि । एवं अहम्मत्थिकायपएसेहिवि । केवइएहि आगासत्थि० ? सत्तरसहि, सेसं जहा धम्मत्थिकायस्स । एवं एएणं गमेणं भाणियच्चं जाव दस, णवरं जहण्णपए दोण्णि पक्खिवियच्चा उक्कोसपए पंच । चत्तारि पोग्गलत्थिकायपएसे० जहण्णपए दसहि उक्कोसपए बावीसाए, पंच पोग्गलत्थिकाय० जहण्णपए बारसहि उक्कोसपए सत्तावीसाए, छ पोग्गल० जहण्णपए चौदसहि उक्कोसेणं बत्तीसाए, सत्त पोग्गल० जहण्णेणं सोलसहि उक्कोसपए सत्ततीसाए, अट्ठ पोग्गल० जहण्णपए अट्टारसहि उक्कोसेणं बायालीसाए, णव पोग्गल० जहण्णपए बीसाए उक्कोसपए सीयालीसाए, दस पोग्गल० जहण्णपए बावीसाए उक्कोसपए बावण्णाए । आगासत्थिकायस्स सच्चत्थ उक्कोसगं भाणियच्चं । संखेज्जा णं भंते ! पोग्गलत्थिकायपएसा केवइएहि धम्मत्थिकायपएसेहि पुट्टा ? जहण्णपए तेणेव संखेज्जाएणं दुग्गुणेणं दुरूवाहिएणं, उक्कोसपए तेणेव संखेज्जाएणं पंचगुणेणं दुरूवाहिएणं, केवइएहि अधम्मत्थिकाएहि ? एवं चेव, केवइएहि आगासत्थिकाय० तेणेव संखेज्जाएणं पंचगुणेणं दुरूवाहिएणं, केवइएहि जीवत्थिकाय० ? अणंतेहि केवइएहि पोग्गलत्थिकाय० ? अणंतेहि, केवइएहि अट्ठासमएहि ? सिय पुट्ठे सिय णो पुट्ठे जाव अणंतेहि । असंखेज्जा भंते ! पोग्गलत्थिकायपएसा केवइएहि धम्मत्थिकाय० ? जहण्णपए तेणेव असंखेज्जाएणं दुग्गुणेणं दुरूवाहिएणं, उक्कोसपए तेणेव असंखेज्जाएणं पंचगुणेणं दुरूवाहिएणं सेसं जहा संखेज्जाणं जाव णियमं अणंतेहि । अणंता भंते ! पोग्गलत्थिकायपएसा केवइएहि धम्मत्थिकाय० एवं जहा असंखेज्जा तहा अणंतावि णिरवसेसं । एगे भंते ! अट्ठासमए केवइएहि धम्मत्थिकायपएसेहि पुट्ठे ? सत्ताहि, केवइएहि अहम्मत्थि० ? एवं चेव, एवं आगासत्थिकायपएसेहिवि, केवइएहि जीवत्थिकाय० ? अणंतेहि,

एवं जाव अद्वासमएहिं । धम्मत्थिकाए णं भंते ! केवइएहिं धम्मत्थिकायप्पए-
 सेहिं पुट्ठे ? णत्थि एक्केणवि, केवइएहिं अधम्मत्थिकायप्पएसेहिं ? असंखेज्जेहिं,
 केवइएहिं आगासत्थिकायप० ? असंखेज्जेहिं, केवइएहिं जीवत्थिकायपएसेहिं ?
 अणंतेहिं, केवइएहिं पोगलत्थिकायपएसेहिं० ? अणंतेहिं, केवइएहिं अद्वा-
 समएहिं ? सिय पुट्ठे सिय णो पुट्ठे, जइ पुट्ठे णियमा अणंतेहिं । अहम्मत्थि-
 काए णं भंते ! केवइएहिं धम्मत्थिकाय० ? असंखेज्जेहिं, केवइएहिं अहम्म-
 त्थि० ? णत्थि एक्केणवि, सेसं जहा धम्मत्थिकायस्स, एवं एएणं गमएणं
 सव्वेवि सट्ठाणए णत्थि एक्केणवि पुट्ठा, परट्ठाणए आइल्लएहिं तिहिं भसंखेज्जेहिं
 भाणियव्वं, पच्छिल्लएसु तिसु अणंतां भाणियव्वा जाव अद्वासमओत्ति जाव
 केवइएहिं अद्वासमएहिं पुट्ठे ? णत्थि एक्केणवि । जत्थ णं भंते ! एगे धम्म-
 त्थिकायपएसे ओगाढे तत्थ केवइया धम्मत्थिकायप्पएसा ओगाढा ? णत्थि
 एक्कोवि, केवइया अहम्मत्थिकायप्पएसा ओगाढा ? एक्को, केवइया आगा-
 सत्थिकाय० ? एक्को, केवइया जीवत्थिकाय० ? अणंता, केवइया पोगलत्थि-
 काय० ? अणंता, केवइया अद्वासमया ? सिय ओगाढा सिय णो ओगाढा जइ
 ओगाढा अणंता । जत्थ णं भंते ! एगे अहम्मत्थिकायपएसे ओगाढे तत्थ केव-
 इया धम्मत्थिकाय० ? एक्को, केवइया अहम्मत्थि० ? णत्थि एक्कोवि, सेसं
 जहा धम्मत्थिकायस्स । जत्थ णं भंते ! एगे आगासत्थिकायपएसे ओगाढे तत्थ
 केवइया धम्मत्थिकाय० ? सिय ओगाढा सिय णो ओगाढा, जइ ओगाढा
 एक्को, एवं अहम्मत्थिकायपएसावि, केवइया आगासत्थिकाय० ? णत्थि एक्को
 वि, केवइया जीवत्थि० ? सिय ओगाढा सिय णो ओगाढा, जइ ओगाढा
 अणंता, एवं जाव अद्वासमया । जत्थ णं भंते ! एगे जीवत्थिकायपएसे ओगाढे
 तत्थ केवइया धम्मत्थिकाय० ? एक्को, एवं अहम्मत्थिकायपएसावि, एवं
 आगासत्थिकायपएसावि, केवइया जीवत्थिकाय० ? अणंता, सेसं जहा धम्म-
 त्थिकायस्स । जत्थ णं भंते ! एगे पोगलत्थिकायपएसे ओगाढे तत्थ केवइया
 धम्मत्थिकाय० ? एवं जहा जीवत्थिकायपएसे त्थेव णिरवसेसं । जत्थ णं
 भंते ! दो पोगलत्थिकायपएसा ओगाढा तत्थ केवइया धम्मत्थिकाय० ?
 सिय एक्को सिय दोण्णि, एवं अहम्मत्थिकायस्सवि, एवं आगासत्थिकायस्सवि,
 सेसं जहा धम्मत्थिकायस्स । जत्थ णं भंते ! तिण्णि पोगलत्थिकायपएसा
 ओगाढा तत्थ केवइया धम्मत्थिकाय० ? सिय एक्को सिय दोण्णि

सिय तिणिण, एवं अहम्मत्थिकायस्सवि, एवं आगासत्थिकायस्सवि, सेसं जहेव दोण्हं, एवं एक्केक्को वड्डियक्खो पएसो आइल्लएहि तिहि अत्थिकाएहि, सेसेहि जहेव दोण्हं जाव दसण्हं सिय एक्को सिय दोणिण सिय तिणिण जाव सिय दस, संखेज्जाणं सिय एक्को सिय दोणिण जाव सिय दस सिय संखेज्जा, असंखेज्जाणं सिय एक्को जाव सिय संखेज्जा सिय असंखेज्जा, जहा असंखेज्जा एवं अणंतावि । जत्थ णं भंते ! एगे अद्दासमए ओगाढे तत्थ केवइया धम्मत्थिकाय० ? एक्को, केवइया अहम्मत्थिकाय० ? एक्को, केवइया आगासत्थिकाय० ? एक्को, केवइया जीवत्थि० ? अणंता, एवं जाव अद्दासमया । जत्थ णं भंते ! धम्मत्थिकाए ओगाढे तत्थ केवइया धम्मत्थिकायपएसो ओगाढा ? णत्थि एक्कोवि, केवइया अहम्मत्थिकाय० ? असंखेज्जा, केवइया आगासत्थि० ? असंखेज्जा, केवइया जीवत्थिकाय० ? अणंता, एवं जात्र अद्दासमया । जत्थ णं भंते ! अहम्मत्थिकाए ओगाढे तत्थ केवइया धम्मत्थिकाय० ? असंखेज्जा, केवइया अहम्मत्थिका० ? णत्थि एक्कोवि, सेसं जहा धम्मत्थिकायस्स, एवं सव्वे सट्टाणे णत्थि एक्कोवि भाणियक्खं, परट्टाणे आइल्लगा तिणिण असंखेज्जा भाणियक्खा, पच्छिल्लगा तिणिण अणंता भाणियक्खा जाव अद्दासमओत्ति जाव केवइया अद्दासमया ओगाढा ? णत्थि एक्कोवि ॥४८२॥ जत्थ णं भंते ! एगे पुढविकाइए ओगाढे तत्थ णं केवइया पुढविककाइया ओगाढा ? असंखेज्जा, केवइया आउक्काइया ओगाढा ? असंखेज्जा, केवइया तेउकाइया ओगाढा ? असंखेज्जा, केवइया वाउकाइया ओगाढा ? असंखेज्जा, केवइया वणस्सइकाइया ओगाढा ? अणंता, जत्थ णं भंते ! एगे आउक्काइए ओगाढे तत्थ णं केवइया पुढवि० ? असंखेज्जा, केवइया आउ० ? असंखेज्जा, एवं जहेव पुढविककाइयाणं वत्तव्वया तहेव सव्वेसि णिरवसेसं भाणियक्खं जाव वणस्सइकाइयाणं जाव केवइया वणस्सइकाइया ओगाढा ? अणंता ॥४८३॥ एयंसि णं भंते ! धम्मत्थिकाय० अधम्मत्थिकाय० आगासत्थिकार्यंसि च्चविकया केई आसइत्तए वा सइत्तए वा च्चिट्ठित्तए वा णिसीइत्तए वा तुयट्ठित्तए वा ? णो इणट्ठे समट्ठे, अणंता पुण तत्थ जीवा ओगाढा । से केणट्ठेणं भंते ! एवं वुच्चइ एयंसि णं धम्मत्थि० जाव आगासत्थिकार्यंसि णो च्चविकया केई आसइत्तए वा जाव ओगाढा ? गोयसा ! से जहाणामए—कूडागारसाला सिया बुहओ लित्ता गुत्ता गुत्तडुवारा जहा रायप्प-

सेणइज्जे जाव दुवारवयणाइं पिहेइ दु० २ ता तीसे कूडागारसालाए बहुमज्झ-
 वेसभाए जहणेणं एक्को वा दो वा तिण्णि वा उवकोसेणं पईवसहस्सं पली-
 वेज्जा, से णूणं गोयमा ! ताओ पईवलेस्साओ अणमण्णसंबद्धाओ अणमण्ण-
 पुट्ठाओ जाव अणमण्णघडत्ताए चिट्ठंति ? हंता चिट्ठंति, चविकया णं
 गोयमा ! केई तामु पईवलेस्सामु आसइत्ताए वा जाव तुयट्ठित्ताए वा ? भगवं !
 णो इणट्ठे समट्ठे, अणंता पुण तत्थ जीवा ओगाढा, से तेणट्ठेणं गोयमा !
 एवं वुच्चइ जाव ओगाढा ॥ ४८४ ॥ कहि णं भंते ! लोए बहुसमे, कहि णं
 भंते ! लोए सब्बविग्गहिए पण्णत्ते ? गोयमा ! इमीसे रयणप्पभाए पुढवीए
 उवरिनहेट्ठिल्लेसु खुट्टुगपयरेसु एत्थ णं लोए बहुसमे एत्थ णं लोए सब्बविग्गहिए
 पण्णत्ते । कहि णं भंते ! विग्गहविग्गहिए लोए पण्णत्ते ? गोयमा ! विग्गह-
 कंडए एत्थ णं विग्गहविग्गहिए लोए पण्णत्ते ॥ ४८५ ॥ किसिंठिए भंते ! लोए
 पण्णत्ते ? गोयमा ! सुपइट्ठियसिंठिए लोए पण्णत्ते, हेट्ठा विच्छिण्णे मज्जे संखित्ते
 जहा सत्तमसए पढमुद्देसे जाव अंतं करेइ । एयस्स णं भंते ! अहेल्लोयस्स
 तिरियल्लोयस्स उट्टुलोयस्स य कयरे २ हित्तो जाव विसेसाहिया वा ? गोयमा !
 सब्बत्थेवे तिरियलोए, उट्टुलोए असंखेज्जगुणे, अहेल्लोए विसेसाहिए । सेवं भंते !
 सेवं भंते ! त्ति ॥ ४८६ ॥

तेरसमं सयं पंचमो उद्देसो

णेरइया णं भंते ! किं सच्चित्ताहारा अच्चित्ताहारा मीसाहारा ? गोयमा !
 णो सच्चित्ताहारा अच्चित्ताहारा णो मीसाहारा, एवं असुरकुमारा पढमो णेरइय-
 उद्देसओ णिरवसेसो भाणियव्वो । सेवं भंते ! सेवं भंते ! त्ति ॥ ४८७ ॥

तेरसमं सयं छट्ठो उद्देसो

रायगिहे जाव एवं वयासी-संतरं भंते ! णेरइया उववज्जंति, णिरंतरं
 णेरइया उववज्जंति ? गोयमा ! संतरंपि णेरइया उववज्जंति, णिरंतरंपि णेर-
 इया उववज्जंति, एवं असुरकुमारावि, एवं जहा गंगेए तहेव दो बंडगा जाव
 संतरंपि वेसाणिया चयंति णिरंतरंपि वेसाणिया चयंति ॥ ४८८ ॥ क्हिण्णं
 भंते ! चमरस्स असुरिदस्स असुररण्णो चमरचंचा णामं आवासे पण्णत्ते ?
 गोयमा ! जंबुद्दीवे २ भंवरस्स पव्वयस्स दाहिणेणं तिरियमसंखेज्जे दीवसमुद्दे
 एवं जहा बिइयसए सभाउद्देसए वत्तव्वया सच्चेव अपरितेसा णेयव्वा, णवरं

इमं णाणत्तं जाव तिगिच्छकूडस्स उप्पायपव्वयस्स चमरच्चंआए रायहाणीए चमरच्चस्स आवासपव्वयस्स अण्णेसि च बहूणं सेसं तं चेव जाव तेरस य अंगुलाइं अड्ढंगुलं च किञ्चि विसेसाहिया परिवल्लेवेणं, तीसे णं चमरच्चंआए रायहाणीए दाहिणपच्चत्थिमेणं छक्कोडिसए पणपण्णं च कोडीओ पणतीसं च सयसहस्साइं पण्णासं च सहस्साइं अरुणोदगसमूहं तिरियं वीईवइत्ता एत्थ णं चमरस्स असुरिदस्स असुरकुमाररण्णो चमरच्चं नाम आवासे पण्णात्ते, चउरासीइं जोयणसहस्साइं आयामविक्खंभेणं दो जोयणसयसहस्सा पण्णाट्ठि च सहस्साइं छच्चबत्तीसे जोयणसए किञ्चि विसेसाहिए परिवल्लेवेणं, से णं एगेणं पागारेणं सव्वओ समंता संपरिखित्ते, से णं पागारे दिवड्ढं जोयणसयं उड्ढं उच्चत्तेणं, एवं चमरच्चंआए रायहाणीए वत्तव्वया भाणियव्वा सभाविहूणा जाव चत्तारि पासायपंतीओ । चमरे णं भंते ! असुरिदे असुरकुमारराया चमरच्चं आवासे वसंहि उवेइ ? णो इणट्ठे समट्ठे । से केणं खाइ णं अट्ठेणं भंते ! एवं वुच्चइ चमरच्चं आवासे ? गोयमा ! से जहाणामए—इहं मणुस्सलोगंसि उवगारियलेणाइ वा उज्जाणियलेणाइ वा णिज्जाणियलेणाइ वा वारिधारियलेणाइ वा तत्थ णं बह्वे मणुस्सा य मणुस्सीओ य आसयंति सयंति जहा रायप्पसेणइज्जे जाव कत्ताणफलवित्तिविसेसं पच्चणुडमवमाणा विहरति, अण्णत्थ पुण वसंहि उवेत्ति, एवामेव गोयमा ! चमरस्स असुरिदस्स असुरकुमाररण्णो चमरच्चं आवासे केवलं किट्टारइपत्तियं अण्णत्थ पुण वसंहि उवेइ, से तेणट्ठेणं जाव आवासे । सेवं भंते ! सेवं भंते ! त्ति जाव विहरइ ॥ ४८६ ॥ तए णं समणे भगवं महावीरे अण्णया कयाइ रायगिहाओ णयराओ गुणसित्ताओ जाव विहरइ । तेणं कालेणं तेणं समएणं चंपा णामं णयरी होत्था वण्णओ, पुण्णभद्दे चेइए वण्णओ । तए णं समणे भगवं महावीरे अण्णया कयाइ पुव्वाणुपुर्व्व चरमाणे जाव विहरमाणे जेणेव चंपा णयरी जेणेव पुण्णभद्दे चेइए तेणेव उवागच्छइ २ ता जाव विहरइ । तेणं कालेणं तेणं समएणं सिधुसोवीरेसु जणवएसु वीइभए णामं णयरे होत्था वण्णओ, तस्स णं वीइभयस्स णयरस्स बहिधा उत्तरपुरत्थिमे विसीभाए एत्थ णं मियवणे णामं उज्जाणे होत्था सव्वोडय० वण्णओ, तत्थ णं वीइभए णयरे उदायणे णाम राया होत्था महया वण्णओ, तस्स णं उदायणस्स रण्णो प(उमा) भावई णामं देवी होत्था सुकुमाल० वण्णओ, तस्स

षं उदायणस्स रण्णो पुत्ते पभावईए देवीए अत्तए अभीइणामं कुमारे होत्था सुकु-
 माल जहा सिवभट्टे जाव पच्चुवेक्खमाणे विहरइ, तस्स णं उदायणस्स रण्णो
 णियए भायणेज्जे केसीणामं कुमारे होत्था सुकुमाल जाव सुख्वे । से णं उदायणे
 राया सिंधुसोवीरप्पामोक्खाणं सोलसण्हं जणवयाणं, वीइभयप्पामोक्खाणं तिण्हं
 तेसट्ठीणं नगरागरसयाणं, महसेणप्पामोक्खाणं दसण्हं राईणं बद्धमउडाणं विह-
 ण्णत्तचामरवालवीयणाणं अण्णेसि च बहूणं राईसरतलवर जाव सत्थवाहप्प-
 मिईणं आहेवच्चं पोरेवच्चं जाव कारेमाणे पालेमाणे समणोवासए अभियय-
 जीवानोवे जाव विहरइ । तए णं से उदायणे राया अण्णया कयाइ जेणेव
 पोसहसाला तेणेव उवागच्छइ २ ता, जहा संखे जाव विहरइ । तए णं तस्स
 उदायणस्स रण्णो पुक्वरत्तावरत्तकालसमयंसि धम्मजागरियं जागरमाणस्स
 अयमेयारूवे अज्झत्थिए जाव समुप्पज्जित्था-धण्णं णं ते गामागरणयरखेड-
 कब्बडमंडवंदोणमुहपट्टणासमसंबाहसण्णिवेसा जत्थ णं समणे भगवं महावीरे
 विहरइ, धण्णा णं ते राईसरतलवर जाव सत्थवाहप्पमिइओ जे णं समणं
 भगवं महावीरं वंदंति णमंसंति जाव पज्जुवासंति, जइ णं समणे भगवं महा-
 वीरे पुक्वाणुपुंवि चरमाणे गामाणुगामं जाव विहरमाणे इहमागच्छेज्जा इह
 समोसरेज्जा, इहेव वीइभयस्स णयरस्स बहिया मियवणे उज्जाणे अहापडिक्खं
 उग्हं उग्गिण्हित्ता संजमेणं तवसा जाव विहरेज्जा, तो णं अहं समणं भगवं
 महावीरं वंदेज्जा णमंसेज्जा जाव पज्जुवासेज्जा । तत्थ णं समणे भगवं महावीरे
 उदायणस्स रण्णो अयमेयारूवं अज्झत्थियं जाव समुप्पण्णं विद्याणित्ता चंपाओ
 णयरौओ पुण्णभट्टाओ चेइयाओ पडिणिक्खमइ २ ता पुक्वाणुपुंवि चरमाणे
 गामाणुगामं जाव विहरमाणे जेणेव सिंधुसोवीरे जणवए जेणेव वीइभए
 णयरे जेणेव मियवणे उज्जाणे तेणेव उवागच्छइ २ ता जाव विहरइ ।
 तए णं वीइभए णयरे सिघाडग जाव परिसा पज्जुवासइ । तए णं से
 उदायणे राया इमीसे कहाए लद्धट्ठे समाणे हट्टुट्टुं कोडुंबियपुरिसे सदावेइ
 २ ता एवं वयासी-खिप्पामेय भो देवाणुप्पिया ! वीइभयं णयरं सिंभ-
 तरबाहिरियं जहा कूणिओ उववाइए जाव पज्जुवासइ, पभावईपामोक्खाओ
 देवीओ तहेव जाव पज्जुवासंति, धम्मकहा । तए णं से उदायणे राया समणस्स
 भगवओ महावीरस्स अंतियं धम्मं सोच्चा णिसम्म हट्टुट्टुं-उट्टाए उट्ठेइ २ ता
 समणं भगवं महावीरं तिक्खुत्तो जाव णमंसित्ता एवं वयासी-एवमेयं भंते !

तहमेयं भंते ! जाव से जहेयं तुभे वयहत्तिकट्टु जं णवरं देवाणुप्पिया !
 अभीडकुमारं रज्जे ठावेमि, तए णं अहं देवाणुप्पियाणं अंतिए मुंडे भविता जाव
 पक्वयामि, अहासुहं देवाणुप्पिया ! मा पडिबंधं । तए णं से उदायणे राया सम-
 णेणं भगवथा महावीरेणं एवं वृत्ते समाणे हट्ठतुट्ठे समणं भगवं महावीरं बंदइ
 णमंसइ वं० २ ता तमेव आभिसेक्कं हत्थि दुरूहइ २ ता समणस्स भगवओ
 महावीरस्स अंतियाओ मियवणाओ उज्जाणाओ पडिणिक्खमइ २ ता जेणेव
 वोइभए णयरे तेणेव पहारेत्थे गमणाए । तए णं तस्स उदायणस्स रण्णे अय-
 मेयास्से अज्झत्थिए जाव समुप्पज्जित्था—एवं खलु अभीडकुमारं मम एये पुत्ते
 इट्ठे क्खंते जाव किमंग पुण पासणयाए, तं जइ णं अहं अभीडकुमारं रज्जे
 ठावेत्ता समणस्स भगवओ महावीरस्स अंतियं मुंडे भविता जाव पक्वयामि तो
 णं अभीडकुमारं रज्जे य रट्ठे य जाव जणवए य माणुस्सएसु य कामभोगेसु
 मुच्छिए गिद्धे गडिए अज्झोववणे अणाईयं अणवदमं दीहमद्धं चाउरंतसंसार-
 कंतारं अणुपरियट्ठिस्सइ, तं णो खलु मे सेयं अभीडकुमारं रज्जे ठावेत्ता सम-
 णस्स भगवओ महावीरस्स जाव पक्वइत्तए, सेयं खलु मे णियगं भाइणेज्जं
 केसिकुमारं रज्जे ठावेत्ता समणस्स भगवओ महावीरस्स जाव पक्वइत्तए, एवं
 संपेहेइ २ ता जेणेव वोइभए णयरे तेणेव उवागच्छइ २ ता वोइभयं णयरं
 मज्जमज्जेणं जेणेव सए गेहे जेणेव बाहिरिया उवट्ठानसाला तेणेव उवागच्छइ
 २ ता आभिसेक्कं हत्थि ठवेइ आमि० २ ता आभिसेक्काओ हत्थीओ पच्चो-
 रुहइ २ ता जेणेव स्मिहासणे तेणेव उवागच्छइ २ ता स्मिहासणवरंसि पुरत्था-
 भियुहे णिसीयइ २ ता कोडुंबियपुरिसे सहावेइ २ ता एवं वयासी—खिप्पा-
 मेव भो देवाणुप्पिया ! वोइभयं णयरं सग्गित्तरबाहिरियं जाव पच्चप्पिणंति ।
 तए णं से उदायणे राया दोच्चंपि कोडुंबियपुरिसे सहावेइ २ ता एवं वयासी—
 खिप्पामेव भो देवाणुप्पिया ! केसिस्स कुमारस्स महत्थं ३ एवं रायाभिसेओ
 जहा सिवभहस्स कुमारस्स तहेव भाणियव्वो जाव परमाउं पालयाहि इट्ठजण-
 संपरिवुडे सिघुसोवीरयामोक्खाणं सोलसण्हं जणवयाणं, वोइभयपामोक्खाणं
 तिण्ण तेसट्ठीणं णयरगरसयाणं, महत्तेणपामोक्खाणं दसण्हं राईणं अण्णेसि
 च बहूणं राईसरं जाव कारेमाणे पालेमाणे विहराहित्तिकट्टु जयजयसहं पउं-
 जंति । तए णं से केसीकुमारं राया जाए महया जाव विहरइ । तए णं से
 उदायणे राया केसि रायाणं आपुच्छइ । तए णं से केसीराया कोडुंबियपुरिसे

सद्भावेइ एवं जहा जमालिस्स तहेव सन्धिभतरबाहिरियं तहेव जाव णिक्खमणा-
 भित्सेयं उवट्टवेइ । तए णं से केसीराया अणेगगणयाग जाव संपरिवुडे उदायणं
 रायं सीहासणवरंसि पुरत्थाभिमुहे णिसीयावेइ २ त्ता अट्टसएणं सोवण्णियाभं०
 एवं जहा जमालिस्स जाव एवं वयासी-भण सामी ! कि देमो कि पयच्छामो
 किणा वा ते अट्ठो ? तए णं से उदायणे राया केसि रायं एवं वयासी-
 इच्छामि णं देवानुप्पिया ! कुत्तियावणाओ० एवं जहा जमालिस्स णवरं
 पउमावई अगकेसे पडिच्छइ पियविप्यओगदूसहा । तए णं से केसी
 राया दोच्चंपि उत्तरावक्कमणं सीहासणं रयावेइ दो० २ त्ता उदायणं रायं
 सेयापीयएहिं कलसेहिं० सेसं जहा जमालिस्स जाव सणिसण्णे तहेव अम्म-
 धाई णवरं पउमावई हंसलक्खणं पउसाडगं गहाय सेसं तं चेव जाव सीयाओ
 पच्चोहहइ २ त्ता जेणेव समणे भगवं महावीरे तेणेव उवागच्छइ २ त्ता
 समणं भगवं महावीरं तिवखुत्तो वंदइ णमंसइ वंदित्ता णमंसित्ता उत्तर-
 पुरत्थिमं दिसीभागं अवक्कमइ २ त्ता सयमेव आभरणमत्तालंकारं तं चेव
 जाव पउमावई पडिच्छइ जाव धडियक्वं सामी ! जाव णो पमाएयव्वतिकट्टु
 केसी राया पउमावई य समणं भगवं महावीरं वंदति णमंसति वं० २ त्ता जाव
 पडिगया । तए णं से उदायणे राया सयमेव पंचमुट्ठियं लोयं सेसं जहा उसभ-
 वत्तस्स जाव सक्खदुक्खप्पहीणे ॥ ४६० ॥ तए णं तस्स अभीइकुमारस्स अण्णया
 कयाइ पुव्वरत्तावरत्तकालसमयसि कुडुंबजागरियं जागरमाणस्स अयमेयारूवे
 अउत्थिए जाव समुप्पज्जित्था-एवं खलु अहं उदायणस्स पुत्ते पभावईए देवीए
 अत्तए, तए णं से उदायणे राया ममं अवहाय णियगं भायणिज्जं केसिकुमारं
 रज्जे ठावेत्ता समणस्स भगवओ महावीरस्स जाव पव्वइए, इमेणं एयारूवेणं
 महया अप्पत्तिएणं मणोमाणसिएणं दुक्खेणं अभिभूए समाणे अंतेउरपरियाल-
 संपरिवुडे सभंडमत्तोवगरणमायाए वीइभयाओ णयरओ णिगच्छइ २ त्ता
 पुव्वानुपुट्ठिव चरमाणे गामाणुगामं दूइज्जमाणे जेणेव चंपा णयर जेणेव कूणिए
 राया तेणेव उवागच्छइ २ त्ता कूणियं रायं उवसंपज्जित्ताणं विहरइ, तत्थवि
 णं से विउलमोगसमिइसमण्णागए यावि होत्था । तए णं से अभीइकुमारे समणो-
 बासए यावि होत्था, अभिगय जाव विहरइ, उदायणंमि रायरिसिमि समणु-
 बद्धवेरे यावि होत्था । तेणं कालेणं तेणं समएणं इमीसे रयणप्पभाए

पुढवीए गिरयपरिसामंतेसु चो(प)सट्टि असुरकुमारावाससयसहस्सा पणत्ता,
 तए णं से अभीइकुमारे बहूइं वासाइं समणोवासगपरियाणं पाउणइ २ ता
 अद्धमासियाए संलेहणाए तीसं भत्ताइं अणसणाए छेएइ २ ता तस्स ठाणस्स
 अणालोइयपडिक्कंते कालमासे कालं किच्चा इमीसे रयणप्पभाए पुढवीए तीसाए
 गिरयपरिसामंतेसु चोसट्ठीए आधावा जाव सहस्सेसु अणयरंसि आयावा
 असुरकुमारावाससि आयावा असुरकुमारदेवत्ताए उववण्णो, तत्थ णं अत्थेगइयाणं
 आयावगाणं असुरकुमारणं देवाणं एगं पत्तिओवमं ठिई प०, तत्थ णं अभी-
 इस्सवि देवस्स एगं पत्तिओवमं ठिई पणत्ता । से णं भंते ! अभीइदेवे ताओ
 देवलोगाओ आउवखएणं ३ अणंतरं उव्वट्टिसा कंहि गच्छिहिइ कंहि उवव-
 ज्जिहिइ ? गोयमा ! महाविदेहे वासे सिज्जिहिइ जाव अंतं काहिइ । सेवं
 भंते ! सेवं भंते ! त्ति ॥ ४६१ ॥

तेरसमं सयं सत्तमो उद्देशो

रायगिहे जाव एबं बयासी-आया भंते ! भासा अण्णा भासा ? गोयमा !
 णो आया भासा अण्णा भासा, रुवि भंते ! भासा अरुवि भासा ? गोयमा !
 रुवि भासा णो अरुवि भासा । सच्चिता भंते ! भासा अचित्ता भासा ? गोयमा !
 णो सच्चिता भासा अचित्ता भासा । जीवा भंते ! भासा अजीवा भासा ?
 गोयमा ! णो जीवा भासा अजीवा भासा । जीवाणं भंते ! भासा अजीवाणं
 भासा ? गोयमा ! जीवाणं भासा णो अजीवाणं भासा । पुंवि भंते ! भासा
 भासिज्जमाणी भासा भासासमयवीइक्कंता भासा ? गोयमा ! णो पुंवि भासा
 भासिज्जमाणी भासा णो भासासमयवीइक्कंता भासा । पुंवि भंते ! भासा
 भिज्जइ, भासिज्जमाणी भासा भिज्जइ, भासासमयवीइक्कंता भासा भिज्जइ ?
 गोयमा ! णो पुंवि भासा भिज्जइ, भासिज्जमाणी भासा भिज्जइ, णो भासा-
 समयवीइक्कंता भासा भिज्जइ । कइविहा णं भंते ! भासा पणत्ता ? गोयमा !
 चउद्विहा भासा पणत्ता, तंजहा-सच्चा, मोसा, सच्चा मोसा, असच्चा मोसा
 ॥ ४६२ ॥ आया भंते ! मणे अण्णे मणे ? गोयमा ! णो आया मणे अण्णे
 मणे, जहा भासा तहा मणेवि जाव णो अजीवाणं मणे । पुंवि भंते ! मणे
 मणिज्जमाणे मणे ? एवं जहेव भासा । पुंवि भंते ! मणे भिज्जइ, मणि-
 ज्जमाणे मणे भिज्जइ, मणसमयवीइक्कंते मणे भिज्जइ ? एवं जहेव

भासा । कइविहे णं भंते ! मणे पण्णत्ते ? गोयमा ! चउच्चिहे मणे पण्णत्ते, तंजहा—सच्चै जाव असच्चामोसे ॥ ४६३ ॥ आया भंते ! काए अण्णे काए ? गोयमा ! आयावि काए अण्णेवि काए । रुवि भंते ! काए अरुवि काए ? गोयमा ! रुवि काए अरुवि काए, एवं एक्केक्के पुच्छा, गोयमा ! सच्चित्ते वि काए अचित्तेवि काए, जीवेवि काए अजीवेवि काए, जीवाणवि काए अजीवाणवि काए । पुच्चि भंते ! काए पुच्छा, गोयमा ! पुच्चि वि काए काइज्जमाणेवि काए कायसमयवीडक्कत्तेवि काए । पुच्चि भंते ! काए भिज्जइ पुच्छा, गोयमा ! पुच्चि वि काए भिज्जइ काइज्जमाणेवि काए भिज्जइ, कायसमयवीडक्कत्तेवि काए भिज्जइ । कइविहे णं भंते ! काए पण्णत्ते ? गोयमा ! सत्तविहे काए पण्णत्ते, तंजहा—ओरालिए ओरालियमीसए वेउच्चि वेउच्चियमीसए आहारए आहारगमीसए कम्मए ॥ ४६४ ॥ कइविहे णं भंते ! मरणे पण्णत्ते ? गोयमा ! पंचविहे मरणे पण्णत्ते, तंजहा—आवीच्चियमरणे ओहिमरणे आइत्तियमरणे वात्तमरणे पच्चियमरणे । आवीच्चियमरणे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा—दव्वावीच्चियमरणे खेत्तावीच्चियमरणे कालावीच्चियमरणे भावावीच्चियमरणे भावावीच्चियमरणे । दव्वावीच्चियमरणे णं भंते ! कइविहे पण्णत्ते ? गोयमा ! चउच्चिहे पण्णत्ते, तंजहा—णेरइयदव्वावीच्चियमरणे, तिरिखणोणियदव्वावीच्चियमरणे, मणुस्सदव्वावीच्चियमरणे, देवदव्वावीच्चियमरणे । से केणट्ठेणं भंते ! एवं वुच्चइ—णेरइयदव्वावीच्चियमरणे णेरइयदव्वावीच्चियमरणे ? गोयमा ! जण्णं णेरइया णेरइएदव्वे वट्टमाणा जाइं दव्वाइं णेरइयाउयत्ताए गहियाइं बद्धाइं पुट्ठाइं कडाइं पट्टुवियाइं णिविट्ठाइं अभिणिविट्ठाइं अभिसमण्णागयाइं भवन्ति ताइं दव्वाइं आवीच्चियं अणुसमयं गिरंतरं मरन्ति त्ति कट्टु से तेणट्ठेणं गोयमा ! एवं वुच्चइ—णेरइयदव्वावीच्चियमरणे, एवं जाव देवदव्वावीच्चियमरणे । खेत्तावीच्चियमरणे णं भंते ! कइविहे पण्णत्ते ? गोयमा ! चउच्चिहे पण्णत्ते, तंजहा—णेरइयखेत्तावीच्चियमरणे जाव देवखेत्तावीच्चियमरणे । से केणट्ठेणं भंते ! एवं वुच्चइ—णेरइयखेत्तावीच्चियमरणे २ ? गोयमा ! जण्णं णेरइया णेरइयखेत्ते वट्टमाणा जाइं दव्वाइं णेरइयाउयत्ताए एवं जहेव दव्वावीच्चियमरणे सहेव खेत्तावीच्चियमरणेवि, एवं जाव भावावीच्चियमरणे । ओहिमरणे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा—दव्वोहिमरणे खेत्तोहिमरणे जाव भावोहिमरणे । दव्वोहिमरणे णं भंते !

कइविहे पणत्ते ? गोयमा ! चउव्विहे पणत्ते, तंजहा-णेरइयदव्वोहिमरणे जाव देवदव्वोहिमरणे । से केणट्ठेणं भंते ! एवं वुच्चइ-णेरइयदव्वोहिमरणे २ ? गोयमा ! जणं णेरइया णेरइयदव्वे वट्टमाणा जाइं दव्वाइं संपयं मरंति जणं णेरइया ताइं दव्वाइं अणागए काले पुणोवि मरिस्संति, से तेणट्ठेणं गोयमा ! जाव दव्वोहिमरणे, एवं तिरिक्खजोणिय० मणुस्स० देवदव्वोहिमरणेवि, एवं एएणं गमेणं खेतोहिमरणेवि कालोहिमरणेवि भवोहिमरणेवि मावोहिमरणेवि । आइतियमरणे णं भंते ! पुच्छा, गोयमा ! पंचविहे पणत्ते, तं०-दव्वाइंतियमरणे खेत्ताइंतियमरणे जाव भावाइंतियमरणे । दव्वाइंतियमरणे णं भंते ! कइविहे प० ? गोयमा ! चउव्विहे प०, तं०-णेरइयदव्वाइंतियमरणे जाव देवदव्वाइंतियमरणे । से केणट्ठेणं भंते ! एवं वुच्चइ-णेरइयदव्वाइंतियमरणे २ ? गोयमा ! जणं णेरइया णेरइयदव्वे वट्टमाणा जाइं दव्वाइं संपयं मरंति जे णं णेरइया ताइं दव्वाइं अणागए काले णो पुणोवि मरिस्संति, से तेणट्ठेणं जाव मरणे, एवं तिरिक्ख० मणुस्स० देवाइंतियमरणे, एवं खेत्ताइंतियमरणेवि, एवं जाव भावाइंतियमरणेवि । बालमरणे णं भंते ! कइविहे प० ? गोयमा ! दुवालसविहे प०, तं०-बलयमरणे जहा खंडए जाव गिद्धपिट्ठे । पंडियमरणे णं भंते ! कइविहे पणत्ते ? गोयमा ! दुविहे पणत्ते, तंजहा-पाओवगमणे य भत्तपक्खबलाणे य । पाओवगमणे णं भंते ! कइविहे प० ? गोयमा ! दुविहे प०, तं०-णीहारिमे य अणीहारिमे य जाव नियमं अपडिक्कम्मे । भत्तपक्खबलाणे णं भंते ! कइविहे प० ? एवं तं चेव णवरं नियमं सपडिक्कम्मे । सेवं भंते ! सेवं भंते ! त्ति ॥ ४६५ ॥

तेरसमं सयं अट्टमो उट्ठेसो

कइ णं भंते ! कम्मपयडोओ पणत्ताओ ? गोयमा ! अट्ट अम्मपयडोओ पणत्ताओ, एवं बंधट्ठिउट्ठेसो भाणियव्वो णिरवसेसो जहा पणवणाए । सेवं भंते ! सेवं भंते ! त्ति ॥ ४६६ ॥

तेरसमं सयं णवमो उट्ठेसो

रायगिहे जाव एवं वयासी-से जहाणामए केइ पुरिसे केयाघडियं गहाय गच्छेज्जा, एवामेव अणगारेवि भावियप्पा केयाघडियाकिच्चहत्थगएणं अप्पाणेणं

उड्डं वेहासं उप्पएज्जा ? हुंता गोयमा ! जाव समुप्पएज्जा । अणगारे णं भंते ! भावियप्पा केवइयाइं पभू केयाघडियाकिच्चहत्थगयाइं रुवाइं विउच्चित्तए ? गोयमा ! से जहाणामए जुवइं जुवाणे हत्थेणं हत्थे एवं जहा तइयसए पंचमुद्देसए जाव णो चेव णं संपत्तीए विउच्चिसु वा विउच्चिवत्ति वा विउच्चिवस्सति वा । से जहाणामए केइ पुरिसे हिरण्णपेलं गहाय गच्छेज्जा, एवामेव अणगारेवि भावियप्पा हिरण्णपेलहत्थकिच्चगएणं अप्पाणेणं ? सेसं तं चेव, एवं सुव-ण्णपेलं, एवं रयणपेलं वड्ढरपेलं वत्थपेलं आभरणपेलं, एवं वियलकिड्डं सुंबकिड्डं चम्मकिड्डं कंबलकिड्डं, एवं अयभारं तंबभारं तउयभारं सीसगभारं हिरण्णभारं सुवण्णभारं वड्ढरभारं । से जहाणामए--वग्गुली सिया दोवि पाए उत्तंभिया २ उड्डंवाया अहोसिरा चिट्ठेज्जा, एवामेव अणगारेवि भावियप्पा वग्गुलीकिच्चगएणं अप्पाणेणं उड्डं वेहासं० एवं जण्णोवइयवत्तव्वया भाणियदवा जाव विउच्चिवस्सति वा । से जहाणामए जलोया सिया उदगंसि कायं उच्चिहिया २ गच्छेज्जा, एवामेव सेसं जहा वग्गुलीए । से जहाणामए बीयंबीयगसउणे सिया दोवि पाए समतुरंगेमाणे २ गच्छेज्जा, एवामेव अणगारे० सेसं तं चेव । से जहाणामए पविखविरात्तए सिया रुक्खाओ रुक्खं डेव्वेमाणे २ गच्छेज्जा, एवामेव अणगारे सेसं तं चेव । से जहाणामए जीवंजीवगसउणे सिया दोवि पाए समतुरं-गेमाणे २ गच्छेज्जा, एवामेव अणगारे सेसं तं चेव । से जहाणामए हुंसे सिया तीराओ तीरं अभिरममाणे २ गच्छेज्जा, एवामेव अणगारे हुंसकिच्चगएणं अप्पाणेणं सेसं तं चेव । से जहाणामए समुद्वायसए सिया वीईओ वीइं डेव्वेमाणे २ गच्छेज्जा, एवामेव तहेव । से जहाणामए केइ पुरिसे चवकं गहाय गच्छेज्जा, एवामेव अणगारेवि भावियप्पा चवककिच्चहत्थगएणं अप्पाणेणं सेसं जहा केयाघडियाए, एवं छत्तं, एवं चमरं । से जहाणामए केइ पुरिसे रयणं गहाय गच्छेज्जा, एवं चेव, एवं वड्ढरं वेरुत्तियं जाव रिट्ठं, एवं उप्पलहत्थगं पउम-हत्थगं कुमुदहत्थगं, एवं जाव से जहाणामए केइ पुरिसे सहस्सपत्तगं गहाय गच्छेज्जा, एवं चेव । से जहाणामए केइ पुरिसे भिसं अवद्दालिय २ गच्छेज्जा, एवामेव अणगारेवि भिसकिच्चगएणं अप्पाणेणं तं चेव । से जहा-णामए मुणालिया सिया उदगंसि कायं उम्मज्जिय २ चिट्ठेज्जा, एवामेव सेसं जहा वग्गुलीए । से जहाणामए वणसंडे सिया-किण्हे किण्हेभासे जाव णिकुसंब-

भूए पांसाईए ४, एवामेव अणगारेवि भावियप्पा वणसंडकिच्चगएणं अप्पाणेणं उड्ढं वेहासं उप्पएज्जा, सेसं तं चेव । से जहाणामए पुक्खरिणी सिया—चउक्कोणा सप्ततीरा अणुपुक्खसुजाय जाव सद्दुण्णइयमहुरसरणाइया पासाईया ४, एवामेव अणगारेवि भावियप्पा पोक्खरिणीकिच्चगएणं अप्पाणेणं उड्ढं वेहासं उप्पएज्जा ? हुंता उप्पएज्जा । अणगारे णं भंते ! भावियप्पा केवइयाइं पभू पोक्खरिणीकिच्चगयाइं रुवाइं विउच्चिसए, सेसं तं चेव जाव विउच्चिस्संति वा । से भंते ! किं माईं विउच्चइ अमाईं विउच्चइ ? गोयमा ! माईं विउच्चइ णो अमाईं विउच्चइ, माईं णं तस्स ठाणस्स अणालोइय० एवं जहा तइयसए चउत्थुद्देसए जाव अत्थि तस्स आराहणा । सेवं भंते ! सेवं भंते ! त्ति जाव बिहरइ ॥ ४६७ ॥

तेरसमं सयं दसमो उद्देसो

कइ णं भंते ! छाउमत्थियसमुग्घाया पण्णत्ता ? गोयमा ! छ छाउमत्थिया समुग्घाया पण्णत्ता, तंजहा—वेयणासमुग्घाए एवं छाउमत्थियसमुग्घाया णेयव्वा जहा पण्णवणाए जाव आहारगसमुग्घाएत्ति । सेवं भंते ! सेवं भंते ! त्ति जाव बिहरइ ॥ ४६८ ॥

॥ तेरसमं सयं समत्तं ॥

चोद्दसमं सयं पढमो उद्देसो

चर १ उम्माय २ सरीरे ३ पोगल ४ अगणी ५ तहा किमाहारे ६ । संसिट्ठ ७ मंतरे खलु ८ अणगारे ९ केवली चेव १० ॥ १ ॥ रायगिहे जाव एवं वयासी—अणगारे णं भंते ! भावियप्पा चरमं देवावासं वीइक्कंते परमं देवावासमसंपत्ते एत्थ णं अंतरा कालं करेज्जा, तस्स णं भंते ! कंहि गई कंहि उवथाए पण्णत्ते ? गोयमा ! जे से तत्थ परियस्सओ तल्लेसा देवावासा तंहि तस्स गई तंहि तस्स उवथाए पण्णत्ते, से य तत्थगए विराहेज्जा कम्मलेस्सामेव पडिपडइ, से य तत्थ गए णो विराहेज्जा तामेव लेस्सं उवसंपज्जित्ताणं बिहरइ । अणगारे णं भंते ! भावियप्पा चरमं असुरकुमारावासं वीइक्कंते परमं असुरकुमारा० एवं चेव, एवं जाव थणियकुमारावासं जोइसियावासं, एवं वेमाणियावासं जाव बिहरइ ॥ ४६९ ॥ णेरइयाणं भंते ! क्हं सीहा गई क्हं

सोहे गइविसए पणत्ते ? गोयमा ! से जहाणामए—केइ पुरिसे तरुणे बलवं जुगवं जाव णिउणसिण्पोवगए आउंठियं बाहं पसारेज्जा पसारियं वा बाहं आउं-
 टेज्जा, विक्खिण्णं वा मुंठि साहरेज्जा साहरियं वा मुंठि विक्खिरेज्जा, उम्मि-
 सियं वा अच्छि णिम्मिसेज्जा णिम्मिसियं वा अच्छि उम्मिसेज्जा, भवे एया-
 रूवे ? णो इणत्ठे समत्ठे, णेरइया णं एगसमएण वा दुसमएण वा तिसमएण
 वा विग्गहेणं उववज्जंति, णेरइयाणं गोयमा ! तहा सीहा गई तहा सीहे गइ-
 विसए पणत्ते, एवं जाव वेमाणियाणं, णवरं एगिदियाणं चउसमइए विग्गहे
 भाणियव्वे, सेसं तं चेव ॥ ५०० ॥ णेरइया णं भंते ! कि अणंतरोववण्णगा परं-
 परोववण्णगा अणंतरपरंपरअणुववण्णगा ? गोयमा ! णेरइया अणंतरोव-
 वण्णगादि परंपरोववण्णगावि अणंतरपरंपरअणुववण्णगावि । से केणत्ठेणं भंते !
 एवं वुच्चइ जाव अणंतरपरंपरअणुववण्णगावि ? गोयमा ! जे णं णेरइया
 पढमसमयोववण्णगा ते णं णेरइया अणंतरोववण्णगा, जे णं णेरइया अपढम-
 समयोववण्णगा ते णं णेरइया परंपरोववण्णगा, जे णं णेरइया विग्गहगइसमा-
 वण्णगा ते णं णेरइया अणंतरपरंपरअणुववण्णगा, से तेणत्ठेणं जाव अणुववण्ण-
 गावि, एवं णिरंतरं जाव वेमाणिया १ । अणंतरोववण्णगा णं भंते ! णेरइया कि
 णेरइयाउयं पकरेंति, तिरिक्ख० मणुस्स० देवाउयं पकरेंति ? गोयमा ! णो
 णेरइयाउयं पकरेंति जाव णो देवाउयंपकरेंति । परंपरोववण्णगा णं भंते ! णेर-
 इया कि णेरइयाउयं पकरेंति जाव देवाउयं पकरेंति ? गोयमा ! णो णेरइया-
 उयं पकरेंति, तिरिक्खजोणियाउयं पकरेंति, मणुस्साउयंपि पकरेंति, णो देवा-
 उयं पकरेंति । अणंतरपरंपरअणुववण्णगा णं भंते ! णेरइया कि णेरइयाउयं
 पकरेंति पुच्छा, गोयमा ! णो णेरइयाउयं पकरेंति जाव णो देवाउयं पकरेंति,
 एवं जाव वेमाणिया, णवरं पंचिदियतिरिक्खजोणिया मणुस्सा य परंपरोव-
 वण्णगा चत्तारिवि आउयाइं पकरेंति, सेसं तं चेव २ । णेरइया णं भंते !
 कि अणंतरणिग्गया परंपरणिग्गया अणंतरपरंपरअणिग्गया ? गोयमा ! णेर-
 इया णं अणंतरणिग्गयावि जाव अणंतरपरंपरअणिग्गयावि । से केणत्ठेणं भंते !
 जाव अणिग्गयावि ? गोयमा ! जे णं णेरइया पढमसमयणिग्गया ते णं णेर-
 इया अणंतरणिग्गया, जे णं णेरइया अपढमसमयणिग्गया ते णं णेरइया परंपर-
 णिग्गया, जे णं णेरइया विग्गहगइसमावण्णगा ते णं णेरइया अणंतरपरंपर-

अणिग्गया, से तेणट्ठेणं गोयमा ! जाव अणिग्गयावि, एवं जाव वेमाणिया ३ । अणंतरणिग्गया णं भंते ! णेरइया कि णेरइयाउयं पकरेंति जाव देवाउयं पकरेंति ? गोयमा ! णो णेरइयाउयं पकरेंति जाव णो देवाउयं पकरेंति । परंपरणिग्गया णं भंते ! णेरइया कि णेरइयाउयं पुच्छा, गोयमा ! णेरइयाउयं पकरेंति जाव देवाउयं पकरेंति । अणंतरपरंपरअणिग्गया णं भंते ! णेरइया पुच्छा, गोयमा ! णो णेरइयाउयं पकरेंति जाव णो देवाउयं पकरेंति, एवं णिरवसेसं जाव वेमाणिया ४ । णेरइया णं भंते ! कि अणंतरखेदोववण्णगा परंपरखेदोववण्णगा अणंतरपरंपरखेदाणुववण्णगा ? गोयमा ! णेरइया० एवं एएणं अभिलावेणं तं चेव चत्तारि वंडगा भाणियव्वा । सेवं भंते ! सेवं भंते ! ति जाव विहरइ ॥ ५०१ ॥

चोदसमं सयं बीओ उद्देसो

कइविहे णं भंते ! उम्माए पणत्ते ? गोयमा ! दुविहे उम्माए पणत्ते, तंजहा—जक्खावेसे य मोहणिज्जस्स य कम्मस्स उदएणं, तत्थ णं जे से जक्खावेसे से णं सुहवैयणतराए चेव सुहविमोयणतराए चेव, तत्थ णं जे से मोहणिज्जस्स कम्मस्स उदएणं से णं दुहवैयणतराए चेव दुहविमोयणतराए चेव । णेरइयाणं भंते ! कइविहे उम्माए पणत्ते ? गोयमा ! दुविहे उम्माए पणत्ते, तंजहा—जक्खावेसे य मोहणिज्जस्स य कम्मस्स उदएणं । से केणट्ठेणं भंते ! एवं वुच्चइ—णेरइयाणं दुविहे उम्माए पणत्ते, तंजहा—जक्खावेसे य मोहणिज्जस्स य कम्मस्स उदएणं ? ग्नेयमा ! देवे वा से असुभे पोग्गले पक्खिज्जा, से णं तेसि असुभाणं पोग्गलाणं पक्खिवणयाए जक्खाएसं उम्मायं पाउणेज्जा, मोहणिज्जस्स वा कम्मस्स उदएणं मोहणिज्जं उम्मायं पाउणेज्जा, से तेणट्ठेणं जाव उदएणं । असुरकुमाराणं भंते ! कइविहे उम्माए पणत्ते ? एवं जहेव णेरइयाणं णवरं देवे वा से महिड्डियतराए असुभे पोग्गले पक्खिज्जा, से णं तेसि असुभाणं पोग्गलाणं पक्खिवणयाए जक्खाएसं उम्मायं पाउणेज्जा, मोहणिज्जस्स वा सेसं तं चेव, से तेणट्ठेणं जाव उदएणं, एवं जाव धणियकुमाराणं, पुह्विककाइयाणं जाव मणुस्साणं एएसिं जहा णेरइयाणं, वाणमंतरजोइसियवेमाणियाणं जहा असुरकुमाराणं ॥ ५०२ ॥ अत्थि णं भंते !

पज्जण्णे कालवासो वुट्ठिकायं पकरेइ ? हंता अत्थि । जाहे णं भंते ! सब्बे देविंदे देवराया वुट्ठिकायं काउकामे भवइ से कहमियाणि पकरेइ ? गोयमा ! ताहे चेव णं से सब्बे देविंदे देवराया अंभितरपरिसए देवे सद्दावेइ, तए णं ते अंभितरपरिसगा देवा सद्दाविया समाणा मज्झिमपरिसए देवे सद्दावेत्ति, तए णं ते मज्झिमपरिसगा देवा सद्दाविया समाणा बाहिरपरिसए देवे सद्दावेत्ति, तए णं ते बाहिरपरिसगा देवा सद्दाविया समाणा बाहिरबाहिरगे देवे सद्दावेत्ति, तए णं ते बाहिरबाहिरगा देवा सद्दाविया समाणा आभिओगिए देवे सद्दावेत्ति, तए णं ते जाव सद्दाविया समाणा वुट्ठिकाइए देवे सद्दावेत्ति, तए णं ते वुट्ठिकाइया देवा सद्दाविया समाणा वुट्ठिकायं पकरेत्ति, एवं खलु गोयमा ! सब्बे देविंदे देवराया वुट्ठिकायं पकरेइ । अत्थि णं भंते ! असुरकुमारावि देवा वुट्ठिकायं पकरेत्ति ? हंता अत्थि । किं पत्तियण्णं भंते ! असुरकुमारा देवा वुट्ठिकायं पकरेत्ति ? गोयमा ! जे इमे अरहंता भगवंता एएसि णं जम्मणमहिमासु वा, णिक्खमणमहिमासु वा णाणुप्पायमहिमासु वा परिणिट्ठ्वाणमहिमासु वा, एवं खलु गोयमा ! असुरकुमारावि देवा वुट्ठिकायं पकरेत्ति, एवं णागकुमारावि, एवं जाव थणियकुमारा, वाणमंतरजोइसियवेमाणिया एवं चेव ॥ ५०३ ॥ जाहे णं भंते ! ईसाणे देविंदे देवराया तमुक्कायं काउकामे भवइ से कहमियाणि पकरेइ ? गोयमा ! ताहे चेव णं से ईसाणे देविंदे देवराया अंभितरपरिसए देवे सद्दावेइ, तए णं ते अंभितरपरिसगा देवा सद्दाविया समाणा एवं जहेव सब्बस्स जाव तए णं ते आभिओगिया देवा सद्दाविया समाणा तमुक्काइए देवे सद्दावेत्ति, तए णं ते तमुक्काइया देवा सद्दाविया समाणा तमुक्कायं पकरेत्ति, एवं खलु गोयमा ! ईसाणे देविंदे देवराया तमुक्कायं पकरेइ । अत्थि णं भंते ! असुरकुमारावि देवा तमुक्कायं पकरेत्ति ? हंता अत्थि । किं पत्तियण्णं भंते ! असुरकुमारा देवा तमुक्कायं पकरेत्ति ? गोयमा ! किड्डारइपत्तियं वा पडिणीयविमोहणट्ठयाए वा गुत्तीसारक्खणहेउं वा अप्पणो वा सरीरपच्छायणट्ठयाए, एवं खलु गोयमा ! असुरकुमारावि देवा तमुक्कायं पकरेत्ति, एवं जाव वेमाणिया । सेवं भंते ! सेवं भंते ! त्ति जाव विहरइ ॥ ५०४ ॥

चोद्दसमं सयं तइओ उद्देसो

देवे णं भंते ! महाकाए महासरीरे अणगारस्स भावियप्पणो मज्झंमज्जेणं वीईवएज्जा ? गोयमा ! अत्थेगइए वीईवएज्जा अत्थेगइए णो वीईवएज्जा । से केणट्ठेणं भंते ! एवं वुच्चइ अत्थेगइए वीईवएज्जा अत्थेगइए णो वीइवएज्जा ? गोयमा ! दुविहा देवा पणत्ता, तंजहा—माइमिच्छादिट्ठिउववण्णया य अमाइ-सम्मदिट्ठिउववण्णया य, तत्थ णं जे से माइमिच्छादिट्ठिउववण्णए देवे से णं अणगारं भावियप्पणं पासइ २ त्ता णो वंदइ णो णमंसइ णो सक्कारेइ णो सम्माणेइ णो कल्लाणं मंगलं देवयं जाव पज्जुवासइ, से णं अणगारस्स भावियप्पणो मज्झं-मज्जेणं वीईवएज्जा, तत्थ णं जे से अमाइसम्मदिट्ठिउववण्णए देवे से णं अण-गारं भावियप्पणं पासइ पासित्ता वंदइ णमंसइ जाव पज्जुवासइ, से णं अण-गारस्स भावियप्पणो मज्झंमज्जेणं णो वीईवएज्जा, से तेणट्ठेणं गोयमा ! एवं वुच्चइ जाव णो वीईवएज्जा । असुरकुमारे णं भंते ! महाकाए महासरीरे एवं चेव, एवं देवदंडओ भाणियव्वो जाव वेमाणिए ॥ ५०५ ॥ अत्थि णं भंते ! णेरइयाणं सक्कारेइ वा सम्माणेइ वा किइकम्मेइ वा अब्भुट्ठाणेइ वा अंजलि-पगहेइ वा आसणाभिग्गहेइ वा आसणाणुप्पदाणेइ वा इतस्स पच्चुग्गच्छणया ठियस्स पज्जुवासणया गच्छंतस्स पडिसंसाहणया ? णो इणट्ठे समट्ठे । अत्थि णं भंते ! असुरकुमारारणं सक्कारेइ वा सम्माणेइ वा जाव पडिसंसाहणया ? हुंता अत्थि, एवं जाव थणियकुमारारणं, पुढविकाइयाणं जाव चउरंरिदियाणं एएंसि जहा णेरइयाणं । अत्थि णं भंते ! पंचिदियतिरिक्खजोणियाणं सक्कारेइ वा जाव पडिसंसाहणया ? हुंता अत्थि; णो चेव णं आसणाभिग्गहेइ वा आस-णाणुप्पयाणेइ वा, मणुस्साणं जाव वेमाणियाणं जहा असुरकुमारारणं ॥ ५०६ ॥ अप्पिड्डिए णं भंते ! देवे महिड्डियस्स देवस्स मज्झंमज्जेणं वीईवएज्जा ? णो इणट्ठे समट्ठे, समिड्डिए णं भंते ! देवे समिड्डियस्स देवस्स मज्झंमज्जेणं वीईवएज्जा ? णो इणट्ठे समट्ठे, पमत्तं पुण वीईवएज्जा । से णं भंते ! कि सत्थेणं अक्कमित्ता पभू अणक्कमित्ता पभू ? गोयमा ! अक्कमित्ता पभू णो अणक्कमित्ता पभू । से णं भंते ! कि पुंविं सत्थेणं अक्कमित्ता पच्छा वीई-वंएज्जा, पुंविं वीईवएज्जा पच्छा सत्थेणं अक्कमेज्जा ? एवं एएणं अभिलावेणं जहा दसमसए आइड्ढीउद्देसए तहेव णिरवसेसं चत्तारि दंडगा भाणियव्वो जाव

महिद्धिया वेमाणिणी अप्पिद्धियाए वेमाणिणीए ॥ ५०७ ॥ रयणप्पभापुढविणे-
इया णं भंते ! केरिसयं पोगलपरिणामं पच्चणुडभवमाणा विहरंति ? गोयमा !
अणिट्ठं जाव अमणामं, एवं जाव अहेसत्तमापुढविणेरइया, एवं वेयणापरिणामं,
एवं जहा जीवाभिगमे बिइए णेरइयउद्देसए जाव अहेसत्तमापुढविणेरइया णं
भंते ! केरिसयं परिगहसण्णापरिणामं पच्चणुडभवमाणा विहरंति ? गोयमा !
अणिट्ठं जाव अमणामं । सेवं भंते ! सेवं भंते ! त्ति ॥ ५०८ ॥

चोद्दसमं सयं चउत्थो उद्देसो

एस णं भंते ! पोगले तीयमणंतं सासयं समयं लुक्खी समयं अलुक्खी
समयं लुक्खी वा अलुक्खी वा ? पुट्ठि च णं करणेण अणेगवण्णं अणेगरुव्वं परि-
णामं परिणमइ ? अह से परिणामे णिज्जिण्णे भवइ तओ पच्छा एगवण्णे एगरुवे
सिया ? हंता गोयमा ! एस णं पोगले तीयं तं चेव जाव एगरुवे सिया ।
एस णं भंते ! पोगले पडुप्पणं सासयं समयं ० ? एवं चेव, एवं अणागय-
मणंतपि । एस णं भंते ! खंधे तीयमणंतं ० ? एवं चेव, खंधेवि जहा पोगले
॥ ५०९ ॥ एस णं भंते ! जीवे तीयमणंतं सासयं समयं दुक्खी समयं अदुक्खी
समयं दुक्खी वा अदुक्खी वा ? पुट्ठि च णं करणेण अणेगभावं अणेगभूयं परि-
णामं परिणमइ, अह से वेयणिज्जे णिज्जिण्णे भवइ तओ पच्छा एगभावे एग-
भूए सिया ? हंता गोयमा ! एस णं जीवे जाव एगभूए सिया, एवं पडुप्पणं
सासयं समयं, एवं अणागयमणंतं सासयं समयं ॥ ५१० ॥ परमाणुपोगले णं
भंते ! किं सासए असासए ? गोयमा ! सिय सासए सिय असासए । से केण-
ट्ठेणं भंते ! एवं वुच्चइ सिय सासए सिय असासए ? गोयमा ! दव्वट्टयाए
सासए, वण्णपज्जवेहं जाव फासपज्जवेहं असासए, से तेणट्ठेणं जाव सिय
सासए सिय असासए ॥ ५११ ॥ परमाणुपोगले णं भंते ! किं चरिमे अचरिमे ?
गोयमा ! दव्वादेसेणं णो चरिमे अचरिमे, खेत्तादेसेणं सिय चरिमे सिय अच-
रिमे, कालादेसेणं सिय चरिमे सिय अचरिमे, भावादेसेणं सिय चरिमे सिय
अचरिमे ॥ ५१२ ॥ कइविहे णं भंते ! परिणामे पण्णत्ते ? गोयमा ! दुविहे
परिणामे पण्णत्ते, तंजहा-जीवपरिणामे य अजीवपरिणामे य, एवं परिणामपयं
णिरवसेसं भाणियव्वं । सेवं भंते ! सेवं भंते ! त्ति जाव विहरइ ॥ ५१३ ॥

चोद्दसमं सयं पंचमो उद्देसो

णेरइए णं भंते ! अगणिकायस्स मज्झंमज्जेणं वीईवएज्जा ? गोयमा !

अत्थेगइए वीईवएज्जा अत्थेगइए णो वीईवएज्जा । से केणट्ठेणं भंते ! एवं
 वुच्चइ अत्थेगइए वीईवएज्जा अत्थेगइए णो वीईवएज्जा ? गोयमा ! णेरइया
 दुविहा पणत्ता, तंजहा—विग्गहगइसमावण्णगा य अविग्गहगइसमावण्णगा य,
 तत्थ णं जे से विग्गहगइसमावण्णए णेरइए से णं अगणिकायस्स मज्झंमज्झेणं
 वीईवएज्जा । से णं तत्थ झियाएज्जा ? णो इणट्ठे समट्ठे, णो खलु तत्थ सत्थं
 कमइ, तत्थ णं जे से अविग्गहगइसमावण्णए णेरइए से णं अगणिकायस्स मज्झं-
 मज्झेणं णो वीईवएज्जा, से तेणट्ठेणं जाव णो वीईवएज्जा । असुरकुमारे णं
 भंते ! अगणिकायस्स० पुच्छा, गोयमा ! अत्थेगइए वीईवएज्जा अत्थेगइए णो
 वीईवएज्जा । से केणट्ठेणं जाव णो वीईवएज्जा ? गोयमा ! असुरकुमारा दुविहा
 पणत्ता, तं०—विग्गहगइसमावण्णगा य अविग्गहगइसमावण्णगा य, तत्थ णं जे से
 विग्गहगइसमावण्णए असुरकुमारे से णं एवं जहेव णेरइए जाव कमइ, तत्थ णं
 जे से अविग्गहगइसमावण्णए असुरकुमारे से णं अत्थेगइए अगणिकायस्स मज्झं-
 मज्झेणं वीईवएज्जा, अत्थेगइए णो वीईवएज्जा । जे णं वीईवएज्जा से णं तत्थ
 झियाएज्जा ? णो इणट्ठे समट्ठे, णो खलु तत्थ सत्थं कमइ, से तेणट्ठेणं एवं
 जाव यणियकुमारे । एगिदिया जहा णेरइया । बेइंदिया णं भंते ! अगणिकायस्स
 मज्झंमज्झेणं जहा असुरकुमारे तहा बेइंदिएवि, णवरं जे णं वीईवएज्जा से णं
 तत्थ झियाएज्जा ? हुंता झियाएज्जा, सेसं तं चेव एवं जाव चर्चरिदिए ।
 पंचिदियतिरिक्खजोणिए णं भंते ! अगणिकाय० पुच्छा, गोयमा ! अत्थेगइए
 वीईवएज्जा अत्थेगइए णो वीईवएज्जा । से केणट्ठेणं० ? गोयमा ! पंचिदिय-
 तिरिक्खजोणिया दुविहा पणत्ता, तंजहा—विग्गहगइसमावण्णगा य अविग्गह-
 गइसमावण्णगा य, विग्गहगइसमावण्णए जहेव णेरइए जाव णो खलु तत्थ सत्थं
 कमइ, अविग्गहगइसमावण्णगा पंचिदियतिरिक्खजोणिया दुविहा पणत्ता,
 तंजहा—इड्ढिप्पत्ता य अणिड्ढिप्पत्ता य, तत्थ णं जे से इड्ढिप्पत्ते पंचिदियतिरिक्ख-
 जोणिए से णं अत्थेगइए अगणिकायस्स मज्झंमज्झेणं वीईवएज्जा अत्थेगइए णो
 वीईवएज्जा । जे णं वीईवएज्जा से णं तत्थ झियाएज्जा ? णो इणट्ठे समट्ठे,
 णो खलु तत्थ सत्थं कमइ, तत्थ णं जे से अणिड्ढिप्पत्ते पंचिदियतिरिक्खजोणिए
 से णं अत्थेगइए अगणिकायस्स मज्झंमज्झेणं वीईवएज्जा अत्थेगइए णो वीई-
 वएज्जा, जे णं वीईवएज्जा से णं तत्थ झियाएज्जा ? हुंता झियाएज्जा, से

तेणट्ठेणं जाव णो वीईवएज्जा, एवं मणुस्सेवि, वाणमंतरजोइसियवेमाणिए जहा असुरकुमारे ॥ ५१४ ॥ णेरइया दस ठाणाइं पच्चणुंभवमाणा विहरंति, तजहा—अणिट्ठा सद्दा अणिट्ठा रूवा अणिट्ठा गंधा अणिट्ठा रसा अणिट्ठा फासा अणिट्ठा गई अणिट्ठा ठिई अणिट्ठे लावण्णे अणिट्ठे जसोकित्ती अणिट्ठे उट्टाण-कम्मबलवीरियपुरिसवकारपरवकमे । असुरकुमारा दस ठाणाइं पच्चणुंभवमाणा विहरंति, तंजहा—इट्ठा सद्दा इट्ठा रूवा जाव इट्ठे उट्टाणकम्मबलवीरियपुरिस-वकारपरवकमे, एवं जाव थणियकुमारा । पुढविककाइया छट्टाणाइं पच्चणुंभव-माणा विहरंति, तं०—इट्टाणिट्ठा फासा इट्टाणिट्ठा गई एवं जाव परवकमे, एवं जाव वणस्सइकाइया । बेइंदिया संत्तट्टाणाइं पच्चणुंभवमाणा विहरंति, तंजहा—इट्टाणिट्ठा रसा सेसं जहा एगिदियाणं । सेइंदिया अट्टट्टाणाइं पच्चणुंभवमाणा विहरंति, तं०—इट्टाणिट्ठा गंधा सेसं जहा बेइंदियाणं । चउररदिया णवट्टाणाइं पच्चणुंभवमाणा विहरंति, तं०—इट्टाणिट्ठा रूवा सेसं जहा तेइंदियाणं । पंचि-दियतिरिक्खजोणिया दस ठाणाइं पच्चणुंभवमाणा विहरंति, तंजहा—इट्टाणिट्ठा सद्दा जाव परवकमे, एवं मणुस्सावि, वाणमंतरजोइसियवेमाणिया जहा असुर-कुमारा ॥ ५१५ ॥ देवे णं भंते ! महिड्डिए जाव महेसक्खे बाहिरए पोगले अपरियाइत्ता पभू तिरियपव्वयं वा तिरियभिन्ति वा उल्लंघेत्तए वा पल्लंघेत्तए वा ? गोयमा ! णो इणट्ठे समट्ठे । देवे णं भंते ! महिड्डिए जाव महेसक्खे बाहिरए पोगले परियाइत्ता पभू तिरिय जाव पल्लंघेत्तए वा ? हंता पभू । सेवं भंते ! सेवं भंते ! त्ति ॥ ५१६ ॥

चोदसमं सयं छट्ठो उट्ठेसो

रायगिहे जाव एवं वयासी—णेरइया णं भंते ! किमाहारा किपरिणामा किजोणिया किठिईया पणत्ता ? गोयमा ! णेरइया णं पोगलाहारा पोगल-परिणामा पोगलजोणिया पोगलट्टिईया कम्मोवगा कम्मणियाणा कम्मट्टिईया कम्मणामेव विपरियासमेत्ति, एवं जाव वेमाणिया ॥ ५१७ ॥ णेरइया णं भंते ! कि वीचिदव्वाइं आहारंति अवीचिदव्वाइं आहारंति ? गोयमा ! णेर-इया वीचिदव्वाइंपि आहारंति अवीचिदव्वाइंपि आहारंति । से केणट्ठेणं भंते ! एवं वुच्चइ णेरइया वीचि० तं चेव जाव आहारंति ? गोयमा ! जे णं णेर-इया एगपएसूणाइंपि दव्वाइं आहारंति ते णं णेरइया वीचिदव्वाइं आहारंति,

जे णं णेरइया पडिपुण्णाइं व्वाइं आहारेंति ते णं णेरइया अब्बिच्चिदव्वाइं
आहारेंति, से तेणदुठेणं गोयमा ! एवं दुच्चइ जाव आहारेंति, एवं जाव वेमाणिया
आहारेंति ॥५१८॥ जाहे णं भंते ! सक्के देविदे देवराया दिव्वाइं भोगभोगाईं
भुंजिउं कामे भवइ से कहमियाणिं पकरेइ ? गोयमा ! ताहे चेव णं से सक्के
देविदे देवराया एगं महं णेमिपडिरूवगं विउव्वइ, एगं जोयणसयसहस्सं आयाम-
विकखं भेणं तिण्णि जोयणसयसहस्साइं जाव अद्धं गुलं च किंचिविसेसहियं परि-
क्खेवेणं, तस्स णं णेमिपडिरूवगस्स उव्वारिं बहुसमरमणिज्जे भूमिभागे पण्णत्ते
जाव मणीणं फासे, तस्स णं णेमिपडिरूवगस्स बहुमउअदेसभागे तत्थ णं महं
एगं पासायवडिसगं विउव्वइ पंच जोयणसयाइं उड्डं उच्चत्तेणं, अड्डाइज्जाइं
जोयणसयाइं विकखं भेणं, अठ्ठमुग्गयमूसियं वण्णओ जाव पडिरूवं, तस्स णं पासाय-
वडिसगस्स उल्लोए पउमलयाभत्तिचित्ते जाव पडिरूवे, तस्स णं पासायवडि-
सगस्स अंतो बहुसमरमणिज्जे भूमिभाए जाव मणीणं फासो, मणिपेडिया अट्ट-
जोयणिया जहा वेमाणियाणं, तीसे णं मणिपेडियाए उव्वारिं महं एगे देवसयणिज्जे
विउव्वइ सयणिज्जवण्णओ जाव पडिरूवे, तत्थ णं से सक्के देविदे देवराया
अट्टहिं अगमहिंसीहिं सपरिवाराहिं दोहिं य अणिएहिं णट्टाणिएण य गंधव्वाणि-
एण य सद्धिं महयाहयणट्टं जाव दिव्वाइं भोगभोगाईं भुंजमाणे विहरइ । जाहे
ईसाणे देविदे देवराया दिव्वाइं जहा सक्के तहा ईसाणेवि णिरवसेसं, एवं
सणकुमारेवि, णवरं पासायवडिसओ छ जोयणसयाइं उड्डं उच्चत्तेणं तिण्णि
जोयणसयाइं विकखं भेणं, मणिपेडिया तहेव अट्टजोयणिया, तीसे णं मणिपेडि-
याए उव्वारिं एत्थ णं सहेगं सोहासणं विउव्वइ सपरिवारं भाणियव्वं, तत्थ णं
सणकुमारे देविदे देवराया बावत्तरीए सामाणियसाहस्सीहिं जाव चउहिं बाव-
त्तरीहिं आयरक्खदेवसाहस्सीहिं य बह्निं सणकुमारकप्पवासीहिं वेमाणिएहिं
देवेहिं य देवीहिं य सद्धिं सपरिवुडे महया जाव विहरइ । एवं जहा सणकुमारे
तहा जाव पाणओ अच्चओ, णवरं जो जस्स परिवारो सो तस्स भाणियव्वो,
पासायउच्चत्तं जं सएमु २ कप्पेसु विमाणानं उच्चत्तं अट्टद्वं वित्थारो जाव
अच्चयस्स णवजोयणसयाइं उड्डं उच्चत्तेणं अट्टपंचमाइं जोयणसयाइं विकखं-
भेणं, तत्थ णं गोयमा ! अच्चए देविदे देवराया दसहिं सामाणियसाहस्सीहिं
जाव विहरइ, सेसं तं चेव । सेवं भंते ! सेवं भंते ! ति ॥ ५१९ ॥

चोद्दसमं सयं सत्तमो उद्देसो

रायगिहे जाव परिसा पडिगया, गोयमाइ ! समणे भगवं महावीरे भगवं
 गोयमं आमतेत्ता एवं वयासी-चिरसंसिट्ठोऽसि मे गोयमा ! चिरसंथुओऽसि
 मे गोयमा ! चिरपरिचिओऽसि मे गोयमा ! चिरजुसिओऽसि मे गोयमा !
 चिराणुगओऽसि मे गोयमा ! चिराणुवत्तीसि मे गोयमा ! अणंतरं देवलोए
 अणंतरं भाणुसए भवे कि परं मरणा कायस्स भेया इओ चुया दोवि तुल्ला एगट्ठा
 अविसेसमणाणत्ता भविस्सामो ॥५२०॥ जहा णं भंते ! वयं एयमट्ठं जाणामो
 पासामो तहा णं अणुत्तरोववाइयावि देवा एयमट्ठं जाणंति पासंति ? हंता
 गोयमा ! जहा णं वयं एयमट्ठं जाणामो पासामो तहा णं अणुत्तरोववाइयावि
 देवा एयमट्ठं जाणंति पासंति । से केणट्ठेणं जाव पासंति ? गोयमा ! अणु-
 त्तरोववाइयाणं अणंताओ मणोदव्ववग्गणाओ लद्धाओ पत्ताओ अभिसमणा-
 गयाओ भवंति, से तेणट्ठेणं गोयमा ! एवं वुच्चइ जाव पासंति ॥५२१॥ कइविहे
 णं भंते ! तुल्लए पण्णत्ते ? गोयमा ! छद्विहे तुल्लए पण्णत्ते, तंजहा-दव्वतुल्लए,
 खेत्तुल्लए, कालतुल्लए, भवतुल्लए, भावतुल्लए, संठाणुतुल्लए । से केणट्ठेणं
 भंते ! एवं वुच्चइ दव्वतुल्लए २ ? गोयमा ! परमाणुपोगले परमाणुपोगलस्स
 दव्वओ तुल्ले, परमाणुपोगले परमाणुपोगलवइरित्तस्स दव्वओ णो तुल्ले,
 दुपएसिए खंधे दुपएसियस्स खंधस्स दव्वओ तुल्ले, दुपएसिए खंधे दुपएसिय-
 वइरित्तस्स खंधस्स दव्वओ णो तुल्ले, एवं जाव दसपएसिए, तुल्लसंखेज्जपए-
 सिए खंधे तुल्लसंखेज्जपएसियस्स खंधस्स दव्वओ तुल्ले, तुल्लसंखेज्जपएसिए
 खंधे तुल्लसंखेज्जपएसियवइरित्तस्स खंधस्स दव्वओ णो तुल्ले, एवं तुल्लअसंखे-
 ज्जपएसिए वि, एवं तुल्लअणंतपएसिएवि, से तेणट्ठेणं गोयमा ! एवं वुच्चइ
 दव्वतुल्लए २ । से केणट्ठेणं भंते ! एवं वुच्चइ खेत्तुल्लए २ ? गोयमा ! एगपए-
 सोगाढे पोगले एगपएसोगाढस्स पोगलस्स खेत्तओ तुल्ले, एगपएसोगाढे पोगले
 एगपएसोगाढवइरित्तस्स पोगलस्स खेत्तओ णो तुल्ले, एवं जाव दसपएसोगाढे,
 तुल्लसंखेज्जपएसोगाढे एवं तुल्लअसंखेज्जपएसोगाढेवि, से तेणट्ठेणं जावं खेत्त-
 तुल्लए २ । से केणट्ठेणं भंते ! एवं वुच्चइ कालतुल्लए २ ? गोयमा ! एगसमय-
 ठिईए पोगले एगसमयठिईयस्स पोगलस्स कालओ तुल्ले, एगसमयठिईए
 पोगले एगसमयठिईयवइरित्तस्स पोगलस्स कालओ णो तुल्ले, एवं जाव दससमय-

ट्टिइए, तुल्लसंखेज्जसमयठिईए एवं चेव, एवं तुल्लअसंखेज्जसमयट्टिईएवि, से तेण-
 ट्ठेणं जाव काल तुल्लए २। से केणट्ठेणं भंते ! एवं वुच्चइ भवतुल्लए २ ? गोयमा !
 गेरइए गेरइयस्स भवट्टयाए तुल्ले, गेरइए गेरइयवइरित्तस्स भवट्टयाए णो तुल्ले,
 त्तिरिक्खजोणिए एवं चेव, एवं भणुस्सेवि, एवं वेवेवि, से तेणट्ठेणं जाव भव-
 तुल्लए २। से केणट्ठेणं भंते ! एवं वुच्चइ भावतुल्लए भावतुल्लए ? गोयमा !
 एगगुणकालए पोगगले एगगुणकालयस्स पोगगलस्स भावओ तुल्ले, एगगुणकालए
 पोगगले एगगुणकालावइरित्तस्स पोगगलस्स भावओ णो तुल्ले, एवं जाव इस-
 गुणकालए, एवं तुल्लसंखेज्जगुणकालए पोगगले, एवं तुल्लअसंखेज्जगुणकालएवि,
 एवं तुल्लअणंतगुणकालएवि, जहा कालए एवं णीलए लोहियए ह्मलिइए
 सुक्किल्लए, एवं सुद्धिभगंधे, एवं दुद्धिभगंधे, एवं तित्ते जाव महुरे, एवं कक्खडे
 जाव लुक्खे, उदइए भावे उदइयस्स भावस्स भावओ तुल्ले, उदइए भावे उद-
 इयभाववइरित्तस्स भावस्स भावओ णो तुल्ले, एवं उवसमिएवि, खइए० खओ-
 वसमिए० पारिणामिए० सण्णिवाइए भावे सण्णिवाइयस्स भावस्स, भावओ तुल्ले,
 सण्णिवाइए भावे सण्णिवाइयभाववइरित्तस्स भावस्स भावओ णो तुल्ले, से तेण-
 ट्ठेणं गोयमा ! एवं वुच्चइ भावतुल्लए २। से केणट्ठेणं भंते ! एवं वुच्चइ
 संठाणतुल्लए २ ? गोयमा ! परिमंडले संठाणे परिमंडलस्स संठाणस्स संठाणओ
 तुल्ले, परिमंडलसंठाणे परिमंडलसंठाणवइरित्तस्स संठाणस्स संठाणओ णो तुल्ले,
 एवं वट्टे तंसे चउरसे आयए, समचउरंसंठाणे समचउरंसस्स संठाणस्स संठा-
 णओ तुल्ले, समचउरंसंठाणे समचउरंसंठाणवइरित्तस्स संठाणस्स संठाणओ
 णो तुल्ले, एवं परिमंडले, एवं जाव हुंडे, से तेणट्ठेणं जाव संठाणतुल्लए २
 ॥ ५२२ ॥ भत्तपच्चक्खायए णं भंते ! अणगारे मुच्छिए जाव अज्झोववण्णे
 आहारमाहारेइ अहे णं वीससाए कालं करेइ तओ पच्छा अमुच्छिए अगिद्धे
 जाव अणज्झोववण्णे आहारमाहारेइ ? हुंता गोयमा ! भत्तपच्चक्खायए णं
 अणगारे तं चेव, से केणट्ठेणं भंते ! एवं वुच्चइ भत्तपच्चक्खायए णं तं चेव,
 गोयमा ! भत्तपच्चक्खायए णं अणगारे मुच्छिए जाव अज्झोववण्णे आहारे
 भवइ, अहे णं वीससाए कालं करेइ तओ पच्छा अमुच्छिए जाव आहारे भवइ,
 से तेणट्ठेणं गोयमा ! जाव आहारमाहारेइ ॥ ५२३ ॥ अत्थि णं भंते ! लव-
 सत्तमा देवा २ ? हुंता अत्थि, से केणट्ठेणं भंते ! एवं वुच्चइ लवसत्तमा
 देवा २ ? गोयमा ! से जहाणामए—केइ पुरिसे तरुणे जाव णिउणसिप्पोवमाए

सालीण वा वीहीण वा गोधूमाण वा जवाण वा जवजवाण वा पक्काणं परिघाताणं हरियाणं हरियकडाणं तिवखेणं णवपञ्जणएणं असिअएणं पडिसा-हरिया २ पडिसंखिविया २ जाव इणामेव २ त्तिकट्टु सत्तलवए लुएज्जा, जइ णं गोयमा ! तेसि देवाणं एवइयं कालं आउए पहुप्पए तो णं ते देवा तेणं चेव भवग्गहणेणं सिज्जंता जाव अंतं करेता, से तेणट्ठेणं जाव लवसत्तमा देवा लवसत्तमा देवा ॥ ५२४ ॥ अत्थि णं भंते ! अणुत्तरोववाइया देवा २ ? हुंता अत्थि, से केणट्ठेणं भंते ! एवं वुच्चइ अणुत्तरोववाइया देवा २ ? गोयमा ! अणुत्तरोववाइयाणं देवाणं अणुत्तरा सद्दा अणुत्तरा रूवा जाव अणुत्तरा फासा, से तेणट्ठेणं गोयमा ! एवं वुच्चइ जाव अणुत्तरोववाइया देवा २ । अणुत्तरोववाइया णं भंते ! देवा केवइएणं कम्मावसेसेणं अणुत्तरोववाइय-देवत्ताए उववण्णा ? गोयमा ! जावइयं छट्ठभत्तिए ससंणे णिग्गंथे कम्मं णिज्जरेइ एवइएणं कम्मावसेसेणं अणुत्तरोववाइय देवा देवत्ताए उववण्णा । सेवं भंते ! सेवं भंते ! त्ति ॥ ५२५ ॥

चोद्दसमं सयं अट्ठमो उद्देशो

इमीसे णं भंते ! रयणप्पभाए पुढवीए सक्करप्पभाए य पुढवीए केवइयं अबाहाए अंतरे पणत्ते ? गोयमा ! असंखेज्जाइं जोयणसहस्साइं अबाहाए अंतरे पणत्ते, सक्करप्पभाए णं भंते ! पुढवीए वालुयप्पभाए य पुढवीए केवइयं ? एवं चेव, एवं जाव तमाए अहेसत्तमाए य । अहेसत्तमाए णं भंते ! पुढवीए अलोगस्स य केवइयं अबाहाए अंतरे पणत्ते ? गोयमा ! असंखेज्जाइं जोयणसहस्साइं अबाहाए अंतरे पणत्ते । इमीसे णं भंते ! रयणप्पभाए पुढवीए जोइसियस्स य केवइयं पुच्छा, गोयमा ! सत्तणउए जोयणसए अबाहाए अंतरे पणत्ते, जोइसियस्स णं भंते सोहम्मसीसाणाण य कप्पाणं केवइयं पुच्छा ? गोयमा ! असंखेज्जाइं जोयण जाव अंतरे पणत्ते, सोहम्मसीसाणाणं भंते ! सणकुमारमाहिदाण य केवइयं ? एवं चेव, सणकुमारमाहिदाणं भंते ! बंभलोगस्स कप्पस्स य केवइयं ? एवं चेव, बंभलोगस्स णं भंते ! लंतगस्स य कप्पस्स केवइयं ? एवं चेव, लंतगस्स णं भंते ! महासुवकस्स य कप्पस्स केवइयं ? एवं चेव, एवं महासुवकस्स य कप्पस्स सहस्सारस्स य, एवं सहस्सारस्स आणयपाणयकप्पाणं, एवं आणयपाणयाणं य कप्पाणं आरणच्चुयाण य कप्पाणं, एवं आरणच्चुयाणं गोविज्जविमाणण

य, एवं नेवेऽजविमाणानं अणुत्तरविमाणानं भंते !
 ईंसिपन्भारीए य पुढवीए केवइयं० पुच्छा, गोयमा ! दुवालसजोयणे अबाहाए
 अंतरे पणत्ते । ईंसिपन्भारीए णं भंते ! पुढवीए अलोगस्स य केवइए अबा-
 हाए० पुच्छा, गोयमा ! देसूणं जोयणं अबाहाए अंतरे पणत्ते ॥ ५२६ ॥ एस
 णं भंते ! सालरुक्खे उण्हाभिहए तण्हाभिहए दवगिज्जालाभिहए कालमासे
 कालं किच्चा कंहि गच्छिहिइ कंहि उववज्जिहिइ ? गोयमा ! इहेव रायगिहे
 णयरे सालरुक्खत्ताए पच्चायाहिइ, से णं तत्थ अच्चियवंदियपूइयसक्कारिय-
 सम्माणिए दिव्वे सच्चे सच्चोवाए सण्णिहियपाडिहेरे लाउल्लोइयमहिए यावि
 भविस्सइ, से णं भंते ! तओहिंतो अणंतरं उव्वट्टित्ता कंहि गमिहिइ कंहि उव-
 वज्जिहिइ ? गोयमा ! महाविदेहे वासे सिज्जिहिइ जाव अंतं काहिइ । एस
 णं भंते ! साललट्टिया उण्हाभिहया तण्हाभिहया दवगिज्जालाभिहया कालमासे
 कालं किच्चा जाव कंहि उववज्जिहिइ ? गोयमा ! इहेव जंबुद्वीवे २ भारहे
 वासे विज्जगिरियायमूले महेसरिए णयरीए सामलिरुक्खत्ताए पच्चायाहिइ, सा
 णं तत्थ अच्चियवंदियपूइय जाव लाउल्लोइयमहिया यावि भविस्सइ । से णं
 भंते ! तओहिंतो अणंतरं उव्वट्टित्ता सेसं जहा सालरुक्खस्स जाव अंतं काहिइ ।
 एस णं भंते ! उंबरलट्टिया उण्हाभिहया ३ कालमासे कालं किच्चा जाव कंहि
 उववज्जिहिइ ? गोयमा ! इहेव जंबुद्वीवे २ भारहे वासे पाडलिपुत्ते णयरे
 पाडलिरुक्खत्ताए पच्चायाहिइ, से णं तत्थ अच्चियवंदिय जाव भविस्सइ, से णं
 भंते ! तओहिंतो अणंतरं उव्वट्टित्ता सेसं तं चेव जाव अंतं काहिइ ॥ ५२७ ॥ तेणं
 कालेणं तेणं समएणं अम्मइस्स परिव्वायगस्स सत्त अंतेवासीसया गिम्हकालसम-
 यंसि एवं जहा उववाइए जाव आराहया ॥ ५२८ ॥ बहुजणे णं भंते ! अणमणस्स
 एवमाइक्खइ ४ एवं सल्लु अम्मडे परिव्वायए कपिल्लपुरे णयरे घरसए एवं
 जहा उववाइए अम्मइस्स वसव्वया जाव दवप्पइणो अंतं काहिइ ॥ ५२९ ॥
 अत्थि णं भंते ! अक्खाबाहा देवा अक्खाबाहा देवा ? हंता अत्थि । से केणट्ठेणं
 भंते ! एवं बुच्चइ अक्खाबाहा देवा २ ? गोयमा ! पभू णं एगमेगे अक्खाबाहे
 देवे एगमेगस्स पुरिसस्स एगमेगंसि अच्छिपत्तंसि दिव्वं देविंइ दिव्वं देवज्जुइं
 दिव्वं देवाणुमागं दिव्वं बत्तीसइविहं णट्टविहि उववंसेत्तए, णो चेव णं तस्स
 पुरिसस्स किचि आवाहं वा वावाहं वा उप्पाएइ छविच्छेवं वा करेइ, एमुहुमं

च णं उवदसेज्जा, से तेणट्ठेणं जाव अक्खाबाहा देवा २ ॥ ५३० ॥ पमू णं भंते ! सक्के देविंदे देवराया पुरिसस्स सीसं सपाणिणा असिणा छिदित्ता कम्म-डलुंमि पक्खिवित्तए ? हुंता पमू, से कहमिदाणि पकरेइ ? गोयमा ! छिदिया छिदिया च णं वा पक्खिवेज्जा, भिदिया भिदिया च णं वा पक्खिवेज्जा, कोट्टया कोट्टिया च णं वा पक्खिवेज्जा, चुण्णिया-चुण्णिया च णं वा पक्खिवेज्जा, तओ पच्छा छिप्पामेव पडिसंघाएज्जा, णो चेव णं तस्स पुरिसस्स किंचिवि आवाहं वा वाबाहं वा उप्पाएज्जा, छविच्छेदं पुण करेइ, एसुहुमं च णं पक्खिवेज्जा ॥ ५३१ ॥ अत्थि णं भंते ! जंभया देवा जंभया देवा ? हुंता अत्थि, से केणट्ठेणं भंते ! एवं वुच्चइ जंभया देवा जंभया देवा ? गोयमा ! जंभया णं देवा णिच्चं पमइयपवकीलिया कंदपरइमोहणसीला जे णं ते देवे कुद्धे पासेज्जा से णं पुरिसे महंतं अयसं पाउणिज्जा, जे णं ते देवे तुट्ठे पासेज्जा से णं महंतं असं पाउ-णेज्जा, से तेणट्ठेणं गोयमा ! एवं वुच्चइ-जंभया देवा २ ! कहविहा णं भंते ! जंभया देवा पणत्ता ? गोयमा ! दसविहा पणत्ता, तंजहा-अणजंभया पाण-जंभया वत्थजंभया लेणजंभया सयणजंभया पुप्फजंभया फलजंभया पुप्फ-फल जंभया विज्जाजंभया अघियोत्तजंभया, जंभया णं भंते ! देवा कहिं वसहिं उवेत्ति ? गोयमा ! सव्वेसु चेव दीहवेयड्ढेसु चित्तविचित्तजमगपव्वएसु कंचणपव्वएसु य एत्थि णं जंभया देवा वसहिं उवेत्ति । जंभया णं भंते ! देवाणं केवइयं कालं ठिई पणत्ता ? गोयमा ! एगं पलिओवमं ठिई पणत्ता । सेवं भंते ! २ ति जाव विहरइ ॥ ५३२ ॥

चोद्दसमं सयं णवमो उद्देसो

अणगारे णं भंते ! भावियप्पा अप्पणो कम्मलेस्सं ण जाणइ ण पासइ तं पुण जीवं सख्खिं सकम्मलेस्सं जाणइ पासइ ? हुंता गोयमा ! अणगारे णं भावियप्पा अप्पणो जाव पासइ । अत्थि णं भंते ! सख्खीं सकम्मलेस्सा पोग्गला ओभासंति ४ ? हुंता अत्थि । कयरे णं भंते ! सख्खीं सकम्मलेस्सा पोग्गला ओभासंति जाव पभासेत्ति ? गोयमा ! जाओ इमाओ चंदिमसूरियाणं देवाणं विमाणेहिंतो लेस्साओ बहिया अभिणिसड्डाओ ताओ ओभासेत्ति जाव पभासेत्ति एवं एएणं गोयमा ! ते सख्खीं सकम्मलेस्सा पोग्गला ओभासेत्ति ४ ॥ ५३३ ॥ णेरइयाणं भंते ! किं अत्ता पोग्गला अणत्ता पोग्गला ? गोयमा ! णो अत्ता पोग्गला अणत्ता पोग्गला, असुरकुमाराणं भंते ! किं अत्ता पोग्गला

अणत्ता पोग्गला ? गोयमा ! अत्ता पोग्गला णो अणत्ता पोग्गला, एवं जाव
 यणियकुमारारणं । पुढविकाइयाणं पुच्छा, गोयमा ! अत्तावि पोग्गला अणत्तावि
 पोग्गला, एवं जाव मणुस्साणं, वाणमंतरजोइसियवेमाणियाणं जहा असुरकुमा-
 राणं । णेरइयाणं भंते ! किं इट्ठा पोग्गत्ता अणिट्ठा पोग्गला ? गोयमा ! णो
 इट्ठा पोग्गला अणिट्ठा पोग्गला, जहा अत्ता भणिया एवं इट्ठावि कंतावि पियावि
 मणुष्णावि भाणियत्ता एवं पंच दंडगा । देवे णं भंते ! महिड्डिए जाव महे-
 सक्खे रूवसहस्सं विउव्विता पभू भासासहस्सं मासित्तए ? हंता पभू । सा णं
 भंते ! किं एगा भासा भासासहस्सं ? गोयमा ! एगा णं सा भासा णो खलु
 तं भासासहस्सं ॥ ५३४ ॥ तेणं कालेणं तेणं समएणं भगवं गोयमे अचिरुगयं
 बालसूरियं जासुमणाकुसुमपुंजप्पगासं लोहितगं पासइ पासित्ता जायसइडे जाव
 समुप्पणकोउहुल्ले जेणेव समणे भगवं महावीरे तेणेव उवागच्छइ २ ता जाव
 णमंसित्ता एवं वयासी-किमिदं भंते ! सूरिए किमिदं भंते ! सूरियस्स अट्ठे ?
 गोयमा ! सुभे सूरिए, सुभे सूरियस्स अट्ठे । किमिदं भंते ! सूरिए किमिदं
 भंते ! सूरियस्स पभा ? एवं चेव छाया, एवं लेस्ता ॥ ५३५ ॥ जे इमे भंते !
 अज्जत्ताए समणा णिग्गंथा विहरति एए णं कस्स तेयलेस्सं वीईवयति ?
 गोयमा ! मासपरियाए समणे णिग्गंथे वाणमंतराणं देवाणं तेयलेस्सं
 वीईवयइ, बुमासपरियाए समणे णिग्गंथे असुरिदवज्जियाणं भवणवासीणं
 देवाणं तेयलेस्सं वीईवयइ, एवं एएणं अभित्तावेणं तिमासपरियाए समणे
 णिग्गंथे असुरकुमाणं देवाणं तेयलेस्सं वीइवयइ, चउम्मासपरियाए समणे
 णिग्गंथे गहणणक्खत्तताराख्खाणं जोइसियाणं देवाणं तेयलेस्सं वीईवयइ,
 पंचमासपरियाए य समणे णिग्गंथे चंदिमसूरियाणं जोइसिदाणं जोइसराईणं
 तेयलेस्सं वीईवयइ, छम्मासपरियाए समणे णिग्गंथे सोहम्मीसाणाणं देवाणं
 सत्तमासपरियाए० सणकुमारमाहिदाणं देवाणं० अट्टमासपरियाए समणे
 णिग्गंथे बंभलोगलंतगाणं देवाणं तेयलेस्सं वीइवयइ, णवमासपरियाए समणे
 णिग्गंथे महासुक्कसहस्साराणं देवाणं तेयलेस्सं वीइवयइ, दसमासपरियाए
 समणे णिग्गंथे आणयपाणयआरणच्चुयाणं देवाणं० एक्कारसमासपरियाए
 समणे णिग्गंथे नेवेज्जगाणं देवाणं० बारसमासपरियाए समणे णिग्गंथे अनु-
 त्तरोववाइयाणं देवाणं तेयलेस्सं वीइवयइ, तेण परं सुक्के सुक्काभिजाए

भवित्ता तसो पच्छा सिज्जइ जाव अंतं करेइ । सेवं भंते ! सेवं भंते ! त्ति जाव विहरइ ॥ ५३६ ॥

चोद्दसमं सयं दसमो उद्देशो

केवली णं भंते ! छउमत्थं जाणइ पासइ ? हंता जाणइ पासइ, जहा णं भंते ! केवली छउमत्थं जाणइ पासइ तथा णं सिद्धेवि छउमत्थं जाणइ पासइ ? हंता जाणइ पासइ । केवली णं भंते ! आहोहिंयं जाणइ पासइ ? एवं चेव, एवं परमाहोहिंयं, एवं केवलं एवं सिद्धं जाव जहा णं भंते ! केवली सिद्धं जाणइ पासइ तथा णं सिद्धेवि सिद्धं जाणइ पासइ ? हंता जाणइ पासइ । केवली णं भंते ! भासेज्ज वा वागरेज्ज वा ? हंता भासेज्ज वा वागरेज्ज वा, जहा णं भंते ! केवली भासेज्ज वा वागरेज्ज वा तथा णं सिद्धेवि भासेज्ज वा वागरेज्ज वा ? णो इणट्ठे समट्ठे । से केणट्ठेणं भंते ! एवं वुच्चइ—जहा णं केवली भासेज्ज वा वागरेज्ज वा णो तथा णं सिद्धे भासेज्ज वा वागरेज्ज वा ? गोयमा ! केवली णं सउट्टाणे सकम्मे सबले सवीरिए सपुरिसक्कारपरवकमे, सिद्धे णं अणुट्टाणे जाव अपुरिसक्कारपरवकमे, से तेणट्ठेणं जाव णो वागरेज्ज वा । केवली णं भंते ! उम्मिसेज्ज वा णिम्मिसेज्ज वा ? हंता गोयमा ! उम्मिसेज्ज वा णिम्मिसेज्ज वा एवं चेव, एवं आउट्टेज्ज वा पसारेज्ज वा, एवं ठाणं वा सेज्जं वा णिसीहिंयं वा चेएज्जा, केवली णं भंते ! इमं रयणप्पभं पुढावि रयणप्पमापुढवीति जाणइ पासइ ? हंता गोयमा ! जाणइ पासइ । जहा णं भंते ! केवली इमं रयणप्पभं पुढावि रयणप्पमापुढवीति जाणइ पासइ तथा णं सिद्धेवि इमं रयणप्पभं पुढावि रयणप्पमापुढवीति जाणइ पासइ ? हंता जाणइ पासइ । केवली णं भंते ! सक्करप्पभं पुढावि सक्करप्पमापुढवीति जाणइ पासइ ? एवं चेव, एवं जाव अहेसत्तमं । केवली णं भंते ! सोहम्मं कप्पं सोहम्मकपेति जाणइ पासइ ? हंता जाणइ पासइ, एवं चेव एवं ईसाणं एवं जाव अक्कुयं, केवली णं भंते ! गेवेज्जविमाणं गेवेज्जविमाणेति जाणइ पासइ ? एवं चेव, एवं अणुत्तरविमाणेति । केवली णं भंते ! ईसिपवभारं पुढावि ईसिपवभारपुढवीति जाणइ पासइ ? एवं चेव । केवली णं भंते ! परमाणुपोग्गलं परमाणुपोग्गलेत्ति जाणइ पासइ ? एवं चेव, एवं दुपएसियं खंधं एवं जाव जहा णं

भंते ! केवली अणंतपएसियं खंधं अणंतपएसिए खंधेत्ति जाणइ-पासइ तथा णं
सिद्धेवि अणंतपएसियं खंधं जाव पासइ ? हुंता जाणइ-पासइ । सेवं भंते !
- सेवं भंते ! त्ति ॥ ५३७ ॥

॥ चोद्दसमं सयं समत्तं ॥

पण्णरसमं सयं

णमो सुयदेवयाए भगवईए । तेणं कालेणं तेणं समएणं सावत्थी णामं
णयरी होत्था वण्णओ, तीसे णं सावत्थीए णयरीए बहिया उत्तरपुरत्थिमे
विसीभाए तत्थ णं कोट्टए णामं चेइए होत्था वण्णओ, तत्थ णं सावत्थीए
णयरीए हालाहला णामं कुंभकारी आजीविओवासिया परिवसइ, अड्डा जाव
अपरिमूया आजीवियसमयंसि लद्धट्टा गहियट्टा पुच्छियट्टा विणिच्छियट्टा अट्टि-
मिजवेम्माणुरागरत्ता अयमाउसो ! आजीवियसमए अट्ठे अयं परमट्ठे सेसे
अणट्ठेत्ति आजीवियसमएणं अप्पाणं भावेभाणी विहरइ । तेणं कालेणं तेणं समएणं
गोसाले मंखलिपुत्ते चउब्बीसवासपरियाए हालाहलाए कुंभकारीए कुंभकारा-
वणंसि आजीवियसंघसंपरिवुद्धे आजीवियसमएणं अप्पाणं भावेभाणे विहरइ । तए
णं तस्स गोसालत्तस्स मंखलिपुत्तस्स अण्णया कयाइ इमे छ दिसाचरा अंतियं पाउब्भ-
धित्था, तंजहा—साणे कलदे कणियारे अच्छिदे अगिगवेसायणे अज्जुणे गोमायुपुत्ते ।
तए णं ते छ दिसाचरी अट्टविहं पुक्खगयं मग्गवसमं सर्णाहिं २ मइदंसणेहिं णिज्जुहंति
स० २ ता गोसालं मंखलिपुत्तं उवट्टांइसु, तए णं से गोसाले मंखलिपुत्ते तेणं
अट्ठंगस्स महाणिमित्तस्स केणइ उल्लोयमेत्तेणं सव्वेसि पाणाणं सव्वेसि भूयाणं
सव्वेसि जीवाणं सव्वेसि सत्ताणं इमाइं छ अणइक्कमणिज्जाइं वागरणाइं
वागरेइ, तं०—त्ताभं अलाभं सुहं दुक्खं जीवियं मरणं तथा । तए णं से गोसाले
मंखलिपुत्ते तेणं अट्ठंगस्स महाणिमित्तस्स केणइ उल्लोयमेत्तेणंसावत्थीए
णयरीए अजिणे जिणप्पलावी अणरहा अरहप्पलावी अकेवली केवलप्पलावी
असव्वण्णु सव्वण्णुप्पलावी अजिणे जिणसइं पगासेमाणे विहरइ ॥ ५३८ ॥
तए णं सावत्थीए णयरीए सिघाडग जाव पहेसु बहुजणो अण्णमण्णस्स एव-
माइवखइ जाव एवं परूवेइ—एधं खलु देवाणुप्पिया ! गोसाले मंखलिपुत्ते
जिणे जिणप्पलावी जाव पगासेमाणे विहरइ, से कहमेयं मण्णे एवं ? तेणं

कालेणं तेणं समएणं सामी समोसडे जाव परिसा पडिगया, तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूई णामं अणगारे गोयमगोत्तेणं जाव छट्छट्ठेणं एवं जहा विइयसए णियंठुइसए जाव अडमाणे बहुजणसइं णिसामेइ, बहुजणो अण्णमण्णस्स एवमाइक्खइ ४- एवं खलु देवाणुप्पिया ! गोसाले मंखलिपुत्ते जिणे जिणप्पलावी जाव पगा-सेमाणे विहरइ, से कहमेयं मण्णे एवं ? तए णं भगवं गोयमे बहुजणस्स अंतियं एयमट्ठं सोच्चा णिसम्म जाव जायसइहे जाव भत्तपणं पडिदंसेइ जाव पज्जु-वासमाणे एवं वयासी-एवं खलु अहं भंते ! छट्ठं तं चेव जाव जिणसइं पगा-सेमाणे विहरइ, से कहमेयं भंते ! एवं ? तं इच्छामि णं भंते ! गोसालस्स मंखलिपुत्तस्स उट्ठानपरियाणियं परिकहियं । गोयमाइ समणे भगवं महावीरे भगवं गोयमं एवं वयासी-जण्णं गोयमा ! से बहुजणे अण्णमण्णस्स एवमाइ-क्खइ ४ एवं खलु गोसाले मंखलिपुत्ते जिणे जिणप्पलावी जाव पगासेमाणे विहरइ तण्णं मिच्छा । अहं पुण गोयमा ! एवमाइक्खामि जाव पक्खेमि-एवं खलु एयस्स गोसालस्स मंखलिपुत्तस्स मंखलिणामं मंखे पिया होत्था, तस्स णं मंखलिस्स मंखस्स भद्दा णामं भारिया होत्था सुकुमाल जाव पडिक्खा, तए णं सा भद्दा भारिया अण्णया कयाइ गुट्ठिणी याचि होत्था, तेणं कालेणं तेणं समएणं सरवणे णामं सण्णिवेसे होत्था रिद्धत्थिमियं जाव सण्णमप्यगासे पासार्इ ४, तत्थ णं सरवणे सण्णिवेसे गोबहुले णामं माहणे परिवसइ, अइहे जाव अपरिभूए रिउध्वेय जाव सुपरिणिट्ठिए याचि होत्था, तस्स णं गोबहुलस्स माहणस्स गोसाला याचि होत्था, तए णं से मंखलीमंखे अण्णया कयाइ भद्दाए भारियाए गुट्ठिणीए सट्ठि चित्तफलगहत्थगए मंखत्तणेणं अप्पाणं भावे-माणे पुट्ठानुपुट्ठि चरमाणे गामाणुगामं दूइज्जमाणे जेणेव सरवणे सण्णिवेसे जेणेव गोबहुलस्स माहणस्स गोसाला तेणेव उवागच्छइ २ ता गोबहुलस्स माहणस्स गोसालाए एगदेसंसि भंडणिवखेवं करेइ भंड० २ ता सरवणे सण्णिवेसे उच्चणीयमज्झिमाइं कुलाइं घरसमुदाणस्स भिक्खायरियाए अडमाणे वस-हीए सव्वओ समंता मग्गणगवेसणं करेइ, वसहीए सव्वओ समंता मग्गणगवे-सणं करेमाणे अण्णत्थ वसहिं अलभमाणे तस्सेव गोबहुलस्स माहणस्स गोसालाए एगदेसंसि वासावासं उवागए, तए णं सा भद्दा भारिया

णवर्हं मासाणं बहुपडिपुण्णाणं अद्धट्टमाणं य राईं दियाणं वीइक्कंताणं
सुकुमालं जाव पडिक्कं दारणं पयाया । तए णं तस्स दारगस्स
अम्मापियरो एक्कारसमे दिवसे वीइक्कंते जाव बारसमे दिवसे अयमेधा-
रुवं गोष्णं गुणणिप्फणं णामधेज्जं करेति-जम्हा णं अम्हं इमे दारए गोव-
हुलस्स माहणस्स गोसालाए जाए, तं हीउ णं अम्हं इमस्स दारगस्स णामधेज्जं
गोसाले गोस लेत्ति, तए णं तस्स दारगस्स अम्मापियरो णामधेज्जं करेति गोसालेति ।
तए णं से गोसाले दारए उम्मुक्कबालभावे विष्णायपरिणयमेत्ते जोव्वणगमणु-
पत्ते सयमेव पडिक्कं चित्तफलं करेइ २ ता चित्तफलगहत्थगए मंखत्तणेणं
अप्पाणं भावेमाणे विहरइ ॥ ५३६ ॥ तेणं कालेणं तेणं समएणं अहं गोयमा !
तीसं वासाइं अगारवासमज्जे वसित्ता अम्मापिईहिं देवत्तगएहिं एवं जहा भाव-
णाए जाव एगं देवदूसमादाय मुंडे भवित्ता अगाराओ अणगारियं पव्वइत्तए ।
तए णं अहं गोयमा ! पढमं वासं अद्धमासंअद्धमासेणं खममाणे अट्ठियगामं
णिस्साए पढमं अंतरावासं वासावासं उवागए, दोच्चणं वासं मासंमासेणं खम-
माणे पुव्वानुपुंखि चरमाणे गामाणुगामं दूइज्जमाणे जेणेव रायगिहे णयरे
जेणेव णालिदा बाहिरिया जेणेव तंतुवायसाला तेणेव उवागच्छामि ते० २ ता
अहापडिक्कं उगहं ओगिण्हामि अहा० २ ता तंतुवायसालाए एगदेसंसि वासा-
वासं उवागए । तए णं अहं गोयमा ! पढमं मासक्खमणं उवसंपज्जित्ताणं विह-
रामि । तए णं से गोसाले मंखलिपुत्ते चित्तफलगहत्थगए मंखत्तणेणं अप्पाणं
भावेमाणे पुव्वानुपुंखि चरमाणे जाव दूइज्जमाणे जेणेव रायगिहे णयरे जेणेव
णालिदा बाहिरिया जेणेव तंतुवायसाला तेणेव उवागच्छइ ते० २ ता तंतुवाय-
सालाए एगदेसंसि भंडणिक्खेवं करेइ मं० २ ता रायगिहे णयरे उच्चणीय जाव
अणत्थ कत्थवि वसहिं अलममाणे तीसे य तंतुवायसालाए एगदेसंसि वासा-
वासं उवागए जत्थेय णं अहं गोयमा ! तए णं अहं गोयमा ! पढममासक्ख-
मणंपारणंसि तंतुवायसालाओ पडिणिक्खमामि तंतु० २ ता णालिदाबाहिरियं
मज्झमज्जेणं जेणेव रायगिहे णयरे तेणेव उवागच्छामि २ ता रायगिहे णयरे
उच्चणीय जाव अडमाणे विजयस्स गाहावइस्स गिहं अणुप्पविट्ठे, तए णं से
विजए गाहावईं ममं एज्जमाणं पासइ २ ता हट्टुट्टु० खिप्पामेव आसणाओ
अभुट्ठेइ खि० २ ता पायपीढाओ पच्चोरुहइ २ ता पाउयाओ मुओयइ पा० २ ता

एगसाडियं उत्तरासंगं करेइ २ ता अंजलिमउलियहृत्ये भमं सत्तट्टपयाइं
अणुगच्छइ २ ता ममं तिवखुत्तो आयाहिणं पयाहिणं करेइ २ ता ममं वंदइ
णमंसइ वं० २ ता ममं विउलेणं असणपाणखाइमसाइमेणं पडिलाभिस्सामिति-
कट्टु तुट्ठे पडिलाभेमाणेवि तुट्ठे पडिलाभिए वि तुट्ठे, तए णं तस्स
विजयस्स गाहावइस्स तेणं दव्वसुद्धेणं दायगसुद्धेणं पडिगाहगसुद्धेणं
तिविहेणं तिकरणसुद्धेणं दाणेणं मए पडिलाभिए समाणे देवाउए णिवट्ठे
संसारे परिक्कीए गिहंसि य से इमाइं पंच दिव्वाइं पाउळ्भूयाइं, तंजहा—वगु-
धारा वुट्ठा १ दसद्धवण्णे कुसुमे णिवाइए २ चेलुवख्वेवे कए ३ आहयाओ देव-
दुंदुभीओ ४ अंतरावि य णं आगासे अहो दाणे २ ति घुट्ठे ५ । तए णं
रायगिहे णयरे सिघाडग जाव पहेसु बहुजणो अण्णमण्णस्स एवमाइदखइ जाव
एवं परूवेइ—धण्णे णं देवाणुप्पिया ! विजए गाहावई, कयत्थे णं देवाणुप्पिया !
विजए गाहावई, कयपुण्णे णं देवाणुप्पिया ! विजए गाहावई, कयलवखणं णं
देवाणुप्पिया ! विजए गाहावई, कया णं लोया देवाणुप्पिया ! विजयस्स
गाहावइस्स, सुलद्धे णं देवाणुप्पिया ! माणुस्सए जम्मजीवियफले विजयस्स
गाहावइस्स जस्स णं गिहंसि तहारूवे साहु साहुरूवे पडिलाभिए समाणे इमाइं
पंच दिव्वाइं पाउळ्भूयाइं, तंजहा—वगुधारा वुट्ठा जाव अहो दाणे २ घुट्ठे, सं
धण्णेणं० कयपुण्णे० कयलवखणे० कया णं लोया० सुलद्धे माणुस्सए जम्म-
जीवियफले विजयस्स गाहावइस्स विजय० २ । तए णं से गोसाले मंडलितुत्ते
बहुजणस्स अंतिए एयमट्ठं सोच्चा णिसम्म समुप्पणसंसए समुप्पणकोउहल्ले
जेणेव विजयस्स गाहावइस्स गिहे तेणेव उवागच्छइ २ ता पासइ विजयस्स
गाहावइस्स गिहंसि वसुहारं वुट्ठं दसद्धवण्णं कुसुमं णिवडियं ममं च णं विज-
यस्स गाहावइस्स गिहाओ पडिणिवल्लममाणं पासइ २ ता हट्टुट्ठे० जेणेव ममं
अंतिए तेणेव उवागच्छइ २ ता ममं तिवखुत्तो आयाहिणं पयाहिणं करेइ २ ता
ममं वंदइ णमंसइ वं० २ ता ममं एवं वयासी—तुब्भे णं भते ! ममं धम्मा-
यरिया अहण्णं तुब्भं धम्मतेवासी, तए णं अहं गोयमा ! गोसालस्स मंडलितुत्त-
स्स एयमट्ठं णो आढामि णो परिजाणामि तुत्तिणीए संचिट्ठामि । तए णं अहं
गोयमा ! रायगिहाओ णयराओ पडिणिवल्लमामि २ ता-णासंदं बाहिरियं
मज्झंसज्जेणं जेणेव तंतुवायसाला तेणेव उवागच्छामि २ ता दोच्चं मासख-
मणं उवसंपज्जित्ताणं विहरामि, तए णं अहं गोयमा ! दोच्चं मासखमण-

पारणगंसि तंतुवायसालाओ पडिणिक्खमामि तं० २ ता णालंदं बाहिरियं मज्झं-
मज्जेणं जेणेव रायगिहे णयरे जाव अडमाणे आणंदंस्स गाहावइस्स गिहं अणु-
प्पविट्ठे, तए णं से आणंदे गाहावई ममं एज्जमाणं पासइ २ ता एवं जहेव
विजयस्स, णवरं ममं विउलाए खज्जगविहीए पडिलाभेस्सामीत्ति तुट्ठे सेसं
सं चेव जाव तच्चं मासक्खमणं उवसंपज्जित्ताणं विहरामि । तए णं अहं गोयमा !
तच्चं मासक्खमणपारणगंसि तंतुवायसालाओ पडिणिक्खमामि तं० २ ता
तहेव जाव अडमाणे सुणंदस्स गाहावइस्स गिहं अणुप्पविट्ठे, तए णं से सुणंदे
गाहावई एवं जहेव विजयगाहावई, णवरं ममं सत्थकामगुणिएणं भोयणेणं
पडिलाभेइ सेसं तं चेव जाव चउत्थं मासक्खमणं उवसंपज्जित्ताणं विहरामि ।
तीसे णं णालंदाए बाहिरियाए अदूरसामंते एत्थ णं कोल्लाए णामं सण्णिवेसे
होत्था सण्णिवेसं० वण्णओ, तत्थ णं कोल्लाए सण्णिवेसे बहुले णामं माहणे
परिवसइ, अइठे जाव अपरिभूए रिउत्थेव जाव सुपरिणिट्ठिए यावि होत्था,
तए णं से बहुले माहणे कत्तियचाउम्मासियपाडिवगंसि विउलेणं महूघयसंजुत्तेणं
परमण्णेणं माहणे आयामेत्था, तए णं अहं गोयमा ! चउत्थमासक्खमणपारण-
गंसि तंतुवायसालाओ पडिणिक्खमामि २ ता णालंदं बाहिरियं मज्झंमज्जेणं
णिग्गच्छामि २ ता जेणेव कोल्लाए सण्णिवेसे तेणेव उवागच्छामि २ ता
कोल्लाए सण्णिवेसे उच्चणीय जाव अडमाणे बहुलस्स माहणस्स गिहं
अणुप्पविट्ठे, तए णं से बहुले माहणे ममं एज्जमाणं तहेव जाव ममं विउलेणं
महूघयसंजुत्तेणं परमण्णेणं पडिलाभेस्सामीत्ति तुट्ठे सेसं जहा विजयस्स जाव
बहु० २ । तए णं से गोसाले भंखलिपुत्ते ममं तंतुवायसालाए अपासमाणे रायगिहे
णयरे सन्निभतरबाहिरियाए ममं सत्थओ समंत्ता मग्गणगवेसणं करेइ, ममं
कत्थवि सुइ वा खुइ वा पक्किंति वा अलममाणे जेणेव तंतुवायसाला तेणेव
उवागच्छइ २ ता साडियाओ य पाडियाओ य कुडियाओ य वाहणाओ
य चित्तफलं च माहणे आयामेइ आयामेत्ता सउत्तरोट्ठं मुंडं कारेइ स० २
त्ता तंतुवायसालाओ पडिणिक्खमइ तं० २ ता णालंदं बाहिरियं मज्झंमज्जेणं
णिग्गच्छइ णिग्गच्छित्ता जेणेव कोल्लागसण्णिवेसे तेणेव उवागच्छइ, तए णं
त्तस्स कोल्लागस्स सण्णिवेसस्स बहिया बहुजणो अण्णमण्णस्स एवमाइक्खइ जाव
परुवेइ-धण्णे णं देवाणुप्पिया ! बहुले माहणे तं चेव जाव जीवियफले बहु-

लस्स माहणस्स ब० २, तए णं तस्स गोसालस्स मंखलिपुत्तस्स बहुजणस्स अंतियं एयमट्ठं सोच्चा णिसम्म अयमेयाख्वे अज्झत्थिए जाव समुत्थज्जित्था-
 जारिसिया णं मम धम्ममायरियस्स धम्मोवएसगस्स समणस्स भगवओ महा-
 रस्स इड्ढी जुई जसे बले वीरिए पुरिसवकारपरक्कमे लद्धे पत्ते अभिसम-
 ण्णागए, णो खलु अत्थि तारिसिया णं अण्णस्स कस्सइ तहारूवस्स समणस्स
 वा माहणस्स वा इड्ढी जुई जाव परक्कमे लद्धे पत्ते अभिसमण्णागए, तं
 णिस्संदिद्धं च णं एत्थ ममं धम्ममायरिए धम्मोवएसए समणे भगवं महावीरे
 भविस्सईत्तिकट्टु कोह्लागसण्णिवेसे सद्धिभत्तरच्चाहिरिए ममं सव्वओ समंता
 मगगणभवेसणं करेइ, ममं सव्वओ जाव करेमाणे कोह्लागसण्णिवेसस्स बहिया
 पणियभूमिए भए सद्धि अभिसमण्णागए, तए णं से गोसाले मंखलिपुत्ते हट्टतुट्ठे
 ममं तिक्खुत्तो आयाहिणं पयाहिणं जाव णमंसित्ता एवं वयासी-तुब्भे णं भंते!
 ममं धम्ममायरिया अहण्णं तुब्भं अंतेवासी, तए णं अहं गोयमा ! गोसालस्स
 मंखलिपुत्तस्स एयमट्ठं पड्डिसुणेमि, तए णं अहं गोयमा ! गोसालेणं मंखलि-
 पुत्तेणं सद्धि पणियभूमिए छव्वासाइं लाभं अलाभं सुहं दुक्खं सवकारम-
 सवकारं पच्चणुब्भसवमाणे अणिच्चजागरियं विहरित्था ॥ ५४० ॥ तए णं अहं
 गोयमा ! अण्णया कयाइ पढमसरदकालसमयंसि अप्पवुट्टिकार्यंसि गोसालेणं
 मंखलिपुत्तेणं सद्धि सिद्धत्थगामाओ णयरओ कुम्मगामं णयरं संपट्टिए विहा-
 राए, तस्स णं सिद्धत्थगामस्स णयरस्स कुम्मगामस्स णयरस्स य अंतरा
 एत्थ णं महं एगे तिलथंभए पत्तिए पुत्तिए हरियगरेरिज्जमाणे सिरीए
 अईव २ उवसोभेमाणे २ चिट्ठइ । तए णं से गोसाले मंखलिपुत्ते तं तिलथंभं
 पासइ २ ता ममं वंदइ णमंसइ वं० २ ता एवं वयासी-एस णं भंते ! तिल-
 थंभए किं णिप्फज्जिस्सइ णो णिप्फज्जिस्सइ, एए य सत्त तिलपुप्फजीवा उदा-
 इत्ता २ काहि गच्छिहिति काहि उववज्जिहिति ? तए णं अहं गोयमा ! गोसालं
 मंखलिपुत्तं एवं वयासी-गोसाला ! एस णं तिलथंभए णिप्फज्जिस्सइ णो ण
 णिप्फज्जिस्सइ, एए य सत्त तिलपुप्फजीवा उदाइत्ता २ एयस्स च्चव तिलथंभगस्स
 एमाए तिलसंगलियाए सत्त तिला पच्चायाइस्संति, तए णं से गोसाले मंखलिपुत्ते
 ममं एवं आइक्खमाणस्स एयमट्ठं णो सद्धहइ णो पत्तिवइ णो रोएइ, एयमट्ठं
 असद्धमाणे अपत्तियमाणे अरोएमाणे ममं पणिहाय अयण्णं निच्छावाइं भवउ-
 त्तिकट्टु ममं अंतियाओ सणियं २ पच्चोसक्कइ २ ता जेणेव से तिलथंभए

तेणेव उवागच्छइ २ ता तं तिलथंभगं सलेट्टुयायं चैव उप्पाडेइ २ ता एगंते एडेइ, तक्खणमेत्तं च णं गोयमा ! दिक्खे अब्भवहूलए पाउब्भूए, तए णं से दिक्खे अब्भवहूलए खिप्पामेव पतणतणाएइ २ ता खिप्पामेव पविज्जयाइ २ ता खिप्पामेव णच्चोदगं णाइमट्टियं पविरलपप्फुसियं रयरेणुविणासणं दिक्खं सलिलोदगं वासं वासइ, जेणं से तिलथंभए आसत्थे वीसत्थए पच्चायाए तत्थेव बद्धमूले तत्थेव पइट्टिए, ते य सत्त तिलगुप्फनीवा उदाइत्ता २ तस्सेव तिल-थंभगस्स एगाए तिलसंगलियाए सत्त तिला पच्चायाया ॥ ५४१ ॥ तए णं अहं गोयमा ! गोसालेणं मंखलिपुत्तेणं सच्चि जेणेव कुम्भगामे णयर तेणेव उवा-गच्छामि, तए णं तस्स कुंभगामस्स णयरस्स बहिया वेसियायणे णामं बालतव-स्सी छट्ठंछट्ठेणं अणिक्खित्तेणं तवोकम्मेणं उइहं बाहाओ पगिज्झिय २ सुरा-भिमूहे आयावणभूमोए आयावेमाणे विहरइ, आइच्चतेथतवियाओ य से उप्प-बीओ सच्चओ समंता अभिणिस्सवति पाणभूयजीवसत्तदयट्टयाए च णं पडियाओ २ तत्थेव २ भुज्जो २ पच्चोहहेइ । तए णं से गोसाले मंखलिपुत्ते वेसियायणं बालतवस्सि पासइ २ ता ममं अंतियाओ सणियं २ पच्चोसक्कइ ममं २ ता जेणेव वेसियायणे बालतवस्सी तेणेव उवागच्छइ २ ता वेसियायणं बालतवस्सि एवं वयासी—किं भवं मुणी मुणिए उदाहु जूयासेज्जायरए ? तए णं से वेसि-यायणे बालतवस्सी गोसालस्स मंखलिपुत्तस्स एयमट्ठं णो आढाइ णो परि-याणइ तुसिणीए सच्चिट्ठइ । तए णं से गोसाले मंखलिपुत्ते वेसियायणं बाल-तवस्सि दोच्चपि तच्चपि एवं वयासी—किं भवं मुणी मुणिए जाव सेज्जायरए ? तए णं से वेसियायणे बालतवस्सी गोसालेणं मंखलिपुत्तेणं दोच्चपि तच्चपि एवं वुत्ते समणे आसुरुत्ते जाव मिसिमिसेमाणे आयावणभूमोओ पच्चोहहेइ आ० २ ता तेयासमुग्घाएणं समोहण्णइ तेयासमुग्घाएणं समोहणित्ता सत्तट्ट-पयाइ पच्चोसक्कइ स० २ ता गोसालस्स मंखलिपुत्तस्स वहाए सरोरगंसि तेयं णिसिरइ । तए णं अहं गोयमा ! गोसालस्स मंखलिपुत्तस्स अणुकंपणट्टयाए वेसियायणस्स बालतवस्सिस्स उमिणतेयपडिसाहरणट्टयाए एत्थ णं अंतरा अहं सीयलियं तेयलेस्सं णिसिरामि, जाए सा ममं सीयलियाए तेय-लेस्साए वेसियायणस्स बालतवस्सिस्स साउसिणा तेयलेस्सा पडिहया । तए णं से वेसियायणे बालतवस्सी ममं सीयलियाए तेयलेस्साए साउसियं तेयलेस्सं

पडिहयं जाणित्ता गोसालस्स मंखलिपुत्तस्स सरीरगस्स किञ्चि आबाहं वा वाबाहं वा छविच्छेदं वा अकीरमाणं पासित्ता साउसिणं तेयलेस्सं पडिसाहरइ साउ० २ ता ममं एवं वयासी-से गयमेयं भगवं ! गयगयमेयं भगवं ! तए णं गोसाले मंखलिपुत्ते ममं एवं वयासी-किण्णं भंते ! एस जूयासिज्जायरए तुव्वे एवं वयासी-से गयमेयं भगवं ! गयगयमेयं भगवं ! तए णं अहं गोयमा ! गोसालं मंखलिपुत्तं एवं वयासी-तुमं णं गोसाला ! वेसियायणं बालतवस्सि पाससि पासित्ता ममं अंतियाओ सणियं २ पच्चोसक्कसि जेणेव वेसियायणे बालतवस्सी तेणेव उवागच्छसि ते० २ ता वेसियायणं बालतवस्सि एवं वयासी-किं भवं मुणी मुणिए उदाहु जूयासेज्जायरए ? तए णं से वेसियायणे बालतवस्सी तव एयमट्ठं णो आढाइ णो परियाणइ तुसिणीए सच्चिट्ठइ, तए णं तुमं गोसाला ! वेसियायणं बालतवस्सि दोच्चंपि तच्चंपि एवं वयासी-किं भवं मुणी मुणिए जाव जूयासेज्जायरए ? तए णं से वेसियायणे बालतवस्सी तुमं दोच्चंपि तच्चंपि एवं वृत्ते समणे आसुरुत्ते जाव पच्चोसक्कइ २ ता तव वहाए सरीरगंसि तेयलेस्सं णिस्सरइ, तए णं अहं गोसाला ! तव अणुक्कपणट्टयाए वेसियायणस्स बालतवस्सिस्स उसिणतेयपडिसाहरणट्टयाए एत्थ णं अंतरा सोयलियं तेयलेस्सं णिसिरामि जाव पडिहयं जाणित्ता तव य सरीरगस्स किञ्चि आबाहं वा वाबाहं वा छविच्छेदं वा अकीरमाणं पासित्ता साउसिणं तेयलेस्सं पडिसाहरइ सा० २ ता ममं एवं वयासी-से गयमेयं भगवं ! गयगयमेयं भगवं ! तए णं से गोसाले मंखलिपुत्ते ममं अंतियाओ एयमट्ठं सोच्चा णिसम्म भीए जाव संजायभए ममं वंदइ णमंसइ ममं वं० २ ता एवं वयासी-कहणं भंते ! संखित्तविउल्लतेयलेस्से भवइ ? तए णं अहं गोयमा ! गोसालं मंखलिपुत्तं एवं वयासी-जे णं गोसाला ! एगाए सणहाए कुम्मास-पिडियाए एमेण य वियडासएणं छट्ठंछट्ठेणं अणिकिखत्तेणे तवोक्कमेणं उड्ढं बाहाओ पगिज्झय २ जाव विहरइ, से णं अंतो छ्हं मासाणं संखित्तविउल-तेयलेस्से भवइ, तए णं से गोसाले मंखलिपुत्ते ममं एयमट्ठं सम्मं विणएणं पडिसुणेइ ॥ ५४२ ॥ तए णं अहं गोयमा ! अणया कयाइ गोसालेर्णं मंखलि-पुत्तेणं सट्ठि कुम्भगामाओ णयराओ सिद्धत्थग्गामं णयरं संपट्टिए विहाराए, जाहे य मो तं देसं हव्वमामया जत्थ णं से तिलथंभए तए णं से गोसाले मंखलि-पुत्ते ममं एवं वयासी-तुज्जे णं भंते ! तया ममं एवं आइक्खइ जाव एवं

परुवेह—गोसाला ! एस णं तिलथंभए णिष्फज्जिस्सइ णो ण णिष्फज्जिस्सइ तं चेव जाव म्भवायाइस्संति तण्णं मिच्छा । इमं च णं पच्चक्खमेव बीसइ एस णं से तिलथंभए णो णिष्फण्णे अणिष्फण्णमेव ते य सत्त तिलपुष्फजीवा उदाइत्ता २ णो एयस्स चेव तिलथंभगस्स एगाए तिलसंगलियाए सत्त तिला पच्चायाया । तए णं अहं गोयमा ! गोसालं मंखलिपुत्तं एवं वयासी—तुमं णं गोसाला ! तया ममं एवं आइक्खमाणस्स जाव एवं परुवेमाणस्स एयमट्ठं णो सदहसि णो पत्तियसि णो रोयसि, एयमट्ठं असदहमाणे अपत्तियमाणे अरोएमाणे ममं पणिहाए अयण्णं मिच्छावाई भवउत्तिकट्ठु ममं अंतियाओ सणियं २ पच्चोसक्कसि २ ता जेणेव से तिलथंभए तेणेव उवागच्छसि २ ता जाव एगंतमंते एडेसि, तक्खणमेत्तं गोसाला ! दिब्बे अब्भवहलए पाउडभूए, तए णं से दिब्बे अब्भवहलए खिप्पामेव तं चेव जाव तस्स चेव तिलथंभगस्स एगाए तिलसंगलियाए सत्त तिला पच्चायाया । तं एस णं गोसाला ! से तिलथंभए णिष्फण्णे णो अणिष्फण्णमेव, ते य सत्त तिलपुष्फजीवा उदाइत्ता २ एयस्स चेव तिलथंभगस्स एगाए तिलसंगलियाए सत्त तिला पच्चायाया, एवं खलु गोसाला ! वणस्सइकाइया पउट्टपरिहारं परिहरंति । तए णं से गोसाले मंखलिपुत्ते ममं एयमाइक्खमाणस्स जाव परुवेमाणस्स एयमट्ठं णो सदहइ ३ एयमट्ठं असदहमाणे जाव अरोएमाणे जेणेव से तिलथंभए तेणेव उवागच्छइ २ ता ताओ तिलथंभयाओ तं तिलसंगलियं खुडुइ खुडुत्ता करयलसि सत्त तिले पप्फोडेइ । तए णं तस्स गोसालस्स मंखलिपुत्तस्स ते सत्त तिले गणमाणस्स अयमेयारुवे अज्झत्थिए जाव समुप्पज्जित्था—एवं खलु सक्खजीवावि पउट्टपरिहारं परिहरंति । एस णं गोयमा ! गोसालस्स मंखलिपुत्तस्स पउट्टे, एस णं गोयमा ! गोसालस्स मंखलिपुत्तस्स ममं अंतियाओ आयाए अवक्कमणे ५० ॥ ५४३ ॥ तए णं से गोसाले मंखलिपुत्ते एगाए सणहाए कुम्भासंपिडियाए एगेण य वियडासएणं छट्ठंछट्ठेणं अणिक्खत्तेणं तवोकम्मणं उड्डं बाहाओ पणिज्जिय २ जाव बिहरइ । तए णं से गोसाले मंखलिपुत्ते अतो छण्हं मासाणं संखित्तविउलतेयलेस्से जाए ॥ ५४४ ॥ तए णं तस्स गोसालस्स मंखलिपुत्तस्स अण्णया कयाइ इमे छट्ठिसाचरा अतियं पाउडभवित्था तं०—साणे तं चेव सक्खं जाव अजिणे जिणसहं पयासेमाणे विहरइ, तं णो खलु गोयमा ! गोसाले

मंखलिपुत्ते जिणे जिणप्पलावी जाव जिणसद्दं पगासेमाणे विहरइ, गोसाले णं मंखलिपुत्ते अजिणे जिणप्पलावी जाव पगासेमाणे विहरइ । तए णं सा महइ-महालिया महच्चपरिसा जहा सिवे जाव पडिगया । तए णं सावत्थीए णय-रीए सिघाडग जाव बहुजणी अण्णमण्णस्त जाव परूवेइ—जण्णं देवाणुप्पिया ! गोसाले मंखलिपुत्ते जिणे जिणप्पलावी जाव विहरइ तं मिच्छा, समणे भगवं महावीरे एवं आइवडइ जाव परूवेइ—एवं खलु तस्स गोसालस्स मंखलिपुत्तस्स मंखली णामं मंत्ते पिया होत्था, तए णं तस्स मंखलिस्स एवं तं चेव सव्वं भाणियव्वं जाव अजिणे जिणप्पलावी जिणसद्दं पगासेमाणे विहरइ, तं णो खलु गोसाले मंखलिपुत्ते जिणे जिणप्पलावी जाव विहरइ, गोसाले मंखलिपुत्ते अजिणे जिणप्पलावी जाव विहरइ, समणे भगवं महा-वीरे जिणे जिणप्पलावी जाव जिणसद्दं पगासेमाणे विहरइ । तए णं से गोसाले मंखलिपुत्ते दहजणस्स अंतियं एयमट्ठं सोच्चा णिसम्म अगुरुत्ते जाव मिसि-मिसेमाणे आयावणभूमिओ पच्चोरुहइ आयावणभूमिओ पच्चोरुहइत्ता सार्वत्थि णयरि मज्झमज्जेणं जेणेव हालाहलाए कुंभकारीए कुंभकारावणे तेणेव उवा-गच्छइ उवागच्छत्ता हालाहलाए कुंभकारीए कुंभकारावणंसि आजीवियसंघ-संपरिवुडे महया अमरिसं वहमरणे एवं त्ति विहरइ ॥५४५॥ तेणं कालेणं तेणं समएणं समणस्स भगवओ महावीरस्स अतेवासी आणंदे णामं थेरे पगइभट्टए जाव विणीए छट्ठंछट्ठेणं अणिक्वित्तेणं तवोकम्मेणं संजमेणं तवसा अप्पाणं भादेमाणे विहरइ । तए णं से आणंदे थेरे छट्ठवखमणपारणंसि पढमाए पोरि-सीए एवं जहा गोयभसामी तहेव आपुच्छइ, तहेव जाव उच्चणीयमज्झिम० जाव अडमाणे हालाहलाए कुंभकारीए कुंभकारावणस्स अदूरसामंतेणं वीईवयइ । तए णं से गोसाले मंखलिपुत्ते आणंदं थेरं हालाहलाए कुंभकारीए कुंभकारावणस्स अदूरसामंतेणं वीईवयमाणं पासइ २ त्ता एवं वयासी—एहि ताव आणंदा ! इओ एगं महं उवमियं णिसामेहि । तए णं से आणंदे थेरे गोसालेणं मंखलि-पुत्तेणं एवं वुत्ते समणे जेणेव हालाहलाए कुंभकारीए कुंभकारावणे जेणेव गोसाले मंखलिपुत्ते तेणेव उवागच्छइ । तए णं से गोसाले मंखलिपुत्ते आणंदं थेरं एवं वयासी—एवं खलु आणंदा ! इओ चिराईयाए अट्टाए केइ उच्चा-वया वणिघा अत्थत्थी अत्थलुट्ठा अत्थगवैसी अत्थकंखिया अत्थपिवासा

अत्थगवेसणयाए ज्ञानाविह्वित्तलपणियमंडमायाए सगडोसागडेणं सुवहुं भत्त-
पाणपत्थय्यणं गहाय एगं महं अगामियं अणोहियं छिण्णावायं दीहमद्धं अडवि
अणुप्पविट्ठा । तए णं तेसिं वणियाणं तीसे अगामियाए अणोहियाए छिण्णा-
वायाए दीहमद्धाए अडवीए किच्चिं देसं अणुप्पत्ताणं समाणाणं से पुव्वगहिए उदए
अणुप्पवेणं परिभुंजेमाणे २ खीणे । तए णं ते वणिया खीणोदगा समाणा
तप्हाए परिभवमाणा अण्णमण्णे सद्दवेति अण्ण० २ ता एवं वयासी-एवं
खलु देवाणुप्पिया ! अम्हं इमीसे अगामियाए जाव अडवीए किच्चिं देसं अणु-
प्पत्ताणं समाणाणं से पुव्वगहिए उदए अणुप्पवेणं परिभुंजेमाणे २ खीणे, तं
सेयं खलु देवाणुप्पिया ! अम्हं इमीसे अगामियाए जाव अडवीए उदगस्स
सव्वओ समंता मग्गणगवेसणं करेत्तएत्तिकट्टु अण्णमण्णस्स अंतिए एयमट्ठं
पडिसुणेति अण्ण० २ ता तीसेणं अगामियाए जाव अडवीए उदगस्स सव्वओ
समंता मग्गणगवेसणं करेति, उदगस्स सव्वओ समंता मग्गणगवेसणं करेमाणा
एगं महं वणसंडं आसाएति, किण्हं किण्होभासं जाव णिकुरंबभूयं पासाईयं
जाव पडिक्खं, तस्स णं वणसंडस्स बहुमज्झदेसभाए एत्थ णं महेगं वम्मीयं
आसाएति, तस्स णं वम्मीयस्स चत्तारि वप्पुओ अन्नमग्गयाओ अभिणि-
सद्दाओ तिरियं सुसंपग्गहियाओ अहे पण्णगद्धरूवाओ पण्णगद्धसंठाणसंठियाओ
पासाईयाओ जाव पडिक्खाओ । तए णं ते वणिया हट्टुत्तुट्ठं अण्णमण्णं सद्दवेति
अ० २ ता एवं वयासी-एवं खलु देवाणुप्पिया ! अम्हं इमीसे अगामियाए जाव
सव्वओ समंता मग्गणगवेसणं करेमाणेहिं इमे वणसंडे आसाइए किण्हे
किण्होभासे० इमस्स णं वणसंडस्स बहुमज्झदेसभाए इमे वम्मीए आसाइए,
इमस्स णं वम्मीयस्स चत्तारि वप्पुओ अन्नमग्गयाओ जाव पडिक्खाओ, तं सेयं
खलु देवाणुप्पिया ! अम्हं इमस्स वम्मीयस्स पढमं वप्पिं भिदित्तए, अवि-
याइं ओरालं उदगरयणं अस्साएस्सामो । तए णं ते वणिया अण्णमण्णस्स अंतियं
एयमट्ठं पडिसुणेति २ ता तस्स वम्मीयस्स पढमं वप्पिं भिदंति, ते णं तत्थ
अच्छं पत्थं जच्चं तणुयं फालियवण्णान्णं उरालं उदगरयणं आसाएति, तए
णं ते वणिया हट्टुत्तुट्ठा पाणियं पिबंति २ ता वाहणाइं पज्जेति वा० २ ता
भायणाइं भरेति भा० २ ता दोक्खंवि अण्णमण्णं एवं वयासी-एवं खलु देवा-
णुप्पिया ! अम्हेहिं इमस्स वम्मीयस्स पढमाए वप्पाए भिण्णाए ओराले उद-

गरयणे अस्साइए, तं सेयं खलु देवाणुप्पिया ! अम्हं इमस्स वम्मीयस्स दोच्चपि वण्पि भिदित्तए, अबियाइं एत्थ ओरालं सुवण्णरयणं अस्साएस्सामो । तए णं ते वणिया अण्णमण्णस्स अंतियं एयमट्ठं पडिसुणेंति अ० २ ता तस्स वम्मीयस्स दोच्चपि वण्पि भिदंति, ते णं तत्थ अच्छं जक्कं तावणिज्जं महत्थं महग्घं मह-
रिहं ओरालं सुवण्णरयणं अस्साएति, तए णं ते वणिया हट्ठुट्ठा भायणाइं भरेंति २ ता पवहणाइं भरेंति २ ता तच्चपि अण्णमण्णं एवं वयासी-एवं खलु देवाणुप्पिया ! अम्हे इमस्स वम्मीयस्स पढमाए वप्पाए भिण्णाए ओराले उदगरयणे अस्साइए, दोच्चाए वप्पाए भिण्णाए ओराले सुवण्णरयणे अस्साइए, तं सेयं खलु देवाणुप्पिया ! अम्हं इमस्स वम्मीयस्स तच्चपि वण्पि भिदित्तए, अबियाइं एत्थ ओरालं मणिरयणं अस्साएस्सामो । तए णं ते वणिया अण्ण-
मण्णस्स अंतियं एयमट्ठं पडिसुणेंति अ० २ ता तस्स वम्मीयस्स तच्चपि वण्पि भिदंति, ते णं तत्थ विमलं पिम्मलं णित्तलं णिवकल्लं महत्थं महग्घं महरिहं ओरालं मणिरयणं अस्साएति, तए णं ते वणिया हट्ठुट्ठा भायणाइं भरेंति भा० २ ता पवहणाइं भरेंति २ ता चउत्थपि अण्णमण्णं एवं वयासी-एवं खलु देवाणुप्पिया ! अम्हे इमस्स वम्मीयस्स पढमाए वप्पाए भिण्णाए ओराले उदगरयणे अस्साइए, दोच्चाए वप्पाए भिण्णाए ओराले सुवण्णरयणे अस्सा-
इए, तच्चए वप्पाए भिण्णाए ओराले मणिरयणे अस्साइए । तं सेयं खलु देवाणुप्पिया ! अम्हं इमस्स वम्मीयस्स चउत्थपि वण्पि भिदित्तए, अबियाइं उत्तमं महग्घं महरिहं ओरालं वडररयणं अस्साएस्सामो । तए णं तेसि वणियाणं एगे वणिए हियकामए सुहकामए पत्थकामए आणुक्कपिए णिस्से-
यसिए हियसुहणिस्सेसकामए ते वणिए एवं वयासी-एवं खलु देवाणुप्पिया ! अम्हे इमस्स वम्मीयस्स पढमाए वप्पाए भिण्णाए ओराले उदगरयणे जाव तच्चए वप्पाए भिण्णाए ओराले मणिरयणे अस्साइए, तं होउ अलाहि पज्जत्तं णे एसा चउत्थी वप्पा मा पिज्जउ, चउत्थी णं वप्पा सउवसग्गा यावि होत्था । तए णं ते वणिया तस्स वणियस्स हियकामगस्स सुहकामगस्स जाव हियसुहणिस्सेसकामगस्स एवमाइवखमाणस्स जाव परूवेमाणस्स एयमट्ठं णो सट्ठंति जाव णो रोयंति, एयमट्ठं असह्हमाणा जाव अरोएमग्गा तस्स वम्मी-
यस्स चउत्थपि वण्पि भिदंति, ते णं तत्थ उग्गविसं चंडविसं धोरविसं महाविसं

अइकायमहाकायं मसिमसाकालगं णयणविसरोसपुणं अंजणपुंजणिगरप्यगासं
रसच्छं जमलज्जयलच्चंचलचलंतजीहं धरणितलवेणिभूयं उक्कडफुडकुडिलजडुल-
कवखडविकडफडाडोवकरणवच्छं लोहागरधम्ममाणधमधमंतघोसं अणागलिय-
चंडतिव्वरोसं समुहिं तुरियं चवलं धमंतं दिट्ठिविसं सप्यं संघट्टेति । तए णं से
दिट्ठिविसे सप्ये तेहिं वणिएहिं संघट्टिए समाणे आसुरुत्ते जाव मिसिमिसेमाणे
सणियं २ उट्ठेइ २ ता सरसरसरस्स वम्भीयस्स सिहरतलं दुरुहइ सि० २
ता आइच्चं णिज्जाइ आ० २ ता ते वणिए अणिमिसाए विट्ठोए सव्वओ
समंता समभिलोएइ । तए णं ते वणिया तेणं दिट्ठिविसेणं सप्येणं अणिमिसाए
दिट्ठोए सव्वओ समंता समभिलोइया समाणा खिप्पामेव सभंडमत्तोवगरण-
मायाए एगाहच्चं कूडाहच्चं भासरासी कया यावि होत्था । तत्थ णं जे से वणिए
तेसिं वणियाणं हियकामए जाव हियसुहणिस्सेसकामए से णं अणुकंपियाए देवयाए
सभंडमत्तोवगरणमायाए णियणं णयरं साहिए । एवामेव आणंदा ! तववि धम्ममा-
यरिएणं धम्मोवएसएणं समणेणं णायपुत्तेणं ओराले परियाए अस्साइए, ओराला
कित्तिवण्णसहसिलोगा सवेवमणुयामुरे लोए पुव्वंति गुव्वंति थुव्वंति इति खलु
समणे भगवं महावीरे इति० २, तं जइ भे से अज्ज किंचिवि ववइ, तो णं तवेणं
तेएणं एगाहच्चं कूडाहच्चं भासरासिं करेमि जहा वा वालेणं ते वणिया, तुमं
च णं आणंदा ! सारवस्सामि संगोघामि जहा वा से वणिए तेसिं वणियाणं हिय-
कामए जाव णिस्सेसकामए अणुकंपियाए देवयाए सभंडमत्तोव० जाव साहिए,
तं गच्छ णं तुमं आणंदा ! तव धम्ममायरियस्स धम्मोवएसगस्स समणस्स णाय-
पुत्तस्स एयमट्ठं परिकहेहि । तए णं से आणंदे थेरे गोसालेणं मंखलिपुत्तेणं
एवं वुत्ते समाणे भीए जाव संजायमए गोसालस्स मंखलिपुत्तस्स अंतियाओ
हालाहलाए कुंभकारीए कुंभकारावणाओ पडिणिवल्लमइ २ ता सिग्घं तुरियं
सावत्थिय णयरिं मज्झमज्जेणं णिग्गच्छइ २ ता जेणेव कोट्टए चेइए जेणेव समणे
भगवं महावीरे तेणेव उवागच्छइ २ ता समणं भगवं महावीरं तिवल्लुत्तो आयाहिणं
पयाहिणं करेइ २ ता वंदइ णमंसइ वं० २ ता एवं वयासी-एवं खलु अहं भंते !
छट्ठवक्खमणवारणगंसि तुम्भेहिं अब्भणुष्णाए समाणे सावत्थीए णयरीए उच्चणीय
जाव अडमाणे हालाहलाए कुंभकारीए जाव घीईवयामि, तए णं गोसाले मंखलिपुत्ते
ममं हालाहलाए जाव पासिता एवं वयासी-एहिं ताव आणंदा ! इओ एगं महं

उवमियं णिसामेहि, तए णं अहं गोसालेणं मंखलिपुत्तेणं एयं वुत्ते समणे जेणेव हालाहलाए कुंभकारीए कुंभकारावणे जेणेव गोसाले मंखलिपुत्ते तेणेव उवागच्छामि, तए णं से गोसाले मंखलिपुत्ते ममं एवं वयासी—एवं खलु आणंदा ! इओ चिराईयाए अद्धाए केइ उच्चवया वणिया एवं तं चेव सव्वं णिरवसेसं भाणियव्वं जाव णियणं णयरं साहिए तं गच्छ णं तुमं आणंदा ! तव धम्मयायरियस्स धम्मोवएसगस्स जाव परिकहेहि ॥ ५४६ ॥ तं पभू णं भंते ! गोसाले मंखलिपुत्ते तवेणं तेएणं एगाहच्चं कूडाहच्चं भासरासि करेत्तए, विसए णं भंते ! गोसालस्स मंखलिपुत्तस्स जाव करेत्तए, समत्थे णं भंते ! गोसाले मंखलिपुत्ते तवेणं जाव करेत्तए ? पभू णं आणंदा ! गोसाले मंखलिपुत्ते तवेणं जाव करेत्तए, विसए णं आणंदा ! गोसालस्स जाव करेत्तए, समत्थे णं आणंदा ! गोसाले जाव करेत्तए, णो चेव णं अरिहंते भगवंते, परियावणियं पुण करेज्जा, जावइएणं आणंदा ! गोसालस्स मंखलिपुत्तस्स तवतेए एत्तो अणंतगुणविसिट्ठतराए चेव तवतेए अणगाराणं भगवंताणं, खंतिखमा पुण अणगारा भगवंतो, जावइएणं आणंदा ! अणगाराणं भगवंताणं तवतेए एत्तो अणंतगुणविसिट्ठतराए चेव तवतेए थेराणं भगवंताणं, खंतिखमा पुण थेरा भगवंतो, जावइएणं आणंदा ! थेराणं भगवंताणं तवतेए एत्तो अणंतगुणविसिट्ठतराए चेव तवतेए अरिहंताणं भगवंताणं, खंतिखमा पुण अरहंता भगवंतो, तं पभू णं आणंदा ! गोसाले मंखलिपुत्ते तवेणं तेएणं जाव करेत्तए, विसए णं आणंदा ! जाव करेत्तए, समत्थे णं आणंदा ! जाव करेत्तए, णो चेव णं अरिहंते भगवंते, पारियावणियं पुण करेज्जा ॥ ५४७ ॥ तं गच्छ णं तुमं आणंदा ! गोयमाईणं समणेणं णिगंथाणं एयमट्ठं परिकहेहि—मा णं अज्जो ! तुव्वं केइ गोसाल मंखलिपुत्तं धम्मियाए पडिच्चोयणाए पडिच्चोएउ, धम्मियाए पडिसारणाए पडिसारेउ, धम्मिएणं पडोयारेणं पडोयारेउ, गोसाले णं मंखलिपुत्ते समणेहि णिगंथोहि मिच्छं विपडिवण्णे । तए णं से आणंदे थेरे समणेणं भगवया महावीरेणं एवं वुत्ते समणे समणं भगवं महावीर वंदइ णमंसइ वं० २ ता जेणेव गोयमाइसमणा णिगंथा तेणेव उवागच्छइ २ ता गोयमाइसमणे णिगंथे आभंतेइ २ ता एवं वयासी—एवं खलु अज्जो ! छट्ठक्खमणपारणमसि समणेणं भगवया महावीरेणं अब्भणुणाए समणे सावत्थीए णयरीए उच्चणीय० तं चेव सव्वं जाव णायपुत्तस्स

एयमट्ठं परिकहेहि, तं मा णं अज्जो ! तुभं केइ गोसालं मंखलिपुत्तं धम्मि-
याए पडिच्छेयणाए पडिचोएउ जाव मिच्छं विप्पडिवण्णे ॥ ५४८ ॥ जावं च
णं आणवे धेरे योयमाईणं समणाणं णिगंथाणं एयमट्ठं परिकहेइ तावं च णं से
गोसाले मंखलिपुत्ते हालाहलाए कुंभकारीए कुंभकारावणाओ पडिणिक्खमइ
पडिणिक्खमित्ता आजोविद्यसंघसंपरिवुडे भहया अमरिसं वहमाणे सिग्घं तुरियं
जाव सार्वत्थि णयारि मज्झमज्झेणं णिगच्छइ २ ता जेणेव कोट्टुए चेइए जेणेव
समणे भगवं महावीरे तेणेव उवागच्छइ ते० २ ता समणस्स भगवओ महा-
वीरस्स अदूरसामंते ठिच्चा समणं भगवं महावीरं एवं वयासी—सुट्ठु णं आउसो !
कासवा ! ममं एवं वयासी साहू णं आउसो ! कासवा ! ममं एवं वयासी—
गोसाले मंखलिपुत्ते ममं धम्मंतेवासी गोसाले० २, जे णं गोसाले मंखलिपुत्ते
तव धम्मंतेवासी से णं सुक्के सुक्काभिजाइए भवित्ता कालमासे कालं किच्चा
अणयरेसु देवलोएसु देवत्ताए उववण्णे, अहण्णं उदाई णामं कुंडियायणीए
अज्जुणस्स गोयमपुत्तस्स सरोरगं विप्पजहामि अ० २ ता गोसालस्स मंखलि-
पुत्तस्स सरोरगं अणुप्पविसामि गो० २ ता इमं सत्तमं पउट्टपरिहारं परिहरामि,
जेवि आइं आउसो ! कासवा ! अम्हं समयंसि केइ सिज्झिसु वा सिज्झंति
वा सिज्झिस्संति वा सब्बे ते चउरासीइं महाकप्पसयसहस्साइं सत्त दिव्वे सत्त
संजूहे सत्त सण्णिगग्गं सत्त पउट्टपरिहारे पंच कम्मणिसयसहस्साइं सत्तिं च
सहस्साइं छच्च सए तिण्णि य कम्मसे अणुपुव्वेणं खवइत्ता तओ पच्छा सिज्झंति
वुज्झंति मुच्चति परिणिव्वार्यंति सब्बदुक्खाणमंतं करिसु वा करेंति वा करि-
स्संति वा, से जहा वा गंगा महाणई जओ पबूहा जहि वा पज्जुवत्थिया एस
णं अट्ठपंचजोयणसयाइं आयामेण अट्ठजोयणं विक्खंमेणं पंच धणुसयाइं
उव्वेहेणं एएणं गंगापमाणेणं सत्त गंगाओ सा एगा महागंगा, सत्त महागंगाओ
सा एगा साईणगंगा, सत्त साईणगंगाओ सा एगा मच्चुंगंगा, सत्त मच्चुंगंगाओ
सा एगा लोहियगंगा सत्त लोहियगंगाओ सा एगा आवईगंगा, सत्त आवई-
गंगाओ सा एगा परमावई, एवामेव सपुव्वावरेणं एगं गंगासयसहस्सं सत्तर
सहस्सा छच्चगुणपण्णं गंगासया भवंतीति मक्खाया, तांसि दुविहे उट्ठारे पण्णत्ते,
तज्जहा—सुहमबोदिकलेवरे चेव बायरबोदिकलेवरे चेव, तत्थ णं जे से सुहमबोदि-
कलेवरे से ठप्पे, तत्थ णं जे से बायरबोदिकलेवरे तओ णं वाससए २ गए २

एगमेगं गंगावातुयं अवहाय जावइएणं कालेणं से कोट्ठे खीणे नीरए णिल्लेवे णिट्ठिए भवइ, सेत्तं सरे सरप्पमाणे, एएणं सरप्पमाणेणं तिण्णि सरसयसाहस्सीओ से एगे महाकप्पे, चउरासीइं महाकप्पसयसहस्साइं से एगे महामाणसे, अणंताओ संजूहाओ जीवे चयं चइत्ता उवरिल्ले माणसे संजूहे देवे उववज्जइ, से णं तत्थ दिव्वाइं भोगभोगाइं भुंजमाणे विहरइ विहरित्ता ताओ देवलोगाओ आउवखएणं भववखएणं ठिइवखएणं अणंतरं चयं चइत्ता पढमे सण्णिगढमे जीवे पच्चायाइ, से णं तओहिंतो अणंतरं उव्वट्ठित्ता मज्झिल्ले माणसे संजूहे देवे उववज्जइ, से णं तत्थ दिव्वाइं भोगभोगाइं भुंजमाणे जाव विहरित्ता ताओ देवलोगाओ आउवखएणं ३ जाव चइत्ता दोस्से सण्णिगढमे जीवे पच्चायाइ, से णं तओहिंतो अणंतरं उव्वट्ठित्ता हेट्ठिल्ले माणसे संजूहे देवे उववज्जइ, से णं तत्थ दिव्वाइं जाव चइत्ता तच्चे सण्णिगढमे जीवे पच्चायाइ, से णं तओहिंतो जाव उव्वट्ठित्ता उवरिल्ले माणुसुत्तरे संजूहे देवे उववज्जइ, से णं तत्थ दिव्वाइं भोग जाव चइत्ता चउत्थे सण्णिगढमे जीवे पच्चायाइ, से णं तओहिंतो अणंतरं उव्वट्ठित्ता मज्झिल्ले माणुसुत्तरे संजूहे देवे उववज्जइ, से णं तत्थ दिव्वाइं भोग जाव चइत्ता पंचमे सण्णिगढमे जीवे पच्चायाइ, से णं तओहिंतो अणंतरं उव्वट्ठित्ता हिट्ठिल्ले माणुसुत्तरे संजूहे देवे उववज्जइ, से णं तत्थ दिव्वाइं भोग जाव चइत्ता छट्ठे सण्णिगढमे जीवे पच्चायाइ, से णं तओहिंतो अणंतरं उव्वट्ठित्ता बंसलोगे णामं से कप्पे पण्णत्ते, पाईणपडीणायए उदीण-दाहिणविच्छिण्णे जहा ठाणपए जाव पंच वडंसगा ५०, तंजहा-असोगवडंसए जाव पडिरूवा, से णं तत्थ देवे उववज्जइ, से णं तत्थ दस सागरोवमाइं दिव्वाइं भोग जाव चइत्ता सत्तमे सण्णिगढमे जीवे पच्चायाइ, से णं तत्थ णवण्हं मासाणं बहुपडिपुण्णाणं अद्धट्टमाण जाव वीइक्कंताणं सुकुमात्तगमट्टए मिउ-कुंडलकुच्चिकेसए मट्टगंडतलकण्णपीढए देवकुमारसमप्पमए दारए पयायइ, से णं अहं कासवा ! तए णं अहं आउत्तो ! कासवा ! कोमारियाए पव्वज्जाए कोमारएणं बंभचेरवासेणं अन्निकण्णए च्चैव संखाणं पडिलभामि सं० २ ता इमे सत्त पउट्ट-परिहारे परिहरामि, तंजहा-एणेज्जस्स, मल्लरामस्स, मंडियस्स, रोहस्स, भारद्वाइस्स, अज्जुणगस्स गोयमपुत्तस्स, गोसालस्स मंखलिपुत्तस्स, तत्थ णं जे से पढमे पउट्टपरिहारे से णं रायगिहस्स णयरस्स ब्रह्मिा मंडियकुच्छिसि

चेइयंसि उदाइस्स कुंडियायणस्स सरीरं विप्पजहामि उवा० २ ता एणेज्जगस्स सरीरं अणुप्पविसामि एणे० २ ता बावीसं वासाइं पढमं पउट्टपरिहारं परिहरामि, तत्थ णं जे से दोच्चे पउट्टपरिहारे से णं उट्टंउपुरस्स णयरस्स बहिया चंदोयरणंसि चेइयंसि एणेज्जगस्स सरीरं विप्पजहामि २ ता मल्लरामस्स सरीरं अणुप्पविसामि मल्ल० २ ता एकवीसं वासाइं दोच्चं पउट्टपरिहारं परिहरामि, तत्थ णं जे से तच्चे पउट्टपरिहारे से णं चंपाए णयरीए बहिया अंगमंदिंरंमि चेइयंसि मल्लरामस्स सरीरं विप्पजहामि मल्ल० २ ता मंडियस्स सरीरं अणुप्पविसामि मंडि० २ ता वीसं वासाइं तच्चं पउट्टपरिहारं परिहरामि, तत्थ णं जे से चउत्थे पउट्टपरिहारे से णं वाणारसीए णयरीए बहिया काममहावणंसि चेइयंसि मंडियस्स सरीरं विप्पजहामि मंडि० २ ता रोहस्स सरीरं अणुप्पविसामि रोह० २ ता एकूणवीसं वासाइं चउत्थं पउट्टपरिहारं परिहरामि, तत्थ णं जे से पंचमे पउट्टपरिहारे से णं आलभिंयाए णयरीए बहिया पत्तकालगंसि चेइयंसि रोहस्स सरीरं विप्पजहामि रोह० २ ता भारद्वाइस्स सरीरं अणुप्पविसामि भा० २ ता अट्टारस वासाइं पंचमं पउट्टपरिहारं परिहरामि, तत्थ णं जे से छट्ठे पउट्टपरिहारे से णं वेसालीए णयरीए बहिया कौंडियायणंसि चेइयंसि भारद्वाइस्स सरीरं विप्पजहामि भा० २ ता अज्जुणगस्स गोयमपुत्तस्स सरीरं अणुप्पविसामि अ० २ ता सत्तरस वासाइं छट्ठं पउट्टपरिहारं परिहरामि, तत्थ णं जे से सत्तमे पउट्टपरिहारे से णं इहेवं सावथीए णयरीए हांलाहलाए कुंभकारीए कुंभकारावणंसि अज्जुणगस्स गोयमपुत्तस्स सरीरं विप्पजहामि अज्जुणगस्स० २ ता गोसालस्स मंखलिपुत्तस्स सरीरं अलं थिरं धुवं धारणिज्जं सीयसहं उण्हसहं खुहासहं विविहदंसमसगपरीसहोवसग्गसहं थिरसंघयणंतिकट्टु तं अणुप्पविसामि २ ता तं सोलस वासाइं इमं सत्तमं पउट्टपरिहारं परिहरामि, एवामेव आउसो ! कासवा ! एगेणं तेत्तीतेणं वाससएणं सत्तं पउट्टपरिहारा परिहरिया भवंतीति मक्खाया, तं सुट्ठु णं आउसो ! कासवा ! ममं एवं वयासी-साहु णं आउसो ! कासवा ! ममं एवं वयासी-गोसाले मंखलिपुत्ते ममं धम्मतेवासित्ति गोसाले० २ ॥५४६॥ तए णं समणे भगवं महावीरे गोसालं मंखलिपुत्तं एवं वयासी-गोसाला ! से जहाणामए तेणए सिया गामेल्लएहिं परढभमाणे २ कत्थ य गड्डं वा दरि वा

दुग्गं वा णिण्णं वा पव्वयं वा विसमं वा अणस्साएभाणे एमेण महं उष्णालोमेण वा सणलोमेण वा कप्पासपम्हेण वा तणसूएण वा अत्ताणं आवरेत्ताणं चिट्ठेज्जा, से णं अणावरिए आवरियमिति अप्पाणं मण्णइ, अप्पच्छण्णे य पच्छण्णमिति अप्पाणं मण्णइ, अणिलुक्के णिलुक्कमिति अप्पाणं मण्णइ, अपलाए पलायमिति अप्पाणं मण्णइ, एवामेव तुमंपि गोसाला ! अण्णे संते अणमिति अप्पाणं उपलभसि, तं मा एवं गोसाला ! णारिहसि गोसाला ! सच्चेव ते सा छाया णो अण्णा ॥५५०॥ तए णं से गोसाले मंखलिपुत्ते समणेणं भगवया महावीरेणं एवं वुत्ते समाणे आसुरुत्ते ५ समणं भगवं महावीरं उच्चावयाहिं आउसणाहिं आउसइ उच्चा० २ ता उच्चावयाहिं उद्धंसणाहिं उद्धंसेइ उद्धंसेता उच्चावयाहिं णिडमंछणाहिं णिडमंछेइ उ० २ ता उच्चावयाहिं णिच्छोडणाहिं णिच्छोडेइ उ० २ ता एवं वयासी-णट्ठेसि कयाइ, विणट्ठेसि कयाइ, भट्ठेसि कयाइ, णट्ठविणट्ठभट्ठेसि कयाइ, अज्ज ण भवसि णाहिं ते ममाहिं तो सुहमस्सि ॥ ५५१ ॥ तेणं कालेणं तेणं समएणं समणस्स भगवओ महावीरस्स अंतेवासी पाईणजाणवए सव्वाणुमूई णामं अणगारे पगइभट्टए जाव विणीए धम्मायरियाणुरागेणं एयमट्ठं असट्टहमाणे उट्टाए उट्ठेइ उ० ता जेणेव गोसाले मंखलिपुत्ते तेणेव उवागच्छइ २ ता गोसालं मंखलिपुत्तं एवं वयासी-जेवि ताव गोसाला ! तहारुवस्स समणस्स वा माहणस्स वा अंतियं एगमवि आरियं धम्मियं सुवयणं णिसामेइ सेवि ताव तं वंदइ णमंसइ जाव कल्लाणं मंगलं वेवयं चेइयं पज्जुवासइ, किमंग पुण तुमं गोसाला ! भगवया चेव पव्वाविए, भगवया चेव मुंडाविए, भगवया चेव सेहाविए, भगवया चेव सिक्खाविए, भगवया चेव बहुस्सुईकए, भगवओ चेव मिच्छं विप्पडिवण्णे, तं मा एवं गोसाला ! णारिहसि गोसाला ! सच्चेव ते सा छाया णो अण्णा । तए णं से गोसाले मंखलिपुत्ते सव्वाणुमूइणामेणं अणगारेणं एवं वुत्ते समाणे आसुरुत्ते ५ सव्वाणुमूई अणगारं तवेणं तेएणं एगाहच्चं कूडाहच्चं जाव भासरांसि करेइ । तए णं से गोसाले मंखलिपुत्ते सव्वाणुभूई अणगारं तवेणं तेएणं एगाहच्चं कूडाहच्चं जाव भासरांसि करेत्ता-दोच्चंयि समणं भगवं महावीरं उच्चावयाहिं आउसणाहिं आउसइ जाव सुहं णत्वि । तेणं कालेणं तेणं समएणं समणस्स भगवओ महावीरस्स अंतेवासी कोसलजाणवए सुणक्खत्ते णामं अणगारे पगइभट्टए जाव विणीए धम्मायरियाणुरागेणं जहा

सव्वाणुभूई तहेव जाव सचवेव ते सा छाया णो अण्णा । तए णं से गोसाले मंखलिपुत्ते सुणक्खत्तेणं अणगारेणं एवं वृत्ते समाणे आसुरुत्ते ५ सुणक्खत्तं अणगारं तवेणं तेएणं परितावेइ । तए णं से सुणक्खत्ते अणगारे गोसालेणं मंखलिपुत्तेणं तवेणं तेएणं परिताविए समाणे जेणं व समणे भगवं महावीरे तेणं व उवागच्छइ २ ता समणं भगवं महावीरं तिवखुत्तो आयाहिणं पयाहिणं करेइ २ ता वंदइ णमंसइ वं० २ ता सपमेव पंच महव्वयाइं आरुहेइ स० २ ता समणा य समणीओ य खामेइ सम० २ ता आलोइयपडिक्कंते समाहिपत्ते आणुपुव्वीए कालगए । तए णं से गोसाले मंखलिपुत्ते सुणक्खत्तं अणगारं तवेणं तेएणं परितावेत्ता तच्चंपि समणं भगवं महावीरं उच्चवाय्याहिं आउसणाहिं आउसइ सव्वं तं चेव जाव सुहं णत्थि । तए णं समणे भगवं महावीरे गोसालं मंखलिपुत्तं एवं वयासी-जेवि ताव गोसाला ! तहारूवस्स समणस्स वा माहणस्स वा तं चेव जाव पज्जुवासइ, किमंग पुण गोसाला ! तुमं मए चेव पव्वाविए जाव मए चेव बहुस्सुईकए ममं चेव भिच्छं विप्पडिवण्णे ? तं मा एवं गोसाला ! जाव णो अण्णा । तए णं से गोसाले मंखलिपुत्ते समणेणं भगवया महावीरेणं एवं वृत्ते समाणे आसुरुत्ते ५ तेयासमुग्घाएणं समोहणइ तेया० २ ता सत्तट्टपयाइं पक्कोसक्कइ २ ता समणस्स भगवओ महावीरस्स वहाए सरीरगंसि तेयं णिसिरइ, से जहाणामए वाउक्कलियाइ वा वायमंडलियाइ वा सेलंसि वा कुडुंसि वा थंभंसि वा थूमंसि वा आवरिज्जमाणी वा णिवारिज्जमाणी वा सा णं तत्थ णो कमइ णो पक्कमइ, एवामेव गोसालस्सवि मंखलिपुत्तस्स तवे तेए समणस्स भगवओ महावीरस्स वहाए सरीरगंसि णिसिट्ठे समाणे से णं तत्थ णो कमइ णो पक्कमइ, अंचियींच करेइ अंचि० २ ता आयाहिणं पयाहिणं करेइ आ० २ ता उड्डं वेहासं उप्पइए, से णं तओ पडिहए, पडिणियत्ते समाणे तमेव गोसालस्स मंखलिपुत्तस्स सरीरगं अणुडहमाणे २ अंतो २ अणुप्पविट्ठे । तए णं से गोसाले मंखलिपुत्ते सएणं तेएणं अण्णाइट्ठे समाणे समणं भगवं महावीरं एवं वयासी-तुमं णं आउसो ! कासवा ! ममं तवेणं तेएणं अण्णाइट्ठे समाणे अंतो छण्हं मासाणं पित्तज्जरपरिगयसरीरे दाहवक्कंतोए छउमत्थे चेव कालं करिस्ससि । तए णं समणे भगवं महावीरे गोसालं मंखलिपुत्तं एवं वयासी-णो खलु अहं गोसाला ! तव तवेणं तेएणं अण्णाइट्ठे

समाणे अंतो छण्हं मासाणं जाव कालं करिस्सामि, अहण्णं अण्णाइं सोलस वासाइं जिणे सुहत्थी विहरिस्सामि । तुमं णं गोसाला ! अप्पणां चैव सएणं तेएणं अण्णाइट्ठे समणे अंतो सत्तरत्तस्स पित्तञ्जरपरिगयसरीरे जाव छउमत्थे चैव कालं करिस्ससि । तए णं सावत्थीए णयरीए सिधाडग जाव पहेसु बहुजणो अण्णमण्णस्स एवमाइक्खइ जाव एवं परूवेइ—एवं खलु देवाणुप्पिया ! सावत्थीए णयरीए बहिया कोट्टुए चेइए दुवे जिणा संलवन्ति, एगे एवं वयन्ति—तुमं पुंवि कालं करिस्ससि एगे एवं वयन्ति तुमं पुंवि कालं करिस्ससि, तत्थ णं के पुण सम्मावाई के पुण मिच्छावाई ? तत्थ णं जे से अहप्पहाणे जणे से वयइ—समणे भगवं महावीरे सम्मावाई गोसाले मंखलिपुत्ते मिच्छावाई । अज्जोत्ति ! समणे भगवं महावीरे समणे णिगंथे आमंतेत्ता एवं वयासी—अज्जो ! से जहाणामए तणरासीइ वा कट्टरासीइ वा पत्तरासीइ वा तयारासीइ वा तुसरासीइ वा भुनरासीइ वा गोमयरासीइ वा अवकररासीइ वा अगणिज्जामिए अगणिज्जूसिए अगणिपरिणामिए ह्यतेए गयतेए णट्टेए भट्टेए लुत्तेए विणट्टेए जाव एवा-मेव गोसाले मंखलिपुत्ते ममं वहाए सरीरगसि तेयं णिसिरिन्ता ह्यतेए गयतेए जाव विणट्टेए जाए, तं छदेणं अज्जो ! तुव्वे गोसालं मंखलिपुत्तं धम्मयाए पडिचोयणाए पडिचोएह धम्मि० २ ता धम्मियाए पडिसारणाए पडिसारेह धम्मि० २ ता धम्मिएणं पडोयारेणं पडोयारेह धम्मि० २ ता अट्ठेहि य हेऊहि य पसिणेहि य वागरणेहि य कारणेहि य णिप्पट्टपसिणवागरणं करेह । तए णं ते समणा णिगंथा समणेणं भगवया महावीरेणं एवं वुत्ता सभाणा समणं भगवं महावीरं वंदंति णमंसंति वंदित्ता णमंसित्ता जेणेव गोसाले मंखलिपुत्ते तेणेव उवागच्छंति तेणेव उवागच्छित्ता गोसालं मंखलिपुत्तं धम्मियाए पडिचोयणाए पडिचोएति ध० २ ता धम्मियाए पडिसारणाए पडिसारंति ध० २ ता धम्मिएणं पडोयारेणं पडोयारंति ध० २ ता अट्ठेहि य हेऊहि य कारणेहि य जाव वागरणं करंति । तए ण से गोसाले मंखलिपुत्ते समणेहि णिगंथेहि धम्मियाए पडिचोयणाए पडिचोइज्जमाणे जाव णिप्पट्टपसिणवागरणे कीरमाणे आमुहत्ते जाव मिसिमिसेमाणे णो संचाएइ समणाणं णिगंथाणं सरीरगस्स किञ्चि आवाहं वा वावाहं वा उप्पाएत्तए छविच्छेदं वा करेत्तए । तए णं ते आजीविया थेरा गोसालं मंखलिपुत्तं समणेहि णिगंथेहि धम्मियाए पडिचोयणाए पडिचोएज्जमाणं धम्मियाए पडिसारणाए पडिसारिज्जमाणं धम्मिएणं पडोयारेणं पडोया-

रिञ्जमाणं अट्ठेहि य हेऊहि य जाव कीरमाणं आसुक्तं जाव मिसिमिसेमाणं
समणाणं णिगंगयाणं सरीरगस्स किञ्चि आबाहं वा वाबाहं वा छविच्छेदं वा
अकरेमाणं पासंसि २ ता गोसालस्स मंखलिपुत्तस्स अंतियाओ आयाए अवक्क-
मंति आयाए अवक्कमित्ता जेणेव समणे भगवं महावीरे तेणेव उवागच्छंति ते०
२ ता समणं भगवं महावीरं तिवक्खुत्तो आयाहिणं पयाहिणं० वंदंति णमंसंति
वं० २ ता समणं भगवं महावीरं उवसंपज्जित्ताणं विहरंति, अत्येगइया आजो-
विषा थेरा गोसालं च्चेव मंखलिपुत्तं उवसंपज्जित्ताणं विहरंति । तए णं से
गोसाले मंखलिपुत्ते जस्सट्ठाए हव्वमागए तमट्ठं असाहेमाणे रुंदाइं पलोएमाणे
दीहुण्हाइं णीससमाणे दाडियाए लोमाए लुंचमाणे अवडुं कंडूयमाणे पुयल्लि
पफोडेमाणे हृत्ये विणिद्धमाणे दोहिवि पाएहिं भूमि कोट्टेमाणे हाहा अहो !
हूओऽहमस्सीतिकट्टु समणस्स भगवओ महावीरस्स अंतियाओ कोट्टयाओ
चेइयाओ पडिणिव्वमइ २ ता जेणेव सावत्थी णयरी जेणेव हालाहलाए
कुंभकारीए कुंभकारावणे तेणेव उवागच्छइ ते० २ ता हालाहलाए कुंभकारीए
कुंभकारावणंसि अंबकूणगहत्थगए मज्जपाणं पियमाणे अभिक्खणं गायमाणे
अभिक्खणं णच्चमाणे अभिक्खणं हालाहलाए कुंभकारीए अंजलिकम्मं करे-
माणे सीयलएणं मट्टियापाणएणं आयंच्चणुउदएणं गायइं परिंसिचमाणे विह-
रइ ॥ ५५२ ॥ अज्जोत्ति ! समणे भगवं महावीरे समणे णिगंगंथे आमंतेत्ता
एवं वयासी-जावइएणं अज्जो ! गोसालेणं मंखलिपुत्तेणं ममं वहाए सरीरगंसि
तेए णिसट्ठे से णं अत्ताहि पज्जत्ते सोलसण्हं जणवयाणं, तं०-अंगाणं वंगाणं
मगहाणं मलयणं मालवगाणं अच्छाणं वच्छाणं कोच्छाणं पाढाणं लाढाणं
वज्जीणं मोलीणं कासीणं कोसलाणं अवाहाणं सुंभुत्तराणं घायाए वहाए
उच्छादणयाए भासीकरणयाए, जंपि य अज्जो ! गोसाले मंखलिपुत्ते हाला-
हलाए कुंभकारीए कुंभकारावणंसि अंबकूणगहत्थगए मज्जपाणं पियमाणे
अभिक्खणं जाव अंजलिकम्मं करेमाणे विहरइ, तस्सवि य णं वज्जस्स पच्छा-
दणट्टयाए इमाइं अट्ट चरिमाइं पणवइ, तंजहा-चरिमे पाणे, चरिमे गोए,
चरिमे णट्टे, चरिमे अंजलिकम्मे, चरिमे पोक्खलसंवट्टए महामेहे, चरिमे
सैयणए गंघहत्थी, चरिमे महासिलाकंटए संगामे, अहं च णं इमीसे ओसप्पि-
णीए उउवीसाए तित्थयराणं चरिमे तित्थयरे सिज्झस्सं जाव अंतं करेस्सं ति,

जं पिय अज्जो ! गोसाले मंखलिवुत्ते सीयलएणं मट्टियापाणएणं आवंचणिउद-
एणं गायाइं परिसिचमाणे विहरइ, तस्सवि य णं वज्जस्स पच्छादणट्टयाए इमाइं
चत्तारि पाणगाइं चत्तारि अपाणगाइं पण्णवेइ । से किं तं पाणए ? पाणए चउ-
च्चिहे पण्णत्ते, तंजहा—गोपुट्टए, हत्थमट्टियए, आयवत्तए, सिलापणमट्टए, सेत्तं
पाणए । से किं तं अपाणए ? अपाणए चउच्चिहे पण्णत्ते, तंजहा—थालपाणए,
तयापाणए सिबलिपाणए सुद्धपाणए । से किं तं थालपाणए ? २ जण्णं दाथालगं
वा दावारगं वा दाकुंभगं वा दाकलसं वा सीयलगं उल्लगं हत्थेहिं परामुसइ ण
य पाणियं पियइ, सेत्तं थालपाणए । से किं तं तयापाणए ? २ जण्णं अंब वा
अंबाडगं वा जहा पओगपए जाव बोरें वा तिदुरुयं वा तरुणं वा आभगं वा
आसगंसि आवीलेइ वा पवीलेइ वा ण य पाणियं पियइ, सेत्तं तयापाणए । से
किं तं सिबलिपाणए ? २ जण्णं कलसंगलियं वा मुग्गसंगलियं वा माससंगलियं
वा सिबलिसंगलियं वा तरुणियं आमियं आसगंसि आवीलेइ वा पवीलेइ वा
ण य पाणियं पियइ, सेत्तं सिबलिपाणए । से किं तं सुद्धपाणए ? सुद्धपाणए
जण्णं छम्मासे सुद्धखाइमं खाइ दो मासे पुढविंसंथारोवगए दो मासे कट्टसंथा-
रोवगए दो मासे दम्मसंथारोवगए, तस्स णं बहुपट्टिपुण्णणं छण्हं मासाणं
अंतिमराईए इमे दो देवा महिड्डिया जाव महेसवखा अंतियं पाउट्ठमवन्ति, तं—
पुण्णभट्टे य माणिभट्टे य । तए णं ते देवा सीयलएहि उल्लएहि हत्थेहिं गायाइं
परामुसंति, जे णं ते देवे साइज्जइ से णं आसीविसत्ताए कम्मं पकरेइ, जे णं
ते देवे णो साइज्जइ तस्स णं संसि सरोरगंसि अगणिकाए संभवइ, से णं सएणं
तेएणं सरोरगं ज्ञामेइ स० २ ता तओ पच्छा सिज्जइ जाव अंतं करेइ, सेत्तं
सुद्धपाणए । तत्थ णं सावत्थीए णयरीए अयंपुले णामं आजीविओवासए परि-
वसइ अड्ढे जाव अपरिमूए जहा हालाहला जाव आजीवियसमएणं अप्पाणं
भावेमाणे विहरइ । तए णं तस्स अयंपुलस्स आजीविओवासगस्स अण्णया कयाइ
पुच्चरसावरत्तकालसमयंसि कुडुंबजागरियं जागरमाणस्स अयमेयारूवे अज्जत्थिए
जाव समुप्पज्जित्या—किंसंठिया हल्ला पण्णत्ता ? तए णं तस्स अयंपुलस्स
आजीविओवासगस्स दोच्चंपि अयमेयारूवे अज्जत्थिए जाव समुप्पज्जित्या—एवं
खलु ममं धम्मोवएसए गोसाले मंखलिवुत्ते उप्पण्णणागदंतणधरे
जाव सव्वण्णू सव्वदरिसी इहेव सावत्थीए णयरीए हालाहलाए कुंभकारीए

कुंभकारावर्णसि आजीवियसंघसंपरिवृद्धे आजीवियसमएणं अप्पाणं भावेमाणे विहरइ, तं सेयं खलु मे कल्लं जाव जलंते गोसालं मंखलिपुत्तं बंदिता जाव पञ्जुवासित्ता इमं एयारुवं वागरणं वागरित्तए त्ति कट्टु एवं संपेहेइ संपेहिता कल्लं जाव जलंते ग्हाए कथं जाव अप्पमहग्घाभरणालंक्रियसरिरे साओ गिहाओ पडिणिकखमइ सा० २ ता पायविहारचारेणं सार्वत्थि णयारि मज्झं-मज्जेणं जेणेव हालाहलाए कुंभकारीए कुंभकारावणे तेणेव उवागच्छइ २ ता गोसालं मंखलिपुत्तं हालाहलाए कुंभकारीए कुंभकारावर्णसि अंबकूण-गह्वरथगयं जाव अंजलिकम्मं करेमाणं सीयलएणं मट्टिया जाव गायार्इ परिंसिचमाणं पासइ २ ता लज्जिए विलिए विड्डे सणियं २ पच्चोसवकइ । तए णं ते आजीविया थेरा अयंपुत्तं आजीवियोवासगं लज्जियं जाव पच्चोस-क्कमाणं पासइ २ ता एवं वयासी—एहि ताव अयंपुत्ता ! एतओ । तए णं से अयंपुत्ते आजीवियोवासए आजीवियथेरेहि एवं वृत्ते समाणे जेणेव आजीविया थेरा तेणेव उवागच्छइ उवागच्छित्ता आजीविए थेरे वदइ णमंसइ वं० २ ता णच्चसाण्णे जाव पञ्जुवासइ । अयंपुत्ताइ ! आजीविया थेरा अयंपुत्तं आजीवियोवासगं एवं वयासी—से णूणं ते अयंपुत्ता ! पुव्वरत्तावरत्तकाल-समयंसि जाव किंसंठिया हल्ला पणत्ता ? तए णं तव अयंपुत्ता ! दोच्चंपि अयमेया० तं चेव सव्वं भाणियव्वं जाव सार्वत्थि णयारि मज्झंमज्जेणं जेणेव हालाहलाए कुंभकारीए कुंभकारावणे जेणेव इहं तेणेव हव्वमागए, से णूणं ते अयंपुत्ता ! अट्ठे समट्ठे ? हंता अत्थि । जंपि य अयंपुत्ता ! तव धम्मा-यारिए धम्मोवएसए गोसाले मंखलिपुत्ते हालाहलाए कुंभकारीए कुंभकारावर्णसि अंबकूणगह्वरथगए जाव अंजलि करेमाणे विहरइ, तत्थवि णं भगवं इमाइं अट्ठ-चारिमाइं पणवेइ, तं०—चारिमे पाणे जाव अंतं करेस्सइ, जंपि य अयंपुत्ता ! तव धम्मायारिए धम्मोवएसए गोसाले मंखलिपुत्ते सीयलएणं मट्टिया जाव विहरइ, तत्थवि णं भगवं इमाइं चत्तारि पाणगाइं चत्तारि अपाणगाइं पणवेइ, से किं तं पाणए ? पाणए जाव तओ पच्छा सिज्झइ जाव अंतं करेइ, तं गच्छह णं तुमं अयंपुत्ता ! एस चेव तव धम्मायारिए धम्मोवएसए गोसाले मंखलिपुत्ते इमं एयारुवं वागरणं वागरेहिति । तए णं से अयंपुत्ते आजी-वियोवासए आजीविएहि थेरेरेहि एवं वृत्ते समाणे हट्टुट्टु० उट्टाए उट्ठेइ उ० २

त्ता जेणेव गोसाले मंखलिपुत्ते तेणेव पहारेत्थ गमणाए । तए णं ते आजीविया थेरा गोसालस्स मंखलिपुत्तस्स अंबकूणगएडावणट्टयाए एगंतमते संगारं कुब्बंति । तए णं से गोसाले मंखलिपुत्ते आजीवियाणं थेराणं संगारं पडिच्छइ २ ता अंबकूणगं एगंतमते एडेइ । तए णं से अयंपुले आजीवियोवासए जेणेव गोसाले मंखलिपुत्ते तेणेव उवागच्छइ उवागच्छिता गोसालं मंखलिपुत्तं तिक्खुतो जाव पज्जुवासइ । अयंपुलाइ ! गोसाले मंखलिपुत्ते अयंपुलं आजीवियोवासगं एवं वयासी—से णूणं अयंपुला ! पुव्वरत्तावरत्तकालसमयंसि जाव जेणेव ममं अस्थियं तेणेव हृद्वमागए, से णूणं अयंपुला ! मट्ठे समट्ठे ? हंता अस्थि, तं णो खलु एस अंबकूणए अंबचोयए णं एसे, किसंठिया हल्ला पण्णत्ता ? वंसीमूलसंठिया हल्ला पण्णत्ता । वीणं वाएहि रे वीरगा ! वी० २ । तए णं से अयंपुले आजीवियोवासए गोसालेणं मंखलिपुत्तेणं इमं एयारूवं वागरणं वागरिए समाणे हट्टुट्टु जाव हियए गोसालं मंखलिपुत्तं वंदइ णमंसइ वं० २ ता पसि-णाइं पुच्छइ २ ता अट्टाईं परियावियइ अ० ता उट्टाए उट्ठेइ उ० २ ता गोसालं मंखलिपुत्तं वंदइ णमंसइ वं० २ ता जाव पडिगए । तए णं से गोसाले मंखलिपुत्ते अप्पणे भरणं आभोएइ २ ता आजीविए थेरे सद्दावेइ आ० २ ता एवं वयासी—तुभे णं देवाणुप्पिया ! ममं कालगयं जाणित्ता सुरभिणा गंधो-दएणं ण्हाणेह सु० २ ता पम्हलसुकुमालाए गंधकासाईए गायाइं लूहेह गा० २ ता सरसेणं गोसीसच्चंणेणं गायाइं अणुलिपह स० २ ता महरिहं हंसलवल्लणं पडसाडयं णियंसेह मह० २ ता सव्वालंकारविभूसियं करेह स० २ ता पुरिस-सहस्सवाहिंणं सीयं डुरूहेह पुरि० ता सावत्थीए णयरीए सिधाडग जाव पहेसु महया-महया सहेणं उग्घोसेमाणा २ एवं वयह—एवं खलु देवाणुप्पिया ! गोसाले मंखलिपुत्ते जिणे जिणप्पलावी जाव जिणसहं पगासेमाणे विहरित्ता इभोसे ओसप्पिणीए चउवीसाए तित्थयराणं चरिमे तित्थयरे सिद्धे जाव सव्वदुक्खप्प-हीणे, इड्ढीसवकारसमुदएणं ममं सरीरगस्स णीहरणं करेह । तए णं ते आजी-विया थेरा गोसालस्स मंखलिपुत्तस्स एयमट्ठं विणएणं पडिसुणंति ॥ ५५३ ॥ तए णं तस्स गोसालस्स मंखलिपुत्तस्स सत्तरत्तंसि परिणममाणंसि पडिलद्धसम्म-त्तस्स अयमेयारूवे अज्झत्थिए जाव समुप्पज्जित्था—णो खलु अहं जिणे जिणप्प-लावी जाव जिणसहं पगासेमाणे विहरइ, अहं णं गोसाले चेव मंखलिपुत्ते समण-

घायए समणमारए समणपडिणीए आयरियउवज्झायाणं अयसकारए अवष्ण-
कारए अकित्तिकारए ब्रह्मि असम्भावुम्भावणाहि मिच्छत्ताभिणिवेसेहि य
अप्पाणं वा परं वा तदुभयं वा बुग्गाहेमाणे वुप्पाएमाणे विहरित्ता सएणं तेएणं
अण्णाइट्ठे समाणे अंतो सत्तरत्तस्स पित्तज्जरपरिगयसरीरे दाहवक्कतोए छउ-
मत्थे चेव कालं करेस्सं, समणे भगवं महावीरे जिणे जिणप्पलावी जाव जिण-
सद्दं पगासेमाणे विहरइ, एवं संपेहेइ एवं संपेहिता आजीविए थेरे सहावेइ आ० २
त्ता उच्चवावयसवहसाविए पकरेइ उच्च० २ ता एवं वयासी-णो खलु अहं जिणे
जिणप्पलावी जाव पगासेमाणे विहरइ, अहण्णं गोसाले मंखलिपुत्ते समणघायए
जाव छउमत्थे चेव कालं करेस्सं, समणे भगवं महावीरे जिणे जिणप्पलावी
जाव जिणसद्दं पगासेमाणे विहरइ, तं तुब्भे णं देवाणुप्पिया ! ममं कालगयं
जाणित्ता वामे पाए सुंबेणं बंधह वा० २ ता तिव्खुत्तो मुहे उट्ठुभह ति० २
त्ता सावत्थीए णयरीए सिघाडग जाव पहेसु आकडुविकाडु करेमाणा महया २
सद्दं उग्घोसेमाणा २ एवं वयह-णो खलु देवाणुप्पिया ! गोसाले मंखलिपुत्ते
जिणे जिणप्पलावी जाव विहरिए, एस णं गोसाले चेव मंखलिपुत्ते समणघायए
जाव छउमत्थे चेव कालगए, समणे भगवं महावीरे जिणे जिणप्पलावी जाव
विहरइ, महया अणिड्ढीअसक्कारसमुदएणं ममं सरीरगस्स णीहरणं करेज्जाह,
एवं वदित्ता कालगए ॥ ५५४ ॥ तए णं आजीविथा थेरा गोसालं मंखलिपुत्तं
कालगयं जाणित्ता हालाहलाए कुंभकारीए कुंभकारावणस्स बुवारइं पिहेति
दु० २ ता हालाहलाए कुंभकारीए कुंभकारावणस्स बहुमज्झदेसभाए सावत्थि
णयरीं आलिहति सा० २ ता गोसालस्स मंखलिपुत्तस्स सरीरगं वामे पाए सुंबेणं
बंधति वा० २ ता तिव्खुत्तो मुहे उट्ठुभंति २ ता सावत्थीए णयरीए सिघाडग
जाव पहेसु आकडुविकाडु करेमाणा णीयं २ सद्दं उग्घोसेमाणा २ एवं वयासी-
णो खलु देवाणुप्पिया ! गोसाले मंखलिपुत्ते जिणे जिणप्पलावी जाव विहरए,
एस णं गोसाले चेव मंखलिपुत्ते समणघायए जाव छउमत्थे चेव कालगए, समणे
भगवं महावीरे जिणे जिणप्पलावी जाव विहरइ, सवहपडिमोक्खणगं करेति
स० २ ता दोच्चंपि पूयासक्कारथिरीकरणट्टयाए गोसालस्स मंखलिपुत्तस्स
वामाओ पायाओ सुंबं मुयंति सु० ता हालाहलाए कुंभकारीए कुंभकारावणस्स
बुवारवयणाइं अवगुंति २ ता गोसालस्स मंखलिपुत्तस्स सरीरगं सुरभिणा

गंधोदणं ष्णार्णेतितं चैव जाव महया इड्ढीसक्कारसमुदणं गोसालस्स
 मंखलिपुत्तस्स सरीरगस्स णीहरणं करेति ॥ ५५५ ॥ तए णं समणे भगवं महा-
 वीरे अण्णया कयाइ सावत्थीओ णयरीओ कोट्टयाओ चेइयाओ पडिणिकलमइ
 २ ता बहिया जणवयविहारं विहरइ । तेणं कालेणं तेणं समएणं भेडियगामे
 णामं णयरे होत्था वण्णओ, तस्स णं भेडियगामस्स णयरस्स बहिया उत्तरपुरत्थिमे
 दिसीभाए एत्थ णं सालकोट्टए णामं चेइए होत्था वण्णओ जाव पुढविसिला-
 पट्टओ, तस्स णं सालकोट्टगस्स चेइयरस अदूरसामंते एत्थ णं महगे मालुया-
 कच्छए यावि होत्था किण्हे किण्होभासे जाव णिकुखंबभूए पत्तिए पुण्णिए फल्लिए
 हरिययरेरिज्जसाणे सिरीए अईव २ उवसोभेमाणे २ चिट्टइ । तत्थ णं भेडिय-
 गामे णयरे रेवई णामं गाहावइणी परिवसइ अड्डा जाव अपरिभूया, तए णं
 समणे भगवं महावीरे अण्णया कयाइ पुट्ठाणुपुण्ड्वि चरमाणे जाव जेणेव भेडिय-
 गामे णयरे जेणेव सालकोट्टए चेइए जाव परिसा पडिगया । तए णं समणस्स
 भगवओ महावीरस्स सरीरगसि विउले रोगायके पाउठभूए उज्जले जाव दुरहि-
 यासे पित्तज्जरपरिगयसरीरे दाहवक्कतीए यावि विहरइ, अविद्याइं लोहिय-
 वच्चाइंपि पकरेइ, चाउवण्णं वागरेइ—एवं खलु समणे भगवं महावीरे गोसा-
 लस्स मंखलिपुत्तस्स तवेणं तेएणं अण्णाइट्ठे समाणे अंतो छण्हं मासाणं पित्तज्जर-
 परिगयसरीरे दाहवक्कतीए छउमत्थे चैव कालं करिस्सइ । तेणं कालेणं तेणं
 समएणं समणस्स भगवओ महावीरस्स अंतेवासी सीहे णामं अण्णगारे पगइभद्दए
 जाव विणीए मालुयाकच्छगस्स अदूरसामंते छट्ठंछट्ठेणं अण्णिक्लत्तेणं तवो-
 कम्मेणं उड्ढं बाहाओ जाव विहरइ । तए णं तस्स सीहस्स अण्णगरस्स ज्ञाणंत-
 रियाए वट्टमाणस्स अयमेयारूवे जाव समुप्पज्जित्था—एवं खलु ममं धम्ममारियस्स
 धम्मोवएसगस्स समणस्स भगवओ महावीरस्स सरीरगसि विउलेरोगायके पाउ-
 ठभूए उज्जले जाव छउमत्थे चैव कालं करेस्सइ, वदिसंति य णं अण्णतित्थिया
 छउमत्थे चैव कात्तगए, इमेणं एयारूवेणं महया मणोमाणसिएणं दुक्खेणं अभि-
 भूए समाणे आयावणभूमिओ पच्चोरुहइ आया० २ ता जेणेव मालुयाकच्छए
 तेणेव उवागच्छइ २ ता मालुयाकच्छयं अंतो २ अणुप्पविसइ मालुया० २ ता
 महया २ सद्देषं कुहकुह्वस्स परुण्णे ! अज्जोत्ति ! समणे भगवं महावीरे समणे
 णिगमथे आमंतेइ २ ता एवं वयासी—एवं खलु अज्जो ! ममं अंतेवासी सीहे

णामं अणगारे पगइमट्टए तं चेव सब्बं भाणियव्वं जाव पहण्णे, तं गच्छह णं अज्जो ! तुभं सीहं अणगारं सहइ । तए णं ते समणा णिग्गंथा समणेणं भगवया महावीरेणं एवं वुत्ता समाणा समणं भगवं महावीरं वंदंति णमंसंति वं० २

त्ता समणस्स भगवओ महावीरस्स अंतियाओ सालकोट्टयाओ चेइयाओ पडिणिवखमति सा० २ त्ता जेणेव मालुयाकच्छए जेणेव सीहे अणगारे तेणेव उवागच्छंति २ त्ता सीहं अणगारं एवं वयासी-सीहा ! धम्मघरिया सदावेति । तए णं से सीहे अणगारे समणेहं णिग्गंथेहिं सद्धि मालुयाकच्छयाओ पडिणिवखमइ २ त्ता जेणेव सालकोट्टए चेइए जेणेव समणे भगवं महावीरे तेणेव उवागच्छइ २ त्ता समणं भगवं महावीरं तिकखुत्तो आयाहिणं २ जाव पज्जुवासइ । सीहाइ ! समणे भगवं महावीरे सीहं अणगारं एवं वयासी-से णूणं ते सीहा ! ज्ञानंतरियाए बट्टमाणस्स अयमेयाखुवे जाव पहण्णे, से णूणं ते सीहा ! अट्ठे समट्ठे ? हंता अत्थि, तं णो खलु अहं सीहा ! गोसालस्स मंखलिपुत्तस्स तवेणं तेएणं अण्णाइट्ठे समाणे अंतो छहं मासाणं जाव कालं करेस्सं, अहण्णं अण्णाइं अट्ठसोत्तसथासाइं जिणे सुहत्थी विहरिस्सामि । तं गच्छह णं तुमं सीहा ! मँडियगामं णयरं रेवईए गाहावइणीए गिहे, तत्थ णं रेवईए गाहावइणीए ममं अट्टाए बुवे कवोयसरीरा उववस्सइया तेहिं णो अट्ठो अत्थि से अण्णे पारियासिए मज्जारकडए कुक्कुडमंसए तमाहराहि एएणं अट्ठो । तए णं से सीहे अणगारे समणेणं भगवया महावीरेणं एवं वुत्ते समाणे हट्टुट्ट जाव हियए समणं भगवं महावीरं वंदइ णमंसइ वंदित्ता णमंसित्ता अतुरियमच्चवलमसंभंतं मूहपोत्तियं पडिलेहेइ सु० २ त्ता जहा गोयमसामी जाव जेणेव समणे भगवं महावीरे तेणेव उवागच्छइ २ त्ता समणं भगवं महावीरं वंदइ णमंसइ वं० २ त्ता समणस्स भगवओ महावीरस्स अंतियाओ सालकोट्टयाओ चेइयाओ पडिणिवखमइ २ त्ता अतुरिय जाव जेणेव मँडियगामे णयरे तेणेव उवागच्छइ २ त्ता मँडियगामं णयरं मज्झमज्जेणं जेणेव रेवईए गाहावइणीए गिहे तेणेव उवागच्छइ २ त्ता रेवईए गाहावइणीए गिहं अणुप्पविट्ठे । तए णं सा रेवई गाहावइणी सीहं अणगारं एज्जमाणं पासइ २ त्ता हट्टुट्टु० खिप्पामेव आसणाओ अब्भुट्ठेइ २ त्ता सीहं अणगारं सत्तट्टुपयाइ अणुगच्छइ स० २ त्ता तिकखुत्तो आयाहिणं पयाहिणं० वंदइ णमंसइ वं० २ त्ता एवं वयासी-संदिसंतु णं देवाणुप्पिया ! किमागमणप्पओयणं ? तए णं से सीहे

अणगारे रेवईं गाहावइणी एवं वयासी—एवं खलु तुमे देवानुप्पिए ! समणस्स भगवओ महावीरस्स अट्टाए दुवे कवोपसरीरा उवक्खडिमा तेहि णो अट्ठो, अत्थि ते अण्णे पारियासिए मज्जारकडए कुक्कुडमंसए एयमाहराहि तेणं अट्ठो । तए णं सा रेवईं गाहावइणी सीहं अणगारं एवं वयासी—केस णं सीहा ! से णाणी वा तवस्सी वा जेणं तव एस अट्ठे मम ताव रहस्सकडे हव्वमक्खाए जओ णं तुमं जाणासि ? एवं जहा खंदए जाव जओ णं अहं जाणामि । तए णं सा रेवईं गाहावइणी सीहस्स अणगारस्स अंतियं एयमट्ठं सोच्चा णिसम्म हट्टुत्तुट्ठा जेणेव भत्तधरे तेणेव उवागच्छइ २ ता पत्तणं मोएइ पत्तणं मोएत्ता जेणेव सीहे अणगारे तेणेव उवागच्छइ २ ता सीहस्स अणगारस्स पडिग्गहगंसि तं सब्बं सम्मं णित्सिरइ । तए णं तीए रेवईए गाहावइणीए तेणं दव्वमुद्धेणं जाव दाणेणं सीहे अणगारे पडिलाभिए समाणे देवाउए णिबद्धे जहा विजयस्स जाव जम्मजीवियफले रेवईए गाहावइणीए रेवईए गाहावइणीए । तए णं से सीहे अणगारे रेवईए गाहावइणीए गिहाओ पडिणिक्कमइ २ ता मँद्धियगामं णयरं मज्झमज्झेणं णिग्गच्छइ णिग्गच्छइत्ता जहा गोयमसामी जाव भत्तपाणं पडि-दंसेइ २ ता समणस्स भगवओ महावीरस्स पाणिसि तं सब्बं सम्मं णित्सिरइ । तए णं समणे भगवं महावीरे अमुच्छिए जाव अणज्जोववण्णे विलमिव पण्णम-भूएणं अप्पाणेणं तमाहारं सरीकोट्टगंसि पविखवइ । तए णं समणस्स भगवओ महावीरस्स तमाहारं आहारियस्स समाणस्स से विउले रोगायके विप्पामेव उवसमं पत्ते हट्ठं जाए आरोग्गे बलियसरीरे तुट्ठा समणा तुट्ठाओ समणीओ तुट्ठा सावया तुट्ठाओ सावियाओ तुट्ठा देवा तुट्ठाओ देवीओ सवेवमणुयसुरे तीए तुट्ठे हट्ठे जाए समणे भगवं महावीरे हट्ठे ० २॥ ५५६ ॥ भतेत्ति ! भगवं गोयमे समणं भगवं महावीरं चंदइ णमंसइ वं ० २ ता एवं वयासी—एवं खलु देवानुप्पियाणं अंतेवासी पाईणजाणवए सव्वाणुभूर्इ णामं अणगारे पगइभइए जाव विणीए, से णं भंते ! तथा गोसालेणं मंखलिपुत्तेणं तवेणं तेएणं भासरासीकए समाणे कहिं गए कहिं उववण्णे ? एवं खलु गोयमा ! ममं अंतेवासी पाईणजाणवए सव्वा-णुभूर्इ णामं अणगारे पगइभइए जाव विणीए, से णं तथा गोसालेणं मंखलि-पुत्तेणं तवेणं तेएणं भासरासीकए समाणे उड्ढं चंदिमसूरिय जाव बंभलंतक-महासुक्के कप्पे वीईवइत्ता सहससारे कप्पे देवताए उववण्णे, तत्थ णं अत्थेगइ-

याणं देवाणं अट्टारस्स सागरोवमाइं ठिई पणत्ता, तत्थ णं सव्वाणुभूइस्सवि
 वेवस्स अट्टारस्स सागरोवमाइं ठिई पणत्ता, सेणं सव्वाणुभूई देवे ताओ देव-
 लोमाओ आउक्खएणं भवक्खएणं ठिइक्खएणं जाव महाविदेहे वासे सिज्झिहिइ
 जाव अंतं करेहिइ । एवं खलु देवाणुप्पियाणं अंतेवासी कोसलजाणवए सुणक्खत्ते
 णामं अणगारे पगइभट्टए जाव विणीए, से णं भंते ! तया गोसालेणं मंखलि-
 पुत्तेणं तवेणं तेएणं परिताविए समाणे कालमासे कालं किच्चा कंहि गए कंहि
 उववण्णे ? एवं खलु गोयमा ! ममं अंतेवासी सुणक्खत्ते णामं अणगारे पगइ-
 भट्टए जाव विणीए, से णं तया गोसालेणं मंखलिपुत्तेणं तवेणं तेएणं परिताविए
 समाणे जेणेव ममं अंतिए तेणेव उवागच्छइ २ ता वंदइ णमंसइ वं० २ ता
 सयमेव पंच महव्वयाइं आरुहेइ सयमेव पंच महव्वयाइं आरुहेत्ता समणा य
 समणीओ य खामेइ २ ता आलोइयपडिक्कंते समाहिपत्ते कालमासे कालं
 किच्चा उड्ढं चंदिमसूरिय जाव आणयपाणयारणकप्पे बीईवइत्ता अच्चए कप्पे
 देवत्ताए उववण्णे, तत्थ णं अत्थेगइयाणं देवाणं बावीसं सागरोवमाइं ठिई
 पणत्ता, तत्थ णं सुणक्खत्तस्सवि देवस्स बावीसं सागरोवमाइं सेसं जहा
 सव्वाणुभूइस्स जाव अंतं काहिइ ॥५५७॥एवं खलु देवाणुप्पियाणं अंतेवासी
 कुसिस्से गोसाले णामं मंखलिपुत्ते से णं भंते ! गोसाले मंखलिपुत्ते कालमासे
 कालं किच्चा कंहि गए कंहि उववण्णे ? एवं खलु गोयमा ! ममं अंतेवासी
 कुसिस्से गोसाले णामं मंखलिपुत्ते समणघायए जाव छउमत्थे चेव कालमासे
 कालं किच्चा उड्ढं चंदिमसूरिय जाव अच्चए कप्पे देवत्ताए उववण्णे, तत्थ णं
 अत्थेगइयाणं देवाणं बावीसं सागरोवमाइं ठिई ५०, तत्थ णं गोसालस्सवि
 देवस्स बावीसं सागरोवमाइं ठिई ५० । से णं भंते ! गोसाले देवे ताओ देव-
 लोमाओ आउक्खएणं ३ जाव कंहि उववज्जिहिइ ? गोयमा ! इहेव जंबूदीवे
 २ भारहे वासे विज्जगिरिपायमूले पुंडेसु जणवएसु सयदुवारे णधरे संभुइस्स
 रण्णे भट्टए भारियाए कुच्छिसि पुत्तत्ताए पक्खायाहिइ, से णं तत्थ णवण्हं
 मासाणं बहुपडिपुण्णाणं जाव बीइक्कंताणं जाव सुरुवे दारए पयाहिइ । जं रयाण
 च णं से दारए जाइहिइ तं रयाण च णं सयदुवारे णधरे सन्भितरवाहिरिए
 भारग्गसो य कुम्भसो य पउमवासे य रयणवासे य वासे वासिहिइ । तए णं
 तस्स दारगस्स अम्मापियरो एक्कारसमे दिवसे बीइक्कंते जाव संपत्ते बारसाह-

दिवसे अयमेयाकृवं गोष्णं गुणणिष्कणं णामधेज्जं कांहिति-जम्हा णं अम्हं
 इमंसि दारगंसि जायंसि समाणंसि सयदुवारे णयरे सन्निभतरबाहिरिए
 जाव रयणवासे बुट्ठे, तं होउ णं अम्हं इमस्स दारगस्स णामधेज्जं
 महापउमे-महापउमे, तए णं तस्स दारगस्स अम्मापियरो णामधेज्जं करेहिति
 महापउमेत्ति । तए णं तं महापउमं दारगं अम्मापियरो साइरेगट्टवासजायगं
 जाणिस्ता सोहणंसि तिहिकरणदिवसणक्खत्तमुहुत्तंसि महया २ रायाभिसेगेणं
 अभिसिचेहिति, से णं तत्थ राया भविस्सइ महया हिमवंतमहंतं० वण्णओ जाव
 विहरिस्सइ । तए णं तस्स महापउमस्स रण्णो अण्णया कयाइ दो देवा महिड्डिया
 जाव महेसक्खा सेणाकम्मं कांहिति, तं०-पुण्णभद्दे य माणिभद्दे य । तए णं सय-
 दुवारे णयरे बहवे राईसरतलवर जाव सत्थवाहपभिईओ अण्णमण्णं सद्दावेहिति
 अ० २ ता एवं वदेहिति-जम्हा णं देवाणुप्पिया ! अम्हं महापउमस्स रण्णो
 दो देवा महिड्डिया जाव सेणाकम्मं करेत्ति तं०-पुण्णभद्दे य माणिभद्दे य, तं
 होउ णं देवाणुप्पिया ! अम्हं महापउमस्स रण्णो दोच्चेवि णामधेज्जं देवसेणे २,
 तए णं तस्स महापउमस्स रण्णो दोच्चेवि णामधेज्जे भविस्सइ देवसेणेत्ति । तए
 णं तस्स देवसेणस्स रण्णो अण्णया कयाइ सेए संखतलविमलसण्णिगासे चउट्ठते
 हत्थिरयणे समुप्पज्जिस्सइ, तए णं से देवसेणे राया तं सेयं संखतलविमलसण्णि-
 गासं चउट्ठंतं हत्थिरयणं दुरूढे समाणे सयदुवारं णयरं मज्झमज्झेणं अभिक्खणं
 २ अइजाहिइ य णिज्जाहिइ य, तए णं सयदुवारे णयरे बहवे राईसर जाव
 पभिईओ अण्णमण्णं सद्दावेहिति अ० २ ता वदेहिति-जम्हा णं देवाणुप्पिया !
 अम्हं देवसेणस्स रण्णो सेए संखतलसण्णिगासे चउट्ठते हत्थिरयणे समुप्पणे, तं
 होउ णं देवाणुप्पिया ! अम्हं देवसेणस्स रण्णो तच्चेवि णामधेज्जे विमलवाहणे
 २. तए णं तस्स देवसेणस्स रण्णो तच्चेवि णामधेज्जे भविस्सइ विमलवाहणेत्ति ।
 तए णं से विमलवाहणे राया अण्णया कयाइ समणेहि णिग्गंथेहि मिच्छं विप्पाउ-
 वज्जिहिइ, अप्पेगइए आउसेहिइ, अप्पेगइए अवहंसिहिइ, अप्पेगइए णिच्छो-
 डेहिइ, अप्पेगइए णिब्बत्थेहिइ, अप्पेगइए बंधेहिइ, अप्पेगइए णिहुंभेहिइ,
 अप्पेगइयाणं छविच्छेदं करेहिइ, अप्पेगइए पमारोहिइ, अप्पेगइयाणं उट्ठेहिइ,
 अप्पेगइयाणं वत्थं पडिगहं कंबलं पायपुंछणं आच्छिदिहिइ विच्छिदिहिइ
 भिदिहिइ अवहरिहिइ, अप्पेगइयाणं भत्तपाणं वोच्छिदिहिइ, अप्पेगइए णिण्ण-

यरे करेहिइ, अप्पेगइए णिव्विसए करेहिइ । तएणं सयदुवारे णयरे बहवे राईसर जाव वदिहिइति—एवं खलु देवाणुप्पिया ! विमलवाहणे राया समणेहि णिगंथेहि मिच्छं विप्पडिवण्णे, अप्पेगइए आउसइ जाव णिव्विसए करेइ, तं णो खलु देवाणुप्पिया ! एयं अम्हं सेयं, णो खलु एयं विमलवाहणस्स रण्णो सेयं, णो खलु एयं रज्जस्स वा रट्टस्स वा बलस्स वा वाहणस्स वा पुरस्स वा अंतेउरस्स वा जणवयस्स वा सेयं जण्णं विमलवाहणे राया समणेहि णिगंथेहि मिच्छं विप्पडिवण्णे, तं सेयं खलु देवाणुप्पिया ! अम्हं विमलवाहणं रायं एयमट्ठं विण्णवित्तएत्तिकट्टु अण्णमण्णस्स अंतियं एयमट्ठं पडिसुणेति अ० २ ता जेणेव विमलवाहणे राया तेणेव उवागच्छंति २ ता करयलपरिगगहियं विमलवाहणं रायं जएणं विजएणं वट्ठावेति ज० २ ता एवं वपासी—एवं खलु देवाणुप्पिया ! समणेहि णिगंथेहि मिच्छं विप्पडिवण्णा, अप्पेगइए आउस्संति जाव अप्पेगइए णिव्विसए करेति, तं णो खलु एयं देवाणुप्पियाणं सेयं, णो खलु एयं अम्हं सेयं, णो खलु एयं रज्जस्स वा जाव जणवयस्स वा सेयं जं णं देवाणुप्पिया ! समणेहि णिगंथेहिमिच्छं विप्पडिवण्णा, तं विरमंतु णं देवाणुप्पिया ! एयस्स अट्टस्स अकरणयाए । तए णं से विमलवाहणे राया तेहि बहूहि राईसर जाव सत्यवाहप्पभिईहि एयमट्ठं विण्णत्ते समाणे णो धम्मोत्ति णो तवोत्ति मिच्छा-विणएणं एयमट्ठं पडिसुणेहिइ । तस्स णं सयदुवारस्स णयरस्स बहिधा उत्तर-पुरत्थिमे दिसीभाए एत्थ णं सुभूमिभागे णामं उज्जाणे भविस्सइ सब्बोउय० वण्णओ । तेणं कालेणं तेणं समएणं विमलस्स अरहओ पउप्पए सुमंगले णामं अणगारे जाइसंपण्णे जहा धम्मघोसस्स वण्णओ जाव संखितविउल्लतेयलेस्से तिण्णाणोवगए सुभूमिभागस्स उज्जाणस्स अदूरसामंते छट्ठंछट्ठेणं अणिविक्ख-त्तेणं जाव आयावेमाणे विहरिस्सइ । तए णं से विमलवाहणे राया अण्णया कयाइ रह्चरियं काउं णिज्जाहिइ । तए णं से विमलवाहणे राया सुभूमिभागस्स उज्जाणस्स अदूरसामंते रह्चरियं करेमाणे सुमंगलं अणगारं छट्ठंछट्ठेणं जाव आयावेमाणं पासिहिइ २ ता आसुरुत्ते जाव भिसिंमिसेमाणे सुमंमलं अणगारं रहसिरेणं णोल्लावेहिइ । तए णं से सुमंगले अणगारे विमलवाहणेणं रण्णा रह-सिरेणं णोल्लाविए समाणे सणियं २ उट्ठेहिइ २ ता दोच्चंपि उड्ढं बाहाओ पगिज्झिय २ जाव आयावेमाणे विहरिस्सइ । तए णं से विमलवाहणे राया

सुमंगलं अणगारं दोच्चंपि रहसिरेणं णोल्लावेहिइ । तए णं से सुमंगले अणगारे विमलवाहणेणं रण्णा दोच्चंपि रहसिरेणं णोल्लाविए समाणे सणियं २ उट्ठे-हिइ २ ता ओहिं पउंजेहिइ २ ता विमलवाहणस्स रण्णो तीतद्धं ओहिणा आभोएहिए २ ता विमलवाहणं रायं एवं वइहिइ—णो खलु तुमं विमलवाहणे राया, णो खलु तुमं देवसेणे राया, णो खलु तुमं महापउमे राया, सुमण्णं इओ तच्चे भवगहणे गोसाले णामं मंजलिपुत्ते होत्था, समणघायए जाव छउमत्थे चेव कालगए, तं जइ ते तथा सज्जाणुभूइणा अणगारेणं पभुणावि होऊणं सम्मं सहियं खमियं तितिविखयं अहियासियं, जइ ते तथा सुणक्खत्तेणं अणगारेणं पभुणावि होऊणं जाव अहियासियं, जइ ते तथा समणेणं भगवया महावीरेणं पभुणावि जाव अहियासियं । तं णो खलु ते अहं तथा सम्मं सहिस्सं जाव अहिया-सिस्सं, अहं ते णवरं सहयं सरहं ससारहियं तवेणं तेएणं एगाहच्चं कूडाहच्चं भासरासिं करेज्जामि । तए णं से विमलवाहणे राया सुमंगलेणं अणगारेणं एवं वुत्ते समाणे आसुरुत्ते जाव मिसिमिसेमाणे सुमंगलं अणगारं तच्चंपि रहसिरेणं णोल्लावेहिइ । तए णं से सुमंगले अणगारे विमलवाहणेणं रण्णा तच्चंपि रह-सिरेणं णोल्लाविए समाणे आसुरुत्ते जाव मिसिमिसेमाणे आयावणभूमीओ पच्चोसुहइ आ० ता तेयासमुग्घाएणं समोहण्हिइ तेया० २ ता सत्तट्टपयाइं पच्चोसक्किहिइ सत्तट्ट० २ ता विमलवाहणं रायं सहयं सरहं ससारहियं तवेणं तेएणं जाव भासरासिं करेहिइ । सुमंगले णं भंते ! अणगारे विमलवाहणं रायं सहयं जाव भासरासिं करेत्ता कंहि गच्छिहिइ कंहि उववज्जिहिइ ? गोयमा ! सुमंगले णं अणगारे विमलवाहणं रायं सहयं जाव भासरासिं करेत्ता बह्हि चउत्थच्छट्टट्टगदसमदुवालस जाव विचित्तीहं तवोकम्मैहि अप्पाणं भावेमाणे बह्हिं वासाइं सामणपरियागं पाउणिहिइ बहू० २ ता मासियाए संलेहणाए सट्ठि भत्ताइं अणसणाए जाव छेदेत्ता आलोइयपडिक्कंते समाहिपत्ते उड्डं चंदिम-सूरिय जाव गेविउज्जविमाणावाससयं वीईवइत्ता सव्वट्टसिद्धे महाविमाणे देवत्ताए उववज्जिहिइ, तत्थ णं देवाणं अजहण्णमणुक्कोसेणं तेत्तीसं सागरोवमाइं ठिई प०, तत्थ णं सुमंगलस्सवि देवस्स अजहण्णमणुक्कोसेणं तेत्तीसं सागरोवमाइं ठिई प० । से णं भंते ! सुमंगले देवे ताओ देवलोगाओ जाव महाविदेहे वासे सिज्जिहिइ जाव अंतं काहिइ ॥ ५५८ ॥ विमलवाहणे णं भंते ! राया सुमंग-

लेणं अणगारेणं सहए जाव भासरासीकए समाणे कंहि गच्छिहिइ कंहि उव-
वज्जिहिइ ? गीयमा ! विमलवाहणे णं राया सुमंगलेणं अणगारेणं सहए जाव
भासरासीकए समाणे अहे सत्तमाए पुढवीए उक्कोसकालट्टिइयंसि णरयंसि णेर-
इयत्ताए उववज्जिहिइ, से णं तओ अणंतरं उव्वट्टिता मच्छेसु उववज्जिहिइ,
तत्थवि णं सत्थवज्जे दाहवक्कंतीए कालमासे कालं किच्चा दोच्चंपि अहे सत्त-
माए पुढवीए उक्कोसकालट्टिइयंसि णरयंसि णेरइयत्ताए उववज्जिहिइ, से णं
तओ अणंतरं उव्वट्टिता दोच्चंपि मच्छेसु उववज्जिहिइ, तत्थवि णं सत्थवज्जे
जाव किच्चा छट्ठीए तमाए पुढवीए उक्कोसकालट्टिइयंसि णरयंसि णेरइयत्ताए
उववज्जिहिइ, से णं तओहितो जाव उव्वट्टिता इत्थियासु उववज्जिहिइ, तत्थवि
णं सत्थवज्जे दाह जाव दोच्चंपि छट्ठीए तमाए पुढवीए उक्कोसकाल जाव
उव्वट्टिता दोच्चंपि इत्थियासु उववज्जिहिइ, तत्थवि णं सत्थवज्जे जाव किच्चा
पंचमाए धूमप्पभाए पुढवीए उक्कोसकालट्टिइयंसि जाव उव्वट्टिता उरएसु उव-
वज्जिहिइ, तत्थवि णं सत्थवज्जे जाव किच्चा दोच्चंपि पंचमाए जाव उव्व-
ट्टिता दोच्चंपि उरएसु उववज्जिहिइ जाव किच्चा चउत्थीए पंकप्पभाए पुढवीए
उक्कोसकालट्टिइयंसि जाव उव्वट्टिता सीहेसु उववज्जिहिइ, तत्थवि णं सत्थ-
वज्जे तहेव जाव कालं किच्चा दोच्चंपि चउत्थीए पंकप्पभाए जाव उव्वट्टिता
दोच्चंपि सीहेसु उववज्जिहिइ जाव किच्चा तच्चाए वालुयप्पभाए पुढवीए
उक्कोसकाल जाव उव्वट्टिता पक्खीसु उववज्जिहिइ, तत्थवि णं सत्थवज्जे जाव
किच्चा दोच्चंपि तच्चाए वालुय० जाव उव्वट्टिता दोच्चंपि पक्खीसु उववज्जि-
हिइ जाव किच्चा दोच्चाए सबकरप्पभाए जाव उव्वट्टिता सिरीसवेसु उववज्जि-
हिइ, तत्थवि णं सत्थवज्जे जाव किच्चा दोच्चंपि दोच्चाए सबकरप्पभाए जाव
उव्वट्टिता दोच्चंपि सिरीसवेसु उववज्जिहिइ जाव किच्चा इमीसे रयणप्पभाए
पुढवीए उक्कोसकालट्टिइयंसि णरयंसि णेरइयत्ताए उववज्जिहिइ जाव उव्व-
ट्टिता सण्णीसु उववज्जिहिइ, तत्थवि णं सत्थवज्जे जाव किच्चा असण्णीसु
उववज्जिहिइ, तत्थवि णं सत्थवज्जे जाव किच्चा दोच्चंपि इमीसे रयणप्पभाए
पुढवीए पत्तिओवमस्स असंखेज्जइभागट्टिइयंसि णरयंसि णेरइयत्ताए उववज्जि-
हिइ, से णं तओ जाव उव्वट्टिता जाइं इमाइं खहचरविहाणाइं भवति, तं०-
चम्मपक्खीणं, लोमपक्खीणं, समुगपक्खीणं, विययपक्खीणं, तेसु अणेगसयसहस्स-

खुत्तो उद्वाहता २ तत्थेव २ भुज्जो २ पच्चायाहिइ, सव्वत्थवि णं सत्थवज्जे दाह-
वक्कंतीए कालमासे कालं किच्चा जाइं इमाइं भुयपरिसप्पविहाणाइं भवन्ति, तं०—
गोहाणं णउलाणं जहा पणवणायए जाव जाह्माणं चउप्पाइयाणं, तेसु अणेगसय-
सहस्सखुत्तो सेसं जहा खहचराणं जाव किच्चा जाइं इमाइं उरपरिसप्पविहाणाइं
भवन्ति, तं०—अहीणं अयगराणं आसालियाणं महोरगाणं, तेसु अणेगसयसहस्स-
खुत्तो जाव किच्चा जाइं इमाइं चउप्पयविहाणाइं भवन्ति, तं०—एगळुराणं दुखु-
राणं गंडीपयाणं सणहूपयाणं, तेसु अणेगसयसहस्स जाव किच्चा जाइं इमाइं
जलयरविहाणाइं भवन्ति, तं०—मच्छाणं कच्छमाणं जाव सुंसुमाराणं, तेसु अणेग-
सयसहस्स जाव किच्चा जाइं इमाइं च्छरिदियविहाणाइं भवन्ति, तं०—अधि-
याणं पोत्तियाणं जहा पणवणायए जाव गोमयकीडाणं, तेसु अणेगसयसहस्स
जाव किच्चा जाइं इमाइं तेइंदियविहाणाइं भवन्ति, तं०—उवचियाणं जाव
हत्थिसोडाणं, तेसु अणेग जाव किच्चा जाइं इमाइं वेइंदियविहाणाइं भवन्ति,
तं०—पुलाकिमियाणं जाव समुट्ठलिवखाणं, तेसु अणेगसय जाव किच्चा जाइं
इमाइं वणस्सइविहाणाइं भवन्ति, तं०—रुक्खाणं गुच्छाणं जाव कुह्णाणं, तेसु
अणेगसय जाव पच्चायाइस्सइ, उस्सणं च णं कडुयरुक्खेसु कडुयवल्लीसु सव्व-
त्थवि णं सत्थवज्जे जाव किच्चा जाइं इमाइं वाउक्काइयविहाणाइं भवन्ति,
तं०—पाईणवायाणं जाव सुट्ठवायाणं, तेसु अणेगसयसहस्स जाव किच्चा जाइं
इमाइं तेउक्काइयविहाणाइं भवन्ति, तं०—इंगालाणं जाव सूरकंतमणिणित्ति-
याणं, तेसु अणेगसयसहस्स जाव किच्चा जाइं इमाइं भाउक्काइयविहाणाइं
भवन्ति, तं०—उस्साणं जाव खातोदगाणं, तेसु अणेगसयसहस्स जाव पच्चायाइ-
स्सइ, उस्सणं च णं खातोदएसु खातोदएसु, सव्वत्थवि णं सत्थवज्जे जाव
किच्चा जाइं इमाइं पुट्ठविककाइयविहाणाइं भवन्ति, तं०—पुट्ठवीणं सक्कराणं
जाव सूरकंताणं, तेसु अणेगसय जाव पच्चायाहिइ, उस्सणं च णं खरवायर-
पुट्ठविककाइएसु, सव्वत्थवि णं सत्थवज्जे जाव किच्चा रायगिहे णयरे वार्हि
खरियत्ताए उववज्जिहिइ, तत्थवि णं सत्थवज्जे जाव किच्चा बोक्कंपि रायगिहे
णयरे अंतो खरियत्ताए उववज्जिहिइ, तत्थवि णं सत्थवज्जे जाव किच्चा इहेव
जंबुद्दीवे दीवे भारे वेसे विंजगिरिपायमूले वेभेले सणिवेसे मीहणकुलंसि दारि-
यत्ताए पच्चायाहिइ । तए णं तं दारियं अम्मापियरो उम्मुक्कवात्तभावं जोव्वण-

गमणुप्पत्तं पडिह्वएणं सुवक्केणं पडिह्वएणं विणएणं पडिह्वयस्स भत्तारस्स
 भारियत्ताए वलइस्संति, सा णं तस्स भारिया भविस्सइ इट्ठा कंता जाव अणु-
 मया भंडकरंडगसमाणा तेल्लकेला इव सुसंगोविया चेलपेडा इव सुसंपरिगगहिया
 र्द्येणकरंडओ विव सुसारविख्या सुसंगोविया मा णं सीयं मा णं उण्हं जाव
 परिस्सहोवसग्गा कुसंतु । तए णं सा दारिथा अण्णया कयाइ गुविणी समुर-
 कुलाओ कुलघरं णिज्जमाणी अंतरा दवग्गिजालाभिहया कालमासे कालं किञ्च
 दाहिणिल्लेसु अग्गिकुमारेसु देवेसु देवत्ताए उववज्जिहिइ, से णं तओहिंतो अणं-
 तरं उव्वट्ठित्ता माणुस्सं विग्गहं लभिहिइ माणुस्सं० २ ता केवलं बोहिं बुज्जि-
 हिइ के० २ ता केवलं मुंडे भवित्ता अगाराओ अणगारियं पव्वइहिइ, तत्थवि य
 णं विराहियसामण्णे कालमासे कालं किञ्चा दाहिणिल्लेसु असुरकुमारेसु देवेसु
 देवत्ताए उववज्जिहिइ, से णं तओहिंतो जाव उव्वट्ठित्ता माणुस्सं विग्गहं तं
 चैव जाव तत्थवि णं विराहियसामण्णे कालमासे कालं किञ्चा दाहिणिल्लेसु
 णागकुमारेसु देवेसु देवत्ताए उववज्जिहिइ, से णं तओहिंतो अणंतरं उव्वट्ठित्ता
 एवं एएणं अभिलावेणं दाहिणिल्लेसु सुवण्णकुमारेसु एवं विज्जकुमारेसु एवं
 अग्गिकुमारवज्जं जाव दाहिणिल्लेसु थणियकुमारेसु से णं तओ जाव उव्वट्ठित्ता
 माणुस्सं विग्गहं लभिहिइ जाव विराहियसामण्णे जोइसिएसु देवेसु उववज्जि-
 हिइ, से णं तओ अणंतरं चयं चइत्ता माणुस्सं विग्गहं लभिहिइ जाव अविराहिय-
 सामण्णे कालमासे कालं किञ्चा सोहम्मे कप्पे देवत्ताए उववज्जिहिइ, से णं
 तओहिंतो अणंतरं चयं चइत्ता माणुस्सं विग्गहं लभिहिइ, केवलं बोहिं बुज्जि-
 हिइ, तत्थवि णं अविराहियसामण्णे कालमासे कालं किञ्चा ईसाणे कप्पे देव-
 त्ताए उववज्जिहिइ, सेणं तओ० चइत्ता माणुस्सं विग्गहं लभिहिइ० तत्थवि णं
 अविराहियसामण्णे कालमासे कालं किञ्चा सणकुमारे कप्पे देवत्ताए उववज्जि-
 हिइ, से णं तओहिंतो एवं जहा सणकुमारे तथा बंभलोए महासुक्के आणए
 आरणे, से णं तओ जाव अविराहियसामण्णे कालमासे कालं किञ्चा सब्वट्ठिसिद्धे
 महाविमाणे देवत्ताए उववज्जिहिइ, से णं तओहिंतो अणंतरं चयं चइत्ता महा-
 भिवेहे वासे जाइ इमाइं कुलाइं भवति-अड्ढाइं जाव अपरिभूयाइं, तहप्यगारेसु
 कुलेसु पुत्तत्ताए वच्चायाहिइ, एवं जहा उक्वाइए दढप्पइणवत्तव्वया सच्चेव
 वत्तव्वया णिरवसेसा भाणियव्वा जाव केवलवरणाणदंसणे समुप्पज्जिहिइ ।

तए णं से दढप्पइण्णे केवली अप्पणो तीतद्धं आभोएहिइ अप्प० २ ता समणे णिग्गथे सहावेहिइ सम० २ सा एवं वडिहिइ-एयं खलु अहं अज्जो ! इओ चिराईयाए अट्ठाए गोसाले णामं मंखत्तिपुत्ते होत्था समणघायए जाव छउम-
 त्थे चेव कालगए, तम्मूलगं च णं अहं अज्जो ! अणाईयं अणवदग्गं दीहमद्धं
 चाउरंतसंसारकंतारं अणुपरियट्ठिए । तं मा णं अज्जो ! तुहमं केइ भवउ
 आयरियपडिणीए उव्वज्जःपपडिणीए आयरियउव्वज्जायाणं अयसकारए अवण-
 कारए अकित्तिकारए, मा णं सेऽपि एव चेव अणाईयं अणवदग्गं जाव संसार-
 कंतारं अणुपरियट्ठिहिइ जहा णं अहं । तए णं ते समणा णिग्गथा दढप्पइण्णसस
 केवलिसस अंतियं एयमट्ठं सोच्चा णिसम्म भिया तत्था तसिया संसारभय-
 उव्विग्गमा दढप्पइण्णं केवलं वडिहिइ णमंसिहिइ वं० २ ता तस्स ठाणस्स
 आत्तोइएहिइ णिदिहिइ जाव पडिबडिज्जहिइ । तए णं से दढप्पइण्णे केवली
 बहूइं वासाइं केवलपरियागं पाउणिहिइ बहूइं० २ ता अप्पणो आउसेसं जाणि-
 ता भत्तं पच्चक्खाहिइ, एवं जहा उव्वधाइए जाव सच्चदुक्खाणमंतं काहिइ ।
 सेव भंते ! २ त्ति जाव विहरइ ॥ ५५६ ॥

पणरसमं सयं समत्तं

॥ सोलसमं सयं पढमो उद्देशो ॥

अहिगरणि जरा कम्मे जावइयं गंगदत्त सुमिणे य । उव्वओग लोग बलि
 ओहि दीव उव्वही दिसा थणिया ॥ १ ॥ चउद्दस० सोलससे । तेणं कालेणं तेणं
 समएणं रायगिहे जाव पज्जुवासमाणे एवं वयासी-अत्थि णं भंते ! अहिगरणिसि
 वाउयाए वक्कमइ ? हंता अत्थि । से भंते ! ऋ पुट्ठे उद्दाइ ? अपुट्ठे उद्दाइ ?
 गोयमा ! पुट्ठे उद्दाइ णो अपुट्ठे उद्दाइ । से भंते ! किं ससरीरी णिक्खमइ अस-
 रीरी णिक्खमइ ? एवं जहा खंदए जाव से तेणट्ठेणं जाव णो असरीरी णिक्ख-
 मइ ॥ ५६० ॥ इंगालकारियाए णं भंते ! अगणिकाए केवइयं कालं संचिट्ठइ ?
 गोयमा ! जहण्णेणं अंतोमुट्ठसं उक्कोसेणं तिण्णि राईदियाइं, अण्णेवि तत्थ
 वाउयाए वक्कमइ, ण विणा वाउयाएणं अगणिकाए उज्जलइ ॥ ५६१ ॥ पुरिसे
 णं भंते ! अयं अयकोट्ठंसि अयोमएणं संडासएणं उव्विहमाणे वा पवित्रहमाणे
 वा कइकिरिए ? गोयमा ! जावं च णं से पुरिसे अयं अयकोट्ठंसि अयोमएणं
 संडासएणं उव्विहिइ वा पवित्रहिइ वा तावं च णं से पुरिसे काइयाए जाव

पाणाद्वायकिरियाए पंचाह किरियाह पुट्ठे, जेसिपिय णं जीवाणं सरीरेहितो
 अए णिव्वत्तिए अयकोट्ठे णिव्वत्तिए संडासए णिव्वत्तिए इंगाला णिव्वत्तिया
 इंगालकड्डुणी णिव्वत्तिया भत्था णिव्वत्तिया तेवि णं जीवा काइयाए जाव
 पंचाह किरियाह पुट्ठा । पुरिसे णं भत्ते ! अयं अयकोट्ठाओ अयोमएणं संडा-
 सएणं गहाय अहिगरणिसि उक्खिव्वमाणे वा णिक्खिव्वमाणे वा कइकिरिए ?
 गोयमा ! जावं च णं से पुरिसे अयं अयकोट्ठाओ जाव णिक्खिव्व वा तावं च
 णं से पुरिसे काइयाए जाव पाणाद्वायकिरियाए पंचाह किरियाह पुट्ठे जेसि-
 पिय णं जीवाणं सरीरेहितो अयो णिव्वत्तिए संडासए णिव्वत्तिए चम्मेट्ठे णिव्व-
 त्तिए मुट्ठिए णिव्वत्तिए अहिगरणी णिव्वत्तिया अहिगरणिखोडी णिव्वत्तिया
 उदगदोणी णिव्वत्तिया अहिगरणसाला णिव्वत्तिया तेविप णं जीवा काइयाए
 जाव पंचाह किरियाह पुट्ठा ॥ ५६२ ॥ जीवे णं भत्ते ! किं अहिगरणी अहि-
 गरणं ? गोयमा ! जीवे अहिगरणीवि अहिगरणंपि । से केणट्ठेणं भत्ते ! एवं
 बुच्चइ—जीवे अहिगरणीवि अहिगरणंपि ? गोयमा ! अविरइं पडुच्च, से तेण-
 ट्ठेणं जाव अहिगरणंपि । णेरइए णं भत्ते ! किं अहिगरणी अहिगरणं ?
 गोयमा ! अहिगरणीवि अहिगरणंपि, एवं जहेव जीवे तहेव णेरइएवि, एवं
 णिरंतरं जाव वेमाणिए । जीवे णं भत्ते ! किं साहिगरणी णिरहिगरणी ?
 गोयमा ! साहिगरणी णो णिरहिगरणी । से केणट्ठेणं पुच्छा । गोयमा ! अवि-
 रइं पडुच्च, से तेणट्ठेणं जाव णो णिरहिगरणी, एवं जाव वेमाणिए । जीवे
 णं भत्ते ! किं आयाहिगरणी पराहिगरणी तदुभयाहिगरणी ? गोयमा !
 आयाहिगरणीवि पराहिगरणीवि तदुभयाहिगरणीवि, से केणट्ठेणं भत्ते !
 एवं बुच्चइ जाव तदुभयाहिगरणीवि ? गोयमा ! अविरइं पडुच्च, से
 तेणट्ठेणं जाव तदुभयाहिगरणीवि, एवं जाव वेमाणिए । जीवाणं भत्ते ! अहि-
 गरणे किं आयप्पओगणिव्वत्तिए परप्पओगणिव्वत्तिए तदुभयप्पओगणिव्वत्तिए ?
 गोयमा ! आयप्पओगणिव्वत्तिएवि परप्पओगणिव्वत्तिएवि तदुभयप्पओगणिव्व-
 त्तिएवि । से केणट्ठेणं भत्ते ! एवं बुच्चइ० ? गोयमा ! अविरइं पडुच्च, से तेण-
 ट्ठेणं जाव तदुभयप्पओगणिव्वत्तिएवि, एवं जाव वेमाणियाणं ॥ ५६३ ॥ कइ णं
 भत्ते ! सरीरगा पणत्ता ? गोयमा ! पंच सरीरगा पणत्ता, तं०—ओरालिए
 जाव कम्मए । कइ णं भत्ते ! इंदिया पणत्ता ? गोयमा ! पंच इंदिया पणत्ता,

तंजहा—सोइदिए जाव फासिदिए । कइजिहे णं भंते ! जोए पणत्ते ? गोयमा ! तिविहे जोए पणत्ते, तंजहा—मणजोए वइजोए कायजोए । जीवे णं भंते ! ओरालियसरीरं णिव्वत्तेमाणे कि अहिगरणी अहिगरणं ? गोयमा ! अहिगरणीवि अहिगरणंवि । से केणट्ठेणं भंते ! एवं बुच्चइ—अहिगरणीवि अहिगरणंवि ? गोयमा ! अवरिइं पडुच्च, से तेणट्ठेणं जाव अहिगरणंवि । पुढविकाइए णं भंते ! ओरालियसरीरं णिव्वत्तेमाणे कि अहिगरणी अहिगरणं ? एवं चेव, एवं जाव मणुस्से । एवं वेउद्वियसरीरंवि, णवरं जस्स अस्थि । जीवे णं भंते ! आहारगसरीरं णिव्वत्तेमाणे कि अहिगरणी० पुच्छा, गोयमा ! अहिगरणीवि अहिगरणंवि । से केणट्ठेणं जाव अहिगरणंवि ? गोयमा ! पमायं पडुच्च, से तेणट्ठेणं जाव अहिगरणंवि, एवं मणुस्सेवि, तेयासरीरं जहा आरालियं, णवरं सव्वजीवाणं भाणियद्वं, एवं कम्मगसरीरंवि । जीवे णं भंते ! सोइदियं णिव्वत्तेमाणे कि अहिगरणी अहिगरणं ? एवं जहेव ओरालियसरीरं तहेव सोइदियंवि भाणियद्वं, णवरं जस्स अस्थि सोइदियं, एवं च्चिखदियघाणदियजिन्धियफासिदियाणवि, णवरं जाणियद्वं जस्स जं अस्थि । जीवे णं भंते ! मणजोए णिव्वत्तेमाणे कि अहिगरणी अहिगरणं ? एवं जहेव सोइदियं तहेव णिरवसेसं, वइजोमो एवं चेव, णवरं एणियद्वयज्जाणं, एवं कायजोगोवि, णवरं सव्वजीवाणं जाव वेमाणिए । सेवं भंते ! सेवं भंते ! त्ति ॥ ५६४ ॥

सोलसमं सयं बीओ उद्देसो

रायमिहे जाव एवं वयासी—जीवाणं भंते ! कि जरा सोगे ? गोयमा ! जीवाणं जरावि सोगेवि । से केणट्ठेणं भंते ! एवं बुच्चइ जाव सोगेवि ? गोयमा ! जे णं जीवा सारीरं वेयणं वेदंति तेसि णं जीवाणं जरा, जे णं जीवा माणसं वेयणं वेदंति तेसि णं जीवाणं सोगे, से तेणट्ठेणं जाव सोगेवि, एवं णेरइयाणवि, एवं जाव थणियकुमारणं । पुढविकाइयाणं भंते ! कि जरा सोगे ? गोयमा ! पुढविकाइयाणं जरा णो सोगे । से केणट्ठेणं जाव णो सोगे ? गोयमा ! पुढविकाइया णं सारीरं वेयणं वेदंति णो माणसं वेयणं वेदंति, से तेणट्ठेणं जाव णो सोगे, एवं जाव च्चउरिदियाणं, सेसाणं जहा जीवाणं जाव वेमाणियाणं । सेवं भंते ! २ त्ति जाव पज्जुवासइ ॥ ५६५ ॥ तेणं कालेणं तेणं

समणं सक्के देविंदे देवराया वज्जपाणी पुरंदरे जाव मुंजमाणे विहरइ, इमं च णं केवलकप्यं जंबुद्वीवं २ विउलेणं ओहिणा आभोएमाणे २ पासइ समणं भगवं महावीरं जंबुद्वीवे दीवे एवं जहा ईसाणे तइयसए तहेव सक्केवि णवरं आभिओगे ण सद्दावेइ हरी पायत्ताणियाहिवई, सुघोसा घंटा, पालओ विमाण-कारी पालगं विमाणं, उत्तरिल्ले णिज्जाणमग्गे, दाहिणपुरत्थिमिल्ले रइकर-पव्वए सेसं तं चेव जाव णामगं सावेत्ता पज्जुवासइ, धम्मकहा जाव परिसा पडिगया। तए णं से सक्के देविंदे देवराया समणस्स भगवओ महावीरस्स अतियं धम्मं सोच्चा णिसम्म हइतुट्टु० समणं भगवं महावीरं वंदइ णमंसइ वं० ता एवं वयासी-कइविहे णं भंते ! उग्गहे पण्णत्ते ? सक्का ! पंचविहे उग्गहे पण्णत्ते, तंजहा-देविंदोग्गहे रायोग्गहे, गाहावइउग्गहे, सागारियउग्गहे, साह-म्मियउग्गहे। जे इमे भंते ! अज्जत्ताए ससणा णिग्गंथा विहरंति, एएसि णं अहं उग्गहं अणुजाणामीतिकट्टु समणं भगवं महावीरं वंदइ णमंसइ वं० २ ता तमेव दिच्चं जाणविमाणं दुरूहइ २ ता जामेव दिंसि पाउव्वभूए तामेव दिंसि पडिगए। भंते ! त्ति भगवं गोथमे समणं भगवं महावीरं वंदइ णमंसइ वं० २ ता एवं वयासी-जं णं भंते ! सक्के देविंदे देवराया सुव्वमे णं एवं वदइ सच्चे णं एसमट्ठे ? हंता सच्चे ॥ ५६६ ॥ सक्के णं भंते ! देविंदे देवराया कि सम्मा-वाई मिच्छावाई ? गोयमा ! सम्मावाई णो मिच्छावाई । सक्के णं भंते ! देविंदे देवराया कि सच्चं भासं भासइ, मोसं भासं भासइ, सच्चामोसं भासं भासइ, असच्चामोसं भासं भासइ ? गोयमा ! सच्चंपि भासं भासइ जाव असच्चामोसंपि भासं भासइ। सक्के णं भंते ! देविंदे देवराया कि सावज्जं भासं भासइ अणवज्जं भासं भासइ ? गोयमा ! सावज्जंपि भासं भासइ अणवज्जंपि भासं भासइ। से केणट्ठेणं भंते ! एवं बुच्चइ-सावज्जंपि जाव अणवज्जंपि भासं भासइ ? गोयमा ! जाहे णं सक्के देविंदे देवराया सुहुमकायं अणिजूहिताणं भासं भासइ ताहे णं सक्के देविंदे देवराया सावज्जं भासं भासइ, जाहे णं सक्के देविंदे देव-राया सुहुमकायं णिजूहिताणं भासं भासइ ताहे णं सक्के देविंदे देवराया अण-वज्जं भासं भासइ, से तेणट्ठेणं जाव भासइ। सक्के णं भंते ! देविंदे देवराया कि भवसिद्धिए अभवसिद्धिए सम्मट्ठिए मिच्छादिट्ठिए० एवं जहा मोउइसए सणकुमारं जाव णो अचरिमे ॥ ५६७ ॥ जीवाणं भंते ! कि चेयकडा कम्मा

कज्जंति अचेयकडा कम्मा कज्जंति ? गोयमा ! जीवाणं चेयकडा कम्मा कज्जंति णो अचेयकडा कम्मा कज्जंति । से केणट्ठेणं भंते ! एवं बुच्चइ जाव कज्जंति ? गोयसा ! जीवाणं आहारोवच्चिया पोग्गला, बोदिच्चिया पोग्गला, कलेवरच्चिया पोग्गला तथा २ णं ते पोग्गला परिणमंति णत्थि अचेयकडा कम्मा समणाउसो ! बुट्ठाणेसु दुसेज्जामु दुण्णिसीहिंघामु तथा २ णं ते पोग्गला परिणमंति णत्थि अचेयकडा कम्मा समणाउसो ! आर्यके से वहाए होइ संकप्पे से वहाए होइ मरणंते से वहाए होइ तथा २ णं ते पोग्गला परिणमंति णत्थि अचेयकडा कम्मा समणाउसो ! से तेणट्ठेणं जाव कम्मा कज्जंति, एवं णेरइयाणवि एवं जाव वेमाणियाणं । सेवं भंते ! २ त्ति जाव विहरइ ॥ ५६८ ॥

सोलसमं सयं तइओ उट्ठेसो

रायगिहे जाव एवं वयासी—कइ णं भंते ! कम्मपयडीओ पणत्ताओ ? गोयमा ! अट्ट कम्मपयडीओ पणत्ताओ, तंजहा—णाणावरणिज्जं जाव अंतराइयं, एवं जाव वेमाणियाणं । जीवे णं भंते ! णाणावरणिज्जं कम्मं वेदेमाणे कइ कम्मपयडीओ वेदेइ ? गोयमा ! अट्ट कम्मपयडीओ, एवं जहा पणवणए वेधावेउट्ठेसओ सो चेव णिरवसेसो भाणियव्वो, वेदाबंधोवि तहेव, बंधावेदोवि तहेव, बंधाबंधोवि तहेव भाणियव्वो जाव वेमाणियाणंति । सेवं भंते ! २ त्ति जाव विहरइ ॥ ५६९ ॥ तए णं समणे भगवं महावीरे अण्णया कयाइ रायगिहाओ गुणसिंहाओ जेइयाओ पडिणिक्खिमइ २ ता बहिया जणवथविहारं विहरइ । तेणं कालेणं तेणं समएणं उल्लुयतीरे णामं णयरे होत्था वण्णओ, तस्स णं उल्लुयतीरस्स णयरस्स बहिया उत्तरपुरत्थिमे विसीभाए एत्थ णं एगजंबुए णामं चेइए होत्था वण्णओ, तए णं समणे भगवं महावीरे अण्णया कयाइ पुव्वाणुपुंविं चरमाणे जाव एगजंबुए समोसडे जाव परिसा पडिगया । भंते ! त्ति भगवं गोयमे समणं भगवं महावीरं वंदइ णमंसइ वंदित्ता णमंसित्ता एवं वयासी—अणगरस्स णं भंते ! भावियप्पणो छट्ठंछट्ठेणं अणिक्खत्तेणं जाव आयावेमाणस्स तस्स णं पुरत्थिमेणं अवड्ढं दिवसं णो कप्पइ हत्थं वा पायं वा बाहं वा ऊरं वा आउंटावेत्तए वा पसारत्तए वा, पच्चत्थिमेणं से अवड्ढं दिवसं कप्पइ हत्थं वा पायं वा जाव ऊरं वा आउंटावेत्तए वा पसारत्तए वा, तस्स णं अंसियाओ लंबंति, तं च वेज्जे अदक्खु ईसि पाडेइ २ ता अंसियाओ

छिदेज्जा, से णूणं भंते ! जे छिदइ तस्स किरिया कज्जइ, जस्स छिज्जइ णो तस्स किरिया कज्जइ णणत्थेणेणं धम्मंतराइएणं ? हंता गोयमा ! जे छिदइ जाव धम्मंतराइएणं । सेवं भंते ! सेवं भंते ! ति ॥ ५७० ॥

सोलसमं सयं चउत्थो उद्देशो

रायगिहे जाव एवं वधासी—जावइयणं भंते ! अण्णगिलायए समणे णिगंथे कम्मं णिज्जरेइ एवइयं कम्मं णरएसु णेरइयाणं वासेण वा वासेहिं वा वाससएहिं वा खवयंति ? णो इणट्ठे समट्ठे । जावइयणं भंते ! चउत्थभत्तिए समणे णिगंथे कम्मं णिज्जरेइ एवइयं कम्मं णरएसु णेरइया वाससएण वा वाससएहिं वा वाससहस्सेहिं वा खवयंति ? णो इणट्ठे समट्ठे, जावइयणं भंते ! छट्ठभत्तिए समणे णिगंथे कम्मं णिज्जरेइ एवइयं कम्मं णरएसु णेरइया वाससहस्सेण वा वाससहस्सेहिं वा वाससयसहस्सेहिं वा खवयंति ? णो इणट्ठे समट्ठे । जावइयणं भंते ! अट्ठमभत्तिए समणे णिगंथे कम्मं णिज्जरेइ एवइयं कम्मं णरएसु णेरइया वाससयसहस्सेण वा वाससयसहस्सेहिं वा वासकीडीए वा खवयंति ? णो इणट्ठे समट्ठे । जावइयणं भंते ! दसमभत्तिए समणे णिगंथे कम्मं णिज्जरेइ एवइयं कम्मं णरएसु णेरइया वासकोडीए वा वासकोडीहिं वा वासकोडाकोडीए वा खवयंति ? णो इणट्ठे समट्ठे । से केणट्ठेणं भंते ! एवं वुच्चइ—जावइयं अण्णगिलायए समणे णिगंथे कम्मं णिज्जरेइ एवइयं कम्मं णरएसु णेरइया वासेण वा वासेहिं वा वाससएण वा णो खवयंति, जावइयं चउत्थभत्तिए एवं तं चैव पुक्कभणियं उच्चारेयस्वं जाव वासकोडाकोडीए वा णो खवयंति ? गोयमा ! से जहाणामए—केइ पुरिसे जुण्णे जराज्जजरियेहे सिद्धिलतयावलितरंग-संपिण्णद्वगत्ते पविरलपरिसडियदंतसेढी उण्हाभिहए तण्हाभिहए आउरे सुंभिए पिवासिए दुब्बले किलंते एगं महं कोसबगंडियं सुक्कं जडिलं गंठिल्लं चिक्कणं वाइद्धं अपत्तियं मुंडेण पस्सुणा अवकमेज्जा, तए णं से पुरिसे महंताइं २ सट्ठाइं करेइ णो महंताइं २ दलाइं अवदालेइ, एवामेव गोयमा ! णेरइयाणं पावाइं कम्मइं गाढीकयाइं चिक्कणीकयाइं एवं जहा छट्ठसए जाव णो महा-पज्जवसाणा भवति । से जहाणामए—केइ पुरिसे अहिगराणि आउडेमाणे महया जाव णो महापज्जवसाणा भवति । से जहाणामए—केइ पुरिसे तरुणे बलवं जाव

मेहावी णिउणसिप्पोवगए एगं महं सामलिगडियं उल्लं अजडिलं अगठिल्लं
अच्चिकरणं अवाइद्धं सपत्तियं तिवक्खेण परमुणा अक्कमेज्जा, तए णं से पुरिसे
णो महंताइं २ सदाइं करेइ, महंताइं २ दलाइं अवहालेइ, एवामेव गोयमा !
समणाणं णिग्गंथाणं अहावायराइं कम्माइं सिद्धिलीकयाइं णिट्ठियाइं कयाइं जाव
खिप्पामेव परिविद्धत्थाइं भवंति, जावइयं तावइयं जाव महापज्जवसाणा भवंति,
से जहा वा केइ पुरिसे सुक्कतणहत्थगं जायतेयंसि पक्खिवेज्जा, एवं जहा छट्ट-
सए तहा अयोक्कवत्तेवि जाव महापज्जवसाणा भवंति, से तेणट्ठेणं गोयमा !
एवं वुच्चइ जावइयं अण्णगिलायए समणे णिग्गंथे कम्मं णिज्जरेइ तं चेव जाव
वासकोडाकोडोए वा णो खवयति । सेवं भंते ! सेवं भंते ! त्ति जाव
विहरइ ॥ ५७१ ॥

सोलसमं सयं पंचमो उद्देशो

तेणं कालेणं तेणं समएणं उल्लयतीरे णामं णयरं होत्था वण्णओ, एग-
जंबुए चेइए वण्णओ, तेणं कालेणं तेणं समएणं सामी समोसडे जाव परिसा पज्ज-
वासइ तेणं कालेणं तेणं समएणं सक्के देविदे देवराया वज्जपाणी एवं जहेव बिइय-
उद्देसए तहेव दिव्वेणं जाणविमाणेणं आगओ जाव जेणेव समणे भगवं महावीरे
तेणेव उवागच्छइ २ ता जाव णमंसित्ता एवं वयासी-देवे णं भंते ! महिड्डिए
जाव महेसक्खे बाहिरए पोगगले अपरियाइत्ता पभू आगमित्तए ? णो इणट्ठे
समट्ठे । देवे णं भंते ! महिड्डिए जाव महेसक्खे बाहिरए पोगगले परियाइत्ता
पभू आगमित्तए ? हंता पभू । देवे णं भंते ! महिड्डिए एवं एएणं अभित्तावेणं
गमित्तए २, एवं भासित्तए वा वागरित्तए वा ३, उम्मिसावेत्ताए वा
णिम्मिसावेत्ताए वा ४, आउंटावेत्ताए वा पसारित्तए वा ५, ठाणं वा सेज्जं
वा णिसीहिणं वा चेइत्तए वा ६, एवं विउव्वित्तए वा ७, एवं परियारावेत्ताए
वा ८ जाव हंता पभू, इमाइं अट्ट उक्खित्तपसिणवागरणाइं पुच्चइ इमाइं ०
२ ता संभंतियवंदणएणं वंदइ संभंतियं ० २ ता तमेव दिव्वं जाणविमाणं दुरुहइ
२ ता जामेव दिंसि पाउब्भूए तामेव दिंसि पडिगए ॥ ५७२ ॥ भंते ! त्ति
भगवं गोयमे समणं भगयं महावीरं वंदइ णमंसइ थं ० २ ता एवं वयासी-
अण्णया णं भंते ! सक्के देविदे देवराया देवाणुप्पियं वंदइ णमंसइ सक्कारेइ
जाव पज्जवासइ, किण्णं भंते ! अज्ज सक्के देविदे देवराया देवाणुप्पियं अट्ट

उक्खित्तपसिणवागरणाइं पुच्छइ २ ता संभंतियवंदणएणं वंदइ णमंसइ वं० २
 ता जाव पडिगए ? गोयमादि ! समणे भगवं महावीरे भगवं गोयमं एवं वयासी-
 एवं खलु गोयमा ! तेणं कलेणं तेणं समएणं महासुक्के कप्पे महासामाणे
 विमाणे दो देवा महिड्डिया जाव महेसक्खा एगविमाणसि देवत्ताए उववण्णा,
 तं०—माइमिच्छदिट्ठिउववण्णए य अमाइसम्मदिट्ठिउववण्णए य, तए णं से माइ-
 मिच्छदिट्ठिउववण्णए देवे तं अमाइसम्मदिट्ठिउववण्णगं देवं एवं वयासी—परि-
 णममाणा पोगगला णो परिणया अपरिणया, परिणमंतीति पोगगला णो परिणया
 अपरिणया, तए णं से अमाइसम्मदिट्ठिउववण्णए देवे तं माइमिच्छदिट्ठिउव-
 वण्णगं देवं एवं वयासी—परिणममाणा पोगगला परिणया णो अपरिणया, परिण-
 मंतीति पोगगला परिणया णो अपरिणया । तं माइमिच्छदिट्ठिउववण्णगं देवं एवं
 पडिहणइ २ ता ओहि पउंजइ २ ता ममं ओहिणा आमोएइ ममं० २ ता
 अयमेयारूवे जाव समुप्पज्जित्था—एवं खलु समणे भगवं महावीरे जंबुद्वीवे २
 जेणेव भारहे वासे जेणेव उल्लुयतीरे णयरे जेणेव एगजंबुए चेइए अहापडि-
 रूवं जाव विहरइ, तं सेयं खलु मे समणं भगवं महावीरं वंदित्ता जाव पज्जु-
 वासित्ता इमं एयारूवं वागरणं पुच्छित्तएत्तिकट्टु एवं संपेहेइ एवं संपेहित्ता
 अउहिंवि सामाणियसाहस्सीहिं परिधारो जहा सूरियाभस्स जाव णिग्घोसणाइ-
 थरवेणं जेणेव जंबुद्वीवे २ जेणेव भारहे वासे जेणेव उल्लुयतीरे णयरे जेणेव
 एगजंबुए चेइए जेणेव ममं अंतिए तेणेव पहारेत्थ गमणाए । तए णं से सक्के
 देविंवे देवराया तस्स देवस्स तं दिव्वं देविंइ दिव्वं देवजुइं दिव्वं देवाणुभागं
 दिव्वं तेयलेस्सं असहमाणे ममं अट्ट उक्खित्तपसिणवागरणाइं पुच्छइ २ ता
 संभंतिय० जाव पडिगए । १५७३॥ जअवं च णं समणे भगवं महावीरे भगवओ
 गोयमस्स एयमट्ठं परिकहेइ तावं च णं से देवे तं वेसं हइवमागए । तए णं से
 देवे समणं भगवं महावीरं तिकखुत्तो वंदइ णमंसइ वं० २ ता एवं वयासी-
 एवं खलु भंते ! महासुक्के कप्पे महासामाणे विमाणे एगे माइमिच्छदिट्ठिउव-
 वण्णए देवे ममं एवं वयासी—परिणममाणा पोगगला णो परिणया अपरिणया,
 परिणमंतीति पोगगला णो परिणया अपरिणया, तए णं अहं तं माइमिच्छदिट्ठि-
 उववण्णगं देवं एवं वयासी—परिणममाणा पोगगला परिणया णो अपरिणया,
 परिणमंतीति पोगगला परिणया णो अपरिणया, से कहमेयं भंते ! एवं ?

गंगदत्तादि ! समणे भगवं महावीरे गंगदत्तं देवं एवं वयासी-अहंपि णं गंगदत्ता !
 एवमाइक्खामि ४-परिणममाणा पोगला जाव णो अपरिणया सच्चमेसे अट्ठे ।
 तए णं से गंगदत्ते देवे समणस्स भगवओ महावीरस्स अंतियं एवमट्ठं सोच्चा
 णिसम्म हट्टुट्ठं समणं भगवं महावीरं वंदइ णमंसइ वं० २ ता णच्चासण्णे
 जाव पज्जुवासइ । तए णं समणे भगवं महावीरे गंगदत्तस्स देवस्स तीसे य जाव
 धम्मं परिकहेइ जाव आराहए भवइ । तए णं से गंगदत्ते देवे समणस्स भगवओ
 महावीरस्स अंतिए धम्मं सोच्चा णिसम्म हट्टुट्ठं उट्टाए उट्ठेइ उ० २ ता
 समणं भगवं महावीरं वंदइ णमंसइ वं० २ ता एवं वयासी-अहण्णं भंते !
 गंगदत्ते देवे किं भवसिद्धिए अभवसिद्धिं ? एवं जहम मूरियाओ जाव वत्तीसइ-
 विहं णट्टविहिं उवदसेइ २ ता जाव तामेव विसं पडिगए ॥ ५७४ ॥ भंते !
 त्ति भगवं गोयमे समणं भगवं महावीरं जाव एवं वयासी-गंगदत्तस्स णं भंते !
 देवस्स सा दिव्वा देविड्ढी दिव्वा देवजुई जाव अणुप्पविट्ठा ? गोयमा ! सरीरं
 गया सरीरं अणुप्पविट्ठा कूडागारसालादिदत्तो जाव सरीरं अणुप्पविट्ठा । अहो
 णं भंते ! गंगदत्ते देवे महिड्डिए जाव सहेसक्खे । गंगदत्तेणं भंते ! देवेणं सा
 दिव्वा देविड्ढी दिव्वा देवजुई किण्णा लद्धा जावं जं णं गंगदत्तेणं देवेणं सा
 दिव्वा देविड्ढी जाव अभिसमण्णागया ? गोयमादि ! समणे भगवं महावीरे
 भगवं गोयमं एवं वयासी-एवं खलु गोयमा ! तेणं कालेणं तेणं समएणं इहेव
 जंबुद्दीवे २ भारहे वासे हत्थिणापुरे णामं णयरे होत्था वण्णओ, सहसंबवणे
 उज्जाणे वण्णओ, तत्थ णं हत्थिणापुरे णयरे गंगदत्ते णामं गाहावई परिवसइ
 अड्ढे जाव अपरिभूए । तेणं कालेणं तेणं समएणं मुणिसुव्वए अरहा आइगरे जाव
 सव्वण्णु सव्वदरिसी आगासगएणं चक्केणं जाव पकड्डिज्जमाणेणं २ सीसगणसंपरि-
 वुडे पुव्वानुपुव्वि चरमाणे गामाणुगामं जाव जेणेव सहसंबवणे उज्जाणे जाव
 विहरइ, परिसा णिग्गया जाव पज्जुवासइ । तए णं से गंगदत्ते गाहावई इमीसे
 कहाए लद्धट्ठे समणे हट्टुट्ठं जाव कयक्कलि जाव सरीरे साओ गिहाओ पडि-
 णिवलमइ २ ता पायविहारचारेणं हत्थिणाजरं णथरं मज्झसंज्जेणं णिग्गच्छइ २
 ता जेणेव सहसंबवणे उज्जाणे जेणेव मुणिसुव्वए अरहा तेणेव उवागच्छइ २
 ता मुणिसुव्वयं अरहं तिक्खुत्तो आयाहिणं पयाहिणं जाव तिविहाए पज्जुवास-
 णाए पज्जुवासइ । तए णं मुणिसुव्वए अरहा गंगदत्तस्स गाहावइस्स तीसे य महइ

जाव परिसा पडिगया । तए णं से गंगदत्ते गाहावई मुणिसुक्वयस्स अरहओ
 अंतियं धम्मं सीच्चा णिसम्म हट्टतुट्ट उट्टाए उट्ठेइ २ ता मुणिसुक्वयं अरहं वंदइ
 णमंसइ वंदित्ता णमंसित्ता एवं वयासी—सद्दहामि णं भंते ! णिगंथं पावयणं जाव
 से जहेयं तुब्भे वदइ, जं णवरं देवाणुप्पिया ! जेट्टपुत्तं कुडुंबे ठावेमि, तए णं अहं
 देवाणुप्पियाणं अंतियं मुंडे जाव पठवयामि । अहासुहं देवाणुप्पिया ! भा पडिबंधं ।
 तए णं से गंगदत्ते गाहावई मुणिसुक्वएणं अरहया एवं वुत्ते समाणे हट्टतुट्टं
 मुणिसुक्वयं अरहं वंदइ णमंसइ वं० २ ता मुणिसुक्वयस्स अरहओ अंतियाओ
 सहसंबवणाओ उज्जाणाओ पडिणिकखमइ २ ता जेणेव हत्थियापुरे णयरे
 जेणेव सए गिहे तेणेव उवागच्छइ २ ता विउलं असणं पाणं जाव उवक्ख-
 डावेइ २ ता मित्तणाइणियग जाव आमंतेइ आमंतेत्ता तओ पच्छा ण्हाए जहा
 पूरणे जाव जेट्टपुत्तं कुडुंबे ठावेइ, तं मित्तणाइ जाव जेट्टपुत्तं च आपुच्छइ २ ता
 पुरिससहस्सवाहिंणि सीयं बुरूहइ पुरिससह० २ ता मित्तणाइणियग जाव
 परिजणेणं जेट्टपुत्तेणं य समणुगम्भमाणमग्गे संब्विड्ढीए जाव णाइयरवेणं
 हत्थियापुरं णयरं मज्झंमज्जेणं णिग्गच्छइ २ ता जेणेव सहसंबवणे उज्जाणे
 तेणेव उवागच्छइ २ ता छत्ताइए तिप्प्यगराइसए पासइ एवं जहा उदायणे
 जाव सयमेव आभरणे उमुयइ स० २ ता सयमेव पंचमूट्ठियं लीयं करेइ स० २
 ता जेणेव मुणिसुक्वए अरहा एवं जहेव उदायणे तहेव पव्वइए, तहेव एक्का-
 रस अंगाई अहिज्जइ जाव मासियाए संलेहणाए सट्ठि भत्ताइं अणसणाए
 छेवेइ सट्ठि भत्ताइं० २ ता आलोइयपुडिक्कंते समाहिपत्ते कालमासे कालं
 किच्चा महासुक्के कप्पे महासाभाणे विमाणे उववायसभाए देवसयणिज्जंसि
 जाव गंगदत्तदेवत्ताए उववण्णे । तए णं से गंगदत्ते देवे अहुणोववण्णमेत्तए समाणे
 पंचविहाए पज्जतीए पज्जत्तिभावं गच्छइ, तंजहा—आहारपज्जतीए जाव
 भासामणपज्जतीए, एवं खलु गोयमा ! गंगदत्तेणं देवेणं सा दिक्वा देविड्ढी
 जाव अभिसमण्णागया । गंगदत्तस्स णं भंते ! देवस्स केवइयं कालं ठिई पणत्ता ?
 गोयमा ! सत्तरस सागरोवमाइं ठिई प० । गंगदत्ते णं भंते ! देवे ताओ देव-
 सोमाओ आउक्खएणं जाव महाविदेहे वासे सिज्झिहिइ जाव अंतं काहिइ ।
 सेवं भंते ! सेवं भंते ! त्ति ॥ ५७५ ॥

सोलसमं सयं छट्ठो उद्देशो

कइविहे णं भंते ! सुविणदंसणे पण्णत्ते ? गोयमा ! पंचविहे सुविणदंसणे पण्णत्ते, तंजहा—अहातच्चे पयाणे चित्तसुविणे तद्विवरीए अब्वत्तदंसणे । सुत्ते णं भंते ! सुविणं पासइ, जागरे सुविणं पासइ, सुत्तजागरे सुविणं पासइ ? गोयमा ! णो सुत्ते सुविणं पासइ णो जागरे सुविणं पासइ, सुत्तजागरे सुविणं पासइ । जीवा णं भंते ! किं सुत्ता जागरा सुत्तजागरा ? गोयमा ! जीवा सुत्तावि जागरावि सुत्तजागरावि । णेरइया णं भंते ! किं सुत्ता० पुच्छा, गोयमा ! णेरइया सुत्ता णो जागरा णो सुत्तजागरा, एवं जाव चर्डारइया । पंचदिय-तिरिक्खजोणिया णं भंते ! किं सुत्ता० पुच्छा, गोयमा ! सुत्ता णो जागरा सुत्तजागरावि, मणुस्सा जहा जीवा, बाणमंतरजोइसियवेमाणिया जहा णेरइया ।। ५७६ ।। संबुडे णं भंते ! सुविणं पासइ असंबुडे सुविणं पासइ, संबुडासंबुडे सुविणं पासइ ? गोयमा ! संबुडेवि सुविणं पासइ, असंबुडेवि सुविणं पासइ, संबुडासंबुडे वि सुविणं पासइ, संबुडे सुविणं पासइ अहातच्चं पासइ, असंबुडे सुविणं पासइ तथा वा तं होज्जा अण्णहा वा तं होज्जा, संयुडासंबुडे सुविणं पासइ एवं चेव । जीवा णं भंते ! किं संबुडा असंबुडा संबुडासंबुडा ? गोयमा ! जीवा संबुडावि असंबुडावि संबुडासंबुडावि, एवं जहेव सुत्ताणं दंडओ तहेव भाणियब्बो । कइ णं भंते ! सुविणा पण्णत्ता ? गोयमा ! बायालीसं सुविणा पण्णत्ता । कइ णं भंते ! महासुविणा पण्णत्ता ? गोयमा ! तीसं महासुविणा पण्णत्ता । कइ णं भंते ! सव्वसुविणा पण्णत्ता ? गोयमा ! बावत्तरि सव्वसुविणा पण्णत्ता । तित्थयरमायरो णं भंते ! तित्थयरंसि गढमं वक्कममाणंसि कइ महासुविणे पासित्ता णं पडिबुज्झति ? गोयमा ! तित्थयरमायरो णं तित्थयरंसि गढमं वक्कममाणंसि एएसि तीसाए महासुविणाणं इमे चोइय महासुविणे पासित्ताणं पडिबुज्झति, तं०—गयउमभसीहअभिसेय जाव सिहिं च । चक्कवट्टिमायरो णं भंते ! चक्कवट्टिसि गढमं वक्कममाणंसि कइ महासुविणे पासित्ताणं पडिबुज्झति ? गोयमा ! चक्कवट्टिमायरो चक्कवट्टिसि जाव वक्कममाणंसि एएसि तीसाए महासुविणाणं एवं जहा तित्थयरमायरो जाव सिहिं च । वासुदेवमायरो णं पुच्छा, गोयमा ! वासुदेवमायरो

जाव वक्कममाणंसि एएसि चोद्दसहं महासुविणाणं अण्णयरे सत्त महासुविणे पासित्ताणं पडिबुद्धंति । बलदेवमायरो पुच्छा, गोयमा ! बलदेवमायरो जाव एएसि चोद्दसहं महासुविणाणं अण्णयरे चत्तारि महासुविणे पासित्ताणं पडिबुद्धंति । मंडलियमायरो णं भंते ! पुच्छा, गोयमा ! मंडलियमायरो जाव एएसि चोद्दसहं महासुविणाणं अण्णयरं एगं महासुविणं जाव पडिबुद्धंति ॥ ५७७ ॥ समणे भगवं महावीरे छउमत्थकालियाए अंतिमराइयंसि इमे वस महासुविणे पासित्ताणं पडिबुद्धे, तं०—एगं च णं महं घोररूवदित्तधरं तालपिसायं सुविणे पराजियं पासित्ताणं पडिबुद्धे १, एगं च णं महं सुक्किल्लपक्खगं पुंस-कोइलगं सुविणे पासित्ताणं पडिबुद्धे २, एगं च णं महं चित्तविचित्तपक्खगं पुंस-कोइलगं सुविणे पासित्ताणं पडिबुद्धे ३, एगं च णं महं दामदुगं सव्वरयणामयं सुविणे पासित्ताणं पडिबुद्धे ४, एगं च णं महं सेयं गोवगं सुविणे पासित्ताणं पडिबुद्धे ५, एगं च णं महं पउमसरं सव्वओ समंता कुसुमियं सुविणे पासित्ताणं पडिबुद्धे ६, एगं च णं महं सागरं उम्मीवीईसहस्सकलियं भुयाहि तिण्णं सुविणे पासित्ताणं पडिबुद्धे ७, एगं च णं महं विणयरं तेयसा जलंतं सुविणे पासित्ताणं पडिबुद्धे ८, एगं च णं महं हरिवेहलियवण्णाभेणं णियगेणं अतेणं माणसुत्तरं पक्खयं सव्वओ समंता आवेडियं परिवेडियं सुविणे पासित्ताणं पडिबुद्धे ९, एगं च णं महं मंदरे पक्वए मंदरचूलियाए उर्वारि सोहासणवरगयं अप्पाणं सुविणे पासित्ताणं पडिबुद्धे १० । जण्णं समणे भगवं महावीरे एगं महं घोररूवदित्तधरं तालपिसायं सुविणे पराजियं पासित्ताणं पडिबुद्धे, तण्णं समणेणं भगवया महावीरेणं मोहणिज्जे कम्मे मूलाओ उगघाइए १, जण्णं समणे भगवं महावीरे एगं महं सुक्किल्ल जाव पडिबुद्धे, तण्णं समणे भगवं महावीरे सुक्कज्जाणोवगए विहरइ २, जण्णं समणे भगवं महावीरे एगं महं चित्तविचित्त जाव पडिबुद्धे, तण्णं समणे भगवं महावीरे विचित्तं ससमयपरसमइयं दुवालसंगं गणिपिड्ढं आघवेइ पण्णवेइ परूवेइ दंसेइ णिदंसेइ उवदंसेइ, तंजहा—आयारं सूयगडं जाव दिट्ठिवायं ३, जण्णं समणे भगवं महावीरे एगं महं दामदुगं सव्वरयणामयं सुविणे पासित्ताणं पडिबुद्धे, तण्णं समणे भगवं महावीरे दुविहं धम्मं पण्णवेइ, तं०—आगारधम्मं वा अणागारधम्मं वा ४, जण्णं समणे भगवं महावीरे एगं महं सेयगोवगं जाव पडिबुद्धे, तण्णं समणस्स भगवओ महावीरस्स चाउव्व-

पणाइण्णे समणसंघे तं०-समणा समणीओ सावया सावियाओ ५, जण्णं समणे भगवं महावीरे एगं महं पउमसरं जाव पडिबुद्धे, तण्णं समणे भगवं महावीरे चउत्विहे देवे पणवेइ, तं०-भवणवासी वाणमंतरे जोइसिए वेमा-
 णिए ६, जण्णं समणे भगवं महावीरे एगं महं सागरं जाव पडिबुद्धे, तण्णं समणे भगवया महावीरेणं अणाईए अणवदग्गे जाव संसारकंतारे तिण्णे ७,
 जण्णं समणे भगवं महावीरे एगं महं दिणधरं जाव पडिबुद्धे, तण्णं समणस्स भगवओ महावीरस्स अणंते अणुत्तरे णिव्वाघाए णिरावरणे कसिणे पट्टिपुण्णे
 केवलवरणाणदंसणे सम्पुण्णे ८, जण्णं समणे जाव वीरे एगं महं हरिवेरुत्तिय जाव पडिबुद्धे, तण्णं समणस्स भगवओ महावीरस्स ओराला कित्तियणसद-
 सिलीया सदेवमणुयासुरे लोए परिभसंति-इति खलु समणे भगवं महावीरे इति खलु समणे भगवं महावीरे ९, जण्णं समणे भगवं महावीरे मंदरे पन्वए मंदर-
 चूलियाए जाव पडिबुद्धे, तण्णं समणे भगवं महावीरे सदेवमणुयासुराए परि-
 साए मज्झगए केवलीपण्णत्तं धम्मं आघवेइ जाव उवदसेइ ॥ ५७८ ॥ इत्थी वा पुरिसे वा सुविणंते एगं महं हयपांत वा गयपांत वा जाव वसभवंति वा
 पासमाणे पासइ, दुरूहमाणे दुरूहइ, दुरूढमिइ अप्पाणं मण्णइ, तक्खणामेव बुज्झइ, तेणेव भवग्गहणेणं सिज्झइ जाव अंतं करेइ । इत्थी वा पुरिसे वा सुविणंते एगं महं दामिणि पाईणपडोणाययं दुहओ समुहे पुट्ठं पासमाणे पासइ,
 संवेत्तेमाणे संवेत्तेइ, संवेत्तियमिइ अप्पाणं मण्णइ, तक्खणामेव बुज्झइ, तेणेव भवग्गहणेणं जाव अंतं करेइ । इत्थी वा पुरिसे वा सुविणंते एगं महं
 रज्जुं पाईणपडोणाययं दुहओ लोणंते पुट्ठं पासमाणे पासइ, छिद्रमाणे छिद्रइ, छिद्रणमिइ अप्पाणं मण्णइ, तक्खणामेव जाव अंतं करेइ । इत्थी वा पुरिसे वा सुविणंते एगं महं
 किण्हसुत्तं वा जाव सुक्कल्लसुत्तं वा पासमाणे पासइ, उग्गोदेमाणे उग्गोवेइ, उग्गोवियमिइ अप्पाणं मण्णइ, तक्खणामेव जाव अंतं करेइ । इत्थी वा पुरिसे वा सुविणंते एगं महं अयरारिं वा तंबरारिं वा तउय-
 रारिं वा सीसगरारिं वा पासमाणे पासइ, दुरूहमाणे दुरूहइ, दुरूढमिइ अप्पाणं मण्णइ, तक्खणामेव बुज्झइ, दोच्चेणं भवग्गहणेणं सिज्झइ जाव अंतं
 करेइ । इत्थी वा पुरिसे वा सुविणंते एगं महं हिरण्णरारिं वा सुवण्णरारिं वा रयणरारिं वा बइररारिं वा पासमाणे पासइ, दुरूहमाणे दुरूहइ, दुरूढमिइ
 अप्पाणं मण्णइ, तक्खणामेव बुज्झइ, तेणेव भवग्गहणेणं सिज्झइ जाव अंतं

करेइ । इत्थी वा पुरिसे वा सुविणंते एगं महं तणरासि वा जहा तेयणिसग्गे जाव अक्कररासि वा पासमाणे पासइ, विक्खिरमाणे विक्खिरइ, विक्खिणमिइ अप्पाणं मण्णइ, तक्खणामेव बुज्झइ, तेणेव जाव अंतं करेइ ! इत्थी वा पुरिसे वा सुविणंते एगं महं सरथंभं वा वीरणथंभं वा वंसीमूलथंभं वा वल्लीमूलथंभं वा पासमाणे पासइ, उम्मूलेमाणे उम्मूलेइ, उम्मूलियमिइ अप्पाणं मण्णइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं खीरकुंभं वा दहिकुंभं वा घयकुंभं वा महकुंभं वा पासमाणे पासइ, उप्पाडेमाणे उप्पाडेइ, उप्पाडियमिइ अप्पाणं मण्णइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं सुरावियडकुंभं वा सोवीरवियडकुंभं वा तेल्लकुंभं वा वसाकुंभं वा पासमाणे पासइ, भिदमाणे भिदइ, भिण्णमिइ अप्पाणं मण्णइ, तक्खणामेव बुज्झइ, दोच्चेणं भवग्गहणेणं जाव अंतं करेइ । इत्थी वा पुरिसे वा सुविणंते एगं महं पउमसरं कुसुमियं पासमाणे पासइ, ओगाहेमाणे ओगाहेइ, ओगाहमिइ अप्पाणं मण्णइ, तक्खणामेव बुज्झइ, तेणेव जाव अंतं करेइ । इत्थी वा जाव सुविणंते एगं महं सागरं उम्मीवीई जाव कलियं पासमाणे पासइ, तरमाणे तरइ, तिण्णमिइ अप्पाणं मण्णइ, तक्खणामेव बुज्झइ, तेणेव जाव अंतं करेइ । इत्थी वा जाव सुविणंते एगं महं भवणं सक्वरयणामयं पासमाणे पासइ, अणुप्पविसमाणे अणुप्पविसइ, अणुप्पविट्ठमिइ अप्पाणं मण्णइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं विंमाणं सक्वरयणामयं पासमाणे पासइ, दुरूहमाणे दुरूहइ, दुरूहमिइ अप्पाणं मण्णइ, तक्खणामेव बुज्झइ, तेणेव जाव अंतं करेइ ॥५७९॥ अहं भंते ! कोट्टपुडाण वा जाव केयईपुडाण वा अणुवार्यसि उन्निमज्जमाणण वा जाव ठाणाओ वा ठाणं संकामिज्जमाणणं किं कोट्ठे वाइ जाव केयई वाइ ? गोयमा ! णो कोट्ठे वाइ जाव णो केयई वाइ, घाणसहग्गया पोग्गला वाइ । सेवं भंते ! सेवं भंते ! ति ॥ ५८० ॥

सोलसमं सयं सत्तमो उद्देसो

कइविहे णं भंते ! उवओगे पण्णत्ते ? गोयमा ! दुविहे उवओगे पण्णत्ते, एवं जहा उवओगपयं पण्णवणाए तहेव णिरवसेसं भाणियत्वं, पासणयापयं च णिरवसेसं णेयत्वं । सेवं भंते ! सेवं भंते ! ति ॥ ५८१ ॥

सोलसमं सयं अट्टमो उद्देशो

केमहालए णं भंते ! लोए पणत्ते ? गोयमा ! महइमहालए जहा बारस-
मसए तहेव जाव असंखेज्जाओ जोयणकोडाकोडीओ परिवत्तेवेणं । लोगस्स णं
भंते ! पुरत्थिमिल्ले चरिमंते कि जीवा जीवदेसा जीवप्पएसा अजीवा अजीव-
देसा अजीवप्पएसा ? गोयमा ! णो जीवा जीवदेसावि जीवप्पएसावि अजी-
वावि अजीवदेसावि अजीवप्पएसावि । जे जीवदेसा ते णियमं एगिदियदेसा य
अहवा एगिदियदेसा य वेइंदियस्स य वेत्ते एवं जहा दसमसए अग्गेई दिसा तहेव,
णवरं देसेसु अण्णदियाणं आइल्लविरहिओ । जे अरूवी अजीवा ते छव्विहा,
अट्ठासमओ णत्थि, सेसं तं चेव सव्वं णिरवसेसं । लोगस्स णं भंते । दाह्णिल्ले
चरिमंते कि जीवा० ? एवं चेव, एवं पच्चत्थिमिल्लेवि, एवं उत्तरिल्लेवि ।
लोगस्स णं भंते ! उवरिल्ले चरिमंते कि जीवा० पुच्छा, गोयमा ! णो जीवा
जीवदेसावि जीवप्पएसावि जाव अजीवप्पएसावि । जे जीवदेसा ते णियमं एगि-
दियदेसा य अण्णदियदेसा य अहवा एगिदियदेसा य अण्णदियदेसा य वेइंदियस्स
य वेत्ते, अहवा एगिदियदेसा य अण्णदियदेसा य वेइंदियाणं य देसा, एवं मज्झि-
ल्लविरहिओ जाव पंचदियाणं, जे जीवप्पएसा ते णियमं एगिदियप्पएसा य
अण्णदियप्पएसा य अहवा एगिदियप्पएसा य अण्णदियप्पएसा य वेइंदियस्स
पएसा य अहवा एगिदियप्पएसा य अण्णदियप्पएसा य वेइंदियाणं य पएसा,
एवं आइल्लविरहिओ जाव पंचदियाणं, अजीवा जहा दसमसए तमाए तहेव
णिरवसेसं । लोगस्स णं भंते ! हेट्ठिल्ले चरिमंते कि जीवा० पुच्छा गोयमा !
णो जीवा जीवदेसावि जीवप्पएसावि जाव अजीवप्पएसावि जे जीवदेसा
ते णियमं एगिदियदेसा अहवा एगिदियदेसा य वेइंदियस्स देसे अहवा एगि-
दियदेसा य वेइंदियाणं य देसा, एवं मज्झिल्लविरहिओ जाव अण्णदियाणं पएसा,
आइल्लविरहिओ सव्वेसि जहा पुरत्थिमिल्ले चरिमंते तहेव, अजीवा जहेव उव-
रिल्ले चरिमंते तहेव । इमीसे णं भंते ! रयणप्पभाए पुडवीए पुरत्थिमिल्ले
चरिमंते कि जीवा० पुच्छा, गोयमा ! णो जीवा एवं जहेव लोगस्स तहेव चत्ता-
रिवि चरिमंता जाव उत्तरिल्ले, उवरिल्ले तहेव जहा दसमसए विमला दिसा
तहेव णिरवसेसं, हेट्ठिल्ले चरिमंते जहेव लोगस्स हेट्ठिल्ले चरिमंते तहेव, णवरं
देसे पंचदिएसु तियभंगोत्ति सेसं तं चेव, एवं जहा रयणप्पभाए चत्तारि चरि-

मंता भगिया एवं सबकरप्यभाएवि उवरिमहेद्विल्ला जहा रयणप्यभाए हेद्विल्ले,
 एवं जाव अहे सत्तमाए, एवं सोहम्मस्सवि जाव अच्चुयस्स, गेविज्जविमाणार्ण
 एवं चेव, णवरं उवरिमहेद्विल्लेसु चरिमतेसु देवेसु पांचदियाणवि मज्जिल्लविर-
 हिओ चेव सेसं तहेव, एवं जहा गेवेज्जविमाणा तथा अणुत्तरविमाणावि, ईसिप्प-
 वभारावि ॥ ५८२ ॥ परमाणुपोगले णं मंते ! लोगस्स पुरत्थिमिल्लाओ चरि-
 मंताओ पच्चत्थिमिल्लं चरिमंतं एगसमएणं गच्छइ, पच्चत्थिमिल्लाओ चरि-
 मंताओ पुरत्थिमिल्लं चरिमंतं एगसमएणं गच्छइ, दाहिणिल्लाओ चरिमंताओ
 उत्तरिल्लं जाव गच्छइ, उत्तरिल्लाओ चरिमंताओ दाहिणिल्लं चरिमंतं जाव
 गच्छइ, उवरिल्लाओ चरिमंताओ हेद्विल्लं चरिमंतं जाव एवं गच्छइ, हेद्विल्लाओ
 चरिमंताओ उवरिल्लं चरिमंतं एगसमएणं गच्छइ ? हंता गोयमा ! परमाणु-
 पोगले णं लोगस्स पुरत्थिमिल्लं तं चेव जाव उवरिल्लं चरिमंतं गच्छइ
 ॥ ५८३ ॥ पुरिसे णं मंते ! वासं वासइ णो वासइत्ति हत्थं वा पायं वा बाहुं
 वा ऊरुं वा आउंटावेमाणे वा पसारेमाणे वा कइकिरिए ? गोयमा ! जावं च
 णं से पुरिसे वासं वासइ वासं णो वासइइ हत्थं वा जाव ऊरु वा आउंटावेइ
 वा पसारेइ वा तावं च णं से पुरिसे काइयाए जाव पंचाहिं किरियाहिं पुट्ठे
 ॥ ५८४ ॥ देवे णं मंते ! महिद्विए जाव महेसक्खे लोगंते ठिच्चा पभू अलो-
 गंसि हत्थं वा जाव ऊरुं वा आउंटावेत्तए वा पसारेत्तए वा ? णो इणट्ठे
 समट्ठे । से केणट्ठेणं मंते ! एवं वुच्चइ—देवे णं महिद्विए जाव महेसक्खे लोगंते
 ठिच्चा णो पभू अलोगंसि हत्थं वा जाव पसारेत्तए वा ? गोयमा ! जीवाणं
 आहारोवच्चिया पोगला बौदिच्चिया पोगला कलेवरच्चिया पोगला पोगलामेव
 पप्प जीवाण य अजीवाण य गइपरियाए आहिज्जइ. अलोए णं गेवत्थि जीवा
 गेवत्थि पोगला से तेणट्ठेणं जाव पसारेत्तए वा । सेवं मंते ! २ त्ति ॥ ५८५ ॥

सोलसमं सयं णवमो उद्देसो

कहिण्णं मंते ! बलिस्स वइरोयणिदस्स वइरोयणरणो सभा सुहम्मा प० ?
 गोयमा ! जंबुद्वीवे दीवे मंदरस्स पक्खयस्स उत्तरेणं तिरियमसंखेज्जे जहेव
 चंमरस्स जाव बायालीसं जीयणसहस्साइं ओगाहिता एत्थ णं बलिस्स वइरोय-
 णिदस्स वइरोयणरणो रुयगिदे णामं उप्पायपक्खए पणत्ते, सत्तरस एक्कवीसे

जोयणसए एवं पमाणं जहेव तिगिच्छिकूडस्स पासायवडिसगस्सवि तं चेव
पमाणं सीहासणं सपरिवारं बलिस्स परियारेणं अट्ठो तहेव, णवरं ह्यग्गिदप्प-
भाइं ३ सेसं तं चेव जाव बलिचंचाए रायहाणीए अण्णेसि च जाव
रुयग्गिदस्स णं उप्पायपव्वयस्स उत्तरेणं छवकोडिसए तहेव जाव चत्तालीसं
जोयणसहस्साइं ओगाहिता एत्थ णं बलिस्स वडिरोयणिवस्स वडिरोयणरण्णो
बलिचंचा णामं रायहाणी प० एगं जोयणसयसहस्सं पमाणं तहेव उववाओ जाव
आयरक्खा सव्वं तहेव णिरवसेसं, णवरं साइरेगं सागरोवमं ठिई प०, सेसं तं
चेव जाव बली वडिरोयणिवे बली० २ । सेवं भंते ! २ त्ति जाव विहरइ ॥ ५८६ ॥

सोलसमं सयं दसमो उट्ठेसो

कइविहे णं भंते ! ओही पण्णत्ते ? गोयमा ! दुविहा ओही प०, तं०-
ओहीपयं णिरवसेसं भाणियव्वं । सेवं भंते ! २ त्ति जाव विहरइ ॥ ५८७ ॥

सोलसमं सयं ११-१४ उट्ठेसा

दीवकुमारा णं भंते ! सव्वे समाहारा सव्वे समुस्सासणिस्सासा ? णो
इणट्ठे समट्ठे, एवं जहा पढमसए विइयउट्ठेसए दीवकुमाराणं वत्तव्वया तहेव
जाव समाउया समुस्सासणिस्सासा । एवं णामावि, दीवकुमाराणं भंते ! कइ
लेस्साओ पण्णत्ताओ ? गोयमा ! चत्तारि लेस्साओ पण्णत्ताओ, तंजहा-कण्ह-
लेस्सा जाव तेउलेस्सा । एएसि णं भंते ! दीवकुमाराणं कण्हलेस्साणं जाव
तेउलेस्साण य कयरे कयरेहितो जाव विसेसाहिया वा ? गोयमा ! सव्वत्योवा
दीवकुमारा तेउलेस्सा, काउलेस्सा असंखेज्ज गुणा, णीललेस्सा विसेसाहिया,
कण्हलेस्सा विसेसाहिया । एएसि णं भंते ! दीवकुमाराणं कण्हलेस्साणं जाव
तेउलेस्साण य कयरे कयरेहितो अप्पिड्डिया वा महिड्डिया वा ? गोयमा !
कण्हलेस्साहितो णीललेस्सा महिड्डिया जाव सव्वमहिड्डिया तेउलेस्सा । सेवं
भंते ! २ त्ति जाव विहरइ ॥ १६ ॥ ११ ॥ उदहिकुमारा णं भंते ! सव्वे
समाहारा० एवं चेव । सेवं भंते ! २ त्ति ॥ १६ ॥ १२ ॥ एवं दिसाकुमारावि ।
सेवं भंते ! २ त्ति ॥ १६ ॥ १३ ॥ एवं थणियकुमारावि । सेवं भंते ! सेवं
भंते ! त्ति जाव विहरइ ॥ ५८८ ॥

सोलसमं सयं समत्तं

सत्तरसमं सयं पढमो उद्देसो

णमो सुयदेवयाए भगवईए । कुंजर १ संजय २ सेलेसि ३ किरिय ४ ईसाण
 ५ पुढवि ६-७ दग ८-९ वाऊ १०-११ । एगिदिय १२ णाग १३ सुवण्ण १४
 विज्जु १५ वाउ १६ ऽगि १७ सत्तरसे ॥ १ ॥ रायगिहे जाव एवं वयासी-
 उवाई णं भंते ! हत्थिराया कओहिंतो अणंतरं उव्वट्टित्ता उदाइहत्थिरायत्ताए
 उववण्णे ? गोयमा ! असुरकुमारोहंतो देवेहिंतो अणंतरं उव्वट्टित्ता उदाइ-
 हत्थिरायत्ताए उववण्णे । उवाई णं भंते ! हत्थिराया कालमासे कालं किञ्चा
 काहिं गच्छिहिइ काहिं उववज्जिहिइ ? गोयमा ! इभोसे णं रयणप्पमाए पुढवीए
 उवकोससागरोवमट्टिइयसि णिरयावाससि णेरइयत्ताए उववज्जिहिइ । से णं
 भंते ! तओहिंतो अणंतरं उव्वट्टित्ता काहिं गच्छिहिइ काहिं उववज्जिहिइ ?
 गोयमा ! महाविदेहे वासे सिज्जिहिइ जाव अंतं काहिइ । भूयाणंदे णं भंते !
 हत्थिराया कओहिंतो अणंतरं उव्वट्टित्ता भूयाणंदे हत्थिरायत्ताए० एवं जहेव
 उवाई जाव अंतं काहिइ ॥ ५८९ ॥ पुरिसे णं भंते ! तालमारुहइ ता० २ ता
 तालाओ तालफलं पचालेमाणे वा पवाडेमाणे वा कइकिरिए ? गोयमा ! जावं
 च णं से पुरिसे तालमारुहइ तालमारुहिता तालाओ तालफलं पचालेइ वा
 पवाडेइ वा तावं च णं से पुरिसे काइयाए जाव पंचाहिं किरियाहिं पुट्ठे, जेसि-
 पिय णं जीवाणं सरीरेहिंतो ताले णिव्वत्तिए तालफले णिव्वत्तिए तेवि णं जीवा
 काइयाए जाव पंचाहिं किरियाहिं पुट्ठा । अहे णं भंते ! से तालफले अप्पणो
 गइयत्ताए जाव पच्चोवयमाणे जाइं तत्थ पाणाइं जाव जीवियाओ ववरोवेइ
 ताए णं भंते ! से पुरिसे कइकिरिए ? गोयमा ! जावं च णं से पुरिसे ताल-
 प्फले अप्पणो गरुयत्ताए जाव जीवियाओ ववरोवेइ तावं च णं से पुरिसे काइ-
 याए जाव चउहिं किरियाहिं पुट्ठे, जेसिपिय णं जीवाणं सरीरेहिंतो ताले णिव्व-
 त्तिए तेवि णं जीवा काइयाए जाव चउहिं किरियाहिं पुट्ठा, जेसिपिय णं जीवाणं
 सरीरेहिंतो तालफले णिव्वत्तिए तेवि णं जीवा काइयाए जाव पंचाहिं किरि-
 याहिं पुट्ठा, जेवि य से जीवा अहे बीससाए पच्चोवयमाणस्स उवग्गहे वट्टंति
 तेवि णं जीवा काइयाए जाव पंचाहिं किरियाहिं पुट्ठा । पुरिसे णं भंते ! रुक्खस्स
 मूलं पचालेमाणे वा पवाडेमाणे वा कइकिरिए ? गोयमा ! जावं च णं से पुरिसे
 रुक्खस्स मूलं पचालेइ वा पवाडेइ वा तावं च णं से पुरिसे काइयाए जाव

पंचाहं किरियाहं पुट्टे, जेसिपिय णं जीवाणं सरीरेहंतो मूले णिव्वत्तिए जाव बीए णिव्वत्तिए तेवि णं जीवा काइयाए जाव पंचाहं किरियाहं पुट्टा । अहे णं भंते ! से मूले अप्पणो गहयत्ताए जाव जीवियाओ ववरोवेइ तओ णं भंते ! से पुरिसे कइकिरिए ? गोयमा ! जावं च णं से मूले अप्पणो जाव ववरोवेइ तावं च णं से पुरिसे काइयाए जाव चउहं किरियाहं पुट्टे, जेसिपिय णं जीवाणं सरीरेहंतो कंदे णिव्वत्तिए जाव बीए णिव्वत्तिए तेवि णं जीवा काइयाए जाव चउहं किरियाहं पुट्टा, जेसिपिय णं जीवाणं सरीरेहंतो मूले णिव्वत्तिए तेवि णं जीवा काइयाए जाव पंचाहं किरियाहं पुट्टा, जेवि णं से जीवा अहे बीससाए पच्चोवयमाणस्स उवग्गहे चट्टति तेवि णं जीवा काइयाए जाव पंचाहं किरियाहं पुट्टा । पुरिसे णं भंते ! ख्वलस्स कंदं पाचलेइ० ? गोयमा ! जावं च णं से पुरिसे जाव पंचाहं किरियाहं पुट्टे, जेसिपिय णं जीवाणं सरीरेहंतो मूले णिव्वत्तिए जाव बीए णिव्वत्तिए तेवि णं जीवा जाव पंचाहं किरियाहं पुट्टा । अहे णं भंते ! से कंदे अप्पणो जाव चउहं किरियाहं पुट्टे, जेसिपिय णं जीवाणं सरीरेहंतो मूले णिव्वत्तिए खंधे णिव्वत्तिए जाव चउहं पुट्टा, जेसिपिय णं जीवाणं सरीरेहंतो कंदे णिव्वत्तिए तेवि णं जीवा पंचाहं किरियाहं पुट्टा, जेवि य से जीवा अहे बीससाए पच्चोवयमाणस्स जाव पंचाहं पुट्टा जहा कंदे एवं जाव वीयं ॥ ५६० ॥ कइ णं भंते ! सरीरगा पणत्ता ? गोयमा ! पंच सरीरगा पणत्ता, तंजहा—ओरालिए जाव कम्मए । कइ णं भंते ! इंदिया प० ? गोयमा ! पंच इंदिया प०, तं—सोइंदिए जाव फांसिदिए । कइविहे णं भंते ! जोए प० ? गोयमा ! तिविहे जोए प०, तं—मणजोए वइजोए कायजोए । जीवे णं भंते ! ओरालियसरीरं णिव्वत्तेमाणे कइकिरिए ? गोयमा ! सिघ तिकिरिए सिघ चउकिरिए सिघ पंचकिरिए, एवं पुढविक्काइएवि, एवं जाव मणुस्से । जीवा णं भंते ! ओरालियसरीरं णिव्वत्तेमाणा कइकिरिया ? गोयमा ! तिकिरियावि चउकिरियावि पंचकिरियावि, एवं पुढविक्काइयावि, एवं जाव मणुस्सा, एवं वेउध्वियसरीरेणवि दो दंडगा णवरं जस्स अत्थि वेउध्वियं, एवं जाव कम्मगसरीरं, एवं सोइंदियं जाव फांसिदियं, एवं मणजोगं वइजोगं कायजोगं जस्स जं अत्थि तं माणियव्वं, एए एगत्तपुहुत्तेणं छव्वीसं दंडगा ॥ ५६१ ॥ कइविहे णं भंते !

भावे पण्णत्ते ? गोयमा ! छविहे भावे प०, तं०-उदइए उवसमिए जाव सण्णिवाइए । से कि तं उदइए भावे ? उदइए भावे दुविहे पण्णत्ते, तंजहा-उदए य उदयणित्पण्णे य, एवं एएणं अभिलावेणं जहा अनुओगदारे छण्णामं तहेव गिरवसेसं भाणियव्वं जाव से तं सण्णिवाइए भावे । सेवं भंते ! सेवं भंते ! त्ति ॥ ५६२ ॥

सत्तरसमं सयं बीओ उट्टेसो

से णूभं भंते ! संजयविरयपडिहयपच्चवखायपावकम्मे धम्मे टिए, असंजय-अविरयअपडिहयपच्चवखायपावकम्मे अहम्मे टिए, संजयासंजए धम्माधम्मे टिए ? हुंता गोयमा ! संजयविरय जाव धम्माधम्मे टिए । एएसि णं भंते ! धम्मसि वा अहम्मसि वा धम्माधम्मसि वा चक्किया केइ आसइत्तए वा जाव तुयट्टित्तए वा ? गोयमा ! णो इणट्ठे समट्ठे । से केणं खाइ अट्ठेणं भंते ! एवं वुच्चइ जाव धम्माधम्मे टिए ? गोयमा ! संजयविरय जाव पावकम्मे धम्मे टिए धम्मं चेव उवसंपज्जित्ताणं विहरइ, असंजय जाव पावकम्मे अहम्मे टिए अहम्मं चेव उवसंपज्जित्ताणं विहरइ, संजयासंजए धम्माधम्मे टिए धम्माधम्मं उवसंपज्जित्ताणं विहरइ, से तेणट्ठेणं जाव धम्माधम्मे टिए । जीवा णं भंते ! किं धम्मे ठिया अहम्मे ठिया धम्माधम्मे ठिया ? गोयमा ! जीवा धम्मेवि ठिया अहम्मेवि ठिया धम्माधम्मेवि ठिया । णेरइयाणं भंते ! पुच्छा, गोयमा ! णेरइया णो धम्मे ठिया, अहम्मे ठिया, णो धम्माधम्मे ठिया, एवं जाव चउरिदियाणं । पंचिदियतिरिक्खजोणियाणं पुच्छा, गोयमा ! पंचिदिय-तिरिक्खजोणिया णो धम्मे ठिया, अहम्मे ठिया, धम्माधम्मेवि ठिया, मणुस्सा जहा जीवा, वाणमंतर-जोइसिय-वेमाणिया जहा णेरइया ॥ ५६३ ॥ अण्ण-उत्थिया णं भंते ! एवमाइक्खंति जाव परूवेति-एवं खलु समणा पंडिया समणोवासया बालपंडिया, जस्स णं एगपाणाएवि दंडे अणिविखत्ते से णं एगंतबालेत्ति वत्तव्वं सिया । से कहमेयं भंते ! एवं ? गोयमा ! जण्णं ते अण्णउत्थिया एवमाइक्खंति जाव वत्तव्वं सिया, जे ते एवमाहंसु म्मिच्छं ते एवमाहंसु, अहं पुण गोयमा ! एवमाइक्खामि जाव परूवेमि-एवं खलु समणा पंडिया, समणोवासया बालपंडिया, जस्स णं एगपाणाएवि दंडे णिविखत्ते से णं णो एगंतबालेत्ति वत्तव्वं सिया । जीवा णं भंते ! किं बाला पंडिया बालपंडिया ?

गोयमा ! जीवा बालावि पंडियावि बालपंडियावि । णेरइयाणं पुच्छा, गोयमा ! णेरइया बाला णो पंडिया णो बालपंडिया, एवं जाव च उररिदिया । पंचिदियतिरि-
 वखजोणियाणं पुच्छा, गोयमा ! पंचिदियतिरिक्खजोणिया बाला णो पंडिया बाल-
 पंडियावि, मणुस्सा जहा जीवा, वाणमंतरजोइसियवेमाणिया जहा णेरइया । ५६४।
 अण्णउत्थिया णं भंते ! एवमाइक्खति जाव परुवेति—एवं खलु पाणाइवाए मुसावाए
 जाव मिच्छादंसणसल्ले वट्टमाणस्स अण्णे जीवे अण्णे जीवाया, पाणाइवायवेरमणे
 जाव परिग्गह्वेरमणे कोहविवेगे जाव मिच्छादंसणसल्लविवेगे वट्टमाणस्स अण्णे
 जीवे अण्णे जीवाया, उप्पत्तियाए जाव पारिणामियाए वट्टमाणस्स अण्णे जीवे
 अण्णे जीवाया, उग्गहे ईहा अवाए धारणाए वट्टमाणस्स जाव जीवाया, उट्टाणे
 जाव परक्कमे वट्टमाणस्स जाव जीवाया, णेरइयत्ते तिरिक्खमणुस्सदेवेत्ते वट्ट-
 माणस्स जाव जीवाया, णाणावरणिज्जे जाव अंतराइए वट्टमाणस्स जाव
 जीवाया, एवं कण्हलेस्साए जाव सुवकलेस्साए, सम्मदिट्ठीए ३, एवं चक्खु-
 दंसणे ४, आभिणिबोहियण्णे ५, मइअण्णाणे ३, आहारसण्णाए ४, एवं ओरा-
 लियसरीरे ५, एवं मणजोए ३, सागारोवओगे अणागारोवओगे वट्टमाणस्स
 अण्णे जीवे अण्णे जीवाया । से कहमेयं भंते ! एवं ? गोयमा ! जण्णं ते अण्ण-
 उत्थिया एवमाइक्खति जाव मिच्छं ते एवमाहंसु, अहं पुण गोयमा ! एवमाइ-
 क्खामि जाव परुवेमि—एवं खलु पाणाइवाए जाव मिच्छादंसणसल्ले वट्टमाणस्स
 सच्चेव जीवे सच्चेव जीवाया जाव अणागारोवओगे वट्टमाणस्स सच्चेव जीवे
 सच्चेव जीवाया ॥ ५६५ ॥ देवे णं भंते ! महिड्डिए जाव महेसक्खे पुव्वामेव रूवी
 भवित्ता पभू अरूविं विउच्चित्ताणं चिट्ठित्तए ? णो इणट्ठे समट्ठे । से केणट्ठेणं
 भंते ! एवं बुच्चइ—देवे णं जाव णो पभू अरूविं विउच्चित्ताणं चिट्ठित्तए ?
 गोयमा ! अहमेयं जाणामि, अहमेयं पासामि, अहमेयं बुञ्जामि, अहमेयं अभि-
 समण्णागच्छामि, मए एयं णायं, मए एयं दिट्ठं, मम एयं बुद्धं, मए एयं अभि-
 समण्णागयं—जण्णं तहागयस्स जीवस्स सरूविस्स सकम्मस्स सरागस्स सवेयस्स
 समोहस्स सलेसस्स सरीरस्स ताओ सरीराओ अविप्पभुवक्कस्स एवं पण्णायइ,
 तंजहा—कालत्ते वा जाव सुविकल्लत्ते वा, सुद्धिमगंधत्ते वा दुद्धिमगंधत्ते वा, तित्तत्ते
 वा जाव महुरत्ते वा, कक्खडत्ते वा जाव लुक्खत्ते वा, से -तेणट्ठेणं गोयमा !
 जाव चिट्ठित्तए । सच्चेव णं भंते ! से जीवे पुव्वामेव अरूवी भवित्ता पभू रूविं

विउच्चित्तानं चिद्विहृत्तए ? णो इणट्ठे समट्ठे । से केणट्ठेणं जाव चिद्विहृत्तए ? गोयमा ! अहमेयं जाणामि जाव जण्णं तहागयस्स जीवस्स अरुविस्स अकम्मस्स अरागस्स अवेयस्स अमोहस्स अलेसस्स असरीरस्स ताओ सरीराओ विप्पमुक्कस्स णो एवं पणायइ, तं०—कालत्ते वा जाव लुक्खत्ते वा, से तेणट्ठेणं जाव चिद्विहृत्तए वा । सेवं भंते ! सेवं भंते ! त्ति ॥ ५६६ ॥

सत्तरसमं सयं तइओ उद्देसो

सेलेसि पडिक्खणए णं भंते ! अणगारे सया समियं एयइ वेयइ जाव तं तं भावं परिणमइ ? णो इणट्ठे समट्ठे, णणत्थेगेणं परप्पओगेणं । कइविहा णं भंते ! एयणा प० ? गोयमा ! पंचविहा एयणा प०, तंजहा—दब्बेयणा खेत्तेयणा कालेयणा भवेयणा भावेयणा । दब्बेयणा णं भंते ! कइविहा प० ? गोयमा ! चउच्चिहा प०, तंजहा—णेरइयदब्बेयणा, तिरिक्खदब्बेयणा, मणुस्सदब्बेयणा, देवदब्बेयणा । से केणट्ठेणं भंते ! एवं वुच्चइ—णेरइयदब्बेयणा २ ? गोयमा ! जण्णं णेरइया णेरइयदब्बे वट्टिसु वा वट्टंति वा वट्टिस्संति वा ते णं तत्थ णेरइया णेरइयदब्बे वट्टमाणा णेरइयदब्बेयणं एइंसु वा एयंति वा एइस्संति वा, से तेणट्ठेणं जाव दब्बेयणा । से केणट्ठेणं भंते ! एवं वुच्चइ—तिरिक्खजोणियदब्बेयणा २ ? एवं चेव, णवरं तिरिक्खजोणियदब्बे० भाणियद्वं, सेसं तं चेव, एवं जाव देवदब्बेयणा । खेत्तेयणा णं भंते ! कइविहा प० ? गोयमा ! चउच्चिहा प०, तं०—णेरइयखेत्तेयणा जाव देवखेत्तेयणा । से केणट्ठेणं भंते ! एवं वुच्चइ णेरइयखेत्तेयणा २ ? एवं चेव, णवरं णेरइयखेत्तेयणा भाणियत्त्वा, एवं जाव देवखेत्तेयणा, एवं कालेयणावि, एवं भवेयणावि, एवं भावेयणा वि, एवं जाव देवभावेयणा ॥ ५६७ ॥ कइविहा णं भंते ! चलणा प० ? गोयमा ! तिविहा चलणा प०, तं०—सरीरचलणा इंदियचलणा जोगचलणा । सरीरचलणा णं भंते ! कइविहा प० ? गोयमा ! पंचविहा प०, तं०—ओरालियसरीरचलणा जाव कम्मगसरीरचलणा । इंदियचलणा णं भंते ! कइविहा प० ? गोयमा ! पंचविहा प०, तंजहा—सोइंदियचलणा जाव फासिंदियचलणा । जोगचलणा णं भंते ! कइविहा प० ? गोयमा ! तिविहा प०, तं०—मणजोगचलणा वइजोगचलणा कायजोगचलणा । से केणट्ठेणं भंते ! एवं वुच्चइ—ओरालियसरीरचलणा २ ? गोयमा ! जं णं जीवा ओरालियसरीरे वट्टमाणा ओरालियसरीरप्पाओगाइं दक्काइं ओरा-

लियसरीरत्ताए परिणामेमाणा ओरालियसरीरचलणं चलिमु वा चलन्ति वा
 चलिस्मन्ति वा से तेणट्ठेणं जाव ओरालियसरीरचलणा २ । से केणट्ठेणं भंते !
 एवं वुच्चइ वेउड्वियसरीरचलणा २ ? एवं खेव, णवरं वेउड्वियसरीरे वट्टमाणा
 एवं जाव कम्मगसरीरचलणा । से केणट्ठेणं भंते ! एवं वुच्चइ सोइंदियचलणा
 २ ? गोयमा ! जण्णं जीवा सोइंदिए वट्टमाणा सोइंदियप्पाओगाइं दक्खाइं
 सोइंदियत्ताए परिणामेमाणा सोइंदियचलणं चलिमु वा चजति वा चलिस्मन्ति
 वा से तेणट्ठेणं जाव सोइंदियचलणा २, एवं जाव फासिदियचलणा, से केण-
 ट्ठेणं भंते ! एवं वुच्चइ मणजोगचलणा २ ? गोयमा ! जण्णं जीवा मणजोए
 वट्टमाणा मणजोगप्पाओगाइं दक्खाइं मणजोगत्ताए परिणामेमाणा मणजोग-
 चलणं चलिमु वा चलन्ति वा चलिस्मन्ति वा से तेणट्ठेणं जाव मणजोगचलणा २
 एवं वड्ढजोगचलणावि, एवं कायजोगचलणावि ॥ ५६८ ॥ अहं भंते ! संवेगे
 णिव्वेए गुरुसाहम्मियमुत्सूसणया आलोयणया णिदणया भरहणया खमावणया
 सुयसहायया विउसमणया भावे अप्पडिब्रद्धया विणिवट्टणया विचित्तसय्यासण-
 सेवणया सोइंदियसंवेरे जाव फासिदियसंवेरे जोगपच्चक्खाणे सरीरपच्चक्खाणे
 कसायपच्चक्खाणे संभोगपच्चक्खाणे उवहिपच्चक्खाणे भत्तपच्चक्खाणे खमा
 विरागया भावसच्चे जोगसच्चे करणसच्चे मणसमण्णाहरणया वड्ढसमण्णाहरणया
 कायसमण्णाहरणया कोहविवेसे जाव मिच्छादंसणसल्लविवेगे णाणसंपण्णया
 दंसणसंपण्णया अरित्तसंपण्णया वेयणअहियासणया मारणंतियअहियासणया एए
 णं भंते ! पया किपज्जवसाणकला पणत्ता ? समणाउसो ! गोयमा ! संवेगे
 णिव्वेए जाव मारणंतियअहियासणया एए णं सिद्धिपज्जवसाणकला प० समणा-
 उसो ! सेवं भंते ! सेवं भंते ! त्ति जाव त्रिहरइ ॥ ५६९ ॥

सत्तरसमं सयं चउत्थो उट्ठेसो

तेणं कालेणं तेणं समएणं रायगिहे णयरे जाव एवं वयासी-अत्थि णं भंते !
 जीवाणं याणाइवाएणं किरिया कज्जइ ? हुंता अत्थि । सा भंते ! कि पुट्टा
 कज्जइ अपुट्टा कज्जइ ? गोयमा ! पुट्टा कज्जइ णो अपुट्टा कज्जइ, एवं जहा
 पढमसए छट्ठहंसए जाव णो अणाणुपुट्टिकडान्ति वत्तव्वं सिया, एवं जाव वेमा-
 णियरणं, णवरं जीवाणं एगिदियाण य णिव्ववाघाएणं छट्ठिसं वाघायं पडुच्च सिय
 तिदिंसि सिय चउदिंसि सिय पंचदिंसि सेसाणं णियमं छट्ठिसि । अत्थि णं भंते !

जीवाणं मुसावाएणं किरिया कज्जइ ? हंता अत्थि । सा भंते ! किं पुट्टा कज्जइ अपुट्टा कज्जइ ? जहा पाणाइवाएणं दंडओ एवं मुसावाएणवि, एवं अदिग्णादाणेणवि मेहुणेणवि परिग्गहेणवि, एवं एए पंच दंडगा ५ । जं समयणं भंते ! जीवाणं पाणाइवाएणं किरिया कज्जइ सा भंते ! किं पुट्टा कज्जइ अपुट्टा कज्जइ ? एवं तहेव जाव वत्तव्वं सिधा जाव वेमाणियाणं, एवं जाव परिग्गहेणं, एवं एएवि पंच दंडगा १० । जं देसेणं भंते ! जीवाणं पाणाइवाएणं किरिया कज्जइ ? एवं चेव जाव परिग्गहेणं, एए वि पंच दंडगा १५ । जं पएसं णं भंते ! जीवाणं पाणाइवाएणं किरिया कज्जइ सा भंते ! किं पुट्टा कज्जइ एवं तहेव दण्डओ, एवं जाव परिग्गहेणं २० एवं एए वीसं दंडगा ॥ ६०० ॥ जीवाणं भंते ! किं अत्तकडे दुक्खे, परकडे दुक्खे, तदुभयकडे दुक्खे ? गोयमा ! अत्तकडे दुक्खे, णो परकडे दुक्खे, णो तदुभयकडे दुक्खे, एवं जाव वेमाणियाणं । जीवा णं भंते ! किं अत्तकडं दुक्खं वेदंति, परकडं दुक्खं वेदंति, तदुभयकडं दुक्खं वेदंति ? गोयमा ! अत्तकडं दुक्खं वेदंति, णो परकडं दुक्खं वेदंति, णो तदुभयकडं दुक्खं वेदंति, एवं जाव वेमाणियाणं । जीवाणं भंते ! किं अत्तकडा वेयणा, परकडा वेयणा, तदुभयकडा वेयणा ? गोयमा ! अत्तकडा वेयणा, णो परकडा वेयणा, णो तदुभयकडा वेयणा, एवं जाव वेमाणियाणं । जीवा णं भंते ! किं अत्तकडं वेयणं वेदंति, परकडं वेयणं वेदंति, तदुभयकडं वेयणं वेदंति ? गोयमा ! जीवा अत्तकडं वेयणं वेदंति, णो परकडं वेयणं वेदंति, णो तदुभयकडं वेयणं वेदंति, एवं जाव वेमाणियाणं । सेवं भंते ! सेवं भंते ! त्ति ॥ ६०१ ॥

सत्तरसमं सयं पंचमो उद्देशो

कहिं णं भंते ! ईसाणस्स देविदस्स देवरण्णो सभा सुहम्मा पणत्ता ? गोयमा ! जंबुद्दीपे २ भंदरस्स पव्वयस्स उत्तरेणं इमीसे णं रयणप्पभाए पुढ-वीए बहुसभरमणिज्जाओ भूमिभागाओ उड्ढं चंदिमसूरियं । जहा ठाणपए जाव मज्जे ईसाणवाडिसए महाविमाणे से णं ईसाणवाडिसए महाविमाणे अद्धतेरस-जोयणत्तयसहस्साइं० एवं जहा वसमसए सक्कविमाणवत्तव्वया सा इहवि ईसा-णस्स णिरवसेसा भाणियग्गवा जाव आयरक्खत्ति, ठिईसाइरेगाइं दो सागरोव-माइं, सेसं तं चेव जाव ईसाणे देविदे देवराया २ । सेवं भंते ! २ त्ति ॥ ६०२ ॥

सत्तरसमं सयं ६-१७ उद्देसा

पुढविवकाइए णं भंते ! इमीसे रयणप्पभाए पुढवीए समोहए २ ता जे भविए सोहम्मे कप्पे पुढविवकाइयत्ताए उववज्जित्तए से णं भंते ! किं पुढ्वि उववज्जित्ता पच्छा संपाउणेज्जा, पुढ्वि वा संपाउणित्ता पच्छा उवज्जेज्जा ? गोयमा ! पुढ्वि वा उववज्जित्ता पच्छा संपाउणेज्जा, पुढ्वि वा संपाउणित्ता पच्छा उववज्जेज्जा । से केणट्ठेणं जाव पच्छा उववज्जेज्जा ? गोयमा ! पुढविवकाइयाणं तओ समुग्घाया प०, तं०-वेयणासमुग्घाए कसायसमुग्घाए मारणतियसमुग्घाए, मारणतियसमुग्घाएणं समाहणमाणे देसेणं वा समोहणइ सव्वेण वा समोहणइ, देसेणं समोहणमाणे पुढ्वि संपाउणित्ता पच्छा उववज्जित्ता, सव्वेणं समोहणमाणे पुढ्वि उववज्जित्ता पच्छा संपाउणेज्जा, से तेणट्ठेणं जाव उववज्जेज्जा । पुढविवकाइए णं भंते ! इमीसे रयणप्पभाए पुढवीए जाव समोहए २ ता जे भविए ईसाणे कप्पे पुढ्वि० एवं चेव ईसाणेवि, एवं जाव अच्चुयगेविज्जविमाणे, अणुत्तरविमाणे ईसिप्पभाराए य एवं चेव । पुढविवकाइए णं भंते ! सक्करप्पभाए पुढवीए समोहए २ ता जे भविए सोहम्मे कप्पे पुढ्वि० एवं जहा रयणप्पभाए पुढविवकाइओ उववाइओ एवं सक्करप्पभाएवि पुढविवकाइओ उववाएयव्वो जाव ईसिप्पभाराए, एवं जहा रयणप्पभाए वत्तव्वया भणिया एवं जाव अहे सत्तभाए समोहए ईसिप्पभाराए उववाएयव्वो सेसं तं चेव । सेवं भंते ! २ त्ति १७-६ ।। ६०३ ।। पुढविवकाइए णं भंते ! सोहम्मे कप्पे समोहए समोहणित्ता जे भविए इमीसे रयणप्पभाए पुढवीए पुढविवकाइयत्ताए उववज्जित्तए से णं भंते ! किं पुढ्वि० सेसं तं चेव जहा रयणप्पभाए पुढविवकाइओ सव्वकप्पेसु जाव ईसिप्पभाराए ताव उववाइओ एवं सोहम्मपुढविकाइओवि सत्तमुवि पुढवीसु उववाएयव्वो जाव अहे सत्तभाए, एवं जहा सोहम्मपुढविकाइओ सव्वपुढवीसु उववाइओ एवं जाव ईसिप्पभारापुढविकाइओ सव्वपुढवीसु उववाएयव्वो जाव अहे सत्तभाए । सेवं भंते ! २ त्ति १७-७ ।। ६०४ ।। आउवकाइए णं भंते ! इमीसे रयणप्पभाए पुढवीए समोहए २ ता जे भविए सोहम्मे कप्पे आउकाइयत्ताए उववज्जित्तए एवं जहा पुढविवकाइओ तहा आउकाइओवि सव्वकप्पेसु जाव ईसिप्पभाराए तहेव उववाएयव्वो, एवं जहा रय-

णप्यसाआउकाइओ उववाइओ तहा जाव अहेसत्तमापुढविआउ काइओ उव-
वाएयव्वो जाव ईसिप्पभाराए। सेवं भंते ! २ त्ति १७-८ ॥६०५॥ आउक्काइए
णं भंते ! सोहम्मे कप्पे समोहए समोहणित्ता जे भविए इमीसे रयणप्यभाए
पुढवीए घणोदहिवलएमु आउकाइयत्ताए उववज्जित्तए से णं भंते ! सेसं तं
चेव एवं जाव अहे सत्तमाए जहा सोहम्मआउक्काइओ एवं जाव ईसिप्पभारा-
आउक्काइओ जाव अहे सत्तमाए उववाएयव्वो । सेवं भंते ! २ त्ति (१७-९)
॥ ६०६ ॥ वाउक्काइए णं भंते ! इमीसे रयणप्यभाए पुढवीए जाव जे भविए
सोहम्मे कप्पे वाउक्काइयत्ताए उववज्जित्तए से णं जहा पुढविककाइओ तहा
वाउक्काइओवि णवरं वाउक्काइयाणं चत्तारि समुग्घाया ५०, तं०-वेयणासमु-
ग्घाए जाव वेउन्वियसमुग्घाए, मारणंतियसमुग्घाएणं समोहणमाणे देसेण वा
समो० सेसं तं चेव जाव अहे सत्तमाए समोहओ ईसिप्पभाराए उववाएयव्वो ।
सेवं भंते ! सेवं भंते ! त्ति (१७-१०) ॥६०७॥ वाउक्काइए णं भंते ! सोहम्मे कप्पे
समोहए २ ता जे भविए इमीसे रयणप्यभाए पुढवीए घणवाए तणुवाए घणवाय-
वलएमु तणुवायवलएमु वाउक्काइयत्ताए उववज्जित्तए से णं भंते ! सेसं तं
चेव एवं जहा सोहम्मे वाउक्काइओ सत्तमुवि पुढवीमु उववाइओ एवं जाव
ईसिप्पभाराए वाउक्काइओ अहे सत्तमाए जाव उववाएयव्वो । सेवं भंते ! २
त्ति (१७-११) ॥ ६०८ ॥ एगिदिया णं भंते ! सव्वे समाहारा सव्वे सम-
सरीरा एवं जहा पढमसए बिइयउट्टेसए पुढविककाइयाणं चत्तव्वया भणिया
सा चेव एगिदियाणं इह भाणियव्वा जाव समाउया समोववण्णया । एगिदियाणं
भंते ! कइ लेस्साओ ५० ? गोयमा ! चत्तारि लेस्साओ ५०, तं०-कण्हलेस्सा
जाव तेउलेस्सा । एएसि णं भंते ! एगिदियाणं कण्हलेस्साणं जाव वित्सेसाहिया
वा ? गोयमा ! सव्वत्थोवा एगिदियाणं तेउलेस्सा, काउलेस्सा अणंतगुणा,
णीललेस्सा वित्सेसाहिया, कण्हलेस्सा वित्सेसाहिया । एएसि णं भंते ! एगिदि-
याणं कण्हलेस्सा इड्ढी जहेव दीवकुमारारणं । सेवं भंते ! २ त्ति (१७-१२)
॥ ६०९ ॥ णागकुमारा णं भंते ! सव्वे समाहारा जहा सोलसमसए दीवकुमा-
रहेसए तहेव णिरवसेसं भाणियव्वं जाव इड्ढीति । सेवं भंते ! २ त्ति जाव
बिहरइ (१७-१३) ॥ ६१० ॥ सुवण्णकुमारा णं भंते ! सव्वे समाहारा०
एवं चेव । सेवं भंते ! २ त्ति (१७-१४) ॥ ६११ ॥ विज्जुकुमारा णं भंते !
सव्वे समाहारा० एवं चेव । सेवं भंते ! २ त्ति (१७-१५) ॥ ६१२ ॥ वाउ-

कुमारा णं भंते ! सव्वे समाहारा० एवं चेव । सेवं भंते ! २ त्ति (१७-१६)
 ॥ ६१३ ॥ अग्गिकुमारा णं भंते ! सव्वे समाहारा० एवं चेव । सेवं भंते !
 सेवं भंते ! त्ति (१७-१७) ॥ ६१४ ॥

सत्तरसमं सयं समत्तं

॥ अट्टारसमं सयं पढमो उट्ठेसो ॥

पढमे १ विसाह २ मार्यदिए थ ३ पाणाइवाय ४ अमुरे य ५ । गुन ६ केवलि ७ अणगारे ८ भविए ९ तह सीमिलड्टारसे १० ॥ १॥ । तेणं कालेणं तेणं समएणं रायगिहे जाव एवं वयासी-जीवे णं भंते ! जीवनावेणं कि पढमे अपढमे ? गोयमा ! णो पढमे अपढमे, एवं णेरइए जाव वेमाणिए । सिद्धे णं भंते ! सिद्धभावेणं कि पढमे अपढमे ? गोयमा ! पढमे णो अपढमे । जीवा णं भंते ! जीवभावेणं कि पढमा अपढमा ? गोयमा ! णो पढमा अपढमा, एवं जाव वेमाणिए १ । सिद्धाणं पुच्छा, गोयमा ! पढमा णो अपढमा । आहारए णं भंते ! जीवे आहारभावेणं कि पढमे अपढमे ? गोयमा ! णो पढमे अपढमे, एवं जाव वेमाणिए, योहत्तिए एवं चेव । अणाहारए णं भंते ! जीवे अणाहारभावेणं पुच्छा, गोयमा ! सिय पढमे सिय अपढमे । णेरइए णं भंते ० ! एवं णेरइए जाव वेमाणिए णो पढमे अपढमे, सिद्धे पढमे णो अपढमे । अणाहारगा णं भंते ! जीवा अणाहारभावेणं पुच्छा, गोयमा ! पढमावि अपढमावि, णेरइया जाव वेमाणिया णो पढमा अपढमा, सिद्धा पढमा णो अपढमा, एवंकेवके पुच्छा भाणियव्वा २ । भवसिद्धिए एगत्तपुहुत्तेणं जहा आराहए, एवं अभवसिद्धिएवि, णोभवसिद्धिणोअभवसिद्धिए णं भंते ! जीवे णोभव० पुच्छा, गोयमा ! पढमे णो अपढमे, णोभवसिद्धिय-णोअभवसिद्धिए णं भंते ! सिद्धा णोभव० अमव०, एवं चेव पुहुत्तेणवि दोण्हवि । सण्णी णं भंते ! जीवे सण्णिभावेणं कि पढमे पुच्छा, गोयमा ! णो पढमे अपढमे, एवं विगति-दियवज्जं जाव वेमाणिए, एवं पुहुत्तेणवि ३ । असण्णी एवं चेव एगत्तपुहुत्तेणं णवरं जाव वाणमंतरा, णोसण्णीणोअसण्णी जीवे मणुस्से-सिद्धे पढमे णो अपढमे, एवं पुहुत्तेणवि ४ । सलेस्से णं भंते ! पुच्छा, गोयमा ! जहा आहारए एवं पुहुत्तेणवि, कण्हलेस्सा जाव सुवकलेस्सा एवं चेव णवरं जस्स जा लेस्सा अत्थि । अलेस्से णं जीवमणुस्ससिद्धे जहा णोसण्णीणोअसण्णी

५ । सम्मद्विष्टि ए णं भंते ! जीवे सम्मद्विष्टिभावेणं किं पढमे पुच्छा, गोयमा ! सिय पढमे सिय अपढमे, एवं एगिदियवज्जं जाव वेमाणिए, सिद्धे पढमे णो अपढमे, पुहुत्तिया जीवा पढमावि अपढमावि, एवं जाव वेमाणिया, सिद्धा पढमा णो अपढमा, मिच्छाद्विष्टि एगत्तपुहुत्तेणं जहा आहारणा, सम्मामिच्छा-द्विष्टि एगत्तपुहुत्तेणं जहा सम्मद्विष्टी, णवरं जस्स अत्थि सम्मामिच्छत्तं ६ । संजए जीवे मणुस्से य एगत्तपुहुत्तेणं जहा सम्मद्विष्टी, असंजए जहा आहारए, संजयासंजए जीवे पंचिदियतिरिक्खजोणियमणुस्सा एगत्तपुहुत्तेणं जहा सम्म-द्विष्टी, णोसंजएणोअसंजएणोसंजयासंजए जीवे सिद्धे य एगत्तपुहुत्तेणं पढमे णो अपढमे ७ । सकसाई कोहकसाई जाव लोभकसाई एए एगत्तपुहुत्तेणं जहा आहारए, अकसाई जीवे सिय पढमे सिय अपढमे, एवं मणुस्सेवि, सिद्धे पढमे णो अपढमे, पुहुत्तेणं जीवा मणुस्सा पढमावि अपढमावि, सिद्धा पढमा णो अप-ढमा ८ । णाणी एगत्तपुहुत्तेणं जहा सम्मद्विष्टी, आभिणिबोहियणाणी जाव मणपज्जवणाणी एगत्तपुहुत्तेणं एव चेव, णवरं जस्स जं अत्थि, केवलणाणी जीवे मणुस्से सिद्धे य एगत्तपुहुत्तेणं पढमा णो अपढमा । अण्णाणी मइअण्णाणी सुय-अण्णाणी विभंगणाणी एगत्तपुहुत्तेणं जहा आहारए ९ । सजोगी मणजोगी वइ-जोगी कायजोगी एगत्तपुहुत्तेणं जहा आहारए, णवरं जस्स जो जोगी अत्थि, अजोगी जीवमणुस्ससिद्धा एगत्तपुहुत्तेणं पढमा णो अपढमा १० । सागारोवउत्ता अणागारोवउत्ता एगत्तपुहुत्तेणं जहा अणाहारए ११ । सवेदगो जाव णपंसगवेदगो एगत्तपुहुत्तेणं जहा आहारए णवरं जस्स जो वेदो अत्थि, अवेदओ एगत्तपुहुत्तेणं तिसुवि पएसु जहा अकसाई १२ । ससरीरी जहा आहारए, एवं जाव कम्मग-सरीरी जस्स जं अत्थि सरीरं, णवरं आहारगसरीरी एगत्तपुहुत्तेणं जहा सम्म-द्विष्टी, असरीरी जीवो सिद्धो एगत्तपुहुत्तेणं पढमो णो अपढमो १३ । पंचाहि पज्जत्तीहि पंचाहि अपज्जत्तीहि एगत्तपुहुत्तेणं जहा आहारए, णवरं जस्स जा अत्थि जाव वेमाणिया णो पढमा अपढमा १४ । इमा लक्खणगाहा-जो जेण पत्तपुक्खो भावो सो तेण अपढमो होइ । सेसेसु होइ पढमो अपत्तपुक्खेसु भावेसु ॥ १॥ जीवे णं भंते ! जीवभावेणं किं चरिमे अचरिमे ? गोयमा ! णो चरिमे अचरिमे । णेरइए णं भंते ! णेरइयभावेणं पुच्छा, गोयमा ! सिय चरिमे सिय अचरिमे, एवं जाव वेमाणिए, सिद्धे जहा जीवे । जीवाणं पुच्छा,

भोयमा ! जीवा णो चरिमा अचरिमा, णेरइया चरिमावि अचरिमावि, एवं
 जाव वेमाणिया, सिद्धा जहा जीवा १। आहारए सव्वत्थ एगत्तेणं सिय चरिमे
 सिय अचरिमे, पुहुत्तेणं चरिमावि अचरिमावि, अणाहारओ जीवो सिद्धो य
 एगत्तेणवि पुहुत्तेणवि णो चरिमो अचरिमो, सेसट्ठाणेषु एगत्तपुहुत्तेणं जहा आहा-
 रओ २। भवसिद्धीओ जीवपए एगत्तपुहुत्तेणं चरिमे णो अचरिमे, सेसट्ठाणेषु
 जहा आहारओ। अभवसिद्धीओ सव्वत्थ एगत्तपुहुत्तेणं णो चरिमे अचरिमे,
 णोभवसिद्धीय णोअभवसिद्धीय जीवा सिद्धा य एगत्तपुहुत्तेणं जहा अभवसिद्धीओ
 ३। सण्णो जहा आहारओ, एवं असण्णीवि, णोसण्णीणोअसण्णी जीवपए सिद्ध-
 पए य अचरिमो, मणुस्सपए चरिमो एगत्तपुहुत्तेणं ४। सलेस्सो जाव सुवक-
 लेस्सो जहा आहारओ णवरं जस्स जा अत्थि, अलेस्सो जहा णोसण्णीअसण्णी
 ५। सम्मदिट्ठी जहा अणाहारओ, मिच्छादिट्ठी जहा आहारओ, सम्मासिच्छा-
 दिट्ठी एगिदियविगल्लिदियवज्जं सिय चरिमे सिय अचरिमे, पुहुत्तेणं चरिमावि
 अचरिमावि ६। संजओ जीवो मणुस्सो य जहा आहारओ, असंजओवि तहेव,
 संजयासंजओवि तहेव, णवरं जस्स जं अत्थि, णोसंजयणोअसंजयणोसंजया-
 संजय जहा णोभवसिद्धीयणोअभवसिद्धीओ ७। सकसाई जाव लोभकसाई
 सव्वट्ठाणेषु जहा आहारओ, अकसाई जीवपए सिद्धपए य णो चरिमो अचरिमो,
 मणुस्सपए सिय चरिमो सिय अचरिमो ८। णाणी जहा सम्मदिट्ठी सव्वत्थ
 आभिण्णिवोहियणाणी जाव मणपज्जवणाणी जहा आहारओ णवरं जस्स जं
 अत्थि, केवलणाणी जहा णोसण्णीणोअसण्णी, अण्णाणी जाव विभंगणाणी जहा
 आहारओ ९। सजोगी जाव कायजोगी जहा आहारओ जस्स जो जोगो अत्थि,
 अजोगी जहा णोसण्णीणोअसण्णी १०। सागारोवउत्तो अणागारोवउत्तो य जहा
 अणाहारओ ११। सवेदओ जाव णपुंसगवेदओ जहा आहारओ, अवेदओ जहा
 अकसाई १२। ससरीरी जाव कम्मसरीरी जहा आहारओ णवरं जस्स जं
 अत्थि, असरीरी जहा णोभवसिद्धीयणोअभवसिद्धीय १३। पंचहिं पज्जत्तीहिं पंचहिं
 अपज्जत्तीहिं जहा आहारओ सव्वत्थ एगत्तपुहुत्तेणं वंडगा भाणियव्वा १४।
 इमा लवखणगाहा जो जं पाविहिइ पुणो भावं सो तेण अचरिमो होइ। अचंचंत-
 विओगो जस्स जेण भावेण सो चरिमो ॥ १ ॥ सेवं भंते ! सेवं भंते ! त्ति
 जाव विहरइ ॥ ६१५ ॥

अट्टारसमं सयं बीओ उद्देसो

तेणं कालेणं तेणं समएणं विसाहा णामं णयरी होत्था वण्णओ, बहुपुत्तिए
 वेइए वण्णओ, सामी समोसढे जाव पज्जुवासइ । तेणं कालेणं तेणं समएणं
 सक्के देविदे देवराया वज्जपाणी पुरंदरे एवं जहा सोलसमसए बिइयउद्देसए
 तहेव दिव्वेणं जाणविमाणेणं आगओ णवरं एत्थ आभिओगावि अत्थि जाव
 बत्तीसइविहं णट्टविहि उवदंसेइ २ ता जाव पडिगए । भंते ! त्ति भगवं गोयमे
 समणं भगवं महावीरं जाव एवं वयासी—जहा तइयसए ईसाणस्स तहेव कूडा-
 गारविट्ठंतो तहेव पुव्वभवपुच्छा जाव अभिसमण्णागया ? गोयमादि !
 समणे भगवं महावीरे भगवं गोयमं एवं वयासी—एवं खलु गोयमा ! तेणं
 कालेणं तेणं समएणं इहेव जंबुद्दीवे २ भारहे वासे हत्थिणाउरे णामं णयरे
 होत्था वण्णओ, सहसंबवणे उज्जाणे वण्णओ, तत्थ णं हत्थिणाउरे णयरे कत्तिए
 णामं सेट्ठी परिवसइ अइडे जाव अपरिभूए णेगमपढमासणिए णेगमट्टसहस्स-
 स्स बहुसु कज्जेसु य कारणेसु य कोडुंबेसु य एवं जहा रायप्पसेणइज्जे चित्ते
 जाव चक्खुभूए णेगमट्टसहस्सस्स सयस्स य कुडुंबस्स आहेवच्चं जाव कारेमाणे
 पालेमाणे य समणोवासए अभिगयजीवाजीवे जाव विहरइ । तेणं कालेणं तेणं
 समएणं मुणिसुव्वए अरहा आइगरे जहा सोलसमसए तहेव जाव समोसढे
 जाव परिसा पज्जुवासइ । तए णं से कत्तिए सेट्ठी इमीसे कहाए लद्धट्ठे समाणे
 हट्टुट्टु० एवं जहा एक्कारसमसए सुवंसणे तहेव णिगओ जाव पज्जुवासइ ।
 तए णं मुणिसुव्वए अरहा कत्तियस्स सेट्टिस्स धम्मकहा जाव परिसा पडिगया ।
 तए णं से कत्तिए सेट्ठी मुणिसुव्वयस्स जाव णिसम्म हट्टुट्टु० उट्टाए उट्ठेइ
 उ० २ ता मुणिसुव्वयं जाव एवं वयासी—एवमेयं भंते ! जाव से जहेयं तुज्जे
 वदहं जं णवरं देवाणुप्पिया ! णेगमट्टसहस्सं आपुच्छामि जेट्टुपुत्तं च कुडुंबे
 ठावेमि, तए णं अहं देवाणुप्पियाणं अंतियं पव्वयामि, अहामुहं जाव मा
 पडिबंधं । तए णं से कत्तिए सेट्ठी जाव पडिणिक्खमइ २ ता जेणेव हत्थि-
 णापुरे णयरे जेणेव सए गेहे तेणेव उवागच्छइ २ ता णेगमट्टसहस्सं सदावेइ
 २ ता एवं वयासी—एवं खलु देवाणुप्पिया ! मए मुणिसुव्वयस्स अरहओ
 अंतियं धम्मे णिसंते सेवि य मे धम्मे इच्छिए पडिच्छिए अभिरइए, तए
 णं अहं देवाणुप्पिया ! संसारभयउत्त्विग्गे जाव पव्वयामि, तं तुज्जे णं देवा-

णुप्पिया ! किं करेह किं ववसह किं भे हियइच्छिए किं भे सामत्थे ? तए णं तं णेगमट्टसहस्संप्पि तं कत्तियं सेट्ठी एवं वयासी—जइ णं देवाणुप्पिया ! संसार-भयउच्चिग्गा भीया जाव पव्वइस्संति अम्हं देवाणुप्पिया ! किं अण्णे आलंबणे वा आहारे वा पडिबंधे वा ? अम्हेवि णं देवाणुप्पिया ! संसारभयउच्चिग्गा भीया जम्मणमरणाणं देवाणुप्पिएहिं सद्धिं मुणिसुव्वयस्स अरहओ अंतियं मुंडा भवित्ता अगाराओ जाव पव्वयामो । तए णं से कत्तिए सेट्ठी तं णेगमट्टसहस्सं एवं वयासी—जइ णं देवाणुप्पिया ! संसारभयउच्चिग्गा भीया जम्मणमरणाणं मए सद्धिं मुणिसुव्वय० जाव पव्वयह तं गच्छह णं तुज्जे देवाणुप्पिया ! सएमु गिहेसु विउलं असणं जाव उवक्खडाधेह मित्तणाइ जाव पुरओ जेट्टपुत्ते कुडुंबे ठावेह जेट्ट० २ त्ता तं मित्तणाइ जाव जेट्टपुत्ते आपुच्छह २ त्ता पुरिससहस्स-वाहिणीओ सीयाओ दुरूहह पु० २ त्ता मित्तणाइ जाव परिजणेणं जेट्टपुत्तेहिं य समणुगम्ममाणमग्गा सच्चिइद्धीए जाव रवेणं अकालपरिहीणं चैव ममं अंतियं पाउव्वभवह । तए णं ते णेगमट्टसहस्संप्पि कत्तियस्स सेट्ठिस्स एयमट्ठं विणएणं पडिसुणेंति २ त्ता जेणेव साइं-साइं गिहाइं तेणेव उवागच्छंति २ त्ता विपुलं असणं जाव उवक्खडावेंति २ त्ता मित्तणाइ जाव तस्सेव मित्तणाइ जाव पुरओ जेट्टपुत्ते कुडुंबे ठावेंति जेट्टपुत्ते० २ त्ता तं मित्तणाइ जाव जेट्टपुत्ते य आपुच्छंति जेट्ट० २ त्ता पुरिससहस्सवाहिणीओ सीयाओ दुरूहंति २ त्ता मित्तणाइ जाव परिजणेणं जेट्टपुत्तेहिं य समणुगम्ममाणमग्गा सच्चिइद्धीए जाव रवेणं अकाल-परिहीणं चैव कत्तियस्स सेट्ठिस्स अंतियं पाउव्वभवति । तए णं से कत्तिए सेट्ठी विपुलं असणं ४ जहा गंगदत्तो जाव मित्तणाइ जाव परिजणेणं जेट्टपुत्तेणं णेग-मट्टसहस्सेण य समणुगम्ममाणमग्गे सच्चिइद्धीए जाव रवेणं हट्ठियापुरं णयरं मउञ्जमउञ्जेणं जहा गंगदत्तो जाव आलित्ते णं भंते ! लोए पलित्ते णं भंते ! लोए आलित्तपलित्ते णं भंते ! लोए जाव अणुगामियत्ताए भविससइ, तं इच्छामि णं भंते ! णेगमट्टसहस्सेणं सद्धिं सयमेव पव्वावियं सयमेव मुंडावियं जाव धम्ममाइविखयं, तए णं मुणिसुव्वए अरहा कत्तियं सेट्ठी णेगमट्टसहस्सेणं सद्धिं सयमेव पव्वावेइ जाव धम्ममाइक्खइ, एवं देवाणुप्पिया ! गंतव्वं एवं चिट्ठियव्वं जाव संजमियव्वं । तए णं से कत्तिए सेट्ठी णेगमट्टसहस्सेणं सद्धिं मुणिसुव्वयस्स अरहओ इमं एयारूवं धम्मियं उवएसं सम्मं संपडिव्वज्जइ, तमा-

णाए तहा गच्छइ जाव संजमेइ । तए णं से कत्तिए सेट्ठी णेगभट्टसहस्सेणं सत्ति
अणगारे जत्तए ईरियासभिए जाव गुत्तबंभयारी । तए णं से कत्तिए अणगारे मुणि-
सुव्वयस्स अरहओ तहाहूवाणं थेराणं अंतियं सामाइयमाइयाइं चोइस पुब्वाइं
अहिज्जइ सा० २ ता बहूहि चउत्थच्छट्ठम जाव अप्पाणं भावेमाणे बहुपडि-
पुण्णाइं दुवालस वासाइं सामणपरियापं पाउणइ २ ता मासियाए संलेहणाए
अत्ताणं शोसेइ मा० २ ता सट्ठि भत्ताइं अणसणाए छेदेइ स० २ ता आलोइय-
पडिक्कते जाव कालं किच्चा सोहम्मे कप्पे सोहम्मवडिसए विमाणे उववाय-
सभाए देवसयणिउजंसि जाव सक्के देविक्कताए उववणणे । तए णं से सक्के देविदे
देवराया अहुणोववणणे सेसं जहा गंगदत्तस्स जाव अंतं काहिइ, णवरं ठिई वो
सागरोवमाइं, सेसं तं सेव । सेवं भंते ! सेवं भंते ! त्ति ॥ ६१६ ॥

अट्टारसमं सयं तइओ उट्ठेसो

तेणं कालेणं तेणं समएणं रायगिहे णामं णयरे होत्था वण्णओ, गुणसितए
चेइए वण्णओ जाव परिसा पडिगया, तेणं कालेणं तेणं समएणं समणस्स
भगवओ महावीरस्स जाव अतिवासी मार्गदियपुत्ते णामं अणगारे पगइमइए जहा
मंडियपुत्ते जाव पज्जुवासमाणे एवं वयासी—से णूणं भंते ! काउलेस्से पुढवि-
काइए काउलेस्सेहितो पुढविकाइएहितो अणंतरं उक्कट्टिता माणुसं विगहं लभइ
मा० २ ता केवलं बोहिं बुज्जइ के० २ ता तओ पच्छा सिज्जइ जाव अंतं
करेइ ? हुंता मार्गदियपुत्ता ! काउलेस्से पुढविकाइए जाव अंतं करेइ । से णूणं
भंते ! काउलेस्से आउकाइए काउलेस्सेहितो आउकाइएहितो अणंतरं उक्कट्टिता
माणुस्सं विगहं लभइ मा० २ ता केवलं बोहिं बुज्जइ जाव अंतं करेइ ? हुंता
मार्गदियपुत्ता ! जाव अंतं करेइ । से णूणं भंते ! काउलेस्से वणस्सइकाइए
एवं चेव जाव अंतं करेइ, सेवं भंते ! २ त्ति मार्गदियपुत्ते अणगारे समणं भगवं
महावीरं जाव णमंसित्ता जेणेव समणे णिगंथे तेणेव उवागच्छइ २ ता समणे
णिगंथे एवं वयासी—एवं खलु अज्जो ! काउलेस्से पुढविकाइए तहेव जाव
अंतं करेइ, एवं खलु अज्जो ! काउलेस्से आउकाइए जाव अंतं करेइ, एवं
खलु अज्जो ! काउलेस्से वणस्सइकाइए जाव अंतं करेइ । तए णं ते समणा
णिगंथा मार्गदियपुत्तस्स अणगारस्स एवमाइक्खमाणस्स जाव एवं परह्वेमाणस्स
एयमट्ठं णो सहहंति ३ एयमट्ठं असहहमाणा ३ जेणेव समणे भगवं महावीरे

तेणेव उवागच्छति २ ता समणं भगवं महावीरं वंदति णमंसति वं० २ ता एवं वयासी-एवं खलु भंते ! मार्गदियपुत्ते अणगारे अहं एवमाइक्खइ जाव परुवेइ-एवं खलु अज्जो ! काउलेस्से पुढविकाइए जाव अंतं करेइ, एवं खलु अज्जो ! काउलेस्से आउक्काइए जाव अंतं करेइ, एवं खलु० वणस्सइकाइएवि जाव अंतं करेइ । से कहमेयं भंते ! एवं ? अज्जोत्ति ! समणे भगवं महावीरे ते समणे णिग्गंथे आमंतेत्ता एवं वयासी-जण्णं अज्जो ! मार्गदियपुत्ते अणगारे तुज्जे एवं आइक्खइ जाव परुवेइ-एवं खलु अज्जो ! काउलेस्से पुढविकाइए जाव अंतं करेइ, एवं खलु अज्जो ! काउलेस्से आउक्काइए जाव अंतं करेइ, एवं खलु अज्जो ! काउलेस्से वणस्सइकाइएवि जाव अंतं करेइ, मच्चे णं एसमट्ठे, अहं पि णं अज्जो ! एवंमाइक्खामि ४-एवं खलु अज्जो ! कण्हलेस्से पुढविकाइए कण्हलेस्सेहिंतो पुढविकाइएहिंतो जाव अंतं करेइ, एवं खलु अज्जो ! णिल्लेस्से पुढविकाइए जाव अंतं करेइ, एवं काउलेस्सेवि जहा पुढविकाइए जाव अंतं करेइ, एवं आउक्काइएवि, एवं वणस्सइकाइएवि, सच्चे णं एसमट्ठे । सेवं भंते ! सेवं भंते ! त्ति समणा णिग्गंथा समणं भगवं महावीरं वंदति णमंसति वं० २ ता जेणेव मार्गदियपुत्ते अणगारे तेणेव उवागच्छति २ ता मार्गदियपुत्तं अणगारं वंदति णमंसति वं० २ ता एयमट्ठं सम्मं विणएणं भुज्जो २ खामेति ॥ ६१७ ॥ तए णं से मार्गदियपुत्ते अणगारे उट्ठाए उट्ठेइ २ ता जेणेव समणे भगवं महावीरे तेणेव उवागच्छइ ते० २ ता समणं भगवं महावीरं वंदइ णमंसइ वं० २ ता एवं वयासी-अणगारस्स णं भंते ! भावियप्पणो सव्वं कम्मं वेएमाणस्स सव्वं कम्मं णिज्जरेमाणस्स सव्वं मारं मरमाणस्स सव्वं सरीरं विप्पजहमाणस्स चरिमं कम्मं वेएमाणस्स चरिमं कम्मं णिज्जरेमाणस्स चरिमं मारं मरमाणस्स चरिमं सरीरं विप्पजहमाणस्स मारणंतियं कम्मं वेएमाणस्स मारणंतियं कम्मं णिज्जरेमाणस्स मारणंतियं मारं मरमाणंतिसस मारणंतियं सरीरं विप्पजहमाणस्स जे चरिमा णिज्जरापोग्गला सुहुमा णं ते पोग्गला प०, समणाउसो ! सव्वं लोगंपिणं ते उग्गाहिताणं चिट्ठंति ? हुंता मार्गदियपुत्ता ! अणगारस्स णं भावियप्पणो जाव ओगाहिताणं चिट्ठंति । छउमत्थे णं भंते ! मणुस्से तेसि णिज्जरापोग्गलाणं किचि आणत्तं वा णाणत्तं वा एवं जहा इंदियउट्ठेए पढमे जाव वेमाणिया जाव तत्थ

णं जे ते उवउत्ता ते जाणंति पासंति आहारेंति, से तेणट्ठेणं णिक्खेवो भाणि-
यक्खोत्ति ण पासंति आहारेंति, णेरइया णं भंते ! णिज्जरापोगला ण जाणंति ण
पासंति आहारेंति, एवं जाव पंचिदियतिरिक्खजोणियाणं । मणुस्सा णं भंते !
णिज्जरापोगले किं जाणंति पासंति आहारेंति उदाहु ण जाणंति ण पासंति ण
आहारेंति ? गोयमा ! अत्येगइया जाणंति ३ अत्येगइया ण जाणंति ण पासंति
आहारेंति, से केणट्ठेणं भंते ! एवं बुक्कइ-अत्येगइया जाणंति पासंति आहा-
रेंति, अत्येगइया ण जाणंति ण पासंति आहारेंति ? गोयमा ! मणुस्सा दुविहा
प०, तंजहा-सण्णिभूया य असण्णिभूया य, तत्थ णं जे ते असण्णिभूया ते ण
जाणंति ण पासंति आहारेंति, तत्थ णं जे ते सण्णिभूया ते दुविहा प०, तं०-
उवउत्ता य अणुवउत्ता य, तत्थ णं जे ते अणुवउत्ता ते ण जाणंति ण पासंति
आहारेंति, तत्थ णं जे ते उवउत्ता ते जाणंति ३, से तेणट्ठेणं गोयमा ! एवं
बुक्कइ-अत्येगइया ण जाणंति २ आहारेंति, अत्येगइया जाणंति ३ वाणमंतर-
ओइसिया जहा णेरइया । वेमाणिया णं भंते ! ते णिज्जरापोगले किं जाणंति
६ ? गोयमा ! जहा मणुस्सा णवरं वेमाणिया दुविहा प०, तं०-माइमिच्छ-
दिट्ठिउववण्णगा य अमाइसम्मदिट्ठिउववण्णगा य तत्थ, णं जे ते माइमिच्छ-
दिट्ठिउववण्णगा ते णं ण जाणंति ण पासंति आहारेंति, तत्थ णं जे ते अमाइ-
सम्मदिट्ठिउववण्णगा ते दुविहा प०, तं०-अणंतरोववण्णगा य परंपरोववण्णगा
य, तत्थ णं जे ते अणंतरोववण्णगा ते णं ण जाणंति ण पासंति आहारेंति,
तत्थ णं जे ते परंपरोववण्णगा ते दुविहा प०, तं०-पज्जत्तगा य अपज्जत्तगा य,
तत्थ णं जे ते अपज्जत्तगा ते णं ण जाणंति ण पासंति आहारेंति, तत्थ णं जे
ते पज्जत्तगा ते दुविहा प०, तं०-उवउत्ता य अणुवउत्ता य, तत्थ णं जे ते
अणुवउत्ता ते णं ण जाणंति २ आहारेंति ॥ ६१८ ॥ कइविहे णं भंते ! बंधे
प० ? मार्गदियपुत्ता ! दुविहे बंधे प०, तं०-दक्खबंधे य भावबंधे य । दक्खबंधे
णं भंते ! कइविहे प० ? मार्गदियपुत्ता ! दुविहे प०, तं०-पओगबंधे य
वीससाबंधे य । वीससाबंधे णं भंते ! कइविहे प० ? मार्गदियपुत्ता ! दुविहे
प०, तं०-साईयवीससाबंधे य अणाईयवीससाबंधे य । पओगबंधे णं भंते ! कइ-
विहे प० ? मार्गदियपुत्ता ! दुविहे प०, तं०-सिदिल्लबंधणबंधे य धणियबंधण-
बंधे य । भावबंधे णं भंते ! कइविहे प० ? मार्गदियपुत्ता ! दुविहे प०, तं०-

मूलपगडिबंधे य उत्तरपगडिबंधे य । णेरइयाणं भंते ! कइविहे भावबंधे प० ? मार्गदियपुत्ता ! दुविहे भावबंधे प०, तं०—मूलपगडिबंधे य उत्तरपगडिबंधे य, एवं जाव वेमाणियाणं । णाणावरणिज्जस्स णं भंते ! कम्मस्स कइविहे भावबंधे प० ? मार्गदियपुत्ता ! दुविहे भावबंधे प०, तं०—मूलपगडिबंधे य उत्तरपगडिबंधे य । णेरइयाणं भंते ! णाणावरणिज्जस्स कम्मस्स कइविहे भावबंधे प० ? मार्गदियपुत्ता ! दुविहे भावबंधे प०, तं०—मूलपगडिबंधे य उत्तरपगडिबंधे य, एवं जाव वेमाणियाणं, जहा णाणावरणिज्जेणं दंडओ भणिओ एवं जाव अंतराइएणं भाणियट्ठो ॥ ६१६ ॥ जीवाणं भंते ! पावे कम्मे जे य कडे जाव जे य कज्जिस्सइ अत्थि याइ तस्स केइ 'णाणत्ते' ? हंता अत्थि । से केणट्ठेणं भंते ! एवं वुच्चइ—जीवाणं पावे कम्मे जे य कडे जाव जे य कज्जिस्सइ अत्थि याइ तस्स णाणत्ते ? मार्गदियपुत्ता ! से जह्णामए—केइ पुरित्ते धणुं परामुसइ २ ता उसुं परामुसइ २ ता ठाणं ठाइ २ ता आययकण्णाययं उसुं करेइ आ० २ ता उड्डं वेहासं उध्विहइ से णूणं मार्गदियपुत्ता ! तस्स उसुस्स उड्डं वेहासं उध्विहइस्स समाणस्स एयइवि णाणत्तं जाव तं तं भावं परिणमइवि णाणत्तं ? हंता भगवं ! एयइवि णाणत्तं जाव परिणमइवि णाणत्तं, से तेणट्ठेणं मार्गदियपुत्ता ! एवं वुच्चइ जाव तं तं भावं परिणमइवि णाणत्तं । णेरइयाणं भंते ! पावे कम्मे जे य कडे एवं चेव, एवं जाव वेमाणियाणं ॥ ६२० ॥ णेरइयाणं भंते ! जे पोगगले आहारत्ताए गेण्हंति तेस्सि णं भंते ! पोगगलाणं सेयकालंसि कइभागं आहारंति कइभागं णिज्जरेंति ? मार्गदियपुत्ता ! असंखेज्जइभागं आहारंति अणंतभागं णिज्जरेंति । चक्किया णं भंते ! केइ तेसु णिज्जरापोगगलेसु आसइत्तए वा जाव तुयट्ठित्तए वा ? णो इणट्ठे समट्ठे, अणाहरणभेयं बुद्धयं समणाउसो ! एवं जाव वेमाणियाणं । सेवं भंते ! सेवं भंते ! ति ॥ ६२१ ॥

अट्टारसमं सयं चउत्थो उट्ठेसो

तेणं कालेणं तेणं सभएणं रायगिहे जाव भगवं गोयमे एवं वयासी—अहं भंते ! पाणाइवाए मुसावाए जाव मिच्छावंसणसल्ले, पाणाइवायवेरमणे मुसावाय० जाव मिच्छावंसणसल्लवेरमणे, पुढविवकाइए जाव वणस्सइकाइए, धम्मत्थिकाए अधम्मत्थिकाए आगासत्थिकाए जीवे असरीरपंडिबद्धे परमाणुपोगगले सेलेसि पडिबण्णए अणगारे सव्वे य बायरबोदिधरा कलेधरा एए णं दुविहा

जीवदत्त्वा य अजीवदत्त्वा य जीवाणं परिभोगत्ताए हृव्वमागच्छति ? गोयमा ! पाणाइवाए-जाव एए णं दुविहा जीवदत्त्वा य अजीवदत्त्वा य अत्थेगइया जीवाणं परिभोगत्ताए हृव्वमागच्छति, अत्थेगइया जीवाणं जाव णो हृव्वमागच्छति । से केणट्ठेणं भंते ! एवं वुच्चइ-पाणाइवाए जाव णो हृव्वमागच्छति ? गोयमा ! पाणाइवाए जाव मिच्छादंसणसल्ले, पुढविकाइए जाव वणस्सइकाइए, सव्वे य बायरबोदिधरा कलेवर एए णं दुविहा जीवदत्त्वा य अजीवदत्त्वा य जीवाणं परिभोगत्ताए हृव्वमागच्छति, पाणाइवायवेरमणे जाव मिच्छादंसणसल्लविवेगे, धम्मत्थिकाए अधम्मत्थिकाए जाव परमाणुपोग्गले सेलेसि पडिवण्णए अणभारे एए णं दुविहा जीवदत्त्वा य अजीवदत्त्वा य जीवाणं परिभोगत्ताए णो हृव्वमागच्छति, से तेणट्ठेणं जाव णो हृव्वमागच्छति ॥६२२॥ कइ णं भंते ! कसाया पणत्ता ? गोयमा ! चत्तारि कसाया प०, तं०-कसायपयं णिरवसेसं भाणियव्वं जाव णिज्जरिस्संति लोभेणं । कइ णं भंते ! जुम्मा पणत्ता ? गोयमा ! चत्तारि जुम्मा पणत्ता, तं०-कडजुम्मे तेआगे दावरजुम्मे कलिओगे । से केणट्ठेणं भंते ! एवं वुच्चइ जाव कलिओगे ? गोयमा ! जे णं रासी चउक्कएणं अवहारेणं अवहीरमाणे चउपज्जवसिए सेत्तं कडजुम्मे, जे णं रासी चउक्कएणं अवहारेणं अवहीरमाणे तिपज्जवसिए सेत्तं तेओगे, जे णं रासी चउक्कएणं अवहारेणं अवहीरमाणे दुपज्जवसिए सेत्तं दावरजुम्मे, जे णं रासी चउक्कएणं अवहारेणं अवहीरमाणे एगपज्जवसिए सेत्तं कलिओगे, से तेणट्ठेणं गोयमा ! एवं वुच्चइ जाव कलिओगे । णेरइयाणं भंते ! किं कडजुम्मा, तेओगा, दावरजुम्मा, कलिओगा ? गोयमा ! जहण्णपए कडजुम्मा, उक्कोसपए तेओगा, अजहण्णमणुक्कोसपए सिय कडजुम्मा जाव सिय कलिओगा, एवं जाव थणियकुमारा । वणस्सइकाइयाणं पुच्छा, गोयमा ! जहण्णपए अपया उक्कोसपए य अपया अजहण्णमणुक्कोसपए सिय कडजुम्मा जाव सिय कलिओगा । बेइदियाणं पुच्छा, गोयमा ! जहण्णपए कडजुम्मा, उक्कोसपए दावरजुम्मा, अजहण्णमणुक्कोसपए सिय कडजुम्मा जाव सिय कलिओगा, एवं जाव चउरिदिया, सेसा एगिदिया जहा बेइदिया, पंचिदियसिरिक्खजोणिया जाव वेमाणिया जहा णेरइया सिद्धा जहा वणस्सइकाइया । इत्थीओ णं भंते ! किं कडजुम्माओ० पुच्छा, गोयमा ! जहण्णपए कडजुम्माओ, उक्कोसपए कडजुम्माओ, अजहण्णमणुक्को-

सपए सिय कडजुम्माओ जाव सिय कलिओमाओ, एवं असुरकुमारित्थीओवि जाव थणियकुमारइत्थीओवि, एवं तिरिक्खजोणियइत्थीओवि, एवं मणुसइत्थी-
आंवि, एवं वाणमंतरजोइसिधवेमाणियवेवइत्थीओ ॥ ६२३ ॥ जावइयाणं
भंते ! वरा अंधगवण्हिणो जीवा तावइया परा अंधगवण्हिणो जीवा ? हुंता
गोयमा ! जावइया वरा अंधगवण्हिणो जीवा तावइया परा अंधगवण्हिणो
जीवा । सेवं भंते ! सेवं भंते ! त्ति ॥ ६२४ ॥

अट्टारसमं सयं पंचमो उद्देशो

दो भंते ! असुरकुमारा एगंसि असुरकुमारावासंसि असुरकुमारदेवत्ताए
उववण्णा तत्थ णं एगे असुरकुमारे देवे पासार्इए दरिसिणज्जे अभिक्खे पडि-
क्खे, एगे असुरकुमारे देवे से णं णो पासार्इए णो दरिसिणज्जे णो अभिक्खे,
णो पडिक्खे, से कहमेयं भंते ! एवं ? गोयमा ! असुरकुमारा देवा दुविहा
प०, तं०—वेउव्वियसरीरा य अवेउव्वियसरीरा य, तत्थ णं जे से वेउव्विय-
सरीरे असुरकुमारे देवे से णं पासार्इए जाव पडिक्खे, तत्थ णं जे से अवेउव्विय-
सरीरे असुरकुमारे देवे से णं णो पासार्इए जाव णो पडिक्खे । से केणट्ठेणं
भंते ! एवं बुच्चइ—तत्थ णं जे से वेउव्वियसरीरे तं चेव जाव णो पडिक्खे ?
गोयमा ! से जहाणामए—इहं मणुयलोगंसि दुवे पुरिसा भवंति, एगे पुरिसे
अलंकियविभूसिए, एगे पुरिसे अणलंकियविभूसिए एएसि णं गोयमा ! दोण्हं
पुरिसाणं कयरे पुरिसे पासार्इए जाव पडिक्खे, कयरे पुरिसे णो पासार्इए जाव
णो पडिक्खे, जे वा से पुरिसे अलंकियविभूसिए जे वा से पुरिसे अणलंकिय-
विभूसिए ? भगवं ! तत्थ जे से पुरिसे अलंकियविभूसिए से णं पुरिसे पासार्इए
जाव पडिक्खे, तत्थ णं जे से पुरिसे अणलंकियविभूसिए से णं पुरिसे णो पासार्-
इए जाव णो पडिक्खे, से तेणट्ठेणं जाव णो पडिक्खे । दो भंते ! णागकुमारा
देवा एगंसि णागकुमारावासंसि एवं चेव, एवं जाव थणियकुमारा, वाणमंतर-
जोइसिधवेमाणिया एवं चेव ॥ ६२५ ॥ दो भंते ! णेरइया एगंसि णेर-
इयावासंसि णेरइयत्ताए उववण्णा, तत्थ णं एगे णेरइए महाकम्मतराए चेव
जाव महावेयणतराए चेव, एगे णेरइए अप्पकम्मतराए चेव जाव अप्पवेयण-
तराए चेव, से कहमेयं भंते ! एवं ? गोयमा ! णेरइया दुविहा प०, तं०—
माइमिच्छादिट्ठिउववण्णा य अमाइसम्मदिट्ठिउववण्णा य, तत्थ णं जे से

माइमिच्छदिट्टिउववण्णए गेरइए से णं महाकम्मतराए च्चैव जाव महावेयण-
तराए च्चैव, तत्थ णं जे से अमाइसम्मदिट्टिउववण्णए गेरइए से णं अप्पकम्म-
तराए च्चैव जाव अप्पवेयणतराए च्चैव । दो भंते ! असुरकुमारा एवं च्चैव, एवं
एंगंदियविगल्लियवज्जं जाव वेमाणिया ॥ ६२६ ॥ गेरइए णं भंते ! अणंतरं
उव्वट्ठिता जे भविए पंचिंदियतिरिक्खजोणिएसु उववज्जित्तए, से णं भंते !
कथरं आउयं पडिसंबेदेइ ? गोयमा ! गेरइयाउयं पडिसंबेदेइ, पंचिंदियति-
रिक्खजोणियाउए से पुरओ कडे चिट्ठइ, एवं मणुस्सेसुवि, णवरं मणुस्साउए
से पुरओ कडे चिट्ठइ । असुरकुमारा णं भंते ! अणंतरं उव्वट्ठिता जे भविए
पुढविकाइएसु उववज्जित्तए पुच्छा, गोयमा ! असुरकुमाराउयं पडिसंबेदेइ,
पुढविकाइयाउए से पुरओ कडे चिट्ठइ, एवं जो जहिं भविओ उववज्जि-
त्तए तस्स तं पुरओ कडे चिट्ठइ, जत्थ ठिओ तं पडिसंबेदेइ जाव वेमाणिए,
णवरं पुढविकाइए पुढविकाइएसु उववज्जइ पुढविकाइयाउयं पडिसंबेदेइ, अण्णे य
से पुढविकाइयाउए पुरओ कडे चिट्ठइ, एवं जाव मणुस्सो सट्ठाणे उववाएयत्थो
परट्ठाणे तहेव ॥ ६२७ ॥ दो भंते ! असुरकुमारा एंगंसि असुरकुमारावासंसि
असुरकुमारदेवत्ताए उववण्णा, तत्थ णं एगे असुरकुमारे देवे उज्जुयं विउव्विस्सा-
मिइ उज्जुयं विउव्वइ, वंकं विउव्विस्सामिइ वंकं विउव्वइ, जं जहा इच्छइ
तं तथा विउव्वइ, एगे असुरकुमारे देवे उज्जुयं विउव्विस्सामिइ वंकं विउव्वइ,
वंकं विउव्विस्सामिइ उज्जुयं विउव्वइ, जं जहा इच्छइ णो तं तथा विउव्वइ,
से कहमेयं भंते ! एवं ? गोयमा ! असुरकुमारा देवा दुविहा प०, तं०—माइ-
मिच्छदिट्टिउववण्णगा य अमाइसम्मदिट्टिउववण्णगा य, तत्थ णं जे से माइ-
मिच्छदिट्टिउववण्णए असुरकुमारे देवे से णं उज्जुयं विउव्विस्सामिइ वंकं
विउव्वइ जाव णो तं तथा विउव्वइ, तत्थ णं जे से अमाइसम्मदिट्टिउववण्णए
असुरकुमारे देवे से णं उज्जुयं विउव्विस्सामिइ उज्जुयं विउव्वइ जाव तं तथा
विउव्वइ । दो भंते ! णागकुमारा एवं च्चैव, एवं जाव थणियकुमारा, वाण-
मंतरजोइसियवेमाणिया एवं च्चैव । सेवं भंते ! सेवं भंते ! ति ॥ ६२८ ॥

अट्टारसमं सयं छट्ठी उद्देशो

फाणियगुले णं भंते ! कइवण्णे कइगंधे कइरसे कइफासे पणत्ते ?
गोयमा ! एत्थ णं दो णया भवन्ति, तं०—णिच्छइयणए य वावहारियणए य,

वावहारियणयस्स भोद्धे काणियगुले, णेच्छइयणयस्स पंचवण्णे दुगंधे पंचरसे अट्ट-
 फासे प० । भमरे णं भंते ! कइवण्णे० पुच्छा, गोयमा ! एत्थ णं दो णया
 भवंति, तं०—णिच्छइयणए य वावहारियणए य, वावहारियणयस्स कालए भमरे,
 णेच्छइयणयस्स पंचवण्णे जाव अट्टफासे प० । सुयपिच्छे णं भंते ! कइवण्णे०
 प० ? एवं चेव, णवरं वावहारियणयस्स णीलए सुयपिच्छे, णेच्छइयणयस्स
 पंचवण्णे सेसं तं चेव, एवं एएणं अभिलावेणं लोहिया मंजिट्टिया, पीतिया
 हालिद्दा, सुविकल्लए संखे, सुभिन्नगंधे कोट्ठे, दुट्ठिभगंधे मयगसरीरे, तित्ते
 णिवे, कडुया सुंठी, कसाए कविट्ठे, अंबा अंबिलिया, महुरे खंडे, ककखंडे वइरे,
 मउए णवणीए, गहए अए, लहुए उल्लुयपत्ते. सीए हिमे, उसिणे अगणिकाए,
 णिद्धे तेत्ते । छारिया णं भंते ! पुच्छा, गोयमा ! एत्थ दो णया भवंति, तं०—
 णिच्छइयणए य वावहारियणए य, वावहारियणयस्स लुक्खा छारिया, णेच्छइय-
 णयस्स पंचवण्णा जाव अट्टफासा प० ॥ ६२६ ॥ परभाणुपोगले णं भंते ! कइ-
 वण्णे जाव कइफासे पण्णत्ते ? गोयमा ! एगवण्णे एगगंधे एगरसे दुफासे
 पण्णत्ते । दुपएसिए णं भंते ! खंधे कइवण्णे० पुच्छा, गोयमा ! सिय एगवण्णे
 सिय दुवण्णे, सिय एगगंधे सिय दुगंधे, सिय एगरसे सिय दुरसे, सिय दुफासे
 सिय तिफासे सिय चउफासे पण्णत्ते । एवं तिपएसिएवि, णवरं सिय एगवण्णे
 सिय दुवण्णे सिय तिवण्णे, एवं रसेसुवि, सेसं जहा दुपएसियस्स, एवं चउप्पए-
 सिएवि । णवरं सिय एगवण्णे जाव सिय चउवण्णे, एवं रसेसुवि, सेसं तं चेव,
 एवं पंचपएसिएवि, णवरं सिय एगवण्णे जाव सिय पंचवण्णे, एवं रसेसुवि,
 गंधफासा तहेव, जहा पंचपएसिओ एवं जाव असंखेज्जपएसिओ । सुट्टमपरिणए
 णं भंते ! अणतपएसिए खंधे कइवण्णे० ? जहा पंचपएसिए तहेव णिरवसेसं ।
 वायरपरिणए णं भंते ! अणंतपएसिए खंधे कइवण्णे० पुच्छा गोयमा ! सिय
 एगवण्णे जाव सिय पंचवण्णे, सिय एगगंधे सिय दुगंधे, सिय एगरसे जाव सिय
 पंचरसे, सिय चउफासे जाव सिय अट्टफासे प० । सेवं भंते ! २ त्ति ॥ ६३० ॥

अट्टारसमं सयं सत्तमो उट्ठेसो

रायगिहे जाव एवं वयासी—अण्णउत्थिया णं भंते ! एवमाइक्खंति जाव
 पक्खंति—एवं खलु केवली जक्खाएसेणं आइस्सइ, एवं खलु केवली जक्खाए-

सेणं आइट्ठे समाणे आहूच्च दो भासाओ भासइ, तं०—मोसं वा सच्चामोसं वा, से कहमेयं भंते ! एवं ? गोयमा ! जणं ते अण्णउत्थिया जाव जे ते एवमाहंसु मिच्छं ते एवमाहंसु, अहं पुण गोयमा ! एवमाइक्खामि ४—णो खलु केवली जक्खाएसेणं आइस्तइ, णो खलु केवली जक्खाएसेणं आइट्ठे समाणे आहूच्च दो भासाओ भासइ, तं०—मोसं वा सच्चामोसं वा । केवली णं असा-
 वज्जाओ अपरोवघाइयाओ आहूच्च दो भासाओ भासइ, तं०—सच्चं वा असच्चा-
 मोसं वा ॥६३१॥ कइविहे णं भंते ! उवही पण्णत्ते ? गोयमा ! तिविहे उवही
 प०, तं०—कम्मोवही, सरीरोवही, बाहिरभंडमत्तोवगरणोवही । णेरइयाणं भंते !
 पुच्छा, गोयमा ! वुविहे उवही प०, तं०—कम्मोवही य सरीरोवही य, सेसाणं
 तिविहे उवही एगिदियावज्जाणं जाव वेमाणियाणं, एगिदियाणं वुविहे उवही प०,
 तंजहा—कम्मोवही य सरीरोवही य । कइविहे णं भंते ! उवही प० ? गोयमा !
 तिविहे उवही प०, तंजहा—सच्चित्ते, अचित्ते, मीसए, एवं णेरइयाणवि, एवं
 णिरवसेसं जाव वेमाणियाणं । कइविहे णं भंते ! परिग्गहे प० ? गोयमा ! तिविहे
 परिग्गहे प०, तं०—कम्मपरिग्गहे, सरीरपरिग्गहे, बाहिरभंडमत्तोवगरणपरिग्गहे ।
 णेरइयाणं भंते० ! एवं जहा उवहिणा दो दंडगा भणिया तहेव परिग्गहेणवि
 दो दंडगा भाणियत्त्वा । कइविहे णं भंते ! पणिहाणे प० ? गोयमा ! तिविहे
 पणिहाणे प०, तं०—मणपणिहाणे, वइपणिहाणे, कायपणिहाणे । णेरइयाणं भंते !
 कइविहे पणिहाणे प० ? एवं चेव, एवं जाव थणियकुमाराणं । पुढविकाइयाणं
 पुच्छा, गोयमा ! एगे कार्यपणिहाणे प०, एवं जाव वणस्सइकाइयाणं । वेइं-
 दियाणं पुच्छा, गोयमा ! वुविहे पणिहाणे प०, तं०—वइपडिहाणे य कायपणि-
 हाणे य, एवं जाव चउररिदियाणं, सेसाणं तिविहेवि जाव वेमाणियाणं । कइ-
 विहे णं भंते ! दुप्पणिहाणे प० ? गोयमा ! तिविहे दुप्पणिहाणे प०, तं०—
 मणदुप्पणिहाणे, वइदुप्पणिहाणे, कायदुप्पणिहाणे, जहेव पणिहाणेणं दंडयो
 भणियो तहेव दुप्पणिहाणेणवि भाणियथो । कइविहे णं भंते ! सुप्पणिहाणे
 प० ? गोयमा ! तिविहे सुप्पणिहाणे प०, तंजहा—मणसुप्पणिहाणे, वइसुप्पणि-
 हाणे, कायसुप्पणिहाणे । मणुस्साणं भंते ! कइविहे सुप्पणिहाणे प० ? एवं चेव ।
 सेवं भंते ! २ त्ति जाव विहरइ । तए णं समणे भगवं महावीरे जाव बहिया
 जणवयविहारं विहरइ ॥ ६३२ ॥ तेणं कालेणं तेणं समएणं रायगिहे णामं
 णयरे गुणसिलए चेइए वण्णओ जाव पुढविसित्तापट्टओ, तस्स णं गुणसिलस्स

जेइयस्स अदूरसामंते बह्वे अण्णउत्थिया परिवसंति, तंजहा—कालोदाई सेलोदाई एवं जहा सत्तमसए अण्णउत्थियउद्देसए जाव से कहमेयं मण्णे एवं ? तत्थ णं रायगिहे णयरे मद्दुए णामं समणोवासए परिवसइ, अद्दे जाव अपरि-भूए अभिगयजीवाजीवे जाव विहरइ । तए णं समणे भगवं महावीरे अण्णया कयाइ पुव्वाणुपुंवि चरमाणे जाव समोसहे, परिसा जाव पज्जुवासइ । तए णं मद्दुए समणोवासए इमीसे कहाए लद्धट्ठे समाणे हट्टुट्टु जाव हियए ण्हाए जाव सरीरे सयाओ गिहाओ पडिणिक्खमइ स० २ ता पायविहारचारेणं राय-गिहं णयरं जाव णिग्गच्छइ २ ता तेसि अण्णउत्थियाणं अदूरसामंतेणं वीईवयइ । तए णं ते अण्णउत्थिया मद्दुयं समणोवासयं अदूरसामंतेणं वीईवयमाणं पासंति २ ता अण्णमण्णं सहावेति २ ता एवं वयासी—एवं खलु देवाणुप्पिया ! अम्हं इमा कहा अविउपकडा इमं च णं मद्दुए समणोवासए अम्हं अदूरसामंतेणं वीईवयइ, तं सेयं खलु देवाणुप्पिया ! अम्हं मद्दुयं समणोवासयं एयमट्ठं पुच्छि-त्तएत्तिकट्ठु अण्णमण्णस्स अंतियं एयमट्ठं पडिमुणेति अण्णमण्णस्स० २ ता जेणेव मद्दुए समणोवासए तेणेव उवागच्छंति २ ता मद्दुयं समणोवासयं एवं वयासी—एवं खलु मद्दुया ! तव धम्मयारिए धम्मोवएसए समणे णायपुत्ते पच्च अत्थिकाए पण्णवेइ जहा सत्तमे सए अण्णउत्थियउद्देसए जाव से कहमेयं मद्दुया ! एवं ? तए णं से मद्दुए समणोवासए ते अण्णउत्थिए एवं वयासी—जइ कज्जं कज्जइ जाणामो पासामो, अहे कज्जं ण कज्जइ ण जाणामो ण पासामो । तए णं ते अण्णउत्थिया मद्दुयं समणोवासयं एवं वयासी—केस णं तुमं मद्दुया ! समणोवासमाणं भवसि, जे णं तुमं एयमट्ठं ण जाणसि ण पाससि ? तए णं से मद्दुए समणोवासए ते अण्णउत्थिए एवं वयासी—अत्थि णं आउसो ! वाउयाए वाइ ? हुंता अत्थि, तुब्भे णं आउसो ! वाउयायस्स वाय माणस्स रूवं पासह ? णो इणट्ठे समट्ठे, अत्थि णं आउसो ! घाणसहगया पोग्गला ? हुंता अत्थि, तुब्भे णं आउसो ! घाणसहगयाणं पोग्गलाणं रूवं पासह ? णो इणट्ठे समट्ठे, अत्थि णं आउसो ! अरणिसहगए अगणिकाए ? हुंता अत्थि, तुब्भे णं आउसो ! अरणिसहगयस्स अगणिकायस्स रूवं पासह ? णो इणट्ठे समट्ठे, अत्थि णं आउसो ! समुद्दस्स पारगयाइं रूवाइं ? हुंता अत्थि, तुब्भे णं आउसो ! समुद्दस्स पारगयाइं रूवाइं पासह ? णो इणट्ठे समट्ठे, अत्थि

णं आउसो ! देवलोगगयाइं रूवाइं ? हंता अत्थि, तुम्मे णं आउसो ? देव-
लोगगयाइं रूवाइं पासह ? णो इणट्ठे समट्ठे, एवामेव आउसो ! अहं वा तुम्मे
वा अणो वा छउमत्थो जइ जो जं ण जाणइ ण पासइ तं सब्वं ण भवइ एवं
भे सुबहुए लोए ण भविस्सईत्तिकट्ठु ते अणउत्थिए एवं पडिहणइ एवं पडि-
हणित्ता जेणेव गुणसिल्लए चेइए जेणेव समणे भगवं महावीरे तेणेव उवागच्छइ
२ ता समणं भगवं महावीरं पंचविहेणं अभिगमेणं अभि० जाव पज्जुवासइ ।
मद्दुयाई ! समणे भगवं महावीरे मद्दुयं समणोवासयं एवं वयासी—सुट्ठं णं
मद्दुया ! तुमं ते अणउत्थिए एवं वयासी, साहु णं मद्दुया ! तुमं ते अण-
उत्थिए एवं वयासी, जे णं मद्दुया ! अट्ठं वा हेउं वा पसिणं वा वागरणं
वा अणायं अट्ठिं अस्सुयं अमयं अविण्णायं बहुजणमज्जे आघवेइ पणवेइ जाव
उववंसेइ, से णं अरिहंतानं आसायणाए वट्ठइ, अरिहंतपणत्तस्स धम्मस्स आसा-
यणाए वट्ठइ, केवलीणं आसायणाए वट्ठइ, केवल्लिपणत्तस्स धम्मस्स आसाय-
णाए वट्ठइ, तं सुट्ठु णं तुमं मद्दुया ! ते अणउत्थिए एवं वयासी, साहु
णं तुमं मद्दुया ! जाव एवं वयासी । तए णं मद्दुए समणोवासए समणेणं
भगवया महावीरेणं एवं वृत्ते समाणे हट्ठुत्ठे समणं भगवं महावीरं वंदइ
णमंसइ वं० २ ता णच्चासण्णे जाव पज्जुवासइ । तए णं समणे भगवं महावीरे
मद्दुयस्स समणोवासगस्स तीसे य जाव परिसा पडिगया । तए णं मद्दुए
समणोवासए समणस्स भगवओ महावीरस्स जाव णिसम्म हट्ठुत्ठे पसिणाइं
पुच्छइ पुच्छित्तं अट्ठाइं परियाइयइ परियाइइत्ता उट्ठाए उट्ठेइ उट्ठित्ता
समणं भगवं महावीरं वंदइ णमंसइ वं० २ ता जाव पडिगए । भंते !
त्ति भगवं गोयमे समणं भगवं महावीरं वंदइ णमंसइ वं० २ ता एवं वयासी—
पभू णं भंते ! मद्दुए समणोवासए देवाणुप्पियाणं अंतियं जाव एव्वइत्तए ?
णो इणट्ठे समट्ठे, एवं जहेव संखे तहेव अहणाभे जाव अतं काहिइ ॥ ६३३ ॥
देवे णं भंते ! महिड्डिए जाव महेसक्खे रूवसहस्सं विउच्चित्ता पभू अणमण्णेणं
सद्धिं संगामं संगामेत्तए ? हंता पभू । ताओ णं भंते ! बोदीओ किं एगजीव-
फुडाओ अणेगजीवफुडाओ ? गोयमा ! एगजीवफुडाओ णो अणेगजीवफुडाओ,
तेसि णं भंते । बोदीणं अंतरा किं एगजीवफुडा अणेगजीवफुडा ? गोयमा !
एगजीवफुडा णो अणेगजीवफुडा । पुरिसे णं भंते ! अंतरेणं हत्थेण वा एवं

जहा अट्टमसए तइए उद्देसए जाव णो खलु तत्थ सत्थं कमइ ॥ ६३४ ॥ अत्थि णं भंते ! देवामुराणं संगामे २ ? हुंता अत्थि । देवामुरेसु णं भंते ! संगामेसु वट्टमाणेसु किण्णं तेसि देवाणं पहरणरयणत्ताए परिणमइ ? गोयमा जण्णं ते देवा तणं वा कट्ठं वा पत्तं वा सक्करं वा परामुसंति तं(णं)तं तेसि देवाणं पहरणरयणत्ताए परिणमइ, जहेव देवाणं तहेव असुरकुमाराणं ? णो इणट्ठे समट्ठे, असुरकुमाराणं देवाणं णिच्चं विउच्चिया पहरणरयणा प० ॥ ६३५ ॥ देवे णं भंते ! महिड्डिए जाव महेसक्खे पभू लवणसमुट्ठं अणुपरियट्ठित्ताणं हव-
मागच्छित्तए ? हुंता पभू । देवे णं भंते ! महिड्डिए एवं धायइसंडं दीवं जाव हुंता पभू, एवं जाव रुयगवरं दीवं जाव हुंता पभू, ते णं परं वोईवएज्जा णो चेव णं अणुपरियट्ठेज्जा ॥ ६३६ ॥ अत्थि णं भंते ! देवा जे अणंते कम्मसे जह-
ण्णेणं एक्केण वा दोहि वा तिहि वा उक्कोसेणं पंचहि वाससएहि खवयंति ? हुंता अत्थि । अत्थि णं भंते ! देवा जे अणंते कम्मसे जहण्णेणं एक्केण वा दोहि वा तिहि वा उक्कोसेणं पंचहि वाससहस्सेहि खवयंति ? हुंता अत्थि । अत्थि णं भंते ! ते देवा जे अणंते कम्मसे जहण्णेणं एक्केण वा दोहि वा तिहि वा उक्को-
सेणं पंचहि वाससयसहस्सेहि खवयंति ? हुंता अत्थि । कयरे णं भंते ! ते देवा जे अणंते कम्मसे जहण्णेणं एक्केण वा दोहि वा तिहि वा जाव पंचहि वास-
सएहि खवयंति, कयरे णं भंते ! ते देवा जाव पंचहि वाससहस्सेहि खवयंति, कयरे णं भंते ! ते देवा जाव पंचहि वाससयसहस्सेहि खवयंति ? गोयमा ! वाणमंतरा देवा अणंते कम्मसे एगेणं वाससएणं खवयंति, असुरिदवज्जिया भवणवासी देवा अणंते कम्मसे दोहि वाससएहि खवयंति, असुरकुमारा णं देवा अणंते कम्मसे तिहि वाससएहि खवयंति, गहणक्खत्तताराक्खा जोइसिया देवा अणंते कम्मसे चउहि वास जाव खवयंति, चदिमसूरिया जोइसिदा जोइस-
रायाणो अणंते कम्मसे पंचहि वाससएहि खवयंति, सोहम्मोसाणगा देवा अणंते कम्मसे एगेणं वाससहस्सेणं खवयंति, सणकुमारमाहिदगा देवा अणंते कम्मसे दोहि वाससहस्सेहि खवयंति, एवं एएणं अभिलावेणं बंभलोगलंतगा देवा अणंते कम्मसे तिहि वाससहस्सेहि खवयंति, महामुवकसहस्सारगा देवा अणंते कम्मसे चउहि वाससहस्सेहि खवयंति, आणयपाणयआरणअच्चुयगा देवा अणंते कम्मसे पंचहि वाससहस्सेहि खवयंति, हेट्ठिमगेवेज्जगा देवा अणंते कम्मसे एगेणं वास-

सयसहस्सेणं खवयति, मज्झिमगेवेज्जगा देवा अणंते कम्मसे दोहिं वाससयसह-
स्सेहिं खवयति, उवरिमगेवेज्जगा देवा अणंते कम्मसे तिहिं वाससयसहस्सेहिं
खवयति, विजयवेज्जयंतजयंतअपराजियगा देवा अणंते कम्मसे चउहिं वाससय-
सहस्सेहिं खवयति, सब्बट्टुसिद्धगा देवा अणंते कम्मसे पंचाहिं वाससयसहस्सेहिं
खवयति, एएणं गोयमा ! ते देवा जे अणंते कम्मसे जहण्णेणं एक्के वा दोहिं
वा तिहिं वा उक्कोसेणं पंचाहिं वाससएहिं खवयति, एएणं गोयमा ! ते देवा
जाव पंचाहिं वाससहस्सेहिं खवयति, एएणट्ठेणं गोयमा ! ते देवा जाव पंचाहिं
वाससयसहस्सेहिं खवयति । सेवं भंते ! सेवं भंते ! त्ति ॥ ६३७ ॥

अट्टारसमं सयं अट्टमो उट्ठेसो

रायगिहे जाव एवं वयासी-अणगारस्स णं भंते ! भावियप्पणो पुरओ
दुहओ जुगमायाए पेहाए रीयं रीयमाणस्स पायस्स अहे कुक्कुडपोए वा बट्टा-
पोए वा कुल्लिगच्छाए वा परियावज्जेज्जा, तस्स णं भंते ! किं इरियावहिया
किरिया कज्जइ, संपराइया किरिया कज्जइ ? गोयमा ! अणगारस्स णं
भावियप्पणो जाव तस्स णं इरियावहिया किरिया कज्जइ, णो संपराइया
किरिया कज्जइ । से केणट्ठेणं भंते ! एवं बुच्चइ० ? जहा सत्तमसए संबुद्धेसए
जाव अट्ठो णिबिखतो । सेवं भंते ! सेवं भंते ! त्ति जाव विहरइ । तए णं
समणे भगवं महावीरे बहिया जाव विहरइ ॥ ६३८ ॥ तेणं कालेणं तेणं समएणं
रायगिहे जाव पुढ्विसिल्लापट्टए, तस्स णं गुणसिलस्स चेइयस्स अबूरसामंते
बह्वे अण्णउत्थिया परिवसंति, तए णं समणे भगवं महावीरे जाव समोसडे जाव
परिसा पडिगया । तेणं कालेणं तेणं समएणं समणस्स भगवओ महावीरस्स जेट्ठे
अंतेवासी इंदभूई णामं अणगारे जाव उड्डं जाणू जाव विहरइ । तए णं ते अण्ण-
उत्थिया जेणेव भगवं गोयमे तेणेव उवागच्छंति उवागच्छइत्ता भगवं गोयमं एवं
वयासी-तुब्भे णं अज्जो ! तिबिहं तिविहेणं असंजय जाव एगंतबाला यावि भवह ।
तए णं भगवं गोयमे ते अण्णउत्थिए एवं वयासी-से केणं कारणेणं अज्जो !
अम्हे तिविहं तिविहेणं असंजय जाव एगंतबाला यावि भवामो ? तए णं ते
अण्णउत्थिया भगवं गोयमं एवं वयासी-तुब्भे णं अज्जो ! रीयं रीयमाणा पाणे
पेच्चेहं अभिहणह जाव उवह्वेह, तए णं तुब्भे पाणे पेच्चेमाणा जाव उट्ठे-
माणा तिविहं तिविहेणं जाव एगंतबाला यावि भवह । तए णं भगवं गोयमे ते

अण्णउत्थिए एवं वयासी-णो खलु अज्जो ! अम्हे रीयं रीयमाणा पाणे पेच्चेमो, जाव उद्द्वेमो, अम्हे णं अज्जो ! रीयं रीयमाणा कायं च जीयं च रीयं च पइच्च विस्सा २ पविस्सा २ वयामो, तए णं अम्हे विस्सा-विस्सा वयमाणा पविस्सा २ वयमाणा णो पाणे पेच्चेमो जाव णो उद्द्वेमो, तए णं अम्हे पाणे अपेच्चेमाणा जाव अणोद्द्वेमाणा तिविहं तिविहेणं जाव एगंतपंडिया यावि भवामो । तुम्भे णं अज्जो ! अप्पणा चेव तिविहं तिविहेणं जाव एगंतबाला यावि भवह । तए णं ते अण्णउत्थिया भगवं गोयमं एवं वयासी-केणं कारणेणं अज्जो ! अम्हे तिविहं तिविहेणं जाव भवामो ? तए णं भगवं गोयमे ते अण्णउत्थिए एवं वयासी-तुम्भे णं अज्जो ! रीयं रीयमाणा पाणे पेच्चेह जाव उद्द्वेह, तए णं तुम्भे पाणे पेच्चेमाणा जाव उद्द्वेमाणा तिविहं जाव एगंतबाला यावि भवह । तए णं भगवं गोयमे ते अण्णउत्थिए एवं पडिहणइ एवं पडिहणित्ता जेयेव समणे भगवं महावीरे तेणेव उवागच्छइ २ ता समणं भगवं महावीरं वंदइ णमंसइ वंदित्ता णमसित्ता णच्चसण्णे जाव पज्जुवासइ । गोयमाई ! समणे भगवं महावीरे भगवं गोयमं एवं वयासी-सुट्ठु णं तुमं गोयमा ! ते अण्णउत्थिए एवं वयासी, साहु णं तुमं गोयमा ! ते अण्णउत्थिए एवं वयासी, अत्थि णं गोयमा ! ममं बहुवे अंतेवासी समणा णिगगंथा छउमत्था जे णं णो पन्न एयं वागरणं वागरेत्तए जहा णं तुमं तं सुट्ठु णं तुमं गोयमा ! ते अण्णउत्थिए एवं वयासी, साहु णं तुमं गोयमा ! ते अण्णउत्थिए एवं वयासी ॥ ६३६ ॥ तए णं भगवं गोयमे समणेणं भगवया महावीरेणं एवं वुत्ते समणे हट्टतुठु० समणं भगवं महावीरं वंदइ णमंसइ वं० २ ता एवं वयासी-छउमत्थे णं भंते ! मणुस्से परमाणुपोगलं किं जाणइ पासइ उदाहु ण जाणइ ण पासइ ? गोयमा ! अत्थेगइए जाणइ ण पासइ, अत्थेगइए ण जाणइ ण पासइ । छउमत्थे णं भंते ! मणुस्से दुपएसियं खंधं किं जाणइ पासइ ? एवं चेव, एवं जाव असंखेज्जपएसियं । छउमत्थे णं भंते ! मणुस्से अणंतपएसियं खंधं किं पुच्छा, गोयमा ! अत्थेगइए जाणइ पासइ १, अत्थेगइए जाणइ ण पासइ २, अत्थेगइए ण जाणइ पासइ ३, अत्थेगइए ण जाणइ ण पासइ ४ । आहोहिए णं भंते ! मणुस्से परमाणु-पोगलं० जहा छउमत्थे एवं आहोहिएवि जाव अणंतपएसियं । परमाहोहिए णं भंते ! मणुस्से परमाणुपोगलं ज समयं जाणइ तं समयं पासइ, जं समयं पासइ तं समयं जाणइ ? णो इणट्ठे समट्ठे । से केणट्ठेणं भंते ! एवं बुच्चइ-परमाहो-

हिए णं मणुसे परमाणुपोग्गलं जं समयं जाणइ णो तं समयं पासइ, जं समयं पासइ णो तं समयं जाणइ ? गोयमा ! सागारे से णाणे भवइ, अणागारे से दंसणे भवइ, से तेणदूठेणं जाव णो तं समयं जाणइ, एवं जाव अणंतपएसियं । केवली णं भंते ! मणुस्से परमाणुपोग्गलं जहा परमाहोहिए तहा केवलीव जाव अणंतपएसियं । सेवं भंते ! सेवं भंते ! त्ति ॥ ६०४ ॥

अट्टारसमं सयं णवमो उद्देशो

रायगिहे जाव एवं वयासी-अस्थि णं भंते ! भवियदव्वणेरइया २ ? हुंता अस्थि । से केणदूठेणं भंते ! एवं वुच्चइ-भवियदव्वणेरइया २ ? गोयमा ! जे भविए पंचिदियतिरिक्खजोणिए वा मणुस्से वा णेरइएमु उववज्जित्तए से तेणदूठेणं, एवं जाव थणियकुमाराणं । अस्थि णं भंते ! भवियदव्वपुढविकाइया २ ? हुंता अस्थि । से केणदूठेणं भंते ! एवं० ? गोयमा ! जे भविए तिरिक्खजोणिए वा मणुस्से वा देवे वा पुढविकाइएसु उववज्जित्तए से तेणदूठेणं, आउक्काइयवणस्सइकाइयाणं एवं चेव उववाओ, तेउवाउबेइदियतेइंदियचउरिदियाण य जे भविए तिरिक्खजोणिए वा मणुस्से वा पंचिदियतिरिक्खजोणियाणं जे भविए णेरइए वा तिरिक्खजोणिए वा मणुस्से वा देवे वा पंचिदियतिरिक्खजोणिए (वा) सु उववज्जित्तए एवं मणुस्सावि, वाणमंतरजोइसियवेमाणियाणं जहा णेरइया । भवियदव्वणेरइयस्स णं भंते ! केवइयं कालं ठिई प० ? गोयमा ! जहण्णेणं अंतोमहुत्तं उक्कोसेणं पुव्वकोडो । भवियदव्वअसुरकुमारस्स णं भंते ! केवइयं कालं ठिई प० ? गोयमा ! जहण्णेणं अंतोमहुत्तं उक्कोसेणं तिणिण पत्तिओवमाइं, एवं जाव थणियकुमारस्स । भवियदव्वपुढविकाइयस्स णं पुच्छा, गोयमा ! जहण्णेणं अंतोमहुत्तं उक्कोसेणं साइरेगाइं वो सागरोवमाइं, एवं आउक्काइयस्सवि, तेउवाऊ जहा णेरइयस्स, वणस्सइकाइयस्स जहा पुढविकाइयस्स, बेइदियस्स तेइंदियस्स चउरिदियस्स जहा णेरइयस्स, पंचिदियतिरिक्खजोणियस्स जहण्णेणं अंतोमहुत्तं उक्कोसेणं तैत्तीसं सागरोवमाइं, एवं मणुस्सावि, वाणमंतरजोइसियवेमाणियस्स जहा असुरकुमारस्स । सेवं भंते ! २ त्ति ॥ ६४१ ॥

अट्टारसमं सयं दसमो उद्देशो

रायगिहे जाव एवं वयासी-अणगारे णं भंते ! भावियप्पा असिधारं वा

खुरधारं वा ओगाहेज्जा ? हुंता ओगाहेज्जा । से णं तत्थ छिज्जेज्ज वा भिज्जे-
ज्ज वा ? णो इणट्ठे समट्ठे, णो खलु तत्थ सत्थं कमड, एवं जहा पंचम-
सए परमाणुयोगलवत्तवया जाव अणगारे णं भंते ! भावियप्पा उदावत्तं
वा जाव णो खलु तत्थ सत्थं कमड ॥ ६४२ ॥ परमाणुयोगले णं भंते ! वाउ-
याएणं फुडे वाउयाए वा परमाणुयोगलेणं फुडे ? गोयमा ! परमाणुयोगले
वाउयाएणं फुडे णो वाउयाए परमाणुयोगलेणं फुडे । दुयएसिए णं भंते !
खंधे वाउयाएणं० एवं चेव, एवं जाव असंखेज्जपएसिए । अणंतपएसिए णं
भंते ! खंधे वाउयाएणं पुच्छा, गोयमा ! अणंतपएसिए खंधे वाउयाएणं फुडे
वाउयाए अणंतपएसिएणं खंधेणं सिय फुडे सिय णो फुडे । वत्थी णं भंते !
वाउयाएणं फुडे वाउयाए वत्थिणा फुडे ? गोयमा ! वत्थी वाउयाएणं फुडे
णो वाउयाए वत्थिणा फुडे ॥ ६४३ ॥ अत्थि णं भंते ! इमीसे रयणप्पभाए
पुढवीए अहे द्वाइं वण्णओ कालणीललोहियहालिदमुविकत्ताइं, गंधओ
सुब्भिमंग्धाइं दुब्भिमंग्धाइं, रसओ तित्तकडुयकसायअबिलमहुराइं, फासओ
कक्खडमउयगरुयलहुयसीयउसिणणिद्धलुक्खाइं, अण्णमण्णवद्धाइं अण्णमण्णपुट्टाइं
जाव अण्णमण्णघडत्ताए चिट्ठंति ? हुंता अत्थि, एवं जाव अहेसत्तमाए ।
अत्थि णं भंते ! सोहम्मस्स कप्पस्स अहे० एवं चेव, एवं जाव ईसिप्पभाराए
पुढवीए । सेवं भंते ! २ त्ति जाव विहरइ । तए णं समणे भगवं महावीरे
जाव बहिया जणवयविहारं विहरइ ॥ ६४४ ॥ तेणं कालेणं तेणं समएणं
वाणियगामे णामं णयरे होत्था वण्णओ, दूइपलासए चेइए वण्णओ, तत्थ णं
वाणियगामे णयरे सोमिले णामं माहणे परिवसइ, अड्ढे जाव अपरिभूए,
रिउव्वेय जाव सुपरिणिट्टिए पंचण्हं खंडियसयाणं सयस्स कुडुंबस्स आहेवच्चं
जाव विहरइ, तए णं समणे भगवं महावीरे जाव समोसडे जाव परिसा पज्जु-
वासइ । तए णं तस्स सोमिलस्स माहणस्स इमीसे कहाए लद्धट्टस्स समाणस्स
अयमेयारूवे जाव सम्पपज्जितथा—एवं खलु समणे णायपुत्ते पुव्वाणुपुंवि चर-
माणे गामाणुगामं दूइज्जमाणे सुहंसुहेणं जाव इहमागए जाव दूइपलासए चेइए
अहापडिरूवं जाव विहरइ, तं गच्छामि णं समणस्स णायपुत्तस्स अंतियं पाउ-
ब्भवामि, इमाइं च णं एयारूवाइं अट्टाइं जाव वागरणाइं पुच्छिस्सामि, तं जइ
मे से इमाइं एयारूवाइं अट्टाइं जाव वागरणाइं वामरेहिइ तओ णं बंदीहामि

णमंसीहामि जाव पञ्जवासीहामि, अह मे से अट्टाई जाव वागरणाई
 णो वागरेहिइ तो णं एएहि चेव अट्ठेहि य जाव वागरणेहि य णिप्पट्ट-
 पसिणवागरणं करेस्सामित्तिकट्ठं एवं संपेहेइ २ ता ण्हाए जाव सरीरे साओ
 गिहाओ पडिणिवल्लमइ २ ता पायविहारचारेणं एणेणं खंडियसएणं सिद्धि संपरि-
 वुडे वाणिपयामं णयरं मज्झमज्जेणं णिग्गच्छइ २ ता जेणेव वूइपलासए चेइए
 जेणेव समणे भगवं महावीरे तेणेव उवागच्छइ २ ता समणस्स भगवओ महा-
 धोरस्स अदूरसामते ठिच्चा समणं भगवं महावीरं एवं वयासी-जत्ता ते भंते !
 जवणिज्जं ते भंते ! अक्खाबाहं ते भंते ! फासुयविहारं ते भंते ! ? सोमिला !
 जत्तावि मे, जवणिज्जंपि मे, अक्खाबाहंवि मे, फासुयविहारंवि मे । किं ते भंते !
 जत्ता ? सोमिला ! जं मे तवणिपयमसंजमसज्जायज्जाणावस्सयमाइएसु जोगेसु
 जयणा सेत्तं जत्ता । किं ते भंते ! जवणिज्जं ? सोमिला ! जवणिज्जे दुविहे प०,
 तं०-इदियजवणिज्जे य णोइदियजवणिज्जे य । से किं तं इदियजवणिज्जे ? इदिय-
 जवणिज्जे जं मे सोइदियच्चकिइदियघाणिदियजिंविमदियफासिदियाइं णिरुवह-
 याइं वसे वट्टंति सेत्तं इदियजवणिज्जे । से किं तं णोइदियजवणिज्जे ? २ जं मे
 कोहमाणमायालोभा बोच्छिणा णो उदीरंति सेत्तं णोइदियजवणिज्जे, सेत्तं
 जवणिज्जे । से किं ते भंते ! अक्खाबाहं ? सोमिला ! जं मे वाइयपित्तिय-
 सिंभियसण्णिवाइया विविहा रोगायंका सरीरगया दोसा उवसंता णो उदीरंति
 सेत्तं अक्खाबाहं । किं ते भंते ! फासुयविहारं ? सोमिला ! जण्णं आरामेसु
 उज्जाणेसु वेवकुलेसु सभामु पवामु इत्थीपसुपंडगविवज्जियासु वसहीसु फासुएस-
 णिज्जं पीढफलगतज्जासंथारयं उवसंपज्जित्ताणं विहरामि सेत्तं फासुयविहारं ।
 सरिसवा ते भंते ! किं भक्खेया अभक्खेया ? सोमिला ! सरिसवा भक्खेयावि
 अभक्खेयावि । से केणट्ठेणं भंते ! एवं वुच्चइ सरिसवा मे भक्खेयावि अभक्खे-
 यावि ? से णूणं ते सोमिला ! बंभण्णएसु णएसु दुविहा सरिसवा पण्णत्ता, तं०-
 मित्तसरिसवा य धण्णसरिसवा य, तत्थ णं जे ते मित्तसरिसवा ते तिविहा प०,
 तं०-सहजायया सहवड्डियया सहपंसुकीलियया, ते णं समणाणं णिमंथाणं
 अभक्खेया, तत्थ णं जे ते धण्णसरिसवा ते दुविहा प०, तं०-सत्थपरिणया य
 असत्थपरिणया य, तत्थ णं जे ते असत्थपरिणया ते णं समणाणं णिमंथाणं
 अभक्खेया, तत्थ णं जे ते सत्थपरिणया ते दुविहा प०, तं०-एसणिज्जा य

अणसणिज्जा, य तत्थ णं जे ते अणसणिज्जा ते समणाणं णिग्गंथाणं अभक्खेया, तत्थ णं जे ते एसणिज्जा ते दुविहा प०, तं०-जाइया य अजाइया य, तत्थ णं जे ते अजाइया ते णं समणाणं णिग्गंथाणं अभक्खेया, तत्थ णं जे ते जाइया ते दुविहा प०, तं०-लद्धा य अलद्धा य, तत्थ णं जे ते अलद्धा ते णं समणाणं णिग्गंथाणं अभक्खेया, तत्थ णं जे ते लद्धा ते णं समणाणं णिग्गंथाणं भक्खेया, से तेणट्ठेणं सोमिला ! एवं वुच्चइ-जाव अभक्खेयावि । मासा ते भंते ! कि भक्खेया अभक्खेया ? सोमिला ! मासा से भक्खेयावि अभक्खेयावि । से केण ट्ठेणं जाव अभक्खेयावि ? से णूणं ते सोमिला ! बंभणएसुणएसु दुविहा मासा प०, तं०-दव्वमासा य कालमासा य, तत्थ णं जे ते कालमासा ते णं सावणाईया आसाहपज्जवसाणा दुवालस प०, तं०-सावणे भइवए आसोए कत्तिए भागसिरे पोसे माहे फागुणे च्चेत्ते वइसाहे जेट्टामूले आसाह, तेणं समणाणं णिग्गंथाणं अभक्खेया, तत्थ णं जे ते दव्वमासा ते दुविहा प०, तं०-अत्थमासा य धणमासा य, तत्थ णं जे ते अत्थमासा ते दुविहा प०, तं०-सुवणमासा य रूपमासा य, ते णं समणाणं णिग्गंथाणं अभक्खेया, तत्थ णं जे ते धणमासा ते दुविहा प०, तं०-सत्थपरिणया य असत्थपरिणया य, एवं जहा धणसरिसवा जाव से तेणट्ठेणं जाव अभक्खेयावि । कुलत्था ते भंते ! कि भक्खेया अभक्खेया ? सोमिला ! कुलत्था से भक्खेयावि अभक्खेयावि । से केणट्ठेणं जाव अभक्खेयावि ? से णूणं ते सोमिला ! बंभणएसुणएसु दुविहा कुलत्था प०, तं०-इत्थिकुलत्था य धणकुलत्था य, तत्थ णं जे ते इत्थिकुलत्था ते तिविहा प०, तं०-जहा-कुलकणयाड वा कुलवहूयाइ वा कुलमाउयाइ वा, ते णं समणाणं णिग्गंथाणं अभक्खेया, तत्थ णं जे ते धणकुलत्था एवं जहा धणसरिसवा, से तेणट्ठेणं जाव अभक्खेयावि ॥ ६४५ ॥ एगे भवं दुवे भवं अक्खए भवं अश्वए भवं अवट्टिए भवं अणेगभूयभावभविए भवं ? सोमिला ! एगेवि अहं जाव अणेगभूयभावभविएवि अहं । से केणट्ठेणं भंते ! एवं वुच्चइ-जाव भविएवि अहं ? सोमिला ! दव्वट्टयाए एगे अहं, णाणदंसणट्टयाए दुविहे अहं, पएसट्टयाए अक्खएवि अहं अक्वएवि अहं अवट्टिएवि अहं, उवओगट्टयाए अणेगभूयभावभविएवि अहं, से तेणट्ठेणं जाव भविएवि अहं । एत्थ णं से सोमिले माहणे संबुद्धे । तए णं से समणं भगवं महावीरं जहा खंदओ जाव से जहेयं तुब्भे वदहं जहा णं देवाणुप्पियणं अंतियं बहवे राईसर० एवं

जहा रायंपसेणइज्जे चित्तो जाव दुत्रालसविहं सावगधम्मं पडिवज्जइ पडिव-
ज्जिता समणं-भगवं महावीरं बंदइ णमंसइ वं० २ ता जाव पडिगए । तए णं
से सोमिले माहणे समणोवासए जाए अभिगयजीवा० जाव विहरइ । भंते ! त्ति
भंगवं गोयमे समणं भगवं महावीरं बंदइ णमंसइ वं० २ ता एवं वयासी-पभू
णं भंते ! सोमिले माहणे देवाणुप्पियाणं अंतिए मुंडे प्रवित्ता० जहेव संखे तहेव
णिरवसेसं जाव अंतं काहिइ । सेवं भंते ! २ त्ति जाव विहरइ ॥ ६४६ ॥

अट्टारसमं सयं समत्तं

॥ एगूणवीसइमं सयं पढमो उद्देसो ॥

लेस्सा य १ गभ २ पुढवी ३ महासवा ४ चरम ५ दीव ६ भवणा ७ य ।
णिब्बत्ति ८ करण ९ वणचरसुरा य १० एगूणवीसइमे ॥ १ ॥ रायगिहे जाव
एवं वयासी-कइ णं भंते ! लेस्साओ पणत्ताओ ? गोयमा ! छल्लेसाओ
पणत्ताओ, तंजहा-एवं जहा पणवणाए चउत्थो लेसुद्देसओ भाणियब्बो णिर-
बसेसो । सेवं भंते ! २ त्ति ॥ ६४७ ॥

एगूणवीसइमं सयं बीओ उद्देसो

कइ णं भंते ! लेस्साओ प० ? एवं जहा पणवणाए गबुद्देसो सो चेव
णिरवसेसो भाणियब्बो । सेवं भंते ! सेवं भंते ! त्ति (१६-२) ॥ ६४८ ॥

एगूणवीसइमं सयं तइओ उद्देसो

रायगिहे जाव एवं वयासी-सिय भंते ! जाव चत्तारि पंच पुढविवकाइया एग-
यओ साहारणसरीरं बंधति एग० २ त्ता तओ पच्छा आहारेंति वा परिणामेंति
वा सरीरं वा बंधति ? णो इणट्ठे समट्ठे, पुढविवकाइयाणं पत्तेयाहारा पत्तेय-
परिणामा पत्तेयं सेरीरं बंधति प० २ त्ता तओ पच्छा आहारेंति वा परिणा-
मेंति वा सरीरं वा बंधति १ । तेसि णं भंते ! जीवाणं कइ लेस्साओ प० ?
गोयमा ! चत्तारि लेस्साओ प०, तं०-कण्हलेस्सा, णील्लेस्सा, काउलेस्सा,
तेउलेस्सा २ । ते णं भंते ! जीवा किं सम्मदिट्ठी मिच्छादिट्ठी सम्मामिच्छा-
दिट्ठी ? गोयमा ! णो सम्मदिट्ठी, मिच्छादिट्ठी, णो सम्मामिच्छादिट्ठी ३ ।
ते णं भंते ! जीवा किं णाणी अण्णाणी ? गोयमा ! णो णाणी अण्णाणी,
णिग्गमा दुअण्णाणी तं०-मइअण्णाणी य सुयअण्णाणी य ४ । ते णं भंते ! जीवा

किं मणजोगी वड्जोगी कायजोगी ? गोयमा ! णो मणजोगी, णो वड्जोगी, कायजोगी ५ । ते णं भंते ! जीवा किं सागारोवउत्ता अणागारोवउत्ता ? गोयमा ! सागारोवउत्तावि अणागारोवउत्तावि ६ । ते णं भंते ! जीवा किमाहारमाहारंति ? गोयमा ! दव्वओ णं अणंतपएसियाइं दव्वाइं एवं जहा पणवणाए पदमे आहारद्वेसए जाव सव्वप्पणयाए आहारमाहारंति ७ । ते णं भंते ! जीवा जमाहारंति तं चिज्जति, जं णो आहारंति तं णो चिज्जति, चिण्णे वा से उद्दाइ पलिसप्पइ वा ? हुंता गोयमा ! ते णं जीवा जमाहारंति तं चिज्जति, जं णो जाव पलिसप्पइ वा ८ । तेसि णं भंते ! जीवाणं एवं सण्णाइ वा पण्णाइ वा मणोइ वा वईइ वा अम्हे णं आहारमाहारो ? णो इणट्ठे समट्ठे, आहारंति पुण ते ९ । तेसि णं भंते ! जीवाणं एवं सण्णाइ वा जाव वईइ वा अम्हे णं इट्ठानिट्ठे फासे पडिसवेदेमो ? णो इणट्ठे समट्ठे, पडिसवेदेति पुण ते १० । ते णं भंते ! जीवा किं पाणाइवाए उवक्खाइज्जति, मुसावाए अदिष्णादाणे जाव मिच्छादंसणसल्ले उवक्खाइज्जति ? गोयमा ! पाणाइवाएवि उवक्खाइज्जति जाव मिच्छादंसणसल्लेवि उवक्खाइज्जति, जेसिपि णं जीवाणं ते जीवा एवमाहिज्जति तेसिपि णं जीवाणं णो विष्णाए णाणत्ते ११ । ते णं भंते ! जीवा कआंहितो उववज्जति किं णेरइएहितो उववज्जति ? एवं जहा वक्कंतोए पुढविक्काइयाणं उववाओ तहा भाणियव्वो १२ । तेसि णं भंते ! जीवाणं केवइयं कालं ठिई ५० ? गोयमा ! जह्ण्णेण अतोमूहत्तं उवकंसिणं बावीसं वाससहरसाइं १३ । तेसि णं भंते ! जीवाणं कइसमुग्घाया ५० ? गोयमा ! तओ समुग्घाया ५०, तं०-वेयणासमुग्घाए, कसायसमुग्घाए मारणंतियसमुग्घाए । ते णं भंते ! जीवा मारणंतियसमुग्घाएणं किं समोहया मरति असमोहया मरति ? गोयमा ! समोहयावि मरति, असमोहयावि मरति । ते णं भंते ! जीवा अणंतरं उव्वट्ठिता किं गच्छंति किं उववज्जति ? एवं उव्वट्ठणा जहा वक्कंतोए १४ । सिय भंते ! जाव चत्तारि पंच आउक्काइया एगयओ साहारणं सरीरं बंधति २ ता तओ पच्छा आहारंति एवं ओ पुढविकाइयाणं गमो सो चेव भाणियव्वो जाव उव्वट्ठति, णवरं ठिई सत्तवाससहरसाइं उवकंसिणं सेसं तं चेव । सिय भंते ! जाव चत्तारि पंच तेउक्काइया एवं चेव णवरं उववाओ ठिई उव्वट्ठणा य जहा पणवणाए सेसं तं चेव । वाउकाइयाणं एवं चेव णाणत्तं णवरं चत्तारि समुग्घाया । सिय भंते ! जाव चत्तारि पंच वणत्सइ-

काइया पुच्छा, गोयमा ! णो इणदठे समदठे, अणंता वणस्सइकाइया एगयओ साहारणसरोरं बंधंति एग० २ ता तओ पच्छा आहारेंति वा परिणामेंति वा सेसं जहा तेउकाइयाणं जाव उच्चदंति, णवरं आहारो णियमं छट्ठिसि, डिई जहण्णेणं अंतोमुहुत्तं, उक्कोसेणवि अंतोमुहुत्तं, सेसं तं चेव ॥ ६४६ ॥ एएसि णं भंते ! पुढविकाइयाणं आउतेउवाउवणस्सइकाइयाणं सुहुमाणं बायरारणं पज्जत्तगणं अपज्जत्तगणं जाव जहण्णक्कोसियाए ओगाहणाए कयरे २ जाव विसेसाहिया वा ? गोयमा ! सब्बत्थोवा सुहुमणिओयस्स अपज्जत्तगस्स जहण्णिया ओगाहणा १, सुहुमवाउक्काइयस्स अपज्जत्तगस्स जहण्णिया ओगाहणा असंखेज्जगुणा २, सुहुमतेउअपज्जत्तगस्स जहण्णिया ओगाहणा असंखेज्जगुणा ३, सुहुमआउअपज्जत्तगस्स जहण्णिया ओगाहणा असंखेज्जगुणा ४, सुहुमपुढविअपज्जत्तगस्स जहण्णिया ओगाहणा असंखेज्जगुणा ५, बायरवाउकाइयस्स अपज्जत्तगस्स जहण्णिया ओगाहणा असंखेज्जगुणा ६, बायरतेउअपज्जत्तगस्स जहण्णिया ओगाहणा असंखेज्जगुणा ७, बायरआउअपज्जत्तगस्स जहण्णिया ओगाहणा असंखेज्जगुणा ८, बायरपुढविकाइयअपज्जत्तगस्स जहण्णिया ओगाहणा असंखेज्जगुणा ९, पत्तेयसरोरबायरवणस्सइकाइयस्स बायरणिओयस्स एएसि णं पज्जत्तगणं एएसि णं अपज्जत्तगणं जहण्णिया ओगाहणा दोण्हवि तुल्ला असंखेज्जगुणा १०-११, सुहुमणिओयस्सपज्जत्तगस्स जहण्णिया ओगाहणा असंखेज्जगुणा १२, तस्सेव अपज्जत्तगस्स उक्कोसिया ओगाहणा विसेसाहिया १३, तस्स चेव पज्जत्तगस्स उक्कोसिया ओगाहणा विसेसाहिया १४, सुहुमवाउकाइयस्स पज्जत्तगस्स जहण्णिया ओगाहणा असंखेज्जगुणा १५, तस्स चेव अपज्जत्तगस्स उक्कोसिया ओगाहणा विसेसाहिया १६, तस्स चेव पज्जत्तगस्स उक्कोसिया ओगाहणा विसेसाहिया १७, एवं सुहुमतेउक्काइयस्स विसे० १८-१९-२० एवं सुहुमआउक्काइयस्सवि २१-२२-२३ एवं सुहुमपुढविकाइयस्स विसेसाहिया २४-२५-२६ एवं बायरवाउकाइयस्स विसेसाहिया २७-२८-२९ एवं बायरतेउक्काइयस्स विसेसाहिया ३०-३१-३२ एवं बायरआउकाइयस्स विसेसाहिया ३३-३४-३५ एवं बायरपुढविकाइयस्स विसेसाहिया ३६-३७-३८ सब्बेसि तिविहेणं ग्गणेणं भाणियत्वं, बायरणिओयस्स पज्जत्तगस्स जहण्णिया ओगाहणा असंखेज्जगुणा ३९, तस्स चेव

अपञ्जत्तगस्स उक्कोसिया ओगाहणा विसेसाहिया ४०, तस्स चैव पञ्जत्त-
 गस्स उक्कोसिया ओगाहणा विसेसाहिया ४१, पत्तियसरीरबायरवणस्सइ-
 काइयस्स पञ्जत्तगस्स जहणिया ओगाहणा असंखेज्जगुणा ४२, तस्स चैव
 अपञ्जत्तगस्स उक्कोसिया ओगाहणा असंखेज्जगुणा ४३, तस्स चैव पञ्जत्तग-
 स्स उक्कोसिया ओगाहणा असंखेज्जगुणा ४४ ॥ ६५० ॥ एयस्स णं भंते !
 पुढविकाइयस्स आउक्काइयस्स तेउकाइयस्स वाउक्काइयस्स वणस्सइकाइयस्स
 कयरे काए सव्वसुहुमे कयरे काए सव्वसुहुमतराए ? गोयमा ! वणस्सइकाइए
 सव्वसुहुमे वणस्सइकाइए सव्वसुहुमतराए १ । एयस्स णं भंते ! पुढविकाइयस्स
 आउक्काइयस्स तेउकाइयस्स वाउक्काइयस्स कयरे काए सव्वसुहुमे कयरे काए
 सव्वसुहुमतराए ? गोयमा ! वाउक्काइए सव्वसुहुमे वाउक्काइए सव्वसुहुम-
 तराए २ । एयस्स णं भंते ! पुढविकाइयस्स आउक्काइयस्स तेउक्काइयस्स कयरे
 काए सव्वसुहुमे कयरे काए सव्वसुहुमतराए ? गोयमा ! तेउक्काए सव्वसुहुमे
 तेउक्काए सव्वसुहुमतराए ३ । एयस्स णं भंते ! पुढविकाइयस्स आउक्काइ-
 यस्स कयरे काए सव्वसुहुमे कयरे काए सव्वसुहुमतराए ? गोयमा ! आउक्काए
 सव्वसुहुमे आउक्काए सव्वसुहुमतराए ४ । एयस्स णं भंते ! पुढविकाइयस्स
 आउक्काइयस्स तेउक्काइयस्स वाउक्काइयस्स वणस्सइकाइयस्स कयरे काए
 सव्वबादरे कयरे काए सव्वबादरतराए ? गोयमा ! वणस्सइकाइए सव्वबादरे
 वणस्सइकाइए सव्वबादरतराए १ । एयस्स णं भंते ! पुढविकाइयस्स आउ-
 क्काइयस्स तेउक्काइयस्स वाउक्काइयस्स कयरे काए सव्वबादरे कयरे काए
 सव्वबादरतराए ? गोयमा ! पुढविकाए सव्वबादरे पुढविकाए सव्वबादर-
 तराए २ । एयस्स णं भंते ! आउक्काइयस्स तेउकाइयस्स वाउक्काइयस्स कयरे
 काए सव्वबादरे कयरे काए सव्वबादरतराए ? गोयमा ! आउक्काए सव्व-
 बादरे आउक्काए सव्वबादरतराए ३ । एयस्स णं भंते ! तेउकाइयस्स वाउ-
 क्काइयस्स कयरे काए सव्वबादरे कयरे काए सव्वबादरतराए ? गोयमा !
 तेउक्काए सव्वबादरे तेउक्काए सव्वबादरतराए ४ । केमहालए णं भंते !
 पुढविसरीरे पणत्ते ? गोयमा ! अणंताणं सुहुमवणस्सइकाइयाणं जावइया
 सरीरा से एगे सुहुयवाउसरीरे, असंखेज्जाणं सुहुमवाउसरीराणं जावइया
 सरीरा से एगे सुहुमतेउसरीरे, असंखेज्जाणं सुहुमतेउकाइयसरीराणं जावइया

सरीरा से एगे सुहुमे आउसरीरे, असंखेज्जाणं सुहुमआउक्काइयसरीराणं जाव-
इया सरीरा से एगे सुहुमे पुढविसरीरे, असंखेज्जाणं सुहुमपुढविकाइयसरीराणं
जावइया सरीरा से एगे बायरवाउसरीरे असंखेज्जाणं बायरवाउक्काइयाणं जाव-
इया सरीरा से एगे बायरतेउसरीरे, असंखेज्जाणं बायरतेउकाइयाणं जावइया
सरीरा से एगे बायरआउसरीरे, असंखेज्जाणं बायरआउक्काइयाणं जावइया
सरीरा से एगे बायरपुढविसरीरे, एमहालए णं गोयमा ! पुढविसरीरे पण्णत्ते
॥६५१॥ पुढविकाइयस्स णं भत्ते ! केमहालिया सरीरोगाहणा प० ? गोयमा ! से
जहाणामए रण्णे चाउरंतचक्कवट्टिस्स वण्णगभेसिया तरुणी बलवं जुगवं जुवाणो
अप्यायंका वण्णओ जाव णिउणसिप्पोवगया णवरं चम्मेट्टुहणमुट्टियसमाहय-
पिचियमत्तकाया ण ऋणइ, सेसं तं चेव जाव णिउणसिप्पोवगया तिक्खाए
वइरामईए सक्कणीए तिक्खेणं वइरामएणं वट्टावरएणं एणं महं पुढविकाइयं
जउगोलासमाणं गहाम पडिसाहरिय २ पडिसंखिविय २ जाव इणामेवत्तिकट्टु
तिसत्तक्खुत्तो उप्पीसेज्जा, तत्थ णं गोयमा ! अत्थेगइया पुढविक्काइया आलिद्धा,
अत्थेगइया पुढविक्काइया णो आलिद्धा, अत्थेगइया संघट्टिया, अत्थेगइया णो
संघट्टिया, अत्थेगइया परियाविया, अत्थेगइया णो परियाविया, अत्थेगइया
उट्टविया, अत्थेगइया णो उट्टविया, अत्थेगइया पिट्टा, अत्थेगइया णो पिट्टा,
पुढविकाइयस्स णं गोयमा ! एमहालिया सरीरोगाहणा प० । पुढविकाइए णं
भत्ते ! अक्कते समाने केरिसियं वेयणं पच्चणुम्भवमाणे विहरइ ? गोयमा !
से जहाणामए-केइ पुरिसे तरुणे. बलवं जाव णिउणसिप्पोवगए एणं पुरिसं जु०णं
जराजज्जरियदेहं जाव दुब्बलं किलंतं जमलपाणिणा मुद्धाणंसि अभिहणिज्जा,
से णं गोयमा ! पुरिसे तेषं पुरिसेणं जमलपाणिणा मुद्धाणंसि अभिहए समाने
केरिसियं वेयणं पच्चणुम्भवमाणे विहरइ ? अणिट्ठं समणाउत्तो ! तस्स णं
गोयमा ! पुरिसस्स वेयणाहंतो पुढविकाइए अक्कते समाने एत्तो अणिट्टतरियं
चेव अकंततरियं चेव जाव अमणामतरियं चेव वेयणं पच्चणुम्भवमाणे विहरइ ।
आउयाए णं भत्ते ! संघट्टिए समाने केरिसियं वेयणं पच्चणुम्भवमाणे विहरइ ।
गोयमा ! जहा पुढविकाइए एवं चेव, एवं तेउयाएवि, एवं वाउयाएवि, एवं
वणस्सइकाएवि जाव विहरइ । सेवं भत्ते ! २ त्ति ॥ ६५२ ॥

एगूणवीसइमं सयं चउत्थो उद्देशो

सिय भंते ! णेरइया महासवा महाकिरिया महावेयणा महाणिज्जरा ? गोयमा ! णो इणट्ठे समट्ठे १ । सिय भंते ! णेरइया महासवा महाकिरिया महावेयणा अप्पणिज्जरा ? हुंता सिया २ । सिय भंते ! णेरइया महासवा महाकिरिया अप्पवेयणा महाणिज्जरा ? गोयमा ! णो इणट्ठे समट्ठे ३ । सिय भंते ! णेरइया महासवा महाकिरिया अप्पवेयणा अप्पणिज्जरा ? गोयमा ! णो इणट्ठे समट्ठे ४ । सिय भंते ! णेरइया महासवा अप्पकिरिया महावेयणा महाणिज्जरा ? गोयमा ! णो इणट्ठे समट्ठे ५ । सिय भंते ! णेरइया महासवा अप्पकिरिया महावेयणा अप्पणिज्जरा ? गोयमा ! णो इणट्ठे समट्ठे ६ । सिय भंते ! णेरइया महासवा अप्पकिरिया अप्पवेयणा महाणिज्जरा ? णो इणट्ठे समट्ठे ७ । सिय भंते ! णेरइया महासवा अप्पकिरिया अप्पवेयणा अप्पणिज्जरा ? णो इणट्ठे समट्ठे ८ । सिय भंते ! णेरइया अप्पासवा महाकिरिया महावेयणा महाणिज्जरा ? णो इणट्ठे समट्ठे ९ । सिय भंते ! णेरइया अप्पासवा महाकिरिया महावेयणा अप्पणिज्जरा ? णो इणट्ठे समट्ठे १० । सिय भंते ! णेरइया अप्पासवा महाकिरिया अप्पवेयणा महाणिज्जरा ? णो इणट्ठे समट्ठे ११ । सिय भंते ! णेरइया अप्पासवा महाकिरिया अप्पवेयणा अप्पणिज्जरा ? णो इणट्ठे समट्ठे १२ । सिय भंते ! णेरइया अप्पासवा अप्पकिरिया महावेयणा महाणिज्जरा ? णो इणट्ठे समट्ठे १३ । सिय भंते ! णेरइया अप्पासवा अप्पकिरिया अप्पवेयणा महाणिज्जरा ? णो इणट्ठे समट्ठे १४ । सिय भंते ! णेरइया अप्पासवा अप्पकिरिया अप्पवेयणा महाणिज्जरा ? णो इणट्ठे समट्ठे १५ । सिय भंते ! णेरइया अप्पासवा अप्पकिरिया अप्पवेयणा अप्पणिज्जरा ? णो इणट्ठे समट्ठे १६, एए सोलस भंगा । सिय भंते ! असुरकुमारा महासवा महाकिरिया महावेयणा महाणिज्जरा ? णो इणट्ठे समट्ठे, एवं चउत्थो भंगो भाणियव्वो, सेसा पण्णरस भंगा खोडेयव्वा, एवं जाव थणियकुमारा । सिय भंते ! पुढविवकाइया महासवा महाकिरिया महावेयणा महाणिज्जरा ? हुंता सिया, एवं जाव सिय भंते ! पुढविवकाइया अप्पासवा अप्पकिरिया अप्पवेयणा अप्पणिज्जरा ? हुंता सिया, एवं जाव मणुस्सा, वाणमंतरजोइसियवेमाणिया अहा असुरकुमारा । सेवं भंते ! २ त्ति ॥ ६५३ ॥

एगूणवीसइमं सयं पंचमो उद्देशो

अस्थि णं भंते ! चरिमावि णेरइया परमावि णेरइया ? हुंता अस्थि । ते णूणं भंते ! चरिमेहितो णेरइएहितो परमा णेरइया महाकम्मतराए चेव महा-किरियतराए चेव महासवतराए चेव महावेयणतराए चेव, परमेहितो वा णेर-इएहितो चरमा णेरइया अप्पकम्मतराए चेव अप्पकिरियतराए चेव अप्पासव-तराए चेव अप्पवेयणतराए चेव ? हुंता गोयमा ! चरमेहितो णेरइएहितो परमा जाव महावेयणतराए चेव, परमेहितो णेरइएहितो चरमा णेरइया जाव अप्पवेयणतराए चेव । से केणट्ठेणं भंते ! एवं वुच्चइ जाव अप्पवेयणतराए चेव ? गोयमा ! ठिइं पडुच्च, से तेणट्ठेणं गोयमा ! एवं वुच्चइ जाव अप्पवेयण-तराए चेव । अस्थि णं भंते ! चरमावि असुरकुमारा परमावि असुरकुमारा ? एवं चेव, णवरं विवरीयं भाणियच्चं, परमा अप्पकम्मा, चरमा महाकम्मा, सेसं तं चेव जाव यणियकुमारा ताव एवमेव, पुढविकाइया जाव मणुस्सा एए जहा णेरइया. चाणमंतरजोइसियवेमाणिया जहा असुरकुमारा ॥ ६५४ ॥ कइविहा णं भंते ! वेयणा प० ? गोयमा ! दुविहा वेयणा प०, तं—णिदा य अणिदा य । णेरइया णं भंते ! कि णिदायं वेयणं वेदंति अणिदायं वेयणं वेदंति० ? जहा पण्णवणाए जाव वेमाणियत्ति । सेवं भंते ! २ त्ति ॥ ६५५ ॥

एगूणवीसइमं सयं छट्ठो उद्देशो

कहि णं भंते ! दीवसमुहा, केवइया णं भंते ! दीवसमुहा, किसंठिया णं भंते ! दीवसमुहा ? एवं जहा जीवीभिगमे दीवसमुद्दुइंसो सो चेव इहवि जोइसियमंडिउद्देशगवज्जो भाणियच्चो जाव परिणामो जीवउववाओ जाव अणंतखुत्तो । सेवं भंते ! सेवं भंते ! त्ति ॥ ६५६ ॥

एगूणवीसइमं सयं सत्तमो उद्देशो

केवइया णं भंते ! अदुरकुमारभवणावाससयसहस्सा प० ? गोयमा ! चउसट्ठि असुरकुमारभवणावाससयसहस्सा प० । ते णं भंते ! किमया प० ? गोयमा ! सव्वरयणामया अच्छा सण्हा जाव पडिह्वा, तत्थ णं बह्वे जीवा य पोगला य वक्कमंति विउक्कमंति चयंति उववज्जंति, सासया णं ते भवणा दव्वट्टयाए, वण्णपज्जवेहं जाव फासपज्जवेहं असासया, एवं जाव यणिय-

कुमारावासा । केवइया णं भंते ! वाणमंतरभोमेज्जणयरवासासयसहस्सा प० ? गोयमा ! असंखेज्जा वाणमंतरभोमेज्जणयरवासासयसहस्सा प० । ते णं भंते ! किमया प० ? सेसं तं चेव । केवइया णं भंते ! जोइसियविमाणावासासयसहस्सा पुच्छा, गोयमा ! असंखेज्जा जोइसियविमाणावासासयसहस्सा प० । ते णं भंते ! किमया प० ? गोयमा ! सव्वफालिहामया अच्छा, सेसं तं चेव । सोहम्मे भे भंते ! कप्पे केवइया विमाणावासासयसहस्सा प० ? गोयमा ! बत्तीसं विमाणावासासयसहस्सा प० । ते णं भंते ! किमया प० ? गोयमा ! सव्वरयणामया अच्छा, सेसं तं चेव जाव अणुत्तरविमाणा, णवरं जाणियव्वा जत्थ जत्तिया भवणा विमाणा वा । सेवं भंते ! २ स्ति ॥ ६५७ ॥

एगूणवीसइमं सयं अट्टमो उट्ठेसो

कइविहा णं भंते ! जीवणिव्वत्ती प० ? गोयमा ! पंचविहा जीवणिव्वत्ती प०, तं०—एगिदियजीवणिव्वत्ती जाव पंचिदियजीवणिव्वत्ती । एगिदियजीवणिव्वत्ती णं भंते ! कइविहा प० ? गोयमा ! पंचविहा प०, तं०—पुढविकाइय एगिदियजीवणिव्वत्ती जाव वणस्सइकाइयएगिदियजीवणिव्वत्ती, पुढविकाइय एगिदियजीवणिव्वत्ती णं भंते ! कइविहा प० ? गोयमा ! दुविहा प०, तंजहा—सुहुमपुढविकाइयएगिदियजीवणिव्वत्ती य बायरपुढविकाइयएगिदियजीवणिव्वत्ती य, एवं एएणं अभित्तावेणं भेओ जहा वहुगबंधो तेयगसरीरस्स जाव सव्वट्टसिद्धअणुत्तरोववाइयकप्पाईयवेमाणियदेवपंचिदियजीवणिव्वत्ती णं भंते ! कइविहा प० ? गोयमा ! दुविहा प०, तं०—पज्जत्तगसव्वट्टसिद्धअणुत्तरोववाइय जाव देवपंचिदियजीवणिव्वत्ती य अपज्जत्तगसव्वट्टसिद्धअणुत्तरोववाइय जाव देवपंचिदियजीवणिव्वत्ती य । कइविहा णं भंते ! कम्मणिव्वत्ती प० ? गोयमा ! अट्टविहा कम्मणिव्वत्ती प०, तं०—णाणावरणिज्जकम्मणिव्वत्ती जाव अंतराइयकम्मणिव्वत्ती । णेरइयाणं भंते ! कइविहा कम्मणिव्वत्ती प० ? गोयमा ! अट्टविहा कम्मणिव्वत्ती प०, तं०—णाणावरणिज्जकम्मणिव्वत्ती जाव अंतराइयकम्मणिव्वत्ती, एवं जाव वेमाणियाणं । कइविहा णं भंते ! सरीरणिव्वत्ती प० ? गोयमा ! पंचविहा सरीरणिव्वत्ती प०, तं०—ओरालियसरीरणिव्वत्ती जाव कम्मगसरीरणिव्वत्ती । णेरइयाणं भंते ! ० एवं

चेव, एवं जाव वेमाणियाणं, णवरं णायव्वं जस्स जइ सरीराणि । कइविहा णं भंते ! सट्ठिदियणिव्वत्ती प० ? गोयमा ! पंचविहा सट्ठिदियणिव्वत्ती प०, तं०—सोइदियणिव्वत्ती जाव फासिदियणिव्वत्ती, एवं जाव णेरइया जाव थणियकुमारा णं । पुढविकाइयाणं पुच्छा, गोयमा ! एगा फासिदियणिव्वत्ती प०, एवं जस्स जइ इंदियाणि जाव वेमाणियाणं । कइविहा णं भंते ! भासाणिव्वत्ती प० ? गोयमा ! चउव्विहा भासाणिव्वत्ती प०, तं०—सच्चभासाणिव्वत्ती, मोसभासाणिव्वत्ती, सच्चामोसभासाणिव्वत्ती, असच्चामोसभासाणिव्वत्ती, एवं एगिदियवज्जं जस्स जा भासा जाव वेमाणियाणं । कइविहा णं भंते ! मणणिव्वत्ती प० ? गोयमा ! चउव्विहा मणणिव्वत्ती प०, तं०—सच्चमणणिव्वत्ती जाव असच्चामोसमणणिव्वत्ती, एवं एगिदियविगल्लिदियवज्जं जाव वेमाणियाणं । कइविहा णं भंते ! कसायणिव्वत्ती प० ? गोयमा ! चउव्विहा कसायणिव्वत्ती प०, तं०—कोहकसायणिव्वत्ती जाव लोभकसायणिव्वत्ती, एवं जाव वेमाणियाणं । कइविहा णं भंते ! वण्णणिव्वत्ती प० ? गोयमा ! पंचविहा वण्णणिव्वत्ती प०, तं०—कालवण्णणिव्वत्ती जाव सुविकल्लवण्णणिव्वत्ती, एवं णिरवसेसं जाव वेमाणियाणं, एवं गंधणिव्वत्ती दुविहा जाव वेमाणियाणं, रसणिव्वत्ती पंचविहा जाव वेमाणियाणं, फासणिव्वत्ती अट्टविहा जाव वेमाणियाणं । कइविहा णं भंते ! संठाणणिव्वत्ती प० ? गोयमा ! छव्विहा संठाणणिव्वत्ती प०, तं०—समचउरंसंठाणणिव्वत्ती जाव हुंडसंठाणणिव्वत्ती । णेरइयाणं पुच्छा, गोयमा ! एगा हुंडसंठाणणिव्वत्ती प० । असुरकुमाराणं पुच्छा, गोयमा ! एगा समचउरंसंठाणणिव्वत्ती प०, एवं जाव थणियकुमाराणं । पुढविकाइयाणं पुच्छा, गोयमा ! एगा मसूरचंदसंठाणणिव्वत्ती प०, एवं जस्स जं संठाणं जाव वेमाणियाणं । कइविहा णं भंते ! सण्णाणिव्वत्ती प० ? गोयमा ! चउव्विहा सण्णाणिव्वत्ती प०, तं०—आहारसण्णाणिव्वत्ती जाव परिग्गहसण्णाणिव्वत्ती, एवं जाव वेमाणियाणं । कइविहा णं भंते ! लेस्साणिव्वत्ती प० ? गोयमा ! छव्विहा लेस्साणिव्वत्ती प०, तं०—कण्हलेस्साणिव्वत्ती जाव सुक्कलेस्साणिव्वत्ती, एवं जाव वेमाणियाणं जस्स जइ लेस्साओ तस्स तत्तिया भाणियव्वदा । कइविहा णं भंते ! दिट्ठिणिव्वत्ती प० ? गोयमा ! त्रिविहा दिट्ठिणिव्वत्ती प०, तं०—सम्मदिट्ठिणिव्वत्ती, मिच्छादिट्ठिणिव्वत्ती, सम्मामिच्छादिट्ठि-

णिव्वत्ती, एवं जाव वेमाणियाणं जस्स जइविहा दिट्ठी । कइविहा णं भंते !
 णाणणिव्वत्ती पणत्ता ? गोयमा ! पंचविहा णाणणिव्वत्ती पणत्ता, तं०-
 आभिणिबोहियणाणणिव्वत्ती जाव केवलणाणणिव्वत्ती, एवं एगिदियवज्जं
 जाव वेमाणियाणं जस्स जइ णाणा । कइविहा णं भंते ! अण्णाणणिव्वत्ती
 पणत्ता ? गोयमा ! तिविहा अण्णाणणिव्वत्ती पणत्ता, तंजहा-मइअण्णाण-
 णिव्वत्ती, सुयअण्णाणणिव्वत्ती, विभंगणाणणिव्वत्ती, एवं जस्स जइ अण्णाणा
 जाव वेमाणियाणं । कइविहा णं भंते ! जोगणिव्वत्ती पणत्ता ? गोयमा !
 तिविहा जोगणिव्वत्ती पणत्ता, तंजहा-मणजोगणिव्वत्ती, वइजोगणिव्वत्ती,
 कायजोगणिव्वत्ती, एवं जाव वेमाणियाणं जस्स जइविहो जोगे । कइविहा णं
 भंते ! उवओगणिव्वत्ती प० ? गोयमा ! दुविहा उवओगणिव्वत्ती प०, तं०-
 सामारोवओगणिव्वत्ती अणमारोवओगणिव्वत्ती, एवं जाव वेमाणियाणं । संगह-
 गाहा-जीवाणं णिव्वत्ती कम्मप्पगडी सरीरणिव्वत्ती । सत्विदियणिव्वत्ती भासा
 य भणे कसाया य ॥ १ ॥ वण्णे गंधे रसे फासे संठाणविही य होइ बोद्धवो ।
 लेस्सा दिट्ठी णाणे उवओगे चेव जोगे य ॥ २ ॥ सेवं भंते ! २ त्ति ॥ ६५८ ॥

एगूणवीसइमं सयं णवमो उट्ठेसो

कइविहे णं भंते ! करणे पणत्ते ? गोयमा ! पंचविहे करणे पणत्ते,
 तंजहा-दव्वकरणे, खेत्तकरणे, कालकरणे भवकरणे, भावकरणे । णेरइयाणं
 भंते ! कइविहे करणे प० ? गोयमा ! पंचविहे करणे प०, तं०-दव्वकरणे
 जाव भावकरणे, एवं जाव वेमाणियाणं । कइविहे णं भंते ! सरीरकरणे प० ?
 गोयमा ! पंचविहे सरीरकरणे पणत्ते, तंजहा-ओरालियसरीरकरणे जाव
 कम्मगसरीरकरणे, एवं जाव वेमाणियाणं जस्स जइ सरीराणि । कइविहे णं
 भंते ! इंदियकरणे प० ? गोयमा ! पंचविहे इंदियकरणे प०, तंजहा-सोइ-
 दियकरणे जाव फांसिदियकरणे, एवं जाव वेमाणियाणं जस्स जइ इंदियाइं, एवं
 एएणं कमेणं भासाकरणे चउट्ठिविहे, मणकरणे चउट्ठिविहे, कसायकरणे चउट्ठिविहे,
 समुग्घायकरणे सत्तविहे, सण्णाकरणे चउट्ठिविहे, लेस्साकरणे छट्ठिविहे, विट्ठिकरणे
 त्तिविहे, वेयकरणे त्तिविहे पणत्ते, तंजहा-इत्थिवेयकरणे, पुरिसवेयकरणे, णपुं-
 सगवेयकरणे, एए सव्वे णेरइयाईं दंडगा जाव वेमाणियाणं, जस्स जं अत्थि तं
 तस्स सव्वं भाणियव्वं । कइविहे णं भंते ! पाणाइवायकरणे प० ? गोयमा !

पंचविहे पाणाइवायकरणे प०, तं०—एंगिदियपाणाइवायकरणे जाव पंचिदिय-
पाणाइवायकरणे, एवं णिरवसेसं जाव वेमाणियाणं । कहविहे णं भंते ! पोगगल-
करणे प० ? गोयमा ! पंचविहे पोगगलकरणे प०, तं०—वष्णकरणे, गंधकरणे,
रसकरणे, फासकरणे, संठाणकरणे । वष्णकरणे णं भंते ! कहविहे प० ? गोयमा !
पंचविहे प०, तंजहा—कालवष्णकरणे जाव सुविकल्लवष्णकरणे, एवं भेदो, गंध-
करणे दुविहे, रसकरणे पंचविहे, फासकरणे अट्टविहे । संठाणकरणे णं भंते !
कहविहे प० ? गोयमा ! पंचविहे प०, तजहा—परिमंडलसंठाणकरणे जाव
आघयसंठाणकरणे । सेवं भंते ! सेवं भंते ! त्ति जाव विहरइ ॥ ६५६ ॥

एगूणवीसइमं सयं दसमो उट्ठेसो

वाणमंतराणं भंते ! सध्वे समाहारा० एवं जहा सोलसमसए दीवकुमारुट्ठे-
सओ जाव अप्पिड्डियसि । सेवं भंते ! सेवं भंते ! त्ति ॥ ६६० ॥

एगूणवीसइमं सयं समत्तं

॥ वीसइमं सयं पढमो उट्ठेसो ॥

बेइदिय १ भागसे २ वाणवहे ३ उवचए ४ य परमाणू ५ । अंतर ६ बंधे
७ भूमो ८ चारण ९ सोवक्कमा जीवा १० ॥ १ ॥ राघगिहे जाव एवं वयासी-
सिय भंते ! जाव चत्तारि पंच बेइदिया एगयओ साहारणसरीर बंधति २ ता
तओ पच्छा आहारेंति वा परिणामेंति वा सरीरं वा बंधति ? णो इणट्ठे
समट्ठे, बेइदिया णं पत्तेयाहारा पत्तेयपरिणामा पत्तेयसरीरं बंधति प० २ ता
तओ पच्छा आहारेंति वा परिणामेंति वा सरीरं वा बंधति । तेसि णं भंते !
जीवाणं कह लेस्साओ प० ? गोयमा ! तओ लेस्साओ प०, तं०—कहूलेस्सा
णीललेस्सा काउलेस्सा, एवं जहा एगूणवीसइमे सए तेउक्काइयाणं जाव उव्वट्ठंति,
णवरं सम्मदिट्ठोवि मिच्छदिट्ठोवि, णो सम्मामिच्छदिट्ठो, वे णाणा दो
अण्णाणा णियमं, णो मणजोभी, वइजोगीवि काइजोगीवि, आहारो णियमं
छट्ठिसि । तेसि णं भंते ! जीवाणं एवं सण्णाइ वा पण्णाइ वा मणेइ वा वईइ
वा अम्हे णं इट्ठाणिट्ठे रसे इट्ठाणिट्ठे फासे पडिसवेदेमो ? णो इणट्ठे समट्ठे,
पडिसवेदेति पुण ते, ठिई जहण्णेणं अंतोमुहुत्तं उवकोसेणं बारससंबच्छराइं,
सेसं तं चेव, एवं तेइदियावि, एवं चउरिदियावि, णाणत्तं इदिएसु ठिईए य

सेसं तं चेव ठिई जहा पणवणाए । सिय भंते ! जाव चत्तारि पंच पंचिदिया एगयओ साहारणसरीरं० एवं जहा बेइदियाणं णवरं छल्लेस्साओ, दिट्ठी तिचि-
हावि, चत्तारि णाणा, तिण्णि अण्णाणा भयणाए, तिचिहो जोगो । तेसि णं
भंते ! जीवाणं एवं सण्णाइ वा पण्णाइ वा जाव वईइ वा अम्हे णं आहार-
माहारेमो ? गोयमा ! अत्थेगइयाणं एवं सण्णाइ वा पण्णाइ वा मणेइ वा
वईइ वा अम्हे णं आहारमाहारेमो, अत्थेगइयाणं णो एवं सण्णाइ वा जाव
वईइ वा अम्हे णं आहारमाहारेमो, आहारंति पुण ते, तेसि णं भंते ! जीवाणं
एवं सण्णाइ वा जाव वईइ वा अम्हे णं इट्ठाणिट्ठे सद्दे, इट्ठाणिट्ठे रूवे, इट्ठा-
णिट्ठे गंधे, इट्ठाणिट्ठे रसे, इट्ठाणिट्ठे फासे पडिसवेदेमो ? गोयमा ! अत्ये-
गइयाणं एवं सण्णाइ वा जाव वईइ वा अम्हे णं इट्ठाणिट्ठे सद्दे जाव इट्ठा-
णिट्ठे फासे पडिसवेदेमो, अत्येगइयाणं णो एवं सण्णाइ वा पण्णाइ वा जाव
वईइ वा अम्हे णं इट्ठाणिट्ठे सद्दे जाव इट्ठाणिट्ठे फासे पडिसवेदेमो, पडि-
सवेदेति पुण ते, ते णं भंते ! जीवा कि पाणाइवाए उवक्खाइज्जंति० ?
गोयमा ! अत्येगइया पाणाइवाएवि उवक्खाइज्जंति जाव मिच्छावंसणसल्लेवि
उवक्खाइज्जंति, अत्येगइया णो पाणाइवाए उवक्खाइज्जंति णो मुसाव्राए
उवक्खाइज्जंति जाव णो मिच्छावंसणसल्ले उवक्खाइज्जंति, जेसि पि णं जीवाणं
ते जीवा एवमाहिज्जंति तेसिपि णं जीवाणं अत्येगइयाणं विण्णाए णाणत्ते,
अत्येगइयाणं णो विण्णाए णाणत्ते, उवक्खाओ सव्वओ जाव सव्वट्टसिद्धाओ, ठिई
जह्णणेणं अंतोमुहुत्तं उवकोसेणं तेत्तीसं सागरोवमाइं, छत्समुग्घाया केवलि-
वज्जा, उव्वट्टणा सव्वत्थ गच्छंति जाव सव्वट्टसिद्धं ति, सेसं जहा बेइदियाणं ।
एएसि णं भंते ! बेइदियाणं जाव पंचिदियाणं य कयरे २ जाव विसेसाहिया
या ? गोयमा ! सव्वत्थोवा पंचिदिया, चउरिंदिया विसेसाहिया, तेइदिया
विसेसाहिया, बेइदिया विसेसाहिया । सेवं भंते ! २ सि जाव विहरइ ॥६६१॥

वीसइमं सयं बीओ उट्टेसो

कइविहे णं भंते ! आगासे प० ? गोयमा ! दुविहे आगासे -प०, तं०-
लोयागासे य अलोयागासे य । लोयागासे णं भंते ! कि जीवा जीवदेसा० ?
एवं जहा विइयसए अत्थिउट्टेसे तए चेव इहवि भाणियेत्वं, णवरं अभिलावो
जाव धम्मत्थिकाए णं भंते ! केमहालए .प० ? गोयमा ! लोए लोयमेत्ते

लोयप्पमाणे लोयफुडे लोयं चेव ओगाहिताणं चिट्ठइ, एवं जाव पोग्गलत्थिकाए ।
 अहेलोए णं भंते ! धम्मत्थिकायस्स केवइयं ओगाढे ? गोयमा ! साइरेमं
 अद्धं ओगाढे, एवं एएणं अभिलावेणं जहा बिइयसए जाव ईसिप्पभारा
 णं भंते ! पुढवी लोयागासस्स किं संखेज्जइभागं ओगाढा० पुच्छा, गोयमा !
 णो संखेज्जइभागं ओगाढा, असंखेज्जइभागं ओगाढा, णो संखेज्जे भागे ओगाढा,
 णो असंखेज्जे भागे ओगाढा, णो सब्वलोयं ओगाढा, सेसं तं चेव ॥६६२॥
 धम्मत्थिकायस्स णं भंते ! केवइया अभिवयणा प० ? गोयमा ! अणेगा
 अभिवयणा प०, तंजहा-धम्मैइ वा धम्मत्थिकाएइ वा पाणाइवायवेरमणेइ
 वा मूसावायवेरमणेइ वा एवं जाव परिग्गहवेरमणेइ वा कोह्विवेगेइ वा
 जाव मिच्छादंसणसल्लविवेगेइ वा इरियासमिईइ वा भासासमिईइ वा एसणा-
 समिईइ वा आयाणभंडमत्तणिकखेवणासमिईइ वा उच्चारपासवणखेत्तजल्ल-
 सिघाणपारिट्ठावणियासमिईइ वा मणुगुत्तीइ वा वइगुत्तीइ वा फायगुत्तीइ वा
 जे यावण्णे तहप्पगारा सब्वे ते धम्मत्थिकायस्स अभिवयणा । अहम्मत्थिकायस्स
 णं भंते ! केवइया अभिवयणा प० ? गोयमा ! अणेगा अभिवयणा प०, तं०-
 अधम्मैइ वा अधम्मत्थिकाएइ वा पाणाइवाएइ वा जाव मिच्छादंसणसल्लेइ
 वा इरियासमिईइ वा जाव उच्चारपासवण जाव पारिट्ठावणियासमिईइ वा
 मणअगुत्तीइ वा वइअगुत्तीइ वा कायअगुत्तीइ वा जे यावण्णे तहप्पगारा सब्वे
 ते अहम्मत्थिकायस्स अभिवयणा । आगासत्थिकायस्स णं पुच्छा, गोयमा ! अणेगा
 अभिवयणा प०, तं०-आगासेइ वा आगासत्थिकाएइ वा गगणेइ वा णभेइ वा
 समेइ वा विसमेइ वा खहेइ वा विहेइ वा वीईइ वा चिचरेइ वा अंबरेइ वा
 अंबरसेइ वा छिड्डेइ वा झुसिरेइ वा मग्गेइ वा विमहेइ वा अद्देइ वा वियद्देइ
 वा आधारेइ वा बोमेइ वा भायणेइ वा अंतरिक्खेइ वा सामेइ वा उवासंतरेइ
 वा अगमेइ वा फल्लिहेइ वा अणंतेइ वा जे यावण्णे तहप्पगारा सब्वे ते आगा-
 सत्थिकायस्स अभिवयणा । जीवत्थिकायस्स णं भंते ! केवइया अभिवयणा प० ?
 गोयमा ! अणेगा अभिवयणा प०, तं०-जीवेइ वा जीवत्थिकाएइ वा पाणेइ वा
 भूएइ वा सत्तेइ वा विष्णूइ वा चेयाइ वा जेयाइ वा आयइ वा रंगणेइ वा
 हिंडुएइ वा पोग्गलेइ वा माणवेइ वा कत्ताइ वा विकत्ताइ वा जएइ
 वा जंतूइ वा जोणीइ वा सयंभूइ वा ससरीरीइ वा णायएइ वा अंतरप्पाइ वा

जे यावण्णे तहृप्पगारा सव्वे ते जाव अभिवयणा प० । पोगलत्थिकायस्स णं भंते ! पुच्छा, गोयमा ! अणेगा अभिवयणा प०, तं०—पोगलेइ वा पोगलत्थिकाएइ वा परमाणुपोगलेइ वा दुपएसिएइ वा त्तिपएसिएइ वा जाव असंखेज्जपएसिएइ वा अपंतपएसिएइ वा खंधे जे यावण्णे तहृप्पगारा सव्वे ते पोगलत्थिकायस्स अभिवयणा प० । सेवं भंते ! सेवं भंते ! त्ति ॥ ६६३ ॥

वीसइमं सयं तइओ उट्ठेसो

अह भंते ! पाणाइवाए सुमावाए जाव मिच्छादंसणसत्ते, पाणाइवायवेरमणे जाव मिच्छादंसणसत्तल्लविवेगे, उप्पत्तिया जाव पारिणाभिया, उग्गहे जाव धारणा, उट्ठाणे कम्मे बले वीरिए पुरिसक्कारपरक्कमे, णेरइयत्ते असुरकुमारत्ते जाव वेमाणियत्ते, णाणावरणिज्जे जाव अंतराइए, कण्हलेस्सा जाव सुवकल्लेस्सा, सम्मदिट्ठी ३, चवखुदंसणे ४, आभिणिबोहियणाणे जाव विभंगणाणे, आहारसण्णा ४, ओरात्तियसरीरे ५, मणजोगे ३, सागरोवओगे अणागारोवओगे जे यावण्णे तहृप्पगारा सव्वे ते णणत्थ आयाए परिणमंति ? हुंता गोयमा ! पाणाइवाए जाव सव्वे ते णणत्थ आयाए परिणमंति ॥६६४॥ जीवे णं भंते ! गइमं ववकममाणे कइवण्णं कइगंधं० एवं जहा वारसमसए पंचमुट्ठेसए जाव कम्मओ णं जए णो अकम्मओ विभत्तिभावं परिणमइ । सेवं भंते ! सेवं भंते ! त्ति जाव विहरइ ॥ ६६५ ॥

वीसइमं सयं चउत्थो उट्ठेसो

कइविहे णं भंते ! इंदियउवचए पणत्ते ? गोयमा ! पंचविहे इंदियउवचए प०, तं०—सोइंदियउवचए एवं बिइओ इंदियउट्ठेसओ णिरवसेसो भाणियच्चो जहा पणवण्णए । सेवं भंते ! २ त्ति भयवं गोयमे जाव विहरइ ॥६६६॥

वीसइमं सयं पंचमो उट्ठेसो

परमाणुपोगले णं भंते ! कइवण्णे कइगंधे कइरसे कइफासे पणत्ते ? गोयमा ! एगवण्णे एगगंधे एगरसे दुफासे पणत्ते, तंजहा—जइ एगवण्णे सिय कालए सिय णोलए सिय लोहिए सिय हालिइए सिय मुक्किल्लए, जइ एगगंधे सिय सुभिगंधे सिय दुभिगंधे, जइ एगरसे सिय तित्ते सिय कइए सिय कसाए सिय अबिले सिय महुरे, जइ दुफासे सिय सीए य णिद्धे य १, सिय सीए य

लुक्खे य २, सिय उसिणे य णिद्धे य ३, सिय उसिणे य लुक्खे य ४ ।
 दुप्पएसिए णं भंते ! खंधे कइवण्णे० ? एवं जहा अट्टारसमसए छट्ठहेसए जाव
 सिय चउफासे पणत्ते । जइ एगवण्णे सिय कालए जाव सिय सुक्किल्लए, जइ
 दुवण्णे सिय कालए य णीलए य १, सिय कालए य लोहियए य २, सिय कालए
 य हालिद्दए य ३, सिय कालए य सुक्किल्लए य ४, सिय णीलए य लोहियए
 य ५, सिय णीलए य हालिद्दए य ६, सिय णीलए य सुक्किल्लए य ७, सिय
 लोहियए य हालिद्दए य ८, सिय लोहियए य सुक्किल्लए य ९, सिय हालिद्दए
 य सुक्किल्लए य १०, एवं एए दुयासंजोगे दस भंगा । जइ एगगंधे सिय सुब्भि-
 गंधे सिय दुब्भिगंधे । जइ दुगंधे सुब्भिगंधे य दुब्भिगंधे य, रसेसु जहा वण्णसु,
 जइ दुफासे सिय सीए य णिद्धे य एवं जहेव परमाणुवोगले ४, जइ तिफासे
 सव्वे सीए देसे णिद्धे देसे लुक्खे १, सव्वे उसिणे देसे णिद्धे देसे लुक्खे २, सव्वे
 णिद्धे देसे सीए देसे उसिणे ३, सव्वे लुक्खे देसे सीए देसे उसिणे ४, जइ चउफासे
 देसे सीए देसे उसिणे देसे णिद्धे देसे लुक्खे १, एए णव भंगा फासेसु । तिवएसिए
 णं भंते ! खंधे कइवण्णे० जहा अट्टारसमसए छट्ठहेसे जाव चउफासे प०, जइ
 एगवण्णे सिय कालए जाव सुक्किल्लए ५, जइ दुवण्णे सिय कालए य सिय
 णीलए य १, सिय कालए य णीलगा य २, सिय कालगा य णीलए य ३, सिय
 कालए य लोहियए य १, सिय कालए य लोहियगा य २, सिय कालगा य लोहि-
 यए य ३, एवं हालिद्दएणवि समं भंगा ३, एवं सुक्किल्लएणवि समं ३, सिय
 णीलए य लोहियए य एत्थंपि भंगा ३, एवं हालिद्दएणवि समं भंगा ३, एवं
 सुक्किल्लएणवि समं भंगा ३, सिय लोहियए य हालिद्दए य भंगा ३, एवं
 सुक्किल्लएणवि समं भंगा ३, सिय हालिद्दए य सुक्किल्लए य भंगा ३, एवं सव्वे
 ते दस दुयासंजोगा भंगा तीसं भवति, जइ तिवण्णे सिय कालए य णीलए य
 लोहियए य १, सिय कालए य णीलए य हालिद्दए य २, सिय कालए य णीलए
 य सुक्किल्लए य ३, सिय कालए य लोहियए य हालिद्दए य ४, सिय कालए
 य लोहियए य सुक्किल्लए य ५, सिय कालए य हालिद्दए य सुक्किल्लए
 य ६, सिय णीलए य लोहियए य हालिद्दए य ७, सिय णीलए य लोहियए य
 सुक्किल्लए य ८, सिय णीलए य हालिद्दए य सुक्किल्लए य ९, सिय लोहि-
 यए य हालिद्दए य सुक्किल्लए य १०, एवं एए दस तियासंजोगा । जइ एग-

गंधे सिय मुब्भिगंधे सिय दुब्भिगंधे, जइ दुग्ंधे मुब्भिगंधे य दुब्भिगंधे य भंगा ३ । रसा जहा वण्णा । जइ बुक्कासे सिय सीए य णिद्धे य एवं जहेव दुपएसियस्स तहेव चत्तारि भंगा, जइ तिफासे सव्वे सीए देसे णिद्धे देसे लुक्खे १, सव्वे सीए देसे णिद्धे देसा लुक्खा २, सव्वे सीए देसा णिद्धा देसे लुक्खे ३, सव्वे उसिणे देसे णिद्धे देसे लुक्खे एत्थवि भंगा तिण्णि ६, सव्वे णिद्धे देसे सीए देसे उसिणे भंगा तिण्णि ६, सव्वे लुक्खे देसे सीए देसे उसिणे भंगा तिण्णि एवं १२, जइ चउफासे देसे सीए देसे उसिणे देसे णिद्धे देसे लुक्खे १, देसे सीए देसे उसिणे देसे णिद्धे देसा लुक्खा २, देसे सीए देसे उसिणे देसा णिद्धा देसे लुक्खे ३, देसे सीए देसा उसिणा देसे णिद्धे देसे लुक्खे ४, देसे सीए देसा उसिणा देसे णिद्धे देसा लुक्खा ५, देसे सीए देसा उसिणा देसा णिद्धा देसे लुक्खे ६, देसा सिया देसे उसिणे देसे णिद्धे देसे लुक्खे ७, देसा सीया देसे उसिणे देसे णिद्धे देसा लुक्खा ८, देसा सीया देसे उसिणे देसा णिद्धा देसे लुक्खे ९, एवं एए तियएसिए फासेसु पणवीसं भंगा । चउप्पएसिए णं भन्ते ! खंधे कइवण्णे ० जहा अट्टारसमसए जाव सिय चउफासे पण्णत्ते, जइ एगवण्णे सिय कालए य जाव सुक्किल्लए य ५, जइ दुवण्णे सिय कालए य णीलए य १, सिय कालए य णीलगा य २, सिय कालगा य णीलए य ३, सिय कालगा य णीलगा य ४, सिय कालए य लोहियए य एत्थवि चत्तारि भंगा ४, सिय कालए य हालिदए य ४, सिय कालए य सुक्किल्लए य ४, सिय णीलए य लोहियए य ४, सिय णीलए य हालिदए य ४, सिय णीलए य सुक्किल्लए य ४, सिय लोहियए य हालिदए य ४, सिय लोहियए य सुक्किल्लए य ४, सिय हालिदए य सुक्किल्लए य ४, एवं एए दस दुयासंजोया भंगा पुण चत्तालीसं ४०, जइ तिवण्णे सिय कालए य णीलए य लोहियए य १, सिय कालए य णीलए य लोहियगा य २, सिय कालए य णीलगा य लोहियए य ३, सिय कालगा य णीलए य लोहियए य, एए णं चत्तारि भंगा, एवं कालणीलहालिदएहि भंगा ४, कालणीलसुक्किल्ल ० ४, काललोहियहालिद ० ४, काललोहियसुक्किल्ल ० ४, कालहालिदसुक्किल्ल ० णीललोहियहालिदगाणं भंगा ४, णीललोहियसुक्किल्ल ० ४, णीलहालिदसुक्किल्ल ० ४, लोहियहालिदसुक्किल्लगाणं भंगा ४, एवं एए दसतियासंजोया एक्केक्के संजोए चत्तारि भंगा, सव्वे ते चत्तालीसं भंगा ४० । जइ चउवण्णे

सिय कालए य नीलए य लोहियए य हालिहए य १, सिय कालए य नीलए य लोहियए य सुविकल्लए य २, सिय कालए य नीलए य हालिहए य सुविकल्लए य ३, सिय कालए य लोहियए य हालिहए य सुविकल्लए य ४, सिय नीलए य लोहियए य हालिहए य सुविकल्लए य ५, एवमेए चउवकागसंजोए पंच भंगा, एए सब्बे णउहभंगा, जइ एगगंधे सिय सुब्बिभगंधे सिय दुब्बिभगंधे, जइ दुगंधे सुब्बिभगंधे य दुब्बिभगंधे य । रसा जहा वण्णा । जइ दुफासे जहेव परमाणु-पोगले ४, जइ तिफासे सब्बे सीए देसे णिद्धे देसे लुक्खे १, सब्बे सीए देसे णिद्धे देसा लुक्खा २, सब्बे सीए देसा णिद्धा देसे लुक्खे ३, सब्बे सीए देसा णिद्धा देसा लुक्खा ४, सब्बे उसिणे देसे णिद्धे देसे लुक्खे एवं भंगा ४, सब्बे णिद्धे देसे सीए देसे उसिणे ४, सब्बे लुक्खे देसे सीए देसे उसिणे ४, एए तिफासे सोलस भंगा, जइ चउफासे देसे सीए देसे उसिणे देसे णिद्धे देसे लुक्खे १, देसे सीए देसे उसिणे देसे णिद्धे देसा लुक्खा २, देसे सीए देसे उसिणे देसा णिद्धा देसे लुक्खे ३, देसे सीए देसे उसिणे देसा णिद्धा देसा लुक्खा ४, देसे सीए देसा उसिणा देसे णिद्धे देसे लुक्खे ५, देसे सीए देसा उसिणा देसे णिद्धे देसा लुक्खा ६, देसे सीए देसा उसिणा देसा णिद्धा देसे लुक्खे ७, देसे सीए देसा उसिणा देसा णिद्धा देसा लुक्खा ८, देसा सीया देसे उसिणे देसे णिद्धे देसे लुक्खे ९, एवं एए चउफासे सोलस भंगा भाणियक्खा जाव देसा सीया देसा उसिणा देसा णिद्धा देसा लुक्खा, सब्बे एए फासेसु छत्तीसं भंगा । पंचपरसिए णं भते ! खंधे कइ-वण्णे० जहा अट्टारसमसए जाव सिय चउफासे ५०, जइ एगवण्णे एगवण्णदुवण्णा जहेव चउप्पएसिए, जइ तिक्खे सिय कालए य नीलए य लोहियए य १, सिय कालए य नीलए य लोहियगा य २, सिय कालए य नीलगा य लोहियए य ३, सिय कालए य नीलगा य लोहियगा य ४, सिय कालगा य नीलए य लोहियए य ५, सिय कालगा य नीलए य लोहियगा य ६, सिय कालगा य नीलगा य लोहियए य ७, सिय कालए य नीलए य हालिहए य एत्थवि सत्त भंगा ७, एवं कालग-णीलगसुविकल्लएसु सत्त भंगा ७, कालगलोहियहालिहएसु ७, कालगलोहिय-सुविकल्लेसु ७, कालगहालिहसुविकल्लेसु ७, नीलगलोहियहालिहएसु ७, नीलग-लोहियसुविकल्लेसु सत्त भंगा ७, नीलगहालिहसुविकल्लेसु ७, लोहियहालिह-सुविकल्लेसुवि सत्त भंगा ७, एवमेए तियासंजोएणं सत्तरि भंगा, जइ चउवण्णे

सिय कालए य णीलए य लोहियए य हालिदए य १, सिय कालए य णीलए य लोहियए य हालिदगा य २, सिय कालए य णीलए य लोहियगा य हालिदगे य ३, सिय कालए य णीलगा य लोहियगे य हालिदगे य ४, सिय कालगा य णीलए य लोहियए य हालिदए य ५, एए पंच भंगा, सिय कालए य णीलए य लोहियए य सुक्किल्लए य एत्थवि पंच भंगा, एवं कालगणीलग-हालिदसुक्किल्लएसुवि पंच भंगा, कालगलोहियहालिदसुक्किल्लएसुवि पंच भंगा ५, णीलगलोहियहालिदसुक्किल्लएसुवि पंच भंगा, एवमेए चउवक्कमंजोएणं पणवीसं भंगा, जइ पंचवण्णे कालए य णीलए य लोहियए य हालिदए य सुक्किल्लए य सव्वमेए एवक्कगदुयगतियगचंउक्कपंचगसंजोएणं ईयालं भंगसयं भवइ । गंधा जहा चउप्पएसियस्स । रसा जहा वण्णा । फासा जहा चउप्पएसियस्स । छप्पएसिए णं भंते ! खंधे कइवण्णे० ? एवं जहा पंचपएसिए जाव सिय चउफासे पण्णत्ते, जइ एगवण्णे एगवण्णवुवण्णा जहा पंचपएसियस्स, जइ तिवण्णे सिय कालए य णीलए य लोहियए य एवं जहेव पंचपएसियस्स सत्त भंगा जाव सिय कालगा य णीलगा य लोहियए य ७, सिय कालगा य णीलगा य लोहियगा य ८, एए अट्ठ भंगा, एवमेए बस तियासंजोगा एक्केक्कए संजोगे अट्ठ भंगा, एवं सव्वेवि तियगसंजोगे असोइ भंगा । जइ चउवण्णे सिय कालए य णीलए य लोहियए य हालिदए य १, सिय कालए य णीलए य लोहियए य हालिदगा य २, सिय कालए य णीलए य लोहियगा य हालिदए य ३, सिय कालए य णीलए य लोहियगा य हालिदगा य ४, सिय कालए य णीलगा य लोहियए य हालिदए य ५, सिय कालए य णीलगा य लोहियए य हालिदगा य ६, सिय कालए य णीलगा य लोहियगा य हालिदए य ७, सिय कालगा य णीलए य लोहियए य हालिदए य ८, सिय कालगा य णीलए य लोहियए य हालिदगा य ९, सिय कालगा य णीलए य लोहियगा य हालिदए य १०, सिय कालगा य णीलगा य लोहियए य हालिदए य ११, एए एक्कारस भंगा, एवमेव पंचचउवक्कसंजोगा कायव्वा, एक्केक्कसंजोए एवकारस भंगा, सव्वेते चउवक्कगसंजोएणं पणपणं भंगा । जइ पंचवण्णे सिय कालए य णीलए य लोहियए य हालिदए य सुक्किल्लए य १, सिय कालए य णीलए य लोहियए य हालिदए य सुक्किल्लगा य २, सिय कालए य णीलए य लोहियए य हालिदगा य

सुक्किल्लए य ३, सिय कालए य नीलए य लोहियगा य हालिद्दए य सुक्किल्लए य ४, सिय कालए य नीलगा य लोहियए य हालिद्दए य सुक्किल्लए य ५, सिय कालगा य नीलए य लोहियए य हालिद्दए य सुक्किल्लए य ६, एवं एए छम्भा भाणियब्बा, एवमेए सब्बेवि एक्कमदुयगतियगच्च उवकणपंचगसंजोगेसु छासीयं भंगसयं भवइ । गंधा जहा पंचपएसियस्स । रसा जहा एयस्सेव वण्णा फासा जहा चउप्पएसियस्स । सत्तपएसिए णं भन्ते ! ख्धे कइवण्णे० ? जहा पंचपएसिए जाव सिय चउफासे ५०, जइ एगवण्णे एवं एगवण्णदुवण्णत्तिवण्णा जहा छप्पएसियस्स, जइ चउवण्णे सिय कालए य नीलए य लोहियए य हालिद्दए य १, सिय कालए य नीलए य लोहियए य हालिद्दगा य २, सिय कालए य नीलए य लोहियगा य हालिद्दए य ३, एवमेए चउवकणसंजोगेणं पण्णरस भंगा भाणियब्बा जाव सिय कालगा य नीलगा य लोहियगा य हालिद्दए य १५, एवमेए पंचचउक्कसंजोगा णेयब्बा एक्केवके संजोए पण्णरस भंगा, सब्बमेए पंचसत्तरि भंगा भवंति । जइ पंचवण्णे सिय कालए य नीलए य लोहियए य हालिद्दए य सुक्किल्लए य १, सिय कालए य नीलए य लोहियए य हालिद्दए य सुक्किल्लगा य २, सिय कालए य नीलए य लोहियए य हालिद्दगा य सुक्किल्लए य ३, सिय कालए य नीलए य लोहियए य हालिद्दगा य सुक्किल्लगा य ४, सिय कालए य नीलए य लोहियगा य हालिद्दए य सुक्किल्लए य ५, सिय कालए य नीलए य लोहियगा य हालिद्दए य सुक्किल्लगा य ६, सिय कालए य नीलए य लोहियगा य हालिद्दगा य सुक्किल्लए य ७, सिय कालए य नीलगा य लोहियए य हालिद्दए य सुक्किल्लए य ८, सिय कालए य नीलगा य लोहियए य हालिद्दए य सुक्किल्लगा य ९, सिय कालए य नीलगा य लोहियए य हालिद्दगा य सुक्किल्लए य १०, सिय कालए य नीलगा य लोहियगा य हालिद्दए य सुक्किल्लए य ११, सिय कालगा य नीलए य लोहियए य हालिद्दए य सुक्किल्लए य १२, सिय कालगा य नीलए य लोहियए य हालिद्दए य सुक्किल्लगा य १३, सिय कालगा य नीलए य लोहियए य हालिद्दगा य सुक्किल्लए य १४, सिय कालगा य नीलए य लोहियगा य हालिद्दए य सुक्किल्लए य १५, सिय कालगा य नीलगा य लोहियए य हालिद्दए य सुक्किल्लए य १६, एए सोलस भंगा, एवं सब्बमेए

एककगदुयगतियगचउक्कगपंचगसंजोगेणं दो सोलस भंगसया भवन्ति, गंधा जहा चउप्पएसियस्स, रसा जहा एयस्स चेव वण्णा, फासा जहा चउप्पएसियस्स । अट्टपएसिए णं भन्ते ! खंधे० पुच्छा, गोयमा ! सिय एगवण्णे जहा सत्तपएसियस्स जाव सिय चउफासे प०, जइ एगवण्णे एवं एगवण्णदुवण्णतिवण्णा जहेव सत्तपएसिए, जइ चउवण्णे सिय कालए य णीलए य लोहियए य हालिद्दए य १, सिय कालए य णीलए य लोहियए य हालिद्दगा य २, एवं जहेव सत्तपएसिए जाव सिय कालगा य णीलगा य लोहियगा य हालिद्दगे य १५, सिय कालगा य णीलगा य लोहियगा य हालिद्दगा य १६, एए सोलस भंगा, एवमेए पंच चउक्कसंजोगा, एवमेए असोइ भंगा ८०, जइ पंचवण्णे सिय कालए य णीलए य लोहियए य हालिद्दए य सुक्किल्लए य १, सिय कालए य णीलए य लोहियए य हालिद्दए य सुक्किल्लगा य, एवं एएणं कमेणं भंगा चारेयव्वा जाव सिय कालए य णीलगा य लोहियगा य हालिद्दगा य सुक्किल्लए य १५, एसो पण्णरसमो भंगो, सियकालगा य णीलगे य लोहियए य हालिद्दए य सुक्किल्लए य १६, सिय कालगा य णीलगे य लोहियए य हालिद्दए य सुक्किल्लगा य १७, सिय कालगा य णीलगे य लोहियए य हालिद्दगा य सुक्किल्लए य १८, सिय कालगा य णीलगे य लोहियगे य हालिद्दगा य सुक्किल्लगा य १९, सिय कालगा य णीलगे य लोहियगा य हालिद्दए य सुक्किल्लए य २०, सिय कालगा य णीलगे य लोहियगा य हालिद्दए य सुक्किल्लगा य २१, सिय कालगा य णीलगे य लोहियगा य हालिद्दगा य सुक्किल्लए य २२, सिय कालगा य णीलगा य लोहियए य हालिद्दए य सुक्किल्लए य २३, सिय कालगा य णीलगा य लोहियगे य हालिद्दए य सुक्किल्लगा य २४, सिय कालगा य णीलगा य लोहियगे य हालिद्दगा य सुक्किल्लए य २५, सिय कालगा य णीलगा य लोहियगा य हालिद्दए य सुक्किल्लए य २६, एए पंचसंजोएणं छव्वीसं भंगा भवन्ति, एवामेव सपुव्वावरेणं एककगदुयगतियगचउक्कगपंचगसंजोगेहि दो एककतीसं भंगसया भवन्ति, गंधा जहा सत्तपएसियस्स, रसा जहा एयस्स चेव वण्णा, फासा जहा चउप्पएसियस्स । णवपएसियस्स पुच्छा, गोयमा ! सिय एगवण्णे जहा अट्टपएसिए जाव सिय चउफासे प०, जइ एगवण्णे एगवण्णदुवण्णतिवण्णचउवण्णा जहेव अट्टपएसियस्स, जइ पंचवण्णे सिय कालए य णीलए

य लोहियए य हालिदए य सुक्किल्लए य १, सिय कालए य नीलए य लोहियए
य हालिदए य सुक्किल्लगा य २, एवं परिवाडीए एकतीसं भंगा भाणियव्वा
जाव सिय कालगा य नीलगा य लोहियगा य हालिदगा य सुक्किल्लए य
३१, एए एकतीसं भंगा एवं एककगदुयगतिपगचउक्कगपंचगसंजोएहि दो
छत्तीसा भंगसया भवति, गंधा जहा अट्टपएसियस्स, रसा जहा एयस्स चैव
वण्णा, फासा जहा चउपएसियस्स । दसपएसिए णं भंते ! खंधे० पुच्छा,
गोयमा ! सिय एगवण्णे जहा णवपएसिए जाव सिय चउफासे पण्णत्ते,
जइ एगवण्णे एगवण्णदुवण्णतिवण्णचउवण्णा जहेव णवपएसियस्स, पंच-
वण्णेवि तहेव णवरं वत्तीसइमो भंगो भण्णइ, एवमेए एककगदुयगतिपग-
चउक्कगपंचगसंजोएमु दोष्णि सत्ततीसा भंगसया भवति, गंधा जहा णव-
पएसियस्स, रसा जहा एयस्स चैव वण्णा, फासा जहा चउपएसियस्स ।
जहा दसपएसिओ एवं संखेज्जपएसिओवि, एवं असंखेज्जपएसिओवि, सुहुम-
परिणओवि अणंतपएसिओवि एवं चैव ॥ ६६७ ॥ बायरपरिणए णं भंते !
अणंतपएसिए खंधे कइवण्णे० ? एवं जहा अट्टारसमसए जाव सिय अट्टफासे
ए०, वण्णगंधरसा जहा दसपएसियस्स, जइ चउफासे सव्वे कक्खडे सव्वे गरुए
सव्वे सीए सव्वे णिट्ठे १, सव्वे कक्खडे सव्वे गरुए सव्वे सीए सव्वे लुक्खे २,
सव्वे कक्खडे सव्वे गरुए सव्वे उसिणे सव्वे णिट्ठे ३, सव्वे कक्खडे सव्वे गरुए
सव्वे उसिणे सव्वे लुक्खे ४, सव्वे कक्खडे सव्वे लहुए सव्वे सीए सव्वे णिट्ठे ५,
सव्वे कक्खडे सव्वे लहुए सव्वे सीए सव्वे लुक्खे ६, सव्वे कक्खडे सव्वे लहुए
सव्वे उसिणे सव्वे णिट्ठे ७, सव्वे कक्खडे सव्वे लहुए सव्वे उसिणे सव्वे लुक्खे
८, सव्वे मउए सव्वे गरुए सव्वे सीए सव्वे णिट्ठे ९, सव्वे मउए सव्वे गरुए
सव्वे सीए सव्वे लुक्खे १०, सव्वे मउए सव्वे गरुए सव्वे उसिणे सव्वे णिट्ठे
११, सव्वे मउए सव्वे गरुए सव्वे उसिणे सव्वे लुक्खे १२, सव्वे मउए सव्वे
लहुए सव्वे सीए सव्वे णिट्ठे १३, सव्वे मउए सव्वे लहुए सव्वे सीए सव्वे
लुक्खे १४, सव्वे मउए सव्वे लहुए सव्वे उसिणे सव्वे णिट्ठे १५, सव्वे मउए
सव्वे लहुए सव्वे उसिणे सव्वे लुक्खे १६, एए सोलस भंग्या । जइ पंचफासे
सव्वे कक्खडे सव्वे गरुए सव्वे सीए देसे णिट्ठे देसे लुक्खे १, सव्वे कक्खडे
सव्वे गरुए सव्वे सीए देसे णिट्ठे देसा लुक्खा २, सव्वे कक्खडे सव्वे
गरुए सव्वे सीए देसा णिट्ठा देसे लुक्खे ३, सव्वे कक्खडे सव्वे गरुए सव्वे

सीए देसा णिद्धा देसा लुक्खा ४, सव्वे कक्खडे सव्वे गरुए सव्वे उसिणे देसे णिद्धे देसे लुक्खे ४, सव्वे कक्खडे सव्वे लहुए सव्वे सीए देसे णिद्धे देसे लुक्खे ४, सव्वे कक्खडे सव्वे लहुए सव्वे उसिणे देसे णिद्धे देसे लुक्खे । ४ एवं एए कक्खडेणं सोलस भंगा । सव्वे मउए सव्वे गरुए सव्वे सीए देसे णिद्धे देसे लुक्खे ४, एवं मउएणवि समं सोलस भंगा, एवं बत्तीसं भंगा । सव्वे कक्खडे सव्वे गरुए सव्वे णिद्धे देसे सीए देसे उसिणे ४, सव्वे कक्खडे सव्वे गरुए सव्वे लुक्खे देसे सीए देसे उसिणे ४, एए बत्तीसं भंगा, सव्वे कक्खडे सव्वे सीए सव्वे णिद्धे देसे गरुए देसे लहुए ४, एत्थवि बत्तीसं भंगा, सव्वे गरुए सव्वे सीए सव्वे णिद्धे देसे कक्खडे देसे मउए ४, एत्थवि बत्तीसं भंगा, एवं सव्वेते पंचफासे अट्टावीसं भंगसयं भवइ । जइ छफासे सव्वे कक्खडे सव्वे गरुए देसे सीए देसे उसिणे देसे णिद्धे देसे लुक्खे १, सव्वे कक्खडे सव्वे गरुए देसे सीए देसे उसिणे देसे णिद्धे देसा लुक्खा २, एवं जाव सव्वे कक्खडे सव्वे गरुए देसा सीया देसा उसिणा देसा णिद्धा देसा लुक्खा १६, एए सोलस भंगा । सव्वे कक्खडे सव्वे लहुए देसे सीए देसे उसिणे देसे णिद्धे देसे लुक्खे एत्थवि सोलस भंगा, सव्वे मउए सव्वे गरुए, देसे सीए देसे उसिणे देसे णिद्धे देसे लुक्खे एत्थवि सोलस भंगा, सव्वे मउए सव्वे लहुए देसे सीए देसे उसिणे देसे णिद्धे देसे लुक्खे एत्थवि सोलस भंगा, एए चउसट्ठिं भंगा, सव्वे कक्खडे सव्वे सीए देसे गरुए देसे लहुए देसे णिद्धे देसे लुक्खे एवं जाव सव्वे मउए सव्वे उसिणे देसा गरुया देसा लहुया देसा णिद्धा देसा लुक्खा एत्थवि चउसट्ठिं भंगा, सव्वे कक्खडे सव्वे णिद्धे देसे गरुए देसे लहुए देसे सीए देसे उसिणे जाव सव्वे मउए सव्वे लुक्खे देसा गरुया देसा लहुया देसा सीया देसा उसिणा १६, एए चउसट्ठिं भंगा, सव्वे गरुए सव्वे सीए देसे कक्खडे देसे मउए देसे णिद्धे देसे लुक्खे एवं जाव सव्वे लहुए सव्वे उसिणे देसा कक्खडा देसा णिद्धा देसा मउया देसा लुक्खा, एए चउसट्ठिं भंगा, सव्वे गरुए सव्वे णिद्धे देसे कक्खडे देसे मउए देसे सीए देसे उसिणे जाव सव्वे लहुए सव्वे लुक्खे देसा कक्खडा देसा मउया देसा सीया देसा उसिणा, एए चउसट्ठिं भंगा, सव्वे सीए सव्वे णिद्धे देसे कक्खडे देसे मउए देसे गरुए देसे लहुए जाव सव्वे उसिणे सव्वे लुक्खे देसा कक्खडा देसा मउया देसा गरुया देसा लहुया, एवमेए चउसट्ठिं भंगा, सव्वे ते छफासे

तिणिचउंरासीया भंगसया भवन्ति ३८४ । जइ सत्तफासे सव्वे कक्खडे देसे गरुए देसे लहुए देसे सीए देसे उसिणे देसे णिद्धे देसे लुक्खे १, सव्वे कक्खडे देसे गरुए देसे लहुए देसे सीए देसे उसिणे देसा णिद्धा देसा लुक्खा ४, सव्वे कक्खडे देसे गरुए देसे लहुए देसे सीए देसा उसिणा देसे णिद्धे देसे लुक्खे ४, सव्वे कक्खडे देसे गरुए देसे लहुए देसा सीया देसे उसिणे देसे णिद्धे देसे लुक्खे ४, सव्वे कक्खडे देसे गरुए देसे लहुए देसा सीया देसा उसिणा देसे णिद्धे देसे लुक्खे, सव्वेते सोलस भंगा भाणियव्वा, सव्वे कक्खडे देसे गरुए देसा लहुया देसे सीए देसे उसिणे देसे णिद्धे देसे लुक्खे, एवं गरुएणं एणत्तेणं लहुएणं पुहुत्तेणं एएवि सोलस भंगा, सव्वे कक्खडे देसा गरुया देसे लहुए देसे सीए देसे उसिणे देसे णिद्धे देसे लुक्खे एएवि सोलस भंगा भाणियव्वा, सव्वे कक्खडे देसा गरुया देसा लहुया देसे सीए देसे उसिणे देसे णिद्धे देसे लुक्खे एएवि सोलस भंगा भाणियव्वा, एवमेए चउसट्ठिं भंगा कक्खडेणं समं, सव्वे मउए देसे गरुए देसे लहुए देसे सीए देसे उसिणे देसे णिद्धे देसे लुक्खे । एवं मउएणवि समं चउसट्ठिं भंगा भाणियव्वा, सव्वे गरुए देसे कक्खडे देसे मउए देसे सीए देसे उसिणे देसे णिद्धे देसे लुक्खे एवं गरुएणवि समं चउसट्ठिं भंगा कायव्वा, सव्वे लहुए देसे कक्खडे देसे मउए देसे सीए देसे उसिणे देसे णिद्धे देसे लुक्खे एवं लहुएणवि समं चउसट्ठिं भंगा कायव्वा, सव्वे सीए देसे कक्खडे देसे मउए देसे गरुए देसे लहुए देसे णिद्धे देसे लुक्खे एवं सीएणवि समं चउसट्ठिं भंगा कायव्वा, सव्वे उसिणे देसे कक्खडे मउए देसे गरुए देसे लहुए देसे णिद्धे देसे लुक्खे एवं उसिणेणवि समं चउसट्ठिं भंगा कायव्वा, सव्वे णिद्धे देसे कक्खडे देसे मउए देसे गरुए देसे लहुए देसे सीए देसे उसिणे एवं णिद्धेणवि समं चउसट्ठिं भंगा कायव्वा, सव्वे लुक्खे देसे कक्खडे देसे मउए देसे गरुए देसे लहुए देसे सीए देसे उसिणे एवं लुक्खेणवि समं चउसट्ठिं भंगा कायव्वा जाव सव्वे लुक्खे देसा कक्खडा देसा मउया देसा गरुया देसा लहुया देसा सीया देसा उसिणा, एवं सत्तफासे पंचबारसुत्तरा भंगसया भवन्ति । जइ अट्टफासे देसे कक्खडे देसे मउए देसे गरुए देसे लहुए देसे सीए देसे उसिणे देसे णिद्धे देसे लुक्खे ४, देसे कक्खडे देसे मउए देसे गरुए देसे लहुए देसे सीए देसा उसिणा देसे णिद्धे देसे लुक्खे ४, देसे कक्खडे देसे मउए देसे गरुए देसे लहुए देसे लहुए

देसा सीया देसे उसिणे देसे णिद्धे देसे लुक्खे ४, देसे कक्खडे देसे मउए देसे गरुए देसे लहुए बेसा सीया देसा उसिणा देसे णिद्धे देसे लुक्खे ४, एए चत्तारि चउक्का सोलस भंगा, देसे कक्खडे देसे मउए देसे गरुए देसा लहुया देसे सीए देसे उसिणे देसे णिद्धे देसे लुक्खे, एवं एए गरुएणं एगत्तएणं लहुएणं पुहत्तएणं सोलस भंगा कायव्वा, देसे कक्खडे देसे मउए देसा गरुया देसे लहुए देसे सीए देसे उसिणे देसे णिद्धे देसे लुक्खे एएवि सोलस भंगा कायव्वा, देसे कक्खडे देसे मउए देसा गरुया देसा लहुया देसे सीए देसे उसिणे देसे णिद्धे देसे लुक्खे एएवि सोलस भंगा कायव्वा, सव्वेऽवि ते चउसट्ठि भंगा कक्खडमउएहि एगत्त-एहि, ताहे कक्खडेणं एगत्तएणं मउएणं पुहत्तेणं एए चउसट्ठि भंगा कायव्वा ताहे कक्खडेणं पुहत्तएणं मउएणं एगत्तएणं चउसट्ठि भंगा कायव्वा, ताहे एएहि चेव दोहिवि पुहुत्तोहि चउसट्ठि भंगा कायव्वा जाव, देसा कक्खडा देसा मउया देसा गरुया देसा लहुया देसा सीया देसा उसिणा देसा णिद्धा देसा लुक्खा एसो अपच्छिमो भंगो, सव्वेते अट्टफासे दो छप्पणा भंगसया भवन्ति । एवं एए बायरपरिणए अणंतपरिणए खंधे सव्वेसु संजोएसु बारस छण्णउया भंगसया भवन्ति ॥ ६६८ ॥ कइविहे णं भंते ! परमाणू प० ? गोयमा ! चउद्विहे परमाणू प०, तं०—दव्वपरमाणू, खेत्तपरमाणू, कालपरमाणू, भावपरमाणू । दव्वपरमाणू णं भंते ! कइविहे प० ? गोयमा ! चउद्विहे प०, तं०—अच्छेज्जे अभेज्जे, अडज्जे, अगेज्जे । खेत्तपरमाणू णं भंते ! कइविहे प० ? गोयमा ! चउद्विहे प०, तं०—अणद्धे, अमज्जे, अपएसे, अविभाइसे । कालपरमाणू पुच्छा, गोयमा ! चउद्विहे प०, तं०—अवण्णे, अगधे, अरसे, अफासे । भावपरमाणू णं भंते ! कइविहे प० ? गोयमा ! चउद्विहे प०, तं०—वण्णमंते, गंधमंते, रस-मंते, फासमंते । सेवं भंते ! सेवं भंते ! त्ति जाव विहरइ ॥ ६६९ ॥

वीसइमं सयं छट्ठो उट्ठेसो

पुढविककाइए णं भंते ! इमीसे रयणप्पमाए य सवकरप्पमाए य पुढवीए अंतरा समोहए समोहणित्ता जे भविए सोहम्मे कप्पे पुढविकाइयत्ताए उववज्जित्तए से णं भंते ! कि पुंवि उववज्जित्ता पच्छा आहारेज्जा पुंवि आहारित्ता पच्छा उववज्जेज्जा ? गोयमा ! पुंवि वा उववज्जित्ता० एवं जहा सत्तरसमसए छट्ठुट्ठेसे जाव से तेणट्ठेणं गोयमा ! एवं वुच्चइ—पुंवि वा जाव उववज्जेज्जा

नवरं तेहि संपाउणेज्जा इमेहि आहारो मण्णइ सेसं तं चेव । पुढविकाइए णं भंते ! इमीसे रयणप्पभाए सक्करप्पभाए य पुढवीए अंतरा समोहए समोहणित्ता जे भविए ईसाणे कप्पे पुढविकाइयत्ताए उववज्जित्तए एवं चेव, एवं जाव ईसिप्पभाराए उववाएयव्वो । पुढविकाइए णं भंते ! सक्करप्पभाए पुढवीए बालुयप्पभाए पुढवीए अंतरा समोहए २ ता जे भविए सोहम्मे जाव ईसिप्पभाराए, एवं एएणं कमेणं जाव तमाए अहेसत्तमाए य पुढवीए अंतरा समोहए समाणे जे भविए सोहम्मे कप्पे जाव ईसिप्पभाराए उववाएयव्वो । पुढविकाइए णं भंते ! सोहम्मीसाणाणं सणंकुमारमाहिदाणं य कप्पाणं अंतरा समोहए २ ता जे भविए इमीसे रयणप्पभाए पुढवीए पुढविकाइयत्ताए उववज्जित्तए से णं भंते ! किं पुढ्वि उववज्जित्ता पच्छा आहारेज्जा सेसं तं चेव जाव से तेणट्ठेणं जाव णिक्खेवओ । पुढविकाइए णं भंते ! सोहम्मीसाणाणं सणंकुमारमाहिदाणं य कप्पाणं अंतरा समोहए २ ता जे भविए सक्करप्पभाए पुढवीए पुढविकाइयत्ताए उववज्जित्तए एवं चेव, एवं जाव अहेसत्तमाए उववाएयव्वो, एवं सणंकुमारमाहिदाणं बंभलोगस्स य कप्पस्स अंतरा समोहए समोहणित्ता पुणरवि जाव अहेसत्तमाए उववाएयव्वो, एवं बंभलोगस्स लंतगस्स य कप्पस्स अंतरा समोहए पुणरवि जाव अहेसत्तमाए, एवं लंतगस्स महासुक्कस्स कप्पस्स य अंतरा समोहए पुणरवि जाव अहेसत्तमाए, एवं महासुक्कस्स सहस्सारस्स य कप्पस्स अंतरा पुणरवि जाव अहेसत्तमाए, एवं सहस्सारस्स आणयपाणयकप्पाणं अंतरा पुणरवि जाव अहेसत्तमाए, एवं आणयपाणयाणं आरणअच्चयाणं य कप्पाणं अंतरा पुणरवि जाव अहेसत्तमाए, एवं आरणअच्चयाणं गेवेज्जविमाणाणं य अंतरा पुणरवि जाव अहेसत्तमाए, एवं गेवेज्जविमाणाणं अणुत्तरविमाणाणं य अंतरा पुणरवि जाव अहेसत्तमाए, एवं अणुत्तरविमाणाणं ईसिप्पभाराए य पुणरवि जाव अहेसत्तमाए उववाएयव्वो ॥ ६७० ॥ आउक्काइए णं भंते ! इमीसे रयणप्पभाए सक्करप्पभाए य पुढवीए अंतरा समोहए समोहणित्ता जे भविए सोहम्मे कप्पे आउक्काइयत्ताए उववज्जित्तए सेसं जहा पुढविकाइयस्स जाव से तेणट्ठेणं, एवं पढमदोच्चाणं अंतरा समोहए जाव ईसिप्पभाराए उववाएयव्वो, एवं एएणं कमेणं जाव तमाए अहेसत्तमाए य पुढवीए अंतरा समोहए २ ता जाव ईसिप्पभाराए उववाएयव्वो

आउक्काइयत्ताए, आउयाए णं भंते ! सोहम्मोसाणाणं सणकुमारमाहिदाण य कप्पाणं अंतरा समोहए समोहणित्ता जे भविए इमीसे रयणप्पभाए पुढवीए घणोदहि(२)—वलएसु आउक्काइयत्ताए उववज्जित्तए सेसं तं चेव एवं एएहि चेव अंतरा समोहओ जाव अहेसत्तमाए पुढवीए घणोदहिवलएसु आउक्काइ- यत्ताए उववाएयव्वो, एवं जाव अणुत्तरविमाणाणं ईसिप्पडभाराए य पुढवीए अंतरा समोहए जाव अहेसत्तमाए घणोदहिवलएसु उववाएयव्वो ॥ ६७१ ॥ वाउक्काइए णं भंते ! इमीसे रयणप्पभाए पुढवीए सक्करप्पभाए पुढवीए अंतरा समोहए समोहणित्ता जे भविए सोहम्मो कप्पे वाउक्काइयत्ताए उववज्जित्तए एवं जहा सत्तरसमसए वाउक्काइयउद्देसए तहा इहवि, णवरं अंतरेसु समोहणा णेयव्वा सेसं तं चेव जाव अणुत्तरविमाणाणं ईसिप्पडभाराए य पुढवीए अंतरा समोहए समोहणित्ता जे भविए घणवायतणुवाए घणवायतणुवायवलएसु वाउ- क्काइयत्ताए उववज्जित्तए, सेसं तं चेव जाव से तेणट्ठेणं जाव उववज्जेज्जा । सेवं भंते ! सेवं भंते ! त्ति ॥ ६७२ ॥

वीसइमं सयं सत्तमो उद्देसो

कइविहे णं भंते ! बंधे प० ? गोयमा ! तिविहे बंधे प०, तं०—जीवप्प- ओगबंधे, अणंतरबंधे, परंपरबंधे । णेरइयाणं भंते ! कइविहे बंधे प० ? एवं चेव, एवं जाव वेमाणियाणं । णाणावरणिज्जस्स णं भंते ! कम्मस्स कइविहे बंधे प० ? गोयमा ! तिविहे बंधे प०, तं०—जीवप्पओगबंधे, अणतरबंधे, परंपरबंधे । णेरइयाणं भंते ! णाणावरणिज्जस्स कम्मस्स कइविहे बंधे प० ? एवं चेव, एवं जाव वेमाणियाणं, एवं जाव अंतराइयस्स । णाणावरणिज्जो- दयस्स णं भंते ! कम्मस्स कइविहे बंधे प० ? गोयमा ! तिविहे बंधे प० एवं चेव, एवं णेरइयाणवि एवं जाव वेमाणियाणं एवं जाव अंतराइयउदयस्स । इत्थीवेयस्स णं भंते ! कइविहे बंधे प० ? गोयमा ! तिविहे बंधे प० एवं चेव । असुरकुमाराणं भंते ! इत्थीवेयस्स कइविहे बंधे प० ? गोयमा ! तिविहे बंधे प० एवं चेव, एवं जाव वेमाणियाणं, णवरं जस्स इत्थिवेओ अत्थि, एवं पुरिसवेयस्सवि, एवं णपुंसगवेयस्सवि जाव वेमाणियाणं, णवरं जस्स जो अत्थि वेओ । दंसणमोहणिज्जस्स णं भंते ! कम्मस्स कइविहे बंधे प० ? एवं चेव णिरंतरं जाव वेमाणियाणं, एवं चरित्तमोहणिज्जस्सवि जाव वेमाणियाणं, एवं

एएणं कमेणं ओरालियसरीरस्स जाव कम्मगसरीरस्स, आहारसण्णाए जाव परिग्गहसण्णाए, कण्हलेस्साए जाव सुक्कलेस्साए, सम्मदिट्ठीए मिच्छादिट्ठीए सम्मामिच्छादिट्ठीए, आभिणिबोहियणाणस्स जाव केवलणाणस्स, मइअण्णाणस्स सुयअण्णाणस्स विभंगणाणस्स, एवं आभिणिबोहियणाणविसयस्स णं भंते ! कइविहे बंधे प० जाव केवलणाणविसयस्स मइअण्णाणविसयस्स सुयअण्णाणविसयस्स विभंगणाणविसयस्स एएसिं सव्वेसिं पयाणं तिबिहे बंधे प०, सव्वेवेते चउव्वीसं दंडगा भाणियव्वा, णवरं जाणियव्वं जस्स जइ अत्थि जाव वेमाणियाणं भंते ! विभंगणाणविसयस्स कइविहे बंधे प० ? गोयमा ! तिबिहे बंधे प०, तं०—जीवप्पओगबंधे, अणंतरबधे, परंपरबधे । सेवं भंते ! सेवं भंते ! त्ति जाव विहरइ ॥ ६७३ ॥

वीसइमं सयं अट्टमो उट्ठेसो

कइ णं भंते ! कम्ममूमीओ प० ? गोयमा ! पण्णरस कम्ममूमीओ प०, तं०—पंच भरहाइं, पंच एरवयाइं, पंच महाविदेहाइं । कइ णं भंते ! अकम्ममूमीओ प० ? गोयमा ! तीसं अकम्ममूमीओ प०, तं०—पंच हेमवयाइं, पंच हेरण्वयाइं, पंच हरिवासाइं, पंच रम्मगवासाइं, पंच देवकुराइं, पंच उत्तरकुराइं । एयासु णं भंते ! तीसासु अकम्ममूमीसु अत्थि उस्सप्पिणीइ वा ओसप्पिणीइ वा ? णो इणट्ठे समट्ठे । एएसु णं भंते ! पंचसु भरहेसु पंचसु एरवएसु अत्थि उस्सप्पिणीइ वा ओसप्पिणीइ वा ? हंता अत्थि, एएसु णं पंचसु महाविदेहेसु०, णेवत्थि उस्सप्पिणी णेवत्थि ओसप्पिणी अवट्ठिए णं तत्थ काले प० समणाउसो ! ॥ ६७४ ॥ एएसु णं भंते ! पंचसु महाविदेहेसु अरिहंता भगवंतो पंचमहव्वइयं सपडिक्कमणं धम्मं पण्णवयंति ? णो इणट्ठे समट्ठे, एएसु णं पंचसु भरहेसु पंचसु एरवएसु पुरिमपच्छिमगा दुवे अरिहंता भगवंतो पंचमहव्वइयं पंचाणुव्वइयं सपडिक्कमणं धम्मं पण्णवयंति, अवसेसा णं अरिहंता भगवंतो चाउज्जामं धम्मं पण्णवयंति, एएसु णं पंचसु महाविदेहेसु अरिहंता भगवंतो चाउज्जामं धम्मं पण्णवयंति । जंबुद्दीवे णं भंते ! दीवे भारहे वासे इमीसे ओसप्पिणीए कइ तित्थगरा प० ? गोयमा ! चउव्वीसं तित्थगरा पण्णत्ता, तं०—उसभअजियसंभवअभिणंदणसुमइसुप्यभसुपासससिपुप्फदंतसीयलसेज्जंसवासुपुज्जचिमलअणंतधम्मसंतिकुंथुअरमल्लिमणिमुक्खयणमिणेमिपासवद्ध-

माणा २४ ॥ ६७५ ॥ एएसि णं भंते ! चउवीसाए तित्थगराणं कइ जिणंतरा प० ? गोयमा ! तेवीसं जिणंतरा प० । एएसि णं भंते ! तेवीसाए जिणंतरेसु कस्स कांहि कालियमुयस्स वोच्छेदे प० ? गोयमा ! एएसु णं तेवीसाए जिणंतरेसु पुरिमपच्छिमएसु अट्टसु २ जिणंतरेसु एत्थ णं कालियमुयस्स अबोच्छेदे प०, मज्झिमएसु सत्तसु जिणंतरेसु एत्थ णं कालियमुयस्स वोच्छेदे प०, सवत्थवि णं वोच्छिण्णे दिट्ठिवाए ॥ ६७६ ॥ जंबुद्वीवे णं भंते ! दीवे भारहे वासे इमीसे ओसप्पिणीए देवाणुप्पियाणं केवइयं कालं पुव्वगए अणुसज्जिस्सइ ? गोयमा ! जंबुद्वीवे णं दीवे भारहे वासे इमीसे ओसप्पिणीए ममं एगं वाससहस्सं पुव्वगए अणुसज्जिस्सइ । जंहा णं भंते ! जंबुद्वीवे दीवे भारहे वासे इमीसे ओसप्पिणीए देवाणुप्पियाणं एगं वाससहस्सं पुव्वगए अणुसज्जिस्सइ तथा णं भंते ! जंबुद्वीवे दीवे भारहे वासे इमीसे ओसप्पिणीए अवसेसाणं तित्थगराणं केवइयं कालं पुव्वगए अणुसज्जित्था ? गोयमा ! अत्थेगइयाणं संखेज्जं कालं अत्थेगइयाणं असंखेज्जं कालं ॥ ६७७ ॥ जंबुद्वीवे णं भंते ! दीवे भारहे वासे इमीसे ओसप्पिणीए देवाणुप्पियाणं केवइयं कालं तित्थे अणुसज्जिस्सइ ? गोयमा ! जंबुद्वीवे दीवे भारहे वासे इमीसे ओसप्पिणीए ममं एगवीसं वाससहस्साइ तित्थे अणुसज्जिस्सइ ॥ ६७८ ॥ जहा णं भंते ! जंबुद्वीवे दीवे भारहे वासे इमीसे ओसप्पिणीए देवाणुप्पियाणं एकवीसं वाससहस्साइ तित्थे अणुसज्जिस्सइ तथा णं भंते ! जंबुद्वीवे दीवे भारहे वासे आगमेस्साणं चरिमत्तित्थगरस्स केवइयं कालं तित्थे अणुसज्जिस्सइ ? गोयमा ! जावइए णं उसभस्स अरहओ कोसलियस्स जिणपरियाए एवइयाइं संखेज्जाइं आगमेस्साणं चरिमत्तित्थगरस्स तित्थे अणुसज्जिस्सइ ॥ ६७९ ॥ तित्थं भंते ! तित्थं तित्थगरे तित्थं ? गोयमा ! अरहा ताव णियमं तित्थगरे, तित्थं पुण चाउवण्णाइण्णे समणसंघे, तं—समणा समणीओ सावया सावियाओ ॥ ६८० ॥ पवयणं भंते ! पवयणं पावयणी पवयणं ? गोयमा ! अरहा ताव णियमं पावयणी, पवयणं पुण दुवालसंगे गणियिडगे, तं—आयारो जाव दिट्ठीवाओ । जे इमे भंते ! उग्गा भोगा राइण्णा इक्खागा णाया कोरवा एए णं अस्सि धम्मो ओगाहंति अस्सि० २ ता अट्ठविहं कम्मरथमलं पवाहंति पवाहित्ता तओ पच्छा सिज्जंति जाव अंतं करंति ? हंता गोयमा ! जे इमे उग्गा भोगा तं सेव जाव अंतं

करेंति, अश्वेगइया अण्णयरेसु देवलोएसु देवत्ताए उववत्तारो भवन्ति । कइविहा
णं भंते ! देवलोया प० ? गोयमा ! चउव्विहा देवलोया प०, तं०—भवणवासी,
वाणमंतरा, जोइसिया, वेमाणिया । सेवं भंते ! २ त्ति ॥ ६८१ ॥

वीसइमं सयं णवमो उद्देशो

कइविहा णं भंते ! चारणा प० ? गोयमा ! दुविहा चारणा पण्णत्ता,
तंजहा—विज्जाचारणा य जंघाचारणा य । से केणट्ठेणं भंते ! एवं वुच्चइ—
विज्जाचारणा-विज्जाचारणा ? गोयमा ! तस्स णं छट्ठंछट्ठेणं अणिक्खत्तेणं
तवोकम्भेणं विज्जाए उत्तरगुणलंद्धिं लममाणस्स विज्जाचारणलद्धी णामं लद्धी
समुप्पज्जइ, से तेणट्ठेणं जाव विज्जाचारणा २ । विज्जाचारणस्स णं भंते !
कहं सीहा गईं कहं सीहे गइविसए पण्णत्ते ? गोयमा ! अयणं जंबूदीवे दीवे
जाव किच्चिविसेसाहिए परिक्खेयेणं देवे णं महिद्धिए जाव महेसक्खे जाव इणा-
मेवत्तिकट्टं केवलकपं जंबूदीवं दीवं तिहं अच्छराणिवाएहिं तिक्खुत्तो अणु-
परियट्ठित्ताणं हव्वमागच्छेज्जा, विज्जाचारणस्स णं गोयमा ! तहा सीहा गईं
तहा सीहे गइविसए पण्णत्ते । विज्जाचारणस्स णं भंते ! तिरियं केवइए गइ-
विसए पण्णत्ते ? गोयमा ! से णं इओ एगेणं उप्पाएणं माणुसुत्तरे पढवए
समोसरणं करेइ करेत्ता चेइयाइं वंदइ २ त्ता बिइएणं उप्पाएणं गंदीसरवरे
दीवे समोसरणं करेइ करेत्ता त्तिहं चेइयाइं वंदइ २ त्ता तओ पडिणियत्तइ २
त्ता इहमागच्छइ २ त्ता इह चेइयाइं वंदइ, विज्जाचारणस्स णं गोयमा !
तिरियं एवइए गइविसए पण्णत्ते । विज्जाचारणस्स णं भंते ! उड्ढं केवइए
गइविसए पण्णत्ते ? गोयमा ! से णं इओ एगेणं उप्पाएणं णंडगबणे समोसरणं
करेइ करेत्ता त्तिहं चेइयाइं वंदइ २ त्ता बिइएणं उप्पाएणं णंडगबणे समोसरणं
करेइ करेत्ता त्तिहं चेइयाइं वंदइ २ त्ता तओ पडिणियत्तइ २ त्ता इहमाग-
च्छइ, २ त्ता इह चेइयाइं वंदइ, विज्जाचारणस्स णं गोयमा ! उड्ढं एवइए
गइविसए पण्णत्ते, से णं तस्स ठाणस्स अणालोइयपडिक्कंते कालं करेइ णत्थि
तस्स आराहणा, से णं तस्स ठाणस्स आलोइयपडिक्कंते कालं करेइ अत्थि
तस्स आराहणा ॥ ६८२ ॥ से केणट्ठेणं भंते ! एवं वुच्चइ—जंघाचारणा २ ?
गोयमा ! तस्स णं अट्टमंअट्टमेणं अणिक्खत्तेणं तवोकम्भेणं अप्पाणं भावेमाण-

स्स जंघाचारणलट्ठी णांमं लट्ठी समुप्पज्जइ, से तेणट्ठेणं जाव जंघाचारणा २ ।
जंघाचारणस्स णं भंते ! क्हं सीहा गई क्हं सीहे गइविसए पण्णत्ते ? गोयमा !
अयण्णं जंबुद्दीवे दीवे एवं जहेव विज्जाचारणस्स णवरं तिसत्तखुत्तो अणुपरिय-
ट्टित्ताणं हव्वमागच्छेज्जा, जंघाचारणस्स णं गोयमा ! तहा सीहा गई तहा सीहे
गइविसए पण्णत्ते, सेसं तं चेव । जंघाचारणस्स णं भंते ! तिरियं केवइए गइ-
विसए पण्णत्ते ? गोयमा ! से णं इओ एगेणं उप्पाएणं रयगवरे दीवे समोसरणं
करेइ करेत्ता तहिं चेइयाइं वंदइ २ त्ता तओ पडिणियत्तमाणे बिइएणं उप्पा-
एणं णंदीसरवरदीवे समोसरणं करेइ करेत्ता तहिं चेइयाइं वंदइ २ त्ता इह-
मागच्छइ २ त्ता इह चेइयाइं वंदइ, जंघाचारणस्स णं गोयमा ! तिरियं एवइए
गइविसए पण्णत्ते । जंघाचारणस्स णं भंते ! उइहं केवइए गइविसए पण्णत्ते ?
गोयमा ! से णं इओ एगेणं उप्पाएणं पंडगवणे समोसरणं करेइ करेत्ता तहिं
चेइयाइं वंदइ २ त्ता तओ पडिणियत्तमाणे बिइएणं उप्पाएणं णंदणवणे समो-
सरणं करेइ २ त्ता तहिं चेइयाइं वंदइ २ त्ता इहमागच्छइ २ त्ता इह चेइयाइं
वंदइ, जंघाचारणस्स णं गोयमा ! उइहं एवइए गइविसए पण्णत्ते, से णं तस्स
ठाणस्स अणालोइयपडिक्कंते कालं करेइ णत्थि तस्स आराहणा, से णं तस्स
ठाणस्स आलोइयपडिक्कंते कालं करेइ अत्थि तस्स आराहणा । सेवं भंते !
सेवं भंते ! ति जाव विहरइ ॥ ६८३ ॥

वीसइमं सयं दसमो उट्ठेसो

जीवा णं भंते ! किं सोवक्कमाउया णिरुवक्कमाउया ? गोयमा ! जीवा
सोवक्कमाउयावि णिरुवक्कमाउयावि । णेरइयाणं पुच्छा, गोयमा ! णेरइया
णो सोवक्कमाउया णिरुवक्कमाउया, एवं जाव थणियकुमारा, पुडविककाइया
जहा जीवा, एवं जाव मणुस्सा, वाणमंतरजोइसियवेमाणिया जहा णेरइया
॥ ६८४ ॥ णेरइया णं भंते ! किं आओवक्कमेणं उववज्जंति, परोवक्कमेणं
उववज्जंति, णिरुवक्कमेणं उववज्जंति ? गोयमा ! आओवक्कमेणवि उव-
वज्जंति, परोवक्कमेणवि उववज्जंति, णिरुवक्कमेणवि उववज्जंति, एवं जाव
वेमाणियाणं । णेरइया णं भंते ! किं आओवक्कमेणं उव्वट्ठंति, परोवक्कमेणं
उव्वट्ठंति, णिरुवक्कमेणं उव्वट्ठंति ? गोयमा ! णो आओवक्कमेणं उव्वट्ठंति,
णो परोवक्कमेणं उव्वट्ठंति, णिरुवक्कमेणं उव्वट्ठंति, एवं जाव थणियकुमारा,

पुढविकाइया जाव मणुस्सा तिसु उव्वट्टति, सेसा जहा णेरइया णवरं जोइसिय-
वेमाणिया चयति । णेरइया णं भंते ! किं आइड्डीए उव्वज्जंति परिड्डीए
उव्वज्जंति ? गोयमा ! आइड्डीए उव्वज्जंति णो परिड्डीए उव्वज्जंति, एवं
जाव वेमाणिया णं । णेरइया णं भंते ! किं आइड्डीए उव्वट्टति परिड्डीए
उव्वट्टति ? गोयमा ! आइड्डीए उव्वट्टति णो परिड्डीए उव्वट्टति, एवं जाव
वेमाणिया, णवरं जोइसियवेमाणिया चयतीइ अभिलावो । णेरइया णं भंते !
किं आयकम्मणा उव्वज्जंति परकम्मणा उव्वज्जंति ? गोयमा ! आयकम्मणा
उव्वज्जंति णो परकम्मणा उव्वज्जंति, एवं जाव वेमाणिया, एवं उव्वट्टणादंड-
ओवि । णेरइया णं भंते ! किं आयप्पओगेणं उव्वज्जंति परप्पओगेणं उव-
वज्जंति ? गोयमा ! आयप्पओगेणं उव्वज्जंति णो परप्पओगेणं उव्वज्जंति,
एवं जाव वेमाणिया, एवं उव्वट्टणादंडओवि ॥ ६८५ ॥ णेरइया णं भंते ! किं
कइसंचिया अकइसंचिया अवत्तव्वगसंचिया ? गोयमा ! णेरइया कइसंचियावि
अकइसंचियावि अवत्तव्वगसंचिय वि । से केणट्ठेणं जाव अवत्तव्वगसंचियावि ?
गोयमा ! जे णं णेरइयां संखेज्जएणं पवेसणएणं पविसंति ते णं णेरइया कइ-
संचिया, जे णं णेरइया असंखेज्जएणं पवेसणएणं पविसंति ते णं णेरइया अकइ-
संचिया, जे णं णेरइया एकएणं पवेसणएणं पविसंति ते णं णेरइया अवत्तव्वग-
संचिया, से तेणट्ठेणं गोयमा ! जाव अवत्तव्वगसंचियावि, एवं जाव थणिय-
कुमारा । पुढविकाइयाणं पुच्छा, गोयमा ! पुढविकाइया णो कइसंचिया अकइ-
संचिया णो अवत्तव्वगसंचिया । से केणट्ठेणं भंते ! एवं वुच्चइ जाव णो
अवत्तव्वगसंचिया ? गोयमा ! पुढविकाइया असंखेज्जएणं पवेसणएणं पविसंति
से तेणट्ठेणं जाव णो अवत्तव्वगसंचिया, एवं जाव वणस्सइकाइया, वेइदिया
जाव वेमाणिया जहा णेरइया । सिद्धाणं पुच्छा, गोयमा ! सिद्धा कइसंचिया
णो अकइसंचिया अवत्तव्वगसंचियावि । से केणट्ठेणं भंते ! जाव अवत्तव्वग-
संचियावि ? गोयमा ! जे णं सिद्धा संखेज्जएणं पवेसणएणं पविसंति ते णं
सिद्धा कइसंचिया, जे णं सिद्धा एकएणं पवेसणएणं पविसंति ते णं सिद्धा
अवत्तव्वगसंचिया, से तेणट्ठेणं गोयमा ! जाव अवत्तव्वगसंचियावि । एएसि णं
भंते ! णेरइयाणं कइसंचियाणं अकइसंचियाणं अवत्तव्वगसंचियाणं य कयरे २
जाव विसेसाहिया वा ? गोयमा ! सव्वत्थोवा णेरइया अवत्तव्वगसंचिया, कइ-

संचिया संखेज्जगुणा, अकइसंचिया असंखेज्जगुणा, एवं एगिदियवज्जगुणां जाव वेमाणियाणं अप्पाबहुगं, एगिदियाणं णत्थि अप्पाबहुगं । एएसि णं भंते ! सिद्धाणं कइसंचियाणं अवत्तव्वगसंचियाणं य कयरे २ जाव विसेसाहिया वा ? गोयमा ! स्ववत्थोवा सिद्धा कइसंचिया, अवत्तव्वगसंचिया संखेज्जगुणा । णेरइया णं भंते ! किं छक्कसमज्जिया १, णोछक्कसमज्जिया २, छक्केण य णोछक्केण य समज्जिया ३, छक्केहिं समज्जिया ४, छक्केहिं य णोछक्केण य समज्जिया ५ ? गोयमा ! णेरइया छक्कसमज्जियावि १, णोछक्कसमज्जियावि २, छक्केण य णोछक्केण य समज्जियावि ३, छक्केहिं समज्जियावि ४, छक्केहिं य णोछक्केण य समज्जियावि ५ । से केणट्ठेणं भंते ! एवं वुच्चइ-णेरइया छक्कसमज्जियावि जाव छक्केहिं य णोछक्केण य समज्जियावि ? गोयमा ! जे णं णेरइया छक्कएणं पवेसणएणं पविसंति ते णं णेरइया छक्कसमज्जिया १, जे णं णेरइया जहणेणं एक्केण वा दोहिं वा तीहिं वा उक्कोसेणं पंचएणं पवेसणएणं पविसंति ते णं णेरइया णोछक्कसमज्जिया २, जे णं णेरइया एणेणं छक्कएणं अण्णेणं य जहणेणं एक्केण वा दोहिं वा तीहिं वा उक्कोसेणं पंचएणं पवेसणएणं पविसंति ते णं णेरइया छक्केण य णोछक्केण य समज्जिया ३, जे णं णेरइया णेगेहिं छक्केहिं पवेसणएणं पविसंति ते णं णेरइया छक्केहिं समज्जिया ४, जे णं णेरइया णेगेहिं छक्केहिं अण्णेणं य जहणेणं एक्केण वा दोहिं वा तीहिं वा उक्कोसेणं पंचएणं पवेसणएणं पविसंति ते णं णेरइया छक्केहिं य णोछक्केण य समज्जिया ५, से तेणट्ठेणं तं चेव जाव समज्जियावि, एवं जाव थणियकुमारा । पुढविक्काइयाणं पुच्छा, गोयमा ! पुढविक्काइया णो छक्कसमज्जिया १, णो णोछक्कसमज्जिया २, णो छक्केण य णोछक्केण य समज्जिया ३, छक्केहिं समज्जियावि ४, छक्केहिं य णोछक्केण य समज्जियावि ५ । से केणट्ठेणं भंते ! जाव समज्जियावि ? गोयमा ! जे णं पुढविक्काइया णेगेहिं छक्कएहिं पवेसणं पविसंति ते णं पुढविक्काइया छक्केहिं समज्जिया, जे णं पुढविक्काइया णेगेहिं छक्कएहिं अण्णेणं य जहणेणं एक्केण वा दोहिं वा तीहिं वा उक्कोसेणं पंचएणं पवेसणएणं पविसंति ते णं पुढविक्काइया छक्केहिं य णोछक्केण य समज्जिया से तेणट्ठेणं जाव समज्जियावि, एवं जाव वणत्सइकाइया, बेइंदिया जाव वेमाणिया, सिद्धा जहा णेरइया । एएसि णं भंते ! णेरइयाणं छक्कसमज्जियाणं णोछक्क-

समज्जियाणं छक्केण य णोछक्केण य समज्जियाणं छक्केहि य समज्जियाणं
 छक्केहि य णोछक्केण य समज्जियाणं य कयरे २ जाव विसेसाहिया वा ?
 गोयमा ! सव्वत्थोवा णेरइया छक्कसमज्जिया, णोछक्कसमज्जिया संखेज्ज-
 गुणा, छक्केण य णोछक्केण य समज्जिया संखेज्जगुणा, छक्केहि य समज्जिया
 असंखेज्जगुणा, छक्केहि य णोछक्केण य समज्जिया संखेज्जगुणा, एवं जाव
 थणियकुमारा । एएसि णं भंते ! पुढविकाइयाणं छक्केहि समज्जियाणं छक्केहि
 य णोछक्केण य समज्जियाणं कयरे २ जाव विसेसाहिया वा ? गोयमा ! सव्वत्थोवा
 पुढविकाइया छक्केहि समज्जिया, छक्केहि य णोछक्केण य समज्जिया संखेज्ज-
 गुणा, एवं जाव वणस्सइकाइयाणं, बेईदियाणं जाव वेमाणियाणं जहा णेरइ-
 याणं । एएसि णं भंते ! सिद्धाणं छक्कसमज्जियाणं णोछक्कसमज्जियाणं
 जाव छक्केहि य णोछक्केण य समज्जियाणं य कयरे कयरे जाव विसेसा-
 हिया वा ? गोयमा ! सव्वत्थोवा सिद्धा छक्केहि य णोछक्केण य सम-
 ज्जिया, छक्केहि समज्जिया संखेज्जगुणा, छक्केण य णोछक्केण य समज्जिया
 संखेज्जगुणा, छक्कसमज्जिया संखेज्जगुणा, णोछक्कसमज्जिया संखेज्जगुणा ।
 णेरइया णं भंते ! किं बारससमज्जिया १, णोबारससमज्जिया २, बारसएण
 य णोबारसएण य समज्जिया ३, बारसएहि समज्जिया ४, बारसएहि य
 णोबारसएण य समज्जिया ५ ? गोयमा ! णेरइया बारससमज्जियावि जाव
 बारसएहि य णोबारसएण य समज्जियावि । से केणट्ठेणं भंते ! एवं जाव
 समज्जियावि ? गोयमा ! जे णं णेरइया बारसएणं पवेसणएणं पविसंति ते
 णं णेरइया बारससमज्जिया १, जे णं णेरइया जहण्णेणं एक्केण वा दोहिं वा
 तीहिं वा उक्कोसेणं एक्कारसएणं पवेसणएणं पविसंति ते णं णेरइया णोबारस-
 समज्जिया २, जे णं णेरइया बारसएणं पवेसणएणं अण्णेण य जहण्णेणं एक्केण
 वा दोहिं वा तीहिं वा उक्कोसेणं एक्कारसएणं पवेसणएणं पविसंति ते णं
 णेरइया बारसएण य णोबारसएण य समज्जिया ३, जे णं णेरइया जेगोहिं
 बारसएहि पवेसणं पविसंति ते णं णेरइया बारसएहि समज्जिया ४, जे णं
 णेरइया जेगोहिं बारसएहि अण्णेण य जहण्णेणं एक्केण वा दोहिं वा तीहिं वा
 उक्कोसेणं एक्कारसएणं पवेसणएणं पविसंति ते णं णेरइया बारसएहि य णो-
 बारसएण य समज्जिया ५, से तेणट्ठेणं जाव समज्जियावि, एवं जाव थणिय-

कुमारा । पुढविवकाइयाणं पुच्छा, भोग्या ! पुढविवकाइया णो बारससमज्जिया १, णो णोबारससमज्जिया २, णो बारसएण य णोबारसएण य समज्जिया ३, बारसएहि समज्जिया ४, बारसएहि य णो बारसएण य समज्जियावि ५ । से केणट्ठेणं भंते ! जाव समज्जियावि ? गोयमा ! जे णं पुढविवकाइया णोरोहि बारसएहि पवेसणयं पविसंति ते णं पुढविवकाइया बारसएहि समज्जिया, जे णं पुढविवकाइया णोरोहि बारसएहि अण्णेण य जहण्णेण एक्केण वा दोहि वा तीहि वा उक्कोसेणं एक्कारसएणं पवेसणएणं पविसंति ते णं पुढविवकाइया बारसएहि य णोबारसएण य समज्जिया, से तेणट्ठेणं जाव समज्जियावि, एवं जाव वणस्सइकाइया, बेइंदिया जाव सिद्धा जहा णेरइया । एएसि णं भंते ! णेरइयाणं बारससमज्जियाणं० सव्वेसि अण्णाबट्ठुं जहा छक्कसमज्जियाणं णवरं बारसाभिलावो, सेसं तं चेव । णेरइया णं भंते ! कि चुलसीइसमज्जिया १, णोचुलसीइसमज्जिया २, चुलसीईए य णोचुलसीईए य समज्जिया ३ चुलसीईहि समज्जिया ४, चुलसीईहि य णोचुलसीईए य समज्जिया ५ ? गोयमा ! णेरइया चुलसीइसमज्जियावि जाव चुलसीईहि य णोचुलसीईए य समज्जियावि । से केणट्ठेणं भंते ! एवं वुच्चइ जाव समज्जियावि ? गोयमा ! जे णं णेरइया चुलसीईएणं पवेसणएणं पविसंति ते णं णेरइया चुलसीइसमज्जिया १, जे णं णेरइया जहण्णेणं एक्केण वा दोहि वा तीहि वा उक्कोसेणं तेसीइपवेसणएणं पविसंति ते णं णेरइया णोचुलसीइसमज्जिया २, जे णं णेरइया चुलसीइएणं अण्णेण य जहण्णेणं एक्केण वा दोहि वा तीहि वा उक्कोसेणं तेसीइएणं पवेसणएणं पविसंति ते णं णेरइया चुलसीईए य णोचुलसीईए य समज्जिया ३, जे णं णेरइया णोरोहि चुलसीईएहि पवेसणयं पविसंति ते णं णेरइया चुलसीईएहि समज्जिया ४, जे णं णेरइया णोरोहि चुलसीईएहि अण्णेण य जहण्णेणं एक्केण वा जाव उक्कोसेणं तेसीइएणं जाव पविसंति ते णं णेरइया चुलसीईए य णोचुलसीईए य समज्जिया ५, से तेणट्ठेणं जाव समज्जियावि, एवं जाव थणियकुमारा, पुढविवकाइया तहेव पच्छिल्लएहि दोहि २ णवरं अभिलावो चुलसीईओ भंगो, एवं जाव वणस्सइकाइया, बेइंदिया जाव वेमाणिया जहा णेरइया । सिद्धाणं पुच्छा, गोयमा ! सिद्धा चुलसीइसमज्जियावि १, णोचुलसीइसमज्जियावि २, चुलसीईए य णोचुलसीईए य समज्जियावि ३, णो चुल-

सोईहि समज्जिया ४, जो चुलसीईहि य णोचुलसीईए य समज्जिया ५ । से केणट्ठेणं भंते !- जाव समज्जिया ? गोयमा ! जे णं सिद्धा चुलसीईएणं पवे-
सणएणं पविसंति ते णं सिद्धा चुलसीइसमज्जिया, जे णं सिद्धा जहण्णेणं एक्केण
वा दोहि वा तीहि वा उक्कोसेणं तेसोइएणं पवेसणएणं पविसंति ते णं सिद्धा
णोचुलसीइसमज्जिया, जे णं सिद्धा चुलसीइएणं अण्णेणं य जहण्णेणं एक्केण वा
दोहि वा तीहि वा उक्कोसेणं तेसोइएणं पवेसणएणं पविसंति ते णं सिद्धा चुल-
सीईए य णोचुलसीईए य समज्जिया, से तेणट्ठेणं जाव समज्जिया । एएसि णं
भंते ! नेरइयाणं चुलसीइसमज्जियाणं णोचुलसीइसमज्जियाणं० सव्वेसि अप्पा-
बहुगं जहा छक्कसमज्जियाणं जाव वेमाणियाणं, णवरं अभलावो चुलसीईओ ।
एएसि णं भंते ! सिद्धाणं चुलसीइसमज्जियाणं णोचुलसीइसमज्जियाणं चुल-
सीईए य णोचुलसीईए य समज्जियाणं कयरे २ जाव विसेसाहिया वा ?
गोयमा ! सव्वत्थोवा सिद्धा चुलसीईए य णोचुलसीईए य समज्जिया, चुल-
सीइसमज्जिया अणंतगुणा, णोचुलसीइसमज्जिया अणंतगुणा । सेवं भंते !
सेवं भंते ! ति जाव विहरइ ॥ ६८६ ॥

वीसइमं सयं समत्तं

॥ एगधीसइमं सयं पढमो वग्गो पढमो उद्देसो ॥

सालि कल अयसि वंते इक्खू दग्गे य अग्ग तुलसी य । अट्ठेए वस वग्गा
असोइं पुण होंति उद्देसा ॥ १ ॥ रायगिहे जाव एवं वयासी-अह भंते ! साली-
वीही-गोधूम जाव जवज्जाणं एएसि णं भंते ! जीवा मूलत्ताए वक्कमंति
ते णं भंते ! जीवा कओहितो उववज्जंति कि नेरइएहितो उववज्जंति तिरि०
मणु० वेवेहितो ? जहा वक्कंतीए तहेव उववाओ णवरं वेववज्जं । ते णं भंते !
जीवा एगसमएणं केवइया उववज्जंति ? गोयमा ! जहण्णेणं एक्को वा दो वा
तिण्णि वा उक्कोसेणं संखेज्जा वा असखेज्जा वा उववज्जंति, अवहारो जहा
उप्पलुद्देसए । तेसि णं भंते ! जीवाणं केमहालिया सरीरोगाहणा प० ? गोयमा !
जहण्णेणं अंगुलस्स असंखेज्जभागं उक्कोसेणं धणुहुत्तं । ते णं भंते ! जीवा
णाणावरणिज्जस्स कम्मस्स कि बंधगा अबंधगा ? जहा उप्पलुद्देसए, एवं
वेएवि उवएवि उदीरणाएधि । ते णं भंते ! जीवा कि कण्हलेस्सा णील्लेस्सा

काउलेस्सा छवीसं भंग, दिट्ठी जाव इंदिया जहा उप्पलुद्देसए । ते णं भंते ! साली-वीही-गोधूम जाव जवजवगमूलगजीवे कालओ केवच्चिरं होइ ? गोयमा ! जहण्णेणं अंतोमुहुत्तं उक्कोसेणं असंखेज्जं कालं । से णं भंते ! साली-वीही-गोधूम जाव जवजवगमूलगजीवे पुट्ठीजीवे पुणरवि साली-वीही जाव जवजवग-मूलगजीवे केवइयं कालं सेवेज्जा केवइयं कालं गइरागइं करेज्जा ? एवं जहा उप्पलुद्देसए, एएणं अभिलावेणं जाव मणुस्सजीवे, आहारो जहा उप्पलुद्देसे ठिई जहण्णेणं अंतोमुहुत्तं उक्कोसेणं वासपुहुत्तं, समुघायसभोहया उव्वट्ठणा य जहा उप्पलुद्देसे । अहं भंते ! सब्बपाणां जाव सब्बसत्ता साली-वीही जाव जवजवगमूलगजीवत्ताए उववण्णपुईवा ? हुंता गोयमा ! असइं अदुवा अणंत-खुत्तो । सेवं भंते ! २ त्ति ॥ ६८७ ॥

एगवीसइमं सयं पढमो वग्गो २-१० उद्देसा

अहं भंते ! साली-वीही जाव जवजवाणं एएसि णं जे जीवा कंदत्ताए वक्क-मंति ते णं भंते ! जीवा कओरिहतो उववज्जंति एवं कंदाहिगारेण सो चैव मूल-द्देसो अपरिसेसो भाणियव्वो जाव असइं अदुवा अणंतखुत्तो । सेवं भंते ! २ त्ति (२१-१-२) । एवं खंधेवि उद्देसओ णेयव्वो (२१-१-३) । एवं तयाएवि उद्देसो भाणियव्वो (२१-१-४) । सालेवि उद्देसो भाणियव्वो (२१-१-५) । पवालैवि उद्देसो भाणियव्वो (२१-१-६) । पत्तेवि उद्देसो भाणियव्वो (२१-१-७) । एए सत्तवि उद्देसगा अपरिसेसं जहा मूले तथा णेयव्वा । एवं पुप्फेवि उद्देसओ णवरं देवा उववज्जंति जहा उप्पलुद्देसे चत्तारि लेस्साओ असोइ भंगा ओगाहणा जहण्णेणं अंगुलस्स असंखेज्जइभाणं उक्कोसेणं अंगुलपुहुत्तं सेसं तं चेव । सेवं भंते ! २ त्ति (२१-१-८) । जहा पुप्फे एवं फलेवि उद्देसओ अपरिसेसो भाणियव्वो (२१-१-९) । एवं बीएवि उद्देसओ (२१-१-१०) एए दस उद्देसगा ॥ २१-१ ॥

एगवीसइमं सयं २-८ वग्गा

अहं भंते ! कलायमसूरतिलमुग्गमासणिप्फावकुलत्थआलिसंदगसइण-पलिसंथगाणं एएसि णं जे जीवा मूलत्ताए वक्कमंति ते णं भंते ! जीवा कओरिहतो उववज्जंति ? एवं मूलादीया दस उद्देसगा भाणियव्वा जहेव सालीणं णिरवसेसं तहेव । बिइओ वग्गो समत्तो ॥ २१-२ ॥ अहं भंते ! अयसिकुसुंभ-

कोद्द्वकंगुरालगतुवरीकोदूसासणसरिसवमूलगबीयाणं एएसि णं जे जीवा मूल-
 ताए वक्कमंति ते णं भंते ! जीवा कओंहितो उववज्जति ? एवं एत्थवि मूला-
 दीया दस उद्देसगा जहेव सालीणं णिरवसेसं तहेव भाणियस्वं । तद्दओ वग्गो
 समत्तो ॥ २१-३ ॥ अहं भंते ! वंसवेणुकणककवकावंसचारावंसवंडाकुडाविमा-
 चंडावेणुयाकल्लाणीणं एएसि णं जे जीवा मूलत्ताए वक्कमंति एवं एत्थवि मूला-
 दीया दस उद्देसगा जहेव सालीणं, णवरं देवो सव्वत्थवि ण उववज्जइ, तिग्णि
 लेस्साओ, सव्वत्थवि छव्वीसं भंगा, सेसं तं चेव । चउत्थो वग्गो समत्तो ॥ २१-
 ४ ॥ अहं भंते ! उक्खइक्खुवाडियावीरणाइक्कडभमाससुंठिसत्तवेत्त तिमिर-
 सयपोरगणलाणं एएसि णं जे जीवा मूलत्ताए वक्कमंति एवं जहेव वंसवग्गो तहेव
 एत्थवि मूलादीया दस उद्देसगा, णवरं खंधुद्देसे देवा उववज्जइ, चत्तारि लेस्साओ
 सेसं तं चेव । पंचमो वग्गो समत्तो ॥ २१-५ ॥ अहं भंते ! सेडियमंडियवक्क-
 कोत्थियवक्ककुसध्वगपोइदतालअज्जुण-आसाढगरोहियंसमुत्तवखीरभूसएरिड्ढकुरु-
 मकुंदकरवरसुंठिविभंगुमहुवयणधुरगसिप्पियसुंकलितणाणं एएसि णं जे जीवा मूल-
 ताए वक्कमंति एवं एत्थवि दस उद्देसगा णिरवसेसं जहेव वंसवग्गो । छट्ठो वग्गो
 समत्तो ॥ २१-६ ॥ अहं भंते ! अब्भरुह्वोयाणहरितगतंतुलेज्जगतणवत्थुलओरग-
 मज्जारयाईचिल्लियालक्कवगपिप्पलियदस्विसोत्थिकसायमंडुविकमूलगसरिसव -
 अंबिलसागजिवंतगाणं एएसि णं जे जीवा मूलत्ताए वक्कमंति एवं एत्थवि दस
 उद्देसगा जहेव वंसवग्गो । सत्तमो वग्गो समत्तो ॥ २१-७ ॥ अहं भंते ! तुलसी-
 कण्हदलफणज्जाअज्जाचुयणाओराओराबमणामरयाइंवीवरसयपुप्फाणं एएसि णं
 जे जीवा मूलत्ताए वक्कमंति एत्थवि दस उद्देसगा णिरवसेसं जहा वंसाणं । अट्ठमो
 वग्गो समत्तो ॥ २१-८ ॥ एवं एएसु अट्ठसु वग्गेषु असोइ उद्देसगा भवंति ॥ ६८८ ॥

एकवीसइमं सयं समत्तं

॥ बाबीसइमं सयं १-६ वग्गा ॥

तालेपट्टियवह्वीयगा थ गुच्छा य गुम्म वल्ली य । छट्ठस वग्गा एए सट्ठि
 पुण होंति उद्देसा ॥ १ ॥ रायगिहे जाव एवं वयासी-अहं भंते ! तालतमाल-
 तक्कलितेतलिसालसरलासारकल्लाणं जाव केयइक्कवलिक्कं वलीचम्मरुक्खगुंतुरुक्ख-
 हिगुरुक्खलवंगरुक्खपूयफलसज्जूरिणालिप्रीणं एएसि णं जे जीवा मूलत्ताए

वक्कमंति ते णं भंते ! जीवा कओहिंतो उववज्जंति ? एवं एत्थवि मूलादीया दस उद्देसगा कायव्वा जहेव सालीणं णवरं इमं णाणत्तं-मूले कंदे खंधे तथाए साले य एएसु पंचसु उद्देसएसु देवो ण उववज्जइ, तिग्णि लेस्साओ, ठिई जह्णेणं अंतोमुहुत्तं दसवाससहस्साइं, उवरिल्लेसु पंचसु उद्देसएसु देवो उववज्जइ चत्तारि लेस्साओ, ठिई जह्णेणं अंतोमुहुत्तं उवकोसेणं वासपुहुत्तं, ओगाहणा मूले कंदे धणुहपुहुत्तं, खंधे तथाए साले य गाउयपुहुत्तं, पवाले पत्ते धणुहपुहुत्तं, पुफे हत्थपुहुत्तं, फले बीए य अंगुलपुहुत्तं, सव्वेसि जह्णेणं अंगुलस्स असं-खेज्जइभागं मेसं जहा सालीणं, एवं एए दस उद्देसगा । पढमो वग्गो समत्तो ॥ २२-१ ॥ अहं भंते ! णिंबंजंबुकोसंबतालअंकोल्लपीलुसेलुसल्लइमोयइमालुय-बउलपलास-करंज-पुत्तंजीवग-रिट्टुबहेडगहरियगमत्ताय-उंबरियखीरणि-धायइ-पियालपूडयणिवायगसेह्यपासियसीसवअयसिपुण्णागणागरवक्खसीवण्णअसोगाणं एएसि णं जे जीवा मूलत्ताए वक्कमंति एवं मूलादीया दस उद्देसगा कायव्वा णिरवसेसं जहा तालवग्गो । बिइओ वग्गो समत्तो ॥ २२-२ ॥ अहं भंते ! अत्थियत्तिदुयबोरकषिट्ट-अंबाडगमाउल्लिगबिल्लआमलगफणसदाडिम-आसत्थउंबरवडणागोहर्णदिरुक्खपिप्पलिसत्तरपिलक्खुक्खकाउंबरियकुच्छुंभरिय-देवदालितिलगलउयच्छत्तीहिसिरीससत्तवण्णवहिवण्णलोद्धव-चंदण-अज्जुणणीव-कुडुगकलंबाणं एएसि णं जे जीवा मूलत्ताए वक्कमंति ते णं भंते ! एवं एत्थवि मूलादीया दस उद्देसगा तालवग्गसरिसा णेयव्वा जाव बीयं । तइओ वग्गो समत्तो ॥ २२-३ ॥ अहं भंते ! वाइंगणिअल्लइपोंडइ एवं जहा पण्णवणाए गाहाणुसारेणं णेयव्वं जाव गंजपाडलावासिअंकोल्लाणं एएसि णं जे जीवा मूल-त्ताए वक्कमंति एवं एत्थवि मूलादीया दस उद्देसगा तालवग्गसरिसा णेयव्वा जाव बीयति णिरवसेसं जहा वंसवग्गो । चउत्थो वग्गो समत्तो ॥ २२-४ ॥ अहं भंते ! सिरियकाणवणालियकोरटगबंधुजीवगमणोज्जा जहा पण्णवणाए पढमपए गाहाणुसारेणं जाव णलणीय कुंदमहाजाईणं एएसि णं जे जीवा मूल-त्ताए वक्कमंति एवं एत्थवि मूलादीया दस उद्देसगा णिरवसेसं जहा सालीणं । पंचमो वग्गो समत्तो ॥ २२-५ ॥ अहं भंते ! पूसफलिकालिगीतुंबीतउसीएला-वालुंकी एवं पयाणि छिंदियव्वाणि पण्णवण्णागाहाणुसारेणं जहा तालवग्गो जाव दधिफोल्लइकालिसोवकलिअवकवीदीणं एएसि णं जे जीवा मूलत्ताए वक्क-

मंति एवं मूलादीया दस उद्देसगा कायव्वा जाव तालवग्गो, णवरं-फलउद्देसे ओगाहणाए जहण्णेणं अंगुलस्स असंखेज्जइभागं उक्कोसेणं घणुहपुहुत्तं, ठिई सक्वत्थ जहण्णेणं अंतोमुहुत्तं उक्कोसेणं वासपुहुत्तं, सेसं तं चेव । छट्ठो वग्गो समत्तो ॥ २२-६ ॥ एवं छमुवि वग्गोसु सट्ठि उद्देसगा भवति ॥ ६८६ ॥

बावीसइमं सयं समत्तं

॥ तेवीसइमं सयं १-५ वग्गा ॥

णमो सुयवेवयाए भगवईए । आलुय लोही अवया पाढी तह मासवण्णि-वल्ली य । पंचेए वसवग्गा पण्णासं होंति उद्देसा ॥ १ ॥ रायगिहे जाव एवं वयासी-अह भंते ! आलुयमूलगंसिगबेरहलिट्ठरुक्कंडरियजाहच्छीरविरा-लिकिट्ठिक्कुंदुकण्हकडमुमहुपयलइमहुंसिगिणिरुहासप्पसुगंधाछिण्णरुहाबीयरुहाण एएसि णं जे जीवा मूलत्ताए वक्कमंति एवं मूलादीया दस उद्देसगा कायव्वा वसवग्गसरिसा णवरं परिमाणं जहण्णेणं एक्को वा दो वा तिण्णि वा उक्कोसेणं संखेज्जा वा असंखेज्जा वा अणता वा उववज्जंति, अवहारो-पोयमा ! ते णं समए २ अवहीरमाणा २ अणंताहि ओसप्पिणीहि उस्सप्पिणीहि एवइकालेणं अवहीरंति णो चेव णं अवहरिया सिया, ठिई जहण्णेणवि उक्कोसेणवि अंतो-मुहुत्तं, सेसं तं चेव । पढमो वग्गो समत्तो ॥ २३-१ ॥ अह भंते ! लोहीणीह-थोह्वियवगाअस्सकण्णीसीहकण्णीसीउंदीमुसंडीणं एएसि णं जे जीवा मूलत्ताए वक्कमंति एवं एत्थवि दस उद्देसगा जहेव आलुयवग्गो, णवरं ओगाहणा ताल-वग्गसरिसा, सेसं तं चेव । सेवं भंते ! २'त्ति । विइओ वग्गो समत्तो ॥ २३-२ ॥ अह भंते ! आयकायकुहुणकुंदुरुक्कउव्वेहलियासफासज्जाछत्तावंसाणियकुमारणं एएसि णं जे जीवा मूलत्ताए एवं एत्थवि मूलादीया दस उद्देसगा णिरवसेसं जहा आलुवग्गो णवरं ओगाहणा तालवग्गसरिसा, सेसं तं चेव । सेवं भंते ! २'त्ति । तइओ वग्गो समत्तो ॥ २३-३ ॥ अह भंते ! पाढामिषवालुंकिमहुररसा-रावल्लिपउमामोढरिदंतिवंडीणं एएसि णं जे जीवा मूल० एवं एत्थवि मूला-दीया दस उद्देसगा आलुयवग्गसरिसा णवरं ओगाहणा जहा वल्लीणं, सेसं तं चेव । सेवं भंते ! २'त्ति । चउत्थो वग्गो समत्तो ॥ २३-४ ॥ अह भंते ! मास-पण्णीमुगपण्णीजीव-सरिसवकएणुयकाओलि-खीरकाकोलिभंगिणाहकिमिरासि-भद्दमुच्छणंगलइपओर्याकणापउत्तपाढेहरेणुथालोहीणं एएसि णं जे जीवा मूल०

एवं एत्थवि दस उद्देसगा णिरवसेसं आलुयवग्गसरिसा । पंचमो वग्गो समतो ।
॥ २३-५ ॥ एवं एत्थ पंचसुवि वग्गसु पण्णासं उद्देसगा भाणियत्था, सव्वत्थ
देवा ण उववज्जति, तिण्णि लेस्साओ । सेवं भंते ! २ त्ति ॥ ६६० ॥

तेवीसइमं सयं समत्तं

॥ चउवीसइमं सयं पढमो उद्देसो ॥

उववायपरोमाणं संघयणुच्चत्तमेव संठाणं । लेस्सा विट्ठी णाणे अण्णाणे
जोग उवओगे ॥ १ ॥ सण्णाकसायइदियसमुग्घाया वेयणा घ वेए ष । आउं
अज्जवसाणा अणुबंधो कायसवेहो ॥ २ ॥ जीवपए जीवपए जीवाणं इंडगमि
उद्देसो । चउवीसइमंमि सए चउव्वीसं होति उद्देसा ॥३॥ रायगिहे जाव एवं
वयासी—णेरइया णं भंते ! कओहिंतो उववज्जति, कि णेरइएहिंतो उववज्जति,
तिरिक्खजोणिएहिंतो उववज्जति, मणुस्सेहिंतो उववज्जति, देवेहिंतो उववज्जति,
गोयमा ! णो णेरइएहिंतो उववज्जति, तिरिक्खजोणिएहिंतो उववज्जति,
मणुस्सेहिंतोवि उववज्जति, णो देवेहिंतो उववज्जति । जइ तिरिक्खजोणिएहिंतो
उववज्जति कि एगिदियतिरिक्खजोणिएहिंतो उववज्जति, बेइदियतिरिक्ख-
जोणिएहिंतो० तेइदियतिरिक्खजोणिएहिंतो० चउरिदियतिरिक्खजोणिएहिंतो०
पंचिदियतिरिक्खजोणिएहिंतो उववज्जति ? गोयमा ! णो एगिदियतिरिक्ख-
जोणिएहिंतो उववज्जति, णो बेइदिय० णो तेइदिय० णो चउरिदिय० पंचिदिय-
तिरिक्खजोणिएहिंतो उववज्जति । जइ पंचिदियतिरिक्खजोणिएहिंतो उवव-
ज्जति कि सण्णिपंचिदियतिरिक्खजोणिएहिंतो उववज्जति, असण्णिपंचिदिय-
तिरिक्खजोणिएहिंतो उववज्जति ? गोयमा ! सण्णिपंचिदियतिरिक्खजोणिए-
हिंतो उववज्जति असण्णिपंचिदियतिरिक्खजोणिएहिंतोवि उववज्जति । जइ
असण्णिपंचिदियतिरिक्खजोणिएहिंतो उववज्जति कि जलचरेहिंतो उववज्जति
थलचरेहिंतो उववज्जति खहचरेहिंतो उववज्जति ? गोयमा ! जलचरेहिंतो
उववज्जति, थलचरेहिंतोवि उववज्जति, खहचरेहिंतोवि उववज्जति । जइ
जलचर-थलचर-खहचरेहिंतो उववज्जति कि पज्जत्तएहिंतो उववज्जति
अपज्जत्तएहिंतो उववज्जति ? गोयमा ! पज्जत्तएहिंतो उववज्जति णो अप-
ज्जत्तएहिंतो उववज्जति । पज्जत्ताअसण्णिपंचिदियतिरिक्खजोणिए णं भंते !
जे भविए णेरइएमु उववज्जत्तए से णं भंते ! कइसु पुढवीसु उववज्जत्ता ?

गोयमा ! एगाए रयणप्यभाए पुढवीए उववज्जेज्जा । पज्जत्ताअसण्णि-
 पंचिदियतिरिक्खजोगिए णं भंते ! जे भविए रयणप्यभाए पुढवीए जेरइएसु
 उववज्जत्तए से णं भंते ! केवइकालट्टिईएसु उववज्जेज्जा ? गोयमा !
 जहणेणं दसवाससहस्सट्टिईएसु उक्कोसेणं पलिओवमस्स असंखेज्जइभागट्टिई-
 एसु उववज्जेज्जा १ । ते णं भंते ! जीवा एणसमएणं केवइया उववज्जंति ?
 गोयमा ! जहणेणं एक्को वा दो वा तिण्णि वा उक्कोसेणं संखेज्जा वा असं-
 खेज्जा वा उववज्जंति २ । तेसि णं भंते ! जीवाणं सरीरगा कंसंघयणी प० ?
 गोयमा ! छेवट्टसंघयणी प० ३ । तेसि णं भंते ! जीवाणं केमहालिया सरीरो-
 गाहणा प० ? गोयमा ! जहणेणं अंगुलस्स असंखेज्जइभागं उक्कोसेणं जोयण-
 सहस्सं ४ । तेसि णं भंते ! जीवाणं सरीरगा कंसंठिया प० ? गोयमा !
 हुंडसंठाणसंठिया पण्णात्ता ५ । तेसि णं भंते ! जीवाणं कइ लेस्साओ प० ?
 गोयमा ! तिण्णि लेस्साओ प०, तं०—कभूलेस्सा णीललेस्सा काउलेस्सा ६ ।
 ते णं भंते ! जीवा कि सम्मदिट्ठी मिच्छादिट्ठी सम्मामिच्छादिट्ठी ?
 गोयमा ! णो सम्मदिट्ठी मिच्छादिट्ठी णो सम्मामिच्छादिट्ठी ७ । ते णं
 भंते ! जीवा कि णाणी अण्णाणी ? गोयमा ! णो णाणी अण्णाणी णियमा
 दुअण्णाणी तं०—सइअण्णाणी य सुयअण्णाणी य ८—९ । ते णं भंते ! जीवा कि
 मणजोगी वहजोगी कायजोगी ? गोयमा ! णो मणजोगी वहजोगीवि काय-
 जोगीवि १० । ते णं भंते ! जीवा कि सागारोवउत्ता अणागारोवउत्ता ? गोयमा !
 सागारोवउत्तावि अणागारोवउत्तावि ११ । तेसि णं भंते ! जीवाणं कइ सण्णाओ
 पण्णाताओ ? गोयमा ! चत्तारिसण्णाओ प०, तं०—आहारसण्णा मयसण्णा सेहुण-
 सण्णा परिग्गहसण्णा १२ । तेसि णं भंते ! जीवाणं कइ कसाया प० ? गोयमा !
 चत्तारि कसाया प०, तं०—कोहकसाए माणकसाए भायाकसाए लोमकसाए १३ ।
 तेसि णं भंते ! जीवाणं कइ इंदिया प० ? गोयमा ! पंचिदिया प०, तं०—
 सोइंदिए चक्खिंदिए जाव फांसिंदिए १४ । तेसि णं भंते ! जीवाणं कइ समु-
 ग्घाया प० ? गोयमा ! तओ समुग्घाया प०, तं०—वेयणासमुग्घाए कसाय-
 समुग्घाए मारणंतियसमुग्घाए १५ । ते णं भंते ! जीवा कि सायावेयगा असाया-
 वेयगा ? गोयमा ! सायावेयगावि असायावेयगावि १६ । ते णं भंते ! जीवा
 कि इत्थीवेयगा पुरिसवेयगा णयंसगवेयगा ? गोयमा ! णो इत्थीवेयगा णो

पुरिसवेयया णपुंसगवेयया १७ । तेसि णं भन्ते ! जीवाणं केवइयं कालं ठिई
 प० ? गोयमा ! जहण्णेणं अंतोमुहुत्तं उक्कोसेणं पुव्वकोडी १८ । तेसि णं
 भन्ते ! जीवाणं केवइया अज्झवसाणा प० ? गोयमा ! असंखेज्जा अज्झव-
 साणा प० । ते णं भन्ते ! किं पसत्था अप्पसत्था ? गोयमा ! पसत्थावि अप्प-
 सत्थावि १९ । से णं भन्ते ! पज्जत्ताअसण्णिपंचीदियतिरिक्खजोणिएत्ति कालओ
 केवच्चिरं होइ ? गोयमा ! जहण्णेणं अंतोमुहुत्तं उक्कोसेणं पुव्वकोडी २० ।
 से णं भन्ते ! पज्जत्ताअसण्णिपंचीदियतिरिक्खजोणिए रयणप्पभापुढविणेरइए
 पुणरवि पज्जत्ताअसण्णिपंचीदियतिरिक्खजोणिएत्ति केवइयं कालं सेवेज्जा केव-
 इयं कालं गइरागइं करेज्जा ? गोयमा ! भवादेसेणं दो भवग्गहणाइं, काला-
 देसेणं जहण्णेणं दसवाससहस्साइं अंतोमुहुत्तमब्भहियाइं उक्कोसेणं पत्तिओवमस्स
 असंखेज्जइभागं पुव्वकोडिमब्भहियं एवइयं कालं सेवेज्जा एवइयं कालं गइरा-
 गइं करेज्जा २१ । पज्जत्ताअसण्णिपंचीदियतिरिक्खजोणिए णं भन्ते ! जे भविए
 जहण्णकालट्टिईएसु रयणप्पभापुढविणेरइएसु उववज्जित्तए से णं भन्ते ! केव-
 इयकालट्टिईएसु उववज्जेज्जा ? गोयमा ! जहण्णेणं दसवाससहस्सट्टिईएसु
 उक्कोसेणवि दसवाससहस्सट्टिईएसु उववज्जेज्जा । ते णं भन्ते ! जीवा एगसम-
 एणं केवइया उववज्जंति ? एवं सच्चेव वत्तव्वया णिरवसेसा भाणियव्वा जाव
 अणुबंधोत्ति । से णं भन्ते ! पज्जत्ताअसण्णिपंचीदियतिरिक्खजोणिए जहण्णकाल-
 ट्टिईयरयणप्पभापुढविणेरइए जहण्णकाल० २ पुणरवि पज्जत्ताअसण्णि जाव
 गइरागइं करेज्जा ? गोयमा ! भवादेसेणं दो भवग्गहणाइं, कालादेसेणं
 जहण्णेणं दसवाससहस्साइं अंतोमुहुत्तमब्भहियाइं उक्कोसेणं पुव्वकोडी दसहि
 वाससहस्सेहि अब्भहिया एवइयं कालं सेवेज्जा एवइयं कालं गइरागइं करेज्जा
 २ । पज्जत्ताअसण्णिपंचीदियतिरिक्खजोणिए णं भन्ते ! जे भविए उक्कोसकाल-
 ट्टिईएसु रयणप्पभापुढविणेरइएसु उववज्जित्तए से णं भन्ते ! केवइयकालट्टिई-
 एसु उववज्जेज्जा ? गोयमा ! जहण्णेणं पत्तिओवमस्स असंखेज्जइभागट्टिईएसु
 उववज्जेज्जा, उक्कोसेणवि पत्तिओवमस्स असंखेज्जइभागट्टिईएसु उववज्जेज्जा ।
 ते णं भन्ते ! जीवा० अवसेसं तं चेव जाव अणुबधो । से णं भन्ते ! पज्जत्ता-
 असण्णिपंचीदियतिरिक्खजोणिए उक्कोसकालट्टिईयरयणप्पभापुढविणेरइए
 उक्कोस पुणरवि पज्जत्ता जाव करेज्जा ? गोयमा ! भवादेसेणं दो भवग्गहणाइं

कालादेसेणं जहण्णेणं पलिओवमस्स असंखेज्जइभागं अंतोमुहुत्तमब्भहियं उक्को-
 सेणं पलिओवमस्स असंखेज्जइभागं पुब्बकोडिअब्भहियं एवइयं कालं सेवेज्जा
 एवइयं कालं गइरागइं करेज्जा ३ । जहण्णकालट्टिईयपज्जत्ताअसण्णिपंचिदिय-
 त्तिरिक्खजोणिए णं भंते ! जे भविए रयणप्पभापुढविणेरइएसु उववज्जित्तए से
 णं भंते ! केवइयकालट्टिईएसु उववज्जेज्जा ? गोयमा ! जहण्णेणं दसवास-
 सहस्सट्टिईएसु उक्कोसेणं पलिओवमस्स असंखेज्जइभागट्टिईएसु उववज्जेज्जा । ते
 णं भंते ! जीवा एगसमएणं केवइया० सेसं तं चेव णवरं इमाइं तिण्णि णाण-
 ताइं-आउं अज्झवसाणा अणुबंधो य, जहण्णेणं ठिई अंतोमुहुत्तं उक्कोसेणवि
 अंतोमुहुत्तं । तेसि णं भंते ! जीवाणं केवइया अज्झवसाणा प० ? गोयमा !
 असंखेज्जा अज्झवसाणा प० । ते णं भंते ! कि पसत्था अप्पसत्था ? गोयमा !
 णो पसत्था अप्पसत्था, अणुबंधो अंतोमुहुत्तं, सेसं तं चेव । से णं भंते ! जहण्ण-
 कालट्टिईय पज्जत्ताअसण्णिपंचिदिय० रयणप्पभा जाव करेज्जा ? गोयमा !
 भवादेसेणं दो भवगगहणाइं, कालादेसेणं जहण्णेणं दसवाससहस्साइं अंतो-
 मुहुत्तमब्भहियाइं उक्कोसेणं पलिओवमस्स असंखेज्जइभागं अंतोमुहुत्तमब्भहियं
 एवइयं कालं सेवेज्जा जाव गइरागइं करेज्जा ४ । जहण्णकालट्टिईयपज्जत्ता-
 असण्णिपंचिदियत्तिरिक्खजोणिए णं भंते ! जे भविए जहण्णकालट्टिईएसु रयण-
 प्पभापुढविणेरइएसु उववज्जित्तए से णं भंते ! केवइयकालट्टिईएसु उववज्जेज्जा ?
 गोयमा ! जहण्णेणं दसवाससहस्सट्टिईएसु उक्कोसेणवि दसवाससहस्सट्टिई-
 एसु उववज्जेज्जा । ते णं भंते ! जीवा० सेसं तं चेव ताइं चेव तिण्णि णाणत्ताइं
 जाव से णं भंते ! जहण्णकालट्टिईयपज्जत्त जाव जोणिए जहण्णकालट्टिईयरयण-
 प्पभा० पुणरवि जाव गोयमा ! भवादेसेणं दो भवगगहणाइं, कालादेसेणं जहण्णेणं
 दसवाससहस्साइं अंतोमुहुत्तमब्भहियाइं उक्कोसेणवि दसवाससहस्साइं अंतो-
 मुहुत्तमब्भहियाइं एवइयं कालं सेवेज्जा जाव करेज्जा ५ । जहण्णकालट्टिईय-
 पज्जत्त जाव त्तिरिक्खजोणियाणं भंते ! जे भविए उक्कोसकालट्टिईएसु रयण-
 प्पभापुढविणेरइएसु उववज्जित्तए से णं भंते ! केवइयकालट्टिईएसु उवव-
 ज्जेज्जा ? गोयमा ! जहण्णेणं पलिओवमस्स असंखेज्जइभागट्टिईएसु उक्को-
 सेणवि पलिओवमस्स असंखेज्जइभागट्टिईएसु उववज्जेज्जा । ते णं भंते !
 जीवा० अवसेसं तं चेव ताइं चेव तिण्णि णाणत्ताइं जाव से णं भंते ! जह-

णकालट्टिईयपज्जत्त जाव तिरिक्खजोणिए उक्कोसकालट्टिईयरयणप्पभा जाव
 करेज्जा ? गोयमा ! भवादेसेणं दो भवग्गहणाइं, कालादेसेणं जहण्णेणं पत्ति-
 ओवमस्स असंखेज्जइभागं अंतोमहुत्तमइभहियं उक्कोसेणवि पत्तिओवमस्स असं-
 खेज्जइभागं अंतोमहुत्तमइभहियं एवइयं कालं जाव करेज्जा ६ । उक्कोसकाल-
 ट्टिईयपज्जत्ताअसाण्णिपच्चिदियत्तिरिक्खजोणिए णं भंते ! जे भविए रयणप्पभा-
 पुढविणेरइएमु उववज्जत्तए से णं भंते ! केवइयकालं जाव उववज्जेज्जा ?
 गोयमा ! जहण्णेणं दसवाससहस्सट्टिईएमु उक्कोसेणं पत्तिओवमस्स असंखेज्जइ-
 भागट्टिईएमु उववज्जेज्जा । ते णं भंते ! जीवा एगसमएणं० अवसेसं जदेव ओहिय-
 गमएणं तहेव अणुगतत्वं, णवरं—इमाइं दोण्णि णाणत्ताइं—ठिई जहण्णेणं
 पुव्वकोडी उक्कोसेणवि पुव्वकोडी, एवं अणुबंधोवि, अवसेसं तं चेव । से णं
 भंते ! उक्कोसकालट्टिईयपज्जत्तअसाण्णि जाव तिरिक्खजोणिए रयणप्पभा जाव-
 गोयमा ! भवादेसेणं दो भवग्गहणाइं, कालादेसेणं जहण्णेणं पुव्वकोडी दसहिं
 वाससहस्सेहिं अइभहिया उक्कोसेणं पत्तिओवमस्स असंखेज्जइभागं पुव्वकोडीए
 अइभहियं एवइयं जाव करेज्जा ७ । उक्कोसकालट्टिईयपज्जत्तं० तिरिक्खजोणिए
 णं भंते ! जे भविए जहण्णकालट्टिईएमु रयणप्पभा जाव उववज्जत्तए से णं
 भंते ! केवइ जाव उववज्जेज्जा ? गोयमा ! जहण्णेणं दसवाससहस्सट्टिईएमु
 उक्कोसेणवि दसवाससहस्सट्टिईएमु उववज्जेज्जा । ते णं भंते ! ० सेसं तं चेव
 जहा सत्तमगमए जाव—मे णं भंते ! उक्कोसकालट्टिईय जाव तिरिक्खजोणिए
 जहण्णकालट्टिईयरयणप्पभा जाव करेज्जा ? गोयमा ! भवादेसेणं दो भवग्गह-
 णाइं, कालादेसेणं जहण्णेणं पुव्वकोडी दसहिं वाससहस्सेहिं अइभहिया उक्को-
 सेणवि पुव्वकोडी दसहिं वाससहस्सेहिं अइभहिया एवइयं जाव करेज्जा ८ ।
 उक्कोसकालट्टिईयपज्जत्त जाव तिरिक्खजोणिए णं भंते ! जे भविए उक्कोस-
 कालट्टिईएमु रयणप्पभा जाव उववज्जत्तए से णं भंते ! केवइयकालं जाव
 उववज्जेज्जा ? गोयमा ! जहण्णेणं पत्तिओवमस्स असंखेज्जइभागट्टिईएमु
 उक्कोसेणवि पत्तिओवमस्स असंखेज्जइभागट्टिईएमु उववज्जेज्जा । ते णं भंते !
 जीवा एगसमएणं० सेसं जहा सत्तमगमए जाव से णं भंते ! उक्कोसकालट्टिईय-
 पज्जत्त जाव तिरिक्खजोणिए उक्कोसकालट्टिईयरयणप्पभा जाव करेज्जा ?
 गोयमा ! भवादेसेणं दो भवग्गहणाइं, कालादेसेणं जहण्णेणं पत्तिओवमस्स

असंखेज्जइभागं पुव्वकोडीए अब्भहियं उक्कोसेणवि पलिओवमस्स असंखेज्जइ-
भागं पुव्वकोडीए अब्भहियं एवइयं कालं सेवेज्जा जाव गइरागइं करेज्जा ६ ।
एवं एए ओहिया तिण्णि गमगा ३, जहण्णकालट्ठिईएसु तिण्णि गमगा ६,
उक्कोसकालट्ठिईएसु तिण्णि गमगा ६, सव्वेते णव गमगा भवति ॥ ६६२-२ ॥
जइ सण्णिपंचिदियतिरिक्खजोणिएहिंतो उववज्जति किं संखेज्जवासाउयसण्णि-
पंचिदियतिरिक्खजोणिएहिंतो उववज्जति असंखेज्जवासाउयसण्णिपंचिदियतिरि-
क्ख जाव उववज्जति ? गोयमा ! संखेज्जवासाउयसण्णिपंचिदियतिरिक्ख-
जोणिएहिंतो उववज्जति णो असंखेज्जवासाउयसण्णिपंचिदिय जाव उववज्जति ।
जइ संखेज्जवासाउयसण्णिपंचिदिय जाव उववज्जति किं जलचरेहिंतो उव-
वज्जति पुच्छा, गोयमा ! जलचरेहिंतो उववज्जति जहा असण्णी जाव
पज्जत्तएहिंतो उववज्जति णो अपज्जत्तएहिंतो उववज्जति । पज्जत्तसंखेज्ज-
वासाउयसण्णिपंचिदियतिरिक्खजोणिए णं भंते ! जे भविए णेरइएसु उव-
वज्जित्तए से णं भंते ! कइसु पुढवीसु उववज्जेज्जा ? गोयमा ! सत्तसु
पुढवीसु उववज्जेज्जा, तंजहा-रयणप्पभाए जाव अहेसत्तमाए पज्जत्तसंखे-
ज्जवासाउयसण्णिपंचिदियतिरिक्खजोणिए णं भंते ! जे भविए रयणप्पभापुढवि-
णेरइएसु उववज्जित्तए से णं भंते ! केवइयकालट्ठिईएसु उववज्जेज्जा ?
गोयमा ! जहण्णेणं दसवाससहस्सट्ठिईएसु उक्कोसेणं सागरोवमट्ठिईएसु उव-
वज्जेज्जा । ते णं भंते ! जीवा एगसमएणं केवइया उववज्जति ? जहेव असण्णी ।
तेसि णं भंते ! जीवाणं सरीरगा किसंघयणी प० ? गोयमा ! छव्विहसंघयणी
प०, तं-वइरोसभणारायसंघयणी उसभणारायसंघयणी जाव छेवट्ठसंघयणी,
सरीरोगाहणा जहेव असण्णीणं जहण्णेणं अंगुलस्स असंखेज्जइभागं उक्कोसेणं
जोयणसहस्सं । तेसि णं भंते ! जीवाणं सरीरगा किसंठिया प० ? गोयमा !
छव्विहसंठिया प०, तंजहा-समचउरंसा णिगगोहा जाव हुंडा । तेसि णं भंते !
जीवाणं कइ लेस्साओ प० ? गोयमा ! छल्लेस्साओ पण्णत्ताओ, तंजहा-
कण्णेस्सा जाव सुक्कलेस्सा, दिट्ठी तिक्खिहावि, तिण्णि णाणा तिण्णि अण्णाणा
भयणाए, जोगो तिक्खिहोवि सेसं जहा असण्णीणं जाव अणुबंधो, णवरं पंच
समुग्घाया आइल्लगा, वेदो तिक्खिहोवि, अबसेसं तं चेव जाव-से णं भंते !
पज्जत्तसंखेज्जवासाउय जाव तिरिक्खजोणिए रयणप्पभा जाव करेज्जा ?

गोयमा ! भवादेसेणं जहण्णेणं दो भवग्गहणाइं उक्कोसेणं अट्ट भवग्गहणाइं, कालादेसेणं जहण्णेणं दसवाससहस्साइं अंतोमुहुत्तमब्भहियाइं उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं एवइयं कालं सेवेज्जा जाव करेज्जा १ । पज्जत्तसंखेज्जवासाउय जाव जे भविए जहण्णकाल जाव से णं भंते ! केवइयकालट्टिईएसु उववज्जेज्जा ? गोयमा ! जहण्णेणं दसवाससहस्सट्टिईएसु उक्कोसेणवि दसवाससहस्सट्टिईएसु उववज्जेज्जा । ते णं भंते ! जीवा० एवं सो चेव पढमो गमओ णिरवसेसो भाणियव्वो जाव कालादेसेणं जहण्णेणं दसवाससहस्साइं अंतोमुहुत्तमब्भहियाइं उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ एवइयं कालं सेवेज्जा एवइयं कालं गडरागइं करेज्जा २ । सो चेव उक्कोसकालट्टिईएसु उववण्णे जहण्णेणं सागरोवमट्टिईएसु उक्कोसेणवि सागरोवमट्टिईएसु उववज्जेज्जा, अवसेसो परिमाणादीओ भवादेसपज्जवसाणो सो चेव पढमगमो णेयव्वो जाव कालादेसेणं जहण्णेणं सागरोवमं अंतोमुहुत्तमब्भहियं उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं एवइयं कालं सेवेज्जा जाव करेज्जा ३ । जहण्णकालट्टिईयपज्जत्तसंखेज्जवासाउयसण्णिपंचदियतिरिक्खजोणिए णं भंते ! जे भविए रयणप्यभापुढवि जाव उववज्जित्तए से णं भंते ! केवइयकालट्टिईएसु उववज्जेज्जा ? गोयमा ! जहण्णेणं दसवाससहस्सट्टिईएसु उक्कोसेणं सागरोवमट्टिईएसु उववज्जेज्जा । ते णं भंते ! जीवा० अवसेसो सो चेव गमओ णवरं इमाइं अट्ट णाणत्ताइं—सरीरोगाहणा जहण्णेणं अंगुलस्स असंखेज्जइभागं उक्कोसेणं धणुहपुहुत्तं, लेस्साओ तिण्णि आदिल्लाओ, णो सम्मदिट्ठी मिच्छादिट्ठी णो सम्मामिच्छादिट्ठी, णो णाणी दो अण्णाणा णियमं, समुग्घाया आदिल्ला तिण्णि, आउं अज्जवसाणा अणुबंधो य जहेव असण्णीणं अवसेसं जहा पढमगमए जाव कालादेसेणं जहण्णेणं दसवाससहस्साइं अंतोमुहुत्तमब्भहियाइं उक्कोसेणं चत्तारि सागरोवमाइं चउहिं अंतोमुहुत्तेहिं अब्भहियाइं एवइयं कालं जाव करेज्जा ४ । सो चेव जहण्णकालट्टिईएसु उववण्णे जहण्णेणं दसवाससहस्सट्टिईएसु उक्कोसेणवि दसवाससहस्सट्टिईएसु उववज्जेज्जा । ते णं भंते ! ० एवं सो चेव चउत्थो गमओ णिरवसेसो भाणियव्वो जाव कालादेसेणं जहण्णेणं दसवाससहस्साइं अंतोमुहुत्तमब्भहियाइं उक्कोसेणं चत्तालीसं वाससहस्साइं चउहिं अंतोमुहुत्तेहिं एवइयं

जाव करेज्जा ५ । सो चेव उक्कोसकालट्टिईएसु उववण्णो जहण्णेणं सागरोवम-
ट्टिईएसु उक्कोसेणवि सागरोवमट्टिईएसु उववज्जेज्जा । ते णं भंते ! ० एवं सो
चेव चउत्थो गमओ गिरवसेसो भाणियब्बो जाव कालादेसेणं जहण्णेणं साग-
रोवमं अंतोमहुत्तमअभहियं उक्कोसेणं चत्तारि सागरोवमाइं चउर्हं अंतोमहुत्तेहि
अअभहियाइं एवइयं जाव करेज्जा ६ । उक्कोसकालट्टिईयपज्जत्तसंखेज्जवासा-
उय जाव तिरिक्खजोणिए णं भंते ! जे भविए रयणप्पभापुढविणेरइएसु
उववज्जित्तए से णं भंते ! केवइयकालट्टिईएसु उववज्जेज्जा ? गोयमा ! जह-
ण्णेणं दसवाससहस्सट्टिईएसु उक्कोसेणं सागरोवमट्टिईएसु उववज्जेज्जा । ते णं
भंते ! जीवा अवसेसो परिमाणादीओ भवादेसपज्जवसाणो एएसिं चेव पढमो
गमओ जेयब्बो णवरं ठिई जहण्णेणं पुब्बकोडी उक्कोसेणवि पुब्बकोडी, एवं
अणुबंधोवि, सेसं तं चेव, कालादेसेणं जहण्णेणं पुब्बकोडी दसहिं वाससहस्सेहि
अअभहिया उक्कोसेणं चत्तारि सागरोवमाइं चउर्हं पुब्बकोडीहिं अअभहियाइं
एवइयं कालं जाव करेज्जा ७ । सो चेव जहण्णकालट्टिईएसु उववण्णो जह-
ण्णेणं दसवाससहस्सट्टिईएसु उक्कोसेणवि दसवाससहस्सट्टिईएसु उववज्जे-
ज्जा । ते णं भंते ! जीवा० सो चेव सत्तमो गमओ गिरवसेसो भाणियब्बो
जाव भवादेसोत्ति, कालादेसेणं जहण्णेणं पुब्बकोडी दसहिं वाससहस्सेहि
अअभहिया उक्कोसेणं चत्तारि पुब्बकोडीओ चत्तालीसाए वाससहस्सेहिं अअभ-
हियाओ एवइयं जाव करेज्जा ८ । उक्कोसकालट्टिईयपज्जत्त जाव तिरिक्ख-
जोणिए णं भंते ! जे भविए उक्कोसकालट्टिईय जाव उववज्जित्तए से णं
भंते ! केवइयकालट्टिईएसु उववज्जेज्जा ? गोयमा ! जहण्णेणं सागरो-
वमट्टिईएसु उक्कोसेणवि सागरोवमट्टिईएसु उववज्जेज्जा । ते णं भंते ! जीवा०
सो चेव सत्तमो गमओ गिरवसेसो भाणियब्बो जाव भवादेसोत्ति, काला-
देसेणं जहण्णेणं सागरोवमं पुब्बकोडीए अअभहियं उक्कोसेणं चत्तारि सागरो-
वमाइं चउर्हं पुब्बकोडीहिं अअभहियाइं एवइयं जाव करेज्जा ९ । एवं एए
णव गमगा उक्खेवणिक्खेवओ णवसुवि जहेव असण्णीणं ॥ ६९३ ॥ पज्जत्त-
संखेज्जवासाउयसण्णिपौंचदियतिरिक्खजोणिए णं भंते ! जे भविए सक्करप्प-
भाए पुढवीए णेरइएसु उववज्जित्तए से णं भंते ! केवइयकालट्टिईएसु उव-
वज्जेज्जा ? गोयमा ! जहण्णेणं सागरोवमट्टिईएसु उववज्जेज्जा, उक्कोसेणं
तिसागरोवमट्टिईएसु उववज्जेज्जा । ते णं भंते ! जीवा एगसमएणं० एवं जहेव

रयणप्पभाए उववज्जंतगस्स लद्धी सच्चेव णिरवसेसा भाणियत्त्वा जाव भवा-
 देसात्ति, कालादेसेणं जहण्णेणं सागरोवमं अंतोमुहुत्तमब्भहियं उवकोसेणं बारस-
 सागरोवमाइं चउहिं पुव्वकोडीहिं अब्भहियाइं एवइयं जाव करेज्जा १, एवं
 रयणप्पभापुट्टविगमसरिसा णववि गमगा भाणियत्त्वा णवरं सव्वगमएसुवि
 णेरइयट्ठिईसवेहेसु सागरोवमा भाणियत्त्वा एवं जाव छट्ठपुट्टवित्ति, णवरं
 णेरइयट्ठिई जा जत्थ पुट्टवीए जहण्णवकोसिया सा तेणं चेव कमेणं चउग्गुणा
 कायत्त्वा, वालुयप्पभाए पुट्टवीए अट्टावीसं सागरोवमाइं चउग्गुणिया भवंति,
 पंकप्पभाए चत्तालीसं, धूमप्पभाए अट्टसट्ठि, तमाए अट्टासोइं, संघयणाइं बालुय-
 प्पभाए पंचविहसंघयणी तं०—वइरोसहणारायसंघयणी जाव कीलियासंघयणी,
 पंकप्पभाए चउद्वियहसंघयणी, धूमप्पभाए तिविहसंघयणी, तमाए दुविहसंघयणी
 तं०—वइरोसहणारायसंघयणी य उतभणारायसंघयणी य, सेसं तं चेव ; पज्जत्त-
 संखेज्जवासाउय जाव तिरिवखजोणिए णं भंते ! जे भविए अहेसत्तमाए पुट्ट-
 वीए णेरइएसु उववज्जित्तए से णं भंते ! केवइयकालट्ठिईएसु उववज्जेज्जा ?
 गीयमा ! जहण्णेणं बावीससागरोवमट्ठिईएसु उवकोसेणं तेलीससागरोवमट्ठिई-
 एसु उववज्जेज्जा । ते णं भंते ! जीवा० एवं जहेव रयणप्पभाए णव गमगा
 लद्धीवि सच्चेव णवरं वइरोसभणारायसंघयणी, इत्थियेयगा ण उववज्जित्तं सेसं
 तं चेव जाव अणुबंधोत्ति, संवेहो भवादेसेणं जहण्णेणं तिण्णि भवग्गहणाइं उवको-
 सेणं सत्त भवग्गहणाइं, कालादेसेणं जहण्णेणं बावीसं सागरोवमाइं दोहिं अंतो-
 मुहुत्तेहिं अब्भहियाइं उवकोसेणं छावट्ठि सागरोवमाइं चउहिं पुव्वकोडीहिं अब्भ-
 हियाइं एवइयं जाव करेज्जा १ । सो चेव जहण्णकालट्ठिईएसु उववण्णे सच्चेव
 वत्तव्वया जाव भवादेसोत्ति, कालादेसेणं जहण्णेणं कालादेसोवि तहेव जाव
 चउहिं पुव्वकोडीहिं अब्भहियाइं एवइयं जाव करेज्जा २ । सो चेव उवकोसकाल-
 ट्ठिईएसु उववण्णे सच्चेव लद्धी जाव अणुबंधोत्ति, भवादेसेणं जहण्णेणं तिण्णि
 भवग्गहणाइं उवकोसेणं पंच भवग्गहणाइं, कालादेसेणं जहण्णेणं तेलीसं सागरो-
 वमाइं दोहिं अंतोमुहुत्तेहिं अब्भहियाइं उवकोसेणं छावट्ठि सागरोवमाइं तिहिं
 पुव्वकोडीहिं अब्भहियाइं एवइयं जाव करेज्जा ३ । सो चेव अप्पणा जहण्ण-
 कालट्ठिईओ जाओ सच्चेव रयणप्पभापुट्टविजहण्णकालट्ठिईयवत्तव्वया भाणि-
 यत्त्वा जाव भवादेसोत्ति, णवरं पढमसंघयणं णो इत्थियेयगा, भवादेसेणं जह-

ष्णेणं तिण्णि भवग्गहणाइं उक्कोसेणं सत्त भवग्गहणाइं, कालादेसेणं जहण्णेणं
 बावीसं सागरोवमाइं दीहि अंतोमुहुत्तेहि अब्भहियाइं उक्कोसेणं छावट्ठि सागरो-
 वमाइं चउहि अंतोमुहुत्तेहि अब्भहियाइं एवइयं जाव करेज्जा ४ । सो चेव जहण्ण-
 कालट्ठिईएसु उववण्णो एअं सो चेव चउत्थो गमओ णिरवसेसो भाणियव्वो जाव
 कालादेसोत्ति ५ । सो चेव उक्कोसकालट्ठिईएसु उववण्णो सच्चेव लद्धी जाव
 अणुबंधोत्ति, भवादेसेणं जहण्णेणं तिण्णि भवग्गहणाइं उक्कोसेणं पंच भवग्ग-
 हणाइं कालादेसेणं जहण्णेणं तेत्तीसं सागरोवमाइं दीहि अंतोमुहुत्तेहि अब्भहियाइं
 उक्कोसेणं छावट्ठि सागरोवमाइं तिहि अंतोमुहुत्तेहि अब्भहियाइं एवइयं कालं
 जाव करेज्जा ६ । सो चेव अप्पण्ण उक्कोसकालट्ठिईओ जहण्णेणं बावीस-
 सागरोवमट्ठिईएसु उक्कोसेणं तेत्तीससागरोवट्ठिईएसु उववज्जेज्जा । ते णं भंते ! ०
 अवसेसा सच्चेव सत्तमपुद्दविपदमगमगवत्तव्वया भाणियव्वा जाव भवादेसोत्ति,
 णवरं ठिई अणुबंधो य जहण्णेणं पुव्वकोडी उक्कोसेणवि पुव्वकोडी सेसं तं चेव,
 कालादेसेणं जहण्णेणं बावीसं सागरोवमाइं दीहि पुव्वकोडीहि अब्भ-
 हियाइं उक्कोसेणं छावट्ठि सागरोवमाइं चउहि पुव्वकोडीहि अब्भहियाइं एवइयं
 जाव करेज्जा ७ । सो चेव जहण्णकालट्ठिईएसु उववण्णो सच्चेव लद्धी संवेहोवि
 तहेव सत्तमगमगरिसो ८ । सो चेव उक्कोसकालट्ठिईएसु उववण्णो एस चेव लद्धी
 जाव अणुबंधोत्ति, भवादेसेणं जहण्णेणं तिण्णि भवग्गहणाइं उक्कोसेणं
 पंच भवग्गहणाइं, कालादेसेणं जहण्णेणं तेत्तीसं सागरोवमाइं दीहि पुव्वकोडीहि
 अब्भहियाइं उक्कोसेणं छावट्ठि सागरोवमाइं तिहि पुव्वकोडीहि अब्भहियाइं
 एवइयं कालं सेवेज्जा जाव करेज्जा ॥ ६६४ ॥ जइ मणुस्सेहितो उववज्जंति
 किं सण्णिमणुस्सेहितो उववज्जंति असण्णिमणुस्सेहितो उववज्जंति ? गोयमा !
 सण्णिमणुस्सेहितो उववज्जंति णो असण्णिमणुस्सेहितो उववज्जंति । जइ सण्णि-
 मणुस्सेहितो उववज्जंति किं संखेज्जवासाउयसण्णिमणुस्सेहितो उववज्जंति असं-
 खेज्जवासाउय जाव उववज्जंति ? गोयमा ! संखेज्जवासाउयसण्णिमणुस्सेहितो
 उ० णो असंखेज्जवासाउय जाव उववज्जंति, जइ संखेज्जवासाउय जाव उवव-
 ज्जंति किं पज्जत्तसंखेज्जवासाउय जाव उववज्जंति अपज्जत्त जाव उववज्जंति ?
 गोयमा ! पज्जत्तसंखेज्जवासाउय जाव उववज्जंति णो अपज्जत्तसंखेज्ज-
 वासाउय जाव उववज्जंति । पज्जत्तसंखेज्जवासाउयसण्णिमणुस्से णं भंते ! जे

भविण्णेणेरइएसु उववज्जित्तए से णं भंते ! कइसु पुढवीसु उववज्जेज्जा ? गोयमा ! सत्तसु पुढवीसु उववज्जेज्जा, तं०-रयणप्पभाए जाव अहेसत्तमाए । पज्जत्त-संखेज्जवासाउयसणिमणस्से णं भंते ! जे भविण्ण रयणप्पभाए पुढवीए णेरइएसु उववज्जित्तए से णं भंते ! केवइयकालट्टिईएसु उववज्जेज्जा ? गोयमा ! जहण्णेणं दसवाससहस्सट्टिईएसु उवकोसेणं सागरोवमट्टिईएसु उववज्जेज्जा । ते णं भंते ! जीवा एगसमएणं केवइया उववज्जति ? गोयमा ! जहण्णेणं एवको वा दो वा तिण्णि वा उवकोसेणं संखेज्जा उववज्जति, संघयणा छ, सरीरोगाहणा जहण्णेणं अंगुलपुहुत्तं उवकोसेणं पंचघणुसयाइं, एवं सेसं जहा सण्णिपंचिदिय-तिरिक्खजाणियाणं जाव भवादेसोत्ति, णवरं चत्तारि णाणा तिण्णि अण्णाणा भयणाए, छ समुग्घाया केवलिवज्जा, टिई अणुबंधो य जहण्णेणं मासपुहुत्तं उवकोसेणं पुव्वकोडी सेसं तं चेव, कालादेसेणं जहण्णेणं दसवाससहस्साइं मास-पुहुत्तमब्भहियाइं उवकोसेणं चत्तारि सागरोवमाइं चउहि पुव्वकोडीहिं अब्भ-हियाइं एवइयं जाव करेज्जा १ । सो चेव जहण्णकालट्टिईएसु उववण्णो एस चेव वत्तव्वया णवरं कालादेसेणं जहण्णेणं दसवाससहस्साइं मासपुहुत्तमब्भहियाइं उवकोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ एव-इयं जाव करेज्जा २ । सो चेव उवकोसकालट्टिईएसु उववण्णो एस चेव वत्तव्वया णवरं कालादेसेणं जहण्णेणं सागरोवमं मासपुहुत्तमब्भहियं उवकोसेणं चत्तारि सागरोवमाइं चउहि पुव्वकोडीहिं अब्भहियाइं एवइयं जाव करेज्जा ३ । सो चेव अप्पणा जहण्णकालट्टिईओ जाओ एस चेव वत्तव्वया णवरं इमाइं पंच णाण-त्ताइं सरीरोगाहणा जहण्णेणं अंगुलपुहुत्तं उवकोसेणवि अंगुलपुहुत्तं, तिण्णि णाणा तिण्णि अण्णाणाइं भयणाए, पंच समुग्घाया आइल्ला, टिई अणुबंधो य जहण्णेणं मासपुहुत्तं उवकोसेणवि मासपुहुत्तं सेसं तं चेव जाव भवादेसोत्ति, कालादेसेणं जहण्णेणं दसवाससहस्साइं मासपुहुत्तमब्भहियाइं उवकोसेणं चत्तारि सागरो-वमाइं चउहि मासपुहुत्तेहिं अब्भहियाइं एवइयं जाव करेज्जा ४ । सो चेव जहण्णकालट्टिईएसु उववण्णो एस चेव वत्तव्वया चउत्थयगमसरिसा भेयव्वा णवरं कालादेसेणं जहण्णेणं दसवाससहस्साइं मासपुहुत्तमब्भहियाइं उवकोसेणं चत्तालीसं वाससहस्साइं चउहि मासपुहुत्तेहिं अब्भहियमाइं एवइयं जाव करेज्जा ५ । सो चेव उवकोसकालट्टिईएसु उववण्णो एस चेव गमगो णवरं कालादेसेणं

जहण्णेणं सागरोवमं मासपुहुत्तमब्भहियं उक्कोसेणं चत्तारि सागरोवमाइं चउर्हि
 मासपुहुत्तोहिं अब्भहियाइं एवइयं जाव करेज्जा ६ । सो चेव अप्पणा
 उक्कोसकालट्टिईओ जाओ सो चेव पढमगमओ णेयव्वो णवरं सरीरोगाहणा
 जहण्णेणं पंचधणुसयाइं उक्कोसेणवि पंचधणुसयाइं, ठिई जहण्णेणं पुव्व-
 कोडी उक्कोसेणवि पुव्वकोडी, एवं अणुबंधोवि, कालादेसेणं जहण्णेणं पुव्व-
 कोडी दसहिं वाससहस्सेहिं अब्भहिया उक्कोसेणं चत्तारि सागरोवमाइं
 चउर्हि पुव्वकोडीहिं अब्भहियाइं एवइयं कालं जाव करेज्जा ७ । सो चेव
 जहण्णकालट्टिईएमु उव्वण्णो सच्चेव सत्तमगमगवत्तव्वया णवरं कालादेसेणं
 जहण्णेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि पुव्व-
 कोडीओ चत्तालीसाए वाससहस्सेहिं अब्भहियाओ एवइयं कालं जाव करेज्जा
 ८ । सो चेव उक्कोसकालट्टिईएमु उव्वण्णो सच्चेव सत्तमगमगवत्तव्वया णवरं
 कालादेसेणं जहण्णेणं एगं सागरोवमं पुव्वकोडीए अब्भहियं उक्कोसेणं चत्तारि
 सागरोवमाइं चउर्हि पुव्वकोडीहिं अब्भहियाइं एवइयं कालं जाव करेज्जा ९
 ॥६९५॥ पज्जत्तसंखेज्जवासाउयसण्णिवणुस्से णं भंते ! जे भविए सक्करप्पमाए
 पुढीए णेरइएमु जाव उव्वज्जित्तए से णं भंते ! केवइयकाल जाव उव्व-
 ज्जेज्जा ? गोयमा ! जहण्णेणं सागरोवमट्टिईएमु उक्कोसेणं तिसागरोवमट्टिई-
 एमु उव्वज्जेज्जा, ते णं भंते ! ० एवं सो चेव रयणप्पभापुहविगमओ णेयव्वो
 णवरं सरीरोगाहणा जहण्णेणं रयणिपुहुत्तं उक्कोसेणं पंचधणुसयाइं, ठिई जह-
 ण्णेणं वासपुहुत्तं उक्कोसेणं पुव्वकोडी, एवं अणुबंधोवि, सेसं तं चेव जाव भवा-
 देसोत्ति, कालादेसेणं जहण्णेणं सागरोवमं वासपुहुत्तमब्भहियं उक्कोसेणं बारस
 सागरोवमाइं चउर्हि पुव्वकोडीहिं अब्भहियाइं एवइयं जाव करेज्जा १, एवं
 एसा ओहिएमु तिसु गमएमु मणुसस्स लद्धी णाणत्तं णेरइयट्टिई कालादेसेणं संवेहं
 च जाणेज्जा ३ । सो चेव अप्पणा जहण्णकालट्टिईओ जाओ तस्स वि तिसुवि
 गमएमु एस चेव लद्धी णवरं सरीरोगाहणा जहण्णेणं रयणिपुहुत्तं उक्कोसेणवि
 रयणिपुहुत्तं, ठिई जहण्णेणं वासपुहुत्तं उक्कोसेणवि वासपुहुत्तं एवं अणुबंधोवि,
 सेसं जहा ओहियाणं संवेहो सव्वो उव्वजुज्जिऊण भाणियव्वो ४-५-६ ।
 सो चेव अप्पणा उक्कोसकालट्टिईओ जाओ तस्सवि तिसुवि गमएमु इमं
 णाणत्तं-सरीरोगाहणा जहण्णेणं पंचधणुसयाइं उक्कोसेणवि पंचधणुसयाइं
 ठिई जहण्णेणं पुव्वकोडी उक्कोसेणवि पुव्वकोडी एवं अणुबंधोवि, सेसं जहा

पढमगमए णवरं णेरइयट्ठिइं कायसवेहं च जाणेज्जा ६, एवं जाव छट्टपुडवी णवरं तच्चाए आढवेत्ता एक्केक्कं संघयणं परिहायइ जहेव तिरिक्खजोणियाणं कालादेसोवि तहेव णवरं मणूससट्ठिई भाणियव्वा । पज्जत्तसंखेज्ज- वासाउयसण्णिमणूससेणं भंते! जे भविए अहेसत्तमापुढविणेरइएमु उववज्जितए से णं भंते ! केवइयकालट्ठिईएमु उववज्जेज्जा ? गोयमा ! जहण्णेणं बावीसं सागरो- वमट्ठिईएमु उवकोसेणं तेत्तीसं सागरोवमट्ठिईएमु उववज्जेज्जा । ते णं भंते ! जीवा एगसमएणं ० अवसेसो सो चेव सक्करप्पभापुढविगमओ णेयव्वो णवरं पट्ठमं संघयणं इत्थिवेयगा ण उववज्जंति सेसं तं चेव जाव अणुबंधोत्ति, भवा- देसेणं दो भवगगहणाइं कालादेसेणं जहण्णेणं बावीसं सागरोवमाइं वासपुहुत्त- मब्भहियाइं उवकोसेणं तेत्तीसं सागरोवमाइं पुव्वकोडीए अब्भहियाइं एवइयं जाव करेज्जा १ । सो चेव जहण्णकालट्ठिईएमु उववण्णो एस चेव वत्तव्वया णवरं णेरइयट्ठिइं संवेहं च जाणेज्जा २ । सो चेव उवकोसकालट्ठिईएमु उववण्णो एस चेव वत्तव्वया णवरं संवेहं च जाणेज्जा ३ । सो चेव अप्पणा जहण्णकाल- ट्ठिईओ जाओ तस्सवि तिसुवि गमएमु एस चेव वत्तव्वया णवरं सरीरोगाहणा जहण्णेणं रयणिपुहुत्तं उवकोसेणवि रयणिपुहुत्तं, ठिई जहण्णेणं वामपुहुत्तं उवकोसेणवि वासपुहुत्तं एवं अणुबंधोवि, संवेहो उवजुंजिऊण भाणियव्वा ६ । सो चेव अप्पणा उवकोसकालट्ठिईओ जाओ तस्सवि तिसुवि गमएमु एस चेव वत्तव्वया णवरं सरीरोगाहणा जहण्णेणं पंचधणुहसयाइं उवकोसेणवि पंचधणुह- सयाइं, ठिई जहण्णेणं पुव्वकोडी उवकोसेणवि पुव्वकोडी एवं अणुबंधोवि णव- सुवि एएमु गमएमु णेरइयट्ठिइं संवेहं च जाणेज्जा, सव्वत्थ भवगगहणाइं दोणिण जाव णवमगमए कालादेसेणं जहण्णेणं तेत्तीसं सागरोवमाइं पुव्वकोडीए अब्भहियाइं उवकोसेणवि तेत्तीसं सागरोवमाइं पुव्वकोडीए अब्भहियाइं एवइयं कालं सेवेज्जा एवइयं कालं गइरागइं करेज्जा ६ । सेवं भंते ! सेवं भंते ! ति जाव विहरइ ॥६६६॥

चउवीसइमं सयं बीओ उट्ठेसो

रायगिहे जाव एवं वयासी-असुरकुमारा णं भंते ! कओहिंतो उववज्जंति कि णेरइएहिंतो उववज्जंति तिरिक्ख ० मणूसो ० देवोहिंतो उववज्जंति ? गोयमा ! णो णेरइएहिंतो उववज्जंति तिरिक्ख ० मणूसोहिंतो उववज्जंति णो देवोहिंतो

उववज्जति, एवं जहेव णेरइयउहेसए जाव-पज्जत्तअसण्णिपंचिदियतिरिक्ख-
जोणिए णं भंते ! जे भविए असुरकुमारेसु उववज्जित्तए से णं भंते ! केवइय-
कालट्टिईएसु उववज्जेज्जा ? गोयमा ! जहण्णेणं वसवाससहस्सट्टिईएसु उवको-
सेणं पलिओवमस्स असंखेज्जइभागट्टिईएसु उववज्जेज्जा । ते णं भंते ! जीवा
एवं रयणप्पभागमगसरिसा णववि गमा भाणियक्खा णवरं-जाहे अप्पणा जह-
ण्णकालट्टिईओ भवइ ताहे अज्जवसाणा पसत्था णो अप्पसत्था तिसुवि गमएसु
अवसेसं तं चेव ६ । जइ सण्णिपंचिदियतिरिक्खजोणिएहितो उववज्जति कि
संखेज्जवासाउय जाव उववज्जति असंखेज्जवासाउय जाव उववज्जति ?
गोयमा ! संखेज्जवासाउय जाव उववज्जति असंखेज्जवासाउय जाव उव-
वज्जति । असंखेज्जवासाउयसण्णिपंचिदियतिरिक्खजोणिए णं भंते ! जे भविए
असुरकुमारेसु उववज्जित्तए से णं भंते ! केवइयकालट्टिईएसु उववज्जेज्जा ?
गोयमा ! जहण्णेणं वसवाससहस्सट्टिईएसु उववज्जेज्जा उवकोसेणं तिपलिओ-
वमट्टिईएसु उववज्जेज्जा । ते णं भंते ! जीवा एगसमएणं पुच्छा, गोयमा !
जहण्णेणं एक्को वा दो वा तिण्णि वा उवकोसेणं संखेज्जा उववज्जति, वइ-
रोसमणारायसंघयणी, ओगाहणा जहण्णेणं घणुहपुहुत्तं उवकोसेणं छ गाउयाइं,
समच्चउरंसंठाणसंठिया ५०, चत्तारि लेस्साओ आइल्लाओ, णो सम्मदिट्ठी
मिच्छाविट्ठी णो सम्मामिच्छाविट्ठी, णो णाणी अण्णाणी णियमं दुअण्णाणी
मइअण्णाणी य सुयअर्ण्णाणी य, जीगो तिविहोवि, उवओगो दुविहोवि, चत्तारि
सण्णाओ, चत्तारि कसाया, पंच इंदिया, तिण्णि समग्घाया आइल्लगा, समोह-
यावि मरंति असमोहयावि मरंति, वेयणा दुविहावि सायावेयगावि असाया-
वेयगावि, वेदो दुविहोवि इत्थिवेयगावि पुरिसवेयगावि णो णंपंसववेयगा, ठिई
जहण्णेणं साइरेगा पुव्वकोडी उवकोसेणं तिण्णि पलिओवमाइं, अज्जवसाणा
पसत्थावि अप्पसत्थावि, अणुबंधो जहेव ठिई, कायसवेहो भवादेसेणं दो भवग्गह-
णाइं, कालादेसेणं जहण्णेणं साइरेगा पुव्वकोडी वसहिं वाससहस्सेहिं अब्भहिया
उवकोसेणं छप्पलिओवमाइं एवइयं जाव करेज्जा १ । सो चेव जहण्णकाल-
ट्टिईएसु उववण्णो एस चेव वत्तव्वया णवरं असुरकुमारट्टिईं संवेहं च
जाणेज्जा २ । सो चेव उवकोसकालट्टिईएसु उववण्णो जहण्णेणं तिपलिओ-
वमट्टिईएसु उवकोसेणवि तिपलिओवमट्टिईएसु उववज्जेज्जा एस चेव वत्तव्वया

णवरं ठिई से जहण्णेणं तिण्णि पलिओवमाइं उक्कोसेणवि तिण्णि पलिओ-
वमाइं एवं अणुबंधोवि, कालादेसेणं जहण्णेणं छप्पलिओवमाइं उक्कोसेणवि छप्प-
लिओवमाइं एवइयं० सेसं तं चेव ३ । सो चेव अप्पणा जहण्णकालट्टिईओ जाओ
जहण्णेणं दसवामसहस्सट्टिईएमु उक्कोसेणं साइरेगं पुव्वकोडीआउएमु उववज्जे-
ज्जा । ते णं भंते ! अवसेसं तं चेव जाव भवादेसोत्ति, णवरं—ओगाहणा जहण्णेणं
धणुहपुट्टत्तं उक्कोसेणं साइरेगं धणुसहस्सं, ठिई जहण्णेणं साइरेगा पुव्वकोडी
उक्कोसेणवि साइरेगा पुव्वकोडी एवं अणुबंधोवि, कालादेसेणं जहण्णेणं साइरेगा
पुव्वकोडी दसहिं वाससहस्सेहिं अब्भहिया उक्कोसेणं साइरेगाओ दो पुव्वकोडीओ
एवइयं० ४ । सो चेव अप्पणा जहण्णकालट्टिईएमु उववण्णो एम चेव वत्तव्वया
णवरं असुरकुमारट्टिईं संवेहं च जाणेज्जा ५ । सो चेव उक्कोमकालट्टिईएमु उव-
वण्णो जहण्णेणं साइरेगपुव्वकोडीआउएमु उक्कोमेणवि साइरेगपुव्वकोडीआउ-
एमु उववज्जेज्जा सेसं तं चेव, णवरं कालादेसेणं जहण्णेणं साइरेगाओ दो पुव्व-
कोडीओ उक्कोसेणवि साइरेगाओ दो पुव्वकोडीओ एवइयं कालं सेवेज्जा० ६ ।
सो चेव अप्पणा उक्कोसकालट्टिईओ जाओ सो चेव पढमगमगो भाणियद्वो णवरं
ठिई जहण्णेणं तिण्णि पलिओवमाइं उक्कोसेणं वि तिण्णि पलिओवमाइं
एवं अणुबंधोवि, कालादेसेणं जहण्णेणं तिण्णि पलिओवमाइं दसहिं वास-
सहस्सेहिं अब्भहियाइं उक्कोसेणं छ पलिओवमाइं एवइयं० ७ । सो चेव जहण्ण-
कालट्टिईएमु उववण्णो एम चेव वत्तव्वया णवरं असुरकुमारट्टिईं संवेहं च जाणेज्जा
८ । सो चेव उक्कोमकालट्टिईएमु उववण्णो जहण्णेणं तिपलिओव० उक्कोमेणवि
तिपलिओव० एम चेव वत्तव्वया णवरं—कालादेसेणं जहण्णेणं छप्पलिओवमाइं
उक्कोसेणवि छप्पलिओवमाइं एवइयं० ९ । जइ संखेज्जवासाउयसण्णिपत्तिदिय
जाव उववज्जति किं जलचर० एवं जाव—पज्जत्तसंखेज्जवासाउयसण्णिपत्तिदिय
तिरिक्खजोणिणं णं भंते ! जे भविण्णं असुरकुमारेणु उववज्जत्तं ते णं
भंते ! केवइयकालट्टिईएमु उववज्जेज्जा ? गोयमा ! जहण्णेणं दसवामसहस्स-
ट्टिईएमु उक्कोसेणं साइरेगसागरोवमट्टिईएमु उववज्जेज्जा । ते णं भंते ! जीवा
एगसमएणं एवं एएसिं रयणप्पभपुढविगमगसरिसा णव गमगा गेयव्वा, णवरं
जाहे अप्पणा जहण्णकालट्टिईओ भवइ ताहे तिसुवि गमएमु इमं णाणत्तं—चत्तरि
लेस्साओ अज्जवसाणा पसत्था णो अप्पसत्था सेसं तं चेव, संवेहो साइरेगेण

सागरोवमेण कायव्वो ६। जइ मणुस्सेह्हितो उववज्जंति कि सण्णिमणुस्सेह्हितो उ०, असण्णिमणुस्सेह्हितो उ० ? गोयमा ! सण्णिमणुस्सेह्हितो उ० णो असण्णिमणुस्सेह्हितो उववज्जंति । जइ सण्णिमणुस्सेह्हितो उववज्जंति कि संखेज्जवासाउयसण्णिमणुस्सेह्हितो उववज्जंति ? गोयमा ! संखेज्जवासाउय जाव उववज्जंति असंखेज्जवासाउय जाव उववज्जंति । असंखेज्जवासाउयसण्णिमणुस्से णं भंते ! जे भविए असुरकुमारेसु उववज्जित्तए से णं भंते ! केवइयकालट्ठिईएसु उववज्जेज्जा ? गोयमा ! जहण्णेणं दसवाससह्हस्सट्ठिईएसु उक्कोसेणं तिपल्लिओवमट्ठिईएसु उववज्जेज्जा एवं असंखेज्जवासाउयतिरिक्खजोणियसरिसा आइल्ला तिण्णि गमगा पेयव्वा, णवरं सरीरोगाहणा पढमब्बिइएसु गमएसु जहण्णेणं साइरेगाइं पंचधणुहसयाइं उक्कोसेणं तिण्णि गाउयाइं सेसं तं चेव, तइयगमे ओगाहणा जहण्णेणं तिण्णि गाउयाइं उक्कोसेणवि तिण्णि गाउयाइं सेसं जहेव तिरिक्खजोणियाणं ३। सो चेव अप्पणा जहण्णकालट्ठिईओ जाओ तस्सवि जहण्णकालट्ठिईयतिरिक्खजोणियसरिसा तिण्णि गमगा भाणियव्वा, णवरं सरीरोगाहणा तिसुवि गमएसु जहण्णेणं साइरेगाइं पंचधणुहसयाइं उक्कोसेणवि साइरेगाइं पंचधणुहसयाइं सेसं तं चेव ६। सो चेव अप्पणा उक्कोसकालट्ठिईओ जाओ तस्सवि ते चेव पच्छिल्लगा तिण्णि गमगा भाणियव्वा णवरं सरीरोगाहणा तिसुवि गमएसु जहण्णेणं तिण्णि गाउयाइं उक्कोसेणवि तिण्णि गाउयाइं, अवसेसं तं चेव ६। जइ संखेज्जवासाउयसण्णिमणुस्सेह्हितो उववज्जंति कि पज्जत्तसंखेज्जवासाउय० अपज्जत्तसंखेज्ज० जाव उववज्जंति ? गोयमा ! पज्जत्तसंखेज्ज० णो अपज्जत्तसंखेज्ज० । पज्जत्तसंखेज्जवासाउयसण्णिमणुस्से णं भंते ! जे भविए असुरकुमारेसु उववज्जित्तए से णं भंते ! केवइयकालट्ठिईएसु उववज्जेज्जा ? गोयमा ! जहण्णेणं दसवाससह्हस्सट्ठिईएसु उक्कोसेणं साइरेगसागरोवमट्ठिईएसु उववज्जेज्जा । ते णं भंते ! जीवा० एवं जहेव एएसि रयणप्पभाए उववज्जमाणाणं णव गमगा तहेव इहवि णव गमगा भाणियव्वा, णवरं संवेहो साइरेगेण सागरोवमेण कायव्वो, सेसं तं चेव ६। सेवं भंते ! २ त्ति ॥ ६६७ ॥

चउवीसइमं सयं तइओ उद्देसो

रायगिहे जाव एवं वयासी-णागकुमारा णं भंते ! कओह्हितो उववज्जंति

किं णेरइएहिंतो उववज्जंति तिरि० मणु० देवेहिंतो उववज्जंति ? गोयमा !
 णो णेरइएहिंतो उववज्जंति तिरिक्खजोणिएहिंतो उ० मणुस्सेहिंतो उववज्जंति
 णो देवेहिंतो उववज्जंति । जइ तिरिक्खजोणि० एवं जहा असुरकुमारणं वत्त-
 व्वया तथा एएसि पि जाव असण्णित्ति । जइ सण्णिपंचिदियतिरिक्खजोणिएहिंतो
 उ० किं संखेज्जवासाउय० असंखेज्जवासाउय० ? गोयमा ! संखेज्जवासाउय
 असंखेज्जवासाउय० जाव उववज्जंति । असंखेज्जवासाउयसण्णि पंचिदियतिरि-
 व्खजोणिए णं भंते ! जे भविए णागकुमारेसु उववज्जित्तए से णं भंते ! केवइ-
 कालट्टिई० ? गोयमा ! जहण्णेणं वसवाससहस्सट्टिईएसु उवकोसेणं देसूणादुपति-
 ओवमट्टिईएसु उववज्जेज्जा । ते णं भंते ! जीवा अवसेसो सो चेव असुरकुमारेसु
 उववज्जमाणस्स गमगो भाणियव्वो जाव भवादेसोत्ति, कालादेसेणं जहण्णेणं
 साइरेगा पुव्वकोडी वसहिं वाससहस्सेहिं अड्भहिया उवकोसेणं देसूणाइं
 पंच पलिओवमाइं एवइयं जाव करेज्जा १ । सो चेव जहण्णकालट्टिईएसु
 उववण्णो एस चेव वत्तव्वया णवरं णागकुमारट्टिइं संवेहं च जाणेज्जा २ । सो
 चेव उक्कोसकालट्टिईएसु उववण्णो तस्सवि एस चेव वत्तव्वया णवरं ठिई
 जहण्णेणं देसूणाइं दो पलिओवमाइं उवकासेणं तिण्णि पलिओवमाइं सेसं तं चेव
 जाव भवादेसोत्ति, कालादेसेणं जहण्णेणं देसूणाइं चत्तारि पलिओवमाइं उवका-
 सेणं देसूणाइं पंच पलिओवमाइं एवइयं० ३ । सो चेव अप्पणा जहण्णकाल-
 ट्टिईओ जाओ तस्सवि तिसुवि गमएसु जहेव असुरकुमारेसु उववज्जमाणस्स-
 जहण्णकालट्टिईयस्स तहेव णिरवसेसं ६ । सो चेव अप्पणा उवकोसकालट्टिईओ
 तस्सवि तहेव तिण्णि गमगा जहा असुरकुमारेसु उववज्जमाणस्स णवरं
 णागकुमारट्टिइं संवेहं च जाणेज्जा सेसं तं चेव ६ । जइ संखेज्जवासाउय-
 सण्णिपंचिदिय जाव किं पज्जत्तसंखेज्जवासाउय०, अपज्जत्तसंखेज्ज० ? गोयमा !
 पज्जत्तसंखेज्जवासाउय० णो अपज्जत्तसंखेज्जवासाउय० । पज्जत्तसंखेज्जवामा-
 उय०, जाव जे भविए णागकुमारेसु उववज्जित्तए से णं भंते ! केवइयकाल-
 ट्टिईएसु उववज्जेज्जा ? गोयमा ! जहण्णेणं वसवाससहस्साइं उवकोसेणं देसू-
 णाइं दो पलिओवमाइं एवं जहेव असुरकुमारेसु उववज्जमाणस्स वत्तव्वया
 तहेव इहवि णवसुवि गमएसु, णवरं णागकुमारट्टिइं संवेहं च जाणेज्जा, सेसं तं
 चेव ६ । जइ मणुस्सेहिंतो उववज्जंति किं सण्णिमणु० असण्णिमणु० ?

गोयमा ! सण्णिमणुस्से० णो असण्णिमणुस्से० जहा असुरकुमारेसु उववज्जमाणस्स
 जाव-असंखेज्जवासाउयसण्णिमणुस्से णं भंते ! जे भविए णागकुमारेसु
 उववज्जित्तए से णं भंते ! केवइयकालट्टिईएसु उववज्जइ ? गोयमा ! जहण्णेणं
 दसवाससहस्सट्टिईएसु उक्कोसेणं देसूणदोपलिओवमट्टिईएसु एवं जहेव असंखे-
 ज्जवासाउयाणं तिरिक्खजोणियाणं णागकुमारेसु आइत्ला तिण्णि गमगा तहेव
 इमस्सवि, णवरं पढमबिइएसु गमएसु सरीरोगाहणा जहण्णेणं साइरेगाइं पंच-
 धणुहसयाइं उक्कोसेणं तिण्णि गाउयाइं, तइयगमे ओगाहणा जहण्णेणं देसूणाइं
 दो गाउयाइं उक्कोसेणं तिण्णि गाउयाइं सेसं तं चेव ३ । सो चेव अप्पणा जह-
 णकालट्टिईओ जाओ तस्स तिसुवि गमएसु जहा तस्स चेव असुरकुमारेसु
 उववज्जमाणस्स तहेव णिरवसेसं ६ । सो चेव अप्पणा उक्कोसकालट्टिईओ जाओ
 तस्स तिसुवि गमएसु जहा तस्स चेव उक्कोसकालट्टिईयस्स असुरकुमारेसु उवव-
 ज्जमाणस्स णवरं णागकुमारट्टिइं संवेहं च जाणेज्जा, सेसं तं चेव ६ । जइ
 संखेज्जवासाउयसण्णिमणु० कि पज्जत्तसंखेज्ज० अपज्जत्तसंखेज्ज० ? गोयमा !
 पज्जत्तसंखेज्ज० णो अपज्जत्तसंखेज्ज० । पज्जत्तसंखेज्जवासाउयसण्णिमणुस्से
 णं भंते ! जे भविए णागकुमारेसु उववज्जित्तए से णं भंते ! केवइ० ? गोयमा !
 जहण्णेणं दसवाससहस्सट्टिईएसु उक्कोसेणं देसूणदोपलिओवमट्टिईएसु उ० एवं
 जहेव असुरकुमारेसु उववज्जमाणस्स सच्चेव लद्धी णिरवसेसा णवसु गमएसु
 णवरं णागकुमारट्टिइं संवेहं च जाणेज्जा । सेवं भंते ! २ त्ति ॥ ६६८ ॥

चउवीसइमं सयं ४-११ उद्देसा

अवसेसा सुवण्णकुमाराई जाव थणियकुमारा एए अट्टवि उद्देसगा जहेव
 णागकुमाराणं तहेव णिरवसेसा भाणियन्वा । सेवं भंते ! २ त्ति ॥ ६६९ ॥

चउवीसइमं सयं दुवालसमो उद्देसो

पुढविक्काइया णं भंते ! कओहिंतो उववज्जंति कि णेरइएहिंतो उवव-
 ज्जंति तिरिक्ख० मणु० देवेहिंतो उववज्जंति ? गोयमा ! णो णेरइएहिंतो
 उववज्जंति तिरिक्ख० मणु० देवेहिंतोवि उववज्जंति । जइ तिरिक्खजोणिएहिंतो
 उ० कि एगिदियतिरिक्खजोणिए० एवं जहा वक्कतीए उववाओ जाव-जइ बायर-
 पुढविक्काइयाएगिदियतिरिक्खजोणिएहिंतो उववज्जंति कि पज्जत्तबायर जाव

उववज्जति अपज्जत्तवायरपुट्टवि जाव उ०? गोयमा ! पज्जत्तवायरपुट्टवि० अप-
 ज्जत्तवायरपुट्टवि जाव उववज्जति । पुट्टविककाइए णं भंते ! जे भविए पुट्टवि-
 वकाइएसु उववज्जित्तए से णं भंते ! केवइयकालट्टिईएसु उववज्जेज्जा ?
 गोयमा ! जहण्णेणं अंतोमुहुत्तट्टिईएसु उवकोसेणं बावीसवाससहस्सट्टिईएसु उव-
 वज्जेज्जा । ते णं भंते ! जीवा एगसमएणं पुच्छा, गोयमा ! अणुत्तमयं अवि-
 र्हिया असंखेज्जा उववज्जति, छेवट्टसंघयणी, मरीरोगाहणा जहण्णेणं अंगुलस्स
 असंखेज्जइभागं उवकोसेणवि अंगुलस्स असंखेज्जइभागं, मसूरचंदसंठिया, चत्तारि
 लेस्साओ, णो सम्मादिट्ठी मिच्छादिट्ठी णो सम्मामिच्छादिट्ठी, णो णाणी
 अण्णाणी दो अण्णाणा णियमं, णो मणजोगी णो वइजोगी कायजोगी, उवओगो
 दुविहोवि, चत्तारि सण्णाओ, चत्तारि कसया, एगे फांसिदिए पणत्ते, तिण्णि सम-
 गघया, वेयणा दुविहा, णो इत्थिवेयगा णो पुरिसवेयगा णपंसगवेयगा, ठिई जहण्णेणं
 अंतोमुहुत्तं उवकोसेणं बावीसं वाससहस्साइं, अज्जवसाणा पसत्थावि अप्पस-
 तथावि अणुबंधो जहा ठिई १ । से णं भंते ! पुट्टविककाइए पुणरवि पुट्टविककाइ-
 एत्ति केवइयं कालं सेवेज्जा केवइयं कालं गइरागइं करेज्जा ? गोयमा ! भवा-
 देसेणं जहण्णेणं दो भवगहणाइं उवकोसेणं असंखेज्जाइं भवगहणाइं, काला-
 देसेणं जहण्णेणं दो अंतोमुहुत्ता उवकोसेणं असंखेज्जं कालं एवइयं जाव करेज्जा
 १ । सो चेव जहण्णकालट्टिईएसु उववण्णो जहण्णेणं अंतोमुहुत्तट्टिईएसु उवको-
 सेणवि अंतोमुहुत्तट्टिईएसु एवं चेव वत्तव्वया णिरवसेसा २ । सो चेव उवकोस
 कालट्टिईएसु उववण्णो जहण्णेणं बावीसवाससहस्सट्टिईएसु उवकोसेणवि बावीस-
 वाससहस्सट्टिईएसु सेसं तं चेव जाव अणुबंधोत्ति, णवरं जहण्णेणं एक्को वा दो
 वा तिण्णि वा उवकोसेणं संखेज्जा वा असंखेज्जा वा उववज्जेज्जा, भवादेसेणं
 जहण्णेणं दो भवगहणाइं उवकोसेणं अट्ट भवगहणाइं, कालादेसेणं जहण्णेणं
 बावीसं वाससहस्साइं अंतोमुहुत्तमव्वहिंयाइं उवकोसेणं छावत्तारि वाससहस्सुत्तरं
 सयसहस्सं एवइयं कालं जाव करेज्जा ३ । सो चेव अप्पणा जहण्णकालट्टिईओ
 जाओ सो चेव पट्टमित्तलो गमओ भाणियव्वो णवरं लेस्साओ तिण्णि, ठिई
 जहण्णेणं अंतोमुहुत्तं उवकोसेणवि अंतोमुहुत्तं, अप्पसत्था अज्जवसाणा, अणुबंधो
 जहा ठिई, सेसं तं चेव ४ । सो चेव जहण्णकालट्टिईएसु उववण्णो सच्चेव चउत्थ-
 गमगवत्तव्वया भाणियव्वया ५ । सो चेव उवकोसकालट्टिईएसु उववण्णो एस चेव

वत्त्वव्या णवरं जहण्णेणं एक्को वा दो वा तिण्णि वा उक्कोसेणं संखेज्जा वा असखेज्जा वा जाव भवादेसेणं जहण्णेणं दो भवग्गहणाइं उक्कोसेणं अट्ट भवग्गहणाइं, कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं उक्कोसेणं अट्टासीइं वाससहस्साइं चउर्हि अंतोमुहुत्तोहि अब्भहियाइं एवइयं ६ । सो चेव अप्पणा उक्कोसकालट्टिईओ जाओ एवं तइयगमगसरिसो णिरवसेसो भाणियब्बो णवरं अप्पणा से टिई जहण्णेणं बावीसं वाससहस्साइं उक्कोसेणवि बावीसं वाससहस्साइं ७ । सो चेव जहण्णकालट्टिईएसु उववण्णो जहण्णेणं अंतोमुहुत्तं उक्कोसेणवि अंतोमुहुत्तं, एवं जहा सत्तमगमगो जाव भवादेसो, कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं उक्कोसेणं अट्टासीइं वाससहस्साइं चउर्हि अंतोमुहुत्तोहि अब्भहियाइं एवइयं ८ । सो चेव उक्कोसकालट्टिईएसु उववण्णो जहण्णेणं बावीसं वाससहस्सट्टिईएसु उक्कोसेणवि बावीसं वाससहस्सट्टिईएसु एस चेव सत्तमगमगवत्त्वव्या जाणियब्बा जाव भवादेसोत्ति, कालादेसेणं जहण्णेणं चोयालीसं वाससहस्साइं उक्कोसेणं छावत्तरिवाससहस्सुत्तरं सयसहस्सं एवइयं ९ । जइ आउक्काइयएंगियतिरिक्खजोणिएंहितो उववज्जति किं मुहुमआउं वावरआउं ? एवं चउक्कओ भेदो भाणियब्बो जहा पुढविवकाइयाणं । आउक्काइएणं भंते ! जे भविए पुढविवकाइएसु उववज्जित्तए से णं भंते ! केवइयकालट्टिईएसु उववज्जेज्जा ? गोयमा ! जहण्णेणं अंतोमुहुत्तट्टिईएसु उक्कोसेणं बावीसं वाससहस्सट्टिईएसु उववज्जेज्जा, एवं पुढविवकाइयगमगसरिसा णवगमगा भाणियब्बा ९, णवरं थिबुगबिदुसंठिए, ठिई जहण्णेणं अंतोमुहुत्तं उक्कोसेणं सत्त वाससहस्साइं, एवं अणुबंधोवि एधं तिसुवि गमएसु, ठिई संवेहो तइयछट्टसत्तमट्टमणवमगमएसु भवादेसेणं जहण्णेणं दो भवग्गहणाइं उक्कोसेणं अट्ट भवग्गहणाइं, सेसेसु चउसु गमएसु जहण्णेणं दो भवग्गहणाइं उक्कोसेणं असंखेज्जाइं भवग्गहणाइं, तइयगमए कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं उक्कोसेणं सोलसुत्तरं वाससयसहस्सं एवइयं, छट्ठे गमए कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं उक्कोसेणं अट्टासीइं वाससहस्साइं चउर्हि अंतोमुहुत्तोहि अब्भहियाइं एवइयं, सत्तमे गमए कालादेसेणं जहण्णेणं सत्त वाससहस्साइं अंतोमुहुत्तमब्भहियाइं उक्कोसेणं सोलसुत्तरवाससयसहस्सं एवइयं, अट्टमे गमए कालादेसेणं जहण्णेणं सत्त वाससहस्साइं

अंतोमुहुत्तमवहियाइं उक्कोसेणं अट्टावीसं वाससहस्साइं चउहिं अंतोमुहुत्तोहिं अवहियाइं एवइयं०, णवमे गमए भवादेसेणं जहण्णेणं दो भवग्गहणाइं उक्कोसेणं अट्ट भवग्गहणाइं, कालादेसेणं जहण्णेणं एगूणतीसं वाससहस्साइं उक्कोसेणं सोलसुत्तरं वाससयसहस्सं एवइयं०, एवं णवसुवि गमएसु आउक्काइयठिईं जाणियव्वा ६ । जइ तेउक्काइएहिंतो उववज्जंति०? तेउक्काइयाणवि एस चेव वत्तव्वा णवरं णवसुवि गमएसु तिण्णि लेस्साओ तेउक्काइयाणं सुई-कलावसंठिया ठिईं जाणियव्वा तइयगमए कालादेसेणं जहण्णेणं बावीसं वाससहस्साइं अंतोमुहुत्तमवहियाइं उक्कोसेणं अट्टासीइं वाससहस्साइं बारसहिं राइंदिएहिं अवहियाइं एवइयं एवं संवेहो उवज्जंजिऊण भाणियव्वा ६ । जइ वाउक्काइएहिंतो उववज्जंति०? वाउक्काइयाणवि एवं चेव णव गमगा अहेव तेउक्काइयाणं णवरं पडागासंठिया प० संवेहो वाससहस्सेहिं कायव्वा तइयगमए कालादेसेणं जहण्णेणं बावीसं वाससहस्साइं अंतोमुहुत्तमवहियाइं उक्कोसेणं एगं वाससयसहस्सं एवं संवेहो उवज्जंजिऊण भाणियव्वा । जइ वणस्सइ-काइएहिंतो उववज्जंति०? वणस्सइकाइयाणं आउक्काइयगमसरिसा णव गमगा भाणियव्वा णवरं णाणासंठिया सरीरोगाहणा पढमएसु पच्छिल्लएसु य तिसु गमएसु जहण्णेणं अंगुत्तस्स असंखेज्जइभागं उक्कोसेणं साइरेगं जोयणसहस्सं मज्झिल्लएसु तिसु तहेव जहा पुढविकाइयाणं संवेहो ठिईं य जाणियव्वा तइयगमए कालादेसेणं जहण्णेणं बावीसं वाससहस्साइं अंतोमुहुत्तमवहियाइं उक्कोसेणं अट्टावीसुत्तरं वाससयसहस्सं एवइयं एवं संवेहो उवज्जंजिऊण भाणियव्वा ॥ ७०० ॥ जइ बेइंदिएहिंतो उववज्जंति कि पज्जत्तबेइंदिएहिंतो उववज्जंति, अपज्जत्तबेइंदिएहिंतो उववज्जंति ? गोयमा ! पज्जत्तबेइंदिएहिंतो उववज्जंति अपज्जत्तबेइंदिएहिंतोवि उववज्जंति । बेइंदिए णं भंते ! जे भविए पुढविकाइएसु उववज्जंत्तए से णं भंते ! केवइकाल० ? गोयमा ! जहण्णेणं अंतोमुहुत्तट्टिईएसु उक्कोसेणं बावीसवाससहस्सट्टिईएसु । ते णं भंते ! जीवा एगसमएणं० ? गोयमा ! जहण्णेणं एक्को वा दो वा तिण्णि वा उक्कोसेणं संखेज्जा वा असंखेज्जा वा उववज्जंति, छेवट्टसंघयणी, ओगाहणा जहण्णेणं अंगुत्तस्स असंखेज्जइभागं उक्कोसेणं बारस जोयणाइं, हुंडसंठिया, तिण्णि लेस्साओ, सम्पदिट्ठीवि मिच्छादिट्ठीवि णो सम्मामिच्छादिट्ठी, दो णाणा दो अण्णाणा णियमं,

णो मणजोगी वइजोगीवि कायजोगीवि, उवओगो दुविहोवि, चत्तारि सण्णाओ,
 चत्तारि कंसाया, दो इंदिया प०, तं०—जिन्निवि ए य फासिदि ए य, तिणि
 समुघाया सेसं जहा पुढविक्काइयाणं णवरं ठिई जहण्णेणं अंतोमुहुत्तं उक्कोसेणं
 बारस संवच्छराइं एवं अणुबंधोवि, सेसं तं चेव, भवादेसेणं जहण्णेणं दो भव-
 गहणाइं उक्कोसेणं संखेज्जाइं भवग्गहणाइं, कालादेसेणं जहण्णेणं दो अंतोमु-
 हुत्ता उक्कोसेणं संखेज्जं कालं एवइयं० १ । सो चेव जहण्णकालद्विईएसु उववण्णो
 एस चेव वत्तव्वया सव्वा २ । सो चेव उक्कोसकालद्विईएसु उववण्णो एस चेव
 वेइंदियस्स लद्धो णवरं भवादेसेणं जहण्णेणं दो भवग्गहणाइं उक्कोसेणं अट्ट
 भवग्गहणाइं, कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं
 उक्कोसेणं अट्टासीइं वाससहस्साइं अडधालीसाए संवच्छरेहि अब्भहियाइं एव-
 इयं० ३ । सो चेव अप्पणा जहण्णकालद्विईओ जाओ तस्सवि एस चेव वत्तव्वया
 तिसुवि गमएसु णवरं इमाइं सत्त णाणत्ताइं सरीरोगाहणा जहा पुढविक्काइयाणं,
 णो सम्मविट्ठी मिच्छादिट्ठी णो सम्मामिच्छादिट्ठी, दो अण्णाणा णियमं,
 णो मणजोगी णो वइजोगी कायजोगी, ठिई जहण्णेणं अंतोमुहुत्तं उक्कोसेणवि
 अंतोमुहुत्तं, अज्जवसाणां अप्पसत्था, अणुबंधो जहा ठिई, संवेहो तहेव आइल्लेसु
 दोसु गमएसु तइयगमए भवादेसो तहेव अट्ट भवग्गहणाइं कालादेसेणं जहण्णेणं
 बावीसं वाससहस्साइं अंतोमुहुत्तमब्भहियाइं उक्कोसेणं अट्टासीइं वाससहस्साइं
 चउर्हि अंतोमुहुत्तेहि अब्भहियाइं एवइयं० ६ । सो चेव अप्पणा उक्कोसकालद्वि-
 ईओ जाओ एयस्सवि ओहियगमगसरिसा तिणि गमगा भाणियव्वा णवरं तिसुवि
 गमएसु ठिई जहण्णेणं बारस संवच्छराइं उक्कोसेणवि बारस संवच्छराइं, एवं अणु-
 बंधोवि, भवादेसेणं जहण्णेणं दो भवग्गहणाइं उक्कोसेणं अट्ट भवग्गहणाइं, काला-
 देसेणं उवजुंजिऊण भाणियव्वं जाव णवमे गमए जहण्णेणं बावीसं वाससहस्साइं
 बारसहि संवच्छरेहि अब्भहियाइं उक्कोसेणं अट्टासीइं वाससहस्साइं अडधालीसाए
 संवच्छरेहि अब्भहियाइं एवइयं० ६ । जइ तेइंदिएहितो उववज्जंति०?
 एवं चेव णव गमगा भाणियव्वा णवरं आइल्लेसु तिसुवि गमएसु सरीरोगाहणा
 जहण्णेणं अंगुलस्स असंखेज्जइभागं उक्कोसेणं तिणि गाउयाइं, तिणि इंदि-
 याइं, ठिई जहण्णेणं अंतोमुहुत्तं उक्कोसेणं एगूणपणं राइंदियाइं, तइयगमए
 कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं उक्कोसेणं

अट्टासीई वाससहस्साई छण्णउई राईदियसयमव्वभहियाई एवइयं०, मज्झिमा
 तिण्णि गमगा तहेव पच्छिमावि तिण्णि गमगा तहेव णवरं ठिई जहण्णेणं
 एगुणपण्णं राईदियाई उक्कोसेणवि एगुणपण्णं राईदियाई संवेहो उवज्जिऊण
 भाणियव्वो ६ । जइ चउरिदिएहितो उववज्जति एवं चेव चउरिदियाणवि णव
 गमगा भाणियव्वः णवरं एएसु चेव ठाणसु णाणत्ता भाणियव्वा सरीरोगाहणा
 जहण्णेणं अंगुलस्स असंखेज्जइभागं उक्कोसेणं चत्तारि गाउयाई, ठिई जहण्णेणं
 अंतोमुहुत्तं उक्कोसेणं छम्मासा एव अणुबंधोवि, चत्तारि इंदियाई सेसं तं चेव
 जाव णवमगमए कालादेसेणं जहण्णेणं बावीसं वाससहस्साई छहिं मासेहिं अब्भ-
 हियाई उक्कोसेणं अट्टासीई वाससहस्साई चउवीसाए मासेहिं अब्भहियाई एव-
 इयं० ६ । जइ पंचिदियतिरिक्खजोणिएहितो उववज्जति किं सण्णिपंचिदिय-
 तिरिक्खजोणिएहितो उववज्जति असण्णिपंचिदियतिरिक्खजोणिए० ? गोयमा !
 सण्णिपंचिदिय०, असण्णिपंचिदिय० । जइ असण्णिपंचिदिय जाव उ० किं जल-
 चरेहितो उववज्जति जाव किं पज्जत्तएहितो उववज्जति अपज्जत्तएहितो उव-
 वज्जति ? गोयमा ! पज्जत्तएहितावि उववज्जति अपज्जत्तएहितोवि उववज्जति ।
 असण्णिपंचिदियतिरिक्खजोणिए णं भते ! जे भविए पुट्ठिव्वाइएसु उवव-
 ज्जत्तए से णं भते ! केवइ० ? गोयमा ! जहण्णेणं अंतोमुहुत्तं उक्कोसेणं
 बावीसं वाससहस्साई । ते णं भते ! जीवा० एवं जहेव बेइंदियस्स ओहियमए
 लद्धी तहेव णवरं सरीरोगाहणा जहण्णेणं अंगुलस्स असंखेज्जइभागं उक्कोसेणं
 जोयणसहस्सं, पंचिदिया, ठिई अणुबंधो य जहण्णेणं अंतोमुहुत्तं उक्कोसेणं पुव्व-
 कोडी सेसं तं चेव, भवादेसेणं जहण्णेणं दो भवगहणाई उक्कोसेणं अट्ट भवगह-
 णाई, कालादेसेणं जहण्णेणं दो अंतोमुहुत्ता उक्कोसेणं चत्तारि पुव्वकोडीओ
 अट्टासीईए वाससहस्सेहिं अब्भहियाओ एवइयं० णवसुवि गमएसु कायसंवेहो
 भवादेसेणं जहण्णेणं दो भवगहणाई उक्कोसेणं अट्ट भवगहणाई कालादेसेणं
 उवज्जिऊण भाणियव्वं, णवरं मज्झिमएसु तिसु गमएसु जहेव बेइं-
 दियस्स पच्छिस्सएसु तिसु गमएसु जहा एयस्स चेव पडमगमएसु, णवरं
 ठिई अणुबंधो य जहण्णेणं पुव्वकोडी उक्कोसेणवि पुव्वकोडी, सेसं तं चेव
 जाव णवम गमएसु जहण्णेणं पुव्वकोडी बावीसाए वाससहस्सेहिं अब्भ-
 हिया उक्कोसेणं चत्तारि पुव्वकोडीओ अट्टासीईए वाससहस्सेहिं अब्भहियाओ
 एवइयं कालं सेवेज्जा० ६ । जइ सण्णिपंचिदियतिरिक्खजोणि० जाव उ० किं

संखेज्जवासाउय० असंखेज्जवासाउय० ? गोयमा ! संखेज्जवासाउय० णो असंखेज्जवासाउय जाव उ० । जइ संखेज्जवासाउय जाव उ० किं जलचरेहिंतो सेसं जहा असणीणं जाव-ते णं भंते ! जीवा एगसमएणं केवइया उववज्जंति एवं जहा रयणप्पभाए उववज्जमाणस्स सण्णिपंचिदियस्स तहेव इहवि, णवरं ओगाहणा जह्णणेणं अंगुलस्स असंखेज्जइभागं उक्कोसेणं जौयणसहस्सं सेसं तहेव जाव कालादेसेणं जह्णणेणं दो अंतोमहुत्ता उक्कोसेणं चत्तारि पुव्वकोडीओ अट्टासीईए वाससहस्सेहिं अक्कमहियाओ एवइयं०, एवं संवेहो णवसुवि गमएसु जहा असणीणं तहेव णिरवसेसं लद्धी से आइल्लएसु तिसुवि गमएसु एस चेव पच्चिल्लएसुवि तिसुवि गमएसु एस चेव णवरं इमाइं णव णाणत्ताइं ओगाहणा जह्णणेणं अंगुलस्स असंखेज्जइभागं उक्कोसेणवि अंगुलस्स असंखेज्जइभागं, तिण्णि लेस्साओ, मिच्छादिट्ठी, दो अण्णाणा, कायजोगी, तिण्णि समुग्घाघा, ठिई जह्णणेणं अंतोमहुत्तं उक्कोसेणवि अंतोमहुत्तं, अप्पसत्था अज्जवसाणा, अणुबंधो जहा ठिई सेसं तं चेव, पच्चिल्लएसु तिसुवि गमएसु जहेव पढमगमए णवरं ठिई अणुबंधो जह्णणेणं पुव्वकोडी उक्कोसेणवि पुव्वकोडी, सेसं तं चेव ६ ।। ७०१ ।। जइ मणुस्सेहिंतो उववज्जंति किं सण्णिमणुस्सेहिंतो उववज्जंति असण्णिमणुस्सेहिंतो उ० ? गोयमा ! सण्णिमणुस्सेहिंतो उववज्जंति असण्णिमणुस्सेहिंतोवि उववज्जंति । असण्णिमणुस्से णं भंते ! जे भविए पुढविककाइएसु० से णं भंते ! केवइयकालट्टिईएसु एवं जहा असण्णिपंचिदियतिरिक्खजोणियस्स जह्णणकालट्टिईयस्स तिण्णि गमगा तहा एयस्सवि ओहिया तिण्णि गमगा भाणियध्वा तहेव णिरवसेसा सेसा छ णं भंति १ । जइ सण्णिमणुस्सेहिंतो उववज्जंति किं संखेज्जवासाउय० असंखेज्जवासाउय जाव उ० ? गोयमा ! संखेज्जवासाउय० णो असंखेज्जवासाउय जाव उ० । जइ संखेज्जवासाउय जाव उ० किं पज्जत्त० अपज्जत्त० ? गोयमा ! पज्जत्तसंखेज्जवासाउय० अपज्जत्तसंखेज्जवासा जाव उ० । सण्णिमणुस्से णं भंते ! जे भविए पुढविककाइएसु उववज्जित्तए से णं भंते ! केवइकाल० ? गोयमा ! जह्णणेणं अंतोमहुत्तं उक्कोसेणं बाधीसं वाससहस्सट्टिईएसु । ते णं भंते ! जीवा एवं जहेव रयणप्पभाए उववज्जमाणस्स तहेव तिसुवि गमएसु लद्धी णवरं ओगाहणा जह्णणेणं अंगुलस्स असंखेज्जइभागं उक्कोसेणं पंचधणुहसघाइं, ठिई जह्णणेणं अंतोमहुत्तं उक्को-

सेणं पुक्वकोडी एवं अणुबंधो, संवेहो णवसु गमएसु जहेव सण्णिपंचिदियस्स मज्झिन्लएसु तिसु गमएसु लद्धी जहेव सण्णिपंचिदियस्स म० सेसं तं चेव पिरव-
 सेसं, पच्छिल्ला तिण्णि गमगा जहा एयस्स खेव ओहिया गमगा णवरं ओगा-
 हणा जहण्णेणं पंचधणुहसयाइं उक्कोसेणवि पंच धणुहसयाइं, ठिई अणुबंधो
 जहण्णेणं पुक्वकोडी उक्कोसेणवि पुक्वकोडी सेसं तहेव णवरं पच्छिन्लएसु गम-
 एसु संखेज्जा उववज्जंति णो असंखेज्जा उववज्जंति । जइ देवेहिंतो उववज्जंति
 कि भवणवासिदेवेहिंतो उववज्जंति वाणमतर० जोइसियदेवेहिंतो उववज्जंति
 वेमाणियदेवेहिंतो उववज्जंति ? गोयमा ! भवणवासिदेवेहिंतोवि उववज्जंति जाव
 वेमाणियदेवेहिंतोवि उववज्जंति । जइ भवणवासिदेवेहिंतो उववज्जंति कि असुर-
 कुमारभवणवासिदेवेहिंतो उववज्जंति जाव थणियकुमारभवणवामिदेवेहिंतो
 उ० ? गोयमा ! असुरकुमारभवणवासिदेवेहिंतो उववज्जंति जाव थणिय-
 कुमारभवणवासिदेवेहिंतो उववज्जंति । असुरकुमारे णं भंते ! जे भविए पुढवि-
 व्काइएसु उववज्जंति ए से णं भंते ! केवइ० ? गोयमा ! जहण्णेणं अंतोमुहत्तं
 उक्कोसेणं बावोसं वाससहस्साइं ठिई । ते णं भंते ! जीवा पुच्छा, गोयमा !
 जहण्णेणं एक्को वा दो वा तिण्णि वा उक्कोसेणं संखेज्जा वा असंखेज्जा वा
 उववज्जंति । तेसि णं भंते ! जीवाणं सरीरगा किसंघयणी प० ? गोयमा ! छण्हं
 संघयणं असंघयणी जाव परिणमति । तेसि णं भंते ! जीवाणं केमहालिया
 सरीरोगाहणा ? गोयमा ! दुविहा प०, तं०—भवधारणिज्जा य उत्तरवेउच्चिया
 य, तत्थ णं जा सा भवधारणिज्जा सा जहण्णेणं अंगुलस्स असंखेज्जइभागं
 उक्कोसेणं सत्त रयणीओ, तत्थ णं जा सा उत्तरवेउच्चिया सा जहण्णेणं अंगु-
 लस्स संखेज्जइभागं उक्कोसेणं जायणसयसहस्सं । तेसि णं भंते ! जीवाणं
 सरीरगा किसंठिया प० ? गोयमा ! दुविहा प०, तं०—भवधारणिज्जा य
 उत्तरवेउच्चिया य, तत्थ णं जे ते भवधारणिज्जा ते समच्चउरंसंठाणसंठिया
 प०, तत्थ णं जे ते उत्तरवेउच्चिया ते णाणासंठाणसंठिया प०, लेस्साओ चत्तारि,
 दिट्ठी तिविहावि, तिण्णि णाणा णियसं, तिण्णि अण्णाणा भयणागं, जागो
 तिविहोवि, उवओगो दुविहावि, चत्तारि सण्णाओ, चत्तारि कसाया, पंच इंदिया,
 पंच समुघाया, वेयणा दुविहावि, इत्थिवेयगावि पुरिसवेयगावि णो णपुंसग-
 वेयणा, ठिई जहण्णेणं वसवाससहस्साइं उक्कोसेणं साइरेणं सागरीवमं अज्ज-

वसाणा असंखेज्जा पसत्थावि अप्पसत्थावि, अणुबंधो जहा ठिई, भवादेसेणं दो भवग्गहणाइं, कालादेसेणं जहण्णेणं दसवाससहस्साइं अंतोमुहुत्तमब्भहियाइं उक्कोसेणं साइरेगं सागरोवमं बावीसाए वाससहस्सेहिं अब्भहियं एवइयं०, एवं णववि गमा णेयव्वा णवरं मज्झिल्लएसु पच्छिल्लएसु तिसु गमएसु असुरकुमारानं ठिइविसेसो जाणियव्वा सेसा आंहिया चेव लढी कायसंबेहं च जाणेज्जा, सब्बत्थ दो भवग्गहणाइं जाव णवमगमए कालादेसेणं जहण्णेणं साइरेगं सागरोवमं बावीसाए वाससहस्सेहिं अब्भहियं उक्कोसेणवि साइरेगं सागरोवमं बावीसाए वाससहस्सेहिं अब्भहियं एवइयं० ६ । णागकुमारे णं भंते ! जे भविए पुढविक्काइएसु एस चेव वसत्थवा जाव भवादेसोत्ति, णवरं ठिई जहण्णेणं दसवाससहस्साइं उक्कोसेणं देसूणाइं दो पत्तिओवमाइं, एवं अणुबंधोवि, कालादेसेणं जहण्णेणं दसवाससहस्साइं अंतोमुहुत्तमब्भहियाइं उक्कोसेणं देसूणाइं दो पत्तिओवमाइं बावीसाए वाससहस्सेहिं अब्भहियाइं, एवं णववि गमगा असुरकुमारगमगसरिसा णवरं ठिइं कालादेसं च जाणेज्जा, एवं जाव थणियकुमारानं । जइ वाणमंतरेहिंतो उववज्जति कि पिसायवाणमंतरं जाव गंधव्ववाणमंतरं ? गोयमा ! पिसायवाणमंतरं जाव गंधव्ववाणमंतरं । वाणमंतरं देवे णं भंते ! जे भविए पुढविक्काइएसु० एएसिपि असुरकुमारगमगसरिसा णव गमगा भाणियव्वा, णवरं ठिई कालादेसं च जाणेज्जा, ठिई जहण्णेणं दसवाससहस्साइं उक्कोसेणं पत्तिओवमं सेसं सहेव । जइ जोइसियदेवेहिंतो उववज्जति कि चंदविमाणजोइसियदेवेहिंतो उववज्जति जाव ताराविमाण जोइसियदेवेहिंतो उ० ? गोयमा ! चंदविमाण जाव उ० जाव ताराविमाण जाव उ० । जोइसियदेवे णं भंते ! जे भविए पुढविक्काइएसु लढी जहा असुरकुमारानं णवरं एगा तेउलेस्सा प०, तिण्णि णाणा तिण्णि अण्णाणा णियमं, ठिई जहण्णेणं अट्टभागपत्तिओवमं उक्कोसेणं पत्तिओवमं वाससयसहस्समब्भहियं एवं अणुबंधोवि, कालादेसेणं जहण्णेणं अट्टभागपत्तिओवमं अंतोमुहुत्तमब्भहियं उक्कोसेणं पत्तिओवमं वाससयसहस्सेणं बावीसाए वाससहस्सेहिं अब्भहियं एवइयं०, एवं सेसावि अट्ट गमगा भाणियव्वा णवरं ठिइं कालादेसं च जाणेज्जा । जइ वेमाणियदेवेहिंतो उववज्जति कि कप्पोववण्णगवेमाणिय० कप्पाईयवेमाणिएहिंतो उ० ? गोयमा ! कप्पोववण्णगवेमाणिय जाव उ० णो कप्पाईयवेमा-

शिय जाव उ० । जइ कप्पोववण्णग जाव उ० कि सोहम्मकप्पोववण्णगवेमाणिय० जाव अरुच्चयकप्पोववण्णगवेमाणिय जाव उ० ? गोयमा ! सोहम्मकप्पोववण्णगवेमाणिय० ईसाणकप्पोववण्णगवेमाणिय जाव उ०, णो सणकुमार जाव णो अरुच्चयकप्पोववण्णगवेमाणिय जाव उ० । सोहम्मदेवे णं भंते ! जे भविए पुढविकाइएसु उववज्जित्तए से णं भंते ! केवइय० एवं जहा जोइसियस्स गमगो णवरं ठिई अणुबंधो य जहण्णेणं पलिओवमं उक्कोसेणं दो सागरोवमाइं, काला-देसेणं जहण्णेणं पलिओवमं अंतोभुत्तमब्भहियं उक्कोसेणं दो सागरोवमाइं बावी-साए वाससहस्सेहिं अब्भहियाइं एवइयं कालं० एवं सेसावि अट्ट गमगा भाणियव्वा, णवरं ठिई कालादेसं च जाणेज्जा । ईसाणदेवे णं भंते ! जे भविए एवं ईसाणदेवेणवि णव गमगा भाणियव्वा णवरं ठिई अणुबंधो जहण्णेणं साइरेणं पलिओवमं उक्कोसेणं साइरेयाइं दो सागरोवमाइं, सेसं तं चेव । सेवं भंते ! २ त्ति जाव विहरइ ॥ ७०२ ॥

चउवीसइमं सयं तेरसमो उद्देसो

आउक्काइया णं भंते ! कओहिंतो उववज्जंति ? एवं जहेव पुढविकाइय उद्देसए जाव-पुढविकाइए णं भंते ! जे भविए आउक्काइएसु उववज्जित्तए से णं भंते ! केवइ० ? गोयमा ! जहण्णेणं अंतोभुत्तं उक्कोसेणं सत्तवास-सहस्सट्ठिईएसु उववज्जेज्जा, एवं पुढविकाइयउद्देसगसरिसो भाणियव्वो णवरं ठिइं संवेहं च जाणेज्जा, सेसं तहेव । सेवं भंते ! २ त्ति ॥ ७०३ ॥

चउवीसइमं सयं चोद्दसमो उद्देसो

तेउक्काइया णं भंते ! कओहिंतो उववज्जंति ? एवं जहेव पुढविका-इयउद्देसगसरिसो उद्देसो भाणियव्वो णवरं ठिइं संवेहं च जाणेज्जा, देवेहिंतो ण उववज्जंति, सेसं तं चेव । सेवं भंते ! २ त्ति जाव विहरइ ॥ ७०४ ॥

चउवीसइमं सयं पण्णरसमो उद्देसो

वाउक्काइया णं भंते ! कओहिंतो उववज्जंति ? एवं जहेव तेउक्काइय-उद्देसओ तहेव णवरं ठिइं संवेहं च जाणेज्जा । सेवं भंते ! २ त्ति ॥ ७०५ ॥

चउवीसइमं सयं सोलसमो उद्देसो

वणस्सइकाइया णं भंते ! कओहिंतो उववज्जंति ? एवं पुढविकाइय-

सरिसो उद्देसो णवरं जाहे वणस्सइकाइओ वणस्सइकाइएसु उववज्जंति ताहे पढमविइयचउत्थपंचमेसु गमएसु परिमाणं अणुसमयं अबिरहियं अणंता उववज्जंति, भवादेसेणं जहण्णेणं दो भवगगहणाइं उक्कोसेणं अणंताइं भवगगहणाइं, कालादेसेणं जहण्णेणं दो अंतोमुहुत्ता उक्कोसेणं अणंतं कालं एवइयं०, सेसा पंच गमा अट्टभवगगहणिया तहेव णवरं ठिइं संवेहं च जाणेज्जा। सेवं भंते ! २ त्ति ॥ ७०६ ॥

चउवीसइमं सयं १७-१९ उद्देसा

बेइंदिया णं भंते ! कओहिंतो उववज्जंति जाव पुढविककाइए णं भंते ! जे भविए बेइंदिएसु उववज्जितए से णं भंते ! केवइ० सच्चेव पुढविककाइयस्स लद्धी जाव कालादेसेणं जहण्णेणं दो अंतोमुहुत्ता उक्कोसेणं संखेज्जाइं भवगगहणाइं एवइयं०, एवं तेसु चैव चउसु गमएसु संवेहो सेसेसु पंचसु तहेव अट्ट भवा। एवं जाव चउरिदिएणं समं चउसु संखेज्जा भवा, पंचसु अट्ट भवा, पंचदियतिरिक्खजोणियमणुस्सेसु समं तहेव अट्ट भवा, देवेसु चैव ण उववज्जंति, ठिइं संवेहं च जाणेज्जा। सेवं भंते ! २ त्ति ॥ ७०७ ॥ २४-१७ ॥ तेइंदिया णं भंते ! कओहिंतो उववज्जंति ? एवं तेइंदियाणं जहेव बेइंदियाणं उद्देसो णवरं ठिइं संवेहं च जाणेज्जा, तेउक्काइएसु समं तइयगमे उक्कोसेणं अट्टुत्तराइं बेराइंदियसयाइं बेइंदिएहिं समं तइयगमे उक्कोसेणं अडयालीसं संवच्छराइं छणणउयराइंदियसयमभहियाइं तेइंदिएहिं समं तइयगमे उक्कोसेणं वाणउयाइं तिण्णि राइंदियसयाइं एवं सव्वत्थ जाणेज्जा जाव सण्णिमणुस्सत्ति। सेवं भंते ! २ त्ति ॥ ७०८ ॥ २४-१८ ॥ चउरिदिया णं भंते ! कओहिंतो उववज्जंति ? जहा तेइंदियाणं उद्देसओ तहेव चउरिदियाणवि णवरं ठिइं संवेहं च जाणेज्जा। सेवं भंते ! सेवं भंते ! त्ति ॥ ७०९ ॥ २४-१९ ॥

चउवीसइमं सयं वीसइमो उद्देसो

पंचदियतिरिक्खजोणिया णं भंते ! कओहिंतो उववज्जंति किं णेरइ०तिरिक्ख०मणु०देवेहिंतो उववज्जंति ? गोपमा ! णेरइएहिंतोवि उववज्जंति तिरिक्ख०मणुस्सेहिंतोवि उ०देवेहिंतोवि उववज्जंति। जइ णेरइएहिंतो उववज्जंति किं रयणप्पभापुवविणेरइएहिंतो उववज्जंति जाव अहेसत्तमापुढविणेरइएहिंतो उववज्जंति ? गोयमा ! रयणप्पमापुढविणेरइएहिंतो उववज्जंति जाव अहेसत्तमापुढवि-

णेरइएहिंतोवि उववज्जति । रयणप्पभाएुद्विणेरइए णं भंते ! जे भविए पंचिविय-
 त्तिरिवल्लजोणिएसु उववज्जित्तए से णं भंते ! केवइकालट्टिईएसु उववज्जेजा ?
 गोयमा ! जहण्णेणं अंतोमुहुत्तट्टिईएसु उवकोसेणं पुव्वकोडिआउएसु उवव-
 ज्जेज्जा । ते णं भंते ! जीवा एगसमएणं केवइया उववज्जति ? एवं जहा
 असुरकुमारणं वत्तव्वया णवरं संघयणे पोगला अणिट्टा अकंता जाव परिण-
 मति, ओगाहणा दुविहा प०, तं०—भवधारणिज्जा य उत्तरवेउव्विया य, तत्थ
 णं जा सा भवधारणिज्जा सा जहण्णेणं अंगुलस्स असंखेज्जइभागं उवकोसेणं
 सत्त धणूइं तिण्णि रयणीओ छच्चंगुलाइं, तत्थ णं जा सा उत्तरवेउव्विया सा जह-
 ण्णेणं अंगुलस्स संखेज्जइभागं उवकोसेणं पण्णरस धणूइं अड्डाइज्जाओ रयणीओ ।
 तेसि णं भंते ! जीवाणं सरीरगा किंसंठिया प० ? गोयमा ! दुविहा प०, तं०—
 भवधारणिज्जा य उत्तरवेउव्विया य, तत्थ णं जे ते भवधारणिज्जा ते हुंड-
 संठिया प०, तत्थ णं जे ते उत्तरवेउव्विया तेवि हुंडसंठिया प०, एगा काउ-
 लेस्सा प०, समुग्घाया चत्तारि, णो इत्थिवेयगा णो पुरिसवेयगा णणंसगवेयगा,
 ठिई जहण्णेणं दसवाससहस्साइं उवकोसेणं सागरोवमं एवं अणुबंधोवि, सेमं
 तहेव, भवादेसेणं जहण्णेणं दो भवग्गहणाइं उवकोसेणं अट्ट भवग्गहणाइं, काला-
 देसेणं जहण्णेणं दसवाससहस्साइं अंतोमुहुत्तमड्ढमहियाइं उवकोसेणं चत्तारि
 सागरोवमाइं चउर्हि पुव्वकोडीहिं अड्ढमहियाइं एवइयं० । सो चेव जहण्णकाल-
 ट्टिईएसु उववण्णो जहण्णेणं अंतोमुहुत्तट्टिईएसु उववज्जेज्जा, उवकोसेणवि अंतो-
 मुहुत्तट्टिईएसु अबसेमं तहेव, णवरं कालादेसेणं जहण्णेणं तहेव उवकोसेणं चत्तारि
 सागरोवमाइं चउर्हि अंतोमुहुत्तोहिं अड्ढमहियाइं एवइयं कालं० २, एवं सेमावि सत्त
 गमगा भाणियव्वा जहेव णेरइयउट्टेसए सण्णियंदिदिहिं समं, णेरइयाणं
 मज्झिमएसु य तिसुवि गमएसु पच्छिमएसु तिसुवि गमएसु ठिइयाणत्तं
 भवइ, सेसं तं चेव सव्वत्थं ठिइं संवेहं च जाणेज्जा ६। सक्करप्पभाएुद्विणेर-
 इए णं भंते ! जे भविए० एवं जहा रयणप्पभाए णव गमगा तहेव सक्करप्पभा-
 एवि, णवरं सरीरोगाहणा जहा ओगाहणासंठाणे, तिण्णि णाणा तिण्णि अण्णाणा
 णियमं, ठिई अणुबंधा पुव्वभणिया, एवं णववि गमगा उवज्जिऊण भाणियव्वा,
 एवं जाव छट्टपुढवी, णवरं ओगाहणा-लेस्सा-ठिई-अणुबंधो संवेहो य जाणियव्वा ।
 अहेसत्तमापुढवीणेरइए णं भंते ! जे भविए० एवं चेव णव गमगा, णवरं ओगा-
 हणा-लेस्सा-ठिई-अणुबंधा जाणियव्वा, संवेहो भवादेसेणं जहण्णेणं दो भवग्गह-

णाइ उक्कोसेणं छम्भवग्गहणाइं, कालादेसेणं जहण्णेणं बावीसं सागरोवमाइं
 अंतोमूहुत्तमम्भहियाइं उक्कोसेणं छावट्ठि सागरोवमाइं तिहि पुव्वकोडीहि अम्भ-
 हियाइं एवइयं०, आइल्लएसु छसुवि गमएसु जहण्णेणं दो भवग्गहणाइं उक्को-
 सेणं छ भवग्गहणाइं, पच्छिल्लएसु तिसु गमएसु जहण्णेणं दो भवग्गहणाइं
 उक्कोसेणं चत्तारि भवग्गहणाइं, लद्धी णवसुवि गमएसु जहा पडमगमए णवरं
 ठिईविसेसो कालादेसो य बिइयगमएसु जहण्णेणं बावीसं सागरोवमाइं अंतो-
 मूहुत्तमम्भहियाइं उक्कोसेणं छावट्ठि सागरोवमाइं तिहि अंतोमूहुत्तोहि अम्भ-
 हियाइं एवइयं कालं०, तइयगमए जहण्णेणं बावीसं सागरोवमाइं पुव्वकोडीए
 अम्भहियाइं उक्कोसेणं छावट्ठि सागरोवमाइं तिहि पुव्वकोडीहि अम्भहियाइं,
 चउत्थगमए जहण्णेणं बावीसं सागरोवमाइं अंतोमूहुत्तमम्भहियाइं उक्कोसेणं
 छावट्ठि सागरोवमाइं तिहि पुव्वकोडीहि अम्भहियाइं, पंचमगमए जहण्णेणं
 बावीसं सागरोवमाइं अंतोमूहुत्तमम्भहियाइं उक्कोसेणं छावट्ठि सागरोवमाइं
 तिहि अंतोमूहुत्तोहि अम्भहियाइं, छट्ठगमए जहण्णेणं बावीसं सागरोवमाइं
 पुव्वकोडीहि अम्भहियाइं उक्कोसेणं छावट्ठि सागरोवमाइं तिहि पुव्वकोडीहि
 अम्भहियाइं, सत्तमगमए जहण्णेणं तेत्तीसं सागरोवमाइं अंतोमूहुत्तमम्भहियाइं
 उक्कोसेणं छावट्ठि सागरोवमाइं दोहि पुव्वकोडीहि अम्भहियाइं, अट्ठम-
 गमए जहण्णेणं तेत्तीसं सागरोवमाइं अंतोमूहुत्तमम्भहियाइं उक्कोसेणं छावट्ठि
 सागरोवमाइं दोहि अंतोमूहुत्तोहि अम्भहियाइं, णवमगमए जहण्णेणं तेत्तीसं
 सागरोवमाइं पुव्वकोडीहि अम्भहियाइं उक्कोसेणं छावट्ठि सागरोवमाइं दोहि
 पुव्वकोडीहि अम्भहियाइं एवइयं० ६ । जइ तिरिवखजोणिएहितो उववज्जंति
 कि एगिदियतिरिवखजोणिएहितो उ० एवं उववाओ जहा पुदविकाइयउइएसए
 जाव-पुढविकाइए णं भंते ! जे भविए पंचिदियतिरिवखजोणिएसु उववज्जित्तए
 से णं भंते ! केवइ० ? गोयमा ! जहण्णेणं अंतोमूहुत्तट्ठिईएसु उक्कोसेणं पुव्व-
 कोडीआउएसु उववज्जेज्जा । ते णं भंते ! जीवा० एवं परिमाणईया अणुबंध-
 पज्जवसाणा जच्चेय अप्पणो सट्ठाणे वत्तव्वया सच्चेव पंचिदियतिरिवखजोणि-
 एसुवि उववज्जमाणस्स भाणियव्वा णवरं णवसुवि गमएसु परिमाणे जहण्णेणं
 एक्को वा दो वा तिण्णि वा उक्कोसेणं संखेज्जा वा असखेज्जा वा उववज्जंति,
 भवादेसेणवि णवसुवि गमएसु जहण्णेणं दो भवग्गहणाइं उक्कोसेणं अट्ठ भव-

गहणाइ, सेसं तं चेव, कालादेसेणं उभओ ठिईए करेज्जा । जइ आउवकाइएहिंतो उववज्जति एवं आउवकाइयाणवि एवं जाव चउरिंदिया उववाएयव्वा, णवरं सव्वत्थ अप्पणो लद्धी भाणियव्वा, णवमुवि गमएसु भवादेसेणं जहण्णेणं दो भव-गहणाइ उवकोसेणं अट्ट भवग्गहणाइ, कालादेसेणं उभओ ठिई करेज्जा-सव्वेसि सव्वगमएसु, जहेव पुढविक्काइएसु उववज्जमाणं लद्धी तहेव सव्वत्थ ठिई संवेहं च जाणेज्जा । जइ पंचिदियतिरिक्खजोणिएहिंतो उववज्जति कि सण्णिपंचिदियतिरिक्खजोणिएहिंतो उववज्जति असण्णिपंचिदियतिरिक्खजो-णिएहिंतो उववज्जति ? गोयमा ! सण्णिपंचिदिय० असण्णिपंचिदिय०, भेओ जहेव पुढविक्काइएसु उववज्जमाणस्स जाव-असण्णिपंचिदियतिरिक्खजोणिए-णं भंते ! जे भविए पंचिदियतिरिक्खजोणिएसु उववज्जित्तए से णं भंते ! केवद-काल० ? गोयमा ! जहण्णेणं अंतोमुहुत्तं उवकोसेणं पत्तिओवमस्स असंखेज्जइ-भागट्टिईएसु उवव० । ते णं भंते ! ० अवसेसं जहेव पुढविक्काइएसु उववज्ज-माणस्स असण्णिस्स तहेव णिरवसेसं जाव भवादेसोत्ति, कालादेसेणं जहण्णेणं दो अंतोमुहुत्ता उवकोसेणं पत्तिओवमस्स असंखेज्जइभागं पुव्वकोडिपुहुत्तमइभहियं एवइयं० १, बिइयगमए एस चेव लद्धी णवरं कालादेसेणं जहण्णेणं दो अंतो-मुहुत्ता उवकोसेणं चत्तारि पुव्वकोडीओ चउहि अंतोमुहुत्तंहि अब्भहियाओ एव-इयं० २ । सो चेव उवकोसकालट्टिईएसु उववण्णो जहण्णेणं पत्तिओवमस्स असंखेज्जइ-भागट्टिईएसु उवकोसेणवि पत्तिओवमस्स असंखेज्जइभागट्टिईएसु उववज्जेज्जा । ते णं भंते ! जीवा० एवं जहा रयणप्पभाए उववज्जमाणस्स असण्णिस्स तहेव णिर-वसेसं जाव कालादेसोत्ति, णवरं परिमाणं जहण्णेणं एवको वा दो वा तिणि वा उवकोसेणं संखेज्जा उववज्जति, सेसं तं चेव ३ । सो चेव अप्पणा जहण्णकालट्टिईओ जाओ जहण्णेणं अंतोमुहुत्तट्टिईएसु उवकोसेणं पुव्वकोडिआउएसु उववज्जेज्जा । ते णं भंते ! ० अवसेसं जहा एसस्स पुढविक्काइएसु उववज्जमाणस्स मज्झिमेसु तिसु गमएसु तथा इहवि मज्झिमेसु तिसु गमएसु जाव अणुबंधोत्ति, भवा-देसेणं जहण्णेणं दो भवग्गहणाइ उवकोसेणं अट्ट भवग्गहणाइ, कालादेसेणं जह-ण्णेणं दो अंतोमुहुत्ता उवकोसेणं चत्तारि पुव्वकोडीओ चउहि अंतोमुहुत्तंहि अब्भहियाओ ४ । सो चेव जहण्णकालट्टिईएसु उववण्णो एस चेव वत्तव्वया णवरं कालादेसेणं जहण्णेणं दो अंतोमुहुत्ता उवकोसेणं अट्ट अंतोमुहुत्ता एवइयं० ५ ।

सो चेव उक्कोसकालट्टिईएसु उववण्णो जहण्णेणं पुव्वकोडिआउएसु उक्कोसे-
णवि पुव्वकोडिआउएसु उववज्जेज्जा, एस चेव वत्तव्वया णवरं कालादेसेण
जाणेज्जा ६ । सो चेव अप्पणा उक्कोसकालट्टिईओ जाओ सच्चेव पढमगम-
वत्तव्वया णवरं ठिई जहण्णेणं पुव्वकोडी उक्कोसेणवि पुव्वकोडी सेसं तं चेव,
कालादेसेणं जहण्णेणं पुव्वकोडी अंतोमुहुत्तमम्महिया उक्कोसेणं पलिओवमस्स
असंखेज्जइभागं पुव्वकोडिपुहुत्तमम्महियं एवइयं० ७ । सो चेव जहण्णकालट्टिई-
एसु उववण्णो एस चेव वत्तव्वया जहा सत्तमगमए णवरं कालादेसेणं जहण्णेणं
पुव्वकोडी अंतोमुहुत्तमम्महिया उक्कोसेणं चत्तारि पुव्वकोडीओ चउत्तिहं अंतो-
मुहुत्तोहं अम्महियाओ एवइयं० ८ । सो चेव उक्कोसकालट्टिईएसु उववण्णो
जहण्णेणं पलिओवमस्स असंखेज्जइभागं उक्कोसेणवि पलिओवमस्स असंखेज्जइ-
भागं, एव्वं जहा रयणप्यभाए उववज्जमाणस्स असण्णस्स णवमगमए तहेव
णिरवसेसं जाव कालादेसोत्ति, णवरं परिमाणं जहा एयस्सेव तइयगमे, सेसं तं
चेव ९ । जइ सण्णिपंचिदियतिरिक्खजोणिएहितो उववज्जंति कि संखेज्ज-
वासा० असंखेज्जवासा० ? गोयमा ! संखेज्ज० णो असंखेज्ज० । जइ संखे-
ज्जवासाउय जाव कि पउज्जत्तसंखेज्ज० अपज्जत्तसंखेज्ज० ? दोमुधि । संखेज्ज-
वासाउयसण्णिपंचिदियतिरिक्खजोणिए णं भंते ! जे भविए पंचिदियतिरिक्ख-
जोणिएसु उववज्जत्तए से णं भंते ! केवइ० ? गोयमा ! जहण्णेणं अंतो-
मुहुत्तं उक्कोसेणं तिपलिओवमट्टिईएसु उववज्जेज्जा । ते णं भंते ! अवसेसं
जहा एयस्स चेव सण्णस्स रयणप्यभाए उववज्जमाणस्स पढमगमए,
णवरं ओगाहणा जहण्णेणं अंगुलस्स असंखेज्जइभागं उक्कोसेणं जोयणसहस्सं
सेसं तं चेव जाव भवादेसोत्ति, कालादेसेणं जहण्णेणं दो अंतोमुहुत्ता उक्कोसेणं
तिण्णि पलिओवमाइं पुव्वकोडी पुहुत्तमम्महियाइं एवइयं० १ । सो चेव जहण्ण-
कालट्टिईएसु उववण्णो एस चेव वत्तव्वया णवरं कालादेसेणं जहण्णेणं दो अंतो-
मुहुत्ता उक्कोसेणं चत्तारि पुव्वकोडीओ चउत्तिहं अंतोमुहुत्तोहं अम्महियाओ २ ।
सो चेव उक्कोसकालट्टिईएसु उववण्णो जहण्णेणं तिपलिओवमट्टिईएसु उक्को-
सेणवि तिपलिओवमट्टिईएसु उववज्जेज्जा, एस चेव वत्तव्वया णवरं परि-
माणं जहण्णेणं एवको वा दो वा तिण्णि वा उक्कोसेणं संखेज्जा उववज्जंति,
ओगाहणा जहण्णेणं अंगुलस्स असंखेज्जइभागं उक्कोसेणं जोयणसहस्सं सेसं तं

चेव जाव अणुबंधोत्ति, भवादेसेणं दो भवग्गहणाइं, कालादेसेणं जहण्णेणं तिण्णिण पलिओवमाइं अंतोमुहुत्तमब्भहियाइं उक्कोसेणं तिण्णिण पलिओवमाइं पुव्व-
कोडीए अब्भहियाइं ३ । सो चेव अप्पणा जहण्णकालट्टिईओ जाओ जहण्णेणं अंतो-
मुहुत्तं, उक्कोसेणं पुव्वकोडिआउएमु उववज्जेज्जा, लद्धी से जहा एयस्स चेव
सण्णिणपंचदियस्स पुढविककाइएमु उववज्जमाणस्स मज्झिस्सएमु तिसु गमएमु
सत्तेव इहवि मज्झिमेसु तिसु गमएमु कायच्चा, संवेहो जहेव एत्थ चेव अस-
ण्णिस्स मज्झिमेसु तिसु गमएमु ६। सो चेव अप्पणा उक्कोसकालट्टिईओ जाओ
जहा पढमगमए णवरं ठिई अणुबंधो जहण्णेणं पुव्वकोडी उक्कोसेणवि पुव्व-
कोडी, कालादेसेणं जहण्णेणं पुव्वकोडी अंतोमुहुत्तमब्भहिया उक्कोसेणं तिण्णिण
पलिओवमाइं पुव्वकोडीपुहुत्तमब्भहियाइं ७ । सो चेव जहण्णकालट्टिईएमु
उववण्णो एस चेव वत्तव्वथा णवरं कालादेसेणं जहण्णेणं पुव्वकोडी अंतोमुहुत्त-
मब्भहिया उक्कोसेणं चत्तारि पुव्वकोडीओ चउट्ठि अंतोमुहुत्तेहि अब्भहियाओ
८ । सो चेव उक्कोसकालट्टिईएमु उववण्णो जहण्णेणं तिपलिओवमट्टिईएमु उक्को-
सेणवि तिपलिओवमट्टिईएमु अवसेसं तं चेव, णवरं परिमाणं ओगाहणा थ जहा
एयस्सेव तद्दयगमए, भवादेसेणं दो भवग्गहणाइं, कालादेसेणं जहण्णेणं तिण्णिण
पलिओवमाइं पुव्वकोडीए अब्भहियाइं उक्कोसेणवि तिण्णिण पलिओवमाइं पुव्व-
कोडीए अब्भहियाइं एवइयं ९। जइ मणुस्सेहिंतो उववज्जति किं सण्णिमणुं
असण्णिमणुं? गोयमा! सण्णिमणुं, असण्णिमणुं । असण्णिमणुस्से णं भंते! जे
भविए पंचदियतिरिक्खजोणिएमु उववज्जित्तए से णं भंते! केवइकालं? गोयमा!
जहण्णेणं अंतोमुहुत्तं उक्कोसेणं पुव्वकोडीआउएमु उववज्जति, लद्धी से तिसुवि
गमएमु जहेव पुढविककाइएमु उववज्जमाणस्स संवेहो जहा एत्थ चेव असण्णि-
पंचदियस्स मज्झिमेसु तिसु गमएमु तहेव णिरवसेसो भाणियव्वो । जइ सण्णि-
मणुस्सं किं संखेज्जवासाउयसण्णिमणुस्सं असंखेज्जवासाउयसण्णिमणुस्सं?
गोयमा! संखेज्जवासाउयंणो असंखेज्जवासाउयं । जइ संखेज्जं किं पज्जत्तं
अपज्जत्तं? गोयमा! पज्जत्तं अपज्जत्तंसंखेज्जवासाउयं । सण्णिमणुस्से णं भंते!
जे भविए पंचदियतिरिक्खजोणिएमु उववज्जित्तए से णं भंते! केवइं?
गोयमा! जहण्णेणं अंतोमुहुत्तं उक्कोसेणं तिपलिओवमट्टिईएमु उववज्जेज्जा ।
ते णं भंते! । लद्धी से जहा एयस्सेव सण्णिमणुस्सस्स पुढविककाइएमु उववज्ज-

माणस्स पढमग्गमए जाव भवादेसोत्ति, कालादेसेणं जहण्णेणं दो अंतो-
 मुहुत्ता उक्कोसेणं तिण्णि पलिओवमाइं पुब्बकोडिपुहुत्तमब्भहियाइं १ ।
 सो चेव जहण्णकालट्ठिईएसु उववण्णो एस चेव वत्तव्वया णवरं कालादेसेणं
 जहण्णेणं दो अंतोमुहुत्ता उक्कोसेणं चत्तारि पुब्बकोडीओ चउहि अंतोमुहुत्तेहि
 अब्भहियाओ २ । सो चेव उक्कोसकालट्ठिईएसु उववण्णो जहण्णेणं तिपलिओ-
 वमट्ठिईएसु उक्कोसेणवि तिपलिओवमट्ठिईएसु सच्चेव वत्तव्वया णवरं ओगा-
 हणा जहण्णेणं अंगुलपुहुत्तं उक्कोसेणं पंच धणुहसयाइं, ठिई जहण्णेणं मास-
 पुहुत्तं उक्कोसेणं पुब्बकोडी एवं अणुबंधोवि, भवादेसेणं दो भवग्गहणाइं, काला-
 देसेणं जहण्णेणं तिण्णि पलिओवमाइं मासपुहुत्तमब्भहियाइं उक्कोसेणं तिण्णि
 पलिओवमाइं पुब्बकोडीए अब्भहियाइं एवइयं० ३ । सो चेव अप्पणा जहण्णकाल-
 ट्ठिईओ जाओ जहा सण्णिपंचदियतिरिक्खजोणियस्स पंचदियतिरिक्खजोणि-
 एसु उववज्जमाणस्स मज्झिमेसु तिसु गमएसु वत्तव्वया णियया सच्चेव
 एयस्सवि मज्झिमेसु तिसु शमएसु णिरवसेसा भाणियव्वा, णवरं परिमाणं उक्को-
 सेणं संखेज्जा उववज्जति, सेसं तं चेव ६ । सो चेव अप्पणा उक्कोसकालट्ठिईओ
 जाओ सच्चेव पढमगमगवत्तव्वया णवरं ओगाहणा जहण्णेणं पंच धणुहसयाइं
 उक्कोसेणवि पंच धणुहसयाइं, ठिई अणुबंधो जहण्णेणं पुब्बकोडी उक्कोसेणवि
 पुब्बकोडी, सेसं तहेव जाव भवादेसोत्ति, कालादेसेणं जहण्णेणं पुब्बकोडी अंतो-
 मुहुत्तमब्भहिया उक्कोसेणं तिण्णि पलिओवमाइं पुब्बकोडिपुहुत्तमब्भहियाइं
 एवइयं० ७ । सो चेव जहण्णकालट्ठिईएसु उववण्णो एस चेव वत्तव्वया णवरं
 कालादेसेणं जहण्णेणं पुब्बकोडी अंतोमुहुत्तमब्भहिया उक्कोसेणं चत्तारि पुब्ब-
 कोडीओ चउहि अंतोमुहुत्तेहि अब्भहियाओ ८ । सो चेव उक्कोसकालट्ठिईएसु
 उववण्णो जहण्णेणं तिण्णि पलिओवमाइं उक्कोसेणवि तिण्णि पलिओवमाइं,
 एस चेव लद्धी जहेव सत्तमग्गमए, भवादेसेणं दो भवग्गहणाइं, कालादेसेणं
 जहण्णेणं तिण्णि पलिओवमाइं पुब्बकोडीए अब्भहियाइं उक्कोसेणवि तिण्णि
 पलिओवमाइं पुब्बकोडीए अब्भहियाइं एवइयं० ९ । जइ देवेहितो उववज्जति
 किं भवणवासिदेवेहितो उववज्जति वाणमंतरं० जोइसियं० वेमाणियदेवेहितो उ०?
 गोयमा ! भवणवासिदेवेहितो उ० जाव वेमाणियदेवेहितोवि उ० । जइ भवण-
 वासिदेवेहितो किं असुरकुमारभवणं० जाव थणियकुमारभवणं ? गोयमा !

असुरकुमार० जाव थणियकुमारमवण० । असुरकुमारे णं भंते ! जे भविए पंचिदियतिरिक्खजोणिएसु उववज्जित्तए से णं भंते ! केवइय० ? गोयमा ! जहणेणं अंतोमूहुत्तट्टिईएसु उवकोसेणं पुव्वकोडिआउएसु उववज्जज्जा, असुर-कुमाराणं लद्धी णवसुवि गमएसु जहा पुढविवकाइएसु उववज्जमाणस एवं जाव ईसाणदेवस्स तहेव लद्धी भवादेसेणं सव्वत्थ अट्ट भवग्गहणाइं उवकोसेणं जहणेणं दोष्णि भवग्गहणाइं, ठिइं संवेहं च सव्वत्थ जाणेज्जा ६ । णागकुमारे णं भंते ! जे भविए० एस चेव वत्तव्वया णवरं ठिइं संवेहं च जाणेज्जा, एवं जाव थणिय-कुमारे ६ । जइ वाणमंतरेहिंतो उ० किं पिसाय० तहेव जाव वाणमंतरे णं भंते ! जे भविए० पंचिदियतिरिक्ख० एवं चेव णवरं ठिइं संवेहं च जाणेज्जा ६ । जइ जोइसिय० उववाओ तहेव जाव जोइसिए णं भंते ! जे भविए पंचिदियतिरि-क्ख० एस चेव वत्तव्वया जहा पुढविवकाइयउद्देसए भवग्गहणाइं णवसुवि गम-एसु अट्ट जाव कालादेसेणं जहणेणं अट्टभागपलिओवसं अंतोमूहुत्तमभहियं उवकोसेणं चत्तारि पलिओवमाइं चउहि पुव्वकोडोहि चउहिय वाससयसहस्सेहि अहभहियाइं एवइयं०, एवं णवसुवि गमएसुवि णवरं ठिइं संवेहं च जाणेज्जा ६ । जइ वेमाणियदेवे० किं कप्पोववण्णग० कप्पाईयवेमाणिय० ? गोयमा ! कप्पो-ववण्णगवेमाणिय० णो कप्पाईयवेमाणिय० । जइ कप्पोववण्णग० जाव सहस्सार-कप्पोववण्णगवेमाणियदेवेहिंतोवि उववज्जति, णो आणय जाव णो अच्चुय-कप्पोववण्णगवेमाणिय० । सोहस्मदेवे णं भंते ! जे भविए पंचिदियतिरिक्ख-जोणिएसु उववज्जित्तए से णं भंते ! केवइ० ? गोयमा ! जहणेणं अंतोमूहुत्त० उवकोसेणं पुव्वकोडिआउएसु सेसं जहेव पुढविवकाइयउद्देसए णवसुवि गमएसु णवरं णवसुवि गमएसु जहणेणं दो भवग्गहणाइं उवकोसेणं अट्ट भवग्गहणाइं, ठिइं कालादेसं च जाणेज्जा । एवं ईसाणदेवेवि, एवं एएणं कमेणं अवसेसावि जाव सहस्सारदेवेषु उववाएयव्वा णवरं ओगाहणा जहा ओगाहणासंठाणे, लेस्सा सणकुमारमाहिंदवंबलोएसु एगा पम्हलेस्सा सेसाणं एगा सुवकलेस्सा, वेदे णो इत्थिवेयगा पुरिसवेयगा णो णपुंसगवेयगा, आउअणुबंधा जहा ठिइपए सेसं जहेव ईसाणगाणं कायसंवेहं च जाणेज्जा । सेवं भंते ! सेवं भंते ! त्ति ॥ ७१० ॥

चउवीसइमं सयं एगवीसइमो उद्देसो

मणुस्सा णं भंते ! कओहिंतो उववज्जति-किं णेरइएहिंतो उववज्जति

जाव देवेहितो उववज्जति ? गोयमा ! नेरइएहितोवि उववज्जति जाव देवे-
हितोवि उर्ववज्जति, एवं उववाओ जहा पंचिदियतिरिक्खजोणियउद्देसए जाव
तमापुढविणेरेइएहितोवि उववज्जति णो अहेसत्तमापुढविणेरेइहितो उववज्जति ।
रयणप्पभापुढविणेरेइए णं भंते ! जे भविए मणुस्सेसु उववज्जित्तए से णं
भंते ! केवइकाल० ? गोयमा ! जहण्णेणं मासपुहुत्तट्टिईएसु उक्कोसेणं पुव्व-
कोडीआउएसु अबसेसा वत्तव्वया जहा पंचिदियतिरिक्खजोणिएसु उववज्जत्तस्स
तहेव णवरं परिमाणे जहण्णेणं एक्को वा दो वा तिण्णि वा उक्कोसेणं संखेज्जा
उववज्जति, जहा त्तिहं अंतोमुहुत्तेहं तथा इहं मासपुहुत्तेहं सदेहं करेज्जा सेसं
तं चेव ६ । जहा रयणप्पभाए वत्तव्वया तथा सक्करप्पभाएवि वत्तव्वया णवरं
जहण्णेणं वासपुहुत्तट्टिईएसु उक्कोसेणं पुव्वकोडि०, ओगाहणालेस्साणाणट्टिई-
अणुबंधसंवेहं-णाणत्तं च जाणज्जा जहेव तिरिक्खजोणियउद्देसए एवं जाव तमा-
पुढविणेरेइए ६ । जइ तिरिक्खजोणिएहितो उववज्जति किं एगिदियतिरिक्ख-
जोणिएहितो उववज्जति जाव पंचिदियतिरिक्खजोणिएहितो उववज्जति ?
गोयमा ! एगिदियतिरिक्खजोणिए० भेदो जहा पंचिदियतिरिक्खजोणियउद्दे-
सए णवरं तेउवाळ पडिसेहेयत्त्वा, सेसं तं चेव जाव—पुढविक्काइए णं भंते ! जे
भविए मणुस्सेसु उववज्जित्तए से णं भंते ! केवइ० ? गोयमा ! जहण्णेणं
अंतोमुहुत्तट्टिईएसु उक्कोसेणं पुव्वकोडीआउएसु उववज्जज्जा । ते णं भंते !
ओवा० एवं जहेव पंचिदियतिरिक्खजोणिएसु उववज्जमाणस्स पुढविक्काइयस्स
वत्तव्वया सा चेव इहवि उववज्जमाणस्स भाणियत्त्वा णवसुवि गमएसु, णवरं
तइयच्छट्टणवमेषु गमएसु परिमाणं जहण्णेणं एक्को वा दो वा तिण्णि वा उक्को-
सेणं संखेज्जा उववज्जति, जाहे अप्पणा जहण्णकालट्टिईओ भवइ ताहे पढमग-
मए अज्जवसाणा पसत्थावि अप्पससत्थावि, बिइयगमए अप्पसत्था, तइयगमए
पसत्था भवंति सेसं तं चेव णिरवसेसं ६ । जइ आउक्काइए एवं आउक्काइ-
याणवि, एवं वणस्सइकाइयाणवि, एवं जाव चउरिदियाणवि, असण्णिपंचिदिय-
तिरिक्खजोणिया सण्णिपंचिदियतिरिक्खजोणिया असण्णिमणुस्ससण्णिमणुस्सा
य एए सव्वेवि जहा पंचिदियतिरिक्खजोणियउद्देसए तहेव भाणियत्त्वा, णवरं
एयाणि चेव परिमाणअज्जवसाणाणाणाणाणि जाणिज्जा, पुढविकाइयस्स एत्थ
चेव उद्देसए भणियाणि, सेसं तहेव णिरवसेसं । जइ देवेहितो उववज्जति किं

भवणवासिदेवैर्हितो उववज्जति वाणमंतरं जोइसियं वेमाणियदेवैर्हितो उवव-
ज्जति ? गोयमा ! भवणवासिं जाव वेमाणियं उ० । जइ भवणं किं असुरं
जाव थणियं ? गोयमा ! असुरं जाव थणियं । असुरकुमारे णं भंते ! जे भविए
मणुस्सेसु उववज्जत्तए से णं भंते ! केवइं ? गोयमा ! जहण्णेणं मासपुहुत्त-
ट्ठिईएसु उवकोसेणं पुव्वकोडिआउएसु उववज्जज्जा, एवं जच्चेव पंचिदिय-
तिरिक्खजोणियउद्देसए वत्तव्वया सच्चेव एत्थवि भाणियत्वा, णवरं जहा तं हिं
जहण्णं अंतोमूहुत्तट्ठिईएसु तथा इहं मासपुहुत्तट्ठिईएसु, परिमाणं जहण्णेणं एक्को
वा दो वा तिण्णि वा उवकोसेणं संखेज्जा उववज्जति, सेसं तं चेव, एवं जाव
ईसाणदेवोत्ति, एयाणि चेव णाणत्ताणि सणं कुमारादीया जाव सहस्सारात्ति
जहेव पंचिदियतिरिक्खजोणियउद्देसए, णवरं परिमाणं जहण्णेणं एक्को वा दो
वा तिण्णि वा उवकोसेणं संखेज्जा उववज्जति, उववाओ जहण्णेणं वासपुहुत्त-
ट्ठिईएसु उवकोसेणं पुव्वकोडिआउएसु उववज्जति, सेसं तं चेव संवेहं
वासपुहुत्तं पुव्वकोडोसु करेज्जा । सणं कुमारे ठिई चउगुणिया अट्टावीसं
सागरोवमा भवंति, माहिंवे ताणि चेव साइरेगाणि, बम्हलोए चत्तालीसं, तंतए
छप्पणं, महासुक्के अट्टसाट्ठि, सहस्सारे वावत्तारिं सागरोवमाइं एसा उवकोसा
ठिई भणिया जहण्णट्ठिईपि चउ गणेज्जा ६ । आणयदेवे णं भंते ! जे
भविए मणुस्सेसु उववज्जत्तए से णं भंते ! केवइं ? गोयमा ! जहण्णेणं
वासपुहुत्तट्ठिईएसु उववज्जज्जा उवकोसेणं पुव्वकोडिठिईएसु । ते णं भंते ! एवं
जहेव सहस्सारदेवाणं वत्तव्वया णवरं ओगाहणा-ठिई-अणुबंधे य जाणेज्जा,
सेसं तं चेव, भवादेसेणं जहण्णेणं दो भवगहणाइं उवकोसेणं छ भवगहणाइं,
कालादेसेणं जहण्णेणं अट्टारस सागरोवमाइं वासपुहुत्तमव्वहियाइं उवकोसेणं
सत्तावण्णं सागरोवमाइं तिहिं पुव्वकोडीहिं अव्वहियाइं एवइयं कालं, एवं
णववि गमगा, णवरं ठिई अणुबंधं संवेहं च जाणेज्जा, एवं जाव अच्चुयदेवो,
णवरं ठिई अणुबंधं संवेहं च जाणेज्जा, पाणयदेवस्स ठिई तिगुणिया सट्ठि साग-
रोवमाइं, आरणगस्स तेवट्ठि सागरोवमाइं, अच्चुयदेवस्स छावट्ठि सागरोवमाइं ।
जइ कप्पाईयवेमाणियदेवैर्हितो उववज्जति किं गेवेज्जकप्पाईयं अणुत्तरोव-
वाइयकप्पाईयं जाव उ० ? गोयमा ! गेवेज्जं अणुत्तरोववाइयं । जइ गेवेज्जं
किं हेट्ठिम २ गेवेज्जकप्पाईयं जाव उवरिम २ गेवेज्जं ? गोयमा !

हेट्टिम २ गेवेज्ज० जाव उवरिम २ गेवेज्ज० । गेवेज्जगदेवे णं भंते ! जे भविए मणुस्सेसु उववज्जित्तए से णं भंते ! केवइकाल० ? गोयमा ! जहण्णेणं वास-
 पुहुत्तट्ठिईएसु उक्कोसेणं पुव्वकोडिड्ठिईएसु, अवसेसं जहा आणयदेवस्स वत्त-
 व्वया णवरं ओगाहणा० गोयमा ! एगे भवधारणिज्जे सरोरए से जहण्णेणं
 अंगुलस्स असंखेज्जइभागं उक्कोसेणं दो रयणीओ संठाणं, गोयमा ! एगे
 भवधारणिज्जे सरोरए से समचउरंससंठाणसंठिए प०, पंच समुग्घाया प०,
 तं०—वेयणासमुग्घाए जाव तेयगसमुग्घाए णो चेव णं वेउव्वियतेयगसमुग्घाए-
 हितो समोहणिसु वा समोहणंति वा समोहणिस्संति वा ठिई अणुबंधो जह-
 ण्णेणं बावीसं सागरोवमाइं उक्कोसेणं एकतीसं सागरोवमाइं, सेसं तं चेव,
 कालादेसेणं जहण्णेणं बावीसं सागरोवमाइं वासपुहुत्तमब्भहियाइं उक्को-
 सेणं तेणउइं सागरोवमाइं तिहि पुव्वकोडीहि अब्भहियाइं एवइयं०, एवं सेसे-
 सुविअट्टगमएसु णवरं ठिइं संवेहं च जाणेज्जा ६ । जइ अणुत्तरोववाइयकप्पाईय-
 वेमाणिय जाव उ० किं विजयअणुत्तरोववाइय० वेजयंतअणुत्तरोववाइय० जाव
 सव्वट्टसिद्ध० ? गोयमा ! विजयअणुत्तरोववाइय० जाव सव्वट्टसिद्धअणुत्तरोव-
 वाइय० । विजयवेजयंतजयंतअपराजियदेवे णं भंते ! जे भविए मणुस्सेसु उवव-
 ज्जित्तए से णं भंते ! केवइ० ? एवं जहेव गेवेज्जगदेवाणं णवरं ओगाहणा जह-
 ण्णेणं अंगुलस्स असंखेज्जइभागं उक्कोसेणं एगा रयणी, सम्मविट्ठी णो मिच्छ-
 विट्ठी, णो सम्मामिच्छविट्ठी, णाणी णो अण्णाणी णियमं तिण्णाणी तं०—
 आभिणिबोहियणाणी सुयणाणी ओहिणाणी, ठिई जहण्णेणं एकतीसं साग-
 रोवमाइं उक्कोसेणं तेत्तीसं सागरोवमाइं, सेसं तं चेव, भवादेसेणं जहण्णेणं दो
 भवग्गहणाइं उक्कोसेणं चत्तारि भवग्गहणाइं, कालादेसेणं जहण्णेणं एकतीसं
 सागरोवमाइं वासपुहुत्तमब्भहियाइं उक्कोसेणं छावट्ठि सागरोवमाइं दोहि पुव्व-
 कोडीहि अब्भहियाइं एवइयं०, एवं सेसावि अट्ट गमगा भाणियव्वा णवरं ठिइं
 अणुबंधं संवेहं च जाणेज्जा सेसं तं चेव । सव्वट्टसिद्धगदेवे णं भंते ! जे भविए
 मणुस्सेसु उववज्जित्तए सा चेव विजयाद्विवेवत्तव्वया भाणियव्वा णवरं ठिई
 अजहण्णमणुक्कोसेणं तेत्तीसं सागरोवमाइं एवं अणुबंधोवि, सेसं तं चेव, भवा-
 देसेणं दो भवग्गहणाइं, कालादेसेणं जहण्णेणं तेत्तीसं सागरोवमाइं वासपुहुत्तमब्भ-
 हियाइं उक्कोसेणं तेत्तीसं सागरोवमाइं पुव्वकोडीए अब्भहियाइं एवइयं० १ ।

सो चेव जहणकालट्टिईएसु उववणो एस चेव वत्तव्वया णवरं कालादेसेणं जहण्णेणं तेत्तीसं सागरोवमाइं वासपुहुत्तमब्भहियाइं उक्कोसेणवि तेत्तीसं सागरोवमाइं वासपुहुत्तमब्भहियाइं एवइयं २ । सो चेव उक्कोसकालट्टिईएसु उववणो एस चेव वत्तव्वया, णवरं कालादेसेणं जहण्णेणं तेत्तीसं सागरोवमाइं पुव्वकोडीए अब्भहियाइं उक्कोसेणवि तेत्तीसं सागरोवमाइं पुव्वकोडीए अब्भहियाइं एवइयं ३, एए चेव तिण्णि गमगा सेसा ण भण्णंति । सेवं भंते ! सेवं भंते ! त्ति ॥ ७११ ॥

चउवीसइमं सयं बावीसइमो उद्देमो

वाणमंतरा णं भंते ! कओहिंती उववज्जति किं णेरइएहिंती उववज्जति तिरिवख्खं ? एवं जहेव णागकुमारउद्देसए असण्णी तहेव णिरवसेसं । जइ सण्णि-पंचिदियं जाव असखेज्जवासाउयं सण्णिपंचिदियं जे भविए वाणमंतरं से णं भंते ! केवइं ? गोयमा ! जहण्णेणं दसवाससहस्सट्टिईएसु उक्कोसेणं पलिओवमट्टिईएसु सेसं तं चेव जहा णागकुमारउद्देमए जाव कालादेसेणं जहण्णेणं साइरेगा पुव्वकोडी दसहिं वाससहस्सेहिं अब्भहिया उक्कोसेणं चत्तारि पलिओवमाइं एवइयं १ । सो चेव जहणकालट्टिईएसु उववणो जहेव णामकुमाराणं द्विइयगमे वत्तव्वया २ । सो चेव उक्कोसकालट्टिईएसु उववणो जहण्णेणं पलिओवमट्टिईएसु उक्कोसेणवि पलिओवमट्टिईएसु एस चेव वत्तव्वया णवरं ठिई से जहण्णेणं पलिओवमं उक्कोसेणं तिण्णि पलिओवमाइं, सवेहो जहण्णेणं दो पलिओवमाइं उक्कोसेणं चत्तारि पलिओवमाइं एवइयं ३ । भज्झमगमगा तिण्णवि जहेव णागकुमारेसु पच्छिमेसु तिसु गमएसु तं चेव जहा णागकुमारुद्देसए णवरं ठिइं संवेहं च जाणेज्जा, संखेज्जवासाउय तहेव णवरं ठिई अणुबंघो संवेहं च उभओ ठिईए जाणेज्जा । जइ मणुस्सं असखेज्जवासाउयाणं जहेव णागकुमाराणं उद्देसए तहेव वत्तव्वया णवरं तइयगमए ठिई जहण्णेणं पलिओवमं उक्कोसेणं तिण्णि पलिओवमाइं, ओगाहणा जहण्णेणं गाउयं उक्कोसेणं तिण्णि गाउयाइं सेसं तहेव, संवेहो से जहा एत्थ चेव उद्देसए असखेज्जवासाउयसण्णिपंचिदियाणं, संखेज्जवासाउयसण्णिमणुस्से जहेव णागकुमारुद्देसए णवरं वाणमंतरे ठिइं संवेहं च जाणेज्जा । सेवं भंते ! सेवं भंते ! त्ति ॥ ७१२ ॥

चउवीसइमं सयं तेवीसइमो उद्देसो

जोइसिया णं भंते ! कओहिंतो उववज्जति किं णेरइए० भेदो जाव सण्णि-
 पंचिदियतिरिक्खजोणिएहिंतो उववज्जति णो असण्णिपंचिदियतिरिक्ख० । जइ
 सण्णि० किं संखेज्ज० असंखेज्ज० ? गोयमा ! संखेज्जवासाउय० असंखेज्ज-
 वासाउय जाव उ० । असंखेज्जवासाउयसण्णिपंचिदियतिरिक्खजोणिए णं भंते !
 जे भविए जोइसिएसु उववज्जिए से णं भंते ! केवइ० ? गोयमा ! जह-
 ण्णेणं अट्टभागपलिओवमट्टिईएसु उक्कोसेणं पलिओवमवाससयसहस्सट्टिईएसु
 उववज्जेज्जा, अवसेसं जहा असुरकुमारइसए णवरं-ठिईं जह्ण्णेणं अट्टभाग-
 पलिओवमं उक्कोसेणं तिण्णि पलिओवमाइं एवं अणुबंधोवि सेसं तहेव, णवरं
 कालादेसेणं जह्ण्णेणं दो अट्टभागपलिओवमाइं उक्कोसेणं चत्तारि पलिओवमाइं
 वाससयसहस्समब्भहियाइं एवइयं० १ । सो चेव जह्ण्णकालट्टिईएसु उववण्णो
 जह्ण्णेणं अट्टभागपलिओवमट्टिईएसु उक्कोसेणवि अट्टभागपलिओवमट्टिईएसु
 उ०, एस चेव वत्तव्वया णवरं कालादेसेणं जाणेज्जा २ । सो चेव उक्कोसकाल-
 ट्टिईएसु उववण्णो एस चेव वत्तव्वया णवरं ठिईं जह्ण्णेणं पलिओवमं वास-
 सयसहस्समब्भहियं उक्कोसेणं तिण्णि पलिओवमाइं, एवं अणुबंधोवि, काला-
 देसेणं जह्ण्णेणं दो पलिओवमाइं दोहिं वाससयसहस्सेहिं अब्भहियाइं उक्कोसेणं
 चत्तारि पलिओवमाइं वाससयसहस्समब्भहियाइं ३ । सो चेव अप्पणा जह्ण्ण-
 कालट्टिईओ जाओ जह्ण्णेणं अट्टभागपलिओवमट्टिईएसु उववज्जेज्जा उक्को-
 सेणवि अट्टभागपलिओवमट्टिईएसु उववज्जेज्जा । ते णं भंते ! जीवा एगसमए
 एस चेव वत्तव्वया णवरं ओगाहणा जह्ण्णेणं धणुहुपुहुत्तं उक्कोसेणं साइरेगाइं
 अट्टारसधणुहसयाइं, ठिईं जह्ण्णेणं अट्टभागपलिओवमं उक्कोसेणवि अट्टभाग-
 पलिओवमं, एवं अणुबंधोवि सेसं तहेव, कालादेसेणं जह्ण्णेणं दो अट्टभागपलि-
 ओवमाइं उक्कोसेणवि दो अट्टभागपलिओवमाइं एवइयं० जह्ण्णकालट्टिईयस्स
 एस चेव एक्को गसो ६ । सो चेव अप्पणा उक्कोसकालट्टिईओ जाओ सा चेव
 ओहिया वत्तव्वया णवरं ठिईं जह्ण्णेणं तिण्णि पलिओवमाइं उक्कोसेणवि
 तिण्णि पलिओवमाइं एवं अणुबंधोवि, सेसं तं चेव, एवं पच्छिमा तिण्णि गमगा
 णेयव्वा णवरं ठिईं संवेहं च जाणेज्जा, एए सत्त गमगा । जइ संखेज्जवासाउय-
 सण्णिपंचिदिय० संखेज्जवासाउयाणं जहेव असुरकुमारेसु उववज्जमाणानं तहेव

णववि गमा भाणियव्वा णवरं जोइसियठिइं सवेहं च जाणेज्जा, सेसं तहेव
णिरवसेसं भाणियव्वं । जइ मणुस्सेहितो उववज्जति० भेदो तहेव जाव असंखेज्ज-
वासाउयसण्णिमणुस्से णं भंते ! जे भविए जोइसिएसु उववज्जित्तए से णं
भंते ! एवं जहा असंखेज्जवासाउयसण्णिपंचिदियस्स जोइसिएसु चेव उववज्ज-
माणस्स सत्त गमगा तहेव मणुस्साणवि णवरं ओगाहणाविसेसो पढमेसु तिसु
गमएसु ओगाहणा जहण्णेणं साइरेगाइं णव धणुहसयाइं उवकोसेणं तिण्णि गाउ-
याइं, मज्झिमगमए जहण्णेणं साइरेगाइं णव धणुहसयाइं उवकोसेणवि साइरे-
गाइं णव धणुहसयाइं पच्छिमेसु तिसुवि गमएसु जहण्णेणं तिण्णि गाउयाइं उक्को-
सेणवि तिण्णि गाउयाइं, सेसं तहेव णिरवसेसं जाव सवेहोत्ति । जइ संखे-
ज्जवासाउयसण्णिमणुस्से० संखेज्जवासाउयाणं जहेव अमुरकुमारेसु उववज्जमा-
णाणं तहेव णव गमगा भाणियव्वा, णवरं जोइसियठिइं सवेहं च जाणेज्जा, सेसं
तं चेव णिरवसेसं । सेवं भंते ! सेवं भंते ! त्ति ॥ ७१३ ॥

चउवीसइमं सयं चउवीसइमो उद्देसो

सोहम्मदेवा णं भंते ! कओहितो उववज्जति कि णेरइएहितो उवव-
ज्जति० ? भेदो जहा जोइसियउद्देसए, असंखेज्जवासाउयसण्णिपंचिदियतिरिक्ख-
कोणिए णं भंते ! जे भविए सोहम्मगदेवेसु उववज्जित्तए से णं भंते ! केवइ-
काल० ? गोयमा ! जहण्णेणं पलिओवमट्ठिईएसु उ० उवकोसेणं तिपलिओवम-
ट्ठिईएसु उववज्जेज्जा । ते णं भंते ! ० अवसेसं जहा जोइसिएसु उववज्जमाणस्स
णवरं सम्मदिट्ठीवि मिच्छादिट्ठीवि णो सम्मामिच्छादिट्ठी, णाणीवि अण्णाणीवि
दो णाणा दो अण्णाणा णियमं, ठिई जहण्णेणं पलिओवमं उवकोसेणं तिण्णि पलि-
ओवमाइं एवं अणुबंधीवि सेसं तहेव, कालादेसेणं जहण्णेणं दो पलिओवमाइं उक्को-
सेणं छप्पलिओवमाइं एवइयं० १ । सो चेव जहण्णकालट्ठिईएसु उववण्णो एस चेव
वत्तव्वया णवरं कालादेसेणं जहण्णेणं दो पलिओवमाइं उवकोसेणं चत्तारि पलिओ-
वमाइं एवइयं० २ । सो चेव उवकोसकालट्ठिईएसु उववण्णो जहण्णेणं तिपलिओव०
उवकोसेणवि तिपलिओव० एस चेव वत्तव्वया णवरं ठिई जहण्णेणं तिण्णि
पलिओवमाइं उवकोसेणवि तिण्णि पलिओवमाइं सेसं तहेव, कालादेसेणं जह-
ण्णेणं छप्पलिओवमाइं उवकोसेणवि छप्पलिओवमाइं एवइयं० ३ । सो चेव

अप्यणा जहण्णकालट्टिईओ जाओ जहण्णेणं पलिओवमट्टिईएसु उक्कोसेणवि
 पलिओवमट्टिईएसु एस चेव वत्तव्वया णवरं ओगाहणा जहण्णेणं धणुहुपुहुत्तं
 उक्कोसेणं दो गाउयाइं, ठिई जहण्णेणं पलिओवमं उक्कोसेणवि पलिओवमं
 सेसं तहेव, कालादेसेणं जहण्णेणं दो पलिओवमाइं उक्कोसेणंवि दो पलिओव-
 माइं एवइयं० ६ । सो चेव अप्यणा उक्कोसकालट्टिईओ जाओ आइल्लगमग
 सरिसा तिण्णि गमगा णेयव्वा णवरं ठिइं कालादेसं च जाणेज्जा ६ । जइ
 संखेज्जवासाउयसण्णिपंचिवियं० संखेज्जवासाउयस्स जहेव असुरकुमारेसु उवव-
 ज्जमाणस्स तहेव णववि गमगा, णवरं-ठिइं संवेहं च जाणेज्जा, जाहे य
 अप्यणा जहण्णकालट्टिईओ भवइ ताहे तिसुवि गमएसु सम्मदिट्ठीवि मिच्छा-
 दिट्ठीवि णो सम्मामिच्छादिट्ठी, दो णाणा दो अण्णाणा णियमं सेसं तं
 चेव । जइ मणुस्सेहितो उववज्जंति० भेदो जहेव जोइसिएसु उववज्जमाणस्स
 जाव असंखेज्जवासाउयसण्णिमणुस्से णं भंते ! जे भविए सोहम्मं कप्पे देव-
 ताए उववज्जित्तए एवं जहेव असंखेज्जवासाउयस्स सण्णिपंचिवियतिरिक्खजोणि-
 यस्स सोहम्मं कप्पे उववज्जमाणस्स तहेव सत्त गमगा णवरं आइल्लएसु दोसु
 गमएसु ओगाहणा जहण्णेणं गाउयं उक्कोसेणं तिण्णि गाउयाइं, तइयगमे जह-
 ण्णेणं तिण्णि गाउयाइं उक्कोसेणवि तिण्णि गाउयाइं, चउत्थगमए जहण्णेणं गाउयं
 उक्कोसेणवि गाउयं, पच्छिमएसु तिसु गमएसु जहण्णेणं तिण्णि गाउयाइं उक्को-
 सेणवि तिण्णि गाउयाइं सेसं तहेव णिरवसेसं ६ । जइ संखेज्जवासाउयसण्णि-
 मणुस्सेहितो० एवं संखेज्जवासाउयसण्णिमणुस्साणं जहेव असुरकुमारेसु उवव-
 ज्जमाणं तहेव णव गमगा णाणियव्वा णवरं सोहम्मदेवट्टिइं संवेहं च जाणेज्जा,
 सेसं तं चेव ६ । ईसाणदेवा णं भंते ! कओरहितो उववज्जंति० ईसाणदेवाणं
 एस चेव सोहम्मगदेवसरिसा वत्तव्वया णवरं असंखेज्जवासाउयसण्णिपंचिविय-
 तिरिक्खजोणियस्स जेसु ठाणेसु सोहम्मं उववज्जमाणस्स पलिओवमठिई तेसु
 ठाणेसु इहं साइरेगं पलिओवमं कायव्वं, चउत्थगमे ओगाहणा जहण्णेणं
 धणुहुपुहुत्तं उक्कोसेणं साइरेगाइं दो गाउयाइं, सेसं तहेव ६ । असंखे-
 ज्जवासाउयसण्णिमणुस्सवि तहेव ठिई जहा पंचिवियतिरिक्खजोणियस्स
 असंखेज्जवासाउयस्स ओगाहणावि जेसु ठाणेसु गाउयं तेसु ठाणेसु इहं
 साइरेगं गाउयं, सेसं तहेव ६ । संखेज्जवासाउयाणं तिरिक्खजोणियाणं

मणुस्साण य जहेव सोहम्मेसु उववज्जमाणं तहेव णिरवसेसं णववि गमगा
 णवरं ईसाणठिइं सवेहं च जाणेज्जा ६ । सणकुमारदेवा णं भंते ! कओ-
 हितो उववज्जति० उववाओ जहा सक्करप्पभापुद्धविणेरइयाणं जाव पज्जत्त-
 संखेज्जवासाउपसण्णिपंनिदियतिरिक्खजोणिए णं भंते ! जे भविए सणकुमार-
 वेवेसु उववज्जित्तए अवसेसा परिमाणार्इया भवादेसपज्जवसाणा सच्चेव वत्त-
 व्वया भाणियव्वा जहा सोहम्मे उववज्जमाणस्स णवरं सणकुमारट्ठिइं सवेहं च
 जाणेज्जा, जाहे य अप्पणा जहण्णकालट्ठिइंओ भवइ ताहे तिसुवि गमएसु पंच
 लेस्साओ आइल्लाओ कायव्वाओ, सेसं तं चेव ६ । जइ मणुस्सेहितो उववज्जति०
 मणुस्साणं जहेव सक्करप्पभाए उववज्जमाणं तहेव णववि गमा भाणियव्वा
 णवरं सणकुमारट्ठिइं सवेहं च जाणेज्जा ६ । माहिदगदेवा णं भंते ! कओहितो
 उववज्जति० जहा सणकुमारदेवाणं वत्तव्वया तहा माहिदगदेवाणवि भाणियव्वा,
 णवरं माहिदगदेवाणं ठिई साइरेया भाणियव्वा सच्चेव, एवं बंभलोगदेवाणवि
 वत्तव्वया णवरं बंभलोगट्ठिइं सवेहं च जाणेज्जा, एवं जाव सहस्सारी, णवरं
 ठिइं सवेहं च जाणेज्जा, लतगार्इणं जहण्णकालट्ठिइंयस्स तिरिक्खजोणियस्स
 तिसुवि गमएसु छप्पि लेस्साओ कायव्वाओ, संघयणाइं बंभलोमलंतएसु पंच
 आइल्लगणि, महासुक्कसहस्सारेसु चत्तारि, तिरिक्खजोणियाणवि मणुस्साणवि,
 सेसं तं चेव ६ । आणयदेवा णं भंते ! कओहितो उववज्जति० उववाओ जहा
 सहस्सारे देवाणं णवरं तिरिक्खजोणिया खोडेयव्वा जाव पज्जत्तसंखेज्जवासा-
 उपसण्णिमणुस्से णं भंते ! जे भविए आणयदेवेसु उववज्जित्तए० मणुस्साणं वत्त-
 व्वया जहेव सहस्सारेसु उववज्जमाणं णवरं तिण्णि संघयणाणि सेसं तहेव
 जाव अणुबंधो भवादेसेणं जहण्णेणं तिण्णि भवगाहणाइं उक्कोसेणं सत्त भवग-
 हणाइं, कालादेसेणं जहण्णेणं अट्टारस सागरोबमाइं दोहिं वासपुट्टोहिं अब्भहियाइं
 उक्कोसेणं सत्तावणं सागरोबमाइं चउर्हिं पुक्ककोडीहिं अब्भहियाइं एवइयं०,
 एवं सेसावि अट्ट गमगा भाणियव्वा णवरं ठिइं सवेहं च जाणेज्जा, सेसं तं चेव ६ ।
 एवं जाव अच्चुयदेवा, णवरं ठिइं सवेहं च जाणेज्जा ६ । चउसुवि संघयणा
 तिण्णि आणयार्इसु । गेवेज्जगदेवा णं भंते ! कओहितो उववज्जति० एस चेव
 वत्तव्वया णवरं दो संघयणा, ठिइं सवेहं च जाणेज्जा । विजयवेजयंतजयत-
 अपराजियदेवा णं भंते ! कओहितो उववज्जति० एस चेव वत्तव्वया णिरवसेसा

जाव अणुबंधोत्ति, णवरं पढमं संघयणं, सेसं तहेव, भवादेसेणं जहण्णेणं तिण्णि
 भवग्गहणाइं उत्रकोसेणं पंच भवग्गहणाइं, कालादेसेणं जहण्णेणं एवकतीसं
 सागरोवमाइं दोहि वासपुहुत्तोहि अब्भहियाइं उवकोसेणं छावट्ठि सागरोवमाइं
 तिहि पुव्वकोडोहि अब्भहियाइं एवइयं० एवं सेसावि अट्टगमगा भाणियव्वा,
 णवरं ठिइं संवेहं च जाणेज्जा, मणूसे लद्धी णवसुवि गमएसु जहा गेवेज्जेसु
 उववज्जमाणस्स णवरं पढमं संघयणं । सव्वट्टुगसिद्धगदेवा णं भंते ! कओहिंतो
 उववज्जंति० उववाओ जहेव विजयाईणं जाव से णं भंते ! केवइयकालट्टिईएसु
 उववज्जेज्जा ? गोयमा ! जहण्णेणं तेत्तीसं सागरोवमट्टिईएसु उवकोसेणवि
 तेत्तीसं सागरोवमट्टिईएसु उववज्जेज्जा, अवसेसा जहा विजयाईसु उववज्जं-
 ताणं णवरं भवादेसेणं तिण्णि भवग्गहणाइं, कालादेसेणं जहण्णेणं तेत्तीसं सागरो-
 वमाइं दोहि वासपुहुत्तोहि अब्भहियाइं उवकोसेणवि तेत्तीसं सागरोवमाइं दोहि
 पुव्वकोडोहि अब्भहियाइं एवइयं० ६ । सो चेव अप्पणा जहण्णकालट्टिईओ
 जाओ एस चेव वत्तव्वया णवरं ओगाहणाठिईओ रयणिपूहुत्तवासपुहुत्ताणि सेसं
 तहेव, संवेहं च जाणेज्जा ६ । सो चेव अप्पणा उवकोसकालट्टिईओ जाओ एस
 चेव वत्तव्वया णवरं ओगाहणा जहण्णेणं पंच घणुहसयाइं उवकोसेणवि पंच-
 धणुहसयाइं, ठिई जहण्णेणं पुव्वकोडो उवकोसेणवि पुव्वकोडो, सेसं तहेव जाव
 भवादेसोत्ति, कालादेसेणं जहण्णेणं तेत्तीसं सागरोवमाइं दोहि पुव्वकोडोहि
 अब्भहियाइं उवकोसेणवि तेत्तीसं सागरोवमाइं दोहि पुव्वकोडोहि अब्भहियाइं
 एवइयं कालं सेवेज्जा एवइयं कालं गहरागइं करेज्जा, एए तिण्णि गमगा
 सव्वट्टुसिद्धगदेवाणं । सेवं भंते ! २ ति भगवं गोयमे जाव विहरइ ॥ ७१४ ॥

चउवीसइमं सयं समत्तं

॥ पंचवीसइमं सयं पढमो उट्टेसो ॥

लेस्साय १ वव्व २ संठाण ३ जूम ४ पज्जव ५ णियंठ ६ समणा य ७
 ओहे ८ भविया ९ भधिए १० सम्मा ११ मिच्छे य १२ उट्टेसा ॥ १ ॥ तेणं
 कालेणं तेणं समएणं रायगिहे जाव एवं वयासी—कइ णं भंते ! लेस्साओ प० ?
 गोयमा ! छल्लेस्साओ प०, तं०—कण्हलेस्सा जहा पढमसए बिइए उट्टेसए तहेव
 लेस्साविभागो अप्पाबहुगं च जाव चउव्विहाणं देवाणं चउव्विहाणं देवीणं
 मीसगं अप्पाबहुगति ॥ ७१५ ॥ कइविहा णं भंते ! संसारसमावण्णगा जीवा
 पण्णत्ता ? गोयमा ! चउइसविहा संसारसमावण्णगा जीवा प०, तं०—सुहुम-

अपञ्जत्तगा १, सुहुमपञ्जत्तगा २, बाघरअपञ्जत्तगा ३, बाघरपञ्जत्तगा ४, बेइंदिया अपञ्जत्तगा ५, बेइंदिया पञ्जत्तगा ६, एवं तेइंदिया ८, एवं चउरि-
दिया १०, असण्णिपंचीदिया अपञ्जत्तगा ११, असण्णिपंचीदिया पञ्जत्तगा १२, सण्णिपंचीदिया अपञ्जत्तगा १३, सण्णिपंचीदिया पञ्जत्तगा १४ । एएसि णं
चउद्धसविहाणं संसारसमावण्णाणं जीवाणं जहण्णुक्कोसगस्स जोगस्स कयरे २
जाव विसेसाहिया वा ? गोयमा ! सव्वत्थोवे सुहुमस्स अपञ्जत्तगस्स जहण्णए
जोए १, बाघरस्स अपञ्जत्तगस्स जहण्णए जोए असंखेज्जगुणे २, बेइंदियस्स
अपञ्जत्तगस्स जहण्णए जोए असंखेज्जगुणे ३, एवं तेइंदियस्स ४, एवं चउ-
रिदियस्स ५, असण्णिपंचीदियस्स अपञ्जत्तगस्स जहण्णए जोए असंखेज्जगुणे
६, सण्णिपंचीदियस्स अपञ्जत्तगस्स जहण्णए जोए असंखेज्जगुणे ७, सुहुमस्स
पञ्जत्तगस्स जहण्णए जोए असंखेज्जगुणे ८, बाघरस्स पञ्जत्तगस्स जहण्णए
जोए असंखेज्जगुणे ९, सुहुमस्स अपञ्जत्तगस्स उक्कोसए जोए असंखेज्जगुणे १०,
बाघरस्स अपञ्जत्तगस्स उक्कोसए जोए असंखेज्जगुणे ११, सुहुमस्स पञ्जत्तग-
स्स उक्कोसए जोए असंखेज्जगुणे १२, बाघरस्स पञ्जत्तगस्स उक्कोसए जोए
असंखेज्जगुणे १३, बेइंदियस्स पञ्जत्तगस्स जहण्णए जोए असंखेज्जगुणे १४,
एवं तेइंदियस्सवि १५, एवं जाव सण्णिपंचीदियस्स पञ्जत्तगस्स जहण्णए जोए
असंखेज्जगुणे १८, बेइंदियस्स अपञ्जत्तगस्स उक्कोसए जोए असंखेज्जगुणे १९,
एवं तेइंदियस्सवि २०, एवं चउरिदियस्सवि २१, एवं जाव सण्णिपंचीदियस्स
अपञ्जत्तगस्स उक्कोसए जोए असंखेज्जगुणे २३, बेइंदियस्स पञ्जत्तगस्स उक्को-
सए जोए असंखेज्जगुणे २४, एवं तेइंदियस्सवि पञ्जत्तगस्स उक्कोसए जोए
असंखेज्जगुणे २५, चउरिदियस्स पञ्जत्तगस्स उक्कोसए जोए असंखेज्जगुणे
२६, असण्णिपंचीदियपञ्जत्तगस्स उक्कोसए जोए असंखेज्जगुणे २७, एवं
सण्णिपंचीदियस्स पञ्जत्तगस्स उक्कोसए जोए असंखेज्जगुणे ॥ २८ ॥ ७१ ॥ ६ ॥
दो भंते ! णेरइया पढमसमयोववण्णाया किं समजोगी किं विसमजोगी ?
गोयमा ! सिध समजोगी सिध विसमजोगी । से केणट्ठेणं भंते ! एवं वुच्चइ-
सिध समजोगी सिध विसमजोगी ? गोयमा ! आहारयाओ वा से अणाहारए
अणाहारयाओ वा से आहारए सिध हीणे सिध तुल्ले सिध अब्भहिए, जइ हीणे
असंखेज्जइभागहीणे वा संखेज्जइभागहीणे वा संखेज्जगुणहीणे वा असंखेज्ज-

गुणहीणे वा, अह अन्नम्हिए असंखेज्जइभागमन्नम्हिए वा संखेज्जइभागम-
 न्नम्हिए वा संखेज्जगुणमन्नम्हिए वा असंखेज्जगुणमन्नम्हिए वा, से तेणट्ठेणं
 जाद्व सिय समजोगी सिय विसमजोगी, एवं जाव वेमाणियाणं ॥ ७१७ ॥
 कइविहे णं भंते ! जोए प० ? गोयमा ! पण्णरसविहे जोए प०, तं०—
 सच्चमणजोए मोसमणजोए सच्चामोसमणजोए असच्चामोसमणजोए सच्च-
 वइजोए मोसवइजोए सच्चामोसवइजोए असच्चामोसवइजोए ओरालियसरीर-
 कायजोए ओरालियमीसासरीरकायजोए वेउव्वियसरीरकायजोए वेउ-
 व्वियमीसासरीरकायजोए आहारगसरीरकायजोए आहारगमीसासरीरकायजोए
 कम्मसरीरकायजोए १५ । एधस्स णं भंते ! पण्णरसविहस्स जहण्णवको-
 सस्स कपरे २ जाव विसेसाहिया वा ? गोयमा ! सव्वत्थोवे कम्मगसरी-
 रस्स जहण्णए जोए १ । ओरालियमीसगस्स जहण्णए जोए असंखेज्जगुणे
 २ । वेउव्वियमीसगस्स जहण्णए जोए असंखेज्जगुणे ३ । ओरालियसरीरस्स
 जहण्णए जोए असंखेज्जगुणे ४ । वेउव्वियसरीरस्स जहण्णए जोए असंखेज्जगुणे
 ५, कम्मगसरीरस्स उक्कोसए जोए असंखेज्जगुणे ६, आहारगमीसगस्स जहण्णए
 जोए असंखेज्जगुणे ७, तस्स चेव उक्कोसए जोए असंखेज्जगुणे ८, ओरालियमीस-
 गस्स वेउव्वियमीसगस्स एएसि णं उक्कोसए जोए दोण्हवि तुल्ले असंखेज्जगुणे
 ९-१०, असच्चामोसमणजोगस्स जहण्णए जोए असंखेज्जगुणे ११, आहारग-
 सरीरस्स जहण्णए जोए असंखेज्जगुणे १२, तिविहस्स मणजोगस्स चउव्विहस्स
 वइजोगस्स एएसि णं सत्तण्हवि तुल्ले जहण्णए जोए असंखेज्जगुणे १९, आहारग-
 सरीरस्स उक्कोसए जोए असंखेज्जगुणे २०, ओरालियसरीरस्स वेउव्वियसरीर-
 स्स चउव्विहस्स य मणजोगस्स चउव्विहस्स य वइजोगस्स एएसि णं दसण्हवि
 तुल्ले उक्कोसए जोए असंखेज्जगुणे ३० । सेवं भंते ! २ त्ति ॥ ७१८ ॥

पंचवीसइमं सयं बीओ उद्देशो

कइविहा णं भंते ! दग्धा पण्णत्ता ? गोयमा ! दुविहा दग्धा प०, तं०—
 जीवदग्धा य अजीवदग्धा य । अजीवदग्धा णं भंते ! कइविहा प० ? गोयमा !
 दुविहा प०, तंजहा—रूविअजीवदग्धा य अरूविअजीवदग्धा य, एवं एएणं अभि-
 लावेणं जहा अजीवपज्जवा जाव से तेणट्ठेणं गोयमा ! एवं वुच्चइ—ते णं णो

संखेज्जा णो असंखेज्जा अणंता । जीवदब्बा णं भंते ! किं संखेज्जा असंखेज्जा अणंता ? गोयमा ! णो संखेज्जा णो असंखेज्जा अणंता । से केणट्ठेणं भंते ! एवं वुच्चइ—जीवदब्बा णं णो संखेज्जा णो असंखेज्जा अणंता ? गोयमा ! असंखेज्जा णेरइया जाव असंखेज्जा वाउक्काइया, अणंता वणत्सइकाइया, असंखेज्जा बेइंदिया एवं जाव वेमाणिया, अणंता सिद्धा, से तेणट्ठेणं जाव अणंता ॥७१६॥ जीवदब्बाणं भंते ! अजीवदब्बा परिभोगत्ताए हव्वमागच्छति अजीवदब्बाणं जीवदब्बा परिभोगत्ताए हव्वमागच्छति ? गोयमा ! जीवदब्बाणं अजीवदब्बा परिभोगत्ताए हव्वमागच्छति णो अजीवदब्बाणं जीवदब्बा परिभोगत्ताए हव्वमागच्छति । से केणट्ठेणं भंते ! एवं वुच्चइ—जाव हव्वमागच्छति ? गोयमा ! जीवदब्बा णं अजीवदब्बे परिधाइयंति अजीव० २ ता ओरालियं वेउच्चियं आहारं तेयं कम्मं सोइंदियं जाव फासिदियं मणजोगं वइजोगं कायजोगं आणापाणुत्तं च णिव्वत्तयंति, से तेणट्ठेणं जाव हव्वमागच्छति । णेरइयाणं भंते ! अजीवदब्बा परिभोगत्ताए हव्वमागच्छति अजीवदब्बाणं णेरइया परिभोगत्ताए हव्वमागच्छति ? गोयमा ! णेरइयाणं अजीवदब्बा परिभोगत्ताए हव्वमागच्छति णो अजीवदब्बाणं णेरइया जाव हव्वमागच्छति । से केणट्ठेणं ? गोयमा ! णेरइयाणं अजीवदब्बे परिधाइयंति अ० २ ता वेउच्चियं तेयं कम्मं सोइंदियं जाव फासिदियं आणापाणुत्तं च णिव्वत्तयंति, से तेणट्ठेणं गोयमा ! एवं वुच्चइ०, एवं जाव वेमाणिया णवरं सरीरइंदियजोगं भाणियव्वा जस्स जे अत्थि ॥ ७२० ॥ से णूणं भंते ! असंखेज्जे लोए अणंताइं दब्बाइं आगासे भइयव्वाइं ? हंता गोयमा ! असंखेज्जे लोए जाव भइयव्वाइं । लोगस्स णं भंते ! एग्गि आगासपएसे कइदिंसि पोग्गला च्छिज्जति ? गोयमा ! णिव्वाघाएणं छइदिंसि वाघायं पडुच्च सिय तिदिंसि सिय चउदिंसि सिय पंचदिंसि । लोगस्स णं भंते ! एग्गि आगासपएसे कइदिंसि पोग्गला च्छिज्जति ? एवं चेव, एवं उवच्चिज्जति एवं अवच्चिज्जति ॥ ७२१ ॥ जीवेणं भंते ! जाइं दब्बाइं ओरालियसरीरत्ताए गेण्हइ ताइं किं ठियाइं गेण्हइ अठियाइं गेण्हइ ? गोयमा ! ठियाइंपि गेण्हइ अठियाइंपि गेण्हइ । ताइं भंते ! किं दव्वओ गेण्हइ खेतओ गेण्हइ कालओ गेण्हइ भावओ गेण्हइ ? गोयमा ! दव्वओवि गेण्हइ खेतओवि गेण्हइ कालओवि गेण्हइ भावओवि

गेण्हइ, ताइं दव्वओ अणंतपएसियाइं दव्वाइं खेत्तओ असंखेज्जपएसीगण्हाइं एवं जहा पण्णवणाए पद्धमे आहारुद्देसए जाव णिग्वाघाएणं छद्दिसि वाघायं पडुच्च सिय तिद्विसि सिय चउद्विसि सिय पंचद्विसि । जीवे णं भंते ! जाइं दव्वाइं वेउद्वियसरीरत्ताए गेण्हइ ताइं किं ठियाइं गेण्हइ अठियाइं गेण्हइ ? एवं चेव णवरं णियमं छद्दिसि, एवं आहारगसरीरत्ताएवि । जीवे णं भंते ! जाइं दव्वाइं तेयगसरीरत्ताए गेण्हइ पुच्छा, गोयमा ! ठियाइं गेण्हइ णो अठियाइं गेण्हइ सेसं जहा ओरालियसरीरत्तस कम्मगसरीरे एवं चेव एवं जाव भावओवि गेण्हइ । जाइं दव्वाइं दव्वओ गेण्हइ ताइं किं एगपएसियाइं गेण्हइ दुपएसियाइं गेण्हइ ? एवं जहा भासापए जाव आणुपुंठिव गेण्हइ णो अणाणुपुंठिव गेण्हइ । ताइं भंते ! कइद्विसि गेण्हइ ? गोयमा ! णिग्वाघाएणं जहा ओरालियत्तस । जीवे णं भंते ! जाइं दव्वाइं सोइद्वियत्ताए गेण्हइ ? जहा वेउद्वियसरीरं एवं जाव जिंमिद्वियत्ताए फांसिद्वियत्ताए जहा ओरालियसरीरं मणजोगत्ताए जहा कम्मगसरीरं णवरं णियमं छद्दिसि एवं वइजोगत्ताएवि कायजोगत्ताएवि जहा ओरालियसरीरत्तस । जीवे णं भंते ! जाइं दव्वाइं आणापाणुत्ताए गेण्हइ जहेव ओरालियसरीरत्ताए जाव सिय पंचद्विसि । सेवं भंते ! सेवं भंते ! त्ति । केइ चउद्वीसवंडएणं एयाणि पयाणि मण्णंति जत्तसं जं अत्थि ॥ ७२२ ॥

पंचवीसइमं सयं तइओ उद्देसो

कइ णं भंते ! संठाणा प० ? गोयमा ! छ संठाणा प०, तं०—परिमंडले वट्टे तंसे चउरंसे आयए अणित्थंथे । परिमंडला णं भंते ! संठाणा दव्वट्टयाए किं संखेज्जा असंखेज्जा अणंता ? गोयमा ! णो संखेज्जा णो असंखेज्जा अणंता वट्टा णं भंते ! संठाणा० एवं चेव, एवं जाव अणित्थंथा, एवं पएसट्टयाएवि, एवं दव्वट्टपएसट्टयाएवि । एएसि णं भंते ! परिमंडलवट्टंतसचउरंसआयत्तअणित्थंथाणं संठाणाणं दव्वट्टयाए पएसट्टयाए दव्वट्टपएसट्टयाए कयरे २ हितो जाव विसेसाहिया वा ? गोयमा ! सव्वत्थोवा परिमंडलसंठाणा दव्वट्टयाए, वट्टा संठाणा दव्वट्टयाए संखेज्जगुणा, चउरंसा संठाणा दव्वट्टयाए संखेज्जगुणा, तंसा संठाणा दव्वट्टयाए संखेज्जगुणा, आययसंठाणा दव्वट्टयाए संखेज्जगुणा, अणित्थंथा संठाणा दव्वट्टयाए असंखेज्जगुणा, पएसट्टयाए—सव्वत्थोवा परिमंडला संठाणा पएसट्टयाए, वट्टा संठाणा पएसट्टयाए संखेज्जगुणा, जहा दव्वट्टयाए तथा पए-

सट्टयाएवि जाव अणित्थंथा संठाणा पएसट्टयाए असंखेज्जगुणा, दच्चट्टयाएसट्टयाए सवत्थोवा परिमंडला संठाणा दच्चट्टयाए सो चेव गणओ भाणियव्वो जाव अणित्थंथा संठाणा दच्चट्टयाए असंखेज्जगुणा, अणित्थंवीहितो संठाणेहितो दच्चट्टयाए परिमंडला संठाणा पएसट्टयाए असंखेज्जगुणा, वट्टा संठाणा पएसट्टयाए संखेज्जगुणा, सो चेव पएसट्टयाए गमओ भाणियव्वो जाव अणित्थंथा संठाणा पएसट्टयाए असंखेज्जगुणा ॥ ७२३ ॥ कइ णं भंते ! संठाणा पणसा ? गोयमा ! पंच संठाणा प०, तं०-परिमंडले जाव आयए । परिमंडला णं भंते ! संठाणा कि संखेज्जा असंखेज्जा अणंता ? गोयमा ! णो संखेज्जा णो असंखेज्जा अणंता । वट्टा णं भंते ! संठाणा कि संखेज्जा० ? एवं चेव, एवं जाव आयया । इमीसे णं भंते ! रयणप्पभाए पुट्ठीए परिमंडला संठाणा कि संखेज्जा असंखेज्जा अणंता ? गोयमा ! णो संखेज्जा णो असंखेज्जा अणंता ! वट्टा णं भंते ! संठाणा कि संखेज्जा० ? एवं चेव, एवं जाव आयया । सक्करप्पभाए णं भंते ! पुट्ठीए परिमंडला संठाणा एवं चेव, एवं जाव आयया, एवं जाव अहेसत्तमाए । सोहम्मे णं भंते ! कप्पे परिमंडला संठाणा एवं चेव, एवं जाव अच्चए । गेवेज्जगविमाणणं भंते ! परिमंडलसंठाणा एवं चेव, एवं अणुत्तरविमाणेसुवि, एवं हिसिप्पमारोएवि । जत्थ णं भंते ! एगे परिमंडले संठाणे जवमज्जे तत्थ परिमंडला संठाणा कि संखेज्जा असंखेज्जा अणंता ? गोयमा ! णो संखेज्जा णो असंखेज्जा अणंता । वट्टा णं भंते ! संठाणा कि संखेज्जा असंखेज्जा अणंता ? एवं चेव, एवं जाव आयया । जत्थ णं भंते ! एगे वट्टे संठाणे जवमज्जे तत्थ परिमंडला संठाणा० ? एवं चेव, वट्टा संठाणा एवं चेव, एवं जाव आयया, एवं एक्केक्केणं संठाणेणं पंचवि चारेयव्वा । जत्थ णं भंते ! इमीसे रयणप्पभाए पुट्ठीए एगे परिमंडले संठाणे जवमज्जे तत्थ णं परिमंडलसंठाणा कि संखेज्जा० पुच्छा, गोयमा ! णो संखेज्जा णो असंखेज्जा अणंता । वट्टा णं भंते ! संठाणा कि संखेज्जा० पुच्छा, गोयमा ! णो संखेज्जा णो असंखेज्जा अणंता, एवं चेव, एवं जाव आयया । जत्थ णं भंते ! इमीसे रयणप्पभाए पुट्ठीए एगे वट्टे संठाणे जवमज्जे तत्थ णं परिमंडला संठाणा कि संखेज्जा० पुच्छा, गोयमा ! णो संखेज्जा णो असंखेज्जा अणंता, वट्टा संठाणा एवं चेव, एवं जाव आयया, एवं पुणरवि एक्केक्केणं संठाणेणं पंचवि चारेयव्वा जहेव हेट्टिल्ला जाव आयएणं, एवं जाव अहेसत्तमाए, एवं

कप्येसुवि जाव ईसिप्पभाराए पुडवीए ॥ ७२४ ॥ वट्टे णं भंते ! संठाणे कइ-
 पएसिए कइपएसोगाढे प० ? गोयमा ! वट्टे संठाणे दुविहे प०, तं०-घणवट्टे
 य पयरवट्टे य, तत्थ णं जे से पयरवट्टे से दुविहे प०, तं०-ओयपएसिए य
 जुम्मपएसिए य, तत्थ णं जे से ओयपएसिए से जहण्णेणं पंचपएसिए
 पंचपएसोगाढे उक्कोसेणं अणंतपएसिए असंखेज्जपएसोगाढे, तत्थ णं जे से
 जुम्मपएसिए से जहण्णेणं बारसपएसिए बारसपएसोगाढे उक्कोसेणं अणंतपए-
 सिए असंखेज्जपएसोगाढे, तत्थ णं जे से घणवट्टे से दुविहे प०, तं०-ओयपए-
 सिए य जुम्मपएसिए य, तत्थ णं जे से ओयपएसिए से जहण्णेणं सत्तपएसिए
 सत्तपएसोगाढे प०, उक्कोसेणं अणंतपएसिए असंखेज्जपएसोगाढे प०, तत्थ णं
 जे से जुम्मपएसिए से जहण्णेणं बत्तीसपएसिए बत्तीसपएसोगाढे प०, उक्कोसेणं
 अणंतपएसिए असंखेज्जपएसोगाढे प० । तंसे णं भंते ! संठाणे कइपएसिए
 कइपएसोगाढे प० ? गोयमा ! तंसे णं संठाणे दुविहे प०, तं०-घणतंसे य
 पयरतंसे य, तत्थ णं जे से पयरतंसे से दुविहे प०, तं०-ओयपएसिए य जुम्म-
 पएसिए य, तत्थ णं जे से ओयपएसिए से जहण्णेणं तिपएसिए तिपएसोगाढे
 प०, उक्कोसेणं अणंतपएसिए असंखेज्जपएसोगाढे प०, तत्थ णं जे से जुम्मपए-
 सिए से जहण्णेणं छप्पएसिए छप्पएसोगाढे प०, उक्कोसेणं अणंतपएसिए असं-
 खेज्जपएसोगाढे प०, तत्थ णं जे से घणतंसे से दुविहे प०, तं०-ओयपएसिए य
 जुम्मपएसिए य, तत्थ णं जे से ओयपएसिए से जहण्णेणं पणतीसपएसिए पण-
 तीसपएसोगाढे उक्कोसेणं अणंतपएसिए तं चेव, तत्थ णं जे से जुम्मपएसिए से
 जहण्णेणं चउप्पएसिए चउप्पएसोगाढे प०, उक्कोसेणं अणंतपएसिए तं चेव ।
 चउरंसे णं भंते ! संठाणे कइपएसिए० पुच्छा, गोयमा ! चउरंसे संठाणे दुविहे प०
 भेदी जहेव वट्टस्स जाव तत्थ णं जे से ओयपएसिए से जहण्णेणं णवपएसिए णव-
 पएसोगाढे प०, उक्कोसेणं अणंतपएसिए असंखेज्जपएसोगाढे प०, तत्थ णं जे से
 जुम्मपएसिए से जहण्णेणं चउप्पएसिए चउप्पएसोगाढे प०, उक्कोसेणं अणंत-
 पएसिए तं चेव, तत्थ णं जे से घणचउरंसे दुविहे प०, तंजहा-ओयपएसिए
 य जुम्मपएसिए य, तत्थ णं जे से ओयपएसिए से जहण्णेणं सत्तावीसइपएसिए
 सत्तावीसइपएसोगाढे उक्कोसेणं अणंतपएसिए तहेव, तत्थ णं जे से जुम्मपए-
 सिए से जहण्णेणं अट्टपएसिए अट्टपएसोगाढे प०, उक्कोसेणं अणंतपएसिए

तहेव । आयए णं भंते ! संठाणे कइपएसिए कइपएसोगाढे प० ? गोयमा ! आयए णं संठाणे तिविहे प०, तं०—सेडिआयए पयरायए घणायए, तत्थ णं जे से सेडिआयए से डुविहे प०, तं०—ओयपएसिए य जुम्मपएसिए य, तत्थ णं जे से ओयपएसिए से जह्ण्णेणं तपएसिए तपएसोगाढे उक्कोसेणं अणंतपएसिए तं चेव, तत्थ णं जे से जुम्मपएसिए से जह्ण्णेणं दुपएसिए दुपएसोगाढे उक्कोसेणं अणंतपएसिए तं चेव, तत्थ णं जे से पयरायए से डुविहे प०, तं०—ओयपएसिए य जुम्मपएसिए य, तत्थ णं जे से ओयपएसिए से जह्ण्णेणं पणरसपएसिए पणरसपएसोगाढे उक्कोसेणं अणंत० तहेव, तत्थ णं जे से जुम्मपएसिए से जह्ण्णेणं छप्पएसिए छप्पएसोगाढे उक्कोसेणं अणंत० तहेव, तत्थ णं जे से घणायए से डुविहे प०, तं०—ओयपएसिए य जुम्मपएसिए य, तत्थ णं जे से ओयपएसिए से जह्ण्णेणं पणयालीसपएसिए पणयालीसपएसोगाढे प०, उक्कोसेणं अणंत० तहेव, तत्थ णं जे से जुम्मपएसिए से जह्ण्णेणं बारसपएसिए बारसपएसोगाढे प०, उक्कोसेणं अणंत० तहेव । परिमंडले णं भंते ! संठाणे कइपएसिए० पुच्छा, गोयमा ! परिमंडले णं संठाणे डुविहे प० तं०—घणपरिमंडले य पयरपरिमंडले य, तत्थ णं जे से पयरपरिमंडले से जह्ण्णेणं वीसइपएसिए वीसइपएसोगाढे उक्कोसेणं अणंतपएसिए तहेव, तत्थ णं जे से घणपरिमंडले से जह्ण्णेणं चत्तालीसपएसिए चत्तालीसपएसोगाढे प०, उक्कोसेणं अणंतपएसिए असंखेज्जपएसोगाढे पणत्ते ॥७२५॥ परिमंडले णं भंते ! संठाणे दव्वट्टयाए किं कइजुम्मे तेओए दावरजुम्मे कलिओए ? गोयमा ! णो कइजुम्मे णो तेओए णो दावरजुम्मे कलिओए, वट्टे णं भंते ! संठाणे दव्वट्टयाए एवं चेव एवं जाव आयए । परिमंडला णं भंते ! संठाणा दव्वट्टयाए किं कइजुम्मा तेओगा दावरजुम्मा कलिओगा पुच्छा, गोयमा ! ओघादेसेणं सिय कइजुम्मा सिय तेओगा सिय दावरजुम्मा सिय कलिओगा, विहाणादेसेणं णो कइजुम्मा णो तेओगा णो दावरजुम्मा कलिओगा, एवं जाव आयया । परिमंडले णं भंते ! संठाणे पएसट्टयाए किं कइजुम्मे० पुच्छा, गोयमा ! सिय कइजुम्मे सिय तेओगे सिय दावरजुम्मे सिय कलिओगे, एवं जाव आयए, परिमंडला णं भंते ! संठाणा पएसट्टयाए किं कइजुम्मा० पुच्छा, गोयमा ! ओघादेसेणं सिय कइजुम्मा जाव सिय कलिओगा, विहाणादेसेणं कइजुम्मावि तेओगावि दावरजुम्मावि

कलिओगावि, एवं जाव आयया । परिमंडले णं भंते ! संठाणे किं कडजुम्म-
पएसोगाढे जाव कलिओगपएसोगाढे ? गोयमा ! कडजुम्मपएसोगाढे णो तेओग-
पएसोगाढे णो दावरजुम्मपएसोगाढे णो कलिओगपएसोगाढे । वट्टे णं भंते !
संठाणे किं कडजुम्म० पुच्छा, गोयमा ! सिय कडजुम्मपएसोगाढे सिय तेओग-
पएसोगाढे णो दावरजुम्मपएसोगाढे सिय कलिओगपएसोगाढे । तंसे णं भंते !
संठाणे पुच्छा, गोयमा ! सिय कडजुम्मपएसोगाढे सिय तेओगपएसोगाढे सिय-
दावरजुम्मपएसोगाढे णो कलिओगपएसोगाढे । चउरसे णं भंते ! संठाणे जहा
वट्टे तथा चउरसेवि । आयए णं भंते ! पुच्छा, गोयमा ! सिय कडजुम्मपए-
सोगाढे जाव सिय कलिओगपएसोगाढे । परिमंडला णं भंते ! संठाणा किं
कडजुम्मपएसोगाढा तेओगपएसोगाढा० पुच्छा, गोयमा ! ओघादेसेणवि
विहाणादेसेणवि कडजुम्मपएसोगाढा णो तेओगपएसोगाढा णो दावरजुम्मपए-
सोगाढा णो कलिओगपएसोगाढा । वट्टा णं भंते ! संठाणा किं कडजुम्मपए-
सोगाढा० पुच्छा, गोयमा ! ओघादेसेण कडजुम्मपएसोगाढा णो तेओग० णो
दावरजुम्म० णो कलिओग०, विहाणादेसेण कडजुम्मपएसोगाढावि तेओगपए-
सोगाढा वि णो दावरजुम्मपएसोगाढा कलिओगपएसोगाढावि, तंसा णं भंते !
संठाणा किं कडजुम्म० पुच्छा, गोयमा ! ओघादेसेण कडजुम्मपएसोगाढा णो
तेओग० णो दावरजुम्म० णो कलिओगपएसोगाढा, विहाणादेसेण कडजुम्मपए-
सोगाढावि तेओगपएसोगाढावि णो दावरजुम्मपएसोगाढा णो कलिओगपए-
सोगाढा । चउरसा जहा वट्टा । आयया णं भंते ! संठाणा पुच्छा, गोयमा !
ओघादेसेण कडजुम्मपएसोगाढा णो तेओगपएसोगाढा णो दावरजुम्मपए-
सोगाढा णो कलिओगपएसोगाढा, विहाणादेसेण कडजुम्मपएसोगाढावि जाव
कलिओगपएसोगाढावि । परिमंडले णं भंते ! संठाणे किं कडजुम्मसमयठिईए
तेओगसमयठिईए दावरजुम्मसमयठिईए कलिओगसमयठिईए ? गोयमा ! सिय
कडजुम्मसमयठिईए जाव सिय कलिओगसमयठिईए, एवं जाव आयए ।
परिमंडला णं भंते ! संठाणा किं कडजुम्मसमयठिईया० पुच्छा, गोयमा !
ओघादेसेण सिय कडजुम्मसमयठिईया जाव सिय कलिओगसमयठिईया, विहाणा-
देसेण कडजुम्मसमयठिईयावि जाव कलिओगसमयठिईयावि, एवं जाव आयया ।
परिमंडले णं भंते ! संठाणे कालवण्णपउजवेहिं किं कडजुम्मे जाव कलिओगे ?

गोयमा ! सिय कड्जुम्मे एवं एएणं अभिलावेणं जहेव ठिईए एवं नीलवण-
 पज्जवेहिं, एवं पंचहिं वण्णेहिं दोहिं गंधेहिं, पंचहिं रसेहिं, अट्ठहिं फस्सेहिं जाव
 लुबकफासपज्जवेहिं । सेढीओ णं भंते ! दच्चट्टयाए किं संखेज्जाओ असंखेज्जाओ
 अणंताओ? गोयमा! णो संखेज्जाओ णो असंखेज्जाओ अणंताओ । पाईणपडीणाय-
 याओ णं भंते! सेढीओ दच्चट्टयाए किं संखेज्जाओ ३ एवं चेव, एवं दाहिणुत्तरायया-
 ओवि, एवं उड्डमहाययाओवि । लोगागाससेढीओ णं भंते ! दच्चट्टयाए किं संखे-
 ज्जाओ असंखेज्जाओ अणंताओ? गोयमा ! णो संखेज्जाओ असंखेज्जाओ णो अणं-
 ताओ । पाईणपडीणाययाओ णं भंते ! लोगागाससेढीओ दच्चट्टयाए किं संखेज्जाओ
 एवं चेव, एवं दाहिणुत्तराययाओवि । एवं उड्डमहाययाओवि । अलोगागास-
 सेढीओ णं भंते ! दच्चट्टयाए किं संखेज्जाओ असंखेज्जाओ अणंताओ ? गोयमा !
 णो संखेज्जाओ णो असंखेज्जाओ अणंताओ, एवं पाईणपडीणाययाओवि, एवं
 दाहिणुत्तराययाओवि, एवं उड्डमहाययाओवि । सेढीओ णं भंते ! पएसट्टयाए
 किं संखेज्जाओ० जहा दच्चट्टयाए तथा पएसट्टयाएवि जाव उड्डमहाययाओवि
 सब्बाओ अणंताओ । लोगागाससेढीओ णं भंते ! पएसट्टयाए किं संखेज्जाओ०
 पुच्छा, गोयमा ! सिय संखेज्जाओ सिय असंखेज्जाओ णो अणंताओ, एवं
 पाईणपडीणाययाओवि, एवं दाहिणुत्तराययाओवि, एवं चेव उड्डमहाययाओवि
 णो संखेज्जाओ असंखेज्जाओ णो अणंताओ । अलोगागाससेढीओ णं भंते !
 पएसट्टयाए पुच्छा, गोयमा ! सिय संखेज्जाओ सिय असंखेज्जाओ सिय अणं-
 ताओ । पाईणपडीणाययाओ णं भंते ! अलोया० पुच्छा, गोयमा ! णो संखे-
 ज्जाओ णो असंखेज्जाओ अणंताओ, एवं दाहिणुत्तराययाओवि । उड्डमहाययाओ
 पुच्छा, गोयमा ! सिय संखेज्जाओ सिय असंखेज्जाओ सिय अणंताओ ॥७२७॥
 सेढीओ णं भंते ! किं साइयाओ सपज्जवसियाओ १, साइयाओ अपज्जवसि-
 याओ २, अणाइयाओ सपज्जवसियाओ ३, अणाइयाओ अपज्जवसियाओ ४ ?
 गोयमा ! णो साइयाओ सपज्जवसियाओ, णो साइयाओ अपज्जवसियाओ,
 णो अणाइयाओ सपज्जवसियाओ, अणाइयाओ अपज्जवसियाओ, एवं जाव
 उड्डमहाययाओ । लोगागाससेढीओ णं भंते ! किं साइयाओ सपज्जवसियाओ०
 पुच्छा, गोयमा ! साइयाओ सपज्जवसियाओ, णो साइयाओ, अपज्जवसियाओ,
 णो अणाइयाओ सपज्जवसियाओ, णो अणाइयाओ अपज्जवसियाओ, एवं जाव

उड्डमहाययाओ । अलोगागाससेढीओ णं भंते ! किं साइयाओ सपज्जवसि-
याओ० पुच्छा, - गोयमा ! सिय साइयाओ सपज्जवसियाओ १, सिय साइ-
याओ अपज्जवसियाओ २, सिय अणाइयाओ सपज्जवसियाओ ३, सिय
अणीइयाओ अपज्जवसियाओ ४, पाईणपडीणाययाओ दाहिणुत्तराययाओ ष
एवं चेव, णवरं णो साइयाओ सपज्जवसियाओ सिय साइयाओ अपज्जवसि-
याओ सेसं तं चेव, उड्डमहाययाओ जहा ओहियाओ तहेव चउमंगो । सेढीओ
णं भंते ! दव्वट्टयाए किं कडजुम्माओ तेओयाओ० पुच्छा, गोयमा ! कडजुम्माओ
णो तेओयाओ णो दावरजुम्माओ णो कलिओगाओ, एवं जाव उड्डमहाययाओ,
लोगागाससेढीओ एवं चेव, एवं अलोगागाससेढीओवि । सेढीओ णं भंते !
पएसट्टयाए किं कडजुम्माओ० पुच्छा, एवं चेव एवं जाव उड्डमहाययाओ ।
लोगागाससेढीओ णं भंते ! पएसट्टयाए पुच्छा, गोयमा ! सिय कडजुम्माओ णो
तेओयाओ सिय दावरजुम्माओ णो कलिओगाओ, एवं पाईणपडीणाययाओवि
दाहिणुत्तराययाओवि । उड्डमहाययाओ णं० पुच्छा, गोयमा ! कडजुम्माओ णो
तेओयाओ णो दावरजुम्माओ णो कलिओगाओ । अलोगागाससेढीओ णं भंते !
पएसट्टयाए पुच्छा, गोयमा ! सिय कडजुम्माओ जाव सिय कलिओगाओ, एवं
पाईणपडीणाययाओवि, एवं दाहिणुत्तराययाओवि, उड्डमहाययाओवि एवं चेव,
णवरं णो कलिओगाओ, सेसं तं चेव ॥ ७२७ ॥ कइ णं भंते ! सेढीओ प० ?
गोयमा ! सत्त सेढीओ पुण्णत्ताओ, तंजहा—उज्जुआयया एगओवका दुहओ-
वका एगओखहा दुहओखहा चक्कवात्ता अद्धचक्कवात्ता । परमाणुपोग्गलाणं
भंते ! किं अणुसेढिं गई पवत्तइ विसेढिं गई पवत्तइ ? गोयमा ! अणुसेढिं
गई पवत्तइ णो विसेढिं गई पवत्तइ । दुपएसियाणं भंते ! खंधाणं अणुसेढिं गई
पवत्तइ विसेढिं गई पवत्तइ ? एवं चेव, एवं जाव अणंतपएसियाणं खंधाणं ।
णेरइयाणं भंते ! किं अणुसेढिं गई पवत्तइ विसेढिं गई पवत्तइ ? एवं चेव,
एवं जाव वेमाणियाणं ॥ ७२६ ॥ इमीसे णं भंते ! रयणप्पभाए पुढवीए
केवइया णिरयावाससयसहस्सा प० ? गोयमा ! तीसं णिरयावाससयसहस्सा
प०, एवं जहा पढमसए पंचमुद्देसए जाव अणुत्तरविमाणत्ति ॥ ७३० ॥
कइकिहे णं भंते ! गणिपिडए प० ? गोयमा ! दुवालसंगे गणिपिडए प०, तं—
आयारो जाव दिट्ठिवाओ । से किं तं आयारो ? आयारो णं समणाणं णिग्गंथाणं

अयारगोयर० एवं अंगपरूवणा भाणियव्वा जहा णंदीए जाव-सुत्तथो खलु पढमो बीओ णिज्जुत्तिमीसिओ भणिओ । तइओ य णिरवसेसो एस विही होइ अणुओगे ॥ १ ॥ ७३१ ॥ एएसि णं भंते ! णेरइयाणं जाव देवाणं सिद्धाण य पंचगइसमासेणं कयरे २ हितो० पुच्छा, गोयमा ! अप्पाबहुयं जहा बहुवत्त-व्वयाए अट्टगइसमासअप्पाबहुयं च । एएसि णं भंते ! सइदियाणं एगिदियाणं जाव अणिदियाण य कयरे० ? एयंपि जहा बहुवत्तव्वयाए तहेव ओहियं पयं भाणियव्वं, सकाइयअप्पाबहुयं तहेव ओहियं भाणियव्वं । एएसि णं भंते ! जीवाणं पोभगलाणं जाव सब्वपज्जवाण य कयरे २ जाव बहुवत्तव्वयाए । एएसि णं भंते ! जीवाणं आउयस्स कम्मस्स अबंधगाणं अबंधगाणं जहा बहुवत्तव्वयाए जाव आउयस्स कम्मस्स अबंधगा विसेसाहिपा । सेवं भंते ! २ ति ॥ ७३२ ॥

पंचवीसइमं सयं चउत्थो उट्टेसो

कइ णं भंते ! जूम्मा पण्णत्ता ? गोयमा ! चत्तारि जूम्मा प०, तं०-कडजुम्मे जाव कलिओगे । से केणट्ठेणं भंते ! एवं वुच्चइ-चत्तारि जूम्मा, प०-कडजुम्मे जाव कलिओगे एवं जहा अट्टारसमसए चउत्थे उट्टेसए तहेव जाव से तेणट्ठेणं गोयमा ! एवं वुच्चइ । णेरइयाणं भंते ! कइ जूम्मा प० ? गोयमा ! चत्तारि जूम्मा प०, तंजहा-कडजुम्मे जाव कलिओगे । से केणट्ठेणं भंते ! एवं वुच्चइ-णेरइयाणं चत्तारि जूम्मा प०, तं०-कडजुम्मे अट्ठो तहेव, एवं जाव वाउ-काइयाणं । वणस्सइकाइयाणं पुच्छा, गोयमा ! वणस्सइकाइया सिय कडजुम्मा सिय तेओया सिय दावरजुम्मा सिय कलिओया । से केणट्ठेणं भंते ! एवं वुच्चइ-वणस्सइकाइया जाव कलिओगा ? गोयमा ! उववायं पडुच्च, से तेणट्ठेणं तं चेव, बेइदियाणं जहा णेरइयाणं, एवं जाव वेमाणियाणं, सिद्धाणं जहा वणस्सइ-काइयाणं । कइविहा णं भंते ! सब्वदव्वा प० ? गोयमा ! छविवा सब्वदव्वा प०, तंजहा-धम्मत्थिकाए अधम्मत्थिकाए जाव अट्ठासमए । धम्मत्थिकाए णं भंते ! दव्वट्टयाए कि कडजुम्मे जाव कलिओगे ? गोयमा ! णो कडजुम्मे णो तेओए णो दावरजुम्मे कलिओगे, एवं अहम्मत्थिकाएवि, एवं आगासत्थिकाएवि । जीवत्थिकाए णं भंते ! पुच्छा, गोयमा ! कडजुम्मे णो तेओए णो दावरजुम्मे णो कलिओए । योगलत्थिकाए णं भंते ! पुच्छा, गोयमा ! सिय कडजुम्मे जाव सिय कलिओगे, अट्ठासमए जहा जीवत्थिकाए । धम्मत्थिकाए णं भंते ! पए-

सदृयाए कि कडजुम्मे० पुच्छा, गोयमा ! कडजुम्मे णो तेओए णो दावरजुम्मे णो कलिओए, एवं जाव अद्दासमए । एएसि णं भंते ! घम्मत्थिकायअहम्मत्थिकाय जाव अद्दासमयाणं दव्वट्टयाए० एएसि णं अप्पावहुणं जहा बहुवत्तव्वयाए त्तेव णिरवसेसं । घम्मत्थिकाए णं भंते ! कि ओगाढे अणोगाढे ? गोयमा ! ओगाढे णो अणोगाढे । जइ ओगाढे कि संखेज्जपएसोगाढे असंखेज्जपएसोगाढे अणंतपएसोगाढे ? गोयमा ! णो संखेज्जपएसोगाढे असंखेज्जपएसोगाढे णो अणंतपएसोगाढे । जइ असंखेज्जपएसोगाढे कि कडजुम्मपएसोगाढे० पुच्छा, गोयमा ! कडजुम्मपएसोगाढे णो तेओग० णो दावरजुम्म० णो कलिओगपएसोगाढे, एवं अहम्मत्थिकाएवि, एवं आगासत्थिकाएवि, जीवत्थिकाए पोगलत्थिकाए अद्दासमए एवं चेव । इमा णं भंते ! रयणप्पभापुढवी कि ओगाढा अणोगाढा जहेव घम्मत्थिकाए एवं जाव अहेसत्तमा, सोहम्मे एवं चेव, एवं जाव ईसिप्प-बभारापुढवी ॥ ७३३ ॥ जीवे णं भंते ! दव्वट्टयाए कि कडजुम्मे० पुच्छा, गोयमा ! णो कडजुम्मे णो तेओगे णो दावरजुम्मे कलिओगे, एवं णेरइएवि, एवं जाव सिद्धे । जीवा णं भंते ! दव्वट्टयाए कि कडजुम्मा० पुच्छा गोयमा ! ओघादेसेणं कडजुम्मा णो तेओगा णो दावरजुम्मा णो कलिओगा, विहाणादेसेणं णो कडजुम्मा णो तेओगा णो दावरजुम्मा कलिओगा । णेरइया णं भंते ! दव्वट्टयाए पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं णो कडजुम्मा णो तेओगा णो दावरजुम्मा कलिओगा, एवं जाव सिद्धा । जीवे णं भंते ! एसदृयाए कि कडजुम्मे० पुच्छा, गोयमा ! जीवपएसे पडुच्च कडजुम्मे णो तेओगे णो दावरजुम्मे णो कलिओगे, सरीरपएसे पडुच्च सिय कडजुम्मे जाव सिय कलिओगे, एवं जाव वेमाणिए । सिद्धे णं भंते ! एसदृयाए कि कडजुम्मे० पुच्छा, गोयमा ! कडजुम्मे णो तेओगे णो दावरजुम्मे णो कलिओगे । जीवा णं भंते ! एसदृयाए कि कडजुम्मा० पुच्छा, गोयमा ! जीवपएसे पडुच्च ओघादेसेणवि विहाणादेसेणवि कडजुम्मा णो तेओगा णो दावरजुम्मा णो कलिओगा, सरीरपएसे पडुच्च ओघादेसेणं सिय कडजुम्मा जाव सिय कलिओगा, विहाणादेसेणं कडजुम्मावि जाव कलिओगावि, एवं णेरइयावि, एवं जाव वेमाणिया । सिद्धा णं भंते ! पुच्छा, गोयमा ! ओघादेसेणवि विहाणादेसेणवि कडजुम्मा णो तेओगा णो दावरजुम्मा णो कलिओगा ॥ ७३४ ॥ जीवे

णं भंते ! किं कडजुम्मपएसोगाढे० पुच्छा, गोयमा ! सिय कडजुम्मपएसोगाढे
 जाव सिय कलिओगपएसोगाढे० एवं जाव सिद्धे । जीवा णं भंते ! किं कड-
 जुम्मपएसोगाढा० पुच्छा, गोयमा ! ओघादेसेणं कडजुम्मपएसोगाढा णो तेओग०
 णो दावर० णो कलिओगपएसोगाढा, विहाणादेसेणं कडजुम्मपएसोगाढावि जाव
 कलिओगपएसोगाढावि । णेरइया णं भंते ! पुच्छा, गोयमा ! ओघादेसेणं सिय
 कडजुम्मपएसोगाढा जाव सिय कलिओगपएसोगाढा, विहाणादेसेणं कडजुम्म-
 पएसोगाढावि जाव कलिओगपएसोगाढावि, एवं एगिदियसिद्धवज्जा सत्वेवि,
 सिद्धा एगिदिया य जहा जीवा । जीवे णं भंते ! किं कडजुम्मसमयट्ठिईए०
 पुच्छा, गोयमा ! कडजुम्मसमयट्ठिईए णो तेओग० णो दावर० णो कलिओग-
 समयट्ठिईए । णेरइए णं भंते ! पुच्छा, गोयमा ! सिय कडजुम्मसमयट्ठिईए
 जाव सिय कलिओगसमयट्ठिईए, एवं जाव वेमाणिए, सिद्धे जहा जीवे । जीवा णं
 भंते ! पुच्छा, गोयमा ! ओघादेसेणवि विहाणादेसेणवि कडजुम्मसमयट्ठिईया
 णो तेओग० णो दावरजुम्म० णो कलिओगसमयट्ठिईया । णेरइयाणं पुच्छा,
 गोयमा ! ओघादेसेणं सिय कडजुम्मसमयट्ठिईया जाव सिय कलिओगसमयट्ठिई-
 यावि विहाणादेसेणं कडजुम्मसमयट्ठिईयावि जाव कलिओगसमयट्ठिईयावि, एवं
 जाव वेमाणिया, सिद्धा जहा जीवा ॥७३५॥ जीवे णं भंते ! कालवण्णपज्जवेहिं
 किं कडजुम्मे० पुच्छा, गोयमा ! जीवपएसे पडुच्च णो कडजुम्मे जाव णो
 कलिओगे, सरोरपएसे पडुच्च सिय कडजुम्मे जाव सिय कलिओगे, एवं जाव
 वेमाणिए, सिद्धो चेव ण पुच्छिज्जइ । जीवा णं भंते ! कालवण्णपज्जवेहिं०
 पुच्छा, गोयमा ! जीवपएसे पडुच्च ओघादेसेणवि विहाणादेसेणवि णो कड-
 जुम्मा जाव णो कलिओगा, सरोरपएसे पडुच्च ओघादेसेणं सिय कडजुम्मा
 जाव सिय कलिओगा, विहाणादेसेणं कडजुम्मावि जाव कलिओगावि, एवं जाव
 वेमाणिया, एवं णीलवण्णपज्जवेहिं दंडओ भाणियच्चो एगत्तपुहत्तेणं एवं जाव
 लुक्खफासपज्जवेहिं । जीवे णं भंते ! आभिणिबोहियणाणपज्जवेहिं किं कड-
 जुम्मे० पुच्छा, गोयमा ! सिय कडजुम्मे जाव सिय कलिओगे, एवं एगिदिय-
 वज्जं जाव वेमाणिए । जीवा णं भंते ! आभिणिबोहियणाणपज्जवेहिं० पुच्छा,
 गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं
 कडजुम्मावि जाव कलिओगावि, एवं एगिदियवज्जं जाव वेमाणिया, एवं सुय-

णाणपञ्जवेहिवि, ओहिणाणपञ्जवेहिवि एवं चेव, णवरं विगल्लिदियाणं णत्थि
 ओहिणाणं, मणपञ्जवणाणं पि एवं चेव, णवरं जीवाणं मणुस्साण य, सेसाणं
 णत्थि । जीवे णं भन्ते ! केवलणाणपञ्जवेहिवि किं कडजुम्मे० पुच्छा, गोयमा !
 कडजुम्मे णो तेओगे णो दावरजुम्मे णो कलिओगे, एवं मणुस्सेवि, एवं सिद्धेवि ।
 जीवा णं भन्ते ! केवलणाण० पुच्छा, गोयमा ! ओघादेसेणवि विहाणादेसेणवि
 कडजुम्मा णो तेओगा णो दावरजुम्मा णो कलिओगा, एवं मणुस्सावि, एवं
 सिद्धावि । जीवे णं भन्ते ! मइअण्णाणपञ्जवेहिवि किं कडजुम्मे०? जहा आभिणि-
 वोहियणाणपञ्जवेहिवि तहेव दो वंडगा, एवं सुयअण्णाणपञ्जवेहिवि, एवं विभंग-
 णाणपञ्जवेहिवि । चक्खुदंसणअचक्खुदंसणओहिदंसणपञ्जवेहिवि एवं चेव,
 णवरं जस्स जं अत्थि तं भाणियस्वं, केवलदंसणपञ्जवेहिवि जहा केवलणाणपञ्ज-
 वेहिवि ॥ ७३६ ॥ कइ णं भन्ते ! सरीरगा प०? गोयमा ! पंच सरीरगा प०, तं०—
 ओरात्ति ए जाव कम्मए, एत्थं सरीरगपयं णिरवसेसं भाणियस्वं जहा पण्ण-
 वणाए ॥ ७३७ ॥ जीवा णं भन्ते ! किं सेया णिरेया ? गोयमा ! जीवा सेयावि
 णिरेयावि । से केणट्ठेणं भन्ते ! एवं वुच्चइ—जीवा सेयावि णिरयावि ?
 गोयमा ! जीवा दुविहा प०, तंजहा—संसारसमावण्णगा य असंसारसमावण्णगा
 य, तत्थ णं जं ते असंसारसमावण्णगा ते णं सिद्धा, सिद्धा णं दुविहा प०,
 तंजहा—अणंतरसिद्धा य परंपरसिद्धा य, तत्थ णं जं ते परंपरसिद्धा ते णं णिरेया,
 तत्थ णं जं ते अणंतरसिद्धा ते णं सेया । ते णं भन्ते ! किं देसेया सव्वेया ?
 गोयमा ! णो देसेया सव्वेया, तत्थ णं जं ते संसारसमावण्णगा ते दुविहा प०,
 तंजहा—सेलेसिपडिवण्णगा य असेलेसिपडिवण्णगा य तत्थ णं जं ते सेलेसिपडि-
 वण्णगा ते णं णिरेया, तत्थ णं जं ते असेलेसिपडिवण्णगा ते णं सेया । ते णं भन्ते !
 किं देसेया सव्वेया ? गोयमा ! देसेयावि सव्वेयावि, से तेणट्ठेणं जाव णिरे-
 यावि । णेरइया णं भन्ते ! किं देसेया सव्वेया ? गोयमा ! देसेयावि सव्वे-
 यावि । से केणट्ठेणं जाव सव्वेयावि ? गोयमा ! णेरइया दुविहा प०, तं०—
 विग्गहगइसमावण्णगा य अविग्गहगइसमावण्णगा य, तत्थ णं जं ते विग्गहगइ-
 समावण्णगा ते णं सव्वेया, तत्थ णं जं ते अविग्गहगइसमावण्णगा ते णं देसेया,
 से तेणट्ठेणं जाव सव्वेयावि, एवं जाव वेमाणिया ॥ ७३८ ॥ परमाणुपोमला
 णं भन्ते ! किं संखेज्जा असंखेज्जा अणंता ? गोयमा ! णो संखेज्जा णो

असंखेज्जा अणंता, एवं जाव अणंतपएसिया खंधा । एगपएसोगाढा णं भते !
 पोग्गला कि संखेज्जा असंखेज्जा अणंता ? एवं चेव, एवं जाव असंखेज्जप-
 सोगाढा । एगसमयट्ठिईया णं भते ! पोग्गला कि संखेज्जा० ? एवं चेव, एवं जाव
 असंखेज्जसमयट्ठिईया । एगमुणकालगा णं भते ! पोग्गला कि संखेज्जा० ? एव
 चेव, एवं जाव अणंतगुणकालगा, एवं अवसेसावि वण्णगंधरसफासा णेयव्वा जाव
 अणंतगुणलुक्खत्ति । एएसि णं भते ! परमाणुपोग्गलाणं दुपएसियाण य खंधाणं
 दब्बट्टयाए कयरे २ हितो अप्पा वा बहुया वा तुल्ला वा विसेसाहिया वा ?
 गोयमा ! दुपएसिह्ति खंधेह्ति परमाणुपोग्गला दब्बट्टयाए बहुया । एएसि
 णं भते ! दुपएसियाणं तिपएसियाण य खंधाणं दब्बट्टयाए कयरे २ हितो
 बहुया ? गोयमा ! तिपएसिह्ति खंधेह्ति दुपएसिया खंधा दब्बट्टयाए बहुया
 एवं एएणं गमएणं जाव दसपएसिह्ति खंधेह्ति णवपएसिया खंधा दब्बट्ट-
 याए बहुया । एएसि णं भते ! दसपएसि० पुच्छा, गोयमा ! दसपएसिह्ति
 खंधेह्ति संखेज्जपएसिया खंधा दब्बट्टयाए बहुया । एएसि णं भते ! संखेज्ज०
 पुच्छा, गोयमा ! संखेज्जपएसिह्ति खंधेह्ति असंखेज्जपएसिया खंधा दब्बट्ट-
 याए बहुया । एएसि णं भते ! असंखेज्जपएसि०, पुच्छा, गोयमा ! अणंतप-
 सिह्ति खंधेह्ति असंखेज्जपएसिया खंधा दब्बट्टयाए बहुया । एएसि णं भते !
 परमाणुपोग्गलाणं दुपएसियाण य खंधाणं पएसट्टयाए कयरे २ हितो बहुया ?
 गोयमा ! परमाणुपोग्गलेह्ति दुपएसिया खंधा पएसट्टयाए बहुया, एवं एएणं
 गमएणं जाव णवपएसिह्ति खंधेह्ति दसपएसिया खंधा पएसट्टयाए बहुया,
 एवं सब्बथ पुच्छियच्चं, दसपएसिह्ति खंधेह्ति संखेज्जपएसिया खंधा प-
 सट्टयाए बहुया । संखेज्जपएसिह्ति खंधेह्ति असंखेज्जपएसिया खंधा पएसट्ट-
 याए बहुया, एएसि णं भते ! असंखेज्जपएसियाणं पुच्छा, गोयमा ! अणंत-
 पएसिह्ति खंधेह्ति असंखेज्जपएसिया खंधा पएसट्टयाए बहुया । एएसि
 णं भते ! एगपएसोगाढाणं दुपएसोगाढाणं य पोग्गलाणं दब्बट्टयाए कयरे २
 हितो जाव विसेसाहिया वा ? गोयमा ! दुपएसोगाढेह्ति पोग्गलेह्ति एग-
 पएसोगाढा पोग्गला दब्बट्टयाए विसेसाहिया, एवं एएणं गमएणं तिपएसोगाढे-
 ह्ति पोग्गलेह्ति दुपएसोगाढा पोग्गला दब्बट्टयाए विसेसाहिया जाव दसप-
 सोगाढेह्ति पोग्गलेह्ति णवपएसोगाढा पोग्गला दब्बट्टयाए विसेसाहिया,

एएसि णं भंते ! दसपए० पुच्छा, गोयमा ! दसपएसोगाढेहितो पोग्गलेहितो संखेज्जपएसोगाढा पोग्गला दब्बट्टयाए बहुया, संखेज्जपएसोगाढेहितो पोग्गलेहितो असंखेज्जपएसोगाढा पोग्गला दब्बट्टयाए बहुया, पुच्छा सव्वत्थ भाणियब्बा । एएसि णं भंते ! एगपएसोगाढाणं दुपएसोगाढाणं य पोग्गलाणं पएसट्टयाए कयरे २ हितो जाव विसेसाहिया वा ? गोयमा ! एगपएसोगाढेहितो पोग्गलेहितो दुपएसोगाढा पोग्गला पएसट्टयाए विसेसाहिया, एवं जाव णवपएसोगाढेहितो पोग्गलेहितो दसपएसोगाढा पोग्गला पएसट्टयाए विसेसाहिया, दसपएसोगाढेहितो पोग्गलेहितो संखेज्जपएसोगाढा पोग्गला पएसट्टयाए बहुया, संखेज्जपएसोगाढेहितो पोग्गलेहितो असंखेज्जपएसोगाढा पोग्गला पएसट्टयाए बहुया । एएसि णं भंते ! एगसमयट्टिईयाणं दुसमयट्टिईयाणं य पोग्गलाणं दब्बट्टयाए जहा ओगाहणाए वत्तब्बया एधं ठिईएवि । एएसि णं भंते ! एगगुणकालयाणं दुगुणकालयाणं य पोग्गलाणं दब्बट्टयाए एएसि णं जहा परमाणुपोग्गलाईणं तहेव वत्तब्बया णिरवसेसा, एवं सव्वेसि वण्णगंधरसाणं । एएसि णं भंते ! एगगुणकक्खडाणं दुगुणकक्खडाणं य पोग्गलाणं दब्बट्टयाए कयरे २ हितो जाव विसेसाहिया वा ? गोयमा ! एगगुणकक्खडेहितो पोग्गलेहितो दुगुणकक्खडा पोग्गला दब्बट्टयाए विसेसाहिया, एवं जाव णवगुणकक्खडेहितो पोग्गलेहितो दसगुणकक्खडा पोग्गला दब्बट्टयाए विसेसाहिया, दसगुणकक्खडेहितो पोग्गलेहितो संखेज्जगुणकक्खडा पोग्गला दब्बट्टयाए बहुया, संखेज्जगुणकक्खडेहितो पोग्गलेहितो असंखेज्जगुणकक्खडा पोग्गला दब्बट्टयाए बहुया, असंखेज्जगुणकक्खडेहितो पोग्गलेहितो अणंतगुणकक्खडा पोग्गला दब्बट्टयाए बहुया, एवं पएसट्टयाए सव्वत्थ पुच्छा भाणियब्बा, जहा कक्खडा एवं मउयगइयलहुयावि, सीयउसिणणिट्ठलुक्खा जहा वण्णा ॥ ७३६ ॥ एएसि णं भंते ! परमाणुपोग्गलाणं संखेज्जपएसियाणं असंखेज्जपएसियाणं अणंतपएसियाणं य खंधाणं दब्बट्टयाए पएसट्टयाए दब्बट्टपएसट्टयाए कयरे २ जाव विसेसाहिया वा ? गोयमा ! सव्वत्थोवा अणंतपएसिया खंधा दब्बट्टयाए, परमाणुपोग्गला दब्बट्टयाए अणंतगुणा, संखेज्जपएसिया खंधा दब्बट्टयाए संखेज्जगुणा, असंखेज्जपएसिया खंधा दब्बट्टयाए असंखेज्जगुणा, पएसट्टयाए सव्वत्थोवा अणंतपएसिया खंधा पएसट्टयाए, परमाणुपोग्गला अपएसट्टयाए अणंतगुणा, संखे-

ज्ञपएसिया खंधा पएसट्टयाए संखेज्जगुणा, असंखेज्जपएसिया खंधा पएसट्टयाए
 असंखेज्जगुणा, दब्बट्टपएसट्टयाए—सव्वत्थोवा अणंतपएसिया खंधा दब्बट्टयाए ते
 चेव पएसट्टयाए अणंतगुणा, परमाणुपोगला दब्बट्ट-पएसट्टयाए अणंतगुणा,
 संखेज्जपएसिया खंधा दब्बट्टयाए संखेज्जगुणा ते चेव पएसट्टयाए संखेज्ज-
 गुणा असंखेज्जपएसिया खंधा दब्बट्टयाए असंखेज्जगुणा ते चेव पएसट्टयाए असंखे-
 ज्जगुणा। एएसि णं भंते ! एगपएसोगाढाणं संखेज्जपएसोगाढाणं असंखेज्जपए-
 सोगाढाणं य पोगलाणं दब्बट्टयाए पएसट्टयाए दब्बट्टपएसट्टयाए कयरे २ जाव
 विसेसाहिया वा ? गोयमा ! सव्वत्थोवा एगपएसोगाढा पोगला दब्बट्टयाए, संखे-
 ज्जपएसोगाढा पोगला दब्बट्टयाए संखेज्जगुणा, असंखेज्जपएसोगाढा पोगला
 दब्बट्टयाए असंखेज्जगुणा, पएसट्टयाए-सव्वत्थोवा एगपएसोगाढा पोगला अपएस-
 ट्टयाए, संखेज्जपएसोगाढा पोगला पएसट्टयाए संखेज्जगुणा, असंखेज्जपएसोगाढा
 पोगला पएसट्टयाए असंखेज्जगुणा, दब्बट्टपएसट्टयाए—सव्वत्थोवा एगपएसो-
 गाढा पोगला दब्बट्टापएसट्टयाए, संखेज्जपएसोगाढा पोगला दब्बट्टयाए संखे-
 ज्जगुणा ते चेव पएसट्टयाए संखेज्जगुणा, असंखेज्जपएसोगाढा पोगला दब्ब-
 ट्टयाए असंखेज्जगुणा ते चेव पएसट्टयाए असंखेज्जगुणा। एएसि णं भंते !
 एगसमयट्टिईयाणं संखेज्जसमयट्टिईयाणं असंखेज्जसमयट्टिईयाणं य पोगलाणं ?
 जहा ओगाहणाए तथा ठिईएवि भाणियव्वं अप्पाबहुगं । एएसि णं भंते !
 एगगुणकालगाणं संखेज्जगुणकालगाणं असंखेज्जगुणकालगाणं अणंतगुणकाल-
 गाणं य पोगलाणं दब्बट्टयाए पएसट्टयाए दब्बट्टपएसट्टयाए० एएसि जहा
 परमाणुपोगलाणं अप्पाबहुगं तथा एएसिपि अप्पाबहुगं, एवं सेसाणवि वण-
 गंधरसाणं । एएसि णं भंते ! एगगुणकवखडाणं संखेज्जगुणकवखडाणं असंखेज्ज-
 गुणकवखडाणं अणंतगुणकवखडाणं य पोगलाणं दब्बट्टयाए पएसट्टयाए दब्बट्ट-
 पएसट्टयाए कयरे २ जाव विसेसाहिया वा ? गोयमा ! सव्वत्थोवा एगगुण-
 कवखडा पोगला दब्बट्टयाए, संखेज्जगुणकवखडा पोगला दब्बट्टयाए संखेज्ज-
 गुणा, असंखेज्जगुणकवखडा पोगला दब्बट्टयाए असंखेज्जगुणा, अणंतगुणकवखडा
 पोगला दब्बट्टयाए अणंतगुणा, पएसट्टयाए एवं चेव णवरं संखेज्जगुण-
 कवखडा पोगला पएसट्टयाए असंखेज्जगुणा सेसं तं चेव, दब्बट्टपएसट्ट-
 याए सव्वत्थोवा एगगुणकवखडा पोगला दब्बट्टपएसट्टयाए, संखेज्जगुणकवखडा

पोगला दव्वट्टयाए संखेज्जगुणा ते चेव पएसट्टयाए संखेज्जगुणा, असंखेज्जगुण-
 कक्खडा पोगला दव्वट्टयाए असंखेज्जगुणा ते चेव पएसट्टयाए असंखेज्जगुणा,
 अणंतगुणकक्खडा पोगला दव्वट्टयाए अणंतगुणा ते चेव पएसट्टयाए अणंतगुणा एवं
 सउयगरुयलहुयाणवि अप्पाबहुणं, सीयउसिणणिद्धलुवखाणं जहा वण्णाणं तहेव
 ॥ ७४० ॥ परमाणु पोगले णं भंते ! दव्वट्टयाए किं कडजुम्मे तेओए दावर-
 ज्जुम्मे कलिओए ? गोयमा ! णो कडजुम्मे णो तेओए णो दावरज्जुम्मे कलिओए,
 एवं जाव अणंतपएसिए खंधे । परमाणुपोगला णं भंते ! दव्वट्टयाए किं कडजुम्मा०
 पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं
 णो कडजुम्मा णो तेओगा णो दावरज्जुम्मा कलिओगा, एवं जाव अणंतपएसिया
 खंधा । परमाणुपोगले णं भंते ! पएसट्टयाए किं कडजुम्मे० पुच्छा, गोयमा ! णो
 कडजुम्मे णो तेओए णो दावरज्जुम्मे कलिओए । दुपएसिए पुच्छा, गोयमा ! णो
 कडजुम्मे णो तेओए दावरज्जुम्मे णो कलिओए, तिपएसिए पुच्छा, गोयमा !
 णो कडजुम्मे तेओए णो दावरज्जुम्मे णो कलिओए । चउप्पएसिए पुच्छा,
 गोयमा । कडजुम्मे णो तेओए णो दावरज्जुम्मे णो कलिओए, पंचपएसिए जहा
 परमाणुपोगले, छप्पएसिए जहा दुप्पएसिए, सत्तपएसिए जहा तिपएसिए,
 अट्टपएसिए जहा चउप्पएसिए, णवपएसिए जहा परमाणुपोगले, दसपएसिए
 जहा दुपएसिए । संखेज्जपएसिए णं भंते ! पोगले पुच्छा, गोयमा ! सिय
 कडजुम्मे जाव सिय कलिओगे, एवं असंखेज्जपएसिएवि, एवं अणंतपएसिएवि ।
 परमाणुपोगला णं भंते ! पएसट्टयाए किं कडजुम्मा० पुच्छा, गोयमा !
 ओघादेसेणं सिय कडजुम्मा जाव सिय कलिओगा, विहाणादेसेणं णो कडजुम्मा
 णो तेओगा णो दावरज्जुम्मा कलिओगा । दुप्पएसियाणं पुच्छा, गोयमा !
 ओघादेसेणं सिय कडजुम्मा णो तेओगा सिय दावरज्जुम्मा णो कलिओगा,
 विहाणादेसेणं णो कडजुम्मा णो तेओगा दावरज्जुम्मा णो कलिओगा । तिपए-
 सियाणं पुच्छा, गोयमा ! ओघादेसेणं सिय कडजुम्मा जाव सिय कलिओगा,
 विहाणादेसेणं णो कडजुम्मा तेओगा णो दावरज्जुम्मा णो कलिओगा । चउप्पए-
 सियाणं पुच्छा, गोयमा ! ओघादेसेणवि विहाणादेसेणवि कडजुम्मा णो तेओगा
 णो दावरज्जुम्मा णो कलिओगा, पंचपएसिया जहा परमाणुपोगला, छप्पएसिया
 जहा दुप्पएसिया, सत्तपएसिया जहा तिपएसिया, अट्टपएसिया जहा चउप्प-
 एसिया, णवपएसिया जहा परमाणुपोगला, दसपएसिया जहा दुपएसिया ।

संखेज्जपएसियाणं पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं कडजुम्मावि जाव कलिओगावि, एवं असंखेज्जपएसियावि अणंतपएसियावि । परमाणुपोगले णं भंते ! किं कडजुम्मपएसोगाढे० पुच्छा, गोयमा ! णो कडजुम्मपएसोगाढे णो तेओग० णो दावरजुम्म० कलिओगपएसोगाढे । दुपएसिए णं पुच्छा, गोयमा ! णो कडजुम्मपएसोगाढे णो तेओग० सिय दावरजुम्मपएसोगाढे सिय कलिओगपएसोगाढे । तिपएसिए णं पुच्छा, गोयमा ! णो कडजुम्मपएसोगाढे सिय तेओगपएसोगाढे सिय दावरजुम्मपएसोगाढे सिय कलिओगपएसोगाढे ३ । चउपएसिए णं पुच्छा, गोयमा ! सिय कडजुम्मपएसोगाढे जाव सिय कलिओगपएसोगाढे ४, एवं जाव अणंतपएसिए । परमाणुपोगला णं भंते ! किं कडजुम्मपएसोगाढा० पुच्छा, गोयमा ! ओघादेसेणं कडजुम्मपएसोगाढा णो तेओग० णो दावर० णो कलिओग०, विहाणादेसेणं णो कडजुम्मपएसोगाढा णो तेओग० णो दावर० कलिओगपएसोगाढा । दुपएसियाणं पुच्छा, गोयमा ! ओघादेसेणं कडजुम्मपएसोगाढा णो तेओग० णो दावर० णो कलिओगपएसोगाढा, विहाणादेसेणं णो कडजुम्मपएसोगाढा णो तेओगपएसोगाढा दावरजुम्मपएसोगाढावि कलिओगपएसोगाढावि । तिपएसियाणं पुच्छा, गोयमा ! ओघादेसेणं कडजुम्मपएसोगाढा णो तेओग० णो दावर० णो कलिओगपएसोगाढा, विहाणादेसेणं णो कडजुम्मपएसोगाढा तेओगपएसोगाढावि दावरजुम्मपएसोगाढावि कलिओगपएसोगाढावि ३ । चउपएसियाणं पुच्छा, गोयमा ! ओघादेसेणं कडजुम्मपएसोगाढा णो तेओग० णो दावर० णो कलिओगपएसोगाढा, विहाणादेसेणं कडजुम्मपएसोगाढावि जाव कलिओगपएसोगाढावि एवं जाव अणंतपएसिया । परमाणुपोगले णं भंते ! किं कडजुम्मसमयट्टिईए० पुच्छा, गोयमा ! सिय कडजुम्मसमयट्टिईए जाव सिय कलिओगसमयट्टिईए, एवं जाव अणंतपएसिए । परमाणुपोगला णं भंते ! किं कडजुम्मसमयट्टिईया० पुच्छा, गोयमा ! ओघादेसेणं सिय कडजुम्मसमयट्टिईया जाव सिय कलिओगसमयट्टिईया ४, विहाणादेसेणं कडजुम्मसमयट्टिईयावि जाव कलिओगसमयट्टिईयावि ४, एवं जाव अणंतपएसिया । परमाणुपोगले णं भंते ! कालवण्णपज्जवेहिं किं कडजुम्मे तेओगे? जहां टिईए वत्तव्वया एवं वण्णेसुवि सव्वेसु गंधेसुवि एवं चैव, रसेसुवि जाव

महुरो रसोत्ति । अणंतपएसिए णं भंते ! खंधे कक्खड्ढासपज्जवेहि कि कड-
जुम्मे० पुच्छा, गोयमा ! सिय कडजुम्मे जाव सिय कलिओगे । अणंतपएसिया
णं भंते ! खंधा कक्खड्ढासपज्जवेहि कि कडजुम्मा० पुच्छा, गोयमा ! ओघा-
वेसेण सिय कडजुम्मा जाव सिय कलिओगा ४, विहाणादेसेणं कडजुम्मावि
जाव कलिओगावि ४, एवं मउयगरुयलहुयावि भाणियव्वा, सीयउसिणणिद्ध-
सुक्खा जहा वण्णा ॥ ७४१ ॥ परमाणुपोगले णं भंते ! कि सड्ढे
अणड्ढे ? गोयमा ! णो सड्ढे अणड्ढे । दुपएसिए णं पुच्छा, गोयमा ! सड्ढे
णो अणड्ढे, तिपएसिए जहा परमाणुपोगले, चउप्पएसिए जहा दुपएसिए,
पंचपएसिए जहा तिपएसिए, छप्पएसिए जहा दुपएसिए, सत्तपएसिए जहा
तिपएसिए, अट्टपएसिए जहा दुपएसिए, णवपएसिए जहा तिपएसिए,
दसपएसिए जहा दुपएसिए । संखेज्जपएसिए णं भंते ! खंधे—पुच्छा,
गोयमा ! सिय सड्ढे सिय अणड्ढे एवं असंखेज्जपएसिएवि, एवं अणंत-
पएसिएवि । परमाणुपोगला णं भंते ! कि सड्ढा अणड्ढा ? गोयमा !
सड्ढा वा अणड्ढा वा, एवं जाव अणंतपएसिया ॥ ७४२ ॥ परमाणुपोगले
णं भंते ! कि सेए णिरेए ? गोयमा ! सिय सेए सिय णिरेए, एवं जाव
अणंतपएसिए । परमाणुपोगला णं भंते ! कि सेया णिरेया ? गोयमा !
सेयावि णिरेयावि, एवं जाव अणंतपएसिया । परमाणुपोगले णं भंते ! सेए
कालओ केवच्चिरं होइ ? गोयमा ! जहण्णेणं एककं समयं उक्कोसेणं आवलि-
याए असंखेज्जइभागं । परमाणुपोगले णं भंते ! णिरेए कालओ केवच्चिरं
होइ ? गोयमा ! जहण्णेणं एककं समयं उक्कोसेणं असंखेज्जं कालं, एवं जाव
अणंतपएसिए । परमाणुपोगला णं भंते ! सेया कालओ केवच्चिरं होंति ?
गोयमा ! सव्वद्धं । परमाणुपोगला णं भंते ! णिरेया कालओ केवच्चिरं होंति ?
गोयमा ! सव्वद्धं, एवं जाव अणंतपएसिया । परमाणुपोगलस्स णं भंते !
सेयस्स केवइयं कालं अंतरं होइ ? गोयमा ! सट्ठाणंतरं पडुच्च जहण्णेणं एककं
समयं उक्कोसेणं असंखेज्जं कालं, परट्ठाणंतरं पडुच्च जहण्णेणं एककं समयं
उक्कोसेणं असंखेज्जं कालं । णिरेयस्स केवइयं कालं अंतरं होइ ? गोयमा !
सट्ठाणंतरं पडुच्च जहण्णेणं एककं समयं उक्कोसेणं आवलियाए असंखेज्जइभागं,
परट्ठाणंतरं पडुच्च जहण्णेणं एककं समयं उक्कोसेणं असंखेज्जं कालं । दुपए-

सियस्स णं भन्ते ! खंधस्स सेयस्स पुच्छा, गोयमा ! सट्ठाणंतरं पडुच्च जहण्णेणं एवकं समयं उक्कोसेणं असंखेज्जं कालं, परट्ठाणंतरं पडुच्च जहण्णेणं एवकं समयं उक्कोसेणं अणंतकालं । गिरेयस्स केवड्ढयं कालं अंतरं होइ ? गोयमा ! सट्ठाणंतरं पडुच्च जहण्णेणं एवकं समयं उक्कोसेणं आवलियाए असंखेज्जइसां परट्ठाणंतरं पडुच्च जहण्णेणं एवकं समयं उक्कोसेणं अणंतं कालं, एवं जाव अणंतपएसियस्स । परमाणुपोग्गलाणं भन्ते ! सेयाणं केवड्ढयं कालं अंतरं होइ ? गोयमा ! णत्थि अंतरं । गिरेयाणं केवड्ढयं कालं अंतरं होइ ? गोयमा ! णत्थि अंतरं, एवं जाव अणंतपएसियाणं खंधाणं । एएसि णं भन्ते । परमाणुपोग्गलाणं सेयाणं गिरेयाण य कयरे २ हितो जाव विसेसाहिया वा ? गोयमा ! सव्वत्थोवा परमाणुपोग्गला सेया, गिरेया असंखेज्जगुणा एवं जाव असंखेज्जपएसियाणं खंधाणं । एएसि णं भन्ते ! अणंतपएसियाणं खंधाणं सेयाणं गिरेयाण य कयरे २ जाव विसेसाहिया वा ? गोयमा ! सव्वत्थोवा अणंतपएसिया खंधा गिरेया, सेया अणंतगुणा । एएसि णं भन्ते ! परमाणुपोग्गलाणं संखेज्जपएसियाणं असंखेज्जपएसियाणं अणंतपएसियाण य खंधाणं सेयाणं गिरेयाण य दव्वट्टयाए पएसट्टयाए दव्वट्टपएसट्टयाए कयरे २ जाव विसेसाहिया वा ? गोयमा ! सव्वत्थोवा अणंतपएसिया खंधा गिरेया दव्वट्टयाए १, अणंतपएसिया खंधा सेया दव्वट्टयाए अणंतगुणा २, परमाणुपोग्गला सेया दव्वट्टयाए अणंतगुणा ३, संखेज्जपएसिया खंधा सेया दव्वट्टयाए असंखेज्जगुणा ४, असंखेज्जपएसिया खंधा सेया दव्वट्टयाए असंखेज्जगुणा ५, परमाणुपोग्गला गिरेया दव्वट्टयाए असंखेज्जगुणा ६, संखेज्जपएसिया खंधा गिरेया दव्वट्टयाए संखेज्जगुणा ७, असंखेज्जपएसिया खंधा गिरेया दव्वट्टयाए असंखेज्जगुणा ८, पएसट्टयाए एवं चेव णवरं परमाणुपोग्गला अपएसट्टयाए भाणियत्था, संखेज्जपएसिया खंधा गिरेया पएसट्टयाए असंखेज्जगुणा सेसं तं चेव, दव्वट्टपएसट्टयाए—सव्वत्थोवा अणंतपएसिया खंधा गिरेया दव्वट्टयाए १, ते चेव पएसट्टयाए अणंतगुणा २, अणंतपएसिया खंधा सेया दव्वट्टयाए अणंतगुणा ३, ते चेव पएसट्टयाए अणंतगुणा ४, परमाणुपोग्गला सेया दव्वट्ट-अपएसट्टयाए अणंतगुणा ५, संखेज्जपएसिया खंधा सेया दव्वट्टयाए असंखेज्जगुणा ६, ते चेव पएसट्टयाए असंखेज्जगुणा ७, असंखेज्जपएसिया खंधा सेया दव्वट्टयाए असंखेज्जगुणा ८, ते चेव पएसट्टयाए असंखेज्जगुणा ९, परमाणु-

पोगला गिरेया दब्बट्टयाए अपएसट्टयाए असंखेज्जगुणा १०, संखेज्जपएसिया
संधा गिरेया दब्बट्टयाए असंखेज्जगुणा ११, ते चैव पएसट्टयाए असंखेज्जगुणा १२,
असंखेज्जपएसिया खंधा गिरेया दब्बट्टयाए असंखेज्जगुणा १३, ते चैव पएसट्ट-
याए असंखेज्जगुणा १४ । परमाणुपोगले णं भंते ! किं देसेए सव्वेए गिरेए ?
गोयमा ! णो देसेए सिय सव्वेए सिय गिरेए । दुपएसिए णं भंते ! खंधे पुचछा,
गोयमा ! सिय देसेए सिय सव्वेए सिय गिरेए, एवं जाव अणंतपएसिए । पर-
माणुपोगला णं भंते ! किं देसेया सव्वेया गिरेया ? गोयमा ! णो देसेया सव्वे-
यावि गिरेयावि । दुपएसिया णं भंते ! खंधा पुचछा, गोयमा ! देसेयावि सव्वे-
यावि गिरेयावि, एवं जाव अणंतपएसिया । परमाणुपोगले णं भंते ! सव्वेए
कालओ केवच्चिरं होइ ? गोयमा ! जहण्णेणं एक्कं समयं उक्कोसेणं आवलि-
याए असंखेज्जइभागं । गिरेए कालओ केवच्चिरं होइ ? गोयमा ! जहण्णेणं
एक्कं समयं उक्कोसेणं असंखेज्जं कालं । दुपएसिए णं भंते ! खंधे देसेए
कालओ केवच्चिरं होइ ? गोयमा ! जहण्णेणं एक्कं समयं उक्कोसेणं आवलि-
याए असंखेज्जइभागं । सव्वेए कालओ केवच्चिरं होइ ? गोयमा ! जहण्णेणं
एक्कं समयं उक्कोसेणं आवलियाए असंखेज्जइभागं । गिरेए कालओ केवच्चिरं
होइ ? गोयमा ! जहण्णेणं एक्कं समयं उक्कोसेणं असंखेज्जं कालं, एवं जाव
अणंतपएसिए । परमाणुपोगला णं भंते ! सव्वेया कालओ केवच्चिरं होंति !
गोयमा ! सव्वद्धं । गिरेया कालओ केवच्चिरं होंति ? गोयमा ! सव्वद्धं ।
दुपएसिया णं भंते ! खंधा देसेया कालओ केवच्चिरं होंति ? गोयमा ! सव्वद्धं ।
सव्वेया कालओ केवच्चिरं होंति ? सव्वद्धं । गिरेया कालओ केवच्चिरं होंति ?
सव्वद्धं, एवं जाव अणंतपएसिया । परमाणुपोगलस्स णं भंते ! सव्वेयस्स
केवइयं कालं अंतरं होइ ? गोयमा ! सट्ठाणंतरं पडुच्च जहण्णेणं एक्कं समयं
उक्कोसेणं असंखेज्जं कालं, परट्ठाणंतरं पडुच्च जहण्णेणं एक्कं समयं उक्कोसेणं
एवं चैव । गिरेयस्स केवइयं कालं अंतरं होइ ? सट्ठाणंतरं पडुच्च
जहण्णेणं एक्कं समयं उक्कोसेणं आवलियाए असंखेज्जइभागं, परट्ठाणंतरं
पडुच्च जहण्णेणं एक्कं समयं उक्कोसेणं असंखेज्जं कालं । दुपएसियस्स णं
भंते ! खंधस्स देसेयस्स केवइयं कालं अंतरं होइ ? गोयमा ! सट्ठाणंतरं पडुच्च
जहण्णेणं एक्कं समयं उक्कोसेणं असंखेज्जं कालं, परट्ठाणंतरं पडुच्च जहण्णेणं
एक्कं समयं उक्कोसेणं अणंतं कालं । सव्वेयस्स केवइयं कालं० ? एवं चैव जहा

देसेयस्स । निरेयस्स केवइयं कालं ? सट्ठाणंतरं पडुच्च जहण्णेणं एवकं समयं
 उवकोसेणं आचलियाए असंखेज्जभागं, परट्ठाणंतरं पडुच्च जहण्णेणं एवकं समयं
 उवकोसेणं अणंतं कालं, एवं जाव अणंतपएसियास्स । परमाणुपोग्गलाणं भंते !
 सव्वेयाणं केवइयं कालं अंतरं होइ ? गोयमा ! णत्थि अंतरं । निरेयाणं केव-
 इयं ? णत्थि अंतरं । दुपएसियाणं भंते ! खंधाणं देसेयाणं केवइयं कालं ?
 णत्थि अंतरं । सव्वेयाणं केवइयं कालं ? णत्थि अंतरं । निरेयाणं केवइयं कालं ?
 णत्थि अंतरं, एवं जाव अणंतपएसियाणं । एएसि णं भंते ! परमाणुपोग्गलाणं
 सव्वेयाणं निरेयाणं य कयरे २ जाव विसेसाहिया वा ? गोयमा ! सव्वत्थोवा
 परमाणुपोग्गला सव्वेया, निरेया असंखेज्जगुणा । एएसि णं भंते ! दुपएसि-
 याणं खंधाणं देसेयाणं सव्वेयाणं निरेयाणं य कयरे २ जाव विसेसाहिया वा ?
 गोयमा ! सव्वत्थोवा दुपएसिया खंधा सव्वेया, देसेया असंखेज्जगुणा, निरेया
 असंखेज्जगुणा, एवं जाव असंखेज्जपएसियाणं खंधाणं । एएसि णं भंते ! अणंत-
 पएसियाणं खंधाणं देसेयाणं सव्वेयाणं निरेयाणं य कयरे २ जाव विसेसाहिया
 वा ? गोयमा ! सव्वत्थोवा अणंतपएसिया खंधा सव्वेया, निरेया अणंतगुणा,
 देसेया अणंतगुणा । एएसि णं भंते ! परमाणुपोग्गलाणं संखेज्जपएसियाणं
 असंखेज्जपएसियाणं अणंतपएसियाणं य खंधाणं देसेयाणं सव्वेयाणं निरेयाणं
 दव्वट्टयाए पएसट्टयाए दव्वट्टपएसट्टयाए कयरे २ जाव विसेसाहिया वा ?
 गोयमा ! सव्वत्थोवा अणंतपएसिया खंधा सव्वेया दव्वट्टयाए १, अणंत-
 पएसिया खंधा निरेया दव्वट्टयाए अणंतगुणा २, अणंतपएसिया खंधा देसेया
 दव्वट्टयाए अणंतगुणा ३, असंखेज्जपएसिया खंधा सव्वेया दव्वट्टयाए असंखेज्ज-
 गुणा ४, संखेज्जपएसिया खंधा सव्वेया दव्वट्टयाए असंखेज्जगुणा ५ परमाणु-
 पोग्गलासव्वेया दव्वट्टयाए असंखेज्जगुणा ६, संखेज्जपएसिया खंधा देसेया दव्व-
 ट्टयाए असंखेज्जगुणा ७, असंखेज्जपएसिया खंधा देसेया दव्वट्टयाए असंखे-
 ज्जगुणा ८, परमाणु पोग्गला निरेया दव्वट्टयाए असंखेज्जगुणा ९, संखेज्जप-
 एसिया खंधा निरेया दव्वट्टयाए संखेज्जगुणा १०, असंखेज्जपएसिया खंधा
 निरेया दव्वट्टयाए असंखेज्जगुणा ११, पएसट्टयाए—सव्वत्थोवा अणंतप-
 सिया एवं पएसट्टयाएचि णवरं परमाणुपोग्गला अपएसट्टयाए भाणियव्वा,
 संखेज्जपएसिया खंधा निरेया पएसट्टयाए असंखेज्जगुणा सेसं तं चव,

द्वद्वद्वपएसद्वयाए—सव्वत्थोवा अणंतपएसिया खंधा सव्वेया दव्वद्वयाए १, ते चेव पएसद्वयाए अणंतगुणा २ अणंतपएसिया खंधा णिरेया दव्वद्वयाए अणंतगुणा ३, ते चेव पएसद्वयाए अणंतगुणा ४, अणंतपएसिया खंधा देसेया दव्वद्वयाए अणंतगुणा ५, ते चेव पएसद्वयाए अणंतगुणा ६, असंखेज्जपएसिया खंधा सव्वेया दव्वद्वयाए अणंतगुणा ७, ते चेव पएसद्वयाए असंखेज्जगुणा ८, संखेज्जपएसिया खंधा सव्वेया दव्वद्वयाए असंखेज्जगुणा ९, ते चेव पएसद्वयाए असंखेज्जगुणा १०, परमाणुपोग्गला सव्वेया दव्वद्वद्वअपएसद्वयाए असंखेज्जगुणा ११, संखेज्जपएसिया खंधा देसेया दव्वद्वयाए असंखेज्जगुणा १२, ते चेव पएसद्वयाए असंखेज्जगुणा १३, असंखेज्जपएसिया खंधा देसेया दव्वद्वयाए असंखेज्जगुणा १४, ते चेव पएसद्वयाए असंखेज्जगुणा १५, परमाणुपोग्गला णिरेया दव्वद्वअपएसद्वयाए असंखेज्जगुणा १६, संखेज्जपएसिया खंधा णिरेया दव्वद्वयाए संखेज्जगुणा १७, ते चेव पएसद्वयाए संखेज्जगुणा १८, असंखेज्जपएसिया णिरेया दव्वद्वयाए असंखेज्जगुणा १९, ते चेव पएसद्वयाए असंखेज्जगुणा २० ॥ ७४३ ॥

कइ णं भंते ! धम्मत्थिकायस्स मज्झपएसा प० ? गोयमा ! अट्ट धम्मत्थिकायस्स मज्झपएसा प० । कइ णं भंते ! अहम्मत्थिकायस्स मज्झपएसा प० ? गोयमा ! एव चेव, कइ णं भंते ! आगासत्थिकायस्स मज्झपएसा प० ? एव चेव । कइ णं भंते ! जीवत्थिकायस्स मज्झपएसा प० ? गोयमा ! अट्ट जीवत्थिकायस्स मज्झपएसा प० । एए णं भंते ! अट्ट जीवत्थिकायस्स मज्झपएसा कइसु आगासपएसेसु ओगाहंसि ? गोयमा ! जहण्णेणं एवकंसि वा वीहिं वा तिहिं वा चउहिं वा पंचहिं वा छहिं वा उक्कोसेणं अट्टसु, णो चेव णं सत्तसु । सेवं भंते ! सेवं भंते ! त्ति ॥ ७४४ ॥

पंचवीसइमं सयं पंचमो उद्देशो

कइविहा णं भंते ! पज्जवा पणत्ता ? गोयमा ! दुविहा पज्जवा प०, तं—जीवपज्जवा य अजीवपज्जवा य, पज्जवपयं णिरवसेसं भाणियव्वं जहा पणवणाए ॥ ७४५ ॥ आवलियाणं भंते ! किं संखेज्जा समया असंखेज्जा समया अणंता समया ? गोयमा ! णो संखेज्जा समया असंखेज्जा समया णो अणंता समया । आणापाणुणं भंते ! किं संखेज्जा० ? एवं चेव । थोवे णं

भन्ते ! किं संखेज्जा० ? एवं चेव एवं लवेवि म्हुत्तेवि, एवं अहोत्तेवि, एवं पक्खे मासे उऊ अयणे संवच्छरे जुगे वाससए वाससहस्से वाससयहस्से पुब्बंमे पुब्बे तुद्धियमे तुडिए अडडंमे अडडे अववंगे अववे ह्हुअंगे ह्हुए उप्पसंगे उप्पत्ते पउमंगे पउमे णलिंगंमे णलिंगे अच्चिण्णि पूरंगे अच्चिण्णिपूरे अउयंगे अउए णउयंगे णउए पउयंगे पउए च्चलियंगे च्चलिए सीसपहेलियंगे सीसपहेलिया पलिओवमे सागरोवमे ओसप्पिणी एवं उस्सप्पिणीवि । पोग्गलपरियट्ठे णं भन्ते ! किं संखेज्जा समया असंखेज्जा समया अणंता समया ? गोयमा ! णो संखेज्जा समया णो असंखेज्जा समया अणंता समया, एवं तीयद्धा अणागयद्धा सक्खद्धा । आवलियाओ णं भन्ते ! किं संखेज्जा समया० पुच्छा, गोयमा ! णो संखेज्जा समया सिय असंखेज्जा समया सिय अणंता समया । आणापाणुणं भन्ते ! किं संखेज्जा समया० पुच्छा, एवं चेव, थोवाणं भन्ते ! किं संखेज्जा समया ३ ? एवं चेव एवं जाव ओस्सप्पिणीओत्ति । पोग्गलपरियट्ठाणं भन्ते ! किं संखेज्जा समया० पुच्छा, गोयमा ! णो संखेज्जा समया णो असंखेज्जा समया अणंता समया । आणापाणुणं भन्ते ! किं संखेज्जाओ आवलियाओ० पुच्छा, गोयमा ! संखेज्जाओ आवलियाओ णो असंखेज्जाओ आवलियाओ णो अणंताओ आवलियाओ, एवं थोवेवि, एवं जाव सीसप्पहेलियत्ति । पलिओवमे णं भन्ते ! किं संखेज्जा० पुच्छा, गोयमा ! णो संखेज्जाओ आवलियाओ असंखेज्जाओ आवलियाओ णो अणंताओ आवलियाओ, एवं सागरोवमेवि, एवं ओसप्पिणीवि उस्सप्पिणीवि । पोग्गलपरियट्ठे पुच्छा, गोयमा ! णो संखेज्जाओ आवलियाओ णो असंखेज्जाओ आवलियाओ अणंताओ आवलियाओ, एवं जाव सक्खद्धा । आणापाणुणं भन्ते ! किं संखेज्जाओ आवलियाओ० पुच्छा, गोयमा ! सिय संखेज्जाओ आवलियाओ सिय असंखेज्जाओ सिय अणंताओ, एवं जाव सीसप्पहेलियाओ, पलिओवमाणं पुच्छा, गोयमा ! णो संखेज्जाओ आवलियाओ सिय असंखेज्जाओ आवलियाओ सिय अणंताओ आवलियाओ, एवं जाव उस्सप्पिणीओत्ति । पोग्गलपरियट्ठाणं पुच्छा, गोयमा ! णो संखेज्जाओ आवलियाओ णो असंखेज्जाओ आवलियाओ अणंताओ आवलियाओ । थोवे णं भन्ते ! किं संखेज्जाओ आणापाणुओ असंखेज्जाओ जहा आवलियाए वत्तव्वया एवं आणापाणुओवि णिरवसेसा, एवं एएणं गमएणं जाव सीसप्पहेलिया भाणियव्वा । सागरोवमे णं भन्ते ! किं संखेज्जा पलिओवमा० पुच्छा, गोयमा ! संखेज्जा पलि-

भोयमा णो असंखेज्जा पलिओवमा णो अणंता पलिओवमा, एवं ओसप्पिणीएवि
 उस्सप्पिणीएवि । पोग्गलपरियट्ठे णं-पुच्छा, गोयमा ! णो संखेज्जा पलिओवमा
 णो असंखेज्जा पलिओवमा अणंता पलिओवमा, एवं जाव सव्वद्धा । सागरो-
 वमाणं भंते ! किं संखेज्जा पलिओवमा० पुच्छा, गोयमा ! सिय संखेज्जा
 पलिओवमा सिय असंखेज्जा पलिओवमा सिय अणंता पलिओवमा, एवं जाव
 ओसप्पिणीवि उस्सप्पिणीवि । पोग्गलपरियट्ठाणं पुच्छा, गोयमा ! णो संखेज्जा
 पलिओवमा णो असंखेज्जा पलिओवमा अणंता पलिओवमा । ओसप्पिणी णं
 भंते ! किं संखेज्जा सागरोवमा जहा पलिओवमस्स वत्तव्वया तथा सागरो-
 वमस्सवि । पोग्गलपरियट्ठे णं भंते ! किं संखेज्जाओ ओसप्पिणउस्सप्पि-
 णीओ० पुच्छा, गोयमा ! णो संखेज्जाओ ओसप्पिणउस्सप्पिणीओ णो
 असंखेज्जाओ अणंताओ ओसप्पिणउस्सप्पिणीओ, एवं जाव सव्वद्धा । पोग्गल-
 परियट्ठाणं भंते ! किं संखेज्जाओ ओसप्पिणउस्सप्पिणीओ० पुच्छा, गोयमा !
 णो संखेज्जाओ ओसप्पिणउस्सप्पिणीओ णो असंखेज्जाओ अणंताओ ओस-
 प्पिणउस्सप्पिणीओ । तीयद्धाणं भंते ! किं संखेज्जा पोग्गलपरियट्ठा०
 पुच्छा, गोयमा ! णो संखेज्जा पोग्गलपरियट्ठा णो असंखेज्जा अणंता पोग्गल-
 परियट्ठा, एवं अणागयद्धावि, एवं सव्वद्धावि ॥ ७४६ ॥ अणागयद्धाणं भंते !
 किं संखेज्जाओ तीयद्धाओ असंखेज्जाओ० अणंताओ० ? गोयमा ! णो
 संखेज्जाओ तीयद्धाओ णो असंखेज्जाओ तीयद्धाओ णो अणंताओ तीयद्धाओ,
 अणागयद्धा णं तीयद्धाओ समयाहिया, तीयद्धा णं अणागयद्धाओ समयऊणा ।
 सव्वद्धाणं भंते ! किं संखेज्जाओ० पुच्छा, गोयमा ! णो संखेज्जाओ
 तीयद्धाओ णो असंखेज्जाओ तीयद्धाओ णो अणंताओ तीयद्धाओ, सव्वद्धा णं
 तीयद्धाओ साइरेगदुग्गणा तीयद्धा णं सव्वद्धाओ थोव्वणए अद्धे । सव्वद्धाणं भंते !
 किं संखेज्जाओ अणागयद्धाओ० पुच्छा, गोयमा ! णो संखेज्जाओ अणागय-
 द्धाओ णो असंखेज्जाओ अणागयद्धाओ णो अणंताओ अणागयद्धाओ, सव्वद्धा
 णं अणागयद्धाओ थोव्वणगदुग्गणा अणागयद्धा णं सव्वद्धाओ साइरेगे अद्धे ॥ ७४७ ॥
 कइविहा णं भंते ! णिओया प० ? गोयमा ! दुविहा णिओया प०, तं०-णिओया-
 य णिओयजीवा य । णिओया णं भंते ! कइविहा प० ? गोयमा ! दुविहा
 प०, तंजहा-सुहुमणिओया य बायरणिओया य, एवं णिओया भाणियव्वा जहा

जीवाभिगमे तहेव णिरवसेसं ॥ ७४८ ॥ कइविहे णं भंते ! णामे पणत्ते ? गोयमा ! छविहे णामे पणत्ते, तंजहा-उदइए जाव सण्णिवाइए । से किं तं उदइए णामे ? उदइए णामे दुविहे प०, तं०-उदइए य उदयणिक्फण्णे य, एवं जहा सत्तरसमसए पढमे उद्देसए भावो तहेव इहवि, णवरं इमं णामणत्तं, सेसं तहेव जाव सण्णिवाइए । सेवं भंते ! सेवं भंते ! त्ति ॥ ७४९ ॥

पंचवीसइमं सयं छट्ठो उद्देसो

पण्णव १ वेय २ रागे ३ कप्प ४ चरित्त ५ पडिसेवणा ६ णामे ७ । तित्थे ८ लिग ९ सरीरे १० खेत्ते ११ काले १२ गइ १३ संजम १४ णिगासे १५ ॥ १ ॥ जोगु १६ वओग १७ कसाए १८ लेसा १९ परिणाम २० बंध २१ वेदे य २२ । कम्मोदीरण २३ उवसंपजहण २४ सण्णा य २५ आहारे २६ ॥२॥ भव २७ आगरिसे २८ कालं २९ तरे य ३० समुघाय ३१ खेत्त ३२ फुसणा य ३३ । भावे ३४ परिमाणे ३५ विद्य अप्पाबहुयं ३६ णियंठाणं ३७ ॥ ३ ॥ रायगिहे जाव एवं वयासी-कइ णं भंते ! णियंठा पणत्ता ? गोयमा ! पंच णियंठा प०, तं०-पुलाए बउसे कुसीले णियंठे सिणाए । पुलाए णं भंते ! कइ-विहे पणत्ते ? गोयमा ! पंचविहे प०, तं०-णाणपुलाए दंसणपुलाए चरित्त-पुलाए लिगपुलाए अहासुहुमपुलाए णामं पंचमे । बउसे णं भंते ! कइविहे प० ? गोयमा ! पंचविहे प०, तं०-आभोगबउसे अणाभोगबउसे संवुडबउसे असंवुड-बउसे अहासुहुमबउसे णामं पंचमे । कुसीले णं भंते ! कइविहे प० ? गोयमा ! दुविहे प०, तं०-पडिसेवणाकुसीले य, कसायकुसीले य । पडिसेवणाकुसीले णं भंते ! कइविहे पणत्ते ? गोयमा ! पंचविहे प०, तं०-णाणपडिसेवणाकुसीले दंसणपडिसेवणाकुसीले चरित्तपडिसेवणाकुसीले लिगपडिसेवणाकुसीले अहासुहुम-पडिसेवणाकुसीले णामं पंचमे । कसायकुसीले णं भंते ! कइविहे पणत्ते गोयमा ! पंचविहे प०, तं०-णाणकसायकुसीले दंसणकसायकुसीले चरित्तकसायकुसीले लिगकसायकुसीले अहासुहुमकसायकुसीले णामं पंचमे । णियंठे णं भंते ! कइ-विहे प० ? गोयमा ! पंचविहे प०, तंजहा-पढमसमयणियंठे अपढमसमयणियंठे चरिभसमयणियंठे अचरिभसमयणियंठे अहासुहुमणियंठे णामं पंचमे । सिणाए णं भंते ! कइविहे प० ? गोयमा ! पंचविहे प०, तं०-अच्छवी १, असबले २,

अकम्भंसे ३, संसुद्धाणदंसणधरे अरहा जिणे केवली ४, अपरिस्तावी ५। १।
 पुलाए णं भंते ! किं सवेयए होज्जा अवेयए होज्जा ? गोयमा ! सवेयए होज्जा
 णो अवेयए होज्जा । जइ सवेयए होज्जा किं इत्थिवेयए होज्जा पुरिसवेयए होज्जा
 पुरिसणपुंसगवेयए होज्जा ? गोयमा ! णो इत्थिवेयए होज्जा पुरिसवेयए होज्जा
 पुरिसणपुंसगवेयए वा होज्जा । बउसे णं भंते ! किं सवेयए होज्जा अवेयए
 होज्जा ? गोयमा ! सवेयए होज्जा णो अवेयए होज्जा, जइ सवेयए होज्जा
 किं इत्थिवेयए होज्जा पुरिसवेयए होज्जा पुरिसणपुंसगवेयए होज्जा ? गोयमा !
 इत्थिवेयए वा होज्जा पुरिसवेयए वा होज्जा पुरिसणपुंसगवेयए वा होज्जा, एवं
 पडिसेवणाकुसीलेवि । कसायकुसीले णं भंते ! किं सवेयए होज्जा० पुच्छा,
 गोयमा ! सवेयए वा होज्जा अवेयए वा होज्जा । जइ अवेयए होज्जा किं उव-
 संतवेयए होज्जा खीणवेयए होज्जा ? गोयमा ! उवसंतवेयए वा होज्जा
 खीणवेयए वा होज्जा, जइ सवेयए होज्जा किं इत्थिवेयए होज्जा० पुच्छा,
 गोयमा ! तिमुवि जहा बउसो । णियंठे णं भंते ! किं सवेयए० पुच्छा, गोयमा !
 णो सवेयए होज्जा अवेयए होज्जा । जइ अवेयए होज्जा किं उवसंत० पुच्छा,
 गोयमा ! उवसंतवेयए वा होज्जा खीणवेयए वा होज्जा । सिणाए णं भंते ! किं
 सवेयए होज्जा० ? जहा णियंठे तहा सिणाएवि, णवरं णो उवसंतवेयए होज्जा
 खीणवेयए होज्जा २ ॥ ७५० ॥ पुलाए णं भंते ! किं सरागे होज्जा वीयरामे
 होज्जा ? गोयमा ! सरागे होज्जा णो वीयरामे होज्जा, एवं जाव कसाय-
 कुसीले । णियंठे णं भंते ! किं सरागे होज्जा० पुच्छा, गोयमा ! णो सरागे
 होज्जा वीयरामे होज्जा । जइ वीयरामे होज्जा किं उवसंतकसायवीयरामे होज्जा
 खीणकसायवीयरामे होज्जा ? गोयमा ! उवसंतकसायवीयरामे वा होज्जा
 खीणकसायवीयरामे वा होज्जा, सिणाए एवं चेव, णवरं णो उवसंतकसायवीय-
 रामे होज्जा खीणकसायवीयरामे होज्जा ३ ॥ ७५१ ॥ पुलाए णं भंते ! किं
 ठियकप्पे होज्जा अट्ठियकप्पे होज्जा ? गोयमा ! ठियकप्पे वा होज्जा अट्ठिय-
 कप्पे वा होज्जा, एवं जाव सिणाए । पुलाए णं भंते ! किं जिणकप्पे होज्जा
 थेरकप्पे होज्जा कप्पाईए होज्जा ? गोयमा ! णो जिणकप्पे होज्जा थेरकप्पे
 होज्जा, णो कप्पाईए होज्जा । बउसे णं—पुच्छा, गोयमा ! जिणकप्पे
 वा होज्जा थेरकप्पे वा होज्जा णो कप्पाईए होज्जा, एवं पडिसेवणाकुसीलेवि ।
 कसायकुसीले णं पुच्छा, गोयमा ! जिणकप्पे वा होज्जा थेरकप्पे वा होज्जा

कप्पाईए वा होज्जा । गियंठे णं पुच्छा, गोयमा ! णो जिणकप्पे होज्जा णो घेरकप्पे होज्जा कप्पाईए होज्जा, एवं सिणाएवि ४ ॥ ७५२ ॥ पुलाए णं भंते ! किं सामाइयसंजमे होज्जा छेओवट्ठावणियसंजमे होज्जा परिहारविमुट्ठियसंजमे होज्जा सुहुमसंपरायसंजमे होज्जा अहक्खायसंजमे होज्जा ? गोयमा ! सामाइयसंजमे वा होज्जा छेओवट्ठावणियसंजमे वा होज्जा णो परिहारविमुट्ठियसंजमे होज्जा णो सुहुमसंपरायसंजमे होज्जा णो अहक्खायसंजमे होज्जा, एवं बउसेवि, एवं पडिसेवणाकुसीलेवि । कसायकुसीले णं पुच्छा, गोयमा ! सामाइयसंजमे वा होज्जा जाव सुहुमसंपरायसंजमे वा होज्जा णो अहक्खायसंजमे होज्जा । गियंठे णं पुच्छा, गोयमा ! णो सामाइयसंजमे होज्जा जाव णो सुहुमसंपरायसंजमे होज्जा अहक्खायसंजमे होज्जा, एवं सिणाएवि ५ ॥ ७६३ ॥ पुलाए णं भंते ! किं पडिसेवए होज्जा, अपडिसेवए होज्जा ? गोयमा ! पडिसेवए होज्जा णो अपडिसेवए होज्जा । जइ पडिसेवए होज्जा किं मूलगुणपडिसेवए होज्जा उत्तरगुणपडिसेवए होज्जा ? गोयमा ! मूलगुणपडिसेवए वा होज्जा उत्तरगुणपडिसेवए वा होज्जा, मूलगुणपडिसेवमाणे पंचण्हं आसवाणं अण्णयरं पडिसेवेज्जा, उत्तरगुणपडिसेवमाणे दसविहस्स पच्चक्खाणस्स अण्णयरं पडिसेवेज्जा । बउसे णं पुच्छा, गोयमा ! पडिसेवए होज्जा णो अपडिसेवए होज्जा । जइ पडिसेवए होज्जा किं मूलगुणपडिसेवए होज्जा उत्तरगुणपडिसेवए होज्जा ? गोयमा ! णो मूलगुणपडिसेवए होज्जा उत्तरगुणपडिसेवए होज्जा, उत्तरगुणपडिसेवमाणे दसविहस्स पच्चक्खाणस्स अण्णयरं पडिसेवेज्जा, पडिसेवणाकुसीले जहा पुलाए । कसायकुसीले णं पुच्छा, गोयमा ! णो पडिसेवए होज्जा अपडिसेवए होज्जा, एवं गियंठेवि, एवं सिणाएवि ६ ॥ ७५४ ॥ पुलाए णं भंते ! कइसु णाणेषु होज्जा ? गोयमा ! दोसु वा तिसु वा होज्जा, दोसु होमाणे दोसु आभिणिबोहियणाणे सुअणाणे होज्जा, तिसु होमाणे तिसु आभिणिबोहियणाणे सुयणाणे ओहिणाणे होज्जा, एवं बउसेवि, एवं पडिसेवणाकुसीलेवि । कसायकुसीले णं पुच्छा, गोयमा ! दोसु वा तिसु वा चउसु वा होज्जा, दोसु होमाणे दोसु आभिणिबोहियणाणे सुयणाणे होज्जा, तिसु होमाणे तिसु आभिणिबोहियणाणसुयणाणओहिणाणेषु होज्जा अहवा तिसु होमाणे आभिणिबोहियणाणसुयणाणमणपज्जवणाणेषु होज्जा, चउसु होमाणे

चउसु आभिनिबोहियणाणसुयणाणओहिणाणमणपज्जयणाणसु होज्जा, एवं णियं-
 ठेवि । सिणाए णं पुच्छा, गोयमा ! एगंमि केवलणाणे होज्जा ॥ ७५५ ॥ पुलाए
 णं भंते ! केवइयं सुयं अहिज्जेज्जा ? गोयमा ! जहण्णेणं णवमस्स पुव्वस्स
 तइयं आघारवत्थं, उक्कोसेणं णव पुव्वाइं अहिज्जेज्जा । बउसे-पुच्छा,
 गोयमा ! जहण्णेणं अट्ट पवयणमायाओ उक्कोसेणं वस पुव्वाइं अहिज्जेज्जा ।
 एवं पडिसेवणाकुसीलेवि । कसायकुसीले णं पुच्छा, गोयमा ! जहण्णेणं अट्ट
 पवयणमायाओ उक्कोसेणं चउहस पुव्वाइं अहिज्जेज्जा, एवं णियंठेवि । सिणाए
 णं पुच्छा, गोयमा । सुयवइरित्ते होज्जा ७ ॥ ७५६ ॥ पुलाए णं भंते ! किं
 तित्थे होज्जा अतित्थे होज्जा ? गोयमा ! तित्थे होज्जा णो अतित्थे होज्जा,
 एवं बउसेवि, एवं पडिसेवणाकुसीलेवि । कसायकुसीले पुच्छा, गोयमा ! तित्थे
 वा होज्जा अतित्थे वा होज्जा । जइ अतित्थे होज्जा किं तित्थयरे होज्जा पत्तेय-
 बुद्धे होज्जा ? गोयमा ! तित्थयरे वा होज्जा पत्तेयबुद्धे वा होज्जा, एवं णियंठेवि,
 एवं सिणाएवि ८ ॥ ७५७ ॥ पुलाए णं भंते ! किं सल्लिगे होज्जा अण्णालिगे होज्जा
 गिहिल्लिगे होज्जा ? गोयमा ! बव्वलिंगं पडुच्चं सल्लिगे वा होज्जा अण्णालिगे
 वा होज्जा गिहिल्लिगे वा होज्जा, भावलिंगं पडुच्चं णियमा सल्लिगे होज्जा, एवं
 जाव सिणाए ९ ॥ ७५८ ॥ पुलाए णं भंते ! कइसु सरारेसु होज्जा ? गोयमा !
 तिसु ओरालियतेयाकम्मएसु होज्जा । बउसे णं भंते ! पुच्छा, गोयमा ! तिसु
 वा चउसु वा होज्जा, तिसु होमाणे तिसु ओरालियतेयाकम्मएसु होज्जा,
 चउसु होमाणे चउसु ओरालियवेउब्बियतेयाकम्मएसु होज्जा, एवं पडिसेवणा-
 कुसीलेवि । कसायकुसीले पुच्छा, गोयमा ! तिसु वा चउसु वा पंचसु वा
 होज्जा, तिसु होमाणे तिसु ओरालियतेयाकम्मएसु होज्जा, चउसु होमाणे
 चउसु ओरालियवेउब्बियतेयाकम्मएसु होज्जा, पंचसु होमाणे पंचसु ओरालिय-
 वेउब्बियआहारगतेयाकम्मएसु होज्जा, णियंठो सिणाओ य जहा पुलाओ
 ॥ १० ॥ ७५९ ॥ पुलाए णं भंते ! किं कम्मभूमीए होज्जा अकम्मभूमीए
 होज्जा ? गोयमा ! जम्मणसंतिभावं पडुच्चं कम्मभूमीए होज्जा णो
 अकम्मभूमीए होज्जा । बउसे णं पुच्छा, गोयमा ! जम्मणसंतिभावं पडुच्चं
 कम्मभूमीए होज्जा, णो अकम्मभूमीए होज्जा, साहरणं पडुच्चं कम्मभूमीए
 वा होज्जा अकम्मभूमीए वा होज्जा, एवं जाव सिणाए ॥ ११ ॥ ७६० ॥

पुसाए णं भंते ! किं ओसप्पिणिकाले होज्जा उस्सप्पिणिकाले होज्जा गोओसप्पिणिकाले उस्सप्पिणिकाले वा होज्जा ? गोयमा ! ओसप्पिणिकाले वा होज्जा उस्सप्पिणिकाले वा होज्जा णोओसप्पिणिकाले उस्सप्पिणिकाले वा होज्जा । जइ ओसप्पिणिकाले होज्जा किं सुसमसुसमाकाले होज्जा १, सुसमाकाले होज्जा २, सुसमदूसमाकाले होज्जा ३, दूसमसुसमाकाले होज्जा ४, दूसमाकाले होज्जा ५, दूसमदूसमाकाले होज्जा ६ ? गोयमा ! जम्मणं पडुच्च णो सुसमसुसमाकाले होज्जा, १, णो सुसमाकाले होज्जा २, सुसमदूसमाकाले वा होज्जा ३, दूसमसुसमाकाले वा होज्जा ४, णो दूसमाकाले होज्जा ५, णो दूसमदूसमाकाले होज्जा ६, संतिभावं पडुच्च णो सुसमसुसमाकाले होज्जा णो सुसमाकाले होज्जा सुसमदूसमाकाले वा होज्जा दूसमसुसमाकाले वा होज्जा दूसमाकाले वा होज्जा णो दूसमदूसमाकाले होज्जा । जइ उस्सप्पिणिकाले होज्जा किं दूसमदूसमाकाले होज्जा दूसमाकाले होज्जा दूसमसुसमाकाले होज्जा सुसमदूसमाकाले होज्जा सुसमसुसमाकाले होज्जा ? गोयमा ! जम्मणं पडुच्च णो दूसमदूसमाकाले होज्जा १, दूसमाकाले वा होज्जा २, दूसमसुसमाकाले वा होज्जा ३, सुसमदूसमाकाले वा होज्जा ४, णो सुसमाकाले होज्जा ५, णो सुसमसुसमाकाले होज्जा ६, संतिभावं पडुच्च णो दूसमदूसमाकाले होज्जा १, दूसमाकाले होज्जा २, दूसमसुसमाकाले वा होज्जा ३, सुसमदूसमाकाले वा होज्जा ४, णो सुसमाकाले होज्जा ५, णो सुसमसुसमाकाले होज्जा ६ । जइ णोओसप्पिणिकाले उस्सप्पिणिकाले होज्जा किं सुसमसुसमापलिभागे होज्जा सुसमापलिभागे होज्जा सुसमदूसमापलिभागे होज्जा दूसमसुसमापलिभागे होज्जा ? गोयमा ! जम्मणं संतिभावं च पडुच्च णो सुसमसुसमापलिभागे होज्जा णो सुसमापलिभागे होज्जा णो सुसमदूसमापलिभागे होज्जा दूसमसुसमापलिभागे होज्जा । बउसे णं भंते ! पुच्छा, गोयमा ! ओसप्पिणिकाले वा होज्जा उस्सप्पिणिकाले वा होज्जा णोओसप्पिणिकाले उस्सप्पिणिकाले वा होज्जा । जइ ओसप्पिणिकाले होज्जा किं सुसमसुसमाकाले० पुच्छा, गोयमा ! जम्मणं संतिभावं च पडुच्च णो सुसमसुसमाकाले होज्जा णो सुसमाकाले होज्जा सुसमदूसमाकाले वा होज्जा दुस्समसुसमाकाले वा होज्जा दूसमाकाले वा होज्जा णो दूसमदूसमाकाले होज्जा, साहरणं पडुच्च अण्यथरे समाकाले होज्जा । जइ उस्सप्पि-

णिकाले होज्जा कि दूसमदूसमाकाले होज्जा ६ पुच्छा, गोयमा ! जम्भणं पडुच्च
 णो दुस्समदुस्समाकाले होज्जा जहेव पुलाए, संतिभावं पडुच्च णो दूसमदूसमा-
 काले होज्जा णो दूसमाकाले होज्जा एवं संतिभावेणवि जहा पुलाए जाव
 णो सुसमसुसमाकाले होज्जा, साहरणं पडुच्च अण्यरे समाकाले होज्जा ।
 जइ णोओसप्पिणोउस्सप्पिणिकाले होज्जा० पुच्छा, गोयमा ! जम्भणसंति-
 भावं पडुच्च णो सुसमसुसमापलिभागे होज्जा जहेव पुलाए जाव दूसमसुसमा-
 पलिभागे होज्जा, साहरणं पडुच्च अण्यरे पलिभागे होज्जा, जहा बउसे एवं
 पडिसेवणाकुसीले वि, एवं कसायकुसीलेवि, णियंठो सिणाओ य जहा पुलाओ, णवरं
 एएंसि अह्महिंयं साहरणं भाणियत्वं, सेसं तं चेव १२ ॥ ७६१ ॥ पुलाए णं भंते !
 कालगए समाणे कं गइं गच्छइ ? गोयमा ! देवगइं गच्छइ । देवगइं गच्छमाणे कि
 भवणवासीसु उववज्जेज्जा वाणमंतरेसु उववज्जेज्जा जोइसियवेमाणिएसु उवव-
 ज्जेज्जा ? गोयमा ! णो भवणवासीसु उ० णो वाणमंतरेसु उ० णो जोइ-
 सिएसु उ० वेमाणिएसु उववज्जेज्जा, वेमाणिएसु उववज्जमाणे जहण्णेणं सोह्ममे
 कप्पे उवकोसेणं सहस्सारे कप्पे उववज्जेज्जा, बउसे णं एवं चेव णवरं उवको-
 सेणं अच्चुए कप्पे, पडिसेवणाकुसीले जहा बउसे, कसायकुसीले जहा पुलाए, णवरं
 उवकोसेणं अणुत्तरविमाणेसु उववज्जेज्जा, णियंठे णं भंते ! एवं चेव, एवं जाव
 वेमाणिएसु उववज्जमाणे अजहण्णमणुक्कोसेणं अणुत्तरविमाणेसु उववज्जेज्जा ।
 सिणाए णं भंते ! कालगए समाणे कं गइं गच्छइ ? गोयमा ! सिद्धिगइं
 गच्छइ । पुलाए णं भंते ! देवेसु उववज्जमाणे कि इंदत्ताए उववज्जेज्जा सामा-
 णियत्ताए उववज्जेज्जा, तायत्तीसगत्ताए उववज्जेज्जा लोगपालत्ताए उववज्जे-
 ज्जा अह्मिदत्ताए उववज्जेज्जा ? गोयमा ! अविराहणं पडुच्च इंदत्ताए उवव-
 ज्जेज्जा सामाणियत्ताए उववज्जेज्जा तायत्तीसगत्ताए वा उववज्जेज्जा लोग-
 पालगत्ताए उववज्जेज्जा णो अह्मिदत्ताए उववज्जेज्जा, विराहणं पडुच्च अण्य-
 यरेसु उववज्जेज्जा, एवं बउसेवि, एवं पडिसेवणाकुसीलेवि । कसायकुसीले
 पुच्छा, गोयमा ! अविराहणं पडुच्च इंदत्ताए वा उववज्जेज्जा जाव अह्मिद-
 त्ताए उववज्जेज्जा विराहणं पडुच्च अण्यरेसु उववज्जेज्जा । णियंठे पुच्छा,
 गोयमा ! अविराहणं पडुच्च णो इंदत्ताए उववज्जेज्जा जाव णो लोगपालत्ताए उवव-
 ज्जेज्जा अह्मिदत्ताए उववज्जेज्जा, विराहणं पडुच्च अण्यरेसु उववज्जेज्जा ।

पुलागस्स णं भंते ! देवलोकेसु उववज्जमाणस्स केवइयं कालं ठिई प० ? गोयमा ! जहण्णेणं पत्तिओवमपुहुत्तं उक्कोसेणं अट्टारससांगरोवमाइं । बउसस्स णं पुच्छा, गोयमा ! जहण्णेणं पत्तिओवमपुहुत्तं उक्कोसेणं बावीसं सागरोवमाइं, एवं पडिसेवणाकुसीलस्सवि । कसायकुसीलस्स पुच्छा, गोयमा ! जहण्णेणं पत्तिओवमपुहुत्तं उक्कोसेणं तेत्तीसं सागरोवमाइं । णियंठस्स पुच्छा, गोयमा । अजहण्णमणुक्कोसेणं तेत्तीसं सागरोवमाइं १३ ॥ ७६२ ॥ पुलागस्स णं भंते ! केवइया संजमट्टाणा प० ? गोयमा ! असंखेज्जा संजमट्टाणा प०, एवं जाव कसायकुसीलस्स । णियंठस्स णं भंते ! केवइया संजमट्टाणा प० ? गोयमा । एगे अजहण्णमणुक्कोसेए संजमट्टाणे, प०, एवं सिणायस्सवि । एएसि णं भंते ! पुलागवउसपडिसेवणाकसायकुसीलणियंठसिणायानं संजमट्टाणाणं कपरे २ जाव विसेसाहिया वा ? गोयमा ! सव्वरथोवे णियंठस्स सिणायस्स य एगे अजहण्णमणुक्कोसेए संजमट्टाणे, पुलागस्स णं संजमट्टाणा असंखेज्जगुणा, बउसस्स संजमट्टाणा असंखेज्जगुणा, पडिसेवणाकुसीलस्स संजमट्टाणा असंखेज्जगुणा, कसायकुसीलस्स संजमट्टाणा असंखेज्जगुणा १४ ॥ ७६३ ॥ पुलागस्स णं भंते ! केवइया चरित्तपज्जवा प० ? गोयमा ! अणंता चरित्तपज्जवा प०, एवं जाव सिणायस्स । पुलाए णं भंते ! पुलागस्स सद्वानसण्णिगासेणं चरित्तपज्जवेहं किं हीणे तुल्ले अब्भहिए ? गोयमा ! सिय हीणे १, सिय तुल्ले २, सिय अब्भहिए ३, जइ हीणे अणंतभागहीणे वा असंखेज्जइभागहीणे वा संखेज्जइभागहीणे वा संखेज्जगुणहीणे वा असंखेज्जगुणहीणे वा अणंतगुणहीणे वा, अह अब्भहिए अणंतभागमब्भहिए वा असंखेज्जइभागमब्भहिए वा संखेज्जइभागमब्भहिए वा संखेज्जगुणमब्भहिए वा असंखेज्जगुणमब्भहिए वा अणंतगुणमब्भहिए वा । पुलाए णं भंते ! बउसस्स परट्टाणसण्णिगासेणं चरित्तपज्जवेहं किं हीणे तुल्ले अब्भहिए ? गोयमा ! हीणे णो तुल्ले णो अब्भहिए अणंतगुणहीणे, एवं पडिसेवणाकुसीलस्सवि, कसायकुसीलेण समं छट्टाणवडिए जहेव सद्वाने, णियंठस्स जहा बउसस्स, एवं सिणायस्सवि । बउसे णं भंते ! पुलागस्स परट्टाणसण्णिगासेणं चरित्तपज्जवेहं किं हीणे तुल्ले अब्भहिए ? गोयमा ! णो हीणे णो तुल्ले अब्भहिए अणंतगुणमब्भहिए । बउसे णं भंते ! बउसस्स सद्वानसण्णिगासेणं चरित्तपज्जवेहं पुच्छा, गोयमा ! सिय हीणे सिय तुल्ले सिय अब्भहिए, जइ हीणे छट्टाणवडिए । बउसे णं भंते ! पडि-

सेवणाकुसीलस्स परट्टाणसण्णिगासेणं चरित्तपज्जवेहिं किं हीणे ? छट्ठाण-
वडिए, एवं कसायकुसीलस्सवि । बउसे णं भंते ! णियंठस्स परट्टाणसण्णि-
गासेणं चरित्तपज्जवेहिं पुच्छा, गोयमा ! हीणे णो तुल्ले णो अब्भहिए, अणंत-
गुणहीणे, एवं सिणायस्सवि, पडिसेवणाकुसीलस्स एवं चेव बउसवत्तव्वया
भाणियव्वा, कसायकुसीलस्स एस चेव बउसवत्तव्वया णवरं पुलाएणवि
समं छट्ठाणवडिए । णियंठे णं भंते ! पुलागस्स परट्टाणसण्णिगासेणं चरित्त-
पज्जवेहिं पुच्छा, गोयमा ! णो हीणे णो तुल्ले अब्भहिए अणंतगुणमब्भहिए,
एवं जाव कसायकुसीलस्स । णियंठे णं भंते ! णियंठस्स सट्टाणसण्णिगासेणं
पुच्छा, गोयमा ! णो हीणे तुल्ले णो अब्भहिए, एवं सिणायस्सवि । सिणाए
णं भंते ! पुलागस्स परट्टाणसण्णिगासेणं एवं जहा णियंठस्स वत्तव्वया तहा
सिणायस्सवि भाणियव्वा जाव-सिणाए णं भंते ! सिणायस्स सट्टाणसण्णिगासेणं
पुच्छा, गोयमा ! णो हीणे तुल्ले णो अब्भहिए । एएसि णं भंते ! पुलागबउस-
पडिसेवणाकुसीलकसाय-कुसीलणियंठसिणायणं जहण्णकोसगाणं चरित्तपज्ज-
वाणं कथरे २ जाव विसेसाहिया वा ? गोयमा ! पुलागस्स कसायकुसीलस्स य
एएसि णं जहण्णगा चरित्तपज्जवा दोण्हवि तुल्ला सव्वत्थोवा, पुलागस्स
उक्कोसगा चरित्तपज्जवा अणंतगुणा, बउसस्स पडिसेवणाकुसीलस्स य एएसि
णं जहण्णगा चरित्तपज्जवा दोण्हवि तुल्ला अणंतगुणा, बउसस्स उक्कोसगा
चरित्तपज्जवा अणंतगुणा, पडिसेवणाकुसीलस्स उक्कोसगा चरित्तपज्जवा
अणंतगुणा, कसायकुसीलस्स उक्कोसगा चरित्तपज्जवा अणंतगुणा, णियंठस्स
सिणायस्स य एएसि णं अजहण्णमण्णकोसगा चरित्तपज्जवा दोण्हवि तुल्ला
अणंतगुणा १५ ॥ ७६४ ॥ पुलाए णं भंते ! किं सजोगी होज्जा अजोगी
होज्जा ? गोयमा ! सजोगी होज्जा णो अजोगी होज्जा । जइ सजोगी होज्जा
किं मणजोगी होज्जा वइजोगी होज्जा कायजोगी होज्जा ? गोयमा !
मणजोगी वा होज्जा वइजोगी वा होज्जा कायजोगी वा होज्जा, एवं जाव
णियंठे । सिणाए णं भंते ! पुच्छा, गोयमा ! सजोगी वा होज्जा अजोगी वा
होज्जा, जइ सजोगी होज्जा किं मणजोगी होज्जा सेसं जहा पुलागस्स १६
॥ ७६५ ॥ पुलाए णं भंते ! किं सागारोवउत्ते होज्जा अणागारोवउत्ते होज्जा ?
गोयमा ! सागारोवउत्ते वा होज्जा अणागारोवउत्ते वा होज्जा, एवं जाव

सिणाए १७ ॥ ७६६ ॥ पुलाए णं भंते ! किं सकसाई होज्जा अकसाई होज्जा ? गोयमा ! सकसाई होज्जा णो अकसाई होज्जा । जइ सकसाई होज्जा से णं भंते ! कइसु कसाएसु होज्जा ? गोयमा ! चउसु कोहमाणमायालोभेसु होज्जा, एवं बउसेवि, एवं पडिसेवणाकुसीलेवि । कसायकुसीले णं—पुच्छा, गोयमा ! सकसाई होज्जा णो अकसाई होज्जा, जइ सकसाई होज्जा से णं भंते ! कइसु कसाएसु होज्जा ? गोयमा ! चउसु वा तिसु वा दोसु वा एगम्मि वा होज्जा, चउसु होमाणे चउसु संजलणकोहमाणमायालोभेसु होज्जा, तिसु होमाणे तिसु संजलणमाणमायालोभेसु होज्जा, दोसु होमाणे संजलणमायालोभेसु होज्जा, एगम्मि होमाणे एगम्मि संजलणलोभे होज्जा । णियंठे णं पुच्छा, गोयमा ! णो सकसाई होज्जा अकसाई होज्जा । जइ अकसाई होज्जा किं उवसंतकसाई होज्जा खीणकसाई होज्जा ? गोयमा ! उवसंतकसाई वा होज्जा खीणकसाई वा होज्जा, सिणाए एवं चेव, णवरं णो उवसंतकसाई होज्जा, खीणकसाई होज्जा १८ ॥ ७६७ ॥ पुलाए णं भंते ! किं सलेस्से होज्जा अलेस्से होज्जा ? गोयमा ! सलेस्से होज्जा णो अलेस्से होज्जा । जइ सलेस्से होज्जा से णं भंते ! कइसु लेस्सासु होज्जा ? गोयमा ! तिसु विसुद्धलेस्सासु होज्जा, तं०—तेउलेस्साए पम्हलेस्साए सुवकलेस्साए, एवं बउसत्सवि, एवं पडिसेवणाकुसीलेवि । कसायकुसीले पुच्छा, गोयमा ! सलेस्से होज्जा णो अलेस्से होज्जा । जइ सलेस्से होज्जा से णं भंते ! कइसु लेस्सासु होज्जा ? गोयमा ! छसु लेस्सासु होज्जा, तं०—कण्हलेस्साए जाव सुवकलेस्साए । णियंठे णं भंते ! पुच्छा, गोयमा ! सलेस्से होज्जा णो अलेस्से होज्जा । जइ सलेस्से होज्जा से णं भंते ! कइसु लेस्सासु होज्जा ? गोयमा ! एक्काए सुवकलेस्साए होज्जा । सिणाए पुच्छा, गोयमा ! सलेस्से वा होज्जा अलेस्से वा होज्जा । जइ सलेस्से होज्जा से णं भंते ! कइसु लेस्सासु होज्जा ? गोयमा ! एगाए परमसुवकलेस्साए होज्जा १९ ॥ ७६८ ॥ पुलाए णं भंते ! किं वड्डमाणपरिणामे होज्जा हीयमाणपरिणामे होज्जा अवट्ठियपरिणामे होज्जा ? गोयमा ! वड्डमाणपरिणामे वा होज्जा हीयमाणपरिणामे वा होज्जा अवट्ठियपरिणामे वा होज्जा, एवं जाव कसायकुसीले । णियंठे णं पुच्छा, गोयमा ! वड्डमाणपरिणामे होज्जा, णो हीयमाणपरिणामे होज्जा, अवट्ठियपरिणामे वा होज्जा, एवं सिणाएवि । पुलाए णं भंते ! केवइयं कालं वड्डमाणपरिणामे होज्जा ? गोयमा ! जहण्णेणं एक्कं

समयं उक्कोसेण अंतोमुहुत्तं । केवइयं कालं हीयमाणपरिणामे होज्जा ? गोयमा !
 जहण्णेणं एक्कं समयं उक्कोसेणं अंतोमुहुत्तं । केवइयं कालं अवट्ठियपरिणामे
 होज्जा ? गोयमा ! जहण्णेणं एक्कं समयं उक्कोसेणं सत्तं समयया, एवं जाव
 कंसायकुसीले । गियंठे णं भंते ! केवइयं कालं वड्डुमाणपरिणामे होज्जा ?
 गोयमा ! जहण्णेणं अंतोमुहुत्तं उक्कोसेणवि अंतोमुहुत्तं । केवइयं कालं अवट्ठिय-
 परिणामे होज्जा ? गोयमा ! जहण्णेणं एक्कं समयं उक्कोसेणं अंतोमुहुत्तं ।
 सिणाए णं भंते ! केवइयं कालं वड्डुमाणपरिणामे होज्जा ? गोयमा ! जहण्णेणं
 अंतोमुहुत्तं उक्कोसेणवि अंतोमुहुत्तं । केवइयं कालं अवट्ठियपरिणामे होज्जा ?
 गोयमा ! जहण्णेणं अंतोमुहुत्तं उक्कोसेणं देसूणा पुड्वकोडी २० ॥ ७६० ॥ पुलाए
 णं भंते ! कइ कम्मप्पगडीओ बंधइ ? गोयमा ! आउयवज्जाओ सत्तं कम्मप्पगडीओ
 बंधइ । बउसे पुच्छा, गोयमा ! सत्तविहबंधए वा अट्ठविहबंधए वा, सत्त बंध-
 माणे आउयवज्जाओ सत्तं कम्मप्पगडीओ बंधइ, अट्ठ बंधमाणे पडिपुण्णाओ अट्ठ
 कम्मप्पगडीओ बंधइ, एवं पडिसेवणाकुसीलेवि । कसायकुसीले णं पुच्छा, गोयमा !
 सत्तविहबंधए वा अट्ठविहबंधए वा छविहबंधए वा, सत्त बंधमाणे आउय-
 वज्जाओ सत्तं कम्मप्पगडीओ बंधइ, अट्ठ बंधमाणे पडिपुण्णाओ अट्ठ कम्मप्पग-
 डीओ बंधइ, छ बंधमाणे आउयमोहणिज्जवज्जाओ छकम्मप्पगडीओ बंधइ ।
 गियंठे णं पुच्छा, गोयमा ! एग वेयणिज्जं कम्मं बंधइ । सिणाए णं पुच्छा,
 गोयमा ! एगविहबंधए वा अबंधए वा, एगं बंधमाणे एगं वेयणिज्जं कम्मं
 बंधइ २१ ॥ ७७० ॥ पुलाए णं भंते ! कइ कम्मप्पगडीओ वेदेइ ? गोयमा !
 गियंठे अट्ठ कम्मप्पगडीओ वेदेइ, एवं जाव कसायकुसीले । गियंठे णं पुच्छा,
 गोयमा ! मोहणिज्जवज्जाओ सत्तं कम्मप्पगडीओ वेदेइ । सिणाए णं पुच्छा,
 गोयमा ! वेयणिज्जआउयणामगोयाओ चत्तारि कम्मप्पगडीओ वेदेइ २२
 ॥ ७७१ ॥ पुलाए णं भंते ! कइ कम्मप्पगडीओ उदीरेइ ? गोयमा ! आउय-
 वेयणिज्जाओ छ कम्मप्पगडीओ उदीरेइ । बउसे णं पुच्छा, गोयमा ! सत्त-
 विहउदीरे वा अट्ठविहउदीरे वा छविहउदीरे वा, सत्त उदीरेमाणे आउय-
 वज्जाओ सत्तं कम्मप्पगडीओ उदीरेइ, अट्ठ उदीरेमाणे पडिपुण्णाओ अट्ठ
 कम्मप्पगडीओ उदीरेइ, छ उदीरेमाणे आउयवेयणिज्जवज्जाओ छ कम्मप्पग-
 डीओ उदीरेइ, पडिसेवणाकुसीले एवं चेव । कसायकुसीले णं पुच्छा, गोयमा !

सत्तविहउदीरए वा अट्टविहउदीरए वा छव्विहउदीरए वा पंचविहउदीरए वा, सत्त उदीरेमाणे आउयवज्जाओ सत्त कम्मप्पगडीओ उदीरेइ, अट्ट उदीरेमाणे पडिपुण्णाओ अट्ट कम्मप्पगडीओ उदीरेइ, छ उदीरेमाणे आउयवेयणिज्जवज्जाओ छ कम्मप्पगडीओ उदीरेइ, पंच उदीरेमाणे आउयवेयणिज्जमोहणिज्जवज्जाओ पंच कम्मप्पगडीओ उदीरेइ । गियंठे—पुच्छा, गोयमा ! पंचविहउदीरए वा दुविहउदीरए वा, पंच उदीरेमाणे आउयवेयणिज्जमोहणिज्जवज्जाओ पंच कम्मप्पगडीओ उदीरेइ, दो उदीरेमाणे णामं च गोयं च उदीरेइ । सिणाए णं पुच्छा, गोयमा ! दुविहउदीरए वा अणुदीरए वा, दो उदीरेमाणे णामं च गोयं च उदीरेइ २३ ॥ ७७२ ॥ पुलाए णं भंते ! पुलायत्तं जहमाणे किं जहइ किं उवसंपज्जइ ? गोयमा ! पुलायत्तं जहइ कसायकुसीलं वा अस्संजमं वा उवसंपज्जइ । वउमे णं भंते ! बउसत्तं जहमाणे किं जहइ किं उवसंपज्जइ ? गोयमा ! बउसत्तं जहइ पडिसेवणाकुसीलं वा कसायकुसीलं वा अस्संजमं वा संजमासंजमं वा उवसंपज्जइ । पडिसेवणाकुसीले णं भंते ! पडिसेवणाकुसीलत्तं ० पुच्छा, गोयमा ! पडिसेवणाकुसीलत्तं जहइ बउसं वा कसायकुसीलं वा अस्संजमं वा संजमासंजमं वा उवसंपज्जइ । कसायकुसीले णं पुच्छा, गोयमा ! कसायकुसीलत्तं जहइ पुलायं वा बउसं वा पडिसेवणाकुसीलं वा गियंठं वा अस्संजमं वा संजमासंजमं वा उवसंपज्जइ । गियंठे णं पुच्छा, गोयमा ! गियंठत्तं जहइ कसायकुसीलं वा सिणायं वा अस्संजमं वा उवसंपज्जइ । सिणाए णं पुच्छा, गोयमा ! सिणायत्तं जहइ सिद्धिगइ उवसंपज्जइ २४ ॥ ७७३ ॥ पुलाए णं भंते ! किं सण्णोवउत्ते होज्जा णोसण्णोवउत्ते होज्जा ? गोयमा ! णो सण्णोवउत्ते होज्जा । बउसे णं भंते । पुच्छा, गोयमा ! सण्णोवउत्ते वा होज्जा णोसण्णोवउत्ते वा होज्जा, एवं पडिसेवणाकुसीलेवि, एवं कसायकुसीलेवि गियंठे सिणाए य जहा पुलाए २५ ॥ ७७४ ॥ पुलाए णं भंते ! किं आहारए होज्जा अणाहारए होज्जा ? गोयमा ! आहारए होज्जा णो अणाहारए होज्जा, एवं जाव गियंठे । सिणाए णं पुच्छा, गोयमा ! आहारए वा होज्जा अणाहारए वा होज्जा २६ ॥ ७७५ ॥ पुलाए णं भंते ! कइ भवग्गहणाइं होज्जा ? गोयमा ! जहण्णेणं एक्कं उक्कोसेणं तिण्णि । बउसे णं पुच्छा, गोयमा ! जहण्णेणं एक्कं उक्कोसेणं अट्ट, एवं पडिसेवणाकुसीलेवि, एवं कसायकुसीलेवि, गियंठे जहा

पुलाए । सिणाए णं पुच्छा, गोयमा ! एक्कं २७ ॥ ७७६ ॥ पुलागस्स णं भंते !
 एगभवग्गहणिया केवइया आगरिसा प० ? गोयमा । जहण्णेणं एक्को उक्को-
 सेणं तिण्णि । बउसस्स णं पुच्छा, गोयमा ! जहण्णेणं एक्को उक्कोसेणं सयग्गसो
 एवं पडिसेवणाकुसीलेवि, कसायकुसीले वि । णियंठस्स णं पुच्छा, गोयमा !
 जहण्णेणं एक्को उक्कोसेणं दोण्णि । सिणायस्स णं पुच्छा, गोयमा ! एक्को ।
 पुलागस्स णं भंते ! णाणाभवग्गहणिया केवइया आगरिसा प० ? गोयमा !
 जहण्णेणं दोण्णि उक्कोसेणं सत्त । बउसस्स णं पुच्छा, गोयमा ! जहण्णेणं दोण्णि
 उक्कोसेणं सहस्सग्गसो, एवं जाव कसायकुसीलस्स । णियंठस्स णं पुच्छा गोयमा !
 जहण्णेणं दोण्णि उक्कोसेणं पंच । सिणायस्स णं पुच्छा, गोयमा ! णत्थि एक्कोवि
 २८ ॥ ७७७ ॥ पुलाए णं भंते ! कालओ केवच्चिरं होइ ? गोयमा ! जहण्णेणं
 अंतोमुहुत्तं उक्कोसेणंवि अंतोमुहुत्तं । बउसे णं पुच्छा, गोयमा ! जहण्णेणं एक्कं
 समयं उक्कोसेणं देसूणा पुक्वकोडी, एवं पडिसेवणाकुसीलेवि, कसायकुसीलेवि ।
 णियंठे णं पुच्छा, गोयमा ! जहण्णेणं एक्कं समयं उक्कोसेणं अंतो-
 मुहुत्तं । सिणाए णं पुच्छा, गोयमा ! जहण्णेणं अंतोमुहुत्तं उक्कोसेणं देसूणा
 पुक्वकोडी । पुलाया णं भंते ! कालओ केवच्चिरं होइ ? गोयमा ! जहण्णेणं
 एक्कं समयं उक्कोसेणं अंतोमुहुत्तं । बउसा णं भंते ! पुच्छा, गोयमा ! सव्वद्धं,
 एवं जाव कसायकुसीला, णियंठा जहा पुलागा, सिणाया जहा बउसा २९ ॥ ७७८ ॥
 पुलागस्स णं भंते ! केवइयं कालं अंतरं होइ ? गोयमा ! जहण्णेणं अंतो-
 मुहुत्तं उक्कोसेणं अणंतं कालं अणंताओ ओसप्पिणिउस्सप्पिणीओ कालओ,
 खेतओ अवड्ढं षोगलपरियट्टं देसूणं, एवं जाव णियंठस्स । सिणायस्स णं
 पुच्छा, गोयमा ! णत्थि अंतरं । पुलायाणं भंते ! केवइयं कालं अंतरं
 होइ ? गोयमा ! जहण्णेणं एक्कं समयं उक्कोसेणं संखेज्जाइं वासाइं ।
 बउसा णं भंते ! पुच्छा, गोयमा ! णत्थि अंतरं, एवं जाव कसायकुसीलाणं ।
 णियंठाणं पुच्छा, गोयमा ! जहण्णेणं एक्कं समयं उक्कोसेणं छम्मासा, सिणा-
 याणं जहा बउसाणं ३० ॥ ७७९ ॥ पुलागस्स णं भंते ! कइ समुग्घाया
 पणत्ता ? गोयमा ! तिण्णि समुग्घाया पणत्ता तंजहा—वेयणासमुग्घाए
 कसायसमुग्घाए मारणत्थियसमुग्घाए । बउसस्स णं भंते ! पुच्छा, गोयमा ! पंच-
 समुग्घाया प०, तं०—वेयणासमुग्घाए जाव तेयासमुग्घाए, एवं पडिसेवणा-

कुसीलेवि । कसायकुसीलस्स पुच्छा, गोयमा ! छ समुग्घाया प०, तं०-त्रेयणा-
समुग्घाए जाव आहारगसमुग्घाए । णियंठस्स णं पुच्छा, गोयमा ! णत्थि एक्कोषि ।
सिणायस्स णं पुच्छा, गोयमा ! एमे केवलिसमुग्घाए प० ३१ ॥ ७८० ॥
पुलाए णं भंते ! लोगस्स कि संखेज्जइभागे होज्जा १, असंखेज्जइभागे होज्जा
२, संखेज्जेसु भागेषु होज्जा ३, असंखेज्जेसु भागेषु होज्जा ४, सव्वलोए होज्जा
५ ? गोयमा ! णो संखेज्जइभागे होज्जा, असंखेज्जइभागे होज्जा, णो संखे-
ज्जेसु भागेषु होज्जा, णो असंखेज्जेसु भागेषु होज्जा, णो सव्वलोए होज्जा,
एवं जाव णियंठे । सिणाए णं पुच्छा, गोयमा ! णो संखेज्जइभागे होज्जा
असंखेज्जइभागे होज्जा णो संखेज्जेसु भागेषु होज्जा असंखेज्जेसु भागेषु
होज्जा, सव्वलोए वा होज्जा ३२ ॥ ७८१ ॥ पुलाए णं भंते ! लोगस्स कि
संखेज्जइभागं फुसइ असंखेज्जइभागं फुसइ० ? एवं जहा ओगाहणा भणिया
तहा फुसणावि भाणियव्वा जाव सिणाए ३३ ॥ ७७२ ॥ पुलाए णं भंते !
कयरम्म भावे होज्जा ? गोयमा ! खओवसमिए भावे होज्जा, एवं जाव
कसायकुसीले । णियंठे पुच्छा, गोयमा ! उवसमिए वा भावे होज्जा खइए वा
भावे होज्जा । सिणाए पुच्छा, गोयमा ! खइए भावे होज्जा ३४ ॥ ७८३ ॥
पुलाया णं भंते ! एगसमएणं केवइया होज्जा ? गोयमा ! पडिवज्जमाणए
पडुच्च सिय अत्थि सिय णत्थि, जइ अत्थि जहण्णेणं एक्को वा दो वा तिण्णि
वा उवकोसेणं सयपुहुत्तं, पुव्वपडिवण्णए पडुच्च सिय अत्थि सिय णत्थि, जइ
अत्थि जहण्णेणं एक्को वा दो वा तिण्णि वा उवकोसेणं सहस्सपुहुत्तं । इउसा णं
भंते ! एगसमएणं० पुच्छा, गोयमा ! पडिवज्जमाणए पडुच्च सिय अत्थि सिय
णत्थि जइअत्थि जहण्णेणं एक्को वा दो वा तिण्णि वा उवकोसेणं सयपुहुत्तं,
पुव्वपडिवण्णए पडुच्च जहण्णेणं कोडिसयपुहुत्तं उवकोसेणवि कोडिसयपुहुत्तं, एयं
पडिसेवणाकुसीलेवि । कसायकुसीलाणं पुच्छा, गोयमा ! पडिवज्जमाणए
पडुच्च सिय अत्थि सिय णत्थि, जइ अत्थि जहण्णेणं एक्को वा दो वा तिण्णि
वा उवकोसेणं सहस्सपुहुत्तं, पुव्वपडिवण्णए पडुच्च जहण्णेणं कोडिसहस्सपुहुत्तं
उवकोसेणवि कोडिसहस्सपुहुत्तं । णियंठाणं पुच्छा, गोयमा ! पडिवज्जमाणए
पडुच्च सिय अत्थि सिय णत्थि, जइ अत्थि जहण्णेणं एक्को वा दो वा तिण्णि
वा उवकोसेणं वावट्ठं सयं-अट्टसयं खवगाणं चउप्पणं उवसामगाणं, पुव्व-

पडिवण्णए पडुच्च सिय अत्थि सिय णत्थि, जइ अत्थि जहण्णेणं एक्को वा दो वा तिण्णि वा उक्कोसेणं सयपुहुत्तं । सिणायाणं पुच्छा, गोयमा ! पडिवज्ज-
माणए पडुच्च सिय अत्थि सिय णत्थि, जइ अत्थि जहण्णेणं एक्को वा दो वा
त्तिण्णि वा उक्कोसेणं अट्टसयं, पुव्वपडिवण्णए पडुच्च जहण्णेणं कोडिपुहुत्तं
उक्कोसेणवि कोडिपुहुत्तं । एएसि णं भंते ! पुलागबउसपडिसेवणाकुसीलकसाय-
कुसीलणियंठसिणायाणं कयरे २ जाव विसेसाहिया वा ? गोयमा ! सव्वत्थोवा
णियंठा, पुलाया संखेज्जगुणा, सिणाया संखेज्जगुणा, बउसा संखेज्जगुणा,
पडिसेवणाकुसीला संखेज्जगुणा, कसायकुसीला संखेज्जगुणा । सेवं भंते !
सेवं भंते ! त्ति जाव विहरइ ॥ ७८४ ॥

पंचवीसइमं सयं सत्तमो उद्देसो

कइ णं भंते ! संजया प० ? गोयमा ! पंच संजया प०, तं०--सामाइय-
संजए छेओबट्टावणियसंजए परिहारविसुद्धियसंजए सुहुमसंपरायसंजए अहक्खाय-
संजए । सामाइयसंजए णं भंते ! कइविहे पण्णत्ते ? गोयमा ! डुविहे पण्णत्ते,
तंजहा-इत्तरिए य आक्कहिए य, छेओबट्टावणियसंजए णं पुच्छा, गोयमा !
डुविहे प०, तं०--साइयारे य णिरइयारे य । परिहारविसुद्धियसंजए पुच्छा,
गोयमा ! डुविहे प०, तं०--णिव्विसमाणए य णिव्विट्टकाइए य । सुहुमसंपराय०
पुच्छा, गोयमा ! डुविहे प०, तं०--संकिलिस्समाणए य विसुद्धमाणए य । अह-
क्खायसंजए पुच्छा, गोयमा ! डुविहे प०, तं०--छउमत्थे य केवली य ।
माहाओ-सामाइयमि उ कए चाउज्जमिं आणुत्तरं धम्मं । तिचिहेण फासयंतो
सामाइयसंजओ स खलु ॥ १ ॥ छेत्तूण उ परियाणं पोरारणं जो ठवेइ अप्पाणं ।
धम्ममि पंचजामे छेओबट्टावणो स खलु ॥ २ ॥ परिहरइ जो विसुद्धं तु पंच-
जामं अणुत्तरं धम्मं । तिचिहेणं फासयंतो परिहारियसंजओ स खलु ॥ ३ ॥
सोमाणु देययंतो जो खलु उवसामओ व खवओ वा । सो सुहुम संपराओ
अहक्खाया ऊणओ किचि ॥ ४ ॥ उवसंते खीणमि व जो खलु कम्ममि मोह-
णिज्जमि । छउमत्थो व जिणो वा अहक्खाओ संजओ स खलु ॥ ५ ॥ ७८५ ॥
सामाइयसंजए णं भंते ! कि सवेयए होज्जा अवेयए होज्जा ? गोयमा !
सवेयए वा होज्जा अवेयए वा होज्जा, जइ सवेयए होज्जा० एवं जहा कसाय-

कुसीले तहेव गिरवसेसं, एयं छेदोवट्टावणियसंजएवि, परिहारविमुद्धियसंजओ जहा पुलाओ, सुहुमसंपरायसंजओ अहक्खायसंजओ य जहा णियंठो २ । सामा-
इयसंजए णं भंते ! किं सरागे होज्जा वीयरगे होज्जा ? गोयमा ! सरागे
होज्जा णो वीयरगे होज्जा, एवं जाव सुहुमसंपरायसंजए, अहक्खायसंजए
जहा णियंठे ३ । सामाइयसंजए णं भंते ! किं ठियकप्पे होज्जा अट्टियकप्पे
होज्जा ? गोयमा ! ठियकप्पे वा होज्जा अट्टियकप्पे वा होज्जा । छेदोवट्टाव-
णियसंजए पुच्छा, गोयमा ! ठियकप्पे होज्जा णो अट्टियकप्पे होज्जा, एवं
परिहारविमुद्धियसंजएवि, सेसा जहा सामाइयसंजए । सामाइयसंजए णं भंते !
किं जिणकप्पे होज्जा थेरकप्पे होज्जा कप्पाईए होज्जा ? गोयमा !
जिणकप्पे वा होज्जा जहा कसायकुसीले तहेव, गिरवसेसं, छेदोवट्टावणियो
परिहारविमुद्धिओ य जहा बउसो, सेसा जहा णियंठे ४ ॥ ७८६ ॥ सामाइय-
संजए णं भंते ! किं पुलाए होज्जा बउसे जाव सिणाए होज्जा ? गोयमा !
पुलाए वा होज्जा बउसे जाव कसायकुसीले वा होज्जा, णो णियंठे होज्जा णो
सिणाए होज्जा, एवं छेदोवट्टावणिएवि । परिहारविमुद्धियसंजए णं भंते !
पुच्छा, गोयमा ! णो पुलाए णो बउसे पडिसेवणाकुसीले होज्जा, कसायकुसीले
होज्जा, णो णियंठे होज्जा णो सिणाए होज्जा, एवं सुहुमसंपराएवि । अहक्खाय-
संजए पुच्छा, गोयमा ! णो पुलाए होज्जा जाव णो कसायकुसीले होज्जा, णियंठे
वा होज्जा सिणाए वा होज्जा ५ । सामाइयसंजए णं भंते ! किं पडिसेवए होज्जा
अपडिसेवए होज्जा ? गोयमा ! पडिसेवए वा होज्जा अपडिसेवए वा होज्जा,
जइ पडिसेवए होज्जा किं मूलगुणपडिसेवए होज्जा ० सेसं जहा पुलागस्स, जहा
सामाइयसंजए एवं छेदोवट्टावणिएवि । परिहारविमुद्धियसंजए पुच्छा, गोयमा !
णो पडिसेवए होज्जा अपडिसेवए होज्जा, एवं जाव अहक्खायसंजए ६ । सामा-
इयसंजए णं भंते ! कइसु णाणेसु होज्जा ? गोयमा ! दोसु वा तिसु वा चउसु
वा णाणेसु होज्जा, एवं जहा कसायकुसीलस्स तहेव चत्तारि णाणाइं भयणाए,
एवं जाव सुहुमसंपराए, अहक्खायसंजयस्स पंच णाणाइं भयणाए जहा-णाणुदेसए ।
सामाइयसंजए णं भंते ! केवइयं सुयं अहिज्जेज्जा ? गोयमा ! जहण्णेणं अट्ट
पवयणमायाओ जहा कसायकुसीले, एवं छेदोवट्टावणिएवि । परिहारविमुद्धिय-
संजए पुच्छा, गोयमा ! जहण्णेणं णवसस्स पुक्कस्स तइयं आयावत्तं उक्को-

सेणं असंपुष्णाइं दस पुष्वाइं अहिज्जेज्जा, सुहुमसंपरायसंजए जहा सामाइय-
संजए । अहवखायसंजए पुच्छा, गोयमा ! जहण्णेणं अद्दु पववणमायाओ उक्को-
सेणं चउदुस पुष्वाइं अहिज्जेज्जा सुयवइरित्ते वा होज्जा ७ । सामाइयसंजए
णं भंते ! किं तित्थे होज्जा, अतित्थे होज्जा ? गोयमा तित्थे वा होज्जा
अतित्थे वा होज्जा जहा कसायकुसीले, छेओवट्टावणिए परिहारविसुद्धिए
य जहा पुलाए, सेसा जहा सामाइयसंजए ८ । सामाइयसंजए णं भंते !
किं सल्लिगे होज्जा अण्णल्लिगे होज्जा गिहिल्लिगे होज्जा ? जहा पुलाए, एवं
छेओवट्टावणिएवि । परिहारविसुद्धियसंजए णं भंते ! किं पुच्छा, गोयमा !
दध्वल्लिगंवि भावल्लिगंवि पडुच्च सल्लिगे होज्जा णो अण्णल्लिगे होज्जा णो
गिहिल्लिगे होज्जा, सेसा जहा सामाइयसंजए ९ । सामाइयसंजए णं भंते !
कइसु सरिरेसु होज्जा ? गोयमा ! तिसु वा चउसु वा पंचसु वा होज्जा
जहा कसायकुसीले, एवं छेओवट्टावणिएवि, सेसा जहा पुलाए १० । सामा-
इयसंजए णं भंते ! किं कम्मभूमोए होज्जा अकम्मभूमोए होज्जा ?
गोयमा ! जम्मणं संतिभावं च पडुच्च कम्मभूमोए होज्जा णो अकम्मभूमोए
जहा बउसे, एवं छेओवट्टावणिएवि, परिहारविसुद्धिए य जहा पुलाए, सेसा
जहा सामाइयसंजए ११ ॥ ७८७ ॥ सामाइयसंजए णं भंते ! किं ओसप्पिणी-
काले होज्जा उस्सप्पिणीकाले होज्जा णोओसप्पिणिणोउस्सप्पिणिकाले होज्जा ?
गोयमा ! ओसप्पिणीकाले जहा बउसे, एवं छेओवट्टावणिएवि, णवरं जम्मणं
संतिभावं च पडुच्च चउसुवि पल्लिभागेसु णत्थि, साहरणं पडुच्च अण्णयरे पल्लि-
भागे होज्जा, सेसं तं चैव । परिहारविसुद्धिए पुच्छा, गोयमा ! ओसप्पिणिकाले
वा होज्जा उस्सप्पिणिकाले वा होज्जा णोओसप्पिणिणोउस्सप्पिणिकाले णो
होज्जा, जइ ओसप्पिणिकाले होज्जा जहा पुलाओ, उस्सप्पिणिकालेवि जहा
पुलाओ, सुहुमसंपराइओ जहा णियंठो, एवं अहवखाओवि १२ ॥ ७८८ ॥ सामा-
इयसंजए णं भंते ! कालगए समाणे किं गइं गच्छइ ? गोयमा ! देवगइं
गच्छइ, देवगइं गच्छमाणे किं भवणवासीसु उववज्जेज्जा वाणमंतरेसु उव-
वज्जेज्जा जोइसिएसु उववज्जेज्जा वेमाणिएसु उववज्जेज्जा ? गोयमा ! णो
भवणवासीसु उववज्जेज्जा जहा कसायकुसीले, एवं छेओवट्टावणिएवि, परिहार-
विसुद्धिए जहा पुलाए, सुहुमसंपराए जहा णियंठो । अहवखाए पुच्छा, गोयमा !
एवं अहवखायसंजएवि जाव अहजण्णमणुवकोसेणं अणुत्तरविमाणेसु उववज्जेज्जा,

अत्थेगइए सिज्जइ जाव अंतं करेइ । सामाइयसंजए णं भंते ! देवलोगेसु उव-
वज्जमाणे किं इंदत्ताए उववज्जइ पुच्छा, गोयमा ! अविराहणं पडुच्च एवं जहा
कसायकुसीले एवं छेदोवट्टावणिएवि । परिहारविसुद्धिए जहा पुलाए, सेसा जहा
णियंठे । सामाइयसंजयस्स णं भंते ! देवलोगेसु उववज्जमाणस्स केवइयं कालं ठिई
प० ? गोयमा ! जहण्णेणं दो पलिओवमाइं उक्कोसेणं तेत्तीसं सागरोवमाइं, एवं
छेदोवट्टावणिएवि, परिहारविसुद्धियस्स पुच्छा, गोयमा ! जहण्णेणं दो पलि-
ओवमाइं उक्कोसेणं अट्टारस सागरोवमाइं, सेसाणं जहा णियंठस्स १३ ॥ ७८६ ॥
सामाइयसंजयस्स णं भंते ! केवइया संजमट्टाणा प० ? गोयमा ! असंखेज्जा
संजमट्टाणा प०, एवं जाव परिहारविसुद्धियस्स । सुहुमसंपरायसंजयस्स पुच्छा,
गोयमा ! असंखेज्जा अंतोमुहुत्तिया संजमट्टाणा प० । अहक्खाय संजयस्स पुच्छा,
गोयमा ! एगे अजहण्णमणुक्कोसए संजमट्टाणे प० । एएसि णं भंते ! सामाइय-
छेदोवट्टावणियपरिहारविसुद्धियसुहुमसंपरायं अहक्खायसंजयाणं संजमट्टाणाणं
कयरे २ जाव विसेसाहिमा वा ? गोयमा ! सव्वत्थोवे अहक्खायसंजयस्स एगे
अजहण्णमणुक्कोसए संजमट्टाणे, सुहुमसंपरायसंजयस्स अंतोमुहुत्तिया संजमट्टाणा
असंखेज्जगुणा, परिहारविसुद्धियसंजयस्स संजमट्टाणा असंखेज्जगुणा, सामाइय-
संजयस्स छेदोवट्टावणियसंजयस्स य एएसि णं संजमट्टाणा दोण्हवि तुल्ला
असंखेज्जगुणा १४ ॥ ७९० ॥ सामाइयसंजयस्स णं भंते ! केवइया चरित्तपज्जवा
प० ? गोयमा ! अणंतं चरित्तपज्जवा प०, एवं जाव अहक्खायसंजयस्स ।
सामाइयसंजए णं भंते ! सामाइयसंजयस्स सट्टाणसण्णिगासेणं चरित्तपज्जवेहिं
किं हीणे तुल्ले अब्भहिए ? गोयमा ! सिध हीणे छट्टाणवडिए । सामाइयसंजए
णं भंते ! छेदोवट्टावणियसंजयस्स परट्टाणसण्णिगासेणं चरित्तपज्जवेहिं० पुच्छा,
गोयमा ! सिध हीणे छट्टाणवडिए, एवं परिहारविसुद्धियस्सवि । सामाइयसंजए
णं भंते ! सुहुमसंपरायसंजयस्स परट्टाणसण्णिगासेणं चरित्तपज्जवे० पुच्छा,
गोयमा ! हीणे णो तुल्ले णो अब्भहिए, अणंतगुणहीणे, एवं अहक्खायसंजयस्सवि
एवं छेदोवट्टावणिएवि, हेट्टिल्लेसु तिसुवि समं छट्टाणवडिए, उवरिल्लेसु दोसु
तहेव हीणे, जहा छेदोवट्टावणिए तथा परिहारविसुद्धिएवि । सुहुमसंपरायसंजए
णं भंते ! सामाइयसंजयस्स परट्टाण० पुच्छा, गोयमा ! णो हीणे णो तुल्ले
अब्भहिए अणंतगुणमब्भहिए, एवं छेदोवट्टावणिय परिहारविसुद्धिएसुवि समं,

सद्गणे सिय हीणे णो तुल्ले सिय अब्भहिए, जइहीणे अणंतगुणहीणे, अह
 (जइ)अब्भहिए अणंतगुणमब्भहिए । सुहुमसंपरायसंजयस्स अहक्खायसंजयस्स
 परट्ठाण० पुच्छा, गोयमा । हीणे णो तुल्ले णो अब्भहिए, अणंतगुणहीणे, अहक्खाए
 हेट्ठिल्लाणं चउण्हवि षो हीणे णो तुल्ले अब्भहिए अणंतगुणमब्भहिए, सद्गणे
 णो हीणे तुल्ले णो अब्भहिए । एएसि णं भंते ! सामाइयछेदोवट्ठावणियपरिहार-
 विसुद्धियसुहुमसंपरायअहक्खायसंजयाणं जहण्णुक्कोसगाणं चरित्तपज्जवाणं कयरे
 कयरे जाव विसेसाहिया वा ? गोयमा ! सामाइयसंजयस्स छेदोवट्ठावणिय-
 संजयस्स य एएसि णं जहण्णगा चरित्तपज्जवा दोण्हवि तुल्ला सव्वत्थोवा, परि-
 हारविसुद्धियसंजयस्स जहण्णगा चरित्तपज्जवा अणंतगुणा तस्स चेव उक्कोसगा
 चरित्तपज्जवा अणंतगुणा, सामाइयसंजयस्स छेदोवट्ठावणियसंजयस्स य एएसि
 णं उक्कोसगा चरित्तपज्जवा दोण्हवि तुल्ला अणंतगुणा, सुहुमसंपरायसंजयस्स
 जहण्णगा चरित्तपज्जवा अणंतगुणा तस्स चेव उक्कोसगा चरित्तपज्जवा अणंत-
 गुणा, अहक्खायसंजयस्स अजहण्णमणुक्कोसगा चरित्तपज्जवा अणंतगुणा १५ ।
 सामाइयसंजए णं भंते ! कि सजोगी होज्जा अजोगी होज्जा ? गोयमा !
 सजोगी जहा पुलाए, एवं जाव सुहुमसंपरायसंजए, अहक्खाए जहा सिणाए
 १६ । सामाइयसंजए णं भंते ! कि सागारोवउत्ते होज्जा अणागारोवउत्ते
 होज्जा ? गोयमा ! सागारोवउत्ते जहा पुलाए, एवं जाव अहक्खाए, णवरं
 सुहुमसंपराए सागारोवउत्ते होज्जा णो अणागारोवउत्ते होज्जा १७ । सामाइय-
 संजए णं भंते ! कि सकसाई होज्जा अकसाई होज्जा ? गोयमा ! सकसाई
 होज्जा णो अकसाई होज्जा, जहा कसायकुसीले, एवं छेदोवट्ठावणिएवि, परि-
 हारविसुद्धिए जहा पुलाए । सुहुमसंपरायसंजए पुच्छा, गोयमा ! सकसाई होज्जा
 णो अकसाई होज्जा । जइ सकसाई होज्जा से णं भंते ! कइसु कसाएसु होज्जा ?
 गोयमा ! एग्ग्मि संजलणलोमे होज्जा, अहक्खायसंजए जहा णियठे १८ ।
 सामाइयसंजए णं भंते ! कि सलेस्से होज्जा अलेस्से होज्जा ? गोयमा ! सलेस्से
 होज्जा जहा कसायकुसीले, एवं छेदोवट्ठावणिएवि, परिहारविसुद्धिए जहा पुलाए,
 सुहुमसंपराए जहा णियठे, अहक्खाए जहा सिणाए, णवरं जइ सलेस्से होज्जा
 एगाए सुक्कलेस्साए होज्जा १९ ॥ ७६१ ॥ सामाइयसंजए णं भंते ! कि
 वड्डमाणपरिणामे होज्जा हीयमाणपरिणामे होज्जा अवट्ठियपरिणामे होज्जा ?

गोयमा ! वड्डमाणपरिणामे होज्जा जहा पुलाए, एवं जाव परिहारविसुद्धिए ।
 सुहुमसंपराय० पुच्छा, गोयमा ! वड्डमाणपरिणामे वा होज्जा हीयमाणपरिणामे
 वा होज्जा णो अवट्ठियपरिणामे होज्जा, अहक्खाए जहा णियंठे । सामाइय-
 संजए णं भंते ! केवइयं कालं वड्डमाणपरिणामे होज्जा ? गोयमा ! जहण्णेणं
 एक्कं समयं जहा पुलाए, एवं जाव परिहारविसुद्धिए । सुहुमसंपरायसंजए णं
 भंते ! केवइयं कालं वड्डमाणपरिणामे होज्जा ? गोयमा ! जहण्णेणं एक्कं
 समयं उक्कोसेणं अंतोमुहुत्तं । केवइयं कालं हीयमाणपरिणामे होज्जा एवं चेव ।
 अहक्खायसंजए णं भंते ! केवइयं कालं वड्डमाणपरिणामे होज्जा ? गोयमा !
 जहण्णेणं अंतोमुहुत्तं उक्कोसेणवि अंतोमुहुत्तं, केवइयं कालं अवट्ठियपरिणामे
 होज्जा ? गोयमा ! जहण्णेणं एक्कं समयं उक्कोसेणं देसूणा पुव्वकोडी २०
 ॥ ७६२ ॥ सामाइयसंजए णं भंते ! कइ कम्मप्पगडीओ बंधइ ? गोयमा !
 सत्तविहबंधए वा अट्टविहबंधए वा एवं जहा बउसे, एवं जाव परिहारविसुद्धिए ।
 सुहुमसंपरायसंजए पुच्छा, गोयमा ! आउयमोहणिज्जवज्जाओ छ कम्मप्पग-
 डीओ बंधइ, अहक्खायसंजए जहा सिणाए २१ ॥ सामाइयसंजए णं भंते !
 कइ कम्मप्पगडीओ वेदेइ ? गोयमा ! णियमं अट्ट कम्मप्पगडीओ वेदेइ, एवं
 जाव सुहुमसंपराए । अहक्खाए पुच्छा, गोयमा ! सत्तविहवेयए वा चउट्ठिविह-
 वेयए वा, सत्त वेदेमाणे मोहणिज्जवज्जाओ सत्त कम्मप्पगडीओ वेदेइ, चत्तारि
 वेदेमाणे वेयणिज्जआउयणामगोयाओ चत्तारि कम्मप्पगडीओ वेदेइ २२ ।
 सामाइयसंजए णं भंते ! कइ कम्मप्पगडीओ उदीरेइ ? गोयमा ! सत्तविह०
 जहा बउसे, एवं जाव परिहारविसुद्धिए । सुहुमसंपराए पुच्छा, गोयमा !
 छव्विहउदीरेए वा पंचविहउदीरेए वा, छ उदीरेमाणे आउयवेयणिज्ज-
 वज्जाओ छ कम्मप्पगडीओ उदीरेइ, पंच उदीरेमाणे आउयवेयणिज्जमोहणिज्ज-
 वज्जाओ पंच कम्मप्पगडीओ उदीरेइ । अहक्खायसंजए पुच्छा, गोयमा ! पंच-
 विहउदीरेए वा दुविहउदीरेए वा, अणुदीरेए वा, पंच उदीरेमाणे आउय० सेसं
 जहा णियंठस्स २३ ॥ ७६३ ॥ सामाइयसंजए णं भंते ! सामाइयसंजयत्तं
 जहमाणे किं जहइ किं उवसंपज्जइ ? गोयमा ! सामाइयसंजयत्तं जहइ छेदो-
 वट्ठावणियसंजयं वा सुहुमसंपरायसंजयं वा असंजमं वा संजमासंजमं वा
 उवसंपज्जइ । छेदोवट्ठावणिय० पुच्छा, गोयमा ! छेदोवट्ठावणियसंजयत्तं जहइ

सामाह्यसंजमं वा परिहारविसुद्धियसंजमं वा सुहृमसंपरायसंजमं वा असंजमं वा संजमासंजमं वा उवसंपज्जइ । परिहारविसुद्धिं पुच्छा, गोयमा ! परिहार-
 विसुद्धियसंजयत्तं जहइ छेदोवट्टावणियसंजयत्तं वा असंजमं वा उवसंपज्जइ ।
 सुहृमसंपराए पुच्छा, गोयमा ! सुहृमसंपरायसंजयत्तं जहइ सामाह्यसंजमं वा
 छेदोवट्टावणियसंजमं वा अहक्खायसंजमं वा असंजमं वा उवसंपज्जइ । अह-
 क्खायसंजए णं पुच्छा, गोयमा ! अहक्खायसंजयत्तं जहइ सुहृमसंपरायसंजमं वा
 असंजमं वा सिद्धिगहं वा उवसंपज्जइ २४ ॥ ७६४ ॥ सामाह्यसंजए णं भंते !
 किं सण्णोवउत्ते होज्जा णोसण्णोवउत्ते होज्जा ? गोयमा ! सण्णोवउत्ते होज्जा
 जहा वउसो, एवं जाव परिहारविसुद्धिं, सुहृमसंपराए अहक्खाए य जहा पुलाए
 २५ । सामाह्यसंजए णं भंते ! किं आहारए होज्जा अणाहारए होज्जा ?
 जहा पुलाए, एवं जाव सुहृमसंपराए, अहक्खायसंजए जहा सिणाए २६ ॥
 सामाह्यसंजए णं भंते ! कइ भवग्गहणाइं होज्जा ? गोयमा ! जहण्णेणं एक्कं
 उक्कोसेणं अट्ठ, एवं छेदोवट्टावणिएवि । परिहारविसुद्धिं पुच्छा, गोयमा !
 जहण्णेणं एक्कं उक्कोसेणं तिण्णि, एवं जाव अहक्खाए २७ ॥ ७६५ ॥ सामाह्य-
 संजयस्स णं भंते ! एगभवग्गहणिया केवइया आगरिसा प० ? गोयमा !
 जहण्णेणं जहा वउसस्स छेदोवट्टावणियस्स पुच्छा, गोयमा ! जहण्णेणं एक्कं
 उक्कोसेणं वीसपुहुत्तं परिहारविसुद्धियस्स पुच्छा, गोयमा ! जहण्णेणं एक्कं
 उक्कोसेणं तिण्णि सुहृमसंपरायस्स पुच्छा, गोयमा ! जहण्णेणं एक्कं उक्को-
 सेणं चत्तारि । अहक्खायस्स पुच्छा, गोयमा ! जहण्णेणं एक्कं उक्कोसेणं दोण्णि ।
 सामाह्यसंजयस्स णं भंते ! णाणाभवग्गहणिया केवइया आगरिसा प० ?
 गोयमा ! जहा वउसे । छेदोवट्टावणियस्स पुच्छा, गोयमा ! जहण्णेणं दोण्णि
 उक्कोसेणं उव्वरि णवण्हं सघाणं अंतो सहस्सस्स, परिहारविसुद्धियस्स जहण्णेणं
 दोण्णि उक्कोसेणं सत्त, सुहृमसंपरायस्स जहण्णेणं दोण्णि उक्कोसेणं णव,
 अहक्खायस्स जहण्णेणं दोण्णि उक्कोसेणं पंच २८ ॥ ७६६ ॥ सामाह्यसंजए
 णं भंते ! कालओ केवच्चिरं होइ ? गोयमा ! जहण्णेणं एक्कं समयं उक्को-
 सेणं देसूणएहि णव्वहि वासेहि ऊणिया पुक्वकोडी, एवं छेदोवट्टावणिएवि, परि-
 हारविसुद्धिं जहण्णेणं एक्कं समयं उक्कोसेणं देसूणएहि एगूणतीसाए वासेहि
 ऊणिया पुक्वकोडी, सुहृमसंपराए जहा णियंठे, अहक्खाए जहा सामाह्यसंजए ।

सामाह्वयसंजया णं भंते ! कालओ केवच्चिरं होति ? गोयमा ! सव्वदं । छेदोवट्टावणिय० पुच्छा, गोयमा ! जहण्णेणं अट्टाहज्जाइं वाससयाइं उक्कोसेणं पण्णासं सागरोवमकोडिसयसहस्साइं । परिहारविसुद्धिएसु पुच्छा, गोयमा ! महण्णेणं देसूणाइं दो वाससयाइं उक्कोसेणं देसूणाओ दो पुक्खकोडीओ । सुहुमसंपरायसंजया णं भंते ! पुच्छा, गोयमा ! जहण्णेणं एक्कं समयं उक्कोसेणं अंतोमुहुत्तं, अहक्खायसंजया जहा सामाह्वयसंजया २६ ॥ सामाह्वयसंजयस्स णं भंते ! केवइयं कालं अंतरं होइ ? गोयमा ! जहण्णेणं जहा पुलागस्स एवं जाव अहक्खायसंजयस्स । सामाह्वयसंजयाणं भंते ! पुच्छा, गोयमा ! णत्थि अंतरं । छेदोवट्टावणिय० पुच्छा, गोयमा ! जहण्णेणं तेवट्ठं वाससहस्साइं उक्कोसेणं अट्टारस सागरोवमकोडाकोडीओ । परिहारविसुद्धियस्स पुच्छा, गोयमा ! जहण्णेणं अट्टारासीइं वाससहस्साइं उक्कोसेणं अट्टारस सागरोवमकोडाकोडीओ, सुहुमसंपरायाणं जहा णियंठाणं, अहक्खायाणं जहा सामाह्वयसंजयाणं ३० । सामाह्वयसंजयस्स णं भंते ! कइ समुघाया पणत्ता ? गोयमा ! छ समुघाया पणत्ता, जहा कसायकुसीलस्स, एवं छेदोवट्टावणियस्सवि, परिहारविसुद्धियस्स जहा पुलागस्स, सुहुमसंपरायस्स जहा णियंठस्स, अहक्खायस्स जहा सिणायस्स ३१ । सामाह्वयसंजए णं भंते ! लोगस्स किं संखेज्जइभागे होज्जा असंखेज्जइभागे० पुच्छा, गोयमा ! णो संखेज्जइ० जहा पुलाए, एवं जाव सुहुमसंपराए । अहक्खायसंजए जहा सिणाए ३२ । सामाह्वयसंजए णं भंते ! लोगस्स किं संखेज्जइभागे फुसइ जहेव होज्जा तहेव फुसइ ३३ । सामाह्वयसंजए णं भंते ! कयरम्मि भावे होज्जा ? गोयमा ! खओवसमिए भावे होज्जा, एवं जाव सुहुमसंपराए । अहक्खायसंजए पुच्छा, गोयमा ! उवसमिए वा खइए वा भावे होज्जा ३४ । सामाह्वयसंजया णं भंते ! एगसमएणं केवइया होज्जा ? गोयमा ! पडिवज्जमाणए य पडुच्च जहा कसायकुसीला तहेव णिरवसेसं । छेदोवट्टावणिया पुच्छा, गोयमा ! पडिवज्जमाणए पडुच्च सिय अत्थि सिय णत्थि, जइ अत्थि जहण्णेणं एक्को वा दो वा तिण्णि वा उक्कोसेणं सयपुहुत्तं, पुक्खपडिवणए पडुच्च सिय अत्थि सिय णत्थि, जइ अत्थि जहण्णेणं कोडिसयपुहुत्तं उक्कोसेणंवि कोडिसयपुहुत्तं, परिहारविसुद्धिया जहा पुलाया, सुहुमसंपराया जहा णियंठा । अहक्खायसंजयाणं पुच्छा, गोयमा ! पडिवज्जमाणए पडुच्च सिय अत्थि सिय णत्थि, जइ अत्थि जहण्णेणं एक्को वा दो वा तिण्णि वा उक्कोसेणं वावट्टसयं अट्ठत्तरसयं

खवगाणं चउत्पणं उवसागणं, पुव्वपडिवणए पडुव्व जहण्णेणं कोडिपुहुत्तं
उक्कोसेणवि कोडिपुहुत्तं । एएसि णं भन्ते ! सामाइयछेदोवट्ठावणियपरिहार-
विसुद्धियसुहुमसंपरायअहक्खायसंजयाणं कयरे २ जाव वित्तेसाहिया वा ? गोयमा !
सव्वथोवा सुहुमसंपरायसंजया, परिहारविसुद्धियसंजया संखेज्जगुणा, अहक्खाय-
संजया संखेज्जगुणा, छेदोवट्ठावणियसंजया संखेज्जगुणा, सामाइयसंजया संखेज्ज-
गुणा ३६ ॥ ७६७ ॥ पडिसेवण दोसालोयणा य आलोयणारिहे चेव । तत्तो
सामायारी पायच्छित्ते तवे चेव ॥ १ ॥ कइविहा णं भन्ते ! पडिसेवणा प० ?
गोयमा ! दसविहा पडिसेवणा प०, तं०-दप्प १ प्पमाद २ ऽणामोगे ३, आउरे ४
आवती ५ ति य । संकिण्णे ६ सहसवकारे ७ भय ८ प्पओसा ९ य वीमंसा १०
॥ १ ॥ दस आलोयणावोसा प०, तंजहा-आकंपइत्ता १ अणुमाणइत्ता २ जं
दिट्ठं ३ बायरं च ४ सुहुमं वा ५ । छणं ६ सहाउलयं ७ बहुजण ८
अव्वत्त ९ तस्सेवी १० ॥ २ ॥ दसहिं ठाणेहिं संपण्णे अणगारे अरिहइ अत्तवोसं
आलोइत्तए, तंजहा-जाइसंपण्णे १, कुलसंपण्णे २, विणयसंपण्णे ३, णाणसंपण्णे ४,
दंसणसंपण्णे ५, चरित्तसंपण्णे ६, खते ७, दंते ८, अमाई ९, अपच्छाणुतावी १० ।
अट्ठहिं ठाणेहिं संपण्णे अणगारे अरिहइ आलोयणं पडिच्छित्तए, तं०-आयारवं १,
आहारवं २, ववहारवं ३, उक्कीलए ४, पकुव्वए ५, अपरिस्सावी ६, णिज्ज-
वए ७, अवायदंसी ८ ॥ ७६८ ॥ दसविहा सामायारी प०, तंजहा-इच्छा १
मिच्छा २ तहक्कारे ३, आवस्सिया य ४, णिसीहिया ५ । आपुच्छणा य ६,
पडिपुच्छा ७, छवणा य ८, णिमंतणा ९ ॥ १ ॥ उवसंपया १० य काले, सामा-
यारी भवे दसहा ॥ ७६९ ॥ दसविहे पायच्छित्ते प०, तं०-आलोयणारिहे
पडिक्कमणारिहे तदुभयारिहे विवेगारिहे विउसगारिहे तवारिहे छेदारिहे मूला-
रिहे अणवट्ठुप्पारिहे पारंच्चियारिहे ॥ ८०० ॥ दुविहे तवे पणत्ते, तंजहा-बाहि-
रए य अविभतरए य । से किं तं बाहिरए तवे ? बाहिरए तवे छविवहे प०,
तं०-अणसणं ओमोयरिया भिक्खायरिया रसपरिच्चाओ कायकिलेसो पडि-
संलीणया ॥ १ ॥ से किं तं अणसणे ? अणसणे दुविहे प०, तं-इत्तरिए य
आवकहिए य । से किं तं इत्तरिए ? इत्तरिए अणेगविहे पणत्ते, तंजहा-चउत्थे
भत्ते छट्ठे भत्ते अट्ठमे भत्ते दसमे भत्ते दुवालसमे भत्ते चउट्ठसमे भत्ते अद्ध-
मासिए भत्ते भासिए भत्ते दोमासिए भत्ते तेमासिए भत्ते जाव छम्मासिए

भत्ते, सेत्तं इत्तरिए । से किं तं आवकहिए ? आवकहिए दुविहे प०, तंजहा-
पाओवगमणे य भत्तपच्चवखाणे य । से किं तं पाओवगमणे ? पाओवगमणे
दुविहे प०, तं०-णीहारिमे य अणीहारिमे य गियमं अपडिक्कमे, से तं पाओव-
गमणे, से किं तं भत्तपच्चवखाणे ? भत्तपच्चवखाणे दुविहे प०, तं०-णीहारिमे
य अणीहारिमे य गियमं सपडिक्कमे, सेत्तं भत्तपच्चवखाणे, सेत्तं आवकहिए, सेत्तं
अणसणे । से किं तं ओमोयरिया ? ओमोयरिया दुविहा प०, तं०-दव्वोमोय-
रिया य भावोमोयरिया य । से किं तं दव्वोमोयरिया ? दव्वोमोयरिया दुविहा
प०, तं०-उवगरणदव्वोमोयरिया य भत्तपाणदव्वोमोयरिया य । से किं तं उव-
गरणदव्वोमोयरिया ? उवगरणदव्वोमोयरिया त्तिविहा प०, तं०-एगे वत्थे एगे
पाए च्चियत्तोवगरणसाइज्जणया, सेत्तं उवगरणदव्वोमोयरिया । से किं तं भत्त-
पाणदव्वोमोयरिया ? भत्तपाणदव्वोमोयरिया अट्टकुवकुडिअंडगप्पमाणमेत्ते कवले
अहारं आहारेमाणे अप्पाहारे दुवालस० जहा सत्तमसए पढमोइसए जाव णो
पकामरसभोईति वत्तव्वं सिया, सेत्तं भत्तपाणदव्वोमोयरिया, सेत्तं दव्वोमोयरिया ।
से किं तं भावोमोयरिया ? भावोमोयरिया अणेगविहा प०, तं०-अप्पकोहे
जाव अप्पलोभे अप्पसद्दे अप्पझंझे अप्पतुमंतुमे, सेत्तं भावोमोयरिया, सेत्तं
ओमोयरिया । से किं तं भिक्खायरिया ? भिक्खायरिया अणेगविहा प०, तं०-
दव्वाभिग्गहृत्तरए जहा उववाइए जाव सुद्धसणिए संखादत्तिए, सेत्तं भिक्खा-
यरिया । से किं तं रसपरिच्चाए ? रसपरिच्चाए अणेगविहे प०, तं०-णिव्वि-
गिइए पणीयरसविव्वज्जए जहा उववाइए जाव लूहाहारे, सेत्तं रसपरिच्चाए । से
किं तं कायकिल्लेसे ? २ अणेगविहे प०, तं०-ठाणाईए उवकुडुयासणिए जहा उव-
वाइए जाव सव्वगायपडिक्कम्मविभूसविप्पमुक्के, सेत्तं कायकिल्लेसे । से किं तं पडि-
संलीणया ? पडिसंलीणया चउट्ठिव्हा प०, तं०-इंदियपडिसंलीणया कसायपडि-
संलीणया जोगपडिसंलीणया णिव्वित्तसयणासणसेवणया । से किं तं इंदियपडि-
संलीणया ? इंदियपडिसंलीणया पंचविहा प०, तं०-सोइंदियविसयप्पयारणिरोहो
वा सोइंदियविसयप्पत्तेनु वा अत्थेसुरागदोसविणिग्गहो च्चिक्खदियविसय० एवं
जाव फासिदियविसयप्पयारणिरोहो वा फासिदियविसयप्पत्तेनु वा अत्थेसु राग-
दांस विणिग्गहो, सेत्तं इंदियपडिसंलीणया । से किं तं कसायपडिसंलीणया ?
कसायपडिसंलीणया चउट्ठिव्हा प०, तं०-कोहोदयणिरोहो वा उदयप्पत्तस्स वा
कोहस्स विफलीकरणं एवं जाव लोभोदयणिरोहो वा उदयप्पत्तस्स वा लोभस्स

विकलीकरणं, सेत्तं कसायपडिसंलीणया । से किं तं जोगपडिसंलीणया ? जोग-
पडिसंलीणया तिविहा प०, तं०—मणजोगप० वइजोगप० कायजोगपडिसंलीणया ।
से किं तं मणजोगपडिसंलीणया ? २ तिविहा प०, तं०—अकुसलमणणिरोहो
वा कुसलमणउदीरणं वा मणस्स वा एगत्तीभावकरणं । से किं तं वइजोगपडि-
संलीणया ? २ तिविहा प०, तं०—अकुसलवइणिरोहो वा कुसलवइउदीरणं वा
वईए वा एगत्तीभावकरणं । से किं तं कायपडिसंलीणया ? कायपडिसंलीणया
जण्णं सुसमाहिद्यपसंतसाहरियपाणिपाए कुम्मो इव गुत्तिदिए अल्लीणे-पल्लीणे
चिट्ठइ, सेत्तं कायपडिसंलीणया, सेत्तं जोगपडिसंलीणया । से किं तं विवित्त-
सयणासणसेवणया ? विवित्तसयणासणसेवणया जण्णं आरामेसु वा उज्जाणेषु
वा जहा सोमिलुहेसए जाव सेज्जासंथारणं उबसंपज्जित्ताणं विहरइ, सेत्तं विवित्त-
सयणासणसेवणया, सेत्तं पडिसंलीणया, सेत्तं बाहिरए तवे १ । से किं तं अंभितरए
तवे ? अंभितरए तवे छब्बिहे प०, तं०—पायच्छित्तं विणओ वेयावच्चं
सज्जाओ ज्ञाणं विउसग्गो । से किं तं पायच्छित्ते ? पायच्छित्ते दसविहे प०,
तंजहा—आलोयभारिहे जांव पारंचियारिहे, सेत्तं पायच्छित्ते । से किं तं विणए ?
विणए ससविहे पण्णत्ते, तंजहा—णाणविणए बंसणविणए चरित्तविणए मणविणए
वइविणए कायविणए लोमोवयारविणए । से किं तं णाणविणए ? णाणविणए
पंचविहे प०, तंजहा—आभिणिबोहियणाणविणए जाव केवलणाणविणए, सेत्तं
णाणविणए । से किं तं बंसणविणए ? बंसणविणए दुविहे प०, तं०—सूस्सुसणा-
विणए य अणच्चासायणाविणए य । से किं तं सुस्सुसणाविणए ? सुस्सुसणा-
विणए अणेगविहे प०, तं०—सक्कारेइ वा सम्माणेइ वा जहा चउट्टसमसए
तइए उहेसए जाव पडिसंसाहणया, सेत्तं सुस्सुसणाविणए । से किं तं अणच्चा-
सायणाविणए ? अणच्चासायणाविणए पणयालीसइविहे प०, तं०—अरिहंतानं
अणच्चासायणया अरिहंतपण्णत्तस्स धम्मस्स अणच्चासायणया आयरियाणं
अणच्चासायणया उवज्जायाणं अणच्चासायणया थेराणं अणच्चासायणया कुल-
स्स अणच्चासायणया गणस्स अणच्चासायणया संघस्स अणच्चासायणया किरि-
याए अणच्चासायणया संभोगस्स अणच्चासायणया आभिणिबोहियणाणस्स अण-
च्चासायणया जाव केवलणाणस्स अणच्चासायणया १५, एएसिं चैव भत्तिबहु-
माणेणं एएसिं चैव वण्णसंजलणया, सेत्तं अणच्चासायणयाविणए, सेत्तं

दंसणविणए । से किं तं चरित्तविणए ? चरित्तविणए पंचविहे पण्णत्ता, तं०—सामाइयचरित्तविणए जाव अहबखायचरित्तविणए, सेत्तं चरित्तविणए । से किं तं मणविणए ? मणविणए दुविहे प०, तं०—पसत्थमणविणए य अप्पसत्थमणविणए य । से किं तं पसत्थमणविणए ? पसत्थमणविणए सत्तविहे प०, तंजहा—अपावए असावज्जे अकिरिए णिरुवक्केसे अण्हयकरे अच्छविकरे अमूयाभिसंकणे, सेत्तं पसत्थमणविणए । से किं तं अप्पसत्थमणविणए ? अप्पसत्थमणविणए सत्तविहे प०, तं०—पावए सावज्जे सकिरिए सउवक्केसे अण्हयकरे छविकरे भूयाभिसंकणे, सेत्तं अप्पसत्थमणविणए, सेत्तं मणविणए । से किं तं वडविणए ? वडविणए दुविहे प०, तं०—पसत्थवडविणए य अप्पसत्थवडविणए य । से किं तं पसत्थवडविणए ? पसत्थवडविणए सत्तविहे पण्णत्ता, तंजहा—अपावए असावज्जे जाव अमूयाभिसंकणे, सेत्तं पसत्थवडविणए । से किं तं अप्पसत्थवडविणए ? अप्पसत्थवडविणए सत्तविहे पण्णत्ता, तंजहा—पावए सावज्जे जाव भूयाभिसंकणे, सेत्तं अप्पसत्थवडविणए, सेत्तं वडविणए । से किं तं कायविणए ? कायविणए दुविहे पण्णत्ता, तंजहा—पसत्थकायविणए य अप्पसत्थकायविणए य । से किं तं पसत्थकायविणए ? पसत्थकायविणए सत्तविहे पण्णत्ता, तंजहा—आउत्तं गमणं आउत्तं ठाणं आउत्तं णिसीयणं आउत्तं तुयट्ठं आउत्तं उल्लंघणं आउत्तं पल्लंघणं आउत्तं सत्त्विदियजोगजुंजणया, सेत्तं पसत्थकायविणए । से किं तं अप्पसत्थकायविणए ? अप्पसत्थकायविणए सत्तविहे पण्णत्ते, तंजहा—अणाउत्तं गमणं जाव अणाउत्तं सत्त्विदियजोगजुंजणया, सेत्तं अप्पसत्थकायविणए, सेत्तं कायविणए । से किं तं लोपोवयारविणए ? लोपोवयारविणए सत्तविहे प०, तं—अहमासवत्तियं परच्छदाणुवत्तियं कज्जहेअं कयपडिकइया अत्तगवेसणया देसकालणया सवत्थेसु अप्पडिलोमया, सेत्तं लोपोवयारविणए, सेत्तं विणए । से किं तं वेयावच्चे ? वेयावच्चे दसविहे प०, तं०—आयरियवेयावच्चे उवज्जायवेयावच्चे थेरवेयावच्चे तवत्तिसवेयावच्चे गिलाणवेयावच्चे सेहवेयावच्चे कुलवेयावच्चे गणवेयावच्चे संघवेयावच्चे साहम्मियवेयावच्चे, सेत्तं वेयावच्चे । से किं तं सज्जाए ? सज्जाए पंचविहे प०, तं०—वायणा पडिपुच्छणा परियट्ठणा अणुप्पेहा धम्मकहा, सेत्तं सज्जाए ॥ ८०१ ॥ से किं तं ज्ञाणे ? ज्ञाणे चउधिवहे पण्णत्ते, तंजहा—अट्टे ज्ञाणे रोद्वे ज्ञाणे धम्मे ज्ञाणे

सुषके ज्ञाने । अद्वे ज्ञाने चउत्विहे पण्णत्ते, तंजहा—अमणुण्णसंपओगसंपउत्ते तस्स विप्पओगसइसमण्णागए यावि भवइ १, मणुण्णसंपओगसंपउत्ते तस्स अविप्प-
 ओगसइसमण्णागए यावि भवइ २, आयकसंपओगसंपउत्ते तस्स विप्पओगसइसम-
 ण्णागए यावि भवइ ३. परिउज्जुसियकामओगसंपओगसंपउत्ते तस्स अविप्पओग-
 सइसमण्णाए यावि भवइ ४ । अट्टहस णं ज्ञाणस्स चत्तारि लक्खणा प०, तं०—
 कंदणया सोघणया तिप्पणया परिदेवणया १ । रोह्हे ज्ञाने चउत्विहे प०, तं०—
 हिसाणुबंधी भोसाणुबंधी तेयाणुबंधी सारक्खणाणुबंधी, रोह्हेस्स णं ज्ञाणस्स
 चत्तारि लक्खणा प०, तं०—ओसण्णदोसे बहुलदोसे अण्णाणदोसे आमरणांतदोसे
 २ । धम्मे ज्ञाने चउत्विहे चउप्पडोयारे प०, तं०—आणाविजए अवायविजए
 विवागविजए संठाणविजए । धम्मस्स णं ज्ञाणस्स चत्तारि लक्खणा प०, तं०—
 आणारुई णिसगारुई सुत्तारुई ओगावरुई । धम्मस्स णं ज्ञाणस्स चत्तारि आलं-
 वणा प०, तं०—वायणा पडिपुच्छणा परिवट्टणा धम्मकहा । धम्मस्स णं ज्ञाणस्स
 चत्तारि अणुप्पेहाओ प०, तं०—एगत्ताणुप्पेहा अणिच्चानुप्पेहा असरणणुप्पेहा
 संसाराणुप्पेहा ३ । सुषके ज्ञाने चउत्विहे चउप्पडोयारे प०, तं०—पुहुत्तवियक्के
 सवियारी १, एगंतवियक्के अविियारी २, सुहुमकिरिए अणियट्टी ३, समुच्छि-
 णकिरिए अप्पडिवाई ४ । सुषकस्स णं ज्ञाणस्स चत्तारि लक्खणा प०, तं०—खंती
 मत्ती अज्जवे मह्वे । सुषकस्स णं ज्ञाणस्स चत्तारि आलंवणा प०, तं०—अह्वहे
 असंमोहे विवेगे विउसगे । सुषकस्स णं ज्ञाणस्स चत्तारि अणुप्पेहाओ प०, तं०—
 अणंतवत्तियाणुप्पेहा विप्परिणामाणुप्पेहा असुमाणुप्पेहा अवायाणुप्पेहा ४, सेत्तं
 ज्ञाने ॥ ८०२ ॥ से किं तं विउसगगे ? विउसगगे दुक्खिहे प०, तं०—दक्खविउसगगे ध
 भावविउसगगे य । से किं तं दक्खविउसगगे ? दक्खविउसगगे चउत्विहे प०, तं०—
 गणविउसगगे सरीरविउसगगे उवहिविउसगगे भत्तपाणविउसगगे, सेत्तं दक्ख-
 विउसगगे । से किं तं भावविउसगगे ? भावविउसगगे तिविहे प०, तं०—कसाय-
 विउसगगे संसारविउसगगे कम्मविउसगगे । से किं तं कसायविउसगगे ? कसाय-
 विउसगगे चउत्विहे प०, तं०—कोहविउसगगे माणविउसगगे मायाविउसगगे लोभ-
 विउसगगे, सेत्तं कसायविउसगगे । से किं तं संसारविउसगगे ? संसारविउसगगे
 चउत्विहे प०, तं०—णेरइयसंसारविउसगगे जाव देवसंसारविउसगगे, सेत्तं संसार-
 विउसगगे । से किं तं कम्मविउसगगे ? कम्मविउसगगे अट्टविहे प०, तं०—णाणावर-

णिज्जकम्मविउसग्गे जाव अंतराइयकम्मविउसग्गे, सेत्तं कम्मविउसग्गे सेत्तं भावविउसग्गे, सेत्तं अग्भितरए तवे । सेवं भंते ! सेवं भंते ! त्ति ॥ ८०३ ॥

पंचवीसइमं सयं ८-१२ उद्देसा

रायगिहे जाव एवं वयासी-णेरइया णं भंते ! कंहं उववज्जंति ? गोयमा । से जहाणामए पवए पवमाणे अज्झवसाणणिग्गत्तिएणं करणोवाएणं सेयकाले तं ठाणं विप्पजहित्ता पुरिमं ठाणं उवसंपज्जित्ताणं विहरइ एवामेव एएवि जीवा पवओविव पवमाणा अज्झवसाणणिग्गत्तिएणं करणोवाएणं सेयकाले तं भवं विप्पजहित्ता पुरिमं भवं उवसंपज्जित्ताणं विहरंति । तेसि णं भंते ! जीवाणं कंहं सीहा गई कंहं सीहे गइविसए प० ? गोयमा ! से जहाणामए केइ पुरिसे तरुणे बलवं एवं जहा चउट्टसमसए पढमूडेसए जाव तिसमएण वा विग्गहेणं उववज्जंति, तेसि णं जीवाणं तहा सीहा गई तहा सीहे गइविसए प० । ते णं भंते ! जीवा कंहं परभवियाउयं पकरंति ? गोयमा ! अज्झवसाणजोगिणिव्वत्तिएणं करणोवाएणं एवं खलु ते जीवा परभवियाउं पकरंति । तेसि णं भंते ! जीवाणं कंहं गई पवत्तइ ? गोयमा ! आउवखएणं भवखएणं ठिइखएणं, एवं खलु तेसि जीवाणं गई पवत्तइ । ते णं भंते ! जीवा कि आइड्ढीए उववज्जंति परिड्ढीए उववज्जंति ? गोयमा ! आइड्ढीए उववज्जंति णो परिड्ढीए उववज्जंति । ते णं भंते ! जीवा कि आयकम्मणा उववज्जंति परकम्मणा उववज्जंति ? गोयमा ! आयकम्मणा उववज्जंति णो परकम्मणा उववज्जंति । ते णं भंते ! जीवा कि आयप्पओगेणं उववज्जंति परप्पओगेणं उववज्जंति ? गोयमा ! आयप्पओगेणं उववज्जंति णो परप्पओगेणं उववज्जंति । अमुरकुमारा णं भंते ! कंहं उववज्जंति ? जहा णेरइया तहेव णिरवसेसं जाव णो परप्पओगेणं उववज्जंति, एवं एगिदियवज्जा जाव वेमाणिया, एगिदिया तं चेव णवरं चउसमइओ विग्गहो, सेसं तं चेव । सेवं भंते ! २ त्ति जाव विहरइ ॥ ८०४ ॥ २५ । ८ ॥ भवसिद्धियणेरइया णं भंते ! कंहं उववज्जंति ? गोयमा ! से जहाणामए पवए पवमाणे अवसेसं तं चेव जाव वेमाणिए । सेवं भंते ! २ त्ति ॥ ८०५ ॥ २५ । ९ ॥ अभवसिद्धियणेरइया णं भंते ! कंहं उववज्जंति ? गोयमा ! से जहाणामए पवए पवमाणे अवसेसं तं चेव एवं जाव वेमाणिए । सेवं भंते ! २ त्ति ॥ ८०६ ॥ २५ । १० ॥

सम्मदिट्ठिणेरइया णं भंते ! कंहं उववज्जंति ? गोयमा ! से जहाणामए पवए
पवमाणे अवसेसं तं चेव एवं एगिदियवज्जं जाव वेमाणिया । सेवं भंते ! २ त्ति
॥ ८०७ ॥ २५ । ११ ॥ मिच्छादिट्ठिणेरइया णं भंते ! कंहं उववज्जंति ?
गोयमा ! से जहाणामए—पवए पवमाणे अवसेसं तं चेव, एवं जाव वेमाणिए ।
सेवं भंते ! २ त्ति जाव विहरइ ॥ ८०८ ॥

पंचवीसइमं सयं समत्तं

॥ छवीसइमं सयं पढमो उद्देशो ॥

पमो सुयदेवयाए भगवईए । जीवा १ य लेस्स २ पक्खिय ३ दिट्ठी ४
अण्णाण ५ णाण ६ सण्णाओ ७ । वेय ८ कसाए ९ उवओग १० जोग ११
एक्कारसवि ठाणा ॥१॥ तेणं कालेणं तेणं समएणं रायगिहे जाव एवं वयासी—
जीवे णं भंते ! पावं कम्मं किं बंधी बंधइ बंधिस्सइ १, बंधी बंधइ ण बंधिस्सइ
२, बंधी ण बंधइ बंधिस्सइ ३, बंधी ण बंधइ ण बंधिस्सइ ४ ? गोयमा !
अत्थेगइए बंधी बंधइ बंधिस्सइ १, अत्थेगइए बंधी बंधइ ण बंधिस्सइ २,
अत्थेगइए बंधी ण बंधइ बंधिस्सइ ३, अत्थेगइए बंधी ण बंधइ ण बंधिस्सइ
४—१ ॥ सलेस्से णं भंते ! जीवे पावं कम्मं किं बंधी बंधइ बंधिस्सइ, बंधी
बंधइ ण बंधिस्सइ० पुच्छा, गोयमा ! अत्थेगइए बंधी बंधइ बंधिस्सइ, अत्थेगइए
एवं चउभंगो । कण्हलेस्से णं भंते ! जीवे पावं कम्मं किं बंधी० पुच्छा, गोयमा !
अत्थेगइए बंधी बंधइ बंधिस्सइ अत्थेगइए बंधी बंधइ ण बंधिस्सइ एवं जाव
पम्हलेस्से सववत्य पढमबिइया भंगा । सुक्कलेस्से जहा सलेस्से तहेव चउभंगो ।
अलेस्से णं भंते ! जीवे पावं कम्मं किं बंधी० पुच्छा, गोयमा ! बंधी ण बंधइ
ण बंधिस्सइ २ । कण्हपक्खिए णं भंते ! जीवे पावं कम्मं० पुच्छा, गोयमा !
अत्थेगइए बंधी पढमबिइया भंगा । सुक्कपक्खिए णं भंते ! जीवे पुच्छा,
गोयमा ! चउभंगो भाणियव्वो ॥ ८०९ ॥ सम्मदिट्ठीणं चत्तारि भंगा, मिच्छा-
दिट्ठीणं पढमबिइया भंगा, सम्मामिच्छादिट्ठीणं एवं चेव । णाणीणं चत्तारि
भंगा, आभिणिबोहियणाणीणं जाव मणपज्जवणाणीणं चत्तारि भंगा, केवल-
णाणीणं चरिमो भंगो जहा अलेस्साणं ५ । अण्णाणीणं पढमबिइया, एवं मह-
अण्णाणीणं सुयअण्णाणीणं विभंगणाणीणवि ६ । आहारसण्णोवउत्ताणं जाव परि-
गहसण्णोवउत्ताणं पढमबिइया णोसण्णोवउत्ताणं चत्तारि ७ । सवेयगाणं पढम-

बिहया, एवं इत्थिवेयगा पुरिसवेयगा णपुंसगवेयगावि, अवेयगाणं चत्तारि सकसाईणं चत्तारि, कोहकसाईणं पढमबिहया भंगा, एवं माणकसा-इस्सवि मायाकसाइस्सवि लोभकसाइस्सवि चत्तारि भंगा । अकसाई णं भंते ! जीवे पावं कम्मं किं बंधी० पुच्छा, गोयमा ! अत्थेगइए बंधी ण बंधइ बंधि-स्सइ ३, अत्थेगइए बंधी ण बंधइ ण बंधिस्सइ ४ । सजोगिस्स चउभंगो, एवं भणजोगिस्सवि वइजोगिस्सवि कायजोगिस्सवि, अजोगिस्स चरिमो । सागारोवउत्ते चत्तारि, अणगारोवउत्तेवि चत्तारि भंगा ११ ॥ ८१० ॥ णेरइए णं भंते ! पावं कम्मं किं बंधी बंधइ बंधिस्सइ० पुच्छा, गोयमा ! अत्थेगइए बंधी पढमबिहया १ । सलेस्से णं भंते ! णेरइए पावं कम्मं० एवं चेव, एवं कण्ह-लेस्सेवि णील्लेस्सेवि काउलेस्सेवि, एवं कण्हपबिखए सुक्कपबिखए, सम्म-बिट्ठी मिच्छादिट्ठी सम्मामिच्छादिट्ठी, णाणी आभिणिबोहियणाणी सुय-णाणी ओहिणाणी अण्णाणी मइअण्णाणी सुयअण्णाणी विभंगणाणी आहारसण्णो-वउत्ते जाव परिग्गहसण्णोवउत्ते, सवेयए जाव णपुंसगवेयए, सकसाई जाव लोभकसाई, सजोगी भणजोगी वइजोगी कायजोगी सागारोवउत्ते अणगारो-वउत्ते, एएसु सव्वेसु पएसु पढमबिहया भंगा भाणियव्वा, एवं असुरकुमारस्सवि वत्तव्वया भाणियव्वा णवरं तेउलेस्सा इत्थिवेयगा पुरिसवेयगा य अन्नमहिया णपुंसगवेयगा ण भण्णति सेसं तं चेव सव्वत्थ पढमबिहया भंगा, एवं जाव थणिय-कुमारस्स, एवं पुढविकाइयस्सवि आउकाइयस्सवि जाव पँचिदियतिरिक्ख-जोणियस्सवि सव्वत्थवि पढमबिहया भंगा णवरं जस्स जा लेस्सा दिट्ठी णाणं अण्णाणं वेदो जोगो य अत्थि तं तस्स भाणियव्वं सेसं तहेव, मणू-सस्स जच्चेव जीवपए वत्तव्वया सच्चेव णिरवसेसा भाणियव्वा, वाणमंतरस्स जहा असुरकुमारस्स, जोइसियस्स वेमाणियस्स एवं चेव णवरं लेस्साओ जाणि-यव्वाओ, सेसं तहेव भाणियव्वं ॥ ८११ ॥ जीवे णं भंते ! णाणावरणिज्जं कम्मं किं बंधी बंधइ बंधिस्सइ एवं जहेव पावकम्मस्स वत्तव्वया तहेव णाणावरणिज्जस्सवि भाणियव्वा णवरं जीवपए मणुस्सपए य सक-साई जाव लोभकसाईमि य पढमबिहया भंगा अवसेसं तं चेव जाव वेमाणिया, एवं दरिसणावरणिज्जेणवि वंडगो भाणियव्वो णिरवसेसो । जीवे णं भंते ! वेयणिज्जं कम्मं किं बंधी० पुच्छा, गोयमा ! अत्थेगइए बंधी बंधइ बंधिस्सइ

१, अत्थेगइए बंधी बंधइ ण बंधिस्सइ २, अत्थेगइए बंधी ण बंधइ ण बंधि-
 स्सइ ४, सलेस्सेवि एवं चेव तइयविहूणा भंगा, कण्हलेस्से जाव पण्हलेस्से पढम-
 बिइया भंगा, सुक्कलेस्से तइयविहूणा भंगा, अलेस्से चरिमो भंगो, कण्हपक्खिए
 पढमबिइया भंगा, सुक्कपक्खिया तइयविहूणा, एवं सम्मदिट्ठिस्सवि, मिच्छा-
 विट्ठिस्स सम्मामिच्छाविट्ठिस्स य पढमबिइया, णाणिस्स तइयविहूणा, आभि-
 णिबोहियणाणी जाव मणपज्जवणाणी पढमबिइया, केवलणाणी तइयविहूणा, एवं
 णोसण्णोवउत्ते अवेयए अकमाई सागारोवउत्ते अणागारोवउत्ते एएसु तइयविहूणा,
 अजोगिम्मि य चरिमो, सेसेमु पढमबिइया । णेरइए ण भंते ! वेयणिज्जं कम्मं
 किं बंधी बंधइ बंधिस्सइ० एवं णेरइया जाव वेमाणियत्ति जस्स जं अत्थि
 सव्वत्थवि पढमबिइया, णवरं मणस्से जहा जीवे । जीवे णं भंते ! मोहणिज्जं
 कम्मं किं बंधी बंधइ० जहेव पावं कम्मं तहेव मोहणिज्जंपि णिरवसेसं जाव
 वेमाणिए ॥ ८१२ ॥ जीवे णं भंते ! आउयं कम्मं किं बंधी बंधइ० पुच्छा,
 गोयमा ! अत्थेगइए बंधी चउभंगो, सेसस्से जाव सुक्कलेस्से चत्तारि भंगा,
 अलेस्से चरिमो भंगो । कण्हपक्खिए णं पुच्छा, गोयमा ! अत्थेगइए बंधी बंधइ
 बंधिस्सइ अत्थेगइए बंधी ण बंधइ बंधिस्सइ, सुक्कपक्खिए सम्मदिट्ठी मिच्छा-
 विट्ठी चत्तारि भंगा । सम्मामिच्छाविट्ठी पुच्छा, गोयमा ! अत्थेगइए बंधी ण
 बंधइ बंधिस्सइ अत्थेगइए बंधी ण बंधइ ण बंधिस्सइ, णाणी जाव ओहिणाणी
 चत्तारि भंगा । मणपज्जवणाणी पुच्छा, गोयमा ! अत्थेगइए बंधी बंधइ बंधिस्सइ,
 अत्थेगइए बंधी ण बंधइ बंधिस्सइ, अत्थेगइए बंधी ण बंधइ ण बंधिस्सइ,
 केवलणाणे चरिमो भंगो, एवं एएणं कमेणं णोसण्णोवउत्ते बिइयविहूणा जहेव
 मणपज्जवणाणे, अवेयए अकमाई य तइयचउत्था जहेव सम्मामिच्छत्ते, अजो-
 गिम्मि चरिमो, सेसेमु एएसु चत्तारि भंगा जाव अणागारोवउत्ते । णेरइए णं
 भंते ! आउयं कम्मं किं बंधी० पुच्छा, गोयमा ! अत्थेगइए चत्तारि भंगा एवं
 सव्वत्थवि णेरइयाणं चत्तारि भंगा णवरं कण्हलेस्से कण्हपक्खिए य पढमतइया
 भंगा, सम्मामिच्छत्ते तइयचउत्था, असुरकुमारो एवं चेव, णवरं कण्हलेस्सेवि
 चत्तारि भंगा भाणियव्वा सेसं जहा णेरइयाणं एवं जाव थणियकुमाराणं,
 पुढविककाइयाणं सव्वत्थवि चत्तारि भंगा, णवरं कण्हपक्खिए पढमतइया भंगा ।
 तेउलेस्से पुच्छा, गोयमा ! बंधी ण बंधइ बंधिस्सइ, सेसेमु सव्वत्थ चत्तारि
 भंगा, एवं आउवकाइयवणस्सइकाइयाणवि णिरवसेसं, तेउवकाइयवाउक्काइयाणं

सव्वत्थवि पढमत्तइया भंगा, बेइंदियतेइंदियचर्जरिययाणंपि सव्वत्थवि पढम-
 तइया भंगा, णवरं सम्मत्ते णाणे आभिणिबोहियणाणे सुयणाणे तइओ भंगो ।
 पंचदियतिरिक्खजोगियाणं कण्हपविखए पढमत्तइया भंगा, सम्मामिच्छत्ते
 तइयचउत्थो भंगो, सम्मत्ते णाणे आभिणिबोहियणाणे सुयणाणे ओहिणाणे एएमु
 पंचसुवि एएमु बिइयविहूणा भंगा, सेसेमु चत्तारि भंगा, मणुस्साणं जहा जीवाणे,
 णवरं सम्मत्ते ओहिए णाणे आभिणिबोहियणाणे सुयणाणे ओहिणाणे एएमु
 बिइयविहूणा भंगा, सेसं तं चेव, वाणमंतरजोइसियवेभाणिया जहा अमुरकुमारा,
 णामं गोयं अंतरायं च एयाणि जहा णाणावरणिज्जं । सेवं भंते ! सेवं भंते !
 त्ति जाव विहरइ ॥ ८१३ ॥

छवीसइमं सयं बीओ उद्देसो

अणंतरोववण्णए णं भंते ! णेरइए पावं कम्मं किं बंधी० पुच्छा तहेव,
 गोयमा ! अत्थेगइए बंधी पढमबिइया भंगा । सलेस्से णं भंते ! अणंतरोव-
 वण्णए णेरइए पावं कम्मं किं बंधी० पुच्छा, गोयमा ! पढमबिइया भंगा, एवं
 खलु सव्वत्थ पढमबिइया भंगा, णवरं सम्मामिच्छत्तं मणजोगो वइजोगो य
 ण पुच्छिज्जइ, एवं जाव थणियकुमारणं, बेइंदियतेइंदियचर्जरिययाणं वइजोगो
 ण भण्णइ, पंचदियतिरिक्खजोगियाणंपि सम्मामिच्छत्तं ओहिणाणं विसंगणाणं
 मणजोगो वइजोगो एयाणि पंच पयाणि ण भण्णंति । मणुस्साणं अलेस्ससम्मामि-
 मिच्छमणपउजवणाणकेवलणाणविसंगणाणणोसण्णोवउत्त-अवेयग-अकमाई-मण-
 जोग वइजोगअजोगी एयाणि एवकारस पयाणि ण भण्णंति, वाणमंतरजोइसिय-
 वेभाणियाणं जहा णेरइयाणं तहेव ते तिण्णि ण भण्णंति, सव्वेसिं जाणि सेसाणि
 ठाणाणि सव्वत्थ पढमबिइया भंगा, एगिदियाणं सव्वत्थ पढमबिइया भंगा, जहा
 पावे एवं णाणावरणिज्जेणवि दंडओ, एवं आउयवज्जेमु जाव अंतराइए दंडओ ।
 अणंतरोववण्णए णं भंते ! णेरइए आउयं कम्मं किं बंधी० पुच्छा, गोयमा !
 बंधी ण चधइ बंधिसइ । सलेस्से णं भंते ! अणंतरोववण्णए णेरइए आउयं
 कम्मं किं बंधी० ? एवं चेव तइओ भंगो, एवं जाव अणागारोवउत्ते, सव्वत्थवि
 तइओ भंगो, एवं मणुस्सवज्जं जाव वेमाणियाणं, मणुस्साणं सव्वत्थ तइय-
 चउत्था भंगा, णवरं कण्हपविखएमु तइओ भंगो सव्वेसिं णाणत्ताइं ताइं चेव ।
 सेवं भंते ! सेवं भंते ! त्ति ॥ ८१४ ॥

छवीसद्वमं सयं तद्दो उद्देसो

परंपरोववण्णए णं भंते ! गेरइए पावं कम्मं किं बंधी० पुच्छा, गोयमा ! अत्थेगइए पढमबिइया, एवं जहेव पढमो उद्देसओ तहेव परंपरोववण्णएहिं उद्देसओ भाणियव्वो गेरइयाइओ तहेव णववंडगसंगहिओ, अट्टह्वि कम्मपग-डीणं जा अत्स कम्मस्स वत्तववया सा तत्स अहीणमइरित्ता गेयव्वा जाव वेमा-णिया अणागारोवउत्ता । सेवं भंते ! सेवं भंते ! त्ति ॥ ८१५ ॥

छवीसद्वमं सयं ४-११ उद्देसो

अणंतरोगाडए णं भंते ! गेरइए पावं कम्मं किं बंधी० पुच्छा, गोयमा ! अत्थेगइए० एवं जहेव अणंतरोववण्णएहिं णववंडगसंगहिओ उद्देसओ भाणियो तहेव अणंतरोगाडएहिं अहीणमइरित्तो भाणियव्वो गेरइयाइए जाव वेमाणिए । सेवं भंते ! सेवं भंते ! त्ति ॥ २६-४ ॥ परंपरोगाडए णं भंते ! गेरइए पावं कम्मं किं बंधी० जहेव परंपरोववण्णएहिं उद्देसो सो चेव गिरवसेसो भाणिय-व्वो । सेवं भंते ! २ त्ति ॥ २६-५ ॥ अणंतराहारए णं भंते ! गेरइए पावं कम्मं किं बंधी० पुच्छा, गोयमा ! एवं जहेव अणंतरोववण्णएहिं उद्देसो तहेव गिरवसेसं । सेवं भंते ! २ त्ति ॥ २६-६ ॥ परंपराहारए णं भंते ! गेर-इए पावं कम्मं किं बंधी० पुच्छा, गोयमा ! एवं जहेव परंपरोववण्णएहिं उद्देसो तहेव गिरवसेसो भाणियव्वो । सेवं भंते ! सेवं भंते ! त्ति ॥ २६-७ ॥ अणंतरपज्जसए णं भंते ! गेरइए पावं कम्मं किं बंधी० पुच्छा, गोयमा ! एवं जहेव अणंतरोववण्णएहिं उद्देसो तहेव गिरवसेसं । सेवं भंते ! २ त्ति ॥ २६-८ ॥ परंपरपज्जसए णं भंते ! गेरइए पावं कम्मं किं बंधी० पुच्छा, गोयमा ! एवं जहेव परंपरोववण्णएहिं उद्देसो तहेव गिरवसेसो भाणियव्वो । सेवं भंते ! २ त्ति जाव विहरइ ॥ २६-९ ॥ चरिसे णं भंते ! गेरइए पावं कम्मं किं बंधी० पुच्छा, गोयमा ! एवं जहेव परंपरोववण्णएहिं उद्देसो तहेव चरि-मेहिं गिरवसेसं । सेवं भंते ! २ त्ति जाव विहरइ ॥ २६-१० ॥ अचरिसे णं भंते ! गेरइए पावं कम्मं किं बंधी० पुच्छा, गोयमा ! अत्थेगइए एवं जहेव पढमोद्देसए तहेव पढमबिइया भंगा भाणियव्वा सव्वत्थ जाव पंचिदिय-तिरिक्खओणियाणं । अचरिसे णं भंते ! मणुस्से पावं कम्मं किं बंधी० पुच्छा,

गोयमा ! अत्थेगइए बंधी बंधइ बंधिस्सइ, अत्थेगइए बंधी बंधइ ण बंधिस्सइ, अत्थेगइए बंधी ण बंधइ बंधिस्सइ । सलेस्से णं भंते ! अचरिमे मणुस्से पावं कम्मं किं बंधी० ? एवं चेव तिण्णि भंगा चरिमबिहूणा भाणियव्वा एवं जहेव पढमद्देस्से, णवरं जेसु तत्थ वीससु चत्तारि भंगा तेसु इह आवित्ता तिण्णि भंगा भाणियव्वा चरिमभंगवज्जा, अलेस्से केवलणाणी य अजोगी य एए तिण्णिवि ण पुच्छिज्जंति, सेसं तहेव, वाणमंतरजोइसियवेमाणिए जहा णेरइए । अचरिमे णं भंते ! णेरइए णाणावरणिज्जं कम्मं किं बंधी० पुच्छा, गोयमा ! एवं जहेव पावं णवरं मणुस्सेसु सकसाईसु लोमकसाईसु य पढम-बिइया भंगा, सेसा अट्टारस चरिमबिहूणा सेसं तहेव जाव वेमाणियाणं, दरि-सणावरणिज्जंति एवं चेव णिरवसेसं, वेयणिज्जे सव्वत्थवि पढमबिइया भंगा जाव वेमाणियाणं णवरं मणुस्सेसु अलेस्से केवली अजोगी य णत्थि । अचरिमे णं भंते ! णेरइए मोहणिज्जं कम्मं किं बंधी० पुच्छा, गोयमा ! जहेव पावं तहेव णिरवसेसं जाव वेमाणिए । अचरिमे णं भंते ! णेरइए आउयं कम्मं किं बंधी० पुच्छा, गोयमा ! पढमबिइया भंगा, एवं सव्वपएसुवि, णेरइयाणं पढमतइया भंगा णवरं सम्मामिच्छत्ते तइओ भंगो, एवं जाव थणियकुमारानं, पुढविककाइयआउक्काइयवणस्सइकाइयाणं तेउलेस्साए तइओ भंगो सेसेसु पएसु सव्वत्थ पढमतइया भंगा, तेउकाइयवाउक्काइयाणं सव्वत्थ पढमतइया भंगा, बेइदियतेइंदियचउरिदियाणं एवं चेव णवरं सम्मत्ते ओहिणाणे आभिणिबोहिय-णाणे सुयणाणे एसु चउसुवि ठाणेसु तइओ भंगो, पंचिदियतिरिक्खजोणियाणं सम्मामिच्छत्ते तइओ भंगो, सेसेसु पएसु सव्वत्थ पढमतइया भंगा, मणुस्साणं सम्मामिच्छत्ते अवैयए अकसाइम्मि य तइओ भंगो, अलेस्स केवलणाण अजोगी य ण पुच्छिज्जंति, सेसपएसु सव्वत्थ पढमतइया भंगा, वाणमंतरजोइसियवेमा-णिया जहा णेरइया । णामं गोयं अंतराइयं च जहेव णाणावरणिज्जं तहेव णिरवसेसं । सेवं भंते ! २ ति जाव विहरइ ॥ ८१६ ॥

छवीसइमं सयं समत्तं

॥ सत्तवीसइमं सयं १-११ उट्टेसा ॥

जीवे णं भंते ! पावं कम्मं किं करिसु करेति करिस्संति १, करिसु करेति

ण करिस्संति २, करिंसु ण करेति करिस्संति ३, करिंसु ण करेति ण करिस्संति ४ ? गोयमा ! अत्थेगइए करिंसु करेति करिस्संति १, अत्थेगइए करिंसु करेति ण करिस्संति २, अत्थेगइए करिंसु ण करेति करिस्संति ३, अत्थेगइए करिंसु ण करेति ण करिस्संति ४ । सलेस्से णं भंते ! जीवे पावं कम्मं एवं एएणं अभिलावेणं जच्चेव बंधिसए वत्तव्वया सच्चेव णिरवसेसा भाणियव्वा, तहैव णवदंडगसंगहिया एक्कारस उद्देसगा भाणियव्वा ॥ ८१७ ॥

सत्तवीसइमं सयं समत्तं

॥ अट्टावीसइमं सयं १-११ उद्देसा ॥

जीवा णं भंते ! पावं कम्मं कहि समज्जिणिंसु कहि समारिंसु ? गोयमा ! सव्वेवि ताव तिरिक्खजोणिंसु होज्जा १ अहवा तिरिक्खजोणिंसु य णेरइएसु य होज्जा २ अहवा तिरिक्खजोणिंसु य मणुस्सेसु य होज्जा ३ अहवा तिरिक्खजोणिंसु य देवेषु य होज्जा ४ अहवा तिरिक्खजोणिंसु य णेरइएसु य मणुस्सेसु य होज्जा ५ अहवा तिरिक्खजोणिंसु य णेरइएसु य देवेषु य होज्जा ६ अहवा तिरिक्खजोणिंसु य मणुस्सेसु य देवेषु य होज्जा ७ अहवा तिरिक्खजोणिंसु य णेरइएसु य मणुस्सेसु य देवेषु य होज्जा ८ । सलेस्सा णं भंते ! जीवा पावं कम्मं कहि समज्जिणिंसु कहि समारिंसु ? एवं चेव, एवं कण्हलेस्सा जाव अलेस्सा, कण्हपक्खिया सुक्कपक्खिया एवं जाव अणागारोवउत्ता । णेरइया णं भंते ! पावं कम्मं कहि समज्जिणिंसु कहि समारिंसु ? गोयमा ! सव्वेवि ताव तिरिक्खजोणिंसु होज्जत्ति एवं चेव अट्ट भंगा भाणियव्वा, एवं सव्वत्थ अट्ट भंगा, एवं जाव अणागारोवउत्तावि, एवं जाव वेमाणियाणं, एवं णाणावरणिज्जेणवि दंडओ, एवं जाव अंतराइएणं, एवं एए जीवाईया वेमाणियपज्जवसाणा णव दंडगा भवंति । सेवं भंते ! २ त्ति जाव विहरइ ॥ ८१८ ॥ २८ । १ ॥ अणंतरोववण्णगा णं भंते ! णेरइया पावं कम्मं कहि समज्जिणिंसु कहि समारिंसु ? गोयमा ! सव्वेवि ताव तिरिक्खजोणिंसु होज्जा, एवं एत्यवि अट्ट भंगा, एवं अणंतरोववण्णगाणं णेरइयाईणं जस्स जं अत्थि लेस्सा-ईयं अणागारोवओगपज्जवसाणं तं सव्वं एयाए भयणाए भाणियव्वं जाव वेमाणियाणं, णवरं अणंतरेसु जे परिहरियव्वा ते जहा बंधिसए तहा इहंपि, एवं णाणावरणिज्जेणवि दंडओ एवं जाव अंतराइएणं णिरवसेसं, एसोवि णवदंडग-

संगहिओ उद्देसओ भाणियव्वो । सेवं भंते । २ त्ति ॥ ८१८ ॥ २८ । २ ॥ एवं
एएणं कमेणं जहेव बंधिसए उद्देसगाणं परिवाडो तहेव इहंपि अट्टसु भंगेसु
णयंस्वा णवरं जाणियव्वं जं जस्स अत्थि तं तस्स भाणियव्वं जाव अचरिमुद्देसो ।
सव्वेवि एए एककारस उद्देसगा । सेवं भंते ! २ त्ति जाव विहरइ ॥ ८१९ ॥

अट्टावीसइमं सयं समत्तं

॥ एगूणतीसइमं सयं पढमो उद्देसो ॥

जीवा णं भंते । पावं कम्मं किं समायं पट्टविंसु समायं णिट्टविंसु १, समायं
पट्टविंसु विसमायं णिट्टविंसु २, विसमायं पट्टविंसु समायं णिट्टविंसु ३, विसमायं
पट्टविंसु विसमायं णिट्टविंसु ४ ? गोयमा ! अत्थेगइया समायं पट्टविंसु समायं
णिट्टविंसु जाव अत्थेगइया विसमायं पट्टविंसु विसमायं णिट्टविंसु । से केणट्ठेणं
भंते ! एवं वुच्चइ—अत्थेगइया समायं पट्टविंसु समायं णिट्टविंसु, तं चेव ?
गोयमा । जीवा चउत्थिवा पणत्ता, तंजहा—अत्थेगइया समाउया समोववण्णगा १,
अत्थेगइया समाउया विसमोववण्णगा २, अत्थेगइया विसमाउया समोववण्णगा
३, अत्थेगइया विसमाउया विसमोववण्णगा ४, तत्थ णं जे ते समाउया समोव-
वण्णगा ते णं पावं कम्मं समायं पट्टविंसु समायं णिट्टविंसु, तत्थ णं जे ते समाउया
विसमोववण्णगा ते णं पावं कम्मं समायं पट्टविंसु विसमायं णिट्टविंसु, तत्थ णं
जे ते विसमाउया समोववण्णगा ते णं पावं कम्मं विसमायं पट्टविंसु समायं
णिट्टविंसु, तत्थ णं जे ते विसमाउया विसमोववण्णगा ते णं पावं कम्मं विसमायं
पट्टविंसु विसमायं णिट्टविंसु, से तेणट्ठेणं गोयमा ! तं चेव । सलेस्सा णं भंते !
जीवा पावं कम्मं एवं चेव, एवं सव्वट्ठाणेषुवि जाव अणागारोवउत्ता, एए सव्वेवि
पया एयाए वत्तव्वयाए भाणियव्वो । णेरइया णं भंते ! पावं कम्मं किं समायं
पट्टविंसु समायं णिट्टविंसु० पुच्छा, गोयमा ! अत्थेगइया समायं पट्टविंसु एवं
जहेव जीवाणं तहेव भाणियव्वं जाव अणागारोवउत्ता, एवं जाव वेमाणियाणं
जस्स जं अत्थि तं एएणं चेव कमेणं भाणियव्वं जहा पावेण दंडओ, एवं
एएणं कमेणं अट्टसुवि कम्मप्पगडोसु अट्ट दंडगा भाणियव्वो जीवाइया वेमा-
णियपज्जवसाणा, एसो णवदंडगसंगहिओ पढमो उद्देसओ भाणियव्वो । सेवं
भंते ! सेवं भंते ! त्ति ॥ ८२० ॥

एगूनतीसइमं सयं २-११उद्देसा

अणंतरोववण्णगा णं भंते ! णेरइया पावं कम्मं किं समायं पट्टविंसु समायं णिट्टविंसु० पुच्छा, गोयमा ! अत्थेगइया समायं पट्टविंसु समायं णिट्टविंसु अत्थेगइया समायं पट्टविंसु विसमायं णिट्टविंसु । से केणट्ठेणं भंते ! एवं वुच्चइ-अत्थेगइया समायं पट्टविंसु तं चेव, गोयमा ! अणंतरोववण्णगा णेरइया दुविहा प०, तं०-अत्थेगइया समाजया समोववण्णगा अत्थेगइया समाजया विसमोववण्णगा, तत्थ णं जे ते समाजया समोववण्णगा ते णं पावं कम्मं समायं पट्टविंसु समायं णिट्टविंसु, तत्थ णं जे ते समाजया विसमोववण्णगा ते णं पावं कम्मं समायं पट्टविंसु विसमायं णिट्टविंसु, से तेणट्ठेणं तं चेव । सलेस्सा णं भंते ! अणंतरोववण्णगा णेरइया पावं कम्मं एवं चेव, एवं जाव अणागारोवउत्ता, एवं असुरकुमारावि एवं जाव वेमाणिया णवरं जं जस्स अत्थि तं तस्स माणियव्वं, एवं णाणावरणिज्जेणवि इंडओ, एवं णिरवसेसं जाव अंतराइएणं । सेव भंते ! २ त्ति जाव विहरइ ॥ ८२१ ॥ २६-२ ॥ एवं एएणं ममएणं जच्चेव भंथिसए उद्देसगपरिवाडी सच्चेव इहवि भाणियव्वा जाव अचरिमोत्ति, अणंतरउद्देसगणं धउण्हवि एक्का वत्तव्वया सेसाणं सत्तण्हं एक्का ॥ ८२२ ॥

एगूनतीसइमं सयं समत्तं

॥ तीसइमं सयं पढमो उद्देसो ॥

कइ णं भंते ! समोसरणा प० ? गोयमा ! चत्तारि समोसरणा पणत्ता, तंजहा-किरियावाई अकिरियावाई अण्णाणियवाई वेणइयवाई । जीवा णं भंते ! किं किरियावाई अकिरियावाई अण्णाणियवाई वेणइयवाई ? गोयमा ! जीवा किरियावाईवि अकिरियावाईवि अण्णाणियवाईवि वेणइयवाईवि । सलेस्सा णं भंते ! जीवा किं किरियावाई० पुच्छा, गोयमा ! किरियावाईवि अकिरियावाईवि अण्णाणियवाईवि वेणइयवाईवि, एवं जाव सुवकलेस्सा । अलेस्सा णं भंते ! जीवा पुच्छा, गोयमा ! किरियावाई णो अकिरियावाई णो अण्णाणियवाई णो वेणइयवाई । कण्हपक्खिया णं भंते ! जीवा किं किरियावाई० पुच्छा, गोयमा ! णो किरियावाई अकिरियावाई अण्णाणियवाईवि वेणइयवाईवि, सुक्कपक्खिया जहा सलेस्सा, सम्मदिट्ठी जहा अलेस्सा, मिच्छादिट्ठी

जहा कण्हपविल्लया । सम्मामिच्छादिट्ठीणं पुच्छा, गोयमा ! णो किरियावाई
 णो अकिरियावाई अण्णाणियवाईवि वेणइयवाईवि, णाणी जाव केवल्लणाणी
 जहा अलेस्से, अण्णाणी जाव विभंगणाणी जहा कण्हपविल्लया, आहारसणो-
 वउत्ता जाव परिग्गहसणोवउत्ता जहा सलेस्सा, णोसणोवउत्ता जहा अलेस्सा,
 सवेयगा जाव णपुंसगवेयगा जहा सलेस्सा, अवेयगा जहा अलेस्सा, सकसाई
 जाव लोभकसाई जहा सलेस्सा, अकसाई जहा अलेस्सा, सजोगी जाव काय-
 जोगी जहा सलेस्सा, अजोगी जहा अलेस्सा, सागारोवउत्ता अणागारोवउत्ता
 जहा सलेस्सा । णेरइया णं भंते ! किं किरियावाई० पुच्छा, गोयमा ! किरिया-
 वाईवि जाव वेणइयवाईवि । सलेस्सा णं भंते ! णेरइया किं किरियावाई० ?
 एवं चेव, एवं जाव काउलेस्सा, कण्हपविल्लया किरियाविवज्जिया, एवं एएणं
 कमेणं जच्चेव जीवाणं वत्तव्वया सच्चेव णेरइयाणवि वत्तव्वया जाव अणागा-
 रोवउत्ता णवरं जं अत्थि तं भाणियव्वं सेसं ण भण्णइ, जहा णेरइया एवं जाव
 थणियकुमारा । पुढविकाइया णं भंते ! किं किरियावाई० पुच्छा, गोयमा !
 णो किरियावाई अकिरियावाईवि अण्णाणियवाईवि णो वेणइयवाई, एवं पुढ-
 विकाइयाणं जं अत्थि तत्थ सव्वत्थवि एयाइं दो मज्झिल्लाइं समोसरणाइं जाव
 अणागारोवउत्तावि, एवं जाव चउरिदियाणं सव्वट्ठाणेसु एयाइं चेव मज्झिल्ल-
 गाइं दो समोसरणाइं, सम्मत्तणाणेहिंवि एयाणि चेव मज्झिल्लगाइं दो समो-
 सरणाइं, पंचिदियतिरिक्खजोणिया जहा जीवा णवरं जं अत्थि तं भाणियव्वं,
 मणुस्सा जहा जीवा तहेव णिरवसेसं, वाणमंतरजोइसियवेभाणिया जहा अमुर-
 कुमारा । किरियावाई णं भंते ! जीवा किं णेरइयाउयं पकरेति तिरिक्ख-
 जोणियाउयं पकरेति मणुस्साउयं पकरेति देवाउयं पकरेति ? गोयमा ! णो
 णेरइयाउयं पकरेति णो तिरिक्खजोणियाउयं पकरेति मणुस्साउयंपि पकरेति
 देवाउयंपि पकरेति । जइ देवाउयं पकरेति किं भवणवासिदेवाउयं पकरेति जाव
 वेमाणियदेवाउयं पकरेति ? गोयमा ! णो भवणवासिदेवाउयं पकरेति णो
 वाणमंतरदेवाउयं पकरेति णो जोइसियदेवाउयं पकरेति वेमाणियदेवाउयं पक-
 रेति । अकिरियावाई णं भंते ! जीवा किं णेरइयाउयं पकरेति तिरिक्ख०
 पुच्छा, गोयमा ! णेरइयाउयंपि पकरेति जाव देवाउयंपि पकरेति, एवं अण्णा-
 णियवाईवि वेणइयवाईवि । सलेस्सा णं भंते ! जीवा किरियावाई किं णेरइया-

उयं पकरेंति० पुच्छा, गोयमा ! णो णेरइयाउयं एवं जहेव जीवा तहेव सलेस्सावि चउह्विधि समोसरणेहि भाणियत्वा । कण्हलेस्सा णं भंते ! जीवा किरियावाई कि णेरइयाउयं पकरेंति० पुच्छा, गोयमा ! णो णेरइयाउयं पकरेंति णो तिरिक्खजोणियाउयं पकरेंति मणुस्साउयं पकरेंति णो देवाउयं पकरेंति, अकिरियावाई अण्णाणियवाई वेणइयवाई य चत्तारिवि आउयाइं पकरेंति, एवं णीललेस्सावि काउलेस्सावि । तेउलेस्सा णं भंते ! जीवा किरियावाई कि णेरइयाउयं पकरेंति० पुच्छा, गोयमा ! णो णेरइयाउयं पकरेंति णो तिरिक्खजोणियाउयं पकरेंति मणुस्साउयंपि पकरेंति देवाउयंपि पकरेंति, जइ देवाउयं पकरेंति तहेव । तेउलेस्सा णं भंते ! जीवा अकिरियावाई कि णेरइयाउयं० पुच्छा, गोयमा ! णो णेरइयाउयं पकरेंति तिरिक्खजोणियाउयंपि पकरेंति मणुस्साउयंपि पकरेंति देवाउयंपि पकरेंति, एवं अण्णाणियवाईवि वेणइयवाईवि, जहा तेउलेस्सा एवं पण्हलेस्सावि सुक्कलेस्सावि णेयत्वा । अलेस्सा णं भंते ! जीवा किरियावाई कि णेरइयाउयं पकरेंति० पुच्छा, गोयमा ! णो णेरइयाउयं पकरेंति णो तिरिक्ख० मणुस्स० णो देवाउयं पकरेंति । कण्हपक्खिया णं भंते ! जीवा अकिरियावाई कि णेरइयाउयं० पुच्छा, गोयमा ! णेरइयाउयंपि पकरेंति एवं चउह्विहंपि, एवं अण्णाणियवाईवि वेणइयवाईवि, सुक्कपक्खिया जहा सलेस्सा । सम्मदिट्ठी णं भंते ! जीवा किरियावाई कि णेरइयाउयं पुच्छा, गोयमा ! णो णेरइयाउयं पकरेंति णो तिरिक्खजोणियाउयं पकरेंति मणुस्साउयंपि पकरेंति देवाउयंपि पकरेंति, मिच्छादिट्ठी जहा कण्हपक्खिया । सम्मामिच्छादिट्ठी णं भंते ! जीवा अण्णाणियवाई कि णेरइयाउयं० जहा अलेस्सा, एवं वेणइयवाईवि, णाणी आभिणिवोहियणाणी य सुयणाणी य ओहिणाणी य जहा सम्मदिट्ठी । मणपज्जवणाणी णं भंते ! कि० पुच्छा, गोयमा ! णो णेरइयाउयं पकरेंति णो तिरिक्ख० णो मणुस्साउयं पकरेंति देवाउयं पकरेंति । जइ देवाउयं पकरेंति कि भवणवासि० पुच्छा, गोयमा ! णो भवणवासिदेवाउयं पकरेंति णो वाणमंतर० णो जोइसिय० वेमाणियदेवाउयं पकरेंति, केवलणाणी जहा अलेस्सा, अण्णाणी जाव विभंगणाणी जहा कण्हपक्खिया, सण्णामु चउसुवि जहा सलेस्सा, णोसण्णोवउत्ता जहा मणपज्जवणाणी, सवेयगा जाव णपुंसगवेयगा जहा सलेस्सा, अवेयगा जहा अलेस्सा, सकसाई जाव लोभकसाई जहा सलेस्सा, अकसाई जहा अलेस्सा,

सजोगी जाव कायजोगी जहा सलेस्सा, अजोगी जहा अलेस्सा, सागारोवउत्ता य अणागारोवउत्ता य जहा सलेस्सा ॥ ८२३ ॥ किरियावाई णं भंते ! णेरइया कि णेरइयाउयं० पुच्छा, गोयमा ! णो णेरइयाउयं पकरेंति णो तिरिक्खजोणियाउयं पकरेंति मणुस्साउयं पकरेंति णो देवाउयं पकरेंति । अकिरियावाई णं भंते ! णेरइया पुच्छा, गोयमा ! णो णेरइयाउयं पकरेंति तिरिक्खजोणियाउयं पकरेंति मणुस्साउयं पकरेंति णो देवाउयं पकरेंति, एवं अण्णाणियवाई वि वेणइयवाई वि । सलेस्सा णं भंते ! णेरइया किरियावाई कि णेरइयाउयं० एवं सव्वेवि णेरइया जे किरियावाई ते मणुस्साउयं एमं पकरेंति, जे अकिरियावाई अण्णाणियवाई वेणइयवाई ते सब्बट्ठाणेषु णो णेरइयाउयं पकरेंति तिरिक्खजोणियाउयं पकरेंति मणुस्साउयं पकरेंति णो देवाउयं पकरेंति, णवरं सम्माभिच्छत्ते उवरिल्लेहिं दोहिचि समोसरणेहिं ण किच्चि पकरेंति जहेव जीवपए, एवं जाव थणियकुमारा जहेव णेरइया । अकिरियावाई णं भंते ! पुढविकाइया पुच्छा, गोयमा ! णो णेरइयाउयं पकरेंति तिरिक्खजोणियाउयं पकरेंति मणुस्साउयं पकरेंति णो देवाउयं पकरेंति, एवं अण्णाणियवाई वि । सलेस्सा णं भंते ! एवं जं जं पयं अरिय पुढविकाइयाणं तहिं २ मज्झिमेसु दोसु समोसरणेसु एवं चेव दुविहं आउयं पकरेंति णवरं तेउलेस्साए ण किंपि पकरेंति, एवं आउवकाइयाणवि, एवं वणस्सइकाइयाणवि, तेउकाइया वाउकाइया सब्बट्ठाणेषु मज्झिमेसु दोसु समोसरणेसु णो णेरइयाउयं पकरेंति तिरिक्खजोणियाउयं पकरेंति णो मणुस्साउयं पकरेंति णो देवाउयं पकरेंति, वेइदियतेइदियच्चरिदियाणं जहा पुढविकाइयाणं णवरं सम्मत्तणेषु ण एक्कपि आउयं पकरेंति । किरियावाई णं भंते ! पांचदियतिरिक्खजोणिया कि णेरइयाउयं पकरेंति० पुच्छा, गोयमा ! जहा मणपज्जवणाणी, अकिरियावाई अण्णाणियवाई वेणइयवाई य चउच्चिहंपि पकरेंति, जहा ओहिया तहा सलेस्सावि । कण्हलेस्सा णं भंते ! किरियावाई पांचदियतिरिक्खजोणिया कि णेरइयाउयं० पुच्छा, गोयमा ! णो णेरइयाउयं पकरेंति णो तिरिक्ख० णो मणुस्साउयं पकरेंति णो देवाउयं पकरेंति, अकिरियावाई अण्णाणियवाई वेणइयवाई चउच्चिहंपि पकरेंति, जहा कण्हलेस्सा एवं णीललेस्सावि काउलेस्सावि, तेउलेस्सा जहा सलेस्सा, णवरं अकिरियावाई अण्णाणियवाई वेणइयवाई य णो णेरइयाउयं पकरेंति तिरिक्खजोणियाउयं पकरेंति मणुस्साउयं पकरेंति देवाउयं पकरेंति, एवं पण्हलेस्सावि, एवं

सुक्कलेस्सावि भाणियब्बा, कण्हपक्खिया तिंहि समोसरणेह चउव्विहंपि आउयं पकरेंति, सुक्कपक्खिया जहा सलेस्सा, सम्मद्दिट्ठी जहा मणपज्जवणाणी तहेव वेमाणियाउयं पकरेंति, भिच्छादिट्ठी जहा कण्हपक्खिया, सम्मामिच्छादिट्ठी ण य एक्कंपि आउयं पकरेंति जहेव णेरइया, णाणी जाव ओहिणाणी जहा सम्मद्दिट्ठी, अण्णाणी जाव विभंगणाणी जहा कण्हपक्खिया, सेसा जाव अणागारोवउत्ता सव्वे जहा सलेस्सा तथा चेव भाणियब्बा, जहा पंचदियतिरिक्खजोणियाणं वत्तव्वया भणिया एवं मणुस्साणवि वत्तव्वया भाणियब्बा, णवरं मणपज्जवणाणी णोसण्णोवउत्ता य जहा सम्मद्दिट्ठी तिरिक्खजोणिया तहेव भाणियब्बा, अलेस्सा केवलणाणी अबेदगा अकसाई अजोगो य एए एक्कंपि आउयं ण पकरेंति, जहा ओहिया जीवा सेसं तं चेव, वाणमंतरजोइसियवेमाणिया जहा असुरकुमारा । किरियावाई णं भंते ! जीवा कि भवसिद्धिया अभवसिद्धिया ? गोयमा ! भवसिद्धिया णो अभवसिद्धिया । अकिरियावाई णं भंते ! जीवा कि भवसिद्धिया पुच्छा, गोयमा ! भवसिद्धियावि अभवसिद्धियावि, एवं अण्णाणियवाईवि, वेणइयवाईवि ; सलेस्सा णं भंते ! जीवा किरियावाई कि भवसिद्धिया पुच्छा, गोयमा ! भवसिद्धिया णो अभवसिद्धिया । सलेस्सा णं भंते ! जीवा अकिरियावाई कि भवसिद्धिया पुच्छा, गोयमा ! भवसिद्धियावि अभवसिद्धियावि, एवं अण्णाणियवाईवि वेणइयवाईवि जहा सलेस्सा, एवं जाव सुक्कलेस्सा । अलेस्सा णं भंते ! जीवा किरियावाई कि भवसिद्धिया पुच्छा, गोयमा ! भवसिद्धिया णो अभवसिद्धिय, एवं एएणं अभिलावेणं कण्हपक्खिया तिसुवि समोसरणेसु भयणाए, सुक्कपक्खिया चउसुवि समोसरणेसु भवसिद्धिया णो अभवसिद्धिया, सम्मद्दिट्ठी जहा अलेस्सा, भिच्छादिट्ठी जहा कण्हपक्खिया, सम्मामिच्छादिट्ठी दोसुवि समोसरणेसु जहा अलेस्सा, णाणी जाव केवलणाणी भवसिद्धिया णो अभवसिद्धिया, अण्णाणी जाव विभंगणाणी जहा कण्हपक्खिया, सण्णासु चउसुवि जहा सलेस्सा, णोसण्णोवउत्ता जहा सम्मद्दिट्ठी, सवेदगा जाव णपुंसपवेदगा जहा सलेस्सा, अबेदगा जहा सम्मद्दिट्ठी, सकसाई जाव लोभकसाई जहा सलेस्सा, अकसाई जहा सम्मद्दिट्ठी, सजोगी जाव कायजोगी जहा सलेस्सा, अजोगी जहा सम्मद्दिट्ठी, सागारोवउत्ता अणागारोवउत्ता जहा सलेस्सा, एवं णेरइयावि भाणियब्बा णवरं णायव्वं जं अत्थि, एवं असुर-

कुमारावि जाव थणियकुमारा, पुढविक्काइया सव्वट्टाणेसुवि मज्झिल्लेसु दोसुवि समोसरणेसु भवसिद्धियावि अभवसिद्धियावि एवं जाव वणस्सइकाइया, वेइं-दियतेइदियचउरिदिया एवं चेव णवरं सम्मत्ते ओहिणाणे आभिणिबोहियणाणे सुयणाणे एएसु चेव दोसु मज्झिमेसु समोसरणेसु भवसिद्धिया णो अभवसिद्धिया, सेसं तं चेव, पच्चिदियतिरिक्खजोणिया जहा णेरइया णवरं णायव्वं जं अत्थि, मणुस्सा जहा ओहिया जोवा, वाणमंतरजोइसियवेमाणिया जहा असुरकुमारा । सेवं भंते ! २ त्ति ॥ ८२४ ॥

तीसइमं सयं बीओ उद्देसो

अणंतरोववण्णगा णं भंते ! णेरइया कि किरियावाई० पुच्छा, गोयमा ! किरियावाईवि जाव वेणइयवाईवि, सलेस्सा णं भंते ! अणंतरोववण्णगा णेरइया कि किरियावाई० एवं चेव, एवं जहेव पढमुद्देसे णेरइयाणं वत्तव्वया तहेव इहवि भाणियव्वा, णवरं जं जस्स अत्थि अणंतरोववण्णगाणं णेरइयाणं तं तस्स भाणियव्वं, एवं सव्वजीवाणं जाव वेमाणियाणं, णवरं अणंतरोववण्णगाणं जं जाहि अत्थि तं तहि भाणियव्वं । किरियावाई णं भंते ! अणंतरोववण्णगा णेरइया कि णेरइयाउयं पकरेंति० पुच्छा, गोयमा ! णो णेरइयाउयं पकरेंति णो तिरि० णो मणु० णो देवाउयं पकरेंति, एवं अकिरियावाईवि अण्णाणियवाईवि वेणइयवाईवि । सलेस्सा णं भंते ! किरियावाई अणंतरोववण्णगा णेरइया कि णेरइयाउयं० पुच्छा, गोयमा ! णो णेरइयाउयं पकरेंति जाव णो देवाउयं पकरेंति, एवं जाव वेमाणिया, एवं सव्वट्टाणेसुवि अणंतरोववण्णगा णेरइया ण किच्चिवि आउयं पकरेंति जाव अणागारोवउत्तत्ति, एवं जाव वेमाणिया णवरं जं जस्स अत्थि तं तस्स भाणियव्वं । किरियावाई णं भंते ! अणंतरोववण्णगा णेरइया कि भवसिद्धिया अभवसिद्धिया ? गोयमा ! भवसिद्धिया णो अभवसिद्धिया । अकिरियावाई णं पुच्छा, गोयमा ! भवसिद्धियावि, अभवसिद्धियावि, एवं अण्णाणियवाईवि वेणइयवाईवि । सलेस्सा णं भंते ! किरियावाई अणंतरोववण्णगा णेरइया कि भवसिद्धिया अभवसिद्धिया ? गोयमा ! भवसिद्धिया णो अभवसिद्धिया, एवं एएणं अभिलावेणं जहेव ओहिए उद्देसए णेरइयाणं वत्तव्वया भाणिया तहेव इहवि भाणियव्वा जाव अणागारोवउत्तत्ति, एवं जाव वेमाणियाणं णवरं जं जस्स अत्थि तं तस्स भाणियव्वं, इमं

से लक्ष्मणं—जे किरियावाई सुक्कपक्खिया सम्मामिच्छदिट्ठिया एए सव्वे भव-
सिद्धिया णो अभवसिद्धिया, सेसा सव्वे भवसिद्धियावि अभवसिद्धियावि ।
सेवं भंते ! २ त्ति ॥ ८२५ ॥ ॥ ३०-२ ॥ परंपरोववण्णगा णं भंते ! णेर-
इया कि किरियावाई० एवं जहेव ओहिओ उट्टेसओ तहेव परंपरोववण्णएमुवि
णेरइयाईओ तहेव णिरवसेसं भाणियव्वं तहेव तियदंडगसंगहिओ । सेवं भंते !
सेवं भंते ! त्ति जाव विहरइ ॥ ८२६ ॥ ३०-३ ॥ एवं एएणं कमेणं जच्चेव
बंधिसए उट्टेसगाणं परिवाडो सच्चेव इहंपि जाव अचरिमो उट्टेसओ, णवरं
अणंतरा चत्तारिवि एक्कगमगा, परंपरा चत्तारिवि एक्कगमएणं, एवं चरिमावि,
अचरिमावि एवं चेव णवरं अलेस्सो केवली अजोगो ण भण्णइ, सेसं तहेव ।
सेवं भंते ! २ त्ति । एए एक्कारसवि उट्टेसगा ॥ ८२७ ॥

तीसइमं सयं समत्तं

॥ इवकतीसइमं सयं १-२८ उट्टेसा ॥

रायगिहे जाव एवं थयासी—कइ णं भंते ! खुड्ढाग जुम्मा प०? गोयमा !
चत्तारि खुड्ढाग जुम्मा प०, तं०—कइजुम्मे १, तेओगे २, दावरजुम्मे ३, कलि-
ओगे ४, से केणट्ठेणं भंते ! एवं वुच्चइ चत्तारि खुड्ढाग जुम्मा प० तं०—कइ-
जुम्मे जाव कलिओगे ? गोयमा ! जे णं रासी चउक्कएणं अवहारेणं अवहीर-
माणे चउपज्जवसिए सेत्तं खुड्ढागकइजुम्मे, जे णं रासी चउक्कएणं अवहारेणं
अवहीरमाणे तिपज्जवसिए सेत्तं खुड्ढागतेओगे, जे णं रासी चउक्कएणं अवहा-
रेणं अवहीरमाणे दुपज्जवसिए सेत्तं खुड्ढागदावरजुम्मे, जे णं रासी चउक्कएणं
अवहारेणं अवहीरमाणे एपज्जवसिए सेत्तं खुड्ढागकलिओगे, से तेणट्ठेणं जाव
कलिओगे । खुड्ढागकइजुम्मेणेरइया णं भंते ! कओ उववज्जंति कि णेरइएहिंतो
उववज्जंति तिरिवख० पुच्छा, गोयमा ! णो णेरइएहिंतो उववज्जंति एवं णेरइ-
याणं उववाओ जहा वक्कंतीए तहा भाणियव्वो । ते णं भंते ! जीवा एगसम-
एणं केवइया उववज्जंति ? गोयमा ! चत्तारि वा अट्ठ वा बारस वा सोलस वा
संखेज्जा वा असंखेज्जा वा उववज्जंति । ते णं भंते ! जीवा कइं उववज्जंति ?
गोयमा ! से जहाणामए पवए पवमाणे अज्जवसाण० एवं जहा पंचवीसइमे
सए अट्ठमुट्टेसए णेरइयाणं वत्तव्वया तहेव इहवि भाणियव्वया जाव आयप्यओगेणं
उववज्जंति णो परप्पओगेणं उववज्जंति । रयणप्पभापुद्विखुड्ढागकइजुम्मा-

णेरइया णं भंते । कओ उववज्जंति० ? एवं जहा ओहियणेरइयाणं वत्तव्वापा
 सच्चैव रथणप्पभाएवि भाणियध्वा जाव णो परप्पओगेणं उववज्जंति, एवं
 सक्करप्पभाएवि, एवं जाव अहेसत्तमाए, एवं उववाओ जहा वक्कंतीए, असणी
 खलु पढमं दोच्चं व सरीसवा तइय पक्खी । गाहाए । उववाएयव्वा, सेसं
 तहेव । खुड्ढागतेओंग-णेरइया णं भंते ! कओ उववज्जंति कि णेरइएहंतो?
 उववाओ जहा वक्कंतीए, ते णं भंते ! जीवा एगसमएणं केवइया उववज्जंति ?
 गीयमा ! तिण्णि वा सत्त वा एक्कारस वा पण्णरस वा संखेज्जा वा असंखेज्जा
 वा उववज्जंति, सेसं जहा कडजुम्मस्स, एवं जाव अहेसत्तमाए । खुड्ढागदावर-
 जुम्मणेरइया णं भंते ! कओ उववज्जंति० ? एवं जहेव खुड्ढागकडजुम्मे णवरं
 परिमाणं दो वा छ वा दस वा चउट्ठस वा संखेज्जा वा असंखेज्जा वा सेसं तं
 चैव, एवं जाव अहेसत्तमाए । खुड्ढागकलिओगणेरइया णं भंते ! कओ उव-
 वज्जंति० ? एवं जहेव खुड्ढागकडजुम्मे णवरं परिमाणं एक्को वा पंच वा णव
 वा तेरस वा संखेज्जा वा असंखेज्जा वा उववज्जंति, सेसं तं चैव, एवं जाव
 अहेसत्तमाए । सेवं भंते ! २ त्ति जाव विहरइ ॥ ८२८ ॥ ३१-१ ॥ कण्हलेस्स-
 खुड्ढागकडजुम्मणेरइया णं भंते ! कओ उववज्जंति० ? एवं चैव जहा ओहि-
 यगमो जाव णो परप्पओगेणं उववज्जंति, णवरं उववाओ जहा वक्कंतीए,
 धूमप्पभापुट्ठविणेरइया णं सेसं तहेव, धूमप्पभापुट्ठविकण्हलेस्सखुड्ढागकडजुम्-
 णेरइया णं भंते ! कओ उववज्जंति० ? एवं चैव णिरवसेसं, एवं तमाएवि एवं
 अहेसत्तमाएवि, णवरं उववाओ सव्वत्य जहा वक्कंतीए । कण्हलेस्सखुड्ढाग-
 तेओगणेरइया णं भंते ! कओ उववज्जंति० ? एवं चैव णवरं तिण्णि वा सत्त
 वा एक्कारस वा पण्णरस वा संखेज्जा वा असंखेज्जा वा सेसं तहेव एवं जाव
 अहेसत्तमाएवि । कण्हलेस्सखुड्ढागदावरजुम्मणेरइया णं भंते ! कओ उव-
 वज्जंति० ? एवं चैव णवरं दो वा छ वा दस वा चउट्ठस वा सेसं तं चैव, एवं
 धूमप्पभाएवि जाव अहेसत्तमाएवि । कण्हलेस्सखुड्ढागकलिओगणेरइया णं भंते !
 कओ उववज्जंति० ? एवं चैव णवरं एक्को वा पंच वा णव वा तेरस वा
 संखेज्जा वा असंखेज्जा वा सेसं तं चैव, एवं धूमप्पभाएवि तमाएवि अहेसत्त-
 माएवि । सेवं भंते ! २ त्ति ॥ ८२९ ॥ ३१-२ ॥ णीललेस्सखुड्ढागकडजुम्-

णेरइया णं भंते ! कओ उववज्जंति० एवं जहेव कण्हलेस्सखुड्ढागकडजुम्मा-
 णवरं उववाओ जो बालुयप्पभाए सेसं तं चेव, बालुयप्पभापुढविणीललेस्स-
 खुड्ढागकडजुम्मणेरइया एवं चेव, एवं पंकप्पभाएवि, एवं धूमप्पभाएवि, एवं
 चउसुवि जुम्मेसु णवरं परिमाणं जाणियब्बं, परिमाणं जहा कण्हलेस्सउद्देसए ।
 सेसं तहेव । सेवं भंते ! सेवं भंते ! त्ति ॥ ८३० ॥ ३१-३ ॥ काउलेस्सखुड्ढाग-
 कडजुम्मणेरइया णं भंते ! कओ उववज्जंति० ? एवं जहेव कण्हलेस्सखुड्ढाग-
 कडजुम्मणेरइया णवरं उववाओ जो रयणप्पभाए सेसं तहेव । रयणप्पभापुढवि-
 काउलेस्सखुड्ढागकडजुम्मणेरइया णं भंते ! कओ उववज्जंति० ? एवं चेव,
 एवं सवकरप्पभाएवि, एवं बालुयप्पभाएवि, एवं चउसुवि जुम्मेसु, णवरं परि-
 माणं जाणियब्बं, परिमाणं जहा कण्हलेस्सउद्देसए सेसं तं चेव, सेवं भंते ! २
 त्ति ॥ ८३१ ॥ ३१-४ ॥ भवसिद्धियखुड्ढागकडजुम्मणेरइया णं भंते ! कओ
 उववज्जंति किं णेरइए० ? एवं जहेव ओहिओ गमओ तहेव णिरवसेसं जाव
 णो परप्पओगेणं उववज्जंति । रयणप्पभापुढविभवसिद्धियखुड्ढागकडजुम्मणेर-
 इया णं भंते ! ०? एवं चेव णिरवसेसं, एवं जाव अहेसत्तमाए, एवं भवसिद्धिय-
 खुड्ढागतेओगणेरइयावि । एवं जाव कलिओगत्ति, णवरं परिमाणं जाणियब्बं, परि-
 माणं पुक्वमणियं जहा पढभुद्देसए । सेवं भंते ! २ त्ति ॥ ८३२ ॥ ३१-५ ॥
 कण्हलेस्सभवसिद्धियखुड्ढागकडजुम्मणेरइया णं भंते ! कओ उववज्जंति० ?
 एवं जहेव ओहिओ कण्हलेस्सउद्देसओ तहेव णिरवसेसं चउसुवि जुम्मेसु
 भाणियब्बो जाव अहेसत्तमपुढविकण्हलेस्सखुड्ढागकलिओगणेरइया णं भंते !
 कओ उववज्जंति० ? तहेव । सेवं भंते ! २ त्ति ॥ ८३३ ॥ ३१-६ ॥ णील-
 लेस्सभवसिद्धिया चउसुवि जुम्मेसु तहेव भाणियब्बा जहा ओहिए णीललेस्स-
 उद्देसए । सेवं भंते ! सेवं भंते ! त्ति जाव विहरइ ॥ ८३४ ॥ ३१-७ ॥ काउ-
 लेस्सभवसिद्धिया चउसुवि जुम्मेसु तहेव उववाएयब्बा जहेव ओहिए काउलेस्स-
 उद्देसए । सेवं भंते ! २ त्ति जाव विहरइ ॥ ८३५ ॥ ३१-८ ॥ जहा भवसिद्धिएहि
 चत्तारि उद्देसगा भणिया एवं अभवसिद्धिएहिवि चत्तारि उद्देसगा भाणियब्बा
 जाव काउलेस्सउद्देसओत्ति । सेवं भंते ! २ त्ति ॥ ८३६ ॥ ३१-१२ ॥ एवं
 सम्महिट्ठीहिंवि लेस्सासंजुत्तेहिं चत्तारि उद्देसगा कायब्बा, णवरं सम्महिट्ठी
 पढभित्तएसु दोसुवि उद्देसगेसु अहेसत्तमापुढवीए ण उववाएयब्बो, सेसं तं चेव ।

सेवं भंते ! सेवं भंते ! त्ति ॥ ८३७ ॥ ३१-१६ ॥ मिच्छाविट्ठीहि चत्तारि उद्देसगा कायव्वा जहा भवसिद्धियाणं । सेवं भंते ! २ त्ति ॥ ८३८ ॥ ३१-२० ॥ एवं कण्हपक्खि एहि वि लेस्सासंजुत्तेहि चत्तारि उद्देसगा कायव्वा जहेव भवसिद्धि-
एहि । सेवं भंते ! सेवं भंते ! त्ति ॥ ८३९ ॥ ३१-२४ ॥ सुवकपक्खि एहि एवं चेव चत्तारि उद्देसगा भाणियव्वा जाव वालुयप्पभापुढविकाउलेस्ससुवकपक्खिय-
खुड्डागकलिओगणेरइया णं भंते ! कओ उववज्जंति ० ? तहेव जाव णो परप्पओगेण उववज्जंति । सेवं भंते ! २ त्ति ॥ ८४० ॥ ३१-२८ ॥ सव्वेवि एए अट्टावीसं उद्देसगा ।

इक्कीसइमं सयं समत्तं

॥ बत्तीसइमं सयं १-२८ उद्देसा ॥

खुड्डागकडजुम्मणेरइया णं भंते ! अणंतरं उव्वट्टित्ता कहिं गच्छंति कहिं उववज्जंति किं णेरइएसु उववज्जंति ? तिरिक्खजोणि एसु उववज्जंति ० उव्वट्टणा जहा वक्कंतीए । ते णं भंते ! जीवा एगसमएणं केवइया उव्वट्टंति ? गोयमा ! चत्तारि वा अट्ट वा बारस वा सोलस वा संखेज्जा वा असंखेज्जा वा उव्वट्टंति, ते णं भंते ! जीवा कहं उव्वट्टंति ? गोयमा ! से जहाणामए पवए एवं तहेव, एवं सो चेव गमओ जाव आयप्पओगेणं उव्वट्टंति णो परप्पओगेणं उव्वट्टंति, रयणप्पभापुढविल्लुड्डागकडजुम्मं ० एवं रयणप्पभाएवि एवं जाव अहे-
सत्तमाए, एवं खुड्डागतेओगल्लुड्डागदावरजुम्मखुड्डागकलिओगा णवरं परिमाणं जाणियध्वं, सेसं तं चेव । सेवं भंते ! २ त्ति ॥ ८४१ ॥ ३२-१ ॥ कण्हलेस्स-
कडजुम्मणेरइया ० एवं एएणं कमेणं जहेव उववायसए अट्टावीसं उद्देसगा भणिया तहेव उव्वट्टणासएवि अट्टावीसं उद्देसगा भाणियव्वा णिरवसेसा णवरं उव्वट्टंति-
त्ति अभिस्सावो भाणियव्वो, सेसं तं चेव । सेवं भंते ! सेवं भंते ! त्ति जाव विहरइ ॥ ८४२ ॥

बत्तीसइमं सयं समत्तं

॥ तेत्तीसइमं सयं-एंगिदियं सयं ॥

कइविहा णं भंते ! एंगिदिया प० ? गोयमा ! पंचविहा एंगिदिया प०, तं०-पुढविकाइया जाव वणस्सइकाइया । पुढविकाइया णं भंते ! कइविहा प० ?

गोयमा ! दुविहा प०, तं०-सुहुमपुढविकाइया य बायरपुढविकाइया य, सुहुम-
पुढविकाइया णं भंते ! कइविहा प० ? गोयमा ! दुविहा प०, तंजहा-पज्जत्त-
सुहुमपुढविकाइया य अपज्जत्तसुहुमपुढविकाइया य । बायरपुढविकाइया णं भंते !
कइविहा प० ? गोयमा ! एवं चेव, एवं आउवकाइयावि चउवकएणं भेएणं
भाणियत्वा एवं जाव वणस्सइकाइया । अपज्जत्तसुहुमपुढविकाइयाणं भंते !
कइ कम्मप्पगडीओ प० ? गोयमा ! अट्ट कम्मप्पगडीओ प०, तं०-णाणावर-
णिज्जं जाव अंतराइयं । पज्जत्तसुहुमपुढविकाइयाणं भंते ! कइ कम्मप्पगडीओ
प० ? गोयमा ! अट्ट कम्मप्पगडीओ प०, तंजहा-णाणावरणिज्जं जाव अंतराइयं ।
अपज्जत्तबायरपुढविकाइयाणं भंते ! कइ कम्मप्पगडीओ प० ? गोयमा ! एवं चेवः
पज्जत्तबायरपुढविकाइयाणं भंते ! कइ कम्मप्पगडीओ प० ? एवं चेव ः, एवं एएणं
कमेणं जाव बायरवणस्सइकाइयाणं पज्जत्तगार्णंति । अपज्जत्तसुहुमपुढविका-
इया णं भंते ! कइ कम्मप्पगडीओ बंधंति ? गोयमा ! सत्तविहबंधगावि अट्टविह-
बंधगावि, सत्त बंधमाणा आउयवज्जाओ सत्त कम्मप्पगडीओ बंधंति अट्ट बंध-
माणा पडिपुण्णाओ अट्ट कम्मप्पगडीओ बंधंति । पज्जत्तसुहुमपुढविकाइया णं
भंते ! कइ कम्मप्पगडीओ बंधंति ? एवं चेव, एवं सव्वे जाव-पज्जत्तबायर-
वणस्सइकाइया णं भंते ! कइ कम्मप्पगडीओ बंधंति ? एवं चेव । अपज्जत्त-
सुहुमपुढविकाइया णं भंते ! कइ कम्मप्पगडीओ वेदंति ? गोयमा ! चउहस
कम्मप्पगडीओ वेदंति, तं०-णाणावरणिज्जं जाव अंतराइयं, सोइदियवज्जं
चखिदियवज्जं घाणिदियवज्जं जिणिमदियवज्जं इत्थिवेयवज्जं पुरिसवेयवज्जं,
एवं चउवकएणं भेदेणं जाव पज्जत्तबायरवणस्सइकाइया णं भंते ! कइ कम्म-
प्पगडीओ वेदंति ? गोयमा ! एवं चेव चउहस कम्मप्पगडीओ वेदंति । सेवं
भंते ! २ त्ति ॥ ८४३ ॥ ३३-१-१ ॥ कइविहा णं भंते ! अणंतरोववणगा
एगिदिया प० ? गोयमा ! पंचविहा अणंतरोववणगा एगिदिया प०, तं०-पुढ-
विकाइया जाव वणस्सइकाइया, अणंतरोववणगा णं भंते ! पुढविकाइया
कइविहा प० ? गोयमा ! दुविहा पणत्ता, तंजहा-सुहुमपुढविकाइया य बायर
पुढविकाइया य, एवं दुपएणं भेएणं जाव वणस्सइकाइया । अणंतरोववणगा-
सुहुमपुढविकाइयाणं भंते ! कइ कम्मप्पगडीओ प० ? गोयमा ! अट्ट कम्म-
प्पगडीओ प०, तं०-णाणावरणिज्जं जाव अंतराइयं । अणंतरोववणगाबायरपुढवि-

काइयाणं भंते ! कइ कम्मप्पगडीओ प० ? गोयमा ! अट्ट कम्मप्पगडीओ प०, तं०—णाणावरणिज्जं जाव अंतराइयं, एवं जाव अणंतरोववण्णगबायर-वणस्सइकाइयाणंति । अणंतरोववण्णगसुहुमपुढविकाइया णं भंते ! कइ कम्मप्प-गडीओ बंधंति ? गोयमा ! आउयवज्जाओ सत्त कम्मप्पगडीओ बंधंति, एवं जाव अणंतरोववण्णगबायरवणस्सइकाइयत्ति । अणंतरोववण्णगसुहुमपुढविकाइया णं भंते ! कइ कम्मप्पगडीओ वेदंति ? गोयमा ! चउट्टस कम्मप्पगडीओ वेदंति, तं०—णाणावरणिज्जं तहेव जाव पुरिसवेयवज्जं, एवं जाव अणंतरोव-वण्णगबायरवणस्सइकाइयत्ति । सेवं भंते ! सेवं भंते ! त्ति ॥ ८४४ ॥ ३३-१-२॥ कइविहा णं भंते ! परंपरोववण्णगा एगिदिया प० ? गोयमा ! पंचविहा परंपरोववण्णगा एगिदिया प०, तं०—पुढविकाइया एवं चउवकओ भेओ जहा ओहियउट्टेसए । परंपरोववण्णगअपज्जत्तसुहुमपुढविकाइयाणं भंते ! कइ कम्म-प्पगडीओ प० ? एवं एएणं अभिलावेणं जहा ओहियउट्टेसए तहेव णिरवसेसं भाणियव्वं जाव चउट्टस वेदंति । सेवं भंते ! २ त्ति ॥ ८४५ ॥ ३३-१-३॥ अणंतरोगाढा जहा अणंतरोववण्णगा ४ ॥ परंपरोगाढा जहा परंपरोववण्णगा ५ ॥ अणंतराहारगा जहा अणंतरोववण्णगा ६ ॥ परंपराहारगा जहा परंपरो-ववण्णगा ७॥ अणंतरपज्जत्तगा जहा अणंतरोववण्णगा ८॥ परंपरपज्जत्तगा जहा परंपरोववण्णगा ९ ॥ चरिमावि जहा परंपरोववण्णगा तहेव १० ॥ एवं अच-रिमावि ११ ॥ एवं एए एवकारस उट्टेसगा । सेवं भंते ! २ त्ति जाव विहरइ ॥ ८४६ ॥ पढमं एगिदियसयं समत्तं ॥१॥ कइविहा णं भंते ! कण्हलेस्सा एगिदिया प० ? गोयमा ! पंचविहा कण्हलेस्सा एगिदिया पण्णत्ता, तंजहा—पुढविकाइया जाव वणस्सइकाइया । कण्हलेस्सा णं भंते ! पुढविकाइया कइविहा पण्णत्ता ? गोयमा ! दुविहा पण्णत्ता, तंजहा— सुहुमपुढविकाइया य बायरपुढविकाइया य । कण्हलेस्सा णं भंते ! सुहुमपुढविकाइया कइविहा प० ? गोयमा ! एवं एएणं अभिलावेणं चउवकभेओ जहेव ओहिए उट्टेसए जाव वणस्सइकाइयत्ति । कण्हलेस्सअपज्जत्तसुहुमपुढविकाइयाणं भंते ! कइ कम्मप्पगडीओ प० ? एवं चेव एएणं अभिलावेणं जहेव ओहिउट्टेसए तहेव पण्णत्ताओ तहेव बंधंति तहेव वेदंति । सेवं भंते ! २ त्ति । कइविहा णं भंते ! अणंतरोववण्णगा कण्हलेस्सा एगिदिया पण्णत्ता ? गोयमा ! पंचविहा अणंतरोव-

वण्णगा कण्हलेस्सा एगिदिया एवं एएणं अभिलावेणं तहेव दुयओ भेओ जाव वणस्सइकाइयत्ति । अणंतरोववण्णगकण्हलेस्ससुहुमपुढविकाइयाणं भंते ! कइ कम्मप्पगडीओ प० ? एवं एएणं अभिलावेणं जहा ओहिओ अणंतरोववण्णमाणं उद्देसओ तहेव जाव वेवेत्ति । सेवं भंते ! सेवं भंते ! त्ति । कइविहा णं भंते ! परंपरोववण्णगा कण्हलेस्सा एगिदिया प० ? गोयमा ! पंचविहा परंपरोव-
वण्णगा कण्हलेस्सा एगिदिया पण्णत्ता, तंजहा-पुढविकाइया एवं एएणं अभि-
लावेणं तहेव चउक्कओ भेओ जाव वणस्सइकाइयत्ति । परंपरोववण्णगकण्ह-
लेस्सअपज्जत्तसुहुमपुढविकाइयाणं भंते ! कइ कम्मप्पगडीओ प० ? एवं एएणं
अभिलावेणं जहेव ओहिओ परंपरोववण्णगउद्देसओ तहेव जाव वेवेत्ति, एवं
एएणं अभिलावेणं जहेव ओहिएगिदियसए एक्कारस उद्देसगा भणिया तहेव
कण्हलेस्ससएवि भाणियव्वा जाव अचरिमचरिमकण्हलेस्सा एगिदिया ॥ ८४७ ॥
बिइयं एगिदियसयं समत्तं ॥ २ ॥ जहा कण्हलेस्सेहिं भणियं एवं णीललेस्सेहिं वि-
सयं भाणियव्वं । सेवं भंते ! २ त्ति । तइयं एगिदियसयं समत्तं ॥ ३ ॥ एवं
काउलेस्सेहिं वि सयं भाणियव्वं णवरं काउलेस्सेत्ति अभिलावो भाणियव्वो ।
चउत्थं एगिदियसयं समत्तं ॥ ४ ॥ कइविहा णं भंते ! भवसिद्धिया एगिदिया
प० ? गोयमा ! पंचविहा भवसिद्धिया एगिदिया प०, तं०-पुढविकाइया जाव
वणस्सइकाइया भेओ चउक्कओ जाव वणस्सइकाइयत्ति । भवसिद्धियअपज्जत्त-
सुहुमपुढविकाइयाणं भंते ! कइ कम्मप्पगडीओ प० ? एवं एएणं अभिलावेणं
जहेव पढमित्तगं एगिदियसयं तहेव भवसिद्धियसयंपि भाणियव्वं, उद्देसगपरि-
वाडी तहेव जाव अचरिमोत्ति । सेवं भंते ! २ त्ति । पंचमं एगिदियसयं समत्तं
॥ ५ ॥ कइविहा णं भंते ! कण्हलेस्सा भवसिद्धिया एगिदिया प० ? गोयमा !
पंचविहा कण्हलेस्सा भवसिद्धिया एगिदिया प०, तं०-पुढविकाइया जाव वण-
स्सइकाइया । कण्हलेस्सभवसिद्धियपुढविकाइया णं भंते ! कइविहा प० ? गोयमा!
दुविहा प०, तं०-सुहुमपुढविकाइया य बायरपुढविकाइया य । कण्हलेस्सभवसि-
द्धियसुहुमपुढविकाइया णं भंते ! कइविहा प० ? गोयमा ! दुविहा प०,
तंजहा-पज्जत्तगा य अपज्जत्तगा य, एवं बायरावि, एवं एएणं अभिलावेणं
तहेव चउक्कओ भेओ भाणियव्वो, कण्हलेस्सभवसिद्धियअपज्जत्तसुहुमपुढवि-
काइयाणं भंते ! कइ कम्मप्पगडीओ प० ? एवं एएणं अभिलावेणं जहेव

ओहिउद्देसए तहेव जाव वेदेंति । कइविहा णं भंते ! अणंतरोववण्णा कण्हलेस्सा भवसिद्धिया एगिदिया प० ? गोयमा ! पंचविहा अणंतरोववण्णा जाव वणस्सइकाइया । अणंतरोववण्णाकण्हलेस्सभवसिद्धियपुढविकाइया णं भंते ! कइविहा प० ? गोयमा ! दुविहा प०, तं०—सुहुमपुढविकाइया (य बायरपुढविकाइया य) एवं दुयओ भेओ । अणंतरोववण्णाकण्हलेस्सभवसिद्धियसुहुमपुढविकाइयाणं भंते ! कइ कम्मपगडीओ प० ? एवं एएणं अभिलावेणं जहेव ओहिओ अणंतरोववण्णागउद्देसओ तहेव जाव वेदेंति, एवं एएणं अभिलावेणं एवकारसवि उद्देसगा तहेव भाणियव्वा जहा ओहियसए जाव अचरिमोत्ति । छट्ठं एगिदियसयं समत्तं ॥ ६ ॥ जहा कण्हलेस्सभवसिद्धिर्एहि सयं भाणियं एवं णीललेस्सभवसिद्धिर्एहिवि सयं भाणियव्वं । सत्तमं एगिदियसयं समत्तं ॥ ७ ॥ एवं काउलेस्सभवसिद्धिर्एहिवि सयं । अट्ठमं एगिदियसयं समत्तं ॥ ८ ॥ कइविहा णं भंते ! अभवसिद्धिया एगिदिया प० ? गोयमा ! पंचविहा अभवसिद्धिया एगिदिया प०, तं०—पुढविककाइया जाव वणस्सइकाइया एवं जहेव भवसिद्धियसयं भाणियं णवरं णव उद्देसगा चरिमअचरिमउद्देसगवज्जा सेसं तहेव । णवमं एगिदियसयं समत्तं ॥ ९ ॥ एवं कण्हलेस्सअभवसिद्धियएगिदियसयं पि । दसमं एगिदियसयं समत्तं ॥ १० ॥ णीललेस्सअभवसिद्धियएगिदिएहिवि सयं ॥ ११ ॥ काउलेस्सअभवसिद्धियसयं, एवं चत्तारिवि अभवसिद्धियसयाणि णव २ उद्देसगा भवंति, एवं एयाणि बारस एगिदियसयाणि भवंति ॥ ८४८ ॥

तेत्तीसइमं सयं समत्तं

॥ चोत्तीसइमं सयं—एगिदियसेढि सयं ॥

कइविहा णं भंते ! एगिदिया प० ? गोयमा ! पंचविहा एगिदिया प०, तं०—पुढविककाइया जाव वणस्सइकाइया, एवं एएणं चैव चउवकएणं भेएणं भाणियव्वा जाव वणस्सइकाइया, अपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरत्थिमिल्ले चरिमंते समोहए समोहणित्ता जे भविए इमीसे रयणप्पभाए पुढवीए पच्चत्थिमिल्ले चरिमंते अपज्जत्तसुहुमपुढविकाइयत्ताए उववज्जित्तए से णं भंते ! कइसमइएणं विग्गहेणं उववज्जज्जा ? गोयमा ! एगसमइएण वा दुसमइएण वा तिसमइएण वा विग्गहेणं उव-

वज्जेज्जा, से केणट्ठेणं भंते ! एवं वुच्चइ एगसमइएण वा दुसमइएण वा जाव उववज्जेज्जा ? एवं खलु गोयमा ! मए सत्त सेढीओ प०, तं०-उज्जुआयया सेढी एगओवंका दुहओवंका एगओखहा दुहओखहा चक्कवाला अद्धचक्कवाला ७, उज्जुआययाए सेढीए उववज्जमाणे एगसमइएणं विग्गहेणं उववज्जेज्जा, एगओवंकाए सेढीए उववज्जमाणे दुसमइएणं विग्गहेणं उववज्जेज्जा, दुहओवंकाए सेढीए उववज्जमाणे तिसमइएणं विग्गहेणं उववज्जेज्जा, से तेणट्ठेणं गोयमा ! जाव उववज्जेज्जा । अपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरत्थिमिल्ले चरिमंते समोहए २ ता जे भविए इमीसे रयणप्पभाए पुढवीए पच्चत्थिमिल्ले चरिमंते पज्जत्तसुहुमपुढविकाइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा ? गोयमा ! एगसमइएण वा दुसमइएण वा सेसं तं चेव जाव से तेणट्ठेणं जाव विग्गहेणं उववज्जेज्जा, एवं अपज्जत्तसुहुमपुढविकाइओ पुरत्थिमिल्ले चरिमंते समोहणावेत्ता पच्चत्थिमिल्ले चरिमंते बायरपुढविकाइएसु अपज्जत्तएसु उववाएयव्वो, ताहे तेसु चेव पज्जत्तएसु ४, एवं आउक्काइएसुवि चत्तारि आत्तावगा सुहुमेहिं अपज्जत्तएहिं ताहे पज्जत्तएहिं बायरेहिं अपज्जत्तएहिं ताहे पज्जत्तएहिं उववाएयव्वो ४, एवं चेव सुहुमतेउकाइएहिंवि अपज्जत्तएहिं १, ताहे पज्जत्तएहिं उववाएयव्वो २, अपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरत्थिमिल्ले चरिमंते समोहए समोहणिसा जे भविए मणुस्सखेत्ते अपज्जत्तबायरतेउकाइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा ? सेसं तं चेव, एवं पज्जत्तबायरतेउक्काइयत्ताए उववाएयव्वो ४, वाउक्काइएसु सुहुमबायरेसु जहा आउक्काइएसु उववाइओ तहा उववाएयव्वो ४, एवं वणस्सइकाइएसुवि २० । पज्जत्तसुहुमपुढविकाइए णं भंते ! इमीसे रयणप्पभाए पुढवीए०? एवं पज्जत्तसुहुमपुढविकाइओवि पुरत्थिमिल्ले चरिमंते समोहणावेत्ता एएणं चेव कमेणं एएसु चेव बीससु ठाणेसु उववाएयव्वो जाव बायरवणस्सइकाइएसु पज्जत्तएसुवि ४०, एवं अपज्जत्तबायरपुढविकाइओवि ६०, एवं पज्जत्तबायरपुढविकाइओवि ८०, एवं आउक्काइओवि चउसुवि गमएसु पुरत्थिमिल्ले चरिमंते समोहए एयाए चेव वत्तव्वयाए एएसु चेव बीसइठाणेसु उववाएयव्वो १६०, सुहुमतेउकाइओवि अपज्जत्तओ पज्जत्तओ य एएसु चेव बीससु ठाणेसु उववाए-

यवो । अपञ्जत्तबायरतेउक्काइए णं भंते ! मणुस्सखेत्ते समोहए २ ता जं भविए इमीसे रयणप्पभाए पुढवीए पच्चत्थिमिल्ले चरिमंते अपञ्जत्तमुहुम-पुढविकाइयत्ताए उववज्जित्तए से णं भंते ! कइसमइएणं विगहेणं उववज्जेज्जा सेसं तहेव जाव से तेणट्ठेणं० एवं पुढविकाइएसु चउवहेसुवि उववाएयव्वो, एवं आउकाइएसु चउवहेसुवि, तेउकाइएसु सुहुमेसु अपञ्जत्तएसु पञ्जत्तएसु य एवं चेव उववाएयव्वो, अपञ्जत्तबायरतेउक्काइए णं भंते ! मणुस्सखेत्ते समोहए २ ता जं भविए मणुस्सखेत्ते अपञ्जत्तबायरतेउक्काइयत्ताए उववज्जित्तए से णं भंते ! कइसमइएणं० सेसं तं चेव, एवं पञ्जत्तबायरतेउक्काइयत्ताएवि उववाएयव्वो, वाउकाइयत्ताए य वणस्सइकाइयत्ताए य जहा पुढविकाइएसु तहेव चउवकएणं भेएणं उववाएयव्वो, एवं पञ्जत्तबायरतेउक्काइआंवि समयखेत्ते समोहणावेत्ता एएसु चेव वीसाए ठाणेसु उववाएयव्वो जहेव अपञ्जत्तओ उववाइओ, एवं सव्वत्थवि बायरतेउक्काइया अपञ्जत्तगा य पञ्जत्तगा य समयखेत्ते उववाएयव्वो समोहणावेयव्वादि २४०, वाउक्काइया वणस्सइकाइया य जहा पुढविकाइया तहेव चउवकएणं भेएणं उववाएयव्वो जाव पञ्जत्ता ४०० । बायर-वणस्सइकाइए णं भंते ! इमीसे रयणप्पभाए पुढवीए पुरत्थिमिल्ले चरिमंते समो-हए समोहणित्ता जं भविए इमीसे रयणप्पभाए पुढवीए पच्चत्थिमिल्ले चरि-मंते पञ्जत्तबायरवणस्सइकाइयत्ताए उववज्जित्तए से णं भंते ! कइसमइएणं० सेसं तहेव जाव से तेणट्ठेणं०, अपञ्जत्तमुहुमपुढविकाइए णं भंते ! इमीसे रयणप्पभाए पुढवीए पच्चत्थिमिल्ले चरिमंते समोहए २ ता जं भविए इमीसे रयणप्पभाए पुढवीए पुरत्थिमिल्ले चरिमंते अपञ्जत्तमुहुमपुढविकाइयत्ताए उववज्जित्तए से णं भंते ! कइसमइएणं० सेसं तहेव णिरवसेसं, एवं जहेव पुरत्थिमिल्ले चरिमंते सव्वपएसुधि समोहया पच्चत्थिमिल्ले चरिमंते समय-खेत्ते य उववाइया जे य समयखेत्ते समोहया पच्चत्थिमिल्ले चरिमंते समयखेत्ते य उववाइया एवं एएणं चेव कमेणं पच्चत्थिमिल्ले चरिमंते समयखेत्ते य समो-हया पुरत्थिमिल्ले चरिमंते समयखेत्ते य उववाएयव्वो तेणेव गमएणं, एवं एएणं गमएणं दाहिणिल्ले चरिमंते (समयखेत्ते य) समोहयाणं उत्तरिल्ले चरिमंते समयखेत्ते य उववाओ एवं चेव उत्तरिल्ले चरिमंते -समयखेत्ते य समोहया दाहिणिल्ले चरिमंते समयखेत्ते य उववाएयव्वो तेणेव गमएणं, अपञ्जत्तमुहुम-

पुढविकाइए णं भंते ! सक्करप्पभाए पुढवीए पुरत्थिमिल्ले चरिमंते समोहए
 २ ता जे भविए सक्करप्पभाए पुढवीए पच्चत्थिमिल्ले चरिमंते अपज्जत्तसुहुम-
 पुढविकाइयत्ताए उववज्जित्तए० एवं जहेव रयणप्पभाए जाव से तेणट्ठेणं एवं
 एएणं कमेणं जाव पज्जत्तएसु सुहुमतेउकाइएमु । अपज्जत्तसुहुमपुढविकाइए णं
 भंते ! सक्करप्पभाए पुढवीए पुरत्थिमिल्ले चरिमंते समोहए समोहणित्ता जे
 भविए समयखेत्ते अपज्जत्तबायरतेउवकाइयत्ताए उववज्जित्तए से णं भंते ! कइ-
 समइएणं पुच्छा, गोयमा ! दुसमइएण वा तिसमइएण वा विग्गहेणं उववज्जेज्जा ।
 से केणट्ठेणं भंते ! ० पुच्छा, एवं खलु गोयमा ! मए सत्त सेढीओ प०, तं०-
 उज्जआयया जाव अद्धक्कवाला, एगओवंकाए सेढीए उववज्जमाने दुसमइएणं
 विग्गहेणं उववज्जेज्जा दुहओवंकाए सेढीए उववज्जमाने तिसमइएणं विग्गहेणं
 उववज्जेज्जा से तेणट्ठेणं०, एवं पज्जत्तएसुवि बायरतेउवकाइएसु, सेसं जहा
 रयणप्पभाए, जेऽवि बायरतेउकाइया अपज्जत्तगा य पज्जत्तगा य समयखेत्ते
 समोहणित्ता दोच्चाए पुढवीए पच्चत्थिमिल्ले चरिमंते पुढविकाइएसु चउव्विहेसु
 भाउक्काइएसु चउव्विहेसु तेउकाइएसु दुविहेसु वाउकाइएसु चउव्विहेसु वण-
 स्सइकाइएसु चउव्विहेसु उववज्जंति तेऽवि एवं चेव दुसमइएण वा तिसमइ-
 एण वा विग्गहेणं उववाएयव्वा, बायरतेउवकाइया अपज्जत्तगा य पज्जत्तगा
 य जाहे तेसु चेव उववज्जंति ताहे जहेव रयणप्पभाए तहेव एगसमइयदुसमइय-
 तिसमइयविग्गहा भाणियव्वा सेसं जहेव रयणप्पभाए तहेव गिरवसेसं, जहा
 सक्करप्पभाए वत्तव्वया भणिया एवं जाव अहैसत्तमाए भाणियव्वा ॥८४६॥
 अपज्जत्तसुहुमपुढविकाइए णं भंते ! अहोलीयखेत्तणालीए बाहिरिल्ले खेत्ते
 समोहए २ ता जे भविए उड्डुलीयखेत्तणालीए बाहिरिल्ले खेत्ते अपज्जत्तसुहुम-
 पुढविकाइयत्ताए उववज्जित्तए से णं भंते ! कइसमइएणं विग्गहेणं उववज्जे-
 ज्जा ? गोयमा ! तिसमइएण वा चउसमइएण वा विग्गहेणं उववज्जेज्जा । से
 केणट्ठेणं भंते ! एवं वुच्चइ-तिसमइएण वा चउसमइएण वा विग्गहेणं उव-
 वज्जेज्जा ? गोयमा ! अपज्जत्तसुहुमपुढविकाइए णं अहोलीयखेत्तणालीए
 बाहिरिल्ले खेत्ते समोहए २ ता जे भविए उड्डुलीयखेत्तणालीए बाहिरिल्ले खेत्ते
 अपज्जत्तसुहुमपुढविकाइयत्ताए एगपयरंसि अणुसेढीए उववज्जित्तए से णं
 तिसमइएणं विग्गहेणं उववज्जेज्जा जे भविए विसेढीए उववज्जित्तए से णं

चउसमइएणं विग्गहेणं उववज्जेज्जा, से तेणट्ठेणं जाव उववज्जेज्जा, एवं पज्जत्तसुहुमपुढविकाइयत्ताएवि, एवं जाव पज्जत्तसुहुमतेउकाइयत्ताए ! अपज्जत्तसुहुमपुढविकाइए णं भंते ! अहोलोग जाव समोहणित्ता जे भविए समयखेत्ते अपज्जत्तबायरतेउकाइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा ? गोयमा ! दुसमइएण वा तिसमइएण वा विग्गहेणं उववज्जेज्जा । से केणट्ठेणं०? एवं खलु गोयमा ! मए सत्त सेढीओ प०, तं०—उज्जु-आयया जाव अद्धचक्कवाला, एगओवकाए सेढीए उववज्जमाणे दुसमइएणं विग्गहेणं उववज्जेज्जा दुहओवकाए सेढीए उववज्जमाणे तिसपइएणं विग्गहेणं उववज्जेज्जा से तेणट्ठेणं०, एवं पज्जत्तएसुवि बायरतेउकाइएसुवि उववाए-यव्वो, वाउवकाइयवणस्सइकाइयत्ताए चउवकएणं भेएणं जहा आउवकाइयत्ताए तहेव उववाएयव्वो २०, एवं जहा अपज्जत्तसुहुमपुढविकाइयत्ताए गमओ भणिओ एवं पज्जत्तसुहुमपुढविकाइयत्ताए भाणियव्वो तहेव वीसाए ठाणेसु उववाए-यव्वो ४० । अहोलोयखेतणालीए बाहिरिल्ले खेत्ते समोहए समोहणित्ता एवं बायरपुढविकाइयत्ताए अपज्जत्तगस्स य भाणियव्वं ८०, एवं आउवकाइयत्ताए चउव्विहस्सवि भाणियव्वं १६०, सुहुमतेउवकाइयत्ताए दुविहस्सवि एवं चेव २००। अपज्जत्तबायरतेउवकाइए णं भंते ! समयखेत्ते समोहए २ त्ता जे भविए उडु-लोगखेतणालीए बाहिरिल्ले खेत्ते अपज्जत्तसुहुमपुढविकाइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा ? गोयमा ! दुसमइएण वा तिसमइएण वा चउसमइएण वा विग्गहेणं उववज्जेज्जा । से केणट्ठेणं० अट्ठो जहेव रयणप्पभाए तहेव सत्त सेढीओ एवं जाव अपज्जत्तबायरतेउकाइए णं भंते ! समयखेत्ते समोहए २ त्ता जे भविए उडुलोयखेतणालीए बाहिरिल्ले खेत्ते पज्जत्तसुहुमतेउकाइयत्ताए उववज्जित्तए से णं भंते ! सेसं तं चेव । अपज्जत्तबायर-तेउवकाइए णं भंते ! समयखेत्ते समोहए २ त्ता जे भविए समयखेत्ते अपज्जत्त-बायरतेउवकाइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा ? गोयमा ! एगसमइएण वा दुसमइएण वा तिसमइएण वा विग्गहेणं उववज्जेज्जा । से केणट्ठेणं० अट्ठो जहेव रयणप्पभाए तहेव सत्त सेढीओ, एवं पज्जत्तबायरतेउकाइयत्ताएवि, वाउकाइएसु वणस्सइकाइएसु य जहा पुढविकाइएसु उववाइएओ तहेव चउवकएणं भेएणं उववाएयव्वो, एवं

पञ्जत्तबायरतेउकाइओवि एएसु चैव ठाणेषु उववाएयव्वो, वाउवकाइयवण-
 स्सइकाइयाणं जहेव पुढविकाइयत्ते उववाइओ तहेव भाणियव्वो । अपञ्जत्त-
 सुहुमपुढविकाइए णं भंते ! उड्डलोगखेत्तणालीए बाहिरिल्ले खेत्ते समोहए
 समोहणित्ता जे भविए अहेलोगखेत्तणालीए बाहिरिल्ले खेत्ते अपञ्जत्तसुहुमपुढ-
 विकाइयत्ताए उववज्जित्तए से णं भंते ! कइसमइएणं० ? एवं उड्डलोगखेत्त-
 णालीए बाहिरिल्ले खेत्ते समोहयाणं अहेलोगखेत्तणालीए बाहिरिल्ले खेत्ते उव-
 वज्जयाणं सो चैव गमओ णिरवसेसो भाणियव्वो जाव बायरवणस्सइकाइओ
 पञ्जत्तओ बायरवणस्सइकाइएसु पञ्जत्तएसु उववाइओ । अपञ्जत्तसुहुमपुढ-
 विकाइए णं भंते ! लोगस्स पुरत्थिमिल्ले चरिमंते समोहए २ त्ता जे भविए
 लोगस्स पुरत्थिमिल्ले चैव चरिमंते अपञ्जत्तसुहुमपुढविकाइयत्ताए उववज्जि-
 त्तए से णं भंते ! कइसमइएणं विग्गहेणं उववज्जेज्जा ? गोयमा ! एगसम-
 इएण वा दुसमइएण वा तिसमइएण वा चउसमइएण वा विग्गहेणं उववज्जेज्जा ।
 से केणट्ठेणं भंते ! एवं वृच्चइ-एगसमइएण वा जाव उववज्जेज्जा ? एवं
 ललु गोयमा ! मए सत्त सेढीओ प०, तंजहा-उज्जुआयया जाव अद्धचक्क-
 वाला, उज्जुआययाए सेढीए उववज्जमाणे एगसमइएणं विग्गहेणं उववज्जेज्जा,
 एगओवकाए सेढीए उववज्जमाणे दुसमइएणं विग्गहेणं उववज्जेज्जा, दुहओव-
 काए सेढीए उववज्जमाणे जे भविए एगपयरमि अणुसेढि उववज्जित्तए से
 णं तिसमइएणं विग्गहेणं उववज्जेज्जा जे भविए विसेढि उववज्जित्तए से
 णं चउसमइएणं विग्गहेणं उववज्जेज्जा, से तेणट्ठेणं जाव उववज्जेज्जा, एवं
 अपञ्जत्तसुहुमपुढविकाइओ लोगस्स पुरत्थिमिल्ले चरिमंते समोहए २ त्ता लोगस्स
 पुरत्थिमिल्ले चैव चरिमंते अपञ्जत्तएसु पञ्जत्तएसु य सुहुमपुढविकाइएसु सुहुम-
 आउकाइएसु अपञ्जत्तएसु पञ्जत्तएसु य सुहुमतेउवकाइएसु अपञ्जत्तएसु पञ्जत्त-
 एसु य सुहुमवाउकाइएसु अपञ्जत्तएसु पञ्जत्तएसु बायरवाउकाइएसु अपञ्जत्त-
 एसु पञ्जत्तएसु सुहुमवणस्सइकाइएसु अपञ्जत्तएसु पञ्जत्तएसु य बारसमुवि ठाणेषु
 एएणं चैव कमेणं भाणियव्वो, सुहुमपुढविकाइओ पञ्जत्तओ एवं चैव णिरवसेसो
 बारसमुवि ठाणेषु उववाएयव्वो २४, एवं एएणं गमएणं जाव सुहुमवणस्सइ-
 काइओ पञ्जत्तओ सुहुमवणस्सइकाइएसु पञ्जत्तएसु चैव भाणियव्वो । अपञ्जत्त-
 सुहुमपुढविकाइए णं भंते ! लोगस्स पुरत्थिमिल्ले चरिमंते समोहए २ त्ता जे

भविए लोगस्स दाहिणिल्ले चरिमंते अपज्जत्तसुहुमपुढविकाइएसु उववज्जित्तए से णं भंते ! कइसमइएणं विग्गहेणं उववज्जेज्जा ? गोयमा ! दुसमइएण वा तिसमइएण वा चउसमइएण वा विग्गहेणं उववज्जेज्जा । से केणट्ठेणं भंते ! एवं वुच्चइ० ? एवं खलु गोयमा ! मए सत्त सेढीओ पण्णत्ताओ, तंजहा—उज्जआयया जाव अद्धच्चकवाला, एगओवंकाए सेढीए उववज्जमाणे दुसमइएणं विग्गहेणं उववज्जेज्जा दुहुओवंकाए सेढीए उववज्जमाणे जे भविए एगपपरंसि अणुसेढीओ उववज्जित्तए से णं तिसमइएणं विग्गहेणं उववज्जेज्जा जे भविए विसेहि उववज्जित्तए से णं चउसमइएणं विग्गहेणं उववज्जेज्जा से तेणट्ठेणं गोयमा ! ०, एवं एएणं गमएणं पुरत्थिमिल्ले चरिमंते समोहए दाहिणिल्ले चरिमंते उववाएयव्वो जाव सुहुमवणस्सइकाइओ पज्जत्तओ सुहुमवणस्सइकाइएसु पज्जत्तएसु चेव, सब्बेमि दुसमइओ तिसमइओ चउसमइओ विग्गहो भाणियव्वो ! अपज्जत्तसुहुमपुढविकाइए णं भंते ! लोगस्स पुरत्थिमिल्ले चरिमंते समोहए २ त्ता जे भविए लोगस्स पच्चत्थिमिल्ले चरिमंते अपज्जत्तसुहुमपुढविकाइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा ? गोयमा ! एगसमइएण वा दुसमइएण वा तिसमइएण वा चउसमइएण वा विग्गहेणं उववज्जेज्जा । से केणट्ठेणं० ? एवं जहेव पुरत्थिमिल्ले चरिमंते समोहया पुरत्थिमिल्ले चेव चरिमंते उववाइया तहेव पुरत्थिमिल्ले चरिमंते समोहया पच्चत्थिमिल्ले चरिमंते उववाएयव्वो सब्बे । अपज्जत्तसुहुमपुढविकाइए णं भंते ! लोगस्स पुरत्थिमिल्ले चरिमंते समोहए २ त्ता जे भविए लोगस्स उत्तरिल्ले चरिमंते अपज्जत्तसुहुमपुढविकाइयत्ताए उववज्जित्तए से णं भंते ! एवं जहा पुरत्थिमिल्ले चरिमंते समोहओ दाहिणिल्ले चरिमंते उववाइओ तहा पुरत्थिमिल्ले समोहओ उत्तरिल्ले चरिमंते उववाएयव्वो । अपज्जत्तसुहुमपुढविकाइए णं भंते ! लोगस्स दाहिणिल्ले चरिमंते समोहए समोहणित्ता जे भविए लोगस्स दाहिणिल्ले चेव चरिमंते अपज्जत्तसुहुमपुढविकाइयत्ताए उववज्जित्तए० एवं जहा पुरत्थिमिल्ले समोहओ पुरत्थिमिल्ले चेव उववाइओ तहेव दाहिणिल्ले समोहए दाहिणिल्ले चेव उववाएयव्वो, तहेव गिरवसेसं जाव सुहुमवणस्सइकाइओ पज्जत्तओ सुहुमवणस्सइकाइएसु चेव पज्जत्तएसु दाहिणिल्ले चरिमंते उववाइओ एवं दाहिणिल्ले समोहओ पच्चत्थिमिल्ले चरिमंते उववाएयव्वो णवरं दुसमइय-

तिसमइयचउसमइयविग्गहो सेसं तहेव, दाहिणिल्ले समोहओ उत्तरिल्ले चरिमंते उववाएयव्वो जहेव सट्टाणे तहेव एगसमइयदुसमइयतिसमइयचउसमइयविग्गहो पुरत्थिमिल्ले जहा पच्चत्थिमिल्ले तहेव दुसमइयतिसमइयचउसमइयविग्गहो, पच्चत्थिमिल्ले चरिमंते समोहयाणं पच्चत्थिमिल्ले चेव उववज्जमाणाणं जहा सट्टाणे, उत्तरिल्ले उववज्जमाणाणं एगसमइओ विग्गहो णत्थि, सेसं तहेव, पुरत्थि-मिल्ले जहा सट्टाणे, दाहिणिल्ले एगसमइओ विग्गहो णत्थि, सेसं तं चेव, उत्तरिल्ले समोहयाणं उत्तरिल्ले चेव उववज्जमाणाणं जहेव सट्टाणे, उत्तरिल्ले समोहयाणं पुरत्थिमिल्ले उववज्जमाणाणं एवं चेव णवरं एगसमइओ विग्गहो णत्थि, उत्तरिल्ले समोहयाणं दाहिणिल्ले उववज्जमाणाणं जहा सट्टाणे, उत्तरिल्ले समोहयाणं पच्चत्थिमिल्ले उववज्जमाणाणं एगसमइओ विग्गहो णत्थि, सेसं तहेव जाव सुहुमवणस्सइकाइओ पज्जत्ताओ सुहुमवणस्सइकाइएसु पज्जत्तएसु चेव । कहिणं भंते ! बायरपुढविकाइयाणं पज्जत्तगाणं ठाणा प० ? गोयमा ! सट्टाणेणं अट्टसु पुढवीसु जहा ठाणपए जाव सुहुमवणस्सइकाइया जे य पज्जत्ता जे य अपज्जत्ता ते सब्बे एगविहा अविसेसमणाणत्ता सब्बलोमपरियावण्णा प० समणाउसो ! अपज्जत्तसुहुमपुढविकाइयाणं भंते ! कइ कम्मप्पगडीओ पणत्ताओ ? गोयमा ! अट्ट कम्मप्पगडीओ प०, तं०-णाणावरणिज्जं जाव अंतराइयं, एवं चउक्कएणं भएणं जहेव एगिदियसएसु जाव बायरवणस्सइकाइयाणं पज्जत्तगाणं । अपज्जत्तसुहुमपुढविकाइया णं भंते ! कइ कम्मप्पगडीओ बंधंति ? गोयमा ! सत्तविहबंधगावि अट्टविहबंधगावि जहा एगिदियसएसु जाव पज्जत्ता बायरवणस्सइकाइया । अपज्जत्तसुहुमपुढविकाइया णं भंते ! कइ कम्मप्पगडीओ वेदंति ? गोयमा ! चउइस कम्मप्पगडीओ वेदंति, तंजहा-णाणावरणिज्जं जहा एगिदियसएसु जाव पुरिसवेयवज्जं एवं जाव बायरवणस्सइकाइयाणं पज्जत्तगाणं । एगिदिया णं भंते ! कओ उववज्जंति कि णेरइएंहंतो उववज्जंति० ? जहा वक्कंतीए पुढविकाइयाणं उववाओ । एगिदियाणं भंते ! कइ समुग्घाया प० ? गोयमा ! चत्तारि समुग्घाया प०, तंजहा-वेयणासमुग्घाए जाव वेउक्विपसमुग्घाए । एगिदिया णं भंते ! कि तुल्लट्ठिईया तुल्लविसेसाहियं कम्मं पकरंति तुल्लट्ठिईया वेमायविसेसाहियं कम्मं पकरंति वेमायट्ठिईया तुल्लविसेसाहियं कम्मं पकरंति वेमायट्ठिईया वेमायविसेसाहियं कम्मं पकरंति ?

गोयमा ! अत्थेगइया तुल्लट्टिईया तुल्लविसेसाहियं कम्मं पकरेंति अत्थेगइया तुल्लट्टिईया वेमायविसेसाहियं कम्मं पकरेंति अत्थेगइया वेमायट्टिईया तुल्ल-विसेसाहियं कम्मं पकरेंति अत्थेगइया वेमायट्टिईया वेमायविसेसाहियं कम्मं पकरेंति । से केणट्ठेणं भंते ! एवं वुच्चइ-अत्थेगइया तुल्लट्टिईया जाव वेमाय-विसेसाहियं कम्मं पकरेंति ? गोयमा ! एगिदिया चउत्विहा पण्णत्ता, तंजहा-अत्थेगइया समाउया समोववण्णगा १, अत्थेगइया समाउया विसमोववण्णगा २, अत्थेगइया विसमाउया समोववण्णगा ३, अत्थेगइया विसमाउया विसमो-ववण्णगा ४ । तत्थ णं जे ते समाउया समोववण्णगा ते णं तुल्लट्टिईया तुल्ल-विसेसाहियं कम्मं पकरेंति १, तत्थ णं जे ते समाउया विसमोववण्णगा ते णं तुल्लट्टिईया वेमायविसेसाहियं कम्मं पकरेंति २, तत्थ णं जे ते विसमाउया समोववण्णगा ते णं वेमायट्टिईया तुल्लविसेसाहियं कम्मं पकरेंति ३, तत्थ णं जे ते विसमाउया विसमोववण्णगा ते णं वेमायट्टिईया वेमायविसेसाहियं कम्मं पकरेंति ४ । से तेणट्ठेणं गोयमा ! जाव वेमायविसेसाहियं कम्मं पकरेंति । सेवं भंते ! २ स्ति जाव विहरइ ॥ ८५० ॥ ३४-१-१ ॥ कइविहा णं भंते ! अणंतरोववण्णगा एगिदिया प० ? गोयमा ! पंचविहा अणंतरोव-वण्णगा एगिदिया पण्णत्ता, तंजहा-पुढविकाइया दुयाभेओ जहा एगिदियसएसु जाव बायरवणस्सइकाइया य । कहिण्णं भंते ! अणंतरोववण्णगाणं बायरपुढ-विकाइयाणं ठाणा प० ? गोयमा ! सट्टाणेणं अट्टसु पुढवीसु, तं०-रयणपभाए जहा ठाणपए जाव दीवेसु समुद्देसु एत्थ णं अणंतरोववण्णगाणं बायरपुढ-विकाइयाणं ठाणा पण्णत्ता, उववाएणं सव्वलोए समुग्धाएणं सव्वलोए सट्टाणेणं लोगस्स असंखेज्जइभागे, अणंतरोववण्णगसुहुमपुढविकाइया एगविहा अवि-सेसमण्णत्ता सव्वलोए परिवावण्णा पण्णत्ता, सभणाउसो ! एवं एएणं कसेणं सव्वे एगिदिया भाणियव्वा, सट्टाणाइं सव्वेसिं जहा ठाणपए तेसिं पज्जत्तगाणं बायरारणं उववायसमुग्घायसट्टाणाणि जहा तेसिं चेव अपज्जत्तगाणं बायरारणं, सुहुमाणं सव्वेसिं जहा पुढविकाइयाणं भाणिया तहेव भाणियव्वा जाव वण-स्सइकाइयत्ति । अणंतरोववण्णगसुहुमपुढविकाइयाणं भंते ! कइ कम्मप्पगडीओ प० ? गोयमा ! अट्ट कम्मप्पगडीओ पण्णत्ताओ एवं जहा एगिदियसएसु अणं-तरोववण्णगउद्देसए तहेव पण्णत्ताओ तहेव बंधंति तहेव वेदंति जाव अणंतरो-ववण्णगा बायरवणस्सइकाइया । अणंतरोववण्णगएगिदिया णं भंते ! कओ

उववज्जति०? जहेव ओहि ए उहेसओ भणिओ तहेव । अणंतरोववण्णगएगिदिया-
यानं भंते !- कइ समुग्घाया प० ? गोयमा ! दोण्ण समुग्घाया प०, तं०-
वेयणासमुग्घाए य कसायसमुग्घाए य । अणंतरोववण्णगएगिदिया णं भंते ! कि
तुल्लट्ठिईया तुल्लविसेसाहियं कम्मं पकरेंति पुच्छा तहेव ? गोयमा ! अत्थेगइया
तुल्लट्ठिईया तुल्लविसेसाहियं कम्मं पकरेंति अत्थेगइया तुल्लट्ठिईया वेमाय-
विसेसाहियं कम्मं पकरेंति । से केणट्ठेणं भंते ! जाव वेमायविसेसाहियं कम्मं
पकरेंति ? गोयमा ! अणंतरोववण्णगा एगिदिया दुविहा प०, तं०-अत्थेगइया
समाउया समोववण्णगा अत्थेगइया समाउया विसमोववण्णगा, तत्थ णं जे ते
समाउया समोववण्णगा ते णं तुल्लट्ठिईया तुल्लविसेसाहियं कम्मं पकरेंति, तत्थ
णं जे ते समाउया विसमोववण्णगा ते णं तुल्लट्ठिईया वेमायविसेसाहियं कम्मं
पकरेंति, से तेणट्ठेणं जाव वेमायविसेसाहियं कम्मं पकरेंति । सेवं भंते ! २ त्ति
॥ ८५१ ॥ ३४-१-२ ॥ कइविहा णं भंते ! परंपरोववण्णगा एगिदिया प० ?
गोयमा ! पंचविहा परंपरोववण्णगा एगिदिया प०, तं०-पुढविक्काइया भेओ
चउवकओ जाव वणस्सइकाइयत्ति । परंपरोववण्णगअपज्जत्तसुहुमपुढविकाइए
णं भंते ! इमीसे रयणप्पभाए पुढवीए पुरत्थिमिल्ले चरिमंते समोहए २ त्ता
जे भविए इमीसे रयणप्पभाए पुढवीए जाव पच्चत्थिमिल्ले चरिमंते अपज्जत्त-
सुहुमपुढविकाइयत्ताए उववज्जत्तए०? एवं एएणं अभिलावेणं जहेव पढमो
उहेसओ जाव लोगचरिमंतोत्ति । कहिण्णं भंते ! परंपरोववण्णगबायरपुढ-
विकाइयाणं ठाणा प० ? गोयमा ! सट्ठाणेणं अट्टसु पुढवीसु एवं एएणं अभिलावेणं
जहा पढमे उहेसए जाव तुल्लट्ठिईयत्ति । सेवं भंते ! २ त्ति ॥ ३४-१-३ ॥
एवं सेसावि अट्ट उहेसगा जाव अचरिमोत्ति, णवरं अणंतरा अणंतरसरिसा परंपरा
परंपरसरिसा चरिमा य अचरिमा य एवं चेव, एवं एए एक्कारस उहेसगा
॥ ८५२ ॥ ३४-१-११ ॥ पढमं एगिदियसेदिसयं समत्तं । कइविहा णं भंते !
कण्हलेस्सा एगिदिया प० ? गोयमा ! पंचविहा कण्हलेस्सा एगिदिया प० भेओ
चउवकओ जहा कण्हलेस्सएगिदियसए जाव वणस्सइकाइयत्ति । कण्हलेस्सअप-
ज्जत्तसुहुमपुढविकाइए णं भंते ! इमीसे रयणप्पभाए पुढवीए पुरत्थिमिल्ले एवं
एएणं अभिलावेणं जहेव ओहिउहेसओ जाव लोगचरिमंतेत्ति सव्वथ कण्ह-
लेस्सेसु चेव उववाएयव्वो । कहिण्णं भंते ! कण्हलेस्सअपज्जत्तगबायरपुढविकाइ-

याणं ठाणा प० ? गोयमा ! एवं एएणं अभिलावेणं जहा ओहियउद्देसओ जाव तुल्लट्टिईयत्ति । सेवं भंते ! २ त्ति । एवं एएणं अभिलावेणं जहेव पढमं सेट्ठिसयं तहेव एक्कारस उद्देसगा भाणियव्वा ॥ ३४-२-११ ॥ बिइयं एंगिदियसेट्ठिसयं समत्तं । एवं णीललेस्सेहिंवि तइयं सयं । काउलेस्सेहिंवि सयं, एवं चेव चउत्तयं सयं । भविसिद्धियएंगिदिएहिंवि सयं पंचमं समत्तं । कइविहा णं भंते ! कण्हलेस्सभवसिद्धियएंगिदिया प० ? एवं जहेव ओहियउद्देसओ । कइविहा णं भंते ! अणंतरोववण्णगा कण्हलेस्सा भवसिद्धिया एंगिदिया प० जहेव अणंतरोववण्णगउद्देसओ ओहिओ तहेव । कइविहा णं भंते ! परंपरोववण्णगकण्हलेस्सभवसिद्धिया एंगिदिया प० ? गोयमा ! पंचविहा परंपरोववण्णगकण्हलेस्सभवसिद्धियएंगिदिया प० ओहिओ भओ चउक्कओ जाव वणस्सइकाइयत्ति । परंपरोववण्णगकण्हलेस्सभवसिद्धियअपज्जत्तसुहुमपुढविकाइए णं भंते ! इमीसे रयणप्पमाए पुढवीए एवं एएणं अभिलावेणं जहेव ओहिओ उद्देसओ जाव लोयच्चरि-मत्तेत्ति, सव्वत्थ कण्हलेस्सेसु भवसिद्धिएसु उववाएयव्वो । कहिण्णं भंते ! परंपरोववण्णकण्हलेस्सभवसिद्धियपज्जत्तदायरपुढविकाइयाणं ठाणा प० ? एवं एएणं अभिलावेणं जहेव ओहिओ उद्देसओ जाव तुल्लट्टिईयत्ति, एवं एएणं अभिलावेणं कण्हलेस्सभवसिद्धियएंगिदिएहिंवि तहेव एक्कारसउद्देसगसंजुत्तं सयं, छट्ठं सयं समत्तं । णीललेस्सभवसिद्धियएंगिदिएसु सत्तमं सयं समत्तं । एवं काउलेस्सभवसिद्धियएंगिदिएहिंवि सयं अट्ठमं सयं । जहा भवसिद्धिर्एहिं चत्तारि सयाणि एवं अभवसिद्धिर्एहिं चत्तारि सयाणि भाणियव्वाणि, णवरं चरिमअचरिमवज्जा णव उद्देसगा भाणियव्वा, सेसं तं चेव, एवं एयाइं बारस एंगिदियसेट्ठीसयाइं भाणियव्वाइं । सेवं भंते ! २ त्ति जाव बिहरइ ॥ ८५३ ॥

चोतीसइमं सयं समत्तं

॥ पणतीसइमं सयं—एंगिदियमहाजुम्मसयं ॥

कइ णं भंते ! महाजुम्भा पणत्ता ? गोयमा ! सोलस महाजुम्भा प०, तं०—कडजुम्मकडजुम्मे १, कडजुम्मतेओगे २, कडजुम्मदावरजुम्मे ३, कडजुम्मकलिओगे ४, तेओगकडजुम्मे ५, तेओगतेओगे ६, तेओगदावरजुम्मे ७, तेओगकलिओगे ८, दावरजुम्मकडजुम्मे ९, दावरजुम्मतेओगे १०, दावरजुम्मदावरजुम्मे ११, दावरजुम्मकलिओगे १२, कलिओगकडजुम्मे १३, कलिओग-

तेओगे १४, कलिओगदावरजुम्मे १५, कलिओगकलिओगे १६ । से केणट्टेणं भन्ते ! एवं बुच्चई-सोलस महाजुम्मा प०, तं०-कडजुम्मकडजुम्मे जाव कलिओगकलिओगे ? गोयमा ! जे णं रासी चउक्कएणं अवहारेणं अवहीरमाणे चउपज्जवसिए जे णं तस्स रासिस्स अवहारसमया तेऽवि कडजुम्मा सेत्तं कडजुम्मकडजुम्मे १, जे णं रासी चउक्कएणं अवहारेणं अवहीरमाणे तिपज्जवसिए जे णं तस्स रासिस्स अवहारसमया कडजुम्मा सेत्तं कडजुम्मतेओए २, जे णं रासी चउक्कएणं अवहारेणं अवहीरमाणे दुपज्जवसिए जे णं तस्स रासिस्स अवहारसमया कडजुम्मा सेत्तं कडजुम्मदावरजुम्मे ३, जे णं रासी चउक्कएणं अवहारेणं अवहीरमाणे एगपज्जवसिए जे णं तस्स रासिस्स अवहारसमया कडजुम्मा सेत्तं कडजुम्मकलिओगे ४, जे णं रासी चउक्कएणं अवहारेणं अवहीरमाणे चउपज्जवसिए जे णं तस्स रासिस्स अवहारसमया तेओगा सेत्तं तेओगकडजुम्मे ५, जे णं रासी चउक्कएणं अवहारेणं अवहीरमाणे तिपज्जवसिए जे णं तस्स रासिस्स अवहारसमया तेओगा सेत्तं तेओगतेओगे ६, जे णं रासी चउक्कएणं अवहारेणं अवहीरमाणे दुपज्जवसिए जे णं तस्स रासिस्स अवहारसमया तेओगा सेत्तं तेओगदावरजुम्मे ७, जे णं रासी चउक्कएणं अवहारेणं अवहीरमाणे एगपज्जवसिए जे णं तस्स रासिस्स अवहारसमया तेओगा सेत्तं तेओगकलिओगे ८, जे णं रासी चउक्कएणं अवहारेणं अवहीरमाणे चउपज्जवसिए जे णं तस्स रासिस्स अवहारसमया दावरजुम्मा सेत्तं दावरजुम्मकडजुम्मे ९, जे णं रासी चउक्कएणं अवहारेणं अवहीरमाणे तिपज्जवसिए जे णं तस्स रासिस्स अवहारसमया दावरजुम्मा सेत्तं दावरजुम्मतेओए १०, जे णं रासी चउक्कएणं अवहारेणं अवहीरमाणे दुपज्जवसिए जे णं तस्स रासिस्स अवहारसमया दावरजुम्मा सेत्तं दावरजुम्मदावरजुम्मे ११, जे णं रासी चउक्कएणं अवहारेणं अवहीरमाणे एगपज्जवसिए जे णं तस्स रासिस्स अवहारसमया दावरजुम्मा सेत्तं दावरजुम्मकलिओए १२, जे णं रासी चउक्कएणं अवहारेणं अवहीरमाणे चउपज्जवसिए जे णं तस्स रासिस्स अवहारसमया कलिओगा सेत्तं कलिओगकडजुम्मे १३, जे णं रासी चउक्कएणं अवहारेणं अवहीरमाणे तिपज्जवसिए जे णं तस्स रासिस्स अवहारसमया कलिओगा सेत्तं कलिओगतेओए १४, जे णं रासी चउक्कएणं अवहारेणं अवहीरमाणे दुपज्जवसिए जे णं

तस्स रासिस्स अवहारसमया कलिओगा सेत्तं कलिओगदावरजुम्मे १५, जे णं रासी चउष्कएणे अवहारेणं अवहीरमाणे एगपज्जवसिए जे णं तस्स रासिस्स अवहारसमया कलिओगा सेत्तं कलिओगकलिओगे १६ । ते तेणट्ठेणं जाव कलिओगकलिओगे ॥ ८५४ ॥ कडजुम्मकडजुम्मएगिदिया णं भंते ! कअं उववज्जंति कि णेरइएहिंतो जहा उप्पलुट्ठेसए तहा उववाओ । ते णं भंते ! जीवा एगसमएणं केवइया उववज्जंति ? गोयमा ! सोलस वा संखेज्जा वा असंखेज्जा वा अणंता वा उववज्जंति । ते णं भंते ! जीवा समए समए पुच्छा, गोयमा ! ते णं अणंता समए समए अवहीरमाणा २ अणंतार्हा ओसप्पिणी-उस्सप्पिणीहिं अवहीरंति णो चेव णं अवहरिया सिया, उच्चत्तं जहा उप्पलुट्ठेसए । ते णं भंते ! जीवा णाणावरणिज्जस्स कम्मस्स कि बंधगा अबंधगा ? गोयमा ! बंधगा णो अबंधगा, एवं सव्वेसि आउयवज्जाणं, आउयस्स बंधगा वा अबंधगा वा । ते णं भंते ! जीवा णाणावरणिज्जस्स कम्मस्स वेयगा पुच्छा, गोयमा ! वेयगा णो अवेयगा, एवं सव्वेसि । ते णं भंते ! जीवा कि सायावेयगा असायावेयगा पुच्छा, गोयमा ! सायावेयगा वा असायावेयगा वा, एवं उप्पलुट्ठेसगपरिवाडी, सव्वेसि कम्माणं उदई णो अणुदई, छ्हं कम्माणं उदीरगा णो अणुदीरगा, वेयणिज्जाउयाणं उदीरगा वा अणुदीरगा वा । ते णं भंते ! जीवा कि कण्हलेस्सा पुच्छा, गोयमा ! कण्हलेस्सा वा णीललेस्सा वा काउलेस्सा वा तेउलेस्सा वा, णो सम्मादिट्ठी णो सम्मामिच्छादिट्ठी मिच्छादिट्ठी, णो णाणी अण्णाणी णियमं दुअण्णाणी तं०—मइअण्णाणी य सुयअण्णाणी य, णो मणजोगी णो वइजोगी, कायजोगी, सागारोवउत्ता वा अणागारोवउत्ता वा । तेसि णं भंते ! जीवाणं सरीरा कइवण्णा जहा उप्पलुट्ठेसए सव्वत्थ पुच्छा, गोयमा ! जहा उप्पलुट्ठेसए ऊसासगा वा णीसासगा वा णो उस्सासणीसासगा वा, आहारगा वा अणाहारगा वा, णो विरथा अविरया णो विरयाविरया, सकिरिया णो भकिरिया, सत्तविहबंधगा वा अट्ठविहबंधगा वा, आहारसण्णोवउत्ता वा जाव परिगहसण्णोवउत्ता वा, कोहकसाई वा जाव लोभकसाई वा, णो इत्थिवेयगा णो पुरिसवेयगा णपुंसगवेयगा, इत्थिवेयबंधगा वा, पुरिसवेयबंधगा वा णपुंसगवेयबंधगा वा, णो सण्णी असण्णी, सइंदिया णो अण्णदिया । ते णं भंते ! कडजुम्मकडजुम्मएगिदिया कालओ केवच्चिरं होइ ? गोयमा ! जहण्णेणं एषकं

समयं उक्कोसेणं अणंतं कालं-अणंता ओसप्यिणित्ससप्यिणीओ वणस्सइ-
 काइयकालो, संवेहो ण भण्णइ, आहारो जहा उप्पलुद्देसए णवरं णिब्वाघाएणं
 छद्दिसि वाघायं पडुच्च सिय तिदिसि सिय चउदिसि सिय पंचदिसि सेसं तहेव,
 ठिई जहण्णेणं एक्कं समयं अंतोमुहुत्तं उक्कोसेणं बावीसं वाससहस्साइं, समुघाया
 आइल्ला चत्तारि, मारणंतियसमुघाएणं समोहयावि मरंति असमोहयावि मरंति
 उव्वट्टणा जहा उप्पलुद्देसए । अहं भंते ! सव्वपाणा जाव सव्वसत्ता कडजुम्म २
 एगिदियात्ताए उव्ववण्णपुग्वा ? हंता गोयमा ! असइं अदुवा अणंतखुत्तो । कड-
 जुम्मतेओयएगिदिया णं भंते ! कओ उव्वज्जंति० ? उववाओ तहेव । ते णं
 भंते ! जीवा एगसमए० पुच्छा, गोयमा ! एगुणवीसा वा संखेज्जा वा असं-
 खेज्जा वा अणंता वा उव्वज्जंति, सेसं जहा कडजुम्मकडजुम्माणं जाव अणंत-
 खुत्तो । कडजुम्मदावरजुम्मएगिदिया णं भंते । कओ उव्वज्जंति० ? उववाओ
 तहेव । ते णं भंते ! जीवा एगसमएणं पुच्छा, गोयमा ! अट्टारस वा संखेज्जा
 वा असंखेज्जा वा अणंता वा उव्वज्जंति सेसं तहेव जाव अणंतखुत्तो । कडजुम्म-
 कलिओगएगिदिया णं भंते ! कओ उव्वज्जंति० ? उववाओ तहेव परिमाणं सत्तरस
 वा संखेज्जा वा असंखेज्जा वा अणंता वा सेसं तहेव जाव अणंतखुत्तो, तेओगकड-
 जुम्मएगिदिया णं भंते ! कओ उव्वज्जंति० ? उववाओ तहेव परिमाणं बारस वा
 संखेज्जा वा असंखेज्जा वा अणंता वा उव्वज्जंति सेसं तहेव जाव अणंतखुत्तो ।
 तेओयतेओयएगिदिया णं भंते ! कओ उव्वज्जंति० ? उववाओ तहेव परिमाणं
 पण्णरस वा संखेज्जा वा असंखेज्जा वा अणंता वा सेसं तहेव जाव अणंतखुत्तो,
 एधं एएसु सोलससु महाजुम्मेसु एक्को गमओ णवरं परिमाणे णाणत्तं तेओय-
 दावरजुम्मेसु परिमाणं चउद्दस वा संखेज्जा वा असंखेज्जा वा अणंता वा
 उव्वज्जंति, तेओगकलिओगेसु तेरस वा संखेज्जा वा असंखेज्जा वा अणंता वा
 उव्वज्जंति, दावरजुम्मकडजुम्मेसु अट्ट वा संखेज्जा वा असंखेज्जा वा अणंता
 वा उव्वज्जंति, दावरजुम्मतेओगेसु एक्कारस वा संखेज्जा वा असंखेज्जा वा
 अणंता वा उव्वज्जंति, दावरजुम्मदावरजुम्मेसु दस वा संखेज्जा वा असंखेज्जा
 वा अणंता वा उव्वज्जंति, दावरजुम्मकलिओगेसु णव वा संखेज्जा वा असं-
 खेज्जा वा अणंता वा उव्वज्जंति, कलिओगकडजुम्मेसु चत्तारि वा संखेज्जा
 वा असंखेज्जा वा अणंता वा उव्वज्जंति, कलिओगतेओगेसु सत्त वा संखेज्जा

वा असंखेज्जा वा अणंता वा उववज्जंति, कलिओगदावरज्जुमेसु छ वा संखेज्जा वा असंखेज्जा वा अणंता वा उववज्जंति । कलिओग २ एगिदिया णं भंते ! कओ उववज्जंति० ? उववाओ तहेव परिमाणं पंच वा संखेज्जा वा असंखेज्जा वा अणंता वा उववज्जंति सेसं तहेव जाव अणंतखुत्तो । सेवं भंते ! सेवं भंते ! त्ति ॥ ८५५ ॥

॥ ३५-१-१ ॥ पढमसमयकडज्जुम्म २ एगिदिया णं भंते ! कओ उववज्जंति० ? गोयमा ! तहेव एवं जहेव पढमो उद्देसओ तहेव सोलसखुत्तो बिडओवि भाणियव्वो, तहेव सव्वं णवरं इमाणि दस णाणत्ताणि-ओगाहणा जहण्णेणं अंगुलस्स असंखेज्जइभागं उवकोसेणवि अंगुलस्स असंखेज्जइभागं, आउयकम्मस्स णो बंधगा अबंधगा आउयस्स णो उदीरगा अणुदीरगा, णो उस्सासगा णो गिरसासगा णो उस्सासणिस्सासगा, सत्तविह्वंधगा णो अट्टविह्वंधगा । ते णं भंते ! पढमसमयकडज्जुम्म २-एगिदियत्ति कालओ केवच्चिरं होइ ? गोयमा ! एवकं समयं, एवं ठिईएवि, समुग्घाया आइल्ला दोण्णि, समोहया ण पुच्छिज्जंति उववट्टणा ण पुच्छिज्जइ, सेसं तहेव सव्वं णिरवसेसं, सोलससुवि गमएसु जाव अणंतखुत्तो । सेवं भंते ! २ त्ति ॥ ८५६ ॥ ३५-१-२ ॥ अपढमसमयकडज्जुम्म २ एगिदिया णं भंते ! कओ उववज्जंति० ? एसो जहा पढमुद्देसो सोलसहिवि जुम्मेसु तहेव पेयव्वो जाव कलिओगकलिओगत्ताए जाव अणंतखुत्तो । सेवं भंते ! २ त्ति ॥ ३५-१-३ ॥ चरिमसमयकडज्जुम्म २ एगिदिया णं भंते ! कओ उववज्जंति० ? एवं जहेव पढमसमयउद्देसओ णवरं देवा ण उववज्जंति तेउल्लेस्ता ण पुच्छिज्जंति, सेसं तहेव । सेवं भंते ! २ ! त्ति ॥ ३५-१-४ ॥ अचरिमसमयकडज्जुम्म २ एगिदिया णं भंते ! कओ उववज्जंति० ? जहा अपढमसमयउद्देसो तहेव णिरवसेसो भाणियव्वो । सेवं भंते ! २ त्ति ॥ ३५-१-५ ॥ पढमपढमसमयकडज्जुम्म २ एगिदिया णं भंते ! कओ उववज्जंति० ? जहा पढमसमयउद्देसओ तहेव णिरवसेसं । सेवं भंते ! २ त्ति जाव विहरइ ॥ ३५-१-६ ॥ पढमपढमसमयकडज्जुम्मकडज्जुम्मएगिदिया णं भंते ! कओ उववज्जंति० ? जहा पढमसमयउद्देसओ तहेव भाणियव्वो । सेवं भंते ! २ त्ति ॥ ३५-१-७ ॥ पढमचरिमसमयकडज्जुम्म २ एगिदिया णं भंते ! कओ उववज्जंति० ? जहा चरिमुद्देसओ तहेव णिरवसेसं । सेवं भंते ! २ त्ति ॥ ३५-१-८ ॥ पढमअचरिमसमयकडज्जुम्म २ एगिदिया णं भंते ! कओ उववज्जंति० ?

जहा (पढमुद्देसओ) बीओ उद्देसओ तहेव गिरवसेसं । सेवं भंते ! २ त्ति जाव विहरइ ॥ ३५-१-६ ॥ चरिम२समयकडजुम्म २ एगिदिया णं भंते ! कओ उववज्जंति० ? जहा चउत्थो उद्देसओ तहेव । सेवं भंते ! सेवं भंते ! त्ति ॥ ३५-१-१० ॥ चरिमअचरिमसमयकडजुम्म२एगिदिया णं भंते ! कओ उववज्जंति० ? जहा पढमसमयउद्देसओ तहेव गिरवसेसं । सेवं भंते ! सेवं भंते ! त्ति जाव विहरइ ॥ ३५-१-११ ॥ एवं एए एक्कारस उद्देसगा, पढमो तइओ पंचमओ य सरिसगमा सेसा अट्टु सरिसगमगा, णवरं चउत्थे छट्ठे अट्टुमे दसमे य देवा ण उववज्जंति, तेउलेस्सा णत्थि ॥ ८५७ ॥ पणतोसइमे सए पढमं एगिदियमहाजुम्मसयं समत्तं ॥ १ ॥

कण्हलेस्सकडजुम्म २ एगिदिया णं भंते ! कओ उववज्जंति० ? गोयमा ! उववाओ तहेव एवं जहा ओहिउद्देसए णवरं इमं णाणत्तं । ते णं भंते ! जीवा कण्हलेस्सा ? हुंता कण्हलेस्सा । ते णं भंते ! कण्हलेस्सकडजुम्म २ एगिदियत्ति कालओ केवच्चिरं होइ ? गोयमा ! जहणेणं एक्कं समयं उक्कोसेणं अंतो-मुट्ठत्तं, एवं ठिईएवि, सेसं तहेव जाव अणंतखुत्तो, एवं सोलसवि जुम्मा भाणियक्वा । सेवं भंते ! २ त्ति ॥ ३५-२-१ ॥ पढमसमयकण्हलेस्सकडजुम्म २ एगिदिया णं भंते ! कओ उववज्जंति० ? जहा पढमसमयउद्देसओ णवरं-ते णं भंते ! जीवा कण्हलेस्सा ? हुंता कण्हलेस्सा, सेसं तहेव । सेवं भंते ! सेवं भंते ! त्ति ॥ ३५-२-२ ॥ एवं जहा ओहियसए एक्कारस उद्देसगा भाणिया तहा कण्हलेस्ससएवि एक्कारस उद्देसगा भाणियक्वा, पढमो तइओ पंचमो य सरिसगमगा सेसा अट्टुवि सरिसगमगा णवरं चउत्थेअट्टुअट्टुमदसमेसु उववाओ णत्थि देवस्स । सेवं भंते ! २ त्ति ॥ ३५ इमे सए बिइयं एगिदियमहाजुम्मसयं समत्तं ॥ २ ॥ एवं णोल्लेस्सेहिंवि सयं कण्हलेस्ससयसरिसं एक्कारस उद्देसगा तहेव । सेवं भंते ! २ त्ति । तइयं एगिदियमहाजुम्मसयं समत्तं ॥ ३ ॥ एवं काउ-लेस्सेहिंवि सयं कण्हलेस्ससयसरिसं । सेवं भंते ! २ त्ति । चउत्थं एगिदिय-महाजुम्मसयं ॥ ४ ॥ भवसिद्धियकडजुम्म २ एगिदिया णं भंते ! कओ उव-वज्जंति० ? जहा ओहियसयं तहेव णवरं एक्कारसमुवि उद्देसएसु । अहं भंते ! सव्वपाणा जाव सव्वसत्ता भवसिद्धियकडजुम्म२एगिदियत्ताए उववणपुक्वा ? गोयमा ! णो इणट्ठे समट्ठे, सेसं तहेव । सेवं भंते ! २ त्ति । पंचम एगि-

दियमहाजुम्मसयं समत्तं ॥ ५ ॥ कण्हलेस्सभवसिद्धियकडजुम्मसएंगिदिया णं भंते ! कओ उववज्जंति० ? एवं कण्हलेस्सभवसिद्धियएंगिदिएहिंवि सयं विइय-सयकण्हलेस्ससरिसं भाणियत्वं । सेवं भंते ! सेवं भंते ! त्ति । छट्ठं एंगिदिय-महाजुम्मसयं समत्तं ॥ ६ ॥ एवं णीललेस्सभवसिद्धियएंगिदिएहिंवि सयं । सेवं भंते ! सेवं भंते ! त्ति । सत्तमं एंगिदियमहाजुम्मसयं समत्तं ॥ ७ ॥ एवं काउलेस्सभवसिद्धियएंगिदिएहिंवि तहेव एक्कारसउट्टेसगसंजुत्तं सयं, एवं एयाणि चत्तारि भवसिद्धियसयाणि, चउसुवि सएसु सव्वे पाणा जाव उववण्णपुव्वा ? णो इणट्ठे समट्ठे । सेवं भंते ! सेवं भंते ! त्ति । अट्ठमं एंगिदियमहाजुम्मसयं समत्तं ॥ ८ ॥ जहा भवसिद्धिएहिं चत्तारि सयाइं भणियाइं एवं अभवसिद्धिए-हिंवि चत्तारि सयाणि लेस्सासंजुत्ताणि भाणियत्वाणि, सव्वे पाणा तहेव णो इणट्ठे समट्ठे, एवं एयाइं बारस एंगिदियमहाजुम्मसयाइं भवति । सेवं भंते ! सेवं भंते ! त्ति ॥ ८५ ॥

पणतीसइमं सयं समत्तं

॥ छत्तीसइमं सयं—बेइंदियमहाजुम्मसयं ॥

कडजुम्मसबेइंदिया णं भंते ! कओ उववज्जंति० ? उववाओ जहा वक्क-तोए, परिमाणं सोलस वा संखेज्जा वा असंखेज्जा वा उववज्जंति, अवहारो जहा उप्पलुट्टेसए, ओगाहणा जहण्णेणं अंगुलस्स असंखेज्जइसागं उवकोसेणं बारस जोयणाइं, एवं जहा एंगिदियमहाजुम्ममाणं पढमुट्टेसए तहेव णवरं तिण्णि लेस्साओ देवा ण उववज्जंति सम्मदिट्ठी वा मिच्छादिट्ठी वा णो सम्मामिच्छा-दिट्ठी णाणो वा अण्णाणो वा णो मणजोगी वइजोगी वा कायजोगी वा । ते भंते ! कडजुम्मसबेइंदिया कालओ केवच्चिरं होइ ? गोयमा ! जहण्णेण एक्कं समयं उवकोसेणं संखेज्जं कालं, ठिईं जहण्णेणं एक्कं समयं उवकोसेणं बारस संवच्छराइं, आहारो णियमं छहिंति, तिण्णिसमुग्घाया सेसं तहेव जाव अणंतखुत्तो, एवं सोलससुवि जुम्मेसु । सेवं भंते ! २ त्ति ॥ बेइंदियमहाजुम्म-सए पढमो उट्टेसो समत्तो ॥ ३६-१-१ ॥ पढमसमयकडजुम्मसबेइंदिया णं भंते ! कओ उववज्जंति० ? एवं जहा एंगिदियमहाजुम्ममाणं पढमसमयउट्टेसए दस णाणत्ताइं ताइं चेव दस इहवि, एक्कारसमं इमं णाणत्तं—णो मणजोगी णो

धइजोगी कायजोगी सेसं जहा बेइंदियाणं चैव पढमुद्देसए । सेवं भंते ! सेवं भंते !
 त्ति । एवं एएवि जहा एगिदियमहाजुम्मसु एक्कारस उद्देसगा तहेव भाणि-
 यक्वा णवरं चउत्थंछट्टुअट्टमदसमेसु सम्मत्तणाणाणि ण भण्णंति, जहेव एगिदिएसु
 पढमी तइओ पंचमो थ एक्कगमा सेसा अट्ट एक्कगमा ॥ ३६ इमे सए पढमं
 बेइंदियमहाजुम्मसयं समत्तं ॥ १ ॥ कण्हलेस्सकडजुम्म२बेइंदिया णं भंते !
 कओ उववज्जंति० ? एवं चैव कण्हलेस्सेसुवि एक्कारसउद्देसगसंजुत्तं सयं,
 णवरं लेस्सा संचिट्टणा ठिई जहा एगिदियकण्हलेस्साणं । विइयं बेइंदियसयं
 समत्तं ॥२॥ एवं णीललेस्सेहिंवि सयं । तइयं सयं समत्तं ॥३॥ एवं काउलेस्से-
 हिंवि, चउत्थं सयं समत्तं ॥ ४ ॥ भवसिद्धियकडजुम्म२बेइंदिया णं भंते ! एवं
 भवसिद्धियसयाधि चत्तारि तेणेव पुक्खगमएणं णेयक्वा णवरं सव्वे पाणा० णो
 इणट्ठे समट्ठे, सेसं तहेव ओहियसयाणि चत्तारि । सेवं भंते ! सेवं भंते !
 त्ति । छत्तीसइमे सए अट्टमं सयं समत्तं ॥ ८ ॥ जहा भवसिद्धियसयाणि चत्तारि
 एवं अभवसिद्धियसयाणि चत्तारि भाणियक्वाणि णवरं सम्मत्तणाणाणि सव्वेहिं
 णरिय, सेसं तं चैव, एयाणि बारस बेइंदियमहाजुम्मसयाणि भवंति । सेवं भंते !
 सेवं भंते ! त्ति ॥ ८५६ ॥ बेइंदियमहाजुम्मसया समत्ता ॥ १२ ॥

छत्तीसइमं सयं समत्तं

॥ सत्ततीसइमं सयं ॥

कडजुम्म२तेइंदिया णं भंते ! कओ उववज्जंति० ? एवं तेइंदिएसुवि
 बारस सया कायक्वा बेइंदियसयसरिसा णवरं-ओगाहणा जहण्णेणं अंगुलस्स
 असंखेज्जइभागं उक्कोसेणं तिण्णि गाउयाइं, ठिई जहण्णेणं एक्कं समयं उक्को-
 सेणं एगुणपण्णं राइंदियाइं, सेसं तहेव । सेवं भंते ! सेवं भंते ! त्ति ॥ ८६० ॥
 तेइंदियमहाजुम्मसया समत्ता ॥ १२ ॥ सत्ततीसइमं सयं समत्तं ॥

॥ अट्टतीसइमं सयं ॥

चउरिदिएहिंवि एवं चैव बारस सया कायक्वा णवरं ओगाहणा जहण्णेणं
 अंगुलस्स असंखेज्जइभागं उक्कोसेणं चत्तारि गाउयाइं, ठिई जहण्णेणं एक्कं
 समयं उक्कोसेणं छुम्मासा, सेसं जहा बेइंदियाणं । सेवं भंते ! २ त्ति ॥ ८६१ ॥
 चउरिदियमहाजुम्मसया समत्ता ॥ १२ ॥ अट्टतीसइमं सयं समत्तं ॥

॥ एगूणयालीसइमं सयं ॥

कडजुम्म२असण्णिपंचिदिया णं भंते ! कओ उववज्जंति० ? जहा बेइवि-
याणं तहेव असण्णिसुवि बारस सया कायव्वा णवरं ओगाहणा जहण्णेणं अंगु-
लस्स असंखेज्जइभागं उवकोसेणं जोयणसहस्सं संचिट्ठणा जहण्णेणं एवकं समयं
उवकोसेणं पुव्वकोडिपुहुत्तं ठिई जहण्णेणं एवकं समयं उवकोसेणं पुव्वकोडी सेसं
जहा बेइदियाणं । सेवं भंते ! २ ति ॥ ८६२ ॥ असण्णिपंचिवियमहाजुम्मसया
समत्ता ॥ १२ ॥

एगूणयालीसइमं सयं समत्तं

॥ चत्तालीसइमं सयं—सण्णिपंचिदियमहाजुम्म सयं ॥

कडजुम्म२सण्णिपंचिदिया णं भंते ! कओ उववज्जंति० ? उववाओ चउ-
सुवि गईसु, संखेज्जवासाउयअसंखेज्जवासाउयपज्जत्तअपज्जत्तएसु य ण कओवि
पडिसेहो जाव अणुत्तरविमाणत्ति, परिमाणं अवहारो ओगाहणा य जहा अस-
ण्णिपंचिदियाणं, वेयणिज्जवज्जाणं सत्तण्हं पगडीणं बंधगा वा अबंधगा वा,
वेयणिज्जस्स बंधगा णो अबंधगा, मोह्णिज्जस्स वेधगा वा अवेधगा वा सेसाणं
सत्तण्हवि वेधगा णो अवेधगा, सायावेधगा वा असायावेधगा वा, मोह्णिज्जस्स
उदई वा अणुदई वा सेसाणं सत्तण्हवि उदई णो अणुदई, णामस्स गोयस्स य
उदीरगा णो अणुदीरगा सेसाणं छण्हवि उदीरगा वा अणुदीरगा वा, कण्हलेस्सा
वा जाव सुवकलेस्सा वा, सम्मदिट्ठी वा मिच्छादिट्ठी वा सम्मामिच्छादिट्ठी
वा, णाणी वा अण्णाणी वा मणज्जोगी वा वइज्जोगी कायज्जोगी, उवओगो वण्ण-
माई उस्सासगा वा णीसासगा वा आहरगा य जहा एगिदियाणं, विरया य
अविरया य विरयाविरया य, सकिरिया णो अकिरिया । ते णं भंते ! जीवा
किं सत्तविहबंधगा अट्ठविहबंधगा छट्ठविहबंधगा एगविहबंधगा वा ? गोयमा ।
सत्तविहबंधगा वा जाव एगविहबंधगा वा । ते णं भंते ! जीवा किं आहार-
सण्णोवउत्ता जाव परिग्गहसण्णोवउत्ता णोसण्णोवउत्ता ? गोयमा ! आहार-
सण्णोवउत्ता वा जाव णोसण्णोवउत्ता वा, सन्वत्थ पुच्छा भाणियव्वा कोहकसाई
वा जाव लोभकसाई वा अकसाई वा, इत्थोवेयगा वा पुरिसवेयगा वा णपुंसग-
वेयगा वा अवेयगा वा, इत्थोवेयबंधगा वा पुरिसवेयबंधगा वा णपुंसगवेयबंधगा

वा अबंधगा वा, सग्णी णो असग्णी, सद्द्विद्या णो अग्निद्विद्या, संचिद्विद्या जह-
 ण्णेणं एक्कं समयं उक्कोसेणं सागरोवमसयपुहुत्तं सादरेणं, आहारो तहेव जाव
 णियमं छद्दिस्सि, ठिई जहण्णेणं एक्कं समयं उक्कोसेणं तेत्तीसं सागरोवमाइं, छ
 समुग्घायमा आइत्तलगा मारणंतियसमुग्घाएणं समोह्यावि मरंति असमोह्यावि
 मरंति, उक्वट्टणा जहेव उक्वाओ ण कत्थइ पडिसेहो जाव अणुत्तरविमाणति,
 अह भंते ! सक्वपाणा जाव अणंतखुत्तो, एवं सोलससुवि जुम्मेसु षाणियम्बं
 जाव अणंतखुत्तो, णवरं-परिमाणं जहा बेइद्वियाणं सेसं तहेव । सेवं भंते ! २
 ति ॥ ४०-१-१ ॥ पढमसमयकडजुम्म२सग्णिपंचिद्विद्या णं भंते ! कओ उव-
 वज्जंति० ? उक्वाओ परिमाणं आहारो जहा एएसि चैव पढमोहेसए ओगा-
 हणा बंधो वेयो वेयणा उदई उदीरगा य जहा बेइद्वियाणं पढमसमइयाणं तहेव
 कण्हलेस्सा वा जाव सुक्कलेस्सा वा, सेसं जहा बेइद्वियाणं पढमसमइयाणं जाव
 अणंतखुत्तो णवरं इत्थिवेयगा वा पुरिसवेयगा वा णपुंसगवेयगा वा सग्णिणो
 असग्णिणो सेसं तहेव एवं सोलससुवि जुम्मेसु परिमाणं तहेव सक्बं । सेवं भंते !
 २ ति ॥ ४०-१-२ ॥ एवं एत्थवि एक्कारस उहेसगा तहेव, पढमो तदओ
 पंचमो य सरिसगमगा सेसा अट्टवि सरिसगमगा, चउत्थछट्टुअट्टमदसमेसु णत्थि
 विसेसो कायव्वो । सेवं भंते ! सेवं भंते ! ति ॥ ८६३ ॥ चत्तालीसइमे सए
 पढमं सग्णिपंचिद्वियमहाजुम्मसयं समत्तं ॥ १ ॥

कण्हलेस्सकडजुम्म २ सग्णिपंचिद्विद्या णं भंते ! कओ उक्वज्जंति० ?
 तहेव जहा पढमुहेसओ सग्णीणं, णवरं, बंधो वेओ उदई उदीरणा लेस्सा बंधग-
 सग्णा-कसायवेयबंधगा य एयाणि जहा बेइद्वियाणं, कण्हलेस्साणं वेओ तिबिहो
 अवेयगा णत्थि संचिद्विद्या जहण्णेणं एक्कं समयं उक्कोसेणं तेत्तीसं सागरोवमाइं
 अंतोमहुत्तमभहियाइं एवं ठिईएवि णवरं-ठिईए अंतोमहुत्तमभहियाइं ण
 मण्णंति सेसं जहा एएसि चैव पढमे उहेसए जाव अणंतखुत्तो । एवं सोलस-
 सुवि जुम्मेसु । सेवं भंते ! सेवं भंते ! ति । पढमसमयकण्हलेस्सकडजुम्म२
 सग्णिपंचिद्विद्या णं भंते ! कओ उक्वज्जंति० ? जहा सग्णिपंचिद्वियपढम-
 समयउहेसए तहेव णिरवसेसं णवरं-ते णं भंते ! जीवा कण्हलेस्सा ? हंता
 कण्हलेस्सा सेसं तं चैव, एवं सोलससुवि जुम्मेसु । सेवं भंते ! सेवं भंते ! ति ।
 एवं एएवि एक्कारस उहेसगा कण्हलेस्ससए, पढमतइयपंचमा सरिसगमगा

सेसा अट्टवि एक्क(सरिस)गमगा । सेवं भंते २ त्ति । विइयं सयं समत्तं ॥२॥
 एवं णील्लेस्सेसुवि सयं, णवरं संचिट्टुणा जहण्णेणं एक्कं समयं उक्कोसेणं दस
 सागरोवमाइं पलिओवमस्स असंखेज्जइभागमब्भहियाइं, एवं ठिईएवि, एवं तिसु
 उद्देसएसु, सेसं तं चेव । सेवं भंते ! सेवं भंते ! त्ति । तइयं सयं समत्तं ॥३॥
 एवं काउल्लेस्ससयंपि, णवरं संचिट्टुणा जहण्णेणं एक्कं समयं उक्कोसेणं तिण्णि
 सागरोवमाइं पलिओवमस्स असंखेज्जइभागमब्भहियाइं, एवं ठिईएवि, एवं तिसुवि
 उद्देसएसु, सेसं तं चेव । सेवं भंते ! सेवं भंते ! त्ति । चउत्थं सयं ॥ ४ ॥ एवं
 तेउल्लेस्सेसुवि सयं, णवरं संचिट्टुणा जहण्णेणं एक्कं समयं उक्कोसेणं दो साग-
 रोवमाइं पलिओवमस्स असंखेज्जइभागमब्भहियाइं एवं ठिईएवि णवरं णोस-
 ण्णोवउत्ता वा, एवं तिसुवि (गमएसु) उद्देसएसु सेसं तं चेव । सेवं भंते । २
 त्ति । पंचमं सयं ॥५॥ जहा तेउल्लेस्सासयं तथा पम्हलेस्सासयंपि णवरं संचि-
 ट्टुणा जहण्णेणं एक्कं समयं उक्कोसेणं दस सागरोवमाइं अंतोमूहुत्तमब्भहियाइं,
 एवं ठिईएवि, णवरं अंतोमूहुत्तं ण भण्णइ सेसं तहेव, एवं एएसु पंचसु सएसु
 जहा क्कह्लेस्सासए गमओ तथा णेयव्वो जाव अणंतखुत्तो । सेवं भंते ! २ त्ति ।
 छट्ठं सयं समत्तं ॥६॥ सुक्कलेस्ससयं जहा ओहियसयं णवरं संचिट्टुणा ठिईय
 जहा क्कह्लेस्ससए सेसं तहेव जाव अणंतखुत्तो । सेवं भंते ! २ त्ति । सत्तमं सयं
 समत्तं ॥७॥ भवसिद्धियकडजुम्म २ सण्णिपंचिदिया णं भंते ! कओ उववज्जंतिं?
 जहा पढमं सण्णिसयं तथा णेयव्वं भवसिद्धियाभिलावेणं णवरं सव्वपाणां?
 णो इणट्ठे समट्ठे, सेसं तं चेव । सेवं भंते ! सेवं भंते ! त्ति । अट्ठमं सयं
 समत्तं ॥ ८ ॥ क्कह्लेस्सभवसिद्धियकडजुम्म २ सण्णिपंचिदिया णं भंते ! कओ
 उववज्जंतिं? एवं एएणं अभिलावेणं जहा ओहियक्कह्लेस्ससयं । सेवं भंते ।
 २ त्ति । णवमं सयं ॥ ९ ॥ एवं णील्लेस्सभवसिद्धिएवि सयं । सेवं भंते ! २
 त्ति । दसमं सयं ॥१०॥ एवं जहा ओहियाणि सण्णिपंचिदियाणं सत्त सयाणि
 भणियाणि एवं भवसिद्धिएहिवि सत्त सयाणि कायव्वाणि, णवरं सत्तमुवि
 सएसु सव्वपाणा जाव णो इणट्ठे समट्ठे, सेसं तं चेव । सेवं भंते ! २ त्ति ।
 भवसिद्धियसया समत्ता । चउत्तमं सयं समत्तं ॥१४॥ अभवसिद्धियकडजुम्म
 सण्णिपंचिदिया णं भंते ! कओ उववज्जंतिं? उववाओ तहेव अणुत्तरविमाण-
 वज्जो परिमाणं अवहारो उच्चत्तं बंधो वेओ वेयणं उदओ उदीरणा य जहा
 क्कह्लेस्ससए क्कह्लेस्सा वा जाव सुक्कलेस्सा वा णो सम्मदिट्ठी मिच्छादिट्ठी

णो सम्मामिच्छाविट्ठी णो णाणी अण्णाणी एवं जहा कण्हलेस्ससए णवरं
 णो विरया अविरया णो विरयाविरया संचिट्ठणा ठिई य जहा ओहिउद्देसए
 समुघाया आइल्लागा पंच उव्वट्ठणा तहेव अणुत्तरविमाणवज्जं सव्वपाणा० णो
 इणट्ठे समट्ठे सेसं जहा कण्हलेस्ससए जाव अणंतखुत्तो, एवं सोलसमुवि
 जुम्मेसु । सेवं भंते ! २ त्ति । पढमसमयअभवसिद्धियकडजुम्म २ सण्णिपंचि-
 दिया णं भंते ! कओ उव्वज्जंति०? जहा सण्णीणं पढमसमयउद्देसए तहेव
 णवरं सम्मत्तं सम्मामिच्छत्तं णाणं च सव्वत्थ णत्थि सेसं तहेव । सेवं भंते ! २ त्ति ।
 एवं एत्थ वि एक्कारस उद्देसगा कायव्वा पढमतइयपंचमा एक्कगमा सेसा अट्ठवि
 एक्क गमा । सेवं भंते ! २ त्ति । पढमं अभवसिद्धियमहाजुम्मसयं समत्तं । चत्तालीस-
 इमे सए पण्णरसमं सयं समत्तं ॥ १५ ॥ कण्हलेस्सअभवसिद्धियकडजुम्म २ सण्णिपंचि-
 दिया णं भंते ! कओ उव्वज्जंति०? जहा एएसिजेव ओहियसयं तथा कण्हलेस्स-
 सयंपि णवरं ते णं भंते ! जीवा कण्हलेस्सा ? हंता कण्हलेस्सा ठिई संचिट्ठणा य जहा
 कण्हलेस्ससए सेसं तं जेव । सेवं भंते ! २ त्ति । बिइयं अभवसिद्धियमहाजुम्मसयं ।
 चत्तालीसइमे सए सोलसमं सयं समत्तं ॥ १६ ॥ एवं छहिवि लेस्साहं छ सया काय-
 व्वा जहा कण्हलेस्ससयं णवरं संचिट्ठणा ठिई य जहेव ओहियसए तहेव भाणियव्वा,
 णवरं सुव्वकलेस्साए उक्कोसेणं एक्कतीसं सागरोवमाइं अंतोमुहुत्तमव्वहियाइं, ठिई
 एवं जेव णवरं अंतोमुहुत्तं णत्थि जहण्णणं तहेव सव्वत्थ सम्मत्तणाणाणि णत्थि
 विरई विरयाविरई अणुत्तरविमाणोववत्ति एयाणि णत्थि, सव्वपाणा० णो
 इणट्ठे समट्ठे । सेवं भंते ! २ त्ति । एवं एयाणि सत्त अभवसिद्धियमहाजुम्म-
 सयाइं भवति । सेवं भंते ! २ त्ति । एवं एयाणि एक्कवीसं सण्णिमहाजुम्म-
 सयाणि । सव्वानिवि एक्कासीइमहाजुम्मसया समत्ता ॥ ८६४ ॥

चत्तालीसइमं सयं समत्तं

॥ इक्कचत्तालीसइमं सयं—रासीजुम्म सयं ॥

कइ णं भंते ! रासीजुम्मा प०? गोयमा ! चत्तारि रासीजुम्मा पण्णत्ता,
 तंजहा—कडजुम्मे जाव कलिओगे । से केणट्ठेणं भंते ! एवं वुच्चइ—चत्तारि
 रासीजुम्मा पण्णत्ता तं०—कडजुम्मे जाव कलिओगे ? गोयमा ! जे णं रासी
 चउक्कएणं अवहारेणं अवहीरमाणे चउपज्जवसिए सेत्तं रासीजुम्मकडजुम्मे,
 एवं जाव जे णं रासी चउक्कएणं अवहारेणं अवहीरमाणे एगपज्जवसिए सेत्तं

रासीजुम्मकलिओगे, से तेणट्ठेणं जाव कलिओगे । रासीजुम्मकडजुम्मेणेरइया णं भंते ! कओ उववज्जंति० ? उववाओ जहा ववकंतीए । ते णं भंते ! जीवा एणसमएणं केवइया उववज्जंति ? गोयमा ! चत्तारि वा अट्ठ वा बारस वा सोलस वा संखेज्जा वा असंखेज्जा वा उववज्जंति । ते णं भंते ! जीवा कि संतरं उववज्जंति णिरंतरं उववज्जंति ? गोयमा ! संतरपि उववज्जंति णिरंतरपि उववज्जंति, संतरं उववज्जमाणा जहण्णेणं एकं समयं उवकोसेणं असंखेज्जा समया अंतरं कट्ठ उववज्जंति, णिरंतरं उववज्जमाणा जहण्णेणं दो समया उवकोसेणं असंखेज्जा समया अणुसमयं अविरहियं णिरंतरं उववज्जंति । ते णं भंते ! जीवा जं समयं कडजुम्मा तं समयं तेओगा जं समयं तेओगा तं समयं कडजुम्मा ? गोयमा ! णो इणट्ठे समट्ठे । जं समयं कडजुम्मा तं समयं दावरजुम्मा जं समयं दावरजुम्मा तं समयं कडजुम्मा ? णो इणट्ठे समट्ठे । जं समयं कडजुम्मा तं समयं कलिओगा जंसमयं कलिओगा तंसमयं कडजुम्मा ? णो इणट्ठे समट्ठे । ते णं भंते ! जीवा कहिं उववज्जंति ? गोयमा ! से जहाणामए पवए पवमाणे एवं जहा उववायसए जाव णो परप्पओगेणं उववज्जंति । ते णं भंते ! जीवा कि आयजसेणं उववज्जंति आयजसेणं उववज्जंति ? गोयमा ! णो आयजसेणं उववज्जंति आयजसेणं उववज्जंति । जइ आयजसेणं उववज्जंति कि आयजसं उवजीवंति आयजसं उवजीवंति ? गोयमा ! णो आयजसं उवजीवंति आयजसं उवजीवंति । जइ आयजसं उवजीवंति कि सलेस्सा अलेस्सा ? गोयमा ! सलेस्सा णो अलेस्सा । जइ सलेस्सा कि सकिरिया अकिरिया ? गोयमा ! सकिरिया णो अकिरिया । जइ सकिरिया तेणेव भवग्गहणेणं सिज्जंति जाव अंतं करंति ? णो इणट्ठे समट्ठे । रासीजुम्मकडजुम्मअमुरकुमारा णं भंते ! कओ उववज्जंति० ? जहेव णेरइया तहेव णिरवसेसं एवं जाव पंचदियतिरिक्खजोणिया णवरं वणस्सइकाइया जाव असंखेज्जा वा अणंता वा उववज्जंति सेसं तं चेव, मणुस्सावि एवं चेव जाव णो आयजसेणं उववज्जंति आयजसेणं उववज्जंति । जइ आयजसेणं उववज्जंति कि आयजसं उवजीवंति आयजसं उवजीवंति ? गोयमा ! आयजसंपि उवजीवंति आयजसंपि उवजीवंति । जइ आयजसं उवजीवंति कि सलेस्सा अलेस्सा ? गोयमा ! सलेस्सावि अलेस्सावि । जइ अलेस्सा कि सकि-

रिया अकिरिया ? गोयमा ! णो सकिरिया अकिरिया । जइ अकिरिया तेणेव भवग्गहणेणं सिज्झंति जाव अंतं करेति ? हुंता सिज्झंति जाव अंतं करेति । जइ सलेस्सा कि सकिरिया अकिरिया ? गोयमा ! सकिरिया णो अकिरिया । जइ सकिरिया तेणेव भवग्गहणेणं सिज्झंति जाव अंतं करेति ? गोयमा ! अत्थेगइया तेणेव भवग्गहणेणं सिज्झंति जाव अंतं करेति अत्थेगइया णो तेणेव भवग्गहणेणं सिज्झंति जाव अंतं करेति । जइ आयअजसं उवजीवंति कि सलेस्सा अलेस्सा ? गोयमा ! सलेस्सा णो अलेस्सा । जइ सलेस्सा कि सकिरिया अकिरिया ? गोयमा ! सकिरिया णो अकिरिया । जइ सकिरिया तेणेव भवग्गहणेणं सिज्झंति जाव अंतं करेति ? गोयमा ! णो इणट्ठे समट्ठे । वाणमंतरजोइसियवेमाणिया जहा णेरइया । सेवं भंते ! २ ति । इवकचत्तालीसइमे रासीजुम्मसए पढ्मो उद्देसो ॥ ४१-१ ॥ राजीजुम्मतेओयणेरइया णं भंते ! कओ उववज्जंति० ? एवं चेव उद्देसओ भाणियव्वो णवरं परिमाणं तिण्णि वा सत्त वा एक्कारस वा पण्णरस वा संखेज्जा वा असंखेज्जा वा उववज्जंति, संतरं तहेव । ते णं भंते ! जीवा जंसमयं तेओगा तंसमयं कडजुम्मा जंसमयं कडजुम्मा तंसमयं तेओगा ? गोयमा ! णो इणट्ठे समट्ठे । जंसमयं तेओया तंसमयं दावरजुम्मा, जंसमयं दावरजुम्मा तंसमयं तेओया ? गोयमा ! णो इणट्ठे समट्ठे, एवं कलिओगेणवि समं, सेसं तं चेव जाव वेमाणिया णवरं उववाओ सव्वेसिं जहा वक्कंतीए । सेवं भंते ! २ ति ॥ ४१-२ ॥ रासीजुम्मदावरजुम्मणेरइया णं भंते ! कओ उववज्जंति० ? एवं चेव उद्देसओ णवरं परिमाणं दो वा छ वा दस वा संखेज्जा वा असंखेज्जा वा उववज्जंति संवेहो । ते णं भंते ! णीवा जंसमयं दावरजुम्मा तंसमयं कडजुम्मा जंसमयं कडजुम्मा तंसमयं दावरजुम्मा ? णो इणट्ठे समट्ठे, एवं तेओएणवि समं, एवं कलिओगेणवि समं, सेसं जहा पढ्मुद्देसए जाव वेमाणिया । सेवं भंते ! २ ति ॥ ४१-३ ॥ रासीजुम्मकलिओगणेरइया णं भंते ! कओ उववज्जंति० ? एवं चेव णवरं परिमाणं एक्को वा पंच वा णव वा तेरस वा संखेज्जा वा असंखेज्जा वा उववज्जंति संवेहो । ते णं भंते ! जीवा जंसमयं कलिओगा तंसमयं कडजुम्मा जंसमयं कडजुम्मा तंसमयं कलिओगा ? णो इणट्ठे समट्ठे एवं तेओएणवि समं, एवं दावरजुम्मेणवि समं, सेसं जहा पढ्मुद्देसए एवं जाव

वेमाणिया । सेवं भंते ! २ त्ति ॥४१-४॥ कण्हलेस्सरासीजुम्मकडजुम्मणेरइया
 णं भंते । कओ उववज्जंति०? उववाओ जहा धूमप्पभाए सेसं जहा पढमुद्दे-
 सए, असुरकुमारारणं तहेव एवं जाव वाणमंतरारणं मणुस्साणवि जहेव णेरइयाणं
 आयअजसं उवजीवंति अलेस्सा अकिरिया तेणेव भवग्गहणेणं सिज्जंति एवं ण
 भाणियव्वं सेसं जहा पढमुद्देसए । सेवं भंते ! २ त्ति ॥४१-५॥ कण्हलेस्सतेओए-
 हिवि एवं चेव उद्देसओ, सेवं भंते ! २ त्ति ॥४१-६॥ कण्हलेस्सदावरजुम्मोह-
 एवं चेव उद्देसओ । सेवं भंते ! २ त्ति ॥४१-७॥ कण्हलेस्सकलिओएहिवि एवं
 चेव उद्देसओ परिमाणं संवेहो य जहा ओहिएसु उद्देसएसु । सेवं भंते ! २
 त्ति ॥४१-८॥ जहा कण्हलेस्सेहि एवं णीललेस्सेहिवि चत्तारि उद्देसगा भाणि-
 यव्वा णिरवसेसा, णवरं णेरइयाणं उववाओ जहा व्रातुयप्पभाए, सेसं तं चेव ।
 सेवं भंते ! २ त्ति ॥ ४१-१२ ॥ काउलेस्सेहिवि एवं चेव चत्तारि उद्देसगा
 कायव्वा णवरं णेरइयाणं उववाओ जहा रयणप्पभाए, सेसं तं चेव । सेवं भंते !
 २त्ति ॥४१-१६॥ तेउलेस्सरासीजुम्मकडजुम्मअसुरकुमारारणं भंते ! कओ उव-
 वज्जंति०? एवं चेव णवरं जेसु तेउलेस्सा अत्थि तेसु भाणियव्वं, एवं एएवि
 कण्हलेस्सासरिसा चत्तारि उद्देसगा कायव्वा । सेवं भंते ! २ त्ति ॥ ४१-२० ॥
 एवं पम्हलेस्साएवि चत्तारि उद्देसगा कायव्वा पंचिदियतिरिक्खजोणियाणं मणु-
 स्साणं वेमाणियाण य एएसि पम्हलेस्सा, सेसाणं णत्थि । सेवं भंते ! २ त्ति ।
 ॥ ४१-२४ ॥ जहा पम्हलेस्साए एवं सुक्कलेस्साएवि चत्तारि उद्देसगा
 कायव्वा णवरं मणुस्साणं गमओ जहा ओहिउद्देसएसु सेसं तं चेव, एवं एए छसु
 लेस्सासु चउव्वीसं उद्देसगा ओहिया चत्तारि, सव्वे ते अट्ठावीसं उद्देसगा भवति ।
 सेवं भंते ! सेवं भंते ! त्ति ॥४१-२८॥ भवसिद्धियरासीजुम्मकडजुम्मणेर-
 इया णं भंते ! कओ उववज्जंति०? जहा ओहिया पढमगा चत्तारि उद्देसगा
 तहेव णिरवसेसं एए चत्तारि उद्देसगा । सेवं भंते ! २ त्ति ॥४१-३२॥ कण्ह-
 लेस्सभवसिद्धियरासीजुम्मकडजुम्मणेरइया णं भंते ! कओ उववज्जंति०? जहा
 कण्हलेस्साए चत्तारि उद्देसगा भवति तथा इमेवि भवसिद्धियकण्हलेस्सेहिवि
 चत्तारि उद्देसगा कायव्वा ॥४१-३६॥ एवं णीललेस्सभवसिद्धिएहिवि चत्तारि
 उद्देसगा कायव्वा ॥ ४१-४० ॥ एवं काउलेस्सेहिवि चत्तारि उद्देसगा ॥ ४१-
 ४४ ॥ तेउलेस्सेहिवि चत्तारि उद्देसगा ओहियसरिसा ॥४१-४८॥ पम्हलेस्से-

हिवि चत्तारि उद्देसगा ॥ ४१-५२ ॥ सुक्कलेस्सेहिवि चत्तारि उद्देसगा ओहिय-
सरिसा । एवं एएवि भवसिद्धिएहिवि अट्टावीसं उद्देसगा भवन्ति । सेवं भन्ते ! २
त्ति ॥ ४१-५६ ॥ अभवसिद्धियरासीजुम्मकडजुम्मणेरइया णं भन्ते ! कओ उवव-
ज्जन्ति०? जहा पढमो उद्देसओ णवरं मणुस्सा णेरइया य सरिसा भाणियव्वा, सेसं
तहेव । सेवं भन्ते ! २ त्ति । एवं चउसुवि जुम्मेसु चत्तारि उद्देसगा । कण्हलेस्सअभव-
सिद्धियरासीजुम्मकडजुम्मणेरइया णं भन्ते ! कओ उववज्जन्ति०? एवं चेव
चत्तारि उद्देसगा । एवं णीललेस्सअभवसिद्धिएहिवि चत्तारि उद्देसगा एवं काउ-
लेस्सेहिवि चत्तारि उद्देसगा एवं तेउलेस्सेहिवि चत्तारि उद्देसगा पण्हलेस्सेहिवि
चत्तारि उद्देसगा सुक्कलेस्सअभवसिद्धिएहिवि चत्तारि उद्देसगा, एवं एएसु
अट्टावीसाएवि अभवसिद्धियउद्देसएसु मणुस्सा णेरइयगमेणं णेयव्वा । सेवं भन्ते ।
सेवं भन्ते ! त्ति । एवं एएवि अट्टावीसं उद्देसगा ॥ ४१-८४ ॥ सम्मदिट्ठी-
रासीजुम्मकडजुम्मणेरइया णं भन्ते ! कओ उववज्जन्ति०? एवं जहा पढमो
उद्देसओ एवं चउसुवि जुम्मेसु चत्तारि उद्देसगा भवसिद्धियसरिसा कायव्वा ।
सेवं भन्ते ! २ त्ति । कण्हलेस्ससम्मादिट्ठीरासीजुम्मकडजुम्मणेरइया णं भन्ते!
कओ उववज्जन्ति०? एएवि कण्हलेस्ससरिसा चत्तारिवि उद्देसगा कायव्वा,
एवं सम्मदिट्ठीसुवि भवसिद्धियसरिसा अट्टावीसं उद्देसगा कायव्वा । सेवं भन्ते ! २
त्ति जाव विहरइ ॥ ४१-११२ ॥ मिच्छादिट्ठीरासीजुम्मकडजुम्मणेरइया णं
भन्ते ! कओ उववज्जन्ति०? एवं एत्यवि मिच्छादिट्ठीअभिलावेणं अभवसि-
द्धियसरिसा अट्टावीसं उद्देसगा कायव्वा । सेवं भन्ते ! सेवं भन्ते ! त्ति ॥ ४१-
१४० ॥ कण्हपक्खियरासीजुम्मकडजुम्मणेरइया णं भन्ते ! कओ उववज्जन्ति०?
एवं एत्यवि अभवसिद्धियसरिसा अट्टावीसं उद्देसगा कायव्वा । सेवं भन्ते ! २
त्ति ॥ ४१-१६८ ॥ सुक्कपक्खियरासीजुम्मकडजुम्मणेरइया णं भन्ते ! कओ
उववज्जन्ति०? एवं एत्यवि भवसिद्धियसरिसा अट्टावीसं उद्देसगा भवन्ति, एवं
एए सध्वेवि छण्णउयं उद्देसगसयं भवन्ति रासीजुम्मसयं जाव सुक्कलेस्सा सुक्क-
पक्खियरासीजुम्मकलिओगवेमाणिया जाव जइ सकिरिया तेणेव भवगहणेणं
सिज्जन्ति जाव अंतं करेत्ति ? णो इणट्ठे समट्ठे । सेवं भन्ते ! सेवं भन्ते ! त्ति
॥ ८६५ ॥ ॥ ४१-१९६ ॥ भगवं गोयमे समणं भगवं महावीरं तिक्खुत्तो आया-
हिणं पयाहिणं करेइ २ ता वंदइ णमंसइ वंदित्ता णमंसित्ता एवं वयासी-एव-

मेयं भंते ! तहमेयं भंते ! अवितहमेयं भंते ! असंदिद्धमेयं भंते ! इच्छियमेयं
भंते ! पडिच्छियमेयं भंते ! इच्छियपडिच्छियमेयं भंते ! सत्त्वे णं एसमट्ठे
जे णं तुम्हे वयह त्ति कट्ठु अपूइवयणा खलु अरिहंता भगवंतो, समणं भगवं
महावीरं वंदइ णमंसइ वदित्ता णमंसित्ता संजमेणं तवसा अप्पाणं भावे-
माणे विहरइ ॥ ८६६ ॥

इक्कच्चत्तालीसइमं रासीजुम्मसयं समत्तं

॥ परिसेसो ॥

सत्त्वाए भगवईए अट्ठतीसं सयं सयाणं १३८ उद्देसगाणं १६२५ ।
धुलसीय सयसहस्सा पयाण पवरवरणाणदंसीहि । भावाभावमणंता पणत्ता
एत्थमंगंमि ॥ १ ॥ तवणिघमविणयवेलो जयइ सया णाणविमलविउलजलो ।
हेउसयविउलवेगो संघसमुद्दो गुणविसालो ॥ २ ॥ णमो गोयमाईणं गणहराणं,
णमो भगवईए विवाहपण्णत्तीए, णमो दुवालसंगसस गणिपिडगसस ॥
गाहा—कुम्मसुसंठियचलणा, अमलियकोरंठबेटसंकासा । सुयदेवया भगवई
मम मइतिमिरं पणासेउ ॥ १ ॥ पणत्तीए आइमाणं अट्ठुहं सयाणं दो दो उद्दे-
सगा उद्दिसिज्जंति णवरं चउत्थे सए पढमदिवसे अट्ठ बिइयदिवसे दो उद्देसगा
उद्दिसिज्जंति, णवमाओ सयाओ आरद्धं जावइयं-जावइयं एइ तावइयं-तावइयं
एगदिवसेणं उद्दिसिज्जइ उक्कोसेणं सयंपि एगदिवसेणं मज्झिमेणं दोहि दिवसेहि
सयं जहण्णेणं तिहि दिवसेहि सयं एवं जाव वीसइमं सयं, णवरं गोसालो
एगदिवसेणं उद्दिसिज्जइ जइ ठिओ एगेण च्चव आयंबिलेण अणुणवइ
अहण्णां ठिओ आयंबिलेणं छट्ठेणं अणुणवइ, एक्कवीसबावीसतेवीसइ-
साइं सयाइं एक्केक्कदिवसेणं उद्दिसिज्जंति, चउवीसइमं सयं दोहि दिवसेहि छ
छ उद्देसगा, पंचवीसइमं दोहि दिवसेहि छ छ उद्देसगा, बंधिसयाइं अट्ठसयाइं
एगेणं दिवसेणं सेटिसयाइं बारस एगेणं एगिंदियमहाजुम्मसयाइं बारस एगेणं
एवं बेइंदियाणं बारस तेइंदियाणं बारस चउररदियाणं बारस एगेण अग्गिण-
पंचिंदियाणं बारस सण्णिपंचिंदियमहाजुम्मसयाइं एक्कवीसं एगदिवसेणं उद्द-
सिज्जंति रासीजुम्मसयं एगदिवसेणं उद्दिसिज्जइ । गाहाओ-विपसियअरंविदकरा
णासियतिमिरा सुयाहिया देवी । मज्जांपि देउ मेहं बुहविबुहणंसिया णिच्चं

॥ १ ॥ सुयदेवयाए पणमिमो ज्जीए पसाएण सिक्खियं णाणं । अण्णं पवयण
 देवी संतिकरी तं णमंसांमि ॥ २ ॥ सुयदेवया य जक्खो कुंमघरो बंमसंति
 बेरोट्टा । विज्जा य अंतहुंडी देउ अबिग्घं लिहंतस्स ॥ ३ ॥ ८६७ ॥

॥ सिरिविवाहपण्णत्ती समत्ता ॥

॥ पंचमं अंगं समत्तं ॥



पायाधम्मकहाओ

पदमं अज्झयणं

तेणं कालेणं तेणं समएणं चंपा णामं णयरी होत्या । वण्णओ ॥१॥ तीसे णं चंपाए णयरीए बहिया उत्तरपुररिथमे दिसीभाए (एत्य णं) पुण्णमद्दे णामं चेइए होत्या । वण्णओ ॥२॥ तत्थ णं चंपाए णयरीए कोणिए णामं राया होत्या । वण्णओ ॥३॥ तेणं कालेणं तेणं समएणं समणस्स भगवओ महावीरस्स अंतेवासी अज्जसुहम्मस्से णामं थेरे जाइसंपण्णे कुल्लसंपण्णे बल्लरुवविणयणाणवंसण- चरित्तलाघवसंपण्णे ओयंसी तेयंसी वरुचंसी जसंसी जियकोहे जियमाणे जिय- माए जियलोहे जिइदिए जियणिद्दे जियपरीसहे जीवियासामरणमयविप्पमुक्के तवप्पहाणे गुणप्पहाणे एवं करणचरणणिग्गह्णिच्छयअज्जवमद्दवलाघवखंति- गुत्तिमत्तिविज्जामंतंबं. (चेर) वयणयणियमसक्कसोयणाणवंसणचरित्तप्पहाणे उ(ओ)राले घोरे घोरव्वए घोरत्तवस्सी घोरबंमचेरवासी उच्छूदसरीरे संखित्त- त्रिउलते(प)उल्लेसे चोद्दसपुक्को चउणाणोवगए पंचहि अणगारसएहि सद्धि संपरिवुद्धे पुक्खाणुपुदिय चरमाणे गामाणुगामं दूइज्जमाणे सुहंसुहेणं विहरमाणे जेणेव चंपा णयरी जेणेव पुण्णमद्दे चेइए तेणामेव उवागच्छइ २ ता अहा- एदिक्खं उग्गहं ओगिण्हइ ओगिण्हित्ता संज्जमेणं तवसा अप्पाणं भावेमाणे विह- रइ ॥४॥ तए णं चंपाए णयरीए परिसा णिग्गया । कोणिओ णिग्गओ । धम्मो क्हिओ । परिसा जामेव दिंसि पाउठमूया तामेव दिंसि पडिग्गया । तेणं कालेणं तेणं समएणं अज्जसुहम्मस्स अणगारस्स जेट्ठे अंतेवासी अज्ज जंबू णामं अण- गारे कासवगोत्तेणं सत्तुस्सेहे जाव अज्जसुहम्मस्स थेरस्स अदूरसामंते उइडंजाणु अहोसिरे ज्ञाणकोट्ठोवगए संज्जमेणं तवसा अप्पाणं भावेमाणे विहरइ । तए णं से अज्जजंबूणामे जायसद्धे जायसंसए जायकोउहल्ले संजायसद्धे संजायसंसए संजायकोउहल्ले उप्पण्णसद्धे उप्पण्णसंसए उप्पण्णकोउहल्ले समुप्पण्णसद्धे समुप्पण्णसंसए समुप्पण्णकोउहल्ले उट्टुए उट्ठेइ उट्टुए उट्टित्ता जेणामेव अज्ज- सुहम्मस्से थेरे तेणामेव उवागच्छइ २ ता अज्जसुहम्मस्से थेरे तिव्खुत्तो आयाहिणं पयाहिणं करेइ २ ता वंदइ णमंसइ वंदित्ता णमंसित्ता अज्जसुहम्मस्स थेरस्स

णच्छासणेण णाड्दूरे सुस्ससमाणे णमसमाणे अभिन्नुहे पंजलिउडे विणएणं पज्जु-
वासमाणे एवं वयासी-जइ णं भंते ! समणेणं भगवया महावीरेणं आइगरेणं
तित्थगरेणं सयंसंबुद्धेणं पुरिसुत्तमेणं पुरिमसीहेणं पुरिसवरपुंडरीएणं पुरिसवर-
गंधहत्थिणा लोगतुत्तमेणं लोगणाहेणं लोगहिएणं लोगपईवेणं लोगपउजोयारेणं
अभयवएणं सरणदएणं चक्खुदएणं मगदएणं बोहिदएणं धम्मदएणं धम्मदेसएणं
धम्मणायगेणं धम्मसारहिणा धम्मवरचाउरंतचक्कवट्टिणा अप्पडिहयवरणाण-
दंसणधरेणं वियट्टछउमेणं जिणेणं जा(व)णएणं तिण्णेणं तारएणं बुद्धेणं बोह-
एणं मुत्तेणं मोयगेणं सव्वण्णेणं सव्वदरिसिणा सिवमयलमरुयमणंतमक्खयमग्वा-
बाहमपुणरावित्थिंयां सासयं ठाणमुवयएणं पंचमस्स अंगस्स अयमट्ठे पण्णत्ते,
छट्टस्स णं अंगस्स णं भंते ! णायां धम्मकहाणं के अट्ठे पण्णत्ते ? जंबुत्ति अज्ज-
सुहम्मे थेरे अज्जजंबूणांमं अणगारं एवं वयासी--एवं खलु जंबू ! समणेणं
भगवया महावीरेणं जाव संपत्तेणं छट्टस्स अंगस्स दो सुयवखंधा पण्णत्ता, तंजहा-
णायाणि य धम्मकहाओ य । जइ णं भंते ! समणेणं भगवया महावीरेणं जाव
संपत्तेणं छट्टस्स अंगस्स दो सुयवखंधा पण्णत्ता तंजहा-णायाणि य धम्मकहाओ
य । पढमस्स णं भंते ! सुयवखंधस्स समणेणं जाव संपत्तेणं णायाणं कइ अज्जयणा
पण्णत्ता ? एवं खलु जंबू ! समणेणं जाव संपत्तेणं णायाणं एगूणवीसं अज्जयणा
पण्णत्ता, तंजहा-उक्खित्तणाए संघाडे अंडे कुम्मे य सेलगे । तुंबे य रोहिणे
मत्तली मायंदी चंदिमाइय ॥१॥ दावद्वे उवगणाए मंडुक्के सेयली वि य । गंदी-
फले अवरकंका आइण्णे सुंसुमाइ य ॥ २ ॥ अचरे य पुंडरीए णायए एगूणवीस-
इमे ॥ ५ ॥ जइ णं भंते ! समणेणं जाव संपत्तेणं णायाणं एगूणवीसा अज्जयणा
पण्णत्ता तंजहा-उक्खित्तणाए जाव पुंडरीए (त्ति) य, पढमस्स णं भंते ! अज्ज-
यणस्स के अट्ठे पण्णत्ते ? एवं खलु जंबू ! तेणं कालेणं तेणं समएणं इहेव
जंबुद्वीवे दीवे भारहे वासे दाहिणडुमरहे रायगिहे णामं णयरे होत्था । वण्णओ !
गुणसिलए चेइए । वण्णओ । तत्थ णं रायगिहे णयरे सेणिए णामं राया
होत्था । महया हिमवंतं वण्णओ । तस्स णं सेणियस्स रण्णो णंदा णामं देवी
होत्था सुकुमालपाणिपाया वण्णओ ॥ ६ ॥ तस्स णं सेणियस्स पुत्ते णंदाए देवीए
अत्तए अभए णामं कुमारे होत्था अहीणपंचिदियसरीरे जाव सुरुवे सामवंडमेय-
उवप्पयाणणीइ सुप्पउत्तणयविहिण्णू ईहावूहमगणगवेसणअत्थसत्थमइ विसारए

उप्वत्तियाए वेणइयाए कम्मियाए पारिणामियाए चउव्विहाए बुद्धीए उव्वेए
 सेणियस्स रण्णो बहुमु कज्जेसु य कुडुबेसु य मतेसु य गुज्जेसु य रहस्सेसु य णिच्छ-
 एसु य आपुच्छणिज्जे पडिपुच्छणिज्जे मेढी पमाणं आहारे आलंबणं चक्खू मेढीभूए
 पमाणभूए आहारभूए आलंबणभूए चक्खुभूए सव्वकज्जेसु सव्वभूमियासु लद्ध-
 पच्चए विइणविद्यारे रज्जघुरं चित्तए यावि होत्था । सेणियस्स रण्णो रज्जं च
 रट्ठं च कोसं च कोट्टागारं च बलं च वाहणं च पुरं च अंतेउरं च सयमेव समु (वे)
 पेक्खमाणे २ विहरइ ॥७॥ तस्स णं सेणियस्स रण्णो धारिणी णां देवी होत्था
 जाव सेणियस्स रण्णो इट्ठा जाव विहरइ ॥८॥ तए णं सा धारिणी देवी अणया
 कयाइ तंसि तारिसगंसि छक्कट्टगलट्टमट्टसंठियखं मुगयपवरवरसालमंजियउज्जल-
 मणिकणगरयणथू भियविडकजालद्धचंदणिज्जुहकंतरकणयात्तिचंदसालियाविभत्ति-
 कलिए सरसच्छधाऊवलवण्णरइए बाहिरओ दूमियघट्टमट्ठे अट्ठिमतरओ पसत्तमु-
 विलिहियचित्तकम्मे णाणाविहपंचवण्णमणिरयणकोट्टिमतले पउमलयाफुल्लव-
 त्तिवरपुष्फजाइउल्लोयचित्तियतले चं (वं) णवरकणगकलमसु (वि) णिम्मिय-
 पडिपूजियसरसपउमसोहूंतदारभाए पयरगलंबंतमणिमूत्तामसुविरेइयदारसोहे
 सुगंधवरकुसुमउयपमह्लसयणोवयारमणहिययणिव्वुइयरे कप्पूरलवंगमलयचंद-
 णकालागरुपवरकुंदुरुक्कतुरुक्कधूवड्जंतसुरभिमघमघंतगंधुद्धयाभिरामे सुगंध-
 वरगंधिए गंधवट्टिभूए मणिकिरणपणासियंधयारे कि बहूणा ? जुइगुणेहि सुरवर-
 विमाणवेत्तं (बिय) वरघरए तंसि तारिसगंसि सयणिज्जंसि सालिमवट्टिए उभओ
 विव्वोयणे दुहओ उण्णए मज्जे णयंगंभीरे गंगापुलियवाल्पाउद्दालसालिसए
 उयचियखोमदुगुल्लपट्टपडि (च्छण्णे) च्छयणे अत्थरयमलयणवत्तयकुसत्तलिब-
 सीहकेसरपक्वत्थए सुविरेइयरयत्ताणे रत्तंसुयसंवुए सुरम्मे आइणगरुयबूरणवणी-
 णसुल्लफासे पुंवरत्तावरत्तकालसमयंसि सुत्तजागरा ओहीरमाणी ओहीरमाणी
 एगं महं सत्तस्सेहं रययकूडसण्णिहं णहयत्तंसि सोमं सोमागारं लीलायत्तं जंभा-
 (यत्तं) यमाणं मुहमत्तिगयं गयं पासित्ता णं पडिबुद्धा । तए णं सा धारिणी देवी
 अयमेयारूवं उरालं कल्लाणं सिखं घण्णं मंगल्लं सत्तिरोयं महासुमिणं पासित्ता-
 णं पडिबुद्धा समाणी हट्टुट्टा चित्तमाणंविद्या पीइमणा परमसोमणस्सिया हरि-
 सव्वसविसप्पमाणहियया धाराहयकलंबपुष्फगं पिब समूससियरोमक्खा तं सुमिणं
 ओणिण्हइ २ ता सयणिज्जाओ उट्ठेइ २ ता पायपीडाओ पच्चोहइ २ ता

अतुरियमचवलमसंभताए अविलंबियाए रायहंससरिसीए गईए जेणामेव से
 सेणिए राया तेणामेव उवामच्छइ २ ता सेणियं रायं ताहि इट्ठाहि कंताहि
 पियाहि मणुणाहि मणामाहि उरालाहि कल्लाणाहि सिवाहि धण्णाहि मंगल्लाहि
 सस्तिरीयाहि हिययगमणिज्जाहि हिययपल्हायणज्जाहि मियमहुररिभियगंभीर-
 सस्तिरीयाहि गिराहि संलवमाणी २ पडिबोहेइ २ ता सेणिएणं रण्णा अम्भ-
 णुणाया समाणी णाणामणिकणगरयणभत्तिच्चित्तसि भद्दासणंसि णिसीयइ २ ता
 आसत्था वीसत्था सुहासणवरगया करयलपरिग्गहियं सिरसावत्तं मत्थए अंजलि
 कट्टु सेणियं रायं एवं वयासी-एवं खलु अहं देवाणुप्पिया ! अज्ज तंसि तारि-
 सणंसि सयणिज्जंसि सात्तिगणवट्ठिए जाव णिययवयणमइवयंतं गयं सुमिणे
 पासिस्ता णं पडिबुद्धा । तं एयस्स णं देवाणुप्पिया ! उरालस्स जाव सुमिणस्स
 के मण्णे कल्लाणे फलवित्तिविसेसे भविस्सइ ? ॥६॥ तए णं से सेणिए राया
 धारिणीए देवीए अतिए एयमट्ठं सोच्चा णिसम्म हट्टुत्तु जाव हियए धारा-
 ह्यणीवसुरभिकुसुमचुंचुमालइयतण ऊससियरोमकूवे तं सुमिणं उग्गिण्हइ २
 ता ईहं पविसइ २ ता अप्पणो साभाविणं मइपुट्ठवणं बुद्धिविण्णाणं तस्स
 सुमिणस्स अत्थोग्गहं करेइ २ ता धारिणिं देविं ताहि जाव हिययपल्हायण-
 ज्जाहि मिउमहुररिभियगंभीरसस्तिरीयाहि वग्गूहि अणुवूहेमाणे २ एवं
 वयासी-उराले णं तुमे देवाणुप्पिए ! सुमिणे दिट्ठे, कल्लाणे णं तुमे देवाणु-
 प्पिए ! सुमिणे दिट्ठे, सिवे धण्णे मंगल्ले सस्तिरीए णं तुमे देवाणुप्पिए ! सुमिणे
 दिट्ठे, आरोग्गतुट्ठिदीहाउयकल्लाणमंगलकारए णं तुमे देवी ! सुमिणे दिट्ठे,
 अत्थलाभो ते देवाणुप्पिए ! पुत्तलाभो ते देवाणुप्पिए ! रज्जलाभो भोगलाभो
 सोक्खलाभो ते देवाणुप्पिए ! एवं खलु तुमं देवाणुप्पिए ! णवण्हं मासाणं बहुपडि-
 पुष्णाणं अट्टमाणं य राइंदियाणं बीइवकंताणं अम्हं कुलकेउं कुलदीवं कुलपट्ठवं
 कुलवाडिसयं कुलतिलयं कुलकित्तिकरं कुलवित्तिकरं कुलेणदिकरं कुलजसकरं
 कुलाधारं कुलपायवं कुलविबद्धणकरं सुकुमालवाणियायं जाव दारयं पयाहिसि ।
 से वि य णं दारए उम्भक्कवालभावे विण्णाय परिणयमेत्ते जोव्वणममणुप्पत्तं सूरे
 वीरे विक्कते वित्थिणवपुलबलवाहणे रज्जवई राया भविस्सइ । तं उराले णं
 तुमे देवी ! सुमिणे दिट्ठे जाव आरोग्गतुट्ठिदीहाउकल्लाणकारए णं तुमे देवी !
 सुमिणे दिट्ठे त्ति कट्टु भुज्जो २ अणुवूहेइ ॥१०॥ तए णं सा धारिणी देवी

सेणिएणं रण्णा एवं वृत्ता समाणी हट्टुट्ठा जाव हियया करयलपरिग्गहियं जाव अंजलि कट्टु एवं वयासी—एवमेयं देवाणुप्पिया ! तहमेयं देवाणुप्पिया ! अवित-
हमेयं असंदिद्धमेयं इच्छियमेयं देवाणुप्पिया ! पडिच्छियमेयं इच्छियपडि-
च्छियमेयं सच्चे णं एसमट्ठे जं णं तुब्भे वयह त्ति कट्टु तं सुमिणं सम्मं पडि-
च्छइ २ ता सेणिएणं रण्णा अब्भणुण्णाया समाणी णाणामणिकणवरयणसत्ति-
चित्ताओ भट्टासणाओ अब्भट्ठेइ २ ता जेणेव सए सयणिज्जे तेणेव उवागच्छइ
२ ता सयसि सयणिज्जंसि णिसीयइ २ ता एवं वयासी—ना मे से उत्तमे पहाणे
मंगल्ले सुमिणे अण्णेहिं पावसुमिणेहिं पडिहम्मिहित्ति कट्टु देवयगुरुजणसंब-
द्धाहिं पसत्थाहिं धम्मियाहिं कहाहिं सुमिणजागरियं पडिजागरमाणी २ विह-
रइ ॥११॥ तए णं से सेणिए राया पच्चसकालसमयंसि कोडुंबियपुरिसे सद्दा-
वेइ २ ता एवं वयासी—खिप्पामेव भो देवाणुप्पिया ! बाहिरियं उवट्ठाणसालं
अज्ज सविसेसं परमरम्मं गंधोदगसित्तसुइयसम्मज्जिओवलित्तं पंचवणसरस-
सुरभिमुक्कपुण्फुंजोवयारकलियं कालागरुपवरकुंदुरुक्क तुरुक्कधूवडज्जंतमघम-
घंतगंधुद्धयाभिरामं सुगंधवरगंधियं गंधवट्टिभूयं करेह य कारवेह य करित्ता य
कारवित्ता य ए (व) यमाणत्तियं पच्चप्पिणह । तए णं ते कोडुंबियपुरिसा सेणि-
एणं रण्णा एवं वृत्ता समाणा हट्टुट्ठा जाव पच्चप्पिणंति । तए णं से सेणिए
राया कल्लं पाउप्पमायाए रयणीए फुल्लुप्पलकमलकोमलुम्मिलियंसि अहापंडुरे
पभाए रत्तासोगप्पगार्सिकिसुयसुयमहगुंजद्धरागबंधुजीवगपारावयचलण-
णयणपरह्यसुरत्तलोयजासुमणकुसुमजलियजलणत्तवणिज्जकलसहिगुलयणगर-
रूवाइरेगरेहंतसस्सिरीए दिवा(ग)धरे अहकमेण उदिए तस्स दिण(कर)
करपरंपरावयारपारद्धंमि अंधयारे बालायवकुंकुमेण खइयव्व जीवलोए लोयण-
विसयाणुयासविगसंतविसददंसियंसि लोए कमलागरसंडबोहए उट्टियंसि सूरे
सहस्सरस्सिमि दिणयरे तेयसा जलंते सयणिज्जाओ उट्ठेइ २ ता जेणेव
अट्टणसाला तेणेव उवागच्छइ २ ता अट्टणसालं अणुपविसइ २ ता अणेग-
वायामजोगवग्गणवामट्टणमल्लजुद्धकरणोहिं संते परिस्संते सयपागसहस्सपागोहिं
सुगंधवरतेल्लमाइएहिं पीणणिज्जेहिं दीवणिज्जेहिं दप्पणिज्जेहिं मयणिज्जे हिं
विहंणिज्जेहिं सत्विदियमायपल्हायणिज्जेहिं अब्भंगएहिं अब्भंगिए समाणे तेल्ल-
चम्मंसि पडिपुण्णपाणिपायसुकुमालकोमलत्तलोहिं पुरिसोहिं छेएहिं दवखोहिं पट्ठोहिं

कुसलेहि मेहावीहि णिउणेहि णिउणसिप्पोवगएहि जियपरिस्समेहि अङ्गण-
परिमद्दणुव्वलणकरणगुणिम्माएहि अट्टिसुहाए मंससुहाए तयासुहाए रोमसुहाए
चउव्विवाए संबाहणाए संबाहिए समाणे अवगयपरिस्समे णरिदे अट्टण-
सालाओ पडिणिकखमइ २ ता जेणेव मज्जणघरे तेणेव उवागच्छइ २ ता
मज्जणघरं अणुपविसइ २ ता स(म्)मं(त)त्तजालामिरामे विचित्तमणिरयण-
कोट्टिमतले रमणिज्जे ष्हाणमंडवंसि णाणामणिरयणमत्तिचित्तंसि ष्हाणघोढंसि
सुहणिसण्णे सुहोदएहि पुप्फोदएहि गंधोदएहि सुद्धोदएहि य पुणो पुणो कल्ला-
भगपवरमज्जणविहीए मज्जिए तत्थ कोउयसएहि बहुविहेहि कल्लाणगपवर-
मज्जणावसाणे पम्हलसुकुमालगंधकासाईयलूहियगे अहयसुमहग्घदूसरयणसुसंवुए
सरससुरभिगोसीसच्चंदणाणुलित्तगत्ते सुइमालावण्णगविल्लेवणे आविद्धमणिसुवण्णे
कप्पियहारद्वहारतिसरयपालंबपालंबमाणकडिसुत्तसुकयसोहे पि (ण) णिद्धगेविज्जे
अंगुलेज्जगललियंगयललियकयामरणे णाणामणिकडगनुडियथंभियसुए अहिय-
रुवसत्तिसरीए कुंडलज्जोइयाणणे मउडित्तिसिए हारोत्थयसुकयरइयवच्छे पालं-
बपालंबमाणसुकयपडउत्तरिज्जे मुट्ठियापिगलंगुलीए, णाणामणिकणगरयणविमल-
महरिह-णिउणोवियमिसिमिसंतविरइयसुसिल्लुविसिल्लुट्टसंठियपसत्थयाविद्ध-
धीरवलए, कि बहुणा ? कप्परुवलए जेव सुअलंकियविभूसिए णरिदे सकोरंठमल्ल-
दामेणं छत्तेणं धरिज्जमाणेणं (उमओ) चउचामरवालवीइयंगे मंगलजयसह-
कयालोए अणेगगणायगवंडणायगराईसरतलवरमाडंबियकोडुंबियमत्तिसहामत्ति-
गणमदोवारियअमच्चवेडपीढमद्दणगरणियमसेट्टिनेणावइसत्थवाहवूयसंधिवाल-
सद्धि संपरिवुडे धवलमहामेहणियगए विव गहगणविप्पंतरिक्खतारागणाण मज्जे
ससि व्व पियदंसणे णरवई मज्जणघराओ पडिणिकखमइ २ ता जेणेव बाहिरिया
उवट्टाणसाला तेणेव उवागच्छइ २ ता सीहासणवरगए पुरत्याभिमूहे सणि-
सण्णे । तए णं ते सेणिए राया अप्पणो अदूरसामंते उत्तरपुरत्थियमे दिसीमाए
अट्ट मद्दासणाइं सेयवत्थपच्चुत्थुयाइं सिद्धत्थमंगलोवयारकयसंतिकम्माइं रया-
वेइ २ ता (अप्पणो अदूरसामंते) णाणामणिरयणमडियं अहियपेच्छणज्जरुव्वं
महग्घवरपट्टणुग्गयं सण्हवहु मत्तिसयचित्त (ट्टा) ठाणं ईहामियउसभनुरयणरमगर-
विहगवालगकिण्णररुहरसभचमरकुंजरवणलथपउमलयभत्तिचित्तं सुखत्रियवर-
कणगपवरपेरंतदेसमागं अंभतरियं जवणियं अंछावेइ २ ता अ(च्छ)त्थरगमउ-

अमसूरगउच्छइयं धवलवत्थपच्चत्थुयं विसिट्ठं अंगमुहफासयं सुमज्जं धारिणीए देवीए भद्दासणं रयावेइ २ ता कोडुं बियपुरिसे सद्दावेइ २ ता एवं वयासी-खिप्पा-मेव भो देवाणुप्पिया ! अट्ठंगमहाणिमित्तमुत्तत्थपाढए विविहसत्थकुसले सुमिण-पाढए सद्दावेह २ ता एयमाणत्तियं खिप्पामेव पच्चप्पिणह । तए णं ते कोडुं-बियपुरिसा सेणिएणं रण्णा एवं वृत्ता समाणा हट्टतुट्ट जाव हियया करयत्तपरि-गहियं दसणहं सिरसावत्तं मत्थए अंजलिं कट्टु एवं देवो तहत्ति आणाए विण-एणं वयणं पडिमुणोति २ ता सेणियस्स रण्णो अंतियाओ पडिणिवल्लमंति २ ता रायगिहस्स णयरस्स मज्झंमज्झेणं जेणेव सुमिणपाढगगिहाणि तेणेव उवागच्छंति २ ता सुमिणपाढए सद्दावेति । तए णं ते सुमिणपाढगा सेणियस्स रण्णो कोडुं-बियपुरिसेहिं सद्दाविया समाणा हट्टतुट्ट जाव हियया ण्हाया कयवल्लिकम्मा जाव पायच्छिता अप्पमहग्घाभरणात्तं कियसरीरा हरियालियसिद्धत्थयकयमुद्धाणा सएहिं सएहिं गिहेहिं तो पडिणिवल्लमंति २ ता रायगिहस्स णयरस्स मज्झंमज्झेणं जेणेव सेणियस्स रण्णो भवणवडंसगदुवारे तेणेव उवागच्छंति २ ता एग-यओ मिलायंति २ ता सेणियस्स रण्णो भवणवडिसगदुवारेणं अणुपविसंति २ ता जेणेव बाहिरिया उवट्टाणसाला जेणेव सेणिए राया तेणेव उवागच्छंति २ ता सेणियं रायं जएणं विजएणं वद्धावेति, सेणिएणं रण्णा अच्चियवंदियपूइयमा-णियसक्कारियसम्मणिया समाणा पत्तेयं २ पुठवणत्थेसु भद्दासणेसु णिसीयंति । तए णं सेणिए राया जवप्पियंतरियं धारिणिं देविं ठवेइ २ ता पुप्फफलपडि-पुण्हत्थे परेणं विणएणं ते सुमिणपाढए एवं वयासी एवं खलु देवाणुप्पिया ! धारिणी देवी अज्ज तसि तारिसगंसि संयणिज्जंसि जाव महामुमिणं पासित्ता णं पडिबुद्धा, तं एयस्स णं देवाणुप्पिया ! उरालस्स जाव सत्सिरीयस्स महा-सुमिणस्स के मण्णे कल्लाणे फलवित्तिविसेसे भविस्सइ ? । तए णं ते सुमिण-पाढगा सेणियस्स रण्णो अंतिए एयमट्ठं सोच्चाणिसम्महट्टतुट्ट जाव हियया तं सुमिणं सम्मं ओगिण्हंति २ ता ईहं अणुपविसंति २ ता अण्णमण्णेण सद्धिं संचा-लेंति २ ता तस्स सुमिणस्स लद्धट्टा गहियट्टा पुच्छियट्टा विणिच्छियट्टा अभिग-यट्टा सेणियस्स रण्णो पुरओ सुमिणसत्थाइं उच्चारमाणा २ एवं वयासी-एवं खलु अहं सामी ! सुमिणसत्थंसि बायालीसं सुमिणा तीसं महामुमिणा बाव-त्तिरि सव्वसुमिणा दिट्टा । तत्थ णं सामी ! अरहंसमायरो वा चक्कवट्टिमायरो

वा अरहंतंसि वा चक्रवर्तिंसि वा गम्भं वक्कममाणंसि एएसि तीसाए महासुमि-
 गाणं इमे चउद्दसमहासुमिणे पासित्ता णं पडिबुज्जंति तंजहा-गयवसहसोहअभि-
 सेयदामससिदिणयरं झयं कुंभं । पउमसरसागरत्रिमाणभवणरणणुच्चयसिंहि च । १।
 वासुदेवमायरो वा वासुदेवंसि गम्भं वक्कममाणंसि एएसि चउद्दसहं महासुमि-
 गाणं अण्णयरे सत्त महासुमिणे पासित्ता णं पडिबुज्जंति । बलदेवमायरो वा
 बलदेवंसि गम्भं वक्कममाणंसि एएसि चउद्दसहं महासुमिगाणं अण्णयरे चत्तारि
 महासुमिणे पासित्ता णं पडिबुज्जंति । मंडलियमायरो वा मंडलियसि गम्भं
 वक्कममाणंसि एएसि चउद्दसहं महासुमिगाणं अण्णयरं एगं महासुमिणं पासित्ता
 णं पडिबुज्जंति । इमे य (णं) सामी ! धारिणीए देवीए एगे महासुमिणे
 दिट्ठे । तं उराले णं सामी ! धारिणीए देवीए सुमिणे दिट्ठे जाव आरोग-
 तुट्ठिदीहाउकल्लाणमंगल्लकारए णं सामी ! धारिणीए देवीए सुमिणे दिट्ठे ।
 अत्यत्ताभो सामी ! सोक्खलाभो सामी ! भोगलाभो सामी ! पुत्तलाभो रज्ज-
 लाभो, एवं खलु सामी ! धारिणी देवी णव्वहं मासाणं बहुपडिपुण्णाणं जाव
 दारणं पयाहिइ । से वि य णं दारए उम्मक्कबालभावे विण्णायपरिणयमित्ते
 जोव्वणगमणुप्पत्ते सुरे वीरे विक्कंते विस्थिण्णविउल्लबलवाहणे रज्जवई राया
 भविस्सइ अण्णारे वा भावियप्पा । तं उराले णं सामी ! धारिणीए देवीए
 सुमिणे दिट्ठे जाव आरोगतुट्ठि जाव दिट्ठे-त्तिकट्ठु भुज्जो भुज्जो अणु-
 वूहंति । तए णं सेणिए राया तेसि सुमिणपाढगाणं अंतिए एयमट्ठं सोच्चा
 णिसम्म हट्ठ जाव हियए करयल जाव एवं वेयासी-एवमेयं देवाणुप्पिया ।
 जाव णं तुंभे वयह-त्तिकट्ठु तं सुमिणं सम्भं पडिच्छइ २ ता ते सुमिण-
 पाढए विउल्लेणं असणपाणखाइमसाइमेणं वत्थयंघमल्लासंकारेण य सक्कारेइ
 सम्माणेइ सक्कारित्ता सम्माणित्ता विउल्लं जीवियारिहं पीइदाणं दलयइ २ ता
 पडिविसज्जेइ । तए णं से सेणिए राया सीहासणाओ अरमुट्ठेइ २ ता जेणेव
 धारिणी देवी तेणेव उवागच्छइ २ ता धारिणि देवि एवं वयासी-एवं
 खलु देवाणुप्पिए ! सुमिणसत्थंसि वायालीसं सुमिणा तीसं महासुमिणा जाव
 एगं महासुमिणं जाव भुज्जो २ अणुवूहेइ । तए णं सा धारिणी देवी सेणि-
 यस्स रण्णो अंतिए एयमट्ठं सोच्चा णिसम्म हट्ठ जाव हियया तं सुमिणं सम्भं
 पडिच्छइ २ ता जेणेव सए वासघरे तेणेव उवागच्छइ २ ता ग्हाया कयवति-

कम्मा जाव विपुलाइं जाव विहरइ ॥१२॥ तए णं तीसे धारिणीए देवीए दोसु
 मासेसु वीइक्कंतेसु तइए मासे वट्टमाणे तस्स गबमस्स दोह्लकालसमयंसि अयमेया-
 रुत्ते अकालमेहेसु दोहले पाउब्भवित्था—घण्णाओ णं ताओ अम्मयाओ संपुण्णाओ
 णं ताओ अम्मयाओ कयत्थाओ णं ताओ० कयपुण्णाओ कयलक्खणाओ कय-
 विह्वाओ सुलद्धे णं तांसि माणुस्सए जम्मजीवियफले जाओ णं मेहेसु अब्भुग-
 एसु अब्भुज्जएसु अब्भुण्णएसु अब्भुट्ठिएसु सगज्जिएसु सविज्जएसु सफुसिएसु
 सथणिएसु धंतधोयरूपपट्टकंसंखचंदकुंदसालिपिट्टुरासिसमप्पभेसु विउरहरिया-
 लभेयचंपगसणकोरंटसरिस(य)वपउमरयसमप्पभेसु लक्खारससरसरात्तंसुय-
 जासुमणरत्तबंधुजीवगजाइंहिगुलयसरसकुंकुमउरब्भससरुहिरइंदगोवगसमप्पभेसु
 बरहिणणीलगुलियसुगचासपिच्छाभिगपत्तसासगणीलुप्पलणियरणवसिरोसकुसुम-
 णवसद्लसमप्पभेसु जच्चंजणाभिगभेयरिट्टुगभमरावल्लिगवल्लगुलियकज्जलसमप्प-
 भेसु फुरंतविज्जुयसगज्जिएसु वायवसविपुलगगणचवलपरिसक्किरेसु णिम्मल-
 वरवारिधारापयलियपयंडमारुयसमाहयसमोत्थरंतउवरिउवरितुरियवासां पत्रा-
 सिएसु धारापहकरणिवायणिव्वाविध मेइणितले हरिय(ग)णकंचुए पल्ल-
 विय पायवगणेसु वल्लिवियाणेसु पसरिएसु उण्णएसु सोहगमुवागएसु (णगेसु
 णएसु वा) वेमारगिरिप्पवायतडकडगविमुक्केसु उज्जरेसु तुरियपहावियपल्लो-
 ट्टुकेणाउलं सकलसं जलं वहंतीसु गिरिणईसु सज्जज्जुणणीवकुडय कंदलंसिंलि-
 धकलिएसु उववणेसु मेहरसियहट्टुट्टुचिट्ठियहरिसवसपमुक्ककंठकेकारवं मुयंतेसु
 बरहिणेसु उउवसमयजणियतरुणसहयरियणच्चिएसु णवसुरभिसिंलिधकुडय-
 कंदलकलंबगंधद्वणि मुयंतेसु उववणेसु परहुयरपरिभियसकुलेसु उद्दा(यं)-
 इतरत्तइंदगोवयथोवयकारुणञ्जिलविएसु ओणयतणमंडिएसु दद्धुरपयपिएसु
 संपिडियदरियममरमहुयरियहकरपरिलित्तमत्तल्लप्पयकुसुमासवल्लोलमहुरपूजंत-
 देसभाएसु उववणेसु परिसामियचंदसूरगहगणपणट्टणक्खत्ततारगपहे इंदउहबद्ध-
 चिधपट्टसि अंबरतले उड्डीणबलागपतिसोहंतमेहविंदे कारंडगवक्कवायकलहं-
 सउस्सुयकरे संपत्ते पाउसंमि काले ष्हायाओ कयवल्लिकम्माओ कयकोउय-
 मंगल-पायच्छिताओ किं ते वरपायपत्तणेउरमणिमेह्लहाररइयओवियकडगखड्डु-
 यविच्चित्तवरवल्लयथंभियमुयाओ कुंडलउज्जोवियाणगाओ रयणमूसियं(गा)-
 गीओ णासाणीसासवायवोज्जं चक्खुहरं वण्णफरिससंजुत्तं हयलालापेलवा-
 हरेयं धवलकणयखच्चियंतकम्मं आगासकलिहसरिसप्पभं अंसुयं पवर परिहियाओ

दुगुल्लसुकुमालउत्तरिज्जाओ सव्वोउयसुरम्मिकुसुमपवरमल्लसोहियसिराओ-
 कालागरुधूवधूवियाओ सिरिसमाणवेसाओ सेयणयगंधहृत्थिरयणं डुरूढाओ
 समाणीओ सकोरंटमल्लदामेणं छत्तेणं धरिज्जमाणेणं चंदप्पभवहरवेरुलिय-
 विमलदंडसंखकुंददगरयअमयमहियफेणपुंजसण्णिगासच्चउच्चामरवालवीजियगीओ
 सेणिएणं रण्णा सद्धि हृत्थिखंधवरगएणं पिट्टओ २ समणुगच्छमाणीओ चाउ-
 रंगिणीए सेणाए मह्या ह्याणीएणं गयाणीएणं रहाणीएणं पायत्ताणीएणं
 सव्वड्ढीए सव्वज्जुईए जाव णिग्घीसणाइयरवेणं रायगिहं गयरं सिघाडग-
 तियचउक्कचच्चरचउम्महमहापहपहेसु आसित्तसित्तसुइयसंमज्जिओवलित्तं जाव
 सुगंधवरगंधियं गंधवट्टिमूयं अवलोएमाणीओ णागरज्जणेणं अग्निगंदिज्जमाणीओ
 गुच्छलयाह्वखगुम्मवल्लिगुच्छओच्छाइयं सुरम्मं. वेभारगिरिकडगपायमल्लं
 सव्वओ समंता आहिडेमाणीओ २ दोहलं विणियंति । तं जइ णं अहमत्रि
 मेहेसु अम्मगएसु जाव दोहलं विणिज्जामि ॥१३॥ तए णं सा धारिणी देवी
 तंसि दोहलंसि अविणिज्जमाणंसि असंपत्तदोहला असंपुण्णदोहला असंमाणिय-
 दोहला सुवका भुक्खा णिम्मंसा ओलुग्गा ओलुग्गसरीरा पमइलदुब्बला
 किलंता ओमथियवयणणयणकमला पंडुइयमूही करयलमलियव्व चंपगमाला
 णित्सेवा दीणविधण्णवयणा जहोच्चियपुष्पगंधमल्लालंकारहारं अणभिलसमाणी
 कोडारमणकिरियं च परिहावेमाणी दीणा दुम्मणा णिराणंदा भूमिगयविट्ठीया
 ओहयमणसंकप्पा जाव झियायइ । तए णं तीसे धारिणीए देवीए अंगपडिया-
 रियाओ अंभितरियाओ दासचेडियाओ धारिणि देवि ओलुग्गं जाव झियायमाणि
 पासंति २ ता एवं वयासी-किण्णं तुमे देवाणुप्पिए ! ओलुग्गा ओलुग्गसरीरा
 जाव झियायसि ? तए णं सा धारिणी देवी तर्हि अंगपडियारियाहि अंभित-
 रियाहि दासचेडियाहि(य) एवं वुत्ता समाणी ताओ दासचेडियाओ णो आढाइ
 णो परियाणाइ अणाढायमाणी अपरियाणमाणी तुसिणीया संचिट्टुइ । तए णं
 ताओ अंगपडियारियाओ अंभितरियाओ दासचेडियाओ धारिणि देवि दोच्चंपि
 तच्चंपि एवं वयासी-किण्णं तुमे देवाणुप्पिए ! ओलुग्गा ओलुग्गसरीरा जाव
 झियायसि ? तए णं सा धारिणी देवी तर्हि अंगपडियारियाहि अंभितरियाहि
 दासचेडियाहि दोच्चंपि तच्चंपि एवं वुत्ता समाणी णो आढाइ णो परियाणाइ
 अणाढायमाणी अपरियाणमाणी तुसिणीया संचिट्टुइ । तए णं ताओ अंगपडिया-

रियाओ अदिमतरियाओ दासचेडिपाओ धारिणीए देवीए अणगडाइज्जमाणीओ अपरिजाणिज्जमाणीओ तहेव संभंताओ समाणीओ धारिणीए देवीए अंतियाओ पडिणिवत्थमंति २ ता जेणेव सेणिए राया तेणेव उवागच्छंति २ ता करयल-परिग्गहियं जाव कट्टु जएणं विजएणं वट्ठावेति २ ता एवं वयासी-एवं खलु सामी ! कियि अज्ज धारिणी देवी ओलुग्गा ओलुग्गसरीरा जाव अट्टज्जाणो-वगया झियायइ । तए णं से सेणिए राया तांसि अंगपडियारियाणं अंतिए एयमट्ठं सोच्छा णिसम्म तहेव संभंते समाणे सिग्घं तुरियं चवलं वेइयं जेणेव धारिणी देवी तेणेव उवागच्छइ २ ता धारिणि देवि ओलुग्गं ओलुग्गसरीरं जाव अट्ट-ज्जाणोवगयं झियायमणिं पासइ २ ता एवं वयासी-किणं तुमं देवाणुप्पिए । ओलुग्गा ओलुग्गसरीरा जाव अट्टज्जाणोवगया झियायसि ? तए णं सा धारिणी देवी सेणिएणं रण्णा एवं वुत्ता समाणी णो आढाइ जाव तुसिणीया संचिट्टइ । तए णं से सेणिए राया धारिणि देवि दोच्चंयि तच्चंयि एवं वयासी-किणं तुमं देवाणुप्पिए ! ओलुग्गा जाव झियायसि ? तए णं सा धारिणी देवी सेणिएणं रण्णा दोच्चंयि तच्चंयि एवं वुत्ता समाणी णो आढाइ णो परिजाणाइ तुसिणीया संचिट्टइ । तए णं से सेणिए राया धारिणि देवि सवहसावियं करेइ २ ता एवं वयासी-किं णं तुमं देवाणुप्पिए ! अहमेयस्स अट्टस्स अणरिहे सवण-याए ता णं तुमं ममं अयमेयारूवं मणोमाणसियं दुक्खं रहस्सीकरेसि ? तए णं सा धारिणी देवी सेणिएणं रण्णा सवहसाविया समाणी सेणियं रायं एवं वयासी-एवं खलु सामी ! मम तस्स उरालस्स जाव महामुमिणस्स तिण्हं मासाणं वट्टपडिपुण्णाणं अयमेयारूवे अकालमेहेसु दोहले पाउम्मए-धण्णाओ णं ताओ अम्मयाओ कयथाओ णं ताओ अम्मयाओ जाव वेमारणिग्गिपायमूलं आहिंइमाणीओ दोहलं विणिति, तं जइ णं अहमवि जाव दोहलं विणिज्जामि । तए णं हं सामी । अयमेयारूवंसि अकालदोहलंसि अविणिज्जमाणांसि ओलुग्गा जाव अट्टज्जाणोवगया झियायामि । एएणं अहं कारणेणं सामी ! ओलुग्गा जाव अट्टज्जाणोवगया झियायामि । तए णं से सेणिए राया धारिणीए देवीए अंतिए एयमट्ठं सोच्छा णिसम्म धारिणि देवि एवं वयासी-मा णं तुमं देवाणुप्पिए ! ओलुग्गा जाव झियाहि, अहं णं तथा करिस्सामि जहा णं तुमं अयमेयारूवस्स अकालदोहलस्स मणोरहसंपत्ती भविस्सइ त्तिकट्टु धारिणि देवि इट्ठाहि कंताहि

पियाहि मणुष्णाहि मणामाहि वग्गूहि समासासेइ २ ता जेणेव बाहिरिया उवट्टा-
 णसाला तेणामेव उवागच्छइ २ ता सीहासणवरगए पुरंथांमिमुहे सण्णिसणे
 धारिणीए देवीए एयं अकालदोहलं वहुंहि आएहि य उवाएहि य उप्पत्तियाहि
 य वेणइयाहि य कम्मियाहि य पारिणामियाहि य चउत्विहार्हाहि वट्ठीहि अणुत्तिते-
 माणे २ तस्स बोहलस्स आयं वा उवायं वा ठिइं वा उप्पत्ति वा अविदमाणे
 ओहयमणसंकप्पे जाव श्रियायइ ॥१४॥ तयानंतरं च णं अभए कुमारे ष्हाए
 कयवलिकम्मे जाव सव्वालंकारविभूंसिए पायवंदए पहारेत्थ गमणाए । तए णं
 से अभयकुमारे जेणेव सेणिए राया तेणेव उवागच्छइ २ ता सेणियं रायं ओहय-
 मणसंकप्पं जाव श्रियायमाणं पासइ २ ता अयमेयारूवे अज्झत्थिए चित्तिए पत्थिए
 मणोगए संकप्पे सम्पपिज्जत्था-अण्णया ममं सेणिए राया एज्जमाणं पासइ
 पासित्ता आढाइ परियाणइ सवकारेइ सम्माणेइ आलवइ संलवइ अट्ठासणेणं
 उवणिमंतेइ मत्थयंसि अग्घाइ । इयाणि ममं सेणिए राया णो आढाइ णो
 परियाणइ णो सवकारेइ णो सम्माणेइ णो इट्ठाहि कंताहि पियाहि मणुष्णाहि
 मणामाहि ओरालाहि वग्गूहि आलवइ संलवइ णो अट्ठासणेणं उवणिमंतेइ णो
 मत्थयंसि अग्घाइ कियि ओहयमणसंकप्पे श्रियायइ । तं भवियव्वं णं एत्थ कार-
 णेणं । तं सेयं खलु मे सेणियं रायं एयमदुठं पुच्छित्तए । एवं संपेहेइ २
 ता जेणामेव सेणिए राया तेणामेव उवागच्छइ २ ता करयलपरिग्गहियं सिरसा-
 वत्तं मत्थए अंजलि कट्टु जएणं विजएणं वट्ठावेइ २ ता एवं वयासी-तुभं
 णं ताओ ! अण्णया ममं एज्जमाणं पासित्ता आढाइ परियाणह जाव मत्थयंसि
 अग्घायह आसणेणं उवणिमंतेह, इयाणि ताओ ! तुभं ममं णो आढाइ जाव
 णो आसणेणं उवणिमंतेह कियि ओहयमणसंकप्पा जाव श्रियायह, तं भवियव्वं
 ताओ ! एत्थ कारणेणं, तओ तुभं मम ताओ ! एयं कारणं अग्गहेमाणा
 असंकेमाणा अणिग्गहेमाणा अपच्छाएमाणा जहाभूयमवितहमसंदिद्धं एयमदुठं
 आइक्खह । तए णं हं तस्स कारणस्स अंतगमणं गमिस्सामि । तए णं से सेणिए
 राया अभएणं कुमारेणं एवं वुत्ते समाणे अभयकुमारं एवं वयासी-एवं खलु
 पुत्ता ! तव च्चल्लमाउयाए धारिणीए देवीए तस्स गन्मस्स दोमु भासेसु अइ-
 व्वकंतेसु तइयमासे वट्टमाणे दोहलकालसमयंसि अयमेयारूवे दोहले पाउवम-
 चित्था-धण्णाओ णं ताओ अम्मयाओ त्हेव निरवसेसं भाणियव्वं जाव विणत्ति ।

तए णं अहं पुत्ता ! धारिणीए देवीए तस्स अकालदोहलस्स बह्निहि आएहि य उवाएहि जाव उर्पत्ति अविदमाणे ओह्यमणसंकप्पे जाव झियामि तुमं आगयंपि ण याणामि, तं एएणं कारणेणं अहं पुत्ता ! ओह्यमणसंकप्पे जाव झियामि । तए णं से अभए कुमारे सेणियस्स रण्णे अंतिए एयमदुठं सोच्चा णिसम्म हट्ठ जाव हियए सेणियं रायं एवं वथासी—मा णं तुभ्भे ताओ ! ओह्यमणसंकप्पा जाव झियायह । अहं णं तथा करिस्सामि जहा णं मम चुल्लमाउयाए धारिणीए देवीए अयमेयारूवस्स अकालदोहलस्स मणोरहसंपत्ती भविस्सइ त्तिकट्टु सेणियं रायं ताहि इट्ठाहि कंताहि जाव समासासेइ । तए णं सेणिए राया अमएणं कुमारेणं एवं वुत्ते समाणे हट्ठनुदुठे जाव अमयं कुमारं सक्कारेइ सम्माणेइ सक्कारित्ता सम्माणित्ता पडिबिसज्जेइ ॥१५॥ तए णं से अभए कुमारे सक्कारिए सम्माणिए पडिबिसज्जिए समाणे सेणियस्स रण्णे अंतियाओ पडिणिक्खमइ २ ता जेणामेव सए भवणे तेणामेव उवागच्छइ २ ता सोहासणे णिसण्णे । तए णं तस्स अमयकुमारस्स अयमेयारूवे अज्झत्थिए जाव समुप्पज्जित्था—ओ खलु सक्का माणस्सएणं उवाएणं मम चुल्लमाउयाए धारिणीए देवीए अकालदोहलमणोरहसंपत्ति करित्तए णण्णत्थ दिव्वेणं उवाएणं । अत्थि णं मज्झ सोहम्मकप्पवासी पुव्वसंगइए देवे महिड्डिए जाव महारासोक्खे । तं सेयं खलु मम पोसहसालाए पोसहियस्स बंभयारिस्स उम्भक्कमणिसुवण्णस्स ववगयमालावण्णगविल्लेवणस्स णिक्खित्तसत्थमुसल्लस्स एगस्स अबीयस्स दब्भसंधारोवगयस्स अट्टमभत्तं पणिण्हत्ता पुव्वसंगइयं देवं मणसीकरेमाणस्स विहरित्तए । तए णं पुव्वसंगइए देवे मम चुल्लमाउयाए धारिणीए देवीए अयमेयारूवे अकालमेहेसु दोहलं विणेहिइ, एवं संपेहेइ २ ता जेणेव पोसहसाला तेणामेव उवागच्छइ २ ता पोसहसालं पमज्जइ २ ता उच्चारपासवणमूमि पडिलेहेइ २ ता दब्भसंधारणं पडिलेहेइ २ ता दब्भसंधारणं दुक्खइ २ ता अट्टमभत्तं पणिण्हइ २ ता पोसहसालाए पोसहिए बंभयारी जाव पुव्वसंगइयं देवं मणसीकरेमाणे २ चिट्ठइ । तए णं तस्स अमयकुमारस्स अट्टमभत्ते परिणममाणे पुव्वसंगइयस्स देवस्स आसणं चलइ । तए णं पुव्वसंगइए सोहम्मकप्पवासी देवे आसणं चत्थियं पासइ २ ता ओहि पउंजइ । तए णं तस्स पुव्वसंगइयस्स देवस्स अयमेयारूवे अज्झत्थिए जाव समुप्पज्जित्था—एवं खलु मम पुव्वसंगइए जंबूहीवे २ भारहे वासे दाहिणडुभरहे रायगिहे णयरे

पोसहसालाए पोसहिए अन्नए णामं कुमारे अट्टमभत्तं पगिण्हत्ता णं मम मणसी-
करेमाणे २ चिट्ठइ । तं सेयं खलु मम अभयस्स कुमारस्स अत्तिए पाउब्भवित्तए ।
एवं संपेहेइ २ ता उत्तरपुरत्थिमं दिसीभागं अवक्कमइ २ ता वेउत्त्विय-
समुग्घाएणं समोहणइ २ ता संखेज्जाइं जोयणाइं दंडं णिसिरइ, तंजहा-रय-
णाणं वइरारं वेहलियाणं लोहियवखाणं मसारगत्ताणं हंसगन्भाणं पुलगाणं
सोमंघियाणं जोइरसाणं अंकाणं अंजणाणं रयणाणं जायव्वाणं अंजणपुलगाणं
फलहाणं रिट्टाणं अहाबायरे पोगले परिसाडेइ २ ता अहासुट्ठे पोगले परि-
गिण्हइ २ ता अभयकुमारमणुकंपमाणे देवे पुव्वभवज्जणियणेहोइवहुमाणजाय-
सोगे तओ विमाणवरपुंडरीयाओ रयणुत्तमाओ धरणियलगमणतुरियसंजणिय-
गमणपयारो वाघुण्णिय-विमल-कणंभ-पयंरग-वडिसगमउत्तुवकडाडोवदंसणिज्जो
अणेगमणि-कणगरयणपहकरपरिमंडिय-भत्तिचित्त-विणित्त (मणुगुण) गमण-
गजणियहरिसे पेंखोलमाणवरललियकुंडलुज्जलिय-वयणगुणजणियसोमरूवे
उदिओ विव कोमुदीणिसाए सणिच्छरंगारकुज्जलियमज्जमागत्ये णयणाणंदो
सरयचंदो दिव्वोसहिपज्जलुज्जलियदंसणाभिरामो उउलच्छिसमतजाय-
सोहे पइट्टगंधुद्धुयाभिरामे मेहरिव णगवरो विउत्त्वियवित्तवेसे दीवसमु-
ट्टाणं असंखपरिमाणणामधेज्जाणं मज्जयारेणं वीइवयमाणो उज्जोयंतो
पभाए विमलाए जीवलोयं रायगिहं पुरवरं च अभयस्स य तस्स पासं ओवयइ
दिव्वरूवधारो ॥१६॥ तए णं से देवे अंतलिवक्खपडिवण्णे दसद्धवण्णाइं सखि-
खिणियाइं पवर वत्थाइं परिहिए । एवको ताव एसो गमो । अण्णोऽवि गमो-
ताए उविकट्टाए तुरियाए चवलाए चंडाए सोहाए उद्धुयाए जयणाए छेयाए
दिव्वाए देवगईए जेणामेव जंबुद्धीवे २ भारहे वासे जेणामेव दाहिणद्धभरहे राय-
गिहे णयरे पोसहसालाए अन्नए कुमारे तेणामेव उवागच्छइ २ ता अंत-
लिवक्खपडिवण्णे दसद्धवण्णाइं सखिखिणियाइं पवरवत्थाइं परिहिए अभयं कुमारं
एवं वयासी-अहं णं देवाणुप्पिया ! पुव्वसंगइए सोहम्मकप्पवासी देवे महड्डिए
जं णं तुमं पोसहलासाए अट्टमभत्तं पगिण्हत्ता णं मम मणसीकरेमाणे २ चिट्ठसि,
तं एस णं देवाणुप्पिया ! अहं इहं हव्वमागए । सद्धिसाहि णं देवाणुप्पिया ! किं
करेमि किं दलामि किं पयच्छामि किं वा ते हियइच्छियं ? । तए णं से अन्नए
कुमारे तं पुव्वसंगइयं देवं अंतलिवक्खपडिवण्णं पासइ २ ता हट्टुट्टे पोसहं
पारेइ २ ता करयल जाव अंजलि कट्टु एवं वयासी-एवं खलु देवाणुप्पिया ! मम

चुल्लमाउयाए धारिणीए देवीए अयमेयारुवे अकालदोहले पाउडूमए—धण्णाओ णं ताओ अम्मयाओ तहेव पुच्चगमेणं जाव विणिज्जाभि । तं णं तुमं देवाणु-
 पिपया ! मम चुल्लमाउयाए धारिणीए देवीए अयमेयारुवं अकालदोहलं विणेहि ।
 तए णं से देवे अभएणं कुमारेणं एवं बुत्ते समाणे हट्टुत्ठे अभयं कुमारं एवं
 वयासी—तुमं णं देवाणुपिपया ! सुणिच्चयवीसत्थे अच्छाहि, अहं णं तव
 चुल्लमाउयाए धारिणीए देवीए अयमेयारुवं दोहलं विणेमित्तिकट्टु अभयस्स
 कुमारस्स अंतियाओ पड्डिणिवखमइ २ ता उत्तरपुरत्थिमे णं वेभारपव्वए
 वेउद्वियममुग्घाणं समोहणइ २ ता संखेज्जाइं जोयणाइं दंडं णिस्सरइ जाव
 दोच्चपि वेउद्वियममुग्घाणं समोहणइ २ ता खिप्पामेव सगज्जइयं सविज्जुयं
 सफुमियं तं पंचवण्णमेहणिणाओवसोहियं दिव्वं पाउससिरी विउव्वइ २ ता
 जेणेव अभए कुमारे तेणेव उवागच्छइ २ ता अभयं कुमारं एवं वयासी—
 एवं खलु देवाणुपिपया ! मए तव पियट्टयाए सगज्जिया सफुसिया सवि-
 ज्जुया दिव्वा पाउससिरी विउद्विया, तं विणेउ णं देवाणुपिपया ! तव चुल्ल-
 माउया धारिणी देवी अयमेयारुवं अकालदोहलं । तए णं से अभए कुमारे
 तस्स पुच्चसंगइयस्स सोहम्मकप्पवासिस्स देवस्स अंतिए एयमट्ठं सोच्चा णिसम्म
 हट्टुत्ठे मयाओ भवणाओ पड्डिणिवखमइ २ ता जेणामेव सेणिए राया तेणा-
 मेव उवागच्छइ २ ता करयल जाव अंजलि कट्टु एवं वयासी—एवं खलु ताओ !
 मम पुच्चसंगइएणं सोहम्मकप्पवाणिणा देवेणं खिप्पामेव सगज्जिया सविज्जुया
 (सफुमिया) पंचवण्णमेहणिणाओवसोमिया दिव्वा पाउससिरी विउद्विया । तं
 विणेउ णं मम चुल्लमाउया धारिणी देवी अकालदोहलं । तए णं से सेणिए
 राया अभयस्स कुमारस्स अंतिए एयमट्ठं सोच्चा णिसम्म हट्टुत्ठु जाव कोडुं-
 वियपुरिसे सद्दावेइ २ ता एवं वयासी—खिप्पामेव भो देवाणुपिपया ! रायगिहं
 णयरं मिघाडगतिगच्चउवकच्चचर० आसित्तिसित्त जाव सुगंधवरगधियं गंधव-
 ह्दियं करेह य कारवेह य करित्ता य कारविस्ता य मम एयमाणत्थियं पच्च-
 पिपणइ । तए णं ते कोडुंबियपुरिसा जाव पच्चपिपणंति । तए णं से सेणिए राया
 दोच्चपि कोडुंबियपुरिसे सद्दावेइ २ ता एवं वयासी—खिप्पामेव भो देवाणुपिपया !
 हयगयरहजोहपवरकत्थियं चाउरंमिणिं सेणं सण्णाहेह्दु सेयणयं च गंधहत्थि
 परिकप्पेह । तेवि तहेव जाव पच्चपिपणंति । तए णं से सेणिए राया जेणेव

धारिणी देवी तेणामेव उवागच्छइ २ ता धारिणि देवि एवं वयासी-एवं खलु देवानुप्पिए ! सगज्जया जाव पाउससिरी पाउब्भया, तं णं तुमं देवानुप्पिए ! एयं अकालदोहलं विणेहि । तए णं सा धारिणी देवी सेणिएणं रण्णा एवं वुत्ता समाणी हट्टुट्टा जेणामेव मज्जणघरे तेणेव उवागच्छइ २ ता मज्जणघरं अणु-प्पविसइ २ ता अंतो अंतेउरंसि ण्हाया कयबलिकम्मा कयकोउय-मंगल-पाय-च्छित्ता किं ते वरपायपत्तणेउर जाव आगासफालियसमप्यभं असुयं णियत्या सेयणयं गंधहत्थि दुरूद्धा समाणी अमयमहियफेणपुंजसण्णिभासाहि सेयचायरवाल-वीयणीहि वीइज्जमाणी २ संपत्थिया । तए णं से सेणिए राया ण्हाए कयबलि-कम्मे जाव सत्सिरीए हत्थिखंधवरगए सकोरेंटमल्लदामेणं छत्तेणं धरिज्जमाणेणं चउचामराहि वीइज्जमाणे धारिणीदेवीं पिट्टओ अणुगच्छइ । तए णं सा धारिणी देवी सेणिएणं रण्णा हत्थिखंधवरगएणं पिट्टओ २ समणुगम्ममाणमग्गा ह्यगय-रहजोहकलियाए चाउरंणिणीए सेणाए सद्धि संपरिवुडा महया भडचडगर-बंदपरिविखत्ता सत्विइदीए सव्वज्जुईए जाव दुंदुभिणिग्घोसणाइयरवेणं रायगिहे णयरे सिघाडगतिगन्नउवकच्चर जाव महापहेसु णागरजणेणं अभिणदिज्जमाणी २ जेणामेव वेभारगिरिवट्ठए तेणामेव उवागच्छइ २ ता वेभारगिरि-कडगतडपायमूले आरामेसु य उज्जाणेसु य काण्णेसु य वणेसु य वणसंडेसु य रुवलेसु य गुच्छेसु य गुम्मेसु य लयासु य वल्लीसु य कंदरासु य दरीसु य चुण्डीसु य दहेसु य कच्छेसु य णईसु य संगमेसु य विवरएसु य अच्छमाणी य पेच्छ-माणी य मज्जमाणी य पत्ताणि य पुप्फाणि य फलाणि य पल्लवाणि य मिण्ह-माणी य माणेमाणी य अघायमाणी य परिभुंजमाणी य परिभाएमाणी य वेभारगिरिपायमूले दोहलं विणेमाणी सव्वओ समंता आहिइइ । तए णं सा धारिणी देवी (तंसि अकालदोहलंसि विणीयंसि सम्माणियदोहला) विणीय-दोहला संपुण्णदोहला संपण्णदोहला जाया यावि होत्था । तए णं सा धारिणी देवी सेयणयं गंधहत्थि दुरूद्धा समाणी सेणिएणं हत्थिखंधवरगएणं पिट्टओ २ समणुगम्म-माणमग्गा ह्यगय जाव र(हि)वेणं जेणेव रायगिहे णयरे तेणेव उवागच्छइ २ ता रायगिहं णयरं मज्जमज्जेणं जेणामेव सए भवणे तेणामेव उवागच्छइ २ ता विउलाइं माणुस्सगाइं भोगभागाइं जाव विहरइ ॥१७॥ तए णं से अमए कुमारे जेणामेव पोसहसाला तेणामेव उवागच्छइ २ ता पुव्वसंगइयं देवं सक्कारेइ

सम्माणेइ सं २ ता पड्विसज्जेइ । तए णं से देवे सगज्जियं पंचवणमेहोव-
सोहियं विस्वं पाउससिंरि पडिसाहरइ २ जामेव विंसि पाउग्भूए तामेव विंसि
पडिगए ॥१६॥ तए णं सा धारिणी देवी तंसि अकालदोहलंसि विणीयसि
सम्माणियदोहला तस्स गम्भस्स अणुकंपणट्टाए जयं चिट्ठइ जयं आसयइ जयं
सुवइ आहारं पियं आहारेमाणी णाइतित्तं णाइकडुयं णाइकसायं णाइ-
अंबिलं णाइमहुरं जं तस्स गम्भस्स हियं मियं पत्थयं देसे य काले य आहारं
आहारेमाणी णाइचित्तं णाइसोयं (णाइदेणं) णाइमोहं णाइभयं णाइपरित्तासं
ववगयं चित्तासोयमोहभयपरित्तासा उउभयमाणसुहेहिं भोयणच्छायणगंधमल्ला-
लंकारेहिं तं गम्भं सुहंसुहेणं परिवहइ ॥१६॥ तए णं सा धारिणी देवी गवण्हं
मासाणं बहुपडिपुण्णाणं अट्टट्टमाणं य राइदियाणं वीइक्कंताणं अट्टरत्तकाल-
समयंसि सुकुमालपाणिपायं जाव सव्वंगसुंदरं दारगं पयाया । तए णं ताओ
अंगपडियारियाओ धारिणिं देविं गवण्हं मासाणं जाव दारगं पयायं पसंति २
ता सिग्घं तुरियं चवलं वेइयं जेणेव सेणिए राया तेणेव उवागच्छंति २ ता
सेणियं रायं जएणं विजएणं वट्ठावेति २ ता करयत्तपरिगहियं सिरसावत्तं
मत्थए अजंलिं कट्टु एवं वयासी—एवं खलु देवाणुप्पिया ! धारिणी देवी गवण्हं
मासाणं जाव दारगं पयाया, तं णं अम्हे देवाणुप्पियाणं पियं णिवेएमी पियं भे
भवउ । तए णं से सेणिए राया तांसि अंगपडियारियाणं अंतिए एयमट्ठं सोच्चा
णिसम्म हट्टुत्तुट्टुं ताओ अंगपडियारियाओ महुरेहिं वयणेहिं विउलेणं य पुष्फ-
गंधमल्लालंकारेणं सक्कारेइ सम्माणेइ सं २ ता मत्थयधोयाओ करेइ पुत्ताणु-
पुत्तिव्वं विंसि कप्पेइ २ ता पड्विसज्जेइ । तए णं से सेणिए राया (पच्चूस-
कालसमयंसि) कोडुंबियपुरित्ते सद्दावेइ २ ता एवं वयासी—खिप्पामेव भो
देवाणुप्पिया ! रायगिहं णयरे आसिय जाव परिणीयं करेह २ ता चारगपरि-
सोहणं करेह २ ता भाणुम्माणवट्ठणं करेह २ ता एयमाणत्तियं पच्चप्पिणह
जाव पच्चप्पिणंति । तए णं से सेणिए राया अट्टारससेणिएप्पेणीओ सद्दावेइ २
ता एवं वयासी—गच्छह णं तुवमे देवाणुप्पिया ! रायगिहे णयरे अंबितरवाहि-
रिए उस्सुवकं उक्करं अमडप्पवेसं अवंडिमकुदंडिमं अधरिमं अधारणिज्जं अणु-
द्धुयमुइंगं अमिलायमल्लदामं गणियावरणाडइज्जकलियं अणेगतालायराणुचरियं
पमुइयपक्कीत्तियाभिरामं जहारिहं ठिइवडियं वसद्विसियं करेह २ ता एय-

माणत्तियं पच्चप्पिणह तेवि करेति २ तहेव पच्चप्पिणंति । तए णं से सेणिए राया ब्राहिरियाए उवट्टाणसालाए सीहासणवरगए पुरत्थासिमुहे सण्णिसण्णे सदएहि य साहस्सिएहि य सयसाहस्सिएहि य जाएहि य दाएहि य भाएहि य दलयमाणे २ पडिच्छेमाणे २ एवं च णं विहरइ । तए णं तस्स अम्मापियरो पढमे दिवसे जायकम्मं करेति २ ता बिइयदिवसे जागरियं करेति २ ता तइए दिवसे चंदसूरइंसणियं करेति २ ता एवामेव णिव्वत्ते असुइजायकम्मकरणे संपत्ते बारसाहदिवसे विपुलं असणं पाणं खाइमं साइमं उवक्खडावेति २ ता मित्तणाइणियगसयणसंबंधिपरिजणं बलं च बहवे गणणायगदंडणायग जाव आमतेति तओ पच्छा ण्हाया कयबलिकम्मा कयकोउय जाव सव्वालंकारविमू- सिया महइमहालयंसि भोयणमंडवंसि तं विपुलं असणं पाणं खाइमं साइमं मित्तणाइ० गणणायग जाव सद्धि आसाएमाणा विसाएमाणा परिभाएमाणा परिभुंजेमाणा एवं च णं विहरंति जिमियभुत्तुरागयात्रि य णं समाणा आयंता चोवखा परमसुइभूया तं मित्तणाइणियगसयणसंबंधिपरियणं बलं च बहवे गण- णायग जाव विपुलेणं पुष्फवत्थगंधमत्तालंकारेणं सवकारेति सम्माणेति स० २ ता एवं वयासी—जम्हा णं अम्हं इमस्स दारगस्स गड्ढत्थस्स चैव समाणस्स अकालमेहेसु दोहले पाउवभूए तं होउ णं अम्हं दारए मेहे णामेणं मेहकुमारे । तस्स दारगस्स अम्मापियरो अयमेयारुचं गोणं गुणणिष्फणं णामधेज्जं करेति मेहेइ । तए णं से मेहे कुमारे पंचधाईपरिग्गहिए तंजहा—खीरधाईए मंडणधाईए मज्जणधाईए कीलावणधाईए अंकधाईए अण्णाहि य बहहि खुज्जाहि चिलाइ- याहि वामणिवडभिबव्वरिबउसिजोणियपत्तहवियईसिणिय धोरुगिणि- लासियलउसियदमिलिसंहलित्तिआरविपुलिदिवक्कणिबह्लिमुरुंडिसवरिपारसीहि णाणादेसीहि विदेसपरिमंडियाहि इगियचित्तियपत्थियवियाणियाहि सदेसणेवत्थ- गहियवेसाहि णउणकुसलाहि विणीयाहि चेडियाचक्कवालवरिसधरकंचुइज्ज- महयरगवंदपरिविखत्ते हत्थाओ हत्थं साहरिज्जमाणे अंकाओ अंकं परिमुज्ज- माणे परिगिज्जमाणे उवलालिज्जमाणे रम्मंसि भणिकोट्टिमत्तलंसि परिमिज्ज- माणे २ णिव्वायणिव्वाघायंसि गिरिकंदरमत्तीणेव चंपगपायवे सुहंसुहेणं वड्डइ । तए णं तस्स मेहस्स कुमारस्स अम्मापियरो अणुपुव्वेणं णामकरणं च पजेमणं च एवं चंकमणं च चोलोवणं च महया २ इड्ढीसवकारसमुदएणं करिमु ।

तए णं तं मेहं कुमारं अम्मापियरो साइरेगट्टुवासजायगं चैव गड्ढट्टुमे वासे सोहर्णसि तिहिकरणमुहुत्तंसि कलायरियस्स उवणेति । तए णं से कलायरिए मेहं कुमारं लेहाइयाओ गणियप्पहाणाओ सउणरुयपज्जवसाणाओ बावत्तारि कलाओ सुत्तओ य अत्थओ य करणओ य सेहावेइ सिक्खावेइ तंजहा—लेहं गणियं रूवं णट्टं गीयं वाइयं सरगयं पोक्खरगयं समतालं जूयं जणवायं पासयं अट्टावथं पोरेकच्चं दगमट्टियं अणज्जविहिं पाणविहिं वत्थविहिं विलेवणविहिं सयणविहिं अज्जं पहेलियं मागहियं गाहं गीइयं सिलोयं हिरण्णज्जुत्तिं सुवण्णज्जुत्तिं चूण्णज्जुत्तिं आभरणविहिं तरुणीपडिकम्मं इत्थित्तवखणं पुरिसलवखणं ह्यलवखणं गयलवखणं गोणलवखणं कुक्कुडलवखणं छत्तलवखणं दंडलवखणं असिलवखणं मणिलवखणं कामिणिलवखणं वत्थुविज्जं खंधारमाणं णगरमाणं वूहं पडिवूहं चारं पडिचारं चक्कवूहं गरुलवूहं सगडवूहं जुद्धं णिज्जुद्धं जुद्धाइज्जुद्धं अट्टिज्जुद्धं मट्टिज्जुद्धं बाहुज्जुद्धं लयाज्जुद्धं ईसत्थं छरुप्पत्रायं धणुव्वेयं हिरण्णपागं सुवण्णपागं सुत्तवेडं वट्टुखेडं णालियाखेडं पत्तच्छेज्जं कडगच्छेज्जं सज्जीवं णिज्जोवं सउणरुयं ति ॥२०॥ तए णं से कलायरिए मेहं कुमारं लेहाइयाओ गणियप्पहाणाओ सउणरुयपज्जवसाणाओ बावत्तारि कलाओ सुत्तओ य अत्थओ य करणओ य सेहावेइ सिक्खावेइ सेहावित्ता सिक्खावित्ता अम्मापिऊणं उवणेइ । तए णं मेहस्स कुमारस्स अम्मापियरो तं कलायरियं महुरेहिं वयणेहिं विउलेणं वत्थगधमल्लालंकारेणं सक्कारेति सम्माणेति स० २ ता विउत्तं जीवियारिहं पीइदाणं दलयति २ ता पडिविसज्जेति ॥२१॥ तए णं से मेहे कुमारं बावत्तरिकलापंडिए णवंगमुत्तपडिबोहिए अट्टारसविहिप्पमारदेसीभासाविसारए गीयरई गंधव्वणट्टुकुसले ह्यजोही गयजोही रहजोही बाहुजोही बाहुप्पमट्टी अलंभोगसमत्थे साहसिए वियालचारी जाए यावि होत्था ॥२२॥ तए णं तस्स मेहकुमारस्स अम्मापियरो मेहं कुमारं बावत्तरिकलापंडियं जाव वियालचारिं जायं पासंति २ ता अट्टापासायवडिसए कारेति अट्टभुगयमूसिय पंहसिए विव मणिकणगरयणभत्तिच्चित्ते वाउद्धयविजयवेजयतीपडागाच्छत्ताइच्छत्तकलिए तुंगे गगणतलमभिलंघमाणसिहुरे जालंतररयणपंजरम्मिल्लियव्व मणिकणमथूसियाए वियसियसयपत्तपुंडरीए तिलपरयणद्धयचंदच्चिए णाणामणिमयदामालंकिए अंतो बहिं च सण्हे तवणिज्जरुइलवालुयापत्थरे सुहफासे सस्सिरीयरूवे पासार्इए जाव पडिरूवे । एयं च णं महं

भवणं कारेति अणेगखंभसयसणिविदं लीलट्टियसालभंजियागं अट्टभुगयमुकय-
 वइरवेइयातोरण-वररदयसालभंजियासुसिलिट्टु-विसिट्टुलट्टुसंठिपपसत्थ-वेहलिय-
 खंभणाणामणिकणगरयणखच्चियउज्जलं बहुसमसुविभत्तणिच्चियरमणिउज्जभूमि-
 भागं ईहामिय जाव भत्तिच्चत्तं खंभुगयवयरवेइयापरिगयाभिरामं विज्जाहर-
 जभलजुयलजंतजुत्तंपिव अच्चीसहस्समालणीयं रुवगसहस्सकलियं भिसमाणं
 भिन्मिसमाणं चवखुल्लोयणलेसं सुहफासं सस्सिरीयरूवं कंचणमणिरयणथम्मियागं
 णाणाविहपंचवण्णघंटापडागपरिमंडियग्गसिहरं धवलमिरीचिकवयं विणिम्मयंतं
 लाउल्लोइयमहियं जाव गंधवट्टिमूयं पासाईयं दरिसणिज्जं अमिरूवं पडिरूवं
 ॥२३॥ तए णं तस्स मेहस्स कुमारस्स अम्मापियरो मेहं कुमारं सोहणंसि
 तिहिकरणवखत्तम्हुत्तंसि सरिसियाणं सरिसव्वयाणं सरित्तयाणं सरिस-
 लावण्णरूवजोच्चवण्णोववेयाणं सरिसएहिंतो रायकुलेहिंतो आणियत्तिलयाणं
 पसाहणट्ठंगअविहववहुओवयणमंगलमुज्जंपिएहिं अट्टाहिं रायवरकण्णाहिं सट्ठि एग-
 दिवसेणं पाणिं गिण्हाविसु । तए णं तस्स मेहस्स अम्मापियरो इमं एयारूवं
 पीइदाणं दलयति—अट्ट हिरण्णकोडीओ अट्ट सुवण्णकोडीओ गाहाणुसारेण भाणि-
 यव्वं जाव पेसणकारियाओ अण्णं च विपुलं धणकणगरयणमणिमोत्तिय-
 संखसिलप्पवालरत्तरयणसंतसारंसावएज्जं अलाहिं जाव आसत्तमाओ कुलवंसाओ
 पकामं दाउं पकामं भोत्तुं पकामं परिभाएउं । तए णं से मेहे कुमारे एगमेगाए
 भारियाए एगमेगं हिरण्णकोडि दलयइ एगमेगं सुवण्णकोडि दलयइ जाव एग-
 मेगं पेसणकारिं दलयइ अण्णं च विउलं धणकणग जाव परिभाएउं दलयइ ।
 तए णं से मेहे कुमारे उप्पि पासायवरगए फुट्टमाणेहिं मुइंगमत्थएहिं वरतरुणि-
 संपउत्तेहिं बत्तीसइबट्टएहिं णाडएहिं उवगिज्जमाणे २ उवत्तालिज्जमाणे २
 सद्दफरिसरसरूवगंधविउले माणुस्सए कामभोगे पच्चणुभवमाणे विहरइ ॥२४॥
 तेणं कालेणं तेणं समएणं समणे भगवं महावीरे पुब्बाणुपुट्ठि चरमाणे गामाणु-
 गामं वूइज्जमाणे सुहंसुहेणं विहरमाणे जेणामेव रायगिहे णयरे गुणसिलए चेइए
 जाव विहरइ । तए णं (से) रायगिहे णयरे सिघाडगतियचउवकचचवरं मह्या
 बहुजणसहेइ वा जाव बहवे उग्गा भोगा जाव रायगिहस्स णयरस्स मज्झंमज्जेणं
 एगदिंसि एगाभिभुहा णिगचच्छंति, इमं च णं मेहे कुमारे उप्पि पासायवरगए
 फुट्टमाणेहिं मुयंगमत्थएहिं जाव माणुस्सए कामभोगे भुजमाणे रायमगं च

आलोएमाणे २ एवं च णं विहरइ । तए णं से मेहे कुमारे ते बहवे उग्गे भोगे जाव एगविसाभिमुहे णिग्गच्छमाणे पासइ २ ता कंचुइज्जपुरिसं सद्दावेइ २ ता एवं वयासी—किण्णं भो देवाणुप्पिया ! अज्ज रायगिहे णयरे इंदमहेइ वा खंदमहेइ वा एवं रुट्टसिववेसमणणागजवखभूयणईतलायक्खवेइयपव्वयउज्जाणगिरि-जत्ताइ वा जओ णं बहवे उग्गा भोगा जाव एगविसि एगाभिमुहा णिग्गच्छंति । तए णं से कंचुइज्जपुरिसे समणस्स भगवओ महावीरस्स गहियागमणपवित्तीए मेहं कुमारं एवं वयासी—णो खलु देवाणुप्पिया ! अज्ज रायगिहे णयरे इंदमहेइ वा जाव गिरिजत्ताइ वा जं णं एए उग्गा जाव एगविसि एगाभिमुहा णिग्गच्छंति एवं खलु देवाणुप्पिया ! समणे भगवं महावीरे आइगरे तित्थगरे इहमागए इह संपत्ते इह समोसठे इह चेव रायगिहे णयरे गुणसिलए चेइए अहापडिरूवं जाव विहरइ ॥२५॥ तए णं से मेहे कुमारे कंचुइज्जपुरिसस्स अंतिए एयमट्ठं सोच्चाणिसम्म हट्टुट्ठे कीडुंबियपुरिसे सद्दावेइ २ ता एवं वयासी—त्तिप्पामेव भो देवाणुप्पिया ! चाउघटं आसरहं जूतामेव उवट्टवेह तहत्ति उवणेंति । तए णं से मेहे श्हाए जाव सव्वालंकारविभूसिए चाउघटं आसरहं दुख्खे समाणे सकोरंटमत्तदामेणं छत्तेणं धरिज्जमाणेणं महया भडचडगरविदपरियालसंपरि-बुडे रायगिहस्स णयरस्स भज्जंमज्जेणं णिग्गच्छइ २ ता जेणामेव गुणसिलए चेइए तेणामेव उवागच्छइ २ ता समणस्स भगवओ महावीरस्स छत्ताइ-च्छतं पडागाइपडागं विज्जाहरचारणे जंभए य देवे ओवयमाणे उप्पयमाणे पासइ २ ता चाउघटाओ आसरहाओ पच्चोरुहइ २ ता समणं भगवं महावीरं पंच-विहेणं अभिगमेणं अभिगच्छइ तंजहा—संचित्ताणं दब्बाणं विउसरणयाए, अचि-त्ताणं दब्बाणं अविउसरणयाए, एगसाडियं उत्तरासंगकरणेणं, चक्खुप्फासे अज-लिपग्गहेणं, मणसो एगत्तीकरणेणं । जेणामेव समणे भगवं महावीरे तेणामेव उवागच्छइ २ ता समणं भगवं महावीरं तिवखुत्तो आयाहिणं पयाहिणं करेइ २ ता वंदइ णमंसइ वं० ता समणस्स भगवओ महावीरस्स णच्चासण्णे णाइ-दूरे सुस्सुसमाणे णमंसमाणे पंजलिउडे अभिमुहे विणएणं पज्जवासइ । तए णं समणे भगवं महावीरे मेहस्स कुमारस्स तीसे य महइमहालियाए परिसाए मज्झागए विचित्तं धम्ममाइक्खइ जहा जीवा बज्जंति मुच्चंति जह य संकित्तिस्संति, धम्मकहा भाणियव्वा जाव परिसा पडिगया ॥२६॥ तए णं से मेहे कुमारे समणस्स भगवओ महावीरस्स अंतिए धम्मं सोच्चा णिसम्म हट्ट-

तुट्ठे समणं भगवं महावीरं तिवल्लुत्तो आयाहिणं पयाहिणं करेइ २ ता वंदइ
 णमंसइ वं० सा एवं वयासी-सइहामि णं भंते ! णिगमंथं पावयणं एवं पत्ति-
 यामि णं रोएमि णं अब्भुट्ठेमि णं भंते ! णिगमंथं पावयणं, एवमेयं भंते ! तह-
 मेयं अवित्तहमेयं इच्छियमेयं पडिच्छियमेयं भंते ! इच्छियपडिच्छियमेयं भंते !
 से जहेव तं तुव्वे वयह जं णवरं देवाणुप्पिया ! अम्मापियरो आपुच्छामि तओ
 पच्छा मुंडे भवित्ता णं पव्वइस्सामि । अहामुहं देवाणुप्पिया ! मा पडिबंधं करेह ।
 तए णं से मेहे कुमारे समणं भगवं महावीरं वंदइ णमंसइ वं० २ ता जेणामेव
 चाउग्घंटे आसरहे तेणामेव उवागच्छइ २ ता चाउग्घंटे आसरहं दुरुहइ २ ता
 महया भडचउगपरहकरेणं रायगिहस्सं णयरस्स मज्झंमज्जेणं जेणामेव सए भवणे
 तेणामेव उवागच्छइ २ ता चाउग्घंटाओ आसरहाओ पच्चोरुहइ २ ता जेणा-
 मेव अम्मापियरो तेणामेव उवागच्छइ २ ता अम्मापियरुणं पायवडणं करेइ २
 ता एवं वयासी-एवं खलु अम्मयाओ ! मए समणस्स भगवओ महावीरस्स अंतिए
 धम्मे णिसंते सेवि य मे धम्मे इच्छिए पडिच्छिए अभिरुइए । तए णं तस्स मेहस्स
 अम्मापियरो एवं वयासी-धणोसि तुमं जाया ! संपुणोसि० कयत्थोसि०
 कयलवखणोसि तुमं जाया ! जणं तुमे समणस्स भगवओ महावीरस्स अंतिए
 धम्मे णिसंते, से वि य ते धम्मे इच्छिए पडिच्छिए अभिरुइए । तए णं से मेहे
 कुमारे अम्मापियरो दोच्चंपि तच्चंपि एवं वयासी-एवं खलु अम्मयाओ ! मए
 समणस्स भगवओ महावीरस्स अंतिए धम्मे णिसंते, से वि य मे धम्मे इच्छिए
 पडिच्छिए अभिरुइए, तं इच्छामि णं अम्मयाओ ! तुव्वेहिं अब्भणुणाए समाणे
 समणस्स भगवओ महावीरस्स अंतिए मुंडे भवित्ता णं अगाराओ अणगारियं
 पव्वइत्तए । तए णं सा धारिणी देवी तं अणिट्ठं अकंतं अप्पियं अमणुणं अम-
 णां असुयपुव्वं फरुसं गिरं सोच्चा णिसम्म इमेणं एयास्सेवणं मणोमागसिएणं
 महया पुत्तदुवखेणं अभिभूया समाणी सेयागयरोमकूवपगलंतविलोणगाया सोय-
 णरपवेविद्यगी णित्तेया दीणविमणवयणा करयलमलियव्व कमलमाला तवखण-
 ओलुग्गदुव्वलसरीरा लावणसुण्णिच्छायगयसरीया पसिदिलभूतणपडंतखुम्मि-
 यसंचुणियधधवलवलयपव्वभट्टउत्तरिज्जा सुमालविकिण्णकेसहृत्था मुच्छावसणट्ट-
 चेयगरुई परसुणियत्तव्व चंपगलया णिव्वत्तमहेव इंदलट्ठी विमुक्कसंधि-
 बंधणा कोट्टिमत्तलंसि सव्वंभोहिं धसस्ति पडिया । तए णं सा धारिणी देवी

ससंभमोवत्तियाए तुरियं कंचर्णभिगारमुहविणिग्गयसीयलजलविमलधाराए
परिसिच्चमाणा णिव्वावियगायलदठी उक्खेवणत्तात्तिवटवीयणगजणियचाएणं
सफूसिएणं अंतेउरपरियणं आसासिया समाणी मुत्तावत्तिसिण्णगासपवडंत-
अंसुधाराहि सिच्चमाणी पओहरे कलुणविमणदीणा रोयमाणी कंदमाणी तिप्प-
माणी सोयमाणी विलवमाणी मेहं कुमारं एवं वयासी-तुमं सि णं जाया ! अम्हं
एगे पुत्ते इदंते कंते पिए मणुण्णे मणामे येज्जे वेसासिए सम्मए बहुमए अणुमए
भंडकरंदगसमाणे रयणे रयणभूए जीवियउस्सासए हिययाणंदज्जणणे उंवरपुप्फं
व दुल्लहे सवणयाए किमंग पुण पासणयाए, णो खलु जाया ! अम्हे इच्छामो
खणमवि विप्पओणं सहित्तए, तं भुंजाहि ताव जाया । विपुले माणुस्सए काम-
भोगे जाव ताव वयं जीवामो, तओ पच्छा अम्हेहि कालगएहि परिणयवए
वडियकुलवंसतंतुकज्जमि णिरावयक्खे समणस्स भगवओ महावीरस्स अतिए
मुंडे भवित्ता अगाराओ अणगारियं पव्वइस्ससि ॥२७॥ तए णं से मेहे
कुमारे अम्मापिऊहि एवं वुत्ते समाणे अम्मापियरो एवं वयासी-तहेव णं तं
अम्मयाओ ! जहेव णं तुम्हे ममं एवं वयह-तुमं सि णं जाया ! अम्हं एगे पुत्ते
तं चेव जाव णिरावयक्खे समणस्स भगवओ महावीरस्स जाव पव्वइस्ससि,
एवं खलु अम्मयाओ ! माणुस्सए भवे अधुवे अणियए असासए वसण-
सउवह्वाभिभूए विज्जुलयाचंचले अणिच्चे जलवुब्बुयसमाणे कुसग्गजलविदु-
सणिभे संज्ञमरागसरिसे सुविणदंसणोवमे सडणपडणविद्धंसणधम्मे पच्छा पुरं
च णं अवस्सविप्पजहणिज्जे, से के णं जाणइ अम्मयाओ ! के पुंवि गमणाए के
पच्छा गमणाए ? तं इच्छामि णं अम्मयाओ ! तुम्हेहि अब्बणुण्णाए समाणे
समणस्स भगवओ महावीरस्स जाव पव्वइत्तए । तए णं तं मेहं कुमारं अम्मा-
पियरो एवं वयासी इमाओ ते जाया ! सरिसियाओ सरित्तयाओ सरिव्वयाओ
सरिसलावण्णरूवजोव्वणगुणोव्वेयाओ सरिसेहितो रायकुलेहितो आणियत्ति-
याओ भारियाओ, तं भुंजाहि णं जाया ! एयाहि सिद्धि विउले माणुस्सए काम-
भोगे, तओ पच्छा सुत्तभोगे समणस्स भगवओ महावीरस्स जाव पव्वइस्ससि ।
तए णं से मेहे कुमारे अम्मापियरं एवं वयासी-तहेव णं अम्मयाओ ! जं णं तुम्हे
ममं एवं वयह-इमाओ ते जाया ! सरिसियाओ जाव समणस्स पव्वइस्ससि,
एवं खलु अम्मयाओ ! माणुस्सगा कामभोगा असुई असासया वंतासवा पित्ता-

सवा खेलासवा सुवकासवा सोणियासवा दुरुस्सासणीसासा दुरुयमुत्तपुरीसपूय-
 बहूपडिपुष्णा उच्चारपासवणखेलजल्लसिघाणगवंतपित्तसुवकसोणियसंभवा
 अधुवा अणियया असासया सडणपडणविद्धंसणधम्मा पच्छा पुरं च णं अवस्स
 विप्पजहणिज्जा, से के णं अम्मयाओ ! जाणइ के पुंविं गमणाए के पच्छा
 गमणाए ? तं इच्छामि णं अम्मयाओ ! जाव पव्वइत्तए । तए णं तं मेहं
 कुमारं अम्मापियरो एवं वयासी-इमे ते जाया ! अज्जगपज्जगविउपज्जयागए
 सुबहु हिरण्णे य सुवण्णे य कंसे य दूसे य मणिमोत्तिय संखसिलपवालरत्तरयण-
 संतसारसावएज्जे य अलाहि जाव आसत्तमाओ कुलवंसाओ पगामं दाउं पगामं
 भोत्तुं पगामं परिभाएउं, तं अणुहीहिं ताव जाव जाया ! विपुलं माणुस्सगं इड्डि-
 सवकारसमुदयं, तओ पच्छा अणुभूयकल्लाणे समणस्स भगवओ महावीरस्स
 अंतिए जाव पव्वइस्ससि । तए णं से मेहे कुमारे अम्मापियरं एवं वयासी-तहेव
 णं अम्मयाओ ! जं णं तं वयह-इमे ते जाया ! अज्जगपज्जगविउपज्जयागए
 जाव तओ पच्छा अणुभूयकल्लाणे जाव पव्वइस्ससि, एवं खलु अम्मयाओ !
 हिरण्णे य सुवण्णे य जाव सावएज्जे अगिसाहिए चोरसाहिए रायसाहिए दाइय-
 साहिए मच्चुसाहिए अगिसामण्णे जाव मच्चुसामण्णे सडणपडणविद्धंसणधम्मे
 पच्छा पुरं च णं अवस्सविप्पजहणिज्जे, से के णं जाणइ अम्मयाओ ! के पुंविं
 जाव गमणाए ? तं इच्छामि णं जाव पव्वइत्तए । तए णं तस्स मेहस्स कुमारस्स
 अम्मापियरो जाहे णो संचाएत्ति मेहं कुमारं बहूहिं विसयाणुलोमाहि आघवणाहि
 य पणवणाहि य सणवणाहि य विणवणाहि य आघवित्तए वा पणवित्तए वा
 सणवित्तए वा विणवित्तए वा ताहे विसयपडिकूलाहि संजमभउव्वेयकारियाहि
 पणवणाहि पणवेमाणा एवं वयासी-एस णं जाया ! णियगंथे पावयणे सच्चे
 अणुत्तरे केवलिए पडिपुष्णे णेयाउए संसुद्धे सल्लगतणे सिद्धिमग्गे मुत्तिमग्गे
 णिज्जाणमग्गे णिव्वाणमग्गे सव्वदुक्खप्पहीणमग्गे अहीव एगंतदिट्ठीए खुरो इव
 एगंतधाराए लोहमया इव जवा चावेयव्वा वालयाकवले इव णिरस्साए गंगा
 इव महाणई पडिसोयगमणाए महासमुदो इव भुयाहिं दुत्तरे तिवखं चंक्रमियवं
 गरुअं लंबेयवं असिधारव्वयं चरियवं । णो खलु कप्पइ जाया ! समणां णियगं-
 थाणं आहाकम्मिए वा उद्देसिए वा कौयगडे वा ठवियए वा रइयए वा दुम्मि-
 बखभत्ते वा कंतारभत्ते वा बट्टलियभत्ते वा गिलाणभत्ते वा मूलभोयणे वा कंद-
 भोयणे वा फलभोयणे वा वीयभोयणे वा हरियभोयणे वा भोत्तए वा पायए

वा । तुमं च णं जाया ! सुहसमुच्चिए णो चैव णं दुहसमुच्चिए णालं सीयं णालं
उण्हं णालं खुहं णालं पिवासं णालं वाइयपित्तिर्यासिभियसण्णिवाइयविविहे रोगा-
यके उच्च्रावए गामकंठए बाबीसं परीसहोवसग्गे उदिण्णे सम्मं अहियासित्तए ।
भुंजाहि ताव जाया ! माणुस्सए कामभोगे, तओ पच्छा भुत्तभोगी समणस्स
भगवओ महावीरस्स जाव पव्वइस्ससि । तए णं से मेहे कुमारे अम्मापिऊहि
एवं वुत्ते समाणे अम्मापियरं एवं वयासी-तहेव णं तं अम्मयाओ ! जं णं
तुभे ममं एवं वयह-एस णं जाया ! णिगंथे पावयणे सच्चे अणुत्तरे पुणरवि
तं चैव जाव तओ पच्छा भुत्तभोगी समणस्स भगवओ महावीरस्स जाव पव्व-
इस्ससि, एवं खलु अम्मयाओ ! णिगंथे पावयणे कीवाणं कायरानं कापुरि-
साणं इह्लोगपडिबद्धाणं परलोगणिपिवासाणं दुरणुत्तरे पाययजणस्स णो चैव णं
धीरस्स णिच्छियस्स ववसियस्स एत्थ किं दुक्करं करणयाए ? तं इच्छामि णं
अम्मयाओ ! तुभेहि अबभणुणाए समाणे समणस्स भगवओ महावीरस्स जाव
पव्वइत्तए ॥२८॥ तए णं तं मेहं कुमारं अम्मापियरो जाहे णो संवाइति बहूहि
विसयाणुलोमाहि य विसयपडिकूलाहि य आघवणाहि य पणवणाहि य सण्ण-
वणाहि विण्णवणाहि य आघवित्तए वा पणवित्तए वा सण्णवित्तए वा विण्ण-
वित्तए वा ताहे अका(मए)माइं चैव मेहं कुमारं एवं वयासी-इच्छामो ताव
जाया ! एगदिवसंमवि ते रायसिरिं पासित्तए । तए णं से मेहे कुमारे अम्मा-
पियरमणुवत्तमाणे तुसिणोए संचिट्ठइ । तए णं से सेणिए राया कोडुंबियपुरिसे
सहावेइ २ ता एवं वयासी-खिप्पाभेव भो देवानुप्पिघा ! मेहस्स कुमारस्स
महत्थं महगंथं महरिहं विउलं रायाभिसेयं उवट्ठवेह । तए णं ते कोडुंबियपुरिसा-
जाव तेवि तहेव उवट्ठवेति । तए णं से सेणिए राया बहूहि गणणायगदंडणा-
यगेहि य जाव संपरिवुडे मेहं कुमारं अट्ठसएणं सोवणियाणं कलसाणं एवं
हव्वमयाणं कलसाणं सुवण्णहव्वमयाणं कलसाणं मणिमयाणं कलसाणं सुवण्ण-
मणिमयाणं कलसाणं हव्वमणिमयाणं कलसाणं सुवण्णहव्वमणिमयाणं कलसाणं
भोमेइजाणं कलसाणं सव्वोदएहि सव्वमट्टियाहि सव्वपुप्फेहि सव्वगंधेहि सव्व-
मत्तेहि सव्वोसहीहि य सिद्धत्थएहि य सव्विड्ढीए सव्वज्जूए सव्वबलेणं जाव
बुंदुभिणिघोसणाइयरवेणं महया २ रायाभिसेएणं अभिसिचइ २ ता कर-
यल जाव कट्ठु एवं वयासी-जय २ गंदा ! जय २ भद्दा ! जय-गंदा ! ०

महं ते अजियं जिणेहि जियं पालयाहि जियमज्जे वसाहि अजियं जिणेहि सत्तु-
 पक्खं जियं च पालेहि मित्तपक्खं जाव भरहो इव मग्गयाणं रायगिहस्स णगरस्स
 अण्णेसि च बहूणं मामागरणगर जाव सण्णिवेसाणं आहेवच्चं जाव विहराहि
 त्ति कट्टु जयजयसहं पउंजति । तए णं से मेहे राया जाए महया जाव विहरइ । तए
 णं तस्स मेहस्स रण्णे अम्मापियरो एवं वयासी-भण जाया ! किं दलयामो किं
 पयच्छामो किं वा ते हियइच्छिए सामत्थे (मते) ? , तए णं से मेहे राया अम्मा-
 पियरो एवं वयासी-इच्छामि णं अम्मयाओ ! कुत्तियावणाओ रयहरणं पडिगहं
 च (आणियं) उवणेह कासवयं च सद्दावेह । तए णं से सेणिए राया कोडुं-
 बियपुरिसे सद्दावेइ २ ता एवं वयासी-गच्छह णं तुम्हे देवाणुप्पिया ! सिरि-
 घराओ तिण्णि सयसहस्साइं गहाय दोहि सयसहस्सेहि कुत्तियावणाओ रयहरणं
 पडिगहं च उवणेह सयसहस्सेणं कासवयं सद्दावेह । तए णं ते कोडुंबियपुरिसा
 सेणिएणं रण्णा एवं वुत्ता समाणा हट्टुट्टु! सिरिघराओ तिण्णि सयसहस्साइं गहाय
 कुत्तियावणाओ दोहि सयसहस्सेहि रयहरणं पडिगहं च उवणेति सयसहस्सेणं
 कासवयं सद्दावेति । तए णं से कासवए तेहि कोडुंबियपुरिसेहि सद्दाविए समाणे
 हट्टुट्टु जाव ह्यहियए ण्हाए कयबलिकम्भे कयकोउय-मंगल-पायच्छित्तं मुद्धप्पा-
 वेसाइं मंगल्लाइं वत्थाइं पवरपरिहिए अप्पमहग्घाभरणात्तं कियसरीरे जेणेव
 सेणिए राया तेणेव उवागच्छइ २ ता सेणियं रायं करयत्तमंज्जितं कट्टु एवं
 वयासी-सदिसह णं देवाणुप्पिया ! जं मए करणज्जं । तएणं से सेणिए राया
 कासवयं एवं वयासी-गच्छाहि णं तुमं देवाणुप्पिया ! मुरभिणा गंधोदएणं
 णिवके हत्थपाए पक्खालेहि सेयाए चउप्फालाए पोत्तीए मुहं बंधिता मेहस्स
 कुमारस्स चउरंगुलवज्जे णिवखमणपाउग्गे अगकेसे कप्पेहि । तए णं से कास-
 वए सेणिएणं रण्णा एवं वुत्ते समाणे हट्टुट्टु जाव हियए जाव पडिमुणेइ २ ता
 मुरभिणा गंधोदएणं हत्थपाए पक्खालेइ २ ता मुद्धवत्थेणं मुहं बंधइ २ ता
 परेणं जत्तेणं मेहस्स कुमारस्स चउरंगुलवज्जे णिवखमणपाउग्गे अगकेसे कप्पइ ।
 तए णं तस्स मेहस्स कुमारस्स माया महुरिहेणं हंसलक्खणेणं पडसाडएणं अग-
 केसे पडिच्छइ २ ता मुरभिणा गंधोदएणं पक्खालेइ २ ता सरसेणं गोसीस-
 चंदणेणं चच्चाओ दसयइ २ ता सेयाए पोत्तीए बंधइ २ ता रयणसमुग्गयसि
 पक्खवइ २ ता मंजूसाए पक्खवइ २ ता हारवारिधारिसिदुवारिच्छिणमुत्ता-

वलिप्पंगासाइं अंसूइं विणिम्मुयमाणी २ रोयमाणी २ कंदमाणी २ विलवमाणी २ एवं बयासी—एस णं अम्महं मेहस्स कुमारस्स अब्भुदएमु य उस्सवेसु य पव्वेसु य तिहीसु य छ्णसु य जण्णेसु य पव्वणीसु य अपच्छ्मे दरिसणे भविस्सइ त्ति कट्ट उस्सीसामूले ठवेइ । तए णं तस्स मेहस्स कुमारस्स अम्मपियरो उत्तरा-वक्कमणं सीहासणं रयावेति मेहं कुमारं दोच्चंपि तच्चंपि सेयपीयएहि कल-सेहि ण्हावेति २त्ता पम्हलसुकुमालाए गंधकासाइयाए गायाइं लूहेति २ ता सरसेणं गोसीसच्चंदणेणं गायाइं अणुलिपति २ ता णासाणीसासवायवोज्जं जाव हंसलक्खणं पडगसाडगं णियसेति २ ता हारं पिण्ढेति २ ता अद्धहारं पिण-ढेति २ ता एगावालं मुत्तावालं कणगावालं रयणावालं पालंबं पायपलंबं कड-गाइं तुडिगाइं केऊराइं अंगयाइं दसमुद्धियाणंतयं कडिसुत्तयं कुंडलाइं चूडामणि रयणक्कडं मउडं पिण्ढेति २ ता दिव्वं सुमणदामं पिण्ढेति २ ता ददूरमलय-सुगंधिए गंधे पिण्ढेति । तए णं तं मेहं कुमारं गंठिसवेडिमपूरिमसंधाइमेण चउच्चिहेणं मल्लेणं कप्पहक्खणं पिव अलंकियविभूसियं करेति । तए णं से सेणिए राया कोडुंबियपुरिसे सहावेइ २ ता एवं बयासी—खिप्पामेव भो देवाणु-प्पिया ! अणेगळंमसयसण्णिविट्ठं लीलद्वियसालभंजियाणं ईहामियउसभतुरय-णरमगरविहगवाल्लगकिण्णररुहसरभच्चमरकुंजरवणलयपउमलयभत्तिचित्तं घंटा-बलिसहुरमणहरसरं सुभकंतदरिसणिज्जं णिउणोवियमितिमिसितमणिरयण-घंटियाजालपरिक्खित्तं अब्भुग्गयवहरवेइयापरिगयाभिरामं विज्जाहरजमल-जंतजत्तं पिव अच्छीसहस्समालणीयं रूवगसहस्सकलियं भिसमाणं भिडिभसमाणं चक्खुल्लोयणलेस्सं सुहफासं सस्सिरीयरूवं सिगघं तुरियं चवलं वेइयं पुरिस-सहस्सवाहिणीं सीयं उवट्टवेह । तए णं ते कोडुंबियपुरिसा हट्टुट्टु जाव उवट्टवेति । तए णं से मेहे कुमारे सीयं दुरूहइ २ ता सीहासणवरगए पुरस्था-भिमुहे सण्णिसण्णे । तए णं तस्स मेहस्स कुमारस्स माया ण्हाया कयबलिकम्मा जाव अप्पमहग्घाभरणालंकियसरीरा सीयं दुरूहइ २ ता मेहस्स कुमारस्स दाहिणे पासे भद्दासणंसि णिसीयइ । तए णं तस्स मेहस्स कुमारस्स अंबघाई रयहरणं च पडिग्गहणं च गहाय सीयं दुरूहइ २ ता मेहस्स कुमारस्स वामे पासे भद्दा-सणंसि णिसीयइ । तए णं तस्स मेहस्स कुमारस्स पिट्टुओ एगा वरतरुणी सिगारागारचारुवेसा संगययहसियभणियवेद्वियविलाससंलावुल्लावणिउणजुत्तो-

वयारकुसला आमेलगजमलजुयल-वट्टियअवभुण्णयवीरणरइयसंठिय-पओहरा हिम-
 रययकुदंडुपगासं सकोरेंटमल्लदामधवलं आयवत्तं गहाय सलील ओहारेमाणी २
 चिट्ठइ । तए णं तस्स मेहस्स कुमारस्स दुवे वरतरुणीओ सिगारागारचाइ-
 वेसाओ जाव कुसलाओ सीयं दुरुहति २ त्ता मेहस्स कुमारस्स उभओ पासिं णाणा-
 मणिकणगरयणमहरिहतवणिणञ्जुज्जलविचित्तदंडाओ चिल्लियाओ सुहमवर-
 दीह्वालाओ संछकुंदवगरयअमयमहियफेणुंजसणिगामाओ चामराओ गहाय
 सलील ओहारेमाणीओ २ चिट्ठंति । तए णं तस्स मेहकुमारस्स एगा वरतरुणी
 सिगारा जाव कुसला सीयं जाव दुरुहइ २ त्ता मेहस्स कुमारस्स पुरओ पुरत्थि-
 भेणं चंदप्पभवइरवेहलियविमलदंडं त्तालवित्तं गहाय चिट्ठइ । तए णं तस्स
 मेहस्स कुमारस्स एगा वरतरुणी जाव सुरूवा सीयं दुरुहइ २ त्ता मेहस्स कुमा-
 रस्स पुत्थवविखणेणं सेयं रययामयं विमलमल्लिपुण्णं प्रत्तगयमहामुहाकित्तिसमाणं
 भिगारं गहाय चिट्ठइ । तए णं तस्स मेहस्स कुमारस्स पिया कोडुंबियपुरिसे सद्दा-
 वेइ २ त्ता एवं वयासी-त्तिप्पामेव भो देवाणुप्पिया ! सरिसयाणं सरित्तयाणं
 सरिव्वयाणं एगामरणगहियणिज्जोयाणं कोडुंबियवरतरुणाणं सहस्सं सद्दावेह
 जाव सद्दावेत्ति । तए णं ते कोडुंबियवरतरुणपुरिसा सेणिगस्स रण्णे कोडुंबिय-
 पुरिसोहिं सद्दादिया समाणा हट्ठा गहाया जाव एगामरणगहियणिज्जोया जेणा-
 मेव सेणिए राया तेणामेव उवागच्छति २ त्ता सेणियं रायं एवं वयासी-संदि-
 सहणं देवाणुप्पिया ! जं णं अम्हेहिं करणिज्जं । तए णं से सेणिए राया तं
 कोडुंबियवरतरुणसहस्सं वयासी-गच्छहं तुवभे देवाणुप्पिया ! मेहस्स कुमारस्स
 पुरिससहस्सवाहिणी सीयं परिवहेह । तए णं तं कोडुंबियवरतरुणसहस्सं सेणिएणं-
 रण्णा एवं वुत्तं संतं हट्ठं तुट्ठं तस्स मेहस्स कुमारस्स पुरिससहस्सवाहिणिं सीयं
 परिवहइ । तए णं तस्स मेहस्स कुमारस्स पुरिससहस्सवाहिणिं सीयं दुरुहस्स
 इमे अट्टमंगलया तप्पढमयाए पुरओ अहाणुपुव्वीए संपट्टिया, तंजहा-सोत्थिय-
 सिरिवच्छ, णंदियावत्त-वट्टनाणय-भट्टासण-कलस-मच्छ-दप्पण जाव बह्वे अत्थ-
 स्थिया जाव तार्हि इट्ठाहिं जाव अणवरयं अभिणंदंता य अभियुंता य एवं वयासी-
 जय २ णंदा ! जय २ भट्टा ! जयजयणंदा ! भट्टं ते अजियाइं जिणाहिं इंदियाइं
 जियं च पालेहिं समणधम्मं जियविग्घोऽविय वसाहि तं देव ! सिद्धिमज्जे
 णिहणारहिं रागदोसमल्ले तवेणं धिइधणियवट्टकच्छे सद्दाहि य अट्टकम्मसत्तू क्षाणेणं
 उत्तमेणं सुवकेणं अप्पमत्तो पावय वित्तिमिरमणुत्तरं केवलं णाणं गच्छ य भोक्खं

परमं पयं सासयं च अयलं हुंता परीसहचमूणं अभीओ परीसहोवसगमाणं धम्मे ते अविघं भवउ—त्तिकट्टुपुणो २ मंगलजय २ सद्दं पउजंति । तए णं से मेहे कुमारे रायगिहस्स णयरस्स मज्झंमज्जेणं णिग्गच्छइ २ ता जेणेव गुणसिलए चेइए तेणेव उवागच्छइ २ ता पुरिससहस्सवाहिणीओ सीयाओ पच्चोरुहइ ॥२६॥ तए णं तस्स मेहस्स कुमारस्स अम्मापियरो मेहं कुमारं पुरओ कट्टु जेणामेव समणे भगवं महावीरे तेणामेव उवागच्छति २ ता समणं भगवं महावीरं तिवखुत्तो आयाहिणं पयाहिणं करेति २ ता वंदंति णमसंति वं० २ ता एवं वयासी—एस णं देवाणुप्पिया ! मेहे कुमारे अम्हं एगे पुत्ते इट्ठे कंते जाव जीवियऊसासए हिययणंदिजणए उंवरपुष्कं पिव दुल्लहे सवणयाए किमंग पुण दरिसणयाए ? से जहाणामए उप्लेइ वा पउमेइ वा कुमुदेइ वा पंके जाए जले संबड्डिए णोवलिप्पइ पंकरएणं णोवलिप्पइ जलरएणं एवामेव मेहे कुमारे कामेसु जाए भोगेसु संबुड्ढे णोवलिप्पइ कामरएणं णोवलिप्पइ भोगरएणं, एस णं देवाणुप्पिया ! संसार-भउठिवागे भीए जम्मण-जर-भरणाणं इच्छइ. देवाणुप्पियाणं अंतिए मुंडे भवित्ता अगाराओ अणगारियं प्भवइत्तए । अम्हे णं देवाणुप्पियाणं तिस्सभिवखं दलयामो । पडिच्छतु णं देवाणुप्पिया ! तिस्सभिवखं । तए णं से समणे भगवं महावीरे मेहस्स कुमारस्स अम्मापिऊंहि एवं वृत्ते समाणे एयमट्ठं सम्मं पडिसुणेइ । तए णं से मेहे कुमारे समणस्स भगवओ महावीरस्स अंतियाओ उत्तरपुरच्छिभं विसीभागं अवक्कमइ २ ता सयमेव आभरणमल्लालंकारं ओमुयइ । तए णं से तस्स मेहकुमारस्स मया हुंसलक्खणेणं पडसाइएणं आमरणमल्लालंकारं पडिच्छइ २ ता हारवारिधारंसिद्धुवारच्छिणमुत्तावलिप्पगासाइं अंसूणि विणिम्मयमाणी २ रोयमाणी २ कंदमाणी २ विलवमाणी २ एवं वयासी—जइयवं जाया ! घडियवं जाया ! परक्कमियवं जाया ! अंसि च णं अट्ठे णो पमाएयवं, अम्हंपि णं एमेव पागे भवउ—त्तिकट्टु मेहस्स कुमारस्स अम्मापियरो समणं भगवं महावीरं वंदंति णमसंति वं० २ ता जामेव दिंसि पाउक्कमया तामेव दिंसि पडिगया ॥३०॥ तए णं मेहे कुमारे सयमेव पंचमूट्ठियं लोयं करेइ २ ता जेणामेव समणे भगवं महावीरे तेणामेव उवागच्छइ २ ता समणं भगवं महावीरं तिवखुत्तो आयाहिणं पयाहिणं करेइ २ ता ववइ णमसइ वं० २ ता एवं वयासी—आलित्ते णं भंते ! लोए, पलित्ते णं भंते ! लोए, आलित्तपलित्ते

णं भंते ! लोए जराए मरणेण य । से जहाणामए केइ गाहावई अगारंसि जियाय-
 माणंसि जे तत्थ भंडे भवइ अप्पभारे मोल्लगुरुए तं गहाय आयाए एगंत अवक्क-
 मइ-एस मे णित्थारिए समाणे पच्छा पुरा य(लोए) हियाए सुहाए खमाए भिस्से-
 साए आणुगामियत्ताए भविस्सइ-एवामेव ममवि एगे आयाभंडे इट्ठे कंते पिए
 मणुण्णे मणामे एस मे णित्थारिए समाणे संसारवोच्छेयकरे भविस्सइ तं इच्छामि
 णं देवाणुप्पियाहिं सयमेव पव्वावियं सयमेव मुंडावियं सेहावियं सिज्जावियं
 सयमेव आयारगोयरविणयवेणइयचरणकरणजायामायावत्तियं धम्ममाइविखयं ।
 तए णं समणे भगयं महावीरे मेहं कुमारं सयमेव पव्वावेइ सयमेव आयार जाव
 धम्ममाइवखइ-एवं देवाणुप्पिया ! गंतव्वं चिट्ठिपव्वं णिसीयव्वं तुयट्ठियव्वं
 भुंजियव्वं भासियव्वं एवं उट्ठाए उट्ठाय पाणेहिं भूएहिं जीवेहिं सत्तेहिं संजमेणं
 संजमियव्वं अंसि च णं अट्ठे णो पमाएयव्वं । तए णं से मेहे कुमारे समणस्स
 भगवओ महावीरस्स अंतिए इमं एयारूवं धम्मियं उव्वएसं णिसम्म सम्मं पडि-
 वज्जइ तमाणाए तह गच्छइ तह चिट्ठइ जाव उट्ठाए उट्ठाय पाणेहिं भूएहिं जीवेहिं
 सत्तेहिं संजमइ ॥३१॥ जं दिवसं च णं मेहे कुमारे मुंडे भवित्ता अगाराओ अण-
 गारियं पव्वइए तस्स णं दिवसस्स पच्चावरहकालसमयंसि समणाणं णिगंथाणं
 अहाराइणियाए सेज्जासंधारएमु विभज्जमाणेसु मेहकुमारस्स दारमूले सेज्जा-
 संधारए जाए यावि होत्था । तए णं समणा णिगंथा पुव्वरत्तावरत्तकालसमयंसि
 वायणाए पुच्छणाए परियट्ठणाए धम्ममाणुजोर्गचित्ताए य उच्चारस्स य पासवणस्स
 य अइगच्छमाणा य णिमगच्छमाणा य अप्पेगइया मेहं कुमारं हत्थेहिं संघट्ठेति एवं
 पाएहिं सीसे पोटे कार्थंसि अप्पेगइया ओलंडेति अप्पेगइया पोलंडेति अप्पेगइया
 पायरयरेणुगुंडियं करेति । एवं महालियं च णं रयणि मेहे कुमारे णो संचाएइ खण-
 मवि अच्छिंणमोलित्तए । तए णं तस्स मेहस्स कुमारस्स अयमेयारूवे अज्झत्थिए
 जाव समुप्पज्जत्था-एवं खलु अहं सेणियस्स रण्णो पुत्ते धारिणीए देवीए अत्तए मेहे
 जाव सवणयाए, तं जया णं अहं अगारयज्जे वसामि तथा णं मम समणा णिगंथा
 आढार्यंति परिजाणंति सबकारेति सम्माणेति अट्ठाइं हेऊइं पसिणाइं कारणाइं
 वागरणाइं आइव्वंति इट्ठाहिं कंताहिं वग्गूहिं आलवेंति संलवेंति, जप्पभिइं
 च णं अहं मुंडे भवित्ता अगाराओ अणमारियं पव्वइए तप्पभिइं च णं ममं
 समणा णो आढार्यंति जाव णो संलवेंति, अट्ठत्तरं च णं मम समणा णिगंथा
 राओ पुव्वरत्तावरत्तकालसमयंसि वायणाए पुच्छणाए जाव महालियं च णं रंति

णो संचाएमि अञ्छि णिमिल्लावेत्तए, तं सेयं खलु मज्झं कल्लं पाउप्पभायाए रयणीए जाव-तेयसा जलंते समणं भगवं महावीरं आपुञ्छित्ता पुणरवि अगार-मज्झे वसित्तए-त्तिकट्टु एवं संपेहेइ २ अट्टुहुट्टुवसट्टुमाणसाए णिरयपडिरुवं च णं तं रयणि खवेइ २ ता कल्लं पाउप्पभायाए सुविमत्ताए रयणीए जाव तेयसा जलंते जेणामेव समणे भगवं महावीरे तेणामेव उवागच्छइ २ ता तिवखुत्तो आयाहिणं पयाहिणं करेइ २ ता वंदइ णमंसइ वं० २ ता जाव पज्जवासइ ।।३२।। तए णं मेहाइ समणे भगवं महावीरे मेहं कुमारं एवं वयासी-से णूणं तुमं मेहा ! राओ पुव्वरत्तावरत्तकालसमयंसि समणेहि णिमंग्थेहि वायणाए पुच्छणाए जाव महालियं च णं राइं णो संचाएसि भुहुत्तमवि अञ्छि णिमिल्ला-वेत्तए, तए णं तुव्वमे मेहा ! इमे एयाखुवे अज्जत्थिए जाव समुप्पज्जित्था-जया णं अहं अगारमज्झे वसामि तथा णं मम समणा णिमंग्था आढार्यंति जाव संलवेत्ति, जप्पभिइं च णं मंडे भवित्तः अगाराओ अणगारियं पक्वयामि तप्पभिइं च णं मम समणा णो आढार्यंति जाव णो (परियाणंति) संलवेत्ति अट्टु-त्तरं च णं मम समणा णिमंग्था राओ अप्पेगइया वायणाए जाव पायरयरेणु-गुंडियं करेत्ति, तं सेयं खलु मम कल्लं पाउप्पभायाए समणं भगवं महावीरं आपुञ्छित्ता पुणरवि अगारमज्झे आवसित्तए-त्तिकट्टु एवं संपेहेसि २ ता अट्टु-हुट्टुवसट्टुमाणसे जाव रयणि खवेसि २ ता जेणामेव अहं तेणामेव हव्वमागए, से णूणं मेहा ! एस अट्ठे समट्ठे ? हुंता अट्ठे समट्ठे । एवं खलु मेहा ! तुमं इओ तच्चे अईए भवभगहणे वेयडुगिरिपायमूले वणधरेहि णिव्वत्तियणामधोज्जे सेए संखलउज्जलविमलणिम्मलइहिघणगोखीरफेणरयणियरप्पयासे सत्तुस्सेहे णवायए दसपरिणाहे सत्तंगपत्तिट्टिए सोमे समिए सुखुवे पुरओ उदग्गे समूसि-यसिरे सुहासणे पिट्टुओ वराहे अइयाकुच्छी अञ्छिइकुच्छी अलंबकुच्छी पलंब-लंबोवराहरकरे धणुपट्टुगिइविसिट्टुपुट्ठे अल्लीणपमाणजुत्तवट्टियपीवरगत्तावरे अल्लीणपमाणजुत्तपुच्छे पडिपुण्णसुचारुकुम्मचत्तणे पंडुरसुविसुद्धणिद्धणिरुवह-यविसतिणहे छट्ठंते सुमेरुप्पमे णामं हत्थिराया हीत्था । तत्थ णं तुमं मेहा ! बहूहि हत्थीहि हत्थिणियाहि य लोट्टुएहि य लोट्टुयाहि य कलभेहि य कलभियाहि य सद्धिं संपरिवुडे हत्थिसहस्सणायाए देसए पागट्ठी पट्टवए जूहवई वंदपरियट्टुए अणोसि च बहूणं एकत्तलाणं हत्थिकलभाणं आहेवच्चं

जाव विहरसि । तए णं तुमं मेहा ! णिच्चप्पमत्ते सइं पलत्तिए कंदप्परई
 मोहणसोले अवित्तहे कामभोगतिसिए बहूहि हत्थीहि य जाव संपरिवुडे वेयवु-
 गिरिपायमूलेगिरीसु य दरीसु य कुहरेसु य कंदरासु य उज्जरेसु य णिज्जरेसु य
 य बियरएसु य गद्दासु य पल्लवेसु य चिल्ललेसु य कडगेसु य कडयपल्ललेसु य
 तडीसु य विद्यडीसु य टंकेसु य कूडेसु य सिहरेसु य पव्वारेसु य मंचेसु य मालेसु
 य काण्णेसु य वणेसु य वणसंडेसु य वणराईसु य णईसु य णईकच्छेसु य जूहेसु
 य संगमेसु य वावीसु य पोवखरिणीसु य दीहियासु य गुंजालियासु य सरेसु य
 सरपंतियासु य सरसरपंतियासु य वणयरेहि दिण्णवियारे बहूहि हत्थीहि य जाव
 सद्धि संपरिवुडे बहूविहत्तरुपल्लवर्पउरपाणियतणे णिब्भए णिरुद्धिग्गं तुहंसुहेणं
 विहरसि । तए णं तुमं मेहा ! अण्णया कयाइ पाउसवरिसारत्तसरयहेमंतवसं-
 तेसु कमेण पंचसु उज्जसु समइवकंतेसु गिम्हकालसमयसि जेट्टामूलभागे पायव-
 घंससमुट्टिएणं सुक्कतणपत्तकयवरमारुयसंजोगदीविएणं महाभयकरेणं हुयवहेणं
 वणदव्वजालासंपलित्तेसु वणतेसु धूमाउलासु दिसासु महावायवगेणं संघट्टिएसु
 छिण्णजालेसु आवयमाणेसु पोल्लखखेसु अंतोअंतो झियायमाणेसु मयकुहिय-
 विणट्टकमियकद्दमणईवियरगज्जीणपाणीयंतेसु वणतेसु भिगारकदीणकरिय-
 रवेसु खरफरसअणिट्टुरिट्टुवाहीत्तविददुमग्गेसु दुप्पेसु तण्हावसमुक्कपवखपयडिप-
 जिम्भतालुयअसंपुडियतुंडपविखसंघेसु संसंतेसु गिम्हउम्हउह्हावखरफरसचंड-
 मारुयसुक्कतणपत्तकयवरवाउलिभमंतविससंमंतसावयाउलमिगतण्हाबद्धिचिध-
 पट्टेसु गिरिवरेसु संघट्टिएसु तत्थमियपसघसरीसिवेसु अवदालियवयणविवर-
 णिल्लालियग्गजीहे महंततुंबडप्रपुण्णकण्णे संकुचियथोरपीवरकरे ऊसियणंगुले
 पोणाइयविरसरडियसट्टेणं फोडयंतेव अंबरतलं पायदूरएणं कंपयंतेव मेइ-
 णितलं विण्णमभुयमाणे य सीयारं सध्वओ समंता वल्लिवियाणाइं छिंदमाणे
 खखसहससाइं तत्थ सुबहूणि णोल्लायंते विणट्टुरट्टेव्व णरवरिंदे वायाइ-
 ळ्ळेव्व पोए मंडलवाएव्व परिब्भमंते अभिवल्लणं २ लिडिणियरं पंजुवमाणे २
 बहूहि हत्थीहि य जाव सद्धि दिसोदिसि विप्पलाइत्था । तत्थ णं तुमं मेहा !
 जण्णे जराजज्जरियदेहे आउरे झंजिए पित्वासिए दुब्बले किल्लते णट्टुनुइए मूढ-
 दिसाए सयाओ जूहओ विप्पहणे वगदव्वजालापारच्छे उह्णेणं य तग्हाए य
 छुहाए य परब्भाहए सभाये मीए तत्थे तसिए उच्चिग्गे संजायमर् सध्वओ

समंता आधावसाणे परिधावमाणे एगं च णं महं सरं अप्पोदयं पंकवहुलं अति-
 त्येणं पाणिघपाए उइण्णो । तत्थ णं तुमं मेहा ! तीरमइगए पाणियं असंपत्ते
 अंतरा चैव सेयंसि विसण्णे । तत्थ णं तुमं मेहा ! पाणियं पाइस्सामि त्तिक्कट्टु
 हत्थं पसारेसि, से वि य ते हत्थे उदगं ण पावइ । तए णं तुमं मेहा ! पुणरवि
 कायं पच्चुद्धरिस्सामि-त्तिकट्टु बलियतरायं पंकंसि खुत्ते । तए णं तुमं मेहा !
 अण्णया कयाइ एमे चिरणिज्जुद्धे गयवरज्ज्वाणए सगाओ जूहाओ करचरणदंत-
 मुसलप्वहारेहि विप्परद्धे समाणे तं चैव महद्दहं पाणी (यं पाएउं) यपाए समोय-
 रेइ । तए णं से कलभए तुमं पासइ २ ता तं पुच्चवेरं सुपरइ २ ता आसुस्सत्ते
 रुद्धे कुविए चंडिकिए मिसिमिसेमाणे जेणेव तुमं तेणेव उवागच्छइ २ ता
 तुमं तिक्खेहि दंतमुसलेहि तिक्खुत्तो पिट्टुओ उच्छुभइ २ ता पुच्चवेरं णिज्जाएइ
 २ ता हट्टुत्तुद्धे पाणियं पियइ २ ता जामेव विसि पाउब्भूए तामेव विसि पडि-
 गए । तए णं तव मेहा ! सरीरगंसि वेयणा पाउब्भवित्था उज्जला विउला
 तिउला कक्खडा जाव दुरहिपासा पित्तज्जरपरिगयसरीरे दाहवक्कंतीए यावि
 विहरित्था । तए णं तुमं मेहा ! तं उज्जलं जाव दुरहिपासं सत्तराईदियं वेयणं
 वेदेसि सवीसं वाससयं परमाउं पालइत्ता अट्टवसट्टुहट्टे कालमासे कालं किच्चा
 इहेव जंबूदीवे २ भारहे वासे दाहिणद्धुभरहे गंगाए महाणईए दाहिणे कूले
 विन्नगिरिपायमूले एगेणं मत्तवरगंधहत्थिणा एगाए गयवरकरेणूए कुच्छिसि
 गयकलभए जणिए । तए णं सा गयकलभिया णवण्हं मासाणं वसंतमासम्मि
 तुमं पयाया । तए णं तुमं मेहा ! गम्भवासाओ विप्पमूक्के समाणे गयकलभए
 यावि होत्था रत्तप्पलरत्तसूमालए जार्नुमणारत्तपारिजातयलक्खारससरसकुंकुम-
 संभ्रभरागवण्णे इट्ठे णियगस्स जूहवइणो गणि (या) यारकणे रुकोत्थहत्थी अणेग-
 हत्थिसयसंपरिवुडे रम्भेसु गिरिकाणणेषु सुहंसुहेणं विहरसि । तए णं तुमं मेहा !
 उम्मवकबालभावे जोव्वणगमणुप्पसे जूहवइणा कालधम्मणा संजुत्तेणं तं जूहं
 सयमेव पडिक्कज्जसि । तए णं तुमं मेहा ! वणयरेहि णिच्चत्तियणामधेज्जे जाव
 चउदंते मेरुप्पमे हत्थिरयणे होत्था । तत्थ णं तुमं मेहा ! सत्तंगपइट्टिए तहेव
 जाव पडिरूवे । तत्थ णं तुमं मेहा ! सत्तसइयस्स जूहस्स आहेवच्चं जाव अभि-
 रमेत्था । तए णं तुमं अण्णया कयाइ गिम्हकालसमयंसि जेट्टामूले वणदवजाला-
 पलित्तंसु वणंतेसु सुधूमाउलासु विसासु जाव मंडलवाएव परिब्भमंते भोए तत्थे
 जाव सजायभाए बहूहि हत्थीहि य जाव कलभियाहि य सद्धि संपरिवुडे सव्वओ

समंता दिसोर्दिसि विप्लवाइत्था । तए णं तव मेहा ! तं वणद्वं पासित्ता अय-
मेयारूवे अज्झत्थिए जाव समुप्पज्जित्था—कहिं णं मण्णे मए अयमेयारूवे अग्गि-
संभवे अणुभूयपुव्वे ? तए णं तव मेहा ! लेस्साहिं विसुज्जमाणीहिं अज्झ-
वसाणेणं सोहणेणं तुभेणं परिणामेणं तयावरणिज्जाणं कम्ममाणं खओवसमेणं
ईहापूहमागणमवेसणं करेसाणस्स सण्णिपुव्वे जाईसरणे समुप्पज्जित्था । तए णं
तुमं मेहा ! एयमट्ठं सम्मं अभिसमेसि—एवं खलु मया अईए दोच्चे भधमहणे
इहेव जंबुदीवे २ भारहे वासे वेयड्डगिरिपायमूले जाव तत्थ णं महया अयमेयारूवे
अग्गिसंभवे समणुभूए । तए णं तुमं मेहा ! तस्सेव दिवसस्स पच्चवारण्हकाल-
समयंसि गियएणं जूहेणं सद्धि समण्णागए यावि होत्था । तए णं तुमं मेहा !
सत्तुस्सेहे जाव सण्णिजाइस्सरणे चउट्ठं मेच्छपभे णामं हत्थी होत्था । तए णं
तुज्जं मेहा ! अयमेयारूवे अज्झत्थिए जाव समुप्पज्जित्था—तं सेयं खलु मम
इयाणं गंगाए महाणईए दाहिणिल्लंसि कूलसि विज्जगिरिपायमूले दवगिसं (ताण)
जायकारणट्ठा सएणं जूहेणं (महट्ट)महालयं मंडलं घाइत्तए—त्तिकट्टु एवं संपेहेसि
२ ता सुहंसुहेणं विहरसि । तए णं तुमं मेहा ! अण्णया कयाइ पढमपाउसंसि
महावुट्टिकायंसि सण्णिवइयंसि गंगाए महाणईए अदूरसामते ब्रह्महिं हत्थीहिं
जाव कलभियाहिं य सत्तहिं य हत्थिसएहिं संपरिवुडे एगं महं जोयणपरिमंडल
महट्टमहालयं मंडलं घाएसि जं तत्थ तणं वा पत्तं वा कट्ठं वा कंठए वा लय
वा वल्ली वा खाणं वा रुव्वे वा खुवे वा तं सध्वं तिवच्छुत्तो आहुणिय २ पाएणं
उट्टवेसि हत्थेणं गेण्हसि एगंते एडेसि । तए णं तुमं मेहा ! तस्सेव मंडलस्स
अदूरसामते गंगाए महाणईए दाहिणिल्ले कूले विज्जगिरिपायमूले गिरीमु य जाव
विहरसि । तए णं तुमं मेहा ! अण्णया कयाइ मज्झमए चरिसारत्तंसि महा-
वुट्टिकायंसि सण्णिवइयंसि जेणेव से मंडले तेणेव उवागच्छसि २ ता दोच्चंपि
मंडलं घाएसि, एवं चरिमवासारत्तंसि महावुट्टिकायंसि सण्णिवइयमाणंसि
जेणेव से मंडले तेणेव उवागच्छसि २ ता तच्चंपि मंडलघायं करेसि जं तत्थ
तणं वा जाव सुहंसुहेणं विहरसि । अहं मेहा ! तुमं गइंदभावम्मि वट्टमाणो
कमेणं णलिणिवणविवहणगरे हेमंते कुंदलोद्धउद्धत्तुसारपउरम्मि अइवकंते अहि-
णवे गिगहसमयंसि पत्ते विथट्टमाणे घणंसु वणकरेणुविविहदिणिकययंसुवघाओ
तुमं उउयकुसुमकयचामरकण्णपूरपरिमंडिपाभिरामो भयवसविगसंत कडतड-

किल्णिणगंधमदवारिणा सुरभिजणियगंधो करेणुपरिवारिओ उउसमत्तजणिय-
सोहो काले विणयरकरपयडे परिसोसियतहवरसिहरभोमतरवंसणिज्जे भिगार-
रवंतभेरवरवे णाणाविहपत्तकट्टतणकयवरुद्धतपइमारुयाइद्धणहयलदुमगणे वाउ-
लियादारुणतरे तण्हावसबोसदूसियभमंतविहिसावयसमाउले भीमदरिसणिज्जे
षट्ठते दारुणम्मि गिम्हे मारुयवसवसरपसरियवियंभिणं अंभहियभीमभेरव-
रवणपगारेणं महुधारापडियसित्तउद्धायमाण धगधगंतसद्दुद्धुएणं दित्तर-
सफुल्लिगेणं धूममालाउलेणं सावयसयंतकरणेणं अंभहियवणदवेणं जालालो-
वियणिरुद्धधूमंधकारभीओ आयवाल्लोयमहंतंतुंबइयपुण्णकण्णो आकुंचियथोर-
पीवरकरो भयवसभयंतदित्तणयणो वेगेण महामेहोच्च पवणोल्लियमहल्लरुवो
जेणेव कओ ते (ण) पुरा दवग्गिमयभीयहियएणं अवगयतणपएसरुक्खो
रुक्खोहेसो दवग्गिसंताणकारणट्टा(ए)जेणेव मंडले तेणेव पहारेत्थ गमणाए ।
एक्को ताव एस गमो । तए णं तुमं मेहा ! अण्णया कयाइं कमेणं पंचसु उऊसु
समइष्कंतेसु गिम्हकालसमयंसि जेट्टामूले मासे पायवसंधंससमुट्टिएणं जाव संव-
ट्टिएसु मियपसुपक्खिसंरोसिवेसु विसोदिसि विण्पलायमाणेसु तेहिं बहूहिं हत्थीहिं
य सद्धिं जेणेव (से) मंडले तेणेव पहारेत्थ गमणाए । तत्थ णं अण्णे बहवे सीहा
य वग्घा य विगा य दीविया य अच्छा य तरच्छा य पारासरा य सरभाय सियाला
विराला सुण्हा कोला ससा कोकंतिया चित्ता चिल्लला पुडवपविट्टा अग्गिभय-
विद्दुया एगयओ बिलधम्मेणं चिट्ठति । तए णं तुमं मेहा ! जेणेव से मंडले
तेणेव उवागच्छसि २ ता तेहिं बहूहिं सीहेहिं जाव चिल्ललेहिं य एगयओ
बिलधम्मेणं चिट्ठसि । तए णं तुमं मेहा ! पाएणं गत्तं कंडुइस्सामीतिकट्ट
पाए उक्खित्ते, तंसि च णं अंतरंसि अण्णेहिं बलवंतेहिं सत्तेहिं पणोल्लिज्ज-
माणे २ ससए अणुप्पविट्ठे । तए णं तुमं मेहा ! गायं कंडुइत्ता पुण-
रवि पायं पडिणिषळमिस्सामि त्तिकट्टु तं ससयं अणुपविट्ठं पाससि २
त्ता पाणाणुकंपयाए भूयाणुकंपयाए जीवाणुकंपयाए सत्ताणुकंपयाए से पाए अंतरा
चेव संधारिए णो चेव णं णिक्खित्ते । तए णं तुमं मेहा ! ताए पाणाणुकंपयाए
जाव सत्ताणुकंपयाए संसारे परित्तीकए माणुस्साउए णिबद्धे । तए णं से वण-
दवे अट्टाइज्जाइं राइंविद्याइं तं वणं ज्ञामेइ २ ता णिट्टिए उवरए उवसंते
विज्जाए यावि होत्था । तए णं ते बहवे सीहा य जाव चिल्लला यत्तं वण-

द्वं णिद्विं जाव विज्जायं पासंति २ ता अग्गिभयविप्पमुक्का त्हाए य
छुहाए य परव्भाहया समाणा तओ मंडलाओ पडिणिवद्धमंति २ ता सव्वओ
समंता विप्पसरित्था । तए णं ते बह्वे हत्थी जाव छुहाएय परव्भाहया समाणा
तओ मंडलाओ पडिणिवद्धमंति २ ता दिसोर्वसि विप्पसरित्था । तए णं तुमं
मेहा ! जण्णे जराजज्जरियदेहे सिद्धिलवलितयापिण्डुगत्ते दुब्बले किलंते
जुंजिए पिवासिए अत्थामे अबले अपरक्कमे अचंक्रमणो वा टाणुखंडे वेगेण
विप्पसरिस्सामि त्तिकट्टु पाए पसारमाणे विज्जुहए विव रययगिरिपढ्भारे
धरणितलंसि सव्वमेहिं सण्णिवइए । तए णं तव मेहा ! सरीरमंसि वेयणा
पाउब्भया उज्जला जाव दाहवक्कंतीए यावि विहरसि । तए णं तुमं मेहा !
तं उज्जलं जाव दुरहिंयासं तिण्णि राइंविद्याइं वेयणं वेएमाणे विहरित्ता एमं
वाससयं परमाजं पालइत्ता इहेव जंबूदीवे २ भारहे वासे रायगिहे णयरे सेण-
पस्स रण्णो धारिणीए देवीए कुच्छिसि कुमारत्ताए पच्चायाए ॥३३॥ तए णं
तुमं मेहा ! आणुपुव्वेणं मम्मवासाओ णिवद्धंते समाणे उम्मुक्कञ्जालभावे जोव्व-
णगमणुप्पत्ते मम अंतिए मुंडे भवित्ता अगाराओ अणगारियं पव्वइए । तं जइ
जाव तुमे मेहा ! तिरिक्खजोणियभावमुव्वगएणं अपडिलद्धसम्मतरयण-
लभेणं से पाए पाणाणकंपयाए जाव अंतरा चेव संधारिए णो चेव णं णिविल्लते
किमंग पुण तुमं मेहा ! इयाणि विपुलकुलसमुब्भवेणं णिवह्वयसरीर इंतलद्ध-
पंचिदिएणं एवं उट्टाणबलवीरियपुरिसगारपरक्कमसंजुत्तेणं मम अंतिए मुंडे
भवित्ता अगाराओ अणगारियं पव्वइए समाणे समणानं णिग्गंथाणं राओ पुव्व-
रत्तावरत्तकालसमयंसि वायणाए जाव धम्माणुओगचित्ताए य उच्चारस्स वा
पासवणस्स वा अइग्गच्छमाणाय य णिग्गच्छमाणाय य हत्थसंघट्टणाणि य पाय-
संघट्टणाणि य जाव रथरेणुगुंडणाणि य णो सम्मं सहसि खमसि तित्तिकलसि
अहियासेसि ? तए णं तस्स मेहस्स अणगारस्स समणस्स भगवओ महावीरस्स
अंतिए एयमट्ठं सोच्चा णिसम्म सुमेहिं परिणामेहिं पसत्थेहिं अज्जवसाणेहिं
लेस्साहिं विमुज्जमाणीहिं तथावरणिज्जाणं कम्माणं खओवसमेणं ईहापूहमगण-
गवेसणं करेमाणस्स सण्णिवुव्वे जाईसरणे समुप्पण्णे एयमट्ठं सम्मं अरिसमेइ ।
तए णं से मेहे कुमारे समणेणं भगवया महावीरेणं संभारिखपुव्वजाईसरणे दुग्-
णाणीयसंवेणे आणंदयंसुपुणमुहे हरिसवत्तेणं धाराहयकयंबकं पिव समूससिय-

रोमकूवे समणं भगवं महावीरं वंदइ णमंसइ वं० २ ता एवं वयासी-अञ्जप्प-
भिई णं भंते । मम दो अच्छीणि मोत्तूणं अवसेसे काए समणाणं णिगंथाणं
णिसट्ठे त्तिकट्ठु पुणरवि समणं भगवं महावीरं वंदइ णमंसइ वं० २ ता एवं
वयासी-इच्छामि णं भंते । इयाणि दोच्चंपि सयमेव पव्वावियं सयमेव मुंडा-
वियं जाव सयमेव आयारगोयरं जायामायावत्तियं धम्ममाइक्खह । तए णं
समणे भगवं महावीरे मेहं कुमारं सयमेव पव्वावेइ जाव जायामायावत्तियं
धम्ममाइक्खइ-एवं देवाणुप्पिया । गंतव्वं एवं चिट्ठियव्वं एवं णिसीयव्वं एवं
तुयट्ठियव्वं एवं भुजियव्वं एवं भासियव्वं उट्ठाय २ पाणाणं भूयाणं जीवाणं
सत्ताणं संजमेणं संजमियव्वं । तए णं से मेहे समणस्स भगवओ महावीरस्स
अयमेयारूवं धम्मियं उवएसं सम्मं पडिच्छइ २ ता तह चिट्ठइ जाव संजमेणं
संजमइ । तए णं से मेहे अणगारे जाए इरियासमिए अणगरवण्णओ भाणि-
यक्खे । तए णं से मेहे अणगारे समणस्स भगवओ महावीरस्स अंतिए तहा-
(एया) रूवाणं थेराणं सामाइयमाइयाणि एक्कारस्स अंगाइं अहिज्जइ २ ता
बह्निहं चउत्थएट्ठुट्ठमदसमबुवालसेहि मासद्धमासखमणेहि अप्पाणं भावेमाणे विह-
रइ । तए णं समणे भगवं महावीरे रायणिहाओ णयराओ गुणसित्तयाओ चेइ-
याओ पडिणिक्खमइ २ ता बहिया जणवयविहारं विहरइ ॥३४॥ तए णं से
मेहे अणगारे अणया कयाइ समणं भगवं महावीरं वंदइ णमंसइ वं० २ ता
एवं वयासी-इच्छामि णं भंते । तुभोहि अब्भणुण्णाए समाणे मासियं भिक्खु-
पडिमं उवसंपज्जित्ताणं विहरित्तए । अहासुहं देवाणुप्पिया ! मा पडिबंधं करेह ।
तए णं से मेहे अणगारे समणेणं भगवया महावीरेणं अब्भणुण्णाए समाणे
मासियं भिक्खुपडिमं उवसंपज्जित्ताणं विहरइ, मासियं भिवलुपडिमं अहासुत्तं
अहाक्कप्पं अहामग्गं सम्मं काएणं फासेइ पालेइ सोभेइ तीरेइ किट्ठेइ सम्मं काएणं
फासेत्ता पालित्ता सोभेत्ता तीरेत्ता किट्ठेत्ता पुणरवि समणं भगवं महावीरं वंदइ
णमंसइ वं० २ ता एवं वयासी-इच्छामि णं भंते । तुभोहि अब्भणुण्णाए
समाणे दोमासियं भिक्खुपडिमं उवसंपज्जित्ताणं विहरित्तए । अहासुहं देवाणु-
प्पिया ! मा पडिबंधं करेह । जहा पढमाए अभिलावी तहा दोच्चाए तच्चवाए
चउत्थाए पंचमाए छम्मसासियाए सत्तमासियाए पढमसत्तराइंदियाए दोच्चं
सत्तराइंदियाए तइयं सत्तराइंदियाए अहोराइंदियाएवि एगराइंदियाएवि । तए

णं से मेहे अणगारे बारस भिक्खुपडिमाओ सम्मं काएणं फासेत्ता पालेत्ता सोभेत्ता तीरेत्ता किट्टेत्ता पुणरवि वंदइ णमंसइ वं० ता एवं वयासी-इच्छामि णं भंते! तुदभेहि अम्भणुष्णाए समाणे गुणरयणसंवच्छरं तवोकम्मं उवसंपज्जित्ताणं विहरित्तए । अहामुहं देवाणुप्पिया ! मा पडिवंधं करेह । तए णं से मेहे अणगारे पढमं मासं चउत्थंचउत्थेणं अणिविखत्तेणं तवोकम्मेणं दिया ठाणुकुडुए सूरामिमुहे आयावणभूमीए आयावेमाणे रत्ति वीरासणेणं अवाउडेणं । दोच्चं मासं छट्ठंछट्ठेणं० । तच्चं मासं अट्टमंअट्टमेणं० । चउत्थं मासं दसमंदसमेणं अणिविखत्तेणं तवोकम्मेणं दिया ठाणुकुडुए सूरामिमुहे आयावणभूमीए आयावेमाणे रत्ति वीरासणेणं अवाउडेणं । पंचममासं दुवालसमंदुवालसमेणं अणिविखत्तेणं तवोकम्मेणं दिया ठाणुकुडुए सूरामिमुहे आयावणभूमीए आयावेमाणे रत्ति वीरासणेणं अवाउडेणं । एवं खलु एएणं अभिलावेणं छट्ठे चोइसमं २ सत्तमे सोससमं २ अट्टमे अट्टारसमं २ णवमे वीसइमं २ दसमे बावीसइमं २ एवकारसमे चउत्थवीसइमं २ बारसमे छुत्थवीसइमं २ तेरसमे अट्टावीसइमं २ चोइसमे तीसइमं २ पंचइसमे बत्तीसइमं २ सोलसमे (मासे) चउत्तीसइमं २ अणिविखत्तेणं तवोकम्मेणं दिया ठाणुकुडुए (णं) सूरामिमुहे आयावणभूमीए आयावेमाणे रत्ति वीरासणेणं अवाउडेणं य । तए णं से मेहे अणगारे गुणरयणसंवच्छरं तवोकम्मं अहामुत्तं जाव सम्मं काएणं फासेइ पालेइ सोभेइ तीरेइ किट्टेइ अहामुत्तं अहाकप्पं जाव किट्टेत्ता समणं भगवं महावीरं वंदइ णमंसइ वं० २ ता बहूहि छट्टट्टमवसमदुवालसेहि मासद्धमासखमणेहि विचित्तेहि तवोकम्मेहि अप्पराणं भावेमाणे विहरइ ॥३५॥ तए णं से मेहे अणगारे तेणं उरालेणं विपुलेणं सत्तिरीएणं पयत्तेणं पग्गहिएणं कल्लाणेणं सिवेणं धण्णेणं मंगल्लेणं उदग्गेणं उदारएणं उत्तमेणं महाणुभावेणं तवोकम्मेणं सुक्के भुक्खे लुक्खे णिम्मसे णिस्सोणिए किडिकिडियाभूए अट्टिचम्मावणद्धे किमे धमणिसंतए जाए यावि होत्था, जीवंचीवेणं गच्छइ जीवंचीवेणं चिट्ठइ भासं भासित्ता गिलायइ भासं भासमाणे गिलायइ भासं भासिस्साभित्ति गिलायइ । से जहाणामए इंगालसगडियाइ वा कट्टसगडियाइ वा पत्तसगडियाइ वा तिलसगडियाइ वा एरंडकट्टसगडियाइ वा उण्हे दिण्णा सुंवका समाणी ससद्दं गच्छइ ससद्दं चिट्ठइ एवामेव मेहे अणगारे ससद्दं गच्छइ ससद्दं चिट्ठइ उवच्चिए

तवेणं अबच्चिए मंससोणिएणं ह्यासणे इव भासरासिपरिच्छण्णे तवेणं तेएणं तवतेयसिरीए अईव २ उवसोभेमाणे २ चिट्ठइ । तेणं कालेणं तेणं समएणं समणे भगवं महावीरे आइगरे तित्यगरे जाव पुव्वाणुपुव्वि चरमाणे गामाणु-गामं दूइज्जमाणे सुहंसुहेणं विहरमाणे जेणामेव रायगिहे णयरे जेणामेव गुण-सिल्लए चेइए तेणामेव उवागच्छइ २ ता अहापडिक्खं उगगहं उगिण्हिता संजमेणं तवसा अप्पाणं भावेमाणे विहरइ । तए णं तस्स मेहस्स अणगारस्स राओ पुव्वरत्तावरत्तकालसमयंसि धम्मजागरियं जागरमाणस्स अयमेयारूवे अज्झत्थिए जाव समुप्पज्जित्था—एवं खलु अहं इमेणं उरालेणं तहेव जाव भासं भासिस्सा-मिस्सि गिलांमि, तं अत्थि ता मे उट्ठाणे कम्मे बले वीरिए पुरिसक्कारपरक्कमे सद्धा धिई संबेगे तं जाव ता मे अत्थि उट्ठाणे कम्मे बले वीरिए पुरिसक्कार-परक्कमे सद्धा धिई संबेगे जाव य मे धम्मयारिए धम्मोवएसए समणे भगवं महा-वीरे जिणे सुहत्थी विहरइ ताव ताव मे सेयं कल्लं पाउप्पभायाए रयणीए जाव तेयसा जलंते (सूरे)समणं भगवं महावीरं वंदित्ता णमंसित्ता समणेणं भगवया महा-वीरेणं अब्भणुण्णायस्स समाणस्स सयमेव पंच महव्वयाइं आरुहिता गोयमाइए समणे णिगंथे णिगंथीओ य खामेत्ता तरहारूवेहिं कडाईहिं थेरेहिं सद्धिं विउलं पव्वयं सणियं २ बुरुहिता सयमेव मेहघणसण्णिगासं पुढविसिलापट्टयं पडि-लेहिता संलेहणाञ्जुसणा (ए) झूसियस्स भत्तपाणपडियाइक्खियस्स पाओवगयस्स कालं अणवक्खमाणस्स विहरित्तए । एवं संपेहेइ २ ता कल्लं पाउप्पभायाए रयणीए जाव जलंते जेणेव समणे भगवं महावीरे तेणेव उवागच्छइ २ ता समणं भगवं महावीरं तिक्खुत्तो आयाहिणं पयाहिणं करेइ २ ता वंदइ णमंसइ वं० २ ता णच्चवासणे णाइदूरे सुस्ससमाणे णमंसमाणे अभिमुहे विणएणं पंजलिउडे पज्जुवासइ । मे (हेत्ति) हाइ समणे भगवं महावीरे मेहं अणगारं एवं वयासी-से णूणं तव मेहा ! राओ पुव्वरत्तावरत्तकालसमयंसि धम्मजागरियं जागर-माणस्स अयमेयारूवे अज्झत्थिए जाव समुप्पज्जित्था—एवं खलु अहं इमेणं उरालेणं जाव जेणेव अहं तेणेव हव्वमागए । से णूणं मेहा ! अट्ठे समट्ठे ? हंता अत्थि । अहासुहं देवाणुप्पिया ! मा पडिबंधं करेह । तए णं से मेहे अणगारे समणेणं भगवया महावीरेणं अब्भणुण्णाए समाणे हट्ठु जाव हियए उट्ठाए उट्ठेइ २ ता समणं भगवं महावीरं तिक्खुत्तो आयाहिणं पयाहिणं करेइ २ ता

वंदइ नमंसइ वं० २ ता सयमेव पंच महक्वयाइं आरुहेइ २ ता गोयमाइ समणे
 णिग्गंथे णिग्गंथीओ य खामेइ २ ता तहारुवेहि कडाईहि थेरेहि सद्धि विपुलं पच्चयं
 सणियं २ दुरुहइ २ ता सयमेव मेहघणसण्णिणासं पुड्विसिलापट्टयं पडिलेहेइ २
 ता उच्चारासत्रगभूमिं पडिलेहे २ ता दम्भसंथारगं संथरइ २ ता दम्भ-
 संथारगं दुरुहइ २ ता पुरत्थामिसुहे संपलियंकणिसण्णे करयलपरिग्गहिंयं
 सिरसावत्तं मत्थए अंज्जलिं कट्टु एवं वयासी—णमोत्थुणं अरिहंताणं भगवंताणं
 जाव संपत्ताणं, णमोत्थुणं समणस्स भगवओ महावीरस्स जाव संपाविउकामस्स
 मम धम्मायरियस्स । वंदामि णं भगवंतं तत्थगयं इहाए पासउ मे भगवं तत्थ-
 गए इहगयं—तिकट्टु वंदइ णमंसइ वं० २ ता एवं वयासी—पुंविं वि य णं मए
 समणस्स भगवओ महावीरस्स अंतिए सव्वे पाणाइवाए पच्चक्खाए सुसावाए
 अदिण्णादाणे मेहुणे परिग्गहे कोहे माणे माया लोहे पेज्जे दोसे कलहे अब्भक्खाणे
 पेमुण्णे परपरिवाए अरइरइ मायामोसे मिच्छादंसणसल्ले पच्चक्खाए । इयाणं
 पि णं अहं तस्सेव अंतिए सव्वं पाणाइवायं पच्चक्खामि जाव मिच्छादंसणसल्लं
 पच्चक्खामि सव्वं असणपाणखाइमसाइमं चउत्विहंति पाआहारं पच्चक्खामि
 जावज्जीवाए । जंपि य इमं सरीरं इट्ठं कंतं पियं जाव विविहा रोगायंका
 परोसहोवसग्गा फुमंतीतिकट्टु एयं पि य णं चरमेहिं ऊसासणीसासेहिं वोसि-
 रामि त्तिकट्टु संलेहणाइसणाइसिए भत्तपाणपडियाइमिखए पाओवगए कालं
 अणवकंखमाणे विहरइ । तए णं ते थेरा भगवंतो मेहस्स अणगारस्स अगिलाए
 वेयावडियं करेति । तए णं से मेहे अणगारे समणस्स भगवओ महावीरस्स
 तहारुवाणं थेराणं अंतिए सामाइयमाइयाइं एक्कारस अंगाइं अहिज्जिता
 बहुपडिपुण्णाइं दुवालसवरिसाइं सामणपरियागं पाउणित्ता मासियाए संलेह-
 णाए अप्पाणं ज्ञोसेत्ता सद्धि मत्ताइं अणसणाए छेएत्ता आलोइयपडिक्कसे उद्धिय-
 सल्ले समाहिपत्ते आणुपुव्वेणं कालगए । तए णं ते थेरा भगवंतो मेहं अणगारं
 आणुपुव्वेणं कालगयं पासंति २ ता परिणिव्वाणवत्तिंयं काउस्सगं करेति २ ता
 मेहस्स आधारभंडगं गेहंति २ ता विउलाओ पच्चयाओ सणियं २ पच्चोहइति
 २ ता जेणामेव गुणसिलए चेइए जेणामेव समणे भगवं महावीरे तेणामेव
 उवागच्छति २ ता समणं भगवं महावीरं वंदंति णमंसंति वं० २ ता एवं
 वयासी—एवं खलु देवाणुत्पियाणं अंतिवासी मेहे णामं अणगारे पगइभइए जाव
 विणोए । से णं देवाणुत्पिएहिं अब्भणुण्णाए समाणे गोयमाइए समणे णिग्गंथे

शिंगथीओ य खामेता अम्हेहिं सद्धि विउलं पव्वयं सणियं २ बुरूहइ २ ता सय-
मेव मेहघणसण्णिगासं पुढविंसिलं (पट्टयं) पडिलेहेइ २ ता भत्तपाणपडियाइविखए
अणुपुव्वेणं कालगए । एस णं देवानुप्पिया ! मेहस्स अणगारस्स आधारभंडए
॥३६॥ भंते ! त्ति भगवं गोयमे समणं भगवं महावीरं वंदइ णमंसइ वं०२ ता
एवं वयासी-एवं खलु देवानुप्पियाणं अंतेवासी मेहे णामं अणगारे, से णं भंते !
मेहे अणगारे कालमासे कालं किच्चा कंहिं गए कंहिं उववण्णे ? गोयमाइ
समणे भगवं महावीरे भगवं गोयमं एवं वयासी-एवं खलु गोयमा ! मम अंते-
वासी मेहे णामं अणगारे पगइभट्टए जाव विणीए, से णं तहारूवाणं थेराणं
अंतिए सामाइयमाइयाइं एक्कारस अंगाइं अहिज्जइ २ ता बारस भिवखु-
पडिमाओ गणरयणसंवच्छरं तवोकम्मं काएणं फासित्ता जाव किट्टेत्ता मए
अभणुण्णाए समाणे गोयमाइ थेरे खामेइ २ ता तहारूवेहिं जाव विउलं पव्वयं
बुरूहइ २ ता दहभसंथारणं संथरइ २ ता दहभसंथारोवगए सयमेव पंचमह-
ध्वए उच्चारेइ बारस वासाइं सामणपरियामं पाउणित्ता मासियाए संलेहणाए
अप्पाणं झूसित्ता सद्धि भत्ताइं अणसणाए छेदेत्ता आलोइयपडिक्कंते उद्धियसत्ते
समाहिपत्ते कालमासे कालं किच्चा उद्धं च्चदिमसूरगहगणणक्खत्ततारारूवाणं
बहूइं जोयणाइं बहूइं जोयणतयाइं बहूइं जोयणसहस्साइं बहूइं जोयणसयसह-
स्साइं बहूइं जोयणकोडीओ बहूइं जोयणकोडाकोडीओ उद्धं दूरं उप्पइत्ता
सोह्मसीसाणसणकुमारमाहिंबवंभलंतगमहासुक्कसहस्साराणयपाणयारणचचुए
त्तिष्णि य अट्टारसुत्तरे गेवेज्जविमा(ण)णाराससए वीडवइत्ता विजए महा-
विमाणे देवत्ताए उववण्णे । तत्थ णं अत्थेगइयाणं देवाणं तेत्तीसं साग-
रोवमाइं ठिईं पणत्ता । तत्थ णं मेहस्सवि देवस्स तेत्तीसं सागरोवमाइं
ठिईं पणत्ता । एस णं भंते ! मेहे देवे ताओ देवलोयाओ आउक्खएणं ठिइ-
क्खएणं भवक्खएणं अणंतरं चयं चइत्ता कंहिं गच्छिहिइ कंहिं उववज्जिहिइ ?
गोयमा ! महाविबेहे वासे त्तिज्जिहिइ बुज्जिहिइ मुच्चिहिइ परिणिव्वाहिइ
सव्वदुक्खाणमंतं काहिइ । एवं खलु जंबू ! समणेणं भगवया महावीरेणं
आइगरेणं तित्थगरेणं जाव संपत्तेणं अप्पोपालंमणिमित्तं पढमस्स णायज्जयणस्स
अयमदठे पणत्ते त्तिबेमि ॥ ३७ ॥ गाहा-महुरेहिं णिउणेहिं वयणेहिं चोययत्ति
आयरिया । सीसे कंहिंचि खलिए जह मेहर्माणं महावीरो ॥१॥

॥ पढमं अज्जयणं समत्तं ॥

संघाडे णामं बीयं अज्झयणं

जइ णं भंते ! समणेणं भगवथा महावीरेणं जाव संपत्तेणं पढमस्स णाय-
 ज्झयणस्स अयपट्ठे पणत्ते विइयस्स णं भंते ! णायज्झयणस्स के अट्ठे पणत्ते ?
 एवं खलु जंबू ! तेणं कालेणं तेणं समएणं रायगिहे णामं णयरे होत्था वण्णओ !
 तस्स णं रायगिहस्स णयरस्स बहिया उत्तरपुरत्थिमे दिसीभाए गुणसिलए
 णामं चेइए होत्था वण्णओ । तस्स णं गुणसिलयस्स चेइयस्स अदूरसामंते
 एत्थ णं महं एगे (पडिघ) जिण्णुज्जाणे यावि होत्था विण्णुदेवउले परिसडिय-
 तोरणघरे णाणाविहगुच्छगुम्मलयावत्तिलवच्छच्छाइए अणेगवालसयसंकाणिज्जे
 यावि होत्था । तस्स णं जिण्णुज्जाणस्स बहुमज्झदेसभाए एत्थ णं महं एगे
 भग्गकूवए यावि होत्था । तस्स णं भग्गकूवस्स अदूरसामंते एत्थ णं महं एगे
 मालुयाकच्छए यावि होत्था किण्हे किण्हेभासे जाव रम्मे महामेहण्डरंबभूए
 बहूहिं रुवलेहि य गुच्छेहि य गुम्मेहि य लयाहि य वल्लीहि य तणेहि य
 कुसेहि य खाणएहि य संछण्णे पत्तिच्छण्णे अंतो झुसिरे बाहिं गंभीरे अणेग-
 वालसयसंकाणिज्जे यावि होत्था ॥ ३८ ॥ तत्थ णं रायगिहे णयरे धण्णे
 णामं सत्थवाहे अड्ठे दित्ते जाव विउलभत्तपाणे । तस्स णं धण्णस्स सत्थ-
 वाहस्स भट्टा णामं भारिया होत्था सुकुमालपाणिपाया अहीणपडिपुण्ण-
 पत्तिदियसरीरा लक्खणवंजणगुणोववेया साणुग्गमाणप्पमाणपडिपुण्णसुजायसत्त्वंग-
 सुंदरंगी ससिसोमागारा कंता पियदंसणा मुरूवा करयलपरिमियत्तिलियमज्झा
 कुंडलुत्तिलिहियगंडलेहा कोमुइरयणियरपडिपुण्णसोमवयणा सिगारागारचाख्वेसा
 जाव पडिख्खा वंझा अविघाउरी जाणुकोप्परमाया यावि होत्था ॥ ३९ ॥
 तस्स णं धण्णस्स सत्थवाहस्स पंथए णामं दासचेडे होत्था सत्त्वंगसुंदरंगे
 मंसोवच्चिए बालकीलावणकुसले यावि होत्था । तए णं से धण्णे सत्थवाहे राय-
 गिहे णयरे बहूणं णगरणिगमसेट्टिसत्थवाहाणं अट्टारसण्ह य सेणिप्पसेणीणं बहूसु
 कज्जेसु य कुडुंबेसु य मंतेसु य जाव चक्खुभूए यावि होत्था णियगस्स वि
 य णं कुडुंबस्स बहूसु (य) कज्जेसु जाव चक्खुभूए यावि होत्था ॥ ४० ॥ तत्थ णं
 रायगिहे णयरे विजए णामं तक्करे होत्था पावे चंडालरूवे भौमतररुद्धकम्मे
 आरुसियदित्तरत्तणयणे खरफरुसमहल्लविगयवोभच्छदांदिए असंपुडिय-
 उट्ठे उद्धयपइणलंबंतमुद्धए भमरराहुवण्णे णिरणुक्कोसे णिरणुतावे दारुणे

पइमए णिसंसइए णिरणुकपे अहिष्णव एगंतविट्ठि खुरेव एगंतधाराए गिद्धेव
 आमिसतल्लिच्छे अग्गिमिव सव्वभवखे जलमिव सव्वगाही उवकंचणवंचण-
 मायाणियडिक्कडकवडसाइसंपओगबहुले चिरणगरविणट्टुडुसीलाघारचरित्ते
 जूयप्पसंगी मज्जप्पसंगी भोज्जप्पसंगी मंसप्पसंगी दारुणे हिययदारए साहसिए
 संघिच्छेयए उवहिए विसंसंघाई आलीयगतित्थमेयलहुहत्थसंपउत्ते परस्स दव्व-
 हरणंमि णिच्चं अणुबद्धे तिच्चवेरे रायगिहस्स णगरस्स बहूणि अइगमणाणि
 य णिगमणाणि य दाराणि य अवदाराणि य छिंडिओ य खंडीओ य णगर-
 णिद्धमणाणि य संघट्टणाणि य णिव्वट्टणाणि य जूवखलयाणि य पाणागाराणि
 य वेसागाराणि य तट्टारट्टाणाणि य तक्करट्टाणाणि य तक्करघराणि य सिगाड-
 गाणि य तियाणि य चउवकाणि य चच्चराणि य णागघराणि य भूयघराणि
 य जव्वखदेउलाणि य सभाणि य पवाणि य पणियसालाणि य सुण्णघराणि य
 आभोएमाणे २ मग्गमाणे गवेसमाणे बहुजणस्स छिद्देसु य विसमेसु य विहुरेसु
 य वसणेसु य अब्भुदएसु य उस्सवेसु य पसवेसु य तिहीसु य छणेसु य जण्णेसु
 य पव्वणीसु य मत्तपमत्तस्स य वक्खित्तस्स य चाउत्तस्स य सुहियस्स य
 दुहियस्स य विदेसत्थस्स य विप्पवसियस्स य मग्गं च छिद्दं च विरहं च अंतरं
 च मग्गमाणे गवेसमाणे एधं च णं विहरइ, बहिया वि य णं रायगिहस्स
 णगरस्स आरामेसु य उज्जाणेसु य वाविषोक्खरणीदोहियागुंजालिया सरेसु य
 सरपंतिमुय सरसरपंतिवासु य जिण्णुज्जाणेसु य भग्गकूवएसु य मालुयाकच्छएसु
 य सुसाणेसु य गिरिकंदरलेणउवट्टाणेसु य बहुजणस्स छिद्देसु य जाव एवं च णं
 विहरइ ॥४१॥ तए णं तीसे भट्टाए भारियाए अणया कयाइं पुव्वरत्तावरत्त-
 कालसमयंसि कुडुंबजागरियं जागरमाणीए अयमेयारूवे अज्झत्थिए जाव सम-
 प्पज्जित्था-अहं धण्णेणं सत्थवाहेणं सिद्धिं बहूणि वासाणि सट्टफरित्तरसंगंध-
 रूवाणि माणुस्सगाइं कामभोगाइं पच्चणुब्भवमाणी विहरामि णो चेव णं अहं
 दारगं वा दारिगं वा पयायामि । तं धण्णाओ णं ताओ अम्मयाओ जाव मुलद्धे
 णं माणुस्सए जम्मजीवियफले तांसि अम्मयाणं जांसि मण्णे णियगकुच्छिसंभू-
 याइं थणदुद्धलुद्धयाइं भहुरसमुत्तावगाइं मम्मणपयंपियाइं थणमूलकवखदेसभाणं
 अभिसरमाणाइं मुंद्धयाइं थणयं पिबंति तओ य कोमलकमलोवमेहि हत्थेहि
 गिण्हूऊणं उच्छंणे णिवेसियाइं देंति समुत्तावए पिए सुमहुरे पुणो २ मंजुत्तप्प-

मणिण १ तं णं अहं अधण्णा अपुण्णा अलक्खणा अकयपुण्णा एत्तो एगमवि ण पत्ता । तं सेयं मम कल्लं पाउप्पभायाए जाव जलंते धण्णं सत्थवाहं आपुच्छिता धण्णेणं सत्थवाहेणं अन्नमणुण्णाया समाणी सुबहं विपुलं असणं ४ उवक्खडावेत्ता सुबहं पुफवत्थगंधमल्लालंकारं गहाय बहूहिं मित्तणाइणियगसयणसंबंधिपरि-जणमहिलाहिं सद्धिं सपरिवुडा जाइं इमाइं रायगिहस्स णयरस्स बहिया णापाणि य मूयाणि य जवखाणि य इदाणि य खंदाणि य रुदाणि य सेवाणि य वेसम-णाणि य तत्थ णं बहूणं णागपडिमाण य जाव वेसमणपडिमाण य महरिहं पुफक्कचिणियं करेत्ता जाणुपायपडियाए एवं वइत्तए—जइ णं अहं देवाणुप्पिया ! दारणं वा दारियं वा पयायामि तो णं अहं तुमं जायं च दायं च भायं च अक्ख-यणिहिं च अणुवड्ढेमि त्तिकट्टु उवाइयं उवाइत्तए । एवं सपेहेइ २ ता कल्लं जाव जलंते जेणामेव धण्णे सत्थवाहे तेणामेव उवागच्छइ २ ता एवं वयासी-एवं खलु अहं देवाणुप्पिया ! तुमोहिं सद्धिं बहूइं वासाइं जाव देति समुल्लावए सुमहुरे पुणो २ मंजुलप्पमणिण, तं णं अहं अहण्णा अपुण्णा अकयलक्खणा एत्तो एगमवि ण पत्ता, तं इच्छामि णं देवाणुप्पिया ! तुमोहिं अन्नमणुण्णाया समाणी विपुलं असणं ४ जाव अणुवड्ढेमि उवाइयं करेत्तए । तए णं धण्णे सत्थवाहे भदं भारियं एवं वयासी—ममं पि य णं खलु देवाणुप्पिए ! एस चेव मणोरहे—कहं णं तुमं दारणं वा दारियं वा पयाएज्जसि ? भदाए सत्थवाहीए एयमट्ठं अणुजाणइ । तए णं सा भदा सत्थवाही धण्णेणं सत्थवाहेणं अन्नमणुण्णाया समाणी हट्टुट्टु जाव हयहियया विपुलं असणं ४ उवक्खडावेइ २ ता सुबहं पुफवत्थगंधमल्लालंकारं गेण्हइ २ ता सयाओ गिहाओ णिग्गच्छइ २ ता रायगिहं णयरं मज्झंमज्जेणं णिग्गच्छइ २ ता जेणेव पोक्खरिणी तेणेश उवागच्छइ २ ता पुक्खरिणीए तीरे सुबहं पुफ्फ जाव मल्लालंकारं ठवेइ २ ता पुक्खरिणि ओगाहेइ २ ता जलमज्जणं करेइ जलकीडं करेइ २ ता ण्हाया कयबलिकम्मा उल्लपडसाडिगा जाइं तत्थ उप्पलाइं जाव सहस्सपत्ताइं ताइं गिण्हइ २ ता पुक्खरिणीओ पच्चोरुहइ २ ता तं सुबहं पुफ्फवत्थ-गंधमल्लं गेण्हइ २ ता जेणामेव णागघरए य जाव वेसमणघरए य तेण-मेव उवागच्छइ २ ता तत्थ णं णागपडिमाण य जाव वेसमणपडिमाण य आलोए पणामं करेइ ईति पच्चुण्णमइ २ ता लोमहत्थयं परामुसइ २ ता

णागपडिमाओ य जाव वेसमणपडिमाओ य लोमहृत्थेणं पमज्जइ उदगघाराए
 अब्भुवखेइ २ ता पम्हलसुकुमालाए गंधकासाईए गायाई लूहेइ २ ता महरिहं
 वत्थारुहणं च मल्लाहहणं च गंधारुहणं च चुण्णारुहणं च वण्णारुहणं च करेइ
 २ ता जाव धूवं डहइ २ ता जण्णुपायपडिया पंजलिउडा एवं वयासी-
 जइ णं अहं दारणं वा दारियं वा पयायामि तो णं अहं जायं च जाव अणु-
 वड्ढेमि तिकट्ट उवाइयं करेइ २ ता जेणेव पोक्खरिणी तेणेव उवागच्छइ
 २ ता विपुलं असणं ४ आसाएमाणी जाव विहरइ जिमिया जाव सुइभूया
 जेणेव सए गिहे तेणेव उवागया । अदुत्तरं च णं भद्दा सत्थवाही चाउइसट्ट-
 मुट्टिदुण्णमासिणीसु विपुलं असणं ४ उवक्खडेइ २ ता ब्रह्मे णागा य जाव
 वेसमणा य उवायमाणी णमंसमाणी जाव एवं च णं विहरइ ॥४२॥ तए णं
 सा भद्दा सत्थवाही अण्णया कयाइ केणइ कालंतरेणं आवण्णसत्ता जाया यावि
 होत्था । तए णं तीसे भद्दाए सत्थवाहीए दोसु मासेसु बीद्धक्कंतेसु तइए मासे
 वट्टमाणे इभेयारूवे दोहले पाउब्भूए--धण्णाओ णं ताओ अम्मयाओ जाव कय-
 सक्खणाओ णं ताओ अम्मयाओ जाओ णं विउलं असणं ४ सुबहुयं पुप्फवत्थ-
 गंधमल्लालंकारं गहाय मित्तणाइणियगसयणसंबंधिपरियणमहिलियाहि य सद्धि
 संपरिवुडाओ रायगिहं णयरं मज्झमज्जेणं णिग्गच्छंति २ ता जेणेव पुक्खरिणी
 तेणेव उवागच्छंति २ ता पोक्खरिणी ओगाहेति २ ता ण्हायाओ कयबलि-
 कम्माओ सत्वालंकारविभूसियाओ विपुलं असणं ४ आसाएमाणीओ जाव पडि-
 भुंजेमाणीओ दोहलं विणेति । एवं संपेहेइ २ ता कल्लं जाव जल्लंते जेणेव धण्णे
 सत्थवाहे तेणेव उवागच्छइ २ ता धण्णं सत्थवाहं एवं वयासी-एवं खलु
 देवाणुप्पिया ! मम तस्स गग्गस्स जाव विणेति, तं इच्छामि णं देवाणुप्पिया !
 तुब्भेहि अब्भण्णयाया समाणी जाव विहरित्तए । अह्हासुहं देवाणुप्पिया ! मा
 पडिबंधं करेह । तए णं सा भद्दा सत्थवाही धण्णेणं सत्थवाहेणं अब्भण्णयाया
 समाणी हट्टुट्टा जाव विपुलं असणं ४ जाव ण्हाया जाव उल्लपडसाडगा जेणेव
 णागघरए जाव धूवं डहइ २ ता पणामं करेइ २ ता जेणेव पोक्खरिणी तेणेव
 उवागच्छइ । तए णं ताओ मित्तणाइ जाव णगरमहिलाओ भद्दं सत्थवाहि
 सत्वालंकारविभूसियं करेति । तए णं सा भद्दा सत्थवाही ताहि मित्तणाइणियग-
 सयणसंबंधिपरियणणगरमहिलियाहि सद्धि तं विपुलं असणं ४ जाव परिभुंज-

माणी य दोहलं विणेइ २ ता जामेव दिंसि पाउम्भूया तामेव दिंसि पडि-
 गया । तए णं सा भद्दा सत्थवाही संपुण्णडोहला जाव तं गम्भं सुहसुहेणं
 परिवहइ । तए णं सा भद्दा सत्थवाही णवण्हं मासाणं बहुपडिपुण्णाणं अट्टट्ट-
 माण य राइंदियाणं सुकुमालपाणिपायं जाव दारयं पयाया । तए णं तस्स
 दारगस्स अम्मापियरो पढमे दिवसे जायकम्मं करेति २ ता तहेव जाव विपुलं
 असणं ४ उवखड्ढावेति २ ता तहेव मित्तणाइणियगं भोयावेत्ता अयमेयाख्वं
 गोणं गुणणिक्कणं णामधेज्जं करेति—जम्हा णं अम्हं इमे दारए बहूणं णाग-
 पडिमाण य जाव वेत्तमणपडिमाण य उवाइयलद्धे णं तं होउ णं अम्हं इमे
 दारए देवदिण्णे णामेणं । तए णं तस्स दारगस्स अम्मापियरो णामधेज्जं करेति
 देवदिण्णेति । तए णं तस्स दारगस्स अम्मापियरो जायं च दायं च मायं च
 अक्खयणिंहि च अणुवड्ढेति ॥४३॥ तए णं से पंथए दासचेडए देवदिण्णस्स
 दारगस्स बालगगाही जाए, देवदिण्णं दारयं कडोए गेण्हइ २ ता बहूहि
 डिभएहि य डिभियाहि य दारएहि य दारियाहि य कुमारएहि य कुमारियाहि
 य सद्धिं संपरिवुडे अभिरममाणे अभिरमइ । तए णं सा भद्दा सत्थवाही
 अणया कयाइं देवदिण्णं दारयं ण्हायं कयवलिकम्मं कयकोउव-मंगल-पायच्छित्तं
 सव्वालंकारविभूसियं करेइ २ ता पंथयस्स दासचेडयस्स हत्थयसि दलयइ ।
 तए णं से पंथए दासचेडए भद्दाए सत्थवाहीए हत्थाओ देवदिण्णं दारगं कडोए
 गेण्हइ २ ता सयाओ गिहाओ पडिणिवलमइ २ ता बहूहि डिभएहि य डिभि-
 याहि य जाव कुमारियाहि य सद्धिं संपरिवुडे जेणेव रायमग्गे तेणेव उवा-
 गच्छइ २ ता देवदिण्णं दारगं एगते ठावेइ २ ता बहूहि डिभएहि य जाव
 कुमारियाहि य सद्धिं संपरिवुडे पमत्ते यावि होत्था विहरइ । इमं च णं
 विजए तवकरे रायगिहस्स णयरस्स बहूणि दाराणि य अवदाराणि य तहेव
 जाव आभोएमाणे मग्गेमाणे गवेसमाणे जेणेव देवदिण्णे दारए तेणेव उवा-
 गच्छइ २ ता देवदिण्णं दारगं सव्वालंकारविभूसियं पासइ २ ता देवदिण्णस्स
 दारगस्स आभरणालंकारेसु मुच्छिए गटिए गिट्ठे अज्जोववण्णे पंथयं दाम-
 चेडं पमत्तं पासइ २ ता दिसालोयं करेइ २ ता देवदिण्णं दारगं गेण्हइ २
 ता कक्खंसि अत्तियावेइ २ ता उत्तरिज्जेणं पिहेइ २ ता सिग्घं तुरियं चवलं
 वेइयं रायगिहस्स णगरस्स अवदारेणं णिगच्छइ २ ता जेणेव जिण्णुज्जाणे

जेणेव भग्गकूवए तेणेव उवागच्छइ २ ता देवदिणं दारयं जीवियाओ बवरो-
वेइ २ ता आभरणालंकारं गेहइ २ ता देवदिणस्स दारगस्स सरीरं
णिप्पाणं णिच्चेट्ठं जीवियविप्यजदं भग्गकूवए पक्खिअइ २ ता जेणेव
मालुयाकच्छए तेणेव उवागच्छइ २ ता मालुयाकच्छयं अणुप्पविसइ २ ता
णिच्चले णिप्फे तुत्तिणोए दिवसं खिवेमाणे चिट्ठइ ॥ ४४ ॥ तए णं से
पंधए दासचेडे तओ मुहुत्तंतरस्स जेणेव देवदिणं दारए ठविए तेणेव उवा-
गच्छइ २ ता देवदिणं दारगं तंसि ठाणंसि अपासमाणे रोयमाणे कंदमाणे
विलवमाणे देवदिणस्स दारगस्स सव्वओ समंता मग्गणगवेसणं करेइ २ ता
देवदिणस्स दारगस्स कत्थइ सुइं वा खुइं वा पउत्ति वा अलभमाणे जेणेव सए
गिहे जेणेव धण्णे सत्थवाहे तेणेव उवागच्छइ २ ता धण्णं सत्थवाहं एवं बयासी-
एवं खलु सामी ! भद्दा सत्थवाही देवदिणं दारयं ण्हायं जाव मम हत्थंसि
वलयइ । तए णं अहं देवदिणं दारयं कडोए गिण्हामि जाव मग्गणगवेसणं
करेमि । तं ण णज्जइ णं सामी ! देवदिणं दारए केणइ हए वा अवहिए
वा अवखित्ते वा पायवडिए धण्णस्स सत्थवाहस्स एयमट्ठं णिवेदेइ । तए णं
से धण्णे सत्थवाहे पंधयस्स दासचेडयस्स एयमट्ठं सोच्चा णिसम्म तेण ध
महया पुत्तसोएणाभिभूए समाणे प रसुणियत्ते व चंपगपायवे धसत्ति धरणीय-
लंसि सव्वंगोहिं सण्णिवइए । तए णं से धण्णे सत्थवाहे तओ मुहुत्तंतरस्स
आसत्थे पच्छागयपाणे देवदिणस्स दारगस्स सव्वओ समंता मग्गणगवेसणं
करेइ देवदिणस्स दारगस्स कत्थइ सुइं वा खुइं वा पउत्ति वा अलभमाणे
जेणेव सए गिहे तेणेव उवागच्छइ २ ता महत्थं पाहुडं गेहइ २ ता जेणेव
णगरगुत्तिया तेणेव उवागच्छइ २ ता तं महत्थं पाहुडं उवणेइ २ ता एवं
बयासी-एवं खलु देवाणुप्पिया ! मम पुत्ते भद्दाए भारियाए अत्तए देवदिणं
णामं दारए हट्ठे जाव उंबरपुप्फपिव दुल्लहे सवणयाए किमंग पुण पासण-
याए ? तए णं सा भद्दा देवदिणं ण्हायं सव्वालंकारविभूसियं पंधगस्स हत्थे
दलाइ जाव पायवडिए तं मम णिवेदेइ । तं इच्छामि णं देवाणुप्पिया !
देवदिणस्स दारगस्स सव्वओ समंता मग्गणगवेसणं कयं । तए णं ते णगर-
गोत्तिया धण्णेणं सत्थवाहेणं एवं बुत्ता समाणा सग्गद्वबद्धम्मियकवया
उप्पोत्तियसरासणपट्टिया जाव गहियाउहपहरणा धण्णेणं सत्थवाहेणं सिद्धि

रायगिहस्स णगरस्स बहूणि अइगमणाणि य जाव पवामु य मग्गणगवेसणं
 करेमाणा रायगिहाओ णयरओ पडिणिक्खमंति २ ता जेणेव जिणुज्जाणे
 जेणेव भग्गकुवए तेणेव उवागच्छंति २ ता देवदिणस्स दारगस्स सरीरगं
 णिप्पाणं णिच्चेट्ठं जीवविप्पज्जहं पासंति २ ता हा हा अहो अकञ्जमि
 तिकट्टु देवदिणं दारगं भग्गकूवाओ उत्तारेंति २ ता धणस्स सत्थवाहस्स
 हत्थे दलयंति ॥ ४५ ॥ तए णं ते णगरगुत्तिया विजयस्स तक्करस्स पयमग्ग-
 मणुगच्छमाणा जेणेव मालुयाकच्छए तेणेव उवागच्छंति २ ता मालुया-
 कच्छयं अणुप्पविसंति २ ता विजयं तक्करं ससक्खं सहोढं सगेवेज्जं
 जीवग्गाहं गेहंति २ ता अट्टिमट्टिजाणुकोप्परपहारसंभग्गमहियगतं करेति २
 ता अवउडा बंधणं करेति २ ता देवदिणस्स दारगस्स आभरणं गेहंति
 २ ता विजयस्स तक्करस्स गीवाए बंधंति २ ता मालुयाकच्छयाओ पडि-
 णिक्खमंति २ ता जेणेव रायगिहे णयरे तेणेव उवागच्छंति २ ता रायगिहं
 णयरं अणुप्पविसंति २ ता रायगिहे णयरे सिंघाडगतिगच्चउक्कचच्चरमहा-
 पहूपहेसु कसप्पहारे य लयापहारे य छिवापहारे य णिवाएमाणा २ छारं च
 धूर्सि च कयवरं च उवरी पक्किरमाणा २ महया २ सद्दणं उघोसेमाणा एवं
 वयंति—एस णं देवाणुप्पिया ! विजए णामं तक्करे जाव गिद्धे विव आमिस-
 भक्खी बालघायए बालमारए, तं णो खलु देवाणुप्पिया ! एयस्स केइ राया
 वा रायपुत्ते वा रायमच्चे वा अवरज्जइ एत्थट्ठे अप्पणो सयाइं कम्माइं
 अवरज्जंतित्तिकट्टु जेणामेव चारगसाला तेणामेव उवागच्छंति २ ता हडिबंधणं
 करेति २ ता भत्तपाणणिरोहं करेति २ ता तिसंजं कसप्पहारे य जाव णिवाएमाणा
 २ विहरंति । तए णं से धण्णे सत्थवाहे मित्तणाइणियगसयणसंबंधिपरियणेणं सद्धि
 रोथमाणे जाव विलवमाणे देवदिणस्स दारगस्स सरीरस्स महया इड्ढीसक्कार-
 समुदएणं णिहरणं करेइ २ ता बहुइं लोइयाइं मयगकिच्चाइं करेइ २ ता केणइ
 कालंतरेणं अवगयसोए जाए यावि होत्था ॥ ४६ ॥ तए णं से धण्णे सत्थवाहे
 अण्णया कयाइं लहुसयंसि रायावराहंसि संपलत्ते जाए यावि होत्था- । तए णं
 ते णगरगुत्तिया धण्णं सत्थवाहं गेहंति २ ता जेणेव चारगे तेणेव उवागच्छंति
 २ ता चारगं अणुप्पवेसंति २ ता विजएणं तक्करेणं सद्धि एगयओ हडिबंधणं
 करेति । तए णं सा भद्दा भारिया कल्लं जाव जलत्ते विपुलं असणं ४ उवक्खडेइ

२ ता भोयणपिडए करेइ २ ता भायणाइं पबिखवइ २ ता लंछियमुद्दिणं करेइ २ ता एगं च सुरभिवारिपडिपुण्णं दगवारयं करेइ २ ता पंथयं दासवेडं सद्दवेइ २ ता एवं वयासी-गच्छं तुमं देवानुप्पिया ! इमं विपुलं असणं ४ गहाय चारगसालाए धण्णस्स सत्थवाहस्स उवणेहि । तए णं से पंथए भद्दाए सत्थवाहीए एवं बुत्ते समाणे हट्टुत्ठे तं भोयणपिडगं तं च सुरभिवरवारिपडिपुण्णं दगवारयं गेण्हइ २ ता सयाओ गिहाओ पडिणिक्लमइ २ ता रायगिहं णगरं मज्झमज्जेणं जेणेव चारगसाला जेणेव धण्णे सत्थवाहे तेणेव उवागच्छइ २ ता भोयणपिडयं ठावेइ २ ता उल्लंछेइ २ ता भायणाइं गेण्हइ २ ता भायणाइं धोवेइ २ ता हृत्यसोयं दलयइ २ ता धण्णं सत्थवाहं तेणं विपुलेणं असणेणं ४ परिवेसइ । तए णं से विजए तक्करे धण्णं सत्थवाहं एवं वयासी-तुमं णं देवानुप्पिया ! ममं एयाओ विपुलाओ असणाओ ४ संविभागं करेहि । तए णं से धण्णे सत्थवाहे विजयं तक्करं एवं वयासी-अविदाइं अहं विजया । एयं विपुलं असणं ४ कायाणं वा सुणगाणं वा दलएज्जा उक्कुहडियाए वा णं छइडेज्जा णो चेव णं तव पुत्तघायगस्स पुत्तमारगस्स अरिस्स वेरियस्स पडिणीयस्स पच्चामित्तस्स एत्तो विपुलाओ असणाओ ४ संविभागं करेज्जामि । तइ णं से धण्णे सत्थवाहे तं विपुलं असणं ४ आहारेइ २ ता तं पंथयं पडिविसज्जेइ । तए णं से पंथए दासवेडे तं भोयणपिडगं गिण्हइ २ ता जामेव दिंति पाउडभूए तामेव दिंति पडिगए । तए णं तस्स धण्णस्स सत्थवाहस्स तं विपुलं असणं ४ आहारियस्स समाणस्स उच्चारपासवणे णं उच्चाहिंथा तए णं से धण्णे सत्थवाहे विजयं तक्करं एवं वयासी-एहि ताव विजया ! एणं तमवक्कमामो जेणं अहं उच्चारपासवणं परिट्ठवेमि । तए णं से विजए तक्करे धण्णं सत्थवाहं एवं वयासी-तुमं देवानुप्पिया ! विपुलं असणं ४ आहारियस्स अत्थि उच्चारे वा पासवणे वा, ममं णं देवानुप्पिया ! इमेहिं बहूहिं कसप्प-हारेहि य जाव लयापहारेहि य तण्हाए य छुहाए य परब्भवमाणस्स णत्थि केइ उच्चारे वा पासवणे वा, तं छुदेणं तुमं देवानुप्पिया ! एणंते अवक्कमित्ता उच्चारपासवणं परिट्ठवेहि । तए णं से धण्णे सत्थवाहे विजएणं तक्करेणं एवं बुत्ते समाणे तुसिणीए संचिट्ठइ । तए णं से धण्णे सत्थवाहे मुहुत्तं तरस्स बलिय-तराणं उच्चारपासवणेणं उच्चाहिज्जमाणे विजयं तक्करं एवं वयासी-एहि ताव

विजया ! जाव अवक्कमामो । तए णं से विजए धण्णं सत्थवाहं एवं वयासी-
जइ णं तुमं देवाणुपिया ! ताओ विपुलाओ असणाओ ४ संविभागं करेहि
तओइहं तुमेहि सद्धि एगंतं अवक्कमामि । तए णं से धण्णे सत्थवाहे विजयं
एवं वयासी-अहं णं तुम्भं ताओ विपुलाओ असणाओ ४ संविभागं करिस्सामि ।
तए णं से विजए धण्णस्स सत्थवाहस्स एयमट्ठं पडिसुणेइ । तए णं से विजए
धण्णेणं सद्धि एगंते अवक्कमइ उच्चारपासवणं परिट्टवेइ आयंते चोक्खे परम-
मुइभूए तमेव ठाणं उवसंक्कमित्ताणं विहरइ । तए णं सा भट्टा कल्लं जाव
जलंते विपुलं असणं ४ जाव परिवेसेइ । तए णं से धण्णे सत्थवाहे विजयस्स
तवकरस्स ताओ विपुलाओ असणाओ ४ संविभागं करेइ । तए णं से धण्णे
सत्थवाहे पंथयं दासचेडं विसज्जेइ । तए णं से पंथए भोयणपिडयं गहाय चार-
णाओ पडिणिवक्खमइ २ ता रायगिहं णयरं मज्झमज्जेणं जेणेव सए गिहे
जेणेव भट्टा भारिया तेणेव उवागच्छइ २ ता महं सत्थवाहिणं एवं वयासी-
एवं खलु देवाणुपिया ! धण्णे सत्थवाहे तव पुत्तघाययस्स जाव पच्चामित्तस्स
ताओ विपुलाओ असणाओ ४ संविभागं करेइ ॥४७॥ तए णं सा भट्टा सत्थ-
वाही पंथयस्स दासचेडयस्स अंतिए एयमट्ठं सोच्चा आसुरुत्ता रुट्ठा जाव
मिसिमिसेमाणी धण्णस्स सत्थवाहस्स पओसमावज्जइ । तए णं से धण्णे सत्थ-
वाहे अण्णया कयाइं मित्तणाइणियगसयणसंबंधिपरियणेणं सएण थ अत्थसारेणं
रायकज्जाओ अप्पाणं मोयावेइ २ ता चारगसालाओ पडिणिवक्खमइ पडि-
णिवक्खमित्ता जेणेव अलंकारियसमा तेणेव उवागच्छइ उवागच्छित्ता अलं-
कारियकम्मं करेइ २ ता जेणेव पुबखरिणी तेणेव उवागच्छइ २ ता अह-
धोयमट्ठियं गेहइ २ ता पोवखरिणी ओगाहइ २ ता जलमज्जणं करेइ २
ता ण्हाए कयबलिकम्मे जाव रायगिहं णगरं अणुप्पविसइ २ ता रायगिहस्स
णगरस्स मज्झमज्जेणं जेणेव सए गिहे तेणेव प्हारेत्थे गमणाए । तए णं तं धण्णं
सत्थवाहं एज्जमाणं पासित्ता रायगिहे णयरे बहवे णियगसेट्ठिसत्थवाहपमिइओ
आढंति परिजाणंति सक्कारंति सम्माणंति अब्भट्ठंति सारीरकुमलं पुच्छंति ।
तए णं से धण्णे सत्थवाहे जेणेव सए गिहे तेणेव उवागच्छइ । जावि य से तत्थ
वाहिरिया परिसा भवइ तंजहा-दासाइ वा पेस्साइ वा भियगाइ वा माइल्लागाइ
वा से वि य णं धण्णं सत्थवाहं एज्जमाणं पामइ २ ता पायंविडियाए खेमकुसलं

पुच्छंति । जावि य से तत्थ अम्मंतरिया परिसा भवइ तंजहा—मायाइ वा पियाइ वा मायाइ वा भइणीइ वा सावि य णं धण्णं सत्थवाहं एज्जमाणं पासइ २ ता आसणाओ अम्मट्ठेइ २ ता कंठाकंठियं अवयासियं बाहूपपोक्खणं करेइ । तए णं से धण्णे सत्थवाहे जेणेव भद्दा भारिया तेणेव उवागच्छइ । तए णं सा भद्दा धण्णं सत्थवाहं एज्जमाणं पासइ २ ता णो आढाइ णो परिघाणाइ अणाढायमाणी अपरिजाणमाणी तुसिणीया परम्मूही संचिद्धइ । तए णं से धण्णे सत्थवाहे भद्दं भारियं एवं वयासी—किं णं तुम्भं देवानुप्पिए ! ण तुट्ठी वा ण हरिसे वा णाणदे वा जं भए सएणं अत्थसारेणं रायकज्जाओ अप्पाणं विमोइए । तए णं सा भद्दा धण्णं सत्थवाहं एवं वयासी—रूहं णं देवानुप्पिया ! मम तुट्ठी वा जाव आणदे वा भविस्सइ ? जेणं तुमं मम पुतघायगस्स जाव पच्चामित्तस्स ताओ विपुलाओ असणाओ ४ संविभागं करेसि । तए णं से धण्णे भद्दं एवं वयासी—णो खलु देवानुप्पिए ! धम्मोत्ति वा तवोत्ति वा कयपडिकइयाइ वा लोग्गत्ताइ वा णायएइ वा धाडिएइ वा सहाएइ वा सुहिति वा ताओ विपुलाओ असणाओ ४ संविभागे कए णणत्थ सरीर-चित्ताए । तए णं सा भद्दा धण्णेणं सत्थवाहेणं एवं वृत्ता समाणी हट्ठा जाव आसणाओ अम्मट्ठेइ २ ता कंठाकंठि अवयासेइ खेमकुसलं पुच्छइ २ ता आया जाव पायच्छित्ता विपुलाइं भोगभोगाइं भुंजमाणी विहरइ । तए णं से विजए तवकरे चारगसालाए तेहिं बंधेहिं वहेहिं कसप्पहारेहिं य जाव तण्हाए य छुहाए य परम्भवमाणे कालमासे कालं किच्चा णरएमु णेरइयत्ताए उववण्णे । से णं तत्थ णेरइए जाए काले कालोभासे जाव वेयणं पच्चण्णम्मवमाणे विहरइ । से णं तओ उववट्ठित्ता अणादीयं अणवदग्गं दीहमद्धं चाउरंतसंसारकंतारं अणुपरियट्ठिस्सइ । एवामेव जंबू ! जे णं अम्मं णिग्गंथो वा णिग्गंथो वा आयरियउवज्जायाणं अंतिए मुंडे भवित्ता अगाराओ अणगारियं पच्चइए समाणे विपुलमणिमोत्तियधणकणगरयणसारेणं लुम्भइ से वि (य) एवं जेव ॥४८॥ तेणं कालेणं तेणं समएणं धम्मघोसा णामं थेरा भगवंतो जाइसंपण्णा कुलसंपण्णा जाव पुञ्जाणुपुडिक्क चरमाणा जाव जेणेव रायगिहे णयरे जेणेव गुणसिलए चेइए जाव अहापडिरूवं उग्गहं उग्गिण्हिता संजमेणं तवसा अप्पाणं भावेमाणा विहरंति । परिसा णिग्गया धम्मो कहिओ । तए णं तस्स धण्णस्स

सत्थवाहस्स बहुजणस्स अंतिए एयमट्ठं सोच्चा णिसम्म इमेयारूवे अज्झत्थिए जाव समुप्पजित्था—एवं खलु थेरा भगवंतो जाइसंपण्णा इहमागया इह संपत्ता, तं इच्छामि णं थेरे भगवंते वंदांमि णमंसामि ण्हाए जाव सुद्धप्पावेसाइं मंग-
 ल्लाई वत्थाइं पवरपरिहिए पायविहारचारेणं जेणेव गुणसिलए चेइए जेणेव थेरा भगवंतो तेणेव उवागच्छइ २ ता वंदइ णमंसइ । तए णं थेरा धण्णस्स विचित्तं धम्ममाइवखंति । तए णं से धण्णे सत्थवाहे धम्मं सोच्चा एवं वयासी—सह-
 हामि णं भंते ! णिग्गंथे पावयणे जाव पव्वइए जाव बहूणि वासाणि साम-
 णपरियाणं पाउणित्ता भत्तं पच्चक्खाइत्ता मासियाए संलेहणाए सट्ठि भत्ताइं अणसणाए छेदेइ २ ता कालमासे कालं किच्चा सोहम्मे कप्पे देवत्ताए उव-
 वण्णे । तत्थ णं अत्थेगइयाणं देवाणं चत्तारि पल्लिओवमाइं ठिई प० । तत्थ णं धण्णस्स देवस्स चत्तारि पल्लिओवमाइं ठिई प० । से णं धण्णे देवे ताओ देवलोगाओ आउवखएणं ठिइवखएणं भवक्खएणं अणंतरं चयं चइत्ता महा-
 विदेहे वासे सिज्झहिइ जाव सव्वदुक्खाणमंतं करेहिइ ॥ ४९ ॥ जहा णं जंबू ! धण्णेणं सत्थवाहेणं णो धम्मोत्ति वा जाव विजयस्स तवकरस्स ताओ विपुलाओ असणाओ ४ संविभागे कए णणत्थ सरीरसारवखणट्टाए एवमेव जंबू ! जे णं अम्हं णिग्गंथे वा णिग्गंथी वा जाव पव्वइए समाणे ववगयण्हाणुम-
 ह्णपुष्फंगधमल्लालंकारविभूसे इमस्स ओरालियसरीरस्स णो वण्णहेउं वा रुवहेउं वा (बल) विसयहेउं वा (तं विपुलं) असणं ४ आहारमाहारेइ णणत्थ णाणदंसणचरित्तानं बहणयाए से णं इहलोए चेव बहूणं समणाणं (बहूणं) समणीणं (बहूणं) सावमाण य सावियाण य अच्चणिज्जे जाव पज्जुवासणिज्जे भवइ । परलोए वि य णं णो बहूणि हृत्यच्छेयणाणि य कण्णच्छेयणाणि य णासाच्छेयणाणि य एवं हिययउप्पायणाणि य वसणप्पा-
 यणाणि य उरुलंबणाणि य पाविहिइ अणाईयं च णं अणवदमं दीहमडं जाव वोईवइस्सइ जहा व से धण्णे सत्थवाहे । एवं खलु जंबू ! समणेणं जाव संपत्तेणं दोचवस्स णायज्झयणस्स अयमट्ठे पणत्ते त्तिवमि ॥१०॥ गाहा-
 सिवसाहणेसु आहारविरहिओ जं ण वट्टए देहो । तम्हा धण्णोव्व विजयं साहू तं तेण पोसेज्जा ॥१॥

॥ ब्रियं अज्झयणं समत्तं ॥

अंडे णामं तच्च अज्जयणं

जइ णं भंते ! समणेणं भगवया महावीरेणं दोच्चस्स अज्जयणस्स नायाधम्म-
 कहांणं अयमट्ठे पण्णत्ते तइअस्स अज्जयणस्स के अट्ठे पण्णत्ते ? एवं खलु जंबू !
 तेणं कालेणं तेणं समएणं चंपा णामं णयरी होत्था वण्णओ । तीसे णं चंपाए णय-
 रीए बहिया उत्तरपुरत्थिमे दिसीभाए सुभूमिभाए णामं उज्जाणे होत्था सव्वो-
 उयपुष्कफलसमिद्धे सुरम्भे णंदणवणे इव सुहसुरभिसीयलच्छायाए समणुबद्धे ।
 तस्स णं सुभूमिभामस्स उज्जाणस्स उत्तरओ एगदेसंभि मालुयाकच्छए होत्था
 वण्णओ । तत्थ णं एगा वणमऊरी दो पुट्ठे परिघामए पिट्ठंडोपंडुरे णिक्खणे
 णिक्खहए भिण्णमुट्ठिप्पमाणे मऊरी अंडए पसवइ २ ता सएणं पक्खवाएणं
 सारक्खमाणी संगोबेमाणी संविट्ठेमाणी विहरइ । तत्थ णं चंपाए णयरीए दुबे
 सत्थवाहदारगा परिवसंति तंजहा—जिणदत्तपुत्ते य सगारदत्तपुत्ते य सहजायया
 सहवड्ढियया सहपंसुकीलियया सहदारदरिसी अण्णमण्णमणुरत्तया अण्णमण्णमणु-
 व्वयया अण्णमण्णच्छंदाणुवत्तया अण्णमण्णहियइच्छियकारया अण्णमण्णेसु गिहेसु
 किच्चइं करणिज्जाइं पक्खणुभवमाणा विहरंति ॥५१॥ तए णं तेसि सत्थ-
 वाहदारगाणं अण्णया कयाइं एगयओ सहियाणं समुवागयाणं सण्णिसण्णाणं
 सण्णिविट्ठाणं इमेयारूवे भिहोकहासमुल्लावे समुप्पज्जित्था—जण्णं देवानुप्पिया !
 अम्हं सुहं वा दुक्खं वा पक्खज्जा वा धिवेसगमणं वा समुप्पज्जइ तं णं अम्हेह
 एगयओ समेक्खा णित्थेरियक्खं—तिकट्ठु अण्णमण्णमेयारूवं संगारं पडिसुणेति
 २ ता सकम्मसंपउत्ता जाया यावि होत्थां ॥५२॥ तत्थ णं चंपाए णयरीए देव-
 दत्ता णामं गणिया परिवसइ अड्ढा जाव भत्तपाणा चउसट्ठिकलापंडिया चउ-
 सट्ठिगणियागुणोव्वेया अउणत्तीसं विसेसे रसमाणी एक्कवीसरइगुणप्पहाणा
 वत्तीसपुरिसोवयारकुसला णवंगमुत्तपडिबोहिया अट्टारसदेसीभासाविसारया
 सिंगारागारचारूवेसा संगयगयहसिय जाव ऊसियज्जया सहस्सलंभा विदिण्ण-
 छत्तचामरबालवीयणिया कण्णीरहप्पयाया यावि होत्था बहूणं गणियासहस्साणं
 आहेवच्चं जाव विहरइ । तए णं तेसि सत्थवाहदारगाणं अण्णया कयाइं
 पुग्गावरण्हकालसमयंसि जिमियभुत्तुरागयाणं समाणाणं आर्यंताणं चौवत्ताणं
 परमसुइभूयाणं सुहासणवरगयाणं इमेयारूवे भिहोकहासमुल्लावे समुप्पज्जित्था—
 तं सेयं खलु अम्हं देवानुप्पिया ! कलं जाव जलंते विपुलं असणं ४ उवक्खडा-

वेत्ता तं विपुलं असणं ४ ध्रुवपुष्पगंधवत्थं गहाय देवदत्ताए गणियाए सद्धिं
 सुभूमिभागस्स उज्जाणस्स उज्जाणसिरि पच्चणुब्भवमाणां विहरित्तए—
 त्तिकट्टु अणमणस्स एयमट्ठं पडिसुणेति २ ता कल्लं पाउवमूए कोडुंबिय-
 पुरिसे सद्दावेति २ ता एवं वयासी—गच्छह णं देवाणुप्पिया ! विपुलं असणं ४
 उववखडेह २ ता तं विपुलं असणं ४ ध्रुवपुष्पं गहाय जेणेव सुभूमिभागे
 उज्जाणे जेणेव णंदापुवखरिणी तेणामेव उवागच्छह २ ता णंदाए पोक्खरिणीए
 अदूरसामंते थूणामंडवं आहणह २ ता आसियसम्मज्जिओवलित्तं मुगंध जाव
 कलियं करेह २ ता अम्हे पडिवालेमाणा २ चिट्ठह जाव चिट्ठंति । तए णं
 [ते] सत्थवाहदारगा दोच्चंपि कोडुंबियपुरिसे सद्दावेति २ ता एवं वयासी—
 खिप्पामेव लट्ठकरणजुत्तओइयं समखुरवालहाण-समलिहियतिल्लभ्भासिगएहिं
 रययामयघंटमुत्तरज्जुपवरकंचणखच्चियणत्थपगहोवग्गहिंएहिं णीलुप्पलकयामेल-
 एहिं पवरगोणजुवाणएहिं णाणामणिरयणकंचणघंटियाजालपरिविखत्तं पवर-
 लख णोववेयं जुत्तमेव पवहणं उवणेह । ते वि लहेव उवणेति । तए णं ते सत्थवाह-
 दारगा ण्हाया जाव अप्पमहायामरणालंकिय सरीरा पवहणं दुरुहति २ ता जेणेव
 देवदत्ताए गणियाए गिहे तेणेव उवागच्छंति २ ता पवहणाओ पच्चोहंति २ ता
 देवदत्ताए गणियाए गिहं अणुप्पविसंति । तए णं सा देवदत्ता गणिया [ते] सत्थ-
 वाहदारए एज्जमाणे पासइ २ ता हट्ठतुट्ठा आसणाओ अब्भुट्ठेइ २ ता सत्तदु
 पयाइ अणुगच्छइ २ ता ते सत्थवाहदारए एवं वयासी—संदिंसंतु णं देवाणुप्पिया !
 किमिहागमणप्पओयणं । तए णं ते सत्थवाहदारगा देवदत्तं गणियं एवं
 वयासी—इच्छामो णं देवाणुप्पिए ! तुम्हेहिं सद्धिं सुभूमिभागस्स उज्जाणस्स
 उज्जाणसिरि पच्चणुब्भवमाणा विहरित्तए । तए णं सा देवदत्ता तेसि
 सत्थवाहदारगाणं एयमट्ठं पडिसुणेइ २ ता ण्हाया कयवलिकम्मा किं ते पवर
 जाव सिरिसमाणवेसा जेणेव सत्थवाहदारगा तेणेव समागया । तए णं ते सत्थ-
 वाहदारगा देवदत्ताए गणियाए सद्धिं जाणं दुरुहति २ ता चंपाए णयरीए मज्झं-
 मज्जेणं जेणेव सुभूमिभागे उज्जाणे जेणेव णंदापोक्खरिणी तेणेव उवागच्छंति
 २ ता पवहणाओ पच्चोहंति २ ता णंदापोक्खरिणीं ओगाहेति २ ता जल-
 भज्जणं करेति जलकीडं करेति ण्हाया देवदत्ताए सद्धिं पच्चुत्तरति जेणेव थूणा-
 मंडवे तेणेव उवागच्छंति २ ता थूणामंडवं अणुप्पविसंति २ ता सत्वालंकार-

विभूतिया आसत्था बीसत्था सुहासणवरगया देवदत्ताए सद्धि तं विपुलं असणं ४ ध्रुवपुष्पगंधर्वत्थं आसाएमाणा बीसाएमाणा (परिभाएमाणा) परिभुंजेमाणा एवं च णं विहरंति जिमियभुत्ततरागया वि य णं समाणा देवदत्ताए सद्धि विपुलाई भाणुसगाइं कामभोगाइं भुंजमाणा विहरंति ॥ ५३ ॥ तए णं ते सत्थवाहदारगा पुव्वावरण्हकालसमयंसि देवदत्ताए गणियाए सद्धि थूणामंडवाओ पडिणिक्खमंति २ ता हत्थसंगेत्तीए सुभूमिभागे बहुसु आलिघरएसु य कपलीघरेसु य लयाघरएसु य अच्छणघरएसु य पेच्छणघरएसु य पसाहणघरएसु य मोहणघरएसु य सालघरएसु य जालघरएसु य कुसुमघरएसु य उज्जाणसिंरि पच्चणुंभवमाणा विहरंति ॥ ५४ ॥ तए णं ते सत्थवाहदारगा जेणेव से मालुयाकच्छए तेणेव पहारेत्थ गमणाए । तए णं सा वणमऊरी ते सत्थवाहदारए एज्जमाणे पासइ पासित्ता भीयात्तथा० महया-महया सद्देणं केकारवं विणिम्मूयमाणी विणिम्मूयमाणी मालुयाकच्छाओ पडिणिक्खमइ २ ता एगंसि रुक्खलालयंसि ठिच्चो ते सत्थवाहदारए मालुयाकच्छयं च अणिमिसाए दिट्ठीए पेहमाणी २ चिट्ठइ । तए णं ते सत्थवाहदारगा अणमण्णं सद्दावेति २ ता एवं वयासी-जहा णं देवानुप्पिया ! एसा वणमऊरी अम्हे एज्जमाणे पासित्ता भीया तत्था तसिया उद्विग्गा पलाया महया २ सद्देणं जाव अम्हे मालुयाकच्छयं च पेच्छमाणी २ चिट्ठइ तं भवियव्वमेत्थ कारणेणं तिकट्टु मालुयाकच्छयं अंतो अणुप्पविसंति २ ता तत्थ णं वो पुट्ठे परियागए जाव पासित्ता अणमण्णं सद्दावेति २ ता एवं वयासी-तेयं खलु देवानुप्पिया ! अम्हं इमे वणमऊरीअंडए साणं जाइमंताणं कुक्कुडियाणं अंडएसु (अ) पक्खिवाविसए । तए णं ताओ जाइमंताओ कुक्कुडियाओ ताए अंडए सए य अंडए सएणं पक्खवाएणं सारक्खमाणीओ संगोवेमाणीओ विहरिस्संति । तए णं अम्हं एत्थं वो कीलावणया मऊरधोयगा भविरस्संति-तिकट्टु अणमण्णस्स एयमट्ठं पडिसुणोति २ ता सए सए दासचेइए सद्दावेति २ ता एवं वयासी-मच्छह णं तुम्हे देवानुप्पिया ! इमे अंडए गहाय समाणं जाइमंताणं कुक्कुडीणं अंडएसु पक्खिवह जाव ते वि पक्खिवेति । तए णं ते सत्थवाहदारगा देवदत्ताए गणियाए सद्धि सुभूमिभागस्स उज्जाणस्स उज्जाणसिंरि पच्चणुंभवमाणा विहरित्ता तमेव जाणं वुहुडा समाणा जेणेव चंपा णयरी जेणेव देवदत्ताए गणियाए गिहे तेणेव उवा-

गच्छति २ ता देवदत्ताए गिहं अणुपविसंति २ ता देवदत्ताए गणियाए विउलं
जीवियारिहं पीइदाणं दलयति २ ता सक्कारेति सम्माणेति स० २ ता देव-
दत्ताए गिहाओ पडिणिकखमंति २ ता जेणेव सयाइं २ गिहाइं तेणेव उवा-
गच्छति २ ता सकम्मसंपउत्ता जाया यावि होत्था ॥५५॥ तए णं जे से
सागरवत्तपुत्ते सत्थवाहदारए से णं कल्लं जाव जलंते जेणेव से वणमऊरी-
अंडए तेणेव उवागच्छइ २ ता तंसि मऊरीअंडयंसि संकिए कंखिए वित्तिगिच्छ-
समावण्णे भेयसमावण्णे कल्लससमावण्णे किण्णं ममं एत्थ कीलावणए मऊरी-
पोयए भविस्सइ उदाहु णो भविस्सइ—त्तिकट्टु तं मऊरीअंडयं अभिक्खणं
२ उव्वत्तेइ परियत्तेइ आसारेइ संसारेइ चालेइ फेदेइ घट्टेइ खोभेइ अभिवणं
२ कणमूलंसि टिट्ठियावेइ । तए णं से मऊरीअंडए अभिक्खणं २ उव्वत्तिज्जमाणे
जाव टिट्ठियावेज्जमाणे पोच्चडे जाए यावि होत्था । तए णं से सागरदत्तपुत्ते
सत्थवाहदारए अणया कयाइं जेणेव से मऊरीअंडए तेणेव उवागच्छइ २ ता
तं मऊरीअंडयं पोच्चडमेव पासइ २ ता अहो णं ममं एत्थ कीलावणए मऊरी-
पोयए ण जाए—त्तिकट्टु ओहयमण जाव शिषायइ । एवामेव समणाउसो !
जो अमहं णिगंथो वा २ आयरियवउज्जायाणं अंतिए पत्रइए समाणे पंचमह-
द्वएसु जाव छज्जीवणिकाएसु णिगंथे पावयणे संकिए जाव कल्लससमावण्णे
से णं इह भवे चेव बहूणं समणाणं बहूणं समणीणं बहूणं सवगाणं साविगाणं
हीलणिज्जे णिदणिज्जे खिसणिज्जे गरहणिज्जे परभवणिज्जे परलोए विष
णं आमच्छइ बहूणि दंडणाणि य जाव अणुपरियट्टए ॥५६॥ तए णं से
जिणदत्तपुत्ते जेणेव से मऊरीअंडए तेणेव उवागच्छइ २ ता तंसि मऊरी-
अंडयंसि णिस्संकिए सुव्वत्तए णं ममं एत्थ कीलावणए मऊरीपोयए
भविस्सइ—त्तिकट्टु तं मऊरीअंडयं अभिक्खणं २ णो उव्वत्तेइ जाव णो टिट्ठि-
यावेइ । तए णं से मऊरीअंडए अणुव्वत्तिज्जमाणे जाव अटिट्ठियाविज्जमाणे
तेणं कालेणं तेणं समएणं उब्भिण्णे मऊरीपोयए एत्थ जाए । तए णं से
जिणदत्तपुत्ते तं मऊरीपोययं पासइ २ ता हट्टुठ्ठे मऊरपोसए सद्देइ २
ता एवं वयासी—तुब्भेणं देवाणुप्पिया ! इमं मऊरपोययं बहूहिं मऊरपोसण-
याओग्गेहिं व्वेहिं अणुपुव्वेणं सारवखमाणा संगोवेमाणा संबंड्ढेह णट्टुल्लयं च
सिक्खावेह । तए णं ते मऊरपोसमा जिणदत्तस्स पुत्तस्स एयमट्ठं पडिमुणंति

२ ता तं मऊरपोयगं गेण्हंति २ ता जेणेव सए गिहे तेणेव उवागच्छंति २ ता तं मऊरपोयगं जाव णट्टल्लगं सिक्खावेति । तए णं से मऊरपोयए उम्मूक्कवालभावे विण्णायपरिणयमेत्ते जोव्वणगमणुपत्ते लक्खणवज्जणगुणोव्वेए माणुस्मानणप्पमाणपडिपुण्णपक्खवेहुणकलावे विचित्तिपिच्छसत्तचंदए णीलकंठए णच्चणसीलए एगाए चप्पुडियाए कयाए समाणीए अणेगाइं णट्टुल्लगसयाइं केकारवसयाणि य करेमाणे विहरइ । तए णं ते मऊरपोसगा तं मऊरपोयगं उम्मूक्क जाव करेमाणं पासित्ता णं तं मऊरपोयगं गेण्हंति २ ता जिणदत्तस्स पुत्तस्स उवणेति । तए णं से जिणदत्तपुत्ते सत्यवाहदारए मऊरपोयगं उम्मूक्क जाव करेमाणं पासित्ता हट्टुट्ठे तेसि विपुलं जीवियारिहं पीइदाणं जाव पडि-
 विसज्जेइ । तए णं से मऊरपोयए जिणदत्तपुत्तेणं एगाए चप्पुडियाए कयाए समाणीए णंगोलाभंगसिरोधरे सेयावंगे अवयारियपइण्णपक्खे उविल्लत्तचंद-
 काइयकलावे केवकाइयसयाणि विमुच्चमाणे णच्चइ । तए णं से जिणदत्तपुत्ते तेणं मऊरपोयएणं चंपाए णयरीए सिघाडग जाव पहेसु स (इ) एहि य साह-
 स्सिएहि य सयसाहस्सिएहि य पणिएहि य जयं करेमाणे विहरइ । एवामेव समणाउसो ! जो अस्हं णिगंथो वा २ पव्वइए समाणे पंचमहच्चएसु छज्जीवणिकाएसु णिगंथे पावयणे णिस्सकिए णिवक्खिए णिव्वित्तिगिच्छे से णं इहभवे चेव बहूणं समणाणं जाव वीइवइस्सइ । एवं खलु जंबू !
 समणेणं ३ जाव संपत्तेणं णायानं तच्चस्स अज्जयणस्स अयमट्ठे पणस्सेति वेमि ॥५७॥ गहाओ—जिणवरभासियभावेसु भावसच्चेसु भावओ मइमं । णो कुज्जा संदेहं संदेहोऽणत्थहेउत्ति ॥१॥ णिस्संवेहत्तं पुण गुणहेउं जं तओ तयं कज्जं । एत्थं दो सिद्धिसुया अंडपगाही उदाहरणं ॥२॥ कत्थइ मइ-
 दुब्बल्लेण तव्विहायरियविरहओ वा वि । णेयगहणत्तणेणं णाणावरणोदएणं च ॥३॥ हेऊदाहरणासंभवे य सइ सुट्ठु जं ण बुज्झिज्जा । सव्वण्णमयमवित्तहं तहावि इइ चित्तए मइमं ॥ ४ ॥ अणुवकयपराणुगमाहपरायणा जं जिणा जग-
 प्पवरा । जियरागदोसमोहा य णण्णहावाइणो तेण ॥५॥

॥ तच्चं अज्जयणं समत्तं ॥

कुम्भे णामं चउत्थं अउज्जयणं

जइ णं भंते ! समणेणं ३ णायाणं तच्चस्स णायज्झयणस्स अयमट्ठं पण्णत्ते चउत्थस्स णं णायाणं के अट्ठे पण्णत्ते ? एवं खलु जंबू ! तेषां कालेणं तेषां समएणं वाणारसी णामं णयरी होत्था वण्णओ । तीसे णं वाणारसीए णयरीए वहिया उत्तरपुरसिथमे विसीभाए गंगाए महाणईए मयंगतीरद्वहे णामं वहे होत्था अणुपुंस्वसुजायवपगंभीरसीयलजले अच्छविमलसलिलपल्लिच्छण्णे संछण्णपत्त-पुष्पपलासे बहुउप्पलप उमकुमुयणल्लिणसुभगसोगंधिययुंडरीयमहापुंडरीयसयपत्त-सहस्सपत्तकेसरपुष्पोच्चिण्ण पासाईए ४ । तत्थ णं बहूणं मच्छाण य कच्छभाण य गाहाण य मगराण य सुंमुमाराण य सइयाण य साहसियाण य सयसाहसियाण य जूहाइं णिअभयाइं णिरुत्विग्गाइं मुहंमुहेणं अंभिरममाणाइं २ विहरंति । तस्स णं मयंगतीरद्वहस्स अदूरसामंते एत्थ णं महं एगे मालुयाकच्छए होत्था वण्णओ । तत्थ णं दुबे पावसियालगा परिचसंति पावा चंडा रद्धा तल्लिच्छा साहसिया लोहियघाणी आमिसत्थी आमिसाहारा आमिसप्पिया आमिसलोला आमिसं गवेसमाणा रंति विद्यालचारिणो विया फच्छण्णं चावि चिट्ठंति । तए णं ताओ मयंगतीरद्वहाओ अण्णया कयाइं सूरियंसि चिरत्थमियंसि लुलियाए संझाए पविरलमाणसंसि णिसंतपडिणिसंतंसि समाणंसि दुबे कुम्भगा आहारत्थी आहारं गवेसमाणा सणियं २ उत्तरंति तस्सेव मयंगतीरद्वहस्स परिपेरतेणं सच्चओ समंता परिघोलेमाणा २ वित्ति कप्पेमाणा विहरंति । तयाणतरं च णं ते पावसियालगा आहारत्थी जाव आहारं गवेसमाणा मालुयाकच्छयाओ पडिणिवच्छमंति २ ता जेणेव मयंगतीरद्वहे तेणेव उवागच्छंति २ ता तस्सेव मयंगतीरद्वहस्स परिपेरतेणं परिघोलेमाणा २ वित्ति कप्पेमाणा विहरंति तए णं ते पावसियाला ते कुम्भए पासंति २ ता जेणेव ते कुम्भए तेणेव पहारेत्थ गमणाए । तए णं ते कुम्भगा ते पावसियालए एज्जमाणे पासंति २ ता भीया तत्था तसिया उच्चिग्गा संजायभया हत्थे य पाए य गीवाए य सएहिं २ काएहिं साहरंति २ ता णिचच्चला णिष्फडा तुसिणीया संचिट्ठंति । तए णं ते पावसियालगा जेणेव ते कुम्भगा तेणेव उवागच्छंति २ ता ते कुम्भगा सच्चओ समंता उव्वत्तेति परिचत्तेति आसादेति संसारेति चालेति घट्ठेति फंदेति खोभेति णहेहिं आलुपंति दंतेहिं य अवच्छोडेति णो चेव णं संचाएति तेसि कुम्भगाणं सरीरस्स आवाहं

वा पबाहं वा वाबाहं वा उप्पाएत्तए छविच्छेयं वा करेत्तए । तए णं ते पाव-
सियालगा एए कुम्मए दोच्चंपि तच्चंपि सव्वओ समंता उव्वत्तेति जाव णो
चेव णं संचाएति करेत्तए ताहे संता तंता परितंता णिव्विण्णा समाणा सणियं २
पच्चोसक्केति एगंतमववकमंति २ ता णिच्चला णिप्फदा तुसिणीया संबिट्ठंति ।
तत्थ णं एगे कुम्मगे ते पावसियालए चिरंगए दूरंगए जाणित्ता सणियं २ एगं पायं
णिच्छुभइ । तए णं ते पावसियालगा तेणं कुम्मएणं सणियं २ एगं पायं णीणियं
पासंति २ ता (ताए उक्किट्ठाए गईए) सिग्घं चवलं तुरियं चंडं जइणं वेगियं
जेणेव से कुम्मए तेणेव उवागच्छंति २ ता तस्स णं कुम्मगस्स तं पायं णखेहिं
आलुपति दंतेहिं अक्खुडेंति तओ पच्छा मंसं च सोणियं च आहारंति २ ता
तं कुम्मगं सव्वओ समंता उव्वत्तेति जाव णो चेव णं संचाएति करेत्तए ताहे
दोच्चंपि अवक्कमंति एवं चत्तारि वि पाया जाव सणियं २ गीवं णीणेइ । तए
णं ते पावसियालगा तेणं कुम्मएणं गीवं णीणियं पासंति २ ता सिग्घं चवलं ४
णहेहिं दंतेहिं क्वालं विहाडेंति २ ता तं कुम्मगं जीवियाओ ववरोवेंति २
ता मंसं च सोणियं च आहारंति । एवामेव समणाउतो ! जो अम्हं णिगंयो
वा २ आयरियउवज्जायाणं अतिए पव्वइए समाणे पंच य से इंदिया अगुत्ता
भवति से णं इहमवे चेव बहूणं समणाणं ४ हीलणिज्जे परलो वि थ णं
आगच्छइ बहूणं दंडणाणं जाव अणुपरियट्ठइ जहा (व) से कुम्मए अगुत्तिदिए ।
तए णं ते पावसियालगा जेणेव से दोच्चे कुम्मए तेणेव उवागच्छंति २ ता
तं कुम्मगं सव्वओ समंता उव्वत्तेति जाव दंतेहिं अक्खुडेंति जाव करेत्तए ।
तए णं ते पावसियालगा दोच्चंपि तच्चंपि जाव णो संचाएति तस्स कुम्म-
गस्स किंचि आबाहं वा विबाहं वा जाव छविच्छेयं वा करेत्तए ताहे संता
तंता परितंता णिव्विण्णा समाणा जामेव दिंसि पाउब्भूया तामेव दिंसि पडि-
गया । तए णं से कुम्मए ते पावसियालए चिरंगए दूरंगए जाणित्ता सणियं
२ गीवं णेणेइ २ ता विसावलोयं करेइ २ ता जमगसमगं चत्तारि वि पाए
णीणेइ २ ता ताए उक्किट्ठाए कुम्मगईए वीईवयमाणे २ जेणेव मयंगतोर-
इहे तेणेव उवागच्छइ २ ता मित्तणाइणियगसयणसंबंधिपरियणेणं सद्धि
असिसमण्णागए यावि होत्था । एवामेव समणाउतो ! जो अम्हं समणो
वा समणो वा पंच (प) से इंदियाइं गुत्ताइं भवति जाव जहा (उ) व से

कुम्भए गुत्तिदिए । एवं खलु जंबू ! समणेणं भगवया महावीरेणं चउत्थस्स
 णायज्जयणस्स अयमट्ठे पणत्तेत्ति बेमि ॥ ५५ ॥ गाहाउ-विसएसु इदिआइं
 हंभंता रागदोसणिम्मवका । पावेंति णिव्वइसुहं कुम्भुव्व मयंगवहसोखं
 ॥१॥ अवरे उअणत्थयरंपरा उ पावेंति पावकम्मवसा । संसारसागरगया गोमा-
 उग्गसियकुम्भोव्व ॥२॥

॥ चउत्थं अज्जयणं समत्तं ॥

सेलगे णामं पंचमं अज्जयणं

जइ णं भंते ! समणेणं भगवया महावीरेणं चउत्थस्स णायज्जयणस्स अयमट्ठे
 पणत्ते पंचमस्स णं भंते ! णायज्जयणस्स के अट्ठे पणत्ते ? एवं खलु जंबू ! तेणं
 कालेणं तेणं समत्तं बारवई णामं णयरी होत्था पाईणपडीणापया उडीणवाहिण-
 त्तिथिण्णा णत्रजोयणत्तिथिण्णा दुवालसजोयणायामा धणवइमइणिग्गमाया
 चामोयरपन्नरपागारा णाणामणिपंचवणकन्निसोसगसोहिया अलयापुरिसंकासा
 पमुइयपवकीलिया पच्चवखं देयलोयभूया । तीसे णं बारवईए णयरीए व्हिया
 उत्तरपुरच्छिमे विसीमाए रेवयणे णाम पववए होत्था तुंगे गगणत्तलमणुलिहंत-
 सिहरे णाणाविहग्गुच्छग्गुभालयावल्लिपरिगए हंसमिगमयूरकोंचसारसचक्रवा-
 यमयणभालकोइलकुलोववेए अणेगतडकडगविधरउज्जर (य) पचायपभार-
 सिहरपउरे अच्छरणदेवसंघचारणविज्जाहरमिहुणसंविचिण्णे णिच्चच्छणए
 दसारचरवीरपुरिसतेलोक्कवलवगाणं सोमे सुभगे पियइंसणे सुरूवे पमाईए ४ ।
 तस्स णं रेवयणस्स अदूरसामंते एत्थ णं णंदणवणे णामं उज्जाणे होत्था
 सव्वोउयपुष्फफलसमिद्धे रम्मे णंदणवणप्पगासे पमाईए ४ । तस्स णं उज्जा-
 णस्स बहुमज्जदेसभाए सुरप्पिए णामं जक्खाययणे होत्था दिव्वे वण्णओ ।
 तत्थ णं बारवईए णयरीए कण्हे णामं वामुदेवे राया परिवसइ । ते णं
 तत्थ समुद्दुविजपपामोक्खाणं दसण्हं दसाराणं बलदेवपामोक्खाणं पंचण्हं
 महावीराणं उग्गमेणपामोक्खाणं सोलसण्हं राईसहस्साणं पज्जुणपामोक्खाणं
 अद्दुट्ठाणं कुमारकोडीणं संबपामोक्खाणं सट्ठीए दुइंतसाहस्सीणं वीरसेण-
 पामोक्खाणं एक्कवीसाए वीरसाहस्सीणं महासेणपामोक्खाणं छप्पण्णाए बलवप-
 साहस्सीणं रुप्पिणीपामोक्खाणं बत्तीसाए महिलासाहस्सीणं अणंगसेणपामो-

क्खणं अणेगणं गणिघासाहस्सीणं अण्णेसि च बहूणं ईसरतलवर जाव सत्थ-
वाहपभिईणं वेयड्ढगिरिसागरपेरंतस्स य दाहिणड्ढुभरहस्स य बारवईए
णयरीए आहेवच्चं जाव पालेमाणे विहरइ ॥५६॥ तस्स णं बारवईए
णयरी थावच्चा णामं गाहावइणी परिवसइ अड्ढा जाव अपरिभूया । तीसे
णं थावच्चाए गाहावइणीए पुत्ते थावच्चापुत्ते णामं सत्थवाहदारए होत्था
सुकुमालपाणिपाए जाव सुरूवे । तए णं सा थावच्चा गाहावइणी तं दारयं
साइरेगअट्टवामजाययं जाणित्ता सोह्णंसि तिहिकरणणखत्तमूहुत्तंसि कला-
परियस्स उवणेइ जाव भोगसमत्थं जाणित्ता बत्तीसाए इड्ढकुलवालियाणं
एगदिवसेणं पाणिं गेह्हावेइ बत्तीसओ दाओ जाव बत्तीसाए इड्ढकुलवालियाणं
सिद्धि विपुले सट्ठफरिसरसकूववण्णगंधे जाव भुंजमाणे विहरइ । तेणं कालेणं तेणं
समएणं अरहा अरिट्टणेमी सो चेव वण्णओ दसधणुस्सेहे णोलुप्पलगवलगुलिय-
अयसिकुसुमप्पगासे अट्टारसहिं समणसाहस्सीहिं चत्तात्तीसाए अज्जियासाह-
स्सीहिं सिद्धि संपरिवुडे पुब्बाणुपूर्व्व चरमाणे जाव जेणेव बारवई णगरी
जेणेव रेवयगएव्वए जेणेव णंदणवणे उज्जाणे जेणेव सुरप्पियस्स जक्खस्स जवत्ता-
पयणे जेणेव असोघरसियं तेणेव उवागच्छइ २ ता अहापडिक्खं उगगहं
ओगिण्हित्ता संजमेणं तवसा अप्पाणं भावेमाणे विहरइ । परिसा णिगया धम्मो
कहिओ । तए णं से कहे वामुदेवे इमीसे कहाए लट्ठट्ठे समाणे कोडुंबिय-
पुरिसे सट्ठावेइ २ ता एव्वं वयासी-खिप्पामेव भो देवाणुप्पिया ! सभाए सुह-
म्माए मेघोघरसियं गंभीरमहुरसइं कोमुइयं भेरिं तालेह । तए णं ते कोडुंबिय-
पुरिसा कण्हेणं वामुदेवेणं एवं वृत्ता समाणा हट्टुत्तु जाव मत्थए अंजलि
कट्टु एवं सामो ! तह त्ति जाव पडिसुणेंति २ ता कण्हस्स वामुदेवस्स
अंतियाओ पडिणिवक्खमंति २ ता जेणेव सभा सुहम्मा जेणेव कोमुइया
भेरी तेणेव उवागच्छंति २ ता तं मेघोघरसियं गंभीरमहुरसइं कोमुइयं
भेरिं तालेंति । तओ णिद्धमहुरगंभीरपडिसुएणं पिव सारइएणं बलाहएणं
(पिव) अणुरसियं भेरीए । तए णं तीसे कोमुइयाए भेरीया तालियाए
समाणीए बारवईए णयरीए णवज्जोयणविट्ठिष्णाए दुवालसजोयणायामाए
सिघाडगतियचउक्कञ्जच्चरकंदरदरी (य) विवरकुहरगिरिसिहरनगरगोउर-
पासायडुवारभवणदेउलपडिस्सुयासयसहस्ससंकुलं (सइं) करेमाणे बारवईए

णयरीए सन्धितरबाहिरियं सव्वओ समंता से सह्दे विप्पमरित्था । तए णं बारवईए णयरीए णवजोयणवित्थिण्णाए बारसजोयणायामाए समुद्विजय-
 पामोवत्था दस दसारा जाव गणियामहस्साइं कोमुईयाए भेरीए सह्दे सोच्चा
 णिसम्म हट्टुतुट्ठा जाव ७हाया आविद्धवग्घारियमल्लदामकत्तावा अह्यवत्थ-
 चंदणोविकण्णगायसरीरा अप्पेगइया ह्ययया एवं गययया रहसीयासंदमाणोपया
 अप्पेगइया पायविहारचारेणं पुरिसवग्गुरापपरिक्खत्ता कण्हस्स वामुदेवस्स अंतियं
 पाउव्वमित्था । तए णं से कण्हे वामुदेवे समुद्विजयपामोवत्थे दस दसारे
 जाव अंतियं पाउव्वभमाणे पासइ पासित्ता हट्टुतुट्ठु जाव कोडुंक्खियपुरिसे सट्ठावेइ २
 ता एवं वयासी-खिप्पामेव भो देवाणुप्पिया ! चाउरं गिणं सेणं सज्जेह विजयं
 च गंधहत्थि उव्वट्ठेह । तेवि तर्हात्ति उव्वट्ठेत्ति जाव पज्जुवासंति ॥६०॥
 थावच्चापुत्ते वि णिगए जहा मेहे तेहेव धम्मं सोच्चा णिसम्म जेणेव थावच्चा
 गाहावइणी तेणेव उवागच्छइ २ ता पायग्गहणं करेइ जहा मेहस्स तथा चेव
 णिवेयणा जाहे णो संचाएइ विसयाणुलोमाहि य विसयपडिकूत्ताहि य बर्हाहि
 आघवणाहि य पण्णवणाहि य सण्णवणाहि य विष्णवणाहि य आघवित्तए
 वा ४ ताहे अकामिया चेव थावच्चापुत्तस्स णिवेखमणमणुमणित्थया (णवरं
 णिवत्थमणाभिसेयं पासामो, तए णं से थावच्चापुत्ते तुसिणीए संचिट्ठइ) तए
 णं सा थावच्चा आसणाओ अब्भुट्ठेइ २ ता महत्थं महग्गं महरिहं रायरिहं
 पाहुडं गेण्हइ २ ता मित्त जाव संरिवुड्ढा जेणेव कण्हस्स वामुदेवस्स
 भवणवरपडिदुवारदेसभाए तेणेव उवागच्छइ २ ता पडिहारदेसिएणं माग्गं
 जेणेव कण्हे वामुदेवे तेणेव उवागच्छइ २ ता करयत्त जाव वट्ठावेइ २ ता
 तं महत्थं ४ पाहुडं उव्वणेइ २ ता एवं वयासी-एवं खलु देवाणुप्पिया !
 मम एगे पुत्ते थावच्चापुत्ते णामं दारए इट्ठे जात्र से णं संसारभउत्थिग्गो
 (सीए) इच्छइ अरहओ अरिट्ठणेमिस्स जाव पव्वइत्तए । अहं णं णिवत्थमण-
 सक्कारं करेमि । इच्छामि णं देवाणुप्पिया ! थावच्चापुत्तस्स णिवत्थममाणस्स
 छत्तमउड्ढामराओ य विदिण्णाओ । तए णं कण्हे वामुदेवे थावच्चाग्गहावइणि
 एवं वयासी-अच्छाहि णं तुमं देवाणुप्पिए ! सुणिव्वुया वीरित्थया । अहं णं सप-
 मेव थावच्चापुत्तस्स दारगस्स णिवत्थमणसक्कारं करिस्सामि । तए णं से कण्हे
 वामुदेवे चाउरं गिणीए सेणाए विजयं हत्थिययणं दुरुट्ठे समाणे जेणेव थावच्चाए

गाहावइणीए भवणे तेणेव उवागच्छइ २ ता थावच्चापुत्तं एवं वयासी-सा णं तुमे देवाणुप्पिया ! मुंडे भवित्ता पव्वयाहि, भुंजाहि णं देवाणुप्पिया ! विउले माणुस्सए कामभोगे मम बाहुच्छायापरिग्गहिए, केवलं देवाणुप्पियस्स अहं णो संचाएमि वाउकायं उवरिमेणं गच्छमाणं णिवारित्तए, अण्णे णं देवाणुप्पियस्स जं किच्चि(वि) आवाहं वा वावाहं वा उप्पाएइ तं सव्वं णिवारेमि । तए णं से थावच्चापुत्ते कण्हेणं वासुदेवेणं एवं वुत्ते समाणे कण्हं वासुदेवं एवं वयासी-जइ णं तुमं देवाणुप्पिया ! मम जीवियंतकरणं सच्चुं एज्जमाणं णिवारेसि जरं वा सरीररूवविणासिणिं सरीरं अइवयमाणं णिवारेसि तए णं अहं तव बाहुच्छायापरिग्गहिए विउले माणुस्सए कामभोगे भुंजमाणे विहरामि । तए णं से कण्हे वासुदेवे थावच्चापुत्तेणं एवं वुत्ते समाणे थावच्चापुत्तं एवं वयासी-एए णं देवाणुप्पिया ! दुरइक्कमणिज्जा, णो खलु सक्का सुबलिए-णावि देवेण वा दाणवेण वा णिवारित्तए णणत्थ अप्पणो कम्मक्खएणं । तए णं से थावच्चापुत्ते कण्हं वासुदेवं एवं वयासी-जइ णं एए दुरइक्कमणिज्जा णो खलु सक्का सुबलिएणावि देवेण वा दाणवेण वा णिवारित्तए णणत्थ अप्पणो कम्मक्खएणं तं इच्छामि णं देवाणुप्पिया ! अण्णाणमिच्छत्तअविरइ-कसायसंचियस्स अत्तणो कम्मक्खयं करित्तए । तए णं से कण्हे वासुदेवे थाव-च्चापुत्तेणं एवं वुत्ते समाणे कोडुंबियपुरिसे सदावेइ २ ता एवं वयासी-गच्छह णं देवाणुप्पिया ! बारवईए णयरीए सिघाडगतिग जाव पहेसु हत्थिखंधवरगया महया २ सट्ठेणं उग्घोसेमाणो २ उग्घोसणं करेह-एवं खलु देवाणुप्पिया ! थावच्चापुत्ते संसारभउव्विगगे भीए जम्मणजरमरणं इच्छइ भरहओ अरिट्टणेमिस्स अत्तिए मुंडे भवित्ता पव्वइत्तए, तं जो खलु देवाणुप्पिया राया वा ज्वराया वा देवी वा कुमारे वा ईसरे वा तलवरे वा कोडुंबियमाड-बियइभसेट्टिसेणावइसत्थवाहे वा थावच्चापुत्तं पव्वयंतमणुपव्वयइ तस्स णं कण्हे वासुदेवे अणुजाणइ एच्छाउरस्स वि य से मित्तणाइणियगसंबंधिपरिजणस्स जोग खेमं वट्टमाणं पडिवहइ-त्तिकट्टु घोसणं घोसेह जाव घोसंति । तए णं थावच्चापुत्तस्स अणुराएणं पुरिससहस्सं णिवक्खमणाभिमुहं ण्हायं सव्वा-लंकारविभूसियं पत्तेयं २ पुरिससहस्सवाहिणीसु सिवियासु बुळ्ळं समाणं मित्त-णाइपरिवुडं थावच्चापुत्तस्स अंतियं पाउळ्भूयं । तए णं से कण्हे वासुदेवे पुरिस-

सहस्सं अंतियं पाउडभवमाणं पासइ २ ता कोडुंविपपुरिसे सदावेइ २ ता एवं वयामी-जहा मेहस्स णिवल्लमणाभिसेओ तहेव सेयापीएहि कलसेहिं ण्हावेइ नाव अरहओ अरिट्टणेमिस्स छत्ताइच्छतं पडागाइपडगं पासइ २ ता विज्जा-हरच्चारणे जाव पासित्ता सी (सिवि) याओ पच्चोचहइ । तए णं से कण्हे चासुदेवे थावच्चापुत्तं पुरओ काउं जेणेव अरहा अरिट्टणेमी सच्चं तं चेव जाव आभरणमल्लालंकारं ओमुयइ । तए णं सा थावच्चा गाहावइणी हंसलववणं पडगसाइएणं आभरणमल्लालंकारे पडिच्छह हारवारिधारच्छिणमुत्ताव-लिप्पगासाइं अंसूणि विणिम्मंज्जमाणी २ एवं वयामी-जइयच्चं जाया ! घडियच्चं जाया ! परिवकमियच्चं जाया ! अस्सि च णं अट्ठे णो पमाएयच्चं । जामेव दिंति पाउडमूया तासेव दिंति पडिगया । तए णं से थावच्चापुत्ते पुरिससहस्सेहिं सद्धिं सयमेव पंचमुट्टियं लोयं करेइ जाव पव्वइए । तए णं से थावच्चापुत्ते अणगारे जाए इरियासमिए भासासमिए जाव विहरइ । तए णं से थावच्चापुत्ते अरहओ अरिट्टणेमिस्स तहाक्खवाणं थेराणं अंतिए सामाइय-साइयाइं चोइसपुव्वाइं अहिज्जइ २ ता बहूहिं जाव चउत्थेणं विहरइ । तए णं अरिहा अरिट्टणेमी थावच्चापुत्तस्स अणगारस्स तं इडमाइयं अणगार-सहस्सं सीसत्ताए दलयइ । तए णं से थावच्चापुत्ते अणया कयाइं अरहं अरिट्टणेमि वंदइ णंसइ वं०२ ता एवं वयामी-इच्छामि णं भंते ! तुवमेहि अड्ढणुण्णाए सभाणे अणगारसहस्सेणं सद्धिं बहिया जणवयविहारं विहरित्ते । अहासुह देवाणुप्पिया ! । तए णं से थावच्चापुत्ते अणगारसहस्सेणं सद्धिं तेणं उरालेणं उ (व) ग्गेणं पयत्तेणं पग्गहिएणं बहिया जणवयविहारं विहरइ ॥६१॥ तेणं कालेणं तेणं समएणं सेलगपुरे णामं णगरे होत्था । सुभूमिभागे उज्जाणे । सेलए राया, पउमावई देवी, मंडुए कुमारे जुवराया । तस्स णं सेलगस्स पंथगयामोवखा पंच मंतिसया होत्था उप्पत्तियाए वेणइयाए कम्मियाए पारिणामियाए उववेया रज्जधुरं चित्तयंति । थावच्चा-पुत्ते सेलगपुरे समोसडे । राया णिग्गए धम्मकहा । धम्मं सोच्चा जहा णं देवाणुप्पियाणं अंतिए बह्वे उग्गा भोगा जाव चइत्ता हिरणं जाव पव्वइया तथा णं अहं णो संच्चाएमि पव्वइत्तए । अहं णं देवाणुप्पियाणं अंतिए पंचा-णुव्वइयं जाव समणोवासए जाव अहिग्गयजोवाजोवे जाव अष्पाणं

भावेमाणे विहरइ । पंचगपामोक्खा पंच मत्तिसया य समणोवासया जाया थावच्चापुत्ते बहिया जणवयविहारं विहरइ । तेणं कालेणं तेणं समएणं सोगंधिया णामं णयरी होत्था वण्णओ । शीलासोए उज्जाणे वण्णओ । तत्थ णं सोगंधियाए णयरीए सुदंसणे णामं णयरसेट्ठी परिवसइ अइडे जाव अपरिमूए । तेणं कालेणं तेणं समएणं सुए णामं परिव्वायए होत्था रिउव्वेयज्जुव्वेयसामवेयअथवणवेयसट्ठित्तकुसले संखसमए लड्डट्ठे पंचजमपंचणियमजुत्तं सोयमूलयं दसप्पयारं परिव्वायगधम्मं दाणधम्मं च सोयधम्मं च तित्थाभिसेयं च आधवेमाणे पण्णवेमाणे धाउरत्तवत्थपवरपरिहिए तिदंडकुडिपल्लत्तछणालयअंकुसपधित्तयकेसरिहत्थगए परिव्वायगसहस्सेणं सट्ठि संपरिवुडे जेणेव सोगंधिया णयरी जेणेव परिव्वायगावसहे तेणेव उवागच्छइ २ ता परिव्वायगावसहंसि भंडगणिकखेवं करेइ २ ता संखसमएणं अप्पाणं भावेमाणे विहरइ । तए णं सोगंधियाए णगरीए सिघाडग जाव बहुजणो अणमणस्स एवमाइक्खइ— एवं खलु सुए परिव्वायए इहमागए जाव विहरइ । परिसा णिग्गया । सुदंसणो वि णिग्गए । तए णं से सुए परिव्वायए तीसे परिसाए सुदंसणस्स च अणोसि च बहूणं संखाणं परिकहेइ— एवं खलु सुदंसणा ! अम्हं सोयमूलए धम्मे पण्णत्ते । से वि य सोए दुक्खिहे पण्णत्ते तंजहा—दव्वसोए य भावसोए य । दव्वसोए य उवएणं मट्ठियाए य । भावसोए दव्वेहि य मत्तेहि य । जं णं अम्हं देवाणुप्पिया ! किंचि असुई भवइ तं सच्चं स (ज्जो)-ज्जपुढवीए आलिप्पइ तओ पच्छा सुद्धेण वारिणा पक्खालिज्जइ तओ तं असुई सुई भवइ । एवं खलु जीवी जलाभिसेयपूयप्पाणो अविग्घेणं सग्गं गच्छति । तए णं से सुदंसणे सुयस्स अंतिए धम्मं सोच्चा हट्ठे सुयस्स अंतियं सोयमूलयं धम्मं मेहइ २ ता परिव्वायए विउलेणं असणपाणखाइमसाइमेणं पडिलामेमाणे जाव विहरइ । तए णं से सुए परिव्वायए सोगंधियाओ णयरीओ णिग्गच्छइ २ ता बहिया जणवयविहारं विहरइ । तेणं कालेणं तेणं समएणं थावच्चापुत्तस्स समोसरणं । परिसा णिग्गया । सुदंसणो वि णिग्गए थावच्चापुत्तं वंदइ णमंसइ वं० २ एवं वयासी—तुम्हाणं किमूलए धम्मे पण्णत्ते ? । तए णं थावच्चापुत्ते सुदंसणेणं एवं वृत्ते समाणे सुदंसणं एवं वयासी—सुदंसणा ! विणयमूले धम्मे पण्णत्ते । से विद्य विणए

दुविहे पणत्ते तंजहा—अणारविणए ष अणारविणए ष । तत्थ णं जे से अणार-
विणए से णं पंच अणुव्वयाइं सत्त सिक्खावयाइं एक्कारस उवासगपडिमाओ ।
तत्थ णं जे से अणारविणए से णं पंच महव्वयाइं तंजहा—सव्वाओ पाणाइ-
वायाओ वेरमणं सव्वाओ सुसावायाओ वेरमणं सव्वाओ अदिण्णादाणाओ वेर-
मणं सव्वाओ सेट्ठणाओ वेरमणं सव्वाओ परिग्गहाओ वेरमणं सव्वाओ राइ-
भोयणाओ वेरमणं जाव मिच्छादंसणसत्त्ताओ वेरमणं दसविहे पच्चक्खाणे बारस
मिक्खुपडिमाओ इच्चेएणं दुविहेणं विणयमूलएणं धम्मएणं अणुपुब्बेणं अट्टकम्म-
पगडीओ खवेत्ता लोयग्गपइट्ठुणे भवति । तए णं थावच्चापुत्ते सुदंसणं एवं
वयासी—तुब्भे णं सुदंसणा ! किमूलए धम्मए पणत्ते ? अम्हाणं देवाणुष्पिया !
सोयमूले धम्मए पणत्ते जाव सग्गं गच्छति । तए णं थावच्चापुत्ते सुदंसणं एवं
वयासी—सुदंसणा ! से जहाणामए केइ पुरिसे एगं महं रुहिरकयं वत्थं रुहिरेण
चेव धोवेज्जा तए णं सुदंसणा ! तस्स रुहिरकयस्स वत्थस्स रुहिरेण चेव
पक्खालिज्जमाणस्स अत्थि काइ सोही ? णो इणट्ठे समट्ठे । एवामेव सुदं-
सणा ! सुब्भपि पाणाइवाएणं जाव मिच्छादंसणसत्त्लेणं गत्थि सोही जहा तस्स
रुहिरकयस्स वत्थस्स रुहिरेणं चेव पक्खालिज्जमाणस्स गत्थि सोही । सुदंसणा !
से जहाणामए केइ पुरिसे एगं महं रुहिरकयं वत्थं सज्जियाखारेणं अणुलिपइ
२ ता पयणं आरुहेइ २ ता उण्हं गाहेइ २ ता तओ पच्छा सुद्धेणं वारिणा
धोवेज्जा से णूणं सुदंसणा ! तस्स रुहिरकयस्स वत्थस्स सज्जियाखारेणं अणु-
लित्तस्स पयणं आरुहियस्स उण्हं गाहियस्स सुद्धेणं वारिणा पक्खालिज्जमाणस्स
सोही भवइ ? हंता भवइ । एवामेव सुदंसणा ! अम्हंपि पाणाइवायवेरमणेणं
जाव मिच्छादंसणसत्त्ववेरमणेणं अत्थि सोही जहा वि तस्स रुहिरकयस्स वत्थ-
स्स जाव सुद्धेणं वारिणा पक्खालिज्जमाणस्स अत्थि सोही । तत्थ णं (से)
सुदंसणे संबुद्धे थावच्चापुत्तं वंदइ णंसंसइ वं० २ ता एवं वयासी—इच्छामि णं
भंते ! धम्मं सोच्चा जाणित्तए जाव समणोवासए जाए अभिगयजीवाजीवे
जाव पडित्ताभेमाणे विहरइ । तए णं तस्स सुयस्स परिच्चायगस्स इमीसे कहाए
लद्धट्टस्स समणस्स अयमेयारुत्ते जाव समुप्पज्जित्था—एवं खलु सुदंसणेणं
सोयधम्मं विप्पज्जाय विणयमूले धम्मए पडिवण्णे । तं सेयं खलु मम
सुदंसणस्स दिट्ठि वामेत्तए पुणरवि सोयमूलए धम्मए आंधवित्तए तिकट्टु एवं
संपेहेइ २ ता परिच्चायगसहस्सेणं सट्ठि जेणेव सोगंधिया णयरी जेणेव परि-

ष्वाधगावसहे तेणेव उवागच्छइ २ ता परिव्वायगावसहंसि भंडिणिवखेवं करेइ
 २ ता धाउरत्तवर्थ [पवर] परिहए पविरलपरिव्वायगेणं सद्धि संपरिवुडे
 परिव्वायगावसहाओ पडिणिवलमइ २ ता सोगंधियाए जयरीए मज्झंमज्झेणं
 जेणेव सुवंसणस्स गिहे जेणेव सुवंसणे तेणेव उवागच्छइ । तए णं से सुवंसणे
 तं सुयं एज्जमाणं पासइ २ ता णो अब्भुट्ठेइ णो पच्चुग्गच्छइ णो आढाइ
 णो परिधाणाइ णो वंदइ तुसिणीए संचिट्ठइ । तए णं से सुए परिव्वायए
 सुवंसणं अणब्भुट्ठियं पासित्ता एवं वयासी-तुमं णं सुवंसणा ! अण्णया ममं
 एज्जमाणं पासित्ता अब्भुट्ठेसि जाव वंदसि, इयाणि सुवंसणा ! तुमं ममं
 एज्जमाणं पासित्ता जाव णो वंदसि, तं कस्स णं तुमे सुवंसणा ! इमेघारूवे
 विणयमूले धम्मे पडिवण्णे ? । तए णं से सुवंसणे सुएणं परिव्वायएणं
 एवं वुत्ते समाणे आसणाओ अब्भुट्ठेइ २ ता करयल जाव सुयं परिव्वायगं
 एवं वयासी-एवं खलु देवाणुपियया ! अरहओ अरिट्ठणेमिस्स अंतेवासी थाव-
 च्चापुत्ते णामं अणगारे जाव इहमागए इह चेव णीलासोए उज्जाणे विहरइ,
 तस्स णं अंतिए विणयमूले धम्मे पडिवण्णे । तए णं से सुए परिव्वायए
 सुवंसणं एवं वयासी-तं गच्छामो णं सुवंसणा ! तव धम्मायरियस्स थावच्चा-
 पुत्तस्स अंतियं पाउभवाओ इमाइं च णं एघारूवाइं अट्टाइं हेऊइं पतिणाइं
 कारणाइं वागरणाइं पुच्छामो । तं जइ णं मे से इमाइं अट्टाइं जाव वाग-
 रेइ तओ णं अहं वंदामि षमंसामि । अहं मे से इमाइं अट्टाइं जाव णो से वाग-
 रेइ तओ णं अहं एएहिं चेव अट्ठेहिं हेऊहिं णिण्पट्टपसिणवागरणं करिस्सामि ।
 तए णं से सुए परिव्वायगसहस्सेणं सुवंसणेण य सेट्ठिणा सद्धि जेणेव
 णीलासोए उज्जाणे जेणेव थावच्चापुत्ते अणगारे तेणेव उवागच्छइ २ ता
 थावच्चापुत्तं एवं वयासी-जत्ता ते भंते ! जवणिज्जं ते अग्वाबाहं पि ते
 फासुयं विहारं ते ? । तए णं से थावच्चापुत्ते सुएणं परिव्वायगेणं एवं वुत्ते
 समाणे सुयं परिव्वायगं एवं वयासी-सुया ! जत्ताविमे जवणिज्जंपि मे अग्वा-
 बाहंपि मे फासुयं विहारंपि मे । तए णं से सुए थावच्चापुत्तं एवं वयासी-किं
 भंते ! जत्ता ? सुया ! जं णं मम णाणवंसणवरित्तवसंजममाइएहिं जोएहिं
 जोयणा से तं जत्ता । से किं तं भंते ! जवणिज्जं ? सुया ! जवणिज्जे डुविहे
 एणत्ते तंजहा-इंदियजवणिज्जे य णो इंदियजवणिज्जे य । से किं तं इंदिय-

जवणिज्जं ? सुया ! जं णं ममं सोइंदियच्चिक्खदियघाणिदियजिंभदियफासि-
दियाइं णिरुवह्याइं वसे वट्टंति से तं इंदियजवणिज्जं । से किं तं णेइंदिय-
जवणिज्जे ? सुया ! जं णं कोहमाणमायालोभा खीणा उवसंता णो उवयंति
से तं णोइंदियजवणिज्जे । से किं तं भंते ! अवावाहं ? सुया ! जं णं मम
वाइयपित्तियसिभियसण्णिवाइया विविहा रोगायका णो उदीरंति से तं अवा-
वाहं । से किं तं भंते ! फामुयविहारं ? सुया ! जं णं आरामेसु उज्जाणेषु
दे(व) उलेसु सभामु पव्वासु इत्थीपमुपंडगविवज्जियामु वसहीसु पाडिहारियं
पीढफलगसेज्जासंथारयं ओगिण्हत्ताणं विहरामि से तं फामुयविहारं । सरिस-
वया ते भंते ! किं भवखेया अभवखेया ? सुया ! सरिसवया भवखेयावि
अभवखेयावि । से केणट्ठेणं भंते ! एवं युच्चइसरिसवया भवखेयावि अभवखे-
यावि ? सुया ! सरिसवया दुविहा पणत्ता तंजहा—मित्तसरिसवया य धण-
सरिसवया य । तत्थ णं जे ते मित्तसरिसवया ते तिविहा पणत्ता तंजहा—सह-
जायया सहवड्डियया सहंपसुकीलियया ते णं समणाणं णिग्गंथाणं अभवखेया, तत्थ
णं जे ते धणसरिसवया ते दुविहा पणत्ता तंजहा—सत्थपरिणया य असत्थ-
परिणया य । तत्थ णं जे ते असत्थपरिणया ते समणाणं णिग्गंथाणं अभवखेया ।
तत्थ णं जे ते सत्थपरिणया ते दुविहा पणत्ता तंजहा—फामुया य अफामुया य ।
अफामुया णं सुया ! णो भवखेया । तत्थ णं जे ते फामुया ते दुविहा पणत्ता
तंजहा—जाइया य अजाइया य । तत्थ णं जे ते अजाइया ते अभवखेया । तत्थ
णं जे ते जाइया ते दुविहा पणत्ता तंजहा—एसणिज्जा य अणेसणिज्जा य ।
तत्थ णं जे ते अणेसणिज्जा ते णं अभवखेया । तत्थ णं जे ते एसणिज्जा
ते दुविहा पणत्ता तंजहा—लद्धा य अलद्धा य । तत्थ णं जे ते अलद्धा ते अभ-
वखेया । तत्थ णं जे ते लद्धा ते णिग्गंथाणं भवखेया । एएणं अट्ठेणं सुया ! एवं
युच्चइ-सरिसवया भवखेयावि अभवखेयावि । एवं कुलत्थावि भाणियंवा णवरं
इमं णाणत्तं—इत्थिकुलत्था य धणकुलत्था य । इत्थिकुलत्था तिविहा पणत्ता
तंजहा—कुलवह्या य कुलमाउया इ य कुलधूया इ य । धणकुलत्था तहेव ।
एवं मासा वि णवरं इमं णाणत्तं—मासा तिविहा पणत्ता तंजहा—कालमासा
य अत्थमासा य धणमासा य । तत्थ णं जे ते कालमासा ते णं दुवालस-
विहा पणत्ता तंजहा—सावणे जाव आसादे, ते णं अभवखेया । अत्थमासा

उवागच्छइ २ ता सीहासणं सण्णिसण्णे । तए णं से सेलए राया पंथगपामोवखे
 पंच मंतिसए सद्दावेइ २ ता एवं वयासी-एवं छलु देवाणुप्पिया ! मए सुयस्स
 अतिए धम्मे णिसंते से वि य मे धम्मे इच्छिए पडिच्छिए अभिरुइए, अहं णं
 देवाणुप्पिया ! संसारमउट्ठिवगे जाव पट्ठयामि, तुब्भे णं देवाणुप्पिया ! किं
 करेह किं ववसह किं वा (से) भे हियइच्छिए सामत्थे ? तए णं ते पंथगपामोवखा
 सेलगं रायं एवं वयासी-जइ णं तुब्भे देवाणुप्पिया ! संसारं जाव पट्ठयह
 अम्हाणं देवाणुप्पिया ! किमण्णे आहारे वा आलंबे वा अम्हे वि य णं
 देवाणुप्पिया ! संसारमउट्ठिवगा जाव पट्ठयामो, जहा णं देवाणुप्पिया !
 अम्हं बहुसु कउजेसु य कारणेसु य ज्ञाव तथा णं पट्ठइयाण वि समाणाणं
 बहूसु जाव चक्खुभूए । तए णं से सेलगे पंथगपामोवखे पंच मंतिसए
 एवं वयासी-जइ णं देवाणुप्पिया ! तुब्भे संसारं जाव पट्ठयह तं गच्छह
 णं देवाणुप्पिया ! सएसु २ कुडुंबेसु जेट्ठेपुत्ते कुडुंबमज्जे ठावेत्ता पुरिससहस्स-
 वाहिणीओ सीयाओ दुरूढा समाणा मम अंतियं पाउडभवह (ति) तेवि
 तहेव पाउडभवन्ति । तए णं से सेलए राया पंच मंतिसयाइं पाउडभवमाणाइं
 पासइ २ ता हट्टुट्ठे कोडुंबियपुरिसे सद्दावेइ २ ता एवं वयासी-खिप्पामेव
 भो देवाणुप्पिया ! मंडुयस्स कुमारस्स महत्थं जाव रायाभिसेयं उवट्टवेहं
 अभिसिच्चइ जाव राया जाए (जाव) विहरइ । तए णं से सेलए मंडुयं रायं
 आपुच्छइ । तए णं से मंडुए राया कोडुंबियपुरिसे सद्दावेइ २ ता एवं
 वयासी-खिप्पामेव सेलगपुरं णवरं आसिय जाव गंधवट्टिभूयं करेह य
 कारवेह य कं २ ता एयमाणत्तियं पच्चप्पिणह । तए णं से मंडुए
 दोच्चपि कोडुंबियपुरिसे सद्दावेइ २ ता एवं वयासी-खिप्पामेव सेलगस्स
 रण्णो महत्थं जाव णिवत्तमणाभिसेयं जहेव मेहस्स तहेव णवरं पउमावई देवी
 अगगैसे पडिच्छइ सव्वेवि पडिगहं गहाय सीयं दुरूहंति अवसेसं तहेव जाव
 सामाइयमाइयाइं एवकारस्स अंगाइं अहिज्जइ २ ता बहूहि चउत्थ जाव
 विहरइ । तए णं से सुए सेलगस्स अणगारस्स ताइं पंथगपामोवखाइं पंच
 अणगारसयाइं सीसत्ताए वियरइ । तए णं से सुए अणया कयाइं सेलगपुराओ
 णगराओ सुभूमिमागाओ उज्जाणाओ पडिणिक्खमइ २ ता बहिया जणवय-
 विहारं विहरइ । तए णं से सुए अणगारे अणया कयाइं तेषं अणगारसहस्सेणं

सद्धि संपरिवृद्धे पुब्बाणुपुंवि चरमाणे गामाणुगामं विहरमाणे जेणेव पुंडरीय-
 पव्वए जावं सिद्धे ॥६३॥ तए णं तस्स सेलगस्स राघरिसिस्स तेहि अंतेहि य
 पतेहि य तुच्छेहि य लूहेहि य अरसेहि य विरसेहि य सीएहि य उण्हेहि य
 कालाइक्कतेहि य पमाणाइक्कतेहि य णिच्चं पाणभोयणेहि य पयइसुकुमालस्स
 सुहोच्चियस्स सरीरगंसि वेयणा पाउब्भूया उज्जला जाव दुरहियासा कंडुय-
 दाहपित्तज्जरपरिगयसरीरे यावि बिहरइ । तए णं से सेलए तेणं रोयायंकेणं
 सुक्के भुक्खे जाए यावि होत्था । तए णं से सेलए अण्णया कयाई
 पुब्बाणुपुंवि चरमाणे जाव जेणेव सुभूमिभागे जाव विहरइ । परिसा णिग्गया
 मंडुओडवि णिग्गओ सेलगं अणगारं जाव बंदइ णमंसइ २ ता पज्जवासइ ।
 तए णं से मंडुए राया सेलगस्स अणगारस्स सरीरगंसुक्कं भुक्खं जाव सव्वाबाहं
 सरीरं पासइ २ सा एवं बयासी-अहं णं भंते ! तुब्भं अहापवित्तेहि
 तेगिच्छएहि अहापवत्तेणं ओसहभेसज्जेणं मत्तपाणेणं तिगिच्छं आउट्टावेमि ।
 तुब्भं णं भंते ! मम जाणसालामु समोसरह फामुअं एसणिज्जं पीढफलग-
 सेज्जासंधारणं औगिग्गित्तानं विहरह । तए णं से सेलए अणगारे मंडुयस्स
 रण्णे एयमट्ठं तहसि पडिसुणेइ । तए णं से मंडुए सेलगं बंदइ णमंसइ
 वं २ ता जामेव विसि पाउब्भूए तामेव विसि पडिगए । तए णं से सेलए
 कल्लं जाव जल्लंते समंडमत्तोवगरणमायाए पंथगपामोक्खेहि पंचहि अणगार
 सएहि सद्धि सेलगपुरमणुपविसइ २ ता जेणेव मंडुयस्स जाणसाला तेणेव
 उवागच्छइ २ ता फामुयं पीढ जाव विहरइ । तए णं से मंडुए (राया)
 तिगिच्छए सहावेइ २ ता एवं बयासी-तुब्भे णं देवाणुप्पिया ! सेलगस्स
 फामुएसणिज्जेणं जाव तेगिच्छं आउट्टेह । तए णं तिगिच्छया मंडुएणं रण्णा
 एवं बुत्ता समाणा हट्टुट्टा सेलगस्स अहापवत्तेहि ओसहभेसज्जमत्तपाणेहि
 तिगिच्छं आउट्टेति मज्जपाणयं च उवविसंति । तए णं तस्स सेलगस्स
 अहापवत्तेहि जाव मज्जपाणएण य से रोगायंके उवसंते जाए यावि होत्था
 हट्ठे मल्लसरीरे जाए बवगयरोगायंके । तए णं से सेलए तंसि रोयायंकेसि
 उवसंतंसि समानंसि तंसि विपुलंसि असणंसि ४ मज्जपाणए य मुच्छिए
 गट्टिए गिट्ठे अज्झोववण्णे ओसण्णे ओसण्णविहारी एवं पासत्थे २ कुसीले २
 पमत्ते २ संसत्ते २ उउवट्टपीढफलगसेज्जासंधारए पमत्ते यावि विहरइ णो

संचाएइ फासुएसणिउजं पीढ-फलग-सेउजा-संथारयं पच्चप्पिणित्ता मंडुर्यं च रायं आपुच्छित्ता बहिया जाव विहरित्ते ॥६४॥ तए णं तेसिं पंथमवउज्जाणं पंचण्हं अणगारसयाणं अणया कयाइ एगयओ संहियाणं जाव पुव्वरत्तावरत्त-कालसमयंसि धम्मजागरियं जागरमाणाणं अयमेयाह्वे अज्झत्थिए जाथ समु-प्पज्जित्था—एवं खलु सेलए रायरिसी चइत्ता रउजं जाव पव्वइए विउले (णं) असणे ४ मज्जपाणए य मुच्छिए णो संचाएइ जाव विहरित्ते । णो खलु कप्पइ देवाणुप्पिया ! समणाणं जाव पमत्ताणं विहरित्ते । तं सेयं खलु देवाणुप्पिया ! अम्हं कल्लं सेलगं रायरिसिं आपुच्छित्ता पाडिहारियं पीढफलग-सेउजासंथारयं पच्चप्पिणित्ता सेलगस्स अणगारस्स पंथयं अणगारं वेयावच्चकरं ठवेत्ता बहिया अब्भुज्जएणं जाव विहरित्ते । एवं संपेहेत्ति २ ता कल्लं जेणेव सेलएरायरिसी० आपुच्छित्ता पाडिहारियं पीढफलग जाव पच्चप्पिणित्ता २ ता पंथयं अणगारं वेयावच्चकरं ठवेत्ति २ ता बहिया जाव विहरित्ति ॥६५॥ तए णं से पंथए सेलगस्स २ सेउजासंथारउच्चारपासवणखेल्लसिंघाणमत्त-ओसह-भेसज्जभत्तपाणएणं अगिलाए विणएणं वेयावडियं करेइ । तए णं से सेलए अणया कयाइ कत्थिच्चाउम्मासियंसि विउलं असणं ४ आहारमाहारिए सुवहं च मज्जपाणयं पीए पुव्वावरउहकालसमयंसि सुहप्पमुत्ते । तए णं से पंथए कत्थि-च्चाउम्मासियंसि कयकाउस्सग्गे देवसियं पडिक्कमणं पडिक्कंते च्चाउम्मासियं पडिक्कमिउं कामे सेलगं रायरिसिं खामणट्टयाए सीसेणं पाएसु संघट्टेइ । तए णं से सेलए पंथएणं सीसेणं पाएसु संघट्टिए समाणे आसुरत्ते जाव भिसिमिसेमाणे उट्ठेइ २ ता एवं वयासी—सेकेस णं भो ! एस अपत्थियपत्थिए जाव वज्जिए जे णं ममं सुहपमुत्तं पाएसु संघट्टेइ ? तए णं से पंथए सेलएणं एवं वुत्तेसमाणे भीए तत्थे तसिए करयल जाव कट्टु एवं वयासी—अहं णं भते ! पंथए कयकाउस्सग्गे देवसियं पडिक्कमणं पडिक्कंते च्चाउम्मासियं पडिक्कंते च्चाउम्मासियं खामेमाणे देवाणुप्पियं धंदमाणे सीसेणं पाएसु संघट्टेमि । तं खामेभि णं तुव्वे देवाणुप्पिया ! खमंतु मे अवरहं तुमं णं देवाणुप्पिया ! णाइभुज्जो एवं करणयाए—त्तिकट्टु सेलयं अणगारं एयमट्ठं सम्मं विणएणं भुज्जो २ खामेइ । तए णं तस्स सेलगस्स रायरिसिस्स पंथएणं एवं वुत्तस्स अयमेयाह्वे अज्झत्थिए जाव समुप्पज्जित्था—एवं खलु अहं रउजं च जाव ओत्तणो

जाव उउबद्धपीड० विहरामि । तं णो खलु कप्पइ समणाणं २ पासत्थानं जाव विहरित्तए । तं सेयं खलु मे कल्लं मंडयं रायं आपुच्छित्ता पाडिहारियं पीढ-फलमसेज्जासंथारयं पच्चप्पिणित्ता पंथएणं अणगारेणं सद्धिं बहिया अब्मुज्जएणं जाव जणवयविहारेणं विहरित्तए । एवं संपेहेइ २ त्ता कल्लं जाव विहरइ ॥६६॥ एवामेव समणाउसो ! जाव णिग्गंथो वा २ ओसण्णे जाव संथारए पमत्ते विहरइ से णं इहलोए चेव बहूणं समणाणं ४ हीलणिज्जे संसारो माणियब्बो । तए णं ते पंथगवज्जा पंच अणगारसया इमीसे कहाए लद्धट्ठा समाणा अण्णमण्णं सद्धान्तेति २ त्ता एवं वयासी—[एवं खलु] सेलए रायरिसी पंथएणं बहिया जाव विहरइ । तं सेयं खलु देवाणुप्पिया ! अम्हं सेलगं (रायरिसि) उवसंपज्जित्ताणं विहरित्तए । एवं संपेहेति २ त्ता सेलगं रायरिसि उवसंपज्जित्ताणं विहरंति ॥६७॥ तए णं (ते सेलयपामोक्खा) से सेलए रायरिसि पंथगपामोक्खा पंच अणगारसया बहूणि वासाणि सामण्णपरियागं पाउणित्ता जेणेव पुंडरीय-पक्वए तेणेव उवागच्छंति २ त्ता जहेव थावच्चापुत्ते तहेव सिद्धा ४ । एवामेव समणाउसो ! जो णिग्गंथो वा २ जाव विहरिस्सइ । एवं खलु जंबू ! समणेणं भगवया महावीरेणं पंचमस्स णायज्झयणस्स अयमट्ठे पण्णत्ते त्तिब्बेमि ॥७८॥ गाहा—सिद्धिलियसंजमकज्जावि होइउं उज्जमंति जइ पच्छा । सवेगाओ तो सेलउब्ब आराहया होति ॥१॥

॥ पंचम अज्झयणं समत्तं ॥

तुंबे णामं छट्ठं अज्झयणं

जइ णं भंते ! समणेणं ३ जाव संपत्तेणं पंचमस्स णायज्झयणस्स अयमट्ठे पण्णत्ते छट्ठस्स णं भंते ! णायज्झयणस्स समणेणं जाव संपत्तेणं के अट्ठे पण्णत्ते ? एवं खलु जंबू ! तेणं कालेणं तेणं समएणं रायगिहे समोसरणं परिसा णिग्गया । तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूर्ई णामं अणगारे अदूरसामंते जाव सुवक-ज्जाणोवगए विहरइ । तए णं से इंदभूर्ई जायसड्ढे जाव एवं वयासी—कहं णं भंते ! जीवा गरुयत्तं वा लहुयत्तं वा हव्वमागच्छंति ? गोयमा ! से जहा-णामए केइ पुरिसे एगं महं सुवकं तुंबं णिच्छिइडं णिरुवहयं दब्भेहि य कुसेहि

य वेडेइ २ ता मट्टियालेवेणं लिपइ २ ता उण्हे दलयइ २ ता सुक्कं समाणं
 दोच्चंपि दब्भेहि य कुमेहि य वेडेइ २ ता मट्टियालेवेणं लिपइ २ ता उण्हे
 दलयइ २ ता सुक्कं समाणं तच्चंपि दब्भेहि य कुसेहि य वेडेइ २ ता मट्टिया-
 लेवेणं लिपइ । एवं खलु एएणं उवाएणं अंतरा वेडेमाणे अंतरा लिपमाणे
 अंतरा सुक्कवेमाणे जाव अट्टहिं मट्टियालेवेहिं आलिपइ २ ता अत्याहमता-
 रमपोरिसियंसि उदगंसि पक्खिवेज्जा । से नूणं गोयमा ! से तुंबे तंसि अट्टुहं
 मट्टियालेवेणं गुरुययाए भारिययाए गुरुयभारिययाए उरिप सलिलमइवइत्ता
 अहे धरणिपलपइट्टाणे भवइ । एवामेव गोयमा ! जीवावि पाणाइवाएणं जाव
 मिच्छादंसणसल्लेणं अणुपुब्बेणं अट्टुकम्मपगडीओ समज्जिजंति तांसि गुरुययाए
 भारिययाए गुरुयभारिययाए कालमासे कालं किच्चा धरणिपलमइवइत्ता
 अहे णरगतलपइट्टाणा भवंति । एवं खलु गोयमा ! जीवा गुरुयत्तं
 हव्वमागच्छंति । अहण्णं गोयमा ! से तुंबे तंसि पढमिल्लुगंसि मट्टियालेवंसि
 तिण्णंसि कुहियंसि परिसड्डियंसि ईंसि धरणिपलाओ उप्पइत्ताणं चिट्ठइ ।
 तयाणंतरं (च णं) दोच्चंपि मट्टियालेवे जाव उप्पइत्ताणं चिट्ठइ । एवं
 खलु एएणं उवाएणं तेसु अट्टसु मट्टियालेवेसु तिण्णेसु जाव विमुक्कबंधणे
 अहे धरणिपलमइवइत्ता उरिप सलिलतलपइट्टाणे भवइ । एवामेव गोयमा ! जीवा
 पाणाइवायवेरमणेणं जाव मिच्छादंसणसल्लवेरमणेणं अणुपुब्बेणं अट्टुकम्मपगडीओ
 खवेत्ता गगणतलमूपइत्ता उरिप लोयगपइट्टाणा भवंति । एवं खलु गोयमा !
 जीवा लहुयत्तं हव्वमागच्छति । एवं खलु जंबू ! समणेणं जाव संपत्तेणं छट्टस्स
 णायज्झयणस्स अयमट्ठे पणत्ते त्तिबेमि ॥६६॥ गाहाउ-जह मिउलेवालित्तं
 गुरुयं तुंबं अहो वयइ एवं । आसवकयकम्मगुरू जीवा वच्चंति अहरगइं ॥१॥
 तं चेव तड्विमुक्कं जलोवरिं ठाइ जायलहुभावं । जह तह कम्मविमुक्का लोय-
 गपइट्टिया होति ॥२॥

॥ छट्ठं अज्झयणं समत्तं ॥

रोहिणी णामं सत्तमं अज्झयणं

जइ णं भंते ! समणेणं जाव संपत्तेणं छट्टस्स णायज्झयणस्स अयमट्ठे
 पणत्ते सत्तमस्स णं भंते ! णायज्झयणस्स के अट्ठे पणत्ते ? एवं खलु जंबू !

तेणं कालेणं तेणं समएणं रायगिहे णामं णयरे होत्था । सुभूमिभागे उज्जाणे । तत्थ णं रायगिहे णयरे धण्णे णामं सत्थवाहे परिवसइ अड्ढे जाव अपरिभूए । भद्दा भारिया-अहीणपर्विचियसरीरा जाव सुख्खा । तस्स णं धण्णस्स सत्थ-वाहस्स पुत्ता भद्दाए भारियाए अत्तया चत्तारि सत्थवाहदारगा होत्था तंजहा-धणपाले धणदेवे धणगोवे धणरक्खिए । तस्स णं धण्णस्स सत्थवाहस्स चउण्हं पुत्ताणं भारियाओ चत्तारि सुण्हाओ होत्था तंजहा-उज्झिया भोगवइया रक्खइया रोहिणिया । तए णं तस्स धण्णस्स सत्थवाहस्स अण्णया कयाइं पुव्वरत्तावरत्तकालसमयसि इमेयारूवे अज्झत्थिए जाव समुप्पज्जित्था-एवं खल्लु अहं रायगिहे णयरे बहूणं ईसरत्तलवर जाव पभिईणं सयस्स कुडुंबस्स बहूसु कज्जेसु य कारणे (करणिज्जे) सु य कोडुंबेसु य मंतणेसु य गुज्जेसु रहस्सेसु णिच्छएसु ववहारेसु य आपुच्छणिज्जे पडिपुच्छणिज्जे मेढी पमाणे आहारे आलंबणे चक्खू मेढी-पमाणभूए सब्बकज्जवट्टाए । तं ण णज्जइ जं मए मयंसि वा चयंसि वा मयंसि वा भम्मंसि वा लुग्गंसि वा सडियंसि वा पडियंसि वा विवेसत्थंसि वा विप्वंसियंसि वा इमस्स कुडुंबस्स किं मण्णे आहारे वा आलंबे वा पडिबंधे वा भविस्सइ । तं सेयं खल्लु मम कल्लं जाव जलंते विपुलं असणं ४ उयक्खडावेत्ता मित्तणाइ० चउण्हं य सुण्हाणं कुलघरवग्गं आमंतेत्ता तं मित्तणाइणियगसयणं चउण्हं य सुण्हाणं कुलघरवग्गं विपुलेणं असणेणं ४ धूवपुण्णवत्थगंधं जाव सबकारेत्ता सम्माणेत्ता तस्सेव मित्तणाइ चउण्हं य सुण्हाणं कुलघरवग्गस्स पुरओ चउण्हं सुण्हाणं परिवक्खणट्टयाए पंच २ सालि-अक्खए दलइत्ता जाणामि ताव का किहं वा सारक्खेइ वा संगोवेइ वा संचड्ढेइ वा ? एवं सपेहेइ २ ता कल्लं जाव मित्तणाइ० चउण्हं सुण्हाणं कुलघरवग्गं आमंतेइ २ ता विपुलं असणं ४ उयक्खडावेइ तओ पच्छा ण्हाए भोयणमंडवंसि सुहासणवरगए मित्तणाइ० चउण्हं य सुण्हाणं कुलघरवग्गं सडिं तं विपुलं असणं ४ जाव सबकारेइ सम्माणेइ स० २ ता तस्सेव मित्तणाइ० चउण्हं य सुण्हाणं कुलघरवग्गस्स पुरओ पंच सालिअवक्खए गेण्हइ २ ता जेट्ठा सुण्हा उज्झइया तं सहावेइ २ ता एवं वयासी-तुमं णं पुत्ता ! मम हत्थाओ इमे पंच सालिअक्खए गेण्हहि २ ता अणुपुव्वेणं सारक्खमाणी संगोवेमाणी चिहराहि । जया णं अहं पुत्ता ! तुमं इमे पंच सालिअक्खए जाएज्जा तथा णं तुमं मम इमे पंच

सालिअक्खए पडिदिज्जाएज्जासि त्तिकट्टु सुण्हाए हत्थे दलयइ २ ता पडिविसज्जेइ तए णं सा उज्झया धण्णस्स तह त्ति एयमट्ठं पडिसुणेइ २ ता धण्णस्स सत्थक्काहस्स हत्थाओ ते पंच सालिअक्खए गेण्हइ २ ता एगंतमवक्कमइ एगंतमवक्कमियाए इमेयास्सवे अज्झत्थिए जाव समुपज्जित्थया—एवं खलु तयाणं कोट्टामारंसि बह्वे पत्ता सालीणं पडिपुण्णा चिट्ठंति, तं जया णं ममं ताओ इमे पंच सालिअक्खए जाएस्सइ तया णं अहं पत्तंतंराओ अण्णे पंच सालिअक्खए गहाय दाहामि—त्तिकट्टु एवं सपेहेइ २ ता ते पंच सालिअक्खए एगंते एडेइ २ ता सकम्मसंजुत्ता जाया यावि होत्था । एवं भोगवइयाए वि णवरं सा छोल्लेइ २ ता अणुगिलइ २ ता सकम्मसंजुत्ता जाया यावि होत्था । एवं रक्खिया वि णवरं गेण्हइ २ ता इमेयास्सवे अज्झत्थिए०—एवं खलु ममं ताओ इमस्स मित्तणाइ० चउण्ह य सुण्हाणं कुलघरवग्गस्स य पुरओ सद्दावेत्ता एवं वयासी—तुमं णं पुत्ता ! मम हत्थाओ जाव पडिदिज्जाएज्जासि—त्तिकट्टु मम हत्थंसि पंच सालिअक्खए दलयइ, तं भवियव्वं एत्थ कारणेणं—त्तिकट्टु एवं सपेहेइ २ ता ते पंच सालिअक्खए सुट्ठे वत्थे वंअइ २ ता रयणकरंडियाए पक्खिवेइ २ ता ऊसीसामूले डावेइ २ ता तिसंसं पडिजाणर-माणी २ विहरइ । तए णं से धण्णे सत्थवाहे तस्सेव मित्त जाव चउत्थि रोहि-णीयं सुण्हं सद्दावेइ २ ता जाव तं भवियव्वं एत्थ कारणेणं तं सेयं खलु मम एए पंच सालिअक्खए सारक्खमाणीए संगोवेमाणीए संबड्ढेमाणीए—त्तिकट्टु एवं सपेहेइ २ ता कुलघरपुरिसे सद्दावेइ २ ता एवं वयासी—तुभं णं देवाणु-प्पिया ! एए पंच सालिअक्खए गेण्हइ २ ता पढमपाउसंसि महावुट्ठिकायंसि णिवइयंसि समाणंसि खुट्ठागं केयारं सुपरिकम्मियं करेह २ ता इमे पंचसालि-अक्खए वावेह २ ता दोक्कंपि तक्कंपि उक्खयण्हए करेह २ ता वाडि-पक्खेवं करेह २ ता सारक्खमाणा संगोवेमाणा अणुपुब्बेणं संबड्ढेह । तए णं ते कोडुंबिया रोहिणीए एयमट्ठं पडिसुणेति २ ता ते पंच सालिअक्खए गेण्हति २ ता अणुपुब्बेणं सारक्खंति संगोविति विहरंति । तए णं ते कोडुंबिया पढम-पाउसंसि महावुट्ठिकायंसि णिवइयंसि समाणंसि खुट्ठागं केयारं सुपरिकम्मियं करेति २ ता ते पंच सालिअक्खए ववति २ ता दोक्कंपि तक्कंपि उक्खयण्हए करेति २ ता वाडिपरिक्खेवं करेति २ ता अणुपुब्बेणं सारक्खेमाणा संगोवेमाणा संबड्ढेमाणा विहरंति । तए णं ते साली अक्खए अणुपुब्बेणं सारक्खज्जमाणा

संगोविज्जमाणा संबद्धिज्जमाणा साली जाया किण्हा किण्होभासा जाव णिउ-
रंबमूया पासार्इया ४ । तए णं ते साली पत्तिया वत्तिया गन्धिमया पसूया आगय-
गंधा खीराइया बद्धफला पक्का परियागया सत्तइया पत्तइया हरियपक्कंडा
जाया याचि होत्था । तए णं ते कोडुंबिया ते साली पत्तिए जाव सत्तइएपत्तइए
जाणित्ता तिक्खेहि णवपज्जणएहि असिग्रएहि लुणंति २ ता करयलमलिए करेति
२ ता पुणंति । तत्थ णं चोक्खाणं सूइयाणं अखंडाणं अफोडियाणं छडुछडापूयाणं
सालीणं मागहए पत्थए जाए । तए णं ते कोडुंबिया ते साली णवएसु घडएसु
पक्खिवंति २ ता उर्वलपंति २ ता लंछियमहिए करेति २ ता कोट्टागारस्स
एगदेसंसि ठावेति २ ता सारक्खेमाणा संगोवेमाणा विहरंति । तए णं ते कोडुं-
बिया दोच्चंसि वासारत्तंसि पढमपाउसंसि महावट्टिकायंसि णिवइयंसि खुडुगं
केयारं सुपरिकम्मियं करेति २ ता ते साली धवति दोच्चंपि तच्चंपि उक्खय-
णिहए जाव लुणंति जाव जलणतलमलिए करेति २ ता पुणंति । तत्थ णं बहवे
सालीणं कुडवा मुरला जाव एगदेसंसि ठावेति २ ता सारक्खेमाणा० विहरंति ।
तए णं ते कोडुंबिया तच्चंसि वासारत्तंसि महावट्टिकायंसि णिवइयंसि बहवे
केयारे सुपरिकम्मिए जाव लुणंति २ ता संबहंति २ ता खलयं करेति २ ता
मलेति जाव बहवे कुंभा जाया । तए णं ते कोडुंबिया साली कोट्टागारसि
पक्खिवंति जाव विहरंति । चउत्थे वासारत्ते बहवे कुंसया जाया । तए णं
तस्स घणस्स पंचमग्रंसि संबच्छरंसि परिणममाणंसि पुअरत्तावरत्तकालसम-
यंसि इमेयारूवे अज्जत्थिए जाव समुप्पज्जित्था-एवं खलु मम इओ अईए पंचमे
संबच्छरे चउण्हं सुण्हाणं परिवखणट्टयाए ते पंच २ सालिअक्खया हत्थे दिण्णा,
तं सेयं खलु मम कल्लं जाव जलंते पंच सालिअक्खए परिजाइत्तए जाव जाणामि
ताव काए किह सारक्खिया वा संगोबिया वा संबद्धिया जाव तिकट्टु एवं
संयेहेइ २ ता कल्लं जाव जलंते विपुलं असणं ४ मित्ताइणियग० चउण्हं
य सुण्हाणं कुलघरवग्गं जाव सम्माणित्ता तस्सेव मित्तं चउण्ह य सुण्हाणं
कुलघरवग्गस्स पुरओ जेट्ठं उज्जियं सद्दावेइ २ ता एवं वयासी-एवं खलु अहं
पुत्ता ! इओ अईए पंचमंसि संबच्छरंसि इमस्स मित्तं चउण्ह य सुण्हाणं
कुलघरवग्गस्स य पुरओ तव हत्थंसि पंच सालिअक्खए दलयामि जया णं अहं
पुत्ता ! एए पंच सालिअक्खए जाएज्जा तथा णं तुमं मम इमे पंच सालि-
अक्खए पडिदिज्जाएसि-तिकट्टु तं हत्थंसि दलयामि । से पूणं पुत्ता !

भट्ठे समट्ठे ? हंता अत्थि । तं णं [तुमं] पुत्ता ! मम ते सालिअक्खए पडि-
 णिज्जाएहि । तए णं सा उज्झिया एयमट्ठं धण्णस्स पडिसुणेइ २ ता जेणेव
 कोट्टागारं तेणेव उवागच्छइ २ ता पत्ताओ पंच सालिअक्खए गेण्हइ २ ता
 जेणेव धण्णे सत्थवाहे तेणेव उवामच्छइ २ ता धण्णं सत्थवाहं एवं वयासी-
 एए णं ते पंच सालिअक्खए-त्तिकट्टु धण्णस्स हत्थसि ते पंच सालिअक्खए
 दलयइ । तए णं धण्णे उज्झियं सवहसाविद्यं करेइ २ ता एवं वयासी-किं णं
 पुत्ता ! (एए) ते चेव पंच सालिअक्खए उदाहु अण्णे ?, तए णं उज्झिया
 धण्णं सत्थवाहं एवं वयासी-एवं खलु तुम्हे ताओ ! इओ अईए पंचमे संवच्छरे
 इमस्स मित्तणाइ० चउण्ह य जाव विहराहि । तए णं अहं तुवमं एयमट्ठं पडि-
 सुणेमि २ ता ते पंच सालिअक्खए गेण्हामि एगंतमवक्कमामि । तए णं मम
 इमेयाह्वे अज्झत्थिए जाव समुप्पज्जित्था-एवं खलु तायाणं कोट्टागारंसि जाव
 सकम्मसंजुत्ता, तं णो खलु ताओ ! ते चेव पंच सालिअक्खए एए णं अण्णे ।
 तए णं से धण्णे उज्झियाए अत्तिए एयमट्ठं सोच्चा णिसम्म आसुरुत्ते
 जाव मित्तिमिसेमाणे उज्झइयं तस्स मित्तणाइ० चउण्हं सुण्हाणं कुलघरवग्ग-
 स्स य पुरओ तस्स कुलघरस्स छासुज्झियं च छाणुज्झियं च कयवरुज्झियं च
 समु (संघु) च्छियं च सम्मज्जिअं च पाउववाइं च ण्हाणोववाइं च बाहिर-
 पेसणकारिं ठवेइ । एवामेव समणाउसो ! जो अम्हं णिग्गंथो वा २
 जाव पट्ठइए पंच य से महव्वयाइं उज्झियाइं भवन्ति से णं इहभवे चेव बहूणं
 समणाणं ४ हीलणिज्जे जाव अणुपरियट्टइस्सइ जहा सा उज्झिया । एवं
 भोगवइयावि णवरं तस्स कुलघरस्स कांडितियं च कोट्टितियं च पीसंतियं च
 एवं रुच्चंतियं च रंघंतियं च परिवेसंतियं च परिभायंतियं च अर्धितरियं
 च पेसणकारिं महाणत्तिणं ठवेइ । एवामेव समणाउसो ! जो अम्हं समणो
 वा २ पंच य से महव्वयाइं फोडियाइं भवन्ति से णं इहभवे चेव बहूणं समणाणं
 ४ हीलणिज्जे ४ जाव जहा व सा भोगवइया । एवं रक्खइयावि णवरं जेणेव
 वासघरे तेणेव उवागच्छइ २ ता मंजूसं विहाडेइ २ ता रयणकरंडमाओ ते
 पंच सालिअक्खए गेण्हइ २ ता जेणेव धण्णे सत्थवाहे तेणेव उवागच्छइ २
 ता पंच सालिअक्खए धण्णस्स हत्थे दलयइ । तए णं से धण्णे स० रक्खइयं
 एवं वयासी-किं णं पुत्ता ! ते चेव एए पंच सालिअक्खए उदाहु अण्णे ति ?
 तए णं रक्खइया धण्णं सत्थवाहं एवं वयासी-ते चेव ताओ ! एए पंच सालि-

अखया णो अण्णे । कहं णं पुत्ता ? एवं खलु ताओ ! तुम्हे इओ पंचमंमि संवच्छरे जाव भवियव्वं एत्थ कारणेणं—तिकट्टु ते पंच सालिअखए सुद्धे वत्थे जाव तिसंघं पडिजागरमानी यावि विहरामि । तओ एएणं कारणेणं ताओ ! ते चेव ते पंच सालिअखए णो अण्णे । तए णं से धण्णे रक्खियाए अंतिए एयमट्ठं सोच्चा हट्टुत्तुठे तस्स कुलघरस्स हिरण्णस्स य कंसदूस-विपुलधण जाव सावएज्जस्स य संडागारिणि ठवेइ । एवामेव समणाउसो ! जाव पंच य से महव्वयाइं रक्खियाइं भवति से णं इहभवे चेव बहूणं समणाणं ४ अच्चणिज्जे जाव जहा सा रक्खिया । रोहिणियावि एवं चेव णवरं तुम्हे ताओ ! मम सुबहुयं सगडीसागडं दत्ताहि जेणं अहं तुम्भं ते पंच सालिअखए पडिणिज्जाएमि । तए णं से धण्णे सत्थवाहे रोहिणि एवं वयासी—कहं णं तुमं मम पुत्ता ! ते पंच सालिअखए सगडसागडेणं णिज्जाइस्ससि ? । तए णं सा रोहिणी धणं सत्थवाहं एवं वयासी—एवं खलु ताओ ! इओ तुम्हे पंचमे संवच्छरे इमस्स मित्त जाव बहवे कुंभसया जाया तेणेव कमेणं, एवं खलु ताओ ! तुम्हे ते पंच सालिअखए सगडीसागडेणं णिज्जाएमि । तए णं से धण्णे सत्थवाहे रोहिणीयाए सुबहुयं सगडीसागडं दत्तयइ । तए णं रोहिणी सुबहुं सगडीसागडं गहाय जेणेव सए कुलघरे तेणेव उवागच्छइ २ ता कोट्टागारे विहाउंइ २ ता पल्ले उंभइइ २ ता सगडीसागडं भरेइ २ ता रायगिहं णयरं मज्झंमज्झेणं जेणेव सए गिहे जेणेव धण्णे सत्थवाहे तेणेव उवागच्छइ । तए णं राय-गिहे णयरे सिधाउग जाव बहुजणो अण्णमणं एवमाइक्खइ ४—धण्णे णं देवा-णुत्पिया ! धण्णे सत्थवाहे जस्स णं रोहिणीया सुण्हा(जीए ण) पंच सालिअखए सगडसागडिएणं णिज्जाएइ । तए णं से धण्णे सत्थवाहे ते पंच सालिअखए सगडीसागडेणं णिज्जाइए पासइ २ ता हट्टु जाव पडिच्छइ २ ता तस्सेव मित्तणइ० चउण्ह य सुण्हाणं कुलघरवग्गस्स पुरओ रोहिणीयं सुण्हं तस्स कुलघरस्स बहुमु कज्जेसु य जाव रहस्सेसु य आपुच्छणिज्जं जाव वट्ठावियं पमाणमूयं ठावेइ । एवामेव समणाउसो ! जाव पंच [से] महव्वया संवड्डिया भवति से णं इहभवे चेव बहूणं समणाणं जाव वीईवइस्सइ जहा व सा रोहिणीया । एवं खलु अंबू ! समणेणं भगवया महावीरेणं जाव संपत्तेणं सत्तमस्स णायज्जयणस्स अयमट्ठे पण्णत्ते त्तिबेमि ॥७०॥ गाहाओ—जह सेट्ठी

तह गुरुणो जह णाइजणो तहा समणसंघो । जह वहुया तह भव्वा जह सालि-
कणा तह वयाइं ॥१॥ जह सा उज्झयणामा उज्झयसाली जहत्थमभिहाणा ।
पेसणगारित्तेणं असंखदुक्खवखणी जाया ॥२॥ तह भव्वो जो कोई संघसमवखं
गुरुविट्ठणाइं । पडिवज्जिजं समुज्झइ महव्वयाइं महामोहा ॥३॥ सो इह
चेव भव्वमी जणाण धिक्कारभायणं हीइ । परलोए उ दुहत्तो णाणाजोणीसु
संचरइ ॥४॥ जह वा सा भोगवई जहत्थणामोवभुत्तसालिकणा । पेसणविसेस-
कारित्तेणेण पत्ता दुहं चेव ॥ ५ ॥ तह जो महव्वयाइं उवभुंजइ जीवियत्ति
पालितो । आहाराइसु सत्तो चत्तो सिवसाहणिच्छाए ॥६॥ सो एत्थ जहिच्छाए
पावइ आहारमाइ लिगित्ति । विउसाण णाइपुज्जो परलोयम्मी दुही चेव ॥७॥
जह वा रविखयवहुया रविखयंसालीकणा जहत्थक्खा । परिजणमण्णा जाया
भोगमुहाइं च संपत्ता ॥८॥ तह जो जीवो सम्मं पडिवज्जिता महव्वए पंच ।
पालेइ णिरइयारे पमायलेसपि वज्जेतो ॥९॥ सो अप्पहिएक्करई इहलोयंमिबि
विऊहि पणयपओ । एगंतसुही जायइ परम्मि मोवखंपि पावेइ ॥१०॥ जह
रोहिणी उ सुण्हा रोवियसाली जहत्थमभिहाणा । वड्डित्ता सालिकणे पत्ता
सव्वस्स सामित्तं ॥११॥ तह जो भव्वो पाविय वयाइं पालेइ अप्पणा सम्मं ।
अण्णेसिवि भव्वणं देइ अणेमंसि हियहेउं ॥१२॥ सो इह संघपहाणो जग-
प्पहाणेत्ति लहइ संसहं । अप्पपरेसि कल्लाणकारओ गोथमपहुव्व ॥१३॥ तित्थस्स
वड्डिकारी अक्खेवणओ कुत्तित्थियाईणं । विउसणरसेवियकमो कमेण सिद्धिपि
पावेइ ॥१४॥ सत्तमं अज्झयणं समत्तं ॥

मल्ली णामं अट्टमं अज्झयणं

जइ णं भंते ! समणेणं जाव संपत्तेणं सत्तमस्स णायज्झयणस्स अयमद्दे
पण्णत्ते अट्टमस्स णं भंते । के अट्ठे पण्णत्ते ? एयं खलु जंबू ! तेणं कालेणं
तेणं समएणं इहेव जंबुद्दीवे २ महाविदेहे वासे मंदरस्स पध्वयस्स पच्चत्थिमेणं
णिसद्धस्स वासहरपध्वयस्स उत्तरेणं सीओयाए महानईए दाहिणेणं मुहावहस्स
ववखारपध्वयस्स पच्चत्थिमेणं पच्चत्थिमलवणसमूहस्स पुरत्थिमेणं एत्थ णं
सल्लितावई णामं विजए पण्णत्ते । तत्थ णं सल्लितावईविजए वीयसोगा णामं
रायहाणी पण्णत्ता णवजोयणवित्थिण्णा जाव पच्चवखं देवलोगमूया । तीसे णं

वीयसोगाए रायहाणीए उत्तरपुररिथिमे विसीभाए इंदकुंभे णामं उज्जाणे । तत्थ
 णं वीयसोगाए रायहाणीए बले णामं राया । तस्सेव धारिणीपामोक्खं देवि-
 सहस्से उवरोहे होत्था । तए णं सा धारिणी देवी अण्णया कयाइ सीहं सुमिणे
 पासित्ताणं पडिबुद्धा जाव महब्बले णामं वारए जाए उम्मवक जाव भोगसमत्थे ।
 तए णं तं महब्बलं अम्मापियरो सरिसियाणं कमलसिरीपामोक्खाणं पंचण्हं
 रायवरकणासयाणं एगदिवसेणं पाणि गेहावेति । पंच पासायसया पंचसओ
 दाओ जाव विहरइ । थेरागमणं इंदकुंभे उज्जाणे समोसढा । परिसा
 णिग्गया । बलो वि णिग्गओ । धम्मं सोच्चा णिसम्म जं णवरं महब्बलं कुमारं
 रज्जे ठावेमि जाव एक्कारसंगवी बहूणि वासाणि सामण्णपरियाणं पाउणित्ता
 जेणेव चारुपव्वए भासिएणं भत्तेणं सिद्धे । तए णं सा कमलसिरी अण्णया कयाइ
 सीहं सुमिणे (पासित्ताणं पडिबुद्धा) जाव बलभट्टो कुमारो जाओ जुवराया यावि
 होत्था । तस्स णं महब्बलस्स रण्णो इमे छुप्पियबालवयंसगा रायाणो होत्था
 तंजहा-अयले धरणे पूरणे वसू वेसमणे अभिच्छं दे सहजायया जाव सहिच्चाए
 णित्थरियव्वे त्तिकट्टु अण्णमण्णस्स एयमट्ठं पडिसुणंति । तेणं कालेणं तेणं
 समएणं इंदकुंभे उज्जाणे थेरा समोसढा । परिसा णिग्गया । महब्बले णं धम्मं
 सोच्चा० जं णवरं छुप्पियबालवयंसए आपुच्छामि बलभट्टं च कुमारं रज्जे
 ठावेमि जाव छुप्पियबालवयंसए आपुच्छइ । तए णं ते छुप्पिय० महब्बलं रायं
 एवं वयासी-जइ णं देवाणुप्पिया ! तुम्भे पव्वयह अम्हं के अण्णे आहारे वा
 जाव पव्वयामो । तए णं से महब्बले राया ते छुप्पिय० एवं वयासी-जइ णं
 तुम्भे मए सद्धि जाव पव्वयह तो णं गच्छह जेट्ठे पुत्ते सएहिं र रज्जेहिं ठावेह
 पुरिससहस्सवाहिणीओ सीयाओ दुरूढा जाव पाउम्मवंति । तए णं से महब्बले
 राया छुप्पियबालवयंसए पाउम्भए पासइ २ ता हट्ठ तुट्ठे कोडुंबियपुरिसे०
 बलभट्टस्स रायाभिसेओ जाव आपुच्छइ । तए णं से महब्बले जाव महया इड्ढीए
 पव्वइए एक्कारसअंगाइ० बहूहि चउत्थ जाव भावेमाणे विहरइ । तए णं तेति
 महब्बलपामोक्खाणं सत्तण्हं अण्णाराणं अण्णया कयाइ एगयओ सहियाणं इमेया-
 रूवे मिहो-कहासमुत्तावे समुप्पज्जित्था-जं णं अम्हं देवाणुप्पिया ! एणे
 तवोकम्मं उवसंपज्जित्ताणं विहरइ तं णं अम्होहिं सव्वेहिं तवोकम्मं उवसंप-
 ज्जित्ताणं विहरित्तए-त्तिकट्टु अण्णमण्णस्स एयमट्ठं पडिसुणंति २ ता बहूहि

चउत्थं जाव विहरंति । तए णं ते महब्बले अणगारे इमेणं कारणेणं इत्थि-
 णामगोयं कम्मं णिव्वत्तंमु-जइ णं ते महब्बलवज्जा छ अणगारा चउत्थं
 उवसंपज्जित्ताणं विहरंति तओ से महब्बले अणगारे छट्ठं उवसंपज्जित्ताणं
 विहरइ । जइ णं ते महब्बलवज्जा [छ] अणगारा छट्ठं उवसंपज्जित्ताणं
 विहरंति तओ से महब्बले अणगारे अट्ठमं उवसंपज्जित्ताणं विहरइ । एवं (अह)
 अट्ठमं तो दसमं अह् दसमं तो दुवालसं । इमेहि य णं बीसाएहि य कारणेहि
 आसेवियवहलीकएहि तित्थयरणागोयं कम्मं णिव्वत्तंमु तंजहा-अरहंतसिद्ध
 पवधणगुरुथेरवहुस्सुए तवस्सीसुं । वच्छलया य तेसि अभिव्व णागोवओमे य
 ॥१॥ वंसणवियणए आवस्सए य सीलव्वए णिरइया (रं) रो । खणत्वतवच्चिवाए
 वेयावच्चे समाही य ॥२॥ अप्पुव्वणाणगहणे सुयमत्तो पवयणे पभावणया ।
 एएहि कारणेहि तित्थयरत्तं लहइ (जीओ) सो उ ॥३॥ तए णं ते महब्बल-
 पामोक्खा सत्त अणगारा मासियं भिव्वखुडिडं उवसंपज्जित्ताणं विहरंति जाव
 एगराइयं भि० उव० । तए णं ते महब्बलपामोक्खा सत्त अणगारा खुट्ठाणं
 सीहणविकलियं तवोक्कम्मं उवसंपज्जित्ताणं विहरंति तंजहा-चउत्थं करेति २
 ता सव्वजागुणियं पारंति २ ता छट्ठं करेति २ ता चउत्थं करेति २ ता
 अट्ठमं करेति २ ता छट्ठं करेति २ ता दसमं करेति २ ता अट्ठमं करेति २
 ता दुवालसमं करेति २ ता दसमं करेति २ ता चोदसमं करेति २ ता
 दुवालसमं करेति २ ता सीलसमं करेति २ ता चोदसमं करेति २ ता अट्ठ-
 रसमं करेति २ ता सीलसमं करेति २ ता बीसइमं करेति २ ता अट्ठारसमं
 करेति २ ता बीसइमं करेति २ ता सीलसमं करेति २ ता अट्ठारसमं करेति
 २ ता चोदसमं करेति २ ता सीलसमं करेति २ ता दुवालसमं करेति २ ता
 चोदसमं करेति २ ता दसमं करेति २ ता दुवालसमं करेति २ ता अट्ठमं
 करेति २ ता दसमं करेति २ ता छट्ठं करेति २ ता अट्ठं करेति २ ता
 चउत्थं करेति २ ता छट्ठं करेति २ ता चउत्थं करेति सव्वत्थं सव्वकाम-
 गुणिएणं पारंति । एवं खलु एसा खुट्ठागसीहणविकलीयस्स तवोक्कम्मस्स
 पढमा परिवाडी छहि मासेहि सत्तहि य अहोरत्तेहि य अहामुत्ता जाव आराहिया
 भवइ । तयाणंतंरं दोच्चाए परिवाडीए चउत्थं करेति णवरं विगइवज्जं
 पारंति । एवं तच्चा वि परिवाडी णवरं पारणए अलेवाडं पारंति । एवं चउ-

त्यावि परिवाडी णवरं पारणए आर्यबिलेण पारंति । तए णं ते महब्बलपामोक्खा सत्त अणगारा खुड्ढागं सीहणिककीलियं तवोकम्मं दोहि संवच्छरेहिं अट्ठावीसाए अहोरत्तेहिं अहामुत्तं जाव आणाए आराहेत्ता जेणेव थेरे भगवंते तेणेव उवागच्छंति २ ता थेरे भगवंते वंदंति णमंसंति वं० २ ता एवं वयासी-इच्छामो णं भंते ! महालयं सीहणिककीलियं (तवोकम्मं०) तहेव जहा खुड्ढागं णवरं चोत्तीसइमाओ णियत्तए एगाए परिवाडीए कालो एगेणं संवच्छरेणं छंहिं मासेहिं अट्ठारसहिं य अहोरत्तेहिं समप्पेइ । सव्वंपि सीहणिककीलियं छंहिं वासेहिं दोहि य मासेहिं बारसहिं य अहोरत्तेहिं समप्पेइ । तए णं ते महब्बलपामोक्खा सत्त अणगारा महालयं सीहणिककीलियं अहामुत्तं जाव आराहेत्ता जेणेव थेरे भगवंते तेणेव उवागच्छंति २ ता थेरे भगवंते वंदंति णमंसंति वं० २ ता बहूणि चउत्थं जाव विहरंति । तए णं ते महब्बलपामोक्खा सत्त अणगारा तेणं उरालेणं सुक्का भुक्खा जहा खंदओ णवरं थेरे आपुच्छित्ता चारुपव्वयं (सणियं) दुरुहंति जाव दोमासियाए संलेहणाए सवोसं भत्तसयं (अणसणं) चउरासीइं वाससयसहस्साइं सामणपरियागं पाउणति २ ता चउसीइं पुव्वसयसहस्साइं सव्वाउयं पालइत्ता जयंते विमाणे देवत्ताए उवण्णा ॥७१॥ तत्थ णं अत्थेगइयाणं देवाणं बत्तीसं सागरोवमाइं ठिईं पणत्ता । तत्थ णं महब्बलवज्जणं छण्हं देवाणं देसूणाइं बत्तीसं सागरोवमाइं ठिईं । महब्बलस्स देवस्स पडिपुण्णाइं बत्तीसं सागरोवमाइं ठिईं प० । तए णं ते महब्बलवज्जा छप्पिय देवा जयंताओ देवलोगाओ आउक्खएणं जाव अणंतरं चयं चइत्ता इहेव जंबुद्दीवे २ भारहे वासे विमुद्धपिडमाइवंसेसु रायकुलेसु पत्तेयं २ कुमारत्ताए पच्चायाया(सी) तंजहां-पडिबुद्धी इक्खागराया, चंदच्छाए अंगराया, संखे कासिराया, रुपी कुणालाहिवई, अदीणसत्त कुरराया, जियसत्त पंचालाहिवई । तए णं से महब्बले देवे तिहिं णाणेहिं समग्गे उच्चट्ठाण(ट्ठि) गएसु गहेसु सोमासु दिसासु वितिमिरासु विमुद्धासु जइएसु सउण्णेषु पयाहिणाणुकूलंसि भूमिसिप्पिसि मारुयंसि पवायंसि णिष्फणसस्समेइणीयंसि कालंसि पमुइयपक्कीलिएसु जणएसु अट्ठरत्तकालसमयंसि अस्सिणीणवत्तत्तेणं जोगमुवागएणं जे से हेमंताणं चउत्थे मासे अट्ठमे पक्खे फग्गुणसुद्धे तस्स णं फग्गुणसुद्धस्स चउत्थिपक्खेणं जगंताओ विमाणाओ बत्तीसं सागरोवमट्ठिइयाओ अणंतरं चयं

चइत्ता इहेव जंबुद्वीवे २ भारहे वासे मिहिलाए रायहाणीए कुंभगस्स रण्णो पभावईए देवीए कुच्छिसि आहारववकंतीए भवववकंतीए सरीरववकंतीए गम्भत्ताए ववकते । तं रयणि च णं चोद्द्व महासुमिणा वण्णओ । भत्तार-कहणं सुमिणपाद्दगपुच्छा जाव विहरइ । तए णं तीसे पभावईए देवीए तिण्हं मासाणं बहूपडिपुण्णाणं इमेयरूवे डोहले पाउबभूए—धण्णाओ णं ताओ अम्म-याओ जाओ णं जलथलयभामुरप्पभूएणं दसद्धवण्णेणं मल्लेणं अत्थयपच्चत्थयसि सयणिज्जसि सणिणसण्णाओ संणिवण्णाओ य विहरति एमं च महं सिरिदामगंडं पाडलमत्तिलयचंगसोगपुण्णागणागमरुयगदमणगअणोज्जकोज्जय पउरं परमसुहफासदरिसणिज्जं महया गंधद्धणिं मुयंतं अघायमाणीओ डोहलं विणेति । तए णं तीसे पभावईए देवीए इमं एयरूवं डोहलं पाउबभूयं पासत्ता अहासणिहिया वाणसंतरा देव। खिप्पामेव जलथलय जाव दसद्धवणमल्लं कुंभगसो य भारगसो य कुंभगस्स रण्णो भवणंसि साहरंति एमं च णं महं-सिरिदामगंडं जाव गंधद्धणिं मुयंतं उवणेति । तए णं सा पभावई देवी जलथलय जाव मल्लेणं दोहलं विणेइ । तए णं सा पभावई देवी पसत्थदोहला जाव विहरइ । तए णं सा पभावई देवी णवण्हं मासाणं अद्धदुमाण य रत्तिदियणं जे से हेमंताणं पट्ठमे मासे दोच्छे पवखे सग्गसिरसुद्धे तस्स णं एवकारसीए पुव्वरत्तावरत्तकालसमयंसि अरिसणीणवखत्तेणं उच्चट्टाणगएसु गहेसु जाव पम्-इयपवकीलएसु जणवएसु आरोयारीयं एगूणवीसइमं तित्थयरं पयाया ॥७२॥ तेणं कालेणं तेणं समएणं अहो लोगवत्थव्वाओ अट्ट दिसाकुमारीओ मयहरीयाओ जहा जंबुद्वीवपण्णत्तीए जम्मणं सव्वं णवरं मिहिलाए कुंभस्स पभावईए देवीए अभिलावो संजोएयवो जाव णंदीसरवरे दीवे महिमा । तथा णं कुंभए राया बहूहि भवणवईहि ४ तित्थयर(जम्मणाभिसेयं) जायकम्मं जाव णामकरणं-जम्हा णं अम्हे इमीए दारियाए माऊए मल्लसयणीज्जसि डोहले विणीए तं होउ णं णामेणं मल्ली जहा सहबले जाव परिवड्डिया—सा वड्डई भगवई दियलोयच्चा अणोवमसिरीया । दासीदासपरिवुडा परिकिण्णा पीडमहेहि ॥१॥ असिघसिरया सुणयणा विवोदठी धवलदंतपंतीया । वरकमलकोमलंगी फुल्लुपलगंधणीसासा ॥७३॥ तए णं सा मल्ली विदेहरायवरकण्णा उम्भुवकबलभावा जाव रुवेण य जोध्वणेण य लावण्णेण य अईव २ उक्किट्टा उक्किट्टसरीरा जाया यावि

होत्या । तए णं सा मल्ली देसूणवाससयजाया ते छप्पिय रायाणो विउलेणं ओहिणा आभोएमाणी २ विहरइ तंजहा—पडिबुद्धि जाव जियसत्तुं पंचालाहि-
वई । तए णं सा मल्ली कोडुंबियपुरिसे सद्दावेइ २ ता एवं वयासी—तुम्भे णं
देवाणुप्पिया ! असोगवणियाए एगं महं मोहणघरं करेह अणेगखंमसयसणि-
विट्ठं । तस्स णं मोहणघरस्स बहुमज्झदेसभाए छ गम्भघरए करेह । तेसि णं
गम्भघरगाणं बहुमज्झदेसभाए जालघरयं करेह । तस्स णं जालघरयस्स बहुमज्झ-
देसभाए मणिपेडियं करेह जाव पच्चप्पिणंति । तए णं (सा) मल्ली मणिपेडियाए
उर्वारि अप्पणो सरिसियं सरित्तयं सरिद्वयं सरिसलावण्णजोव्वणगुणोव्वेयं
कणगामईं मत्थयच्छिड्डुं पउमप्पलपिहाणं पडिमं करेइ २ ता जं विउलं असणं ४
आहारेइ तओ मणुष्णाओ असणाओ ४ कल्लाकाल्लि एगमेगं पिंडं गहाय तीसे
कणगामईए मत्थयच्छिड्डुए जाव पडिमाए मत्थयंसि पक्खिवमाणी २ विहरइ ।
तए णं तीसे कणगामईए जाव मत्थयच्छिड्डुए पडिमाए एगमेगंसि पिंडे पक्खिप्प-
माणे २ तओ गंधे पाउव्वमवइ से जहाणामए अहिमडेइ वा जाव एत्तो अणिट्ठ-
तराए अमणामतराए [चैव] ॥७४॥ तेणं कालेणं तेणं समएणं कोसला णामं
जणवए । तत्थ णं सागेए णामं णयरे । तस्स णं उत्तरपुरच्छिमे विसीभाए एत्थ
णं (महं एगे) महेगे णागघरए होत्या दिध्वे सच्चे सच्चोवाए संणिहियपाडिहेरे ।
तत्थ णं सागेए णयरे पडिबुद्धी णामं इवखागुराया परिवसइ पउमावई देवी
सुबुद्धी अमच्चे सामदंडं । तए णं पउमावईए देवीए अणया कयाइं णाग-
जणए यावि होत्या । तए णं सा पउमावईं णागजणसुवट्ठियं जाणित्ता जेणेव
पडिबुद्धीं करयल जाव एवं वयासी—एवं खलु सामी ! मम कल्लं णागजणए
(यावि) भविस्सइ, तं इच्छामि णं सामी ! तुम्भेहि अब्भणुष्णाया समाणी
णागजणयं गमित्तए, तुम्भेवि णं सामी ! मम णागजणयंसि समोसरह । तए
णं पडिबुद्धी पउमावईए देवीए एयमट्ठं पडिसुणेइ । तए णं पउमावईं पडि-
बुद्धिणा रण्णा अब्भणुष्णाया समाणी हट्ठुत्तुत्ता जाव कोडुंबियपुरिसे सद्दावेइ २
ता एवं वयासी—एवं खलु देवाणुप्पिया ! मम कल्लं णागजणए भविस्सइ । तं
तुम्भे मालागारे सद्दावेइ २ ता एवं वयह—एवं खलु पउमावईए देवीए कल्लं
णागजणए भविस्सइ । तं तुम्भे णं देवाणुप्पिया ! जलथलयं दसद्ववणं मल्लं
णागघरयंसि साहरह एगं च णं महं सिरिदामगंडं उवणेह । तए णं जलथलयं

दसद्वयवर्णो मरुलेणं णाणाविहभत्तिसुविरइयं हंसमियमयूरकोचसारसत्तवकवाय-
 मयणसालकोइलकुलोववेयं ईहामिय जाव भत्तित्तं महग्घं महूरिहं विउलं
 पुष्फमंडवं विरएह । तस्स णं बहुमज्झवेसमाए एगं महं सिरिदामगंडं जाव गंध-
 द्वाणि मयुंतं उल्लोयंसि ओल्लवेह २ ता पउमावई देवि पडिवालेमाणा २ चिट्ठह ।
 तए णं ते कोडुंबिया जाव चिट्ठंति । तए णं सा पउमावई देवी कल्लं० कोडुं-
 बियपुरिसे सद्दावेइ २ ता एवं वयासी—खिप्पामेव भो देवाणुप्पिया ! सागेयं णयरं
 सत्तिमतरबाहिरियं आसियसम्मज्जिओवलित्तं जाव पच्चप्पिणंति । तए णं सा
 पउमावई देवी दोच्चपि कोडुंबिय जाव खिप्पामेव लहुकरणजुत्तं जाव जुत्ता-
 मेव (उवट्टुदेह, तए णं तैवि ततेक्) उवट्टुवेंति । तए णं सा पउमावई अंतो
 अतेउरंसि ष्हाया जाव धम्मियं जाणं डुरुडा । तए णं सा पउमावई णियग-
 परिवालसंपरिवुडा सागेयं णयरं मज्झमज्झेणं णिज्जइ २ ता जेणेव पुक्खरणी
 तेणेव उवागच्छइ २ ता पोक्खरणि ओगाहइ २ ता जलमज्जणं जाव परम-
 सुइधूया उल्लपडसाडया जाइं तस्थ उप्पलाइं जाव गेण्हइ २ ता जेणेव णाग-
 धरए तेणेव पहारेत्थ गमणाए । तए णं पउमावईए दासचेडीओ बहूओ पुष्फ-
 पडलगहत्थगयाओ धूयकडुच्छुमहत्थगयाओ षिट्ठओ समणुगच्छंति । तए णं पउमा-
 वई सत्तिवड्डीए जेणेव णागधरए तेणेव उवागच्छइ २ ता णागधरयं अणुप्प-
 विसइ २ ता लोमहत्थगं जाव धूवं डहइ २ ता पडिबुद्धि (रायं) पडिवाले-
 माणी २ चिट्ठइ । तए णं पडिबुद्धी (राया) ष्हाए हत्थिखंधवरणए सकारंठ
 जाव सेयवरचाधरारहि (महया) हयगयरहजोहमहयाभडगचडगरपहकरेहि सागेयं
 णगरं मज्झमज्झेणं णिगच्छइ २ ता जेणेव णागधरए तेणेव उवागच्छइ २
 ता हत्थिखंधओ पच्चोरुहइ २ ता आलोए पणामं करेइ २ ता पुष्फमंडवं
 अणुपविसइ २ ता पासइ तं एगं महं सिरिदामगंडं । तए णं पडिबुद्धी तं
 सिरिदामगंडं सुइरं कालं गिरिक्खइ २ ता तंसि सिरिदामगंडंसि जायविम्हए
 सुबुद्धि अमच्चं एवं वयासी—तुमं णं देवाणुप्पिया ! मम दोच्चेणं बहूणि गामा-
 गर जाव सण्णिवेसाइं आहिंइसि बहूणि राईसर जाव गिहाइं अणुपविससि,
 तं अत्थि णं तुमे कर्हिचि एरिसए सिरिदामगंडे विट्ठुप्पवे जारिसए णं इमे पउमा-
 वईए देवीए सिरिदामगंडे ? तए णं सुबुद्धी पडिबुद्धि स्यं एवं वयासी—एवं
 खलु सामी ! अहं अण्णया कयाइं तुडमं दोच्चेणं मिहितं रायहाणि गए । तस्थ

षं भए कुंभगस्स रण्णो धूयाए पडमावईए देवीए अत्तयाए मल्लीए संवच्छरपडि-
 लेहणमसि दिव्वे सिरिदामगंके दिट्ठपुट्ठे । तस्स षं सिरिदामगंकेत्त इसे पजमा-
 वईए देवीए सिरिदामगंके समयहस्सइमपि कलं ण अत्तइ । तए षं पडिबुद्धी
 राया सुबुद्धि अमत्तं एवं वयासी-केरिसिया षं देवाणुप्पिया ! मल्ली विदेह-
 रायवरकण्णः जस्त षं संवच्छरपडिलेहणमसि सिरिदामगंकेत्त पडमावईए देवीए
 सिरिदामगंके समयहस्सइमपि कलं ण अत्तइ ? । तए षं सुबुद्धी पडिबुद्धि
 इण्णपरारं एवं वयासी-एवं खलु सामी ! मल्ली विदेहरायवरकण्णगा
 सुपट्टियत्तुम्पणपचरुत्तरणा वण्णओ । तए षं पडिबुद्धी राया सुबुद्धिस्स
 अमत्तस्स अत्तिए एयमत्तं सोच्चा णिसत्थं सिरिदामगंकेत्तणिसहासे दूयं सदा
 वेइ २ ता एवं वयासी-गच्छाहि षं तुभं देवाणुप्पिया ! मिहितं रायहाणि,
 तत्थ षं कुंभगस्स रण्णो धूयं पमावईए देवीए अत्तियं यत्तिले विदेहरायवर-
 कण्णयं मम भारियत्ताए वरेहि जइ धि य षं ता सयं रज्जसुंका । तए षं से
 दूए पडिबुद्धिणा रण्णा एवं दूत्ते समाणे हट्ठनुदंठे पडिसुणेइ पडिसुणेत्ता
 जणेव तए गिहे जणेव च्चाउघंटे आसरहे तेणेव उवागच्छइ २ ता चाउघंटे
 आसरहं पडिकप्पावेइ २ ता दुरूढे जाव ह्यगयमह्यामडचडगरेणं साएयाओ
 णिसगच्छइ २ ता जणेव विदेहजणवए जणेव मिहिला रायहाणी तेणेव पहा-
 रेत्थ समणाए ॥७५॥ तेणं कालेणं तेणं समएणं अंगणां जणवए होत्था तत्थ
 षं चंवा णामं जयरी होत्था । तत्थ षं चंवाए जयरीए चंदच्छाए अंगरावा
 होत्था । तत्थ षं चंवाए जयरीए अरहण्णगपामोक्खा बहुये संजत्ता णावावाणियगा
 परिक्खंति अट्ठा जाव अपरिक्खयार । तए षं से अरहण्णगे समणोवासए यावि
 होत्था अहिमयजीवाजीवे वण्णओ । तए षं तेत्ति अरहण्णगपामोक्खाणं संजत्ता-
 णावावाणियगाणं अण्णया कयाइ एपयओ सहियाणं इमेयाख्वे मिहोकहा
 समुत्ता (संता)वे समुप्पज्जित्था-सेयं खलु अरहं गणिमं च धरिमं च मेज्जं च
 पारिक्खेत्तं च भंडगं गहाय लवणसमुद्धं पोयवहणेणं ओगाहित्तए-त्तिकदट्ठ
 अण्णमण्णं एयमत्तं पडिसुणेत्ति २ ता गणिमं च ४ गेण्हंति २ ता सपडिसाग-
 डिं च सज्जेत्ति २ ता गणिमस्त ४ भंडगस्स सगडिसागडियं भरंति २ ता
 सोहणंसि तिहिकरणवत्तमुहुत्तंसि त्रिउवं असणं ४ उवक्कडवेत्ति मित्तणाइ०
 भोयणवेत्ताए भुंजावेत्ति जाव थापुच्छंति २ ता सगडीसागडियं जोयंति २ ता

चंपाए णयरीए मज्झमज्झेणं णिमगच्छति २ ता जेणेव गंभीरए पोयपट्टणे तेणेव
 उवागच्छति २ ता सगडीसागडियं मोर्यति २ ता पोयवहणं सज्जेति २ ता
 गणिमस्स जाव चउविहूस्स भंडगस्स भरति तंदुलाण य समियस्स य तेत्तस्स
 य घयस्स य गुलस्स य गोरसस्स य उदयस्स य उदयभायणाण य ओसहाण य
 भेसज्जाण य तणस्स य कट्टस्स य आवरणाण य पहरणाण य अण्णेसि च बहूणं
 पोयवहणपाउग्गाणं दव्वाणं पोयवहणं भरति २ ता मोहणंसि तिहिकरण-
 णवखत्तमूहत्तंसि विउलं असणं ४ उवक्खडावेति २ मित्तणाइ० आपुच्छति २
 ता जेणेव पोयट्टाणे तेणेव उवागच्छति । तए णं तेसि अरहण्णग जाव वाणिय-
 गाणं जाव परिणो जावताहि इट्ठीहि जाव वग्गूहि अभिणंइता य अभिसंथुण-
 माणा य एवं वयासी-अज्ज ! ताय ! भाय ! माउल ! भाइणेज्ज ! भगवया
 समूहेणं अभिरविखज्जमाणा २ चिरं जीवह भट्टं च भे पुणरवि लद्धट्ठे कयकज्जे
 अणहसमगे णियं घरं हवमागए पासांमत्तिकट्टं ताहि सोमाहि णिट्ठाहि
 दोहाहि सप्पिवासाहि पप्पुर्याहि दिट्ठीहि णिरीक्खमाणा मुहुत्तमेत्तं संचिट्ठति ।
 तओ समाणिएसु पुष्कल्लकस्सेसु दिग्गोसु सरसरत्तचंदणद्वरपंचंगुलितलेसु
 अणुविखत्तंसि धूवंसि पूइएसु समूद्वाएसु संसारियासु वल्लयबाहासु ऊसिएसु
 सिएसु झयग्गेसु पडुप्पवाइएसु तूरेसु जइएसु सव्वसउणेसु गहिएसु रायवरसास-
 णेसु महया उविकट्टसीहणाय जाव रवेणं पक्खुभियमहासमुद्दरवभूयपिव मेइणि
 करेमाणा एगदिसि जाव वाणियगा णावं बुद्धा । तओ पुस्समाणवो वक्कमूदाहु-
 हं भो ! सव्वेसिमवि अत्थसिद्धी उवट्टियाइं कल्लाणाइं पडिहयाइं सव्वपावाइं
 ज्तो पूसो विजओ मुहुत्तो अयं देसकालो । तओ पुस्समाणएणं वक्केमूदाहिए
 हट्टुत्तुट्ठे कुच्छिधारकणधारगम्भज्जसंजत्ताणावावाणियगा वावारिसु तं णावं
 पुण्णुच्छंणं पुण्णुमुहि बंधणेहितो मुंचंति । तए णं सा णावा विमुक्कबंधणा पवण-
 बलसमाहया ऊसियसिया विततपवखा इव गरुड (स) ज्वई गंगासलिलतिक्ख-
 सोयवेगेहि संखुब्भमाणी २ उम्मीतरंगमालासहस्साइं समइच्छमाणी २ कइवएहि
 अहोरत्तेहि लवणसमूहं अणेगाइं जोयणसयाइं ओगाढा । तए णं तेसि अरहण्णप-
 पामोक्खणं संजत्ताणावावाणियगाणं लवणसमूहं अणेगाइं जोयणसयाइं ओगा-
 ढाणं समाणाणं बहूइं उप्पाइयसयाइं पाउवभूयाइं संजहा-अकाले गज्जिए अकाले
 विज्जुए अकाले थणियसट्टे अभिक्खणं २ आगासे देवघाओ णच्चंति, एणं च णं
 महं पिसायरुवं पासंति तालजंघं दिवं गयाहिं वाहाहिं मसिमूत्तगमहिसकालं

भरियमेह्वणं संबोद्धं निरगयग्गदंतं णित्तलालियजमलज्जुयलजीहं आऊसियवयण-
गंडदेसं चीणच्चि(पिड)मिदणसियं विगयभुगमुमयं खज्जीयपदित्तक्खुरागं
उत्तासणयं विसालवच्छं विसालकुच्छं पलंबकुच्छं पहेसियपयलियपयडियगतं
पणच्छमाणं अप्फोडंतं अग्गिवयंतं अभिग्जजंतं बहुसो २ अट्टट्टहासे विणिम्मयंतं
णीलप्लत्तगयल्लुलियअयसिक्कुमुमप्पगासं खुरधारं असिग्गहाय अमिमुहुमावयमाणं
पासंति । तए णं ते अरहण्णग्गवज्जा संजसाणावावाणियगा एगं च णं महं ताल-
पिसायं (पासति) पासित्ता तालजंघं त्रिबंगयाहिं बाह्याहिं फुट्टिसिरं भमरणिगर-
वरमासारासिमहिसकालयं भरियमेह्वणं सुप्पणहं फालसरिसजीहं संबोद्धं
धवलवट्टअमिलिट्टित्तखथिरपीणकुडिलदाढोवगूढवयणं विकोसियधारासिज्जुयल-
समसारसतणुयच्चललंतरसलोलचवलफुरुफुरेंतणित्तलालियग्गजीहं अवय-
च्छियमहत्तलविगयबीभच्छलालपगलंतरत्ततालुयं हिगलुयनग्गमकंदरविलं व
अंजणगिरिस्स अग्गिजालुग्गिलंतवयणं आऊसियअक्खम्मउडुगंडदेसं चीण-
च्चि(पिड)मिदवंकभग्गगासं रोसागयधमधमेत्तमारुयणिट्टुरखरफहसज्जुसिरं ओमु-
ग्गगासियपुडं घाडुम्भडरइयभीसणमहं उद्धमुहकण्णसवकुलियमहंतविगयलोम-
सखात्तगलदंतवलियकण्णं विगलदिप्पंतलोयणं भिडडित्ठि(य)णिडालं णरसिर-
मालपारणद्धिच्चिधं विचित्तगोणसमुबद्धपरिकरं अवहोलंतपुप्फुयायंतसप्पविच्छुय-
गोधुंदरत्तलसरडविरइयविचित्तवेयच्छमालियागं भोगकूरकहसप्पधमधमेत्तलंबं-
तकण्णपूर मज्जारसियात्तलइयखंधं दित्तधुयंतघूपकयकुंतलसिरं घंटारवेण भीमं
भयंकरं कायरजणहिययफोडणं दित्तमट्टट्टहासं विणिम्मयंतं वसाहहिरपूयमंसमल-
मलिययोच्चडतणं उत्तासणयं विसालवच्छं पेच्छंता भिण्णणहमुहुणयणकण्ण-
वरवग्गचित्तकत्तीणिवसथं सरसहहिरगयच्चम्मविययऊसवियबाहुज्जुयलं ताहि
य खरफहसअसिणिद्धअणिट्टदित्तअमुभअप्पियअकंतवग्गूहि य तज्जयंतं पासंति
तं तालपिसायरूवं एज्जमाणं पासंति २ त्ता भीया संजायभया अण्णमण्णस्स
कायं समतुरंगेमाणा २ बहूणं इंदाण य खंदाण य रुट्टिसिवेसमण्णगागाणं
भूयण य जक्खान य अज्जकोट्टकिरियाण य बहूणि उवाइयसयाणि ओवाइय-
साणा २ चिट्ठंति । तए णं से अरहण्णए समगोवासए तं दिव्वं पिसायरूवं
एज्जमाणं पासइ २ त्ता अभीए अतत्थे अचलिए असंभंते अणाउले अणुविग्गो
अभिण्णनुहुरागणधणवण्णे अदीणविमणमाणसे पोयवहणस्स एग्गदेसंसि वत्थं तेणं

भूमि पमज्जइ २ ता ठाणं ठाइ २ ता करयल जाव एवं वयासी-णमोत्थ
 णं अरहंताणं जाव संपत्ताणं, जइ णं अहं एत्तो उवसग्गाओ मुंचामि तो मे
 कप्पइ पारित्तए, अहं णं एत्तो उवसग्गाओ ण मुंचामि तो मे तथा पच्चक्खा-
 एयव्वे-त्ति कट्टु सागारं भत्तं पच्चक्खाइ । तए णं से पिसायरूवे जेणेव
 अरहणए समणोवासए तेणेव उवागच्छइ २ ता अरहणगं एवं वयासी-हं
 भो ! अरहणगा ! अपत्थियपत्थिया ! जाव परिवज्जिया ! णो खलु कप्पइ
 तव सीलव्वयगुणवेरमणपच्चक्खाणे पोसहोववासइं चालित्तए वा एवं खोभे-
 तए वा खडित्तए वा भजित्तए वा उज्झित्तए वा परिच्चइत्तए वा । तं जइ णं
 तुमं सीलव्वयं जाव ण परिच्चयसि तो ते अहं एयं पोयवहणं दोहि अंगुलियाहि
 गेण्हामि २ ता सत्तट्टतलप्पमाणमेत्ताइं उड्डं वेह्मासं उव्विहामि २ ता अंतो-
 जलसि णिच्छोलिमि जेणं तुमं अट्टदुहट्टवसट्टे असमाहिपत्ते अकाले चैव जीवियाओ
 ववरोविज्जसि । तए णं से अरहणए समणोवासए तं देवं मणसा चैव एवं
 वयासी-अहं णं देवाणुप्पिया ! अरहणए णामं समणोवासए अहिगयजीवाजीवे,
 णो खलु अहं सक्का केणइ देवेण वा जाव णिग्गंथाओ पावयणाओ चालित्तए वा
 खोभित्तए वा विपरिणाभेत्तए वा, तुमं णं जा सट्ठा तं करेहि-त्तिकट्टु अभोए
 जाव अभिण्णमुहरागणयणवण्णे अदीणविमणमाणसे णिच्चले णिष्फंदे तुसिणीए
 धम्मज्झाणोवगए विहरइ । तए णं से दिव्वे पिसायरूवे अरहणगं समणोवासगं
 दोच्चंपि तच्चंपि एवं वयासी-हं भो अरहणगा ! जाव अदीगविमण-
 माणसे णिच्चले णिष्फंदे तुसिणीए धम्मज्झाणोवगए विहरइ । तए णं से
 दिव्वे पिसायरूवे अरहणगं धम्मज्झाणोवगयं पासइ २ ता बलियतरागं आसु-
 रुत्ते तं पोयवहणं दोहि अंगुलियाहि गिण्हइ २ ता सत्तट्टतत्ताइं जाव अरह-
 णगं एवं वयासी-हं भो अरहणगा ! अपत्थियपत्थिया ! णो खलु कप्पइ
 तव सीलव्वय तहेव जाव धम्मज्झाणोवगए विहरइ । तए णं से पिसायरूवे
 अरहणगं जाहे णो संचाएइ णिग्गंथाओ० चालित्तए वा ०ताहे उवसत्ते जाव
 णिच्चिण्णे तं पोयवहणं सणियं २ उवरि जलस्स ठवेइ २ ता तं दिव्वं पिसाय-
 रूवं पडिसाहरइ २ ता दिव्वं देवरूवं विउव्वइ २ ता अंतलिव्वखण्डिव्वणे
 सखिखिणियाइं जाव परिहिए अरहणगं समणोवासगं एवं वयासी-हं भो अर-
 हणगा ! धण्णोऽसि णं तुमं देवाणुप्पिया ! जाव जीवियफले जस्स णं तव

णिग्गंथे पावयणे इमेयारूवा पडिवत्ती लद्धा पत्ता अभिसमण्णागया, एवं खलु देवाणुप्पिया ! सर्वके देविदे देवराया सोहम्मि कप्पे सोहम्मर्वाडिसए विमाणे सभाए सुहम्मिआए बहूणं देवाणं मज्झगए महया २ सद्देणं एवं आइवल्लइ ४— एवं खलु जंबुद्वीवे २ भारहे वासे चंपाए णयरीए अरहण्णए समणोवासए अभिगयजीवाजीवे णो खलु सक्का केणइ देवेण वा दाणवेण वा ६ णिग्गंथाओ पावयणाओ चालित्तए वा जाव विपरिणामित्तए वा । तए णं अहं देवाणु- प्पिया ! सक्कस्स देविदस्स णो एयमट्ठं सद्दहामि० । तए णं मम इमेयारूवे अज्झत्थिए०—गच्छामि णं अरहण्णयस्स अंतियं पाउड्ढमवामि जाणामि ताव अहं अरहण्णं किं पियधम्मि णो पियधम्मि, दद्धधम्मि णो दद्धधम्मि, सीलव्वयगुणे किं चालेइ जाव परिच्चयइ णो परिच्चयइ—त्तिकट्टु एवं संपेहेमि २ ता ओहिं पउं- जामि २ ता देवाणुप्पियं ओहिणा आभोएमि २ ता उत्तरपुरच्छिमं २ उत्तर- वेउच्चियं० ताए उक्किट्ठाए जाव जेणेव लवणसमुद्दे जेणेव देवाणुप्पिया तेणेव उवागच्छामि २ ता देवाणुप्पियाणं उवसगं करेमि णो चेव णं देवाणुप्पिया भीया वा०, तं जं णं सर्वके देविदे देवराया एवं वयइ सच्चे णं एसमट्ठे तं दिट्ठे णं देवाणुप्पियाणं इड्ढी जाव परक्कमे लद्धे पत्ते अभिसमण्णागए । तं खामेमि णं देवाणुप्पिया ! खमंतु मरहंतु णं देवाणुप्पिया ! णाइभुज्जो २ एवं करणयाए—त्तिकट्टु पंजलिउडे पायवडिए एयमट्ठं विणएणं भुज्जो २ खामेइ २ ता अरहण्णगस्स य दुवे कुंडलज्जुयले दलयइ २ ता जामेव दिसि पाउड्ढूए तामेव दिसि पडिगए ॥७६॥ तए णं से अरहण्णए णिव्वसग्गमिति- कट्टु पडिमं पारेइ । तए णं ते अरहण्णगपामोक्खा जाव वाणियगा दक्खि- णाणुकूलेणं वाएणं जेणेव गंभीरए पोयपट्टणे तेणेव उवागच्छंति २ ता पोयं लंबेति २ ता सगडिसागडं सज्जेति २ ता तं गणिमं च ४ सगडि० संकामेति २ ता सगडी० जोएति २ ता जेणेव मिहिला० तेणेव उवागच्छंति २ ता मिहिलाए रायहाणीए बहिया अग्गुज्जाणंसि सगडीसागडं मोएति २ ता मिहिलाए रायहाणीए तं महत्थं महग्घं महरिहं विउलं रायारिहं पाहुडं कुंडल- ज्जुयलं च गेण्हंति २ ता मिहिलाए रायहाणीए अणुप्पविसंति २ ता जेणेव कुंभए राया तेणेव उवागच्छंति २ ता करयल जाव महत्थं विव्व कुंडलज्जुयलं उवणेति । तए णं कुंभए राया तेसि संजत्तगाणं जाव पडिच्छइ २ ता मल्ल

विदेहरायवरकण्णं सद्वावेइ २ ता तं दिव्वं कुंडलजुयलं मल्लीए विदेह-
 रायवरकण्णमाए पिण्णेइ पिण्णेइत्ता पडिविसज्जेइ । तए णं से कुंभए
 राया ते अरहण्णगपामोवखे जाव वाणियगो विपुलेणं असण वत्थांगमल्ला-
 लंकारेणं जाव उस्सुवकं वियरइ २ ता रायमगमोगादेइ आवासे वियरइ
 २ सा पडिविसज्जेइ । तए णं अरहण्णगसंजत्तया जेणेव रायमगमोगादे
 आवासे तेणेव उवागच्छति २ ता भंडववहरणं करेति २ ता पडिभंडं गेहंति
 २ ता सगडी० भरेति जेणेव गंभीरए पोयपट्टणे तेणेव उवागच्छति २ ता
 पोयवहणं सज्जेति २ ता भंडं संकामेति चक्खिणाणु० जेणेव चंपोयट्टाणे
 तेणेव पोयं लंबेति २ ता सगडी० सज्जेति २ ता तं गणिमं ४ सगडी०
 संकामेति जाव महत्थं पाहुंडं दिव्वं च कुंडलजुयलं गेहंति २ ता जेणेव
 चंदच्छाए अंगराया तेणेव उवागच्छति २ ता तं महत्थं जाव उवणेति । तए
 णं चंदच्छाए अंगराया तं दिव्वं महत्थं च कुंडलजुयलं पडिच्छइ २ ता ते अरह-
 ण्णगपामोवखे एवं वयासी-तुम्भे णं देवाणुप्पिया ! बहूणि गासागर जाव
 आहिडह लवणसमहुं च अभिवल्लणं २ पोयवहणेह ओगाहेह, तं अत्थियाइं भे
 केइ कीहिचि अच्छेरए दिट्टुपुब्बे ? । तए णं ते अरहण्णगपामोवखा चंदच्छायं
 अंगरायं एवं वयासी-एवं खलु सामी ! अम्हे इहेव चंपाए णयरीए अरहण्णग-
 पामोवखा बहवे संजत्तगाणावावाणियया परिवसामो । तए णं अम्हे अणया
 कयाइ गणिमं च ४ तहेव अहीण(म) अइरित्तं जाव कुंभगस्स रणेणो उवणेसो ।
 तए णं से कुंभए मल्लीए विदेहरायवरकण्णाए तं दिव्वं कुंडलजुयलं पिण्णेइ
 २ ता पडिविसज्जेइ । तं एस णं सामी ! अम्हेहि कुंभगरायभवणंसि मल्ली
 विदेहरायवरकण्णा अच्छेरए दिट्ठे । तं णो खलु अणया कावि तारिसिया
 देवकण्णा वा जाव जारिसिया णं मल्ली विदेहरायवरकण्णा । तए णं चंदच्छाए
 (ते) अरहण्णगपामोवखे सक्कारेइ सम्माणेइ स० २ ता [उस्सुं कं वियरइ]
 पडिविसज्जेइ । तए णं चंदच्छाए वाणियगाज्जणियहासे दूयं सद्वावेइ जाव
 जइ वि य णं सा सयं रज्जसुक्का । तए णं से दूए हट्ट जाव पहारेत्य
 गमणाए २ ॥७७॥ तेणं कालेणं तेणं समएणं कुणाला णामं जणवए- होत्था ।
 तत्थं सावत्थो णामं णयरी होत्था । तत्थं णं हप्पो कुणालाहिवई णामं
 राया होत्था । तस्स णं हप्पिस्स धूया धारिणीए देवीए अत्तया सुवाहु णामं
 दारिया होत्था सुकुमाल जाव रूवेण य जोवणेण य लावणेण य उक्किट्ठा

उक्किट्टसरीरा जाया यावि होत्था । तीसे णं सुबाहुए दारियाए अण्णया चाउ-
 म्मासियमज्जणए जाए यावि होत्था । तए णं से रूपी कुणालाहिवई सुबाहुए
 दारियाए चाउम्मासियमज्जणयं उव्वट्ठियं जाणइ जाणइत्ता कोडुंबियपुरिसे
 सद्दावेइ २ ता एवं वयासी-एवं खलु देवाणुप्पिया ! सुबाहुए दारियाए कल्लं
 चाउम्मासियमज्जणए भविस्सइ । तं कल्लं तुब्भे णं रायमग्गमोगाढंसि (चउ-
 वकंसि) मंडवंसि जलयलयदसद्धवणमल्लं साहरेह जाव सिरिदामगंडे ओलइति ।
 तए णं से रूपी कुणालाहिवई सुवण्णगरसेणि सद्दावेइ २ ता एवं वयासी-
 लिप्पामेव भो देवाणुप्पिया ! रायमग्गमोगाढंसि पुप्फमंडवंसि णाणाविहपंच-
 वण्णेहि तंदुल्लेहि णयरं आलिहह तस्स बहूमज्जइसभाए पट्टयं एएह जाव
 पच्चप्पिणंति । तए णं से रूपी कुणालाहिवई हत्थिखंधवरगए चाउरंगिणीए
 सेणाए महया मडचडगर जाव अंतेउरपरियालसंपरिवुडे सुबाहुं दारियं पुरओ
 कट्टे जेणेव रायमग्गे जेणेव पुप्फमंडवे तेणेव उवागच्छइ २ ता हत्थिखंधाओ
 पच्चोरुहइ २ ता पुप्फमंडवे अणुप्पविसइ २ ता सीहासणवरगए पुरत्था-
 भिसुहे सणिसण्णे । तए णं ताओ अंतेउरियाओ सुबाहुं दारियं पट्टयंसि दुरू-
 हेति २ ता सेयापीयएहि कलसेहि ष्हाणंति २ ता सव्वालंकारविभूसियं करंति
 २ ता पिउणो पायंबंदिउं उव्वणंति । तए णं सुबाहुं दारिया जेणेव रूपी राया
 तेणेव उवागच्छइ २ ता पायग्गहणं करेइ । तए णं से रूपी राया सुबाहुं
 दारियं अंके णिवेसेइ २ ता सुबाहुए दारियाए रूवेण य जोव्वणेण य लाव-
 ण्णेण य जाव विम्भिए(जायविम्भए) वरिसधरं सद्दावेइ २ ता एवं वयासी-तुमं
 णं देवाणुप्पिया ! मम दोच्चेणं बहूणि गामागरणगरगिहाणि अणुप्पविससि, तं
 अत्थियाइं ते कस्सइ रण्णो वा ईसरस्स वा कहिंचि एयारिसए मज्जणए दिट्ठ-
 पुव्वे जारिसए णं इमीसे सुबाहुदारियाए मज्जणए ? तए णं से वरिसधरे रूपि
 करयल जाव एवं वयासी-एवं खलु सामी ! अहं अण्णया तुब्भेणं दोच्चेणं मिहिलं
 गए, तत्थे णं मए कुंभग्गस्स रण्णो धूयाए पभावईए देवीए अत्तयाए मत्तीए
 विदेहरायवरकण्णगाए मज्जणए दिट्ठे, तस्स णं मज्जणग्गस्स इमे सुबाहुएदारि-
 याए मज्जणए सयसहस्सइमं पि कलं ण अग्घेइ । तए णं से रूपी राया वरिस-
 धरस्स अंतिए एथमट्ठं सोच्चा णिसम्म(सेसं तहेव) मज्जणगज्जणियहासे दूयं
 सद्दावेइ जाव जेणेव मिहिला णयरी तेणेव पहारेत्थे गमणाए (३)॥७८॥ तेषं

कालेणं तेणं समएणं कासी णामं जणवए होत्था । तत्थ णं वाणारसी णामं
णयरी होत्था । तत्थ णं संखे णामं कासीराया होत्था । तए णं तीसे मत्तोए
वि० अण्णया कयाइं तस्स दिव्वस्स कुंडलजुयलस्स संधी विसंघडिए यावि होत्था ।
तए णं से कुंभए राया सुवण्णगारसेणि सद्दावेइ २ ता एवं वयासी-तुम्भे णं
देवाणुपिपाया ! इमस्स दिव्वस्स कुंडलजुयलस्स संधि संघाडेह । तए णं सा सुवण्ण-
गारसेणी एयमट्ठं तहत्ति पडिमुणेइ २ ता तं दिव्वं कुंडलजुयलं गेण्हइ २ ता
जेणेव सुवण्णगारभिसियाओ तेणेव उवागच्छइ २ ता सुवण्णगारभिसियासु
णिवेसेइ २ ता वहाँहि आएहि य जाव परिणामेमाणा इच्छति तस्स दिव्वस्स
कुंडलजुयलस्स संधि घडित्तए णो चैव णं संचाएइ संघडित्तए । तए णं सा
सुवण्णगारसेणी जेणेव कुंभए तेणेव उवागच्छइ २ ता करयल जाव वद्धावेत्ता
एवं वयासी-एवं खलु सामी ! अज्ज तुम्भे अम्हे सद्दावेह जाव संधि संघाडेत्ता
एयमाणत्तियं पच्चप्पिणह । तए णं अम्हे तं दिव्वं कुंडलजुयलं गेण्हामो जेणेव
सुवण्णगारभिसियाओ जाव णो संचाएमो संघाडित्तए । तए णं अम्हे सामी !
एयस्स दिव्वस्स कुंडलस्स अण्णं सरिसयं कुंडलजुयलं घडेमो । तए णं से कुंभए
राया तीसे सुवण्णगारसेणीए अत्तिए एयमट्ठं सीच्चा णिसम्म आसुत्ते ४
तिवत्तियं भिउडि णिडाले साहट्टु एवं वयासी-(से के)केस णं तुम्भे कलायाणं
भवह ? जे णं तुम्भे इमस्स [दिव्वस्स] कुंडलजुयलस्स णो संचाएह संधि
संघाडित्तए ? ते सुवण्णगारे णिव्विसए आणवेइ । तए णं ते सुवण्णगारा कुंभेणं
रण्या णिव्विसया आणत्ता समाणा जेणेव साइं २ गिहाइं तेणेव उवा-
गच्छति २ ता समंडमत्तोवगरणमायाओ मिहिलाए रायहाणीए मज्झमज्झेणं
णिव्विखमंति २ ता विदेहस्स जणवयस्स मज्झमज्झेणं जेणेव कासी जणवए जेणेव
वाणारसी णयरी तेणेव उवागच्छति २ ता अग्गुज्जाणसि सगडोसागडं मोएत्ति
२ ता महत्थं जाव पाहुडं गेण्हति २ ता वाणारसीए णयरीए मज्झमज्झेणं
जेणेव संखे कासीराया तेणेव उवागच्छति २ ता करयल जाव वद्धावेत्ति २
ता (पाहुडं पुरओ ठावेत्ति २ ता संखरायं) एवं वयासी-अम्हे णं सामी !
मिहिलाओ णयरीओ कुंभएणं रण्या णिव्विसया आणत्ता समाणा इहं हव्व-
मागया, तं इच्छामो णं सामी ! तुम्भं बाहुच्छयापरिग्गहिया णिदमया णिस्-
त्विग्गमा सुहंसुहेणं परिवसिडं । तए णं संखे कासीराया ते सुवण्णगारे एवं

वयासी—किं णं तुब्भे देवाणुप्पिया ! कुंभएणं रण्णा णिव्विसया आणत्ता ? तए णं ते सुवण्णगारा संखं एवं वयासी—एवं खलु सामी ! कुंभगस्स रण्णो धूयाए पभावईए देवीए अत्तयाए मल्लीए कुंडलजुपलस्स संधी विसंघडिए । तए णं से कुंभए सुवण्णगारसेणि सद्दावेइ जाव णिव्विसया आणत्ता । तं एएणं कारणेणं सामी ! अस्हे कुंभएणं णिव्विसया आणत्ता । तए णं से संखे सुवण्णगारे एवं वयासी—केरिसिया णं देवाणुप्पिया ! कुंभगस्स धूया पभावईदेवीए अत्तया मल्ली विदेहरायवरकण्णा ? तए णं ते सुवण्णगारा संखं रायं एवं वयासी—णो खलु सामी ! अण्णा कावि तारिसिया देवकण्णा वा जाव जारिसिया णं मल्ली विदेहवररायकण्णा । तए णं से संखे कुंडल (जुअल)जणियहासे दूयं सद्दावेइ जाव तहेव पहारेत्थ गमणाए (४) ॥७६॥ तेणं कालेणं तेणं समएणं कुरुजणवए होत्था । हत्थिणाउरे णयरे । अदीणसत्तू णामं राया होत्था जाव विहरइ । तत्थ णं मिहिलाए [तस्स णं] कुंभगस्स पुत्ते पभावईए अत्तए मल्लीए अणु(मरा)जायए मल्लदिण्णेणं णामं कुमारे जाव जुवराया यावि होत्था । तए णं मल्लदिण्णे कुमारे अण्णया कोडुंबियपुरिसे सद्दावेइ २ ता एवं वयासी—गच्छह णं तुब्भे मम पमदवणंसि एगं महं चित्तसभं करेह अणेग जाव पच्चप्पिणंति । तए णं से मल्लदिण्णे चित्तगरसेणि सद्दावेइ २ ता एवं वयासी—तुब्भे णं देवाणुप्पिया ! चित्तसभं हावभावविलासविब्बोयकलिएहिं रुवेहिं चित्तेह जाव पच्चप्पिणह । तए णं सा चित्तगरसेणी तहत्ति पडिसुणेइ २ ता जेणेव सयाइं गिहाइं तेणेव उथागच्छइ २ ता तूलियाओ वण्णए थ गेण्हइ २ ता जेणेव चित्तसभां तेणेव (उवागच्छइ २ ता) अणुप्पविसइ २ ता भूमिभागे विरयइ २ ता भूमि सज्जेइ २ ता चित्तसभं हावभाव जाव चित्तेउं पयत्ता यावि होत्था । तए णं एगस्स चित्तगरस्स इमेयारूवा चित्तगरलद्धी लद्धा पत्ता अभिसमण्णागया—जरुस णं दुपयस्स वा चउपयस्स वा अपयस्स वा एगदेसमवि पासइ तस्स णं देसाणुसारेणं तयाणुरूवं णिव्वत्तेइ । तए णं से चित्तगरदारए मल्लीए जवणियंतरियाए जालंतरेण पायंगुट्ठं पासइ । तए णं तस्स (णं) चित्तगरस्स इमेयारूवे अज्जत्थिए जाव समुप्पज्जित्था—सेयं खलु ममं मल्लीए वि० पायंगुट्ठाणुसारेणं सरिसगं जाव गुणोववेयं रूवं णिव्वत्तिए । एवं सपेहेइ २ ता भूमिभागं सज्जेइ २ ता मल्लीए वि०

पायांगट्टाणुसारेणं जाव णिव्वत्तेइ । तए णं सा चित्तगरसेणी चित्तसभं जावं
हावमावे चित्तेइ २ ता जेणेव मल्लदिण्णे कुमारे तेणेव उवागच्छइ २ ता
एयमाणत्तियं पच्चप्पिणइ । तए णं मल्लदिण्णे चित्तगरसेणिं सवकारेइ २ ०
विपुलं जीवियारिहं पीइदाणं दलयइ २ ता पडिविसज्जेइ । तए णं मल्ल-
दिण्णे कुमारे अण्णया ष्हाए अंतेउरपरियालसंपरिवूडे अम्मधाईए सद्धिं जेणेव
चित्तसभा तेणेव उवागच्छइ २ ता चित्तसभं अणुपविसइ २ ता हावमाव-
विलासविब्बोयकलियाडं रुवाइं पासमाणे २ जेणेव मल्लीए वि० । तयाणुरूवे
णिव्वत्तिए तेणेव पहारेत्थ गमणाए । तए णं से मल्लदिण्णे कुमारे मल्लीए
वि० तयाणुरूवं णिव्वत्तियं पासइ २ ता इमेयारूवे अज्झत्थिए जाव समुप्पज्जि-
त्था—एस णं मल्ली वि० त्तिकट्टु लज्जिए वीडिए वि (अडे)ड्डे सणियं २ पच्चो-
सवकइ । तए णं [तं] मल्लदिण्णं अम्मधाई सणियं २ पच्चोसवकंतं पासित्ता एवं
वयासी—किण्णं तुमं पुत्ता ! लज्जिए वीडिए विड्डे सणियं २ पच्चोसवकसि ?
तए णं से मल्लदिण्णे अम्मधाई एवं वयासी—जुत्तं णं अम्मो ! मम जेट्टाए
भगिणीए गुरुदेवयभूयाए लज्जणिज्जाए मम चित्तगरणिव्वत्तियं अणुपविसि-
त्तए ? तए णं अम्मधाई मल्लदिण्णं कुमारं एवं वयासी—णो खलु पुत्ता !
एस मल्ली, एस णं मल्लीए विदे० चित्तगरएणं तयाणुरूवे णिव्वत्तिए । तए
णं से मल्लदिण्णे अम्मधाईए एयमट्ठं सोच्चा णिसम्म आमुहत्ते ४ एवं
वयासी—केस णं भो ! से चित्तगरए अपत्थियपत्थिए जाव परिवज्जिए जे णं
मम जेट्टाए भगिणीए गुरुदेवयभूयाए जाव णिव्वत्तिए—त्तिकट्टु तं चित्तगरं
वज्जं आणवेइ । तए णं सा चित्तगरसेणी इमीसे कहाए लद्धुत्ता समाणं जेणेव
मल्लदिण्णे कुमारे तेणेव उवागच्छइ २ ता करयलपरिगहियं जाव वद्धावेत्ता
एवं वयासी—एवं खलु सामी ! तस्स चित्तगरस्स इमेयारूवा चित्तगरलद्धी
लद्धा पत्ता अभिसमण्णागया—जस्स णं दुपयस्स वा जाव णिव्वत्तेइ, तं मा णं
सामी ! तुब्भे तं चित्तगरं वज्जं आणवेह, तं तुब्भे णं सामी ! तस्स चित्तगर-
स्स अण्णं तयाणुरूवं दंडं णिव्वत्तेह । तए णं से मल्लदिण्णे तस्स चित्तगरस्स
संडासगं छिंदावेइ २ ता णिव्विसयं आणवेइ । तए णं से चित्तगरए मल्ल-
दिण्णेणं णिव्विसए आणत्ते समाणे सभंडमत्तोवगरणमाथाए मिहिलाओ णय-
रीओ णिव्वखमइ २ ता विदेहं जणवयं मज्झंमज्जेणं जेणेव कुरुजणवए जेणेव
हत्थिणाउरे णयरे जेणेव अदीणसत्तू राया तेणेव उवागच्छइ २ ता भंड-

णिवखेवं करेइ २ ता चित्तफलं सज्जेइ २ ता मल्लीए विदे० पायंगुहाणुसारेण
 रुवं णिव्वत्तेइ २ ता कषखंतरसि छुम्भइ २ ता महत्थं जाव पाहुडं गेण्हइ २
 ता हृत्थिणाउरं णयरं मज्झंमज्झेणं जेणेव अदीणसत्तू राया तेणेव उवागच्छइ २
 ता तं करयल जाव वडावेइ २ ता पाहुडं उवणेइ २ ता एवं वयासी-एवं
 खलु अहं सामी ! मिहिलाओ रायहाणीओ कुमगस्स रण्णो पुत्तेणं पभावईए
 देवीए अत्तएणं मल्लदिण्णेणं कुमारेणं णिव्विसए आणत्ते समाणे इह ह्ववमागए
 तं इच्छामि णं सामी ! तुम्भं बाहुच्छयापारिगग्हिए जाव परिवसित्तए । तए
 णं से अदीणसत्तू राया तं चित्तगरदारयं एवं वयासी-किण्णं तुमं देवाणु-
 प्पिया । मल्लदिण्णेणं णिव्विसए आणत्ते ? तए णं से चित्तगरदारए अदीण-
 सत्तू रायं एवं वयासी-एवं खलु सामी ! मल्लदिण्णे कुमारे अण्णया कयाई
 चित्तगरसेणि सदावेइ २ ता एवं वयासी-तुम्भे णं देवाणुप्पिया ! मम चित्त-
 सभं० तं चेव सव्वं भाणियव्वं जाव मम संडासगं छिदावेइ २ ता णिव्विसयं
 आणवेइ, तं एवं खलु [अहं] सामी ! मल्लदिण्णेणं कुमारेणं णिव्विसए आणत्ते ।
 तए णं अदीणसत्तू राया तं चित्तगरं एवं वयासी-से केरिसए णं देवाणुप्पिया !
 तुमे मल्लीए वि० तहाणुरूवे रुवे णिव्वत्तिए ? तए णं से चित्तगरे कखंतराओ
 चित्तफलयं णीणेइ २ ता अदीणसत्तुस्स उवणेइ २ ता एवं वयासी-एस णं
 सामी ! मल्लीए वि० तयाणुरूवस्स रुवस्स केइ आगारभावपडोयारे णिव्व-
 त्तिए, णो खलु सक्का केणइ देवेण वा जाव मल्लीए विदेहरायवरकण्णाए
 तयाणुरूवे रुवे णिव्वत्तिए । तए णं (से) अदीणसत्तू (राया) पडिरुव-
 जणियहासे दूयं, सदावेइ २ ता एवं वयासी-तहेव जाव पहारेत्थ गमणाए (५)
 ॥८०॥ तेणं कालेणं तेणं समएणं पंचाले जणवए । कपिल्लेपुरे णयरे । जियसत्तू
 णामं राया पंचालाहिवई । तस्स णं जियसत्तुस्स धारिणीपामोक्खं देविसहस्सं
 ओरोहे होत्था । तत्थ णं मिहिलाए चोक्खा णामं परिव्वाइया रिउव्वेय जाव
 (सु)परिणिट्ठिया यावि होत्था । तए णं सा चोक्खा परिव्वाइया मिहिलाए
 बहूणं राईसर जाव सत्थवाहपभिईणं पुरओ दाणधम्मं च सोयधम्मं च तित्था-
 भिसेयं च आध्वेमाणी पण्णवेमाणी परुवेमाणी उवदंसेमाणी विहरइ । तए णं
 सा चोक्खा परिव्वाइया अण्णया कयाई तिवडं च कुडियं च जाव धाउर-
 ताओ य गेण्हइ २ ता परिव्वाइयावसहाओ पडिणिक्खमइ २ ता पवि-

रत्नपरिव्वाइया सद्धि संपरिवुडा मिहिलं रायहाणि मज्झमज्जेणं जेणेव कुंभगस्स
 रण्णो भवणे जेणेव कण्णतेउरे जेणेव मल्ली वि० तेणेव उवागच्छइ २ ता
 उदयपरिकासियाए दम्भोवरिपच्चत्थयाए भिसियाए णिसियइ २ ता मल्लीए
 वि० पुरओ दाणधम्मं च जाव विहरइ । तए णं मल्ली वि० चोवखं परिव्वाइयं
 एवं वयासी-तुम्हे णं चोवखे ! किमूलए धम्मे पण्णत्ते ? तए णं सा चोवखा
 परिव्वाइया मल्लि वि० एवं वयासी-अम्हं णं देवाणुप्पियाए ! सोयमूलए धम्मे
 पण्णत्ते, जं णं अम्हं किञ्चि असुई भवइ तं णं उदण्ण य मट्टियाए जाव
 अविघ्घेणं सगं गच्छामो । तए णं मल्ली वि० चोवखं परिव्वाइयं एवं वयासी-
 चोवखा ! से जहाणामए केई पुरिसे रहिरकयं वत्थं रहिरेण चेव धोव्वजा
 अत्थि णं चोवखा ! तस्स रहिरकयस्स वत्थस्स रहिरेणं धोव्वमाणस्स काई
 सोही ? णो इणट्ठे समट्ठे । एवामेव चोवखा ! तुम्हे णं पाणाइवाएणं जाव
 मिच्छादंसणसल्लेणं णत्थि काई सोही जहा व तस्स रहिरकयस्स वत्थस्स रहि-
 रेणं चेव धोव्वमाणस्स । तए णं सा चोवखा परिव्वाइया मल्लीए वि० एवं
 वत्ता समाणा संकिया कंखिया विङ्गिच्छिया भेयसमावण्णा जाया यावि होत्था
 मल्लीए वि० णो संचाएइ किञ्चि पामोक्खमाइविखत्तए तुसिणीया संत्तिइ ।
 तए णं तं चोवखं मल्लीए बहुओ दासचेडीओ हीलेंति णिंदंति खिसंति गर-
 हंति अप्पेगइया हेरुयालंति अप्पेगइया सुहुमवकडिया करंति अप्पेगइया
 वग्घाडीओ करंति अप्पेगइया तज्जमाणोओ (क० अ०) तालेमाणोओ (क०
 अ०) णिच्छुभंति । तए णं सा चोवखा मल्लीए विवेहरायवरकण्णाए दासचेडि-
 याहिं हीत्तिज्जमाणो जाव गरहिज्जमाणो आसुरत्ता जाव मिसिमिसेमाणो
 मल्लीए विदेहरायवरकण्णाए पओसमावज्जइ भिसियं गेण्हइ २ ता कण्ण-
 तेउराओ पडिणिवखमइ २ ता मिहिलाओ णिगच्छइ २ ता परिव्वाइया संप-
 रिवुडा जेणेव पंचालजणवए जेणेव कंपिल्लपुरे तेणेव उवागच्छइ २ ता बहूणं
 राईसर जाव परूवेमाणो विहरइ । तए णं से जियसत्तू अण्णया कयाइ अंतेउर-
 परियालसद्धि संपरिवुडे एवं जाव विहरइ । तए णं सा चोवखा परिव्वाइया-
 संपरिवुडा जेणेव जियसत्तुस्स रण्णो भवणे जेणेव जियसत्तू तेणेव उवागच्छइ
 २ ता अणुपविसइ २ ता जियसत्तुं अएणं विजएणं वट्ठावेइ । तए णं से
 जियसत्तू चोवखं परिव्वाइयं एज्जमाणं पासइ २ ता सीहासणाओ अब्भट्ठेइ

अस्मत्तेइत्ता चोक्खं परिव्वाइयं सक्कारेइ २ ० आसणेणं उवणिमंतेइ । तए णं सा चोक्खा उदगपरिफासियाए जाव भिसियाए णिविसइ जियसत्तुं रायं रज्जे य जाव अंतेउरे य कुसलोदंतं पुच्छइ । तए णं सा चोक्खा जियसत्तुस्स रण्णो दाणधम्मं च जाव विहरइ । तए णं से जियसत्तू अप्पणो ओरोहंसि जाव विम्हिए (जायविम्हए) चोक्खं (परिव्वाइयं) एवं वयासी-तुमं णं देवाणुप्पिया ! बहूणि गामामर जाव (अडह) आहिंडसि बहूण य राईसरगिहाइं अणुप्पविससि, तं अत्थियाइं ते कस्सवि रण्णो वा जाव एरिसए आंरोहे विट्ठपुक्खे जारिसए णं इमे मह उवरोहे ? तए णं सा चोक्खा परिव्वाइया जियसत्तुं (रायं) एवं वयासी-ईसि अवहसियं करेइ २ ता एवं वयासी-(एवं च) सरिसए णं तुमं देवाणुप्पिया ! तस्स अगडददुुरस्स । केस णं देवाणुप्पिए ! से अगडददुुरे ? जियसत्तू ! से जहाणामए अगडददुुरे सिया, से णं तत्थ जाए तत्थेव बुद्धे अण्णं अगडं वा तलायं वा दहं वा सरं वा सागरं वा अपासमाणे चेवं मण्णइ-अयं सेव अगडे वा जाव सागरे वा । तए णं तं कूवं अण्णे सामुद्दए ददुुरे हव्वमागए । तए णं से कूवददुुरे तं सामुद्ददुुरं एवं वयासी-से केस णं तुमं देवाणुप्पिया ! कत्तो वा इह हव्वमागए ? तए णं से सामुद्दए ददुुरे तं कूवददुुरं एवं वयासी-एवं खलु देवाणुप्पिया ! अहं सामुद्दए ददुुरे । तए णं से कूवददुुरे तं सामुद्दयं ददुुरं एवं वयासी-केमहालए णं देवाणुप्पिया ! से समुद्दे ! तए णं से सामुद्दए ददुुरे तं कूवददुुरे एवं वयासी-महालए णं देवाणुप्पिया ! समुद्दे । तए णं से कूवददुुरे पाएणं तीहं कड्ढेइ २ ता एवं वयासी-एमहालए णं देवाणुप्पिया ! से समुद्दे ? णो इणट्ठे समट्ठे, महालए णं से समुद्दे । तए णं से कूवददुुरे पुरत्थिमिल्लाओ तीराओ उप्फिडित्ताणं [पच्चत्थिमिल्लं तीरं] गच्छइ २ ता एवं वयासी-एमहालए णं देवाणुप्पिया ! से समुद्दे ? णो इणट्ठे समट्ठे (तहेव) । एवामेव तुमंपि जियसत्तू अण्णंसि बहूणं राईसर जाव सत्थवाहपभिईणं भज्जं वा भगिणिं वा घूयं वा सुण्हं वा अपासमाणे जाणेसि जारिसए मम चेवं णं ओरोहे तारिसए णो अण्णस्स । तं एवं खलु जियसत्तू ! मिहिल्लाए णयरीए कुंभगस्स धूया पभावईए अत्थिया मल्लीणामं विदेहरायवरकण्णा रुद्धेण य जुव्वणेण य जाव णो खलु अण्णा काइ देवकण्णा वा जारिसिया मल्ली । विदेहवररायकण्णाए छिण्णस्स वि पायंगुट्ठगस्स इमे तव ओरोहे सयसहस्सइमंपि कलं ण अघइ-त्तिकट्ठु जामेव दिसं पाउवभूया

तामेव दिसं पडिगया । तए णं से जियसत्तू परिव्वाइयाज्जणियहासे दूयं सदावेइ जाव पहारेत्थ गमणाए (६) ॥८१॥ तए णं तेसि जियसत्तुपामोवखाणं छुहं राईणं दूया जेणेव मिहिला तेणेव पहारेत्थ गमणाए । तए णं छुप्पि(य)दूयया जेणेव मिहिला तेणेव उवागच्छति २ ता मिहिलाए अग्गुज्जाणसि पत्तेयं २ खंधावारणिवेसं करेति २ ता मिहिलं रायहार्णि अणुपविसति २ ता जेणेव कुंभए तेणेव उवागच्छति २ ता पत्तेयं २ करयल जाव साणं २ राईणं वयणाइं निवेदेति । तए णं से कुंभए राया तेसि दूयाणं अतिए एयमट्ठं सोच्चा आसुरुत्ते जाव तिवलियं भिउडिं (णिडाले साहट्टु) एवं वयासी-ण देमि णं अहं तुम्म मल्लि विदे० त्तिकट्टु ते छुप्पि दूए असक्कारिय असम्माणिय अवदारेणं णिच्छुभावेइ । तए णं जियसत्तुपामोवखाणं छुहं राईणं दूया कुंभएणं रण्णा असक्कारिया असम्माणिया अवदारेणं णिच्छुभाविद्या सभाणा जेणेव सगा २ जाणवया जेणेव सयाइं २ णगराइं जेणेव सगा २ रायाणो तेणेव उवागच्छति २ ता करयल जाव एवं वयासी-एवं खलु सामी ! अम्हे जियसत्तुपामोवखाणं छुहं राईणं दूया जमगसमगं चेव जेणेव मिहिला जाव अवदारेणं णिच्छुभावेइ । तं ण देइ णं सामी ! कुंभए मल्लि विदेहरायवरकणं । साणं २ राईणं एयमट्ठं णिवेदिति । तए णं ते जियसत्तुपामोवखा छुप्पि रायाणो तेसि दूयाणं अतिए एयमट्ठं सोच्चा णिसम्म आसुरुत्ता ४ अण्णमण्णस्स दूयसपेसणं करेति २ ता एवं वयासी-एवं खलु देवाणुप्पिया ! अम्हं छुहं राईणं दूया जमगसमगं चेव जाव णिच्छुढा । तं सेयं खलु देवाणुप्पिया ! (अम्हं) कुंभगस्स जत्तं गेण्हत्तए-त्तिकट्टु अण्णमण्णस्स एयमट्ठं पडिसुणेति २ ता ण्हाया सण्णद्धा हत्थिखंधवरगया सकोरंटमल्लदामा जाव सेयवरचामराहि० महायाहयगयरहपवरजोहकलियाए चाउरंगिणीए सेणाए सद्धि संपरिबुडा सत्थि-इडोए जाव रवेणं सएहि २ णगरेहितो जाव णिगगच्छति २ ता एगयओ मित्तायति (२ ता) जेणेव मिहिला तेणेव पहारेत्थ गमणाए । तए णं कुंभए राया इमीसे क्हाए लद्धट्ठे समाणे बलवाउयं सदावेइ २ ता एवं वयासी-छिपामेव (भो देवाणुप्पिया !) हय जाव सेण्णं सण्णाहेह जाव पच्चप्पिणति । तए णं कुंभए (राया) ण्हाए सण्णद्धे हत्थिखंधवरगए जाव सेयवरचामराहिं महया० मिहिलं रायहार्णि मज्झमज्जेणं णिज्जाइ णिज्जाइत्ता विदेहजणवयं

मज्झिमज्जेणं जेणेव वेसअंते तेणेव उवागच्छइ २ ता खंधावारणिवेसं करेइ २ ता जियसत्तूपामोक्खा छप्पि य रायाणो पडिबालेमाणे जुज्झसज्जे पडिचिट्ठइ । तए णं ते जियसत्तूपामोक्खा छप्पि य रायाणो जेणेव कुंभए तेणेव उवागच्छति २ ता कुंभएणं रण्णा सद्धि संपलग्गा यावि होत्था । तए णं ते जियसत्तूपामोक्खा छप्पि रायाणो कुंभयं रायं ह्यमहियपवरवीरघाइयणिवडिपिचिधद्धयपपडागं किच्छप्पाणोवगयं दिसोदिंसि पडिसेहिंति । तए णं से कुंभए राया जियसत्तूपामोक्खेहिं छंहिं राईहिं ह्यमहिय जाव पडिसेहिए समाणे अत्थामे अबले अवीरिए जाव अधारणिज्जमितिकट्टु सिग्घं तुरियं जाव वेइयं जेणेव मिहिला तेणेव उवागच्छइ २ ता मिहिलं अणुपविसइ २ ता मिहिलाए दुवारारइं पिहेइ २ ता रोहसज्जे चिट्ठइ । तए णं ते जियसत्तूपामोक्खा छप्पि रायाणो जेणेव मिहिला तेणेव उवागच्छति २ ता मिहिलं रायहार्णि णिस्संचारं णिरुच्चारं सव्वओ समंता ओरुंभित्तानं चिट्ठति । तए णं से कुंभए राया मिहिलं रायहार्णि रुद्धं जाणित्ता अब्भंतरियाए उवट्ठाणसालाए सीहासणवरगए तेसि जियसत्तूपामोक्खाणं छण्हं राईणं छिट्ठाणि य विवराणि य मग्गमाणि य अलभमाणे बहूहिं आएहिं य उवाएहिं य उप्पत्तियाहिं य ४ बुद्धीहिं परिणामेमाणे २ किच्चि आयं वा उवायं वा अलभमाणे ओहयमणसंकप्पे जाव झियायइ । इमं च णं मल्ली विदे० ष्हाया जाव बहूहिं खुज्जाहिं परिवुडा जेणेव कुंभए तेणेव उवागच्छइ २ ता कुंभगस्स पायग्गहणं करेइ । तए णं कुंभए राया मल्लि विदे० णो आडाइ णो परिघाणाइ तुसिणीए संचिट्ठइ । तए णं मल्ली विदे० कुंभगं रायं एवं वयासी-तुब्भे णं ताओ ! अण्णया ममं एज्जमाणं जाव णिवेसेह, किण्णं तुब्भं अज्ज ओह्य जाव झियायह ? तए णं कुंभए मल्लि विदे० एवं वयासी-एवं खलु पुत्ता ! तव कज्जे जियसत्तूपामोक्खेहिं छंहिं राईहिं दूया संपेसिया । ते णं मए असक्कारिया जाव णिच्छइ । तए णं ते जियसत्तूपामोक्खा तेसि दूयाणं अंतिए एयमट्ठं सोच्चा परिकुविया समाणा मिहिलं रायहार्णि णिस्संचारं जाव चिट्ठति । तए णं अहं पुत्ता ! तेसि जियसत्तूपामोक्खाणं छण्हं राईणं अंतराणि अलभमाणे जाव झियामि । तए णं सा मल्ली विदे० कुंभयं रायं एवं वयासी-मा णं तुब्भे ताओ ! ओहयमणसंकप्पा जाव झियायह तुब्भे णं ताओ ! तेसि जियसत्तूपामोक्खाणं छण्हं राईणं पत्तेयं २ रहसियं दूय-

संपेसे करेह एगमेगं एवं वयह—तव देमि मल्लि विदे० तिकट्टु संज्ञाकालसम-
 यंसि पविरलमणुस्संसि णिसंतपडिणिसंतंसि पत्तेयं २ मिहिलं रायहाणि अणुप्प-
 वेसेह २ ता गढमघरएसु अणुप्पविसेह मिहिलाए रायहाणीए दुवाराइं पिहेइ
 २ ता रोहसज्जे चिट्ठह । तए णं कुंभए राया एवं तं चेव जाव पवेसेइ रोह-
 सज्जे चिट्ठइ । तए णं ते जियसत्तुपामोक्खा छप्पि य रायाणो कल्लं पाउवभूया
 जाव [जलंते] जालंतरेहि कणगमयं मत्थयच्छिडुं पउमप्पलपिहाणं पडिमं पासंति
 एस णं मल्ली विदे० तिकट्टु मल्लीए विदे० रूवे य जोव्वणे य लावण्ये य
 मुच्छिया गिद्धा जाव अज्झोववण्णा अणिसिआए विट्ठीए पेहमाण २ चिट्ठंति ।
 तए णं सा मल्ली विदे० ण्हाया जाव पायच्छित्ता सव्वालंकारविभूसिया ब्रह्मि
 खुज्जाहिं जाव परिविखत्ता जेणेव जालघरए जेणेव कणगपडिमा तेणेव उदा-
 गच्छइ २ ता तीसे कणगपडिमाए मत्थयाओ तं पउमं अवणेइ । तए णं गंधे
 णिद्धावइ से जहाणामए अहिमडेइ वा जाव असुभतराए चेव ! तए णं ते जिय-
 सत्तुपामोक्खा ते णं असुभेणं गंधेणं अभिभूया समाणा सएहि २ उत्तरिज्जेहि
 आसाइं पिहेति २ ता परम्मुहा चिट्ठंति । तए णं सा मल्ली विदे० ते जिय-
 सत्तुपामोक्खे एवं वयासी—कि णं तुढं देवाणुप्पिया ! सएहि २ उत्तरिज्जेहि
 जाव परम्मुहा चिट्ठह ? तए णं ते जियसत्तुपामोक्खा मल्लि विदे० एवं वयंति-
 एवं खलु देवाणुप्पिए ! अम्हे इमेणं असुभेणं गंधेणं अभिभूया समाणा सएहि
 २ जाव चिट्ठामो । तए णं मल्ली विदे० ते जियसत्तुपामोक्खे एवं वयासी-
 जइ ताव देवाणुप्पिया ! इमीमे कणग जाव पडिमाए कल्लाकल्लि ताओ मणु-
 ण्णाओ असणाओ ४ एगमेगे पिडे पक्खिप्पमाणे २ इमेयारूवे असुभे योगत परि-
 णामे इमस्स पुण ओरालियसरीरस्स खेलासवस्स वंतासवस्स पित्तासवस्स सुक्का-
 सवस्स सोणियपूयासवस्स दुरूव(स्य)ऊसासणीसासस्स दुरूवमुत्तपुइयपुरीसपुण-
 स्स सडण जाव धम्मस्स केरिसए[य]परिणामे भविस्सइ ? तं मा णं तुढं देवाणु-
 प्पिया ! माणुस्सएसु कामभोगेसु सज्जह रज्जह गिज्जह मुज्जह अज्झोववज्जह ।
 एवं खलु देवाणुप्पिया ! तुम्हे (अम्हे) इमाओ तच्चे भवगगहणे अवरविदेहवासे
 सल्लिलावइंसि विजए वीयसोगाए रायहाणीए महबलपामोक्खा सत्तविद्यबालवयं-
 सया रायाणो होत्या सहज्जाया जाव पव्वइया । तए णं अहं देवाणुप्पिया !
 इमेणं कारणेणं इत्थीणामगोयं कम्मं णिवत्तेमि—जइ णं तुढं चउत्थं उव-

संपज्जित्तानं विहरह तए णं अहं छट्ठं उवसंपज्जित्तानं विहरामि सेसं तहेव सव्वं । तए णं तुब्भे देवाणुप्पिया ! कालमासे कालं किच्चा जयते विमाणे उववण्णा । तए णं तु तुब्भे देसूणाइं बत्तीसाइं सागरोवमाइं ठिई । तए णं तुब्भं ताओ देवलोयाओ अणंतरं चयं चइत्ता इहेव जंबुहीवे २ जाव साइं २ रज्जाइं उवसंपज्जित्तानं विहरह । तए णं अहं देवाणुप्पिया ! ताओ देवलोयाओ आउक्खएणं जाव दारियत्ताए पच्चायाया । किं थ तयं पम्हुट्ठं जं थ तया भो ! जयंत पवरंमि । वृत्था समयणिबद्धं देवा तं संभरह जाइं ॥१॥ तए णं तैसि जियसत्तुपामोक्खाणं छण्हं राईणं मल्लीए विदे० अंतिए एयमट्ठं सोच्चा २ सुभेणं परिणामेणं पसत्थेणं अज्झवसाणेणं लेसाहिं विसुज्जमाणीहिं तयावरणि-ज्जाणं कम्ममाणं खओवसमेणं ईहावूह जाव सण्णिजाईसरणे समुप्पणे एयमट्ठं सम्मं अभिसमागच्छति । तए णं मल्ली अरहा जियसत्तुपामोक्खे छप्पि रायाणो समुप्पणजाईसरणे जाणित्ता गम्भधराणं दाराइं विहाडावेइ । तए णं ते जिय-सत्तुपामोक्खा जेणेव मल्ली अरहा तेणेव उवागच्छति । तए णं महब्बलपामो-क्खा सत्तं वि य बालवयंसा एगयओ अभिसमण्णागया(या)वि होत्था । तए णं मल्ली अरहा ते जियसत्तुपामोक्खे छप्पि य रायाणो एवं वयासी-एवं खलु अहं देवाणुप्पिया ! संसारभउट्ठिग्गा जाव पव्वयासि, तं तुब्भे णं किं करेह किं ववसह(जाव)किं भे हियसामत्थे ? तए णं जियसत्तुपामोक्खा छ० रा० मल्लि अरहं एवं वयासी-जइ णं तुब्भे देवाणुप्पिया ! संसार जाव पव्वयह अम्हाणं देवाणुप्पिया ! के अणे आलंबणे वा आहारे वा पडिबंधे वा ? जह चेव णं देवाणुप्पिया ! तुब्भे अम्हे इओं तच्चे भवग्गहणे बहूसु कज्जेसु य मेढी-पमाणं जाव धम्मधुरा होत्था तहा चेव णं देवाणुप्पिया ! इण्हिपि जाव भवि-स्सह । अम्हे विद्यणं देवाणुप्पिया ! संसारभउट्ठिग्गा जाव भीया जम्मणमर-णाणं देवाणुप्पियाणं सट्ठिं मुंडा भवित्ता जाव पव्वयाओ । तए णं मल्ली अरहा ते जियसत्तुपामोक्खे एवं वयासी-(जं)जइ णं तुब्भे संसार जाव मए सट्ठि पव्वयह तं गच्छह णं तुब्भे देवाणुप्पिया ! सएहिं २ रज्जेहिं जेट्ठे पुत्ते रज्जे ठावेह २ त्ता पुरिससहस्सवाहिणीओ सीयाओ डुरूहह (डुरूडा समाणा) मम अंतियं पाउब्भवह । तए णं ते जियसत्तुपामोक्खा मल्लिस्स अरहओ एय-मट्ठं पडिमुणेंति । तए णं मल्ली अरहा ते जियसत्तुपामोक्खे गहाय जेणेव

कुंभए (राया)तेणेव उवागच्छइ २ ता कुंभगस्स पाएसु पाडेइ । तए ण कुंभए (राया) ते जियसत्तुपामोक्खा विउलेण असणेणं ४ पुष्कवत्थांगधमल्लालंकारेणं सक्कारेइ जाव पडिविसज्जेइ । तए णं ते जियसत्तुपामोक्खा कुंभएणं रण्णा विसज्जिजया समाणा जेणेव साइं २ रज्जाइं जेणेव णगराइं तेणेव उवागच्छंति २ ता सगाइं [२] रज्जाइं उवसंपज्जित्ता[ण] विहरंति । तए णं मल्ली अरहा संवच्छरावसाणे णिक्खमिस्सामित्ति मणं पहारेइ ॥८०॥ तेणं कालेणं तेणं सम-एणं सक्कस्स आसणं चलइ । तए णं सक्के देविदे देवराया आसणं चलियं पासइ २ ता ओहि पउंजइ २ ता मल्लि अरहं ओहिणा आभोएइ २ ता इमेया-रूवे अज्झत्थिए जाव समुप्पज्जित्था-एवं खलु जंबुद्दीवे २ भारहे वासे मिहिल-लाए कुंभगस्स रण्णो मल्ली अरहा णिक्खमिस्सामित्ति मणं पहारेइ । तं जीय-मेयं तीयपच्चुप्पणमणागयाणं सक्काणं (३) अरहताणं भगवंताणं णिवल्लम-माणाणं इमेयारूवं अत्थसंपयाणं दलित्तए तंजहा-तिण्णेव य कोडिसया अट्टा-सीइ च हौंति कोडीओ । असिइ च सयसहस्सा इंदा दलयति अरहाणं ॥१॥ एव संपेहेइ २ ता वेसमणं देवं सद्दावेइ २ ता एवं वयासी-एवं खलु देवाणु-प्पिया ! जंबुद्दीवे २ भारहे वासे जाव असीइ च सयसहस्साइं दलइत्तए, तं गच्छह णं देवाणप्पिया ! जंबुद्दीवे दीवे भारहे वासे मिहिलाए कुंभगभवणंसि इमेयारूवं अत्थसंपयाणं साहराहि २ ता खिप्पामेव मम एयमाणत्तियं पच्चप्पि-णाहि । तए णं से वेसमणे देवे सक्केणं वेविदेणं ० एवं वुत्ते समाणे हट्ठे० करयल जाव पडिमुणेइ २ ता जंभए देवे सद्दावेइ २ ता एवं वयासी-गच्छह णं तुउमे देवाणप्पिया ! जंबुद्दीवं २ भारहं वासं मिहितं रायहाणि कुंभगस्स रण्णो भवणंसि तिण्णेव य कोडिसया अट्टासीयं च कोडीओ असियं च सय-सहस्साइं अयमेयारूवं अत्थसंपयाणं साहरह २ ता मम एयमाणत्तियं पच्चप्पि-णह । तए णं ते जंभगा देवा वेसमणेण जात्र सुणेत्ता उत्तरपुरच्छिमं द्विसीभाणं अवक्कमंति जाव उत्तरवेउत्थिवायं रूवाइं विउत्थंति २ ता ताए उक्किट्टाए जाव वीइवयमाणा जेणेव जंबुद्दीवे २ भारहे वासे जेणेव मिहिला रायहाणी जेणेव कुंभगस्स रण्णो भवणे तेणेव उवागच्छंति २ ता कुंभगस्स रण्णो भवणंसि तिण्णि कोडिसया जाव साहरंति २ ता जेणेव वेसमणे देवे तेणेव उवागच्छंति २ ता करयल जात्र पच्चप्पिणंति । तए णं से वेसमणे देवे जेणेव सक्के ३ तेणेव

उवागच्छइ २ ता करयल जाव पच्चप्पिणइ । तए णं मत्ती अरहा कत्ताकत्ति
जाव मागहओ पयरासो त्ति बहूणं सणाहाण य अणाहाण य पथियाण य पहि-
याण य करोडियाण य कप्पडियाण य एगमेगं हिरण्णकोडि अट्टु य अणुणाइं
सयसहसाइं इमेयारूढं अत्थसंपयाणं दलयइ । तए णं से कुंभए राया मिहि-
लाए रायहाणीए तत्थ २ ताहि २ देसे २ बहूओ महाणससालाओ करेइ । तत्थ
णं बहूवे मणया दिण्णमइभत्तवेयणा विउलं असणं ४ उववखडंति ० जे जहा
आगच्छंति तंजहा—पथिया वा पहिया वा करोडिया वा कप्पडिया वा पासंडत्था
वा गिहत्था वा तस्स य तहा आसत्थस्स वीसत्थस्स मुहासणवरगयस्स तं विउलं
असणं ४ परिभाएमाणा परिवेसेमाणा विहरंति । तए णं मिहिलाए सिघाडग
जाव बहूजणे अण्णमण्णस्स एवमाइवखइ—एवं खलु देवाणुप्पिया ! कुंभगस्स
रण्णे भवणंसि सब्वकामगुणियं किमिच्छियं विपुलं असणं ४ बहूणं समणाण
य जाव परिवेसिज्जइ । वरवरिया घासिज्जइ किमिच्छियं दिज्जए बहूविहीयं ।
सुरअसुरदेवदाणवणरिदमहियाण णिक्खमणे ॥ १ ॥ तए णं मत्ती अरहा
सवच्छरेणं तिण्णि कोडिसया अट्टासीइं च होंति कोडीओ असिइं च सय-
सहसाइं इमेयारूढं अत्थसंपयाणं दलइत्ता णिवखमामित्ति मणं पहारेइ ॥ ८३ ॥
तेणं कालेणं तेणं समएणं लोगंतिया देवा बंभलोए कप्पे रिट्ठे विमाणपत्थडे
सएहि २ विमाणोहि सएहि २ पासायवडिसएहि पत्तेयं २ चउहि सामाणिय-
साहस्सीहि तिहि परिसाहि सत्ताहि अणिएहि सत्ताहि अणियाहिवईहि सीलसाहि
आयरक्खदेवसाहस्सीहि अण्णेहि य बहूहि लोगतिएहि देवोहि सड्ढि संपरिवुडा
महयाहयणट्टगीयवाइय जाव रयेणं भुंजमाणा विहरंति तंजहा—सारसयमाइच्चा
क्खणी वरुणा य गट्ठोया य । तुसिया अध्वाबाहा अगिच्चा जेव रिट्ठा य ॥ १ ॥
तए णं तेसि लोयंतियाणं देवाणं पत्तेयं २ आसणाइ चलंति तहेव जाव अरहंताणं
णिक्खममाणाणं संबोहणं करेत्तए—त्ति तं गच्छामो णं अम्हे वि मत्तिस्स
अरहओ संबोहणं करेमि—त्तिकट्टु एवं संपेहेति २ ता उत्तरपुरच्छिमं दिसीभायं ०
वेउत्तिययसमुघाएणं समोहणंति ० संखिज्जाइं जोयणाइं एवं जहा जंभगा जाव
जेणेव मिहिला रायहाणी जेणेव कुंभगस्स रण्णे भवणे जेणेव मत्ती अरहा
तेणेव उवागच्छंति २ ता अंतलिक्खपडिवण्णा संखिखिणियाइं जाव वत्थाइं
पवरपरिहिया करयल जाव ताहि इट्ठाहि जाव एवं वयासी—बुज्जाहि भगवं !

लोगणाहा ! पवत्तेहि धम्मतित्थं जीवाणं हियमुहणिससेयसकरं भविस्सइ-
 त्तिकट्टु दोच्चंपि तच्चंपि एवं वयंति ० मल्लि अरहं वंदंति णमंसति वं० २
 ता जामेव दिंसि पाउब्भया तामेव दिंसि पडिगया । तए णं मल्ली अरहा तेहि
 लोगतिएहि देवेहि संबोहिए समाणे जेणेव अम्मापियरो तेणेव उवागच्छइ २
 ता करयल जाव एवं वयासी-इच्छामि णं अम्मयाओ ! तुव्वेहि अब्भणुणाए
 मुंडे भवित्ता जाव पव्वइत्तए । अहामुहं देवाणुप्पिया ! मा पडिबंधं करेह ।
 तए णं कुंभए राया कोडुंबियपुरिसे सद्दावेइ २ ता एवं वयासी-खिप्पामेव
 अट्टसहस्सं सोवणियाणं [कलसाणं] जाव भोमेज्जाणं (ति) अण्णं च महत्थं
 जाव तित्थयराभिसेयं उवट्टुवेह जाव उवट्टुवेति । तेणं कालेणं तेणं समएणं
 चमरे अमुंरिदे जाव अच्चयपज्जवसाणा आगया । तए णं सक्के (३) आभि-
 ओगिए देवे सद्दावेइ २ ता एवं वयासी-खिप्पामेव अट्टसहस्सं सोवणियाणं
 (कलसाणं) जाव अण्णं च तं विपुलं उवट्टुवेह जाव उवट्टुवेति । तेवि कलसा ते
 चेव कलसे अणुपविट्टा । तए णं से सक्के देविंदे देवराया कुंभए य राया मल्लि
 अरहं सीहासणंसि पुरत्थाभिमुहं णिवेत्तेइ अट्टसहस्सेणं सोवणियाणं जाव अवि-
 सिच्चंति । तए णं मल्लिस्स भगवओ अभिसेए वट्टुमाणे अप्पेगइया देवा मिहित्तं
 च सन्धिभतरं बाहिरियं जाव सव्वओ समंता परिधावन्ति । तए णं कुंभए राया
 दोच्चंपि उत्तराववकमणं जाव सव्वालंकारविभूसियं करेइ २ ता कोडुंबियपुरिसे
 सद्दावेइ २ ता एवं वयासी-खिप्पामेव मणोरमं सीयं उवट्टुवेह ते वि उवट्टुवेति ।
 तए णं सक्के (३) आभिओगिए देवे सद्दावेइ २ ता एवं वयासी-खिप्पामेव
 अणेगखंभ जाव मणोरमं सीयं उवट्टुवेह जाव सावि सीया तं चेव सीयं
 अणुपविट्टा । तए णं मल्ली अरहा सीहासणाओ अब्भट्टेइ २ ता जेणेव मणो-
 रमा सीया तेणेव उवागच्छइ २ ता मणोरमं सीयं अणुपयाहिणीकरेमाणा मणो-
 रमं सीयं डुल्लुहइ २ ता सीहासणवरगए पुरत्थाभिमुहे सण्णिसण्णे । तए णं
 कुंभए (राया) अट्टारस सेणिप्पसेणीओ सद्दावेइ २ ता एवं वयासी-तुव्वे णं
 देवाणुप्पिया ! ण्हाया जाव सव्वालंकारविभूसिया मल्लिस्स सीयं परिवहह जाव
 परिवहंति । तए णं सक्के ३ मणोरमाए [सीयाए] दक्खिणिल्लं उवरिल्लं बाहं
 गेण्हइ । ईसाणे उत्तरिल्लं उवरिल्लं बाहं गेण्हइ । चमरे दाहिणिल्लं हेट्टिल्लं
 बली उत्तरिल्लं हेट्टिल्लं अवसेसा देवा जहारिहं मणोरमं सीयं परिवहंति-पुंक्ख
 उव्विखत्ता माणुस्सेहि(तो)सा हट्टरोमकूवेहि । पच्छा वहंति सीयं अमुंरिदमुंरि-

णामेदा ॥१॥ चलचवलकुंडलधरा सच्छंदविउच्चिव्याभरणधारी । देविद्वदान-
विदा वहति सीयं जिणिदस्स ॥२॥ तए णं मल्लिस्स अरहओ मणोरमं सीयं
दुरुद्धस्स एमे अट्टुमंगलगा पुरओ अहाणुपुक्वीए एवं णिगमो जहा जमालिस्स ।
तए णं मल्लिस्स अरहओ णिक्खममाणस्स अप्पेगइया देवा मिहिलं आसिय
जाव अम्मितरवासविहिगाहा जाव परिधावन्ति । तए णं मल्ली अरहा जेणेव
सहस्संबवणे उज्जाणे जेणेव असोगवरपायवे तेणेव उवागच्छइ २ ता सीयाओ
पच्चोरुहइ० आभरणालंकारं० पभावई पडिच्छइ । तए णं मल्ली अरहा सय-
मेव पंचमुट्ठियं लोयं करेइ । तए णं सक्के ३ मल्लिस्स केसे पडिच्छइ (२ ता)
खीरोदगसमुद्दे साहर (पक्खव) इ । तए णं मल्ली अरहा णमोऽत्थु णं सिद्धाणं-
तिकट्टु सामाइय (च) चारित्तं पडिवज्जइ । जं समयं च णं मल्ली अरहा चरित्तं
पडिवज्जइ तं समयं च णं देवाणं माणसाण य णिग्घोसे तुरियणिणाए
गीयवाइयणिग्घोसे य सक्कसवयणसंदेसेण णिलुक्के यावि होत्था । जं समयं
च णं मल्ली अरहा सामाइयं चारित्तं पडिवण्णे तं समयं च णं मल्लिस्स अर-
हओ माणसधम्माओ उत्तरिए मणपज्जवणाणे समुप्पण्णे । मल्ली णं अरहा जे
से हेमताणं दोक्खे मासे चउत्थे पक्खे पोसमुद्धे तस्स णं पोसमुद्धस्स एक्कारसी-
पक्खेणं पुव्वण्हकालसमयंसि अट्टमेणं भत्तेणं अयाणएणं अस्सिणीहि णक्खत्तेणं
जोगमुवागएणं तिहि इत्थोसएहि अम्मितरियाए परिसाए तिहि पुरिससएहि
बाहिरियाए परिसाए सद्धिं मुंडे भवित्ता पव्वइए । मल्लि अरहं इमे अट्ट णाय-
कुमारा अणुपव्वइंसु तंजहा-णंदे य णंदिमित्ते सुमित्त बलमित्त भाणमित्ते य ।
अमरवइ अमरसेणे महसेणे चेव अट्टसए ॥१॥ तए णं (ते) ते भवणवई ४
मल्लिस्स अरहओ णिक्खमणमहिमं करेति २ ता जेणेव णंदीस (रव) रे० अट्टा-
हियं करेति जाव पडिगया । तए णं मल्ली अरहा जं चेव विवसं पव्वइए तस्सेव
दिवसस्स पुव्वा (पच्चा) वरण्हकालसमयंसि असोगवरपायवस्स अहे पुद्विसिला-
पट्टयंसि सुहासणवरगयस्स सुहेणं परिणामेणं (पसत्थोहि अज्जवसाणोहि) पसत्थाहि
लेसाहि (विसुज्झमाणीहि) तयावरणकम्मरयविकरणकरं अपुव्वकरणं अणु-
पविट्टस्स अणंते जाव केवल [वर] णाणदंसणे समुप्पण्णे ॥८४॥ तेणं कालेणं तेणं
समएणं सव्वदेवाणं आसणाइं चलन्ति समोसढा सुणेति अट्टाहिय महिमा० णंदी-
सरे [जाव] जामेव दिंसि पाउब्भूया तामेव दिंसि पडिगया । कुंभए वि
णिग्गच्छइ । तए णं ते जियसत्तुपामोक्खा छप्पि य रायाणो जेट्टुपुत्ते रज्जे

ठावेत्ता पुरिससहस्रवाहिणीयाओ वुरूडा सक्विड्ढोए जेणेव मल्ली अरहा जाव पञ्जुवासंति । तए णं मल्ली अरहा तीसे महइमहालियाए कुंभगस्स रण्णे तेसि च जियसत्तुपामोक्खाणं धम्मं [परि]कहेइ । परिसा जामेव दिंसि पाउड्ढूया तामेव दिंसि पडिगया । कुंभए समणोवासए जाए पडिगए पभावई य । तए णं जियसत्तुपामोक्खा छप्पि रायाणो धम्मं सोच्चा आलित्तए णं भत्ते ! जाव पक्व-इया [जाव] चोइसपुट्ठिवणो अणत्ते केवले सिद्धा । तए णं मल्ली अरहा सहसंब-वणाओ णिवल्लमइ २ ता बहिया जणवयविहारं विहरइ । मल्लिस्स णं (अरहओ) भिसगपामोक्खा अट्ठावीसं गणा अट्ठावीसं गणहरा होत्था । मल्लिस्स णं अर-हओ चत्तालीसं समणसाहस्सीओ उवको० । बंधुमईपामोक्खाओ पणपणं अज्जियासाहस्सीओ उवको० । सावयाणं एग सयसाहस्सी चुलसीइं सहस्सा ० सावियाणं तिण्ण सयसाहस्सीओ पण्णट्ठि च सहस्सा छस्सया चोइसपुट्ठोणं वीससया ओहिणाणोणं बत्तीसं सया केवल्लणाणीणं पणतीसं सया वेउवियाणं अट्ठसया मणपञ्जवणाणीणं चोइससया वाईणं वीसं सया अणुत्तरोववाइयाणं । मल्लिस्स [णं] अरहओ दुविहा अंतगडभूमी होत्था तंजहा—जुयंतकरभूमी परि-यायंतकरभूमी य जाव वीसइमाओ पुरिसजुगाओ जुयंतकरभूमी दुवासपरि-याए अंतमकासी । मल्ली णं अरहा पणुवीसं धणूइं उड्ढं उच्चत्तेणं वण्णेणं पियंगुसमे समच्चउरंसंठाणे वज्जरिसहणारायसंघयणे मज्झदेसे सुहंसुहेणं विह-रित्ता जेणेव सम्मेए पक्वए तेणेव उवागच्छइ २ ता संमेयसेलसिहरे पाओवप-मणुववण्णे । मल्ली णं अरहा एगं वाससयं अगारवासमज्जे पणपणं वाससह-स्साइं वाससयऊणाइं केवल्लपरियाणं पाउणित्ता पणपणं वाससहस्साइं सव्वा-उयं पालइत्ता जे से गिम्हाणं पढमे मासे दोच्चे पक्खे चित्तमुट्ठे तस्स णं वेत्त-मुट्ठस्स चउत्थोए भरणीए णवखत्तेणं अट्ठरत्तकालसमयंसि पंचहिं अज्जिया-सएहिं अड्ढितरियाए परिसाए पंचहिं अणगारसएहिं बाहिरियाए परिसाए मासिएणं भत्तेणं अपाणएणं वधारियपाणी खीणे वेयणिज्जे आउए णसे-गोए सिद्धे । एवं परिणिव्वाणमहिमा भाणियव्वा जहा जंबुद्वीवपण्णत्तोए णंदी-सरे अट्ठाहियाओ पडिगयाओ । एवं खलु जंबू ! समणेणं भगवया महावीरेणं अट्ठमस्स णायज्जयणस्स अयमट्ठे पणत्ते—त्तिव्वेमि ॥६३॥ गाहाउ—उगगतव-संजमवओ पगिट्ठफलसाहगस्सत्ति जियस्स । धम्मविसएवि सुहुमावि होइ माया

अणत्थाय ॥१॥ जह मल्लिस्स महाबलमवंमि तित्थयरणामबंधेऽवि । तवविसय-
धेवमाया जाया जुवइत्तहेउत्ति ॥२॥ अट्टमं अज्झयणं समत्तं ॥

मायंदी णामं णवमं अज्झयणं

जइ णं भंते ! समणेणं भगवया महावीरेणं जाव संपत्तेणं अट्टमस्स णाय-
ज्झयणस्स अयमट्ठे पणत्ते णवमस्स णं भंते ! णायज्झयणस्स समणेणं जाव
संपत्तेणं के अट्ठे पणत्ते ? एवं खलु जंबू ! तेणं कालेणं तेणं समएणं चंपा णामं
णयरो । पुण्णभट्ठे चेइए । तत्थ णं माकंदी णामं सत्थवाहे परिवसइ अट्ठे जाव
अपरिमूए । तस्स णं भट्ठा णामं भारिया होत्था । तीसे णं भट्ठाए अत्तया दुवे सत्थ-
वाहदारया होत्था तंजहा—जिणपालिए य जिणरविखिए य । तए णं तेसिं मागंदिय-
दारगाणं अण्णया कयाइ एगयओ सहियाणं इमेयाह्वे मिहोकहासमुत्तावे
समुप्पज्जित्था—एवं खलु अम्हे लवणसमुद्दं पोयवहणेणं एवकारसवारा ओगाढा
सव्वत्थ वि य णं लद्धट्ठा कथकज्जा अणहसमग्गा पुणरवि णिययघरं हव्वमा-
गया । तं सेयं खलु अम्हं बेवाणुप्पिया । दुवालसमपि लवणसमुद्दं पोयवहणेणं
ओगाहित्तए—त्तिकट्टु अण्णमण्णस्स एयमट्ठं पडिसुणेंति २ ता जेणेव अम्मा-
पियरो तेणेव उवागच्छंति २ ता एवं वयासी—एवं खलु अम्हे अम्मयाओ !
एवकारस वारा तं चेव जाव णिययं घरं हव्वमागया, तं इच्छामो णं अम्मयाओ !
तुब्भेहिं अब्भणुण्णार्या समाणा दुवालसमलवणसमुद्दं पोयवहणेणं ओगाहित्तए ।
तए णं ते मागंदियदारए अम्मपियरो एवं वयासी—इमे ते जाया ! अज्जग
जाव परिभाएत्तए, तं अणहोह ताव जाया ! विउले माणुस्सए इड्ढीसक्कार-
समदए, किं भे सपच्चवाएणं णिरालंइणेणं लवणसमुद्दोत्तारेणं ? एवं खलु पुत्ता !
दुवालसमी जत्ता सोवसग्गा यावि भवइ, तं मा णं तुब्भे दुवे पुत्ता ! दुवालस-
मपि लवण जाव ओगाहेह, भा हू तुब्भं सरीरस्स वावत्ती भविस्सइ । तए णं
[ते] मागंदियदारगा अम्मपियरो दोच्चंपि तच्चंपि एवं वयासी—एवं खलु अम्हे
अम्मयाओ ! एवकारस वारा लवण जाव ओगाहित्तए । तए णं ते मागंदिय-
दारए अम्मपियरो जाहे णो संचाएति बहूहिं आघवणाहि य पण्णवणाहि य
आघवित्तए वा पण्णवित्तए वा ताहे अकामा चेव एयमट्ठं अणुजाणित्था । तए
णं ते मागंदियदारगा अम्मपिऊहिं अब्भणुण्णया समाणा गणिमं च धरिमं च

मेज्जं च पारिच्छेज्जं च जहा अरहण्णगरस जाव लवणसमुद्दं बहूइं जोयण-
सयाइं ओगाढा ॥८६॥ तए णं तेसि मागदियदारणां अणेगाइं जोयणसयाइं
ओगाढाणं समाणाणं अणेगाइं उप्पाइयसयाइं पाउडमूयाइं तंजहा—अकाले गज्जियं
जाव थणियसहे कालियवाए तत्थ समुट्ठिए । तए णं सा णावा तेणं कालिय-
वाएणं अहृणिज्जमाणी २ संचालिज्जमाणी २ संछोभिज्जमाणी २ सलिल-
तिखवेगेहि आयट्टिज्जमाणी २ कोट्टिमसि करतलाहए विव तिव्वसए तत्थेव
२ ओवयमाणी य उप्पयमाणी य उप्पयमाणी—विव धरणीयलाओ सिद्धविज्जा
विज्जाहरकण्णगा ओवयमाणी विव गणतलाओ भट्टविज्जा विज्जाहरकण्णगा
विपत्तायमाणी विव महागरहलवेगविज्जासिया भयगवरकण्णगा धावमाणी विव
महाजणरसियसट्टवित्तथा ठाणभट्टा आसकिसोरी णिगुंजमाणी विव मुहजण-
दिट्ठावराहा सुयणकुलकण्णगा घूममाणी विव बीचोपहारसपतालिया गलिय-
लंबणा विव गणतलाओ रोयमाणी विव सलिलगठिविप्पइरमाणघोरं-
सुवाएहि णववहू उवरयभत्तुया विलवमाणी विव परच्चकरायाभिरोहिया
परममहद्वभयाभिद्धुया महापुरधरी ज्ञायमाणी विव कवडच्छोम[ण]पओगजुत्ता
जोगपरिस्वाइया णिसासमाणी विव महाकंतरविणिगयपरिस्संता परिणयवया
अम्मया सोयमाणी विव तवच्चरणखीणपरिभोगा चयणकाले देववरवहू संचुणिय-
कट्टकूवरा भगमेद्धिमोडियसहस्समाला सुलाइयवंकपरिमासा फलहंतरतडतडेत्-
फुट्टंसंघिवियलंतलोहकीलिया सव्वंगवियंभिया परिसडियरज्जुविसरंतसव्वगत्ता
आमगमल्लगभूया अकयपुण्णजणमणोरहो विव चित्तिज्जमाणगुरुई हाहाकयकण्ण-
धारणावियवाणिघगजणकम्मगारविलविया णाणाविहरयणपणियसंपुण्णा बहूहि
पुरिससएहि रोयमाणेहि कंदमाणेहि सोयमाणेहि तिप्पमाणेहि विलवमाणेहि
एगं महं अंतोजलगयं गिरिसिहरमासायइत्ता संमग्गकूवतोरणा मोडियजयदंडा
वलयसयखंडिया करकरस्स तत्थेव विद्वं उवगया । तए णं तीए णावाए भिज्ज-
माणीए [ते] बहवे पुरिसा विपुलपडियभंडमायाए अंतोजलंमि णिमज्जावि यावि
होत्था । तए णं ते मागदियदारणा छेया दवखा पत्तटा कुसला मेहावी णिउण-
सिप्पोवगया बहुसु पोयवहणसंपराएसु कयकरणा लद्धविजया अमूढा अमूढहत्था
एगं महं फलगाखंडं आसादेति । जसि च णं पएसंसि से पोयवहणे विवण्णे तंसि
च णं पएसंसि एगे महं रयणहीवे णामं दीवे होत्था अणेगाइं जोयणाइं आयाम-
विबखंभेणं अणेगाइं जोयणाइं परिवखेवेणं णाणादुमसंडमंडिउद्देसे सस्सिरीए

पासाईए दरिसणिज्जे अमिरूवे पडिरूवे । तस्स णं बहुमज्झदेसमाए तत्थ णं महं
एगे पासायवडेंसए होत्था अब्भुगयमूसिय जाव सत्सिरी(मू)यरूवे पासाईए ४ ।
तत्थ णं पासायवडेंसए रयणदीवदेवया णांमं देवया परित्रसइ पावा चंडा रुहा
खुद्दा साहसिया । तस्स णं पासायवडेंसयस्स चउट्ठिसि चत्तारि वणसंडा किण्हा
किण्होभासा । तए णं ते मार्गदियदारगा तेणं फलयखंडेणं उवुज्झमाणा
२ रयणदीवतेणं संबुद्धा यावि होत्था । तए णं ते मार्गदियदारगा याहं लभंति
२ ता मुहुत्ततरं आससंति २ ता फलगखंडं विसज्जेति २ ता रयणदीवं उत्त-
रंति २ ता फलाणं मग्गणगवेसणं करेति २ ता फलाइं गेण्हंति २ ता आहा-
रंति २ ता णालिएराणं मग्गणगवेसणं करेति २ ता णालिएराइं फोडेंति २ ता
णालिएरतेल्लेणं अण्णमण्णस्स गायाइं अब्भंगेति २ ता पोवखरणीओ ओगाहिंति
२ ता जलमज्जणं करेति २ ता जाव पच्चुत्तरंति २ ता पुढविसिलापट्टयंसि
णिसीयंति २ आसत्था दोसत्था सुहासणवरगया चंपा णयारिं अम्मापिउआपुच्छणं
च लवणसमुद्दोत्तारणं च कासियवायसमुत्थणं च पोयवहणविबत्ति च फलय-
खंडस्स आसायणं च रयणदीवत्तारं च अणुचितेमाणा २ ओह्यमण-
संकप्पा जाव झियायेति । तए णं सा रयणदीवदेवया ते मार्गदियदारए
ओहिणा आभोएइ आभोएत्ता असिफलगवग्गहत्था सत्तट्टतलप्पमाणं उड्डं
वेहासं उप्पयइ २ ता ताए उक्किट्टाए जाव देवगईएवीईवयमाणी २ जेणेव
मार्गदियदारए तेणेव उवागच्छइ २ ता आसुरुत्ता [ते] मार्गदियदारए खर-
फहसणिट्ठुरवयणेहि एवं वयासी-हं भो मार्गदियदारया ! अपत्थियपत्थिया !
जइ णं तुब्भे मए सद्धिं विउलाइं भोगभोगाइं भुंजमाणा विहरह तो भे अत्थिय
जीवियं, अहण्णं तुब्भे मए सद्धिं विउलाइं ० णो विहरह तो भे इमेणं णीलु-
प्पत्तगवल्लगुलिय जाव खुरधारेणं असिणा रत्तगंडमंसुघाइं माउयाहि उव-
सोहियाइं तालफलाणीव सीसाइं एगते एडेमि । तए णं ते मार्गदियदारगा
रयणदीवदेवयाए अंतिए एयमट्ठं सोच्चा णिसम्म भीया करयल जाव वद्धा-
वेत्ता एवं वयासी-जण्णं देवाणुप्पिया ! वइस्सइ तस्स आणाउववायवयणणिद्वेसे
च्चिट्ठिस्सामो । तए णं सा रयणदीवदेवया ते मार्गदियदारए गेण्हइ २ ता
जेणेव पासायवडेंसए तेणेव उवागच्छइ २ ता असुभपोग्गलावहारं करेइ २ ता
सुभपोग्गलपक्खेवं करेइ २ ता [तओ] पच्छा तेहि सद्धिं विउलाइं भोगभोगाइं

भुंजमाणी विहरइ कल्लाकल्लि च अमयफलाई उवणेइ ॥ ८७ ॥ तए णं सा
 रयणदीवदेवया सक्कवयणसंसेसेणं सुट्टिएणं लवणाहिवइणा लवणसमुद्दे तिसत्त-
 खुत्तो अणुपरियट्टियव्वे त्ति जं किञ्चि तत्थ तणं वा पत्तं वा कट्ठं वा कयवरं वा
 असुइं पूइयं दुरभिगंधमच्चोक्खं सव्वं आहुणिय २ तिसत्तखुत्तो एगते एडेयव्वं
 तिकट्टं णिउत्ता । तए णं सा रयणदीवदेवया ते मागंदिअदारए एवं वयासी-
 एवं खल्लु अहं देवाणुप्पिया ! सक्कवयणसंसेसेणं सुट्टिएणं लवणाहिवइणा
 तं चेव जाव णिउत्ता । तं जाव अहं देवाणुप्पिया ! लवणसमुद्दे जाव
 एडेमि ताव तुब्भे इहेव पासायवडेसए सुहंसुहेणं अभिरममाणा च्चिट्ठह । जइ
 णं तुब्भे एयसि अंतरंसि उद्विग्गा वा उस्सुया वा उप्पुया वा भवेज्जाह तो णं
 तुब्भे पुरत्थिमिल्लं वणसंडं गच्छेज्जाह । तत्थ णं दो उऊ सया साहीणा
 तंजहा-पाउसे य वासारत्ते य । तत्थ उ कंदलसिंलिधदंतो णिउरवरपुष्फोवर-
 करो । कुडयज्जुणणीवसुरभिवाणो पाउसउऊ-गयवरो साहीणो ॥१॥ तत्थ
 य-सुरगोवमणिच्चित्तो दददुरकुलरसियउज्झररवो । बरहिणाविदपरिणद्ध-
 सिहरो वासारत्तो उऊपव्वओ साहीणो ॥२॥ तत्थ णं तुब्भे देवाणुप्पिया !
 बहुसु वावीसु य जाव सरसरपंतियासु य बहुसु आलीघरएसु य माली-
 घरएसु य जाव कुसुमघरएसु य सुहंसुहेणं अभिरममाणा २ विहरेज्जाह ।
 जइ णं तुब्भे एत्थ वि उद्विग्गा वा उस्सुया वा उप्पुया वा भविज्जाह तो
 णं तुब्भे उत्तरिल्लं वणसंडं गच्छेज्जाह । तत्थ णं दो उऊ सया साहीणा तंजहा-
 सरदो य हेमंतो य । तत्थ उ सणसत्तिवण्णकउ(हो)ओ णीलुप्पलपउमणल्लिण-
 सिगो । सारसच्चकवायरत्रियघोसो सरयउऊ-गोवई साहीणो ॥१॥ तत्थ य
 सियकुंदधवल्लजोहो कुसुमियलोद्धवणसंडमंडलतलो । तुसारदगधारपीवरकरो
 हेमंतउऊससी सया साहीणो ॥२॥ तत्थ णं तुब्भे देवाणुप्पिया ! वावीसु य
 जाव विहरेज्जाह । जइ णं तुब्भे तत्थ वि उद्विग्गा वा जाव उप्पुया वा
 भवेज्जाह तो णं तुब्भे अवत्तिल्लं वणसंडं गच्छेज्जाह । तत्थ णं दो उऊ सया
 साहीणा तंजहा-वसंते य गिम्हे य । तत्थ उ सहकारचारुहारो किमुयकणि-
 यारासोगमउडो । ऊसियतिलगवउलायवत्तो वसंतउऊ-णरवई साहीणो ॥१॥
 तत्थ य पाडलसिरीससलिलो भलियावासंतियधवल्लेत्ते सीयल्लसुरभिअणिल-
 मगरचरिओ गिम्हउऊसागरो साहीणो ॥२॥ तत्थ णं बहुसु जाव विहरेज्जाह ।

जइणं तुब्भं देवाणुप्पिया ! तत्थ वि उव्विग्गया (धा) उस्सुया (वा उप्पुया वा) भवेज्जाह तओ तुब्भं जेणेव पासायवडेंसए तेणेव उवागच्छेज्जाह ममं पडि-
 बालेमाणा २ चिट्ठेज्जाह । मा णं तुब्भं दक्खिणिल्लं वणसंडं गच्छेज्जाह ।
 तत्थ णं महं एगे उगगविसे चंडविसे घोरविसे अइकाय महाकाए जहा तेय-
 णिसग्गे भसिमहिंसमूसाकालए णयणविसरोसपुण्णे अंजणपुंजणियरप्पगासे
 रत्तच्छे जमलजुयलचंचलचलंतजीहे धरणिपलवेणिभूए उवकडफुडकुडिलजडिल-
 कवलडवियडफडाडोकरणावच्छे लोगाहारधम्ममाणधमधमंतघोसे अणागलिय-
 चंडतिव्वरोसे समुह्तिरियं चवलं धमधमंतदिट्ठीविसे सप्पे य परिवसइ । मा णं
 तुब्भं सरीरगस्स वावत्ती भविस्सइ । ते मागंदिद्यदारए दोच्चंपि तच्चंपि एवं
 वयइ २ ता वेउव्वियसमुग्घाएणं समोहणइ २ ता ताए उव्विकट्ठाए लवण-
 समुद्धं तिसत्तखत्तो अणुपरियट्ठेउं पयत्ता यावि होत्था ॥८८॥ तए णं ते मागं-
 दिद्यदारया तओ मुहुत्ततरस्स पासायवडेंसए सइ धा रइ वा धिइ वा अलभ-
 माणा अणमण्णं एवं वयासी—एवं खलु देवाणुप्पिया ! रयणदीवदेवया अम्हे
 एवं वयासी—एवं खलु अहं सक्कवयणसंदेसेणं सुट्ठिएणं लवणाहिवइणा जाव
 वावत्ती भविस्सइ । तं सेयं खलु अम्हं देवाणुप्पिया ! पुरत्थिमिल्ले वणसंडं
 गमित्तए । अणमण्णस्स एयमट्ठं पडिसुणेति २ ता जेणेव पुरत्थिमिल्ले वण-
 संडे तेणेव उवागच्छति २ ता तत्थ णं वावीसु य जाव आलीघरएसु य जाव
 विहरंति । तए णं ते मागंदिद्यदारया तत्थ वि सइ वा जाव अलभमाणा जेणेव
 उत्तरिल्ले वणसंडे तेणेव उवागच्छति २ ता तत्थ णं वावीसु य जाव आली-
 घरएसु य विहरंति । तए णं ते मागंदिद्यदारया तत्थ वि सइ वा जाव अलभ-
 माणा जेणेव पच्चत्थिमिल्ले वणसंडे तेणेव उवागच्छति २ ता जाव विहरंति ।
 तए णं ते मागंदिद्यदारया तत्थवि सइ वा जाव अलभमाणा अणमण्णं एवं
 वयासी—एवं खलु देवाणुप्पिया ! अम्हे रयणदीवदेवया एवं वयासी—एवं खलु
 अहं देवाणुप्पिया ! सक्कस्स वयणसंदेसेणं सुट्ठिएणं लवणाहिवइणा जाव मा
 णं तुब्भं सरीरगस्स वावत्ती भविस्सइ । तं भवियव्वं एत्थ कारणेणं । तं सेयं
 खलु अम्हं दक्खिणिल्लं वणसंडं गमित्तए—त्तिकट्ठं अणमण्णस्स एयमट्ठं पडि-
 सुणेति २ ता जेणेव दक्खिणिल्ले वणसंडे तेणेव पहारेत्थ गमणाए । तए णं
 गंधे णित्ताइ ते जहाणामए अहिमडेइ वा जाव अणिट्ठतराए चेव । तए णं ते

मार्गद्वियदारया तेणं अमुत्तेणं मंघ्रेणं अभिभूया समाणा सएहि २ उत्तरिज्जेहि
 आसाइं पिहेति २ ता जेणेव दक्खिणिल्ले वणसंडे तेणेव उवागया । तत्थ णं
 महं एगं आघयणं पासंति अट्टियरासिसयसकुलं भीमदरिसणिज्जं एगं च
 तत्थ सूलाइयं पुरिसं कलुणाइं कटुाइं विस्सराइं कुट्टवमाणं पासंति २ ता
 भीया जाव संजायमया जेणेव से सूलाइए पुरिसे तेणेव उवागच्छंति २ ता
 तं सूलाइयं पुरिसं एवं वयासी-एस णं देवाणुप्पिया ! कस्स आघयणे तुमं च
 णं के कओ वा इहं हव्वमागए केण वा इमेयारूवं आवयं पाविए ? तए णं
 से सूलाइए पुरिसे (ते) मार्गद्वियदारए एवं वयासी-एस णं देवाणुप्पिया !
 रयणदीवदेवयाए आघयणे । अहं णं देवाणुप्पिया ! जंबुद्दीवाओ दीवाओ
 भारहाओ वासाओ कागंदीए आसवाणियए विपुलं पणियमंडमायाए पोयवहणेणं
 लवणसमहं ओयाए । तए णं अहं पोयवहणविंसीए णिब्बुद्धमंडसारे एगं
 फलगखंडं आसाएमि । तए णं अहं उवुज्झमाणे २ रयणदीवतेणं संबूडे । तए
 णं सा रयणदीवदेवया ममं ओहिणा पासइ २ ता ममं गेहइ २ ता मए तिड्ढि
 विउलाइं भोगभोगाइं भुंजमाणो विहरइ । तए णं सा रयणदीवदेवया अण्णया
 कयाइ अहालहुसगंसि अवराहंसि परिकुच्चिया समाणी ममं एयारूवं आवयं
 पावेइ तं ण जजइ णं देवाणुप्पिया ! तुमहं पि इमेसि सरीरगाणं का मणे आवई
 भविस्सइ ? तए णं ते मार्गद्वियदारया तस्स सूलाइयत्स अतिए एयमट्ठं
 सोच्चा णिसम्म बलियत्तरं भीया जाव संजायमया सूलाइयं पुरिसं एवं वयासी-
 कहं णं देवाणुप्पिया ! अम्हे रयणदीवदेवयाए हत्थाओ सार्हत्थि णित्य-
 रिज्जामो ? तए णं से सूलाइए पुरिसे ते मार्गद्वियदारगे एवं वयासी-एस णं
 देवाणुप्पिया ! पुरत्थिमिल्ले वणसंडे सेलगस्स जक्खस्स जक्खाययणे सेलए णां
 आसरूवधारी जक्खे परिवसइ । तए णं से सेलए जक्खे जोहसट्टमुट्ठिपुणमासि-
 णीमु आगयसमए पत्तसमए महया २ सट्ठेणं एवं वदइ-कं तारयासि ? कं
 पालयासि ? तं गच्छहं णं तुम्हे देवाणुप्पिया ! पुरत्थिमिल्लं वणसंडं सेलगस्स
 जक्खस्स महरिहं पुण्फच्चणियं करेह २ ता जण्णुपायवडिया पंजलिउडा विण-
 एणं पज्जवासमाणा विहर (चिट्ठ) ह । जाहे णं से सेलए जक्खे आगयसमए
 पत्तसमए एवं वएज्जा-कं तारयासि ? कं पालयासि ? ताहे तुम्हे (एवं)
 वयह-अम्हे तारयाहि अम्हे पालयाहि । सेलए भे जक्खे परं रयणदीवदेवयाए

हत्याओ साहृत्थि णित्थारेज्जा । अण्णा भे ण घाणामि इमेसि सरीरगाणं
 का मण्णे आवई भविस्सइ ॥८६॥ तए णं ते मार्गदियदारगा तस्स मूलाइयस्स
 अंतिए एयमट्ठं सोच्चा णिसम्म सिग्घं चंडं चवलं तुरियं वेइयं जेणेव पुर-
 द्दियमित्थे वणसंडे जेणेव पोक्खरिणी तेणेव उवागच्छति २ ता पोक्खरिणि
 ओगाहे (गाहं) ति २ ता जलमज्जणं करेति २ ता जाइं तत्थ उप्पलाइं जाव
 गेहंति २ ता जेणेव सेलगस्स जक्खस्स जक्खाययणे तेणेव उवागच्छति २
 ता आलोए पणामं करेति २ ता महरिहं पुप्फच्चणियं करेति २ ता जण्णु-
 पायवडिया सुस्ससमाणा णमंसमाणा पज्जुवासंति । तए णं से सेलए जक्खे
 आगयसमए पत्तसमए एवं वयासी-कं तारयामि ? कं पालयामि ? तए णं ते
 मार्गदियदारगा उट्टाए उट्ठेति करयल जाव वड्ढावेत्ता एवं वयासी-अम्हे
 तारयाहि अम्हे पालयाहि । तए णं से सेलए जक्खे ते मार्गदियदारए एवं
 वयासी-एवं खलु देवाणुप्पिया ! तुढं मए सद्धि लवणसमूद्रेणं मज्झमज्जेणं
 वीईवयमाणणं सा रयणदीवदेवया पावा चंडा रुहा साहंसिया बहूहि खर-
 एहि य मउएहि य अणुलोमेहि य पडिलोमेहि य सिगारेहि य कलुणेहि य
 उवसग्गेहि य उवसग्गं करेहिइ । तं जइ णं तुढमे देवाणुप्पिया ! रयणदीव-
 देवयाए एयमट्ठं आढाह वा परिघाणह वा अवयक्खह वा तो भे अहं
 पिट्ठाओ विधुणामि । अहं णं तुढमे रयणदीवदेवयाए एयमट्ठं णो आढाह णो
 परिघाणह णो अवयक्खह तो भे रयणदीवदेवयाए हत्याओ साहृत्थिं
 णित्थारेमि । तए णं ते मार्गदियदारगा सेलगं जक्खं एवं वयासी-जं णं देवा-
 णुप्पिया ! वइस्संति तस्स णं उववायवयणणिद्वेसे च्छिट्ठिससामो । तए णं से
 सेलए जक्खे उत्तरपुरच्छिमं दिसीमागं अवक्कमइ २ ता वेउड्वियसमुग्घाएणं
 समोहणइ २ सा संखेज्जाइं जोयणाइं वंडं णिस्सरइ दोच्चंपि तक्कंपि वेउड्विय-
 समुग्घाएणं समोहणइ २ ता एगं महं आसरूवं विउव्वइ २ ता ते मार्ग-
 दियदारए एवं वयासी-हं भो मार्गदियदारया ! आरुहं णं देवाणुप्पिया !
 मम पिट्ठंति । तए णं ते मार्गदियदारया हट्ठुं सेलसस्स जक्खस्स पणामं
 करेति २ ता सेलगस्स पिट्ठिं वुरूढा । तए णं से सेलए ते मार्गदियदारए
 वुरूढे जाणित्ती सत्तट्ठतालप्पमाणमेत्ताइं उड्डं वेहासं उप्पयइ २ ता य ताए
 उविकट्ठाए तुरियाए [चवलाए चंडाए दिव्वाए] देवयाए देवगईए लवणसमूदं

मज्झिमज्झेणं जेणेव जंबुद्वीवे दीवे जेणेव भारहे वासे जेणेव चंपा गयरी तेणेव
 पहारेत्थ गमणाए ॥ ६० ॥ तए णं सा रयणदीवदेवया लवणसमुद्दं तिसत्त-
 खुत्तो अणुपरियट्टइ जं तत्थ तणं वा जाव एडेइ २ त्ता जेणेव पासायवडैसए
 तेणेव उवागच्छइ २ त्ता ते मार्गदियदारया पासायवडैसए अपासमाणी
 जेणेव पुरत्थिमिल्ले वणसंडे जाव सव्वओ समंता मग्गणगवेसणं करेइ २ ता
 तैसि मार्गदियदारयाणं कत्थइ सुइं वा ३ अलभमाणी जेणेव उत्तरिल्ले (वणसंडे)
 एवं चेव पच्चत्थिमिल्ले वि जाव अपासमाणी ओहिं पउंजइ ० ते मार्गदिय-
 दारए सेलएणं सद्धिं लवणसमुद्दं मज्झिमज्झेणं वीईवयमाणे २ पासइ २ ता
 आसुरुत्ता असिखेडगं गेणहइ २ त्ता सत्तट्टु जाव उप्पयइ २ ता ताए उक्किट्टाए
 जेणेव मार्गदियदारया तेणेव उवागच्छइ २ त्ता एवं वयासी-हं भो मार्गदिय-
 दारया ! अपत्थियपत्थिया ! किण्णं तुब्भे जाणह ममं विप्पज्जहाय सेलएणं जवखेणं
 सद्धिं लवणसमुद्दं मज्झिमज्झेणं वीईवयमाणा ? तं एवमवि गए जइ णं
 तुब्भे ममं अवयवत्तह तो भे अत्थि जीवियं, अहं णं णावयवत्तह तो भे इमेणं
 णीलुप्पलगवल जाव एडेमि । तए णं ते मार्गदियदारया रयणदीवदेवयाए
 अत्तिए एयमट्ठं सोच्चा णिसम्म अभीया अतत्था अणुत्विग्गा अवखुमिया अस्-
 भंता रयणदीवदेवयाए एयमट्ठं णो आहंति णो परिद्याणंति णो अवयवत्तंति
 अण्णाहायमाणा अपरियाणमाणा अणवयवत्तमाणा सेलएणं जक्खेणं सद्धिं लवण-
 समुद्दं मज्झिमज्झेणं वीईवयंति । तए णं सा रयणदीवदेवया ते मार्गदियदारया
 जाहे णो संचाएइ बहहिं पडिलोमेहि य उवसग्गेहि य चालित्तए वा खोमित्तए
 वा विपरिणामित्तए वा लोभित्तए वा ताहे मट्टरेहि य सिगारेहि य कल-
 णेहि य उवसग्गेहि य उवसग्गेउं पयत्ता यावि होत्था-हं भो मार्गदियदारया !
 जइ णं तुब्भेहि देवाणुप्पिया ! मए सद्धिं हसियाणि य रमियाणि य ललियाणि
 य कीलियाणि य हिडियाणि य मोहियाणि य ताहे णं तुब्भे सव्वाइं अगणेमाणा
 ममं विप्पज्जहाय सेलएणं सद्धिं लवणसमुद्दं मज्झिमज्झेणं वीईवयह । तए णं सा
 रयणदीवदेवया जिणरविल्लयस्स मणं ओहिणा आभोएइ २ त्ता एवं वयासी-
 णिच्चंपि य णं अहं जिणपालियस्स अणिट्टा ५ । णिच्चं मम जिणपालए अणिट्ठे
 ५ । णिच्चंपि य णं अहं जिणरविल्लयस्स इट्टा ५ । णिच्चंपि य णं ममं जिण-
 रविल्लए इट्ठे ५ । जइ णं ममं जिणपालिए रोयमाणि कंदमाणि सोयमाणि

तिप्पमाणि विलवमाणि णावयक्खइ किण्णं तुमं [पि]जिणरविल्लया ! ममं रोय-
 माणि जावणावसक्खयि ? तए णं-सा पवररयणदीवस्स देवया ओहिणा (उ)
 जिणरविल्लयस्स मणं । णाऊण वधणिमित्तं उवरि मार्गदियदारमाणं
 दोण्हपि ॥१॥ दोसकलिया सत्तलियं णाणाविहचुण्णवासमीसं दिव्वं । घाणमण-
 णिव्वुइकरं सव्वोउयसुरभिकुसुमवट्ठि पमंच्चमाणी ॥२॥ णाणामणिकणगरयण-
 घटियंखिलिणिणेऊरमेह्लभूसणरवेणं । दिसाओ विदिसाओ पूरयंती वयणमिणं
 वेइ सा सकलुसा ॥३॥ होल वसुल गोल णाह दइत पिय रमण कंत सामिय
 णिग्घिण णित्थक्क । थि (छि) ण्ण णिकिकव अकयण्णुय सिट्ठिलभाव णिल्लज्ज लुक्ख
 अकल्लणजिणरविल्लय मज्झं हिययरक्खगा ॥४॥ ण हू जुज्जसि एक्कियं अणाहं
 अबंधवं तुज्झ च्चलणओवायकारियं उज्झउमह (ध) ण्णं । गुणसंकर ! अहं तुमे
 विहूणा ण समत्था (वि) जीविउं खणपि ॥५॥ इमस्स उ अणेगजसमगरविविध-
 सावयसयाउलघरस्स । रयणागरस्स मज्झे अप्पाणं वहेमि तुज्झ पुरओ एहि
 णियत्ताहि जइ ति कुवियो खमाहि एक्कावराहं मे ॥६॥ तुज्झ थ विगयघण-
 विमलससिमंडलगारसस्सिरीयं सारयणवकमलकुमुदकुवल्लयविमलवल्लणिकर-
 सरिसणिभणयणं । वयणं पिवासागयाए सट्ठा मे पेच्छिउं चे अवलोएहि ता
 इओ ममं णाह जा ते पेच्छामि वयणकमलं ॥७॥ एवं सप्पणयसरलमहुराई
 पुणो २ कलुगाइं वयणाइं जंपमाणी सा पवा मग्गओ समण्णेइ पाव्हियया ॥८॥
 तए णं से जिणरविल्लए च्चलमणे तेणेव भूसणरवेणं कण्णसुहमणोहरेणं तेहि थ
 सप्पणयसरलमहुरमणिएहि संजायविउणराए रयणदीवस्स देवयाए तीसे
 सुंदरयणजहणवयणकरचरणयणलावणरूवजोवण्णसिंरि च्च दिव्वं सरभसउ-
 वगूहियाइं (जाति) बिब्बोयविलसियाणि थ विहसियसकडक्खदिट्ठिणस्ससिय-
 मलियउवल्लिय (ठि) थियगमणपणयखिज्जियपासाइयाणि थ सरमाणे राग-
 मोहियमई अवसे कम्मवसगए अवयक्खइ मग्गओ सबिलियं । तए णं जिण-
 रविल्लयं समुप्पणकल्लुणभावं मच्चगलत्थल्लणोत्तिल्लयमई अवयक्खंतं तहेव जक्खे
 (य) उ सेलए जाणिऊण सणियं २ उव्विहइ णियगपिट्ठाहि विगयस (रयं) छे ।
 तए णं सा रयणदीवदेवया णिस्संसा कल्लुणं जिणरविल्लयं सकलुसा सेलग-
 पिट्ठाहि उवयंतं-दास ! मओसि त्ति जंपमाणी अप्पत्तं सागरसलिलं
 मेण्हिय बाहाहि आरसंतं उड्ढं उव्विहइ अंबरतले ओवयमाणं च्च मंडलगणे

पडिच्छित्ता णीलुप्लगवलअयसिप्पगासेण असिबरेण खंडाखंडि करेइ २ ता तत्थ विलवमाणे तत्स य सरसवहियस्स घेतूण अंगमंगाइं सरुहिराईं उविखत्त-
 वलि चउट्ठिसिं करेइ सा पंजली पहिट्ठा ॥६१॥ एवामेव समणाउसो ! जो
 अम्हं णिगंथाण वा णिगंथोग वा अंतिए पव्वइए समाणे पुणरवि माणुस्सए
 कामभोगे आसायइ पत्थयइ पीहेइ अभिलसइ से णं इहभवे चेव बहूणं समणां
 बहूणं समणीणं बहूणं सावयाणं बहूणं सावियाणं जाव संसारं अणुपरियट्ठिस्सइ
 जहा वा से जिणरविखए । छल्लिओ अवयक्खंतो णिरावयक्खो गओ अविमपेणं ।
 तम्हा पवयणसारे णिरावयक्खेण भविषव्वं ॥१॥ भोगे अवयक्खंता पडति
 संसारसायरे घोरे । भोगेहि णिरवयंक्खा तरंति संसारकंतरं ॥ २ ॥ ६२ ॥
 तए णं सा रयणदीवदेवया जेणेव जिणपालिए तेणेव उवागच्छइ २ ता बहूहि
 अणुलोमेहि य पडिलोमेहि य खरमहुरंसिगारेहि य कलणेहि य उव-
 सगगेहि य जाहे णो संचाएइ चालितए वा खोभित्तए वा विपरिणमितए
 वा ताहे संता तंता परितंता णिच्चिण्णा समाणा जामेव विसिं पाउड्ढूया तामेव
 विसिं पडिगया । तए णं से सेलए अवखे जिणपालिएण सट्ठि लवणसमुद्दं मज्जे-
 मज्जेणं बीईवयइ २ ता जेणेव चंपा णयरी तेणेव उवागच्छइ २ ता चंपाए
 णयरीए अगुज्जाणंसि जिणपालियं पट्टाओ ओवपारेइ २ ता एवं वयासी-एस
 णं देवाणुप्पिया ! चंपा णयरी दीसइ त्तिकट्टु जिणपालियं आपुच्छइ २ ता
 जामेव विसिं पाउड्ढूए तामेव विसिं पडिगए ॥६३॥ तए णं जिणपालिए चंपं
 अणुपविसइ २ ता जेणेव सए गिहे जेणेव अम्मापियरो तेणेव उवागच्छइ २
 ता अम्मापिऊणं रोयमाणे जाव विलवमाणे जिणरविखयवावसिं णिवेदेइ । तए
 णं जिणपालिए अम्मापियरो मित्तणाइ जाव परियणेणं सट्ठि रोयमाणाइं बहूई
 लोइयाइं मयकिच्चइ करेति २ ता कालेणं विगयसोया जाया । तए णं जिण-
 पालियं अणया कयाइ सुहासणवरगयं अम्मापियरो एवं वयासी-कहणं पुत्ता !
 जिणरविखए कालगए ? तए णं से जिणपालिए अम्मापिऊणं लवणसमुद्दोत्तरं
 च कालियवायसमुत्थणं [च] पोयवहणविचित्तिं च फलहल्लंडआसायणं च रयण-
 दीवुत्तरं च रयणदीवदेवया गिहं च भोगविभूइं च रयणदीवदेवयाअपाहणं च
 सूलाइयपुरिसदरिसणं च सेलगजक्खआरुहणं च रयणदीवदेवयाउवसगं च
 जिणरविखयविचित्तिं च लवणसमुद्दउत्तरणं च चंपागमणं च सेलगजक्खअपुच्छणं

च जहामूयमवित्तहमसंविद्धं परिकहेइ । तए णं जिणपालिए जाव अप्पसोणे जाव
 विउत्ताइ भोगभोगाइं भुजमाणे विहरइ ॥६४॥ तेणं कालेणं तेणं समएणं
 समणे भगवं महाधीरे समोसठे जाव घम्मं सोच्चा पच्चइए एक्कारसंगवी मासि-
 एणं भत्तेणं जाव सोहम्मे कप्पे देवत्ताए उववण्णे दो सागरोवमाइं ठिई
 प० । महाविदेहे वासे सिज्झहिइ जाव अंतं काहिइ । एवामेव समणा-
 उसो ! जाव भाणुस्सए कामभोगे णो पुणरवि आसाइ से णं जाव वीईवइस्सइ
 जहा व से जिणपालिए । एवं खलु जंबू ! समणेणं भगवया महाधीरेणं जाव
 संपत्तेणं णवमस्स णायज्झयणस्स अयमट्ठे पण्णत्ते त्तिबेमि ॥६५॥ माहाओ—जह
 रयणवीवदेवी तह एत्थं अविरई महापावा । जह लाहत्थी वणिया तह सुहकामा
 इहं जीवा ॥१॥ जह तेहि भीएहि दिट्ठो आघायमंडले पुरितो । संसारदुक्ख-
 भीया पासंति तहेव घम्मकहं ॥२॥ जह तेण तेसि कहिया देवी दुक्खाण कारणं
 घोरं । तत्तो च्चिय णित्थारो सेलगजक्खाओ णणत्तो ॥३॥ तह घम्मकही
 भव्वाण साहए दिट्ठुअविरइसहाबो । सयलदुहहेउभूओ विसया विरयंति जीवाणं
 ॥४॥ सत्ताणं दुहत्ताणं सरणं चरणं जिणिदपणत्तं । आणंदरूवणिक्खाण-
 साहणं तह य देसेइ ॥५॥ जह तेसि तरियव्वो रुदसमुदो तहेव संसारो । जह
 तेसि सगिहगमणं णिव्वाणगमो तथा एत्थं ॥६॥ जह सेलगपिट्ठाओ मट्ठो
 देवीइ मोहियमईओ । सावयसहस्सपउरम्मि सायरे पाविओ णिहणं ॥७॥
 तह अविरईइ णडिओ चरणधुओ दुक्खसाधयाइण्णे । णिवडइ अपारसंसार-
 सायरे दारुणसरूवे ॥८॥ जह देवीए अक्खोहो पत्तो सट्ठाण जीवियमुहाइं ।
 तह चरणट्ठिओ साह अक्खोहो जाइ षिक्खाणं ॥९॥

॥ णवमं अज्झयणं समत्तं ॥

चंदिमा णामं दसमं अज्झयणं

जह णं भंते ! समणेणं० णवमस्स णायज्झयणस्स अयमट्ठे पण्णत्ते दस-
 मस्स० के अट्ठे पण्णत्ते ? एवं खलु जंबू ! तेणं कालेणं तेणं समएणं राय-
 गिहे णयरे सामी समोसठे । गोयमसामी एवं चयासी—कहण्णं भंते !
 जीवा वड्ढंति वा हायंति वा ? गोयमा ! से जहाणामए बहुलपक्खस्स पाडि-
 वयाचंदे पुण्णिमाचंदं पणिहाय हीणे वण्णेणं हीणे सोम्मयाए हीणे णिद्ध-

याए हीणे कंतीए एवं द्वितीए जूतीए छायाए पमाए ओयाए लेस्साए मंड-
लेणं । तयाणंतरं च णं बीयाचंदे पाडिवयं चंदं पणिहाय हीणतराए वण्णेणं
जाव मंडलेणं । तयाणंतरं च णं तद्दयाचंदे बीयाचंदं पणिहाय हीणतराए
वण्णेणं जाव मंडलेणं । एवं खलु एएणं कमेणं परिहायमाणे २ जाव अमाव-
स्साचंदे चाउट्टसिचंदं पणिहाय णट्ठे वण्णेणं जाव णट्ठे मंडलेणं । एवामेव
समणाउसो ! जो अम्हं णिगंथो वा २ जाव पक्वइए समाणे हीणे खंतीए एवं
मूत्तीए गूत्तीए अज्जवेणं मट्टवेणं लाघवेणं सच्चवेणं तवेणं चियाए अकिचणयाए
बंभचेरवासेणं । तयाणंतरं च णं हीणे हीणतराए खंतीए जाव हीणतराए
बंभचेरवासेणं । एवं खलु एएणं कमेणं परिहायमाणे २ णट्ठे खंतीए जाव
णट्ठे बंभचेरवासेणं । से जहा वा सुक्कपक्खस्स पडिवयाचंदे अमावसाचंदं
पणिहाय अहिए वण्णेणं जाव अहिए मंडलेणं । तयाणंतरं च णं बीयाचंदे
पडिवयाचंदं पणिहाय अहिययराए वण्णेणं जाव अहिययराए मंडलेणं । एवं
खलु एएणं कमेणं परिवड्ढेमाणे २ जाव पुण्णिमाचंदे चाउट्टसि चंदं पणिहाय
पडिपुण्णे वण्णेणं जाव पडिपुण्णे मंडलेणं । एवामेव समणाउसो ! जाव पक्वइए
समाणे अहिए खंतीए जाव बंभचेरवासेणं । तयाणंतरं च णं अहिययराए
खंतीए जाव बंभचेरवासेणं । एवं खलु एएणं कमेणं परिवड्ढेमाणे २ जाव
पडिपुण्णे बंभचेरवासेणं । एवं खलु जीवा वड्ढति वा हायति वा । एवं खलु
जंबू ! समणेणं भगवया महावीरेणं० दसमस्स णायज्जयणस्स अयमट्ठे पण्णत्ते
त्ति बेमि ॥ ६९ ॥ गाहाओ—जह चंदो तह साहू राहुवरोहो जहा तह पमाओ ।
वण्णाई गुणगणो जह तहा खमाई समणधम्मो ॥१॥ पुण्णो वि पइदिणं जह
हायंतो सक्कहा ससी णस्से । तह पुण्णचरित्तोऽवि हु कुलीलसंसंगिमाईहि ॥२॥
जाणयपमाओ साहू हायंतो पइदिणं खमाईहि । जायइ णट्टचरित्तो तत्तो हुवखाइं
पावेइ ॥३॥ हीणगुणो वि हु होइं सुहगुरूजोगाइजणियसवेगो । पुण्णसहवो
जायइ विवड्डमाणो ससहरोव्व ॥४॥ दसमं अज्जयणं समत्तं ॥

दावह्वे णामं एक्कारसमं अज्जयणं

जइ णं भंते ! समणेणं० दसमस्स णायज्जयणस्स अयमट्ठे पण्णत्ते एक्का-
रसमस्स ० के अट्ठे पण्णत्ते ? एवं खलु जंबू ! तेषां कालेणं तेषां समएणं
रायगिहे जात्त गोयमे (समणं ३) एवं वयासी—कहं णं भंते ! जीवा आराहगा

वा विराहगा वा सवन्ति ? गोयमा ! से जहाणामए एगंसि समुहकूलंसि दाव-
 द्वा णामं रुक्खा पण्णत्ता किण्हा जाव णिउरुंभूया पत्तिया पुप्फिया फलिया
 हरियगरेरिउज्जमाणा सिरीए अईव उवसोभेमाणा २ चिट्ठति । जया णं दीवि-
 च्चगा ईंसि पुरेवाया पच्छावाया मंदावाया महावाया वायंति तथा णं बह्वे
 दावद्वा रुक्खा पत्तिया जाव चिट्ठति । अप्पेगइया दावद्वा रुक्खा जूष्णा
 श्रोडा परिसडियपंडुपत्तपुप्फफला सुक्करुक्खओ विव मिलायमाणा २ चिट्ठति ।
 एवामेव समणाउसो ! जे अम्हं णिगंथो वा २ जाव पव्वइए समाणे बहूणं
 समणाणं ४ सम्मं सहइ जाव अहियासेइ बहूणं अण्णउत्थियणं बहूणं गिहत्थाणं
 णो सम्मं सहइ जाव णो अहियासेइ एस णं मए पुरिसे देसविराहए पण्णत्ते
 समणाउसो ! जया णं सामुद्दगा ईंसि पुरेवाया पच्छावाया मंदावाया महावाया
 वायंति तथा णं बह्वे दावद्वा रुक्खा जूष्णा श्रोडा जाव मिलायमाणा २
 चिट्ठति । अप्पेगइया दावद्वा रुक्खा पत्तिया पुप्फिया जाव उवसोभेमाणा २
 चिट्ठति । एवामेव समणाउसो ! जो अम्हं णिगंथो वा २ जाव पव्वइए
 समाणे बहूणं अण्णउत्थियगिहत्थाणं सम्मं सहइ बहूणं समणाणं ४ णो सम्मं
 सहइ एस णं मए पुरिसे देसाराहए पण्णत्ते समणाउसो ! जया णं णो
 दीविच्चगा णो सामुद्दगा ईंसि पुरेवाया पच्छावाया जाव महावाया वायंति
 तए णं सव्वे दावद्वा रुक्खा जूष्णा श्रोडा ० । एवामेव समणाउसो ! जाव
 पव्वइए समाणे बहूणं समणाणं ४ बहूणं अण्णउत्थियगिहत्थाणं णो सम्मं
 सहइ एस णं मए पुरिसे सव्वविराहए पण्णत्ते समणाउसो ! जया णं दीविच्चगा
 वि सामुद्दगा वि ईंसि पुरेवाया पच्छावाया जाव वायंति तथा णं सव्वे दाव-
 द्वा रुक्खा पत्तिया जाव चिट्ठति । एवामेव समणाउसो ! जो अम्हं पव्व-
 इए समाणे बहूणं समणाणं ४ बहूणं अण्णउत्थियगिहत्थाणं सम्मं सहइ एस णं
 मए पुरिसे सव्वआराहए पण्णत्ते (समणाउसो !) । एवं खलु गोयमा ! जीवा
 आराहगा वा विराहगा वा भवन्ति । एवं खलु जंबू ! समणेणं भगवया महा-
 वीरेणं जाव संपत्तेणं एक्कारसमस्स अयमट्ठे पण्णत्ते त्तिबेमि ॥६७॥ गाहाओ-
 जह दावद्दवतव्वणमेवं साहू जहेव दीविच्चा । वाया तह समणाइयसपव्ववय-
 णाइं दुसहाइं ॥१॥ जह सामुद्दयवाया तहउणत्तिथाइकड्यवयणाइं । कुमुमाइ-
 संपया जह सिवमगाराहणा तह उ ॥२॥ जह कुमुमाइविणासो सिवमग-

विराहणा तथा गेया । जह दीववाउजोगे बहू इड्ढी ईसि य अणिड्ढी ॥३॥
 तह साहम्मियवयणाण सहमाणाराहणा भवे बहुया । इयराणमसहणे पुण सिव-
 मगगविराहणा थोवा ॥४॥ जह जलहियाउजोगे थेविड्ढी बहुयरा यऽणिड्ढी य ।
 तह परपवखवखमणे आराहणसीसि बहु य यरं ॥५॥ जह उभयवाउविरहे सञ्जा
 तरुसंपया विणट्टु त्ति । अणिमित्तोभयमच्छररूवे विराहणा तह य ॥६॥ जह
 उभयवाउजोगे सव्वसमिड्ढी वणस्स संजाया । तह उभयवयणसहणे सिवमगा-
 राहणा वुत्ता ॥७॥ ता पुण्णसमणधम्माराहणचित्तो सया महासत्तो । सव्वेण
 वि कीरंतं सहेज्ज सव्वं पि पडिकूलं ॥८॥

॥ एवकारसमं अज्झयणं समत्तं ॥

उदगणाए णामं वारसमं अज्झयणं

जइ णं भंते ! समणेणं जाव संपत्तेणं एवकारसमस्स णायज्झयणस्स अय-
 मट्ठे पण्णत्ते वारसमस्स णं ० के अट्ठे पण्णत्ते ? एवं खलु जंबू ! तेणं कालेणं
 तेणं समएणं चंपा णामं गयरी । पुण्णमह्हे चेइए । जियसत्तू राया । धारिणी
 देवी । अदीणसत्तू णामं कुमारे जुवराया वि होत्था । सुबुद्धी अमच्छे जाव रज्ज-
 धुराचित्तए समणोवासए । तीसे णं चंपाए गयरीए बहिया उत्तरपुरत्थिमेणं एए
 फरिहोदए यावि होत्था । भेयवसारुहिरयंसपूयपडलपोच्चडे मयगकलेयरसंछण्णे
 अमण्णुणे वण्णेणं जाव फासेणं से जहाणामए अहिमडेइ वा गोमडेइ वा जाव
 मयकुहियविणट्टुकिमिणवावण्णदुरभिगंधे किमिजालाउले संसत्ते असुइविगय-
 बीमच्छदरिसणिज्जे । भवेयाःरूवे सिया ? णो इणट्ठे समट्ठे । एत्तो अगिदुतराए
 चेव जाव गंधेणं पण्णत्ते ॥९८॥ तए णं से जियसत्तू राया अण्णया कयाइ ष्हाए
 कयवलिक्कम्भे जाव अप्पमहग्घाभरणालंकिवसरीरे बहूहिं ईसर जाव सत्थवाह-
 पमिईहिं सट्ठि [भोयणमंडवंसि] भोयणवेत्ताए सुहासणवरगए विउलं असणं ४
 जाव विहरइ जिमियभत्तुरारामए जाव सुइभूए तंसि विपुत्तंति असणंसि ४
 जाव जायविम्हए ते बहूवे ईसर जाव पमिईए एवं वयासी-अहो णं देवाणु-
 प्पिदा ! इमे मण्णुणे असणं ४ वण्णेणं उववेए जाव फासेणं उववेए अस्साय-
 णिज्जे विस्सायणिज्जे पोणणिज्जे दीवणिज्जे दप्पणिज्जे मयणिज्जे विहणिज्जे
 सत्थिवियगयापत्तहायणिज्जे । तए णं ते बहूवे ईसर जाव पमियओ जियसत्तुं

एवं वयासी-तहेव णं सामी ! जणं तुव्वे वयह-अहो णं इमे मणुणे
 असणे ४ वण्णेणं उव्वेए जाव पलहायणिज्जे । तए णं जियसत्तु सुबुद्धि
 अमच्चं एवं वयासी-अहो णं सुबुद्धी ! इमे मणुणे असणे ४ जाव पलहाय-
 णिज्जे । तए णं सुबुद्धी जियसत्तुस्स रण्णे एयमट्ठं णो आढाइ जाव
 तुसिणीए संचिट्ठइ । तए णं जियसत्तु सुबुद्धि दोच्चंपि तच्चंपि एवं वयासी-
 अहो णं सुबुद्धी ! इमे मणुणे तं चेव जाव पलहायणिज्जे । तए णं (जियसत्तुणा)
 से सुबुद्धी अमच्चे दोच्चंपि तच्चंपि एवं वृत्ते समाणे जियसत्तुं रायं एवं
 वयासी-णो खलु सामी ! अहं एयंसि मणुणंसि असणंसि ४ केइ विम्हए ।
 एवं खलु सामी ! सुब्भिसद्दा वि पोग्गला दुब्भिसद्दाए परिणमंति
 दुब्भिसद्दा वि पोग्गला सुब्भिसद्दाए परिणमंति । सुरूवा वि पोग्गला दुरू-
 वत्ताए परिणमंति दुरूवा वि पोग्गला सुरूवत्ताए परिणमंति । सुब्भिगंधा वि
 पोग्गला दुब्भिगंधत्ताए परिणमंति दुब्भिगंधा वि पोग्गला सुब्भिगंधत्ताए
 परिणमंति । सुरसा वि पोग्गला दुरसत्ताए परिणमंति । दुरसा वि पोग्गला
 सुरसत्ताए परिणमंति । सुहफासा वि पोग्गला दुहफासत्ताए परिणमंति दुहफासा
 वि पोग्गला सुहफासत्ताए परिणमंति । पओगवीससापरिणया वि य णं सामी !
 पोग्गला पणत्ता । तए णं से जियसत्तु सुबुद्धिस्स अमच्चस्स एवमाइक्खमाणस्स
 ४ एयमट्ठं णो आढाइ णो परियाणइ तुसिणीए संचिट्ठइ । तए णं से जियसत्तु
 अण्णया कयाइ ण्हाए आसखंधवरगए महयाभडच्चडगरह आसवाहणियाए
 णिज्जायमाणे तस्स फरिहोदगस्स अदूरप्पामंतेणं वीईवयइ । तए णं जियसत्तु
 राया तस्स फरिहोदगस्स असुभेणं गंधेणं अभिभूए समाणे सएणं उत्तरिज्जगेणं
 आसगं पिहेइ एगंतं अवक्कमइ २ ता बहवे ईसर जाव पसिइओ एवं
 वयासी-अहो णं देवाणुप्पिया ! इमे फरिहोदए अमणुणे वण्णेणं ४ से जहा-
 णामए अहिमडेइ वा जाव अमणामतराए चेव । तए णं ते बहवे राईसर जाव
 पसियओ एवं वयासी-तहेव णं तं सामी ! जं णं तुव्वे एवं वयह-अहो णं
 इमे फरिहोदए अमणुणे वण्णेणं ४ से जहाणामए अहिमडेइ वा जाव अमणा-
 मतराए चेव । तए णं से जियसत्तु सुबुद्धि अमच्चं एवं वयासी-अहो णं सुबुद्धी !
 इमे फरिहोदए अमणुणे वण्णेणं ४ से जहाणामए अहिमडेइ वा जाव अम-

णामतराए चेव । तए णं से सुबुद्धी अमच्चे जाव तुसिणीए संचिट्ठइ । तए णं से जियसत्तू राया सुबुद्धि अमच्चं दोच्चंपि तच्चंपि एवं वयासी-अहो णं तं चेव । तए णं से सुबुद्धी अमच्चे जियसत्तूणा रण्णा दोच्चंपि तच्चंपि एवं वुत्ते समणे एवं वयासी-णो खलु सामी ! अमहं एयंसि फरिहोदमंसि केइ विमहए । एवं खलु सामी ! सुब्भिसद्दा वि पोग्गला दुब्भिसद्दाए परिणमति तं चेव जाव पओग्गवीससापरिणया वि य णं सामी ! पोग्गला पणत्ता । तए णं जियसत्तू राया सुबुद्धि अमच्चं एवं वयासी-मा णं तुमं देवाणुप्पिया ! अप्पाणं च परं च तदुभयं च बहूहि य असम्भावुम्भावणाहि मिच्छत्ताभिणिवेसेण य बुग्गाहे-माणे वुप्पाएमाणे विहराहि । तए णं सुबुद्धिस्स इमेयारुवे अज्जत्थिए० समु-प्पज्जित्था-अहो णं जियसत्तू संते तच्चे तहिए अविताहे सद्भूए जिणपण्णत्ते भावे णो उवलमइ । तं सेयं खलु मम जियसत्तूस्स रण्णो संताणं तच्चत्ताणं तहि-याणं अविताहाणं सद्भूयाणं जिणपण्णत्ताणं भात्ताणं अभिगमणदुयाए एयमदं उवाइणावेत्तए । एवं सपेहेइ २ ता पच्चइएहि पुरिसेहि सद्धि अंतरावणाओ णवए घडए य पडए य पगेहइ २ ता संज्ञाकालसमयंसि पविरलमणुस्संति णिसंतपडिणिसंतंसि जेणेव फरिहोदए तेणेव उवागए २ ता तं फरिहोदगे गण्हा-वेइ २ ता णवएसु घडएसु गालावेइ २ ता णवएसु घडएसु पक्खिवावेइ २ ता सज्जखारं पक्खिवावेइ लंछियमहिए करावेइ २ ता सत्तरत्तं परिवसावेइ परिवसावेत्ता दोच्चंपि णवएसु घडएसु गालावेइ गालावेत्ता णवएसु घडएसु पक्खिवावेइ पक्खिवावेत्ता सज्जखारं पक्खिवावेइ २ ता लंछियमहिए कार-वेइ २ ता सत्तरत्तं परिवसावेइ २ ता तच्चंपि णवएसु घडएसु जाव संवसा-वेइ । एवं खलु एएणं उवाएणं अंतरा गलावेमाणे अंतरा पक्खिवावेमाणे अंतरा य विपरिवसावेमाणे २ सत्तसत्त य राइदियाइं विपरिवसावेइ । तए णं से फरि-होदए सत्तमंसि सत्तर्यंसि परिणममाणंसि उदगरयणे जाए यात्रि होत्था अच्छे पत्थे जच्चे तणुए फलिहवण्णाओ वण्णेणं उववेए ४ आसायणिज्जे जाव सत्वि-दियगायपरहायणिज्जे । तए णं सुबुद्धी अमच्चे जेणेव से उदगरयणे तेणेव उवा-गच्छइ २ ता करयलंसि आसावेइ २ ता तं उदगरयणं वण्णेणं उववेयं ४ आसाय-णिज्जे जाव सत्विदियगायपरहायणिज्जे जाणित्ता हट्टुत्तुदं बहूहि उदगसंभार-णिज्जेहि दब्बेहि संभारेइ २ ता जियसत्तूस्स रण्णो पाणिघपरियं सद्दावेइ २

त्ता एवं वयासी-तुमं च णं देवाणुप्पिया ! इमं उदगरयणं गेण्हाहि २ ता जियसत्तुस्स रण्णो भोयणवेलाए उवणेज्जासि । तए णं से पाणियघरिए सुबुद्धि-यस्स एयमट्ठं पडिसुणेइ २ ता तं उदगरयणं गिण्हाइ २ ता जियसत्तुस्स रण्णो भोयणवेलाए उवट्टवेइ । तए णं से जियसत्तू राया तं विपुलं असणं ४ आसाए-माणे जाव विहरइ जिमियभुत्तत्तरायया वि थ णं जाव परमसुइभूए तंति उदग-रयणे जायजिम्हए ते बह्वे राईसर जाव एवं वयासी-अहो णं देवाणुप्पिया ! इमे उदगरयणे अच्छे जाव सत्विदियमायपल्हायणिज्जे । तए णं ते बह्वे राईसर जाव एवं वयासी-तहेव णं सामी ! जण्णं तुम्भे वयह जाव एत्तं चैव पल्हाय-णिज्जे । तए णं जियसत्तू राया पाणियघरियं सद्दावेइ २ ता एवं वयासी-एस णं तुम्भे देवाणुप्पिया ! उदगरयणे कओ आसाइए ? तए णं से पाणिय-घरिए जियसत्तुं एवं वयासी-एस णं सामी ! मए उदगरयणे सुबुद्धिस्स अंति-याओ आसाइए । तए णं जियसत्तू राया सुबुद्धि अमच्चं सद्दावेइ २ ता एवं वयासी-अहो णं सुबुद्धी ! केणं कारणेणं अहं तव अणिट्ठे ५ जेणं तुमं मम कल्लाकल्लि भोयणवेलाए इमं उदगरयणं ण उवट्टवेसि ? तं एस (तए) णं तुमे देवाणुप्पिया ! उदगरयणे कओ उवलद्धे ? तए णं सुबुद्धी जियसत्तुं एवं वयासी-एस णं सामी ! से फरिहोदए । तए णं से जियसत्तू सुबुद्धि एवं वयासी-केणं कारणेणं सुबुद्धी ! एस से फरिहोदए ? तए णं सुबुद्धी जिय-सत्तुं एवं वयासी-एवं खलु सामी ! तुम्हे तथा मम एवमाइक्खमाणस्स ४ एयमट्ठं णो सद्दहह तए णं मम इमेयारूवे अज्झत्थिए०-अहो णं जियसत्तू संते जाव भावे णो सद्दहइ णो पत्तियइ णो रोएइ । तं सेयं खलु मम जियसत्तुस्स रण्णो संताणं जाव सम्भूयाणं जिणपण्णत्ताणं भावाणं अभिगमणट्ट-याए एयमट्ठं उवाइणावेत्तए । एवं संपेहेमि २ ता तं चैव जाव पाणियघरियं सद्दावेमि २ ता एवं वदामि-तुमं णं देवाणुप्पिया ! उदगरयणं जियसत्तुस्स रण्णो भोयणवेलाए उवणेहि । तं एएणं कारणेणं सामी ! एस से फरिहोदए । तए णं जियसत्तू राया सुबुद्धिस्स (अमच्चस्स) एवमाइक्खमाणस्स ४ एयमट्ठं णो सद्दहइ ३ असद्दहमाणे अपत्तियमाणे अरोयमाणे अविभत्तरट्टाणिज्जे पुरिसे सद्दावेइ २ ता एवं वयासी-गच्छह णं तुम्भे देवाणुप्पिया ! अंतरावणाओ णव घडए पडए थ गेण्हह जाव उदगसंहारणिज्जेहि दव्वेहिं संमारेह ।

तेवि तहेव संसारंति २ ता जियसत्तुस्स उवणेंति । तए णं से जियसत्तू राया तं उदगारयणं करयलंसि आसाएइ आसायणिज्जं जाव सत्त्वियमायपत्तहाय-णिज्जं जाणित्ता सुबुद्धिं अमच्चं सद्दावेइ २ ता एवं वयासी-सुबुद्धी ! एए णं तुमे संता तच्चा जाव सब्भूया मावा कओ उवलद्धा ? तए णं सुबुद्धी जियसत्तुं एवं वयासी-एए णं सामी ! मए संता जाव भावा जिणवयणाओ उवलद्धा । तए णं जियसत्तू सुबुद्धिं एवं वयासी-तं इच्छामि णं देवाणुप्पिया ! तव अंतिए जिणवयणं णिसामित्तए । तए णं सुबुद्धी जियसत्तुस्स विचित्तं केवलपण्णत्तं चाउज्जामं धम्मं परिकहेइ तमाइवल्लइ जहा जीवा बज्झंति जाव पंचाणुच्चयाइं । तए णं जियसत्तू सुबुद्धिस्स अंतिए धम्मं सोच्चा णिसम्म हट्ट० सुबुद्धिं अमच्चं एवं वयासी-सद्दहामि णं देवाणुप्पिया ! णिग्गं पावयणं ३ जाव से जहेयं तुब्भे वयह । तं इच्छामि णं तव अंतिए पंचाणुच्चइयं सत्तसिक्खत्तावइयं जाव उवसंपज्जित्ताणं विहरित्तए । अहासुहं देवाणुप्पिया ! मा पडिबंघं करेह । तए णं से जियसत्तू सुबुद्धिस्स अंतिए पंचाणुच्चइयं जाव दुवालसविहं सावयधम्मं पडिबज्जइ । तए णं जियसत्तू समणोवासए जाए अभिगयजीवा-जीवे जाव पडित्ताभेमाणे विहरइ । तेणं कालेणं तेणं समएणं थेरागमणं । जियसत्तू राया सुबुद्धी य णिग्गच्छइ । सुबुद्धी धम्मं सोच्चा जं णवरं जियसत्तुं आपुच्छामि जाव पव्वयामि । अहासुहं देवाणुप्पिया ! तए णं सुबुद्धी जेणेव जियसत्तू तेणेव उवागच्छइ २ ता एवं वयासी-एवं खलु सामी ! मए थेराणं अंतिए धम्मं णिसंते । से वि य धम्मं इच्छिय पडिच्छिए ३ । तए णं अहं सामी ! संसारभउव्विग्गे भीए जाव इच्छामि णं तुब्भोहं अम-णुष्णाए स० जाव पव्वइत्तए । तए णं जियसत्तू सुबुद्धिं एवं वयासी-अच्छसु ताव देवाणुप्पिया ! कइवयाइं वासाइं उरालाइं जाव भुंजमाणा तओ पच्छा एगयओ थेराणं अंतिए मुंडे भवित्ता जाव पव्वइस्सामो । तए णं सुबुद्धी जिय-सत्तुस्स रण्णो एयसट्ठं पडिभुणेइ । तए णं तस्स जियसत्तुस्स रण्णो सुबुद्धिणा सद्धिं विपुलाइं माणुस्सगाइं जाव पच्चणुब्भवमाणस्स दुवालस वासाइं बीइ-वक्ताइं । तेणं कालेणं तेणं समएणं थेरागमणं । तए णं जियसत्तू धम्मं सोच्चा एवं जं णवरं देवाणुप्पिया ! सुबुद्धिं आमंतेमि न्नेट्टुपुत्तं रज्जे ठवेमि तए णं तुब्भं जाव पव्वयामि । अहासुहं देवाणुप्पिया ! तए णं जियसत्तू

राया जेणेव सए गिहे तेणेव उवागच्छइ २ ता सुबुद्धि सहावेइ २ ता एवं वयासी-एवं खलुं मए थेराणं जाव पव्वज्जामि, तुमं णं किं करेसि ? तए णं सुबुद्धी जियसत्तु एवं वयासी-जाव के अण्णे आहारे वा जाव पव्वयामि तं जइ णं देवाणुप्पिया ! जाव पव्वयह । गच्छह णं देवाणुप्पिया ! जेट्टुपुत्तं च कुडुंबे ठावेहि २ ता सीयं दुरुहित्तानं ममं अंतिए सीया जाव पाउब्भवइ । तए णं सु० जाव पाउब्भवइ तए णं जियसत्तु कोडुंबिय-पुरिसे सहावेइ २ ता एवं वयासी-गच्छह णं तुम्भे देवाणुप्पिया ! अदीणसत्तु-स्स कुमारस्स रायाभिसेयं उवट्टवेह जाव अभिसिच्चंति जाव पव्वइए । तए णं जियसत्तु एवकारस अंगाइं अहिज्जइ बहूणि वासाणि परियाओ पाउजिन्ता मासियाए संलेहणाए जाव सिद्धे । तए णं सुबुद्धी एवकारस अंगाइं अहिज्जित्ता बहूणि वासाणि जाव सिद्धे । एवं खलुं जंबू ! समणेणं भगवया महावीरेणं जाव संपत्तेणं बारसमस्स णायज्जयणस्स अयमट्ठे पण्णत्ते ति वेमि ॥ ६६ ॥ गाहा-मिच्छत्तमोहियमणा पावपसत्तावि पाणिणो विगुणा । फरिहोदगं च णुणिणो हवति वरगुरुपसायाओ ॥ १ ॥

॥ बारसमं अज्झयणं समत्तं ॥

मंडुक्के णामं तेरसमं अज्झयणं

जइ णं भंते ! समणेणं जाव संपत्तेणं बारसमस्स णा० अयमट्ठे पण्णत्ते तेरसमस्स णं भंते ! णाय० के अट्ठे पण्णत्ते ? एवं खलुं जंबू ! तेणं कालेणं तेणं समएणं रायगिहे णयरे ० गुणसिलए चेइए समोसरणं । परिसा णिरगया । तेणं कालेणं तेणं समएणं सोहम्भे कप्पे दददुरवडिसए विमाणे सभाए सुहम्माए दददुरंसि सीहासणंसि दददुरे देवे चउहि सामाणियसाहस्सीहि चउहि अग्ग-महिसीहि सपरिसाहि एवं जहा सुरियाभो जाव दिव्वाइं भोगभोगाइं भुंजमाणो विहरइ इमं च णं केवलकप्पं जंबुद्दीवं दीवं विउलेणं ओहिणा आभोएमाणे २ जाव णट्टुविहि उवदंसित्ता पडिगए जहा सूरियाभे । भंते ! ति भगवं गोयमे समणं ३ वंदइ णमंसइ वं० २ ता एवं वयासी-अहो णं भंते ! दददुरे देवे सहि-ड्डिए ६ । दददुरस्स णं भंते ! देवस्स सा दिव्वा देविड्डी ३ काहि गया ? काहि अणुपविट्ठा ? गोयसा ! सरीरं गया सरीरं अणुपविट्ठा कूडागारदिट्ठंती ।

वद्वुरेणं भंते ! देवेणं सा दिव्वा देविड्डी ३ किण्णा लद्धा जाव अभिसमण्णा-
 गया ? एवं खलु गोयमा ! इहेव जंजूदीवे २ भारहे वासे रायगिहे गुणसिलए
 चेइए सेणिए राया । तत्थ णं रायगिहे णंदे णामं मणियारसेट्ठी परिवसइ
 अड्ढे दित्ते० । तेणं कालेणं तेणं समएणं अहं गोयमा ! समोसद्धे परिसा णिग्गाया
 सेणिए वि राया णिग्गाए । तए णं से णंदे मणियारसेट्ठी इमीसे कहाए लद्धट्ठे
 समाणे ण्हाए पायचारेणं जाव पज्जुवासइ । णंदे धम्मं सोचन्ना समणोवासए
 जाए । तए णं अहं रायगिहाओ पडिणिवखत्ते बहिया जणवयविहारं विहरामि ।
 तए णं से णंदे मणियारसेट्ठी अण्णया कयाइ असाहुंसण्णेण य अयज्जुवासणाए
 य अण्णसासणाए य असुस्सुसणाए य सम्गतपज्जवेहं परिहायमाणोहं २ मिच्छत्त-
 पज्जवेहं परिवट्ठमाणोहं २ मिच्छत्तं विपडिवण्णे जाए यावि होत्था । तए णं
 णंदे मणियारसेट्ठी अण्णया [कयाइ] गिम्हकालसमयंसि जेट्टामूलंसि मासंसि
 अट्टमभत्तं परिगण्हइ २ त्ता पोसहसालाए जाव विहरइ । तए णं णंदस्त अट्टम-
 भत्तंसि परिणममाणंसि तण्हाए छुहाए य अभिभूयस्स समाणस्स इमेयाह्वे
 अज्झत्थिए०-धण्णा णं ते जाव ईसरपभियओ, जेसि णं रायगिहस्स बहिया
 बहोओ वावीओ पोक्खरणीओ जाव सरसरपत्तियाओ जत्थ णं बहुजणो ण्हाइ य
 पियइ य पाणियं च संवहइ । तं सेयं खलु ममं कल्लं (पाउ०) सेणियं रायं
 आपुच्छत्ता रायगिहस्स बहिया उत्तरपुरत्थिमे दिसीभाए वेढभारपव्वयस्स
 अदूरसाभंते वत्थुपाढपरोइयंसि भूमिभागंसि (जाव) णंदं पोक्खरिणि खणावेत्तए-
 त्तिकट्टु एवं संपेहेइ २ त्ता कल्लं पाउड्ढाए जाव पोसहं पारेइ २ त्ता ण्हाए
 कयबलिकम्मं मित्तणाइ जाव संपरिवुडे महत्थं जाव पाहुडं रायािरहं गेण्हइ २
 त्ता जेणेव सेणिए राया तेणेव उवागच्छइ जाव पाहुडं उवट्टवेइ २ त्ता एवं
 वयासी-इच्छामि णं सामी ! तुव्भेहिं अब्भणुण्णाए समाणे रायगिहस्स बहिया
 जाव खणावेत्तए । अहामुहं देवाणुप्पिया ! तए णं से णंदे सेणिएणं रण्णा
 अब्भणुण्णाए समाणे हट्टतुट्ठे रायगिहं [णगरं] मज्झमज्जेणं णिग्गच्छइ २ त्ता
 वत्थुपाढपरोइयंसि भूमिभागंसि णंदं पोक्खरिणि खणाविउं पयत्ते याधि होत्था ।
 तए णं सा णंदा पोक्खरणी अणुपुट्ठेणं खणमाणा २ पोक्खरणी जाया यावि
 होत्था चाउवकोणा समतीरा अणुपुट्ठसुजायवप्पसीयलजला सच्छण्णपत्तविस-
 मुणाला बहुउप्पलपउमकुमुदणलिणिमुभगसोगधियपुंडरीयमहापुंडरीयसयपत्त-

सहरसपत्तपफुल्लकेसरोववेया परिहत्थ-भमंत-मत्तछप्पय-अणेगसउणगण-मिहुण-
 त्रियरियसद्दुण्णइयमहुरसरणाइया पासाईया ४ । तए णं से णंदे मणियारसेट्ठी
 णंदाए पोखरिणीए चउर्दिसिं चत्तारि वणसंडे रोवावेइ । तए णं ते वणसंडा
 अणंपुग्घेणं सारविज्जमाणा संगोविज्जमाणा य संवड्डियमाणा य से वणसंडा
 जाया किंहा जाव णिकुरंबभूया पत्तिया पुण्डिया जाव उवसोभेमाणा २
 चिट्ठंति । तए णं णंदे पुरत्थिमिल्ले वणसंडे एगं महं चित्तसभं करावेइ [२]
 अणेगखंभसयसंणविट्ठं पासाइयं ४ । तत्थ णं बहूणि किंहाणि य जाव सुविक-
 लाणि य कट्टकम्माणि य पोत्थकम्माणि य चित्तं लियं गयिमवेद्धिम-
 पूरिमसंघाइमं उवदसिज्जमाणाइं २ चिट्ठंति । तत्थ णं बहूणि आस-
 णाणि य सयणाणि य अत्थयपचत्थयाइं चिट्ठंति । तत्थ णं बहूवे णडा
 य णट्टा य जाव दिण्णभइभत्तवेयणा तालायरकम्मं करेमाणा विहरंति । राय-
 गिह्विणिग्गओ य तत्थ बहूजणो तेषु पुच्चणत्थेषु आसणसयणेषु संणि-
 सण्णो य संतुयट्टो य सुणमाणो य साहेमाणो य सासोमाणो य सुहंसुहेणं विह-
 रइ । तए णं णंदे दाहिणिल्ले वणसंडे एगं महं महाणससालं करावेइ अणेय-
 खंभ जाव पडिरूवं । तत्थ णं बहूवे पुरिसा दिण्णभइभत्तवेयणा विउलं असणं ४
 उवक्खडेंति बहूणं समणमाहणअतिहोकिवणवणीसगाणं परिभाएमाणा २ विहरंति ।
 तए णं णंदे मणियारसेट्ठी पच्चत्थिमिल्ले वणसंडे एगं महं तेगिच्छियसालं
 करावेइ अणेगखंभसय जाव पडिरूवं । तत्थ णं बहूवे वेज्जा य वेज्जपुत्ता य
 जाणया य जाणयपुत्ता य कुसला य कुसलपुत्ता य दिण्णभइभत्तवेयणा बहूणं
 वाहियाणं य गिलाणाण य रोगियाण यं दुब्बलाण य तेइच्छकम्मं करेमाणा
 विहरंति । अण्णे य एत्थ बहूवे पुरिसा दिण्णभइं तेषिं बहूणं वाहियाण य
 रोगिं गिलां दुब्बलाण य ओसहभेसज्जभत्तपाणेणं पडियारकम्मं करेमाणा
 विहरंति । तए णं णंदे उत्तरिल्ले वणसंडे एगं महं अलंकारियसभं करेइ अणेग-
 खंभसय जाव पडिरूवं । तत्थ णं बहूवे अलंकारियपुरिसामणुस्सा दिण्णभइभत्त-
 वेयणा बहूणं समणाण य अणाहाण य गिलाणाण य रोगियाण य दुब्बलाण
 य अलंकारियकम्मं करेमाणा २ विहरंति । तए णं तीए णंदाए पोखरिणीए
 बहूवे सणाहा य अणाहा य पंथिया य पहिया य करोडिया य(कारिया य) तण-
 हारा पत्तहारा कट्टहारा अप्पेगइया ण्हायंति अप्पेगइया पाणियं विरयंति अप्पे-

गइया पाणियं संवहति अप्येगइया विसञ्जियमेयज्जलमलपरिस्समणिट्ठुत्थि-
 वासा सुहंसुहेणं विहरंति । रायगिहविणिग्गओ वि जत्थ बहुजणो कि ते
 जलरमण-विविहमज्जण-कयलिलयाघरय-कुमुमसत्थरय-अणेगसउणगण-रुयरि-
 भियसंकुलेसु सुहंसुहेणं अभिरममाणो २ विहरइ । तए णं णंदाए पोवखरिणीए
 बहुजणो ण्हायमाणो य पीयमाणो य पाणियं च संवहमाणो य अणमण्णं एवं
 वयासी-धण्णे णं देवाणुप्पिया ! णंदे मणियारसेट्ठी कयत्थे जाव जम्मजीवियफले
 जस्स णं इमेयास्सवा णंदा पोवखरिणी चाउवकोणा जाव पडिरूवा जस्स णं
 पुरत्थिमिल्ले तं चेव सव्वं चउमु वि वणसंडेसु जाव रायगिहविणिग्गओ जत्थ
 बहुजणो आसणेसु य सयणेसु य सण्णिसण्णो य संतुयट्ठो य पेच्छमाणो य साहे-
 माणो य सुहंसुहेणं विहरइ । तं धण्णे कयत्थे [कयत्त्वखणे] कयपुण्णे ० कया णं
 लोया ! सुलद्धे माणुस्सए जम्मजीवियफले णंदस्स मणियारस्स । तए णं राय-
 गिहे सिघाडग जाव बहुजणो अणमण्णस्स एवमाइवल्लइ ४-धण्णे णं देवा-
 णुप्पिया ! णंदे मणियारे सो चेव गमओ जाव सुहंसुहेणं विहरइ । तए णं से णंदे
 मणियारे बहुजणस्स अंतिए एयमट्ठं सोच्चा णिसम्म हट्टुट्ठे धाराहयकलं-
 वगं पिव समससियरोमकूवे परं सायासोक्खमणुंभवमाणे विहरइ ॥१००॥
 तए णं तस्स णंदस्स मणियारसेट्ठिस्स अण्णया कयाइ सरीरगंसि सोलस-
 रोयायंका पाउब्भूया तंजहा-सासे कासे जरे दाहे कुच्छिसूले भगंदरे ।
 अरिसा अजीरए दिट्ठिमुद्धसूले अगारए ॥१॥ अच्छिवेयणा कण्णवेयणा कंडू वउदरे
 कोढे ॥ तए णं से णंदे मणियारसेट्ठी सोलसंहि रोयायंकेहि अभिभूए समाणे
 कोडुंबियपुरिसे सदाब्भेइ २ सा एवं वयासी-गच्छह णं तुब्भे देवाणुप्पिया !
 रायगिहे णयरे सिघाडग जाव पहेसु महया २ सट्ठेणं उग्घोसेमाणा २ एवं
 वयह-एवं खलु देवाणुप्पिया ! णंदस्स मणियार (सेट्ठि) स्स सरीरगंसि सोलस
 रोयायंका पाउब्भूया तंजहा-सासे जाव कोढे । तं जो णं इच्छइ देवाणुप्पिया !
 वेज्जो वा वेज्जपुत्तो वा आणुओ वा २ कुसलो वा २ णंदस्स मणियारस्स
 तेसि च णं सोलसण्हं रोयायंकाणं एगमवि रोयायंकं उवसामेत्तए-तस्स णं
 दे ० ! णंदे मणियारे विउलं अत्थसंपयाणं दलयइ-त्तिकट्टु दोचंचिपि तच्चपि
 घोसणं घोसेह २ सा एयमाणत्तियं पच्चप्पिणह तेवि तहेव्वं पच्चप्पिणंति । तए
 णं रायगिहे इमेयास्सवं घोसणं सोच्चा णिसम्म बह्वे वेज्जा य वेज्जपुत्ता य

जाव कुसलपुत्ता य सत्थकोसहत्थगया य कोसगपायहत्थगया य सिलियाहत्थ-
गया य गुलियाहत्थगया य ओसहभेसज्जहत्थगया य सएहिं २ गिहेहिंतो णिक्ख-
मंति २ ता रायगिहं मज्झमज्जेणं जेणेव णंदस्स मणियारेसेट्ठिस्स गिहे तेणेव
उवागच्छति २ ता णंदस्स मणियारस्स सरीरं पासंति २ तेसि रोयायंकाणं
णियाणं पुच्छंति २ ता णंदस्स मणियारस्स बहूहिं उच्चलणेहिं य उच्चट्टणेहिं
सिणेहपाणेहिं य वमणेहिं य विरेयणेहिं य सेयणेहिं य अवदहणेहिं य
अवभाषेहिं य अणुवासणेहिं य वत्थिकम्मेहिं य णिरूहेहिं य सिरावेहेहिं य
तच्छणाहिं य पच्छणाहिं य सिरावेढेहिं य तप्पणाहिं य पुढवाएहिं य
छल्लीहिं य वल्लीहिं य मूलेहिं य कंदेहिं य पत्तेहिं य पुप्फेहिं य फलेहिं य
बीएहिं य सिलियाहिं य गुलियाहिं य ओसहेहिं य भेसज्जेहिं य इच्छति तेसि
सोलसण्हं रोयायंकाणं एगमवि रोयायंकां उवसामित्तए णो चेव णं संचाएंति
उवसामेत्तए । तए णं ते बहूवे वेज्जा य ६ जाहे णो संचाएंति तेसि सोलसण्हं
रोयायंकाणं एगमवि रोयायंकां उवसामित्तए ताहे संता तंता जाव पडिगया ।
तए णं णंदे तेहिं सोलसेहिं रोयायंकेहिं अभिभूए समाणे णंदाए पोक्ख-
रिणीए मुच्छिए ४ त्तिरिक्खजोणिएहिं णिवद्वाउए बद्धएसिए अट्टदुहट्ट-
वसट्टे कालमासे कालं किच्चा णंदाए पोक्खरिणीए ददुदुरीए कुच्छिसि ददुदुर-
त्ताए उववणे । तए णं णंदे ददुदुरे गब्भाओ विणिम्मवके समाणे उम्मु-
क्कवालभावे विष्णावपरिणयमित्ते जोव्वणममणुप्पत्ते णंदाए पोक्खरिणीए
अभिरममाणे २ विहरइ । तए णं णंदाए पोक्खरिणीए बहुजणे ण्हायमाणो
य पियमाणो य पाणियं च संवहमाणो य अणमणस्स एवमाइक्खइ ४-धणे
णं देवाणुप्पिया ! णंदे मणियारे जस्स णं इमेयारूवा णंदा पुक्खरिणी चाउ-
क्कोणा जाव पडिक्खा जस्स णं पुरत्थिमिल्ले वणसंडे चित्तसभा अपेगखंभ०
तहेव चत्तारि सहाओ जाव जम्मजीवियफले । तए णं तस्स ददुदुरस्स तं
अभिवक्खणं २ बहुजणस्स अंतिए एयमट्ठं सोच्चा णिसम्म इमेयारूवे अज्झ-
त्थिए० सम्पुप्पज्जित्था-से कीहिं मण्णे मए इमेयारूवे सट्ठे णिसंतपुब्बे-त्तिकट्टु
सुभेणं परिणामेणं जाव जाईसरणे सम्पुप्पणे पुव्ववजाई सम्मं समागच्छइ । तए
णं तस्स ददुदुरस्स इमेयारूवे अज्झत्थिए०-एवं खलु अहं इहेव रायगिहे णयरे
णंदे णामं मणियारे अड्ढे० । तेणं कालेणं तेणं समएणं समणे भगवं महावीरे
इह समोसडे । तए णं समणस्स ३ अंतिए पंचाणुव्वइए सत्तसिक्खावइए

जाव पडिवण्णे । तए णं अहं अण्णया कयाइ असाहुवंसणेण य जाव भिच्छत्तं
विपडिवण्णे तए णं अहं अण्णया कयाई गिम्हे कालसमयांसि जाव उवसंपज्जि-
त्ताणं विहरामि-एवं जहेव चिंता आपुच्छणा णंदापुक्खरिणी वणसंडा सहाओ
तं चेव सव्वं जात्र णंदाए पोक्ख० ददुदुरत्ताए उववण्णे । तं अहो णं अहं
अहण्णे अपुण्णे अकयपुण्णे णिग्गंथाओ पावयणाओ णट्ठे मट्ठे परिडमट्ठे । तं
सेयं खलु ममं सयमेव पुव्वपडिवण्णाइं पंचाणुव्वयाइं० उवसंपज्जित्ताणं विह-
रित्तए । एवं संपेहेइ २ त्ता पुव्वपडिवण्णाइं पंचाणुव्वयाइं जाव आरुहेइ २
त्ता इमेयारूव्वं अभिग्गहं अभिग्गिण्हइ-कप्पइ मे जावजीवं छट्ठंछट्ठेणं अणि-
विखत्तेणं अप्पाणं सावेमाणस्स विहरित्तए । छट्ठस्स वि य णं पारणमंसि कप्पइ
मे णंदाए पोक्खरिणीए परिपेरंतेसु फामुएणं ण्हाणीदएणं उम्महूणोलोलियाहि
य वित्तिं कप्पेसाणस्स विहरित्तए । इमेयारूव्वं अभिग्गहं अभिग्गेहइ जावज्जीवाए
छट्ठंछट्ठेणं जाव विहरइ । तेणं कालेणं तेणं समएणं अहं गोयमा ! गुणसिए
चेइए समोसडे परिसा णिग्गया । तए णं णंदाए पुक्खरिणीए बहुजणो ण्हाप०
३ अणमण्णं • जाव समणे ३ इहेव गुणसिए चेइइ समोसडे । तं गच्छामो
णं देवाणुणिया ! समणं ३ वंदामो जाव पज्जुवासामो । एयं मे इहमवे
परमवे य हियाए जाव आणुगामियत्ताए भविस्सइ । तए णं तस्स ददुदुरस्स
बहुजणस्स अंतिए एयमट्ठं सोचचा णिसम्म अयमेयारूव्वे अज्जत्थिए० सम्प-
ज्जित्था-एवं खलु समणे ३ • समोसडे । तं गच्छामि णं वंदामि • । एवं
संपेहेइ २ त्ता णंदाओ पुक्खरिणीओ सणियं २ उत्तरेइ २ त्ता जेणेव रायमणे
तेणेव उवागच्छइ २ त्ता ताए उक्किट्टाए ५ ददुदुरगईए वीईवयमाणे जेणेव
ममं अंतिए तेणेव पहारेत्थ गमणाए । इमं च णं सेणिए राया भंभसारे ण्हाए
कयकोउय जाव सव्वालंकारविभूसिए हत्थिखंधवरगए सकोरंटमत्तदामेणं
छत्तेणं धरिज्जमाणेणं सेयवरत्तामरा० ह्यगयरह० महया भइचउगर० चाउ-
रंणिणीए सेणाए सट्ठि संएरिवुडे मम पायवंदए हव्वमागच्छइ । तए णं से
ददुदुरे सेणियस्स रण्णो एगेणं आसकिसोरएणं वामपाएणं अवकंते सुमाणे अंत-
णिग्घाइए कए यावि होत्था । तए णं से ददुदुरे अत्थामे अबले अवीरिए अपुरि-
सकारपरवकमे अधारणिज्जमि-तिकट्टु एणंतमववकमइ • करयल जाव एवं
वयासी-णमोत्थुणं अरहंताणं (भगवंताणं) जाव संपत्ताणं । णमोत्थुणं सम-

णस्स ३ मम धम्मायरियस्स जाव संपाविउकामस्स । पुंविपि य णं मए सम-
णस्स ३ अंतिए थूलए पाणाइवाए पच्चक्खाए जाव थूलए परिग्गहे पच्चक्खाए ।
तं इयांणिपि तस्सेव अंतिए सव्वं पाणाइवायं पच्चक्खामि जाव सव्वं परिग्गहं
पच्चक्खामि जावज्जीवं सव्वं असणं ४ पच्चक्खामि जावज्जीवं जंपि य इमं
सरीरं इट्ठं कंतं जाव मा फुसंतु एयंपि णं चरिमेहिं ऊसासेहिं वोसिरामि-
त्तिकट्टु । तए णं से ददुदुरे कालमासे कालं किञ्चा जाव सोहम्मे कप्पे ददुदुर-
वडिसए विमाणे उववायसभाए ददुदुरवेवत्ताए उववण्णे । एवं खलु गोयमा !
ददुदुरेणं सा दिव्वा देविइढ्ढी लद्धा ३ । ददुदुरस्स णं भंते ! देवस्स केवइयं
कालं ठिई पणत्ता ? गोयमा ! चत्तारि पलिओवमाइं ठिई पणत्ता । से णं
ददुदुरे देवे० महाविदेहे वासे सिज्झिहिइ बुज्झिहिइ जाव अंतं करेहिइ ।
एवं खलु जंबू ! समणेणं भगवया महावीरेणं जाव संपत्तेणं तेरसमस्स
णायज्झयणस्स अयमट्ठे पणत्ते त्ति बेमि ॥ १०१ ॥ गाहाउ-संपण्णगुणो
वि जओ सुसाहुसंसग्गिवज्जिओ पायं । पावइ गुणपरिहाणि ददुदुरजीवोव्व
मणिधारो ॥ ११ ॥ तित्थयरुषं दणत्थं चलिओ भावेण पावए सग्गं । जह ददुदुर-
देवेणं पत्तं वेमाणियसुरत्तं ॥ १२ ॥ तेरसमं अज्झयणं समत्तं ॥

तेयली णामं चोद्वसमं अज्झयणं

जइ णं भंते ! समणेणं जाव संपत्तेणं तेरसमस्स णायज्झयणस्स अयमट्ठे
पणत्ते चोद्वसमस्स ० के अट्ठे पणत्ते ? एवं खलु जंबू ! तेणं कालेणं तेणं
समएणं तेयलिपुरं णामं णयरं । पमयवणं उज्जाणे । कणगरहे राया । तस्स णं
कणगरहस्स पउमावई देवी । तस्स णं कणगरहस्स रण्णे तेयलिपुत्ते णामं अमच्चे
सामदंडं० तत्थ णं तेयलिपुरे कलादे णामं मूसियारदारए होत्था अइडे जाव
अपरिभूए । तस्स णं भइा णामं भारिया । तस्स णं कलायस्स मूसियारदारयस्स
धूया भइाए अत्तथा पोट्टिलां णामं दारिया होत्था रूवेण य जोव्वणेण य लाव-
ण्णेण य उविकट्टा उविकट्टुसरीरा । तए णं सा पोट्टिला दारिया अणया कयाइ
ण्हाया सव्वालंकारविभूसिया चेडियाचक्कवालसंपरिवुडा उंप्पि पासाधवरगया
आगासत्तलगत्ति कणगमएणं तिद्वसएणं कीलमाणी २ विहरइ । इमं च णं तेयलि-
पुत्ते अमच्चे ण्हाए आसखंधवरगए महया भडचडगरआसवाहणियाए णिज्जाय-

माणे कलायस्स मूसियारदारगस्स गिहस्स अदूरसामंतेणं वीईवयइ । तए णं से तेयलिपुत्ते अमच्चे मूसियारदारगिहस्स अदूरसामंतेणं वीईवयमाणे २ पोट्टिलं दारियं उप्पि पासायवरगयं आगासत्तलंगंसि कणगतिदूसएणं कीलमाणीं पासइ २ ता पोट्टिलाए दारियाए रुवे य ३ जाव अज्जोववण्णे कोडुंबियपुरिसे सदावेइ २ ता एवं वयासी-एस णं देवाणुप्पिया ! कस्स दारिया किणामधेज्जा वा ? तए णं कोडुंबियपुरिसे तेयलिपुत्तं एवं वयासी-एस णं सामी ! कलायस्स मूसियारदारगस्स धूया भट्टाए अत्तया पोट्टिला णामं दारिया रुवेण य जाव सररीरा । तए णं से तेयलिपुत्ते आसवाहणियाओ पडिणियत्ते समाणे अदिभत्तर-ठाणिज्जे पुरिसे सदावेइ २ ता एवं वयासी-गच्छह णं तुम्भे देवाणुप्पिया । कलायस्स २ धूयं भट्टाए अत्तयं पोट्टिलं दारियं मम भारियत्ताए वरेह । तए णं ते अदिभत्तरठाणिज्जा पुरिसा तेयलिणा एवं वुत्ता समाणा हट्टुं करयत्तं तहत्ति जेणेव कलायस्स २ गिहे तेणेव उवागया । तए णं से कलाए मूसियार-दारए पुरिसे एज्जमाणे पासइ २ ता हट्टुत्तुठे आसणाओ अब्भुत्तेइ २ ता सत्तद्वपयाइं अणुगच्छइ २ ता आसणेणं उवणिमंतेइ २ ता आसत्ये वीसत्थे सुहासणवरगए एवं वयासी-संदिस्तु णं देवाणुप्पिया ! किमागमणपओवणं ? तए णं ते अदिभत्तरठाणिज्जा पुरिसा कलायं २ एवं वयासी-अम्हे णं देवाणु-प्पिया ! तव धूयं भट्टाए अत्तयं पोट्टिलं दारियं तेयलिपुत्तस्स भारियत्ताए वरेमी, तं जइ णं जाणसि देवाणुप्पिया ! जुत्तं वा पत्तं वा सलाहणिज्जं वा सरिसो वा संजोगो ता दिज्जउ णं पोट्टिला दारिया तेयलिपुत्तस्स, ता मण देवाणुप्पिया ! किं दलामो सुक्कं ? तए णं कलाए २ ते अदिभत्तरठाणिज्जे पुरिसे एवं वयासी-एस चेव णं देवाणुप्पिया ! मम सुक्के जण्णं तेयलिपुत्ते मम दारियाणिमित्तेणं अणुमहं करेइ । ते ठाणिज्जे पुरिसे विपुत्तेणं असणेणं ४ पुप्फवत्थ जाव मल्लालंकारेणं सक्कारेइ सम्माणेइ ० पडिद्विसज्जेइ । तए णं कलायस्स मूसियारदारगस्स गिहाओ पडिणियत्तति २ ता जेणेव तेयलि-पुत्ते अमच्चे तेणेव उवागच्छति २ ता तेयलिपुत्तं एयमदट्ठं णिवेयंति । तए णं कलाए २ अण्णया कयाइं सोहणंसि तिहि [करण] णक्खत्तमुहत्तंसि पोट्टिलं दारियं ष्हायं सव्वालंकारविभूसियं सीयं डुरूहइ डुरूहिता मित्तणाइसंपरि-वुडे साओ गिहाओ पडिणिवखमइ २ ता सच्चिड्डीए ४ तेयलिपुरं णयं

मज्झिमज्झेणं जेणेव तेयलिस्स गिहे तेणेव उवागच्छइ० पोट्टिलं दारियं तेयलि-
 पुत्तस्स सयमेव भारियत्ताए दलयइ । तए णं तेयलिपुत्ते पोट्टिलं दारियं भारिय-
 ताए उवणीयं पासइ २ ता पोट्टिलाए सद्धि पट्टयं दुरूहइ २ ता सेयाधीएहि
 कलसेहि अप्पाणं मज्जावेइ २ ता अग्गिहोमं करेइ २ ता पोट्टिलाए भारियाए
 मित्तणाइ जाव परिजणं विउलेणं असणपाणखाइमसाइमेणं पुप्फ [वत्य] जाव
 पडिबिमज्जेइ । तए णं से तेयलिपुत्ते पोट्टिलाए भारियाए अणुरत्ते अविरत्ते
 उरालाई जाव विहरइ ॥१०२॥ तए णं से कणगरहे राया रज्जे य रट्ठे
 य बले य वाहणे य कोसे य कोट्टागारे य अंतेउरे य मुच्छिए ४ जाए २ पुत्ते
 वियंगेइ । अप्पेगइयाणं हत्थंगुलियाओ छिइइ अप्पेगइयाणं हत्थंगुट्टए छिइइ ।
 एवं पायंगुलियाओ पायंगुट्टए वि कण्णसक्कुलीए वि णासापुडाइं फालेइ
 अंगमंगाइं वियंगेइ । तए णं तीसे पउमावईए देवीए अण्णया [कयाइ]
 पुव्वरत्तावरत्तकालसमयंसि अयमेयारुवे अज्झत्थिए ४ सम्पपज्जित्था—एवं खलु
 कणगरहे राया रज्जे य जाव पुत्ते वियंगेइ जाव अंगमंगाइं वियंगेइ । तं जइ
 णं अहं दारयं पयायामि सेयं खलु मम तं दारगं कणगरहस्स रहस्सि [य] यं चेव
 सारक्खमाणीए संगोवेमाणीए विहरित्तए—तिकट्टु एवं संपेहेइ २ ता तेयलि-
 पुत्तं अमच्चं सद्दावेइ २ ता एवं वयासी—एवं खलु देवाणुप्पिया ! कणगरहे
 राया रज्जे य जाव वियंगेइ । तं जइ णं अहं देवाणुप्पिया ! दारगं पयायामि
 तए णं तुमं कणगरहस्स रहस्सिययं चेव अणुपुव्वेणं सारक्खमाणे संगोवेमाणे
 संवड्ढेहि । तए णं से दारए उम्मुक्कवालभावे [जाव] जोव्वणगमणुप्पत्ते तव य
 मम य भिक्खाभायणे भविस्सइ । तए णं से तेयलिपुत्ते पउमावईए एयमट्ठं
 पडिसुणेइ २ ता पडिगए । तए णं पउमावई य देवी पोट्टिला य अमच्ची सम-
 नेव गढं गेण्हंति सममेव परिवहंति (सममेव गढं परिवड्ढंति) । तए णं सा
 पउमावई णवण्हं मासाणं जाव विघट्ठसणं सुखं दारगं पयाया । जं रयणि
 च णं पउमावई देवी दारयं पयाया तं रयणि च णं पोट्टिला वि अमच्ची
 णवण्हं मासाणं विणिहायमावण्णं दारियं पयाया । तए णं सा पउमावई
 देवी अम्मधाइं सद्दावेइ २ ता एवं वयासी—गच्छह णं तुमे अम्मो ! तेयलि-
 पुत्तगिहे तेयलिपुत्तं रहस्सिययं चेव सद्दावेह । तए णं सा अम्मधाई तहत्ति
 पडिसुणेइ २ ता अंतेउरस्स अवदारेणं णिग्गच्छइ २ ता जेणेव तेयलिस्स

गिहे जेणेव तेयलिपुत्ते तेणेव उवागच्छइ २ ता करयल जाव एवं वयासी-एवं
 खलु देवाणुप्पिया ! पउमावई देवी सहावेइ । तए णं तेयलिपुत्ते अम्मघाईए
 अतिए एयमट्ठं सोच्चा णिसम्म हट्टुट्ठे अम्मघाईए सद्धि साओ गिहाओ
 णिगच्छइ २ ता अंतेउरस्स अवदारेणं रहस्सिययं चैव अणुप्पविसइ २ ता
 जेणेव पउमावई देवी तेणेव उवागच्छइ २ ता करयल जाव एवं वयासी-संवि-
 संतु णं देवाणुप्पिया ! जं मए कायच्चं । तए णं पउमावई देवी तेयलिपुत्तं एवं
 वयासी-एवं खलु कणगरहे राया जाव वियंगेइ । अहं च णं देवाणुप्पिया !
 दारगं पयाया । तं तुमं णं देवाणुप्पिया ! तं (एयं) दारगं गेण्हाहि जाव तव
 मम य भिक्खाभायणे भविस्सइ-त्तिकट्ठु तेयलिपुत्तस्स हत्थे इलगइ । तए
 णं तेयलिपुत्ते पउमावईए हत्थाओ दारगं गेण्हाइ उत्तरिज्जेणं पिहेइ २ ता
 अंतेउरस्स रहस्सिययं अवदारेणं णिगच्छइ २ ता जेणेव सए गिहे जेणेव
 पोट्टिला मारिया तेणेव उवागच्छइ उवागच्छत्ता पोट्टिलं एवं वयासी-एवं
 खलु देवाणुप्पिया ! कणगरहे राया रज्जे य जाव वियंगेइ । अयं च णं दारए
 कणगरहस्स पुत्ते पउमावईए अत्तए । (तेणं) तणं तुमं देवाणुप्पिए ! इमं
 दारगं कणगरहस्स रहस्सिययं चैव अणुपुच्चेणं सारवखाहि य संगोवेहि य
 संबड्ढेहि य । तए णं एस दारए उम्मुक्कवालभावे तव य मम य पउमावईए य
 आहारे भविस्सइ-त्तिकट्ठु पोट्टिलाए पासे णिक्खवइ [२] पोट्टिलाओ पासाओ
 तं विणिहायमावणियं दारियं गेण्हाइ २ ता उत्तरिज्जेणं पिहेइ २ ता अंतेउरस्स
 अवदारेणं अणुप्पविसइ २ जेणेव पउमावई देवी तेणेव उवागच्छइ २ ता पउमा-
 वईए देवीए पासे ठावेइ जाव पडिणिसए । तए णं तीसे पउमावईए अण-
 पडियारियाओ पउमावइं देवि विणिहायमावणियं (च) दारियं पयायं पासंति
 २ ता जेणेव कणगरहे राया तेणेव उवागच्छंति २ ता करयल जाव एवं
 वयासी-एवं खलु सामी ! पउमावई देवी मएल्लियं दारियं पयाया । तए
 णं कणगरहे राया तीसे मएल्लियाए दारियाए णीहरणं करेइ बहू (णि) इं
 लोड्याइं मयक्कच्चाइं करेइ २ कालेणं विगयसीए जाए । तए णं से-तेयलिपुत्ते
 कल्ले कोडुंबियपुरिसे सहावेइ २ ता एवं वयासी-खिप्पामेव चारगसोहणं जाव
 ठिइपडियं जग्हा णं अम्हं एस दारए कणगरहस्स रज्जे जाए तं होउ णं दारए
 णामेणं कणगज्जए जाव अलंभोगसमत्थे जाए ॥१०३॥ तए णं सा पोट्टिला

अणया कयाइ तेयलिपुत्तस्स अणिट्ठा ६ जाया यावि होत्था णेच्छइ(य)ं तेयलि-
 पुत्ते पोट्टिलाए णामसोत्तमवि सवणयाए किपुण दं (दरि)सणं वा परिभोगं वा ?
 तए णं तीसे पोट्टिलाए अणया कयाइ पुट्टरस्तावरत्तकालसमयांसि इमेयाख्वे
 अज्जात्थिए ४ जाव समुप्पज्जित्था—एवं खलू अहं तेयलिस्स पुत्थिइ इट्ठा ५ आसि
 इयाणि अणिट्ठा ५ जाया । णेच्छइ णं तेयलिपुत्ते मम णामं जाव परिभोगं वा
 ओहयमणसंकप्पा जाव ज्ञियायइ । तए णं तेयलिपुत्ते पोट्टिलं ओहयमणसंकप्पं
 जाव ज्ञियायमाणं पासइ २ ता एवं वयासी—मा णं तुमं देवाणुप्पिए ! ओहय-
 मणसंकप्पा जाव ज्ञियाहि, तुमं णं मम महाणसंसि विपुलं असणं ४ उवक्खडा-
 वेहि २ ता बहूणं समणमाहण जाव वणीममाणं देयभाणी य दवावेमाणी य
 विहराहि । तए णं सा पोट्टिला तेयलिपुत्तेणं अमच्चेणं एवं वृत्ता समाणा हट्ठं
 तेयलिपुत्तस्स एयमट्ठं पडिसुणेइ २ ता कल्लाकल्लि महाणसंसि विपुलं असणं ४
 जाव दवावेमाणी विहरइ ॥१०४॥ तेणं कालेणं तेणं समएणं सुव्वयाओ णामं
 अज्जाओ ईरियासमियाओ जाव गुत्तबंभयारिणीओ बहुस्सुयाओ बहुपरिवाराओ
 पुव्वाणुपुत्थि [चरमाणीओ] जेणामेव तेयलिपुरे णयरे तेणेव उवागच्छति २ ता
 अहापडिक्खं उग्गहं ओगिण्हंति २ ता संजमेण तवसा अप्पाणं भावेमाणीओ
 विहरंति । तए णं तांसि सुव्वयाणं अज्जाणं एगे संघाडए पट्टमाए पोरिसीए
 सज्जायं करेइ जाव अडमाणीओ तेयलिस्स गिहं अणुपविट्ठाओ । तए णं सा
 पोट्टिला ताओ अज्जाओ एज्जमाणीओ पासइ २ ता हट्ठं आसणाओ अट्ठुट्ठेइ
 वंदइ णमंसइ वं० २ ता विपुलं असणं ४ पडिलाभेइ २ ता एवं वयासी—
 एवं खलू अहं अज्जाओ ! तेयलिपुत्तस्स पुत्थिइ इट्ठा ५ आसि इयाणि अणिट्ठा ५
 जाव दंसणं वा परिभोगं वा, तं तुव्वे णं अज्जाओ सिक्खियाओ बहुणायाओ
 बहुपडियाओ बहूणि गामागर जाव आहिडह बहूणं राईसर जाव गिहाइ अणु-
 पविसह, तं अत्थियाइं भे अज्जाओ ! केइ कहिन्नि चुण्णजोए वा मंतजोगे
 वा कम्मणजोए वा हियउट्टावणे वा काउट्टावणे वा आभिओगिए वा वसीकरणे
 वा कोउयकम्मे वा भूइकम्मे वा मूले [वा] कंदे [वा] छल्ली वल्ली सिलिया
 वा गुलिया वा ओसहे वा भेसज्जे वा उवलद्धपुव्वे जेणाहं तेयलिपुत्तस्स पुणरवि
 इट्ठा ५ भवेज्जामिं ? तए णं ताओ अज्जाओ पोट्टिलाए एवं वृत्ताओ
 समाणीओ दोवि कण्णे ठाइति २ ता पोट्टिलं एवं वयासी—अम्हे णं

देवानुप्पिए ! समणीओ णिमंथीओ जाव गुत्तबंभचारिणीओ । णो खलु
 कप्पइ अम्हं एयप्पयारं कणेहि वि णिसाभेत्तए किमंग पुग उवदिसित्तए वा
 आयरित्तए वा ? अम्हे णं तव देवानुप्पिया ! विचित्तं केवलपण्णत्तं धम्मं
 पडिकहिज्जाओ । तए णं सा पोट्टिला ताओ अज्जाओ एवं वयासी-इच्छामि
 णं अज्जाओ ! तुम्हं अतिए केवलपण्णत्तं धम्मं णिसामिसए । तए णं ताओ
 अज्जाओ पोट्टिलाए विचित्तं धम्मं परिकहेति । तए णं सा पोट्टिला धम्मं सोच्चा
 णिसम्म हट्ट० एअं वयासी-सट्टहामि णं अज्जाओ ! णिमंथं पावयणं जाव से
 जहेयं तुहमे वयह, इच्छामि णं अहं तुहमं अतिए पंचाणुव्वइयं जाव धम्मं पडि-
 वज्जित्तए । अहामुहं देवानुप्पिया ! तए णं सा पोट्टिला तासि अज्जाणं अतिए
 पंचाणुव्वइयं जाव धम्मं पडिवज्जइ ताओ अज्जाओ वंदइ णमंसइ वं० २ ता
 पडिविसज्जेइ । तए णं सा पोट्टिला समणोवासियर जाया जाव पडिलाभेमाणी
 विहरइ ॥१०५॥ तए णं तीसे पोट्टिलाए अण्णया कयाइ पुव्वरत्तावरत्तकाल-
 समयंसि कुडुंबजागरियं जागरभाणीए अयमेयारुवे अज्जत्तियए०-एवं खलु
 अहं तेयलिपुत्तस्स पुंस्व इट्ठा ५ आसि इयाणि अणिट्ठा ५ जाव परिभोगं वा,
 तं सेयं खलु मम सुव्वयाणं अज्जाणं अतिए पव्वइत्तए । एवं सपेहेइ २ ता कलं
 पाउ० जेणेव तेयलिपुत्ते तेणेव उवागच्छइ २ ता करयल जाव एवं वयासी-
 एवं खलु देवानुप्पिया ! मए सुव्वयाणं अज्जाणं अतिए धम्मं णिसंते जाव
 अन्नणुण्णया पव्वइत्तए । तए णं तेयलिपुत्ते पोट्टिलं एवं वयासी-एवं खलु
 तुमं देवानुप्पिए ! मुंडा पव्वइया समाणी कालमामे कालं किच्चा अण्णयरेसु
 देवलोएसु देवत्ताए उववज्जिहिसि, तं जइ णं तुमं देवानुप्पिए ! ममं ताओ
 देवलोयाओ आगम्म केवलपण्णत्तं धम्मं बोहिहि तो हं विसज्जेमि, अहं णं
 तुमं ममं ण संबोहेसि तो ते ण विसज्जेमि । तए णं सा पोट्टिला तेयलिपुत्तस्स
 एयमदठं पडिसुणेइ । तए णं तेयलिपुत्ते विउलं असणं ४ उववखडावेइ २ ता
 मित्तणाइ जाव आगंतेइ जाव सम्माणेइ २ पोट्टिलं ग्हायं जाव पुरिससहस्स-
 वाहणीयं सीयं दुरुहिता मित्तणाइ जाव [सं] परिवुडे सच्चिव्ठिए जाव रवेणं
 तेयलिपुरस्स मज्झमज्जेणं जेणेव सुव्वयाणं उवस्सए तेणेव उवागच्छइ २ ता
 सीयाओ पच्चोरुहइ २ ता पोट्टिलं पुरओ-कट्टु जेणेव सुव्वयाणं अज्जा तेणेव
 उवागच्छइ २ ता वंदइ णमंसइ वं० २ ता एवं वयासी-एवं खलु देवानुप्पिया !

मम षोडशिता भारिया इट्ठा ५ एस णं संसारभउट्ठिग्गा जाव पव्वइ-
 त्तए, पडिच्छंतु णं देवाणुप्पिया ! सिस्सिणिभिव्वं दत्तयामि । अहामुहं मा
 पडिञ्चं करेह । तए णं सा षोडशिता सुव्वयाहिं अज्जाहिं एवं वुत्ता समाणी
 हट्ठं उत्तरपुरस्थिमं विसीभागं अववकमइ २ ता सयमेव आभरणमत्तलालंकारं
 ओमुणइ २ ता सयमेव पंचमुट्ठियं तोयं करेइ २ ता जेणेव सुव्वयाओ अज्जाओ
 तेणेव उवागच्छइ २ ता बंदइ णमंसइ वं० २ ता एवं वयासी-आलित्ते णं
 भंते ! लोए एवं जहा देवाणंदा जाव एवकारस अंगाइं बहूणि वासाणि सामण-
 परिवागं पाउणइ २ ता मासियाए संलेहणाए अत्ताणं ज्ञोसेत्ता सट्ठि भत्ताइं
 अणसणाइं आलोइयपडिक्कता समाहिपत्ता कालमासे कालं किच्चा अणयरेसु
 देवलोएसु देवत्ताए उव्ववणा ॥१०६॥ तए णं से कणगरहे राया अणया
 कयाइ कालधम्मणा संजुत्ते यावि होत्था । तए णं ते राईसर जाव णीहरणं
 करेति २ ता अणमण्णं एवं वयासी-एवं खलु देवाणुप्पिया । कणगरहे राया
 रज्जे य जाव पुत्ते वियंगित्था । अम्हे णं देवाणुप्पिया ! रायहीणा रायाहिट्ठिया
 रायहीणकज्जा । अयं च णं तेयली अमच्चे कणगरहस्स रण्णो सव्वट्ठाणेसु
 सव्वभूनियासु लद्धपच्चए विण्णविघारे सव्वकज्जवट्ठावए यावि होत्था । सेयं
 खलु अम्हं तेयलिपुत्तं अमच्चं कुमारं जाइत्तए-त्तिकट्ठं अणमण्णस्स एयमट्ठं
 पडिसुणेति २ ता जेणेव तेयलिपुत्ते अमच्चे तेणेव उवागच्छति २ ता तेयलिपुत्तं
 एवं वयासी-एवं खलु देवाणुप्पिया ! कणगरहे राया रज्जे य रट्ठे य जाव
 वियंगेइ, अम्हे (य) णं देवाणुप्पिया ! रायहीणा जाव रायहीणकज्जा, तुमं
 च णं देवाणुप्पिया ! कणगरहस्स रण्णो सव्वट्ठाणेसु जाव रज्जधुराचित्तए
 (होत्था) तं जइ णं देवाणुप्पिया ! अरिथ केइ कुमारे रायलक्खणसंपण्णे अभि-
 सेयारिहे तण्णं तुमं अम्हं दत्ताहि जाणं अम्हे महया २ रायाभिसेएणं अभि-
 सिचामो । तए णं तेयलिपुत्ते तेसिं ईसर जाव एयमट्ठं पडिसुणेइ २ ता कणगज्जयं
 कुमारं प्हायं जाव सिस्सिरीयं करेइ २ ता तेसिं ईसर जाव उवणेइ २ ता
 एवं वयासी-एस णं देवाणुप्पिया ! कणगरहस्स रण्णो पुत्ते पउमावईए देवीए
 अत्तए कणगज्जाए णामं कुमारे अभिसेयारिहे रायलक्खणसंपण्णे मए कणगरह-
 स्स रण्णो रहस्सिययं संवड्ढिए, एयं णं तुम्भे महया २ रायाभिसेणं अभिसिचह ।
 सव्वं च तेसिं उट्ठाणपरियावणियं परिकहेइ । तए णं ते ईसर जाव कणगज्जयं

कुमारं महया २ रायाभिसेएणं अभिंसिचंति । तए णं से कणगज्झए कुमारे राया जाए महयाहिमवंतमलय० वण्णओ जाव रज्जं पत्तासेमाणे विहरइ । तए णं सा पउमावई देवी कणगज्झयं रायं सहावेइ २ ता एवं वयासी-एस णं पुत्ता ! तव रज्जे जाव अंतेउरे य तुमं च तेयलिपुत्तस्स अमच्चस्स पहावेणं, तं तुमं णं तेयलिपुत्तं अमच्चं आढाहि परिजाणाहि सवकारेहि सम्माणेहि इंतं अब्भुट्ठेहि ठियं पज्जुवासाहि वचचंतं पडिसंसाहेहि अद्धासणेणं उवणिमंतेहि भोगं च से अणुवड्ढेहि । तए णं से कणगज्झए पउमावईए देवीए तहत्ति वयणं पडिसुणेइ जाव भोगं च से संबड्ढेइ ॥१०७॥ तए णं से पोट्टिले देवे तेयलिपुत्तं अभिवखणं २ केवलियण्णत्ते धम्ममे संबोहेइ णो सेव णं से तेयलिपुत्ते संबुज्झइ । तए णं तस्स पोट्टिलदेवस्स इमेयारूवे अज्झत्थिए०-एवं खलु कणगज्झए राया तेयलिपुत्तं आढाइ जाव भोगं च संबड्ढेइ । तए णं से तेयलीपुत्ते अभिवखणं २ संबोहज्जमाणे वि धम्ममे णो संबुज्झइ । तं सेयं खलु कणगज्झयं तेयलिपुत्ताओ त्रिप्परिणामेत्तए-त्तिकट्टु एवं संपेहेइ २ ता कणगज्झयं तेयलिपुत्ताओ त्रिप्परिणामेइ । तए णं तेयलिपुत्ते कल्लं ण्हाए जाव पायच्छित्ते आसखंधवरगए बहूहि पुरिसेहि [सिद्धि] संपरिवुडे साओ गिहाओ णिगच्छइ २ ता जेणेव कणगज्झए राया तेणेव प्हारेत्थ गमणाए । तए णं तेयलिपुत्तं अमच्चं जे जहा बहवे राईसरतलवर जाव पभियओ पासंति ते तहेव अद्यायंति परियाणंति अब्भुट्ठेति २ ता अंजलिपरिगहं करंति इट्ठाहि कंताहि जाव वग्गूहि आलवेमाणा य संलवमाणा य पुरओ य पिट्टओ य पासओ य मगओ य समणुगच्छंति । तए णं से तेयलिपुत्ते जेणेव कणगज्झए तेणेव उवागच्छइ । तए णं से कणगज्झए तेयलिपुत्तं एज्जमाणं पासइ २ ता णो आढाइ णो परियाणाइ णो अब्भुट्ठेइ अणाढायमाणे ३ परम्महे संचिट्ठइ । तए णं से तेयलिपुत्ते कणगज्झयस्स रणो अंजलि करेइ । तए णं से कणगज्झए राया अणाढायमाणे तुसिणीए परम्महे संचिट्ठइ । तए णं तेयलिपुत्ते कणगज्झयं त्रिप्परिणयं जाणित्ता भीए जाव संजायमए एवं वयासी-रुट्ठे. णं मम कणगज्झए राया । हीणे णं मम कणगज्झए राया । अवज्झाए णं कणगज्झए (राया) । तं णं गज्जइ णं मम केणइ कुमारेण भारेहिइ-त्तिकट्टु भीए तत्थे (य) जाव सणियं २ पच्चोसवकेइ २ ता तमेव आसखंधं दुरुहेइ २ ता

तेयलिपुरं मज्झमज्जेणं जेणेव सए गिहे तेणेव पहारेत्थ गमणाए । तए णं तेयलि-
 पुत्तं जे जहा ईसर जाव पासंति ते तथा णो आढायंति णो परिघाणंति णो
 अद्भुट्ठेति णो अंजलिं ० इट्ठाहिं जाव णो संलवंति णो पुरओ य पिट्ठोओ य पासओ
 (य भगओ य) समणुगच्छंति । तए णं तेयलिपुत्ते जेणेव सए गिहे तेणेव उवा-
 गच्छइ । जा वि य से तत्थ बाहिरिया परिसा भवइ तंजहा—दासेइ वा पेसेइ वा
 भाइलएइ वा सा वि य णं णो आढाइ ३ । जा वि य से अंभतरिया परिसा
 भवइ तंजहा—पियाइ वा मायाइ वा जाव सुण्हाइ वा सा वि य णं णो आढाइ ३
 तए णं से तेयलिपुत्ते जेणेव वासघरे जेणेव सए सयणिज्जे तेणेव उवागच्छइ
 २ ता सयणिज्जंसि णिसीयइ २ ता एवं वयासी—एवं खलु अहं सयाओ गिहाओ
 णिगच्छामि तं चैव जाव अंभतरिया परिसा णो आढाइ णो परिघाणाइ णो
 अद्भुट्ठेइ । तं सेयं खलु मम अप्पाणं जीवियाओ ववरोवित्तए—त्तिकट्ठु एवं
 सपेहेइ २ ता तालउडं विसं आसगंसि पक्खिवइ, से य विसे णो संकमइ ।
 तए णं से तेयलिपुत्ते[अमच्चे] णीलुप्पल जाव असि खंधेसि ओहरइ, तत्थ वि
 य से धारा ओपत्ता । तए णं से तेयलिपुत्ते जेणेव असोगवणिया तेणेव उवा-
 गच्छइ २ पासगं गीवाए बंधइ २ ता हक्खं दुरुहइ २ ता पासं हक्खे बंधइ २
 ता अप्पाणं मुयइ, तत्थ वि य से रज्जू छिण्णा । तए णं से तेयलिपुत्ते सहइ-
 महालयं सिलं गीवाए बंधइ २ ता अत्थाहमतारमपोरिसियंसि उदगंसि अप्पाणं
 मुयइ, तत्थ वि से थाहे जाए । तए णं से तेयलिपुत्ते सुक्कंसि तणकूडंसि अगणि-
 कायं पक्खिवइ २ ता अप्पाणं मुयइ, तत्थ वि य से अगणिकाए विज्जाए
 तए णं से तेयलिपुत्ते एवं वयासी—सद्धेयं खलु भो समणा वयंति, सद्धेयं खलु
 भो माहणा वयंति, सद्धेयं खलु भो समणा माहणा वयंति, अहं एगो असद्धेयं
 वयामि, एवं खलु अहं सह पुत्तेहि अपुत्ते, को मेदं सद्दहिस्सइ ? सह मित्तेहि
 अभित्ते, को मेदं सद्दहिस्सइ ? एवं अत्थेणं दारेणं दासेहि (पेसेहि) परिजणेणं
 एवं खलु तेयलिपुत्तेणं अमच्चेणं कणगज्जाएणं रण्णा अवज्जाएणं समाणेणं
 तेयलीपुत्तेणं अमच्चेणं तालपुडगे विसे आसगंसि पक्खित्ते, से वि य णो संक-
 मइ, को मेयं सद्दहिस्सइ ? तेयलिपुत्ते णीलुप्पल जाव खंधेसि ओहरिए, तत्थ
 वि य से धारा ओपत्ता, को मेदं सद्दहिस्सइ ? तेयलिपुत्तस्त पासगं गीवाए
 बंधेत्ता जाव रज्जू छिण्णा, को मेदं सद्दहिस्सइ ? तेयलिपुत्ते महासिलयं
 जाव बंधित्ता अत्थाह जाव उदगंसि अप्पा मुक्के, तत्थ वि य णं थाहे

जाए, को मेयं सदृहस्सइ ? तेयलिपुत्ते सुक्कसि तणकूडे अग्गी विज्जाए, को मेयं सदृहस्सइ ? ओह्यमणसंकप्पे जाव झियाइ । तए णं से पोट्टिले देवे पोट्टि-
 लाह्वं विउव्वइ २ त्ता तेयलिपुत्तस्स अदूरसामंते ठिच्चो एवं वयासी-हं भो
 तेयलिपुत्ता ! पुरओ पवाए पिट्ठओ हत्थिभयं दुहओ अचवत्तफामे मज्जे
 सराणि वरिसयं(पत्तं)ति, गामे पलित्ते रण्णे झियाइ रण्णे पलित्ते गामे झियाइ,
 आउसो तेयलिपुत्ता ! कओ वयामो ? तए णं से तेयलिपुत्ते पोट्टिलं एवं वयासी-
 भीयस्स खलु भो ! पव्वज्जा सरणं, उक्कंठियस्स सडेसगमणं छुहियस्स अणं
 तिसियस्स पाणं आउरस्स भेसज्जं माइयस्स रहस्सं अभिजुत्तस्स पच्चयकरणं
 अद्धानपरिसंतस्स वाहणगमणं तरिउकामस्स पवहणं किच्चं परं अभिओजिउ-
 कामस्स सहायकिच्चं, खंतस्स वंतस्स जिइंदियस्स एत्तो एगमवि ण भवइ ।
 तए णं से पोट्टिले देवे तेयलिपुत्तं अमच्चं एवं वयासी-मुट्ठु णं तुमं तेयलिपुत्ता !
 एयमट्ठं आयाणिहिं त्तिक्कट्ठु दोच्चंपि तच्चंपि एवं वयइ २ त्ता जामेव दिसं
 पाउव्वमू ए तामेव दिसं पडियए ॥ १०८ ॥ तए णं तस्स तेयलिपुत्तस्स सुभेणं
 परिणामेणं जाईसरणे समुप्पण्णे । तए णं तस्स तेयलिपुत्तस्स अयमेयाह्वे
 अउत्तथिए० समुप्पण्णे-एवं खलु अहं इहेव जंबुद्वीवे २ महाविदेहे वासे पोव्वला-
 वईविजए पौंडरीगिणीए रायहाणीए महापउमे णामं राया होत्था । तए णं
 (अ)हं थेराणं अंतिए मुंडे भवित्ता जाव चोइसपुव्वाइं ० वहूणि वासाणि
 सामणपरियाए पाउणित्ता मासियाए संलेहणाए महासुक्के कप्पे देवे । तए
 णं हं ताओ देवलोगाओ आउव्वएणं इहेव तेयलिपुरे तेयलित्त्स अमच्चस्स भद्दाए
 भारियाए दारगत्ताए पच्छायाए । तं सेयं खलु मम पुव्वविट्ठाइं महव्वयाइं सयमेव
 उव्वसंपज्जिताणं विहरित्तए । एवं संपेहेइ २ त्ता सयमेव महव्वयाइं आरुहेइ २
 त्ता जणेव पमयवणे उज्जाणे तेणेव उवागच्छइ २ त्ता असोगवरपायवत्त अहे
 पुट्ठविसित्तापट्ठयंसि सुहणिसण्णस्स अणुत्तितेमाणस्स पुव्वाहीयाइं सामाइयमाइ-
 याइं चोइसपुव्वाइं सयमेव अभिसमण्णागयाइं । तए णं तस्स तेयलिपुत्तस्स अण-
 गारस्स सुभेणं परिणामेणं जाव तयावरणिज्जाणं कम्मणं खओवसमेणं कम्मरय-
 विकरणकरं अपुव्वकरणं पविट्टस्स केवलवरणाणदंसणे समुप्पण्णे ॥ १०९ ॥ तए
 णं तेयलिपुरे णयरे अह्मासिणाहिएहिं वाणमंतरेहिं देवेहिं देवीहिं य देवदुंभोओ
 समाहयाओ दसद्ववणे कुसुमे णिवाइए दिव्वे गीयगंधव्वणिणाए कए यावि

होत्था । तए णं से कणगज्झए राया इमीसे कहाए लद्धठे समाणे एवं वयासी-
एवं खलु तेयलिपुत्ते मए अवज्झाए मुंडे भवित्ता पक्खइए तं गच्छामि णं तेयलि-
पुत्तं अणगारं वंदामि णमंसामि वं० २ ता एयमट्ठं विणएणं भुज्जो २ खामेमि ।
एवं संपेहेइ २ ता ण्हाए चाउरंगिणीए सेणाए जेणेव पमयवणे उज्जाणे जेणेव
तेयलिपुत्ते अणगारे तेणेव उवागच्छइ २ ता तेयलिपुत्तं अणगारं वंदइ णमंसइ
वं० २ ता एयमट्ठं च[ण] विणएणं भुज्जो २ खामेइ [२] णच्चासणे जाव
पज्जुवासइ । तए णं से तेयलिपुत्ते अणगारे कणगज्झयस्स रण्णो तीसे थ महइ-
महालियाए परिसाए धम्मं परिकहेइ । तए णं से कणगज्झए राया तेयलिपुत्तस्स
केवलस्स अंतिए धम्मं सोच्चा णिसम्म पंचाणुच्चइयं सत्तसिक्खावइयं सावग-
धम्मं पडिवज्जइ २ ता समणोवासए जाए जाव अहिगयजीवाजीवे । तए णं
तेयलिपुत्ते केवली बहूणि वासाणि केवलिपरियागं पाउणित्ता जाव सिद्धे । एवं
खलु जंबू ! समणेणं भगवया महावीरेणं जाव संपत्तेणं चोहसमस्स णायज्झय-
णस्स अयमट्ठे पण्णत्ते त्तिबेमि ॥११०॥ गाहा-जाव ण दुक्खं पत्ता माणअंसं
च पाणिणो पायं । ताव'ण धम्मं गेह्हंति भावओ तेयलिसुउव्व ॥१॥

॥ चोहसमं अज्झयणं समत्तं ॥

गंदीफले णामं पण्णरसमं अज्झयणं

जइ णं मंते ! समणेणं० चोहसमस्स णायज्झयणस्स अयमट्ठे पण्णत्ते
पण्णरसमस्स णं ० के अट्ठे पण्णत्ते ? एवं खलु जंबू ! तेणं कालेणं तेणं सम-
एणं चंपा णामं णयरी होत्था पुण्णमइ वेइए जियसत्तू राया । तत्थ णं चंपाए
णयरीए ध(०)णे णामं सत्थवाहे होत्था अइडे जाव अपरिभूए । तीसे णं चंपाए
णयरीए उत्तरपुरत्थिमे दिसिभाए अहिच्छत्ता णामं णयरी होत्था रिद्धत्थिमिय-
समिद्धा वण्णओ । तत्थ णं अहिच्छत्ताए णयरीए कणगकेऊ णामं राया होत्था
महया वण्णओ । तए णं तस्स धण्णस्स सत्थवाहस्स अण्णया कयाइ पुक्खरत्ता-
वरत्तकालसमयंसि इमेयारूवे अज्झत्थिए चित्तिए पत्थिए मणोगए संकप्पे
समुपज्जित्था-सेयं खलु मम विपुलं पणियभंडमायाए अहिच्छत्तं णयरी
वाणिज्जाए गमित्तए । एवं संपेहेइ २ ता गणिमं च ४ चउत्विहं भंडं गेह्हइ०
सगडीसागडं सज्जेइ २ ता सगडीसागडं मरेइ २ ता कोडुंबियपुरित्ते सद्दावेइ

२ ता एवं वयासी-गच्छह णं तुब्भे देवाणुप्पिया ! चंपाए सिघाडग जाव पहेसु [एवं वयह-] एवं खलु देवाणुप्पिया ! धणे सत्थवाहे विपुले पणिय० इच्छइ अहिच्छत्तं णयारिं वाणिज्जाए गमित्तए । तं जो णं देवाणु-
 प्पिया ! चरए वा चीरिए वा चम्मखडिं वा मिच्छुं डे वा पंडुरगे वा गोयमे वा गोवतीए वा गिहिधम्मे वा गिहिधम्मचित्तए वा अवरुद्धविरुद्धबुद्धसावग-
 रत्तपडणिग्गंथप्पभिइपासंडत्थे वा गिहत्थे वा तस्स णं घण्णेणं सद्धिं अहिच्छत्तं
 णयारिं गच्छइ तस्स णं धणे अच्छत्तगस्स छत्तं दलायइ अणुवाहणस्स उवाह-
 णाउ दलयइ अकुडियस्स कुंडियं दलयइ अपत्थयणस्स पत्थयणं दलयइ
 अपवखेवगस्स पवखेवं दलयइ अंतरा वि य से पडियस्स वा भगलुग्ग-
 साहेज्जं दलयइ सुहंसुहेण य णं अहिच्छत्तं संपावेइ-त्तिकट्टु दोच्चं पि तच्चं पि
 घोसेह २ ता मम एयमाणत्तियं पच्चप्पिणह । तए णं ते कोडुंबियपुरिसा जाव
 एवं वयासी-हंदि सुणंतु भगवंतो चंपाणयरीवत्थवा बहवे चरगा य जाव
 पच्चप्पिणति । तए णं (से) तेसिं कोडुंबिय (घोस) पुरिसाणं अंतिए एयमट्ठं
 सुच्छा चंपाए णयरीए बहवे चरगा य जाव गिहत्था य जेणेव धणे सत्थवाहे
 तेणेव उवागच्छति । तए णं धणे सत्थवाहे तेसिं चरगाण य जाव गिहत्थाण य
 अच्छत्तगस्स छत्तं दलयइ जाव पत्थयणं दलाइ २ एवं वयासी-गच्छह णं तुब्भे
 देवाणुप्पिया ! चंपाए णयरीए बहिया अग्गुज्जाणंसि ममं पडिवात्तेमाणा
 चिट्ठह । तए णं ते चरगा य० घण्णेणं सत्थवाहेणं एवं वुत्ता समाणा जाव
 चिट्ठति । तए णं धणे सत्थवाहे सोहणंसि तिहिकरणवत्तंसि विउलं असणं ४
 उववखडावेइ २ ता मित्तणाई आमंतेइ २ ता भोयणं भोयावेइ २ ता आपुच्छइ
 २ ता सगडीसागडं जोयावेइ २ ता चंपाणयरीओ णिगगच्छइ० णाइविपगिट्ठोह
 अट्ठाणेहि वसमाणे २ सुहेहि वसहिपायरासेहि अंगं जणवयं मज्जमज्जेणं जेणेव
 देसगं तेणेव उवागच्छइ २ ता सगडीसागडं भोयावेइ २ ता सत्थणिवेसं करेइ
 २ ता कोडुंबिय पुरिसे सद्दावेइ २ ता एवं वयासी-तुब्भे णं देवाणुप्पिया ! मम
 सत्थणिवेसंसि महया २ सद्देणं उग्घोसेमाणा २ एवं वयह-एवं खलु देवाणु-
 प्पिया ! इमीसे आगामियाए छिण्णावायाए दीहमद्धाए अडवीए बहमज्जदेस-
 भाए (एत्थ णं) बहवे णंदिकत्ता णामं रुक्खा पणत्ता किण्हा जाव पत्तिया
 पुक्किया फलिया हरिया रेरिज्जमाणा सिरीए अईव २ उवसोभेमाणा चिट्ठति

मणुष्णा वण्णेणं ४ जाव मणुष्णा फासेणं मणुष्णा छायाए । तं जो णं देवाणु-
 प्पिया ! तेसि णंदिफलाणं रक्खाणं मूलाणि वा कंद० तयपत्तपुष्फफलबीयाणि
 वा हरियमिणि वा आहारेइ छायाए वा बीसमइ तस्स णं आवाए भद्दए भवइ
 तओ पच्छा परिणममाणा २ अकाले चैव जीवियाओ ववरोवेति । तं मा णं
 देवाणुप्पिया ! केइ तेसि णंदिफलाणं मूलाणि वा जाव छायाए वा बीसमउ
 मा णं सेइ अकाले चैव जीवियाओ ववरोविज्जिस्सइ । तुम्भे णं देवाणुप्पिया !
 अण्णेसि रक्खाणं मूलाणि य जाव हरियाणि य आहारेइ छायासु बीसमह ति
 घोसणं घोसेह जाव पच्चप्पिणंति । तए णं धणे सत्थवाहे सगडीसागडं जोएइ
 २ ता जेणेव णंदिफला रक्खा तेणेव उवागच्छइ २ ता तेसि णंदिफलाणं
 अदूरसामंते सत्थणिवेसं करेइ करेत्ता दोच्चपि तच्चपि कोडुंबियपुरिसे
 सद्दावेइ २ ता एवं वयासी-तुम्भे णं देवाणुप्पिया ! मम सत्थणिवे-
 संसि महया २ सद्देणं उगघोसेमाणा २ एवं वयह-एए णं देवाणुप्पिया !
 ते णंदिफला [रक्खा] किण्हा जाव मणुष्णा छायाए । तं जो णं देवाणु-
 प्पिया ! एएसि णंदिफलाणं रक्खाणं मूलाणि वा कंद० पुष्फतयापत्तफलाणि
 जाव अकाले चैव जीवियाओ ववरोवेइ । तं मा णं तुम्भे जाव दूरं दूरेणं
 परिहरमाणा बीसमह मा णं अकाले चैव जीवियाओ ववरोविस्संति अण्णेसि
 रक्खाणं मूलाणि य जाव बीसमह-त्तिकट्टु घोसणं जाव पच्चप्पिणंति ।
 तत्थ णं अत्थेगइया पुरिसा-धणस्स सत्थवाहस्स एयमट्ठं सद्दहंति जाव
 रोयंति एयमट्ठं सद्दहमाणा ३ तेसि णंदिफलाणं दूरं दूरेणं परिहरमाणा २
 अण्णेसि रक्खाणं मूलाणि य जाव बीसमंति । तेसि णं आवाए णो भद्दए भवइ
 तओ पच्छा परिणममाणा २ सुहुरूवत्ताए ५ भुज्जो २ परिणमंति । एवामेव
 समणाउसो ! जो अम्हं णिमग्गो वा २ जाव पंचसु कामगुणेषु णो सज्जेइ
 णो रज्जेइ से णं इहभवे चैव बहूणं समणाणं ४ अच्चणिज्जे परलोए णो
 आगच्छइ जाव बीईवइस्सइ-जहा व ते पुरिसा । तत्थ णं जे से अप्पेगइया
 पुरिसा धणस्स एयमट्ठं णो सद्दहंति ३ धणस्स एयमट्ठं असद्दहमाणा ३
 जेणेव ते णंदिफला तेणेव उवागच्छंति २ ता तेसि णंदिफलाणं मूलाणि य जाव
 बीसमंति तेसि णं आवाए भद्दए भवइ तओ पच्छा परिणममाणा जाव ववरो-
 वेति । एवामेव समणाउसो ! जो अम्हं णिमग्गो वा २ पव्वइए पंचसु काम-
 गुणेषु सज्जइ जाव अणुपरियट्ठिस्सइ जहा व ते पुरिसा । तए णं से धणे सगडी-

सागडं जोयावेइ २ ता जेणेव अहिच्छत्ता णयरी तेणेव उवागच्छइ २ ता अहिच्छत्ताए णयरीए बहिया अगुज्जाणे सत्थणिवेसं करेइ २ ता सागडीसागडं मोयावेइ । तए णं से धणे सत्थवाहे महत्थं ३ रायारिहं पाहुडं गेण्हइ २ ता बहुपुरिसोहिं सडि संपरिवुडे अहिच्छत्तं णयरं मज्झंमज्झेणं अणुप्पविसइ २ ता जेणेव कणगकेऊ राया तेणेव उवागच्छइ २ ता करयल जाव वद्धावेइ २ ता तं महत्थं ३ पाहुडं उवणेइ । तए णं से कणगकेऊ राया हट्टुट्टु० धणस्स सत्थवाहस्स तं महत्थं ३ जाव पडिच्छइ २ ता धणं सत्थवाहं सक्कारेइ सम्माणेइ स० २ ता उस्सुबकं वियरइ २ ता पडिविसज्जेइ भंडविणिमयं करेइ २ ता पडिभंडं गेण्हइ २ ता सुहंसुहेणं जेणेव चंपा णयरी तेणेव उवागच्छइ २ ता मित्तणाइअभिसमण्णागए विपुलाइं माणस्सगाइं जाव विहरइ । तेणं कालेणं तेणं समएणं थेरागमणं । धणे धम्मं सोच्चा जेट्टुपुत्तं कुडुंवे ठावेत्ता जाव पव्वहए सामाइयाइं एक्कारस्स अंगाइं अहिज्जित्ता बहूणि वासाणि जाव मासियाए संलेहणाए० जाव अण्णयरेमु देवत्ताए उववण्णे महाविदेहे वासे सिज्जिहिइ जाव अंतं करेहिइ । एवं खलु जंबू ! समणेणं भगवया महावीरेणं पणरसमस्स णायज्जयणस्स अयमट्ठे पणत्ते त्तिवेमि ॥१११॥ गहाओ-चंपा इव मणुयगई धण्णोश्व भयवं जिणो दएक्करसो । अहिच्छत्ताणयरिसमं इह णिव्वाणं मुणेयव्वं ॥१॥ घोसणया इव तित्थंकरस्स सिवमग्गदेसणमहग्गं । चरगाइणोव्व इत्थं सिवसुहकामा जिया बह्वे ॥२॥ णंदिकलाइ व्व इहं सिवपहपडिवण्णमाण विसया उ । तव्वक्खणाओ मरणं जह तह विसएहि संसारो ॥३॥ तव्वज्जणेण जह इट्टपुरगमो विसयवज्जणेण तहा । परमाणंदणिबंधणसिवपुरगमणं मुणेयव्वं ॥४॥ पणरसमं अज्जयणं समत्तं ॥

अमरकंका णामं सोलसमं अज्जयणं

जइ णं भंते ! समणेणं ३ जाव संपत्तेणं पणरसमस्स णायज्जयणस्स अयमट्ठे पणत्ते सोलसमस्स णं भंते ! णायज्जयणस्स ० के अट्ठे पणत्ते ? एवं खलु जंबू ! तेणं कालेणं तेणं समएणं चंपा णामं णयरी होत्था । तीसे णं चंपाए णयरीए बहिया उत्तरपुरत्थिये विसीभाए सुभूमिभागे णामं उज्जाणे होत्था । तत्थ णं चंपाए णयरीए तओ माहणा भायरो परिवसति तंजहा-सोमे

सोमदत्ते सोमभूई अड्डा जाव अपरिभूया रिउध्वेयजउध्वेयसामवेयअथव्वणवेय जाव सुपरिणिट्ठिया । तेसि णं माहणाणं तओ भारियाओ होत्था तंजहा- णाग- सिरी भूयसिरी जक्खसिरी सुकुमाल जाव तेसि णं माहणाणं इट्ठाओ विपुले माणस्सए जाव विहरंति । तए णं तेसि माहणाणं अण्णया कयाइ एगयओ समुवागयाणं जाव इमेयारूवे मिहोकहासमुल्लावे समुप्पज्जित्था—एवं खलु देवाणु- प्पिया ! अम्हं इमे विउले धणे जाव सावएज्जे अत्ताहि जाव आसत्तमाओ कुलवंसाओ पकामं दाउं पकामं भोत्तुं पकामं परिभाएउं । तं सेयं खलु अम्हं देवाणुप्पिया ! अण्णमण्णस्स गिहेसु कल्लाकल्लि विपुलं असणं पाणं खाइमं साइमं उवक्खडेउं २ परिभुंजेमाणाणं विहरित्तए । अण्णमण्णस्स एयमट्ठं पडिसुणेंति कल्लाकल्लि अण्णमण्णस्स गिहेसु विपुलं असणं ४ उवक्खडावेति २ ता परि- भुंजेमाणा विहरंति । तए णं तीसे णागसिरीए माहणीए अण्णया [कयाइ] भोयणवारए जाए यावि होत्था । तए णं सा णागसिरी विपुलं असणं ४ उवक्खडेवेइ २ ता एगं महं सालइयं तित्तालाउयं बहुसंभारसंजुत्तं णेहावगाढं उवक्खडावेइ एगं विदुयं करयत्तंसि आसाएइ २ तं खारं कडुयं अखज्जं (अभोज्जं) विसम्भूयं जाणित्ता एवं वयासी—धिरत्थु णं मम णागसिरीए अधण्णाए अधुण्णाए दूमगाए दूमगसत्ताए दूमगणिबोलियाए जीए णं मए सालइए बहु- संभारसंभिए णेहावगाढे उवक्खडिए सुबहुदव्वक्खए (णं) णेहक्खए य कए । तं जइ णं मम जाउयाओ जाणित्तंसि तो णं मम खिसिस्सति । तं जाव ताव ममं जाउयाओ ण जाणंति ताव मम सेयं एयं सालइयं तित्तालाउयं बहुसंभार- णेहकयं एगंते गोवेत्तए अण्णं सालइयं महुरालाउयं जाव णेहावगाढं उव- क्खडेत्तए । एवं संपेहेइ २ ता तं सालइयं जाव गोवेइ २ अण्ण सालइयं महुरालाउयं उवक्खडेइ २ तेसि माहणाणं ण्हायाणं जाव सुहासणवरगयाणं तं विपुलं असणं ४ परिवेसेइ । तए णं ते माहणा जिमियभुत्तत्तरागया समाणा आयंता ओक्खा परमसुइभूया सकम्मसंपउत्ता जाया यावि होत्था । तए णं ताओ माहणीओ ण्हायाओ जाव विभूसियाओ तं विपुलं असणं ४ आहारेंति २ ता जेणेव सथाइं २ गिहाइं तेणेव उवागच्छंति २ ता सकम्मसंपउत्ताओ जायाओ ॥ ११२ ॥ तेणं कालेणं तेणं समएणं धम्मघोसा णाम थेरा जाव बहुपरिवारा जेणेव चंपा णामं णयरी जेणेव सुभूमिभागे उज्जाणे तेणेव उवागच्छंति २ ता

अहापडिरूवं जाव विहरंति । परिसा णिगया । धम्मो कहिओ । परिसा पडि-
 गया । तए णं तेसिं धम्मघोसाणं थेराणं अतेवासी धम्मरुई णामं अणगारे
 ओराले जाव तेउलेस्से मासं मासेणं खममाणे विहरइ । तए णं से धम्मरुई
 अणगारे मासखमणपारणगंसि पढमाए पोरिसीए सज्जायं करेइ २ ता बीयाए
 पोरिसीए एवं जहा गोयमसामी तहेव उग्गाहेइ २ ता तहेव धम्मघोसं थेरं
 आपुच्छइ जाव चंपाए णयरीए उच्चणीयमज्झिमकुलाई जाव अडमाणे जेणेव
 णागसिरीए माहणीए गिहे तेणेव अणुपविट्ठे । तए णं सा णागसिरी माहणी
 धम्मरुइं एज्जमाणं पासइ २ ता तस्स सालइयस्स तित्तकडुयस्स ब्रहु० णेहाव-
 गाढस्स एड(णिसिर) णट्टयाए हट्टंतुट्टा [उट्टाए] उट्ठेइ २ ता जेणेव भत्तघरे
 तेणेव उवागच्छइ २ ता तं सालइयं तित्तकडुयं च ब्रहुणे(हं) हावगाढं धम्मरुइस्स
 अणगारस्स पडिगग्हंसि सव्वमेव णिसिरइ । तए णं से धम्मरुई अणगारे अहा-
 पज्जत्तमित्तिकट्टु णागसिरीए माहणीए गिहाओ पडिणिक्खमइ २ ता चंपाए
 णयरीए मज्झमज्झेणं पडिणिक्खमइ २ ता जेणेव सुभूमिभागे उज्जाणे तेणेव
 उवागच्छइ २ ता [जेणेव धम्मघोसा थेरा तेणेव उवागच्छइ २] धम्मघोसस्स
 अदूरसामंते अण्णपार्णं पडि(दंसे)लेहेइ २ ता अण्णपार्णं करयलंसि पडिदंसेइ ।
 तए णं ते धम्मघोसा थेरा तस्स सालइयस्स णेहावगाढस्स गंधेणं अन्नभूया
 समाणा तओ सालइयाओ णेहावगाढाओ एगं त्रिदुगं गहाय करयलंसि आसा-
 देंति तित्तगं खारं कडुयं अखज्जं अमोज्जं विसमूयं जाणित्ता धम्मरुई अण-
 गारं एवं वयासी-जइ णं तुमं देवाणुप्पिया ! एयं सालइयं जाव णेहावगाढं
 आहारेसि तो णं तुमं अकाले चेव जीविघाओ ववरोविज्जसि । तं मा णं तुमं
 देवाणुप्पिया ! इमं सालइयं जाव आहारेसि मा णं तुमं अकाले चेव जीवि-
 घाओ ववरोविज्जसि । तं गच्छह णं तुमं देवाणुप्पिया ! इमं सालइयं एगंत-
 णावाए अचित्ते थंडिले परिट्टवेहि २ ता अण्णं फासुयं एसणिज्जं असणं ४
 पडिगाहेत्ता आहारं आहारेहि । तए णं से धम्मरुई अणगारे धम्मघोसेणं
 धेरेणं एवं वुत्ते समाणे धम्मघोसस्स थेरस्स अंतियाओ पडिणिक्खमइ २ ता
 सुभूमिभागओ उज्जाणाओ अदूरसामंते थंडिलं पडिलेहेइ २ ता तओ
 सालइयाओ एगं त्रिदुगं गेहइ २ ता थंडिलंसि णिसिरइ । तए णं तस्स साल-
 इयस्स तित्तकडुयस्स ब्रहुणेहावगाढस्स गंधेणं ब्रहुणि पिपीत्तिगासहस्साधि

पाउब्भू० जा जहा य णं पिपोलिगा आहारेइ सा तथा अकाले चैव जीवि-
याओ ववरोविज्जइ । तए णं तस्स धम्मरुइस्स अणगारस्स इमेपाक्खे अज्ज-
स्थिए०—जइ ताव इमस्स सालइयस्स जाव एग्गिं बिदुग्गिं पक्खित्तमि अणेगाइं
पिपोलिगामहस्साइं ववरोविज्जंति तं जइ णं अहं एयं सालइयं थंडित्तंसि
सव्वं णिसिरामि (तए) तो णं बहूणं पाणाणं ४ वह्करेणं भविस्सइ । तं सेयं
खलु मम एयं सालइयं जाव णेहावगाढं सयमेव आहारेत्तए मम चैव
एएणं सरीरेणं णिज्जाउ—त्तिकट्टु एवं संपेहेइ २ ता मुहपोत्तिं २ पडिलेहेइ
२ ता ससीत्तोवरियं कायं पमज्जेइ २ ता तं सालइयं तित्तकडुयं बहुणेहावगाढं
बिलमिं पण्णमभूएणं अप्पाणेणं सव्वं सरीरकोट्ठंसि पक्खवइ । तए णं
तस्स धम्मरुइस्स तं सालइयं जाव णेहावगाढं आहारियस्स समाणस्स
मुहत्तंतरेणं परिणममाणंसि सरीरगंसि वेयणा पाउब्भूया उज्जला जाव दुरहि-
यासा । तए णं से धम्मरुइं अणगारे अथामे अबले अवीरिए अपुरिसक्कार-
परक्कमे अधारणिज्जमित्तिकट्टु आगारभंडगं एगते ठवेइ २ ता थंडित्तं पडि-
लेहेइ २ ता दब्भसंथारगं संथारेइ २ ता दब्भसंथारगं दुरूहइ २ ता पुरत्था-
मिमूहे संपत्तियं कणिसण्णे करयलपरिग्गहियं एवं वयासी—णमोत्थु णं अरहंताणं
जाव संरत्ताणं णमोत्थुणं धम्मघोसाणं थेराणं मम धम्माधरियाणं धम्मो-
वएसगाणं पुंविं पि णं मए धम्मघोसाणं थेराणं अंतिए सव्वे पाणाइवाए
पच्चक्खाए जावज्जीवाए जाव परिग्गहे इयाणि पि णं अहं तेसि चैव भगवताणं
अंतियं सव्वं पाणाइवायं पच्चक्खामि जाव परिग्गहं पच्चक्खामि जावज्जीवाए
जहा खंदओ जाव चरिमेहि उस्सासेहि'बोसिरामि—त्तिकट्टु आलोइयपडिक्कते
समाहिपत्ते कालगए । तए णं ते धम्मघोसा थेरा धम्मरुइं अणगारं चिरंगयं
जाणिता समणे णिग्गंये सट्ठावेति २ ता एवं वयासी—एवं खलु देवानुप्पिया ।
धम्मरुइस्स अणगारस्स मासखमणपारणगंसि सालइयस्स जाव णेहावगाढस्स
णिसिरणट्टुयाए बहिया णिगए चिरा[वे]इ, तं गच्छह णं तुब्भे देवानुप्पिया ।
धम्मरुइस्स अणगारस्स सव्वओ समंता मग्गणगवेसणं करेह । तए णं ते समणा
णिग्गंथा जाव पडिसुणेंति २ ता धम्मघोसाणं थेराणं अतियाओ पडिणिवल-
मंति २ ता धम्मरुइस्स अणगारस्स सव्वओ समंता मग्गणगवेसणं करेमाणा
जेणेव थंडित्तं तेणेव उवागच्छंति २ ता धम्मरुइस्स अणगारस्स सरीरगं
णिप्पाणं णिच्चेट्ठं जीवविप्पजइं पासंति २ ता हा हा ! अहो ! अकज्जमि-

तिकट्टु धम्मरुइस्स अणगारस्स परिणित्थानवत्तियं काउत्सगं करेति ० धम्म-
रुइस्स आगारभंडगं भेष्हंति २ ता जेणेव धम्मघोसा थेरा तेणेव उवागच्छंति
२ ता गमणागमणं पडिवकमंति २ ता एवं वयासी-एवं खलु अम्हे तुक्कं अंति-
याओ पडिणिवखमामो २ ता सुभूमिभागस्स उज्जाणस्स परिपेरंतेणं धम्मरुइस्स
अणगारस्स सव्वं जाव करेमाणे जेणेव थंडिल्ले तेणेव उवागच्छामो जाव इहं
हृद्वमागया, तं कालगए णं भंते ! धम्मरुई अणगारे इमे से आगारभंडए ।
तए णं ते धम्मघोसा थेरा पुव्वगए उवओगं गच्छंति २ ता समणे णिमग्गे
णिमग्गीओ य सद्धान्तेति २ ता एवं वयासी-एवं खलु अज्जो ! मम अंतेवयासी
धम्मरुई णाम अणगारे पगइभइए जाव विणीए मासंसासेणं अणिविखत्तेणं
तवोक्कम्मेणं जाव णामसिरीए माहणीए गिहे अणुपविट्ठे । तए णं सा णाम-
सिरी माहणी जाव णिसिरइ । तए णं से धम्मरुई अणगारे अहापज्जत्तमि-
तिकट्टु जाव कालं अणवकंखमाणे विहरइ । से णं धम्मरुई अणगारे बहूणि
वासाणि सामण्यपरियागं पाउणिता आलोइयपडिवकंते समाहिपत्ते कालमासे
कालं किच्चा उड्डं सोहम्म जाव सव्वट्टुसिद्धे महाविमाणे देवत्ताए उववणे ।
तए णं अजहणमणुक्कोसेणं तेत्तीसं सागरोवमाइं ठिई पणत्ता । तए णं
धम्मरुइस्स वि देवस्स तेत्तीसं सागरोवमाइं ठिई पणत्ता । से णं धम्मरुई देवे
ताओ देवलोगाओ जाव महाविदेहे वासे सिज्झहिइ ॥११३॥ तं धिरत्थु णं
अज्जो ! णामसिरीए माहणीए अघण्णाए अपुण्णाए जाव णिबोलियाए जाए
णं तहारुवे साहू साहूरुवे धम्मरुई अणगारे मासखमणपारणगसि सालइएणं
जाव गाढेणं अकाले चेव जीवियाओ ववरोविए । तए णं ते समणा णिमग्था
धम्मघोसां थेराणं अंतिए एयमट्ठं सोच्चा णिसम्म चंपाए सिघाडग-तिग
जाव बहुजणस्स एवमाइवखंति ४-धिरत्थु णं देवाणुपियया । णामसिरीए
माहणीए जाव णिबोलियाए जाए णं तहारुवे साहू साहूरुवे सालइएणं
जीवियाओ ववरोविए । तए णं तेसि समणाणं अंतिए एयमट्ठं सोच्चा णिसम्म
बहुजणो अणमण्यस्स एवमाइवखइ एवं भासइ-धिरत्थु णं णामसिरीए
माहणीए जाव जीवियाओ ववरोविए । तए णं ते माहणा चंपाए णयरीए बहु-
जणस्स अंतिए एयमट्ठं सोच्चा णिसम्म आमुहत्ता जाव मिसिमिसेमाणा जेणेव
णामसिरी माहणी तेणेव उवागच्छंति २ ता णामसिरीं माहणीं एवं वयासी-

हं भो णागसिरी ! अपत्थियपत्थिए ! दुरंतपंतलवलणे ! हीणपुण्णचाउद्दसे !
 धिरत्थे णं तव अघण्णाए अपुण्णाए जाव णिबोलियाए जाए णं तुमे तथाह्वे
 साहू साहुरूवे मासखमणवारणमंसि सालइएणं जाव ववरोविए उच्चावयाहि
 अक्कोसणाहि अक्कोसति उच्चावयाहि उद्धंसणाहि उद्धसेति उच्चावयाहि
 णिभमत्थणाहि णिभमत्थति उच्चावयाहि णिच्छोडणाहि णिच्छोडेंति तज्जेति
 तालेंति तज्जेता तालेत्ता सयाओ गिहाओ णिच्छुभंति । तए णं सा णागसिरी
 सयाओ गिहाओ णिच्छूढा समाणी चपाए णयरीए सिघाडगतियचउक्कचच्चर-
 चउम्मुहमहापहपहेसु बहुजणेणं हीलिज्जमाणी खिसिज्जमाणी णिदिज्जमाणी मर-
 हिज्जमाणी तज्जिज्जमाणी पव्वहिज्जमाणी धिक्कारिज्जमाणी थुक्कारिज्जमाणी
 क्तयइ ठाणं वा णिलयं वा अलभमाणी २ दंडीखंडणिवसणा खंडमल्लयखंडघड-
 गहत्यगया फुट्टहडाहडसीसा मच्छियाचडगरेणं अण्णिज्जमाणमग्गा गेहंगिहेणं देहं-
 बलियाए विंति कप्पेमाणी विहरइ । तए णं तीसे णागसिरीए माहणाए तभवंसि
 चव सोलस रोयायंका पाउवभूया तंजहा—सासे कासे जोणिसूले जाव कोडे । तए णं
 सा णागसिरी माहणी सोलसहि रोगायंकेहि अभिभूया समाणी अट्टुहट्टुवसट्टा
 कालमासे कालं किच्चा छट्ठीए पुढवीए उक्कोसेणं वावीससागरोवमट्टिइएसु णर-
 एसु णेरइयत्ताए उववण्णा । सा णं तओऽणंतरे उव्वट्टिता मच्छेसु उववण्णा ।
 तत्थ णं सत्थवज्जा दाहवक्कंतीए कालमासे कालं किच्चा अहेसत्तमीए पुढवीए
 उक्कोसाए तित्तीससागरोवमट्टिइएसु णेरइएसु उववण्णा । सा णं तओऽणंतरे
 उव्वट्टिता दोच्चंपि मच्छेसु उववज्जइ । तत्थ वि य णं सत्थवज्जा दाहवक्कंतीए
 दोच्चंपि अहे सत्तमाए पुढवीए उक्कोसं तेत्तीससागरोवमट्टिइएसु णेरइएसु
 उववज्जइ । सा णं तओऽहितो जाव उव्वट्टिता तच्चंपि मच्छेसु उववण्णा । तत्थ
 वि य णं सत्थवज्जा जाव कालमासे कालं किच्चा दोच्चंपि छट्ठीए पुढवीए
 उक्कोसेणं ० । तओऽणंतरे उव्वट्टिता उरएसु एवं जहा गोसाले तथा णेयव्वं
 जाव रयणप्पभाए [पुढवीओ उव्वट्टिता] सत्तसु उववण्णा । तओ उव्व-
 ट्टिता जाव इमाइं खहयरविहाणाइं जाव अदुत्तरं च णं खरबायरपुढविकाइय-
 ताए तेसु अणेगसयहसहस्सखुत्तो ॥११४॥ सा णं तओऽणंतरे उव्वट्टिता इहेव
 जंबूदीवे दीवे भारहे वासे चंपाए णयरीए सागरदत्तस सत्थवाहस्स भदाए
 भारियाए कुंच्छिसि दारियत्ताए पच्चायाया । तए णं सा भदा सत्थवाही

णवण्हं मासाणं दारियं पयाया सुकुमालकोमलियं गयतालुयसमाणं । तीसेदारियाए
 णिव्वत्ते बारसाहिंयाए अम्मापियरो इमं एयाःरूवं गोणं गुणणिक्कणं णामधेज्जं
 करेति—अम्हाणं अम्हं एसा दारिया सुकुमाला गयतालुयसमाणा तं होउ णं अम्हं
 इमीसे दारियाए णामधेज्जे सुकुमालिया २ । तए णं तीसे दारियाए अम्मापियरो
 णामधेज्जं करेति सुमालियत्ति । तए णं सा सुमालिया दारिया पंचधाईपरिगहिंया
 तंजहा—खीरघाईए जाव गिरिकंदरमत्तीणा इव चंपकलया णिव्वाए णिव्वाघायमि
 जाव परिवड्डुइ । तए णं सा सुमालिया दारिया उम्मुक्कवालभावा रूवेण य जोड्व-
 णेण य लावण्णेण य उक्किट्टा उक्किट्टसरीरा जाया यावि होत्था ॥११५॥ तत्थ णं
 चंपाए णयरीए जिणदत्ते णामं सत्थवाहे अड्ढे ० । तस्स णं जिणदत्तस्स भद्दा
 भारिया सुमाला इट्ठा जाव माणुस्सए कामभोए पच्चण्डमवमाणा विहरइ ।
 तस्स णं जिणदत्तस्स पुत्ते भद्दाए भारियाए अत्तए सागरए णामं दारए सुकु-
 माले जाव सुरूवे । तए णं से जिणदत्ते सत्थवाहे अणया कयाइ सयाओ
 गिहाओ पडिणिक्खमइ २ त्ता सागरदत्तस्स गिहस्स अदूरसामंतेणं
 वीईवयइ । इमं च णं सुमालिया दारिया ण्हाया चेडियासंघपरिवुडा उप्पि
 आगासतलमंसि कणगतेवूसएणं कीलमाणी २ विहरइ । तए णं से जिणदत्ते
 सत्थवाहे सुमालियं दारियं पासइ २ त्ता सुमालियाए दारियाए रूवे य ३
 जायविम्हए कोडुंबियपुरिसे सद्दावेइ २ त्ता एवं वयासी—एस णं देवाणुप्पिया !
 कस्स दारिया किं वा णामधेज्जं से ? तए णं ते कोडुंबियपुरिसा जिणदत्तेणं
 सत्थवाहेणं एवं वुत्ता समाणा हट्टे ० करयल जाव एवं वयासी—एस णं देवा-
 णुप्पिया ! सागरदत्तस्स स० धूया भद्दाए अत्तया सुमालिया णामं दारिया
 सुकुमालपाणिपाया जाव उक्किट्टा । तए णं से जिणदत्ते सत्थवाहे तेसि कोडुं-
 बियाणं अंतिए एयमट्ठं सोच्चा जेणेव सए गिहे तेणेव उवागच्छइ २ त्ता ष्हाए
 जाव मित्तभाइपरिवुडे चंपाए णयरीए मज्झंमज्झेणं जेणेव सागरदत्तस्स गिहे
 तेणेव उवागच्छइ । तए णं सागरदत्ते सत्थवाहे जिणदत्तं स० एज्जमाणं पासइ
 २ त्ता आसणाओ अब्भुट्ठेइ २ त्ता आसणेणं उवणिमतेइ २ त्ता आसत्थं
 वीसत्थं सुहासणवरगयं एवं वयासी—अण देवाणुप्पिया ! किंवागमणवओयणं ?
 तए णं से जिणदत्ते सत्थवाहे सागरदत्तं सत्थवाहं एवं वयासी—एवं ल्लु
 अहं देवाणुप्पिया ! तव धूयं भद्दाए अत्तियं सुमालियं सागरस्स भारियताए

वरेमि । जइ णं जाणह देवाणुप्पिया ! जुत्तं वापत्तं वा सत्ताहणिज्जं वा सरिसो वा संजोगो ता दिज्जउ णं सूमालिया सागर[दारण]स्स । तए णं देवाणुप्पिया ! किं दलयामो सुंक्कं सूमालियाए ? तए णं से सागरदत्ते स० जिणदत्तं स० एवं वयासी-एवं खलु देवाणुप्पिया ! सूमालिया दारिया मम एया एगजाया इट्ठा ५ जाव किमंग पुण पासणयाए । तं णो खलु अहं इच्छामि सूमालियाए दारियाए खणमवि विप्पओगं । तं जइ णं देवाणुप्पिया ! सागरदारए मम घरजांमाउए भवइ तो णं अहं सागरस्स दारगस्स सूमालियं दलयामि । तए णं से जिणदत्ते स० सागरदत्तेणं स० एवं वुत्ते समाणे जेणेव सए गिहे तेणेव उवागच्छइ २ ता सागरदारगं सद्दावेइ २ ता एवं वयासी-एवं खलु पुत्ता ! सागरदत्ते स० मम एवं वयासी-एवं खलु देवाणुप्पिया ! सूमालिया दारिया इट्ठा तं चेव, तं जइ णं सागरदारए मम घरजांमाउए भवइ ता दलयामि । तए णं से सागरए दारए जिणदत्तेणं स० एवं वुत्ते समाणे तुत्तिणीए । तए णं जिणदत्ते स० अण्णया कयाइ सोहणंसित्तिहिकरणे विपुलं असणं ४ उवक्खडावेइ २ ता मित्तणाई आर्मत्तेइ जाव सम्माणेत्ता सागरं दारगं ण्हायं जाव सब्वालंकारविभूसियं करेइ २ ता पुरिससहस्सवाहिणि सीयं डुरूहावेइ २ ता मित्तणाइ जाव संपरिवुडे सव्विड्डीए सयाओ गिहाओ णिग्गच्छइ २ ता चंपा णपरि मज्झमज्जेणं जेणेव सागरदत्तस्स गिहे तेणेव उवागच्छइ २ ता सीयाओ पच्चोरुहइ २ ता सागरं दारगं सागरदत्तस्स स० उवणेइ । तए णं से सागरदत्ते स० विपुलं असणं ४ उवक्खडावेइ २ ता जाव सम्माणेत्ता सागरं दारगं सूमालियाए दारियाए सट्ठि पट्टयंसि डुरूहावेइ २ ता सेयापीतएहि कलसेहि मज्जावेइ २ ता होमं करावेइ २ ता सागरं दारयं सूमालियाए दारियाए पाणिं गेहावेइ ॥ ११६ ॥ तए णं सागरदारए सूमालियाए दारियाए इमं एयारुवं पाणिफासं पडिसंवेदेइ से जहाणामए असिपत्तेइ वा जाव मुम्मुरेइ वा एत्तो अणिट्ठतराए चेव पाणिफासं संवेदेइ । तए णं से सागरए अकामए अवसव्वसे तं म्हुत्तमित्तं संचिट्ठइ । तए णं से सागरदत्ते सत्थवाहे सागरस्स दारगस्स अम्मापियरो मित्तणाइ विपुलं असणं ४ पुष्कवत्थ जाव सम्माणेत्ता पडिविसज्जेइ । तए णं सागरए दारए सूमालियाए सट्ठि जेणेव वासघरे तेणेव उवागच्छइ २ ता सूमालियाए दारियाए सट्ठि तत्तिगंसि णिवज्जइ । तए णं से सागरए

दारए सूमालियाए दारियाए इमं एयरूवं अंगफासं पडिसवेदेइ से जहाणामए अस्सिपत्तेइ वा जाव अमणामघरागं जेव अंगफासं पच्चणुवभवमाणे विहरंइ । तए णं से सागरए दारए सूमालियाए दारियाए अंगफासं असहमाणे अवसत्त्वसे मुहुत्तमित्तं संचिट्ठइ । तए णं से सागरदारए सूमालियं दारियं सुहपसुत्तं जाणित्ता सूमालियाए दारियाए पासाओ उट्ठेइ २ ता जेणेव सए सयणिज्जे तेणेव उवागच्छइ २ ता सयणीयंसि णिवज्जइ । तए णं सूमालिया दारिया तओ मुहुत्त-तरस्स पडिबुद्धा समाणी पइंवया पइमणुरत्ता पइं पासे अपस्समाणी तलिमाउ उट्ठेइ २ ता जेणेव से सयणिज्जे तेणेव उवागच्छइ २ ता सागरस्स पासे णुव-ज्जइ । तए णं से सागरदारए सूमालियाए दारियाए दोच्चंपि इमं एयरूवं अंगफासं पडिसवेदेइ जाव अकामए अवसत्त्वसे मुहुत्तमेत्तं संचिट्ठइ । तए णं से सागरदारए सूमालियं दारियं सुहपसुत्तं जाणित्ता सयणिज्जाओ उट्ठेइ २ ता वासघरस्स दारं विहाडेइ २ ता मारामुक्के विव काए जामेव विसि पाउवमूए तामेव विसि पडिगए ॥११७॥ तए णं सूमालिया दारिया तओ मुहुत्ततरस्स पडिबुद्धा पइंवया जाव अपासमाणी सयणिज्जाओ उट्ठेइ साग-रस्स दारगस्स सत्थओ समंता मग्गणगवेसणं करेमाणी २ वासघरस्स दारं विहा-डियं पासइ २ ता एवं वयासी-गए णं से सागरए-त्तिकट्टु ओहयमणसंकप्पा जाव झियायइ । तए णं सा भद्दा सत्थवाही कल्लं पाउप्पमायाए दासचेडियं सद्दावेइ २ ता एवं वयासी-गच्छह णं तुमं देवाणुप्पिए ! वहुवरस्स मुह्धोव-णियं उवणेहि । तए णं सा दासचेडी भद्दाए एवं वुत्ता समाणी एयमट्ठं तहत्ति पडिसुणेइ २ मुह्धोवणियं गेण्हइ २ ता जेणेव वासघरे तेणेव उवागच्छइ ० सूमालियं दारियं जाव झियायमाणि पासइ २ ता एवं वयासी-किणं तुमं देवाणुप्पिए ! ओहयमणसंकप्पा जाव झियाहि ? तए णं सा सूमालिया दारिया तं दासचेडीयं एवं वयासी-एवं खलु देवाणुप्पिया ! सागरए दारए मम सुहपसुत्तं जाणित्ता मम पासाओ उट्ठेइ २ ता वासघरदुवारं अवगुण्डइ जाव पडिगए । तए णं (हं)तओ(अहं)मुहुत्ततरस्स जाव विहाडियं पासामि २ गए णं से सागरए-त्तिकट्टु ओहयमणसंकप्पा जाव झियायामि । तए णं सा दास-चेडी सूमालियाए दारियाए एयमट्ठं सोच्छा जेणेव सागरदत्ते सत्थं ० तेणेव उवा-गच्छइ २ ता सागरदत्तस्स एयमट्ठं णिवेदेइ । तए णं से सागरदत्ते दासचेडीए

अंतिए एयमट्ठं सोच्चा णिसम्म आमुहस्से० जेणेव जिणदत्तसत्थवाहगिहे तेणेव उवागच्छइ २ त्ता जिणदत्तं स० एवं वयासी-किण्णं देवाणुप्पिया ! एवं जूत्तं वा पत्तं वा कुलाणुरूवं वा कुलसरिसं वा जण्णं सागरदारए सुमालियं दारियं अद्धिदुत्तं पइवयं विप्पजहाय इहमागओ ? बहूहि विज्जणियाहि य हंटाणियाहि य उवालमइ । तए णं जिणदत्ते सागरदत्तस्स सत्थ० एयमट्ठं सोच्चा जेणेव सागरए दारए तेणेव उवागच्छइ २ त्ता सागरयं दारयं एवं वयासी-दुट्ठं णं पुत्ता ! तुमे कयं सागरदत्तस्स गिहाओ इहं हव्वमागए, तेणं तं गच्छह णं तुमं पुत्ता ! एवमवि गए सागरदत्तस्स गिहे । तए णं से सागरए जिणदत्तं एवं वयासी-अवि याइं अहं ताओ ! गिरिपडणं वा तरुपडणं वा मरुप्पदायं वा जलप्पवेसं वा जलणप्पवेसं वा विसभवखणं वा सत्थोवाडणं वा वेहाणसं वा गिद्धपिट्ठं वा पव्वज्जं वा विदेसगमणं वा अद्भवगच्छिज्जामि णो खलु अहं सागरदत्तस्स गिहं गच्छिज्जा । तए णं से सागरदत्ते सत्थ० कुहुंतरिए सागरस्स एयमट्ठं णिसामेइ २ त्ता लज्जिए विलीए विद्धे जिणदत्तस्स सत्थ० गिहाओ पडिणिवखमइ २ त्ता जेणेव सए गिहे तेणेव उवागच्छइ २ त्ता सुकुमालियं दारियं सद्दावेइ २ त्ता अंके णिवेसेइ २ त्ता एवं वयासी-किण्णं तव पुत्ता ! सागरएणं दारएणं भुक्का ? अहं णं तुमं तस्स दाहामि जस्स णं तुमं इट्ठा जाव मणाप्पा भविस्ससित्ति सुमालियं दारियं ताहि इट्ठाहि जाव वग्गहि समासासेइ २ त्ता पडिविसज्जेइ । तए णं से सागरदत्ते सत्थवाहे अण्णया उप्पि आगासतलगंसि सुहणिसण्णे रायमग्गं ओलोएमाणे २ चिट्ठइ । तए णं से सागरदत्ते एगं महं दमगपुरिसं पासइ, दंडिखंडणिवसणं खंडगमल्लगंडघडग-हत्थगयं मच्छियासहस्सेहि जाव अण्णिज्जमाणमग्गं । तए णं से सागरदत्ते सत्थवाहे कोडुंबियपुरिसे सद्दावेइ २ त्ता एवं वयासी-तुव्वे णं देवाणुप्पिया ! एयं दमगपुरिसं विपुलेणं असण ४ पलोभेह ० गिहं अणुप्पवेसेह २ त्ता खंडगमल्लगं खंडघडगं च से एगंते एडेह २ त्ता अलंकारियकम्मं कारेह २ त्ता ण्हायं कयवल्लिकम्मं जाव विभूसियं करेह २ त्ता मणुणं असणं ४ भोयावेह ० मम अंतियं उवणेह । तए णं ते कोडुंबियपुरिसा जाव पडिसुणंति २ त्ता जेणेव से-दमगपुरिसे तेणेव उवागच्छंति २ त्ता तं दमगं असण ४ उवप्पलोभंति २ त्ता सयं गिहं अणुप्पवेसंति २ त्ता तं खंडगमल्लगं खंडघडगं च तस्स दमग-

पुरिसस्स एगंते एड्ढेति । तए णं से दमगे तंसि खंडमल्लगंसि खंडघडगंसि य
 (एगंते) एडिज्जमाणंसि महया २ सद्देणं आरसइ । तए णं से सागरदत्ते सत्थवाहे
 तस्स दमगपुरिसस्स तं महया २ आरसियसइ सोच्चा णिसम्म कोडुंबियपुरिसे
 एवं वयासी—किण्णं देवाणुप्पिया ! एस दमगपुरिसे महया २ सद्देणं आरसइ ?
 तए णं ते कोडुंबियपुरिसा एवं वयासी—एस णं सामी ! तंसि खंडमल्लगंसि
 खंडघडगंसि (एगंते) य एडिज्जमाणंसि महया २ सद्देणं आरसइ । तए णं से
 सागरदत्ते सत्थवाहे ते कोडुंबियपुरिसे एवं वयासी—मा णं तुम्हे देवाणुप्पिया !
 एयस्स दमगस्स तं खंड जाव एड्ढे पासे ठवेह जहा णं पत्तियं भवइ । तेवि
 तहेव ठविति तए णं ते कोडुंबियपुरिसा तस्स दमगस्स अलंकारियकम्मं करेति
 २ ता सयपागसहस्सपागेहिं तिल्लेहिं अब्भंतेति अब्भगिए समाणे सुरभिगंधुवट्ट-
 णेणं गायं उव्वट्टिति उव्वट्टिता उस्सिणोदगगंधोदएणं ण्हाणेति सीओदगेणं ण्हाणेति ।
 पम्हलसुकुमालगंधकासाईए गायान् लूहंति २ ता हंसलवखणं पट्टसाडगं परिहंति
 २ ता सब्वालंकारविभूसियं करेति २ ता विपुलं असणं ४ भोयावेंति २ ता सागर-
 दत्तस्स जवणेति । तए णं [से] सागरदत्ते [२] सूमालियं दारियं ण्हाय जाव सव्वा-
 लंकारविभूसियं करित्ता तं दमगपुरिसं एवं वयासी—एस णं देवाणुप्पिया ! मम
 धूया इट्ठा ५ एयं णं अहं तव भारियत्ताए दलयामि भट्टियाए मद्दो भविज्जासि ।
 तए णं से दमगपुरिसे सागरदत्तस्स एयमट्ठं पडिसुणेइ २ ता सूमालियाए
 दारियाए सद्धिं वासघरं अणुपविसइ सूमालियाए दारियाए सद्धिं तलियंसि
 णिवज्जइ । तए णं से दमगपुरिसे सूमालियाए इमं एयारुवं अंगकासं पडिसंवे-
 देइ सेसं जहा सागरस्स जाव सयणिज्जाओ अब्भट्ठेइ २ ता वासघराओ
 णिगगच्छइ २ ता खंडमल्लगं खंडघडं च गहाय मारामुक्के विव काए
 जामेव दिंसि पाउव्भूए तामेव दिंसि पडिगए । तए णं सा सूमालिया
 जाव गए णं से दमगपुरिसे—त्तिकट्टु ओह्यमणसंक्क्या जाव श्रियायइ ॥११८॥
 तए णं सा भट्टा कल्लं पाउप्पभायाए दासचेडिं सट्टावेइ २ एवं वयासी जाव
 सागरदत्तस्स एयमट्ठं णिवेदेइ । तए णं से सागरदत्ते तहेव संमंते समाणे
 जेणेव वासघरे तेणेव उवागच्छइ २ ता सूमालियं दारियं अंके णिवेसेइ २
 ता एवं वयासी—अहो णं तुमं पुत्ता । पुरापोराणाणं जाव पच्चणुव्भवमाणी

विहरसि, तं मा णं तुमं पुत्ता ! ओह्यमणसंकप्पा जाव श्रियाहि, तुमं णं पुत्ता ! मम महाणसंसि विपुलं असणं ४ जहा पोट्टिला जाव परिभाए-
 मानी विहराहि । तए णं सा सूमालिया दारिया एयमट्ठं पडिसुणेइ २ ता
 महाणसंसि विपुलं असणं ४ जाव दलमानी विहरइ । तेणं कालेणं तेणं समएणं
 गोवालियाओ अज्जाओ बहुस्सुयाओ एवं जहेव तेयलिणाए सुध्वयाओ तहेव
 समोसड्डाओ तहेव संघाडओ जाव अणुपविट्ठे तहेव जाव सूमालिया पडि-
 लाभित्ता एवं वयासी-एवं खलु अज्जाओ ! अहं सागरस्स अणिट्ठा जाव अम-
 णामा, पेच्छइ णं सागरए दारए मम णामं वा जाव परिभोगं वा, जस्स-जस्स
 वि य णं विज्जामि तस्स-तस्स वि य णं अणिट्ठा जाव अमणामा भवामि,
 तुम्भे य णं अज्जाओ ! बहुणायाओ एवं जहा पोट्टिला जाव उवलद्धे जेणं
 अहं सागरस्स दारगस्स इट्ठा कंता जाव भवेज्जामि । अज्जाओ तहेव भणंति
 तहेव साविद्या जाया तहेव चिंता तहेव सागरदसं स० आपुच्छइ जाव गोवा-
 लियाणं अंतिए पव्वइया । तए णं सा सूमालिया अज्जा जाया ईरियासमिया
 जाव गुत्तबंभधारिणी बह्ही चउत्थच्छट्ठुम जाव विहरइ । तए णं सा सूमालिया
 अज्जा अणया कयाइ जेणेव गोवालियाओ अज्जाओ तेणेव उवागच्छइ २ ता
 वंदइ णमंसइ वं० २ ता एवं वयासी-इच्छामि णं अज्जाओ ! तुम्भेहि अमण-
 णाया समानी चंसाओ बाहिं सुमूमिभागस्स उज्जाणस्स अदूरसामंते छट्ठं-
 छट्ठेणं अणिकित्तेणं तवोक्कमेणं सूरामिमुही आयावेमानी विहरित्तए । तए
 णं ताओ गोवालियाओ अज्जाओ सूमालियं एवं वयासी-अम्हे णं अज्जे !
 समणीओ णिगंथीओ ईरियासमियाओ जाव गुत्तबंभचारिणीओ, णो खलु अम्हं
 कप्पइ बहिया णामस्स वा ज्ञाव सण्णिवेसस्स वा छट्ठंछट्ठेणं जाव विहरित्तए,
 कप्पइ णं अम्हं अंतो उवस्सयस्स वइपरिविखत्तस्स संघाडिबद्धियाए णं समतल-
 पइयाए आयावित्तए । तए णं सा सूमालिया गोवालियाए अज्जाए एयमट्ठं
 णो सट्ठइ णो पत्तियइ णो रोएइ एयमट्ठं असट्ठहमाणे ३ सुमूमिभागस्स
 उज्जाणस्स अदूरसामंते छट्ठंछट्ठेणं जाव विहरइ ॥११६॥ तत्थ णं चंपाए
 ललिया णाम गोट्ठी परिवसइ णरवइविण्ण(वि)पयारा अम्मापिइणियय-
 णिविवासा वेसविहारकयणिकेया णाणाविहअविणयप्पहाणा अड्ढा जाव अपरि-
 भूया । तत्थ णं चंपाए ० देवदत्ता णामं गणिया होत्था सुकुमाला जहा अंड-

पाए १ तए णं तीसे ललियाए गोठ्ठीए अण्णया [कयाइ] पंच गोठ्ठिल्लगपुरिसा देवदत्ताए गणियाए सद्धि सुम्मिभागस्स उज्जाणस्स उज्जाणसिंरि पच्चणुम्मव-
 माणा विहरति । तत्थ णं एगे गोठ्ठिल्लगपुरिसे देवदत्तं गणियं उच्छंभे धरेइ
 एगे पिट्ठो आयवत्तं धरेइ एगे पुष्कद्वरयं रएइ एगे पाए रएइ एगे चामहखेवं
 करेइ । तए णं सा सूमालिया अज्जा देवदत्तं गणियं तेहि पंचहि गोठ्ठिल्लपुरि-
 सेहि सद्धि उरालाई माणुस्सगाई भोगभोगाई भुंजमाणि पासइ २ ता इमेया-
 रुवे संकप्पे समुप्पज्जित्था—अहो णं इमा इत्थिया पुरापोराणां कम्मणां जाव
 विहरइ । तं जइ णं केइ इमस्स सुचरियस्स तवणियमबंभेचरवासस्स कल्लणे
 फलवित्तिविसेसे अत्थि तो णं अहमवि आगमिस्सेणं भवगहणेणं इमेयारुवाइं
 उरालाई जाव विहरिज्जामि—त्तिकट्टु णियाणं करेइ २ ता आयावणुम्मिओ
 पच्चोरुहइ ॥१२०॥ तए णं सा सूमालिया अज्जा सरीरबउसा जाया यावि
 होत्था अभिव्खणं २ हत्थे धोवेइ पाए धोवेइ सीसं धोवेइ मुहं धोवेइ थणंतराईं
 धोवेइ कक्खंतराईं धोवेइ गोज्झंतराईं धोवेइ जत्थ णं ठाणं वा सेज्जं वा
 णिसीहियं वा चेएइ तत्थ वि य णं पुब्बामेव उदएणं अम्मव्खइत्ता तओ पच्छा
 ठाणं वा ३ चेएइ । तए णं ताओ गोवालियाओ अज्जाओ सूमालियं अज्जं एवं
 वयासी—एवं खलु देवा० ! अज्जे ! अम्हे समणीओ णिग्गंथीओ इरिया-
 सभियाओ जाव बंभेचरधारिणीओ, णो खलु कप्पइ अम्हं सरीरबाउसियाए
 होत्तए, तुमं च णं अज्जे ! सरीरबाउसिया अभिव्खणं २ हत्थे धोवेसि जाव
 चेएसि, तं तुमं णं देवाणुप्पिए ! एय[त]स्स ठाणस्स आलोएहि जाव पडिक्कजाहि ।
 तए णं सूमालियाणं गोवालियाणं अज्जाणं एयमट्ठं णो आढाइ णो परिज्जाणइ
 अणाढायमाणो अपरिज्जाणमाणो विहरइ । तए णं ताओ अज्जाओ सूमालियं अज्जं
 अभिव्खणं २ अभिहीलंति जाव परिभवंति अभिव्खणं २ एयमट्ठं णिवारंति ।
 तए णं तीसे सूमालियाए समणीहि णिग्गंथीहि हील्लिज्जमाणोए जाव वारिज्ज-
 माणो इमेयारुवे अज्जत्थिए जाव समुप्पज्जित्था—जया णं अहं अगारवासमज्जे
 वसामि तथा णं अहं अप्पवसा । जया णं अहं भुंडे भवित्ता पव्वइया तथा
 णं अहं परवसा । पुच्चि च णं ममं समणीओ आढायंति इयार्णि णो आढायंति ।
 तं सेयं खलु मम कल्लं पाउप्पभायाए गोवालियाणं अंतियाओ पडिणिववमित्ता
 पाडिएवकं उवस्सयं उवसंपज्जित्ताणं विहरित्तए—त्तिकट्टु एवं सपेहेइ २ ता

कल्लं पा० गोवाल्लियाणं अज्जाणं अंतियाओ पडिणिवस्समइ २ ता पाडिएवकं उवस्सयं उवसंपज्जित्तानं विहरइ । तए णं सा सूमाल्लिया अज्जा अणोहट्टिया अभिचारिया सच्छंदमई अन्निवस्सणं २ हत्थे धोवेइ जाव चेएइ तत्थ वि य णं पासत्था पासत्थविहारीणी ओसण्णा २ कुसीला २ संसत्ता २ बहुणि वासाणि सामणपरियागं पाउणइ २ अद्धमासियाए संलेहणाए तस्स ठाणस्स अणालोइयअपडिक्कंता कालमासे कालं किच्चा ईसाणे कप्पे अणयरंसि विमा- णंसि देवगणियत्ताए उववण्णा । तत्थेगइयाणं देवीणं णवपलिओवमाइं ठिई पणत्ता । तत्थ णं सूमाल्लियाए देवीए णवपलिओवमाइं ठिई पणत्ता ॥१२१॥

तेणं कालेणं तेणं समएणं इहेव जंबूद्वीवे २ भारहे वासे पंचालेसु जणवएसु कपिल्लपुरे णामं णयरे होत्था वण्णओ । तत्थ णं दुवए णामं राया होत्था वण्णओ । तस्स णं चुलणी देवी धट्टज्जणे कुमारे जुवराया । तए णं सा सूमाल्लिया देवी ताओ देवलोगाओ आउक्खएणं जाव चइत्ता इहेव जंबूद्वीवे २ भारहे वासे पंचालेसु जणवएसु कपिल्लपुरे णयरे दुवयस्स रण्णे चुलणीए देवीए कुच्छिसि दारियत्ताए पच्छायाया । तए णं सा चुलणी देवी णवण्हं मासाणं जाव दारियं पयाया । तए णं तीसे दारियाए णिव्वत्तबारसाहियाए इमं एयारूवं० णामं०—

जम्हा णं एसा दारिया दुवयस्स रण्णे धूया चुलणीए देवीए अत्तया तं होउ णं अम्हं इमीसे दारियाए णामधिज्जे बोवई । तए णं तीसे अम्मापियरो इमं एयारूवं गुण्णं गुणणिक्कणं णामधेज्जं करेति बोवई तए णं सा बोवई दारिया पंचधाइपरिग्गहिया जाव गिरिकंदरमल्लीण इव चंपगलया णिवाय- णिव्वाघायंसि सुहंसुहेणं परिवड्ढइ । तए णं सा बोवई देवी रायवरकण्णा उम्भक्कबालभावा जाव उविकट्टसरीरा जाया यावि होत्था । तए णं तं बोवइं रायवरकण्णं अणया कयाइ अंतेउरियाओ ण्हायं जाव विभूसियं करेति २ ता दुवयस्स रण्णे पायवद्विउं पेसंति । तए णं सा बोवई २ जेणेव दुवए राया तेणेव उवागच्छइ २ ता दुवयस्स रण्णे पायगहणं करेइ । तए णं से दुवए राया बोवइं दारियं अंके णिवेसेइ २ ता बोवईए २ रुवेण थ ३ जायविम्हए बोवइं २ एवं वयासी—जस्स णं अहं [तुमं] पुत्ता । रायस्स वा जुवरायस्स वा भारियत्ताए सयमेव दलइस्सामि तत्थ णं तुमं सुहिया वा दुहिया वा भविज्जासि । तए णं मम जावज्जीवाए हिययडाहे भविस्सइ । तं णं अहं

तव पुत्ता ! अज्जयाए सयंवरं विरयामि । अज्जयाए णं तुमं विष्णं सयं-
 वरा । जे णं तुमं सयमेव रायं वा जुवरायं वा वरेहिस्सि से णं तव भत्तारे
 भविस्सइत्तिकट्टु ताहि इट्ठाहि जाव आसासेइ २ ता पडिविसज्जेइ ॥१२२॥
 तए णं से बुवए राया दूयं सदावेइ २ ता एवं वयासी-गच्छह णं तुमं देवाणु-
 प्पिया ! बारवइं णयरि । तत्थ णं तुमं कण्हं वामुदेवं समुद्विजयपामोक्खे
 दस दसारे बलवगपामोक्खे पंच महावीरे उग्गसेणपामोक्खे सोलस रायसहस्से
 पज्जुणपामोक्खाओ अट्ठट्ठाओ कुमारकोडोओ संबवामोक्खाओ सट्ठि दुइंत-
 साहस्सीओ बीरसेणपामोक्खाओ इक्कवीसं बीरपुरिससाहस्सीओ महासेणपामो-
 क्खाओ छप्पणं बलवगसाहस्सीओ अण्णे य बह्वे राईसरत्तलवरमाडंबिय-
 कोडुंबियइअसेट्ठिसेणावइसत्थवाहपन्निइओ करयलपरिगहियं दसणहं सिर-
 सावत्तं मत्थए अंजलि कट्टु जएणं विजएणं वट्ठावेहि २ ता एवं वयाहि-
 एवं खलु देवाणुप्पिया ! कंपिल्लपुरे णयरे बुवयस्स रण्णो धूयाए च्चलणीए देवीए
 अत्तयाए धट्टुज्जुणकुमारस्स भगिणीए दोवईए राय० सयंवरे भविस्सइ । तं णं
 तुव्वे देवा० ! बुवयं रायं अणुगिहेमाणा अकालपरिहीणं चेव कंपिल्लपुरे णयरे
 समोसरह । तए णं से दूए करयल जाव कट्टु बुवयस्स रण्णो एयमट्ठं विण-
 एणं पडिसुणेइ २ ता जेणेव सए गिहे तेणेव उवागच्छइ २ ता कोडुंबियपुरिसे
 सदावेइ २ ता एवं वयासी-खिप्पामेव भो देवाणुप्पिया ! चाउगघंटं आसरहं
 जुत्तामेव उवट्टुवेह जाव उवट्टुवेति । तए णं से दूए ष्हाए जाव सरीरे
 चाउगघंटं आसरहं दुहहइ २ ता बहूहि पुरिसेहि सण्णइ जाव गहियाऽऽउहपह-
 रणेहि सट्ठि संपरिवुडे कंपिल्लपुरं णयरं मज्झंमज्झेणं णिग्गच्छइ० पंचालज्ज-
 वयस्स मज्झंमज्झेणं जेणेव देसप्पते तेणेव उवागच्छइ २ ता सुरट्टाजणवयस्स
 मज्झंमज्झेणं जेणेव बारवईं णयरी तेणेव उवागच्छइ २ ता बारवइं णयरि
 मज्झंमज्झेणं अणुप्पविसइ २ ता जेणेव कण्हस्स वामुदेवस्स ब्राह्मिरिया
 उवट्टाणसाला तेणेव उवागच्छइ २ ता चाउगघंटं आसरहं ठवेइ २ ता रहाओ
 पच्चोहहइ २ ता मणुस्सवग्गुरापरिक्खित्ते पायविहारचारेणं जेणेव कण्हे
 वामुदेवे तेणेव उवागच्छइ २ ता कण्हं वामुदेवं समुद्विजयपामोक्खे य दस
 दसारे जाव बलवगसाहस्सीओ करयल तं चेव जाव समोसरह । तए णं से
 कण्हे वामुदेवे तस्स दूयस्स अंतिए एयमट्ठं सोच्चा णिसम्म हट्टुतुट्ठे जाव

हियए तं दूयं सक्कारेइ सम्माणेइ स० २ ता पडिविसज्जेइ । तए णं से कण्हे
वासुदेवे कोडुंबियपुरिसे सद्दावेइ २ ता एवं वयासी-गच्छह णं तुमं देवाणु-
प्पिया ! सभाए सुहम्माए सामुदाइयं भेरि तालेहि । तए णं से कोडुंबिय-
पुरिसे करयल जाव कण्हस्स वासुदेवस्स एयमट्ठं पडिसुणेइ २ ता जेणेव सभाए
सुहम्माए सामुदाइया भेरी तेणेव उवागच्छइ २ ता सामुदाइयं भेरि महया २
सद्देणं तालेइ । तए णं ताए सामुदाइयाए भेरीए तालियाए समाणीए समुद्-
विजयपामोक्खा दस दसारा जाव महासेणपामोक्खाओ छप्पणं बलवगसाहस्सीओ
ण्हाया जाव विमूसिया जहाक्खिमवइड्डिसक्कारसमुदएणं अप्पेगइया जाव पाय-
विहारचारेणं जेणेव कण्हे वासुदेवे तेणेव उवागच्छति २ ता करयल जाव कण्हं
वासुदेवं जएणं विजएणं वद्धावेति । तए णं से कण्हे वासुदेवे कोडुंबियपुरिसे
सद्दावेइ २ ता एवं वयासी-खिप्पामेव भो देवाणुप्पिया ! अभिसेक्कं हत्थिरयणं
पडिकप्पेह हयगय जाव पच्चप्पिणंति । तए णं से कण्हे वासुदेवे जेणेव मज्जण-
घरे तेणेव उवागच्छइ २ ता समुत्तजालाकुलाभिरामे जाव अज्जणगिरिकूड-
सणिभं गयवइं णरवईं दुरूढे । तए णं से कण्हे वासुदेवे समुद्द्विजयपामोक्खेहि
दसहिं दसारेहिं जाव अणंगसेणापामोक्खाहिं अणेगाहिं गणियासाहस्सीहिं सद्धि
संपरिवुडे सत्थिवड्डीए जाव रवेणं बारवइं णयारिं मज्झंमज्जेणं णिगच्छइ
२ ता मुरट्टाजणवयस्स मज्झंमज्जेणं जेणेव देसप्पंते तेणेव उवागच्छइ २ ता
पंचालजणवयस्स मज्झंमज्जेणं जेणेव कपिल्लपुरे णयरे तेणेव पहारेत्थ गमणाए ।
तए णं से दुवए राया दोच्चं दूयं सद्दावेइ २ ता एवं वयासी-गच्छ [ह] णं
तुमं देवाणुप्पिया ! हत्थिणाउरं णयरं, तत्थ णं तुमं पंडुरायं सपुत्तयं जुहिट्टिल्लं
भीमसेणं अज्जुणं णउलं सहदेवं दुज्जोहणं भाइसयसमगं गगेयं विदुरं
दोणं जयद्दहं सउणीं कीवं आसत्थामं करयल जाव कट्टु तहेव समोसरह ।
तए णं से दूए एवं वयासी-जहा वासुदेवे णवरं भेरी णत्थि जाव जेणेव
कपिल्लपुरे णयरे तेणेव पहारेत्थ गमणाए । एएणेव कमेणं तच्चं दूयं
चंपाणयारिं, तत्थ णं तुमं कण्हं अंगरायं सेत्तलं णदिरायं करयल तहेव जाव
समोसरह । चउत्थं दूयं सुत्तिमइं णयारिं, तत्थ णं तुमं सिमुपालं दमघोसमुयं
पंचमाइसयसंपरिवुडं करयल तहेव जाव समोसरह । पंचमगं दूयं हत्थिशीस-
णयरं तत्थ णं तुमं दमदंतं रायं करयल तहेव जाव समोसरह । छट्ठं दूयं

महुरं णयरं, तत्थ णं तुमं धरं रायं करयल जाव समोसरह । सत्तमं दूयं राय-
 गिहं णयरं, तत्थ णं तुमं सहवेवं जरा सिधुमुयं करयल जाव समोसरह । अट्टमं
 दूयं कोडिणं णयरं । तत्थ णं तुमं हंप्पि भेसगमुयं करयल तहेव जाव
 समोसरह । णवमं दूयं विराटं णयरं तत्थ णं तुमं कीयमं माउसयसमगं कर-
 यल जाव समोसरह । दसमं दूयं अवसेसेसु (य) गामागरणगरेसु अणेगाइं
 रायसहस्साइं जाव समोसरह । तए णं से दूए तहेव णिग्गच्छइ जेणेव गामागर
 जाव समोसरह । तए णं ताइं अणेगाइं रायसहस्साइं तस्स दूयस्स अंतिए
 एयमट्ठं सोच्चा णिसम्म हट्ठं । तं दूयं सक्कारेति सम्मानेति स० २ ता
 पडिविसिञ्जति । तए णं ते वासुदेवपामोक्खा बहवे रायसहस्सा पत्तेयं २
 ७हाया सण्णद्ध हत्थिखंधवरगयाह्यगयरह० महुया मडच्चडगररहपहकर ०
 सएहि २ णयरं हिंती अभिणिग्गच्छति २ ता जेणेव पंचाले जणवए तेणेव
 पहारेत्थ गमणाए ॥१२३॥ तए णं से दुवए राया कोडुंबियपुरिसे सद्दावेइ
 २ ता एवं वयासी-गच्छह णं तुमं देवाणुप्पिया ! कंपिल्लपुरे णयरे बहिया
 गंगाए महाणईए अट्टरसामंते एगं महं सयंवरमंडवं करेह अणेगखंभसयसणि-
 विट्ठं लीलद्विपसालभजियागं जाव पच्चप्पिणंति । तए णं से दुवए राया
 कोडुंबियपुरिसे सद्दावेइ २ ता एवं वयासी-खिप्पामेव मो देवाणुप्पिया !
 वासुदेवपामोक्खाणं बहूणं रायसहस्साणं आवासे करेह । ते वि करेत्ता पच्चप्पि-
 णंति । तए णं से दुवए राया वासुदेवपामोक्खाणं बहूणं रायसहस्साणं आगमं
 जाणेत्ता पत्तेयं २ हत्थिखंध जाव परिवुडे अग्घं च पज्जं च गहाय सन्विइठीए
 कंपिल्लपुराओ णिग्गच्छइ २ ता जेणेव ते वासुदेवपामोक्खा बहवे रायसहस्सा
 तेणेव उवामच्छइ २ ता ताइं वासुदेवपामोक्खाइं अग्घेण य पज्जेण य सक्का-
 रेइ सम्माणेइ स० २ ता तेसि वासुदेवपामोक्खाणं पत्तेयं २ आवासे वियरइ ।
 तए णं ते वासुदेवपामोक्खा जेणेव सया २ आवासा तेणेव उवामच्छति २ हत्थि-
 खंधाहितो पच्चोरुहंति २ ता पत्तेयं २ खंधावारणिवेसं करेति २ ता सएसु २
 आवासेसु अणुप्पविसंति २ ता सएसु २ आवासेसु य आसणेसु य सयणेसु य
 सणिणसणा य संतुयट्ठा य बहूहि गंधव्वेहि य णाडएहि य उवगिज्जमाणा य
 उवणच्चिज्जमाणा य विहरंति । तए णं से दुवए राया कंपिल्लपुरं णयरं अणु-
 प्विसइ २ ता विपुलं असणं ४ उवक्खडावेइ २ ता कोडुंबियपुरिसे सद्दावेइ

२ ता एवं वयासी—गच्छह णं तुम्हे देवाणुप्पिया ! विपुलं असणं ४ सुरं च मज्जं च मंसं च सीधुं च पसणं च सुब्रह्मपुष्पवत्थगंधमल्लालंकारं च वामुदेव-
 पामोक्खाणं रायसहस्साणं आवासेसु साहरह । ते वि साहरंति । तए णं ते
 धामुदेवपामोक्खा तं विपुलं असणं पाणं खाइमं साइमं जाव पसणं च आसाए-
 साणा ४ विहरंति जिभियमुत्तरागया वि य णं समाणा आयंता चोक्खा जाव
 सुहासणवरगया बहूहि गंधव्वेहिं जाव विहरंति । तए णं से दुवए राया पुव्वावर-
 ण्हकालसमयंति कोडुंबियपुरिसे सद्दावेइ २ ता एवं वयासी—गच्छह णं तुम्हे देवाणु-
 प्पिया ! कंपिल्लपुरे सिघाडग जाव पहेसु वामुदेवपामोक्खाण य रायसहस्साणं
 आवासेसु हंथियखंधवरगया मह्या २ सद्देणं जाव उगोसेमाणा २ एवं वयह—
 एवं खलु देवाणुप्पिया ! कल्लं पाउप्पमायाए दुवयस्स रणो धूयाए चुलणीए देवीए
 अत्तयाए धट्टुज्जुणस्स भगिणीए दोवईए रा० सयंवरे भविस्सइ । तं तुम्हे णं
 देवाणुप्पिया ! दुवयं रायाणं अणुगिण्हेमाणा ण्हाया जाव विभूसिया हत्थियखंधवर-
 गया सकोरेंट० सेयवरचामर० ह्यगयरह० मह्या भडचडगरेणं जाव परिविखत्ता
 जेणेव सयंवरमंडवे तेणेव उवागच्छह २ ता पत्तेयं णामकेसु आसणेसु णिसीयह
 २ ता दोवईं रा० पडिवाल्लेमाणा २ चिद्धह घोसणं घोसेह २ मम एयमाणत्तियं
 पच्चप्पिणह । तए णं ते कोडुंबिया तहेव जाव पच्चप्पिणंति । तए णं से दुवए
 राया कोडुंबियपुरिसे सद्दावेइ २ ता एवं वयासी—गच्छह णं तुम्हे देवाणुप्पिया ।
 सयंवरमंडवं आसियसंमज्जिओवलित्तं सुगंधवरगंधियं पंचवण्णपुष्पुंजोवधार-
 कलियं कालागरुपवरकुंदुरुक्कतुक्क जाव गंधवट्टिभूयं मंचाइमंचकलियं करेह
 कारवेह करेत्ता कारवेत्ता वामुदेवपामोक्खाणं बहूणं रायसहस्साणं पत्तेयं २
 णामंकाइं (कियाइं) आसणाइं अत्थयपच्चत्थुयाइं रएह २ ता एयमाणत्तियं
 पच्चप्पिणह तेवि जाव पच्चप्पिणंति । तए णं ते वामुदेवपामोक्खा बहवे
 रायसहस्सा कल्लं पाउ० ण्हाया जाव विभूसिया हत्थियखंधवरगया सकोरेंट०
 सेयवरचामराहिं ह्यगय जाव परिवुडा सव्विद्धीए जाव रवेणं जेणेव सयंवे-
 मंडवे तेणेव उवागच्छंति २ ता अणुप्पविसंति २ ता पत्तेयं २ णामंकेसु
 णिसीयंति दोवईं रायवरकण्णं पडिवाल्लेमाणा चिद्धंति । तए णं से दुवए
 राया कल्लं ण्हाए जाव विभूसिए हत्थियखंधवरगए सकोरेंट० ह्यगय० कंपिल-
 पुरं मज्जंसज्जेणं णिरगच्छइ० जेणेव सयंवरामंडवे जेणेव वामुदेवपामोक्खा

बह्वे रायसहस्सा तेणेव उवागच्छइ २ ता तेसि वामुदेवपामोवखाणं करयल जाव वट्ठावेत्ता कण्हस्स वामुदेवस्स सेयवरचामरं गहयं उववीयमाणे चिट्ठइ । १२४ । तए णं सा दोवई रायवरकण्णा जेणेव मज्जणघरे तेणेव उवागच्छइ २ ता ण्हाया कयबलिकम्भा कयकोउयमंगलपायच्छित्ता मुट्ठप्पावेसाइं मंगत्ताइं वत्थाइं पवरपरिहिया जिणपडिमाणं अच्चणं करेइ २ ता जेणेव अंतेउरे तेणेव उवागच्छइ । तए णं तं दोवइं रा० अंतेउरियाओ सव्वालंकारविभूसियं करेति, किं ते ? वरपायपत्तणेउरा जाव चेडियाचक्कवालमयहरगविदपरिक्खित्ता अंतेउराओ पडिणिवखमइ २ ता जेणेव बाहिरिया उवट्ठानसाला जेणेव चाउ-घटं आसरहे तेणेव उवागच्छइ २ ता किट्ठावियाए लेहियाए सांढि चाउघटं आस-रहं टुहूहइ । तए णं से धट्टज्जणे कुमारे दोवईए रायवरकण्णाए सारत्थं करेइ । तए णं सा दोवई २ कपिल्लपुरं णयरं मज्झमज्जेणं जेणेव सयंवरमंडवे तेणेव उवागच्छइ २ ता रहं ठवेइ रहाओ पच्चोरुहइ २ ता किट्ठावियाए लेहियाए सांढि सयंवरमंडवं अणुपविसइ करयल जाव तेसि वामुदेवपामोवखाणं बहूणं रायवरसहस्साणं पणामं करेइ । तए णं सा दोवई रा० एणं महं सिरिदाम-गंडं किं ते ? पाडलमल्लियचंपय जाव सत्तच्छयाईं हि गंधर्वाणि मयंतं परम-सुहफासं दरिसणिज्जं गेणहइ । तए णं सा किट्ठाविया जाव मुरूवा जाव वाम-हत्थेणं चिल्लगं दप्पणं गहेऊण सल्लियं दप्पणसंकंतिं वसंदंसिए य से दाहिणेणं हत्थेणं दरिसिए पवररायसीहे फुडविसयविसुद्धरिभियगंभीरमहुरमणिया सा तेसि सव्वेसि पत्थिवाणं अम्मापिऊणं वंससत्तसामत्थगोत्तविवकंति कतिवहुविहआगम-माहूपरुवजोव्वणगुणत्तावण्णकुलसीलजाणिया कित्तणं करेइ । पढमं ताव वट्ठिपुंगवाणं दसदसार [वर] वीरपुरिसाणं तेलोक्कवलवगाणं सत्तुसयसह-स्समाणावमट्ठगाणं भवसिद्धिपवरपुंडरीयाणं चिल्लगाणं बलवीरियरुवजोव्वण-लावण्णकित्तिया कित्तणं करेइ । तओ पुणो उग्गसेणमाईणं जायवाणं भणइ य सोहगणरुवकलिए वरेहि वरपुरिसगंधहत्थीणं जो हु ते होइ हिययदइओ । तए णं सा दोवई रायवरकण्णा बहूणं रायवरसहस्साणं मज्झमज्जेणं समइच्छमाणि २ पुव्वकयणियाणेणं चोइज्जमाणी २ जेणेव पंच पंडवा तेणेव उवागच्छइ २ ता ते पंच पंडवे तेणं दसद्धवण्णेणं कुसुमदामेणं आवेडियपरि-वेडियं करेइ २ ता एवं वधासी-ए णं मए पंच पंडवा वरिया । तए णं तेसि(ताइं)वामुदेवपामोवखाणं बहूणि रायसहस्साणि मह्या २ सट्ठेणं उग्घो-

सेमाणाइं २ एवं वयंति—सुवरियं खलु भो ! दोवइए रायवरकण्णाए त्ति-
 कट्टु सयंवरमडवाओ पडिणिक्खमंति २ ता जेणेव सया २ आवासा तेणेव
 उवागच्छंति । तए णं धट्टुज्जण्णेकुमारे पंच पंडवे दोवइं रायवरकण्णं चाउ-
 रघंटं आसरहं दुरूहेइ २ ता कपिल्लपुरं मज्झंमज्झेणं जाव सयं भवणं अणु-
 पविसइ । तए णं दुवए राया पंच पंडवे दोवइं राय० पट्टयं दुरूहेइ २ ता
 सेयपीयएहिं कलसेहिं मज्जावेइ २ ता अग्गिहोमं कारवेइ पंचण्हं पंडवाणं
 दोवईए य पाणिग्गहणं करावेइ । तए णं से दुवए राया दोवईए रा० इमं एयाह्वं
 पीइदाणं दलयइ तंजहा—अट्टु हिरण्णकोडीओ जाव अट्टु पेसणकारीओ दास-
 चेडीओ अणं च विपुलं धणकणय जाव दलयइ । तए णं से दुवए राया ताइं
 वासुदेवपामोक्खाइं विपुलेणं अत्तणपाणखाइमसाइमेणं वत्थगंधं जाव पडिविस-
 ज्जेइ ॥१३५॥ तए णं से पंडू राया तेसिं वासुदेवपामोक्खाणं बहूणं रायसहस्साणं
 करयल जाव एवं वयासी—एवं खलु देवाणुप्पिया ! हत्थिणाउरे णयरे पंचण्हं
 पंडवाणं दोवईए य देवीए कल्लाणकरे भविससइ, तं तुभंमे णं देवाणुप्पिया !
 ममं अणुगिण्हमाणा अकालपरिहीणं समोसरह । तए णं ते वासुदेवपामोक्खा
 पत्तेयं २ जाव पहारेत्थ गमणाए । तए णं से पंडू राया कोडुंबियपुरिसे
 सहावेइ सहावेत्ता एवं वयासी—गच्छह णं तुभंमे देवाणुप्पिया ! हत्थिणा-
 उरे पंचण्हं पंडवाणं पंच पासायवांडिसए कारेह अम्मुगयमूसिय वण्णओ जाव
 पडिरूवे । तए णं ते कोडुंबियपुरिसा पडिसुणेति जाव करावेंति । तए णं से
 पंडू राया पंचाहिं पंडवेहिं दोवईए देवीए सद्धिं हयगयसंपरिवुडे कपिल्लपुराओ
 पडिणिवल्लमइ २ ता जेणेव हत्थिणाउरे तेणेव उवागए । तए णं से पंडूराया
 तेसिं वासुदेवपामोक्खाणं आगमणं जाणिता कोडुंबियपुरिसे सहावेइ २ ता एवं
 वयासी—गच्छह णं तुभंमे देवाणुप्पिया ! हत्थिणाउरस्स णयरस्स बहिंया वासु-
 देवपामोक्खाणं बहूणं रायसहस्साणं आवासे कारेह अणेगलंभसथ० तहेव जाव
 पंचप्पिणंति । तए णं ते वासुदेवपामोक्खा बहवे रायसहस्सा जेणेव हत्थिणाउरे
 णयरे तेणेव उवागच्छंति । तए णं से पंडूराया तेसिं वासुदेवपामोक्खाणं आगमणं
 जाणिता हट्टुमुट्ठे ण्हाए कयबलिकभ्भे जहा दुपए जाव जहारिहं आवासे दल-
 यइ । तए णं ते वासुदेवपामोक्खा बहवे रायसहस्सा जेणेव सया २ आवासा
 तेणेव उवागच्छंति ० तहेव जाव विहरंति । तए णं से पंडू राया हत्थिणाउरं
 णयरं अणुपविसइ २ ता कोडुंबियपुरिसे सहावेइ २ ता एवं वयासी—तुभंमे णं

वेवाणुप्पिया । विपुलं असणं ४ तहेव जाव उवणंति । तए णं ते वासुदेवपामोक्खा
 बहवे रायसहस्सा ण्हाया कयबलिकम्मा तं विपुलं असणं ४ तहेव जाव विह-
 रंति । तए णं से पंडूराया [ते] पंचपंडवे दोवइं च देविं पट्टयं दुरुहेइ २ ता
 सीयापीएहिं कलसेहिं ण्हावेइ २ ता कल्लाणकारं करेइ २ ता ते वासुदेव-
 पामोक्खे बहवे रायसहस्से विपुलेणं असणं ४ पुण्फवत्थेणं सक्कारेइ सम्माणेइ
 जाव पडिविसज्जेइ । तए णं ताइं वासुदेवपामोक्खाइं बहूहिं जाव पडिगयाइं
 ॥ १२६ ॥ तए णं ते पंच पंडवा दोवईए देवीए (सद्धि अंतो अंतेउरपरियाव)
 सद्धि कल्लाकल्लि वारंवारंणं ओरालाइं भोगभोगाइं जाव विहरंति । तए
 णं से पंडू राया अणया कयाइं पंचहिं पंडवेहिं कुंतीए देवीए दोवईए य सद्धि
 अंतोअंतेउरपरियावसद्धि संपरिवुडे सीहासणवरगए यावि विहरइ । इमं च णं
 कच्छुल्लणारए दंसणेणं अइमइए विणीए अंतो २ य कलुसहियए मज्झथो-
 वत्थिए य अल्लोणसोमपियदंसणे सुरुवे अमहलसगलपरिहिए कालमियचम्म-
 उत्तरासंगरइयवत्थे दण्डकमण्डलुहत्थे जडामउडदित्तिसिए जणोवइयगणंतिप-
 मुंजेमेह्लावागलधरे हत्थकयकच्छमीए पियगंधवे घरणिगोयप्पहाणे संवरणा-
 वरणओवय (णउ) णुप्पयणिलेसणीसु य संकामणिअमिओगपण्णत्तिगमणीयंम-
 णीसु य बहूसु विज्जाहरीसु विज्जासु विस्सुयजसे इट्ठे रामस्स य केसवस्स य
 पज्जुण्णपईवसंबअणिरुद्धिणिसद्धउम्मयसारणगयसुमुहहुम्महाईंणं जाययाणं अद्द-
 ट्ठाण कुमारकोडीणं हिययदइए संथवए कलहज्जुडकोलाहलप्पिए भंडणाभिलासी
 बहूसु य समरसयसंपराएसु दंसणरए समंतओ कलहं सदविल्लणं अणुगवेस-
 माणे असमाहिकरे दसारवरवीरपुरिसतेलोवकबलगवगाणं आमतेऊण तं मग-
 वइं ए (प) ककमणि गगणगमणदच्छं उप्पइओ गगणमभिलंघयंतो गामागरणर-
 खेडकम्बडमंडवदोणमुहपट्टणसंवाहसहस्समंडियं यिमियमेइणीतलं वसुहं ओलो-
 इंतो रम्मं हत्थियाउरं उवागए पंडुरायभवणंसि अइवेगेण समोवइए । तए णं से
 पंडू राया कच्छुल्लणारयं एज्जमाणं पासइ २ ता पंचहिं पंडवेहिं कुंतीए य
 देवीए सद्धि आसणाओ अइमुट्ठेइ २ ता कच्छुल्लणारयं सत्तट्टुपयाइं पच्च-
 गच्छइ २ ता तिक्खुत्तो आयाहिणपयाहिणं करेइ २ ता वंदइ णमंसइ वं २
 ता महुरिहेणं आसणेणं उवणिमंतेइ । तए णं से कच्छुल्लणारए उदगपरिकोत्ति-
 याए दम्भोवरिणच्छत्थुयाए भिसियाए णिसीयइ २ ता पंडुरायं रज्जे जाव

अंतेउरे य कुसलोदंतं पुच्छइ । तए णं से पंडुराया कौंती देवी पंच य पंडवा
कच्छुल्लणारयं आहंति जाव पज्जुवासंति । तए णं सा दोवई देवी कच्छुल्ल-
णारयं अस्संजयं अविरयं अप्पडिह्यपच्चक्खायपावकम्म—त्तिकट्टु णो
आढाइ णो परियाणइ णो अब्भट्ठेइ णो पज्जुवासइ ॥ १२७ ॥ तए णं तस्स
कच्छुल्लणारयस्स इमेयारूवे अज्जत्थिए चितिए पत्थिए मणोगए संकप्पे समु-
प्पज्जितथा—अहो णं दोवई देवी रूवेण य जाव लावण्णेण य पंचाहि पंडवेहि
अणुव(वत्य)द्धा समानी ममं णो आढाइ जाव णो पज्जुवासइ । तं सेयं खलु
मम दोवईए देवीए विप्पियं करित्तए—त्तिकट्टु एयं संपेहेइ २ ता पंडुरायं
आपुच्छइ २ ता उप्पर्याण विज्जं आयाहेइ २ ता ताए उधिकट्टाए जाव विज्जा-
हरगई लवणसमुद्धं मज्झमज्जेणं पुरत्थाभिमुहे वीइवइउं पयस्से यावि होत्था ।
तेणं कालेणं तेणं समएणं धायइसंडे दीवे पुरत्थिमज्झदाहिणद्धुमरह्वासे अमर-
कंका णाम रायहाणी होत्था । तत्थ णं अमरकंकाए रायहाणीए पउमणाभे
णामं राया होत्था महया हिमधंत वण्णओ । तस्स णं पउमणाभस्स रण्णो सत्त
देवीसयाइ ओरोहे होत्था । तस्स णं पउमणाभस्स रण्णो सुणाभे णामं पुत्ते
ज्वराया यावि होत्था । तए णं से पउमणाभे राया अंतोअंतेउरंसि ओरोह-
संपरिवुडे सीहासणवरगए विहरइ । तए णं से कच्छुल्लणारए जेणेव अमरकंका
रायहाणी जेणेव पउमणाभस्स भवणे तेणेव उवागच्छइ २ ता पउमणाभस्स
रण्णो भवणंसि अत्तिवेगेणं समोवइए । तए णं से पउमणाभे राया कच्छुल्ल-
णारयं एज्जमाणं पासइ पासित्ता आसणाओ अब्भट्ठेइ २ ता अग्घेणं
जाव आसणेणं उवणिमंतेइ । तए णं से कच्छुल्लणारए उदयपरिफोसियाए
दम्मोवरिपच्चत्थयाए मिसियाए णिसीयइ जाव कुसलोदंतं आपुच्छइ ।
तए णं से पउमणाभे राया णियगओरोहे जायविम्हए कच्छुल्लणारयं एयं
वयासी—तुम्हं देवाणुप्पिया ! ब्रह्मणि गामाणि जाव गेहाइं अणुपविससि, तं
अत्थि याइं ते कंहिचि देवाणुप्पिया ! एरिसए ओरोहे दिट्ठुपुवे जारिसए णं मम
ओरोहे ? तए णं से कच्छुल्लणारए पउमणाभेणं रण्णा एयं वत्ते समाणे ईंसि
विहसियं करेइ २ ता एयं वयासी—सरिसे णं तुमं पउमणाभा ! तस्स अगड-
ददुुरस्स । के णं देवाणुप्पिया ! से अगडददुुरे ? एयं जहा मत्तिणाए । एयं
देवाणुप्पिया ! जंबुद्वीवे २ मारहे वासे हत्थिणाउरे णधरे दुपयस्स रण्णो धूया

चुलगीए देवीए अत्तया पंडुस्स सुण्हा पंचण्हं पंडवाणं भारिया दोवई देवी रुवेण य जाव उक्किट्टसरीरा । दोवईए णं देवीए छिण्णस्सवि पायंगूट्टयस्स अयं तत्र ओरोहे सइमं पि कलं ण अग्घइ-त्तिकट्ट पउमणांमं आपुच्छइ ० जाव पडिगए । तए णं से पउमणांमे राया कच्छुल्लणारयस्स अंतिए एयमट्ठं सोच्चा णिसम्म दोवईए देवीए रुवे य ३ मुच्छिए ४ ० जेणेव पोसहमाला तेणेव उवागच्छइ २ ता पोसहमालं जाव पुव्वसंगइयं देवं एवं वयासी-एवं खलु देवाणुप्पिया ! जंबूद्वीवे २ भारहे वासे हत्थिणाउरे जाव उक्किट्टसरीरा, तं इच्छामि णं देवाणु-प्पिया ! दोवइं देवि इहमाणियं । तए णं पुव्वसंगइए देवे पउमणांमं एवं वयासी-णो खलु देवाणुप्पिया ! एयं भूयं वा भव्वं वा भविसं वा जणं दोवई देवी पंचपंडवे मोत्तूण अण्णेणं पुरिसेणं सद्धि ओरालाइं जाव विहरिस्सइ । तहावि य णं अहं तव पियट्टयाए दोवइं देवि इहं हव्वमाणेमि-त्तिकट्ट पउम-णांमं आपुच्छइ २ ता ताए उक्किट्टाए जाव तवणसमुदं मज्झंमज्झेणं जेणेव हत्थिणाउरे णयरे तेणेव पहारेत्थ गमणाए । तेणं कालेणं तेणं समएणं हत्थिणा-उरे णयरे जूहिट्टिल्ले राया दोवईए देवीए सद्धि उप्पि आगासतत्तमि सुहृत्पमुत्ते यावि होत्था । तए णं से पुव्वसंगइए देवे जेणेव जूहिट्टिल्ले राया जेणेव दोवई देवी तेणेव उवागच्छइ २ ता दोवईए देवीए ओसोवणियं दलयइ २ ता दोवइं देवि गिण्हइ २ ता ताए उक्किट्टाए जाव जेणेव अमरकंका जेणेव पउमणांमस्स भवणे तेणेव उवागच्छइ २ ता पउमणांमस्स भवणंसि असोगवणियाए दोवइं देवि ठावेइ २ ता ओसोवणि अवहरइ २ ता जेणेव पउमणांमे तेणेव उवागच्छइ २ ता एवं वयासी-एस णं देवाणुप्पिया ! मए हत्थिणाउराओ दोवई देवी इह हव्वमाणिया तव असोगवणियाए च्चिट्टइ । अओ परं तुमं जाणत्ति-त्तिकट्ट जामेव दिंसि पाउब्भूए तामेव दिंसि पडिगए । तए णं सा दोवई देवी तओ मूहुत्त-तरस्स पडिबुद्धा समणी तं भवणं असोगवणियं च अपच्चभिजाणमाणी एवं वयासी-णो खलु अहं एसे सए भवणे णो खलु एसा अहं सया असोगवणिया । तं ण णज्जइ णं अहं केणई देवेण वा दाणवेण वा किंपुरिसेण वा किंणरेण वा महोरगेण वा गंधच्चेण वा अण्णस्स रण्णो असोगवणियं साहरिय-त्तिकट्ट ओहयमणसंकप्पा जाव जिययइ । तए णं से पउमणांमे राया ण्हाए जाव सध्वालंकारविस्सुसिए अंतेउरपरियालसंपरिवुडे जेणेव असोगवणिया जेणेव दोवई

देवी तेणेव उवागच्छइ २ ता दोवतीं देवीं ओहय ० जाव झियायमाणीं पासइ २ ता एवं वयासी—किणं तुमं देवाणुप्पिए ! ओहय जाव झियाहि ? एवं खलु तुमं देवाणुप्पिए ! मम पुव्वसंगइएणं देवेणं जंबुद्वीवाओ २ भारहाओ वासाओ हत्थिणापुराओ णयराओ जुहिट्टिल्लस्स रण्णो भवणाओ साहरिया, तं माणं तुमं देवाणुप्पिए ! ओहय ० जाव झियाहि, तुमं णं मए सद्धिं विपुलाइं भोग-भोगाइं जाव विहराहि । तए णं सा दोवई देवी पउमणाभं एवं वयासी—एवं खलु देवाणुप्पिया ! जंबुद्वीवे २ भारहे वासे बारवईए णयरीए कण्हे णामं वामुदेवे ममप्पियभाउए परिवसइ, तं जइ णं से छण्हं मासाणं ममं कूवं णो हव्वमागच्छइ तए णं अहं देवाणुप्पिया ! जं तुमं वदसि तस्स आणाओवाय-वयणणिहेसे चिट्ठिस्सामि । तए णं से पउमणाभे दोवईए एयमट्ठं पडिसुणेइ २ ता दोवइं देवि कण्णंतेउरे ठवेइ । तए णं सा दोवई देवी छट्ठंछट्ठं अणि-विखत्तं आयंवित्रपरिगहिएणं तवोकम्मं अण्णं भावेमाणीं विहरइ ॥१२८॥ तए णं से जुहिट्ठिल्ले राया तओ म्हुत्तंतरस्स पडिबुद्धे समाणे दोवइं देविं पासि अपासमाणो सयणिज्जाओ उट्ठेइ २ ता दोवईए देवीए सव्वओ समंता मग्गण-गवेसणं करेइ २ ता दोवईए देवीए कत्थइ सुइं वा खुइं वा पवतिं वा अलभमाणे जेणेव पंडू राया तेणेव उवागच्छइ २ ता पंडू रायं एवं वयासी—एवं खलु ताओ ! मम आगासतलगंसि सुहपसुत्तस्स पासओ दोवई देवी ण णज्जइ केणइ देवेण वा दाणवेण वा किंपुरिसेण वा किण्णरेण वा महोरगेण वा गंधव्वेण वा हिया वा णिया वा अविखत्ता वा ? तं इच्छामि णं ताओ ! दोवईए देवीए सव्वओ समंतं मग्गणगवेसणं क(रित्तए)यं । तए णं से पंडू राया कोडुंबिय-पुरिसे सद्दावेइ २ ता एवं वयासी—गच्छह णं तुम्हे देवाणुप्पिया ! हत्थि-णाउरे णयरे सिघाडगतिपत्रउक्कचचरमहापहपहेसु महया २ सद्देणं उग्घो-सेमाणा २ एवं वयह—एवं खलु देवाणुप्पिया ! जुहिट्ठिल्लस्स रण्णो आगास-तलगंसि सुहपसुत्तस्स पासओ दोवई देवी ण णज्जइ केणइ देवेण वा दाणवेण वा किंपुरिसेण वा किण्णरेण वा महोरगेण वा गंधव्वेण वा हिया वा णिया वा अविखत्ता वा, तं जो णं देवाणुप्पिया ! दोवईए देवीए सुइं वा खुइं वा पवतिं वा परिकहेइ तस्स णं पंडू राया विउलं अत्थसंपयाणं (दाणं) इलयइ—त्तिकट्टु घोसणं घोसावेह २ ता एयमाणत्तियं पच्चप्पिण्ह । तए

णं ते कोडुंबियपुरिसा जाव पचवप्पिणंति । तए णं से पंडूराया दोवईए देवीए
 कथइ सुइं वा जाव अलभमाणे कौतीं देवीं सद्दावेइ २ ता एवं वयासी-
 गच्छह णं तुमं देवाणुप्पिया ! बारवईं णयारि कण्हस्स वासुदेवस्स एयमदंठं
 णिवेदेहि । कण्हे णं परं वासुदेवे दोवईए देवीए मग्गणगवेसणं करेज्जा अण्णा
 ण णज्जइ दोवईए देवीए सुइं वा खुइं वा पविंति वा उवलभेज्जा । तए णं
 सा कौती देवी पंडुरण्णा एवं वृत्ता समाणी जाव पडिमुणेइ २ ता ण्हाया
 कयवलिकम्मा हत्थिखंधवरगया हत्थिणाउरं णयरं मज्झंमज्जेणं णिगच्छइ
 २ ता कुरुजणवयं मज्झंमज्जेणं जेणेव सुरट्टाज्जणवए जेणेव बारवईं णयरी जेणेव
 अग्गज्जाणे तेणेव उवागच्छइ २ ता हत्थिखंधाओ पच्चोरुहइ २ ता कोडुंबिय-
 पुरिसे सद्दावेइ २ ता एवं वयासी-गच्छह णं तुमं देवाणुप्पिया ! जेणेव
 (बारवईं ण०) बारवईं णयारि अणुपविस्सह २ ता कण्हं वासुदेवं करयल० एवं
 वयह-एवं खलु सामी ! तुमं पिउच्छा कौती देवी हत्थिणाउराओ णयराओ
 इहं हव्वमागया तुमं दंसणं कंखइ । तए णं ते कोडुंबियपुरिसा जाव कहेंति ।
 तए णं कण्हे वासुदेवे कोडुंबियपुरिसाणं अंतिए एयमदंठं सोच्चा णिसम्म
 हट्टुट्टे हत्थिखंधवरगए हयगय० बारवईए णयरीए मज्झंमज्जेणं जेणेव कौती
 देवी तेणेव उवागच्छइ २ ता हत्थिखंधाओ पच्चोरुहइ २ ता कौतीए देवीए
 पायग्गहणं करेइ २ ता कौतीए देवीए सद्धि हत्थिखंधं डुरुहइ २ ता बारवईए
 णयरीए मज्झंमज्जेणं जेणेव सए गिहे तेणेव उवागच्छइ २ ता सयं गिहं अणु-
 पविस्सइ । तए णं से कण्हे वासुदेवे कौतीं देविं ण्हायं कयवलिकम्मं जिमिय-
 भुत्तुत्तरागयं जाव सुहासणवरगयं एवं वयासी-संदिसउ णं पिउच्छा ! किमाग-
 मणपओयणं ? तए णं सा कौती देवी कण्हं वासुदेवं एवं वयासी-एवं खलु
 पुत्ता ! हत्थिणाउरे णयरे जुहिद्विल्लस्स रण्णे आगासतलए सुहपमुत्तस्स पासओ
 दोवई देवी ण णज्जइ केणइ अवहिया जाव अवक्खिता वा, तं इच्छामि णं
 पुता ! दोवईए देवीए मग्गणगवेसणं कयं । तए णं से कण्हे वासुदेवे कौतीं पिउ-
 च्छि एवं वयासी-जं णवरं पिउच्छा ! दोवईए देवीए कथइ सुइं वा जाव-लसामि
 तां णं अहं पायालाओ वा मवणाओ वा अद्धभरहाओ वा समंतओ दोवईं (देविं)
 साहंति उवणेमि-त्तिकट्टु कौतीं पिउच्छि सवकारेइ सम्माणेइ जाव पडिविस्स-
 ज्जेइ । तए णं सा कौती देवी कण्हेणं वासुदेवेणं पडिविस्सज्जिया समाणी

जामेव विंति पाउब्भूया तामेव विंति पडिगया । तए णं से कण्हे वासुदेवे कोडुब्बियपुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! बारवई णयरी एवं जहा पंडु तहा घोसणं घोसावेइ जाव पच्चप्पिणति पंडुस्स कहा तए णं से कण्हे वासुदेवे अणया अंतोअतेउरगए ओरोहे जाव विहरइ । इमं च णं कच्छुल्लणारए जाव समोवइए जाव णिसीइत्ता कण्हं वासुदेवं कुसलोदंतं पुच्छइ । तए णं से कण्हे वासुदेवे कच्छुल्लं णारयं एवं वयासी-तुमं णं देवाणुप्पिया ! बह्णि गामागर जाव अणुपविससि, तं अत्थि-याइं ते कंहिचि दोवईए देवीए सुई वा जाव उवलद्धा ? तए णं से कच्छुल्लणारए कण्हं वासुदेवं एवं वयासी-एवं खलु देवाणुप्पिया ! अणया धायइंसडे दीवे पुरत्थिमद्धं दाहि-णुभरह्वासं अवरककारायहाणिं गए, तत्थ णं मए पउमणाभस्स रणो भवणंसि दोवई देवी जारिसिया विट्ठपुब्बा यावि होत्था । तए णं कण्हे वासुदेवे कच्छु-ल्लं एवं वयासी-तुब्भं चेव णं देवाणुप्पिया ! ए(यं)वं पुब्बकम्मं । तए णं से कच्छुल्लणारए कण्हेणं वासुदेवेणं एवं वृत्ते समाणे उप्पयाणि विज्जं आवाहेइ २ ता जामेव विंति पाउब्भूए तामेव विंति पडिगए । तए णं से कण्हे वासुदेवे वृथं सद्दावेइ २ ता एवं वयासी-गच्छह णं तुमं देवाणुप्पिया ! हत्थिणाउरं पंडुस्स रणो एयमट्ठं णिवेदेहि-एवं खलु देवाणुप्पिया ! धायइंसडे दीवे पुरच्छिमद्धे अवरककाए रायहाणीए पउमणाभभवणंसि दोवईए देवीए पउत्ती उवलद्धा । तं गच्छंतु पंच पंडवा चाउरंगिणीए सेणाए सद्धिं संपरिवुडा पुरत्थिम-वेयासीए ममं पडिवाल्लेमाणा चिट्ठंतु । तए णं से इए जाव भणइ (जाव) पडि-वाल्लेमाणा चिट्ठइ । तेवि जाव चिट्ठंति । तए णं से कण्हे वासुदेवे कोडुब्बिय-पुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! सण्णाहियं भेरिं तालेह । तेवि तालेति । तए णं तीसे सण्णाहियाए भेरीए सद्दं सोच्चा समुद्विजयपामोवखा दस दसारा जाव छप्पणं बलवयसाहस्सीओ सण्णद्वबद्ध जाव गहियाउहपहरणा अप्पेगइया हयगया (अप्पेगइया) गयगया जाव वगुरापरिविखत्ता जेणेव सभा सुहस्सा जेणेव कण्हे वासुदेवे तेणेव उवागच्छंति २ ता करयत्त जाव वद्धावेति । तए णं से कण्हे वासुदेवे हत्थिखंधवरगए सको-रेंटमत्तदामेणं छत्तेणं धारिज्जमाणेणं सेयवर० हयगय० महया मडचडगरपह-करेणं बारवईए णयरीए मज्झमज्जेणं णिगच्छइ० जेणेव पुरत्थिमवेयाली

तेणेव उवागच्छइ २ ता पंचहि पंडवेहि सद्धि एगयओ मिलइ २ ता खंधा-
वारणिवेसं करेइ २ ता पोसहसालं अणुपविसइ २ ता सुट्टियं देवं मणसि-
करेमाणे २ च्चिट्ठइ । तए णं कण्हस्स वासुदेवस्स अट्ठमभत्तंसि परिणमसाणसि
सुट्टिओ जाव आगओ - भण देवाणुप्पिया ! जं मए कायध्वं । तए णं से
कण्हे वासुदेवे सुट्टियं देवं एवं वयासी-एवं खलु देवाणुप्पिया ! दोवई देवो जाव
पउमणाभस्स भवणांसि साहरिया, तण्णं तुमं देवाणुप्पिया ! मम पंचहि पंडवेहि
सद्धि अप्पच्छट्ठस्स छण्हं रहाणं लवणसमुद्धं मगं वियरेहि जण्णं अहं अवर-
कंकारायहाणिं दोवईए कूवं गच्छामि । तए णं से सुट्टिए देवे कण्हं वासुदेवं एवं
वयासी-कण्हं देवाणुप्पिया ! जहां चेव पउमणाभस्स रण्णे पुव्वसंगइएणं
देवेणं दोवई जाव सहरिया तथा चेव दोवइं देवि, धायईसंडाओ दोवाओ भार-
हाओ जाव हत्थिणाउरं साहरामि उदाहु पउमणाभं रायं सपुरबलवाहणं लवण-
समुद्धं पविखवामि ? तए णं से कण्हे वासुदेवे सुट्टियं देवं एवं वयासी-मा णं
तुमं देवाणुप्पिया ! जाव साहराहि, तुमं णं देवाणुप्पिया ! मम लवणसमुद्धं
पंचहि पंडवेहि सद्धि अप्पच्छट्ठस्स छण्हं रहाणं मगं वियराहि, सयमेव णं अहं
दोवईए कूवं गच्छामि । तए णं से सुट्टिए देवे कण्हं वासुदेवं एवं वयासी-एवं
होउ । पंचहि पंडवेहि सद्धि अप्पच्छट्ठस्स छण्हं रहाणं लवणसमुद्धं मगं विय-
रइ । तए णं से कण्हे वासुदेवे चाउरं गिणी सेणं पड्डिविसज्जेइ २ ता पंचहि
पंडवेहि सद्धि अप्पच्छट्ठे छ्हि रहेहि लवणसमुद्धं मज्झमज्जेणं वीईवयइ २ ता
जेणेव अवरकंका रायहाणी जेणेव अवरकंकाए रायहाणीए अगुज्जाणे तेणेव
उवागच्छइ २ ता रहं ठवेइ २ ता दारुयं सारहिं सदावेइ २ ता एवं वयासी-
गच्छह णं तुमं देवाणुप्पिया ! अवरकंकारायहाणिं अणुपविसाहि २ ता पउम-
णाभस्स रण्णे वामेणं पाएणं पायपीढं अवकमित्ता कुंतगेणं लेहं पणामेहि
तिवत्तियं भिउडं णिडाले साहट्ट आसुरुत्ते रुट्ठे कुड्ढे कुविए चंडिकिए एवं
व०-हं भो पउमणाभा! अपत्थियपत्थिधा! दुरंतपत्तलवखणा! होणपुण्णचाउहसा!
सिरोहिरिधीपरिवज्जिया ! अज्ज ण भवसि किण्णं तुमं ण याणांसि कण्हस्स
वासुदेवस्स भगिणिं दोवइं देवि इहं हव्वमाणमाणे ? तं एयमवि एए पच्च-
प्पिणाहि णं तुमं दोवइं देवि कण्हस्स वासुदेवस्स अहव णं जुद्धसज्जे गिगच्छाहि
एस णं कण्हे वासुदेवे पंचहि पंडवेहि सद्धि अप्पच्छट्ठे दोवईए देवोए कूवं हव्व-

मागए । तए णं से दासए सारही कण्हेणं वासुदेवेणं एवं वृत्ते समाणे हट्टुट्टे
 (जाव) पडिसुणेइ २ ता अवरककं रायहाणि अणुपविसइ २ ता जेणेव पउमणाभे
 तेणेव उवागच्छइ २ ता करयल जाव वड्ढावेत्ता एवं वयासी-एस णं सामी !
 मम विणयपडिवत्ती इमा अण्णा मम सामिस्स समुहाणत्ति-त्तिकट्टु आसुरुत्ते
 वामपाएणं पायपीढं अ(णु)वक्कमइ २ ता कौत्तगणं लेहं पणामइ ० जाव कूवं
 ह्व्वमागए । तए णं से पउमणाभे दासएणं सारहिणा एवं वृत्ते समाणे आसुरुत्ते
 तिवलं भिउडि णिडाले साहट्टु एवं वयासी-णो अप्पिणामि णं अहं देवाणु-
 प्पिया ! कण्हस्स वासुदेवस्स दोवइं । एस णं अहं सयमेव जुज्झसज्जो णिग्ग-
 च्छामि-त्तिकट्टु दासयं सारहि एवं वयासी-केवलं भो ! रायसत्थेसु दूये
 अवज्जे-त्तिकट्टु असक्कारिय असम्मणिय अवदारेणं णिच्छुभावेइ । तए णं
 से दासए सारही पउमणाभेणं असक्कारिय जाव णिच्छूहे समाणे जेणेव कण्हे
 वासुदेवे तेणेव उवागच्छइ २ ता करयल जाव कण्हं जाव एवं वयासी-एवं
 खलु अहं सामी ! तुढ्भं वयणेणं जाव णिच्छुभावेइ । तए णं से पउमणाभे
 बलवाउयं सट्ठावेइ २ ता एवं वयासी-खिप्पामेव भो देवाणुप्पिया ! आभि-
 सेक्कं हत्थिरयणं पडिकप्पेह । तयाणंतरं च णं छेयायरियउवदेसमइविकप्पणा-
 विगप्पेहिं जाव उवणेति । तए णं से पउमणाहे सण्णद्ध ० अभिसेयं दुरूहइ
 २ ता हयगय जेणेव कण्हे वासुदेवे तेणेव पहारेत्थ गमणाए । तए णं से कण्हे
 वासुदेवे पउमणाभं रायाणं एज्जमाणं पासइ २ ता ते पंच पंडवे एवं वयासी-
 हं भो दारगा ! किण्णं तुढ्भे पउमणाभेणं सद्धिं जुज्झहिह उयाहु पेच्छिहिह ?
 तए णं ते पंच-पंडवा कण्हं वासुदेवं एवं वयासी-अम्हे णं सामी ! जुज्झामो
 तुढ्भेपेच्छह तए णं ते पंच-पंडवे सण्णद्ध जाव पहरणा रहे दुरूहति २ ता जेणेव
 पउमणाभे राया तेणेव उवागच्छंति २ ता एवं वयासी-अम्हे पउमणाभे वा
 राय-त्तिकट्टु पउमणाभेणं सद्धिं संपलगा यावि होत्था । तए णं से पउमणाभे
 राया ते पंच-पंडवे खिप्पामेव हयमहियपवरविवडियच्चिधद्धयपडागा जाव दिसो-
 दिंसि पडिसेहेइ । तए णं ते पंच पंडवा पउमणाभेणं रण्णा हयमहियपवरविव-
 डिय जाव पडिसेहिया समाणा अत्थामा जाव अधारणिज्जमि त्तिकट्टु जेणेव
 कण्हे वासुदेवे तेणेव उवागच्छंति । तए णं से कण्हे वासुदेवे ते पंच-पंडवे एवं
 वयासी-कहण्णं तुढ्भे देवाणुप्पिया ! पउमणाभेण रण्णा सद्धिं संपलगा ? तए

णं ते पंच-पंडवा कण्हं वासुदेवं एवं वयासी-एवं खलु देवाणुप्पिया ! अम्हे
 तुम्भेहिं अब्भणुण्णाया समाणा सण्णाद्ध० रहे दुरूहामो २ ता जेणेव पउमणामे
 जाव पडिसेहेइ । तए णं से कण्हे वासुदेवे ते पंच-पंडवे एवं वयासी-जइ णं
 तुम्भे देवाणुप्पिया ! एवं वयंता-अम्हे णो पउमणामे रायत्तिकट्टु पउमणाभेणं
 सद्धि संपल्लगंता तो णं तुम्भे णो पउमणाभे ह्यमहि्यपवर जाव पडिसेहंते तं
 पेच्छह णं तुम्भे देवाणुप्पिया ! अहं णो पउमणाभे रायत्तिकट्टु पउमणाभेणं
 रण्णा सद्धि जुज्झामि रहं दुरूहइ २ ता जेणेव पउमणाभे राया तेणेव उवा-
 गच्छइ २ ता सेयं गोखीरहारधवलं तणसोल्लिर्यांसिदुवारकुदेंदुसण्णिगासं णियय-
 स्स बलस्स हरिसज्जणं रिउसेणविणसकरं पंचजणं संखं परामुसइ २ ता
 मुहवायपूरियं करेइ । तए णं तस्स पउमणाहस्स तेणं संखसद्धेणं बलतिभाए हए
 जाव पडिसेहिए । तए णं से कण्हे वासुदेवे धणुं परामुसइ वेढो धणुं पूरेइ २ ता
 धणुसइं करेइ । तए णं तस्स पउमणाभस्स दोच्चे बलतिभाए तेणं धणुसद्धेणं
 ह्यमहि्य जाव पडिसेहिए । तए णं से पउमणाभे राया तिमागबलावसेसे अत्यामे
 अबले अवीरिए अपुरिसवकारपरवकम्मे अधारणिज्जमित्तिकट्टु सिग्घं तुरियं
 जेणेव अवरकंका तेणेव उवागच्छइ २ ता अवरकंकां रायहाणि अणुपविसइ २ ता
 दाराइं पिहेइ २ ता रोहसज्जे चिट्ठइ । तए णं से कण्हे वासुदेवे जेणेव अवरकंका
 तेणेव उवागच्छइ २ ता रहं ठवेइ २ ता रहाओ पच्चोरुहइ २ ता वेउद्विय-
 समुघाएणं समोहणइ एगं महं णरसोहरूवं विउद्वइ २ ता महया-महया
 सद्धेणं पायदहरियं करेइ । तए णं (से) कण्हेणं वासुदेवेणं महया-महया
 सद्धेणं पायदहरएणं कएणं समाणेणं अवरकंका रायहाणी संभग्गपागारगो(पु)
 उराट्ठालयच्चरियतोरणपल्लहत्थियपवरभवणसिरिघरा सर(र)सरस्स धरणिपले
 सण्णिवइया । तए णं से पउमणाभे राया अवरकंकां रायहाणिं संभग्ग जाव
 पासित्ता भीए दोवइं देवि सरणं उवेइ । तए णं सा दोवई देवी पउमणामं
 रायं एवं वयासी-किण्णं तुमं देवाणुप्पिया ! ण जाणसि कण्हस्स वासुदेवस्स
 उत्तमपुरिसस्स विप्पियं करेमाणे ममं इह हव्वमाणेसि ? तं एवमवि गए-गच्छह
 णं तुमं देवाणुप्पिया ! ण्हाए उल्लपडसाडए ओ(अव) चूलगवत्थणिघत्थे अतेउर-
 परिघालसंपरिवुडे अग्गाइं वराइं रयणाइं गहाय ममं पुरओ काउं कण्हं वासुदेवं
 करयत्त ० पायवडिए सरणं उवेहि, पणिवइयवच्छला णं देवाणुप्पिया ।

उत्तमपुरिसा । तए णं से पउमणाभे दोवईए देवीए एयमट्ठं पडिसुणेइ पडिसुणेत्ता ण्हाए जाव सरणं उवेइ उवेत्ता करयल जाव एवं वयासी-दिट्ठा. णं देवाणुप्पियाणं इड्ढी जाव परक्कमे । तं खामेमि षं देवाणुप्पिया । जाव खम्मंतु णं जाव णाहं भुज्जो २ एवं करणयाए-त्तिकट्ठु पंजलिउडे पायवडिए कण्हस्स वासुदेवस्स दोवइं देवि साहत्थि उवणेइ । तए णं से कण्हे वासुदेवे पउमणाभं एवं वयासी-हं भो पउमणाभा ! अप्पत्थिय-पत्थिया ४ किण्णं तुमं ण जाणसि मम भगिणि दोवइं देवि इह हव्वमाणमाणे ? तं एवमवि गए णत्थि ते ममाहितो इयाणि भयमत्थि-त्तिकट्ठु पउमणाभं पडिविसज्जेइ० दोवइं देवि गेण्हइ २ ता रहं डुरुहेइ २ ता जेणेव पंच पंडवा तेणेव उवागच्छइ २ ता पंचण्हं पंडवाणं दोवइं देवि साहत्थि उवणेइ । तए णं से कण्हे पंचाहि पंडवेहि सद्धि अप्पच्छट्ठे छहि र्हेहि लवणसमुहं मज्झंमज्झेणं जेणेव जंबुद्वीवे २ जेणेव भारहे वासे तेणेव पहारेत्थ गमणाए ॥१२६॥ तेणं कालेणं तेणं समएणं धायइसंडे दीवे पुरत्थिमद्धे भारहे वासे चंपा णामं णयरी होत्था । पुण्णसद्दे णामं चेइए । तत्थ णं चंपाए णयरीए कविले णामं वासुदेवे राया होत्था महया हिमवंतं वण्णओ । तेणं कालेणं तेणं समएणं मूणिसुव्वए अरहा चंपाए पुण्णसद्दे समोसहे । कविले वासुदेवे धम्मं सुणेइ । तए णं से कविले वासुदेवे मूणिसुव्वयस्स अरहओ अंतिए धम्मं सुणेमाणे कण्हस्स वासुदेवस्स संख सद्दं सुणेइ । तए णं तस्स कविलस्स वासुदेवस्स इमेयारूवे अज्झत्थिए ४ समु-प्पज्जित्या-कि मण्णे धायइसंडे दीवे भारहे वासे दोच्चे वासुदेवे समुप्पण्णे ? जस्स णं अयं संखसद्दे ममं पिव मुहवायपूरिए वियंभइ ? कविले वासुदेवे सद्दाइं सुणेइ । मूणिसुव्वए अरहा कविलं वासुदेवं एवं वयासी-से णूणं ते कविला वासुदेवा ! ममं अंतिए धम्मं णिसामेमाणस्स संखसद्दं आकण्णित्ता इमेयारूवे अज्झत्थिए-कि मण्णे जाव वियंभइ । से णूणं कविला वासुदेवा ! अयमट्ठे समट्ठे ? हुंता ! अत्थि । तं णो खलु कविला ! एवं भूयं वा भवइ वा भविस्सइ वा जण्णं एगखेत्ते एगजुगे एगसमए कुवे अरहंता वा चक्कवट्ठी वा बल्लदेवा वा वासुदेवा वा उप्पज्जिसु वा उप्पज्जिति वा उप्पज्जिस्संति वा । एवं खलु वासुदेवा ! जंबुद्वीवाओ २ भारहाओ वासाओ हत्थिणाउराओ णयराओ पंडुस्स रण्णो सुण्हा पंचण्हं पंडवाणं भारिया दोवई देवी तव पउम-

णाभस्स रण्णो पुव्वसंगइएणं देवेणं अवरककं णयरि साहरिया । तए णं से कण्हे
वासुदेवे पंचहि पंडवेहि सद्धि अप्पच्छट्ठे छहि रहेहि अवरककं रायहाणि दोवईए
देवीए कूवं हव्वमागए । तए णं तस्स कण्हस्स वासुदेवस्स पउमणाभेणं रण्णा
सद्धि संगामं संगामेमाणस्स अयं संखसद्दे तव मूहवाया० इव इट्ठे कंते इहे
वियंभइ । तए णं से कविले वासुदेवे मुणिसुव्वयं वंदइ णमंसइ वं० २ ता एवं
वयासी-गच्छामि णं अहं भंते ! कण्हं वासुदेवं उत्तमपुरिसं मम सरिसपुरिसं
पासामि । तए णं मुणिसुव्वए अरहा कविलं वासुदेवं एवं वयासी-भो खलु
देवाणुप्पिया ! एवं भूयं वा ३ जण्णं अरहंता वा अरहंतं पासंति चक्कवट्ठी वा
चक्कवट्ठी पासंति बलवेवा वा बलवेवं पासंति वासुदेवा वा वासुदेवं पासंति ।
तह्वि य णं तुमं कण्हस्स वासुदेवस्स लवणसमुद्दं मज्झमज्झेणं वोईवयमाणस्स
सेयापीयाइं धयग्गाइं पासिहिसि । तए णं से कविले वासुदेवे मुणिसुव्वयं वंदइ
णमंसइ वं० २ ता हत्थिखंधं दुरूहइ २ ता सिग्घं २ जेणेव वेलाउले तेणेव
उवागच्छइ २ ता कण्हस्स वासुदेवस्स लवणसमुद्दं मज्झमज्झेणं वोईवयमाणस्स
सेयापीयाइं धयग्गाइं पासइ २ ता एवं वयइ-एस्स णं मम सरिसपुरिसे उत्तम-
पुरिसे कण्हे वासुदेवे लवणसमुद्दं मज्झमज्झेणं वोईवयइ-त्तिकट्ठ पंचयणं संखं
परामुसइ २ मूहवायपूरियं करेइ । तए णं से कण्हे वासुदेवे कविलस्स वासुदेवस्स
संखसइं आयण्णेइ २ ता पंचयणं जाव पूरियं करेइ । तए णं दोवि वासुदेवा
संखसइसामाधारिं करंति । तए णं से कविले वासुदेवे जेणेव अवरकका तेणेव
उवागच्छइ २ ता अवरककं रायहाणि संभगतीरणं जाव पासइ २ ता पउम-
णाभं एवं वयासी-किण्णं देवाणुप्पिया ! एसा अवरकका संभग जाव सण्णि-
वइया ? तए णं से पउमणामे कविलं वासुदेवं एवं वयासी-एवं खलु सामो !
जंबूट्ठीवाओ २ भारहाओ वासाओ इहं हव्वमागम्म कण्हेणं वासुदेवेणं तुव्वं
परिभूय अवरकका जाव सण्णिवाडिया । तए णं से कविले वासुदेवे पउम-
णाभस्स अंतिए एयमट्ठं सोच्चा पउमणाभं एवं वयासी-हं भो पउमणाभा !
अपत्थियपत्थिया ५ किण्णं तुमं ण जाणसि मम सरिसपुरिस्स कण्हस्स वासु-
देवस्स विप्पियं करेमाणे ? आसुरुत्ते जाव पउमणाभं णिव्विसयं आणवेइ
पउमणाभस्स पुत्तं अवरककाए रायहाणीए महया २ रायाभिसेएणं अभिसिचइ
जाव पडिगए ॥१३०॥ तए णं से कण्हे वासुदेवे लवणसमुद्दं मज्झमज्झेणं वोई-

वयइ गंगं उवागए ते पंच पंडवे एवं वयासी-गच्छह णं तुब्भे देवाणुप्पिया ! गंगा महाणइं उत्तरह जाव ताव अहं सुट्ठियं लवणाहिवइं पासामि । तए णं ते पंच पंडवा कण्हेणं २ एवं वुत्ता समाणा जेणेव गंगा महाणइं तेणेव उवा-गच्छति २ ता एगट्ठियाए णावाए मग्गणगवेसणं करेति २ ता एगट्ठियाए णावाए गंगं महाणइं उत्तरति २ ता अण्णमण्णं एवं वयंति-पहू णं देवाणु-प्पिया । कण्हे वासुदेवे गंगं महाणइं बाहाहि उत्तरितए उदाहु णो पहू उत्तरि-त्तए-त्तिकट्टु एगट्ठियाओ णावाओ णूमेति २ ता मूसति २ ता कण्हं वासुदेवं पडिवालेमाणा २ चिट्ठति । तए णं से कण्हे वासुदेवे सुट्ठियं लवणाहिवइं पासइ २ ता जेणेव गंगा महाणइं तेणेव उवागच्छइ २ ता एगट्ठियाए सब्बओ समंता मग्गणगवेसणं करेइ २ ता एगट्ठियं अपासमाणे एगाए बाहाए रहं ससुरगं ससारहि गेण्हइ एगाए बाहाए गंगं महाणइं वासिट्ठि जोयणाइं अद्धजोयणं च वित्थिणं उत्तरिउं पयत्ते यावि होत्था । तए णं से कण्हे वासुदेवे गंगाए महाणइंए बहुमज्झदेसभागं संपत्ते समणे संते तंते परितंते बद्धसेए जाए यावि होत्था । तए णं तस्स कण्हस्स वासुदेवस्स इमेएयारूवे अज्झत्थिए जाव समुप्पज्जित्था-अहो णं पंचवा महाबलवगा जेहि गंगामहाणइं बा(व)सिट्ठि जोयणाइं अद्धजोयणं च वित्थिणा बाहाहि उत्तिणा, इच्छंतएहि णं पंचहि पंडवेहि पउमणाभे राया हयमहिय जाव णो पडिसेहिए । तए णं गंगादेवी कण्हस्स वासुदेवस्स इमं एयारूवं अज्झत्थियं जाव जाणित्ता थाहं वियरइ । तए णं से कण्हे वासु-देवे मूहुसंतरं समासासइ २ ता गंगं महाणइं वासिट्ठि जाव उत्तरइ २ ता जेणेव पंच-पंडवा तेणेव उवागच्छइ० पंच पंडवे एवं वयासी-अहो णं तुब्भे देवाणुप्पिया ! महाबलवगा जेहणं तुब्भेहि गंगामहाणइं वासिट्ठि जाव उत्तिणा, इच्छंतएहि णं तुब्भेहि पउमणाहे जाव णो पडिसेहिए । तए णं ते पंच पंडवा कण्हेणं वासुदेवेणं एवं वुत्ता समाणा कण्हं वासुदेवं एवं वयासी-एवं खलु देवा-णुप्पिया ! अहं तुब्भेहि विसज्जिया समाणा जेणेव गंगा महाणइं तेणेव उवा-गच्छामो २ ता एगट्ठियाए मग्गणगवेसणं तं चेव जाव णूमेसो तुब्भे पडिवाले-माणा चिट्ठामो । तए णं से कण्हे वासुदेवे तेसिं पंचण्हं पंडवाणं एयमट्ठं सोच्चा णिसम्म आसुरुत्ते जाव तिवलियं एवं वयासी-अहो णं जया मए लवणसमुहं दुवे जोयणसयसह(स्ता)स्सवित्थिणं वीईवइत्ता पउमणासं हयमहिय

जाव पडित्तेहिता अवरकंका संभग० दोवई साहसिय उवणीया तथा णं-
 तुम्हेहि मम माहप्यं ण विण्णायं इयाणि जाणित्तस्सह-त्तिकट्टु लोहवडं परामुसइ
 पंचहं पंडवारणं रहे चूरेइ २ ता णिव्विसए आणवेइ २ ता तथ णं
 रहमद्वेण णामं कोड्डे णिव्विट्ठे । तए णं से कण्हे वामुदेवे जेणेव सए खंधावारे
 तेणेव उवागच्छइ २ ता सएणं खंधावारेणं सद्धि अभिसमण्णागए यावि होत्था ।
 तए णं से कण्हे वामुदेवे जेणेव बारवई णयरी तेणेव उवागच्छइ २ ता अणु-
 प्विसइ ॥१३१॥ तए णं ते पंच-पंडवा जेणेव हत्थिणाउरे णयरे तेणेव उवा-
 गच्छति २ ता जेणेव पंडू राया तेणेव उवागच्छति २ ता करयल जाव एवं
 वयासी-एवं खलु ताओ ! अम्हे कण्हेणं णिव्विसया आणत्ता । तए णं पंडू-
 राया ते पंच पंडवे एवं वयासी-कहणं पुत्ता ! तुम्हे कण्हेणं वामुदेवेणं णिव्वि-
 सया आणत्ता ? तए णं ते पंच-पंडवा पंडुरायं एवं वयासी-एवं खलु ताओ !
 अम्हे अवरकंकाओ पडिणियत्ता लवणसमुद्धं दोणिण जौघणसयसहस्साइं वीई-
 वइ (ता)त्था । तए णं से कण्हे वामुदेवे अम्हे एवं वयइ-गच्छह णं तुम्हे देवा-
 णुप्पिया ! गंगा महाणइं उत्तरह जाव (चिट्ठह) ताव अहं एवं तहेव जाव
 चिट्ठामो । तए णं से कण्हे वामुदेवे सुट्ठियं लवणाहिवडं दट्ठणं तं चैव सध्वं
 णवरं कण्हस्स चित्ता ण (वुज्झइ) जुज्ज [वूच्च]इ जाव अम्हे णिव्विसए आणवेइ ।
 तए णं से पंडूराया ते पंच-पंडवे एवं वयासी-डुट्ठु णं (तुमं) पुत्ता ! कयं
 कण्हस्स वामुदेवस्स विट्ठियं करेमाणेहि । तए णं से पंडू-राया कोत्ति देव
 सदावेइ सदावेत्ता एवं वयासी-गच्छ णं तुमं देवाणुप्पिया ! बारवइं कण्हस्स
 वामुदेवस्स णिव्वेएहि-एवं खलु देवाणुप्पिया ! तु(मे)म्हे पंच-पंडवा णिव्विसया
 आणत्ता, तुमं च णं देवाणुप्पिया ! दाहिणडुभरहस्स सामी, तं संदिसंतु णं
 देवाणुप्पिया ! ते पंच-पंडवा कयरं विंसि(वेसं) वा विंविंसि वा गच्छंतु ? ।
 तए णं सा कोत्ती पंडुणा एवं वृत्ता समाणी हत्थिखंधं दुरुहइ ० जहा हेट्ठा
 जाव संदिसंतु णं पिउच्छा ! किमागमणपओयणं । तए णं सा कोत्ती कण्हं
 वामुदेवं एवं वयासी-एवं खलु (तुमे) पुत्ता ! पंच-पंडवा णिव्विसया आणत्ता
 तुमं च णं दाहिणडुभरहस्स जाव विंविंसि वा गच्छंतु ? तए णं से कण्हे
 वामुदेवे कोत्ति देवि एवं वयासी-अपूर्ईवयणा णं पिउच्छा ! उत्तमपुरिसा
 वामुदेवा बलदेवा चक्कवट्ठी । तं गच्छंतु णं देवाणु० ॥ पंच-पंडवा दाहिणित्तं
 वेयालि तत्थ पंडुमहुरं णिव्वेसंतु मम अविट्ठवेसगा भवंतु-त्तिकट्टु कोत्ति देवि

सवकारेइ सम्माणेइ जाव पडिविसज्जेइ । तए णं सा कींती देवी जाव पंडुस्स
 एयमट्ठं णिवेएइ । तए णं पंडू राया पंचपंडवे सद्दवेइ २ ता एवं वयासी-
 गच्छह णं तुम्भे पुत्ता ! दाहिणिल्लं वेयात्ति, तत्थ णं तुम्भे पंडुमहुरं णिवेसेह ।
 तए णं ते पंच पंडवा पंडुस्स रण्णो जाव तहत्ति पडिसुणेंति २ ता सबलवाहणा
 ह्यगय० हत्थिणाउराओ पडिणिक्खमंति २ ता जेणेव दक्खिणिल्ले वेयाली
 तेणेव उवागच्छंति २ ता पंडुमहुरं णयरि णिवेसेइ २ ता तत्थ णं ते विपुल-
 भोगसमिइसमण्णागया यावि होत्था ॥१३२॥ तए णं सा दोवई देवी अण्णया
 कयाइ आवण्णसत्ता जाया यावि होत्था । तए णं सा दोवई देवी णवण्हं मासाणं
 जाव सुखं दारणं पयाया सुमालं णिवत्तबारसाहस्स इमं एयाखूं-जम्हा णं
 अम्हं एस दारए पंचण्हं पंडवाणं पुत्ते दोवईए देवीए अत्तए तं होउ अम्हं णं
 इमस्स दारगस्स णामधेज्जं पंडुसेणे । तए णं तस्स दारगस्स अम्मापियरो
 णामधेज्जं करेइ पंडुसेणत्ति । बावत्तारिं कलाओ जाव अलंभोगसमत्थे जाए
 जुवाराया जाव विहरइ । थेरा समोसढा परिसा णिग्गया । पंडवा णिग्गया
 धम्मं सोच्चा एवं वयासी-जं णवरं देवाणुप्पिया ! दोवइं देवि आपुच्छामो
 पंडुसेणं च कुमारं रज्जे ठावेमो तओ पच्छा देवाणुप्पियाणं अतिए मुंडे भवित्ता
 जाव पव्वयाओ । अहामुहं देवाणुप्पिया ! तए णं ते पंच-पंडवा जेणेव सए गिहे
 तेणेव उवागच्छंति २ ता दोवइं देवि सद्दवेति २ ता एवं वयासी-एवं खलु
 देवाणुप्पिए ! अम्हेहि चेरानं अतिए धम्मे णिसंते जाव पव्वयाओ, तुमं णं
 देवाणुप्पिए ! किं करेसि ? तए णं सा दोवई देवी ते पंच-पंडवे एवं वयासी-
 जइ णं तुम्भे देवाणुप्पिया ! संसारभउव्विग्गा जाव पव्वयह मम के अण्णे
 भालंबे वा जाव भविस्सइ ? अहं पि य णं संसारभउव्विग्गा देवाणुप्पिएहि
 सद्धि पव्वइस्सामि । तए णं ते पंच-पंडवा० पंडुसेणस्स अभिसेओ जाव राया
 जाए जाव रज्जं पसाहेमाणे विहरइ । तए णं ते पंच-पंडवा दोवई य देवी
 अण्णया कयाइं पंडुसेणं रायाणं आपुच्छंति । तए णं से पंडुसेणे राया कोडु-
 बियपुरिसे सद्दवेइ २ ता एवं वयासी-खिप्पामेव भो ! देवाणुप्पिया ! णिवल-
 मणाभिसेयं जाव उवट्टवेह पुरिससहस्सवाहिणीओ सिवियाओ उवट्टवेह जाव
 पच्चोरुहंति जेणेव थेरा जाव आलित्ते णं जाव समणा जाया चोहस्स पुव्वाइं
 अहिज्जंति २ ता बहूणि वासाणि छट्टट्टमदसमडुवालसेहि मासद्धमासखमणेहि

अप्याणं भावेमाणा विहरंति ॥१३३॥ तए णं सा दोवई देवी सीयाओ पच्चोसहइ जाव पववइया सुववयाए अज्जाए सिस्सिणीयत्ताए वलयइ एवकारस अंगाइं अहि-
ज्जइ० बहूणि वासाणि छट्टुदुमदत्तमदुवालसेहिं जाव विहरइ ॥१३४॥ तए णं थेरा भगवंतो अण्णया कयाई पंडुमहुराओ णयरीओ सहसंबवणाओ उज्जाणाओ पडि-
णिवखमंति २ ता बहिया जणवयविहारं विहरंति । तेणं कालेणं तेणं समएणं अरहा अरिट्टणेमी जेणेव सुरट्टाजणवए तेणेव उवागच्छइ २ ता सुरट्टाजणवयंसि संजमेणं तवसा अप्याणं भावेमाणे विहरइ । तए णं बहुजणो अणमण्णस्स एव-
माइवखइ ४-एवं खलु देवाणुप्पिया ! अरहा अरिट्टणेमी सुरट्टाजणवए जाव विहरइ । तए णं से (ते) जुहिट्टिल्लपामोवखा पंच अणगारा बहुजणस्स अतिए एयमट्ठं सोच्छा अणमण्णं सद्धान्ते २ ता एवं वयासी-एवं खलु देवाणुप्पिया !
अरहा अरिट्टणेमी पुक्खाणुपुंवि जाव विहरइ, तं सेयं खलु अम्हं थेरा आपुच्छता अरहं अरिट्टणेमि वंदणाए गमित्तए । अणमण्णस्स एयमट्ठं पडिसुणेति २ ता जेणेव थेरा भगवंतो तेणेव उवागच्छंति २ ता थेरे भगवंते वंदंति णमंसंति वं०
२ ता एवं वयासी-इच्छामो णं तुवसेहिं अब्भणुण्णया समाणा अरहं अरिट्ट-
णेमि जाव गमित्तए । अहामुहं देवाणुप्पिया ! तए णं ते जुहिट्टिल्लपामोवखा पंच अणगारा थेरेहिं अब्भणुण्णया समाणा थेरे भगवंते वंदंति णमंसंति वं०
२ ता थेराणं अंतियाओ पडिणिवखमंति २ ता मासंमासेणं अणिविखत्तेणं तवो-
कस्सेणं गामाणुगामं द्दईज्जमाणा जाव जेणेव हत्थकापे णयरे तेणेव उवा-
गच्छंति० हत्थकप्पस्स बहिया सहसंबवणे उज्जाणे जाव विहरंति । तए णं ते जुहिट्टिल्लवज्जा चत्तारि अणगारा मासवखमणपारणए पढमाए पोरिसीए सज्जायं करेति बीयाए एवं जहा गोयमसामी णवरं जुहिट्टिल्लं आपुच्छंति जाव अब्भया बहुजणसहं णिसामेति-एवं खलु देवाणुप्पिया ! अरहा अरिट्टणेमी उज्जितसेलसिहरे मासिएणं भत्तेणं अपाणएणं पंचहिं छत्तीसेहिं अणगारसएहिं सद्धिं कालगए जाव पहीणे । तए णं ते जुहिट्टिल्लवज्जा चत्तारि अणगारा बहुजणस्स अतिए एयमट्ठं सोच्छा हत्थकप्पाओ पडिणिवखमंति २ ता जेणेव सहसंबवणे उज्जाणे जेणेव जुहिट्टिल्ले अणगारे तेणेव उवागच्छंति २ ता भत्तपाणं पच्चुवेकखंति २ ता गमणागमणस्स पडिवकमंति २ ता एसणम-
णसणं आलोएंति २ ता भत्तपाणं पडिदसेंति २ ता एवं वयासी-एवं खलु

देवानुप्पिया ! जाव कालगए । तं सेयं खलु अहं देवानुप्पिया ! इमं पुव्व-
गहियं भत्तपाणं परिट्टवेत्ता सेत्तुंजं पव्वयं सणियं २ दुरुहित्तए संलेहणाए-
इसणासियाणं कालं अणवकंखमाणाणं विहरित्तए—त्तिकट्टु अणमणस्स एय-
मट्ठं पडिसुणेंत्ति २ ता तं पुव्वगहियं भत्तपाणं एगंते परिट्टवेत्ति २ ता जेणेव
सेत्तुंजे पव्वए तेणेव उवागरुच्छति २ ता सेत्तुंजं पव्वयं सणियं २ दुरुहंति ०
जाव कालं अणवकंखमाणा विहरंति । तए णं ते जुह्णित्तल्लपामोक्खा पंच अण-
गारा सामाइयमाइयाइं चोइसपुव्वाइं अहिज्जिता बहूणि वासाणि सामण्य-
परियाणं पाउणित्ता दोमासियाए संलेहणाए अत्ताणं क्षोसित्ता जस्सट्टाए किरइ
णगमावे जाव तमट्टुमारहेंति २ ता अणंते जाव केवलवर-णाणइंसणे समुप्पणे
जाव सिद्धा ॥१३५॥ तए णं सा दोवई अज्जा सुव्वयाणं अज्जियाणं अंतिए
सामाइयमाइयाइं एक्कारस अंगाइं अहिज्जइ २ ता बहूणि वासाणि सा०मासि-
याए संलेहणाए आलोइयपडिक्कंता कालमासे कालं किच्चा बंभलोए उववणा ।
तत्थ णं अत्थेगइयाणं देवाणं दस सागरोवमाइं ठिई पणत्ता । तत्थ णं दुवइ-
(य)स्स [वि] देवस्स दस-सागरोवमाइं ठिई पणत्ता । से णं भंते ! दुवए देवे
तओ जाव महाविदेहे वासे जाव अंतं काहिइ । एवं खलु जंबू ! समणेणं
भगवया महावीरेण जाव संपत्तेणं सोलसमस्स णायज्झयणस्स अयमट्ठे पणत्ते
त्तिबेमि ॥१३६॥ गाहाउ—सुबहुं पि तवकिलेसो णियाणदोसेण दूसिओ संतो ।
ण सिवाय दोवईए जह किल सुकुमालियाज्जमे ॥१॥ अमणुणममत्तीए पत्ते
दाणं मवे अणत्थाय । जह कडुयतुंबदाणं णांगसिरिभवमि दोवईए ॥२॥

॥ सोलसमं अज्झयणं समत्तं ॥

आइण्णे णामं सत्तरसमं अज्झयणं

जइ णं भंते ! समणेणं० सोलसमस्स णायज्झयणस्स अयमट्ठे पणत्ते सत्तर-
समस्स ० णायज्झयणस्स के अट्ठे पणत्ते ? एवं खलु जंबू ! तेषं कालेणं तेषं
समएणं हत्थिसीसे णामं णयरे होत्था वण्णओ । तत्थ णं कणगकेऊ णामं राया
होत्था वण्णओ । तत्थ णं हत्थिसीसे णयरे बहूवे संजुत्ता-णावावाणिघगा परि-
वसंति अड्ढा जाव बहूजणस्स अपरिभूया यावि होत्था । तए णं तेषं संजुत्ताणा-

वावाणिघमाणं अणया कयाइ एगयओ (सहियाणं) जहा अरहण्यओ (ए) जाव लवणसमुहं अणेगाइं जोयणसयाइं ओगाढा यावि होत्था । तए णं तेसि जाव बहूणि उप्पाइयसयाइं जहा माकदियदारगाणं जाव कालियवाएणं य तत्थ समुत्थिए । तए णं सा णावा तेणं कालियवाएणं आघोलि(घुणि)ज्जमाणी २ संचालिज्जमाणी २ संखोहिज्जमाणी २ तत्थेव परिममइ । तए णं से णिज्जामए णट्टमईए णट्टसुईए णट्टसण्णे मूढदिसाभाए जाए यावि होत्था ण जाणइ कयरं (देसं वा) दिसं वा विदिसं वा पोयवहणे अवहिए—त्तिकट्टु ओहयमणसंकप्पे जाव शिषायइ । तए णं ते बह्वे कुच्छिधारा य कण्णधारा य मदिभ(भ्मे)ल्लगा य संजुत्ताणावावाणिघया य जेणेव से णिज्जामए तेणेव उदामच्छंति २ ता एवं वयासी—किणं तुमं देवाणुप्पिया ! ओहयमणसंकप्पा जाव शिषायसि ? तए णं से णिज्जामए ते बह्वे कुच्छिधारा य ४ एवं वयासी—एवं खलु अहं देवाणुप्पिया ! णट्टमईए जाव अवहिएत्तिकट्टु तओ ओहयमणसंकप्पे जाव शिषायसि । तए णं ते कण्णधारा तस्स णिज्जामयस्संतिए एयमट्ठं सोच्चा णिसम्म भीया० ष्हाया कयवत्तिकम्मा करयल बहूणं इंदाण य खंदाण य जहा मल्लिणाए जाव उवायमाणा २ चिट्ठंति । तए णं से णिज्जामए तओ मुहुत्तंतरस्स लद्धमईए ३ अमूढदिसाभाए जाए यावि होत्था । तए णं से णिज्जामए ते बह्वे कुच्छिधारा य ४ एवं वयासी—एवं खलु अहं देवाणुप्पिया ! लद्धमईए जाव अमूढदिसाभाए जाए । अम्हे णं देवाणुप्पिया ! कालियदीवंतेणं संबूढा । एस णं कालियदीवे आलोक्कइ । तए णं ते कुच्छिधारा य ४ तस्स णिज्जामगरस्स अंतिए एयमट्ठं सोच्चा हट्टुट्ठा पयक्खिणाणुकूलेणं वाएणं जेणेव कालियदीवे तेणेव उवायच्छंति २ ता पोयवहणं लंबंति २ ता एगट्टियारिहं कालियदीवं उत्तरंति । तत्थ णं बह्वे हिरण्णागरे य सुवण्णागरे य रयणागरे य बइरागरे य बह्वे तत्थ आसे पासंति किं ते ? हरिरेणुसोणिसुत्तागा आइण्णवेढो । तए णं ते आसा ते वाणिघए पासंति तेसि गंधं अग्घायंति ० भीया तत्था उच्चिग्गा उच्चिग्गमणा तओ अणेगाइं जोयणाइं उच्चमंति । ते णं तत्थ पउरगोयरा पउरतणपाणिगया णिग्गया णिह्विग्गया सुहंसुहेणं विहरंति । तए णं ते संजुत्ताणावावाणिघया अणमणं एवं वयासी—किणं अम्हे देवाणुप्पिया ! आसेहि ? इमे णं बह्वे हिरण्णागरा य सुवण्णागरा य रयणागरा य बइरागरा य । तं सेयं खलु अम्हं हिरण्णस्स य सुवण्णस्स य

रयणस्स य वइरस्स य पोयवहणं भरित्तए—त्तिकट्टु अण्णमण्णस्स एयमट्ठं पडिसुणेंति २ त्तं हिरण्णस्स य सुवण्णस्स य रयणस्स य वइरस्स य तणस्स य कट्टुस्स य अण्णस्स य पाणियस्स य पोयवहणं भरेंति २ त्ता पयविल्लणाणुकूलेणं चाएणं जेणेव गंभीरपोयवहणपट्टणे तेणेव उवागच्छति २ पोयवहयणं लंबेंति २ त्ता सगडीसागडं सज्जेति २ त्ता तं हिरण्णं जाव वइरं च एगट्ठियाहिं पोयवहणाओ संचारेंति २ त्ता सगडीसागडं संजोईति० जेणेव हत्थिसीसए णयरे तेणेव उवागच्छति २ त्ता हत्थिसीसयस्स णयरस्स ब्रहिया अगगुज्जाणे सत्थणिवेसं करेंति २ त्ता सगडीसागडं मोएति २ त्ता महत्थं जाव पाहुडं गेहूँति २ त्ता हत्थिसीसं च णयरं अणुप्पविसंति २ त्ता जेणेव से कणगकेऊ राया तेणेव उवागच्छति २ त्ता जाव उवणेंति । तए णं से कणगकेऊ तेसि संजुत्ताणावावाणियमाणं तं महत्थं जाव पडिच्छइ २ ते संजुत्ताणावावाणियया एवं वयासी—तुब्भे णं देवाणुप्पिया ! मामागर जाव आहिंडह लवणसमुद्धं च अभिवल्लणं २ पोयवहणेणं ओगाह(हे)ह, तं अत्थियाइं केइ भे कहिंच्चि अच्छेरए दिट्ठुव्वे ? । तए णं ते संजुत्ताणावावाणियया कणगकेऊं एवं वयासी—एवं खलु अम्हे देवाणुप्पिया ! इहेव हत्थिसीसे णयरे परिवसामो तं चैव जाव कालियदीवंतेणं संछूढा । तत्थ णं ब्रह्वे हिरण्णागरा य जाव ब्रह्वे तत्थ आसे कि ते ? हरिरेणु जाव अणेगाइं जोयणाइं उक्कममति । तए णं सामो ! अम्हेहिं कालियदीवे ते आसा अच्छेरए दिट्ठुव्वे । तए णं से कणगकेऊ तेसि संजुत्तमाणं अंतिए एयमट्ठं सोच्चा ते संजुत्तए एवं वयासी—गच्छह णं तुब्भे देवाणुप्पिया ! मम कोडुंबियपुरिसेहिं सद्धि कालियदीवाओ ते आसे आणेह । तए णं ते संजुत्तावाणियया कणगकेऊं एवं वयासी—एवं सामिति कट्टु आणाए विणएणं वयणं पडिसुणेंति । तए णं से कणगकेऊ कोडुंबियपुरिसे सद्दवेइ २ त्ता एवं वयासी—गच्छह णं तुब्भे देवाणुप्पिया ! संजुत्तएहिं (णावावाणियएहिं) सद्धि कालियदीवाओ मम आसे आणेह । तेवि पडिसुणेंति । तए णं ते कोडुंबिय० सगडीसागडं सज्जेति २ त्ता तत्थ णं बहूणं वीणाण य वल्लकीण य भामरीण य कच्छभीण य भंभाण य छम्भामरीण य विचित्तवीणाण य अण्णेसि च बहूणं सोइदियपाउग्गाणं दक्खणं सगडीसागडं भरेंति २ त्ता बहूणं किण्हाण य जाव सुक्किलाण य कट्टुकम्माण य ४ गंथिमाण य ४ जाव संघाइमाण य अण्णेसि च बहूणं चिक्खिदियपाउग्गाणं दक्खणं सगडीसागडं भरेंति २ त्ता

बहूणं कोट्टपुडाण य केयइपुडाण य जाव अण्णेसि च बहूणं घाणिवियपाउग्गाणं
 दब्बाणं सगडीसागडं भरेति २ ता बहुस्स खंडस्स य गुलस्स य सक्कराए य
 मच्छंडियाए य पुप्फुत्तरपउमुत्तर० अण्णेसि च जिदिमदियपाउग्गाणं दब्बाणं
 सगडीसागडं भरेति २ ता अण्णेसि च बहूणं कोयवया(वा)ण य कंत्रलाण य
 पावरणा(वारा)ण य णवत्तयाण य मलयाण य मसूराण य सिलावट्टाण य जाव
 हंसगढसाण य अण्णेसि च फासिदियपाउग्गाणं दब्बाणं जाव भरेति २ ता सगडी-
 सागडं जोएति २ ता जेणेव गंभीरए पोयट्टाणे तेणेव उवागच्छति० सगडी-
 सागडं भोएति २ ता पोयवहणं सज्जेति २ ता तेसि उक्किट्टाणं सद्द-
 फरिसरसरुवगंधाणं कट्टस्स य तणरतं य पाणियस्स य तंदुलाण य समियस्स य
 गोरस्स य जाव अण्णेसि च बहूणं पोयवहणपाउग्गाणं पोयवहणं भरेति २ ता
 दक्खिणाणुकुलेणं वाएणं जेणेव कालियदीवे तेणेव उवागच्छति २ ता पोयवहणं
 लंबेति २ ता ताइ उक्किट्टाणं सद्दफरिसरसरुवगंधाणं एगट्टियाहिं कालियदीवं
 उत्तारेति २ ता जहिं जहिं च णं ते आसा आसयंति वा सयंति वा चिट्ठंति
 वा तुयट्ठंति वा तहिं २ च णं ते कोडुंबियपुरिसा ताओ वीणाओ य जाव विचित्त-
 वीणाओ य अण्णाणि बहूणि सोइंदियपाउग्गाणि य दब्बाणि समुद्दी(दी)रेमाणा
 चिट्ठंति तेसि च परिपेरंतेणं पासए ठवेति० णिच्चला णिष्फंदा तुसिणीया चिट्-
 ठंति । जत्थ जत्थ ते आसा आसयंति वा जाव तुयट्ठंति तत्थ २ णं ते कोडुंबिया
 बहूणि किष्हाणि य ५ कट्टकम्माणि य जाव संघाइमाणि य अण्णाणि य बहूणि
 चक्खिदियपाउग्गाणि य दब्बाणि ठवेति तेसि परिपेरंतेणं पासए ठवेति २ ता
 णिच्चला णिष्फंदा तुसिणीया चिट्ठंति । जत्थ २ ते आसा आसयंति ४ तत्थ
 तत्थ णं ते कोडुंबियपुरिसा तेसि बहूणं कोट्टपुडाण य अण्णेसि च घाणिवियपाउ-
 ग्गाणं दब्बाणं पुंजे य णियरे य करेति २ ता तेसि परिपेरंते जाव चिट्ठंति ।
 जत्थ णं ते आसा आसयंति ४ तत्थ-तत्थ गुलस्स जाव अण्णेसि च बहूणं
 जिदिमदियपाउग्गाणं दब्बाणं पुंजे य णियरे य करेति २ ता वियरए षणंति
 २ ता गुलपाणगस्स खंडपाणगस्स पोरपाणगस्स अण्णेसि च बहूणं-पाणगणं
 वियर भरेति २ ता तेसि परिपेरंतेणं पासए ठवेति जाव चिट्ठंति । जहिं जहिं
 च णं ते आसा आस० तहिं तहिं च णं ते बहुवे कोयवया जाव सिलावट्टाणा
 अण्णाणि य फासिदियपाउग्गाणं अत्ययपचत्थुयाइं ठवेति २ ता तेसि

परिपेरतेणं जाव चिट्ठंति । तए णं ते आसा जेणेव ते उक्किट्ठा सट्ठफरिस-
 रसरुवगंधा तेणेव उवागच्छंति० । तस्य णं अत्थेयइया आसा अपुक्खा णं इमे
 सट्ठफरिसरसरुवगंधा तिकट्ठु तेसु उक्किट्ठेसु सट्ठफरिसरसरुवगंधेसु अमू-
 च्छिवा ४ तेषि उक्किट्ठाणं सट्ठ जाव गंधाणं धूरधूरेणं अवक्कमंति ते णं तस्य
 पडरगोदरा पडरतणधाणिधा णिठभया णिरुविग्गाः सुहमुहेणं विहरंति । एवामेव
 समणाउसो ! जो अम्मं णिग्गंथो वा णिरगंथो वा सट्ठफरिसरसरुवगंधा णो सज्जइ
 से णं इहलोए च्चैव बहू णं समणाणं ४ अच्चणियजे जाव बीईवइस्सइ ॥ १३७ ॥
 तस्य णं अत्थेयइया आसा जेणेव उक्किट्ठा सट्ठफरिसरसरुवगंधा तेणेव उवा-
 गच्छंति २ ता तेसु उक्किट्ठेसु सट्ठेसु ५ मुच्छिवा जाव अवज्जोववण्णा
 भासेविडं पयसा पावि होत्था । तए णं ते आसा ते उक्किट्ठे सट्ठे ५
 भासेवभाणा तेहि बहूहि कूडेहि य पासेहि य गलएसु य पाएसु य वज्जंति ।
 तए णं ते फोडुंबिया ते आसे णिण्हंति २ ता एगट्ठियाहि पोयवहणे
 संचारंति २ ता तणस्स कट्ठस्स जाव भरंति । तए णं ते संजुत्ता (णावा-
 वाणियगा) दविज्जणाणुकूलेणं चाएणं जेणेव गंभीरपोयपट्टणे तेणेव उवा-
 गच्छंति २ ता पोयवहणं संबंति २ ता ते आसे उत्तारंति २ ता जेणेव
 हत्थिसीसे णयरे जेणेव कणगकेऊ राया तेणेव उवागच्छंति २ ता करवल
 जाव शट्ठारंति० ते आसे उवणंति । तए णं से कणगकेऊ राया तेषि संजुत्ता-
 वाणियगाणं उस्सुक्कं विप्ररइ २ ता सवकारेइ सम्माणेइ स० २ ता पडि-
 विसज्जेइ । तए णं से कणगकेऊ राया फोडुंबियपुरिसे सहावेइ २ ता सवकारेइ
 सम्माणेइ स० २ ता पडिविसज्जेइ । तए णं से कणगकेऊ राया आसमट्ठए
 सहावेइ २ ता एवं बयासी-तुग्गंभे णं देवाणुप्पिया ! मम आसे विणएह । तए
 णं ते आसमट्ठगा तहत्ति पडिसुणंति २ ता ते आसे बहूहि मुहबंधेहि य कण-
 बंधेहि य णासबंधेहि य चालबंधेहि य खुरबंधेहि य कडगबंधेहि य खल्लिण-
 बंधेहि य अहिल्लणणबंधेहि य पडियाणेहि य अंकणाहि य (वेल्पहारेहि य)
 वित्तप्पहारेहि य लयप्पहारेहि य कसप्पहारेहि य छिवप्पहारेहि य विणयंति०
 कणगकेऊस्स रणो उवणंति । तए णं से कणगकेऊ ते आसमट्ठए सवकारेइ
 २ पडिविसज्जेइ । तए णं ते आसा बहूहि मुहबंधेहि य जाव छिवप्पहारेहि य
 बहूणि सारीरभाणसाइं दुक्खाइं पावेंति । एवामेव समणाउसो ! जो अम्मं णिग्गंथो

वा णिग्गंथी वा पञ्चइए समाणे इदंठेसु सद्धपरिसारसकूवग्धेसु सज्जइ
 रज्जइ गिज्जइ मुज्जइ अज्जोववज्जइ से णं इहलोए चेव बहूणं समणाणं
 जाव साविषाण य हीलणिज्जे जाव अणुपरियट्टिस्सइ । गाहा-कलरिभिय-
 महुरंततीतलतालवंसकउहाभिरानेसु । सद्धेसु रज्जमाणा रमंति सोइदियवसट्टा
 ॥ १ ॥ सोइदियदुइंतत्तणस्स अह एत्तिओ हवइ दोसी । दीविगहयमसहंती
 वहुब्रंधं तित्तिरो पत्तो ॥ २ ॥ अणजहणवयणकरचरण-णयणगविषय-
 विलासियग्गईसु । रुवेसु रज्जमाणा रमंति चदिखदियवसट्टा ॥ ३ ॥
 चदिखदियदुइंतत्तणस्स अह एत्तिओ हवइ दोसी । जं जलणंमि जलंते पउड
 पयंगो अवुत्तीओ ॥ ४ ॥ अगखवरपवरधूवणउउयमल्लाणुलेवणविहीसु । गंधेसु
 रज्जमाणा रमंति घाणियवसट्टा ॥ ५ ॥ घाणियदियदुइंतत्तणस्स अह एत्तिओ
 हवइ दोसी । जं ओसहिग्गंधेणं विलाओ गिद्धावई उरगो ॥ ६ ॥ तित्तकडुयं
 कसायं महुरं बहुखज्जपेज्जलेज्जेसु । आसायमि उ गिद्धा रमंति जिडिम-
 दियवसट्टा ॥ ७ ॥ जिडिमदियदुइंतत्तणस्स अह एत्तिओ हवइ दोसी । जं
 गल्लगभुविद्धत्तो फुरइ थलविरेल्लिओ मच्छो ॥ ८ ॥ उउमयमाणसुहेसु य
 सविमवहिययमणणिव्वुइकरेसु । फासेसु रज्जमाणा रमंति फासियवसट्टा
 ॥ ९ ॥ फासियदियदुइंतत्तणस्स अह एत्तिओ हवइ दोसी । जं खणइ मत्थयं
 कुंजरस्स लोहंकुसो तिक्खो ॥ १० ॥ कलरिभियमहुरंततीतलतालवंसकउहा-
 भिरानेसु । सद्धेसु जे ण गिद्धा वसट्टगरणं ण ते मरए ॥ ११ ॥ अणजहणवयण-
 करचरणयणगविषयविलासियग्गईसु । रुवेसु जे ण रत्ता वसट्टमरणं ण
 ते मरए ॥ १२ ॥ अगखवरपवरधूवणउउयमल्लाणुलेवणविहीसु । गंधेसु जे ण
 गिद्धा वसट्टगरणं ण ते मरए ॥ १३ ॥ तित्तकडुयं कसायं महुरं बहुखज्जपेज्ज-
 लेज्जेसु । आसायमि ण गिद्धा वसट्टमरणं ण ते मरए ॥ १४ ॥ उउमय-
 माणसुहेसु य सविमवहिययमणणिव्वुइकरेसु । फासेसु जे ण गिद्धा वसट्टमरणं
 ण ते मरए ॥ १५ ॥ सद्धेसु य भद्दयपावएसु सोयविसयं उवगएसु । तुदंठेण व
 रुदंठेण व समणेण सया ण होयव्वं ॥ १६ ॥ रुवेसु य भद्दयपावएसु च्चख-
 विसयं उवगएसु । तुदंठेण व रुदंठेण व समणेण सया ण होयव्वं ॥ १७ ॥
 गंधेसु य भद्दयपावएसु घाणविसयमुवगएसु । तुदंठेण व रुदंठेण व सम-
 णेण सया ण होयव्वं ॥ १८ ॥ रसेसु य भद्दयपावएसु जिडिमविसयमुवगएसु ।

तुट्ठेण व रुट्ठेण व समणेण सया ण होयव्वं ॥ १६ ॥ फासेसु य भद्दयपाव-
 एसु कायविसयमुव्वगएसु । तुट्ठेण व रुट्ठेण व समणेण सया ण होयव्वं
 ॥ २० ॥ एवं खलु जंबू ! समणेणं भगवथा महावीरेणं जाव संपत्तेणं
 सत्तरसंमस्स णायज्झयणस्स अयमदुट्ठे पण्णत्ते त्तिबेमि ॥ १३८ ॥ गाहाओ—
 जह सो कालियदीवो अणुवमसोवखो तहेव जइधम्मो । जह आसा तह साह
 वणियव्वणुकूलकारिज्जणा ॥ १ ॥ जह सद्दाइअगिद्धा पत्ता णो पासबंधणं
 आसा । तह विसएसु अगिद्धा बज्जति ण कम्मणा साहू ॥ २ ॥ जह सच्छंद-
 विहारो आसाणं तह य इह वरमुणीणं । जरमरणाइं विवज्जिय संपत्ताणंद-
 णिव्वाणं ॥ ३ ॥ जह सद्दाइसु गिद्धा बद्धा आसा तहेव विसयरया । पावेंति
 कम्मबंधं परमासुहकारणं घोरं ॥ ४ ॥ जह ते कालियदीवा णीया अण्णत्थ
 दुहगणं पत्ता । तह धम्मपरिव्वभट्ठा अधम्मपत्ता इहं जीवा ॥ ५ ॥ पावेंति कम्म-
 णरवइवसया संसारवाह्यालीए । आसप्पमद्दएहि व णेरइयाइहि दुक्खाइं ॥ ६ ॥

॥ सत्तरसमं अज्झयणं समत्तं ॥

सुसमा णामं अट्ठारसमं अज्झयणं

जइ णं भंते ! समणेणं० सत्तरसमस्स (णायज्झयणस्स) अयमदुट्ठे
 पण्णत्ते अट्ठारसमस्स के अट्ठे पण्णत्ते ? एवं खलु जंबू ! तेणं कालेणं
 तेणं समएणं रायगिहे णामं णयरे होत्था वण्णओ । तत्थ णं धण्णे णामं
 सत्थवाहे भद्दा भारिया । तस्स णं धण्णस्स सत्थवाहस्स पुत्ता भद्दाए अत्तया पंच
 सत्थवाह्वारगा होत्था तंजहा—धणे धणपाले धणदेवे धणगावे धणरक्खिए ।
 तस्स णं धण्णस्स सत्थवाहस्स धूया भद्दाए अत्तया पंचण्हं पुत्ताणं अणुमगजा-
 इया सुसुमा णामं दारिया होत्था सुमालवाणिवाया । तस्स णं धण्णस्स
 सत्थवाहस्स च्छिए णामं दासच्चेडे होत्था अहीणपंचिदियसरीरे मंसोवचिए
 बालकीलावणकुसले यावि होत्था । तए णं से दासच्चेडे सुसुमाए दारियाए
 बालगाहे जाए यावि होत्था सुसुमं दारियं कडोए गिण्हइ २ ता बह्हि दार-
 एहि य दारियाहि य डिमएहि य डिभिवाहि य कुमारएहि य कुमारियाहि य
 सद्धि अभिरममाणे २ विहरइ । तए णं से च्छिए दासच्चेडे तेसि बहुणं दार-

याण य ६ अप्पेगइयाणं खुल्लए अवहरइ एवं वट्टए आडोलियाओ तिव्वुमए
 पोत्तुल्लए साडोल्लए, अप्पेगइयाणं आमरणमल्लालंकारं अवहरइ अप्पेगइए
 आउसइ एवं अवहसइ पिच्छोडेइ पिच्चमच्छेइ तज्जेइ अप्पेगइए तालेइ ।
 तए णं ते बह्वे दारगा य ६ रोयमाणा य ५ साणं साणं अम्मापिऊणं णिवेदेति ।
 तए णं तेसि बहूणं दारगाण य ६ अम्मापियरो जेणेव धणो सत्थवाहे तेणेव
 उवागच्छंति २ ता धणो सत्थवाहं बहूहिं खिज्जणिमाहि य हंटाणाहि य उवाल-
 भणाहि य खिज्जमाणा य हंटाणा य उवालभेमाणा य धणसस स० एयमट्ठं
 णिवेदेति । तए णं से धणो सत्थवाहे चिलायं दासचेडे एयमट्ठं भुज्जो-भुज्जो
 णिवारेइ णो चेव णं चिलाए दासचेडे उवरमइ । तए णं से चिलाए दासचेडे तेति
 बहूणं दारगाण य ६ अप्पेगइयाणं खुल्लए अवहरइ जाव तालेइ । तए णं ते बह्वे
 दारगा य ६ रोयमाणा य जाव अम्मापिऊणं णिवेदेति । तए णं ते आसुरुत्ता ५
 जेणेव धणो सत्थवाहे तेणेव उवागच्छंति २ ता बहूहिं खिज्जणाहि य जाव एय-
 मट्ठं णिवेदेति । तए णं से धणो २ बहूणं दारगाणं ६ अम्मापिऊणं अंतिए एयमट्ठं
 सोच्छा आसुरुत्ते चिलायं दासचेडे उच्चावयाहि आउसणाहि आउसइ उट्ठंइ
 पिच्चमच्छेइ पिच्छोडेइ तज्जेइ उच्चावयाहि तालणाहि तालेइ साओ गिहाओ
 पिच्छुभइ ॥ १३६ ॥ तए णं से चित्ताए दासचेडे साओ गिहाओ पिच्छूडे समाणे
 रायणिहे णयेरे तिघाडग जाव पहेसु देवकुलेसु य सभामु य पदामु य जूगल-
 एसु य केसाघरएसु य पागघरएसु य सुहंसुहेणं परिवहइ । तए णं से चिलाए
 दासचेडे धणोहट्टिए अणिवारिए सच्छंदायई सडरणयारी गज्जप्पसंगी चोच्च-
 प्संगी (संस०) जूयप्पसंगी वेसप्पसंगी परदारप्पसंगी जाए यावि होत्था ।
 तए णं रायगिहसस णयरसस अदूरसामंते दाहिणपुरत्थिमे विसीभाए सीहुगुहा
 णामं चोरपत्ती होत्था विसमगिरिकडगको (डं) लंअसणिविट्ठा वंसो कलंअपागार-
 परिदिखत्ता उिण्णमेलविसमप्पवायफरिहोवगूढा एगदुवारा अण्णेगळंडी विदित-
 लण-णिगममप्वेसा अट्ठमत्तरपाणिया सुसुल्लज्जलपेरंता सुअहुसस्वि कूटिय-
 बलसस आगयसस दुपहंभा यावि होत्था । तत्थ णं सीहुगुहाए चोरपत्तीए
 विजए णामं चोरणेणावई परिवसइ अहम्मिए जाव अहम्मकेउ समुट्टिए बह-
 णभर-णिगयजसे सूरु देहप्पहारो साहसीए सद्देही । से णं तत्थ- सीहुगुहाए
 चोरपत्तीए पंचहं चोरसयाणं आहेवच्चं जाव विहरइ । तए णं से विजए

तक्करे (चोर) सेणावई बहूणं चोराण य पारदारियाण य गंठिभेयगाण य
संधिच्छेयगाण य खत्तखणगाण य रायात्रमारीण य अणधारगाण य बालघाय-
गाण य वीरंसवायगाण य जूयकाराण य खंडरवलाण य अग्गोसि च बहूणं
द्विष्णभिष्णवाहिराहयाणं कुडंगे यावि होत्था । तए णं से विजए (तक्करे) चोर-
सेणावई रायगिहस्स दाहिनपुरत्थिमं जणवयं बहूहिं गामघाएहि य नगरघाएहि
य गोमहणेहि य बंदिगहणेहि य पंधकुट्टणेहि य खत्तखणणेहि य उवीलेमाणे २
विद्धसेमाणे २ णित्थाणं णिद्धणं करमाणे विहरइ । तए णं से चिलाए दासचेडे
रायगिहे णयरे बहूहिं अत्थाभिसंकीहि य चोउआभिसंकीहि य दाराभिसंकीहि
य धणिएहि य जूइकरेहि य परवभवमाणे २ रायगिहाओ नगरीओ णिरगच्छइ
२ ता जेणव सीहगुहा चोरपल्ली तेणेव उवागच्छइ २ ता विजयं चोरसेणावइं
उवसंपज्जित्ताणं विहरइ । तए णं से चिलाए दासचेडे विजयस्स चोरसेणावइस्स
अग्गे असिलट्टिग्गाहे जाए यावि होत्था । जाहे वि य णं से विजए चोरसेणावई
गरमघायं वा जाव पंधकोट्टि वा काउं वचचइ ताहे वि य णं से चिलाए दास-
चेडे सुबहुपि (हु) क्वियबलं ह्यमहिय जाव पडिसेहेइ [२] पुणरवि लद्धट्ठे
कयकज्जे अणहसमग्गे सीहगुहं चोरपल्लि हव्वमागच्छइ । तए णं से विजए
चोरसेणावई चिलायं तक्करं बहूओ चोरविज्जाओ य चोरमते य चोरमा-
याओ य चोरणिगडीओ य सिक्खावेइ । तए णं से विजए चोरसेणावई अण्णया
कयाइं कालधम्मणा संजुत्ते यावि होत्था । तए णं ताइं पंच-चोरसयाइं विजयस्स
चोरसेणावइस्स महया २ इड्ढीसक्कारसमुदएणं णीहरणं करेति ता २ वहूइं
लोइयाइं मयकिच्चाइं करेति २ ता जाव विगयसीया जाया यावि होत्था ।
तए णं ताइं पंचचोरसयाइं अण्णमण्णं सहावेति २ ता एवं वयासी-एवं खलु
अम्हं देवाणुप्पिया ! विजए चोरसेणावई कालधम्मणा संजुत्ते । अयं च णं
चिलाए तक्करे विजएणं चोरसेणावइणा बहूओ चोरविज्जाओ य जाव सिक्खा-
विए । तं सेयं खलु अम्हं देवाणुप्पिया ! चिलायं तक्करं सीहगुहाए चोरपल्लीए
चोरसेणावइत्ताए अभिसिच्चित्तए-त्तिकट्टु अण्णमण्णस्स एप्रमट्ठं पडिमुणेति
२ ता चिलायं (तीए) सीहगुहाए [चोरपल्लीए] चोरसेणावइत्ताए अभि-
सिच्चित्ति । तए णं से चिलाए चोरसेणावई जाए अहम्मिए जाव विहरइ । तए
णं से चिलाए चोरसेणावई चोरणायगे जाव कुडंगे यावि होत्था । से णं तत्थ
सीहगुहाए चोरपल्लीए पंचण्हं चोरसयाण य एवं जहा विज्जाओ तहेव सध्वं जाव

रायगिहस्स णयरस्स दाहिणपुरत्थिमिल्लं जणवयं जाव जित्थाणं जिद्धणं करेमाणे
 विहरइ ॥१४०॥ तए णं से चिलाए चोरतेणावई अणया कयाइ विपुलं असणं ४
 उववखडावेत्ता ते पंच चोरसए आमंतेइ तओ पच्छा ण्हाए कयवत्तिकम्मे भोयण-
 मंडवंसि तेहि पंचहि चोरसएहि सद्धि विपुलं असणं ४ सुरं च जाव पत्तणं
 च आसाएमाणे ४ विहरइ जिमिपभुत्तत्तरागए ते पंच चोरसए दिपुलेणं
 धूवपुफगंधमल्लालंकारेणं सयकारेइ सम्माणेइ स० २ ता एवं वयासी-एयं खलु
 देवाणुप्पिया ! रायगिहे णयेरे धण्णे णायं सत्थवाहे अड्डे तस्स णं धूया मद्दाए
 अत्तया पंचण्हं पुत्ताणं अणुप्पयाइया सुंनुमा णामं दारिया (यावि) होत्था अहीणा
 जाव सुद्धया, तं गच्छामो णं देवाणुप्पिया ! धण्णस्स सत्थवाहस्स गिहं विन्-
 पामो, तुद्धं विपुले धणकणग जाव खिलप्पवाले ममं सुंनुमा दारिया । ताए णं
 ते पंच चोरसया विज्जायस्स० पडिमुणेति । तए णं से चिलाए चोरतेणावई
 तेहि पंचहि चोरसएहि सद्धि अल्लच्चम्मं दुक्कइ २ पच्छावरण्हकात्तमयंनि
 पंचहि चोरसएहि सद्धि सण्णद्ध जाव गहियाउहपहरणा माइययोमूहिएहि फल-
 एहि णि (क) विकट्टाहि असिलट्ठीहि अंगएहि तोणेहि सज्जीवेहि धूयहि सम-
 विखत्तेहि सरेहि समुल्लालियाहि वीहाहि ओसारियाहि उरुघट्टियाहि छिण-
 तूरेहि वज्जमाणेहि महया २ उक्किट्टसीहणाव (चोरकलकलरवं) जाव समूह-
 वभूयं (पिव) करेमाणा सीहगुहाओ चोरपल्लीओ पडिणिक्खमंति २ ता जेणेव
 रायगिहे णयेरे तेणेव उवागच्छति २ ता रायगिहस्स अदूरसामंते एग म्हे गहणं
 अणुप्पविसंति २ ता दिवसं खवेमाणा चिट्ठंति । तए णं से चिलाए चोरतेणा-
 वई अदूरसकालत्तमयंति विसंतपडिणिसंतंति पंचहि चोरसएहि सद्धि माइ-
 योमूहिएहि फलएहि जाव मूइयार्हि उरुघट्टियाहि जेणेव रायगिहे णयेरे पुर-
 त्थिमिल्ले दुवारे तेणेव उवागच्छइ० उदगवत्थि परामुसइ आयत्ते चोत्तवे
 परममुइभूए तालुग्याडगिज्जं आवाहेइ २ ता रायगिहस्स दुवारत्तवाडे
 उदएणं अच्छोडेइ २ ता कवाडं विहाडेइ २ ता रायगिहं अणुप्पविसइ २ ता
 महया २ सद्देणं उगघोसेमाणे २ एवं वयासी-एयं खलु अहं देवाणुप्पिया !
 चिलाए णायं चोरतेणावई पंचहि चोरसएहि सद्धि सीहगुहाओ चोरपल्लीओ इहं
 हव्वमागए धण्णस्स सत्थवाहस्स गिहं जाउकामे । तं जो णं णवियाए साउवाए
 दुद्धं पाउकामे से णं णियगच्छउत्तिवट्ठु जेणेव धण्णस्स सत्थवाहस्स गिहे तेणेव

उवागच्छइ २त्ता धणस्स गिहं विहाडेइ । तए णं से धण्णे चिलाएणं चोरसेणा-
वइणा पंचाहि चोरसएहि सद्धि गिहं घाइज्जमाणं पासइ २ ता मीए तत्थे ४
पंचाहि पुत्तेहि सद्धि एगंतं अवक्कमइ । तए णं से चिलाए चोरसेणावई धणस्स
सत्थवाहस्स गिहं घाएइ २ ता सुबहुं धणकणग जाव सावएज्जं सुंसुयं च दारियं
गेण्हइ २ ता रायगिहाओ पडिणिवखमइ २ ता जेणेव सीहगुहा तेणेव पहा-
रेत्थ गमणाए ॥ १४१ ॥ तए णं से धण्णे सत्थवाहे जेणेव सए गिहे तेणेव
उवागच्छइ २ ता सुबहुं धणकणगं सुंसुमं च दारियं अवहरियं जानित्ता महत्थं
२ पाहुडं गहाय जेणेव णगरगुत्तिया तेणेव उवागच्छइ २ ता तं महत्थं पाहुडं
जाव उवणे (स्ति)इ २ ता एवं वयासी-एवं खलु देवाणुप्पिया ! चिलाए चोर-
सेणावई सीहगुहाओ चोरपत्तीओ इहं हव्वमागम्म पंचाहि चोरसएहि सद्धि
मम गिहं घाएत्ता सुबहुं धणकणगं सुंसुमं च दारियं गहाय जाव पडिगए, तं
इच्छामि णं देवाणुप्पिया ! सुंसुमाए दारियाए कूवं गमित्तए, तुब्भे णं देवा-
णुप्पिया ! से विपुत्ते धणकणगे ममं सुंसुमा दारिया । तए णं ते णगर-
गुत्तिया धणस्स एयमट्ठं पडिसुणेति २ ता सण्णद्ध जाव गहियाउहवहरणा
महया २ उक्किट्ठ जाव समुद्धरवभूयं पिव करेमाणा रायगिहाओ णिगच्छंति २
ता जेणेव चिलाए चोरे तेणेव उवागच्छंति २ ता चिलाएणं चोरसेणावइणा
सद्धि संपलग्गा यावि होत्था । तए णं ते णगरगुत्तिया चिलायं चोरसेणावइं
हयमहिय जाव पडिसेहेति । तए णं ते पंच-चोरसया णगरगुत्तिएहि हयमहिय
जाव पडिसेहिया समणा तं विपुलं धणकणगं विच्छइडे (ड्ढे) माणा य विप्पकि-
रेमाणा य सव्वओ समंता विप्पलाइत्था । तए णं ते णगरगुत्तिया तं विपुलं
धणकणगं गेण्हंति २ ता जेणेव रायगिहे तेणेव उवागच्छंति । तए णं से चिलाए
तं चोरसेणं तेहि णगरगुत्तिएहि हयमहिय जाव मीए तत्थे सुंसुमं दारियं
गहाय एगं महं अगामियं दीहमट्ठं अडविं अणुप्पविट्ठे । तए णं धण्णे सत्थवाहे
सुंसुमं दारियं चिलाएणं अडवीमु(हि)हं अवहीरमाणि पासित्ताणं पंचाहि
पुत्तेहि सद्धि अप्पच्छट्ठे सण्णद्धवद्धं । चिलायस्स पयमगविहि (अभिगच्छति)
अणुगच्छमाणे अभिग (ज्जेमाणे) ज्जते हव्वकारेमाणे पुवकारेमाणे अभित्त-
ज्जेमाणे अभित्तासेमाणे पिट्ठओ अणुगच्छइ । तए णं से चिलाए तं धणं सत्थ-
वाहं पंचाहि पुत्तेहि (सद्धि) अप्पच्छट्ठं सण्णद्धवद्धं समणुगच्छमाणं पासइ २ ता

अथामे ४ जाहे णो संचाएइ सुंमुमं दारियं णिव्वाहित्तए ताहे संते तंते परितंते णोलुप्पलं अंसि परामुसइ २ ता सुंसुमाए दारियाए उत्तमंगं छिदइ २ ता तं गहाय तं अगामियं अडवीं अणुप्पविट्ठे । तए णं (से) चिलाए तीसे अगामियाए अडवीए तण्हाए (छुहाए) अभिसूए समाणे पम्हु(ह)द्विसाभाए सीहृग्हं चोरपल्लि असंपत्ते अंतरा चैव कालगए । एवामेव समाणाउसो ! जाव पव्वइए समाणे इमस्स ओरालियसरोरस्स वंतासवस्स जाव विद्धंसणघम्मस्स वण्णहेउं जाव आहारं आहारेइ से णं इहलोए चैव वहूणं समाणां ४ हीलणिव्जे जाव अणपरियट्ठिस्सइ जहा वसे चिलाए त्वकरे । तए णं से धण्णे सत्थवाहे पंचहि पुत्तेहि अप्पच्छट्ठे चिलायं [तीसे अगामियाए सच्चओ समंता] परिधाडेमाणे २ (तण्हाए छुहाए यं) संते तंते परितंते णो संचाएइ चिलायं चोर-सेणावइं साहत्थि गिहित्तए । से णं तओ पडिणियत्तइ २ ता जेणेव ता सुंसुमा दारिया चिलाएणं जीविद्याओ ववरोवि(ल्लि) या तेणेव उवागच्छइ २ ता सुंसुमं दारियं चिलाएणं जीविद्याओ ववरोवियं पासइ २ ता परसुणियत्तेव चंपग-पायवे । तए णं से धण्णे सत्थवाहे (पंचहि पु०) अप्पच्छट्ठे आसत्थे कूवमाणे कंव-माणे विलवमाणे महया २ सट्ठेणं कुहुकुहुस्स परुण्णे सुच्चिरं कालं ब्राह्(प्प) मोक्खं करेइ । तए णं से धण्णे सत्थवाहे पंचहि पुत्तेहि अप्पच्छट्ठे चिलायं तीसे अग-नियाए सच्चओ समंता परिधाडेमाणे तण्हाए छुहाए य परवभं (रद्धं) ते समाणे तीसे अगामियाए अडवीए सच्चओ समंता उदगस्स मग्गणगवेसणं करेइ २ ता संते तंते परितंते णिव्विण्णे [समाणे] तीसे अगामियाए (अडवीए) उदगस्स मग्गणगवेसणं करेमाणे णो चैव णं उदगं आसाएइ तए णं) उदगं अणासाए-माणे जेणेव सुंसुमा जीविद्याओ ववरोविद्या तेणेव उवागच्छइ २ ता जेट्ठं पुत्तं धण्णे (स०) सट्ठावेइ २ ता एवं वयासी-एवं खलु पुत्ता ! सुंसुमाए दारियाए अट्ठाए चिलायं त्वकरं सच्चओ समंता परिधाडेमाणा तण्हाए छुहाए य अभि-सूया समाणा इमीसे अगामियाए अडवीए उदगस्स मग्गणगवेसणं करेमाणा णो चैव णं उदगं आसादेमो । तए णं उदगं अणासाएमाणा णो संचाएमो राय-गिहं संपवित्तए । तण्णं तुब्भे भमं देवाणुप्पिया ! जीविद्याओ ववरोवेह [मम] मंसं च साणियं च आहारेह० तेणं आहारेणं अव (हिट्ठा) थट्ठा समाणा तओ पच्छा इमं अगामियं अडवीं गित्थरिहिह रायगिहं च संपाविहह मित्तणाइ० अणि-समागच्छिहिह अत्थस्स य क्षम्मस्स य पुण्णस्स य आभागी भवित्तसह । तए णं

से जेट्ठे पुत्ते धण्णेणं सत्थवाहेणं एवं वृत्ते समाणे धण्णं सत्थवाहं एवं वयासी-
तुब्भे णं ताओ ! अहं पिया गुरुजणया देवयभूया ठावका पइट्ठावका संरक्खगा
संगोवगा । तं कहण्णं अहं ताओ ! तुब्भे जीवियाओ ववरोवेमो तुब्भं णं मंसं
च सोणियं च आहारेमो ? तं तुब्भे णं ताओ ! ममं जीवियाओ ववरोवेह
मंसं च सोणियं च आहारेह अगामियं अड्ढवि णित्थरह तं जेव सव्वं भणइ
जाव अत्थस्स जाव आभागी भविस्सह । तए णं धण्णं सत्थवाहं बोच्चे पुत्ते एवं
वयासी-मा णं ताओ ! अहं जेट्ठं भायरं गुरुदेवयं जीवियाओ ववरोवेमो,
तुब्भे णं ताओ ! ममं जीवियाओ ववरोवेह जाव आभागी भविस्सह । एवं
जाव पंचमे पुत्ते । तए णं से धण्णे सत्थवाहे पंचपुत्ताणं हियइच्छियं जाणित्ता
ते पंच पुत्ते एवं वयासी-मा णं अहं पुत्ता ! एगमवि जीवियाओ ववरोवेमो ।
एस णं सुंमुमाए दारियाए सररीए णिप्पाणे जाव जीविवप्पजडे । तं सेयं खलु
पुत्ता ! अहं सुंमुमाए दारियाए मंसं च सोणियं च आहारेत्तए । तए णं अहं
तेणं आहारेणं अवयद्धा समाणा रायगिहं संपाउणित्तामो । तए णं ते पंच-
पुत्ता धण्णेणं सत्थवाहेणं एवं वृत्ता समाणा एयमट्ठं पडिसुणेंति । तए णं धण्णे
सत्थवाहे पंचाहं पुत्तेहिं सद्धि अरणिं करेइ २ ता सरगं च करेइ २ ता सरएणं
अरणिं महेइ २ ता अग्गि पाडेइ २ ता अग्गि संधुक्खेइ २ ता दाहयाइं
प(रि)क्खेवेइ २ ता अग्गि पज्जालेइ २ ता सुंमुमाए दारियाए मंसं च
सोणियं च आहारेइ । तेणं आहारेणं अवयद्धा समाणा रायगिहं णयरिं संपत्ता
मित्तणाइणियगं अभिसमण्णागया तस्स 'य विउलस्स धणकणगरघण जाव
आभागी जाया (वि होत्था) । तए णं से धण्णे सत्थवाहे सुंमुमाए दारियाए
बहूइं लोइयाइं जाव विगयसोए जाए यावि होत्था ॥ १४२ ॥ तेणं
कालेणं तेणं समएणं समणे भगवं महावीरे गुणसिलए चेइए समोसडे । (से)
तए णं धण्णे सत्थवाहे संपत्ते धम्मं सोच्चा पव्वइए एक्कारसंगवी मासियाए
सलेहणाए सोहम्मे उववण्णो महाविदेहे वासे सिज्झिहिइ । जहा वि य
णं जंबू ! धण्णेणं सत्थवाहेणं णो खण्णहेउं वा णो रुवहेउं वा णो बलहेउं वा
णो विसयहेउं वा सुंमुमाए दारियाए मंससोणिए आहारिए णण्णत्थ एगाए
रायगिहं संपावणट्ठयाए, एवामेव समणउसो ! जो अहं णिग्गंथो वा णिग्गंथो

वा इमस्स ओरालियसरीरस्स वंतासवस्स पित्तासवस्स सुक्कासवस्स सोणिया-
सवस्स जाव अवस्सं त्रिपपजहियव्वस्स णो वण्णहेउं वा णो रूवहेउं वा णो बल-
हेउं वा णो विसयहेउं वा आहारं आहारेइ णण्णत्थ एमाए तिद्धिमगणसंवा-
वणट्ठयाए से णं इह-भवे चेव बहूणं समणानं बहूणं समणीणं बहूणं सावयाणं
बहूणं सावियाणं अरुच्चणिज्जे जाव वीईवइस्सइ । एवं खलु जइ ! समणेणं
भगवया महावीरेणं जाव संपत्तेणं अट्टारसमस्स णायज्झयणस्स अयमट्ठे
पण्णत्ते त्ति वेमि ॥ १४३ ॥ गाहाओ—जह सो चित्ताइपुत्तो सुंमुमगिद्धो
अकज्जपडिबद्धो । धणपारद्धो पत्तो महाडविं वसणसयकलियं ॥ १ ॥ तह जीवो
विसयसुहे लुद्धो काऊण पावकिरियाओ । कम्मवसेणं पावइ भवाडवीए महा-
दुक्खं ॥ २ ॥ धणसेट्ठी—विण गुरुणो पुत्ता इव साह्वो भवो अडवी । सुयमंस-
सिवाहारो रायगिहं इह सिवं णेयं ॥ ३ ॥ जह अडविणयरणित्थरणपावणत्थं
तएहिं सुयमंसं । भुत्तं तहेह साह गुरुण आणाए आहारं ॥ ४ ॥ भवत्तंघणसि-
पावणहेउं भुंजं (भुज्ज) ति ण उण गेहीए । वण्णबलरूवहेउं च भावियप्पा
महासत्ता ॥ ५ ॥ अट्टारसमं अज्झयणं सभत्तं ॥

पुंडरीए णामं एगूणवीसइमं अज्झयणं

जइ णं भंते ! समणेणं० अट्टारसमस्स णायज्झयणस्स अयमट्ठे पण्णत्ते एगूणवीस-
इमस्स (०) के अट्ठे पण्णत्ते ? एवं खलु जइ ! तेणं कालेणं तेणं समएणं इहेव जंबूद्वीवे
दीवे पुव्वविदेहे सीयाए महाणईए उत्तरिल्ले कूले णीलवंतस्स दाहिणेणं उत्त-
रिल्लस्स सीयामुहवणसंडस्स पच्चत्थिमेणं एगसेलगस्स वक्खारपव्वयस्स पुर-
त्थिमेणं एत्थ णं पुक्खलावई णामं विजए पण्णत्ते । तत्थ णं पुंडरिगिणी णामं
रायहाणी पण्णत्ता णव जोयणवित्थिणा दुवात्तसजोयणायासा जाव पच्चवक्खं
देवलोयभूया पासार्इया दरिसणीया अमिरूवा पडिरूवा । तीसे णं पुंडरिगिणीए
णयरीए उत्तरपुरत्थिमे दिसोसाए णलिणित्थे णामं उज्झाणे होत्था वण्णओ ।
तत्थ णं पुंडरिगिणीए रायहाणीए महापउमे णामं राया होत्था । तस्स णं
पउमावई णामं देवी होत्था । तस्स णं महापउमस्स रण्णो पुत्ता पउमावईए
देवीए अत्तया दुवे कुमारा होत्था तं जहा—पुंडरीए य कंडरीए य सुकुमालपाणि-

पाया । पुंडरीए ज्वराया । तेणं कालेणं तेणं समएणं थेरागमणं महापउमे
 राया णिग्गए, धम्मं सोच्चा पुंडरीयं रज्जे ठवेत्ता पव्वइए पुंडरीए राया
 जाए कंडरीए ज्वराया । महापउमे अणगारे चोद्दमपुव्वाइं अहिज्जइ, तए
 णं थेरा बहिया जणवयविहारं विहरंति । तए णं से महापउमे बहूणि
 वासाणि जाव सिद्धे ॥ १४४ ॥ तए णं थेरा अणया कयाइ पुणरवि
 पुंडरिगिणीए रायहाणीए णलिणवणे उज्जाणे समोसद्धा । पुंडरीए राया
 णिग्गए । कंडरीए महाजणसहं सोच्चा जहा महव्वलो जाव पज्जुवासइ ।
 थेरा धम्मं परिकहेति पुंडरीए समणोवासए जाए जाव पडिगए । तए णं
 कंडरीए उट्ठाए उट्ठेइ २ ता जाव से जहेयं तुम्भे वयह जं णवरं पुंडरीयं
 रायं आपुच्छामि तए णं जाव पव्वयामि । अहामुहं देवाणुप्पिया ! तए णं से
 कंडरीए जाव थेरे बंदइ णमंसइ वं० २ ता [थेराण] अतियाओ पडिणिवख-
 मइ २ ता तमेव चाउघटं आसरहं बुरुहइ जाव पच्चोरुहइ जेणेव पुंडरीए राया
 तेणेव उवागच्छइ २ ता करयल जाव पुंडरीयं एवं वयासी-एवं खलु देवा०!
 मए थेराणं अंतिए (जाव) धम्मे णिसते से धम्मे अभिरुइए । तए णं
 देवा०! जाव पव्वइत्तए । तए णं से पुंडरीए कंडरीयं एवं वयासी-मा
 णं तुमं भाउ (देवाणुप्पि)या । इयाणि मुंडे जाव पव्वयाहि, अहं णं तुमं
 महारायाभिसेएणं अभिसिचामि । तए णं से कंडरीए पुंडरीयस्स रण्णो
 एयमट्ठं णो आडाइ जाव तुसिणीए संचिट्ठइ । तए णं पुंडरीए राया
 कंडरीयं दोच्चपि तच्चपि एवं वयासी जाव तुसिणीए संचिट्ठइ । तए णं
 पुंडरीए कंडरीयं कुमारं जाहे णो संचाएइ बहूहि आघवणाहि य पण-
 वणाहि य ४ ताहे अकामए चेव एयमट्ठं अणमणित्था जाव णिवख-
 मणाभिसेएणं अभिसिचइ जाव थेराणं सीएणिवलं दलयइ पव्वइए अण-
 गारे जाए एक्कारसंगवी । तए णं थेरा भगवंती अणया कयाइ पुंडरी-
 गिणीओ णयरीओ णलिणवणाओ उज्जाणाओ पडिणिवखमंति २
 ता बहिया जणवयविहारं विहरंति ॥ १४५ ॥ तए णं तस्स कंडरीयस्स
 अणगरस्स तेहि अंतेहि य पंतेहि य जहा सेलगस्स जाव दाहववकंतीए यावि
 विहरइ । तए णं थेरा अणया कयाइ जेणेव पुंडरीगिणी तेणेव
 उवागच्छंति २ ता णलिणवणे समोसद्धा । पुंडरीए णिग्गए धम्मं

मुणेइ । तए णं पुंडरीए राया धम्मं सोच्छा जेणेव कंडरीए अणगारे तेणेव उवा-
गच्छइ २ ता कंडरीयं वंदइ णमंसइ वं० २ ता कंडरीयस्स अणगारस्स
सरीरमं सव्वावाहं सरीरं पासइ २ ता जेणेव थेरा भगवंतो तेणेव उवागच्छइ २
ता थेरे भगवंते वंदइ णमंसइ वं० २ ता एवं वयासी-अहणं भंते ! कंडरीयस्स
अणगारस्स अहापवत्तेहिं ओमहभेसज्जेहिं जाव तिगिच्छं आ (उट्टा) उंटामि,
तं तुम्भे णं भंते ! मम जाणयालामु समोसरह । तए णं थेरा भगवंतो पुंड-
रीयस्स पडिमुणेति जाव उवसंपज्जिताणं विहरति । तए णं पुंडरीए राया
जहा मंडूए सेलगस्स जाव बलियसरीरे जाए । तए णं थेरा भगवंतो पुंडरीयं
रायं आपुच्छति २ ता बहिया जणवयविहारं विहरति । तए णं से कंडरीए
ताओ रोयायंकाओ विप्पमवके समणे तंति मणुणंसि असणपाणखाडमसाइ-
मंसि मुच्छिए गिद्धे गट्टिए अज्झोववणे णो संचाएइ पुंडरीयं आपुच्छिता
बहिया अड्ढुजएणं जणवयविहारं विहरित्तए तत्थेव अंसणे जाए । तए णं
से पुंडरीए इमीमे कहाए लद्धट्ठे समणे ण्हाए अंतेउरपरियालसंपरिवुडे जेणेव
कंडरीए अणगारे तेणेव उवागच्छइ २ ता कंडरीयं तिवखुत्तो आयाहिणं
पयाहिणं करेइ २ ता वंदइ णमंसइ वं० २ ता एवं वयासी-धणुणंसि ! णं
तुमं देवाणुप्पिया ! कयत्थे कयपुण्णे कयलववणे, सुलद्धे णं देवाणुप्पिया !
तव माणुस्सए जम्मजीवियफले जे णं तुमं रज्जं च जाव अंतेउरं च (वि)छ-
(डुड)डुत्ता विगोवइत्ता जाव पव्वइए, अहणं अहण्णे अपुण्णे अकयपुण्णे
रज्जे य जाव अंतउरे य माणुस्सएसु य कामभोगेसु मुच्छिए जाव अज्झोवव-
णे णो संचाएमि जाव पव्वइत्तए, तं धणुणंसि णं तुमं देवाणुप्पिया ! जाव
जीवियफले ; तए णं से कंडरीए अणगारे पुंडरीयस्स एयमट्ठं णो आढाइ
जाव संचिट्ठइ । तए णं से कंडरीए पोंडरीएणं दोचचंपि तच्चंपि एवं वृत्ते
समाणे अकामए अवस्सवसे लज्जाए नारवेण य पुंडरीयं रायं आपुच्छइ २
ता थेरेहिं सट्ठि बहिया जणवयविहारं विहरइ । तए णं से कंडरीए थेरेहिं
सट्ठि किच्चि कालं उगमं उगगेणं विहरइ तओ पच्छ्या समणत्तणपरित्ते समण-
त्तण-णिट्ठिण्णे समणत्तण-णिट्ठिभ(त्थि)च्छिए समणगणमुवकजोगी थेराणं
अंतिपाओ सणियं २ पच्चोसवकइ २ ता जेणेव पुंडरिगिणी णयरी
जेणेव पुंडरीयस्स भवणे तेणेव उवागच्छइ २ ता असोगवणियाए असोग-

घरपायवस्स अहे पुढविसित्तापट्टमंसि णिसीयइ २ ता ओह्यमणसंकप्पे जाव
 भियायमाणे संजिह्णइ । तए णं तस्स पोंडरीयस्स अम्मघाई जेणेव असोग-
 वणिया तेणेव उवागच्छइ २ ता कंडरीयं अणगारं असोगवरपायवस्स अहे
 पुढविसित्तापट्टमंसि ओह्यमणसंकप्पं जाव शियायमाणं पासइ २ ता जेणेव
 पुंडरीए राया तेणेव उवागच्छइ २ ता पुंडरीयं रायं एवं वयासी-एवं खलु
 देवानुप्पिया ! तव पिउं थ) भाउए कंडरीए अणगारे असोगवणियाए असोगवर-
 पायवस्स अहे पुढविसित्तापट्टे ओह्यमणसंकप्पे जाव शियायइ । तए णं [से]
 पुंडरीए अम्मघाईए एयमट्ठं सोच्चा णिसम्म तहेव संमंते समाणे उट्ठाए उट्ठेइ
 २ ता अंतेउरपरियालसपरिवुडे जेणेव असोगवणिया जाव कंडरीयं तिवखुत्तो०
 एवं वयासी-घण्णेसि णं तुमं देवानुप्पिया ! जाव पव्वइए, अहं णं अधण्णे [३]
 जाव पव्वइत्तए, तं घण्णेसि णं तुमं देवानुप्पिया ! जाव जीवियफले । तए
 णं कंडरीए पुंडरीएणं एवं वत्ते समाणे तुसिणीए संचिट्ठइ दोचंवि तच्चंवि
 जाव चिट्ठइ । तए णं पुंडरीए कंडरीयं एवं वयासी-अट्ठो भंते ! भोगेहि ?
 हंता ! अट्ठो । तए णं से पुंडरीए राया कोडुंबियपुरिसे सट्ठावेइ २ ता एवं
 वयासी-खिप्पामेव भो देवानुप्पिया ! कंडरीयस्स महत्थं जाव रायाभिसेयं
 उवट्टवेह जाव रायाभिसेएणं अभिसिचइ ॥ १४६ ॥ तए णं से पुंडरीए सयमेव
 पंचमट्ठियं लोयं करेइ सयमेव चाउज्जामं धम्मं पडिवज्जइ २ ता कंडरीयस्स
 संतियं आधारभंडयं गेहइ २ ता इमं एयारुवं अभिगहं अभिगिहइ-कप्पइ
 मे थरे वदित्ता णमंसित्ता थेराणं अंतिए चाउज्जामं धम्मं उवसंपज्जित्ताणं
 तओ पच्छा आहारं आहारित्तए त्तिकट्ट इमं च एयारुवं अभिगहं अभि-
 गिहत्तणं पुंडरिगिणीए पडिणिकखमइ २ ता पुठ्ठाणुंवि चरमाणे गासाणुगामं
 दूइज्जमाणे (जेणेव) थेरा भगवंतो तेणेव पहारेत्थ गमणाए ॥ १४७ ॥ तए
 णं तस्स कंडरीयस्स रणो तं पणीयं पाणभोयणं आहारियस्स समाणस्स अइ-
 जागरिएण थ अइभोयणप्पसंसेण थ से आहारे णो सम्मं परिणमइ । तए णं
 तस्स कंडरीयस्स रणो तंसि आहारंसि अपरिणममाणंसि पुव्वरत्तावरत्तकाल-
 समयंसि मरीरगंसि वेयणा पाउंभूया उज्जत्ता विउत्ता पगाहा जाव दुरहियासा
 पित्तज्जरपरिणयसरीरे दाहवक्कंतीए यावि विहरइ । तए णं से कंडरीए राया
 रज्जे थ रट्ठे थ अंतेउरे थ जाव अज्जीववण्णे अट्टुहट्टवसट्टे अकामए अत्र-

स्वप्ने कालमासे कालं किञ्चा अहे सत्तमाए पुढवीए उवकोसकालट्टिइयसि
 णरयंसि णेरइयत्ताए उववण्णे । एवामेव समणाउसो ! जाव पव्वइए समाणे
 पुणरवि माणुस्सए कामभोगे आसाइए जाव अणुपरिपट्टिस्सइ जहा व से
 कंडरीए राधा ॥ १४८ ॥ तए णं से पुंडरीए अणगारे जेणेव थेरा भगवंतो
 तेणेव उवागच्छइ २ ता थेरे भगवते वंदइ णमसइ वं० २ ता थेराणं अंतिए
 दोच्चंपि चाउज्जामं धम्मं पडिवज्जइ छट्ठखमणपारणंसि पढमाए पोरिसीए
 सज्जायं करेइ २ ता जाव अडमाणे सीयलुक्खं पाणभोयणं पडिगाहेइ २ ता
 अहापज्जत्तमितिकट्टु पडिणियस्सइ जेणेव थेरा भगवंतो तेणेव उवागच्छइ
 २ ता भत्तपाणं पडिदंसेइ २ ता थेरेहिं भगवंतेहिं अडभणुणाए समाणे
 अमुच्छिए ४ बिलमिव पणममूएणं अप्पाणेणं तं फ़ामुएसणिज्जं असणं ४
 सरीरकोट्टुगंसि पविखवइ । तए णं तस्स पुंडरीयस्स अणगारस्स तं कालाइक्कंतं
 भरसं त्रिरसं सीयलुक्खं पाणभोयणं आहारियस्स समाणस्स पुव्वरत्तावरत्तकाल-
 समयंसि धम्मजागरियं जागरमाणस्स से आहारे णो सम्मं परिणमइ । तए णं
 तस्स पुंडरीयस्स अणगारस्स सरीरगंसि वेयणा पाउठ्ठमूया उज्जला जाव दुर-
 हियासा पित्तज्जरपरिगयसरीरे द्वाहवक्कतीए विहरइ । तए णं से पुंडरीए
 अणगारे अत्थामे अबले अवीरिए अपुरिसवकारपरवकमे करयल जाव एवं
 वयासी-णमोत्थुणं अरिहंताणं भगवंताणं जाव संपत्ताणं । णमोत्थु णं थेराणं
 भगवंताणं मम धम्मायरियाणं धम्मोवएसयाणं । पुंवि पि य णं मए थेराणं
 अंतिए सव्वे पाणाइवाए पच्चवखाए जाव मिच्छादंसणसत्तलेणं पच्चवखाए
 जाव आलोइयपडिवक्कंते कालमासे कालं किञ्चा सव्वट्टुसिद्धे उववण्णे । तसो
 अणंतरं उव्वट्टित्ता महाविदेहे वासे सिज्झिहिइ जाव सव्वदुक्खाणसंतं काहिइ ।
 एवामेव समणाउसो ! जाव पव्वइए समाणे माणुस्ताएहिं कामभोगेहिं णो
 सज्जइ णो रज्जइ जाव णो विप्पडिघायमावज्जइ से णं इहमवे चेव बहूणं
 समणाणं बहूणं समणोणं बहूणं सावथाणं बहूणं सावियाणं अच्चणिज्जे वंदणिज्जे
 पूयणिज्जे सवकारणिज्जे सम्माणणिज्जे कल्लाणं मंगलं देवयं त्थेइयं पज्जुवास-
 णिज्जे-त्तिकट्टु परलोए वि य णं णो आगच्छइ बहूणि वंडणाणि य मंडणाणि
 य तज्जणाणि य ता(ड)लणाणि य जाव चाउरंतं संसारकंतां जाव वीईवइस्सइ
 जहा व से पुंडरीए अणगारे । एवं खलु जंबू । समणेणं भगवया महावीरेणं

आइगरेणं तित्थगरेणं सयंसंबद्धेणं जाव सिद्धिगइणामधेज्जं ठाणं संपत्तेणं
एगूणवीसइमस्स णायज्झयणस्स अयमट्ठे पणत्ते । एवं खलु जंबू ! समणेणं
भगवया महावीरेणं जाव सिद्धिगइ-णामधेज्जं ठाणं संपत्तेणं छट्ठस्स अंगस्स
पढमस्स सुयवखंधस्स अयमट्ठे पणत्ते त्ति बेमि । तस्स णं सुयवखंधस्स एगूण-
वीसं अज्झयणाणि ए (क्क) गासरगाणि एगूणवीसाए दिवसेसु सम्प्यति । १४६।
गाहाउ—वाससहस्सं पि जई काऊणं संजमं सुविउलं पि । अंते किलिट्ठमावो
ण विमुज्झइ कंडरीउव्व ॥ १॥ अप्पेण वि कालेणं केइ जहागहियसीलसामण्णा ।
साहित्ति णिययकज्जं पुंडरीयमहारिसिच्च जहा ॥ २ ॥

॥ एगूणवीसइमं अज्झयणं समत्तं ॥

॥ पढमो सुयवखंधो समत्तो ॥

बीओ सुयवखंधो

पढमो वग्गो—काली णामं पढमं अज्झयणं

तेणं कालेणं तेणं झमएणं रायगिहे णामं णयरे होत्था वण्णओ । तस्स णं
रायगिहस्स (णयरस्स) बहिया उत्तरपुरत्थिमे दिसीमाए तत्थ णं गुण-
सिलए चेइए णामं होत्था वण्णओ । तेणं कालेणं तेणं समएणं समणस्स भग-
वओ महावीरस्स अंतेवासी अज्जमुहम्ममा णामं थेरा भगवंतो जाइसंपण्णा
कुलसंपण्णा जाव चउइसपुक्खी चउणाणोवगया पंचहि अणगारसएहि
सद्धि संपरिवुडा पुक्खाणपुक्खि चरमाणा गामाणुगामं दुइज्जमाणा सुहंसुहेणं
विहरमाणा जेणेव रायगिहे णयरे जेणेव गुणसिलए चेइए जाव संजमेणं
तवसा अप्पाणं भावेमाणा विहरत्ति । परिसा णिःगया धम्मो कहिओ,
परिसा जामेव दित्ति पाउळ्ळया तामेव दित्ति पडिगया । तेणं कालेणं तेणं
समएणं अज्जमुहम्मस्स अणगारस्स अंतेवासी अज्ज जंबू णामं अणगारे जाव
पज्जवासमाणे एवं वयासी—जइ णं भंते ! समणेणं (३) जाव संपत्तेणं छट्ठस्स
अंगस्स पढमस्स सुयवखंधस्स णायसुयाणं अयमट्ठे पणत्ते वोच्चस्स णं
भंते ! सुयवखंधस्स धम्मकहाणं समणेणं० के अट्ठे पणत्ते ? एवं खलु
जंबू ! समणेणं० धम्मकहाणं दस वग्गा पणत्ता तंजहा—चमरस्स अगमहिंसीणं
पढमे वग्गे, बलिस्स वइरोयणंदस्स वइरोयणरण्णो अगमहिंसीणं बीए वग्गे,

असुरिववञ्जियाणं दाह्निग्ल्लारणं इवाणं अगमहिस्तीणं तर्दए वग्गे, उत्तरिल्लारणं
 असुरिदवञ्जियाणं भवणवासिइंदाणं अगमहिस्तीणं चउत्थे वग्गे, दाह्निग्ल्लारणं
 वाणमंतराणं इंदाणं अगमहिस्तीणं पंचमे वग्गे, उत्तरिल्लारणं वाणमंतराणं
 इंदाणं अगमहिस्तीणं छट्ठे वग्गे, चंदस्स अगमहिस्तीणं सत्तमे वग्गे, सूस्स
 अगमहिस्तीणं अट्टमे वग्गे, सब्बस्स अगमहिस्तीणं णवमे वग्गे, ईसाणस्स (य)
 अगमहिस्तीणं दसमे वग्गे । जइ णं भंते ! समणेणं० धम्मकहाणं वस वग्गा
 पण्णत्ता पढमस्स णं भंते ! वग्गस्स समणेणं० के अट्ठे पण्णत्ते ? एवं खलु
 जंबू ! समणेणं० पढमस्स वाग्गस्स पंच अज्झयणा पण्णत्ता तंजहा—काली राई
 रयणी विज्जू मेहा । जइ णं भंते ! समणेणं० पढमस्स वग्गस्स पंच अज्झयणा
 पण्णत्ता पढमस्स णं भंते ! अज्झयणस्स समणेणं० के अट्ठे पण्णत्ते ? एवं खलु
 जंबू ! तेषं कालेणं तेषं समएणं रायगिहे णयरे गुणसिलए चेइए सेणिए राय
 चेलणा देवी सभो समोसद्धे परिसा णिग्गया जाव परिसा पज्जुवासइ । तेषं
 कालेणं तेषं समएणं काली णामं देवी चमरचंवाए रायहाणीए कालवड्डेसगभवणे
 कालंसि सीहासणंसि चउर्हि सामाणियसाहस्सीहि चउर्हि मयहरियाहि सपरि-
 वाराहि तिहि परिसाहि सत्ताहि अणिएहि सत्ताहि अणियाहिवईहि सोलसाहि
 आयरवखदेवसाहस्सीहि अणे यब्बहि कालवड्डिसयभवणवासीहि असुरकुमारेहि
 देवीहि देवीहि य सद्धि संपरिवुडा महयाहय जाव विहरइ इमं च णं केवलकणं
 जंबूदीवं २ विउलेणं ओहिणां आओएमाओ २ पासइ । ए(त)त्थ समणं
 भगवं महावीरं जंबूदीवे दीवे भारहे वासे रायगिहे णयरे गुणसिलए चेइए
 अहापडिक्खं उग्गहं उग्गिण्हत्ता संजमेणं तवसा अष्पाणं भावेमाणं पासइ
 २ ता हट्ठुट्ठच्चित्तमार्णविया पीइमणा जाव (हय)हियया सीहासणाओ
 अट्ठमुट्ठेइ २ ता पायपीडाओ पक्कोरुहइ २ ता पाउयाओमुयइ २ ता तित्थ-
 गरामिमुही सत्तट्ठ पयाइं अणुगच्छइ २ ता कामं जाणुं अचेइ २ ता दाहिणं
 जाणुं धरणिण्यलंसि णिहट्ठु तिक्खत्तो मुट्ठाणं धरणिण्यलंसि णिवेसेइ(०) ईंसि
 पक्कण्णमइ २ ता कडयतुडियथमियाओ भूयाओ साहरइ २ ता करयल
 जाव कट्ठु एवं वयासी—णमोत्थु णं अरहंताणं भगवंताणं जाव संपत्ताणं ।
 णमोत्थु णं समणस्स भगवओ महावीरस्स जाव संपाविउकामस्स । बंवासि
 णं भगवंतं तत्थगयं इहग(ए)या पासउ मे समणे ३ तत्थ-गए इह गयं-तिकट्ठु

वंदइ णमंसइ वं० २ ता सीहासणवरंसि पुरत्थाभिमुहा णिसण्णा । तए णं तीसे कालीए देवीए इमेयाख्खे जाव समुप्पज्जित्था—सेयं खलु मे समणं ३ वंदित्ता जाव पज्जुवासितए—त्तिकट्टु एवं संवेहेइ २ ता आभिओगिए देवे सदावेइ २ ता एवं वयासी—एवं खलु देवाणुप्पिया ! समणे ३ एवं जहा सूरियामो तहेव आणत्तियं वेइ जाव दिव्वं सुरवराभिगमणजोगं करेह २ ता जाव पच्चप्पिणह । तेवि तहेव करेत्ता जाव पच्चप्पिणंति । णवरं जोयणसहस्सविट्थिणं जाणं सेसं तहेव । तहेव णामगोयं साहेइ तहेव णट्टुविहि उवदसेइ जाव पडिगया । भंतेत्ति ! भगवं गोयमे समणं ३ वंदइ णमंसइ वं० २ ता एवं वयासी—कालीए णं भंते ! देवीए सा दिव्वा देविड्डी ३ कहि गया० ? कूडागारसालादिठंती । अहो णं भंते ! कालो देवी महिड्डिया [३] । कालीए णं भंते ! देवीए सा दिव्वा देविड्डी ३ किण्णा लद्धा किण्णा पत्ता किण्णा अमिससण्णागया ? एवं जहा सूरियाभस्स जाव एवं खलु गोयमा ! तेणं कालेणं तेणं समएणं इहेव जंबुद्वीवे २ भारहे वासे आमलकप्पा णामं णयरी होत्था वण्णओ । अंबसालवणे चेइए । जियसत्तू राया । तत्थ णं आमलकप्पाए णयरीए काले णामं गाहावई होत्था अड्ढे जाव अपरि-भूए । तस्स णं कालस्स गाहावइस्स कालसिरी णामं भारिया होत्था सुकुमाल(पाणिपाया)जाव सुरूवा । तस्स णं काल(प)स्स गाहावइस्स धूया कालसिरीए भारियाए अत्तया काली णामं दारिया होत्था वड्डा वड्डुकुमारी जुण्णा जुण्णकुमारी पडियपुयत्थणी णिविण्णवरा वरपरिवज्जिया वि होत्था । तेणं कालेणं तेणं समएणं पासे अरहा पुरिसादाणीए आइगरे जहा वद्धमाणसामी णवरं णवहत्थुस्सेहे सोलसहि समणसाहस्सीहि अट्टुत्तीसाए अज्जियासाहस्सीहि संदि संपरिवडे जाव अंबसालवणे समोसडे । परिसा णिग्गया जाव पज्जुवासइ । तए णं सा काली दारिया इमीसे कहाए लद्धट्टा समाणा हट्टु जाव हियया जेणेव अम्मपियरो तेणेव उवागच्छइ २ ता करयल जाव एवं वयासी—एवं खलु अम्मयाओ ! पासे अरहा पुरिसादाणीए आइगरे जाव विहरइ, तं इच्छामि णं अम्मयाओ ! तुब्भेहि अन्नणुण्णाया समाणी पासस्स [णं] अरहओ पुरिसा-दाणीयस्स पायवंदिआ गमित्तए । अहामुहं देवाणुप्पिया ! मा पडिबंधं करेहि । तए णं सा काली दारिया अम्मापिईहि अन्नणुण्णाया समाणी हट्टु जाव हियया

ष्हाया कयबलिकम्मा कयकोउय-मंगल-पायच्छित्ता सुद्धप्पवेसाइं मंपल्लाईं
 वत्थाइं पवर परिहिया अणमहग्घाभरणालकियसरीरा चेडियात्रक्कवालपरि
 किण्णा साओ गिहाओ पडिणिषखमइ २ ता जेणेव बाहिरिया उवट्टाणमाला जेणेव
 धम्मिण्ण जाणप्पवर तेणेव उवागच्छइ २ ता धम्मियं जाणप्पवरं दुक्कडा । तए णं
 सा काली दारिया धम्मियं जाणप्पवरं एवं जहा दोवई जाव तहा पञ्जुवासइ ।
 तए णं पासे अरहा पुरिसादाणीए कालीए दारियाए तीमे य महडमहालियाए
 परिमाए धम्मं कहेइ । तए णं सा काली दारिया पासस्स अरहओ पुरिसादाणी-
 यस्स अंतिए धम्मं सोच्छा णिसम्म हट्ट जाव हियया पासं अरहं पुरिसादाणीयं
 तिक्खत्तो वंदइ णमंसइ वं० २ ता एवं वयासी-सट्टहामि णं भन्ते ! णिसंभं पाव-
 यणं जाव से जहेयं तुभे वयह जं णवरं देवाणुप्पिया ! अम्मापियरो आपुच्छामि
 तए णं अहं देवाणुप्पियाणं अंतिए जाव पव्वयामि । अहामुहं देवाणुप्पिए ! ।
 तए णं सा काली दारिया पासेणं अरहया पुरिसादाणीएणं एवं वत्ता समाणी
 हट्ट जाव हियया पासं अरहं वंदइ णमंसइ वं० २ ता तमेव धम्मियं जाणप्पवरं
 दुक्कइ २ ता पासस्स अरहओ पुरिसादाणीयस्स अंतियाओ अब्बसालवणाओ
 चेडियाओ पडिणिषखमइ २ ता जेणेव आमलकप्पा णयरी तेणेव उवागच्छइ
 २ ता आमलकप्पं णयरी मज्झमज्झेणं जेणेव बाहिरिया उवट्टाणमाला तेणेव
 उवागच्छइ २ ता धम्मियं जाणप्पवरं ठवेइ २ ता धम्मियाओ जाणप्पवराओ
 पच्चोरुहइ २ ता जेणेव अम्मापियरो तेणेव उवागच्छइ २ ता करयल[परिग
 हिय] जाव एवं वयासी-एवं खलु अम्मयाओ ! मए पामस्स अरहओ अंतिए
 धम्मे णिसंते, से वि य धम्मे इच्छिए पडिच्छिए अभिरुइए, तए णं अहं अम्म-
 याओ ! संसारभउव्विग्गा भीया जम्मणमरणाणं इच्छामि णं तुभेहिं अम्म-
 णुष्णाया समाणी पासस्स अरहओ अंतिए मुंडा भवित्ता अगाराओ अणमारियं
 पव्वइत्तए । अहामुहं देवाणुप्पिए ! सा पडिबंधं करेहि । तए णं से काले गहा-
 वई विउलं अमणं ४ उवक्खडावेइ २ ता मित्त-णाइ-णियगसयणसंबंधिपरियणं
 आमनेइ २ ता तओ पच्छा ष्हाए जाव त्रिपुलेणं पुप्फवत्थगंधमबलालंकारेणं
 सवकारेइ सम्माणेइ[२] तस्सेव मित्त-णाइ-णियगसयणसंबंधिपरियणस्स पुरओ
 कालियं दारियं सेयापीएहिं कलसेहिं ष्हावेइ २ ता सव्वालंकारविभूसियं करेइ
 २ ता पुरिससहस्सवाहिणीयं सीयं दुक्कहेइ २ ता मित्त णाइ-णियगसयणसंबंधि-

परिणेषं सत्तिं संपरिवुडा सच्चिइदीए जाव रवेणं आमलकप्यं णयारि मज्झं-
मज्जेणं णिगच्छइ २ ता जेणेव अबसालवणे चेइए तेणेव उवागच्छइ २ ता
छत्ताइए तित्थगराइसए पासइ २ ता सीयं ठवेइ २ ता [कालियं दारियं
सीयीओ पच्चोरुहइ । तए णं तं] कालियं दारियं अम्मापियरो पुरओ काउं
जेणेव पासे अरहा पुरिसादाणीए तेणेव उवागच्छइ २ ता वंदंति णमंसंति वं०
२ एवं वयासी-एवं खलु देवाणुप्पिया ! काली दारिया अम्हं धूया इट्ठा कंता
जाव किमंग पुण पासणयाए ? एस णं देवाणुप्पिया ! संसारभउव्विरगा इच्छइ
देवाणुप्पियाणं अंतिए मंडा भवित्ता (णं) जाव पव्वइत्तए, तं एयं णं देवाणु-
प्पियाणं सिस्सिणिभिवखं दलयामो, पडिच्छंतु णं देवाणुप्पिया ! सिस्सिणि-
भिवखं । अहामुहं देवाणुप्पिया ! मा पडिबंथं (करेइ) । तए णं [सा] काली
कुमारी पासं अरहं वंदइ णमंसइ वं० २ ता उत्तरपुरत्थिमं दिसीभागं अवक्क-
मइ २ ता सयमेव आभरणमल्लालंकारं ओमुयइ २ ता सयमेव लोयं करेइ २
ता जेणेव पासे अरहा पुरिसादाणीए तेणेव उवागच्छइ २ ता पासं अरहं
तिषखुत्तो वंदइ णमंसइ वं० २ ता एवं वयासी-आलित्ते णं भंते ! लोए एवं
जहा देवाणंदा जाव सयमेव पव्वविउं । तए णं पासे अरहा पुरिसादाणीए
कालिं सयमेव पुप्फचूलाए अज्जाए सिस्सिणियत्ताए दलयइ । तए णं सा
पुप्फचूला अज्जा कालिं कुमारिं सयमेव पव्ववेइ जाव उवसंपज्जित्ताणं विह-
रइ । तए णं सा काली अज्जा जाया हरियासमिया जाव गुत्तबंभयारिणी ।
तए णं सा काली अज्जा पुप्फचूलाए अज्जाए अंतिए सामाइयमाइयाइं एक्का-
रस अंगाइं अहिज्जइ बहंहि चउत्थ जाव विहरइ । तए णं सा काली अज्जा
अणया कयाइ सरीरबाउसियां जाया यावि होत्था, अभिवखणं २ हत्थे धो(व)-
वेइ पाए धोवेइ सीसं धोवेइ मुहं धोवेइ थणंतरा(इं)णि धोवेइ कक्खंतराणि
धोवेइ गुज्जंतराणि धोवेइ जत्थ-जत्थ वि ष णं ठाणं वा सेज्जं वा णिसी-
हियं वा चेइइ तं पुव्वामेव अक्खेत्ता तओ पच्छा आसयइ वा सयइ वा ।
तए णं सा पुप्फचूला अज्जा कालिं अज्जं एवं वयासी-णो खलु कप्पइ देवा-
णुप्पिए ! समणीं णिगंथोणं सरीरबाउसियाणं होत्तए, तुमं च णं देवा-
णुप्पिए ! सरीरबाउसिया जाया अभिवखणं २ हत्थे धोवसि जाव आसयाहि
वा सयाहि वा, तं तुमं देवाणुप्पिए ! एयस्स ठाणस्स आलोएहि जाव पाय-

चिद्धत्तं पडिवज्जाहि । तए णं सा काली अज्जा पुक्कसूलाए अज्जाए एयमदुंठं
 णो आढाइ जाव तुसिणीया संचिट्ठइ । तए णं ताओ पुक्कसूलाओ अज्जाओ
 कार्ति अज्जं अभिवखणं २ हीलैति गिदंति खिसंति गरहंति अवमण्णति
 अभिवखणं २ एयमदुंठं णिवारंति । तए णं तीसे कालीए अज्जाए समणीहिं
 णिमगंभीहिं अभिवखणं २ हीलिवज्जमाणीए जाव वारिवज्जमाणीए इमेयारूवे
 अज्जत्थिए जाव समुपपज्जित्था-जया णं अहं अगारवासमज्जे वसित्था
 तथा णं अहं सयंवजा । जप्पभिइं च णं अहं मुंडा भवित्ता अगाराओ अण-
 गारियं पव्वइया तप्पभिइं च णं अहं परवसा जाया । तं मेयं खलु मय कल्लं
 पाउप्पभायाए रयणीए जाव जलंने पाडि(क्कि) वक्यं उवस्सयं उवसंपज्जि-
 त्ताणं विहरित्तए--त्तिकट्टु एवं सपेहेइ २ त्ता कल्लं जाव जलंने पाडि(ए)वकं
 उवस्सयं गिण्हइ तत्थ णं अणिवारिया अणोहट्ठिया सच्छदमई अभिवखणं २
 हत्थे धोवेइ जाव आसयइ वा सपइ वा । तए णं सा काली अज्जा पासत्था
 पासत्थविहारी ओसण्णा ओसण्णविहारी कुसीला कुसीलविहारी अहाछंवा
 अहाछंदविहारी संसत्ता संसत्तविहारी बहूणि वासाणि सागण्णपरियाणं पाउ-
 णइ २ त्ता अद्धमासियाए संलेहणाए अप्पाणं झूगेइ २ त्ता तीसं भताइं
 अणसणाए छेइ २ त्ता तस्स ठाणस्स अणालोइयअपडिवकंता कालमासे
 कालं किच्चा चमरचंचाए रायहाणीए कालवडिसए भवणे उवसायसभाए
 देवसयणिज्जंसि देवदूसंतरिया अंगुलस्स असंखेज्जाइ भागमेत्ताए ओगाह-
 णाए कालीदेवित्ताए उववण्णा । तए णं सा काली देवी अट्ठणोववण्णा
 समाणी पंचविहाए पज्जतीए जहा सूरियाओ जाव भासामणपज्जतीए । तए
 णं सा काली देवी चउण्हं सामाणियसाहस्सीणं जाव अण्णेसि च बहूणं
 कालवडैसगभवणवासीणं असुरकुमारारणं देवाण य देवीण य आहेवच्चं जाव
 विहरइ । एवं खलु गोयमा ! कालीए देवीए सा दिव्वा देविइद्धी २ लद्धा
 पत्ता अभिसमण्णागया । कालीए णं भंते ! देवीए केवइयं कालं ठिई पण्णत्ता !
 गोयमा ! अड्डाडुज्जाइं पल्लिओवसाइं ठिई पण्णत्ता । काली णं भंते ! देवी
 ताओ देवलोमाओ अणंतरं उव्वट्ठित्ता काहिं गच्छिहिइ काहिं उववज्जिहिइ ?
 गोयमा ! महाविदेहे वासे सिज्झिहिइ जाव अंतं काहिइ । एवं खलु जंबू !

समणेणं जाव संपत्तेणं पढमस्स वग्गस्स पढमज्झयणस्स अयमट्ठे पण्णत्ते तिन्नेमि ॥ १५० ॥

॥ पढमं अज्झयणं समत्तं ॥

राई णामं बीयं अज्झयणं

जइ णं भंते ! समणेणं० धम्मकहाणं पढमस्स वग्गस्स पढमज्झयणस्स अयमट्ठे पण्णत्ते बिइयस्स णं भंते ! अज्झयणस्स समणेणं (३) जाव संपत्तेणं के अट्ठे पण्णत्ते ? एवं खलु जंबू ! तेणं कालेणं तेणं समएणं रायगिहे णयरे गुणसिलए चेइए सामी समोसढे परिसा णिगया जाव पज्जुवासइ । तेणं कालेणं तेणं समएणं राई देवी चमरचंचाए रायहाणीए एवं जहा काली तहेव आगया णट्टविहिं उधदंसित्ता पडिगया । भंतेत्ति ! भगवं गोयमे पुक्कभवपुच्छा । एवं खलु गोयमा ! तेणं कालेणं तेणं समएणं आमलकप्पा णयरी अंबसालवणे चेइए जियसत्तू राया राई गाहावई राईसिरी भारिया राई दारिया पासस्स समोसरणं राई दारिया जहेव काली तहेव भिवखंता तहेव सरीरबाउसिया तं चेव सव्वं जाव अंतं काहिइ । एवं खलु जंबू ! बिइयज्झयणस्स णिवखेवओ ॥ जइ णं भंते ! तइयज्झयणस्स उक्खेवओ । एवं खलु जंबू ! रायगिहे णयरे गुणसिलए चेइए एवं जहेव राई तहेव रयणी वि णवरं आमलकप्पा णयरी रयणी गाहावई रयणसिरी भारिया रयणी दारिया सेसं तहेव जाव अंतं काहिइ । एवं विज्जूवि आमलकप्पा णयरी विज्जू गाहावई विज्जूसिरी भारिया विज्जू दारिया सेसं तहेव । एवं मेहा वि आमलकप्पाए णयरीए मेहे गाहावई मेहसिरी भारिया मेहा दारिया सेसं तहेव । एवं खलुजंबू ! समणेणं जाव संपत्तेणं पढमस्स धम्मकहाणं वग्गस्स अयमट्ठे पण्णत्ते ॥ १५१ ॥

२-१० वग्गाणि

जइ णं भंते ! समणेणं० दोच्चस्स वग्गस्स उक्खेवओ । एवं खलु जंबू ! समणेणं० दोच्चस्स वग्गस्स पंच अज्झयणा तंजहा—सुंभा णिसुंभा रंभा णिरंभा मदणा । जइ णं भंते ! समणेणं० धम्मकहाणं दोच्चस्स वग्गस्स पंच अज्झयणा पण्णत्ता, दोच्चस्स णं भंते ! वग्गस्स पढमज्झयणस्स के अट्ठे पण्णत्ते ? एवं

खलु जंबू ! तेणं कालेणं तेणं समएणं रायगिहे णयरे गुण-सिलए चेइए सामी समोसडे परिसा णिग्गया जाव पज्जुवासइ । तेणं कालेणं तेणं समएणं सुंभा देवी बलिच्चंआए रायहाणीए सुंभवडेंसए भवणे सुंभसि सीहासणंसि कालीगमएणं जाव णट्टविहिं उवदसेत्ता जाव पडिगया । पुव्वभवपुच्छा । सावत्थी णयरी कोट्टए चेइए जियसत्तू राया सुंभे गाहावई सुंभसिरी भारिया सुंभा दारिया सेसं जहा कालीए णवरं अट्टट्टाई पलिआंवमाइं ठिई । एवं खलु जंबू ! णिबखे-वओ अज्झयणस्स । एवं सेसावि चत्तारि अज्झयणा सावत्थीए णवरं माया दिया सत्तिसणामया । एवं खलु जंबू ! णिबखेवओ विट्ठयवग्गस्स ॥ १५२ ॥ उवखेवओ तइयवग्गस्स । एवं खलु जंबू ! समणेणं० तइयवग्गस्स चउपणं अज्झयणा पणत्ता तजहा—पढमे अज्झयणे जाव चउपण्णइमे अज्झयणे । जइ णं भंते ! समणेणं० धम्मकहाणं तइयवग्गस्स चउपण्णज्झयणा पणत्ता पढमस्स णं भंते ! अज्झयणस्स समणेणं० के अट्ठे पणत्ते ? एवं खलु जंबू ! तेणं कालेणं तेणं समएणं रायगिहे णयरे गुण-सिलए चेइए सामी समोसडे परिसा णिग्गया जाव पज्जुवासइ । तेणं कालेणं तेणं समएणं इत्ता देवी धरणीए रायहाणीए इत्तावडेंसए भवणे इत्तंसि सीहासणंसि एवं काली-गमएणं जाव णट्टविहिं उवदसेत्ता पडिगया । पुव्वभवपुच्छा । वाणारसीए णयरीए काममहावणे चेइए इत्ते गाहावई इत्तिसिरी भारिया इत्ता दारिया सेसं जहा कालीए णवर धरणस्स अग्गमहिंसित्ताए उववाओ साइरेयं अट्टपलि-ओवमं ठिई सेसं तहेव । एवं खलु जंबू ! णिबखेवओ पढमज्झयणस्स । एवं कमा सते सोयामणी इंदा घणा विज्जुया-वि । सव्वाओ एयाओ धरणस्स अग्गमहिंसीओ एव । एए छ अज्झयणा वेणुदेवस्स वि अविसेसिया माणिय-व्वा, एवं जाव घोसस्स वि एए चेव छ अज्झयणा । एवमेते दाहिणिल्लानं इंदाणं चउपण्णं अज्झयणा भवंति सव्वाओ वि वाणारसीए काममहावणी चेइए । तइयवग्गस्स णिबखेवओ ॥ १५३ ॥ चउत्थस्स उवखेवओ । एवं खलु जंबू ! समणेणं० धम्मकहाणं चउत्थवग्गस्स चउपण्णं अज्झयणा पणत्ता तजहा—पढमे अज्झयणे जाव चउपण्णइमे अज्झयणे । पढमस्स अज्झयणस्स उवखेवओ । एवं खलु जंबू ! तेणं कालेणं तेणं समएणं राय-गिहे समोसरणं जाव परिसा पज्जुवासइ । तेणं कालेणं तेणं समएणं रूप

देवी रुयाणंदा रायहाणी रुयगवडेंसए भवणे रुयगंसि सीहासणंसि जहा कालीए तथा णवरं पुव्वभवे चंपाए पुण्णमद्दे चेइए रुयगगाहावई रुयगसिरी भारिया रुया दारिया सेसं तहेव णवरं भूयाणंदअगमहिंसिताए उववाओ देसूणं पलिओवमं ठिई । णिवखेवओ । एवं खलु सुरुया वि रुयंसो वि रुयगावई वि रुयकंता वि रुयप्पमा वि । एयाओ चेव उत्तरित्ताणं इंदाणं भाणियव्वाओ जाव महाघोसस्स । णिवखेवओ चउत्थवग्गस्स ॥ १५४ ॥ पंचमवग्गस्स उवखेवओ । एवं खलु जंबू ! जाव वत्तीसं अज्जयणा पण्णत्ता तंजहा-कमला कमलप्पमा चेव, उप्पला यसुदंसणा । रुववई बहुरुवा, सुरुवा सुभगा वि य ॥ १ ॥ पुण्णा बहुपुत्तिया चेव, उत्तमा भारिया वि य । पउमा वसुमई चेव, कणगा कणगप्पमा ॥ २ ॥ वडेंसा केऊमई चेव, वइरसेणा रइप्पिया । रोहिणी णवमिया चेव, हिरी पुप्फवई(ति) वि य ॥ ३ ॥ भुयगा भुयगवई चेव, महाकच्छाऽपराइया । सुघोसा विमला चेव, सुस्सरा य सरस्सई ॥ ४ ॥ उवखेवओ पढमज्जयणस्स । एवं खलु जंबू ! तेणं कालेणं तेणं समएणं रायमिहे समीसरणं जाव परिसा पज्जुवासइ । तेणं कालेणं तेणं समएणं कमला देवी कमलाए रायहाणीए कमलवडेंसए भवणे कमलंसि सीहासणंसि सेसं जहा कालीए तहेव णवरं पुव्वभवे णागपुरे णयरे सहसंबवणे उज्जाणे कमलस्स गाहावइस्स कमलसिरीए भारियाए कमला दारिया पासस्स अंतिए णिवखंता कालस्स पिमाप्यकुमारिदस्स अगमहिंसी अद्धपलिओवमं ठिई । एवं सेसा वि अज्जयणा दाहिणित्ताणं वाणमंतरिदाणं भाणियव्वाओ (सव्वाओ) णागपुरे सहसंबवणे उज्जाणे मायापियरो धूया सरिसणामया ठिई अद्धपलिओवमं । पंचमो वग्गो समत्तो ॥ १५५ ॥ छट्ठो वि वग्गो पंचमवग्गसरिसो णवरं महाकायाईणं उत्तरित्ताणं इंदाणं अगमहिंसीओ । पुव्वभवे सागेय णयरे उत्तरकुसउज्जाणे मायापियरो धूया सरिसणामया । सेसं तं चेव । छट्ठो वग्गो समत्तो ॥ १५६ ॥ सत्तमस्स वग्गस्स उवखेवओ । एवं खलु जंबू ! जाव चत्तारि अज्जयणा पण्णत्ता तंजहा-सूरप्पमा आयवा अच्चिमाली पभंकरा । पढमज्जयणस्स उवखेवओ । एवं खलु जंबू ! तेणं कालेणं तेणं समएणं रायमिहे समीसरणं जाव परिसा पज्जुवासइ । तेणं कालेणं तेणं समएणं सूरप्पमा देवी सूरंसि विमाणंसि सूरप्पभंसि सीहासणंसि सेसं जहा

कालीए तहा णवरं पुव्वभवो अरक्खुरीए णयरीए सूरप्पभस्स गाहावडस्स सूर-
 सिरीए भारियाए सूरप्पभा दारिया सूरस्स अग्गमहिंसी ठिई अट्टपलिओवमं
 पंचंह वाससएहि अग्गमहिंयं सेसं जहा कालीए । एवं सेसाओ वि सक्खाओ
 अरक्खुरीए णयरीए । सत्तमो वग्गो समत्तो ॥ १५७ ॥ अट्टमस्स उवखेवओ ।
 एवं खलु जंबू ! जाव चत्तारि अज्झयणा पणत्ता तंजहा—चंदप्पभा दोसि-
 णाभा अच्चिमाली पमंकरा । पढमज्झयणस्स उवखेवओ । एवं खलु जंबू !
 तेणं कालेणं तेणं समएणं रायगिहे समोसरणं जाव परिसा पज्जुवासइ । तेणं
 कालेणं तेणं समएणं चंदप्पभा देवी चंदप्पमंसि विमाणंसि चंदप्पमंसि सीहा-
 सणंसि सेसं जहा कालीए णवरं पुव्वभवो महुराए णयरीए बंडि(चद)वडोए
 उज्जाणे चंदप्पभे गाहावई चंदसिरी भारिया चंदप्पभा दारिया चंदस्स अग्गम-
 हिंसी ठिई अट्टपलिओवमं पणत्ताए वाससहस्सेहि अग्गमहिंयं, सेसं जहा कालीए ।
 एवं सेसाओ वि महुराए णयरीए मायापियरो(वि)धूया सरिसणामा । अट्टमो
 वग्गो समत्तो ॥ १५८ ॥ णवमस्स उवखेवओ । एवं खलु जंबू ! जाव अट्ट
 अज्झयणा पणत्ता तंजहा—पउमा सिवा सई अंजू रोहिणी णवमिया[इ य]।
 अचला अच्छरा । पढमज्झयणस्स उवखेवओ । एवं खलु जंबू ! तेणं कालेणं
 तेणं समएणं रायगिहे समोसरणं जाव परिसा पज्जुवासइ । तेणं कालेणं तेणं
 समएणं पउमावई देवी सीहम्मे कप्पे पउमवडोसए विमाणे सभाए सुहम्माए
 पउमंसि सीहासणंसि जहा कालीए एवं अट्ट वि अज्झयणा कालीगमएणं णयध्वा
 णवरं सावत्थीए दोजणीओ हत्थिणाउरे दांजणीओ कपिलपुरे दोजणीओ
 सागेय णयरे दोजणीओ पउमे पियरो विजया नायरओ सक्खाओ वि
 पासस्स अंतिए पव्वइयाओ सबक्कस्स अग्गमहिंसीओ ठिई सत्त पलिओवमाइं
 महाविवेहे वासे अंतं कांहिति । णवमो वग्गो समत्तो ॥ १५९ ॥ दसमस्स
 उवखेवओ । एवं खलु जंबू ! जाव अट्ट अज्झयणा पणत्ता तंजहा—कण्हा य
 कण्हराई रामा तह रामरक्खिया वसूया । वसुगुत्ता वसुमित्ता वसुंधरा भेव
 ईसाणे ॥ १ ॥ पढमज्झयणस्स उवखेवओ । एवं खलु जंबू ! तेणं कालेणं तेणं
 समएणं रायगिहे समोसरणं जाव परिसा पज्जुवासइ । तेणं कालेणं तेणं समएणं
 कण्हा देवी ईसाणे कप्पे कण्हवडोसए विमाणे सभाए सुहम्माए कण्हंसि सीहा-
 सणंसि सेसं जहा कालीए एवं अट्ट वि अज्झयणा कालीगमएणं णयध्वा णवरं

पुक्कभवो वाणारसीए णयरीए दोजणीओ रायगिहे णयरे दोजणीओ सावत्थीए
 णयरीए दोजणीओ कोसंबीए णयरीए दोजणीओ रामे पिया धम्मा माया
 सव्वाओ वि पासस्स अरहूओ अतिए पच्चइयाओ पुष्कचूलाए अज्जाए सिस्सि-
 णियत्ताए ईसाणस्स अग्गमहिंसीओ ठिई णवपत्तिओवमाइं महाविदेहे वासे
 सिज्झिंहिति बुज्झिंहिति मुच्चिंहिति सव्वदुक्खाणं अंतं कांहिति । एवं खलु
 जंबू ! णिव्वेवओ दसमवग्गस्स । दसमो वग्गो समत्तो ॥ १६० ॥ एवं खलु
 जंबू ! समणेणं भगवया महावीरेणं आइगरेणं तित्थगरेणं सयंसंबुद्धेणं पुरिसो-
 त्तमेणं [पुरिससीहेणं] जाव संपत्तेणं धम्मकहाणं अपमट्ठे पणत्ते । धम्मकहा
 सुयक्खंधो समत्तो । दसहिं वग्गेहिं णायाधम्मकहाओ समत्ताओ ॥ १६१ ॥
 बीओ सुयक्खंधो समत्ता ॥

॥ णायाधम्मकहाओ समत्ताओ ॥



उवासगदसाओ

आणंदे णामं पढमं अज्झयणं

तेणं कालेणं तेणं समएणं चम्पा णामं णयरी होत्था । वण्णओ । पुण्णमद्दे चेइए । वण्णओ ॥ १ ॥ तेणं कालेणं तेणं समएणं अज्जसुहम्मे समोसरिए जाव जम्बू पज्जुवासमाणे एवं वयासी-जइ णं भंते ! समणेणं भगवया महावीरेणं जाव संपत्तेणं छट्टस्स अंगस्स णयाधम्मकहाणं अयमट्ठे पण्णत्ते, सत्तमस्स णं भंते ! अंगस्स उवासगदसाणं समणेणं जाव संपत्तेणं के अट्ठे पण्णत्ते ? एवं खलु जम्बू ! समणेणं जाव संपत्तेणं सत्तमस्स अंगस्स उवासगदसाणं दस अज्झयणा पण्णत्ता, तंजहा-आणंदे १, कामदेवे य २, गाहावइच्चुलणीपिया ३, सुरादेवे ४, चूल्लसयए ५, गाहावइकुंडकोलिए ६, सहालपुत्ते ७, महासयए ८, णंदिणीपिया ९, सालिहंभेपिया १० ॥ २ ॥ जइ णं भंते ! समणेणं जाव संपत्तेणं सत्तमस्स अंगस्स उवासगदसाणं दस अज्झयणा पण्णत्ता पढमस्स णं भंते ! समणेणं जाव संपत्तेणं के अट्ठे पण्णत्ते ? एवं खलु जम्बू ! तेणं कालेणं तेणं समएणं वाणिजगामे णामं णयरे होत्था । वण्णओ । तस्स [णं] वाणिजगामस्स णयरस्स बहिंया उत्तरपुरत्थिमे विसीभाए दूइपलासए णामं चेइए । तत्थ णं वाणिजगामे णयरे जियसत्तू राया होत्था । वण्णओ । तत्थ णं वाणिजगामे आणंदे णामं गाहावई परिवसइ, अइडे'जाव अपरिमूए । तस्स णं आणंदस्स गाहावइस्स चत्तारि हिरण्णकोडीओ णिहाणपउत्ताओ, चत्तारि हिरण्णकोडीओ वड्ढिपउत्ताओ, चत्तारि हिरण्णकोडीओ पवित्थरपउत्ताओ, चत्तारि वया दस-गोसाहस्सिएणं वएणं होत्था । से णं आणंदे गाहावई बहूणं राईसर जाव सत्थ-वाहाणं बहूसु कज्जेसु य कारणेसु य मंतेसु कुडुंबेसु य गुज्जेसु य रहस्सेसु य णिच्छएसु य ववहारेसु य आपुच्छणिज्जे पडिपुच्छणिज्जे, सयस्सवि य णं कुडुंबस्स मेढी पमाणं आहारे आलबणं चक्खू, मेढीभूए जाव सक्कज्जवड्ढा-वए यावि होत्था । तस्स णं आणंदस्स गाहावइस्स सिवाणंवा णामं भारिया होत्था, अहीण जाव सुरूवा आणंदस्स गाहावइस्स इट्ठा आणंदेणं गाहावइणा

सिद्धि अणुरस्ता अविरस्ता इट्टा सह जाव पंचविहे माणुस्सए कामभोए पच्चणु-
भवमाणी विहरइ । तस्स णं वाणियगामस्स बहिया उत्तरपुरच्छिमे दिमीमाए
एत्थ णं कोत्लाए णामं सण्णिवेसे होत्था, रिद्धस्थिमियं जाव पामाईए (४) ।
तत्थ णं कोत्लाए सण्णिवेसे आणंदस्स गाहावइस्स बहूए मित्तणाइणियगसयण-
संबंधिपरिजणे परिवसइ, अइठ्ठे जाव अपरिभूए । तेणं कालेणं तेणं समएणं समणे
भगवं महावीरे जाव समोसरिए । परिसा णिग्गया । कूणिए राया जहा तहा
जियसत्तू णिग्गच्छइ (२ ता) जाव पज्जुवासइ । तए णं से आणंदे गाहावई
इमीसे कहाए लद्धट्ठे समणे ' एवं खलु समणे जाव विइरइ, तं महाफलं [जाव]
गच्छामि णं जाव पज्जुवासामि ' एवं सपेहेइ संपेहिता ण्हाए सुद्धपावेसाइं
जाव अप्पमहग्घाभरणालं कियसरीरे सयाओ विहाओ पडिणिववमइ, पडिणिवव-
मित्ता सकोरंटमहलदामेणं छत्तेणं धरिज्जमाणेणं मणुस्सवग्गुरापरिविखस्से पाय-
विहारवारेणं वाणियगामं णयरं मज्झमज्जेणं णिग्गच्छइ, णिग्गच्छिता जेणामेव
दूइपलासे चेइए जेणेव समणे भगवं महावीरे तेणेव उवागच्छइ, उवागच्छित्त
तिवखुत्तो आयाहिणं पयाहिणं करेइ, करेत्ता वंदइ णमंसइ जाव पज्जुवासइ ।
तए णं समणे भगवं महावीरे आणंदस्स गाहावइस्स तीसे य महइमहालिदाए
परिसाए जाव धम्मकहा, परिसा पडिगया, राया य गए ॥३॥ तए णं से
आणंदे गाहावई समणस्स भगवओ महावीरस्स अंतिए धम्मं सोच्चा णिसम्म
हट्टतुट्ट जाव एवं वयासी- 'सद्दहामि णं भंते ! णिग्गंथं पावयणं, पत्तियामि णं
भंते ! णिग्गंथं पावयणं, रोएभि णं भंते ! णिग्गंथं पावयणं, एवमेयं भंते !,
तहमेयं भंते !, अविहमेयं भंते !, इच्छियमेयं भंते !, पडिच्छियमेयं भंते !,
इच्छियपडिच्छियमेयं भंते !, से जहेयं तुवमे वयह ' त्तिक्कट्टु जहा णं देवाणु-
प्पियाणं अंतिए बहवे राईसरतलवरसाडंबियकोडुंबियसेट्टि (सेणायइ) सत्थ-
वाहएप्पभिइया मुंडे भवित्ता अगाराओ अणगारियं पव्वइया, णो खलु अहं तहा
संत्ताएमि मुंडे जाव पव्वइसए, अहं णं देवाणुप्पियाणं अंतिए पंचाणुव्वइयं
सत्तसिक्खवाइयं दुवालसविहं गिहिधम्मं पडिबज्जिस्सागि । अहानुहं देवाणु-
प्पिया ! मा पडिबंधं करेहि ॥ ४ ॥ तए णं से आणंदे गाहावई समणस्स
भगवओ महावीरस्स अंतिए तप्पढमयाए थूलगं पाणाइवायं पच्चक्खाइ,
' जावज्जीवाए दुविहं तिविहेणं ण करेमि ण कारवेमि मणसा वयसा कायसा ' १ ।

तयाणंतरं च णं थूलगं मुसावायं पच्चवखाइ, 'जावज्जीवाए दुविहं तिविहेणं ण करेमि ण कारवेमि मणसा वयसा कायसा' २ । तयाणंतरं च णं थूलगं अदिष्णादाणं पच्चवखाइ, 'जावज्जीवाए दुविहं तिविहेणं ण करेमि ण कारवेमि मणसा वयसा कायसा' ३ । तयाणंतरं च णं सदारसंतोसिए परिमाणं करेइ, 'णणत्थएवकाए सिवणंदाए भारियाए, अवसेसं सच्चं मेहूणविहिं पच्चवखा(इ)मि मणसा वयसा कायसा ४ । तयाणंतरं च णं इच्छाविहिपरिमाणं करेमाणे हिरणसुवणविहिपरिमाणं करेइ, णणत्थ चउहिं हिरणकोडीहिं णिहाणपउत्ताहिं, चउहिं बुद्धिपउत्ताहिं चउहिं पवित्थर-पउत्ताहिं, अवसेसं सच्चं हिरणसुवणविहिं पच्चवखामि ३' । तयाणंतरं च णं चउप्यविहिपरिमाणं करेइ, 'णणत्थ चउहिं वएहिं दसगोसाहस्सिएणं वएणं, अवसेसं सच्चं चउप्यविहिं पच्चवखामि ३' । तयाणंतरं च णं खेत्तवत्थविहि-परिमाणं करेइ, 'णणत्थ पंचहिं हलसएहिं णियत्तणसइएणं हलेणं अवसेसं सच्चं खेत्तवत्थविहिं पच्चवखामि ३' । तयाणंतरं च णं सगडविहिपरिमाणं करेइ, 'णणत्थ पंचहिं सगडसएहिं दिसायत्तिएहिं, पंचहिं सगडसएहिं संवाहणिएहिं, अवसेसं सच्चं सगडविहिं पच्चवखामि ३' । तयाणंतरं च णं वाहणविहिपरि-माणं करेइ, 'णणत्थ चउहिं वाहणेहिं, दिसायत्तिएहिं चउहिं वाहणेहिं संवा-हणिएहिं, अवसेसं सच्चं वाहणविहिं पच्चवखामि ३' ५ । तयाणंतरं च णं उव-भोगपरिभोगविहिं पच्चवखाएमाणे उल्लणियाविहिपरिमाणं करेइ, 'णणत्थ एमाए गंधकासाइए, अवसेसं सच्चं उल्लणियाविहिं पच्चवखामि ३' । तया-णंतरं च णं दंतवणविहिपरिमाणं करेइ, 'णणत्थ एगेणं अल्ललट्ठीमहुएणं, अवसेसं दंतवणविहिं पच्चवखामि ३' । तयाणंतरं च णं फलविहिपरिमाणं करेइ, 'णणत्थ एगेणं खीरामलएणं, अवसेसं फलविहिं पच्चवखामि ३' । तयाणंतरं च णं अढ्मंगणविहिपरिमाणं करेइ, 'णणत्थ सयपागसहस्सपा-गेहिं तेल्लेहिं, अवसेसं अढ्मंगणविहिं पच्चवखामि ३' । तयाणंतरं च णं उव्वट्ट(ण)णाविहिपरिमाणं करेइ, 'णणत्थ एगेणं सुरहिणा गंधट्टएणं, अव-सेसं उव्वट्टणाविहिं पच्चवखामि ३, । तयाणंतरं च णं मज्जणविहिपरिमाणं करेइ, 'णणत्थ अट्ठीहिं उट्टिएहिं उदगस्स घडएहिं, अवसेसं मज्जणविहिं पच्चवखामि ३' । तयाणंतरं च णं वत्थविहिपरिमाणं करेइ, 'णणत्थ एगेणं

लोमज्वलेणं, अवसेसं वत्थविहि पच्चवखामि ३' । तयाणंतरं च णं विलेवण-
 विहिपरिमाणं करेइ, 'णणत्थ अगरुकुंकुमचन्दणमादिएहि, अवसेसं विले-
 वणविहि पच्चवखामि ३' । तयाणंतरं च णं पुफविहिपरिमाणं करेइ, 'णणत्थ
 एगेणं सुद्धपउमेणं मालइकुमुमवामेणं वा, अवसेसं पुफविहि पच्चवखामि ३' ।
 तयाणंतरं च णं आमरणविहिपरिमाणं करेइ, 'णणत्थ मट्टकण्णेज्जएहि
 णाममूहाए य, अवसेसं आमरणविहि पच्चवखामि ३' । तयाणंतरं च णं धूवण-
 विहिपरिमाणं करेइ, 'णणत्थ अगरुतुरुवकधूवमाइएहि, अवसेसं धूवणविहि
 पच्चवखामि ३' । तयाणंतरं च णं भोयणविहिपरिमाणं करेमाणे पेज्जविहि-
 परिमाणं करेइ, 'णणत्थ एगाए कट्टपेज्जाए अवसेसं पेज्जविहि पच्चवखामि
 ३' । तयाणंतरं च णं भवखविहिपरिमाणं करेइ, 'णणत्थ एगेहि घयपुण्णेहि
 खंडखज्जएहि वा, अवसेसं भवखविहि पच्चवखामि ३' । तयाणंतरं च णं
 ओदणविहिपरिमाणं करेइ, 'णणत्थ कलमसालिओदणेणं, अवसेसं ओदण-
 विहि पच्चवखामि ३' । तयाणंतरं च णं सूवविहिपरिमाणं करेइ, 'णणत्थ
 कलायसूवेण वा मुगमाससूवेण वा, अवसेसं सूवविहि पच्चवखामि ३' । तया-
 णंतरं च णं घयविहिपरिमाणं करेइ, 'णणत्थ सारइएणं मोघयमडेणं,
 अवसेसं घयविहि पच्चवखामि ३' । तयाणंतरं च णं सागविहिपरिमाणं करेइ,
 'णणत्थ वत्थसाएण वा तुंबसाएण वा सुत्थियसाहण वा मंडुक्कियसाएण वा
 अवसेसं सागविहि पच्चवखामि ३, । तयाणंतरं च णं माहुरयविहिपरिमाणं
 करेइ, 'णणत्थ एगेणं पालंगामाहुरएणं अवसेसं माहुरयविहि पच्चवखामि ३'
 तयाणंतरं च णं जेमणविहिपरिमाणं करेइ, 'णणत्थ सेहंबदालियबोह,
 अवसेसं जेमणविहि पच्चवखामि ३' । तयाणंतरं च णं पाणियविहिपरि-
 माणं करेइ, 'णणत्थ एगेणं अंतलिकखोदएणं, अवसेसं पाणियविहि पच्च-
 वखामि ३, । तयाणंतरं च णं मुहवासविहिपरिमाणं करेइ, 'णणत्थ पंचसो-
 गन्धिएणं तम्बोलेणं अवसेसं मुहवासविहि पच्चवखामि ३' ६ । तयाणंतरं च
 णं चउत्विहं अणट्टादण्डं पच्चवखाइ, तंजहा—अवज्झाणावरियं प्सायावरियं
 हिसप्पयाणं पावकम्मोवएसे ३, ७ ॥ ५ ॥ इह खलु 'आणंदाहं ! समणे भगवं
 महावीरे आणंदं समणोवासणं एवं वयासी—'एवं खलु आणंदा ! समणोवास-
 एणं अभिगयजीवाजीवेणं जाव अणइक्कमणिज्जेणं सम्मत्तस्स पंच अइयारा

पेयाला जाणियव्वा ण समायरियव्वा, तंजहा—संका, कंखा, विड्मिच्छा, परपासंड-
पसंसा, परपासंडसंथवो । तयाणंतरं च णं थूलगस्स पाणाइवायवेरमणस्स
समणोवाएणं पंच अइयारा पेयाला जाणियव्वा ण समायरियव्वा, तंजहा—
अंधे, वहै, छविच्छेए, अइमारे, भत्तवाणवोच्छेए १ । तयाणंतरं च णं थूलगस्स
मुसावायवेरमणस्स पंच अइयारा जाणियव्वा ण समायरियव्वा, तंजहा—सहसा-
अभक्खाणे, रहसाअभक्खाणे, सदारमंतमेए, मोसोवएसे, कूडलेहकरणे २ ।
तयाणंतरं च णं थूलगस्स अदिष्णादाणवेरमणस्स पंच अइयारा जाणियव्वा ण
समायरियव्वा, तंजहा—तेणाहडे, तक्करप्पओगे, विरुद्धरज्जाइवकमे, कूडतुल-
कूडमाणे, तप्पडिरुवगववहारे ३ । तयाणंतरं च णं सदारसंतोसिए पंच
अइयारा जाणियव्वा ण समायरियव्वा, तंजहा—इत्तरियपरिगहियागमणे
अपरिग्गहियागमणे, अणंगकीडा, परविवाहकरणे कामभोगतिव्वाभिलासे
४ । तयाणंतरं च णं इच्छापरिमाणस्स समणोवासएणं पंच अइयारा
जाणियव्वा ण समायरियव्वा, तंजहा—खेत्तवत्थुपमाणाइवकमे, हिरण्णसुवण्ण-
पमाणाइवकमे, दुपयच्चउप्पयपमाणाइवकमे, धणधणपमाणाइवकमे, कुविय-
पमाणाइवकमे ५ । तयाणंतरं च णं विसियव्यस्स पंच अइयारा जाणियव्वा
ण समायरियव्वा, तंजहा—उडुविसिपमाणाइवकमे, अहोविसिपमाणाइवकमे,
तिरियविसिपमाणाइवकमे, खेत्तवुड्ढी,सइअंतरद्धा ६ । तयाणंतरं च णं उवभोग-
परिभोगे दुविहे पणत्ते, तंजहा—भोयणओ य कम्मओ य । तत्थ णं भोयणआं
समणोवासएणं पंच अइयारा जाणियव्वा ण समायरियव्वा, तंजहा—सच्चित्ता-
हारे, सच्चित्तपडिबद्धाहारे, अप्पउत्तिओसंहिभक्खणया, दुप्पउत्तिओसंहिभक्ख-
णया, तुच्छोसंहिभक्खणया । कम्मओ णं समणोवासएणं पण्णरस कम्मादाणाइं
जाणियव्वाइं ण समायरियव्वाइं, तंजहा—इंगालकम्मे, वण्णकम्मे, साडीकम्मे,
भाडीकम्मे, फोडीकम्मे, दंतवाणिज्जे, लक्खवाणिज्जे, रसवाणिज्जे, विस-
वाणिज्जे, केसवाणिज्जे, जंतपीलणकम्मे, णिल्लंछणकम्मे, दवगिदावणया,
सरदहतलावसोसणया, असईजणपोसणया ७ । तयाणंतरं च णं अणट्टादण्डवेर-
मणस्स समणोवासएणं पंच अइयारा जाणियव्वा ण समायरियव्वा, तंजहा—
कंदप्ये, कुक्कुइए, मोहरिए, संजुत्ताहिगरणे, उवभोगपरिभोगाइरित्ते ८ । तया-
णंतरं च णं सामाइयस्स समणोवासएणं पंच अइयारा जाणियव्वा ण समा-

परियच्वा, तंजहा—मणदुष्पणिहाणे, वयदुष्पणिहाणे, कायदुष्पणिहाणे, सामाद-
यस्स सहअकरणया, सामादयस्स अणवट्ठियस्स करणया ६ । तयाणंतरं च णं
देसावगात्तियस्स समणोवासएणं पंच अइयारा जाणियच्वा ण समायरियच्वा,
तंजहा—अणवणप्पओगे, पेसवणप्पओगे, सट्ठाणुवाए, रूवाणुवाए, बहिया पोगल-
पवखेवे १० । तयाणंतरं च णं पोसहोववासस्स समणोवासएणं पंच अइयारा
जाणियच्वा ण समायरियच्वा, तंजहा—अप्पडिलेहियदुष्पडिलेहियसिज्जासंयारे,
अप्पमज्जियदुष्पमज्जियसिज्जासंयारे, अप्पडिलेहियदुष्पडिलेहियउच्चारपास-
वणभूमी, अप्पमज्जियदुष्पमज्जियउच्चारपासवणभूमी, पोसहोववासस्स सम्मं
अणुपालणया ११ । तयाणंतरं च णं अहासंविभागस्स समणोवासएणं पंच
अइयारा जाणियच्वा ण समायरियच्वा, तंजहा—सच्चित्तणिवखेवणया, सच्चित्तपिह-
णया, कालाड्ढकमे, परो(र)ववदेसे, मच्छरिया १२ । तयाणंतरं च णं अपच्छिम-
मारणत्तियसलेहणात्तुसणाराहणाए पंच अइयारा जाणियच्वा ण समायरियच्वा,
तंजहा—इहलोगाससंप्पओगे, परलोगाससंप्पओगे, जीवियासंस्पओगे, मरणा-
संस्पओगे, कामभोगासंस्पओगे १३ ॥ ६ ॥ तए णं से आणदे गाहावई सम-
णस्स भगवओ महावीरस्स अंतिए पंचाणुव्वइयं सत्तसिक्खावइयं दुवालसविहं
सावयधम्मं पडिवज्जइ, पडिवज्जिता समणं भगवं महावीरं वंदइ णमंसइ,
वदित्ता णमंसित्ता एवं वयासी—णो खलु मे भंते ! कप्पइ अज्जप्पमिइं
अण्णउत्थिए वा अण्णउत्थियदेवयाणि वा अण्णउत्थिय परिग्गहिधाणि वा
वदित्तए वा णमंसित्तए वा, पुट्ठिअ अणालत्तेणं आलवित्तए वा संसवित्तए
वा, तेसि असणं वा पाणं वा खाइमं वा साइमं वा दाउं वा अणुप्पहाउं
वा, ण्णत्थ रायाभिओगेणं गणामिओगेणं बलामिओगेणं देवयामिओगेणं
गुरुणिग्गहेणं वित्तिकतारेणं । कप्पइ मे समणे णिग्गंथे फासुएणं एसणिज्जेणं
असणपाणखाइमसाइमेणं वरथपडिग्गहक्कम्बलपायपंछुणेणं पीडफलगसिज्जा-
संथारएणं ओसहभेसज्जेण य पडिलाभेसाणस्स विहरित्तए' तिकट्ट इमं
एयारुवं अभिग्गहं अमिणिहइ, अमिणिहिहत्ता पसिणाइं पुच्छइ, पुच्छिता
अट्टाइं आदियइ, आदित्ता समणं भगवं महावीरं तिवखुत्तो वंदइ, वदित्ता
समणस्स भगवओ महावीरस्स अंतिथाओ दूइपलासाओ चेइयाओ पडिणिवल-
मइ, पडिणिवलमित्ता जेणेव वाणिययामे णयरे जेणेव सए गिहे तेणेव उवा-
मच्छइ, उवाग्गच्छित्ता सिवणंदं भारियं एवं वयासी—' एवं खलु देवाणुप्पिए ।

सए समणस्स भगवओ महावीरस्स अंतिए धम्मे णिसंते, सेऽवि य धम्मे मे इच्छिए पडिच्छिए अभिरुइए, तं गच्छ णं तुमं देवान्णिएए ! समणं भगवं महावीरं वंदाहि जाव पज्जुवासाहि, समणस्स भगवओ महावीरस्स अंतिए पंचाणुव्वइयं सत्तसिक्खावइयं दुवालसविहं गिहिधम्मं पडिवज्जाहि' ॥ ७ ॥ तए णं सा सिवणंदा भारिया आणंदेणं समणोवासएणं एवं बुत्ता समाणा हट्ट-तुट्टा कोडुंनियपुरिसे सदावेइ, सदावेत्ता एवं वयासी- 'खिप्पामेव लहुकरण जाव पज्जुवासइ । तए णं समणे भगवं महावीरे सिवणंदाए तीसे य महइ जाव धम्मं कहेइ । तए णं सा सिवणंदा समणस्स भगवओ महावीरस्स अंतिए धम्मं सोच्चा णिसम्म हट्ट जाव गिहिधम्मं पडिवज्जइ २ ता तमेव धम्मियं जाणप्पवरं दुरूहड, दुरूहिता जामेव दिंसि पाउड्ढ्या तामेव दिंसि पडिगया ॥८॥ 'भंते'त्ति भगवं गोयमे समणं भगवं महावीरं वंदइ णमंसइ, वंदिसा णमंसिता एवं वयासी- 'पहू णं भंते ! आणंदे समणोवासए देवान्णुप्पियाणं अंतिए म्णडे जाव पव्वइ-त्तए ?' णो इणट्ठे समट्ठे, गोयमा ! आणंदे णं समणोवासए बहूइं वासाइं समणोवासगपरियागं पाउणिहिइ, पाउणित्ता जाव सोहम्मे कप्पे अरुणे विमाणे देवत्ताए उव्वज्जिहिइ । तत्थ णं अत्थेगइयाणं देवाणं चत्तारि पलिओवमाइं ठिई पणत्ता । तत्थ णं आणंदस्सवि समणोवासगस्स चत्तारि पलिओवमाइं ठिई पणत्ता । तए णं समणे भगवं महावीरे अणया कयाइ बहिया जाव विहरइ । तए णं से आणंदे समणोवासए जाए अभिगयजीवाजीवे जाव पडिलामेमाणे विहरइ । तए णं सा सिवणंदा भारिया समणोवासिया जाया जाव पडिलामे-माणी विहरइ ॥ ९ ॥ तए णं तस्स आणंदस्स समणोवासगस्स उच्चावएहि सीलव्वयगुणवेरमणपच्चक्खाणपोसहोववासेहिं अप्पाणं भावेमाणस्स चोइम संवच्छराइं वइवकंताइं, पण्णरसमस्स संवच्छरस्स अंतरा वट्टमाणस्स अणया कयाइ पुव्वरत्तावरत्तकालसमयंसि धम्मजागरियं जागरमाणस्स इमेयारुवे अज्झत्थिए चित्तिए पत्थिए मणोए संकप्पे समुप्पज्जित्था- ' एवं खलु अहं वाणियमासे णयरे बहूणं राईसर जाव सयस्सवि य णं कुड्ढ्वस्स जाव आधारे, तं एएणं विक्खवेणं अहं णो संचाएमि समणस्स भगवओ महावीरस्स अंतियं धम्मपण्णत्ति उव्वसंपज्जित्ताणं विहरित्तए, तं सेयं खलु ममं कलं जाव जलंते विउलं असणं० जहा पूरणो जाव जेट्टुत्तं कुड्ढ्वे ठवेत्ता तं मित्त

जाव जेट्टपुत्तं च आपुच्छित्ता कोल्लाए सण्णिवेसे णायकुलंसि पोमहसालं पडि-
 लेहित्ता समणस्स भगवओ महावीरस्स अतियं धम्मपण्णात्ति उवसंपज्जित्ता णं
 विहरित्ताए' एवं सपेहेइ, सपेहित्ता कल्लं विउलं, तहेव जिगियमत्तत्तरागए
 तं मित्त जाव विउलेणं पुफ्फ ५ सबकारेइ सम्माणेइ सबकारित्ता सम्माणत्ता
 तस्मेव मित्त जाव पुरओ जेट्टपुत्तं सद्दावेइ, सद्दावेत्ता एवं वयासी—' एवं खलु
 पुत्ता ! अहं वाणियगामे बहूणं राईसर जहा च्चित्तियं जाव विहरित्ताए, तं सेयं
 खलु मम इवाणि तुमं सयस्स कुडुम्बस्स आलम्बणं ४ ठवेत्ता जाव विहरित्ताए' ।
 तए णं जेट्टपुत्ते आणदस्स समणोवासगस्स लहत्ति एयमट्ठं विणएणं पडि-
 सुणंइ । तए णं से आणदे समणोवासए तस्सेव मित्त जाव पुरओ जेट्टपुत्तं
 कुडुम्बे ठवेइ, ठवेत्ता एवं वयासी—' मा णं देवाणुप्पया ! तुदमं अज्जप्पभिइ
 केइ मम बहूसु कज्जेसु जाव आपुच्छउ वा पडिपुच्छउ वा, ममं अट्टाए अणणं
 वा ४ उववखडेउ वा उवकरेउ वा । तए णं से आणदे समणोवासए जेट्ट-
 पुत्तं मित्तणाइ आपुच्छइ, आपुच्छित्ता सयाओ गिहाओ पडिणिक्खमइ, पडि-
 णिक्खमित्ता वाणियगामं णयरं मज्झमज्जेणं णिगच्छइ, णिगच्छित्ता जेणेव
 कोल्लाए सण्णिवेसे जेणेव णायकुले जेणेव पोसहसाला तेणेव उवागच्छइ,
 उवागच्छित्ता पोसहसालं पमज्जइ, पमज्जित्ता उच्चारपासवणभूमि पडिलेहेइ,
 पडिलेहित्ता दढ्मसंथारयं संथरइ, दढ्मसंथारयं दुरूहइ, दुरूहित्ता पोसहसालाए
 पोसहिए दढ्मसंथारोवगए समणस्स भगवओ महावीरस्स अतियं धम्मपण्णात्ति
 उवसंपज्जित्ता णं विहरइ ॥ १० ॥ तए णं से आणदे समणोवासए उवातग-
 पडिमाओ उवसंपज्जित्ता णं विहरइ । पहमं उवासगपडिमं अहासुत्तं अहाकप्पं
 अहामगं अहातच्चं सम्मं काएणं फासेइ पालेइ सोहेइ तीरेइ कित्तेइ
 आराहेइ । तए णं से आणदे समणोवासए दोच्चं उवासगपडिमं, एवं
 तच्चं चउत्थं पंचमं छट्ठं सत्तमं अट्टमं णवमं दसमं एक्कारत्तां जाव
 आराहेइ ॥ ११ ॥ तए णं से आणदे समणोवासए इमेणं एयारूवेणं उरा-
 लेणं विउलेणं पयसेणं पग्गहिएणं तवोकम्मेणं सुवके जाव किसे धम्मणिसंतए
 जाए । तए णं तस्स आणदस्स समणोवासगस्स अण्णया कयाइ पुत्तरत्ता जाव
 धम्मजागरियं जागरमाणस्स अयं अज्झत्थिए ५—एवं खलु अहं इमेणं जाव
 धम्मणिसंतए जाए, तं अत्थि ता मे उट्टाणे कम्मे बले धीरिए पुरिसवकारप-

ककमे सद्धाधिइसंवेगे, तं जाव ता मे अत्थि उट्ठाणे सद्धाधिइसंवेगे जाव थ मे धम्मयायिए धम्मोवएसए समणे भगवं महावीरे जिणे सुहत्थी विहरइ ताक् ता-मे सेयं कल्लं जाव जलंते अपच्छिम्ममारणंतियसंलेहणाञ्जुसणाञ्जुसियसस भत्तपाणपडियाइक्खियस्स कालं अणवकंखमाणस्स विहरित्तए' एवं संपेहेइ, सपेहिता कल्लं पाउ जाव अपच्छिम्ममारणंतिय जाव कालं अणवकंखमाणे विहरइ । तए णं तस्स आणंदस्स समणोवासगस्स अणया कयाइ सुभेणं अज्झव-साणेणं सुभेणं परिणामेणं लेसाहि विसुज्झमाणीहि तदावरणिज्जाणं कम्माणं खओवसमेणं ओहिणाणे समुप्पण्णे । पुरत्थिमेणं लवणसमूहे पंचजोयणसयाइं खेतं जाणइ पासइ, एवं दक्खिणेणं पच्चत्थिमेणं य, उत्तरेणं जाव चुल्ल-हिमवंतं वासधरंपव्वयं जाणइ पासइ, उड्ढं जाव सोहम्मं कप्पं जाणइ पासइ, अहे जाव इमीसे रयणप्पभाए पुढवीए लोलुयक्कचुयं णरयं चउरासीइवाससह-स्सट्ठिइयं जाणइ पासइ ॥ १२ ॥ तेणं कालेणं तेणं समएणं समणे भगवं महा-वीरे समोसरिए, परिस्स णिग्गया जाव पडिगया । तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूई णामं अणगारे गोयम-योत्तेणं सत्तस्सेहे समच्चउरंसंठाणसंठिए वज्जरिसहणारायसंघयणे कणमपुल-गणिघसपम्हगोरे उग्गतवे दित्ततवे तत्ततवे घोरतवे महातवे उराले घोरगुणे घोरत्तवस्सी घोरबम्भचेरवासी उच्छूढसरिरे संखित्तविउलतेउलेसे छट्ठंछट्ठंठंठं अणिकिखत्तेणं तवोकम्मैणं सज्जमेणं तवसा अप्पाणं भावेमाणे विहरइ । तए णं से भगवं गोयमे छट्ठवक्खमणपारणगंसि पढमाए पोरिसीए सज्जायं करेइ, बिइ-याए पोरिसीए ज्ञाणं ज्ञियाइ, तइयाए पोरिसीए अतुरियं अचवलं असम्भंते मुहपत्ति पडिलेहेइ, २ ता भायणवत्थाइं पडिलेहेइ, २ ता मायणवत्थाइं, २ पमज्जइ, २ ता भायणाइं उग्गाहेइ, उग्गाहेत्ता जेणेव समणे भगवं महावीरे तेणेव उवागच्छइ, उवागच्छित्ता समणं भगवं महावीरं वंदइ णमंसइ, वंदित्ता णमंसित्ता एवं वयासी- 'इच्छामि णं भंते ! तुब्भोहि अब्भणुण्णाए छट्ठवक्खमणस्स पारणगंसि वाणियगामे णयरे उच्चणीयमज्झमाइं कुलाइं घरसमुदाणस्स भिक्खायरियाए अडित्तए' । अहामुहं देवाणुप्पिया ! मा पडिबंधं करेह । तए णं भगवं गोयमे समणेणं भगवथा महावीरेणं अब्भणुण्णाए समाणे समणस्स भगवओ महावीरस्स अंतियाओ दूइपलासाओ वेइयाओ पडिणिवक्खमइ,

पडिणिवसिन्ता अतुरियमच्चवलमसम्भन्ते जुगंतरपरितोयणाए विट्ठाए पुरओ ई(इ)रियं सोहेमाणे जेणेव वाणियगामे णयरे तेणेव उवागच्छइ, उवामिच्छता वाणियगामे णयरे उच्चणीयमज्झिमाइं कुलाइं धरसमुदाणस्स भिक्खायरियाए अडइ । तए णं से भगवं गोयमे वाणियगामे णयरे जहा पण्णत्तीए तहा जाव भिक्खायरियाए अडमाणे अहापज्जत्तं षत्तपाणं सम्मं पडिगाहेइ, पडिगाहिता वाणियगामाओ पडिगिगच्छइ पडिणिभाच्छित्ता कोल्लायस्स सण्णिवेसस्स अदूरसामतेणं वीईवयमाणे बहुजणसद्दं णिसामेइ । बहुजणो अण्णमण्णस्स एयमाइवलइ ४-‘एवं खलु देवानुप्पिया ! ससणस्स भगवओ महावीरस्स अंतेवासी आणंदे णामं समणोवासए पोसहसालाए अपच्छिम जाव अणवक्खंमाणे विहरइ’ । तए णं तस्स गोयमस्स बहुजणस्स अंतिए एयमट्ठं सोच्चा णिसम्म अयमेयारूवे अज्झस्थिए ४-‘तं गच्छामि णं आणंदं समणोवासयं पासामि’ एवं संपेहेइ, संपेहिता जेणेव कोल्लाए सण्णिवेसे जेणेव आणंदे समणोवासए जेणेव पोसहसाला तेणेव उवागच्छइ । तए णं से आणंदे समणोवासए भगवं गोयमं एज्जमाणं पासइ, पासित्ता हट्ठ जाव हियए भगवं गोयमं बंदइ णमंसइ, बंदित्ता णमंसित्ता एवं वयासी-‘एवं खलु भंते ! अहं इमेणं उरालेणं जाव धमणिसंतए जाए, णो संचाएमि देवानुप्पियस्स अंतियं पाउब्भवित्ता णं तिवखुत्तो मुद्धाणेणं पाए अभिबंदित्तए, तुवमे णं भंते ! इच्छाकारेणं अणभिओएणं इओ जेव एह, जा णं देवानुप्पियाणं तिवखुत्तो मुद्धाणेणं पाएसु वंदामि णमंतामि’ तए णं से भगवं गोयमे जेणेव आणंदे समणोवासए तेणेव उवागच्छइ ॥ १३ ॥ तए णं से आणंदे समणोवासए भगवओ गोयमस्स तिवखुत्तो मुद्धाणेणं पाएसु बंदइ णमंसइ, बंदित्ता णमंसित्ता एवं वयासी-‘अत्थि णं भंते ! गिहिणो गिहिमज्जावसंतस्स ओहिणाणे समुप्पज्जइ?’ हंता अत्थि । जइ णं भंते ! गिहिणो जाव समुप्पज्जइ, एवं खलु भंते ! ममवि गिहिणो गिहिमज्जावसंतस्स ओहिणाणे समुप्पण्णे-पुरत्थिमेणं लवणसमुद्दे पंच जोयणसयाइं जाव लोलुपच्चयं णरयं जाणामि पासामि । तए णं से भगवं गोयमे आणंदं समणोवासयं एवं वयासी-‘अत्थि णं आणंदा ! गिहिणो जाव समुप्पज्जइ, णो जेव णं एमहालए, तं णं तुमं

आणंदा ! एयस्स ठाणस्स आलोएहि जाव तवोकम्मं पडिवज्जाहि' । तए णं से आणंदे समणोवासए भगवं गोयमं एवं वयासी- 'अत्थि णं भंते ! जिणवयणे संताणं तच्चाणं तहियाणं सम्भूयाणं भावाणं आलोइज्जइ जाव पडिवज्जि-ज्जइ ?' णो इणट्ठे समट्ठे । 'जइ णं भंते ! जिणवयणे संताणं जाव भावाणं णो आलोइज्जइ जाव तवोकम्मं णो पडिवज्जिज्जइ तं णं भंते ! तुब्भे चेव एयस्स ठाणस्स आलोएहि जाव पडिवज्जइ' । तए णं से भगवं गोयमे आणंदेणं समणोवासएणं एवं वुत्ते समणे संकिए कंखिए विइगिच्छासमावण्णे आणंदस्स अंतियाओ पडिणिकखमइ, पडिणिकखमिता जेणेव दूइपलासे चेइए जेणेव समणे भगवं महावीरे तेणेव उवागच्छइ, उवागच्छिता समणस्स भगवओ महावीरस्स अदूरसामंते गमणागमणाए पडिक्कमइ, पडिक्कमिता एसणमणे-सणं आलोएइ, आलोएत्ता भत्तपाणं पडिदंसेइ, पडिदंसित्ता समणं भगवं महावीरं वंदइ णमंसइ, वंदित्ता णमंसित्ता एवं वयासी- 'एवं खलु भंते ! अहं तुब्भेहि अम्मणुष्णाए तं चेव सव्वं कहेइ जाव तए णं अहं संकिए ३ आणंदस्स समणोवासणस्स अंतियाओ पडिणिकखमामि, पडिणिकखमिता जेणेव इहं तेणेव हव्वमागए, तं णं भंते ! किं आणंदेणं समणोवासएणं तस्स ठाणस्स आलोएयव्वं जाव पडिवज्जेयव्वं उदाहु मए ?' 'गोयमाइ ! समणे भगवं महावीरे भगवं गोयमं एवं वयासी- 'गोयमा ! तुमं चेव णं तस्स ठाण-स्स आलोएहि जाव पडिवज्जाहि, आणंदं च समणोवासयं एयमट्ठं खामेहि' । तए णं से भगवं गोयमे समणस्स भगवओ महावीरस्स 'तहत्ति एयमट्ठं विण-एणं पडिसुणेइ, पडिसुणेत्ता तस्स ठाणस्स आलोएइ जाव पडिवज्जइ, आणंदं च समणोवासयं एयमट्ठं खामेइ । तए णं समणे भगवं महावीरे अण्णया कयाइ बहिया जणवयविहारं विहरइ ॥ १४ ॥ तए णं से आणंदे समणोवासए बर्हीहि सीलव्वएहि जाव अप्पाणं भावेत्ता वीसं वासाइं समणोवासगपरियाणं पाउणित्ता एक्कारस य उवासगपडिमाओ सम्मं काएणं फासित्ता मासियाए संलेहणाए अत्ताणं झूसित्ता सट्ठि मत्ताइं अणसणाए छेदेत्ता आलोइयपडिक्कंते समाहिपत्ते कालमासे कालं किच्चा सोहम्मे कप्पे सोहम्मवडिसणस्स महाविमा-णस्स उत्तरपुरिच्छमेणं अरुणे विमाणे देवत्ताए उववण्णे । तत्थ णं अत्थेगइ-याणं देवाणं चत्तारि पत्तिओवमाइं ठिई पणत्ता, तत्थ णं आणंदस्सवि देवस्स

चत्तारि पलिओवमाइं ठिईं पणत्ता । आणंदे णं भंते ! देवे ताओ देवलोगाओ
आउवत्तएणं ३ अणंतरं चयं चइत्ता कंहि गच्छिहिइ ? कंहि उववज्जिहिइ ?
गोयमा ! महाविदेहे वासे सिज्जिहिइ ॥ १५ ॥ णिक्खेवो ॥

॥ पढमं अज्झयणं समत्तं ॥

कामदेवे णामं बीयं अज्झयणं

जइ णं भंते ! समणेणं भगवया महावीरेणं जाव संपत्तेणं सत्तमस्स अंगस्स
उवासगदसाणं पढमस्स अज्झयणस्स अयमट्ठे पणत्ते, दोचस्स णं भंते !
अज्झयणस्स के अट्ठे पणत्ते ? एवं खलु जम्बू ! तेणं कालेणं तेणं समएणं
चंपा णामं णयरी होत्था । पुण्णभदे चेइए । जियमत्त राया । कामदेवे गाहावइ ।
भट्टा भारिया । छ हिरणकोडीओ णिहाणपउत्ताओ, छ वुड्ढिपउत्ताओ,
छ पवित्थरपउत्ताओ । छ वया दसगोसाहस्सिएणं वएणं । (तेणं का० तेणं स०
भगवं म०) समोसरणं । जहा आणंदो तहा णिगओ, तहेव सावयधम्मं पडि-
वज्जइ । सा चेव वत्तवया जाव जेट्टपुत्तं मित्ताणं (आपुच्छइ) आपुच्छित्ता
जेणेव पोसहसाला तेणेव उवागच्छइ, उवागच्छित्ता जहा आणंदो जाव समणस्स
भगवओ महावीरस्स अंतियं धम्मपणत्ति उवसंपज्जित्ताणं विहरइ ॥ १६ ॥
तए ण तस्स कामदेवस्स समणोवासगस्स पुव्वरत्तावरत्तकालसमयसि एगे देवे
मायो मिच्छद्दिट्ठी अंतियं पाउव्भूए । तए णं से देवे एमं महं पिसायरुव
विउव्वइ । तस्स णं देवस्स पिसायरुवस्स इमे एयारुवे वण्णावासे पणत्ते-सीमं
से गोकिंजसठाणसंठियं, सालिमसेल्लसरिसा से केसा कविलतेएणं दिप्पमाणा,
महल्लउट्टियाकभल्लसठाणसंठियं णिडालं मुगुंसपुंछ व तस्स भुमगाओ फुग-
फुगगाओ विगयबीभच्छदंसणाओ, सोसघडिंविणिगययाइं अच्छीणि विगय-
बीभच्छदंसणाइं, कण्णा जह सुप्पकत्तरं चेव विगयबीभच्छदंसणिज्जा, उरुम-
पुडसणिभा से णासा, झसिरा जमलचूलीसंठाणसंठिया दोसवि तस्स णासा-
पुडया, घोडयपुंछ व तस्स मंसूइं कविलकविलाइं विगयबीभच्छदंसणाइं, उट्टा-
उट्टस्स चेव लम्बा, फालसरिसा से दंता, जिम्मा जहा सुप्पकत्तरं चेव विगय-
बीभच्छदंसणिज्जा, हलकुट्टालसंठिया से हण्णया, गल्लकीडल्लं च तस्स खडुं फुट्टं
कविलं फरुत्तं महल्लं, मुइंगाकारोवमे से खंधे, पुरवरकवाडोवमे से वच्छे, कांठिया-

संठाणसंठिया दो वि तस्स बाहा, णिसाणाहाणसंठाणसंठिया दोवि तस्स अग्ग-
हत्था, णिसालोढसंठाणसंठियाओ हत्थेसु अंगुलीओ, सिप्पिपुडमसंठिया से
णक्खा, ण्हावियपसेवओ व्व उरंसि लम्बंति दोऽवि तस्स थणया, पोट्टं
अयकोट्टओ व्व वट्टं, पाणकलंदसरिसा से णाही, सिक्कगसंठाणसंठिया से णेत्ते,
किण्णपुडसंठाणसंठिया दोऽवि तस्स थसणा, जमलकोट्टियासंठाणसंठिया
दोऽवि तस्स उरू, अज्जुणगट्ठं व तस्स जाणूइं कुडिलकुडिलाइं विगय-
बीभच्छदंसणाइं, जंघाओ कक्खडीओ लोमेहि उवच्चियाओ, अहरीसंठाणसंठिया
दोऽवि तस्स पाया, अहरीलोढसंठाणसंठियाओ पाएसु अंगुलीओ, सिप्पिपुड-
संठिया से णक्खा, लडहमडहजाणए विगयमग्गमुग्गभुमए अवदालियवयण-
विवरणिल्लालियग्गजीहे सरडकयमालियाए उंदुरमालापारिणद्धसुक्याच्चिणे णउ-
लकयकण्णपूरे सप्पकयवेगच्छे अफोडंते अभिगज्जंते भीममुक्कट्टट्टहासे णाणा-
विहपंचवणोहि लोमेहि उवच्चिए एगं महं णीलुप्पलगवलगुलियअयसिकुमुमप्प-
गासं अंसि खरधारं गहाय जेणेव पोसहसाला जेणेव कामदेवे समणोवासए
तेणेव उवागच्छइ, उवागच्छिता आसुरत्ते रुठे कुविए चण्डिकिए मिसि-
मिसीयमाणे कामदेवं समणोवासयं एवं वयासी- 'हं भो कामदेवा ! समणो-
वासया ! अप्पत्थियपत्थिया दुरंतपंतलक्खणा हीणपुण्णचाउडसिया हिरि-
सिरिधिइकित्तिपरिवज्जिया धम्मकामया पुण्णकामया सग्गकामया मोक्ख-
कामया धम्मकंखिया पुण्णकंखिया सग्गकंखिया मोक्खकंखिया धम्मपिवासिया
पुण्णपिवासिया सग्गपिवासिया मोक्खपिवासिया णो खलु कप्पइ तव देवा-
णुप्पिया ! जं सीलाइं वयाइं वेरमणाइं पच्चक्खाणाइं पोसहोववासाइं
चालित्तए वा खोभित्तए वा खंडित्तए वा भंजित्तए वा उज्झित्तए वा परि-
च्चइत्तए वा, तं जइ णं तुमं अज्ज सीलाइं जाव पोसहोववासाइं ण छुड्ढेसि
ण भंजेसि तो ते अहं अज्ज इमेणं णीलुप्पल जाव असिणा खण्डाखण्डि करेमि,
जहा णं तुमं देवाणुप्पिया ! अट्टदुहट्टवसट्टे अकाले चेव जीवियाओ ववरो-
विज्जसि ' । तए णं से कामदेवे समणोवासए तेणं देवेणं पिसायरूवेणं एवं वुत्ते
समाणे अभीए अतत्थे अणुत्थिग्गे अक्खुभिए अचलिए असम्भंते तुसिणीए
धम्मज्झाणोवगए विहरइ ॥ १७ ॥ तए णं से देवे पिसायरूवे कामदेवे सम-

णोवासयं अभीयं जाव धम्मज्झाणोवगयं विहरमाणं पासइ, पासित्ता दोच्चंपि तच्चंपि कामदेवं समणोवासयं एवं वयासी—'हं भो कामदेवा ! समणोवासया ! अपत्थियपत्थिया जइ णं तुमं अज्ज जाव ववरोविज्जसि' । तए णं से कामदेवे समणोवासए तेणं देवेणं दोच्चंपि तच्चंपि एवं वृत्ते समाणे अभीए जाव धम्मज्झाणोवगए विहरइ । तए णं से देवे पिसायरूवे कामदेवं समणोवासयं अभीयं जाव विहरमाणं पासइ, पासित्ता आसुरुत्ते (५) तिवलियं भिउडि णिडाले साहट्टु कामदेवं समणोवासयं णोलुप्पल जाव असिणा खण्डाळिण्ड करेइ । तए णं से कामदेवे समणोवासए तं उज्जलं जाव दुरहियासं वेयणं सम्मं सहइ जाव अहियासेइ ॥ १८ ॥ तए णं से देवे पिसायरूवे कामदेवं समणोवासयं अभीयं जाव विहरमाणं पासइ, पासित्ता जाहे णो संचाएइ कामदेवं समणोवासयं णिग्गंथाओ पावयणाओ चालित्तए वा खोभित्तए वा विपरिणामित्तए वा ताहे संते तंते परित्तंते सणियं-सणियं पच्चोसवकइ, पच्चोसविकत्ता पोतहसालाओ पडिणिबल्लमइ, पडिणिबल्लमित्ता दिव्वं पिसायरूवं विप्पजहइ, विप्पजहित्ता एगं महं दिव्वं हत्थिरूवं विउच्चइ, सत्तंगपइट्टियं सम्मं संठियं मुजायं पुरओ उदगं पिट्टओ वराहं अयाकुच्छि अलम्बकुच्छि पलम्बलम्बोवराधरकरं अग्गं भयमउल्लमल्लियाविमलधवलदंतं कच्चणकोसीपविट्टवंतं आणामियवावल्लियसंविस्सियग्गसोणं कुम्मपडिपुण्णचल्लणं वीसइणवत्थं अत्तलीणपमाणजुत्तपुच्छं मत्तं मेहमिव गुलगुलेत्तं मणपवणजइणवेणं दिव्वं हत्थिरूवं विउच्चइ, विउच्चिता जेणेव पोसहसाला जेणेव कामदेवे समणोवासए तेणेव उवागच्छइ, उवागच्छिता कामदेवं समणोवासयं एवं वयासी—'हं भो कामदेवा ! समणोवासया ! तहेव मणइ जाव ण भंजेसि, तो ते अज्ज अहं सोण्डाए मिण्हामि, मिण्हिता पोसहसालाओ णीणेमि, णीणेत्ता उड्डं वेहासं उच्चिहामि, उच्चिहित्ता तिवर्खेहि वंतमुसलेहि पडिच्छामि, पडिच्छित्ता अहे धरणितल्लसि तिवखुत्तो पाएसु सोलेमि, जहा णं तुमं अट्टुहट्टवसट्टे अकाले चेव जीवियाओ ववरोविज्जसि' । तए णं से कामदेवे समणोवासए तेणं देवेणं हत्थिरूवेणं एवं वृत्ते समाणे अभीए जाव विहरइ । तए णं से देवे हत्थिरूवे कामदेवं समणोवासयं अभीयं जाव विहरमाणं पासइ, पासित्ता दोच्चंपि तच्चंपि कामदेवं समणोवासयं एवं वयासी—'हं भो कामदेवा ! तहेव जाव सोडवि विहरइ । तए णं से देवे हत्थिरूवे कामदेवं

समणोवासयं अभीयं जाव विहरमाणं पासइ, पासित्ता आसुरुत्ते ४ कामदेवं
समणोवासयं सोण्डाए गिण्हइ, गिण्हित्ता उड्डं वेहासं उच्चिहइ, उच्चिहत्ता
तिक्खोहिं दंतमुसलेहिं पडिच्छइ, पडिच्छित्ता अहे धरणिंतलंसि तिक्खुत्तो पाएसु
लोलैइ । तए णं से कामदेवे समणोवासए तं उज्जलं जाव अहियासेइ ॥ १६ ॥
तए णं से देवे हत्थिरूवे कामदेवं समणोवासयं जाहे णो संचाएइ जाव
सणियं-सणियं पच्चोसक्कइ, पच्चोसविकत्ता पोसहसलाओ पडिणिवक्खमइ,
पडिणिवक्खमित्ता दिव्वं हत्थिरूव विप्पजहइ, विप्पजहित्ता एगं महं दिव्वं
सप्परूवं विउव्वइ—उगविसं चण्डविसं घोरविसं महाकाय मसीमूसाकालगं
णयणविसरोसपुणं अजणपुंजणिगरप्पगासं रत्तच्छं लोहियलोयणं जमलजुयल-
चंचलजीहं धरणीयलवेणिभूयं उक्कडफुडकुडिलजडिलकक्कसविण्डफडाडोव-
करणदच्छं लोहागरधम्ममाणधम्मधर्मंतघोसं अणागलियतिव्वचण्डीरीसं सप्परूवं
विउव्वइ, २ त्ता जेणेव पोसहसला जेणेव कामदेवे समणोवासए तेणेव उवा-
गच्छइ, उवागच्छित्ता कामदेवं समणोवासयं एवं वयासी—'ह भो कामदेवा !
समणोवासया ! जाव ण भजेसि तो ते अज्जेव अहं सरसरस्स कायं दुरुहामि,
२ त्ता पच्छिमेणं भाएणं तिक्खुत्ते गीवं वेढेमि वेढेत्ता तिक्खाहिं विसपरिगयाहिं
दाढाहिं उरंसि चेव णिकुट्टेमि, जहा णं तुमं अट्टुदुहट्टवसट्टे अकाले चेव जीवि-
याओ धवरोविज्जसि' । तए णं से कामदेवे समणोवासए तेणं देवेणं सप्परूवेणं
एवं वृत्ते समणे अभीए जाव विहरइ, सोऽवि दोच्चपिं तच्छपि भणइ, काम-
देवोऽवि जाव विहरइ । तए णं से देवे सप्परूवे कामदेवं समणोवासयं अभीयं
जाव पासइ, पासित्ता आसुरुत्ते ४ कामदेवस्स समणोवासयस्स सरसरस्स कायं
दुरुहइ, दुरुहित्ता पच्छिमभाएणं तिक्खुत्तो गीवं वेढेइ, वेढेत्ता तिक्खाहिं विसपरि-
गयाहिं दाढाहिं उरंसि चेव णिकुट्टेइ । तए णं से कामदेवे समणोवासए तं उज्जलं
जाव अहियासेइ ॥ २० ॥ तए णं से देवे सप्परूवे कामदेवं समणोवासयं अभीयं
जाव पासइ, पासित्ता जाहे णो संचाएइ कामदेवं समणोवासयं णिग्गंथाओ
पावयणाओ चालित्तए वा खोभित्तए वा विपरिणामित्तए वा ताहे सत्ते ३
सणियं-सणियं पच्चोसक्कइ, पच्चोसविकत्ता पोसहसलाओ पडिणिवक्खमइ,
पडिणिवक्खमित्ता दिव्वं सप्परूवं विप्पजहइ विप्पजहित्ता एगं महं दिव्वं देवरूवं
विउव्वइ, हारविराडयवच्छं जाव दस दिसाओ उज्जोवेमाणं पभासेमाणं पासार्हियं

वरिसणिज्जं अभिरूचं पडिरूचं दिव्वं देवरूचं त्रिउस्वइ, विउत्तिवत्ता कामदेवस्स
 समणोवासयस्स पोसहसालं अणुप्पविसइ, अणुप्पविसित्ता अंतलिवत्तपडिवण्णे
 सखिखिणियाइं पंचवण्णाइं वत्थाइं पवरपरिहिए कामदेवं समणोवासयं
 एवं वयासी-‘हं भो कामदेवा ! समणोवासया ! धण्णे सि णं तुमं देवा-
 णुप्पिया ! स(८)पुण्णे कयत्थे कयलवखणे, सुलद्धे णं तव देवाणुप्पिया !
 माणुस्सए जम्मजीवियफले, जस्स णं तव णिगंथे पावयणे इमेयारूवा पडिवत्ती
 लद्धा पत्ता अभिसमण्णायया । एवं खलु देवाणुप्पिया ! सक्के देविदे देवराया
 जाव सक्कसि सीहासणंसि चउरासीईए सामाणियसाहस्सीणं जाव अण्णंसि च
 बहूणं देवाण य देवीण य मज्झगए एवमाइक्खइ ४-एवं खलु देवा(०) !
 जम्बूद्वीवे दीवे भारहे वासे चंपाए ण्यरीए कामदेवे समणोवासए पोसहसालाए
 पोसहियब्रह्मचारी जाव दम्मसंथारोवगए समणस्स भगवओ महावीरस्स
 अंतियं धम्मपण्णत्ति उवत्सम्पज्जित्ताणं विहरइ, णो खलु से सक्का केणइ देवेण
 वा दाणवेण वा जाव गंधवेण वा णिमंथाओ पावयणाओ चालित्तए वा
 खोमित्तए वा विपरिणामित्तए वा । तए णं अहं सक्कस्स देविदस्स देवरण्णे
 एयमट्ठं असहहमाणे ३ इहं हव्वमागए, तं अहो णं देवाणुप्पिया ! इड्ढी ६
 लद्धा ३, तं दिट्ठा णं देवाणुप्पिया ! इड्ढी जाव अभिसमण्णायया, तं तामेमि
 णं देवाणुप्पिया ! खमंतु मज्झ देवाणुप्पिया ! खंतुमरहति णं देवाणुप्पिया !
 णाइं भुज्जो करणयाए’ त्ति-कट्टु पायवडिए पंजलित्तडे एयमट्ठं भुज्जो भुज्जो
 खामेइ, खामेत्ता जामेव दिसं पाउम्मए तामेव दिसं पडिगए । तए णं से कामदेवे
 समणोवासए णिरुवसग्गं तिकट्टु पडिमं पारेइ ॥२१॥ तेषं कालेणं तेषं समएणं
 समणे भगवं महावीरे जाव विहरइ । तए णं से कामदेवे समणोवासए
 इमीसे कहाए लद्धट्ठे समाणे ‘एवं खलु समणे भगवं महावीरे जाव
 विहरइ, तं सेयं खलु मम समणं भगवं महावीरं वंदित्ता णमसित्ता तओ पडि-
 णियत्तस्स पोसहं पारित्तए’ त्ति कट्टु एवं संपेहेइ संपेहित्ता मुद्धप्पावेसाइं
 वत्थाइं जाव अप्पमहग्घ जाव मणुस्सवग्गुरापरिविखत्ते सयाओ गिहोओ पडि-
 णिवत्तमइ, पडिणिवत्तमित्ता चम्पं णयरिं मज्झमज्झेणं णिग्गच्छइ, णिग्गच्छित्ता
 जेणेव पुण्णभट्टे चेइए जहा संखो जाव पज्जुवासइ । तए णं समणे भगवं

महावीरे कामदेवस्स समणोवासयस्स तीसे य जाव धम्मकहा समत्ता ॥ २२ ॥
 कामदेवा इ ! समणे भगवं महावीरे कामदेवं समणोवासयं एवं वयासी-से
 णूणं कामदेवा ! तुदमं पुव्वरत्तावरत्तकालसमयंसि एगे देवे अतिए पाउब्भूए,
 तए णं से देवे एगं महं दिव्वं पिसायरूवं विउव्वइ, विउव्वित्ता आसुरुत्ते ४ एगं
 महं णीलुप्पल-जाव असि गहाय तुमं एवं वयासी-हं भो कामदेवा ! जाव
 जीवियाओ ववरोविज्जसि, तं तुमं तेणं देवेणं एवं वुत्ते समाणे अभीए जाव
 विहरसि, एवं वण्णगरहिया तिण्णिवि उव्वसग्गा तद्देव पडिउच्चारेयव्वा जाव
 देवो पडिगओ । से णूणं कामदेवा ! अट्ठे समट्ठे ? हुंता, अत्थि । 'अज्जो !
 इ समणे भगवं महावीरे बह्वे समणे णिमग्थे य णिमग्थोओ य आमंतेत्ता एवं
 वयासी-जइ ताव अज्जो ! समणोवासगा गिहिणो गिहिमज्जावसंता दिव्व-
 माणुस्सतिरिबखजोणिए उव्वसग्गे सम्मं सहति जाव अहियासेति, सबका-पुणाइ
 अज्जो ! समणेहि णिमग्थोहि दुवालसंगं गणिपिडगं अहिज्जमाणोहि दिव्वमाणुस-
 तिरिबखजोणिए सम्मं सहित्तए जाव अहियासित्तए । तओ ते बह्वे समणा
 णिमग्था य णिमग्थोओ य समणस्स भगवओ महावीरस्स तहत्ति एयमट्ठं
 विणएणं पडिमुणंति । तए णं से कामदेवे समणोवासए हट्ठ जाव समणं भगवं
 महावीरं पसिणाइं पुच्छइ, अट्टमादियइ, समणं भगवं महावीरं तिवखुत्तो वंदइ
 णमंसइ, वंदित्ता णमंसित्ता जामेव दिंसि पाउब्भूए तामेव दिंसि पडिगए । तए
 णं समणे भगवं महावीरे अण्णया कयाइ चप्पाओ पडिणिवल्लमइ पडिणिवल्ल-
 मित्ता बहिया जणवयविहारं विहरइ ॥ २३ ॥ तए णं से कामदेवे समणोवासए
 पढमं उवासगपडिमं उव्वसंपज्जित्ताणं विहरइ, तए णं से कामदेवे समणोवासए
 बह्निहि [सीलवएहि] जाव भावेत्ता वीसं वासाइं समणोवासगपरियागं पाउणित्ता
 एक्कारस उवासगपडिमाओ सम्मं काएणं फासेत्ता मासियाए संलेहणाए अप्पाणं
 झसित्ता सट्ठि भत्ताइं अणसणाए छेदेत्ता आलोइयपडिक्कते समाहिपत्ते कालमासे
 कालं किच्चा सोहम्मे कप्पे सोहम्मवडिसयस्स महाविमाणस्स उत्तरपुरत्थिमेणं
 अहणाभे विमाणे देवत्ताए उव्ववण्णे । तत्थ णं अत्थेगइयाणं देवाणं चत्तारि
 पत्तिओवमाइं ठिई पणत्ता, कामदेवस्सऽवि देवस्स चत्तारि पत्तिओ-
 वमाइं ठिई पणत्ता । से णं भंते ! कामदेवे ताओ देवलोगाओ आज-
 वखएणं भववखएणं ठिइवखएणं अणंतरं चयं चइत्ता कहिं गमिहिइ, कहिं

उक्खवेज्जिहिइ ? गोयमा ! महाविदेहे वासे सिज्जिहिइ (जाव सव्वदुक्खा०)
॥ २४ ॥ णिक्खेवो ॥ बीयं अज्झयणं समत्तं ॥

चूलणीपिया णामं तइयं अज्झयणं

उक्खेवो तइयस्स अज्झयणस्स । एवं खलु जंबू ! तेणं कालेणं तेणं समएणं
वाणारसी णामं णयरी (होत्था), कोट्टए चेइए, जियसत्तू राया । तत्थ णं
वाणारसीए णयरीए चूलणीपिया णामं गगहारवई परिवसइ, अइहे जाव अपरि-
भूए । सामा भारिया । अट्ट हिरणकोडीओ णिहाणपउत्ताओ, अट्ट वृद्धिपउत्ताओ
अट्ट पवित्थरपउत्ताओ, अट्ट वया दसगोसाहरिसएणं वएणं, जहा आणंदो राईसर
जाव सव्वकज्जवड्ढावए यावि होत्था । सामो समोसइहे, परिसा णिग्गया, चूलणी-
पियावि जहा आणंदो तहा णिग्गओ, तहेव गिहिधम्मं पडिबज्जइ । गोयमपुच्छा
तहेव मेस जहा कामदेवस्स जाव पोसहमालाए पोसहिए ब्रम्मयारी समणस्स
भगवओ महावीरस्स अंतियं धम्मपण्णत्ति उक्खसंपज्जित्ताणं विहरइ ॥ २५ ॥
तए णं तस्स चूलणीपियस्स समणोवासयस्स पुव्वरत्तावरत्तकालसमयसि एगे देवे
अंतियं पाउब्भूए । तए णं से देवे एगं (महं) णीलुप्पल जाव अमि गहाय
चूलणीपियं समणोवासयं एवं वयासी-हं भो चूलणीपिया ! समणोवासया !
जहा कामदेवो जाव ण मंजसि तो ते अहं अज्ज जेट्ठं पुत्तं साओ गिहाओ
णीगेमि, णोणत्ता तव अग्गओ घाएमि, घाएत्ता तओ मंससोल्ले करेमि, करेत्ता
आदाणभरियसि कडाहयसि अट्टहेमि, अट्टहेत्ता तव गायं मंसेण य सोणिएण य
आयच्चांमि, जहा णं तुमं अट्टदुहट्टवसट्टे अकाले चेव जीवंधयाओ ववरोविज्जसि
॥ २६ ॥ तए णं से चूलणीपिया समणोवासए तेणं देवेणं एवं वूत्ते समाणे
अभीए जाव विहरइ । तए णं से देवे चूलणीपियं समणोवासयं अभीयं जाव
पासइ, पासित्ता दोच्चंवि तच्चंवि चूलणीपियं समणोवात्तयं एवं वयासी-हं भो
चूलणीपिया ! समणोवासया ! तं चेव भणइ, सो जाव विहरइ । तए णं से
देवे चूलणीपियं समणोवासयं अभीयं जाव पासित्ता आमुहत्ते ५ चूलणीपियस्स
समणोवासयस्स जेट्ठं पुत्तं गिहाओ जीणेइ, णोणत्ता अग्गओ दागइं, घाएत्ता
तओ मंससोल्लए करेइ, करेत्ता आदाणभरियसि कडाहयसि अट्टहेइ, अट्टहेत्ता
चूलणीपियस्स समणोवासयस्स गायं मंसेण य सोणिएण य आयंचइ । तए

णं से चुलणीपिया समणोवासए तं उज्जलं जाव अहियासेइ । तए णं से देवे
 चुलणीपियं समणोवासयं अभीयं जाव पासइ, पासित्ता दोक्खंपि चुलणी-
 पियं समणोवासयं एवं वयासी-हं भो चुलणीपिया ! समणोवासया ! अप-
 त्थियपत्थिया ! जाव ण भंजसि तो ते अहं अज्ज मज्झिमं पुत्तं साओ
 गिहाओ णीणेमि, णीणेत्ता तव अग्गओ घाएमि, जहा जेट्ठं पुत्तं तहेव भणइ,
 तहेव करेइ । एवं तच्चं-पि कणीयसं जाव अहियासेइ ॥२७॥ तए णं से देवे
 चुलणीपियं समणोवासयं अभीयं जाव पासइ, पासित्ता चउत्थं-पि चुलणीपियं
 समणोवासयं एवं वयासी-“ हं भो चुलणीपिया ! समणोवासया ! अपत्थिय-
 पत्थिया ४ जइ णं तुमं जाव ण भंजसि तओ अहं अज्ज जा इमा तव माया
 भदा सत्थवाही देवयगुरुजणणी दुक्करदुक्करकारिया तं ते साओ गिहाओ
 णीणेमि, णीणेत्ता तव अग्गओ घाएमि, घाएत्ता तओ मंससोल्लए करेमि,
 करेत्ता आदाणभरियंसि कडाहर्यंसि अद्दहेमि, अद्दहेत्ता तव मायं मंसेण य सोणि-
 एण य आयंचामि जहा णं तुमं अट्टुहट्टुवसट्टे अकाले चेव जीवियाओ ववरो-
 विज्जसि ” । तए णं से चुलणीपिया समणोवासए तेणं देवेणं एवं वृत्ते समाणे
 अभीए जाव विहरइ । तए णं से देवे चुलणीपियं समणोवासयं अभीयं जाव
 विहरमाणं पासइ, पासित्ता चुलणीपियं समणोवासयं दोक्खंपि तच्चंपि एवं
 वयासी-हं भो चुलणीपिया ! समणोवासया ! तहेव जाव ववरोविज्जसि ।
 तए णं तस्स चुलणीपियस्स समणोवासयस्स तेणं देवेणं दोक्खंपि तच्चंपि एवं
 वृत्तस्स समाणस्स इमेयारूवे अज्जत्थियए ५-अहो णं इमे पुरिसे अणारिए अणारिव-
 व्दि अणारियाइं पावाइं कम्माइं समायइइ, जेणं ममं जेट्ठं पुत्तं साओ गिहाओ
 णीणेइ, णीणेत्ता मम अग्गओ घाएइ, घाएत्ता जहा कयं तहा चित्तेइ जाव मायं आयं-
 चइ, जेणं ममं मज्झिमं पुत्तं साओ गिहाओ जाव सोणिएण य आयंचइ, जेणं ममं
 कणीयसं पुत्तं साओ गिहाओ तहेव जाव आयंचइ, जाडवि य णं इमा ममं माया
 भदा सत्थवाही देवयगुरुजणणी दुक्करदुक्करकारिया तंपि य णं इच्छइ साओ
 गिहाओ णीणेत्ता मम अग्गओ घाएत्तए, तं सेयं खलु ममं एयं पुरिसं गिहित्तए
 त्तिकट्टु उट्ठा(द्धा)इए, सेडवि य आगासे उप्पइए, तेणं च खम्मं आसाइए,
 महधा-महया सट्ठेणं कोलाहले कए । तए णं सा भदा सत्थवाही तं कोलाहलसइं
 सांच्चा णिसम्म जेणेव चुलणीपिया समणोवासए तेणेव उवागच्छइ, उवागच्छित्ता

चुलणीपियं समणोवासयं एवं वयासी-किणं पुत्ता ! तुमं महया-महया सद्देणं
 कोलाहले कए ? तए णं से चुलणीपिया समणोवासए अम्मयं भद्दं सत्थवाहि
 एवं वयासी-एवं खलु अम्मो ! ण जाणामि, केवि पुरिसे आसुसते ५ एगं
 महं णीलुप्पल-जाव अंसि गहाय ममं एवं वयासी-हं भो चुलणीपिया !
 समणोवासया ! अपत्थियपत्थिया ४ जइ णं तुमं जाव ववरोविज्जसि ।
 (तए णं) अहं तेणं पुरिसेणं एवं वुत्ते समाणे अभीए जाव विहरामि । तए णं
 से पुरिसे ममं अभीयं जाव विहरमाणं पासइ, पासित्ता ममं दोच्चंपि तच्चंपि
 एवं वयासी-हं भो चुलणीपिया ! समणोवासया ! तहेव जाव गायं आयं चइ ।
 तए णं अहं तं उज्जलं जाव अहियासेमि । एवं तहेव उच्चारेयव्वं सव्वं जाव
 कणीयसं जाव आयं चइ, अहं तं उज्जलं जाव अहियासेमि । तए णं से पुरिसे
 ममं अभीयं जाव पासइ, पासित्ता ममं चउत्थंपि एवं वयासी-हं भो चुलणी-
 पिया ! समणोवासया ! अपत्थियपत्थिया जाव ण भंजसि तो ते अज्ज जा
 इमा माया देवयगुह जाव ववरोविज्जसि । तए णं अहं तेणं पुरिसेणं एवं
 वुत्ते समाणे अभीए जाव विहरामि । तए णं से पुरिसे दोच्चंपि तच्चंपि ममं
 एवं वयासी-हं भो चुलणीपिया समणोवासया ! अज्ज जाव ववरोविज्जसि ।
 तए णं तेणं पुरिसेणं दोच्चंपि तच्चंपि ममं एवं वुत्तस्स समाणस्स इमेया-
 रुवे अज्जत्थिए ५-अहो णं इमे पुरिसे अणारिए जाव समायरइ, जेणं ममं
 जेट्ठं पुत्तं साओ गिहाओ तहेव जाव कणीयसं जाव आयं चइ, तुव्वं वि य णं
 इच्छइ साओ गिहाओ णीणेत्ता मम अग्गओ घाएत्तए, तं सेयं खलु ममं एयं
 पुरिसं गिण्हत्तए तिकट्टु उट्ठाइए, सेऽवि य आगासे उपपइए, मएऽवि य खम्भे
 आसाइए, महया महया सद्देणं कोलाहले कए ॥ २८ ॥ तए णं सा भद्दा सत्थ-
 वाही चुलणीपियं समणोवासयं एवं वयासी-णो खलु केइ पुरिसे तव जाव
 कणीयसं पुत्तं साओ गिहाओ णीणेइ, णीणेत्ता तव अग्गओ घाएइ, एस
 णं केइ पुरिसे तव उवसग्गं करेइ, एस णं तुमे विदरिसणे दिट्ठे. तं णं तुमं
 इयाणं भग्गववए भग्गणियमे भग्गपोसहे विहरसि, तं णं तुमं पुत्ता ! एयस्स
 ठाणस्स आलोएहि जाव पडिबज्जहि । तए णं से चुलणीपिया समणो-
 वासए अम्मगाए भद्दाए सत्थवाहीए तहत्ति एयमट्ठं विणएणं पडिसुणेइ. पडि-
 सुणेत्ता तस्स ठाणस्स आलोएइ जाव पडिबज्जइ ॥ २९ ॥ तए णं से चुलणी-

पिया समणोवासए पढमं उवासगपडिमं उवसंपज्जिता णं विहरइ, पढमं उवा-
सगपडिमं अहामुत्तं जहा आणंदो जाव एक्कारसवि । तए णं से चुलणीपिया
समणोवासए तेणं उरालेणं जहा कामदेवो जाव सोहम्मे कप्ये सोहम्मवडिसगसस
महाविमाणस्स उत्तरपुरत्थिमेणं अरुणप्यभे विमाणे देवताए उववण्णे । चत्तारि
पलिओवमाइं ठिई पणत्ता । महाविदेहे वासे सिज्झहिइ ५ ॥ ३० ॥ णिवखेवो ।

॥ तइयं अज्झयणं समत्तं ॥

सुरादेवे णामं चउत्थं अज्झयणं

उवखेवओ चउत्थस्स अज्झयणस्स । एवं खलु जम्बू ! तेणं कालेणं तेणं सम-
एणं वाणारसी णामं णयरी । कोट्टए चेइए । जियसत्तू राया । सुरादेवे गाहावई,
अड्ढे (जाव अपरिभूए) । छ हिरण्णकोडीओं जाव छ वया दसगोसाहसिएणं
वएणं । धग्णा भारिया । सामी समोसढे । जहा आणंदो तहेव पडिवज्जइ
गिहिधम्मं । जहा कामदेवो जाव समणस्स भंगवओ महावीरस्स धम्मपण्णत्ति
उवसम्पज्जित्तार्णं विहरइ ॥ ३१ ॥ तए णं तस्स सुरादेवस्स समणोवासयस्स
पुअरत्तावरत्तकालसमयंसि एणं देवे अंतियं पाउडमवित्था । से देवे एणं महं
णीलूपत्त जाव असि गहाय सुरादेवं समणोवासयं एवं वयासी—हं भो सुरादेवा
समणोवासया ! अपत्थियपत्थिया ४ जइ णं तुमं सीलाइं जाव ण भंजसि तो
ते जेट्ठं पुत्तं साओ गिहाओ णीणेमि, णीणत्ता तव अग्गओ घाएमि, घाएत्ता
पंच मंस सोल्लए करेमि, (२ ता) आवाणभरियंसि कडाहयंसि अइहेमि, अइ-
हेत्ता तव गायं मसेण य सोणिएण य आयंचामि, जहा णं तुमं अकाले चेव
जीवियाओ ववरोविज्जसि । एवं मज्झिमयं, कणीयसं, एक्केक्के पंच सोल्लया,
तहेव करेइ, जहा चुलणीपियस्स, णवरं एक्केक्के पंच सोल्लया । तए णं से देवे
सुरादेवं समणोवासयं चउत्थं पि एयं वयासी—हं भो सुरादेवा ! समणोवासया !
अपत्थियपत्थिया ४ जाव ण परिच्चय (भंज)सि तो ते अज्ज सरीरंसि जमग-
समगमेव सोल्लस रोगायंके पखिखवामि, तंजहा—सासे, कासे जाव कोढे, जहा
णं-तुमं अट्टुहट्टु जाव ववरोविज्जसि । तए णं से सुरादेवे समणोवासए जाव
विहरइ । एवं देवो दोच्चंपि तच्चंपि भणइ जाव ववरोविज्जसि ॥ ३२ ॥

तए णं तस्स सुरादेवस्स समणोवासयस्स तेणं देवेणं दोच्चंपि तच्चंपि एवं
 वृत्तस्स समाणस्स इमेयाऋवे अज्झत्थिए ४ (समु०)—अहो णं इमे पुरिसे अणा-
 रिए जाव समायरइ, जेणं ममं जट्ठ पुत्तं जाव कणीयसं जाव आधवइ, जेऽवि
 य इमे सोलस रोगायका तेऽवि य इच्छइ मम सरीरगंसि पविखवित्तए, तं मेघ
 खलु ममं एयं पुरिसं गिण्हित्तए तिकट्टु उद्धाइए । सेऽवि य आगामे उप्पइए,
 तेण य खम्ममे आसाइए, महया-महया सद्देषं कोलाहले कए ॥ ३३ ॥ तए णं
 सा धण्णा भारिया कोलाहलं सोच्चा णिसम्म जेणेव सुरादेवे समणोवामए
 तेणेव उवागच्छइ, उवागच्छिता एव वयासी—किण्णं देवाणुप्पिया ! तुब्भंहि
 महया-महया सद्देषं कोलाहले कए ? तए णं से सुरादेवे समणोवासए धण्णं
 भारियं एवं वयासी—एवं खलु देवाणुप्पिए ! केऽवि पुरिसे तहेव कहेइ जहा
 च्चुलणीपिया । धण्णाऽवि पडिभणइ—जाव कणीयसं, णो खलु देवाणुप्पिया !
 तुब्भं केऽवि पुरिसे सरीरंसि जममसममं सोलस रोगायके पविखवइ, एसणं केऽवि
 पुरिसे तुब्भं उवसणं करेइ, सेसं जहा च्चुलणीपियस्स तहा भणइ । एवं सेसं
 जहा च्चुलणीपियस्स णिरवसेसं जाव सोहम्ममे कप्पे अरुणकंते विमणो उववण्णे ।
 चत्तारि पालोवमाइं ठिईं, महाविदेहे वासे सिज्झहिइ ५ ॥ ३४ ॥ णिवखंवा ॥

॥ चउत्थं अज्झयणं समत्तं ॥

चुल्लसयए णामं पंचमं अज्झयणं

उवखेवो पंचमस्स । एवं खलु जम्बू ! तेणं कालेणं तेणं समएणं आलभिया
 णामं णयरी । संखवणे उज्जाणे । जियसत्तू राया । चुल्लसयए गाहावई (परि-
 बसइ), अड्ढे जाव छ हिरणकोडीओ जाव छ वया दसगोसाहस्सिएणं वएणं ।
 बहुला भारिया । सामो समोसडे । जहा आणंदो तहा (धम्म सोच्चा) गिहि-
 धम्मं पडिबज्जइ, सेसं जहा कामदेवो जाव धम्मपण्णत्ति उवसंपज्जित्तणं विह-
 रइ ॥ ३५ ॥ तए णं तस्स चुल्लसयगस्स समणोवासयस्स पुब्बरत्तावरत्तकाल-
 समयंसि एगे देवे अंतियं जाव असि गहाय एवं वयासी—हं भो चुल्लसयगा समणो-
 वासया ! जाव ण भजसि तो ते अज्ज जेट्ठं पुत्तं साओं गिहाओ णीणंमि, एवं
 जहा च्चुलणीपियं, णवरं एक्केवके सत्तं मंससोल्लया जाव कणीयसं जाव आयं-

चामि । तए णं से चुल्लसयए समणोवासए जाव विहरइ । तए णं से देवे चुल्लसयणं समणोवासयं चउत्थंवि एवं वयासी-हं भो चुल्लसयणा ! समणो-
वासया ! जाव ण भंजसि तो ते अज्ज जाओ इमाओ छ हिरण्णकोडीओ णिहाणपउत्ताओ, छ बुद्धिपउत्ताओ, छ पवित्थरपउत्ताओ ताओ साओ गिहाओ
णीणेमि, णीणेत्ता आलभियाए णयरीए सिघाडग जाव पहेसु सच्चओ समंता
विप्पइरामि, जहा णं तुमं अट्टदुहट्टवसट्टे अकाले चेव जीवियाओ ववरोविज्जसि
॥ ३६ ॥ तए णं से चुल्लसयए समणोवासए तेणं देवेणं एवं वुत्ते समाणे अभीए
जाव विहरइ । तए णं से देवे चुल्लसयणं समणोवासयं अभीयं जाव पासित्ता
दोच्चंवि तच्चंवि तहेव भणइ जाव ववरोविज्जसि । तए णं तस्स चुल्लसयणस्स
तेणं देवेणं दोच्चंवि तच्चंवि एवं वुत्तस्स समाणस्स अयमेघारूवे अज्जत्थिए ५
'अहो णं इमे पुरिसे अणारिए जहा चुलणीपिया तथा चित्तेड जाव कभीयसं
जाव आयच्चइ, जाओऽवि य णं इमाओ ममं छ हिरण्णकोडीओ णिहाणपउत्ताओ
छ बुद्धिपउत्ताओ छ पवित्थरपउत्ताओ ताओऽवि य णं इच्छइ ममं साओ
गिहाओ णीणेत्ता आलभियाए णयरीए सिघाडग-जाव विप्पइरित्तए, तं सेयं
खलु ममं एयं पुरिसं गिण्हित्तए त्तिकट्ट उद्धाइए जहा सुरादेवो तहेव मारिया
पुच्छइ तहेव कहेइ । सेसं जहा चुलणीपियस्स जाव सोहम्मे कप्पे अरुणसिट्ठे
विमाणे उववण्णे, चत्तारि पत्तिओवमाइं ठिई । सेसं तहेव जाव महाविदेहे वासे
सिज्जिहिइ [५] ॥ ३७ ॥-णिक्खेवो ॥

॥ पंचमं अज्जयणं समत्तं ॥

कुण्डकोलिए णामं छट्ठं अज्जयणं

छट्टस्स उक्खेवओ । एवं खलु जम्बू ! तेणं कालेणं तेणं समएणं कपिलपुरे
णयरे । सहसम्भवणे उज्जाणे । जियसत्तू राया । कुण्डकोलिए गाहावई । पूमा
मारिया । छ हिरण्णकोडीओ णिहाणपउत्ताओ, छ बुद्धिपउत्ताओ, छ पवित्थर-
पउत्ताओ, छ वया वसगोसाहस्सिएणं वएणं । सामी समोसदे । जहा कामदेवो
तहा सावयधम्मं पडिबज्जइ । सच्चेव वस्तव्वया जाव पडिलाभमाणे विहरइ
॥ ३८ ॥ तए णं से कुण्डकोलिए समणोवासए अणया कयाइ पुव्वावरहकाल-
समयंसि जेणेव असोवणिया जेणेव पुढविसिलापट्टए तेणेव उवागच्छइ, उवा-

गच्छिता णाममद्दं च उत्तरिज्जगं च पुढ्वीमिलापट्टए ठवेइ, ठवेत्ता समणस्स भगवओ महावीरस्स अनियं धम्मपण्णत्ति उवमंपज्जिताणं विहरइ, ॥ ३६ ॥ तए णं तस्म कुण्डकोलियस्स समणोवासयस्स एगे देवे अतियं पाउढमविट्ठया । तए णं से देवे णाममद्दं च उत्तरियं च पुढ्विमिलापट्टयाओ गेण्हइ, २ ता मख्खिअिणं अंतत्तिवत्तपडिअणे कुण्डकोलियं समणोवासयं एवं वयासी-हं भो कुण्डकोलिया समणोवासया ! सुंदरी णं देवाणुप्पिया ! गोसालस्स मख्खलि-पुत्तस्स धम्मपण्णत्ती, णत्थि उट्टाणे इ वा कम्मे इ वा बले इ वा वीरिए इ वा पुरिसक्कारपरक्कमे इ वा, णियया सव्वभावा, मंगुली णं समणस्स भगवओ महावीरस्स धम्मपण्णत्ती, अत्थि उट्टाणे इ वा कम्मे इ वा बले इ वा वीरिए इ वा पुरिसक्कारपरक्कमे इ वा, अणियया सव्वभावा ॥ ४० ॥ तए णं से कुण्डकोलिए समणोवासए तं देवं एवं वयासी-जइ णं देवां । सुंदरी गोसालस्स मख्खलिपुत्तस्स धम्मपण्णत्ती-णत्थि उट्टाणे इ वा जाव णियया सव्वभावा, मंगुली णं समणस्स भगवओ महावीरस्स धम्मपण्णत्ती-अत्थि उट्टाणे इ वा जाव अणियया सव्व-भावा, तुमे णं देवां । इमा एयारूवा दिव्वा देविइही दिव्वा देवज्जई दिव्वा देवाणुभावे किणा लद्धे, किणा पत्ता, किणा अभिसमण्णागया, किं उट्टाणेणं जाव पुरिसक्कारपरक्कमेणं, उदाट्ट अणुट्टाणेणं अकम्मेणं जाव अपुरिसक्कारपर-क्कमेणं ? तए णं से देवे कुण्डकोलियं समणोवासयं एवं वयासी-एवं खलु देवाणुप्पिया ! मए इमेयारूवा दिव्वा देविइही ३ अणुट्टाणेणं जाव अपुरि-सक्कारपरक्कमेणं लद्धा पत्ता अभिसमण्णागया । तए णं से कुण्डकोलिए समणो-वासए तं देवं एवं वयासी-जइ णं देवा ! तुमे इमा एयारूवा दिव्वा देविइही ३ अणुट्टाणेणं जाव अपुरिसक्कारपरक्कमेणं लद्धा पत्ता अभिसमण्णागया, जेसि णं जीवाणं णत्थि उट्टाणे इ वा जाव परक्कमे इ वा, ते किं ण देवा ? अहं णं देवां ! तुमे इमा एयारूवा दिव्वा देविइही ३ उट्टाणेणं जाव परक्कमेणं लद्धा पत्ता अभिसमण्णागया, तो जं वदत्ति-सुंदरी णं गोसालस्स मख्खलिपुत्तस्स धम्म-पण्णत्ती, णत्थि उट्टाणे इ वा जाव णियया सव्वभावा, मंगुली णं समणस्स भगवओ महावीरस्स धम्मपण्णत्ती-अत्थि उट्टाणे इ वा जाव अणियया सव्व-भावा, तं ते मिच्छा । तए णं से देवे कुण्डकोलिएणं समणोवासएणं एवं वृत्ते समणे संकिए जाव कलुससमावण्णे णो संचाएइ कुण्डकोलियस्स समणोवास-

यस्स किञ्चि पामोवखमाइविल्लत्तए, णाममुद्दं च उत्तरिज्जयं च पुढविसिलापट्टए
 ठवेइ, ठवेत्ता जामेव दिसि पाउब्भूए तामेव दिसि पडिगए । तेणं कालेणं तेणं
 समएथं सामी समोसडे । तए णं से कुण्डकोलिए समणोवासए इमीसे कहाए
 लद्धट्ठे हट्ट (तुट्ठे) जहा कामदेवो तथा णिग्गच्छइ जाव पज्जवासइ । धम्मकहा
 ॥ ४१ ॥ 'कुण्डकोलियाइ ! से समणे भगवं महावीरे कुण्डकोलियं समणोवासयं
 एवं वयासी—से णूणं कुण्डकोलिया ! कल्लं तुब्भं पुच्चावरण्हकालसमयंसि असोग-
 वणियाए एगे देवे अत्तियं पाउब्भवित्था । तए णं से देवे णाममुद्दं च तहेव जाव
 पडिगए । से णूणं कुण्डकोलिया ! अट्ठे समट्ठे ? हंता अत्थि । तं घण्णे सि
 णं तुमं कुण्डकोलिया ! जहा कामदेवो । 'अज्जोइ' ! समणे भगवं महावीरे
 समणे णिग्गंथे य णिग्गंथीओ य आमत्तित्ता एवं वयासी—जइ ताव अज्जो !
 गिहिणो गिहिमज्जावसंता णं अण्णउत्थिए अट्ठेहि य हेऊहि य पसिणेहि य
 कारणेहि य वागरणेहि य णिप्पट्टपसिणवागरणे करेत्ति, सक्का पुणाइं अज्जो !
 समणेहि णिग्गंथेहि दुवालसंयं गणिपिडगं अहिज्जमाणेहि अण्णउत्थिया अट्ठेहि
 य जाव णिप्पट्टपसिणवागरणा करित्तए । तए णं समणा णिग्गंथा य णिग्गंथीओ
 य समणस्स भगवओ महावीरस्स तहत्ति एयमट्ठं विणएणं पडिसुणेत्ति । तए
 णं से कुण्डकोलिए समणोवासए समणं भगवं महावीरं वंदइ णमंसइ, वंदित्ता
 णमंसित्ता पसिणाइं पुच्छइ, पुच्छित्ता अट्टमादियइ, २ ता जामेव दिसं पाउ-
 ब्भूए तामेव दिसं पडिगए । सामी बहिया जणवयविहारं विहरइ ॥ ४२ ॥
 तए णं तस्स कुण्डकोलियस्स समणोवासस्स बहूहि सील जाव भावेमाणस्स
 चोदस्स संवच्छराइं विडक्कंताइं, पण्णरसमस्स संवच्छरस्स अंतरा वट्ट-
 माणस्स अण्णया कयाइ जहा कामदेवो तथा जेट्टपुत्तं ठवेत्ता तथा पोसहसालाए
 जाव धम्मपण्णत्ति उवसंपज्जित्ताणं विहरइ । एवं एक्कारस उवासगपडिमाओ,
 तहेव जाव सोहम्मके कप्पे अहणज्जाए विमाणे जाव अंतं काहिइ ॥ ४३ ॥ णिक्खेवो ।

॥ छट्ठं अज्झयणं समत्तं ॥

सद्दालपुत्ते णामं सत्तमं अज्झयणं

सत्तमस्स उक्खेवो । पोलासपुरे णामं णयरे । सहस्संबवणे उज्जाणे । जिय-
 सत्तू राया । तत्थ णं पोलासपुरे णयरे सद्दालपुत्ते णामं कुंभकारे आजीविओ-

वासए परिवसद्, आजीवियममयंसि लद्धट्ठे गहिघट्ठे पुच्छिघट्ठे विणिच्छिघट्ठे अभिगघट्ठे अट्ठिमिजपेमाणुरागरत्ते य, अयमाउसो ! आजीवियममए अट्ठे अयं परमट्ठे सेसे अणट्ठेत्ति आजीवियममएणं अप्पाणं भावेमाणे विहरइ । तस्म णं सद्दालपुत्तस्स आजीविओवासगस्स एवका हिरण्णकोडी णिहाणवउत्ता, एवका बुद्धिपउत्ता, एवका पवित्थरवउत्ता, एवके वए दसगोसाहस्सिएणं वएणं । तस्म णं सद्दालपुत्तस्स आजीविओवासयस्स अग्गिमित्ता णामं भारिया होत्था । तस्म णं सद्दालपुत्तस्स आजीविओवासगस्स पोलासपुरस्स णधरस्स बहिया पंच कुम्भकारावणसया होत्था । तत्थ णं बह्वे पुरिसा दिण्णमइभत्तवेयणा कल्लाकल्लि वह्वे करए य वारए य पिहइए यं घडए य अट्ठघडए य कलमए य अल्लिजरए य जम्बूलए य उट्ठियाओ य करेत्ति । अण्णे य से बह्वे पुरिसा दिण्णमइभत्तवेयणा कल्लाकल्लि तेहि बहूहिं करएहि य जाव उट्ठियाहि य रायमगंसि वित्ति कप्पेमाणा विहरंति ॥ ४४ ॥ तए णं से सद्दालपुत्ते आजीविओवासए अणया कयाइ पुच्चावरण्हकालसमयंसि जेणेव असोगवणिया तेणेव उवागच्छइ, उवागच्छित्ता गोसालस्स मंखलिपुत्तस्स अंतियं धम्मपण्णत्ति उवसम्पज्जित्ताणं विहरइ । तए णं तस्स सद्दालपुत्तस्स आजीविओवासगस्स एये देवे अंतियं पाउब्भवित्था । तए णं से देवे अंतिलिखपडिअण्णे सखिखिणियाई जाव परिहिए सद्दालपुत्तं आजीविओवासयं एवं वयासी-एहिइ णं देवाण्णिया ! कल्लं इहं महामाहणे उप्पण्णणाणदंसणधरे तीयपडुप्पण्णमणागयजाणए अरहा जिणे केवली सब्बणू सब्बदरिसी तेलोवकवहियमहियपूइए सदेवमणुयामुरस्सलोगस्स अच्चणिज्जे (पूयणिज्जे) वंदणिज्जे सक्कारणिज्जे सम्माणिज्जे कल्लाणं मंगलं देवयं चेइयं जाव पज्जुवासणिज्जे तच्चकम्मसम्पयासम्पउत्ते, तं णं तुमं वंदेज्जाहि जाव पज्जुवामेज्जाहि, पाडिहारिएणं पीढफलयंसज्जासंथारएणं उवणिमतेज्जाहि, दोच्चंपि तरुच्चंपि एवं वयइ वइत्ता जामेव दिसं पाउब्भए तामेव दिसं पडिगए ॥४५॥ तए णं तस्स सद्दालपुत्तस्स आजीविओवासगस्स तेणं देवेणं एवं वुत्तस्स समाणस्स इमेयारूवे अज्जरियए ४ समुप्पणे- ' एवं खलु ममं धम्मोयरिए धम्मोवएसए गोसाले मंखलिपुत्ते, से णं महामाहणे उप्पण्णणाणदंसणधरे जाव तच्चकम्मसंपयासम्पउत्ते, से णं कल्लं इहं

हृद्यमागच्छिस्सइ । तए णं तं अहं वंदिस्सामि जाव पज्जुवासिस्सामि, पाडि-
हारिएणं जाव उवणिमंतिस्सामि ' ॥ ४६ ॥ तए णं कल्लं जाव जलंते समणे
भगवं महावीरे जाव समोसरिए । परिसा णिग्गया जाव पज्जुवासइ ।
तए णं से सद्दालपुत्ते आजीविओवासए इमीसे कहाए लद्धट्ठे समाणे—' एवं
खलु समणे भगवं महावीरे जाव विहरइ, तं गच्छामि णं समणं भगवं महावीरं,
वंदामि जाव पज्जुवामामि ' एवं सम्पेहेइ, संपेहिता ण्हाए जाव पायच्छित्ते
सुद्धप्पावेसाइं जाव अप्पमहग्घाभरणाळक्खित्तरिरे मणस्सवग्गुरापरिए साओ
गिहाओ पडिणिवक्खमइ, २ ता पोलासपुरं णयरं मज्झमज्झेणं णिग्गच्छइ,
णिग्गच्छित्ता जेणेव महस्सम्भवणे उज्जाणे जेणेव समणे भगवं महावीरे
तेणेव उवागच्छइ, उवागच्छित्ता तिवखुत्तो आयाहिणं पयाहिणं करेइ, करेत्ता
वंदइ णमंसइ, वंदित्ता णमसित्ता जाव पज्जुवासइ ॥ ४७ ॥ तए णं समणे
भगवं महावीरे सद्दालपुत्तस्स आजीविओवासगस्स तीसे य महइ जाव धम्मकहा
ममत्ता । 'सद्दालपुत्ता' इ ! समणे भगवं महावीरे सद्दालपुत्तं आजीविओ-
वासय एवं वयासी—' से णूणं सद्दालपुत्ता ! कल्लं तुमं पुव्वावरं कालसमयंति
जेणेव असोगवणिया जाव विहरसि । तए णं तुमं एगे देवे अंतियं
पाउब्भवित्था । तए णं से देवे अंतिलिखपडिवण्णे एवं वयासी—हं भो सद्दाल-
पुत्ता ! तं चेव सच्चं जाव पज्जुवासिस्सामि ' । से णूणं सद्दालपुत्ता ! अट्ठे
समट्ठे ? हुंता अत्थि । (तं) णो खलु सद्दालपुत्ता । तेणं देवेणं गोसालं
मंखलिपुत्तं पणिहाय एवं वृत्ते । तए णं तस्स सद्दालपुत्तस्स आजीविओ-
वासयस्स समणेणं भगवया महावीरेणं एवं वृत्तस्स समाणस्स इमेयारूवे अज्झ-
त्थिए ४—' एस णं समणे भगवं महावीरे महामाहणे उप्पण्णणानंदसणधरे जाव
तच्चकम्मसम्पयासम्पउत्ते, तं सेयं खलु ममं समणं भगवं महावीरं वंदित्ता णमं-
सित्ता पाडिहारिएणं पीढफलग जाव उवणिमंतिस्सामि ' एवं सम्पेहेइ संपेहिता
उट्टाए उट्ठेइ, उट्ठेत्ता समणं भगवं महावीरं वंदइ णमंसइ, वंदित्ता णमंसित्ता
एव वयासी—' एवं खलु भंते ! ममं पोलासपुरस्स णयरस्स बहिंया पंच कुम्भ-
कारावणसया । तत्थ णं तुमं पाडिहारियं पीढ जाव संथारयं ओगिहित्ताणं
विहरइ ' । तए णं समणे भगवं महावीरे सद्दालपुत्तस्स आजीविओवासगस्स
एयमट्ठं पडिसुणेइ, पडिसुणेत्ता सद्दालपुत्तस्स आजीविओवासगस्स पंचकुम्भ-

कारावणसए सु फासुए सणिज्जं पाडिहारियं पीढफलग-जाव संथारयं ओगिण्हि-
त्ताणं विहरइ ॥ ४८ ॥ तए णं से सद्दालपुत्ते आजीविओवासए अण्णया
कयाइ वायाहयं कोलालभण्डं अतो सालाहितो बहिया णोणेइ, णीणेत्ता
आयवंसि दलयइ । तए णं समणे भगवं महावीरे सद्दालपुत्तं आजीविओवासयं
एवं वयासी-‘सद्दालपुत्ता ! एस णं कोलालभण्डे कओ ?’ तए णं से सद्दालपुत्ते
आजीविओवासए समणं भगवं महावीरं एवं वयासी-एस णं भंते ! पुंवि
सट्टिया आसी, तओ पच्छा उदएणं णि (मि) गिज्जइ, २ त्ता छारेण य करिसेण
य एगयओ मोसिज्जइ, २ त्ता चक्के आरोहिज्जइ, तओ बहवे करया य
जाव उट्टियाओ य कज्जति । तए णं समणे भगवं महावीरे सद्दालपुत्तं आजीविओ-
वासयं एवं वयासी-‘सद्दालपुत्ता ! एस णं कोलालभण्डे कि उट्टाणेणं जाव पुरि-
सक्कारपरक्कमेणं कज्जति, उदाहु अणुट्टाणेणं जाव अपुरिसक्कारपरक्कमेणं
कज्जति ? तए णं से सद्दालपुत्ते आजीविओवासए समणं भगवं महावीरं एवं
वयासी-‘भंते ! अणुट्टाणेणं जाव अपुरिसक्कारपरक्कमेणं णत्थि उट्टाणे इ वा
जाव परक्कमे इ वा, णियया सव्वभावा’ ॥ ४९ ॥ तए णं समणे भगवं महा-
वीरे सद्दालपुत्तं आजीविओवासयं एवं वयासी-‘सद्दालपुत्ता ! जइ णं तुमं
केइ पुरिसे वायाहयं वा पक्केल्लयं वा कोलालभण्डं अवहरेज्जा वा विविखरेज्जा
वा भिंदेज्जा वा अक्खिदेज्जा वा परिट्टवेज्जा वा, अभिमित्ताए वा भारियाए
सट्ठि विउलाइं भोगभोगाइं भुंजमाणे विहरेज्जा, तस्स णं तुमं पुरिसस्स
कि दण्डं वत्तेज्जासि ?’ भंते ! अहं णं तं पुरिसं आओसेज्जा वा हणेज्जा
वा बंधिज्जा वा महेज्जा वा तज्जेज्जा वा तलेज्जा वा णिच्छोडेज्जा
वा णिदमच्छेज्जा वा अकाले चेव जीवियाओ ववरोवेज्जा । सद्दालपुत्ता !
णो खलु तुमं केइ पुरिसे वायाहयं वा पक्केल्लयं वा कोलालभण्डं
अवहरइ वा जाव परिट्टवेइ वा, अगिमित्ताए वा भारियाए सट्ठि विउ-
लाइं भोगभोगाइं भुंजमाणे विहरइ, णो वा तुमं तं पुरिसं आओसेज्जसि वा
हणेज्जसि वा जाव अकाले चेव जीवियाओ ववरोवेज्जसि, जइ णत्थि उट्टाणे इ
वा जाव परक्कमे इ वा णियया सव्वभावा । अहं णं तुमं केइ पुरिसे वायाहयं
जाव परिट्टवेइ वा, अगिमित्ताए वा जाव विहरइ, तुमं वा तं पुरिसं आओसेसि
वा जाव ववरोवेसि, तो जं वदसि णत्थि उट्टाणे इ वा जाव णियया सव्व-

भावा तं ते मिच्छा । एत्थ णं से सद्दालपुत्ते आजीविओवासए सम्बद्धे ॥५०॥
तए णं से सद्दालपुत्ते आजीविओवासए समणं भगवं महावीरं बंदइ णमंसइ,
वंदिता णमंसिता एवं वयासी—‘इच्छामि णं भंते ! तुभं अंतिए धम्मं णिसा-
मेत्तए’ । तए णं समणे भगवं महावीरे सद्दानुत्तस्स आजीविओवासगस्स तीसे
य जाव धम्मं परिकहेइ । तए णं से सद्दालपुत्ते आजीविओवासए समणस्स भग-
वओ महावीरस्स अंतिए धम्मं सोच्चा णिसम्म हट्टुत्तु जाव हियए जहा आणंदो
तहा गिहिधम्मं पडिवज्जइ । णवरं एगा हिरण्णकोडी णिहाणपउत्ता, एगा
हिरण्णकोडी वृद्धिपउत्ता, एगा हिरण्णकोडी पवित्थरपउत्ता, एगे वए दस-
गोसाहस्सिएणं वएणं, जाव समणं भगवं महावीरं वंदइ णमंसइ, वंदिता णमं-
सिता जेणेव पोलासपुरे णयरे तेणेव उवागच्छइ, उवागच्छिता पोलासपुरं णयरं
मज्झमज्झेणं जेणेव सए गिहे जेणेव अग्गिमित्ता भारिया तेणेव उवागच्छइ,
उवागच्छिता अग्गिमित्तं भारियं एवं वयासी—‘एवं खलु देवानुप्पिए ! समणे
भगवं महावीरे जाव समोसडे, तं गच्छाहि णं तुभं समणं भगवं महावीरं वंदाहि
जाव पज्जुवासाहि, समणस्स भगवओ महावीरस्स अंतिए पंचानुब्बइयं सत्त-
सिक्खावइयं दुवालसविहं गिहिधम्मं पडिवज्जाहि’ ॥५१॥ तए णं सा अग्गि-
मित्ता भारिया सद्दालपुत्तस्स समणोवासगस्स ‘तह’त्ति एयमट्ठं विणएणं पडि-
सुणेइ । तए णं से सद्दालपुत्ते समणोवासए कोडुंबियपुरिसे सद्दावेड, सद्दावित्ता
एवं वयासी—‘खिप्पामेव भो देवानुप्पिया ! लहुकरणजुत्तजोइयं समखुरवालि-
हाणसमलिहियसिगएहि जम्बूणयामयकल्लवजोत्तपडिविसिट्टएहि रययामयघण्ट-
सुत्तरज्जुगवरकंचणलइयणत्थापगहोभाहियएहि णीलुप्पलकयामेलएहि पवर-
गोणजुवाणएहि णाणामणिकणगघण्टियाजालपरिगयं सुजायजुगजुत्तउज्जग-
पसत्थसुविरइयणिम्मियं पवरलक्खणीववेयं जुत्तामेव धम्मियं जाणप्पवरं
उवट्टवेह, उवट्टवेत्ता मम एयमाणत्तियं पच्चप्पिणह’ । तए णं ते कोडुंबिय-
पुरिसा जाव पच्चप्पिणंति ॥५२॥ तए णं सा अग्गिमित्ता भारिया ण्हाया
जाव पायच्छित्ता सुट्ठप्पावेसाइं जाव अप्पमहग्घाभरणालंकियसरीरा चेडिया-
चक्कवालपरिकिण्णा धम्मियं जाणप्पवरं दुरुहइ, दुरुहित्ता पोलासपुरं णयरं
मज्झमज्झेणं णिग्गच्छइ, णिग्गच्छिता जेणेव सहस्सम्भवणं उज्जाणे तेणेव उवा-
गच्छइ, उवागच्छिता धम्मियाओ जाणप्पवराओ पच्चोहइ, पच्चोहइत्ता

सेडियाचवकवालपरिवडा जेणेव समणे भगवं महावीरे तेणेव उवागच्छइ, उवा-
 गच्छिता तिवद्धुत्तो जाव वंदइ णमंसइ, वंदिता णमंसिता णच्चसण्णे णाइदूरे
 जाव पंजलिउडा ठिडया सेव पञ्जुवासइ ॥ ५२ ॥ तए णं समणे भगवं महा-
 वीरे अग्गिमित्ताए तीसे य जाव धम्मं कहेइ । तए णं सा अग्गिमित्ता भारिया
 समणस्स भगवओ महावीरस्स अंतिए धम्मं सोच्चा णिस्सम्म हट्टतुट्ठा समणं
 भगवं महावीरं वंदइ णमंसइ, वंदिता णमंसिता एवं वयासी—'मट्ट्हामि णं
 भंते ! णिमंथं पावयणं जाव मे जहेयं तुम्हे वयह, जहा णं देवाण्णपियाणं
 अंतिए बहवे उग्गम भोगा जाव पटवइया णो खलु अहं तथा संचाण्णि देवाण-
 प्पियाणं अंतिए मण्डा भवित्ता जावं अहं णं देवाण्णपियाणं अंतिए पंचाण्णवइयं
 सत्तमिक्खावइयं दुवालमविहं गिहिधम्मं पडिवाज्जस्सामि' । अहासुहं देवाण-
 प्पिया ! मा पडिवंधं करेह । तए णं सा अग्गिमित्ता भारिया समणस्स भगवओ
 महावीरस्स अंतिए पंचाण्णवइयं सत्तमिक्खावइयं दुवालमविहं गिहि(सावग)धम्मं
 पडिवाज्जइ २ ता समणं भगवं महावीरं वदइ णमंसइ वंदिता णमंसिता तमेव
 धम्मियं जाणप्पवरं दुहुहइ, दुहुहिता जामेव विमं पाउठ्ठया तामेव दिस पडिगया ।
 तए णं समणे भगवं महावीरे अणया कयाइ पोलासपुराओ णयराओ सहस्संब-
 वणाओ उज्जाणाओ पडिणिकवमइ, पडिणिकवमित्ता ब्राह्मया जणवयविहारं
 विहरइ ॥ ५४ ॥ तए णं से सद्दालपुत्ते समणोवासए जाए अमिगयजीवाजीवे
 जाव विहरइ । तए णं से गोसाले मखलिपुत्ते इमीसे कहाए लद्धट्ठे समण-
 'एवं खलु सद्दालपुत्ते आजीवियसमयं वमित्ता समणाणं णिमंथाणं दिट्ठि-
 पडिवण्णे, तं गच्छामि णं सद्दालपुत्तं आजीविओवासयं समणाणं णिमंथाणं
 दिट्ठि वामेत्ता पुणरवि आजीवियदिट्ठि गेण्हावित्तए' त्तिकट्टु एवं सपेहेइ,
 सपेहिता आजीवियसंघसंपरिवुडं जेणेव पोलासपुरे णयरे जणेव आजीवियसभा
 तेणेव उवागच्छइ, उवागच्छिता आजीवियसमाए भण्डाणिकखेवं करेइ, करेता
 कइवएहि आजीविएहि सद्धि जेणेव सद्दालपुत्ते समणोवासए तेणेव उवागच्छइ ।
 तए णं से सद्दालपुत्ते समणोवासए गोमालं मखलिपुत्तं एज्जमाणं पासइ, पासिता
 णो आहाइ, णो परिजाणइ, अणाढायमाणे अपरिजाणमाणे तुस्सिणीए संचि-
 ट्ठइ ॥ ५५ ॥ तए णं से गोसाले मखलिपुत्ते सद्दालपुत्तेणं समणोवासएणं अणा-
 ढाइज्जमाणे अपरिजाजिज्जमाणे पीढफलगसिज्जसंथारट्टयाए समणस्स भगवओ
 महावीरस्स गुणकित्तणं करेमाणे सद्दालपुत्तं समणोवासयं एवं वयासी-

'आगए णं देवाणुप्पिया ! इहं महामाहणे ?' तए णं से सद्दालपुत्ते समणो-
 वासए गोसाले मंखलिपुत्तं एवं वयासी- 'के णं देवाणुप्पिया ! महामाहणे ?'
 तए णं से गोसाले मंखलिपुत्ते सद्दालपुत्तं समणोवासयं एवं वयासी- 'समणे
 भगवं महावीरे महामाहणे' । 'से केणट्ठेणं देवाणुप्पिया ! एवं बुच्चइ-समणे
 भगवं महावीरे महामाहणे ?' 'एवं खलु सद्दालपुत्ता ! समणे भगवं महावीरे
 महामाहणे उप्पण्णणानवसणधरे जाव महियपूइए जाव तच्चकम्मसम्पयासंपउत्ते,
 से तेणट्ठेणं देवाणुप्पिया ! एवं बुच्चइ-समणे भगवं महावीरे महामाहणे ।
 'आगए णं देवाणुप्पिया ! इहं महागोवे ?' 'के णं देवाणुप्पिया ! महागोवे ?'
 'समणे भगवं महावीरे महागोवे' 'से केणट्ठेणं देवाणुप्पिया ! जाव महा-
 गोवे ?' 'एवं खलु देवाणुप्पिया ! समणे भगवं महावीरे संसाराडवीए बहवे
 जीवे णस्समाणे विणस्समाणे खज्जमाणे छिज्जमाणे भिज्जमाणे लुप्पमाणे
 विलुप्पमाणे धम्ममएणं दण्डेणं सारवखमाणे संगोवेमाणे णिव्वाणमहावाडं साह-
 तिथि सम्पावेइ, से तेणट्ठेणं सद्दालपुत्ता ! एवं बुच्चइ-समणे भगवं महावीरे
 महागोवे' । 'आगए णं देवाणुप्पिया ! इहं महासत्थवाहे ?' 'के णं देवाणु-
 प्पिया ! महासत्थवाहे ?' सद्दालपुत्ता ! समणे भगवं महावीरे महासत्थवाहे'
 'से केणट्ठेणं (देवाणु० महासत्थवाहे) ?' 'एवं खलु देवाणुप्पिया ! समणे
 भगवं महावीरे संसाराडवीए बहवे जीवे णस्समाणे विणस्समाणे जाव विलुप्प-
 माणे (उम्मगपडिवण्णे) धम्ममएणं पथेणं सारवखमाणे निव्वाणमहागट्ठणा-
 भिमूहे साहतिथि संपावेइ, से तेणट्ठेणं सद्दालपुत्ता ! एवं बुच्चइ-समणे भगवं
 महावीरे महासत्थवाहे' । 'आगए णं देवाणुप्पिया ! इहं महाधम्मकही ?' 'के
 णं देवाणुप्पिया ! महाधम्मकही ?' 'समणे भगवं महावीरे महाधम्मकही'
 'से केणट्ठेणं समणे भगवं महावीरे महाधम्मकही ?' 'एवं खलु देवाणुप्पिया !
 समणे भगवं महावीरे महइमहालयसि संसारसि बहवे जीवे णस्समाणे विणस्स-
 माणे खज्जमाणे छिज्जमाणे भिज्जमाणे लुप्पमाणे विलुप्पमाणे उम्मगपडि-
 वण्णे सप्पह्विप्पणट्ठे मिच्छत्तबलाभिभूए अट्ठविहकम्मतमपडलपडिच्छणगे
 बहूहि अट्ठेहि य जाव वागरणेहि य चाउरंताओ संसारकंताराओ साहतिथि
 णित्थारेइ, से तेणट्ठेणं देवाणुप्पिया ! एवं बुच्चइ-समणे भगवं महावीरे
 महाधम्मकही' । 'आगए णं देवाणुप्पिया ! इहं महणिज्जामए ?' 'से के णं

देवाणुप्पिया ! महाणिज्जामए ?' 'समणे भगवं महावीरे महाणिज्जामए'।
 'से केणट्ठेणं ?' 'एवं खलु देवाणुप्पिया ! समणे भगवं महावीरे संसारमहा-
 समुद्वे बहवे जीवे णस्समणे विणस्समाणे जाव विलुप्पमाणे बुद्धमाणे णिवृद्धमाणे
 उप्पियमाणे धम्ममईए णावाए णिव्वाणतीरामिमुहे साहात्थि संपावेइ, से तेण-
 ट्ठेणं देवाणुप्पिया ! एवं बुच्चइ--समणे भगवं महावीरे महाणिज्जामए'
 ॥ ५६ ॥ तए णं से सद्दालपुत्ते समणोवासए गोसालं मंखलिपुत्तं एवं वयासी-
 'तुब्भे णं देवाणुप्पिया ! इयच्छेया जाव इयणिउणा इयणयवादी इयउवएभलद्धा
 इयविण्णाणपत्ता, पभू णं तुब्भे मम धम्ममायरिणं धम्मोवएणं समणेणं
 भगवया महावीरेणं सद्धिं विवादं करेत्तए ?' 'णे इणट्ठे समट्ठे'। 'से केण-
 ट्ठेणं देवाणुप्पिया ! एवं बुच्चइ--णो खलु पभू तुब्भे मम धम्ममायरिणं जाव
 महावीरेणं सद्धिं विवादं करेत्तए ?' 'सद्दालपुत्ता ! से जहाणामए केइ पुरिसे
 तरुणे जुगवं जाव णिउणसिप्पोवगए एगं महं अयं वा एलयं वा सूयरं वा
 कुवकुडं वा तित्तिरं वा वट्टयं वा लावयं वा कवोयं वा कविजलं वा वायसं वा
 सेणयं वा हत्थंसि वा पायंसि वा खुरंसि वा पुच्छंसि वा पिच्छंसि वा सिगंसि
 वा विसाणंसि वा रोमंसि वा जहिं-जहिं गिण्हइ तहिं-तहिं णिच्चनं णिफदं
 धरेइ, एवामेव समणे भगवं महावीरे ममं बहूहि अट्ठेहि य हेऊहि य जाव
 वागरणेहि य जहिं-जहिं गिण्हइ तहिं तहिं णिप्पट्टपसिणवागरणं करेइ, से तेण-
 ट्ठेणं सद्दालपुत्ता ! एवं बुच्चइ--णो खलु पभू अहं तव धम्ममायरिणं जाव
 महावीरेणं सद्धिं विवादं करेत्तए' ॥ ५७ ॥ तए णं से सद्दालपुत्ते समणोवासए
 गोसालं मंखलिपुत्तं एवं वयासी--'जम्हा णं देवाणुप्पिया ! तुब्भे मम धम्मा-
 यरियस्स जाव महावीरस्स संतेहिं तच्चेहिं तहिंएहिं सवमूएहिं भावेहिं
 गुणकित्तणं करेह तम्हा णं अहं तुब्भे पाडिहारिणं पीढ जाव संथारणं उव-
 णिमंतेमि, णो चेव णं धम्मोत्ति वा तवोत्ति वा, तं गच्छहं णं तुब्भे मम
 कुम्भारावणेसु पाडिहारियं पीढफलग जाव ओगिण्हिताणं विहरह'।
 तए णं से गोसाले मंखलिपुत्ते सद्दालपुत्तस्स समणोवासयस्स एयमट्ठं
 पडिमुणेइ, पडिमुणेत्ता कुम्भारावणेसु पाडिहारियं पीढ जाव ओगि-
 ण्हिता णं विहरइ । तए णं से गोसाले मंखलिपुत्तं सद्दालपुत्तं समणोवासयं
 जाहे णो संघएइ बहूहि आघवणाहि य पणवणाहि य सणवणाहि य विण-

मणाहि यं णिग्गन्धाओ पावयणाओ चालित्तए वा खोमित्तए वा विपरिणा-
मित्तए वा त्थहे सत्ते तंते परित्तंते पोलासपुराओ णयराओ पडिणिवल्लमइ,
परिणिवल्लमिता बहिया जणवयविहारं विहरइ ॥ ५८ ॥ तए णं तस्स सद्दाल-
पुत्तस्स समणोवासयस्स बह्निह सील० जाव भावेमाणस्स चोइस संवच्छरा
वीइवकंता, पण्णरसमस्स संवच्छरस्स अंतरा वट्टमाणस्स पुव्वरत्तावरत्तकाले जाव
पोसहसालाए समणस्स भगवओ महावीरस्स अंतियं धम्मपण्णात्ति उवसम्प-
ज्जित्ताणं विहरइ । तए णं तस्स सद्दालपुत्तस्स समणोवासयस्स पुव्वरत्ता-
वरत्तकाले एगे देवे अंतियं पाउब्भवित्था । तए णं से देवे एगं महं णीलूप्ल-
जाव असि गहाय सद्दालपुत्तं समणोवासयं एवं वयासी—जहा चुलणीपियस्स
तहेव देवो उवसग्गं करेइ, णवरं एवकेवके पुत्ते णव मंससोल्लए करेइ जाव
कणीयसं घाएइ, घाइत्ता जाव आयञ्चइ । तए णं से सद्दालपुत्ते समणोवासए
अभीए जाव विहरइ । तए णं से देवे सद्दालपुत्तं समणोवासयं अभीयं जाव
पासित्ता चउत्थपि सद्दालपुत्तं समणोवासयं एवं वयासी—‘हं भो सद्दालपुत्ता !
समणोवासया ! अपत्तिथ्यपत्थिया जाव ण भंजसि तओ ते जा इमा अग्गिमित्ता
भारिया धम्मसहाइया धम्मविइज्जिया धम्माणुरागरत्ता समसुहदुख-
सहाइया तं साओ गिहाओ णीणेमि, णीणेत्ता तव अग्गओ घाएमि, घाएत्ता
णव मंससोल्लए करेमि, करेत्ता आदाणभरियंसि कडाहयंसि अट्टहेमि, अट्टहेत्ता
तव मायं मंसेण य सोणिएण य आयंचामि, जहा णं तुमं अट्टहुट्ट जाव
ववरोविज्जसि’ । तए णं से सद्दालपुत्ते समणोवासए तेणं देवेणं एवं वुत्ते समाणे
अभीए जाव विहरइ । तए णं से देवे सद्दालपुत्तं समणोवासयं दोच्चं-पि तच्चं-
पि एवं वयासी—‘हं भो सद्दालपुत्ता ! समणोवासया ! तं चेव षणइ । तए णं
तस्स सद्दालपुत्तस्स समणोवासयस्स तेणं देवेणं दोच्चं-पि तच्चं-पि एवं वुत्तस्स
समाणस्स अयं अज्झत्थिए ४ सम्पुप(ज्जित्था)ण्णे । एवं जहा चुलणीपिया
तहेव चितेइ—‘जेणं ममं जेट्ठं पुत्तं, जेणं ममं सज्झिमयं पुत्तं, जेणं ममं कणी-
यसं पुत्तं जाव आयञ्चइ, जाइवि य णं ममं इमा अग्गिमित्ता भारिया सम-
सुहदुखसहाइया तं-पि य इच्छइ साओ गिहाओ णीणेणा मम अग्गओ घाए-
त्तए, तं सेयं खल्ल ममं एयं पुरिसं गिण्हत्तए’ त्ति-कट्ट उट्ठाइए जहा चुलणी-
पिया तहेव सव्वं भाणियव्वं, णवरं अग्गिमित्ता भारिया कोलाहलं सुणित्ता

भणइ, सेसं जहा चुलणिपिया वलव्वया, णवरं अहणमूए विमाणे उव्वण्णे,
जाव महाविदेहे वासे तिज्झहिइ (५) ॥ ५६ ॥ णिव्वेवो ॥

॥ सत्तमं अज्झयणं समत्तं ॥

महासयए णाम अट्टमं अज्झयणं

अट्टमस्स उव्वेवओ । एवं खलु जम्बू ! तेणं कालेणं तेणं समएणं रायगिहे
णयरे । गुणसिलए चेइए । तेणिए राया । तत्थ णं रायगिहे महासयए णामं
गाहावई परिवसइ, अइडे—जहा आणन्दो । णवरं अट्ट हिरण्णकोडोओ सकं-
साओ णिहाणपउत्ताओ, अट्ट हिरण्णकोडोओ सकंसाओ वृद्धिपउत्ताओ, अट्ट
हिरण्णकोडोओ सकंसाओ पविथरपउत्ताओ, अट्ट वया दसगोसाहस्सिएणं
वएणं । तस्स णं महासयगस्स रेवईपामोव्वखाओ तेरस भारियाओ होत्था,
अहीण जाव सुरूवाओ । तस्स णं महासयगस्स रेवईए भारियाए कोल(ह)घ-
रियाओ अट्ट हिरण्णकोडोओ, अट्ट-वया दसगोसाहस्सिएणं वएणं होत्था ।
अवसेसाणं दुवालसण्हं भारियाणं कोलघरिया एगमेगा हिरण्णकोडो, एगमेगे य
वए दसगोसाहस्सिएणं वएणं होत्था ॥६०॥ तेणं कालेणं तेणं समएणं सामी
समोसठे । परिसा णिग्गया । जहा आणन्दो तथा णिग्गच्छइ, तहेव सावय-
धम्मं पडिबज्जइ । णवरं अट्ट हिरण्णकोडोओ सकंसाओ उच्चारेइ, अट्ट वया,
रेवईपामोव्वखाहिं तेरसाहिं भारियाहिं अवसेसं मेहुणविहिं पच्चवव्वखाइ, सेसं सव्वं
तहेव । इमं च णं एयारूवं अभिग्गहं अभिग्गिहइ—कल्लार्कल्लि च णं कएइ मे
बे दोणियाए कंसपाईए हिरण्णभरियाए संववहरित्तए । तए णं से महासयए
समणोवासए जाए अभिग्गयजीवाजीवे जाव विहरइ, तए णं समणे भग्गं महा-
वीरे बहिया जणवयविहारं विहरइ ॥६१॥ तए णं तीसे रेवईए गाहावइणीए
अणया कयाइ पुव्वरत्तावरत्तकालसमयसि कुडुम्ब जाव इमेयारूवे अज्झरिथिए
४—' एवं खलु अहं इयासि दुवालसण्हं सवत्तीणं विघाएणं णो संचाएमि महास-
यएणं समणोवासएणं सद्धि उरालाइं माणुस्सयाइं भोगमोगाइं भुज्जमाणी विह-
रित्तए, तं सेयं खलु ममं एथाओ दुवालस-वि सवत्तियाओ अग्गिप्पओगेणं वा
सत्थप्पओगेणं वा विसप्पओगेणं वा जीवियाओ ववरोवित्त, एयासि एगमेगं हिर-
ण्णकोडिं एगमेगं वयं सयमेव उव्वसम्पज्जित्ता णं महासयएणं समणोवासएणं सद्धि

उरालाईं जाव विहरित्तए' एवं सम्पेहेइ, सपेहिता तासि दुवालसण्हं सवत्तीणं अंतराणि य छिद्राणि य विवराणि य पडिजागरमाणी विहरइ । तए णं सा रेवईं गाहावइणी अणया कयाइ तासि दुवालसण्हं सवत्तीणं अंतरं जाणित्ता छ सवत्तीओ सत्थप्पओगेणं उह्वेइ, उह्वेत्ता छ सवत्तीओ विसप्पओगेणं उह्वेइ उह्वेत्ता तासि दुवालसण्हं सवत्तीणं कोलघरियं एगमेगं हिरणकोडि एगमेगं वयं सयमेव पडिवज्जइ, पडिवज्जित्ता महासयएणं समणोवासएणं सद्धि उरालाईं भोगभोगाईं भुंजमाणी विहरइ । तए णं सा रेवईं गाहावइणी मंसलोलुया मंसेसु मुच्छिया जाव अज्जोववण्णा बहुविहेहि मंसेहि य सोल्लेहि य तल्लिएहि य भज्जिएहि य सुरं च महं च मेरगं च मज्जं च सीधुं च एसणं च आसाएमाणी ४ विहरइ ॥ ६२ ॥ तए णं रायगिहे णयरे अणया कयाइ अमाघाए घूठ्ठे यावि होत्था । तएणं सा रेवईं गाहावइणी मंसलोलुया मंसेसु मुच्छिया ४ कोलघरिए पुरिसे सद्दावेइ, सद्दावेत्ता एवं वयासी—'तुंभे णं देवानुप्पिया ! मम कोलघरिएहितो वएहितो कल्लाकल्लि दुवे दुवे गोणपोयए उह्वेह, उह्वेत्ता ममं उवणेह । तए णं ते कोलघरिया पुरिसा रेवईए गाहावइणीए 'तह'त्ति एयमट्ठं विणएणं पडिसुणेंति, पडिसुणेंता रेवईए गाहावइणीए कोलघरिएहितो वएहितो कल्लाकल्लि दुवे दुवे गोणपोयए वहेति, वहेत्ता रेवईए गाहावइणीए उवणेंति । तए णं सा रेवईं गाहावइणी तेहि गोणमंसेहि सोल्लेहि य सुरं च ६ आसाएमाणी ४ विहरइ ॥ ६३ ॥ तए णं तस्स महासयगस्स समणोवासगस्स बहूहिं सील जाव भावेमाणस्स चोद्दस संवच्छरा वइक्कता । एवं तहेव जेट्ठ पुत्तं ठवेइ जाव पोसहसालाए धम्मपण्णत्ति उवसंपज्जित्ताणं विहरइ । तए णं सा रेवईं गाहावइणी मत्ता लूलिया विइण्णकेसी उत्तरिज्जयं विककुमाणी २ जेजेव पोसहसाला जेजेव महासयए समणोवासए तेजेव उवागच्छइ, उवागच्छित्ता मोहुंमयाजणणाइं सिगारियाइं इत्थिभावाइं उवदंसेमाणी २ महासययं समणोवासयं एवं वयासी—'हं भो महासयगा ! समणोवासया ! धम्मकामया पुण्णकामया सगकामया मोक्खकामया धम्मकल्लिया ४ धम्मपिवासिया ४ किण्णं तुंभं देवानुप्पिया ! धम्मणेण वा पुण्णेण वा सग्गेण वा मोक्खेण वा ? जण्णं तुसं मए सद्धि उरालाईं जाव भुंजमाणे णो विहरसि ?' । तए णं से महासयए समणोवासए रेवईए गाहावइणीए

एयमट्ठं णो आढाइ, णो परियाणइ, अणाढायमाणे अपरियाणमाणे तुसिणीए धम्मज्झाणोवगए विहरइ । तए णं सा रेवई गाहावइणी महासययं समणोवासयं दोच्चंपि तच्चंपि एवं वयासी-‘हं भो ! तं च्चैव भणइ, सोऽवि तहेव जाव अणाढायमाणे अपरियाणमाणे विहरइ । तए णं सा रेवई गाहावइणी महासयएणं समणोवासएणं अणाढाइज्जमाणी अपरियाणिज्जमाणी जामेव दिसि पाउब्भूया तामेव दिसि पडिगया ॥ ६४ ॥ तए णं से महासयए समणोवासए पढमं उवासगपडिमं उवसंपज्जित्तानं विहरइ । पढमं अहामुत्तं जाव एक्का-रसऽवि । तए णं से महासयए समणोवासए तेषां उरालेणं जाव किसे धमणि-संतए जाए । तए णं तस्स महासययस्स समणोवासयस्स अणया कयाइ पुक्वरत्तावरत्तकाले धम्मजागरियं जागरमाणस्स अयं अज्झत्थिए ४-‘एवं खलु अहं इमेणं उरालेणं जहा आणंदो तहेव अपच्छिन्नमारणांतियसंलेहणा-ज्ञसियसरीरे भत्तपाणपडियाइविस्सए कालं अणवकंखमाणे विहरइ । तए णं तस्स महासयगस्स समणोवासगस्स सुभेणं अज्झवसाणेणं जाव खओवसमेणं ओहिणाणे समुप्पणे । पुरत्थिमेणं लवणसमुद्दे जोयणसाहस्सियं खेतं जाणइ पासइ, एवं दक्खिणेणं पच्चत्थिमेणं, उत्तरेणं जावं च्चुल्लहिमवंतं वासहरपक्कयं जाणइ पासइ, अहे इमीसे रयणप्पभाए पुट्ठीए लोलुयच्छुयं णरयं चउरासीइ-वाससहस्सट्ठियं जाणइ पासइ ॥ ६५ ॥ तए णं सा रेवई गाहावइणी अणया कयाइ मत्ता जाव उत्तरिज्जयं विकड्डुमाणी २ जेणेव पोत्तहसाला जेणेव महा-सयए समणोवासए तेणेव उवागच्छइ, उवागच्छत्ता महासययं तहेव भणइ, जाव दोच्चंपि तच्चंपि एवं वयासी-‘हं भो तहेव । तए णं से महासयए समणो-वासए रेवईए गाहावइणीए दोच्चंपि तच्चंपि एवं वृत्तं समाणे आमुत्ते ४ ओहि पउंजइ, पउजित्ता ओहिणा आमोएइ, आमोएत्ता रेवइं गाहावइणि एवं वयासी-‘हं भो रेवई ! अपत्थियपत्थिए ! ४ एवं खलु तुमं अंतो सत्तरत्तस्स अलसएणं वाहिणा अभिभूया समाणी अट्टुहुट्टवसट्टा असमाहिपत्ता कालमासे कालं किच्चा अहे इमीसे रयणप्पभाए पुट्ठीए लोलुयच्छुए णरए चउरासीइवाससहस्सट्ठि-एमु णेरइएमु णेरइयत्ताए उववज्जिहिसि’ । तए णं सा रेवई गाहावइणी महा-सयएणं समणोवासएणं एवं वृत्ता समाणी एवं वयासी-‘रुट्ठे णं ममं महासयए समणोवासए, हीणे णं ममं महासयए समणोवासए अवज्झाया णं अहं महा-

सयएणं समणोवासएणं, ण णज्जइ णं अहं केणवि कुमारेणं मारिज्जिस्सामिं
 त्तिकट्टु भीया तंत्या तसिया उव्वग्गा संजायमया सणिधं २ पच्चोसक्कइ,
 पच्चोसविकत्ता जेणेव सए गिहे तेणेव उवागच्छइ, उवागच्छित्ता ओहयं जाव
 श्रियाइ । तए णं सा रेवई गाहावइणी अंतो सत्तरत्तस्स अलसएणं वाहिणा
 अभिभूया अट्टुहट्टुवसट्टा कालमासे कालं किच्चवा इमीसे रयणप्पभाए पुढवीए
 लोलुयच्चुए णरए चउरासीइवाससहस्सट्ठिइएमु णेरइएमु णेरइयत्ताए उववण्णा
 ॥ ६६ ॥ तेणं कालेणं तेणं समएणं समणे भगवं महावीरे, समोसरणं, जाव परिसा
 पडिगया । 'गोयमा'इ ! समणे भगवं महावीरे एवं वयासी—'एवं खलु गोयमा ।
 इहेव रायगिहे णयरं ममं अतेवासी महासयए णामं समणोवासए पोसहसालाए
 अपच्छिममारणंतियसलेहणाए झूसियसरीरे भत्तपाणपडियाइविखए कालं अणव-
 कंखमाणे विहरइ । तए णं तस्स महासयगस्स रेवई गाहावइणी मत्ता जाव विकट्टु-
 माणो २ जेणेव पोसहसाला जेणेव महासयए तेणेव उवागच्छइ, उवागच्छित्ता
 मोहुम्माय जाव एवं वयासी—तहेव जाव दोच्चंपि तच्चंपि एवं वयासी—
 तए णं से महासयए समणोवासए रेवईए गाहावइणीए दोच्चंपि तच्चंपि एवं
 वुत्ते समणे आसुरुत्ते ४ ओहिं पउंजइ पउंजित्ता ओहिणा आभोएइ, आभोएत्ता
 रेवइं गाहावइणीं एवं वयासी—जाव 'उववज्जिहिसि' । णो खलु कप्पइ गोयमा !
 समणोवासगस्स अपच्छिम जाव झूसियसरीरस्स भत्तपाणपडियाइविखयस्स
 परो संतेहिं तच्चेहिं तहिएहिं सण्णुएहिं अणिट्ठेहिं अकतेहिं अप्पिएहिं अमण-
 ण्णेहिं अमणामेहिं वागरणेहिं वागरित्तए, तं गच्छ णं देवाणुप्पिया ! तुमं महा-
 सययं समणोवासयं एवं वयाहिं—णो खलु देवाणुप्पिया ! कप्पइ समणोवासगस्स
 अपच्छिम—जाव भत्तपाणपडियाइविखयस्स परो संतेहिं जाव वागरित्तए । तुमे
 य णं देवाणुप्पिया ! रेवई गाहावइणी संतेहिं ४ अणिट्ठेहिं ५ वागरणेहिं
 वागरिया, तं णं तुमं एयस्स ठाणस्स आलोएहिं जाव जहारिहं च पावच्छित्तं
 पडिवज्जाहिं । तए णं से भगवं गोयमे समणस्स भगवओ महावीरस्स 'तह'
 त्ति एयमट्ठं विणएणं पडिसुणेइ, पडिसुणेत्ता तओ पडिणिकखमइ, पडिणिवख-
 मित्ता रायगिहं णयरं सज्जंमज्जेणं अणुप्पविसइ, अणुपविसित्ता जेणेव महासय-
 गस्स समणोवासयस्स गिहे जेणेव महासयए समणोवासए तेणेव उवागच्छइ ।
 तए णं से महासयए समणोवासए भगवं गोयमं एज्जमाणं पासइ, पासित्ता हट्टु
 जाव हियए भगवं गोयमं वंदइ णमंसइ । तए णं से भगवं गोयमे महासययं

समणोवासयं एवं वयासी- 'एवं खलु देवानुप्पिया ! समणे भगवं महावीरे एवमाइवखइ भासइ पणवेइ परुवेइ-णो खलु कप्पइ देवानुप्पिया ! समणो- वासगस्स अपच्छिम जाव वागरित्तए, तुमे णं देवानुप्पिया ! रेवई गाहावइणी संतेहि जाव वागरिया, तं णं तुमं देवानुप्पिया ! एयस्स ठाणस्स आलोएहि जाव पडिवज्जाहि ' । तए णं से महासयए समणोवासए भगवओ गोयमस्स ' तह ' ति एयमट्ठं विणएणं पडिसुणेइ, पडिसुणेत्ता तस्स ठाणस्स आलोएइ जाव अहारिहं च पायच्छित्तं पडिवज्जइ । तए णं से भगवं गोयमे महासयगस्स समणोवासयस्स अंतियाओ पडिणिवखमइ, पडिणिवखमित्ता रऱयगिहं णयरं मज्झमज्जेणं णिगच्छइ, णिगच्छित्ता जेणेव समणे भगवं महावीरे तेणेव उवा- गच्छइ, उवागच्छित्ता समणं भगवं महावीरं वंदइ णमंसइ, वंदित्ता णमसित्ता संजसेणं तवसा अप्पाणं भावेमाणे विहरइ । तए णं समणे भगवं महावीरे अणया कयाइ रायगिहाओ णयराओ पडिणिवखमइ, पडिणिवखमित्ता बहिया जणवय- विहारं विहरइ ॥ ६७ ॥ तए णं से महासयए समणोवासए बहूहि सील-जाव भावेत्ता वीसं वासाइं समणोवासयपरियायं पाउणित्ता एवकारस उवासयपडि- माओ सम्मं काएणं फासित्ता मासियाए संलेहणाए अप्पाणं झूसित्ता सद्धि भत्ताइं अणसणाए छेदेत्ता आलोइयपडिक्कंते सनाहिपत्ते कालमासे कालं किच्चा सोहम्मे कप्पे अरुणवडिसए विमाणे देवत्ताए उववण्णे । चत्तारि पलि- ओवमाइं ठिई । महाविदेहेवासे सिज्झिहिइ ॥ ६८ ॥ णिवखेवो ॥

॥ अट्टमं अज्झयणं समत्तं ॥

णंदिणीपिया णामं णवमं अज्झयणं

णवमस्स उवखेवो । एवं खलु जम्बू ! तेणं कालेणं तेणं समएणं सावत्थी णयरो । कोट्टए चेइए जियससू राथा । तत्थे णं सावत्थीए णयरीए णंदिणी- पिया णामं गाहावई परिवसइ, अइहे । चत्तारि हिरण्णकोडीओ णिहाणपुउत्ताओ, चत्तारि हिरण्णकोडीओ वुड्ढिपउत्ताओ, चत्तारि हिरण्णकोडीओ पवित्थर- पउत्ताओ, चत्तारि वया दसणोसाहस्सिएणं वएणं । अस्सिणी भारिया । सामो समोसहे । जहा आणंदो तहेव गिहिधम्मं पडिवज्जइ । सामो बहिया विहरइ ।

तए णं से णंदिणीपिया समणोवासए जाए जावविहरइ । तए णं तस्स णंदिणी-
पियस्स समणोवासयस्स बहूहिं सौलव्वयगुण० जाव भावेमाणस्स चोद्दस
संबच्छराइं वद्धवर्कताइं । तहेव जेट्ठं पुत्तं ठवेइ, धम्मपण्णत्ति, बीसं वासाइं
परियांगं, णाणत्तं अरुणगवे विमाणे उववाओ । महाविदेहे वासे सिज्झहिइ
॥ ६६ ॥ णिक्खेवो ॥ णवमं अज्झयणं समत्तं ॥

सालिहीपिया णामं दसमं अज्झयणं

दसमस्स उवखेवो । एवं खलु जम्बू ! तेणं कालेणं तेणं समएणं सावत्थी
णयरी । कोट्टए चेइए । जियसत्तू राया । तत्थ णं सावत्थीए णयरीए सालिही-
पिया णामं गाहावईं परिवसइ । अड्ढे दित्ते । चत्तारि हिरण्णकोडीओ णिहाण-
पउत्ताओ, चत्तारि हिरण्णकोडीओ वृद्धिपउत्ताओ, चत्तारि हिरण्णकोडीओ
पविस्थरपउत्ताओ । चत्तारि बया दसगोसाहस्सिएणं वएणं । फग्गणी भारिया ।
सामी समोसडे । जहा आणंदो तहेव गिहिधम्मं पडिवज्जइ, जहा कामदेवो
तहा जेट्ठं पुत्तं ठवेत्ता पोसहसालाए समणस्स भगवओ महावीरस्स धम्मपण्णत्ति
उवसम्पज्जित्ताणं विहरइ । णवरं णिहवसग्गाओ एवकारस-वि उवासगपडि-
माओ तहेव भाणियव्वाओ । एवं कामदेवगमेणं णेयव्वं जाव सोहम्मे कप्पे
अरुणकीले विमाणे देवत्ताए उववण्णे । चत्तारि पत्तिओवमाइं ठिई, महाविदेहे
वासे सिज्झहिइ ॥ ७० ॥ दसमं अज्झयणं समत्तं ॥

दसण्ह-वि पणरसमे संबच्छरे वट्टमाणानं चित्ता । दसण्ह-वि बीसं वासाइं
समणोवासयपरियाओ । एवं खलु जम्बू ! समणेणं जाव सम्पत्तेणं सत्तमस्स
अंगस्स उवासगदसाणं अयमट्ठे पण्णत्ते ॥ ७१ ॥ उवासगदसाओ समत्ताओ ।
उवासगदसाणं सत्तमस्स अंगस्स एगो सुयखंधो दस अज्झयणा एवकसरगा
दससु चेवं दिवसेसु उट्ठिस्सिज्जति तओ सुयखंधो समुट्ठिस्सिज्जइ अणुणविज्जइ
दोसु दिवसेसु अंगं तहेव ॥

॥ उवासगदसाओ समत्ताओ ॥



अंतगडदसाओ

पढमो वग्गो—पढमं अज्झयणं

तेणं कालेणं तेणं समएणं चंपा णामं णयरी हो० व०, तत्थ णं चं० ण० उ० दि० ए० पुण्णभइे णा० चेइए हो० वण्णओ, ती० चं० ण० को० णा० रा० हो० म० हि० व०, तेणं कालेणं तेणं समएणं अज्जसुहम्मे थरे जाव पं० अ० स० सं० पु० च० गा० दु० सु० वि० जे० चं० ण० जे० पु० चे० ते० समोसरिए परिसा णिग्गया जाव पडिग्गया । तेणं कालेणं तेणं समएणं अज्जसुहम्मस्स अंतेवासी अज्ज. जंबू जाव पज्जुवासभाणे एवं वयासी—जइ णं भंते ! समणेणं भ० म० आइगरेणं जाव संपत्तेणं सत्तमस्स अंगस्स उवासग्गदसाणं अयमट्ठे पण्णत्ते अट्टमस्स णं भंते ! अंगस्स अंतगडदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! समणेणं जाव संपत्तेणं अट्टमस्स अंगस्स अंतगडदसाणं अट्ट वग्गा पण्णत्ता, जइ णं भंते ! समणेणं जाव संपत्तेणं अट्टमस्स अंगस्स अंतगडदसाणं अट्ट वग्गा पण्णत्ता, पढमस्स णं भंते ! वग्गस्स अंतगडदसाणं समणेणं जाव संपत्तेणं कइ अज्झयणा पण्णत्ता ? एवं खलु जंबू ! समणेणं जाव संपत्तेणं अट्टमस्स अंगस्स अंतगडदसाणं पढमस्स वग्गस्स दस अज्झयणा पण्णत्ता, तं—'गोयम-समुट्ठ-सागर-गंभीरे चेव होइ थिमिए य । अथले कंपिल्ले खलु अक्खोभ-पत्तेणइं विण्हू ॥ १ ॥' जइ णं भंते ! समणेणं जाव संपत्तेणं अट्टमस्स अंगस्स अंतगडदसाणं पढमस्स वग्गस्स दस अज्झयणा पण्णत्ता (तं० गो० जाव वि०) पढमस्स णं भंते ! अज्झयणस्स अंतगडदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! तेणं कालेणं तेणं समएणं बारवई षाभं णयरी होत्था, वुज्जालसजोयणायाभा णवजोयणविस्थिणा धणवइमइणिम्मया चामीकरपागारा णाणासणिपंचवण्णकविसीसगपरिमडिया

सुरम्म अलकापुरिसंकासा पमुदिथपक्कीलिया पच्चक्खं देवलोगमूया पासईया
 ४, तीसे णं बारवईणयरीए बहिया उत्तरपुरत्थिमे दिसिमाए एत्थ णं रेवयए
 णामं पव्वए होत्था तत्थ णं रेवयए पव्वए णंदणवणे णामं उज्जाणे होत्था
 वण्णओ, सुरप्पिए णामं जक्खाययणे होत्था, पोराणे सेणं एगेणं वण्णं देणं
 असोगवरपायवे, तत्थ णं बारवईए णयरीए कण्हे णामं वासुदेवे राया परिवसइ
 महया० रायवण्णओ, से णं तत्थ समुद्धविजयपामोक्खाणं दसण्हं दसाराणं बल-
 देवपामोक्खाणं पंचण्हं महावीराणं पज्जुणपामोक्खाणं अद्धट्टाणं कुमारकोडीणं
 संबपामोक्खाणं सट्ठीए दुद्धंसाहस्सीणं सहासेणपामोक्खाणं छण्णण्णए बलवाग-
 साहस्सीणं बीरसेणपामोक्खाणं एगवीसाए बीरसाहस्सीणं उगमेणपामोक्खाणं
 सीत्सण्हं रायसाहस्सीणं हप्पिणीपामोक्खाणं सीत्सण्हं देवीसाहस्सीणं अणंग-
 सेणा पामोक्खाणं अणेगाणं गणिया साहस्सीणं अण्णेसि च बहूणं ईसर जाव
 सत्थवाहाणं बारवईए णयरीए अद्धभरहस्स य समंतस्स आह्वेच्चं जाव
 विहरइ, तत्थ णं बारवईए णयरीए अंधगवण्हिस्स णामं राया परिवसइ महया०
 रायवण्णओ । तस्स णं अंधगवण्हिस्स रण्णे धारिणी णामं देवी होत्था
 वण्णओ । तए णं सा धारिणी देवी अण्णया कयाइं तंसि तारिसणंसि सप-
 णिज्जंसि (एवं) जहा महब्बले 'सुमिण्हंसणकहणा जम्मं बालत्तणं कलाओ
 य । जोव्वणपाणिग्गहणं (कंता) कण्णा पासायभोगा य ॥ १॥' णवरं गोयमो
 णामेणं अट्टण्हं रायवरकण्णाणं एगद्विवसेणं पाणि गेण्हावेत्ति अट्टट्टओ दाओ,
 तेणं कालेणं तेणं समएणं अरहा अरिट्टणेमी आदिकरे जाव विहरइ चउविवहा
 देवा आगया कण्हेवि णिग्गए, तए णं तस्स गोयमस्स कुमारस्स ० जहा
 मेहे तहा णिग्गए धम्मं सोच्चा (णि०) जं णवरं देवाणुप्पिया ! अम्मा-
 पियरो आपुच्छामि देवाणुप्पियाणं० एवं जहा मेहे जाव अणगारे जाए इरिया
 समिए जाव इणमेव णिग्गंथं पावयणं पुरओ काउं विहरइ, तए णं से गोयमे
 अ० अण्णया कयाइं अरहओ अरिट्टणेमिस्स तहारूवाणं थेराणं अंतिए सामा-
 इयमइयाइं एवकारस अंगइं अहिज्जइ २ त्ता वहूहि चउत्थ जाव भावेमाणे
 विहरइ, तएणं (ते) अरहा अरिट्टणेमी अण्णया कयाइं बारवईओणयरीओ
 णंदणवणाओ उ० पडिणिवळमइ (२ त्ता) बहिया अणधयविहारं विहरइ,
 तए णं से गोयमे अणगारे अण्णया कयाइं जेणेव अरहा अरिट्टणेमी तेणेव उवा-

गच्छइ २ ता अरहं अरिदुर्णोम तिवल्लुतो आयाहिणपयाहिणं करेइ २ ता वंदइ
 णमंसइ वं० २ ता एवं बयासी-इच्छामि णं भंते ! तुभोहं अन्नणुणाए
 समणे मासियं भिक्खुपडिभं उवसंपज्जिताणं विहरित्तए, एवं जहा खंदओ तथा
 बारस भिक्खुपडिमाओ फासेइ० गुणरयणं तवोक्कम्मं तहेव फासेइ गिरव-
 सेसं जहा खंदओ तथा वितेइ तथा आपुच्छइ तथा धेरेहिं सिद्धिं सेत्तुंजं दुरुहइ
 मासियाए संलेहणाए बारस वरिसाइं परियाए जाव सिद्धे (५) ॥ १ ॥ एवं
 खलु जंबू ! समणेणं जाव संपत्तेणं अट्टमस्स अंगस्स अंतगडदसाणं पढमस्स
 वग्गस्स पढमस्स अज्झयणस्स अयमट्ठे पणत्ते । एवं जहा गोयमो तथा सेसा
 वण्ही पिया धारिणी माया समुद्दे सागरे गंभीरे थिमिए अयले कंपित्ते अवलोभे
 पसेणई विण्ह एए एगममा, पढमो वग्गो समत्तो ॥ २ ॥

दोच्चो वग्गो

जइ दोच्चस्स वग्गस्स० उवखेवओ, तेणं कालेणं तेणं समएणं बारवईए
 णयरीए वण्ही पिया धारिणी माया-अवल्लोभसागरे खलु समुद्दहिमवंत-अ(य)-
 चलणामे य । धरणे य पूरणे वि य अभिचंदे चैव अट्टमए ॥ १ ॥ जहा पढमे
 वग्गे तथा सव्वे अट्ट अज्झयणा, गुणरयणं तवोक्कम्मं, सोलस-बासाइं परियाओ,
 सेत्तुंजे मासियाए संलेहणाए जाव सिद्धा० ॥ ३ ॥

तच्चो वग्गो

जइ तच्चस्स० उवखेवओ एवं खलु जंबू ! (स० जाव सं० अ० अं०)
 तच्चस्स वग्गस्स अंतगडदसाणं तेरस अज्झयणा पणत्ता, तं० अणीयसेणे
 अणंतसेणे अजियसेणे अणिहयरिउ देवसेणे सत्तुसेणे सारणे गए सुम्भे
 दुम्भे कूवए दाहए अणादिट्ठी । जइ णं भंते ! समणेणं जाव संपत्तेणं०
 तच्चस्स वग्गस्स अंतगडदसाणं तेरस अज्झयणा प० (तं० अ० जाव अ०)
 तच्चस्स णं भंते ! वग्गस्स पढम-अज्झयणस्स अंतगडदसाणं० के अट्ठे
 प० ? एवं खलु जंबू ! तेणं कालेणं तेणं समएणं भद्विलपुरे णामं णयरे
 हात्था (रि०) वण्णओ, तस्स णं भद्विलपुरस्स ण० उत्तरपुरथिये विसी-
 भाए सिरिवणे णामं उज्जाणे होत्था वण्णओ, जियसत्तू राधा, तत्थ णं भद्विल-

पुरे णयरे णागे णामं गाहावई होत्था अड्ढे जाव अपरिभूए, तस्स णं णागस्स गाहावइस्स सुलसा णामं भारिया होत्था सुकुमाला जाव सुख्वा, तस्स णं णागस्स गाहावइस्स पुत्ते सुलसाए भारियाए अतए अणीयसे णामं कुमारे होत्था सुमाले जाव सुख्वे पंचघाइपरिखित्ते तं०—खीरघाई [०] जहा दडपइण्णे जाव गिरि० सुहसुहेणं परिवड्ढइ, तए णं अणियसं कुमारं साइरेगअट्टवासजायं अम्मपियरो कलाघरिय० जाव भोगसमत्थे जाए घावि होत्था, तए णं तं अणीयसं कुमारं उम्भकबालभावं जाणेत्ता अम्मपियरो सरिसियाणं जाव बत्तीसाए इम्भ-वरकण्णमाणं एगदिवसे पाणिं गेण्हावेत्ति, तए णं से णागे गाहावई अणीयसस्स कुमारस्स इमं एयारूवं पोइदाणं दलयइ तं०—बत्तीसं हिरण्णकोडीओ० जहा महाबलस्स जाव उप्पि पासायवरमए फुट्टु० विहरइ, तेणं कालेणं तेणं समएणं अरहा अरिट्टणेमी जाव समोसडे सिरिवणे उज्जाणे अहा जाव विहरइ परिसा णिग्गया, तए णं तस्स अणीयसस्स कु० तं (म०) जहा गोयमे तहा णवरं सामाइयभाइयाई चोइस-पुव्वाई अहिज्जइ वीसं वासाइं परियाओ सेसं तहेव जाव सेत्तुंजे पव्वए मासियाए संलेह्णाए जाव सिद्धे (५) । एवं खलु जंबू ! समणेणं० अट्टमस्स अंगस्स अतगडदसाणं तच्चस्स वग्गस्स पढम-अज्झयणस्स अयमट्ठे पणत्ते, एवं जहा अणीयसे एवं सेसा-वि अणंतसेणे जाव सत्त-सेणे छ-अज्झयणा एगग्गमा बत्तीसओ दाओ वीसं वासा परियाओ चोइस पु० सेत्तुंजे जाव सिद्धा ॥ छट्टमज्झयणं समत्तं ॥ ४ ॥ (ज० णं० मं० उ० स०) तेणं कालेणं तेणं समएणं वारवईए णयरीए जहा पढमे णवरं वसुद्धे राया धारिणी देवी सीहो सुमिणे सारणे कुमारे पण्णासओ दाओ चोइस पुव्वा वीसं वासा परियाओ सेसं जहा गोयमस्स जाव सेत्तुंजे सिद्धे ॥५॥ जइ० उवखेवओ अट्टमस्स एवं खलु जंबू ! तेणं कालेणं तेणं समएणं वारवईए णयरीए जहा पढमे जाव अरहा अरिट्टणेमी सामी समोसडे । तेणं कालेणं तेणं समएणं अरहओ अरिट्टणेमिस्स अंतेवासी छ अणगारा भायरो सहोदरा होत्था सरिसया सरित्तया सरिव्वया णीलुप्पलगवलगुल्लियअयसिकुसुमप्पगासा सिरिव-च्छकियवच्छा कुसुमकुंडलभट्टलया णलकुब्बरसमाणा, तए णं ते छ अण-गारा जं चेव दिवसं मुंडा भवेत्ता अगाराओ अणगारियं पव्वइया तं चेव दिवसं अरहं अरिट्टणेमिं वंदति णमंसति वं० २ त्ता एवं वयासी—इच्छामो णं

मते ! तुम्हेहि अम्भणुण्याया समाणा जावज्जीवाए छट्ठं छट्ठेणं अणिकखत्तेणं तथोकस्मेणं संजमेणं तवसा अप्पाणं भावेमाणा विहरित्तए । अहामुहं देवाणुप्पिया ! मा पडिबंधं करेह । तए णं ते छ अणगारा अरहया अरिट्ठणेमिणा अम्भणुण्याया समाणा जावज्जीवाए छट्ठंछट्ठेणं जाव विहरति । तए णं ते छ अणगारा अणया कयाइं छट्ठवखमणपारणयसि पढमाए पोरिसीए सज्जायं करेति जहा गोयमो जाव इच्छामो णं मते ! छट्ठवखमणस्स पारणए तुम्हेहि अम्भणुण्याया समाणा तिहिं संघाडएहि बारवईए णयरीए जाव अडित्तए ? अहा मुहं देवाणुप्पिया ! मा पडिबंधं करेह । तए णं छ अणगारा अरहया अरिट्ठणेमिणा अम्भणुण्याया समाणा अरहं अरिट्ठणेमि वंदंति णमंसंति वं० २ ता अरहओ अरिट्ठणेमिस्स अंतियाओ सहस्संबवणाओ० पडिणिकखमति २ ता तिहिं संघाडएहि अतुरियं जाव अडंति । तत्थ णं एमे संघाडए बारवईए णयरीए उच्चणीयमज्झिमाइं कुलाइं घरसमुदाणस्स भिक्खायरियाए अडमाणे वसुदेवस्स रण्णे देवईए देवीए मेहे अणुपविट्ठे । तए णं सा देवई देवी ते अणगारे एज्जमाणे पासइ पासित्ता हट्ठ जाव हियया आसणाओ अम्मुट्ठेइ २ ता सत्तट्ठपयाइं (अ० २ ता) तिक्खत्तो आयाहिणपयाहिणं करेइ २ ता वंदइ णमंसइ वं० २ ता जेणेव सत्तघरे तेणेव उवागच्छइ २ ता सीहकेसरानं मोयमाणं थालं मरेइ ते अणगारे पडित्ताभेइ ० वंदइ णमंसइ वं० २ ता पडि विसज्जेइ, तयाणंतरं च णं दोच्चं संघाडए बारवईए (ण०) उच्च० जाव पडिविसज्जेइ । तयाणंतरं च णं तच्चे संघाडए बारवईए णयरीए उच्च जाव पडित्ताभेइ २ ता एवं वयासी-किण्णं देवाणुप्पिया ! कण्हस्स वामुदेवस्स इमीसे बारवईए णयरीए दु० णवजोयण० पच्चक्खदेवलोगमूयाए समणा णिग्गंथा उच्च जाव अडमाणा भत्तपाणं णो लभंति ? जणं ताइं चेव कुलाइं भत्तपाणाए भुज्जो २ अणुप्पविसंति ? तए णं ते अणगारा देवइ देवि एवं वयासी-णो खलु देवा० ! कण्हस्स वामुदेवस्स इमीसे बारवईए णयरीए जाव देवलोगमूयाए समणा णिग्गंथा उच्च जाव अडमाणा भत्तपाणं णो लभंति णो चेव णं ताइं ताइं कुलाइं दोच्चंपि तच्चंपि भत्तपाणाए अणुप्पविसंति । एवं खलु देवाणुप्पिए ! अम्हे भद्विलपुरे णयरे णागस्स गाहावइस्स पुत्ता सुलसाए भारियाए अत्तया छ मायरो सहोदरा सरिसया० जाव णलकुब्बरसमाणा अरहओ अरिट्ठणेमिस्स

अंतिए धम्मं सोच्चा-संसारभउविदया भीया जम्मणमरणाणं मुंडा जाव एव-
इया, तए णं अम्हे जं चेव दिवसं पटवइया तं चेव दिवसं अरहं अरिट्ठणेमि
वंदामो णमंसामो वं० २ ता इमं एयाखुवं अभिग्गहं अभिग्गहामो-इच्छामो
णं भंते ! तुम्भेहि अब्भणुण्णाया समाणा जाव अहासुहं। तए णं अम्हे अरहओ
अ० अब्भणुण्णाया समाणा जावउजीवाए छट्ठंछट्ठेणं जाव विहरामो, तं
अम्हे अज्ज छट्ठवखमणपारणयसि पढसाए पोरिसीए जाव अडमाणा तव गेहं
अणुप्पविट्ठा, तं णो खलु देवाणुप्पिए ! ते चेव णं अम्हे, अम्हे णं अण्णे देवइं
देवि एवं वदंति २ ता जामेव दिसं पाउब्भूया तामेव दिसं पडिगया । तए णं
तीसे देवईए देवीए अयमेयाखुवे, अज्जत्थिए ४ सम्पुप्पणे, एवं खलु अहं
पोलासपुरे णयरे अइमत्तेणं कुमारसमणेणं बालत्तणे वागरिया तुमणं देवाण-
प्पिए ! अट्ट पुत्ते पयाइस्ससि सरिसए जाव णलकुब्बरसमाणे णो चेव णं भरहे
बासे अण्णाओ अम्मयाओ तारिसए पुत्ते पयाइस्संति तं णं मिच्छा, इमं णं
पच्चवखमेव दिस्सइ भरहे बासे अण्णाओवि अम्मयाओ खलु एरिसए जाव
पुत्ते पयायाओ, तं गच्छामि णं अरहं अरिट्ठणेमि वंदामि ण० वं० २ ता इमं
च णं एयाखुवं वागरणं पुच्छिस्सामि तिकट्टुएवं संयेहेइ २ ता कोडुंविद्यपुरिसा
सदावेइ २ ता एवं वयासी-लहूकरणजाणप्पवरं० जाव उवट्ठवेंति, जहा देवा-
णंदा जाव पज्जवासइ । तए णं अरहा अरिट्ठणेमी देवइं देवि एवं वयासी-से णूणं
तव देवई ! इमे इअणगारे पासेत्ता अयमेयाखुवे अज्जत्थिए० एवं खलु अहं
पोलासपुरे णयरे अइमत्तेणं तं चेव जाव णिगगच्छसि २ ता जेणेव ममं अंतियं
हव्वमागयासे णूणं देवई ! अट्ठे समट्ठे ? हंता अत्थि । एवं खलु देवाणुप्पिए !
तेणं कालेणं तेणं समएणं भद्विलपुरे णयरे णाणे णामं गाहावई परिवसइ
अइडे० तस्स णं णगस्स गाहावइस्स सुलसा णामं भारिया होत्था, सा सुलसा
गाहावइणी बालत्तणे चेव णिमित्तिए वागरिया-एस णं दारिमा णिदू भविसइ,
तए णं सा सुलसा बालप्पमिइं चेव हरिणगमेसी देव मत्ता यावि होत्था, हरिण-
गमेसिस्स पडिमं करेइ २ ता कल्लाकल्लि णहाया जाव पायच्छित्ता उल्लपड-
साडया महरिहं पुप्फचवणं करेइ २ ता जाणु पायपडिया पणामं करेइ, तओ पच्छा
आहारेइ वा णीहारेइ वा (वरइ वा) । तए णं तीसे सुलसाए गाहावइणीए
भत्तिबहुमाणसुस्सुसाए हरिणगमेसीदेवे आराहिए यावि होत्था । तए णं से हरि-

णेगमेसी देवे सुलसाए गाहावडणीए अणुकंपणट्टयाए सुलसं गाहावडणि
तुमं च णं दो-वि-समउउयाओ करेइ, तए णं तुभ्मे दो-वि-सममेव गब्भे
गिण्हह सममेव गब्भे परिवहह सममेव दारए पयायह । तए णं सा सुलसा गाहा-
वडणी विणिहायमावण्णे दारए पयायइ, तए णं से हरिणेगमेसी देवे सुलसाए
अणुकंपणट्टाए विणिहायमावण्णए दारए करयलसंपुडेणं गेण्हइ २ ता तव
अंतियं साहरइ तं समयं च णं तुमंवि णवण्हं मासाणं० सुकुमालदारए
पसवसि, जेवि य णं देवाणुप्पिए ! तव पुत्ता तेवि य तव अंतियाओ
करयलसंपुडेणं गेण्हइ २ ता सुलसाए गाहावडणीए अंतिए साहरइ, तं तव चेव
णं देवई ! एए पुत्ता णो चेव सुलसाए गाहावडणीए, तए णं सा देवई देवी
अरहओ अरिट्टणेमिस्स अंतिए एयमट्ठं सोच्छा णिसम्म हट्टतुट्ट जाव हियया
अरहं अरिट्टणेमि वंदइ णमंसइ वं० २ ता जेणेव ते छ अणगारा तेणेव उवा-
गच्छइ २ ता ते छप्पि अणगारा वंदइ णमंसइ वं० २ ता आगयपणहुया
पप्पुयलोयणा कंचुयपडिक्खित्तया दरियवलयवाहा धाराहयकलंबपुफ्फगंविक्ख
समूससियरोमकूवा ते छप्पि अणगारे अणिमिसाए विट्ठीए पेहमाणी २ सुच्चिरं
णिरिक्खइ २ ता वंदइ णमंसइ वं० २ ता जेणेव अरिहा अरिट्टणेमी तेणेव
उवागच्छइ २ ता अरहं अरिट्टणेमि तिक्खुत्तो आयाहिणपयाहिणं करेइ २ ता
वंदइ णमंसइ वं० २ ता तमेव धम्मियं जाणं दुरुहइ २ ता जेणेव बारवई
णयरी तेणेव उवागच्छइ २ ता बारवइं णयारि अणुप्पविसइ २ ता जेणेव सए
गिहे जेणेव बाहिरिया उवट्टाणसाला तेणेव उवागच्छइ २ ता धम्मियाओ
जाणप्पवराओ पच्चोरुहइ २ ता जेणेव सए वासधरे जेणेव सए सयणिज्जे
तेणेव उवागच्छइ उवागच्छिता सयंसि सयणिज्जंसि णिसीयइ, तए णं तीसे
देवईए देवीए अयं अज्जत्थिए ४ समुप्पण्णे—एवं खलु अहं सरिसए जाव णल-
कुब्बरसमाणे सत्त पुत्ते पयाया, णो चेव णं मए एगस्स वि बालत्तणए सम-
भूए, एस वि य णं कण्हे वासुदेवे छण्हं छण्हं मासाणं मम अंतियं पायवंदए
हव्वसागच्छइ, तं धण्णाओ णं ताओ अम्माओ जांसि मण्णे णियगकुच्छि-
संपूयाइं थणदुद्धलुद्धयाइं महरसमुल्लावयाइं मंमणपज्जपियाइं थणमूलकक्खदेस-
भायं अभिसरमाणाइं मुट्टयाइं पुणो य कोमलकमलोवभेहिं हत्थेहिं गिण्हऊण
उच्छंगि णिवेसियाइं देति समुल्लावए सुमहुरे पुणो २ मंजुलप्पमणिए

अहं णं अधण्णा अपुण्णा अकयपुण्णा एत्तो एगयरमपि ण पत्ता, ओहय० जाव
 श्रियायइ । इमं च णं कण्हे वासुदेवे णहाए जाव विभूसिए देवईए देवीए पायवंदए
 हव्वमागच्छइइ. तए णं से कण्हे वासुदेवे देवइं देविं पासइ २ ता देवईए देवीए
 पायग्गहणं करेइ २ ता देवईं देवीं एवं वयासी-अण्णया णं अम्मो ! तुढ्मे
 ममं पासएत्ता हट्ट० जाव भवह, किण्णं अम्मो ! अज्ज तुढ्भे ओहय० जाव श्रिया-
 यह ? तए णं सा देवईं देवी कण्हं वासुदेवं एवं वयासी-एवं खलु अहं पुत्ता !
 सरिसए जाव समाणे मत्त-पुत्ते पयाया णो चैव णं मए एगस्स-वि बालत्तणे
 अणहभूए तुम-पि य णं पुत्ता !, छण्हं २ मासाणं ममं अतियं पायवंदए
 हव्वमागच्छसि तं धण्णाओ णं ताओ अम्मयाओ जाव श्रियामि, तए णं से कण्हे
 वासुदेवे देवइं देवि एवं वयासी-मा णं तुढ्मे अम्मो ! ओहय जाव श्रियायइ
 अहण्णं तहा घत्तिस्सामि जहा णं ममं सहोदरे कणीयसे भाउए मविस्सई-
 त्तिकट्ट देवइं देवि ताहि इट्टाहि (कं जाव) वग्गहिं समासासेइ (२) तओ
 पडिणिवल्लमइ २ ता जेणेव पोसहसाला तेणेव उवागच्छइ २ ता जहा अमओ
 णवरं हरिणेगमेस्सिस्स अट्टमभत्तं पगेण्हइ जाव अंजलि कट्ट एवं वयासी-
 इच्छामि णं देवाणूपिया ! सहोदरं कणीयसं भाउयं विद्धिणं, तए णं से हरि-
 णेगमेसी देवे कण्हं वासुदेवं एवं वयासी-होहिइ णं देवाणूपिया ! तव देव-
 लोयचए सहोदरे कणीयसे भाउए से णं उम्भुवक० जाव अणुपत्ते अरहओ अरिट्ट-
 णेमिस्स अतियं मुंडे जाव पव्वइस्सइ, कण्हं वासुदेवं दोच्चपि तच्चपि एवं वदइ
 २ ता जामेव दिसं पाउब्भूए तामेव दिसं पडिगए । तए णं से कण्हे वासुदेवे
 पोसहमालाओ पडिण० जेणेव देवईं देवी तेणेव उवागच्छइ २ ता देवईए देवीए
 पायग्गहणं करेइ २ ता एवं वयासी-होहिइ णं अम्मो ! ममं सहोदरे कणीयसे
 भाउए त्तिकट्ट देवइं देवि ताहि इट्टाहि जाव आसासेइ २ ता जामेव दिसं
 पाउब्भूए तामेव दिसं पडिगए । तए णं सा देवईं देवी अण्णया कयाइं तंमि
 तारिमगंसि जाव सीहं सुमिणे पासएत्ता पडिब्बुद्धा जाव पाहया हट्टुत्तु हियया
 (तं ग० सु०) परिवहइ, तए णं सा देवईं देवी णवण्हं मासाणं जामुमणारत्त-
 बंधजीवयलवखारससरसपारिजातकतरुणदिवायरसमपपं सव्वणयणकंतं मुकु-
 मालं जाव सुरूवं गयतालुयसमाणं दारयं पयाया जम्मणं जहा मेहकुमारे जाव
 जम्हा णं अहं इमे दारए गयतालुसमाणे तं होउ णं अहं एयस्स दारगस्स

गामधेज्जे गयसुकुमाले २, तए णं तस्स दारगस्स अम्मापियरे णामं करेति
 गयसुकुमालेत्ति सेसं जहा मेहे जाव अलं भोगममत्थे जाए यावि होत्था ।
 तत्थ णं बारवईए णयरीए सोमिले णामं माहणे परिवसइ अउडे रिउव्वेय जाव
 सुपरिणिट्टिए यावि होत्था, तस्स सोमिलमाहणस्स सोमसिरी णामं माहणी
 होत्था, सूमाल०, तस्स णं सोमिलस्स मा० धूया सोमसिरीए माहणीए
 अत्तया सोमा णामं दारिया होत्था सुकुमाला जाव मुरूवा रूवेणं जाव लावणेणं
 उविकट्टा उविकट्टसरीरा यावि होत्था । तए णं सा सोमा दारिया अण्णया कयाइ
 ष्हाया जाव विमूसिया बहूहि खुज्जाहि जाव परिविखत्ता मयाओ गिहाओ
 पडिणिवखमइ २ ता जेणेव रायमगे तेणेव उवागच्छइ २ ता रायमगसि
 कणगतिदूसएणं कीलमाणी २ चिट्टइ । तेणं कालेणं तेणं समएणं अरहा
 अरिट्टणेमी समोसडे परिसा णिग्गया । तए णं से कण्हे वासुदेवे इमीसे कहाए
 लद्धट्ठे समाणे ष्हाए जाव विमूसिए गयसुकुमालेणं कुमारेणं सद्धि हत्थिखंध-
 वरगए सकोरंटमल्लदामेणं छत्तेणं धरेज्जमाणेणं से य वरचामराहि उद्धव-
 माणीहि बारवईए णयरीए मज्झमज्झेणं अरहओ अरिट्टणेमिस्स पायवंदाए
 णिग्गच्छमाणे सोमं दारियं पासइ २ ता सोमाए दारियाए रूवेण य जीव-
 णेण य लावणेण य जाव विमूहए । तए णं से कण्हे० कोडुंबियपुरिसे
 सहावेइ २ ता एवं वयासी-गच्छह णं तुम्भे-देवाण्णपिया ! सोमिलं माहणं
 जायित्ता सोमं दारियं गेहह २ ता कण्णतेउरसि पविखवह, तए णं एमा
 गयसुकुमालस्स कुमारस्स भारिया भविस्सइ । तए णं कोडुंबिय जाव पविखवंति,
 तए णं से कण्हे वासुदेवे बारवईए णयरीए मज्झमज्झेणं णिग्गच्छइ २ ता जेणेव
 सहसंबवणे उज्जाणे जाव पज्जवासइ । तए णं अरहा अरिट्टणेमी कण्हस्स
 वासुदेवस्स गयसुकुमालस्स कुमारस्स तीसे य धम्मकहाए कण्हे एडिहाए,
 तए णं से गयसुकुमाले कु० अरहओ अरिट्टणेमिस्स अतियं धम्मं सोच्चा
 जं णवरं अम्मापियरं आपुच्छामि जहा मेहो णवरं महिलियावज्जं जाव
 वड्डियकुले । तए णं से कण्हे वासुदेवे इमीसे कहाए लद्धट्ठे समाणे जेणेव गयसु-
 कुमाले-तेणेव उवागच्छइ २ ता गयसुकुमालं० आलिगइ २ ता उच्छंणे णिवे-
 सेइ २ ता एवं वयासी-तुमं ममं सहोयरे कणीयसे भाया तं मा णं तुमं देवाण-
 पिया ! इयाणि अरहओ अ० अं० मुंडे जाव पब्बयाहि, अहणं तुमे बारवईए

णयरीए महाया २ रायाभिसेएणं अभिसिचिस्सामि । तए णं से गयसु-
कुमाले कण्हेणं वासुदेवेणं एवं वृत्ते समाने तुसिणीए संचिट्टइ । तएणं तं
गयसुकुमाले कण्हे वासुदेवं अम्मापियरो य दुच्चंपि तच्चंपि एवं वयासी-
एवं खलु देवाणुप्पिया । माणुस्सया कामा खेलासवा जाव विण्णजहियव्वा
भविस्संति, तं इच्छामि णं देवाणुप्पिया । तुब्भेहि अन्नमणुणाए स०
अरहओ अरिट्ठणेमिस्स अंतिए जाव पव्वइत्तए । तए णं तं गयसुकुमालं कण्हे
वासुदेवे अम्मापियरो य जाहे णो संचाए० बहुयार्हि अणुलोमाहि जाव आय-
वित्तए ताहे अकामाइं चैव एवं वयासी-तं इच्छामो णं ते जाया ! एगदिवसमवि
रञ्जतिरिं पासित्तए । णिवखमणं जहा महाबलस्स जाव तमाणए तहा जाव
संजमइ । तए णं से गयसुकुमाले अणगारे जाए इरिया० जाव० गुत्तवंभयारी, तए
णं से गयसुकुमाले अ० जं चैव दिवसं पव्वइए तस्सेव दिवसस्स पुव्वावर-
ण्हकालसमयंसि जेणेव अरहा अरिट्ठणेमी तेणेव उवागच्छइ २ ता अरहं अरिट्ठ-
णेमिं तिवखुत्तो आयाहिण पयाहिणं० वंदइ णमंसइ वं० २ ता एवं वयासी-
इच्छामि णं भते ! तुब्भेहि अन्नमणुणाए समाने महाकालंसि सुत्ताणंसि एण-
राइयं महापडिमं उवसंपज्जित्ताणं विहरेत्तए । अहामुहं देवाणुप्पिया ! तए णं से
गयसुकुमाले अणगारे अरहया अरिट्ठणेमिणा अन्नमणुणाए समाने अरहं अरिट्ठ-
णेमिं वदइ णमंसइ वं० २ ता अरहओ अरिट्ठणेमिस्स अंति० सहसंबवणाओ
उज्जाणाओ पडिणिवखमइ २ ता जेणेव महाकाले सुत्ताणे तेणेव उवागए २ ता
थंडिल्लं पडिलेहेइ २ ता उच्चारपासवणम्मिं पडिलेहेइ २ ता ईसिपहभारगएणं
काएणं जाव दोवि पाए साहट्टु एगराइं महापडिमं उवसंपज्जित्ताणं विहरइ । इमं
च णं सोमिले भाहणे सामिघेयस्स अट्टाए बारवईओ णयरीओ बहिया पुव्वणिग्गए
समिहाओ य दम्भे य कुसे य पत्तामोडं च गेण्हइ २ ता तओ पडिणियत्तइ २
ता महाकालस्स सुत्ताणस्स अदूरसामंतेणं वीईवयमाणे २ संज्ञाकालसमयंसि
पविरलमणुस्संसि गयसुकुमालं अणगारं पासइ २ ता तं वेरं सरइ २ ता आसुरुत्ते
५ एवं वयासी-एस णं भो ! से गयसुकुमाले कुमारे अप्पत्थिय जाव परि-
वज्जिए, जे णं मम धूयं सोमतिरीए मारियाए अत्तयं सोमं दारियं अदिदुदोस-
पइयं कालवत्तिणं विण्णजहेत्ता मुंडे जाव पव्वइए, तं सेयं खलु ममं गयसुकु-

मालस्स कुमारस्स बेरणिज्जायणं करेतए, एवं संपेहेइ २ ता विसापडिलेहणं करेइ २ ता सरसं मट्टियं गेण्हइ २ ता जेणेव गयसुकुमाले अणगारे तेणेव उवा-
गच्छइ २ ता गयसुकुमालस्स अणगारस्स मत्थए मट्टियाए पालि बंधइ २ ता
जलतीओ चिययाओ फुल्लियाकिसुयसमाणे खइरगारे कहल्लेणं गेण्हइ २ ता
गयसुकुमालस्स अणगारस्स मत्थए पविखवइ २ ता भोए ५ तओ खिप्पामेव
अवकमइ २ ता जामेव दिसं पाउब्भूए तामेव दिसं पडिगए । तए णं
तस्स गयसुकुमालस्स अणगारस्स सरीरयसि वेधणा पाउब्भूया उज्जला जाव
दुरहियासा । तए णं से गयसुकुमाले अणगारे सोमिलस्स माहणस्स मणसावि
अप्पदुस्समाणे तं उज्जलं जाव अहियासेइ । तए णं तस्स गयसुकुमालस्स अणगा-
रस्स तं उज्जलं जाव अहियामेमाणस्स सुभेणं परिणामेणं पसत्थज्झवसाणेणं
तया वरणिज्जाणं कम्मणं खएणं कम्मरयविकिरणकरं अपुव्वकरणं अणु-
प्पविट्ठस्स अणंते अणुसरे जाव केवलवरणाणदंसणे सम्पुप्पणे, तओ पच्छा सिद्धे
जाव प्पहीणे । तत्थ णं अह्मासणिहिंहेहिं देवेहिं सम्मं आराहियतिकट्टु दिव्वे
सुरभिगंधोदए वट्ठे वसद्धवणे कुसुमे णिवाडिए चेलुक्खेवे कए दिव्वे य गीय-
गधव्वणिणाए कए यावि होत्था । तए णं से कण्हे वासुदेवे कल्लं पाउप्पभायाए
जाव जलंते ण्हाए जाव विभूसिए हत्थिखंधवरगए सकोरंटमल्लवामेणं
छत्तेणं धरेज्जमाणेणं सेयवरचामराहिं उद्धव्वमाणीहिं महया भडचडगर-
पहकारवंदपरिक्खत्ते बारवईं णयारिं मज्झमज्झेणं जेणेव अरहा अरिट्ठणेमी
तेणेव पहारेत्थ गमणाए । तए णं से कण्हे वासुदेवे बारवईए णयरीए मज्झं-
मज्झेणं णिगच्छमाणे एगं पुरिसं पासइ जुणं जराजज्जरियवेहं जाव
किलंतं महइमहालयाओ इट्टगरासीओ एगमेगं इट्टगं गहाय बहियारत्था-
पहाओ अंतोहिं अणुप्पविसमाणं पासइ । तए णं से कण्हे वासुदेवे तस्स पुरि-
सस्स अणुकंपणट्टाए हत्थिखंधवरगए चेव एगं इट्टगं गेण्हइ २ ता बहिया रत्था-
पहाओ अंतोहिं अणुप्पवेसेइ । तए णं कण्हेणं वासुदेवेणं एगाए इट्टगाए गहियाए
समाणीए अणेगेहिं पुरिससएहिं से महालए इट्टगस्स रासी बहिया रत्थापहाओ
अंतोघरंसि अणुप्पवेसिए । तए णं से कण्हे वासुदेवे बारवईए णयरीए मज्झं-
मज्झेणं णिगच्छइ २ ता जेणेव अरहा अरिट्ठणेमी तेणेव उवागए २ ता जाव
वंदइ णमंसइ थं० २ ता गयसुकुमालं अणगारं अपासमाणे अरहं अरिट्ठणेमिं

बंदइ णमंसइ वं० २ ता एवं वयासी-कह्णं भंते ! से ममं सहोयरे कणीयसे
 भाया गयसुकुमाले अणगारे ? जणं अहं वंदामि णमंसामि ? तए णं
 अरहा अरिट्ठणेमी कण्हं वासुदेवं एवं वयासी-साहिए णं कण्हा ! गयसुकुमालेणं
 अणगारेणं अप्पणो अट्ठे । तए णं से कण्हे वासुदेवे अरहं अरिट्ठणेमि एवं वयासी-
 कह्णं भंते ! गयसुकुमालेणं अणगारेणं साहिए अप्पणो अट्ठे ? तए णं
 अरहा अरिट्ठणेमी कण्हं वासुदेवं एवं वयासी-एवं खलु कण्हा ! गयसुकुमालेणं
 अणगारेणं ममं कल्लं पुट्ठावरण्हकालसमयसि बंदइ णमंसइ वं० २
 ता एवं वयासी-इच्छामि णं जाव उवसंपज्जित्ताणं विहरइ, तए णं तं
 गयसुकुमालं अणगारं एगे पुरिसे पासइ २ ता आसुत्ते ५ जाव सिद्धे,
 तं एवं खलु कण्हा ! गयसुकुमालेणं अणगारेणं साहिए अप्पणो अट्ठे ।
 तए णं से कण्हे वासुदेवे अरहं अरिट्ठणेमि एवं वयासी-केस णं भंते !
 से पुरिसे अपत्थियपत्थिए जाव परिवज्जिए ? जेणं ममं सहोयरे कणीयसे
 भायरे गयसुकुमालं अणगारं अकाले च्चैव जीविदाओ ववरोविए ?
 तए णं अरहा अरिट्ठणेमी कण्हं वासुदेवं एवं वयासी-मा णं कण्हा ! तुमं
 तस्स पुरिसस्स पदोसमावज्जाहि, एवं खलु कण्हा ! तेणं पुरिसेणं गयसु-
 कुमालस्स अणगारस्स साहिएज्जे दिण्णे, कह्णं भंते ! तेणं पुरिसेणं गयसु-
 कुमालस्स णं साहेज्जे दिण्णे ? तए णं अरहा अरिट्ठणेमी कण्हं वासुदेवं एवं
 वयासी-से णं कण्हा ! तुमं ममं पायवंदए हव्वमागच्छमाणे बारवईए
 णयरीए एगं पुरिसं पाससि जाव अणुप्पविसिए, जहा णं कण्हा ! तुमं
 तस्स पुरिसस्स साहिएज्जे दिण्णे एवामेव कण्हा ! तेणं पुरिसेणं गयसुकुमालस्स
 अणगारस्स अणेगभन्नसयसहस्ससाच्चयं कम्मं उदीरेमाणेणं बह्ठकम्मणिज्जरत्थं
 साहिएज्जे दिण्णे । तए णं से कण्हे वासुदेवे अरहं अरिट्ठणेमि एवं वयासी-से णं
 भंते ! पुरिसे मए कण्हं जाणियथ्वे ? तए णं अरहा अरिट्ठणेमी कण्हं वासुदेवं
 एवं वयासी-जे णं कण्हा ! तुमं बारवईए णयरीए अणुप्पविसमाणं पाससता
 ठियए च्चैव ठिइमेएणं कालं करिस्सइ तण्णे तुमं जाणेज्जासि एस णं से पुरिसे ।
 तए णं से कण्हे वासुदेवे अरहं अरिट्ठणेमि बंदइ णमंसइ वं० २ ता जेणेव
 आभिसेथं हत्थियवणं तेणेव उवागच्छइ २ ता हत्थि वुरूहइ २ ता जेणेव बार-
 वई णयरी जेणेव सए गिहे तेणेव पहारेत्थ गमणाए । तए णं तस्स सोमित्त-

माहणस्स कल्लं जाव जलंते अयमेयारूवे अब्भत्थिए ४ समुप्पण्णे—एवं खलु कण्हे वासुदेवे अरहं अरिदुणेमि पायवंदए णिग्गए तं णायमेयं अरहया विष्णा-
 यमियं अरहया सुयमेयं अरहया सिट्ठमेयं अरहया भविस्सइ कण्हस्स वासुदेवस्स,
 तं ण णज्जइ णं कण्हे वासुदेवे ममं केणवि कुमारेणं मारिस्सइत्तिकट्टु भीए ४
 सयाओ गिहाओ पडिणिवखमइ, कण्हस्स वासुदेवस्स बारवइं णयारिं अणुप्प-
 पविसमाणस्स पुरओ सपविख सपडिदिंसि ह्ववमागए । तए णं से सोमिले माहणे
 कण्हं वासुदेवं सहसा पासेत्ता भीए ४ ठियए चेव ठिइभेयं कालं करेइ
 धरणित्तलसि सव्वंगेहिं धसत्ति संणिवडिए, तए णं से कण्हे वासुदेवे सोमिलं
 माहणं पासइ २ ता एवं वयासी—एस णं भो देवाणुप्पिया ! से सोमिले
 माहणे अपत्थियपत्थिए जाव परिवज्जिए जेणं ममं सहोदरे कणोयसे
 भायरे गयसुंकुमाले अणगारे अकाले चेव जीवियाओ ववरोविए त्तिकट्टु
 सोमिलं माहणं पाणेहिं कड्डुवेइ २ ता तं भूमि पाणिएणं अब्भोवखावेइ २ ता
 जेणेव सए गिहे तेणेव उवागए सयं गिहं अणुप्पविट्ठे । एवं खलु जंबू ! जाव
 अट्टमस्स अंगस्स अंतगडदसाणं तच्चस्स वग्गस्स अट्टमज्जयणस्स अयमट्ठे
 पण्णत्ते ॥ ६ ॥ णवमस्स उक्खेवओ, एवं खलु जंबू ! तेणं कालेणं तेणं सभ-
 एणं बारवईए णयरीए जहा पढमए जाव विहरइ । तत्थ णं बारवईए—बलदेवे
 णामं राया ह्रोत्था वण्णओ, तस्स णं बलदेवस्स रण्णे धारिणी णामं देवी
 ह्रोत्था वण्णओ, तए णं सा धारिणी सीहं सुमिणे जहा गोयमे णवरं सुमुहे
 णामं कुमारे पण्णासं कण्णाओ पण्णासओ दाओ चोदसपुव्वाइं अहिज्जइ वीसं
 वासाइं परियाओ सेसं तं चेव जाव सेत्तुंजे सिद्धे णिव्खेवओ । एवं दुम्भुहेवि
 कूवदारए वि, तिण्णि वि बलदेवधारिणीसुया, दाएवि एवं चेव, णवरं
 वसुदेवधारिणीसुए । एवं अणाहिदंठी-वि वसुदेवधारिणीसुए, एवं खलु
 जंबू ! समणेणं जाव संपत्तेणं अट्टमस्स अंगस्स अंतगडदसाणं तच्चस्स वग्गस्स
 तेरसमस्स अज्जयणस्स अयमट्ठे पण्णत्ते ॥ ७ ॥

चउत्थो वग्गो

जह णं सत्ते ! समणेणं जाव संपत्तेणं...अं० तच्चस्स वग्गस्स अयमट्ठे
 पण्णत्ते चउत्थस्स णं भं० व० अं० स० जाव सं० के अट्ठे पण्णत्ते ? एवं
 खलु जंबू ! समणेणं जाव संपत्तेणं चउत्थस्स वग्गस्स अं० दस अज्जयणा

पणत्ता, तं०—जालिमयालिउवयालि पुरिससेणे य वारिसेणे य । पञ्जुण-
संवअणिरुद्धे सच्चर्णेमी य दढणेमी य ॥ १ ॥ जइ णं भंते ! समणेणं जाव
संपत्तेणं चउत्थस्स वग्गस्स दस अज्झयणा पणत्ता पढमस्स णं भं० अज्झयणस्स
स० जाव सं० के अट्ठे पणत्ते ? एवं खलु जंबू ! तेषं कालेणं तेषं समएणं
बारवई णा० णयरी ही० तीसे जहा पढमे कण्हे वासुदेवे आहेवच्च जाव
विहरइ, तत्थ णं बारवईए णगरीए वसुदेवे राया तस्स णं वसुदेवस्स रण्णे
धारिणी णामं देवी होत्था वण्णओ जहा गोयमो णवरं जालिकुमारो एणासओ
दाओ बारसंगी सोलस-वामा परिआओ सेसं जहा गोयमस्स जाव सेत्तुजे सिद्धे ।
एवं मयाली उवयाली पुरिससेणे य वारिसेणे य । एवं पञ्जुणे वि, णवरं
कण्हे पिया रुप्पिणी माया । एवं संबे वि, णवरं जबवई माया । एवं अणिरुद्धे वि,
णवरं पञ्जुणे पिया वेदव्भी माया । एवं सच्चर्णेमी, णवरं समुद्विजए पिया
सिवा माया, एवं दढणेमी वि, सब्बे एगममा । चउत्थस्स वग्गस्स णिक्खेवओ ॥८॥

पंचमो वग्गो

जइ णं भंते ! समणेणं जाव संपत्तेणं चउत्थस्स वग्गस्स अयमट्ठे पणत्ते
पंचमस्स णं भं० वग्गस्स अंतगउदसाणं समणेणं जाव संपत्तेणं के अट्ठे पणत्ते ?
एवं खलु जंबू ! समणेणं जाव संपत्तेणं पंचमस्स वग्गस्स दस अज्झयणा
पणत्ता, तं०—'पउमावई य गोरी गंधारी लक्खणा सुसीमा य । जंबवई सच्च-
भामा रुप्पिणि मूलसिरी मूलदत्ता-वि ॥१॥ जइ णं भंते समणेणं जाव संपत्तेणं
पंचमस्स वग्गस्स दस अज्झयणा प० पढमस्स णं भंते ! अज्झयणस्स के अट्ठे
प० ? एवं खलु जंबू ! तेषं कालेणं तेषं समएणं बारवई णयरी जहा पढमे
जाव कण्हे वासुदेवे आहेवच्च जाव विहरइ । तस्स णं कण्हस्स वासुदेवस्स पउ-
मावई णामं देवी होत्था वण्णओ । तेषं कालेणं तेषं समएणं अरहा अरिट्ठणेमी
समोसडे जाव विहरइ, कण्हे वासुदेवे णिग्गए जाव पञ्जुवासइ, तए णं सा
पउमावइ देवी इमीसे कहाए लद्धट्ठा समाणी हट्ठ० जहा देवई जाव पञ्जु-
वासइ । तए णं अरहा अरिट्ठणेमी कण्हस्स वासुदेवस्स पउमावईए दे० य
धम्मकहा परिआ पडिगया । तए णं कण्हे वासुदेवे अरहं अरिट्ठणेमि वंदइ णम-
सइ वं० २ ता एवं वयासी इमीसे णं भंते ! बारवईए णयरीए णवजोयण०
जाव देवलोगभूयाए किमूलाए विणासे भविस्सइ ? कण्हाइ ! अरहा अरिट्ठ-

णमी कण्हं वासुदेवं एवं वयासी-एवं खलु कण्हा । इमीसे बारवईए णयरीए-
 णवजोयण जाव० भूयाए सुरग्गिदीवायणमूलाए विणासे भविस्सइ । तए णं
 कण्हस्स वासुदेवस्स अरहओ अरिट्ठणेमिस्स अंतिए एयमट्ठं सोच्चा णिसम्म
 अ० एयं अब्भत्थिए ४-घण्णा णं ते जालिमयालिउ० पुरिससेणवारिसेणपज्ज-
 णसंबअणिरुद्धदढणेमिसच्चणेमिप्पमियओ कुमारा जे णं विच्चा हिरणं
 जाव परिमाएत्ता अरहओ अरिट्ठणेमिस्स अंतियं मुंडा जाव पव्वइया, अहणं
 अधण्णे अकवपुण्णे रज्जे य जाव अंतेउरे य माणुस्सएसु य कामभोगेसु मुच्छिए
 ४ णो संचाएमि अरहओ अरिट्ठणेमिस्स जाव पव्वइत्तए । कण्हाइ ! अरहा
 अरिट्ठणेमी कण्हं वासुदेवं एवं वयासी-से णूणं कण्हा ! तव अयमब्भत्थिए
 ४-घण्णा णं ते जाव पव्वइत्तए, से णूणं कण्हा ! अयमट्ठे समट्ठे ? हता
 अत्थिए । तं णो खलु कण्हा ! तं एवं भूयं वा भक्खं वा भविस्सइ वा जणं
 वासुदेवा चइत्ता हिरणं जाव पव्वइस्सति । से केणं अट्ठेणं भते ! एवं
 वृच्चइ-ण एवं भूयं वा जाव पव्वइस्सति ? कण्हाइ ! अरहा अरिट्ठणेमी
 कण्हं वासुदेवं एवं वयासी-एवं खलु कण्हा ! सव्वेवि य णं वासुदेवा पुक्कभवे
 णियाणकडा, से तेणट्ठेणं कण्हा ! एवं वृच्चइ-ण एवं भूयं० पव्वइ-
 स्सति । तए णं से कण्हे वासुदेवे अरहं अरिट्ठणेमि एवं वयासी-अहं णं भते !
 इओ कालमासे कालं किच्चा कहि गमिस्सामि, कहि उववज्जिस्सामि ?
 तए णं अरहा अरिट्ठणेमी कण्हं वासुदेवं एवं वयासी-एवं खलु कण्हा ! बार-
 वईए णयरीए सुरग्गिदीवायण कुमार, कोवणिहड्डाए अम्मापिइणियगविप्प-
 हूणे रामेणं बलदेवेणं सद्धि दाहिणवेयालि अभिमूहे जीहिट्ठित्ठलपामोक्खाणं
 पंचण्हं पंडुवाणं पंडुरायपुत्ताणं पासं पंडुमहुरं संपत्थिए कोसंबवणकाणणे णग्गो-
 हवरपायवस्स अहे पुक्कविसिलापट्टए पीयवत्थपच्छाइयसररीरे जरकुमारेणं
 तिवक्खेणं कोवंडविप्पभूक्केणं इसुणा वामे पाये विद्धे सभाणे कालमासे कालं
 किच्चा तच्चाए वालुयप्पभाए पुढवीए उज्जलिए णरए णेरइयत्ताए उववज्जि-
 हिसि । तए णं कण्हे वासुदेवे अरहओ अरिट्ठणेमिस्स अंतिए एयमट्ठं सोच्चा
 णिसम्म ओहयं जाव झियाइ । कण्हाइ ! अरहा अरिट्ठणेमी कण्हं वासुदेवं एवं
 वयासी-मा णं तुमं देवाणुप्पिया ! ओहयं जाव झियाहि, एवं खलु तुम देवा-
 णुप्पिया ! तच्चाओ पुढवीओ उज्जलियाओ अणंतरं उव्वट्ठित्ता इहेव जंबूदीवे

दीवे भारहे वासे आगमेसाए उस्मपिणीए पुंडेसु जणवएसु सयदुपारे णधरे
 बारसमे अममे णायं अरहा भविस्सणि, तत्थ तुमं बहूइं वासाइं केवलपरियायं
 पाउणेत्ता सिद्धिहामि ५ । तए णं से कण्हे वासुदेवे अरहओ अरिट्टणेमिस्स अंतिए
 एयमदठं सोच्चा णिसम्म हट्टुट्टु० अफोडेइ २ ता वगइ २ ता तिवइं छिवइ
 २ ता सीहणायं करेइ २ ता अरहं अरिट्टणेमि वंदइ णमंसइ वं० २ ता तमेव
 अभिसेवकं हत्थियर० दुरुहइ २ ता जेणेव बारवईं णयरी जेणेव सए गिहे तेणेव
 उवागए, अभिसेयइत्थिरयणाओ पच्छोरुहइ० जेणेव दाहिरिया उवट्टाणसाता
 जेणेव सए सीहासणे तेणेव उवागच्छइ २ ता सीहामणवरमि पुरत्थामिमहे
 णिसीयइ २ ता कोडुंबियपुन्नि सट्ठावेइ २ ता एवं वयासी-गच्छइ णं तुम्हे
 देवाणुप्पिया ! बारवईए णयरीए सिघाडग० जाव उवघोसेमाणा एवं वयह-
 एवं खलु देवाणुप्पिया ! बारवईए णयरीए णवजोयण जाव सूटाए सुरमि-
 दीवायणमूलाए विणासे भविस्सइ, तं जो णं देवाणुप्पिया ! इच्छइ बारवईए
 णयरीए राया वा जुवराया वा ईसरे तलवरे माडवियकांडुंबियडम्भसेट्ठी वा
 देवी वा कुमारो वा कुमारी वा अरहओ अरिट्टणेमिस्स अंतिए मुंडे जाव पव्व-
 इत्तए तं णं कण्हे वासुदेवे विसज्जेइ, पच्छातुरस्स वि य से अहापांसं गित्त
 अणुजाणइ भइया इट्ठिसवकारसमूदएण य से णिवखमणं करेइ, दोच्चपि तच्चपि
 घोमणयं घोसेइ २ ता ममं एयसाणत्थियं पच्चपिणह । तए णं ते कोडुंबिय
 जाव पच्चपिणंति । तए णं सा पउमावईं देवी अरहओ० अंतिए धम्म सोच्चा
 णिसम्म हट्टुट्टु० जाव हियया अरहं अरिट्टणेमि वंदइ णमंसइ ६० २ ता एवं
 वयासी-सट्ठहामि णं भत्ते ! णिसत्थं पवयणं० से जहेयं तुम्हे वयह जं णवरं
 देवाणुप्पिया ! कण्हं वासुदेवं आपुच्छामि, तए णं अहं देवा० अंतिए मुंडा जाव
 पव्वयामि । अहासुहं देवाणुप्पि० ! मा पडिबंधं करेहि । तए णं सा पउमावईं
 देवी धम्मियं जाणप्पवरं दुरुहइ २ ता जेणेव बारवईं णयरी जेणेव सए गिहे
 तेणेव उवागच्छइ २ ता धम्मियाओ जाणाओ पच्छोरुहइ २ ता जेणेव कण्हे
 वासुदेवे तेणेव उवागच्छइ २ ता करयल० अंजलि कट्टु (कण्ह हा०) एवं
 वयासी-इच्छामि णं देवाणुप्पिया ! तुम्हेहि अम्भणुण्णया समणी अरहओ
 अरिट्टणेमिस्स अंतिए मुंडा जाव पव्व० । अहासुहं० । तए णं से कण्हे वासु-
 देवे कोडुंबिए पु० सट्ठावेइ २ ता एवं वयासी-त्थिणादेव मां दे० पउमा-

वईए० महत्थं निम्नमणाभिसेयं उवट्टवेह २ ता एयमाणत्तियं पच्चप्पिणह ।
 तए णं ते जावं पच्चप्पिणंति । तए णं से कण्हे वासुदेवे पउमावईं देवि
 पट्टयंसि दुरुहेइ० अट्टसएणं सोवण्णकलस जाव महाणिवत्तमणाभिसेएणं अभि-
 सिचइ २ ता सव्वालंकारविभूसियं करेइ २ ता पुरिससहस्सवाहिणि सिवियं
 दुरुहावेइ २ ता बारवईए णयरीए मज्झंमज्जेणं णिगगच्छइ २ ता जेणेव
 रेवयए पव्वए जेणेव सहसंबवणे उज्जाणे तेणेव उवागच्छइ २ ता सीयं
 ठवेइ० पउमावईं देखी सीयाओ पच्चोरुहइ २ ता जेणेव अरहा अरिट्टणेमी
 तेणेव उवागच्छइ २ ता अरहं अरिट्टणेमि तिक्खुत्तो आयाहिणपयाहिणं करेइ
 २ ता वंदइ णमंसइ वं० २ ता एवं वयासी-एस णं भंते ! मम आगमहिंसी
 पउमावईणां देवी इट्टा कंता पिया मणुणा मणामा अभिरामा जाव किमंग
 पुण पासणयाए ? तण्णं अहं देवाणुप्पिया ! सिस्सिणिभिव्वं दलयामि
 पडिच्छंणुं ते देवाणुप्पिया ! सिस्सिणिभिव्वं । अहासुहं० । तए णं सा पउमावईं०
 उत्तरपुरत्थिमे दिसीमागं अवक्कमइ २ ता सयमेव आभरणालंकारं ओमु-
 यइ २ ता सयमेव पंचमुट्टियं लोयं करेइ २ ता जेणेव अरहा अरिट्टणेमी तेणेव
 उवागच्छइ २ ता अरहं अरिट्टणेमि वंदइ णमंसइ वं० २ ता एवं वयासी-
 आलित्तेणं० जाव धम्ममाइक्खियं । तए णं अरहा अरिट्टणेमी पउमावईं देवि
 सयमेव पव्वावेइ २ ता सयमेव मुंडावेइ सयमेव जक्खिणीए अज्जाए सिस्सिणि
 दलयइ । तए णं सा जक्खिणी अज्जा पउमावईं देवि सयमेव पव्वा० जाव
 संजमियव्वं । तए णं सा पउमावईं जाव संजमइ । तए णं सा पउमावईं अज्जा
 जाया ईरियासमिया जाव गुत्तबंभयारिणी । तए णं सा पउमावईं अज्जा
 जक्खिणीए अज्जाए अंतिए सामाइयमाइयाइं एक्कारस अंगाइं अहिज्जइ,
 बर्हीहि चउत्थच्छट्टुमदसमदुवालसेहिं मासद्धमासखमणेहिं० अप्पाणं भावेमाणी
 विहरइ । तए णं सा पउमावईं अज्जा बहुपडिपुण्णाइं वीत्तं वासाइं सामण्णपरि-
 यागं पाउणइ पाउणित्ता मात्तियाए संलेहणाए अप्पाणं झूसेइ २ ता सट्ठि
 भत्ताइं अणसणाए छेदेइ २ ता जस्सट्टाए कीरइ णग्गभावे जाव तमट्ठं
 आराहेइ चरिमुस्सासेहिं सिद्धा ५ ॥ ६ ॥ उ० य अ० तेणं कालेणं तेणं सम-
 एणं बारवईं ण० रेवयए उज्जाणे णंदणवणे तत्थ णं बारवईए णयरीए कण्हे
 वासुदेवे० तस्स णं कण्हस्स वासुदेवस्स गोरी देवी वण्णओ अरहा अ० समो-

सढे कण्हे णिग्गए गोरी जहा पउमावई तहा णिग्गया धम्मकहा परिसा पडि-
गया, कण्हे-वि । तए णं मा गोरी जहा पउमावई तहा णिवखंता जाव सिद्धा
५ । एवं गंधारी । लक्खणा । सुमीमा । जंबवई । सच्चभामा । हंगिणी ।
अट्टवि पउमावई सरिसाओ अट्ट अज्झयणा ॥ १० ॥ .ण० तेणं कालेणं तेणं
समएणं बारवईए णयरीए रेवयए प० णंदणवणे उ० कण्हे० तत्थ णं बारवईए
णयरीए कण्हस्स वामुदेवस्स पुत्तए जंबवईए देवीए अत्तए संवे णामं कुमारे
होत्था अहीण० तस्स णं संबस्स कुमारस्स मूलसिरी णामं बारिया होत्था
वण्णओ,अरहा समोसढे कण्हे णिग्गए मूलसिरी-वि णिग्गया जहा पउमावई जं
णवरं देवाणुप्पिया ! कण्हं वामुदेवं,आपुच्छामि जाव सिद्धा । एवं मूलदत्ता-वि
पंचमो वग्गो ॥११॥

छट्ठी वग्गो

जइ णं षं छट्ठमस्स उक्खेवओ णवरं सोलस अज्झयणा प०, तं-मकाई
किकमे चेव मोग्गपणी य कासवे । खेमए धिइहरे चेव केलामे हरि-
चंदणे ॥ १ ॥ वारत्तसुवंसणपुण्णमहसुमणमहसुपइट्ठे मेहे । अइमुत्ते य
अलक्खे अज्झयणाणं तु सोलसयं ॥ २ ॥ जइ सोलस अज्झयणा प० पढमस्स
अज्झयणस्स के अट्ठे पण्णत्ते ? एवं खलु जंबू ! तेणं कालेणं तेणं समएणं
रायगिहे णयरे गुणसिलए चेइए सेणिए राया, तत्थ णं मकाई-णामं गाहावई
परिवसइ अइडे जाव अपरिभूए । तेणं कालेणं तेणं समएणं समणे भगवं महा-
वीरे आइगरे गुणसिलए जाव त्रिहरइ परिसा णिग्गया, तए णं से मकाई
गाहावई इमीसे कहाए लद्धट्ठे जहा पण्णत्तीए गंगदत्ते सहेव इमोवि जेट्टुत्तं
कुडुबे ठवेत्ता पुरिससहस्सवाहिणीए सीयाए णिवखंते जाव अणगारे जाए
ईरियासमिए० तए णं से मकाई अणगारे समणस्स भगवओ महावीरस्स तहा-
रूवाणं थेरानं अंतिए सामाइयमाइयाइं एक्कारस अंगाइं अहिज्जइ सेसं जहा
खंदगस्स, गणरयणं तवोकम्मं सोलसवासाइं परियाओ तहेव विउले सिद्धे ।
दो० उ० किकमे-वि एवं चेव जाव विउले सिद्धे ॥१२॥ त० ए० ख० जं० तेणं
कालेणं तेणं समएणं रायगिहे ण० गुणसिलए चेइए सेणिए राया चेल्लणावेवी
वण्णओ, तत्थ णं रायगिहे णयरे अज्जणए णामं मालागारे परिवसइ, अइडे०

जाव अपरिभूए, तस्स णं अज्जुणयस्स मालागारस्स बंधुमई-णामं भारिया
 होत्था सुमा० । तस्स णं अज्जुणयस्स मालागारस्स रायगिहस्स णयरस्स बहिया
 एत्थ णं महं एगे पुष्कारामे होत्था किण्हे जाव णिकुरंबभूए दसद्धवण्ण-
 कुमुभकुमुमिए पासार्हए ४ । तस्स णं पुष्कारामस्स अदूरसामंते तत्थे णं अज्जुण-
 यस्स मालागारस्स अज्जय-पज्जयपिइपज्जयागए अणेगकुलपुरिसपरंपरागए
 मोगगरपाणिस्स जक्खस्स जक्खाययणे होत्था, पोराणे दिव्वे सत्त्वे जहा पुण्णमइ ।
 तत्थे णं मोगगरपाणिस्स पडिमा एगं महं पलसहस्सणिष्ण्णं अयोमयं मोगगरं
 गहाय चिट्ठइ । तए णं से अज्जुणए मालागारे बालप्पभिइं चेव मोगगरपाणि-
 जक्खस्स भत्ते यावि होत्था, कल्लाकल्लि पच्छियपिडगाइं गेण्हइ २ ता रायगिहाओ
 णयराओ पडिणिक्खमइ २ ता जेणेव पुष्कारामे तेणेव उवागच्छइ २ ता पुष्कु-
 च्चयं करेइ २ तां अग्गाइं वराइं पुष्काइं गहाइ २ ता जेणेव मोगगरपाणिस्स
 जक्खाययणे तेणेव उवागच्छइ २ ता मोगगरपाणिस्स जक्खस्स महिरिहं पुष्कच-
 णयं करेइ २ ता जण्णुपायपडिए पणामं करेइ, तओ पच्छा रायमग्गंसि वित्ति
 कप्पेमाणे विहरइ । तत्थे णं रायगिहे णयरे ललिया णामं गोट्ठी परिवसइ
 अड्ढा जाव अपरिभूया जं कयसुकया यावि होत्था । तए णं रायगिहे णयरे
 अण्णया कयाइ पमोए घट्ठे यावि होत्था । तए णं से अज्जुणए मालागारे कल्लं
 पभूयतराएहिं पुष्कोहिं कज्जमिन्ति कट्ठं पच्चूसकालसमयंसि बंधुमईए भारियाए
 सद्धिं पच्छियपिडयाइं गेण्हइ २ ता सयाओ गिहाओ पडिणिक्खमइ २ ता राय-
 गिहं णयरं मज्झमज्झेणं णिरगच्छइ २ ता जेणेव पुष्कारामे तेणेव उवागच्छइ
 २ ता बंधुमईए भारियाए सद्धिं पुष्कुच्चयं करेइ । तए णं तीसे ललियाए गोट्ठीए
 छं गोट्ठिल्ला पुरिसा जेणेव मोगगरपाणिस्स जक्खस्स जक्खाययणे तेणेव उवा-
 गया अमिरममाणा चिट्ठति । तए णं से अज्जुणए मालागारे बंधुमईए भारि-
 याए सद्धिं पुष्कुच्चयं करेइ० अग्गाइं वराइं पुष्काइं गहाय जेणेव मोगगरपाणिस्स
 जक्खस्स जक्खाययणे तेणेव उवागच्छइ । तए णं ते छं गोट्ठिल्ला पुरिसा अज्जुणयं
 मालागारं बंधुमईए भारियाए सद्धिं एज्जमाणं पासंति २ ता अण्णमण्णं एवं
 वयासी-एस णं देवाणुप्पिया ! अज्जुणए मालागारे बंधुमईए भारियाए सद्धिं
 इह हव्वभागच्छइ तं सेयं खलु देवाणुप्पिया ! अहं अज्जुणयं मालागारं अव-
 ओडयब्रधणयं करेत्ता बंधुमईए भारियाए सद्धिं विउलाइं भोगभोगाइं भुंजमाणं

विहरित्तए त्तिकट्टु एयमट्ठं अण्णमण्णस्स पडिसुणोति २ ता कवाडंतरेसु णिलुक्कंति णिच्चला णिष्फंदा तुत्तिणीया पच्छण्णा चिट्ठंति । तए णं से अज्जुणए मालागारे बंधुमईए भारियाए सद्धि जेणेव मोग्गरपाणिस्स जक्खस्स जक्खाययणे तेणेव उवागच्छइ० आलोए पणामं करेइ० महरिहं पुष्फचरणं करेइ० जण्णपायपडिए पणामं करेइ । तए णं छ गोट्टिला पुरिसा दवदवस्स कवाडंतरेहोतो णिग्गच्छति २ ता अज्जुणयं मालागारं गेण्हंति २ ता अवओगइय बंधणं करेति० बंधुमईए मालागारीए सद्धि विउलाइं भोगभोगाइं भुंजमाणा विहरंति । तए णं तस्स अज्जुणयस्स मालागारस्स अयमज्जत्थिए ४(त०)—एवं खलु अहं बालप्पमिइं चेव मोग्गरपाणिस्स भगवओ कल्लाकल्लि जाव विंति कप्पेमाणे विहरामि, तं जइ णं मोग्गरपाणी जक्खे इह संणिहिए होते से णं किं मम एयारूवं आवइं पावेज्जमाणं पासंते ? तं णत्थि णं मोग्गरपाणी जक्खे इह संणिहिए, सुव्वत्तं णं एस कट्ठे । तए णं से मोग्गरपाणी जक्खे अज्जुणयस्स मालागारस्स अयमेयारूवं अज्जत्थियं जाव विद्याणित्ता अज्जुणयस्स मालागारस्स सरीरयं अण्णप्पविसइ २ ता तडतडस्स बंधाइं छिदइ, छिदिता तं पलसहस्सणिष्फणं अयोमयं मोग्गरं गेण्हइ २ ता ते इत्थिसत्तमे छ पुरिसे घाएइ । तए णं से अज्जुणए मालागारे मोग्गरपाणिणा जक्खेणं अण्णाइट्ठे समाणे रायगिहस्स णगरस्स परिपेरतेणं कल्लाकल्लि इत्थिसत्तमे छ पुरिसे घाएमाणे विहरइ । तए णं रायगिहे णयरे सिघाडग जाव महापहपहेसु बहुजणो अण्णमण्णस्स एवमाइक्खइ ४ एवं खलु देवानुप्पिया ! अज्जुणए मालागारे मोग्गरपाणिणा अण्णाइट्ठे समाणे रायगिहे णयरे बहिया इत्थिसत्तमे छ पुरिसे घायएमाणे विहरइ । तए णं से सेणिए राया इमीसे कहाए लद्धट्ठे समाणे कोडुंविद्य० सट्ठावेइ २ ता एवं वयासी—एवं खलु देवानुप्पिया ! अज्जुणए मालागारे जाव घाएमाणे जाव विहरइ तं मा णं तुभं केइ कट्टस्स वा तणस्स वा पाणियस्स वा पुष्फफलाणं वा अट्टाए सट्ठं णिग्गच्छइ मा णं तस्स सरीरयस्स वावत्ती भविस्सइत्तिकट्टु दोच्छं पि तच्चं पि घोसणयं घोसेह २ ता खिप्पामेव भमेयं पच्चप्पिणह । तए णं ते कोडुंविद्य० जाव पच्चप्पिणंति । तत्थ णं रायगिहे णयरे सुवंसणे णामं सेट्ठी परिवसइ अड्ढे०, तए णं से सुवंसणे समणोवासए यावि होत्था अभिगयजोवाजीवे जाव विहरइ । तेणं कालेणं तेणं समएणं समणे भगवं जाव समोसइ० विहरइ,

तए णं रायगिहे णयरे सिघाडग बहुजणो अणमणस्स एवमाइवल्लड जाव किमंग पुण विपुत्तस्स अट्टस्स गहणयाए० तएणं तस्स सुदंसणस्स बहुजणस्स अंतिए एयं सोच्चा णिसम्म अयं अज्झत्थिए ४-एवं खलु समणे जाव विहरइ, तं गच्छामि णं० वंदामि०, एवं संपेहेइ २ ता जेणेव अम्मापियरो तेणेव उवा-गच्छइ २ ता करयल० अंजलि कट्टु एवं वयासी-एवं खलु अम्मयाओ ! समणे जाव विहरइ, तं गच्छामि णं समणं भगवं महावीरं वंदामि णमंसाहि जाव पज्जुवासामि ? तए णं तं सुदंसणं सेट्ठि अम्मापियरो एवं वयासी-एवं खलु पुत्ता ! अज्जुणए मालागारे जाव घाएमाणे विहरइ, तं मा णं तुमं पुत्ता ! समणं भगवं महावीरं वंदए णिगच्छाहि, मा णं तव सरीरयस्स वावत्ती भवि-स्सइ, तुमणं इह गए चेव समणं भगवं महावीरं वंदहि णमंसाहि । तए णं सुदं-सणे सेट्ठी अम्मापियरं एवं वयासी-किणं अहं अम्मयाओ ! समणं भगवं महावीरं इहमागयं इह पत्तं इह समोसदं इह गए चेव वंदिस्सामि० ? तं गच्छामि णं अहं अम्मयाओ ! तुमंहि अम्मणुणाए समाणे स० भगवं महावीरं वंदामि जाव पज्जु० । तए णं सुदंसणं सेट्ठि अम्मापियरो जाहे णो संचायति बहूहि आघवणाहि ४ जाव परूवेत्तए ताहे अकामा चेव सुदंसणं एवं वयासी-अहामुहं देवा० । तए णं से सुदंसणे अम्मापिईहि अम्मणुणाए समाणे ण्हाए सुद्ध-पावेसाइ जाव सरीरे सयाओ गिहाओ पडिणिकखमइ २ ता पायविहारचारेणं रायगिहं णगरं मज्झमज्झेणं णिगच्छइ २ ता भोग्गरपाणस्स जवखस्स जवखा-ययणस्स अदूरसामंतेणं जेणेव गणसिए चेइए जेणेव समणे भगवं महावीरे तेणेव पहारेत्थ गमणाए । तए णं से भोग्गरपाणी जवखे सुदंसणं समणोवासयं अदूरसामंतेणं वीईवयमाणं २ पासइ २ ता आसुरते ५ तं पलसहस्सणिप्फणं अयोमयं भोग्गरं उल्लालेमाणे २ जेणेव सुदंसणे समणोवासए तेणेव पहारेत्थ गमणाए । तए णं से सुदंसणे समणोवासए भोग्गरपाणि जवखं एज्जमाणं पासइ २ ता अभीए अतत्थे अणुत्विग्गे अक्खुभिए अचलिए असंभते वत्थं तेणं भूमि पमज्जइ २ ता करयल० एवं वयासी-णमोऽत्थु णं अरहंताणं जाव संपत्ताणं णमोऽत्थु णं समणस्स जाव संपाविउकामस्स, पुंत्वि च णं मए समणस्स भगवओ महावीरस्स अंतिए थूलए पाणाइवाए पच्चक्खाए जावज्जीवाए थूलए मूसावाए थूलए अदिग्णादाने सदारसंतोसे कए जावज्जीवाए इच्छापपरिमाणे

कए जावज्जीवाए, तं इदार्णि-पिणं तस्सेव अतियं सव्वं पाणाइवायं पच्चक्खामि जावज्जीवाए० मुसावायं० अदत्तादाणं० मेहुणं० परिग्गहं पच्चक्खामि जावज्जीवाए सव्वं कोहं जाव मिच्छादंसणसत्तं पच्चक्खामि जावज्जीवाए सव्व असणं पाणं खाइमं साइमं चउत्विहं पि आहार पच्चक्खामि जावज्जीवाए, जइ णं एत्तो उवसग्गाओ मूच्चिस्सामि तो मे कप्पइ पारेत्तए अहणं एत्तो उवसग्गाओ ण मूच्चिस्सामि तओ मे तहा पच्चक्खाए चैव त्तिकट्टु सागार पडिमं पडिवज्जइ । तए णं से मोग्गरपाणी जक्खे तं पत्तसहस्सणिक्फणं अयोमयं मोग्गरं उल्लालेमाणे २ जेणेव सुदंसणे समणोवासए तेणेव उवागच्छं णो चैव णं संचाएइ सुदंसणं समणोवासयं तेयसा समभिपडित्तए । तए णं से मोग्गरपाणी जक्खे सुदंसणं समणोवासयं सव्वओ समंताओ परिघोलेमाणे २ जाहे णो [चैव ण] संचाएइ सुदंसणं समणोवासयं तेयसा समभिपडित्तए ताहे सुदंसणस्स समणोवासयस्स पुरओ सर्पाक्ख सपडिदिमि ठिच्चा सुदंसणं समणोवासयं अणिमिसाए दिट्ठीए सुच्चिरं णिरिक्खइ २ ता अज्जणयस्स मालागारस्स मरीरं विप्पज्जहाइ २ ता तं पत्तसहस्सणिक्फणं अयोमयं मोग्गरं गहाय जामेव दिसं पाउडमूए तामेव दिसं पडिगए । तए णं से अज्जणए मालागारे मोग्गरपाणिणा जक्खेणं विप्प मुक्के समणे धसत्ति धरणिणयलसि सव्वंगोहि (सं) णिवाडए । तए णं से सुदंसणे समणोवासए णिक्खसग्गमित्तिकट्टु पडिमं पारेइ । तए णं से अज्जणए मालागारे तओ मुहुत्तंतरेणं आसत्थे समणे उट्ठेइ २ ता सुदंसणं समणोवासयं एवं वयासी-तुव्वे णं देवाणुप्पिया ! के कंहि वा संपत्थिया ? तए णं से सुदंसणे समणोवासए अज्जणयं मालागारं एवं वयासी-एवं खलु देवाणुप्पिया ! अहं सुदंसणे णामं समणोवासए अभिगयजीवाजीवे गुणसिलए चेइए समणं भगवं महावीरं वंदए संपत्थिए । तए णं से अज्जणए मालागारे सुदंसणं समणोवासयं एवं वयासी-तं इच्छामि णं देवाणुप्पिया ! अहमच्चि तुमए सद्धिं समणं भगवं महावीरं वंदित्तए जाव पज्जुवासित्तए ? अहासुहं देवाणुप्पिया । ना पडिबंधं करेह । तए णं से सुदंसणे समणोवासए अज्जणएणं मालागारेणं सद्धिं जेणेव गुणसिलए चेइए जेणेव समणे भगवं महावीरे तेणेव उवागच्छइ २ ता अज्जणएणं मालागारेणं सद्धिं समणं भगवं महावीरं तिक्खुत्तो जाव पज्जुवासइ । तए णं [से] समणे भगवं महावीरे सुदंसणस्स समणोवासयस्स अज्जणयस्स माला-

गारस्स तीसे य० धम्मकहा०, सुदंसणे पडिगए । तए णं से अज्जुणए माला-
गारे समणस्से भगवओ महावीरस्स अंतिए धम्मं सोच्चा णिसम्म हट्ठ०
सट्ठहामि णं षंते ! णिमंथं पावयणं जाव अब्भुट्ठेभि । अहासुहं० । तए णं से
अज्जुणए मालागारे उत्तर० सयमेव पंचमुट्ठियं लोयं करेइ करित्ता जाव अण-
गारे जाए जाव विहरइ । तए णं से अज्जुणए अणगारे जं च्चैव दिवसं मुंडे
जाव पव्वइए तं च्चैव दिवसं समणं भगवं महावीरं वदइ णमंसइ वं० २ ता
इमं एघारुवं अभिगहं उगिगहइ-कप्पइ मे जावज्जीवाए छट्ठंछट्ठेणं
अणिविल्लत्तेणं तवोकम्मेणं अप्पाणं भावेमाणस्स विहरित्तए त्तिकट्टु अयमेया-
रुवं अभिगहं ओगेहइ २ ता जावज्जीवाए जाव विहरइ । तए णं से अज्जु-
णए अणगारे छट्ठक्खमणवारणयंसि पढम पोरिसीए सज्जायं करेइ जहा
गोयमसामी जाव अडइ । तए णं तं अज्जुणयं अणगारं रायगिहे णयरे उच्च०
जाव अडमाणं व्वहे इत्थिया य पुरिसा य डहरा य महल्ला य ज्वाणा य एवं
वयासी-इमे णं मे विया-मारिए माया मारिया भाया० भगिणी० भज्जा०
पुत्तं० धूया० सुण्हा० इमेण मे अण्णयरे सयणसंबंधिपरियणे मारिए त्तिकट्टु
अप्पेगइया अक्कोत्तंति अप्पेगइया हिलति णिदंति छिसंति गरिहंति तज्जेत्ति
तालेंति । तए णं से अज्जुणए अणगारे तेहिं बहूहि इत्थीहि य पुरिसेहि य डहरेहि
य महल्लेहि य ज्वाणएहि य आओसेज्जमाणे जाव तालेज्जमाणे तेसि मणमावि
अपउस्समाणे सम्मं सहइ सम्मं लमइ सम्मं तितिवल्लइ सम्मं अहियासेइ सम्मं
सहमाणे० रायगिहे णयरे उच्चणीय मज्झिमकुलाइ अडमाणे जइ भत्तं लभइ तो
पाणं ण लभइ जइ पाणं लभइ तो भत्तं ण लमइ । तए णं से अज्जुणए अ० अदीणे
अविमणे अंकलुसे अणाइले अविताई अपरितंतजोगी अडइ २ ता रायगिहाओ
णयराओ पडिणिवल्लमइ २ ता जेणेव गुणसीलए चेइए जेणेव समणे भगवं महा-
वीरे जहा गोयमसामी जाव पडिदंसेइ २ ता समणेणं भगवया महावीरेणं अडभ-
णुण्णाए समाणे अमुच्छिइ ४ बिलमिव पण्णमभूएणं अप्पाणेणं तमाहारं आहारेइ,
तए णं समणे भगवं महावीरे अणया क० राय० पडिणिवल्लमइ २ ता बहिं
जण० विहरइ । तए णं से अज्जुणए अणगारे तेणं उरालेणं (वि०) पयत्तेणं पग-
हिएणं महानुत्तारेणं तवोकम्मेणं अप्पाणं भावेमाणे बहुपडिपुण्णे छम्मासे सामण्ण-
परियाणं पाउणइ, पाउणित्ता अट्ठमासियाए संलेहणाए अप्पाणं झ्सेइ २ ता

तीसं भत्ताइं अणमणाए छेदेइ २ ता जस्सट्टाए कीरइ जाव सिद्धे ३ ॥ १३ ॥
 (३० च० अ० ए० ख० जं०) तेणं कालेणं तेणं समएणं रायगिहे णयरे गुण-
 मिलए चेदए तत्थ णं सेणिए राया कासवे णामं गाहावई परिवसइ जहा
 भकाई, सोलस वासा परिआओ विपुले सिद्धे ४ । एवं खेमएऽवि गाहावई णवरं
 काकंदी णयरी सोलस वासा परिआओ विपुले पक्वए सिद्धे ५ । एवं धिइहरेवि
 गाहावई काकंदीए णयरीए सोलस वासा जाव विपुले सिद्धे ६ । एवं केलासेवि
 गाहावई णवरं सागेए णयरे बारसवामाई परिआओ विपुले सिद्धे ७, एवं हरि-
 चंदणेवि गाहावई सागेए बारसवामा परिआओ विपुले सिद्धे ८ । एवं बारत्तए
 वि गाहावई णवरं रायगिहे णयरे बारसवासा परिआओ विपुले सिद्धे ९ । एवं
 सुदंसणे वि गाहावई णवरं वाणियगामे णयरे वूइपलासए चेदए पंचवासा
 परिआओ विपुले सिद्धे १० । एवं पुण्णभट्टे वि गाहावई वाणियगामे णयरे पंच
 वासा परिआओ विपुले सिद्धे ११ । एवं सुमणभट्टे वि गाहावई सावत्थीए णय-
 रीए बहुवासाइं परि० सिद्धे १२ । एवं सुपइट्ठे वि गाहावई सावत्थीए णयरीए
 सत्तावीसं वासा परिआओ विपुले सिद्धे १३ । एवं मेहे वि गाहावई रायगिहे
 णयरे बहूइं वासाइं परिआओ विपुले सिद्धे १४ ॥ १४ ॥ (३० प० अ० ए०
 व० ए० ख० जं०) तेणं कालेणं तेणं समएणं पोलासपुरे णयरे सिरिवणे उज्जाणे,
 तत्थ णं पोलासपुरे णयरे विजये णामं राया होत्था, तस्स णं विजयस्स रण्णे
 सिरीणामं देवी होत्था वण्णओ, तस्स णं विजयस्स रण्णे पुत्ते सिरीए देवीए
 अत्तए अइमुत्ते णामं कुमारे होत्था सूमाले० । तेणं कालेणं तेणं समएणं समणे
 भगवं महावीरे जाव सिरिवणे विहरइ । तेणं कालेणं तेणं समएणं समणस्स
 भगवओ महावीरस्स जेट्ठे अंतेवासी इंदमूई जहा पण्णत्तीए जाव पोलासपुरे
 णयरे उच्च जाव अडइ । इमं च णं अइमुत्ते कुमारे ण्हाए जाव विभूसिए बहूहिं
 दारएहिं य दारियाहिं य डिभएहिं य डिभियाहिं य कुमारएहिं य कुमारियाहिं
 य सिद्धिं संपरिवुडे सयाओ गिहाओ पडिणिक्खमइ २ ता जेणेव इंदट्टाणे तेणेव
 उवागए तेहिं बहूहिं दारएहिं य ६ संपरिवुडे अभिरमभाणे २ विहरइ । तए णं
 भगवं गोयमे पोलासपुरे णयरे उच्च जाव अडमाणे इंदट्टाणस्स अदूरसामंतेणं
 वीईवयइ । तए णं से अइमुत्ते कुमारे भगवं गोयमं अदूरसामंतेणं वीईवयमाणं
 पासइ २ ता जेणेव भगवं गोयमे तेणेव उवागए २ ता भगवं गोयमं एवं

वयासी-के णं भंते ! तुभमे ? किं वा अडह ? तए णं भगवं गोयमे अइमुत्तं कुमारं एवं वयासी-अस्हे णं देवाणुप्पिया ! समणा णिगयंथा ईरियासमिया जावगुत्तं बंभयारी उच्च जाव अडामो । तए णं अइमुत्ते कुमारे भगवं गोयमं एवं वयासी-एह णं भंते ! तुभमे जणं अहं तुभं भिक्खं दवावेमी तिकट्टु भगवं गोयमं अंगुलीए गेण्हइ २ ता जेणेव सए गिहे तेणेव उवागए । तए णं सा सिरिवेवी भगवं गोयमं एज्जमाणं पासइ २ ता हट्टु० आसणाओ अब्भट्ठेइ २ ता जेणेव भगवं गोयमे तेणेव उवागया भगवं गोयमं तिवखुत्तो आयाहिण-पयाहि० वंदइ० विउल्लेणं असण० जाव पडिविसज्जेइ । तए णं से अइमुत्ते कुमारे भगवं गोयमं एवं वयासी-कहि णं भंते ! तुभमे परिवसह ? तए णं [से] भगवं गोयमे अइमुत्तं कुमारं एवं वयासी-एवं खलु देवाणुप्पिया ! मम धम्मपरिए धम्मोवएसए भगवं महावीरे आइगरे जाव संपाविउकामे इहेव पोलासपुरस्स णयरस्स बहिद्या सिरिवणे उज्जाणे अहापडिरुवं उगाहं उगि-ण्हित्ता संजमेणं जाव भावेमाणे विहरइ, तथ णं अस्हे परिवसामो । तए णं से अइमुत्ते कुमारे भगवं गोयमं एवं वयासी-गच्छामि णं भंते ! अहं तुभमेहिं सद्धिं समणं भगवं महावीरं पायवंदए ? अहामुहं देवाणुप्पिया ! तए णं से अइमुत्ते कुमारे भगवया गोयमेणं सद्धिं जेणेव समणे भ० महावीरे तेणेव उवागच्छइ २ ता समणं भगवं महावीरं तिवखुत्तो आयाहिण-पयाहिणं करेइ २ ता वंदइ जाव पज्जुवासइ । तए णं भगवं गोयमे जेणेव समणे भगवं महावीरे तेणेव उवागए जाव पडिदसेइ २ ता संजमेणं तव० विहरइ । तए णं समणे भगवं महावीरे अइमुत्तस्स कुमारस्स-तीसे य धम्मकहा, तए णं से अइमुत्ते कु० समणस्स भगवओ महावीरस्स अंतिए धम्मं सोच्चा णिसम्म हट्टु० जं णवरं देवाणुप्पिया ! अम्मापियरो आपुच्छामि, तए णं अहं देवाणुप्पियाणं अंतिए जाव पक्खयामि । अहामुहं देवाणुप्पिया । मा पडिबधं करेह । तए णं से अइमुत्ते कुमारे जेणेव अम्मापियरो तेणेव उवागए जाव पक्खइत्तए । अइ-मुत्तं कुमारं अम्मापियरो एवं वयासी-बाले-सि ताव तुमं पुत्ता ! असंबुद्धे-सि० किं णं तुमं जाणासि धम्मं ? तए णं से अइमुत्ते कुमारे अम्मापियरो एवं वयासी-एवं खलु अहं अम्मयाओ ! जं चेव जाणामि तं चेव ण जाणामि जं चेव ण जाणामि तं चेव जाणामि । तए णं तं अइमुत्तं कुमारं अम्मापियरो

एवं वयासी—कहं णं तुमं पुत्ता ! जं चेव जाणसि जाव तं चेव जाणसि ? तए णं से अइमुत्ते कुमारे अम्मापियरो एवं वयासी—जाणामि अहं अम्मयाओ ! जहा जाएणं अवस्समरियव्वं ण जाणामि अहं अम्मयाओ ! काहे वा कहि वा कहं वा केच्चिरेण वा ? ण जाणामि अहं अम्मयाओ ! केहि कम्माययणेहि जीवा णेरइयतिरिक्खजोणियमणस्सदेवेसु उव्वज्जति, जाणामि णं अम्मयाओ ! जहा सएहि कम्माययणेहि जीवा णेरइयं जाव उव्वज्जति, एवं खलु अहं अम्मयाओ ! जं चेव जाणामि तं चेव ण जाणामि जं चेव ण जाणामि तं चेव जाणामि, तं इच्छामि णं अम्मयाओ ! तुभोहि अब्भणुण्णाए जाव पव्वइत्तए । तए णं तं अइमुत्तं कुमारं अम्मापियरो जाहे णो संचाएति बहूहि आघवं तं इच्छामो ते जाया । एगदिवसमंवि रायसिंरि पासेत्तए । तए णं से अइमुत्ते कुमारे अम्मापिउव्वयणमण्यत्तमाणे तुसिणीए सच्चिट्ठइ अभिसेओ जहा महाबलस्स णिक्खमणं जाव सामाइयमाइयाइं एक्कारस अंगाइं अहिज्जइ बहूइं वासाइं सामणपरियाणं गुणरयणं जाव विपुले सिद्धे १५ । उ० सो० अ० ए० ख० जं० तेणं कालेणं तेणं समएणं वाणारसीए णयरीए काममहावणेचेइए तत्थ णं वाणारसीइए अलक्खे णामं राया होत्था । तेणं कालेणं तेणं समएणं समणे जाव विहरइ परिमा णिग्गया, तए णं से अलक्खे राया इमीसे कहाए लद्धट्ठे स० हट्टुट्टु० जहा कूणिए जाव पज्जुवासइ धम्मकहा० । तए णं से अलक्खे राया समणस्स भगवओ महावीरस्स अतिए जहा उदायणे तहा णिक्खंते णवरं जेट्टु-पुत्तं रज्जे अहिंसिचइ एक्कारस अंगाइं बहू वासा परिआओ जाव विपुले सिद्धे १६ । एवं जंबू ! समणेणं जाव छट्टमस्स वग्गस्स अयमट्ठे पणत्ते ॥१५॥

सत्तमो वग्गो

जइ णं भंते ! सत्तमस्स वग्गस्स उक्खेवओ० जाव तेरस अज्झयणा पणत्ता तं०—णंदा तह णंदवई णंदोत्तरं गंदिसेणिया चेव मरुया मुमरुया महमरुया मरुहेवा य अट्टमा ॥ १ ॥ भट्टा य सुभट्टा य सुजाया सुमणा-इया । भूयदिण्णा य बोद्धघव्वा सेणियमज्जाणं णामाइं ॥ २ ॥ जइ णं भंते !० तेरस अज्झयणा पणत्ता पट्टमस्स णं भंते ! अज्झयणस्स समणेणं० के अट्ठे पणत्ते ? एवं खलु जंबू ! तेणं कालेणं तेणं समएणं रायसिंहे णयरे

गुणसिए चेइए सेणिए राया व०, तस्स णं सेणियस्स रण्णो णंदा णामं देवी
 होत्था वण्णओ, सामी समोसडे परिसा णिग्गया । तए णं सा णंदा देवी इमीसे
 कहाए लद्धट्टा स० जाव हट्ट० कोडुंबियपुरिते सद्दावेइ २ ता जाणं नुरुहइ जहा
 पउमावई जाव एक्कारस अंगाई अहिज्जिता वीसं वासाई परियाओ जाव सिद्धा ।
 एवं तेरसवि देवीओ णंदागमेण णेयव्वाओ णि० ॥ सत्तमो वग्गो समत्तो ॥१६॥

अट्टमो वग्गो

जइ णं भंते ! अट्टमस्स वग्गस्स उक्खेवओ जाव दस अज्जयणा पण्णत्ता,
 तं०—काली सुकाली महाकाली कणा सुकणा महाकणा । वीरकणा य
 बोधव्वा रामकणा तहेव थ ॥ १ ॥ पिउसेणकणा णवमी दसमी महासेणकणा
 थ । जइ० दस अज्जयणा० पढमस्स णं मं० अज्जयणस्स स० जाव सं० के
 अट्ठे पण्णत्ते ? एवं खलु जंबू ! तेणं कालेणं तेणं समएणं चंपा णामं णयरी
 होत्था पुण्णभट्टे चेइए, तत्थ णं चंपाए णयरीए कोणिए राया वण्णओ, तत्थ णं
 चंपाए णयरीए सेणियस्स रण्णो भज्जा कोणियस्स रण्णो चुल्लमाउया काली
 णामं देवी होत्था वण्णओ जहा णंदा जाव सामाइयमाइयाई एक्कारस अंगाई
 अहिज्जइ, बहूहि चउत्थ० जाव अप्पाणं भावेमाणी विहरइ, तए णं सा काली
 अज्जा अणया कयाइ जेणेव अज्जचंदणा अज्जा तेणेव उवागया उवागच्छित्ता
 एवं वयासी—इच्छामि णं अज्जाओ ! तुवभेहि अब्भणुणाया समाणी रयणावलि
 तवं उवसंपज्जेत्ताणं विहरेत्तए अहामुहं । तए णं सा काली अज्जा अज्ज
 चंदणाए अब्भणुणाया समाणी रयणावलि त० उवसंपज्जित्ताणं विहरइ
 तं०—चउत्थं करेइ करेत्ता सव्वकामगुणियं पारेइ पारेत्ता छट्ठं करेइ करेत्ता
 सव्वकामगुणियं पारेइ २ अट्टमं करेइ २ सव्वकाम० २ अट्ट छट्ठाइं करेइ
 २ सव्वकाम० २ चउत्थं करेइ २ सव्वकाम० छट्ठं करेइ २ सव्वकाम०
 २ अट्टमं करेइ २ सव्वकाम० २ दसमं करेइ २ सव्वकाम० २ दुवालसमं
 करेइ २ सव्वकाम० २ चोदसमं २ सव्व० २ सोलसमं २ सव्व० २
 अट्टारसमं २ सव्व० २ वीसइमं २ सव्व० २ बावीसइमं २ सव्व० २
 चउत्तीसइमं २ सव्व० २ छत्तीसइमं २ सव्व० २ अट्टावीसइमं २ सव्व०
 २ तीसइमं २ सव्व० २ बत्तीसइमं २ सव्व० २ चोत्तीसइमं २ सव्व० २

चोत्तीसं छट्ठाई करेइ २ सव्व० २ चोत्तीसदमं करेइ २ सव्व० २ बत्तीसं २
 सव्व० २ तीसं २ सव्व० २ अट्ठावीसं २ सव्व० २ छट्ठवीसं २ सव्व० २
 चउवीसं २ सव्व० २ वावीसं २ सव्व० २ वीसं २ सव्व० २ अट्ठारममं
 २ सव्व० २ सोलसमं २ सव्व० २ चोद्दममं २ सव्व० २ बारसमं २ सव्व० २
 दसमं २ सव्व० २ अट्टमं २ सव्व० २ छट्ठं २ सव्व० २ चउत्थं २
 सव्व० २ अट्ट छट्ठाई करेइ २ सव्व० २ अट्टम करेइ २ सव्व० २ छट्ठं करेइ
 २ सव्व० २ चउत्थं २ सव्व० एव खलु एसा रयणावलीए तवोकम्मस्स पढमा
 परिवाडी एगणं संवच्छरेणं तिहि मासेहि बावीसाए य अहोरत्तेहि अहामुत्त
 जाव आराहिधा भवइ । तयाणतरं च णं दोच्चाए परिवाडीए चउत्थं करेइ २
 विगइवज्जं पारेइ २ छट्ठं करेइ २ विगइवज्जं पारेइ० एव जहा पढमाए-
 परिवाडिए तहा बीयाए एव णवरं सव्वपारणए विगइवज्जं पारेइ जाव आराहिधा
 भवइ । तयाणतरं च णं तच्चाए परिवाडीए चउत्थं करेइ करेत्ता अलेवाडं पारेइ
 सेसं तहेव, एवं चउत्था परिवाडी णवरं सव्वपारणए आयबिलं पारेइ सेसं त चेव-
 'पढसंमि सव्वकामं पारणयं विइयाए विगइवज्जं । तइयंमि अलेवाडं आयबि-
 लओ चउत्थमि ॥ १॥' तए णं सा काली अज्जा रयणावली तवोकम्म
 पंचीहि संवच्छरेहि दोहि य मासेहि अट्ठावीसाए य विवसेहि अहामुत्तं जाव
 आराहेत्ता जेणेव अज्जचंदणा अज्जा तेणेव उवा० २ ता अज्जचंदणं अज्ज
 वंदइ णमंसइ वं० २ ता बहूहि चउत्थ जाव अप्पाणं भावेमाणी विहरइ ।
 तए णं सा काली अज्जा तेणं ओरालेणं जाव धमणिंसंतया जाया यावि
 होत्था से जहा इंगाल० जाव सुहयहुयासणे इव भासरासिपत्तिच्छण्णा तवेणं
 तेएणं तवतेयासरीए अईव २ उवसोहेमाणी २ चिट्ठइ, तए णं तांसे कालीए
 अज्जाए अणया कयाइ पुव्वरत्तावरत्तकाले अयमज्झत्थिए जहा खदयस्स
 चित्ता जहा जाव जत्थि उट्ठा० ताव ता मे सेयं कल्लं जाव जलंते अज्जचंदणं
 अज्जं आपुच्छित्ता अज्जचंदणाए अज्जाए अम्मणुण्णायाए समाणीए सलेह्णा-
 झसणाञ्जूसियाए मत्तपाणपडियाइविख्याए कालं अणवकंखमाणीए विहरे-
 त्तएत्तिकट्टु एवं संपेहेइ २ ता कल्लं जेणेव अज्जचंदणा अज्जा तेणेव उवा-
 गच्छइ २ ता अज्जचंदणं अज्जं वंदइ णमंसइ वं० २ ता एवं वयासी-इच्छामि
 णं अज्जो ! तुभंहेहि अम्मणुण्णाया समाणी संलेह्णा० जाव विहरेत्तए, अहा-

सुहं० । तओ काली अज्जा अज्जचदणाए अडमणुणयाया समाणी संलेहणा०
जाव विहरइ । सा काली अज्जा अज्जचदणाए अतिए सामादयमादयाइं एक्का-
रस अंमाइं अहिज्जिता बहुपाडिपुण्णाइं अट्ट संवच्छराइं सामणपरियाणं
पाउणित्ता मासियाए संलेहणाए अत्ताणं झुसेत्ता सद्धि मत्ताइं अणसणाए
छेदिता जस्सट्टाए कीरइ णमभावे जाव चरिभस्सासणीमासेहि सिद्धा ॥१॥
णिवखेयओ ॥ पढमं अज्जणणं समत्तं ॥ १७ ॥ (उ० वि० अ० ए० ख० जं०)
तेणं कालेण तेणं समएणं चंपाणां णयरी पुणमहे चेइए कोणिए राया,
तत्थ णं सेणियस्स रणो भज्जा कोणियस्स रणो च्चलमाउया सुकाली-णां
देवी होत्था जहा काली तथा सुकाली-वि णिवसंता जाव बहूहि चउत्थ-जाव
भावेमाणी विहरइ । तए णं सा सुकाली अज्जा अणया कयाह जेणेव अज्ज-
चदणा अज्जा जाव इच्छामि णं अज्जो ! तुभोहि अडमणुणयाया समाणी कण-
गावलीतवोकम्मं उवसंपज्जित्ताणं विहरेत्तए, एवं जहा रयणावली तथा कण-
गावली वि, णवरं तिसु ठाणेषु अट्टमाइं करेइ जहा रयणावलीए छट्टाइं एक्काए
परिवाडीए संवच्छरो पंच मासा बारस य अहोरत्ता चउण्हं पंच वरिसा णव
मासा अट्टारस दिवस मसं तहेव, णव वासा परियाओ जाव सिद्धा ॥ १८ ॥
एवं महाकाली-वि, णवरं खुट्टाणं सोहणिवकीलियं तवोकम्मं उवसंपज्जित्ताणं
विहरइ, तं—चउत्थं करेइ २ सव्वकामगुणियं पारेइ २ छट्ठं करेइ २ सव्व-
कामगुणियं पारेइ २ चउत्थं करेइ २ सव्वका० २ अट्टमं करेइ २ सव्वका० २
छट्ठं २ सव्व० २ दसमं २ सव्व० अट्टमं २ सव्व० २ दुवालसं०
२ सव्व० २ दसमं २ सव्व० २ चोदसं० २ दुवालसं० २ सव्व० २
सोलसमं २ सव्व० २ चोदसं० २ सव्व० २ अट्टारसं० २ सव्व० २
सोलसमं २ सव्व० २ बीसं २ सव्व० २ अट्टार० २ सव्व० २ बीसं
२ सव्व० २ सोलसमं २ सव्व० २ अट्टार० सव्व० २ चोदसं० २ सव्व० २
सोलसमं २ सव्व० २ दुवालसं० २ सव्व० २ चोदसं० २ सव्व० २ दसमं०
२ सव्व० २ दुवालसं० २ सव्व० २ अट्टमं २ सव्व० २ दसमं २ सव्व० २
छट्ठं २ सव्व० २ अट्टमं २ सव्व० २ चउत्थं २ सव्व० २ छट्ठं
२ सव्व० २ चउत्थं २ सव्वकामगुणियं पारेइ तहेव चत्तारि परिवाडीओ,
एक्काए परिवाडीए छम्मासा सत्त य विवसा, चउण्हं दो वरिसा अट्टावीसा य

दिवसा जाव सिद्धा ॥ १६ ॥ एवं कण्हा वि णवरं महालयं सीहणिकवीलियं तवोकम्म जहेव खुड्डागं णवरं चोत्तीसइमं जाव णेयब्बं तहेव ऊमारोयब्बं, एवकाए वरिसं छम्मासा अट्टारस य दिवसा, चउण्हं छच्चरिसा दो मामा वारस य अहो- रत्ता, सेमं जहा कालीए जाव सिद्धा ॥ २० ॥ एवं मुकण्हा वि णवरं सत्तसत्त- मियं भिक्खुपडिमं उवसंपज्जित्ताणं विहरइ, पढमे सत्तए एक्केवकं भोयणस्स दत्ति पडिगाहेइ एक्केवकं पाणयस्स, दोच्चे सत्तए दो दो भोयणस्स दो दो पाण- यस्स पडिगाहेइ, तच्चे सत्तए तिण्णि० चउत्थे० पंचमे० छ० सत्तमे सत्तए सत्त दत्तीओ भोयणस्स पडिगाहेइ सत्त पाणयस्स, एवं खलु एयं सत्तसत्तमियं भिक्खुपडिमं एगुणपण्णाए राइदिएहिं एगेण य छण्णउएणं भिक्खासएणं अहा- सुत्ता जाव आराहेत्ता जेगेव अज्जचंदणा अज्जा तेणेव उवागया २ ता अज्ज- चंदणं अज्जं वंदइ णमंसइ वं० २ ता एवं वयासी-इच्छामि णं अज्जाओ ! तुइभेहिं अन्नण्णयाया समाणी अट्टुमियं भिक्खुपडिमं उवसंपज्जित्ताणं विहरे- त्तए, अहामुहं० । तए णं सा मुकण्हा अज्जा अज्जचंदणाए अन्नण्णयाया समाणी अट्टुमियं भिक्खुपडिमं उवसंपज्जित्ताणं विहरइ, पढमे अट्टए एक्केवकं भोय- णस्स दत्ति पडिगाहेइ एक्केवकं पाणयस्स जाव अट्टमे अट्टए अट्टु भोयणस्स दत्ति पडिगाहेइ अट्ट पाणयस्स, एवं खलु एयं अट्टुमियं भिक्खुपडिमं चउ- सट्ठीए राइदिएहिं दोहि य अट्टासीएहिं भिक्खासएहिं अहामुत्तं जाव णव- णवमियं भिक्खुपडिमं उवसंपज्जित्ताणं विहरइ, पढमे णवए एक्केवकं भोयणस्स दत्ति पडिगाहेइ एक्केवकं पाणयस्स जाव णवमे णवए णवणव द० भो० पडि०-णव २ पाणयस्स, एवं खलु णवणवमियं भिक्खुपडिमं एकासीइ राइदि- एहिं चउहिं पंचोत्तरेहिं भिक्खासएहिं अहामुत्ता जाव दसदसमियं भिक्खुपडिमं उवसंपज्जित्ताणं विहरइ, पढमे दसए एक्केवकं भोयणस्स दत्ति पडिगाहेइ- एक्केवकं पाणयस्स जाव दसमे दसए दस २ भोयणस्स दत्ति पडिगाहेइ दस २ पाण य स्स०, एवं खलु एयं दसदसमियं भिक्खुपडिमं एक्केणं राइदियसएणं अट्टछट्ठींहिं भिक्खासएहिं अहामुत्तं जाव आराहेइ २ ता बहूहिं चउत्थं जाव मासद्धमासविहत्तवोकम्महिं अप्पाणं भावेमाणी विहरइ, तए णं सा मुकण्हा अज्जा तेणं उरालेणं जाव सिद्धा ॥ णिकखेवओ ॥ पंचम अज्जयणं ॥ २१ ॥ एवं महाकण्हा वि णवरं खुड्डागं सट्ठओभइ पडिमं उवसंपज्जित्ताणं विहरइ (तं०)

चउत्थं करेइ २ सव्वकामगुणियं पारेइ २ छट्ठं करेइ २ सव्व० २ अट्टमं २ सव्व० २ दसमं २ सव्व० २ दुवालसमं २ सव्व० २ अट्टमं २ सव्व० २ दसमं २ सव्व० २ दुवालसमं २ सव्व० २ चउत्थं २ सव्व २ छट्ठं २ सव्व० २ दुवालसमं २ सव्व० २ चउत्थं २ सव्व० २ छट्ठं २ सव्व० २ अट्टमं २ सव्व० २ दसमं २ सव्व० २ छट्ठं २ सव्व० २ अट्टमं २ सव्व० २ दसमं २ सव्व० २ दुवालसमं २ सव्व० २ चउत्थं २ सव्व० २ दसमं २ सव्व० २ दुवालसमं २ सव्व० २ चउत्थं २ सव्व० २ छट्ठं २ सव्व० २ अट्टमं २ सव्व० एवं खलु एवं खुड्ढागसव्वओमद्वस्स तवोक्कम्मस्स पढमं परिवाडिं तिहि मासेहि दसहिं दिवसेहिं अहासुत्तं जाव आराहिंसा बोच्चाए परिवाडोए चउत्थं करेइ २ विगइवज्जं पारेइ २ जहा रयणावलीए तथा एत्थं चित्तारि परिवाडोओ पारणा त्थेव, चउत्थं कालो संबच्छरो भासो दस य दिवसा, सेसं त्थेव जाव सिद्धा । णिक्खेवओ ॥ छट्ठं अज्जयणं ॥ २२ ॥ एवं वीर-कम्हा-विं णधरं महालयं सव्वओमद्वं तवोक्कम्मं उवसंपज्जित्ताणं विहरइ, तं— चउत्थं करेइ २ सव्व० २ छट्ठं २ सव्व० २ अट्टमं २ सव्व० १ दसमं २ सव्व० २ दुवालसमं २ सव्व० २ चौदसमं २ सव्व० २ सोलसमं २ सव्व० २ (प० लया) दसमं २ सव्व० २ दुवालसमं २ सव्व० २ चौदसमं २ सव्व० २ सोलसमं २ सव्व० २ चउत्थं २ सव्व० २ छट्ठं २ सव्व० २ अट्टमं २ सव्व० २ (वि० ल०) सोलसमं २ सव्व० २ चउत्थं २ सव्व० छट्ठं २ सव्व० २ अट्टमं २ सव्व० २ दसमं २ सव्व० २ दुवाल २ सव्व० २ चौदसं २ सव्व० २ (ति० ल०) अट्टमं २ सव्व० २ दसमं २ सव्व० २ दुवालसमं २ सव्व० २ चौदसमं २ सव्व० २ सोलसमं २ सव्व० २ चउत्थं २ सव्व० २ छट्ठं २ सव्व० २ (च० ल०) चौदसं २ सव्व० २ सोलसमं २ सव्व० २ चउत्थं २ सव्व० २ छट्ठं २ सव्व० २ अट्टमं २ सव्व० २ दसमं २ सव्व० २ दुवाल २ सव्व० २ (पं० ल०) छट्ठं २ सव्व० २ अट्टमं २ सव्व० २ दसमं २ सव्व० २ दुवाल २ सव्व० २ चौदसमं २ सव्व० २ सोलसमं २ सव्व० २ चउत्थं २ सव्व० २ (छ० ल०) दुवाल २ सव्व० २ चौदसमं २ सव्व० २ सोलसमं २ सव्व० २ चउत्थं २ सव्व० २ छट्ठं २ सव्व० २ अट्टमं २ सव्व० २ दसमं २ सव्व०

(स० ल०) एक्काए कालो अट्ट मासा पंच य दिवसा चउण्हं दो वासा अट्ट मासा बीसं दिवसा सेसं तहेव जाव सिद्धा ॥ २३ ॥ एवं रामकण्हा वि णवरं महात्तरपडिमं उवसंपज्जित्ताणं विहरइ तं—दुवालसमं करेइ २ सव्व० चोद्दसमं २ सव्व० २ सोलसमं २ सव्व० २ अट्टारसमं २ सव्व० २ वीसइमं २ सव्व० २ सोलसमं २ सव्व० अट्टारसमं २ सव्व० २ वीसइमं २ सव्व० दुवालसमं २ सव्व० चोद्दसमं २ सव्व० २ वीसइमं २ सव्व० २ दुवालसमं २ सव्व० २ चोद्दसमं २ सव्व० २ सोलसमं २ सव्व० २ अट्टारसमं २ सव्व० २ वीसइमं २ सव्व० २ दुवालसमं २ सव्व० २ अट्टारसमं २ सव्व० २ वीसइमं २ सव्व० २ दुवालसमं २ सव्व० २ चोद्दसमं २ सव्व० २ सोलसमं २ सव्व० एक्काए कालो छम्मासा बीस य दिवसा, चउण्हं कालो दो वरिसा दो मासा बीस य दिवसा, सेसं तहेव जहा काली जाव सिद्धा ॥ २४ ॥ एवं पिउसेणकण्हा वि णवरं मुत्तावलीतवोकम्मं उवसंपज्जित्ताणं विहरइ, तं—चउत्थं करेइ २ सव्व० २ छट्ठं २ सव्व० २ चउत्थं २ सव्व० २ अट्टमं २ सव्व० २ चउत्थं २ सव्व० २ दसमं २ सव्व० २ चउत्थं २ सव्व० २ दुवाल २ सव्व० २ चउत्थं २ सव्व० २ चोद्दसमं २ सव्व० २ चउत्थं २ सव्व० २ सोलसमं २ सव्व० चउत्थं २ सव्व० २ अट्टारसमं २ सव्व० २ चउत्थं २ सव्व० २ वीसइमं २ सव्व० २ चउत्थं २ सव्व० २ बावीसइमं २ सव्व० २ चउत्थं २ सव्व० २ चउत्थीसइमं २ सव्व० २ चउत्थं २ सव्व० २ छव्वीसइमं २ सव्व० २ चउत्थं २ सव्व० २ अट्टावीसं २ सव्व० २ चउत्थं २ सव्व० २ तीसइमं २ सव्व० २ चउत्थं २ सव्व० २ वत्तीसइमं २ सव्व० २ चउत्थं २ चोत्तीसइमं २ सव्व० (२ ता च २ ता स० २ ता व० २ ता) एवं तहेव ओसारेइ जाव चउत्थं करेइ २ ता सव्वकामणुणियं पारेइ, एक्काए कालो एक्कारस मासा पणरस य दिवसा चउण्हं तिणिण वरिसा दस य मासा सेसं तहेव जाव सिद्धा ॥ २५ ॥ एवं महात्सेणकण्हा वि णवरं आर्यबिलवडुमाणं तवोकम्मं उवसंपज्जित्ताणं विहरइ, तं—आर्यबिलं करेइ २ चउत्थं करेइ २ बे आर्यबिलाइं करेइ २ चउत्थं करेइ तिणिण आर्यबिलाइं करेइ २ चउत्थं २ चत्तारिं २ चउत्थं २ पंचं २

चउत्थं० २ छ० २ चउत्थं० २ एषं एकोत्तरियाए वड्ढीए आयंबिलाइं वड्ढंति
 चउत्थंतरियाइं जाव आयंबिलसयं करेइ २ चउत्थं करेइ । तए णं सा महासेण-
 कण्हा अज्जा आयंबिलवड्ढमाणं तवोकम्मं चोदसहिं वासेहिं तिहिं य मासेहिं
 बीसहिं य अहोरत्तेहिं अहामुत्तं जाव सम्मं काएणं फासेइ जाव आराहिता जेणेव
 अज्जचंदणा अज्जा तेणेव उवा० २ ता अ० अ० वंदइ णमंसइ वंदित्त
 णमंसित्ता बर्हीहिं चउत्थ जाव भावेमाणी विहरइ, तए णं सा महासेणकण्हा
 अज्जा तेणं उरालेणं जाव उवसोभेमाणी चिट्ठइ । तए णं तीसे महासेणकण्हाए
 अज्जाए अण्णया कयाइं पुव्वरत्तावरत्तकाले चित्ता जहा खंदयस्स जाव अज्जचदणं
 आपुच्छइ जाव संलेहणा० कालं अणवकंखमाणी विहरइ । तए णं सा महासेण-
 कण्हा अज्जा अज्जचंदणाए अज्जाए अंतिए सामाइयमाइयाइं एवकारस अंगाइं
 अहिज्जित्तं बहुपडिपुण्णाइं सत्तरस वासाइं परियायं पालइत्ता मासियाए
 संलेहणाए अप्पाणं भूसित्ता सट्ठिं भत्ताइं अणसणाए छेवित्ता जस्सट्टाए कीरइ
 जाव तमट्ठं आराहेइ आराहिता चरिमउस्सासणीसासेहिं सिद्धा बुद्धा० ।
 अट्ट य वासा आईं एवकोत्तरियाए जाव सत्तरस । एसो खलु परियाओ सेणिय-
 भज्जाणं णायब्बो ॥ १ ॥ एवं खलु जंबू ! समणेभं भगवया महावीरेणं आदि-
 गरेणं जाव संपत्तेणं अट्टमस्स अंगस्स अंतगडदसाणं अयमट्ठे पण्णसे
 ॥२६॥ अंतगडदसाणं अंगस्स एगो सुयखंधो अट्टवग्गा अट्टसु चैव दिवसेसु
 उट्ठिसिज्जंति, तथ पढमबिइयवग्गे दस दस (अट्ट) उट्ठेसगा तइयवग्गे तेरस
 उट्ठेसगा चउत्थपंचमवग्गे दस दस उट्ठेसगा छट्ठवग्गे सोलस उट्ठेसगा सत्तमवग्गे
 तेरस उट्ठेसगा अट्टमवग्गे दस उट्ठेसगा सेसं जहा णायधम्मकहाणं ॥२७॥

॥ अंतगडदसाओ समत्ताओ ॥



अणुत्तरोववाइयदसाओ

पढमो वगो

तेणं कालेणं तेणं समएणं राधगिहे णयरे अज्जसुहम्मस्स समोसरणं परिआ
 णिग्गया जाव अंबू पज्जुवासइ एवं वयासी-जइ णं भंते ! समणेणं जाव संपत्तेणं
 अट्टमस्स अंगस्स अंतगइवसाणं अयमट्ठे पण्णत्ते णवमस्स णं भंते ! अंगस्स
 अणुत्तरोववाइयदसाणं समणेणं जाव संपत्तेणं के अट्ठे पण्णत्ते ? तए णं से सुहुम्मे
 अणगारे जंबू अणगारं एवं वयासी-एवं खलु जम्बू ! समणेणं जाव संपत्तेणं
 णवमस्स अंगस्स अणुत्तरोववाइयदसाणं तिष्णि वग्गा पण्णत्ता । जइ णं भंते !
 समणेणं जाव संपत्तेणं णवमस्स अंगस्स अणुत्तरोववाइयदसाणं तओ वग्गा
 पण्णत्ता पढमस्स णं भंते ! वग्गस्स अणुत्तरोववाइयदसाणं समणेणं जाव संप-
 त्तेणं कइ अज्जयणा पण्णत्ता ? एवं खलु जंबू ! समणेणं जाव संपत्तेणं
 अणुत्तरोववाइयदसाणं पढमस्स वग्गस्स वस अज्जयणा पण्णत्ता, तं०-(गो०-)
 जालिमयालिउवयाली पुरिससेणे य धारिसेणे य, वीहवंते य लट्ठवंते य विहल्ले
 वेहा[य]से अमए इ य कुमारे । जइ णं भंते ! समणेणं जाव संपत्तेणं पढमस्स
 वग्गस्स वस अज्जयणा पण्णत्ता पढमस्स णं भंते ! अज्जयणस्स अणुत्तरोववा-
 इयदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! तेणं
 कालेणं तेणं समएणं राधगिहे णयरे रिद्धतिथमियसमिद्धे गुणसिलए वेइए सेगिए
 राया धारिणीदेवी सीहो सुमिणे जालीकुमारो जहा मेहो अट्टट्टओ वाओ जाव
 उप्पि पासाय० बिहरइ । सामी समोसडे, सेगिओ णिग्गओ, जहा मेहो तथा
 जालीवि णिग्गओ तहेव णिक्खंतो जहा मेहो, एवकारस अंगाइं अहिज्जइ,
 गुणरयणं तवोक्कम्मं एवं जा चेव खंदयस्स वत्तध्वया सा चेव चित्ता
 आपुच्छणा धेरेहिं सद्धि विपुलं तहेव दुरुइइ, णवरं सोलस वासाइं साम-

णपरियाणं पाउणित्ता कालमामे कालं किच्चा उड्डं चंदिमं सोहस्मीमाण
जाव आरणच्छुए कप्पे णवयणेवेज्जेविमाणपत्थडे उड्डं दूरं वीईवइत्ता विजय-
विमाणे देवत्ताए उववणे। तएणं ते थेरा भगवन्तो जालि अणगारं कालगणं
जाणेत्ता परिणिव्वाणवत्तियं काउस्समं करेति २ ता पत्तवीवराइं गेह्ति
तहेव ओयरंति जाव इमे से आयारसंडए । भंते ! ति भगवं गीयमे जाव
एवं वयासी—एवं खलु देवाणुणियाणं अंतेवासी जाली णामं अणगारे पगइभइए मे
णं जाली अणगारे कालगए कहिं गए कहिं उववणे ? एवं खलु गोयमा ! ममं
अंतेवासी तहेव जहा खंदयस्स जाव कालं उड्डं चंदिमं जाव विजय विमाणे
देवत्ताए उववणे । जालिस्स णं भंते ! देवस्स केवइयं कालं ठिई पणत्ता ?
गोयमा ! बत्तीसं सागरोवसाइं ठिई पणत्ता । से णं भंते ! ताओ देवलोगाओ
आउवखएणं ३ कहिं गच्छिहिइ २ ? गोयमा ! महविदेहे वसि मिअज्झहिइ
(ता) एवं खलु जंबू ! समणेणं जाव संपत्तेणं अणुत्तरोववाइयदसाणं पढयस्स
वगस्स पढमज्झयणस्स अयमट्ठे पणत्ते । एवं सेमाण वि अट्टुण्हं माणि-
यव्वं, णवरं (सत्त) छ धारिणीसुआ वेहल्लवेहा[य]मा चैल्लभाए (अ० णं०),
आइल्लाणं पंचण्हं सोलस वासाइं सामण्णपरियाओ तिग्हं बारस वासाइं दोग्ग-
पंच वासाइं, आइल्लाणं पंचण्हं आणुपुत्तीए उववाओ विजए वेजयंते जयंते-
अपराजिए सव्वट्टुसिद्धे, दीहवते सव्वट्टुसिद्धे, उवकमेणं सेना, अमओ विजए,
सेसं जहा पढमे, अमयस्स णाणत्तं, रायगिहे णयरे सेणिए राया णंदा देवी
माया सेसं तहेव, एवं खलु जंबू ! समणेणं जाव संपत्तेणं अणुत्तरोववाइय-
दसाणं पढमस्स वगस्स अयमट्ठे पणत्ते ॥१॥ पढमो वग्गो समत्तो ॥

दोच्चा वग्गो

जइ णं भंते ! समणेणं जाव संपत्तेणं अणुत्तरोववाइयदसाणं पढमस्स वग्गम
अयमट्ठे पणत्ते दोच्चस्स णं भंते ! वग्गस्स अणुत्तरोववाइयदसाणं समणेणं
जाव संपत्तेणं के अट्ठे पणत्ते ? एवं खलु जंबू ! समणेणं जाव संपत्तेणं अणु-
त्तरोववाइयदसाणं दोच्चस्स वग्गस्स तेरस अज्जयणा पणत्ता, तं—दीहसेणे
महासेणे लट्टवंते य गूढवंते य सुद्धवंते य हल्ले दुमे दुमसेणे मुहादुमसेणे य
आहिए । सोहे य सीहसेणे य महासीहसेणे य आहिए, पुणसेणे य बांद्धवे

तेरसमे होइ अज्जयणे ॥ जइ णं भंते ! समणेणं जाव संपत्तेणं अणुत्तरोववाइय-
दसाणं दोच्चस्स वग्गस्स तेरस अज्जयणा प०, दोच्चस्स णं भंते ! वग्गस्स
पढमज्जयणस्स समणेणं ३ जाव संपत्तेणं के अट्ठे प० ? एवं खलु जंबू !
तेणं कालेणं तेणं समएणं रायगिहे णयरे गुणमित्ते चेट्ठए सेणिए राया धारिणी
देवी सीहो सुमिणे जहा जाली तहा जस्मं बालत्तणं कलाओ णवरं दीहसेणो
कुमारो सच्चेव वत्तव्वया जहा जालिस्स जाव अत्त काहिइ, एवं तेरसवि राय-
गिहे (ण०) सेणिओ पिया धारिणी माथा तेरसण्ह वि सोलसवासा परियाओ,
आणुपुव्वीए (उ०) विजए दोण्णि वेजयंते दोण्णि जयंते दोण्णि अपराजिए
दोण्णि, सेसा महाडुमसेणमाई पंच सव्वट्ठसिद्धे । एवं खलु जंबू ! समणेणं
अणुत्तरोववाइयदसाणं दोच्चस्स वग्गस्स अयमट्ठे पणत्ते, मासियाए संलेहणाए
दोसु वि वग्गोसु ॥ बीओ वग्गो समत्तो ।

तच्चो वग्गो

जइ णं भंते ! समणेणं जाव संपत्तेणं अणुत्तरोववाइयदसाणं दोच्चस्स
वग्गस्स अयमट्ठे पणत्ते तच्चस्स णं भंते ! वग्गस्स अणुत्तरोववाइयदसाणं
समणेणं जाव संपत्तेणं के अट्ठे प० ? एवं खलु जंबू ! समणेणं जाव संपत्तेणं
अणुत्तरोववाइयदसाणं तच्चस्स वग्गस्स दस अज्जयणा पणत्ता, तं०-धण्णे य
सुणव्वत्ते य, इंसिवासे य आहिए । पेल्लए रामपुत्ते य, चंदिमा पिट्ठिमा-
इया ॥१॥ पेढालपुत्ते अणगारे, णवमे पुट्ठिले वि य । वेहल्ले दसमे वत्ते,
इमेय दस (ए० अ०) आहिए ॥२॥ जइ णं भंते ! समणेणं जाव संपत्तेणं
अणुत्तरोववाइयदसाणं तच्चस्स वग्गस्स दस अज्जयणा प० पढमस्स णं भंते !
अज्जयणस्स समणेणं जाव संपत्तेणं के अट्ठे पणत्ते ? एवं खलु जंबू ! तेणं
कालेणं तेणं समएणं काकंदी णमं णयरी होत्था रिद्धत्थिमियसमिद्धा सहस्संबवणे
उज्जाणे सव्वोउय० जियसत्तु राया, तत्थ णं काकंदीए णयरीए भद्दा णामं
सत्थवाही परिवसइ अड्डा जाव अपरिभूया, तीसे णं भद्दाए सत्थवाहीए पुत्ते
धण्णे णामं दारए होत्था अहीण जाव सुक्खे पंचधाईपरिगहिए तं०-खीर-
धाईए जहा महब्बले जाव बायत्तरिकलाओ अहीए जाव अत्तं-भोगसमत्थे जाए
यावि होत्था, तए णं सा भद्दा सत्थवाहीधण्णे दारयं उम्मुक्कबालमावं जाव

भोगसमत्थं यावि जाणिता बत्तीसं पासायवडिसए कारेइ अङ्गमगयमूसिए जाव तेसि मज्जे भवणं अणेगखंभसयसंणिविट्ठं जाव बत्तीसाए इङ्गमवरकण्णयाणं एगद्विवसेणं पाणि सेण्हावेइ (२) बत्तीसओ दाओ जाव उप्पि पासाय० फट्ठं-तेहिं जाव विहरइ । तेणं कालेणं तेणं समएणं समणे० समोसडे परिता णिग्गया राया जहा कोणिओ तहा जियसत्तू णिग्गओ, तए णं तस्स घण्णस्स तं महया (ज०) जहा जमाली तहा णिग्गओ, णवरं पायच्चारेणं जाव जं णवरं अम्मयं भद्दं सत्थवार्हि आपुच्छामि, तए णं अहं देवाणुप्पियाणं अंतिए जाव पस्वयामि जाव जहा जमाली तहा आपुच्छइ मच्छिया वृत्तपडिबृत्तया जहा महब्बले जाव जाहे णो संचाएइ जहा थम्बच्चापुत्तो जियसत्तू आपुच्छइ छत्तचा-मराओ० सयमेव जियसत्तू णिकखंमणं करेइ जहा यावच्चापुत्तस्स कण्णो जाव पस्वइए अणगारे जाए ईरियासमिए जाव गुत्तबंभयारी, तए णं से घण्णे अणगारे जं जेव दिवसं मुंडे भवित्ता जाव पस्वइए तं जेव दिवसं भगवं महावीरं वंइ णमंसइ वं० २ ता एवं वयासी-एवं खलु इच्छामि णं भंते ! तुभोहिं अङ्गणुष्णाए समाणे जावज्जीवाए छट्ठंछट्ठेणं अणिकखित्तेणं आर्यबिलपरिग्गहिएणं तवोकम्मेणं अप्पाणं भावेमाणे विहरित्तए छट्ठस्स वि-य णं पारणयंसि कप्पइ [मे] आर्यबिलं पडिग्गहित्तए णो जेव णं अणार्यबिलं तं-पि-य संसट्ठं णो जेव णं असंसट्ठं तं-पि-य णं उज्झियघम्मियं णो जेव णं अणुज्झियघम्मियं तं पि-य (णं) जं अण्णे बहुवे समणमाहणअतिहि-क्खिणवणीमया णावकंखंति, अहासुहं देवाणुप्पिया ! मा पडिबंधं करेइ । तए णं से घण्णे अणगारे समणेणं भगवया महावीरेणं अङ्गणुष्णाए समाणे हट्ठ० जावज्जीवाए छट्ठंछट्ठेणं अणिकखित्तेणं तवोकम्मेणं अप्पाणं भावेमाणे विहरइ, तए णं से घण्णे अणगारे पढमच्छट्ठ(व)खमणपारणयंसि पढमाए पोरिसीए सज्जायं करेइ जहा मोयमसामी तहेव आपुच्छइ जाव जेनेव काकंदी णयरी तेनेव उवागच्छइ २ सा काकंदीए णयरीए उच्च० जाव अडमाणे आर्यबिलं [णो अणार्यबिलं] जाव णावकंखंति, तए णं से घण्णे अणगारे ताए अङ्गज्जयाए प्यय-याए पयताए पग्गहिवाए एसणाए एसमाणे जइ भत्तं लमइ तो पाणं ण लमइ अह पाणं लमइ तो भत्तं ण लमइ, तए णं से घण्णे अणगारे अब्बिणे अविमणे अक-लुसे अबिसाई अपरितंतजोगी जयणघडणजोगचरित्ते अहापज्जत्तं समुदाणं पडि-

गाहेइ २ ता काकंदीओ णयरीओ पडिणिवल्लमइ २ ता जहा गोयमे जाव पडि-
दसेइ । तए णं से धण्णे अणगारे समणेणं भगवया महावीरेणं अढमणुष्णाए समाणे
अमुच्छिए जाव अणज्जोववण्णे बिलमिव पण्णगमूएणं अप्पाणेणं आहारं आहा-
रेइ २ ता संजमेणं तवसा० विहरइ । तए णं समणे भगवं महावीरे अणया
कयाइ काकंदीओ णयरीओ सहसंबवणाओ उज्जाणाओ पडिणिवल्लमइ
२ ता बहिया जणवयविहारं विहरइ । तए णं से धण्णे अणगारे समणस्स भग-
वओ महावीरस्स त्हारूवाणं थेराणं अंतिए सामाइयमाइयाइं एवकारस्स अंगाइं
अहिज्जइ अहिज्जिता संजमेणं तवसा अप्पाणं भवेमाणे विहरइ । तए णं
से धण्णे अणगारे तेणं ओरालेणं जहा खंदओ जाव० चिट्ठइ । धण्णस्स णं
अणगारस्स पायाणं अयमेयारूवे तवरूवलावण्णे होत्या, से जहा णामए सुक्क-
छल्ली इ वा कट्टुपाउया इ वा जरगउवाहणा इ वा, एवामेव धण्णस्स अणगा-
रस्स पाया सुक्का (लुक्खा) णिम्मसा अट्टिचम्मछिरत्ताए पण्णायंति णो जेव
णं मंससोणियत्ताए । धण्णस्स णं अणगारस्स पायंगुलियाणं अयमेयारूवे० से
जहाणामए कलसंगलिया इ वा मृगसं० माससंगलिया इ वा तहणिया छिण्णा
उण्हे दिण्णा सुक्का समाणी मिलायमाणी २ चिट्ठइ, एवामेव धण्णस्स अ०
पायंगुलियाओ सुक्काओ जाव सोणियत्ताए, धण्णस्स णं अ० जंघाणं अथ-
मेयारूवे० से जहा० काकजंघा इ वा कंकजंघा इ वा ढेणियालियाजंघा इ वा
जाव सोणियत्ताए, धण्णस्सणं जाणू णं अयमेयारूवे० से जहा० कालीपोरे
इ वा मयूरपोरे इ वा ढेणियालियापोरे इ वा एवं जाव सोणियत्ताए, धण्णस्स
उरस्स० जहाणामए सामकरेल्लेइ वा बोरिकरिल्लेइ वा सल्लइकरिल्लेइ वा
सामलिकरिल्लेइ वा तहणिए छि० उण्हे जाव चिट्ठइ एवामेव धण्णस्स उरू
जाव सोणियत्ताए, धण्णस्स कडिपत्तस्स इमेयारूवे० से जहा० उट्टुपाए इ वा
जरगपाए इ वा [महिसपाए इ वा] जाव सोणियत्ताए, धण्णस्स उदरभायणस्स
अयमेयारूवे० से जहा० सुक्कदिए इ वा भज्जणयकमल्ले इ वा कट्टुकोलंबए इ
वा, एवामेव उदरं सुक्कं० धण्णस्स पांसुलियकडयाणं इमेयारूवे० से जहा०
थासयावली इ वा पाणावली इ वा मुंडावली इ वा०, धण्णस्स पिट्टिकरंड-
याणं अयमेयारूवे० से जहा० कण्णावली इ वा गोलावली इ वा बट्टुपावली इ
वा एवामेव०, धण्णस्स उरकडयस्स अयमेयारूवे० से जहा० चित्तकट्टुरे इ

वा विषणपत्ते इ वा तालियंटपत्ते इ वा एवामेव०, धणस्स वाहाणं० से जहा-
 णामए समिसंगलिया इ वा वाहायासंगलिया इ वा अगतियसंगलिया इ वा
 एवामेव० धणस्स हत्थाणं० से जहा० सुक्कच्छगणिया इ वा वडपत्ते इ वा
 पलासपत्ते इ वा, एवामेव० धणस्स हत्थंगुलियाणं० से जहा० कलसंगलिया इ
 वा मुगसं० माससंगलिया इ वा तरुणिया द्विष्णा आयवे दिष्णा सुक्का समाणी
 एवामेव०, धणस्स गीवाए० से जहा० करगगीवा इ वा कुंडियागीवा इ वा
 उच्चट्टवणए इ वा एवामेव० धणस्स णं हणुयाए० से जहा० लाउफले
 इ वा हकुवफले इ वा अंबगट्टिया इ वा एवामेव०, धणस्स उट्टाणं० से जहा०
 सुक्कजलोया इ वा सिलेसगुलिया इ वा अलत्तगुलिया इ वा एवामेव०, धणस्स
 जिम्भाए० से जहा० वडपत्ते इ वा पलासपत्ते इ वा (उंबर०) सासपत्ते इ वा
 एवामेव० धणस्स णासाए० से जहा० अंबगपेसिया इ वा अंबाडगपेसिया इ
 वा माउल्लिगपेसिया इ वा तरुणिया एवामेव०, धणस्स अच्छीणं० से जहा०
 वीणाच्छिहे इ वा वट्ठीसगच्छिहे इ वा पामाइयतारिगा इ वा एवामेव०
 धणस्स कण्णाणं० से जहा० मूलाच्छलियाइ वा वालुंकं कारेल्लयच्छल्लीयाइ
 वा एवामेव० धणस्स अ० सीसस्स० से जहा० तरुणगलउएइ वा तरुणग-
 एलालुएइ वा सिण्हालएइ वा तरुणए जाव चिट्टइ, एवामेव धणस्स अण-
 गारस्स सीसं सुक्कं लुक्खं णिम्मंसं अट्टिचम्मच्छिरत्ताए पण्णायइ णो जेव णं
 मंससोणियत्ताए, एवं सत्त्वत्य, णवरं उदरभायणं कण्णा जीहा उट्टा एएसि
 अट्ठी ण भण्णइ चम्मच्छिरत्ताए पण्णायइत्ति भण्णइ, धण्णे णं अणगारे णं सुक्केणं
 भुक्खेणं पायजंधोरुणा विषयत्तडिकरालेणं कडिकडाहेणं पिट्टमवस्सिएणं उदर-
 भायणेणं जोइज्जमाणेहिं पांसुलियकडएहिं अक्खसुत्तमालाइ वा गणिज्जमालाइ
 वा गणिज्जमाणेहिं पिट्टिकरंडगसंधीहिं गंगातरंगभूएणं उरकडगदेसमाएणं
 सुक्कसप्पसमाणाहिं बाहाहिं सिद्धिलकडालो विव लंबं(चलं)तेहिं य अग्ग-
 हत्थेहिं कंणवगइओविव वेवमाणीए सीसघडीए पच्चापवयणकमले उदमडधड-
 मूहे उब्बट्टुणयणकोसे जीवंजीवेणं गच्छइ जीवंजीवेणं चिट्टइ मासं मासिस्सामित्ति
 गिलाइ ३ से जहाणामए इंगालसगडियाइ वा जहा खंदओ तहा जाव हुयासणे
 इव भासरासिपलिच्छण्णे तवेणं तेएणं तवतेयसिरीए (अ०) उवसोभेमाणे २
 चिट्टइ ॥३॥ तेणं कालेणं तेणं समएणं रायगिहे णयरे गुणसिलए च्चैइ तेणिए

राया, तेणं कालेणं तेणं समएणं समणे भगवं महावीरे समोसद्धे परिसा णिग्गया
 सेणियो णिग्गए धम्मकहा परिसा पडिग्गया । तए णं से सेणिए राया समणस्स
 भगवओ महावीरस्स अंतिए धम्मं सोच्चा णिसम्म समणं भगवं महावीरं बंदइ
 णमंसइ वं० २ ता एवं वयासी-इमासि णं भंते ! इंदमूइपामोवखाणं चोइसण्हं
 समणसाहस्सीणं कयरे अणगारे महादुक्करकारए चेव महाणिज्जरयराए चेव ?
 एवं खलु सेणिया ! इमासि इंदमूइपामोवखाणं चोइसण्हं समणसाहस्सीणं धण्णे
 अणगारे महादुक्करकारए चेव महाणिज्जरयराए चेव । से केणदठेणं भंते !
 एवं वुच्चइ इमासि जाव साहस्सीणं धण्णे अणगारे महादुक्करकारए चेव महा-
 णिज्जरयराए चेव ? एवं खलु सेणिया ! तेणं कालेणं तेणं समएणं कायंदी
 णामं णयरी होत्थ्या० उप्पि पासायवडिसए विहरइ, तए णं अहं अणया
 कयाइ पुब्बाणुपुब्बीए चरमाणे गामाणुगामं दूइज्जमाणे जेणेव कायंदी णयरी
 जेणेव सहसंबवणे उज्जाणे तेणेव उवागए [उवागमित्ता] अहापडिरूवं उगहं
 उग्गिहामि २ ता संजमेणं जाव विहरामि, परिसा णिग्गया, तहेव जाव पव्व-
 इए जाव बिलमिव जाव आहारेइ । धणस्स णं अणगरस्स पादाणं सरीरवणओ
 सव्वो जाव उवसोभमाणे २ चिट्ठइ, से तेणदठेणं सेणिया ! एवं वुच्चइ-
 इमासि चउदसण्हं समणसाहस्सीणं धण्णे अणगारे महादुक्करकारए महा-
 णिज्जरयराए चेव । तए णं से सेणिए राया समणस्स भगवओ महावीरस्स
 अंतिए एयमदठं सोच्चा णिसम्म हट्ठ० समणं भगवं महावीरं तिवखुत्तो आया-
 हिणं पयाहिणं करेइ २ ता बंदइ णमंसइ वं० २ ता जेणेव धण्णे अणगारे तेणेव
 उवागच्छइ २ ता धण्णं अणगारं तिवखुत्तो आयाहिणपयाहिणं करेइ २ ता
 बंदइ णमंसइ वं० २ एवं वयासी-धण्णेऽसि णं तुमं देवाणुप्पिया ! सुपुण्णे०
 सुकपथ्ये कयलक्खणे सुलद्धे णं देवाणुप्पिया ! तव माणुस्सए जम्मजीवियफले-
 त्तिकट्ठु बंदइ णमंसइ वं० २ ता जेणेव समणे भगवं महावीरे तेणेव उवा-
 गच्छइ २ ता समणं भगवं महावीरं तिवखुत्तो जाव बंदइ णमंसइ वं० २
 ता जामेव दिसं पाउठमूए तामेव दिसं पडिगए ॥४॥ तए णं तस्स धणस्स
 अणगरस्स अणया कयाइ पुव्वरत्तावरत्तकालसमयंसि धम्मजागरियं० इमेया-
 रुवे अज्जत्थिए० एवं खलु अहं इमेणं उरालेणं० जहा खंबओ तहेव चिता
 आपुच्छणं घेरेहिं सद्धिं विउलं कुरुहइ मासिया संलेहणा णवमासा परियाओ

जाव कालमासे कालं किञ्चा उद्वृद्धं चंद्रिम जाव णवयगवेज्जविमाणपत्तये उद्वृद्धं
दूरं बीईवइत्ता सव्वट्टसिद्धे विमाणे देवत्ताए उववण्णे । धेरा तहेव ओघरंति जाव
इमे से आघारभंडए । भंतेत्ति ! भगवं गोयमे तहेव पुच्छइ जहा खंदयस्स भगवं
वागरेइ जाव सव्वट्टसिद्धे विमाणे उववण्णे । धणस्स णं भंते ! देवस्स केवइयं
कालं ठिई पणत्ता ? गोयमा ! तेत्तीसं सागरोवमाइं ठिई पणत्ता । से णं
भंते ! ताओ देवलोगाओ (आ० ३) कंहि गच्छिहिइ कंहि उववज्जहिइ ?
गोयमा ! महाविदेहे वासे सिज्जहिइ ५ । तं एवं खलु जंबू ! समणेणं जाव
संपत्तेणं पढमस्स अज्जयणस्स अयमट्ठे पणत्ते ॥५॥ पढमं अज्जयणं समत्तं ॥
जइ णं भंते ! ० उवखेवओ एवं खलु जंबू ! तेणं कालेणं तेणं समएणं काकंदी
णयरी जियसत्तू राया तत्थ णं काकंदीए णयरीए भहा-णामं सत्थवाही परिवसइ
अड्डा०, तीसे णं भहाए सत्थवाहीए पुत्ते सुणवखत्ते णामं दारए होत्था अहीण०
जाव सुखेवे पंचधाइपरिखत्ते जहा धणो तहा बत्तीसओ दाओ जाव
उपि पासायवाडिसए विहरइ । तेणं कालेणं तेणं समएणं समोसरणं जहा
धणो तहा सुणवखत्ते वि णिगए जहा यावच्चापुत्तस्स तहा णिवखमणं जाव
अणगारे जाए ईरियासमिए जाव बंसयारी । तए णं से सुणवखत्ते अणगारे जं
चेव दिवसं समणस्स भगवओ महावीरस्स अंतिए भुंडे जाव पव्वइए तं चेव
दिवसं अभिगहं तहेव जाव बिलमिव ० आहारेइ संजमेणं जाव विहरइ ०
बहिया जणवयविहारं विहरइ एक्कारस अंगाइं अहिज्जइ संजमेणं तवसा अण्णाणं
भावेमाणे विहरइ । तए णं से सुणवखत्ते अ० तेणं ओरालेणं० जहा खंदओ । तेणं
कालेणं तेणं समएणं रायगिहे णयरे गुणसिए चेइए सेणिए राया सामी समो-
सट्ठे परिसा णिगया राया णिगओ धम्मकहा राया पडिगओ परिसा पडिगया ।
तए णं तस्स सुणवखत्तस्स अणयया कयाइं पुव्वरत्तावरत्तकालसमयंसि धम्मजा०
जहा खंदयस्स वइ वासा परियाओ गोयमपुच्छा तहेव कहेइ जाव सव्वट्टसिद्धे
विमाणे देवत्ताए उववण्णे तेत्तीसं सागरोवमाइं ठिई पणत्ता, से णं भंते ! महा-
विदेहे वासे सिज्जहिइ । बीयं अज्जयणं समत्तं ॥ एवं सुणवखत्तगमेणं सेसा-वि
अट्ट भाणियक्खा, णवरं आणुपुब्बीए दोणिण रायगिहे दोणिण साएए दोणिण
वाणियगामे णवमो हत्थिणापुरे दसमो रायगिहे णवण्हं भहाओ जणणीओ
णवण्ह-वि बत्तीसओ दाओ णवण्हं णिवखमणं यावच्चापुत्तस्स सरिसं वेहल्लस्स-

पिया करेइ छम्मासां वेह्लए णव घण्णे सेसाणं बहू वासा मासं सलेहणा
 सव्वट्टुसिद्धे महाविदेहे सिज्झिस्सन्ति । एवं खलु जंबू ! समणेणं भगवया महावी-
 रेणं आइगरेणं तित्थयरेणं सयंसंबुद्धेणं लोगणाहेणं लोगप्पईत्थेणं लोगपज्जोयगरेणं
 अभयदएणं सरणदएणं चक्खुदएणं भग्गदएणं धम्मदएणं धम्मदेसएणं धम्मवर-
 चाउरंतचक्कवट्टिणा अप्पडिहयवरणाणदंसणघरेणं जिणेणं जाणएणं बुद्धेणं बोह-
 एणं मुक्केणं सोयएणं तिण्णेणं तारएणं सिवमयलमरुयमणंतमक्खयमग्गवाहाह-
 मपुणरावत्तयं सिद्धिगइणामधेयं ठाणं संपत्तेणं अणुत्तरोववाइयदसाणं तच्चस्स
 वग्गस्स अयमट्ठे पण्णत्ते ॥६॥ अणुत्तरोववाइयदसाणामं णवमसंयं समत्तं ॥ अणु-
 त्तरोववाइयदसाणं एगो सुयखंधो तिण्णि षग्गा तिसु चैव दिवसेसु उ० तत्थ पढ्मे
 वग्गे दस उद्देसगा बिइए वग्गे तेरस उद्देसगा तइए वग्गे दस उद्देसगा सेसं जहा
 णायाधम्मकहाणं तहा णेयव्वं ॥ ७ ॥

॥ अणुत्तरोववाइयदसाओ समत्ताओ ॥



पण्हावागरणं

पढमो सुयक्खंधो

पढमं अज्झयणं

(तेणं कालेणं तेणं समएणं चंपाणामं णयरी होत्था, पुण्णभद्दे चेद्दए असो-
गवरपायवे पुढविसिलापट्टए, तत्थ णं चंपाए णयरीए कोणिए णामं राया होत्था,
धारिणो देवी, तेणं कालेणं तेणं समएणं समणस्स भगवओ महावीरस्स अंते-
वासी अज्जसुहम्मे णाम थेरे जाइसंपण्णे कुलसंपण्णे बलसंपण्णे रूवसंपण्णे
विणयसंपण्णे णाणसंपण्णे दंसणसंपण्णे चरित्तसंपण्णे लज्जासंपण्णे लाधवसंपण्णे
ओयसी तेयसी वच्चंसी जसंसी जियकोहे जियमाणे जियमाए जियलोभे
जियणिट्ठे जियइंदिए जियपरीसहे जीविद्यासमरणभधविप्पम्बुके तवप्पहाणे
गुणप्पहाणे मत्तिप्पहाणे विज्जापहाणे मंतप्पहाणे बंसप्पहाणे वयप्पहाणे णयप्प-
हाणे णियमप्पहाणे सच्चप्पहाणे सोयप्पहाणे णाणप्पहाणे दंसणप्पहाणे चरित्तप्प-
हाणे चोहसपुब्धी चउणाणोवगए पंचहिं अणगारसएहिं सत्थि संपरिवुडे पुब्बाणु-
पुविं चरमाणे गामाणुधामं दूइज्जमाणे जेणेव चंपा णयरी तेणेव उवागच्छइ
जाव अहापडिरूवं उगगहं उग्गिण्हित्ता संजमेणं तवसा अप्पाणं भावेमाणे विह-
रइ । तेणं कालेणं तेणं समएणं अज्जसुहम्मस्स अंतेवासी अज्जजंबू णामं अण-
गारे कासवगोत्तेणं सत्तस्सेहे जाव संखित्तविपुल्लतेयलेस्से अज्जसुहम्मस्स थेरस्स
अदूरसामंते उड्डंजाणू जाव संजमेणं तवसा अप्पाणं भावेमाणे विहरइ । तए णं
से अज्जजंबू जायसड्ढे जायसंसए जायकोउह्ले उप्पणसड्ढे ३ संजायसड्ढे ३
समप्पणसड्ढे ३ उट्टाए उट्ठेइ २ ता जेणेव अज्जसुहम्मे थेरे तेणेव उवा-
गच्छइ २ ता अज्जसुहम्मं थेरं तिक्खुत्तो आयाहिणपयाहिणं करेइ २ ता बंवइ
णमंसइ वं० २ ता णच्चासण्णे णाइदूरे विणएणं पंजलिउडे पज्जुवासमाणे एवं
वयासी-जइ णं भंते ! समणेणं भगवया महावीरेणं जाव संपत्तेणं णयमस्स
अंगस्स अणुत्तरोववाइयदसाणं अयमट्ठे ५० दसमस्स णं भंते० अंगस्स पण्हा-

वागरणानं समणेणं जाव संपत्तेणं के अट्ठे प० ? जंबू ! इसमस्स अंगरस समणेणं जाव संपत्तेणं दो सुयवखंधा पणत्ता-आसवदारा य संवरदारा य । पढमस्स णं भंते ! सुयवखंधस्स समणेणं जाव संपत्तेणं कइ अज्जयणा पणत्ता ? जम्बू ! पढमस्स णं सुयवखंधस्स समणेणं जाव संपत्तेणं पंच अज्जयणा पणत्ता, दोच्चस्स णंते ! ० एवं चेव, एसि णं भंते ! अण्हयसंवरणं समणेणं जाव संपत्तेणं के अट्ठे पणत्ते ? तए णं अज्जसुहम्मे थेरे जंबूणामेणं अणगारेणं एवं वृत्ते समाणे ज० अणगारं एवं वयासी-) जंबू ! इणमो अण्हयसंवरविणिच्छयं पवयणस्स णिस्सं । वोच्छामि णिच्छयत्थं सुहासियत्थं महेसीहि ॥ १ ॥ पंच-विहो पणत्तो जिणेहि इह अण्हओ अणह्ओ । हिसामोसमदत्तं अब्बंमपरिगहं चेव ॥ २ ॥ जारिसओ जंणामा जह य कओ जारिसं फलं देइ । जेवि य करेति पावा पाणवहं तं णिसामेह ॥ ३ ॥ पाणवहो णाम एस णिच्चं जिणेहि णिओ-पावो चंडो ह्दो खुद्दो साहसिओ अणारिओ णिग्घिओ णिस्संसे महब्भओ पइमओ १० अइमओ बीहणओ तासणओ अणज्जो उव्वेयणओ य णिरवयवखो णिद्धम्मो णिप्पिवासो णिवकलुणो णिरयवासगमणिधणो २० मोहमहब्भयपट्टओ मरणवेमणस्सो २२ ॥ पढमं अधम्मदारं ॥ १ ॥ तस्स य णामाणि इमाणि गोणणाणि होति तीसं, तंजहा-पाणवहो १ उम्मूलणा सरीराओ २ अवीसंभो ३ हिसविहिंसा ४ तहा अक्किच्चं च ५ घायणा ६ मारणा य ७ वहणा ८ उट्टवणा ९ तिवायणा य १० आरंभसमारंभो ११ आउयकम्मस्सुव-ह्वो भेयणिट्टवणगालणा य संवट्टगसंखेवो १२ मच्चू १३ असंजमो १४ कडग-मट्टणं १५ वीरमणं १६ परमवसंकासकारओ १७ दुग्गइप्पवाओ १८ पावकोवो य १९ पावलोभो २० छविच्छेओ २१ जीविघंतकरणो २२ भयं करो २३ अण-करो य २४ वज्जो २५ परितावणअण्हओ २६ विणामो २७ णिज्जवणा २८ लुपणा २९ गुणाणं विराहणत्ति ३० विद्य तस्स एवमाईणि णामधेज्जाणि होति तीसं पाणवहस्स कलुसस्स कडुयफलदेसगाइं ॥ २ ॥ तं च पुण करेति केई पावा असंजया अविरया अणिह्वयपरिणामदुप्पयोगी पाणवहं भयंकरं बहुविहं बहुप्पमारं परदुवल्खुप्पायणप्पसत्ता इमेहि तसथावरेहि जीवेहि पडिनि-विट्ठा, किं ते ? पाठीणत्तिमितिमिगिल्लअणेगल्लसविह्वजाइंमंडुवकडुविह्वकच्छम-णवकमगरदुविह्वगाहविलिवेढयमंडुयसीमागारपुलुयसंसुमारबहुप्पेगारजलयरविहा-णाकए थ एवमाई, कुरंगरुहसरभच्चमरसंवरउररुमससयपसयग्गेण रोहिय-

हयगयखरकरभ्रखग्गवाणरगवयविगसियालकोलमज्जारकोलमुण (का) कसिरि-
यंदलगावत्तकोकंतिय.गोकण्णमियमहिंस.विद्यग्घ-छ्गलदीविद्य.साण.तरच्छअच्छ-
भल्लसददुल.सीहचिल्लल.चउप्यविहाणाकए य एवमाई, अघररणोणसवराहि.
मउलिकाउदरदम्पुफआसालियमहोरगोगविहाणककए य एवमाई, छीरल-
सरंबसेह.सेल्लग.गोधुंदर.णउलसरड.जाहग.मुगुंमखाडहिल.वाउप्यइय.घरोलिय.
सिरीसिदग्गणे य एवमाई, कादंबक-बक.बलाकासारसआडासेतीयकुललचंजुल-
पारिप्यवकीवसउणदीविद्यहंसधत्तरिट्ठगभासकुलीकोसकुचवगतुंडेणियालगसुई-
मुहकविलपिगलबखगकारंडगचवकवागउवकीसगरुलिपिगुलसुधवरहिणमयणसाल-
णदीमूह.णंदमाणग.कोरंग.भिगारग.कोणालग.जीवंजीवग.तित्तर.वट्टकलावक-
कपिजलककवोतगपारेवगच्चिडिगडिककुबकुडवेसरमयूरगचउरगहयपोंडरीयसा-
लग (करकरग) वीरल्लसेणवायसविहंगभेणासि चासवग्गलिचम्मट्टुलवितत-
पक्खिखह्यरविहाणाकए य एवमाई, जलथलखगचारिणो उ पांचिदिए यमुगणे
बियतियचउररिदिए विविहे जीवे पियजीविए मरणदुक्खपडिकूले वराए हणंति
बहुसकलिट्ठकम्मा । इमेहि विविहेहि कारणेहि, किं ते ? चम्मवसामंसमेय-
णियजगफिफिसमत्थु (लि) लुंगहियंतिपित्तफोफमदंतट्टा अट्टिमजणहणयण-
कण्णण्हाहणिणक्कधमणिंसिगदाडिपिच्छविसविसाणवालहेउं, हिंसति य भमर-
मधुकरिगणे रसेमु गिद्धा तहेव तेइदिए सरीरोक्करणट्टयाए किवणे बेइदिए
बह्वे च्चयोहरपरिमंडणट्टा, अण्णेहि य एवमाइएहि बहूहि कारणसएहि अब्हा
इह हिंसंति तसे पाणे इमे य एगिदिए बह्वे वराए तसे य अण्णे तदस्सिए चेव
तणुसरीरे समारंभंति अत्ताणे असरणं अणाहे अबंधवे कम्मणिगलबद्धे अकुसल-
परिणाममंदबुद्धिजणदुच्चिजाणए पुढविमए पुढविसंसिए जलमए जलगाए अण-
लाणिलतणवणस्सतिगणस्सिए य तम्मयतज्जिए चेव तदाहारे तपपरिणतवण्ण-
गंधरसफासबोंविरूवे अचवखुसे चवखुसे य तसकाइए असंखे थावरकाए य
सुहुम.बायर.पत्तेयसरीर.णाम.साधारणं अणंते हणंति अबिजाणओ य
परिजाणओ य जीवे इमेहि विवेहेहि कारणेहि, किं ते ? करिसणपोक्खरणी-
वाधिवपिणिकूवसरतलागचित्थिवेत्थिखातियआरामविहारथूभपागारदारगोउर-
अट्टालगचरियासेतुंसंकमपासायविकप्पभवणघरसरणलेणआवणचेत्थियदेवकुलचित्त-
सभापवाआयतणावसहूमिधरमंडवाण य कए भायणमंडोवगरणस्स विविहूस

य अट्टाए पुढवि हिंसति मंदबुद्धिया जलं च मज्जणपपाणभोयणवत्थधोवण-
 सोयमादिएहि पयणपयावणजलावणविदंसणेहि अगणिं, सुप्पविपणतालयंटेपुण-
 मुहकरयलसागपत्तत्रयभारविएहि अणिलं, अगारपरियार सवल्लभोयणसयणासण-
 फलगमसल उक्खलततविततातोउज्जवहणवाहणमंडव-विचिह-भवण-तोरणविडंण-
 वेवकुलजालयद्धचंदणिज्जहृग-चंदसालियवेतियणिस्सेणिवोणि-चंगेरिखील-मेढक-
 सभापवावसहृग-धमत्तलणुलेवण-अंबरजयणंगल मइय-कुलिय-संदणसोघारहसगड-
 जाणजोगाअट्ट-लगच्चरिअदागोपुरकलिहाजंतसूलियलउडमुसंढिसयग्घिवहुपहर-
 णावरणुवक्खराण कए अणोहि य एवमाइएहि बर्हहि कारणसएहि हिंसति ते
 तरुणणे भणिया भणिए य एवमाई । सत्ते सत्तपरिवज्जिया उवहणंति दठमूढा
 दाहणमई कोहा माणा माया लोभा हस्स-रई अरई सोय-वेयत्थी जीयकामत्थ-
 धम्महेउं सवसा अवसा अट्टा अणट्टाए य तसपाणे थावरे य हिंसति मंदबुद्धी
 सवसा ह्णंति अवसा ह्णंति सवसा अवसा दुहओ ह्णंति अट्टा ह्णंति अणट्टा
 ह्णंति अट्टा अणट्टा दुहओ ह्णंति हस्सा ह्णंति वेरा ह्णंति रईय ह्णंति हस्स-
 वेरारई य ह्णंति कुद्धा ह्णंति लुद्धा ह्णंति मुद्धा ह्णंति कुद्धा लुद्धा मुद्धा
 ह्णंति अत्था ह्णंति धम्मा ह्णंति कामा ह्णंति अत्था धम्मा कामा ह्णंति ॥३॥
 कधरे ते ? जे ते सोयरिया मच्छब्धा साउणिया वाहा कूरकम्मा वाउरिया
 दीवियबंधणप्पभोगत्तप्पगल जालबीरत्तगायसीदठमवगुराकूडछेलिहत्थाहरिएसा-
 साउणिया य बीदंसगपासहत्था वणच्चरगा लुद्धगा य महुघातपोतघाया एणी-
 यारा पएणियारा सरदह्दीहिअत्तलामत्तलपरिगालणमत्तणसोत्तबंधणसलिला-
 सयसोसगा विमगरस्स य दायगा उत्तणवल्लरदवभिणिट्टयपत्तीवका कूरकम्म-
 कारी इमे य बह्वे मिलक्खुजाई, के ते ? सकजवणसवरबब्बरगायमृंडोव-
 भडगतित्तियपक्कणियकुलवक्खगोडसोहलपारसकोचंधदविल विल्ललपुलिदअरो-
 सडोंबोक्कणगंधहारगवहलीयजल्लरोममासबउसमलया चूंचुया य चूलिया
 कोंकणगामेतपह्वमालवमहुरआभासियअणवक्कोणत्हासियखसखासिया णहु-
 रमरहहुमुट्टियआरबडोविल्लगकुहणकेकयहुणरोमगरुहमरुगा चिलायविसयवासी
 य पावमतिणो जलयरथलयरसणफ्तोरगखह्चरसंडासतोडजीवोवघायजीवी
 सणो य असणिणो य पज्जत्ता अमुमलेस्सपरिणामा एए अणो य एवमाई करंति
 पाणाइवायकरणं पावा पावाभिगमा पावरई पाणवह्कयरई पाणवह्खवाण-

लीसु दट्ठण य तं पवेवियं गोबंधं अंसुपगलंतपप्पुयच्छा छिण्णा तण्हाइयम्ह
 कलुणाणि जंपमाणा विप्येखंता दिमोदिमि अत्ताणा असरणा अणाहा अबंधवा
 बंधुविप्यहणा विपलायति य मिगा इव वेगेण भयुच्चिग्गा, घेतून बला पलाय-
 माणाणं णिरणुकंपा मूहं विहाडेत्तं लोहडंडेहिं कलकलं ण्हं वयणंमि छुमंति केइ
 जमकाइया हसंता, तेण दड्ढा संतो रसंति य भीमाइं विस्सराइं हवति य कलुण-
 गाइं पारेवयमा व एवं पलविद्यविलावकलुणकंदियवहुरुणसइयसद्दो परि-
 देवियरुद्धवद्धयणारायारवसंकुलो णोसट्ठो रसियमणियकुवियउक्कूइयणिरयपाल-
 तत्तिजय गेण्हकम पहर छिद भिद उप्पाडेहुक्खणाहि कत्ताहि विकत्ताहि य
 भुज्जो हण विहण विच्छुभोच्छुभ आकडु विकडु कि ण जपसि ? सराहि पाव-
 कम्माइं दुक्कयाइं एव वयणमहप्पगंमो पडिसुयासदसंकुलो तासओ सया
 णिरयगोयराणं मज्ञाणगरडउक्षमाणसरिसो णिग्घोसो मुच्चए अणिट्ठो तहियं णेर-
 इयाणं जाडुज्जताणं जायणाहि । कि ते ? असिन्नपदभक्खणजंतपत्थरपूइतलक्खा-
 रवाविकलकलंतवेपरणिकलबबालयाजलियगुहणिरुंमणउसिणोसिणकटइल्लदुग्ग-
 मरहजोयणतत्तलोहमग्गमणवाहणाणि, इमेहिं विविहेहिं आयुहेहिं कि ते ?
 मोग्गरमुसंडिककयमत्तिहलगयमसलचक्ककोत्ततोमरसूललउत्तिभिडिमाससद्धल-
 पट्टिसच्चमेट्टुहुहणमुट्टियअसिखेडगखग्गमग्गवणा। रायकणगकप्पिवासिपरमुटं-
 तिवखणिममलअण्णेहिं य एवमाइएहिं अमुमेहिं वेउच्चिवाएहिं पहरणसएहिं
 अणबद्धतिस्ववेरा परोप्परवेयणं उदीरेंति अभिहणंता । तत्थ य मोग्गरपहार-
 च्चणियमुसंडिसंमग्गमहितवेहा जंतोवपीलणफुरंतकप्पिया केइत्थ सच्चमका
 विगता णिमूलूलणकण्णोदुणासिका छिण्णहत्थयाया असिकरकयतिक्खकोत्तप-
 रसुप्पहारफालियवासीसंतच्छित्तंगमंगा कलकलमाणखारपरिसित्तगादडउज्जंतगत-
 कुत्तग्गभिण्णजज्जरियस्ववेहा विलोलंति महीतले (णिग्गयग्गजीहा) विसुणि-
 यंगमंगा । तत्थ य विगमुणगसियालकाकमज्जारसरभदोवियवियग्गमद्दूलसीह-
 वपियखहासिमूएहिं णिच्चकालमणसिएहिं घोरा-ss-रसमाणमोमरुवेहिं अक्क-
 मित्ता दढदाढागादडक्ककड्डियसुतिक्खणहफालियउद्धवेहा विच्छिप्पंते समंतओ
 विम्वक्कसच्चिबंधणावियंगिमंगा कंककुररगिद्धघोरकट्टुवायमणोहिं य पुणो खर-
 थिरदट्ठणक्खलोहंतुंडेहिं ओवइत्ता पक्खाहयतिक्खणक्खविकिण्णजिबंमच्छियणय-
 णणिइओलुग्गविगयवयणा, उक्कोसंता य उप्पयंता णिपतंता ममंता पुक्कम्मो-

दयोवगया पच्छाणसएण डज्जमाणा णिदंता पुरेकडाइं कम्माइं पावगाइं तहिं २
 तारिसाणि ओसण्णाच्चिककाणं दुक्खाइं अणुभविता तओ य आउव्वएणं उच्च-
 ट्ठिया समाणा बह्वे गच्छति तिरियवसहिं दुक्खत्तरं सुदारुणं जम्मणमरणञ्जरा-
 बाहिपरियट्टणारहट्टं जलपलखहचरपरोप्परविहिंसणपवंचं इमं च जगपागडं
 वरागा दुक्खं पावति दीहकालं । किं ते ? सीउण्हतण्हाल्लुह्वेयणअप्पईकार-
 अडविजम्मणणिच्चमउवित्रगवासजगणबहुबंधणताडणंकणविवायणअट्टिमंजण-
 णासाभेयप्पहारदूमणछांविच्छेयणअभिओगपावणकसंकुसारणित्रायदमणाणि वाह-
 णाणि य मयापिड्विप्वयोगसोयपरिपीलणाणि य सत्थगिगिसामिघायगलव-
 वलावलणमारणाणि य गलजालुच्छिपणाणि पउलण-विकप्पणाणि य जावज्जो-
 विगबंधणाणि य पंजरणिरोहणाणि य मयूह्णिट्ठाडणाणि य घमणाणि य
 दोहणाणि य कुदंडगलबंधणाणि वाडगपरिवारणाणि य पंकजलणिमज्जणाणि य
 वारिप्वेसणाणि य ओवायणिमंगविसमणिवडणदवगिगजालदहणाई य । एवं
 ते दुक्खसयसंपलिता णरगाओ आगया इहं सावसेसकम्मा तिरिक्खपंचेदिएसु
 पावति पावकारी कम्माणि पमायरागदोसबहुसच्चियाइं अईव अस्सायकक्कसाइं ।
 भमरमसगमच्छिमाइएसु य जाइकुलकोडिसयसहस्सेहिं णव्हिं चउररदियाण
 तहिं-तहिं चेव जम्मणमरणाणि अणुहवता कालं संखेज्जकं भमति णेरइय-
 समाणतिव्वदुक्खा फरिसरसणघाणञ्जखुसहिंया तहेव तेइविएसु कुंयुपिप्यी-
 लियाअवधिकादिएसु य जाइकुलकोडिसयसहस्सेहिं अट्टाहिं अणूणएहिं तेइदियाण
 तहिं २ चेव जम्मणमरणाणि अणुहवता कालं संखेज्जकं भमति णेरइयसमाण-
 तिव्वदुक्खा फरिसरसणघाणसंपउत्ता (तहेव बेइविएसु) गंडूलयजलन्यकिमि-
 यचंदणगमाइएसु य जाइकुलकोडिसयसहस्सेहिं सत्तहिं अणूणएहिं बेइ-
 वियाण तहिं २ चेव जम्मणमरणाणि अणुहवता कालं संखिज्जकं भमति
 णेरइयसमाणतिव्वदुक्खा फरिसरसणसंपउत्ता । पत्ता एगिदियत्तणंवि य
 पुट्ठविजलजलणमारुयवणफडसुह्णमबायटं च पज्जतमपज्जतं पत्तेयसरीरणाम-
 साहारणं च पत्तेयसरीरजीविएसु य तत्थवि कालमसखेज्जकं भमति अणंतकालं
 च अणंतकाए फासिदियभावसंपउत्ता दुक्खसमुदयं इमं अणिट्ठं पावति पुणो
 २ तहिं २ चेव परभवत्तरुगणगहणे कोट्टालकुलियदालणसलिलमलणल्लुंभणरुंभण-
 अणलाणिलविबिहसत्थघट्टणपरोप्पराभिहणणमारणविराहणाणि य अकामकाइं

परपओगोदीरणहि य कज्जपओयणेहि य पेस्सपसुणिमित्तं ओसहाहारमाइ-
 एहि उक्खणणउक्कथणपयणकोट्टणपीसणपिट्ठणभज्जणमाल्लणआमोडणसडण-
 फुडणभंजणछेयणतच्छणविलुंछणपत्तज्जोडणअग्गिदहणाइयाइ एवं ते भवपरवरा-
 दुक्खसमणवद्धा अडंति संसारबीहणकरे जीवा पाणाइवायणिरया अणतकालं
 जेवि यइह माणुसत्तं अगया क्हिं चिं णरगा उक्कट्टिया अधंणा तेवि य
 दीसंति पायसो विकर्यावगलरूवा खुज्जा वडभा य वामणा यं बहिंरा
 काणा कुटा पंगला विउला य मूका य मंगणा य अंधयगा एगच्चखु
 विणिहयसच्चित्तया वाहिरोमपीलिय-अप्पाउय-सत्थवज्जवाला कुलवखणुविक-
 णवेहा दुक्खलकुसंधयणकुप्पमाणकुसंठिया कुरूवा किविणा य हीणा हीणमत्ता
 णिच्चंसोक्खपरिविज्जया असुहदुक्खभागी णरगाओ उक्कट्टिया इहं तावमेस-
 कम्मा । एवं णरमं तिरिक्खजोणिं कुमाणुसत्तं च हिंइमाणो पावंति
 अणताइं दुक्खाइं पावकारी एसो सो पाणवहस्स फलविवागो इहलोइओ
 परलोइओ अप्पसुहो बहुदुक्खो महम्मयो बहुरयप्पगाढो दाणो कक्कसो अमाओ
 वासासहस्सेहिं मुच्चईं, ण य अवेदयित्ता अत्थि हु मोक्खोत्ति एवमाहुंमु, णाय
 कुलणंदणो महप्पा जिणो उ वीरवरणामधेज्जो कहेसो य पाणवहणम्म
 फलविवायं । एसो सो पाणवहो चंडो रुहो खुहो अणारिओ णिग्घिणो णिसंगो मह-
 ब्भसो बीहणओ तासणओ अणज्जो उक्केयणओ य णिरवयक्खो णिद्धम्मो णिप्पि-
 वासो णिवक्कलणो णिरयवासगमणणिधणो मोहमहम्मयपवडुओ मरणवेमणस्सो
 पढमं अहम्मदारं समत्तंतिवेमि ॥ ४ ॥ पढमं अज्जयणं समत्तं ॥

बीयं अज्जयणं

जं ! बिइयं च अलियवयणं लहुसगलहुच्चल्लमणियं भयंकरं दुहकरं
 अयसकरं वेरकरं अरइरइरागदोसमणसंकिंल्लेसविपरं अलियणियडिंसाइ-
 जोयबहुलं णीयजणणिसेवियं णिस्संतं अप्पकच्चकारं परमसाहगरहणज्जं-
 परपीलाकारं परमकिण्हल्लेस्ससहियं दुग्गइविणिवायवडुणं भवपुणंभवकरं
 चिरपरिच्चियमणुगयं दुरंतं कित्तियं बिइयं अहम्मदारं ॥५॥ तस्स य णामाणि
 मोण्णाणि होति तीसं, तंजहा-अलियं १ सडं २ अणज्जं ३ मय्यामोसो ४ अम-
 तं ५ कूडकवडमवत्थयं च ६ णिरत्थयमवत्थयं च ७ विहेसगरहणिज्जं

८ अणुजुगं ९ कक्कणा य १० वंचणा य ११ मिच्छापच्छाकडं च १२ साई
 उ १३ उच्छेष्णं १४ उक्कूलं च १५ अट्टं १६ अवमवख्खणं च १७ किच्चिसं
 १८ वलयं १९ गहणं च २० मम्मणं च २१ णुसं २२ णिययी २३ अप्प-
 च्चओ २४ अममओ २५ असच्चसंधतणं २६ त्रिवक्खो २७ अवही(आणाड)यं
 २८ उवह्निअसुद्धं २९ अवलोवोत्ति ३०, भविय तस्स एयाणि एवमाईणि
 णामधेज्जाणि होति तीम सावज्जस्स अलियस्स वड्ढोसस्स अणेमाई ॥ ६ ॥
 तं च पुण्ण वयंति केई अलियं पावा असंजया अविरया कवडकुडिलकडुय-
 चडलभावा कुट्ठा लुट्ठा भया य हस्सट्ठिया य सक्खी चोरा चारमड्डा खंडरक्खा
 जियजूईकरा य गहियगहणा कक्ककुहगकारगा कुलिंगो उवहिया वाणियगा य
 कूडतुलकूडमाणी कुडकाहावणोवजीवी पडगारकलायकारुड्ढज्जा वंचणपरा
 चारियचाडुयारणगरगुत्तयपरिचारगा दुट्ठवायिसुपकअणबलभणिया य पुव्व-
 कालियवयणदच्छा साहमिया लहुस्सगा असच्छा गारविया असच्चट्टावणाह्चिच्चा
 उच्चच्छंदा अणियगहा अणियत्ता छंदेण सुक्कवाया भवंति अलियाहि जे अवि-
 रया । अवरे णत्थिंणवाइणो वामलोक्कवादी भणंति णत्थि जीवो ण जाइ इह
 परे वा लोए ण य किच्चि व फुसइ पुष्णपावं णत्थि फलं सुकयदुक्कयाणं पंच-
 महामूइयं सरीरं भासंति हे ! वायखोगजुत्तं, पंच य खधे भणंति केई, मणं च
 मणजीभिया वयंति, वाउजीवोत्ति एवमाहंसु, सरीरं साइयं सणियणं इहमवे
 एगे भवे तस्स विष्णणासमि सव्वणासोत्ति, एवं जंपंति म्सावाई, तम्हा द्वाण-
 वदपोसहाणं तवसंजमव्वंभवेरकल्लाणमाइयाणं णत्थि फलं णवि य पाणचह-
 अलियवयणं ण चेव चोरिक्ककरणपरदारसेवणं वा सपरिगहपावकम्मकरणं-पि
 णत्थि किच्चि ण जेरदुयत्तिरियमणुयाण जीणी ण देवतोयो वा अत्थि ण य अत्थि
 सिद्धिमणं अम्मापियरो णत्थि णचि अत्थि पुरिसकारा पच्चवखाणमवि णत्थि
 णवि अत्थि कालमच्छू य अरिहंता व्वक्कवट्टो बलदेवा वासुदेवा णत्थि णवत्थि
 केइ रिमओ धम्ममाधम्मफलं च णवि अत्थि किच्चि बहूयं च योवकं वा, तम्हा
 एवं विजाणिऊण जहा सुबहु इदियाणुकूलेसु सव्वदिसएसु वट्टुह णत्थि काइ
 किरिया वा अकिरिया वा एवं भणंति णत्थिगथाइणो वामलोयवाई । इमं पि
 विईयं कुदंसणं असव्वभाववाइणो पण्णवेत्ति मूढा—संमूओ अंडकाओ लोकी सयं-
 म्णा सयं च णिमिमओ, एवं एयं अलियं-पयावइणा इस्सरेण य कयंति केई,

एवं विष्णुमयं कसिणमेव य जगति केई । एवमेगे बयंति मोसं एको आया अकारको वेदको य सुकयस्स दुष्कयस्स य करणाणि कारणाणि सव्वहा सव्वहिं च णिच्चो य णिकिकओ णिरगुओ य अणुवलेवओत्ति-विय एवमाहुसु अंसव्वायं, जपि इह किंच जीवलोके दीसइ सुकयं वा दुकयं वा एयं जदिच्छाए वा सहावेण वावि दइवत्तप्पभावओ यावि भवइ, णत्थेत्थ किंच कयणं तत्तं लव्वण-विहाणणियतीए कारियं एवं केइ जंपति इड्डिरससायगारवपरा बह्वे करणा-लसा परुवैति धम्मवीमंसएण मोसं, अचरे अहम्मओ रायदुट्ठं अस्मखणां भणैति-अलियं चोरोत्ति अचोरयं करैतं डामरिज्जति वि य एमेव उदासीणं दुस्सो-लोत्ति य परदारं गच्छइत्ति मइलित्ति सीलकलियं अयंवि गुरुत्तप्पओत्ति, अण्णे एमेव भणंति उवाहणंता भित्तकलत्ताइं सेवंति अयंवि लुत्तधम्मो इमोवि विस्सं-भ[वाइ]घायओ पावकम्मकारी अकम्मकारी अगम्मगामी अयं दुरप्पा बहुएसु य पावगसु ज्जुत्ति एवं जंपति मच्छरी, भट्ठके वा गुणकित्तिगेहपरलोणण्णिवासा, एवं ते अलियवयणदच्छा परदोसुप्पायणप्पसत्ता वेडैति अक्खाइयवीएण अप्पाणं कम्मबंधणेण मूहरी असमिक्खियप्पलावा णिक्खेवे अवहरंति परस्स अत्थमि गट्ठियगिद्धा अभिजुंजति य परं असंतएहिं लुद्धा य करैति कूडसक्खित्तणं असच्चा अत्थालियं च कण्णालियं च मोमालियं च तह गवालियं च गरुयं भणंति अहरगइगमणं, अण्णपि य जाइरूवकुलसीलपच्चयं मायाणिगुणं चवत्त-पिसुणं परमट्ठमेयगम[स]संतकं विहेसमणत्थकारकं पावकम्ममूलं दुट्ठिदं दुस्सुयं अमुणियं णिल्लज्जं लोकपरहणिज्जं वहुबंधपरिकिलेसबहुलं जराभरणदुक्ख-सोयणिम्मं असुद्धपरिणामसकिलिट्ठं भणंति अलियाहिंसंघिसणिविट्ठा असंतगुण-दीरया य संतगुणणासका य हिंसाम्मओवघाइयं अलियसंपउत्ता वयणं सावज्ज-मकुसलं साहृगरहणिज्जं अधम्म जणणं भणंति अणभिययपुण्णपावा, पुणोवि अधिकरणकिरियापवत्तका बहुविहं अणत्थं अवमहं अप्पणो परस्स य करैति, एमेव जंपमाणा महिससूकरे य साहित्ति घायगाणं ससयपसपरोहिए य साहित्ति वागुराणं तित्तिरवट्टकलावके य कंबिजलकवोयके य साहित्ति साउणीणं झस-मगरकच्छभे य साहित्ति मच्छियाणं सखंके खल्लए य साहित्ति मगराणं अयगर-गोणस-मंडलि-वक्कीकरे मउली य साहित्ति बालवीणं गोहा सेहग सल्लग-सरउगे य साहित्ति लुद्धाणं गयकुलवाणरकुले य साहित्ति पासियाणं सुक-बरहिण-

मयणसाल-कोइल-हंसकुले सारसे य सार्हित पोसगाणं वधसंधजायणं च सार्हिति
 मोम्मियाणं धेणध्णगवेलए य सार्हिति तवकरणं गामागरणगरपट्टणे य सार्हिति
 चारियाणं पारघाइय-पथघाइयाओ सार्हिति य गार्ठभेयाणं कथं च चोरियं णगर-
 गोत्तियाणं लंछणणिल्लंछणधमणदुहणपोसणवणणदवणवाहणाइयाइं सार्हिति
 बहूणि गोमियाणं धातुसणिंसिलपवालरयणागरे य सार्हिति आगरीणं पुप्फविहिं
 फलविहिं च सार्हिति मालियाणं अघमहुकोसए य सार्हिति वणचराणं जंताइं
 विसाइं मूलकम्मं आहेवण-आविधण-आभिओग-मंतोसहिपओगे चोरियपरदार-
 गमणबहुपावकम्मकरणं उक्खंधे गामघाइयाओ वणदहणतलागभेयणाणि बुद्धि-
 विसविणासणाणि वसीकरणमाइयाइं भयमरणकिलेसदोसजणणाणि भावबहुसकि-
 लिट्टमलिणाणि भूयघाओवघाइयाइं सच्चाइंपिताइं हिंसगाइं वयणाइं उदाहरति ।
 पुट्टा वा अपुट्टा वा परतसियवावडा य असमिखियभासिणो उवदिसंति सहसा
 उट्टा गोणा भवया बंमंतु परिणयवया अस्सा हत्थो गवेलग-कुक्कुडा य किज्जंतु
 किणावेध य विक्केह पथह य सयणस्स देह पियय दासि-दास-भयक-भाइस्लका य
 सिस्सा य पेसकजणो कम्मकरा य किकरा य एए सयणपरिजणो य कीम
 अचछंति ? सारिया भे करिंतु कम्मं गहणाइं वणाइं खेत्ताखिलभूमिवत्तराइं
 उत्तणघणसंकडाइं डज्जंतु-सूडिज्जंतु य रुवखा मिज्जंतु जंतमंडाइयस्स उवहिस्स
 कारणाए बहुविहस्स य अट्टाए उच्छू तुज्जंतु पीलिज्जंतु य तिला पयावेह य
 इट्टकाउ मम घरट्टयाए खेत्ताइं कसह कसावेह य लहुं गाम-आगर-णगर-खेड-
 कब्बडे णिवेसेह अडवीदेसेसु विज्जत्तसीमे पुप्फाणि य फलाणि य कंदमूलाइं
 फालपत्ताइं गण्हेह करेह संचयं परिजणट्टयाए साली वीही जवा य लुच्चंतु
 मलिज्जंतु उप्पपाणज्जंतु य लहुं च पविसंतु य कोट्टागारं अप्पमहउक्कोसगा
 य हंमंतु पोयसस्था सेणा णिज्जाउ जाउ डमरं घोरा वट्टंतु य संगामा पवहंतु
 य सगडवाहणाइं उवणयणं चोलमं विवाहो जण्णो अमग्गम्मि उ होउ दिवसेसु
 करणेसु महुत्तेसु णक्खत्तेसु तिहिंसु य अज्ज होउ ण्हवणं मुइयं बहुलज्जपि-
 ज्जकलियं कोतुकं विष्हावणकं संतिकम्माणि कुणह ससि-रवि-गहोवरागविसिमेसु
 सज्जणपरियणस्स य णियकस्स य जीवियस्स परिरक्खणट्टयाए पडिसोस-
 काइं च देह दह य सीसोवहारे विविहोसहि-मज्ज-मंस-भक्खण-पाणमल्लानु-

लेवणपईवजलि-उज्जलमुगंधिधुवावकारपुष्कफलसमिद्धे पायच्छित्ते करेह पाणाह-
वायकरणेणं बहुविहेणं विवरीउत्पायदुस्सुमिणपावसउणअसोमग्गाहन्नरियअमंगल-
णिमित्तपडिघायहेउं त्रित्तिच्छेयं करेह मा देह किञ्चि दाणं सुट्ठु हओ सुट्ठु हओ
सुट्ठु छिण्णो भिण्णोत्ति उन्नदिसंता एवंविहं करेति अलियं मणेण वायाए कम्मणा
य अकुसला अणज्जा अलियाणा अलियधम्मणिरया अलियामु कहामु अभिर-
मंता तुट्ठा अलियं करेत्तु होंति य बहुपरयारं ॥ ७ ॥ तस्म य अलियस्म फल-
विवागं अयाणयाणा चडडंति महम्मयं अविस्साभावेयणं दीहकालं बहुदुक्खसंकडं
णरयतिरियजोणि तेण य अलियणं समण्यद्व्या आइद्धा पुणम्मवंधकारे
भसंति मीसे दुग्गइवसहिमवगया । ते य दीमंतिह दुग्गया दुरंता परवमा
अत्थभोगपरिवज्जिया असुहिया फुडियच्छविबीमच्छविचण्णा खरकलत्तिरत्त-
ज्जाअज्जसिरा णिच्छया लत्तविफलवाया असवकयमसवकया अग्धा अवेयणा
दुभगा अकंता काकस्सरा हीणमिण्णघोसा विहिमा जडबहिरंधया य मम्मणा
अकंतविकयकरणा णीया णीयजणणित्तिविणो लोमगरहणिज्जा भिच्छा अम-
रिसज्जणस्म पेस्सा दुग्गेहा लोकदेवअज्जप्पसपगलुडवज्जिया णरा धम्मवद्वि-
वियला अलियणं य तेणं पडज्जमाणा असंतणं य अदमाणपपाईमसाहि-
क्खेत्रपिसुणभयणसुहइधयमयणमित्तवखारणाइयाइं अदभवत्ताणाइं बहुविहाइं
पावेंति यमणोरमाइं हिययमणदूमकाइं जावज्जीवं दुक्खुइं अणिट्ठवरफहस-
वयण-तज्जण-णिदम्मच्छण-दीणवयणाअमणा कुभोयणा कुयाससा कुवसहीसु
किलिस्संता णेव सुहं णेव णिव्वुइं उवलमंति अचत्तविउलदुक्खसयसंपलिता ।
एसो सो अलियवयणस्स फलविवाओ इहलोइओ परलोइओ अप्पमुहो बहुदुक्खो
महम्मओ बहुरयप्पपाहो दासणो कक्कसो असाओ वाससहस्सेहिं मूच्चड, ण य
अवेयइत्ता अत्थि ह्नु सोवत्तोत्ति । एवमाहंसु णायकुलणंदणो महप्पा जिणो उ
वीरवरणामधेज्जो कहेसी य अलियवयणस्स फलविवागं एयं तं विईयपि अलिय-
वयणं लहुसगलहृचवलभणियं भयंकरं दुहकरं अयसकरं वैरकरं अरइरइराग-
दोसमणमंकिसेसवियरणं अलियणियडिसाइजोगवहुलं णीयजणणित्तिविणं णिसंसं
अप्पच्चयकारणं परमसाहुगरहणिज्जं परपीलाकारणं परमकण्हेलेससहिं दुग्गइ-
विणिवायवदुणं (भव) पुणम्मवकरं त्तिरपरिचियमणुगयं दुरंतं । विडयं अधम्मदारं
समत्तं ॥८॥ वीयं अज्जयणं समत्तं ॥

तद्वयं अज्जयणं

जंबू ! तद्वयं च अदिष्णादाणं हरदहमरणभयकलुसतासणपरसत्तिगऽभेज्ज-
लोममूलं कालविममसंसियं अहोऽच्छिणतण्हपत्थाणपत्थोइमद्वयं अकित्तिकरणं
अणज्जं छिद्दंमंतरविधूरवसणमगणउत्सवमत्तप्पमत्तपसुत्तवचणक्खिवणघायण-
पराणिह्वयपरिणामतक्करज्जणबहुमयं अकलुणं रायपुरिसरविखयं सया साहुगारह-
णिज्जं पियजणमित्तज्जणभेदविप्पीडकारकं रागदोसबहुलं पुणो य उप्पूरसमर-
संगामडमरकलिकलहवेहकरणं बुग्गहविणिवायवड्डुणं भवपुणभभवकरं चिरपरि-
चियमणुगयं दुरंतं । तद्वयं अधम्मदारं ॥ ९ ॥ तस्स य णामाणि गोष्णाणि
होति तीसं, तंजहा—चोरिवकं १ परहडं २ अदत्तं ३ कूरिकडं ४ परलाभो
५ असंजमो ६ परधणमि गोही ७ लोलिवकं ८ तक्करत्तणं ति य ९ अव-
हारो १० हत्थलहुत्तणं ११ पावकम्मकरणं १२ तेणिक १३ हरणविप्प-
णासो १४ आदियणा १५ लुंपणा घणाणं १६ अप्पच्चओ १७ अवीसो
१८ अक्खेवो १९ खेवो २० विक्खेवो २१ कूडया २२ कुलमसो य २३ कंखा २४
त्तालप्पणपत्थणा य २५ आससणाय वसणं २६ इच्छामुच्छा य २७ तण्हा-
गंही २८ णियडिकम्मं २९ अपरच्छति ३० विद्य तस्स एयाणि एवमाईणि णाम-
धेज्जाणि होति तीसं अदिष्णादाणस्स पावकलिकलुसकम्मबहुलस्स अणेगाइं
॥ १० ॥ तं पुण करेति चोरियं तक्करा परवग्गहरा छेया कयकरणलद्धलक्खा
साहसिया लट्ठसंगा अइमहिच्छलोमगच्छा दहरओवीलका य गोहिया अहि-
मरा अणमंजकभगसंधिया रायडुट्टकारी य विसयणिच्छूदलोकबन्ना उट्टो-
हकगामघायगपुरघायगपंथघायगभालीवगतित्थमेया लहुहत्थसंपउत्ता जूडकरा
खंडरक्खत्थोचोरपुरिसचोरसंधिच्छेया य गंथिभेयगपरधणहरणलोमावहार-
अक्खेवो हडकारका णिम्मट्टगूडचोरकगोचोरगअस्सचोरगवासिचोरा य एक-
चोरा ओकडुक-संपदायक-उत्तिष्पक-सत्थघायक-बिल (चोरी) कोलीकारका य
णिग्गाहविप्पलुंपणा बहुविहतेणिकहरणदुट्टो, एए अणे य एवमाई परस्स
दक्वाहि जे अविरया । विउलबलपरिगग्गा य बहवे रायाणो परधणमि गिद्धा साए
व दग्गे असंतुट्टा परविसए अहिहणंति ते लुट्टा परधणस्स कज्जे चउरंग (सम)-
विभत्तबलसमगा णिच्छियवरजोहजुट्टसद्वियअहमहमिइद्विपएहिं सेष्णाहिं संप-

रिषुडा पउमसागडसूदचवकसागरगहलवूहाइएहि अणिएहि उत्थरंता अभिभूय
 हरंति परधणाइं अवरे रणसीसलद्वलकखा संगामंमि अइवयति सण्णद्वबद्ध-
 परिधरउप्पोलिय-चिंधपट्टगहियाउहूपहरणा मादिवर-वम्ममुडिया आविद्ध-
 जालिया कथयकंकडडया उरसिरमुह्वद्धकंठतोणमाइयवरफलहरचियपहकर-
 सरहसखरचावकर-करांछय-मुणिसियसरवरिसचठकरक-चंमयंत-धणडवेग-धारा-
 णिवायमग्गे अणेगधणमंडलगसंधिता-उच्छलियसत्तिकणगवाभकरगहियखेडग-
 णिममलणिधिकट्टुखगपहरंतकोततोभरचवकगयापरसुममललंगलसूललउत्तमिड-
 मालासब्वलपट्टिमचमेदुदुघणमोद्वियमोगरवरफलहजंतपथरदुहणतोणकुवेणी-
 पीठकलियईलीपहरणमिलिमिलिमिलंतखिप्पंतविज्जुजसविरेचियसमप्पहणभतले
 फुडपहरणे महारणसंखसेरिवरतूरपउरपडुपहडाह्यणिणायगंभीरणंधियपवद्ध-
 भियविउलघोसे ह्यगयरहजोहनुरियपसरियउद्धततसंधकारबहुले कायरणरगय-
 णहिययवाउलकरे विल्लियउवकडवरमउडतिरीडकुंडलोडुदामाडोविया पागड-
 पडागउसियज्जयवेजयतिचामरचलंतल्लनंधकारगम्भीरे ह्यहेसियहत्थिगुलुगुल-
 डयरहघणघणाडपवाहवकहरहराडयअफोडियसोह्णायछेलियविघुट्टुवकुट्टकंठग-
 यसदूभीमगज्जिए सयरहहसंतकसंतकलकलरवे आमूणिघययणरुदूभीमदसणा-
 धरोट्टुगाढदट्टुमप्पहारणुज्जयकरे अगरिमवसतिव्वरसणिहारितच्छे वेर-
 दिट्टिकुद्धचिद्वियतिवलीकुडिलिमिउडिकपणिलाडे वहपरिणयणरसहस्सविक्रम-
 वियंभियवले वग्गततुरगरहपहावियसमरपडा आवडियछेयलाघवपहारसा-
 धिया समभियय्याहजुयलं मूवकट्टुहासपुवकतबोलबहुले फलफलगावरणगहिय-
 गयवरपत्थितदरियभडखलपरेप्परपलागजुद्धगद्वियविउसियवरासिरोमतुरिय-
 अभिमहपहरंतछिणकगिकरविभंगियकरे अवड[ट्टु]द्धणिसुद्धिभणफालियपग-
 लियरुहिर-कयसूमि-कहमचिलिचिल्लपहे कुच्छिदालिय-गलितरुलतणिमेरुलं-
 तंतफुरुफुरुंतडविगलमम्महाह्यविकयगाडदिणपहारमुच्छितरुलंत-वेमलविलावक-
 लुणे ह्यजोहममंततुरगउहाममस्तकुंजरपरिसंक्रियजणिणब्वकच्छिणधयम-
 गगरहवरणट्टिसिरकरिकलेवराकिणपतितपहरणविकिण्णाभरणमूमिभागे णचं-
 तकबंधपउरभयंकरवायसपरिलेंतगिद्धमंडलममंतच्छायंकारंभीरे वसुवमुह-
 विकंपिधव्व पच्चकल्लपिउवणं परमरुह्वीहणगं दुप्पवेसतरगं अभिवयति संगाम-

संकडं परधणं महंता । अवरे पाइक्कच्चोरसंघा सेणावड-चोरवंद-पागड्डिका य
 अडवीदेसदुग्गवासी कालहरितरत्तपीतमुक्किल्लअणेगसयच्चिध-पट्टवद्धा परविसए
 अभिहणंति लद्धा धणस्स कज्जे रथणागरसागरं उम्मीसहस्समालाउलाकुलविओ-
 यपीतकलकलेंतकलियं पायालसहस्सवायवसवेगसलिलउद्धम्ममाणदगरयरयंधकारं
 वरफेणपउरधवलपुलंपुलसमुट्टियट्टहासं माएयविच्छुभमाणपाणियजलमालुपीलहु-
 लियं अवि य समंतओ खुभियल्लियखोखुब्भमाणपक्खलियचलियविउलजलचक्क-
 बालमहाणईवेगतुरिय-आपूरमाणगंभीरविउलआवत्तचवलभममाणगुप्पमाणच्छ-
 लंतपक्खोणियत्तपाणियपघावियखरफरुसपधंडवाउलियसलिलफुट्टंतवीडकल्लोल-
 संकुलं महामगर-मच्छक्कच्छभोहार-गाहतिमिसुमार-साधयसमाहय-समुद्धायमा-
 णकपूरघोरपउरं कायरजणहिययकंपणं घोरमारसंतं महब्भयं भयंकरं पइभयं
 उत्तामणगं अणोरपारं आगासं चेव णिरवलंबं उप्पाइयपक्खणधणियणोल्लियउव-
 रुहरितरंतगदरियअइवेगवेगचक्खुपहमुच्छरंतंकच्छइ-गंभीर-विउलगज्जिय-गुजिय-
 णिग्घायगरुयणिवडियसुवीहणीहारिदूरसुच्छंतगंभीरधुग्घुगंतसई पडिपहहंस-
 तजक्खरक्खसकुहंडपिसायरुसियतज्जायउवसम्मसहस्ससंकुलं बहूप्पाइयभूयं विर-
 चित्तबलिहोमधुवउवचारदिणरुधिररुच्चणाकरणपयत्तजोगपयक्कचरियं परियतं-
 जुगंतकालकप्पोत्रमं दुरंतं महाणईणईवईमहाभीमवरिसणिज्जं दुरणुच्चरं
 विसमप्पवेसं दुक्खुत्तारं दुरासयं लवणसलिलपुण्णं असियसियसमूसियगंहि
 दच्छ (हत्य)तरकेहि वाहणेहि अइवइत्ता समुहमज्जे हणंति गंतूण-जणस्स-
 पोते परदव्वहरा णरा णिरणुक्कपा णिरवयक्खा गामागरणगरखेडकव्वडभडंब-
 दोणसुहपट्टणासमणिगमजणवए ,य धणसमिद्धे हणंति धिरहिययच्छिण्णलज्जा
 बंदिग्गहोगगहे य गेहंति दारुणमई णिक्कित्वा णियं हणंति छिदंति गेहसंधि
 णिक्खित्ताणि य हरंति धणधण्णदव्वजायाणि जणवयकुलाणं णिग्घणमई
 परस्स दक्खाहि जे अवरिया । तहेव केई आदिण्णादानं गवेसमाणा कालाकालेसु
 संचरंता चियकापज्जलियसरसदरदडुकयकलेवरे रुहिरलित्तवपणअखयखाइय-
 पीयडाइणिममत्तम(य)यंकरं जंबूयक्खिक्खियंते धूयकयघोरसइ वेयालुट्टियणिसुद्ध-
 कहकहियपहसियवीहणकणिरभिराभे अइदुब्भिमगंधवीमच्छदरिसणिज्जे मुसा-
 णवणसुण्णघरलेणअंतरावणगिरिकं दरविसमसावयसमाकुलासु वसहीसु किलि-
 स्संता सीयातवसोसियसरीरा दडुक्खवी णिरयतिरियभवसंकडदुक्खसंभारवेयणि-

उजाणि पावकम्माणि संचिणंता दुल्लहमवखणपानभोयणा पिवासिया दुंझिया
 किलंता संसकुणिकमंदमूलर्जाकिचिकयाहारा उव्विगणा उप्पुया असरणा अडवी-
 वामं उवेति वालसयसंकाणज्जं अयसकरा तवकरा भयंकरा काम हंभोत्त
 अउत्त दत्वं इइ सामत्थं करेति गूज्जं बहुयस्स जणस्स कउज्जकरणेषु विघकरा
 मत्तपमत्तपसुत्तवीसत्थच्छिद्धधाती वसणभुदएसु हरणबुद्धी विगव्व रुहिरसांहाया
 परेति णरवद्धमज्जायमइवकंता सज्जणजणदुगुंछिया सकम्भेहि पावकम्मकारी
 अत्तुमपरिणया य दुक्खभागी णिच्चाइलदुहमणिव्वइमणा इहलोए चैव किलि-
 स्संता परदव्वहरा णरा वसणसयसमावण्णा ॥११॥ तहेव केइ परस्स दव्वं
 गवेसमाणा गहिया य हया य बद्धरुद्धा य तुरियं अडधाडिया पुरवर समाणया
 चोरगहचारभडचाडकरण तेहि यं कप्पडप्पहारिणद्वयआरक्खियखरफहसवयण-
 तज्जण-गलच्छत्तलुच्छत्तलणाहिं विमणा चारगवसहिं पवेसिया णिरघवसहिंसरिस्सं
 तत्थवि गोम्मियप्पहार-दूमण-णिठमच्छण-कडुयवयण-भेसणगभयाभिभूया
 अविखत्तणियंसणा मलिनदंडिखंडणिवसणा उवकोडालच-पासमगणपरायणेहिं
 दुक्खसमुदीरणेहिं गोम्मियभडेहिं विविहेहिं बंधणेहिं, किं ते ? हंडिणयड-
 बालरज्जुयकुदंडगवरत्तलोहसंकलहत्थं दुयबज्जपट्टवामकणिककोडणेहिं अणेहिं
 य एवमाइएहिं गोम्मिकमंडोवकरणेहिं दुक्खसमुदीरणेहिं संकोडणमोडणाहिं
 बज्जंति मवपुण्णा संपुडकवाडलोहपंजरभूमिघरणिरोहकूवचारगकीलगज्ज-
 चवकविततबंधणखंभालणउड्ढचलणबंधणविहम्मणाहिं य विहेइयंता अवकोडक-
 गाडउरसिरबद्धउद्धपूरियफुरतउरकडगमोडणामेडणाहिं बद्धा य भीमसता
 सीसावेढऊरुयावलत्तप्पडगसंधिबंधणत्तसलागसूडयाकोडणाणि तच्छणविमाम-
 णाणि य चारकडयत्तित्तावणजायणाकारणसयाणि बहुयाणि पावियंता उर-
 वखोडोदिण्णमाडपेल्लणअट्टिकसंभगसंधंमुलीया गलकालकलोहडंडउरउदरवात्थ-
 पिट्टि-परिपीलिया [मत्थं]च्छंतहिययसंचुणियगसंभा आणत्तीककरेहिं केइ
 अविराहियवेरिएहिं जमपुरिससणिहेहिं पहया ते तत्थ मंदपुण्णा चडवेला-
 वज्जपट्टपाराइं छिबकसलत्तवरत्तणेत्तप्पहारसयताल्लियगसंभा किदणा लंबंत्त-
 चम्मवणवेयणविमुहियमणा घणकोट्टिमणियलज्जुयलसंकाडियमोडिया य कीरंति
 णिरुच्चारा एया अण्णा य एवमाइओ देयणाओ पावा पावेति अइतिदिया
 वसट्टा बहुमोहमोहिया परधंभिं लुद्धा फांसिदियविसयत्तव्वगिद्धा इत्थियगयस्व-

सद्वरसंगंधद्वुरदमहिय भोगतण्हाइया य धनतोसगा गहिया य जे णरमणा । पुण-
रवि ते कम्महुंविद्यद्धा उवणीया राधकिकराण तेसि बहसस्यगपाहयाणं विल-
उलीकारकाणं लंचसयगेहगाणं कूडकवडमायाणियडिआयरणपणिहिवंचणवि-
सारयाणं बहुविहअलियसयजंपकाणं परलोयपरम्महाणं णिरयगइयामिधाणं तेहि
य आणतजीयडंडा तुरियं उग्वाडिया पुरवरे सिघाडगतियचउक्कचचरचउम्मह-
महापहपहेसु वेत्तवडलउडकट्टलेटुपत्थरपणात्तिपणोल्लिमट्टिलयापायपणिहजाणु-
कोपरपहारसंभगमहियगता अट्टारसकम्मकारणा जाइयंगमंगा कलुणा सुवकोट्ट-
कठगलकत्तालजीहा जायंता पाणोयं विगयजीवियासा तण्हाइया बरागा तंपिय
ण लभनि वज्जपुरिसेहि धाडियंता, तत्थ य खरफरुसपडहघट्टियकूडगहभाठरुट्ट-
णिसाट्टपरामुट्टा वज्जकरकुडिजुयणियत्था सुरत्तकणवीरगहियविमुकुलकठेगुण-
वज्जदूयआविद्ध-भल्लदाभा मरणभयुप्पणसेयआयतणेहुत्तुपियकिलिणगतः
चूणगुंडियसरीररयेरेणभरियकेसा कुसुंभगोविकणमूढया छिणजीवियासा
घुणता वज्जयाभीया तिलं-तिलं चैव छिज्जमाणा सरीरविकित्तलोहि-
ओलित्ता कागणिमसाणि खायियंता पावा खरफरुसएहि तालिज्जमाण-
वेहा वातिगणरणासिंपरिवडा पेच्छिज्जंता य णगरज्जेण वज्जणेवत्थिया
पणेज्जंति णयरमज्जेण किवणकलुणा अत्ताणा असरणा अणाहा अबंधवा बंधु-
विप्पहीणा विपिखिता दिसोदिंसि मरणभयुक्विग्गा आघायणपडिदुवारसंपाविया
अधण्णा सुलगविलगमिण्णदेहा । ते य तत्थ कीरंति परिकपियंगमंगा उल्लं-
विज्जति रुक्खसालासु केइ कलुणाइं विलवमाणा अवेरे चउरंगघणियबद्धा पव्वय-
कडया पमुच्छंते दूरपातबट्टविसमपत्थरसहा अण्णे य गयचलणमलयणियम्महिया
कीरंति पावकारी अट्टारसखंडिया य कीरंति मुंडपरसूहि केइ उक्कत्तकण्णोट्टाणासा
उत्पाडियणयणदसणवसणा जिम्मिदिद्यच्छिण्णकण्णसिरा पणिज्जंते छिज्जंते य
असिणा णिव्विसया छिण्णहत्थपाया पमच्छंते जावज्जीवबंधणा य कीरंति केइ
परदव्वहरणलुद्धा कारगलणियलजुयलरुद्धा चारगाव हतसारा सयणविप्प-
मुक्का मित्तजणणिरिक्खिया णिरासा बहुजणधिवकारसहलज्जाइया अलज्जा
अणुबद्धखुहापारदसीउण्हतण्हेवेयणदुग्घट्टघट्टिया विवण्णमूह्विच्छविया विहल-
मइलदुब्बला किलंता कासंता वाहिया य आमाभिमूयगता परूढणहकेसमंसुरोमा
छगमुत्तमि णियगंमि खुत्ता तत्थेव मया अकामगा बंधिरुण पाएसु कट्टिया

खाइयाए छूटा तस्थ य वगमुणगसियालकीलमज्जारखंदसंवसगतुंडपिखगण-
 विविहमुहसयलविलुसगता कयविहंगा केइ किमिणो य कुहियवेहा अणिट्ट-
 वयणेहि सप्पमाणा सुट्ठु कयं जं मउत्ति पावो तुट्ठेणं जणेण हम्ममाणा लज्जा-
 वणगा य होति सयणस्सवि य दीहकालं मया संता । पुणो परलोपसमावण्णा
 णरए गच्छति णिरभिरामे अंगारपलित्तककप्पअच्छत्थसोयवेयणअस्साउदिष्ण-
 सययदुक्खसयसमभिव्दुए तओवि उच्चट्टिया समाणा पुणोवि पवज्जति तिरिय-
 जोणिं तंहिपि णिरयोवमं अणुह्वंति वेयणं, ते अणंतकालेण जइ षाम कहिं-
 पि मण्यभावं लभंति जेगेहि णिरयगइगमणतिरियभवसयसहस्सपरियट्टेहि
 तस्थवि य भवंतंऽणारिया णीच्चकुलसम्पण्णा आरियजणेवि लोगवज्जा तिरिवज्ज-
 भूया य अकुसला काममोगतिसिया जहि णिब्रंधंति णिरयवत्तणिसवप्पवत्तकरण-
 पणोल्लि पुणोवि संसारावत्तणेममूले धम्मसुइविवज्जिया अणज्जा कूरा मिच्छंत-
 सुइपवण्णा य होति एगंतदंडरुइणो वेहेता कोसिकारकीडोव्व अप्पयं अट्टकम्म-
 तंतुघणबधणेणं । एवं णरगतिरियणरअमरगमणपेरंतचक्कवालं जम्मजरामरण-
 करणगम्भीरदुक्खपखुभियपउरसलिलं संजोगवियोगवोचोचिंता पसंगपसरियवह-
 बंधमहल्ल-विपुल-कल्लोल-कलणविलवियलोभकलकलित्तबोलबहुलं अवमाणण-
 फेणं तिस्सवल्लिखसणुलपुलप्पभूयरोभवयेणपराभवविणिवायफुहसघरिसणसमाव-
 डियकठिणकम्मपरथरतरंगंतंणिच्चमच्चुभयतोयपट्ठं कसायपायालसंकुलं
 भवसयसहस्सजलसंचयं अणंतं उच्चयेणयं अणोरपारं महम्मयं भयंकरं पइभयं
 अपरिमियमहिच्छकलुसमइवाउवेगउद्धम्ममाणआसापिवासपायालकामरडरागदे-
 संबंधणबहुविहसकप्पविपुलदगरययं धकारं मोहमहावत्तभोगभ्रममाणगप्पमा-
 णुच्छलंतबहुगवमवासपच्चोणियत्तपाणियं पहावियवसणसमावण्णरुणबंडमाहय-
 समाहयामण्णवोचोवाकुलियभग्गफुट्ठंतणिट्टकल्लोलसंकुलजलं पमायवहचंडुइ-
 सावयसमाहयउद्धायमाणगपूरघोरविद्धसणत्थबहुलं अण्णाणभसंतमच्छपरिहत्थं
 अणिहुत्तिदियमहामगरतुरियचरियखोखुब्भमाणसंतावणिच्चयचलंत चवलचंचल-
 अस्ताणाऽसरणपुव्वकयकम्मसंचयोदिष्णवज्जवेइउजमाणदुहसयविपाकधुणंतुजल-
 समूहं इड्डिरससायगारवोहारगहियकम्मपडिबद्धसत्तकड्डिज्जमाणणिरयत्तलहुत्त-
 सण्णविसण्णबहुलअरइइभयविसायसोगमिच्छत्तसेलसंकडअणइसंताणकम्मबंध-
 णकिलेसचिक्खिल्लसुदुत्तारं अमरणरतिरियणिरयगइगमणकुडिलपरियत्तविपुल-

बेलं हिंसात्तियअवत्तादाणमेहुणपरिग्गहारंभकरणकारावणानुभोयणअट्टविह्वअणि-
 ट्टकम्मविडिय-पुंभारवकंत-दुगजलोघदूरपणोलिज्जमाण-उम्मसगणिममादुल्लभ-
 त्तत्तंसारोरमणोमयाणि दुक्खाणि उप्पियंता सायस्सायपरित्तावणमयं उब्बहु-
 णिब्बहुयं करेता चउरंतमहंतमणवयग रद्दं संसार-सागरं अट्टियअणालंब-
 णमपइठाणमप्पमेयं चुलसीइज्जोणिसयसहसमगविलं अणालोकमंधकारं अणंत-
 कालं णिच्चं उत्तत्थसुष्णभयसणसंपउत्ता वसंति उव्विग्गवासवसंहि । अहिं
 आउयं णिबंधंति पावकम्मकारी बंधवजणसयणमित्तपरिवज्जिया अणिट्टा भवंति
 अणादेज्जदुव्विणीया कुठाणासणकुसेज्जकुभोयणा असुइणो कुसंघयणकुप्पमाण-
 कुसंठिया कुरूवा बहुकोहमाणमायालोभा बहुमोहा घम्मसणसम्मत्त परिक्कट्टा
 दारिद्रोवद्दवाभिभूया णिच्चं परकम्मकारिणो जीवणत्थरहिया किंविणा परंपिड-
 त्तक्कका दुक्खलद्धाहारा अरसविरसनुच्छकयकुच्छिपूरा परस्स पेच्छंता रिद्धि-
 त्तक्कारभोयणविसेससमुदयविहिं णिदंता अप्पकं कयंतं च परिवयंता इह य पुरे-
 कडाइं कम्माइं पावगाइं विमणसो सोएण उज्जमाणा परिभूया होंति सत्तपरि-
 वज्जिया य छोमासिप्पकंलासमयसत्थपरिवज्जिया जहाजायपसुभूया अबियत्ता
 णिच्चणीयकम्मोवजीविणो लोयकुच्छणिज्जा मोघमणोरहा णिरासबहुला
 आसापासपिडिक्कपाणा अत्थोपायाणकामसोक्खे य लोयसारे होंति अफलवंतका
 य सुदट्ठवि य उज्जमंता तद्विबसुज्जत्तकम्मकयदुक्खसंठिवियसिंथापिडसंचयपरा-
 पक्खोणदक्खसारा णिच्चं अध्वघणघणकोसपरिभोगविवज्जिया रहियकाम-
 भोगपरिभोगसव्वसोक्खा परसिरिभोगोवभोगणिस्साणमगणपरायणा वरागा
 अकामिकाए विणोति दुक्खं जेव सुहं जेव णिवुइं उव्वसमंति अच्चंतविपुल-
 दुक्खसयसंपत्तिता परस्स दब्बेहिं जे अविरया । एसो सो अविण्णादाणस्स फल-
 ववागो इहलोइओ परलोइओ अप्पसुहो बहुदुक्खो महव्वमओ बहुरयपगाढो
 दाहणो कक्कसो असाओ वाससहस्सेहिं मूच्चइ, ण य अव्येइत्ता अत्थि उ
 मोक्खोत्ति, एवमाहंसु णायकुलणंदणो महप्पा जिणो उ वीरवरणामघेज्जो
 कहेसो य अविण्णादाणस्स फलविवागं, एयं तं तइयपि अविण्णादाणं हरदह-
 मरणभयकलुसतासणपरसंतिकभेज्जलोममूलं एवं जाव चिरपरिगयमणुगयं
 दुरंतं । तइयं अहम्मदारं समत्तं तिबेमि ॥१२॥

॥ तइयं अज्जयणं समत्तं ॥

चउत्थं अज्झयणं

अब्बं ! अब्बं च चउत्थं सदेवमणयासुरस्स लोयस्स पत्थणिज्जं पंकपण-
 यपासजालभूयं थीपुरिसणपुंभवेदीचधं तवसंजमबंभचेरविग्घं भेयाययणवहु-
 पमायमूलं कायरकापुरिमसेवियं सुयणजणवज्जणिज्जं उड्डणरयतिरियतिलोवक-
 पडट्टाणं जरामरणरोगसोगबहुलं वधबंधविघायदुक्खिघायं दंसणचरित्तमोहस्स
 हेउभूयं चिरपरिगघमणुयं दुरंतं । चउत्थं अधम्मदारं ॥ १३ ॥ तस्स य
 णामाणि गोष्णाणि डमाणि होंति तीसं, तं—अब्बं १ सेहुणं २ चरंतं ३ संस-
 गि ४ सेवणाधिकारो ५ संकप्यो ६ ब्राह्मणापयाणं ७ दप्यो ८ मोहो ९
 मणसंखोभो १० अणिगहो ११ वुग्गहो १२ विघाओ १३ विग्गो १४
 विग्गमो १५ अधम्मो १६ असीलया १७ गामधम्मत्ति १८ रई १९ राग-
 चिंता २० कामभोगमारो २१ वेरं २२ रहस्सं २३ गुज्जं २४ बहुमाणो २५
 बंभचेरविग्घो २६ वावत्ति २७ विराहणा २८ पसंगो २९ कामगुणोत्ति ३० विघ
 तस्स एयाणि एवमाइणि णामधेज्जाणि होंति तीसं ॥ १४ ॥ तं च पुण पिसे-
 वंति सुरमणा सअच्छरा मोहमोहियमई असुरभूयगगहलविज्जजलणदीवउव-
 ह्हिदिसिपवणयणिया १० अणवणियपणवणियइसिवाइयमूघवाइयकंदियमहा-
 कदियकंहंडपयंगदेवा ८ पिसायभूयजक्खरक्खसकिणरंकिपुरिसमहोरगगंधवा ८
 तिरियजोइसविमाणवासिमणुयणणा जलयरथलयरखहयरा य मोहपडिबद्धचित्ता
 अविताहा कामभोगतिसिया तहाए बलवईए महईए समभिमूया गदिया य
 अइमुच्छिया अब्भे उस्सण्णा तामसेण भावेण अणम्मूवका दंसणचरित्तमोहस्स
 पंजरं पिब करेंति अण्णोण्णं सेवमाणा, भुज्जो असुरसुरतिरियमणुयभोगरइ-
 विहारसंपुज्जता य चक्कवट्टी सुरणरवइसक्कया सुरवरुव देवलोए भरहणण-
 णगरणिगमजणवयपुरवरबोणमुहखेडकब्बडमडंबसंबाहपट्टणसहस्समंडियं थियि-
 यमेयणियं एगच्छत्तं ससागरं भुंजिऊण वसुहं णरसीहा णरवई णरिंदा णरध-
 सभा मरुयवसभक्कया अब्भहियं रायतेयलच्छोए दिप्पमाणा सोमा रायवंसति-
 लगा रवि-ससि-संखवरचक्क-सोत्थिय-पडाग-जव-मच्छ-कुम्म-रहवरभमभवण-
 विमाण-तुरयतोरण-गोपुरमणिरयण-णदियावत्त-मुसलणगत्तसुरइयवरक्कपक्क-
 मिगवइभट्टासणसुरूविधुभवरमउडसरिधकुंडलकुंजरवरवसमदीवमंदिरगरुलद्ध-

षडंकेउदपण्णअट्टावयचाववाणणवखत्तमेहमेहलवीणाज्जगच्छत्तदामदाभिणि कम्-
 डलुकमलघंटावरपोय-सूदसागर-कुमुदागर-मगरहारगामरणे उरणमणगरवइरकि-
 ण्णरमयूरवररायहससारसचकोरचवकवागमिहुणचामरखेडगपव्थीसगविपच्चि-
 रतालियंटासिरयाभिसेयमेइणि-खग्गकुसविमलकलस-भिगारवद्धमागग-पसत्थ-
 उत्तमविभत्तवरपुरिसलवखणधरा बत्तीसवररायसहस्साणजायमगा चउसट्टि-
 सहस्सपवरजुवतीण-णयणकंता रत्तामा पउमपम्ह कोरटगदाम-चपकसुय-
 यवरकणकाणहसवणा सुजायसव्वगंसुंदरगा महग्घ-वरपट्टणग्गय विचित्त-
 रागएणि पेणि-णिम्मिय दुग्गल्लवरचीणपट्ट कोसेज्ज-सोणीसुत्तक-विभूसियं गा-
 वरसुरभिग्गंध-वरचण्णवासवरकुमुमभरिय-सिरया कप्पिय-छेयायरियसुकय रइ-
 तमालकडग्गंध-तुडिय-पवरभूसण-पिण्डदेहा एकावलिकंठसुरइयवच्छा पालंब-
 पलंबमाणसुकपपउत्तरिज्जभुद्धियापिगलंगुल्लिया उज्जलणेवत्थरइयचेत्तलगवि-
 रायमाणा तेएण दिवाकरोव्व वित्ता सारयणवत्थणियधमहुरग्गीरीणिद्धयोसा
 उप्पण्णसमत्तरयणचक्करयणप्पहाणा णवणिहिवइणो समिद्धकोसा चाउरता
 चाउराहि सेणाहि समण्जाइज्जमाणमगा तुरगवई गयवई रहवई णरवई
 विपुलकुलवीसुयजसा सारयससित्तकल-सोमवयणा सूरा तेलोवकणिग्गयपभावल-
 ङ्कसट्टा समत्तभरहाहिवा णरिदा ससेलवण-काणणं च हिमवत्त-सागरंतं धीरा
 भूत्तूण भरहवासं जियसत्त पवररायसीहा पुव्वकडत्तवप्पभावा णिविट्ठसं-
 चियसुहा अणेगवाससयमायुवंती भज्जाहि य जणवयप्पहाणाहि लालियंता
 अतुलसट्टफरिसरसरूवग्गंधे य अणुभवेत्ता तेवि उवणमंति मरणधम्मं अचित्ता
 कामाणं । भुज्जो बलदेववासुदेवा य पवरपुरिसा महाबलपरवकमा महा-
 धणुविघट्टका महासत्तसागरा दुद्धरा धणुद्धरा णरवसमा रामकेसवा भायरो
 सपरिसा वसुदेवसमट्टविजयमाइयदसाराणं पज्जुण्ण-पइव-संब-अणिरुद्ध-णिसह-
 उम्मय-सारण-गय-सुमूह बुम्मूहाईण जायवाणं अट्टुट्टाणवि कुमारकोडीणं हियय-
 वइया देवीए रोहिणीए देवीए देवकीए य आणंदहिययभावणं वणकरा सोल-
 सरायवरसहस्साणजायमगा सोलसदेवीसहस्सवरणयणहिययवइया णाणाभि-
 कणम-रयण-मोत्ति-यपवाल-धण-धण्णसंचय-रिद्धि-समिद्धकोसा ह्य गयरहसहस्स
 सामीगामागर-णगर-खेड-कबड-मडंब-वोणमुह-पट्टणासम-संबाहसहस्सथिमियणि-
 व्वयपमुइयजण-विविहसास-णिप्फज्जमाणमेइणि-सरस-रिय-त्ताग-सेल-काणण-

आरामुज्जाणमणाभिरामपरिमंडियस्स दाणिडुवेयडुगिरिविभत्तस्स लवणजलहि-
 परिगयस्स छुध्विहकालगुणकामजत्तस्स अद्धभरहस्स सामिका धीरकित्तिपुरिसा
 ओहबला अहबला अणिहया अपराजियसत्तुमद्दणरिपुसहस्समाणमहणा साण-
 ककोसा अमच्छरी अचवला अचंडा भियमंजुलपलावाहसियगंभीर-महुरभणिया
 अब्भुवमयवच्छला सरणा लवखणवज्जणगुणोववेया भाणम्मणपमाणपडिपुण-
 सुजापयसक्खंगसुंदरंग ससि-सोमायार-खंतपियदंसणा अमरिसणा पयंडडडप्यार-
 गंभीरदरिसणिज्जा तालद्धउध्विद्धगरुलकेऊबलवगगज्जंतदरियदप्पियमुट्टियचा-
 नूरमूरगा रिट्टवसभघाडणे केसरिमुह्विष्पाडया दरियणागदप्पमहणा जमलज्ज-
 णसंजगा महासउणियणारिखू कंसमउडमोडगा जरासंधमाणमहणा तेहि
 य अविरलसभसहियचंदमंडलसमप्पभोहि सूरमिरीयकवयं विणिम्मयंतेहि सप-
 तिदंडेहि आधयत्तेहि धरिज्जंतेहि विरायंता ताहि य पवरगिरिकुहरविहरणस-
 म्भुट्टयाहि गिरुवहयचमरपच्छिमसरीरसंजाताहि अमइलंसियकमलविमुकुलज्ज-
 लियरययगिरिसिहरविमलससिकिरणसरिसकलहोयणिम्मलाहि पवणाहयचवल-
 चलियसललियपणच्छियवीडपसरियखीरोदगपवरसागरूपूचंचलाहि माणससरप-
 सरपरिचियावासदिसदवेसाहि कणगगिरिसिहरसंसिताहि उवाउप्यायचवलजयि-
 णसिघवेगाहि हंसवधूयाहि चेव कालिया णाणामणिकणममहरिहतवणिज्जुज्ज-
 लविच्चित्तंडाहि सललियाहि णरवडुसिरिसमुदयप्पमासणकरीहि वरपट्टणग-
 याहि समिद्धरायकुलसेवियाहि कालागुरुपवरकुंदुरुवकतुरुवकधूववसवासविसदगं-
 धुद्धूयाभिरामाहि चिल्लिकाहि उभयोपासंपि चामराहि उक्खिप्पमाणाहि सुहसीत-
 लवायवीडयंया अजिया अजियरहा हलमुसलकणगपाणी संखचक्कगयसत्तिगंदम-
 धरा पवरुज्जलमुकयविमलकोथुभतिरीडधारी कुंडलउज्जोविद्याणणा षंडरीय-
 णयणा एगावलीकंठरइयवच्छा सिरियच्छमुलंछणा वरजसा सक्खोउय-सुरभि-
 कुमुमसुरइयपलंबसोहंतवियसंतचित्तवणमालरइयवच्छा अदुसयविभत्तलवखण-
 पसत्थसुंदरविराइयंगमंगा मत्तगयवरिदललियविककमविलसियगई कडिसुत्तग-
 णीलदीयकोसिज्जवाससा पवरदित्तेया सारयणवचणियमहुरगंभीरणिद्धघोसा-
 णरसीहा सीह्विक्कमगई अत्थनियपवररायसीहा सोमा बारवडुपुणचंदा पुवकय-
 त्थप्पमावा णिविट्टसंचियसुहा अणेमवाससयमायुवंतो भज्जाहि य जणवयप्पहा-
 णाहि लालियंता अनुलसद्धफरिसरसक्खमंघे अणुभवेत्ता ते-वि उवणमंति मरण-

धम्मं अवितत्ता कामाणं । भुज्जो मंडलिय-णरवरेंदा सबला सअंतेउरा सपरिसा
सपुरोहिया-मच्चदंडणायगसेणावइमंतणीइकुसला णाणामणिरयणविपुलघण-
धणासंचयणही-समिद्धकोसा रज्जसिंरिं विउलमणुभवित्ता विक्कोसंता बलेण
मत्ता तेवि उवणमंति मरणधम्मं अवितत्ता कामाणं । भुज्जो उत्तरकुरु-देवकुरु-
वणविवर-पायचारिणो णरगणा भोगुत्तमा भोगलक्खणधरा भोगसस्सिरीया
पसत्थसोमपडिपुण्णरूवदरिसणिज्जा सुजायसक्खंगसुंदरंगा रत्तुप्पलपत्तकंतकर-
चरणकोमलतला सुपइट्टियकुम्मचारुचलणा अणुपुव्वसुसंहयंगुलीया उणयत-
णुतंबणिद्धणखा संठियसुसिलिट्ठगूढगोका एणीकुरुविदवत्तवट्टाणुपुविज्जंघा
समुग्गणिसग्गमूढजाणूं वरवारणमत्ततुल्लविककम-विलासियगई वरतुरग-
सुजायगुज्जदेसा आइण्णहयक्व णिरुवलेवा पमइयवरतुरगसीहअइरेगवट्टियकडी
गंगावत्त-वाहिणावत्त तरंगभंगुर-रविकिरण-बोहियविकोसायंतपम्ह-गंभौरवियद्ध
णाभोसाहत्तसोणंद-भुसल-वप्पणणिगरियवरकणगच्छरुसरिस वरवइरवलियमज्जा
उज्जगसमसहियजच्चतणुकसिणणिद्धआवेज्जलडहसूमालमउयरोभरई षसविहग-
सुजायपीणकुच्छी झसोयरा पम्हविगडणाभा संगतपासा संगयपासा सुंदरपासा
सुजायपासा मियमाइयपीणरइयपासा अकरंडुयकणगरुयगणिम्मलसुज्जायणिरु-
वहयदेहधारी कणगसिलातलपसत्थसमतलउवइयविच्छिण्णपिहुत्तवच्छा ज्य-
संणिभपीणरइयपीवरपउट्टसंठियसुसिलिट्ठविसिट्ठलट्टुसुणिचियघणधिरसुबद्धसंधी
पुरवरफलिहवट्टियमया भयईसरविउलभोगआयाणफलिउच्छूढदीहवाह रत्त-
लोवइय-मउय-मंसल-मुजायलक्खण-पसत्थ-अच्छिट्ठजालपाणी पीवरसुजाय-
कोमलवरंगुली तंबतलिणसुइरुदलणिद्धणवखा णिट्ठपाणिलेहा चंदपाणिलेहा सूर-
पाणिलेहा संखपाणिलेहा चक्कपाणिलेहा विसासोवत्थियपाणिलेहा रविससिंसंख-
वरक्ककदिसासोवत्थियविभत्तसुविरइयपाणिलेहा वरमहिसवरहासीहंसद्वूल-
रिसह-णागवर-पडिपुण्णविउलखंघा चउरंगुलसुप्पमाण-कंबुवरसरिसग्गीवा
अवट्टियसुविभत्तचित्तमंसू उवचियमंसलपसत्थसद्वूलविपुलहुणया ओय-
वियसिलप्पवालिबिबफलसंणिभाधरोट्टा पंडुरससिसकलविमलसंखगोलीरफेणकुंद-
वमरयमूणालियाघवलवत्तसेदी अखंडदंता अफुडियदंता अविरलदंता सुणिद्धवता
सुजायदंता एगदंतसेडिक्व अणेगदंता हुयवहणिद्धंतधोयतत्तवणिज्जरत्ततल-
तालुजीहा गरुलायतउज्जुतंगणासा अवदालियपोंडरीयणयणा कोकासियधवल-

पत्तलच्छा आणामियत्तावसुइल-किंह्वभराजि-संठियसंगयायय-सुजायमुमगा
 अत्तलोनपमाणजुत्तसवणा सुसवणा पीणमंसलकबोलदेसभागा अत्तिहग्गयबाल-
 च्चंसंठियमहाणिडाला उडुवतिरिव पडिपुण्णसोमवयणा छत्तागारुत्तमंगदेसा घण-
 णिच्चियसुबद्धलक्खण्णण्यकूडागारणिर्भापिडियग्गसिरा ह्यवह्णिद्धंतधोयत्तत्त-
 वणिज्जरत्तकेसंतकेसभूमो सामलीपोडघणणिच्चियछोडियमिडविसत्तपसत्थसुहुम-
 लवखण-सुग्गधि-सुंदरभ्यमोघग-भिगणीलकज्जल-पहट्टममरण-णिद्धणिगुहंबणि-
 च्चियकुच्चिय-पयाहिणावत्त-सुद्धिसिरया सुजातसुविभत्तसंगयंगा लक्खणवंजण-
 गुणोववेया पसत्थत्तसीसलवखणधरा हंसस्सरा कुच्चस्सरा कुंडुमिस्सरा सीहस्सरा
 उज्जस्सरा मेघस्सरा सुस्सरा सुस्सरणिग्घोसा वज्जरिसहणारायसंघयणा
 समच्चउरंसंठाणसंठिया छायाउज्जोवियंगमंगा पसत्थच्छवी णिरातंका कंकग-
 हणी कवोयपरिणामा सगुणियोसपिट्ठंतरोरुपरिणया पउमुप्लसरिसग्ग-
 धस्साससुरभिवयणा अणुलोमवाउवेया अवदायणिद्धकाला विग्गहियउण्य-
 कुच्छी अमयरसफलाहारा तिगाउयसमूसिया तिवलिओवमट्टिइया तिणि
 य पलिओवमाइं परमाउं पालयित्ता तेवि उवणमंति मरणधम्मं अवितत्ता
 कामाणं । पमयावि य तेसि होति सोममा सुजायसत्त्वंगसुंदरीओ पहाणमहिला-
 गुणेहि जत्ता अइकंत-विसप्पमाण-मउयसुकुमाल-कुम्मसंठियसिलिट्टवलगा
 उज्जमउयपीवरसुसाहंतगुलीओ अब्भुण्णयरइयत्तलिणतंबसुइणिद्धणखा रोमरहि-
 यवट्टसंठियअजहण्णपसत्थलक्खणअकोप्पजंघजुयला सुणिम्मियसुणिगूढजाण-
 मंसलपसत्थसुबद्धसंधी कयलीखंमाइरेकसंठियणिठवणसुकुमालमउयकोमलअधि-
 रलसमसहियसुजायवट्टपीवरणिरतंरोरु अट्टावयवोइपट्टसंठियपसत्थविच्छिण्ण-
 पिहुलसोणी वयणायामप्पमाणदुग्गुणियविसालमंसलसुबद्धजहणवरधारिणीओ
 वज्जविराइय-पसत्थलक्खणणिरोदरीओ तिवलिवलिय-तण्णनियमज्झयाआ
 उज्जयसमसहियजच्चतणुकसिणणिद्धआदेज्जलडहसुकुमालमउयसुविभत्तरोमरा-
 ईओ गंगावत्तगवदाहिणावत्ततरंगमंगरविकिरणतरुणवोहियआकोसायत्तपउम-
 पंभीरविगडणाभी अणुभडपसत्थसुजायपीणकुच्छी सण्णयपासा सुजायपासा
 संघयपासा मियमायियपीणरइयपासा अकरंडुयकणगरुयगणिम्मलसुजायणिरुव-
 इयगायलट्ठी कंचणकलसपमाणसमसहियलट्टुचुचुयआमेलगजमलजुवलवट्टिय-
 रओहराओ भुयंगअणुपुव्वतणुयपोपुच्छवट्टसमसहियणमियआदेज्जलडहवाहा तंब-

गहा मंसलगंगहृथा कोमलपीवरवरंगुलिया णिद्धपाणिलेहा ससिसूरसंखचक्कवर-
सोत्थियविभत्तसुधिरइयपाणिलेहा पीणुण्यकक्खदत्थियपएसपडिपुण्णगलक्खोला
चउरंगुलसुप्पमाणकडुवरसरिसगीवा मंसलसंठियपसत्थहणुया दालिमपुफुप्प-
गासपीवरपलंबकुचियवराधरा सुंदरोत्तरोट्टा दधिवगरयकुंदचंदवासंतिमजल-
अच्छिद्धविमलदसणा रत्तुप्पलपउमपत्तमुकुमालतालुजीहा कणवीरमुउलऽकुडिलऽ-
बभुण्य-उज्जुत्तंगणास। सारयणवकमल-कुमुय-कुवलयदलणिगरसरिसलवखण-
पसत्थअजिम्हकतणयणा आणा। मियचावरुडलकिंहुम्भराइसंगयसुजायतणुकसिण-
णिद्धभुमगा अत्तीणपमाणजुत्तसवणा सुस्सवणा पीणमट्टगडलेहा चउरंगुल-
विसात्तसमिणडाला कोमहुरयणिकरविमलपडिपुण्णसोमवदणा छत्तुण्यउत्त-
मंगा अकविलसुसिणिद्धवीहसिरया छत्तज्जयजुवधूमवामिणिकमंडलुकलसवावि-
सोत्थिय-पडागजव-मच्छ-कुम्भरहधरमकरज्जय-अंक-थाल-अंकुस-अट्टावयसुपइट्ट-
अमर-सिरियाभिसेय-तोरण-भेइणि-उदधिवर-पवरभवण-गिरिवर-वरायंस-सल-
लियगयउसम-सोह-चामर-पसत्थबत्तीसलक्खणधरीओ हंससरिच्छगईओ कोइल-
महुरगिराओ कंता सव्वस्स अणुमयाओ ववगयलिपलितवंगदुक्खणवाहिदोहग-
सोयमूक्काओ उच्चत्तेण य णराण थोवूणमूसियाओ सिमारारारचारुवेसाओ
सुंदर-थण-जहण-वयण-करचरण-णयणा लावण्णरुवजोक्खणगुणोववेया णंदणवण-
विवरचारिणीओ-क्खअच्छराओ उत्तरकुम्भमाणसच्छराओ अक्खेरगपेक्खणिज्जि-
याओ तिण्णि य पलिओव्रमाइं परमाउं पालइत्ता ताओऽवि उवणमंति मरण-
धम्मं अवितित्ता कामाणं ॥१५॥ मेहुणसण्णासंपगिद्धा य मोहभरिया सत्थोहि
हणंति एक्कमेक्कं विसयविसउदीरएसु, अवरे परदारोहि हम्मंति विसुणिया
धणणासं सयणविपणासं च पाउणंति, परस्स दाराओ जे अवरिया मेहुणसण-
संपगिद्धा य मोहभरिया अस्सा हुरपी गवा य महिसा मिगा य मारेंति एक्क-
मेवकं, मण्यमणा वाणरा य पक्खी य विरुज्जंति, मित्ताणि खिप्वं भवंति
सत्तु समये धम्मे गणे य भिदंति पारदारी, धम्मगुणरया य भंभयारी खणेण
उल्लोट्टए चरित्ताओ जसमंतो सुक्खया य पावेंति अयमकिंत्त रोगत्ता वाहिया
पवड्ढेंति रोयवाही, वुवे य लोया दुआराहगा भवंति-इहलोए चैव परलोए
परस्स दाराओ जे अवरिया, तथेव केइ परस्स दारं गथेसमाणा गहिया हया
य बद्धरुद्धा य एवं जाव गच्छंति विउलमोहाभिमूयसण्णा । मेहुणमूलं च सुक्खए

तथ्य तथ्य वत्तपुग्वा संगामा जणवखयकरा सीयाए बोवईए कए रुपिणीए पउ-
 भावईए ताराए कंचणाए रत्तमुभटाए अहिल्लियाए सुवण्णभुलियाए किण्णरीए
 सुखुवविज्जुमईए रोहिणीए य, अण्णेसु य एवमाइएसु बहवो महिलाकएसु
 सुक्वन्ति अइक्कंता संगामा यामधम्ममूला इहलोए ताव णट्टा परलोएवि य णट्टा
 महया मोहतिमिसंधयारे घोरे तसथावरसुट्टुमवायरेसु पज्जत्तमपज्जत्तसाहारण-
 सरीरपत्तेयसरीरेसु य अंडजपोत्तजजराउयरसजसंसेइमसंमुच्छिमउत्तमियउव-
 वाइएसु य णरयतिरियदेवमाण्णसेसु जरामरणरोगसोगबहुले पत्तिओवमसागरो-
 वमाइ अणाईयं अणवदग्गं बोहमद्धं चाउरंतसंसारकंतां अणुपरियट्ठंति जीवा
 मोहवससणिणिविट्ठा । एसो सो अबंभस्स फलविवागो इहलोइओ परलोइओ य
 अप्पसुहो बहुदुक्खो महम्मओ बहुरयप्पमाढो दासणो कक्कसो असाओ वास-
 सहस्सेहिं मुच्चई, ण य अवेयइत्ता अत्थि ह्नु मोक्खोत्ति । एवमाहुंसु णायकुल-
 णंदणो महप्पा जिणो उ वीरवरणामधेज्जो कहेसी य अबंभस्स फलविवागं एयं
 तं अबंभंपि चउरत्थं सदेवमणुयासुरस्स लोगस्स पत्थणिज्जं एवं चिरपरिचिय-
 मणुगयं दुरंतं । चउत्थं अधम्मदारं समत्तंतिवेमि ॥ १६ ॥

॥ चउत्थं अज्जयणं समत्तं ॥

पंचमं अज्जयणं

जंबू ! इत्तो परिग्गहो पंचमो उ णियमा णाणामणिक्कणगरयणसहरिह-
 परिमलसपुत्तदारपरिजणदासीदासभयगपेसहयगयगोमहिंसउट्टुत्तरअयगवेलगसी-
 यासगद्धरहजाणजुगगसंदणसयणासणवाहणकुवियधणधण्णपाणभोयणाच्छायणगंध-
 मल्लभायणभवणविहिं च्चै बह्विहीयं षरहं णगणगरणियमज्जणवयपुरवरदोण-
 म्मुहखेउकब्बइमडंबसंबाहपट्टणसहस्सपरिमंडियं यिमियमेइणीयं एगच्छत्तं ससागरं
 षुंजिऊण वसुहं अपरिमियमणंततत्तम्मणुगयमहिच्छसाराणिरयमूलो लोभकलि-
 कसायमहक्खंघो चित्तासयणिचियविउलसालो गारवपविरल्लियगमविडवो णिय-
 धित्थयापत्तपल्लवधरो पुप्फफलं जस्स कामभोगा आयासविसूरणाकलहपकंपियमा-
 सिहरो णरवइसंपूइओ बहुजणस्स हिययदइओ इमस्स मोक्खवरमोत्तिमगस्स
 फलिहम्मओ खरिमं अहम्मदारं ॥ १७ ॥ तस्स य णामाणि इमाणि गोष्णाणि
 होति तीसं, तंजहा-परिग्गहो १ संचयो २ चयो ३ उवचयो ४ णिहारं ५

संभारो ६ संकरो ७ आधरो ८ पिंडो ९ दम्बसारो १० तथा महिच्छा ११
 पडिबंधो १२ लोहपा १३ महद्दी १४ उवकरणं १५ संरक्खणा य १६ भागो
 १७ संपाउप्पायको १८ कलिकरंडो १९ पविस्थरो २० अणत्थो २१ संथवो २२
 अगुत्तो २३ आयासो २४ अविओगो २५ अमुत्तो २६ तण्हा २७ अणत्थको
 २८ आमत्तो २९ असंतोसो त्ति वि य ३०, तस्स एयाणि एवमाईणि नाम-
 धेज्जाणि होति तीसं ॥ १८ ॥ तं च पुण परिग्गहं ममायंति लोभयत्था भवण-
 वरविमाणवासिणो परिग्गह्वई परिग्गहे विविहकरणवृद्धी देवणिकाया य असुर-
 भुयगगकलविज्जजलण-दीवउदहिदिसिपत्रणयणिय-अणवणिय-पणवणियइसिवा-
 इयमूयवाइयकदियमहाकदियकुहंडपयंगदेवा पिसायभूयजकखरक्खसंकिणरकिपु-
 रिसमहोरगयंधवा य तिरियवासी पंचविहा जोइसिया य देवा बहस्सईचंसूर-
 मुक्कसणिच्छरा रङ्गुधूमकेउद्धा य अंगारका य तत्ततवणिज्जकणयवण्णा जे
 य गहा ओइसम्मि चारं चरंति केऊ य गइरईया अट्टावीसइविहा य णक्खत्त-
 देवगणा णाणासंठाणसंठियाओ य तारगाओ ठियलेस्सा चारिणो य अविस्साम-
 मंडलगई उवरिचरा उड्डुलोगवासी बुविहा वेमाणिया य देवा सोहम्मोसाण-
 सणकुमारमाहदंबंभलोगलंसकमहामुक्क-सहस्सार-आणय-पाणय-आरण-अच्छया
 कप्पवरविमाणवासिणो सुरगणा गेवेज्जा अणत्तरा बुविहा कप्पाईया विमाण-
 वासी महिद्धिया उत्तमा सुरवरा एवं च ते चउत्तिवहा सपरिसावि देवा ममायंति
 भवणवाहणजाणविमाणसयणासणाणि य णाणाविहवत्थमूसणाणि य पवरपहर-
 णाणि य णाणामणिपंचवण्णदिव्वं च भायणविहि णाणाविहकामरूवे वेउदिव्व-
 अच्छरगणसंघाते दीवसमुद्धे विसाओ विदिसाओ चेइयाणि वणसंघे पव्वए य
 गामणगराणि य आरामुज्जाणकाणणाणि य क्वसरत्तसागवाविदोहियदेवकुल-
 सभप्पववसहिमाइयाइं अहुकाइं कित्तणाणि य परिगेहिस्ता परिग्गहं विपुलवक्ख-
 सारं देवावि सइंदगा ण तित्ति ण तुट्ठि उवत्तमति अच्चंतविउत्तलोभासिमूयत्त-
 वासहरइक्खुगारवट्टपव्वय-कुंडलकयगवर भाणुसोत्तर-कालोदधिलवण-सलिलदह-
 पइरइकर-अंजणकसेलदहिमहइवपातुप्पाय-कंचणकच्चत्तिवित्तजमक-वरसिहर-
 कूडवासी वक्खारअकम्मभूमिसु सुविभत्तमागदेसानु कम्मभूमिसु, जेइवि य णरा
 चाउरंतचक्कवट्टी वामुदेवा बलदेवा मंडलीया इस्तरा तलवरा सेणावई इक्खा
 सेट्ठी रट्ठिया पुरोहिया कुमारा बंडेणायगा माड्ढिया सत्थवाहा कोड्ढिया

अमच्छा एए अण्णे य एवमाई परिगहं संचिणंति अणंतं असरणं दुरंतं अधुव-
मणिच्चं असासयं पावकम्मणेम्मं अवकिरियव्वं विणासमूलं बहुबंधपरिकिलेस-
बहुलं अणंतसंकिलेसकारणं, ते तं धनकणगरयणनिच्चयं पिडिता चेव लोमघत्था
संसारं अद्वयंति सखदुक्खसंगिलयणं, परिगहस्सेव य अट्टाए सिप्पमयं
सिक्खए बहुजणो कलाओ य बावत्तरि सुणिपुणाओ लेहाइयाओ सउणरुयावसा-
णाओगणियप्पहाणाओ-चउसट्ठि च महिलागुणे रइजणणे सिप्पसेव अंसिमसि-
किसिवाणिज्जं ववहारं अत्थसत्थईसत्थच्छरूपपयं विविहाओ य जोगजुंज-
णाओ अण्णेषु एवमाइएसु बहूसु कारणसएसु जावज्जीवं णडिज्जए संचिणंति
संदबुद्धी परिगहस्सेव य अट्टाए करंति पाणाण-वहकरणं अलियणिवडिसाइ-
संपओगे परदठव-अंसिज्जा सपरदारअभिगमणासेवणाए आयासविसूरणं फलह-
मंडणवेराणि य अब्रमाणणविमाणणाओ इच्छामहिच्छप्पिवाससययतिसिया
तण्हगेहिलोमघत्था अत्ताणा अणिगहिया करंति कोह्मणमयालोभे अकित-
णिज्जे परिगहे चेव होंति णियमा सत्ता बंडा य गारवा य कसाया सणा य
कामगुण-अण्हगा य इंवियलेसाओ सयणसंपओगा सचित्ताचित्तमोसगाइं दव्वाइं
अणंतकाइं इच्छंति परिघेत्तुं सदेवमणयासुरम्मि लोए लोमपरिगहो जिणवरेहि
मणिओ णत्थि एरिसो पासो पडिबंधो अत्थि सव्वजीवाणं सव्वलोए ॥ १९ ॥
परलोगम्मि य णट्टा तमं पविट्टा महयामोहमोहियमई त्तिमिसंधयारे तसथावर-
सुहमवायरेसु पज्जत्तमपज्जत्तय एवं जाव परिघट्टंति बीहमदं जीवा लोमवस-
संगिविट्टा । एसो सो परिगहस्स फलविवाओ इहलोइओ परलोइओ अप्पसुहो
बहुदुक्खो महम्मओ बन्नुरयप्पगाठो दारुणो कक्कसो असाओ वाससहस्सेहि मूच्चइ
ण य अव्येइत्ता अत्थि हु मोक्खोत्ति, एवमाहंसु णायकुलणंदणो महप्पा जिणो उ
वीरवरणामधेज्जो कहेसो य परिगहस्स फलविवाणं । एसो सो परिगहो पंचमो
उ णियमा णाणाभिकणगरयणमहरिह एवं जाव इमस्स मोक्खवरमोत्तिमग्गस्स
फत्तिहभूयो चरिंमं अधम्मदारं समत्तं । एएहि पंचाहि असंवरेहि रयमादि-
णित्तुं अणुसमयं । चउत्थिविहगइपेरंतं अणुपरिघट्टंति संसारं ॥ १ ॥ सव्वमई
पक्खदे कांहिति अणंतए अकयपुण्णा । जे य ण सुणंति धम्मं सोऊण य जे
पमायंति ॥ २ ॥ अणसिट्ठंपि बहुविहं मिच्छादिट्ठोय जे णरा अहम्मा ।
बट्टणिकाइयकम्मा सुणंति धम्मं ण य करंति ॥ ३ ॥ किं सक्का काउं जे जं

नेच्छह ओसहं मुहा पाउं । जिनवयणं गुणमहुरं विरेयणं सव्यबुक्खणं ॥४॥
पंचेव य उज्झऊणं पंचेव य रक्खऊण भावेण । कम्मरयविप्पमूक्का सिद्धिवर-
मणुत्तरं जति ॥ ५ ॥ २० ॥ पंचमं अज्झयणं समत्तं ॥

बीयो सुयक्खंधो

पढमं अज्झयणं

जंबू ! एतो संवरदाराइं पंच बोच्छामि आणपुब्बीए । जह भणियाणि
भगवया सव्वबुह्विमोक्खणट्ठाए ॥ १ ॥ पढमं होइ अहिंसा बिइयं सच्चवयणंति
पण्णत्तं । वत्तमणुणाय संवरो य बंभचेरमपरिमहत्तं च ॥ २ ॥ तत्थ पढमं
अहिंसा तसथावरसव्वभूयखेमकरी । तीसे सभावणाओ किच्चि बोच्छं गुणद्वेमं
॥ ३ ॥ ताणि उ इमाणि सुव्वय ! महव्वयाइं लोपहिंयमव्वयाइं सुयसागर-
वेसियाइं तवसंजममहव्वयाइं सोल्लगुणवरव्वयाइं सच्छउजवव्वयाइं णरय-
तिरियमणुयदेवगइविबंजगाइं सव्वजिणसासणगाइं कम्मरयविदारगाइं भव-
सयविणासणगाइं बुहसयविमोयणगाइं सुहसयपवत्तणगाइं कापुरिसवुकत्तराइं
सत्पुरिसणिसेवियाइं णिठ्वाणममणमभय-समणप्यघाणयमाइं संवरदाराइं
पंच कहियाणि उ भगवया । तत्थ पढमं अहिंसा जा सा सदेवमणुया-
सुरस्स लोगस्स भवइ दीवो ताणं सरणं गई पइट्ठा णिठ्वाणं १ णिठ्वाई २
समाही ३ सत्ती ४ कित्ती ५ कंती ६ रई य ७ विरई य ८ सुयं ९
तित्ती १० दया ११ विभुत्ती १२ खंती १३ सम्मत्ताराहणा १४ महंती १५
बोही १६ बुद्धी १७ धिई १८ समिद्धी १९ रिद्धी २० विद्धी २१ ठिई २२
पुट्ठी २३ षंदा २४ भट्टा २५ विसुद्धी २६ लद्धी २७ विसिद्धिविद्धी २८
कल्लाणं २९ मंगलं ३० पमोओ ३१ विभूई ३२ रक्खा ३३ सिद्धावासी ३४
अणासवी ३५ केवलीण ठाणं ३६ सिव्वं २७ समिई ३८ सोल्लं ३९ संजमोत्ति
य ४० सोलपरिधरो ४१ संवरो य ४२ गुत्ती ४३ ववसाओ ४४ उत्सओ ४५
जण्णो ४६ आययणं ४७ जयणमप्यसाओ ४८-४९ अस्सासो ५० बीसासो ५१
अमओ ५२ सव्वस्सवि अमाघाओ ५३ चोक्खपवित्ता ५४-५५ सूई ५६
पुया ५७ विमल ५८ पमासा ५९ य णिम्मलयर ६० त्ति एवमाईणि णियय-

गुणणिम्मियाहं पञ्जवणामाणि होंति अहिमाए भगवईए ॥ २१ ॥ एसा सा भगवई अहिमा जा सा मीयाण विव सरणं पक्खीणं विव गमणं तिमियाणं विव सलिलं ख्दिहाणं विव असणं समट्टमज्जे व पोयवहणं चउत्पयाणं व आममपयं दुहट्टियाणं व ओसहिबलं अडवीमज्जे विसत्थगमणं एत्तो विसिट्टतरिया अहिमा जा सा पुढविजलअगणिमारुयवणस्सडबोयहरिय जलयरथलयरख्हयरतसयावर-सव्वभूयखेमकरी, एसा भगवई अहिमा जा सा अपरिमियणाणदंसणधरेहि सीलगुणविणयतवसंयमणायगेहि तित्थंकरेहि सव्वजगजीववच्छलेहि तिलोय-महिएहि जिणच्चेत्रेहि सुट्टुट्टु ओहिजिणेहि विण्णाया उज्जुमईहि विदिट्टा विपुलमईहि विविदिआ पुञ्चधरेहि अहीया वेउव्वीहि पतिण्णा आमिणिबोहि-वाणीहि सुयणाणीहि मणपञ्जवणाणीहि केवल्लणाणीहि आमोसहिपत्तेहि खेलोसहिपत्तेहि जल्लोसहिपत्तेहि विप्पोसहिपत्तेहि सव्वोसहिपत्तेहि ब्रियबुद्धीहि कुट्टबुद्धीहि पयाणुमारोहि संभण्णसोएहि सुयधरेहि मणबलिएहि वयबलिएहि कायबलिएहि णाणबलिएहि दंसणबलिएहि चरित्तबलिएहि खीरासवेहि महु-आसवेहि सप्पियामवेहि अक्खीणमहाणसिएहि चारणेहि विज्जाहरेहि चउत्थ-भत्तिएहि एवं जाव छम्मासमत्तिएहि उव्विखत्तचरएहि णिविखत्तचरएहि अत-चरएहि पंतचरएहि लूहचरएहि समुदाणचरएहि अण्णइलाएहि मोणचरएहि ससट्टकप्पिएहि तज्जायसंसट्टकप्पिएहि उव्वणिहिएहि सुद्धेसणिएहि संखादत्तिएहि दिट्टलाभिएहि अदिट्टलाभिएहि पुट्टलाभिएहि आयबलिएहि पुरिमड्डिएहि एवका-सणिएहि णिविड्डिएहि सिण्णापिडवाडएहि परिमियपिडवाडएहि अंताहारेहि पंताहारेहि अरसाहारेहि विरसाहारेहि लुहाहारेहि तुच्छाहारेहि अंतजीवीहि पंतजीवीहि लूहजीवीहि तुच्छजीवीहि उवसंतजीवीहि पसंतजीवीहि विवित्तजी-वीहि अखोरमहुमप्पिएहि अमज्जमंसासिएहि ठाणाएहि पिडमट्टाईहि ठाण-वकडिएहि खीरासणिएहि णेसज्जिएहि डंडाएहि लगंडसाईहि एगपासगेहि आया-वएहि अत्पावएहि अणिट्ठु[व]मएहि अकंडुयएहि धुयकेसंमुलोमणखेहि सव्व-गायपडिकम्मविप्पमुक्केहि समणुचिण्णा सुयधरविड्डियत्थकायबुद्धीहि धीरमड-बुद्धिणो य जे ते आसीविसउग्गतेयकप्पा णिच्छयववसायपज्जत्तकथमईया णिच्चं सज्जायज्जाणअणुबद्धधम्मज्जाणा पंचमहत्त्वयचरित्तजुत्ता समिया समि-इसु समियावाा छ्विहजगवच्छला णिच्चमप्पमत्ता एएहि अणेहि य जा सा

अणुपालिया भगवई । इमं च पुढविदगअगणिमाहयतरुणतसथावरसस्वभूयसंज-
मदपट्टयाए सुद्धं उच्छं गवेसियव्वं अकयमकारियमणाह्वयमणुद्विट्ठं अकीयकडं णवहि
य कांडिहं सुपरिसुद्धं दसाहि य दोसेहि विप्पमुक्कं उगमउत्पायणेसणामुद्धं
ववगयत्तुयत्तावियत्तत्तवेहं च फासुयं च ण णिसज्जकहापओयणक्लामुओव-
णीयंति ण तिमच्छामंतभूलभेसज्जकज्जहेउं ण लक्खणुत्पायसुमिणजोइसणिमित्त-
कहकप्पउत्तं णवि उंमणाए णवि रक्खणाए णवि सासणाए णवि उंमणरक्खण-
सासणाए भिक्खं गवेसियव्वं णवि वंदणाए णवि माणणाए णवि पूयणाए णवि
वदंममाणणपूथणाए भिक्खं गवेसियव्वं णवि हीलणाए णवि णिदणाए णवि
गरहणाए णवि हीलणंभिदणगरहणाए भिक्खं गवेसियव्वं णवि भेसणाए णवि
तज्जणाए णवि तालणाए णवि भेसणतज्जणतालणाए भिक्खं गवेसियव्वं णवि
मारवेणं णवि कुहणयाए णवि वणीमयाए णवि गारवकुहणवणीमयाए भिक्खं
गवेसियव्वं णवि मित्तयाए णवि पत्थणाए णवि सेवणाए णवि मित्तपरथणसेव-
णाए भिक्खं गवेसियव्वं अण्णाए अगद्विए अबुट्ठे अदीणे अविमणे अकलुणे
अविसाई अपरितंतजोगी जयणघडणकरणचरियविणयगुणजोगसंपउत्ते भिक्खू
भिक्खेसणाए णिरए, इमं च णं सव्वजीवरक्खणदयट्टाए पावपणं भगवया सुक-
हियं अत्तहियं पेत्तानाचियं आगमेसिभहं सुद्धं पेयाउयं अकुडिलं अणुत्तरं सव्व-
दुक्खपावाण विउत्तमणं ॥ २२ ॥ तस्स.इमा पंच भावणाओ पढमस्स वयस्स
होति पाणाइवायवेरमणपरिरक्खणट्टयाए पढमं ठाणममणगुणजोगजुंजणजुं गतर-
णिवाइयाए दिठ्ठीए ईरियव्वं कीडपयंगतसथावरदयावरेण णिक्कं पुप्फफल-
तयपवालकंवमूलवगमट्टियव्वीयहरियपरिवज्जिएण संमं, एवं खलु सव्वपाणा ण
होलियव्वा ण णिदियव्वा ण गरहियव्वा ण हिंसियव्वा ण छिंदियव्वा ण भिदि-
यव्वा ण वहेयव्वा ण भयं दुक्खं च किञ्चि लब्धा पावेउं एवं ईरियासमिइजोगेण
भाविओ भवइ अंतरप्पा असबलमसंकिलिट्टिणिव्वणचरित्तभावणाए अहिंसए
संजए सुसाहू । विइयं च मणेण पावएणं पावगं अहम्मियं दारुणं णिस्संसं व-
व्वं-परिकिलेसबहुलं भयमरणपरिकिलेससंकिलिट्ठं ण कयावि मणेण पावएणं
पावगं किञ्चि श्रायव्वं एवं मणसमिइजोगेण भाविओ भवइ अंतरप्पा
असबलमसंकिलिट्टिणिव्वणचरित्तभावणाए अहिंसए संजए सुसाहू । तइयं च वईए
पावियाए पावणं ण किञ्चि भासियव्वं एवं वइसमिइजोगेण भाविओ भवइ

अंतरप्पा असबलमसंकिलिट्टुणिव्वणचरित्तभावणाए अहिंसओ संजओ सुसाहू ।
 चउरथं आहारएसणाए सुद्धं उंछं गवेसियव्वं अण्णाए अगट्टिए अदुसिट्ठे अदीणं
 अकलुणे अविसाई अपरितंतजांगी जयणघडणकरणचरियविषययणुणजांगमपओग-
 जुत्ते भिवखू भिवखेसणाए जुत्ते सम्दानेऊण भिवखचरियं उंछं येत्तूण अगओ
 गुरुजणस्स पासं गभणागमणाद्वयारे पडिवकमणपडिवकते आलोघणद्वायणं च
 दाऊण गुरुजणस्स गुरुसंदिट्ठस्स वा जहंवाएसं णिरइयारं च अप्पमत्तो, पुणरवि
 अणेसणाए पयओ पडिवकमिन्ता पसंते आसीणमुह्णिंसणणे सुहुत्तमेत्तं च ज्ञाणमुह-
 ज्जागणाणसज्झायगोविचयमणे धम्ममणे अविमणे सुहमणे अविग्गहमणे समाह्व-
 मणे सट्ठासंवेगणिज्जरमणे पवयभवच्छकल्लमाविमणे उट्ठेऊण य पहट्टुट्ठे
 जहारायणियं णिमंतइत्ता य साह्वे भावओ य चिदुणे य गुरुजणेणं उवावट्ठे
 संपमज्जऊण ससीसं कायं तहा करयलं अमुच्छिए अगिट्ठे अगट्टिए अगराहए
 अणज्झोववणं अणाइले अलुद्धं अणत्तट्टिए असुरसुरं अचवचव्वं अदुयमवित्तं ब्रियं
 अपरिसाडि आलोघभायणे जयं पयत्तेण ववगयसंजोगमणिगालं च विगयधूमं
 अक्खं वंजणवणाणुलेवणभूमं संजमजायामायाणिमित्तं संजमभारवहणद्वयाए
 भुंजेज्जा पाणधारणद्वयाए संजएण समियं एवं आहारसमिदुजोगेणं भाविओ
 भवइ अंतरप्पा असबलमसंकिलिट्टुणिव्वणचरित्तभावणाए अहिंसए संजए सुसाहू ।
 पंचम आयाणविक्षेवणसमिई पीढफलगसिज्जासंथारगवत्थपत्तकबलदंडगय-
 हरणचोलपट्टुगमहूपोत्तियपाययुंछणाई एयंपि संजयस्स उवबूहणद्वयाए वायात-
 वट्ठसमसगसीयपरिरक्खणद्वयाए उवगरणं रागदोसरहियं पत्तिहरियव्वं संजमेणं
 णिच्चं पडिलेहणपफोडणपमज्जणाए अहो य राओ य अप्पमत्तेण हंडे सययं
 णिविखयव्वं च णिण्हियव्वं च भायणभंडोवहिउवगरणं एवं आयाणभंडणिवक्खे-
 वणासमिदुजोगेण भाविओ भवइ अंतरप्पा असबलमसंकिलिट्टुणिव्वणचरित्तभाव-
 णाए अहिंसए संजए सुसाहू । एवमिणं संवरस्स दारं सम्मं संवरियं होइ सुप्पणि-
 हियं इमेहि पंचहिंवि कारणेहि मणवयणकायपरिरक्खिएहि णिच्चं आमरणंतं च
 एस जोगो णेयव्वो धिइमया मइपया अणासथो अकलुसो अच्छिट्टोअपरिस्सावी-
 असंकिलिट्ठो सुद्धो सव्वजिणमणुणाओ, एवं पढमं संवरदारं फासियं पालियं सोहियं
 तीरियं किट्टियं आराहियं आणाए अणुपालियं भवइ, एवं णायमणिणा भग-
 वया पण्णवियं पुरुवियं पसिद्धं सिद्धवरसासणमिणं आयवियं-सुदेसियं पसत्थं
 पढमं संवरदारं समत्त तिब्वेमि ॥२३॥ ॥ पढमं अज्झयणं समत्तो ॥

बीयं अज्जयणं

जंभू ! विइयं च सच्चवयणं सुद्धं सुइयं सिवं सुजायं सुभासियं सुवयं
सुकहियं सुदिट्ठं सुपइट्ठियं सुपइट्ठियजसं सुसंजमियवयणबुइयं सुरवरणरत्तसभ-
पवरत्तलवगसुविहियजणबहुमयं परमसाहुधम्मचरणं तवणियमपरिगहियं सुग-
इपह्वेसगं च लोग्गत्तमं अयमिणं विज्जाहूरसगणगमणविज्जाणसाहकं सग-
मगसिद्धिपह्वेसगं अविस्सह तं सच्चं उज्जुयं अकुडिलं मूयत्थं अत्थओ विमुद्ध
उज्जोयकरं पभासगं भवइ सच्चभावाण जीवलोए अविस्सवाइ जह्वत्थमधुरं
पच्चवखं दइवयं व जं तं अच्छेरकारणं अवत्थंतेरेसु बहुएसु माणसाणं सच्चेण
महासमुद्धमज्जेवि च्छिट्ठंति ण णिमज्जंति मूढाणियावि पोया सच्चेण य उदग-
संभमंमि वि ण वुज्जइ ण य मरंति थाहं ते लमंति सच्चेण य अगणिसंभमं-
मि वि ण उज्जंति उज्जगा मणूसा सच्चेण य तत्तेत्ततउलोहसीसगाइं छिवंति
घरंति ण य उज्जंति मणूसा पच्चयकडकाहिं मुच्चंते ण य मरंति सच्चेण
य परिगहिया अस्सिपंजरगया समराओवि णिइति अणहा य सच्चवाइं
वह्वंभियोगवेरघोरेहं पमुच्चंति य अमित्तमज्जाहिं णिइति अणहा य सच्च-
वाइं सादेव्वाणि य देवयाओ करंति सच्चवयणे रत्ताणं । तं सच्चं भगव
त्तित्थयरसुभासियं दसविहं च्छोइसपुब्बीहिं पाहुइत्थविइयं महुरिसीण य
समयप्पइणं वेविदणरिव्भासियत्थं वेमाणियसाहियं महत्थं मंतोसहि-
विज्जासाहणत्थं च्छारणगणसमणसिद्धविज्जं मणूयगणाणं वंदणिज्जं अमर-
गणाणं अच्चणिज्जं असुरगणाणं च्छ पूयणिज्जं अणेगपासंडिपरिगहियं जं तं
लोग्गि सारमूयं गंभीरतरं महासमुद्धाओ थिरयरं मेरुपच्चवाओ सोमतरं
चंदमंडलाओ वित्तयरं सूरमंडलाओ विमलयरं सरयणहयलाओ सुरभियरं गध-
मादणाओ जैविय लोग्गि मपरिसेसा मंतजोगा जवा य विज्जा य जमगा य
अत्थाणि य सत्थाणि य सिक्खाओ य आगमा य सच्चवाणि वि ताइं सच्चे
पइट्ठियाइं, सच्चंपिय संजमस्स उवरोहकारं किच्चि ण वत्तव्वं हिमा-
सावज्जसंपउत्तं भेयविकहकारं अणत्थवापकलंहकारं अणज्जं अववायविवा-
यसंपउत्तं वेत्तं ओज्जेज्जबहुलं णिल्लज्जं लीयगरहणिज्जं दुट्ठिं दुस्सुयं अ-
णियं अप्पणो थवणा परेसु णिदा ण तंसि मेहावी ण तंसि धण्णो ण तंसि पियधम्मो
ण तं कुलीणो ण तंसि दाणवई ण तंसि सूरुो ण तंसि पडिक्खो ण तंसि लट्ठो ण

पंडिओ ण बहुस्सुओ णवि य तं तवस्सो ण यावि परलोगणिच्छिप्रमईसि
 सव्वकालं जाइकुलक्खवाहिरोगेण वावि जं होइ वज्जाणिज्जं दुहओ उवयार-
 मइवकतं एवविहं सच्चंपि ण वत्तव्वं । अह केरिसकं पुणाइ सच्चं तु
 भासियव्वं ? जं तं दव्वेहि पज्जवेहि य गुणेहि कम्मोहि बह्विहेहि मिपेहि
 आगमेहि य णामक्खायणिवाउवसरगतद्धियममाससंधिपदहेउजोगियउपादिकिरि-
 याविहाणघातुसरविभत्तिवण्णजुत्तं तिकहलं दसविहंपि सच्चं जह भणियं तह य
 कम्मणा होइ दुवालत्तवहा होइ भासा वयणपि-य होइ सोलसविहं, एवं अर-
 हंतमणुणायं समिक्खयं संजएणं कालमि य वत्तव्वं ॥ २४ ॥ इम च अलिय-
 पिसुणफरुसकड्यच्चवलवयणपरिरक्खणट्टयाए पावयणं भगवया सुकहियं अत्त-
 हियं पेच्चाभात्रिकं आगमेमिभद्द सुद्धं णेयाउयं अकुडिलं अणुत्तरं सव्वदुक्खपात्राणं
 विओसमणं । तस्स ट्ठमा पच्च भावणाओ विइयस्स वयस्स अलियवयणस्स वेर-
 मणपरिरक्खणट्टयाए, पढमं सोऊणं संवरट्ठं परमट्ठं सुट्ठु जाणिऊणं ण वेगियं
 ण भुरियं ण चवलं ण कडुयं ण फरुस ण साहसं ण य परस्स पीलाकरं सच्चं
 च हियं च मियं च गाहणं च सुद्धं संगयमकाहलं च समिक्खयं संजएण कालमि
 य वत्तव्वं एवं अणुवीइसमिइजोगेण भाविओ भवइ अतरप्पा संजयकरचर-
 णणयणवयणो सूरौ सच्चज्जवसंपुण्णो । विइयं कोहो ण सेवियव्वो, कुद्धो
 चंडिविकओ मणूसो अलियं भणेज्ज पिसुणं भणेज्ज फरुसं भणेज्ज अलियं
 पिसुणं फरुसं भणेज्ज कलहं करेज्जा वेरं करेज्जा विकहं करेज्जा कलहं वेरं
 विकहं करेज्जा सच्चं हणेज्ज सीलं हणेज्ज विणयं हणेज्ज सच्चं सीलं विणयं
 हणेज्ज वेसो हवेज्ज वत्थुं भवेज्ज गम्मो भवेज्ज वेसो वत्थुं गम्मो भवेज्ज
 एयं अण्णं च एवमाइयं भणेज्ज कोहगिगसंपलित्तो तप्पहा कोहो ण सेवियव्वो,
 एयं खंतीइ भाविओ भवइ अंतरप्पा संजयकरचरणणयणवयणो सूरौ सच्चज्जव-
 संपुण्णो । तइयं लोभो ण सेवियव्वो लुद्धो लोलो भणेज्ज अलियं खेतस्स व
 वत्थुस्स व कएण १ लुद्धो लोलो भणेज्ज अलियं कित्तोए लोभस्स व कएण २ लुद्धो
 लोलो भणेज्ज अलियं इड्ढीए व सोवखस्स व कएण ३ लुद्धो लोलो भणेज्ज
 अलियं भत्तस्स व पाणस्स व कएण ४ लुद्धो लोलो भणेज्ज अलियं पीढस्स व
 फलगस्स व कएण ५ लुद्धो लोलो भणेज्ज अलियं सेज्जाए व संथारगस्स व
 कएण ६ लुद्धो लोलो भणेज्ज अलियं वत्थस्स व पत्तस्स व कएण ७ लुद्धो

स्तो मणेज्ज अलियं कंबलस्स व पायपुंछणस्स व कएण ८ लुट्ठो लोलो
 मणेज्ज अलियं सीसस्स व सिस्सिणीए व कएण ९ लुट्ठो लोलो मणेज्ज
 अलियं अण्णेषु य एवमाइसु बहुसुकारणसएसु, लुट्ठो लोले मणेज्ज अलियं
 तम्हा लोमो ण सेवियब्बो, एवं मुत्तोए माविओ भवइ अंतरप्पा संजयकर-
 चरणणयणवयणो सूरुो सच्चज्जवसंपण्णो । चउत्थं ण भीइयब्बं भीयंखु भया
 अइति लहुयं भीओ अब्बितिज्जओ मणूसो भीओ भूएहि धिप्पइ मीओ अण्ण-
 विहु म्भेजेज्जा भीओ तवसंजमं वि हु मएज्जा भीओ य भरं ण णित्थरेज्जा
 सत्पुरिसणिसेवियं च मगं भीओ ण समत्थो अणुचरिउं तम्हा ण भीइयब्बं ।
 भयस्स वा वाहिस्स वा रोगस्स वा जराए वा मच्चूरस्स वा अण्णस्स वा
 एवं धेजेण माविओ भवइ अंतरप्पा संजयकरचरणणयणवयणो सूरुो सच्च-
 ज्जवसंपण्णो । पंचमगं हासं ण सेवियब्बं अलियाइं असंतगाइं जंपति हासइत्ता
 परपरिभवकारणं च हासं परपरिवायप्पियं च हासं परपीलाकारणं च हासं
 भेयावमुत्तिकारणं च हासं अण्णोणजणियं च होज्ज हासं अण्णोणगमणं च
 होज्ज मम्मं अण्णोणगमणं च होज्ज कम्मं कदप्पामियोगगमणं च होज्ज हासं
 आसुरियं किंविस्सत्तणं च जणेज्ज हासं तम्हा हासं ण सेवियब्बं एवं मणेण
 माविओ भवइ अंतरप्पा संजयकरचरणणयणवयणो सूरुो सच्चज्जवसंपण्णो ।
 एवमिणं संवरस्स दारं मम्मं संवरियं होइ सुप्पणिहियं इमेहि पंचहि वि कारणेहि
 मणवयणकायपरिरिक्खएहि णिच्चं आमरणंतं च एस ओगो जेयव्वो धिइमया
 महमया अणासवो अकलूसो अच्छिहो अपरिस्ताधी असकिलिट्ठा-सुट्ठो-सक्खजिण-
 मणुण्णाओ, एवं विइयं संवरदारं फौमियं पालियं साहियं तीरियं किट्ठियं अणु-
 पालियं आणाए आराहियं भवइ । एवं णायमूणिणा भगवया एणवियं एक्कियं
 पसिट्ठं सिद्धवरसासणमिणं आघवियं सुदेसियं पसत्थं विइयं संवरदारं समत्तं
 तिब्बेमि ॥ २५ ॥ विइयं अज्झयणं समत्तं ॥

तइयं अज्झयणं

जंझ ! दत्तमणुण्णायसंवरो णाम होइ तइयं सुक्खया । महक्खयं मणव्वयं
 परदक्खहरणपडिबिरइकरणजुत्तं अपरिभियमणंततण्हाणुगयमहिक्खमणवयण-
 कलूसआयाणसुणिग्गहियं सुसंजमियमणोहृत्थपायणिहुयं णिग्गंथंणिट्ठिं णिरुत्तं

णिरासवं णिदमयं त्रिभुत्तं उत्तमणरवसमपवरबलवगमुविहियज्जणसंमतं परम-
साहृधम्मचरणं जत्थ य गमामगरणगरणिगमखेडकव्वडमडंबवोणमहसंबाहपट्टणा-
समगयं च किञ्चि दव्वं मणिभुत्तसिलप्पवालकंसदूसरययवरकणगरयणमाइं
पडियं पम्हट्ठं विप्पणट्ठं ण कप्पइ कस्सइ कहेउं वा गेण्हउं वा अहिरण-
सुवणिकेण समलेट्ठकंचणेणं अपरिरमहसंबुडेणं लोममि विहरियव्वं, जंपिय
होज्जाहि दव्वजायं खलगयं खेतगयं रणमंतरगयं वा किञ्चि पुष्फल-तयप्पवाल-
कंदमूल-तणकट्टसवकराड अप्पं च बहं च अणुं च थूलगं वा ण कप्पइ उग्गहमि
अदिण्णमि गिण्हिउं जे हणि हणि उग्गहं अणुणविय गेण्हियव्वं वज्जेयव्वो[य]
सव्वकालं अच्चियत्तघरप्पवेमा अच्चियत्तभत्तपाणं अच्चियत्तपीढफलगसेज्जासंथा-
रगवत्थपत्तकंबलदंडगरयहरणणिसेज्जचोलेपट्टगमुहपोत्तियपायपुंछणाइ-भायण -
भंडोवहिउवगरणं परपरिवाओ परस्स दोसो परवधएसेणं जं च गेण्हइ परस्स
णासेइ जं च सुकयं दाणस्स य अंतराइयं दाणविप्पणासो पेसुणं चैव भच्छरियं
च, जेविय पीढफलगसेज्जासंथारगवत्थपायकंबलदंडगरयहरणणिसेज्जचोलेपट्टग-
मुहपोत्तियपायपुंछणाइभायणभंडोवहिउवगरणं असंविभागी असंगहुरूई तवतेणे
य वइतेणे य रुवतेणे य आयारे चैव भावतेणे य सइकरे अंझकरे कलहकरे
वेरकरे विकहकरे असमाहिकरे सयः अप्पमाणमोई सययं अणुवद्धवेरे य णिच्च-
रोसी से तारिसए आराहए वयमिणं । अहं केरिसए पुणाई आराहए वयमिणं ?
जे से उवहिभत्तपाणसंगहणदाणकुसले अच्चतबालदुब्बलगिलानवुडुखवग-पवत्ति-
आयरियउवज्जाए सेहे साहम्मिए तवस्सीकुलगणसंघचेइयट्ठे य णिज्जरट्ठो
वेयावच्चं अणिसिसयं दसविहं बहुविहं करेइ, ण य अच्चियत्तस्स गिहं पविमइ
ण य अच्चियत्तस्स गेण्हइ भत्तपाणं ण य अच्चियत्तस्स सेवइ पीढफलगसेज्जा-
संथारगवत्थपायकंबल-दंडगरयहरणणिसेज्ज-चोलेपट्ट-मुहपोत्तिय-पायपुंछणाइ-
भायणभंडोवहिउवगरणं ण य परिवायं परस्स जंपइ ण यावि दोसे परस्स
गेण्हइ परवधएसेण वि ण किञ्चि गेण्हइ ण य त्रिपरिणामेइ किञ्चि जणं ण यावि
णासेइ दिण्णसुकयं दाऊण य काऊण य ण होइ पच्छातावि संविभागसोले
संगहोवग्गहकुसले से तारिसए आराहए वयमिणं, इमं च परदव्वहरणवेरमण-
परिरिक्खणट्टयाए पावयणं भगवया सुकहियं अत्तहियं पेच्चाभावियं आगमेसि-
भदं सुद्धं णेयाउयं अकुडिलं अणुत्तरं सव्वदुक्खपावाणं विओवसमणं, तस्स इमा

पंच भावणाओ तइयस्सवयस्स होंति परदव्वहरणवेरमणपरिरवखणट्टयाए,
 पढमं देवकुलसभाप्यवावसहहवखमूलआरामकंदरागरगिरिगृहाकम्मउज्जाणजाण-
 सालाकुवियसालामंडवमुण्णघरमुसाणलेणभावणे अण्णमि य एवसाइयमि दग-
 मट्टियवोजहरियतसपाणअसंसत्ते अहाकडे फामुए विवत्ते पसत्थे उवस्सए होइ
 विहरियव्वं, आहाकम्मबहुले य जे से आसियसंमज्जियउस्सित्तसोहियछायणदू-
 मणल्लिपणअण्लिपणजलणमंडचालणं अंतो बह च असंजमो जत्थ वट्टई संजयाण
 अट्टा वज्जेयव्वो हू उवस्सओ से तारिसए सुत्तपडिक्कुट्ठे, एवं विवित्तवास-
 वसहिंसमिइजोगेण भाविओ भवइ अंतरप्पा णिच्च अहिगरणकरणकारावण-
 पावकम्मविरओ दत्तमणुण्णायओग्गहृई । विइयं आरामुज्जाणकाणणवणप्य-
 देसभागे जं किंचि इक्कडं व कठिणगं च जंतुगं च परामेरकुच्चकुसडंभपलाल-
 मूयगव्वकयपुष्फ-फल-तयप्पवाल-कंद-मूल-तण-कट्टमक्कराई गेण्हइ सेज्जोवहिंस्स
 अट्टा ण कप्पए उग्गहे अदिण्णमि गेण्हिउं जे हणि हणि उग्गहं अणुणवियं गेण्हि-
 यव्वं एवं उग्गहसमिइजोगेण भाविओ भवइ अंतरप्पा णिच्चं अहिगरणकरण-
 कारावणपावकम्मविरए दत्तमणुण्णायओग्गहृई । तइयं पीठफलगसिज्जासंधार-
 गट्टयाए रूक्खा ण छिंदियव्वा ण छेयणेण भेयणेण सिज्जा कारियव्वा जस्सेव उव-
 स्सए वसेज्ज सेज्जं तत्थेव गवेसेज्जा ण य विसमं समं करेज्जा ण णिवायपदाय-
 उस्सुगतं ण डंसमसगोसु खुंभियव्वं अग्गी धूमो य ण कायव्वो एवं, संजमबहुले
 संवरबहुले संबुडबहुले समाहिबहुले धीरे काएण फासयंतो सययं अज्झप्वज्झा-
 णजुत्ते समिए एगे चरेज्जं धम्मं, एवं सेज्जासमिइजोगेण भाविओ भवइ अंतरप्पा
 णिच्चं अहिगरणकरणकारावणपावकम्मविरए दत्तमणुण्णायउग्गहृई । चउरथं
 साहारणपिडपायलामे भोत्तव्वं संजएणं समियं ण सायसूपाहियं ण खड्दं ण वेइयं
 ण तुरियं ण चवत्तं ण साहसं ण य परस्सपीलाकारसावज्जं तह भोत्तव्वं जह से
 तइयवयं ण सीयइ साहारणपिडपायलामे सुहुमं अदिण्णादाणवमणियमविरमणं
 एवं साहारणपिडपायलामे समिइजोगेण भाविओ भवइ अंतरप्पा णिच्चं अहि-
 गरणकरणकारावणपावकम्मविरए दत्तमणुण्णायउग्गहृई । पंचमगं साहम्मिए
 विणओ पउंजियव्वो उवगरणपारणामु विणओ पउंजियव्वो वायणपरियट्टणामु
 विणओ पउंजियव्वो दाणगहणपुच्छणामु विणओ पउंजियव्वो णिक्खमणपवेम-
 णामु विणओ पउंजियव्वो अण्णेसु य एवमाइसु बहुसु कारणसएसु विणओ

पञ्जियव्वो, विणओवि तवो तवोवि धम्मो तम्हा विणओ पञ्जियव्वो गुरुमु
साहुमु तवस्सोसु य एव विणएण भाविओ भवइ अंतरप्पा निच्चं अहिगरण-
करणकारात्रअवाक्कम्मत्रिए दत्तमणुणायउमाहुरई । एत्रमिणं संवरस्स दारं
सम्मं संवरियं होइ सुपणिहियं एवं जाव आघवियं सुदेसियं पसत्थं तइयं संवरदारं
समत्तंतिवेमि ॥ २६ ॥ ॥ तइयं अउज्जयणं समत्तं ॥

चउत्थ अउज्जयणं

जब् ! एत्तो य बंभसेरं उत्तमतवाणियमणाणटंसणचरित्तसम्मत्त-
विणयमूलं यमणियमगुणप्पहाणज्जत्तं हिमवत्तमहंततेयमतं पसत्थगंधीरथिमि-
यमज्झं अउज्जवमाहुज्जणाचरियं मोक्खमभगं विमुद्धमिद्धिगइणिलयं सासय-
सव्वावाहमपुण्डमव पसत्थं सोमं सुभं सिवण्यलमक्खयकरं जइवरसार-
विल्लयं सुचरियं सुभासियं णवरि म्णिवरेरिहं महापुरिमधीरसूरधम्मिय-
धिइमंताण य मया विमुद्धं सच्चं भटवज्जणाणच्चिण्णं णिसत्तकियं णिइमयं णित्तसं
णिरायात्तं णिरुवलेवं णिव्वइघरं णियमणिप्पकयं तत्रसंजममूलदालियणेम्मं
पंचमहइवयसुरविल्लयं समिइगुत्तं ज्ञाणवरकवाडमुकयमज्झप्पविष्णफलिहं संण-
द्धोच्छइयदुग्गइपहं सुगइपहदेसयं च लोगुत्तमं च ययमिणं पउमसरत्तलागपालि-
भूयं महासगडअरगतुंबभूयं महाविद्धिमरुक्खक्खंघभूयं महाणगरपागारकवाड-
फलिहभूयं रज्जपिणिट्ठो व इंदकेऊ विस्द्धणेगगुणसपिणद्धं जमि य मग्गमि
होइ सहसा सच्चं सभग्गमथियच्चणियकुसलिलयंपल्लट्टपडियखंडियपरिसडिय-
घिणासियं विणयसीलतवाणियमगुणसमूहं तं बंभं भगवत्तं गहगणणक्खत्त-
तारगाणं वा जहा उडुवई मणिमत्तनिलप्पवालरत्तरयणागगाणं च जहा
समुट्ठो वेरुलिओ चेव जहा मणीणं जहा मउडो चेव भूसणाणं दत्थाणं चेव
खोमज्जयलं अरविदं चेव पुप्फजेट्ठं गोसीसं चेव चंदणाणं हिमवतो चेव ओस-
हीणं सीतोदा चेव णिण्णगाणं उदहीसु जहा सयंभुरमणो रुयगवरे चेव मड-
लियपव्वयाणं पवरे एरावण इव कुंजराणं सीहोव्व जहा मियाणं पवरे पव-
गाणं चेव वेणुदेवे धरणी जहा पण्णगइदराया कप्पाणं चेव बंभलोए सभासु य
जहा भवे सुहम्मा ठिइसु लवसत्तमव्व पवरदाणाणं चेव-अभयदाणं किमिरा
चेव कंदलाणं संघयणं चेव वज्जिरिसहे संठःणे चेव समचउरसे ज्ञाणोसु य परम-

सुवकज्जाणं णाणेसु य परमकेवलं तु पमिद्धं लेसासु य परमसुवकलेस्सा तित्थयरे
 चेव जहा मुणेणं वासेसु जहा महाविदेहे गिरिराया चेव मंदरवरे वणेसु जहा
 णं वणवणं पवरं दुपेसु जहा जंबू सुदंमणा वीसुयजसा जीय णामेण य अयं दीवी,
 तुरगवई गयवई रहवई णरवई जह वीसुए चेव राया रहिए चेव जहा
 महारहगए, एवमणेग गणा अहीणा भवंति एग्गमि बंभचेरे जंमि य आरा-
 हियंमि आराहियं अयमिणं सत्वं, सीलं तन्नो य विणओ य संजमो य खंती
 गृत्ती मुत्ती तहेव इहलोइयपारलोइयजसे य किसी य पच्चओ य, तम्हा णिहु-
 यण बंभचेरं चरियत्वं सव्वओ विसुद्धं जावज्जीवाए जाव सेयट्टिसंजउत्ति, एवं
 मणियं वयं भगवया । तं च इमं—पंचमहत्त्वयसुव्वयमूलं, समणमणाइलसाहुसु-
 च्चिणं । वेरविरामणपज्जवसाणं, सत्त्वसमद्दमहोदहित्थं ॥ १ ॥ तित्थयरेहि
 सुदेसियमग्गं, णरयत्तिरिच्छविज्जियमग्गं । सव्वपवित्तिसुणिम्मियसारं, सिद्धि-
 विमाणअवंगुपदारं ॥ २ ॥ देवणरिदणमंसियपूयं सव्वजगुत्तममंगलमग्गं । बुद्ध-
 रिसं गुणणायगमेवकं, मोवखपहस्स वडिसगभूयं ॥ ३ ॥ जेण सुद्धचरिएण
 भवइ सुवंभणो सुसमणो सुसाहू स इसी स मुणो स संजए स एव भिवक्खू जो सुद्धं
 चरइ बंभचेरं । इमं च रइरागवोसमोहपवहुणकरं किमज्झपमायवोसपासत्थ-
 सीलकरणं अब्भंगणाणि य तेत्लमज्जणाणि य अभिवखणं कक्खाखसीसकरच-
 रणवयणधोवणसंबाहुणगायकम्मपरिमहूणाणुलेवणचुण्णवासधूवणसरीरपरिमंड-
 णवाउसियकहसिय मणियणट्टगीयवाइयणडणट्टगजल्लमत्तपेच्छणवेलंबगं
 ञ्जाणिय निगारागाराणि य अण्णाणि य एवमाइयाणि तवसंजमबंभचेर-
 धाओवघाइयाइं अणुचरमाणेणं बंभचेरं वज्जेयव्वाइं सव्वकालं, भावियव्वो
 भवइ य अंतरप्पा इमेहि तत्राणियमसीलजोगेहि णिच्चकालं । कि ते ? अण्हाणग-
 अबंतधावणसेयमलजल्लधारणं मूणवयकेमलोए य खमदमअत्तेलगखुप्पिवासला-
 घवसीउसिणकट्टसेज्जाभूमिणित्तेज्जापरघरपवेस-लद्धावलद्ध-माणावमाणं विवण-
 वंसमसयफासणियमतवगुणविणयमाइएहि जहा से थिरतरगं होइ बंभचेरं
 इमं च अबंभचेरविरमणपरिरक्खणट्टयाए पावयणं भगवया सुकहियं-अत्तहियं-
 पेच्छाभावियं आगमेसिभद्दं सुद्धं णेयाउयं अकुडिलं अणुत्तरं सव्वदुक्खपावाणं
 विउसमणं । तस्स इमा पंच भावणाओ चउत्थं वयस्स हींति अबंभचेरवेर-
 मणपरिरक्खणट्टयाए । पढमं सयणासणघरदुवारअंगणआगासगवक्खसालअभि-

लोयणपच्छवत्पुगसाहणगश्लणिगावकासा अवकासा जे य वेसियाणं अचछंति
 य जत्थ इत्थियाओ अभिक्खणं मोहदोसरइरागवडुणीओ कर्हिंति य क्हाओ
 बहुविहाओ तेऽवि हु वज्जणिज्जा इत्थिसंसत्तसंकिलिट्ठा अण्णवि य एवमाई
 अवगासा ते हु वज्जणिज्जा जत्थ मणोविब्भमो वा भगो वा भंसणा वा अट्टं
 र्हं च हुज्ज ज्ञाणं तं तं वज्जेज्ज वज्जभीरु अणाययणं अंतपंतयासो,
 एवमसंसत्तवासवसहीसमिइजोगेण भाविओ भवइ अंतरप्पा आरयमणविरय-
 गामधम्मं जिइंदिए बंभचेरगुत्ते । बिइयं णारीजणस्स मज्जे ण क्हेयव्वा
 क्हा विचिस्ता विब्बोयविलाससंपउत्ता ह्सासिगारलोइयकहव्व मोहजणणी ण
 आवाहविवाहवरकहाविव इत्थीणं वा सुभग्गुभगकहा चउसट्ठि च महिलागुणा ण
 वण्णदेसजाइकुलरूवणाभगेवत्थपरिजणकहा इत्थियणं अण्णवि य एवमाइ-
 याओ क्हाओ सिगारकलुणाओ तवसंजमबंभचेरघाओवघाइयाओ अण्णचर-
 माणेणं बंभचेरं ण क्हेयव्वा ण सुणेयव्वा ण चित्तेयव्वा, एवं इत्थीकहविरइ-
 समिइजोगेणं भाविओ भवइ अंतरप्पा आरयमणविरयगामधम्मं जिइंदिए बंभ-
 चेरगुत्ते । तईयं णारीणं हसियमणियं चेट्ठियविपेनिखयगइविलासकीलियं विब्बो-
 इयणट्टगीयवाइयसरोर-संठाणवण्णकरचरणयण-लावण्णरूव-जोव्वणपयोहरा-
 धरवत्थालंकारभूसणाणि य गुज्जोवगासियाइं अण्णाणि य एवमाइयाइं तवसंजम
 बंभचेरघाओवघाइयाइं अण्णचरमाणेणं बंभचेरं ण चक्खुसा ण मणसा ण
 वयसा पत्थेयव्वाइं पावकम्माइं, एवं इत्थीरूवविरइसमिइजोगेण भाविओ
 भवइ अंतरप्पा आरयमणविरयगामधम्मं जिइंदिए बंभचेरगुत्ते । चउत्थं पुव्व-
 रयपुव्वकीलियपुव्वसंगंथयसंथुया जे ते आवाहविवाहचोल्लकेसु य तिहिमु
 जण्णेसु उस्सवेसु य सिगारागारचारुवेसाहिं हावभावपल्लियविक्खेवविलाससा-
 लिणीहिं अण्णकूलपेम्मिगार्हिं सट्ठि अण्णसूया सयणसंपओगा उउसुहवरकुसुमसुरभि-
 चंदणसुगधिवरवासधूवसुहफरिसवत्थभूसणगुणोव्वेया रमणज्जाउज्जगेयपउर-
 णउणट्टगजल्लमल्लमट्ठिगवेलव्रगकहापव्वग-लासग-आइवक्खग-लंख-मंख-तूणइल्ल-
 तुंबबीणियतालायरपकरणाणि य बह्णिं महुरसरगीयसुस्सराइं अण्णाणि य एव-
 माइयाणि तवसंजमेबंभचेरघाओवघाइयाइं अण्णचरमाणेणं बंभचेरं णं ताइं
 ससणेण लढमा इट्ठं ण क्हेउं णवि सुमरिउं जे, एवं पुव्वरयपुव्वकीलियविर-
 इसमिइजोगेण भाविओ भवइ अंतरप्पा आरयमणविरयगामधम्मं जिइंदिए

यंभचेरगुत्ते । पंचमं आहारपणीयणिद्धभोयणविवज्जए संजए सुसाहू ववगय-
 खीर-दहिसप्पिणवणीयतेस्स-गुलखंडमच्छंडिगमहुमज्जमंसखज्जगबिगइपरिचत्त-
 कयाहारे ण दप्पणं ण बहुसो ण णिद्धं ण सायसूपाहियं ण खद्धं तथा भोत्तब्बं
 जहा मे जायामाया य भवइ । ण य भवइ विडमसो ण मंसणा य धम्मस्स, एवं
 पणीयाहारविरइसमिद्धजोगेण भाविओ भवइ अंतरप्पा आरयमणविरयगाम-
 धम्मे जिइदिए बंभचेरगुत्ते । एवमिणं संवरस्स वारं सम्मं संवरियं होइ
 सुपणिहियं इमेहिं पंचहिं वि कारणेहिं मणवयणकायपरिरविव्खएहिं णिच्चं
 आमरणंतं च एसो जोगो णेयव्वो धिइमया मइमया अणासवो अकलसो
 अच्चइदं अपरिस्सावी असंक्किलिट्ठो सुद्धो सव्वजिणमणुण्णाओ । एवं चउत्थं
 संवदारं फासियं पालियं सोहियं तीरियं किट्टियं आराहियं आणाए अणुपालियं
 भवइ, एवं णायमणिणा भगवया पणवियं पंरुवियं पसिद्धं सिद्धवरसासणमिणं
 आघवियं सुदेसियं पसत्थं, चउत्थं संवरदारं समत्तंतिबेमि ॥२७॥

॥ चउत्थं अज्झयणं समत्तं ॥

पंचमं अज्झयणं

अंबू ! अपरिगहसंबुडे य समणे आरंभपरिगहाओ विरए, विरए कोह-
 माणमायालोहा एमे असंजमे दो चेव रागदोसा तिण्णि य वंडगारवा य गुत्तीओ
 तिण्णि तिण्णि य विराहणाओ चत्तारि कसाया ज्ञाणसण्णाविकहा तथा य वृत्ति
 चउरो पंच य किरियाओ समिद्धइदियमंहव्वयाइं च छुज्जीवणिकाया छुच्च
 लेसाओ सत्त भया अट्ट य मया णव चेव य बंभचेरवयगुत्ती दसप्पगारे य समण-
 धम्मे एकारस य उवासणार्णं वारस य भिवखुपडिमा किरियठाणा य भूयगामा
 परमाघम्मिया गाहासोत्तसया असंजमअबंभणायअसमाहिठाणा सबला परिसहा
 सूयगडज्जयणदेवभावणउट्टेसगुणपक्कपावसुयमोहणिज्जे सिद्धाइगुणा य जोग-
 संगहे तित्तीसा आसायणा सुरिंदा आवि एक्काइयं करेत्ता एक्कुत्तरियाए
 वड्ढोए तीसाओ जाव उ भवे तिगाहिया विरईपणिहीसु अविरेईसु य
 एवमाइसु बहूसु ठाणेसु जिणपसत्थेसु अवितहेसु सासयभावेसु अवट्टिएसु संकं
 कंखं णिराकरेत्ता सदहए सासणं भगवओ अणिघाणे अगारवे अलुद्धे अमूढमण-
 वयणकायगुत्ते ॥२८॥ जो सो वीरवरवयणविरइपवित्थरवहुविहप्यारो सम्मत्त-

विसुद्धमूलो धिदकंदो विणयवेद्दओ भिग्गयतिलोग्गविउलजसणिच्चियपीणपीवर-
 सुजायखंघो पंचमहब्बपविसालसालो भावणतपंतज्झाणसुभजोणणाणपल्लभवरं-
 कुरधरो बहूगणकुसुमसमिद्धो सीलमुगंधो अणह्वफलो पुणो य मोक्खवरबीज-
 सारो मवरगिरिसिहरचूलिआ इमस्स मोक्खवरमुत्तिमग्गस्स सिहरभूओ संवर-
 वरपायवो चरिमं संवरदारं । जत्थ ण कप्पइ गामागरणभरखेडकम्बडमंडबदोण-
 म्हुपट्टणासमगयं च किच्चि अप्पं व बहूं व अणुं व थूलं व तसथावरकापदव्वजायं
 मणसावि परिघेत्तुं ण हिरण्णमुवणखेत्तवत्थु ण दासीदासमपकपेसहयगयवेत्तं
 च ण जाणजुगसयणासणाइं ण छत्तं ण कुंडिया ण उवाणहा ण पेहुणबीयणतालि-
 यंटया ण यावि अपत्तउयतंबसीसगकंसरययजायरूवमणिमुत्ताहारपुडकसंखदंत-
 मणिंसिगसेलकायवरचेत्तचम्मपत्ताइं महिरहाइं परस्स अज्जोववायलोभजणणाइं
 परिपड्डिउं गुणवओ ण यावि पुष्फकलकंदमूलाइयाइं सणसत्तरसाइं सव्वधण्णाइं
 तिहिं विजोगेहिं परिघेत्तुं ओसहभेसज्जभोयणट्टयाए संजएणं, किं कारणं ? अपरि-
 मियणणवंमणधरेहिं सीलगुणविणयतवसंजमणायगेहिं तिथयरेहिं सव्वजग-
 ज्जीववच्छलेहिं तिलोयमहिंएहिं जिणवरिदेहिं एस जोगो जंगमाणं
 दिट्ठा ण कप्पइ जोगिसमुच्छेदोत्ति तेण वज्जंति समणसीहा । जंपिय ओदण-
 कुम्मासंगजत्तप्पणमथु मुज्जियपल्लसूपसवकुलिवेदिंमवरसरकच्चुण्णकोसगपिडसि-
 हरिणिवट्टभोयगखोरदहिसप्पिणवणीयतेल्लगुलखंडमच्छंडियमहुमज्ज-मंस-खज्जग-
 वंजणविधिमाइयं पणीयं उव्वस्सए परधरे व रणे ण कप्पइ तंपि सण्हि
 काउं सुविहिमाणं, जंपिय उट्टिट्ठठवियरच्चियगपज्जवजायं पक्किणपाउकरणपा-
 मिच्च मोसकजायं कीयगडपाहुं च दाणट्टपुणपगडं समणवणीमगट्टयाए व कयं
 पच्छाकम्मं पुरेकम्मं णिइकम्मं मक्खियं अहरित्तं मोहरं चेव सयगहमाहुं
 मट्टिओवत्तित्तं अच्छंज्जं चेव अणीसट्ठं जं तं तिहीसु जण्णेसु ऊसवेसु य
 अंतो व बहिं व होज्ज समणट्टयाए ठवियं हिंसासावज्जसंपउत्तं ण कप्पइ तंपि-
 य वारघेत्तुं । अह केरिसयं पुणाइ कप्पइ ? जं तं एक्कारसंपिडवायसुद्धं किणण-
 हणणपयणकयकारियाणुभोयणणवकोडीहिं सुपरिसुद्धं दसहिं य दोसेहिं विप्य-
 मुक्कं उग्गमउप्पायणेसणाए सुद्धं ववगयच्चुयच्चवियत्तवेहं च फासुयं वधगध-
 संजोगमणिगालं विगयधूमं छट्ठाणणिमित्तं छक्कायपरिवखणट्टा हणिं-हणिं
 फासुएणं भिक्खेणं वट्टियव्वं, जंपि-य समणस्स सुविहियस्स उ रोगायंके बहूप-

कारंमि समुपपन्ने वायाहिंगपित्तसिंभअइरित्तकुब्बिय-सह-सण्णिवायजाए व उवय-
पत्ते उज्जलबलविउल[तिउल]कक्खडपगाढदुक्खे असुभकड्यफरुसे चंडफल-
विवागे महम्मए जीवियंतकरणे सब्बसरीरपरितावणकरे ण कप्पइ तारित्से
वि तह अप्पणो परस्स वा ओसहभेसज्जं भत्तपाणं च तंवि सण्हिकयं । जंवि
य समणस्स सुविहियस्स तु पडिगगहधारिस्स भवइ भायणभंडोवहिउवगरणं
पडिगगहो पायबंधणं पायकेसरिया पायठवणं च पडलाइं तिण्णेव रयत्ताणं च
गोच्छओ तिण्णेव य पच्छागा रयोहरणचोलपट्टगमुहणंतगमाईयं एयंवि य संज-
मस्स उववूहणदुयाए वायायवबंधंसमसगसीयपरिरवखणदुयाए उवगरणं रागदोस-
रहियं परिहरियव्वं संजएण णिच्चं पडिलेहणपफोडणपमज्जणाए अहो य राओ
य अप्पमत्तेण होइ सययं णिक्खिवियव्वं च गिहियव्वं च भायणभंडोवहिउव-
गरणं, एवं से संजए विमुत्ते णिस्संगे णिप्परिगगहृई णिम्ममे णिण्णेह-
बंधणे सब्बपावविरए वासीचंदणसमाणकप्पे समत्तिणमणिमुत्तालेट्टुकंचणे समे
य माणावमाणणाए समियरए समियरागदोसे समिए समिईसु सम्मदिट्ठी
समे य जे सब्बपाणभूएसु से हू समणे सुयधारए उज्जए संजए स साहू
सरणं सब्बभूयाणं सब्बजगंबच्छले सच्चमासए य संसारंतट्टिए य संसारसमु-
च्छिण्णे सययं मरणणुवारए पारगे य सब्बैसि संसयाणं पवयणमायाहि अट्टुहि
अट्टुकम्मगंठीविमोयोगे अट्टमयमहणे ससमयकुसले य भवइ सुहवुक्खणिग्घिसेसे
अंभितरवाहिरंमि सया तवोवहाणंमि य सुट्टुज्जए खंते वंते य हिय-
णिरए ईरिधासमिए भासासमिए एसंगासमिए आयाणभंडमत्तणिवखेवणासमिए
उच्चारपासवणखेलंसिघाणजल्लपरिट्ठावणियासमिए मणगुत्ते वयमत्ते काय-
गुत्ते गुत्तिदिए गुत्तबंधयारी चाई लज्ज धण्णे तवस्सी खंतिक्खमे जिह्विए
सोहिए अणियाणे अब्बहिल्लेस्से अममे अकिंचणे छिण्णगंगंवे णिश्वलेवे सुविमल-
वरकंसभायणं व मुक्कतोए संखे विव णिरंजणे विगयरायदोसमोहे कुम्मो इव
इदिएसु गुत्ते जच्चकंचणमं व जायक्खे पोषखरपत्तं व णिश्वलेवे चंदो इव सोम-
भावयाए सूरौव्व वित्तेए अचले जह मंदरे गिरिवरे अक्खोभे सागरो व्व थिमिए
पुट्ठी-व सब्बफाससहे तवसा च्चिय भासरासिद्धिणिव्व जायतेए जलियदुयासणो
विव तेयसा जलंते गोसीसचंदणं पिव सीयले सुयंधे य हरयो विव समियभावे
उग्घोसियसुणिम्मलं व आयंसमंडलतलं व पागडभावेण सुद्धभावे सौंडीरे कुंज-

रोक्व वसभेव जाययामे सीहे वा जहा मियाहिवे होइ दुप्पघरिसे सारयसलिलं
 व सुद्धहियए भारंडे चेव अप्पमत्ते खगिगविसाणं व एगजाए खाणं चेव उड्डुकाए
 सुण्णागारेक्व अप्पडिकम्ममे सुण्णागारावणस्संतो णिवायसरणप्पदीवपज्जाणमिय
 णिण्णकपे जहा खुरो चेव एगधारे जहा अही चेव एगविट्ठी आभासं चेव णिरालंबे
 विहगे विव सक्वओ विप्पमुक्के कयपरणिए जहा चेव उरए अप्पडिबद्धे अणिलोक्व
 जीवोक्व अप्पडिहयगई गामे गामे एगरायं णयरे णयरे य पंचरायं दूइज्जंते
 य जिह्दिए जियपरोसहे णिक्कओ विऊ सच्चित्ताच्चित्तमीसगोहं दक्खोहं विरायं
 गए संचयओ विरए मूत्ते लहुए णिरवकंखे जीवियमरणासविप्पमुक्के णिस्संधि
 णिवेणं चरित्तं धीरे काएण फासयते सययं अज्झप्पझाणजुत्ते णिहुए एमे चरेज्ज
 धम्मं । इमं च परिग्गह्वेरमणपरिरक्खणट्टयाए पावयणं भगवया सुकहियं अत्त-
 हियं पेच्छाभातियं आगमेसिभद्दं सुद्धं णेयाउयं अंकुडिलं अणुत्तरं सक्खदुक्ख-
 पावाणविओसमणं । तस्स इमा पंच भावणाओ चरिमस्स वयस्स होत्ति परिग्गह-
 वेरमणरक्खणट्टयाए—पढमं सोइदिएण सोच्छा सद्दाइं मणुणभद्दाइं, किं ते ?
 वरमुरयमुद्गणपवदददुरकच्छभिधीणावि-पंचीवत्तलियिवद्धीसक-सुधोसणंदिसूसर-
 परिव्राइणि-वंस-तूणगपव्वग-तंतो-तलताल-तुडियणिगोसणीयवाइयाइं णडणट्टग-
 जल्लमल्लमट्टिगवेलंबग-कहग-पवगलासग-आइवखगलंबंखतूणइल्लंतुंबवीणिय-
 तालायरपकरणिण य बहूणि महुसरगायसुस्सराइं कंचीमेहलाकलावपत्तरग-
 पहेरगपायजालगघटियिखिणिरयणोरुजालियछुद्धियणे उरचलण-मालियकणग-
 णियलजालभूसणसद्दाणि लीलचं कम्ममाण-णुदीरियाइं तरुणीजणहसियमणियक-
 लरिभियमंजलाइं गुणवयणाणि व बहूणि महुरजणसासियाइं अण्णेसु य एवमाइ-
 एसु सहेसु मणुणभद्दाएसु ण तेसु समणे ण सज्जियव्वं ण रज्जियव्वं ण गिज्जियव्वं
 ण मुज्जियव्वं ण विणियघायं अविज्जियव्वं ण लभियव्वं ण तुसियव्वं ण हसि-
 यव्वं ण सइं च मइं च तत्थ कुज्जा, पुणरवि सोइदिएण सोच्छा सद्दाइं अम-
 णुणपावगाइं, किं ते । अक्कोसफरुसखिसणअवमाणणतज्जणणिक्कंछणदित्त-
 वयणतासणक्कजियरुणरडियकंदियणिग्घुट्टरसियकलुणविलविद्याइं अण्णेसु य
 एवमाइएसु सहेसु अमणुणपावएसु ण तेसु समणेण रूसियव्वं ण होलियव्वं
 ण णिदियव्वं ण खिसियव्वं ण छिदियव्वं ण भिदियव्वं ण बहेयव्वं ण दुगुल्लाव-
 त्तियाए लब्भा उप्पाएउं, एवं सोइदियभावणाभाविओ भवइ अंतरप्पा मणुणा-

मणुष्णसुन्मिदुडिभरामदोसप्वणिहियप्पा साह मणवयणकायगुत्ते संबडे पणि-
हिइदिए चरेज्ज धम्मं । विइयं चविखदिएण पासिय रुवाणि मणु-
ष्णाइं भद्दाइं सच्चित्ताऽचित्तमीसगाइं कट्ठे पोत्थे य चित्तकम्मे लेप्प-
कम्मे सेले य वंतकम्मे य पंचहि वण्णेहि अणेगसंठाणसंठियाइं गंठिमवेडिम-
पूरिम-संघाइमाणि य मल्लाइं बहुविहाणि य अहियं णयणमणसुह्यराइं
वणसंडे पव्वए य गामागरणगराणि य खुदिय-पुक्खरिणि-वावी-दीहियगंजा-
लियसरसरपंतियसागरबिलपंतियखादियणईसरतलागवप्पिणीकुत्तुप्पलपउमपरि-
संडियाभिरामे अणेगसउणगणमिहुणविच्चरिए वरमडवविहभचणतोरण-चेइय-
देवकुलसभंपवावसहसुकयसयणासणसीयरहसयडजाणजुगसंदगरणारिगणे य
सोमपडिरूवदरिसणिज्जे असंकियविभूसिए पुक्कयतवप्पभावसोहमसंपउत्ते
णडणट्टगजल्लमल्लमुट्टियवेल्लवगकहगपवगलासगाआइवखगल्लंखमंख-त्तूणइल्लतुंब-
वीणियतालायरपकरणाणि य बहूणि सुकरणाणि अण्णेसु य एवमाइएसु
रूवेसु मणुष्णभद्दाएसु ण तेसु समणेण सज्जियव्वं ण रज्जियव्वं जाव ण सहं
च महं च तत्थ कुज्जा, मुणरवि चविखदिएण पासिय रुवाइं अमणुष्णपावगाइं,
कि ते ? गंडिकोडिककुण्डदरिक्कल्लपइल्लकुज्जपंगुलवामणअंधिल्लगएगच-
क्खविणिहयसप्पिसल्लगवाहिरोगपीलियं विगयाणि य भयगकलेवराणि सकिमण-
कुहियं च वरवरांसि अण्णेसु य एवमाइएसु अमणुष्णपावएसु ण तेसु समणेण
रूसियव्वं जाव ण दुग्घावत्तियावि लब्भा उप्पाएउं, एवं चविखदियभावणा-
भाविवो भवइ अंतरप्पा जाव चरेज्ज धम्मं । तइयं घाणिदिएण अग्घाइय
गंधाइं मणुष्णभद्दाइं, कि ते ? जलय-थलय-सरसपुक्कलवाणभोयण-कुट्ट-तगर-
पत्त-चोयवमणगमरुयएत्तरसपिक्कमंसि-गोसीससरसचंदणकप्पूर-लवंगअगरकुं-
भकक्कोलउसीरसेयचंदणसुगंधसारंगजुत्तिवरधूववासे उउयर्पडिमणिहारिमगंधि-
एसु अण्णेसु य एवमाइएसु गंधेसु मणुष्णभद्दाएसु ण तेसु समणेण सज्जियव्वं
जाव ण सहं च महं च तत्थ कुज्जा, पुणरवि घाणिदिएण अग्घाइय गंधाणि
अमणुष्णपावगाइं, कि ते ? अहिमडअस्समडहत्थिमडगोमडविगसुणगसियालम-
णुयमज्जारसीहवीवियमयकुहियविणट्टुकिविणबहुदुरभिगंधेसु अण्णेसु य एवमाइ-
एसु गंधेसु अमणुष्णपावएसु ण तेसु समणेण रूसियव्वं जाव पणिहियर्पाचिदिए
चरेज्ज धम्मं । चउत्थं जिभिदिएणसाइयरसाणि उ मणुष्णभद्दाइं, कि

ते ? उग्गाहिमविविहवाणभोयणगुलकयखंडकयतेल्लघयकयमवखेसु बहुविहेसु
 लवणरससंजुसेसु महुमंस-बहुप्पगारमज्जियणिट्ठाणगदालियंबसेहंबदुद्धदहिसरय-
 मज्जवरवाहणी सीट्टु-काविसायणसायट्टारसबहुप्पगारेसु भोयणेसु य मणुणवण-
 गंधरस-फासबहुद्वसंभिएसु अण्णेसु य एवमाइएसु रसेसु मणुणमद्दएसु ण तेसु
 समणेण सज्जियत्वं जाव ण सइं च मइं च तत्थ कुज्जा । पुणरवि जिद्धिदिएण
 साइय रसाइं अमणुणपावगाइं, किं ते ? अरसविरससीयत्तुखणिज्जप्पपाण-
 भोयणाइं दोसीणवावणकुहियपूहयअमणुणविणट्टप्पसूयबहुदुद्धिभंगधियाइं तित्त-
 कडुयकसायअंबिलरसलिडणीरसाइं अण्णेसु य एवमाइएसु रसेसु अमणुणपाव-
 एसु ण तेसु समणेण रूमियत्वं जाव चरेज्ज धम्मं । पंचममं फांसिदिएण फासिय
 फासाइं मणुणमद्दगाइं किं ते ? दगमंडवहारसेयचंदणसीयलविमलजलत्तविह-
 कुसुमसत्थरओसीरमूत्तियमृणात्तदोसिणा-पेहुण-उक्खेवगतालियंटीयणगजणिय-
 सुहसीयले य पवणे गिह्फकाले सुहफासाणि य बहुणि सयणाणि आसणाणि य
 पाउरणगुणे य सिंसिरकाले अंगारपयावणा य आयवणिद्धमउयसीयउसिणलहुया
 य जे उदुसुहफामा अंगसुहणिब्बुडकरा ते अण्णेसु य एवमाइएसु फासेसु मणुण-
 मद्दएसु ण तेसु समणेण सज्जियत्वं ण रज्जियत्वं ण गिज्जियत्वं ण मुज्जियत्वं
 ण विणिग्घायं आवज्जियत्वं ण लुभियत्वं ण अज्जोववज्जियत्वं ण तूसियत्वं
 ण हसियत्वं ण सइं च मइं च तत्थ कुज्जा, पुणरवि फांसिदिएण फासिय फासाइं
 अमणुणपावगाइं, किं ते ? अणेगहवहब्धतालणकणअइमारारोवणए अंगभंजण-
 सूईणखप्पवेसगायपच्छणणलक्खारसखारतेल्लकलकलंततउयसीसग-काललोहिसि-
 च्चणहडिबंधणरज्जुणिगलसंकलहत्यंडुयकुंभियागदहण-सीह पुच्छण-उब्बंधणसुल-
 भेयगयचलणमलणकरचरण-कणणासोट्टसीसच्छेयणजिदभंच्छेयण-वसणणयणहि-
 ययवंतमंजण-जोत्तलय-कसप्पहार-पायपहिज्जाणपत्थरणिवाय-पीलण-कविकच्छु-
 अगणित्रिच्छुयडक्कवायातववंसमसगणिवाए दुट्टुणिसज्जदुणिसीहियदुद्धिभकक्खड-
 गुहसीयउसिणत्तुखेसु बहुविहेसु अण्णेसु य एवमाइएसु फासेसु अमणुणपावएसु
 ण तेसु समणेण रूमियत्वं ण हीलियत्वं ण णिदियत्वं ण छिसियत्वं ण छिदि-
 यत्वं ण भिदियत्वं ण वहेयत्वं दुग्घावत्तियं च लब्भा उप्पाएउं, एवं फांसि-
 दियभावाणाभाविओ भवइ अंतरप्पा मणुणामणुणसुब्भिवुद्धिभरागदोसपणि-
 हियप्पा साहु मणवयणकायगुत्ते संबुडे पणिहिइदिए चरिज्ज धम्मं । एवमिणं

संवरस्स दारं सम्मं संवरियं होइ सुप्पणिहियं इमेहि पंचहि वि कारणेहि मणवय-
 कायपरिरक्खिएहि णिक्खं आमरणंतं च एस ओगो णेयव्वो धिइमया महमया
 अणासवो अकलुसो अच्चिद्धो अपरिस्साधी असंकिंलिट्ठो सुद्धो सध्वजिणमणु-
 ण्णाओ । एवं पंचमं संवरदारं फासियं पालियं सोहियं तीरियं किट्टियं अणुपा-
 लियं आणाए आराहियं भवइ । एवं णायसुणिणा भगवया यणवियं यरुवियं
 पसिद्धं सिद्धं सिद्धवरसासणमिणं आधविय सुवेसियं पसत्थं पंचमं संवरदारं समत्तं
 तिबेमि । एयाइं वयाइं पंचवि सुध्वयमहध्वयाइं हेउसयविचित्तपुक्कलाइं कहि-
 याइं अरिहंतसासणे पंच सप्पासेण संवरा विरथरेण उ पणवीसइसमियसहियसं-
 वुडे सया जयणघडअसुविमुद्धवंसणे एए अणुचरियसंजए चरमसरीरधरे भवि-
 स्सतीति ॥२६॥ पण्हावागरणे णं एगो सुयवखंधो दस अज्जयणा एवकसरगा
 दससु चेव विवसेसु उट्टिसिक्खंति एगंतरेसु आयंक्खिलेसु णिरुद्धेसु आउत्तभत्तपाण-
 एणं अंगं जहा आघारस्स ॥ ३० ॥

॥ पण्हावागरणं सुत्तं समत्तं ॥



विवागसुयं

पढमो सुयक्खंधो

मियापुत्ते णामं पढमं अज्जसयणं

तेणं कालेणं तेणं समएणं चंपा णामं णयरी होत्या वणओ, पुणमद्दे चेइए ॥ १ ॥ तेणं कालेणं तेणं समएणं समणस्स भगवओ महावीरस्स अंतेवासी अज्जसुहम्मे णामं अणगारे जाइसंपण्णे वणओ चउट्टसपुव्वी चउणाणोवगए पंथहि अणगारसएहि सद्धि संपरिबुडे पुव्वानुपुंठि जाव जेणेव पुणमद्दे चेइए अहापडि-रूवं जाव विहरइ, परिसा णिग्गया, धम्मं सीच्चा णिसम्म जामेव विंसि पाउ-म्भया तामेव विंसि पडिग्गया । तेणं कालेणं तेणं समएणं अज्जसुहम्मस्स अंतेवासी अज्जजंबू णामं अणगारे सत्तस्सेहे जहा गोयमसामी तहा जाव झानकोट्ठोवगए विहरइ । तए णं अज्जजंबू णामं अणगारे जायसद्धे जाव जेणेव अज्जसुहम्मे अणगारे तेणेव उवागए तिकखुत्तो आयाहिणपयाहिणं करेइ २ ता वंदइ णमं-सइ वं० २ सा जाव पज्जुवासइ, [२] एवं वयासी-जइ णं भंते ! समणेणं भम-वया महावीरेणं जाव संपत्तेणं वसमस्स अंगस्स पण्हावागरणाणं अयमट्ठे पण्णत्ते, एक्कारसमस्स णं भंते ! अंगस्स त्रिवागसुयस्स समणेणं जाव संपत्तेणं के अट्ठे पण्णत्ते ? तए णं अज्जसुहम्मे अणगारे जंबू अणगारं एवं वयासी-एवं खलु जंबू ! समणेणं जाव संपत्तेणं एक्कारसमस्स अंगस्स विवागसुयस्स दो सुयक्खंधा पण्णत्ता, तं०-दुह्विवागा य सुह्विवागा य । जइ णं भंते ! समणेणं जाव संपत्तेणं एक्कारसमस्स अंगस्स विवागसुयस्स दो सुयक्खंधा पण्णत्ता, तं०-दुह्विवागा य सुह्विवागा य, पढमस्स णं भंते ! सुयक्खंधस्स दुह्विवागाणं समणेणं जाव संपत्तेणं कइ अज्जसयणा पण्णत्ता ? तए णं अज्जसुहम्मे अणगारे जंबू अणगारं एवं वयासी-एवं खलु जंबू ! समणेणं० आइगरेणं तित्थगरेणं जाव संपत्तेणं दुह्विवागाणं वस अज्जसयणा पण्णत्ता, तं०-‘मियापुत्ते य उज्जियए अमग्ग सगडे बहसई णंदी । उंबर सोरियदत्ते य देवदत्ता य अंजू य ॥ १ ॥’ जइ णं

भंते ! समणेणं० आइगरेणं तित्यगरेणं जाव संपत्तेणं दुह्विवागाणं दस अज्ज-
 यणा वण्णत्ता, तं०—मियापुत्ते य जाव अंजू य, पढमस्स णं भंते ! अज्जयणस्स
 दुह्विवागाणं समणेणं जाव संपत्तेणं के अट्ठे वण्णत्ते ? तए णं से सुहम्मि अण-
 गारे जंबु अणगारं एवं वयासी—एवं खलु जंबू ! तेणं कालेणं तेणं समएणं
 मियग्गामे णाम णयरे होत्था वण्णओ, तस्स णं मियग्गामस्स णयरस्स बहिधा
 उत्तरपुरत्थिमे दिसीभाए चंदणपायवे णाम उज्जाणे होत्था सव्वोजय...वण्णओ ।
 तत्थणं सुहम्मस्स जवखस्स जवखाययणे होत्था चिराइए जहा पुण्णमद्दे । तत्थ णं
 मियग्गामे णयरे विजए णामं खत्तिए राया परिवसइ वण्णओ । तस्स णं विजय-
 स्स खत्तियस्स मियाणामं देवी होत्था अहीण...वण्णओ । तस्स णं विजयस्स
 खत्तियस्स पुत्ते मियाए देवीए अत्तए मियापुत्ते णामं दारए होत्था जाइअंधे जाइ-
 मूए जाइबहिरे जाइपंगुले य हुंढे य वायव्वे, णत्थि णं तस्स दारगस्स हत्था
 वा पाया वा कणा वा अच्छी वा णासा वा, केवलं से तेसि अंगोवंगणं आगिई
 आगिइमेत्ते । तए णं सा मियादेवी तं मियापुत्तं दारगं रहस्सियंसि भूमिघरंसि
 रहस्सिएणं भत्तपाणेणं पडिजागरमाणी २ विहरइ ॥ २ ॥ तत्थ णं मियग्गामे
 णयरे एगे जाइअंधे पुरिसे परिवसइ, से णं एगेणं सच्चक्खुएणं पुरित्सेणं पुरओ-
 दंडएणं पगड्डिज्जमाणे २ फुट्टुहडाहडसीसे मच्छिपाचडमारपहकरेणं अण्णिज्ज-
 माणमग्गे मियग्गामे णयरे गेहे २ कालुणवडिद्याए वित्ति कप्पेमाणे विहरइ ।
 तेणं कालेणं तेणं समएणं समणे भगवं महावीरे जाव समोसरिए जाव परिसा
 णिग्गया । तए णं से विजए खत्तिए इमीसे कहाए तद्धट्ठे समाणे जहा कूणिए
 तहा णिग्गए जाव पज्जवासइ । तए णं से जाइअंधे पुरिसे तं महया जणमद्दे जाव
 सुणेत्ता तं पुरिसं एवं वयासी—किं णं देवाणुप्पिया ! अज्ज मियग्गामे णयरे
 इंदमहेइ वा जाव णिग्गच्छइ ? तए णं से पुरिसे तं जाइअंधपुरिसं एवं वयासी-
 णो खलु देवाणुप्पिया ! इंदमहेइ वा जाव णिग्गच्छइ, एवं खलु देवाणुप्पिया !
 समणे जाव विहरइ, तए णं एए जाव णिग्गच्छति । तए णं से अंधपुरिसे तं
 पुरिसं एवं वयासी—गच्छामो णं देवाणुप्पिया ! अह्वेवि समणं भगवं जाव
 पज्जवासामो । तए णं से जाइअंधे पुरिसे तेणं पुरओ-दंडएणं [पुरित्सेणं] पगड्डिज्ज-
 माणे २ जेणेव समणे भगवं महावीरे तेणेव उवागए २ ता त्तिवक्खुत्तो आया-
 ह्णिणपयाहिणं करेइ २ ता वंदइ णमंसइ वं० २ ता जाव पज्जवासइ । तए णं

समणे भगवं महावीरे विजयस्स खत्तियस्स तीसे य० धम्ममाइक्खइ जाव
परिसा (जाव) पडिगया, विजए वि गए ॥ ३ ॥ तेणं कालेणं तेणं समएणं
समणस्स भगवओ महावीरस्स जेट्ठे अंतेवासी इंदमूर्हे णामं अणगारे जाव
विहरइ । तए णं से भगवं गोयमे तं जाइअंधपुरिसं पासइ २ ता जायसइडे
जाव एवं वयासी-अत्थि णं भंते ! केइ पुरिसे जाइअंधे जाइअंधारूवे ? हंता
अत्थि, कहि णं भंते ! से पुरिसे जाइअंधे जाइअंधारूवे ? एवं खलु
गोयमा ! इहेव मियग्गामे णयरे विजयस्स खत्तियस्स पुत्ते मियादेवीए अत्तए
मियापुत्ते णामं दारए जाइअंधे जाइअंधारूवे, णत्थि णं तस्स दारगस्स जाव
आगिइमेत्ते, तए णं सा मियादेवी जाव पडिजागरमाणी २ विहरइ । तए णं
से भगवं गोयमे समणं भगवं महावीरं वंदइ णमंसइ वं० २ ता एवं वयासी-
इच्छामि णं भंते ! अहं तुब्भेहि अब्भणुणाए समाणे मियापुत्तं दारयं पासि-
त्तए । अहासुहं देवाणुप्पिया ! तए णं से भगवं गोयमे समणेणं भगवया महा-
वीरेणं अब्भणुणाए समाणे हट्ठनुट्ठे समणस्स भगवओ महावीरस्स अंति-
याओ पडिणिक्खमइ २ ता अतुरियं जाव सोहेमाणे २ जेजेव मियग्गामे
णयरे तेणेव उवागच्छइ २ ता मियग्गामं णयरं भज्जंसज्जेणं जेजेव मियाए
देवीए गिहे तेणेव उवागच्छइ । तए णं सा मियादेवी भगवं गोयमं एज्ज-
माणं पासइ २ ता हट्ठनुट्ठु जाव एवं वयासी-संदिंसंतु णं देवाणुप्पिया !
किमागमणप्पओयणं ? तए णं से भगवं गोयमे मियादेवि एवं वयासी-अहं णं
देवाणुप्पिए ! तव पुत्तं पासिउं हव्वमागए । तए णं सा मियादेवी मियापुत्तस्स
दारयस्स अणुमगजायए चत्तारि पुत्ते सव्वालंकारविमूसिए करेइ २ ता
भगवओ गोयमस्स पाएसु पाडेइ २ ता एवं वयासी-एए णं भंते ! मम पुत्ते
पासह । तए णं से भगवं गोयमे मियं देवि एवं वयासी-णो खलु देवा० अहं
एए तव पुत्ते पासिउं हव्वमागए, तत्थि णं जे से तव जेट्ठे पु० मियापुत्ते दारए
जाइअंधे जाइअंधारूवे जं णं तुमं रहस्सियंसि भूमिघरंसि रहस्सिएणं भत्त-
पाणेणं पडिजागरमाणी २ विहरसि तं णं अहं पासिउं हव्वमागए । तए णं सा
मियादेवी भगवं गोयमं एवं वयासी-से के णं गोयमा ! से तहारूवे णाणी वा
तवस्सी वा जेणं तव एसमट्ठे मम ताव रहस्सिकए तुब्भं हव्वमक्खाए जओ
णं तुब्भे जाणह ? तए णं भगवं गोयमे मियं देवि एवं वयासी-एवं खलु

देवाणुधिए ! मम धम्मपरिए समणे भगवं महावीरे जाव जओ णं अहं
जाणामि, जावं च णं मियादेवी भगवया गोयमेण सद्धि एयमएठं संलवइ तावं
च णं मियापुत्तस्स दारगस्स भत्तवेला आया यावि होत्था । तए णं सा मिया-
देवी भगवं गोयमं एवं वयासी-तुइमे णं भंते ! इहं चेव चिट्ठह जा णं अहं
तुइमं मियापुत्तं दारगं उवदंसेमिसिकट्टु जेणेव भत्तपाणपरए तेणेव
उवागच्छइ २ ता वत्थपरियट्टयं करेइ २ ता कट्टुसगडियं गिण्हइत्ता विउल-
स्स असणपाणखाइमसाइमस्स भरेइ २ ता तं कट्टुसगडियं अणुकड्डुपाणी २
जेणेव भगवं गोयमे तेणेव उवागच्छइ २ ता भगवं गोयमं एवं वयासी-
एह णं तुइमे भंते ! ममं अणुगच्छइ जा णं अहं तुइमं मियापुत्तं दारगं उवदं-
सेमि । तए णं से भगवं गोयमे मियादेवि पिट्ठओ समणुगच्छइ । तए णं सा मिया-
देवी तं कट्टुसगडियं अणुकड्डुपाणी २ जेणेव भूमिघरे तेणेव उवागच्छइ २ ता
चउणुण्डेणं वत्थेणं मुहं बंधमाणी भगवं गोयमं एवं वयासी-तुइमे वि णं भंते ।
मुहपोत्थियाए मुहं बंधह तए णं से भगवं गोयमे मियादेवीए एवं वुत्ते समाणे
मुहपोत्थियाए मुहं बंधेइ । तए णं सा मियादेवी परंमुही भूमिघरस्स दुवारं
विहाडेइ, तए णं गंधे गिण्णच्छइ से जहाणामए अहिमडेइ वा(सप्पकडेवरे इ
वा) जाव तओ वि य णं अणिट्ठतराए खेव जान गंधे पणत्ते । तए णं से मिया-
पुत्ते दारए तस्स विउलस्स असणपाणखाइमसाइमस्स गंधेणं अभिणूए समाणे
तंसि विउलंसि असणपाणखाइमसाइमंसि मुच्छिए० तं विउल असणं ४ आसएणं
आहारेइ २ ता विप्पमेव विद्धमेइ २ ता तओ पच्छा पूयत्ताए य सोणियत्ताए
य परिणामेइ तंयिध णं पूयं च सोणियं च आहारेइ । तए णं भगवओ गोयम-
स्स तं मियापुत्तं दारगं पासित्ता अयमेदाखेव अज्झत्थिए ५ समुणज्जित्था-
अहो णं इमे दारए पुरापोराणाणं दुच्चिणाणं दुप्पडिक्कंताणं अनुभाणं पवाणं
कड्डाणं कम्मणं पावगं फलवित्तिवित्तेसं पच्चणुभवमाणे विहरइ ण मे दिट्ठा
जरगा वा णेरइया वा पच्चक्खं खलु अयं पुरिसे णरगपडिइदियं वेयणं वेए-
इत्तिकट्टु मियं देवि आपुच्छइ २ ता मियाए देवीए गिहाओ पडिणिज्जलमइ २
ता मियमामं णयरं मज्झमज्जेणं गिण्णच्छइ २ ता जेणेव समणे भगवं महा-
वीरे तेणेव उवागच्छइ २ ता समणं भगवं महावीरं तिक्खुंती आयाहिणपणा-
हिणं करेइ २ ता वंदइ णमंसइ वं० २ ता एवं वयासी-एवं खलु

अहं तुम्बेहि अहम्गुण्णाए समाणे मियग्गामं णयरं मज्झंमज्झेणं अणुप्पविसामि
 अणेव मियाए देवीए गिहे तेणेव उवागए, तए णं सा मियादेवी
 ममं एज्जमाणं पासइ २ ता हट्ठा तं चेव सक्वं जाव पूयं च सोणियं
 च आहारेइ, तए णं मम इमे अज्जत्थिए० समुप्पज्जित्था—अहो णं इमे
 वारए पुरा जाव विहरइ ॥ ४ ॥ से णं मंते ! पुरिसे पुक्कमवे के आसि ?
 किंणामए वा किंगोए वा कयरंसि गामंसि वा णयरंसि वा ? कि वा दच्चा
 कि वा भोच्चा कि वा समायरिता केसि वा पुरा जाव विहरइ ? गोयमाइ
 समणे भगवं महावीरे भगवं गोयमं एवं वयासी—एवं खल्लु गोयमा ! तेणं
 कालेणं तेणं समएणं इहेव जंबूद्वीवे द्वीवे भारहे वासे सयदुवारे णामं णयरे
 होत्था रिद्धत्थमियसमिद्धे वण्णओ । तस्य णं सयदुवारे णयरे धणवई णामं राया
 होत्था वण्णओ । तस्स णं सयदुवारस्स णयरस्स अदुरसामंते दाहिणपुर-
 तिथमे विसीमाए विजयवद्धमाणे णामं खेडे होत्था रिद्धत्थिमियसमिद्धे ! तस्स णं
 विजयवद्धमाणस्स खेडस्स पंच गामसयाइं आभोए यावि होत्था, तत्थ णं विजय-
 वद्धमाणे खेडे एक्काई णामं रट्टकूडे होत्था अहम्मिए जाव दुप्पडियाणंदे । से णं
 एक्काई रट्टकूडे विजयवद्धमाणस्स खेडस्स पंचण्हं गामसयाणं आहेवक्कं जाव
 पालेमाणे विहरइ । तए णं से एक्काई २० विजयवद्धमाणस्स खेडस्स पंच
 गामसयाइं बहूहि करेहि य भरेहि य विद्धीहि य उक्कोडाहि य पराभवेहि य
 देज्जेहि य भेज्जेहि य कुंतेहि य लंछपोसेहि य आलीवणेहि य पंथकोट्टेहि य
 ओवीलेमाणे २ विहम्ममाणे २ तज्जेमाणे २ तालेमाणे २ गिद्धणे करेमाणे २
 विहरइ । तए णं से एक्काई रट्टकूडे विजयवद्धमाणस्स खेडस्स बहूणं राईसर-
 तत्वरमारडंबियकोडुंबियइम्मसेट्टिसेणावइसत्थवाहाणं अण्णेसि च बहूणं गामेल्लग-
 पुरिसाणं बहूसु कज्जेसु य कारणेसु य मंतेसु य गुज्जेसु य णिच्छएसु य ववहारेसु
 य सुणमाणे भणइ ण सुणेमि असुणमाणे भणइ सुणेमि एवं पस्समाणे भात्तमाणे
 गिण्हमाणे जाणमाणे । तए णं से एक्काई रट्टकूडे एयकम्मे एयप्पहाणे एयविज्जे
 एयसमायारे सुबहूं पावकम्मं कलिकलुसं समज्जिणमाणे विहरइ । तए णं तस्स
 एत्तकाइयस्स रट्टकूडस्स अण्णया कयाइ सरीरगंसि जमगसमगमेव सोलस रोगा-
 यंका पाउबभूया, तं०—सासे कासे जरे दाहे कुच्छिसूले भगंदरे । अरिसा अजीरए
 विट्ठीमुद्धसूले अकारए ॥ १ ॥ अच्छिवेयणा कण्णवेयणा कंडू उयरे कोढे ।

तए णं से एक्काई रट्टकूडे सोलसहिं रोगायकैहिं अभिभूए समणे कोडुंविद्यपुरिमे
 सहावेड २ ता एयं अयासी-गच्छह णं तुदमे देवाणुप्पिया ! विजयवद्धमाणे खेडे
 सिघाडगतिगयउक्कचच्चरमहापहपहेसु यथया २ सद्देषं उग्घोत्तेमाण २ एवं
 वयहू-इहं खलु देवाणुप्पिया ! एक्काईरट्टकूडस्स सरीरगसि सोलस-रोगा-
 यका पाउव्वय्या, तं-सासे कामे जरे जाव काढे, तं जो णं इच्छइ देवाणुप्पिया ।
 वेज्जो वा वेज्जपुत्तो वा जाणुओ वा जाणुपुत्तो वा तेभिच्छी वा तेपिच्छिपुत्तो
 वा एक्काईरट्टकूडस्स तेसि सालसण्हं रोगायकाणं एगमवि रोगायकं उवसामि-
 त्तए तस्स णं एक्काई रट्टकूडे विडलं अत्थत्तपदाणं दलयइ, बोच्चपि तच्चपि
 उग्घोत्तेह २ ता एयमाणत्तिय पच्चप्पिणह । तए णं ते कोडुंविद्यपुरिमा जाव
 पच्चप्पिणंति । तए णं (से) विजयवद्धमाणे खेडे इमं एयाख्व उग्घोत्तणं सोच्चा
 णिसम्म बहवे वेज्जा य द्द सत्थकोसहत्थगया सएहिंती २ गिहेहिंती पडिणिव्व-
 मति २ ता विजयवद्धमाणस्स खेडस्स मज्झमज्झेणं जेणेव एक्काईरट्टकूडस्स
 गिहे तेणेव उवागच्छति २ ता एक्काईरट्टकूडस्स सरीरगं परामुसांति २ ता
 तेसि रोगाणं णिदाणं पुच्छति २ ता एक्काईरट्टकूडस्स ब्रह्महिं अढमगेहिं य
 उव्वट्टणेहिं य सिधेहपाणेहिं य वनणेहिं य विरेयणेहिं य सेयणेहिं य अवहृहणाहिं
 य अवव्हाणेहिं य अणुवासणाहिं य बत्थिकम्मेहिं य णिरुहंहिं य सिरावेहेहिं य
 तच्छणेहिं य पच्छणेहिं य सिरोवत्थीहिं व तण्णरुहिं य पुडवागेहिं य छत्तीहिं
 य मूलेहिं य कंदेहिं य पत्तेहिं य पुप्फेहिं य फलेहिं य बीएहिं य सालयाहिं य
 गुलियरुहिं य ओमहेहिं य भेसज्जेहिं य इच्छंति तेसि सोलसण्हं रोगायकाणं
 एगमवि रोगायकं उवसामित्तए, णो जेव णं संचाएति उवसांसत्तए । तए णं
 ते बहवे वेज्जा य वेज्जपुत्ता य जाहे णो संचाएति तेसि सोलसण्हं रोगायकाणं
 एगमवि रोगायकं उवसामित्तए ताहे संता तंता परितंता जन्मेव दिंसि पाउ-
 व्वया ताभेव दिंसि पडिगया । तए णं एक्काईरट्टकूडे वेज्जेहिं य द्द पडिगयाडविद्यए
 परिधारगपरिच्चले णिविट्टोसहभेसज्जे सोलसरोगायकैहिं अभिभूए समणे रज्जे
 य रट्ठे य जाव अंतेउरे य म्च्छिद्यए रज्जं च रट्ठं च आत्ताएमाणे पत्थे-
 माणे पीहेमाणे अभिलसमाणे अट्टदुहट्टवसट्टे अट्टाडज्जाइ वाससयाइ परमाउयं
 पालइत्ता कालमासे कालं किच्चा इमासे रयणपपभाए पुददीए उवकासेणं सागरो-
 व्मर्माट्टइएसु णेरइएसु णेरइयत्ताए उववण्णे । से णं तओ अपंतंरं उव्वट्टुत्ता इहेव

मियगामे णयरे विजयस्स खत्तियस्स मियाए देवीए कुच्छिसि पुत्ताए उववण्णे । तए णं तीसे मियाए देवीए सरिरे वेयणा पाउळ्मूया उज्जला जात्र दुरहियासा, जप्पमिइं च णं मियापुत्ते दारए मियाए देवीए कुच्छिसि गम्भत्ताए उववण्णे तप्पमिइं च णं मियादेवी विजयस्स ख० अणिट्टा अकंता अप्पिया अमणुणा अमणामा जाया यावि होत्था । तए णं तीसे मियाए देवीए अणया कयाइ पुव्व-रत्तावरत्तकालसमयंसि कुडुंबजागरियाए जागरमाणीए इमे एयारूवे अज्जत्थिए जाव समुप्पज्जित्या—एयं खलु अहं विजयस्स खत्तियस्स पुर्व्व इट्टा ६ धेज्जा वेसासिया अणुमया आसी, जप्पमिइं च णं मम इमे गम्भे कुच्छिसि गम्भत्ताए उववण्णे तप्पमिइं च णं अहं विजयस्स खत्तियस्स अणिट्टा जाव अमणामा जाया यावि होत्था, णिच्छइ णं विजए खत्तिए मम णामं वा गोयं वा गिण्हत्तए वा किमंग पुण दंसणं वा परिभोगं वा, तं सेयं खलु मम एयं गम्भं बहूहिं गम्भ-साडणाहि य पाडणाहि य गालणाहि य मारणाहि य साडित्तए वा ४, एवं संपे-हेइ संपेहिता बहूणि खाराणि य कडुयाणि य तूवराणि य गम्भसाडणाणि य ४ खायमाणी य पीयमाणी य इच्छइ तं गम्भं साडित्तए वा ४ णो चेव णं से गम्भे सडइ वा ४ । तए णं सा मियादेवी जाहे णो संचाएइ तं गम्भं साडि-त्तए वा ४ ताहे संता तंता परितंता अकामिया असयंवसा तं गम्भं दुहंदुहेणं परिचहइ, तस्स णं दारगस्स गम्भगयस्स चेव अट्टणालीओ अभितर-प्पवहाओ अट्टणालीओ ब्राह्मिण्यवहाओ अट्टपुयप्पवहाओ अट्टसोणियप्पवहाओ दुवे-दुवे कणतरेसु दुवे-दुवे अच्छिअंतरेसु दुवे-दुवे णवकंतरेसु दुवे-दुवे धमणिअंतरेसु अभिक्खणं अभिक्खणं पूयं च सोणियं च परिसवमाणीओ २ चेव चिट्ठति । तस्स णं दारगस्स गम्भगयस्स चेव अगिए णामं वाही पाउ-ळ्मूए जे णं से दारए आहारेइ से णं खिप्पामेव विद्धंसमागच्छइपूय-त्ताए य सोणियत्ताए य परिणमइ, तंपिय से पूयं च सोणियं च आहारेइ । तए णं सा मियादेवी अणया कयाइ णवण्हं सासाणं बहुपडिपुण्णाणं दारगं ययाया जाइअंधे जाव आगिइमेत्ते । तए णं सा मियादेवी तं दारगं हुंडं अंधारूवं पासइ २ ता भीया ४ अम्मधाइं सदावेइ २ सा एवं ययासी-गच्छह णं देवा-णुप्पिया ! तुमं एयं दारगं एगंते उवकुरुडियाए उज्झाहि । तए णं सा अम्मधाइं मियादेवीए तहत्ति एयमट्ठं पडिसुणेइ २ ता जेणेव विजए खत्तिए तेणेव उवा-

गच्छइ २ ता करयलपरिगहियं.....एवं वयासी-एवं खलु सामी ! मियादेवी
 णवण्हं मासाणं.....जाव आगिइमेत्ते, तए णं सा मियादेवी तं हुंडं अंधारुवं
 पासइ २ ता भीया तत्था तसिया उच्चिग्गा संजायमया ममं सद्दावेइ २ ता
 एवं वयासी-गच्छइ णं तुमं देवाणुप्पिया ! एयं दारगं एगते उक्कुहडियाए
 उज्झाहि, तं संदिसह णं सामी ! तं दारगं अहं एगते उज्झामि उदाहु मा ?
 तए णं से विजए खत्तिए तीसे अम्मधाईए अंतिए एयमट्ठं सोच्चा णिसम्म
 तहेव संभंते उट्टाए उट्ठेइ २ ता जेणेव मियादेवी तेणेव उवागच्छइ २ ता
 मियादेवि एवं वयासी-देवाणुप्पिया ! तुब्भं पढमं गब्भे तं जइ णं तुमं एयं
 (दा०) एगते उक्कुहडियाए उज्झासि,(तो)तओ णं तुब्भं पया णो थिरा भवि-
 स्सइ, तो णं तुमं एयं दारगं रहस्सिययंसि भूमिघरंसि रहस्सिएणं सत्तपाणेणं
 पडिजागरमाणी २ विहराहि तो णं तुब्भं पया थिरा भविस्सइ । तए णं सा
 मियादेवी विजयस्स खत्तियस्स तहत्ति एयमट्ठं विणएणं पडिमुणेइ २ ता तं
 दारगं रहस्सिययंसि भूमिघरंसि रहस्सिएणं सत्तपाणेणं पडिजागरमाणी २ विहरइ,
 एवं खलु गोयमा ! मियापुत्ते दारए पुरापोराणाणं जाव पच्चणुभवमाणे विह-
 रइ ॥ ५ ॥ मियापुत्ते णं भंते । दारए इओ कालमासे कालं किच्चा कीह
 गमिहिइ ? कीह उववज्जिहिइ ? गोयमा ! मियापुत्ते दारए छ्वीसं वासाइं
 परमाउयं पालइत्ता कालमासे कालं किच्चा इहेव जंबूदीवे भारहे वासे वेय-
 ड्ढगिरिपायमूले सीहकुलंसि सीहत्ताए पच्चायाहिइ, से णं तत्थ सीहे भविस्सइ
 अहम्मिए जाव साहसिए सुवहं पावं जाव समज्जिणइ २ ता कालमासे कालं
 किच्चा इमीसे रयणपवमाए पुढवीए उक्कोससागरोवमट्टिइएसु जाव उववज्जि-
 हिइ, से णं तओ अणंतरं उव्वट्टित्ता सिरीसवेसु उववज्जिहिइ, तत्थ णं
 कालं किच्चा दोच्चाए पुढवीए उक्कोसेणं तिण्ण सागरोवमाइं.....से णं तओ
 अणंतरं उव्वट्टित्ता पक्खीसु उववज्जिहिइ, तत्थ वि कालं किच्चा तच्चाए
 पुढवीए सत्त सागरोवमाइं..... से णं तओ सीहेसु थ..... तयाणंतरं चो-
 त्थीए उरगो पंचमी० इत्थी० छट्ठी० मणुया० अहेसत्तमाए, तओ
 अणंतरं उव्वट्टित्ता से जाइं इमाइं जलधरपंचदियतिरिक्खजोणियाणं
 मच्छ-कच्छभवगाहमगर-सुसुमारार्इणं अट्ठतेरस जाइकुलक्केडिजोणियमहस-
 यसहस्साइं.....तत्थ णं एगमेगंसि जोणी विहाणंसि अणेगसयसहस्सखुत्तो

उद्दाहृता २ तत्थेव भुज्जो २ पच्चायाइस्सइ, से णं तओ अणंतरं उव्वट्टिता....
 वउपएसु उरपरिसप्पेसु भुयपरिसप्पेसु खह्यरेसु चउरिदिएसु तेइंदिएसु बेइंदि-
 एसु वआफइएसु कइयख्वेसु कइयवुद्धिएसु वाउ० तेउ० आउ० पुढवी०
 अणेगसयसहस्सखुत्तो.....से णं तओ अणंतरं उव्वट्टिता सुपइट्टपुरे णयरे गोण-
 ताए पच्चायाहिइ, से णं तत्थ उम्मवक जाव अणया कयाइ पढमपाउसंसि गंगाए
 महाणईए खलीणमट्टियं खणमाणे तडीए पेल्लिए समाणे कालगए तत्थेव सुप-
 इट्टपुरे णयरे सेट्टिकुलंसि पुत्तताए पच्चायाइस्सइ । से णं तत्थ उम्मवकबाल-
 मावे जाव जोध्वणगमणुत्पत्ते तहारूवाणं थेराणं अंतिए धम्मं सोच्चा णिसम्म
 मंडे भविता अगाराओ अणगारियं पव्वइस्सइ, से णं तत्थ अणगारे भविस्सइ
 इरियासमिए जाव बंभधारी, से णं तत्थ यहुइं थासाइं सामणपरियागं पाउ-
 णिता आलोइयपडिक्कंते समाहिपत्ते कालमासे कालं किच्चा सोहम्मे कप्पे
 देवताए उव्वज्जिहिइ, से णं तओ अणंतरं चयं चइत्ता महाविदेहे वासे जाइं
 कुलाइं भवति अड्डाइं.....जहा दढपइण्णे सणं चैव वत्तव्वया कलाओ जाव
 सिज्जिहिइ ५ । एवं खलु जंबू ! समणेणं भगवया महावीरेणं जाव संपत्तेणं
 दुह्विवागणं पढमस्स अज्झयणस्स अयमट्ठे पणत्ते तिबेसि ॥ ६ ॥

॥ पढमं अज्झयणं समत्तं ॥

उज्झयए णामं बीयं अज्झयणं

जइ णं भंते ! समणेणं जाव संपत्तेणं दुह्विवागणं पढमस्स अज्झयण-
 स्स अयमट्ठे पणत्ते दोच्चस्स णं भंते ! अज्झयणस्स दुह्विवागणं समणेणं
 जाव संपत्तेणं के अट्ठे पणत्ते ? तए णं से सुहम्मे अणगारे जंबू अणगारं एवं
 वयासी-एवं खलु जंबू ! तेणं कालेणं तेणं समएणं वाणियगामे णामं णयरे
 होत्था रिद्धत्थिसियसमिद्धे । तस्स णं वाणियगामस्स उत्तरपुरत्थिये दिसी-
 भाए दूईपलासे णामं उज्जाणे होत्था । तत्थ णं दूइपलासे सुहमस्स जक्खस्स
 जवखाययणे होत्था । तत्थ णं वाणियगामे मित्ते णामं राधा होत्था वण्णओ । तस्स
 णं मित्तस्स रण्णे सिरी-णामं देवी होत्था वण्णओ । तत्थ णं वाणियगामे
 कामज्झया णामं गणिया होत्था अहीण जाव सुख्खा भावत्तरीकलापंडिया
 चउसट्ठिगणियागुणोववेया एगूणतीसविसेसे रममाणो एककवीसरइगुणप्पहाणा

बत्तीमपुरिसोबयारकुसला णवंगमुत्तपडिबोहिया अट्टापसेवीसामाविमारया
 सिगारागारचास्वेसा गोयरइयगंधव-णट्टकुमला संभवय० सुंदरयण०
 अंसियज्जया सहससलंभा विदिण्णच्छत्तचामरवालवीयणीया कण्णीरहूपमाया
 दावि होत्था, बहूणं गणियासहस्ताणं आहेवचवं जाव विहरइ ॥ ७ ॥ तत्थ णं
 वाणियगामे विजयमित्ते णमं सत्यथाहे परिवमइ अड्डे०, तस्स णं विजयमित्त-
 स्स सुभट्टा णमं चारिया होत्था अहीण०, तस्स णं विजयमित्तरस पुत्तं मुम-
 हाए भारियाए अत्तए उज्जयए णमं दारए होत्था अहीण जाव सुखे ।
 तेषं कालेणं तेषं समएणं समणे मगवं महावीरे जाव ममोसइ गिरिसा णियया
 राया वि जहा कूणिओ तथा णिमओ धम्मो कहिओ परिसा पडिगया राया य
 गओ । तेषं कालेणं तेषं समएणं समणरस भगवओ महावीरस्स जेट्ठे अंतेवासी
 इवभूई णमं अणगारे जाव लेसे छट्ठंछट्ठेणं जहा पणत्तीए पढम जाव
 जेणेव वाणियगामे णयरे तेणेव उवागच्छइ २ ता उच्चणीय.....अडमाणे
 जेणेव रायमग्गे तेणेव ओगाडे, तत्थ णं बहूरे हत्थी पासइ संणद्धबद्धव-
 म्मियगुडिय उप्पीलियकच्छे उट्टामियघटे णाणाणिरयणविदिग्गेवे-
 ज्जउत्तरकंचुइज्जे पडिकप्पिए ज्ञयपडागवरपंचामेलआरुद्धहत्थारोहे गर्हायाउह-
 पहरणे अणे य तत्थ बहूरे आसे पासइ संणद्धबद्धवम्मियगुडिए आविद्धगुडे
 ओसारियपवचरे उत्तरकंचुइयओचूलमूहचंडाधरचापरथानगपरिमंडियकडिए
 आरुद्धअस्सारीहे गहियाउहपहरणे अणे य तत्थ बहूरे पुरिसे पासइ संणद्धबद्ध-
 वम्मियकवए उप्पीलियसरासणपट्टीए पिणःद्धगेवेज्जे विमलवरयद्धविधपट्टे
 गहियाउहपहरणे, तेसि च णं पुरिसाणं मज्झमवं एगं पुरिसं धामइ अबओउ-
 यवंधणं उक्खित्तकण्णणालं नेहतुप्पियगतं बज्जकरकडियजुय णियत्थं
 कंठेणुरत्तमहलदामं चुण्णगुडियगायं चुण्णयं बज्जावागणीयं तित्तं तित्तं
 चेव छिज्जमाणं फागणिमंसाइं खाधियंतं पावं खवखरमएहि हम्ममाणं
 अणंग-णर-णारीसंपरिवुडं चच्चरे-चच्चरे खंडपडहएणं उघोसिज्जमाणं, इमं
 च ण एम.रुवं उघोसणं पडिसुणेइ-णो खलु देवा० ! उज्जियगस्स दारगए
 केइ राया वा रायपुत्तो वा अवरज्जइ अप्पणो से सयाइं कम्मइं अवरज्जंति
 ॥ ८ ॥ तए णं से भगवओ गोयगस्स तं पुरिसं पामित्ता इमे अज्जियए १-
 अहो णं इत्ते पुरिसे जाव णिरयपडिखुवियं वेयणं वेपइत्तिकट्टु वाणिय-

गामे णयरे उच्चणीयमज्झिमकुलाहं अडमाणे अहापज्जतं समुदाणं
 गिण्हइ २ ता वाणियगामे णयरे मज्झमज्जेणं जाव पड्विसेइ २ ता समणं
 मगवं महावीरं वंदइ णमंसइ वं० २ ता एवं बयासी—एवं खलु अहं भंते ।
 तुभोहि अम्मणुष्णाए समाणे वाणियगामं जाव तहेव णिवेइ । से णं भंते ।
 पुरिसे पुव्वभवे के आसी जाव पच्चणुभवमाणे विहरइ ? एवं खलु गोयमा ।
 तेणं कालेणं तेणं समएणं इहेव जंबूद्वीवे २ भारहे वासे हत्थिणाउरे णामं णयरे
 होत्था रिद्ध० । तत्थ णं हत्थिणाउरे णयरे सुणंदे णामं राया होत्था
 महया०, तत्थ णं हत्थिणाउरे णयरे बहुमज्झदेसभाए एत्थ णं महं एगे
 गोमंडवे होत्था अणेगखंभसयसणिविट्ठे पासाईए ४ । तत्थ णं बहवे
 णयरगोरूवाणं सणाहा य अणाहाय णगरगाविओ य णगरवसभा य णगरवली-
 वहा य णगरपडुयाओ य पउरतणपाणिया णिम्मया णिरुवसग्गा सुहं सुहेणं
 परिवसंति । तत्थ णं हत्थिणाउरे णयरे भीमे णामं कूडगाहे होत्था अहम्मिए
 जाव दुप्पडियाणंदे । तस्स णं भीमस्स कूडगाहस्स उप्पला णामं भारिया
 होत्था अहीण० । तए णं सा उप्पला कूडगाहिणी अणया कयाइ आवण-
 सत्ता जाया यावि होत्था । तए णं तीसे उप्पलाए कूडगाहिणीए तिण्हं
 मासाणं बहुपडिपुष्णाणं अयमेयारूवे दोहले पाउम्मूए—धण्णाओ णं ताओ
 अम्मयाओ ४ जाव सुलद्धे जम्मजीवियफले जाओ णं बहूणं णगरगोरूवाणं
 सणाहाण य जाव वसमाण य ऊहेहि य यणेहि य वसणेहि य छेप्पाहि य
 ककुहेहि य घहेहि य कणेहि य अच्छीहि य णासाहि य जिम्माहि य ओ-
 द्ढेहि य कंबलेहि य सोल्लेहि य तलिंएहि य भज्जिएहि य परिसुक्केहि य
 लावणेहि य सुरं च महं च मेरगं च जाइं च सीधुं च पसणं च आसाए-
 माणीओ विसाएमाणीओ परिभाएमाणीओ परिभुंजेमाणीओ दोहलं विणेंति,
 तं जइ णं अहमवि बहूणं णगर जाव विणिज्जामित्तिकट्ठं तंसि दोहलंसि
 अविणिज्जमाणंसि सुक्खा भुक्खा णिम्मंसा ओलुग्गा ओलुग्गसरीरा णित्तेया
 वीणविमणवयणा पंडुल्लइयमुहा ओमंधियणयणसयणकमला जहोइयं पुप्फवत्थगं-
 धमल्लालंकाराहारं अपरिभुंजमाणी करयलमलिय-व्व कमलमाला ओह्य जाव
 झियाइ । इमं च णं भीमे कूडगाहे जेणेव उप्पला कूडगाहिणी तेणेव
 उवागच्छइ २ ता ओह्य जाव पासइ २ ता एवं बयासी—किं णं तुमं देवाण-

पिप्ल ! ओह्य जाव झियासि ? तए णं सा उप्पला भारिया भीमं कूडग्गाहं एवं वयासी-एवं खलु देवानुपिया ! ममं तिण्हं मासाणं बहुपडिपुण्णाणं दोहले पाउडमूए धण्णाणं ता० जाओ णं बहूणं गो० ऊहेहि य जाव लावणेहि य सुरं च ३ आसाएमाणीओ० दोहलं विणेति, तए णं अहं देवानुपिया ! तंमि दोहलंसि अविणिज्जमाणंसि जाव झियासि । तए णं से भीमे कूडग्गाहे उप्पलं भारियं एवं वयासी-मा णं तुमं देवानुपिया ! ओह्य० झियाहि, अहं णं तहा करिस्सामि जहा णं तव दोहलस्स संपत्ती भविस्सइ, ताहि इट्ठाहि ५ जाव वगर्पीह समासासेइ । तए णं से भीमे कूडग्गाहे अट्टरत्तकालसमयंसि एमे अबीए संणद्ध जाव पहरणे सयाओ गिहाओ णिग्गच्छइ २ ता हत्थिणाउरे णयरे भज्जमज्जेणं जेणेव गोमंडवे तेणेव उवागए २ ता बहूणं णगरगोरूवाणं जाव वसमाण य अप्पेगइयाणं ऊहे छिदइ जाव अप्पेगइयाणं कंबले छिदए अप्पेगइयाणं अण्णमण्णाणं अंगोवंगारं वियंगेइ २ ता जेणेव सए गिहे तेणेव उवागच्छइ २ ता उप्पलाए कूडग्गाहिणीए उवणेइ । तए णं सा उप्पला भारिया तेहि बहूहि गोमंसेहि य सोत्तेहि य सुरं च [५] आसा-एमा० तं दोहलं विणेइ । तए णं सा उप्पला कूडग्गाहिणी संपुण्णदोहला संमा-णियदोहला विणीयदोहला वीच्छिण्णदोहला संपण्णदोहला तं गब्भं सुहंसुहेणं परिवहइ । तए णं सा उप्पला कूडग्गाहिणी अण्णया कयाइ णवण्हं मासाणं बहु-पडिपुण्णाणं दारगं पयाया ॥ ६ ॥ तए णं तेणं दारएणं जाय-मेतेणं चेव महया महया सट्ठेणं विघुट्ठे विस्सरे आरसिए । तए णं तस्स दारगस्स आरसियसहं सोच्चा णिसम्म हत्थिणाउरे णयरे बहवे णगरगोरूवा जाव वसभा य भीया... उद्विग्गा सच्चओ समंता विप्पलाइत्था । तए णं तस्स दारगस्स अम्मापियरो अयमेयारूवं णामधेज्जं करेति, जम्हा णं अहं इमेणं दारएणं जायमेतेणं चेव महया महया चिच्छीसट्ठेणं विघुट्ठे विस्सरे आरसिए तए णं एयस्स दार-गस्स आरसियसहं सोच्चा णिसम्म हत्थिणाउरे बहवे णगरगोरूवा जाव भीया ४ सच्चओ समंता विप्पलाइत्था तम्हा णं होउ अहं दारए गोत्तासे णामेणं । तए णं से गोत्तासे दारए उम्मुक्कबालमा० जाए यावि होत्था । तए णं से भीमे कूडग्गाहे अण्णया कयाइ कालधम्मुणा संजुत्ते । तए णं से गोत्तासे दारए बहूणं मित्त-णाइणियगसयणसंबंधिपरियणेणं सद्धि संपरि-

वडे रोयमाणे कंदमाणे विलवमाणे भीमस्स कूडगाहिस्स णीहरणं करेइ
 २ ता बहूइ लोइयमयकिच्चाइं करेइ । तए णं से सुणवे राया गोत्तामं
 दारयं अणया कयाइ सयमेव कूडगाहत्ताए ठवेइ । तए णं से गोत्तासे दारए
 कूडगाहे जाए यावि होत्था अहम्मिए जाव दुप्पडियाणंटे । तए णं से गोत्तासे
 दारए कूडगाहिताए कल्लाकल्लि अद्धरत्तयकालसमयंमि एगे अबीए संणद्धवद्ध-
 कवए जाव गहियाउहप्पहरणे सयाओ गिहाओ णिग्गच्छइ २ ता जेणेव गोमंडवे
 तेणेव उवागच्छइ २ ता बहूणं णयरगोरूवाणं सणाहाण य जाव वियंयेइ २ ता
 जेणेव सए गेहे तेणेव उवागए । तए णं से गोत्तासे कूडगाहे तेहि बहूहि गोमं-
 सेहि य सोल्लेहि य.... सुरं च ६ आसाएमाणे विसाएमाणे जाव विहरइ । तए
 णं से गोत्तासे कूडगाहे एयकम्मे....सुवहं पावकम्मं समज्जिणित्ता पंचवाससयाइं
 परमाउयं पालइत्ता अट्टुवुहट्टोवगए कालमासे कालं किच्चा दोच्चाए पुढवीए
 उक्कोसं तिसागरोवमठिइएसु णेरइएसु णेरइयत्ताए उववण्णे ॥ १० ॥ तए णं
 सा विजयमित्तस्स सत्थवाहस्स सुभट्टा णांमं भारिया जायणिदुया यावि होत्था
 जाया-जाया दारगा विणिहायमावज्जति । तए णं से गोत्तासे कूडगाहे दोच्चाए
 पुढवीए अणंतरं उव्वट्टित्ता इहेव वरणिणयगामे णयरे विजयमित्तस्स सत्थवाहस्स
 सुभट्टाए भारियाए कुच्छिसि पुत्तत्ताए उववण्णे । तए णं सा सुभट्टा सत्थवाही
 अणया कयाइ णवण्हं मासाणं बहुपडिपुष्णाणं दारयं पयाया । तए णं सा सुभट्टा
 सत्थवाही तं दारगं जायमेत्तयं चेव एगंते उक्कुड्डियाए उज्जावेइ उज्जावेत्ता
 दोच्चं पि गिण्हावेइ २ ता अणुपुट्ठेणं सारक्खेमाणी संगोवेमाणी संवड्ढेइ । तए
 णं तस्स दारगस्स अम्मापियरो ठिइवडियं च चंडसूरवंसणं च जागरियं च
 महया इड्ढीसक्कारसमुवएणं करेति । तए णं तस्स दारगस्स अम्मापियरो एक्कार-
 ससे दिवसे णिवत्ते संपउत्ते बारससे दिवसे इममेयारूथं गोणं गणणित्कणं
 णामधेज्जं करेति, जम्हा णं अम्हं इमे दारए जायमेत्तए चेव एगंते उक्कुड्डियाए
 उज्झिए तम्हा णं होउ अम्हं दारए उज्झियए णामेणं । तए णं से उज्झियए
 दारए पंचघाईपरिग्गहिए तं-खोरघाईए १ मज्जणघाईए २ मंडणघाईए ३
 कीलावणघाईए ४ अंकघाईए ५ जहा दद्धपइण्णे जाव णिव्वाघाए गिरिकंदर-
 मल्लीणे व चंपगपायवे सुहंसुहेणं विहरइ । तए णं से विजयमित्ते सत्थवाहे अणया
 कयाइ गणिमं च १ धरिमं च २ मेज्जं च ३ पारिच्छेज्जं च ४ चउडिव्हं मंडणं

गहाय लवणसमुद्दं पोयवहणेण उवागए । तए णं से विजयमित्ते तस्य लवणसमुद्दे पोयविवत्तीए णिब्बुडुभंडसारे अत्ताणे असरणे कालधम्मणा संजुत्ते । तए णं तं विजयमित्तं सत्थवाहं जे जहा बहवे ईसरतलवरमाडवियकोडुं वियहम्मसेट्टिसत्थवाहा लवणसमुद्दे पोयविवत्तीए छूढं णिब्बुडुभंडसारं कालधम्मणा संजुत्तं सुणोति ते तथा हत्थणिक्खेवं च बाहिरभंडसारं च गहाय एगंतं अवककमंति । तए णं सा सुभद्दा सत्थवाही विजयमित्तं सत्थवाहं लवणसमुद्दे पोयविवत्तीए णिब्बुडु० कालधम्मणा संजुत्तं सुणेइ २ ता महया पइसीएणं अप्फुष्णा समाणी परसुणियत्ताविक चंधमलया धस-त्ति धरणीयलंसि सव्वंगोहं सणिवडिया । तए णं सा सुभद्दा सत्थवाही मुहुत्तंतरेण आसत्या समाणी बहूहि, मित्त जाव परिबुडा रोयमाणी कंदमाणी विलवमाणी विजयमित्तसत्थवाहस्स लोइयाइं मयकिच्चइं करेइ । तए णं सा सुभद्दा सत्थवाही अणया कयाइ लवणसमुद्दोत्तरणं च लच्छिविणासं च पोयविणासं च पइभरणं च अणचित्तेमाणी २ कालधम्मणा संजुत्ता ॥ ११ ॥ तए णं ते णगर-मुत्तिया सुभद्दं सत्थवाहि कालगयं जाणित्ता उज्झियगं दारयं सयाओ गिहाओ णिच्छमंति णिच्छमित्ता तं गिहं अणस्स दलयंति । तए णं से उज्झियए दारए सयाओ गिहाओ णिच्छहे समाणे वाणियगामे णघरे, सिघाडग जाव पहेसु जूयखलएसु वेसियाघरेसु पाणागारेसु य सुहंसुहेणं परिवडुइ । तए णं से उज्झियए दारए अणोहट्टिए अणिवारिए सच्छंदमई सइरप्पयारे मज्जप्पसंगी चोरजूयवेस-दारप्पसंगी जाए यावि होत्था । तए णं से उज्झियए अणया कयाइ कामज्जयाए गणियाए सट्ठि संपलग्गे जाए यावि होत्था, कामज्जयाए गणियाए सट्ठि विज-ल्लाइं उरालाइं माणुस्सगाइं भोगभोगाइं भुंजमाणे विहरइ । तए णं तस्स विजय-मित्तस्स रणो अणया कयाइ सिरीए देवीए जोणिसूले पाउडमूए यावि होत्था, णो संचाएइ विजयमित्ते राया सिरीए देवीए सट्ठि उरालाइं माणुस्सगाइं भोग-भोगाइं भुंजमाणे विहरित्तए । तए णं से विजयमित्ते राया अणया कयाइ उज्झिय-दारयं कामज्जयाए गणियाए गिहाओ णिच्छमावेइ २ ता कामज्जयं गणियं अन्निमतरियं ठावेइ २ ता कामज्जयाए गणियाए सट्ठि उरालाइं माणुस्सगाइं भोगभोगाइं भुंजमाणे विहरइ । तए णं से उज्झियए दारए कामज्जयाए गणियाए गिहाओ णिच्छमेमाणे कामज्जयाए गणियाए मुच्छिए गिद्धे गट्टिए अज्जोववणे अणत्थ कत्थइ सुइं च रइं च घिइं च अविदमाणे तच्चित्ते तस्मणे तल्लेसे

तद्वज्रवसाने तद्वट्ठोवउत्ते तयप्ययकरणे तन्मावणामाविए कामज्जयाए गणि-
याए बहूणि अंतराणि यं छिद्दाणि यं विवराणि यं पडिजागरमाणे २ विहरइ ।
तए णं से उज्जियए दारए अण्णया कयाइ कामज्जयं गणियं अंतरं लभ्भेइ २
कामज्जयाए गणियाए गिहं रहसियं अणुप्पविसइ २ ता कामज्जयाए गणियाए
सद्धि उरालाइं माणुस्सगाइं भोगभोगाइं भुंजमाणे विहरइ । इमं च णं मित्ते
राया ण्हाए कयबलिकम्मि कयकोउय-मंगल-पायच्छित्ते सव्वालंकारविभूसिए
भणुस्सवागुरापरिखित्ते जेणेव कामज्जयाए गिहे तेणेव उवागच्छइ उवागच्छिता
तत्थ णं उज्जियए दारए कामज्जयाए गणियाए सद्धि उरालाइं माणुस्सगाइं
भोगभोगाइं जाव विहरमाणं पासइ २ ता आसुरुत्ते ४ तिवलियभिउडि
णिडाले साहट्ट उज्जियगं दारगं पुरिसेहि गिण्हावेइ २ ता अट्टिमुट्टि-
जाणुकोप्परपहारसंभगमहिद्यगतं करेइ २ ता अवओडयबंधणं करेइ २ ता
एएणं विहाणेणं वज्जं आणावेइ । एवं खलु गोयमां ! उज्जियए दारए पुरा-
पोराणाणं कम्माणं जाव पच्चणभवमाणे विहरइ ॥ १२ ॥ उज्जियए णं भंते !
दारए इओ कालमासे कालं किच्चा कंहि गच्छिहि० कंहि उववज्जिहिइ ?
गोयमां ! उज्जियए दारए पणधीसं वासाइं परमाउयं पालइत्ता अज्जेव
तिभागावसेसे विवसे सुलीभण्णे कए समाणे कालमासे कालं किच्चा इमीसे
रयणप्पभाए पुढवीए णेरइयत्ताए उववज्जिहिइ, से णं तओ अणंतरं उव्वट्टिता
इहेव जंबुद्वीवे दीवे भारहे वासे वेयडुगिरिपायमूले वाणरकुलंसि वाणरत्ताए
उववज्जिहिइ । से णं तत्थ उम्मुक्कबालभावे तिरियभोगेसु म्च्छिए गिद्धे
गडिए अज्जेववण्णे जाए-जाए वाणरवेत्तए वहेइ तं एयकम्मि एयप्पहाणे
एयविज्जे एयसमुयारे कालमासे कालं किच्चा इहेव जंबुद्वीवे दीवे भारहे
वासे इंदपुरे णयरे गणियाकुलंसि पुत्तत्ताए पच्चायाहिइ । तए णं तं दारयं
अम्मापियरो जायमेत्तकं वट्ठेहिंति णपुंसगकम्मं सिक्खावेहिंति । तए णं तस्स
दारयस्स अम्मापियरो णिव्वत्तवारसाहस्स इमं एयारूवं णामधेज्जं करेहिंति
तं०-होउ णं अम्हं इमे दारए पियसेणे णाम णपुंसए । तए णं से पियसेणे णपुं-
सए उम्मुक्कबालभावे जोश्वणगमणुत्ते विणयपरिणयमेत्ते रूवेण य जोश्वणेण
य त्तावणेण य उक्किट्ठे उक्किट्ठसरीरे भविस्सइ । तए णं से पियसेणे णपुंसए
इंदपुरे णयरे बहवे राईसर जाव पभियओ बहूहि य विज्जापओगेहि य मंतवण्णेहि
य हियउड्ढावणेहि य णिण्हवणेहि य पण्हवणेहि य वसीकरणेहि य आभि-

ओगिण्हि य अमिओगिता उरालाईं माणुस्सगाईं भोगभोगाईं भुंजमाणे विह-
रिस्सइ । तए णं से पियसेणे णवुंसए एयकम्मे० सुबहुं पावकम्मं सपज्जिणित्ता
एककवीसं वाससयं परमाउयं पालइत्ता कालमासे कालं किञ्चा इमीसे
रयणप्पमाए पुढवीए णेरइयत्ताए उव्ववज्जिहिइ, तओ सिरिसिवेसु संसारो
तहेव जहा पढमो जाव पुढवी० से णं तओ अणंतरं उव्वट्टित्ता इहेव जंबुद्वीवे
दीवे भारहे वासे चंपाए णयरीए महिसत्ताए पच्चायाहिइ, से णं तत्थ अण्णया
कयाइ गोट्टिल्लएहि जीवियाओ ववरोविए समाणे तत्थेव चंपाए णयरीए सेट्टि-
कुलंसि पुत्तत्ताए पच्चायाहिइ, से णं तत्थ उम्मुक्कबालभावे तहारूवाणं थेराण
अंतिए केवलं बोहि.....अणगारे सोहम्मं कप्पे जहा पढमे जाव अंतं काहिइ ।
णिवल्लेवो ॥ १३ ॥ ॥ बीयं अज्झयणं समत्तं ॥

अभग्गसेणे णामं तइयं अज्झयणं

तच्चस्स उव्वल्लेवो एवं खलु जंबू ! तेणं कालेणं तेणं समएणं पुरिम-
ताले णामं णयरे होत्था रिद्ध० । तस्स णं पुरिमतालस्स णयस्स उत्तरपुरत्थिमे
दिसोभाए एत्थ णं अमोहदंसणे उज्जाणे । तत्थ णं अमोहदंसिस्स जक्खस्स
आययणे होत्था । तत्थ णं पुरिमताले ण० महाबले णामं राया होत्था । तत्थ
णं पुरिमतालस्स णयरस्स उत्तरपुरत्थिमे दिसोभाए देसप्पत्ते अडवी संधिया,
एत्थ णं सालाडवी णामं चोरपल्ली होत्था तिसममिरिकंदरकोलंबसंणिवट्टा
वंसीकलंकपागारपरिखित्ता छिण्णसेलविसमप्पवायफरिहोवगूढा अकिमतरपा-
णीयामुदुल्लसजलपेरंता अणोगलंडी-विदियज्जणदिण्णणिग्गमप्पवेसामुवहुयस्सवि
कुत्रियस्स जणस्स दुप्पहंसा यावि होत्था । तत्थ णं सालाडवीए चोरपल्लोए
विजय णामं चोरसेणावई परिवसइ अहम्मिए जाव लोहिपपाणी बहुणयरणिग्ग-
यजसे सूरे वट्ठप्पहारे साहसिए सद्देही असिलट्टिपढममल्ले, से णं तत्थ साला-
डवीए चोरपल्लोए पंचहं चोरसयाणं आहेवच्चं जाव विहरइ ॥१४॥ तए णं से
विजए चोरसेणावई बहूणं चोराण य पारदारियाण य मंठिभयाण य मंघिच्छे-
याण य खंडपट्टाण य अण्णेसिं च बहूणं छिण्णभिण्णत्ताहिराहियणं कुडंये यावि
होत्था, तए णं से विजए चोरसेणावई पुरिमतालस्स णयरस्स उत्तरपुरत्थिमत्तं

जणवयं बहूहि गामघाएहि य नगरघाएहि य गोमहणेहि य बंदिगहणेहि य
 पंथकोट्टहि य खल्लणणेहि य ओवीलेमाणे २ विद्धंसेमाणे २ तज्जेमाणे २ ताले-
 माणे २ णित्थाणे णिट्ठणे णिवक्खणे करेमाणे विहरइ । यहइवल्लस्स रण्णे अभि-
 वल्लणे २ कप्पायं गेण्हइ । तस्स णं विजयस्स चोरसेणावइस्स खंडसिरी णामं
 भारिया होत्था अहीण० । तस्स णं विजयचोरसेणावइस्स पुत्ते खंडसिरीए भारि-
 याए अत्तए अभगसेणे णामं दारए होत्था अहीणपुण्णपंचिदियसरीरे विण्णय-
 परिणयमेत्ते जोत्तवणगमणुपत्ते । तेणं कालेणं तेणं समएणं समणे भगवं महावीरे
 पुरिमताले णयरे समोसढे परिसा णिग्गया राया णिग्गओ धम्मो कहिओ
 परिसा राया य पडिगओ । तेणं कालेणं तेणं समएणं समणस्स भगवओ महावी-
 रस्स जेट्ठे अंतेवासी गोयमे जाव रायमग्गं समोगाढे, तत्थ णं बह्वे हत्थी पासइ
 बह्वे आसे पुरिसे सण्णद्धबद्धकवए, तेसि णं पुरिसाणं मज्झगयं एगं पुरिसं
 पासइ अवओडय जाव उग्घोसिज्जमाणं, तए णं तं पुरिसं रायपुरिसा
 पढसंसि चच्चरंसि णिसीयावेंति २ ता अट्ठ चुल्लपिउए अगगओ घाएंति २ ता
 कसप्पहारेहि तालेमाणा २ कलुणं कागणिमंसाइं खावेंति खावेत्ता इहिरप्पाणियं
 च पाएंति तयाणंतरं च णं दोच्चंसि चच्चरंसि अट्ठ चुल्लमाउमाओ अगगओ
 घाएंति एवं तच्चे चच्चरे अट्ठ महापिउए चउत्थे अट्ठ महामाउयाओ पंचमे पुत्ते
 छट्ठे सूण्हा सत्तमे जामाउया अट्ठमे घूयाओ णवमे णत्तुया दसमे णत्तुईओ
 एककारसमे णत्तुयावई बारसमे णत्तुहणीओ तेरसमे पिउस्सियपइया चोइसमे
 पिउस्सियाओ पण्णरसमे माउसियापइया सोलसमे माउस्सियाओ सत्तरसमे मामि-
 याओ अट्टारसमे अवसेसं मित्तणाइणियग्गसयणसंबंधिपरियणं अगगओ घाएंति २
 ता कसप्पहारेहि तालेमाणा २ कलुणं कागणिमंसाइं खावेंति २ इहिरपाणियं
 च पाएंति ॥ १५ ॥ तए णं से भगवं गोयमे तं पुरिसं पासइ २ ता इमे एया-
 रुवे अज्झत्थिए समुप्पण्णे जाव तहेव णिग्गए एवं वयासी—एवं खलु अहं णं
 भंते ! तं चेव जाव से णं भंते ! पुरिसे पुव्वभवे के आसी जाव विहरइ ?
 एवं खलु गोयमा ! तेणं कालेणं तेणं समएणं इहेव जंबूद्वीवे द्वीवे भारहे वासे
 पुरिमताले णामं णयरे होत्था रिद्ध० । तत्थ णं पुरिमताले णयरे उदिओदिए
 णामं राया होत्था महया० । तत्थ णं पुरिमताले णिण्णए णामं अंडयवाणियए
 होत्था अइडे जाव अपरिभूए अहम्मिए जाव दुप्पडियाणंवे, तस्स णं णिण्णयस्स

अंडघवाणियस्स बहवे पुरिसा दिष्णभइमत्तवेयणा कत्ताकाल्लि कुट्टालियाओ
य पत्थियपिडएय गिण्हति २ ता पुरिमत्तालस्स णयरस्स परिपेत्तेसु बहवे काइ-
अंडए य धूइअंडए य पारेबइ० टिट्टिमिअंडए य खगि अ० मयूरि० कुवकुडि-
अंडए य अण्णेसि च बहूणं जलयरथलयरखहयरमाईणं अंडाई गेह्हति २ ता
पत्थियपिडगाइं भरेंति २ जेणेव णिष्णए अंडवाणियए तेणेव उवागच्छति २
ता णिष्णयस्स अंडवाणियस्स उवणेंति । तए णं तस्स णिष्णयस्स अंडवाणि-
यस्स बहवे पुरिसा दिष्णभइ० बहवे काइअंडए य जाव कुवकुडिअंडए य अण्णेसि
च बहूणं जलयरथलयरखहयरमाईणं अंडयए तवएसु य कवत्तोसु य कंडुएसु य
भज्जणएसु य इंगालेसु य तलेति भज्जेति सोलेति तलेता भज्जंता सोल्लेता
रायमग्गे अंतरावणंसि अंडयपणिएणं विंत्ति कप्पेमाणा विहरंति ।
अप्पणावि य णं से णिष्णए अंडवाणियए तेहिं बहूहि काइअंडएहि य जाव
कुवकुडिअंडएहि य सोल्लेहि य तल्लिएहि य भज्जिएहि य सुरं च....आसाए-
माणे विसाएमाणे विहरइ । तए णं से णिष्णए अंडवाणियए एयकम्मे ४ सुवहूं
पावकम्मं समज्जिणिता एणं वाससहस्सं परमाउयं पालइत्ता कालमासे कालं किच्चा
तच्चाए पुढ्डीए उवकोसत्तसागरोवमठिइएसु णेरंडएसु णेरइयत्ताए उववण्णे
॥ १६ ॥ से णं तओ अणंतरं उवट्टित्ता इहेव सालाडवीए चोरपल्लीए विजयस्स
चोरसेणावइस्स खंदसिरीए भारियाए कुच्छिसि पुत्तत्ताए उववण्णे । तए णं
तीसे खंदसिरीए भारियाए अणया कयाइ तिहं मासाणं बहुपडिपुण्णाणं इमे
एयारूवे दोह्ले पाउम्मूए-धण्णाओ णं ताओ अम्मया० जाओ णं बहूहि मित-
णाइणिधगसयणसंबंधिपरियणमहिलाहिं अण्णाहि य चोरमहिलाहिं सड्ढि संपरि-
बुडा ण्हाया कयवलिकम्मा जाव पायच्छित्ता सक्वालंकारविभूसिया विउलं
असणं पाणं खाइमं साइमं सुरं च म० च आसाएमाणो विसाएमाणी० विहरंति ।
जिमियभत्तुत्तरागयाओ पुरिसणेवत्थिया सणद्धबद्ध जाव गहियाउहप्पहरणा-
वरणामरिएहिं फलएहिं णिकिट्टाहिं असोहिं अंसागएहिं तोणेहिं सजोवेहिं धण्हि
समुक्खत्तेहिं सरेंहिं समुल्लालियाहिं दामाहिं लंबियाहिं य ओसारियाहिं ऊरु-
घंटाहिं छिप्पत्तरेणं वज्जमाणेणं २ महया उक्किट्ट जाव समुदरवभूयं पिव करे-
माणीओ सालाडवीए चोरपल्लीए सक्वओ समंता ओलोएमाणीओ २ आहिंड-
माणीओ २ दोह्लं विणेंति । तं जइ णं अहंपि जाव दोह्लं विणिज्जामि-त्ति-

कट्टं तंसि दोहलंसि अविण्जजमाणंसि जाव झियाइ । तए णं से विजए चोर-
 सेणावई खंदसिरिभारियं ओह्य जाव पासइ २ ता एवं वयासी—कि णं तुमं
 देवाणुप्पिया ! ओह्य जाव झियासि ? तए णं सा खंदसिरी मा० विजयं एवं
 वयासी—एवं खलु देवाणुप्पिया । मम तिहं मासाणं जाव झियामि । तए णं से
 विजए चोरसेणावई खंदसिरीए भारियाए अंतिए एयमट्ठं सोच्चा णिसम्म
 खंदसिरिभारियं एवं वयासी—अहासुहं देवाणुप्पियसि एयमट्ठं पडिसुणेइ । तए
 णं सा खंदसिरीभारिया विजएणं चोरसेणावइणा अन्नमणुणया समाणी हट्ट-
 तुट्टं बहूहि मित्त जाव अण्णाहि य बहूहि चोरमहिलाहं सद्धि संपरिवुडा
 ण्हाया जाव विमूसिया विउलं असणं ४ सुरं च ६ आसाएमाणी ४ विहरइ
 जिमियभुत्तारागया पुरिस-णेवत्या संणद्धबद्ध जाव आहिडमाणी दोहलं विणेइ ।
 तए णं सा खंदसिरिभारिया संपुणदोहला संमाणियदोहला विणीयदोहला
 वोच्छिण्णदोहला संपण्णदोहला तं गम्भं सुहंपुहेणं परिवहइ । तए णं सा
 खंदसिरी चोरसेणावइणी णवण्हं मासाणं बहुपडिपुण्णाणं दारणं पयाया । तए
 णं से विजए चोरसेणावई तस्स दारगस्स महया इड्ढीसक्कारसमुदएणं वसरत्तं
 ठिइवडियं करेइ । तए णं से विजए चोरसेणावई तस्स दारगस्स एक्कारसमे
 दिवसे विउलं असणं ४ उवक्खडावेइ २ मित्त-णाइ० आमंतेइ २ ता जाव
 तस्सेव मित्त-णाइ० पुरओ एवं वयासी—अम्हा णं अम्हं इमंसि दारगंसि गम्भ-
 गयंसि समाणंसि इमे एयारुवे दोहले पाउन्नए तम्हा णं होउ अम्हं दारए
 अन्नगसेणे णामेणं तए णं से अन्नगसेणे कुमारे पंचधाईए जाव परिवड्डइ ॥१७॥
 तए णं से अन्नगसेणे कुमारे उम्मक्कबालभावे यावि होत्या अट्ट दारियाओ
 जाव अट्टओ दाओ...उप्पिपासा०.....भुंजमाणे विहरइ । तए णं से विजए चोर-
 सेणावई अण्णया कयाइ कालघम्मणा संजुत्ते । तए णं से अन्नगसेणे कुमारे
 पंचाहि चोरसएहि सद्धि संपरिवुडे रोयमाणे कंजमाणे विलवमाणे विजयस्स
 चोरसेणावइस्स महया इड्ढीसक्कारसमुदएणं णिहरणं करेइ २ ता बहूइ लोइ-
 याइं करेइ २ ता केणइ कालेणं अप्पसोए जाए यावि होत्या । तए णं ते पंच
 चोरसयाइं अण्णया कयाइ अन्नगसेणं कुमारं सालाडवीए चोरपल्लीए महया
 २ चोरसेणावइत्ताए अमिसिचंति । तए णं से अन्नगसेणे कुमारे चोरसेणावई
 जाए अहम्मिए जाव कप्पार्यं गिण्हइ । तए णं ते जाणवया पुरिसा अन्नगसेणेणं

चोरसेणावडणा बहूनामघायावणाहि ताविया समाणा अणमण्णे सदावेति २
 ता एवं वयासी-एवं खलु देवाणुप्पिया ! अभगसेणे चोरसेणावई पुरिमता-
 लस्स णयरस्स उत्तरिल्लं जणवयं बहूहि नामघाएहि जाव णिद्धणं करेमाणं विह-
 रइ, तं सेयं खलु देवाणुप्पिया ! पुरिमताले णयरे महाबलस्स रण्णा एयमट्ठं
 विण्णवित्तए । तए णं ते जाणवया पुरिसा एयमट्ठं अणमण्णेणं पडिमुणेति २
 ता मइत्थं महग्घं महरिहं रायारिहं पाहुडं विहेति २ ता जेणेव पुरिमताले
 णयरे तेणेव उवाग० २ ता जेणेव महाबले राया तेणेव उवाग० २ ता महा-
 बलस्स रण्णा तं मइत्थं जाव पाहुडं उवणेति २ करयल.....अंजति कट्टु महा-
 बलं रायं एवं वयासी-एवं खलु सामी ! सालाडवीए चोरपल्लीए अभगसेणे
 चोरसेणावई अस्से बहूहि नामघाएहि य जाव णिद्धणे करेमाणे विहरइ, तं
 इच्छामि णं सामी ! तुज्झं बाहुच्छायापरिमहिदा णिद्धया णिद्धया मुत्तेणं
 परिवसित्तएत्तिकट्टु पायवडिया पंजलिउडा महाबलं रायं एयमट्ठं विण्णे-
 वेति । तए णं से महाबले राया तेसि जाणवयाणं पुरिसाणं अंतिए एयमट्ठं
 सोच्चा णिसम्म आमुस्से जाव मिसिमिसेमाणे तिबलियं भिडडि णिडाले साह-
 द्दु बडं सदावेइ २ ता एवं वयासी-गच्छह णं तुमं देवाणुप्पिया ! सालाडवि
 चोरपल्लि विलुंपाहि २ ता अभगसेणं चोरसेणावई जीवग्गाहं गिग्गाहि २
 ता ममं उवणेहि । तए णं से बडे तहसि एयमट्ठं पडिमुणेइ । तए णं से बडे
 बहूहि पुरिमेहि सण्णवद्ध जाव पहरणेहि मड्ढि संपरिवडे मग्गइएहि फलएहि
 जाव छिप्पत्तरेणं वज्जमाणेणं महया जाव उविकहु जाव करेमाणे पुरिमताणं णयरं
 मज्झंमज्झेणं णिग्गच्छइ २ ता जेणेव सालाडवी चोरपल्ली तेणेव पहारेत्थ
 गमणाए । तए णं तस्स अभगसेणस्स चोरसेणावडस्स चारपुरिसा इपीये कडाए
 लद्धटा समाणा जेणेव सालाडवी चोरपल्ली जेणेव अभगसेणे चोरसेणावई
 तेणेव उवागच्छति २ ता करयल जाव एवं वयासी-एवं खलु देवाणुप्पिया !
 पुरिमताले णयरे महाबलेणं रण्णा महाभच्चडगरेणं बडे आणत्ते-गच्छह णं
 तुज्झे देवाणुप्पिया ! सालाडवि चोरपल्लि विलुंपाहि अभगसेणं चोरसेणावई
 जीवग्गाहं गेग्गाहि २ ता ममं उवणेहि, तए णं से बडे महयाभच्चडगरेणं जेणेव
 सालाडवी चोरपल्ली तेणेव पहारेत्थ गमणाए । तए णं से अभगसेणे चोरसेणा-

वई तेसि चारपुरिसाणं अंतिए एयमट्ठं सोच्चा णिसम्म पंचचोरसयाइं सहावेड
 सहावेत्ता एवं वयासी—एवं खलु देवाणुप्पिया ! पुरिमताले णयरे महाबले जाव
 तेणेव पहारेत्थ गमणाए (आगए, तए णं से अभगसेणे ताइं पंचचोरसयाइं
 एवं वयासी—) तं सेयं खलु देवाणुप्पिया ! अम्हं तं दंडं सालाडवि चोरपत्ति
 असंपत्तं अंतरा चेव पडिसेहितए । तए णं ताइं पंचचोरसयाइं अभगसेणस्स
 चोरसेणावइस्स तहत्ति जाव पडिसुणेत्ति । तए णं से अभगसेणे चोरसेणावई
 विउलं असणं पाणं खाइमं साइमं उवक्खडावेइ २ ता पंचहिं चोरसएहिं सडि
 ष्हाए जाव पायच्छित्ते मायणसंडवसि तं विउलं असणं ४ सुरं च ६ आसाएमाणे ४
 विहरइ । जिमियमुत्तरागए वि य णं समाणे आयंते चोवखे परमसुइभूए
 पंचहिं चोरसएहिं सडि अलं चम्मं बुरूहइ २ ता संणद्धबद्ध जाव पहरणेहिं
 मग्गइएहिं जाव रवेणं पच्चावरहकालसमयंसि सालाडवीओ चोरपत्तीओ
 णिग्गच्छइ २ ता विसमदुग्गहणं ठिए गहियभत्तपाणे दंडं पडिवालेमाणे
 चिट्ठइ । तए णं से दंडे जेणेव अभगसेणे चोरसेणावई तेणेव उवागच्छइ २ ता
 अभगसेणेणं चोरसेणावइणा सडि संपलगे यावि होरया । तए णं से अभग-
 सेणे चोरसेणावई तं दंडं खिप्पामेव ह्यमहिय जाव पडिसेहिइ । तए णं से दंडे
 अभगसेणेणं चोरसेणावइणा ह्य जाव पडिसेहिए समाणे अथामे अबले अदीरिए
 अपुरिसक्कारपरक्कमे अधारणिज्जमितिकट्ठु जेणेव पुरिमताले णयरे जेणेव
 महाबले राया तेणेव उवागच्छइ २ ता करयल० एवं वयासी—एवं खलु सामी !
 अभगसेणे चोरसेणावई विसमदुग्गहणं ठिए गहियभत्तपाणिए णो खलु से सक्का
 केणइ सुबहुएणावि आसबलेण वा हत्थिबलेण वा जोहबलेण वा रहबलेण वा
 चार्डरिणिणि-पि० उरंउरेणं गिण्हित्तए ताहे सामेण य भेएण य उवप्पयाणेण
 य बीसंभमाणे उवयए यावि होत्था । जे वि य से अभिततरगा सीसगसमा
 भित्तणाइणियगसयणसंबंधिपरियणं च विउलघणकणगरयणसंतसारसावएज्जेणं
 भिदइ अभगसेणस्स य चोरसेणावइस्स अभिक्खणं २ महत्थाइं महाघाइं महरि-
 हाइं पाहुडाइं पेसेइ २ अभगसेणं चोरसेणावइं बीसंभमाणेइ ॥ १८ ॥ तए णं
 से महाबले राया अणया कयाइ पुरिमताले णयरे एणं महं महइमहालियं
 कूडागारसालं करेइ अणेगक्खंभसयसंणिविट्ठं पासाईयं दरसणिज्जं० । तए णं

से महाबले राया अण्णया कयाइ पुरिमताले णयरे उस्सुक्कं जाव दसरत्तं पमोयं उग्घोसावेइ २ ता कोडुंबियपुरिसे सद्दावेइ २ ता एवं वयासी-गच्छहं णं तुम्भे देवाणुप्पिया ! सालाडवीए चोरपल्लीए तस्थ णं तुम्भे अभग्गसेणं चोर-सेणावइं करयल जाव एवं व०-एवं खलु देवाणुप्पिया ! पुरिमताले णयरे महाबलस्स रण्णो उस्सुक्के जाव दसरत्ते पमोए उग्घोसिए तं कि णं देवाणु-प्पिया ! विउलं असणं ४ पुक्कवत्थगंधमल्लालंकारे य इहं हृत्त्वमाणिज्ज उदाहु सयमेव गच्छिता ? तए णं ते कोडुंबियपुरिसा महाबलस्स रण्णो करयल जाव पडिसुणेंति २ ता पुरिमतालाओ णयराओ पडि० णाइविकिट्ठेहि अट्ठाणेहि सुहेहि वसहिपायरासेहि जेणेव सालाडवी चोरपल्ली तेणेव उयागच्छति २ अभग्गसेणं चोरसेणावइं करयल जाव एवं वयासी-एवं खलु देवाणुप्पिया ! पुरिमताले णयरे महाबलस्स रण्णो उस्सुक्के जाव उदाहु सयमेव गच्छिता ? तए णं से अभग्गसेणे चोरसेणावई ते कोडुंबियपुरिसे एवं वयासी-अहं णं देवाणुप्पिया ! पुरिमतालणयरं सयमेव गच्छामि । ते कोडुंबियपुरिसे सक्कारेइ.....पडिविसज्जेइ । तए णं से अभग्गसेणे चोरसेणावई बहूहि मित्त जाव परिवुडे ण्हाए जाव सव्वालकारविभूसिए सालाडवीओ चोरपल्लीओ पडिणिषव-मइ २ ता जेणेव पुरिमताले णयरे जेणेव महाबले राया तेणेव उवागच्छइ २ ता करयल० महाबलं रायं जएणं विजएणं वट्ठावेइ २ ता महत्थं जाव पाहुडं उवणेइ । तए णं से महाबले राया अभग्गसेणस्स चोरसेणावइस्स तं महत्थं जाव पडिच्छइ, अभग्गसेणं चोरसेणावइं सक्कारेइ संमाणेइ पडिविसज्जेइ कूडा-गारसालं च से आवसहं इत्थइ । तए णं से अभग्गसेणे चोरसेणावई महाबलेणं रण्णा विसज्जिए समणे जेणेव कूडागारसाला तेणेव उवागच्छइ । तए णं से महाबले राया कोडुंबियपुरिसे सद्दावेइ २ ता एवं वयासी-गच्छहं णं तुम्भे देवाणुप्पिया ! विउलं असणं पाणं खाइमं साइनं उवक्खडावेह २ ता तं विउलं असणं ४ सुरं च ६ सुबहुं पुक्कवत्थगंधमल्लालंकारं च अभग्गसेणस्स चोरसेणावइस्स कूडागारसालाए उवणेह । तए णं ते कोडुंबियपुरिसा करयल जाव उवणेंति । तए णं से अभग्गसेणे चोरसेणावई बहूहि मित्तगाइ जाव सड्ढि संपरिवुडे ण्हाए जाव विभूसिए तं विउलं असणं ४ सुरं च ६ आसाएमाणे ४ पमत्ते विहरइ । तए णं से महाबले राया कोडुंबियपुरिसे सद्दावेइ २ ता एवं वयासी-गच्छहं

णं तुभ्ये देवाणुपिया । पुरिमतालस्स णयरस्स बुवाराइं पिहे० अभगसेणं चोरसेणावइं जीवगाहं गिण्हह २ ममं उवणेह । तए णं ते कोडुंविथपुरिसा कर-
यल जाव पडिसुणोति २ ता पुरिमतालस्स णयरस्स बुवाराइं पिहेति अभगसेणं चोरसेणावइं जीवगाहं गिण्हति २ महाबलस्स रण्णे उवणोति । तए णं से महा-
बले राया अभगसेणं चोरसेणावइं एएणं विहाणेणं वज्झं आणवेइ । एवं खलु गोयभा । अभगसेणे चोरसेणावई पुरापोराणां जाव विहरइ । अभगसेणे णं भंते ! चोरसेणावई कालमासे कालं किच्चा कहिं गच्छिहिइ ? कहिं उव-
वज्जिहिइ ? गोयभा ! अभगसेणे चोरसेणावई सत्तत्तीसं वासाइं परमाउयं पालइत्ता अज्जेव तिभागावसेसे दिवसे सुलमिण्णे कए समाने कालमासे कालं किच्चा इमीसे रयणप्पमाए उक्कोस.....णेरइएसु उववज्जिहिइ, से णं तओ अणंतरं उववट्टिता.....एवं संसारो जहा पढमे जाव पुढवीए, तओ उववट्टिता वाणारसीए णयरीए सूयरत्ताए पच्छायाहिइ । से णं तत्थ सोयरिएहि जीवि-
याओ खवरोविए समाने तत्थेव वाणारसीए णयरीए सेट्टिकुलंसि पुत्तत्ताए पच्छायाहिइ । से णं तत्थ उम्मक्कवालभावे.....एवं जहा पढमे जाव अंतं काहिइ ॥ णिक्खेवो ॥ १६ ॥ तइयं अज्झयणं समत्तं ॥

सगडे णामं चउत्थं अज्झयणं

जइ णं भंते !चउत्थस्स उक्खेवो, एवं खलु जंबू ! तेणं कालेणं तेणं समएणं साहंजणीए णामं णयरी होत्था रिद्धतिवमियसमिद्धा । तीसे णं साहंजणीए बहिया उत्तरपुरत्थिमे दिसीभाए देवरमणे णामं उज्जाणे होत्था । तत्थणं अमोहस्स जक्खस्स जक्खाययणे होत्था पुराणं० । तत्थ णं साहंजणीए णयरीए महच्चंदे णामं राया होत्था महया० । तस्स णं महच्चंदस्स रण्णे सुसेणे णामं अभच्चे होत्था सामभेयदंडं० णिग्गहकुसले । तत्थ णं साहंजणीए णयरीए सुदरिसणा-णामं गणिया होत्था वण्णओ । तत्थ णं साहंजणीए णयरीए सुभद्दे णामं सत्थवाहे हो० परि-
वसइ अड्ढे० । तस्स णं सुभद्दस्स सत्थवाहस्स भद्दा णामं भारिया होत्था अहीण० । तस्स णं सुभद्दसत्थवाहस्स पुत्ते भद्दाए भारियाए सगडे णामं दारए होत्था अहीण० । तेणं कालेणं तेणं समएणं णगवं महावीरे..... समोसरणं परिसा राया य णिग्गए धम्मो कहिओ परिसा रा० पडिगया । तेणं कालेणं तेणं समएणं

समणस्स भगवओ महावीरस्स जेट्ठे अंतेवासी जाव रायमग्गमोगाढे तत्थ णं
हत्थी आसे पुरिसे.....तेसि च णं पुरिसाणं मज्झगयं पासइ एगं सइत्थीयं
पुरिसं अवओडयबंधणं उक्खित्त जाव घोसिज्जमाणं चित्ता तहेव जाव भगवं
वागरेइ, एवं खलु गोयमा ! तेणं कालेणं तेणं समएणं इहेव जंबुद्वीपे दीवे
भारहे वासे छगलपुरे णामं णयरे होत्था । तत्थ णं सीहगिरी णामं राया होत्था
महया० । तत्थ णं छगलपुरे णयरे छणिए णामं छागलिए परिवसइ
अड्ढे० अहम्मिए जाव दुप्पड्ढियाणंवे । तस्स णं छणियस्स छागलियस्स बह्वे
अयाण य एलयाण य रोज्ञाण य वसमाण य ससयाण य सुयराण य पसयाण
य सिघाण य हरिणाण य मधूराण य महिसाण य सयबद्धाण य सहस्सबद्धाण
य जूहाणि वाडगंसि संणिरुद्धाईं चिट्ठंति, अण्णे य तत्थ बह्वे पुरिसा दिण्ण-
भइभत्तवेयणा बह्वे अए य जाव महिसे य सारवत्तमाणा संगोवेमाणा चिट्ठंति,
अण्णे य से बह्वे पुरिसा अयाण य जाव गिहंसि संणिरुद्धा चिट्ठंति, अण्णे य से
बह्वे पुरिसा दिण्णभइभत्तवेयणा बह्वे अए य जाव सहस्(महि)से य जीवियाओ
ववरोवेति २ मंसाइं कप्पणिकप्पियाइं करंति २ छणियस्स छागलियस्स
उवणेति, अण्णे य से बह्वे पुरिसा ताइं बहूयाइं अयमंसाइं जाव महिसमंसाइं
तवएसु य कवल्लीसु य कंदुएसु य भज्जणेसु य इंगालेसु य तल्लेति य भज्जेति
य सोल्लेति य० तओ रायमग्गंसि विंति कप्पेमाणा विहरंति अप्पणा वि य णं
से छणिए छागलिए तेहि बहुवि० मंसेहि जाव महिसमंसेहि सोल्लेहि य तलि-
एहि य मज्जिएहि य सुरं च ६ आसाएमाणे विहरइ । तए णं से छणिए
छागलिए एयकम्मं....सुबहुं पावकम्मं कलिकलुसं समज्जिणित्ता सत्त-वाससयाइं
परमाउयं पालइत्ता कालमासे कालं किच्च-चोत्थीए पुढवीए उक्कोसेणं दससाग-
रोवमठिइएसु णेरइयत्ताए उववण्णे ॥ २० ॥ तए णं तस्स सुभइ-सत्थवाहस्स
भद्दा भारिया जायणिट्ठया याचि होत्था । जाया-जाया दारगा विणिहायमाव-
ज्जंति । तए णं से छणिए छागलिए चोत्थीए पुढवीए अणतरं उव्वट्ठिता इहेव
साहंजणीए णयरीए सुभइस्स सत्थवाहस्स भद्दाए भारियाए कुच्चिसि पुत्तत्ताए
उववण्णे । तए णं सा भद्दा सत्थवाही अण्णया कयाइ णवहं मासाणं बहुपडि-
पुष्णाणं दारगं पयाया । तए णं तं दारगं अम्मापियरो जायसेत्तं चेव सगडस्स
हेट्ठाओ ठावेति० दोच्चपि गिण्हावेति अणुपुव्वेणं सारवत्तेति संगोवेति संव-

इदंति जहा उज्जिसयए जाव जम्हा णं अम्हं इमे दारए जायमेत्ते चेव सगडस्स हेट्ठा ठाविए तंम्हा णं होउ णं अम्हं एस दारए सगडे णामेणं, सेसं जहा उज्जिस-
यए सुभहे लवणसमुद्धे कालगए मायावि कालगया । से वि सयाओ गिहाओ
णिच्छूढे । तए णं से सगडे दारए सयाओ गिहाओ णिच्छूढे समाणे सिघाडग....
तहेव जाव सुदरिसणाए गणियाए सद्धि संपलम्मे यावि होत्था । तए णं से सुसेणे
अमच्चे तं सगडं दारगं अणया कयाइ सुदरिसणाए गणियाए गिहाओ णिच्छु-
भावेइ २ सुदरिसणियं गणियं अब्भत्तरियं ठावेइ २ ता सुदरिसणाए गणियाए
सद्धि उरालाइं माणुस्सगाइं भोगभोगाइं भुंजमाणे विहरइ । तए णं से सगडे
दारए सुदरिसणाए गिहाओ णिच्छूढे समाणे अणत्थ कत्थवि सुइं वा.....
अलभ०अणया कयाइ रहस्सियं सुदरिसणा-गेहं अणुत्थविसइ २ ता सुदरिसणाए
सद्धि उरालाइं माणुस्सगाइं भोगभोगाइं भुंजमाणे विहरइ । इमं च णं सुसेणे
अमच्चे ष्हाए जाव विभूसिए मणुस्सवग्गुराए जेणेव सुदरिसणाए गणियाए
गेहे तेणेव उवागच्छइ उवागच्छिता सगडं दारयं सुदरिसणाए गणियाए
सद्धि उरालाइं भोगभोगाइं भुंजमाणं पासइ पासिता आसुहत्ते जाव मिसि-
मिसेमाणे तिवलियं मिउडि णिडाले साहट्टं सगडं दारयं पुरिसोहं गिह्हा-
वेइ २ अट्टि जाव महियं करेइ २ अबकोडयबंधणं करेइ २ ता जेणेव महचंदे
राया तेणेव उवागच्छइ उवागच्छिता करयल जाव एवं वयासी-एवं खलु
सामी ! सगडे दारए ममं अंतेउरंसि अवरडे । तए णं से महचंदे राया सुसेणं
अमक्कं एवं वयासी-तुमं चेव णं देवाणुप्पिया । सगडस्स दारगस्स वंडं णिवत्तेहि ।
तए णं से सुसेणे अमक्के महचंदेणं रण्णा अन्नणुण्णाए० समाणे सगडं दारयं
सुदरिसणं च गणियं एएणं विहाणेणं वज्जं आणवेइ । तं एवं खलु गोयमा ।
सगडे दारए पुरापोराणाणं.....पक्कणुभवमाणे विहरइ ॥२१॥ सगडे णं भंते !
दारए कालगए कहिं गच्छहिं० कहिं उववज्जिहिइ ? सगडे णं दारए गोयमा ।
सत्तावण्णं वासाइं परमाउयं पालइत्ता अज्जेव तिभागावसेसे दिवसे एगं महं
अयोमयं तत्तं समजोइभूयं इत्थियडिमं अवयासाविए समाणे कालमासे कालं
किच्चा इमीसे रयणप्पभाए पुढवीए णेरइयत्ताए उववज्जिहिइ । से णं तओ
अणंतरं उव्वट्ठिता रायगिहे णयरे मातंगकुलंसि जूगलत्ताए पच्चायाहिइ । तए
णं तस्स दारगस्स अम्मपियरो णिवत्तवारसगस्स इमं एयारूवं गोष्णं

णामधेज्जं करिस्संति । तं होउ णं दार० सगडे णामेणं होउ णं दारिया सुवरि-
सणा णामेणं । तए णं से सगडे दारए उम्मक्कवालभावे जोव्वणेण.....भविस्सइ ।
तए णं सा सुवरिसणावि दारिया उम्मक्कवालभावा (विण्णय) जोव्वणगम-
णुप्पत्ता रुव्वेण य जोव्वणेण य लावण्णेण य उक्किट्ठा उक्किट्टसरीरा यावि
भविस्सइ । तए णं से सगडे दारए सुदरिसणाए रुव्वेण य जोव्वणेण य लाव-
ण्णेण य मुच्छिए ४ सुदरिसणाए म०सद्धि उरालाई मा० भोगभोगाई भुंजमाणे
विहरिस्सइ । तए णं से सगडे दारए अणया कयाइ सयमेव कूडगाहितं उव-
संपज्जित्ताणं विहरिस्सइ । तए णं से सगडे दारए कूडगाहे भविस्सइ अहम्मिए
जाव दुप्पडियाणं दे एयकम्मि० सुबहुं पावकम्मं जाव समज्जिणत्ता कालमासे
कालं किच्चा इमीसे रयणप्पभाए पुढवीए णेरइयत्ताए उववण्णे । संसारो तहेव
जाव पुढवीए । से णं तओ अणंतरं उव्वट्टित्ता वाणारसीए णयरीए मच्छत्ताए
उववज्जिहिइ । से णं तत्थ णं मच्छबंघिएहि वहिए तत्थेव वाणारसीए णयरीए
सेट्टिकुलंसि पुत्तत्ताए पच्चायाहिइ वोहि बूढे० पव्व० सोहम्मि कप्पे.....महा-
विदेहे वासे सिज्जिहिइ ॥ णिवखेवो ॥२२॥ चउत्थं अज्जयणं समत्तं ॥

बहस्सइदत्ते णामं पंचमं अज्जयणं

जह णं भंते !.....पंचमस्स अज्जयणस्स उवखेवो । एवं खलु जंढू ।
तेणं कालेणं तेणं समएणं कोसंबी णामं णयरी होत्था रिद्धत्थिमिय० बाहि
चंदोयरणे उज्जाणे, सेयमहे जख्खे । तत्थ णं कोसंबीए णयरीए सयाणीए णामं
राया होत्था महया० । मियावई देवी । तस्स णं सयाणीयस्स पुत्ते मियादेवीए
अत्तए उदायणे णामं कुमारे होत्था अहीण० जुवराया । तस्स णं उदायणस्स
कुमारस्स पउमावई णामं देवी होत्था । तस्स णं सयाणीयस्स सोमदत्ते णामं
पुरोहिए होत्था रिउवेय० । तस्स णं सोमदत्तस्स पुरोहिस्स वसुदत्ता णामं
भारिया होत्था । तस्स णं सोमदत्तस्स पुत्ते वसुदत्ताए अत्तए बहस्सइदत्ते णामं
दारए होत्था अहीण० । तेणं कालेणं तेणं समएणं समणे भगवं महावीरे.....
समोसरणं । तेणं कालेणं तेणं समएणं भगवं गोयमे तहेव जाव रायमगमोगाढे
तहेव पासइ हत्थो आसे पुरिसमज्जे पुरिसं चिंता तहेव पुच्छइ पुव्वमवं भगवं
वागरेइ-एवं खलु गोयमा ! तेणं कालेणं तेणं समएणं इहेव जंढूदीवे दीवे

भारहेवासे सव्वओभद्वे णामं णयरे होत्था रिद्धत्थिमियसपि० । तत्थ णं सव्व-
ओभद्वे णयरे जियसत्तू णामं राया हो० । तस्स णं जियसत्तस्स रण्णो महेसर-
दत्ते णामं पुरोहिए होत्था रिउव्वेय जाव अथव्वणकुसले यावि होत्था । तए णं
से महेसरदत्ते पुरोहिए जियसत्तस्स रण्णो रज्जबलविवद्धणअट्टयाए कल्लाकल्लि
एगमेगं माहणदारयं एगमेगं खल्लियदारयं एगमेगं वइस्सदारयं एगमेगं सुद्धदारयं
गिण्हावेइ २ ता तेसि जीवंतगाणं चेव हिययउंडए गिण्हावेइ २ जियसत्तस्स रण्णो
संतिहोमं करेइ । तए णं से महेसरदत्ते पुरोहिए अट्टमीचाइसीसु दुवे २ माहण-
खल्लियवइस्स सुद्धे चउण्हं मासाणं चत्तारि २ छण्हं मासाणं अट्ट २ संवच्छरस्स
सोलस २ जाहे जाहेवि य णं जियसत्तू राया परबलेणं अभिज्जुंजइ ताहे ताहेवि य
णं से महेसरदत्ते पुरोहिए अट्टसयं माहणदारगाणं अट्टसयं खल्लियदारगाणं अट्ट-
सयं वइस्सदारगाणं अट्टसयं सुद्धदारगाणं पुरिसेहिं गिण्हावेइ गिण्हावेत्ता तेसि
जीवंतगाणं चेव हिययउंडीओ गिण्हावेइ २ ता जियसत्तस्स रण्णो संतिहोमं करेइ
तए णं से परबले खिप्पामेव विद्धंसिज्जइ वा पडिसेहिज्जइ वा ॥ २३ ॥ तए
णं से महेसरदत्ते पुरोहिए एयकम्मे० सुबह्वं पावकम्मं समज्जिणित्ता तीसं वास-
सयं परमाउयं पालइत्ता कालमासे कालं किच्चा पंचमीए पुढबीए उव्वकोसेणं सत्त-
रससागरोवमट्टिइए णरगे उव्ववण्णे । से णं ताओ अणंतरं उव्वट्टित्ता इहेव कोसं-
बीए णयरीए सोमदत्तस्स पुरोहियस्स वसुदत्ताए भारियाए पुत्तत्ताए उव्ववण्णे ।
तए णं तस्स दारगस्स उम्मापियरो णिव्वत्तबारसाहस्स इयं एगारूवं णामधेज्जं
करेंति । जम्हा णं अम्हं इमे दारए सोमदत्तस्स पुरोहियस्स पुत्ते वसुदत्ताए
अत्तए तम्हा णं होउ अम्हं दारए बहस्सइदत्ते णामेणं । तए णं से बहस्सइदत्ते
दारए पंचधाईपरिगहिए जाव परिवड्डइ । तए णं से बहस्सइदत्ते उम्मुक्कबाल-
पावे ओव्वण० विण्णय० होत्था । से णं उदायणस्स कुमारस्स पियबालवयस्सए
यावि होत्था सहजायए सहवड्डियए सहपंसुकीलियए । तए णं से सयाणीए
राया अण्णया कयाइ कालघम्मुणा संजत्ते । तए णं से उदायणकुमारे बहूहि
राईसर जाव सत्थवाहप्पमिईहिं सद्धिं संपरिवुडे रोयमाणे कंदमाणे विलवमाणे
सयाणीयस्स रण्णो महया इड्ढीसक्कारसमुदएणं णीहरणं करेइ २ बहूइं लोइ-
याइ मयकिच्चाइं करेइ । तए णं से बहूवे राईसर जाव सत्थवाह० उदायणं कुमारं
मह० रायाभिसेएणं अभिसिचंति । तए णं से उदायणे कुमारे राया जाए महया० ।

तए णं से बहस्सइदत्ते दारए उदायणस्स रण्णे पुरोहिक्कम्मं करेमाणे सव्वट्टा-
 णेषु सव्वभूमियासु अंतेउरे य दिण्णवियारे जाए यावि होत्था । तए णं से
 बहस्सइदत्ते पुरोहिए उदायणस्स रण्णे अंतेउरंसि वेलासु य अवेलासु य काले
 य अकाले य राओ य वियाले य पविसमाणे अण्णया कयाइ पउमावईए देवीए
 सद्धि संपलग्गे यावि होत्था पउमावईए देवीए सद्धि उरालाई भोगभोगाईं भुंज-
 माणे विहरइ । इमं च णं उदायणे राया ण्हाए जाव विम्मिए जेणेव पउमावई
 देवी तेणेव उवागच्छइ २ बहस्सइदत्तं पुरोहिं पउमावईदेवीए सद्धि उरालाईं
 भोगभोगाईं भुंजमाणं पासइ २ आसुहत्ते.....तिवत्तियं सिउडिं णिडाले साहट्ट
 बहस्सइदत्ते पुरोहिं पुरिसेहिं गिण्हावेइ जाव एएणं विहाणेणं वज्जं आ०, एवं
 खलु गोयमा ! बहस्सइदत्ते पुरोहिं पुरापोराणाणं जाव विहरइ । बहस्सइ-
 दत्ते णं भंते ! दारए इओ कालगए समाणे कहिं गच्छिहिइ कहिं उववज्जि-
 हिइ ? गोयमा ! बहस्सइदत्ते णं दारए पुरोहिं चोसद्धिं वासाईं परमाउयं
 पालइत्ता अज्जेव तिभागावसेसे दिवसे सुलीमिण्णे कए समाणे कालमासे कालं
 किच्चा इमीसे रयणप्पभाए पुढवीए०, संसारी तहेव० पुढवी, तओ हत्थिणाउरे
 णयरे मियत्ताए पच्चयायाइस्सइ, से णं तत्थ वाउरिंएहिं बहिं समाणे तत्थेव
 हत्थिणाउरे णयरे सेट्टिकुलंसि पुत्तत्ताए० बोहिं० तोहस्से कप्पे० महाविदेहे वासे
 सिज्जिहिं ॥ णिवखेवो ॥ पंचमं अज्जयणं समत्तं ॥

णंदिवद्धणे णामं छट्ठं अज्जयणं

जइ णं भंते !छट्ठस्स उवखेवो एवं खलु जंबू ! तेणं कालेणं तेणं सम-
 एणं महुरा णामं णयरी, भंडीरे उज्जाणे, सुदंसणे जवक्खे, सिरिदामे राया,
 बंधुसिरी भारिया पुत्ते णंदिवद्धणे णामं कुमारे अही० जुवराया । तस्स णं सिरि-
 दामस्स सुबंधू णामं अमच्चे होत्था सामदंड० । तस्स णं सुवन्धुस्स अमच्चस्स
 बहुमित्तपुत्ते णामं दारए होत्था अहीण० । तस्स णं सिरिदामस्स रण्णे चित्ते
 णामं अलंकारिं होत्था, सिरिदामस्स रण्णे चित्तं बहुविहं अलंकारियकम्मं
 करेमाणे सव्वट्टाणेषु य सव्वभूमियासु य दिण्णवियारे यावि होत्था । तेणं
 कालेणं तेणं समएणं सामी समोसडे परिसा णिग्गया रायावि णिग्गओ जाव
 परिसा पडिग्गया । तेणं कालेणं तेणं समएणं समण० जेट्ठे.....जाव रायमग्ग-

मोगाडे तहेव हृथी आसे पुरिसे.....तेसि च णं पुरिसाणं मज्झगयं एणं पुरिसं
 पासइ जाव णरणारीसंपरिवुडं । तए णं तं पुरिसं रायपुरिसा चच्चरंसि तत्तंसि
 अयोमयंसि समजोइभूयसीहासणंसि णिवेसावेति, तयाणंतरं च णं पुरिसाणं
 मज्झगयं बहुविहं अयकलसेहि तत्तेहि समजोइभूएहि अप्पेगइया तंबभरिएहि
 अप्पेगइया तउयभरिएहि अप्पेगइया सीसगभरिएहि अप्पेगइया कलकलभरि-
 एहि अप्पेगइया खारतेल्लभरिएहि महया २ रायाभिसेएणं अभिसि०, तयाणंतरं
 च णं तत्तं अयोमयं समजोइभूयं अयोमयसंढासएणं गहाय हारं पिणद्धंति ।
 तयाणंतरं च णं अड्डहारं जाव पट्टं मउडं चिंता तहेव जाव धामरेइ-एवं खलु
 गोयमा ! तेणं कालेणं तेणं समएणं इहेव जंबूहीवे बीवे भारहेक्खे सीहपुरे
 णामं णयरे होत्था रिद्धं० । तत्थ णं सीहपुरे णयरे सीहुरहे णामं राया होत्था ।
 तस्स णं सीहुरहस्स रण्णे बुज्जोहणे णामं चारगपालए होत्था अहम्मिए जाव
 दुप्पडियाणंवे, तस्स णं बुज्जोहणस्स चारगपालगस्स इमेयारूवे चारगमंडे होत्था-
 बहवे अयकुंडीओ अप्पेगइयाओ तंबभरियाओ अप्पेगइयाओ तउयभरियाओ अप्पे-
 गइयाओ सीसगभरियाओ अप्पेगइया कलकलभरियाओ अप्पेगइयाओ खार-
 तेल्लभरियाओ अगणिकार्यंसि अट्टहियाओ चिट्ठंति । तस्स णं बुज्जोहणस्स
 चारगपालगस्स बहवे उट्टियाओ अप्पेगइयाओ आसमुत्तभरियाओ अप्पेगइयाओ
 हत्थिमुत्तभरियाओ अप्पेगइयाओ गोमुत्तभरियाओ अप्पेगइयाओ महिसमुत्तभरि-
 याओ अप्पेगइयाओ उट्टमुत्तभरियाओ अप्पेगइयाओ अयमुत्तभरियाओ अप्पे-
 गइयाओ एल(य)मुत्तभरियाओ बहुपडिपुण्णाओ चिट्ठंति । तस्स णं बुज्जो-
 हणस्स चारगपालगस्स बहवे ह्त्थंबुयाण य पायं-दुयाण य हडीण य णियंलाण
 य संकलाण य पुंजा य णिगरा य संणिबिख्खा चिट्ठंति । तस्स णं बुज्जोहणस्स
 चारगपालगस्स बहवे वेणुलयाण य वेत्तलयाण य चिचालयाण य छियाण
 य क्खसाण य वायरासीण य पुंजा णिगरा चिट्ठंति, तस्स णं बुज्जोहणस्स
 चारगपालगस्स बहवे सिलाण य लउडायण य भोगराण य कणंगराण य पुंजा
 णिगरा चिट्ठंति । तस्स णं बुज्जोहणस्स चारगपालगस्स बहवे तंताण य वर-
 ताण य चागुरयाण य वाल्थमुत्तरज्जुण य पुंजा णिगरा चिट्ठंति । तस्स
 णं बुज्जोहणस्स चारगपालगस्स बहवे असिपत्ताण य करपत्ताण य खुरपत्ताण
 य कलंबचीरपत्ताण य पुंजा णिगरा चिट्ठंति । तस्स णं बुज्जोहणस्स चारगपा-
 लगस्स बहवे लोह्खीलाण य कडसक्कराण य चम्भपट्टाण य अल्लपत्ताण

य पुंजा णिगरा चिट्ठंति । तस्स णं दुज्जोहणस्स चारगपालगस्स बह्वे सूर्इण
 य डंभणाण य कोट्टिल्लाण य पुंजा णिगरा चिट्ठंति । तस्स णं दुज्जोहणस्स
 चारगपालगस्स बह्वे पच्छा(सत्था)ण य पिप्पलाण य कुहाडाण य णहच्छेयणाण
 य दम्भतिणाण य पुंजा णिगरा चिट्ठंति । तए णं से दुज्जोहणे चारगपालए
 सीहरहस्स रण्णो बह्वे चीरे य पारदारिए य गंठिभेए य रायावघारी य अण-
 धारए य बालघायए य विसंभघाए य जूयगरे य संडपट्टे य पुरिसेहिं गिण्हा-
 वेइ २ ता उत्ताणए पाडेइ २ लोहवंडेणं मुहं विहाडेइ २ अप्पेगइए तत्ततंबं
 पज्जेइ अप्पेगइए तउयं पज्जेइ अप्पेगइए सीसगं पज्जेइ अप्पेगइए कलकलं
 पज्जेइ अप्पेगइए खारतेल्लं पज्जेइ अप्पेगइयाणं तेणं सेव अभिसेयणं करेइ ।
 अप्पेगइए उत्ताणए पाडेइ २ आसमुत्तं पज्जेइ अप्पेगइए हत्थियमुत्तं पज्जेइ जाव
 एलमुत्तं पज्जेइ, अप्पेगइए हेट्ठामुहे पाडेइ, छइछइस्स वम्मावेइ, २ अप्पेगइ-
 याणं तेणं सेव ओवीलं दलयइ, अप्पेगइए हत्थं-दुयाइं बंधावेइ अप्पेगइए पायं-
 दुए बंधावेइ, अप्पेगइए हडिबंधणं करेइ अप्पेगइए णियडबंधणं करेइ अप्पेगइए
 संकलबंधणं करेइ, अप्पेगइए संकोडियमोडियए करेइ अप्पेगइए हत्थच्छिण्णाए
 करेइ जाव सत्थोवाडिए करेइ, अप्पेगइए वेणुलयाहिं य जाव वायरासीहिं य
 हणावेइ, अप्पेगइए उत्ताणए कारवेइ २ उरे सिलं दलावेइ० तओ लउडं छुहा-
 वेइ २ ता पुरिसेहिं उवकंपावेइ, अप्पेगइए तंतीहिं य जाव सुत्तरज्जूहिं य
 हत्थेसु य पाएसु य बंधावेइ अगडंसि उच्चूलयालगं पज्जेइ, अप्पेगइए असि-
 पत्तेहिं य जाव कलंबचीरपत्तेहिं य पच्छावेइ २ खारतेल्लेणं अम्भंगावेइ ।
 अप्पे० णिलाडेसु य अवद्धसु य कोप्परेसु य जाणसु य खलुएसु य लोहकीलए
 य कडसक्काराओ य दवावेइ अलिए भंजावेइ । अप्पेगइए सूर्इओ य डंभणाणि
 य हत्थंगुलियासु य पायंगुलियासु य कोट्टिल्लएहिं आउडावेइ २ ता भूमि कंड्या-
 वेइ । अप्पेगइए सत्थेहिं य जाव णहच्छेयणेहिं य अंगं पच्छावेइ दम्भेहिं य
 कुसेहिं य थोल्लबद्धेहिं य वेढावेइ २ आयवंसि दलयइ २ सुवके समाणे चड-
 चडस्स उप्पाडेइ । तए णं से दुज्जोहणे चारगपालए एयकम्मे ४ सुबहुं षावकम्मं
 समज्जिणित्ता एगतीसं वाससयाइं परमाउयं पालइत्ता कालमासे कालं किच्चा
 छट्ठीए पुढवीए उवकोसेणं बावीससागरोवमठिइएसु णेरइत्ताए उववण्णे ॥२५॥
 से णं तओ अणंतरं उच्चट्टित्ता इहेव महुराए णयरीए सिरिदामस्स रण्णो बंधु-

सिरीए देवीए कुच्छिसि पुत्ताए उववणे । तए णं बंधुसिरी णवण्हं मासाणं
 वहुपडिपुष्णाणं जाव दारगं पयाया । तए णं तस्स दारगस्स अम्मापिधरो
 णिव्वत्ते दारसाहे इमं एयारूव्वं णामधेज्जं करेत्ति होउ णं अम्हं दार० णंदिसेणे
 णामेणं । तए णं से णंदिसेणे कुमारे पंचघाईपरिवुडे जाव परिववुइ । तए णं से
 णंदिसेणे कुमारे उम्मुक्कबालभावे जाव विहरइ जोव्व० जुवराया जाए यावि
 होत्था । तए णं से णंदिसेणे कुमारे रज्जे य जाव अंतेउरे य मुच्छिए इच्छइ
 सिरिदामं रायं जीवियाओ ववरोवित्तए सयमेव रज्जसिरी कारेमाणे पालेमाणे
 विहरित्तए । तए णं से णंदिसेणे कुमारे सिरिदामस्स रण्णे बहूणि अंतराणि य
 छिद्दाणि य विवराणि य पडिजागरमाणे विहरइ । तए णं से णंदिसेणे कुमारे
 सिरिदामस्स रण्णे अंतरं अलसमाणे अणया कयाइ चित्तं अलंकारियं सहा-
 वेइ २ ता एवं वयासी—तुम्हे णं देवाणुप्पिया ! सिरिदामस्स रण्णे सव्वहाणंसु
 य सव्वभूमिसु य अंतेउरे य विणवियारे सिरिदामस्स रण्णे अभिक्खणं २
 अलंकारियं कम्मं करेमाणे विहरसि तं णं तु० देवाणुप्पिया ! सिरिदामस्स
 रण्णे अलंकारियं कम्मं करेमाणे गोवाए खुरं णिवेसेहि तो णं अहं तुम्हं अद्ध-
 रज्जयं करिस्सामि तुभं अम्हेहिं सद्धिं उरालाईं भोगभोगाईं भुंजमाणे विह-
 रिस्ससि । तए णं से चित्ते अलंकारिए णंदिसेणस्स कुमारस्स वयणं एयमट्ठं
 पडिसुणेइ । तए णं तस्स चित्तस्स अलंकारियस्स इमेयारूवे जाव समुप्पज्जित्था-
 जइ णं मम सिरिदामे राया एयमट्ठं आगमेइ तए णं म० ण णज्जइ केणइ
 असुभेणं कुमारणेणं सारिस्सइत्तिकट्टु भी० जेणेव सिरिदामे राया तेणेव उवा-
 गच्छइ २ सिरिदामं रायं रहस्सियं करयल० एवं वयासी—एवं खलु सामी !
 णंदिसेणे कुमारे रज्जे य जाव मुच्छिए इच्छइ तुभं जीवियाओ ववरोवित्ता
 सयमेव रज्जसिरी कारेमाणे पालेमाणे विहरित्तए । तए णं से सिरिदामे राया
 चित्तस्स अलंकारियस्स अंतिए एयमट्ठं सोच्चा णिसम्म आमुहत्ते जाव साह-
 ट्टु णंदिसेणं कुमारं पुरिसेहिं सद्धिं गिण्हावेइ, २ एएणं विहाणेणं वज्जं आण-
 वेइ । तं एवं खलु गोयमा ! णंदिसेणे (पुत्ते) जाव विहरइ, णंदिसेणे कुमारे इओ
 च्चुए कालमासे कालं किच्चा कहिं गच्छहिइ कहिं उववज्जिहिइ ? गोयमा ।
 णंदिसेणे कुमारे सद्धिं वासाईं परभाउयं पालइत्ता कालमासे कालं किच्चा
 इमीसे रयणप्पभाए पुढवीए०, संसारी तहे० तओ हत्थिणाउरे णयरे मच्छत्ताए

उववज्जिह्द । से णं तत्थ मच्छिह्दि व्हिए समाणे तत्थेव सेट्टिकुले....वोहिं....
सोहम्मे कप्पे....महाविदेहे वासे सिज्जिह्दि बुज्जिह्दि मुच्चिह्दि परिणिव्वाहिं
सव्वदुक्खाणमंतं करेहिं ॥ णिक्खेवो ॥२६॥ छट्ठमं अज्झयणं समत्तं ॥

उंबरदत्ते णामं सत्तमं अज्झयणं

जइ णं भंते !सत्तमस्स उक्खेवो एवं खलु जंबू ! तेणं कालेणं तेणं
समएणं पाडलिसंडे णयरे, वणसंडे णामं उज्जाणे, उंबरदत्तो जक्खो । तत्थ णं
पाडलिसंडे णयरे सिद्धत्थे राया । तत्थ णं पाडलिसंडे णयरे सागरदत्ते मत्थ-
वाहे होत्था अड्ढे० गंगदत्ता भारिया । तस्स णं सागरदत्तस्स पुत्ते गंगदत्ताए
भारियाए अत्तए उंबरदत्ते णामं दारए होत्था अहीण जाव पच्चिदियमरीरे । तेणं
कालेणं तेणं स० समोसरणं जाव परिसा पडिगया । तेणं कालेणं तेणं समएणं
भगवं गोयमे तहेव जेणेव पाडलिसंडे णयरे तेणेव उवागच्छइ २ पाडलिसंडं
णयरं पुरत्थिमिल्लेणं दुवारेणं अणुपविसइ २ तत्थ णं पासइ एगं पुरिसं
कच्छुल्लं कौट्ठियं दोउयरियं भगंदरियं अरिसिल्लं कासिल्लं सामिल्लं सोगलं
सूयमुहं सूयहत्थं सूयपायं सडियहत्थंगुलियं सडियपायंगुलियं सडिकण्ण-णांसिय
रसियाए य पूइए ण यिचिचियित्तवणमूहकिमिउत्तयंतपुवगलंतपूयरुहिरं लालापग-
लंतकण्णणासं अभिक्खणं २ पूयकवले य रुहिरकवले य किमियकवले य वम-
माणं कट्टाई कलुणाई वीसराई कूयमाणं मच्छिद्याच्चडगरपह्करेणं अण्णिज्जमा-
णमगं फुट्टुहडाहडसीसं वंडिखंडवसणं खंडमल्लगखंडघडहत्थगयं गेहे २ देहं-
बलियाए वित्ति कप्पेमाणं पासइ, तथा भगवं गोयमे ! उच्चणीय जाव अडइ २
अहापज्जत्तं० गिण्ह० पाड० पडिणिक्खमइ २ जेणेव समणे भगवं० भत्तपाणं
आलोएइ भत्तपाणं पडिदसेइ समणेणं....अहमणुणाए समाणे जाव बिलमिद
पण्णगमूए अप्पाणेणं आहारमाहारेइ, संजमेणं तवसा अप्पाणं भावेमाणे विह-
रइ । तए णं से भगवं गोयमे दोच्चंपि छट्ठक्खमणपारणगंसि पढमाए पोरिसीए
सज्जायं जाव पाडलिसंडं णयरं दाहिणिल्लेणं दुवारेणं अणुपविसइ तं चेव
पुरिसं पासइ कच्छुल्लं तहेव जाव संजमेणं तवसा० विहरइ । तए णं से गोयमे
त० छट्ठं तहेव जाव पच्चत्थिमिल्लेणं दुवारेणं अणुपविसमाणे तं चेव पुरिसं
कच्छुल्लं....पास० चोत्थं पि छट्ठ उत्तरेणं इ० अज्जत्थिए समुप्पण्णे—अहो णं

इमे पुरिसे पुरापोराणाणं जाव एवं वयासी-एवं खलु अहं भते ! छट्टुं जाव
 रीयंते अणेव पाडलिसंडे णयरे तेणेव उवागच्छामि २ ता पाड० पुरत्थिमि-
 ल्लेणं दुवारेणं अणुपविट्ठे, तत्थ णं एमं पुरिसं पासामि कच्छुल्लं जाव कप्पे-
 माणं० अहं दोच्चच्छ० पारणगंसि बाह्णिगिल्लेणं दुवारेणं..... तच्चच्छट्टुवत्तमण०
 पच्चस्थिमेणं तहेव० अहं चोत्थच्छट्टु० उत्तरदुवारेणं अणुप्विसामि तं चेव
 पुरिसं पासामि कच्छुल्लं जाव विंति कप्पेमा० विह० चित्ता मम पुच्चमवपुच्छा०
 वागरेइ-एवं खलु गोयमा ! तेणं कालेणं तेणं समएणं इहेव जंबुदीवे दीवे
 चारहे वासे विजयपुरे णामं णयरे होत्था रिद्ध० । तत्थ णं विजयपुरे णयरे
 कणगरहे णामं राया होत्था । तस्स णं कणगरहस्स रण्णे घण्णंतरी णामं वेज्जे
 होत्था अट्ठंगाउध्वेयपाइए, तं०-कुमारभिक्षं १ सालामे २ सल्लहत्ते ३ काय-
 तिगिच्छा ४ जंगोले ५ भूयविज्जे ३ रसायणे ७ वाजीकरणे ८ सिवहत्थे
 सुहहत्थे लहत्थे । तए णं से घण्णंतरी वेज्जे विजयपुरे णयरे कणगरहस्स रण्णे
 अंतेउरे य अण्णेसि च बहूणं राईसर जाव सत्थवाहाणं अण्णेसि च बहूणं दुव्व-
 लाण य गिलाणाण य बाहिधाण य रोगियाण य अणाहाण य सणाहाण य
 समणाण य माहणाण य भिक्खुभाण य करोडियाण य कप्पडियाण य आउराण
 य अप्पेगइयाणं मच्छमंसाइं उव्वेसेइ अप्पेगइयाणं कच्छपमंसाइं (उव्वि०)
 अप्पेगइयाणं गाहमं० अप्पेगइयाणं मगरमं० अप्पेगइयाणं सुसुभारमं० अप्पे-
 गइयाणं अयमं० एवं एलय-रोज्ज-सूयर-मिग-ससय-गोमंस-महिसमंसाइं अप्पे-
 गइयाणं तित्तरमंसाइं अप्पेगइयाणं वट्टक-लावक-कवोय-कुवकुड-मयूरमंसाइं
 अण्णेसि च बहूणं जलयरथलयरखहयरमाईणं मंसाइं उव्वेसेइ अप्पणावि य
 णं से घण्णंतरी वेज्जे तेहिं बहूहिं मच्छमंसेहिं य जाव मयूरमंसेहिं य अण्णेहिं
 य बहूहिं जलयरथलयरखहयरमंसेहिं य सोल्लेहिं य तलिएहिं य मज्जिणएहिं
 य सुरं च ६ आसाएमाणे विसाएमाणे विहरइ । तए णं से घण्णंतरी वेज्जे
 एयकम्मे० सुबहूं पावं कम्मं समज्जिणित्ता बत्तीसं वाससयाइं परमाउयं
 पालइत्ता कालभासे कालं किच्चा छट्ठीए पुडवीए उक्कोसेणं बावीससा-
 गरोव० उव्ववणे । तए णं सा गंगवत्ता भारिया जाय-णिदुया यावि होत्था
 जाया-जाया वारगा विणिहायमावज्जति । तए णं तीसे गंगवत्ताए सत्थवाहीए
 अण्णया कयाइ पुव्वरत्तावरत्तकालसमयसि कुडुंबजागरियं जागरमा० अमं

अवज्ञास्त्रिये० समुत्पन्ने—एवं खलु अहं सागरदत्तेणं सत्थवाहेणं सद्धिं बहूइं वासाइं उरालाइं माणुस्सगाइं भोगभोगाइं भुंजमाणीं विहरामि, यो चेव णं अहं दारगं वा दारियं वा पयामि । तं धण्णाओ णं ताओ अम्मयाओ म्पुण्णाओ कयथाओ कयपु० कयलक्खणाओ सुलद्धे णं तासिं अम्मयाणं माणुस्सए जम्मजीवियफले जासिं मण्णे णियमकुच्चिस्संभूयाइं थणहुद्धलुद्धयाइं महुरसमुत्लावगाइं मम्म-णपजपियाइं थणमूलकक्खवेसभागं अभिसरमाणयाइं मूढयाइं पुणो य कोमलकमलोच्चमेहिं हत्थेहिं गिह्हेऊण उच्छंणिवेमियाइं देतिं समुत्लावए सुमहुरे पुणो-पुणो मंजुलत्पमणिए । अहं णं अधण्णा अपुण्णा अकयपुण्णा एत्तो एगमवि ण पत्ता, तं सेयं खलु मम कल्लं जाव जलंते सागरदत्तं सत्थवाहं आपुच्चित्ता सुबहुं पुफक्खत्थगंधमल्लालंकारं गहाय बटुमित्थाइणियधगसयण-संबंधिपरिधणमहिलाहिं सद्धिं पाडलिसंडाओ णवराओ पडिणिक्वमिता बहिया जेणेव उंबरदत्तस्स ज्वलस्स ज्वखाययणे तेणेव उवागच्छत्तए तत्थ णं उंबरदत्तस्स ज्वलस्स महुरिहं पुफक्खणं करित्ता जाणुपायवडियाए ओवाइत्तए—जइ णं अहं देवाणुप्पिया ! दारयं वा दारियं वा पयामि तो णं अहं तुमं जायं च दायं च मायं च अवखय-णिहिं च । अणुवडुहस्सामित्तिकट्टु ओवाइयं उवाइणित्तए, एवं सपेहेइ २ ता कल्लं जाव जलंते जेणेव सागरदत्ते सत्थवाहे तेणेव उवागच्छइ २ ता सागरदत्तं सत्थवाहं एवं वयासी—एवं खलु अहं देवाणुप्पिया । तुम्भेहिं सद्धिं जाव ण पत्ता, तं इच्छामि णं देवाणुप्पिया ! तुम्भेहिं अब्भणुण्णाया जाव उवाइणित्तए । तए णं से सागरदत्ते स० गंगदत्तं भारियं एवं वयासी—ममापि णं देवाणु० एस खेव महोरहे कहं णं तुमं दारयं वा दारियं वा पयाएज्जसि ? गंगदत्ताए भारियाए एयमट्ठं अणुजाणइ । तए णं सा गंगदत्ता भारिया सागरदत्तसत्थवाहेणं एयमट्ठं अब्भणुण्णाया समानी सुबहुं पुफक्ख जाव महिलाहिं सद्धिं सयाओ गिहाओ पडिणिक्वमइ २ ता पाडलिसंडं गधरं मज्झमज्झेणं णिग्गच्छइ २ ता जेणेव पुक्खरिणी तेणेव उवागच्छइ २ ता पुक्खरिणीए तीरे सुबहुं पुफक्खत्थगंधमल्लालंकारं ठवेइ २ ता पुक्खरिणी ओगा-हेइ २ ता जलमज्ज्जं करेइ २ ता जलकीडं करेइ २ ता गहाया कयबलिकम्भा जाव पाथिच्छत्ता उल्लपडसाडिया पुक्खरिणीओ पच्चुत्तरइ २ तातं पुफ्फ० गिह्हेइ २ ता जेणेव उंबरदत्तस्स ज्वलस्स ज्वखाययणे तेणेव उवागच्छइ २ ता उंबर-

दत्तस जखस्स आलोए पणामं करेइ २ ता लोमहत्थं परामुसइ० उंबरवत्तं
जखं लोमहत्थेर्षं पमज्जइ २ ता दगधाराए अम्मख्खेइ २ ता पम्हल० गायल०
ओलूहेइ २ ता सेयाइं वत्थाइं परिहेइ २ महरिहं पुफ्फारुहणं वत्थारुहणं
मत्तारुहणं गंधारुहणं चण्णारुहणं करेइ २ ता धूवं डहेइ २ जानुपायवडिया
एवं वयइ—जइ णं अहं वेवाणुप्पिया ! दारयं वा वारियं वा पयामि तो णं.....
जाव उवाइणइ २ ता जामेव विसि पाउब्भूया तामेव विसि पडिगया । तए णं
से घण्णंतरी वेज्जेताओ गरयाओ अणंतरं उच्चट्टिता इहेव जंबुद्धीवे दीवे भारहे
वासे पाडलिसिंडे णयरे गंगदत्ताए भारियाए कुच्छिसि पुत्तत्ताए उववण्णे । तए
णं तीसे गंगदत्ताए भारियाए तिष्णं मासाणं बहुपडिपुण्णाणं अयमेघारूवे दोहले
पाउब्भूए—घण्णाओ णं ताओ जाव फले जाओ णं विउलं असणं ४ उवक्खडावेत्ति
२ ता बह्हीहि जाव परिवुडाओ तं विउलं असणं ४ सुरं च ६ पुफ्फ जाव गहाय
पाडलिसिंडं णयरं मज्झमज्जेणं पडिणिक्खमंति २ ता जेणेव पुक्खरिणी तेणेव उवा-
गच्छति २ ता पुक्खरिणी ओगाहेति २ ष्हायाओ जाव पायच्छित्ताओ तं विउलं
असणं ४ बह्हीहि मित्तणाइ जाव सट्ठि आसाए० दोहलं विणोति, एवं संपेहेइ २ ता
कलं जाव जलंते जेणेव सागरदत्ते सत्थवाहे तेणेव उवागच्छइ २ ता सागरदत्तं
सत्थवाहं एवं वयासी—घण्णाओ णं ताओ.....जाव विणोति तं इच्छामि णं जाव
विणित्तए । तए णं से सागरदत्ते सत्थवाहे गंगदत्ताए भारियाए एयमट्ठं अणु-
जाणइ । तए णं सा गंगदत्ता सागरदत्तेणं सत्थवाहेणं अम्मणुष्णया समाणो
विउलं असणं ४ उवक्खडावेइ २ तं विउलं असणं ४ सुरं च ६ सुवहुं पुफ्फ०
परिगिष्हावेइ २ बह्हीहि जाव ष्हाया कयक्कलिकम्मा कयकोउय-मंगल-पायच्छित्ता
जेणेव उंबरवत्तस जखस्स अक्खाययणे जाव धूवं डहेइ० जेणेव पुक्खरिणी
तेणेव उवागच्छइ । तए णं ताओ मित्त जाव महिलाओ गंगदत्तं सत्थवाहि सग्वा-
लंकारविमूसियं करेति । तए णं सा गंगदत्ता भारिया ताहि मित्तणाईहि अण्णाहि
बह्हीहि णगरमहिलाहि सट्ठि तं विउलं असणं ४ सुरं च ६.....दोहलं विणेइ
२ ता जामेव विसि पाउब्भूया तामेव विसि पडिगया । तए णं सा गंगदत्ता
सत्थवाही पसत्थ दोहला तं गम्भं सुहंसुहेणं परिवहइ । तए णं सा गंगदत्ता
भारिया णवण्हं मासाणं जाव पयाया ठिइवडिया जाव जम्हा णं अम्मं
इमे दारए उंबरदत्तस जखस्स ओवाइयलइए तं होउ णं दारए उंबरदत्ते

णामेणं । तए णं से उंबरदत्ते दारए पंचघाईपरिग्गहिए....परिवट्टइ । तए णं से सागरदत्ते सत्थवाहे जहा विजयमिसे जाव कालं गंगदत्ता वि.....उंबर-
दत्ते णिच्छूढे जहा उज्झयए । तए णं तस्स उंबरदत्तस्स दारगस्स अण्णया
कयाइ सरीरगंसि जमगसमगमेव सोलस-रोगायका पाउड्ढूया, तं०-सासे
कासे जाव कोढे । तए णं से उंबरदत्ते दारए सोलसाईहं रोगायकेहिं अभि-
भूए समाणे० जाव विहरइ । एवं खलु गोयमा ! उंबरदत्ते दारए पुरापोरा-
णाणं जाव पचत्तणुभवमाणे विहरइ । तए णं से उंबरदत्ते कालमासे कालं
किच्चा कहिं गच्छिहिइ कहिं उववज्जिहिइ ? गोयमा ! उंबरदत्ते दारए वाव-
त्तरि वासाइं परमाउयं पालइत्ता कालमामे कालं किच्चा इमीसे रयणप्पमाए
पुढवीए णेरइयत्ताए उवव०, संसारो तहेव जाव पुढवी, तओ हत्थिणाउरे णयरे
कुवकुडत्ताए पच्चायाहिइ गोट्टिवहिए तत्थेव हत्थिणाउरे णयरे सेट्टिकुलंसि उव-
वज्जिहिइ बोहिं....सोहम्मे कप्पे....महाविदेहे वासे सिज्जिहि०॥णिबखेवो॥२७॥

॥ सत्तमं अज्झयणं समत्तं ॥

सोरियदत्ते णामं अट्टमं अज्झयणं

जइ णं भंते !अट्टमस्स उवखेवो एवं खलु जंबू ! तेणं कालेणं तेणं
समएणं सोरियपुरं णयरे सोरियवडिसगं उज्जाणं सोरियो जखो सोरियवत्ते राया ।
तस्स णं सोरियपुरस्स णयरस्स बहिया उत्तरपुरत्थिमे विसीमाए एत्थ णं एगे
मच्छंधपाडए होत्था । तत्थ णं समुद्दत्ते णामं मच्छंधे परिवसइ-अहम्मिए
जाव दुप्पडियाणंदे । तस्स णं समुद्दत्तस्स समुद्दत्ताणामं भारिया होत्था
अहीण० पंचिदियसरीरा । तस्स णं समुद्दत्तस्स म० पुत्ते समुद्दत्ताए भारिया
अत्तए सोरियदत्ते णामं दारए होत्था अहीण० । तेणं कालेणं तेणं समएणं
सामी समोसढे जाव परिसा पडिगया । तेणं कालेणं तेणं समए० जेट्ठे सीसे
जाव सोरियपुरे णयरे उच्चणीयमज्जिमाइं कुलाइं० अहापज्जत्तं समुदाणं गहाय
सोरियपुराओ णयराओ पडिणिबखमइ, २ तस्स मच्छंधपाडगस्स अट्टरसाम-
तेणं बीईवयमाणे महइमहालियाए मणुस्सपरिसाए मज्जगयं पासइ एगं पुरिसं
सुवकं भुवखं णिम्मंसं अट्टिचम्मावणद्धं किडिकिडियामूयं णीत्तसाडगणियत्थं
मच्छकंटेणं गलए अणुत्तागेणं कट्टाईं कलुणाईं बीसराईं कूवेमाणं अभि-

ब्रह्मणं २ पूयकवले य हरिहरकवले य किमिकवले य वम्ममाणं पासइ, २ इमे-
 यारूवे अज्जीत्थिए ५ पुरा-पोराणाणं जाव विहरइ, एवं सपेहेइ २ जेणेव समणे
 भगवन्...जाव पुक्वभवपुच्छा जाव वागरणं-एवं खलु गोयमा ! तेणं कालेणं
 तेणं समएणं इहेव जंहुहीवे दीवे भारहे वासे णंदिपुरे णामं णयरे होत्था, मित्ते
 राया । तस्स णं मित्तस्स रण्णो सिरीए णामं महानसिए होत्था, अहम्मिए जाव
 दुप्पडियाणदे । तस्स णं सिरीयस्स महानसियस्स बहवे मच्छिया य वागुरिया
 य साउणिया य दिण्णभइभत्तवेयणा कल्लाकल्लि बहवे सण्हमच्छा जाव पडा-
 गाइपडागे य अए य जाव महिसे य तित्तिरे य जाव मऊरे य जीवियाओ बव-
 रोव्वेति २ सिरीयस्स महानसियस्स उवणेंति, अण्णे य से बहवे तित्तिरा य
 जाव मऊरा य पंजरसि संणिह्ढा चिट्ठंति, अण्णे य बहवे पुरिसा दिण्णभइ-
 भत्तवेयणा ते बहवे तित्तिरे य जाव मऊरे य जीवियाओ चेत्र णिपंवेति २
 सिरीयस्स महानसियस्स उवणेंति । तए णं से सिरीए महानसिए बहूणं जलयर-
 थलयरखहयराणं मंसाइं कप्पणिक्कप्पियाइं करेइ, तं०-सण्हखंडियाणि य वट्ट-
 खंडियाणि य दीहखंडियाणि य रहस्सखंडियाणि य हिमपक्काणि य जम्म प०(धम्म)
 वेग० मारुपक्काणि य कालाणि य हेरगाणि य महिट्ठाणि य आमलरसियाणि
 य मुट्ठियारसियाणि य कविट्ठरसियाणि य दालिपरसियाणि य मच्छुरसियाणि
 य तलियाणि य भज्जियाणि य सोल्लियाणि य उवक्खडावेइ २ त्ता अण्णे य बहवे
 मच्छुरसे य एणेज्जस्से य तित्तिरसे य जाव भयूरसे य अण्णं च विउल्लं हरि-
 यसागं उवक्खडावेइ २ त्ता मित्तस्स रण्णो भोयणमंडवंसि भोयणवेलाए उवणेइ
 अप्पणावि य णं से सिरीए महानसिए ते० बहू० जलयर-थलयर-खहयरमंसेहि
 च रसिएहि य हरियसागेहि य सोल्लेहि य तल्लिएहि य भज्जिएहि य सुरं
 च ६ आसाएमाणे० विहरइ । तए णं से सिरीए महानसिए एयक्कमे० सुबहं पाव-
 कम्मं समज्जिणित्ता तेत्तीसं वाससयाइं परमाउयं पालइत्ता कालभासे कालं
 किच्चा छट्ठीए उववण्णे । तए णं सा समुद्वत्ता भारिया णिबू यावि होत्था
 जाया २ दारगा विणिहायमावज्जति जहा गंगदत्ताए चित्ता आपुच्छणा ओ-
 वाइयं दोहला जाव दारगं पयाया जाव जम्हा णं अम्हं इमे दारए सोरियस्स
 जवखस्स ओवाइयलद्धे तम्हा णं होउ अम्हं दारए सोरियदत्ते णामेणं । तए णं
 से सोरियदत्ते दारए पंचधाई जाव उम्मूक्कवालभावे विण्णयपरिणयमित्ते

जाव्वणं होत्था । तए णं से समुद्दत्ते अण्णया कयाइ कालधम्मणा संजुत्ते । तए णं से सोरियदत्ते दा० ब्रह्मि मित्तणाइ० रोयमा० समुद्दत्तस्स णीहरणं करेइ लोइयाइं मयकिच्चाइं करेइ, अण्णया कयाइ समयेव मच्छंधमहततरगतं उवसंपज्जित्ताणं विहरइ । तए णं से सोरियदत्ते दारए मच्छंधे जाए अहम्मिए जाव वुप्पडियाणंदे । तए णं तस्स सोरियदत्तमच्छंधस्स बहवे पुरिसा दिण्णमइ० एगट्टियाहिं जउणामहाणइं ओगाहेति २ ब्रह्मिं बहुमलणेहिं य दहमलणेहिं य दहमदणेहिं य दहमहणेहिं य दहवहणेहिं य दहपवहणेहिं य मच्छंधूलेहिं य पयंचूलेहिं य पंचपुलेहिं य जंभाहिं य तिसराहिं य भिसराहिं य घिसराहिं य विसराहिं य हिल्लिरीहिं य लल्लिरीहिं य झिल्लिरीहिं य जालेहिं य गलेहिं य कूडपासेहिं य वक्कबंधेहिं य सुत्तबंधेहिं य बालबंधेहिं य बहवे सण्हमच्छे य जाव पडागाइपडागे य गिह्ंति० एगट्टियाओ (णावा) भरेंति० कुलं गाहेति० मच्छखलए करेंति० आयवंसि दलयति, अण्णे य से बहवे पुरिसा दिण्णमइभत्त-वेयणा आयवत्तएहिं सोल्लेहिं य तल्लिएहिं य भज्जिएहिं य रायमगंसि वित्ति कप्पेमाणा विहरंति, अण्णवावि य णं से सोरियदत्ते ब्रह्मि गण्हमच्छेहिं य जाव पडा० सोल्लेहिं य तल्लिएहिं य भज्जिएहिं य सुरं च ६ आसाएमाणे० विहरइ । तए णं तस्स सोरियदत्तस्स मच्छंधस्स अण्णया कयाइ ते मच्छसोल्ले तल्लिए य भज्जिए य आहारमाणस्स मच्छकंटए गलए लग्गे यावि होत्था । तए णं से सोरियदत्तमच्छंधे महयाए वेयणाए अभिभूए समाणे कोडुंबियपुरिसे सहावेइ २ ता एवं वयासी-गच्छह णं तुम्हे देवानुप्पिया ! सोरियपुरे णयरे सिघाउग जाव पहेसु महया २ सद्देणं उग्घोसेमाणा २ एवं वयह-एवं खलु देवानुप्पिया ! सोरियदत्तस्स मच्छकंटए गले लग्गे तं जां णं इच्छइ वेज्जा वा ६ सोरियमच्छ-यस्स मच्छकंटयं गलाओ णीहरित्तए तस्स णं सोरिय० विउलं अत्थसंपयाणं दलयइ । तए णं ते कोडुंबियपुरिसा जाव उग्घोसेति । तए णं ते बहवे वेज्जा य ६ इमेयाख्वं उग्घोसणं उग्घोसिज्जमाणं णिसामेति २ ता जेणेव सोरिय० गेहे जेणेव सोरियमच्छंधे तेणेव उवागच्छति २ ब्रह्मिं उप्पत्तिया० परिणम-माणा वमणेयि य छड्डणेहिं य ओवीलणेहिं य कवलगाहेहिं य सल्लद्धरणेहिं य विसल्लकरणेहिं य इच्छति सोरियमच्छं० मच्छकंटयं गलाओ णीहरित्तए णो चेव णं संचाएति णीहरित्तए वा विसोहित्तए वा, तए णं ते बहवे वेज्जा य ६

जाहे णो संचाएति सोरियं मच्छकंदगं गलाओ णीहरित्तए ताहे संता जाव
 जामेव दिंसि पाउब्भूया तामेव दिंसि पडिगया । तए णं से सोरियं म० विज्जं
 पडियारणिक्खिण्णे तेणं बुक्खेणं महया अभिभूए सुक्के जाव विहरइ । एवं खलु
 गोयमा ! सोरियदत्ते पुरापोराणाणं जाव विहरइ । सोरिए णं भंते ! मच्छंधे
 इओ कालमासे कालं किच्चा कंहि मच्छिहिइ ? कंहि उववज्जिहिइ ?
 गोयमा ! सत्तरि-वासाइं परमाउयं पालइत्ता कालमासे कालं किच्चा इमीसे
 रयणप्पमाए पुढबीए०, संसारो तहे० पुढ० हत्थिणाउरे णयरे मच्छत्ताए उवव०,
 से णं तओ मच्छिएहिं जीवियाओ ववरोधिए तत्थेव सेट्टिकुलंसि.....बो० सोहम्मै
 कप्पे.....महाधिदेहे वासे सिज्जिहि० ॥ णिवल्लेबो ॥ २८ ॥

॥ अट्टमं अज्झयणं समत्तं ॥

देवदत्ता णामं णवमं अज्झयणं

अइ णं भंते ! ...उव्वल्लेबो णवमस्स० एवं खलु जंबू । तेणं कालेणं तेणं
 समएणं रोहीइए णामं णयरे होत्था रिद्ध० । पुढविक्खिंसिए उज्जाणे, घरणो
 जक्खो, वेसमणदत्ते राया, सिरी देवी, पूसणंदी कुमारे जुवराया । तत्थ णं
 रोहीइए णयरे दत्ते णामं गाहावई परिवसइ अइडे० कण्हिसिरी भारिया । तस्स
 णं वत्तस्स धूया कण्हिसिरीए अत्तया देवदत्ता णामं दारिया होत्था अहीण० जाव
 उक्किट्ठा उक्किट्ठसरीरा । तेणं कालेणं तेणं समएणं सामी समोसडे जाव परिस्ता०,
 तेणं कालेणं तेणं समए० जेट्ठे अंतेवासी छट्ठकलमण.....तहेव जाव रायमग्ग-
 मोगाडे हत्थी आसे पुरिसे पासइ, तेसि पुरिसाणं मज्झगयं पासइ एणं इत्थियं
 अवओइयबंधणं उक्खित्तकण्णणासं जाव सुल्ले मिज्जमाणं पासइ, २ इमे अज्झ-
 त्तिए....तहेव णिग्गए जाव एवं वयासी-एस णं भंते ! इत्थिया पुएवभवे का
 आसी? एवं खलु गोयमा ! तेणं कालेणं तेणं समएणं इहेव अंबुट्ठीवे दीवे भारहे
 वासे सुपइट्ठे णामं णयरे होत्था रिद्ध०, महासेणे राया । तस्स णं महासेणस्स
 रण्णो धारिणीपामोवत्ताणं देवीसहस्सं ओरोहे यावि होत्था । तस्स णं महासेण-
 स्स रण्णो पुत्ते धारिणीए देवीए अत्तए सीहसेणे णामं कुमारे होत्था अहीण०
 जुवराया । तए णं तस्स सीहसेणस्स कुमारस्स अम्मापियरो अण्णया कयाइ पंच
 पासायवडिसयसयाइं करेति अड्ढुग्गय० । तए णं तस्स सीहसेणस्स कुमारस्स

अणया कयाइ सामापामोवखाणं पंचहं रायवरकणमसयाणं एगदिवमे पाणि
 गिण्हाविसु पंचसयाओ दाओ । तए णं से सीहसेणे कुमारे सामापामोवखाहि
 पंचसयाहि देवीहि सद्धि उप्पि जाव विहरइ । तए णं मे महामेणे राया अणया
 कयाइ कालधम्मणा संजुत्ते णीहरणं...राया जाए महया० । तए णं से सीहसेणे
 राया सामाए देवीए मुच्छिए ४ अवसेमाओ देवीओ णो आढाइ णो पार-
 जणाइ अणाढायमाणे अपरिजाणमाणे विहरइ । तए णं तामि एगूणगाणं पंच-
 हं देवीसयाणं एगूणाइं पंचमाईमयाइं इमीसे कहाए लद्धट्टाइं समाणाइं एवं
 खलु सामी सीहसेणे राया सामाए देवीए मुच्छिए ४ अहं धूयाओ णो आढाइ
 णो परिजाणइ अणाढायमाणे अपरिजाणमाणे विहरइ, तं सेयं खलु अहं सामं
 देविं अग्गिपओगेण वा विसप्पओगेण वा सत्थप्पओगेण वा जीघियाओ ववरोवि-
 त्तए, एवं सपेहेति २ सामाए देवीए अंतराणि य छिट्ठाणि य विरहाणि य
 पडिजागरमाणीओ २ विहरति । तए णं सा सामा देवी इमीसे कहाए लद्धट्टा
 समाणी एवं वयासी-एवं ख० सम पंचहं सवत्तीसयाणं पंचमाइसयाइं इमीसे
 कहाए लद्धट्टाइं समाणाइं अणमणं एवं वयासी-एवं खलु सीहसेणे...जाव
 पडिजागरमाणीओ विहरति, तं ण णज्जइ णं सम केणइ कुमारेणं मारिस्स-
 त्तित्तकट्टु भूया जाव जेणेव कांवघरे तेणेव उवागच्छइ २ ता ओहय जाव
 झियाइ । तए णं से सीहसेणे राया इमीसे कहाए लद्धट्टे समाणे जेणेव कांवघरए
 जेणेव सामा देवी तेणेव उवागच्छइ २ ता सामं देवि ओह० जाव पासइ २
 ता एवं वयासी-किं णं तुमं देवाणुप्पिए ! ओह० जाव झियामि ? तए णं
 सा सामा देवी सीहसेणेणं रण्णा एवं युत्ता समाणी उप्फेणउप्फेणियं सीहसेणं
 रायं एवं वयासी-एवं खलु सामी ! सम एगूणगाणं पंचसवत्तीसयाणं एगूणपंच-
 माइसयाणं इमीसे कहाए लद्धट्टाणं समाणा० अणमण्णे सद्द्वेति २ ता एवं
 वयासी-एवं खलु सीहसेणे राया सामाए देवीए उवरि मुच्छिए ४ अहं
 धूयाओ णो आढाइ...जाव अंतराणि य छिट्ठाणि० पडिजागरमाणीओ विहरति
 तं ण णज्जइ० भूया जाव झियामि । तए णं से सीहसेणे राया सामं देवि एवं
 वयासी-मा णं तुमं देवाणुप्पिए ! ओह० जाव झियाहि, अहं णं तहा जत्ति-
 हामि जहा णं तव णत्थि कत्तोवि सरीरस्स आबाहे वा पबाहे वा पावस्सइत्ति-
 कट्टु ताहि इट्ठाहि ६ समासासेइ २ तओ पडिणिक्खमइ २ ता कोडुविय-

पुरिसे सद्वावेइ २ ता एवं वयासी-गच्छह णं तुड्ढे देवानुप्पिया ! सुपइट्टस्स
 णयरस्स बहिया एगं महं कूडागारसालं करेह अणेगवत्तंभसयसंणिवि० पासा०
 ४ करेह २ ता ममं एयमाणत्तियं पच्चप्पिणह । तए णं ते कोडुब्बियपुरिसा
 करयल जाव पडिसुणेति २ ता सुपइट्टणयरस्स बहिया पच्चत्थिये दिसीविभाए
 एगं महं कूडागारसालं जाव करेति अणेगवत्तंभ० पासा० ४ जेणेव सीहसेणे
 राया तेणेव उवागच्छंति २ ता तमाणत्तियं पच्चप्पिणंति । तए णं से सीहसेणे
 राया अणया कयाइ एगूणगाणं पंचण्हं देवीसयाणं एगूणाइं पंचमाइसयाइं आम-
 तेइ । तए णं तासि एगूणपंचदेवीसयाणं एगूणपंचमाइसयाइं सीहसेणेणं रण्णा
 आमंतियाइं समाणाइं सव्वालंकारविमूसियाइं जहाविमवेणं जेणेव सुपइट्ठे णयरे
 जेणेव सीहसेणे राया तेणेव उवागच्छंति । तए णं से सीहसेणे राया एगूणपंचण्हं
 देवीसयाणं एगूणगाणं पंचण्हं माइसयाणं कूडागारसालं आवासं दलयइ । तए
 णं से सीहसेणे राया कोडुब्बियपुरिसे सद्वावेइ २ ता एवं वयासी-गच्छह णं तुड्ढे
 देवानुप्पिया ! विउलं असणं उवणेह सुबहं पुप्फवत्थगंधमल्लालंकारं च कूडा-
 गारसालं साहरह । तए णं ते कोडुब्बियपुरिसा तहेव जाव साहरेति । तए णं
 तासि एगूणगाणं पंचण्हं देवीसयाणं एगूणपंचमाइसयाइं सव्वालंकारविमूसिया०
 तं विउलं असणं ४ सुरं च ६ आसाएमाणा० गंधवेहि य णाडएहि य उव-
 गीयमाणाइं २ विहरंति । तए णं से सीहसेणे राया अट्टरत्तकालसमयंसि
 बहूहि पुरिसेहि सद्धिं संपरिवुडे जेणेव कूडागारसाला तेणेव उवागच्छइ २ ता
 कूडागारसालाए दुवाराइं पिहेइ २ कूडागारसालाए सव्वओ समंता अगणिकायं
 दलयइ । तए णं तासि एगूणगाणं पंचण्हं देवीसयाणं एगूणगाइं पंचमाइस-
 याइं सीहरण्णा आलीवियाइं समाणाइं रोयमाणाइं ३ अत्ताणाइं असरणाइं
 कालधम्मणा संजत्ताइं । तए णं से सीहसेणे राया एकम्म ४ सुबहं पावकम्मं
 समज्जिणित्ता चोत्तीसं वाससयाइं परमाउयं पालइत्ता कालभासे कालं किच्चा
 छट्ठीए पुढवीए उक्कोसेणं बावीससागरोवमट्ठिइए सुणेरइयत्ताए उववण्णे, से
 णं तओ अणंतरं उव्वट्ठित्ता इहेव रोहीडए णयरे वत्तस्स सत्थवाहस्स कण्हसि-
 रीए भारियाए कुच्चिसि दारियत्ताए उववण्णे । तए णं सा कण्हसिरी णवण्हं
 मासाणं जाव दारियं पयाया सुकूमाल० मुळ्वं । तए णं तीसे दारियाए अम्मा-
 पियरो णिव्वत्तबारसाहियाए विउलं असणं ४ जाव मित्त णाइ० णामधेज्जं

करंति....तं होउ णं दारिया देवदत्ता णामेणं । तए णं सा देवदत्ता दारिया पंचधाईपरिगहिया जाव परिवड्ढ । तए णं सा देवदत्ता दारिया उम्भुकबाल-भावा जोध्वणेण य रूवेण य लावणेण य जाव अई० उक्कट्टा उक्कट्टसरीरा जाया यावि होत्था । तए णं सा देवदत्ता दारिया अण्णया कयाइ ष्हाया जाव विमूसिया बहूहिं खुज्जाहिं जाव परिविखत्ता उप्पि आयासतलगमि कणग-त्तिदूसेणं कीलमाणो विहरइ । इमं च णं वेसमणदत्ते राया ष्हाए जाव पाय-च्छित्ते विमूसिए आसं दुरुहत्ता बहूहिं पुरिसेहिं सद्धिं संपरिवुडे आसवाहणि-याए गिज्जायमाणे दत्तस्स गाहावड्ढस्स गिहस्स अट्टूरसामतेणं वीईवयइ । तए णं से वेसमणे राया जाव वीईवयमाणे देवदत्तं दारियं उप्पि आयासतलगमि कणगत्तिदूसेणं कीलमाणो पासइ, देवदत्ताए दारियाए जोध्वणेण य रूवेण य लावणेण य जाव विमूहए कोडुंनियपुरिसे सद्दावेइ २ ता एवं वयासी-कस्स णं देवाणुप्पिया । एसा दारिया किं वा णामघेज्जेणं ? तए णं ते कोडुंनिय-पुरिसा वेसमणरायं करयल० एवं वयासी-एस णं सामी ! दत्तस्स सत्थवाह-स्स धूया कण्हिसरीए भारियाए अत्तया देवदत्ता णामं दारिया जोध्वणेण य रूवेण य लावणेण य उक्कट्टा उक्कट्टसरीरा । तए णं से वेसमणे राया आसवाहणियाओ पडिणियत्ते समाणे अट्ठितरठाणिज्जे पुरिसे सद्दावेइ २ ता एवं वयासी-गच्छह णं तुभ्भे देवाणुप्पिया ! दत्तस्स धूयं कण्हिसरीए भारियाए अत्तयं देवदत्तं दारियं पूसणदिसस्स ज्वरणो भारियत्ताए वरेह, जइवि सा सयंरज्जसुवका । तए णं ते अट्ठितरठाणिज्जा पुरिसा वेसमणेणं रण्णा एवं दत्ता समाणा हट्टुट्टा करयल जाव पडिसुणेति २ ता ष्हाया जाव सुद्ध-प्पावेसाइं.....संपरिवुडा जेणेव दत्तस्स गिहे तेणेव उवागच्छत्था । तए णं से दत्ते सत्थवाहे ते पुरिसे एज्जमाणे पासइ २ ता हट्टुट्टु० आसणाओ अम्भुट्ठेइ २ ता सत्तट्टु पयाइं पच्छुगए आसणेणं उवणिमत्तेइ २ ता ते पुरिसे आसत्थे वीसत्थे मुहासणवरगए एवं वयासी-संदिसंतु णं देवाणुप्पिया ! किं आगमप्प-ओयणं ? तए णं ते रायपुरिसा दत्तं सत्थवाहं एवं वयासी-अप्पे णं देवाणु-प्पिया । तव धूयं कण्हिसरीए अत्तयं देवदत्तं दारियं पूसणदिसस्स ज्वरणो भारियत्ताए वरेमो । तं जइ णं जाणासि देवाणुप्पिया । जलं वा पत्तं वा सत्ताहणिज्जं वा सरिसो वा संजोगो दिज्जउ णं देवदत्ता भारिया पूसणदिसस्स

ज्वरणो, भण देवाणुप्पिया ! किं दलधामो सुवकं ? तए णं से वत्ते ते
 अंभितरठाणिज्जे पुरिसे एवं वयासी-एवं चैव णं देवाणुप्पिया ! मम सुवकं
 जं णं वेसमणे राया मम दारियाः णिमित्तेणं अणुगिण्हइ, ते अंभितर ठाणिज्ज-
 पुरिसे विउल्लेणं पुप्फवत्थगंधमल्लालंकारेणं सक्कारेइ० पडिविसज्जेइ । तए
 णं ते ठाणिज्जपुरिसा जेणेव वेसमणे राया तेणेव उवागच्छंति २ ता वेसमणस्स
 रणो एयमट्ठं णिवेदंति । तए णं से दत्ते गाहावई अण्णया कयाइ सोभणंसि
 तिहिकरणदिवसणवखल्लसमुहुत्तंसि विउलं असणं ४ उववखडावेइ २ ता मित्तणाइ०
 आमंतेइ ण्हाए जाव पायच्छित्ते सुहासणवरणए तेणं मित्त० सट्ठि संपरिवुडे तं
 विउलं असणं ४ आसाएमा० विहरइ जिमियमुत्तुराग० आयांते ३ तं मित्त-णाइ-
 णियग० विउल्लगंधपुप्फ जाव अलंकारेणं सक्कारेइ० देवदत्तं दारियं ण्हायं जाव
 पायच्छित्ता विभूसियसरीरं पुरिससहस्सवाहिणीयं सीयं दुरुहेइ २ ता सुवहु-
 मित्त जाव सट्ठि संपरिवुडे सव्विड्ढीए जाव णाइयरवेणं रोहीडयं णयरं मज्झं-
 मज्जेणं जेणेव वेसमणरणो गिहे जेणेव वेसमणे राया तेणेव उवागच्छइ २ ता
 करयल जाव बद्धावेइ २ ता वेसमणस्स रणो देवदत्तं दारियं उवणेइ । तए णं
 से वेसमणे राया देवदत्तं दारियं उवणीयं पासइ २ ता हट्टुत्तुडुं विउलं असणं
 ४ उववखडावेइ २ ता मित्त-णाइ० आमंतेइ जाव सक्कारेइ० पूसणं विकुमारं
 देवदत्तं च दारियं पट्टयं दुरुहेइ २ ता सेयापीएंहि कलसेहि मज्जावेइ २ ता
 वरणेवत्थाइं करेइ २ ता अगिगहोमं करेइ २ पूसणं विकुमारं देवदत्ताए दारि-
 याए पाणि गिण्हावेइ । तए णं से वेसमणे राया पूसणं विकुमारस्स देवदत्तं
 दारियं सव्विड्ढीए जाव रवेणं म्हाया इड्ढीसक्कारसमुदएणं पाणिगहणं करेइ
 २ देवदत्ताए दारियाए अम्मापियरो मित्त जाव परियणं च विउल्लेणं असण०
 वत्थगंधमल्लालंकारेण य सक्कारेइ संमाणेइ जाव पडिविसज्जेइ । तए णं से
 पूसणं बी कुमारे देवदत्ताए सट्ठि उप्पि पासाय० फुट्टमाणेहि मुइंगमत्थएहि
 वत्ती० उवगिज्जमाणे जाव विहरइ । तए णं से वेसमणे राया अण्णया कयाइ
 कालधम्मुणा संजुत्ते णीहरणं जाव राया जाए । तए णं से पूसणं दी राया
 सिरिए देवीए मायाभत्तए यावि होत्था, कल्लाकल्लि जेणेव सिरि देवी तेणेव
 उवागच्छइ २ ता सिरिए देवीए पायवडणं करेइ २ सयपागसहस्सपागेहि
 तेल्लेहि अंभिमगावेइ अट्टिसुहाए मंससुहाए तयासुहाए (चम्मसुहाए) रोमसुहाए

चउच्चिहाए संवाहणाए संवाहावेइ २ सुरभिणा गंधवट्टएणं उच्चट्टावेइ २ तिहि उदर्हि मज्जावेइ तं०—उत्तिणोदएणं सीओइएणं गंधोदएणं, २ विउलं अमणं ४ भोयावेइ २ सिरीए देवीए ष्हायाए जाव पायच्छित्ताए ज्जिमियमुत्तरागयाए तए णं पच्छा ष्हाइ वा भुंजइ वा उरालाईं माणुस्सगाईं भोगभोगाईं भुंजमाणे विहरइ । तए णं तीसे देवदत्ताए देवीए अण्णया कयाइ पुव्वरत्तावरत्तकालममयंसि कुहुं-बजागरियं जागरमाणीए इमेयारूवे अज्झत्थिए ५ समुप्पण्णे—एवं खलु पूसणंदी राया सिरीए देवीए माइभत्ते जाव विहरइ तं एएणं ववखेवेणं णो संचाएमि अहं पूसणदिणा रण्णा सद्धि उरालाईं० भुंजमाणी विहरित्तए तं सेयं खलु मम सिरिदेविं अग्गिपओगेण वा सत्थं० विसं० संतप्पओगेण वा जीवियाओ ववरो-वित्तए २ ता पूसणदिणा रण्णा सद्धि उरालाईं भोगभोगाईं भुंजमाणीए विहरित्तए, एवं संपेहेइ २ ता सिरीए देवीए अतराणि य ३ पडिजागरमाणी विहरइ । तए णं सा सिरी देवी अण्णया कयाइ मज्जाइया विरहियसयणिज्जमि सुहपमुत्ता जाया यावि होत्था । इमं च णं देवदत्ता देवी जेणेव सिरी-देवी तेणेव उवागच्छइ २ ता सिरीदेवीं मज्जाइयं विरहियसयणिज्जमि सुहपमुत्तं पामइ २ ता विसालोयं करेइ २ ता जेणेव मत्तघरे तेणेव उवागच्छइ २ ता लोह-दंडं परामुसइ २ ता लोहदंडं तावेइ २ तत्तं समजोइभूयं फुल्लकिमुयममाणं संडासएणं गहाय जेणेव सिरी-देवी तेणेव उवागच्छइ २ ता सिरीए देवीए अवाणंसि पविखवइ । तए णं सा सिरी-देवी महया २ सद्धेणं आरसित्ता काल-धम्मणा संजुत्ता । तए णं तीसे सिरीए देवीए दासचेडीओ आरमियसद्धं सोच्चा णिसम्म जेणेव सिरीदेवी तेणेव उवागच्छति २ देवदत्तं देवि तओ अववकम-माणि पासति २ ता जेणेव सिरी-देवी तेणेव उवागच्छति २ सिरि देवि णिप्पाणं णिच्चेट्ठं जीवियविप्पजहं पासति २ ता हा हा ! अहो ! अकज्जमितिकट्टु रोयमाणीओ कंदमाणीओ विलवमाणीओ जेणेव पूसणंदी राया तेणेव उवागच्छति २ ता पूसणदि रायं एवं वयासी—एवं खलु सामी! सिरी-देवी देवदत्ताए देवीए अकाले सेव जीवियाओ ववरोविया । तए णं से पूस-णंदी राया तामि दासचेडीणं अंतिए एयमट्ठं सोच्चा णिसम्म महया माइसो-एणं अक्कुण्णे समाणे परमुणियत्ते विव चंपगवरपायवे धसत्ति धरणीयलंसि सच्चवेहि संजिवडिइ । तए णं से पूसणंदी राया मुहुत्तंतरेण आसत्थे वीसत्थे

समाणे बहूहि राईसर जाव सत्यवाहेहि मित्त जाव परियणेण य सद्धि रोय-
माणे ३ सिरिए देवीए महया इड्डीए णीहरणं करेइ २ ता आसुहत्ते० देव-
वत्तं देवि पुरिसेहि गिण्हावे० एएणं विहाणेणं वज्झं आणवेइ । तं एवं खलु
गोयमा ! देवदत्ता देवी पुरापुराणाणं.....विहरइ । देवदत्ता णं भंते ! देवी
इओ कालमासे कालं किच्चा काहि गच्छि(मि)हि० काहि उववज्जिहिइ ? गोयमा !
असीइं वासाइं परमाउयं पालइत्ता कालमासे कालं किच्चा इमीसे रयणप्प-
भाए पुढवीए णेरइयत्ताए उववण्णा संसारो वणस्सइ.....तओ अणंतरं उव्वट्टित्ता
गंगपुरे णयरे हंसत्ताए पच्चायाहिइ, से णं तत्थ साउणिएहि बहिए समाणे
तत्थेव गंगपुरे णयरे सेट्टिकु० बीहि.....सोहम्मे.....महाविदेहे वासे सिज्जिहि०
॥ णिक्खेवो ॥ २६ ॥ ॥ णवमं अज्झयणं समत्तं ॥

अंजू णामं दसमं अज्झयणं

जइ णं भंते ! समणेणं भगवया महावीरेणं दसमस्स उवखेवो एवं खलु जंबू !
तेणं कालेणं तेणं समएणं वज्झमाणपुरे णामं णयरे होत्था, विजयवज्झमाणे उज्झाणे,
माणिमहे जक्खे, विजयमित्ते राया, तत्थ णं धणवेवे णामं सत्यवाहे होत्था अड्ढे०,
विधंगू णामं भारिया, अंजू दारिया जाव सरीरा, समोसरणं परिसा जाव पडिगया ।
तेणं कालेणं तेणं समएणं जेट्ठे जाव अड्ढमाणे जाव विजयमित्तस्स रण्णे गिहस्स
असोगवणियाए अद्वरसाभंतेणं बीईवयमाणे पासइ एणं इत्थियं सुक्कं सुक्खं णिम्मसं
किड्किडियामूयं अट्टिच्चम्मावणद्धं णोलसाडगणियत्थं कट्टाइं कलुणाइं बीसराइं
कूवमाणं पासइ० चित्ता तहेव जाव एवं वयासी-सा णं भंते ! इत्थिया पुक्क-
भवे का आसी ? वागरणं । एवं खलु गोयमा ! तेणं कालेणं तेणं समएणं
इहेव जंबूदीवे बीवे भारहे वासे इंदपुरे णामं णयरे होत्था । तत्थ णं इंदवत्ते
राया पुढवीसिरी णामं गणिया होत्था वण्णओ । तए णं सा पुढवीसिरी गणिया
इंदपुरे णयरे बहुवे राईसर जाव प्पभिघओ बहूहि चुण्णप्पओगेहि य जाव
आभिओगेत्ता उरालाइं माणस्सगाइं भोगमोगाइं भुंजमाणं विहरइ । तए णं सा
पुढवीसिरी गणिया एथकम्मा ४ सुबहुं० समज्जिणित्ता पणतीसं वासतयाइं
परमाउयं पालइत्ता कालमासे कालं किच्चा छट्ठीए उवकोसेणं णेरइयत्ताए
उववण्णा । सा णं तओ अणंतरं उव्वट्टित्ता इहेव वज्झमाणपुरे णयरे धणदेवस्स

सत्थवाहस्स पियंगुभारियाए कुञ्छिसि दारियत्ताए उववण्णा । तए णं सा पियंगुभारिया णवण्हं मासाणं.....दारियं पयाया, णामं अंजुसिरी, सेसं जहा देवदत्ताए । तए णं से विजए राया आसवाह० जहा वेसमणदत्ते तथा अंजु पासइ णवरं अप्पणो अट्टाए वरेइ जहा तेयली जाव अंजूए भारियाए सद्धि उप्पि जाव विहरइ । तए णं तीसे अंजूए देवीए अण्णया कयाइ जोणिसूले पाउभूए यावि होत्था । तए णं से विजए राया कोडुब्बियपुरिसे सद्दावेइ रत्ता एवं वयासी-गच्छह णं देवाणुप्पिया ! अट्टमाणपुरे णयरे सिघाडग जाव एवं वयह- एवं खलु देवाणुप्पिया ! विजय० अंजूए देवीए जोणिसूले पाउभूए जो णं इ० वेज्जो वा ६.....जाव उगघोसेति । तए णं ते बहवे वेज्जा० ६ इमं एयाख्वं सोच्चा णिसम्म जेणव विजए रायां तेणेव उवागच्छति० उप्पत्तियाहिं० परि- णामेमाणा इच्छति अंजूए देवीए जोणिसूलं उवसामित्तए णो संचाएति उव- सामित्तए । तए णं ते बहवे वेज्जा य ६ जाहे णो संचाएति अंजू० जोणिसूलं उवसामित्तए ताहे संता तंता परितंता जामेव दिसि पाउभूया तामेव दिसि पडिमया । तए णं सा अंजूदेवी ताए वेयणाए अभिभूया समाणी सुवका मूख्खा णिम्मंसा कट्टाई कलणाई वीसराई विलवइ । एवं खलु गोयमा ! अंजूदेवी पुरापोराणाणं जाव विहरइ । अंजू णं भंते ! देवी इओ कालमासे कालं किच्चा काहि गच्छहिं० काहि उववज्जिहिइ ? गोयमा ! अंजू णं देवी णउइ वासाइ परमाउयं पालइत्ता कालमासे कालं किच्चा इमीसे रयणत्पमाए पुठवीए णेरइय- ताए उववज्जिहिइ, एवं संसारो जहा पढमे तथा जेयव्वं जाव वणस्सइ०, सा णं तओ अणंतं उववट्टित्ता सव्वओभद्दे णयरे मयूरत्ताए पच्चायाहिइ । से णं तत्थ साउणिएहिं व्हिए समाणे तत्थेव सव्वओभद्दे णयरे सेट्टिकुलंसि पुत्तत्ताए पच्चायाहिइ । से णं तत्थ उम्मक्कवालभावे तहारूवाणं थेराणं० केवलं बोहि बुज्जिहिइ पव्वज्जा सोहम्म० । से णं ताओ देवलोसाओ आउवखए० काहि गच्छहिं० काहि उववज्जिहिइ ? गोयमा ! महाविदेहे जहा पढमे जाव सिज्जि- हिइ जाव अंतं काहिइ । एवं खलु जंबू ! समणेणं जाव संपत्तेणं दुहवित्रागाणं दसमस्स अज्झयणस्स अयमट्ठे पणत्ते । सेवं भंते० ॥ ३० ॥

॥ पढमो सुयक्खंधो समत्तो ॥

बीओ सुयक्खंधो

सुबाहू णामं पढमं अज्झयणं

तेणं कालेणं तेणं समएणं रायगिहे णयरे गुणसिलए वेइए सुहम्मे समो-
सडे जंबू जाव पज्जुवासमाणे एवं वयासी-जइ णं भंते ! समणेणं जाव संप-
त्तेणं सुहविवागाणं अयमट्ठे पणत्ते सुहविवागाणं भंते ! समणेणं जाव संपत्तेणं
के अट्ठे पणत्ते ? तए णं से सुहम्मे अणगारे जंबू अणगारं एवं वयासी-एवं
खलु जंबू ! समणेणं जाव संपत्तेणं सुहविवागाणं दस अज्झयणा पणत्ता, तं-
(गा०) सुबाहू भइणंदी य सुजाए य सुवासवे । तहेव जिणदासे य धणवई य
महब्बले ॥ १ ॥ भइणंदी महच्चंदे वरदसे तहेव य । जइ णं भंते ! समणेणं
जाव संपत्तेणं सुहविवागाणं दस अज्झयणा पणत्ता पढमस्स भंते ! अज्झयणस्स
सुहविवागाणं जाव संपत्तेणं के अट्ठे पणत्ते ? तए णं से सुहम्मे अणगारे जंबू
अणगारं एवं वयासी-एवं खलु जंबू ! तेणं कालेणं तेणं समएणं हट्ठिसीसे णामं
णयरे होत्था रिद्ध० । तस्स णं हट्ठिसीसस्स णयरस्स बहिया उत्तरपुरत्थिमे
दिसीभाए एत्थ णं पुप्फकरंडए णामं उज्जाणे होत्था सम्बोडय० । तत्थ णं
कयवणमालपियस्स जक्खस्स जक्खाययणे होत्था-विब्बे । तत्थ णं हट्ठि-
सीसे णयरे अदीणसत्तू णामं राया होत्था महया० । तस्स णं अदीणसत्तूस्स
रण्णे धारिणीपामो० देवीसहस्सं ओरोहे यावि होत्था । तए णं सा धारिणी
देवी अणयया कयाइ तंसि तारिसगंसि वासधरंसि सीहं मुमिणे पासइ जहा मेहस्स
जम्मणं तहा भाणियच्चं जाव सुबाहूकुमा० अलंभोगसम० जाणंति० पंचपासाय-
वाडिसगसयाइं कारवेंति अंभुग्गय० भवणं एवं जहा महाबलस्स रण्णे णवरं
पुप्फचूलापामोक्खणं पंचण्हं रायधरकण्णगसयाणं एगद्विसेणं पाणिं गिण्हावेंति ।
तहेव पंचसइओ दाओ जाव उप्पि पासायवरगए फुट्टुमारोहिं जाव विहरइ ।
तेणं कालेणं तेणं समएणं समणे भगवं महावीरे समोसडे परिसा णिगया अदीण-
सत्तू जहा कोणिओ णिगयो सुबाहूवि जहा जमाली तहा रहेणं णिगए जाव
धम्मो कहिओ राया परिसा पडिगया । तए णं से सुबाहूकुमारो समणस्स
भगवओ महावीरस्स अंतिए धम्मं सोक्खा णिसम्म हट्टुट्ठे उट्टुए उट्ठेइ जाव
एवं वयासी-सइहामि णं भंते ! णिगयं पावय० जहा णं देवाणुप्पियाणं अंतिए
बह्वे राईसर जाव अहं णं देवाणुप्पियाणं अंतिए पंचाणुव्वइयं सत्तसिक्खावइयं

दुवालसविहं गिहिधम्मं पडि०, अहासुहं देवाणु०! मा पडिवंधं करेह । तए णं मे सुवाहू समणस्स भगवओ महावीरस्स अंतिए पंचाणुच्चइयं सत्तसिक्खावडयं दुवा० गिहिधम्मं पडिवज्जइ २ ता तमेव० दुहहइ २ जामेव० । तेणं कालेणं तेणं स० जेट्ठे अंतेवासी इंदभूई जाव एवं वयासी-अहो णं भंते ! सुवाहूकुमारे इट्ठे इट्ठ-रुवे कंते कंतरुवे पिए पियरुवे मणुण्णे २ सणामे २ संामे सुभगे पियदंमणं सुरुवे बहजणस्स-वि य णं भंते ! सुवाहूकुमारे इट्ठे इट्ठरुवे ५ सोमे ४ मातुजणस्स-वि य णं भंते ! सुवाहूकुमारे इट्ठे इट्ठरुवे ५ जाव सुरुवे सुवाहुणा भते ! कुमारेणं इमा एषारुवा उराला माणुस्सरिद्धी किण्णा लद्धा किण्णा पत्ता किण्णा अभि-समणणागया ? के वा एस आसी पुंठवभवे० । एवं खलु गोयमा ! तेणं कालेणं तेणं समएणं इहेव जंबुद्धीवे डीवे मारहे वासे हत्थिणाउरे णामं णगरे हांथा रिद्ध० । तत्थ णं हत्थिणाउरे णगरे सुमुहे णामं गाहावई परिवत्तइ अइडे० । तेणं कालेणं तेणं समएणं धम्मघोसा-णामं थेरा जाइसंपण्णा जाव पंचहिं समणमाहिं सद्धि संपरिवूडा पुंठवाणुपुंठव चरमाणा मामाणुगामं वूइज्जमाणा जेणेव हत्थिणाउरे णगरे जेणेव सहस्संभवणे उज्जाणे तेणेव उवागच्छंति २ ता अहापांडरुवं उगहं उग्गिण्हत्ता संजमेणं तवसा अप्पाणं भावेमाणा विहरंति । तेणं कालेणं तेणं समएणं धम्मघोसाणं थेराणं अंतेवासी सुवत्ते णामं अणगारे उराले जाव तेउलेस्से मासं सासेणं खममाणे विहरइ । तए णं से सुदत्ते णामं अणगारे मामाखमण-पारणंसि पढमाए पोरिसीए सज्जायं करेइ जहा गोयमसामी तहेव धम्मघोसे सुहम्मि थेरे आपुच्छइ जाव अडमाणे सुमुहस्स गाहावडस्स गेहे अणुपविट्ठे । तए णं से सुमुहे गाहावई सुदत्तं अणगारं एज्जमाणं पासइ २ ता हट्टुट्ठे आसाओ अब्भट्ठेइ २ ता पायपीढाआं पच्चोरुहइ २ ता पाउयाओ ओमयइ २ ता एगसाडियं उत्तरासंगं करेइ २ ता सुदत्तं अणगारं सत्तट्ठपयाइं अणुगच्छइ २ ता तिवखुत्तो आयाहिणं पयाहिणं करेइ २ ता बंदइ णमंमइ वं० २ ता जेणेव भत्तघरे तेणेव उवागच्छइ २ ता सयहत्थेणं विउलेणं असणपा० पडि-लाभिस्सामीति तुट्ठे..... तए णं तस्स सुमुहस्स गाहावडस्स तेणं दव्वमुद्धेणं... तिविहेणं तिकरणमुद्धेणं सुदत्ते अणगारे पडिलाभिए समाणे संसारे परिनीकए मणुस्साउए णिबद्धे गेहंसि य से इमाइं पंचदिव्वाइं पाउव्भूयाइं तं०-वसुहारा वुट्ठा दसद्धवणं कुसुमे णिवाइए चेलुवत्तेवे कए आहवाओ देवदुद्धीओ अंतरावि

य णं आगासंसि भहो दाणमहो दाणं घ० हत्थिणाउरे सिघाडग जाव पहेसु बहुजणो
अणमणस्स एवं आइक्खइ ४-धण्णे णं देवाणुप्पि० ! सुमहे गाहाव० जाव
तं धण्णे णं देवाणुप्पिया ! सुमहे गाहाव० । तए णं से सुमहे गाहावई बहूई
वाससयाई आउयं पालइत्ता कालमासे कालं किच्चा इहेव हत्थिसीसे णयरे
अदीणसत्तुस्स रण्णो धारिणीए देवीए कुञ्छिसि पुत्तताए उववण्णे । तए णं सा
धारिणी देवी सयणिज्जंसि सुत्तजाग० ओहीरमाणी २ तहेव सीहं पासइ सेसं
तं चेव जाव उप्पि पासा० विहरइ । तं एवं खलु गोयमा ! सुबाहुणा इमा
एयारूवा माणस्सरिद्धी लद्धा पत्ता अभिसमण्णागया । पभू णं भंते ! सुबाहु-
कुमारे देवाणुप्पियाणं अंतिए मुंडे भवित्ता अगाराओ अणगारियं पव्वइत्तए ?
हता पभू । तए णं से भगवं गोयमे समणे भगवं० वंदइ णमंसइ वं० २ ता संजमेणं
तवसा अप्पाणं भावेमाणे विहरइ । तए णं से समणे भगवं महावीरे अणया कयाइ
हत्थिसीसाओ णयराओ पुप्फकरंडयउज्जाणाओ कयवणमालपिय जक्खाय-
यणाओ पडिणिकखमई २ ता बहिया जणवयविहारं विहरइ । तए णं से सुबाहु
कुमारे समणोवासए जाए अभिगयजीवाजीवे जाव पडिलामेमाणे विहरइ । तए
णं से सुबाहुकुमारे अणया कयाइ चाउट्टसट्टमुट्टिदुपुण्णमासिणीसु जेणेव पोसह-
साला तेणेव उवागच्छइ २ ता पोसहसालं पमज्जइ २ ता उच्चारपासवणभूमि
पडिलेहेइ २ ता दंभसंथारं संथरइ २ ता दंभसंथारं दुक्कइ २ ता अट्टम-
भत्तं पगिण्हइ २ ता पोसहसालाए पोसहिए अट्टमभत्तिए पोसहं पडिजामरमाणे
विहरइ । तए णं तस्स सुबाहुस्स कुमारस्स पुंवरत्तावरत्तकालसमयंसि घम्म-
जागरियं जागरमाणस्स इमेयारूवे अज्झत्थिए ५-धण्णा णं ते गामागर-णगर
जाव संणिवेसा जत्थ णं समणे भगवं महावीरे जाव विहरइ, धण्णा णं ते
राईसरतलवर० जे णं समणस्स भगवओ महावीरस्स अंतिए मुंडा जाव पव्व-
यंति, धण्णा णं ते राईसरतलवर० जे णं समणस्स भगवओ महावीरस्स अंतिए
पंचाणुव्वइयं जाव गिहिधम्मं पडिवज्जंति, धण्णा णं ते राईसर जाव जे णं
समणस्स भगवओ महावीरस्स अंतिए धम्मं सुणेंति, तं जइ णं समणे भगवं
महावीरे पुञ्जाणुपुंठिव चरमाणे गामाणुगामं दूइज्जमाणे इहमागच्छिज्जा जाव
विहरिज्जा तए णं अहं समणस्स भगवओ अंतिए मुंडे भवित्ता जाव पव्वएज्जा ।
तए णं समणे भगवं महावीरे सुबाहुस्स कुमारस्स इमं एयारूवं अज्झत्थियं जाव

वियाणित्ता पुग्वाणुपुन्वि जाव दूइज्जमाने जेणेव हत्थिसीसे णयरे जेणेव पुप्फ-
 करंडय उज्जाणे जेणेव कयवणमालपियस्स जक्खस्स जक्खाययणे तेणेव
 उवागच्छइ उवागच्छित्ता अहापडिरूवं उगग्हं गिण्हित्ता संजमेणं तवसा अप्पाणं
 भावेमाणे विहरइ परिसा राया णिग्गया । तए णं तस्स सुबाहुस्स कुमारस्स तं
 महथा जहा पढमं तहा णिग्गओ, धम्मो कह्ठीओ, परिसा राया पडिगया । तए
 णं से सुबाहुकुमारे समणस्स भगवओ महावीरस्स अंतिए धम्मं सोक्खा णिसम्म
 हट्टुट्टु० जहा मेहे तहा अम्मापियरो आपुच्छइ णिवल्लमणाभिसेओ तहेव जाव
 अणगारे जाए इरियासमिए जाव बंभबारी । तए णं से सुबाहु अणगारे समणस्स
 भगवओ महावीरस्स तहारूवाणं थेराणं अंतिए सामाइयमाइयाइं एवकारस
 अंगाइं अहिज्जइ २ ता बहूहि चउत्थल्लट्टुट्टुमतवोविहाणेहि अप्पाणं भावित्ता
 बहूइं वासाइं सामणपरियागं पाउणित्ता मासियाए संलेहणाए अप्पाणं झूसित्ता
 सट्ठि भत्ताइं अणसणाए छेदित्ता आलोइयपडिक्कते समाहिपत्ते कालमासे कालं
 किक्खा सोहम्मे कप्पे देवत्ताए उववण्णे । से णं ताओ देवलोगाओ आउक्खएण
 मवक्खएणं ठिइक्खएणं अणंतरं चयं चइत्ता माणुस्सं विगग्हं लमिहिइ २ ता केवलं
 बोहि बुज्झिहिइ २ ता तहारूवाणं थेराणं अंतिए मुंढे भवित्ता जाव पव्वइस्सइ,
 से णं तत्थ बहूइं वासाइं सामण पाउणिहिइ आलोइयपडिक्कते समाहि०काल०
 सणकुमारे कप्पे देवत्ताए उवव० । से णं ताओ देवलोगाओ.....माणुस्सं पव्वज्जा
 बंभलोए माणुस्सं तओ महासुक्के तओ माणुस्सं आणए० देवे तओ माणु-
 स्सं तओ आरणए देवे तओ माणुस्सं सध्वट्टिसिद्धे । से णं तओ अणंतरं उव्व-
 ट्टित्ता महाविदेहे वासे जाइं० अट्टाइं.....जहा दट्टपइण्णे सिक्खिहिइ ५ । एवं खलु
 जंबू ! समणेणं जाव संपत्तेणं सुह्विवागाणं पढमस्स अज्झयणस्स अयमट्ठे
 पणत्ते ॥ ३१ ॥ पढमं अज्झयणं समत्तं ॥

भट्टणदी णामं बीयं अज्झयणं

दोच्चस्स णं उक्खेवो एवं खलु जंबू ! तेणं कालेणं तेणं समएणं उममपुरे
 णयरे, भूभकरंडे उज्जाणे, धण्णे जवलो धणावहो राया सरस्सई देवी, सुमिणदंसणं
 कह्ठणं जसणं बालत्तणं कलाओ, य जोव्वणं पाणिग्गहणं दाओ पासा० भोगा य ।
 जहा सुबाहुस्स णवरं भट्टणदी कुमारे सिरिदेवीपामोक्खाणं पंचस० सामीसमोसरणं,

सावगधम्मं...पुक्वपुच्छा महाविदेहे वासे पुंडरीकिणी गयरी विजयए कुमारे
जुगदाहू तिस्थयरे पडिलाभिए मणुस्साउए णिबद्धे इह उप्पणे सेसं जहा सुवाहु-
स्स जाव महाविदेहे वासे सिज्झहिइ० ॥ वीयं अज्झयणं समत्तं ॥

सुजाए णामं तइयं अज्झयणं

तच्चस्स उक्खे० वीरपुरं गयरं मणोरमं उज्जाणं वीरकण्हमित्ते राया सिरि
देवी सुजाए कुमारे बलसिरिपामो० पंचसयक० सामीसमोसरणं पुक्वभवपुच्छा
उसुयारे गयरे उसभवत्ते गाहावई पुक्कवत्ते अणगारे पडिला० मणुस्साउए
णिबद्धे इह उप्पणे जाव महाविदेहे वासे सिज्झहिइ० ॥

सुवासवे णामं चउत्थं अज्झयणं

घट्टस्स उक्खे० विनायपुरं गयरं मणोरमं गंवणवणं उज्जाणं वासदवत्ते
राया कण्हा देवी सुवासवे कुमारे महापामोवखाणं पंचस० जाव पुक्वभवे कोसंबी
गयरी धणपाले राया वेसमण्णहे अणगारे पडिलाभिए इह जाव सि० ॥

जिणदासे णामं पंचमं अज्झयणं

पंचमस्स उक्खे० सोगंधिया गयरी णीलासोए उज्जाणे अप्पडिहओ राया
सुकण्णा देवी महधंवे कुमारे तस्स अरहवत्ता भारिया जिणदासो पुत्तो तिस्थय-
रागमणं जिणदासपुक्वभवो मज्झमिया गयरी मेहरहो राया सुधम्मे अणगारे
पडिलाभिए जाव सि० ॥ पंचमं अज्झयणं समत्तं ॥

धणवई णामं छट्ठं अज्झयणं

छट्ठस्स उक्खे० कणगपुरं गयरं सेयासोयं उज्जाणं पियचंदो राया सुमहा
देवी वेसमणे कुमारे जुवराया सिरिदेवीपामो० पंचस० क० पाणिगहणं तिस्थ-
यरागमणं धणवई जुवरायपुत्ते जाव पुक्वभवो मणिवया गयरी मित्तो राया
संभूति अणगारे पडिलाभिए जाव सि० ॥ छट्ठं अज्झयणं समत्तं ॥

महब्बले णामं सत्तमं अज्झयणं

सत्तमस्स उक्खे० महापुरं गयरं रत्तासोयं उज्जाणं बले राया सुमहा देवी
महब्बले कुमारे रत्तवईपामो० पंचस० क० पाणिगहणं तिस्थयरागमणं जाव
पुक्वभवो मणिपुरं गयरं णागवत्ते गाहावई इंदपुरे अणगारे पडिलाभिए जाव सि० ॥

भद्राणंदी नामं अट्टमं अज्जयणं

अट्टमस्स उक्खे० सुघोसं णयरं देवरमणं उज्जाणं अज्जुणो राया तत्तवई देवी भद्राणंदी कुमारे सिरिदेवीपामो० पंचस० जाव पुव्वमवो महाघोसे णयरे धम्मघोसे माहावई धम्मसीहे अणगारे पडिलाभिए जाव सि० ॥

महचंदे नामं णवमं अज्जयणं

णवमस्स उक्खे० चंपा णयरी पुण्णभद्दे उज्जाणे वत्ते राया वत्तवई देवी महचंदे कुमारे जूधराया सिरिकंतापामो० पंचस० क० जाव पुव्वमवो तिग्गिणी णयरी जियसत्तू राया धम्मधीरिए अणगारे पडिलाभिए जाव सि० ॥

वरदत्ते नामं दसमं अज्जयणं

जति णं दसमस्स उक्खेवो एवं खलु जंबू । तेणं कालेणं तेणं समएणं साणेए णामं णयरे होत्था उत्तरकुहउज्जाणे मित्तणंदी राया सिरिकंता देवी वरदत्ते कुमारे वरसेणापामो० पंच देवीसया तिरयथरागमणं सावगधम्मं..... पुव्वभवपुच्छा सयदुधारे णयरे विमलवाहणे राया धम्मवई णामं अणगारं एज्जमाणं पासइ० पडिलाभिए समा० मणुस्ताउए णिबद्धे इहं उप्पणे सेत्तं जहा सुवाहुस्स कुमारस्स चिता जाव पव्वज्जा कप्पंतरिओ जाव सव्वट्टिसिद्धे तओ महाविदेहे जहा ददपइणो जाव सिज्जहिइ ५ । एवं खलु जंबू । समणेणं भगवया महाधीरेणं जाव संपत्तेणं सुहविवागाणं दसमस्स अज्जयणस्स अयमट्ठे पणत्ते, सेवं भंते । ०॥३२॥ दसमं अज्जयणं समत्तं ॥ सुहवि० ॥
॥ बीओ सुयक्खंधो समत्तो ॥

विवागसुयस्स दो सुयक्खंधा बुहविवागो प सुहविवागो य, तत्थ बुहविवागे दस अज्जयणा एकसरगा वससु चेव विवसेसु उद्दिसिज्जंति, एवं सुहविवागे- वि, सेसं जहा आयावस्स ॥ विवागसुयं समत्तं ॥

एक्कारस अंगाइं समत्ताइं

संघ के प्रकाशन

	मूल्य
१ भोजमार्ग ग्रन्थ	अप्राप्य
२ भगवती सूत्र भाग १	"
३ भगवती सूत्र भाग २	"
४ भगवती सूत्र भाग ३	"
५ भगवती सूत्र भाग ४	"
६ भगवती सूत्र भाग ५	"
७ भगवती सूत्र भाग ६	५-००
८ भगवती सूत्र भाग ७	७-००
९ उत्तराध्ययन सूत्र	अप्राप्य
१० उदवाह्य सुत्र	"
११ जैन स्वाध्यायमाला	४-५०
१२ दशवैकालिक सूत्र	२-२५
१३ सिद्धस्तुति	०-७५
१४ स्त्री-प्रधान धर्म	अप्राप्य
१५ सुखविपाक सूत्र	०-५५
१६ कर्म-प्रकृति	०-२०
१७ सामायिक सूत्र	०-१५
१८ सूयशङ्क सूत्र	अप्राप्य
१९ विनयचन्द्र चौकीसी	०-४०
२० नन्दी सूत्र	अप्राप्य
२१ आलोचना पंचक	०-३५
२२ श्री उपासकदशांग सूत्र	४-००
२३ सम्यक्त्व-विभर्षा (हिन्दी)	अप्राप्य

	मूल्य
२४ अंतमडदसा सूत्र	३-००
२५ प्रतिक्रमण सूत्र	०-४५
२६ संसार-त्रणिका	१-२५
२७ तैतीस बोल	०-३५
२८ एक सो दो बोल का बासठिय।	०-१५
२९ गुणस्थान स्वरूप	०-२५
३० गति-आगति	०-१५
३१ प्रश्नव्याकरण सूत्र	७-००
३२ नव तत्त्व	१-२५
३३ पञ्चीस बोल	अप्राप्य
३४ समर्थ समाधान भाग १	३-००
३५ समर्थ समाधान भाग २	अप्राप्य
३६ रजनीश दर्शन	अप्राप्य
३७ शिविर व्याख्यान	अप्राप्य
३८ भंगल-प्रभातिका	०-६०
३९ सार्थ सामायिक सूत्र	अप्राप्य
४० समिति-गुप्ति	०-२०
४१ स्तवन-तरंगिणी	अप्राप्य
४२ अणुत्तरोववाइयदसा सुत्त	०-१०
४३ तीर्थकर पद प्राप्ति के उपाय	१-५०
४४ सम्भवत्व-विमर्श (गुजराती)	अप्राप्य
४५ भवनाशिनी भावना	०-३०
४६ अंतकृत विवेचन	अप्राप्य
४७ तीर्थकरों का लेखा	"
४८ जीव-घड़ा	०-२५
४९ लघुदण्डक	०-४०
५० महादण्डक	०-४०
५१ तीर्थकर चरित्र भाग १	अप्राप्य

	मूल्य
५२ तीर्थंकर चरित्र भाग २	१०-००
५३ तीर्थंकर चरित्र भाग ३	९-००
५४ जैन सिद्धांत शोकसंग्रह भाग १, २	अप्राप्य
५५ आरम-शुद्धि का मूल तत्त्वत्रयी	३-५०
५६ समकित के ६७ बोल	०-२०
५७ समर्थ समाधान भाग ३	३-५०
५८ अंगपविट्ट सुत्ताणि भाग १	१४-००
५९ तत्त्व-पृच्छा	३-००
६० सामण-सङ्घि घम्भो	१-००
६१ अंग पविट्ट सुत्ताणि भाग २	२५-००



